

Tĩrtũm Kapẽr Ã Kagà Nyw

O Novo Testamento
na Língua Apinayé



LIGA BÍBLICA DO BRASIL

As ilustrações por Horace Knowles nas páginas 16, 39, 136, 146, 150, 157, 168, 185, 190, 217, 229, 256, 324, 394, 405, 418, 471, 477, 481, 493, 513, 525, 757, 864, 866, 871, 969 e 972

são usadas com a permissão da

© The British & Foreign Bible Society, 1954, 1967, 1972.

Acréscimos e correções feitos por Louise Bass

© The British & Foreign Bible Society, 1994.

As ilustrações nas páginas 5, 118, 208, 218, 340, 372, 402, 431, 461, 473, 485, 504, 515, 541, 555, 772, 833, 994 e 1012

são usadas com a permissão da

© 1978 David C. Cook Publishing Co.

O Novo Testamento
na língua apinayé
Brasil

Primeira edição 1999

Segunda edição 2010

Publicado pela
Liga Bíblica do Brasil

© The Bible League, 2010, South Holland, IL 60473 USA

(<http://www.bibleleague.org>)

www.ScriptureEarth.org



Creative Commons Licença

Atribuição-Usa Não-Comercial-Vedada a Criação de Obras Derivadas

Você pode copiar, distribuir, exibir e executar a obra sob as seguintes condições:

- **Atribuição.** Você deve dar crédito ao autor original, da forma especificada pelo autor ou licenciante.
- **Usa Não-Comercial.** Você não pode utilizar esta obra com finalidades comerciais.
- **Vedada a Criação de Obras Derivadas.** Você não pode alterar, transformar ou criar outra obra com base nesta.

<http://creativecommons.org/licenses/by-nc-nd/3.0/>

Índice

Matêwre	1
Makre	132
Rukre	209
Juãw	347
Atre	444
Rõmãn	559
Wam Korît	623
Sikũn Korît	680
Karatas	716
Epes	739
Piripos	760
Korosẽ	773
Wam Tesarõn	787
Sikũn Tesarõn	799
Wam Ximotre	806
Sikũn Ximotre	823
Xitre	835
Piremõ	843
Eprêw	846
Xiakre	891
Wam Pêtre	906
Sikũn Pêtre	923
Wam Juãw	932
Sikũn Juãw	945
Hapuhã Juãw	947
Jutre	950
Apokarip	956
Mẽmo nhĩxi	1013
Mẽmoj jarẽnh	1034

Ã mẽ kot amnhĩ nhĩpêx anhỹr xwỳnhjaja na htem àmnhĩx
hamakêtkati nẽ pa ho pa. Na htem mẽ kot amnhĩ tomnuj
xwỳnhjê hkôt amnhĩ nhĩpêx kêt nẽ. Nẽ mẽ kapêr punuj ma nẽ
ãm kuma. Nẽ mẽ kãm Tĩrtũm prãm kêt xwỳnhjê hkôt pa nẽ mẽ
kot amnhĩ nhĩpêx kôt amnhĩ nhĩpêx kêt nẽ. Na htem kãm
Tĩrtũm kapêr mar prãm nẽ hkôt amnhĩ nhĩpêx prãm rãhã nẽ. Ã
mẽ kot amnhĩ nhĩpêx anhỹr xwỳnhjaja na hte Tĩrtũm amnhĩ tã
mẽ omu nẽ mẽ ho mex rãhã nẽ. Jakamã na htem àmnhĩx
hamakêtkati nẽ hkĩnh nẽ pa ho pa.

Sam 1.1

Matêwre

Matêwre kot tanhmã Jejus kot amnhĩ nhĩpêx to ho pa hã kagà

Matêwre na pre kagàja nhĩpêx. Kêp Jejus nhỹ hã hkrajê jahkre xwỳnh na pre. Nê kêp Ijaew. Hixi hõ pê na Rewi. Tã na pre mẽ pamã kagàja nhĩpêx nê kamã Jejus kot pika hwỳr wrỳk nê kator nê tanhmã ri amnhĩ nhĩpêx to ho pa hã harê nê hã kagà. Nê kêp mẽ panhõ pahihiti mex o mex ã harê nê hã kagà. ã na pre Matêwre mẽ pamã Jejus jarê nê hã kagà anê.

Apraãw kanrêhã hkra nê htàmnhwỳjê nhĩxi

Rukre 3.23-38

- 1** 1 Amnepêm Jejus Kris kormã pika hwỳr wrỳk kêt ri hkukamã higêtjê nhĩxi na jajaja.
Wỳj ri higêtjê hõ nhĩxi na pre kêp Tawi.
Nê Tawi xwỳj ri higêt nhĩxi pê na pre Apraãw.
- 2 Nê Apraãw kra na pre kêp Ijak.
Nê Ijak kra na pre kêp Jako.
Nê Jako hkra na pre kêp Juta mẽ htôjaja.
- 3 Nê Juta hkra na pre wa kêp Pere nê Jera.
Nê Pere mẽ Jera wa katorxà na pre kêp Tama.
Nê Pere hkra na pre kêp Erõ.
Nê Erõ hkra na pre kêp Ari.
- 4 Nê Ari hkra na pre kêp Amĩnatap.
Nê Amĩnatap kra na pre kêp Nasõ.
Nê Nasõ hkra na pre kêp Samõ.
- 5 Nê Samõ hkra na pre kêp Poas.
Nê Poas katorxà na pre kêp Raap.
Nê Poas kra na pre kêp Opex.
Nê Opex katorxà na pre kêp Rutre.
Nê Opex kra na pre kêp Jese.
- 6 Nê Jese hkra na pre kêp Pahihti Tawija.

Nē Tawi hkra na pre kêp Sarumāw.

Sarumāw katorxàja Uristi hprō na pre. Tã nhũm pre Uristi ty nhũm Tawija hãmri mỳrpê Uristi hprō ho hprō nē kamã hkra. Nhũm wa hkraja kêp Sarumāw.

7 Nē Sarumāw kra na pre kêp Ropã.

Nē Ropã hkra na pre kêp Apiasti.

Nē Apiasti kra na pre kêp Asti.

8 Nē Asti hkra na pre kêp Josapa.

Nē Josapa hkra na pre kêp Jorã.

Nē Jorã hkra na pre kêp Ojis.

9 Nē Ojis kra na pre kêp Jotã.

Nē Jotã hkra na pre kêp Akaj.

Nē Akaj kra na pre kêp Ejekis.

10 Nē Ejekis kra na pre kêp Manase.

Nē Manase hkra na pre kêp Amõ.

Nē Amõ hkra na pre kêp Josis.

11-12 Nē Josis kra na pre kêp Jekonĩs mẽ htōjaja.

Kormã mẽ htĩr ri na pre Papirõn nhõ xwỳnhjaja kot mẽ hkurê kaxàr kaxyw mẽ hwỳr hprõt nē mẽ unê.

Ijaew piitã unênh pa nē ma akupỳm mẽ õ pyka hwỳr mẽ ho hapêx nhũm mẽ hpãnhã Papirõn kamã pa ho pa. Jakamã nhũm Josis mẽ hkra Jekonĩs mẽ htōjaja mẽ hipêêxà pyrã nē Papirõn kamã pa ho pa.

Nē Jekonĩs kra na pre kêp Saraxi.

Nē Saraxi hkra na pre kêp Joropape.

13 Nē Joropape hkra na pre kêp Apiux.

Nē Apiux kra na pre kêp Eriakĩ.

Nē Eriakĩ hkra na pre kêp Ajo.

14 Nē Ajo hkra na pre kêp Satok.

Nē Satok kra na pre kêp Akĩ.

Nē Akĩ hkra na pre kêp Eriux.

15 Nē Eriux kra na pre kêp Eresa.

Nē Eresa hkra na pre kêp Matã.

Nē Matã hkra na pre kêp Jako.

16 Nē Jako hkra na pre kêp Juje.

Nē Juje hprō na pre kêp Marir.

Nē Marir Kra na pre kêp Jejus.

Mẽ kot kãm: “Tĩrtũm kot mẽ pakaxyw ãm xwỳnh” anhỳr xwỳnhhta na pre.

17Nhũm Apraãw kanrêhã axte axpên kanrêhã mẽ àptàr nywjaja Tawija wỳr kêp 14. Nē Tawi nhĩrõ pê Papirõn hwỳr mẽ hapêx kêt ri axpên

kanrêhã mē àptàr nywjaja mãânên kêp 14. Nê ra Papirôn kamã mē pa nhîrô pê axpên kanrêhã Jejus pê Tîrtûm kot mē pakaxyw âm xwÿnhhta wÿr mãânên kêp 14. ã na pre Jejus Kris xwÿj ri higêtjê nhîxi anê.

Jejus Kris kator

Rukre 1.26-38, 2.1-7

18Tã ã mē hixi jarênh kot anhÿr kanrêhã na pre ã Jejus Kris kator anê. Nhûm pre kormã Jujeja Marir o hprô kaxyw. Nom kormã ho hprô hkêt ri nhûm htujarô. Kormã hkukrit tã nhûm Tîrtûm Karô tanhmã ho nhûm htujarô. 19Hãmri nhûm Jujeja harênh ma nê tee ri hamaxpêr nê htÿx nhãm mêhõ kot kêp htu hã hkamnhîx. Juje kot tãm amnhî nhîpêx nê tãm hamaxpêr jakamã tee ri kot ho hprô hkukamã hamaxpêr. Nê hamaxpêr o:

—Nà pa mãn ixte htüre hã. Nhãm mêhõ ra kot ã hipêx anhÿr kênã. Nà kot paj ho ixprô hkêt nê. Nom kot paj ixkwÿjê mã ã kot amnhî nhîpêx anhÿr o amnhîrît kêt nê. Kot paj anê nhûm mē kuma nê ho kapêr punuj nhûm amnhî kamã hpijaàm tÿx nê. Ja pymaj kot paj ixkatàt kôt hkaga kurê kumrêx. Nom ixkwÿjê hkàx ã hkaga. Anê.

20Nê ã hamaxpêr anhÿrja o ra gôr nê nô. Nhûm Tîrtûm kapêr o mē wrÿk xwÿnhjê hõ hwÿr wrÿ nê hwÿr axàn kuri xa. Hãmri nê kãm:

—Pa Juje? E ot pa awÿr tẽ. Kwa tee ri Marir o aprô hkukamã ajamaxpêr punuj kêt nê. Mãmrî ho aprô. Mêhõ kot apê tanhmã ho hkêt. Tîrtûm Karô na pre ã hipêx anê. Jakamã kwa tee ri ajamaxpêr kêt nê mãmrî ho aprô nê war apa. 21Koja hkrare kato nê myre nê hprêk. Hãmri nê mē kot hkôt amnhî xunhwÿr xwÿnhjaja mē kot amnhî tomnuj piitã pê mē utàr pa. Jakamã koja kato ka wa hã hixi mē nhûm kêp Jejus. Anê.

Nhûm pre ã Tîrtûm kapêr o mē wrÿk xwÿnhja kãm kapêr anê. Ijaew kapêr kãm Jejus jarênhja te kêp “Tîrtûm kêp mē papytâr xwÿnh” anhÿr pyrâk. Jakamã nhûm Tîrtûm kapêr o mē wrÿk xwÿnhja Juje ôt kãm ã kãm Marir jarênh anê. 22-23Nom kormã ã kãm kapêr anhÿr xwÿj ri na pre ra Tîrtûm nhÿ hã kapêr xwÿnhjê hõja kukamã tanhmã harênh to nê hã kagà. Nê hã kagà ho:

E mē inhma nê inhmar tÿx nê ho apa. Koja nhÿrmã pyka ja kamã mêhõ kormã hkukrit tã htujarô. Nê hkra kato nê myre.

Nhûm mē omu nê hã hixi mē nhûm kêp Emanuew. Anê.

Ijaew kapêr kãm “Emanuew” jarênhja te kêp “Ota ra Tîrtûm mē pahkôt pa ho pa” anhÿr jarênhhta pyrâk. Jakamã nhûm pre Tîrtûm nhÿ hã kapêr xwÿnhja Jejus kukamã ã harênh anê nê hã kagà.

24Jakamã nhûm Tîrtûm kapêr o mē wrÿk xwÿnhja Juje mã kapêr par mē nhûm hkrâkato. Hãmri nê kot kãm ujarênh xà hkôt Marir o hprô. 25Nom kormã tanhmã ho hkêt nê ri o pa rãhã nhûm hkrareja kato. Hãmri nhûm wa hã hixi mē nhûm kêp Jejus nê mãânên kêp Emanuew.

Kanhêti ho studa xwÿnhjê jarênh

2 ¹Nhũm pre Jejus Perêj kamã kato. Pika pê Jutej kamã. Pahi Erox kormã kot Jutej nhõ xwÿnhjê ho amnhĩptâr o pa ri nhũm õ pika kamã kato. Hãmri nhũm Tĩrtũmjaja kaxkwa kamã Kra kator jarênh xà hã kanhêti raxta õ nhõ nhũm pika hõ kamã kanhêti ho studa xwÿnhjaja omu. Kanhêtiija pumu nê hkĩnh nê axpên mã:

—Kwa ga mẽ kanhêti raxti mũj pumu. Mãn ra Ijaew nhõ pahi nywta kato nhũm kanhêti mũj kêp ho amnhĩrĩt xà hã ajê. Kwa pu mẽ ma hapêr o mõi nê nhĩri tokyx omu nà.

Anê hãmri nê amnhĩ to pikuprõnh pa nê ma hapêr o pa. Ma myt gjêx xà hwÿr hapêr o pa hã apkati xohtõ nê. Hãmri nê ra Ijaew nhõ pika hwÿr pøj nê krĩ pê Jerujarê hwÿr hapêr o mõi. Pahi Erox nhõ krĩja wÿr nhũm mẽ hapêr o mõi hãmri nê kamã pøj nê mẽ hkrare nywta ã krĩ nhõ xwÿnhjê kukjêr o mõi ²nê mẽ kãm:

—Pa? Ot pa mẽ apê Ijaew nhõ pahi nywreta pumunh kaxyw mõi. Ham kator xwÿnhhta. Mẽ inhõ pika kamã na pa prem kaxkwa hkrax rũm kot ho amnhĩrĩt xà hã kanhêti raxta pumu. Hãmri nê nhĩri pahi nywre pumunh nê kutã mẽ ixkõn krã ho ixtêm nê ixkrĩ nê kãm mex o mex ã harênh kaxyw nêtãnh mẽ inhõ krĩ rũm hapêr o mõi. Kwa mẽ inhmã harê. Nhĩri na? Na pa mẽ inhmã omunh prãm tÿx kumrêx.

Anhÿr o hã mẽ hkukjêr o mõi jakamã nhũm mẽ piitã pahi nywja jarênh ma nê axpên mã harênh o hprõt. ³Nhũm pahi Eroxja harênh ma nê tee ri amnhĩ kukamã hamaxpêr. Pahi nyw kot mẽ ho amnhĩptâr ã hkamnhix nhũm ja kêp omnuj tÿx nê. Nhũm krĩ nhõ xwÿnhjaja ã hamaxpêr anhÿr ã omu nê tee ri amnhĩ kukamã hamaxpêr o ra kãm ma nê. ⁴Hãmri nhũm pahi Eroxja amnhĩ wÿr hkwyjê hã karõ. Mẽ õ patre krãhtũmjaja nê Tĩrtũm kapêr tũm o mẽ ahkre ho mẽ pa xwÿnhjaja nhũm amnhĩ wÿr mẽ hã karõ nê Tĩrtũm kot nhĩrmã mẽ hwÿr mênh mã xwÿnhhta ã mẽ hkukjêr kaxyw. Nê mẽ kãm:

—E Tĩrtũm kot nhĩrmã mẽ pahwÿr mênh mã xwÿnhhta ã na pa mẽ akukjêr kaxyw mẽ ato akuprõ. Kwa mẽ atõ inhmã harê. Koja nhĩrmã kator kaxyw nê nhĩri koja we kato? Xà jar mẽ panhõ krĩ kamã nà? Xà nhĩri krĩ hõ kamã? Anê.

⁵Hãmri nhũm mẽ kuma nê kãm:

—Nà mẽ panhõ pika pê Jutej kamã koja xep kato. Krĩ pê Perêj kamãã. Na pre Tĩrtũm nhĩ hã kapêr o mẽ pa xwÿnhja ra hkukamã mẽ panhĩgêjtê mã tanhmã harênh to nê hã kagà. Nê hã kagà ho:

⁶ Pa Perêj nhõ xwÿnhjaja? E mẽ anhõ krĩ grire htã kamã koja nhĩrmã mẽ panhõ Pahi Maatija kato. Koja mẽ pahpê Ijaewjê piitã mẽ pahto amnhĩptâr mex o pa. Jakamã mẽ anhõ krĩ grire htã koja Ijaew piitã axpên mã mex ã harênh o pa.



Matêwre 2.8-10

Ã na pre Tĩrtũm kot mẽ pahwỳr mẽnh mã xwỳnhnta kukamã mẽ kãm harẽ nẽ hã kagã anẽ. Anẽ.

7Hãmri nhũm pahi Erox tee ri ã harẽnh anhỳrja ma hãmri nẽ amnhĩ wỳr mẽ kot hã àhkukjêr o mõi xwỳnhjê hã karõ. Nom nhỹri Ijaew kàx ã. Hãmri nhũm mẽ ma hwỳr mra nẽ agjê nhũm mẽ omu nẽ pahi nywta ã mẽ hkukja nẽ mẽ kãm:

—E mẽ aprĩ hã inhmã pahi kator nywta jarẽ. Tanhmã na pre ra mẽ ate kanhêti pumunh ã mytwrỳ kute? Xà ham na ka prem omu nà amnepẽ mã? E mẽ aprĩ hã tanhmã inhmã harẽnh to. Anẽ.

Hãmri nhũm mẽ ihõja kãm:

—Nà na ra hã amgrà axkrut kaxyw. Na pa prem omu hãmri nẽ inhnojarêt nẽ man ixpa ho ixpa ry rax nẽ mẽ awỳr põi. Anẽ.

8Nhũm mẽ kuma nẽ mẽ kãm:

—Tỳ. Nom jar amrakati. Perěj kamã na xep kato. E mẽ mãmrĩ ma hwỳr mõi nẽ kamã hapêr. Hãmri nẽ nhỹri omu nẽ akupỳn ixwỳr mõi nẽ inhmã harẽ. Pa ijaxwỳja ma hwỳr mõi nẽ omu nẽ mẽ apyrã nẽ kãm mex o mex ã harẽ. Ijaxwỳja inhmã omunh prãm tỳx kumrêx. Anẽ.

Nom hêx rom ã ri mẽ kãm kapêr anẽ. Kot nhỹri harẽnh mar nẽ hã àmnênh nhũm mẽ kot hpĩr kaxyw nhũm hêx rom ã kãm omunh prãm tỳx ã amnhĩ jarênh anẽ. 9-10Jakamã nhũm mẽ kuma hãmri nẽ kato nẽ ma Perěj wỳr mõi kurê kumrêx. Hãmri nẽ kormã mẽ õ pika kamã mẽ pa ri kanhêti ho studa xwỳnhnta nhũm mẽ axte amnhĩ kukamã omu nẽ

hkĩnh nê. Nhũm ma Perěj wỳr mẽ hkukamã mō nhũm mẽ omunh pê ma hkôt pa rãhã hwỳr pøj. Nhũm kanhêtija pahi nywre nhõrkwỳ mỳri ajêt. 11 Jakamã nhũm mẽ ma hkôt mra nê ixkreja wỳr pøj nê kapem xa. Hãmri nê mẽ kãm kapêr nê mẽ hwỳr agjê nê Jejus mẽ katorxàja wa omu. Hãmri nê Jejus kutã hkõn krã ho hkrĩ hpa nê kãm kapêr nê kãm:

—Pa Xugitre. Hêxta waa nê. Nà amex o amex. Kot kaj nhỹrmã axaptàr hãmri nê apê mẽ inhõ Pahi Maati. Nà ãm hãmri na pa mẽ apumu nê ixkĩnh nê. Anê.

Hãmri nê ahpỹnhã kãm hkĩnh xà gõ. Kãm ôr kwỳ gõ nê kãm mẽhkuxwa xà hkwy gõ nê kãm te kot rãmre kuxware pyrãk pê mĩraja nhũm mẽ kãm hkwy gõ. Mẽ hkĩnh xà hã kàxpore xohtô nhũm prem kãm ôr pa. 12 Hãmri nê ra akupỹm Jerujarẽ kamã pahi Erox wỳr nojarêt. Nhũm kamàt nhũm mẽ gõr nê hikwỳ hãmri nê ra amỹti. Nhũm Tĩrtũm mẽ hpimtir kãm mẽ kãm kapêr nê mẽ kãm:

—Pa? E mẽ inhma. Kêr ka mẽ akupỹm pahi Erox wỳr amrar nê kãm mẽ hkrata jarênh kêt nê. ãm kwarĩ ho kwarĩ. Nê kêr ka mẽ pry hõ hã mãn ma mẽ anhõ pika hwỳr akupỹm apa ho apa.

Anhỹr o mẽ kãm kapêr jakamã nhũm apkati nhũm mẽ kànhmã hkrĩ hãmri nê Tĩrtũm kot mẽ kãm hã karõ xà hkôt ma akupỹm mẽ õ pika hwỳr pa kurê kumrêx nê akupỹm pahi Erox wỳr mrrar kêt nê.

Juje mẽ hprõ wa kot Erox pymaj ma Jejus o mõi

Apokarip 12.1-6, 12.13-18

13 Tã nhũm kanhêti ho studa xwỳnhjaja ma akupỹm hapêx hãmri nhũm Tĩrtũm axte Marir mjên Juje hwỳr kapêr o mẽ wrỳk xwỳnhjê hõ mẽ. Nhũm kê axte hpimtir kãm hwỳr wrỳ nê kãm kapêr nê kãm:

—Pa Juje. E kwa kànhmã nhỹ. Na ra pahi Eroxja aprõ pê hkrata ã amỹnê. Kojã tokyx põristi hkwyjaja mẽ anhõ krĩ hwỳr pøj nê war apê hpĩr kaxyw ri hapêr. Jakamã kwa wa tokyx akato nê ma pika pê Ejit wỳr amõi kurê kumrêx. Nê Ejit kamã apa rãhã pa nhỹrmã akupỹn amnê war amê. E kwa tokyx. Anê.

14 Hãmri nhũm kuma nê kànhmã nhỹ nê Marir mra nê war amnhĩ to akuprõ nê ra nojarêt. Hãmri nê krĩja pê Jejus o kato nê ma o mõi kurê kumrêx. Wa mõi ryy nê hãmri nê Ejit wỳr pøj nê kamã pa ho pa.

15-20 Rõm nhũm pahi Erox tee ri amnhĩ wỳr kanhêti ho studa xwỳnhjê kamã hamak o pa nom nhũm mẽ akupỹm hwỳr mrrar kêt nê. Jakamã nhũm mẽ kamã gryk nê hamaxpêr o:

—Tk. Kwa nà. Na mẽ ãm inhmã hêx nê akupỹn ixwỳr mrrar nê nhỹri inhmã pahi nywta jarênh kêt nê. Nà kwãr mẽ mãmri ã inhĩpêx anê. Mẽ kot ixpê ho hpimxuure kaxyw ã. Nà kot paj mẽ kêp kupĩ nhũm mẽ rĩ amnhĩ pumu. Na xep prem kanhêti kot harênh xàja pumunh ã ra hã amgrã pyxi nê hkôt mytwrỳ kêp 6. Jakamã mãn mẽ hkrata ra hã amgrã

axkrut kaxyw. Nà na pa ra ijamaxpêr. Kot paj Perêj kamã mẽ hkra myjaja ra mẽ hã amgrà axkrut xwÿnhjaja nê kormã mẽ hã amgrà axkrut kêt xwÿnh piitã mẽ himex pa. Jao ra mẽ kamã pahi nywta pĩ. Nà ixte hpĩr mã kênã. Koja hprêk nê ixpãnhã Ijaew o amnhĩptàr kêt nê.

Anhÿr o hamaxpêr hãmri nê amnhĩ wÿr õ pôristi hkwÿjê hã karõ nê mẽ kãm mẽ hkrajê hã amÿnê nê mẽ kãm:

—E kêr ka mẽ ma Perêj wÿr mra nê kamã mẽ kêp mẽ hkra myrejaja ra mẽ hã amgrà axkrut xwÿnhjê nhĩmex pa. Nê kormã mẽ hã amgrà axkrut kêt xwÿnhjaja mãânên mẽ himex par kumrêx. Nê Perêj pu hã ri krĩ hkryre hkôt mãânên ri ajapôj nê ã mẽ himex par anê. Anê.

Hãmri nhũm mẽ kuma nê ma mẽ hwÿr mrar kurê kumrêx. Hãmri nê Perêj wÿr pôj nê mẽ kêp mẽ hkra myre piitã mẽ himex pa. Jakamã nhũm mẽ katorxà nê mẽ hipêêxàjaja tee ri mẽ hkra htyk xwÿnhjê pumu nê hkaprĩ htÿx nê mÿr rũnh nê. Nom na pre Tĩrtũm nhÿ hã kapêr jarênh o mẽ pa xwÿnh finat Jeremĩstija ra amnepêm ã mẽ kot amnhĩ nhĩpêx anhÿrja kukamã mẽ panhĩgêjtê mã mẽ harê nê hã kagà. Na pre mẽ kãm Ijaew kurê xwÿnhjê pynênh nê ma mẽ õ pika hwÿr mẽ ho hapêx par kaxyw. Hãmri nhũm mẽ panã Rrakewja te ra kot tee ri ja hã mẽ omunh nê tanhmã amnhĩ nhĩpêx to pyrãk nhũm Jeremĩstija tanhmã Ijaewjê jarênh to nê hã kagà. Nê hã kagà ho:

Amnepêm Perêj kamã na pre mẽ panã Rrakewja hpijagri ho nõrja ã ra htyk kaxyw nê tee ri hkra kator mã xwÿnhhta kukamã hamaxpêr nê mÿr o nõ. Nhũm hkwÿjaja tee ri akupÿm tãm hamaxpêr kaxyw kãm kapêr. Tã jarãhã Rrakew kanrêhã hkra nê htãmnhwÿ nijaja ra urãk nê tee ri mẽ hkrare ho hamak xàj mÿr o pa. Mẽ kot mẽ kêp utàr nê mẽ himex par jakamã nhũm mẽ tee ri mẽ ho hamak xàj mÿr o pa. Anê.

Nhũm pre finat Jeremĩsja mẽ hkukamã ã mẽ harê nê mẽ hã kagà anê. Tã ra jarãhã mẽni piitã Rrakew pyrã nê hkrajê o hamak xàj mÿr o pa.

Wa kot akupÿm wa õ pika hwÿr Jejus o mõi

Juãw 7.41-42

Tã nhũm mytwrÿ grêre nê hapêx nhũm pahi Eroxo ty. Jakamã nhũm kamàt nhũm Jujeja gõi nê nõ. Nê kê õt kãm axte amÿti. Nhũm Tĩrtũm kapêr o mẽ wrÿk xwÿnhja axte hwÿr wrÿ nê kãm:

—Pa Juje? E na ra Marir pê hkra pĩr mã xwÿnhhta ty. Jakamã kwa wa mãmrĩ ma akupÿm mõi. Ma akupÿm mẽ apê Ijaewjê nhõi pika hwÿr axãmnhix aprõ mẽ hkrata wa o mõi.

Anhÿr o kãm kapêr. Na pre ra amnepêm Tĩrtũm nhÿ hã kapêr o mẽ pa xwÿnhjê hõja ja kukamã mẽ panhĩgêjtê mã ja jarê nê hã kagà. Nê hã kagà kot: “Ixpê Tĩrtũm kot paj nhÿrmã Ejit rúm ma akupÿm õ pika hwÿr ixkrata wa mẽ kumê.” Anhÿr o kot hkukamã harênh nê hã kagà.

21Jakamã nhũm Tĩrtũm kapêr o mẽ wrỳk xwỳnhja ã Juje mã karõ anê hãmri nhũm kuma nê ma akupỹm wa o mõi. Ma akupỹm mẽ õ pika hwỳr wa o mõi.

22Tã ra akupỹm hpõx kaxyw htêp o mõi. Hãmri nê pahi Erox kra Akêrawja ra hipêêxà mỳr pê kot Jutej kamã mẽ ho amnhĩptàr hã harênh ma. Hãmri nê tee ri mẽ amnhĩ kukamã hamaxpêr nê kãm mẽ hwỳr wa o mõi pyrna nê.

Tã nhũm kamàt nhũm Juje ra gõi nê nõ nê kê axte amỹti. Nhũm kê axte Tĩrtũm kapêr o mẽ wrỳk xwỳnhja hwỳr wrỳ nê akupỹm õ pika hkwyê pê Jutej wỳr mõi nê wa mẽ hkurê nê kãm:

— Pa Juje? E kêr ka Jutej wỳr wa mẽ amõi kêt nê. Pãnhã nhãm mẽ anhõ pika hõ hwỳr mãn mõi nê kamã ri apa.

Anê nhũm kuma nê hpãnhã wa mẽ ma mẽ õ pika hkwyê pê Garirej wỳr wa mẽ juk nê ma mõi. 23Nê kamã põi nê krĩ pê Najare hwỳr mõi nê kamã amnhĩm õrkwỹ nhĩpêx nê kamã wa mẽ pa ho pa. Nhũm pre ra amnepêm Tĩrtũm nhỹ hã kapêr o mẽ pa xwỳnhjê hõja ra ã mẽ kot amnhĩ nhĩpêx anhỹrja kukamã mẽ panhĩgêjtjê mã mẽ harê nê hã kagà. Nê hã kagà kot:

Tĩrtũm kot mẽ pahwỳr mẽnh mã xwỳnhhta koja kêp Najare nhõ xwỳnh. Anê.

Juãw Paxis kot Tĩrtũm kapêr jarênh o pa

Makre 1.1-6; Rukre 3.1-14; Juãw 1.19-23

3 1Nhũm pre Juãw Paxisja ã amnhĩ nhĩpêx anê. Nê pika pê Jutej kamã mẽ kãm Tĩrtũm kapêr jarênh o pa. No ãm krĩm pa hkêt nê. ãm mẽ hpu hã krĩ pê amỹm ri kapõt ã ri mẽ kãm Tĩrtũm kapêr jarênh o pa. 2-3Tĩrtũm nhỹ hã kapêr o pa xwỳnh finat Ijais ra kot Juãw kukamã mẽ panhĩgêjtjê mã tanhmã harênh to nê hã kagà xà hkõt. Na pre hkukamã hã kagà ho:

Koja nhỹrmã mẽhõ mõi põi. Kapõt ã mõi põi nê mẽ kãm tanhmã mẽmoj tã karõ hto ho ri pa. Nê mẽ kãm: “Koja Tĩrtũm tokyx mẽ pahwỳr mẽ panhõ Pahihtija mẽ nhũm wrỳ nhũm mẽ piitã omu. Jakamã kwa mẽ tokyx kutêp tãm amnhĩ nhĩpêx o ri apa. Te mẽ kot mẽhõ kutêp pry ho mexta pyrà nê amnhĩ nhĩ ho tãm amnhĩ nhĩpêx nê tãm ajamaxpêr mex o ri apa. Kêr ka mẽ Pahihti kutêp ã amnhĩ nhĩpêx anhỹr o ri apa.” Anhỹr o koja mẽ kãm ujarênh o pa. Anê.

Na pre finat Ijaisja Juãw Paxis kukamã ã mẽ kãm harênh anê nê hã kagà. Tã nhũm hã kagà xàja kõt nhũm Juãw Paxisja mõi põi. Hãmri nê Ijais kot hkukamã harênh xà hkõt kapõt ã ri mẽ kãm ujarênh o pa nhũm mẽ kãm mar prãm xwỳnhjaja ma hwỳr mra. Nhũm mẽ kãm kapêr nê mẽ kãm:

—E koja Tirtûm tokyx kot mẽ pakaxyw âm xwÿnhja o amnhĩrĩt. Jakamã kwa mẽ tokyx kutêp amã amnhĩ tomnuj kaga hprãm xàj tãm amnhĩ nhĩpêx o apa.

Anhÿr o Jejus kutêp mẽ kãm kapêr o pa.

4Juãw Paxisja hikàxpore hkêt jakamã na pre ê mex kêt nê pa. Âm mẽmo mry pê kamer kĩ ho amnhĩm ê nhĩpêx nê hagjê nê hã pa. Nê mẽmo mry hkà ho amnhĩ pre nê ri pa. Nê mẽo mex kur kêt nê âm krit ku nê menh ôr o ri pa.

5Jakamã nhũm kapôt ã ri mẽ kãm Tirtûm kapêr jarênh o pa nhũm mẽ kot mar kaxyw ma hwÿr mra. Pika pê Jutej kamã ri mẽ pa xwÿnhjaja. Nê Jutej kamã krĩ pê Jerujarê nhõ xwÿnhjaja. Nê pyhti pê Jotãw mÿri mẽ pa xwÿnhjaja. Nhũm prem piitã harênh ma nê kot mar kaxyw ma hwÿr mra. 6Hãmri nê kapêr ma nê Tirtûm noo mã mẽ kot amnhĩ tomnuj xwÿnh ã kãm amnhĩ jarê. Mẽ kot amnhĩ tomnuj kaga nê tãm amnhĩ nhĩpêx o pa hprãm xàj ã kãm amnhĩ jarênh anê. Nhũm Tirtûm kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj rênh pa nê axte kãm hamaxpêr kêt nê. Jakamã nhũm pre Juãw Paxisja Tirtûm mã gôx kãm mẽ hkrã kumrãr pa. Pyhti pê Jotãw kamã mẽ hkrã kumrã.

7Tã nhũm Parijew mẽ Satusew nhõ xwÿnhjaja mããnên mẽ hkôt ma Juãw Paxis wÿr mra. Mẽ urak nê mẽ kêp Ijaew jakamã haxwÿja Juãw Paxis kot mẽ hkrã kumrãr kaxyw ma hwÿr mra. No âm hkwÿjê hkĩnhã mẽ kot amnhĩ tomnuj kaga hprãm xàj kãm amnhĩ jarênh kêt nê. Âm amnhĩ krã hkôt hkwÿjê hkôt hwÿr mra nê amnhĩ to kuma. Nom nhũm Juãw Paxisja ra hprĩ hã ã mẽ hamaxpêr anhÿrja kôt mẽ omunh mex nê. Jakamã mẽ kãm:

—Tk kwa nà. Kormã mẽ ate amnhĩ tomnuj pix o ri apa kênã. Xà kot paj mẽ ate amnhĩ tomnuj o apa rãhã mẽ akrã kumrã nhũm Tirtûm ja hã mẽ apumu nhũm ja kãm mex nê? Nà koja ja kãm mex kêt nê. Koja ja mÿrapê nhÿrmã tanhmã mẽ atomnuj tÿx to ka mẽ tee ri umaj apimxur prãm kaprÿ. 8Na htem amnhĩ tomnuj kaga nê tãm amnhĩ nhĩpêx nê tãm axpên nhĩpêx. Jakamã e kwa mẽ ã amnhĩ nhĩpêx o apa anê pa rĩ kormã mẽ akrã kumrã. 9Na ka htem atÿx ri ajamaxpêr o: “Mẽ ixpê finat Apraãw kanrêhã htãmnhwÿ hkwÿ na pa mẽ. Jakamã koja Tirtûm ja hã mẽ ixpumu hãmri nê mẽ ixte amnhĩ tomnuj o ixpa tã nhũm ja hã tanhmã mẽ ixto hkêt nê. Koja mẽ ixto mex nê.” Anhÿr o atÿx ri amnhĩ kukamã ajamaxpêr. Nom ja kot anhÿr kêt. Mẽ apê Apraãw kanrêhã htãmnhwÿ htã mẽ ate urak nê tãm amnhĩ nhĩpêxre hã. Kot kaj mẽ apê htãmnhwÿ htã amnhĩ tomnuj o ri apa hãmri nê Tirtûm noo mã te mẽ apê pikap kênre nhĩkwÿ pix pyrak. 10Na ra Tirtûm mẽ ate amnhĩ tomnuj mÿrapê tanhmã mẽ ato kaxyw. Te ho mẽhõ nhõ mẽmo hpar ô hkêt nhũm kot tee ri omunh nê krãhyr nê

kuwy kamã mênh nê ho kaxàr par pyràk o koja mẽ anhîpêx. Jao amnhî nê kuwy hwÿr mẽ arê ka mẽ kamã amnhî xà htÿx kamã ajamak rãhã ho ri apa. Anê.

Nhũm pre ã Juãw Paxisja Parijew mẽ Satusew nhõ xwÿnhjê mã kapêr anê. 11Hãmri nê hpãnhã axte mẽ kot mar kaxyw hwÿr mẽ mrar xwÿnhjê mã kapêr nê mẽ kãm:

—E ra mẽ ate amnhî tomnuj kaga xwÿnhjaja. Na pa Tirtũm mã mẽ akrã kumrãr kaxyw gô pix o mẽ akrã kumrã. Nom koja tokyx ixpãnhã Tirtũm kot mẽ pakaxyw ãm mã xwÿnhhta tãm mẽ pahwÿr pøj. Àhpumunh tÿx o kot ijakrenh par jakamã na pa hte ãm kukwak ri ixpa nê amnhî tã hã ixpijaãm o ri ixpa. Koja mẽ awÿr Tirtũm Karõ rê nhũm mẽ akarõ mã agjê. Ka mẽ ÿ hã tãm amnhî nhîpêx o ri apa. Nom kormã mẽ kot tãm amnhî nhîpêx kêt xwÿnhjaja koja Tirtũm kot mẽ pahwÿr mênh xwÿnhja ja hã mẽ omu nê mẽ hipêx o te kuwy kot mẽmoj to kaxàr par pyràk o mẽ hipêx.

12—Na htem pur kãm harôj nhîkê nê ho grã nê hpãnhã kahtwÿ. Nê kahuk pa hãmri nê hkapi nhũm kôk apê nê prÿhkà ho htor pa. Nhũm mẽ hpãnhã hy ho pa nê ixkre kamã gôj kãm unhwÿ. Ja pyrã nê koja tokyx Tirtũmja mẽ piitã mẽ kot tanhmã amnhî nhîpêx to ho pa hã mẽ omunh xà hkôt mẽ ho axkjê. Jakamã mẽ kot tãm amnhî nhîpêx o mẽ pa xwÿnhjaja koja ma amnhî wÿr mẽ ho api nhũm mẽ kuri mex rãhã nê pa ho pa. No mẽ kot amnhî tomnuj rãhã ho mẽ pa xwÿnhjaja koja jajê hkĩnhã tanhmã mẽ homnuj to. Nhũm mẽ ma kuwy raxja wÿr pa nê kamã amnhî xà htÿx kamã hamak rãhã nê pa ho pa.

Anhÿr o mẽ kãm kapêr.

Juãw Paxis kot Jejus krã kumrãr

Makre 1.9-11; Rukre 3.21-22; Juãw 1.32-34

13Tã nhũm Jejus pika pê Garirej rũm kato nê ma Juãw Paxis wÿr mõ. Juãw kot pyhti pê Jotãw kamã hkrã kumrãr kaxyw ma hwÿr mõ. Hãmri nê omu nê kãm:

—Pa. E ot pa awÿr amnhî to tẽ. Ate mẽ kuxwar ixkrã kumrãr kaxyw. Anê.

14Hãmri nhũm tee ri kuma nê kãm:

—Kwa nà. Aa ate amnhî tomnure hã kot pa kêt ri akrã kumrã. Nà ka kot kaj ixkrã kumrã. Anê.

15Hãmri nhũm kãm:

—Kwa nà. Mãmrĩ ixkrã kumrã Juãw Paxis. Tirtũm kãm ja prãm kênã kot ka kêt ri axtem nê ixkaga. Kot puj mẽ Tirtũm kãm hprãm xà hkôt tanhmã amnhî nhîpêx to ho ri papa. Anê.

Hãmri nhũm kuma nê kãm:

—Tôe. Nà kot paj akrã kumrã. Anê.

16Hāmri nê pyhti hwÿr o wrÿ nê kamã hkrã kumrã. Hāmri nê wa akupÿm api nê gô mÿ ri âm rãhã nhũm kaxkwa axkjê. Hāmri nhũm kurũm Tirtũm Karõja Jejus wÿr te tuuti pyrã nê ahpar mã hwÿr wrÿk o tẽ nê ìkre hã xa. Nhũm Jejus arĩ amnhĩ wÿr wrÿk o htẽm kãm omunh o xa. 17Hāmri nhũm Tirtũm kaxkwa rũm kãm kapêr nê kãm:

Pa? E apê ixkra mex na ka. Âm hãmri na ka hte ixkanrêhã ã amnhĩ nhĩpêx mex anê. Inhmã ajapê kamã na ka ri apa ho apa. Anê.

Satanasti tee kot amnhĩ tã Jejus kamã hamak

Makre 1.12-13; Rukre 4.1-13; mãânên Eprêw 2.18, 4.15

4 1Tã nhũm Jejus Tirtũm Karõ nhĩ hã ma kapôt ã ri pa. Satanasti kot amnhĩ tã kamã hamak kaxyw nhũm ma kapôt ã ri pa. 2Ri pa hã apkati xohtô nê. Ra hã arĩgro pê 40. Nê kormã apkur kêt jakamã ra kãm prãm tÿx kumrêx nê ri pa. 3Hāmri nhũm Satanastija nhÿhÿnh hwÿr tẽ nê hêx rom kãm kapêr nê kãm:

—Pa. E kwa mãn ka ra amã prãm tÿx nê nà? Nom xep apê Tirtũm Kra jakamã apê mêmoj hihtÿx kêt. Tirtũm pyrã nê axãhpumunh o axãhpumunh kênã. Jakamã kwa kên nhĩkwÿ mÿj mã anê kê amã pãwti hã amnhĩ jahkre ka aku nê tokyx ho amnhĩ xihtÿx. E kwa tokyx kãm akapêr. Anê.

4Hāmri nhũm kuma nê kãm:

—Tk. Nà kot paj amar xà hkôt ã ri amnhĩ nhĩpêx anhÿr kêt nê. Koja Tirtũm kãm inhmã mêmoj nhõr prãm nê inhmã mêmoj gô pa rĩ kormã kukrê. Kapêr ã kagã htũm kot ja jarênh kot:

Na htem mẽ apkur xà pix kukwak ri htĩr nê pa hkêt nê. Na htem mãânên Tirtũm kapêr ma nê hkôt amnhĩ nhĩpêx nê htĩr nê pa. Anê.

—Ã kapêr ã kagã kamã kot harênh kot anhÿr jakamã kot paj akapêr kôt ri ã amnhĩ nhĩpêx anhÿr kêt nê. Âm kwarĩ ho kwarĩ. Anê.

5Hāmri nhũm Satanastija tee ri kuma hãmri nê hpãnhã ma Jerujarê hwÿr o mõi. Nê Tirtũm mã amnhĩ jarênh xà hã ixkre hprêk nhĩmõk wÿr ho api nê kÿxpê hatur xà hã âm nhũm xa. Hāmri nê amnhĩ parpê kên rũnh nhĩkwÿ xwÿnhja pumunh o xa nhũm Satanasti kãm:

6—E apê Tirtũm Kra jakamã kwa ja rũm ahpar mã ajarĩ nê ma tẽ nê pikap tẽm. Koja Anhĩpêêxãja apumunh mex nê ka tanhmã amnhĩ to hkêt nê. Kapêr ã kagã htũm kot harênh kot:

Tirtũm koja kapêr o wrÿk xwÿnh kwÿjê mã ajarê ka ajarĩ nê ahpar mã tẽ nhũm mẽ kÿx pê amÿ nhũm mêmoj akã hyr kêt nê. Anê.

—Ã kapêr ã kagã htũm kot ajarênh anhÿr jakamã e tokyx ajarĩ. Anê.

7Hāmri nhũm Jejus kuma nê kãm:

—Tk kot paj ri ate inhmã karõ xàja kôt ã amnhĩ nhĩpêx anhÿr kêt nê. Koja Tirtùm tãm inhmã ijarĩ hã karõ pa rĩ mar xà hkôt ijarĩ. No kot pa ri amar xà hkôt ijarĩ hkêt nê. Tirtùm kapêr ã kagà htùm kot ja jarênh kot:

Kêr ka mẽ amnhĩ krã hkôt amnhĩ tã ixkamã ajamak kaxyw inhĩxi jarênh kôt tanhmã amnhĩ nhĩpêx to hkêt nê. Anê.

— ã kot ja nê kapêr kot anhÿr jakamã kwarĩ ho kwarĩ. Kot paj ri amar xà hkôt ijarĩ hkêt kumrêx. Tirtùm tãm kot inhmã ã ixte amnhĩ nhĩpêx anhÿr ã karõre hã. Anê.

8Hãmri nhùm Satanasti tee ri kuma nê hpãnhã ma nhÿri kên prêeti hwÿr o tẽ nê himõk ã axte o xa. Hãmri nê kãm pika piitã ahkre hpa. Nê mẽ hikukrêx piitã nhùm kãm ahkre ho xa. Kàxpore nê mẽmoj mex piitã nhùm kãm ahkre nhùm Jesus piitã omunh o xa. 9Hãmri nhùm kê Satanasti axte kãm:

—E mãn ka kam ri mẽmoj mex mÿj piitã omunh pa. Piitã inhõ na. Nom kot kaj ixkutã tẽm nê inhmã inhmex o inhmex ã ijarê pa ama nê amã piitã õr pa. Ka kam mẽmoj piitã ho anhõ nê ho amnhĩptàr o apa. Jakamã e kwa tokyx. Anê.

10Hãmri nhùm kuma nê axte kãm kapêr nê kãm:

—Tk kwa ma nhÿhÿm tẽ Satanasti. Kot paj ri amã amex o amex ã ajarênh kêt kumrêx. Tirtùm kapêr ã kagà htùm kot ja nê kapêr kãm hihtÿx kênã. Kapêr kot:

Kêr ka mẽ ixkapêr pix ma nê ixkutã pix mã akõnkrã ho akrĩ nê inhmã inhmex o inhmex ã ijarê. Kêr ka mẽ ã amnhĩ nhĩpêx anhÿr o ri apa.

—Anhÿr o kot hã karõ jakamã kot paj amã amex o amex ã ajarênh kêt kumrêx. Anê.

11Hãmri nhùm tee ri amnhĩ tã kuma hãmri nê ma tẽ. Tee ri kãm kapêr kaprÿja ã amnhĩ pumu hãmri nê hkaga nê ma tẽ. Hãmri nhùm Tirtùm kapêr o mẽ wrÿk xwÿnhjaja Jesus wÿr wrÿ nê tanhmã ho mex to nê kãm õ nhùm kukrê nê akupÿm hihtÿx.

Jesus kot Garirej kamã kapêr o pa

Makre 1.14-15; Rukre 4.14-15

12Tã nhùm Juãw Paxisja mẽmoj tã pahi Erox mã akir nhùm amnhĩ tã kuma nê gryk xàj haxà nhùm hkrĩ ho hkrĩ. Hãmri nhùm Jesusja harênh ma nê ma akupÿm Garirej kamã krĩ pê Najare hwÿr ma akupÿm tẽ. 13Hãmri nê ra pøj nom kamã ri pa hkêt nê. Nê hpãnhã kurũm kato nê ma krĩ pê Kapanau hwÿr tẽ. Gò rax pê Garirej mÿri na pre. Pika hkwy pê Jepurõ mẽ Natari wa mẽ kamã na pre nhùm Jesus ma hwÿr tẽ. Hãmri nê kamã pa. 14Nhùm ra amnepêm Tirtùm nhÿ hã kapêr jarênh o mẽ pa xwÿnh finat Ijaisja Jesus kukamã ra mẽ panhĩgêtjê mã ã kot amnhĩ

nhîpêx anhÿr ã harê nê hã kagà. Jejus kot ã mẽ hwÿr mör anhÿrja kukamã nhũm pre harê nê hã kagà. 15Pika hkwÿ kamã mẽ pa xwÿnhjaja nhũm pre mẽ hkukamã mẽ harênh mex nê. Nê pika pê Garirej kamã mẽ pa xwÿnhjaja nhũm pre mãänên mẽ hkukamã mẽ harê. Nê pyhti pê Jotãw mẽ gô xujanãr wa hkaêx kãm pika piitã kamã mẽ pa xwÿnhjaja. Nê krî pê Garirej kamã mẽ kêp Ijaew kêt xwÿnhjaja nhũm pre mãänên mẽ harê. ã na pre finat Ijaisja mẽ hkukamã Tirtũm nhÿ hã mẽ piitã mẽ harê nê hã kagà anê. Jejus kot ma mẽ hwÿr mörja kukamã nhũm ra hprî hã harê nê hã kagà. Nê hã kagàja o:

16 E. Kot paj mẽ amã mẽmoj mex jarê ka mẽ inhma. Mẽ ate Tirtũm pumunh kêt jakamã te mẽ ate kamàt kô kamã ri apa pyrãk. Tã koja Tirtũm mẽ amã amnhî to amnhîrit ka mẽ hpãnhã te mẽ ate hirã kamã ri apa pyrãk o amnhî nhîpêx nê ra hkôt amnhî xunhwÿ.

Anhÿr o mẽ hkukamã mẽ harê nê hã kagà. 17Tã nhũm ra kot hkukamã mẽ kãm ujarênh xà hkôt nhũm Jejusja mẽ hwÿr mō nê mẽ kãm Tirtũm kapêr jarênh o ri mẽ hkôt pa. Nê mẽ kãm tanhmã amnhî jarênh to ho pa. Nom kormã hprî hã mẽ kãm amnhî jarênh kêt nê. Te ho nhãm mẽhō jarênh pyrãk o mẽ kãm amnhî jarê nê mẽ kãm:

—E na ra Tirtũmja kot mẽ akaxyw ãm xwÿnhhta mẽ nhũm mẽ awÿr wrÿ. Jakamã kwa mẽ tokyx tee ri ate amnhî tomnuj ã amnhî pumu nê ã ate amnhî nhîpêx anhÿr kaga nê hpãnhã Tirtũm kôt mãn amnhî nhîpêx o ri apa.

Anhÿr o mẽ kãm kapêr o pa pê mẽ ahkre ho ri mẽ hkôt pa.

Jejus kot amnhî wÿr tep pynênh xwÿnhjê hwÿr

Makre 1.16-20; Rukre 5.1-11

18Tã nhũm Jejus ma gô rax pê Garirej mÿ ri pa nê gôx kãm ja wa omu. Simãw Pêtre mẽ htō Andreja nhũm wa gôx kãm kryhti rênh o wa xa. Hãmri nhũm Jejus wa hwÿr tē nê wa omu nê amnhî kôt wa kuwÿ nê wa kãm:

19—Pa. E kwa ma ixkôt mãn war apa. Kot paj tanhmã war ajahkre hto ka wa ma mẽ kãm ijarênh o ri apa. Mẽ kot war amar nê ra ixkôt amnhî xunhwÿr kaxyw. Anê.

20Hãmri nhũm wa kuma nê kryhti re nê wa ma hkôt htēm kurê kumrêx. 21Hãmri nhũm mẽ ma nhãm axte mō nê ra jajê hwÿr kato. Jepetew mẽ hkra Xiakre mẽ Juãwja nhũm wa mẽ hwÿr kato. Nhũm mẽ õ pàr kãm kryhti ho mex o wa mẽ nhÿ. Hãmri nhũm mẽ hwÿr mra nhũm Jejus amnhî kôt ja wa kuwÿ nê wa kãm:

—Pa Xiakre mẽ Juãw. E wa ma ixkôt mãn wa apa. Anê.

22Hãmri nhũm wa kuma nê hipêxã mã amnhî jarê nê ma hkôt pa ho pa kurê kumrêx.

Jejus kot tanhmã amnhĩ nhĩpêx to

Rukre 6.17-19

23Tã nhũm Jejus Garirej kamã Ijaew mã Tĩrtũm kapêr jarênh o pa. Na pre hte Tĩrtũm kapêr o mẽ ahkre xà hã ixkre hwỳr agjê nê kamã mẽ kãm Tĩrtũm kapêr jarênh o hkrĩ nê mẽ kãm:

—E mẽ tee ri ate amnhĩ tomnuj ã amnhĩ pumu nê hpãnhã Tĩrtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anê nhũm ja hã mẽ apumu nê mẽ ato hkra kurê kumrêx. Anê.

Hãmri nê akupỹm mẽ kãm mẽ à xwỳnhjê ho mex. Ahpỹnhã tanhmã mẽ à kute xwỳnhjaja nhũm akupỹm mẽ ho mex o pa. 24Jakamã nhũm mẽ piitã pikaja kamã ri axpên mã harênh o hprôt. Nê pika pê Sir kôt mãânên ma ri axpên mã harênh o hprôt. Nhũm mẽ piitã harênh ma nê ma hwỳr mẽ à xwỳnhjê ho mra. Ahpỹnhã ri tanhmã mẽ à kute xwỳnhjaja. Mẽ à htỳx xwỳnhjaja. Nê mẽ ã kamã mẽ htyk xwỳnhjaja. Nê mẽ hkrã pipãnh xwỳnhjaja. Nê mẽkarõmnuti kot Satanasti nhỹ hã tanhmã ri mẽ ho xwỳnhjaja. Nhũm prem mẽ hamỳ nê ma Jejus wỳr mẽ o mra nhũm mẽ omu nê akupỹm mẽ ho mex pa. 25Jakamã nhũm mẽ ohtô nê ma hkôt pa. Krĩ pê Garirej rũm nê Tekap rũm nê Jerujarê rũm nê pika pê Jutej rũm. Nê pyhti pê Jotãw nhĩkê rũm mẽ pa xwỳnhjaja. Nhũm mẽ ã ohtô nê ma Jejus kôt omunh o pa anê.

Jejus kot tanhmã mẽ ahkre hto

Rukre 6.20-23

5 1Nhũm Jejus amnhĩ kôt ri mẽ kot omunh o mẽ pa xwỳnhjê pumu hãmri nê mẽ ahkre kaxyw ma tẽ nê hixêt ã api nê himõk ã nhỹ. Hãmri nhũm mẽ ma hkôt mra nê pu hã hkrĩ pa. 2Hãmri nhũm mẽ ahkre nê mẽ kãm:

3 E mẽ inhma. Kot kaj mẽ atõ amnhĩ kaxyw tanhmã Tĩrtũm mẽ wa inhã ajamxpêr to nê ajamxpêr o: “Koja Tĩrtũm inhĩhkô hã pa hkêt pa ixtỳx ri tanhmã amnhĩ tomnuj to ho ri ixpa rãhã ho ri ixpa.” Anhỹr o ajamxpêr. Hãmri nhũm Tĩrtũm ã ajamxpêr anhỹr ã apumu nhũm ja kãm mex nê. Hãmri nhũm apê hkra hã ato mex nê atãnopxar o akôt pa ho pa ka ajamakêtkati nê axãmnhĩx akĩnh nê ri apa.

4 Nê kot ka mẽ atõ tanhmã amnhĩ tomnuj to. Hãmri nê tee ri ja hã amnhĩ pumu nê apijaãm nê akaprĩ nê. Nê akaprĩ xaj amỳr o nhỹ. Amỳr rax nê. Hãmri nhũm Tĩrtũm ja hã apumu nhũm ja kãm mex nê. Jakamã nhũm anê akaprĩ hta nê ato mex nê ka ajamakêtkati nê axãmnhĩx akĩnh nê ri apa.

- 5 Nê kot ka mẽ atõ agryx tokyx anhÿr kêt nê. Nê kritpêm amnhĩ tã amã mẽ hkaprĩ ho ri apa. Hãmri nhũm Tĩrtũm ja hã apumu nhũm ja kãm mex nê. Hãmri nhũm ato mex nê ka ajamakêtkati nê axàmnhĩx akĩnh nê ri apa.
- 6 Nê kot ka mẽ atõ amã Tĩrtũm kãm hprãm xà hkôt amnhĩ nhĩpêx o ri apa hprãm nê. Nhũm amnhĩ tã apumu nhũm ja kãm mex nê. Hãmri nhũm ato mex nê tanhmã akrã hto ka hkôt pix mã amnhĩ nhĩpêx o ri apa. Jao ajamakêtkati nê axàmnhĩx akĩnh nê ri apa.
- 7 Nê mẽ kamã mẽ axukaprĩ ho ri apa xwÿnhjaja na hte Tĩrtũm ja hã mẽ apumu nhũm ja kãm mex nê. Jakamã na hte mẽ hã mẽ apyrã nê mẽ akamã ukaprĩ ho pa. Jao mẽ ato mex nê ka mẽ ajamakêtkati nê axàmnhĩx akĩnh nê ri apa.
- 8 Nê kot ka mẽ atõ ã ajamaxpêr anê nê ajamaxpêr o: “Nà kot paj ãm Tĩrtũm kapêr kôt pix mã ri amnhĩ nhĩpêx o ri ixpa. ãm ja pix na inhmã hprãm.” Anhÿr o ajamaxpêr. Hãmri nhũm Tĩrtũm amnhĩ tã mẽ apumu nê mẽ ato mex nê. Ka mẽ ajamakêtkati nê axàmnhĩx akĩnh nê ri apa. Nê nhÿrmã Tĩrtũm wÿr api nê kuri amex rãhã apa ho apa.
- 9 Nê kot ka mẽ atõ mẽhõ wa kot axpên kutã amnhĩ xãm xwÿnhhta axpên tã wa omu nê wa kot tanhmã axpên nhĩpêx tota nê tanhmã wa kãm akapêr to nê akupÿm tãm wa ãm. Hãmri nhũm Tĩrtũm ja hã apumu nhũm ja kãm mex nê. Nê apê hkra hã ajarê ka ajamakêtkati nê axàmnhĩx akĩnh nê ri apa.
- 10 Nê koja mẽhõ mẽ ate Tĩrtũm kapêr mar xà hkôt amnhĩ nhĩpêx o apa hã mẽ apumu nê hã tanhmã mẽ anhĩpêx kati hto. Tã nom koja Tĩrtũm arĩ mẽ ato mex nê. Mẽ apê hkra jakamã mẽ kot tanhmã mẽ anhĩpêx hto htã ka mẽ ajamakêtkati nê axàmnhĩx akĩnh nê ri apa.
- 11-12—Kwãr mẽ mãmrĩ ixtã mẽ ato kapêr rÿ mẽ ato hêx rÿ tanhmã ri mẽ atomnuj to. Kwãr mẽ mãmrĩ ã mẽ anhĩpêx anê. Nom kêr ka mẽ arĩ amnhĩ kaxyw inhmã ajamaxpêr tÿx rãhã pê ajamakêtkati nê axàmnhĩx akĩnh nê ri apa. Kwãr mẽ mãmrĩ ixtã ã mẽ anhĩpêx anê nê mẽ amex kêt ã mẽ ajarê. Amnepêm na prem ã Tĩrtũm nhÿ hã kapêr jarênh xwÿnhjê nhĩpêx anê. Jakamã koja mẽ uràk nê ã mẽ anhĩpêx anê. Hãmri nhũm Tĩrtũm ja hã mẽ apumu nê amnhĩm mẽ amex ã mẽ ajarê. Hãmri nê nhÿrmã kaxkwa kamã wa inhõ krĩ kamã mẽ ato mex nê. Jakamã kêr ka mẽ ã amnhĩ kukamã ajamaxpêr anhÿr pê mãmrĩ akĩnh nê ajamakêtkati nê axàmnhĩx ri apa. Kwãr mẽ mãmrĩ ã wa ixtã mẽ anhĩpêx anê. Anê.

Jejus krajaja te kot kaxwa mẽ kanê hpôk wa uràk

Makre 9.49-50; Rukre 13.34-35

13Nhũm Jejus arĩ mẽ kãm kapêr nê mẽ kãm:

— Nê mẽ ate ixkôt amnhĩ xunhwỳr xwỳnhjaja te mẽ ate kaxwa pyràk. Kaxwaja mẽ apkur xà ho ành mã mex. No koja mēhō tēn kamã pika hkwy mẽ nê ho ahkà. Hãmri tanhmã kot wem ho nê akupỹm ho mex? Nà koja akupỹm mex kêt nê. Âm mẽ kot hkapĩr pix kaxyw koja mex. Ja pyrã nê kot ka mẽ atõ ate inhmã tanhmã amnhĩ nhĩpêx to ho apa hã amnhĩ jarênh tã gaa nê rĩ amã ixkôt amnhĩ nhĩpêx prãm kêt nê. Hãmri nê ra te apê kaxwa mẽ pika pihkarta pyràk. Kwa mẽ ixujarênh ma nê kãm ajamaxpêr tỳx rãhã ho ri apa.


14-16— Nê te mẽ ate kanê hpôk pyràk. Nê te mẽ ate hixêt prêk nhĩmõk ã krĩ xãm pyràk. Koja krĩja hixêt prêeti nhĩmõk ã xa nhũm mẽ piitã omu. Nê kanêja. Xà na htem kanê hpôk nê poti ho hpro? Nà na htem hpôk nê kỳx pê mẽmoj nhĩmõk ã unhwỳ nhũm mẽ piitã mẽ kãm hirã nhũm mẽ hirã kamã mẽmoj pumunh mex nê. Ja pyrã nê kot kaj mẽ tãm amnhĩ nhĩpêx o ri apa nhũm mẽ piitã ja hã mẽ apumunh kôt ra kaxkwa kamã Tĩrtũm mex ã harênh o pa. Anê.

Jejus kot tanhmã Mojes kapêr jarênh to

Rukre 16.16-17

17Nhũm Jejus arĩ mẽ kãm kapêr nê mẽ kãm:

— Nê amnepêm Mojes kot Tĩrtũm nhỹ hã Ijaewjê mã tanhmã mẽ kot amnhĩ nhĩpêx to hã mẽ kãm karõja. Nê amnepêm Tĩrtũm nhỹ hã kapêr jarênh o mẽ pa xwỳnhjê kapêrja. Ixte mẽ kapêr o ijapêx kaxyw na pa



Matêwre 5.14-16

pre mẽ awÿr ixwryk kêt nê. Jakamã kwa mẽ ri ã axpên mã ijarênh anhÿr kêt nê. Kêt ixprî hã ixte mẽ amã mẽ kapêr jarênh nhùm mẽ ate mar mex kaxyw na pa pre kaxkwa rùm mẽ awÿr wry.

18—Tirtûm kapêr ã kagà htûm kot mẽmoj jarênhja. Koja ujarênh xà hkôt mẽmoj tanhmã amnhî to hpar mẽ nhùm rî kormã kaxkwa mẽ pika wa hapêx pa nhùm kapêr ã kagàja mãânên hapêx. Nom nhùm Tirtûm kapêr koja mẽmojja pyrà nê aa hapêx kêt nê. Koja rãhã ho rãhã nê aa ihkjê ho tanhmã mênh to hkêt nê. Âm hãmri na pa ã mẽ amã harênh anê.

19—Nê kot ka mẽ atõ Tirtûm kapêr o pixire nê hirôp xa. Hãmri nê ra amnhî pyrà nê anhîõ mã ja hã amÿnê. Apyrà nê kot hirôp âm kaxyw ka kãm hã amÿnê. Kot kaj ã amnhî nhîpêx anê hãmri nê apê Tirtûm kra hkêt ã amnhî to amnhîrît. Nom kot ka kêt mẽ tãm amnhî nhîpêx o ri apa. Nê amnhî pyrà nê tãm mẽ kot amnhî nhîpêx kaxyw mẽ kãm akapêr o ri apa hãmri nhùm Tirtûm ja hã apumu nê ato hkra nê ato mex nê.

20—No Parijew nhõ xwÿnhjaja nê Tirtûm kapêr tûm o mẽ ahkre ho mẽ pa xwÿnhjaja. Mẽ kot Tirtûm kapêr kôt amnhî nhîpêx mex ã amnhî jarênh tâ no âm hkôt ã amnhî nhîpêx anhÿr kêt nê. Jakamã kot kaj mẽ hkôt amnhî nhîpêx o ri apa hãmri nê mẽ urak nê nhÿrmã Tirtûm mẽ wa inhõ krî kamã apa hkêt nê. Anê.

Mẽ gryk o mẽ pa xwÿnhjê jarênh

Rukre 12.58-59;

mãânên Rômãn 12.19; Epes 4.26; Wam Ximotre 2.8; Xiakre 1.19-20

21Nhùm Jejus arî mẽ kãm kapêr nê mẽ kãm:

—Nê amnepêm na prem mẽ panhîgêjtjê mã Tirtûm kapêr kwÿ jarênh o pa nê mẽ kãm:

Kêr ka mẽ axpên par kêt nê. Kot kaj mẽ mẽhõx pî nhùm mẽ ja mÿrapê atomnuj nê. Nê ma mẽ anhõ pahîhti hwÿr ato tẽ nhùm mÿrapê tanhmã ato rÿ hkôt apî. Anê.

Âm hãmri na prem mẽ kãm ja jarê. 22Tã kot paj ixprî hã mẽ amã tanhmã harênh to ka mẽ inhma. Kot kaj mẽ mẽmoj tâ anhîõ kamã agryk. Hãmri nhùm Tirtûm tee ri ja hã apumu nhùm ja kãm mex kêt nê. Jakamã koja mẽ anhõ pahîhti tanhmã ja hã mẽ ato japêr hã koja ja mex nê. Rÿ kot kaj mẽ tanhmã mẽhõ japyrÿ hto. Ho hagrô rÿ ho rop. Mÿrapê kop apu akwÿ kot apynênh nê anhõ pahîhti hwÿr ato htêm nê îhkram ajaxàr ronhÿx ja inhmã mex nê. Rÿ kot kaj mẽ tanhmã anhîõ mã akapêr punuj to nê kãm: “Tk. Ate ho warêhti hã. Te apê hagrô pyràk kênã.” Anhÿr o kãm akapêr. Tã kop apu Tirtûm ra ã akapêr anhÿrja mÿrapê mẽ kot amnhî xà htÿx kamã hamak tûm xàta wÿr amênh ronhÿx ja inhmã mex nê. Ja pumaj kwa kêr ka mẽ ã axpên mã akapêr anhÿr kêt nê. Kêt mẽ axpên mã tãm akapêr pix o ri axpên kôt apa.

23—Nê kêr ka mê tanhmã ate anhĩo nhĩpêx hto kamã Tĩrtũm mã mex o mex ã harênh kêt nê. Kêr ka mê kãm amnhĩ jarênh o akrĩ hãmri nê ra mêhõ kot mêmõj tã akamã gryk xwỳnh mã ajamaxpêr japêr. 24Hãmri nê akato nê ma hwỳr atêm kurê kumrêx nê wa tãm axpên mã akapêr nê tãm akupỹm axpên xãm. Hãmri nê rĩ kormã ma akupỹm tẽ nê Tĩrtũm mã amnhĩ jarênh jatur xãm amê nê kãm mex o mex ã harê. Kêr ka mê ã amnhĩ nhĩpêx anhỹr o ri apa.

25-26—Na htem tanhmã axpên nhĩpêx to hãmri nê kot tanhmã war axpên to xwỳnhjê hõja ma õ pahi hwỳr tẽ nê kãm tanhmã kot ho xwỳnhhta jarênh kaxyw nojarê. Hãmri nhũm ra kamã gryk xwỳnhhta kot pahi mã harênh kaxyw nojarê ã harênh ma nê tee ri amnhĩ kukamã hamaxpêr nê ma hwỳr tẽ nê wa akupỹm tãm axpên xãm. Na htem ã amnhĩ nhĩpêx anê. Pahi kot wa harênh mar nê tanhmã axpên tã wa ho pymaj na htem ã amnhĩ nhĩpêx anê nê tokyx tãm akupỹm axpên xunhwỳ. No koja mê anhỹr kêt nhũm pahija wa harênh ma nê wa kot tanhmã axpên to xwỳnhhta õ jaxà nhũm tee ri kãm kator prãm. Hãmri nê tanhmã amnhĩ to nê ra amnhĩ pãnhã kãm amnhĩrer pa nhũm pahĩhtija rĩ kormã põristi mã anê nhũm kãm ure nhũm kato. Ja pyrà nê kêr ka mê Tĩrtũm tanhmã kot mê anhĩpêx to pymaj tokyx mê ate amnhĩ tomnuj kaga nê hkõt amnhĩ nhĩpêx rãhã ho ri apa. Anê.

Tanhmã mê pahte mê pahprõjê nhĩpêx to

Matêwre 19.3-9; Makre 9.43-47, 10.2-9; mããnên Rukre 16.18

27Nhũm Jejus arĩ mê kãm kapêr nê mê kãm:

—Nê na pre finat Mojesja mê panhĩgêjtê mã Tĩrtũm kapêr tũm kwỳ jarê nê mê kãm: “Kêr ka mê amnhĩ prõ pix tãnopxar o ri apa. No mê kuhpa hã nhãm mêhõ ho amnhĩkati ho ri apa hkê. Anê. ãm hãmri na pre mê kãm ja hã karõ. 28Tã kot paj ixprĩ hã mê amã tanhmã harênh to ka mê inhma. Kot kaj mê nhãm mêhõ pumu nê amã ho amnhĩkati hprãm mã ajamaxpêr. Jao te ra ate ho amnhĩkati pyræk o amnhĩ nhĩpêx. Kormã ate ho amnhĩkati hkê tã ra hkukamã ajamaxpêr jakamã te ra ate ho amnhĩkati pyræk o amnhĩ nhĩpêx. 29Ã mê hamaxpêr punuj anhỹr xwỳnhhjaja koja mê nhỹrmã ma mê kot amnhĩ xà htỳx kamã hamak tũm xàta wỳr ma mra nê kamã pa rãhã ho pa. Jakamã kêr ka mê nhãm mêhõ pumu nê amã hkĩnh japêr hãmri nê te ate ano kaxàr nê mênh nê axte ate omunh kêt pyræk o amnhĩ nhĩpêx. Jao hkàx ã rĩt nê ma nhỹhỹm atêm kurê kumrêx.

30—Nê kot kaj mê anhĩhkra ho tanhmã amnhĩ tomnuj to kaxyw. Hãmri nê tee ri ja hã amnhĩ pumu nê te ate amnhĩ nhĩhkra krãhyr nê mênh pyræk o amnhĩ nhĩpêx nê tanhmã amnhĩ tomnuj to hkê. Mê ãhkra ho mê kot tanhmã amnhĩ tomnuj to ho mê pa xwỳnhhjaja koja mê

nhÿrmã ma mẽ kot amnhĩ xà htÿx kamã hamak tũm xàta wÿr ma mra nẽ kamã pa rãhã ho pa. Anẽ.

Mẽ pahte axpẽn kaga hkêt

31Nhũm Jejus arĩ mẽ kãm kapẽr nẽ mẽ kãm:

—Nẽ na pre finat Mojes mẽ panhĩgêjtjẽ mã Tĩrtũm kapẽr tũm kwÿ jarẽ nẽ mẽ kãm: “Kot kaj mẽ atõ aprõ kaga kaxyw hãmri nẽ ate hkaga hã amnhĩ jarẽnh ã kaga nhĩpêx nẽ kãm agõ nẽ rĩ kormã hkaga.” Anẽ. ãm hãmri na pre ã mẽ kãm Tĩrtũm kapẽr tũm jarẽnh anẽ. 32Tã kot paj ixprĩ hã mẽ amã tanhmã harẽnh to ka mẽ inhma. Kêr ka mẽ atÿx ri amã hprãm xà hkõt aprõ kaga hkêt nẽ. Nom koja aprõ akuhpa hã nhãm mẽhõ ho amnhĩkati ka harẽnh ma hãmri nẽ amã ja hã hkaga hprãm nẽ mãmri kam nẽ hkaga. Ja tanhmã kute hkêt. Nom koja ã amnhĩ nhĩpêx anhÿr kêt tã ka amnhĩ krã hkõt hkaga. Hãmri nhũm mẽhõ apãnhã ho hprõ nẽ o pa. Hãmri nẽ ra kot apê aprõ ho amnhĩkati ho pa pyræk o hipêx. Nẽ nija haxwÿja. Te arĩ kêp aprõ htã akuhpa hã nhãm myja o amnhĩkati o pa pyræk o amnhĩ nhĩpêx. Anẽ.

Tãm mẽ pakapẽr ã Jejus kot mẽ pamã karõ

Xiakre 5.12

33Nhũm Jejus arĩ mẽ kãm kapẽr nẽ mẽ kãm:

—Nẽ na pre finat Mojes mẽ panhĩgêt nẽ pahpãmjê mã Tĩrtũm kapẽr tũm jarẽnh o: “Kêr ka mẽ Tĩrtũm mã mẽmoj to anhÿr ã amnhĩ jarẽ hãmri nẽ amnhĩ jarẽnh xà hkõt kãm tanhmã amnhĩ nhĩpêx to. Nom kêr ka mẽ atÿx ri kãm tanhmã amnhĩ jarẽnh to ho amnhĩ to axêx kêt nẽ. ãm akatàt kõt mẽ ate amnhĩ jarẽnh to xà hkõt kãm tanhmã mẽmoj to.” Anẽ. ãm hãmri na pre mẽ kãm ja jarẽ. 34Tã kot paj ixprĩ hã mẽ amã tanhmã harẽnh to ka mẽ inhma. Kêr ka mẽhõ mã tanhmã amnhĩ jarẽnh to. Tĩrtũm mã pix mã amnhĩ jarẽnh kêt nhãm mẽhõ mã mããnẽn tanhmã amnhĩ jarẽnh to. Nẽ akatàt kõt kãm amnhĩ jarẽ. Na ka htem mẽ kot mẽ axêx kêt kõt mẽ apumunh kaxyw mẽmoj nhĩxi jarẽnh kõt amnhĩ jarẽ. Nom kêr ka mẽ axte ã mẽmo nhĩxi hã amnhĩ jarẽnh anhÿr kêt nẽ. Mẽmoj tã amnhĩ jarẽ nẽ akatàt kõt amnhĩ jarẽnh kurê kumrêx. No mẽ kot axêx kêt kõt apumunh kaxyw mẽmoj nhĩxi hkõt amnhĩ jarẽnh kêt nẽ. Tanhmãn kaxkwa nhĩxi jarẽnh kõt mẽmoj tã amnhĩ jarẽnh kêt nẽ. Kaxkwa kêp Tĩrtũm krĩ xà maati kênã kot ka kêt mẽ axtem nẽ atÿx ri amnhĩ kaxyw hixi jarẽ. 35Rÿ mẽ kot axêx kêt kõt apumunh kaxyw pika nhĩxi jarẽnh kêt nẽ. Pika kêp Tĩrtũm par xãm xà kênã kot ka kêt mẽ atÿx ri amnhĩ kaxyw tanhmã hixi jarẽnh to. Nẽ krĩ pê Jerujarẽja mããnẽn kêr ka mẽ ri amnhĩ kaxyw tanhmã hixi jarẽnh to hkêt nẽ. Koja nhÿrmã Tĩrtũm mẽ awÿr Jerujarẽ hwÿr ixpê pahi maati hã inhmẽ pa kamã mẽ ato

amnhĩptàr o ixkrĩ. Jakamã kêr ka mẽ ri atỳx amnhĩ kaxyw tanhmã hixi jarênh to ho ri apa hkêt nê.

36—Nê kêr ka mẽ kot axêx kêt kêt apumunh kaxyw mẽ ri tanhmã amnhĩ krã hkĩ jarênh to hkêt nê. Kot kaj mẽ anê nê ãm tanhmã hã harênh to kaprỳ. Xà kot kaj mẽ ajamaxpêr pix o tanhmã amnhĩ krã hkĩ hto? Nà kot kaj mẽ ho anhỳr kêt nê. Jakamã mẽ ri atỳx tanhmã harênh to hkêt nê.

Nê mẽ atỳx ri mẽmo nhĩxi jarênh kêt mẽmoj tã amnhĩ jarênh o apa hkêt nê. 37 ãm akatàt kêt tãm amnhĩ jarênh kurê kumrêx. Jao mẽ kãm: “Tỳ. Nà kot paj ho anê.” Anhỳr o mẽmoj tanhmã ho. Rỳ mẽ kãm: “Nà kot paj ho anhỳr kêt nê.” Anhỳr o mẽmoj tanhmã ho hkêt nê. ãm akatàt kêt tanhmã mẽmoj tã amnhĩ jarênh to xà hkôt ho anhỳr kurê kumrêx. Mẽ kot Satanasti hkôt amnhĩ nhĩpêx o mẽ pa xwỳnh pixjaja na htem hêx rom mẽmoj nhĩxi jarênh kêt tanhmã amnhĩ jarênh to ho pa. Anê.

Mẽ pahte tanhmã axpên nhĩpêx to hã Jejus kot mẽ pamã karõ

Rukre 6.27-30, 23.34; määnên Atre 7.60; Römãn 12.14

38Nhũm Jejusja arĩ mẽ kãm kapêr nê mẽ kãm:

—Na prem amnepêm mẽ panhigêtjê mã Tirtũm kapêr tũm jarênh o: “Koja mẽhõ apê ano katõk nê hkapa hã koja mẽ anhõ pahija atã mã ho anê nê kêp no kapa. Rỳ koja mẽhõ apê axwa hõ hkwỳr hã koja atã mã ho anê nê atã kêp wa hõ hkwỳr.” Anhỳr o mẽ kãm hã karõ. ãm hãmri na prem ã ja jarênh anê. 39Tã kot paj ixprĩ hã mẽ amã tanhmã ja jarênh to ka mẽ inhma. Koja mẽhõ tanhmã mẽ anhĩpêx to ka mẽ ãm amnhĩ tã omu nê tanhmã amnhĩ tã ho hkêt nê. Koja anhĩnep akura ka ãm omu nê tanhmã amnhĩ tã ho hkêt nê. Te ate kãm ihkjê hpêr nhũm kot ihkjê kamã hkuranh pyræk o amnhĩ nhĩpêx nhũm ja amã mex nê. No amnhĩ tã tanhmã ho hkêt nê.

40—Nê koja mẽhõ anhĩnõhkã hã awỳ nhũm mẽ anhõ pahija amã anê ka mãmrĩ kãm agõ nê tanhmã hã kãm nê hkêt nê. Te ate hkôt kry pê kãm anhĩnõhkã hpakà ry jagjênh xwỳnhhta nhõr pyræk o amnhĩ nhĩpêx. Nom kêr ka mẽ kamã agryk kamã kãm õr kêt nê.

41—Nê koja mẽhõ ate kãm jênh tur nê hkôt ho amõr ryy kaxyw amã kapêr ka mãmrĩ kãm ho anê. Nê kot amã nhỹri hã karõ xàja wỳr o põj nom kamã kãm õr kêt nê. Kãm ho hakrenh ryy nê rĩ kormã akupỳm kãm agõ.

42—Nê koja mẽhõ õ mẽmoj kêt nê awỳr tẽ nê mẽmoj tã awỳ ka mãmrĩ kãm agõ. Rỳ nhũm awỳr tẽ nê apê mẽmoj to ipresta kaxyw ka mãmrĩ kãm ho ipresta. Kêr ka mẽ ã axpên nhĩpêx anhỳr o ri apa. Anê.

Mẽ pamã axpên kĩnh ã Jejus kot mẽ pamã karõ

Rukre 6.32-36; määnên Römãn 12.14

43Nhũm Jejus arĩ mẽ kãm kapêr nê mẽ kãm:

—Nê na prem amnhĩ krã hkôt axtem nê tanhmã mẽ panhĩgêjtê mã mẽmoj jarênh to nê mẽ kãm: “Kêr ka mẽ amã mẽ akrãmnhwỳjê pix kĩnh nê tanhmã mẽ ho mex to. No kêt mẽ kot tanhmã mẽ ato xwỳnhjaja kêr ka mẽ mãmri mẽ kamã axãhkurê ho ri apa.” Anhỹr o mẽ kãm karõ. 44Nom pa kot paj mẽ amã Tĩrtũm kot tanhmã ja hã karõ hto hã harê ka mẽ inhma. Kêr ka mẽ kot tanhmã ri mẽ atomnuj to xwỳnhjaja amnhĩ tã tanhmã mẽ ho hkêt nê. ãm tanhmã mẽ ho mex to pix hkukamã mãn ajamxpêr. Nê mẽ ho Tĩrtũm wỳr pix kukamã mãn ajamxpêr. 45Na hte ã kaxkwa kamã Mẽpahpãm Tĩrtũmja amnhĩ nhĩpêx anhỹr o pa. Mẽ kot amnhĩ tomnuj xwỳnhjaja nê mẽ kot amnhĩ to mex xwỳnhjaja nhũm hte mẽ ho hpimràatã mẽ ho mex o axpên pyrãk. Jao hamê wa hwỳr na rê nê hamê wa hwỳr myyti rê nhũm hamê wa kãm hirã ho pa. Jakamã kêr ka mẽ urãk nê mẽ piitã tãm mẽ hipêx o axpên pyrãk. Mẽ kot amnhĩ tomnuj xwỳnhjê mẽ mẽ kot amnhĩ to mex xwỳnhjê mẽ ho apimràatã mẽ ho mex o axpên pyrãk.

46—Nê xat kaj mẽ amã mẽ piitã mẽ ho mex prãm kêt nê ãm mẽ kot mẽ ato mex xwỳnh pixjaja ka mẽ amã mẽ ho mex prãm nhũm Tĩrtũm ja hã mẽ apumu nhũm ja kãm mex nê nà? Nà koja kãm mex kêt nê. Koja mẽhõ ato mex kêt tã kêr ka ãm amnhĩ rom ho mex nê. Nhũm Tĩrtũm ja hã apumu nê amnhĩm amex ã ajarê. Mẽ kot amnhĩ tomnuj xwỳnhjaja na htem ãm mẽ kot mẽ ho mex xwỳnh pixjaja nhũm mẽ amnhĩ xwar mẽ ho mex. No tãm mẽ kot amnhĩ nhĩpêx xwỳnhjaja na htem mẽ piitã mẽ ho mex o axpên pyrãk. Mẽ kot tãm amnhĩ nhĩpêx xwỳnhjaja nê mẽ kot amnhĩ tomnuj xwỳnhjaja nhũm mẽ ho hpimràatã mẽ ho mex o axpên pyrãk.

47—Nê na hte mẽ hkwỳjaja ãm amnhĩ kwỳjê pix mã kapêr mex o pa. Nom mẽ piitã tãm mẽ hipêx kêt nê. Nom kêr ka mẽ ã amnhĩ nhĩpêx anhỹr kêt nê. Kêr ka mẽ kurom mẽ piitã tãm mẽ hipêx o axpên pyrãk. Mẽ akwỳjê mẽ mẽ akwỳ hkêt xwỳnhjaja ka mẽ hipêx o axpên pyrãk. Nê tãm mẽ kãm akapêr o axpên pyrãk. 48Kaxkwa kamã Mẽpahpãm Tĩrtũm pyrã nê mẽ kot amnhĩ tomnuj xwỳnhjê mẽ mẽ kot amnhĩ to mex xwỳnhjaja mẽ ho apimràatã mẽ ho mex o axpên pyrãk. Na hte ã Tĩrtũmja mẽ panhĩpêx anê. Anê.

Mẽ pahte mẽ kêp amrakati xwỳnhjê ho mex rãhã hã mẽ pamã karõ

6 1-2Nhũm Jejus arĩ mẽ kãm kapêr nê mẽ kãm:
—Nê na htem mẽ piitã hkwỳjê noo mã tanhmã mẽ kêp amrakati xwỳnhjê ho mex to. Nom kãm mẽ hkaprĩ kamã tanhmã mẽ ho mex to hkêt nê. ãm hkwỳjaja kot ja hã mẽ omunh nê mẽ mex ã mẽ harênh pix kaxyw na htem krĩ hkôt ri mẽ kêp amrakati xwỳnh piitã mẽ ho mex o pa. Nê mẽ pikuprõnh xã hã ixkre kamã kuhê nê tanhmã mẽ ho mex to. Mẽ hkwỳjaja kot ja hã mẽ omunh nê amnhĩm mẽ mex ã mẽ ho jarkrar

kaxyw. Jakamã koja nhÿrmã Tirtÿmja axte ja hã mẽ kãm mẽmoj mex nhôr kêt nê. Ra jar mẽ hkwÿjaja kot ja hã mẽ omunh nê amnhĩm mẽ mex ã mẽ harênh kênã. Jakamã kwa kêr ka mẽ ho mẽ uràk kêt nê. Nê tanhmã mẽhõ ho mex to kaxyw nê akwÿjê no kuhpa hã mẽ hkàx ã tanhmã mẽ ho mex to. No kot kaj mẽ noo mã tanhmã mẽ ho mex to. Mẽ kot hã apumunh nê ato jarkrar kaxyw tanhmã mẽ ho mex to nhũm kaxkwa kamã Mẽpahpãmja ja hã apumu nê mẽ hã tanhmã ato mex to hkêt nê. Koja ãm hã apumu.

3—Ja pymaj kêr ka mẽ mẽ kêp amrakati xwÿnhjê mã mẽmoj nhôr kaxyw hãmri nê mẽ piitã mẽ no hkàx ã tanhmã mẽ ho mex to. Hãmri nê nhãm ri ja hã mẽ kãm amnhĩ to jarkrar kêt nê. Aprõ mã rÿ akrajê mã rÿ akrãmnhwÿ mã hã amnhĩ jarênh kêt nê. 4Kot kaj mẽ no hkàx ã tanhmã ho mex to no nhũm Tirtÿm tapxipix apumunh o nhÿ. Hãmri nê ja hã ato mex rax nê ka amex nê apa. Anê.

Tanhmã mẽ pahte Tirtÿm mã amnhĩ jarênh to hã mẽ pamã karõ

Rukre 11.1-13, 18.9-14

5Nhũm Jejus arĩ mẽ kãm kapêr nê mẽ kãm:

—Nê mãânên ja. Na htem hakwa pix o amnhĩ mex ã amnhĩ jarênh xwÿnhjaja Tirtÿm mã amnhĩ jarênh kaxyw nê mẽ kot Tirtÿm kapêr o mẽ ahkre xà hã ixkreja wÿr agjê. Nê mẽ piitã mẽ noo mã kãm tanhmã amnhĩ jarênh to. Rÿ gáp kuhê nê mẽ piitã mẽ noo mã kãm amnhĩ jarê. Tã mẽmo kaxyw na htem mẽ noo mã Tirtÿm mã amnhĩ jarê? Nà ãm mẽ kot ja hã mẽ omunh nê mẽ mex ã mẽ ho jarkrar pix kaxyw. Nê mẽ harênh o: “E mũjti pumu. Na hte apkati mẽ ã Tirtÿm mã amnhĩ jarênh anê. Kot amnhĩ to mex xwÿnh mãn.” Anhÿr ã harênh kaxyw. Tã ra mẽ piitã mẽ kot ja hã omunh nê amnhĩm mex ã ho jarkrar jakamã koja Tirtÿm axte ja hã tanhmã ho mex to hkêt nê. Ra pika ja kamã mẽ kot mẽ omunh nê mẽ mex ã mẽ harênh kênã. 6No mẽ kajaja. Kêr ka mẽ uràk nê ã amnhĩ nhĩpêx anhÿr kêt nê. ãm Tirtÿm mã amnhĩ jarênh kaxyw nê akwÿjê no hkàx ã hitom wÿr agjê nê hitom kãm ahte kãm amnhĩ jarê. Hãmri nhũm Tirtÿm tapxipix ja hã mẽ apumu. Mẽ amã amnhĩ to amnhĩrit kêt tã mẽ apumu. Hãmri nê mẽ ato mex nê.

7—Nê mẽ kêp Tirtÿm kra hkêt xwÿnhjaja na htem sãnti mã amnhĩ jarênh kaxyw nê xatã kãm amnhĩ jarê. Nê xatã kàx pêê kãm amnhĩ jarê. Nê hamaxpêr o: “Kot paj xatã sãnti mã amnhĩ jarê nhũm inhmar japêr.” Anhÿr o hamaxpêr jakamã xatã kãm amnhĩ jarê. No ãm htÿx ã hamaxpêr anhÿr kaprÿ. 8Jakamã kwa kêr ka mẽ ho mẽ uràk kêt nê. Tirtÿm ra kot mẽ ate mẽmoj tã hwÿr xàta ra ja kukamã kot omunh mex kênã kot ka kêt mẽ xatã hã hwÿr o akuhê.

9—Nê kêr ka mẽ kãm amnhĩ jarênh kaxyw nê amnhĩ krã hkôt tanhmã kãm amnhĩ jarênh to rÿ kãm amnhĩ jarênh o:

Pa Měinhîpêxà maati pê kaxkwa kamã ri apa xwÿnh? Amex o amex Tîrtûm.

10 Apê mẽ ijamãr mex xwÿnh maati na ka.

Na hte kaxkwa kamã mẽ kot ri amã tanhmã amnhî nhîpêx to ho mẽ pa xwÿnhjaja akôt pix mã amnhî nhîpêx o ri pa. Tã ijaxwÿja inhmã mẽ uràk nê akôt pix mã amnhî nhîpêx o ri ixpa hprãm.

11 Nê kwa jarãhã mẽ inhmã mẽmoj gô pa mẽ akukwak ri ho apku.

12 Na pa hte tôhã amnhî tomnuj nê Tîrtûm. Nom mẽ kot tanhmã ixtomnuj to xwÿnhjaja na pa hte âm mẽ omu nê amnhî tã tanhmã mẽ ho hkêt nê. Nê ja ho ijamakêtkati nê axte kãm ijamaxpêr kêt nê. ã ixte amnhî nhîpêx anhÿr jakamã kwa ja hã ixpumu nê ixpyrà nê ixte tanhmã amnhî tomnuj to hã ixpumu nê hã tanhmã ixto hkêt nê. Âm ho ajamakêtkati kurê kumrêx nê axte kãm ajamaxpêr kêt nê.

13 Nê kot paj nhÿrmã tanhmã amnhî tomnuj to kaxyw ka ja hã ixpumu nê ixte ã amnhî nhîpêx anhÿrja nê ixto htÿx nê pa tanhmã amnhî tomnuj to hkêt nê. Âm mẽmoj punuj pê ixpytâr rãhã ho apa Tîrtûm. Tã âm ja pix na hapêx. Anê.

—E kêr ka mẽ ã Tîrtûm mã amnhî jarênh anê. Anê.

14—Nê koja mẽhõ tanhmã anhîpêx to htã ka ho ajamakêtkati nê axte kãm ajamaxpêr pix o ri apa hkêt nê. Hã koja kaxkwa kamã Měpahpãm maatija ja hã apumu nê apyrà nê tanhmã ate amnhî tomnuj to ho hamakêtkati nê axte kãm hamaxpêr kêt nê. 15Nom kot kaj mẽ ã amnhî nhîpêx anhÿr kêt nê. Nê tanhmã mẽ kot mẽ atota ã anohtÿx rãhã ho apa hãmri nhÿm Měpahpãm maatija mẽ apyrà nê mẽ ate tanhmã amnhî tomnuj to ho hamakêtkati hkêt nê. Âm hã nohtÿx rãhã ho pa ho pa. Anê.

Tanhmã mẽ pahte Tîrtûm mã mex o mex ã harênh to

Rukre 18.11-12

16Nhÿm Jejus arî mẽ kãm kapêr nê mẽ kãm:

—Nê mẽ kot amnhî to jarkrar xwÿnhjaja na htem Tîrtûm mã amnhî jarênh kaxyw hãmri nê tôhã ho apkur kêt rãhã kãm amnhî jarênh jakamã hkuk kaprî nê hkwyjê hkôt pa. Tã mo kaxyw na htem ã mẽ noo mã amnhî nhîpêx anê? Âm mẽ apkur kêt rãhã Tîrtûm mã amnhî jarênh ã mẽ omunh pix kaxyw. Tã ra jar pika ja kamã mẽ kot ja hã mẽ omunh jakamã koja Tîrtûm nhÿrmã ja hã tanhmã mẽ ho mex to hkêt nê. Jakamã kwa kêr ka mẽ ho mẽ uràk kêt nê. 17Kêr ka mẽ tôhã Tîrtûm mã amnhî jarênh ryy kaxyw axàpkur kaga hãmri nê amnhî krã kahõ nê amnhî jaxwÿr mux nê akuk kînh nê ri akwyjê hkôt apa. 18Hãmri nê nhÿri mẽ hkàx ã ahte kãm amnhî jarê nê kãm mex o mex ã harê. Kot kaj mẽ ã mẽ hkàx ã amnhî nhîpêx anê nhÿm mẽ akwyjaja mẽ axàpkur kaga hã mẽ

apumunh kêt nê. Nhũm Tĩrtũm pix ja hã mẽ apumu. Hãmri nê nhỹrmã ja hã mẽ ato mex nê. Anê.

Kaxkwa kamã mẽmoj mex

Rukre 12.33-34; mãânên Sikũn Ximotre 4.8; Wam Pêtre 1.4; Eprêw 10.34

19Nhũm Jejus arĩ mẽ kãm kapêr nê mẽ kãm:

—Nê mãânên ja. Kêr ka mẽ jar pika ja kamã akukrêx rũnh o apa hkêt nê. Kêt jar mẽ hikukrêx koja kritpêm mex kêt nê. Kot kaj mẽ ho akuprõ nhũm amnhôre apê homnu rỳ paratre apê homnu. Nê kàx o mẽ akukrêx nhũm haxwỳja apê omnu rỳ nhũm mēhõ apê hkwy ho ahkĩ. **20**Jakamã kêr ka mẽ akukrêx rũnh o apa hkêt nê. Kaxkwa kamã Tĩrtũm kot mẽ akutêp mẽ akukrêx o pikuprõnhja na kêt mex kumrêx o jar mẽ hikukrêx jakrenh par. Jakamã kêr ka mẽ amã nhỹrmã kaxkwa kamã akukrêx mex prãm xàj tãm mẽ piitã tãm mẽ hipêx nê mẽ ho mex o ri apa. Nê mẽ kamã axukapri nê. Nê Tĩrtũm kôt ri amnhĩ nhĩpêx mex nê. Hãmri nhũm ã mẽ ate amnhĩ nhĩpêx anhỹr ã mẽ apumu nê mẽ akutêp mẽ amã mẽmoj mex kwỳ jaxwỳ. Kaxkwa kamã mo amnhôre nê mo paratre? Nê kamã mo mẽ ahkĩnh xwỳnh? ãm kamã amrakati kumrêx. **21**Kot kaj mẽ jar akukrêx rũnh hãmri nê ãm tanhmã apê homnu hto pix kukamã ajamaxpêr. Nom kot kaj mẽ apê Tĩrtũm kra hã kaxkwa kamã akukrêx mã ajamaxpêr rãhã ho ra akĩnh nê ri apa.

22—Nê kot kaj mẽ ixkapêr ma nê ixkôt amnhĩ nhĩpêx hãmri nê tãm amnhĩ nhĩpêx. Nê tãm axpên hipêx. Jao te hirã kamã arĩt mex pyrãk o amnhĩ nhĩpêx. **23**No koja mēhõ ixkapêr ma nê ãm kuma nê ixkwỳm ri amnhĩ nhĩpêx o pa. Hãmri nê te kamãt kô kamã mēhõ rĩt mex kêt kot amnhĩ nhĩpêx pyrãk o amnhĩ nhĩpêx. E kêr ka mẽ ã amnhĩ nhĩpêx anhỹr pymaj ixkapêr ma nê kãm ajamaxpêr tỳx rãhã ho ri apa.

24—Nê kot kaj apyxi nê anhõ patrãw hamêxkrut hãmri nê arĩgro pyxi hã hamê wa kãm axapênh o amỹkry hkêt nê. Kot kaj anê nê hõ gryk ã ihõ kaga. Ja pyrã nê kot kaj mẽ jar akàxpore nê akukrêx pix mã ajamaxpêr nê amã hapê ho akwỳjê pê ho anhõxỳ ho ri apa. Nê gryk ã Tĩrtũm kãm hprãm xà hkôt tanhmã ho mẽ ho mex to hkêt nê. Jakamã kwa kêr ka mẽ Tĩrtũm pix mã mãn ajamaxpêr rãhã nê. Jao akàxpore nê akukrêx pix kukamã ajamaxpêr o ri apa hkêt nê. Anê.

Mẽ pahte tee ri amnhĩ kukamã pajamaxpêr kêt ã mẽ pamã karõ

Rukre 12.22-31; mãânên Piripos 4.6; Wam Pêtre 5.7

25Nhũm Jejus arĩ mẽ kãm kapêr nê mẽ kãm:

—E. Kwa kêr ka mẽ tee ri mẽmoj tã amnhĩ kukamã ajamaxpêr kêt nê. Tanhmãn axàpkur xà rỳ axê ka mẽ tee ri hkukamã ajamaxpêr kêt nê. Mẽmoj piitã hkukamã tee ri ajamaxpêr o ri apa hkêt nê. Tĩrtũmja àhpumunh tỳx o àhpumunh tỳx xwỳnh na. Na pre àhpumunh tỳx o mẽ

anhîpêx ka mẽ kukwak ri atîr nê apa. Jakamã xà kot mẽ amã mẽ anhõ ho pa kaxyw àhpumunh kêt? Nà ja kaxyw àhpumunh tỳx kênã. Kêp mẽ anhîpêx xwỳnh jakamã mãânên kêp mẽ amã mẽ anhõ xwỳnh. Nê kêp mẽ amã mẽ axê nhõr xwỳnh.

26—Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkaprĩ nê ri pa hkêt nê. Mẽ anhîpêxà maati tãm na hte kãm õ ho pa. Tã kãm mẽ ajapê htỳx o kot kuwênhre jakrenh jakamã koja uràk nê mẽ amã mẽ anhõ rãhã ho pa.

27—Nê xà kot kaj mẽ kritpêm atîr prãm xàj ja pix kukamã ajamaxpêr rãhã nê ra ajamaxpêr kôt kritpêm atîr nê apa? Nà kot kaj mẽ anhỳr kêt nê.

28—Mãn ka htem akunĩ kamã pixôrà pumu. Na hte tee ri tanhmã kute hkukamã hamaxpêr o ra hkaprĩ nê harir kêt nê. 29Tã nom muxre nê harir ka mẽ omu. Te ho amnepêm pahilti Sarumãw xê mex pyràk nom mex o hakre. 30Pixôràreja koja mẽmo arĩgro hã htîr nê mux nê harir tã mẽmo arĩgro hã ra grà pa nê hapêx. Kêp pixôrà pix nê hapêx tokyx anhỳr tã nhũm Tirtũm ho mex nê nhũm mux nê harir. No mẽ kajaja na hte mẽ ato mex o pixôrà ho mexta jakre. Jakamã kwa mẽmo kaxyw kot ka kêt mẽ tee ri amnhĩ xê hkukamã ajamaxpêr o ri akaprĩ nê apa? Kot kaj mẽ ã ajamaxpêr anhỳr jao kormã amnhĩ kaxyw Tirtũm mã ajamaxpêr tỳx kêt nê.

31—Kwa mẽ tee ri axàpkur xà hkukamã ajamaxpêr o ri akaprĩ hkêt nê. Nê tee ri amnhĩ kukamã tanhmã ajamaxpêr to ho ri akaprĩ hkêt nê. 32Mẽ kot Tirtũm kôt amnhĩ xunhwỳr kêt xwỳnhjaja na htem ã ri hamaxpêr anhỳr o pa. Tã nom kêr ka mẽ ho mẽ uràk kêt nê. Tirtũm ra kot mẽ panhõ mẽmoj kêt kôt mẽ pahpumunh mex kênã. 33Jakamã kêr ka mẽ hkôt ri tanhmã amnhĩ nhîpêx to rãhã ho ri apa. Nê amã ja pix tãnopxar prãm. Hãmri nhũm Tirtũm amnhĩ tã mẽ apumu nê apkati mẽ mẽ amã mẽmoj nhõr o pa.

34—Jakamã kwa kêr ka mẽ tee ri amnhĩ kukamã ajamaxpêr o akaprĩ nê apa hkêt nê. Tirtũm kot apkati mẽ mẽ pajamãr mex jakamã kêr ka mẽ jarãhã amnhĩ kukamã apkati mẽ ajamaxpêr kêt nê. Kê apkati mãn. ãm jarãhã pix mã mãn mẽ ate tanhmã amnhĩ nhîpêx tota kukamã ajamaxpêr. Tirtũm kot mẽ pahpumunh mex o pa rãhã kênã. Anê.

Mẽ pahte axpên to pakapêr punuj kêt ã kot mẽ pamã karõ

Rukre 6.37-38, 6.41-42; mãânên Rõmãn 2.1-3; Wam Korõt 4.5; Xiakre 4.11-12

7 1Nhũm Jejus arĩ mẽ kãm kapêr nê mẽ kãm:
—Nê kêr ka mẽ atỳx ri amnhĩ krã hkôt tanhmã akwỳjê hõ kot amnhĩ tomnuj to hã harênh kêt nê. Kot kaj mẽ ã harênh anê nhũm Tirtũm ja hã mẽ apumu nê mẽ kajaja ã mẽ ajarênh anê. 2Na hte tanhmã mẽ pahte axpên nhîpêx to hã mẽ pahpumunh kôt tanhmã mẽ panhîpêx to. 3-5Jakamã kwa kêr ka mẽ mẽhõ kot tanhmã amnhĩ tomnuj to hã omu

hāmri nê hã kãm kapêr tokyx anhÿr kêt nê. Akumrêx ate tanhmã amnhĩ tomnuj to hã amnhĩ pumu nê hkaga hāmri nê rĩ kormã ate mêmoj tã omunh xwÿnhhta wÿr tẽ nê hã tanhmã kãm akapêr to. Kêr ka mẽ ã amnhĩ nhĩpêx anhÿr o ri apa.

—Nê xà koja mẽ akwÿjê hõ tanhmã amnhĩ tomnuj to grire. Ka ate amnhĩ tomnuj tÿx o hakrenh tã ã kot amnhĩ nhĩpêx anhÿr ã omu nê hã kãm akir nhũm amã ja mex nê nà? Nà koja amã ja mex kêt nê. Kot ka akumrêx ate tanhmã amnhĩ tomnuj tota kaga hāmri nê rĩ kormã anhĩo tanhmã kot amnhĩ tomnuj to grireta nê kãm akapêr nhũm ja amã mex nê.

6—Nê xà na htem mẽ apkur xà mex jamÿ nê rop mã kurê? Nà na htem anhÿr kêt nê. Ja pyrã nê kêr ka mẽ kot Tirtũm kaga xwÿnhjê mã kapêr jarênh o ri apa hkêt nê. Anê.

Mê pahte mêmoj to presija hã amnhĩ to Tirtũm wÿr

Makre 11.24; Rukre 11.5-13; Juãw 14.13-14;

mããnên Wam Tesarõn 5.17; Xiakre 1.5-8, 4.1-3

7-11Nhũm Jejus arĩ mẽ kãm kapêr nê mẽ kãm:

—Nê xà kot we akraja kãm prãm nê tep ã awÿ ka axtem nê kagã hõ py nê kãm agõ? Rÿ nhũm krãhyre gre hã awÿ ka axtem nê makre hõ py nê kãm agõ? Nà na ka htem ã mẽ hipêx anhÿr kêt. Na ka htem kot mêmoj tã mẽ awÿr xà hkõt kãm mêmoj gõ. Mẽ ate amnhĩ tomnuj tã na ka htem akrajê ho mex o ri apa. Tã kaxkwa kamã Tirtũmja na hte mẽ ato mex o mẽ ate mẽ akrajê ho mex jakrenh. Kãm mẽ ajapê htÿx kõt na hte mẽ amã mêmoj mex nhõr o pa. Jakamã kot ka mẽ mêmoj tã awÿ nhũm mẽ ama nê mẽ ate mêmoj tã hwÿr xàta kõt amã kugõ. ãm xatã mẽ ate hã axàhwÿr o ri apaja nhũm mẽ amã hprãm xwÿnhhta gõ. ãm mêmoj tã hwÿr rãhã ho ri apa nhũm mẽ ama nê mẽ amã mêmoj tanhmã hipêx to. Te ho mẽhõ kãm tep xành nê teprênhxà hpyr nê xatã gõx kãm rênh o ãm pyrã nê xatã mêmoj tã awÿ. Hāmri nhũm mẽ ama nê mẽ amã hprãm xwÿnhhta gõ. Te tep kanhêr xwÿnhhta jatã kot tep kanhêr pyrãk. Jao mẽ amã mêmoj prãm xwÿnhhta gõ.

12—Nê mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nê tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axãmnhĩx mẽ kêp anhõxÿ hkêt nê tãm mẽ hipêx. Kot kaj mẽ ã axpên nhĩpêx anê nê finat Mojes mẽ Tirtũm nhÿ hã mẽ kapêr o mẽ pa xwÿnhjê xujarênh xà hkõt axpên nhĩpêx mex o ri apa. Anê.

Pry pijakrut jarênh

Rukre 13.24; mããnên Piripos 3.19-21

13-14Nhũm Jejus arĩ mẽ kãm kapêr nê mẽ kãm:

—Tirtũm kapêrja mẽ kêp hihtÿx jakamã na htem ohtô nê hkõt amnhĩ xunhwÿr kêt nê. Na htem ãm hpÿnhre nê hkõt amnhĩ xunhwÿr nê hkõt

amnhĩ nhĩpêx. Jakamã te Tirtũm nhõ krĩ hwỳr pry grireta ã hpÿnhre nẽ pa pyræk. No nhũm Satanasti hkõt mẽ kot amnhĩ xunhwỳr xwỳnhjaja na htem Satanasti kõt pix mã tanhmã amnhĩ tomnuj to hprãm. Mẽ kãm mex jakamã nhũm mẽ amnhĩ nhĩpêx o te pry krepak rax ã axpẽn kõt mẽ ohtõ nẽ pa pyræk o amnhĩ nhĩpêx. Axtem kuwy hwỳr pry krepakja nõr tã nhũm mẽ htỳx kuwyja wỳr amnhĩ to pa. Jakamã Tirtũm kapêrja mẽ apê hihtỳx tã kêr ka mẽ mãmri hkõt amnhĩ xunhwỳ. Jao Tirtũm nhõ krĩ hwỳr pry grireta ã mãn apa. Anẽ.

Mẽ kot amnhĩ to hêx xwỳnhjê jarênh

Rukre 6.43-44; mãänẽn Xiakre 3.9-12; Wam Juãw 3.10, 4.4-6

15Nhũm Jejus arĩ mẽ kãm kapêr nẽ mẽ kãm:

—E kwa mẽ o kora. Mẽ akwỳjaja kot kêp Tirtũm nhỹ hã kapêr jarênh xwỳnh ã amnhĩ jarênh tã na htem ja hã amnhĩ to hêx. Nhũm htem kãm mẽ kapêr mar prãm nẽ. Te mẽ kapêr mex pyræk tã no nhũm htem ãm mẽ kãm amnhĩ to hêx pix o ri mẽ hkõt pa. Mẽ kot mar nẽ axtem nẽ Tirtũm kapêr kwỳm tanhmã amnhĩ nhĩpêx to kaxyw nhũm htem hêx rom tanhmã mẽ kãm kapêr to. Jakamã kwa mẽ o kora. Mẽ axkãm ajamak rom nẽ amnhĩ nẽ mẽ omunh mex nẽ. 16Kêr ka aprĩ hã mẽ piitã mẽ kot tanhmã amnhĩ nhĩpêx to hã mẽ omu nẽ rĩ kormã tanhmã mẽ harênh to. Mẽ hamaxpêr punuj xwỳnhjaja kêp Tirtũm nhỹ hã kapêr jarênh xwỳnh kêt. No koja mẽ tãm hamaxpêr nẽ tãm amnhĩ nhĩpêx ka ja hã mẽ omu nẽ mẽ kêp Tirtũm nhỹ hã kapêr jarênh xwỳnh ã mẽ omunh kurê kumrêx. Na htem hprĩ hã mẽ kot tanhmã amnhĩ nhĩpêx to ho pa hã mẽ omu nẽ rĩ kormã tanhmã mẽ harênh to. 17Na htem hamaxpêr punuj hãmri nẽ hkõt tanhmã amnhĩ tomnuj to. Nom koja mẽhõ hamaxpêr mex nẽ hãmri nẽ hkõt tãm amnhĩ nhĩpêx mex o pa. 18Na htem tanhmã hamaxpêr to xà hkõt tanhmã amnhĩ nhĩpêx to ho pa.

19—Nẽ koja mẽhõ õ pĩ hpàr ô hkêt japêr nhũm tee ri omu hãmri nẽ krãhta nẽ kuwym kumẽ. Ja pyrã nẽ koja mẽhõ tanhmã amnhĩ tomnuj to ho pa nhũm Tirtũm tee ri ja hã omu hãmri nẽ ã kot amnhĩ nhĩpêx anhỳr o paja mỳrapê kuwy hwỳr kumẽ. 20Jakamã kot kaj mẽ tanhmã mẽ kot amnhĩ nhĩpêx to ho pa hã akwỳjê pumu nẽ ra aprĩ hã tanhmã mẽ kute hã mẽ omunh kurê kumrêx. Mẽ kêp Tirtũm nhỹ hã kapêr xwỳnh ã mẽ omu rỳ mẽ kêp hkwỳm ri kapêr xwỳnh ã mẽ omu. Anẽ.

Mẽ kot Tirtũm nhõ krĩ hwỳr gjêx mã xwỳnhjê jarênh

Rukre 13.25-27; mãänẽn Sikũn Korit 13.5; Wam Juãw 2.3-6

21-23Nhũm Jejus arĩ mẽ kãm kapêr nẽ mẽ kãm:

—Nẽ Inhĩpêxã Tirtũm mẽ wa inhõ krĩja wỳr koja mẽ piitã gjêx kêt nẽ. ãm mẽ kot kapêr kõt amnhĩ nhĩpêx o mẽ pa xwỳnh pixjaja koja mẽ

nhÿrmã ma hwÿr agjê. Na hte mẽ hkwÿjaja ixto “Pahihti” anhÿr ã ijarênh tâ no ãm ixkôt ri amnhÿ nhÿpêx kêt nê. Jakamã koja mẽ nhÿrmã wa inhô krÿ hwÿr àpir kêt nê. Kot paj nhÿrmã mẽ piitã mẽ htÿr ri tanhmã mẽ kot amnhÿ nhÿpêx to ho pa hã mẽ omunh xà hkôt tanhmã mẽ harênh to. Mẽ mex ã mẽ hkwÿjê jarê nê mẽ kot amnhÿ tomnuj ã mẽ hkwÿjê jarê. Hãmri nhÿm mẽ hkwÿ kot ixkôt amnhÿ nhÿpêx o pa hkêt xwÿnhjaja kuwyta wÿr ma pa pymaj tee ri amnhÿ kukamã hamaxpêr hãmri nê tanhmã inhmã amnhÿ jarênh to nê inhmã: “Kwa Jejus. Xà ate ixpumunh kêt? Na pa pre amnepêm ixtÿr ri pikap ixpare ri anhÿ hã aa mẽ kot mẽmoj pumunh kêt kwÿ ho anhÿr rax nê. Nê ixkwÿjê nê mẽkarõmnuti jano nê mẽ kãm akapêr jarênh o ri ixpa. Kwa xà ate ja hã ixpumunh kêt?” Anhÿr o inhmã amnhÿ jarê.

—Nom mẽ htÿr ri ã mẽ kot amnhÿ nhÿpêx anhÿr o pa htã ixkapêr kôt amnhÿ nhÿpêx kêt jakamã kot paj mẽ kuma nê ãm mẽ kuma nê amnhÿ nê mẽ hano nê mẽ kãm: “Tk kwa mẽ ma mra. Mẽ apê ixkwÿ hkêt. Mẽ ate ixkôt amnhÿ nhÿpêx o apare hã. ãm mẽ ate amnhÿ tomnuj xwÿnh na ka mẽ. E mẽ ma kuwy hwÿr amrar kurê kumrêx.” Anhÿr o kot paj amnhÿ nê mẽ hano. Hãmri nhÿm mẽ kot ixkôt amnhÿ nhÿpêx o mẽ pa xwÿnh pixjaja ma Tÿrtum mẽ wa inhô krÿ hwÿr gjêx pa. Anê.

Ixkre pijakrut jarênh

Rukre 6.46-49; mãänêñ Xiakre 1.22-25; Wam Juãw 2.3-6

24Nhÿm Jejus arÿ mẽ kãm kapêr nê mẽ kãm:

—E kot paj mẽ amã awjarê ka mẽ ixujarênh ma. Nà mẽ kot ixkapêr mar nê hkôt amnhÿ nhÿpêx o mẽ pa xwÿnhjaja te mẽ kot ixujarênh ja pyræk. Mẽ kot amnhÿ nhÿpêx o te mẽhõ kot amnhÿ kukamã hamaxpêr mex nê aptÿx kãm amnhÿm òrkwÿ nhÿpêxja pyræk. 25Koja mẽhõ aptÿx kãm amnhÿm hipêx nhÿm mẽmo arÿgro hã na wrÿk rax nê gô htàm rax nê hanhi no nhÿm arÿ ãm tÿx nê xa. Tã kot kaj mẽ ixkôt amnhÿ nhÿpêx o ri apa hã kot kaj mẽ te ixkre ja pyræk. Jao amex nê ajamakêtkati nê ri apa. Te ho gô htàm kot ixkre janhir nhÿm arÿ ãm tÿxta pyræk.

26-27—No mẽ kot ixkapêr mar nê ãm mar xwÿnhjaja. Te mẽ kot mẽhõ kot amnhÿ kukamã hamaxpêr mex kêt nê htÿx mõi nê gô mÿri gyw rerek kãm amnhÿm òrkwÿ nhÿpêx pyræk. Koja mẽmo arÿgro hã òrkwÿ hã kòk xàpêr tÿx nê na wrÿk rax nê. Nê gô htàm nê hanhi nê kêp gràn pa. Jakamã koja mẽhõ ixkôt amnhÿ nhÿpêx kêt nê te kot ã kot amnhÿ nhÿpêx anhÿr xwÿnhhta pyræk. Jakamã kwa mẽ ixkapêr mar tÿx nê hkôt amnhÿ nhÿpêx rãhã ho ri apa. Te mẽhõ aptÿx kãm òrkwÿ xãm xwÿnhhta pyræk. Anê.

28Nhÿm pre Jejusja ã mẽ kãm ujarênh ry anê nhÿm mẽ amnhÿ jaêr pê kot tanhmã mẽ ahkre htoja mar o hkrÿ. 29Hãmri nê axpên mã harênh o:

—Hêxta waa nê. Âm hãmri na ã mẽ pamã kapêr anê. Àhpumunh tỳx kôt na hte âm hãmri tanhmã mẽ pamã ujarênh to. Pêr âm Tĩrtũm kapêr tũm o mẽ ahkre xwỳnhjê kurom àhpumunh tỳx kumrêx. Anê.

Kà nhy hkro xàpêr o pa xwỳnh jarênh

Makre 1.40-45; Rukre 5.12-16

8 1Tã nhũm Jejus mẽ kãm kapêr pa hãmri nê hixêt prêêta rũm akupỳn wrỳ nê ma tẽ nhũm mẽ ohtô nê ma hkôt mra. 2Hãmri nhũm mẽhõ my hkà nhy hkro xàpêr o pa xwỳnhja omu nê hwỳr tẽ. Hãmri nê kutã hkõnkrã ho tẽm nê hipô nê nhỹ nê amnhĩ to kuwỳ nê kãm:

—Pa Pahihti. E ot pa awỳr amnhĩ to tẽ. Akupỳm ate mẽ ixto mex kaxyw axàhpumunh tỳx jakamã kot ka amã akupỳm ixto mex prãm nê mãmri ixto mex. Anê.

3Hãmri nhũm Jejus kuma nê hkà punuti hã ìhkra xi. Amnhĩ kamã kahak kêt nê hã ìhkra xi nê kãm:

—Nà kot paj ato mex. E akupỳm akà mex. Anê.

Hãmri nhũm hkà akupỳm mex kurê kumrêx. 4Hãmri nhũm Jejus kãm:

—E kêr ka amnhĩ tã mẽ kãm tanhmã ijarênh to hkêt rãhã ma patre hwỳr tẽ kê akupỳm akà mex ã apumu. Hãmri ka hpãnhã amnepêm finat Mojes kot mẽ ate akupỳm amex ã Tĩrtũm mã tanhmã amnhĩ nhĩpêx to hã karõta ka kãm ho anê. Kê mẽ piitã akupỳm akà mex ã apumu. Anê.

Põristi krãhtũm mã àpênh xwỳnh jarênh

Rukre 7.1-10

5Tã nhũm Jejus ma krĩ pê Kapanaũ hwỳr mõ. Hãmri nê hwỳr pôi nhũm Rõm nhõ xwỳnh pê põristi krãhtũmja omu nê hwỳr tẽ. Kêp Ijaew kêt tã hwỳr tẽ. Na pre kãm àpênh xwỳnh kêp à htỳx nê nõ nhũm omu nê tee ri hkukamã hamaxpêr. Hãmri nê Jejus ra õ krĩ hwỳr hpõx ã omu nê hwỳr tẽ nê kãm harê nê kãm:

6—Pa Jejus? E ot pa awỳr tẽ. Inhmã àpênh xwỳnhja na ixpê à htỳx nê. Ra ì kamã htyk pa nê nõ. O mỳj inhõrkwỳ kamã nõ. Anê.

7Nhũm Jejus kuma nê kãm:

—Tỳ? Tôe. Nà pa ma akôt tẽ nê akupỳm amã ho mex. Anê.

8-9Hãmri nhũm tee ri kuma nê kãm:

—Kwa akĩnhã ixpê Ijaew kêt jakamã ixte amnhĩ kuk ã xpijaàm. Âm ja rũm mãn akapêr pix o akupỳm inhmã ho mex nà? Ixpê mẽ hkrãhtũm na pa hte inhõ põristi mã mẽmoj tã karõ nhũm mẽ inhmar xà hkôt inhmã mẽmoj tanhmã ho. Na pa hte mẽ kãm: “E mẽ ma mra nê ã amnhĩ nhĩpêx anê.” Anê nhũm htem inhma nê ma mrrar kurê kumrêx. Rỳ pa mẽ kãm: “E mẽ amnê ixwỳr mra nê ã amnhĩ nhĩpêx anê.” Anê nhũm mẽ inhma nê ixwỳr mra. No kêt ixrom axàhpumunh

tỳx kôt na ka hte mẽ àja mã akapêr nhũm ama nê mẽ kêp hapôx nê ma mrrar kurê kumrêx. Jakamã kwa âm ja rũm akapêr pix o akupỹm inhmã ho mex nà? Anê.

10Hãmri nhũm Jejus amnhĩ jaêr pê kot kãm ã kapêr anhỹrta ma nê hkĩnh nê. Hãmri nê hã hkôt ri mẽ môr xwỳnhjê mã kãm:

—Kwa xà na ka mẽmyja kapêr ma? Mẽ pahkĩnh ã kêp Ijaew kêt tâ mẽ arom amnhĩ kaxyw inhmã hamaxpêr tỳx nê. Aa mẽ atô uràk nê ã amnhĩ kaxyw inhmã ajamaxpêr tỳx anhỹr kêt tâ nhũm mẽ arom kãm àpênh xwỳnh kaxyw ã inhmã hamaxpêr tỳx anê. 11Nà koja nhỹrmã mẽ hkwyjaja kêp Ijaew kêt tâ ohtô nê pika piitã kurũm ma Tĩrtũm mẽ wa inhõ krĩ hwỳr api nê hwỳr agjê. Nê wa ixkuri wa inhõ krĩ kamã Ijaew pàr krax pê Apraãw nê Ijak nê Jako mẽ pimràatã pa ho pa. Mẽ kêp Ijaew kêt tâ mẽ ìhkô hã apkur mex o hkrĩ nhũm Tĩrtũm mẽ ho mex rax o pa. 12No pêr mẽ apê Ijaew kwỳjaja kot kaj mẽ hkôt hwỳr agjêx kêt nê. Tĩrtũm kãm hwỳr mẽ agjêx prãm tâ ka mẽ axtem nê hkaga. Jakamã kot kaj mẽ ma kamàt kô xihtỳx rax wỳr ajapêx nê mẽ kêp awry rax nê mẽ kot amnhĩ xà htỳx kamã hamak tũm xàta kamã apa ho apa. Hãmri nê tee ri mẽ ixwỳr agjêx prãm kaprỳ nê akaprĩ xàj mur nê amnhĩ kamã agryk tỳx nê. No âm tee ri amnhĩ kamã agryk kaprỳ. Mẽ ate Tĩrtũm kapêr kaga nê hkôt amnhĩ xunhwỳr kêt jakamã kot kaj mẽ nhỹrmã ã amnhĩ nhĩpêx anê. Anê.

13Nhũm pre ã Jejusja mẽ kãm kapêr anê. Hãmri nê pôristi krãhtũmta mã kãm:

—E mãmrĩ ma akupỹm tẽ nê amã àpênh xwỳnhhta pumu. Ra ate kaxyw inhmã ajamaxpêr tỳx jakamã na pa ra akupỹm amã ho mex. E akupỹm tẽ nê omu.

Anhỹr o kãm kapêr rôm nhũm ra akupỹm kãm mex kurê kumrêx.

Jejus kot ahpỹnhã mẽ à xwỳnhjê ho mex

Makre 1.29-31; Rukre 4.38-41

14Tã nhũm Jejus ma Simãw Pêtre nhõrkwỹ hwỳr tẽ nê hwỳr axà. Nhũm Simãw Pêtre xupãnhgêx ra à nê hkà kagro htỳx nê nõ. 15Hãmri nhũm Jejus hwỳr axà nê omu nê ìhkra hã kupy nhũm hkà hakry nê akupỹm hihtỳx kurê kumrêx. Jakamã kãnhmã nhỹ nê mẽ kãm mẽõ hã àpênh o ri mra.

16Tã nhũm ra awjakry. Ra kamàtre ho mō nhũm mẽ piitã Jejus wỳr mẽ à xwỳnhjê ho mra. Nê mẽkarōmnuti kot mẽ hwỳr gjêx xwỳnhjaja nhũm mẽ hwỳr mẽ o mra. Hãmri nhũm mẽ omu nê akupỹm mẽ piitã mẽ ho mex. Mẽ à xwỳnhjê ho mex nê mẽ hkwyjê nê mẽkarōmnuti jano. Âm kapêr pix o mẽ nê mẽ hano nhũm mẽ kêp hapôj nê ma hapêx. 17Na pre ra Tĩrtũm nhỹ hã kapêr xwỳnh finat Ijaisja ã amnhĩ nhĩpêx anhỹrja kukamã amnepêem mẽ kãm harênh o:

Tirtûm kot mẽ pahwÿr mẽnh mã xwÿnhja koja nhÿrmã wrÿ nẽ
mẽ panê mẽ paxã piitã rênh pa nẽ akupÿm mẽ pahto mex
pa. Anẽ.

Na pre ã finat Ijaisja Jejus kukamã harênh anẽ. Tã nhÿm wrÿ nẽ kot
harênh xà hkôt ã amnhĩ nhÿpêx anhÿr o pa.

Wa kãm Jejus kôt amnhĩ xãm prãm xwÿnh wa harênh

Rukre 9.57-62

18Tã nhÿm Jejus amnhĩ pu hã rÿt nẽ tee ri hwÿr mẽ mrar xwÿnhjê
pumu hãmri nẽ hkôt mẽ pa ho mẽ pa xwÿnhjê mã kãm:

—E ma pu mẽ pàr mã agjê nẽ ma xarmã mō. Anẽ.

19Hãmri nhÿm mẽ nojarêr rôm nhÿm Tirtûm kapêr tûm o mẽ ahkre
xwÿnhjê hō Jejus wÿr tẽ nẽ kãm:

—Pa mẽ ijahkre xwÿnh? E pa ma akôt ri ixpa ho ixpa nà. Anẽ.

20Hãmri nhÿm kuma nẽ kãm:

—Ko ka mã. Kam nẽ rÿ ma ixkôt ri apa. Nom kêr ka inhmar
kumrêx. Xore na hte pika hkre kamã hikwÿ. Nẽ kuwênhre pÿ nhÿmōk
ã hikwÿ. No pa ixpê Tirtûm kot mẽ awÿr inhmênh xwÿnh tã mry
hkÿnhã inhōrkwÿ hkêt. Na pa hte amarĩ nhãm krÿ hwÿr ixpa nẽ nhãm
hō hwÿr ixpa. Tã xà kot ka ixpyrà nẽ ã amnhĩ nhÿpêx anhÿr o ri apa
nà? Anẽ.

21Hãmri nhÿm pãnhã hōja hwÿr tẽ. Ra mẽ kot hkôt amnhĩ xunhwÿr
xwÿnhjê hōja hwÿr tẽ nẽ kãm:

—Pa Pahihti. E pa amã amnhĩ jarê ka inhma. Kot paj ma akôt ixpa
ho ixpa no ãm kormã. Koja nhÿrmã inhÿpêêxã tanhmã amnhĩ to nẽ ty
mãn. Pa haxã hãmri nẽ rÿ kormã ma akôt ixpa ho ixpa. Anẽ.

22Hãmri nhÿm kuma nẽ kãm:

—Kwa nà ri ã ajamaxpêr anhÿr kêt nẽ. Ma ixkôt apa ho apa kurê
kumrêx. Kê mẽmoj inhnê ano kupyrr rÿ apê àmnàr kêt nẽ. Kwãr mẽ htÿr
tûm nẽ mẽ pa hkêt mã xwÿnhjaja mãn axwakre kamã amã anhÿpêêxã
jamãr o pa nẽ haxã. Anẽ.

Jejus kot kôk o pinhkrênh jarênh

Makre 4.35-41; Rukre 8.22-25

23Tã nhÿm mẽ ra xarmã nojarêr nhÿm Jejus mẽ hkôt mẽ pa ho mẽ
pa xwÿnhjaja pàr wÿr agjê hãmri nẽ himô raxja ã ma xarmã mō.

24Hãmri nhÿm Jejus ra ôtxwa nẽ ra gôr nẽ nō. Puh nhÿm naja hkoko
ho mō nẽ kôk xapêr tÿx kumrêx. Nhÿm gô kànhmã harĩ nẽ axpên tak
tÿx nẽ. Xatã axpên tak nẽ pàr kre kamã axkapĩ nhÿm ra àr o mō. Hãmri
nhÿm mẽ tee ri omu nẽ kãm ma htÿx kumrêx. Nẽ tee ri amnhĩ nhÿpêx.
No nhÿm Jejusja htÿx gôr nẽ nō. 25Hãmri nhÿm mẽ hwÿr hprôt nẽ
kumra nẽ kãm:

—Kwa Pahшти. Kot puj mẽ jarãhã pahtyk pa. Kwa tokyx kãnhmã nhỹ nẽ ri tanhmã amnhĩ nhĩpêx to wehe. Anẽ.

26Hãmri nhũm hkrãkato nẽ kãnhmã nhỹ nẽ kôk mã kapêr nẽ kãm:

—E kwa hãmri anhĩkrê. Anẽ.

Puh nhũm hpinhkrênh pa nhũm gôja tãm nõr kurê kumrêx. Hãmri nhũm Jejusja hkôt mẽ pa ho mẽ pa xwýnhjê hwýr apkjê nẽ mẽ kãm:

—Hêxta waa nẽ. Kwa pêr âm kormã te mẽ ate amnhĩ kaxyw Tĩrtũm mẽ wa inhmã ajamaxpêr tỳx kêt pyrãk. Hã na ka mẽ amã ma xaj tee ri amnhĩ kukamã ajamaxpêr. Anẽ.

27Hãmri nhũm mẽ amnhĩ jaêr pê ã kot amnhĩ nhĩpêx anhỹrja ã omu nẽ tee ri hamaxpêr nẽ axpên pumunh pê omunh o kuhê. Hãmri nẽ axpên mã:

—Kokỹỹ. Pêr Jejus kêp mẽ panhĩo hkêt. Mẽ pahtõ kot pu we te kot amnhĩ nhĩpêx pyrã nẽ kôk mã pakapêr nhũm hpinhkrênh kurê kumrêx? Nã Jejusja mẽ pakurom àhpumunh tỳx o àhpumunh tỳx. Anẽ.

Jejus kot wa nẽ mẽkarõmnuti janor

Makre 5.1-20; Rukre 8.26-39

28Tã nhũm mẽ ra himô rax pê Garirejja ã rê nẽ pika pê Geras wýr pøj nẽ kamã mõ. Hãmri nhũm ra mẽhõ myja wa hamêxkrut nẽ mẽ kutã tẽ. Ra mẽkarõmnuti kot hamẽ wa hwýr gjêx xwýnhja wa. Mẽkarõmnuti xohtõ kot tanhmã wa ho jakamã nhũm wa oprê htỳx nẽ hihtỳx rax nẽ wa pa. Jakamã nhũm mẽ piitã kãm wa uma nẽ amnhĩ nê mẽ htykjê jagjênh xã hã kên kre kaêx kãm wa kumẽ nhũm wa kamã pa ho pa. Jakamã nhũm wa Jejus kutã tẽ nẽ amnhĩ wýr omu hãmri nẽ amnhĩ nê tanhmã kãm kapêr to. Nom mẽkarõmnuti nhỹ hã àmra kamã kãm kapêr nẽ kãm:

29—Pa Tĩrtũm Kra Jejus? Mo kaxyw na ka mẽ ixwýr tẽ? Kwa tanhmã mẽ ixto hkêt nẽ. Ate tanhmã mẽ ixtomnu hto hã arĩgrota kormã katoore hã. Anẽ.

30Nhũm ra krĩ nhõ xwýnhjê hkrit hagrô ohtõ nẽ ri mẽ hpum pa.

31Nhũm mẽkarõmnuti mẽ omu hãmri nẽ amnhĩ to Jejus wý nẽ kãm:

—Kwa kot ka jahti wa nê mẽ ijapõx japêr nẽ mẽ kot amnhĩ xã htỳx kamã hamak tũm xàta wýr mẽ ixrênh kêt nẽ. Hagrô hkwy mũj wýr mãn mẽ ixrê pa mẽ hpãnhã hwýr mãn hagjê nã? Anẽ.

32Hãmri nhũm mẽ kuma nẽ mẽ kãm:

—Tõe mẽ tãm mẽ hwýr mãn mra. Anẽ.

Hãmri nhũm mẽ kuma nẽ myta wa kêp hapøj nẽ hagrô hwýr mrar kurê kumrêx nẽ hpãnhã kãm gjêx pa. Hãmri nhũm hagrõta mẽkarõmnuti pymaj amýra nẽ ma hprõt nẽ himô hã hixêt prêk ã axpum rôrõk nẽ gõx kãm mrõ nẽ pikaprãr pa. 33Hãmri nhũm hagrô jamãr o ri mẽ pa xwýnhjaja tee ri omu hãmri nẽ ma akupým krĩm hprõt nẽ mẽ

kãm awjarê. Nê myta wa akupÿm tãm hkrã hã harênh o hprôt. 34Hãmri nhũm krĩ nhõ xwÿnhjaja tee ri mẽ hkrít jarênh ma nê ma piitã Jejus wÿr mra nê hkaxpa. Hãmri nê amnhĩ nê kãm:

—E kwa mẽ ma amrar kurê kumrêx. Anê.

Hãmri nhũm mẽ kuma nê awjanã nê ma akupÿm pan rê.

Ĩ kamã htyk xwÿnh jarênh

Makre 2.1-12; Rukre 5.17-26; Juãw 10.37-38

9 1Nhũm Jejus mẽ hkôt mẽ pa ho mẽ pa xwÿnhjaja awjanã nê ma akupÿm pàr wÿr mra nê gjêx pa nê akupÿm xarmã rê nê akupÿm Jejus nhõ krĩ hwÿr mõi. 2Hãmri nê hwÿr pøj nhũm krĩ nhõ xwÿnh kwÿjaja mẽ omu nê ĩ kamã htyk xwÿnhja mÿ nê Jejus wÿr o tẽ. Nõr xà kamã nõr rãhã nhũm mẽ hã hije nê kumÿ nê hwÿr o tẽ. Hãmri nhũm amnhĩ tã mẽ omu. Ra mẽ kot hkrãmnhwÿta kaxyw kãm hamaxpêr tÿx ã mẽ omu nê ĩ kamã htyk xwÿnhhta mã kapêr nê kãm:

—Pa? Kwa tee ri amnhĩ kukamã ajamaxpêr kêt nê. Na pa ra apê tanhmã ate amnhĩ tomnuj to ho ijapêx pa. Kot paj axte kãm ijamaxpêr kêt nê. Anê.

3Hãmri nhũm Tĩrtũm kapêr tũm o mẽ ahkre xwÿnhjaja tee ri ã kot kãm kapêr anhÿrja ã kuma nê axpên mã:

—Tk. Kwa mẽhõ myti mũj kêp Tĩrtũm kêt tã te ri kot amnhĩ nhĩpêx pyrãk ã amnhĩ nhĩpêx. Tĩrtũm pix na kot mẽ nê mẽ kot amnhĩ tomnuj o hapêx xwÿnh. Anê.

4Hãmri nhũm Jejus amnhĩ tã mẽ kuma nê mẽ kãm:

—Kwa mẽ ã ajamaxpêr anhÿr kêt nê. 5Ixte mẽ nê mẽ kot amnhĩ tomnuj o ijapêx par ã amnhĩ jarênh tã mẽ ate ja kôt ixpumunh kêt jakamã na ka mẽ ja kaxyw ixkôt ajamaxpêr kêt nê. Nom kot paj mẽ anoo mã akupÿm ĩ kamã htyk xwÿnhhta o mex ka mẽ apiitã hã ixpumu hãmri nê ixkôt ajamaxpêr kurê kumrêx. Ixpê Tĩrtũm kot mẽ awÿr inhmênh xwÿnhhta na pa. Ixte mẽ anê mẽ ate amnhĩ tomnuj rênh kaxyw na pre mẽ awÿr inhmê pa mẽ awÿr wrÿ. 6Tã mẽ ate ja hã ixpumunh kaxyw kot paj mẽ anoo mã ja ho mex.

Anhÿr o mẽ kãm amnhĩ jarê hãmri nê ĩ kamã htyk xwÿnhhta mã kãm:

—E kãnhmã xa nê anõr xàta py nê ma akupÿm anhõrkwÿ hwÿr tẽ. Anê.

7Puh nhũm kãnhmã ãm kurê kumrêx nê nõr xà py nê mẽ noo mã kato nê ma akupÿm õrkwÿ hwÿr tẽ. 8Hãmri nhũm mẽ piitã no hapõx rũnh nê omunh o kuhê nê kamã no puma htÿx nê. Nê tee ri omu nê axpên mã:

—Kokÿÿ. Kwa aa mẽ pahte ã mẽhõ kot amnhĩ nhĩpêx anhÿr ã omunh kêt tã jarãhã ja pumu.

Anhÿr o Jejus jarê hãmri nê ÿ hã Tĩrtũm mã mex o mex ã harê.

Jejus kot amnhĩ kôt Matêwre hwỳr

Makre 2.13-17; Rukre 5.27-32

9Tã nhũm Jejus mẽ kêp kato nê hkôt mẽ pa xwỳnhjê mẽ nhũm mẽ ma mỗ. Hãmri nê pa ixpê Matêwre ixpumu. Ixte Rôm kãm mẽ ho amnhĩptàr xwỳnh mã krĩ nhỗ xwỳnhjê pê kàxpore hkwỳ jamỳnh xwỳnh na pa pre. Nom mẽ kot ho tewên kryre htã ixte amnhĩm hkwỳ ho ixàrik prãm xàj na pa pre hte mẽ kãm ho rũnh nê harê. Jakamã nhũm mẽ piitã kãm ixkĩnh kêt nê. Tã pa pre mẽ kêp kàxpore jamỳnh xà hã ixkre kamã mẽ kêp hamỳnh o nhỹ nhũm Jejus mẽ hkwỳjaja ijãnh mra nê ixpumu nê amnhĩ kôt ixwỳ nê inhmã:

—Pa? E axàpênhta kaga nê hpãnhã amnê mẽ ixkôt mãn tẽ nê ixkôt mãn ri apa ho apa. Anê.

Hãmri pa kuma nê ixàpênh kaga nê ma hkôt tẽ. Nê hpãnhã hkôt ixpa ho ixpa.

10Hãmri nê mẽmo arĩgro hã amnhĩ nhõrkwỹ hwỳr Jejus nê hkôt mẽ pa ho pa xwỳnhjaja mẽ ixkràmnhwỳ hkwỳjê hwỳ. Nhũm mẽ piitã mra nê inhõrkwỹ hwỳr agjê nê ixkutã apkur o hkrĩ. Nê ixpyrà nê Rôm nhõ pahĩ mã mẽ kêp kàxpore hkwỳ jamỳnh xwỳnh kwỳ haxwỳja ixwỳr mra nê mẽ ixkutã apkur o hkrĩ. 11Hãmri nhũm Parijew nhõ xwỳnhjaja mra nê inhõrkwỹ kapem mẽ ixàpkur ã mẽ ixpumu. Nê tee ri mẽ ixkaêx ã Jejus pumu hãmri nê hkôt mẽ pa ho mẽ pa xwỳnhjê hwỳr agjê nê mẽ ixtã mẽ kãm akir nê mẽ kãm:

—Kwa mẽ kot jajê kutã apkur kêt tã mẽ akrãhtũmja axtem nê mẽ kutã apkur o nhỹ. Kwa nà mẽ kot amnhĩ tomnuj xwỳnh kênã. Jejus kot amnhĩ to mex ronhỹx mẽ kutã apkur kêt nê. Anê.

12Hãmri nhũm Jejus amnhĩ tã ã mẽ kapêr anhỹrja ma nê mẽ kãm:

—Tk. Nà ixte tãm mẽ unhwỳr kaxyw na pa mẽ kutã ixàpkur o nhỹ. Xà na hte tõtôja mẽ mex xwỳnhjê hwỳr mra nê mẽ hkane? Nà ãm mẽ à xwỳnhjê pix wỳr na hte mra nê tanhmã mẽ hkane hto. Ra mẽ ate ja pumunh mex. Tã ja pyrà nê na pa pre mẽ kot amnhĩ to mex xwỳnhjê hwỳr ixwrỹk kêt nê. Mẽ kot amnhĩ tomnuj xwỳnhjê pix wỳr na pa pre wrỳ. Ixte tãm mẽ unhwỳr kaxyw mẽ hwỳr wrỳ nê ã jajê kutã ixàpkur o inhỹr anê. 13Ga mẽ ma mra nê Tĩrtũm kapêr ã kagà htũm kot ja jarênhja kamã harê nê ama. Harênh kot:

Na ka htem inhmã tanhmã amnhĩ jarênh to kaxyw hãmri nê inhmã mẽmoj gõ nê tanhmã ixto mex to. Nom kêr ka mẽ ãm ja pix ho anhỹr kêt nê. Mẽ mãănên mẽ piitã tanhmã mẽ ho mex to ho ri apa. Anê.

—Ã Tĩrtũm kapêr ã kagà htũm kot ja jarênh kot anhỹr. Tã ja pyrà nê na pa pre mẽ kot amnhĩ tomnuj xwỳnhjê hwỳr wrỳ nê mẽ kamã ixukaprĩ ho ixpa. Mẽ kot amnhĩ tomnuj kaga nê hpãnhã tãm amnhĩ nhĩpêx kaxyw

na pa pre ã mẽ hwÿr ixwryk anê. Tã ka mẽ ri atÿx amnhĩ krã hkôt ã ixto akapêr anê. Anê.

Mẽ kot mẽmoj tã Jejus kukjêr

Makre 2.18-20; Rukre 5.33-35

14Tã nhũm Juãw Paxis kôt mẽ pa xwÿnhjaja Jejus wÿr mra nê mẽmoj tã hkukja nê kãm:

—Pa? E ot pa mẽ awÿr mra. Kwa mẽ inhmã mẽmoj jarê. Na pa htem tõiã Parijew nhõ xwÿnhjê pyrã nê ixàpkur kêt kãm Tirtũm mã amnhĩ jarê. Tã nom akôt mẽ pa ho mẽ pa xwÿnhjaja na htem àmnhĩx apkur o pa kamã kãm amnhĩ jarênh o pa. Kwa mo na htem mẽ ixpyrã nê tõiã apkur kêt kamã kãm amnhĩ jarênh kêt nê? Anê.

15Hãmri nhũm mẽ kuma nê mẽ kãm:

—Nà mo kaxyw kot kêt mẽ apkur kêt rãhã kãm amnhĩ jarê? Mẽ hkaprĩre hã. Mẽ kot ixkôt pa ho pa hã amnhĩ pumunh jakamã na htem hkĩnh nê ixkôt pa. Kormã ixte mẽ kamã ixpa kênã kot kêt mẽ apkur kêt rãhã Tirtũm mã tanhmã amnhĩ jarênh to. Xà na htem hkrãmnhwÿ hã hkĩnh kaxyw hã akuprõ nê hkaprĩ nê apkur kêt o kamãt nê mÿr o hkrĩ? Nà na htem anhÿr kêt nê. Na htem hã akuprõ nê hkĩnh nê hã apkur rũnh nê. Ja pyrã nê na hte ixkôt mẽ pa ho mẽ pa xwÿnhjaja ixkôt kormã àmnhĩx hkĩnh nê apkati mẽ apkur o pa. Nom koja mẽ kãm ixkurê xwÿnhjaja nhÿrmã tanhmã ixto hãmri nhũm mẽ hkaprĩ htÿx nê rĩ kormã tõiã apkur kêt rãhã Tirtũm mã amnhĩ jarê. Anê.

Mẽ pahte Jejus kôt amnhĩ nhĩpêx

Makre 2.21-22; Rukre 5.36-39

16Nhũm Jejus mẽ piitã mẽ kãm kapêr nê mẽ kãm:

—Mẽ kot amnhĩ tomnuj xwÿnhjaja ra mẽ kot amnhĩ nhĩpêx tũm o amnhĩ pyrãk jakamã na htem tanhmã mẽ kot amnhĩ nhĩpêx nyw tota kaga. 17Tã ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã na ka htem ixkapêr ma nê ãm ama. Kwa mẽ inhma nê mẽ ate amnhĩ nhĩpêx tũmja gryk ã ixkaga hkêt nê. Anê.

Mẽ hkra htyk nê mẽhõ ni kamrõ wa harênh

Makre 5.21-43; Rukre 8.40-56

18Nhũm pre ã Jejus mẽ kãm kapêr anhÿr o xa. Rõm nhũm mẽõ pahihtija tẽ nê mar o xa. Hãmri nê hamaxpêr o:

—Kokÿÿ. Jejusja ãm hãmri kêp pahi maati kumrêx. Hã na ri ã kapêr mex anê. E pa hwÿr tẽ nê ixkrare ho kuwÿ. Anê.

Hãmri nê hwÿr tẽ nê kutã hkõnkrã ho nhÿ nê kãm:

— Pa akupÿm mẽ ixto mex xwÿnh? E ot pa awÿr tẽ. Kwa ma ixkõt tẽ nẽ inhmã ixkra nire pumu nẽ tanhmã inhmã ho kê akupÿm inhmã htĩr. Na ham ixpê ty pa kaxyw amã ijamaxpêr nẽ man awÿr tẽ. Anẽ.

19Hãmri nhũm kuma nẽ kãm:

— Tôe. Nà kot paj ma akõt tẽ. Anẽ.

Hãmri nẽ ma hkõt tẽ. Mẽ ixpê hkõt ixpa ho ixpa xwÿnhjê mẽ pa mẽ ma hkõt mō. 20-21Nhũm mẽhō ni kamrō rãhã ho pa xwÿnhja ma mẽ ixkõt tẽ. Na pre hte hkamrō hkryre rãhã ho pa hã amgrã pê 12 nẽ tee ri kãm amnhĩ mex prãm o pa. Jakamã Jejus jarẽnh ma nẽ amnhĩ kaxyw kãm hamaxpêr kurê kumrẽx nẽ hamaxpêr o:

— Ma pa kop ma hwÿr tẽ nẽ kêp ê nhĩrê pix kupênh tã akupÿm inhmex japêr. Anẽ.

Hãmri nẽ ma mẽ ohtôjê kaêx kõt hwÿr tẽ. Nẽ katut kõt tẽ nẽ kêp ê nhĩrê kupê. 22Hãmri nhũm Jejus ho hakêx nẽ amnhĩ tã omu nẽ kãm:

— Pa? Kwa tee ri amnhĩ kukamã ajamaxpêr kêt nẽ. Ate amnhĩ kaxyw inhmã ajamaxpêr tÿx jakamã na ka ra akupÿm amex. E mãmri ajamakêtkati nẽ ri apa. Anẽ.

Hãmri nhũm akupÿm mex nẽ hkĩnh tÿx nẽ ma akupÿm tẽ. 23Hãmri pa mẽ ma htyk xwÿnh nhĩpêêxã hkõt mra nẽ òrkwÿ hwÿr agjê nẽ mẽ pikuprõnh xwÿnhjê pumu. Nhũm mẽ ra mẽ hã htu rax nẽ. Nẽ omũj ri kaprĩ xàj pifti kakôr o hkrĩ nẽ omũj ri mur. Kàx pê mur nẽ amnhĩ tak o hkrĩ. 24Hãmri nhũm Jejus mẽ hwÿr axà nẽ mẽ omu. Nẽ ra kot my hkrata htyk ã omunh tã kuri mẽ mÿr o mẽ hkrĩ xwÿnhjê mã kapêr nẽ mẽ kãm ãm òt nẽ nōr ã harê nẽ mẽ kãm:

— Pa? Kwa mon ka mẽ ri akaprĩ nẽ amÿr o akrĩ? E mẽ ma mra. Na wa hkrata wa kêp htyk kêt nẽ. Na ãm gōr nẽ nō. Anẽ.

Hãmri nhũm mẽ kot ra htyk ã omunh mex jakamã kuma nẽ ãm kuma. Nhũm mẽ hkwyja axtem nẽ ri axpên mã hã hpêr o pikênh o hkrĩ. 25Hãmri nhũm kapôt mã mẽ hano nhũm mẽ hapôj nẽ kapôt ã kuhê. Hãmri nhũm Jejusja htyk xwÿnhhta wÿr axà nẽ hpa hã kupy nẽ kãnhmã ãm nhũm akupÿm htĩr nẽ kãnhmã ãm kurê kumrẽx. 26Hãmri nhũm mẽ piitã akupÿm htĩr kãm omu nẽ ma ri krĩ piitã hkõt ri mẽ kãm harẽnh o hprõt.

Wa nohkre xwÿnh wa harẽnh

Matre 20.29-34

27Tã nhũm Jejus kato nẽ ma tẽ. Pa mẽ hkõt ixpa ho ixpa xwÿnhjaja ma hkõt mō. Hãmri nhũm wa myja wa hamêxkrut. Hamẽ wa nohkre xwÿnh wa Jejus jarẽnh ma nẽ hã ajêt nẽ hkõt rôrôk o mō. Nẽ xatã amnhĩ to hwÿr o hkõt rôrôk o mō nẽ kãm:

— Pa Jejus? E Tirtũm kot mẽ ixkaxyw axãm jakamã kwa wa ixpumu nẽ wa ixkamã axukaprĩ kêt wehe. Anẽ.

28Hãmri nhũm wa kuma nẽ wa hkukamã nhỹri ixkrem axà nhũm wa hkôt axà nẽ xa nhũm wa omu nẽ wa kãm:

— Pa? E xàn ka wa ra amnhĩ kaxyw inhmã ajamaxpër tỳx nẽ nà? Anẽ. Hãmri nhũm wa kãm:

— Tỳ. Wa ixte amnhĩ kaxyw amã ijamaxpër tỳx kênã. Anẽ.

29Hãmri nhũm wa kuma nẽ hamẽ wa no hã ihkra xi nẽ wa kãm:

— Tôe. Nà war ate tanhmã amnhĩ kaxyw inhmã ajamaxpër to xà hkôt kot paj war anhĩpêx. Anẽ.

30Hãmri nhũm wa akupỹm rĩt mex kurê kumrêx. Hãmri nẽ akupỹm kato nẽ ma htêm kaxyw nhũm wa kãm:

— E kêr ka wa nhãm mẽ kãm ixte war ato mex ã ijarênh kêt nẽ. ãm kwarĩ ho kwarĩ.

31Anhỹr tã no nhũm wa kuma nẽ ãm kuma nẽ wa ma tẽ nẽ krĩ pu hã mẽ piitã mẽ kãm ri war amnhĩ tã harênh o mra.

Kapër kêt xwỳnh jarênh

32Tã nhũm Jejus ma axte nhỹhỹm mẽ ixto mō. Hãmri nhũm mẽhō my mẽkarōmnuti kot hwỳr àr nẽ tanhmã ho nhũm kapër kêt nẽ pa xwỳnhja nhũm mẽ Jejus wỳr o tẽ. 33Hãmri nhũm omu nẽ nẽ mẽkarōmnuti jano nẽ kãm:

— E kêp akato nẽ ma tẽ. Anẽ.

Hãmri nhũm kuma nẽ kurũm kato nhũm akupỹm kapër mex kurê kumrêx. Hãmri nhũm mẽ kot hã omunh xwỳnhjaja tee ri kot mẽkarōmnuti janor ã omu nẽ kamã no pyma nẽ. Nẽ axpên mã:

— Kokỹỹ. Aa mẽ pahte ã mẽhō kot anhỹr pumunh kêt kumrêx tã na pu mẽ jarãhã ja pumu. Anẽ.

34Nom nhũm mẽ hkwỳ pê Parijew nhō xwỳnhjaja axtem nẽ hã mẽ kãm kapër o:

— Tk. Kot amnhĩ krã hkôt mẽ hanor kêt kênã. Mẽkarōmnuti nhō pahi nhỹ hã kot mẽ nẽ mẽ hanor kênã. Anẽ.

Jejus kêp mẽ pakamã ukapri xwỳnh

Makre 6.34; Rukre 10.2-3; Juãw 4.35

35Tã nhũm Jejusja krĩ ho ohtô nẽ hkôt ri mẽ kãm Tĩrtũm kapër jarênh o pa. Pa mẽ hkôt ixpa. Na pre hte nhỹri krĩ hwỳr pōj nẽ mẽ kot Tĩrtũm kapër o mẽ ahkre xà hã ixkre hwỳr mra nẽ hwỳr agjê nẽ mẽ pikuprōnh xwỳnhjê jahkre. Nẽ mẽ kãm:

— E mẽ inhma. Tĩrtũm kãm mẽ apiitã mẽ ato hkra hprãm. Jakamã kwa mẽ ate amnhĩ tomnuj kaga hprãm xàj hkôt amnhĩ xunhwỳ nẽ kapër kôt amnhĩ nhĩpêx. Jao amnhĩ nhĩpêx nyw o amnhĩ nhĩpêx o ri apa.

Anhÿr o mẽ kãm kapêr. Hãmri nê ahpÿnhã ri tanhmã mẽ à kute xwÿnhjê ho mex. Nhũm mẽ ohtô nê hkôt mar o pa. **36**Hãmri nhũm mẽ omu nê kãm mẽ hkaprĩ nê. Na prem tee ri amnhĩ kukamã hamaxpêr o pa jao ra hkaprĩ nê. Nhũm Jejus ja hã mẽ omu nê hamaxpêr o:

—Hêxta waa nê. Na mẽ mex kêt nê pa. Te mẽ kêp ôwêhti jamãr xwÿnh kêt kot amnhĩ nhĩpêx pyrãk o htÿx ri pa. Mêhõ koja kãm mẽ hkaprĩ nê tanhmã mẽ ho mex to ho pa? Anê.

Hãmri nê mẽ kamã ukaprĩ nê. **37**Hãmri nê mẽ hã mẽ ixpê hkôt ixpa ho ixpa xwÿnhjê mã kapêr nê mẽ inhmã:

—Nà na mẽ kormã ohtô rax nê Tĩrtũm kapêr mar kêt nê. No ãm kormã mẽ ate mẽ kãm kapêr jarênh o apa kaxyw mẽ agrêre. Te pur rax kãm ra harôj kamrêk par nê ãm tã no ãm kaxyw hikênh xwÿnhjaja grêre pyrãk. **38**Jakamã kwa mẽ ho Tĩrtũm wÿ kê axte mẽ kaxyw mẽ akwÿjê rê kê mẽ apyrã nê ma mẽ hkôt ri mẽ kãm kapêr jarênh o pa. Anê.

Jejus kot mẽ ho 12 nê mẽ rênh

Makre 3.13-19; Rukre 6.12-16

10 ¹⁻⁴Tã nhũm Jejusja hkôt mẽ ixpa ho mẽ ixpa xwÿnhjê ho 12 nê mẽ ixrê. Mẽ ixte ma krĩ piitã hwÿr inhmrar nê ÿ hã mẽ ahkre nê tanhmã mẽ à kute xwÿnhjê ho mex o ixpa kaxyw. Nê ÿ hã mẽ nê mẽkarõmnuti janor o ixpa kaxyw nhũm mẽ ixrê. Na pre mẽ ixto 12 nê mẽ ixrê. ã mẽ inhĩxi kot anhÿr.

Pêtre kumrêx na pre kuta. Hixi hõ pê Simãw.

Nê hkôt htõ Andreja ta.

Nê hkôt Jepetew kra Xiakreja ta.

Nê hkôt Xiakre htõ Juãwja ta.

Nê hkôt Firiptija ta.

Nê hkôt Patoromewja ta.

Nê hkôt Tomasja ta.

Nê hkôt pa ixpê Matêwre nhũm pre mẽ hkôt ixta.

Ixpê pahi nhÿ hã kãm mẽ kêp ixujamÿnh xwÿnh tã nhũm pre jajê hkôt ixta.

Nê ixkôt Apew kra Xiakre hõja ta.

Nê hkôt Tatewja ta.

Nê hkôt Simãw Jeroxja ta.

Nê hkôt Jut Kariotja ta.

Kormã kot mẽ kãm Jejus kurê xwÿnhjê nhĩhkram òr mã nhũm Jejus kot amnhĩ kukamã omunh mex tã mẽ hkôt amnhĩ kaxyw kuta.

ã mẽ ixte ÿ hã mẽ ahkre o ixpa kaxyw mẽ ixrênh xwÿnhjê nhĩxi kot anhÿr.


Jejus kot mẽ kêp 12jê mã mẽ àpênh ã karõ

Makre 6.7-13; Rukre 9.1-6, 10.1-12, 10.14; mãânên Atre 13.50-51, 18.6

5Hãmri nhũm Jejus mẽ ixrênh pa nê ma mẽ hwỳr mẽ ixrênh kaxyw tanhmã mẽ inhmã kapêr to nê mẽ inhmã:

—E. Kêr ka mẽ ma mẽ piitã mẽ kãm ri ijarênh o apa. No ãm kormã mẽ kêp Ijaew kêt xwỳnhjê nhõ pika hwỳr apa hkêt nê. Rỳ mẽ kêp Samar nhõ krĩ hwỳr ka mẽ apa hkêt nê. 6Ãm mẽ pahpê Ijaew nhõ krĩ kôt pix mã mãn ri apa. Mẽ kot tee ri amnhĩ kukamã hamaxpêr o pa jakamã te mẽ kêp ôwêhti pikunor nê htỳx ri mex kêt nê pa pyræk. 7Jakamã kêr ka mẽ ma mẽ hwỳr apa nê ã mẽ hkôt ri mẽ kãm akapêr o apa anê nê mẽ kãm: “E kot kaj mẽ ate amnhĩ tomnuj kaga nê Tirtũm kôt amnhĩ xunhwỳ hãmri nhũm amnhĩ tã mẽ apumu nê mẽ ato hkra. Jakamã e kwa mẽ tokyx hkôt amnhĩ xunhwỳ.” Anê. Kêr ka mẽ ã mẽ kãm akapêr anhỳr o ri mẽ hkôt apa. 8Hãmri nê akupỹm mẽ à xwỳnhjê ho mex o ri apa. Nê mẽ htyk xwỳnhjaja ka mẽ akupỹm mẽ ho htĩr o ri apa. Nê mẽ hkànhy rũnh xwỳnhjaja ka mẽ akupỹm mẽ ho mex o ri apa. Nê mẽ kamã mẽkarõmnuti xwỳnhjaja ka mẽ nê mẽ hano. E kêr ka mẽ ã inhỹ hã mẽ ho mex o ri apa anê. Na pa amarĩ tanhmã mẽ ato ka mẽ inhmã amnhĩrer kêt tã ra mẽ ate tanhmã mẽ ho mex to mã tãm. Tã kêr ka mẽ amnhĩ xwar amarĩ ri mẽ ho mex o ri mẽ hkôt apa. No ri mẽ ho mex pãnhã kàxpore hã axàhwỳr kêt nê.

9-10—Nê kêr ka mẽ ma mẽ hwỳr apa kaxyw anojarêt hãmri nê amnhĩ kôt akukrêx rũnh o apa hkêt nê. ãm anhỹ kamã mẽ hwỳr apa. Nê akàxpore ho rax nê ho apa hkêt nê. Rỳ akawà kamã axê hkwy rỳ aparkà hõ xàr nê ho amõr kêt nê. Rỳ kô hõ py nê ri ho apa hkêt nê. ãm anhõ mrykà pix jamỳ nê ma ho apa. Kêr kê mẽ ate Tirtũm kapêr o mẽ ahkre nê mẽ ho mex xwỳnhjaja mãn amnhĩ pãnhã mẽ amã mẽ axàpkur xà gõ ka mẽ kutã axàpkur o ri mẽ hkôt apa.



Matêwre 10.11-12

11—Nê kêr ka mê nhÿri krî hwÿr ajapôj nê kamã mêhõ kot amnhî to mex xwÿnh japêr. Nê ra omu hãmri nê kuri mân pøj nê hkôt apikamênh tâmtã kurûm akupÿm ajapôj nê ma nhãm krî hõ hwÿr mra.

12—Nê kêr ka mê mêhõ nhõrkwy hwÿr pøj nê mê kãm: “E ot pa mê awÿr mô. Nà koja Tirtûmja mê ato mex nê.” Anhÿr o mê kãm akapêr. 13Koja mê ama nê amnhî wÿr awÿ ka mê amnhî tâ mê omu nê mê kãm: “E koja Tirtûm mê ato mex nê ka mê ajamakêtkati nê ri axãmnhix apa.” Anhÿr o mê kãm akapêr. No koja mê amnhî nhõrkwy nê mê akurê nhûm Tirtûm ja hã mê omu nê mê ho mex kêt nê.

14—Nê koja nhÿri krî hõ kamã mê akaga nê akapêr mar kêt japêr. Ka mê tee ri amnhî tâ mê kamã ama hãmri nê tokyx mê kurûm ajapôj nê ma akupÿm apa. Nê akupÿm anojarêt nê mê noo mã akuhê nê amnhî par ã awjagrô kapî nê ma apa. Mê kot Tirtûm kaga hã amnhî pumunh kaxyw ka mê ã mê noo mã amnhî nhîpêx anê. Hãmri nê ma nhÿhÿm hpãnhã apa. 15Koja nhÿrmã Tirtûm mê kot amnhî tomnuj mÿrapê tanhmã mê ho. Na pre ã Sotõ mê Komo nhõ xwÿnhjê nhîpêx anê. Na prem amnhî tomnuj tÿx nê nhûm Tirtûm tee ri ja hã mê omu nê tanhmã hã mê homnuj tÿx to. Tã jar mê kãm ixkapêr mar prãm kêt nê mê kot ixkaga xwÿnhjaja koja ja hã mê omu nê kot Sotõ mê Komo nhõ xwÿnhjê nhîpêx o mê hipêx. No ãm tanhmã mê ho htÿx o mê hakre. Anê.

Nhûm pre Jejus ã mê inhmã mê ixapênh ã karõ anê.

Jejus kot mê kêp 12jê hkukamã mê harênh

Makre 13.9-13; Rukre 12.11-12, mããñên Rukre 21.12-17; Wam Pêtre 3.13-17, 4.12-19, 4.24-25; Rukre 6.40; Juãw 15.20, 15.26-33; Rukre 12.2-9

16Nhûm Jejus arî kot mê ixrênh xwÿnhjê mã kapêr nê mê inhmã:

—E kot paj ma mê hwÿr mê arê. Ma mê ate Tirtûm kapêr o mê ahkre ho ri mê hkôt apa kaxyw. Jakamã kot kaj mê te ôwêhti kot mry xoprê hwÿr amnhî to mrar nhûm kot hkwÿ hpar pyrãk o amnhî nhîpêx. Koja mê hkwÿjaja mê ate mê ahkre ma nhûm ja mê kêp omnuj nê nhûm mê hã tanhmã mê anhîpêx to. Tã nom kêr ka mê tee ri amnhî kukamã ajamaxpêr nê amã mê uma hkêt nê.

17—E kwa mê o kora. Kêr ka mê ma mê hwÿr mra nê amnhî nê mê htãnopxar o ri apa. Koja mê hkwÿjaja mê akapêr ma nê kêp mê aprãm nôkati. Nê mê apynê nê ma mê utar xwÿnhjê hwÿr mê ato mra nê mê kãm tanhmã mê ato hêx to. Hãmri nhûm mê mar xà hkôt mê atak. Tirtûm kapêr o mê ahkre xà hã ixkre kamã koja mê ã mê anhîpêx anê.

18—Nê koja mê ixtã tanhmã mê ato kaxyw mê apynê nê ma mê õ pahi hwÿr mê ato mra nê tanhmã kãm mê ato hêx to. Nom kwãr mê mamrî ã mê anhîpêx anê. Koja mê ato anê ka mê kutã akrî nê mê kãm Tirtûm kapêr jarê. Ijaewjê mã nê mê kêp Ijaew kêt xwÿnhjê mã.

19—Nê koja mẽ ma mẽ õ pahi hwÿr mẽ ato mra nê ã mẽ anhîpêx anê nom kêr ka mẽ tee ri tanhmã mẽ kãm amnhî jarênh to hkukamã ajamxpêr kêt nê. Koja Tîrtûm Karõ tãm tanhmã mẽ akrã hto ka mẽ ô ri mẽ kãm akapêr mex nê. 20Nê kot kaj mẽ amnhî krã hkôt ri mẽ kãm akapêr kêt nê. Tîrtûm Karõ nhÿ hã kot kaj mẽ ô ri mẽ kãm tanhmã axujarênh to.

21-22—Nê koja mẽ hkwÿjaja ixtã mẽ akamã gryk nê. Nê mẽ atã àmnênh pix o pa. Nê mẽ kot mẽ apar kaxyw mẽ akwÿjê hã amÿnê. Koja mẽ anhîpêxã hkwÿjaja mẽ apê mẽ hkra hã amÿnê. Nhùm mẽ akra hkwÿjaja mẽ apê mẽ hipêxã hã amÿnê. Nhùm mẽ atõ hkwÿjaja mẽ apê mẽ htõ hã amÿnê. Nhùm mẽ akatorxàjaja mẽ atã amÿnê. Hãmri nhùm mẽ apa. No ãm kwãr mẽ mãmri ã mẽ anhîpêx anê. ã mẽ kot mẽ anhîpêx anhÿr tã kêr ka mẽ tee ri amnhî kukamã ajamxpêr pê ixkaga hkêt nê. Mẽ ãm amnhî to htÿx rãhã ty. Hãmri nê akaxwÿnhja ma Tîrtûm mẽ wa inhõ krî hwÿr axàpir kurê kumrêx nê wa ixkuri akupÿm amex nê atîr tûm nê apa ho apa.

23—Nê koja mẽ nhÿri krî hkwÿ kamã ixtã tanhmã mẽ anhîpêx hto ka mẽ mãmri mẽ kurûm ajapôj nê ma nhÿhÿm krî hõ hwÿr apa. Nê hpãnhã kamã mẽ kãm ri ijarênh o mẽ hkôt apa. Kot kaj mẽ kormã Ijaewjê nhõ krî piitã hwÿr apa hkêt ri pa akupÿn mẽ awÿr wrÿ. Kwa kêr ka mẽ ixkapêr mã ajamxpêr tÿx rãhã ri apa.

24-25—Mẽ ate ixkôt apa ho apa xwÿnh na ka mẽ. No pa na ixpê mẽ ajahkre xwÿnh. Jakamã koja mẽ kot tanhmã inhîpêx to ho mãânên mẽ anhîpêx. Koja mẽ nhÿrmã tanhmã inhîpêx to nê mã ixkôt mẽ ato anê nê. Mẽ pahte amnhî nhîpêxja kot axpên pyrãk. Jakamã koja mẽ ixpê Satanasti hã ijarê nê mãânên tanhmã mẽ ajarênh punuj to ho pa. Mẽ pahte amnhî nhîpêxja kot axpên pyrãk jakamã koja mẽ panhîpêx o axpên pyrãk.

26—Tã nom kêr ka mẽ tee ri amnhî kukamã ajamxpêr pê amã mẽ uma ho apa hkêt nê. Na htem piitã axpên pê tanhmã hamxpêr punuj to ho hpimxur o pa nom tee ri ho pimxur prãm kaprÿ. Koja nhÿrmã mẽ hamxpêr piitã amnhîrît pa. Nê mẽmoj piitã ra hpimxur mex tã koja nhÿrmã amnhîrît par kumrêx.

27—Nê koja nhÿrmã mẽ piitã ixte amnhî nhîpêx kôt ixpumu. Na pa ra mẽ hkàx ã mẽ amã ixujarênh rax nê. Tã kêr ka mẽ ma mẽ piitã mẽ kãm harênh o ri apa. Nê ra ixte mẽ hkàx ã ahte ixte mẽ amã mẽmoj jarênhhta ka mẽ hpãnhã ma mẽ kãm harênh o ri apa kê mẽ apyrã nê harênh ma.

28—E kêr ka mẽ amã mẽ kot tanhmã mẽ ato mã xwÿnhjê puma ho apa hkêt nê. Mẽ kot mẽ apar mã tã koja mẽ ãm mẽ akrãhkã pix pa nom tanhmã mẽ akaxwÿnh to hkêt nê. Tîrtûmja tapxipix na hte mẽ hkrãhkã nê mẽ hkaxwÿnh mẽ ho pimràatã kot amnhî xà htÿx kamã hamak tûm

xàta wỳr mẽ rēnh pumunh. Tã kot hwỳr mẽ arēnh pymaj kēr ka mẽ amã kapēr kwỳm ri tanhmã amnhĩ nhĩpêx to puma ho ri apa.

29-31—Ně Tĩrtũm kot mẽ pahto hapêx par pumunh tã mããnēn kot mẽ pajamãr mex. Mãn ka htem kuwēnhre pumu. Na hte Tĩrtũm kuwēnhre jamãr mex o pa. Mẽ piitã mẽ kot ãm omunh tã nom nhũm Tĩrtũm mẽ kurom hamãr mex pē mẽ htãnopxar rãhã ho pa. Tã kãm mẽ pajapê htỳx o kot kuwēnhre jakrenh jakamã kwa mẽ tee ri amnhĩ kukamã ajamaxpēr o ri akaprĩ nē apa hkêt nē. Koja Tĩrtũm mẽ pahtãnopxar rãhã ho pa. Kot mẽ panhĩ piitã omunh par. Nē ahpỳnhã tanhmã mẽ pahkrã hkĩ kute hkôt mẽ pahpumunh par. Tã kot mẽ pahtãnopxar rãhã jakamã mo kaxyw kot kaj kêt mẽ ri amã mẽ uma ho apa? Anē.

Mẽ pahte Jejus kôt amnhĩ xunhwỳr rỳ mẽ pahte hkaga jarēnh

32Nhũm Jejus arĩ kot mẽ hwỳr mẽ ixrēnh xwỳnhjê mã kapēr nē mẽ inhmã:

—E kwa mẽ mãmrĩ akwỳjê mã mẽ apê ixkwỳ hã amnhĩ jarēnh o ri apa nē amã mẽ uma xàj tee ri amnhĩ nhĩpêx kêt nē. Kot kaj mẽ kãm ra ate ixkôt amnhĩ xunhwỳr ã amnhĩ jarē. Pa ja hã mẽ apumu hãmri nē mẽ apyrã nē kaxkwa kamã Inhĩpêêxã mã ra ate ixkôt amnhĩ xunhwỳr ã mẽ ajarē. 33Nom kot kaj mẽ kot ixtã tanhmã mẽ ato pymaj apê ixkwỳ hã amnhĩ jarēnh kêt nē. Pa ja hã mẽ apumu hãmri nē nhỹrmã amnhĩ xwar Inhĩpêêxã mã mẽ apê ixkwỳ hkêt ã mẽ ajarē. Jakamã kwa mẽ mãmrĩ mẽ kãm apê ixkwỳ hã amnhĩ jarēnh o ri mẽ hkôt apa kê mẽ ama nē amnhĩ kaxyw inhmã hamaxpēr japêr. Anē.

Mẽ kãm Jejus ã hkwỳjê kurê xwỳnhjaja

Makre 8.34-35; Rukre 9.24, mããnēn Rukre 12.51-53, 14.26-27; Apokarip 12.11

34Nhũm Jejus arĩ kot mẽ hwỳr mẽ ixrēnh xwỳnhjê mã kapēr nē mẽ inhmã:

—Ra mẽ awỳr ixwrỳk tã koja mẽ piitã ixkukwak ri hamakêtkati nē àmnhĩx ri pa hkêt nē. Kormã. Koja mẽ akwỳjaja ixkapēr ma nē mẽ apyrã nē amnhĩ kaxyw ixkôt hamaxpēr. Nhũm mẽ akwỳjaja axtem nē kuma nē ãm kuma. Hãmri nē ixtã tanhmã mẽ atomnuj to ho pa ka mẽ amnhĩ xà htỳx kamã ajamak o ri apa.

35—Koja mẽ akrajaja ixtã mẽ apê mẽ hipêêxã nē mẽ katorxã kutã amnhĩ xunhwỳ. Nhũm mẽ wỳjjaja ixtã mẽ umregêxjê kutã amnhĩ xunhwỳ.

36—Koja mẽ ã mẽ akwỳjaja ixtã mẽ akutã amnhĩ xunhwỳr anē. Mẽ anhōrkwỳ kamã mẽ akukwak ri pa htã ixtã mẽ akutã amnhĩ xunhwỳ.

37—Ně mẽ amã mẽ anhĩpêêxã nē mẽ akatorxã japêê. Nē mẽ amã mẽ akrajê japêê. Tã nom kot kaj mẽ gryk ã ixkôt amnhĩ nhĩpêx mex o ri apa

hkêt hāmri nê apê ixkwỳ mã tām kêt. **38**Rỳ nhũm mẽ nhỹrmã ixtã mẽ apar kaxyw ka mẽ tee ri amnhĩ kukamã ajamaxpêr nê mẽ kot mẽ apar pymaj ixkaga hã kot kaj apê ixkwỳ mã tām kêt nê. **39**Koja mẽ nhỹrmã ixpĩ pa mẽ anê ty. Tã mẽ ate ixkôt amnhĩ nhĩpêx o apa xwỳnhjaja. Koja mẽ ixpyrà nê ixtã mẽ apar mã tã kwa kêr ka mẽ amã atyk pymaj ixkaga hkêt nê. Kwãr mẽ māmri tanhmã ixtã mẽ ato. Kot kaj mẽ nhỹrmã Tĩrtũm mẽ wa ixri axte amnhĩ xà kamã ajamak kêt nê atĩr tũm nê amex rãhã apa ho apa. Nom kot kaj mẽ jar amã amex nê apa hprãm xaj ixkaga hāmri nê nhỹrmã wa ixri atĩr tũm nê apa ho apa hkêt nê. Anê.

Mẽ kot Jejus krajê ho mex xwỳnhjê jarênh

Matre 25.34-40; Makre 9.41; Juãw 13.20

40Nhũm Jejus arĩ kot mẽ hwỳr mẽ ixrênh xwỳnhjê mã kapêr nê mẽ inhmã:

—E koja mẽhõ nhỹri mẽ apumu nê mẽ apê ixkra hã tanhmã mẽ ato mex to nê te pa kot ixto mex pyræk. Nê kot kaj mẽ tanhmã pa ixto mex to nê te Tĩrtũm o mex pyræk.

41—Nê kot ka mẽ nhỹri Tĩrtũm nhỹ hã mẽ kãm kapêr jarênh xwỳnhjê hõ tanhmã ho mex to nhũm Tĩrtũm hã apumu nê nhỹrmã hã ato mex nê. Rỳ ka mẽ mẽhõ kot Tĩrtũm kôt amnhĩ nhĩpêx xwỳnhjê hõ pumu nê tanhmã ho mex to. Nhũm Tĩrtũm hã apumu nê mããnên hã ato mex nê. Te ate mẽhõ ho mexta pyrà nê mããnên ato mex nê. **42**Nhũm mẽhõ nhỹri mẽ kot ixkôt kormã amnhĩ xãm nyw nê kormã àhpumunh tohtuj anhỹr xwỳnhjê hõ pumu. Nê kãm kôr ã omu nê hamaxpêr o: “Kwa Jejus kôt ri pa xwỳnh mũj kãm kôr. Kormã kot Jejus kôt amnhĩ xãm tỳx kêt tã kêp hkwỳy. E kot paj kãm gô hkwỳ kê ho ixkô.” Anê hāmri nê kãm hkwỳ nhũm ho ixkô. Hāmri nhũm Tĩrtũm hã omu nhũm kot kãm gô pix nhõr nhũm kot ho hkôm tã nhũm ja hã ho mex rax nê. Anê.

Nhũm pre ã Jejus kot mẽ hwỳr mẽ ixrênh xwỳnhjê mã kapêr ry rax anê. Mẽ ixpê 12jê mã ã kapêr anê.

Juãw Paxis kot Jejus jarênh mar

Rukre 7.18-23, 7.5, mããnên Rukre 4.16-21

11 **1**Tã nhũm Jejus ra kot mẽ hwỳr mẽ ixrênh xwỳnhjê mã kapêr pa hāmri nê kato nê ma krĩ pu hã krĩ hkwỳjê hkôt ri pa. Nê mẽ kãm Tĩrtũm kapêr jarênh o ri mẽ hkôt pa.

2Nhũm Juãw Paxisja arĩ kêp prês nê mẽ hagiênh xà kamã hkrĩ. Nhũm pre hte hkôt mẽ pa ho mẽ pa xwỳnhjaja hwỳr mra nê kãm Jejus kot tanhmã amnhĩ nhĩpêx to ho pa hã harê. Hāmri nhũm harênh ma nê tee ri hkukamã hamaxpêr. Hāmri nê hkôt mẽ pa xwỳnh wa ho axkrut nê wa kuta **3**nê hwỳr wa kumê nê wa kãm:

—Kwa wa ma Jejus wÿr tẽ nẽ hkukja nẽ kãm: “Xà ka na pre Tirtũm mẽ ixwÿr amẽ nà? Xà kormã axtem mẽhõ na pa mẽ ri hamãr o ri ixpa?” Anhÿr o hkukja hãmri nẽ tanhmã kot amnhĩ jarẽnh to hã ama nẽ man akupÿn ixwÿr tẽ nẽ inhmã harẽ. Anẽ.

4Hãmri nhũm wa kuma nẽ ma hwÿr tẽ. Nhũm Jejus kormã tanhmã mẽ à kute xwÿnhjê ho mex o xa. Mẽ nohkre xwÿnhjaja nhũm akupÿm mẽ ho mex. Nẽ mẽkarõmnuti kot mẽ hwÿr gjêx xwÿnhjaja nhũm mẽ nẽ mẽ hanor o âm rãhã nhũm Juãw kõt wa pa xwÿnhhta wa hwÿr tẽn pøj. Nẽ kormã mẽ hã omunh o wa xa. Hãmri nẽ kãm Juãw Paxis kapër jarẽ nhũm wa kuma nẽ wa kãm:

—Tÿ. Nà âm hãmri na ja hã ijarẽ. Ixpê mẽ ate ixkamã ajamak o apa xwÿnhhta na pa. Na ka wa kam ã ixte amnhĩ nhĩpêx anhÿr ã ixpumu. Jakamã wa ma akupÿm tẽ nẽ aprĩ hã kãm ijarẽ. 5Na pa hte akupÿm mẽ nohkre xwÿnhjê ho mex. Nẽ mẽ hkãnhÿ xwÿnhjaja pa akupÿm mẽ hkã ho mex. Nẽ mẽ hyk o mẽ pa xwÿnhjaja pa akupÿm mẽ hte ho mex. Nẽ mẽ htyk xwÿnhjaja pa akupÿm mẽ ho mẽ htĩr. Nẽ mẽ kêp amrakati nẽ ri mẽ pa xwÿnhjaja pa mẽ kãm mẽmoj mex jarẽnh o ri mẽ hkõt ixpa. ã na pa hte mẽ hipêx anhÿr o ri ixpa. Jakamã e wa ma akupÿm Juãw wÿr tẽ nẽ ã kãm ijarẽnh anẽ 6Kê ijarẽnh ma nẽ ixkõt hamaxpër tÿx nẽ tee ri ixkukamã hamaxpër kêt nẽ. Koja ã amnhĩ nhĩpêx anẽ nẽ hamakêtcati nẽ ri pa. E wa tokyx ma akupÿm tẽ nẽ kãm ã ijarẽnh anẽ. Anẽ.

Jejus kot tanhmã Juãw Paxis jarẽnh to

Rukre 7.24-35

7-9Nhũm pre ã Jejus Juãw Paxis kõt wa pa ho wa pa xwÿnhja wa kãm amnhĩ jarẽnh anẽ nẽ akupÿm hwÿr wa kumẽ nhũm wa ma akupÿm hwÿr tẽ. Hãmri nhũm Jejus mẽ kot mar o kuhê xwÿnhjê mã tanhmã Juãw Paxisja jarẽnh to nẽ mẽ kãm:

—Na ka pre htem kapõt ã Juãw Paxis mar kaxyw ma hwÿr mra. Nom ê mex ã omunh kaxyw rÿ hpijaãm kãm tanhmã kapër to hã mar kaxyw na ka prem hwÿr amrar kêt nẽ. Tirtũm nhÿ hã kapër o pa jakamã na ka prem ate mar kaxyw ma hwÿr mra. Tirtũm nhÿ hã ixkukamã ijarẽnh o pa xwÿnh na. Ixpê Tirtũm kot mẽ akaxyw ixãm xwÿnh ã na hte ijarẽnh o pa. Nẽ hprĩ hã tanhmã mẽ amã ijarẽnh to. Jakamã kapërja mex o kot wam Tirtũm nhÿ hã kapër jarẽnh xwÿnhjê kapër piitã hakrenh par. 10Tirtũm kapër ã kagà htũm kot Juãw kukamã tanhmã harẽnh to nẽ harẽnh kot:

Kot paj Ixkra hkukamã ma mẽ hwÿr harẽnh xwÿnhja mẽ nhũm ma ri kutêp mẽ kãm harẽnh o pa. Mẽ kot mar nẽ kutêp tãm amnhĩ nhĩpêx o pa kaxyw.

—Anhÿr o Tirtũm Juãw Paxis kukamã harẽ nhũm prem hã kagà. Tã nhũm ixkukamã mẽ awÿr kumẽ. 11 Juãw Paxisja na mex kumrêx. Na pre

hprĩ hã ixkukamã tanhmã ijarênh to ho pa. Tã nom ixkôt mẽ pa ho mẽ pa xwỳnhjê hkĩnhã na pre ixkôt pa ho pa hkêt nê. Jakamã ixkôt mẽ pa ho mẽ pa xwỳnhjaja kot ixkôt hprĩ hã ixkapêr mar o pa jakamã na mẽ mex o mẽ kot Juãw Paxisja jakrenh. Anê.

12-13—Na pre finat Mojes kumrêx mẽ kãm Tĩrtũm kapêr kwỳ hã kagà. Tã nhũm hpãnhã Tĩrtũm nhỹ hã kapêr jarênh xwỳnhjaja Mojes mỳr pê hkwỳ hã kagà. Nhũm prem kamã harê nê kuma nê hkôt amnhĩ nhĩpêx o pa. Hãmri nhũm Juãw Paxisja mẽ mỳrpê kato nê tãm Tĩrtũm kapêr o mẽ ahkre ho ri pa. Tã pa hpãnhã ho mẽ ajahkre ho ri mẽ akôt ixpa nhũm mẽ ohtô nê inhma nê ixkôt amnhĩ xunhwỳ nê kãm ixkapêr kôt pix mã amnhĩ nhĩpêx o ri pa hprãm nê.

14—Amnepêm na pre Tĩrtũm nhỹ hã kapêr jarênh xwỳnhjaja mēhõja kukamã tanhmã harênh to ho pa. Nê mẽ kãm harênh o: “Koja nhỹrmã mēhõ te Eris kot amnhĩ nhĩpêx pyrak o amnhĩ nhĩpêx nê mẽ awỳr mō. Nê mẽ amã Tĩrtũm kot mẽ awỳr mēnh mã xwỳnhja jarênh o pa ka mẽ ama.” Anhỹr o mẽ kãm mēhõ jarê. Tã kot paj mẽ amã kot hkukamã harênh xwỳnhta nhĩxi jarê ka mẽ inhma. Nã Juãw Paxisja kukamã na prem ã harênh anhỹr o pa.

15—E kot pa mẽ amã mẽ piitã htỳx ri tanhmã mẽ hamaxpêr to ho mẽ pa hã mẽ amã mẽ harê ka mẽ harênh ma. 16Te mēhprĩre kot amnhĩ nhĩpêx pyrak o na htem amnhĩ nhĩpêx. Mēhprĩrejaja na htem mẽ òrkwỳ kapem mẽmoj to amnhĩkati nê tee ri hkwỳjê kot amnhĩ nhĩpêx pumu nê mẽ kãm:

17 Kwa na pa mẽ amã gre htã ka mẽ ixkutã anhõkrepõx kêt nê. Pa mẽ ja hã mẽ apumu nê hpãnhã mẽ amã mẽ htyk jarê htã ka mẽ akaprĩ nê amỳr kêt nê. Kwa mẽ ri ã amnhĩ nhĩpêx anhỹr kêt nê. Anê.

—Mēhprĩjaja na htem ã axpên mã kapêr anê. Tã te mẽ ate mẽ urak. Tĩrtũm kot mẽ awỳr ÿ hã kapêr jarênh xwỳnhjê rēnh tã ka mẽ te mēhprĩre kot amnhĩ nhĩpêx pyrã nê mẽ ama nê ãm mẽ ama nê mẽ hkôt amnhĩ nhĩpêx kêt nê.

18—Juãw Paxis na pre mẽ awỳr mō nê ixkĩnhã apkur mex o ri pa hkêt nê. Nê ixkĩnh ã wĩhti ho hkõm kêt nê. Ka mẽ ja hã omu nê hkaga nê atỳx ri Satanasti nhỹ hã tanhmã kot amnhĩ nhĩpêx to hã hkamnhĩx. Hãmri nê mēhprĩre kot amnhĩ nhĩpêxta pyrã nê hkôt amnhĩ nhĩpêx kêt nê.

19Tã hãmri pa hpãnhã mẽ awỳr mō nê Juãw Paxis rom apkati mẽ ixàpkur mex o ri mẽ akôt ixpa. Nê kurom mẽ akutã wĩhti hkwỳ ho ixkõm o ri ixpa. Tã ka mẽ ja hã ixpumu nê atỳx ri ixàpkur rũnh nê ixpipãnh o ri ixpa hã ixkamnhĩx nê ã axpên mã ixto akapêr anê. Nê mẽ kot amnhĩ tomnuj xwỳnhjê hkôt ri ixpa xwỳnh ã axpên mã ijarê. ã na ka htem axpên mã ijarênh anê. Jao te mẽ ate Juãw Paxis nhĩpêx pyrã nê ixkaga

nê ixkôt amnhĩ nhĩpêx kêt nê. Na hte ã htỳx ri tanhmã mẽ hamaxpêr to ho mẽ pa xwỳnhjaja amnhĩ nhĩpêx anê. No tãm ri mẽ hamaxpêr xwỳnhjaja na htem ahpỳnhã wa ixte amnhĩ nhĩpêx ã wa ixpumu nê axpên mã wa ijarênh o: “Nà ahpỳnhã wa kot amnhĩ nhĩpêx tã no ãm hamê Tĩrtũm nhỹ hã kapêr mex o pa. E pu mẽ wa uràk nê Tĩrtũm kôt amnhĩ xunhwỳ.” Anhỹr o axpên mã wa ijarê. Anê.

Mê kot Tĩrtũm kôt mẽ hamaxpêr kêt xwỳnhjê jarênh

Rukre 10.13-15

20Na pre hte Jejus krĩ piitã hkôt pa nê krĩ nhõ xwỳnhjê mã kapêr nê mẽ kot amnhĩ tomnuj ã mẽ kãm kapêr. Korajĩ mẽ Pese nhõ xwỳnhjê kumrêx mã kapêr nê mẽ kãm:

21-22—E mẽ inhma. Amnepêm krĩ pê Sitõ mẽ Xir wa kamã mẽ pa xwỳnhjaja na prem tanhmã amnhĩ tomnuj tỳx to ho pa nhũm Tĩrtũm tee ri ja hã mẽ omu nê mẽ kot amnhĩ tomnujta ã tanhmã mẽ ho. Tã kwa mẽ o kora Korajĩ mẽ Pesêj nhõ xwỳnhjaja. Ra ixte mẽ amã aa mẽ ate mẽmoj pumunh kêt kwỳ ho anhỹr rax tã ka mẽ omu nê ãm omu nê amnhĩ tomnuj kaga hkêt nê. Arĩ tanhmã amnhĩ tomnuj to ho ri apa. Mỳrapê kot kaj mẽ amex kêt nê. Kop apu Sitõ rỳ Xir kamã mãn ixte mẽ kãm aa mẽ kot mẽmoj pumunh kêt kwỳ ho anhỹr o ri ixpa ronhỹx mẽ omu nê mẽ arom amnhĩ kaxyw ixkôt hamaxpêr tỳx kurê kumrêx. Nê tee ri kot tanhmã kot amnhĩ tomnuj to hã amnhĩ pumu nê hkaprĩ nê hkaga hpa. No mẽ kajaja na pa hte tee ri mẽ amã aa mẽ ate mẽmoj punuj kêt kwỳ ho anhỹr o ixpa kaprỳ. Ka mẽ ja hã ixpumu nê ãm ixpumu nê amnhĩ tomnuj kaga hkêt nê. Jakamã koja nhỹrmã Tĩrtũm tanhmã mẽ atomnuj tỳx to. Nê tanhmã Sitõ mẽ Xir wa kamã mẽ pa xwỳnhjê jarênh to nhũm mẽ kot amnhĩ tomnuj mỳrapê amnhĩ xà htỳx kamã hamak rãhã ho pa. No mẽ kajaja mẽ ate amnhĩ tomnuj tỳx o mẽ hakrenh jakamã koja Tĩrtũm mẽ hkĩnhã mẽ atomnuj tỳx kumrêx. Ka mẽ amnhĩ xà htỳx kamã ajamak rãhã ho ri apa kãm ga. Anê.

23-24Nhũm pre ã Jejus mẽ kãm kapêr anê. Nê hpãnhã Kapanaũ nhõ xwỳnhjê mã kapêr nê mẽ kãm:

—No mẽ apê Kapanaũ nhõ xwỳnhjaja. Kot kaj mẽ ajaxwỳja mẽ uràk nê amex kêt nê. Ra ixte mẽ amã aa mẽ ate mẽmoj pumunh kêt kwỳ ho anhỹr rax nhũm mẽ ate hã ixpumunh tã amnhĩ tomnuj kaga hkêt tã Tĩrtũm mẽ wa inhõ krĩ hwỳr akrà. No ãm hwỳr akrà kaprỳ. Kot kaj mẽ atõ hwỳr axàpir kêt nê. Kop apu Sotõ nhõ xwỳnhjaja mãn kot ã ixte amnhĩ nhĩpêx anhỹr ã ixpumunh ronhỹx mẽ ra kot amnhĩ tomnuj kaga nê ixkôt amnhĩ xunhwỳr kurê kumrêx. No mẽ kajaja na ka mẽ ã amnhĩ nhĩpêx anhỹr kêt nê. Jakamã kot kaj mẽ nhỹrmã ma kuwy maatita wỳr ajapêx pa kãm ga. Anê.

Jejus kot ô Papaj mã amnhĩ jarênh*Rukre 10.21-22*

25-26 Tã nhũm Jejus Tĩrtũm mã amnhĩ jarê nê kãm:

— Pa Papaj? Nà apê mẽ inhõ Pahi Maati na ka. Pikap ri mẽ pa xwỳnhjaja nê kaxkwa kamã mẽ pa xwỳnhjaja apê mẽ ixpiitã mẽ inhõ Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot amnhĩ to jarkrar xwỳnhjê mã axàhpumunh tỳx o amnhĩrĩt kêt nê. ãm mẽ àhpumunh kêt ã mẽ kot amnhĩ jarênh xwỳnhjê pix mã na ka hte axàhpumunh tỳx o amnhĩrĩt nhũm mẽ tapxipixjaja ja hã apumu. Nà ãm hãmri. ãm hãmri na ka hte amã hprãm xà hkôt ã mẽ piitã mẽ hipêx anhỹr o ri apa Papaj. Jakamã mẽ kot amnhĩ to hkryre xwỳnh pixjaja na htem hprĩ hã ate amnhĩ nhĩpêx kôt apumunh o pa. Anê.

Nhũm pre ã Jejus Tĩrtũm mã amnhĩ jarênh anê. 27 Hãmri nê hpãnhã mẽ kot mar o kuhê xwỳnhjê mã kapêr nê mẽ kãm:

— Nà na pre ra Inhĩpêxàja inhĩkra kamã mẽmoj piitã hagjênh pa. Ixte kãm ho amnhĩptàr o ixpa kaxyw. Jakamã tapxipix na kot ixpê Kra hã ixpumunh par. No jar pika ja kamã mẽ pa xwỳnhjaja na mẽ kot ja hã ixpumunh kêt. Nê papxipix na ixte Inhĩpêxà kot tanhmã amnhĩ nhĩpêx to hã omunh par. Jakamã na pa hte ã amnhĩ nhĩpêx o ri ixpa anê nê inhmã hprãm xà hkôt mẽ hkwyjê mã ho amnhĩrĩt o ri ixpa. Jakamã nhũm mẽ ixpyrà nê Inhĩpêxà kot tanhmã amnhĩ nhĩpêx to ho pa hkôt omu.

28-30— Nê tee ri amnhĩ kukamã mẽ ajamaxpêr o ri apa xwỳnhjaja te mẽ ate mẽmoj pytĩ rax tur nê ahte ho apa pyræk. Kwa mẽ ixkôt amnhĩ xunhwỳ nê ixte amnhĩ nhĩpêx ã ixpumu. Ixte mẽ akamã ixukapri xwỳnh na pa. Na pa hte mẽ akutã inhnojarêt rãhã ho ixpa. Jakamã kot kaj mẽ ixkôt amnhĩ xunhwỳ pa te ixte mẽ anê mẽmoj pytĩ ho ixwryk pyræk o mẽ anhĩpêx nê tãm mẽ axunhwỳ ka mẽ tãm ajamaxpêr nê tãm amnhĩ nhĩpêx o ri apa. Mo kaxyw koja ixkôt mẽ kot amnhĩ nhĩpêx o pa xwỳnhjaja tee ri amnhĩ kukamã hamaxpêr o pa? Nà na htem ixkamnàr rom hamakêtkati nê àmnhĩx ri pa ho pa. Anê.

Jejus kêp arĩgromnu hpãm*Makre 2.23-28; Rukre 6.1-5*

12 ¹Tã nhũm Ijaew nhõ arĩgromnu pê sapja kato. Hãmri nhũm Jejus mẽ hkôt ri mẽ ixpa ho mẽ ixpa xwỳnhjê mẽ pa mẽ ma mẽ hpur kôt ri nhỹhỹm ri ixpa. Hãmri nê ra mẽ inhmã prãm nê mẽmo hy te kot harøj pyræk xwỳnhja kwỳ rê nê kugrà nê ma Jejus kôt hkanhar o mō. Mẽ ixpê Ijaew na pa htem axpên pur kãm ã amnhĩ nhĩpêx anhỹr o

ixpa. 2Hāmri nhũm mẽ ixkwỳ pê Parijew nhõ xwỳnhjaja kām mẽmoj tă Jejus o kapêr prām jakamã ã mẽ ixte amnhĩ nhĩpêx anhỹr ã mẽ ixpumu nẽ mẽ ixtã Jejus kukjêr kurê kumrêx nẽ kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ hpur kãm mẽmoj nhĩkênh nê mẽ pahkurê htã nhũm ri akôt mẽ pa ho mẽ pa xwỳnhjaja axtem nẽ ã amnhĩ nhĩpêx anhỹr o ri akôt pa. Mẽmo hyta rê nẽ akôt hkanhar o pa. Kwa mẽ kãm anê kê mẽ ã amnhĩ nhĩpêx anhỹr kêt nẽ. Na htem arĩgromnu hã mẽmoj tă àpênh kêt kênã. Anẽ.

3-4Hāmri nhũm mẽ kuma nẽ hprĩ hã mẽ kãm Tĩrtũm kapêr jarê nẽ mẽ kãm:

—Tk. Xàn ka htem Tĩrtũm kapêr ã kagà htũm kot pahi Tawi kot tanhmã amnhĩ nhĩpêx tota kamã harênh nẽ mar kêt nẽ? Na pre hkôt ri mẽ pa xwỳnhjê mẽ nhũm mẽ prām xàj Tĩrtũm mã amnhĩ jarênh xà hã ixkre hwỳr agjê. Hāmri nhũm mẽ õ patre maatija mẽ kãm prām tỳx ã mẽ omu nẽ kãm mẽ hkaprĩ nẽ mẽ kãm mẽmoj gõ. Mẽ kot Tĩrtũm noo mã pãwti jaxwỳr xwỳnhhta gõ nhũm mẽ kuku. Tĩrtũm kapêr ã kagà htũm kot ja nê mẽ hkurê htã nhũm mẽ kãm prām tỳx ã mẽ omu nẽ mẽ kamã ukaprĩ xàj mẽ kãm kugõ. ãm mẽ õ patre pix kot ja hkur kaxyw tă nhũm mẽ kãm kugõ nhũm mẽ kuku. Tã nom nhũm Tĩrtũm ja hã mẽ omu nhũm ja kêp omnuj kêt nẽ. Kot mẽ kamã ukaprĩ nẽ mẽ kãm õr ã omu nhũm ja kãm mex nẽ.

5—Mẽ panhõ arĩgromnu htã na hte patrejaja arĩ hã Tĩrtũm mã amnhĩ jarênh xà hã ixkre kamã àpênh o pa. Tĩrtũm kapêr ã kagà htũm kôt na htem arĩgromnu htã nhũm mẽ arĩ hã apê nhũm Tĩrtũm pê jamnuj kêt nẽ. Kumã mẽ àpênh xwỳnh kênã. 6ãm hāmri na pa mẽ amã ja jarê. Tĩrtũm mã amnhĩ jarênh xà hã ixkreta mex tă nom ixpê Tĩrtũm Kra jakamã inhmex o ixte ixkreta jakrenh. 7Tĩrtũm kapêr ã kagà htũm kot ja harênh kot:

Kêr ka mẽ inhmã amnhĩ jarênh kaxyw nẽ ãm inhmã mẽmoj nhõr
pix pê inhmã amnhĩ jarênh kêt nẽ. Mẽ mãânên mẽ kamã
axukaprĩ o ri apa pê inhmã amnhĩ jarê. Ja na kêt inhmã
hprãm.

—Ã harênh kot anhỹr. Tã mẽ ate aprĩ hã ja mar ronhỹx ka mẽ ixkôt mẽ pa xwỳnhjê kot mẽmo hy rênh nẽ hkanhar o mõi ã mẽ omu nẽ ri tanhmã mẽ ho akapêr to hkêt nẽ. ãm mẽ kãm prãm ã mẽ omu nẽ mẽ kamã axukaprĩ nẽ.

8—Kêt pa na pre Tĩrtũm mẽ akaxyw ixãm nẽ mẽ awỳr inhmẽ. Jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ. Kwa mẽ jajê pumu nẽ mẽ kamã axukaprĩ kêt wehe. Kwār mẽ mãmrĩ mẽmo hyta rê nẽ hkanhar o ixkôt mõi. Anẽ.

Ĩhkra grà xwỳnh jarěnh*Makre 3.1-6; Rukre 6.6-11*

9Nhũm pre ã Jejus Parijew nhõ xwỳnhjê mã kapěr aně hãmri nẽ Tĩrtũm kapěr o mẽ ahkre xà hã ixkre hwỳr tẽ nẽ axà. 10Nhũm Parijew nhõ xwỳnhjaja tanhmã ho kapěr to kaxyw htãnopxar o kuhê. Jakamã nhũm ixkre kamã mēhõ my ĩhkra grà xwỳnhja mẽ pikuprõnh xwỳnhjê nhĩhkõ hã nhỹ nhũm Parijew nhõ xwỳnhjaja omu nẽ axpẽn mã:

—Kwa pu mẽ jar pakuhê nẽ Jejus kot tanhmã amnhĩ nhĩpêx to hã omu. Xà koja arĩgromnu hã mũjti ho mex nà? Koja ho aně nẽ Tĩrtũm kapěr tũm kuhpa hã amnhĩ nhĩpêx. E pu mẽ kop xa nẽ hã omu. Aně.

Hãmri nẽ hã Jejus kukja nẽ kãm:

—E mẽ inhmã mēmoj jarě. Xà na htem arĩgromnu hã akupỹm mẽ ho mex nhũm Tĩrtũm kãm ja mex nẽ nà? Aně.

11Hãmri nhũm mẽ hamaxpěr kõt mẽ omunh mex nẽ mẽ kãm:

—Kwa tanhmã na htem arĩgromnu hã amnhĩ nhĩpêx to ho pa wehe? Xà koja we mẽ akrit ôwêhti ahkrehti kamã tēm ka omu nẽ ãm omu nẽ arĩgro mex jamār pê ho axàpir kêt nẽ? Nà kot kaj mẽ tee ri omu nẽ ho axàpir kurê kumrêx. 12Arĩgromnu hã mẽ ho mexja ja mex kênã. Tĩrtũm mã mẽ pahpê panhĩa na mẽ pamex o mẽ hkrit jakrenh jakamã kër pu mẽ tee arĩgromnu htã pu mẽ hã tanhmã axpẽn to mex to ho papa. Ja na Tĩrtũm kãm hprãm.

Anhỹr o mẽ kãm kapěr. 13Hãmri nẽ hpãnhã myta mã:

—E anhĩhkra katàt. Aně.

Hãmri nhũm ĩhkra katàt nẽ mex kurê kumrêx. 14Hãmri nhũm Parijew nhõ xwỳnhjaja tee ri ja hã omu nẽ Jejus kamã gryk nẽ. Arĩgromnu pê sap ã kot ho mex jakamã nhũm mẽ kamã gryk tỳx nẽ. Hãmri nẽ ma mra nẽ hapôj nẽ hã axpẽn kukjêr o kuhê nẽ axpẽn mã:

—Kwa ã kot amnhĩ nhĩpêx anhỹrja mỳrapê tanhmã kot puj wem ho? ã kapěr anhỹrja o te mẽ papamjaja mẽ pahte hkĩnhã mẽ kamã paxukapří kêt pyræk ã mẽ pajarê. Koja mẽ pahkwỳjaja kuma hãmri nẽ mẽ pahte amnhĩ nhĩpêx kaga nẽ amnhĩ kaxyw hkõt pix mã hamaxpěr. Kwa tanhmã kot puj wem ja nê ho?

Anhỹr o axpẽn kukjêr o kuhê.

Jejus kęp Tĩrtũm kot mẽ pahwỳr mēnh xwỳnh ã harěnh*Makre 3.7-12*

15Hãmri nhũm Jejus amnhĩ tã Parijew nhõ xwỳnhjê jamaxpěr kõt mẽ omu hãmri nẽ mẽ kęp kato nẽ hpãnhã ma nhỹhỹm krĩ hõ hwỳr ma tẽ. Nhũm mẽ ohtõ nẽ omu nẽ ma hkõt mra nhũm mẽ omu nẽ akupỹm mẽ kãm mẽ à xwỳnh piitã ho mex. 16Hãmri nẽ mẽ kãm:

—E na pa akupÿm mẽ ato mex. Nom kêr ka mẽ amnhĩ tã ixto axàmra ho ri apa hkêt nê. Ixpê Tĩrtũm Kra hã mẽ kãm ijarênh kêt nê. Ām kwarĩ kumrêx.

Anhÿr o mẽ kãm kapêr. 17Na pre ra amnepêm Tĩrtũm nhÿ hã kapêr xwÿnh finat Ijaisja Jejus kukamã mẽ kãm tanhmã harênh to nê hã kagà. Te Tĩrtũm tãm kapêr pyræk o harê nê hã kagà. Nê hã kagà ho:

18 Ota ixkôt amnhĩ nhĩpêx o pa xwÿnhhta xa. Pa na pa amnhĩ kaxyw âm. Inhmã hapêê. Na pa hte tanhmã kot amnhĩ nhĩpêx to ho pa hã omu nê ixkĩnh tÿx nê. Kot paj hwÿr amnhĩ karõ mẽ nhũm hwÿr axà nhũm ma ÿ hã pika piitã hkôt mẽ piitã mẽ kãm ijarênh o ri mẽ hkôt pa. Mẽ kot hprĩ hã ixte tanhmã amnhĩ nhĩpêx to nê tanhmã ijamaxpêr to hã ixpumunh kaxyw.

19 Nom koja ri amnhĩ to àmra o pa hkêt nê. Rÿ kãm amnhĩ to rax prãm o mẽ kãm tanhmã amnhĩ nhĩpêx to ho pa hkêt nê.

20 Ām kapêr xukaprí pix o koja mẽ hirerek xwÿnhjê mã kapêr o pa. Nê mẽ kot tee ri amnhĩ nhĩpêx ã amnhĩ pumunh xwÿnhjê kamã ukaprí o pa. Nê mẽ kot htÿx ri amnhĩ nhĩpêx o mẽ pa xwÿnhjê kutã nojarêt rãhã ho pa jakamã nhũm mẽ hpãnhã tãm amnhĩ nhĩpêx o pa. Koja ã amnhĩ nhĩpêx anhÿr o ri mẽ hkôt pa rãhã ra akupÿm mẽmoj piitã tãm haxwÿr pa.

21 Ā kot amnhĩ nhĩpêx anhÿr o pa jakamã koja pika piitã hkôt mẽ pa xwÿnh kwÿjaja kukwak ri amnhĩ kaxyw Tĩrtũm kôt hamaxpêr nê hkôt amnhĩ xunhwÿ. Anê.

Na pre ã finat Ijaisja Tĩrtũm nhÿ hã kormã Jejus wrÿk nê kator kêt ri tanhmã kot amnhĩ nhĩpêx to ho pa hkukamã harênh nê hã kagà anê. Tã nhũm mẽ hwÿr wrÿ nê ã mẽ hkôt amnhĩ nhĩpêx anhÿr o pa.

Jejus mẽ mẽkarõmnuti wa harênh

Makre 3.20-30; Rukre 11.14-23, 11.31-32, 12.10

22Tã nhũm prem Jejus wÿr mẽhõ myja o mõi. Mẽkarõmnuti kot hwÿr àr nê ho nohkre nê ho kapêr kêt xwÿnhhta nhũm mẽ hwÿr o mõi. Hãmri nhũm omu nê nê mẽkarõmnuti jano nê akupÿm ho mex kurê kumrêx nhũm akupÿm rít mex nê akupÿm kapêr mex nê. 23Hãmri nhũm mẽ amnhĩ jaêr pè omu nê kamã no puma nê hã axpên kukjêr o:

—Kokÿÿ. Jejus na hte âm mẽ ho mex o mẽ ho mex o pa. Mãn kêp Tĩrtũm kot mẽ pahwÿr mẽnh mã xwÿnhhta na nà? Ā na hte ã amnhĩ nhĩpêx anhÿr o pa. Mãn kêp pahi finat Tawi kanrêhã tàmnhwÿta na nà? Anê.

24Nom nhũm Parijew nhõ xwÿnhjaja ã Jejus kot amnhĩ nhĩpêx anhÿr ã omu nê kêp mẽkarõmnuti hkwy hã hkamnhĩx. Jakamã mẽ kot hã axpêr kukjêr ã mẽ kuma nê mẽ kãm:

—Tk pěr hinhu nhĩkôoti nhỹ hã na hte mẽ nê amnhĩ kwỳjê japôx o pa. Anê.

Hinhu nhĩkôoti nhĩxi hõ pê Satanasti nhũm prem ã Satanasti nhỹ hã Jejus kot amnhĩ nhĩpêx ã hkamnhĩx anê. 25Nhũm ra mẽ hamaxpêr kôt mẽ omunh mex jakamã mẽ kãm:

—Kwa mẽ inhma mẽ ate ixpê Satanasti hkwy hã ixkamnhĩx xwỳnhjaja. Koja pika nhõ xwỳnhjaja axpên kutã amnhĩ xunhwỳ nê axpu hãmri nê anhrã nê ma ahpỳnhã ri pa. Hãmri nê amnhĩ krã hkôt ri tanhmã amnhĩ nhĩpêx to ho pa. Jakamã nhũm mẽ õ pahija mẽ hamãr kêt nê. Nê koja krĩ nhõ xwỳnhjaja. Rỳ mẽ kot axpên to hkwy xwỳnhjaja mẽmoj tã axpên kãm gryk nê axpên kutã amnhĩ xunhwỳ. Hãmri nê ahpỳnhã awry hã pa nhũm mẽ õ pahija tee ri kãm mẽ hamãr prãm kaprỳ. Mo mẽ hkwyjaja kot ri mẽ hamãr o pa? No koja pahija tãm amnhĩ nê amnhĩ kwỳjê janor kêt nê. 26Tã ja pyrã nê ixte Satanasti nhỹ hã tanhmã amnhĩ nhĩpêx to ho ri ixpa ronhỹx pa ri mẽ nê amnhĩ kwỳjê janor kêt nê.

27—No mẽ akwỳjaja? Xà Satanasti nhỹ hã na htem mẽ nê mẽkarõmnuti japôx o pa? Kêp apu pa ixte ý hã mẽ nê amnhĩ kwỳjê japôx ronhỹx mẽ akwỳjaja ixpyrã nê ý hã mẽ nê amnhĩ kwỳjê japôx o pa. Nà Tĩrtũm nhỹ hã mẽ ixte mẽ nê mẽ hapôx o ixpa kênã. Jakamã mẽ ate ã ijarênh anhỹrja mex kêt. 28Tĩrtũm Karõ nhỹ hã ixte mẽ nê mẽ hapôx jakamã kwa mẽ ja hã ixpumu nê ixte mẽ ato amnhĩptar kaxyw Tĩrtũm kot mẽ awỳr inhmênh kôt ixpumu kêt wehe. Pa na ka htem ijamãr o apa.

29—Satanastija àhpumunh tỳx jakamã na htem tee ri kêp hkôt mẽ kot amnhĩ xunhwỳr xwỳnhjê pytãr kaxyw nhũm mẽ nê mẽ omunh mex nê. Tã nom ixàhpumunh tỳx o ixte Satanasti jakrenh par jakamã na pa hte kêp mẽ utã nhũm mẽ hpãnhã ixkôt ri amnhĩ nhĩpêx.

30—Ra mẽ amã ixkapêr mar prãm tã nom kormã ixkôt amnhĩ xunhwỳr kêt nê. Kwa wem ma amnhĩ to amõr gri nê tokyx ixkôt amnhĩ xunhwỳ kêt wehe. Kot kaj mẽ anhỹr kêt hãmri nê mẽ apê ixkutã amnhĩ xunhwỳr xwỳnh pyrãk o amnhĩ nhĩpêx.

31-32—Nê koja mẽhõ ixkapêr ma nê kãm ixprãm kêt nhũm Tĩrtũm ixtã omu nom tokyx tanhmã ixtã ho hkêt nê. Koja kormã amnhĩ tã hamã. Karõ kot axte kãm ijarênh o amnhĩrĩt nhũm jatã kot mar nê kãm ixprãm nê ixkôt amnhĩ xãm prãm xaj nhũm kormã amnhĩ tã hamã. Nom koja Karõ xatã mẽ kãm tanhmã ixto amnhĩrĩt to htã nhũm mẽ kuma nê ãm kuma nê te mẽ kêp amnhĩ jamak pro pyrãk. Jao ra Karõ hã hpijaãm kêt o amnhĩ nhĩpêx. Mỳrapê koja Tĩrtũm nhỹrmã amnhĩ xwar te kêp amnhĩ jamak pro pyrãk o mẽ hipêx nhũm mẽ tee kãm amnhĩ kaprĩ kaprỳ. Hãmri nê amnhĩ xà htỳx kamã hamak o pa xãta wỳr ma pa nê kamã pa rãhã nê pa ho pa. Anê.

Mê pajamaxpêr xà hkôt tanhmã ri mê pakapêr to

Rukre 6.43-45

33Nhũm Jejus arĩ Parijew nhõ xwỳnhjê mã kapêr nê mê kãm:

— Nê kot kaj mê atõ anhõ mẽmo pàr nhũm amã ô mex nê. Ô rax nê. Ka omu nê akĩnh nê amnhĩm mex ã harê. No koja apê ô hkêt ka tee ri omu nê mex kêt ã harê. Na htem ã amnhĩm mẽmo xõ hpàr pumunh kôt tanhmã kute hã harênh anê. Ja pyrã nê na htem tanhmã mê kot amnhĩ nhĩpêx to hã mê omunh kôt tanhmã mê harênh to. Mê kot amnhĩ tomnuj xwỳnh ã mê harê rỳ mê kot amnhĩ to mex xwỳnh ã mê harê.

34-35— Nê koja mẽhõ hamaxpêr mex nê hãmri nê kapêr mex o pa. Nom koja hamaxpêr punuj nê kapêr punuj pix o pa. Nê htỳx ri tanhmã amnhĩ tomnuj to ho pa. Na htem ahpỳnhã amnhĩ jamaxpêr xà hkôt tanhmã kapêr to ho pa. No mê kajaja na ka htem kagã xoprê jamaxpêr pyrãk o ajamaxpêr punuj pix o ri apa. Jao akapêr punuj nê. No tãm ajamaxpêr o tãm akapêr o ri apa hkêt nê. Na htem tanhmã hamaxpêr to xà hkôt tanhmã ri kapêr to ho pa. **36-37**Koja nhỹrmã Tĩrtũm mẽ piitã tanhmã mẽ kapêr to hã mê mar xà hkôt tanhmã mẽ harênh to. Jakamã mẽ akapêr mex o mẽ apa xwỳnhjaja koja mẽ amex ã mẽ ajarê. Nom mẽ atỳx ri akapêr punuj o mẽ apa xwỳnhjaja koja mẽ amex kêt ã mẽ ajarê. Hãmri nê mẽ akapêr punuj o apaja mỳrapê mẽ atomnuj tỳx nê. Anê.

Jejus kot Jõhti jarênh

Makre 8.11-12; Rukre 11.29-32

38Hãmri nhũm Tĩrtũm kapêr tũm o mẽ ahkre xwỳnh mẽ Parijew nhõ xwỳnh kwỳjaja mẽmoj tã Jejus wỳ nê kãm:

— Kwa Pahihtĩ. Mê inhmã aa mẽ ixte mẽmoj pumunh kêt õ ho anê. Kot paj mẽ omu hãmri nê Tĩrtũm kot mẽ ixwỳr amênh ã apumunh kurê kumrêx. Jakamã e mẽ inhmã mẽmoj to anê nã. Anê.

39Hãmri nhũm mẽ kuma nê mẽ kãm:

— Tk. Pêr ãm mẽ ajamaxpêr punuj pix o na ka htem apa. Ixpê Tĩrtũm kot mẽ awỳr inhmênh xwỳnh tã mẽ ate ja hã ixpumunh kêt. Nê mẽ ate ja hã axpên mã ijarênh kêt tã ixte mẽ amã aa mẽmoj pumunh kêt õ ho anhỳr kaxyw hã ixwỳ. Nã pa mẽ amã ho anhỳr kêt nê. Kormã. ãm amnepêm Jõhti kot tanhmã amnhĩ nhĩpêx toja pix kot paj mẽ amã harê.

40— Tĩrtũm nhỹ hã kapêr xwỳnh Jõhtija amnepêm na pre tep rax kumrêxja htĩr rãhã kukrê. Nhũm õxàhkre kamã htĩr nê hkrĩ hã apkati axkrunêpxi hãmri nê htĩr rãhã õxàhkre rũm kato. Tã ixpê Tĩrtũm kot mẽ awỳr inhmênh xwỳnh kot paj nhỹrmã kên kre kamã ixtyk nê inhnõr ã apkati axkrunêpxi. Jõhti hkĩnhã ixtyk kumrêx nê inhnõr ã apkati axkrunêpxi hãmri nhũm Tĩrtũm akupỳm ixto ixtĩr.

41—Nê koja nhÿrmã Tirtûm akupÿm mẽ htyk nê mẽ hikwÿ xwÿnh piitã akupÿm mẽ ho htír hãmri nhûm mẽ piitã Inhîpêêxã mẽ wa ixkutã hkrî pa wa tanhmã mẽ harênh to. Tirtûm mẽ wa ixkuri mẽ htír tûm nê mẽ pa ho mẽ pa mã xwÿnhjê hã mẽ hkwyjê jarê nê wa ixkuri mẽ pa ho mẽ pa hkêt xwÿnhjê jarê. Mẽ piitã ã ahpÿnhã mẽ harênh anê. Amarî mẽ pa xwÿnhjaja nê mẽ õ pahijaja. Jakamã nhûm Ninîwe nhõ xwÿnhjaja tanhmã wa inhmã mẽ ajarênh to. Jõhti kot mẽ hwÿr mör nê mẽ kãm Tirtûm kapêr jarênh o pa xwÿnhjaja nhûm mẽ tanhmã wa inhmã mẽ ajarênh to nê wa inhmã: “Na pre Jõhtija man mẽ inhõ krî hwÿr mō nê mẽ inhmã akapêr jarênh o ri mẽ ixkôt pa. Pa prem kuma nê mẽ ixte amnhî tomnuj kaga nê akôt amnhî xunhwÿr kurê kumrêx Tirtûm. No or war akutã mẽ hkrî xwÿnh kwÿ ata mẽ na pre Akra Jejus tãm mẽ hwÿr mō nê mẽ kãm kapêr o ri mẽ hkôt pa nhûm prem mar tã mẽ ixkînhã mẽ kot amnhî tomnuj kaga nê hkôt amnhî xunhwÿr kêt nê. Mẽ ixkurom mẽ kot Akra mar tã amnhî kaxyw kãm hamaxpêr kêt nê.” Anhÿr o koja mẽ wa inhmã mẽ ajarê ka mẽ tee ri mẽ ama nê ra mẽ amã ma nê. Nom ãm mẽ amã ma kaprÿ.

42—Nê sur kãm mẽ õ pahi nitita koja mẽ hpãnhã tanhmã wa inhmã mẽ ajarênh to nê wa inhmã: “Na pa pre inhmã pahi Sarumãw kot war anhÿ hã àhpumunh tÿx ã harênh ma hãmri nê inhmã mar prãm xaj ma awry hã õ pika hwÿr mō nê omu nê kapêr ma. Hãmri nê ma akupÿm inhõ pika hwÿr mō nê ixkwÿjê mã àhpumunh tÿx ã harênh o ri ixpa. Tã Akra Jejus na kot àhpumunh tÿx o pahi Sarumãw jakrenh tã or war akutã mẽ hkrî xwÿnh kwÿ ata mẽ. Mẽ kot kapêr mar tã ixkînhã kãm mar prãm kêt. Na prem kuma nê ãm kuma.” Anhÿr o koja wa inhmã mẽ ajarê. Hãmri nê ja hã mẽ amã akir ka mẽ tee ri mar o akrî nê amnhî kamã agryk o akrî. Nom ãm amnhî kamã agryk kaprÿ. Anê.

Mêkarõmnuti kot tanhmã mēhõ hto hã harênh

Rukre 11.24-26

43Nhûm Jejus arî Parijew nhõ xwÿnhjê mẽ Tirtûm kapêr tûm o mẽ ahkre xwÿnhjê mã kapêr nê mẽ kãm:

—Te mẽ ate ixte mēhõ nê mêkarõmnuti japôx xwÿnhhta pyrãk. Nhûm te kêp kator nê ma htêm pyrãk. Nê nhÿri amgrã kamã ri pa pyrãk. Koja ja kêp omnuj nhûm tee ri kamã nhÿri hkôt xã japêr o pa. Nom tee ri hapêr o pa kaprÿ. 44Hãmri nê tanhmã amnhî kukamã hamaxpêr to nê hamaxpêr o: “E kot paj ma akupÿm mẽ kot nê ixkator xwÿnhhta wÿr tē nê axà nê kamã mãn ri ixpa.” 45Anhÿr o hamaxpêr hãmri nê ma akupÿm hwÿr tē. Nom kormã akupÿm hwÿr àr kêt ri nhûm kamã amrakati nê ri pa. Jakamã nhûm akupÿm hwÿr axà. Nom ahte hwÿr àr kêt nê. Amnhî kôt hkwyjê ho 7 nê hwÿr mẽ ho gjêx pa. Mẽ kêp 7jaja nê wamta mẽ nhûm mẽ piitã hwÿr gjêx pa. No mẽ kêp 7jaja na omnuj tÿx o kot wamta

jakrenh jakamã nhũm mẽ kot hwỳr gjêx xwỳnhnta mẽ ỹ hã ra amnhĩ tomnuj tỳx nê oprê htỳx o pa. Wam pyxire kot hwỳr àrta nhỹ hã nhũm amnhĩ tomnuj o ri pa nom kawax pê oprê. Tã nhũm ra axte hwỳr mẽ ohtô nê gjêxta nhỹ hã hãmri oprê htỳx kumrêx. Ja pyrà nê kot kaj mẽ tokyx ixkôt amnhĩ xunhwỳr kêt nê hãmri nê amnhĩ tomnuj tỳx pix o ri apa. Anê.

Jejus kot tanhmã hkwỳjê jarênh to hã harênh

46Nhũm Jejus arĩ mẽ ahkre ho nhỹ. Rôm nhũm katorxà nê htôjaja nhỹhỹnh hwỳr môn pôj. Nom kormã hwỳr gjêx kêt nê. Mẽ kot hã htu rax jakamã nhũm mẽ tee ri hwỳr gjêx kaxyw kormã kapôt ã hã mẽ omunh o kuhê. 47Hãmri nhũm mēhōja kapôt ã mẽ omu nê Jejus mã mẽ harê nê kãm:

—Kwa Pahihti. Ota akatorxà mẽ atôjaja awỳr môn pôj nê tee àr kaxyw. O mũj mẽ kapôt ã kuhê. Anê.

48-50Hãmri nhũm kuma nê kãm:

—Tôe. Nà kot pa ixkato nê mẽ omu. Inhmã mẽ hapêê. Nom kot kaj mẽ atô Tirtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtô rỳ ixkatorxà pyràk o pu mẽ axpên nhĩpêx o ri papa. Pa inhmã ixkatorxà nê ixtôjê japê pyrà nê mãânên inhmã mẽ ajapê nê. Anê.

Mêmo hy hkre xwỳnh jarênh

Matêwre 13.18-23; Makre 4.1-9; Rukre 8.4-8

13 1Hãmri nhũm Jejus mẽ kãm kapêr pa nê ixkre rũm kato nê ma himô rax wỳr tẽ nê gô mỳri mẽ kãm ujarênh kaxyw nhỹ. Pa mẽ ixpê hkôt mẽ ixpa ho ixpa xwỳnhjaja ma hkôt mra. 2-3Hãmri nê gôta wỳr pôj nê mỳri ixkrĩ. Nhũm mẽ Jejus ã htu rax nê nhũm tee ri mẽ omunh o nhỹ. Hãmri nê hamaxpêr nê kànhmã xa nê tẽ nê pàr krem axà nê pàr kre kamã mûtũm awry rũm mẽ ahkre ho nhỹ nhũm mẽ piitã omunh nê mar mex o hkrĩ. Nhũm mẽ kãm ujarênh o mẽ ahkre ho nhỹ. Nom mẽ kãm tãm ujarênh kêt nê. Mẽ kot Tirtũm kapêr mar nê tanhmã hkôt amnhĩ nhĩpêx to ho paja nhũm hã kuxi nê mẽ kãm harênh o nhỹ nhũm mẽ amgrà kamã kỳx pê mar o hkrĩ. Nhũm mẽ kãm:

4—E mẽ inhma. Kojã mēhō ma pur mã mō nê pur kãm mêmo hy ho ukapêr o ri pa. Nom nhũm hy piitã amex kãm rôrôk kêt nê. Kojã hkwỳja ahpỹnhã nhỹri rôrôk. Kwỳ aptỳx kãm rôrôk nhũm kuwênhre omu nê hwỳr mra nê hkrêr pa.

5—Nê kojã kên kãm hkwỳ rôrôk nê ra higrôt kutã nojarêr nê higrôt pa. Nom nhũm kamã aptỳx nê kêp pika hkryre. 6Jakamã nhũm higrôt nhũm hã myt ahpa nê arĩgro htỳx mẽ nhũm grã pa. Harê hkryre jakamã grã pa.

7—Nê koja mrônhi kamã hkwỳ rôrôk nê higrôt tâ no nhũm utija kêp amýtã nhũm ô hkêt nê.

8—No kêt hirã kamã pika mex kãm rôrôk xwýnhja hirã kamã rôrôk jakamã higrôt mex nê piitã ô rûnh nê. Kamã ô hkwỳ kêp 30 nê kamã hkwỳ kêp 60 nê kamã hkwỳ kêp 100. Á mẽ ujarênh kot anhÿr. 9Kwa kêr ka mẽ ixujarênhja ma nê kãm ajamaxpêr tÿx rãhã ho apa. Anê.

Mêmo kaxyw Jejus kot mẽ ujarênh o mẽ ahkre

Makre 4.10-25; Rukre 8.9-15

10Hãmri pa mẽ ixpê Jejus kôt mẽ ixpa ho ixpa xwýnhjaja Jejus kot mẽ kãm ã ujarênh anhÿrja ã kuma nê tee ri hkukamã ijamaxpêr. Hãmri nê hã hkukja nê kãm:

—Kwa axujarênh ta na pa mẽ ixprĩ hã hkôt mẽmoj pumunh kêt nê. Mon ka hte ãm mẽ ujarênh pix o mẽ ahkre? Anê.

11Hãmri nhũm mẽ inhãmã:

—Tôe. Nã kot paj mẽ amã harê. Tirtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhũm Tirtũm kot ja hã mẽ omunh nê mẽ ho hkra. Ja na pa harê. No mũjjaja mẽ akĩnhã kãm ja mar prãm kêt jakamã na htem ixujarênhja ma nê ãm kuma nê htÿx ri pa.

12—No kêt mẽ kajaja na ka mẽ ixkôt ri apa ho apa. Nê xatã ixkapêr mar o apa jakamã na ka mẽ aprĩ hã ixkapêr ma. Tã mẽ ate ixkôt amnhĩ nhĩpêx o apa jakamã na pa tanhmã mẽ akrã hto ka mẽ aprĩ hã mar mex o mō. No mẽ kot ixkapêr mar nê ãm mar xwýnhjaja na mẽ akĩnhã inhmar tÿx kêt nê. Jakamã nhũm Tirtũm tanhmã mẽ hkrã hto nhũm mẽ hã no hkêt tokyx anê htÿx ri pa.

13 “Ixte mẽ kãm aa mẽ kot mẽmoj pumunh kêt kwỳ ho anhÿr rax tâ nhũm mẽ omu nê ãm omu. Nê ixte amnhĩ nhĩpêxja nhũm mẽ kãm hkĩnh kêt nê. Nê mẽ kot ixkapêr mar tâ ãm inhma nê kãm hprĩ hã inhmar prãm kêt nê.”

—Jakamã na pa hte ã mẽ kãm mẽmoj te ho tãm pyrã nê harê no ãm hã haxwỳ nê mẽ kãm ixujarênh anê.

14-15—Na pre ra Tirtũm nhÿ hã kapêr o pa xwýnh Ijaisja amnepêm mẽ hkukamã tanhmã mẽ harênh to nê hã kagã. Mẽ kot inhmar nê ãm inhmar xwýnhjê jarê nê tanhmã mẽ hkukamã mẽ harênh to nê mẽ harênh o:

Koja mẽ ujarênh mex mar pymaj amnhĩ jamak pro nê amnhĩ no hpro nê hkôt hamaxpêr kêt nê. Jakamã koja mẽ kãm mẽ kot amnhĩ nhĩpêx mex prãm kêt nê harênhja ma nê ãm kuma. Nê omu nê ãm omu. Mẽ kãm hprãm kêt jakamã koja mẽ ã amnhĩ nhĩpêx anê. Á mẽ kot amnhĩ nhĩpêx anhÿr kêt ronhÿx mẽ ra Tirtũm kapêr ma nê hkôt amnhĩ

xunhwÿ. Hāmri nhūm amnhĩ tā mẽ omu nẽ mẽ nẽ mẽ kot amnhĩ tomnuj rēnh pa. Hāmri nhūm mẽ hkôt amnhĩ nhĩpêx mex nẽ kapêr mar mex o pa. Tã no nhūm mẽ ã amnhĩ nhĩpêx anhÿr kêt nẽ. Anẽ.

— ã Ijaisja mẽ hkukamã mẽ harẽ nẽ mẽ hã kagà anẽ.

16— No kêt mẽ kajaja na ka htem ano ho ixte tanhmã amnhĩ nhĩpêx to ho ixpa hã ixpumunh o ixkôt apa. Nẽ mẽ ajamak o ixkapêr mar o ri ixkôt apa. 17 Amnepêm mẽ akukamã pahijaja nẽ Tĩrtūm nhÿ hã mẽ kãm kapêr o ri mẽ pa xwÿnhjaja na prem kãm ixpumunh prãm tÿx o pa. Nẽ mẽ kãm ixkapêr mar prãm tÿx o pa. No ãm mẽ akĩnhã ixpumunh nẽ ixkapêr mar kêt rãhã htyk pa. Kormã ixwrÿk nẽ jar ixkator kêt jakamã na prem arĩ htĩr nẽ pa ri ixpumunh kêt rãhã ra htyk pa. ãm mẽ kapxipixjaja na ka mẽ mÿr pê ixte amnhĩ nhĩpêx ã ixpumunh nẽ ixkapêr mar o ixkôt apa. Tã mẽ kurom mẽ ate ano ho ixpumunh nẽ ajamak o ixkapêr mar o ixkôt apa jakamã kwa mẽ ja hã amnhĩ pumu nẽ tãm amnhĩ nhĩpêx o ri apa pê akĩnh nẽ ri apa. Anẽ.

Nhūm pre ã Jejus mẽ ixpê hkôt ixpa ho ixpa xwÿnhjê mã kapêr anẽ.

Jejus kot hprĩ hã mẽmo hy jarēnh

Makre 4.13-20; Rukre 8.11-15

18 Hāmri nhūm Jejus mẽ ixpê hkôt ixpa ho ixpa xwÿnhjê mã hprĩ hã mẽ ujarēnhhta jarē nẽ mẽ inhmã:

— E kot paj ixprĩ hã mẽ amã mẽmo hy ho ukapêr xwÿnh ã ixujarēnhhta jarē ka mẽ inhma. Nà mẽmo hyta te kêp Tĩrtūm kapêr pyræk. Nẽ ahpÿnhã mẽmo hy rôrôk ã pikata te kêp mẽ apê panhĩ ahpÿnhã mẽ ate Tĩrtūm kapêr mar nẽ ahpÿnhã hkôt tanhmã amnhĩ nhĩpêx tota pyræk. 19 Jakamã mẽ kot mar xwÿnh kwÿjaja te mẽ kot aptÿx kãm hy rôrôk nhūm kuwēnh kot hwÿr mrar nẽ hkrêr par xwÿnhhta pyræk. Jao Tĩrtūm kapêr ma no nhūm Satanasti te kuwēnh kot hy krêr parta pyrà nẽ mẽ kot mar nẽ amnhĩ kaxyw hkôt hamaxpêr nẽ hkôt amnhĩ xunhwÿr pymaj hāmri ra tanhmã kapêrja nẽ mẽ hkrã hto. Jakamã nhūm mẽ kuma nom ho hamakêtkati tokyx anẽ nẽ axte kãm hamaxpêr kêt nẽ pa.

20— Nẽ mẽ kot mar xwÿnh kwÿjaja te mẽ kot kēnre kamã hy hkwy rôrôk nẽ higrôt nẽ grà par tokyx anhÿr xwÿnhhta pyræk. Jao Tĩrtūm kapêr ma nẽ hkĩnh nẽ. Nẽ kãm mar prãm nẽ. 21 Tã nhūm mēhō Tĩrtūm nẽ tanhmã mẽ kãm kapêr to nhūm mẽ kuma nẽ Tĩrtūm kaga. Te mẽmo hy higrôt nom ra grà par tokyx anhÿrta pyræk.

22— Nẽ mẽ kot mar xwÿnh kwÿjaja te mrônhi kamã hy hkwy rôrôk nẽ higrôt nhūm mrônhi kot kêp àmnàr xwÿnhhta pyræk. Jao mẽ kãm Tĩrtūm kapêr mar prãm tā määnēn kãm mẽ hikukrêx rŭnh nẽ mẽ hikàxpore rŭnh prãm. Hāmri nẽ ãm ja pix kukamã hamaxpêr o pa. Nẽ ja gryk ã axte Tĩrtūm kapêr mã hamaxpêr nẽ hkôt amnhĩ nhĩpêx kêt nẽ.

23—Nê mẽ kot mar xwÿnh kwÿjaja te hirã kamã pika mex kãm hy hkwy rôrôk nê higrôt nê ô rûnhta pyrãk. Jao ixkapêr ma nê amnhĩ krã him hagdênh tÿx nê. Nê ixkôt ri amnhĩ nhĩpêx mex rãhã ho pa. Jakamã te mẽmo hy ô rûnh nê ô mex pyrãk o amnhĩ nhĩpêx. E ã ixujarênhja kot anhÿr. Anê.

Harôj kaàkre jarênh

Matêwre 13.36-43; Makre 4.26-29

24Nhũm Jejus axte mẽ kot mar o hkrĩ xwÿnhjê mã awjarê nom hprĩ hã mẽ kãm ujarênh kêt nê. Axte mẽ kãm mẽmoj tã kuxi nê awjarê nê mẽ kãm:

—Nà nhÿrmã Tirtũm mẽ kot kormã htĩr ri tanhmã amnhĩ nhĩpêx to ho pa hã mẽ omunh xà hkôt ahpÿnhã tanhmã mẽ harênh toja te mẽ ujarênh ja pyrãk. Koja mēhō harôj y mex o ukapêr kaxyw ma hpur mã mō. Hãmri nê hkre hpa nê ma akupÿm mō. 25Tã nhũm kamãt nhũm ra gōr nê nō. Hãmri nhũm kãm hkurê xwÿnhja ma kêp ihpur wÿr tẽ nê harôj mexta nhĩpy axtem nê kêp harôj kaàkre hkre. Harôj kaàkreja te kot harôj mex pyrãk nom mẽ kot hkur kêt. Tã nhũm kêp harôj y mex nhĩpy hkre hpa hãmri nê ma akupÿm tẽ.

26—Tã nhũm hamê higrôt nê anhĩpê ô. 27Nhũm kãm mẽ àpênh xwÿnhjaja tee ri harôj mex kaêx ã harôj kaàkreta pumu nê hpur nhō dōn wÿr tẽ nê kãm harê nê kãm: “Kwa ate harôj mex pix kre htã pêr hkaêx ã harôj kaàkre mãânên kato. Kwa tanhmã na pre amnhĩ to nê hkaêx ã kato?” Anê. 28Hãmri nhũm tee ri mẽ kuma nê mẽ kãm: “Nà mēhō kãm ixkurê xwÿnh na pre ã inhĩpêx anê.” Anê hãmri nhũm kãm mẽ àpênh xwÿnhhta kãm: “Kwa xà kot paj mẽ tokyx ma hwÿr mra nê nê harênh pa nê kurê nà?” Anê. 29Nhũm mẽ kãm: “Nà kot kaj mẽ anê nê harôj mexta mẽ ho apimràatã ixpê harênh pa. 30Kwãr mãmrĩ harôj mex mẽ hpmràatã ô hpa mãn. Ka mẽ rĩ ma hwÿr mra nê harôj kaàkre kumrêx jarênh pa nê axpên tã harê ho ê nê ma o mra nê hpôk. Hãmri nê rĩ kormã hpãnhã harôj mex jakã nê ho akuprô nê ô ho mra nê ixkre kamã haxwÿ.” Anê. ã mẽ ujarênh kot anhÿr.

Anhÿr o mẽ kãm kapêr.

Jejus te kot mẽmo hy hkryre pyrãk ã harênh

Makre 4.30-32; Rukre 13.18-19

31-32Hãmri nhũm Jejus arĩ mẽ kãm amnhĩ tã kuxi nê ujarênh o nhÿ. Nê tanhmã mẽ kãm amnhĩ tã ujarênh to nê mẽ kãm:

—Nà Tirtũm kot mẽ awÿr ixte mẽ ato amnhĩptar kaxyw inhmênh ã ijarênhja. Te ixte mẽmo hy pixire nhũm mẽ kot hkre nhũm higrôt pyrãk. Koja gaa nê hprêk. Hãmri nê hpa anhrã nhũm kuwênhre hwÿr mra nê hōptĩ kamã amnhĩm haê nhĩpêx nê kamã hikwÿ. Tã kot paj nhÿrmã

mêmo hy jarênhta pyrâ nê ixpyxi htã pika piitã hkôt mê ho amnhĩptã nê mê omunh mex rãhã ho ixpa. Anê.

Jejus te kot pãwti kaxkrit xà pyrâk ã harênh

Rukre 13.20-21

33Nhũm Jejus arĩ mê kãm amnhĩ tã kuxi nê ujarênh o nhỹ nê mê kãm:

—E kot pa hpãnhã mê amã tanhmã pãwti kaxkrit xà jarênh to ka mê inhma. Na hte mênijaja pãwti nhĩpêx kaxyw hãmri nê kaxkrit xà hkwy ho grire nê kupy nê trik xôm mê ho ahkã. Hãmri nê ho pãwti nhĩpêx. Kaxkrit xãja grire htã pãwti piitã ho kaxkrit mex nê. Tã ja pyrã nê ixpyxi htã koja mê nhỹrmã pika piitã hkôt ixkôt amnhĩ nhĩpêx mex o pa.

Anhỹr o mê kãm amnhĩ jarê.

Jejus kot mê ujarênh pix kãm mê ahkre hã harênh

Makre 4.33-34

34Na pre ã Jejusja mê ujarênh o mê ahkre ho pa anê. ãm mê ujarênh pix o mê ahkre ho pa. Te tãm ujarênh pyrâk no ãm mêmoj tã haxwỹ rỹ amnhĩ tã haxwỹ nê mê kãm tanhmã amnhĩ jarênh to. 35Ã kot mê ahkre ho pa anhỹr kukamã na pre ra amnepêm Tĩrtũm nhỹ hã kapêr o mê pa xwỹnhjê hõja harê nê hã kagã. Te Jejus tãm tanhmã amnhĩ jarênh to pyrâk o hkukamã harê nê hã kagã nê hã hkagã ho:

Kot paj mê kãm ixujarênh pix kãm mê ahkre ho ri ixpa. Mêmoj te ho tãm pyrã nê harê nom mêmoj tã haxwỹ nê tanhmã mê kãm ixujarênh to. Nê aa mê kot mêmoj mar kêt xwỹnh kwỹ kot paj mê kãm harê kê mê kuma. Anê.

Jejus kot hprĩ hã harôj kaàkre jarênh

Matêwre 13.24-30, 13.47-50

36Tã nhũm Jejus mê kãm ujarênh pa nê mê kure nê ma tẽn ixkrem axã. Hãmri pa mê ixpê hkôt ixpa ho ixpa xwỹnhjaja ma hkôt mra nê ixkrem agjê. Hãmri nê harôj kaàkre hã ujarênhta ã hkukja nê kãm:

—Kwa aprĩ hã mê inhmã harôj kaàkre jarênhta jarê nã. Na pa mê kormã ixprĩ hã mar mex kêt nê. Anê.

37Hãmri nhũm mê inhmã:

—Tõe pa ixprĩ hã mê amã harê. ãm paa.

Ixpê Tĩrtũm kot mê awỹr inhmênh xwỹnh te ixte mêmo hy mex o ukapêr xwỹnhhta pyrâk.

38 Nê purta te kêp pika piitã pyrâk.

Nê harôj mexta te ra mê ate ixkôt amnhĩ xunhwỹr nê ixkôt amnhĩ nhĩpêx o apa xwỹnhjê pyrâk.

Nê harôj kaàkreta te mẽ kot Satanasti hkôt amnhĩ nhĩpêx o mẽ pa xwỳnhjê pyràk.

39 Nê kot harôj kaàkre hkre xwỳnhhta te Satanasti pyràk.

Nê harôj jakàr xà hã arĩgrota te Tĩrtũm kot ahpỳnhã tanhmã mẽ harênh to xà hã arĩgrota pyràk.

Nê mẽ kot harôj jakàr xwỳnhjaja te Tĩrtũm kapêr o wrỳk xwỳnhjê pyràk.

40 Mẽ ujarênhja kamã na prem harôj kaàkre kumrêx jarê nê hã hpòk jarê. Ja pyrà nê koja nhỹrmã Tĩrtũm kot ahpỳnhã tanhmã mẽ harênh to xà hã arĩgrota ã hãmri ã mẽ kot amnhĩ tomnuj o mẽ pa xwỳnhjê nhĩpêx anê.

41—Kot paj nhỹrmã kãm mẽ piitã mẽ ho amnhĩptàr kaxyw hãmri nê kapêr o mẽ wrỳk xwỳnhjê mã anê nhũm mẽ ma mran wrỳ nê mẽ kot amnhĩ tomnuj xwỳnhjê pix o akuprô. Nê mẽ kot nhãm mẽ hkwyjê kot mẽ uràk nê tanhmã amnhĩ tomnuj to ho pa kaxyw mẽ kãm anhỹr xwỳnhjaja nhũm mẽ mãănên mẽ ho akuprô. 42 Hãmri nê mẽ ho pikuprônh pa nê te mẽ kot harôj kaàkreta nhĩpêx pyrà nê kuwy kamã mẽ rênh pa. Hãmri nhũm mẽ kamã amnhĩ xà htỳx kamã hamak rãhã nê pa ho pa. Nê amnhĩ xà htỳx ã maj tee ri mỳr rãhã ho pa. Nê tee ri amnhĩ xà hã maj amnhĩ nham o axpên kamnhar tỳx kaprỳ.

43—No ixkôt mẽ kot amnhĩ nhĩpêx xwỳnhjaja koja mẽ mẽ kurom mex kumrêx nê pa. Kot paj mẽ ho mex rax nê nhũm mẽ mex rãhã nê pa ho pa. Tĩrtũm kot kormã pika nyw nhĩpêx mã xwỳnhhta kamã nhũm mẽ mex kumrêx nê pa ho pa. E kêr ka mẽ ixujarênhja ma nê kãm ajamxpêr tỳx rãhã ho apa. Anê.

Mê hikukrêx mex o hpimxur jarênh

Piripos 3.7

44 Nhũm Jejus arĩ mẽ ixpiitã mẽ inhmã tanhmã ujarênh to. Nom hprĩ hã ujarênh kêt nê. Kê axte mẽmoj tã kuxi nê mẽ inhmã tanhmã ujarênh to nê mẽ inhmã:

—Mê ate ixkôt amnhĩ xunhwỳr xwỳnhjaja te mẽ apê mẽ hikukrêx mex ã pika japrôr xwỳnhhta pyràk. Koja mẽhõ mẽ hikukrêx mex jamỳ nê o tẽ nê nhỹri amnhĩm ho amũxu. Kaxyw kakwỳ nê kamã hagjê nê hity hpa nê ma akupỹm tẽ. Hãmri nhũm jãã nhũm mẽhõ tẽn kãm kato. Hã pikata kakwỳ nê kãm kato nê omu nê hkĩnh nê. Nê hamaxpêr o: “E pa ma tẽ nê inhôrkwỳ kamã ixkukrêx piitã ho wênê hpa nê hpãnhã kàxpore jamỳ nê ho amnhĩm mẽ hikukrêx mex ã pika japrô nê amnhĩm mẽmoj mexta o ixàrik pa.” Anhỹr o hamaxpêr nê akupỹm hity hpa nê ma akupỹm tẽ. Hãmri nê mẽmoj mexta gryk ã õ mẽmoj piitã ho wênê hpa. Hikukrêx nê òrkwỳ nhũm piitã ho wênê hpa. Hãmri nê hpãnhã kàxpore jamỳ nê ma o tẽ nê amnhĩm pikata japrô. Hãmri nê ma akupỹm hwỳr tẽ nê kamã mẽ hikukrêx mexta kwỳnh pa nê ho õ kumrêx.

—Tã te mẽ ate mẽhõ kot ã amnhĩ nhĩpêx anhÿr xwÿnhnta pyrãk. Na ka mẽ urãk nê inhgryk ã amnhĩ tomnuj kaga hpa nê hpãnhã ixkõt amnhĩ nhĩpêx. Te mẽhõ kot mẽmo mẽ hikukrêx mex gryk ã hikukrêx tũm piitã kaga hpar nê mẽ hikukrêx mex o hpimxur xà hã pikata japrõr pyrãk. Anê.

Mêhõ kot kên jaxênh japrõr jarênh

45Nhũm Jejus arĩ mẽ inhmã awjarê nê mẽ inhmã:

—Nê ja. Na htem kãm hkĩnh nê hamakêtkati nê ri hpa hprãm xàj Tĩrtũm kõt amnhĩ xunhwÿ nê hkõt ri amnhĩ nhĩpêx rãhã ho pa. Te mẽhõ my kãm kên jaxênh mex prãm nê ma ri hapêr o pa xwÿnhnta pyrãk. 46Nê ra nhÿri omu nê ma tẽ nê prês ã mẽ hkukja. Nhũm mẽ kãm hã ho ohtõ nê harê nhũm ma akupÿm tẽ nê kãm ho õ hprãm xàj hikukrêx piitã ho wênê hpa. Hãmri nê kàxpore jamÿ nê o tẽ nê amnhĩm ho haprõ. Kên jaxênh mexta pix gryk ã hikukrêx piitã ho wênê hpa nê hpãnhã ho amnhĩm haprõ.

—Tã ja pyrã nê na ka htem amex nê ajamakêtkati nê axãmnhĩx ri apa hprãm xàj ixkõt amnhĩ xunhwÿ nê ixkõt pix mã amnhĩ nhĩpêx o apa. Anê.

Kryhti jarênh

Matêwre 13.24-30, 13.36-43

47-48Nhũm Jejus arĩ mẽ inhmã awjarê nê mẽ inhmã:

—E Tĩrtũm kot nhÿrmã tanhmã mẽ harênh to xà hã arĩgro kot paj ixprĩ hã tanhmã mẽ amã harênh to. Te ho mẽmyjaja kot himõ kamã kryhti rênh pyrãk. Kojã mẽ gõx kãm kumẽ nê akupÿm ho api nhũm kamã tep ohtõ nê. Nhũm omu nê kÿx pê amgrã kamã hkapĩ nê ahpÿnhã ri tanhmã kamã kute kawrà. Nê kamã mex kawrà nê kawà kamã kugjê nê mẽ kot hkur kêtja nhũm nhãm kurê. 49Ja pyrã nê Tĩrtũm kot ahpÿnhã ri tanhmã mẽ kot amnhĩ nhĩpêx to hã mẽ omunh xà hkõt tanhmã mẽ hipêx to kaxyw arĩgrota ã ã mẽ hipêx anê. Kojã kapêr o mẽ wrÿk xwÿnhnjaja mẽ kot hkõt amnhĩ xunhwÿr xwÿnhjê nê mẽ kot amnhĩ tomnuj o mẽ pa xwÿnhjê kawrà hpa. 50Nê te mẽ kot tep mex nê tep punu kawrà nê nhãm rênhta pyrãk o mẽ hipêx nê ma kuwy hwÿr mẽ o mra nê kamã mẽ kurê. Nhũm mẽ tee ri amnhĩ xà htÿx ã maj amÿra nê tee ri amnhĩ nhĩpêx kaprÿ. Anê.

Nhũm pre ã Jejusja axte mẽ ixpê hkõt mẽ ixpa ho mẽ ixpa xwÿnhjê mã ujarênh anê. 51Hãmri nê mẽ inhmã:

—E xàn ka mẽ atã aprĩ hã ixujarênhnta ma nà?

Anê pa mẽ kãm:

—Tÿ. Nà na pa mẽ atã ixprĩ hã mar mex nê. Anê.

52Hãmri nhũm mẽ inhmã:

—Tôe. Nà ãm hãmri. Na ka xep mē ra ixte mē ahkre nywta mar mex nē. Nē mē akwỳjaja mãânēn Tirtũm kapēr tũm mar mex nē. Te mē apē mēhō apkur xà rax pyrà nē ma ho mē piitã mē hipêx o ri mē hkôt paja pyræk. Ja pyrà nē kêr ka mē ma mē piitã mē hkôt Tirtũm mē wa ixkapēr o mē ahkre ho ri mē hkôt apa. Anē.

Najare nhõ xwỳnhjaja kot Jejus kaga hã mē harēnh

Makre 6.1-6; Rukre 4.16-30; Juãw 1.11

53 ã Jejus mē inhmã ujarēnh par anē. 54 Hãmri nē ma akupỹm Najare hwỳr mō nē Tirtũm kapēr o mē ahkre xà hã ixkre hwỳr tē nē axà nē mē ahkre ho nhỹ. Nhũm mē amnhĩ jaēr pē tanhmã kot mē ahkre hto hã kuma nē tee ri hkukamã hamaxpēr nē axpēn mã:

—Tk. Kwa kêp mē panhĩõ htã tanhmã kot we amnhĩ to nē ã àhpumunh tỳx kôt mē pamã kapēr anē nē ri mē kãm aa mē kot mēmoj pumunh kêt kwỳ ho anhỹr o pa? 55-56 Na pre mē panoo mã hprêk nhũm mē pahte pahprĩ hã hkwỳjê pumunh. Kêp pĩ kuprãr xwỳnh Juje mē hprõ Marir wa hkraa. Nē kêp Xiakre nē Juje nē Simãw nē Jut mē htõõ. Nē htõxjaja jar mē pakamã pa nhũm mē pahte mē piitã mē omunh mex kênã kot kêt we mē kurom ã àhpumunh tỳx anē. Anē.

57 Hãmri nē kamã gryk nē hkaga. Hãmri nhũm tee ri amnhĩ tã mē omu nē mē kãm:

—Nà Tirtũm nhỹ hã kapēr jarēnh o mē pa xwỳnhjaja na htem krĩ hkwy kamã kãm mē mar prãm nē. Nom õ krĩ kamã mē kot karàre rũm hprêk kãm omunh xwỳnhjaja na htem kuma nē ãm kuma. Anē.

58 Tã mē kot amnhĩ kaxyw hkôt hamaxpēr kêt jakamã nhũm tee ri mē kãm aa mē kot mēmoj pumunh kêt kwỳ ho anhỹr rax prãm. No ãm mē kãm mēmoj to grêre nē ho anē.

Mē kot Juãw Paxis pĩr ã mē harēnh

Makre 6.14-29; Rukre 9.7-9

14 ¹Tã nhũm pika pē Garirej kamã mēõ pahihti Erox Jejus jarēnh ma ²nē tee ri hkukamã hamaxpēr nē hã õ pôristi mã kapēr nē mē kãm:

—Kwa pēr Juãw Paxis na nà? Ra ixte hã ixãmnnēnh nhũm mē kot hpĩr tã mãn tanhmã amnhĩ to nē akupỹm htĩr. Nà pēr tãm kênã. Jakamã na hte aa mē kot mēmoj pumunh kêt kwỳ ho anhỹr o pa. Anē.

³⁻⁵Na pre ra Erox htõ pē hprõptàn ho hprõ. Tõ arĩ htĩr tã nhũm axtem nē kêp utà nē ho hprõ. Hãmri nhũm Juãw Paxisja harēnh ma nē hã kãm akir nē kãm:

—Kwa Eroxis kêp atõ hprõ kênã na ka kêt axtem nē kêp utà nē ho aprõ. Kwa ja omnuj tỳx o omnuj tỳx. Anē.

Hāmri nhūm amnhĩ tā kuma nē kamā gryk nē kot hpĩr kaxyw. Tā nom nhūm Ijaew kot axpēn mā kēp Tĩrtūm nhỹ hā kapēr jarēnh xwỹnh ā harēnh jakamā nhūm mē umaj hpĩr kēt nē. Ām ho prēs nē haxà nhūm hkrĩ ho hkrĩ.

6Tā nhūm jāã nhūm Erox kator ā arĩgro kato nhūm mē hā akuprō nē hā hkĩnh. Hāmri nhūm hprō nyw kra niti mē hwỳr axà nē ahte mē hipòk ri mē kām gre. Mē kot omunh nē kamā hkurē kaxyw nhūm mē noo mā hpijaam kēt nē mē kām gre o xa. Hāmri nhūm pahi Erox omu nhūm ja kām mex nē nhūm hkĩnh nē kamā nopyma nē. 7Hāmri nē kām:

—Nà ãm hāmri na ka ã mē inhmā amnhĩ nhĩpêx anē. Jakamā kwa māmri mēmoj tā ixwỳ. Amā mēmoj prām xà hkôt hā ixwỳ kot paj amā kugō. Ām hāmri na pa amā anē. E mēmoj na amā hprām? Anē.

8Hāmri nhūm kuma nē kām:

—Ma Juāw Paxis krā na pa inhmā hprām. Inhmā hkrā krāhta nē pasiiti kamā axà nē ixwỳr o tē nē inhmā agō. Anē.

Ra katorxà kot kaxyw kām karō jakamā nhūm ā hā hwỳr anē. 9Hāmri nhūm Eroxja tee ri kuma nhūm ja kēp omnuj nē. Nom ra mē pikuprōnh rax xwỹnhjê nhĩpòk ri mē noo mā kot kām: “E māmri amā mēmoj prām xà hkôt hā ixwỳ pa amā kugō.” Anhỹr jakamā kām kot kēp nē hprām kēt nē. Hāmri nē Juāw Paxis wỳr õ pôristi hkwỳ rē 10nhūm mē ma mē hagjēnh xàta wỳr mra nē unē nē mut krāhta. 11Hāmri nē hkrā mỳ nē pasiiti kamā kuxà nē ma akupỹm nita wỳr o tē nē kām kugō nhūm kumỳ nē ma katorxà hwỳr o tē nē kām kugō.

12Hāmri nhūm Juāw Paxis kôt mē pa xwỹnhjaja tee ri mē kot hpĩr ā harēnh ma nē ma hwỳr mra nē kumỳ nē ma o mōn haxà. Hāmri nē ma Jejus wỳr mra nē kām harē.

Jejus kot mē ho ohtō nē mē kām mē õ hā harēnh

Makre 6.30-44; Rukre 9.10-17; Juāw 6.1-14

13Hāmri nhūm Jejus Juāw Paxis jarēnh ma nē hkaprĩ nē. Nē ma himō nhĩkjê hwỳr kapôt ā mōr kaxyw pàr krem axà nē ma mō. Pa mē hkôt ixpa ho ixpa xwỹnhjaja ma hkôt mra. Hāmri nhūm krĩ hkwỳ kamā mē pa xwỹnhjaja harēnh ma nē ohtō nē ma mē inhĩhkrepi kap mra. Nē ra amnhĩ to wa nē mē inhmōr xàja wỳr pōj nē mē ixkutêp hkrĩ. 14Jakamā pa mē mō nē mē hwỳr pōj nē mē omu. Hāmri nhūm Jejus mē omu nē kām mē hkaprĩ nē mē kām mē à xwỹnhjê ho mex pa.

15Tā nhūm ra myt àr kaxyw pa mē hkôt ixpa ho ixpa xwỹnhjaja tee ri mē omu nē Jejus wỳr mra nē kām:

—Kwa na ra amỹkry htỳx nē. Amnhĩ nē mē hano kê mē ma nhỹri krĩ hkwỳ hwỳr mra nē tokyx amnhĩm mēmoj japrō nē kuku. Mo jar mē apkur xà hā mēõ? Jar akunĩ pix kēnā. Anē.

16Hāmri nhūm mē inhma nē mē inhmā:

— Nà kot paj mẽ hanor kêt nê. Mẽ kajaja kot kaj mẽ kãm õ nhũm mẽ apku. Anê.

17-21 No nhũm mẽ ohtô rax kumrêx. Mẽmyjaja kêp 5.000. Nê kaxyw mẽ hprõ nê mẽ hkrajaja. Jakamã nhũm Jejus ã mẽ inhmã kapêr anê pa mẽ tee ri mẽ hkukamã ijamaxpêr nê kãm:

— Kwa nà mẽ panhõja raxti hã. Mẽ panhõ pãwti kêp sîk pix. Nê kaxyw tep gràja pijakrutre kênã kot kêt mẽ piitã mẽ hipêx. Nà xà kot paj mẽ ma mra nê nhÿri mẽ kãm mẽ mẽmoj japrõ nhũm mẽ kuku? Anê.

Hãmri nhũm mẽ inhmã:

— Nà pu mẽ kãm mẽmoj japrõr kêt nê. Kot puj mẽ kãm mẽ panhõta o anhgrà. E mẽ kãm anê kê mẽ ahpÿnhã ri hije nê hkrĩ hpa. Anê.

Hãmri pa mẽ kuma nê mẽ kãm anê nhũm mẽ piitã hkrĩ hpa. Hãmri nhũm Jejus pãwti mẽ tepja jamÿ nê kaxkwa hwÿr rît nê ho Tirtũm wÿ nê kãm:

— Pa Papaj? Nà apê mẽ inhmã mẽ inhõ ho apa xwÿnh jakamã amex o amex. Anê.

Hãmri nê mẽ kãm ho hkry hpa nê hkõt mẽ ixpa ho mẽ ixpa xwÿnhjê mã kugõ pa mẽ ô ri ho mẽ hipêx pa. Nhũm mẽ piitã apkur o hkrĩ. Mẽõja grire htã nhũm Jejus tanhmã mẽ kãm ho rax to nhũm mẽ ohtô rax kumrêx tã piitã kuku nê ho õhy htu hpa nhũm arĩ mẽõ jakrêx prã. Hãmri pa mẽ akupÿm hakrêx o akuprõ nê ho kawà ho 12 nê ho nÿt pa.

Jejus kot gô krãhkà hã ãm nê htêm ã harênh

Makre 6.45-52; Juãw 6.15-21

22-23 Tã nhũm Jejus mẽ ixpê hkõt ixpa ho ixpa xwÿnhjê mã anê pa mẽ akupÿm pàr mã agjê nê ma xarmã hkukamã mõ. Hãmri nhũm mẽ kot mar o kuhê xwÿnhjê jano nhũm mẽ ma akupÿm hapêx. Hãmri nhũm Jejus kot Tirtũm mã amnhĩ jarênh kaxyw ahte tẽ nê hixêt ã api nê himõk ã kãm amnhĩ jarênh o nhÿ.

Gaa nhũm ra kamàt nhũm arĩ ahte hixêt nhĩmõk ã nhÿ.

24 Rôm pa mẽ pàr kãm mẽ inhmõr xwÿnhjaja kormã himô nhĩpõk ri mõ. Pu nhũm kòk xapêr tÿx mẽ ixkaxpa. Nê gô axpên tak tÿx nê pa mẽ tee ri rrêmti ho gô rênh nhĩpêx nê tee ri axpên pumu.

25 Tã nhũm krãhyre kà nhũm Jejus man mẽ ixkõt gô krãhkà hã xan tẽ 26 pa mẽ amnhĩ wÿr omu. No nhũm kormã hirã mex kêt jakamã pa mẽ ixprĩ hã omunh mex kêt nê. Hãmri nê tee ri omu nê mẽkarõ hã hkamnhix nê umaj ixàmra rax nê. 27 Hãmri nhũm mẽ inhmã kapêr nê mẽ inhmã:

— Tk. Kwa mẽ amã ma hkêt nê. Pa na pa mẽ akõt tẽ. Anê.

28 Hãmri nhũm Simãw Pêtre kuma nê kãm:

—Kwa xà ka na ka tē? Tôe apê mē inhō Pahihiti jakamā kwa amnhĩ wỳr ixwỳ pa apyrà nē gô krāhkà hã xa nē awỳr tē nà? Anē.

29Hāmri nhũm kām:

—Tôe mamrĩ amnē ixwỳr tē. Anē.

Hāmri nhũm kuma nē pàr rũm kato nē hwỳr tē. Uràk nē gô krāhkà hã hwỳr tē. 30Hāmri nē kormã htêp o htêm mē kôk xapêrta kamã ama nē tee ri amnhĩ kukamã hamaxpêr pê ra àr o mô. Hāmri nē àmra kamã Jejus mã amnhĩ to akir nē kām:

—Kwa tokyx ixto api Pahihiti. Anē.

31Hāmri nhũm hpa hã kupy nē ho àpir kurê kumrêx nē kām:

—Kwa pêr âm kormã ate amnhĩ kaxyw inhmã ajamaxpêr tỳx kêt. Mon ka we ixkamnàr rom māmri man ixwỳr atêmre hkêt nē? Anē.

32Hāmri nhũm wa akupỳn mē ixwỳr tē nē wa axà. Hāmri nhũm kôk katat kôt pinhkrênh pa nhũm gô tãm nôr kurê kumrêx. 33Hāmri pa mē Jejus kot ã amnhĩ nhĩpêx anhỳrja ã omu hāmri nē kãm mex o mex ã harē nē kãm:

—Kwa âm hāmri na hte amnhĩ pê Tirtũm Kra hã amnhĩ jarē. Nà apê Kra kênã. Anē.

Jenējare kamã Jejus kot akupỳm mē ho mex ã harênh

Makre 6.53-56

34Tã pa mē ra himô hã rê nē Jenējare hwỳr pôj. 35Hāmri nē ma kapê hã ri ixpa. Hāmri nhũm pika nhô xwỳnh kwỳjaja Jejus pumu nē mē piitã mē kãm harênh o hprôt nē ahpỳnhã hwỳr nhỹhỹnh mē à xwỳnhjê hã karô. Nhũm mē man mē ixwỳr mē o mra 36nē mē ho Jejus wỳ nē kãm:

—Pa? Kwa kê mē à xwỳnhjaja akupỳm mex kaxyw apê axê kupê nà? Anē.

Hāmri nhũm mē kãm:

—Tôe. Kwãr mē māmri mran hkupê. Anē.

Hāmri nhũm mē kuma nē axpên pãnhã hwỳr mra nē kêp ê pix kupênh tã ra akupỳm mex nē ma akupỳm mra.

Parijew nhô xwỳnh mē Tirtũm kapêr tũm o mē ahkre xwỳnhjê jarênh

Makre 7.1-13

15 1Tã nhũm Parijew nhô xwỳnh mē Tirtũm kapêr tũm o mē ahkre ho mē pa xwỳnhjaja Jerujarê rũm ma Jejus wỳr mra. Na htem mē ixkukamã mē inhĩgêjtê pyrã nē apkur kaxyw nē amnhĩ nhĩhkra kuhõnh ryy nē. Amnhĩ nhĩhkra htyk pix kuhõnh nē hkrĩ hkêt nē âm amnhĩ nhĩhkra kuhõnh japjêê nē. Nē õ prat kuhõnh japjêê nē kormã apkur kaxyw hkrĩ. Tirtũm kot ja hã mē omunh nē mē mex ã mē harênh ã amnhĩ kamnhix jakamã na pre ã amnhĩ nhĩpêx anhỹr o pa. Jakamã nhũm mē ma Jejus wỳr mra. 2Hāmri nē omu nē kãm:

— Pa Jejus? E kwa mẽ inhmã mẽmoj jarẽ. Amnepêm mẽ panhîgêtjaja na prem apkur kaxyw nẽ amnhĩ nhĩhkra kuhõnh japjê nẽ rĩ kormã apku. Tã pa htem arĩ ijaxwỳja ã amnhĩ nhĩpêx anẽ. No akõt mẽ pa ho mẽ pa xwỳnhjaja na htem mẽ ixpyrà nẽ ã amnhĩ nhĩpêx anhỹr kêt nẽ. Kwa mo na htem amnhĩ nhĩhkra tyk kuhõnh tokyx anẽ nẽ hkrĩ nẽ apku? Anẽ.

3Hãmri nhũm mẽ kuma nẽ mẽ kãm:

— Tk. Na ka htem ãm mẽ panhîgêtjê hkõt pix mã amnhĩ nhĩpêx o apa no Tĩrtũm kapêr kõt amnhĩ nhĩpêx kêt nẽ. 4Tĩrtũm na pre mẽmoj tã mẽ pamã karõ ho:

Kêr ka mẽ anhĩpêxà nẽ mẽ akatorxà wa hã apijaam nẽ mẽ ho ajuta rãhã ho ri apa. Kot kaj mẽ ã amnhĩ nhĩpêx anhỹr kêt nẽ tanhmã mẽ kãm akapêr punuj to ho ri apa. Hã koja mẽ akwỳjaja ja mỳrapê mẽ apa. Anẽ.

— Na pre ã Tĩrtũmja mẽ pamã karõ anẽ. 5No mẽ kajaja na ka htem ã akwỳjê mã karõ anhỹr kêt nẽ. ãm kapêrja kwỳm na ka htem mẽ kãm karõ nẽ mẽ kãm:

Kot kaj mẽ mẽmo arĩgro hã akàxpore japêr nom kêr ka mẽ ho tanhmã akatorxà rỳ anhĩpêxà ho ajuta hto kaxyw wa kãm hkwỳ nhõr kêt nẽ. ãm ho ate wa ho ajuta hkêt ã wa kãm amnhĩ jarẽ hãmri nẽ Tĩrtũm mã amnhĩ jarênh xà hã ixkre hwỳr o tẽ nẽ mẽ ixte tanhmã ixkreta ho mex to kaxyw mẽ inhmã agõ. Kot kaj mẽ ã amnhĩ nhĩpêx anẽ nhũm Tĩrtũm ja hã mẽ apumu nhũm ja kãm mex nẽ. Kêr ka mẽ ã amnhĩ nhĩpêx anhỹr o ri apa.

— Anhỹr o na ka htem mẽ kãm karõ ho ri apa. 6Nom Tĩrtũm kapêr tũm kot ã ja jarênh anhỹr kêt. ãm amnhĩ krã hkõt na ka htem ã mẽ kãm karõ punuj o ri apa anẽ. Te mẽ akapêrja mex o kot Tĩrtũm kapêr jakrenh pyrãk. 7Mẽ ate Tĩrtũm kõt amnhĩ nhĩpêx ã amnhĩ jarênh tã ãm amnhĩ to axêx nẽ hkõt amnhĩ nhĩpêx kêt nẽ. Na pre Tĩrtũm amnepêm mẽ akukamã tanhmã mẽ ajarênh to. Nhũm y hã mẽ kãm kapêr jarênh xwỳnh Ijaisja ô ri mẽ kãm mẽ ajarẽ nẽ hã kagà. Te Tĩrtũm tãm kot mẽ ajarênh pyrãk. 8Na pre mẽ akukamã mẽ ajarênh o:

Mẽ kãm ixkĩnh ã mẽ kot amnhĩ jarênh tã mẽ kãm ixkĩnh kêt. Na htem kãm ixprãm ã amnhĩ jarênh kaprỳ.

9 Mẽ kot ixkuhpa hã amnhĩ krã hkõt mẽmoj tã hkwỳjê mã karõ ho pa jakamã na htem kot ixkõt amnhĩ nhĩpêx o pa hã amnhĩ jarênh kaprỳ. Anẽ.

— Na pre ã Ijaisja Tĩrtũm nhỹ hã mẽ akukamã mẽ ajarẽ nẽ mẽ atã kagà anẽ. Anẽ.

Nhũm pre ã Jejus Parijew nhõ xwỳnhjê mẽ Tĩrtũm kapêr tũm o mẽ ahkre xwỳnhjê mã kapêr anẽ.

Mêmoj kot mê pahomnu hã harênh

Makre 7.14-23

10Tã nhũm Jejus amnhĩ wỳr mê kot mar o kuhê xwỳnhjê hwỳ nê axte mê kãm kapêr nê mê kãm:

—E mê inhma nê inhmar tỳx nê. 11Na hte Tĩrtũm kapêr tũm o mê ahkre xwỳnhjaja amnhĩ krã hkôt mê ate amnhĩ nhĩhkra kuhõnh japjê hã mê amã karõ ho pa. Nê amnhĩ krã hkôt mê axàpkur xà hã tanhmã mê amã karõ hto ho pa. Tĩrtũm kot ja hã mê apumunh kôt mê amex ã mê ajarênh kaxyw ã mêmoj tã mê amã karõ anê. Nom na hte Tĩrtũm tanhmã mê kot amnhĩ nhĩhkra kuhõnh to hã mê omunh xà hkôt tanhmã mê harênh to hkêt nê. Rỳ mê axàpkur xà pumunh kôt mê mex ã mê ajarênh kêt nê. Ja tanhmã kãm kute hkêt. Na hte ã mê kot amnhĩ nhĩpêx anhỳr ã mê omunh xà hkôt mê mex ã mê harênh rỳ mê mex kêt ã mê harênh kêt nê. Na hte mêmoj kur ã mê omu nê ãm mê omu nê hã tanhmã mê harênh to hkêt nê. ãm mê kapêr punuj rỳ mê kapêr mex ã mê mar kôt pix mã na hte tanhmã mê harênh to. Anê.

12Nhũm pre ã Jejus mê kãm kapêr anê pa mê hkôt mê ixpa ho mê ixpa xwỳnhjaja kuma hãmri nê hwỳr mra nê kãm:

—Kwa na ka ã mê kãm akapêr anê nhũm Parijew nhõ xwỳnhjaja tee ri ama nhũm ja mê kêp omnuj nê. Anê.

13-14Hãmri nhũm mê inhma nê tanhmã mê inhmã Parijew nhõ xwỳnhjê jarênh to nê hprĩ hã mê hkukamã mê harênh o:

—Tk. Kwâr mãmrĩ mê kêp omnuj. Mê kot Tĩrtũm kapêr tũm o mê ahkre ho pa htã na htem hkôt amnhĩ nhĩpêx kêt. Jakamã te mê nohkre xwỳnh kot amnhĩ nhĩpêx pyrãk. Kojã mēhõ nohkre htã amnhĩ kôt nhỹhỹm nohkre hõ ho mō hãmri nê wa hamê pry pumunh kêt nê htỳx mō hãmri nê nhỹri ahkrehti kamã tēm. Tã Parijew nhõ xwỳnhjaja te kot wam htēm xwỳnhhta pyrãk nhũm mê kot mê mar xwỳnhjaja te kot wam htēm xwỳnh kôt hõ htēmta pyrãk. Jakamã Parijew nhõ xwỳnhjaja mê kot mê mar o pa xwỳnhjê mê kojã mê hpimràatã nhỹrmã te ahkrehti kamã rôrôk par pyrãk o amnhĩ nhĩpêx nê mex kêt nê pa ho pa. Kojã kaxkwa kamã inhõ Papaj nhỹrmã amnhĩ nê mê hanor pa.

—Inhõ Papaj te kêp mêmo hy hkre ho pa xwỳnhhta pyrãk. Na htem mêmo hy hkre nhũm higrõt hapôj nê higrõt mex nê. Hãmri nhũm mê hwỳr mra nê omu nê nê mêmoj nhĩgrõt punuj jarê nê kurê. Ja pyrã nê kojã nhỹrmã inhõ Papaj amnhĩ nê Parijew nhõ xwỳnhjê janor pa nhũm mê mex kêt nê pa ho pa. Jakamã kwa kêr ka mê hkôt ri amnhĩ nhĩpêx kêt nê. Anê.

Nhũm pre ã Jejus mê ixte hkôt ixpa ho ixpa xwỳnhjê mã hprĩ hã Parijew nhõ xwỳnhjê hkukamã ã mê harênh anê pa mê mar o ixkrĩ.

15Hāmri nhūm Simāw Pêtre tee ri Tirtūm kot mẽ apkur xà hã mẽ omunh xà hkôt tanhmã mẽ harênh to hkêt ã harênh ma. Nê ãm tanhmã mẽ kapêr to pix ã mẽ mar kôt tanhmã mẽ harênh toja ma hāmri nê hã Jejus kukja nê kãm:

—Kwa mon ka ri ã ja jarênh anê Pahihti? Anê.

16Hāmri nhūm kuma nê hprĩ hã mẽ inhmã awjarê nê mẽ inhmã:

—Kwa xàn ka mẽ kormã aprĩ hã ja mar kêt nê? 17E pa ixprĩ hã mẽ amã harê ka mẽ inhma. Nà na htem mẽmoj ku nhūm hte mẽ hkrã hi hwÿr gjêx kêt nê. Na hte mẽ ôhy pix wÿr agjê nê gaa nê nhãm hapôj nê hapêx. Na htem mẽ apkur xàja ku nê ÿ hã tanhmã amnhĩ tomnu hto hkêt nê. Jakamã na hte Tirtūm ja hã mẽ omunh xà hkôt tanhmã mẽ harênh to hkêt nê. 18Ãm mẽ hkrã kamã mẽ hamaxpêr punuj pix nhÿ hã mẽ kot tanhmã amnhĩ tomnuj to jakamã na hte Tirtūm mẽ hamaxpêr ã mẽ omunh xà hkôt tanhmã mẽ harênh to. 19Koja mẽhõ tanhmã hamaxpêr punuj to nê ra hkôt amnhĩ tomnuj pix o pa. Na htem nhãm mẽ hpar o pa nê mẽ kêp ahkĩ nê amnhĩ to hêx nê mẽ hakwa kamã nhãm axpên mã mẽ hixi jarênh o pa. Nê nhãm mẽ kêp mẽ hprõ ho amnhĩkati nê mẽ hkuprÿ hwÿr mra nê mẽ ho amnhĩkati. Nê tanhmã ri axpên tomnuj to ho pa. 20Mẽ hamaxpêr punuj nhÿ hã na htem ã amnhĩ nhĩpêx anhÿr o pa. No na hte Tirtūm mẽ kot amnhĩ nhĩhkra kuhõnh japjê hkêt ã mẽ omunh xà hkôt mẽ kot amnhĩ to mex xwÿnh ã mẽ harênh kêt nê. Ja tanhmã kãm kute hkêt. Anê.

Jejus kot Ijaew kêt xwÿnh ni kamã ukaprĩ hã harênh

Makre 7.24-30

21Tã nhūm Jejus mẽ inhmã kapêr pa hāmri nê mẽ inhmã anê pa mẽ ma hkôt mõ. Ma Xir mẽ Sitôja wa pu hã ri ixpa. 22Nhūm mẽhõ nija omu nê hwÿr tẽ. Mẽ ixkĩnhã kêp Ijaew kêt tã hwÿr tẽ. Kanaã nhõ xwÿnh na pre. Tã Jejus wÿr tẽ nê kãm:

—Ka Pahihti Jejus? Apê Tirtūm kot mẽ ixwÿr amênh xwÿnh jakamã xê ixujarênh ma nê ixkamã axukaprĩ hkêt wehe. Na mẽkarõmnutija tanhmã ixpê ixkra ho nhūm ixpê omnuj tÿx kumrêx. Anê.

23Hāmri nhūm Jejus kuma nê ãm kuma nê kãm tanhmã nê hkêt nê. Jakamã pa mẽ ixpê hkôt ixpa ho ixpa xwÿnhjaja kãm:

—Kwa hano kê ma akupÿm têê ri. Na ãm ri mẽ pahkôt xatã hkrata jarênh pix o ri pa. Anê.

24Nom nhūm kot amnhĩ tã kamã hamak kaxyw tanhmã mẽ inhmã hã kapêr to nê mẽ inhmã:

—Nà ãm Ijaewjê pix wÿr na pre Tirtūm inhmê. Te mẽ kêp ôwêhti pikunor pyræk o na htem htÿx ri amnhĩ nhĩpêx o pa. Jakamã ãm mẽ hwÿr pix mã na pre inhmê. Na kormã inhmã tanhmã nhãm mẽ hkwÿjê jarênh to hkêt nê. Anê.

25Hāmri nhūm nitita tee ri amnhĩ tã kuma nê hwÿr tẽ nê kutã hkônkrã ho htêm nê nhÿ nê kãm:

— Xê ma we ixkamã axukapřĩ hkêt wehe. Anê.

26Hāmri nhūm kãm:

— Nà kormã. Na pre Tirtūm mẽ kêp Ijaewjê pix wÿr inhmê. Jakamã na pa kormã nhãm tanhmã mẽ akwÿjê ho mex to hkêt nê. Anê.

27Hāmri nhūm kãm:

— Ma ãm hāmri na ka akapêr. Nom ixpê Ijaew kêt tã mẽ kuxwar ãm ixto mex grire kêt wehe. Anê.

28Hāmri nhūm kuma nê kãm:

— Nà ãm hāmri na ka ã akra kaxyw inhmã ajamaxpêr tÿx anê. Jakamã kot paj nê mẽkarômnutita jano. Koja axte tanhmã apê ho hkêt kumrêx.

Anhÿr o kãm kapêrja rôm nhūm hkraja akupÿm mex kurê kumrêx.

Jejus kot mẽ à xwÿnhjê ho ohtô nê mẽ ho mex ã harênh

Makre 7.31-37

29Tã nhūm Jejus mẽ inhmã anê pa mẽ ixrohã krĩja pê ixkato nê ma himô rax pê Garirej wÿr mō. Nê nhÿri gō mÿri hixêt wÿr mō nê hã api nê ixkrĩ. 30Hāmri nhūm mẽ ohtô nê ma mẽ ixkôt mra. Nê mẽ à xwÿnhjaja nhūm mẽ hamÿ nê Jejus wÿr mẽ o mra. Na prem ohtô rax kumrêx. Ra ri mẽ pa hkêt xwÿnhjaja nê mẽ nohkre xwÿnhjaja nê mẽ hyk o mẽ pa xwÿnhjaja. Nê mẽ kapêr kêt xwÿnhjaja nê ahpÿnhã ri tanhmã mẽ à kute xwÿnhjaja nhūm mẽ hamÿ nê ma Jejus wÿr mẽ o mra nê kutã mẽ haxwÿ. Hāmri nhūm mẽ omu nê ahpÿnhã akupÿm mẽ ho mex pa. 31Jakamã na pre mẽ kapêr kêt xwÿnhjaja akupÿm kapêr mex nê. Nê ri mẽ pa hkêt xwÿnhjaja akupÿm mrrar mex nê. Nê mẽ hyk o mẽ pa xwÿnhjaja akupÿm tãm ri mra. Nê mẽ nohkre xwÿnhjaja akupÿm rĩt mex nê. ã ahpÿnhã akupÿm mex par anê. Hāmri nhūm mẽ kot hwÿr mẽ hamÿnh nê Jejus wÿr mẽ o mrrar xwÿnhjaja amnhĩ jaêr pê akupÿm mẽ mex ã mẽ omu nê mẽ kamã no puma nê hkĩnh nê. Hāmri nê Tirtūm mã mex o mex ã harê nê axpêh mã harênh o:

— Nà ãm hāmri mẽ panhō Tirtūmja ãm mex o mex. Anê.

Jejus kot mẽ ho 4.000 nê mẽ kãm mẽ ô hã harênh

Makre 8.1-10

32Tã nhūm Jejus mẽ ixte hkôt ixpa ho ixpa xwÿnhjaja amnhĩ wÿr mẽ ixwÿ nê mẽ ixkôt mẽ mrrar xwÿnhjê jahkre nê mẽ inhmã:

— E. Ka mẽ rĩ kam jajê pumu. Na pa ra inhmã mẽ hkapřĩ nê. Na mẽ pahkôt ri pa hã apkati axkrunêpxi nhūm ra mẽ kêp mẽõja hapêx pa. Koja mẽ apkur kêt rãhã ma akupÿm mẽ ô krĩ hwÿr pa hāmri nê pry hã hirot nê rôrôk o pa. Mẽ ô krĩ hwÿr awryy. Anê.

33Nhũm pre ã mẽ inhmã mẽ harênh anê pa mẽ tee ri kuma hãmri nê kãm:

— Kwa nom nhÿri kot pu mẽ kãm mẽmoj japrô nhũm mẽ tokyx kuku? Ja kapôt pix kênã. Nê mẽ ohtô griiã. Anê.

34Hãmri nhũm mẽ inhmã:

— No mẽ panhõ pãwtita? Tanhmã na arĩ kute nê hikwÿ? Anê.

Hãmri pa mẽ kãm:

— Nã ãm kêp 7 pix. Nê kaxyw tep kwÿ no ãm grêre. Kot mẽ ho dare kaxyw ã. Anê.

35Hãmri nhũm mẽ inhma nê mẽ ixkôt mẽ mrrar xwÿnhjê mã anê nhũm mẽ hkrĩ pa. 36Hãmri nhũm pãwti mẽ tep grêreta jamÿ nê ho Tirtũm wÿ nê kãm:

— Pa Papaj. Nã apê mẽ inhmã mẽ inhõ ho apa xwÿnh jakamã amex o amex. ãm amex kumrêx. Anê.

Hãmri nê mẽ kãm mẽmojta o hkry hpa nê mẽ inhmã kugõ pa mẽ ô ri ho xa nê ho mẽ hipêx pa. 37-38Hãmri nhũm mẽ piitã apku nê ôhy htu hpa. Nhũm prem mẽmyjaja kêp 4.000 nê kaxyw mẽnijaja nê mẽhprijaja. Mẽ ohtô rax kumrêx tã nhũm Jejus mẽõ ho mẽ hipêx pa. Hãmri pa mẽ hakrêx o akuprõ nê ho kawà ho 7 nê ho nÿt. 39Hãmri nhũm Jejus ma akupÿm mẽ ô krĩ hwÿr mẽ hano pa mẽ pãr krem agjê hãmri nê ma ijaxwÿja mõ. Ma pika pê Makatã hwÿr mõ.

**Parijew nhõ xwÿnh kwÿ kot aa mẽ kot mẽmoj pumunh kêt õ
ho anhÿr ã Jejus wÿr ã mẽ harênh**

16 ¹Tã pa mẽ ra hwÿr pøj nhũm Parijew mẽ Satusew nhõ xwÿnhjaja Jejus pumu nê hwÿr mra. Nê hêx rom kot kamã hamak kaxyw hwÿr mra nê kãm:

— Pa Jejus? E kwa mẽ inhmã aa mẽ ixte mẽmoj pumunh kêt õ ho anê nã? Pa mẽ ate ho anhÿr ã apumu nê Tirtũm kot mẽ ixwÿr amênh ã akôt ijamaxpêr kurê kumrêx. E kwa tokyx. Anê.

2-3Hãmri nhũm mẽ kuma nê mẽ kãm:

— Tk. Nã kot paj mẽ amã ho anhÿr kêt nê. Mẽ ate hã ixpumunh nê ixkôt ajamaxpêre kaxyw ã. Na ka htem kaxkwa kamã kakrã pumu nê axpên mã na wrÿk ã harê. Nê kaxkwa mex pumu nê axpên mã amgrã hã harê. Tã ixte tanhmã mẽ amã mẽmoj nhípêx to hã ixpumu nom Tirtũm kot mẽ awÿr inhmênh xwÿnh ã ixkôt ajamaxpêr kêt nê. 4Ãm mẽ ajamaxpêr punuj pix o na ka htem ri ajamaxpêr o apa. Ixpê Tirtũm kot mẽ awÿr inhmênh xwÿnh tã ka mẽ ja hã ixkôt ajamaxpêr kêt nê. Tã mẽ ate aa mẽmoj pumunh kêt kwÿ ixte mẽ amã ho anhÿr kaxyw ka mẽ inhmã hã karõ. Nã kot paj mẽ amã ho anhÿr kêt nê. Kormã. Kot paj ãm nhÿrmã te amnepêm Jõhti kot amnhĩ nhípêx pyrãk o amnhĩ nhípêx. E

ja pix kot paj mẽ amã harê. Nom kot paj mẽ amã aa mẽ ate mẽmoj pumunh kêt õ ho anhÿr kêt nê. Anê.

Nhũm pre ã Jejus mẽ kãm kapêr anê hãmri pa mẽ ixrohã mẽ kêp ixkato nê ma ixpa.

Jejus kot hkôt mẽ pa xwÿnhjê jahkre hã harênh

Makre 8.14-21

5Tã pa mẽ Jejus mẽ ixrohã ma mõi nê pàr mã agjê nê ma xarmã akupÿm rê nê hikjê hã mõi. Hãmri nê tee ri mẽ ixàpkur xà japêr nê axpên mã:

—Kwa na pu mẽ panhõ pãwti ho pajamakêtkati nê kure. Anê.

6Hãmri nhũm Jejus mẽ inhma nê tanhmã mẽ inhmã Parijew mẽ Satusew nhõ xwÿnhjê jarênh to. Nom pãwti hã kuxi nê mẽ inhmã mẽ harê nê mẽ inhmã:

—Kwa mẽ o kora. Kêr ka mẽ Parijew mẽ Satusew nhõ xwÿnhjê mẽ kêp pãw kaxkrit xà hkwy hpyr kêt nê. Anê.

7Hãmri pa mẽ tee ri kuma nê ixprĩ hã mar mex kêt nê. Nê arĩ kapêrta ã axpên kukjêr o hkôt mõi nê axpên mã:

—Kwa mẽ pahte mẽ panhõ pãwti rer jakamã mãn mẽ pahte mẽ õ pãw kaxkrit xà kwÿ hpyr nê mẽ pahkurê nà? Anê.

8Hãmri nhũm mẽ inhma nê mẽ inhmã:

—Hêxta waa nê. Mon ka mẽ ãm axpên mã mẽ panhõ pãwti hkêt pix jarênh o mõi? Pêr kormã mẽ ate amnhĩ kaxyw inhmã ajamaxpêr tÿx kêt. 9Jãã ixte mẽ anoo mã pãwti kêp 5 pix tã nhũm ixte ho mẽ kêp 5.000tajê nhĩpêx par. Nhũm mẽ kot hkur nê ho õhy htu hpar nhũm mẽ ate mẽõ jakrêx o apikuprõnh par nê ho kawà ho 12 nê ho hipu. 10Nê ham pãwti kêp 7 o mẽ kêp 4.000 nhĩpêx par nhũm mẽ kot hkur nê ho õhy htu hpar nhũm mẽ ate mẽõ jakrêx o apikuprõnh raxja. 11Ra ixte mẽ anoo mã ja ho anhÿr o axkrut tã ka mẽ ra hã ano hkêt nê arĩ axpên mã mẽ paxàpkur xà pix jarênh o ixkôt mõi. Nà mẽ paxàpkur xàja na pa harênh kêt nê. Parijew mẽ Satusew nhõ xwÿnhjê nhõ pãwti kaxkrit xà pix na pa hã kuxi nê mẽ amã tanhmã harênh to. Anê.

12Nhũm pre ã mẽ inhmã kapêr anê hãmri pa mẽ atã kuma nê kãm:

—Nà na pa xep mẽ hãmri tã ama. Xep mẽ ixte Parijew mẽ Satusew nhõ xwÿnhjê kapêr kôt amnhĩ nhĩpêx nê na ka mẽ ixkurê nê ã mẽ harênh anê. Anê.

Jejus kot amnhĩ tã hkôt mẽ pa xwÿnhjê kukjêr ã harênh

Makre 8.27-30; Rukre 9.18-21

13Tã pa mẽ axte Jejus kôt mõi nê pika pê Sejarej Piripos kamã kormã mõi nhũm Jejus amnhĩ tã mẽ ixkukja nê mẽ inhmã:

—E mẽ inhmã mẽmoj jarẽ. Tanhmã na hte mẽ akwỳjaja axpẽn mã ijarẽnh to wehe? Anẽ.

14Hãmri pa mẽ kãm:

—Nà na htem ahpỳnhã tanhmã ajarẽnh to. Na hte kamã mẽ hkwỳjaja ajarẽnh o finat Juãw Paxis ã ajarẽ. Nhũm kamã mẽ hkwỳjaja ato finat Eris ã ajarẽ nhũm mẽ hkwỳjaja tõhã apê Tirtũm nhỹ hã akapẽr o apa xwỳnhjê hõ akupỳm atĩr ã ajarẽ. Nẽ tõhã finat Jeremĩstija rỳ axtem hõ hã ajarẽ. Ẽ na htem ahpỳnhã axpẽn mã ajarẽnh anẽ. Anẽ.

15Hãmri nhũm mẽ inhma nẽ mẽ inhmã:

—No mẽ kajaja? Ixpê mẽhõ hã na ka htem axpẽn mã ijarẽ? Anẽ.

16Hãmri nhũm Simãw Pêtre kãm:

—Nà apê Tirtũm kot mẽ ixkaxyw axãm nẽ mẽ ixwỳr amẽnh xwỳnh na ka. Nẽ apê mẽ ixpiitã mẽ inhõ Pahi Maati na ka. Ẽ na pa htem axpẽn mã ajarẽnh anẽ. Anẽ.

17Hãmri nhũm kuma nẽ kãm:

—Nà ãm hãmri na ka ã ijarẽnh anẽ Simãw Pêtre. Nom amnhĩ krã hkõt na ka ã ijarẽnh anhỹr kêt nẽ. Tirtũm tãm kot amã ixto amnhĩrit xà hkõt na ka ã ijarẽnh anẽ. 18Nà akumrẽx na ka ã ijarẽnh anẽ. Tã koja mẽ apyrà nẽ nhỹrmã mẽ kot ixkõt amnhĩ xunhwỳr xwỳnhjaja ma hkwỳjê mã ja hã ijarẽnh o ri krĩ piitã hkõt pa. Hãmri nhũm mẽ hkwỳjaja mẽ kuma nẽ mẽ apyrà nẽ ixkõt amnhĩ xunhwỳ. Hãmri nhũm mẽ kệp ixprãm nõkati xwỳnhjaja tee ri tanhmã mẽ kot ijarẽnh toja ma nẽ ã ijarẽnh anhỹrja nẽ mẽ kãm kapẽr tã nom ho hkapyrỹ. Ẽ koja ixkõt mẽ kot amnhĩ xunhwỳr xwỳnhjaja mẽ kãm ijarẽnh o pa anẽ. Jao te mẽ apê kẽn nhũm ixte mẽ ato amnhĩm inhõrkwỹ nhĩpêx pyræk. Tã akumrẽx ate ã ijarẽnh kot anhỹr jakamã kot paj te ixte akumrẽx amỳnh nẽ ato ixtẽm nẽ inhõrkwỹ nhĩpêx kaxyw amnhĩm akumrẽx axãm pyræk o anhĩpêx Simãw Pêtre.

19—E kêt ka ma inhỹ hã tanhmã mẽ piitã mẽ kãm ijarẽnh to ho ri apa. Mẽ kot hprĩ hã amar kaxyw. Koja mẽ hkwỳjaja ama nẽ amnhĩ kaxyw ixkõt hamaxpẽr nẽ ixkõt amnhĩ xunhwỳ. Ka ja hã mẽ omu nẽ mẽ kãm: “E ra mẽ ate Jejus kõt amnhĩ xunhwỳr jakamã kot ka mẽ nhỹrmã ty nẽ ma kaxkwa hwỳr api nẽ Tirtũm mẽ wa kuri amex kumrẽx nẽ atĩr tũm nẽ apa ho apa.” Anhỹr o mẽ kãm ijarẽnh o apa. No mẽ kot akapẽr mar nẽ ãm mar nẽ ixkõt amnhĩ xunhwỳr kêt xwỳnhjaja ka mẽ kãm: “No mẽ kajaja mẽ ate Jejus kõt amnhĩ xunhwỳr kêt jakamã kot kaj mẽ nhỹrmã Tirtũm mẽ Krata wa kuri atĩr tũm nẽ apa ho apa hkêt nẽ.” Anhỹr o ã inhỹ hã mẽ kãm akapẽr anhỹr o ri mẽ hkõt apa. Jao te ate kaxkwa hwỳr saf pyr nẽ Tirtũm krajê mã kahê xà rẽn h nẽ Tirtũm kra hkêt xwỳnhjê pẽ kahê pyræk o amnhĩ nhĩpêx o apa. Anẽ.

Nhũm pre ã Jejus Simãw Pêtre mã kapẽr anẽ. 20Hãmri nẽ hpãnhã mẽ ixpiitã mẽ inhmã kapẽr nẽ mẽ inhmã:

—E. Kwa kêr ka mẽ kormã mẽ piitã mẽ kãm Tĩrtũm kot mẽ awỳr inhmẽnh ã mẽ kãm ijarẽnh o ri apa hkêt nẽ. Kormã. Anẽ.

Jejus kot amnhĩ kukamã amnhĩ jarẽnh ã harẽnh

Makre 8.31-33; Rukre 9.22

21Hãmri nhũm Jejus hprĩ hã amnhĩ kukamã tanhmã mẽ inhmã amnhĩ jarẽnh to nẽ mẽ inhmã:

—Nà mẽ kajaja mẽ ate aprĩ hã ixpumunh mex. No mẽ pahkwỳjaja kãm hprĩ hã ijarẽnh mar nẽ ixpumunh prãm kêt. Ijaew krãhtũmjaja nẽ Tĩrtũm kapẽr tũm o mẽ ahkre xwỳnhjaja nẽ patre krãhtũmjaja. Mẽ kãm hprĩ hã ixpumunh nẽ kãm ixkapẽr mar prãm kêt jakamã kot paj tokyx ma Jerujarẽ hwỳr mõi nhũm mẽ kamã ixpynẽ nẽ ixtak rax nẽ ixpĩ. Nom kot paj ixytk ã apkati axkrunẽpxi nhũm Tĩrtũm akupỳm ixto ixtĩr. Anẽ.

22Hãmri nhũm Simãw Pẽtre tee ri kot ã mẽ kãm amnhĩ jarẽnh anhỳrja ã kuma nẽ hwỳr tẽ nẽ hpa hã kupy nẽ mẽ ixpẽ ho kato nẽ mẽ ixkàx ã o xa. Nẽ ã kot amnhĩ jarẽnh anhỳrja nẽ kãm kapẽr nẽ kãm:

—Kwa nà Pahihti. Ri ã amnhĩ jarẽnh anhỳr kêt nẽ. Mo kot kêt mẽ ri axtem nẽ ã anhĩpẽx anẽ? Anẽ.

23Hãmri nhũm kuma nẽ hwỳr apkjẽ nẽ omu nẽ kãm:

—Tk. Te apẽ Satanasti kapẽr pyrãk o na ka ã inhmã akapẽr anẽ. Kot kaj ã akapẽr anẽ hãmri nẽ ixkõt apa hkêt nẽ. Tĩrtũm kãm hprãm xà hkõt na ã mẽ kot inhĩpẽx anhỳr kaxyw kẽnã. Tã ka Tĩrtũm jamaxpẽr o ajamaxpẽr kêt nẽ amnhĩ jamaxpẽr o ã inhmã akapẽr anẽ. Te apẽ ixpẽ axãmnrã xwỳnh pyrãk o amnhĩ nhĩpẽx. Anẽ.

Jejus krajaja kot tanhmã amnhĩ nhĩpẽx to hã mẽ harẽnh

Makre 8.34-9.1; Rukre 9.23-27; Juãw 12.24-26; mããnẽn Rõmãn 15.1; Wam Korõt 10.23-24; Karatas 5.24; Pĩrĩpos 2.4; Wam Pẽtre 4.1; Apokarip 2.10, 12.11

24Nhũm pre ã Jejus Simãw Pẽtre mã kapẽr anẽ hãmri nẽ hpãnhã mẽ ixpẽ hkõt ixpa ho ixpa xwỳnh piitã mẽ inhmã kapẽr nẽ mẽ inhmã:

—E kot kaj mẽ ixkõt amnhĩ xunhwỳr ã amnhĩ jarẽ hãmri nẽ mããnẽn amnhĩ jarẽnh o: “Jejus kẽp inhõ Pahihti jakamã kot paj kapẽr kõt pix mã amnhĩ nhĩpẽx rãhã ho ri ixpa. Kwãr ixkwỳjaja tanhmã hã inhĩpẽx hto.” Anhỳr o amnhĩ jarẽ.

25—Koja mẽ ixtã mẽ atõx pĩ rỳ tanhmã mẽ atõ hto ka ty. Tã nom koja akaxwỳnh ma ixwỳr àpir kurẽ kumrẽx. Hãmri ka ixkuri atĩr tũm nẽ amex rãhã nẽ apa ho apa. Nom kot kaj mẽ jar atĩr prãm xaj ixkaga hãmri nẽ inhõ krĩ hwỳr axàpir kêt nẽ.

26—Nẽ koja mẽhõ hikukrẽx rax gryk ã Tĩrtũm kaga. Tã nhỳrmã ty hãmri nẽ amnhĩ kõt hikukrẽx õ hpyr nẽ o mõi kêt nẽ. Koja tee ri kuwy

hwÿr mōr pymaj amnhĩ nê hikukrêx rax o amnhĩ pãnhã amnhĩrer prãm kaprÿ. Tanhmã koja amnhĩ to nê Tĩrtũm mã amnhĩre nê ma ô krĩ hwÿr api? Koja ã amnhĩ nhĩpêx anhÿr kêt nê.

27—Nê ixpê Tĩrtũm kot mē awÿr inhmēnh xwÿnh kot paj nhÿrmã kaxkwa rũm akupÿn mē awÿr wrÿ nhũm Tĩrtũm kapêr o mē wrÿk xwÿnhjaja man ixkôt wrÿ. Hãmri pa inhõ Papaj nhÿ hã ixte mē piitã tanhmã mē kot amnhĩ nhĩpêx to hã mē omunh xà hkôt ahpÿnhã tanhmã mē harēnh to. 28 ãm hãmri na pa ã mē amã amnhĩ jarēnh anê. Kot paj nhÿrmã akupÿn ixte mē ato amnhĩptàr kaxyw man mē awÿr wrÿ. Tã kot kaj mē akwÿjaja akupÿn ixwrÿyta kukamã tokyx ixte tanhmã ixte amnhĩ nhĩpêx to hã ixpumu. Anê.

Jejus kot hixêt prêk nhĩmõk ã hirã kamã ãm ã harēnh

Makre 9.2-13; Rukre 9.28-36; mããnhēn Sikũn Pêtre 1.16-18

17 1Tã nhũm semãnja hapêx nhũm Jejus ma nhÿri hixêt prêk wÿr mō. Nê kaxyw Simãw Pêtre nê Xiakre nê Xiakre htõ Juãwja nhũm ma amnhĩ kôt wa mē o mō. Nhũm wa mē mō nê hixêt prêk ã api nê himõk ã kuhê. 2Hãmri nhũm Jejus xep ra axtem nê xa. Axtem hkuk nhĩrã htÿx nê xa. Te myyti nhĩrã htÿx pyrãk. Nê ê haka htÿx kumrêx. 3Hãmri nhũm xep ja wa kaxkwa rũm hwÿr wrÿ nê kuri kãm kapêr o xa. Mojes mē Erisja wa nhũm hwÿr wrÿ nê kuri xa. Tĩrtũm amnepêm amnhĩ wÿr wa ho àpir tã wa akupÿn wrÿ nê Jejus mã kapêr o xa. 4Hãmri nhũm Jejus kôt mē mōr xwÿnhjaja wa mē omu nhũm Simãw Pêtre tanhmã hamaxpêr to nê Jejus wÿr tē nê kãm:

—Kwa Pahihti. Nà ãm hãmri na pu mē amnê mō. Kwa pu mē kritpêm jar axkamē nê tokyx panojarêt kêt nê. Pa mē amã pô nhĩrõnh o axkrunêpxi nê hipêx. Amã hõ nhĩpêx nê Mojes mã hõ nhĩpêx nê Eris mã hõ nhĩpêx ka mē kamã akrĩ. E kwa pa mē amã ho anê nà?

Anhÿr o kãm kapêr. Nom amnhĩ krã hkôt ã kapêr anê. 5Hãmri nê kormã ã kãm kapêr anhÿr rôm nhũm ra kakrã jaka htÿxja wrÿ nê wa mē hkunor pa nhũm wa mē kamã kuhê. Nhũm kakrã kamã Tĩrtũm mē kãm kapêr nê mē kãm:

—E ota Ixkra xa. Inhmã hapê ho inhmã hapê. E kêr ka mē kapêr mar tÿx rãhã ho ri apa. Anê.

6Hãmri nhũm mē tee ri kuma nê kãm ma htÿx nê umaj pikap rôrõk nê htu mÿrpê hikwÿ. 7Hãmri nhũm Jejus mē hwÿr tē nê mē hã ãhkra jaxwÿ nê mē kãm:

—E mē kãnhmã akuhê nê amã ma hkêt nê. Anê.

8Hãmri nhũm mē kuma nê kãnhmã rĩt nê Jejus pix pumu nhũm ahte xa nhũm kuri wa ãm xwÿnhhta wa ra ma akupÿm api. 9Hãmri nhũm mē kormã akupÿm hixêt nhĩmõk rũm mē ixwÿr wrÿk o mō nhũm Jejus mē kãm:

—E kêr ka mẽ ham ate mẽmoj pumunh xwÿnhnta kormã nhãm mẽ kãm harênh kêt nê. Kot paj nhÿrmã ty nê akupÿm ixtÿr ka mẽ rÿ kormã mẽ kãm ja hã ijarênh o ri apa. Anê.

10Hãmri nhũm mẽ kormã akupÿn mẽ ixwÿr wrÿk o mō nhũm mẽ Jejus mã:

—Kwa mẽ inhmã mẽmoj jarê. Na htem Tÿrtũm kapêr tũm o mẽ ijahkre xwÿnhjaja mẽ inhmã: “Eris kumrêx koja Tÿrtũm mẽ pahwÿr kumê nhũm Krisja kormã hapu hã wrÿ.” Anê. Na htem ã mẽ inhmã war ajarênh anê. Tã ka ra wrÿ nom kormã akukamã Erisja wrÿk kêt. Anê.

11Hãmri nhũm mẽ kãm:

—Nà ãm hãmri na prem ã wa ijarênh anê. Na pre ra ixkukamã te Eris kot amnhÿ nhÿpêx pyrãk xwÿnhnta tẽ nê ixkutêp mẽ kãm ijarênh o pa. 12Tã nom nhũm mẽ ja hã omunh kêt nê. Na prem axtem nê kãm hprãm xà hkôt tanhmã hipêx to nê kupÿ. Tã koja mẽ nhÿrmã ã hipêx anhÿr pyrãk o inhÿpêx. Anê.

13Hãmri nhũm mẽ ra hprÿ hã kuma nê axpên mã:

—Kwa Juãw Paxis pimràata na ã mẽ pamã harênh anê. Tapxipix na pre te Eris kot amnhÿ nhÿpêx pyrãk o amnhÿ nhÿpêx o pa. Tã tãm na mẽ pamã harê. Anê.

Jejus kot mẽhō hkra nê mẽkarōmnuti kator ã harênh

Makre 9.14-29; Rukre 9.37-43

14Tã nhũm mẽ ra akupÿm ahpar mã man mẽ ixwÿr hpôx o mō nhũm mẽ ohtô rax nê Jejus kutêp kuhê. Hãmri nhũm mẽhō myja mẽ omu nê mẽ kutã tẽ nê mẽ hkaxpa nê Jejus kutã hkôn krã ho tẽm nê nhÿ nê hkra ho kuwÿ nê kãm:

15—Pa Jejus. Kwa inhmã ixkra kamã axukaprÿ nê. Na hte mẽkarōmnutija xatã tanhmã ixpê ho nhũm hte ÿ hã mra nê rôrôk nê tōhã kuwy kamã rôrôk nê tōhã gôx kãm mran mrô nê ixpê homnuj tÿx nê. 16Tã pa akôt mẽ pa ho mẽ pa xwÿnhjê hwÿr o tẽ nom nhũm mẽ kot inhmã ho mex kaxyw tee ri tanhmã ho hkaprÿ. Kwa xà kot kaj akupÿm inhmã ho mex nà? Anê.

17Hãmri nhũm kuma nê mẽ ixte hkôt ixpa ho ixpa xwÿnhjê mã kapêr nê mẽ inhmã:

—Hêxta waa nê. Ra mẽ ate ixte Tÿrtũm nhÿ hã mẽ ho mex ã ixpumunh o ixkôt apa ryy htã kormã ixpyrà nê ã mẽ hipêx anhÿr kêt nê. Nà kormã mẽ kaxyw Tÿrtũm kôt mẽ ajamaxpêr tÿx kêt jakamã na ka mẽ tee mẽ ho mex kaxyw. Anê.

Hãmri nê myta mã kãm:

—E amnê ixwÿr akrata o tẽ pa omu. Anê.

18Hãmri nhũm kuma nê hwÿr o tẽ nhũm omu nê nê

mêkarõmnutija kator nhũm akupÿm mex kurê kumrêx. 19Hãmri pa mẽ ixte Jejus kôt ixpa ho ixpa xwÿnhjaja ja hã omu mẽ hkàx ã amnhĩ tã hkukja nê kãm:

—Kwa na pa mẽ axwakre kamã tee ri nê hanor prãm kaprÿ. Kwa mon pa mẽ apyrà nê nê hanor nhũm kator nê ma htêm kêt nê? Anê.

20-21Hãmri nhũm mẽ inhmã:

—Nà kormã mẽ ate mẽ kaxyw Tirtũm kôt ajamaxpêr tÿx kêt. Nom kot ka mẽ kaxyw hkôt ajamaxpêr tÿx hãmri nê hkôt amnhĩ nhĩpêx kukwak ri mẽmoj tã awÿ nhũm mẽ ama nê mẽ ate mẽmoj tã axàhwÿr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mũj mã akapêr nê kãm: “Kwa amnhĩ jarê nê ma tẽ nê gô xujanãr kãm mãn mrõ.” Anhÿr nhũm kot amar nê amar xà hkôt ã amnhĩ nhĩpêx anhÿr kurê kumrêx pyrãk. Ja pyrã nê kot kaj mẽ amnhĩ kaxyw Tirtũm kôt ajamaxpêr tÿx kukwak ri mẽmoj tã awÿ nhũm mẽ ama nê mẽ amã mẽmoj tanhmã ho rÿ mẽ amã mẽmoj gõ. Anê.

Jejus kot htyk kukamã amnhĩ jarênh ã harênh

Makre 9.30-32; Rukre 9.43-45

22-23Tã hãmri pa mẽ Jejus kôt ma mõi nê nhÿri pika pê Garirej kamã kormã ixpa. Hãmri nhũm Jejus axte amnhĩ kukamã mẽ inhmã tanhmã htyk ã amnhĩ jarênh to nê mẽ inhmã:

—Nà koja mẽ tokyx mẽ kãm ixtã amÿnê nhũm mẽ ixpĩ. Mẽ kot ixpĩr tã kot paj ixyk ã apkati axkrunêpxi nhũm Tirtũm akupÿm ixto ixtĩr. Anê.

Hãmri pa mẽ tee ri ã kot amnhĩ jarênh anhÿrja ã kuma nê ixkaprĩ htÿx kumrêx.

Jejus kot Tirtũm nhõrkwÿ hwÿr àr

Rõmãn 13.5-7; Wam Korõt 10.32-11.1

24Tã pa mẽ Jejus kôt ma mõi nê ra Kapanau hwÿr pøj. Hãmri nhũm mẽ kot Tirtũm mã amnhĩ jarênh xà hã ixkre ho mex kaxyw mẽ kêp kàxpore hkwy jamÿnh xwÿnhjaja mẽ ixpumu nê mẽ ixwÿr mra nê Simãw Pêtre mã kãm:

—Pa. Kwa xà na hte mẽ ajahkre xwÿnhja mẽ pahpê hkwyjê pyrã nê Tirtũm mã amnhĩ jarênh xà hã ixkre ho mex kaxyw kàxpore hkwy nhõr kêt nê nà? Anê.

25Hãmri nhũm mẽ kuma nê mẽ kãm:

—Tÿ kot mẽ kãm õr o pa kênã. Anê.

Hãmri nê ma mẽ ixkôt tẽ nê mẽ ixkôt mēhõ nhõrkwÿ hwÿr axà. Hãmri nê kot Jejus mã mẽ harênh mã tã nhũm ra hamaxpêr ã omu nê kumrêx kãm kapêr nê kãm:

—Kwa inhmã mẽmoj jarê Simãw Pêtre. Xà na hte pahi hkrajaja õ

papaj mã kàxpore hkwy nhõr o pa nà? Xà na hte ãm hkra hkêt xwýnh pixjaja kãm hkwy nhõr o pa? Anê.

26Hãmri nhũm kuma nê kãm:

— Nà mẽ kêp hkra hkêt xwýnh pixjaja na hte kãm õr o pa. Anê.

Hãmri nhũm Jejus kãm:

— Tỳ. Nà ãm hãmri na ka ja jarê. Na hte pahi hkrajaja õ papaj mã kàxpore nhõr kêt nê. Mẽ kêp hkra kênã. Tã ixpê Tirtũm Kra jakamã mo kaxyw kot pa kêt õrkwý hwýr inhgîx kaxyw kãm kàxpore hkwy gõ? **27**Tã nom kot paj õr kêt nhũm kàxpore hkwy jamýnh xwýnhjaja tee ri ja hã ixpumu nê axpẽn mã ixte amnhĩ tomnuj xwýnh ã ijarê. Jakamã e ma gõnhmã tẽ nê tep õ kanhê. Hãmri nê ho api nê apy nê hakwa jakjê nê kamã kàxpore htýxre pumu. Nê apy nê man o tẽ nê pahpãnhã kàxpore jamýnh xwýnhhta mã agõ. Anê.

Nhũm pre ã Jejus Simãw Pêtre mã karõ anê nhũm kuma nê ma hwýr tẽ nê kot kãm karõ xà hkõt ã amnhĩ nhĩpêx anê.

Mẽ kot amnhĩ to rũnh xwýnhjê jarênh

Makre 9.33-37; Rukre 9.46-48; mããnên Piripos 2.3-7; Wam Pêtre 3.4, 5.5-6

18 ¹Tã mẽ ixte Jejus kõt ixpa ho ixpa xwýnhjaja amnhĩ kukamã ijamaxpêr nê amnhĩ tã Jejus kukja nê kãm:

— Kwa mẽ inhmã mẽmoj jarê Pahihti. Nhỹrmã mẽ ixpê pahi nê anhĩhkõ hã mẽ ho amnhĩptàr o ri ixpata ã mẽ ixtõ kot paj we mẽ ho amnhĩptàr rax o ixkwýjê jakre? Anê.

2Hãmri nhũm mẽ inhma nê amnhĩ wýr mẽhprĩre hõ mã hpa ho apê nhũm hwýr tẽ nê mẽ ixkuri xa. **3**Hãmri nhũm Jejus omu nê hã mẽ inhmã:

— E mẽ inhma. Kêr ka mẽ apê pahi pyràk o tanhmã amnhĩ jarênh to ho ri apa hkêt nê. ãm te amarĩ ri mẽ apa pyràk o amnhĩ nhĩpêx. Te mẽhprĩre kot amnhĩ nhĩpêx pyràk. Kot kaj mẽ ã amnhĩ nhĩpêx anhýr o apa hkêt hãmri nê nhỹrmã inhĩhkõ hã mẽ ho amnhĩptàr kêt nê. **4**Jakamã kot kaj mẽ amã nhỹrmã inhĩhkõ hã mẽ ho amnhĩptàr o apa hprãm. Hã kot kaj mẽ te mẽhprĩre kot amnhĩ nhĩpêx pyrã nê amã amnhĩ to rũnh prãm kêt nê apa.

5— Nê kêr ka mẽ apê pahi kot amnhĩ nhĩpêx pyràk o tanhmã amnhĩ jarênh to ho apa hkêt nê. ãm te amarĩ ri mẽ apa pyràk o amnhĩ nhĩpêx. Jao nhỹri mẽhprĩjê hõ pumu nê kamã axukapri nê kãm mẽmoj tanhmã ho rý kãm mẽmoj gõ. Hãmri nê te pa ate tanhmã ixto mex to pyràk o amnhĩ nhĩpêx. Kot kaj mẽ ã amnhĩ nhĩpêx anhýr o apa hãmri nhũm Tirtũm ja hã mẽ apumu nê mẽ ate amnhĩ to rũnh kêt tã mẽ ate amnhĩ to rũnh xwýnh ã mẽ ajarê. E kot kaj mẽ amã amnhĩ to rũnh prãm hã kot kaj mẽ ã amnhĩ nhĩpêx anhýr o ri apa. Anê.

Mê kot amnhĩ tomnuj xwÿnhjê hkukamã mẽ harênh

6Nhũm Jejus arĩ mẽ inhmã mẽhprĩ jarê nê mẽ inhmã:

— Nê mẽhprĩre na htem amnhĩ kaxyw ixkôt hamaxpêr o pa. Tã koja mẽhõ inhnê tanhmã mẽ kãm kapêr to. Mẽ kot tanhmã amnhĩ tomnuj to hprãm xàj tanhmã mẽ kãm kapêr to ho pa. Hãmri nhũm mẽ kuma nê mẽ kapêr xà hkôt tanhmã amnhĩ tomnuj to. Hã koja Tĩrtũm ja hã omu hãmri nê kot inhnê tanhmã kãm kapêr to xwÿnhhta pumu nê homnuj tÿx nê. Te mẽ kot mẽhõ pynênh nê mut ã kên pytĩ hõ nhôr nê ma o htêm nê gô xupÿm kãm mẽnh pyræk o hipêx. Te ho ja pyræk no ãm homnuj tÿx o hakre.

7— Nê koja mẽhõ inhnê tanhmã mẽ kot ixkôt amnhĩ xunhwÿr xwÿnhjê hõ mã kapêr to. Kot tanhmã amnhĩ tomnuj to hprãm xàj tanhmã kãm kapêr to. Rÿ kot ixkaga hprãm xàj tanhmã kãm kapêr to. Hãmri nhũm kuma nê mar xà hkôt ixkapêr kwÿm tanhmã amnhĩ tomnuj to. Tã koja Tĩrtũmja ja hã omu nê mãânên kot inhnê kêp àmnàr xwÿnhhta pumu nê ã inhnê kãm kapêr anhÿrja mÿrapê homnuj tÿx kumrêx.

8-9— E kwa mẽ okora. Kot kaj mẽ anhĩkra ho tanhmã amnhĩ tomnuj to rÿ apar o tanhmã amnhĩ tomnuj to. Hã kêr ka mẽ axte ã amnhĩ nhĩpêx anhÿr pymaj te mẽ ate amnhĩ pê krâhyr nê mẽnh pyræk o amnhĩ nhĩpêx nê axte ã amnhĩ tomnuj anhÿr kêt nê. Rÿ ka mẽ ano ho mẽmoj punuj pumu. Hã kêr ka kãm ajamaxpêr pix o apa pymaj te mẽ ate amnhĩ pê ano katøk nê kaxàr nê mẽnh pyræk o amnhĩ nhĩpêx nê nhãm arĩt kurê kumrêx. Kêr ka mẽ ã amnhĩ nhĩpêx anhÿr o ri apa. Hãmri nê nhÿrmã ty nê ma Tĩrtũm nhõ krĩ hwÿr api. No kot ka mẽ arĩ akutã ano nê arĩ akutã apar nê arĩ akutã anhĩkra rãhã ri apa htã ho amnhĩ tomnuj o apa. Hãmri nê nhÿrmã ty nê ate amnhĩ tomnuj mÿrapê ma mẽ kot amnhĩ xà htÿx kamã hamak tũm xà hwÿr ma mõ.

10-11— Nê kêr ka mẽ mẽhprĩrejê kamã axukaprĩ rãhã ho apa. Na hte kaxkwa kamã Tĩrtũm kapêr o mẽ wrÿk xwÿnh kwÿjaja Tĩrtũm mã mẽ hamãr mex o pa. Tã koja mẽhõ tanhmã kêp hõ hto nhũm mẽ hã omu nê ma tẽ nê Tĩrtũm mã harênh kurê kumrêx. Anê.

Ôwêhti pikunor jarênh

Rukre 15.3-7

12Nhũm Jejus arĩ mẽ inhmã kapêr nê mẽ inhmã:

— E pa mẽ amã awjarê ka mẽ ixujarênh ma. Nà koja mẽhõ my hkrit ôwêhti xohtô nê. Nê apkati mẽ ma hamãr o pa. Hãmri nhũm pyxire nê tanhmã amnhĩ to nê kêp akunok. Kwÿ kaga nê ma nhÿhÿm ahte tẽ nê kêp akunok. Hãmri nhũm mytita ma akupÿm o mõi kaxyw hkwy ho pikuprõnh pa hãmri nê tee ri hkwy kaêx ã pikunor xwÿnhhta japêr nom nhÿri omunh kêt nê. Hãmri nê tee ri hkukamã hamaxpêr nê ma hkwy

ho mō nê nhÿri kure. Kutêp apkur kaxyw nhÿri kure hãmri nê ma akupÿm pikunor xwÿnhta japêr o tê. **13**Hãmri nê hapêr ryy nê nhÿri hwÿr kato nê omu nê hkĩnh nê. Hãmri nê kutu nê ma akupÿm o tê. Na hte pikunor kêt xwÿnhjê nhÿ hã hkĩnh tã pikunor xwÿnhta mã kato nê hkĩnh tÿx nê. Krit xohtô htã nom ãm kãm ho pixi nê ho hpikunor prãm kêt. ã mē ujarênh kot anhÿr. **14**Ja pyrã nê Tirtũm kãm mēhõ pyxi nê nhÿrmã ma kuwy wÿr mōr prãm kêt kumrêx. Mē piitã mē kot hkôt amnhĩ xunhwÿrja na kãm hprãm. Anê.

Jejus kôt mē pahtôjê hõ kot mē pahtomnuj jarênh

15Nhũm Jejus arĩ mē inhmã kapêr nê mē inhmã:

— Nê ja. Koja ixkôt mē atõ rÿ mē atõx tanhmã atomnuj to. Hã kêr ka ma hwÿr tē nê kot tanhmã anhĩpêx to hã amnhĩ tã kãm akapêr. Nom kêr ka mē nhãm mēhõ mã harênh kêt nê. ãm tanhmã kot ato xwÿnhta pix wÿr tē nê kumē war axpēn mã akapêr nê war axpēn ma. Nhũm ama nê akupÿm tãm anhĩpêx hã kêr ka akupÿm te ixkôt kêp atõ rÿ atõx pyrãk o ka wa axpēn nhĩpêx nê axte jam ajamaxpêr kêt nê. **16**Nom koja ama nê ãm ama rÿ tanhmã ato hkêt ã amnhĩ jarênh japêr. Hã kêr ka ma akupÿm tē nê akupÿm amnhĩ kôt Kris kôt atõ rÿ atõx o axkrut rÿ mē ho axkrunêpxi nê amnhĩ kôt hwÿr mē o mra kê mē axpēn tã war ama. Amnepêm Tirtũm kapêr ã kagà htũm kot ja jarênh o:

Kêr ka mē atõ tanhmã axpēn nhĩpêx to. Hãmri nê hã axpēn mã akapêr kaxyw nê amnhĩ kôt akwÿjê ho axkrut rÿ ho axkrunêpxi nê akupÿm hwÿr mē o mra kê mē axpēn tã war ama. Anê.

— ã Tirtũm kapêr ã kagà htũm kot ja jarênh kot anhÿr. **17**Jakamã kêr ka mē amnhĩ kôt akupÿm kot tanhmã ato xwÿnhta wÿr mē o mra kê mē atã kuma. Hãmri nhũm arĩ mē kãm kot tanhmã ato hkêt ã amnhĩ jarê ka tee ri amnhĩ tã omu nê ikrêsti hwÿr tē nê Kris kwÿ hã mē pikuprõnh xwÿnhjê mã harê. Kê mē ama hãmri nê ja hã axte kot tanhmã ato xwÿnhta mã kapêr. Nhũm mē mar kêt nê arĩ kot tanhmã ato hkêt ã amnhĩ jarê ka mē amnhĩ nê hanor kurê kumrêx. Hãmri nê te kêp Kris kôt mē atõ rÿ mē atõx kêt pyrãk o hipêx.

18— Nê koja mēhõ ixkôt amnhĩ xãm nê Inhĩpêêxã Tirtũm kôt ri amnhĩ nhĩpêx o pa. Ka mē ja hã omu nê inhÿ hã tanhmã kãm akapêr to nê kãm: “E ra ate Jejus kôt amnhĩ xãm jakamã kot kaj nhÿrmã Tirtũm mē wa kuri amex kumrêx nê atĩr tũm nê apa ho apa.” Anhÿr o kãm akapêr. Nom mē kot ixkôt amnhĩ xunhwÿr kêt xwÿnhjaja ka mē ã mē kãm akapêr anhÿr kêt nê. ãm inhÿ hã mē kãm: “No mē kajaja mē ate Jejus kôt amnhĩ xunhwÿr kêt jakamã kot kaj mē Tirtũm mē Krata wa kuri atĩr tũm nê amex nê apa hkêt nê.” Anê. Kêr ka mē inhÿ hã ã ahpÿnhã tanhmã mē kãm akapêr to ho apa anê.

19-20—Nê kot kaj mē Tirtūm mā amnhī jarēnh kaxyw te axkautre rý axkrunēpxire htā axpēn wýr akuprō nom mē kapxipixjaja apikuprōnh kêt nē. Kot paj mē akaêx ā mē anhīhkô hā mē amar o xa. Mē ate ano ho ixpumunh kêt tā pa wa mē anhīhkô hā mē amar o xa. Jakamā kot kaj mē axpēn wýr akuprō nē mēmoj tā Tirtūm wý nhūm kaxkwa kamā ja hā mē ama. Nê mē ate hā axàhwýr xwýnhhta nhūm mē amā tanhmā ho. Kêr ka mē ā ixkamnàr rom axàmnhīx amnhī to Inhīpêêxà hwýr anē. Anē. Nhūm pre ā Jejus mē inhmā kapēr anē.

Mē pahte tanhmā axpēn nhīpêx to hā mē pamā karō

Matêwre 6.14-15; Rukre 17.3-4; määnēn Epes 4.32; Korosē 3.13

21Tā nhūm Simāw Pêtre Jejus wýr tē nē mēmoj tā hkukja nē kām:

—Kwa inhmā mēmoj jarē Pahīhti. Xà koja akôt ixtō rý ixtōx tanhmā inhīpêx to pa amnhī tā omu nē âm omu nē amnhī tā tanhmā ho hkêt nē. Nhūm axte tanhmā ixto nē axte tanhmā ixto ho 6 tā pa âm amnhī tā omu nē amnhī tā tanhmā ho hkêt nē. Âm ho ijamakêtkati nē axte kām ijamaxpēr kêt nē. Ā amnhī tā hipêx anhýr o 7 nhūm ja amā mex nē nà? Anē.

22Hāmri nhūm kām:

—Nà kot kaj ā amnhī tā hipêx anhýr o 7 pix kêt nē. Koja mēhō xatā tanhmā ato rāhā nē ka amnhī tā omu nē ajaxwýja amnhī tā xatā tanhmā ho hkêt nē. Âm amnhī tā omu nē âm omu nē tām hipêx rāhā ho ri apa. Māmri ho anhýr o apa rāhā nē aa jam anhürer kêt nē.

23—E kot paj ixprī hā mē amā tanhmā ja jarēnh to ka mē inhma. Tirtūm na hte xatā mē ate tanhmā amnhī tomnuj to hā mē apumu nē mē anē rēnh o pa. Te kot pahi kot ā hkwyjê nhīpêx anhýr pyrāk. Koja mē õ pahija kām mē àpēnh xwýnhjaja kot kēp kàxpore ho ãpresta hā mē omunh kaxyw nhý. 24Hāmri nhūm mē hwýr ja ho tē nē kutā âm. Ra kot kēp hikàxpore ho ãpresta rax xwýnhja. 25Tā no âm aa akupým kām õr kêt nē ra kēp ho hapêx pa. Hāmri nhūm pahija tee ri amnhī tā omu nē hkwyjê mā hā amýnê nē mē kām: “E. Mē ma o tē nē hprō nē hkrajaja nē õrkwy nē hikukrêx mērohā ho wēnê hpa nē hpānhā kàxpore py nē man inhmā o tē. Kot ixpê ixkàxpore ho ãpresta nē akupým inhmā õr kêt mýrapê.” Anē.

26—Hāmri nhūm kot ho ãpresta xwýnhhta tee ri amnhī tā kuma nē kutā hkōnkrā ho nhý nē amnhī to hwýr kām hihtýx nē kām: “Kwa nà ri ixto anhýr kêt nē pahīhti. Ixkamā axukapri nē hkêt wehe. Nà kot paj akupým amā kugō kām ga.” Anē.

27—Hāmri nhūm amnhī tā kuma nē kām hkapri nē. Hāmri nē kām: “Tôe. Nà kot paj ā anhīpêx anhýr kêt nē. Kot paj anhō kôt kaxônh pa nē kumē ka māmri ma ajamakêtkati nē axàmnhīx apa.” Anē. 28Nhūm ā kām kapēr anē nhūm kuma nē hkính nē. Hāmri nē ma tē nē kato nē ixkre

kapem pôristi hõ pumu. Na pre ra kêp kàxpore hkwỳ ho grire nê ho ìpresta nhũm kato nê omu. Hãmri nê hwỳr tẽ nê amnhĩ kĩnhã òkre hã kumỳ nê kãm: “Kwa tokyx akupỳm ate ixpê kàxpore ho ìpresta pãnhã inhmã agõ.” Anẽ. ²⁹Hãmri nhũm tee ri amnhĩ tã omu nê ra ham kot pahi kutã amnhĩ nhĩpêxta pyrã nê kutã hkõnkrã ho nhỹ nê kãm: “Kwa nã. Kwa ri ixto anhỳr kêt nê. Nã kot paj hpãnhã amã kugõ. Kwa ixkamã axukaprĩ nê hkêt wehe.” ³⁰Anhỳr tã nom nhũm kuma nê ãm kuma nê hã amỳnê. Hã hkwỳjê mã amỳnê nê mẽ kãm: “E mẽ ma jahti ho tẽ nê haxã. Koja kot ixpê kàxpore ho ìpresta pãnhã inhmã kugõ nê rĩ kormã kato nê rĩ amnhĩ pumu.” Anẽ. Hãmri nhũm mẽ kuma nê ma o tẽ nê haxã.

³¹—Hãmri nhũm hkwỳjaja tee ri mar o kuhê nhũm mẽ kêp ja omnuj nê nhũm mẽ pahi hwỳr agjê nê kãm harẽ. ³²Hãmri nhũm tee ri harênh ma nê kamã gryk tỳx nê akupỳm amnhĩ wỳr hã karõ nhũm akupỳm hwỳr axã nhũm kãm: “Tk. Kwa na ka pre amnhĩ tomnuj tỳx nê. Ate amnhĩ to ixwỳr nhũm inhmã akaprĩ nê ixte anhõ kõt kaxõnh nê mẽnh tã ³³ka amnhĩ kĩnhã anhĩõta kamã axukaprĩ hkêt nê ri ã hipêx anẽ.” Anẽ. ³⁴Hãmri nê kamã gryk nê hã õ pôristi mã amỳnê nhũm mẽ ma o tẽ nê haxã. Mẽ kot mẽ hagiênh xã hã ixkre kamã apkati mẽ tanhmã mẽ kot hipêx to kaxyw nhũm mẽ kãm hã amỳnê. Tanhmã mẽ kot hipêx to rãhã nhũm kot akupỳm kàxpore raxta nhõr par nê rĩ kormã kator kaxyw nhũm mẽ ma o tẽn haxã. ã mẽ ujarênh kot anhỳr. Anẽ.

³⁵Nhũm pre ã Jejus mẽ ixte hkõt ixpa ho ixpa xwỳnhjê mã kapêr anẽ. Hãmri nê mẽ inhmã:

—Ja pyrã nê koja ixkõt mẽ atõ rỳ mẽ atõx tanhmã mẽ atomnuj to ka mẽ amnhĩ tã omu nê ãm omu nê ho ajamakêtkati kurê kumrêx nê axte kãm ajamaxpêr kêt nê. Te pahi kot mẽhõ nhõ kõt kaxõnh par nê axte kãm hamaxpêr kêeta pyrãk. No kot kaj mẽ ã amnhĩ nhĩpêx anhỳr kêt nhũm kaxkwa kamã inhõ Papaj ja hã mẽ apumu nê te ho pahi tee ri kot amnhĩ tomnuj xwỳnhhta kot amnhĩ nhĩpêx ã omunh nê hã ãmnênh nhũm mẽ kot apkati mẽ tanhmã omnuj tota pyrãk o mẽ anhĩpêx. Anẽ.

Jejus kot mẽ pahte axpên kaga nê mẽ pahkurê

Matêwre 5.31-32; Makre 10.1-12; Rukre 16.18; mãänên Wam Korit 7.10-16

19 ¹Tã nhũm Jejus mẽ inhmã kapêr pa nê mẽ inhmã anẽ pa mẽ ixrohã Garirej rũm ixkato nê pyhti pê Jotãw hã rê nê hpãnhã ihkjê hã ri ixpa. Pika pê Jutej kamã. ²Hãmri nhũm mẽ ohtõ nê Jejus pumu nê man mẽ ixwỳr mra nhũm mẽ omu nê mẽ kãm akupỳm mẽ ã xwỳnhjê ho mex. ³Hãmri nhũm Parijew nhõ xwỳnh kwỳjaja hwỳr mra. Hêx rom kot kamã hamak nê tanhmã ho kapêr punuj to kaxyw hwỳr mra nê kãm:

—Pa? Kwa mẽ inhmã mẽmoj jarẽ. Tanhmã na pre amnepêm finat Mojesja mẽ pahte mẽ pahprõ kaga hã mẽ panhigêtjê mã karõ hto? Xã

kot mẽ pahprõ pahkwým ri tanhmã amnhĩ nhĩpêx to pu mẽ hkaga nhũm ja Tĩrtũm mã mex nẽ nà? Anẽ.

4Hãmri nhũm mẽ kãm:

— Nà na ka mẽ aprĩ hã Mojes kot tanhmã ja jarênh to mar mex kêt nẽ. Ja kot anhỹr kêt. Amnepêm mẽmoj piitã hkrax kãm na pre Tĩrtũm my nẽ nija wa hipêx. Axpên kaxyw wa hipêx. 5Hãmri nẽ wa hkukamã tanhmã wa kot amnhĩ nhĩpêx to hã wa harẽ nẽ wa harênh o:

Koja mẽmyjaja hprõ kaxyw hãmri nẽ gryk ã katorxà mẽ hipêêxà wa hkaga nẽ ãm hprõ kôt pix mã pa ho pa. Te wa tipxi nẽ ri wa pa pyrãk o amnhĩ nhĩpêx. Anẽ.

— Na pre ã Mojes Tĩrtũm nhỹ hã mẽ kãm ja jarênh anẽ. 6Jakamã koja te wa tipxi nẽ ri wa pa pyrãk o axpên nhĩpêx o pa. Tĩrtũm tãm kot axpên mã wa õr kênã kot kêt wa axtem nẽ ri htỹx ri hamaxpêr nẽ axpên kaga. Anẽ.

7Hãmri nhũm mẽ kuma nẽ kãm:

— Tỳ. Nom finat Mojes na pre mẽ pakukamã mẽ panhĩgêjtjê mã ã ja hã karõ anẽ nẽ mẽ kãm:

Kot kaj mẽ aprõ kaga kaxyw hãmri nẽ ra kêp aprõ hkêt ã hã kagà nhĩpêx nẽ kãm agõ nẽ amnhĩ nẽ hano kê ma tẽ.

— Anhỹr o na pre mẽ kãm hã karõ. Tã ka na ka mẽ ixte axpên kaga hkêt ã mẽ inhmã karõ. Anẽ.

8Hãmri nhũm mẽ kuma nẽ mẽ kãm:

— Tỳ no ãm mẽ kãm Tĩrtũm kapêr kôt amnhĩ nhĩpêx prãm kêt jakamã na pre ã mẽ kãm ja jarênh anẽ. No amnepêm mẽmoj piitã hkrax kãm na prem ã amnhĩ nhĩpêx anhỹr o pa hkêt nẽ. 9Jakamã kêr ka mẽ aprõ kaga hkêt nẽ apa. Kot kaj mẽ hkaga nẽ hpãnhã nhãm mẽhõ ho aprõ nhũm Tĩrtũm noo mã te ate wam aprõ kamã nhãm aprõ nyw o amnhĩkati pyrãk. Tĩrtũm pê ja omnuj tỹx nẽ. Rỳ koja mẽhõ hprõ kaga ka hpãnhã ho aprõ nhũm Tĩrtũm noo mã te ate wam mjên pê ho amnhĩkati pyrãk. Ja mãânên Tĩrtũm pê omnuj tỹx nẽ. Anẽ.

Nhũm pre ã Parijew nhõ xwỹnhjê mã kapêr anẽ. 10Hãmri pa mẽ ixte hkôt ixpa ho ixpa xwỹnhjaja ã kapêr anhỹrja ã kuma nẽ kãm:

— Xà na hte mẽ mjên ra kãm mẽ hprõ hkĩnh kêt tã hkaga hkêt nẽ arĩ hkôt pa ho pa nhũm hte Tĩrtũm mã ja mex nẽ nà? Jakamã kwa xà kot paj mẽ nhỹrmã ixprõ kaga pymaj ixprõ hkêt kumrêx nẽ ixpa ho ixpa nhũm ja mẽ inhmã mex nẽ nà? Anẽ.

11Hãmri nhũm mẽ inhmã:

— Nà ãm hãmri na ka mẽ ja jarẽ. No mẽ ate harênhja na mẽ piitã mẽ kãm mex kêt. Koja Tĩrtũm tãm amã aprõ hkêt ã ajarẽ ka rĩ aprõ hkêt nẽ ahte ajamakêtkati nẽ ri apa. 12Na htem piitã hprõ nẽ pa hkêt nẽ.

Na hte kamã tanhmã mẽ kute xwỹnhjaja kormã hprĩre ri tanhmã kute mỳrapê kãm hprõ hprãm kêt nẽ pa.

Nê kamã tanhmã mẽ ho mỳrapê nhũm mẽ hkurê hkêť nê hprõ
hkêť nê pa.

Nê kamã mẽ kãm Tĩrtũm mã tanhmã amnhĩ to ho pa pix prãm
xaj kãm hprõ hprãm kêt nê pa.

Tã kot kaj mẽ jajê pyrã nê ã amnhĩ nhĩpêx anhỹr prãm nê rĩ kam nê aprõ
hkêť nê apa. Anê.

Jejus kot amnhĩ nê mẽhprĩjê janor kêt ã harênh

Makre 10.13-16; Rukre 18.15-17

13Tã nhũm Ijaew kwỳjaja Jejus pumu nê hwỳr mẽ hkrarejê jamỳ nê
mẽ o mra. Kot mẽ hã ĩhkra jaxwỳr nê mẽ ho Tĩrtũm wỳr kaxyw hwỳr
mẽ o mra. Hãmri pa mẽ ixte hkôt ixpa ho ixpa xwỳnhjaja tee ri mẽ omu
nê tanhmã nê mẽ kãm ixkapêr to nê mẽ kãm:

—Tk. Mo kaxyw na ka mẽ Jejus wỳr mẽ o mra? Kormã mẽ raxre
kênã. Kwa mẽ ma akupỹm mẽ o mra nã? Anê.

14Hãmri nhũm Jejus mẽ inhma nê mẽ inhmã:

—Kwa nã mẽ ri inhnê mẽhprĩjê kurê hkêť nê. Kwãr mẽ mãmri ixwỳr
mẽ o mra. Anê.

Hãmri nê amnhĩ wỳr mẽ mẽ kãm hpa ho apê nhũm mẽ hwỳr mẽ o
mra nhũm mẽ kuri kuhê nhũm mẽ omu nê mẽ hã mẽ inhmã:

—E mẽ jarejê pumu. Na htem hamakêtkati nê hkĩnh nê ri pa. Nê mẽ
kãm amnhĩ to rũnh prãm kêt nê. Tã Tĩrtũm kôt mẽ kot amnhĩ nhĩpêx o
mẽ pa xwỳnhjaja te mẽ kot jajê pyrã nê kãm amnhĩ to rũnh prãm kêt
nê pa. Anê.

15Hãmri nê mẽ hã ĩhkra jaxwỳ nê mẽ ho Tĩrtũm wỳ hãmri nê mẽ
inhmã anê pa mẽ ma axte mẽ kurũm mỗ.

Kàxpore rũnh xwỳnh jarênh

Makre 10.17-22; Rukre 18.18-23;

mããnênh Rômãn 3.19-20; Wam Ximotre 6.6; Xiakre 2.10

16Tã nhũm Ijaew ôja Jejus wỳr tẽ nê kãm:

—Pa mẽ ijahkre xwỳnh? Kwa inhmã mẽmoj jarê. Tanhmã kot pa
nhỹrmã Tĩrtũm ri ixtĩr tũm nê ixpa ho ixpa kaxyw amnhĩ nhĩpêx to
wehe? Anê.

17Hãmri nhũm kãm:

—Tk. Ra Tĩrtũm kot nhỹrmã mẽ atĩr tũm nê apa kaxyw mẽmoj tã mẽ
amã karõ nhũm ate mar mex kênã kot ka kêt ri axte ja hã ixkukja. Nã
Tĩrtũmja mex o mex jakamã kot kaj amã kuri atĩr tũm nê apa hprãm hã
kot kaj kapêr kôt amnhĩ nhĩpêx no ri apa. Anê.

18Hãmri nhũm kãm:

—No nhỹ kapêr kôt kot paj amnhĩ nhĩpêx o ri ixpa wehe? Anê.

Hāmri nhũm kām:

—Na pre mē amā mēmoj tā karō ho:

Kêr ka mē axpên par kêt nê.

Nê nhām mē hprō ho amnhĩkati hkêt nê.

Nê mē kêp axàhkĩnh kêt nê.

Nê tanhmã mē ho axêx to hkêt nê.

19 Nê anhĩpêxà mē akatorxà wa hã apijaam nê wa ho mex pê wa kutã anojarêt o ri apa.

Nê amã akwỳjê hã ma ho te ka amã amnhĩ tā ma pyræk o mē hipêx. Jao tãm mē hipêx o ri apa.

E kot kaj amã nhỹrmã Tĩrtũm kuri atĩr tũm nê apa hprãm hã kêr ka ã amnhĩ nhĩpêx anhỹr o ri apa. Anê.

20Hāmri nhũm kuma nê kām:

—Ku nhũm. Ra ã ixte amnhĩ nhĩpêx anhỹr o ri ixpa kênã. Nom te kormã ixtĩr tũm nê ixpa kaxyw ixte tãm kêt pyræk. Kwa axte inhmã mēmoj jarê nà? Anê.

21Hāmri nhũm kām:

—Nà kormã mēmoj pyxi nê arĩk. Na ka amã akukrêx rax prãm tỳx o amã Tĩrtũm prãm jakre. Jakamã ma akupỹm tē nê akukrêx rax o wênê hpa nê hpãnhã kàxpore jamỳ nê ma mē kêp amrakati xwỳnhjê mã òr pa. Hāmri nê rĩ akupỹn ixwỳr tē nê rĩ ixkôt apa ho apa. Anê.

22Hāmri nhũm kuma nê tee ri amnhĩ kukamã hamaxpêr. Kãm hikukrêx rax japê nê kãm kamã ìhkra karo hprãm kêt nê. Hāmri nê tee ri Jejus kot ã kãm hã karō anhỹrja ma nhũm ja kêp omnuj nê nhũm ma akupỹm htēm kurê kumrêx. 23Hāmri nhũm Jejus tee ri omu nê mē inhmã:

—Hêxta waa nê. Koja mē hikukrêx rũnh xwỳnhjaja ohtô nê kãm mē hikukrêx japê xàj Tĩrtũm mē wa ixri htĩr tũm nê pa ho pa hkêt nê. Wa ixte amnhĩ nhĩpêxja mē kêp hihtỳx. 24Mê kãm hikukrêx rũnh mã ìhkra karo hprãm kêt rãhã tee ri kãm Tĩrtũm kôt amnhĩ nhĩpêx prãm kaprỳ. Te ho mēhō kot menh kagô hã hkre nê kãm kagô katòk prãm kêt rãhã kãm guhkrax kãm àr prãm kaprỳta pyræk. Anê.

Nhũm pre ã Jejus mē inhmã kapêr anê. 25Hāmri pa mē kuma nê tee ri amnhĩ kukamã ijamaxpêr nê kãm:

—Kwa mē ixpiitã mē inhmã mē ixkukrêx japê kênã. Jakamã xà kot paj mē ixpiitã nhỹrmã war ari ixtĩr tũm nê ixpa ho ixpa hkêt nê nà? Anê.

26Hāmri nhũm mē inhmã:

—Nà kot kaj mē amnhĩ krã hkôt mē amã mē akukrêx japêja mã anhũrer kêt nê. ãm Tĩrtũm pix na hte ja kaxyw tanhmã mē akrã hto ka mē amã akukrêx japê hkêt nê. Jao ra mē apê Tĩrtũm mē wa ixri atĩr tũm nê mē apa ho mē apa mã xwỳnh. Anê.

27Hāmri nhũm Simãw Pêtre kãm:

—Kwa no we mẽ pajaja Pahihti? Na pa prem agryk ã mẽmoj piitã hkaga hpa nẽ akõt ixpa ho ixpa. Jakamã kot paj mẽ nhỹrmã war ari ixtĩr tũm nẽ ixpa ho ixpa nà? Anẽ.

28Hãmri nhũm kuma nẽ mẽ xpiitã mẽ inhmã:

—Tỳ. Kot paj nhỹrmã mẽmoj piitã ho nyw pa hãmri nẽ ixte mẽ ho amnhĩptàr o ixkrĩ xà maati kamã nhỹ nẽ mẽ piitã mẽ kot tanhmã amnhĩ nhĩpêx to hã mẽ omunh xà hkõt tanhmã mẽ harênh to. Tã mẽ kajaja mẽ ate ixkõt apa ho apa xwỳnhjaja kot kaj mẽ inhmã Ijaew kot amnhĩ nhĩpêx ã mẽ omunh xà hkõt ahpỳnhã tanhmã inhmã mẽ harênh to. Mẽ mex ã mẽ harẽ rỳ mẽ mex kêt ã mẽ harẽ. Kot kaj mẽ ã inhmã mẽ harênh anẽ. ãm hãmri na pa mẽ amã ixkapêr anẽ.

29—Nẽ ka mẽ atõ inhmã tanhmã amnhĩ nhĩpêx to ho apa kaxyw akwỳjê re nẽ ma inhmã mẽmoj to anhỹr o ri apa. Tanhmãn anhõrkwỹ rỳ atõ rỳ atõx re. Rỳ aprõ nẽ akrajê re. Rỳ akatorxà mẽ anhĩpêxà war are. Rỳ akukrêx piitã rer pa hãmri nẽ ma mẽ piitã mẽ kãm ixkapêr o mẽ ahkre ho ri mẽ hkõt apa. Hã kot paj mẽ apumu nẽ mẽ ato mex rax nẽ. Hãmri ka mẽ ma mẽ hkõt apa nẽ mẽ kãm ixkapêr jarênh o apa nhũm mẽ kot mẽ amar xwỳnh kwỳjaja mẽ ama nẽ kãm mẽ akĩnh nẽ. Nẽ ra mẽ ate akwỳjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyrãk o mẽ anhĩpêx nẽ mẽ ato mex o pa. Hãmri ka mẽ nhỹrmã ty nẽ ma Tĩrtũm mẽ wa inhõ krĩ hwỳr api nẽ wa ixkuri amex kumrêx nẽ atĩr tũm nẽ apa ho apa. 30Nom kwa kêr ka mẽ amnhĩ tã ja ma nẽ amnhĩ to rũnh xwỳnh ã amnhĩ kamnhĩx kêt nẽ. Jar mẽ kot amnhĩ to rũnh ã amnhĩ to jarkrar xwỳnhjaja koja mẽ nhỹrmã amnhĩ to hkryre hã amnhĩ pumu. No jar mẽ kot amnhĩ to hkryre xwỳnh ã amnhĩ jarênh xwỳnhjaja koja mẽ nhỹrmã amnhĩ to rũnh ã amnhĩ pumu. Anẽ.

Jejus kot nhỹrmã hkrajê ho mex ã harênh

Rõmãn 9.14-16

20 1Nhũm Jejus arĩ mẽ ixte hkõt ixpa ho ixpa xwỳnhjê mã awjarê nẽ mẽ inhmã:

—Nẽ kot paj nhỹrmã tanhmã mẽ ato mex to. Te ixpê hpur nhõ dõn kot amnhĩ nhĩpêx pyrãk o mẽ anhĩpêx. Koja pur nhõ dõnja ihpur kãm mẽmo xõ ra hkà hpa nhũm omu hãmri nẽ kaxyw mẽ àpênh xwỳnhjê japêr kaxyw ma gãm tẽ. Nẽ gáp xa nẽ mẽ kãm akir nhũm mẽ hã akuprõ. 2Hãmri nhũm mẽ kãm: “E. Kot kaj mẽ jarãhã inhmã ixpur kãm apê. Kot kaj mẽ inhmã axapênh o amỹkry pa hpãnhã mẽ kot apkati pixi hã mẽ àpênh pãnhã mẽ kãm amnhĩrer xàja kõt mẽ amã amnhĩre.” Anẽ hãmri nhũm mẽ kuma nẽ kãm: “Tõe. Nà kot paj mẽ amã apê.” Anẽ nhũm pur wỳr mẽ kurẽ nhũm mẽ ma kãm àpênh mã mra.

3—Tã nhũm arĩ kỳx mã myt tẽ nhũm pur nhõ dõn akupỹm gãm tẽ nhũm mẽ hkwỳja arĩ kuhê. 4Nhũm tee ri mẽ omu nẽ mẽ kãm: “Kwa mon

ka mẽ axàpênh kêt nê arĩ akuhê? E. Mẽ ma wamtajê hkôt mra nê inhmã apê pa hpãnhã mẽ amã amnhĩrer mex nê.” Anê. 5Hãmri nhũm mẽ kuma nê ma mẽ hkôt mra. Tã nhũm ra myt kaxkwa nhĩpòk ri ajêt nhũm hpur nhõ dõnja mã hkwyjê ho anê nê. Kê axte mẽ hkôt jajê jano nhũm mẽ ma mẽ hkôt mra. Tã nhũm ra myt ahpanh grire nhũm ma akupỹm kêwe gàm tẽ nê mã mẽ ho anê nê axte mẽ hkôt jajê rê.

6—Tã nhũm ra myt grire nhũm ma akupỹm kêwe gàm tẽ nê jajê pumu nhũm kê wem arĩ gáp kuhê. Hãmri nhũm tee ri mẽ omu nê mẽ kãm: “Kwa mon ka mẽ axàpênh kêt nê atỳx gáp akuhê ho akuhê?” Anê. 7Hãmri nhũm mẽ kãm: “Nà mēhõ kot mẽ inhmã mẽ ixàpênh ã karõre hã.” Anê. Hãmri nhũm mẽ kãm: “Tõe. Mẽ ma mẽ hkôt ixpur wỳr mra nê inhmã mãn apê.” Anê hãmri nhũm mẽ kuma nê ma hkwyjê hkôt mra.

8—Tã nhũm ra kamàt. Hãmri nhũm hpur nhõ dõnja kãm àpênh xwỳnhjê krãhtũm wỳr tẽ nê kãm: “E. Ma mẽ hwỳr tẽ nê mẽ kãm anê kê mẽ àpênh kaga nê man akôt mra ka inhmã mẽ kãm amnhĩre. Nom kêr ka hapu hã mẽ mõi xwỳnhjê kumrêx mã amnhĩre nê wam mẽ mõi xwỳnhjê ho hapu nê mẽ kãm amnhĩre.” Anê. Hãmri nhũm kãm: “Tõe. Nà kot paj mẽ ho anê.” Anê. 9Hãmri nê ã mẽ kãm amnhĩrer anê. Hapu hã mẽ mrrar xwỳnhjê kumrêx mã amnhĩre. Te mẽ kot kwỳhtã àpênh o amỹkry pyrãk o nhũm hpãnhã mẽ kãm amnhĩre. 10Hãmri nhũm wam mẽ mrrar xwỳnhjaja ja hã mẽ omu nê hkĩnh nê. Hãmri nê htỳx hamaxpêr o: “Nà kot paj xep kàxpore jamỳnh rax o mẽ hakre. Ixàpênh rax o ixte mẽ hakrenh kênã.” Anhỳr tã no nhũm mẽ piitã mẽ kãm amnhĩrer o axpên pyrãk. Ra pur nhõ dõn kot kãm hã karõ xà hkôt. 11Hãmri nhũm mẽ hamỳ nê tee ri hkre kamã omu nê we ra hpur nhõ dõnja kamã gryk nê. 12Hãmri nê hwỳr mra nê kãm: “Kwa jajaja na mẽ amã àpênh o ore pyxi nê. No kêt mẽ pajaja na pa mẽ kwỳhtã ixàpênh rax o kamàt. Arĩgro htỳx kãm ixàpênh o ixãm o ixtã kamàt tã ka pêr ãm mẽ inhmã amnhĩrer o axpên pyrãk. Kwa na ka mẽ ixtomnuj nê.” Anê. 13Hãmri nhũm mẽ kuma nê mẽ kãm: “Tk. Nà na pa mẽ atomnuj kêt nê. Na pa kwỳhtã tanhmã mẽ amã amnhĩrer to xà jarê ka mẽ inhma nhũm ja mẽ amã mex nê ka mẽ ma hwỳr axàpênh mã mra. 14Kwa mẽ akàxpore jamỳ nê ma mra. ãm pa inhmã hprãm xà hkôt na pa ã mẽ amã amnhĩrer anê. 15Ixkàxpore jakamã kot paj nhãm inhmã mēhõ mã õr prãm xà hkôt kãm kugõ. Tã ka mẽ ã mẽ hã ixkamã agryk anê. E mẽ akàxporeja mỳ nê ma mra.” Anê. Nhũm ã hpur nhõ dõn mẽ kãm kapêr anê. ã mẽ ujarênh kot anhỳr. Anê.

16Nhũm pre ã Jejus mẽ inhmã ujarênh anê nê mẽ inhmã:

—Ja pyrã nê wam mẽ ate ixkôt amnhĩ xunhwỳr xwỳnhjaja nê hapu hã mẽ kot kormã ixkôt amnhĩ xunhwỳr mã xwỳnhjaja kot paj nhỹrmã mẽ apiitã mẽ ato mex kumrêx o axpên pyrãk. Anê.

Jejus kot htyk kukamã amnhĩ jarênh

Makre 10.32-34; Rukre 18.31-34

17Tã nhũm Jejus mẽ inhmã anê pa mẽ ixrohã ma Jerujarê hwỳr mỗ. Mẽ ohtôjê hkôt mỗ. Hãmri nhũm Jejus mẽ ixpê 12jê mã anê nê mẽ ixkwỳjê hkàx ã mẽ inhmã kapêr kaxyw ahte hapu hã mẽ ixto mỗ. 18Hãmri nê mẽ inhmã amnhĩ kukamã tanhmã amnhĩ jarênh to nê mẽ inhmã:

—E na pu mẽ ra Jerujarê hwỳr mỗ. Kamã koja mẽ pahkwỳjaja inhĩpêx kati nê. Koja mẽ patre krãhtũmjê mẽ Mojese kapêr o mẽ ahkre xwỳnhjê nhĩhkram ijaxà nhũm mẽ kot ixpĩr kaxyw ixtã amỳnê. 19Koja mẽ kãm ixkurê xwỳnhjaja ixpynê nê Rôm nhõ xwỳnhjê nhõ pôristijê hwỳr ixto tẽ nê mẽ kãm tanhmã ixto hêx to. Hãmri nhũm mẽ kuma nê mẽ mar xà hkôt tanhmã inhĩpêx to. Nhũm mẽ hkwỳjaja ixtã hpêr o axkê nê ixtã akunha nhũm mẽ hkwỳjaja ixto kapêr punuj nê tanhmã ijapry hto nê ixtak. Hãmri nê ma ixto tẽ nê pĩ kahpa hã inhô nê ixpĩ. ã koja mẽ inhĩpêx anê. Nom kot paj ixyk ã ixtã apkati axkrunêpxi nhũm Tĩrtũm akupỹm ixto ixtĩr. Anê.

Xiakre mẽ Juãw wa katorxà kot wa ho Jejus wỳr ã harênh

Makre 10.35-45; mãänên Rômãn 12.3, 12.10, 12.16;

Epes 4.2; Piripos 2.3-8; Xiakre 4.6; Wam Pêtre 5.3

20Tã nhũm Jepetew prõja amnhĩ kôt Jejus wỳr hkra Xiakre mẽ Juãwja wa o tẽ. Kot wa ho Jejus wỳr kaxyw hwỳr wa o tẽ. Mẽ ixpyrà nê wa kot Jejus kôt pa ho pa xwỳnhjê hõ na pre wa nhũm wa katorxàja Jejus wỳr wa o tẽ. Hãmri nê kutã hkõnkrã ho tẽm nê nhỹ 21nhũm kãm:

—Pa mo na? Anê.

Hãmri nhũm kãm:

—Ma ixkrata na pa ixte wa ho awỳr kaxyw awỳr wa o tẽ. Xê kot kaj nhỹrmã ate mẽ piitã mẽ ho amnhĩptàr kaxyw nhỹ nhũm ixkrata wa akutã anhĩjê nê wa kêp anhõ kôwenatô nê akutã anhĩjê nê wa ato nhỹ. Ja prãm xàj na pa ã wa ho awỳr anê. Anê.

22Hãmri nhũm kuma nê Xiakre mẽ Juãw wa omu nê wa kãm:

—Nà na war akatorxàja htỳx ã war ato ixwỳr anê. Koja mẽ tokyx ixpĩ kot paj amnhĩ xà htỳx kãm ijamak kãm ty. Tã xà koja mẽ ixpyrà nê ã war anhĩpêx anê ka wa ixpyrà nê amnhĩ xà htỳx kamã ajamak rax kãm ty nà? Anê.

Hãmri nhũm wa kãm:

—Tỳ. Nà kot pa wa ijaxwỳja anê nê apyrà nê amnhĩ xà htỳx kãm ijamak kãm ty. Anê.

23Hãmri nhũm wa kãm:

—Nà ãm hãmri na ka wa amnhĩ jarẽ. War ate ixpyrà nẽ ixkõt amnhĩ xà htỳx kãm ajamak kãm atyk mã kênã. Tã nom war akatorxà kot war ato ixwỳrta ã kot paj tanhmã war amã nẽ hkêt nẽ. Kêt inhõ Papaj tãm koja ixkaxyw mẽhõ japêr nhũm inhĩhkõ hã nhỹ. No pa kot paj amnhĩ kaxyw mẽhõ jarẽnh kêt nẽ.

Anhỹr o wa kãm kapêr. 24Hãmri pa mẽ ixte wa uràk nẽ Jejus kõt ixpa ho ixpa xwỳnhjaja wa katorxà kot ã wa ho Jejus wỳr anhỹrja ã kuma nẽ wa kamã inhgryk nẽ. Hãmri nẽ axpên mã ixkapêr o:

—Tk. Nà koja Juãw mẽ Xiakre wa nhỹrmã kêp õ kôwenatô nẽ mẽ pahto amnhĩptàr kêt kumrêx. Anẽ.

25Nhũm Jejus mẽ inhma nẽ amnhĩ wỳr mẽ ixpiitã mẽ inhmã hpa ho apê nẽ mẽ inhmã:

—E mẽ amnẽ ixwỳr axkamẽ pa mẽ amã awjarẽ mãn. Anẽ.

Hãmri pa mẽ hwỳr axkamẽ nhũm mẽ inhmã:

—E mẽ inhma. Na hte Ijaew kêt xwỳnhjê nhõ pahijaja ã amnhĩ nhĩpêx anhỹr o ri pa nẽ amarĩ hkrĩ xà kamã hkrĩ ho hkrĩ. Àhpumunh tỳx jakamã amarĩ ixkre hkre jakry kamã hkrĩ ho hkrĩ nẽ kãm mẽ àpênh xwỳnhjê pix mã mẽmo mẽ àpênh ã karõ. Na htem ã amnhĩ nhĩpêx anhỹr o hkrĩ. Nẽ mẽ kot mex ã harênh kaxyw tanhmã mẽ ho mex to ho pa. 26-27Tã no mẽ kajaja. Kêr ka mẽ ho mẽ uràk kêt nẽ. ãm te amarĩ ri mẽ apa pyràk o axpên nhĩpêx o ri apa. Nẽ te mẽ apê mẽ kãm axàpênh xwỳnh pyràk o amnhĩ nhĩpêx o ri mẽ hkõt apa. No kêr ka mẽ ho amnhĩptàr mã ajamaxpêr o ri apa hkêt nẽ. 28Mẽ ate mẽmoj tã pa ixkutã anojarêt ho apa kaxyw na pa pre mẽ awỳr ixwrỳk kêt nẽ. Ixte amarĩ mẽmoj to mẽ kamjaja mẽ akutã inhnojarêt o ixpa kaxyw na pa pre mẽ awỳr wrỳ. Nẽ mẽ ate ixkõt amnhĩ xunhwỳr xwỳnhjê nẽ ixtyk kaxyw na pa pre wrỳ. Anẽ.

Jejus kot no hkre xwỳnh wa ho mex ã harênh

Matêwre 9.27-31; Makre 10.46-52; Rukre 18.35-43

29Tã pa mẽ Jejus kõt kormã Jerujarẽ hwỳr ra Jeriko htêp o mõ. Hãmri nẽ kurũm ixkaton mõ nhũm mẽ ohtô nẽ mẽ ixkõt mra. 30Nhũm pry nhĩhkjê hã no hkre xwỳnh wa àhwỳr o hkrĩ xwỳnhja wa amnhĩ wỳr mẽ inhmrar mar o nhỹ. Mẽ ohtô nẽ Jejus kõt mẽ mrar xwỳnhjê mrar ma nẽ mẽ kãm:

—Kwa mo na? Mẽmoj wỳr na ka mẽ axohtô nẽ mra? Anẽ.

Hãmri nhũm mẽ wa kãm:

—Nà Jejus pê Najare nhõ xwỳnhhta kõt na pa mẽ mra. Anẽ.

Hãmri nhũm wa mẽ kuma hãmri nẽ kàx pê Jejus mã kapêr nẽ kãm:

—Pa Pahihti? E apê mẽ inhõ Pahihti mex na ka. Te apê amnepêm anhĩgêt pahihti Tawita pyràk. Jakamã kwa wa ixkamã axukaprí nẽ akupỳm wa ixto mex. Anẽ.

31Hāmri nhũm Jejus kôt mẽ mõi xwỳnhjaja wa kuma nẽ wa kãm:

— Tk. Kwa war akapẽr kêt nẽ nhỹ nà. Anẽ.

Tã no nhũm wa ãm mẽ kuma nẽ xatã amnhĩ to kuwỳ. Kàx pẽ amnhĩ to kuwỳ. 32Hāmri nhũm Jejus wa kuma nẽ xa nẽ wa omu nẽ wa kãm:

— Pa mo na? Tanhmã kot pa wa ato? Anẽ.

33Hāmri nhũm wa kãm:

— Nà akupỹm wa inhmã wa ixrít mex prãm. Anẽ.

34Hāmri nhũm kãm wa hkaprĩ nẽ wa no htok nhũm wa akupỹm rít mex kurê kumrẽx. Hāmri nẽ rít mex ã amnhĩ pumu nẽ hkĩnh tỳx nẽ ma Jejus kôt hkwyjê hkôt mõi.

Jejus kot Jerujarẽ hwỳr àr ã harẽnh

Makre 11.1-11; Rukre 19.28-40; Juãw 12.12-19

21 1Tã nhũm Jejus kormã Jerujarẽ hwỳr kormã mõi. Pa mẽ hkôt mõi nẽ ra Petake hwỳr ixàhtêp o mõi. Hixêt pẽ Oriwêhti kahti ri na pre krĩa xa. Jakamã pa mẽ wa hwỳr ixàhtêp o mõi nhũm Jejus mẽ ixte hkôt ixpa ho ixpa xwỳnhjê wa ho axkrut nẽ amnhĩ kukamã wa kumẽ. 2Nẽ wa kãm:

— E wa ma krĩ mũj wỳr mẽ ixkukamã wa tẽ. Nẽ wa hwỳr axà nẽ nhỹri jumẽnre mẽ hkra wa kãm ê nẽ wa ãm xwỳnh wa omu hãmri nẽ kãm ê xà hpôt nẽ man akupỹn amnẽ hamẽ wa o tẽ. 3Koja mẽhõ ja hã war apumu nẽ hã tanhmã war amã kapẽr to ka wa kãm ã ijarẽnh anẽ nẽ kãm: “Nà mẽ panhõ Pahihti na hã karõ pa wa hwỳr tẽ.” Anhỹr o wa kãm ijarẽ. Hãmri nhũm war ama nẽ war amã õr kurê kumrẽx. E wa ma hwỳr tẽ. Anẽ.

4Tirtũm kapẽr ã kagà htũm ra kot ja kukamã harẽnh. Na pre ra Tirtũm nhỹ hã kapẽr xwỳnhjê hõ ja jarẽ nẽ hã kagà ho:

5 Pa Jerujarẽ nhõ xwỳnhjaja. Kwa mẽ tee ri amnhĩ kukamã
ajamxpẽr ho amã ma hkêt nẽ. Ota mẽ anhõ pahi nywta
ra jumẽnre hã nhỹ nẽ mẽ awỳr hpõx o tẽ. Te kot amnhĩ to
grire xwỳnh pyrak o amnhĩ nhĩpêx nẽ tẽ.

6Anhỹr o kot hkukamã harẽnh jakamã nhũm Jejus amnhĩ kukamã ja wa kumẽ hãmri nhũm wa ma hwỳr htẽm kurê kumrẽx. 7Nẽ krĩa wỳr põi nhũm Jejus kot wa kãm harẽnh xà hkôt nhũm wa jumẽnreta pumu. Hãmri nẽ hamẽ wa kãm ê xà hpôt nẽ ma Jejus wỳr wa o tẽ. Hãmri nẽ kaxyw amnhĩ xê hkwy hkwrỹ nẽ kãm ho jumẽnre nywta kõi kahty. Nẽ kãm ho htỳx nẽ o xa nhũm Jejus hã nhỹ nẽ hã mõi. 8Kormã Jerujarẽ hwỳr hixêt ã àpir o mõi. Nhũm mẽ kot omunh o kuhê xwỳnhjaja hkĩnh nẽ ma hkukamã pry ho mex kaxyw amnhĩ xê hkwyptyr ho mõi. Nẽ põi hkwy jakà nẽ utyr o mõi. 9Nhũm mẽ hkwyjaja Jejus kukamã mra nhũm mẽ hkwyjaja hapu hã hkôt mra. Nẽ piitã kàx pẽ Tirtũm mex o mex ã harẽnh o hkôt mõi nẽ harẽnh o:

Ota Tirtûm kot mẽ pahwÿr mẽnh xwÿnhhta ra pøj. Âm hãmri na mẽ pahwÿr wrÿ. Ja na mex kumrêx. Kêp mẽ panhõ Pahihti mex na. Âm hãmri na pre Tirtûm mẽ pahwÿr kumê.

Tirtûm mex kumrêx. Âm mex o mex.

Anhÿr o Jejus kôt Jerujarê hwÿr harênh o mõ. Kot mẽ ho amnhÿptâr kurê kumrêx ã hkamnhÿx jakamã hkÿnh nê hkôt ã harênh anhÿr o mõ. 10Hãmri nhũm krÿ nhõ xwÿnhjaja tee ri mẽ kuma nê axpên mã:

— Kwa mẽhõ na we hpôx o mõ nhũm mẽ ã hkôt harênh anhÿr o mõ? Anê.

11Hãmri nhũm Jejus kôt mẽ mrar xwÿnhjaja mẽ kuma nê mẽ kãm:

— Nà Tirtûm nhÿ hã kapêr jarênh xwÿnh pê Jejus na. Kêp Garirej kamã krÿ pê Najare nhõ xwÿnhhta na. Anê.

Jejus kot Tirtûm nhõrkwÿ hwÿr àr ã harênh

Makre 11.15-19; Rukre 19.45-48; Juãw 2.13-22

12-13Tã hãmri nhũm Jejus Jerujarê wÿr axà nê jumênre rũm wrÿ nê ma Tirtûm mã amnhÿ jarênh xà hã ixkre hwÿr tẽ nê axà. Hãmri nê tee ri mẽ kot tanhmã ixkre kamã amnhÿ nhÿpêx to hã mẽ omunh o xa. Nhũm mẽ axtem nê môx nê ôwêhti nê tuuti ho wênê ho kuhê. Mẽ kot haprôr nê Tirtûm mã amnhÿ jarênh kaxyw kãm hpar nê ôr kaxyw mẽ kãm ho wênê ho kuhê. Nom axtem nê mẽ kãm hã ohtô rax kãm mẽ kãm ho wênê. Hãmri nhũm Jejus mẽ hwÿr axà nê tee ri mẽ omu nhũm ja kêp omnuj tÿx kumrêx. Hãmri nhũm mẽ hwÿr tẽ nê mẽ kot kàxpore ho pinhpanh xwÿnhjê pê mẽ õ mēsti rēnh pa. Nê mẽ kot tuuti ho wênê xwÿnhjê pê hkrÿ xà hkujate nê rēnh pa. Hãmri nê mẽ kãm:

— Tk. Kwa Tirtûm kapêr ã kagà htũm kot ixkreja jarênh kot:

Inhõrkwÿja ãm mẽ ate inhmã amnhÿ jarênh xà hã ixkre pix kaxyw na.

Anhÿr o kot harênh tã ka mẽ axtem nê kamã ã amnhÿ nhÿpêx anê. E kwa mẽ ajapôx tokyx anê. Anê.

Hãmri nê mẽ kator pa nhũm mẽ ma hapêx. 14Hãmri nhũm mẽ no hkre xwÿnhjaja nê mẽ hyk o mẽ pa xwÿnhjaja mra nê agjê nê Jejus kutã kuhê nhũm mẽ omu nê akupÿm mẽ ho mex. 15-16Hãmri nhũm mẽhprÿ hkwyjaja hwÿr mra nê kuri kãm mex o mex ã gre nê kãm grer o:

Amex kumrêx Pahihti.

Tirtûm na pre mẽ ixwÿr amê.

Kot kaj te anhÿgêt Tawi pyrã nê mẽ ixto amnhÿptâr o apa.

Anhÿr o kãm grer o kuhê. Hãmri nhũm patre krãhtũm mẽ Tirtûm kapêr tũm o mẽ ahkre ho mẽ pa xwÿnhjaja tee ri ã mẽ grer anhÿr ã mẽ kuma. Nê tee ri Jejus kot mẽ no hkre xwÿnhjê mẽ mẽ hyk o mẽ pa xwÿnhjê ho mex ã omunh o kuhê nê gryk nê Jejus wÿr tẽ nê kãm:

—Kwa na mēhprījaja mē grer kām ā ajarēnh anē ka mē mar kêt nē? Mē grerja mexti hā. Anē.

Hāmri nhūm mē kām:

—Tỳ ixte mē mar kēnā. Tirtūm kām hprām xà hkôt na mē ā inhmā inhmex o inhmex ā ixtā grer anē. Tirtūm kapēr ā kagà htūm kot ā mē hkukamā harēnh kot anhÿr. Mē harēnh kot:

Koja mēhprījaja Pahihti mā mex o mex ā grer o kuhê.

Anhÿr o kot mē hkukamā harēnh kēnā. Tā mǎn ka mē kormā kamā harēnh kêt jakamā na ka mē ja jarēnh mar kêt nē. Kwār mē māmri ā inhmex ā grer anē.

17Anhÿr o mē kām kapēr hāmri nē mē inhmā anē pa mē ixkreta rūm ijapôj nē ma akupÿm Petān wÿr mra nē kamā amnhīm hikra.

Jejus kot mēmo hpār mā kapēr ā harēnh

Makre 11.12-14; mǎānēn Xiakre 1.6

18Tā nhūm kwÿhtā nhūm Jejus kànhmā nhÿ nē mē inhmā anē pa mē ixrohā ma akupÿm Jerujarē hwÿr mra. Hāmri nē kormā mō nhūm Jejus pry kahti ri ra kām prām nē. 19Hāmri nē mēmo pī pē fikēhti jarēnhja pumu nē kot ô hkwÿ rēnh nē hkrēr kaxyw hwÿr māt. Hāmri nē tee ri ô japēr nhūm ô hkêt nē ām hô hpix harir. Hāmri nhūm tee ri omu nē kām:

—E kot kaj axte axô hkêt kumrēx.

Anhÿrja o nhūm grà par kurê kumrēx. 20Hāmri pa mē ixte hkôt ixpa ho ixpa xwÿnhjaja omu nē Jejus mā:

—Kokÿÿ. Kwa tanhmā na we amnhī nhīpēx to nē grà kurê kumrēx? Anē.

21Nhūm mē inhmā:

—Nà kot kaj mē ixpyrà nē fikēhti kot tanhmā amnhī nhīpēx to kaxyw Tirtūm mā ajamaxpēr tÿx nē nhūm amā hprām xà hkôt amā tanhmā hipēx to. Nom kêr ka mē ajamaxpēr kati ho tee ri hkukamā ajamaxpēr kêt nē. Ām kaxyw Tirtūm kôt ajamaxpēr tÿx nē nhūm mē amā tanhmā mēmoj nhīpēx to. Ām hāmri na pa mē amā ja jarē. No ām ja pix kêt. Kot kaj mē mǎānēn hixēt mÿj mā akapēr nē kām: “E anhÿr xàta rūm akato nē ma tē nē gô rax kām mrō.” Anē nhūm amar xà hkôt ā amnhī nhīpēx anē.

22—Nē kot kaj mē mēmoj tā Tirtūm wÿ nē kaxyw kām ajamaxpēr tÿx kām hā awÿ nhūm amā mēmoj prām xwÿnhhta gō. Anē.

Méhō nhÿ hā Jejus kot mē ahkre hā harēnh

Makre 11.27-33; Rukre 20.1-8

23Nhūm arīgro hō hā nhūm Jejus kêwe axte Tirtūm mā amnhī jarēnh xà hā ixkreja wÿr axà nē kamā mē ahkre ho nhÿ. Mē kām tanhmā mē kot amnhī nhīpēx to nē nhÿrmā Tirtūm mē wa kuri htīr tūm nē pa kaxyw

tanhmã mẽ kãm kapër to ho nhỹ. Hãmri nhũm Ijaew krãhtũmjê mẽ mẽ õ patre krãhtũmjaja hãmri hwỳr mra nê hêx rom mẽmoj tâ hkukja nê kãm:

— Kwa mẽ inhmã amnhĩ jarẽ. Mẽhõ nhỹ hã na ka hte ã amnhĩ nhĩpêx anhỹr o apa? Na ka hte akupỹm mẽ ho mex o apa nê tanhmã mẽ ahkre hto ho apa. Xà amnhĩ krã hkõt na ka hte ã amnhĩ nhĩpêx anê nà? Anẽ.

24Hãmri nhũm mẽ kãm:

— Nà kot pa ixkumrêx mẽmoj tâ mẽ akukja. Ka mẽ inhma nê tanhmã inhmã harênh to pa rĩ kormã mẽ amã amnhĩ jarẽ. 25-26Finat Juãw Paxis ã kot paj mẽ akukja. Mẽhõ nhỹ hã na pre hte mẽ hkrã kumrãr o pa? Xà amnhĩ krã hkõt nà? Xà Tĩrtũm nhỹ hã? E mẽ atõ inhmã ja jarẽ. Anẽ.

Hãmri nhũm mẽ kuma nê tee ri kot tanhmã kutã kãm harênh to hkukamã hamaxpêr pê axpên pumunh o kuhê nê axpên mã:

— Kwa tanhmã kot puj wem kãm ja jarênh to? Or mẽ kot mar o kuhê xwỳnhjaja na htem kêp Tĩrtũm nhỹ hã kapêr jarênh xwỳnh ã harê. Tã kot puj mẽ kãm kot amnhĩ krã hkõt kot mẽ hkrã kumrãr ã harê nhũm mẽ tee ri mẽ pama nê mẽ pakamã gryk tỳx nê. Nê mẽ paxêx rom ã mẽ pahte kãm pakapêr anhỹr ã mẽ pahpumu nê kên o mẽ pahtak o mẽ panhĩmex. No kot puj mẽ kãm Tĩrtũm nhỹ hã kot mẽ hkrã kumrãr ã harê hãmri nhũm mẽ pamã: “Kwa ã kot anhỹr kênã na ka prem kapêr ma nê hkõt ajamaxpêr kêt nê?” Anẽ. Jakamã kot puj mẽ ja pymaj tanhmã kãm harênh to hkêt nê. Kot puj mẽ ãm kãm aa te mẽ pahte ja jarênh mar kêt pyràk o harê. Anẽ.

Mẽ kot tanhmã Jejus mã nê nhũm kot ta pãnhã tanhmã mẽ kãm nê pymaj nhũm mẽ tee ri kãm tanhmã nê hprãm kaprỹ o kuhê. 27Hãmri nê kãm:

— Konẽn. Mẽ ixte mẽhõ nhỹ hã kapêr o pa hã omunhre hã. Anẽ.

Hãmri nhũm mẽ kuma nê mẽ kãm:

— Tk. Tõe kot pa xep ijaxwỳja mẽ amã tanhmã amnhĩ jarênh to hkêt nê. Ijaxwỳja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anẽ.

Mẽhõ my mẽ hkra wa pijakrut ã wa harênh

Matêwre 7.21-23; Rukre 7.29-30

28Hãmri nhũm Jejus axte Ijaew krãhtũmjê mẽ mẽ õ patre krãhtũmjê mã kapêr nê mẽmoj tâ kuxi nê tanhmã mẽ kãm ujarênh to nê mẽ kãm:

— E pa mẽ amã awjarê ka mẽ inhma. Kojã mẽhõ hkra my hamêxkrut. Hãmri nê hkra kot waja mã tanhmã kapêr to nê kãm: “E kêr ka jarãhã ma tẽ nê inhmã pur kãm apê.” Anẽ. 29Hãmri nhũm kuma nê pur mã htem kaga nê hitõt nê. Tãã no ãm hã ahtũmre nê tanhmã hamaxpêr to hãmri nê ma hwỳr tẽ nê kamã àpênh o xa. 30Hãmri nhũm wa hipêêxàja hpãnhã hkra kot hapu hwỳr tẽ nê mã kãm kapêr anê nê kãm: “E kêr ka

ajaxwỳja atõ hkõt tẽ nẽ wa inhmã apê.” Anẽ nhũm kuma nẽ kãm: “Tõe. Nã kot paj ma tẽ.” Anhỳr tã no ãm hõta kĩnhã htẽm kêt nẽ.

31—Jakamã e. Nhỹ hkra na pre hipêêxà kapër ma nẽ hkõt amnhĩ nhĩpêx nẽ kapër nhĩrõp ãm kêt nẽ? Xà kot waja nã? Xà kot haputa? E mẽ atõ tanhmã inhmã wa harẽnh to. Anẽ.

Hãmri nhũm mẽ kuma nẽ kãm:

—Nã kot wata. Kot wata na hitõt tã tanhmã hamaxpër to nẽ ma tẽ nẽ kãm apê. Anẽ.

Hãmri nhũm mẽ kãm:

—Tỳ ãm hãmri na ka harẽ. No mẽ kajaja te mẽ ate hkra kot haputa kot amnhĩ nhĩpêx pyrãk. Mẽ ate Tĩrtũm kapër kõt amnhĩ nhĩpêx o apa hã amnhĩ jarẽnh tã hkwỳm ri amnhĩ nhĩpêx o apa. Te mẽ ate kot hapu kot hipêêxà mã àpênh ã amnhĩ jarẽnh tã kãm àpênh kêeta pyrãk. No kêt mẽ kot amnhĩ tomnuj o mẽ pa xwỳnh kwỳjaja na mẽ arom Tĩrtũm kapër ma nẽ hkõt amnhĩ nhĩpêx. Jao ra tãm amnhĩ nhĩpêx o pa. Jakamã mẽ arom ma kaxkwa hwỳr pa kaxyw ra tãm nẽ. ãm hãmri na pa mẽ amã ixkapër. 32Na ka mẽ finat Juãw Paxis ã ixkukja. Juãw Paxisja na pre hte mẽ ate tãm amnhĩ nhĩpêx ã mẽ amã karõ ho pa. Tã no ka mẽ ãm ama nẽ ãm ama nẽ aa kapër kõt amnhĩ nhĩpêx kêt nẽ. Nom mẽ kot amnhĩ tomnuj o mẽ pa xwỳnh kwỳjaja mẽ arom kuma nẽ Tĩrtũm kõt amnhĩ nhĩpêx. Ka mẽ ja hã mẽ omu nẽ ãm mẽ omu nẽ mẽ urãk nẽ ã amnhĩ nhĩpêx anhỳr kêt nẽ. Anẽ.

Mẽ àpênh punu xwỳnhjê jarẽnh

Makre 12.1-12; Rukre 20.9-18

33Nhũm Jejus arĩ Ijaew krãhtũmjê mẽ mẽ õ patre krãhtũmjê mã kapër. Nẽ mẽ kot tanhmã hipêx to hkukamã mẽ kãm tanhmã amnhĩ jarẽnh to. No ãm amnhĩ tã kuxi nẽ mẽ kãm awjarẽ nẽ mẽ kãm:

—Koja mẽhõ mẽ kot kãm pur kãm àpênh kaxyw hkwỳjê mã karõ nhũm mẽ ma hwỳr mra nẽ kamã mẽmo hy hkre nẽ hkre pa. Hãmri nhũm hpur nhõ dõn nhỹhỹm nojarêt nẽ kãm mẽ àpênh xwỳnhjê mã tanhmã hpur jarẽnh to nẽ mẽ kãm: “E or ixpur nõ. Kê kamã mẽmoj kà hpa ka mẽ mãmrĩ kamã axujamỳnh pa nẽ ho axkjê. Nẽ ixkutêp inhmã inhõ jaxwỳ nẽ mãmrĩ anhõ tanhmã ho hprãm xà hkõt tanhmã ho.”

—Anhỳr o mẽ kãm kapër hãmri nẽ ma nhỹhỹm mõ. 34Tã nhũm ra pur kãm mẽmoj hkà pa nom nhũm hpur nhõ dõn arĩ krĩ hõ kamã hã ujahkre ho ri pa htã kuri kãm àpênh xwỳnhjê ho axkrunêpxi nẽ akupỳm mẽ hwỳr mẽ kurẽ. Mẽ kot mẽ kãm hkwỳ nhõr nhũm mẽ ma kot kãm o mõr kaxyw nhũm ma mẽ hwỳr mẽ kurẽ. 35Nhũm mẽ ma hwỳr mõ. Mõõ nẽ ra hwỳr põj nhũm mẽ amnhĩ wỳr mẽ omu nẽ axtem nẽ mẽ homnuj nẽ. Nẽ mẽ unẽ nẽ ja tak nẽ ja pĩ nẽ hõja nhũm mẽ kẽn o htak hãmri nẽ amnhĩ nẽ wa hano nhũm wa ma akupỳm y kamã mõ. 36Hãmri nhũm

mê õ patrãwja tee ri wa omu nê hamaxpêr o: “Kwa nà na mê ixpê inhmã mê àpênh xwÿnhjê homnuj tÿx nê. Nà kot paj axte mê hwÿr mê hkwyjê rê. Nom hpãnhã mê ho ohtô nê mê kurê. Kê mê ohtô nê mê hwÿr mō nê tã inhmã inhō hkwyj jamÿ nê man ixwÿr o mō.”

—Anhÿr o hamaxpêr hãmri nê mê hwÿr jajê rê nhũm mê ma akupÿm mê hwÿr mō. Nhũm mê amnhĩ wÿr mê ohtô hã nê mã mê ho anê nê mê hipêx kati nê nhũm mê ÿ kamã ma õ patrãwja wÿr akupÿm mō. 37Hãmri nhũm tee ri mê omu nê hamaxpêr o: “Hêxta waa nê. Tanhmã kot paj amnhĩ nhípêx to? Nà kot paj pêr mê hwÿr ixkraja mãn mê. Inhmã hapê htÿx tã kot paj mê hwÿr kumê kê ma mê hwÿr mō. Hãmri nhũm mê kêp ixkra hã omu nê tanhmã ixpê ho hkêr nê. Nê tã inhmã kãm inhōja kwÿ gō.” Anê.

—Hãmri nê mê hwÿr kumê nhũm ma mō. 38Tã hãmri ra mê hwÿr hpôx o mō nhũm mê amÿm amnhĩ wÿr omu nê kêp hkra hã omu nê axtem nê hã axpên mã amÿnê nê axpên mã: “E onêj hpur nhō dõn krata tẽ. Koja nhÿrmã õ papaj mÿr pê amnhĩm hpur ã pykata pytà nê ho õ. Jakamã kwa pu mê hpÿr kurê kumrêx nê kêp hpur ho arík nê ho panhō. E tokyj pu mê kupĩ ri.” Anê.

39—Hãmri nhũm ra tẽ nê mê hwÿr pøj nhũm mê unê nê hpur nê ho kato nê mã ho anê nê kupĩ. ã mê ujarênh kot anhÿr. Anê.

40Nhũm pre ã Jesus mê kãm ujarênh anê. Hãmri nê hã mê hkukja nê mê kãm:

—E koja pur nhō dõnja hkra jarênh ma hãmri nê tãm mê hwÿr mō hãmri nê tanhmã mê hipêx to wehe? Anê.

41Hãmri nhũm mê kãm:

—Nà koja ma akupÿm mê hwÿr mō hãmri nê mê homnuj tÿx nê mê himex pa. Hãmri nê hpãnhã nhãm hpur ã mêmojjê rê nhũm mê tã katàt kôt kãm àpênh o pa. Anê.

42Hãmri nhũm Jesus mê kãm:

—Tÿ ãm hãmri na ka ã mê harênh anê. Kot mê ho anhÿr mã tãm



Matêwre 21.22-46

kênã. Mãn ka prem ra Tirtũm kapër ã kagã htũm kot tanhmã ja jarẽnh toja ma? Harẽnh kot:

Mẽ kot kën o amnhĩm òrkwỹ nhĩpêx kaxyw nẽ kën maati pumu nẽ htỳx omnuj ã hkamnhĩx nẽ hkagata. Mẽ kot hkaga htã nhũm Tirtũm mẽ kurom mex o kot kën piitã hakrenh par ã omunh kurê kumrêx. Tirtũm kot kën maati mex ã harẽnh xwỳnhhta mẽ pamã mex o mex.

Ã Tirtũm kapër ã kagã htũm kot ja jarẽnh kot anhỹr. ⁴³Ja pyrã nẽ na pre ra Tirtũm amnhĩ kaxyw mẽ apê Ijaew xunhwỳ. Mẽ apê hkra nẽ hkõt mẽ ate amnhĩ nhĩpêx kaxyw amnhĩ kaxyw mẽ axunhwỳ. Tã ka mẽ axtem nẽ hkaga. Te mẽ kot kën maati pumunh nẽ mex kêt ã hkamnhĩx nẽ hkagata pyrãk. Jakamã koja mẽ apãnhã Ijaew kêt xwỳnh kwỳjê xunhwỳ nhũm mẽ arom hkõt amnhĩ nhĩpêx mex o pa. Jao ra mẽ kêp hkra nẽ. Anẽ.

⁴⁴Nhũm pre ã Jejus mẽ kãm te kêp kën maati pyrãk o mẽ kãm amnhĩ jarẽnh anẽ. Hãmri nẽ axte amnhĩ tã kuxi nẽ mẽ kãm axte kën jarẽnh pyrãk ã amnhĩ jarẽ nẽ mẽ kãm:

— Nã kot kaj mẽ atõ ixkaga hãmri nẽ te mẽhõ htỳx htẽm nẽ kën pumunh kêt nẽ hã htêk nẽ tẽm pyrãk o amnhĩ nhĩpêx. Jao ixkutã amnhĩ xãm. Rỳ ka tanhmã ajamaxpêr to nẽ ixkaga nhũm te kën maati kot anhĩpy tẽm nẽ axôm par pyrãk o anhĩpêx ka mẽ amex kêt kumrêx. Anẽ.

⁴⁵Nhũm pre ã mẽ kãm ujarẽnh kãm mẽ harẽnh anẽ. Hãmri nhũm patre krãhtũmjê mẽ Parijew nhõ xwỳnhjaja tee ri amnhĩ tã kuma ⁴⁶nhũm ja mẽ kêp omnuj tỳx jakamã nhũm mẽ kãm unênh nẽ haxàr prãm nẽ. No mẽ ãm amnhĩ tã kãm mẽ kot mar o kuhê xwỳnhjê puma nẽ. Mẽ kurom Jejus kêp Tirtũm nhỹ hã kapêr xwỳnh ã hkamnhĩx jakamã nhũm mẽ kãm mẽ uma nẽ. Hãmri nẽ kormã tanhmã ho hkêt nẽ.

Pahi kot hkra hprõ kaxyw hkwyjê hwỳr ã harẽnh

Rukre 14.15-24; mããnẽn Wam Korõt 6.9-11; Epes 5.5-6; Apokarip 19.7-8

22 ¹⁻²Tã nhũm Jejus axte mẽ kãm awjarẽ. Ijaew kot Tirtũm kaga hã mẽ kãm hã kuxi nẽ awjarẽ nẽ mẽ kãm:

— E pa mẽ amã ahpỳnhã mẽ kot Tirtũm kapêr mar nẽ tanhmã amnhĩ nhĩpêx to xwỳnhjê jarẽ ka mẽ inhma. Te mẽ kot pahihti kot hkra hprõ kaxyw nhũm kot amnhĩ wỳr hkwyjê hwỳr nhũm mẽ kot harẽnh mar nẽ ahpỳnhã tanhmã amnhĩ nhĩpêx to xwỳnhjaja kot amnhĩ nhĩpêx pyrãk. Koja pahihtija hkra hã hkĩnh nẽ hã apkur mex kaxyw amnhĩ wỳr hkwyjê hã karõ. ³Hãmri nhũm kãm mẽ àpênh xwỳnhjaja ra kot amnhĩ wỳr mẽ hã karõ xwỳnhjê hwỳr mra nẽ mẽ kãm nojarêt nhũm mẽ kuma nẽ ãm mẽ kuma nẽ axtem nẽ mẽ kêp hitõt nẽ. Hãmri nhũm mẽ tee ri mẽ kuma nẽ akupỳm tẽ nẽ pahihti mã mẽ harẽ.

4—Hãmri nhũm tee ri amnhĩ tã mẽ harênh ma nê hpãnhã mẽ hwỳr axtem kãm àpênh xwỳnh kwỳjê rê nhũm mẽ ma mẽ hwỳr mra nê mẽ kãm: “Pa. E kwa mẽ tokyx. Na ra pahшти mẽ akutêp mẽõ nhĩpêx pa. Na mẽ môx kwỳ hpa nê ho àr mex nê. Nê mẽ akutêp mẽmoj nhĩpêx par jakamã e kwa mẽ tokyx nà.” Anê. 5 ã mẽ kãm kapêr anhỳr tã nhũm mẽ kuma nê ãm mẽ kuma nê ma ahpỳnhã nhỹhỹm mra. Nhũm ja ma àpênh mã mra nhũm ja ma ihpur kãm àpênh mã ma tẽ nhũm ja ma nhỹhỹm mẽmo to wênê ho tẽ. 6 Nhũm mẽ hkwỳjaja mẽ kãm ujarênh xwỳnhjê pynê nê mẽ htao o mẽ kupa.

7—Hãmri nhũm pahштija mẽ harênh ma nê àhkurê nê. Hãmri nê mẽ hwỳr pôristi hkwỳ rê nhũm mẽ ma mẽ hwỳr mra nê mẽ unê nê mẽ kupa nê mẽ õ krĩ hã hpôk pa. 8 Hãmri nhũm pahшти kãm mẽ àpênh xwỳnh kwỳjê mã kãm: “Kwa ra ixte mẽ kutêp mẽõ mex kwỳ xunhwỳr tã nhũm mẽ ixwỳr mrar kêt nê. Ixtỳx ho mẽ mex ã mẽ hkamnhĩx nê amnhĩ wỳr mẽ hã karõ no mẽ mex kêt. Mẽ kot mẽ ixkutã apkur mã tãm kêt. 9 E kwa mẽ ma krĩ hkôt axtem mẽ hkwỳjê japêr o mra. Nê nhỹri mẽhõ pumu nê kãm awjarê kê man ixwỳr tẽ nê ixkra hã hkĩnh nê mẽ ixkutã apku. Mẽ ã mẽ kãm axujarênh o amrar anê.” Anê.

10—Hãmri nhũm mẽ kuma nê ma mẽ hapêr o mra nê mẽ piitã mẽ kãm anhỳr o mra. Nhũm mẽ kuma nê wam tajê rom ma mẽ hkôt mrar kurê kumrêx. Mẽ kot amnhĩ to mex xwỳnhjaja nê mẽ kot amnhĩ tomnuj xwỳnhjaja hãmri piitã ma mẽ hkôt mra. Hãmri nê ixkreja wỳr mra nê hwỳr gjêx kaxyw nhũm mẽ kãm mẽ ê mex gõ nhũm mẽ hagjê hãmri nê kormã mẽ apkur xà hã ixkre hwỳr agjê nê ho nỳt pa. 11 Hãmri nhũm pahштija mẽ hwỳr axà nê mẽ piitã mẽ omu. Nhũm ja pixi nê axtem nê hkwỳjê hkĩnhã mẽ kot kãm ê mex nhõrja jaxàr kêt rãhã axà nê apkur o nhỹ. 12 Hãmri nhũm tee ri ja hã omu nê hwỳr tẽ nê kãm: “Pa. Tk. Kwa na htem ixkrem gjêx kaxyw nê mẽ kot mẽ kãm mẽ ê mex nhõr jagjê nê rĩ kormã hwỳr agjê nê apku. Tã mon ka akwỳjê hkĩnhã haxàr kaga? Kwa na htem ã amnhĩ nhĩpêx anhỳr kêt nê.” Anhỳr o kãm kapêr nom nhũm kuma nê ãm kuma nê tanhmã kutã kãm nê hkêt nê. ãm htỳx apkur o nhỹ. 13 Jakamã nhũm tee ri omu hãmri nê hã mẽ kot kãm àpênh xwỳnhjê mã amỳnê nê mẽ kãm: “E mẽ hwỳr tẽ nê unê nê hpa nê hte hpre nê ma o tẽ nê kamàt kô kamã amê. Kê tee ri mur nê amnhĩ xà htỳx kamã hamak o amnhĩ nham o axpên kamnhar tỳx kaprỳ ho nõ nê rĩ amnhĩ pumu.” Anê. Hãmri nhũm mẽ kuma nê kãm ho anê. ã mẽ ujarênh kot anhỳr. Anê.

14 Nhũm pre Jejus ã mẽ kãm ujarênh anê hãmri nê mẽ kãm:

—Nà Tirtũm kot pahштita pyrà nê amnhĩ wỳr mẽ ho ohtô nê mẽ hwỳr tã na hte mẽ piitã hkôt amnhĩ xunhwỳr kêt nê. Jakamã na hte ãm mẽ ho grêre nê amnhĩ wỳr mẽ ho api. Anê.

Parijew nhõ xwỳnh kot Jejus kamã hamak ã mẽ harênh

Makre 12.13-17; Rukre 20.20-26; mãânên Rômãn 12.1, 13.7

15-16Tã nhũm Parijew nhõ xwỳnhjaja ã Jejus kot mẽ kãm ujarênh anhỳrja ma hãmri nẽ kurũm kato nẽ tanhmã hkukamã axpẽn mã hã àmnênh to. Hãmri nẽ hwỳr mẽ hkwỳjê mẽ Erox kôt mẽ pa xwỳnh kwỳjê rẽ. Hêx rom mẽ kot mẽmoj tã hkukjêr kaxyw hwỳr mẽ kurẽ nhũm mẽ ma hwỳr mra nẽ omu nẽ kãm:

—Kwa Jejus. Nà ãm hãmri na ka hte Tĩrtũm kapêr o mẽ ahkre mex o ri apa nẽ mẽ kamã akahak o apa hkêt nẽ. Mẽ kot tanhmã ato kapêr punuj to htã ka aprĩ hã mẽ ahkre mex o ri apa. 17E kwa mẽ inhmã mẽmoj jarẽ. Rõm nhõ pahihiti kot mẽ pahpê Ijaew mẽ pahte kãm kàxpore hkwy nhõr ã mẽ pamã karõta. Kwa xà ja amã mex nà? Xà kot pu mẽ kãm hkwy gõ? Nà xà kot pu mẽ kãm òr kêt nẽ? E kwa mẽ inhmã tanhmã ja jarênh to. Anẽ.

18Nhũm prem ã hêx rom àhkukjêr anhỳr tã no nhũm ra mẽ hamaxpêr ã mẽ omu nẽ mẽ kãm:

—Tk. Kwa mon ka mẽ ã axêx rom ja hã ixkukjêr anẽ? 19-20E mẽ atõ inhmã kàxpore htỳxre hõ gõ pa omu. Anẽ.

Hãmri nhũm mẽ kãm ja gõ nhũm kupy nẽ kànhmã mẽ kãm kupê nẽ mẽ kãm:

—E mẽhõ nhĩxi nẽ mẽhõ karõ na ja hã? Anẽ.

21Hãmri nhũm mẽ kãm:

—Pahi Sesti karõ nẽ hixi na hã. Anẽ.

Hãmri nhũm mẽ kuma nẽ mẽ kãm:

—Tỳ. Tô kêr ka mẽ mãmrĩ kãm hkwy nhõr o apa. Hã hkarõ nẽ hã hixi. Tãm kot hipêx xwỳnh jakamã õ na. No mẽ kajaja na pre Tĩrtũm mẽ anhĩpêx nhũm mẽ apê õ jakamã kwa kêr ka mẽ kapêr kôt pix mã ri amnhĩ nhĩpêx o ri apa. Anẽ.

22Hãmri nhũm mẽ amnhĩ jaêr pê ã kot kàxpore jarênh anhỳrja ma nẽ axte kãm tanhmã nẽ hkêt nẽ. Hãmri nẽ akryk omu hãmri nẽ ma akupỳm mra.

Akupỳm mẽ htĩr ã mẽ harênh

Makre 12.18-27; Rukre 20.27-40; Juãw 5.21, 6.39-40; mãânên Wam Korõt 6.14, 15.12-28; Wam Tesarõn 4.13-18

23Tã nhũm Satusew nhõ xwỳnh kwỳjaja mẽ kot akupỳm mẽ htĩr kêt ã mẽ hkamnhĩx kêt xwỳnhjaja na pre mẽ. Na pre htem mẽ htyk nẽ mẽ hapêx kumrêx ã mẽ hkamnhĩx jakamã axpẽn mã tanhmã Jejus jarênh to nẽ axpẽn mã:

—E kwa pu mẽ hwỳr mra nẽ mẽmoj xihtỳx ã hkukja. Kê mẽ pama nẽ tee ri tanhmã mẽ pamã kapêr to hkukamã hamaxpêr kaprỳ. Kê mẽ

piitã ja hã omu nê àhpumunh kêt ã omunh kurê kumrêx. E tokyx pu mē hwÿr.

Anhÿr jakamã Parijew nhõ xwÿnhjê pyrã nê hêx rom ma hwÿr mra nê hkukja nê kãm:

24—Pa Jesus? Kwa mē inhmã mēmoj jarê. Na pre finat Mojesja Tirtũm nhÿ hã ã mē panhĩgêjtê mã karõ anê. Mē hkra hkêt rãhã mē pa nê mē htyk xwÿnhjaja nhũm mē harênh o:

Koja mēhõ hprõ nê kamã hkra hkêt rãhã pan ty. Hã koja hkõt htõja hpãnhã hprõ ho hprõ nê kamã hkra. Hãmri nhũm kato nê te kêp htõ htyk xwÿnhhta hkra pyrãk. Anê.

Ã na pre Mojesja Tirtũm nhÿ hã mē kãm karõ anê. 25Jakamã kwa ga mē ixujarênh ma. Koja mē kot axpên to htõ xwÿnhjaja kêp 7. Nhũm kot waja hãmri hprõ nê wa pa nhũm kamã hkra hkêt rãhã ty. Nhũm hkõt htõja hpãnhã ho hprõ 26nê wa axpên to pa. Nhũm mãânên kamã hkra hkêt rãhã ty. Nhũm htõ hõta haxwÿja hpãnhã tãm o hprõ nê we wa axpên to pa grire nhũm haxwÿja kamã hkra hkêt rãhã ty. Hãmri nhũm htõ hkwÿjaja ni pyxi nê axpên pãnhã ho hprõ hpa no mēhõ kamã hkra hkêt rãhã htyk pa. 27Hãmri nhũm mē hprõta mē hkõt amnhĩ to hitep nê ty. 28Tã Tirtũm kot akupÿm nhÿrmã mē ho htĩr ronhÿx nhÿ nhÿx kêp nija mjên kumrêx? Ra piitã kot ho hprõ kênã. E mē inhmã ja jarê. Anê.

29-30Hãmri nhũm Jesus mē kuma nê mē kãm:

—Nã kaxkwa kamã mē kot amnhĩ nhĩpêxja axtem na. Mē htĩr ri mē kot Tirtũm kõt amnhĩ xunhwÿr xwÿnhjaja na htem ty hãmri nê Tirtũm nhõ krĩ kamã axte kãm hprõ hprãm kêt nê pa. Jakamã hprõ hkêt nê pa. Rÿ ni japêr nê mjên kêt nê pa. Nom ri kãm mjên rÿ hprõ hprãm kêt nê pa. Hãmri nê Tirtũm kapêr o mē wrÿk xwÿnhjê pyrã nê axte htyk kêt nê. ãm htĩr tũm rãhã nê pa ho pa. Pêr mē ate Tirtũm kapêr ã kagã htũm mar mex kêt jakamã na ka mē ã ja hã ixkukjêr anê. Tirtũm àhpumunh tÿx o àhpumunh tÿx jakamã kumã mē ate mēmoj tã ixkukjêr xwÿnhhta na tanhmã kêp kute hkêt. Ra ja kukamã àhpumunh tÿx kênã.

31-32—Nom mē ate akupÿm mē htĩr kêt ã mē hkamnhĩxja kot paj ixprĩ hã mē amã harê. Amnepêm na pre Tirtũm pĩ hpõkja kamã tanhmã Mojes mã kapêr to. Mãn ra mē ate mar. Na pre kãm:

Ixpê Apraãw nhõ Tirtũm na pa. Nê mãânên ixpê Apraãw kra Ijak mē htãmnhwÿ Jako wa õ Tirtũm na pa.

Anhÿr o Mojes mã amnhĩ jarê nhũm kuma nê hã kagã. Kêp apu arĩ mē htyk rãhã nhÿx pre ã mē harênh anhÿr kêt nê. Nhÿx pre mē harênh o: “Amnepêm Apraãw nê hkra nê htãmnhwÿ mē htĩr ri ixpê mē õ Tirtũm na pa pre.” Anhÿr o nhÿx pre mē harê. Nom na pre ã amnhĩ jarênh anhÿr kêt nê. Mē pamã te Apraãwja mē htyk nê mē hapêx pyrãk. Nom nhũm prem ra Tirtũm ri ra akupÿm htĩr nê mex nê pa ho pa. Tã ka htem Tirtũm kapêr kwÿm ri akupÿm mē htĩr kêt ã mē harênh o apa.

Anhÿr o Satusew nhõ xwÿnhjê mã kapêr. **33**Hãmri nhũm mẽ kot mar o kuhê xwÿnhjaja amnhĩ jaêr pê kot mẽ ahkreja ma.

Tirtũm kapêr maati jarênh

Matêwre 10.37; Makre 12.28-34; Rukre 10.25-28; mãânên Wam Juãw 5.3

34Tã nhũm Parijew nhõ xwÿnhjaja Satusew nhõ xwÿnhjê jarênh ma. Mẽ kot tee ri kãm hamaxpêr o Jejus jakrenh prãm kaprÿ hã mẽ harênhja ma hãmri nê axpên wÿr akuprõ nê Jejus wÿr mra. Kot mẽ uràk nê hêx rom àhkukjêr nê hamaxpêr o hakrenh kaxyw hwÿr mra. **35**Hõja kêp Tirtũm kapêr tũm o mẽ ahkre o mẽ pa xwÿnh jakamã hêx rom kamã hamak kaxyw kãm kapêr nê kãm:

36—Kwa Jejus. Ot pa mẽ awÿr mra. Kwa mẽ inhmã mẽmoj jarê. Na pre Tirtũm ahpÿnhã mẽmoj to 10 nê hã mẽ pamã karõ. Mẽ pahte hkõt amnhĩ nhĩpêx kaxyw hã mẽ pamã karõ. Tã nhÿ kapêr na mex o kot hkwy jakrenh wehe? Anê.

37Hãmri nhũm kuma nê mẽ kãm:

—Nà kot mẽ pamã hã karõ kot:

Kêr ka mẽ anhĩ piitã ho amã Tirtũm kĩnh tÿx o apa. Mẽ amã hkĩnh tÿx o mẽmoj piitã hakrenh par o apa.

38E Tirtũm kot mẽ pamã hã karõ ja na mex o piitã hakrenh par. **39**Nê hkõt ja:

Kêr ka mẽ amã akwÿjê hã ma ho te ka amã amnhĩ tã ma pyræk. Jao ra tãm mẽ hipêx.

40Ã Tirtũm kapêr ã kagà htũm kot mẽ pamã hã karõ kot anhÿr. ã mẽ pahte amnhĩ nhĩpêx anhÿr o papaja na Tirtũm kãm hprãm tÿx kumrêx. Kot kaj mẽ ja wa hkõt amnhĩ nhĩpêx rãhã ho ri apa nê mãânên ra Tirtũm kot mẽ pamã mẽmoj tã karõ xwÿnh piitã hkõt amnhĩ nhĩpêx. Ja na pre Mojes mẽ Tirtũm nhÿ hã kapêr xwÿnhjaja amnepêm Tirtũm nhÿ hã mẽ panhĩgêjtê mã hã karõ ho pa. Anê.

Jejus kot amnhĩ tã mẽ hkukjêr ã harênh

Makre 12.35-37; Rukre 20.41-44; mãânên Rõmãn 1.3-4

41Nhũm Parijew nhõ xwÿnhjaja arĩ Jejus mar o kuhê nhũm amnhĩ tã tanhmã mẽ hkukjêr to. Nom te nhãm mēhõ hã mẽ hkukjêr pyræk o mẽ hkukja nê mẽ kãm:

42—E mẽ inhmã mẽmoj jarê. Tanhmã na ka htem axpên mã Tirtũm kot mẽ akaxyw ãm mã xwÿnhhta jarênh to? Kêp mẽhõ kanrêhã htãmnhwÿ koja wehe? Anê.

Hãmri nhũm mẽ kãm:

—Nà koja kato nê kêp pahi finat Tawi kanrêhã htãmnhwÿ koja.

43Anê nhũm Jejus mẽ kuma nê mẽ kãm:

—Tỳ. Âm hāmri na ka mẽ harẽ. No mo na htem axpẽn mã kệp pahi Tawi hkanrêhã htàmnhwỳ pix ã harẽ nẽ mãânèn kệp õ pahihti hã harênh kêt nẽ? Tawi na pre Tirtùm Karõ nhỹ hã tanhmã harênh to nẽ harênh o:

44 Na pre Tirtùm inhõ Pahihti mã ã kapěr anẽ nẽ kãm: “E amnẽ ixwỳr tẽ nẽ inhĩhkô hã nhỹ nẽ inhmã mẽ ho amnhĩptàr o akrĩ. Kot paj mẽ kot kãm akurẽ xwỳnh piitã mẽ unẽn pa nẽ awỳr mẽ o mra nẽ anhĩhkram mẽ haxàr pa.” Anhỹr o pre kãm kapěr.

45 ã Tawija Tirtùm kot Kris mã kapěr jarênh nẽ kệp õ pahi hã kagà anẽ. Mẽ kajaja na ka htem âm kệp Tawi tàmnhwỳ pix ã axpẽn mã harênh o ri apa. No kêt Tawija na pre kệp õ Pahihti hã harênh o pa. Anẽ.

46 Hāmri nhũm mẽ kuma nẽ tee ri kot tanhmã kutã kãm kapěr to hkukamã hamaxpěr nẽ axte mẽmoj tã hkukjêr kêt nẽ. Tanhmã kot mẽ amnhĩ to nẽ hamaxpěr o hakre? Na prem tee ri kãm hamaxpěr o hakrenh prãm kaprỳ. Jejus mẽmoj piitã hkukamã àhpumunh tỳx o àhpumunh tỳx.

Jejus kot tanhmã Parijew nhõ xwỳnhjê jarênh to

Makre 12.38-40; Rukre 11.43-46, 20.45-47

23 ¹Tã nhũm Jejus mẽ ixte hkôt ixpa ho ixpa xwỳnhjê mẽ mẽ kot mar o kuhê xwỳnhjê mã kapěr nẽ mẽ inhmã tanhmã Parijew nhõ xwỳnh mẽ Mojes kapěr o mẽ ahkre xwỳnhjê jarênh to nẽ mẽ inhmã:

2—Nà Parijew nhõ xwỳnh mẽ Tirtùm kapěr tùm o mẽ ahkre xwỳnhjaja na htem hprĩ hã Tirtùm kapěr ã kagà htùm mar mex nẽ. ³Jakamã kêr ka mẽ mar tỳx nẽ mẽ kot ho mẽ ajahkre kôt amnhĩ nhĩpêx. No mẽ kot amnhĩ nhĩpêxja kêr ka mẽ hkôt amnhĩ nhĩpêx kêt nẽ. Mẽ kot Tirtùm kapěr tùm o mẽ ajahkre htã hkôt amnhĩ nhĩpêx kêt nẽ. ⁴Te mẽ kot mẽhõ kot mẽ katut ã mẽ kãm mẽ jênh pytĩ janhôr tã no âm mẽ kuxwar hkwỳ htur kêt kot amnhĩ nhĩpêx pyràk o na htem amnhĩ nhĩpêx o pa. Jao mẽ amã mẽmoj tã karõ nẽ mẽ amã: “E kêr ka mẽ ã amnhĩ nhĩpêx anẽ nẽ ã amnhĩ nhĩpêx anẽ.” Anhỹr pix o mẽ amã kapěr o pa. Nom mẽ tãmjaja amnhĩ kapěr kôt amnhĩ nhĩpêx kêt nẽ.

5—Na htem hkwỳjê kot mẽ omunh nẽ mẽ kot amnhĩ to mex ã mẽ harênh kaxyw mẽ noo mã tanhmã amnhĩ nhĩpêx to. Nẽ mẽ mẽ noo mã mẽ ê mex pix kãm pa. Nẽ amnhĩm Tirtùm kapěr ã kagà htùm kwỳ hã kagà nẽ amnhĩ nhõkrã hã hanhõ nẽ amnhĩ pa hã hanhõ nẽ hã pa. Mẽ kot hã nohtỳx rãhã hã mẽ hkamnhĩx kaxyw nhũm htem ã amnhĩ nhĩpêx anhỹr o pa. Nẽ mẽ kãm mẽ piitã mẽ kot amnhĩm mẽ rũnh ã mẽ harênh o paja nhũm htem kãm hprãm.

6—Nẽ mẽ pahpê Ijaewjê nhõ Tirtùm kapěr o mẽ ahkre xà hã ixkre kamã mẽ kot amnhĩ to rũnh xwỳnhjê hkrĩ xà mex pix kamã kãm hkrĩ hprãm. Nẽ mẽmoj tã mẽ apkur xà mex ã arĩgro hã nhũm htem ma mẽ

apkur xà hã ixkre hwÿr akuprõ nhũm mẽ kot amnhĩ to rũnh xwÿnhjê hkrĩ xà mex pix kamã kãm hkrĩ hprãm. 7Nê nhÿri pry hã mra nhũm mẽ kot mẽ omunh nê mẽ kêp mẽ ahkre xwÿnh maati hã mẽ hã hpijaam kãm tanhmã mẽ kãm kapêr mex toja nhũm htem kãm hprãm. ã na hte Parijew nhõ xwÿnh mẽ Tĩrtũm kapêr tũm o mẽ ajahkre xwÿnhjaja hêx rom mẽ anoo mã amnhĩ nhĩpêx anhÿr o pa.

8-10—No mẽ kajaja. Kêr ka mẽ ho mẽ urak kêt nê. Kê mẽ axpên mã mẽ ajarênh o: “Pahi Maati” anhÿr o mẽ ajarênh kêt nê. Rÿ mẽ ajarênh o: “mê ijahkre xwÿnh maati” anhÿr o axpên mã mẽ ajarênh hkêt nê. Kêt paxipix na pre Tĩrtũm mẽ akaxyw ixãm jakamã paxipix na ixpê mẽ anhõ Pahi Maati. Nê paxipix na ixpê mẽ ajahkre xwÿnh maati. No mẽ kajaja ixkõt mẽ apê axpên to atõx nê atõ na ka mẽ.

—Nê kêr ka mẽ ri axpên jarênh o: “Mêpahpãm” anhÿr kêt nê. Kêt kaxkwa kamã na Mêpahpãmja.

11-12—Nê kot ka mẽ amnhĩ to rax prãm xaj tanhmã amnhĩ to jarkrar to ho apa htã no nhũm akwÿjaja ama nê ãm ama nê akõt hamaxpêr kêt nê. No kot kaj mẽ piitã mẽ kutã tanhmã anojarêt to ho apa nhũm mẽ amnhĩ tã mẽ apumu nê axpên mã mẽ amex ã mẽ ajarê. Jakamã kot kaj mẽ amã mẽ piitã mẽ kot mẽ amex ã mẽ ajarênh prãm hãmri nê ri mẽ piitã mẽ kãm tanhmã amnhĩ nhĩpêx to pê mẽ kutã anojarêt rãhã ho ri apa. Anê.

Jejus kot mẽ hkwÿjê mã kapêr tÿx ã harênh

Makre 12.40; Rukre 11.39-52, 20.45-47

13-14Tã nhũm Jejus hpãnhã Parijew nhõ xwÿnh mẽ Tĩrtũm kapêr tũm o mẽ ahkre ho mẽ pa xwÿnhjê mã kapêr. Nê mẽ kãm kapêr kãm hihtÿx nê mẽ kãm:

—E mẽ apê Parijew nhõ xwÿnh mẽ Tĩrtũm kapêr tũm o mẽ ahkre xwÿnhjaja. E mẽ inhma. Kot kaj mẽ amex kêt nê. Mẽ apê mẽ no kupyw xwÿnh na ka mẽ. Nê mẽ amã Tĩrtũm kõt amnhĩ nhĩpêx prãm kêt. Nê nhÿrmã atyk nê mẽ amã õ krĩ hwÿr axàpir prãm kêt. Nê akwÿjaja kot hwÿr àpir pymaj na ka htem akwÿjê nê tanhmã mẽ kãm axêx to ho apa. Mẽ kot mẽ apyrà nê Tĩrtũm kapêr kwÿm amnhĩ nhĩpêx prãm xaj na ka htem amnhĩ mẽ tanhmã mẽ kãm axêx to ho ri apa. Jao te mẽ ate mẽ kêp Tĩrtũm nhõ krĩ hwÿr kahêxà kahê htÿx pyrak o apa.

15—Nê mẽ akwÿjaja kot mẽ akõt amnhĩ xunhwÿr nê mẽ akõt amnhĩ nhĩpêx prãm xaj na ka htem ma awry hã nhÿhÿm tanhmã mẽ kãm ri axujarênh to ho ri apa. Jakamã nhũm mēhõ mẽ ama nê mẽ akõt amnhĩ xãm hãmri nê ra amnhĩ tomnuj tÿx o mẽ ajakre. Jakamã koja mẽ nhÿrmã mẽ apyrà nê ma mẽ kot amnhĩ xà htÿx kamã hamak tũm xàta wÿr pa. Jakamã kwa mẽ o kora. Kot kaj mẽ amex kêt nê.

16—Hêxta waa nê. Mẽ apê Parijew nhõ xwÿnhjê mẽ mẽ apê Tĩrtũm kapêr tũm o mẽ ahkre xwÿnhjaja kot kaj mẽ amex kêt kumrêx. Na ka

htem mẽ kêp mẽ hikàxpore jamỳnh prãm xàj atỳx ri tanhmã mẽ ahkre hto ho apa nê mẽ kãm: “Kot kaj mẽ ãm hãmri mẽmoj tâ amnhĩ jarênh kaxyw hãmri nê Tĩrtũm mã amnhĩ jarênh xà hã ixkre nhĩxi jarênh kôt mễhỗ mã amnhĩ jarê nhũm ama nê hamaxpêr o: ‘Ko. Apu ãm hãmri na inhmã amnhĩ jarê rỳ ko na apu ãm amnhĩ to hêx.’ Anhỹr o hamaxpêr. Nom kot kaj mẽ ixkreta ho mex kaxyw mẽ kãm kàxpore hkwy gõ hãmri nê ate mẽ kãm ỡr xàta jarênh kôt ãm hãmri mẽmoj tâ mễhỗ mã amnhĩ jarê. Hãmri nhũm ama nê hamaxpêr o: ‘Nà ãm hãmri na ã inhmã amnhĩ jarênh anê. Kot ixkre ho mex kaxyw kàxpore hkwy nhõr kôt ã amnhĩ jarênh anê. Jakamã na amnhĩ to hêx kêt nê.’” Anhỹr o hamaxpêr. Na ka htem ã mẽ ahkre ho apa anê. 17Nom mẽ ate mẽ ahkreta mex kêt. Pêr mẽ ajamaxpêr mexti hã. Tĩrtũm mã amnhĩ jarênh xà hã ixkreta mex o ixkre ho mex kaxyw kàxpore nhõrta jakrenh. Tã ka htem axtem nê mẽ kot kãm kàxpore nhõrta mex o ixkre jakrenh ã harê. No mẽ pahte ãm hãmri mẽmoj tâ amnhĩ jarênh nê aa paxêx kêt rãhã ho papaja na Tĩrtũm kãm hprãm.

18—Nê na ka htem mẽ kêp mẽ hikukrêx jamỳnh prãm xàj ã atỳx ri mẽ ahkre anê nê mẽ kãm: “Kot kaj mẽ ãm hãmri mẽmoj tâ amnhĩ jarênh kaxyw nê Tĩrtũm mã mẽmoj nhõr xà hã mễstija jarênh kôt mễhỗ mã tanhmã amnhĩ jarênh to. Hãmri nhũm mẽ ama nê hamaxpêr o: ‘Nà ãm hãmri na inhmã amnhĩ jarê rỳ ko na apu ãm inhmã amnhĩ to hêx.’ Anhỹr o hamaxpêr. Nom kot kaj mẽ Tĩrtũm mã mẽmoj nhõr xà hã mễstija ã kãm mẽmoj xi. Hãmri nê ra mẽ ate kãm ỡr xàta jarênh kôt ãm hãmri mẽmoj tâ mễhỗ mã amnhĩ jarê. Hãmri nhũm ama nê hamaxpêr o: ‘Nà ãm hãmri na ã inhmã amnhĩ jarênh anê. Kot Tĩrtũm mã mẽmoj nhõr ã amnhĩ jarênh kôt kot amnhĩ jarênh anhỹr jakamã na amnhĩ to hêx kêt nê.’ Anhỹr o hamaxpêr.” Anê. Na ka htem ã mẽ ahkre anê. 19Mễ ajamaxpêr kêt xwỳnh na ka mẽ. Tĩrtũm mã mẽmoj nhõr xà hã mễstija na mex o mẽ kot hã kãm mẽmoj nhõrta jakrenh. Tã na ka htem axtem nê mẽ kot hã kãm mẽmoj nhõrta mex o mễsti jakrenh ã harê. 20Nom Tĩrtũm mã mễsti mẽ mẽ kot hã kãm mẽmoj nhõrta te kot axpên pyrãk jakamã kot kaj mẽ mễstija jarênh kôt mẽmoj tâ amnhĩ jarê nê mããnê nê mẽ ate hã Tĩrtũm mã mẽmoj xirja jarênh kôt amnhĩ jarê. Hamê wa kot axpên pyrãk jakamã hamê wa harênh pê amnhĩ to axêx kêt nê. Jakamã kêr ka mẽ mẽmoj tâ amnhĩ jarênh kaxyw nê hamê wa harênh kôt ãm hãmri mẽmoj tâ amnhĩ jarê nê ho axêx kêt nê. 21Tã kot kaj mẽ ãm hãmri amnhĩ jarênh ã mẽmoj tâ amnhĩ jarênh kaxyw nê Tĩrtũm mã amnhĩ jarênh xà hã ixkre hkôt hã amnhĩ jarê nê mããnê nê Tĩrtũm kêp ixkre hpãm kôt hã amnhĩ jarê. Jakamã kêr ka mẽ hamê wa harênh pê amnhĩ to axêx kêt nê.

22—Nê kot kaj mẽ ãm hãmri amnhĩ jarênh ã mẽmoj tâ amnhĩ jarênh kaxyw nê kaxkwa jarênh kôt amnhĩ jarênhja o mããnê nê kaxyw kaxkwa

kamã Tirtũm krĩ xà maati hkõt amnhĩ jarẽ. Nẽ mãănẽn Tirtũm kõt amnhĩ jarẽ. Jakamã kwa hamẽ wa harẽnh pê amnhĩ to axêx kêt nẽ.

23—Hêxta waa nẽ. Mẽ apê Parijew nhõ xwỳnh mẽ mẽ apê Tirtũm kapêr tũm o mẽ ahkre xwỳnhjaja kot kaj mẽ amex kêt nẽ. Mẽ ate mẽ no kupyw xwỳnh na ka mẽ. Na ka htem Tirtũm kapêr piitã hkõt amnhĩ nhĩpêx kêt nẽ ãm hkwỳ kõt pix mã amnhĩ nhĩpêx o ri apa. Na ka htem ãm kapêr o hpỳnhre nẽ hkõt amnhĩ nhĩpêx ã amnhĩ pumu nẽ ate amnhĩ to mex xwỳnh ã amnhĩ jarẽnh o apa. No Tirtũm kãm hprãm xà piitã hkõt amnhĩ nhĩpêx kêt nẽ. Mẽ ate tãm mẽ hipêx nẽ mẽ ho mex nẽ mẽ kamã axukaprĩ hã kot mẽ amã karõja. Nẽ mẽ amã Tirtũm kĩnh ã kapêr kõt amnhĩ nhĩpêx hã karõja ra mẽ ate mar tã hkõt amnhĩ nhĩpêx kêt nẽ. Mẽ ate kapêr piitã hkõt amnhĩ nhĩpêx ronhỹx ja mẽ amã mex o mex. 24Mẽ ate ãm kapêr o hpỳnh nẽ hkõt amnhĩ nhĩpêx jakamã te mẽ ate atỳx ri tanhmã axàpkur to ho mẽ akrĩ pyræk. Jao te mẽ axàpkur xà hã mẽõ kamã pure pumunh nẽ nê hanhir nẽ rẽnũh tã mãănẽn kamã kẽn rax pumunh tã nê hanhir nẽ rẽnũh kêt rãhã hkur pyræk. Jao Tirtũm kapêr o hpỳnhre nẽ hkõt amnhĩ nhĩpêx no piitã hkõt amnhĩ nhĩpêx kêt nẽ. Pêr mẽ ajamaxpêr kêt tã na ka htem atỳx mẽ ahkre ho ri apa.

25—Hêxta waa nẽ. Mẽ apê Parijew nhõ xwỳnh mẽ mẽ apê Tirtũm kapêr tũm o mẽ ahkre xwỳnhjaja kot kaj mẽ amex kêt nẽ. Mẽ ate mẽ no kupyw xwỳnh na ka mẽ. Nã mẽ apê Parijew nhõ xwỳnhjaja te mẽ ate mẽ kot apkur kaxyw prat kre kuhõnh punuj tã mex ã harẽnh nẽ kamã apkur pyræk o na ka mẽ. Jao ãm mẽ akrãhkà rũm pix mã mẽ amex. Nẽ mẽ noo mã te mẽ amex pyræk no mẽ anhõxàhkre kaxwỳnh kãm mẽ ajamaxpêrja mex kêt. Mẽ akapêr prãm nẽ mẽ axàhkurê nẽ mẽ anhõxỳy. 26Mẽ ajamaxpêr mex kêt kênã. Kwa kêr ka mẽ tãm ajamaxpêr o tãm akwỳjê nhĩpêx o ri apa. Nẽ axàmnhĩx ri mẽ kêp amrakati xwỳnhjê mã mẽmoj nhõr o ri apa. Kot kaj mẽ ã amnhĩ nhĩpêx anê nhũm Tirtũm ja hã mẽ apumu nẽ amnhĩm mẽ amex ã mẽ ajarẽ. No na ka htem amã mẽ amnhĩ to mex prãm xàj ãm tee ri amnhĩ kuhõnh japjê kaprỳ.

27—Hêxta waa nẽ. Mẽ apê Parijew nhõ xwỳnhjê mẽ mẽ apê Tirtũm kapêr tũm o mẽ ahkre ho mẽ apa xwỳnhjaja kot kaj mẽ amex kêt nẽ. Te mẽ ate mẽ htykjê jagjênh xà pyræk. Na htem mẽ hagjênh xà ho mex o pa nom kamã mẽ hi nẽ ahpunuj pix. 28Ja pyrã nẽ ã mẽ ate amnhĩ nhĩpêx anhỹr. Kapõt rũm mẽ anhĩja na mex. Te mẽ ate mẽ ho mex o apa pyræk o na ka htem amnhĩ nhĩpêx nhũm mẽ ãm akrãhkà pix pumu nom ãm mẽ akrã hi kaxwỳnh kãm mẽ ajamaxpêr punuj rãhã hã mẽ apumunh kêt nẽ. Mẽ ate tanhmã mẽ no kupyw to pix kukamã ajamaxpêr jakamã te mẽ ate mẽ htykjê jagjênh xà pyræk.

29-30—Hêxta waa nẽ. Mẽ apê Parijew nhõ xwỳnh mẽ mẽ apê Tirtũm kapêr tũm o mẽ ahkre xwỳnhjaja kot kaj mẽ amex kêt nẽ. Mẽ ate mẽ no

kupyr xwÿnh na ka mẽ. Na ka htem ma mẽ hã pika hwÿr apa nẽ Tirtũm nhÿ hã kapẽr o mẽ pa xwÿnhjẽ hã pika ho mex. Nẽ mẽ kot amnhĩ to mex xwÿnhjẽ hã pika ho mex. Nẽ axpẽn mã mẽ harẽnh o: “Hêxta waa nẽ. Na pre amnepêm mẽ pakukamã mẽ panhĩgêtjaja Tirtũm nhÿ hã mẽ kãm kapẽr xwÿnhjẽ homnuj nẽ mẽ kupa. No kêt mẽ papajaja mẽ kamã ri papa ronhÿx pu prem mẽ urak nẽ ã mẽ hipêx anhÿr kêt nẽ.” Anhÿr o axpẽn mã mẽ hkaprĩ ho ri apa. 31-32Nom ãm amnhĩ to axêx. Mẽ ate ã amnhĩ nhĩpêx anhÿr o apa kênã. ã mẽ ate amnhĩ nhĩpêx anhÿr jao ra apê mẽ hkanrêhã mẽ hkra kumrêx ã amnhĩ to amnhĩrit mex o apa. 33Te mẽ ate kagã xoprê kot mẽ hkamnhar nẽ mẽ homnuj tÿx pyrak jakamã koja Tirtũm nhÿrmã ma mẽ kot amnhĩ xà htÿx kamã hamak tũm xàta wÿr mẽ ajano ka mẽ ma hwÿr ajapêx. Hãmri nẽ tee ri amã ajapôx prãm kaprÿ nẽ rĩ amnhĩ pumu.

34—Kot paj nhÿrmã ma mẽ awÿr inhÿ hã ixkapẽr jarẽnh o mẽ pa xwÿnh kwÿr rẽ. Nẽ inhÿ hã mẽ àhpumunh xwÿnh kwÿr rẽ. Nẽ ixkapẽr o mẽ ahkre xwÿnh kwÿr rẽ. Nom kot kaj mẽ ãm mẽ kapẽr ma nẽ apê mẽ hprãm nõkati nẽ tanhmã mẽ homnuj tÿx to ho apa. Nẽ ixpê mẽ hkwÿjê hpar o apa. Jao pĩ kahpa hã mẽ hanhôr o mẽ hkwÿjê hpa. Nhũm mẽ hkwÿjaja Tirtũm kapẽr o mẽ ahkre xà hã ixkre kamã mẽ ahkre ho hkrĩ ka mẽ omu nẽ mẽ unê nẽ ixkreja kamã mẽ htak. Hãmri nhũm mẽ apymaj nhãm ahpÿnhã krĩ hkwÿ hwÿr hprôt nẽ mra. ã kot kaj mẽ inhÿ hã ixkapẽr jarẽnh xwÿnhjẽ nhĩpêx anhÿr o apa. 35-36Na prem ra mẽ himex rax nẽ. Amnepêm panhĩ kator krax rũm Atãw kra Apewta na pre Tirtũm nhÿ hã kapẽr o pa nhũm htôja kãm mar prãm kêt nẽ kupĩ. Tã nhũm Tirtũm axte mẽ hwÿr ÿ hã kapẽr o mẽ pa xwÿnh kwÿjê rẽ nhũm prem mã mẽ ho anê nẽ mẽ hkwÿjê nhĩmex. Nhũm pre xatã mẽ hwÿr mẽ hkwÿjê rẽ nhũm mẽ xatã mẽ kupa. Apew rũm Parakis kra Jakaris wÿr na prem mẽ himex rũnh nẽ. Hãmri nhũm prem Tirtũm mã amnhĩ jarẽnh xà hã ixkre kamã Jakarisja pĩ. Tã mẽ kajaja mẽ ate mẽ urak nẽ mẽ amã Tirtũm kapẽr mar prãm kêt nẽ mẽ urak nẽ amã Tirtũm nhÿ hã kapẽr xwÿnhjẽ nhĩmex prãm nẽ. ã mẽ ate mẽ anhĩgêtjê pyrã nẽ mẽ hipêx anhÿr mÿrapê koja Tirtũm mẽ apê mẽ hkanrêhã mẽ hkra nẽ mẽ htãmnhwÿjaja mẽ ato hpimràatã tanhmã mẽ ato htÿx to ka mẽ amnhĩ xà htÿx kamã ajamak rãhã ho ri apa. Anẽ.

Jejus kãm Jerujarẽ nhõ xwÿnhjẽ japê htÿx ã harẽnh

Rukre 13.34-35; mããnẽn Rõmãn 11.25-27

37Hãmri nhũm Jejus te ra kot Jerujarẽ nhõ xwÿnhjẽ pumunh nẽ mẽ kãm kapẽr pyrak o tanhmã kapẽr to ho xa. Nẽ mẽ kãm:

—Hêxta waa nẽ Jerujarẽ nhõ xwÿnhjaja. Tirtũm kot xatã mẽ awÿr ÿ hã kapẽr jarẽnh xwÿnhjẽ rẽnh nhũm mẽ kot mẽ akôt mẽ amã kapẽr jarẽnh o pa htã ka mẽ kapẽr mar kêt kumrêx. Nẽ axtem nẽ kên o mẽ htak

o mẽ himex o apa. Ā na ka htem amnhĩ tomnuj o apa anẽ. Tã nom arĩ inhmã mẽ ajamãr o ri ixpa hprãm. Te ho krãhyre kot nore hpro nẽ ho hikwỹ pyrãk o na pa inhmã mẽ anhĩpêx prãm nẽ. Nom mẽ amã ixprãm nõkati nẽ mẽ ate ixkaga kumrêx. ³⁸Mýrapê koja Tĩrtũm mẽ anhõ krĩ jamãr kêt nẽ. ³⁹Kot paj tokyx ty nẽ mẽ apiitã mẽ are nẽ ma akupỹm api ka mẽ axte ixpumunh kêt nẽ. Ām akupỹn ixwrỹk xà hã arĩgrota pix ã koja mẽ akwỹjaja mẽ amỹrpê krĩ ja kamã ixpõx ã ixpumu. Hãmri nẽ mẽ akurom ixpumu nẽ hkĩnh tỹx nẽ. Nẽ tã ixkõt amnhĩ xunhwỹr kurê kumrêx. Hãmri nẽ axpẽn mã ijarênh o:

Ota Tĩrtũm kot mẽ pahwỹr mẽnh xwỹnhhta wrỹ. Nà ãm hãmri na mẽ pahwỹr wrỹ. Ja mex o mex.

Koja mẽ ã axpẽn mã ijarênh anẽ. Anẽ.

Jejus kot mẽ pakukamã mẽmoj jarênh

Makre 13.1-13; Rukre 21.5-19;

mããnẽn Wam Ximotre 4.1-3; Sikũn Ximotre 3.1-9; Apokarip 6.1-17

24 ¹Tã nhũm Jejus Tĩrtũm mã amnhĩ jarênh xà hã ixkre rũm kato nẽ ma tẽ. Pa mẽ ixte hkõt ixpa ho ixpa xwỹnhjaja kormã ixkreja pumunh o ixkuhê nẽ kãm harê nẽ kãm:

—Kwa Pahihiti. Hêxta waa nẽ. Ixkreja ãm mex kumrêx. Anẽ.

Hãmri nhũm mẽ inhmã:

2—Tỹ mex nom koja nhỹrmã mẽ kãm Tĩrtũm kurê xwỹnhjaja grãnh pa. Koja arĩ kẽn õ axkrutre nẽ axpẽn mỳnh nẽ nõr kêt nẽ. Koja piitã anhgrã nẽ ahpỹnhã ri hikwỹ. Anẽ.

3Hãmri pa mẽ kuma nẽ tee ri hkukamã ijamaxpêr. Hãmri nhũm Jejus ma tẽ nẽ hixêp pê Oriwêhti hã api nẽ hã nhỹ pa mẽ ma hkõt mra nẽ mẽ kot ã ixkre nhĩpêx anhỹrta ã hkukja nẽ kãm:

—Kwa xà ãm hãmri koja mẽ ã ixkreta nhĩpêx anẽ? Kwa mẽ inhmã aprĩ hã harê. Xà koja mẽ nhỹrmã ho anẽ nà? Xà koja mẽ tokyx ho anẽ? Nẽ akupỹn mẽ ixwỹr awrỹk nhũm mẽmoj piitã hapêxja. Kwa mẽmo koja we wỹj ri tanhmã amnhĩ nhĩpêx to wehe? Anẽ.

4Hãmri nhũm mẽ inhmã hprĩ hã tanhmã mẽmoj kot amnhĩ nhĩpêx to hkukamã ujarênh o nhỹ nẽ mẽ inhmã:

—Nà nhỹrmã mẽmoj piitã hapêx kaxyw tanhmã amnhĩ nhĩpêx toja kumrêx kot paj mẽ amã harê ka mẽ inhma. Nà koja mẽ ohtô nẽ mẽ awỹr mra nẽ hêx rom te pa ixte amnhĩ nhĩpêx pyrãk o amnhĩ nhĩpêx o mẽ akõt pa. ⁵Nẽ mẽ amã amnhĩ jarênh o: “E Tĩrtũm na pre mẽ awỹr inhmẽ. Ixpê kaxkwa rũm ixwrỹk xwỹnhhta na pa.” Anhỹr o mẽ akõt mẽ amã amnhĩ to hêx o pa. Jao ohtô nẽ mẽ nokupyr o pa.

6—Nẽ koja mẽ nhỹri awry hã axpẽn par o pa nẽ mẽ atã axpẽn par o pa. Nom kêr ka mẽ harênh ma nẽ ri tokyx mẽmoj piitã hapêx ã hkamnhix kêt nẽ. Kormã mẽmoj piitã hapêx xà hã arĩgroja kormã. ⁷Koja

mêmoj piitã hapêx kaxyw nhũm ahpÿnhã ri pika piitã hkôt mē pa xwÿnhjaja pika hõ nhõ xwÿnhjê kutã kuhê nē pijapu ho kuhê. Jao ra axpēn par o pa. Hãmri nhũm nhÿri pika hkwÿ htertet tÿx kumrêx. Nē mē hpur kãm mēõja hapêx nhũm mē kãm prãm tÿx nē pa. Jakamã nhũm mē ohtô nē prãm xàj axkaprã. 8Nom ja kormã mēmoj hapêx kaxyw krax pix na. Te ho mēnijê hõ hpijagri kaxyw nē kormã kawax pê õhy xà pyrãk.

9—Nē koja mē piitã ixkôt mē akamã gryk nē kãm mē akurê htÿx o pa. Nē mē awÿr mra nē ixtã mē apynê nē mē atomnuj tÿx nē mē apa. 10Jakamã koja mē kot ixkôt amnhĩ xunhwÿr xwÿnh kwÿjjaja mē umaj tee ri amnhĩ kukamã hamaxpēr hãmri nē ixkaga. Nē ixkôt mē kãm axpēn tã amÿnê nē axpēn kãm gryk o pa. 11Nhũm nhÿri mē hkwÿjjaja Tirtũm nhÿ hã kapēr jarēnh xwÿnh ã amnhĩ to hêx o pa. Jao mē ohtô nē mē nokupyr o pa. 12Koja mē ã amnhĩ nhĩpêx anhÿrja o ra piitã kãm axpēn kamã ukaprĩ hkêt o pa. 13Koja mē ã ixtã mē atomnuj o pa anê. Tã nom kêr ka mē amnhĩ to htÿx nē ixkaga hkêt nē. Mē kot mē apar tã ka mē kaxkwa kamã akupÿm atĩr kurê kumrêx.

14—Nē kot kaj mē apê ixkwÿjjaja ma krĩ piitã hkôt Tirtũm kapēr o mē ahkre ho apa. Mē kot amnhĩ tomnuj kaga nē ixkôt amnhĩ xunhwÿr nhũm Tirtũm kot ja hã mē omunh nē mē ho hkra hã mē kãm harēnh o ri mē piitã mē hkôt apa. Kot kaj mē piitã mē kãm ijarēnh pa pa rĩ kormã akupÿn mē awÿr wrÿ. Anê.

Mē pahtomnuj tÿx xwÿnh maati hã harēnh

Makre 13.14-23; Rukre 21.20-24; määnēn Sikũn Tesarõn 2.3-4

15Nhũm Jejus arĩ mēmoj kukamã mē inhmã kapēr nē mē inhmã:

—Amnepēm Tirtũm nhÿ hã kapēr xwÿnh finat Tãniewja na pre tanhmã mē atomnuj tÿx xwÿnh maati ja jarēnh to. Tã koja nhÿrmã ra kot harēnh xà hkôt axtem nē Tirtũm mã amnhĩ jarēnh xà hã ixkre hwÿr axà nē Tirtũm xãm xà kamã xa. Ka mē ja hã omu hãmri nē mē kot krĩ grãnh par ã hkamnhĩx kurê kumrêx. 16Koja ã amnhĩ nhĩpêx anê ka mē amÿm amnhĩ wÿr mē omu hãmri nē ajapõj nē ma aprõt nē amrar kurê kumrêx. Mē apê jar pika pê Jutej kamã mē apa xwÿnhjaja kaj mē omu hãmri nē mē kot mē apar pymaj aprõt nē ma amrar kurê kumrêx. 17Rÿ ka mē anhõrkwÿ hkrãmnēnh o akrĩ japēr nē amÿm amnhĩ wÿr mē omu nē akukrêx wÿr axàr nē hõ hpyr mã ajamaxpēr kêt nē. ãm wrÿ nē aprõt nē ma atēm kurê kumrêx. 18Rÿ ka mē apur kãm axapēnh o apa japēr nē amÿm mē omu hãmri nē akupÿm anhõrkwÿ hwÿr axê jamÿnh kaxyw atēm kêt nē. ãm mē umaj aprõt nē ma atēm kurê kumrêx.

19—No mē htujarõ nē mē hkra karãre xwÿnhjaja koja mē kêp mēmoj omnuj tÿx nē. Tanhmã kot mē amnhĩ to nē mē umaj hprõt tÿx? Nã pika

ja kamã koja mẽ mex kêt o mex kêt. Mẽ kot amnhĩ tomnuj mỳrapê koja Tĩrtũm tanhmã mẽ homnuj tỳx to.

20—Nẽ kwa kêt ka mẽ amnhĩ to Tĩrtũm wỳ kê ã mẽ kot amnhĩ nhĩpêx anhỳr xà hã arĩgroja na wrỳk pê ã amnhĩ nhĩpêx anhỳr kêt nẽ. Rỳ mẽ hkôt xà hã arĩgro pê sap ã ã amnhĩ nhĩpêx anhỳr kêt nẽ.

21—Nẽ ã mẽ kot amnhĩ nhĩpêx anhỳr ã arĩgroja ã koja mẽ piitã amnhĩ xà htỳx kãm hamak tỳx kumrêx. Amnepêm Tĩrtũm kot pika ho kator krax rũm amnẽ mẽ pa xwỳnhjaja kormã aa kot ã amnhĩ xà htỳx kamã hamak anhỳr kêt tã arĩgroja ã koja mẽ amnhĩ xà htỳx kumrêx kamã ama. Hãmri nẽ axte pika ja kamã ã amnhĩ xà htỳx kumrêx kamã hamak anhỳr kêt nẽ. 22Kop apu Tĩrtũm kot mẽ kot amnhĩ xà htỳx kamã hamak xà hã arĩgro hkwỳ ho gri hkêt ronhỳx ka mẽ apiitã apikaprãr pa. Ja pymaj koja mẽ amã ho gri. Kot ra amnhĩ kaxyw mẽ arênh xwỳnhjê japê xaj mẽ amã ho gri.

23-24—Tã ã mẽmoj kot amnhĩ nhĩpêx anhỳr jakamã koja mẽmojaja tanhmã mẽ amã ixto hêx to nẽ mẽ amã: “Ota ra Kris akupỳn wrỳ. Kwa mẽ hwỳr mra nẽ omu.” Anẽ. Rỳ mẽ amã: “Krisja krĩ mỳj kamã na raa. Kwa mẽ ma hwỳr mra nẽ omu.” Anhỳr o mẽ amã ixto hêx o pa. Rỳ mẽ awỳr mra nẽ mẽ amã amnhĩ to hêx nẽ mẽ amã: “E. Ot pa ixpê Kris ã mẽ awỳr wrỳ. Tĩrtũm na mẽ awỳr inhmẽ pa wrỳ.” Anẽ. Rỳ mẽ amã: “E ixpê Tĩrtũm nhỹ hã ixkapêr xwỳnh na pa mẽ awỳr mõn pøj.” Anhỳr o mẽ amã amnhĩ to hêx. Hãmri nẽ mẽ anokupyr kaxyw mẽ amã aa mẽ kot mẽmoj pumunh kêt kwỳ ho anhỳr o pa. Tĩrtũm kot amnhĩ kôt mẽ arênh xwỳnhjaja kãm mẽ ate ja hã mẽ omunh nẽ mẽ gryk ã ixkaga hprãm xaj koja mẽ ã mẽ anoo mã amnhĩ nhĩpêx anhỳr o pa. Nom ãm ã amnhĩ nhĩpêx anhỳr kaprỳ ka mẽ ixkaga hkêt nẽ.

25—E kwa mẽ inhmar tỳx nẽ. Na pa ra ixprĩ hã ã mẽ kot amnhĩ nhĩpêx anhỳrja kukamã ã mẽ amã mẽmoj jarênh anẽ. Tã kêt ka mẽ amnhĩ nẽ ã mẽ kot amnhĩ to hêx anhỳr o mẽ pa xwỳnhjê pumunh mex o apa nẽ axkãm ajamak rom. 26Rỳ koja mẽ tanhmã mẽ amã ixto hêx to nẽ mẽ amã: “Ota Tĩrtũm kot mẽ pahwỳr mênh xwỳnhhta kapôt ã mõn pøj. E mẽ tokyx ma hwỳr mra nẽ omu.” Anhỳr o mẽ amã ijarê ka mẽ ama nẽ ãm mẽ ama nẽ hwỳr amrar kêt nẽ. Rỳ nhũm mẽ amã: “Ota hitom kãm xa. E mẽ mamrĩ hwỳr agjê nẽ omu.” Anẽ no ka mẽ ãm mẽ ama nẽ ãm mẽ ama nẽ hwỳr agjêx kêt nẽ. 27Kot paj nhỹrmã akupỳn mẽ awỳr ixwrỳk kaxyw hãmri nẽ ixpimxur kãm ixwrỳk kêt nẽ. Koja pika piitã hkôt mẽ pa xwỳnhjaja anhĩpê ixwrỳk kãm ixpumu. Te mẽ piitã anhĩpê mẽ kot na haxênh pumunh pyrãk o kot kaj mẽ anhĩpê apiitã ixpumu. 28Te nhỹri mẽmoj kro nẽ nõr nhũm nhõnhti kot omunh nẽ hã htor nẽ hpinhpanh nhũm mẽ piitã hã omunh pyrãk o kot paj amnhĩ nhĩpêx. Anẽ.

Jejus akupÿn wrÿk xwÿj ri mêmoj kukamã harênh

Makre 13.24-31; Rukre 21.25-33; mãânên Wam Tesarôn 4.16-17

29Nhũm Jejus arĩ mẽ ixte hkôt ixpa ho ixpa xwÿnhjê mã kapêr nê mẽ inhmã:

—Nê kot paj akupÿn mẽ awÿr inhnojarêt nhũm rĩ Tirtũm kaxkwa kamã tanhmã mêmoj nhĩpêx to. Kapêr ã kagà htũm kot tanhmã ja kukamã harênh to nê harênh kot:

Koja Tirtũm kaxkwa ho àk nhũm kanhêti piitã rôrôk pa nhũm myyti ahtyk nhũm mytwrÿre uràk nê axte hpôk kêt nê.
Anê.

30Koja ã mêmoj amnhĩ nhĩpêx anhÿr pa hãmri pa kaxkwa hã mẽ amã mêmoj nhô. Hãmri nhũm pika piitã hkôt ri mẽ pa xwÿnhjaja piitã omu nê tee ri amnhĩ kukamã hamaxpêr o hkaprĩ nê mÿr rax kumrêx. No mẽ kajaja kot kaj mẽ omu hãmri nê akupÿn mẽ awÿr ixwrÿk nê mẽ ato amnhĩptâr mã ajamaxpêr kurê kumrêx. Kot paj kakrã kamã hirã htÿx kãm akupÿn ixihtÿx kãm mẽ awÿr wrÿ. 31Hãmri nê Tirtũm kapêr o mẽ wrÿk xwÿnh maati mã anê nhũm pifti kakô hãmri nhũm hkwÿjaja kuma nê ma mẽ awÿr pika piitã hkôt anhrã nê ma mra nê inhmã mẽ ato akuprô. Ixte amnhĩ kaxyw mẽ axunhwÿr xwÿnhjê o akuprô nê man akupÿn ixwÿr mẽ ato hapêx. Anê.

Jejus kot mêmo pâr o ejêp jarênh

Makre 13.28-31; Rukre 21.29-33

32Nhũm Jejus arĩ mẽ inhmã kapêr nê mẽ inhmã:

—E ka mẽ pĩ hpâr mÿj pumu. Na hte mêmo mytwrÿ hã rã nhũm mẽ omu nê ô hkukamã hamaxpêr kurê kumrêx. 33Ja pyrã nê koja ã ixte mêmoj jarênh anhÿr xwÿnhja amnhĩ nhĩpêx par mẽ ka mẽ omu nê akupÿn mẽ awÿr ixwrÿk mã ajamaxpêr kurê kumrêx. Kot paj te ra mẽ anhôrkwÿ kapem ixãm pyrãk o amnhĩ nhĩpêx. 34Nom akupÿn ixwrÿk kêt ri koja ã mẽ kot mêmoj kot amnhĩ nhĩpêx anhÿr pumunh xwÿnhjaja kormã piitã htyk kêt ri pa akupÿn wrÿ.

35—Nê koja nhÿrmã pika nê kaxkwa wa hapêx pa. Tã no ãm ixkapêrja koja wa uràk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mênh to hkêt nê. Anê.

Mê pahte akupÿn Jejus wrÿk xà hã arĩgro pumunh kêt ã mẽ pajarênh

Makre 13.32-37; Rukre 12.37, 17.26-30, 17.34-36; mãânên Wam Tesarôn 5.2

36Nhũm Jejus arĩ mẽ inhmã kapêr nê mẽ inhmã:

—Nê ixte akupÿn mẽ awÿr ixwrÿk xà hã arĩgroja mẽ ate omunh kêt. Nê kaxkwa kamã Tirtũm kapêr o mẽ wrÿk xwÿnhjaja haxwÿja kot ja

pumunh kêt. Nê ijaxwýja ixpê Tirtûm Kra htã ixte ja hã amnhĩ pumunh kêt. ãm inhõ Papaj pix na kot ja pumunh.

37—Nê kot paj nhÿrmã man akupÿn mẽ awÿr wrÿ. Akupÿn mẽ awÿr ixwrÿk xà hã arĩgrota ã koja mẽ htÿx ri amnhĩ tomnuj o pa. Te amnepêm Noehti kormã htÿr ri mẽ pa xwÿnhjaja kot htÿx ri amnhĩ tomnuj o pata pyrãk. 38Na pre htem amnhĩ kaxyw Tirtûm mã hamaxpêr kêt nê. ãm jar mẽ kot amnhĩ nhĩpêx pix kukamã hamaxpêr kôt pix mã amnhĩ nhĩpêx o pa. Rôm nhũm Noehti ja gô htãm pymaj pãr rax nhĩpêx mã axã. 39Nhũm mẽ ja hã omu nê ãm omu nê tanhmã ri amnhĩ kukamã hamaxpêr to hkêt nê. Hãmri nhũm naja mẽ haêr pê wrÿ nê wrÿk rax o mẽ hanhir pa. Tã akupÿn ixwrÿk xà hã arĩgroja ã koja mẽ htÿx ri ã amnhĩ nhĩpêx anhÿr o paja o pa mẽ haêr pê naja pyrã nê akupÿn wrÿ.

40—E kot paj mẽ amã nhÿrmã akupÿn ixwrÿk nê tanhmã mẽ anhĩpêx to hã amnhĩ jarê. Te kot ja pyrãk. Kojã mẽmyjê hõ wa hamêxkrut nê hpur kãm àpênh o xa. Nhũm hõja ra ixkôt amnhĩ xãm nhũm hõja ixkôt amnhĩ xãm kêt japêr. Hãmri pa amnhĩ wÿr ra kot ixkôt amnhĩ xãm xwÿnhta o api nhũm kot ixkôt amnhĩ xãm kêt xwÿnhta hpur kãm ahte arĩ xa. Hãmri nê tee ri hkrãmnhwÿ japêr rĩt o xa. 41Rÿ nhũm mẽnijê wa hamêxkrut nê harôj kahuk o xa. Nhũm hõja ra ixkôt amnhĩ xãm nhũm hõja ixkôt amnhĩ xãm kêt japêr. Hãmri pa amnhĩ wÿr kot ixkôt amnhĩ xãm xwÿnhta ho api nhũm kot ixkôt amnhĩ xãm kêt xwÿnhja tee ri hkrãmnhwÿ japêr rĩt o xa hãmri nê hamaxpêr rax kumrêx. Kot paj nhÿrmã akupÿn wrÿ nê ã mẽ anhĩpêx anê. 42Tã mẽ ate akupÿn ixpôx xà hã arĩgro pumunh kêt jakamã kwa kêr ka mẽ ijamãr rãhã ho ri apa. 43Na htem htÿx ri nhÿri tanhmã amnhĩ nhĩpêx to ho pa nhũm mẽ kêp àhkĩnh xwÿnh mẽ ôrkwÿ hwÿr agjê nê mẽ kêp ahkĩ. 44Tã mẽ ate akupÿn ixwrÿk xà hã arĩgro pumunh kêt jakamã kwa kêr ka mẽ ixwakre kamã te mẽ apê mẽ ôrkwÿ nhõ dõn kot amnhĩ nhĩpêx pyrã nê atÿx ri tanhmã amnhĩ tomnuj to ho apa hkêt nê. Ixkutêp axkãm ajamak rom nê ri apa. Jao tãm ixkutêp amnhĩ nhĩpêx rãhã ho ri apa. Anê.

Mẽ kãm mẽ àpênh mex xwÿnhjê jarênh

Rukre 12.41-48

45Nhũm Jejus arĩ mẽ inhmã kapêr nê mẽ inhmã:

—E koja mẽ kãm àpênh xwÿnhjê hõ àpênh mex o pa hãmri nhũm õ patrãw àpênh ã omu hãmri nê ma nhÿhÿm mõi kaxyw nê ìhkram mẽmoj piitã haxãr pa nê kãm: “E kêr ka ixwakre kamã inhmã inhõrkwÿ tãnopxar mex nê. Nê inhmã mẽ àpênh xwÿnhjê mã mẽ apkur xà nhõr o apa.” Anhÿr o kãm mẽmoj tã karõ hãmri nê kato nê ma nhÿhÿm mõi. 46Hãmri nhũm kot kãm àpênh mex xwÿnhja wakre kamã kãm àpênh mex o pa. Jakamã nhũm õ patrãw akupÿn hpôx o mõi nhũm amnhĩ wÿr harênh ma nê hkĩnh nê. Nê tee ri amnhĩ kukamã hamaxpêr o kãm uma

hkêt nê. Kot wakre kamã kutêp kãm àpênh mex jakamã tee ri tanhmã amnhĩ kukamã hamaxpêr to hkêt nê. 47Jakamã nhũm ò patrãwja akupÿn pøj nê kot kãm àpênh mex ã omu nê hkĩnh nê. Hãmri nê kot kãm ò mêmoj piitã hamãr o pa kaxyw ìhkram haxàr pa. 48No koja axtem nê wakre kamã kãm àpênh mex kêt japêr. Nê hamaxpêr o: “Tk. Nà koja tokyx akupÿn mõi kêt nê.” Anhÿr o hkamnhĩx. 49Hãmri nê wakre kamã kãm mē àpênh xwÿnhjê htak nê pipãnh pix o pa. Nê kãm kagôxÿhti xành xwÿnhjê kôt pix mã pa. 50Hãmri nhũm ò patrãwja haêr pê akupÿn pøj nê tee ri ja hã omu. 51Hãmri nê kamã gryk tÿx nê tanhmã homnuj htÿx to nê kãm mē àpênh punuj xwÿnhjê mē mē ho hpimràatã amnhĩ nê mē kator pa. Hãmri nê mē kot kapêr kwÿm amnhĩ nhĩpêx xwÿnhjê mē mē ho hpimràatã tanhmã mē homnuj to nê amnhĩ nê mē kator. Hãmri nhũm mē tee ri amnhĩ kukamã hamaxpêr nê mur nê tee ri amnhĩ nhĩpêx. Tã kêr ka mē ixwakre kamã ho mē uràk kêt nê. Mē kurom ixwakre kamã ixkapêr kôt amnhĩ nhĩpêx mex rãhã ho ri apa. Anê.

Kormã mē mjên kêt xwÿnhjê ho 10 nê mē harênh

Wam Tesarôn 5.1-3

25 1Nhũm Jejus arĩ mē inhmã kapêr nê mē inhmã: —Nê mē ate Tirtũm kôt amnhĩ nhĩpêx o mē apa xwÿnhjaja kêr ka mē akupÿn amnhĩ wÿr ixkãm ajamak rom nê ri apa. Nom mē kêp Tirtũm prãm nõkati xwÿnhjaja koja mē akĩnhã ãm htÿx tanhmã amnhĩ to pix kukamã hamaxpêr o pa. Te kormã mē mjên kêt xwÿnhjaja kot amnhĩ nhĩpêxta pyràk. E pa mē amã tanhmã mē harênh to ka mē inhma. Koja kormã mē mjên kêt xwÿnhjê kêp 10jaja ma hkràmnhwÿ mjên mã xwÿnhjê kutã pry hã mra. Amnhĩ kôt kanê jamÿ nê o mra nê kutêp pry nhĩkrep hkrĩ. 2-4Nhũm mē kêp 5jaja hkwÿjê rom amnhĩ kukamã hamaxpêr mex nê kanê kaxyw amnhĩ kôt orti hkwÿ ho mõi. No nhũm mē kêp 5 nê mē hkĩnhã ãm htÿx kanê pix jamÿ nê o mra. 5Hãmri nê mē mjên mã xwÿnhjaja kutêp axpên mã kapêr o hkrĩ. Nhũm tokyx htêm kêt nhũm mē kutêp hkrĩ nê gaa nê ra òtxwa nê gaa nê hikwÿ nê ra òt pa.

6—Tã nhũm kôt ã kamàt hãmri nhũm mjên mã xwÿnhjaja hpôx o tẽ. Hãmri nhũm kot hkukamã harênh xwÿnhjaja mē òt o mē hikwÿ xwÿnhjê mã amÿra nê mē kãm: “Kwa mē hãmri. Ota mjên mã xwÿnhjaja tẽ. Mē tokyx kànhmã akrĩ pu mē kutã mra.” Anê. 7Hãmri nhũm mē hkrã hapøj nê kanê hpôk. 8Nom nhũm mē hkwÿjê hkĩnhã ò kanê kaxyw orti ho pa hkêt xwÿnhjaja ra mē kêp mē kanêja hkaprÿ hpa nhũm mē tee ri kot hpôk kaxyw. Hãmri nê orti hkwÿ hã hkwÿjê hwÿ nê mē kãm: “Xê mē inhmã orti ho inhõ kanê go.” Anê. 9Nom nhũm mē kêp nê nê mē kãm: “Ma mē inhõ kanê kamã orti grire kênã kot pa kêt mē amã ho go. Xê mē tokyx ma mra nê nhÿri amnhĩm hkwÿ japrô mē.” Anê. 10Hãmri nhũm mē tee ri mē kuma nê ma amnhĩm hkwÿ japrô mã ma mra.

—Rôm nhũm mjên mã xwỳnhta mẽ hãnh tẽ nhũm kanê kamã arĩ mẽ orti xwỳnhjaja omu nẽ hã jêt kurê kumrêx. Hãmri nẽ ma hkôt môn mẽ pikuprônha xà hã ixkreja wỳr wa hã hkĩnh nẽ apkur kaxyw gjêx pa nhũm mẽ hã kahê. Mẽ gjêx xà hã oreja ra hwỳr hpôx jakamã nhũm mẽ hã kahê.

11—Tã nhũm ma mẽ kot orti japrôr mã mrar xwỳnhjaja hãmri amnhĩ to hapu nẽ mra nẽ tee ri mẽ hã hakwakre kupê nẽ htatak nẽ tee ri mẽ kãm akir nẽ mẽ kãm: “Xê mẽ inhmã kahê xà mẽ pa mẽ awỳr agjê.” Anẽ. 12Hãmri nhũm hprô mã xwỳnhta mẽ kuma nẽ mẽ kãm: “Tk. Nà ixte mẽ apumunhre hã kot pa kêt mẽ amã kahê xà mẽ. Kwa mẽ ma akupỹm mra.” Anẽ. Ǻ mẽ ujarênh kot anhỹr. Anẽ.

13Nhũm pre Ǻ Jejus mẽ inhmã ujarênh anẽ. Hãmri nẽ mẽ inhmã:

—E kêr ka mẽ te kot amnhĩ kôt orti hkwỹ ho môr xwỳnhjaja kot amnhĩ nhĩpêx pyrâk. Mẽ ate akupỹn ixwrỹk xà hã arĩgro pumunh kêt jakamã kêr ka mẽ apkati mẽ ixkamã ajamak rãhã ho apa. Anẽ.

Mẽ kãm mẽ àpênh xwỳnhjê jarênh

Rukre 19.11-27

14Nhũm Jejus arĩ mẽ inhmã kapêr nẽ mẽ inhmã:

—E kêr ka mẽ ixwakre kamã inhmã tanhmã amnhĩ nhĩpêx mex to ho ri apa pa hpãnhã mẽ amã amnhĩrer mex nẽ. Mẽ ate tanhmã inhmã amnhĩ nhĩpêx to ho apa xà hkôt kot paj mẽ amã amnhĩre. Te mễhõ my kot kãm mẽ àpênh xwỳnhjê nhĩpêx pyrâk. Kojã nhỹhỹm nojarêr nẽ kãm mẽ àpênh xwỳnhjê mã hikukrêx piitã hkaga hpa. Ǫrkwỹ nẽ hpur nẽ hkrit. Ǻm mẽmoj piitã mẽ kot wakre kamã kãm hamãr o pa kaxyw mẽ kãm hkaga hpa. 15Hãmri nẽ ahpỹnhã mẽ kãm kàxpore hkwỹ gô. Mẽ kot kutêp kãm tanhmã ho rũnh to kaxyw ahpỹnhã mẽ kãm ỏr pa. Kot kàxpore pumunh mex xwỳnhja mã nhũm ho 5.000 nẽ kugô. Nẽ kot hkôt kax pê omunh xwỳnhja mã nhũm ho 2.000 nẽ kugô. Nẽ kormã kot omunh tỳx kêt xwỳnhja mã nhũm Ǻm ho 1.000 pix nẽ kugô. Hãmri nẽ mẽ kãm amnhĩ jarê nẽ ma nhỹhỹm mỗ. 16Hãmri nhũm kot ho 5.000 nẽ hamỳnh xwỳnhja kàxporeta py nẽ ma o môr kurê kumrêx nẽ tanhmã ho àpênh to ho môr kãm ra hipy axte ho 5.000 nẽ kumẽ. 17Nhũm kot ho 2.000 nẽ hamỳnh xwỳnhja mããnhẽn tanhmã ho àpênh to ho môr kamã ra hipy axte ho 2.000 nẽ kumẽ. 18Nom nhũm kot ho 1.000 pix nẽ hpyr xwỳnhja wa hkĩnh Ǻ axtem nẽ ma o tẽ nẽ kãm kakwỳ nẽ kamã haxà nẽ hity hpa nẽ ma akupỹm tẽ.

19—Tã nhũm mẽ ỏ patrãwja akupỹn môn pôj nẽ mẽ kãm: “E mẽ amnẽ ixwỳr mra nẽ ixte mẽ amã kàxpore ho ixpigranh xwỳnhta jarê. Tanhmã na ka prem ixkutêp inhmã hipêx to?” Anẽ. 20Hãmri nhũm kot ho 5.000 nẽ hpyr xwỳnhta kumrêx hwỳr tẽ nẽ kãm: “E ota akàxporeta. Ate inhmã ho 5.000 pix nẽ ỏr tã pa amã ho rax nẽ amã hipy axte ho 5.000 nẽ kumẽ nhũm ho axkamur nẽ ra ho 10.000. Tã ota.” Anhỹr o

kãm kapêr hãmri nê kãm kugõ 21 nhũm amnhĩm hamỳ nê omu nê hkĩnh nê. Hãmri nê kãm: “Nà ãm hãmri na ka inhmã ho anê. Ixte amã ho 5.000 pix nê òr tã ka ra inhmã ho rax jakamã kot kaj apê inhmã mẽ àpênh xwỳnhjê hkrãhtũm. E amnê ixwỳr axà pu mẽ apku nê pahkĩnh.” Anê.

22—Hãmri nhũm hpãnhã kot ho 2.000 nê hpyr xwỳnhhta hwỳr tẽ nê ò patrãwta mã kãm: “E ota akàxporeta. Ate inhmã ho 2.000 pix nê òr tã pa amã ho rax nê amã hipy axte ho 2.000 nê kumê. Tã ota.” Anê.

23Hãmri nhũm kuma nê amnhĩm hamỳ nê omu nê hkĩnh nê. Hãmri nê kãm: “Nà ãm hãmri na ka ã inhmã ho rax anê. Ixte amã ho 2.000 pix nê òr tã ka inhmã ho rax jakamã kot kaj apê inhmã mẽ àpênh xwỳnhjê hkrãhtũm. E amnê ajaxwỳja ixwỳr axà pu mẽ apku nê pahkĩnh.” Anê.

24—Tã nhũm kot ho 1.000 pix nê hpyr xwỳnhhta hapu hã wa hkôt tẽ. Hãmri nê ò patrãw mã tanhmã kapêr to nê kãm: “Nà ra ixte apumunh tũm. Pêr axàhkurê pix kãm na ka hte apa. Nê amã akàxpore ho rax nê anhõ ho rax pix kukamã ajamaxpêr o ri apa. Nom mẽ pajaja mẽ ixàpênh rax pix kukwak ri na ka hte akàxpore rax nê apa. 25Jakamã na pa inhmã apyma nê. Nê akàxporeta py nê ma o tẽ nê kaxyw kre nê kamã haxà. Tã ka akupỳn mõn pøj pa ajarênh ma hãmri nê hkapa nê man akupỳn amã o tẽ. Tã ota anhõ 1.000ta.” Anê. 26-27Hãmri nhũm tee ri kuma nê kãm: “Tk. Kwa amã ixpyma nê ate ixpumunh mex anhỳr tã na ka ixte amã kàxpore nhõrta pyr nê ma ho atêm. Nê mẽ kot mẽ kêp kàxpore jamỳnh o kuhê xà kamã mẽ kãm òr nhũm mẽ ixkutêp tanhmã inhmã ho rax to hkêt nê? Pêr ãm amã kaga nê ate amnhĩ tomnu pix o ri apa xwỳnh.” Anê. 28-30Hãmri nê kêp kàxporeta py nê nhãm jam kugõ nê kãm: “E amỳ nê o tẽ nê kot inhmã ho 10.000 nê òr xwỳnhhta mã agõ. Hãmri nê jahti pynê nê ma o tẽ nê kamàt kô kamã amê. Apênh mexti hã. Koja tee amỳra nê amnhĩ xà htỳx kamã hamak xàj tee ri amnhĩ nham o axpên kamnhar tỳx kaprỳ nê rĩ amnhĩ pumu.” Anhỳr o kãm kapêr nhũm kuma nê hpa hã kupy nê ma o tẽ. Hãmri nhũm mẽ ò patrãwja mẽ àpênh xwỳnhjê mã kãm: “E mẽ ate ixwakre kamã mẽ axàpênh mex xwỳnhjaja kot paj ã mẽ ato mex rax anê ka mẽ akĩnh nê. Nom mẽ kot inhmã mẽ àpênh mex kêt xwỳnhjaja kot paj mẽ kêp mẽõ mẽmojta jamỳ nê nhãm mẽhõm kugõ nhũm hkaprĩ nê.” Anê. ã mẽ ujarênh kot anhỳr. Anê.

Jejus kot nhỹrmã mẽ piitã tanhmã mẽ harênh to hã harênh

Matêwre 13.35-43, 13.47-50; mããnên Apokariþ 20.11-15

31Nhũm Jejus arĩ mẽ inhmã kapêr nê mẽ inhmã:

—Nê kot paj nhỹrmã akupỳn mẽ awỳr wrỳ nhũm Tĩrtũm kapêr o mẽ wrỳk xwỳnh piitã man ixkôt wrỳ. Kot paj wrỳ nê ixpê pahi maati hã ixkrĩ xà maati kamã inhmex nê nhỹ. 32-33Hãmri nê Tĩrtũm kapêr o mẽ wrỳk xwỳnhjê mã anê nhũm mẽ ma krĩ piitã hkôt mẽ apiitã mẽ ato pikuprõnh pa nê akupỳn ixwỳr mẽ ato hapêx. Pa mẽ apumu nê

tanhmã mẽ axunhwỳr to. Te ôwêhti jamãr o pa xwỳnh kot ôwêhti kaêx ã motre pumunh nê nhãm nê motre xunhwỳr parta pyrãk. 34 Hãmri nê ixupôk rùm mẽ ate ixkôt amnhĩ xunhwỳr xwỳnhjê mã ixkapêr nê mẽ amã: “E mẽ kajaja kot kaj mẽ amex kumrêx nê ri apa ho apa. Amnepêm kormã mẽmoj piitã hkêt ri na pa pre Inhĩpêêxà mẽ wa mẽ akukamã tanhmã ijamaxpêr to nê mẽ amã mẽmoj mex xunhwỳr rũnh nê. 35 Tã ka prem ajapôj hãmri nê ixkôt amnhĩ xunhwỳ nê tanhmã ixto mex to ho ri apa.

Na pa pre inhmã prãm nê ixpa ka prem ixpumu nê ixkamã axukaprĩ nê inhmã mẽmoj gô pa kuku.

Nê na pa pre inhmã kôr nê ixpa ka prem ja hã ixpumu nê inhmã gô pa ho ixkô nê akupỳm ixihỳx.

Nê aa mẽ ate ixpumunh kêt tã ka prem nhỹri ixpumu nê amnhĩ nhôrkwỹ hwỳr ixwỳ.

36 Nê na pa pre ixê pynajti nê ri ixpa ka prem ja hã ixpumu nê inhmã axê gô pa haxà nê ri hã ixpa.

Nê na pa pre ixà nê inhĩkwỹ ka prem ixwỳr mra nê ixkane nê tanhmã ixto mex to pa akupỳm inhmex.

Nhũm prem ijaxà pa mẽ hagjênh xà kamã ixkrĩ ka prem ixwỳr mra nê tanhmã ixto mex to.

Ã mẽ ate ixto mex anhỹr o ri apa jakamã nhũm inhõ Papajja ixtã mẽ apumu. Tã koja ixtã mẽ ato mex rax nê.” Anê.

37—Kot paj ã mẽ ate tãm amnhĩ nhĩpêx xwỳnhjê mã ixkapêr anê. Hãmri ka mẽ tee ri inhma nê amnhĩ tã ixkukja nê inhmã: “Kwa xà mẽ pajaja na pa prem ã ato mex anê? Nà mẽ ixte ã anhĩpêx anhỹr kãm amnhĩ pumunh kêt tã na ka ã mẽ ijarênh anê. Kwa nhỹri na ka pre amã prãm nê apa pa prem apumu nê amã mẽmoj gô ka aku? Nê nhỹri na ka pre amã kôr nê apa pa prem amã gô hkwỳ ka ho ixkô? 38 Nê nhỹri na pa prem apumu nê amnhĩ nhôrkwỹ hwỳr awỳ? Rỳ ka pre axê pynajti nê apa pa prem amã inhĩnôhkà gô ka hagjê? 39 Nê nhỹri na ka pre axà nê anhĩkwỹ pa prem apumu nê akane? Nê nhỹri na prem ajaxà pa mẽ hagjênh xàja wỳr mra nê kamã tanhmã ato mex to? Nà mẽ pa hkêt.” Anhỹr o amnhĩ tã ixkukja. 40 Hãmri pa mẽ amã: “Nà mẽ kêp amrakati xwỳnhjaja na pre htem pa pyrãk. Tã ka prem mẽ kamã axukaprĩ hã tanhmã mẽ kutã anojarêt to ho ri apa jao te pa tanhmã ixto mex to ho apa pyrãk. ãm hãmri na ka prem ã mẽ ho mex anhỹr o ri apa.” Anê. Kot paj ã mẽ ate amnhĩ to mex xwỳnhjê mã ixkapêr anê.

41—Hãmri nê hpãnhã apke rùm mẽ kot ixkôt amnhĩ xunhwỳr kêt xwỳnhjê mã tanhmã ixkapêr to nê mẽ kãm: “No mẽ kajaja kot paj ixupôk rùm mẽ unhwỳr xwỳnhhtajê hkĩnhã mẽ ato mex kêt nê. Amnepêm na pre Tĩrtũmja Satanasti mẽ mẽ kot tanhmã kãm amnhĩ nhĩpêx to ho mẽ pa

xwÿnhjê mē mē ho hpimràatã mē kaxyw kuwy rax kumrêxja nhîpêx. Mē kot amnhî tomnuj tÿx mÿrapê nhÿrmã kamã amnhî xà htÿx kamã hamak rãhã nê pa ho pa kaxyw. Tã kot kaj mē ajaxwÿja ma mē hkôt hwÿr ajapêx. Mē apê Satanasti hkôt mē ate amnhî nhîpêx o apa xwÿnh jakamã kot kaj mē uràn ma hwÿr ajapêx pa. ⁴²Aa mē ate tanhmã ixto mex to hkêt. Na ka pre htem inhmã prãm nê ixpa hã ixpumu nom inhmã mēmoj nhôr kêt nê. Nê inhmã kôr nê ixpa hã ixpumu nom inhmã gô hkwyê hkêt nê. ⁴³Nê nhÿri ahte ixpa hã ixpumu nom amnhî nhôrkwÿ hwÿr ixwÿr kêt nê. Nê ixê pynajre nê ixpa hã ixpumu nom inhmã axê nhôr kêt nê. Nê ixà nê inhîkwÿ hã ixpumu nom ixkane hkêt nê. Nê mē kot ijaxàr nhũm arî ixkrî hã ixpumu nom ixwÿr amrar nê tanhmã ixto mex to hkêt nê. ã mē ate inhîpêx anhÿr o apa jakamã e mē ma kuwy hwÿr apa kurê kumrêx.” Anê. Kot paj ã mē kãm ixkapêr anê. ⁴⁴Hãmri nhũm mē tee ri inhma nê amnhî tã ixkukja nê inhmã: “Kwa nà ã mē ijarênh anhÿr kêt nê. Aa mē ixte ã anhîpêx anhÿÿre hã. Nhÿri na pa prem tanhmã akute hã apumu? Nà aa mē ixte nhÿri ã ate amnhî nhîpêx anhÿr ã apumunhre hã.” Anê.

⁴⁵—Koja mē ã inhmã amnhî tã aprâr anhÿr kaprÿ. Kot paj mē kãm: “Nà na ka pre htem mē kêp amrakati xwÿnhjê pumu nê ãm mē omunh o ri apa nê mē kamã axukaprî hkêt nê. ã mē hipêx anhÿr jao te pa ã inhîpêx anhÿr pyræk. Jakamã kwa mē tokyx ma kuwy hwÿr ajapêx kurê kumrêx.” Anê. Kot paj ã kuwy hwÿr mē hanor anê. ⁴⁶Hãmri nê hwÿr mē rênh pa nhũm mē ma hwÿr hapêx nê kamã amnhî xà htÿx kãm hamak rãhã nê pa ho pa nê aa kator kêt kumrêx. No kêt mē ate tãm amnhî nhîpêx o mē apa xwÿnhjaja kot kaj mē kurom ma Tirtùm mē wa inhô krî hwÿr api nê kamã amex nê atîr tùm nê apa ho pa. Kot paj ã ahpÿnhã mē apiitã mē anhîpêx anê. Anê.

Nhũm pre ã Jejus akupÿn wrÿk ã amnhî kukamã mē inhmã ujarênh anê. Hãmri nê mē inhmã ujarênh pa.

Mē kot Jejus ã àmnênh ã amnhî jarênh

Makre 14.1-2; Rukre 22.1-2; Juãw 11.45-53

26 ¹Tã nhũm Jejus mē ixte hkôt ixpa ho ixpa xwÿnhjê mã ujarênh pa nê mē inhmã:

²—E kot puj mē axte pahã apkati axkrut hãmri nhũm arîgro pê Pas kato. Jakamã koja mē piitã amnepêm Tirtùm kot Ejit nhô xwÿnhjê pê mē pakukamã mē panhîgêjtê kator mã hamaxpêr nê hã hkînh kaxyw Jerujarê hwÿr akuprô. Kamã koja mē ixpynê nê pî kahpa hã inhô nê ixpî. Koja mē tokyx ã inhîpêx anê. Anê.

Nhũm pre ã amnhî kukamã mē inhmã amnhî jarênh anê. ³Rôm nhũm Jerujarê kamã patre krãhtùmjê mē Ijaew pigêjtaja patre maati Kajpasja nhôrkwÿ kamã axpên wÿr akuprô. ⁴⁻⁵Ra mē kãm Jejus pîr prãm tã mē

kãm mẽ kot hkôt kapêr mar o pa xwÿnhjê pyma nê. Hãmri nê tee ri hamaxpêr nê axpên mã:

—Hêxta waa nê. Tanhmã kot puj wem ho nê kupĩi? Kot puj mẽ pahkĩnh kãm tanhmã ho nhũm mẽ hkĩnh xwÿnhjaja hã mẽ pakamã gryk tÿx nê. Pu mẽ hã axpu nê hã tanhmã axpên to. Jakamã kwa pu mẽ kormã tanhmã ho hkêt nê.

Anhÿr o axpên ma.

Mêhõ ni kot Jejus krã gregrer ã harênh

Makre 14.3-9; Rukre 7.36-50; Juãw 12.1-8

6Tã nhũm Jejus kormã krĩ pê Petãn kamã Simãw nhõrkwy kamã apkur o nhÿ. Simãwja na pre hkà kro xàpêr tÿx o pa nhũm Jejus ra arĩgro hõ hã akupÿm hkà ho mex. Hãmri nê akupÿm õ krĩ hwÿr pøj nê õrkwy hwÿr tẽ nê kuri apkur o nhÿ. 7Hãmri nhũm mêhõ nija hpõx ã omu nê hamaxpêr o:

—Ma koja pêr Jejusja pa hã apkati grêre hãmri nê ty. An pa ma hwÿr tẽ nê mẽhkuxwa xà ho hkuxwa.

Anê hãmri nê kên jaka ho kàx kãm mẽhkuxwa xàja nhũm kumÿ nê ma hwÿr o tẽ. Hãmri nê ho hkrã gregrer nê hã hkapĩr pa nê ho hkuxwa hpa. Mẽhkuxwa xà hã kàxpore xohtô rax tã nhũm ã hã hkapĩr par anê. 8Hãmri pa mẽ ixte Jejus kôt ixpa ho ixpa xwÿnhjaja tee ri ã kot hipêx anhÿr ã omu nê axpên mã:

—Tk. Kwa na hã mẽhkuxwa xàta kapĩr pa. 9Kop apu ma kot o htêm nê ho wênê nê hpãnhã kàxpore ho rax kumrêx nê hamÿnh nê ho mẽ kêp amrakati xwÿnhjê nhĩpêx par o nhÿx ja kãm mex nê. Kwa mo na we ã amnhĩ nhĩpêx anhÿr kêt nê? Anê.

10Hãmri nhũm Jejus amnhĩ tã mẽ inhma nê mẽ inhmã:

—Kwa kot ixto mex kaxyw kênã na ka mẽ axtem nê ixtã kãm akir. 11Mẽ kêp amrakati xwÿnhjaja koja mẽ arĩ mẽ akôt pa rãhã nê. Ka mẽ amã mẽmo arĩgro hã tanhmã mẽ ho ajuta hto hprãm nê tanhmã mẽ ho ajuta hto nê mẽ kãm mẽmoj gõ. No pa kot paj ri mẽ akôt ixpa ka mẽ ixto mex ry ho apa hkêt nê. Kot paj tokyx mẽ apiitã mẽ are. 12Ixtyk nhũm mẽ kot ijaxàr kukamã na ã ixkuxwa anê. ãm hãmri na ã inhĩpêx anê. 13ãm hãmri na pa mẽ amã kot ã inhĩpêx anhÿrja jarê. Koja mẽ krĩ piitã hkôt axpên mã ijarênh ã kagà kamã ijarênh o pa nê kamã nija kot ã inhĩpêx anhÿr kamã harê nê kuma. Anê.

Jut Kariot kot mẽ kãm Jejus ã àmnênh

Makre 14.10-11; Rukre 22.3-6

14Tã nhũm Jut Kariotja. Kêp mẽ ixpê Jejus kôt ixpa ho ixpa xwÿnhjê pê 12 hõ htã ra tanhmã hamaxpêr to nê axtem nê Satanasti nhÿ hã ma patre krãhtũmjê hwÿr tẽ nê tanhmã Jejus o mẽ mar to nê mẽ kãm:

15—E ot pa mẽ amã Jejus jarênh o tẽ. Xà kot paj mẽ amã hã amÿnẽ ka mẽ hpãnhã inhmã amnhĩre nà? Anẽ.

Hãmri nhũm mẽ kuma nẽ hkĩnh nẽ. Hãmri nẽ kãm:

—Nà kot paj mẽ amã amnhĩre.

Anẽ hãmri nẽ kãm kàxpore ho 30 nẽ òr kurê kumrẽx nhũm hamÿ nẽ hkĩnh nẽ kato nẽ ma tẽ. 16Hãmri nẽ mẽ kãm Jejus pynênh kaxyw tânopxar o ri hkôt ri pa. Mẽ kot mar o ri pa xwÿnhjê hkàx ã unênh nẽ ma mẽ hwÿr o htẽm kaxyw.

Jejus kot hkôt mẽ pa xwÿnhjê kutã apkur
Makre 14.12-21; Rukre 22.7-13; Juãw 13.21-30

17Tã nhũm mẽ hkĩnh pẽ Pasja kato. Amnepê mormã Ejit kãm mẽ pa ri na pre mẽ inhigêtjaja ôwêhti hkrare hkwÿ hpa nẽ ho anẽ nẽ kuku. Tirtũm kot ja hã mẽ omunh nẽ Ejit nhõ xwÿnhjê nẽ mẽ kator kaxyw nhũm prem ã amnhĩ nhĩpêx anẽ. Tã mẽ ixpê mẽ hkanrêhã mẽ htãmnhwÿjaja na pa htem arĩ amgrà mẽ arĩgro pẽ Pasja ã axpẽn wÿr akuprõ nẽ jam ijamaxpêr pẽ mẽ uràk nẽ ôwêhti hkrare hkwÿ pa nẽ pãwti kaxkrit kêt kãm kuku. Jakamã pa mẽ ixte Jejus kôt ixpa ho ixpa xwÿnhja wa axkrut nẽ Jejus wÿr tẽ nẽ amnhĩ tã hkukja nẽ kãm:

—Kwa nhÿri kot paj we wa tẽ nẽ mẽ akutêp Pas ã mẽ panhõ hã apê? Anẽ.

18Hãmri nhũm wa kãm:

—Nà wa mãmrĩ ma Jerujarêja wÿr wa tẽ. Nẽ krĩm axà nẽ mẽhõ myti pumunh kurê kumrẽx nẽ kãm: “E Jejus na wa inhmẽ pa wa awÿr tẽ. Na awÿr hpêr mênh o: ‘E na pa ra inhnojarêt. Jakamã nhÿri kot paj we ixkôt ri mẽ pa ho mẽ pa xwÿnhjê mẽ Pas ã axpẽn kutã apku?’ Anhÿr o awÿr hpêr mẽ.” Anẽ. E wa ã kãm akapêr anẽ kê war ama nẽ war amã òrkwÿ nhĩmõk ã ixkre rax õ jahkre. Kamã ra kaxyw mẽ paxàpkur xà hã mẽmoj piitã. Ka wa omu hãmri nẽ mãmrĩ mẽ ixkutêp kamã mẽmoj tã apê. Anẽ.

19Hãmri nhũm wa kuma nẽ ma Jerujarê hwÿr tẽ. Nẽ hwÿr axà hãmri nẽ ra kot wa kãm mẽmoj jarênh xà hkôt mẽmoj piitã omu hãmri nẽ mẽ ixkutêp mẽõ hã apênh o wa xa.

20Tã nhũm kamàt pa mẽ Jejusja kôt ixkreta wÿr ixpõx pa nẽ hwÿr agjê nẽ ixàpkur kaxyw ixkrĩ. Mẽ ixte Jejus kôt ixpa ho ixpa xwÿnhjê pẽ 12jaja pa mẽ ixpiitã Jejus kutã ixàpkur o ixkrĩ. 21Hãmri nhũm Jejus tanhmã mẽ inhĩõ jarênh to nẽ mẽ inhmã:

—E pa mẽ amã mẽmoj jarẽ ka mẽ inhma. Kot kaj mẽ atõ mẽ kãm ixkurê xwÿnhjê nhĩhkram ijaxà. Anẽ.

22Hãmri pa mẽ tee ri kuma nẽ ixkaprĩ htÿx nẽ. Hãmri nẽ axpẽn pãnhã amnhĩ tã hkukja nẽ kãm:

—Kwa xà pa? Nà pa hkêt. Kot paj ã anhĩpêx anhÿr kêt kumrẽx Pahihti.

Anhÿr o axpën pãnhã kãm amnhĩ tã aprã. **23**Hãmri nhũm mẽ inhmã:

—Nà ãm hãmri na pa mẽ amã ixkapêr. Mẽ ate ixkutã guhkrax kãm anhõ pãwti ho mry kagô nhek o akrĩ xwÿnhjê hõ kot kaj mẽ kãm ixtã amÿnê. **24**Tĩrtũm kapêr ã kagã htũm ra kot ixkukamã harênh xà hkõt koja mẽ tanhmã ixto rax nê ixpĩ. Nom kot mẽ kãm ixtã àmnênh mã xwÿnhta hêxta waa nê. ã kot amnhĩ nhĩpêx anhÿrja mÿrapê koja amnhĩ xà htÿx kãm hamak rax kumrêx. Kop apu aa õ mãmaj nhõxà hkre rũm kator kêt ronhÿx ja kãm mex nê. Anê.

25Hãmri nhũm Jut Kariot kot mẽ kãm hã àmnênh mã xwÿnhta hãmri amnhĩ tã kuma nê kãm:

—Kwa xà we pa Jejus? Xà pa kot paj ã anhĩpêx anê? Kwa nà pa hkêt. Anê.

Hãmri nhũm kãm:

—Tÿ. Ka ã ate inhĩpêx anhÿr mã kênã. Anê.

Jejus kot amnhĩ kamrô pikapĩr kukamã harênh

Makre 14.22-26; Rukre 22.14-23; mãânên Wam Korit 11.23-26

26Tã nhũm Jejus pãwti hõ py nê Tĩrtũm mã harê nê mẽ inhmã ho hkry nê ho mẽ inhĩpêx pa nê mẽ inhmã:

—E na pa ã mẽ amã pãwti ho hkry nê mẽ amã õr anê. Ja pyrã nê koja mẽ ã inhĩpêx anê nê te ixto hkry hpar pyrãk o inhĩpêx pa amnhĩ xà htÿx kamã ijamak kãm ty. Nom mẽ anê kot paj ty. E mẽ mãmrĩ aku.

Anhÿr o mẽ inhmã amnhĩ jarê pa mẽ kuma nê kot mẽ inhmã ho hkry xwÿnhja ku. **27-28**Hãmri nhũm hpãnhã kop py nê mã ho anê nê Tĩrtũm mã harê nê mẽ inhmã kugõ nê mẽ inhmã:

—Mẽ kot ixpĩr xà hã arĩgroja ã koja ixkamrô axkapĩ. Nom koja mẽ amarĩ ixpĩr nhũm amarĩ ixkamrô hpikapĩr kêt nê. ãm paa. Pa kot paj mẽ anê mẽ ãhkram amnhĩ jaxà nhũm mẽ ã inhĩpêx anê nê ixpĩ. Koja ixkamrô axkapĩ nhũm Tĩrtũm omu nê ixkukwak ri mẽ ate ixkõt amnhĩ xunhwÿr xwÿnhjê nê mẽ ate amnhĩ tomnuj piitã te amnhĩ katut kõt rênh par pyrãk o hipêx nê mẽ ato hkra. Ra amnepêm kot ã amnhĩ jarênh anhÿr xà hkõt. Jakamã e mẽ ixkamrô pikapĩr mã ajamxpêr pê wĩhti ho akõm o axpën nhĩpêx. **29**ãm hãmri na pa ã mẽ amã amnhĩ jarênh anê. Kot paj axte wĩhti ho ixkõm kêt rãhã nhũm nhÿrmã inhõ Papaj akupÿn mẽ awÿr inhmê. Hãmri pu mẽ akupÿn ixwrÿk xà hã arĩgrota ã pahkĩnh rax kumrêx. No ãm axtem tanhmã hã pahkĩnh to. Anê.

Nhũm pre ã Jejus mẽ inhmã amnhĩ jarênh anê. Pa mẽ axpën pãnhã kopta py nê wĩta kwÿ ho ixkõ. **30**Hãmri nê mẽ ixpiitã ho ixkõm pa nê Tĩrtũm mã mex ã gre. Hãmri nê ijapõj nê hixêt prêk pê Oriwêhti hwÿr ma mra.

Jejus kot Simãw Pêtre mã kapêr ã harênh
Makre 14.27-31; Rukre 22.31-34; Juãw 13.36-38

31Tã nhũm Jejus tanhmã mẽ ixte hkôt ixpa ho ixpa xwỳnhjê jarênh to nê mẽ inhmã:

—E Tĩrtũm kapêr ã kagà htũmta kot tanhmã mẽ akukamã mẽ ajarênh to nê mẽ ajarênh kot:

Kot paj ôwêhti jamãr o pa xwỳnhja pĩ hãmri nhũm ôwêhti hpigrãnh pa nê ma anhgrã nê ri mra.

Anhỹr o kot mẽ ajarênh. Te ho mẽ apê ôwêhti pyrã nê ã mẽ ajarênh anê. Tã kamàt ja kamã koja mẽ tanhmã inhĩpêx to ka mẽ ixtã mẽ omu nê mẽ umaj ôwêhti pyrã nê apiitã ixkaga hpa nê ma aprõt nê mra. 32Nê mẽ kot ixpĩr tã kot paj akupỹm ixtĩr. Hãmri nê ma akupỹm mẽ akukamã pika pê Garirej wỳr mō. Kamã kot puj mẽ axte axpên pumu. Anê.

33Hãmri nhũm Simãw Pêtre tee ri tanhmã mẽ kot amnhĩ nhĩpêx to hkukamã amnhĩ jarênhja ma nê hkaprĩ nê kãm:

—Tk. Nà kot paj ã amnhĩ nhĩpêx anhỹr kêt nê Pahihti. Koja pahkwỳja akaga japêr no pa kot paj aa akaga hkêt nê. Kot paj akôt ixpa rãhã nê. Anê.

34Hãmri nhũm Jejus kãm:

—Nà ra ixte akukamã ixãhpumunh mex. Koja apkati hkôt krãhyre hkàr kêt ri ka ra mẽ umaj ate ixkôt apa hkêt ã mẽ kãm amnhĩ tã axãprãr o axkrunêpxi kãm ga. Kwa jam ajamaxpêr tỳx nê. Anê.

35Hãmri nhũm tee ri kuma nê axte kãm:

—Kwa nà. Mẽ kot ajaxàr nê apĩr tã kot paj arĩ akôt ri ixpa nhũm mẽ pahto amỹrà nê tanhmã panhĩpêx to. Nà kot paj aa akaga hkêt nê.

Anhỹr o kãm amnhĩ jarê. Pa mẽ ijaxwỳja ã kãm amnhĩ jarênh anê.

Jejus kot Tĩrtũm mã amnhĩ jarênh

Makre 14.32-42; Rukre 22.39-46

36Tã nhũm Jejus mẽ inhmã anê pa mẽ ma nhỹri mẽ kot kãm “Gesêm” anhỹr xwỳnhja wỳr mra. Hãmri nhũm mẽ inhmã:

—E mẽ jar ixkutêp akrĩ. Pa ma mĩtũm tẽ nê Tĩrtũm mã amnhĩ jarê mãn. Anê.

37Hãmri nê mẽ ixkwỳjê ho axkrunêpxi nê amnhĩ kôt mẽ kuwỳ. Simãw Pêtre nê Jepetew kra pijakrut pê Xiakre nê Juãwja wa nhũm amnhĩ kôt mẽ kuwỳ nhũm mẽ ma hkôt mra. Hãmri nhũm Jejus tee ri mẽ kot tanhmã hipêx tota kukamã hamaxpêr o hkaprĩ nê amnhĩ kamã kahak tỳx nê. 38Hãmri nê mẽ kãm:

—Hêxta waa nê. Na pa tee ri amnhĩ xà htỳx kamã ijamakja kukamã ijamaxpêr nê amnhĩ kamã ixkahak tỳx o ra ixkaprĩ nê. Te ixkaprĩ kot

ixpîr o mör pyræk. Jakamã e mẽ jar anohtÿx nê ixto Tîrtûm wÿr o akrî kê tanhmã ixto pa mẽ kot tanhmã ixtoja kutã ixihÿx nê. Anê.

39Hãmri nê mẽ kurûm htêm grire nê Tîrtûm mã amnhĩ jarênh kaxyw htu mÿr pê tēm nê pikap nō nê kãm:

— Kwa Papaj. Hêxta waa nê. Inhmã amnhĩ xà htÿx kãm ijamak prãm kêt kumrêx. Na pa tee ri amnhĩ kukamã ijamaxpêr nê amnhĩ kamã ixkahak tÿx nê. Jakamã kot kaj amã inhnê ja ho ajapêx prãm nê mãmri inhnê ho ajapêx nhũm mẽ kãm ixkurê xwÿnhjaja tanhmã ixto hkêt nê. Rÿ ko. Kot kaj amã mẽ kot tanhmã ixto hprãm kê mẽ mãmri tanhmã inhîpêx to. Nom pam inhmã hprãm xà hkôt kêt. Anê.

40Hãmri nê kànhmã xa nê akupÿm Simãw Pêtreja mẽ hwÿr tē nê tee ri mẽ omu nhũm mẽ ra ôt pa nê hikwÿ. Nhũm mẽ omu nê Simãw Pêtre mã kãm:

— Kwa Simãw Pêtre. E mẽ hãmri akrã hapôj. Kwa wem anohtÿx grire 41nê ixkutêp amnhĩ to Inhõ Papaj wÿr o akrî kê mẽ ixkôt tanhmã mẽ ato htã ka mẽ amã mẽ uma xàj ixkaga hkêt nê arĩ mẽ kutã amnhĩ to htÿx nê akuhê. ã mẽ amã mẽ ate amnhĩ nhîpêx anhÿr prãm nom kormã mẽ amã maa.

42Anhÿr o mẽ kãm kapêr hãmri nê akupÿm tē nê axte Tîrtûm mã amnhĩ jarê nê kãm:

— Kwa Papaj. Nà inhmã amnhĩ xà htÿx kãm ijamak prãm kêt. Na pa amnhĩ kukamã ijamaxpêr nê amnhĩ kamã ixkahak tÿx kumrêx. Jakamã kot kaj amã inhnê ja ho ajapêx prãm nê mãmri inhnê ho ajapêx kê mẽ kãm ixkurê xwÿnhjaja tanhmã ixto hkêt nê. Nom ko. Kot kaj amã mẽ kot tanhmã ixto hprãm kê mẽ mãmri tanhmã inhîpêx to. Nom pam inhmã ja prãm xà hkôt kêt. Anê.

43Hãmri nê kànhmã xa nê Simãw Pêtreja mẽ hwÿr akupÿm tē. Nê mẽ omu nhũm kê mẽ axte gôr nê hikwÿ. Ra mẽ ôtخوا htÿx nê axte gôr



Matêwre 26.39-44

nê hikwỹ. Nhũm Jejus tẽ nê tee ri mẽ omunh o xa ⁴⁴nom axte tanhmã mẽ kãm nê hkêt nê. Âm awjanã nê akupỹm tẽ nê kê wam kot Tĩrtũm mã amnhĩ jarẽnh xà hkôt axte kãm amnhĩ jarẽ. ⁴⁵⁻⁴⁶Hãmri nê akupỹm mẽ hwỳr tẽ nê mẽ kãm:

— Kwa xàn ka mẽ arĩ gõr nê anhĩkwỹ? E mẽ tokyx akrã hapôj. Na mẽ ra mẽ kot ixwỳr mrar nê ixpynênh mã. Koja mẽ tokyx ixkutã mẽ kot amnhĩ xunhwỳr xwỳnhjaja mẽ kãm ixtã amỹnê. Ota ra kot ixtã mẽ kãm amnênh xwỳnhhta tẽ. E mẽ tokyx kànhmã akrĩ pu mẽ kutã mra. Anê.

Mẽ kot Jejus pynênh ã harênh

Makre 14.43-50; Rukre 22.47-53; Juãw 18.2-11

⁴⁷Nhũm Jejus mẽ kãm kapêr o âm rãhã nhũm Jut Kariot pẽ mẽ inhĩõja hwỳr tẽ. Nê amnhĩ kôt mẽ ohtô nê hwỳr mẽ o tẽ nhũm mẽ wapohti nê kô jamỳ nê hkôt o mra. Patre krãhtũm mẽ Ijaew krãhtũmjaja kot Jejus wỳr mẽ rênh xwỳnhjaja nhũm mẽ man hkôt Jejus wỳr mra. ⁴⁸Na pre ra Jut Kariot amnhĩ kukamã mẽ kãm amnhĩ jarẽnh o:

— Kot paj ixkumrêx hwỳr tẽ ka mẽ ixkôt hapu hã mra. Kot paj hwỳr tẽ nê kãm ixkapêr nê kahti hkôt kumỳ. Ka mẽ hã ixpumu nê hwỳr mra nê unênh kurê kumrêx. Ixte kahti hkôt mỳnh xwỳnhhta kot kaj mẽ unê. Anê.

⁴⁹Hãmri nê Jejus wỳr tẽ nê kãm:

— Pa Jejus? Xàn ka kormã anhõt kêt nê xa?

Anê nê kahti hkôt kumỳ. ⁵⁰Hãmri nhũm amnhĩ tã omu nê kãm:

— Kwa Jut. Ate tanhmã ixto kaxyw mã xwỳnh jakamã e kam nê mãmri tanhmã ixto. Anê.

Hãmri nhũm Jut kôt mẽ mrar xwỳnhjaja Jut kot kahti hkôt mỳnh ã omu nê hwỳr mra nê unênh kurê kumrêx. ⁵¹Hãmri nhũm mẽ inhĩõja tee ri ja hã mẽ omu nê õ wapo kapa nê patre maati mã àpênh xwỳnh kot mẽ hkôt htêm xwỳnhhta mã ho apê. Nê kot ho hkrã nhĩpôn mã tã kuhpaw nê upôk rũm hamak nhĩkjê pix krãhta. ⁵²Hãmri nhũm Jejus omu nê nê kãm kapêr nê kãm:

— Kwa akupỹm awapota hkàm haxà nê amarĩ xa. Na htem wapo ho mẽ oprê ho pa nhũm mẽ amnhĩ xwar wapo ho mẽ kupa. ⁵³Xà kot paj amnhĩ to Tĩrtũm wỳ nhũm âm inhma nê tanhmã jajê pẽ ixpytãr to hkêt nê? Nà kot paj amnhĩ to kuwỳ nhũm ixwỳr kapêr o mẽ wrỳk xwỳnhjê rênh kurê kumrêx nhũm mẽ ohtô rax kumrêx nê wrỳ nê mẽ kêp ixpytã. ⁵⁴Nom kot paj ã amnhĩ to hwỳr anhỹr kêt nê. Tĩrtũm kapêr ã kagà htũm kot amnepêm ixkukamã ã mẽ kot inhĩpêx anhỹr ã mẽ harênh jakamã kwãr mẽ mãmri Tĩrtũm kãm hprãm xà hkôt ã inhĩpêx anê. Anê.

⁵⁵Hãmri nê hpãnhã mẽ kot unênh xwỳnhjê mã kapêr nê mẽ kãm:

—Kwa na pa pre apkati mẽ Tĩrtũm mã amnhĩ jarẽnh xà hã ixkre kamã mẽ kãm ixujarẽnh o ixa. Ka prem tokyx ixpynẽnh kêt tã jarãhã te ixte amnhĩ tomnuj xwỳnh pyræk o inhĩpêx nẽ ixwỳr wapohti nẽ kô hã akapẽn nẽ ixwỳr tẽ. 56Tã nom ra Tĩrtũm kapêr ã kagà htũm kamã Tĩrtũm nhỹ hã mẽ kapêr xwỳnh kot mẽ akukamã mẽ ajarẽnh nẽ mẽ atã kagà xà hkôt na ka mẽ ri ã inhĩpêx anẽ. Anẽ.

Nhũm pre ã Jejusja amnhĩ tã mẽ kãm kapêr anẽ. Hãmri pa mẽ ixte hkôt ixa ho ixa xwỳnhjaja mẽ omu nẽ tee ri amnhĩ kukamã ijamaxpêr nẽ mẽ umaj ixprôt nẽ anhrã nẽ ma inhmarr kurê kumrêx.

Mẽ kot patre maati hwỳr Jejus o mõi ã harẽnh

Makre 14.53-65; Rukre 22.54-55, 22.63-71; Juãw 18.12-14, 18.19-24

57Nhũm pre Ijaew krãhtũmjê mẽ Tĩrtũm kapêr tũm o mẽ ahkre xwỳnhjaja ra patre maati Kajpas nhõrkwỹ hwỳr akuprõ nẽ Jejus kutêp hkrĩ. Hãmri nhũm mẽ kot unẽnh xwỳnhjaja ma mẽ hwỳr o tẽ. 58Hãmri nẽ mẽ hwỳr ho axà nẽ hkôt gjêx pa. Nhũm Simãw Pêtre mẽ hkôt hapu hã mẽ htãnopxar o tẽ nẽ kĩtare hwỳr axà nẽ põristi nhĩhkô hã nhỹ. Hãmri nẽ tee ri Jejus kukamã hamaxpêr o nhỹ nẽ hamaxpêr o:

—Kwa tanhmã koja mẽ ixpê mẽ inhõ Pahihti nhĩpêx to? E pa jar amỳm tanhmã mẽ kot hipêx to hã mẽ omunh o nhỹ. Anẽ.

59Hãmri nhũm patre krãhtũmjê mẽ juistijaja kãm Jejus pĩr prãm tỳx nẽ. Jakamã na prem Ijaew wa ho hamêxkrut nẽ axpẽn kôt tanhmã mẽ kãm ho hêx to nhũm mẽ kot hã wa mar nẽ ra hpĩr kaxyw mẽ pikuprõnh xwỳnhjê kapi. 60Jakamã nhũm prem axpẽn pãnhã mẽ hwỳr mra nẽ tanhmã ho hêx to. Nom axpẽn kôt harẽnh kêt nẽ. ãm ahpỹnhã tanhmã ri harẽnh to nom wahõ wa axkrut nẽ axpẽn kôt harẽnh kêt nẽ. Jakamã nhũm mẽ tee ri hã mẽ kuma.

Tã nhũm ja wa mẽ hwỳr tẽ nẽ axpẽn kôt harẽ nẽ mẽ kãm:

61—Nà na pre tanhmã Tĩrtũm mã amnhĩ jarẽnh xà hã ixkre jarẽnh to nẽ harẽnh o: “Kot paj nhỹrmã inhmã ixkreja grãnh par prãm nẽ kugrã hãmri nẽ ãm ixtã apkati axkrunêpxi pix nẽ akupỹm hipêx pa. Ja kaxyw ixãhpumunh tỳx.” Anhỹr o na amnhĩ jarẽ pa wa kuma.

62Anhỹr o mẽ kãm ho hêx. Hãmri nhũm patre maatija wa kuma nẽ kãnhmã xa nẽ Jejus mã kapêr nẽ kãm:

—Kwa xà ãm hãmri na wa ã ajarẽnh anẽ nã? Xàn ka pre ã amnhĩ jarẽnh anẽ? E mẽ inhmã tanhmã amnhĩ jarẽnh to. Anẽ.

63Nom nhũm amarĩ mẽ kãm xa nẽ mẽ kãm tanhmã nẽ hkêt nẽ. Hãmri nhũm patre maatija tee ri omu nẽ axte kãm kapêr nẽ kãm:

—Kwa aprĩ hã mẽ inhmã tanhmã amnhĩ jarẽnh to. Tĩrtũm noo mã amã ixkapêr jakamã kêr ka akatãt kôt mẽ inhmã amnhĩ jarẽ nẽ amnhĩ

to axêx kêt nê. Xà apê Tirtũm Kra? Xà ka na pre Tirtũm mẽ ixkaxyw axãm? Kwa akatât kôt mẽ inhmã amnhĩ jarê. Anê.

64Hãmri nhũm tă hprĩ hã mẽ kãm amnhĩ jarê nê mẽ kãm:

—Tỳ. Nà ãm hãmri na ka ã ijarênh anê. Ixpê Tirtũm kot mẽ akaxyw ixãm xwỳnhta na pa. Na pre mẽ awỳr inhmẽ pa mẽ awỳr wrỳ. Tã kot paj nhỹrmã axte kaxkwa rũm amnẽ akupỳn kakrã kamã mẽ awỳr wrỳ. Hãmri nê Tirtũm xàhpumunh o àhpumunh xwỳnhta nhĩhkô hã nhỹ hãmri nê pam tanhmã mẽ ajarênh to ka mẽ amnhĩ tă ixpumu nê inhma. Anê.

65Hãmri nhũm patre maatija tee ri ã kot amnhĩ jarênh anhỹr ã kuma nê kamã gryk tỳx nê. Hãmri nê gryk xàj kêp patre maati hã ê kapa nê hkaxônha pa nê kumẽ nê hkwỳjê mã kãm:

—Tk. Kwa mo kaxyw kot puj mẽ axte ri tanhmã kot amnhĩ tomnuj to hã harênh xwỳnh ô japêr? Tãm kot amnhĩ pê Tirtũm Kra hã amnhĩ jarênh ã amnhĩ to hêx nhũm mẽ pahte mar kênã. 66Jakamã e kwa tanhmã kot puj mẽ hipêx to? Anê.

Hãmri nhũm mẽ kãm:

—Nà ã kot amnhĩ jarênh anhỹr mỳrapê koja ty. Ra htyk mã tãm kênã. Anê.

67Hãmri nê tanhmã hipêx kati hto. Mẽ hkwỳjaja hkuk kuhtô nê ãhkra ho htak nhũm mẽ hkwỳjaja ãhkra hpo ho htak nê hã hpêr o axkê nê kãm:

68—E apê Tirtũm Kra hã ate amnhĩ jarênh jakamã mãn urak nê axàhpumunh tỳx. Jakamã e mẽ kot atak xwỳnhta nhĩxi jarê pa mẽ ama. Anê.

Simãw Pêtre kot Jejus kôt pa hkêt ã amnhĩ jarênh

Makre 14.66-72; Rukre 22.56-62; Juãw 18.15-18, 18.25-27

69Rôm nhũm Simãw Pêtre arĩ kítare kamã nhỹ. Hãmri nhũm mẽ kãm àpênh xwỳnh nitita omu nê hprĩ hã omunh kurê kumrêx. Hãmri nê kãm:

—Xê pêr apê Jejus kôt mẽ pa xwỳnhjê hõ na ka. Anê.

70Hãmri nhũm tee ri amnhĩ tă kuma nê kãm mẽ uma xàj mẽ kãm amnhĩ tă aprã nê kãm:

—Tk. Kokỹ. Ixte mễhõ my ata pumunhre hã. Anê.

71Hãmri nê mẽ umaj kànhmã xa nê tẽ nê kítare hwỳr hakwakrem ahte mẽ hkax ã xa. Tã nhũm hpãnhã hõja omu nê hã mẽ kãm:

—Xê ma pêr ãm hãmri na mẽ harê. Kêp Jejus kôt ri mẽ pa xwỳnhjê hõ na pêr. Anê.

72Hãmri nhũm amnhĩ tă kuma nê kãm:

—Tk. Nà mẽ ri ã amnhĩ krã hkôt ri ixto axêx anhỹr kêt nê. Ixte aa mễhõta pumunh kêt kumrêx. Anê.

73Tã nhũm mẽ hkwyjaja hwỳr mra nê kãm kapêr nhũm tanhmã mẽ kãm kapêr to nhũm mẽ kuma nê kãm:

—Kwa pêr ãm hãmri na mẽ ajarê. Apê Jejus kwỳ na ka. War akapêr kot axpên pyræk kênã. Anê.

74Hãmri nhũm tee ri mẽ kuma mẽ kãm amnhĩ tã àprâr kãm hihtỳx nê mẽ kãm:

—Kwa nà. Na pa Tirtũm noo mã mẽ amã amnhĩ jarê. Kot paj amnhĩ to ixêx japêr nhũm inhma nê hã tanhmã ixto. Nà uræk ixpê Garirej nhõ xwỳnhre hã. Ixte mễhõ mũj pumunh kêt kumrêx tã ka mẽ xatã axpên kôt ixte hkôt ixpa ho ixpa xwỳnh ã ixkamnhĩx o xa.

Anhỹrja o ra mẽ kãm amnhĩ tã aprâr o axkrunêpxi nhũm krãhyre hkàr kurê kumrêx. 75Hãmri nhũm Simãw Pêtre kuma nê ra Jejus kot hkukamã krãhyre hkàr kêt ri kot hã amnhĩ aprâr o axkrunêpxi hã harênhta mã hamaxpêr kurê kumrêx. Hãmri nê kànhmã hakry hpar o tẽ nê hkaprĩ htỳx kumrêx nê kítare pê kato nê tẽ nê awry hã xa nê mỳr rax nê.



Mẽ kot pahшти Pirat wỳr Jejus o htêm ã mẽ harênh

Makre 15.1; Rukre 23.1-2; Juãw 18.28-32

27 1Tã nhũm ra myt kator o mõi mẽ nhũm mẽ hkrãhtũmjê mẽ patre krãhtũmjaja axpên wỳr pikuprõnh pa. Hãmri nê Jejus ã axpên mar o hkrĩ nê axpên mã:

—Nà kot puj mẽ hã amỳnê kê mẽ kupĩ. Kêp Tirtũm Kra hã kot amnhĩ jarênh o amnhĩ to hêx kênã. Anê.

2Hãmri nê mẽõ pòristijê mã anê nhũm mẽ hpa hpre hpa nê ma pahшти Pirat wỳr o tẽ. Pirat kêp Rõm nhõ pahшти nhỹ hã mẽ ixpê Ijaewjê ho amnhĩptâr jakamã nhũm mẽ ma hwỳr o tẽ nê ìhkram haxà.

Jut Kariot kot amnhĩ pĩr ã harênh

Atre 1.15-19

3Rõm nhũm Jut Kariot tee ri mẽ kot Jejus pĩr kaxyw mẽ harênh ma nê hkaprĩ nê. Ra kot mẽ kãm hã àmnênh tã mẽ kot hpĩr kaxyw ã mẽ

harênh ma nê tee ri amnhĩ kukamã hamaxpêr o hkaprĩ htỳx nê. Hãmri nê hamaxpêr o:

— Hêxta waa nê. Mo na pa pre ri axtem nê ã amnhĩ nhĩpêx anê? Nà na pa pre amnhĩ tomnuj tỳx kumrêx. Anê.

Hãmri nê ra mẽ kot kãm kàxpore ho 30 nê òrta jamỳ nê ma akupỳm patre krãhtũmjê mẽ Ijaew pigêjtê hwỳr o tẽ. Hãmri nê mẽ kot Tĩrtũm mã amnhĩ jarênh xà hã ixkreja wỳr mẽ hwỳr axà 4nê nhỹri mẽ omu nê mẽ hwỳr tẽ nê mẽ kãm:

— E ota mẽ akàxporeta. Na pa ã mẽ amã Jejus ã ixàmnênh anhỹrja o amnhĩ tomnuj tỳx nê. Kot tãm amnhĩ nhĩpêx o pa htã pa axtem nê ã mẽ amã hã ixàmnênh anê. Jakamã e mĩ. Mẽ akupỳm akàxporeta jamỳ. Kot paj amnhĩm hamỳnh kêt nê. Anê.

Hãmri nhũm mẽ tee ri kuma nê kãm:

— Kokỹ. Nom ka na ka pre mẽ ixwỳr tẽ nê ho mẽ inhmar kênã. Anê.

5-7 Hãmri nhũm tee ri mẽ kuma hãmri nê pikap kàxpore rênh pa nê ma tẽ nê kato. Hãmri nê hkaprĩ htỳx kumrêx nê hamaxpêr o:

— Kwa tanhmã kot pa we amnhĩ to? Nà kot paj amnhĩ pĩ. Anê.

Hãmri nê krĩ pê kato nê ma mẽ kot pika kakwỳnh nê ho amnhĩm poti nhĩpêx xà hã pika hwỳr tẽ hãmri nê amnhĩ mut mã ê nê ho amnhĩ pĩ. Hãmri nhũm patre krãhtũmjaja harênh ma nê tee ri kot kàxpore rênhta kawrà nê hã axpên kukja nê axpên mã:

— Kwa tanhmã kot puj wem ja ho? Jut kot mẽ pamã Jejus ã àmnênh nhũm mẽ pahte hpĩr xà hã kàxpore na. Jakamã kot puj mẽ ho Tĩrtũm mã amnhĩ jarênh xà hã ixkre ho mex kêt nê. Finat Mojes kot ja nê mẽ panhĩgêjtê kurê jakamã na htem mẽ hpar xà hã kàxpore ho ixkreta ho mex kêt nê. Jakamã kwa tanhmã kot puj mẽ ho? Anê.

Hãmri nhũm ja mẽ kãm:

— E na pa ra ijamaxpêr. Pu mẽ ho Jut kot amnhĩ pĩr xà hã pikata japrô hãmri nê kamã jar mẽ kêp mẽ pahkwỳ hkêt htyk xwỳnhjê jagjênh o papa. Anê.

Hãmri nhũm mẽ kuma nhũm ja mẽ kãm mex nê. Jakamã nhũm arĩgro hõ hã nhũm mẽ ma hwỳr mra nê haprô. 8 Hãmri nê hã hixi mẽ nhũm kêp “mẽ hkamrô pikapĩr xà kamã pika”. Mẽ kot Jejus pĩr xà hã kàxpore ho haprôr jakamã nhũm prem ã hã hixi mênh anê. Nhũm htem arĩ axpên mã ã hixi jarênh anhỹr o pa. 9-10 Nhũm pre ra amnepêm Tĩrtũm nhỹ hã kapêr o pa xwỳnh finat Jeremĩsti mẽ hkukamã hpĩr hã ja jarê nê hã kagà. Nê hã kagà o:

Koja Ijaew nhõ patrejaja mêhõ kot mẽ kãm mêhõ my hã àmnênh pãnhã kãm kàxpore ho 30 nê òr xwỳnhja jamỳ. Hãmri nê ma o tẽ nê nhỹri mẽ kot amnhĩm pika kakwỳnh nê ho poti nhĩpêx o pa xà hã pika hkwy japrô. Ra Tĩrtũm kot inh mã mẽ harênh xà hkôt koja mẽ ã amnhĩ nhĩpêx anê. Anê.

Ã finat Jeremĩsti kot Tĩrtũm nhỹ hã mẽ hkukamã mẽ harẽnh nẽ hã kagã anhỹr xàja kõt nhũm prem ã amnhĩ nhĩpêx anẽ.

Pahihti Pirat kot Jejus kukjêr ã harẽnh

Makre 15.2-5; Rukre 23.3-5; Juãw 18.33-38

11Rôm nhũm mẽ pahihti Pirat wỳr Jejus o tẽ nẽ hwỳr ho axà nẽ kutã ãm nhũm xa nhũm Piratja omu nẽ kãm:

—E. Kwa inhmã amnhĩ jarẽ. Xà apê Ijaew nhõ pahi na ka nà? Xà ka na htem amnhĩ wỳr ajamãr o pa? Anẽ.

Hãmri nhũm kãm:

—Tỳ. Nà ãm hãmri na ka ijarẽ. Anẽ.

12Hãmri nhũm mẽ hkrãhtũmjê mẽ patre krãhtũmjaja pahihti Pirat mã tanhmã ho kapêr punuj to. Nhũm amnhĩ tã mẽ kuma nom tanhmã kãm amnhĩ tã àprãr to hkêt nẽ. 13Jakamã nhũm pahihti Pirat tee ri ja hã omu nẽ kãm:

—Kwa xà na ka ã mẽ kot ato kapêr anhỹrja mar kêt nẽ nà?

14Anhỹr tã nom nhũm Jejus akryk xa nẽ axte tanhmã kãm nẽ hkêt nẽ. Hãmri nhũm Pirat tee ri kot ã amnhĩ nhĩpêx anhỹr ã omu nẽ hamaxpêr o:

—Kokỹỹ. Mẽ kot ho kapêr punuj tã nhũm ãm mẽ kuma nẽ te kãm mẽ uma hkêt pyrà nẽ tanhmã inhmã amnhĩ tã àprãr to hkêt nẽ. Anẽ.

Pirat kot Jejus pĩr kaxyw hã àmnênh ã harẽnh

Makre 15.6-15; Rukre 23.13-26; Juãw 18.39-19.16

15-21Tã nhũm Pirat kormã mẽ kot axpên mar xà hã ixkre kamã ỹr rãhã nhũm hprõja hwỳr hpêr mẽ nẽ kãm:

—Xê tanhmã mẽ kãm Jejusja ã axàmnênh to hkêt nẽ. Na pa kamàt ja kamã hkõt amỹti nẽ tee ri hkukamã ijamaxpêr. Kot amnhĩ to mex xwỳnh na. Aa tanhmã kot amnhĩ tomnuj to hkêt jakamã xê tanhmã mẽ kãm hã axàmnênh to hkêt nẽ. Kwarĩ. Anẽ.

Hãmri nhũm Piratja kuma nẽ hamaxpêr o:

—Nà ixte Ijaew krãhtũmjê pumunh tũm. Ijaew kwỳjaja kãm Jejus kĩnh nhũm mẽ hkrãhtũmjaja kot mẽ hã Jejus kamã gryk nẽ. Jakamã ixte tanhmã mẽ kãm hã ixàmnênh to kaxyw na mẽ ã ixwỳr o htem anẽ. Anẽ.

Na htem Pas nhõ arĩgrota hapôx mẽ nhũm pre htem Ijaew o amnhĩptàr xwỳnhja mẽ kãm mẽ hagjênh xà kamã hkrĩ xwỳnhjê ho hpỹnh nẽ mẽ hapôj. Mẽ kãm hprãm xà hkõt nhũm mẽ kãm mẽ hapôj nhũm mẽ akupỹm kapôt ã hamakêtkati nẽ amnhĩx pa. Jakamã nhũm ra mẽ hagjênh xà kamã mẽhõ my pê Parapasja hkrĩ. Na pre tanhmã amnhĩ tomnuj to nhũm mẽ mỳrapê unê nẽ haxà. Jakamã nhũm Ijaewjaja mẽ ho amnhĩptàr xwỳnh Pirat wỳr akuprõ nẽ kuhê nhũm mẽ kãm:

—E kot paj jarãhã mẽ amã mẽ hagiênh xà kamã mẽ hkrĩ xwỳnhjê hõ mã inhũre kê àmnhĩx kato nê ri pa. Nhỹ kot paj mẽ amã kãm inhũre? Xà Parapas nà? Xà mẽ akwỳ kot amnhĩm ho mẽ anhõ pahihti Jejus pê Tĩrtũm kot mẽ akaxyw ãm xwỳnhhta kot paj mẽ amã kãm inhũre? Nhỹ wehe? E mẽ inhmã nhỹ jarẽ. Anẽ.

Pirat na pre mẽ inhõ patre krãhtũmjê pumunh mex nê. Ijaew kãm Jejus kapêr mar prãm tỳx ã nhũm mẽ hã kamã gryk tỳx nê hwỳr o mrarja kôt nhũm mẽ omunh mex nê. Jakamã ã hã mẽ hkukjêr anẽ. Hãmri nhũm mẽhpigêt mẽ patre krãhtũmjaja kuma hãmri nê mẽ pikuprõnh nê mẽ kuhê xwỳnhjê mã kãm:

—Kwa mẽ kãm anẽ kê mẽ pamã Parapas mã mãn ure nê mãmri Jejus Kris pĩ. E kwa mẽ tokyx kãm anẽ kê Parapas mã ure. Anẽ.

Hãmri nhũm mẽ mẽ kuma nê pahihti Pirat mã kãm:

—Nà mẽ inhmã Parapas mã mãn anhũre. Anẽ.

22Hãmri nhũm tee ri mẽ kuma nê mẽ kãm:

—Kwa no mẽ ate Jejus pê Tĩrtũm kot mẽ akaxyw ãm xwỳnh ã harênh xwỳnhhta? Tanhmã kot paj hipêx to? Anẽ.

Hãmri nhũm mẽ kãm:

—Apĩ ri. Tokyx pĩ kahpa hã anhõ kê ty. Anẽ.

23Hãmri nhũm tee ri mẽ kuma nê mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt ri pĩ kahpa kunhõ nhũm ty. Anẽ.

Hãmri nhũm mẽ xatã àmra kamã kãm:

—Kwa pĩ kahpa hã mãn anhõ kê ty. Kwa tokyx ã mẽ inhmã hipêx anẽ. Anẽ.

24Hãmri nhũm tee ri ja nê tanhmã mẽ kãm kapêr to no nhũm mẽ mar kêt nê. Nhũm tee ri mẽ àmra mar o xa. Hãmri nê kãm Jejus pĩr prãm kêt jakamã amnhĩm gô hkwỳ janhi nê mẽ piitã mẽ noo mã amnhĩ nhĩhkra kuhõnh o xa. Mẽ kot hã omunh xà hkôt kãm hpĩr prãm kêt ã omunh kaxyw. Hãmri nê mẽ kãm:

—E na pa mẽ anoo mã ã amnhĩ nhĩhkra kuhõnh anẽ ka mẽ ja hã ixpumu. Nà inhmã hpĩr prãm kêt. Tanhmã kot amnhĩ tomnuj tore hã. Mẽ kaxipixjaja mẽ amã hpĩr hprãm jakamã mẽ kam nê tanhmã ho. No pa kot paj tanhmã ho hkêt nê. ãm kwarĩ ho kwarĩ. Anẽ.

25Hãmri nhũm mẽ kuma nê mẽ kãm:

—Tõe. Nà ãm hãmri. Kot paj mẽ pamjaja amnhĩ tã htykja nhõ. Nê mẽ ixkra nê mẽ ixtàmnhwỳjê mẽ amnhĩ to ixpimrãatã amnhĩ tã kunhõ. Kê Tĩrtũm kãm tanhmã hã mẽ ixtõ hto hprãm nê mamrĩ tanhmã hã mẽ ixtõ hto. Anẽ.

26Hãmri nhũm mẽ kuma nê mẽ kãm hprãm xà hkôt mẽ kãm Jejus ã amỳnê nê mẽ kãm Parapas mã ure. Ra Parapas kot pahi Pirat pê õ põristi kutã amnhĩ xãm nê kêp hõxpĩrja mỳrapê nhũm mẽ kot unênh nê haxàr

tã Ijaew kãm hprãm xà hkôt akupÿm kãm ure. Hãmri nê õ pôristijê mã anê nhũm mẽ Jejus tak. Nê htak rax nê hãmri nhũm Pirat mẽ kãm hã amÿnê nhũm mẽ kot pĩ kahpa hã nhôr o hpĩr kaxyw ma o tẽ.

Pôristi kot Jejus ã hpêr o pikênh ã harênh

Makre 15.16-20; Juãw 19.2-3

27Tã nhũm pôristijaja mẽ kot pĩ kahpa hã Jejus nhôr kaxyw ma o tẽ nê pahihiti Pirat nhôrkwÿ kamã ixkre hõ hwÿr ho axà. Nhũm pôristi ohtô nê hwÿr akuprô nê hã pêr o pikênh kaxyw axpên mã:

— E kwa tokyj pu mẽ kãm pahi xê jaxà ri. Kêp pahi hã kot amnhĩ jarênh kênã. Anê.

28Hãmri nê kêp ê kapa nê hpãnhã kêp pahi hã mẽ ê kamrêk mexja py nê kãm haxà. 29Nê kãm pahi hã mẽ ahkà nhípêx nê hkrãm haxà. Nom axtem akunĩ kamã mêmô mrô nhĩ te kot ronh kanêre pyræk xwÿnhja nhũm mẽ hikãx nê hkrãm haxà. Nê kãm pahi hã kô gõ nhũm kupy nê o xa. Hãmri nhũm mẽ ho anhÿr pa nê kutã hkõn krã ho rôrôk nê hkrĩ hpa nê hã pêr o pikênh kamã kãm:

— E ãm hãmri. Apê Ijaew nhõ pahi punuti na ka. Anê.

30Hãmri nê kãnhmã kuhê nê hkuk kuhtô nê kêp kô pytà nê xatã ho hkrãx pê htak. Nhũm prem ã pêr o pikênh kãm hipêx anê. 31Hãmri nê kêp pahi hã ê kapa nê akupÿm kãm ê jaxà nê mẽ kot pĩ kahpa hã nhôr kaxyw ho kato nê ma o tẽ.

Pôristi kot pĩ kahpa hã Jejus nhôr ã harênh

Makre 15.22-32; Rukre 23.27-43; Juãw 19.17-25

32Nhũm pôristijaja Jejus o kato nê ma kapôt mã o tẽ. Nê kãm pĩ kahpa pytĩja gõ nhũm kumÿ nê mẽ hkôt o hkwÿ. Nom ra hirotyx nê nhũm mẽ tee ri ja hã omu nê mēhõ kot ho ajuta kaxyw mẽ kot omunh xwÿnhjê kapi ho xa. Hãmri nê Sirên nhõ xwÿnh Simãw kà htyk pumu nê unê nê kãm kot Jejus o ajuta kaxyw hã karõ nhũm hwÿr tẽ nê kêp pĩ kahpata mÿ nê hkôt kãm kumÿ nê o tẽ. 33Hãmri nhũm mẽ kên nhixêt te kot mẽ hkrã hi pyræk xwÿnhhta wÿr mẽ o pøj. Mẽ kapêr kãm na prem hixêta jarênh o: “Korkot.” No mẽ pakapêr kãm Korkot jarênhja kêp “mẽ hkrã hi xà” nhũm mẽ ma hwÿr Jejus o pøj. 34Hãmri nê mẽ kot pĩ kahpa hã nhôr kaxyw nhũm à htÿx kumrêx kamã hamak pymaj kãm mêmô mẽ hkanexàja gõ. Wĩhti mẽ mêmô mry ma xà ho pihkàr nhũm mẽ kãm hkwÿ gõ. Nom nhũm hkaki nê mẽ kot amnhĩ xà htÿx kamã hamak kêt xà hã omunh kurê kumrêx nê hkaga. Nhũm mẽ tee ri ja hã omu hãmri nê kêp ê kapa nê kumẽ nê pĩ kahpa hã kuxi nê prek o ãhkra nê hpar o htÿx pa. Hãmri nê kãnhmã pĩ jarĩ nê ahkre kamã ãm nê ho htÿx nhũm kÿxpê ajêt. 35Hãmri nhũm pôristi hkwÿjaja axpên mã ê hkwÿ ho pigrãnh kaxyw hã kênre ho jôka. 36Hãmri nê ho anhÿr pa nê pikap Jejus jamãr o hkrĩ.

37Na htem mẽ hpar kaxyw nẽ tanhmã mẽ kot amnhĩ tomnuj to hã kagà nẽ mẽ mỳri pĩ kahpa hã hanhô. Jakamã na prem tapti hõ py nẽ tanhmã Jejus ã kagà hto nẽ hã kagà ho:

IJAEW NHÕ PAHI NA JA

HIXI PÊ JEJUS

Hãmri nẽ hwỳr ho api nẽ mỳri kunhô. ã Jejus kot amnhĩ jarẽnh anhyrja mỳrapê na prem kupĩ.

38Hãmri nhũm mẽ hpãnhã wa àhkĩnh xwỳnh wa ho axkrut nẽ mãănẽn pĩ kahpa hã wa kunhô. Nẽ akutã ho Jejus nhĩjê nhũm war ajêt.

39Tã nhũm pry hã mẽ mrar xwỳnhjaja Jejus pumu nẽ hã hpêr o pikẽnh o mra nẽ kãm:

40—Kwa ka na ka pre ate Tĩrtũm mã amnhĩ jarẽnh xà hã ixkre grãnh par nẽ atã apkati axkrunêpxi nẽ akupỹm hipêx par ã amnhĩ jarê. Nẽ apê Tĩrtũm Kra hã amnhĩ jarê. Nẽ axàhpumunh o axàhpumunh jakamã e kwa amnhĩ kapa nẽ wrỳ pa mẽ ja hã apumu. Kwa tokyx. Anẽ.

41Nẽ patre krãhtũmjê mẽ Tĩrtũm kapêr tũm o mẽ ahkre o mẽ pa xwỳnh mẽ mẽ hkrãhtũmjaja piitã hwỳr mra nẽ hã hpêr o axkê. 42Nẽ expẽn mã harẽnh o:

—E jahti na xep pre mẽ kamã ukapri ho pa nẽ tanhmã mẽ ho ajuta hto ho pa. Tã nom tãm tanhmã amnhĩ to nẽ wrỳk kêt nẽ. Kwa pu mẽ arĩ pakuhê nẽ kot amnhĩ kaxàr nẽ wrỳk kãm omu. Kojã wrỳ pu mẽ omu nẽ kêp mẽ panhõ pahihiti hã hkôt pajamaxpêr kurê kumrêx. E tokyx wrỳ Jejus. Pa mẽ awrỳk kãm apumu. Nà kot kaj awrỳk rax nẽ. 43Na hte amnhĩ kaxyw Tĩrtũm mã hamaxpêr o pa. Nẽ kêp Kra hã amnhĩ jarẽnh o pa. Jakamã e. Kê Tĩrtũm tãm hwỳr tẽ nẽ kêp Kra hã akupỹm mẽ pahpê utã. Anẽ.

44Hãmri nhũm wa kot akutã hijê nẽ jêt xwỳnhhta wa haxwỳja mẽ mar xà hkôt mã ho kapêr anẽ.

Jejus tyk ã harẽnh

Makre 15.33-41; Rukre 23.44-49; Juãw 19.28-30, 19.51;

mãănẽn Eprêw 10.19-20

45Tã nhũm kaxkwa nhĩpòk ri myt ÿr mẽ nhũm te kamàt pyrãk nhũm kamàt kô rax kumrêx. Jao hã awry mẽ nhũm ra akupỹm myt katêr o mõ.

46Hãmri nhũm Jejus kapêr kãm hihtỳx nẽ àmra htỳx kãm Tĩrtũm mã kapêr nẽ kãm:

—Inhõ Tĩrtũm inhõ Tĩrtũm. Kwa mon ka ixkaga? Anẽ.

Nom kapêr kamã kãm kapêr o:

—Eri Eri. Rãmã sapatani. Anẽ.

47Hãmri nhũm mẽ kot mar xwỳnhjaja kot Eri jarẽnh ã kuma nẽ htỳx ho finat Eris mã kapêr ã hkamnhĩx. 48Nhũm Jejus par pê guhkrax kãm wĩhti punure xa. Jakamã nhũm mẽ ã kapêr anhyr ã kuma nhũm mẽhõ

kãm hkaprĩ nê. Hãmri nê mẽmo rerek py nê o tẽ nê kaxyw pĩ rytija py nê ho hkanhwỳ. Nê akupỹn o tẽ nê ho wĩhti nhek nê Jejus kot hkaôr kaxyw kãm kupê. 49Hãmri nhũm hkwỳjaja tee ri ja hã omu nê nê kãm kapêr nê kãm:

—Tk. Kwa nhãm xa. Pu mẽ kop Eris jamã mãn. Kojã hwỳr tẽ nê ho wrỳk japêr. Anê.

50Hãmri nhũm kamàt kô mẽ nhũm Jejus ra htyk kaxyw nê axte àmra htỳx nê hãmri nê ty. 51Tykja kôt nhũm Tĩrtũm mã amnhĩ jarênh xà hã ixkre kamã hakwakre hã kupêxêja kỳj rũm ahpar mã axkjê nê amnhĩ kahê xà mẽnh kurê kumrêx. Utĩ rax tã axkjê nê amnhĩ kahê xà mẽ. Te Jejus htyk o te kot mẽ pahte hkôt amnhĩ xunhwỳr xwỳnhjê mã Tĩrtũm wỳr pry jakwa kre kahê xà mẽnh pyrak o ã amnhĩ nhĩpêx anê. Nhũm pika htertet tỳx kumrêx o kên rũnh kwỳ ohtô nê hkrakrak pa. 52Hãmri nhũm mẽ htyk ã pika kamã mẽ htykjê nhõrkwỳ ho ohtô nê mẽ hã axkjê nhũm mẽ hikwỳ xwỳnhjaja akupỹm htĩr nê hapôj nê kuhê. Na prem kormã htyk kêt ri amnhĩ kaxyw Tĩrtũm kôt hamaxpêr. Tã nhũm Jejus ty nhũm mẽ ohtô nê akupỹm htĩr nê hapôj nê kuhê. 53Nom kormã nhỹhỹm mrrar kêt nê. Arĩ mẽ hã pika nhĩpy Jejus akupỹm htĩr ã hamãr o kuhê. Tã nhũm Jejus apkati hõ hã akupỹm htĩr ã arĩgrota ã nhũm mẽ rĩ kormã ma Jerujarê hwỳr mra nê hwỳr agjê nhũm mẽ ohtô nê akupỹm mẽ htĩr ã mẽ omu.

54Nhũm kormã Jejus htyk o mõrta ã nhũm põristi krãhtũm mẽ põristi hkwỳjaja hãmri hparpê hamãr o kuhê nê htyk kãm omu. Nê pika htertet kamã ama nê mẽmoj kot tanhmã amnhĩ nhĩpêx toja pumu nê tee ri hamaxpêr nê kãm ma htỳx kumrêx. Hãmri nê axpên mã:

—Hêxta waa nê. Pêr ãm hãmri na pre htyk xwỳnhhta amnhĩ jarê. Kêp Tĩrtũm Kra kênã. Tã pu mẽ amarĩ pahtỳx kupĩ. Anê.

55-56Nhũm pre mẽnijaja ohtô nê amỳm Jejus tyk kãm omunh o kuhê. Marir Matarênh nê Xiakre mẽ Juje wa katorxà Marir nê Xiakre hõ mẽ Juãw wa katorxàja nhũm mẽ kormã htyk kãm omunh o kuhê. Na prem Garirej rũm hkôt tanhmã ho ajuta hto ho hkôt Jerujarê wỳr mõ.

Mẽ kot Jejus jaxàr ã harênh

Makre 15.42-47; Rukre 23.50-56; Juãw 19.38-42

57Tã nhũm ra myt greire nhũm krĩ pê Arimatej rũm hikàxpore rax xwỳnh pê Jujeja tẽ. Nom axtem Juje hõ na pre. Ra kot Jejus kôt amnhĩ xãm jakamã kãm ho wrỳk nê haxàr prãm nê. 58Hãmri nê ma pahi Pirat wỳr tẽ nê ã hã kuwỳ nê kãm:

—E ot pa awỳr tẽ. Kwa inhmã htyk xwỳnhhta gõ pa ma o tẽ nê haxà nà? Anê.

Hãmri nhũm kuma nê kãm harê nhũm ma o tẽ nê haxà. 59Kaxyw kupêxê mex õ py nê ho hkupu pa 60nê ma o tẽ nê õ kên kre kamã haxà.

Na pre htyk kukamã kën kre kakwÿ nhũm mẽ kot kormã kamã mẽhõ jaxâr kêt tâ kamã na pre Jejus jaxà. Hãmri nê hã kën rax ò xãm nê ho hitom nê ma akupÿm tẽ. **61**Nhũm Marir Matarên mẽ Marir òja wa kën kreta kapem omunh o wa nhÿ.

Pôristi kot kën kre jamâr o kuhê ã harênh

62Tã nhũm apkati nhũm mẽ inhõ arĩgromnu pê sap kato. Hãmri nhũm Parijew nhõ xwÿnhjê mẽ patre krãhtũmjaja ma pahi Pirat wÿr mra nê kãm:

63—Kwa pahihti. Nà amnhĩ to hêx o pa xwÿnhhta na pre kormã htĩr nê pa ri tanhmã amnhĩ jarênh to ho pa. Nê nhÿrmã ty nê htyk ã apkati axkrunêpxi pix nê akupÿm htĩr ã amnhĩ jarê. **64**Jakamã kwa hwÿr anhõ pôristi hkwy rê kê mẽ ma hwÿr mra nê hamâr mex o apkati axkrunêpxi. Kot ka anhÿr kêt nhũm hkôt mẽ pa ho mẽ pa xwÿnhhaja ma hwÿr mra nê ho ahkĩ nê ma o mra nê nhÿri haxà nê mẽ piitã mẽ kãm ra akupÿm htĩr ã harênh o hêx o pa. Te tãm kot amnhĩ kukamã amnhĩ jarênh pyrãk. Nom mẽ kot axte ã harênh anhÿrja koja omnuj tÿx o tãm kot ã amnhĩ jarênh anhÿrja jakre. Anê.

65Hãmri nhũm mẽ kuma nê mẽ kãm:

—Tôe. Nà koja mẽ ho anê. E mẽ ma hwÿr amnhĩ kôt pôristi hkwy ho mra kê mẽ hakwakre kahê xà jamâr mex o kuhê. Anê.

66Hãmri nhũm mẽ kuma nê ma hwÿr mra nê hakwakre hã kën raxta o htÿx pa. Nê mẽhõ kot omunh nê kahê mênh pymaj menh ê ho hkukõ. Hãmri nê ho anhÿr pa nê pôristi mã kãm:

—E Kêr ka mẽ jar kuri hamâr mex o akuhê. Kê mẽhõ tẽ nê tanhmã ho hkêt nê. Anê.

Jejus akupÿm htĩr ã harênh

Makre 16.1-8; Rukre 24.1-12; Juãw 20.1-10

28 ¹Tã nhũm apkati nhũm tãmĩk. Hãmri nhũm Marir Matarên mẽ Marir òja kwÿhtã kãnhmã nhÿ nê ma akupÿm kën kreta wÿr wa tẽ. ²Puh nhũm pika htertet tÿx nê nhũm Tĩrtũm kapêr o mẽ wrÿk xwÿnhja kën kre wÿr wrÿ nê nhãm hakwakre nê kën raxta mẽ nê hã nhÿ. ³Hirã htÿx kãm nhÿ. Te na jaxênh pyrãk. Nê ê haka htÿx kumrêx. ⁴Nhũm pôristijaja tee ri omu nê kãm ma htÿx nê htertet nê umaj pikap rôrôk pa nê te htyk pyrã nê hikwÿ. ⁵Hãmri nhũm wa nita kën kre hwÿr pøj nê tee ri Tĩrtũm kapêr o mẽ wrÿk xwÿnhhta pumu. Nhũm wa kãm:

—Kwa wa amã ma hkêt nê. War ate Jejus pumunh kaxyw na ka wa tẽ. Mẽ kot pĩ kahpa hã nhôr xwÿnhhta. ⁶Nom jar amrakati. Na ra akupÿm htĩr nê kato nê ma tẽ. E wa kam nê amnê axà nê nõr xà kaprÿ pumu. Anê.

Hãmri nhũm wa kuma nê tee ri kën kre kamã Jejus japêr nhũm kamã amrakati. ⁷Hãmri nhũm Tĩrtũm kapêr o wrÿk xwÿnh wa kãm:

—E wa tokyx ma akupÿm tẽ nẽ hkôt mẽ pa ho mẽ pa xwÿnhjẽ mã harẽ. Kojã ma Jejus mẽ akukamã akupÿm Garirej wÿr mō. Garirej kamã kot kaj mẽ axte axpẽn pumu. Ra kot mẽ amã amnhĩ jarẽnh xà hkôt. E kwa wa tokyx ma akupÿm mẽ hwÿr tẽ. Anẽ.

8Hãmri nhũm wa kuma nẽ ma akupÿm hprôt nẽ htẽm kurẽ kumrẽx. Kãm ma htã hkĩnh nẽ. Nẽ ma Jejus kôt mẽ pa ho mẽ pa xwÿnhjẽ mã ujarẽnh kaxyw ma mẽ hwÿr hprôt nẽ wa tẽ. 9Pu nhũm ra Jejus tãm wa kutã tẽ nẽ wa hkaxpa. Hãmri nẽ wa haer pê wa kãm kapër nẽ wa kãm:

—Pa? Nhÿhÿm na ka wa tẽ? Anẽ.

Hãmri nhũm wa omu nẽ hkĩnh tÿx kumrẽx nẽ hwÿr hprôt nẽ hpar pê hkõn krã ho tẽm nẽ akutã hpar ã kumÿ nẽ kãm mex o mex ã harẽ nẽ kãm:

—Hêxta gàu nẽ. Ma amex kumrẽx. Amex o amex. Anẽ.

10Hãmri nhũm wa kãm:

—E war amã ma hkêt nẽ. Mamrĩ ma tẽ nẽ ixkôt mẽ pa ho mẽ pa xwÿnhjẽ mã ijarẽ kê mẽ ma Garirej wÿr mra. Kamã kot paj mẽ axte axpẽn pumu. Anẽ.

Pôristi kot kàxpore hprãm xàj Jejus o hêx ã harẽnh

11Rôm nhũm pôristi hkwyjaja akupÿm tãm hkrã hãmri nẽ ma kẽn kreta rũm akupÿm krĩm mra. Hãmri nẽ patre krãhtũmjẽ hwÿr mra nẽ mẽ kãm ujarẽnh pa. 12Hãmri nhũm mẽ tee ri mẽ kuma nẽ mẽhpigêtjẽ ho akuprõ nẽ mẽ hã axpẽn mar o hkrĩ. Hãmri nẽ axpẽn mar pa nẽ pôristi mã amnhĩrer rax nẽ mẽ kãm:

13—E mẽ amnhĩm kàxpore jamÿ nẽ ma ri ã mẽ kãm amnhĩ jarẽnh anhÿr o apa. Nom kêr ka mẽ kãm amnhĩ to axêx nẽ mẽ kãm: “Na pa prem kẽn kre kapem ixtÿx gõr nẽ inhĩkwÿ nhũm Jejus kôt mẽ pa ho mẽ pa xwÿnhjaja mra nẽ mẽ ixpẽ ï ho ahkĩ nẽ ma o mra.” Anhÿr o mẽ kãm amnhĩ to axêx o apa. Mẽ ixte kàxpore ho mẽ amã amnhĩrerta pãnhã. 14Kojã pahihti Piratja mẽ anhõt ã mẽ ajarẽnh ma nẽ hã tanhmã mẽ ato kaxyw hã kot paj mẽ axy pê tanhmã kãm ixkapër to nhũm tanhmã mẽ ato hkêt nẽ. Jakamã e. Mẽ tee ri amnhĩ kukamã ajamaxpër kêt nẽ. Mẽ mãmri ma mra nẽ ã mẽ kãm axujarẽnh anhÿr o ri apa. Anẽ.

15Hãmri nhũm mẽ kuma nẽ mẽ kot amnhĩ to hêxta pãnhã kàxpore jamÿ nẽ ma mẽ mar xà hkôt mẽ piitã mẽ kãm Jejus kôt mẽ pa xwÿnhjẽ ho hêx o pa. Tã na htem arĩ jarãhã Ijaewjaja ã axpẽn mã mẽ harẽnh anhÿr rãhã ho pa.

Jejus kot hkôt mẽ pa ho mẽ pa xwÿnhjẽ mã mẽ àpẽnã ã karõ

Makre 16.14-18; Rukre 24.36-49; Juãw 20.19-23; Atre 1.6-8

16Tã pa mẽ ixte Jejus kôt ixpa ho ixpa xwÿnh pê 11jaja hãmri akupÿm Jejus htĩr ã harẽnh ma hãmri nẽ ma Garirej wÿr mra. Nhÿri Jejus kot mẽ inhãm mẽmo hixêt prêk jarẽnhja wÿr.

17Nê ra hwÿr ixpôx o mrrar mẽ Jesus pumu. Tã nom nhũm mẽ ixkwÿjaja tee ri omu nê htÿx ho nhãm mēhō hã hkamnhix. No kêt mẽ pajaja na pa prem ixprĩ hã omunh kurê kumrêx nê ixkĩnh tÿx nê. Nê ixkĩnh nê hwÿr ixprôt nê kãm:

—Pa Jesus? Hêxta waa nê. Amex o amex. Anê.

18Hãmri nhũm mẽ inhmã:

—E na pre Tirtũm ã inhmã kapêr anê nê inhmã: “E kêr ka amnhĩ nhÿ hã mẽmoj piitã tanhmã ho ho apa. Kaxkwa kamã nê pika kamã. Mamrĩ nhÿhÿm amnhĩ krã hkôt amã tanhmã amnhĩ to hprãm xà hkôt tanhmã amnhĩ nhĩpêx to ho ri apa.” Anê. Na pre mẽ akaxyw ã inhmã kapêr anê.

19—Jakamã e. Kêr ka mẽ ma pika piitã hkôt ri mẽ kãm ijarênh o ri apa. Kê mẽ ixte mẽ nê tanhmã amnhĩ nhĩpêx to hã ijarênh ma hãmri nê ixkôt amnhĩ xunhwÿ nê ixkôt ri amnhĩ nhĩpêx o pa. Nê kêr ka mẽ ja hã mẽ omu nê Tirtũm mẽ wa inhmã mẽ hkrã kumrã. Wa ixkarō nhÿ hã mẽ hkrã kumrã. Mẽ kot wa inhÿ hã pix mã tanhmã amnhĩ nhĩpêx to ho pa kaxyw.

20—Nê mẽ kãm anê kê mẽ ixkapêr piitã hkôt amnhĩ nhĩpêx rãhã ho pa. E kêr ka mẽ ma mẽ kãm ã ijarênh anhÿr o ri mẽ hkôt apa. Kot paj mẽ anhĩhkô hã ri ixpa rãhã nhũm nhÿrmã pikaja hapêx o hapêx. Anê.

Na pre ã Jesus mẽ inhmã mẽ ixapênh ã karō anê.

Matêwre kot Jesus jarênh nê hã kagàja ja kôt na hapêx.

Makre

Makre kot tanhmã Jejus kot amnhĩ nhĩpêx to ho pa hã kagà

Juãw Makre na pre kagàja nhĩpêx. Na pre hte ma hkwyjê hkôt mẽ kãm Jejus kot tanhmã amnhĩ nhĩpêx to hã harênh o ri pa. Na pre ra Simãw Pêtreja hprĩ hã Tĩrtũm kapêr o ahkre nhũm kuma nê mar tỳx nê. Hãmri nê mẽ pamã tanhmã Jejus ã kagà hto. Simãw Pêtre xô ri tanhmã kot amnhĩ nhĩpêx to hã kagà. Jejus kêp Tĩrtũm Kra hã hihtỳx o hihtỳx nê àhpumunh o àhpumunh ã nhũm pre harê nê hã kagà. Nê kêp mẽ pakutã nojarêt xwỳnh ã harê nê hã kagà. ã Juãw Makreja mẽ pamã Jejus jarê nê hã kagà anê.

Matêwre 3.1-10; Rukre 3.1-9; Juãw 1.6-8, 1.19-23

1 1Pa Kris kôt ixkràmnhwỳjaja. E kot paj mẽ amã tanhmã Jejus kot amnhĩ nhĩpêx to ho pa hã kagà ka mẽ kamã harê nê ama. Kêp Tĩrtũm Kra na. Tãm na pre mẽ pakaxyw ãm nê mẽ pahwỳr kumê. Tã tãm kot mẽ pahwỳr wrỳk nê tanhmã amnhĩ nhĩpêx to ho paja kot paj mẽ amã ixprĩ hã harê nê hã kagà ka mẽ kamã harê nê ama.

Juãw Paxis kot Jejus kukamã harênh

2Kormã Jejus mẽ pahwỳr wrỳk xwỳj ri na pre Tĩrtũm nhỹ hã kapêr o pa xwỳnhjê hõ pê Ijaisja kukamã tanhmã harênh to nê hã kagà. Nê Jejus kukamã harênh o mõi xwỳnh Juãw Paxisja nhũm pre mãânên hkukamã tanhmã harênh to nê hã kagà. Te Tĩrtũm tãm hamaxpêr pyræk o harê nê harênh o:

E kot paj Ixkra hkukamã ma mẽ hwỳr kot harênh xwỳnhjê hõ mẽ kê ma kutêp mẽ kãm harênh o ri pa. Kê mẽ kuma nê kutêp tãm amnhĩ nhĩpêx mex o pa.

3 Kojã kukamã harênh xwỳnhja ma kapôt ã ri hwỳr mẽ mrar xwỳnhjê mã harênh o ri pa. Nê kỳx pê mẽ kãm kapêr nê mẽ kãm: “E mẽ inhma. Kojã Tĩrtũm tokyx mẽ pahwỳr mẽ panhõ Pahihti mẽ nhũm wrỳ pu mẽ pahpiitã omu.

Jakamã kwa mẽ tokyx kutêp tãm amnhĩ nhĩpêx. Te ho mẽ kot mēhō kutêp pry ho mex pyrāk o amnhĩ nhĩpêx. Nom pry kumrêx o mex kêt nê. Ām amnhĩ nhĩ ho tãm amnhĩ nhĩpêx nê tãm axpên nhĩpêx. Pahihtita kutêp. Mẽ pahte amnhĩ nhĩpêx tũmja te kot pry nhĩnur nê krã hakỳx nê pry juk nhũm mẽ tee ri kot kãm hã mrrar mex prãm kaprỳ pyrāk. Jakamã kot kaj mẽ Pahihti nyw kutêp ate amnhĩ tomnuj kaga nê tãm amnhĩ nhĩpêx nê tãm axpên nhĩpêx. Hãmri nê te mẽ kot pry nhĩnur o mex nê ho katāt nhũm ra katāt mux nê nōr pyrāk o amnhĩ nhĩpêx. E kwa kêr ka mẽ ã kutêp amnhĩ nhĩpêx anê.” Anhỹr o koja mẽ kãm harênh o pa. Anê.

Na pre ã Tĩrtũm Juãw Paxis kukamã harênh anê nhũm ỹ hã kapêr xwỳnh pê Ijaisja mẽ pamã hã kagã.

4Tã ra kot harênh xà hkôt nhũm Juãw Paxisja tẽ. Hãmri nê kapôt ã ri mẽ kãm Tĩrtũm kapêr jarênh o pa nê mẽ kãm:

—Kwa mẽ tokyx amnhĩ tomnuj kaga nê tãm ri amnhĩ nhĩpêx. Kê Tĩrtũm ja hã mẽ apumu nê mẽ anê mẽ ate amnhĩ tomnuj rênh pa nê mẽ ato hkra. Pa mẽ piitã mẽ kot ra mẽ apê hkra hã mẽ apumunh kaxyw mẽ akrã kumrã. Anê.

5Hãmri nhũm mẽ ohtô nê kot kapêr mar kaxyw ma nhỹhỹnh hwỳr kapôt mã mra. Pyka pê Jutej rũm nê Jutej kamã krĩ pê Jerujarẽ rũm nhũm mẽ ohtô nê hwỳr mra. Hãmri nê nhỹri omu nê kãm:

—E ixte amnhĩ tomnuj kaga hprãm xaj na pa awỳr amnhĩ to tẽ. Na pa hte amnhĩ tomnuj pix o ri ixpa. Tã tee ri ja hã amnhĩ pumu nê ixkaprĩ nê. Hãmri nê ra inhmã amnhĩ tomnuj kaga nê tãm amnhĩ nhĩpêx prãm nê.

Anhỹr ã amnhĩ jarẽ. Hãmri nhũm Tĩrtũmja kaxkwa kamã hkrĩ htã mẽ kuma nê amnhĩ katut kôt mẽ kot amnhĩ tomnuj piitã rênh pa nê axte kãm hamaxpêr kêt nê. Jakamã nhũm Juãw Paxis gôx kãm mẽ hkrã kumrã. Pyhti pê Jotãw kamã. 6Juãw Paxisja hikàxpore hkêt jakamã na pre ê mex kêt nê pa. Ām mẽmo mry pê kamer kĩ ho amnhĩm ê nhĩpêx nê hagiê nê hã pa. Nê mẽmo mry hkà ho amnhĩ pre nê ri pa. Nê mẽo mex kur kêt nê ãm krit ku nê menh ôr o ri pa. 7Hãmri nê mẽ kãm tanhmã Jejus jarênh to ho pa nê mẽ kãm:

—E mẽ inhma. Koja tokyx Tĩrtũm kot mẽ pakaxyw ãm xwỳnhhta mẽ pahwỳr wrỳ. Ahpumunh tỳx o kot ijakrenh jakamã na pa hte ãm kukwak ri ixpa nê amnhĩ tã hã xpijaàm rãhã ho ri ixpa. Te ixkrãm ã xpijaàm o amnhĩ nhĩpêx pyrāk. 8Na pa hte gô pix o Tĩrtũm mã mẽ akrã kumrãr o ri ixpa. Nom mẽ pahwỳr wrỳk mã xwỳnhja koja mẽ awỳr Tĩrtũm Karõ rẽ nhũm mẽ akaxwỳnh mã agiê. Ka mẽ ỹ hã tãm ri amnhĩ nhĩpêx rãhã ho ri apa. Anê.

Juãw Paxis kot Jejus krã kumrãr ã harênh
Matêwre 3.13-17; Rukre 3.21-22; Juãw 1.32-34

9Tã nhũm Jejusja tãm Juãw Paxis wÿr tẽ. Garirej kamã krĩ pẽ Najare rũm ma hwÿr tẽn pøj. Hãmri nhũm Juãwja hkrã hkumrã. Pyhti pẽ Jotãw kamã hkrã kumrã. 10Hãmri nẽ wa gøj rũm api nẽ mÿr ri kaxkwa pumunh o xa. Nhũm kaxkwa axkjê nhũm kurũm Tĩrtũm Karõ te tuuti pyrã nẽ Jejus wÿr wrÿk o tẽ nẽ ìkre hã xa nhũm amnhĩ tã omunh o xa. 11Hãmri nhũm Tĩrtũm kaxkwa rũm kãm kapêr nẽ kãm:

E apê Ixkra mex na ka. ãm hãmri na ka hte ixkanrêhã amnhĩ nhĩ-pêx mex o apa. Inhmã ajapê kamã na ka ri apa ho apa. Anẽ.

Jejus kot Satanasti kaga hã harênh
Matêwre 4.1-11; Rukre 4.1-13; mããnên Eprêw 2.18, 4.15

12Tã nhũm Tĩrtũm Karõja ma kapôt mã Jejus o mõi 13nhũm kapôt ã mry xoprê kaêx ã ri mrar o hã arĩgro pẽ 40. Hãmri nhũm Satanasti omu nẽ ma hwÿr tẽ nẽ ri hkôt pa. Kapôt ã ri hkôt hêx rom tanhmã kãm kapêr to nhũm kot mar nẽ hkôt amnhĩ xãm prãm xaj ma hkôt pa. Nom nhũm Jejus hkaga kumrêx nhũm tee ri ho anhÿr kaprÿ nẽ ma akupÿm tẽ. Hãmri nhũm Tĩrtũm kapêr o mẽ wrÿk xwÿnhjaja Jejus wÿr wrÿ nẽ tanhmã ho mex to.

Jejus kot Tĩrtũm mã àpênh krax ã harênh
Matêwre 4.12-17; Rukre 4.14-15

14Nhũm pre ra mẽ ixpê Ijaew o amnhĩptar xwÿnh pẽ Eroxa Juãw Paxis kot mẽmoj tã kãm àkjêr mÿrapê nhũm pre ra unê nẽ haxà. Tã kot haxàr jakành pẽ nhũm Jejus ma akupÿm pyka pẽ Garirej wÿr mõi nẽ kamã mẽ kãm Tĩrtũm kapêr jarênh o pa. Nẽ Tĩrtũm kot mẽ hwÿr mẽnh ã amnhĩ jarênh o pa. Nom te nhãm mẽhõ jarênh pyrãk o amnhĩ jarẽ 15nẽ mẽ kãm:

—E na Tĩrtũm kãm mẽ ato hkra hprãm nẽ. Jakamã na ra kot mẽ awÿr ãm xwÿnhhta mẽ nhũm mẽ awÿr wrÿ. Kwa mẽ tokyx kapêrja ma nẽ amnhĩ kaxyw hkôt ajamxpêr. Hãmri nẽ ate amnhĩ tomnuj kaga nẽ Tĩrtũm kôt mãn amnhĩ nhĩpêx o ri apa. Kot kaj mẽ ã amnhĩ nhĩpêx anẽ nhũm Tĩrtũm amnhĩ tã mẽ apumu nẽ mẽ ato hkra. Anẽ.

Jejus kot amnhĩ kôt tep pynênh xwÿnh wa hwÿr ã harênh
Matêwre 4.18-22; Rukre 5.1-11

16Tã nhũm Jejus ma Garirej kamã gõi rax pẽ Garirej mÿri mõi. Hãmri nẽ Simãw mẽ htõ Andreja wa hwÿr kato nẽ wa omu. Wa kot tep pynênh xwÿnh jakamã na pre wa gõi kãm kryhti rênh o xa nhũm Jejus wa hãnh tẽ nẽ wa omu. 17Hãmri nẽ amnhĩ kôt wa kuwÿ nẽ wa kãm:

—E war amnê ixkôt tē nê ixkôt mǎn apa. War apê tep kanhêr rax o ri apa xwÿnh tǎ kêr ka war axâpênhta kaga nê hpânhǎ ixkôt apa ho apa. Kot paj tanhmǎ war akrǎ hto ka wa tep pynênh pânǎ ma ri mē hkôt mē kām ixkapêr jarênh o ri apa. Mē ohtô nê mē kot war amar nê Tirtûm kôt amnhĩ xunhwÿr kaxyw. Jao kot kaj te war ate tep kanhêr rax nê Tirtûm mǎ ôr pyrâk o amnhĩ nhĩpêx.

Anhÿr o wa kām kapêr. 18Hāmri nhũm wa kuma nê kryhti kaga nê ma hkôt pa ho pa kurê kumrêx. 19Hāmri nê mē gô mÿri mō nê Jepetew kra Xiakre mē htô Juǎw wa hwÿr kato nê wa omu. Nhũm wa kormǎ hipêêxǎ nhĩhkô hǎ pǎr kām kryhti ho mex o wa nhÿ nhũm Jejus wa mē hwÿr kato nê wa omu nê amnhĩ kôt wa kuwÿ. 20Hāmri nhũm wa kuma nê ma hkôt pa ho pa. Pǎr kre kamǎ mē kām âpênh xwÿnhjê ri hipêêxǎ re nê ma Jejus kôt pa ho pa.

Jejus kot mēhō nê mēkarōmnuti janor ǎ harênh

Rukre 4.31-37

21Hāmri nhũm Jejus mē hkôt mē pa ho mē pa xwÿnhjaja ma krĩ pê Kapanau hwÿr mō hāmri nê hwÿr pōj. Hāmri nhũm mē ixpê Ijaewjê nhō arĩgromnu pê sap kato nhũm Jejus ma Tirtûm kapêr o mē ahkre xǎ hǎ ixkre hwÿr tē nê hwÿr axà. Hāmri nê kamǎ mē kot Tirtûm kapêr mar kaxyw axpên wÿr mē pikuprōnh xwÿnhjê jahkre ho nhÿ. 22Nê mē ahkre mex nhũm mē kuma nê tee ri hamaxpêr nê axpên mǎ:

—Hêxta waa nê. Pêr ǎm hāmri na ǎ mē pamǎ mēmoj jarênh anê. Tirtûm kapêr tûm o mē ahkre xwÿnhjê rom âhpumunh tÿx kôt na hprĩ hǎ mē pajahkre mex nê. Anê.

23Hāmri nhũm mēhō myja mē hwÿr axà. Na pre ra mēkarōmnuti hwÿr axà nhũm ÿ hǎ amnhĩ tomnuj o pa. Hāmri nê mē hwÿr axà nê Jejus pumu nê kām kapêr. Nom tǎm kapêr kêt nê. Mēkarōmnuti nhÿ hǎ kām kapêr. Kǎx pê kām kapêr nê kām:

24—Pa Jejus? Kwa tanhmǎ mē ixto hkêt nê. Ixte apumunh mex. Apê Najare nhō xwÿnh tǎ mǎânên apê Tirtûm kot mē ixwÿr amênh xwÿnh maati na ka. Tirtûm rûm na ka pre mē ixwÿr wrÿ. Kwa xǎ kot kaj mē ixto ajapêx nà? Anê.

25Hāmri nhũm kām:

—Tk. Kwa anhĩkrê nê myta kurũm akator kurê kumrêx. Anê.

26Hāmri nhũm kuma nê àmra htÿx kām myja o àk tÿx nê kêp kato nê ma tē nhũm akupÿm mex. 27Hāmri nhũm mē piitǎ omu nê kamǎ no puma nê. Hāmri nê xatǎ axpên mǎ harênh o pa nê axpên mǎ:

—Kokÿÿ. Jejus na pre âhpumunh tÿx kôt mēkarōmnuti jano nhũm kuma nê mē kurũm hapôx kurê kumrêx. Anê.

28Hāmri nhũm Garirej kamǎ mē piitǎ ri axpên mǎ harênh o pa.

Jejus kot akupÿm Simãw xupãnhgêx o mex ã harênh

Matêwre 8.14-15; Rukre 4.38-39

29Tã nhũm Jejus Xiakre mẽ Juãw mẽrohã Tĩrtũm kapêr o mẽ ahkre xà hã ixkre rũm kato nẽ ma Simãw mẽ Andre wa òrkwỹ hwỳr mỗ. 30Hãmri nẽ mẽ hwỳr agjê. Nhũm Simãw xupãnhgêxja ra à nẽ hkà kagro htỳx nẽ nõ nhũm Jejus mẽ hwỳr axà nhũm mẽ kãm harê. 31Hãmri nhũm mẽ kuma nẽ hwỳr axà nẽ omu nẽ hpa hã kupy nẽ kànhmã ỳr nhũm hkà hakry nẽ akupÿm mex kurê kumrêx. Hãmri nẽ kànhmã xa nẽ tẽ nẽ mẽ kãm mẽmoj nhĩpêx nhũm mẽ hkur o hkrĩ.

Jejus kot akupÿm mẽ hkwỳjê ho mex ã harênh

Matêwre 8.16-17; Rukre 4.40-41

32-33Tã nhũm myt axà nhũm mẽ ohtô nẽ Simãw mẽ Andre wa òrkwỹ hwỳr mra nẽ hakwakrem Jejus ã akuprô. Nẽ amnhĩ kôt mẽ à xwỳnhjê ho mra. Nẽ mẽkarômnuti kot mẽ hwỳr gjêx xwỳnhjaja nhũm mẽ hwỳr mẽ o mra. 34Hãmri nhũm Jejus mẽ omu nẽ akupÿm ahpÿnhã mẽ piitã mẽ ho mex pa. Nẽ mẽkarômnutija nhũm mẽ kurũm mẽ hapôj. Mẽkarômnuti kot kêp Tĩrtũm Kra hã omunh tã no nhũm kapêr nẽ mẽ hkurê nẽ mẽ hano nhũm mẽ kapêr kêt rãhã mẽ kurũm hapôj nẽ ma mra.

Jejus kot Tĩrtũm mã amnhĩ jarênh ã harênh

Rukre 4.42-44

35Tã nhũm apkati nhũm kormã myt kator kêt ri nhũm Jejus kànhmã nhỹ nẽ tẽ nẽ kato. Hãmri nẽ ma kapôt ã ahte nhỹhỹm tẽ nẽ nhỹri Tĩrtũm mã amnhĩ jarênh o nhỹ.

36Hãmri nhũm Simãw Pêtre mẽ hkwỳjaja hkrã hapôj nẽ tee ri ixkre kamã hapêr. Hãmri nẽ hapôj nẽ ma hpri jakop o mỗ. 37Hãmri nẽ hwỳr kato nẽ omu nẽ kãm:



Makre 1.32-34

— Pa. Kwa na mẽ piitã tee ri ajapêr. Anê.

38Hãmri nhũm mẽ kãm:

— Tô ma pu mẽ mō. Nom kot puj mẽ akupÿm mẽ hwÿr pamōr kêt nê. Kot puj mẽ hpãnhã nhãm krĩ hwÿr hkôt mãn ri pajapôj. Pa kamã mẽ kãm Tĩrtũm kapêr jarê mãn. Ja kaxyw na pre mẽ awÿr inhmê. Krĩ piitã hkôt mẽ pa xwÿnhjaja kot kapêr mar kaxyw. Anê.

39Hãmri nê mẽ ma axte Garirej kamã krĩ hwÿr hkôt pa. Nê krĩ piitã hkôt Tĩrtũm kapêr o mẽ ahkre xà hã ixkre kamã mẽ kãm Tĩrtũm kapêr jarênh o pa. Nê mẽ kurũm mẽkarōmnuti japōx o pa.

Jejus kot akupÿm mẽhō hkàmnu ho mex ã harênh

Matêwre 8.1-4; Rukre 5.12-16

40Tã nhũm mẽhō hkà hkro xapêr tÿx xwÿnhja Jesus wÿr tẽ. Hãmri nê hã hpijaam kaxyw kutã hkōnkrã ho tēm nê nhÿ nê kãm:

— Pa Pahihti. E ot pa awÿr amnhĩ to tẽ. Akupÿm ate mẽ ixto mex kaxyw axàhpumunh tÿx jakamã kot ka akupÿm amã ixto mex prãm nê mãmri akupÿm ixto mex. Anê.

41Hãmri nhũm kuma nê kamã ukapri nê hã ïhkra xi nê kãm:

— Nà kot paj ato mex. E akupÿm akà mex.

42Anhÿrja kôt nhũm akupÿm hkà mex kurê kumrêx. **43-44**Hãmri nhũm Jesus kãm kapêr kãm hihtÿx nê hano nê kãm:

— E kêt ka amnhĩ tã akwÿjê mã tanhmã ijarênh to hkêt rãhã ma patre hwÿr tẽ kê akupÿm akà mex ã apumu. Hãmri ka amnepem Mojes kot mẽ ate akupÿm mẽ amex ã Tĩrtũm mã tanhmã amnhĩ nhípêx to hã karō xwÿnhta ka kãm ho anê. Kê mẽ piitã akupÿm akà mex ã apumu. Anê.

45Hãmri nhũm kuma nê ma tẽ. Nom axtem nê ma mẽ piitã mẽ kãm amnhĩ jarênh o ri mra. Jesus kot kãm karō xà kuhpa hã ma mẽ kãm amnhĩ jarênh o ri mra. Jakamã nhũm mẽ kuma nê piitã nhÿhÿnh Jesus wÿr mra. Mẽ ohtô rax kumrêx nê hwÿr mra nhũm tee ri mẽ noo mã nhÿri krĩm pa mã. Hãmri nê ãm krĩ pu hã ri pa htã nom nhũm mẽ arĩ ohtô nê hwÿr mra.

Jejus kot akupÿm ï kamã htyk xwÿnh o mex ã harênh

Matêwre 9.1-8; Rukre 5.17-26; Juãw 10.37-38

2 ¹Tã nhũm Jesus hã apkati grêre nê hkôt mẽ pa ho mẽ pa xwÿnhjê mẽrohã ma akupÿm Kapanaũ wÿr mō. Hãmri nê hwÿr pōj nhũm mẽ piitã nhÿri mẽhō nhōrkwÿ kamã hpōx kôt harênh ma nê hã akuprō. ²Ra hã pikuprōnh rax nê ixkre nhĩtom pa. Nhũm mẽ hwÿrjaja kapôt ã kuhê nhũm Jesus Tĩrtũm kapêr o mẽ ahkre ho nhÿ. ³Hãmri nhũm mẽmyjaja kêp kwat nê ï kamã htyk xwÿnhja mÿ nê Jesus kot ho mex kaxyw hwÿr o tẽ. ⁴Hãmri nê tee ri hã mẽ pikuprōnh rax xwÿnhjê pumu nê nhÿhÿnh kot hwÿr o ãr kaxyw tee ri amnhĩ kukamã ho ukapi ho pa.

Hāmri nē hamaxpēr nē ixkre nhīmōk po hwỳr ho api nē himōk kwỳ grà nē hkôt ĩ kamā htyk xwỳnhhta nōr xà mērohā hkôt Jejus wỳr haxà. 5Hāmri nhūm mē kot kaxyw kām hamaxpēr tỳx ã mē omu nē ĩ kamā htyk xwỳnhhta mã kapēr nē kām:

—Pa? Kwa tee ri amnhĩ kukamã ajamaxpēr kêt nē. Na pa ra anê ate amnhĩ tomnuj piitã ho ijapêx. Kot paj axte kām ijamaxpēr kêt nē. Anê.

6Hāmri nhūm Tirtūm kapēr tūm o mē ahkre xwỳnhjaja tee ri ã kapēr anhỹrja ã kuma nē hamaxpēr o:

7—Tk. Kwa pēr mēhō myti mīj kêp Tirtūm kêt tã te kapēr pyrāk o amnhĩ nhĩpêx nē mē nē mē kot amnhĩ tomnuj o hapêx ã amnhĩ jarê. Tirtūm pix kot mē nē mē kot amnhĩ tomnuj o hapêx kênã. Anê.

8Nom nhūm Jejus mē hamaxpēr kôt mē omunh mex nē. Mē kot Tirtūm pix kot mē nē mē kot amnhĩ tomnuj rēnh nē akupỹm mē à xwỳnhjê ho mex kôt mē hamaxpērja nhūm mē omunh mex nē mē kām:

—Kwa mē ã ajamaxpēr anhỹr kêt nē. 9Ixte mē nē mē kot amnhĩ tomnuj o ijapêx par ã amnhĩ jarēnh tã mē ate mē ano ho ja kôt ixpumunh kêt jakamã na ka htem ja hã ixkôt ajamaxpēr kêt nē. Nom kot paj mē anoo mã akupỹm myja o mex. Ka mē ja hã ixpumu hāmri nē ixkôt ajamaxpēr kurê kumrêx. 10Ixpê Tirtūm kot mē awỳr inhmēnh xwỳnh na pa. Ixte mē anê mē ate amnhĩ tomnuj rēnh kaxyw na pre mē awỳr inhmē pa wrỳ. Tã mē ate ja kôt ixpumunh kaxyw kot paj mē anoo mã mytija ho mex.

11Anhỹr o mē kām kapēr hāmri nē ĩ kamā htyk xwỳnhhta mã kapēr nē kām:

—E kànhmã xa nē anōr xà mỳ nē ma akupỹm anhōrkwỹ hwỳr tē. Anê.

12Hāmri nhūm kuma nē kànhmã ãm kurê kumrêx. Hāmri nē akupỹm mex ã amnhĩ pumu nē hkính tỳx nē nōr xà mỳ nē mē noo mã kato nē ma akupỹm ôrkwỹ hwỳr tē. Hāmri nhūm mē kot omunh xwỳnhjaja amnhĩ jaêr pē omu nē no hapôx kaxyw nē hkôt omunh o kuhê nē kamã no puma htỳx nē. Nē tee ri omu nē axpēn mã:

—Hêxta waa nē. Aa mē pahte ã mēhō kot amnhĩ nhĩpêx anhỹr ã omunh kêt kumrêx tã jarãhã ja pumu. Nà Tirtūmja ãm mex o mex. Anê.

Jejus kot amnhĩ wỳr Rewi hwỳr ã harēnh

Matêwre 9.9-13; Rukre 5.27-32

13Hāmri nhūm Jejus mē ma mra nē akupỹm gô rax pē Garirej wỳr mra nē gô mỳ ri pa. Hāmri nhūm mē piitã omu nē hwỳr mra nē hã akuprô nhūm Tirtūm kapēr o mē ahkre ho nhỹ. 14Hāmri nē mē kure nē axte hkôt mē pa ho mē pa xwỳnhjê mērohã ma axte mra nē nhỹri Apew

kra Rewija pumu. Rõm kãm mẽ õ pahihti mã amnhĩ kwỳjê pê kàxpore hkwy jamỳnh xwỳnh na pre. Jakamã nhũm àpênh o nhỹ nhũm Jejus hãnh tẽ nẽ omu nẽ amnhĩ kôt kuwỳ nẽ kãm:

—Pa? E kwa axàpênhta kaga nẽ hpãnhã amně mẽ ixkôt mãn ri apa ho apa. Anẽ.

Hãmri nhũm kuma nẽ àpênh kaga nẽ ma hkôt mỗ nẽ hkôt pa ho pa.

15Hãmri nhũm mẽmo arĩgro hã nhũm Rewi nhõ mẽ apkur xà hã mẽõ rax nẽ. Jakamã nhũm amnhĩ nhõrkwỳ hwỳr hkràmnhwỳjaja nẽ Jejus mẽ hkôt mẽ pa ho mẽ pa xwỳnhjê hwỳ. Hãmri nhũm mẽ ma hkôt mra nẽ õrkwỳ hwỳr agjê nẽ kuri apkur o hkrĩ. Nẽ mãănẽn mẽ kêp Rõm nhõ pahi mã mẽ kêp kàxpore hkwy jamỳnh xwỳnh kwỳ nẽ mẽ ohtô nẽ mẽ kutã apkur o hkrĩ. 16Hãmri nhũm Tĩrtũm kapêr tũm o mẽ ahkre xwỳnh kwỳ pê Parijew nhõ xwỳnhjaja mra nẽ mẽ apkur ã mẽ omu. Nẽ tee ri mẽ hkaêx ã Jejus pumu nẽ hkôt mẽ pa ho mẽ pa xwỳnhjê hwỳr agjê nẽ hã mẽ kãm akir nẽ mẽ kãm:

—Kwa na htem mẽ kot amnhĩ tomnuj xwỳnhjê kutã apkur kêt tã ka mẽ Jejus mẽ apimràatã axtem nẽ mẽ kutã axàpkur o akrĩ. Mẽ ate amnhĩ to mex ronhỹx ka mẽ kutã axàpkur kêt nẽ. Anẽ.

17Hãmri nhũm Jejus amnhĩ tã mẽ kapêr ma nẽ mẽ kãm:

—Tk. Ixte tãm mẽ unhwỳr kaxyw ixte mẽ kutã ixàpkur o inhỹr kênã. Xà na hte tõtô mẽ mex xwỳnhjê hwỳr mra nẽ mẽ hkane? Nà na hte ãm mẽ à xwỳnhjê pix kane ho pa. Ra mẽ ate ja pumunh mex. Ja pyrã nẽ na pa pre mẽ kot amnhĩ to mex xwỳnhjê hwỳr ixwrỳk kêt nẽ. ãm mẽ kot amnhĩ tomnuj xwỳnhjê pix wỳr na pa pre wrỳ. Ixte tãm mẽ unhwỳr kaxyw mẽ hwỳr wrỳ nẽ jajê kutã ixàpkur o nhỹ. Mẽ ate amnhĩ tomnuj mã anhũrer nẽ hpãnhã tãm amnhĩ nhĩpêx o apa kaxyw na pa pre mẽ awỳr wrỳ nẽ mẽ akamã ixukaprĩ ho ri mẽ akôt ixpa. Tã ka mẽ atỳx ã ixte mẽ kutã ixàpkur anhỹrja ã ixto akapêr anẽ. Anẽ.

Mẽ kot Tĩrtũm mã amnhĩ jarênh kaxyw mẽõ kaga hã mẽ harênh

Matêwre 9.14-17; Rukre 5.33-39

18Juãw Paxis kôt mẽ pa xwỳnhjê mẽ Parijew nhõ xwỳnhjaja na prem tõtã Tĩrtũm mã amnhĩ jarênh kaxyw nẽ apkur kêt rãhã kamã kãm amnhĩ jarê. Nom nhũm Jejus kôt mẽ pa ho mẽ pa xwỳnhjaja na prem kãm amnhĩ jarênh prãm nẽ apkur kãm amnhĩx kãm amnhĩ jarênh o pa. Jakamã nhũm Ijaew kwỳjaja tee ri ja hã mẽ omu nẽ Jejus wỳr mra nẽ mẽ hã hkukja nẽ kãm:

—Pa? Kwa aprĩ hã mẽ inhmã mẽmoj jarê. Na hte Parijew nhõ xwỳnhjê mẽ Juãw Paxis kôt mẽ pa xwỳnhjaja tõtã Tĩrtũm mã amnhĩ jarênh kaxyw nẽ apkur kêt rãhã kãm amnhĩ jarê. No akôt mẽ pa ho mẽ pa xwỳnhjaja na htem àmnhĩx apkur o pa kamã kãm amnhĩ jarênh o pa.

Kwa mo na htem mẽ uràk nê tōhã apkur kêt rãhã kãm amnhĩ jarẽnh kêt nê? Anê.

19Hãmri nhũm Jejus mẽ kãm:

—Tk. Mo kaxyw kot mẽ ã amnhĩ nhĩpêx anê? Mẽ hkaprĩ hkêt kênã. Mẽ kot ixkôt pa ho pa hã amnhĩ pumunh jakamã na htem hkĩnh nê pa. Kormã ixte mẽ hkôt ixpa kênã kot kêt mẽ Tĩrtũm mã kapêr kaxyw nê ho apkur kêt kamã kãm amnhĩ jarẽ. Xà na htem hkrãmnhwỳ hã hkĩnh kaxyw hã akuprô nê hkaprĩ nê apkur kêt nê mỳr o hkrĩ? Nà na htem hã akuprô nê hkĩnh nê apkur rũnh nê. Ja pyrã nê na hte ixkôt mẽ pa ho mẽ pa xwỳnhjaja ixkôt kormã àmnhĩx hkĩnh nê apkati mẽ apkur kãm kãm amnhĩ jarẽnh o pa. 20Nom koja mẽ kãm ixkurê xwỳnhjaja nhỹrmã tanhmã ixto hãmri nhũm mẽ rĩ kormã hkaprĩ htỳx kãm ho apkur kêt rãhã Tĩrtũm mã amnhĩ jarẽ. Anê.

Nhũm pre ã Jejus mẽ kãm hkôt ri mẽ pa ho mẽ pa xwỳnhjê jarẽnh anê hãmri nê axte mẽ kãm kapêr nê mẽ kãm:

21-22—Mẽ kot amnhĩ tomnuj xwỳnhjaja mẽ kot amnhĩ nhĩpêx tũm o amnhĩ pyrãk jakamã na htem mẽ kot amnhĩ nhĩpêx nyw kaga. Tã ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã na ka htem inhma nê ãm inhma. Kwa mẽ inhma nê mẽ ate amnhĩ nhĩpêx tũm gryk ã ixkaga hkêt nê. Anê.

Jejus kêp arĩgromnu hpãm ã kot amnhĩ jarẽnh

Matêwre 12.1-8; Rukre 6.1-5

23Tã nhũm mẽ ixpê Ijaew nhõ arĩgromnu pê sap kato nhũm Jejus mẽ hkôt mẽ pa ho mẽ pa xwỳnhjaja ma nhỹhỹm mō. Ma mẽ hpur kahti hkôt nhỹhỹm mō nhũm hkôt mẽ pa ho mẽ pa xwỳnhjaja ra kãm prãm nê. Hãmri nê prãm xàj purta kamã amnhĩm mẽmo hy te kot harôj pyrãk xwỳnhhta kwỳ rê nê ma Jejus kôt hkanhar o mō. Mẽ ixpê Ijaewjaja na pa htem axpên pur kãm ixpa nê ã amnhĩ nhĩpêx anê. 24Hãmri nhũm Parijew nhõ xwỳnhjaja mẽ hkôt mra nê tee ri ja hã mẽ omu nê Jejus wỳr mra nê mẽ hã kãm akir nê kãm:

—Kwa jarãhã sap tã akôt mẽ pa ho mẽ pa xwỳnhjaja mẽmo hy hkwỳ rê nê akôt hkanhar o pa. Tĩrtũm kapêr ã kagà htũm kot mẽ panhõ arĩgromnu hã mẽ pahte mẽmoj nhĩkênh nê mẽ pahkurê kênã. Kwa mẽ kãm anê kê mẽ ã amnhĩ nhĩpêx anhỹr kêt nê. Anê.

25-26Hãmri nhũm Jejus mẽ kuma nê hprĩ hã mẽ kãm Tĩrtũm kapêr tũm jarẽ nê mẽ kãm:

—Kwa xàn ka mẽ kormã Tĩrtũm kapêr ã kagà htũm kamã pahi Tawi kot tanhmã amnhĩ nhĩpêx to kamã harẽnh nê mar kêt nê? Kormã Apiatar kêp patre maati ri na pre Tawi hkôt ri mẽ pa xwỳnhjê mẽ prãm xàj Tĩrtũm mã amnhĩ jarẽnh xà hã ixkre hwỳr agjê. Hãmri nhũm Apiatar

mě kām prām tỳx ã mẽ omu nẽ mẽ kāmã ukaprĩ nẽ mẽ kām mẽmoj gõ. Mẽ kot Tĩrtũm noo mã pãwti jaxwỳr xwỳnhhta nhũm mẽ kām kugõ nhũm mẽ kuku. Tĩrtũm kapẽr ã kagà htũm kot ja nẽ mẽ kurê htã nhũm mẽ kãm prãm tỳx ã mẽ omu nẽ mẽ kāmã ukaprĩ xàj mẽ kãm kugõ. Patre pix kot ja hkur kaxyw tã nhũm mẽ kãm kugõ nhũm mẽ kuku. Tã nom nhũm Tĩrtũm ja hã mẽ omu nhũm ja kêp omnuy kêt nẽ. Patre kot mẽ kāmã ukaprĩ nẽ mẽ kãm õr nhũm ja hã omu nhũm ja kãm mex nẽ. Anẽ.

Hãmri nẽ mẽ kãm:

27—Na pre Tĩrtũm panhĩ kumrẽx o kato nẽ kormã mẽ hkõkõt nẽ Tĩrtũm mã hamaxpẽr o hkrĩ kaxyw arĩgromnu ho kato. No na pre arĩgromnu kumrẽx o kato nẽ hpãnhã kaxyw panhĩ ho kator kêt nẽ. 28Tã pa na pre Tĩrtũm mẽ akaxyw ixãm nẽ mẽ awỳr inhmẽ. Jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karõ ho ri ixpa. Jakamã kwãr mẽ mãmri mẽmojta rê nẽ ixkõt hkanhar o mõ. Anẽ.

Jejus kot akupỳm ãhkra grã xwỳnh o mex ã harẽnh

Matêwre 12.9-14; Rukre 6.6-11

3 1Tã nhũm mẽ ixpê Ijaewjê nhõ arĩgromnu pê sapja axte kato. Hãmri nhũm Jejus Tĩrtũm kapẽr o mẽ ahkre xà hã ixkreja wỳr tẽ nẽ axà nẽ kãmã Tĩrtũm kapẽr o mẽ ahkre ho nhỹ. Nhũm mẽhõ my ãhkra grã xwỳnhja mẽ ãhkõ hã mar o nhỹ. 2Nhũm Parijew nhõ xwỳnhjaja kãm mẽ hkrãhtũmjê mã Jejus o kapẽr prãm jakamã htãnopxar o kuhê nẽ axpẽn mã:

—E kwa pu mẽ jar pakuhê nẽ kot tanhmã amnhĩ nhĩpêx to hã omu. Xà koja jarãhã ãhkra grã xwỳnh mũj o mex nà? Jarãhã arĩgromnu kênã kot kêt kãm ãhkra ho mex. Kojã ho anẽ nẽ ra Tĩrtũm kapẽr tũm nhĩrõp xa. E pu mẽ xa nẽ hã omu. Anẽ.

3Hãmri nhũm Jejus ãhkra grã xwỳnhhta pumu nẽ kãm:

—Pa? E kãnhmã xa nẽ amnẽ ixwỳr tẽ. Anẽ.

Hãmri nhũm kãnhmã xa nẽ hwỳr tẽ nẽ mẽ piitã mẽ noo mã xa. 4Hãmri nhũm Jejus mẽ kot omunh o hkrĩ xwỳnhjê hwỳr rĩt nẽ arĩgromnu hã tanhmã mẽ kot amnhĩ nhĩpêx to hã mẽ hkukja nẽ mẽ kãm:

—E mẽ inhma. Tanhmã na htem arĩgromnu hã axpẽn nhĩpêx to wehe? Xà kot ka mẽ arĩgromnu hã axà htỳx nẽ amex prãm xàj ma mẽhõ hwỳr amnhĩ to tẽ nhũm apumu nẽ apkatim arĩgro mex jamãr pê akane hkêt ka ty nhũm ja amã mex nẽ? Rỳ nhũm apumu nẽ tanhmã atomnuy to nẽ akupỳm amnhĩ nẽ ajano nhũm ja amã mex nẽ? Nà koja ã anhĩpêx anẽ nhũm ja amã mex kêt nẽ. E mẽ inhmã mẽmoj jarẽ. Tanhmã na pre finat Mojesja Tĩrtũm nhỹ hã arĩgromnu hã mẽ pahte axpẽn nhĩpêx ã mẽ pamã karõ hto? Xà kot puj mẽ hã axpẽn kãm paxukaprĩ rỳ hã mẽ pamã

axpën kurê ho papa? Xà kot puj mẽ hã mẽmoj punuj pê mẽ utà rỳ kot puj mẽ ãm arĩgro mex pix ã mẽ utàr kaxyw arĩgro mex jamã? E mẽ atõ inhmã ja jarẽ. Anẽ.

Ra kot hprĩ hã mẽ hamaxpër ã mẽ omunh mex nẽ ã hêx rom mẽ hkukjêr anẽ. Nom nhũm mẽhõ tanhmã kutã kãm nẽ hkêt nẽ. Mẽ ãm piitã akryk mar pê omunh o hkrĩ. Mẽ kot tanhmã kãm nẽ nhũm ta pãnhã tanhmã mẽ kãm nẽ pymaj nhũm mẽ tee ri kãm tanhmã nẽ hprãm nom akryk mar o hkrĩ. 5Hãmri nhũm Jejus tee ri mẽ ukaprĩ hkêt ã mẽ omu nẽ hkaprĩ nẽ mẽ kamã gryk nẽ. Hãmri nẽ ãhkra grã xwỳnhja mã kãm:

—Tk. Mẽ kot tanhmã inhmã ujarẽnh tore hã. E anhĩhkra katàt. Anẽ.

Hãmri nhũm ãhkra katàt nẽ akupỹm mex kurê kumrêx. 6Hãmri nhũm Parijew nhõ xwỳnhjaja tee ri ã Jejus kapër anhỹrja ã kuma nẽ kot sap ã akupỹm myta o mex ã omu nẽ kamã gryk tỳx nẽ. Nẽ hapõj nẽ ma pahi Erox kõt mẽ pa xwỳnhjê hwỳr mra nẽ mẽ kãm harẽ nẽ tanhmã hã axpën kukjêr to nẽ axpën mã:

—Kwa tanhmã kot puj mẽ ho? Na ã kapër anhỹrja o mẽ pahto kapër punuj nẽ. Te hkĩnhã mẽ papamjaja mẽ kamã paxukaprĩ hkêt pyrãk ã mẽ pajarẽ. Kojã mẽ pahkwỳjaja kuma hãmri nẽ mẽ pahte amnhĩ nhĩpêx kaga nẽ amnhĩ kaxyw hkõt pix mã hamaxpër o pa. Ja pymaj kwa tanhmã kot puj mẽ ho? Anẽ.

Mẽ ohtõ nẽ kot Jejus kapër mar kaxyw hwỳr mra ã mẽ harẽnh

Matêwre 4.23-25; Rukre 17-19

7-8Tã nhũm Jejus mẽ hkõt mẽ pa ho mẽ pa xwỳnhjê mẽrohã ma akupỹm gõ rax wỳr mõ nhũm mẽ ohtõ nẽ omu nẽ ma hkõt mra. Pyka pê Garirej mẽ Jutej wa kurũm nẽ krĩ pê Jerujarẽ rũm nẽ pyka pê Itumêj rũm nẽ pyhti pê Jotãw nhĩkjê hã krĩ hkwy rũm nẽ krĩ hkwy pê Xir mẽ Sitõ wa pu hã krĩ hkwy rũm ohtõ nẽ ma hwỳr mra. Na prem ra harẽnh ma nẽ nhỹhỹm mõr ã omu nẽ axpën mã harẽnh o:

—E kwa tokyj pu mẽ ma hwỳr mẽ à xwỳnhjê o mõ kê akupỹm mẽ ho mex. Anẽ.

Hãmri nẽ hwỳr mẽ o mra nẽ hã pikuprõnh rax nẽ. 9-10Hãmri nhũm Jejus akupỹm mẽ à xwỳnhjê ho mex. Gõ mỳri xa nẽ tanhmã mẽ ho mex to. Jakamã nhũm mẽ axte ohtõ nẽ hwỳr mra nẽ piitã kot htok nẽ akupỹm mex kaxyw hwỳr axpën nhĩgã. Hãmri nhũm tee ri amnhĩ wỳr mẽ omu nẽ hkõt mẽ pa ho mẽ pa xwỳnhjê mã:

—Kwa mẽ ma mra nẽ amnẽ kanõre jêt mũj kjênh o tẽ nẽ jar inhmã anhõ. Kê mẽ ixtã axpën nhĩgãnh o ijanênh japêr pa hwỳr axà nẽ amỹm mẽ ho hpỳnh nẽ akupỹm mẽ ho mex. Anẽ.

Hãmri nhũm mẽ kuma nẽ ma mra nẽ kãm ja o tẽ nẽ kunhõ. 11Na pre mẽkarõmnuti hkwyjã mẽ hkwyjê hwỳr agjê. Jakamã nhũm mẽ Jejus

pumu nê mēkarōmnuti nhỹ hã kêp Tĩrtũm Kra hã omunh kurê kumrêx. Hãmri nê hã hpijaàm kaxyw kutã hkõnkrã ho hkrĩ nê mēkarōmnuti nhỹ hã kãm kapêr nê kãm:

— Kwa apê Tĩrtũm Kra na ka. Anê.

12 Hãmri nhũm tee ri amnhĩ tã mē kuma. Kãm mēkarōmnuti ã kot harênh anhỹr prãm kêt nê. ãm mē piitã mē kot kapêr mar nê kot amnhĩ nhĩpêx ã omunh pê kêp Tĩrtũm Kra hã omunhja na kãm hprãm. Jakamã nhũm mēkarōmnuti ã harênh anê nhũm ja nê mē kãm kapêr nê mē kãm:

— Tk kwa nã kêr ka mē tanhmã ijarênh to hkêt nê. Anê.

Jejus kot amnhĩ kaxyw mē kêp 12 rênh ã harênh

Matêwre 10.1-4; Rukre 6.12-16

13 Tã nhũm Jejus hkõt mē pa ho mē pa xwýnh kwýjê mã kãm:

— E pu mē ma mō nê krãhakýx mũj ã api. Anê.

Hãmri nê mē ma hwýr mō nê hã api 14 nhũm Jejus amnhĩ kaxyw mē ho

12 nê mē kurê. Mē kot ma ý hã Tĩrtũm kapêr o mē ahkre 15 nê ý hã mē nê mēkarōmnuti janor o pa kaxyw. 16 ã mē hixi kot anhỹr.

Na pre ja kêp Simãw no nhũm Jejus hpãnhã hã hixi hõ mē nhũm hpãnhã mããnên kêp Pêtre.

17 Nê hkõt Jepetew kra Xiakre mē htõ Juãwja wa kuta.

Hãmri nê kot Simãw nhĩpêx pyrã nê wa hã hixi hõ mē nhũm wa hpãnhã mããnên kêp Poanes. Wa kot amnhĩ prêprêk jakamã nhũm ã wa hã hixi mênh anê.

18 Nê hõ pê Andreja ta.

Nê hkõt Andre htõ Firiptija ta.

Nê hkõt Patoromewja ta.

Nê hkõt Matêwreja ta.

Nê hkõt Tomasja ta.

Nê hkõt Arpêw kra Xiakreja ta.



Makre 3.14-19

Ně hkôt Tatewja ta.

Ně hkôt Simāw oja ta.

Simāwja na pre kām mẽ ixpê Ijaewjê nhõ pika pê Ijaew kĩnh tỳx nê. Jakamã na pre kām nhãm pika hõ nhõ pahi kot mẽ ho amnhĩtār prãm kêt nê pa.

19 Ně hkôt Jut Kariotja ta.

Kormã kot mẽ kām Jejus kurê xwỳnhjê nhĩhkram òr mã nhũm Jejus kot amnhĩ kukamã omunh mex tã mẽ hkôt amnhĩ kaxyw kuta.

Ã mẽ kot ỹ hã mẽ ahkre o pa kaxyw mẽ rênh xwỳnhjê nhĩxi kot anhỹr.

Jejus mẽ mẽkarõmnuti wa harênh

Matêwre 12.22-32; Rukre 11.14-23, 12.10; Juãw 10.19-21

20 Hãmri nhũm Jejus hkôt mẽ pa ho mẽ pa xwỳnh kwỳjê rênh pa nê ma amnhĩ kôt mẽhõ nhõrkwỹ hwỳr mẽ o mõi. Na prem apkur kêt ry rax nê ra kãm prãm tỳx nê nhũm ma mẽ apkur kaxyw amnhĩ kôt mẽ o mõi. Hãmri nhũm axte mẽ à xwỳnhjaja mẽ omu nê Jejus wỳr pikuprõnh rax nhũm mẽ tokyx apkur kêt nê. 21 Hãmri nhũm Jejus katorxà nê htõjaja tee ri mẽ apkur kêt ã mẽ harênh ma nê axpên mã:

— Kwa mãn ãm ra tanhmã hkrã amnhĩ to nà? Hã na mẽ kot omunh kaxyw hã hpikuprõnh rax jakamã nhũm kormã apkur kêt nê. E tokyx pu mẽ ma hwỳr mra nê omu nê mẽ kêp utà nê akupỹn amnhĩ kôt o mõi. Anê.

22 Rôm nhũm Tĩrtũm kapêr tũm o mẽ ahkre xwỳnhjaja Jerujarê rũm Jejus wỳr mõi põi. Hãmri nê tanhmã ho kapêr punuj to. Kêp mẽkarõmnuti hkwy hã hkamnhĩx jakamã harênh o:

— Tk pêr hinhu nhĩkõõti nhỹ hã na hte mẽ nê amnhĩ kwỳjê japõx o pa. Anê.

Hinhu nhĩkõõti nhĩxi hõ pê Satanasti nhũm prem ỹ hã Jejus kot amnhĩ nhĩpêx o pa hã hkamnhĩx. 23 Hãmri nhũm amnhĩ tã mẽ omu nê amnhĩ wỳr mẽ kãm hpa ho apê nê mẽ kãm amnhĩ jarê. Nom amnhĩ tã kuxi nê mẽ kãm mẽmoj jarê nê mẽ kãm:

— Kwa mẽ inhma mẽ ate ixpê Satanasti hkwy hã ixkamnhĩx xwỳnhjaja. Xà na hte Satanasti mẽ nê amnhĩ kwỳjê janor o pa? Nà na hte ã amnhĩ nhĩpêx anhỹr kêt nê. 24 Na hte pika nhõ xwỳnhjaja axpên kutã amnhĩ xunhwỳ nê axpu hãmri nê angrã nê ma ahpỹnhã ri pa nê amnhĩ krã hkôt ri tanhmã amnhĩ to ho ri pa. Jakamã nhũm mẽ õ pahija mẽ hamãr o pa hkêt nê. 25 Nê krĩ nhõ xwỳnhjaja haxwỳja. Mẽ kot axpên to hkwy xwỳnhjaja koja mẽmoj tã axpên kãm gryk nê axpên kutã amnhĩ xunhwỳ hãmri nê angrã nê ahpỹnhã pa hãmri nhũm mẽ õ pahi tee ri kãm mẽ hamãr o pa hprãm. Mo hkwyjaja kot kêt ri mẽ hamãr o pa? Nom tãm kot amnhĩ nê mẽ hanoore hã. Mẽ tãmjaja na prem axpên kãm gryk

ně anhrà ně ahpÿnhã pa. 26Tã ja pyrã ně ixte Satanasti nhÿ hã tanhmã amnhĩ nhĩpêx to ho ixpa ronhÿx pa ri mẽ kurũm amnhĩ kwÿjê japôx o ri ixpa hkêt ně. Mëkarõmnutijaja kêp Satanasti hkwy kênã. Koja Satanasti ixte mẽ kurũm mẽ hapôx kaxyw tanhmã inhmã ně hkêt ně. 27Àhpumunh tÿx jakamã na hte mẽ kot hkôt amnhĩ xunhwÿr xwÿnhjê pumunh tÿx o pa nhũm mēhõ tee ri kêp mẽ utàr kaxyw. Tã ixàhpumunh tÿx o ixte hakrenh jakamã ixte kêp mẽ utàrja inhmã tanhmã kute hkêt. Na pa hte kêp mẽ utã nhũm mẽ hpãnhã ixkôt amnhĩ nhĩpêx o pa nhũm Satanasti tee ri mẽ hã ixpumunh o pa kaprÿ.

28— ãm hãmri na pa mẽ amã ixkapêr. Kot kaj mẽ tanhmã amnhĩ tomnuj to ho apa. Nê amnhĩ tomnuj tÿx kumrêx rãhã ho apa. Rÿ tanhmã akapêr punuj to ho apa. Rÿ tanhmã Tirtũm o akapêr punuj to ho apa. Tã tee ri ja hã amnhĩ pumu ně akaprĩ ně ã ate amnhĩ nhĩpêx anhÿrja kaga ně Tirtũm kôt amnhĩ xunhwÿ. Hãmri nhũm amnhĩ tã mẽ apumu ně amnhĩ katut kôt mẽ ate amnhĩ tomnuj ně mẽ akapêr punuj rēnh pa ně axte kãm hamaxpêr kêt ně. Koja ho hapêx par kumrêx. 29Nom koja Tirtũm Karõ xatã mẽ amã ixto amnhĩrit tã ka mẽ ama ně ãm ama ně te kêp amnhĩ jamak pro pyrãk o amnhĩ nhĩpêx. Jao Tirtũm Karõ hã apijaãm kêt ã amnhĩ to amnhĩrit. Ja mÿrapê koja Tirtũm nhÿrmã amnhĩ xwar te mẽ apê amnhĩ jamak pro pyrãk o mẽ anhĩpêx ka mẽ tee ri kãm amnhĩ kaprĩ kaprÿ. Hãmri ně mẽ kot amnhĩ xà htÿx kamã hamak o pa htũm xà wÿr ma apa ně kamã apa rãhã apa ho apa. Anê.

30Mê kot Satanasti nhÿ hã mẽ nê mẽkarõmnuti janor o pa hã hkamnhix jakamã nhũm pre Jejus ã mẽ kãm kapêr anê.

Jejus katorxã mẽ htõjê jarēnh

Matêwre 12.46-50; Rukre 8.19-21; määnēn Eprêw 2.11-12

31Rôm nhũm Jejus katorxã mẽ htõjaja hwÿr mra no ãm kormã hwÿr gjêx kêt ně. Mê kot hã htu rax jakamã nhũm mẽ tee ri hwÿr gjêx kaxyw kormã kapôt ã kuhê. Hãmri ně mẽ kot mar o kuhê xwÿnhjê hõ mã kapêr ně kãm:

— Kwa ma tēn Jejus mã mẽ ijarē kē mẽ ixwÿr kato. Anê.

32Rôm nhũm ixkre kamã mẽ hkrĩ xwÿnhjaja mẽ omu ně Jejus mã mẽ harē ně kãm:

— Kwa Pahihti. Ota akatorxã mẽ atõjaja awÿr mra ně põj ně tee ri awÿr gjêx mã ně kormã kapôt ã kuhê ně atã karõ. Anê.

33-35Hãmri nhũm mẽ kuma ně mẽ kãm:

— Tõe pa ixkato ně mẽ omu. Inhmã mẽ hapêê. Nom kot kaj mẽ atõ Tirtũm kapêr ma ně hkôt amnhĩ xãm ně hkôt amnhĩ nhĩpêx. Hã kot kaj te apê ixtõ rÿ ixkatorxã kot amnhĩ nhĩpêx pyrãk o pu mẽ axpēn nhĩpêx. Pa te inhmã mẽ hapê pyrã ně inhmã mẽ ajapê ně. Anê.

Mêmo hy hkre xwÿnh jarênh

Matêwre 13.1-9; Rukre 8.4-8

4 ¹Tã nhũm Jejus axte gô jakàx ã mẽ ahkre ho nhÿ. Hãmri nhũm mẽ axte hã htu rax jakamã nhũm tee ri mẽ omu hãmri nê pàr krem axã nê gôx kãm amÿm mẽ ahkre ho nhÿ. Nhũm mẽ piitã kÿxpê omunh nê mar mex o kuhê. ²Hãmri nhũm mẽ ahkre ho nhÿ. Nom mẽ ujarênh pix kãm mẽ ahkre. Mẽ kot Tirtũm kapêr mar nê tanhmã hkôt amnhĩ nhÿpêx to ho paja nhũm hã kuxi nê mẽ kãm hã ujarênh o nhÿ nê mẽ kãm:

³—E mẽ inhma. Koja mēhō ma pur mã mō nê pur kãm mẽmo hy ho ukapêr o pa nom nhũm hy piitã amex kãm rôrôk kêt nê. Koja ahpÿnhã rôrôk. ⁴Koja hkwy aptÿx kãm rôrôk nhũm kuwênhre omu nê hwÿr mra nê hkrêr pa. ⁵⁻⁶Nê koja kên kãm hkwy rôrôk hãmri nê higrôt kutã nojarêr nê higrôt pa. Nom nhũm kamã aptÿx nê kamã kêp pika hkryre jakamã nhũm higrôt nhũm hã myt apha nê arÿgro htÿx mẽ nhũm grã pa. Harê hkryre jakamã grã pa. ⁷Nê koja hkwy mrônhĩ kamã rôrôk nê higrôt tã no nhũm utÿja kêp amÿtã nhũm ô hkêt nê.



Makre 4.1-9

⁸—No koja hirã kamã pika mex kãm hkwy rôrôk. Hãmri nê hirã kamã rôrôk jakamã higrôt mex nê piitã ô rax nê. Kamã ô hkwy kêp 30 nê kamã hkwy kêp 60 nê kamã hkwy kêp 100. ã mẽ ujarênh kot anhÿr. ⁹Kwa mẽ ama nê kãm ajamaxpêr tÿx rãhã ho ri apa. Anê.

Jejus kot hprĩ hã mẽmo hy jarênh

Matêwre 13.10-23; Rukre 8.9-15

¹⁰Hãmri nhũm mẽ Jejus xujarênh mar pa nê anhrã nê ma akupÿm mra nhũm hkôt mẽ pa ho pa xwÿnh pê 12 mẽ hkwyjaja pix Jejus ri arÿk. Hãmri nê ujarênhã ã hkukja nê kãm:

—Kwa mon ka hte ã mẽ kãm axujarênh anê Pahihti? Na pa mẽ ixprĩ hã amar mex kêt nê. Anê.

¹¹⁻¹²Hãmri nhũm mẽ kãm:

—Nã kot paj ixprĩ hã mẽ amã harê. Tirtũm kãm mẽ ate aprĩ hã mar prãm jakamã kot paj ixprĩ hã tanhmã mẽ amã harênh to. Nã mẽ kot amnhĩ tomnu kaga nhũm Tirtũm kot ja hã mẽ omunh xã hkôt mẽ ho hkra hã harênhja na pa hte mẽ kãm harê. No mũjjaja mẽ akĩnhã mẽ kãm mar

prãm kêt jakamã na pa hte mẽ kãm mẽmoj tã haxwỳ nẽ awjarẽ nhũm mẽ ãm ixujarẽnh pix ma.

Na htem kuma nẽ ãm kuma nẽ htỳx ri hã pa. No kệp apu mẽ kãm hprĩ hã mar prãm ronhỳx mẽ ra hprĩ hã kuma nẽ Tirtũm kôt amnhĩ xunhwỳ nhũm amnhĩ tã mẽ omu nẽ mẽ kot amnhĩ tomnuj o hapêx. Nom mẽ kãm mar prãm kêt. Anẽ.

13Tã mẽ ate aprĩ hã ixujarẽnhja mar mex kêt jakamã tanhmã kot kaj mẽ amnhĩ to nẽ ixujarẽnh piitã ama? E kot paj ixprĩ hã mẽ amã mẽmo hyta jarẽ ka mẽ inhma.

14—Nà mẽmo hyta te kệp Tirtũm kapêr pyræk. Nẽ ahpỳnhã rôrøk xà hã pikata te kệp ahpỳnhã mẽ kot Tirtũm kapêr mar xwỳnhjê kot mar nẽ ahpỳnhã tanhmã amnhĩ nhĩpêx to pyræk. 15Jakamã mẽ kot mar xwỳnh kwỳjaja hte kot aptỳx kãm hkwỳ rôrøk nhũm kuwênh kot hwỳr mrar nẽ hkrêr par xwỳnhhta pyræk. Jakamã na htem Tirtũm kapêr ma nom nhũm Satanasti te kuwênh kot hy hkrêr parta pyræk o mẽ hipêx. Nẽ mẽ kot amnhĩ kaxyw hkôt hamaxpêr nẽ hkôt amnhĩ xunhwỳr pymaj tanhmã nẽ mẽ hkrã hto. Jakamã nhũm mẽ Tirtũm kapêr ma nom ho hamakêtkati tokyx anẽ nẽ axte kãm hamaxpêr kêt nẽ.

16—Nẽ mẽ kot mar xwỳnh kwỳjaja te kot kênre kamã hkwỳ rôrøk nẽ higrôt nhũm te hã myt apha nhũm grà par tokyx anhỳr xwỳnhhta pyræk. Na htem Tirtũm kapêr ma nẽ hkĩnh nẽ. Nẽ kãm mar prãm nẽ. Te hy higrôt tokyx anhỳrta pyræk. 17Tã nhũm mễhõ tẽ nẽ Tirtũm nẽ tanhmã mẽ kãm kapêr to nhũm mẽ kuma nẽ hkaga. Rỳ nhũm mẽ Tirtũm ã tanhmã mẽ homnuj to nhũm mẽ tee ri amnhĩ tã mẽ omu nẽ hkaga. Te mẽmo hy higrôt nẽ grà par tokyx anhỳrta pyræk.

18—Nẽ mẽ kot mar xwỳnh kwỳjaja te kot mrônhi kamã hkwỳ rôrøk nẽ higrôt nhũm mrônhi kot kệp àmnar xwỳnhhta pyræk. Nẽ mẽ kãm Tirtũm kapêr mar prãm nẽ. 19Nom määnên kãm hikukrêx rax nẽ hikàxpore rax prãm jakamã ãm ja pix kukamã hamaxpêr o ri pa. Jao ra gryk ã axte Tirtũm kapêr mã hamaxpêr nẽ hkôt amnhĩ nhĩpêx kêt nẽ. Te mrônhi kot higrôt pê àmnar nhũm ô hkêeta pyræk.

20—No mẽ kot mar xwỳnh kwỳjaja te hirã kamã pika mex kãm hy hkwỳ rôrøk nẽ higrôt nẽ ô raxta pyræk. Na htem ixkapêr ma nẽ amnhĩ krã him hagjênh tỳx nẽ. Nẽ ixkôt ri amnhĩ nhĩpêx mex rãhã ho ri pa. Te mẽmo hy hkre kamã ô hkwỳja kệp 30 nẽ kamã kệp 60 nẽ kamã kệp 100ta pyrã nẽ Tirtũm kapêr kôt amnhĩ nhĩpêx mex rãhã ho pa. E ã ixujarẽnhja kot anhỳr. Anẽ.

Kanê hpimxur ã harênh

Rukre 8.16-18, 8.24-25; Matêwre 13.10-15, 25.14-30

21Nhũm Jejus arĩ hkôt mẽ pa ho pa xwỳnhjê jahkre nẽ mẽ kãm:

—Xà na htem kanê hpôk nê poti ho hpro rỳ hitom kãm par krak ri unhwỳ? Nà na htem hpôk hãmri nê kỳx pê mêmoj nhĩmôk ã unhwỳ. 22Ja pyrà nê mẽ piitã kot hkwyjê pê tanhmã hamaxpêr punuj to ho hpimxur prãm tã tee ri kot ho hpimxur prãm kaprỳ. Kojã nhỹrmã mẽ hamaxpêr piitã amnhĩ to amnhĩrĩt pa. Nê mêmoj piitã ra hpimxur mex tã kojã nhỹrmã amnhĩ to amnhĩrĩt pa. Te mẽ kot kanê hpôk nê kỳx pê unhwỳr nhũm amnhĩrĩt mex pyræk. Ja pyrà nê na pa hte Tĩrtũm kapêr o ri ixpimxur o ixpa hkêt nê. Na pa hte ixprĩ hã mẽ amã harênh mex o ixpa. 23Kwa mẽ ixujarênhja ma nê kãm ajamaxpêr tỳx rãhã ho ri apa. Anê.

Nhũm pre ã Jejus mẽ kãm kapêr anê. 24Hãmri nê mẽ kãm:

—Nê kêr ka mẽ axpên kãm axukaprĩ ho ri tanhmã axpên to mex to ho ri apa. Kêr kê Tĩrtũm ja hã mẽ apumu nê mẽ apyrà nê mẽ akamã ukaprĩ pê mẽ ato mex o pa. 25Kojã mêhõ inhmã tanhmã amnhĩ nhĩpêx mex to pa ja hã omu nê kot inhmã àpênh mexta pãnhã ho mex nê. No kojã inhmã àpênh mex kêt pa ja hã omu nê hã ho mex kêt nê.

—Nê kojã mêhõ kãm ixkapêr mar prãm nom kormã hprĩ hã mar mex kêt tã arĩ mar o pa nê gaa nê mar tỳx o mō. No kojã kuma nê ãm kuma hãmri nê gaa nê hã no hkêt. Anê.

Pur kãm mêmoj hy hkre xwỳnh jarênh

Matêwre 13.24-30

26Nhũm Jejus arĩ hkôt mẽ pa ho mẽ pa xwỳnhjê jahkre ho nhỹ nê mẽ kãm:

—E pa mẽ amã tanhmã mẽ kot ixkapêr mar tỳx xwỳnhjê jarênh to ka mẽ inhma. Kojã mêhõ ixkapêr mar tỳx nê ra hkôt ri amnhĩ nhĩpêx o pa. Hãmri nê hamaxpêr nyw o hamaxpêr o pa nê amnhĩ nhĩpêx nyw o amnhĩ nhĩpêx o pa. Te mẽ hpur kãm mêhõ kot mêmoj hy hkre xwỳnh kot amnhĩ nhĩpêx pyræk. Na hte hyja kre ho pa. 27Hãmri nê hkre hpa nê kamàt mẽ ôt o hikwỳ nê arĩgro mẽ mêmoj tã àpênh o pa. Rãhã nhũm mêmoj hyja arĩ hikwỳ ho hikwỳ hkêt nê. Kojã amnhĩ nhĩpêx õ ho amnhĩ nhĩpêx nê higrôt kato nê hprêk. Kre xwỳnh kot tanhmã kot amnhĩ nhĩpêx to hã omunh kêt tã nhũm kãm hprêk.

28—Na hte hpôm hapôx o pa nê higrôt o pyka kahte. Hãmri nê hprêk nê hô axpôt nê gaa nê hpãnhã ô. Hãmri nê hkamrêk pa nê xa. 29Hãmri nê mẽ kot hikênh mã mex nê nhũm kot hkre xwỳnhhta omu nê amnhĩm hamỳnh pa. Tã mẽ kot ixkapêr mar mex xwỳnhhjaja te mêmoj hy ra higrôt kator nê hprêk nê hô pipôt nê ô xwỳnhhta pyræk. Nê uræk nê amnhĩ nhĩpêx õ ho amnhĩ nhĩpêx o pa. Anê.

Jejus te kot mẽmo hy pyræk ã kot amnhĩ jarẽnh

Matẽwre 13.31-32; Rukre 13.18-19

30-32Nhũm Jejus arĩ mẽ ahkre ho nhỹ nẽ mẽ kãm:

—Tĩrtũm kot mẽ awỳr ixte mẽ ato amnhĩptàr kaxyw inhmẽnh ã ijarẽnhja. Te ixte mẽmo hy pixire pyræk. Koja mẽhõ mẽmo hy hõ pixire nẽ hkre nhũm ra higrõt. Nẽ gaa nẽ hprêk. Hãmri nẽ hpa anhrà nhũm kuwẽnhre hwỳr mra nẽ hõptĩ kamã amnhĩm haê nhĩpêx. Mẽmo hyta grire htã nhũm hkre nhũm higrõt nẽ ã amnhĩ nhĩpêx anẽ. Tã kot paj nhỹrmã urà nẽ ipxyxi htã kot paj pika piitã hkõt mẽ ho amnhĩptã nẽ mẽ omunh mex rãhã ho ri ixpa. Anẽ.

Ã na pre Jejusja hkõt mẽ pa ho mẽ pa xwỳnhjê mã amnhĩ tã kuxi nẽ ujarẽnh anẽ. **33**Mẽ kãm ujarẽnh kãm mẽ ahkre ho pa. Te nhãm mẽmoj jarẽnh pyrã nẽ amnhĩ tã haxwỳ nẽ harẽ. Mẽ kot tanhmã mar to hã mẽ omunh xà hkõt tanhmã mẽ kãm ujarẽnh to. **34**Na pre ãm ujarẽnh pix kãm mẽ kãm kapẽr mar prãm kêt xwỳnhjê mã amnhĩ jarẽnh rãhã ho pa. No mẽ kot hkõt pa ho pa xwỳnhjê mã nhũm hprĩ hã ujarẽnh jarẽ nhũm mẽhprĩ hã mar mex nẽ.

Jejus kot kòk o pinhkrẽnh ã harẽnh

Matẽwre 8.23-27; Rukre 8.22-25

35Tã nhũm amỹkry nhũm Jejus arĩ pàr kre kamã nhỹ. Hãmri nẽ hkõt mẽ pa ho mẽ pa xwỳnhjê mã kãm: “E pu mẽ ma xarmã mõ.” **36**Anẽ hãmri nẽ mẽ kot mar o hkrĩ xwỳnhjê re nẽ pàr mã agjê nẽ ma xarmã mõ. Garirej rúm kato nẽ ma xarmã pika hõ hwỳr mõ. Nhũm pàr kwỳja ma mẽ hkõt mõ. **37-38**Nhũm Jejus ra õtxwa nẽ tẽ nẽ pàr kre kamã hkrã japar xà hã hkrã xi nẽ ra õt tỳx nẽ nõ. Nhũm kòk àpêr tỳx nẽ nhũm gô kànhmã harĩ nẽ axpẽn tak. Ra ri xatã axpẽn tak nẽ pàr kre kamã axkapĩ nhũm ra mẽ kệp àr o mõ. Hãmri nhũm mẽ tee ri amnhĩ nhĩpêx nẽ tee ri amnhĩ kukamã hamaxpêr nẽ Jejus wỳr hprõt nẽ kumra nẽ kãm:

—Kwa kànhmã nhỹ Pahihti. Kot puj mẽ jarãhã pahtyk pa. Anẽ.

39Hãmri nhũm hkrãkato nẽ kànhmã nhỹ nẽ kòk mẽ gòta pumu nẽ wa kãm kapẽr o:

—E kwa wa anhĩkrê. Anẽ.

Hãmri nhũm gô mẽ kòk hpinhkrẽnh kurê kumrêx.

40Hãmri nhũm Jejus hkõt mẽ pa ho mẽ pa xwỳnhjê mã kãm:

—Hêxta waa nẽ. Kormã mẽ ate amnhĩ kaxyw Tĩrtũm mẽ wa inhmã ajamaxpêr tỳx kêt. Hã na ka mẽ ri amã ma nẽ tee ri amnhĩ kukamã ajamaxpêr. Anẽ.

41Hãmri nhũm mẽ amnhĩ jaêr pê ã kot amnhĩ nhĩpêx anhỹr ã omu nẽ tee ri axpẽn pumunh pê omunh o kuhê. Hãmri nẽ axpẽn mã:

—Kokỹỹ. Jejus kêp mē panhĩō hkêt. Mē pahtō kot pu te kot amnhĩ nhĩpêx pyrã nê kôk mã pakapêr nhũm anhĩkrê? Nã mē pakurom àhpumunh tỳx o àhpumunh tỳx. Anê.

Jejus kot mēhō nê mēkarōmnuti janor ã jarēnh

Matêwre 8.28-33; Rukre 8.26-34

5 1Tã nhũm Jejus mē hkôt mē pa ho mē pa xwỳnhjê mērohã mō nê xarmã Geras wỳr pøj. 2-4Hãmri nê pàr rũm hapøj nhũm mēhō myja Jejus pumu nê hwỳr tē. Mēkarōmnuti kot hwỳr àr nhũm ỹ hã oprê htỳx kumrêx. Hãmri nê hkwỳjê hkàx ã kapôt ã mē hã pika kamã ri hkênh nê pa ho pa. Nhũm mē xatã kàx o hte hpre nê hpa hpre htã no nhũm kurê. 5Nê kamàt kãm nê arĩgro hã àmra htỳx o mrrar pê kên o amnhĩ tak o mra. Mē hã pyka kamã nê kapôt ã hixêt ã amnhĩ tak tỳx rãhã ho mra. 6Tã amỳm Jejus pumu nê hwỳr hprôt nê hã hpijaàm kaxyw kutã hkôn krã ho tēm nê hparpê nhỹ. 7-8Hãmri nhũm omu nê nê mēkarōmnuti mã kapêr nê kãm:

—Kwa kurũm akato nê ma tē. Anê.

Hãmri nhũm kuma nê tanhmã myta o nhũm tãm mēkarōmnuti nhỹ hã Jejus mã kapêr nê àmra kamã kãm:

—Pa Tĩrtũm Kra Jejus? Mo kaxyw na ka ixwỳr tē? Kwa tanhmã ixto hkêt nê nà?

9-10Anê nhũm kãm:

—Tanhmã na anhĩxi te? Anê.

Nhũm kãm:



Makre 5.1-20

— Nà ixpê Mëohtôhti. Mëkarõmnuti ohtô nê kot ixwÿr gjêx jakamã na htem ã inhîxi jarênh anê. Kwa nê mē ijanor kêt nê nà? Anê.

11-12 Hãmri nhũm mëkarõmnuti tãm amnhĩ to kuwÿ nê kãm:

— Kwa kêr ka jahti nê mē ijapôx japêr nê mē kot amnhĩ xà htÿx kamã hamak o mē pa htũm xàta wÿr mē ixrênh kêt nê. Hagrô hkwy mÿj wÿr mãn mē ixrê pa mē hpãnhã hwÿr mãn hagiê? Anê.

13 Hãmri nhũm mē kãm:

— Tôe. Mē tãm hwÿr mra. Anê.

Hãmri nhũm mëmyta pê hapôx pa nê ma hagrô hwÿr mrar kurê kumrêx nê mē kãm gjêx pa nhũm myja akupÿm tãm hkrã. No nhũm hagrôja mëkarõmnuti pymaj amÿra nê axkakhũm nê hprôt nê himô hã krã hixêt ã axpum rôrôk nê gôx kãm mrô nê hpikaprãr pa. Ohtô rax kumrêx. Kêp 2.000 tã hpikaprãr pa. 14 Hãmri nhũm hagrô jamãr o ri mē pa xwÿnhjaja tee ri ja hã omu nê ma mē õ patrãw wÿr akupÿm mē piitã mē kãm harênh o hprôt nê mra. Hãmri nê mē kãm ujarênh pa. 15-16 Nhũm mē tee ri mē kuma nê ma Jejus wÿr mra nê hkaxpa nê kuri myta pumu. Nhũm ra akupÿm tãm hkrã nê ê kamã tãm amnhĩ nhîpêx nê nhÿ. Nhũm mē kot hã omunh xwÿnhjaja mē kãm ujarênh pa nhũm mē kuma nê myta pumu hãmri nê tee ri amnhĩ kukamã hamaxpêr o kãm Jejus puma nê. 17 Hãmri nê amnhĩ nê kãm kapêr nê kãm:

— Kwa mëmo kaxyw na ka mē ixwÿr rê? Mē ma akupÿm amrar tokyx anê. Anê.

18 Hãmri nhũm mē kuma nê akupÿm pãr wÿr agiê nhũm akupÿm mex xwÿnhhta tee ri ja hã mē omu nê mē hkôt hkrã. 19 No nhũm Jejus kãm:

— Nà kot kaj mē ixkôt amôr kêt nê. Ma akupÿm anhô krĩ hwÿr mãn tē nê mē kãm Tirtũm kot akupÿm ato mex ã amnhĩ jarênh o ri mē hkôt apa. Anê.

20 Hãmri nhũm kuma nê ma akupÿm tē. Hãmri nê õ pyka pê Tekap kãm mē kãm Jejus kot tanhmã ho mex to hã harênh ri mē hkôt pa nhũm mē amnhĩ jaêr pê kuma nê tee ri hkukamã hamaxpêr.

Jejus kot akupÿm mëhõ ho mex nê akupÿm mëhõ ho htír ã harênh

Matêwre 9.18-26; Rukre 8.40-56

21 Tã nhũm Jejus mē hkôt mē pa ho pa xwÿnhjê mërohã akupÿm xarmã mô nê rê. Hãmri nê pãr nhô nê api nê gô mÿri kuhê nhũm pika nhô xwÿnhjaja Jejus pumu nê hã pikuprõnh rax nê. 22-23 Hãmri nhũm mëhõ my pê Jajtija hwÿr tē nê kutã hkõnkrã ho htēm nê nhÿ. Kêp Tirtũm kapêr o mē ahkre xà hã ixkre jamãr xwÿnh maati na pre. Nhũm hkra nija kêp à htÿx nê htyk kaxyw nê nõ. Kormã nyw. Kormã hã amgrã pê 12 pix tã ra kêp htyk kaxyw. Hãmri nhũm Jajtija tee ri hkukamã hamaxpêr nê ma Jejus wÿr tē nê hpar pê hkõn krã ho tēm nê ho hwÿr kãm hihtÿx nê kãm:

— Pa akupỹm mẽ ixto mex xwỹnh maati. E awỳr na pa tẽ. Na ra ixkra ixpê htyk kaxyw. Pa tee ri omu nẽ kaxyw amã ijamaxpêr nẽ awỳr tẽ. Jakamã kwa ma ixkôt inhõrkwỹ hwỳr tẽ nẽ inhmã omu nẽ hã anhĩkra xi nẽ akupỹm inhmã ho mex. Anẽ.

24Hãmri nhũm kuma nẽ ma hkôt tẽ. Nhũm mẽ ohtô nẽ axpẽn nhĩgãnh nẽ axpẽn kujahêk o wa hkôt mra. 25Nhũm mẽhõ nija haxwỳja wa hkôt tẽ. Na pre hte hkamrô hkryre rãhã ho pa hã ra hã amgrã kêp 12. 26Nẽ tõtô mã amnhĩrer rax nẽ nhũm mẽ tee ri kot ho mex kaxyw nom xatã hkane kaprỹ. Hãmri nhũm ra hikàxpore kêp hapêx nhũm arĩ ãm rãhã nẽ pa. 27-28Hãmri nẽ tee ri amnhĩ kukamã hamaxpêr nẽ Jejus jarẽnh ma nẽ hamaxpêr o:

— Ma kot paj ma hwỳr tẽ nẽ kêp ê pix kupênh tã akupỹm inhmex japêr. Ma kot paj ho anẽ.

Anhỹr o hamaxpêr hãmri nẽ ma mẽ hkôt hwỳr htẽm kurê kumrêx. Nhũm mẽ ohtô raxja kaêx ã mẽ hkôt hwỳr tẽ. Hãmri nẽ katut kôt kêp ê nhĩrê kupê. 29Ãm ê pix kupênh tã akupỹm mex ã amnhĩ pumunh kurê kumrêx. 30Hãmri nhũm Jejus kot kêp ê kupênh ã amnhĩ tã omu nẽ hêx rom xa nẽ mẽ ho hakêx nẽ amnhĩ tã mẽ kãm kapêr nẽ mẽ kãm:

— Kwa mẽ atõ na ka ri amnhĩ kaxyw inhmã ajamaxpêr tỳx pê ixpê ixê kupê? Anẽ.

Hãmri nhũm mẽ piitã kuma nẽ tee ri axpẽn pumu nẽ kãm amnhĩ tã aprã. 31Hãmri nhũm hkôt mẽ pa ho pa xwỹnhjaja kãm:

— Mẽ kot apê amnàr griã kot ka kêt ri mẽhõ kot apê hkupênh xwỹnh ã ri mẽ hkukja. Kwa mãn ãm mẽhõ amarĩ apê hkupê. Anẽ.

32Hãmri nhũm mẽ kãm:

— Nà na amarĩ ixpê hkupênh kêt nẽ. Na amnhĩ kaxyw inhmã hamaxpêr tỳx pê ixpê hkupê. Tã na ixàhpumunh tỳx xà ho akupỹm mex. Nom ra ixte mẽhõ kot ixpê hkupênh xwỹnhhta pumunh jakamã na pa ixêx rom ã amnhĩ tã ri mẽ hkukjêr anẽ. E kwa mẽ atõ inhmã amnhĩ jarê. Anẽ.

33Hãmri nhũm nija kuma nẽ tee ri kêp kot amnhĩ to hpimxur prãm. Hãmri nẽ hpijaam nẽ hwỳr httert o tẽ nẽ kutã hkõn krã ho tẽm nẽ nhỹ nẽ kãm amnhĩ jarê nẽ kãm:

— Ma pa na pa inhmã inhmex prãm xàj apê axê kupê. Tã na pa akupỹm inhmex. Anẽ.

34Hãmri nhũm kuma nẽ kãm:

— Tỳ. Nà ate amnhĩ kaxyw inhmã ajamaxpêr tỳx kôt ã ate amnhĩ nhĩpêx anhỹr jakamã na ka akupỹm amex. Kot kaj axte akamrô rãhã ho ri apa hkêt nẽ. E mãmri ajamakêtkati nẽ ma akupỹm anhõrkwỹ hwỳr tẽ. Anẽ.

Hãmri nhũm kuma nẽ hkĩnh nẽ ma akupỹm tẽ.

35Rôm nhũm Jajti mã mẽ àpênh xwỹnhjaja õrkwỹ rũm ma õ patrãw kutã mra nẽ wa hkaxpa nẽ Jajti mã kãm:

—Kwa na ra akra apê ty. Mo kaxyw kot ka kêt amnhĩ kôt Jejus o mō? Kwār māmri ma akupým awjanã nê tẽ. Anẽ.

36Hāmri nhũm Jejus mẽ kuma nê Jajti mã kãm:

—Kwa tee ri akra hkukamã ajamaxpêr kêt nê. ãm kaxyw inhmã mãn ajamaxpêr tỳx rãhã nê. Anẽ.

37-40Hāmri nhũm mẽ axte mō nê mẽ òrkwỹ hwỳr pøj nê mẽ omu. Nhũm mẽ ra hã hturax nê mỳr o hkrĩ. Hāmri nhũm Jejus mẽ hwỳr axà nê mẽ omu nê kot mẽ hkra htyk kumrêx ã omunh tã mẽ kãm:

—Kwa mẽ hāmri amỳr kêt nê. Na nireta htyk kêt nê. Na ãm gõr nê nõ. Anẽ.

Hāmri nhũm mẽ kot ra htyk ã omunh mex jakamã kuma nê ãm kuma nê axtem nê ri axpên mã hã hpêr o axkê. Hāmri nhũm Jejus mẽ hanor pa nê hitom kãm htyk xwỳnh wỳr àr kaxyw nê amnhĩ kôt Juãw nê Xiakre nê Simãw Pêtre nê kaxyw htyk xwỳnh katorxà nê hipêêxà pix amnhĩ kôt mẽ ho axà. 41Hāmri nê htyk xwỳnhhta wỳr tẽ nê hpa hã kupy nê kãm kapêr nê kãm:

—Pa? E kwa kànhmã nhỹ. Anẽ.

Nom amnhĩ kapêr kãm harê nê kãm:

—Tarit kũm. Anẽ.

42Hāmri nhũm kànhmã ỳr kurê kumrêx nê kànhmã xa nê ri mra. Na pre ra hprêk nê ty. Na ra hã amgrà kêp 12 tã ty nhũm Jejus akupým ho htĩr nê kànhmã ỳr nhũm kànhmã xa nê ri mra. 43Hāmri nhũm kuri omunh xwỳnhjaja amnhĩ jaêr pê omu nê kamã no pyma nê hkĩnh tỳx kumrêx. Hāmri nhũm Jejus katorxà mẽ hipêêxàja wa kãm:

—E mãn ra kãm prãm nê. Wa tokyx kãm mẽmoj japêr kê kukrê. Nom kêr ka wa inhmar kumrêx. Kêr ka wa akupým ixte ho htĩr ã ri mẽ kãm ijarênh o ri apa hkêt nê. ãm kwarĩ ho kwarĩ. Anẽ.

Najare nhõ xwỳnhjaja kot Jejus kaga hã mẽ harênh

Matêwre 13.53-58; Rukre 4.16-30; Juãw 1.11

6 1Tã nhũm Jejus ma ò krĩ pê Najare hwỳr ma akupým mō nhũm hkôt mẽ pa ho mẽ pa xwỳnhjaja ma hkôt mō. 2Hāmri nê hwỳr pøj. Nhũm mẽ ò arĩgromnu pê sap kator jakamã nhũm Jejus ma Tĩrtũm kapêr o mẽ ahkre xà hã ixkre hwỳr tẽ. Hāmri nê kamã mẽ ahkre ho nhỹ nhũm mẽ amnhĩ jaêr pê kapêr mex ã kuma nê tee ri axpên pumunh pê hamaxpêr o hkrĩ. Jejus kêp mẽ hkwy hã hkamnhix nom nhũm mẽ kurom àhpumunh tỳx nê kapêr mex jakamã nhũm mẽ kuma nê tee ri hamaxpêr o hkrĩ. Hāmri nê axpên mã:

3—Kwa kêp mẽ panhĩõ htã tanhmã kot we amnhĩ to nê ã àhpumunh tỳx kôt mẽ pamã kapêr anê nê ri mẽ kãm aa mẽ kot mẽmoj pumunh kêt kwỳ ho anhỹr o pa? Mẽ panoo mã na pre hprêk. Kêp pĩ kuprãr xwỳnh Juje mẽ hprõ Marir wa hkra na. Nê htõ Xiakre nê Juje nê Simãw nê Jutja

ra mẽ pahte mẽ kêp htõ hã omunh mex. Nê htõxjaja jar mẽ pakamã pa nhũm mẽ pahte mẽ omunh mex kênã kot kêt we mẽ kurom ã àhpumunh tỳx anê. Anê.

Anhỹr o axpên mã harê. Hãmri nê kamã gryk nê hkaga 4-6nhũm tee ri amnhĩ tã mẽ omu nê hamaxpêr o:

—Hêxta waa nê. Mẽ kãm amnhĩ kaxyw ixkôt hamaxpêr prãm kêt kumrêx. Anê.

Hãmri nê mẽ kãm:

—Nà Tĩrtũm nhỹ hã kapêr jarênh o mẽ pa xwỳnhjaja na htem krĩ hkwy kamã kãm mẽ mar prãm nê. Nom õ krĩ kamã mẽ kot karàre rũm hprêk o mõi kãm omunh xwỳnhjaja na htem kuma nê ãm kuma. Anê.

Hãmri nhũm mẽ kot amnhĩ kaxyw hkôt hamaxpêr kêt jakamã nhũm tee ri mẽ kãm aa mẽ kot mẽmoj pumunh kêt kwỳ ho anhỹr rax prãm kaprỳ. Nê ãm mẽ à xwỳnhjê ho grêre nê mẽ hã ãhkra jaxwỳ nê akupỹm mẽ ho mex. Hãmri nê mẽ kurũm kato nê ma krĩ hkwy hkôt ri Tĩrtũm kapêr o mẽ ahkre ho pa.

Jejus kot mẽmoj tã mẽ kêp 12jê mã karõ hã harênh

Matêwre 10.5-15; Rukre 9.1-6, 10.1-12; mããnên Atre 13.50-51, 18.6

7Tã nhũm Jejus amnhĩ wỳr mẽ kot ỹ hã mẽ ahkre ho pa xwỳnh pê 12jê hwỳ. Ra kot amnhĩ kaxyw mẽ rênh xwỳnhhtaja nhũm amnhĩ wỳr mẽ kuwỳ. Hãmri nê axpên kaxyw mẽ ho axkrut nê mẽ kurê nê mẽ kãm mẽ àpênh ã karõ nê ma mẽ hkwyjê hwỳr mẽ kurê. Nê mẽ kãm:

—E kêr ka mẽ ma mẽ pahkwỳjê hwỳr mra nê inhỹ hã Tĩrtũm kapêr jarênh o ri mẽ hkôt apa. Nê mẽ kurũm mẽkarõmnuti japõx o ri mẽ hkôt apa. 8-9Nom kêr ka mẽ amnhĩ kôt akukrêx rax nê ri apa hkêt nê. Nê kawà htu nê ho ri apa hkêt nê. Nê amnhĩ kôt axàpkur xà ho ri apa hkêt nê. Rỳ akàxpore rax nê ri ho apa hkêt nê. ãm mẽ anhõ Kamis nê mẽ apar kà ho pixire nê agjê nê ri hã apa. Nê mẽ amnhĩ kaxpar xà hã mẽ anhõ kô pix o apa. Mẽ ã anhỹ kamã mẽ hkôt ri apa anê.

10—Nê kêr ka mẽ nhỹri krĩ hõ hwỳr pøj. Nê apõx xà kamã mẽhõ nhõrkwỳ kamã hkôt ri apikamênh tãmtã kurũm akupỹm ajapøj nê ma hpãnhã nhãm krĩ hõ hwỳr apa. Nom atỳx ri nhãm mẽ hwỳr amrar nê nhãm mẽ hwỳr amrar kêt nê.

11—Nê koja mẽ nhỹri mẽ akapêr kaga ka mẽ tee ri amnhĩ tã mẽ kamã ama hãmri nê tokyx mẽ kurũm ajapøj nê ma apa. Nê anojarêr nê mẽ noo mã akuhê nê amnhĩ par ã awjagrõ kapĩ. Mẽ kot Tĩrtũm kaga hã amnhĩ pumunh nhũm kot amnhĩ pyrã nê mẽ hkaga hã omunh kaxyw ka mẽ ã mẽ noo mã amnhĩ nhĩpêx anê. Hãmri nê hpãnhã ma nhỹhỹm apa.

12Anhỹr o mẽ kãm mẽ àpênh ã karõ. Nhũm mẽ kuma nê hapøj nê ma mẽ hkwyjê hkôt pa. Ma krĩ piitã hkôt Tĩrtũm kapêr o mẽ ahkre ho ri mẽ hkôt pa nê mẽ kãm:

—E kwa mẽ tokyx amã ate amnhĩ tomnuj kaga hprãm xàj Tĩrtũm kõt mãn amnhĩ xunhwỳ. Anẽ.

13Hãmri nẽ mẽ nẽ mẽkarõmnuti jano. Nẽ akupỹm mẽ à xwỳnhjê ho mex kaxyw mẽmo htwỳm o mẽ hkrã gregrer nẽ Jejus nhỹ hã akupỹm mẽ ho mex.

Mẽ kot Juãw Paxis pĩr ã mẽ harẽnh

Matêwre 14.1-12; Rukre 9.7-9

14Tã nhũm mẽ piitã Jejus jarẽnh ma nẽ axpẽn mã tanhmã harẽnh to ho pa. Nom ahpỹnhã tanhmã harẽnh to. Na prem kamã harẽnh o:

—Nà Juãw Paxis pimràata na. Pěr akupỹm htĩr jakamã na hte ã mẽ kot aa mẽmoj pumunh kêt kwỳ ho anhỹr o pa. Anẽ.

15Nẽ kamã axtem harẽnh o:

—Nà tãm kêt. Pěr finat Eris na. Anẽ.

Nẽ kamã axtem harẽnh o:

—Nà tãm kêt. Pěr Tĩrtũm nhỹ hã kapěr jarẽnh xwỳnhjê hõ na. Te kot amnepê mã mẽ kot Tĩrtũm nhỹ hã tanhmã amnhĩ nhĩpêx to xwỳnhjê kot amnhĩ nhĩpêx pyrãk o kot amnhĩ nhĩpêx kẽnã.

Anhỹr o ahpỹnhã harẽ. 16Hãmri nhũm Ijaew o amnhĩptar xwỳnh pẽ Erox Æxipasja mẽ kot ã harẽnh anhỹr ã mẽ kuma nẽ Juãw Paxis mã hamaxpěr kurê kumrêx. Hãmri nẽ mẽ kãm:

—Nà pěr Juãw Paxista na. Ixte mẽ kãm hã ixamnênh nhũm mẽ kot inhmã mut krãhyr xwỳnhhta mãn ra tanhmã amnhĩ to nẽ akupỹm htĩr. Anẽ.

17-20Na pre ra pahi Erox Æxipasja htõ Pirip pẽ hprõ Eroxis pytà nẽ ho hprõ nhũm hkra niti mẽ wa hwỳr ahpa. Hãmri nhũm Juãw Paxisja tee ri ja hã pahihiti Erox Æxipasja pumu nẽ hã kãm akir nẽ kãm:

—Tk. Kwa Tĩrtũm kêp ja omnuj. Ra kot ja nẽ mẽ pahkurê htã ka axtem nẽ ã amnhĩ nhĩpêx anẽ.

Anhỹr jakamã nhũm hprõ Eroxisja amnhĩ tã kuma nẽ kamã gryk tỳx nẽ. Nẽ kãm hpĩr prãm nẽ. No nhũm pahi Erox Æxipas kãm hpĩr prãm kêt nẽ. Juãw Paxis kot Tĩrtũm kõt amnhĩ nhĩpêx nhũm kot hã omunh mex jakamã kãm hpĩr prãm kêt nẽ. Juãw na pre hte xatã kãm Tĩrtũm kapěr jarẽnh o pa. Nhũm pahihiti Erox Æxipasja kormã hprĩ hã mar mex kêt tã hã hpijaam nẽ kãm mar prãm nẽ. Nom nhũm hprõ kãm hpĩr prãm jakamã nhũm kêp mẽ kãm hã amỹnê nhũm mẽ ma o tẽ nẽ haxà nhũm mex nẽ mẽ hagiênh xà kamã hkrĩ ho krĩ.

21-24Tã nhũm jãã nhũm pahi Erox Æxipas kator ã arĩgro kato nhũm mẽ piitã hwỳr mra nẽ hã akuprõ nẽ hã hkĩnh nẽ hã apkur o hkrĩ. Õ kôwenatôjaja nẽ hkrãmnhwỳjaja nẽ krĩ hkwy kamã mẽõ pahijaja nhũm mẽ ohtô nẽ hã akuprõ nẽ hã hkĩnh. Hãmri nhũm hprõ Eroxis kra nitija mẽ hwỳr axà nẽ mẽ kãm gre. Mẽ kot omunh nẽ kamã hkurẽ pix kaxyw

mě noo mã hpijaàm kêt nê ã mẽ kãm grer anê. Hãmri nhũm pahi Eroxo omu nhũm ja kãm mex nê nhũm mẽ piitã hkĩnh nê kamã nopyma nê. Nê grer kãm hpijaàm kêt nê tanhmã mẽ kãm grer to nhũm mẽ omu nê kamã no pyma nê. Hãmri nhũm pahi Eroxo Æxipasja kãm:

— Nã ãm hãmri. Na ka mẽ inhmã agrer mex nê. Jakamã kwa mãmri mẽmoj tã ixwỳ. Amã mẽmoj prãm xà hkôt inhmã mẽmoj jarê pa amã kugõ. Æm hãmri na pa amã amnhĩ jarê. Na pa Tirtũm noo mã ã amã amnhĩ jarênh anê. Ka mamri ixkukrêx mex kwỳ hã ixwỳ pu axpên mã ho axkjê. E mẽmo na amã hprãm? Anê.

Hãmri nhũm kuma nê ma katorxà hwỳr tẽ nê kãm harê nê kãm:

— Xê mẽmoj tã kot paj we kuwỳ? Anê.

Hãmri nhũm kuma nê hamaxpêr o:

— Ma ãm hãmri koja mẽ tã jarãhã inhmã Juãw Paxis pĩ. Anê.

Hãmri nê hkrata mã kãm:

— Ma Juãw Paxis krã hã kot kaj awỳ kê mẽ amã kugõ ka man ixwỳr o tẽ. Anê.

25 Hãmri nhũm kuma nê akupỹm pahi hwỳr axà nê kãm:

— Ma Juãw Paxis krã kot kaj inhmã agõ. Pasiiti kamã axà nê inhmã agõ pa ma amnhĩm o ixtêm kurê kumrêx. Æm ja pix na inhmã hprãm. Anê.

26 Hãmri nhũm tee ri kuma nê hkapri nê. Nê hamaxpêr o:

— Hêxta waa nê. Inhmã hpĩr prãm kêt. Nom ra ixte ixkutã mẽ hkrĩ xwỳnhjê noo mã inhmã kãm mẽmoj prãm xwỳnh nhõr ã amnhĩ jarênh nhũm ixte kãm õr ã amnhĩ jarênh nhũm mẽ piitã mẽ kot inhmar jakamã tanhmã kot pa we amnhĩ to nê kêp nê? Nã pa nê hkêt nê. Anê.

27 Hãmri nê õ pôristijê mã kãm:

— E mẽ ma Juãw Paxis wỳr mra nê mut krãhta nê pasiiti kamã hkrã xà nê akupỹn o tẽ nê kãm agõ. Anê.

Hãmri nhũm mẽ kuma nê ma mẽ hagiênh xà hwỳr mra nê Juãw wỳr axà hãmri nê mut krãhta. 28 Hãmri nê pasiiti kamã hkrã xà nê akupỹm o tẽ nê kot hã hwỳr xwỳnh mã kugõ nhũm kumỳ nê ma katorxà hwỳr o tẽ nê kãm kugõ.

29 Hãmri nhũm Juãw Paxis kôt mẽ pa ho mẽ pa xwỳnhjaja tee ri harênh ma nê hkapri htỳx nê. Hãmri nê pahi Eroxo Æxipas wỳr mra nê ã hã kuwỳ nhũm mẽ kãm kugõ nhũm mẽ kumỳ nê ma o mra nê kên kre kamã haxà.

Jejus kot mẽ ho 5.000 nê mẽ kãm õ hã harênh

Matêwre 14.13-21; Rukre 9.10-17; Juãw 6.1-14

30 Tã hãmri nhũm mẽ kot Jejus nhỹ hã mẽ ahkre ho mẽ pa xwỳnhjaja akupỹn Jejus wỳr mõn pøj nê kãm amnhĩ jarê. Tanhmã mẽ kot mẽ ahkre hto ho pa nê tanhmã mẽ ho mex to ho pa hã kãm amnhĩ jarênh pa.

31Tã nhũm mẽ piitã axpẽn pãnhã kot Jejus mar kaxyw mẽ hwỳr mra nhũm mẽ kormã apkur kêt nê. Jakamã nhũm Jejus hkôt mẽ pa ho mẽ pa xwỳnhjê mã:

—E ma pu mẽ awrã kaprỳ hwỳr mō nê nhỹri pahkrĩ nê pakôkôt nê apku.

32Anê hãmri nhũm mẽ gôx kãm kanôre wỳr agjê nê ma ahte xarmã awrã kaprỳ hwỳr mō. 33Nhũm krĩ hkwỳ nhô xwỳnhjaja mẽ omu hãmri nê nhỹhỹm mẽ mōr xà hã mẽ omunh kurê kumrêx. Hãmri nê krĩ hkwỳ rũm ma mẽ ãhkrep mra nê mẽ kãm amnhĩ to wa nê pôj nê mẽ kutêp hkrĩ. 34Hãmri nhũm mẽ mō nê mẽ hwỳr pôj nê kre kura nê kanôre nhô. Hãmri nhũm Jejus mẽ hwỳr api nê mẽ omu nê hamaxpêr o:

—Hêxta waa nê. Na mẽ omnu nê pa. Te mẽ kêp ôwêhti jamãr xwỳnh kêt nê htỳx ri pa xwỳnh kot amnhĩ nhĩpêx pyrãk. Mêhō kot mẽ kamã ukaprĩ nê tanhmã mẽ ho mex to ho pa? Anê.

Hãmri nê mẽ kamã ukaprĩ nê xa nê Tirtũm kapêr o mẽ ahkre rax nê.

35-36Tã nhũm myt àr kaxyw nhũm hkôt mẽ kot pa ho pa xwỳnhjaja hwỳr mra nê kãm:

—Kwa hãmri na ra amỹkry htỳx nê. Mẽ hano kê mẽ ma nhỹri krĩ hkwỳ hwỳr mra nê tokyx amnhĩm mẽmoj japrô nê kuku nê hikwỹ nê gôr. Mo jar kapôt ã mẽ apkur xà? Anê.

37Hãmri nhũm mẽ kuma nê mẽ kãm:

—Kwa nà mẽ kamjaja mẽ kãm mẽmoj gō kê mẽ kuku. Anê.

Hãmri nhũm mẽ kuma nê tee ri hamaxpêr nê kãm:

—Kwa mo mẽ kaxyw mẽ pakàxpore rax? Kot pu mẽ pakàxpore ho 200 nê ho mẽ kãm mẽmoj japrôr tã nom nhũm mẽ ãm ho hkryre nê kuku nê ho ôhy htu hkêt nê. Mẽ ohtô rax kumrêx kênã. Anê.

38Hãmri nhũm mẽ kãm:

—Nà kot puj mẽ kãm mẽmoj japrôr kêt nê. No mẽ panhō pãwtita? Tanhmã na arĩ kute? E mẽ atō tẽ nê omu nê akupỳn tẽ nê inhmã harê. Anê.

Hãmri nhũm ja ma tẽ nê omu nê akupỳn tẽ nê kãm:

—Nà pãwti ãm kêp 5 pix. Nê kaxyw tep ãm pijakrutre. Anê.

39Hãmri nhũm Jejus kuma nê mẽ kãm:

—Tôe. Mẽ kãm anê kê mẽ ahpỳnhã ri hije nê hkrĩ. Anê.

40Hãmri nhũm mẽ piitã ahpỳnhã kêp 50 nê hije nê hkrĩ hpa.

41Nhũm Jejus pãwti mẽ tepta jamỳ nê kànhmã kaxkwa hwỳr rĩt nê Tirtũm mã kupê nê kãm harê nê kãm:



Makre 6.30-44

— Pa Papaj? Nà ka na apê mẽ inhmã mẽ inhõ ho apa xwÿnh jakamã amex o amex. Anê.

Hãmri nê mẽ kãm ho hkry hpa nê hkõt mẽ pa ho mẽ pa xwÿnhjê mã kugõ nhũm mẽ ô ri ho mra nê ho mẽ hipêx pa. Pãwti mẽ tepta nhũm mẽ ho mẽ hipêx pa. 42-44Nhũm mẽ piitã apkur mex nê. Mẽõja mẽ kêp grire htã nhũm Jejus tanhmã mẽ kãm ho rax to nhũm mẽ ohtô rax tã piitã kuku nê ho õhy htu hpa. Mẽmyjaja kêp 5.000 nê kaxyw mẽ hprõ nê mẽ hkrajaja nhũm mẽõja ho mẽ hipêx pa nhũm arĩ hakrêx prá. Jakamã nhũm Jejus kõt mẽ pa ho mẽ pa xwÿnhjaja akupÿm hakrêx o pikuprõnh pa nê ho kawà o 12 nê ho nýt.

Jejus kot gô krãhkã hã htêm ã harênh

Matêwre 14.22-33; Juãw 6.15-21

45-46Tã nhũm Jejus hkõt mẽ pa ho mẽ pa xwÿnhjê mã kãm:

— E mẽ kanõre mã axà nê ma akupÿm ixkukamã krĩ pê Petsêj wÿr rê. Pa jajê jano hãmri nê ma tẽ nê nhÿri Tĩrtũm mã amnhĩ jarê nê rĩ ma mẽ akõt tẽ. Anê.

Hãmri nhũm mẽ kuma nê kanõre mã gjêx pa nê ma mõ nhũm Jejus mẽ kot mar xwÿnhjê janor pa nê ma hixêt prêk ã api nê Tĩrtũm mã amnhĩ jarênh o nhÿ.

47Tã nhũm kamàt nhũm arĩ ahte kÿxpê nhÿ. Nhũm hkõt mẽ pa ho mẽ pa xwÿnhjaja kormã kanõre kamã mõ. 48Hãmri nhũm Jejus amÿm mẽ omu nhũm kôk ra mẽ kutã àpêr tÿx kumrêx nhũm mẽ tee ri amnhĩ nhĩpêx nê tee ri rrêm̄ti ho gô rênh nhĩpêx o hkrĩ.

Tã nhũm ra krãhyre kà nhũm Jejus Tĩrtũm mã amnhĩ jarênh pa nê kànhmã xa nê ma mẽ hkõt tẽ. Nom kanõre kamã htêm kêt nê gô krãhkã hã xa nê mẽ hwÿr hpar o tẽ. 49-50Hãmri nê mẽ hwÿr kato nê mẽ kamã hamak kaxyw hêx rom kot mẽ hakrenh mã. Nhũm mẽ amnhĩ wÿr omu nê mẽkarõ hã hkamnhĩx nê tee ri amnhĩ kukamã hamaxpêr nê umaj htetet nê àmra rax nê. Hãmri nhũm mẽ kãm:

— Tk. Kwa mẽ amã ma hkêt nê. Pa na pa mẽ akõt tẽ. Anê.

51Hãmri nê mẽ hwÿr kanõre hkrem axà nhũm kôk xàpêr tÿxta hapêx. Hãmri nhũm mẽ Jejus kamã no pyma nê tee ri hamaxpêr nê axpên mã:

— Kokÿÿ. Tanhmã na we amnhĩ to nê gô krãhkã hã hpar o man mẽ pahkõt tẽ mẽ pahwÿr àr mẽ nhũm kôk hapêx par kurê kumrêx. Anê.

Hãmri nê tee ri kot ã amnhĩ nhĩpêx anhÿrja kukamã hamaxpêr o hkrĩ. 52Kormã mẽ kot hprĩ hã Jejus tanhmã kute hã omunh kêt jakamã. Tĩrtũm pyrã nê àhpumunh o àhpumunh ã omunh mex kêt jakamã tee ri pãwti grêre ho mẽ hipêx par nê gô krãhkã hã htêm nê kôk o pinhkrênh ã omu nê tee ri ã kot amnhĩ nhĩpêx anhÿrja kukamã hamaxpêr.

Kenējare kamã Jejus kot akupÿm mẽ ho mex ã harênh

Matêwre 14.34-36

53Tã nhũm mẽ xarmã rê nẽ krĩ pê Jenējare hwÿr pøj. Hãmri nẽ kanôre nhô 54nẽ api nẽ kuhê nhũm krĩ nhõ xwÿnhjaja Jejus pumunh kurê kumrêx nẽ axpẽn mã:

—Kwa pěr Jejusta na mō. Nà tãm kênã. Anẽ.

55Hãmri nẽ hkĩnh nẽ ma kape hã mẽ à xwÿnhjê hkôt mrar kurê kumrêx nẽ mẽ harir xà rãhã mẽ hamÿ nẽ akupÿm Jejus wÿr mẽ o mra. Nhÿri hpôx xà kamã omu nẽ hwÿr mẽ o mra.

56Na pre htem ã Jejus nhĩpêx anẽ. Jakamã nhũm hte ma nhÿhÿm mra. Krĩ rũnh kôt mra nẽ krĩ hkryre hkôt mra nhũm mẽ omu nẽ hwÿr mẽ à xwÿnhjê ho mra nẽ mẽ ho kuwÿ nẽ kãm:

—Pa? Kwa kê jajaja akupÿm mex kaxyw apê axê pix kupê nà? Anẽ.

Hãmri nhũm mẽ kãm:

—Tôe. Nà kwãr mẽ mãmri hkupê. Anẽ.

Hãmri nẽ mẽ kot kêp ê kupênh xwÿnh piitã akupÿm mex pa.

Mẽ higêt hkôt mẽ kot amnhĩ nhĩpêx xwÿnhjê jarênh

Matêwre 5.21-48, 15.1-20

7 1-4Tã nhũm Mojes kapêr o mẽ ahkre o mẽ pa xwÿnh kwÿjjaja Jerujarê rũm Jejus wÿr mō. Hãmri nẽ hã akuprõ nẽ hkôt mẽ pa ho mẽ pa xwÿnhjê kot amnhĩ nhĩpêx ã mẽ omunh o kuhê. Ijaew na prem mẽ hkukamã mẽ higêtjê kapêr kôt ri tanhmã amnhĩ nhĩpêx to ho pa. Jakamã mẽ uràk nẽ apkur kaxyw nẽ xatã amnhĩ nhĩhkra kuhõnh japjê nẽ rĩ kormã apku. No mẽ amnhĩ nhĩhkra grã pix kuhõnh nẽ hkrĩ nẽ apkur kêt nẽ. Kuhõnh japjê nẽ kormã hkrĩ nẽ apku. Tĩrtũm kot ja hã mẽ omunh nẽ amnhĩm mẽ mex ã mẽ harênh ã amnhĩ kamnhĩx jakamã na prem ã amnhĩ nhĩpêx anhÿr o pa. Nẽ nhÿri amnhĩm mẽõ hkwÿ japrõ nẽ akupÿm òrkwÿ hwÿr o mra nẽ haxwÿ nẽ mẽ higêt pyrã nẽ wÿr japjê rũnh kumrêx nẽ rĩ kormã apku. Nẽ mẽ uràk nẽ poti nẽ gøj nẽ papêre hkre kahõnh japjê rũnh nẽ rĩ kormã kamã õ nhĩpêx. Mẽ higêt pyrã nẽ ã amnhĩ nhĩpêx anhÿr o pa. Tĩrtũm kot ja hã mẽ omunh nẽ amnhĩm mẽ mex ã mẽ harênh prãm xàj. Nom nhũm Jejus kôt mẽ pa xwÿnhjaja na prem ã amnhĩ nhĩpêx anhÿr kêt nẽ. Na prem apkur kaxyw nẽ katat kôt amnhĩ nhĩhkra kuhõ nẽ àmnhĩx apkur o hkrĩ. Jakamã nhũm Parijew nhõ xwÿnh mẽ Tĩrtũm kapêr tũm o mẽ ahkre xwÿnhjaja tee ri ã mẽ kot amnhĩ nhĩpêx anhÿr ã mẽ omu nẽ mẽ hã Jejus kukja nẽ kãm:

5—Pa Jejus? Kwa mẽ inhmã mẽmoj jarê. Amnepêm mẽ panhigêtjaja na pre htem apkur kaxyw nẽ amnhĩ nhĩhkra kuhõnh japjê rũnh kumrêx nẽ arĩ kormã hkrĩn apku. Jakamã na pa htem mẽ uràk nẽ ã amnhĩ nhĩpêx

anê. No akôt mẽ pa ho mẽ pa xwÿnhjaja na htem ho mẽ ixpyrà kêt nê. Kwa mo na htem ã amnhĩ nhĩpêx anhÿr kêt nê? Anê.

6Hãmri nhũm mẽ kuma nê mẽ kãm amnepêm Tĩrtũm nhÿ hã kapêr xwÿnh pê Ijais kapêr jarê nê mẽ kãm:

— Nà ãm hãmri na pre finat Ijaisja amnepêm tanhmã mẽ ajarênh to. Te Tĩrtũm tãm kapêr pyræk o mẽ ajarê nê mẽ ajarênh o:

Mẽ kãm ixkĩnh ã amnhĩ jarênh tã mẽ kãm ixkĩnh kêt. Na htem ãm kãm ixprãm ã amnhĩ jarênh kaprÿ.

7 Mẽ kot ixkapêr kuhpa hã amnhĩ krã hkôt mẽmoj tã hkwÿjê mã karõ ho pa jakamã na htem ãm kot ixkôt amnhĩ nhĩpêx ã amnhĩ jarênh kaprÿ. Anê.

Ã na pre mẽ ajarênh anê. 8-9 ãm hãmri na pre mẽ ajarê. Na ka htem mẽ panhĩgêet kapêr kôt pix mã amnhĩ nhĩpêx o apaja gryk ã ra Tĩrtũm kapêr kaga hpa. Te mẽ akapêr mex o kot Tĩrtũm kapêr jakrenh pyræk. 10 Na pre finat Mojes Tĩrtũm nhÿ hã mẽmoj tã mẽ pamã karõ ho:

Ker ka mẽ anhĩpêêxà nê mẽ akatorxà wa hã apijaãm o ri apa. Jao wa kutã anojarêet rãhã nê. Nom kot kaj mẽ ho mex hkêt nê tanhmã mẽ kãm akapêr punuj to hãmri nhũm mẽ akwÿjaja ja mÿrapê mẽ apa. Anê.

Na pre ã finat Mojesja Tĩrtũm nhÿ hã mẽ pamã karõ anê. 11 No mẽ kajaja na ka mẽ axtem nê tanhmã akwÿjê mã ja hã karõ hto nê mẽ kãm: “Kot kaj mẽ mẽmo arĩgro hã akàxpore hkwy nom anhĩpêêxà ho ajuta kaxyw kãm hkwy nhõr kêt nê. ãm wa kãm ate ho ajuta kêt ã amnhĩ jarê hãmri nê Tĩrtũm mã amnhĩ jarênh xà hã ixkre hwÿr mãn o tẽ nê mẽ ixte ixkre ho mex kaxyw mẽ inhã agõ. Kot kaj mẽ ã amnhĩ nhĩpêx anê nhũm Tĩrtũm ja hã mẽ apumu nhũm ja kãm mex nê. E kêr ka mẽ ã amnhĩ nhĩpêx anhÿr o ri apa.” Anhÿr o na ka htem akwÿjê mã karõ. 12 Jao mẽ kot mẽ hipêêxà nê mẽ katorxà ho ajuta nê mẽ hkurê. 13 Te mẽ amã mẽ panhĩgêet kapêr mex o kot Tĩrtũm kapêr jakrenh pyræk o na ka htem amnhĩ nhĩpêx. Jao te Tĩrtũm kapêr mex kêt pyræk o hipêx nê mar kêt nê apa. ã na ka htem Tĩrtũm kapêr kuhpa hã amnhĩ nhĩpêx anhÿr o ri apa. Anê.

Mẽ pajamaxpêr punuj kôt mẽ pahomnu hã harênh

Matêwre 15.10-20

14 Tã nhũm Jejus Parijew nhõ xwÿnhjê mẽ hkwÿjê mã kapêr pa hãmri nê amnhĩ wÿr ra mẽ kot mar o kuhê xwÿnhjê mã hpa ho apê nê mẽ kãm:

— E pa mẽ amã mẽmoj jarê ka mẽ inhma nê inhmar mex nê. 15-16 Na hte Tĩrtũm kapêr tũm o mẽ ahkre xwÿnhjaja amnhĩ krã hkôt mẽ ate amnhĩ nhĩhkra kuhõnh japjê hã mẽ amã karõ ho pa. Nê amnhĩ krã hkôt mẽ axàpkur xà hã tanhmã mẽ amã karõ hto ho pa. Mẽ ate ã amnhĩ

nhípêx anhÿr nhũm Tirtũm kot ja hã mẽ apumunh kôt amnhĩm mẽ amex ã mẽ ajarênh kaxyw nhũm htem ã mẽmoj tã mẽ amã karõ anê. Nom na hte Tirtũm tanhmã mẽ panhĩhkra kuhõnh to hã mẽ pahpumu nê ãm hã mẽ pa hpumu. Nê mẽmo mẽ paxàpkur xà hã mẽ pahpumu nê ãm hã mẽ pahpumu. Ja kãm tanhmã kute hkêt. Na hte ja hã mẽ omunh xà hkôt amnhĩm mẽ mex ã mẽ harênh rỳ mẽ mex kêt ã mẽ harênh kêt nê. Rỳ mẽ hakwa ho mẽmoj kur ã mẽ omunh xà hkôt tanhmã mẽ harênh to hkêt nê. ãm mẽ hakwa ho tanhmã kapêr to pix ã mẽ mar kôt na hte tanhmã mẽ harênh to.

Anhÿr o mẽ kãm kapêr. 17Hãmri nê mẽ kot mar o kuhê xwÿnhjê re nê hkôt mẽ pa ho mẽ pa xwÿnhjê mẽ mẽ amnhĩm hikranh xà hã ixkre hwÿr agjê. Hãmri nhũm hkôt mẽ pa ho mẽ pa xwÿnhjaja tee ri Jejus kot tanhmã mẽ hakwa jarênh to hã kuma nê hã hkukja nê kãm:

—Kwa mon ka ri mẽ inhmã ã ja jarênh anê? Anê.

18Hãmri nhũm mẽ kãm:

—Kwa xàn ka mẽ kormã aprĩ hã ja mar mex kêt nê? E pa ixprĩ hã mẽ amã harê ka mẽ inhma. Nà mẽ apkur xà na hte mẽ hkrã hi kamã mẽ hamaxpêr wÿr gjêx kêt nê. 19Na hte ãm mẽ õhy pix wÿr agjê nê gaa nê nhãm hapôj nê hapêx. Na htem mẽ apkur xà nhÿ hã tanhmã amnhĩ tomnu to hkêt nê. Jakamã na hte Tirtũm mẽ apkur xà hã mẽ omunh xà hkôt tanhmã mẽ harênh to hkêt nê. Anê.

Nhũm pre ã mẽ kãm kapêr anhÿr o mẽ paxàpkur xà piitã mex ã harê. Jakamã na hte Tirtũm krajaja àmnhĩx mẽmoj piitã hkur o pa nê kãm mẽmoj kur puma hkêt nê. Jakamã nhũm Jejus ã mẽ kãm kapêr anê nê mẽ kãm:

20—Mẽ hkrã hi kamã mẽ hamaxpêr punuj pix nhÿ hã na htem tanhmã amnhĩ tomnuj to. Jakamã na hte Tirtũm tanhmã mẽ hamaxpêr to ho pa hã mẽ omunh xà hkôt tanhmã mẽ harênh to. Nom mẽ kot mẽmoj kur ã mẽ omunh xà hkôt rỳ mẽ ãhkra kuhõnh japjê hã mẽ omunh xà hkôt tanhmã mẽ harênh to hkêt nê. Ja tanhmã kêp kute hkêt. 21-22Nom koja mẽhõ hamaxpêr punuj nê ra hkôt tanhmã amnhĩ tomnuj to.

Jao axpên kamã hpijaàm kêt nê.

Rỳ mẽhõx pĩ rỳ mẽ kêp ahkĩ.

Rỳ mẽ kêp mẽ hprõ rỳ mẽhkuprỳ ho amnhĩkati.

Rỳ ri axpên pê õxỳ.

Rỳ tanhmã hkwÿjê homnuj to.

Rỳ tanhmã mẽ ho kapêr punuj to.

Rỳ hêx rom mẽ no kupyrr o ri pa.

Rỳ mẽmoj tã amnhĩ to jarkrar o pa.

Rỳ axpên kukrêx pumu nê kãm ho õ hprãm xàj hã õ xwÿnhhta kamã gryk.

Rỳ htỳx ri tanhmã amnhĩ nhípêx to.

Mě hamaxpěr punuj jakamã na htem ã ri amnhĩ nhĩpêx anhÿr o pa. 23Tã ã mẽ kot amnhĩ nhĩpêx anhÿr ã mẽ omunh xà hkôt na hte Tĩrtũm mẽ kot amnhĩ tomnuj xwÿnh hã mẽ harẽ. Anẽ.

Měhõ kot hkra kaxyw Jejus mã hamaxpěr ã harěnh

Matêwre 5.21-28

24Tã nhũm Jejus mẽ hkôt mẽ pa ho mẽ pa xwÿnhjaja nhÿhÿm nojarêh hãmri nẽ krĩ rũm hapôj nẽ ma krĩ pê Xir pu hã ri pa. Hãmri nhũm Jejus hkwÿjê mã:

— E kwa pu mẽ tokyx ixkre mũj wÿr mõi mẽ kuri pøj nẽ kamã amnhĩm hikra. Pu mẽ pahpôx tokyx anẽ kê krĩ nhõ xwÿnhjaja mẽ pahpôx ã mẽ pahpumunh kêt nẽ.

Anhÿr tã nom nhũm mẽ piitã mẽ harěnh ma nẽ mẽ hã akuprõ. 25-26Nhũm mẽhõ ni haxwÿja Jejus hpôx ã harěnh ma nẽ ma hwÿr tẽ. Nom kêp Ijaew kêt axtem Gres nhõ xwÿnh na pre. Pika pê Sir kamã krĩ mẽ kot kãm “Wěniš” anhÿr xwÿnh kamã na pre kato. Nhũm pre mẽkarõmnuti kêp hkra ni mã axà. Hãmri nhũm õ mãmãj tee ri omu nẽ ra Jejus hpôx ã harěnh ma nẽ ma hwÿr tẽ. Hãmri nẽ hwÿr axà nẽ hparpê hkõnkrã ho htẽm nẽ nhÿ nẽ kãm:

— Xê Pahihti. Inhmã ixkra nẽ mẽkarõmnuti jano kê ma tẽ kê akupÿm inhmã mex. Anẽ.

27Hãmri nhũm kãm:

— Nà kormã. Na pre Tĩrtũm taxy kormã Ijaewjê pix wÿr inhmẽ. Jakamã na pa kormã nhãm mẽ akwÿjê hõ tanhmã mẽ ato mex to hkêt nẽ. Anẽ.

28Hãmri nhũm tee ri amnhĩ tã kuma nẽ kãm:

— Ma ãm hãmri na ka ja jarẽ. Ixpê Ijaew kêt tã nom mẽ kuxwar we ixto mex grire kêt wehe. Anẽ.

29Hãmri nhũm kãm:

— Nà ãm hãmri na ka ã akra kaxyw inhmã ajamaxpěr tÿx anẽ. Jakamã kot paj nẽ mẽkarõmnutita jano. Koja axte tanhmã apê ho hkêt nẽ. E ma akupÿm hwÿr tẽ nẽ omu. Anẽ.

30Hãmri nhũm kuma nẽ ma akupÿm õrkwÿ hwÿr tẽ nẽ omu. Nhũm ra mẽkarõmnutija kêp kato nẽ ma tẽ nhũm akupÿm tãm hkrã nẽ hkĩnh nẽ par kãm hkõkõt o nõ.

Hamak kro nẽ kapěr krok xwÿnh jarěnh

Matêwre 15.29-31

31Tã nhũm Jejus mẽ hkôt mẽ pa ho mẽ pa xwÿnhjaja krĩ pê Xir rũm hapôj nẽ akupÿm gõ rax pê Garirej wÿr ma mra. Pyka pê Sitõ jakre nẽ mõi nẽ pyka pê Tekap jakre. 32Hãmri nẽ kormã hpôx o mõi rôm nhũm

mě amnhĩ wỳr Jejus pumu nẽ hwỳr mēhõ myja o tẽ. Kapěr krok nẽ umar kêt xwỳnhhta nhũm mẽ wỳr o tẽ nẽ kãm:

—Pa? Ot pa mẽ awỳr ixkràmnhwỳta o tẽ. Kwa hã anhĩhkra xi kê akupỹm mẽ inhmã mex. Anẽ.

33Hãmri nhũm omu nẽ hpa hã kupy nẽ mẽ kêp o kato nẽ nhỹri mẽ hkàx ã o xa. Nẽ akutã hamak kre kupê nẽ argôx mẽ nẽ ho õhto htok. 34Hãmri nẽ kaxkwa hwỳr rít nẽ htyk xà mēnh tỳx nẽ kãm kapěr. Mẽ pakapěr kãm kãm: “E ajamak katêr nẽ anhõhto kaxkrit.” Anẽ. Nom kapěr kãm kãm: “Epata.” Anẽ. 35Hãmri nhũm hamak katêr nẽ õhto kaxkrit kurê kumrêx nẽ tãm kapěr nẽ tãm ama. 36-37Hãmri nhũm mẽ kot omunh xwỳnhjaja amnhĩ jaêr pê Jejus kot ho mex ã omu nẽ kamã no puma nẽ. Hãmri nhũm mẽ kãm:

—Kwa kêr ka mẽ akwỳjê mã ja hã ijarēnh kêt nẽ.

Anhỹr tã no nhũm mẽ kuma nẽ ãm kuma nẽ ma mẽ piitã mẽ kãm harēnh o ri hprõt nẽ mẽ kãm:

—Kwa Jejus na mex o mex. Na hte mẽ ho mex o pa nhũm mẽ umar kêt xwỳnhjaja akupỹm tãm ama nhũm mẽ kapěr kêt xwỳnhjaja akupỹm tãm kapěr. ãm hãmri na hte ã mẽ hipêx anhỹr o pa. Nã ãm mex o mex. Anẽ.

Jejus kot mẽ ho 4.000 nẽ mẽ kãm mẽ õ hã harēnh

Matêwre 15.32-29

8 1-2Tã nhũm arĩgro hõ hã nhũm mẽ ohtõ nẽ nhỹri kapõt ã Jejus ã htu rax nẽ kot mẽ ahkre mar o kuhê hã apkati axkrunēpxi. Nhũm mẽ apkur xà hã mẽõja ra mẽ kêp hapêx. Hãmri nhũm Jejus ja hã mẽ omu hãmri nẽ hkõt mẽ pa ho mẽ pa xwỳnhjê mã akir nẽ mẽ kãm hpa ho apê nẽ mẽ kãm:

—E mẽ amnẽ ixwỳr mra nẽ ixkapěr ma. Anẽ.

Nhũm mẽ hwỳr mra nẽ kuhê nhũm mẽ kãm:

—Kwa na pa inhmã mẽ kot inhmar o kuhê xwỳnhjê kaprĩ nẽ. Na mẽ ra mẽ pahkõt ri pa hã apkati axkrunēpxi nhũm mẽ apkur xà hã mẽõja mẽ kêp hapêx. 3Mẽ õ krĩ hwỳr awry jakamã koja mẽ mẽmoj kur kêt rãhã ma akupỹm pa hãmri nẽ pry hã hirot nẽ rôrôk o pa. Hãmri pa inhmã mẽ hkaprĩ nẽ. Anẽ

4Hãmri nhũm mẽ kuma nẽ axte tee ri hamaxpěr nẽ kãm:

—Kwa nã nhỹhỹnh kot puj kêt mẽ kãm mẽmoj to mra? Jar ãm kapõt pix kênã. Anẽ.

Hãmri nhũm mẽ kãm:

5—Nã tanhmã na mẽ anhõ pãwtija kute? Anẽ.

Nhũm mẽ kãm:

—Ãm kêp 7 pix. Nẽ kaxyw tep kwỳ no ãm grêre. Anẽ.

6Hãmri nhũm mẽ kuma nẽ mẽ kot mar o kuhê xwỳnhjê mã anẽ nhũm mẽ kuma nẽ hkrĩ pa. Hãmri nhũm pãwti jamỳ nẽ ho Tĩrtũm wỳ nẽ kãm:

— Pa Papaj. Nà ka na apê mẽ inhmã mẽ inhõ ho apa xwỳnh. Jakamã amex o amex. Âm amex kumrêx. Anê.

Hãmri nê mẽ kãm ho hkry pa nê hkôt mẽ pa ho mẽ pa xwỳnhjê mã kugõ nhũm mẽ ho mẽ hipêx pa. 7Nhũm hpãnã tepta py nê mã ho anê nê ho Tirtũm wỳ. Hãmri nê hkôt mẽ pa ho mẽ pa xwỳnhjê mã kugõ nhũm mẽ mã ho anê nê hamỳ nê ho mẽ hipêx pa. 8-9Hãmri nhũm mẽ ohtô rax kumrêx tã piitã apku nê õhy htu pa. Memyjaja kêp 4.000 nê kaxyw mẽ hprõjaja nê mẽ hkrajaja. Tã nhũm Jejus mẽ apkur xàja o mẽ hipêx pa. Nhũm hkôt mẽ pa ho mẽ pa xwỳnhjaja hakrêx o akuprõ nê ho kawà ho 7 nê ho nýt. Hãmri nhũm Jejus ma akupỹm mẽ õ krĩ hwỳr mẽ kot mar xwỳnhjê jano nhũm mẽ ma akupỹm hapêx. 10Hãmri nhũm Jejus hkôt mẽ pa ho mẽ pa xwỳnhjê mẽ ro hã kanõre hkrem agjê nê mẽ hkwỹm ma Tamanut wỳr mõ.

Parijew nhõ xwỳnh kwỳ kot mẽmoj tã Jejus kamã hamak ã mẽ harênh

Matêwre 12.38-42, 16.1-4; Rukre 12.54-59

11Tã nhũm mẽ Tamanut wỳr põj nhũm Parijew nhõ xwỳnh kwỳjaja Jejus pumu nê ma hwỳr mra nê mẽmoj tã kuwỳ nê kãm:

— Pa. Ot pa mẽ awỳr mra. Kwa mẽ inhmã aa mẽ ixte mẽmoj pumunh kêt õ ho anê. Pa mẽ ja hã apumu nê Tirtũm kot mẽ ixwỳr amênh ã akõt ijamaxpêr kurê kumrêx. E tokyx. Anê.

Kot tee ri mẽ kãm mẽmoj to anhỳr kaxyw nê ho anhỳr kêt nhũm mẽ kot hã omunh nê ma hkwỳjê mã ho kapêr punuj kaxyw nhũm mẽ ã hêx rom kãm kapêr anê. 12Nhũm ra kãm mẽ kot amnhĩ kaxyw hkôt hamaxpêr kêt kãm ã kapêr anhỳr mar kaga nê. Hãmri nê tee ri amnhĩ tã mẽ hamaxpêr ã mẽ omu nê htyk xà mênh tỳx nê mẽ kãm:

— Hêxta waa nê. Mẽ ajamaxpêr punuj pix o na ka htem ri ajamaxpêr o apa. Ixpê Tirtũm kot mẽ awỳr inhmênh xwỳnh tã ka mẽ ja hã ixkõt ajamaxpêr kêt nê. Nà mo kaxyw kot pa kêt mẽ amã mẽmoj to anê? Kot paj ho anê ka mẽ omu nê âm omu nê ixkõt ajamaxpêr kêt nê. Nà kot paj mẽ amã mẽmoj to anhỳr kêt nê. Anê.

13Hãmri nê mẽ kure nê hkôt mẽ pa ho mẽ pa xwỳnhjê mẽrohã ma mra nê akupỹm kanõre hkrem agjê nê ma xarmã mõ.

Jejus kôt mẽ pa xwỳnhjaja kot hprĩ hã omunh kêt ã mẽ harênh

Matêwre 16.5-12; mãânên Makre 6.52

14Tã nhũm mẽ kormã kanõre kamã xarmã mõr rôm nhũm Jejus kôt mẽ pa ho mẽ pa xwỳnhjaja tee ri mẽ apkur xà japêr nê axpên mã:

— Kwa hêxta waa nê. Na pu mẽ panhõ pãwti re nê amnhĩ kôt o pamõr kêt nê. Nê âm pixire nê o mõ. Anê.

15Hãmri nhũm Jejus tee ri mẽ kuma nê tanhmã hã mẽ kãm kapêr to. Nom mẽmoj tã kuxi nê mẽ kãm awjarê nê mẽ kãm:

—Kwa oko kêr ka mẽ amnhĩ nê Parijew nhõ xwỳnh mẽ Pahi Erox nhõ pãw kaxkrit xà pumunh mex nê. Anê.

16Hãmri nhũm mẽ kuma nê tee ri kapêrja kukamã hamaxpêr pê hã axpên kukjêr o hkrĩ nê axpên mã:

—Kwa mo na ri ã mẽ pamã pãw kaxkrit xà jarênh anê? Mãn mẽ panhõ pãwti hkêt ã mẽ pahpumu hã na ri ã harênh anê nà? Anê.

17Hãmri nhũm Jesus mẽ kapêr ã mẽ kuma nê mẽ kãm:

—Kwa mon ka wem ãm xatã axpên mã mẽ panhõ pãwti hkêt jarênh pix o mõi? Xàn pa hte mẽ apyrã nê tee ri mẽ paxàpkur xà hkêt kukamã ijamaxpêr o ixpa? Nà inhmã ja tanhmã kute hkêt. 18Ra mẽ ano ho mẽ ate ixpumunh mex tã kormã aprĩ hã tanhmã ixkute hã ixpumunh mex kêt. Nê mẽ ajamak o ixkapêr mar mex tã aprĩ hã mar tỳx kêt. Kwa wem ixte amnhĩ nhĩpêx mã ajamaxpêr tỳx nê. E mẽ inhmã mẽmoj jarê. 19Jãã ixte mẽ kêp 5.000 mã pãwti kêp 5 nhĩrênhta. Tanhmã na ka prem hakrêx o akuprõ nê ho kawà ho nỳt to? E mẽ atõ inhmã harê. Anê

Hãmri nhũm ja kãm: “Na pa prem ho kawà ho 12 nê ho nỳt.” Anê. 20Nhũm kuma nê mẽ kãm:

—Tỳ na pre hakrêx ã kawà kêp 12. Tã ham ixte mẽ kêp 4.000 mã pãwti kêp 7 nhĩrênhta. Tanhmã na ka prem hakrêx ho akuprõ nê ho kawà ho nỳt to? Anê.

Nhũm ja kãm: “Na pa prem ho 7.” Anê. 21Hãmri nhũm kuma nê mẽ kãm:

—Tỳ ra ixte mẽ anoo mã ã ja ho anhỹr o axkrut tã ka mẽ ra hã ano hkêt nê arĩ axpên mã mẽ panhõ pãwti hkêt pix jarênh o ixkõt mõi. Kormã mẽ ate ixàhpumunh tỳx ã ixpumunh kêt. Anê.

Jesus kot akupỹm nohkre xwỳnh o mex ã harênh

Juãw 9.1-7

22Tã nhũm mẽ ma krĩ pê Pesêj wỳr mõi nê ra hwỳr põi. Hãmri nhũm krĩ nhõ xwỳnh kwỳjaja mẽ omu nê Jesus wỳr mẽhõ myja o tẽ. Ra nohkre nê rĩt kêt nê pa xwỳnhja nhũm mẽ hpa hã kupyng hwỳr o tẽ. Hãmri nê ho kuwỳ nê kãm:

—Pa Pahihti? Ot pa mẽ awỳr ja ho tẽ. Kwa hã anhĩhkra xi nê akupỹm mẽ inhmã no ho mex. Anê.

23Hãmri nhũm mẽ kuma nê nohkre xwỳnhta pumu nê hpa hã kupyng nê o tẽ nê krĩ pê ho kato nê nhỹri mẽ hkàx ã o xa. Hãmri nê no hã argõx mẽ nê hã ãhkra xi nê kãm:

—E mãn ka mẽmoj pumu nà? Anê.

24Hãmri nhũm kuma nê hkrãkato nê ri rĩt hãmri nê kãm:

—Tỳ na pa mẽmoj pumu. Nom ixprĩ hã omunh mex kêt nê. Te mẽmo pĩ hpàr kwỳ ri mrar pyrãk. Anê.

25Hāmri nhūm axte no hã ĩhkra xi nhūm tã rīt mex nẽ. Ri hprĩ hã mẽmoj piitã omunh mex nẽ. 26Hāmri nhūm Jejus akupỹm ōrkwỹ hwỳr kumẽ nẽ kãm:

—E kër ka kape hã ri amrar kêt nẽ. Ām ma ma akupỹm anhōrkwỹ hwỳr atẽm kurê kumrẽx. Anẽ.

Jejus kot amnhĩ tã hkôt mẽ pa xwỳnhjê kukjêr ã harẽnh

Matêwre 16.13-20; Rukre 9.18-21

27Tã hāmri nhūm Jejus ma hkôt mẽ pa ho mẽ pa xwỳnhjê mẽ mẽ ma mō. Ma krĩ pẽ Sejarej Piripos pu hã krĩ hkwỳ hkôt mō. Nẽ kormã pry hã mō nhūm Jejus amnhĩ tã hkôt mẽ pa ho mẽ pa xwỳnhjê kukja nẽ mẽ kãm:

—Kwa mẽ inhmã mẽmoj jarẽ. Tanhmã na htem ahpỹnhã ri axpẽn mã ijarẽnh to wehe? Anẽ.

28Hāmri nhūm mẽ kãm:

—Nà na htem ahpỹnhã tanhmã ajarẽnh to. Na hte kamã mẽ hkwỳjaja axpẽn mã ato finat Juãw Paxis ã ajarẽ. Nẽ kamã mẽ hkwỳjaja ato finat Eris ã ajarẽ nẽ mẽ hkwỳjaja apê Tĩrtũm nhỹ hã kapêr o pa xwỳnh ra htyk xwỳnhjê hō hã ajarẽ. Ā na htem ahpỹnhã axpẽn mã ajarẽnh anhỹr o pa. Anẽ.

29Hāmri nhūm mẽ kuma nẽ mẽ kãm:

—No we mẽ kajaja? Ixpê mẽhō hã na ka htem axpẽn mã ijarẽ? Anẽ.

Hāmri nhūm Simãw Pêtre kãm:

—Nà mẽ pajaja na pa htem apê Tĩrtũm kot mẽ ixkaxyw axãm nẽ mẽ ixwỳr amẽn h xwỳnh ã ajarẽ. Nẽ apê mẽ ixpiitã mẽ inhō Pahi Maati hã ajarẽ. Ā na pa htem axpẽn mã ajarẽnh anẽ. Anẽ.

30Hāmri nhūm kuma nẽ mẽ kãm:

—Nà ãm hāmri na ka htem ã ijarẽnh anẽ. Ā ixte anhỹr. Kwa nom kwa kër ka mẽ inhma. Kër ka mẽ kormã ã akwỳjê mã ijarẽnh anhỹr kêt nẽ. Anẽ.

Jejus kot amnhĩ kukamã amnhĩ jarẽnh ã harẽnh

Matêwre 16.21-23; Rukre 9.22

31Tã nhūm Jejus amnhĩ kukamã hkôt mẽ pa ho mẽ pa xwỳnhjê mã tanhmã amnhĩ jarẽnh to nẽ mẽ kãm:

—Nà ra mẽ ate Tĩrtũm kot mẽ akaxyw ixãm ã ixpumunh mex. No mẽ pahkwỳjaja kãm ja hã ijarẽnh mar nẽ ixpumunh prãm kêt. Ijaew krãhtũmjê mẽ Tĩrtũm kapêr tũm o mẽ ahkre o mẽ pa xwỳnhjê mẽ patre krãhtũmjaja na mẽ kãm ja hã ixpumunh prãm kêt. Jakamã koja mẽ nhỹrmã ixpynê nẽ ixtak rax nẽ ixpĩ. Nom kot paj ixtyk ã ixtã apkati axkrunẽpxi hāmri nhūm Tĩrtũm akupỹm ixto ixtĩr. Anẽ.

32Hāmri nhũm mẽ kot hpĩr ã amnhĩ jarēnh ma nẽ tee ri hkukamã hamaxpēr. Hāmri nhũm Simāw Pêtreja hwỳr tẽ nẽ hkwỳjê pê ho kato nẽ mẽ hkàx ã o xa nẽ kãm:

—Kwa nà Pahihti. Koja Tĩrtũm anê mẽ omunh mex nẽ nhũm mẽ ã anhĩpêx anhỳr kêt nẽ. Kwa ri ã kapēr anhỳr kêt nẽ. Anẽ.

33Hāmri nhũm kuma nẽ hwỳr apkjê nẽ pu hã hkôt mẽ pa ho mẽ pa xwỳnh piitã omu. Hāmri nẽ mẽ hamak mã Simāw Pêtre mã kapēr nẽ kãm:

—Tk. Kwa na ka ã inhmã akapēr anhỳrja o te Satanasti nhỹ hã akapēr pyræk. Tĩrtũm nhỹ hã na ka ã inhmã akapēr anhỳr kêt nẽ. Âm jar mẽ kãm Tĩrtũm kapēr mar prãm kêt xwỳnhjê jamaxpēr o na ka ajamaxpēr nẽ ã inhmã akapēr anẽ. No Tĩrtũm jamaxpēr o ajamaxpēr kêt nẽ. Anẽ.

Jejus krajaja tanhmã kot amnhĩ nhĩpêx hto hã mẽ harēnh

Matêwre 6.24-28; Rukre 9.23-27; Juāw 12.24-26;

mãänën Apokarip 2.10, 12.11

34Tã nhũm Jêjus amnhĩ wỳr mẽ kot mar o kuhê xwỳnhjê mẽ hkôt mẽ pa ho mẽ pa xwỳnhjê mã anẽ nhũm mẽ hwỳr axkamẽ nẽ kuhê. Hāmri nhũm tanhmã mẽ ahkre hto nẽ mẽ kãm:

—E mẽ inhma. Kot kaj mẽ ixkôt amnhĩ xunhwỳr ã amnhĩ jarê hã kot kaj mẽ mãänën amnhĩ jarēnh o: “Jêjus kêp inhõ Pahihti jakamã kot paj âm kapēr kôt pix mã amnhĩ nhĩpêx rãhã ho ri ixpa. Kwãr ixkwỳjaja tanhmã hã inhĩpêx to pa arĩ hkôt amnhĩ nhĩpêx rãhã ho ixpa.” Anhỳr o amnhĩ jarê.

35—Koja mẽ ixtã mẽ atõx pĩ rỳ ixtã tanhmã mẽ ato ka ty. Ate tanhmã ijarēnh to ho apa hã nhũm mẽ apĩ. Tã nom koja akaxwỳnh ma inhõ krĩ hwỳr àpir kurê kumrêx nẽ kamã atĩr tũm nẽ amex rãhã nẽ apa ho apa. Nom kot kaj mẽ jar atĩr prãm xàj ixkaga hãmri nẽ hwỳr axàpir kêt nẽ.

36-37—Nẽ koja mēhõ hikukrêx gryk ã Tĩrtũm kaga. Hãmri nẽ nhỹrmã ty nẽ ý kamã kuwy hwỳr ma mō nẽ amnhĩ kôt kukrêx õ hpyr nẽ o mōr kêt nẽ. Koja tee ri kuwy hwỳr mōr pymaj amnhĩ nê hikukrêx rax o amnhĩ pãnhã amnhĩrer prãm kaprỳ. Tanhmã koja amnhĩ to nẽ Tĩrtũm mã amnhĩre nẽ ma õ krĩ hwỳr apĩ? Koja ã amnhĩ nhĩpêx anhỳr kêt nẽ.

38—Nẽ koja mēhõ ixte mẽ ahkre hã inhma nhũm ja kêp omnuj japēr. Nhũm kot mẽ kãm ixprãm nõkati xwỳnhjê hkôt pa gryk ã ixkaga. Hã kot paj nhỹrmã mẽ ato amnhĩptàr kaxyw akupỹn wrỳ nẽ amnhĩ xwar kot ixkaga xwỳnhhta kaga. Âm hãmri na pa mẽ amã ja hã amnhĩ jarê. Kot paj nhỹrmã inhõ Papaj nhỹ hã ixte mẽ ho amnhĩptàr kaxyw akupỹn wrỳ nhũm kapēr o mẽ wrỳk xwỳnhjaja man ixkôt wrỳ. Pa mẽ wrỳ hãmri nẽ ra mẽ kot ixkaga xwỳnhjaja pa amnhĩ pyrã nẽ amnhĩ xwar mẽ hkaga hpa. Anẽ.

9 ¹Nhũm Jejus arĩ mẽ kãm kapêr nê mẽ kãm:
— ãm hãmri na pa mẽ amã amnhĩ jarê. Kot paj nhỹrmã akupÿn ixte mẽ ato amnhĩptàr kaxyw mẽ awÿr wrÿ kãm ga. Tã kot kaj mẽ akwÿjjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anê.

Jejus hirã htÿx kãm ãm ã harênh

Matêwre 17.1-9; Rukre 9.28-36; mããnên Sikũn Pêtre 1.16-18

²Tã nhũm arĩgro kêp 6 nê hapêx nhũm Jejus ma nhÿri hixêr prêk wÿr tẽ. Nê Simãw Pêtre nê Xiakre nê Juãwja nhũm ma amnhĩ kôt wa mẽ o mō. Nhũm wa mẽ ahte mō nê hixêr prêk ã api nê himōk ã kuhê. Hãmri nhũm Jejus axtem nê xa. ³Ra ê haka htÿx kumrêx nê xa. ⁴Hãmri nhũm ja wa kaxkwa rũm hwÿr wrÿ nê kuri kãm kapêr. Finat Mojes mẽ finat Erisja wa wrÿ nê kuri kãm kapêr o xa. Tirtũm amnepêr amnhĩ wÿr wa ho àpir tã nhũm wa akupÿn wrÿ nê kãm kapêr. ⁵⁻⁶Nhũm wa mẽ mex kumrêx nê hirã htÿx kãm kuhê nhũm Jejus kôt mẽ mōr xwÿnhjaja wa mẽ omu nê mẽ kamã no puma nê. Nê tee ri mẽ kãm tanhmã kapêr to hkukamã hamaxpêr. Hãmri nhũm Simãw Pêtre hamaxpêr nê Jejus mã kãm:

— Kwa Pahihti. Nã ãm hãmri na pu mẽ amnê mō. Kwa pu mẽ kritpêr jar axkamê nê tokyx panojarêr kêt nê. Pa mẽ amã pô nhĩrõnh o axkrunêpxi nê hipêx. Amã nê Mojes mã nê Eris mã hõ nhĩpêx ka mẽ kamã akrĩ. Kwa xat pa mẽ amã ho anê nã? Anê.

⁷Hãmri nhũm kakrã jaka htÿx wrÿ nê wa mẽ hkunor pa nhũm wa mẽ kamã kuhê. Hãmri nhũm kakrã kamã Tirtũm mẽ kãm kapêr nê mẽ kãm:

— Ota Ixkra xa. Inhmã hapê ho inhmã hapê. Kêr ka mẽ kapêr mar tÿx rãhã ho ri apa. Anê.



Makre 9.2-8

8Hāmri nhūm mē kuma nē amnhī pu hā rīt nhūm ām Jejus pix mē kuri xa nhūm Mojes mē Erisja wa ra ma akupỹm api nhūm mē ām Jejus pix pumu.

9Hāmri nhūm mē ma akupỹm hkwỳjê hwỳr wrỳk o mō nhūm Jejus mē kām:

— Kwa kêr ka mē ham mē ate mēmoj pumunh xwỳnhhta kormã nhām mē kām harēnh kêt nē. Koja mē mēmo arĩgro hã ixpĩ hāmri nhūm Tĩrtũm akupỹm ixto ixtĩr ka mē rĩ kormã mē kām ja hã ijarēnh o ri apa.

10Anē hāmri nhūm mē kuma nē mē kām harēnh kêt nē. Ām axpēn mã pix mã harē nē kot akupỹm htĩr ã amnhĩ jarēnhja ã axpēn kukjêr o pa nē axpēn mã:

— Kwa mo na ri ã akupỹm htĩr ã amnhĩ jarēnh anē? Tanhmã kot we amnhĩ to nē htyk tã akupỹm htĩr? Anē.

Hāmri nē tee ri hkukamã hamaxpêr o hkôt pa.

Juāw Paxis te kot Eris pyrãk ã harēnh

Matêwre 11.13-15, 17.10-13

11Hāmri nhūm mē kormã ahpar mã wrỳk o mōr mē nhūm Jejus kôt mē mōr xwỳnhjaja mēmoj tã hkukja nē kām:

— Kwa mē inhmã mēmoj jarē. Na hte Tĩrtũm kapêr tũm o mē ahkre xwỳnhjaja mē inhmã: “Eris kumrêx koja Tĩrtũm mē pahwỳr kumē nhūm Krisja hapu hã wrỳ.” Anē. Na htem ã mē inhmã war ajarēnh anē. Tã ka na ka ra wrỳ nom nhūm kormã Erisja akukamã wrỳk kêt nē. Anē.

12-13Hāmri nhūm mē kām:

— Nã ām hāmri na htem mē amã ã ja jarēnh anē. Na pre ra ixkukamã te kot Eris kot amnhĩ nhĩpêx pyrãk xwỳnhhta tē nē ixkutêp mē kām ijarēnh o pa. Nom mē kot ixkukamã ijarēnh xwỳnh ã omunh kêt jakamã na prem axtem nē kām tanhmã hipêx to hprãm xà hkôt tanhmã hipêx kati hton kupĩ. Tã koja mē ã hipêx anhỹr pyrã nē mã ixto anē nē inhĩpêx kati nē tokyx mē kām ixprãm kêt xwỳnhjaja ixpynê nē ixpĩ pa amnhĩ xà htỳx kamã ijamak kām ty. Tĩrtũm kapêr ã kagã htũm kot wa ijamē wa ixkukamã wa ijarēnh xà hkôt. Anē.

Jejus kot mēhō hkra nē mēkarōmnuti janor ã harēnh

Matêwre 17.14-21; Rukre 9.37-43

14Hāmri nhūm Jejus nē Simāw Pêtre nē Xiakre nē Juāwja mē akupỹm hkwỳjê hwỳr hpôx o mra nē amnhĩ kukamã hkwỳjê pumu nhūm mē ohtô nē mē hã akuprô nē mē kām kapêr. Nhūm Tĩrtũm kapêr tũm o mē ahkre ho mē pa xwỳnhjaja mēmoj tã mē hkukjêr o kuhê. 15Jakamã nhūm Jejus mē hwỳr hpôx o tē nhūm mē pikuprõnh xwỳnhjaja amnhĩ wỳr omu nē hkĩnh nē. Hāmri nē kutã hprôt nē kām:

— Pa. Nà ãm hãmri na ka akupÿn mẽ ixwÿr tẽ. Anẽ.

16Hãmri nhũm mẽ kãm:

— Kwa mẽmoj tã na ka mẽ axpẽn mã axàkÿêr o akuhê? Anẽ.

17-18Hãmri nhũm mẽhõ myja kãm:

— Nà ixkra hã na pa mẽ axpẽn mã ixkapêr. Na pre mẽkarõmnuti ixpê hwÿr axà nẽ tanhmã ixpê ho nhũm kapêr kêt nẽ pa. Nhũm hte xatã tanhmã ixpê ho nhũm pykap amnhĩ rẽ nẽ hakwa jamrô ho hikwÿ. Hãmri nẽ à htÿx kamã ama nẽ amnhĩ nham o axpẽn kamnhar tÿx kumrêx pê htÿx pa nẽ hikwÿ nẽ ixpê omnuj tÿx nẽ. Na hte ã mẽkarõmnuti nhÿ hã amnhĩ nhĩpêx anhÿr o pa. Jakamã na pa ate inhmã ho mex kaxyw man o tẽ nẽ tee ri ajapêr. Hãmri nẽ ho akôt mẽ pa ho mẽ pa xwÿnhjê hwÿ nhũm mẽ kot inhmã ho mex kaxyw tee ri tanhmã ho hkapyr. Anẽ.

19Hãmri nhũm Jejus kuma nẽ hkôt mẽ pa ho mẽ pa xwÿnhjê mã kãm:

— Hêxta waa nẽ. Ra mẽ ate Tirtũm nhÿ hã ixte mẽ ho mex ã ixpumunh ryy htã ixpyrà nẽ ã amnhĩ nhĩpêx anhÿr kêt nẽ. Mãn ka mẽ kormã kaxyw Tirtũm kôt ajamaxpêr tÿx kêt nẽ. E amnẽ ixwÿr akra ho tẽ pa omu. Anẽ.

20Hãmri nhũm mẽ hwÿr o tẽ nhũm mẽkarõmnuti Jejus pumu nẽ tanhmã hkrata o htÿx to nhũm pykap tẽm nẽ hakwa jamrô nẽ amnhĩ rênh o nõ. **21**Nhũm Jejus omu nẽ hipêxã mã:

— Kwa tanhmã na ra kot amnhĩ nhĩpêx ã mytwrÿ kute? Anẽ.

Nhũm kãm:

— Nà hprĩre rũm na hte ã amnhĩ nhĩpêx anhÿr o pa. **22**Na hte mẽkarõmnuti xatã ixpê hpĩr kaxyw kuwy kamã kurẽ nẽ gôx kãm kurẽ. Kwa kot ka ate ho mex kukamã axàhpumunh japêr nẽ wa ixkamã axukapri nẽ akupÿm inhmã ho mex. Anẽ.

23Hãmri nhũm Jejus kãm:

— Xàn ka tee ri ixte ho mex kaxyw ixkukamã ajamaxpêr? Nà ixte mẽmoj piitã ho anhÿr kaxyw ixàhpumunh tÿx kênã. Kot ka mẽ atõ mẽmoj tã amnhĩ kaxyw ixkôt ajamaxpêr tÿx hã kot paj amã ho anẽ. Anẽ.

24Hãmri nhũm kuma nẽ kãm hkra mex prãm tÿx xaj kapêr tÿx nẽ kãm:

— Nà na pa amnhĩ kaxyw akôt ijamaxpêr. Nom kot kaj tanhmã ixkrã hto pa akôt ijamaxpêr tÿx rãhã ho ri ixpa Pahihti. Anẽ.

25Rôm nhũm mẽ ohtô rax nẽ hwÿr kormã mra nhũm Jejus amnhĩ wÿr mẽ omu hãmri nẽ mẽkarõmnutija mã kapêr kurẽ kumrêx. Nẽ kãm kapêr kãm hihtÿx nẽ kãm:

— Pa mẽkarõmnuti. E apê mẽ ho mẽ kapêr kêt nẽ mẽ umar kêt o apa xwÿnh ã pa amã ixkapêr ka inhma. Kêr ka mẽ hkrata pê akato nẽ ma amõr o mõ nẽ axte tanhmã ho hkêt nẽ. Anẽ.

26Hãmri nhũm tee ri kot kãm karõja ma nẽ gryk xaj xatã amÿra nẽ mẽ hkrata o htÿx kumrêx nhũm htertet tÿx o nõ. Hãmri nhũm kęp kato

ně ma tē nhũm te htyk pyrà ně nō nhũm mẽ tee ri omu ně ra htyk ã hkamnhix. 27Hãmri nhũm Jejus hpa hã kupy ně kànhmã ãm nhũm akupỹm mex ně kànhmã xa ně ri mra. Ně tãm kapēr o mra ně umar mex ně.

28Tã nhũm Jejus hkôt mẽ pa ho mẽ pa xwỳnhjê mẽrohã ma akupỹm amnhĩm hikranh xà hã ixkreja wỳr mra ně hwỳr agjê ně hkrĩ. Hãmri nhũm Jejus kôt mẽ pa ho mẽ pa xwỳnhjaja amnhĩ tã hkukja ně kãm:

—Kwa mẽ inhmã mẽmoj jarê Pahihti. Na pa mẽ tee ri axwakre kamã mẽ hkrata nê mẽkarõmnuti janor kaprỳ. Kwa mon pa mẽ apyrà ně ja ho anhỳr mex kêt ně? Aně.

29Hãmri nhũm mẽ kãm:

—Nà axtem na mẽkarõmnuti ja. Na htem mẽ nê hanor tokyx anhỳr kêt ně. Na htem ho Tĩrtũm wỳr tỳx ně rĩ kormã hano. Aně.

Jejus kot htyk kukamã amnhĩ jarěnh

Matêwre 17.22-23; Rukre 9.44-45

30-31Tã nhũm Jejus mẽ hkôt ri mẽ pa ho pa xwỳnhjê mẽ krĩa rũm hapôj ně ma nhãm mō. Ně ma pyka pê Garirej kahti hkôt mō. Nom mẽ piitã mẽ hkàx ã mō. Jejus kormã kot amnhĩ tã tanhmã hkôt mẽ pa ho mẽ pa xwỳnhjê jahkre hto ho pa jakamã kãm mẽ hkàx ã mẽ o pa hprãm ně. Hãmri ně amnhĩ kukamã mẽ kãm tanhmã amnhĩ jarěnh to ně mẽ kãm:

—E kot paj mẽ amã tanhmã amnhĩ jarěnh to ka mẽ inhma ně inhmar tỳx ně. Kojã mẽ kãm ixprãm kêt xwỳnhjaja tokyx mẽ kãm ixtã amỳnê nhũm mẽ xipĩ. Kot paj ixtyk ã ixtã apkati axkruněpxi hãmri nhũm Tĩrtũm akupỹm ixto ixtĩr. Kwa kêr ka mẽ ja ma ně hã anohtỳx ně ho apa. Aně.

32Hãmri nhũm mẽ tee ri ã kot amnhĩ jarěnh anhỳrja ma ně axpẽn mã:

—Kwa mo na ri ã mẽ pamã amnhĩ jarěnh aně? Nà kêp mẽ panhō Pahi Maati hã kot amnhĩ jarěnh kênã kot kêt mẽhō kupĩ.

Anhỳr o axpẽn mã harěnh o hkôt mō. Hãmri ně ã kot amnhĩ jarěnh anhỳr mar prãm kêt jakamã hprĩ hã tanhmã hkukjêr to hkêt ně. ãm akryk hkôt mar o mō.

Mẽ kot amnhĩ to rũnh xwỳnh jarěnh

Matêwre 18.1-5; Rukre 9.46-48

33-34Tã nhũm Jejus mẽ hkôt mẽ pa ho pa xwỳnhjaja kormã ma krĩ pê Kapanau hwỳr mō nhũm hkôt mẽ pa ho mẽ pa xwỳnh pê 12jaja tanhmã amnhĩ kukamã hamaxpěr to hãmri ně axpẽn mã:

—Kwa mẽ pahťõ kot puj we nhỹrmã pahpê pahi ně mẽ ho amnhĩptar rax o ri pahkwỳjê jakre?

Anhÿr o axpën kukjêr o Jejus kôt mō. Nē axpën mā: “Nà pa.” Nhũm mē hkwyjaja: “Nà kêt pa.” Anhÿr o hkôt mō. Hāmri nhũm Jejus mē mar o mō. Hāmri nhũm mē mō nē nhÿri amnhĩm hikranh xà hã ixkre hwÿr pōj nē hwÿr agjê nhũm mē kām:

— Kwa mēmoj tã na ka mē pry hã amnhĩ jarēnh o mō? Anē.

Hāmri nhũm mē tee ri kuma nē hpijaàm nē. Nē kām tanhmã amnhĩ jarēnh to hkêt nē. ³⁵Jakamã nhũm Jejus nhÿ nē mē kām anē nhũm mē kuri hkrĩ pa nhũm mē kot mē kām mē ho amnhĩptàr rax prãmta ã mē kām kapēr nē mē kām:

— E mē inhma. Ka mē atō amã mē ho amnhĩptàr rax prãm. Hã kêr ka te apê mē piitã mē kām amarĩ axapēnh xwÿnh pyræk o amnhĩ nhĩpêx o mē hkôt apa. Jao mēmoj to mē kutã anojarêt rãhã nē. Anē.

³⁶Hāmri nē amnhĩ wÿr mēhprĩre hō mã hpa ho apê nhũm hwÿr tē nhũm kumÿ nē o nhÿ nē hã mē kām kapēr nē mē kām:

³⁷— E mē inhma. Kêr ka mē apê pahi pyræk o tanhmã amnhĩ jarēnh to ho ri apa hkêt nē. ãm te amarĩ ri mē apa pyræk o amnhĩ nhĩpêx o ri apa. Jao nhÿri mēhprĩre hō pumu nē kamã axukapřĩ nē kām mēmoj tanhmã ho rÿ kām mēmoj gō. Hāmri nē ã amnhĩ nhĩpêx anhÿr o te pa ate tanhmã ixto mex to pyræk o amnhĩ nhĩpêx. Nē kot ka mē atō pa tanhmã ixto mex to nē te ate Tĩrtũm o mex pyræk o amnhĩ nhĩpêx. E kêr ka mē amã amnhĩ to rũnh prãm nē ã amnhĩ nhĩpêx anhÿr o ri apa. Anē.

³⁸Hāmri nhũm Juãw nhÿhÿnh tēn mē hwÿr axà nē Jejus mã:

— Kwa Pahihtĩ. O mÿj mēhō kēp mē pahkwÿ hkêt tã anhÿ hã mē nē mēkarōmnutĩ janor o pa. Pa mē tee ri ja hã omu nē kēp mē pahkwÿ hkêt jakamã pa mē ã kot amnhĩ nhĩpêx anhÿrja nē kām ixkapēr. Anē.

³⁹⁻⁴⁰Hāmri nhũm kuma nē kām:

— Kwa nà nē tanhmã kām nē hkêt nē. Kojã mēhō inhÿ hã aa mē kot mēmoj pumunh kêt kwÿ ho anē hāmri nē kēp mē panhĩō nē ri mē pahkwÿm tanhmã mē ahkre hto ho pa hkêt nē. Ra mē pahkôt kot amnhĩ nhĩpêx mã kēnã. Jakamã kwa mē ja nē tanhmã kām nē hkêt nē. Kwār māmřĩ ã amnhĩ nhĩpêx anē. Ja mex kēnã.

⁴¹— Kojã mēhō nhÿri mē atō amã kôr ã apumu nē hamaxpēr o: “Kwa Jejus kôt ri pa xwÿnh mÿj kām kôr. E pa kām gô hkwy kē ho ixkō.” Anhÿr o hamaxpēr nē apê ixkwÿ hã amã gô hkwy ka ho ixkō. Nhũm ãm kot amã gô pix nhōr nhũm ate ho akôm tã nhũm Tĩrtũm atã omu nē ho mex rax nē. Anē.

**Mē pahte amnhĩ tomnuj pymaj tanhmã amnhĩ nhĩpêx to hã
mē pajarēnh**

Matêwre 18.6-9; Rukre 17.1-2

⁴²Nhũm Jejus arĩ hkôt mē pa ho mē pa xwÿnhjê mã kapēr nē mē kām:

—Nē mē kot ixkôt amnhĩ xunhwÿr tohtuj anhÿr xwÿnhjaja. Koja mēhō ma mē hwÿr tē nē inhnē mē kām kapēr. Mē kot mē mar nē tanhmā amnhĩ tomnuj to hprām xàj hēx rom mē kām kapēr nhūm mē mar xà hkôt tanhmā amnhĩ tomnuj to. Hã koja Tirtūm ja hã omu nē kot inhnē tanhmā kām nē xwÿnhhta pumu nē homnuj tÿx nē. Te mē kot mēhō pynēnh nē mut ã kēn pytīĩ hō nhôr nē ma o htēm nē gō xupÿm rax kām mēnh pyrāk o hipêx. Te ho ja pyrāk no âm homnuj tÿx o hakre.

43-47—E kwa mē o kora. Kot kaj mē anhĩhkra rÿ apar o tanhmā amnhĩ tomnuj to. Hã kêr ka mē axte ã amnhĩ nhĩpêx anhÿr pymaj te ate amnhĩ pē anhĩhkra rÿ apar krāhyr nē mēnh pyrāk o amnhĩ nhĩpêx nē axte ã amnhĩ tomnuj anhÿr kêt nē. Rÿ ka mē ano ho mēmoj punuj pumu. Hāmri nē kām ajamaxpēr pix o apa pymaj te ate amnhĩ pē ano katōk nē mēnh pyrāk o amnhĩ nhĩpêx nē nhām arīt kurê kumrêx. Kêr ka mē ã amnhĩ nhĩpêx o apa rāhã nē. Hāmri nē nhÿrmã ty nē ma Tirtūm mē wa inhō krī hwÿr api. No kot ka mē arĩ akutã ano nē arĩ akutã apar nē arĩ akutã anhĩhkra rāhã ri mrar tã tōhã tanhmā ho amnhĩ tomnuj to. Hāmri nē nhÿrmã ty nē ma mē kot amnhĩ xà htÿx kamã hamak tūm xà pē kuwy maatita wÿr ma apa.

48 Kuwyja kamã na htem mē kot amnhĩ tomnuj mÿrapê amnhĩ xà htÿx kamã hamak rāhã ho pa ho pa hāmri nē aa hapōx kêt nē.

49Ã koja mē kot amnhĩ tomnuj o mē pa xwÿnh piitã amnhĩ nhĩpêx anhÿr rāhã nē pa ho pa. 50Jakamã kwa kêr ka mē axpēn to mex rāhã ho ri apa. Nom axpēn kām agryk nē tanhmā axpēn nhĩpêx to ho ri apa hkêt nē. Anē.

Nhūm pre ã Jejus hkôt ri mē pa ho mē pa xwÿnhjê jahkre anē.

Mē pahte axpēn kaga nē Jejus kot mē pahkurê

Matêwre 5.31-32, 19.1-12; Rukre 16.18; mãânēn Wam Korīt 7.10-16

10 ¹Tã nhūm Jejus mē hkôt mē pa ho pa xwÿnh mērohã ma pyka pē Jutej wÿr mō. Hāmri nē pyhti pē Jotãw ã rê nē hpãnhã ma xarmã mō. Nhūm mē axte mē hã akuprō nhūm kê Jejus axte mē ahkre ho xa. ²Hāmri nhūm Parijew nhō xwÿnh kwÿjaja hwÿr mra. Mē kot hēx rom kamã hamak nē mar nē tanhmā ho kapēr punuj to kaxyw hwÿr mra nē kām:

—Pa. Ot pa mē mēmoj tã akukjêr kaxyw awÿr mra. Kwa tanhmā na pre amnepēm finat Mojesja mē pahte mē pahprō kaga hã mē panhīgêtjê mã karō hto? Xà koja mē pahprō mē pakapēr hkwȳm tanhmā amnhĩ nhĩpêx to pu mē mÿrapê hkaga nhūm Tirtūm ja hã mē pahpumu nhūm ja kām mex nē nã? Anē.

³Hāmri nhūm mē kām:

— Tanhmã na pre Mojes Tirtũm nhỹ hã ja hã mẽ amã karõ hto? Anẽ.

4Nhũm mẽ kãm:

— Nà na pre harẽnh o:

Kêr ka mẽ aprõ kaga kaxyw hãmri nẽ ate hkaga hã amnhĩ jarẽnh
ã kagã nẽ kãm agõ nẽ rĩ kormã hkaga. Anẽ.

Na pre ã mẽ inhmã ja hã karõ anẽ. Anẽ.

5Hãmri nhũm mẽ kãm:

— Tỳ nom mẽ kãm Tirtũm kapêr kôt amnhĩ nhĩpêx prãm kêt jakamã na pre ã mẽ kãm ja jarẽnh anẽ. 6Amnepêm mẽmoj piitã hkrax kãm na prem axpẽn kaga hkêt nẽ. Na pre Tirtũm wam myja nhĩpêx nẽ hpãnhã kãm hprõ nhĩpêx. Axpẽn kaxyw wa hipêx. 7Jakamã na hte mẽmyjaja hprõ kaxyw nẽ gryk ã katorxã nẽ hipêxã wa hkaga nẽ ãm hprõ kôt pix mã pa ho pa. 8Te wa tipxi nẽ ri wa pa pyrãk o axpẽn nhĩpêx o pa. 9Tirtũm tãm kot axpẽn mã wa õr kênã kot kêt mẽhõ wa kot axpẽn kaga kaxyw tanhmã wa hipêx to rỳ tanhmã wa kãm kapêr to. Anẽ.

Nhũm pre ã Jejus mẽ kãm kapêr anẽ. 10Hãmri nẽ hkôt mẽ pa ho mẽ pa xwỳnhjê mẽ akupỹm ixkrem agjê nhũm mẽ kãm:

— Kwa aprĩ hã mẽ inhmã mẽ kot axpẽn kaga hã mẽ harẽnhta jarẽ pa mẽ ixprĩ hã kuma nà. Anẽ.

Hãmri nhũm mẽ kãm:

11— Nà kot kaj mẽ aprõ kaga nẽ hpãnhã nhãm mẽhõ ho aprõ nhũm Tirtũm noo mã te ate wam aprõ kamã nhãm aprõ nyw o amnhĩkati pyrãk. Tirtũm pê ja omnuj tỳx nẽ. Rỳ koja mẽhõ hprõ kaga ka hpãnhã ho aprõ nhũm Tirtũm noo mã te ate wam mjên pê ho amnhĩkati pyrãk. Ja mãânẽn Tirtũm pê omnuj tỳx nẽ.

12— Nẽ mẽnijaja. Koja mẽhõ ni ra mjên kaga nẽ hpãnhã nhãm mẽhõ ho mjên. Ja mex kêt. Mjên krax kêp mjên kumrêx kênã kot kêt hkaga nẽ hpãnhã nhãm hõ ho mjên. Koja anẽ nhũm Tirtũm noo mã te kot wam mjên kamã nhãm hõ ho amnhĩkati pyrãk nhũm Tirtũm pê ja omnuj tỳx nẽ. Anẽ.

Jejus kot amnhĩ nẽ mẽhprĩjê janor kêt ã harẽnh

Matêwre 19.13-15; Rukre 18.15-17

13Tã nhũm Ijaew kwỳjaja Jejus wỳr mẽ hkrarejê jamỳ nẽ mẽ o mra. Kot mẽ hã ãhkra jaxwỳr nẽ mẽ ho Tirtũm wỳr kaxyw hwỳr mẽ o mra. Hãmri nhũm hkôt mẽ pa ho pa xwỳnhjaja tee ri ja hã mẽ omu nẽ mẽ kãm:

— Kwa mo kaxyw na ka mẽ Jejus wỳr mẽ o mra? Kormã mẽ rãxre kênã. Mẽ ma akupỹm mẽ o mra nà? Anẽ.

14Hãmri nhũm Jejus ja hã mẽ kuma nẽ mẽ kãm:

— Kwa nà kwãr mẽ mãmrĩ ixwỳr mẽ o mra. Mẽ ri inhnê mẽhprĩjê kurê hkêt nẽ. Anẽ.

Hāmri nê mẽ kām hpa ho apê nhũm mẽ hwỳr mẽ o mra nhũm mẽ kuri kuhê. Hāmri nhũm mẽ hã hkôt mẽ pa ho mẽ pa xwỳnhjê mã kām:

—E mẽ jarejê pumu. Na htem hamakêtkati nê hkĩnh nê ri pare. Mẽ kām amnhĩ to rũnh prãm kêt nê ri pare. Tã Tĩrtũm kôt mẽ kot amnhĩ nhĩpêx o ri mẽ pa xwỳnhjaja na htem mẽ uràk nê kām amnhĩ to rũnh prãm kêt nê ri pa.

15—Na hte jarejaja hipêêxà nê katorxà wa kapêr ma nê wa hkôt ri amnhĩ nhĩpêx o ri pare. Tã ixpê Tĩrtũm kot mẽ awỳr inhmênh xwỳnh na pa. Kot ka mẽ amã ixkôt amnhĩ xunhwỳr prãm hã kot kaj mẽ jarejê kot amnhĩ nhĩpêx pyràk o amnhĩ nhĩpêx. Jao ixkapêr ma nê ixkôt ri amnhĩ nhĩpêx mex o ri apa. Anê.

16Hāmri nê mẽhprĩrejê jamỳ nê mẽ hã ìhkra jaxwỳ nê mẽ ho Tĩrtũm wỳ nê kām:

—Pa Papaj. E kêr ka jarejê ho mex rãhã nê kê mẽ mex nê pa. Anê.

Hikàxpore rax xwỳnh jarênh

Matêwre 19.16-22; Rukre 18.18-23; mãânên Wam Ximotre 6.6-10; Xiakre 5.1-6

17Tã nhũm Jejus mẽ hkôt mẽ pa ho pa xwỳnhjaja nhỹri pry hã mō nhũm Ijaew krãhtũmja omu nê hwỳr tẽ nê mẽmoj tã hkukja nê kām:

—Pa mẽ ijahkre xwỳnh maati? E kwa inhmã mẽmoj jarê. Nhỹrmã Tĩrtũm ri ixtĩr tũm nê ixpa hprãm xàj mẽmo kot pa we ho anhỹr o ri ixpa? Ate amnhĩ to mex pix o ri apa xwỳnh jakamã kwa inhmã tanhmã ja jarênh to. Anê.

18Hāmri nhũm kām:

—Xà ate ixpê Tĩrtũm kwỳ hã ixpumunh kôt na ka ixte uràk nê amnhĩ to mex xwỳnh ã ijarê? Tĩrtũm pix na kot amnhĩ to mex rãhã xwỳnh jakamã kot kaj ã ijarênh anê nê ixpê Tĩrtũm Kra hã ijarê. Jao uràk nê ixte amnhĩ to mex xwỳnh ã ijarê. Nà xàn ka ãm atỳx ri amnhĩ krã hkôt ã ijarênh anê?

19—Tĩrtũm mex o mex jakamã kot kaj amã nhỹrmã kuri atĩr tũm nê apa hprãm hāmri nê ra kot mẽmoj tã mẽ amã karō xà hkôt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axàhkĩnh o ri apa hkêt nê.

Nê mẽ hpar kêt nê.

Nê tanhmã axêx kêt nê.

Nê axêx rom tanhmã mẽ nokupyr to hkêt nê.

Nê mẽ kêp mẽ hprô ho amnhĩkati hkêt nê.

Nê anhĩpêêxà mẽ akatorxà wa hã apijaàm nê wa ho mex pê wa kutã anojarêt rãhã ho ri apa.

E kot kaj amã nhỹrmã Tĩrtũm kuri atĩr tũm nê apa hprãm hã kot kaj ã amnhĩ nhĩpêx anhỹr o ri apa. Anê.

20Hāmri nhũm kuma nê kām:

—Kwa ixprĩre ri ra ã ixte amnhĩ nhĩpêx anhÿr o ri ixpa kênã. Nom te ixtĩr tũm nê ixpa kaxyw ixte kormã tãm kêt pyrãk. Anê.

21Hãmri nhũm kuma nê hprĩ hã omu nê kãm hapê nê. Hãmri nê kãm:

—Nà kormã mẽmoj pyxire nê arĩk. Na ka amã akukrêx rax kĩnh tÿx o Tĩrtũm jakre. Jakamã kêr ka ma akupÿm anhõrkwÿ hwÿr tẽ nê akukrêx rax o wênê hpa. Nê kàxpore jamÿ hãmri nê ma mẽ kêp amrakati xwÿnhjê mã õr o ri apa. Hãmri nê akupÿn tẽ nê arĩ ri ixkõt apa ho apa. Anê.

22Hãmri nhũm kuma nê tee ri hikukrêx rax kukamã hamaxpêr. Kãm hapê jakamã kãm kãm ãhkra karo hprãm kêt nê. Hãmri nê tee ri Jejus kot ã kãm hã karõ anhÿrja ma nhũm ja kãm mex kêt nhũm awjanã nê hkaprĩ nê ma akupÿm tẽ. 23Hãmri nhũm Jejus tee ri omu nê hkõt mẽ pa ho mẽ pa xwÿnhjê mã kãm:

—Hêxta waa nê. Koja mẽ hikukrêx rũnh xwÿnhjaja ohtõ nê kãm mẽ hikukrêx japê xaj Tĩrtũm mẽ wa ixri htĩr tũm nê pa ho pa hkêt nê. Wa ixte amnhĩ nhĩpêxja mẽ kêp hihtÿx. Anê.

24Hãmri nhũm mẽ tee ri kapêrja ma nhũm Jejus mẽ hamaxpêr kõt mẽ omunh mex jakamã axte tanhmã mẽ kãm harênh to nê mẽ kãm:

—Nà Tĩrtũm mẽ wa ixte amnhĩ nhĩpêxja na mẽ hikàxpore rũnh xwÿnhjaja pê ja hihtÿx. 25Mẽ kãm hikukrêx rax mã ãhkra karo hprãm kêt rãhã tee kãm Tĩrtũm kõt amnhĩ nhĩpêx prãm kaprÿ. Te ho mẽhõ kot menh kagõ hã hkre nê kãm kagõ katõk prãm kêt rãhã kãm guhkrax kãm àr prãm kaprÿta pyrãk. Anê.

26Hãmri nhũm mẽ kuma nê tee ri amnhĩ kukamã hamaxpêr nê kãm:

—Kwa no mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhÿrmã war ari ixtĩr tũm nê ixpa ho ixpa hkêt nê? Anê.

27Hãmri nhũm mẽ kãm:

—Nà kot kaj mẽ amnhĩ krã hkõt mẽ amã mẽ akukrêx japê mã anhÿrer kêt nê. ãm Tĩrtũm pix na hte ja kaxyw tanhmã mẽ akrã hto ka mẽ amã akukrêx japê hkêt nê. Jao ra mẽ apê Tĩrtũm mẽ wa ixri atĩr tũm nê mẽ apa ho mẽ apa mã xwÿnh. Anê.

28Hãmri nhũm Simãw Pêtre kãm:

—Kwa Pahihti na pa prem agryk ã mẽmoj piitã hkaga hpa nê akõt ixpa ho ixpa. Jakamã xà kot paj mẽ nhÿrmã war ari ixtĩr tũm nê ixpa ho ixpa kêt nê nã? Anê.

29Hãmri nhũm kuma nê hkõt mẽ pa ho pa xwÿnh piitã mẽ kãm:

—Nà ka mẽ atõ inhmã tanhmã amnhĩ to ho apa kaxyw akwÿjê re nê ma inhmã tanhmã amnhĩ nhĩpêx to ho ri apa. Anhõrkwÿ re rÿ atõ rÿ atõx rÿ aprõ nê akrajê re. Rÿ akatorxà nê anhĩpêxà wa are. Rÿ akukrêx piitã rer pa hãmri nê ma ixkapêr o mẽ piitã mẽ ahkre ho ri mẽ hkõt apa. 30Hã kot paj amnhĩ tã mẽ apumu nê mẽ ato mex rax nê. Hãmri ka mẽ

ma mẽ kãm ixkapēr jarēnh o mẽ hkôt apa nhũm mẽ kot mẽ amar xwỳnh kwỳjaja mẽ ama nẽ kãm mẽ akĩnh nẽ. Nẽ ra mẽ ate akwỳjê rer par tã mẽ tãmjaja te mẽ apê mẽ hkra rỳ mẽ htõ rỳ mẽ htõx pyræk o mẽ anhĩpêx. Jao tanhmã mẽ ato mex to ho pa.

— Nẽ koja mẽ kãm ixprãm kêt xwỳnhjaja ixtã tanhmã mẽ atomnuj to hã ka mẽ nhỹrmã ma Tirtũm mẽ wa inhõ krĩ hwỳr api nẽ wa ixkuri amex nẽ atĩr tũm nẽ apa ho apa. ³¹Nom kêt ka mẽ ja hã amnhĩ pumunh kôt amnhĩ to rax xwỳnh ã amnhĩ to jarkrar kêt nẽ. Mẽ kot amnhĩ to rũnh xwỳnh ã amnhĩ jarēnh xwỳnhjaja koja mẽ nhỹrmã amnhĩ to rũnh kêt ã amnhĩ pumu. Nẽ mẽ kot amnhĩ to hkryre xwỳnhjaja koja mẽ nhỹrmã amnhĩ to rũnh ã amnhĩ pumu. Anẽ.

Jejus kot amnhĩ kukamã axte amnhĩ jarēnh

Matêwre 20.17-19; Rukre 18.31-34

³²Tã nhũm Jejus hkôt ri mẽ pa ho mẽ pa xwỳnhjê mã kapēr pa hãmri nẽ ma Jerujarē hwỳr mẽ o mỗ. Ra kamã kãm hkurê xwỳnhjaja kot hpĩr ã amnhĩ jarēnh tã ma hwỳr mẽ o mỗ. Jakamã nhũm mẽ tee ri hkukamã hamaxpēr o hkôt mỗ. Nhũm mẽ amarĩ mẽ hkôt mrar xwỳnhjaja haxwỳja kãm ma nẽ. Hãmri nhũm Jejus mẽ kệp 12ta o mỗ nẽ hkwỳjê hkàx ã amnhĩ kukamã tanhmã mẽ kãm amnhĩ jarēnh to ho mỗ nẽ mẽ kãm:

³³— E na pu mẽ ra Jerujarē hwỳr mỗ. Kot puj mẽ hwỳr pøj nhũm mẽ kãm ixkurê xwỳnhjaja patre krãhtũmjê mẽ Tirtũm kapēr tũm o mẽ ahkre xwỳnhjê nhĩhkram ijaxà. Hãmri nhũm mẽ kãm Tirtũm kapēr kôt amnhĩ nhĩpêx prãm kêt xwỳnhjaja ixpĩr kaxyw mẽ kãm ixtã amỳnê ³⁴nhũm mẽ mar xà hkôt tanhmã inhĩpêx kati hto. Nẽ mẽ hkwỳjaja ixtã hpēr o axkê nẽ ixtã akunha. Nẽ mẽ hkwỳjaja tanhmã ijapry hto nẽ ixtã argôx rẽ nẽ ixtak hãmri nẽ ixpĩ. Koja mẽ ã inhĩpêx anẽ. Nom kot paj ixyk ã ixtã apkati axkrunêpxi nhũm Tirtũm akupỹm ixto ixtĩr. Anẽ.

Xiakre mẽ Juãw wa kot amnhĩ to Jejus wỳr ã wa harēnh

Matêwre 20.20-28; Rukre 22.24-30; mããnẽn Piripos 2.3-8; Wam Pêtre 5.3

³⁵Tã nhũm Jepetew kra Xiakre mẽ Juãw wa tanhmã hamaxpēr to nẽ Jejus mã kãm:

— Kwa mẽ ijahkre xwỳnh. Pa wa amã mẽmoj jarē ka wa inhmã “Ỗ” anẽ nà? Anẽ.

Hãmri nhũm wa kãm:

³⁶— Ko wa mamrĩ inhmã mẽmoj jarē pa wa ama mãn. Anẽ.

³⁷Hãmri nhũm wa kãm:

— Nà kot kaj nhỹrmã ate mẽ piitã mẽ ho amnhĩptàr kaxyw nhỹ pa wa akutã anhĩjê. Nẽ wa papxpix ixpê anhõ kôwenatô nẽ akutã anhĩjê nẽ ato nhỹ. Ja na pa wa inhmã hprãm. Anẽ.

38Hāmri nhūm wa kām:

— Nà na ka wa âm atỳx ri ã amnhĩ to ixwỳr anē. Koja mẽ tokyx ixpĩ pa amnhĩ xà htỳx kamã ijamak rax nē ty. Tã xà koja mẽ ixpyrà nē ã war anhĩpêx anē ka wa ixpyrà nē amnhĩ xà htỳx kamã ajamak rax kãm ty nà? Anē.

39Hāmri nhūm wa kām:

— Tỳ. Nà kot pa wa ijaxwỳja anē nē apyrà nē amnhĩ xà htỳx kamã ijamak kãm ty. Anē.

Hāmri nhūm wa kām:

— Nà âm hāmri na ka wa ja hã amnhĩ jarē. War ate ixpyrà nē ixkôt amnhĩ xà htỳx kãm ajamak kãm atyk mã kênã. **40**Tã nom war ate amnhĩ to ixwỳrta ã kot paj tanhmã war amã nē hkêt nē. Inhõ Papaj tãm koja ja kaxyw mēhõ japêr nhūm inhĩhkô hã nhỹ. No pa kot paj ri ja kaxyw mẽ atõ rênh kêt nē. Anē.

41Hāmri nhūm wa uràk nē Jejus kôt mẽ pa ho mẽ pa xwỳnh kwỳjaja ã wa kot amnhĩ to hwỳr anhỹr ã wa kuma nē wa kamã gryk nē. **42**Jakamã nhūm Jejus mẽ piitã mẽ ho akuprõ nē mẽ kãm:

— E mẽ inhma. Na hte Ijaew kêt xwỳnhjê nhõ pahĩhtijaja ã amnhĩ nhĩpêx anhỹr o ri pa nē amarĩ hkrĩ xà kamã hkrĩ ho hkrĩ. Ahpumunh jakamã amarĩ ixkre kre jakry kamã hkrĩ ho hkrĩ nē kãm mẽ àpênh xwỳnhjê pix mã mẽmo mẽ àpênh ã karõ ho hkrĩ. Na htem ã amnhĩ nhĩpêx anē. Nē mẽ kot amnhĩm mex ã harênh prãm xàj tanhmã mẽ ho mex to ho pa. **43-45**Tã no mẽ kajaja kêt ka mẽ atõ amã amnhĩ to rax prãm hāmri nē ho mẽ kot amnhĩ nhĩpêx pyràk kêt nē. Mẽ piitã mẽ kutã anojarêt rãhã ho ri apa. Kêt paa. Mẽ ate inhmã axàpênh o apa kaxyw na pa pre mẽ awỳr ixwrỳk kêt nē. Âm pa ixte tanhmã mẽ amã amnhĩ nhĩpêx to ho ixpa kaxyw na pa pre mẽ awỳr wrỳ. Mẽ ate nhỹrmã kuwy wỳr apa pymaj mẽ anē ixyk kaxyw na pa pre mẽ awỳr wrỳ. Jakamã kot kaj mẽ atõ amã amnhĩ to rax prãm hã kêt ka ixpyrà nē akwỳjê kutã anojarêt rãhã ho ri apa. Hāmri nē inhmã te ate amnhĩ to rax o amnhĩ nhĩpêx pyràk o amnhĩ nhĩpêx. Anē.

Jejus kot akupỹm Paximew o mex ã harênh

Matêwre 20.29-34; Rukre 18.35

46Tã nhūm Jejus mẽ hkôt mẽ pa ho mẽ pa xwỳnhjaja kormã Jerujarē hwỳr mõi ri ra krĩ pê Jeriko hkôt mõi. Hāmri nhūm mẽ ohtô nē mẽ hã ajêt nē mẽ hkôt mõi. Nhūm mēhõ myja pry nhĩhkrepp nhỹ. Ximew kra Paximew nohkre xwỳnhja pry kamã ahwỳr o hkrĩ. **47**Hāmri nhūm Jejus mẽ hkwỳjaja hwỳr htêp o mõi nhūm amnhĩ wỳr mẽ kuma nē mẽ kot Jejus nhĩxi jarênh o mõi ã kuma hāmri nē kàx pê kãm kapêr nē amnhĩ to kuwỳ nē kãm:

—Pa Jejus? Nà apê mẽ inhõ Pahihti mex kumrêx na ka. Te apê amnepêm anhîgêt pahihti Tawi kot amnhĩ nhípêx pyrâk. Jakamã kwa we ixkamã axukaprĩ nê akupÿm ixto mex kêt wehe. Ixte amnhĩ kaxyw akôt ijamaxpêr xwÿnh na pa. Anê.

48Hãmri nhũm Jejus kukamã mẽ mrar xwÿnhjaja kuma nê kãm:

—Tk. Kwa akapêr kêt nê nhÿ nà. Anê.

Tã nom nhũm ãm mẽ kuma nê xatã amnhĩ to kuwÿ. Kÿx pê amnhĩ to kuwÿ nê axte kãm:

—Kwa ixkamã axukaprĩ nê akupÿm ixto mex Pahihti. Anê.

49Hãmri nhũm Jejus kuma nê xa nê hkôt mẽ pa ho mẽ pa xwÿnhjê mã kãm:

—E mẽ atõ hwÿr tẽ nê hpa hã apy nê amnê ixwÿr o tẽ. Anê.

Hãmri nhũm mẽ kuma nê nohkre xwÿnhhta mã kapêr nê kãm:

—E tee ri amnhĩ kukamã ajamaxpêr kêt nê. Na atã karõ. E tokyx kànhmã xa. Anê.

50Hãmri nhũm mẽ kuma nê hkĩnh tÿx nê. Nê kànhmã harĩ nê amnhĩ nê õ kajaati mẽ nê hwÿr htêm kurê kumrêx. 51Hãmri nhũm Jejus kãm:

—Pa mo na? Tanhmã kot pa ato? Anê.

Hãmri nhũm kãm:

—Nà akupÿm inhmã ixrĩt mex prãm Pahihti.

52Anê nhũm kãm:

—Tõe. Nà ra ate amnhĩ kaxyw inhmã ajamaxpêr tÿx jakamã kot kaj akupÿm arĩt mex kurê kumrêx. E mãmrĩ ma akupÿm tẽ. Anê.

Nhũm akupÿm rĩt mex ã amnhĩ pumu nê hkĩnh o hkĩnh. Hãmri nê Jejus ã ajêt nê ma hkôt hkĩnh nê tẽ.

Jejus kot Jerujarê hwÿr àr ã harênh

Matêwre 21.1-11; Rukre 10.28-40; Juãw 12.12-19

11 1Tã nhũm Jejus mẽ hkôt mẽ pa ho mẽ pa xwÿnhjê mẽ kormã Jerujarê hwÿr mõi. Hãmri nê krĩ pê Petake mẽ hõ pê Petãn wÿr ahtêp o mõi. Hixêt pê Oriwêhti kahti ri na pre krĩja wa xa. Jakamã nhũm Jejus hkôt mẽ pa ho mẽ pa xwÿnh wa ho axkrut nê mẽ amnhĩ kukamã wa kumê 2nê wa kãm:

—E wa ma krĩ mũj wÿr mẽ ixkukamã wa tẽ. Hãmri nê hwÿr pøj nê nhÿri jumênre nyw mã ê nê ãm xwÿnhhta pumu. Kormã mẽ kot hã hkrĩ hkêt kumrêx xwÿnhhta. 3Ka wa omu nê kãm ê xà hpôt nê man akupÿn ixwÿr o tẽ. Koja mêmhõ war apumu nê hã tanhmã war amã kapêr to ka wa ã kãm ijarênh anê nê kãm: “Nà mẽ panhõ Pahihti na hã karõ pa wa hwÿr tẽ.” Anhÿr o kãm ijarê. E wa ma hwÿr tẽ. Anê.

4Hãmri nhũm wa kuma nê ma hwÿr htêm kurê kumrêx nê hwÿr pøj.

Nhũm Jejus kot wa kãm hã karõ xà hkõt jumẽnre nywreta pumu. 5Hãmri nẽ kãm ê xà hpõt o xa nhũm kuri mẽ kuhê xwỳnhjaja tee ri hã wa omu nẽ wa kãm:

—Kwa mo kaxyw na ka wa kãm ê xà hpõt o xa? Kwa kot ka wa mẽ ixpê ho ahkĩ nà? Anẽ.

6Hãmri nhũm wa mẽ kãm:

—Nà mẽ panhõ Pahihti na wa inhmã hã karõ pa wa hwỳr tẽ. Wa ixte ma hwỳr o ixtêm kaxyw. Anẽ.

Hãmri nhũm mẽ wa kãm:

—Tỳ? Tôe wa mãmri ma kãm o tẽ. Anẽ.

7Hãmri nhũm wa ma akupỹm Jejus wỳr o tẽ. Hãmri nẽ kaxyw amnhĩ xê hkwỳ hkwỳr nẽ kãm ho hkõ kahty hpa nẽ kãm ho htỳx nẽ o xa nhũm Jejus hã nhỹ nẽ mõ. 8Nẽ kormã Jerujarẽ hwỳr hixêt ã àpir o mõ. Nhũm mẽ kot omunh o kuhê xwỳnhjaja hkĩnh nẽ ma hkukamã pry ho mex kaxyw amnhĩ xê hkwỳ hkwỳr nẽ ho kãm uty. Nhũm mẽ hkwỳjaja nhỹri pô hkwỳ jakà nẽ o mra nẽ hkukamã kãm uty. 9-10Nhũm mẽ hixêt ã api nẽ ahpar mã wrỳk o mõ nhũm mẽ piitã kax pẽ Tĩrtũm mex o mex ã harẽnh o hkõt mõ. Nhũm mẽ hkwỳjaja kukamã mra nhũm mẽ hkwỳjaja hapu hã mra nhũm prem piitã hkõt Tĩrtũm mex o mex ã harẽnh o mõ. Nẽ harẽnh o:

E ota Tĩrtũm kot mẽ pahwỳr mẽnh xwỳnhhta ra pøj. Nà ãm hãmri na mẽ pahwỳr wrỳ. Ja mex kumrẽx.

Kêp mẽ panhõ Pahihti mex na. Koja mẽ panhĩgêt pahi Tawi pyrà nẽ mẽ pahto amnhĩptà nẽ mẽ pahto mex o pa.

Ãm hãmri na Tĩrtũm mẽ pahwỳr kumẽ.

Tĩrtũm mex kumrẽx. Ãm mex o mex. Kukwak ri pix mã na pu htem pajamakêtkati nẽ paxãmnhĩx papa rãhã ho papa.

Anhỹr o Jejus kõt harẽnh o mõ. Kot mẽ ho amnhĩptàr kurẽ kumrẽx ã hkamnhĩx nẽ hkĩnh nẽ ã hkõt kapẽr anhỹr o mõ. 11Jao ra Jerujarẽ hwỳr pøj nhũm Jejus Tĩrtũm mã amnhĩ jarẽnh xà hã ixkre hwỳr tẽn axà. Nom nhũm ra amỹkry htỳx jakamã nhũm hwỳr axà nẽ ãm hkre pumunh o xa hãmri nẽ akupỹm kato nẽ hkõt mẽ pa ho mẽ pa xwỳnh pẽ 12Jê mẽ nhũm mẽ ma akupỹm Petãn wỳr mra.

Jejus kot pĩ hpàr pẽ fikêhti mã kapẽr ã harẽnh

Matêwre 21.18-22

12Tã nhũm apkati nhũm Jejus mẽ hkõt mẽ pa ho pa xwỳnhjê mẽrohã Petãn rũm hapøj nẽ ma akupỹm Jerujarẽ hwỳr mra. Nhũm Jejus ra kãm prãm nẽ mõ. 13Hãmri nẽ amỹm mẽmo pĩ hpàr hòptĩ rax pẽ fikêhti pumu nẽ hamaxpẽr o:

—E pa hwỳr tẽ nẽ ô hkwỳr rê nẽ kuwô mãn. Anẽ.

Hāmri nê hwÿr tē. Nhūm kormã ô kaxyw ô mytwrÿ kator kêt jakamã nhūm ô hkêt nê âm hô pix nê xa. 14Hāmri nhūm hwÿr tē nê tee ri ô japêr nê âm hô pix pumu. Hāmri nê tee ri omu nê kãm:

—E kot kaj axte axô hkêt kumrêx.

Anhÿr o kãm kapêr nhūm hkôt mẽ pa ho mẽ pa xwÿnhjaja hã kuma.

Jejus kot Tirtūm nhōrkwÿ hwÿr àr ã harênh

Matêwre 21.12-17; Rukre 19.45-46; Juãw 3.13-22

15-17Tã nhūm Jejus mẽ hkôt mẽ pa ho mẽ pa xwÿnhjaja Jerujarê hwÿr agjê nê Tirtūm mã amnhĩ jarênh xà hã ixkre hwÿr agjê. Nhūm Jejus tee ri kamã mẽ kuhê xwÿnhjê pumu. Nhūm mẽ ra ixkre kamã axtem nê môx nê ôwêhti nê tuuti ho wênê ho kuhê. Ixkre hwÿr mrar xwÿnhjaja kot haprôr nê Tirtūm mã amnhĩ jarênh kaxyw kãm hpar nê ôr kaxyw mẽ kãm ho wênê. Nom axtem nê hã ohtô rax kãm mẽ kãm ho wênê nhūm mẽ hkwÿjaja mẽ kãm mẽ hikàxpore ho anhĩpa. Hāmri nhūm Jejus mẽ hwÿr axà nê tee ri mẽ kot ã amnhĩ nhĩpêx anhÿr ã mẽ omu nê mẽ kãm akir nê mẽ kãm:

—Tk. Kwa Tirtūm kapêr ã kagà htūm kot ôrkwÿ jarênh kot:

Inhōrkwÿja âm pika piitã hkôt mẽ piitã kot inhmã amnhĩ jarênh xà hã ixkre pix kaxyw na.

Anhÿr o kot harênh tã ka mẽ axtem nê kamã ã amnhĩ nhĩpêx anhÿr o akuhê. E kwa mẽ ma mra nê ajapôx tokyx anê. Anê.

Nhūm pre ã mẽ kãm kapêr anhÿr pê mẽ ahkre hāmri nê ixkreja nê mẽ kator pa. 18Hāmri nhūm patre krãhtūmjê mẽ Tirtūm kapêr tūm o mẽ ahkre xwÿnhjaja tee ri ã mẽ hipêx anhÿr ã omu nê kapêr ma nê kamã gryk tÿx nê. Hāmri nê mẽ kot hã àmnênh kaxyw tanhmã axpên mar to nê axpên mã:

—Tk. Kwa na mẽ ohtô nê kãm mar prãm nê. Koja mẽ anê nê gryk ã mẽ pahkaga nê axte mẽ pakapêr mar kêt nê. Kwa pu mẽ kupĩ ri. E tanhmã kot puj mẽ ho nê kupĩ? Anê.

19Tã nhūm myt axà nhūm Jejus mẽ hkôt mẽ pa ho pa xwÿnhjaja Jerujarê rūm hapôj nê ma nhÿri amnhĩm hikranh kaxyw mra.



Makre 11.15-17

Mê pahte tanhmã mëmoj tă Tirtúm wỳr to hã mẽ pamã karõ

Matêwre 6.14-15, 17.20; Makre 11.13; Juãw 14.13;

mããnẽn Xiakre 1.6; Wam Juãw 3.22

20Tã nhũm apkati nhũm Jejus mẽ hkõt mẽ pa ho mẽ pa xwỳnhjaja Jerujarẽ hwỳr akupỳm mra. Hãmri nẽ axte pĩ hpàr pẽ fikêhtita pumu. Jejus ra kot kãm kapẽr xwỳnhhta pumu nhũm ra grà pa nẽ xa. 21Hãmri nhũm Simãw Pêtre Jejus kot tanhmã pĩ mã kapẽr toja mã hamaxpẽr nẽ hã kãm:

—Kwa mẽ ijahkre xwỳnh. Ga mẽmoj mũj pumu. Jãã ate fikêhti mã akapẽr xwỳnhhta na grà par kumrẽx nẽ xa. Anẽ.

22-23Hãmri nhũm kuma nẽ mẽ piitã mẽ kãm:

—Tỳ nà ãm hãmri na pa mẽ amã ixkapẽr. Kot kaj mẽ mẽmo kaxyw Tirtúm mã ajamaxpẽr tỳx pẽ mẽmoj tă awỳ nhũm ama nẽ amã hprãm xà hkõt tanhmã amã hipêx to. Ka mẽ amnhĩ kaxyw Tirtúm mã ajamaxpẽr tỳx pẽ hixêt mũj mã akapẽr nẽ kãm: “E xa nẽ ma tẽ nẽ gõ xujanãr kãm mrõ.” Anhỳr o kãm akapẽr nhũm amar xà hkõt ã amnhĩ nhĩpêx anẽ nẽ tẽn kamã mrõ. 24Kot kaj mẽ mẽmoj tă Tirtúm wỳ nẽ kaxyw ãm pix mã ajamaxpẽr tỳx nẽ nhũm amã ho anẽ.

25-26—Nẽ kot kaj mẽ Tirtúm mã amnhĩ jarẽnh kaxyw nẽ ra mẽhõ kot tanhmã ato mã ajamaxpẽr. Hãmri nẽ ja ho ajamakêtkati kurê kumrẽx nẽ axte kãm ajamaxpẽr kêt nẽ. ãm mẽmoj nyw pix mã ajamaxpẽr o tãm amnhĩ nhĩpêx o apa. Hãmri nhũm Tirtúm kaxkwa rũm ja hã apumu nẽ apyrà nẽ ate tanhmã amnhĩ tomnuj to ho hamakêtkati nẽ axte kãm hamaxpẽr kêt nẽ. Anẽ.

Mêhõ kapẽr kõt Jejus kot mẽ ahkre hã mẽ kot hkukjêr

Matêwre 21.23-27; Rukre 20.1-8

27Nhũm mẽ akupỳm Jerujarẽ hwỳr agjê nhũm Jejus kê axte Tirtúm mã amnhĩ jarẽnh xà hã ixkre hwỳr axà. Nhũm hkõt mẽ pa ho mẽ pa xwỳnhjaja hkõt hwỳr mra nẽ hkõt agjê nẽ kormã kamã kuhê. Hãmri nhũm Ijaew krãhtũmjê mẽ mẽ kot Tirtúm kapẽr tũm o mẽ ahkre xwỳnh mẽ mẽ õ patre krãhtũmjaja Jejus pumu nẽ hwỳr mra nẽ hêx rom tanhmã kãm kapẽr to. Na pre ra Jejus ixkreja nẽ mẽmoj to wẽnê xwỳnh mẽ kàxpore o mẽ hpinhpanh xwỳnhjê jano nhũm mẽ tee ri ja hã omu nẽ kamã gryk tỳx nẽ. Jakamã nhũm akupỳn mẽ hwỳr axà nhũm mẽ axte omu nẽ hwỳr mrar kurê kumrẽx 28nẽ kãm:

—Kwa mẽ inhmã amnhĩ jarẽ. Mẽhõ nhỹ hã na ka hte ã amnhĩ nhĩpêx anhỳr o ri apa? Mẽhõ na pre mẽ ixwỳr amẽ ka pre mõ? Nà xà amnhĩ krã hkõt na ka hte ã amnhĩ nhĩpêx anhỳr o ri apahti? E kwa mẽ inhmã amnhĩ jarẽ. Anẽ.

29Nhũm Jejus kot tanhmã mẽ hamaxpêr to hkôt mẽ omunh mex jakamã mẽ kãm:

— Nà kot pa ixkumrêx mẽmoj tă mẽ akukja. Ka mẽ inhmã harê pa rĩ kormã mẽ amã tanhmã amnhĩ jarênh to. 30Finat Juãw Paxisja ã kot paj mẽ akukja. Mẽhõ nhỹ hã na pre hte mẽ hkrã kumrãr o pa? Xà amnhĩ krã hkôt nà xà Tĩrtũm nhỹ hã? E mẽ atõ inhmã harê. Anê.

31-32Hãmri nhũm mẽ kuma nê tee ri kot tanhmã kutã kãm harênh to hkukamã hamaxpêr nê axpên mã:

— Kwa tanhmã kot puj mẽ kãm ja jarênh to? Mẽ kot mar o kuhê xwỹnhjaja na htem Juãw Paxis kêp Tĩrtũm nhỹ hã kapêr jarênh xwỹnh ã axpên mã harênh o pa. Jakamã kot puj mẽ kãm kot amnhĩ krã hkôt mẽ hkrã kumrãr o pa hã harê nhũm mẽ tee ri mẽ pama nê mẽ pakamã gryk nê. Nê mẽ paxêx rom ã kãm mẽ pakapêr anhỹr ã mẽ pahpumu nê kên o mẽ pahtak o mẽ panhĩmex. No kot puj mẽ kãm Tĩrtũm nhỹ hã mẽ hkrã kumrãr ã harê nhũm mẽ pama nê mẽ pamã: “Kwa ã kot anhỹr kênã na ka prem kapêr mar tă ixkôt amnhĩ xunhwỳr kêt nê?” Anê. Nà kot puj pêr mẽ kãm tanhmã harênh to hkêt nê. Kot puj mẽ ãm kãm aa te mẽ pahte ja jarênh mar kêt pyrãk o harê. Anê.

Mẽ kot tanhmã kãm nê nhũm kot ta pãnhã tanhmã mẽ kãm nê pymaj nhũm mẽ tee ri tanhmã kãm nê hprãm kaprỹ ho kuhê.

33Hãmri nê Jejus mã kãm:

— Konên. Mẽ ixte mẽhõ nhỹ hã kapêr o pa hã omunhre hã. Anê.

Hãmri nhũm mẽ kuma nê mẽ kãm:

— Tk. Tõe kot pa xep ijaxwỹja mẽ amã tanhmã amnhĩ jarênh to hkêt nê. Ijaxwỹja ixte mẽhõ nhỹ hã ã ixte amnhĩ nhĩpêx anhỹr o ri ixpa hã amnhĩ pumunhre hã. Anê.

Mẽ àpênh punuj xwỹnhjê jarênh

Matêwre 21.33-46; Rukre 20.9-18

12 1Nhũm Jejus arĩ Ijaew krãhtũm mẽ mẽõ patre krãhtũm mẽ Tĩrtũm kapêr tũm o mẽ ahkre xwỹnhjê mã kapêr o xa. Nê mẽ kãm mẽ kot tanhmã hipêx to hkukamã mẽ kãm tanhmã amnhĩ jarênh to. No ãm hã kuxi nê mẽ kãm awjarê nê mẽ kãm:

— Kojã mẽhõ hpur ã hkwỹjê mã karõ. Mẽ kot kamã kãm àpênh kaxyw mẽ kãm karõ. Hãmri nhũm mẽ ma hwỳr mra nê kamã mẽmo hy hkre nê hkre pa. Hãmri nê pu hã kahê hpa nê pur kaêx kãm ixkre hprêk nhĩpêx. Mẽ kot himõk ã mẽ kot kêp àhkĩnh pymaj mẽ hapêr o hkrĩ kaxyw. Hãmri nê hipêx pa nhũm mẽõ patrãwja awry hã krĩ hõ hwỳr nojarêt nê mẽ kãm tanhmã hpur jarênh to nê mẽ kãm: “E or ixpurta nõ. Kê kamã mẽmoj kã hpa ka mẽ mãmrĩ kamã awjamỳ nê ho axkjê. Hãmri nê ixkutêp inhõ jaxwỹ nê mãmrĩ anhõ tanhmã ho hprãm xà hkôt tanhmã ho.”

— Anhÿr o mẽ kãm kapër hãmri nẽ ma mõi. 2Tã nhũm ra pur kãm mẽmoj hkà pa. Nhũm hpur nhõ dõn arĩ krĩ hõ kamã hã ujahkre ho pa htã kuri kãm àpênh xwÿnhjê hõja nhũm akupÿm mẽ hwÿr kumẽ. Mẽ kot kãm õ hkwy nhõr nhũm ma kot kãm o mõi kaxyw ma mẽ hwÿr kumẽ nhũm ma akupÿm mẽ hwÿr mõi. Mõi nẽ ra mẽ hwÿr pøj. 3Hãmri nhũm mẽ omu nẽ axtem nẽ homnuj nẽ. Nẽ unê nẽ htak nẽ akupÿm hano nhũm ÿ kamã ma akupÿm mõi. 4Hãmri nhũm õ patrãwja tee ri omu nẽ hpãnhã ja mẽ nhũm ma mẽ hwÿr mõi. Mõi nẽ mẽ hwÿr pøj. Hãmri nhũm kê wem omu nẽ mã ho anẽ nẽ. Unê nẽ htak nẽ hkrãx pẽ htak nẽ akupÿm hano nhũm wamta pyrã nẽ ma akupÿm ÿ kamã mõi. 5Hãmri nhũm axpên pãnhã kãm mẽ àpênh xwÿnh kwÿjê rẽ nhũm mẽ axpên pãnhã ma mẽ hwÿr pa. Ma mẽ hwÿr pa nẽ pøj nhũm mẽ te ho wamtajê mẽ hipêx pyrã nẽ mẽ hkwyjê pynê nẽ htak rax nẽ mẽ hano nẽ mẽ hkwyjê pa. 6Nhũm mẽ õ patrãw mẽ harênh ma nẽ tee ri amnhĩ kukamã hamaxpër nẽ hamaxpër o: “Hêxta waa nẽ. Tanhmã kot paj we amnhĩ nhĩpêx to nẽ inhõta kwÿ jamÿ? Nã kot paj mẽ hwÿr ixkraja mẽ. Inhmã hapê htã kot paj mẽ hwÿr kumẽ kê ma mẽ hwÿr mõi. Hãmri nhũm mẽ kêp ixkra hã omu nẽ tanhmã ixpê ho hkêt nẽ. Nẽ jatã inhmã kãm inhõja kwÿ gõ nhũm man ixwÿr o tẽ. Nã kot paj anẽ.”

— Anhÿr o hamaxpër hãmri nẽ ma mẽ hwÿr hkraja mẽ nhũm ma mẽ hwÿr mõi.

7— Tã mẽ hwÿr hpõx o mõi nhũm mẽ amÿm amnhĩ wÿr omu nẽ kêp hkra hã omunh kurê kumrêx nẽ hã axpên mã amÿnê nẽ axpên mã: “E. Nã onêj hpur nhõ dõn krata tẽ. Koja nhÿrmã õ papaj mÿrpe amnhĩm pur ã pyka pytà nẽ ho õ. Jakamã e pu mẽ kupĩ nẽ kêp hpur ho arĩk nẽ ho panhõ. E kwa tokyj pu mẽ kupĩ ri.” Anẽ.

8— Rõm nhũm ra mẽ hwÿr hpõx o tẽ nẽ ra pøj nhũm mẽ unê nẽ pur nẽ ho kato nẽ ahkã kamã kupĩ. ã mẽ ujarênh kot anhÿr. Anẽ.

9Nhũm pre ã Jejus Ijaew krãhtũmjê mã ujarênh anẽ. Hãmri nẽ hã tanhmã mẽ hkukjêr to nẽ mẽ kãm:

— E mẽ inhmã mẽmoj jarẽ. Koja pur nhõ dõnja tee ri mẽ kot hkra hpĩr ã harênh ma hãmri nẽ tãm mẽ hwÿr mõi hãmri nẽ tanhmã mẽ hipêx to wehe? Nã koja ma mẽ hwÿr mõi nẽ mẽ himex pa hãmri nẽ hpãnhã nhãm hpurta ã mẽmojjê rẽ. 10Mãn ka prem ra Tĩrtũm kapër ã kagã htũm kot ja jarênh ma nã? Harênh kot:

Na prem kên o amnhĩm õrkwÿ nhĩpêx kaxyw hãmri nẽ kên maati pumu nẽ htÿx omnuj ã hkamnhĩx nẽ hkaga. Mẽ kot hkaga htã nom nhũm Tĩrtũm mẽ kurom mex o kot kên piitã hakrenh par ã omunh kurê kumrêx.

11 ãm hãmri na pre ã mex ã omunh anẽ. Anẽ.

ã Tĩrtũm kapër ã kagã htũm kot harênh kot anhÿr. Anẽ.

12Nhũm pre ã Jejus mẽ kãm ujarẽnh kãm mẽ harẽnh anẽ nhũm mẽ amnhĩ tã kuma. Tĩrtũm kapẽr tũm o mẽ ahkre xwỹnh mẽ mẽ õ patre krãhtũm mẽ Ijaew krãhtũmjaja nhũm mẽ kot mẽ kãm kẽn maati kaga xwỹnhjê jarẽnh o te mẽ tãm harẽnh pyrãkja ma nhũm ja mẽ kêp omnuj nẽ. Jakamã nhũm mẽ kãm unẽnẽh nẽ haxàr prãm nẽ. Nom amnhĩ tã kãm mẽ kot mar o kuhê xwỹnhjê puma nẽ. 13Jakamã na prem ma mra nẽ hapôj hãmri nẽ Jejus wỹr Parijew nhõ xwỹnh mẽ pahi Eroxo kõt mẽ pa xwỹnh kwỹjê rẽ. Mẽ kot hêx rom mẽmoj tã hkukjêr nhũm kot mẽ mar nẽ tanhmã Rõm nhõ xwỹnhjê nhõ pahi Sesti kapẽr kuhpa hã ri tanhmã mẽ kãm nẽ nhũm mẽ kot mar kaxyw. 14Jakamã nhũm mẽ ma hwỹr mra nẽ hêx rom kãm kapẽr nẽ kãm:



Makre 12.13-17

—Kwa Jejus? Nà ãm hãmri na ka hte Tĩrtũm kapẽr o mẽ ahkre mex nẽ. Na ka hte mẽ kamã akahak o apa hkêt nẽ. Nẽ mẽ kot tee ri mẽ kot tanhmã ato kapẽr punuj to htã ka hte arĩ aprĩ hã mẽ ahkre mex o ri apa. E kwa mẽ inhmã mẽmoj jarẽ. Rõm nhõ pahihti kot mẽ pahpê Ijaew mẽ pahte kãm kàxpore hkwỹ nhõr ã mẽ pamã karõta. Kwa xà ja amã mex nà? Xà kot pu mẽ kãm kugõ? Xà kot pu mẽ kãm õr kêt nẽ? E kwa mẽ inhmã harẽ. Anẽ.

15Nhũm prem ã hêx rom ja hã hkukjêr anhỹr tã no nhũm Jejus mẽ hamaxpêr ã mẽ omunh mex mẽ mẽ kãm:

—Tk. Kwa mon ka mẽ axêx rom ja hã ixkukja? E mẽ atõ inhmã kàxpore htỹxre hõ gõ pa omu. Anẽ.

16Hãmri nhũm ja kãm ja gõ nhũm kupy nẽ kãnhmã kupẽ nẽ mẽ kãm:

—E mẽhõ nhĩxi nẽ mẽhõ karõ na hã? Anẽ.

Anẽ nhũm mẽ kãm:

—Pahi Sesti karõ nẽ hixi na hã.

17Anẽ nhũm mẽ kãm:

—Tỳ. Tô kêr ka mẽ mãmri kãm hkwỹ nhõr o apa. Hã hkarõ nẽ hã hixi. Tãm kot hipêx xwỹnh jakamã õ na. No mẽ kajaja na pre Tĩrtũm mẽ anhĩpêx nhũm mẽ apê õ jakamã kwa kêr ka mẽ kapẽr kõt pix mã ri amnhĩ nhĩpêx o ri apa. Anẽ.

Nhũm pre ã mẽ kãm kapẽr anẽ nhũm mẽ piitã mar o kuhê. Nhũm mẽ kot hêx rom hkukjêr xwỹnhjaja amnhĩ jaêr pê ã kàxpore jarẽnh anhỹrja ã kuma nẽ axpẽn mã:

—Kwa mẽ paxêx rom mẽ pahte hã hkukjêr tã nhũm ãm hãmri mẽ pakutã mẽ pamã harẽ. Kwa tanhmã kot puj wem hkukjêr to nhũm pahi Sesti kapẽr kwỹm ri mẽ pamã mẽmoj jarẽ? Anẽ.

Hãmri nẽ tee ri tanhmã hkukjêr to hkukamã hamaxpêr o kuhê.

Akupÿm mẽ htír xwÿnhjê jarênh

*Matêwre 22.23-33; Rukre 20.27-40; Juãw 6.21, 6.38-40;
mããnên Wam Korît 6.14, 15.12-28; 4 Tesarôn 4.13-18*

18Tã nhũm Satusew nhõ xwÿnh kwÿjaja. Mẽ kot akupÿm mẽ htír mã hamaxpêr kêt xwÿnhjaja na pre mẽ. Tã mẽ kot mẽ htyk nê mẽ hapêx ã mẽ hkamnhĩx jakamã na prem axpên mã Jejus jarênh o:

—E kwa pu mẽ ma hwÿr mra nê mẽmoj xihtÿx ã hkukja kê mẽ pama nê tee ri tanhmã mẽ pamã kapêr to hkukamã hamaxpêr. Hãmri nhũm mẽ piitã ja hã omu nê àhpumunh kêt ã omunh kurê kumrêx. E tokyx ma pu mẽ hwÿr. Anê.

Hãmri nê ma hwÿr mra nê Parijew nhõ xwÿnhjê pyrã nê hêx rom kãm:

19—Pa Jejus? Kwa mẽ inhmã mẽmoj jarê. Na pre finat Mojesja Tirtũm nhÿ hã ã mẽ panhĩgêjtê mã karõ anê. Mẽ hkra hkêt rãhã mẽ pa nê mẽ htyk xwÿnhjaja nhũm mẽ harênh o:

Koja mẽhõ hprõ hãmri nê kamã hkra hkêt rãhã pa nê ty.

Hã koja hkõt htõja hpãnhã hprõ o hprõ nê kamã hkra.

Hãmri nhũm kato nê te kêp htõ htyk xwÿnhhta hkra pyrãk. Anê.

Na pre ã Mojes Tirtũm nhÿ hã ja hã mẽ kãm karõ anê. 20Jakamã kwa ga mẽ ixujarênh ma. Koja mẽmojjaja mẽ kot axpên to htõ xwÿnhjaja kêp 7. Nhũm kot waja hprõ. Nê wa pa nhũm myja kormã hprõ kamã hkra hkêt rãhã ty. 21Nhũm hkõt htõ hõta hpãnhã hprõ ho hprõ nê wa axpên to pa. Nhũm haxwÿja kamã hkra hkêt rãhã ty. Nhũm hkõt htõ hõta haxwÿja ho hprõ nê wa axpên to pa grire nhũm wamta wa urãk nê kamã hkra hkêt rãhã ty. 22Hãmri nhũm htõ hkwyjaja piitã nija pyxi nê axpên pãnhã ho hprõ nom mẽhõ kamã hkra hkêt rãhã htyk pa. Hãmri nhũm mẽ hprõta mẽ hkõt amnhĩ to hitep nê ty. 23Tã Tirtũm kot akupÿm nhÿrmã mẽ ho htír ronhÿx nhÿ nhÿx kêp nija mjên kumrêx? Ra piitã kot ho hprõ kênã. E kwa mẽ inhmã ja jarê. Anê.

24Hãmri nhũm Jejus ã mẽ ujarênh anhÿrja ma nê mẽ kãm:

—Tk. Nã mẽ ate Tirtũm kapêr ã kagã htũm mar mex kêt. Nê mẽ aprĩ hã tanhmã Tirtũm kute hã omunh kêt jakamã na ka mẽ ã atÿx ja hã ixkukjêr anê. 25Kormã mẽ htír ri mẽ kot Tirtũm kõt amnhĩ xunhwÿr xwÿnhjaja na htem ty hãmri nê Tirtũm nhõ krĩ kamã axte kãm hprõ hprãm kêt pa. Rÿ ni japêr nê kãm mjên prãm kêt nê pa. Hãmri nê Tirtũm kapêr o mẽ wrÿk xwÿnhjê pyrã nê axte htyk kêt nê. ãm htír tũm rãhã nê pa ho pa.

26—Nom mẽ ate akupÿm mẽ htír kêt ã mẽ hkamnhĩxja kot paj ixprĩ hã mẽ amã harê. Amnepêm na pre Tirtũm pĩ hpõk kamã tanhmã Mojes mã kapêr to. Mãn ra mẽ ate mar. Na pre kãm:

Ixpê Apraãw nhõ Tirtũm na pa. Nẽ mãănẽn ixpê Apraãw kra Ijak mẽ htãmnhwỳ Jako wa õ Tirtũm na pa.

Anhỹr o Mojes mã amnhĩ jarẽ nhũm kuma nõ hã kagà. 27Kêp apu arĩ mẽ htyk rãhã nhỹx pre ã mẽ harẽnh anhỹr kêt nõ. Nhỹx pre mẽ harẽnh o: “Amnepêm Apraãw nõ hkra nõ htãmnhwỳ mẽ htĩr ri ixpê mẽ õ Tirtũm na pa pre.” Anhỹr o nhỹx pre mẽ harẽ. Nom na pre ã amnhĩ jarẽnh anhỹr kêt nõ. Mẽ pamã te Apraãwja mẽ htyk nõ mẽ hapêx pyræk. Nom nhũm prem ra Tirtũm ri akupỹm htĩr nõ mex nõ pa ho pa. Tã ka htem Tirtũm kapêr kwỳm ri akupỹm mẽ htĩr kêt ã mẽ harẽnh o apa. Anẽ.

Tirtũm kapêr maati jarẽnh

*Matêwre 10.37, 22.34-40; Rukre 10.25-27;
mãănẽn Wam Juãw 2.15, 5.3; Apokarip 2.4*

28Tã nhũm Tirtũm kapêr tũm o mẽ ahkre xwỳnhjê hõ mẽ hwỳr tẽ nõ mẽ kot axpẽn mã kapêr ã mẽ omunh o xa. Hãmri nõ Jejus kot tanhmã Satusew nhõ xwỳnhjê mã kapêr mex toja ma nõ kãm:

—Nà ãm hãmri na ka ã mẽ kãm ja jarẽnh anẽ Pahihti. Kwa inhmã mẽmoj jarẽ. Na pre Tirtũm ahpỳnhã mẽmoj to 10 nõ mẽ pamã hã karõ. Mẽ pahte hkõt amnhĩ nhĩpêx o ri papa kaxyw hã mẽ pamã karõ. Tã nhỹ kapêr na mex o kot hkwỳjê jahkrenh wehe? Anẽ.

29Hãmri nhũm kãm:

—Nà Tirtũm kapêr sohtõõ. Kapêr piitã hkõt mẽ pahte amnhĩ nhĩpêx o papaja na kãm hprãm. No pixi na mẽ pahte hkõt amnhĩ nhĩpêx o papaja nhũm kãm hprãm tỳx o kot hkwỳ jakrenh. Kapêr mex maati na ja. Na pre kapêr o:

E mẽ apê Ijaew nhõ xwỳnhjaja. Ixpê mẽ anhõ Tirtũm ã ixpìxi mex na pa.

30 Jakamã kêr ka mẽ amã ixkĩnh tỳx o mẽmoj piitã hakrenh pa.

Jao mẽ anhĩ piitã ho amã ixkĩnh tỳx kumrêx o ri apa.

31 Anhỹr o na pre mẽ pamã karõ. Nẽ hkõt ja:

Kêr ka mẽ nhãm mẽ hipêx o te ka amã amnhĩ tã ma pyræk o mẽ hipêx o ri apa. Jao tãm mẽ hipêx rãhã ho ri apa. Anẽ.

E ja wa kumrêx na Tirtũm kãm mẽ pahte hkõt amnhĩ nhĩpêx o ri papa hprãm tỳx nõ. Anẽ.

32Hãmri nhũm kuma nõ kãm:

—Nà ãm hãmri na ka ja jarẽ Mějajhkre xwỳnh. Tirtũm pyxi mex kẽnã. 33Amnepêm na pre htem kãm amnhĩ jarẽnh kaxyw nõ kãm mẽmoj gõ nõ rĩ kormã tanhmã kãm amnhĩ jarẽnh to. Tã nom kot puj mẽ ã ate harẽnhta kõt amnhĩ nhĩpêx anhỹr o papa jao mẽ panhĩ piitã pamã Tirtũm kĩnh. Nẽ mẽ pamã hkĩnh o mẽmoj piitã hakrenh pa. Nẽ nhãm mẽ hipêx o te mẽ papamjaja pamã amnhĩ tã ma pyræk o mẽ hipêx. Jao

tãm mẽ hipêx rãhã ho ri papa. Kot puj mẽ ã amnhĩ nhĩpêx anê nhũm Tĩrtũm kãm ja mex o mẽ pahte kãm mẽmoj nhõrta jakre.

Anhỹr o kãm kapêr. ³⁴Hamaxpêr mex pê ã Jejus mã kapêr anê nhũm kuma nê kãm:

— Nà ãm hãmri na ka ja jarê. Na ka ra mẽ kot Tĩrtũm kõt amnhĩ nhĩpêx o amnhĩ nhĩpêx nyw pumunh mex o mõ. Nà te ate tokyx hkõt amnhĩ xãm kaxyw pyrãk. Anê.

Hãmri nhũm mẽ kãm hkurê xwỳnhjaja tee ri wa kot axpên mã kapêr mar o kuhê nê axte kãm mẽmoj tã hkukjêr pyma nê. Ra tee ri mẽ kot hêx rom mẽmoj tã hkukjêr kaprỳ jakamã axte tanhmã hkukjêr to hkêt nê.

Jejus kêp pahi finat Tawi nhõ Pahihti hã harênh

Matêwre 22.41-46; Rukre 20.41-44; mããnên Rõmãn 1.3-4

³⁵Hãmri nhũm Jejus arĩ Tĩrtũm mã amnhĩ jarênh xà hã ixkre kamã amnhĩ tã mẽ ahkre. Nom te nhãm mẽhõ hã mẽ hkukjêr pyrãk amnhĩ tã mẽ hkukja nê mẽ kãm:

— E mẽ inhmã mẽmoj jarê. Tĩrtũm kapêr tũm o mẽ ajakre xwỳnhjaja na htem tanhmã mẽ amã Tĩrtũm kot mẽ akaxyw ãm mã xwỳnh jarênh to nê mẽ amã harênh o: “Koja kêp pahi finat Tawi kanrêhã htãmnhwỳ koja.” Anhỹr o kot mẽ amã harê. ãm kêp kanrêhã htãmnhwỳ pix ã mẽ amã harênh o pa. No na pre pahi Tawija kêp kanrêhã htãmnhwỳ hã harê nê mããnên kêp õ pahihti hã harê. Tã nom nhũm Tĩrtũm kapêr tũm o mẽ ajakre xwỳnhjaja na htem urà nê kêp pahihti hã mẽ amã harênh kêt nê. ãm kêp kanrêhã htãmnhwỳ pix ã harê. Kwa mo na htem Tawi pyrã nê kêp õ pahi hã harênh kêt nê? ³⁶Na pre Tawi tãm Tĩrtũm kapêr tũm kwỳ hã kagà nê tanhmã Tĩrtũm kot mẽ akaxyw ãm mã xwỳnhhta jarênh to. Tĩrtũm Karõ nhỹ hã tanhmã harênh to. Tĩrtũm mex ã mẽ grer xàja kwỳ hã kagà nê hã kagà ho:

Tĩrtũm na pre inhõ Pahihti mã ã kapêr anê nê kãm: “E amnê ixwỳr tẽ nê inhĩhkõ hã nhỹ nê inhmã mẽ ho amnhĩptàr o akrĩ. Kot paj mẽ kot kãm akurê xwỳnh piitã mẽ unênh pa nê awỳr mẽ o mra nê anhĩhkram mẽ haxàr pa.” Anhỹr o pre kãm kapêr. Anê.

³⁷— Na pre ã Tawi Tĩrtũm kot Kris mã kapêr jarênh nê kêp õ pahi hã kagà anê. Tã nom Tĩrtũm kapêr tũm o mẽ ajakre xwỳnhjaja na htem kêp Tawi htãmnhwỳ pix ã ri axpên mã harênh o ri pa. No kêt Tawija na pre kêp õ Pahihti hã harênh o pa. Anê.

Nhũm pre ã Jejus mẽ kãm amnhĩ jarênh anê nhũm mẽ mar o kuhê xwỳnhjaja kuma nê hkĩnh nê. Nê kãm axte mar prãm nê.

³⁸Hãmri nhũm arĩ mẽ ahkre ho nhỹ nê mẽ kãm:

— Kwa mẽ o kora. Kêr ka mẽ Tĩrtũm kapêr tũm o mẽ ahkre ho mẽ pa xwỳnhjê kot amnhĩ nhĩpêx o amnhĩ nhĩpêx kêt nê. Mẽ omu nê ãm mẽ

omu nê mē kot amnhĩ nhĩpêx kôt amnhĩ nhĩpêx kêt nê. Na htem piitã mē hã hpijaam kaxyw ê mex pix kãm ri pa. Nê mē kot amnhĩm mē rûnh ã mē harênh nhũm mē kot amnhĩ jarênh marja na htem kãm hprãm. 39Nê Tĩrtũm kapêr o mē ahkre xà hã ixkre kamã mē kãm amnhĩ to rûnh xwỳnhjê hkrĩ xà mex pix kamã na mē kãm hkrĩ hprãm. Nê mēmoj tã mē apkur xà hã arĩgro hã ma hkwyjê hkôt mē apkur xà hã ixkre hwỳr akuprô nê kãm mē kot amnhĩ to rûnh xwỳnhjê hkrĩ xà mex pix kamã hkrĩ hprãm.

40—Nê mē kot mē mjên htyk xwỳnhjê ho mex o pa hã amnhĩ jarênh tã amnhĩ to hêx. Nê na htem axtem nê mē nokupyr kaxyw mē hwỳr mra nê mē kãm: “E ot pa awỳr ato ajuta kaxyw tẽ. Ra amjên apê htyk jakamã kot paj pam amã akukrêx jamãr o ixpa.” Anê hãmri nê mē kêp mē ôrkwỳ pytà nê amnhĩm mē kêp mē hikukrêx piitã ho hapêx. Te tãm kot mē hipêx o pa pyrak nom tãm mē hipêx kêt nê. Nê te tãm amnhĩ nhĩpêx pyrã nê Tĩrtũm mã amnhĩ jarênh japjêê ho kuhê. Te mē kot Tĩrtũm mã ãm hãmri amnhĩ jarênh pyrak tã hkwyjaja kot ja hã mē omunh pix kaxyw nhũm mē ã kãm amnhĩ jarênh anê. Mỳrapê koja mē mex kêt nê. Koja Tĩrtũm tanhmã mē hipêx kati hto. Jakamã kwa kêr ka mē ã mē kot amnhĩ nhĩpêx anhỳr o mē pa xwỳnhjê kôt amnhĩ nhĩpêx o ri apa hkêt nê. ãm kwarĩ ho kwarĩ. Anê.

Kêp mjên htyk xwỳnh jarênh

Rukre 21.1-4

41Nhũm Jejus arĩ Tĩrtũm mã amnhĩ jarênh xà hã ixkre kamã mē omunh o xa. Na pre hte Ijaew ixkreja o mex kaxyw ixkre jamãr xwỳnhjê mã hikàxpore hkwy nhõr o pa. Nhũm mē hikàxpore rûnh xwỳnhjaja hwỳr agjê nê kàxpore gjênh xà kamã hkwy ho rax nê hagjê nê ma akupỹm mra. 42Tã nhũm mēhõ ni pê mjên htyk xwỳnhja haxwỳja hwỳr axà. Kêp amrakati kumrêx. Nê hikàxpore tỳxre ãm pijakrutre htã kàxpore rûnh xwỳnhjê hpãnhã ixkreta wỳr tẽ. Nê kãm Tĩrtũm kĩnh xàj kàxpore gjênh xà kamã hamê kumê hãmri nê kato nê ma akupỹm tẽ. 43Hãmri nhũm Jejus amỳm ã kot amnhĩ nhĩpêx anhỳr ã omunh o xa nhũm ja kãm mex nê. Hãmri nê hkôt mē pa ho mē pa xwỳnhjê mã harê nê mē kãm:

—E mãn ka mênire htêm mỳj pumu. Na pre mjên kêp ty nhũm kêp amrakati nê hikàxpore grire htã amnhĩ pê ôr pa. Kwỳjê rom kãm Tĩrtũm kĩnh xàj amnhĩ pê ôr pa. Apkur xà hã hikàxpore na. 44Kêt mē hkwyjaja na hte hikàxpore hkwy pix o mra nê gjênh xà kamã hagjê nom arĩ mē hikàxpore rûnh. No nija na mē urak nê kãm hikàxpore japê hkêt nê. Nê ho ôxy hkêt nê ãmnhĩx piitã o tẽ nê ôr pa. Anê.

Jejus kot nhÿrmã mêmoj piitã ho hapêx ã harênh

Matêwre 24.1-14; Rukre 21.5-9, 21.17-19;

mãânên Wam Ximotre 4.1; Sikün Ximotre 3.1

13 ¹Tã hãmri nhÿm Jejus kôt mẽ pa ho mẽ pa xwÿnhjaja arĩ Tĩrtũm mã amnhĩ jarênh xà hã ixkre kaxwÿnh pumunh o kuhê nê hã Jejus mã:

—Hêxta waa nê. Ixkreja mex kumrêx Pahihti. Kên rÿnh o mẽ kot hipêx jakamã mex o mex. Nê mẽ kot ri Tĩrtũm mã hkĩnh xà nhôr nêj haxwÿja piitã mex kumrêx. Anê.

²Hãmri nhÿm mẽ kãm:

—Nà mex tã koja nhÿrmã mẽ kãm Tĩrtũm kurê xwÿnhjaja grành pa. Koja arĩ kên axkrutre axpên mÿnh nê nôr kêt kumrêx. Koja piitã angrã nê ahpÿnhã ri hikwÿ.

Anhÿr o mẽ kãm kapêr. ³Hãmri nê ixkreja rÿm kato nê ma tẽ nê hixêt pê Oriwêhti hã api nê hã nhÿ. Tĩrtũm nhôrkwÿ kutã hixêtja nhÿm hã api nê hã nhÿ. Hãmri nhÿm Simãw Pêtre mẽ Xiakre mẽ Juãw mẽ Andreja ma hkôt mra. Ahte hkôt mra nê mẽ kot Tĩrtũm mã amnhĩ jarênh xà hã ixkre grành par ã hkukja nê kãm:

4—Kwa xà ãm hãmri koja mẽ ã ixkreja nhĩpêx anê? E aprĩ hã mẽ inhmã harê. Xà koja mẽ nhÿrmã kugrà nà xà koja mẽ tokyx ho anê? Kwa mẽmo koja we wÿj ri tanhmã amnhĩ nhĩpêx to? Anê.

⁵⁻⁶Hãmri nhÿm mẽ kãm:

—Nà kot paj mẽ amã harê. Nom nhÿrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtô nê mẽ apê ixkwÿjê hwÿr mra nê hêx rom te pa ixte amnhĩ nhĩpêx pyrãk o amnhĩ nhĩpêx o pa. Nê tanhmã mẽ amã amnhĩ



Makre 13.1-4

jarēnh to nē mē amā: “E pa na pre Tīrtūm mē awȳr inhmē. Ixpê kaxkwa rūm ixwrȳk xw̄ynhta na pa.” Anh̄ȳr o mē akôt mē amā amnhī to hêx o pa. Nē mē amā: “E na pa mē ato amnhīptār kaxyw mē awȳr wrȳ.” Anh̄ȳr o mē amā amnhī jarē. Nom kêr ka mē ama nē ãm mē ama. Mē kot amnhī to hêx xw̄ynh na mē. Kormã akup̄yn ixpôx xà hã arĩgroja kormã.

7—Nē koja mē nh̄yri awry hã axpēn par o pa. Nē mē atãã axpēn par o pa. Nom kêr ka mē harēnh ma nē ri tee ri tokyx mēmoj piitã hapêx ã hkamnhix kêt nē. Mēmoj piitã hapêx xà hã arĩgroja kormã.

8—Nē koja mēmoj piitã hapêx kaxyw nh̄um ahp̄ynhã ri pika piitã hkôt mē pa xw̄ynh piitã pika hõ nhõ xw̄ynhjê kutã amnhī xunhw̄y nē axpu nē axpēn pa.

—Nē koja pika piitã hkôt tanhmã mē à kuteja mē hamȳ nh̄um mē amnhī xà ht̄yx kãm hamak o pa. Nh̄um nh̄yri pika htertet t̄yx nē. Nē nh̄yh̄nh pika hkwȳ kamã mē pa xw̄ynhjaja prãm xaj pikaprār pa. Tã nom kormã mē kot amnhī xà ht̄yx kãm hamak xà hkrax pix na ja. Te mēnijaja pijagri kaxyw nē kormã õhy xà hp̄ynh pyrãk. Koja mēmoj piitã hapêx kaxyw nē ã amnhī nh̄ipêx anē.

9—E pa hpãnhã mē kot Tīrtūm mã amnhī jarēnh xà hã ixkre grãnh par xw̄ȳj ri mēmoj tanhmã kot hkukamã amnhī nh̄ipêx to hã hã harē. Mē ate hã ixkukjêr xw̄ynhta kot paj mē amã harē. Nã koja mē kãm ixkurê xw̄ynhjaja mē awȳr mra nē ixtã mē apynê nē mē atomnuj nē. Nē ma mē pikuprõnh xà hã ixkre hw̄ȳr mē ato mra nē kamã mē kãm mē ato kapêr punuj nē nh̄um mē kuma nē ma mē ato mra nē mē ajagjê. Mē ate ixkôt apa ho apa xw̄ynh ã ã mē anh̄ipêx anē. Nē mē õ pahihiti hw̄ȳr mē ato mra nē mē kãm tanhmã mē ato kapêr punuj to. 10Tã nom kwa kêr ka mē kutã akuhê nē mãmrĩ tãm mē kãm ijarēnh o akuhê. 11Nom kêr ka mē kãm amnhī jarēnh kukamã tee ri ajamaxpêr o ri amã mē uma hkêt nē akuhê. Rȳ mē ajamaxpêr o: “Hêxta waa nē. Mē kot ixkukjêr ã arĩgrota ã tanhmã kot pa we ri mē kãm amnhī jarēnh to?” Anh̄ȳr o tee ri amnhī kukamã ajamaxpêr kêt nē. Koja Tīrtūm Karõ tanhmã mē akrã hto ka mē ȳ hã akatãt kôt tanhmã mē kãm amnhī jarēnh to.

12—Nē mē atõ nē mē anh̄ipêxã nē mē akrajaja koja mē ixtã mē atã am̄ynê nē ma pahi hw̄ȳr mē ato mra nē kãm mē ajarê nh̄um mē kuma nē mē ajagjê nē mē akw̄ȳjê pa. 13Koja mē piitã ixkôt mē akamã gryk nē ã kãm mē akurê ho pa anē. Nom mē kot ã mē anh̄ipêx anh̄ȳr mã tã kêr ka mē amnhī to ht̄yx nē ixkaga hkêt nē. Mē kot mē apar tã ka mē kaxkwa kamã akup̄ym atĩr kurê kumrêx. Hãmri nē mē kurom Tīrtūm mē wa ixri atĩr tũm nē amex rãhã nē apa ho apa. Mē kot tanhmã mē ato htã mē apê akup̄ym kaxkwa kamã atĩr tũm nē apa mã xw̄ynh jakamã kwa tee ri amnhī kukamã ajamaxpêr o ri apa hkêt nē. Anē.

Mê pahomnuj tỳx xwỳnh maati hã harēnh

Matêwre 24.15-28; Rukre 21.20-24;

mããnhēn Sikũn Tesarõn 2.3-4; Apokarip 13.11-17

14-16Nhũm Jejus arĩ mẽ kãm kapēr nẽ mẽ kãm:

—Nẽ koja nhỹrmã kot mẽ atomnuj tỳx kumrēx xwỳnh maati ja axtem nẽ Tĩrtũm mã amnhĩ jarēnh xà hã ixkreja kamã amnhĩ xãm. Hãmri ka mẽ ja hã omu nẽ mẽ kot krĩ grãnh par mã ajamaxpēr kurê kumrēx. Koja ã amnhĩ nhĩpêx anẽ ka mẽ amỳm amnhĩ wỳr mẽ omu hãmri nẽ ajapôj nẽ ma aprõt nẽ amrar kurê kumrēx. Mẽ apê jar pika pê Jutej kamã mẽ apa xwỳnhjaja mẽ omu hãmri nẽ mẽ kot mẽ apar pymaj ma aprõt nẽ amrar kurê kumrēx. Hixêt prêk wỳr ajapôj nẽ aprõt nẽ ma mra. Nẽ jar Jerujarē nhõ xwỳnhjaja kê mẽ umaj haxwỳja hapôj nẽ ma hprõt nẽ ma mrar o mra. Nẽ kapôt ã ri mẽ pa xwỳnhjaja kê mẽ ê jamỳnh kaxyw akupỳm krĩ hwỳr gjêx kêt nẽ. ãm ma mẽ umaj hprõt nẽ mrar o mrar kurê kumrēx.

17—Nẽ mẽ htujarô xwỳnhjaja nẽ mẽ hkra karàre xwỳnhjaja. Jajê pê koja mẽmoj omnuj tỳx nẽ. Tanhmã kot wem amnhĩ to nẽ hprõt tỳx? Nà pika ja kamã koja mẽ mex kêt nẽ. Mẽ kot amnhĩ tomnuj mỳrapê koja Tĩrtũm tanhmã mẽ homnuj tỳx to.

18-19—Koja ã mẽmoj amnhĩ nhĩpêx anẽ hãmri nhũm mẽ piitã amnhĩ xà htỳx kãm hamak rũnh o pa. Tĩrtũm kot mẽ piitã mẽ ho kator krax rũm amnẽ mẽ pa xwỳnhjaja na mẽ kormã à htỳx kamã hamak rũnh kêt nẽ. Kormã amnhĩ xà kamã hamak kryre. No nhỹrmã mẽ hprõt xà hã arĩgrota ã koja mẽ amnhĩ xà htỳx kamã hamak rax kumrēx.

—Tã akupỳn ixte mẽ awỳr ixwrỳk xà hã arĩgrota ã kot pa mẽmoj punuj o ijapêx pa ka mẽ axte ã mẽmoj kot anhỹr pumunh kêt nẽ. Nom kormã akupỳn ixwrỳk xwỳj ri kot kaj mẽ amnhĩ xà htỳx kamã ajamak o apa. Jakamã kêr ka mẽ ã amnhĩ nhĩpêx anhỹrja kukamã amnhĩ to Tĩrtũm wỳ nẽ kãm: “Pa Tĩrtũm. Kwa kê mẽmoj ã amnhĩ nhĩpêx anhỹr kaxyw hãmri kê amgrà pê ã amnhĩ nhĩpêx anẽ. Koja na pê ã amnhĩ nhĩpêx anẽ nhũm omnuj tỳx nẽ.” Anhỹr o amnhĩ to awỳ.

20—Mẽ hprõt xà hã arĩgrota ã koja Tĩrtũm kãm mẽ apê hkrajaja mẽ atyk par pymaj mẽ anẽ mẽmo punuta ã arĩgro hkwy grã nẽ mẽ akukamã mẽ amã ho grêre. Koja mẽ akamã ukapĩ xàj ã mẽ anẽ hipêx anẽ.

21—Nẽ koja ã mẽmoj amnhĩ nhĩpêx anhỹr kaxyw hãmri nhũm mẽ hêx o mẽ pa xwỳnhjaja ma mẽ awỳr mra nẽ hêx rom tanhmã mẽ amã kapēr to nẽ mẽ amã: “E ota ra Tĩrtũm kot mẽ pakaxyw ãm xwỳnhhta pôj. Kwa mẽ tokyx hwỳr mra nẽ omu nẽ hkôt ri apa.” Anhỹr o mẽ amã hêx. Hãmri nhũm mẽ hkwyjaja tee ri mẽ kuma nẽ mẽ amã: “Nà tãm kêt. Jar mẽ ixkamã na. E mẽ tokyx amnẽ hwỳr măn mra nẽ omu.” Anhỹr o mẽ amã hêx o pa. Nom kêr ka mẽ ama nẽ ãm mẽ ama nẽ mẽ hkôt amrar kêt nẽ.

22-23—E kwa mẽ inhma. Na pa ra ixprĩ hã mẽmoj kot ã amnhĩ nhĩpêx anhÿrja kukamã mẽ amã tanhmã harênh to. Tã kêr ka mẽ axkãm ajamak rom nê ri apa. Koja mẽ kot amnhĩ to hêx xwÿnhjaja axpên pãnhã mẽ awÿr mra nê mẽ amã kêp Tĩrtũm kot mẽ akaxyw ãm xwÿnh ã amnhĩ to hêx. Nê mẽ hkwyjaja kêp Tĩrtũm nhÿ hã kapêr jarênh xwÿnh ã amnhĩ to hêx. Hãmri nê aa mẽ kot mẽmoj pumunh kêt kwÿ ho anhÿr o pa. Te Tĩrtũm nhÿ hã kot ho anhÿr pyrãk nom hêx rom mẽ apê Tĩrtũm kot amnhĩm mẽ arênh xwÿnhjê nokupyw kaxyw ã amnhĩ nhĩpêx anhÿr o pa. Anê.

Akupÿn Jejus wrÿk xà hã arĩgro jarênh

Matêwre 24.29-31; Rukre 21.25-28;

mããnêñ Sikũn Pêtre 3.10; Apokarip 1.7, 19.11-16

24-25Nhũm Jejus arĩ mẽ kãm kapêr nê mẽ kãm:

—Tã koja mẽ kot amnhĩ xà htÿx kamã hamak xà hã arĩgrota hapêx nhũm Tĩrtũm ã mẽmoj nhĩpêx anê.

Koja kaxkwa ho àk tÿx nê nhũm myyti ahtyk.

Nhũm mytwrÿre axte hirã hkêt nê.

Nhũm kanhêti piitã axrê nê rôrôk pa.

26Hãmri pa man akupÿn pika hwÿr wrÿ nhũm mẽ piitã ixwrÿk kãm ixpumu. Kakrã kamã kot paj ixihtÿx o inhĩrã rax kãm akupÿn mẽ awÿr wrÿ. 27Hãmri nê ma krĩ piitã hwÿr Tĩrtũm kapêr o mẽ wrÿk xwÿnhjê rê nhũm mẽ ma mra nê amnepêm ixte amnhĩ kaxyw mẽ axunhwÿr xwÿnh piitã ho akuprô nê akupÿn ixwrÿ mẽ ho mra. Anê.

Jejus kot mẽmo pĩ hpàr ã ejêp jarênh

28Nhũm Jejus arĩ mẽ kãm kapêr nê mẽ kãm:

—E ka mẽ pĩ hpàr mũj pumu. Na hte mẽmo mytwrÿ hã rã nhũm mẽ omu nê ô hkukamã hamaxpêr kurê kumrêx. 29Ja pyrã nê koja mẽmoj ã amnhĩ nhĩpêx anhÿr mẽ ka mẽ akupÿn mẽ awÿr ixwrÿk mã ajamaxpêr kurê kumrêx. 30Koja akupÿn ixpôx kêt ri ã mẽ kot mẽmoj kot amnhĩ nhĩpêx anhÿr pumunh xwÿnhjaja kormã piitã htyk par kêt ri pa akupÿn mẽ awÿr wrÿ.

31—Nê koja nhÿrmã pika nê kaxkwa wa hapêx pa. Tã no ãm ixkapêr koja wa urãk nê aa hapêx kêt nê. Koja ãm rãhã ho rãhã. Kot paj aa ihkjê ho tanhmã mênh to hkêt nê. Anê.

Mê pahte akupÿn Jejus wrÿk xà hã arĩgro pumunh kêt ã mẽ pajarênh

Matêwre 24.36-44; Rukre 12.37-40;

mããnêñ Atre 1.9-11; Wam Tesarôn 5.2; Sikũn Pêtre 3

32Nhũm Jejus arĩ mẽ kãm kapêr nê mẽ kãm:

—Nom akupÿn ixwrÿk xà hã arĩgroja mẽ ate omunh kêt. Nê kaxkwa kamã Tĩrtũm kapêr o mẽ wrÿk xwÿnhjaja kot ja pumunh kêt. Nê pa ixpê

Tĩrtũm Kra htã ijaxwỳja ixte ja hã amnhĩ pumunh kêt. Ƃm Mẽpahpãm maatija tapxipix kot ja pumunh.

33—Tã mẽ ate akupỳn ixwrỳk xà hã arĩgro pumunh kêt jakamã kwa kêt ka mẽ axkãm ajamak rom nẽ ri apa. Nẽ apkati mẽ amnhĩ wỳr ijapêr arĩt rãhã ho ri apa.

34-35—E pa tanhmã mẽ amã akupỳn ixwrỳk xà hã arĩgro jarẽnh to ka mẽ inhma. Koja mẽhõ nhỳhỹm nojarêt hãmri nẽ kãm mẽ àpẽn xwỳnhjê mã mẽ àpẽn ã karõ nẽ òrkwỳ jamãr xwỳnh mã tanhmã kãm karõ hto. Hãmri nẽ òrkwỳ kahê xà jamãr xwỳnh mã kãm: “E kêt ka ixwakre kamã ijapêr arĩt rãhã ho ri apa.” Anẽ hãmri nẽ ma nhỳhỹm mõ. Tã mẽ kot ijapêr rĩt rãhã ho mẽ pa xwỳnhjaja te kot ixkre kahê xà jamãr xwỳnh kot amnhĩ nhĩpêx pyrãk. Ɔ patrãwja akupỳn hpõx xà hã arĩgro hã omunh kêt jakamã na hte kahê xà jamãr rãhã ho pa. Koja apu xpêr kamãt nhũm akupỳn hpõx japêr. Rỳ kôt ã kamãt rỳ krãhyre kã nhũm akupỳn hpõx japêr. Rỳ kwỳhtyk nhũm akupỳn hpõx japêr. Tã urãk nẽ mẽ ate akupỳn ixwrỳk xà hã arĩgro pumunh kêt jakamã kêt ka mẽ ijamãr rãhã ho ri apa. Jao ixkutêp inhmã tanhmã amnhĩ nhĩpêx to rãhã nẽ. Ra ixte mẽ amã hã karõ xà hkõt. 36Kop ixkre kahê xà jamãr xwỳnhja tee ri ò patrãw kamã ama hãmri nẽ ra òtxwa nẽ htỳx òt o ỳr rôm nhũm haêr pẽ hwỳr hpõx ronhỹx ja kêp mex kêt nẽ. Ja pyrã nẽ kêt ka mẽ ixkutêp ixkõt amnhĩ nhĩpêx rãhã ho ri apa. Nom tee ri amnhĩ wỳr ixkãm ama hãmri nẽ axte inhmã ajamãxpêr kêt pẽ atỳx ri tanhmã amnhĩ tomnuj to ho apa hkêt nẽ.

37—E ixte mẽ amã mẽmoj jarẽnhja na pa hte ixkwỳjê piitã mẽ kãm harẽ. Jakamã kwa kêt ka mẽ akupỳn ixwrỳk ã ijapêr arĩt rãhã ho ri apa. Anẽ.

Nhũm pre ã Jejus amnhĩ kukamã mẽ kãm ujarẽnh anẽ.

Mẽ kot Jejus pĩr kukamã hamãxpêr ã mẽ harẽnh

Matêwre 26.1-5; Rukre 22.1-2; Juãw 11.45-53

14 ¹Tã nhũm Ijaew hkĩnhã ã arĩgro pẽ Pas wỳr apkati axkrut. Pas ã na hte mẽ ixpê Ijaewjaja amnepêm Tĩrtũm kot pika pẽ Ejit pẽ mẽ inhĩgêt nẽ mẽ ixpãmjê kator mã ijamãxpêr kaxyw xpẽn wỳr akuprõ nẽ hã ixkĩnh. Na pa htem arĩgroja mã: “Pas” anẽ. Nẽ harẽnh o: “Mẽ pahte pãw kaxkrit kêt kur ã arĩgro” anẽ. ²Jakamã nhũm mẽ inhõ patre krãhtũmjê mẽ Tĩrtũm kapêr tũm o mẽ ahkre xwỳnhjaja kãm Jejus pĩr prãm nẽ. Nom mẽ kãm hkõt kapêr mar o mẽ pa xwỳnhjê pyma nẽ. Nẽ tee ri hã amnhĩ jahkre nẽ xpẽn mã:

—Hêxta waa nẽ. Tanhmã kot puj wem ho nẽ kupĩĩ? Kot puj mẽ pahkĩnh kãm tanhmã ho nhũm mẽ hkĩnh xwỳnhjaja hã mẽ pahpumu nẽ mẽ pakamã gryk tỳx nẽ. Pu mẽ hã axpu nẽ hã tanhmã xpẽn to. Jakamã kwa pu mẽ kormã tanhmã ho hkêt nẽ. Anẽ.

Mêhõ ni kot Jejus krã gregrer ã harênh

Matêwre 26.6-13; Rukre 7.36-50; Juãw 12.1-8

3Rôm nhũm Jejus Simãw nhõrkwy kamã kormã apkur o nhỹ. Krĩ pẽ Petãn kamã. Simãwja na pre hkà kro xapêr tỳx o pa nhũm Jejus akupỹn ho mex. Jakamã akupỹm õ krĩ hwỳr pøj nẽ kutã apkur o nhỹ. Hãmri nhũm mêhõ nija harênh ma nẽ mẽ hkuxwa xà hã kàx õ py nẽ ma hwỳr o tẽ. Nẽ mẽ hwỳr axà nẽ nhỹhỹnh kàx kahte nẽ mẽ hkuxwa xà ho hkrã gregrer pa. 4Hãmri nhũm mẽ apkur o hkrĩ xwỳnhjaja tee ri ã kot amnhĩ nhĩpêx anhỹr ã omu nẽ kamã gryk nẽ. Nẽ xepẽn mã:

— Tk. Kwa nà na hã mẽ hkuxwa xàta kapĩr par kumrêx. 5Kop apu ma o htêm nẽ ho wẽnẽ nẽ hpãnhã kàxpore ho rax kumrêx nẽ hamỹnh nẽ ho mẽ kêp amrakati xwỳnhjê nhĩpêx par nhỹx ja kãm mex nẽ. Mo na ri ã amnhĩ nhĩpêx anhỹr kêt nẽ?

Anẽ nẽ hã kãm akir. 6Hãmri nhũm Jejus mẽ kuma nẽ mẽ kãm:

— Tk. Kwa mẽ kãm axàkjêr kêt nẽ. ãm hãmri na ã inhĩpêx anẽ. 7Mẽ kêp amrakati xwỳnhjaja koja mẽ arĩ mẽ akõt pa rãhã nẽ. Ka mẽ amã mẽmo arĩgro hã mẽ ho ajuta hprãm nẽ tanhmã mẽ ho ajuta hto nẽ mẽ kãm mẽmoj gõ. No pa kot paj ri mẽ akõt ixpa ka mẽ ixto mex ry ho apa hkêt nẽ. Kot paj tokyx mẽ are. 8Ixtyk nhũm mẽ kot ijaxàr kukamã na ã ixkrã gregrer anẽ. ãm hãmri na ã inhĩpêx anẽ. 9ãm hãmri na pa mẽ amã ja jarẽ. Koja mẽ krĩ piitã hkõt xepẽn mã ixte tanhmã mẽ anẽ amnhĩ nhĩpêx to hã ijarênh o pa nẽ mãanẽn kot ã inhĩpêx anhỹrja mãanẽn harênh o pa. Nhũm mẽ piitã kot tanhmã ixto mex to hã harênh ma. Anẽ.

Jut Kariot kot mẽ kãm Jejus ã àmnênh kaxyw ã harênh

Matêwre 26.14-16; Rukre 22.3-6; Juãw 13.21-30

10Tã nhũm Jut Kariotja. Jejus kõt mẽ pa ho mẽ pa xwỳnh pẽ 12 hõ na pre. Tã axtem nẽ Satanasti nhỹ hã ma patre krãhtũmjê hwỳr tẽ nẽ axtem nẽ tanhmã Jejus o mẽ mar to nẽ mẽ kãm:

— E ot pa mẽ amã Jejus jarênh o tẽ. Xà kot paj mẽ amã hã amỹnê ka mẽ hpãnhã inhmã amnhĩre nà? Anẽ.

11Hãmri nhũm mẽ kuma nẽ hkĩnh nẽ. Hãmri nẽ kãm:

— Nà kot paj mẽ amã amnhĩre. Anẽ.

Hãmri nhũm mẽ kuma nẽ kato nẽ ma tẽ nẽ Jejus pynênh kaxyw htãnopxar o hkõt ri pa.

Jejus kot ỹ hã kapêr o mẽ pa xwỳnhjê kutã apkur ã harênh

Matêwre 26.17-19; Rukre 22.7-13

12Tã nhũm arĩgro pẽ Pas kato. Amnepêm mẽ inhĩgêjtaja na prem ôwêhti hkrare hkwỳ pa. Tĩrtũm kot ja hã mẽ omunh nẽ Ejit kãm mẽ kãm mẽ hkurê xwỳnhjê nhĩhkra nẽ mẽ kator kaxyw na prem ã amnhĩ nhĩpêx

anê. Jakamã na pa htem arĩ mẽ ixpê mẽ hkanrêhã mẽ htàmnhwỳjaja Pas ã axpên wỳr akuprô nê jam ijamaxpêr pê mẽ uràk nê ôwêhti hkrare hkwy hpa nê pãwti kaxkrit kêt kãm kuku.

Jakamã nhũm Jejus kôt mẽ pa ho pa xwỳnh pê 12jaja Pas ã mẽ apkur xà hã Jejus kukja nê kãm:

— Kwa nhỹri kot paj mẽ akutêp Pas ã mẽ panhõ hã apê? Anê.

13Hãmri nhũm mẽ kuma nê ja wa ho axkrut nê mẽ amnhĩ kukamã wa kumê nê wa kãm:

— E wa ma Jerujarê hwỳr wa tẽ. Nê hwỳr axà nê mễhõ myja pumunh kurê kumrêx. Nhũm amnhĩm gô ru nê amnhĩ kre hã poti xãm nê o tẽ ka wa omu nê hã ajêt nê ma ôrkwỹ hwỳr hkôt tẽ. 14Hãmri nê ixkre nhõ dôn pumu nê kãm: “E Jejus na wa inhmẽ pa wa awỳr tẽ. Na awỳr pêr mễnh o: ‘Nhỹri kot paj we ixkôt ri mẽ pa ho pa xwỳnhjê mẽ Pas ã axpên kutã apku?’ Anhỹr o na awỳr pêr mẽ.”

15— Wa ã kãm akapêr anê kê war ama nê war amã ôrkwỹ nhĩmõk ã ixkre rax ô jahkre. Ra kamã kaxyw mẽ paxàpkur xà hã mẽmoj piitãã. Ka wa omu nê mãmri kamã mẽ ixkutêp mẽ panhõ hã apê. Anê.

16Hãmri nhũm wa kuma nê ma hwỳr tẽ. Nê krĩm axà nê ra kot wa kãm mẽmoj jarênh xà hkôt mẽmoj piitã omu nê mẽ kutêp mẽ kãm mẽo hã àpênh o wa xa.

Jejus kot mễhõ kot mẽ kãm hã àmnênh ã harênh

Matêwre 26.20-25; Rukre 22.21-23; Juãw 13.21-30

17Tã nhũm kamãtre nhũm Jejus mẽ hkôt mẽ pa ho pa xwỳnhjaja wa hkôt mỗ. 18Hãmri nê kỳxpê ixkreja wỳr api nê hwỳr agjê nê apkur kaxyw hkrĩ hpa nê kormã apkur o hkrĩ nhũm Jejus mẽ kãm:

— E pa mẽ amã mẽmoj jarê ka mẽ inhma nê amnhĩ krãm haxàr tỳx nê. Kot kaj mẽ ixkutã axàpkur o akrĩ xwỳnhjê hõ mẽ kãm ixkurê xwỳnhjê mã ixtã amỳnê. Anê.

19Hãmri nhũm mẽ tee ri kuma nê hkaprĩ htỳx nê. Nê axpên pãnhã amnhĩ tã hkukja nê kãm:

— Kwa xà pa kot paj ã anhĩpêx anê? Nà pa hkêt. Anê.

20Hãmri nhũm mẽ kãm:

— Nà mẽ apê 12jê hõ kot kaj ã inhĩpêx anê. Mễ ate ixkutã guhkrax kãm anhõ pãwti ho mry kagô nhek o akrĩ xwỳnhjê hõ kot kaj ixtã amỳnê. 21Tĩrtũm kapêr ã kagà htũm kot ixkukamã harênh xà hkôt koja mẽ tanhmã ixto rax nê ixpĩ. Nom kot mẽ kãm ixtã àmnênh mã xwỳnhta hêxta waa nê. ã kot amnhĩ nhĩpêx anhỹrja mỳrapê koja amnhĩ xà htỳx kãm hamak rax kumrêx. Kop apu aa ô mãmãj nhõxà hkre rũm kator kêt ronhỹx ja kãm mex nê.

22Anê nê kormã mẽ apkur o hkrĩ rôm nhũm pãwti hõ py nê ho Tĩrtũm wỳ. Hãmri nê mẽ kãm ho hkry nê mẽ piitã mẽ kãm ôr pa nê mẽ kãm:

—E na pa mẽ amã pãwti ho hkry nẽ mẽ amã kugõ. Ja pyrà nẽ koja mẽ ã inhîpêx anê nẽ te ixto hkry hpar pyràk o inhîpêx pa amnhî xà htỳx kamã ijamak kãm ty. Nom mẽ anê kot paj ty. E mẽ mãmri aku. Anê.

23-24Nê hpãnhã wĩhti hã kop py nẽ mã ho anê nẽ Tĩrtũm mã harê. Hãmri nẽ mẽ kãm kugõ nẽ mẽ kãm:

—E mẽ kot ixpĩr xà hã arĩgrota ã koja ixkamrõ axkapĩ. Nom koja mẽ amarĩ ixpĩr nhũm amarĩ hpikapĩr kêt nẽ. ãm paa. Pa kot paj mẽ anê mẽ ãhkram amnhĩ jaxà nhũm mẽ ã inhîpêx anê. Koja ixkamrõ axkapĩ nhũm Tĩrtũm omu nẽ ixkukwak ri mẽ anê mẽ ate amnhĩ tomnuj piitã amnhĩ katut kõt rênh pa nẽ mẽ ato hkra. Ra amnepêm kot ja hã amnhĩ jarênh xà hkõt. Jakamã e. Mẽ axpên pãnhã ixkamrõ pikapĩr mã ajamaxpêr pê ixte mẽ amã kop kãm wĩhti nhõrta o akõm o axpên nhîpêx. Anê.

Nhũm pre ã mẽ kãm amnhĩ jarênh anê nhũm mẽ piitã ho hkõm o axpên nhîpêx. **25**Hãmri nhũm mẽ kãm:

—ãm hãmri na pa mẽ amã amnhĩ jarê. Kot paj axte wĩhti ho ixkõm kêt rãhã nhỹrmã Inhõ Papaj akupỹn mẽ awỳr inhmẽ. Hãmri pu mẽ rĩ kormã akupỹn ixpõx xà hã arĩgrota ã pahkĩnh nẽ. Nom axtem tanhmã hã pahkĩnh to. Anê.

26Nhũm pre ã mẽ kãm kapêr anê hãmri nhũm mẽ Tĩrtũm mã mex o mex ã gre hãmri nẽ hapõx pa nẽ ma hixêp pê Oriwêhti hwỳr mra.

Jejus kot Simãw Pêtre hkukamã tanhmã harênh to

Matêwre 26.31-35; Rukre 22.31-34; Juãw 13.36-38

27Tã nhũm Jejus hkõt mẽ pa ho pa xwỳnhjê hkukamã tanhmã mẽ kãm ujarênh to nẽ mẽ kãm:

—E mẽ inhmã. Tĩrtũm kapêr ã kagà htũm kot ã mẽ pajarênh kot anhỹr.

Kot paj ôwêhti jamãr o pa xwỳnhja pĩ hãmri nhũm ôwêhti hpigrãnh pa nẽ ma anhgrã nẽ ri mra.

Anhỹr o te ixpê ôwêhti jamãr xwỳnh nhũm mẽ apê ôwêhti pyràk ã mẽ pajarênh. Tã kot puj mẽ ã amnhĩ nhîpêx anê. **28**Mẽ kot ixpĩr tã koja Tĩrtũm akupỹm ixto ixtĩr. Pa akupỹm ixtĩr nẽ ma mẽ akukamã pika pê Garirej wỳr mõi. Kamã kot puj mẽ axte axpên pumu. Anê.

29Hãmri nhũm Simãw Pêtre tee ri mẽ amnhĩ tã kuma nẽ kãm:

—Kwa nà. Ri ã mẽ ijarênh anhỹr kêt nẽ Pahihti. Kot paj akaga hkêt nẽ. Jajaja koja anhgrã nẽ hprõt nẽ ma mrar japêr no pa kot paj anhỹr kêt nẽ. Anê.

30Hãmri nhũm kãm:

—Nà kot kaj anê Simãw Pêtre. Koja apkati hkõt krãhyre hkàr kêt ri ka ra mẽ umaj ate ixkõt apa hkêt ã mẽ kãm amnhĩ tã axaprãr o axkrunêpxi kãm ga. Kwa jam ajamaxpêr tỳx nẽ. Anê.

31Hāmri nhūm tee ri amnhĩ tã kuma kãm amnhĩ tã àprār kãm hihtỳx nẽ kãm:

—Tk. Kwa nà. Kot paj ã amnhĩ nhĩpêx anhỹr kêt nẽ. Koja mẽ tee akôt ixpĩr mã tã no pa ãm aa akaga hkêt kumrêx. Kot paj akôt ixpa ho ixpa rãhã nẽ. Anẽ.

Hāmri nhūm hkôt mẽ pa ho mẽ pa xwỳnh kwỳjê piitã ã kãm amnhĩ jarênh anẽ.

Jejus kot Tĩrtũm mã amnhĩ jarênh

Matêwre 26.36-46; Rukre 22.39-46

32Tã nhūm Jejus ma nhỹri mẽ kot kãm “Gesêm” anhỹr xwỳnhja wỳr hkôt mẽ pa ho pa xwỳnhjê ho mỗ. Hāmri nẽ mẽ kãm:

—E mẽ jar ixkutêp akrĩ. Pa ma mũtũm tẽ nẽ Tĩrtũm mã amnhĩ jarẽ mãn. Anẽ.

33Hāmri nẽ amnhĩ kôt mẽ ho axkrunêpxi nẽ mẽ o mỗ. Simãw Pêtre mẽ Jepetew kra pijakrut pê Xiakre nẽ Juãwja nhūm amnhĩ kôt mẽ o mỗ.

34Hāmri nẽ amnhĩ kukamã mẽ kãm hkurê xwỳnhjaja kot tanhmã hipêx tota kukamã hamaxpêr o ra amnhĩ kamã kahak tỳx o ra hkaprĩ nẽ. Hāmri nẽ hkôt mẽ mrar xwỳnhjê mã kãm:

—Hêxta waa nẽ. Na pa tee ri amnhĩ xà htỳx kamã ijamakja kukamã ijamaxpêr nẽ amnhĩ kamã ixkahak tỳx o ixkaprĩ nẽ. Te ra ixkaprĩja kot ixpĩr o mỗr pyràk. Jakamã e mẽ jar anohtỳx nẽ ixto Tĩrtũm wỳr o akrĩ kê tanhmã ixto pa mẽ kot tanhmã ixtoja kutã ixihỳx nẽ. Anẽ.

35Hāmri nẽ mẽ kurũm htêm grire nẽ amnhĩ kamã kahak o Tĩrtũm mã amnhĩ jarênh kaxyw htu mỳr pè htêm nẽ pikap nõ nẽ kãm:

36—Kwa Papaj. Hêxta waa nẽ. Inhmã amnhĩ xà htỳx kãm ijamak prãm kêt kumrêx. Na pa tee ri amnhĩ kukamã ijamaxpêr nẽ amnhĩ kamã ixkahak tỳx nẽ. Jakamã kot kaj amã inhnê ja ho ajapêx prãm nẽ mãmri ho ajapêx nhūm mẽ kãm ixkurê xwỳnhjaja tanhmã ixto hkêt nẽ. Rỳ ko. Kot kaj amã mẽ kot tanhmã ixto hprãm kê mẽ mãmri tanhmã inhĩpêx to. Nom pam inhmã hprãm xà hkôt kêt.

37Anhỹr o Tĩrtũm mã amnhĩ jarẽ hāmri nẽ kànhmã xa nẽ akupỹm Simãw Pêtreja mẽ hwỳr tẽ nẽ mẽ omu nhūm mẽ ra htỳx gõr nẽ hikwỹ. Hāmri nhūm tee ri mẽ omu nẽ Simãw Pêtre mã kãm:

—Kwa Simãw Pêtre. E mẽ hāmri akrã hapôj. Kwa wem anohtỳx grire nẽ ixkutêp amnhĩ to Inhõ Papaj wỳr o akrĩ 38kê mẽ ixkôt tanhmã mẽ ato htã ka mẽ amã mẽ uma xàj ixkaga hkêt nẽ arĩ mẽ kutã amnhĩ to htỳx nẽ akuhê. ã mẽ amã mẽ ate amnhĩ nhĩpêx anhỹr prãm nom kormã mẽ amã maa. Anẽ.

39Hāmri nẽ akupỹm tẽ nẽ axte Tĩrtũm mã tanhmã amnhĩ jarênh to.

40Nẽ akupỹm mẽ hwỳr tẽ nẽ mẽ omu nhūm mẽ axte ôt pa nẽ hikwỹ. Nhūm tẽ nẽ tee ri mẽ omu hāmri nẽ tanhmã mẽ kãm nẽ hkêt nẽ. ãm

awjanã nẽ ma akupÿm tẽ nẽ axte Tirtũm mã amnhĩ jarẽ. 41-42Hãmri nẽ akupÿm mẽ hwÿr tẽ nẽ mẽ kãm:

— Kwa xan ka mẽ arĩ gõr nẽ anhĩkwÿ? E mẽ tokyx akrã hapôj. Na mẽ ra ixwÿr mrrar nẽ kot ixpynênh mã. Koja mẽ tokyx ixkutã mẽ kot amnhĩ xunhwÿr xwÿnhjaja mẽ kãm ixtã amÿnê. Ota ra kot ixtã mẽ kãm àmnênh xwÿnhhta tẽ. E mẽ tokyx kànhmã akrĩ pu mẽ kutã mra. Anẽ.

Mẽ kot Jejus pynênh ã mẽ harênh

Matêwre 26.47-56; Rukre 22.47-53; Juãw 18.1-11

43Nhũm Jejus kormã mẽ kãm kapêr o ãm rãhã nhũm Jut Kariotja tẽ. Mẽ hkõt mẽ pa ho mẽ pa xwÿnhjê hõ htã nhũm ra amnhĩ kõt mẽ ohtõ nẽ Jejus wÿr mẽ o tẽ nhũm mẽ wapohti nẽ kô jamÿ nẽ hkõt o mra. Patre krãhtũm mẽ Ijaew krãhtũmjê mẽ Tirtũm kapêr tũm o mẽ ahkre xwÿnhjaja ra Jut kõt mẽ kurê nhũm mẽ man hkõt Jejusja wÿr mra. 44Na pre ra Jut Kariotja mẽ kãm tanhmã amnhĩ jarênh to nẽ mẽ kãm:

— E kot paj nhÿri mẽ pahte unênh mã xwÿnhhta pumu nẽ hwÿr tẽ nẽ kahti hkõt kumÿ nẽ tanhmã kãm ixkapêr to. Ka mẽ ixpumu nẽ hwÿr tẽ nẽ unê nẽ ma akupÿm o tẽ.

Anẽ hãmri nẽ ma hwÿr mẽ o tẽ. 45Nẽ Jejusja pumu nẽ hwÿr tẽ nẽ kãm: “Pa mẽ ijahkre xwÿnh.” Anẽ hãmri nẽ kahti hkõt kumÿ. 46Hãmri nhũm hkõt mẽ mrrar xwÿnhjaja omu nẽ Jejus wÿr mra nẽ unênh kurê kumrêx. 47Hãmri nhũm Jejus kõt mẽ pa ho mẽ pa xwÿnhjaja tee ri ja hã mẽ omu nhũm hõja õ wapo kapa nẽ patre maati mã àpênh xwÿnh kot mẽ hkõt htêm xwÿnhhta mã wapo ho apê. Nẽ kot ho hkrã nhĩpõnh mã tã kuhpaw nẽ upõk rúm hamak nhĩkjê krãhta. 48-49Hãmri nhũm Jejus amnhĩ tã mẽ kot unênh xwÿnhjê mã kãm:

— Kwa na pa pre apkati mẽ Tirtũm mã amnhĩ jarênh xã hã ixkre kamã mẽ kãm ixujarênh o ixpa ka prem tokyx ixpynênh kêt nẽ. Tã jarãhã te ixte amnhĩ tomnuj xwÿnh pyrà nẽ ixwÿr wapohti nẽ kô hã akapên nẽ ixwÿr atêm rax nẽ. Nom ra mẽ ate tanhmã ixto kaxyw arĩgro kator jakamã mẽ mãmri tanhmã amã ixto hprãm xã hkõt tanhmã ixto. Tirtũm kapêr ã kagã htũm kot mẽ akukamã ã mẽ ate inhĩpêx anhÿr ã mẽ ajarênh xã hkõt. Anẽ.

50Hãmri nhũm hkõt mẽ pa ho mẽ pa xwÿnhjaja tee ri mẽ kot unênh ã mẽ omu hãmri nẽ mẽ umaj Jejus kaga nẽ ma hprõt pa nhũm ahte mẽ kuri xa. 51-52Hãmri nhũm mẽ ma o tẽ. Nhũm kormã mẽhõ nyw xwÿnhja tee ri ja hã mẽ omu nẽ ma Jejus kõt tẽ. Nhũm mẽ amnhĩ kõt omu nẽ kot unênh kaxyw kahty xã hã kupy nhũm mẽ umaj mẽ ãhkra kamã kahty xãja re nẽ ma hkênh nẽ hprõt nẽ tẽn akunok.

Ijaew nhõ patre maati kot Jejus kukjêr ã harênh

Matêwre 26.57-68; Rukre 22.63-71; Juãw 18.12-14, 18.19-24

53Tã nhũm mẽ ma mẽ õ patre maati nhõrkwÿ hwÿr Jejus o tẽ.

Hāmri nhūm patre krāhtūmjê mẽ Ijaew krāhtūmjê mẽ Tirtūm kapēr tūm o mẽ ahkre xwỳnhjaja ôrkwỹ hwỳr Jejus ã akuprô. ⁵⁴Hāmri nhūm Simāw Pêtre mẽ hkôt tê nê mẽ hkôt patre maati nhô kítare hwỳr axà nê amỳm hã mẽ omunh o xa. Nhūm ra pôristijaja kítare kamã amnhĩm kuto nê hã ànhunh o hkrĩ nhūm mẽ hwỳr tê nê mẽ ìhkô hã ànhunh o nhỹ.

55-56Rôm nhūm ixkre kamã mẽ pikuprôn̄h xwỳnhjaja tee ri Jejus ã krĩ nhô xwỳnhjê kukja nê mẽ kãm:

— E mẽ atô na ka pre Jejus kot tanhmã amnhĩ tomnuj to hã omu? Mẽ atô mẽ inhmã harê pa mẽ ama nê Rôm nhô xwỳnhjê nhĩhkram haxà kê mẽ pamã kupĩ. Anẽ.

Hāmri nhūm mẽ axpên pãnhã tanhmã harênh to. Tanhmã kot amnhĩ tomnuj to hã harênh to htã nom ri ho hêx jakamã axpên kwỳm ri tanhmã ri harênh to nhūm mẽ tee ri mẽ kuma nê mẽ kãm:

— Tk. Kwa mẽ axpên kwỳm ri tanhmã harênh to hkêt nê. Axpên kôt măn ri tanhmã mẽ inhmã harênh to. Anẽ.

57Hāmri nhūm mẽ hkwỳjjaja kãnhmã kuhê nê axpên kôt tanhmã ho hêx to nê mẽ kãm:

58— Nà kot paj mẽ amã tanhmã kot amnhĩ nhĩpêx to hã harê. Na pa prem ã kapēr anhỹr ã kuma. Na pre tanhmã Tirtūm mã amnhĩ jarênh xà hã ixkreta jarênh to nê harênh o: “Kot paj ixkreja grãnh pa hāmri nê ixtã apkati axkrunêpxi nê akupỳm hipêx. Nom kot paj amnhĩ nhĩhkra ho hipêx kêt nê.” Anhỹr ã ã amnhĩ jarênh anê pa mẽ kuma.

59Anhỹr o harênh tã nom axpên kôt harênh kêt nê. Arĩ axpên kwỳm ri harê. **60**Hāmri nhūm mẽô patre maati tee ri mẽ kot tanhmã ho kapēr toja ma nê mẽ aptàr tūmjê noo mã kãnhmã xa nê Jejus mã kãm:

— E na ka ra mẽ kot ã ajarênh anhỹrja ma. Xà kot kaj tanhmã mẽ inhmã amnhĩ tã axaprãr to hkêt nê? Xà ãm hāmri na mẽ ajarê? E kwa mẽ inhmã tanhmã amnhĩ jarênh to. Anẽ.

61No nhūm akryk xa nê tanhmã kãm nê hkêt nê. Hāmri nhūm tee ri ã kot amnhĩ nhĩpêx anhỹr ã omu nê axte kãm:

— Kwa mẽ inhmã amnhĩ jarê. Xà apê Tirtūm Kra na ka? Xà ka na apê Tirtūm kot mẽ ixwỳr amênh xwỳnh na ka? Anẽ.

62Hāmri nhūm tã kãm amnhĩ jarê nê kãm:

— Tỳ. Ixpê tãmta na pa. Ra mẽ ate jarãhã tanhmã ijarênh to kaxyw apikuprôn̄h tã nom kot paj nhỹrmã mẽ kamjaja tanhmã mẽ ajarênh to ka mẽ amnhĩ tã ixpumu. Kot kaj mẽ Tirtūm kot mẽ ato amnhĩptàr xà kutã akrĩ hāmri pa hwỳr tê nê ìhkô hã nhỹ. Kakra kamã kot paj hwỳr tê nê ìhkô hã nhỹ hāmri nê ÿ hã tanhmã mẽ ajarênh to ka mẽ amnhĩ tã ixpumu. Anẽ.

63-64Hāmri nhūm tee ri ã kot amnhĩ jarênh anhỹrja ã kuma nê gryk xaj amnhĩ xê kaxô nê mẽ aptàr tūmjê mã kãm:

—Kwa mo kaxyw kot puj mẽ axte ri ho tanhmã kot amnhĩ tomnuj to hã harênh xwÿnhjê hõ japêr? Ra tãm kot amnhĩ pê Tĩrtũm Kra hã amnhĩ to hêx nhũm mẽ pahte pajamak o mar kênã. E tanhmã kot puj mẽ ho? Anẽ.

Hãmri nhũm mẽ kãm:

—Nà kot puj mẽ kupĩ. Ra htyk mã tãm kênã. E kwa tokyx pu mẽ ma Rõm nhõ pahihiti hwÿr o tẽ kê mẽ pamã hã amÿnê kê mẽ kupĩ. Anẽ.

⁶⁵Hãmri nhũm mẽ hipêx kati rax nẽ. Nẽ hkuk kuhtô nẽ hpãnhã no hpro nẽ htak nẽ kãm:

—E mẽ kot atak xwÿnhjê nhĩxi jarẽ. Apê Tĩrtũm Kra hã ate amnhĩ jarênh jakamã mãn urak nẽ axãhpumunh tÿx. Jakamã e mẽ hixi jarẽ. Anẽ.

Nhũm prem ã hipêx anẽ hãmri nẽ põristijê nhĩhkram haxà nhũm mẽ htak rax o kuhê.

Simãw Pêtre kot Jejus kõt pa hkêt ã kot amnhĩ jarênh
Matêwre 26.60-75; Rukre 22.54-62; Juãw 18.15-18, 18.25-27

⁶⁶⁻⁶⁷Rõm nhũm Simãw Pêtre arĩ kĩtare kamã mẽ ãhkô hã ànhunh o nhÿ. Hãmri nhũm mẽõ patre maati mã àpênh xwÿnh nitita mẽ hwÿr kato nẽ xa. Hãmri nẽ hirã kamã hprĩ hã Simãw Pêtre pumu nẽ omunh mex kurê kumrêx nẽ kãm:

—Xê pẽr apê Najare nhõ xwÿnh Jejus kõt mẽ pa ho mẽ pa xwÿnhjê hõ na ka. Anẽ.

⁶⁸Hãmri nhũm tee ri kuma nẽ ra kãm ma nẽ. Nẽ kãm amnhĩ tã aprã nẽ kãm:

—Tk. Kokÿ. Ixte mẽhõ my ata pumunhre hã. Anẽ.

Hãmri nẽ kãnhmã xa nẽ ma tẽ nẽ kĩtare hwÿr kahê hkõt ã mẽ hkàx ã ahte xa nhũm krãhyre kà. ⁶⁹Nẽ gaa nhũm hpãnhã mẽ kãm àpênh xwÿnhjê hõja omu nẽ hã mẽ kãm:

—Xê ma ãm hãmri na harê. Kõt ri mẽ pa xwÿnhjê hõ na pẽr. Anẽ.

⁷⁰Hãmri nhũm amnhĩ tã kuma nẽ kãm:

—Tk. Kwa nà. Mẽ ri ã amnhĩ krã hkõt ri ixto axêx anhÿr kêt nẽ. Aa ixte mẽhõ ata pumunh kêt kumrêx. Anẽ.

Hãmri nhũm mẽ hkwyÿja gaa nẽ kê axte hprĩ hã omu nẽ kãm:

—Kwa ãm hãmri na mẽ ajarê. Apê Jejus hkwyÿ na ka. Ajaxwÿja apê Garirej nhõ xwÿnh kênã. Anẽ.

⁷¹Hãmri nhũm tee ri mẽ kuma nẽ kãm ma htÿx nẽ. Hãmri nẽ mẽ kãm:

—Kwa nà. Na pa Tĩrtũm noo mã mẽ amã amnhĩ jarẽ. Kot paj amnhĩ to ixêx japêr nhũm inhma nẽ hã tanhmã ixto. Nà uràn ixpê Garirej nhõ xwÿnhre hã. Ixte mẽhõ mÿj pumunh kêt kumrêx tã ka mẽ xatã xypên kõt ixte hkõt ixpa ho ixpa xwÿnh ã ixkamnhĩx o xa.

Anhÿr o ra mẽ kãm amnhĩ tã aprãr o axkrunẽpxi. 72Hãmri nhũm axte krãhyre kà. Jao ra hkàr o axkrut. Hãmri nhũm Simãw Pêtre kuma nẽ Jejus kot ra hkukamã ã amnhĩ nhĩpêx anhÿr ã harênhja mã hamaxpêr kurê kumrêx. Krãhyre kormã hkàr o axkrut kêt ri kot mẽ kãm amnhĩ tã àprãr o axkrunẽpxi hã harênhja mã hamaxpêr. Hãmri nẽ ra kànhmã hakry hpar o tẽ nẽ hkaprĩ htÿx kumrêx. Hãmri nẽ tee ri amnhĩ kukamã hamaxpêr nẽ amnhĩ mã:

—Hêxta waa nẽ. ãm hãmri na pre Jejus ijarẽ. Tã pa kot ijarênh xà hkôt ã amnhĩ nhĩpêx anẽ. Kwa mo na pa axtem nẽ ã mẽ kãm amnhĩ to ixêx anẽ?

Anẽ hãmri nẽ hkaprĩ xàj mÿr rax nẽ.

Pirat kot Jejus kukjêr ã harênh

Matêwre 27.1-2, 27.11-14; Rukre 23.1-5; Juãw 18.28-38

15 1Tã nhũm myt kato nhũm mẽ axte Jejus ã axpên wÿr akuprõ. Patre krãhtũmjê mẽ Ijaew krãhtũmjê mẽ Tirtũm kapêr tũm o mẽ ahkre xwÿnhjê mẽ Ijaew nhõ juistijaja nhũm mẽ piitã hã akuprõ. Hãmri nẽ pôristi mã anẽ nhũm mẽ Jejus pa hpre nhũm mẽ ma Rõm nhõ xwÿnhjê nhõ pahi Pirat wÿr o tẽ. Piratja na pre hte Rõm nhõ xwÿnhjê nhõ pahi Sesti nhÿ hã Ijaew o amnhĩptar o pa nhũm prem ma hwÿr o tẽ. 2Hãmri nẽ kutã ãm nẽ tanhmã kãm harênh to nẽ kãm:

—E ot pa mẽ awÿr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwÿm ri amnhĩ nhĩpêx prãm xàj tanhmã mẽ inhmã hêx to. Nẽ axtem nẽ mẽ ixte Sesti mã kàxpore hkwy nhõr kêt ã mẽ inhmã karõ. Nẽ Tirtũm kot mẽ ixkaxyw kêp mẽ inhõ pahi hã ãm ã amnhĩ jarênh o pa. Na hte ã mẽ inhmã amnhĩ to hêx anhÿr o pa. Anẽ.

Hãmri nhũm Pirat mẽ kuma nẽ Jejus pumu nẽ tanhmã hkukjêr to nẽ kãm:

—E inhmã amnhĩ jarẽ. Xà ãm hãmri na mẽ ã ajarênh anẽ nà? Xà apê Ijaew nhõ pahi na ka? Xà ka na htem amnhĩ wÿr akãm hamak o pa? Anẽ. Hãmri nhũm kãm:

—Tÿ. Nà ãm hãmri na ka ã ijarênh anẽ. Anẽ.

3Hãmri nhũm patre krãhtũmjaja tanhmã kãm ho kapêr to. 4Nhũm mẽ kuma nẽ axte hkukja nẽ kãm:

—Kwa na mẽ ã ajarênh anẽ ka mẽ ama nẽ ãm mẽ ama nẽ inhmã tanhmã amnhĩ tã axàprãr to hkêt nẽ. Anẽ.

5Nom nhũm Jejus ãm akryk xa nẽ tanhmã axte kãm nẽ hkêt nẽ. Jakamã nhũm Pirat tee ri omunh pê hamaxpêr o nhÿ.

Pirat kot Jejus pĩr ã ãmnênh ã harênh

Matêwre 27.15-26; Rukre 23.13-25; Juãw 18.39-19.16

6Na pre hte pahi Pirat arĩgro pê Pasja ã Ijaewjaja kãm hprãm xà hkôt

mě hagjênh xwÿnhjê ho hpÿnh nê mẽ kãm ure. 7-10 Jakamã nhũm Ijaew kwÿjaja hwÿr mra nê kãm:

— Pa. Kwa xà kot kaj jarãhã mẽ inhmã mẽ hagjênh xwÿnhjê hõ mã anhũre nà? Anê.

Hãmri nhũm mẽ kuma nê hamaxpêr o:

— E paj Jejus ã mẽ kuma nê kãm inhũre. Mẽ piitã mẽ kãm kapêr mar prãm nhũm mẽo patre krãhtũmjaja pix kot mẽ hkôt kamã gryk nê ã ixwÿr o mrrar anhÿr kênã. Anê.

Hãmri nê mẽ kãm:

— Tÿ. Nà kot paj mẽ amã hõm inhũre. Kwa xà kot pa mẽ amã mẽ anhõ “pahihti” jarênhja mã inhũre nà? Anê.

11 Hãmri nhũm patre krãhtũmjaja tee ri kuma nê mẽ kãm:

— Kwa mẽ kãm anê kê Parapas mã mãn ure. Anê.

Hãmri nhũm mẽ kuma nê Pirat mã kãm:

— Nà Jejus mã anhũrer kêt nê. Parapas mã mãn anhũre. Anê.

12 Hãmri nhũm mẽ kãm:

— No mẽ ate mẽ anhõ pahi hã harênh xwÿnhnta? Tanhmã kot paj ho? Anê.

13 Hãmri nhũm mẽ àmra kamã kãm hã amÿnê nê kãm:

— Kwa pĩ kahpa hã anhõ kê ty. Anê.

14 Hãmri nhũm tee ri mẽ kuma nê mẽ kãm:

— Tk. Kwa nà. Tanhmã kot amnhĩ tomnuj tore hã kot pa ã hipêx anê.

Anhÿr tã nhũm mẽ xatã anhĩpê kãm kapêr kãm hihtÿx nê kãm:

— Kwa pĩ kahpa hã mãn anhõ kê ty. Tokyx ã mẽ inhmã hipêx anê.

Anhÿr o kuhê. Kàx pê kãm anhÿr o kuhê. 15 Nhũm tee ri mẽ kuma hãmri nê mẽ kãm hprãm xà hkôt mẽ kãm Parapas mã ure. Nê pòristi hkwyjê mã Jejus ã amÿnê nê mẽ kãm:

— Tôe. Mẽ mamrĩ hwÿr tẽ nê htak hãmri nê kapôt ã mẽ hpar xà hã pika hwÿr o tẽ nê pĩ kahpa hã anhõ. Anê.

Mẽ kot Jejus tak ã mẽ harênh

Matêwre 27.27-32; Juãw 19.2-3

16 Tã nhũm pòristijaja akupÿm ixkreja wÿr Jejus o axà nê amnhĩ wÿr hkwyjê hã karõ nhũm mẽ hwÿr agjê nê Jejus ã akuprõ. 17 Hãmri nê kêp pahi hã hpêr o pikênh kaxyw kãm pahi hã mẽ ahkã nhĩpêx nê hkrãm haxà. Nom axtem nê akunĩ kamã mẽmo mrõ nhĩ te kot ronh kanêre pyrãk xwÿnhja nhũm mẽ kãm hikãx nê hkrãm haxà. Hãmri nê kêp ê kapa nê pahi hã mẽ ê kamrêk õ py nê kãm haxà. 18 Hãmri nê kãm:

— E apê Ijaewjê nhõ pahi na ka. Anê.

19 Hãmri nê xatã axpên pãnhã hwÿr mra nê pĩ ho hkrãx pê htak nê hkuk kuhtõ nê hã hpêr o pikênh pê hã hpijaam pyrã nê kutã hkõn krã

ho hkrĩ. **20**Hãmri nê kêp pahi xê kapa nê akupỹm kãm ê jaxà nê pĩ kahpa hã nhôr kaxyw ma o kato nê o tẽ.

21Nom nhũm ra hiro tỳx nê nhũm mẽ tee ri omu hãmri nê mēhõ kot ho ajuta kaxyw mẽ kot hkôt omunh o mõi xwỳnhjê kapi ho xa. Hãmri nê Sirẽn nhõ xwỳnh Simãw hkà htykreja pumu. Aresãn mẽ Rupti wa hipêêxà na pre. Nhũm htỳx hamakêtkati nê mẽ kutã krĩm tẽ. Hãmri nhũm mẽ haê nê unê nê kãm Jejus o ajuta kaxyw hã karõ nhũm kãm pĩ kahpaja mỳ nê mẽ hkôt o tẽ.

Mẽ kot pĩ kahpa hã Jejus nhôr ã mẽ harẽnh

Matêwre 27.33-44; Rukre 23.33-43; Juãw 19.17-27

22Nhũm mẽ ra kẽn nhĩxêt te kot mẽ hkrã hi pyrãk xwỳnhja wỳr Jejus o põi. Mẽ kot kãm “Korkot” anhỹr xwỳnhja wỳr. Mẽ pakapêr kãm na htem Korkotja jarẽnh o: “Mẽ hkrã hi xà” anê. Jakamã nhũm mẽ ra hwỳr o põi. **23**Hãmri nê kot pĩ kahpa hã nhôr kaxyw wĩhti hkwy ho mẽ mẽmo mẽhkanexà pê mĩra ho ahkà. Kot ho kõi nê amnhĩ xà htỳx kãm hamak kêt kaxyw hipêx nê kãm kugõ nom nhũm hkaga nê ho hkõi kêt nê. **24-26**Hãmri nhũm myt kaxkwa nhĩpõk wỳr tẽ nhũm mẽ pĩ kahpata ã Jejus xi nê prek o ãhkra ho htỳx nê hpar o htỳx. Nê hpãnhã kaxyw kakwỳ nê kànhmã pĩ kahpa jarĩ nê kre kamã ãm nê hity hpa. Nhũm Jejus kỳx pê amnhĩ xà htỳx kumrêx kamã hamak o ajêt. Nhũm põiристи hõja tẽ nê tapti hõ py nê hã kagà ho:

IJAEWJÊ NHÕ PAHI NA JA

Hãmri nê Jejus wỳr ho api nê mỳ ri kunhõ. Hãmri nhũm hparpê põiристи hkwyja axpẽn mã ê hkwy ho hpigrãnh kaxyw hã kẽnre ho jõka ho hkrĩ.

27-28Tã nhũm mẽ wa kot amnhĩ tomnuj xwỳnh wa ho axkrut nê mã wa ho anê nê. Nê pĩ kahpa hã prek o wa ãhkra ho htỳx nê wa hpar o htỳx hãmri nê akutã ho Jejus nhĩjê nhũm wa ajêt.

29Hãmri nhũm mẽ kot omunh mã mrar xwỳnhjaja Jejus pumu nê hã hpêr o pikênh punuj nê hkrã ho apê nê kãm:

—Kwa na ka pre ate Tĩrtũm mã amnhĩ jarẽnh xà hã ixkre grãnh par nê atã apkati axkrunêpxi nê akupỹm hipêx par ã amnhĩ jarẽnh o apa. Nê axãhpumunh o axãhpumunh ã amnhĩ jarẽnh o apa. **30**Jakamã e kwa amnhĩ kapa nê wrỳ pa mẽ ja hã apumu. E kwa tokyx. Anê.

31Nê patre krãhtũmjê mẽ Tĩrtũm kapêr tũm o mẽ ahkre xwỳnhjaja piitã hwỳr mra nê hã hpêr o pikênh o kuhê. Nê axpẽn mã kapêr o:

—E jahti na xep pre mẽ kamã ukapĩrĩ ho pa nê tanhmã mẽ ho ajuta hto ho pa. Tã tãm tanhmã amnhĩ to nê wrỳk kêt nê. **32**Kwa pu mẽ arĩ pakuhê nê kot amnhĩ kaxàr nê wrỳk kãm omu. Kojã wrỳ pu mẽ omu nê kêp mẽ panhõ pahĩhti hã hkôt pajamaxpêr kurê kumrêx. E tokyx wrỳ Jejus pa mẽ awrỳk kãm apumu. Nã kot kaj awrỳk rax nê. Anê.

Hāmri nhũm akutã wa kot hijê nê jêt xwÿnh wa haxwÿja kãm kapêr punuj o ajêt.

Jejus htyk ã harênh

Matêwre 27.45-46; Rukre 23.44-49; Juãw 19.28-30

33Tã nhũm ra kaxkwa nhĩpôk ri myt nhÿr mẽ nhũm te kamàt pyræk. Nhũm kamàt kô rax kumrêx o ra hã awry mẽ nhũm akupÿm myt katêr o mō. 34Hāmri nhũm Jejus àmra kamã Tĩrtũm mã kapêr nê kãm:

— Inhō Tĩrtũm inhō Tĩrtũm. Kwa mon ka ixkaga? Anê.

Nom kapêr kãm kapêr o:

— Eri Eri rãmã sapatani. Anê.

35Hāmri nhũm mẽ kot mar o kuhê xwÿnhjaja kot Eri hã harênh ma nê htÿx ho finat Eris mã kapêr ã hkamnhĩx. 36Hāmri nhũm ja hprôt nê mẽmo rereeti py nê pĩ ho hkanhwÿ nê o tẽ nê ho wĩlti nhek nê Jejus wÿr o tẽ nê kot hkaôr kaxyw kãm kupê. Hāmri nê hkwyjê mã kãm:

— E hāmri pu mẽ jar hkàx ã pakuhê nê Eris jamã mãn. Koja kuma nê hwÿr tẽ nê o wrÿ nà? Anê.

37Nom nhũm Jejus ra htyk kaxyw nê àmra htÿx nê ty.

38Hāmri nhũm Tĩrtũm mã amnhĩ jarênh xà hã ixkre kamã hakwakre hã kupêxêja axkjê nê amnhĩ kahê xà mẽnh kurê kumrêx. Utĩ rax tã kÿj rũm ahpar mã axkjê nê amnhĩ kahê xà mẽ. Te Jejus htyk o mẽ pahte hkôt amnhĩ xunhwÿr xwÿnhjê mã Tĩrtũm wÿr pry jakwa kre kahê xà mẽnh pyræk o ã amnhĩ kaxônh anê. 39Nhũm pōristi krãhtũmjê hōja Jejus parpê kutã htyk kãm omunh o xa. Hāmri nê tee ri omu nê hamaxpêr o:

— Hêxta waa nê. ãm hāmri na pre hte kêp Tĩrtũm Kra hã amnhĩ jarênh o pa. Tã pa mẽ amarĩ kupĩ. Anê.

40-41Rôm nhũm mẽni kwÿjaja amÿm htyk kãm omunh o kuhê. Na pre htem Garirej kamã Jejus mẽ hkôt mẽ pa ho mẽ pa xwÿnhjê mã mẽ apkur xà hã àpênh o mẽ hkôt pa nê mẽ hkôt Jerujarê hwÿr mō. Marir Matarên nê Xiakre mẽ Jojes wa katorxà Marirja. Nê Sarome. Nê mãânên mẽni hkwyjaja nhũm mẽ amÿm Jejus htyk kãm omunh o kuhê.

Mê kot Jejus jaxàr ã harênh

Matêwre 27.57-61; Rukre 23.50-56; Juãw 19.38-42

42Nhũm prem arĩgro pê sêsta hã Jejus pĩ nhũm ra amÿkry htÿx nê. Sap kukamã na pre htem Ijaewjaja amnhĩm apkur xà hã mẽõ nhĩpêx pa nhũm sap kato nhũm mẽmoj to anhÿr kêt nê. 43Jakamã nhũm Juje hō pê Arimatej nhō xwÿnhja. Kêp Ijaewjê nhō juisti hō na pre. Nhũm mẽ piitã kãm hkĩnh nê axpên mã mex o mex ã harênh o pa. Na pre Tĩrtũm kot mẽ pahwÿr Jejus mẽnh kôt hamaxpêr o pa. Tã Jejus htyk ã omu hāmri nê hamaxpêr o:

—E pa ma pahi Pirat wỳr tẽ nẽ Jejus nhĩ hã kuwỳ. Inhmã uma htã kot paj ma hwỳr tẽ nẽ hã kuwỳ kẽ inhmã kugõ pa ma o tẽ nẽ tokyx haxà. Kot paj ho anhỳr tokyx anhỳr kêt nhũm mẽ panhõ arĩgromnu pẽ sapja wỳr ra myt axà hãmri pa haxàr kêt nẽ.

Anhỳr o hamaxpẽr nẽ ma Pirat wỳr tẽ nẽ hã kuwỳ. ⁴⁴Hãmri nhũm amnhĩ jaêr pẽ ra htyk ã harẽnh ma nẽ amnhĩ wỳr pōristi krãhtũmjẽ hõ hã karõ nẽ hã hkukja nẽ kãm:

—Kwa xà na ra Jejus ty? Anẽ.

Hãmri nhũm kãm:

—Tỳ na ra ty. Anẽ.

⁴⁵Hãmri nhũm kuma nẽ Juje mã kãm:

—Tõe. Mamrĩ ma o tẽ nẽ haxà. Anẽ.

⁴⁶Hãmri nhũm kuma nẽ akupỹm Jejus wỳr tẽ nẽ pōristi mã anẽ nhũm mẽ kãm ho wrỳ. Nhũm kumỳ nẽ kupẽxê ho hkupu hpa nẽ o tẽ nẽ kẽn kre kakwỳnh kãm haxà. Hãmri nẽ kẽn rax o hitom mex nẽ ma akupỹm krĩm tẽ. ⁴⁷Nhũm Marir Matarẽn mẽ Juje katorxà Marir õja wa ma hkõt tẽ nẽ kot haxàr kãm omunh o xa. Kot mẽ hkuxwa xà ho gregrer kêt rãhã haxàr kãm omu.

Jejus akupỹm htĩr ã harẽnh

Matêwre 28.1-10; Rukre 24.1-12; Juãw 20.1-10

16 ¹⁻²Tã nhũm apkati. Nom nhũm ra mẽ inhõ arĩgromnu pẽ sap kator jakamã nhũm mẽ kormã akupỹm kẽnkreta wỳr mrar kêt nẽ. Hãmri arĩgro mex jamãr pẽ kòkõt o hkrĩ. Hãmri nhũm axte apkati nhũm tòmĩk nhũm ra mẽ inhõ arĩgromnu hapêx nhũm Marir Matarẽn mẽ Sarome mẽ Xiakre katorxà Marirja mẽ ma akupỹm kẽnkreta wỳr mra. Kormã kwỳhtãã. Kormã myt kator o mõi mẽ nhũm mẽ kãnhmã hkrĩ hãmri nẽ mẽ kot Jejus gregrer kaxyw mẽ hkuxwa xà hkwy jamỳ nẽ ma hwỳr o mra. ³Hãmri nẽ kormã mõi ri tee ri amnhĩ kukamã hamaxpẽr nẽ axpẽn mã:

—Xê gàu nẽ. Mẽhõ koja mẽ pamã nhãm kẽnkre nẽ hitom raxta xãm pu mẽ Jejus wỳr agjẽ nẽ gregrer? Utĩ rax kumrẽx kẽnã. Anẽ.

⁴Hãmri nẽ hwỳr pøj nẽ omu nhũm ra hitom xaja kàx ã nõ nhũm mẽ tee ri omu. Utĩ rax tã ra kàx ã nõ. ⁵Hãmri nhũm mẽ kẽnkre hwỳr agjẽ nẽ upòk rũm mẽhõ nyw pumu. Nhũm ê jakajre kamã nhỹ nhũm mẽ amnhĩ jaêr pẽ omu nẽ tee ri hamaxpẽr. ⁶Hãmri nhũm mẽ kãm:

—Kwa mẽ amã ma hkêt nẽ. Mẽ ate Najare nhõ xwỳnh pẽ Jejus pumunh kaxyw na ka mẽ mra. Mẽ kot pĩ kahpa hã nhõr xwỳnhhta. Nom jar amrakati. Na ra Tĩrtũm akupỹm ho htĩr. E mẽ kam nẽ amnẽ agjẽ nẽ ano ho nõr xà kaprỳ pumu ⁷nẽ tokyx ma akupỹm mra nẽ hkõt mẽ pa ho pa xwỳnhjẽ mã harẽ. Koja ma Jejus mẽ akukamã akupỹm Garirej wỳr mõi. Garirej kamã kot kaj mẽ axte axpẽn pumu. Ra kot mẽ amã amnhĩ

jarênh xà hkôt. Kwa mẽ tokyx ma akupỹm mẽ hwỳr mra. Nê kwa kê Simãw Pêtreja harênh mar mex nê. Anê.

8Hãmri nhũm mẽ kuma nê awjanã nê ma akupỹm hprôt. Nê tee ri hamaxpêr nê kãm ma xàj htetert tỳx jakamã kormã nhãm mẽhõ mã harênh kêt nê.

Jejus kot Marir Matarên wỳr kator ã harênh

Juãw 20.11-18

9Nhũm semãn nyw mã àr xà hã arĩgro pê tòmĩkja ã nhũm Jejus akupỹm htĩr. Hãmri nê Marir Matarên kumrêx wỳr kato. Kot nê mẽkarõmnuti ho 7 nê nê hanor xwỳnh ta kumrêx wỳr kato. 10Hãmri nhũm akupỹm htĩr kãm omu nê hkĩnh tỳx kumrêx. Nê ma akupỹm tẽ nê Jejus krãmnhwỳjê mã harê. Nhũm mẽ hkaprĩ nê mỳr o hkrĩ nhũm mẽ hwỳr axà nê mẽ omu nê mẽ kãm:

11— Xê mẽ amỳr kêt nê. Na ra Jejus akupỹm htĩr nê ham ixwỳr kato pa inhno ho omu. Xê mẽ hãmri axte amỳr kêt nê.

Anhỳr tã nom nhũm mẽ htỳx ho amnhĩ krã hkôt kot ri ã harênh anhỳr ã hkamnhĩx jakamã kuma nê ãm kuma.

Jejus kot hkwỳjê hwỳr kator ã harênh

Rukre 24.13-35

12Tã nhũm Jejus axte ja wa hwỳr kato. Kôt mẽ pa ho pa xwỳnh wa ho axkrut nê wa hwỳr kato. Na pre wa Jerujarê rũm kato nê akupỹm wa õ krĩ hwỳr mõi mẽ nhũm wa hwỳr kato. Nom axtem tanhmã amnhĩ nhĩpêx to nê wa hwỳr kator jakamã nhũm wa tokyx hprĩ hã kêp Jejus ã omunh kêt nê. 13Tã kêp Jejus ã omu hãmri nê akupỹm Jerujarê hwỳr mõi nê hkwỳjê mã harênh kurê kumrêx. Nom nhũm mẽ wa kuma nê ãm wa kuma nê akupỹm htĩr kôt hamaxpêr kêt nê.

Jejus kot hkwỳjê mã mẽmoj tã karõ hã harênh

Matêwre 28.18-20; Rukre 24.44-49; Juãw 20.19-23; mããnên Atre 1.6-8

14Tã nhũm Jejus tã hkôt mẽ pa ho mẽ pa xwỳnh pê 11 wỳr kato nhũm mẽ kamã no pyma nê hkĩnh tỳx nê omunh o kuhê. Hãmri nhũm mẽ kãm:

— Kwa hêxta waa nê. Marir Matarên mẽ akwỳta mẽ kot akupỹm ixĩr kãm ixpumunh nê mẽ amã ijarênh tã ka mẽ ama nê ãm mẽ ama. Pêr ãm mẽ akrã hihtỳx jakamã na ka mẽ ama nê mẽ hkôt ajamaxpêr kêt nê. Anê.

15Hãmri nê mẽ kot tanhmã kãm amnhĩ nhĩpêx to ho pa hã mẽ kãm karõ nê mẽ kãm:

— E kêt ka mẽ ma krĩ piitã hkôt mẽ kãm ijarênh o ri mẽ hkôt apa. Ixte tanhmã mẽ nê amnhĩ nhĩpêx toja ka mẽ aprĩ hã mẽ kãm ijarênh o ri mẽ hkôt apa. 16Nê mẽ kot mẽ akapêr mar nê amnhĩ kaxyw ixkôt

hamaxpër xwÿnhjaja kêr ka mẽ hkrã kumrã nhũm mẽ nhÿrmã Tirtũm mẽ wa ixri htĩr tũm nẽ mex rãhã nẽ pa ho pa. No mẽ kot amnhĩ kaxyw ixkõt hamaxpër kêt xwÿnhjaja koja Tirtũm nhÿrmã amnhĩ nẽ mẽ hano nhũm mẽ ma kuwy hwÿr pa.

17— Nẽ amnhĩ kaxyw ixkõt mẽ ajamaxpër xwÿnhjaja kot kaj mẽ inhÿ hã tanhmã amnhĩ nhĩpêx to ho ri apa. Aa mẽ kot mẽmoj pumunh kêt kwÿ ho anẽ nẽ inhÿ hã inhĩxi jarẽnh kõt mẽ nẽ mẽkarõmnuti janor o ri mẽ hkõt apa. Nẽ mẽ ate nhãm mẽ kapër mar kêt tã inhÿ hã ho akapër mex o apa. Mẽ ate mar kêt tã ra ho akapër nhũm mẽ kot mẽ kapërta mar xwÿnhjaja hprĩ hã mẽ amar mex nẽ. 18Nẽ kot kaj mẽ nhÿri atÿx kagã xoprẽ hõ hpyr tã no nhũm tanhmã mẽ ato hkêt nẽ. Rÿ atÿx mẽmoj to mẽ hpar xà hkwÿ ho akõm tã no nhũm tanhmã mẽ ato hkêt nẽ. Nẽ inhÿ hã mẽ à xwÿnhjê hã mẽ anhĩhkra jaxwÿ nhũm mẽ akupÿm mex. Kot kaj mẽ amnhĩ kaxyw ixkõt mẽ ajamaxpër xwÿnhjaja ã inhÿ hã amnhĩ nhĩpêx anhÿr o ri apa. Anẽ.

Jejus kot akupÿm kaxkwa hwÿr àpir ã harẽnh

Rukre 24.50-53; mãânẽn Atre 1.6-11

19Tã nhũm mẽ panhõ Pahihti Jejusja hkõt mẽ pa ho mẽ pa xwÿnhjê mã kapër pa hãmri nhũm Tirtũm ma akupÿm amnhĩ wÿr kaxkwa hwÿr ho api. Hãmri nhũm kaxkwa kamã Tirtũm nhĩhkõ hã upõk rũm nhÿ. Kot ãhkõ hã mẽmoj piitã ho amnhĩptar kaxyw hkrĩ ho hkrĩ. 20Hãmri nhũm hkõt mẽ pa ho pa xwÿnhjaja ma akupÿm àpir kãm omu hãmri nẽ anhgrã nẽ ma krĩ piitã hkõt mẽ kãm Tirtũm kapër jarẽnh o pa nhũm Pahihti Jejus mẽ ãhkõ hã pa ho pa. Nhũm mẽ ma ÿ hã hkwÿjê mã aa mẽ kot mẽmoj pumunh kêt kwÿ ho anhÿr o ri mẽ hkõt pa nhũm mẽ ja hã mẽ omu nẽ axpẽn mã mẽ harẽnh o:

— Nã ãm hãmri na mẽ pamã Tirtũm kapër jarẽnh o pa nẽ ho hẽx kêt nẽ. ÿ hã mẽ kot aa mẽ pahte mẽmoj pumunh kêt kwÿ ho anhÿr o pa kẽnã. Nã ãm hãmri na ã mẽ pamã kapër jarẽnh anhÿr o pa. Anẽ.

Ja kõt na Makre kot Jejus jarẽnhja hapêx.



Rukre

Rukre tanhmã Jejus kot amnhĩ nhĩpêx to ho pa hã kagà

Rukre na pre kagàja nhĩpêx. Kêp Ijaew kêt xwỳnh na pre. Tã amnhĩ kaxyw Jejus kôt hamaxpêr. Na pre kêp tôtô nê mẽ hkane ho pa. Nê Jejus nhỹ hã kapêr o pa xwỳnhjê hõ pê Pawreja kôt pa ho pa. Tã tanhmã hamaxpêr to nê hkràmnhwỳ Teopre mã kagàja nhĩpêx nê kamã tanhmã Jejus kot amnhĩ nhĩpêx to ho pa hã harê nê hã kagà.

Nê Jejus kêp Tĩrtũm nhỹ hã kapêr o pa xwỳnh ã harê. Nê mẽ pahpyrà nê ĩ ho ĩ hã harê. Nê kêp mẽ pakamã ukapřĩ xwỳnh ã harê. Nê kêp mẽ pahte amnhĩ tomnuj o hapêx xwỳnh ã harê. Ā na pre Rukreja hkràmnhwỳ Teopre mã Jejus jarê nê hã kagà anê. Nê mããnên mẽ pahpiitã mẽ pakaxyw harê nê hã kagà.

Rukre kot Teopre mã amnhĩ jarênh

Atre 1.1-2

1 1Pa pahi Teopre. Xà amex? E ot pa awỳr kagà nhĩpêx nê awỳr kumê. Ixte amã Jejus jarênh kaxyw. Na prem ra ohtô nê jar mẽ pahkôt Jejus kot amnhĩ nhĩpêx o pa hã kagà rax nê. **2**Jejus nhỹ hã Tĩrtũm kapêr jahkre ho mẽ pa xwỳnhjaja na prem Jejus kot tanhmã amnhĩ nhĩpêx to hkrax kãm kot amnhĩ nhĩpêx o pa hã omunh o hkôt pa. Hãmri nê hprĩ hã mẽ inhmã harê nê hã kagà nhũm mẽ ohtô nê mẽ mar xà hkôt mẽ urà nê kot tanhmã amnhĩ nhĩpêx to ho pa hã kagà. **3**Tã pa mẽ harênh ma nê ijamaxpêr o:

—E kot paj ijaxwỳja Jejus kot amnhĩ nhĩpêx kwỳ hã kagà. Nà kot paj ho anê.

Anhỹr o ijamaxpêr jakamã ot pa ra ixte amã hã kagà kaxyw.

4Tã kêr ka kamã harê nê ixpyrà nê ama nê aprĩ hã harênh mar tỳx nê mẽ kot amã harênh xwỳnhjê hkôt ajamaxpêr tỳx o apa. Ām hãmri na prem mẽ amã harê. E kot paj amã hkwy hã kagà. Ixpê akràmnhwỳ Rukre kot paj ixprĩ hã amã harê nê hã kagà.

Tirtúm kapër o wrỳk xwỳnh kot Juãw Paxis jarënh

5 Juãw Paxis nhĩpêêxà finat Jakarisja kumrëx kot paj amã harë. Kêp finat Apiasti kanrêhã htàmnhwỳ jakamã uràk nê kêp mễ apê Ijaew nhô patre na pre. Pahihti Eroxa kormã kot mễ anhô pika kamã mễ ho amnhĩptàr ri nhũm Jakaris kêp patre nê pa. Nê hprô Ijapew mễ wa kêp Parãw kanrêhã htàmnhwỳ. 6 Nê wa hamê na pre Tirtúm kôt tãm amnhĩ nhĩpêx o wa pa. Âm Tirtúm kapër kôt pix mã ri amnhĩ nhĩpêx rãhã ho wa pa.

7 Nom Ijapewja tanhmã hkra xà kute jakamã nhũm wa hkra hkêt nê wa pa rãhã wa ra hpigêx tỳx nê.

8 Jakamã nhũm Jakaris ma mễ kot Tirtúm mã amnhĩ jarënh xà hã ixkre hwỳr tê. Kwỳjê pyrã nê kot Tirtúm mã tanhmã amnhĩ nhĩpêx to kaxyw ma mễ hpãnhã hwỳr tê nê axà. 9-10 Hãmri nê kamã Tirtúm mã amnhĩ jarënh pê kãm mễ hkuxwaxà ho xêt o xa. Nhũm Ijaew kwỳjaja ixkreta wỳr akuprô nê kapem kutêp Tirtúm mã amnhĩ jarënh o kuhê. 11 Pu nhũm kaxkwa rũm Tirtúm kapër o mễ wrỳk xwỳnhja wrỳ nê Jakaris kutã xa. Mễ hkuxwa xà ho xêt xà hã mês kunĩhti xupôk rũm xa. 12 Hãmri nhũm amnhĩ jaer pê amnhĩ kutã omu nê akryk omunh o xa. 13 Hãmri nhũm kãm:

— Pa Jakaris? Kwa tee ri ajamxpêr o amã ma hkêt nê. Na pre Tirtúm ate akra hã hwỳr o apa hã ama nê hã apumu. Jakamã koja tanhmã aprô hkra xà ho ka kamã akra. Nhũm nô nê rax nê kato nê myre. Ka wa hã hixi mễ nhũm kêp Juãw. 14 Koja kato ka wa omu nê akĩnh tỳx kumrëx. Nhũm akwỳjaja haxwỳja ohtô nê war akra jarënh ma nê war anhỹ hã hkĩnh nê. 15 Koja kormã akra kator kêt ri nhũm Tirtúm Karôja hkarô hwỳr axà. Hãmri nhũm kato nê gaa nê hprêk nê Tirtúm mã tanhmã amnhĩ nhĩpêx to ho pa. Tirtúm kãm hprãm xà hkôt pix mã tanhmã amnhĩ nhĩpêx to ho pa. Nom kêr ka inhmar kumrëx. Kê mễmoj to wĩhti ho hkôm kêt nê pa. Nê kagôxỳhti ho hkôm kêt nê pa. Âm kwarĩ ho kwarĩ. 16 Koja hprêk hãmri nê mễ apê Ijaew mã Tirtúm kapër jarënh o mễ hkôt pa. Nhũm mễ ohtô nê kuma nê kot amnhĩ tomnuj kaga nê Tirtúm kôt amnhĩ xunhwỳ nê hkôt amnhĩ nhĩpêx mex o pa.

17 — Tirtúm kot mễ awỳr mễ apytãr xwỳnh maati mễnh mã xwỳnh kukamã koja mễ kãm harënh o pa. Te Tirtúm nhỹ hã kapër jarënh xwỳnh finat Eris kot amnhĩ nhĩpêx pyrãk o koja amnhĩ nhĩpêx. Nê uràk nê Tirtúm Karô nhỹ hã mễ amã Tirtúm kapër jarënh o mễ akôt pa. Jakamã nhũm mễ akwỳjaja kuma hãmri nê amnhĩ tomnuj kaga hpa nê Tirtúm kôt pix mã amnhĩ nhĩpêx o pa. Nê tãm mễ hkrajê nhĩpêx o pa. Koja mễ ã akra Juãwja kôt amnhĩ nhĩpêx anê. Jao Tirtúm kot mễ awỳr mễnh mã xwỳnhhta kutêp tãm amnhĩ nhĩpêx o pa. Anê.

18Nhũm pre ã Tirtũm kapër o wrỳk xwỳnh Jakaris mã hkrata jarënh anë. Hãmri nhũm tee ri kuma në kãm:

—Kwa xà we ãm hãmri na ka ã inhmã ixkra jarënh anë nà? Ra ixprõ mẽ wa ijamë wa ixpigêx tỳx kênã kot pa kêt wa ixkra. Anë.

19Hãmri nhũm kãm:

—Nà ãm hãmri na pa ã amã harënh anë. Ixpê Gapriew na pa ã awỳr ixwrỳk në Tirtũm nhỹ hã amã harënh anë. Ixte Tirtũm nhĩhkô hã ixkuhê xwỳnhjê hõ na pa. Tãm na awỳr inhmẽ pa awỳr wrỳ në ã amã akra jarënh anë. 20Tã ate ixkôt ajamaxpër kêt jakamã kot kaj axte axumar kêt në akapër kêt rãhã nhũm akra kato. Koja kato ka rĩ kormã akupỳm akapër në akupỳm ama. Ate ixkôt ajamaxpër kêt jakamã kot kaj ã amnhĩ nhĩpêx anë në rĩ amnhĩ pumu. ãm hãmri na pa ã amã ixkapër anë. Anë.

Nhũm pre ã Tirtũm kapër o wrỳk xwỳnhja Jakaris mã kapër anë. Jakamã nhũm tokyx ixkre rũm kator kêt në.

21Hãmri nhũm ixkre kapem mẽ kuhê xwỳnhjaja tee ri kamã ama në axpën mã:

—Tk. Kwa mo na we ri hitom kãm ho anhỹr kãm unê në tokyx kator kêt? Anë.

22Tã nhũm akupỳn mẽ hwỳr kato. Në tee ri kot mẽ kãm kapër kaxyw no ãm ãhkra pix o ri mẽ kãm tanhmã ujahkre hto. Hãmri nhũm mẽ amnhĩ jaer pê kot ã amnhĩ nhĩpêx anhỹr ã omu në tee ri hkukamã hamaxpër në axpën mã:

—Kwa tanhmã na we amnhĩ to? Mãn hitom kãm mẽmoj tanhmã kute hã omu hã na ri ã amnhĩ nhĩpêx anë nà? Anë.

23Hãmri nhũm Jakaris ixkre kamã mẽmoj tã àpênh pa hãmri në ma akupỳm òrkwỹ hwỳr tẽ.

24-25Tã nhũm hprõ Ijapewja htujarô. Hãmri në amnhĩ tujarô hã amnhĩ pumu në hkĩnh tỳx në. Në hamaxpër o:

—Hêxta gàu në. Ma ãm hãmri na pa pre ixkra hkêt në amnhĩ kamã ixpijaàm o ri ixpa. Tã ra ixtujarô. Kot paj wa axte ri amnhĩ kamã ixpijaàm kêt në. Ma ãm hãmri na Tirtũm ã wa inhĩpêx anë. Na pa wa ixkĩnh tỳx kumrêx. Anë.

Nhũm pre ã hamaxpër anë hãmri në arĩ òrkwỹ kamã hkrĩ ho hkrĩ. Aa nhỹhỹm kator në mõi kêt rãhã hã mytwrỳ kêp 5.

Tirtũm kapër o wrỳk xwỳnh kot Marir mã hkra jarënh

Matêwre 1.18-21

26Tã nhũm Ijapew ra htujarô hã mytwrỳ kêp 6 nhũm Tirtũm axte kapër o wrỳk xwỳnh pê Gapriewja mẽ. Nhỹri Garirej kamã krĩ pê Najare hwỳr kumẽ nhũm ma hwỳr wrỳ. 27Mêhõ pê Marir wỳr wrỳ. Nhũm ra Juje ho mjên kaxyw. No ãm kormã hkukrit rãhã ho mjên kaxyw. Jujeja

Marir pyrà nê kêp pahi finat Tawi kanrêhã htãmnhwỳ na pre. ²⁸Jakamã nhũm Gapriew Marir wỳr wrỳ nê kãm:

— Pa Marir? E ot pa amã Tirtũm kapêr jarênh kaxyw awỳr wrỳ. Kot akôt pa ho pa jakamã koja ato mex rax kumrêx. Anê.

²⁹Hãmri nhũm amnhĩ tã kuma nê tee ri hamaxpêr nê hamaxpêr o:

— Xê mêmô na we ri ã inhmã kapêr anê? Tanhmã koja we Tirtũmja ixto mex rax to? Anê.

³⁰Hãmri nhũm Gapriew kãm:

— Kwa tee ri amnhĩ kukamã ajamaxpêr kêt nê. Tirtũm kãm ajapêê.

³¹Kot kaj atujarô nhũm akra kato nê myre. Ka hã hixi mẽ nhũm kêp Jejus. ³²⁻³³Koja Tirtũm amã ho mex rax nê. Nê koja mẽ piitã mẽ kãm kêp amnhĩ Kra hã ho amnhĩrít. Nê mẽ apê Ijaew o amnhĩptâr kaxyw koja mẽ akaxyw âm nhũm higêt pahi Tawi pyrà nê mẽ ato amnhĩptâr o pa. Mẽ ate amnhĩ wỳr kamã ajamak o apa xwỳnhta koja. Tirtũm kãm hprãm xà hkôt koja mẽ ato amnhĩptâr rãhã ho pa. Anê.

³⁴Nhũm pre ã kãm kapêr anê nhũm amnhĩ tã kuma nê tee ri amnhĩ kukamã hamaxpêr hãmri nê kãm:

— Xê gòa nê. Tanhmã kot pa kêt we amnhĩ to nê ixtujarô? Kormã ixkukrit nê mo kormã inhmjên? Mê. Xà Juje kot ixkamã hkra hkukamã na ka ã ri inhmã axujarênh anê? Anê.

³⁵Hãmri nhũm kãm:

— Nà koja Tirtũm Karô tãm tanhmã ato ka ÿ hã tanhmã amnhĩ to hkêt tã atujarô. Jakamã koja akra kêp Tirtũm Kraa. ³⁶⁻³⁷Na ra haxwỳja anã Ijapewja htujarô. Ra hpigêx tỳx nê aa hkra hkêt nhũm hkwyjaja kot axpên mã ôhy kamã hkra hkêt kumrêx ã harênh o pa htã ra htujarô. Tirtũm kot tanhmã mẽ ho nhũm mẽ htujarô tanhmã kêp kute hkêt. Jakamã nhũm tanhmã ho nhũm mjên tãm htu nhũm ra htujarô hã mytwrỳ kêp 6. Tirtũm tãm kot mêmôj piitã tanhmã ho kaxyw àhpumunh xihtỳx. Jakamã koja uràk nê mã ato anê nê ka kormã akukrit tã atujarô. Anê.

³⁸Nhũm pre ã Gapriew Marir mã kapêr anê nhũm amnhĩ tã kuma nê kãm:

— Ko. Kê mãmri kãm tanhmã ixto hprãm xà hkôt mãmri tanhmã inhĩpêx to. Inhmã Tirtũm kapêr kôt amnhĩ nhĩpêx prãm. Kê mãmri kãm tanhmã ixto hprãm xà hkôt tanhmã inhĩpêx to.

Anê nhũm kuma nê ma akupỳm api.

Marir kot Ijapew wỳr mõi ã harênh

Rukre 11.27

³⁹⁻⁴⁰Tã nhũm Marir amnhĩ tujarô hã amnhĩ pumu nê nã Ijapew wỳr hkrà kurê kumrêx. Hãmri nê nojarêt nê ô krĩ rũm kato nê ma hwỳr mõi. Ma Ijapew papxà hwỳr mõi. Ijapew nhõ krija pika pê Jutej kamã nhỹri

hixêť kamã na pre. Nhũm ma hwÿr mō hãmri nê hwÿr pōj nê Ijapew wÿr axà nê omu nê kãm:

—Ka? Xà wa amex? Anê.

41 Hãmri nhũm kuma nê kãm:

—ÿ ma wa inhmex na pa wa ixpa.

Anhÿrja kōť nhũm ōhy kamã hkraja haxwÿja te kot Marir kapêť mar nê amnhĩ nhĩpêx pyràk o htu kamã àxōnh tÿx o nō. Hãmri nhũm Ijapew Tĩrtũm Karō nhÿ hã tanhmã Marir mã kapêť to. 42Kàx pê kãm kapêť nê kãm:

—Xê gàu nê. Ra Tĩrtũm kot ato mex jakamã na ka akĩnh rax o mẽ inhni hkwyjê jakrenh pa. Anhōhy kamã akraja koja Tĩrtũm amã ho mex rax nê. 43Xê mon ka ã ixto mex nê ixwÿr amōr anê? Apê inhō Pahihti katorxà htã ixto mex nê ã ixwÿr amōr anê. Hêxta gàu nê. ãm hãmri na ka ixwÿr mō Marir. 44Na ka ixwÿr mōn pōj nê inhmã akapêť hãmri nhũm ixtu kamã ixkrare akapêť ma nê hkĩnh xaj ixtu kamã ixkamnãr tÿx o nō. 45Na ka pre Tĩrtũm kapêť o wrÿk xwÿnh kot amã kapêťja ma nê hkōť ajamaxpêť tÿx nê. Jakamã kot kaj Tĩrtũm nhÿ hã akĩnh nê ajamakêťkati nê amex nê ri apa. Anê.

Marir kot Tĩrtũm mã mex o mex ã greť ã harênh

Rukre 6.20-26

46Hãmri nhũm Marir Ijapew kot ã kãm kapêť anhÿrja ma nê kãm Tĩrtũm mex o mex ã gre nê greť o:

Tĩrtũm na mex o mex.

47 Kêp ixkaprĩ xwÿnh na.

Kêp ixkaprĩ xwÿnh jakamã na pa inhmex nê ixkĩnh nê ri ixpa.

48-49 Ixte amnhĩ to greťe nhũm ja hã ixpumu nê ixkamã ukaprĩ nê ixto mex rax kumrêx.

Jakamã koja mẽ piitã axpêť kanrêhã axpêť mẽ ijarênh rãhã ho pa. Tĩrtũm kot tanhmã ixto mex to hã ijarênh rãhã ho pa.

Tĩrtũm na mex o mex nê hihtÿx o hihtÿx. Tã na ã inhĩpêx anê.

50 Ma na hte ã amnhĩ nhĩpêx anê nê axpêť kanrêhã mẽ kot hã hpijaãm xwÿnhjê pumu nê mẽ kutã nojarêť rãhã ho pa.

Nê mẽ kamã ukaprĩ rãhã ho pa.

ã na hte mẽ hipêx mex anhÿr o pa.

51 Nê hihtÿx o hihtÿx jakamã na hte mẽ kot amnhĩ to jarkrar o ri mẽ pa xwÿnhjaja tanhmã mẽ ho nhũm mẽ axkaprã.

52 Nê pahihti hkwyť kot kapêť mar nê ãm mar xwÿnhjaja.

Na hte amnhĩ tã mẽ omu nê mẽ àpênh nê mẽ hapōj nê mẽ hpãnhã mẽ kot amnhĩ to hkryre xwÿnh kwÿ jagjê.

53 Na hte mẽ kãm kapër kôt amnhĩ nhĩpêx prãm xwỳnhjê ho mex o pa nhũm mẽ mex nê pa.

No mẽ kãm hprãm kêt xwỳnhjaja nhũm tanhmã mẽ ho mex to hkêt nê.

54-55 ãm hãmri na pre amnepê mã mẽ panhĩgêet mã amnhĩ jarênh xà hkôt mẽ pahpê Apraãw rũm axpên kanrêhã hkrajaja mẽ pahto mex o pa.

Mê pahpê Ijaew mẽ pahte kãm tanhmã amnhĩ nhĩpêx to ho papa nhũm kãm mẽ pajapê xàj mẽ pahto mex rãhã ho pa.

Nê mẽ pakamã ukaprĩ rãhã ho pa. Anê.

Nhũm pre ã Marir Ijapew mã Tĩrtũm mex o mex ã greer anê. 56Hãmri nê ri hkôt pa hã mytwrỳ axkrunêpxi nê ma akupỹm õ krĩ hwỳr mỗ.

Juãw Paxis kator ã harênh

57Tã nhũm Ijapew hpijagri kaxyw õhy xà nhũm hkrare kato nê myre. 58Hãmri nhũm omu nê hkĩnh tỳx nê. Hãmri nhũm hkwỳjaja Tĩrtũm kot wa kamã ukaprĩ hã wa kãm wa hkra myre nhõr ã harênh ma nê wa ỹ hã hkĩnh nê.

59Tã nhũm wa hkraja ra hã arĩgro pê 8 nhũm mẽ hkwỳjaja kot my kwrỳt kà krãhyr kaxyw hwỳr akuprõ. Tĩrtũm kot mẽ kãm hã karõ xà hkôt nhũm mẽ kot kãm õr ã amnhĩ to amnhĩrit kaxyw ã hipêx anhỹr kaxyw. Na htem ã mẽ kêp Ijaew krajê piitã mẽ hipêx anê. Jakamã nhũm prem ã hipêx anê hãmri nê hpãnhã tanhmã kot hã hixi mênh to kaxyw ri hã axpên kukja. Hãmri nê hipêêxà hkôt kot hã Jakaris mênh kaxyw. 60Hãmri nhũm katorxà tee ri axpên tã mẽ kuma nê mẽ kãm:

— Ma koja kêp Jakaris kêt nê. Koja kêp Juãw. Anê.

61Hãmri nhũm mẽ tee ri kuma nê kãm:

— Kokỹ. Mo jar mẽ pahtõ pê Juãw kot kêt ri kêp Juãw? Jar amrakati kênã kot ka kêt wa ri ã hã hixi rênh anê. Anê.

62Hãmri nê hixi hã hipêêxà kukja. Nom nhũm arĩ umar kêt nê kapër kêt jakamã nhũm mẽ tanhmã ri kãm mẽ ãhkra nhĩpêx to. 63Hãmri nhũm ãhkra ho kagà hã ahwỳ nhũm mẽ kãm ja gõ nhũm kupy nê hã mẽ kãm hixi nhĩpêx. Nhũm mẽ kupy nê omu hãmri nê hixi pê Juãw kôt omu. Hãmri nê tee ri hixija kukamã hamaxpêr. 64Rôm nhũm Jakaris akupỹm ama nê kapër mex kurê kumrêx nê Tĩrtũm mã mex o mex ã harênh o xa. 65-66Hãmri nhũm mẽ omu nê ma mẽ piitã mẽ kãm wa hkra jarênh o ri axpên kôt hprõt. Pika pê Jutej kamã hixêet kape hã krĩ hkôt nhũm mẽ ri mẽ piitã mẽ kãm harênh o hprõt. Tĩrtũm kot wa hkra kôt tãnopxar o pa nê ho mex ã harênh o hprõt. Hãmri nhũm mẽ kuma nê tee ri hkukamã hamaxpêr nê axpên mã:

—Hêxta waa nê. Tirtûm tãm na xep hte jare hkôt ri pa ho pa. Jakamã koja nhÿrmã hprêk hãmri nê tanhmã koja we amnhĩ nhĩpêx to ho pa wehee? Anê.

Jakaris kot Tirtûm nhÿ hã kapêr ã harênh

67Hãmri nhũm Jakaris Tirtûm Karõ nhÿ hã Tirtûm mex o mex ã harênh o xa. Tirtûm kot mẽ kêp Ijaew o mex ã harê nê mẽ kãm:

68 Hêxta waa nê. Nà Tirtûmja mex o mex. Na pre hte mẽ pahpãmjaja ãm hkôt pix mã amnhĩ nhĩpêx o pa. Jakamã nhũm hte Tirtûm mẽ pahpê hkrajê kamã ukaprĩ nê mẽ pahto mex o pa.

E kwa pu mẽ kãm mex o mex ã harênh rãhã nê.

69 Ra kot mẽ pahwÿr mẽ pahkaprĩ xwÿnh pê mẽ panhõ pahihti mênh mã. Ja kaxyw àhpumunh xihtÿx o hiltÿx jakamã na pre ra mẽ pahwÿr mênh ã amnhĩ jarê.

Koja kêp amnepêm Tirtûm mã tanhmã amnhĩ nhĩpêx to ho pa xwÿnh Tawija hkanrêhã htàmnhwÿ.

70 Amnepêm Tirtûm nhÿ hã kapêr xwÿnhjaja na prem mẽ kãm Tirtûm kapêr jarênh o pa nê mẽ kãm:

71 “Koja Tirtûm mẽ panê mẽ kãm mẽ pahkurê xwÿnhjê pumunh mex o pa.” Anê.

72 Tirtûm ra kot mẽ pahpãmjê mã amnhĩ jarênh xà hkôt kãm mẽ pakamã ukaprĩ rãhã ho pa hprãm.

Koja aa ja ho anhÿr o hamakêtkati hkê nê.

73-75 Na pre ra mẽ pahpãm Apraãw mã mẽ pakukamã ã mẽ pahtã amnhĩ jarênh anê nê kãm: “Kot paj mẽ anê mẽ kãm mẽ akurê xwÿnhjê pumunh mex nê mẽ ìhkra nê mẽ ato ixkato. Jakamã kot kaj mẽ amnhĩ kamã amã mẽ uma hkê nê axàmnhĩx ri ajamakêtkati nê mẽ kamã apa. Nê kot kaj mẽ mãmri axàmnhĩx ri inhmã tanhmã amnhĩ nhĩpêx to ho ri apa rãhã nê. Nê ixkôt amnhĩ nhĩpêx o ri apa rãhã ty.” Anhÿr o na pre Tirtûm mẽ pakukamã mẽ pahtã amnhĩ jarê. Anê.

Nhũm pre ã Jakaris mẽ kãm Tirtûm kapêr jarênh anê. Hãmri nê hkrareja mÿ nê o xa nê kãm:

76—No ka Xugitre. Kot kaj aprêk hãmri nê apê Tirtûm maati nhÿ hã kapêr jarênh o apa xwÿnh. Jakamã kot kaj Pahihti hkukamã mẽ piitã mẽ kãm harênh o ri mẽ hkôt apa. Mẽ kot amar nê kutêp tãm amnhĩ nhĩpêx kaxyw.

77—Tirtûm kot mẽ nê mẽ kot amnhĩ tomnuj rênh nê mẽ ho hkra hã harênhja kot kaj mẽ hkôt mẽ kãm harênh o ri apa.

78—Na hte Tirtûm mẽ pakamã ukaprĩ ho pa nê mẽ pakamã gryk

tokyx anhÿr kêt nê. Jakamã koja mẽ pahwÿr mẽ pahkaprĩ xwÿnhja mẽ. Kormã mẽ pahwÿr wrÿk kêt jakamã te mẽ pahte kamàt kô kamã tee ri mẽ paxàhkupênh o ri papa xwÿnh pyràk.

— Nom koja mẽ pahwÿr wrÿkja o te ra myt kator nê mẽ pamã hirã nê mẽmoj to amnhĩrĩt mex pyràk o mẽ panhĩpêx. Ja kaxyw koja Tĩrtũm mẽ pahwÿr mẽ pahkaprĩ xwÿnhhta mẽ nhũm man mẽ pahwÿr wrÿ nê mẽ pamã mẽ pahtyk pyma xwÿnhjê mã Tĩrtũm kapêr o amnhĩrĩt o pa. Mẽ pahte mar nê ra pajamakêtkati nê paxàmnhĩx ri papa nê pahtyk kaxyw.

79— Mẽ kãm mẽ htyk pyma xwÿnhjaja te kamàt kô kamã ri pa pyràk. Tã koja mẽ pahkaprĩ xwÿnhja wrÿ hãmri nê tanhmã mẽ hkrã hto nhũm mẽ te arĩgro hã ri mẽ pa xwÿnh kot amnhĩ nhĩpêx pyràk o amnhĩ nhĩpêx. Jao hamakêtkati nê axte kãm htyk pyma hkêt nê ri pa. Anê.

Nhũm pre ã Jakaris Tĩrtũm Karõ nhÿ hã hkrare mã kapêr anê.

80Tã nhũm Juãwja gaa nê aptàr. Nê Tĩrtũm kôt amnhĩ nhĩpêx o pa. Nom kormã kot Ijaew jahkre ho pa hkêt ri kapôt ã ri mẽ puhã pa.

Ã na pre Juãw kator nê amnhĩ nhĩpêx anhÿr o pa anê. Na pre kato nê hã mytwrÿ grêre hãmri nhũm Jejusja hkôt kato.

Jejus kator ã harênh

Matêwre 1.18-25

2 1-2Na pre ã Jejus kator anê. Nhũm pre Rõm nhõ xwÿnhjê nhõ pahi Sesti Akusja õ pika piitã hkôt mẽ ho kôta kaxyw. Aa kot mẽ ho kôta hkêt tã ra kot mẽ ho kôta kaxyw. Kormã pahi Sirên haxwÿja kot pika pê Sir kamã mẽ ho amnhĩptàr ri nhũm pahi Sesti Akus kot mẽ ho kôta kaxyw. Jakamã kãm àpênh xwÿnhjê mã kapêr nê mẽ kãm:

— E kêr ka mẽ ho kôta kaxyw nê mẽ piitã mẽ hixi hã kagà hpa. Anê.

3Hãmri nhũm mẽ piitã ã kot mẽ hipêx anhÿr ã amnhĩ tã harênh ma hãmri nê mẽ kot mẽ hixi hã kagà kaxyw piitã akupÿm papxà hwÿr ma hapêx. 4Nhũm pre Marir mjên Juje haxwÿja ma krĩ pê Perêj wÿr mō. Garirej kamã õ krĩ pê Najare rũm kato nê ma hwÿr mō. Pika pê Jutej kamã na Perêjja. Kamã na pre Juje nhĩgêt Tawija kato. 5Nhũm Juje kêp kanrêhã htàmnhwÿ jakamã na pre ma akupÿm hwÿr mẽ hkwyjê hkôt mō. Nê ma amnhĩ kôt kot ho hprõ mã xwÿnh Marir o mō. Arĩ htujarô rax rãhã nhũm ma amnhĩ kôt o mō. 6Nhũm wa mōõ hãmri nê hwÿr pōj. Nhũm Marir hpijagri xà hã mytwrÿ mã àr jakamã nhũm kamàt nhũm õhy xà. 7Nom nhũm Perêj wÿr mẽ hpôx nyw xwÿnhjaja ra ixkre piitã ho nÿt pa nhũm wa tee ri hpijagri kaxyw amnhĩ to ukapi ho pa. Hãmri nê nhÿri môx nhõrkwÿ punajre hwÿr axà nhũm Marir kamã hpijagri. Nhũm hkra kato nê myre. Kra kot wa na pre. Hãmri nhũm kumÿ nê kupêxê ho hkupu hpa nê môx xàpkur xà hã kôsti kaprÿ kamã kuxi nhũm hamakêtkati nê gõr nê nõ.

Ôwêhti jamâr xwÿnhjê jarênh

8Rôm nhûm ôwêhti jamâr o mẽ pa xwÿnhjaja kapôt ã ri hkrít ôwêhti jamâr o pa. Nhûm ra kamàt nhûm mẽ hamâr o hkrĩ. 9Pu nhûm kaxkwa rûm Tĩrtûm kapêr o wrÿk xwÿnhja wrÿ nê mẽ mÿri ajêt. Hãmri nê tanhmã amnhĩ to nê mẽ hpuhã ho hirã rax kumrêx. Nom nhûm Tĩrtûm tãm ã mẽ hipêx anê. Hãmri nhûm mẽ tee ri jawÿ Tĩrtûm kapêr o wrÿk xwÿnhja pumu nê kãm ma htÿx nê akryk omunh o hkrĩ. 10Hãmri nhûm mẽ kãm:

—Pa? Kwa mẽ amã ixpyma hkêt nê. Ixte mẽ amã mẽmoj mex jarênh kaxyw na pa mẽ awÿr wrÿ. Kot kaj mẽ harênh ma nê akĩnh nê. Nom mẽ kapxipixjaja kaj mẽ akĩnh kêt nê. Koja mẽ piitã ja jarênh ma nê mẽ apyrã nê hkĩnh nê pa. 11Na ra ham mẽ akamã ukaprí xwÿnhhta kato. Pahi Tawi nhô krĩ mẽ mẽ anhô krĩ pê Perêj kamã. Kêp mẽ apiitã mẽ anhô pahihti na. Mẽ ate amnhĩ wÿr kamã ajamak o apa xwÿnh pê Kris na. Tãm na ham kato. 12E pa ixprĩ hã mẽ amã tanhmã harênh to ka mẽ inhma. Na kato nhûm katorxà kupêxê ho kupu hpa nê kôsti kamã kuxi nhûm nô. Kwa mẽ tokyx ma hwÿr mra nê kêp mẽ anhô pahihti hã omu. Anê.

13Nhûm pre ã mẽ kãm ujarênh anê. Hãmri nhûm hkwÿyjaja wamta kôt ohtôô nê mẽ hwÿr wrÿ nê puhã harir. Hãmri nê Tĩrtûm mã mex o mex ã grer o harir. 14Nê hã grer o:



Rukre 2.8-14

Tĩrtũm maati na mex o mex.

Jakamã mẽ kãm hprãm xà kôt pix mã amnhĩ nhĩpêx o mẽ pa
xwỳnhjaja koja amnhĩ tã mẽ omu nẽ tanhmã mẽ ho nhũm
mẽ hamakêtkati nẽ àmnhĩx hkĩnh nẽ pa ho pa.

15Anhỹr o grer o harir hãmri nẽ ma akupỹm kaxkwa hwỳr àpir pa nẽ
akunok. Hãmri nhũm ôwêhti jamãr xwỳnhjaja mẽ kapêr ma nẽ ma
akupỹm àpir ã mẽ omu nẽ axpẽn mã:

—E tokyx pu mẽ krĩm nẽ Tĩrtũm kot mẽ pamã ho amnhĩrĩt xwỳnhhta
japêr nẽ tokyx nhỹri omu. Kwa ma pu mẽ tokyx hwỳr nẽ omu. Anẽ.

16Hãmri nhũm mẽ ma hwỳr
mra. Hãmri nẽ krĩm agjẽ nẽ môx
nhõrkwỹ wỳr agjẽ nẽ mẽ hkrareta
pumu. Nhũm kôsti kamã nõ nhũm
mẽ omu nẽ kuri Marir mẽ Juje wa
omu. 17Hãmri nẽ akupỹm hapôj
nẽ ma mẽ piitã mẽ hkôt ri mẽ kãm
harênh o pa. Ra Tĩrtũm kapêr o
wrỹk xwỳnh kot mẽ kãm harênh
xàja kôt nhũm mẽ ma mẽ kãm
harênh o ri mẽ hkôt pa. 18Nhũm
mẽ amnhĩ jaêr pẽ mẽ kot harênh
ma nẽ tee ri hkukamã hamaxpêr.
19Nom nhũm Marir mẽ kot kãm
hkrax rũm tanhmã hkra jarênh to
xàta kukamã pix mã hamaxpêr
rãhã ho pa.

20Jakamã nhũm ôwêhti jamãr
xwỳnhjaja ma akupỹm hkrit wỳr
mra. Tĩrtũm kapêr o wrỹk xwỳnh

ra kot mẽ kãm ujarênh xà hkôt nhũm mẽ kot Jejus pumunh jakamã ma
akupỹm hkĩnh nẽ Tĩrtũm mã mex o mex ã harênh pẽ hã grer o akupỹm
mra.



Rukre 2.15-20

Mẽ kot Jejus ã hixi mênh ã harênh

Matêwre 1.21; Rukre 1.31

21Tã nhũm wa hkrareta ra hã arĩgro pẽ 8 nhũm mẽ hwỳr akuprõ nẽ
kãm my kwrỹt kà krãhta. Na hte Ijaew mẽ hkra myre piitã ã mẽ hipêx
anẽ. Mẽ piitã mẽ kot Tĩrtũm mã õr ã mẽ omunh kaxyw. Jakamã nhũm
mẽ kãm ho anẽ nẽ hpãnhã hã hixi mẽ. Marir kormã kot ho htujarô hkêt
ri Tĩrtũm kapêr o wrỹk xwỳnh kot hkukamã kãm hixi jarênh xàja kôt
nhũm mẽ hã hixi mẽ nhũm hixi kêp Jejus.

Mě kot Tirtũm mã Jejus nhõr pyræk o hipêx

22-24 Tã nhũm Marir hpijagri ho hapêx. Jakamã nhũm Juje ma krĩ pẽ Jerujarẽ hwỳr mẽ kot Tirtũm mã amnhĩ jarẽnh xà hã ixkre hwỳr amnhĩ kõt o mõi. Na pre ra finat Mojes amnepêm Tirtũm nhỹ hã mẽ hkukamã mẽ hpãmjẽ mã ja hã karõ. Nẽ mẽ kãm hã karõ ho:

Koja mẽ aprõ hpijagri. Hãmri nẽ hpijagri ho hapêx ka mẽ ma Tirtũm mã amnhĩ jarẽnh xà hã ixkre hwỳr o mra nẽ hpãnhã Tirtũm mã mẽmoj gõ. Kãm tutre ho gõ rỳ kãm tuuti hõ ho axkrut nẽ agõ kê patre hamỳ nẽ kãm kupa. Kot ja hã omunh nẽ hpijagri xwỳnhta akupỹm mex ã harẽnh kaxyw.

Anhỹr o kot mẽ kãm ja hã karõ jakamã nhũm wa ma ã amnhĩ nhĩpêx anhỹr kaxyw hwỳr mõi. Nẽ amnhĩ kõt Jejus mỳ nẽ o mõi. Tirtũm kot mẽ kãm ja hã karõ nhũm mẽ kot hã kagà xà hkõt. Na pre ra finat Mojes mẽ kãm ja jarẽ nẽ mẽ kãm:

Kot kaj mẽ akra my kot wa hãmri nẽ te mẽ ate Tirtũm mã õr kaxyw hipêx pyræk o hipêx. Kê tãm amnhĩ nhĩpêx o pa nẽ y hã tanhmã kãm amnhĩ nhĩpêx to ho pa.

Anhỹr jakamã nhũm wa ra Jerujarẽ hwỳr nojarêt nẽ amnhĩ kõt Jejus mỳ nẽ ma amnhĩ kõt o mõi.

Simeãw kot Jejus kukamã harẽnh

25-26 Rõm nhũm Jerujarẽ kamã Simeãwja. Tirtũm Karõ nhỹ hã kot tanhmã amnhĩ to mex to ho pa xwỳnh na pre. Na pre hte Tirtũm kapẽr kõt pix mã tãm amnhĩ nhĩpêx o pa. Jakamã nhũm pre ra Tirtũm Karõ ã kãm kapẽr anẽ nẽ kãm:

—E inhma Simeãw. Kot kaj atĩr rãhã nhỹrmã Tirtũm kot mẽ akaxyw ãm mã xwỳnhja ka ano ho omu nẽ rĩ kormã ty.

Anhỹr o kãm kapẽr jakamã nhũm kuma nẽ hkĩnh nẽ ãm pix kamã hamak o pa. Mẽ kệp Ijaew wỳr wrỳk nẽ mẽ ho mex mã xwỳnhta pix kamã hamak rãhã ho pa. 27 Jakamã nhũm Jejus katorxà mẽ hipêxà purota wa Tirtũm mã amnhĩ jarẽnh xà hã ixkreja wỳr Jejus o axà nẽ kormã o xa. Finat Mojes kot mẽ kãm hã karõ xà hkõt. Hãmri nhũm Tirtũm Karõ mẽ hwỳr Simeãwja mẽ nhũm ma mẽ hwỳr tẽ nẽ axà. 28 Hãmri nẽ wa hkrata pumu nẽ hkĩnh tỳx nẽ. Hãmri nẽ wa kệp kumỳ nẽ o xa nẽ hã Tirtũm mã mex o mex ã harẽ nẽ kãm:

29-32 Pa Pahi Maati. E ot pa ixte amã tanhmã amnhĩ nhĩpêx to ho ixpa xwỳnh ã amnhĩ jarẽ.

Nà ãm hãmri na ka pre ã inhmã jare hkukamã harẽnh anẽ. Tã ate inhmã harẽnh xà hkõt pa ra inhno ho omu. Kệp mẽ

ixkamã ukapřĩ xwỳnh ã omu. Nẽ kệp ate mẽ ixwỳr mẽnh xwỳnh ã omu.

Nà koja te arĩgro hã myt hirã nẽ mẽmoj piitã ho amnhĩrĩt mex pyrãk o koja mẽ inhĩpêx o pa. Jakamã koja hprêk hãmri nẽ ma Ijaew kêt xwỳnhjê mã apê Tĩrtũm ã akapêr o amnhĩrĩt o pa nhũm mẽhprĩ hã ajarênh ma. Nẽ mẽ ixpê Ijaew kot paj mẽ ijaxwỳja kuma nẽ hã ixpijaam o ri ixpa.

Jakamã kot paj ixãmnhĩx ri tanhmã amnhĩ nhĩpêx to ho ri ixpa nẽ ixãmnhĩx ty. Ra ixte inhno ho ate inhmã harênh xwỳnhhta pumunh kênã. Anẽ.

33Nhũm pre ã Simeãw Jejus jarênh anẽ. Nhũm katorxà mẽ hipêêxà purota wa amnhĩ jaêr pê kot ã harênh anhỹrja mar o xa. 34-35Hãmri nhũm Simeãw wa ho Tĩrtũm wỳ nẽ kãm:

—E Tĩrtũm. Kêr ka ja wa ho mex nẽ. Wa ho mex o wa ho mex rãhã ho apa. Anẽ.

Hãmri nẽ Marir mã kapêr nẽ kãm:

—Nà ãm hãmri na pre Tĩrtũm mẽ pakaxyw akrata xãm. Mẽ pahpê Ijaew kaxyw ãm. Jakamã koja hprêk nẽ ma Tĩrtũm kapêr o mẽ piitã mẽ ahkre ho ri mẽ hkôt pa. Nhũm mẽ kuma hãmri nẽ ahpỹnhã tanhmã hamaxpêr to xà hkôt tanhmã hipêx to. Jakamã nhũm mẽ hkwỳjaja kuma nẽ hkôt amnhĩ xunhwỳ nẽ hkôt amnhĩ nhĩpêx o pa. Jao tãm hipêx o pa. No nhũm mẽ hkwỳjaja kuma nẽ axtem nẽ kãm hkĩnh kêt nẽ. Hãmri nẽ tanhmã hipêx to. Jakamã kot kaj tee ri ja hã mẽ omu nẽ akapřĩ htỳx nẽ. Te mẽ kot wapo ho akanhwỳr nẽ akamã ho kaxkep nhũm apê omnuj tỳx pyrãk o kot kaj amnhĩ kamã ama nẽ mẽ omu. Anẽ.

Ãnti kot Jejus pumunh ã harênh

Wam Ximotre 5.5

36-38Rôm nhũm mẽhõ ni pê Ãntija mẽ hwỳr axà nẽ Jejus pumu. Ãntija Panuew kra na pre. Nẽ Ase hkwỳ na pre. Ni htã kệp Tĩrtũm nhỹ hã kapêr jarênh o pa xwỳnh. Na pre ra mjên no ãm kormã mjên nẽ pa hã amgrà pê 7 pix nhũm pre kệp ty. Hãmri nhũm axte mjên kêt nẽ pa rãhã ra hpigêx tỳx nẽ. Ra hã amgrà pê 84. Na pre hte Tĩrtũm mã amnhĩ jarênh xà hã ixkre hwỳr pa nẽ kãm amnhĩ jarênh rãhã ho pa. Nẽ kot kãm amnhĩ jarênh kaxyw nẽ apkur kêt rãhã kãm amnhĩ jarê. Nẽ arĩgro hã hwỳr pa nẽ kamàt kãm hwỳr pa. ã na pre hte amnhĩ nhĩpêx anhỹr rãhã ho pa anẽ. Jakamã mẽ hwỳr axà nẽ Jejus pumu nẽ hkĩnh nẽ. Hãmri nẽ hã Tĩrtũm mã mex o mex ã harê nẽ kãm:

—Hêxta gòa nẽ Tĩrtũm. ãm hãmri na ka mẽ ixwỳr Jejus mẽ. Ma amex o amex. Anẽ.

Hãmri nẽ Ijaew kot amnhĩ wỳr mẽ kamã ukapřĩ xwỳnh kamã hamak xwỳnhjê mã ra Jejus kator ã harênh o ri mẽ hkôt pa.

Marir mẽ Juje wa kot akupỹm Najare hwỳr mõi ã wa harẽnh

Matêwre 2.19-23

39Tã nhũm Marir mẽ Juje wa Tĩrtũm kapẽr ã kagà htũm kõt Tĩrtũm mã amnhĩ jarẽnh xà hã ixkre kamã tanhmã amnhĩ nhĩpêx to hpa hãmri nẽ kato nẽ ma akupỹm mõi. Ma Garirej kamã õ krĩ pê Najare hwỳr wa ma akupỹm mõi.

40Tã nhũm wa hkrata ra wa kãm hprêkre ho mõi. Nẽ mex nẽ àhpumunh tỳx nẽ. Tĩrtũm kot tânopxar nẽ mẽmoj to kutã nojarêt rãhã ho pa jakamã nhũm mex nẽ hkĩnh nẽ pa.

Marir mẽ Juje wa kot tee ri Jejus japêr ã wa harẽnh

Rukre 4.22

41Nhũm pre hte Marir mẽ Juje wa amgrã mẽ hkwỳjê hkõt ma Jerujarẽ hwỳr pa. Mẽ kot arĩgro pê Pas ã hkĩnh kaxyw. Pas ã na hte mẽ kêp Ijaew amnepêm Tĩrtũm kot pika pê Ejit rũm mẽ hpãmjê katorja mã hamaxpêr kaxyw axpẽn wỳr akuprõ nẽ hã hkĩnh. Jakamã nhũm wa ma mẽ hkõt hã hkĩnh kaxyw Jerujarẽ hwỳr hkwỳjê hkõt mõi. 42Nhũm ra Jejus hprêk o mõi. Ra hã amgrã pê 12 jakamã nhũm wa ma amnhĩ kõt o mõi. 43-44Tã nhũm mẽ hkĩnh pa hãmri nẽ akupỹm nojarêt nhũm Marir mẽ Juje wa ma hkwỳjê hkõt akupỹm mõi. Nhũm Jejus Jerujarẽ kamã ahte arĩk nẽ akupỹm wa hkõt mõi kêt nẽ. Nhũm wa htỳx wam ma hkwỳjê hkõt htẽm ã hkamnhĩx jakamã wa hapêr kêt nẽ. Hãmri nẽ wa hapu hã hamakêtkati nẽ mẽ hkõt mõi o mõi ã ra hã kamãt. Hãmri nẽ mẽ kot amnhĩm hikranh xàja wỳr mẽ hkõt pøj nẽ tee ri mẽ hkaêx ã hkra japêr o ri mra nom omunh kêt nẽ. 45Jakamã nhũm apkati nhũm wa awjanã nẽ ma akupỹm Jerujarẽ hwỳr mõi nẽ kamã hapêr o ri pa. 46Nom tokyx kãm kator kêt nẽ. Mẽ hkaêx ã tee ri hapêr o pa hã apkati axkrut. Nẽ nõ nhũm apkati nhũm wa tã Tĩrtũm mã amnhĩ jarẽnh xà hã ixkreja wỳr hapêr o mõi nẽ hwỳr axà. Hãmri nẽ omunh kurê kumrêx. Nhũm arĩ mẽ kot Tĩrtũm kapêr tũm o mẽ ahkre xwỳnhjê mar o mẽ kutã nhỹ. Nẽ mẽmoj tã ri mẽ hkukja nẽ tanhmã mẽ kãm ujarẽnh to. 47Nhũm mẽ kot mar xwỳnhjaja tee ri kapêr ã kuma nẽ àhpumunh tỳx ã omu hãmri nẽ akryk mar o hkrĩ. 48Hãmri nhũm Marir mẽ Juje mẽ hwỳr axà nẽ mẽ kuri wa hkraja pumunh kurê kumrêx. Hãmri nhũm katorxàja hwỳr tẽ nẽ kãm:

— Xê Jejus. Mon ka axtem nẽ ã ri amnhĩ nhĩpêx anẽ nẽ akupỹm wa ixkõt amõi kêt nẽ? Na pa wa mõi nẽ mẽ pahkwỳjê hkõt pøj nẽ tee ri mẽ hkaêx ã ajapêr nẽ tee ri akukamã ijamaxpêr. Anẽ.

49Hãmri nhũm amnhĩ tã wa kuma nẽ wa kãm:

— Tỳ. Nom Inhĩpêxã nhõrkwỹ kamã ixarĩk kênã na ka wa tee ri ixkukamã ajamaxpêr nẽ ijapêr o ri apa. Anẽ.

50Hāmri nhūm wa kuma nē ã kot amnhĩ jarēnh anhỹrja kukamã tee ri hamaxpēr. 51Hāmri nē mẽ ma akupým mō nē Najare hwỳr pōj nē kamã pa. Nhūm pre Jejus wa kapēr kôt ri amnhĩ nhĩpêx rãhã ho pa. Hāmri nhūm katorxàja hkrax rūm mẽ kot kãm tanhmã hkra kot amnhĩ nhĩpêx to hkukamã harēnhja pix kukamã hamaxpēr rãhã ho pa.

52Gaa nhūm Jejus ra àptàr o mō. Nē àhpumunh tỳx nē. Nhūm mẽ piitã ã kot amnhĩ nhĩpêx anhỹr ã omu nē kãm hkĩnh nē. Nhūm Tĩrtũm haxwỳja kãm hapê nē.

Juãw Paxis kot Tĩrtũm kapēr jarēnh o pa hã harēnh

Matêwre 3.1-10; Makre 1.1-8; Juãw 1.19-28

3 1-2Tã nhūm kormã pahihti Tipeja mẽ ho amnhĩptàr o pa. Na pre ra mẽ ho amnhĩptàr ã amgrã pê 15. Nhūm Põn Piratja pahihti Xipe mã pika pê Ijaew nhõ xwỳnhjê ho amnhĩptã. Nhūm Eroxa kãm pika pê Garirej nhõ xwỳnhjê ho amnhĩptã. Nhūm Erox tō Firipja kãm pika pê Iturej nē hõ pê Takonĩt wa kamã mẽ pa xwỳnhjê ho amnhĩptã. Nhūm Risãnja kãm pika pê Apirēn kamã mẽ ho amnhĩptã. Nhūm Anas mẽ Kajpasja wa kêp Ijaew nhõ patre maati.

Rôm nhūm Jejus mẽ Jakaris kra Juãwja wa ra hamē anhĩpê àptàr. Jakamã nhūm Tĩrtũm tanhmã Juãw mã kapēr to. Kormã kapôt ã ri pa ri nhūm kãm kapēr nē kãm tanhmã kot amnhĩ nhĩpêx to ho pa hã kãm karõ nē kãm:

—Pa Juãw. E inhma. Kêr ka ma mẽ kãm ixkapēr jarēnh rãhã ho ri apa. Anê.

3Hāmri nhūm kuma nē ma ri mẽ kãm kapēr jarēnh o pa. Pyhti pê Jotãw mỳri mẽ piitã mẽ kãm harēnh o ri pa nē hpãnhã ihkjê hã ri mẽ pa xwỳnhjê mã harēnh o ri pa. Nē mẽ kãm:

—E kwa mẽ tokyx amã amnhĩ tomnuj kaga hprãm xàj tãm ri amnhĩ nhĩpêx. Kê Tĩrtũm ja hã mẽ apumu nē mẽ anê mẽ ate amnhĩ tomnuj o hapêx pa. Pa mẽ piitã mẽ kot mẽ apê Tĩrtũm kra hã mẽ apumunh kaxyw mẽ akrã kumrã.

Anhỹr o mẽ kãm kapēr o ri pa. 4-5Na pre ra amnepêem mẽ hkukamã Tĩrtũm nhỹ hã kapēr o pa xwỳnh Ijais ra Juãw kukamã kot tanhmã amnhĩ nhĩpêx to hã harē nē hã kagà. Nē hã kagà ho:

Koja nhỹrmã mēhõ mōn pōj. Kapôt ã mōn pōj nē mẽ kãm ujarēnh o ri pa. Nē mẽ kãm ujarēnh o: “E mẽ inhma. Koja Tĩrtũm tokyx mẽ pahwỳr mẽ panhõ pahihti mẽ nhūm wrỳ nhūm mẽ piitã omu. Jakamã kwa mẽ tokyx kutêp tãm amnhĩ nhĩpêx o apa. Te ho mẽ kot mēhõ kutêp pry ho mex pyrãk o amnhĩ nhĩpêx. Jao tãm amnhĩ nhĩpêx. Nē tãm axpên nhĩpêx. Pahihtita kutêp. Mẽ pahte amnhĩ nhĩpêx te kot pry nhĩnur pyrãk nhūm mẽ tee ri kot kãm hã mmar mex

prãm kaprÿ pyræk. Hinur nê krã hakÿx nê pry juk pyræk o na mẽ pahte amnhĩ nhĩpêxja. Jakamã kot kaj mẽ ate amnhĩ tomnuj kaga nê tãm amnhĩ nhĩpêx. Nê tãm axpên nhĩpêx. Hãmri nê te mẽ kot pry nhĩnur o mex nê ho katàt nhũm katàt muux nê nõr pyræk o kot kaj mẽ amnhĩ nhĩpêx. Pahihti nywta kutêp. Kwa kêr ka mẽ ã amnhĩ nhĩpêx anê.

6 Kot kaj mẽ anê nhũm mẽ ohtô nê ja hã mẽ apumu hãmri nê mẽ apyrà Tĩrtũm kot mẽ ho hkra kaxyw amnhĩ to kuwÿ.”

Anhÿr o mẽ kãm ujarênh o pa. Anê.

Nhũm pre ã finat Ijaisja Juãw Paxis kukamã mẽ kãm ujarênh anhÿr o pa. 7Jakamã nhũm àptàr nê Ijais kot ra hkukamã harênh xà hkôt ma Tĩrtũm kapêr o mẽ ahkre ho pa. Nhũm prem kuma hãmri nê kot mẽ hkrã kumrãr kaxyw hwÿr amnhĩ to mra. Nhũm mẽ omu nê tanhmã mẽ ahkre hto. Nê mẽ kãm kapêr kãm hihtÿx nê mẽ kãm:

—Tk. Kwa kormã. Mẽ ate amnhĩ tomnuj pix o ri apa xwÿnh kênã. Xà kot paj mẽ ate amnhĩ tomnuj rãhã mẽ akrã kumrã nhũm Tĩrtũm ja hã mẽ apumu nhũm ja kãm mex nà? Nà koja ja kãm mex kêt nê. Koja ja mÿrapê nhÿrmã tanhmã mẽ anhĩpêx to ka mẽ tee ri umaj apimxur prãm kaprÿ.

8—Na htem amnhĩ tomnuj kaga nê hpãnhã tãm amnhĩ nhĩpêx. Nê tãm ri axpên nhĩpêx. Jakamã e kwa mẽ ã amnhĩ nhĩpêx anhÿr o apa. No na ka htem atÿx ri ajamaxpêr o: “Mẽ ixpê finat Apraãw kanrêhã htãmnhwÿ jakamã koja Tĩrtũm ja hã mẽ ixpumu hãmri nê mẽ ixte amnhĩ tomnuj mÿrapê tanhmã mẽ ixto hkêt nê. Koja ãm mẽ ixto mex rãhã nê.” Anhÿr o atÿx ri amnhĩ kukamã ajamaxpêr o apa. Nom ja kot anhÿr kêt. Mẽ apê Apraãw kanrêhã htãmnhwÿ htã uræk nê tãm amnhĩ nhĩpêx o apare hã. Kot ka mẽ apê kanrêhã htãmnhwÿ htã amnhĩ tomnuj o ri apa hãmri nê Tĩrtũm noo mã te mẽ apê pikap kênre nhĩkwÿ pix pyræk.

9—Na ra Tĩrtũm kot mẽ ate amnhĩ tomnuj mÿrapê tanhmã mẽ ato kaxyw. Koja mẽ anhĩpêx o te mēhō nhō mẽmoj pàr ô hkêt nhũm kot tee ri omunh hãmri nê krãhyr nê kuwy kamã mẽnh nê ho xêt par pyræk o mẽ anhĩpêx. Jao amnhĩ nê kuwy hwÿr mẽ arênh pa ka mẽ kamã amnhĩ xà htÿx kamã ajamak rãhã ho ri apa. Anê.

Nhũm pre ã Juãw Paxisja mẽ kãm kapêr anê. 10Hãmri nhũm mẽ kuma nê tee ri amnhĩ kukamã hamaxpêr nê kãm:

—Kwa xô wehe? Xà koja ã mẽ inhĩpêx anê? Kwa tanhmã kot paj mẽ kot ã mẽ inhĩpêx anhÿr pymaj amnhĩ nhĩpêx to wehe? Anê.

11Hãmri nhũm mẽ kãm:

—Nà kêr ka mẽ axpên kãm axukaprĩ ho ri apa. Nê mẽ kêp amrakati xwÿnhjê mã amnhĩ kutã mẽmoj nhõr o ri apa. Nê mẽ anhĩnôhkà axkrut nê mēhō hinôkà hkêt xwÿnhjê mã ho pyxi nê agō nê pyxi nê ho arĩk. Nê

mẽ axàpkur xà ho anhõxỳ ho apa hkêt nẽ. Âm axàmnhĩx ri mẽ kệp amrakati xwỳnhjê mã amnhĩ kutã mẽ kãm mẽmoj to hkryre nẽ agõ. E kêt ka mẽ ã axpẽn nhĩpêx anhỹr o ri apa. Anẽ.

12Hãmri nhũm Rõm kãm mẽ õ pahihti mã mẽ piitã mẽ kệp kàxpore hkwy jamỳnh xwỳnhjaja mẽ uràk nẽ hwỳr mra. Kot mẽ uràk nẽ mẽ hkrã kumrãr kaxyw hwỳr mra nẽ kãm:

—No we mẽ pajaja? Tanhmã kot paj wem amnhĩ nhĩpêx to? Anẽ.

13Hãmri nhũm mẽ kãm:

—Nà mẽ kajaja kêt ka mẽ Rõm nhõ pahi kot mẽ amã mẽ ate mẽ kệp kàxpore hkwy jamỳnh jarẽn xà hkôt pix mã hamỳnh o ri apa. No mẽ atỳx ri amnhĩ krã hkôt amnhĩm hkwy jamỳnh prãm xàj mẽ kãm hkre kamã ho rũnh nẽ mẽ kãm harẽn o ri apa hkêt nẽ. Anẽ.

14Hãmri nhũm hpãnhã pòristi hkwyjaja hwỳr mra nẽ kãm:

—Kwa no we mẽ pajaja? Tanhmã kot paj wem ri amnhĩ nhĩpêx to ho ixpa? Anẽ.

Hãmri nhũm mẽ kãm:

—Nà kêt ka mẽ anhõ pahihti kot mẽ axapênh pãnhã mẽ amã kàxpore nhõrta pix jamỳ nẽ ajamakêtkati nẽ axàmnhĩx ri ho amnhĩm axujaprõr o ri apa. No mẽ akwỳjaja kãm apyma nẽ mẽ amã kàxpore nhõr prãm xàj ri mẽ kãm tanhmã amnhĩ pyma hto ho ri apa hkêt nẽ. E kêt ka mẽ ã amnhĩ nhĩpêx anhỹr o ri apa. Anẽ.

Juãw Paxis kot tanhmã Jejus jarẽn to hã harẽn

Matêwre 3.11-12; Makre 1.7-8; Juãw 1.19-28; mããnhẽn Atre 19.4

15Nhũm pre ã Juãw Paxisja mẽ kãm kapêr anẽ. Nhũm mẽ kuma nẽ htỳx kệp Tirtũm kot mẽ pakaxyw ãm mã xwỳnhhta ã hkamnhĩx. 16Hãmri nhũm amnhĩ tã ã mẽ hamaxpêr anhỹr ã mẽ omu hãmri nẽ mẽ kãm amnhĩ tã aprã nẽ mẽ kãm:

—Nà pa hkêt. Na pa hte ãm Tirtũm mã gô pix o mẽ hkrã kumrãr o ri ixpa. No koja tokyx ixpãnhã Tirtũm kot mẽ pakaxyw ãm xwỳnhhta tãm mẽ pahwỳr pøj. Àhpumunh tỳx o kot ijakrenh jakamã na pa hte ãm kukwak ri ixpa nẽ hã xpijaàm o ri ixpa. Tirtũm kot mẽ pakaxyw ãm xwỳnhhta koja mẽ awỳr Karõ rẽ nhũm mẽ akaxwỳnh mã agjê ka mẽ ý hã tãm ri amnhĩ nhĩpêx rãhã ho ri apa. Nom kormã mẽ kot tãm amnhĩ nhĩpêx hkêt xwỳnhjaja koja ja hã mẽ omu hãmri nẽ mẽ hipêx o te kuwy kot mẽmoj to kaxàr par pyrãk o mẽ hipêx.

17—Na htem pur kãm harõj nhĩkẽ nẽ ho grã nẽ hpãnhã kahtwỳ. Nẽ kahuk pa hãmri nẽ hkapĩ nhũm kôk apê nẽ prỳhka ho htor nẽ ho hapêx pa. Nhũm mẽ hy ho pa nẽ ixkre kamã gôj kãm unhwỳ. Ja pyrã nẽ koja tokyx Tirtũm mẽ piitã mẽ kot tanhmã amnhĩ nhĩpêx to ho pa hã mẽ omunh xà hkôt mẽ ho axkjê. Mẽ kot tãm amnhĩ nhĩpêx o mẽ pa xwỳnhjaja koja ma amnhĩ wỳr mẽ ho api nhũm mẽ kuri mex nẽ hkĩnh

rãhã nê pa ho pa. No mẽ kot amnhĩ tomnuj xwỳnhjaja koja mẽ hkĩnhã tanhmã mẽ hipêx to nhũm mẽ ma kuwy raxja wỳr pa nê kamã amnhĩ xà htỳx kamã hamak rãhã nê pa ho pa. Anê.

18Nhũm pre ã Juãw Paxis Tĩrtũm kapêr o mẽ ahkre anhỳr o pa.

Juãw Paxis kot Jejus krã kumrãr ã harênh

Matêwre 3.13-17; Makre 1.9-11

19Tã nhũm Ijaew nhõ pahi Eroxo ra htõ hprõ pê Eroxis pytà nê ho hprõ nhũm Juãw Paxisja harênh ma nê ma hwỳr tẽ nê hã kãm akir. No ãm ja pix ã kãm ãkjet kêt nê. Mãânên tanhmã kot amnhĩ tomnuj tỳx to ho pa hã kãm akir. 20Nhũm amnhĩ tã kuma nê kamã gryk tỳx nê amnhĩ tã mẽ kãm hã amỳnê nhũm prem unê nê haxà. Jao amnhĩ tomnuj tỳx nê. 21Nom kormã mẽ kot haxàr kêt ri nhũm Juãw Paxis Ijaew kwỳjê krã kumrãr o xa. Rôm nhũm Jejusja hãmri tãm nhỹhỹnh hwỳr tẽ nê kot hkrã kumrãr kaxyw kãm anê nhũm kuma nê hkrã kumrã. Hãmri nhũm Jejus gôj rũm api nê kormã gô mỳ ri Tĩrtũm mã amnhĩ jarênh o xa. 22Pu nhũm kaxkwa axkjê nhũm kurũm Tĩrtũm Karõ te tuuti pyrà nê hwỳr wrỳk o tẽ nê ãkre hã xa. Hãmri nhũm kaxkwa rũm Tĩrtũm kãm kapêr nê kãm:



Rukre 3.18-20

Pa? E apê Ixkra mex na ka. ãm hãmri na ka hte ixkanrêhã amnhĩ nhĩpêx o apa. Inhmã ajapê kamã na ka ri apa ho apa. Anê.

Jejus kukamã higêt nê hpãmjê nhĩxi hã harênh

Matêwre 1.1-17

23Tã nhũm Jejus Tĩrtũm mã kapêr o mẽ ahkre ho pa hkrax. Na pre ra hã amgrã pê 30 hãmri nê kãm ho hkrax.

E kot paj hpãnhã amã Jejus kukamã hpãmjê nhĩxi jarê Teopre. Ijaewjaja na prem htỳx ho Juje kêp Jejus nhĩpêêxà kumrêx ã hkamnhĩx nom kêp hipêêxà kumrêx kêt ãm kêp hipêêxà puro na pre.

Jejus kêp Eri htãmnhwỳ na pre.

24 Nê Eri kêp Matat kra na pre.

Nê Matat kêp Rewi hkra na pre.

- Nē Rewi kēp Mewki hkra na pre.
 Nē Mewki kēp Jānaj kra na pre.
 Nē Jānaj kēp axtem Juje hō hkra na pre.
- 25 Nē Juje kēp Matatis kra na pre.
 Nē Matatis kēp Amōs kra na pre.
 Nē Amōs kēp Naū hkra na pre.
 Nē Naū kēp Eri hkra na pre.
 Nē Eri kēp Nakai hkra na pre.
- 26 Nē Nakai kēp Mate hkra na pre.
 Nē Mate kēp axtem Matatis ō hkra na pre.
 Nē Matatis kēp Semeĩ hkra na pre.
 Nē Semeĩ kēp Juje hō hkra na pre.
 Nē Juje kēp Jotre hkra na pre.
- 27 Nē Jotre kēp Joanān kra na pre.
 Nē Joanān kēp Rej kra na pre.
 Nē Rej kēp Joropape hkra na pre.
 Nē Joropape kēp Saraxi kra na pre.
 Nē Saraxi kēp Neri hkra na pre.
- 28 Nē Neri kēp axtem Mewki hō hkra na pre.
 Nē Mewki kēp Axi hkra na pre.
 Nē Axi kēp Kojã hkra na pre.
 Nē Kojã kēp Ematã hkra na pre.
 Nē Ematã kēp Erti hkra na pre.
- 29 Nē Erti kēp Jojue hkra na pre.
 Nē Jojue kēp Eries kra na pre.
 Nē Eries kēp Jorĩ hkra na pre.
 Nē Jorĩ kēp Matat hkra na pre.
 Nē Matat kēp axtem Rewi hō hkra na pre.
- 30 Nē Rewi kēp Simeãw kra na pre.
 Nē Simeãw kēp Juta hkra na pre.
 Nē Juta kēp axtem Juje hō hkra na pre.
 Nē Juje kēp Janã hkra na pre.
 Nē Janã kēp Eriakĩ hkra na pre.
- 31 Nē Eriakĩ kēp Merea hkra na pre.
 Nē Merea kēp Mena hkra na pre.
 Nē Mena kēp Matata hkra na pre.
 Nē Matata kēp Natã hkra na pre.
 Nē Natã kēp Tawi hkra na pre.
- 32 Nē Tawi kēp Jese hkra na pre.
 Nē Jese kēp Opex kra na pre.
 Nē Opex kēp Poas kra na pre.
 Nē Poas kēp Sarã hkra na pre.

- Nē Sarā kēp Nasō hkra na pre.
- 33 Nē Nasō kēp Amīnatap kra na pre.
Nē Amīnatap kēp Amī hkra na pre.
Nē Amī kēp Ari hkra na pre.
Nē Ari kēp Erō hkra na pre.
Nē Erō kēp Pere hkra na pre.
Nē Pere kēp Juta hkra na pre.
- 34 Nē Juta kēp Jako hkra na pre.
Nē Jako kēp Ijak kra na pre.
Nē Ijak kēp Apraāw kra na pre.
Nē Apraāw kēp Tera hkra na pre.
Nē Tera kēp Nako hkra na pre.
- 35 Nē Nako kēp Jeruk kra na pre.
Nē Jeruk kēp Rakau hkra na pre.
Nē Rakau kēp Parek kra na pre.
Nē Parek kēp Epti hkra na pre.
Nē Epti kēp axtem Sara hō hkra na pre.
- 36 Nē Sara kēp Kajnā hkra na pre.
Nē Kajnā kēp Apaxat kra na pre.
Nē Apaxat kēp Sēre hkra na pre.
Nē Sēre kēp Noehti hkra na pre.
Nē Noehti kēp Ramek kra na pre.
- 37 Nē Ramek kēp Metujarē hkra na pre.
Nē Metujarē kēp Enok kra na pre.
Nē Enok kēp Jarate hkra na pre.
Nē Jarate kēp Marerer kra na pre.
Nē Marerer kēp axtem Kajnā hō hkra na pre.
Nē Kajnā kēp Enos kra na pre.
- 38 Nē Enos kēp Set kra na pre.
Nē Set kēp Atāw kra na pre.
Nē Atāw kēp Tīrtūm kra na pre. Tīrtūm kot wam my pē Atāwja
pika ho hipêx jakamā te kēp hkra pyrāk.
- Ā Jejus kukamā hpāmjê nhīxi kot anhỹr.

Satanasti kot amnhĩ tā Jejus kamā hamak ā harēnh

Matêwre 4.1-11, 16.23; Makre 1.12-13, 8.33; mǎānēn Eprêw 2.18, 4.15

4 1Tā nhūm Jejus pyhti pē Jotāw rūm akupỹm ma mō. Hāmri nē Tīrtūm Karō nhỹ hā mēmoj kutā amnhĩ to htỳx nē. Jakamā nhūm nhỹhỹm ma kapôt wỳr o mō 2nhūm Satanasti omu nē ma hwỳr tē nē ri hkôt pa. Kapôt ā ri hkôt hêx rom tanhmā kām nē ho pa. Kot mar nē Tīrtūm kapêr nhīrôp âm prām xāj ma hkôt tanhmā kām kapêr to ho pa. Hāmri nē hkôt pa o hā arĩgro pē 40 nhūm Jejus kormā apkur kêt o hā

arĩgro pê 40 nê hapêx nhũm ra kãm prãm tỳx nê. ³Hãmri nhũm Satanasti kãm:

—Kwa mãn ka ra amã prãm tỳx kumrêx nà? Nom xep apê Tĩrtũm Kra jakamã mêmoj tanhmã apê kute hkêt. Kwa kên nhĩkwỹ mũj mã anê kê amã pãwti hã amnhĩ jahkre ka aku nê tokyx ho amnhĩ xihtỳx. E kwa tokyx kãm anê. Anê.

⁴Hãmri nhũm kuma nê kãm:

—Tk. Nà kot paj akapêr mar xà hkôt tanhmã amnhĩ nhĩpêx to hkêt nê. Koja Tĩrtũm kãm inhmã mêmoj nhõr prãm nê inhmã mêmoj gõ pa arĩ kormã kukrê. Kapêr ã kagà htũm kot ja jarênh kot:

Na htem mẽ apkur xà pix kukwak ri htĩr nê pa hkêt nê. Na htem mãânên Tĩrtũm kapêr mar xà hkôt tanhmã ri amnhĩ nhĩpêx to ho pa ho htĩr nê mex nê pa. Anê.

Ã kapêr ã kagà kot ja jarênh kot anhỹr jakamã kot paj amar xà hkôt ã ri amnhĩ nhĩpêx anhỹr kêt nê. ãm kwarĩ ho kwarĩ. Anê.

⁵Nhũm pre ã Jejus Satanasti mã kapêr anê nhũm tee ri kuma hãmri nê hpãnhã ma nhỹhỹm o mõi nê nhỹri kỳx pê mêmoj prêeti nhĩmõk ã o xa. Hãmri nê kãm pika piitã ahkre ho xa. Nê kãm mẽ hikukrêx piitã ahkre. Kãxpore nê mêmoj piitã nhũm kãm ahkre hpa nhũm anhĩpê omunh o xa. ⁶Hãmri nhũm Satanasti kãm:

—E mãn ka kam ri mêmoj mũj piitã omu. Piitã inhõ na. Inhmã na pre Tĩrtũm piitã õr pa. Kot paj inhmã mêmõ mã õr prãm nê kãm kugõ. ⁷Tã amã kot paj kugõ. Jakamã e. Kwa tokyx ixkutã tẽm nê inhmã inhmex o inhmex ã ijarê pa ama nê rĩ amã piitã õr pa. E tokyx. Anê.

⁸Hãmri nhũm kuma nê kãm:

—Tk. Kot paj amã amex o amex ã ajarênh kêt kumrêx. ãm kwarĩ ho kwarĩ. Amexti hã. Tĩrtũm kapêr ã kagà htũm kot ja nê kapêr kãm hihtỳx kênã. Kapêr kot:

Kêr ka mẽ ixkapêr pix ma. Nê ixkutã pix mã mãn akõnkrã ho akrĩ nê inhmã inhmex o inhmex ã ijarênh o ri apa. Kêr ka mẽ ã amnhĩ nhĩpêx anhỹr o ri apa.

Anhỹr o kot harênh jakamã kot paj ri amã amex o amex ã ajarênh kêt nê Satanasti. Anê.

⁹Nhũm pre ã Jejus amnhĩ nê kãm kapêr anê. Hãmri nhũm tee ri kuma nê hpãnhã ma krĩ pê Jerujarê hwỹr o mõi. Nê mẽ kot Tĩrtũm mã amnhĩ jarênh xà hã ixkre hprêk nhĩmõk wỳr ho api nê kỳxpê hatur xà hã ãm nhũm xa. Nhũm amnhĩ parpê kên rũnh nhĩkwỹ pumunh o xa. Hãmri nhũm Satanasti kãm:

—E apê Tĩrtũm Kra jakamã kwa ja rũm ahpar mã ajarĩ nê ma tẽ nê pikap tẽm. Koja Anhĩpêêxã apumunh mex nê ka tanhmã amnhĩ to hkêt nê. ¹⁰⁻¹¹Kapêr ã kagà htũm kot ja jarênh kot:

Tirtūm koja kapēr o wryk xwýnh mā ajarē ka ajarī nē ahpar mā
tē nhūm mē kyx pē amý nhūm mēmoj akà hyr kêt nē.

Ā kapēr ā kagà kamā ajarēnh kot anhýr jakamā e tokyx ajarī nē ma tēn
pikap ahto. Anē.

12Hāmri nhūm kuma nē kê axte amnhī tā kām kapēr nē kām:

— Tk. Kwa nà. Kot pa ri amar xà hkôt ā amnhī nhīpêx anhýr kêt nē.
Koja Tirtūm tām inhmā ijarī hā karō pa rī mar xà hkôt ijarī no kot pa ri
amar xà hkôt ijarī hkêt nē. Tirtūm kapēr ā kagà htūm kot ja jarēnh kot:

Kêr ka mē amnhī krā hkôt amnhī tā ixkamā ajamak kaxyw inhīxi
jarēnh kôt tanhmā amnhī nhīpêx to hkêt nē.

Ā ja nē kapēr kot anhýr jakamā ām kwarī ho kwarī. Kot paj ri amar xà hkôt
ā amnhī nhīpêx anhýr kêt nē. Tām kot inhmā ijarī hā karōre hā. Anē.

13Nhūm pre ā Jejus Satanasti mā kapēr anē hāmri nhūm tee ri
mēmoj piitā ho mar kapry hāmri nē hkaga nē ma nhýhým tē. Hāmri nē
kot nhýrmā axte hwýr htēm nē kot mēmoj punuj o mar kaxyw kormā
amnhīm hamār o ri pa.

Jejus kot Tirtūm kapēr o mē ahkre ho hkrax ā harēnh

Matêwre 4.12-17; Makre 4.14-15


14Tā nhūm Jejus ma akupým Garirej wýr mō. Nē Tirtūm Karō nhý
hā àhpumunh tỳx nē hkwýjê mā kapēr jarēnh o ri pa. Nhūm mē kuma
nē piitā pikaja kamā axpēn mā tanhmā harēnh to. 15Na pre hte mē kot
Tirtūm kapēr o mē ahkre xà hā ixkre hwýr agjê nē kamā mē ahkre ho
hkrī. Nhūm mē piitā kuma nē kām mar prām nē. Hāmri nē axpēn mā
mex ā harēnh o ri pa.

Najare kamā mē kot Jejus kaga hā mē harēnh

Matêwre 13.53-58; Makre 6.1-6; Juāw 1.11

16Tā nhūm Jejus ma akupým krī kamā àptàr xàja wýr ma mō. Najare
hwýr. Hāmri nē kamā pōj.

Nhūm Ijaew nhō arīgromnu pē sap
kato nhūm Jejus ma mē hkôt Tirtūm
kapēr o mē ahkre xà hā ixkre hwýr tē.
Hāmri nē hwýr axà nē mē kuri nhý.
Hāmri nē kamā mē kām Tirtūm kapēr ā
kagà htūm kamā harēnh kaxyw kànhmā
xa 17nhūm mē omu nē kām ja gō. Finat
Ijais pē Tirtūm nhý hā kapēr xwýnh kot
Tirtūm kapēr kwý hā kagàja nhūm mē
kām kugō. Hāmri nhūm kupy nē kamā
kormā Tirtūm kot tanhmā mēmoj jarēnh
to hō japēr o xa. Nē kām kato hāmri nē



Rukre 4.16-21

mě kām kamā harē. Nom amnhī tā kamā mẽ kām harēnh o xa nē mẽ kām:

18 Na pre ra Tirtūm Karōja ixto ixàhpumunh tỳx nē mẽ kệp amrakati xwỳnhjê hwỳr inhmẽ pa ra mō. Ixte mẽ kām mẽmoj mex jarēnh o ixpa kaxyw. Nē Satanasti kot amnhī kôt mẽ unhwỳr xwỳnhjê hwỳr nhũm pre mǎānēn inhmẽ. Ixte mẽ nē Satanasti japôx o ixpa kaxyw. Nē mẽ kot hprī hǎ Tirtūm kapēr mar kêt xwỳnhjê hwỳr nhũm pre mǎānēn inhmẽ. Ixprī hǎ ixte mẽ kām kapēr jarēnh o ri mẽ hkôt ixpa kaxyw. Nē mẽ kot amnhī tomnuj o mẽ pa xwỳnhjê hwỳr nhũm pre mǎānēn inhmẽ. Ixte mẽ nē mẽ kot amnhī tomnuj rēnh pa nhũm mẽ hamakêtkati nē àmnhix ri pa kaxyw. Ā na pre Tirtūm jajê piitǎ hwỳr inhmēnh anē pa ra man mōn pōj.

19 Nē amgrà ja kệp Tirtūm kot mẽ ato mex xà hǎ amgràja nhũm ixte mẽ amǎ harēnh o ixpa kaxyw na pre inhmẽ pa mōn pōj. Anē.

20Nhũm pre ā Jejus Tirtūm kapēr ā kagà htũm kamā mẽ kām amnhī jarēnh anē. Hāmri nē akupỳm mẽ kām kagàja gō nē ho mẽ ahkre kaxyw akupỳm nhỹ nhũm mẽ piitǎ omunh pē mar o hkrī. 21Hāmri nhũm mẽ kām tanhmǎ amnhī jarēnh to nē mẽ kām:

—E ra Ijais kot ā ixkukamǎ ijarēnh anhỹr xà hkôt na pa mẽ awỳr wry nē mẽ anoo mǎ ā amnhī nhípêx anhỹr o hkrax. Anē.

22Hāmri nhũm mẽ amnhī jaēr pē ā kot amnhī jarēnh anhỹr ā kuma. Nē tee ri kuma nē axpēn pumunh pē hamaxpēr o hkrī. Jejus mẽ kurom àhpumunh tỳx nē kapēr mex tǎ nhũm mẽ âm kệp amnhī kwỳ pix ā hkamnhix kām hihtỳx nē. Hāmri nē axpēn mǎ:

—Tk. Kwa kệp Juje hkra pix kēnǎ koja we ri ā amnhī jarēnh anē. Anē.

23Hāmri nhũm amnhī tā mẽ kuma nē mẽ kām:

—Nà na ka mẽ ixte amnhī jarēnh ma nom ixkôt ajamaxpēr kêt nē. Jakamǎ axpēn mǎ ijarēnh o: “Tk. Kệp mẽ pahkaprī xwỳnh ro nhỹx jar mẽ panhō krī kamǎ aa mẽ pahte mẽmoj pumunh kêt kwỳ tanhmǎ mẽ pamǎ hipêx to pu mẽ hǎ omu. Te ra kot krī pē Kapanau kamǎ mẽ kām mẽmoj kwỳ ho anhỹrta pyrək. Pu mẽ omu nē hkôt pajamaxpēr kurê kumrêx.” Anhỹr o ri axpēn mǎ ijarē. 24Koja nhām krī hō kamǎ mēhō kệp Tirtūm kapēr jarēnh xwỳnh ā amnhī jarē ka mẽ harēnh ma nē amǎ ma hwỳr amrar nē mar prām nē. No kêt jar mẽ panhō krī kamǎ ixpê mẽ anhĩō hǎ ā amnhī jarēnh anē ka mẽ amǎ inhmar prām kêt nē.

25—Kwa mẽ inhma. Amnepēm kormǎ finat Eris htĩr ri na pre mẽ hǎ na wrỳk kêt ry rax nē. Jao hǎ amgrà axkrunēpxi nē hkôt mytwrỳ pē 6. Nhũm mẽ õ hkêt nē pa. Ra mẽ kệp mẽmoj grà pa nē hapêx nhũm mẽ

kãm prãm tỳx kumrẽx nẽ pa. Nhũm mẽ kêp mẽ mjên tyk xwỳnhjaja kãm prãm xàj hirot o pa. **26**Tã nom Tĩrtũm mẽ ho mex kaxyw mẽ hwỳr Eris mẽn h kêt nẽ. Erisja mẽ uràk nẽ kêp Ijaew tã nhũm Tĩrtũm kot mẽ ho ajuta kaxyw mẽ hwỳr mẽn h kêt nẽ. Mẽ kot amnhĩ kaxyw Tĩrtũm kôt hamaxpẽr kêt jakamã nhũm mẽ hwỳr mẽn h kêt nẽ. Axtem Ijaew kêt xwỳnhjê hõ hwỳr na pre kumẽ. Nhãm Sitõ kamã krĩ pẽ Sarep kamã mjên htyk xwỳnhhta wỳr. Tokyx kot tanhmã ho mex to kaxyw. Jakamã nhũm ma hwỳr mỗ nẽ tanhmã kãm kapẽr to nhũm kuma nẽ amnhĩ kaxyw Tĩrtũm kôt hamaxpẽr kurê kumrẽx.

27— Nẽ finat Eriasti haxwỳja. Eris pyrà nẽ kêp Tĩrtũm nhỹ hã kapẽr o pa xwỳnh tã amnhĩ kwỳ pẽ Ijaew tanhmã mẽ ho ajuta hto hkêt nẽ. Na prem ohtõ nẽ hkà nhy nẽ hkro xàpẽr o pa. Jao ra omnuj tỳx nẽ. Tã nhũm Tĩrtũm kot akupỹm mẽ ho mex kaxyw mẽ hwỳr Eriasti mẽn h kêt nẽ. Amnhĩ kaxyw mẽ kot hkôt hamaxpẽre hã. Âm Sir nhõ xwỳnh Namãja pix na pre Tĩrtũm Eriasti mã anẽ nhũm akupỹm ho mex. Kêp Ijaew kêt tã nhũm akupỹm ho mex. Tã ja pyrà nẽ na pa âm mẽ kot amnhĩ kaxyw ixkôt hamaxpẽr pix xwỳnhjê mã tanhmã amnhĩ nhĩpêx to ho ri ixpa. No mẽ ate amnhĩ kaxyw ixkôt ajamaxpẽr kêt xwỳnhjê mã tanhmã ri amnhĩ nhĩpêx to hkêt nẽ. Anẽ.

Nhũm pre ã Jejus mẽ kãm amnhĩ jarẽn h anẽ.

28Hãmri nhũm mẽ kuma nẽ kamã gryk tỳx nẽ axpẽn mã hã amỹnê nẽ axpẽn mã:

— Tk. Kwa pu mẽ ixkre nê kator nẽ ma o tẽ nẽ kupĩ ri. Anẽ.

29Hãmri nẽ kaxyw kànhmã kuhê hpa nẽ hwỳr hprõt nẽ unê. Mẽ kot ma o htêm nẽ hixêt prêk jatur xà hã hkujaek nhũm ahpar mã tẽn htêm nẽ htyk kaxyw. Mẽ õ krĩa hixêt prêk nhĩmõk ã na pre. Jakamã nhũm prem unê nẽ hatur xàta wỳr o tẽ. **30**Tã nom nhũm tanhmã amnhĩ nhĩpêx to nẽ mẽ kêp akunok nẽ hpãnhã nhãm ma tẽ nhũm mẽ tee ri hapêr nom nhỹri omunh kêt nẽ.

Jejus kot mễhõ nê mẽkarõmnuti kator ã harẽn h

Makre 1.21-28

31Tã nhũm Jejus ma akupỹm Garirej kamã krĩ pẽ Kapanau hwỳr mỗ. Nhũm mẽ õ arĩgromnu pẽ sap kato nhũm ma mẽ kot Tĩrtũm kapẽr o mẽ ahkre xà hã ixkre hwỳr tẽ nẽ mẽ ahkre ho nhỹ. **32**Hãmri nhũm mẽ kot mar o hkrĩ xwỳnhjaja kuma nẽ kãm mar prãm nẽ. Nẽ axpẽn mã:

— Hêxta waa nẽ. Âm hãmri na ã mẽ pamã kapẽr anẽ. Àhpumunh tỳx xà hkôt na hte âm hãmri mẽ pamã awjarẽ. Anẽ.

33Nhũm mễhõ myja mẽ ãhkõ hã haxwỳja mar o nhỹ. Mẽkarõmnuti na pre ra hwỳr axà nhũm ã hã tanhmã amnhĩ tomnuj to ho pa. Hãmri nẽ mẽ ãhkõ hã Jejus mar o nhỹ nẽ ra àmra kamã tanhmã kãm kapẽr to.

Nom nhũm tãm kãm kapêr kêt ãm kamã mẽkarõmnutija kãm kapêr.
34Nê kãm:

—Pa? Jejus pê Najare nhõ xwỳnh? Nà ate mẽ ixto ajapêx par kaxyw na ka mẽ ixwỳr mõi. Ra ixte apumunh mex kênã. Apê Tĩrtũm kot mẽ ixwỳr amẽnũh xwỳnh maatita na ka. Jakamã kwa tanhmã kot kaj mẽ ixto? Mo kaxyw na ka pre mẽ ixwỳr mõi? Anẽ.

35Hãmri nhũm kuma nẽ mẽkarõmnuti kot kãm ã kapêr anhỹr ã omunh kurê kumrêx. Jakamã kutã kãm kapêr nẽ kãm:

—Tk. Kwa anhĩkrê nẽ kêp akato. Anẽ.

Hãmri nhũm kuma nẽ myta o pika kura nẽ kêp kato nẽ ma tẽ. ãm ho pika kuranh pix nhũm nõ. Hãmri nẽ akupỹm kãnhmã nhỹ nẽ akupỹm mex. 36Hãmri nhũm mẽ piitã omu nẽ kamã no pyma nẽ. Hãmri nẽ axpẽn mã:

—Kokỹỹ. Na hte Jejus amnhĩ krã hkõt àhpumunh tỳx xà hkõt mẽkarõmnuti mã kapêr nẽ mẽ hano nhũm htem kuma nẽ mẽ kêp hapõx kurê kumrêx. Anẽ.

37Hãmri nhũm mẽ mẽõ pika kamã piitã ri axpẽn mã harẽnũh o pa.

Jejus kot Simãw Pêtre xupãnhgêx o mex ã harẽnũh

Matêwre 8.14-15; Makre 1.29-31

38Tã nhũm Jejus Tĩrtũm kapêr o mẽ ahkre xàja rũm kato nẽ ma Simãw Pêtre nhõrkwỹ hwỳr tẽ. Nẽ mẽ hwỳr axà nhũm Simãw Pêtre omu nẽ kãm upãnhgêx tanhmã kute hã harẽ nẽ kãm:

—Kwa Pahihti. Tẽ nẽ inhmã ixupãnhgêx pumu. Na hkà kagro htỳx nẽ amnhĩ to àpêr o nõ. Kwa tẽn inhmã omu. Anẽ.

Hãmri nhũm kãm:

—Tõe. Nà kot paj amã omu. Anẽ.

39Hãmri nẽ hwỳr tẽn kuri xa nẽ kãm:

—Pa? E kwa akà hakry. Anẽ.

Hãmri nhũm kuma nẽ hkà hakry nẽ akupỹm hihtỳx kurê kumrêx. Hãmri nẽ kãnhmã nhỹ nẽ mẽ kãm mẽõ hã àpẽnũh o ri mra.

Jejus kot mẽ ho ohtõ nẽ mẽ ho mex ã harẽnũh

Matêwre 8.16-17; Makre 1.32-34

40Tã nhũm ra amỹkry htỳx mẽ nhũm mẽ Jejus wỳr ahpỹnhã ri mẽ à xwỳnhjê ho mra. Nhũm amnhĩ wỳr mẽ omu hãmri nẽ mẽ piitã ri mẽ hã ãhkra jaxwỳ nẽ akupỹm mẽ ho mex pa. 41Nhũm ra mẽkarõmnuti mẽ hkwyjê hwỳr agjê nhũm mẽ kurũm mẽ hano nhũm mẽ tee ri amnhĩ tã omu nẽ mẽ kêp hapõx kurê kumrêx. Hãmri nẽ mẽ kêp hapõx kaxyw nẽ àmra kamã kãm kapêr nẽ kãm:

—Kwa tanhmã kot pa wem amnhĩ nê ato? Hêxta waa nẽ. Apê Tĩrtũm Kra hã axàhpumunh tỳx kênã.

Anhÿr o kãm kapër. Âm hãmri na prem ã harënh anë. Kêp Tirtûm kot mē pakaxyw âm xwÿnh kênã. No nhũm Ijaew nhõ pahijaja kot mē kapër mar nē kêp mēkarõmnuti hkwȳ hã hkamnhix pymaj nhũm Jejus amnhĩ nê mē kãm kapër nē mē kãm:

—Kwa mē ri ã ijarënh anhÿr kêt nē.

Anhÿr o mē kãm kapër hãmri nē mē hano nhũm mē hapôj nē ma mra.

Mêmo kaxyw Tirtûm kot mē pahwÿr Jejus mēnh ã harënh

Makre 1.35-39

42Tã nhũm apkati nē myt kator grire nhũm Jejus kot Tirtûm mã amnhĩ jarënh kaxyw kãnhmã nhÿ nē kato nē ma nhÿhÿm kapôt mã tē. Hãmri nhũm krĩ nhõ xwÿnhjaja hkrã hapôj nē tee ri hapër nē ma hkôt hpri jakop o mō. Nē nhÿri hwÿr kato nē omu hãmri nē ma nhÿhÿm mōr nē kurê nē kãm:

—Kwa Jejus. Kêr ka tokyx ma nhÿhÿm amōr kêt nē. Kritpêm mē ixkôt axkamē mãn. Anë.

43Hãmri nhũm mē kuma nē amnhĩ tã mē kãm:

—Nã kot paj kritpêm mē akôt ixpikamēnh kêt nē. Kot paj ma krĩ piitã hkôt ri Tirtûm kapër o mē ahkre ho ri mē hkôt ixpa. Tirtûm kot tanhmã mē ho hkra hto hã harënhja kot paj mē hkôt ri mē kãm harënh o ri ixpa. Ja kaxyw na pre Tirtûm mē awÿr inhmē. Anë.

44Nhũm pre ã mē kãm amnhĩ jarënh anë. Hãmri nē mē kêp kato nē ma Ijaew nhõ pika piitã hkôt Tirtûm kapër o mē ahkre ho ri pa. Ijaew nhõ Tirtûm kapër o mē ahkre xà hã ixkre kamã mē piitã ho mē ahkre ho ri pa.

Jejus kot amnhĩ kôt mē hkwȳjê hwÿr ã harënh

Matêwre 4.18-22; Makre 1.16-20

5 1Tã nhũm Jejus ma gô rax pê Jenëjare hwÿr mō. Hãmri nē hwÿr pôj nē gô mÿri Tirtûm kapër o mē ahkre ho xa nhũm mē ohtô nē pu hã mar o kuhê. Nē kot hprĩ hã mar nē hkôt omunh kaxyw hã axpën nhĩgãnh o kuhê. 2Hãmri nhũm tee ri amnhĩ tã mē omu nē amnhĩ pu hã hakëx nē rīt nē gôx kãm pàr kaprÿ hamëxkrut nē jëtja wa omu. Nhũm õ dôn wa gôx kãm kryhti kuhõnh o xa. Nhũm pàr hamē hkaprÿ nē ajêt nhũm Jejus omu. 3Hãmri nē hwÿr tē nē hõm axà nē õ dôn pê Simãwja mã anë nhũm hkôt axà nē kii mē kêp pàrja amÿm kunhõ nhũm ajêt. Hãmri nhũm pàr kre rûm amÿm mē ahkre ho nhÿ nhũm mē piitã omu nē mar mex o kuhê.

4Tã nhũm mē ahkre hpa nē Simãw mã kãm:

—E gô xupÿm wÿr anhõ pàr o axkamē nē axte anhõ kryhti mē nē ho amnhĩm tep kwÿmnê. Anë.

5Hãmri nhũm tee ri kuma nē kãm:

—Kwa na pa mẽ ra kamàt kãm tee rēnh o apkati nē ho hōmnēnh kêt tã ka ri inhmã anē. Nom kot paj amar xà hkôt kop kumē. Anē.

6Hãmri nē upým wỳr pàr o axkamē nē htō Andre mẽ wa axte kryhti mẽ. Nē ãm mẽnh tipxi htã ho tep pynēnh rax kumrēx. Jakamã nhũm kryhtija ra pikaxōnh kaxyw. 7Hãmri nhũm wa tee ri ho anē nē amnhĩ wỳr pàr õ ho mrar xwỳnhhta wa kãm akir. Jepetew kra Juãw mẽ Xiakreja wa nhũm wa amnhĩ wỳr wa kãm akir nhũm wa hwỳr pàr õ ho tē hãmri nē mẽ kryhti hã hije nē pàr wỳr ho api. Hãmri nē pàrta hamē tep o ho nỳt pa nē hamē ho hipu mex nē. Jao nhỹx gōnh mã wa axà. 8-10Hãmri nhũm mẽ amnhĩ jaēr pē tep xohtō raxta pumu nē kamã no pyma nē. Hãmri nhũm Simãwja Jejus kutã hkōn krã ho tēm nē hipô nē nhỹ nē hã hpijaàm kamã kãm kapēr nē kãm:

—Kwa Pahihti. Kii tamũ axkamē. Akĩnhã ixte amnhĩ tomnuj tỳx xwỳnh na pa. Anē.

Hãmri nhũm kuma nē ãm kuma nē kãm:

—Kwa nà tee ri amnhĩ kukamã ajamaxpēr kêt nē. Kot kaj jarãhã hpãnhã tãm amnhĩ nhĩpêx o apa. Na ka ra tep pynēnh rũnh o apa. Tã kot kaj ja kaga nē hpãnhã ma ri mẽ hkôt Tĩrtũm kapēr o mẽ ahkre ho ri apa. Koja mẽ ohtô nē ama nē Tĩrtũm kôt amnhĩ xunhwỳ nē hkôt amnhĩ nhĩpêx o pa. Jakamã kot kaj te ate tep pynēnh rũnh nē Tĩrtũm mã õr pyràk o amnhĩ nhĩpêx o apa. Anē.

Nhũm pre ã Jejus Simãw mã kapēr anē. 11Hãmri nhũm mẽ gô jakàx ã pàr janhôr tỳx nē kamã hikukrēx piitã hkaga hpa nē ma Jejus kôt pa ho pa.

Jejus kot hkà nhy kro tỳx xwỳnh o mex ã harēnh

Matêwre 8.1-4; Makre 1.40-45

12Tã nhũm Jejus ma krĩ hõ hwỳr mō. Hãmri nhũm mẽhõ my hkà nhy hkro htỳx xwỳnhja omu nē hwỳr tē nē hã hpijaàm kaxyw kutã hkōnkrã ho nhỹ nē kãm:

—Pa Pahihti. E ot pa awỳr amnhĩ to tē. Kwa akupỹm ate mẽ ixto mex kaxyw axàhpumunh tỳx jakamã kot ka akupỹm amã ixto mex prãm nē mãmri akupỹm ixto mex. Anē.

13Hãmri nhũm kuma nē hkà punuti hã ìhkra xi. Amnhĩ kamã kahak kêt nē hã ìhkra xi nē kãm:

—Nà kot paj ato mex. E akupỹm akà mex kurē kumrēx.

Anhỹrja kôt hãmri nhũm hkàja akupỹm mex pa. 14Hãmri nhũm Jejus kãm:

—E kēr ka amnhĩ tã akwỳjê mã tanhmã ijarēnh to hkêt rãhã ma patre hwỳr tē kê akupỹm akà mex ã apumu. Hãmri ka amnepēm Mojes kot mẽ ate akupỹm amex ã Tĩrtũm mã tanhmã amnhĩ nhĩpêx to hã karōta ka kãm ho anē. Kê mẽ mẽ piitã akupỹm akà mex ã apumu. Anē.

Hāmri nhũm kuma nẽ kãm:

—Tôe. Nà kot paj anê. Anê.

Hāmri nẽ ma hwỳr htêm kurê kumrêx.

15Hāmri nhũm mẽ piitã axpẽn mã Jejus jarênh o ri hprôt nhũm mẽ kot kapêr mar kaxyw ma hwỳr mra. Nẽ mẽ à xwỳnhjaja nhũm kot mẽ ho mex kaxyw nhũm mẽ hwỳr amnhĩ to mra. 16Jakamã nhũm pre hte Jejus tōhã mẽ kêp hapôj nẽ ahte ma kapôt ã Tĩrtũm mã amnhĩ jarênh kaxyw mra. Nẽ kãm amnhĩ jarênh pa hāmri nẽ ma akupỹm mẽ hwỳr mra.

Jejus kot ĩ kamã htyk xwỳnh o mex ã harênh

Matêwre 9.1-8; Makre 2.1-12; Juãw 10.37-38

17Tã nhũm Jejus ma Tĩrtũm kapêr o Ijaew jahkre ho pa. Jakamã nhỹri mēhō nhōrkwỹ kamã ho mẽ ahkre ho xa nhũm Parijew nhō xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja kot mar kaxyw ma hwỳr mra. Na pre ra Garirej rũm mẽ hkwyjaja ma hwỳr mra. Nẽ pika pê Jutej rũm mẽ hkwy haxwỳja ma hwỳr mra. Nẽ krĩ pê Jerujarê rũm. ã na prem ohtô nẽ krĩ piitã kurũm kot mar kaxyw hwỳr akuprō nhũm mẽ ahkre anê. Nẽ Tĩrtũm kot ho àhpumunh tỳx jakamã nhũm ÿ hã akupỹm mẽ à xwỳnhjê ho mex. 18Hāmri nhũm hkwyjaja ĩ kamã htyk xwỳnh mỳ nẽ Jejus wỳr o tẽ. Nōr xà kamã nōr rãhã nhũm mẽ hã hije nẽ hwỳr o tẽ. Hāmri nẽ tee ri kot hwỳr ho àr kaxyw ri mẽ hkupu ho pa. 19Nom nhũm mẽ ra ixkre ho nỳt rax jakamã nhũm mẽ tee ri amnhĩ kukamã ho ukapi ho ri pa. Hāmri nẽ ra hamaxpêr nẽ ixkre nhĩmōk po hwỳr ho api nẽ ixkre nhĩmōk kwỳ grã nẽ hkôt ĩ kamã htyk xwỳnhhta jaxà. Nōr xà kamã nōr rãhã Jejus wỳr haxà nẽ mẽ hipōk ri ho wrỳ nẽ kutã kuxi nhũm nō. 20Hāmri nhũm Jejus amnhĩ tã mẽ kot kaxyw kãm hamaxpêr tỳx ã mẽ omunh mex nẽ. Hāmri nẽ ĩ kamã htyk xwỳnhhta mã kapêr nẽ kãm:

—Pa? E na pa ra anê tanhmã ate amnhĩ tomnuj to ho apaja o ijapêx pa. Kot paj axte kãm ijamaxpêr kêt nẽ. Anê.

21Hāmri nhũm Parijew nhō xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja tee ri kot ã kãm kapêr anhỹrja ã kuma nẽ axpẽn mã:

—Tk. Kwa kêp Tĩrtũm kêt tã te ri kot amnhĩ nhĩpêx pyrãk o ri mẽ nẽ mẽ kot amnhĩ tomnuj o hapêx ã amnhĩ jarênh o kuhê. Tĩrtũm pix na kot mẽ nẽ mẽ kot amnhĩ tomnuj o hapêx xwỳnh kênã. Anê.

22Nhũm mẽ ã axpẽn mã Jejus jarênh anê nhũm amnhĩ tã mẽ kuma nẽ mẽ hamaxpêr kôt mẽ omunh mex nẽ. Jakamã mẽ kãm:

—Kwa mẽ ã ajamaxpêr anhỹr kêt nẽ. 23Ixte mẽ nẽ mẽ kot amnhĩ tomnuj o ijapêx par ã amnhĩ jarênh tã mẽ ate ja kôt ixpumunh kêt jakamã na ka mẽ ixkôt ajamaxpêr kêt nẽ. Nom kot paj mẽ anoo mã

akupým ĩ kamã htyk xwÿnhta o mex ka mẽ apiitã ja hã ixpumu hãmri nẽ ixkõt ajamxpêr kurê kumrêx. ²⁴Ixpê Tĩrtũm kot mẽ awÿr inhmênh xwÿnhta na pa. Ixte mẽ anê mẽ ate amnhĩ tomnuj rênh kaxyw na pre mẽ awÿr inhmẽ pa mẽ awÿr wrÿ. Tã mẽ ate ja kõt ixpumunh kaxyw kot paj mẽ anoo mã myja o mex. Anẽ.

Hãmri nẽ hpãnhã ĩ kamã htyk xwÿnhja mã kapêr nẽ kãm:

— E kãnhmã xa nẽ anõr xà py nẽ ma akupým anhõrkwÿ hwÿr tẽ. Anẽ.

²⁵Nhũm kãnhmã ãm kurê kumrêx. Hãmri nẽ amnhĩ pumu nẽ hkĩnh tÿx nẽ nõr xà py nẽ mẽ noo mã kato nẽ akupým õrkwÿ hwÿr ma Tĩrtũm mã mex o mex ã harênh o tẽ. ²⁶Hãmri nhũm mẽ amnhĩ jaêr pê omu. Nẽ no hapõx kaxyw hkõt omunh o kuhê nẽ kamã no pyma nẽ. Nẽ tee ri omu hãmri nẽ axpên mã:

— Kokÿÿ. Aa mẽ pahte ã mẽhõ kot amnhĩ nhĩpêx anhÿr ã omunh kêt tã na pu mẽ jarãhã ja pumu. Anẽ.

Hãmri nẽ Tĩrtũm mã mex o mex ã harênh o kuhê.

Jejus kot amnhĩ kõt Rewi hwÿr ã harênh

Matêwre 9.9-13; Makre 2.15-17; Rukre 15.1-2

²⁷Tã nhũm Jejus ma hkõt mẽ pa ho mẽ pa xwÿnhjê mẽrohã ma nhÿhÿm mõ. Hãmri nẽ nhÿri Rewi pumu. Rewi nhĩxi hõ pê na Matêwre. Rõm kãm mẽ õ pahшти mã amnhĩ kwÿjê pê kãxpore hkwy jamÿnh xwÿnh na pre. Jakamã nhũm ujamÿnh xà hã ixkre kamã mẽ kêp hkwy jamÿnh o nhÿ nhũm Jejus mẽ hkõt mẽ pa o mẽ pa xwÿnhjaja hãnh mra. Hãmri nhũm Jejus àpênh ã omu nẽ amnhĩ kõt kuwÿ nẽ kãm:

— Pa? E kwa axàpênhta kaga nẽ hpãnhã amnẽ mẽ ixkõt mãn tẽ. Nẽ ixkõt mãn ri apa ho apa. Anẽ.

²⁸Hãmri nhũm kuma nẽ àpênh kaga hpa nẽ ma hkõt mõ nẽ hkõt pa ho pa.

²⁹Hãmri nhũm mẽmo arĩgro hã nhũm Rewi nhõ mẽ apkur xà hã mẽõ rax nẽ. Jakamã nhũm amnhĩ nhõrkwÿ hwÿr hkrãmnhwÿjaja nẽ Jejus mẽ hkõt mẽ pa ho mẽ pa xwÿnhjê hwÿ. Mẽ kot kutã apkur kaxyw nhũm amnhĩ kõt mẽ kuwÿ nhũm mẽ ma hkõt mra nẽ õrkwÿ hwÿr agjê nẽ apkur o hkrĩ. Nẽ mẽ kêp Rõm nhõ pahi mã mẽ kêp kãxpore hkwy jamÿnh xwÿnh kwÿjaja nẽ mẽ ohtõ nẽ hwÿr akuprõ nẽ axpên kutã apkur o hkrĩ. ³⁰Hãmri nhũm Parijew nhõ xwÿnhjê mẽ Tĩrtũm kapêr tũm o mẽ ahkre ho mẽ pa xwÿnh kwÿjaja mra nẽ mẽ apkur ã mẽ omu nẽ tee ri mẽ hkaêx ã Jejus pumu hãmri nẽ Jejus kõt mẽ pa ho mẽ pa xwÿnhjê hwÿr agjê nẽ hã mẽ kãm akir nẽ mẽ kãm:

— Kwa mẽ kot amnhĩ tomnuj ho mẽ pa xwÿnhjê kutã mẽ apkur kêt tã ka mẽ apytàr xwÿnhja mẽ apimràatã axtem nẽ mẽ kutã axàpkur o

akrĩ. Kwa mẽ ate amnhĩ to mex ronhỹx ka mẽ kutã axàpkur kêt nẽ. Anẽ.

31Hãmri nhũm Jejus amnhĩ tã mẽ kapër ã mẽ kuma nẽ mẽ kãm:

—Tk. Nà ixte tãm mẽ unhwỳr kaxyw na pa mẽ kutã ixàpkur o nhỹ. Xà na hte tõtôja mẽ mex xwỳnhjê hwỳr mra nẽ mẽ hkane? Nà ãm mẽ à xwỳnhjê pix wỳr na htem mra. Ra mẽ ate ja pumunh mex kênã. Ja pyrã nẽ na pa pre mẽ kot amnhĩ to mex xwỳnhjê hwỳr ixwrỳk kêt nẽ. Mẽ kot amnhĩ tomnuj xwỳnhjê pix wỳr na pa pre wrỳ. Ixte tãm mẽ unhwỳr kaxyw na pa pre mẽ hwỳr wrỳ nẽ ã jajê kutã ixàpkur o inhỹr anẽ. **32**Ãm mẽ kot amnhĩ tomnuj xwỳnhjê hwỳr na pa pre wrỳ nẽ mẽ kamã ixukapřĩ ho ri ixpa. Mẽ kot amnhĩ tomnuj mã urer nẽ hpãnhã tãm amnhĩ nhĩpêx o pa kaxyw na pa pre mẽ hwỳr wrỳ. Tã ka mẽ atỳx ã ri mẽ ixto akapër anẽ. Anẽ.

Mẽ hpãmjaja kot amnhĩ nhĩpêx gryk ã Jejus kaga hã mẽ harênh

Matêwre 9.14-17; Makre 2.18-22

33Tã nhũm Ijaew kwỳjaja Jejus wỳr mra nẽ kãm:

—Pa? E ot pa mẽ awỳr mra. Kwa aprĩ hã mẽ inhmã mẽmoj jarẽ. Na hte Parijew nhõ xwỳnhjê mẽ Juãw kôt mẽ pa xwỳnhjaja tõtã Tĩrtũm mã amnhĩ jarênh kaxyw nẽ apkur kêt rãhã kãm amnhĩ jarẽ. No akôt mẽ pa ho mẽ pa xwỳnhjaja na htem àmnhĩx apkur o pa kamã kãm amnhĩ jarẽ. Kwa mo na htem mẽ uràk nẽ tõtã apkur kêt ri kãm amnhĩ jarênh hkêt nẽ? Anẽ.

34Hãmri nhũm mẽ kuma nẽ mẽ kãm:

—Tk. Nà mo kaxyw koja mẽ apkur kêt rãhã kãm amnhĩ jarẽ? Mẽ hkaprĩ hkêt kênã. Mẽ kot ixkôt pa ho pa hã amnhĩ pumunh jakamã hkĩnh nẽ pa. Kormã ixte mẽ kamã ixpa kênã kot kêt mẽ Tĩrtũm mã amnhĩ jarênh kaxyw nẽ apkur kêt rãhã kãm amnhĩ jarẽ. Xà na htem hkrãmnhwỳ hã hkĩnh kaxyw hã akuprõ nẽ hkaprĩ nẽ apkur kêt nẽ mỳr o hkrĩ? Na htem hã akuprõ nẽ hkĩnh nẽ hã apkur rũnh nẽ. Ja pyrã nẽ na hte ixkôt mẽ pa ho mẽ pa xwỳnhjaja ixkôt kormã àmnhĩx ri hkĩnh nẽ apkati mẽ apkur o pa. **35**Nom koja mẽ kãm ixkurê xwỳnhjaja nhỹrmã tanhmã ixto hãmri nhũm mẽ rĩ kormã ixtã hkaprĩ htỳx kãm apkur kêt ri tanhmã amnhĩ nhĩpêx to. Anẽ.

36Nhũm pre ã Jejus mẽ kãm hkôt ri mẽ pa ho mẽ pa xwỳnhjê jarênh anẽ hãmri nẽ mẽ kãm:

—Nà mẽ kot amnhĩ tomnuj xwỳnhjaja mẽ kot amnhĩ nhĩpêx tũm o amnhĩ pyrãk jakamã na htem mẽ kot amnhĩ nhĩpêx nyw kaga. **37-39**Ixte amnhĩ nhĩpêx nywja te kot mẽ ate amnhĩ nhĩpêx tũm pyrãk kêt jakamã ka htem inhma nẽ ãm inhma. Kwa mẽ ixkapër ma nẽ mẽ ate amnhĩ nhĩpêx tũm gryk ã ixkaga hkêt nẽ. Anẽ.

Jejus kêp arĩgromnu hpãm ã harênh

Matêwre 12.1-8; Makre 2.23-28

6 ¹Tã nhũm Ijaew nhõ arĩgromnu pê sapja axte kato. Hãmri nhũm Jejus mẽ hkôt ri mẽ pa ho mẽ pa xwỳnhjê mẽ ma mẽ hpur kôt ri nhỹhỹm ri pa. Hãmri nhũm hkôt mẽ pa ho mẽ pa xwỳnhjaja ra kãm prãm nê mra hãmri nê prãm xàj mẽmo hy te kot harôj pyræk xwỳnhhta kwỳ rê nê kugrà nê ma Jejus kôt hkanhar o mō. Ijaew kot amnhĩ nhĩpêx xà hkôt. ²Hãmri nhũm Parijew nhõ xwỳnhjaja kãm mẽmoj tã Jejus o kapêr prãm jakamã ã mẽ kot amnhĩ nhĩpêx anhỹr ã mẽ omu nê mẽ hã Jejus kukjêr kurê kumrêx nê kãm:

—Kwa Tĩrtũm kapêr tũm kot mẽ panhõ arĩgromnu hã mẽ pahte mẽ pahpur kãm mẽmoj nhĩkênh nê mẽ pahkurê htã nhũm ri akôt mẽ pa ho mẽ pa xwỳnhjaja axtem nê mẽmo hyta kwỳ rê nê akôt hkanhar o mō. Kwa mẽ kãm anê kê mẽ ã amnhĩ nhĩpêx anhỹr kêt nê. Na htem arĩgromnu hã ã amnhĩ nhĩpêx anhỹr kêt nê. Anê.

³⁻⁴Hãmri nhũm Jejus mẽ kuma nê hprĩ hã mẽ kãm Tĩrtũm kapêr tũm jarê nê mẽ kãm:

—Kwa xà na ka mẽ Tĩrtũm kapêr ã kagà htũm kamã pahi Tawi kot tanhmã amnhĩ nhĩpêx tota kamã harênh nê mar kêt nê? Na pre Tawija hkôt ri mẽ pa xwỳnhjê mẽ nhũm mẽ prãm xàj Tĩrtũm mã amnhĩ jarênh xà hã ixkre wỳr agjê nhũm patre maatija mẽ kãm prãm tỳx ã mẽ omu nê mẽ kãm mẽmoj gō. Mẽ kot Tĩrtũm noo mã pãwti jaxwỳr xwỳnhhta nhũm mẽ kãm kugō nhũm mẽ kuku. Tĩrtũm kapêr ã kagà htũm kot ja nê mẽ kurê htã nhũm mẽ kãm prãm tỳx ã mẽ omu nê mẽ kamã ukapřĩ xàj mẽ kãm kugō. Patre pix kot ja kur kaxyw tã nhũm mẽ kãm kugō nhũm mẽ kuku. Tã nhũm Tĩrtũm ja hã mẽ omu nhũm ja kêp omnuj kêt nê. Kot mẽ kamã ukapřĩ nê mẽ kãm őr nhũm mẽ hã omu nhũm ja kãm mex nê. ⁵Tã pa na pre Tĩrtũm mẽ akaxyw ixãm nê mẽ awỳr inhmênh jakamã papxipix na pa hte arĩgromnu hã tanhmã mẽ kot amnhĩ nhĩpêx to hã mẽ kãm karō ho ri ixpa. Ixpê arĩgromnu hpãm na pa. Anê.

Jejus kot ĩhkra grà xwỳnh o mex ã harênh

Matêwre 12.9-14; Makre 3.1-6

6 Tã nhũm Ijaew nhõ arĩgromnu pê sapja axte kato. Hãmri nhũm Jejus Tĩrtũm kapêr o mẽ ahkre xà hã ixkre hwỳr tẽ nê axà nê Tĩrtũm kapêr o mẽ ahkre ho nhỹ. Nhũm mẽhõ myja upôk rũm ĩhkra grà xwỳnhja mẽ ĩhkō hã mar o nhỹ. ⁷Nhũm Parijew nhõ xwỳnhjê mẽ Tĩrtũm kapêr tũm o mẽ ahkre ho mẽ pa xwỳnhjaja mẽ kãm mẽ hkrãhtũmjê mã Jejus o kapêr prãm xàj htãnopxar o kuhê. Nê ĩhkra grà xwỳnhhta pumu nê hã axpẽn mã:

—Kwa pu mẽ jar pakuhê nê Jejus tanhmã kot amnhĩ nhĩpêx to hã omu. Xà koja jarãhã mũjti ho mex nà? Jarãhã arĩgromnu kênã kot kêt

kãm ìhkra ho mex. Koja anê nê Tirtũm kapêr kwỳm ri amnhĩ nhĩpêx. E pu mê kop pakuhê nê hã omu. Anê.

8Nhũm Jejus ra kot mê hamaxpêr kôt mê omunh mex jakamã amnhĩ wỳr myta mã hpa ho apê nê kãm:

— Pa? E kànhmã xa nê amnê ixwỳr tẽ. Anê.

Hãmri nhũm kuma nê kànhmã xa nê hwỳr tẽ. 9Hãmri nhũm Jejus amnhĩ pu hã ri mê ho hakêx nê mê kot mar o hkrĩ xwỳnhjê pumu nê mê kãm:

— E mê inhmã mêmoj jarê. Tanhmã na htem arĩgromnu hã axpên nhĩpêx to ho pa wehe? Xà kot ka arĩgromnu hã axà htỳx nê nõ hãmri nê amnhĩ mex prãm xàj ma mễhõ hwỳr amnhĩ to tẽ. Hãmri nhũm ãm apumu nê apkatim arĩgro mex jamãr pê akane hkêt ka ty nhũm ja amã mex nê nà? Rỳ nhũm tanhmã atomnuj to nê akupỳm amnhĩ nê ajano nhũm ja amã mex nê nà? Nà koja ã anhiêpêx anê nhũm ja amã mex kêt nê. Na ka htem ã amnhĩ nhĩpêx anhỳr o apa hkêt nê. E mê inhmã mêmoj jarê. Tanhmã na pre finat Mojesja Tirtũm nhỹ hã mê pamã arĩgromnu hã mê pahte axpên nhĩpêx ã karõ hto? Xà kot puj mê axpên kãm paxukaprĩ ho papa nà? Kot puj mê pamã axpên kurê ho papa? Xà kot puj mê hã mêmoj punuj pê axpên pytã nà? Xà kot puj mê hã axpên pytãr pymaj arĩgro mex jamã? E mê atõ inhmã ja jarê. Anê.

Nhũm pre ã mê hkukjêr anê. 10Mê hamaxpêr ã mê omunh mex pê ã mê hkukjêr anhỳr o xa. Nom nhũm arĩ mễhõ tanhmã kutã kãm nê hkêt nê. ãm akryk mar pê omunh o hkrĩ. Mê kot tanhmã kãm nê nhũm ta pãnhã tanhmã kot mê kãm nê pymaj nhũm mê tee ri kãm tanhmã nê hprãm nom akryk mar o hkrĩ. Hãmri nhũm Jejus tee ri mê omu hãmri nê myta mã kãm:

— Tk. Mê kot tanhmã inhmã kapêr tore hã. E anhihkra katãt. Anê.

Hãmri nhũm ìhkra katãt nê akupỳm mex kurê kumrêx. 11Hãmri nhũm mê kãm Jejus kurê xwỳnhjaja tee ri ja hã omu nê kamã gryk tỳx nê. Arĩgromnu hã kot ho mex jakamã nhũm mê kamã gryk tỳx nê. Nê hã axpên kukjêr o kuhê nê axpên mã:

— Kwa ã kot amnhĩ nhĩpêx anhỳr mỳrapê tanhmã kot puj wem ho? Na ã kapêr anhỳrja o tanhmã mê pahto kapêr punuj to. Te mê papamjaja mê pahte hkĩnhã pahkwỳjê kamã paxukaprĩ hkêt pyrãk ã mê pajarê. Koja mê pahkwỳjaja kuma hãmri nê mê pahte amnhĩ nhĩpêx kaga nê amnhĩ kaxyw ãm hkôt pix mã hamaxpêr o pa. Jakamã kwa tanhmã kot puj mê ja nê ho? Anê.

Jejus kot amnhĩ kaxyw mê ho 12 nê mê rênh ã harênh

Matêwre 10.1-4; Makre 3.13-19

12Tã nhũm arĩgro hõ hã nhũm Jejus ma kot Tirtũm mã amnhĩ jarênh

kaxyw ma hixêt prêk wÿr tẽ nẽ hã api. Hãmri nẽ kãm amnhĩ jarênh o apkati.

13Tã nhũm kwÿhtã nhũm amnhĩ kôt kot ri mẽ o pa xwÿnhjê hwÿ nẽ amnhĩ kaxyw mẽ ho 12 nẽ mẽ kurê. Nẽ mẽ kãm:

—E mẽ kajaja kot paj ma mẽ pahkwÿjê hwÿr mẽ arẽ ka mẽ ma inhÿ hã Tirtũm kapêr o mẽ ahkre ho ri mẽ hkôt apa. Kot kaj mẽ apê inhÿ hã mẽ ahkre ho apa xwÿnh. Anẽ.

14Kot amnhĩ kaxyw mẽ rênh xwÿnhjê nhĩxi na jajaja:

Simãw kumrêx na pre kuta nẽ axte hã hixi mẽ nhũm kêp Pêtre.

Nẽ Simãw Pêtre hkôt htõ Andreja ta.

Nẽ hkôt Xiakre hta.

Nẽ hkôt Juãw ta.

Nẽ hkôt Firiptija ta.

Nẽ hkôt Patoromew ta.

15 Nẽ hkôt Matêwreja ta.

Nẽ hkôt Tomasja ta.

Nẽ hkôt Apew kra axtem Xiakre hõja ta.

Nẽ hkôt Simãw Jeroxja ta.

16 Nẽ hkôt Xiakre hõ hkra Jutja ta.

Nẽ hkôt Jut Kariot ta.

Jut Kariotja na pre kormã kot mẽ kãm Jejus kurê xwÿnhjê nhĩhkram òr mã. Nhũm kot amnhĩ kuka-mã omunh mex tã mẽ hkôt amnhĩ kaxyw kuta.

Ã mẽ kot Jejus nhÿ hã mẽ ahkre o pa kaxyw mẽ rênh xwÿnhjê nhĩxi kot anhÿr.

Jejus xapênh ã harênh

Matêwre 4.23-25

17Tã nhũm Jejus akupÿm ÿ hã mẽ ahkre ho pa xwÿnhjê mẽ hãmri hixêt prêeta kurũm wrÿ nẽ nhÿri hinur kãm kuhê. Hãmri nhũm nhÿhÿnh mẽ kot mar mã xwÿnhjaja hã akuprõ. Kôt mẽ pa ho mẽ pa xwÿnh kwÿjaja nẽ nhÿhÿnh krĩ hkwÿ rũm mẽ hkwÿjaja. Pika pê Jutej kurũm mẽ hkwÿjaja. Nẽ krĩ pê Jerujarê kurũm mẽ hkwÿjaja. Nẽ gô mÿ ri Xir mẽ Sitõja wa kamã mẽ pa xwÿnh kwÿjaja. ãm ahpÿnhã ri nhÿhÿnh krĩ hkwÿ rũm mẽ kot mar mã xwÿnhjaja hã pikuprõnh rax nẽ. 18-19Mẽ kot kapêr mar nhũm kot akupÿm mẽ ho mex kaxyw nhũm prem ma hwÿr amnhĩ to pa. Mẽ hkwÿjaja tanhmã ri à kute. Nhũm mẽ hkwÿjaja mẽkarõmnuti kot mẽ hwÿr gjêx xwÿnhjaja nhũm mẽ piitã ma hwÿr amnhĩ to pa. Na prem ra amnhĩ kaxyw kãm hamaxpêr o:

—E pa ma hwÿr tẽ nẽ ãm hkupênh pix tã akupÿm inhmex japêr. Anẽ.

Hãmri nẽ ma hwÿr mra nhũm mẽ omu nẽ Tirtũm xàhpumunh tÿx o akupÿm mẽ ho mex pa.

Jejus kot hkôt mẽ pa ho mẽ pa xwỳnhjê jahkre hã harênh

Matêwre 5.1-12

20Tã nhũm Jejus hkôt mẽ pa ho mẽ pa xwỳnhjê jahkre nẽ mẽ kãm:

E kot kaj mẽ atô amnhĩ kaxyw tanhmã inhmã ajamaxpêr to nẽ ajamaxpêr o: “Nà ixkukrêx rax kêt tã na hte Tĩrtũm ixkôt pa ho pa. Koja ixkôt pa hkêt pa ixtỳx ri tanhmã amnhĩ nhĩpêx to ho ri ixpa rãhã nẽ. Tĩrtũmja mex kumrêx o kot mẽ hikukrêx raxta jakrenh par.” Anhỳr o ajamaxpêr. Hãmri nhũm Tĩrtũm ã ajamaxpêr anhỳr ã apumu nhũm ja kãm mex nẽ. Hãmri nhũm apê hkra hã ato mex nẽ atãnopxar o akôt pa ka ajamakêtkati nẽ akĩnh nẽ axàmnhĩx ri apa.

21 Nẽ kot kaj mẽ atô amã Tĩrtũm kãm hprãm xà hkôt tanhmã amnhĩ nhĩpêx to ho ri apa hprãm tỳx nẽ. Nhũm amnhĩ tã apumu nhũm ja kãm mex nẽ nhũm ato mex nẽ. Nẽ tanhmã ato ka hkôt pix mã amnhĩ to mex o ri apa nẽ ajamakêtkati nẽ akĩnh nẽ axàmnhĩx ri apa.

Nẽ kot kaj mẽ tanhmã amnhĩ tomnuj to. Hãmri nẽ tee ri ja hã amnhĩ pumu nẽ ajamaxpêr. Nẽ apijaàm nẽ akaprĩ xaj amỳr o nhỹ. Amỳr rax nẽ. Hãmri nhũm Tĩrtũm ja hã apumu nhũm ja kãm mex nẽ. Jakamã nhũm anê akaprĩ hta nẽ ato mex nẽ. Ka ajamakêtkati nẽ akĩnh nẽ axàmnhĩx ri apa.

22-23 Nẽ kwãr mẽ mãmri ixtã tanhmã mẽ ato kapêr punuj to nẽ tanhmã mẽ ato hêx to nẽ tanhmã ri mẽ atomnuj to ho pa. Kwãr mẽ mãmri ã mẽ anhĩpêx anhỳr o pa. Ka mẽ ãm inhmã pix mã ajamaxpêr rãhã ho apa pê ajamakêtkati nẽ axàmnhĩx ri apa. Kwãr mẽ mãmri ã mẽ anhĩpêx anẽ nẽ mẽ amex kêt ã mẽ ajarênh o pa. Amnepêm na pre Tĩrtũm nhỹ hã kapêr xwỳnhjaja nhũm prem ã mẽ hipêx anẽ. Jakamã koja mẽ urak nẽ ã mẽ anhĩpêx anhỳr o pa. Nhũm Tĩrtũm ja hã mẽ apumu nẽ amnhĩm mẽ amex ã mẽ ajarê. Hãmri nẽ nhỹrmã kaxkwa kamã wa inhõ krĩ kamã mẽ ato mex rax nẽ. Ka mẽ akĩnh nẽ ajamakêtkati nẽ axàmnhĩx ri apa. Jakamã kwãr mẽ mãmri pika jakamã ã ixtã mẽ anhĩpêx anẽ. Anẽ.

Jejus kot arĩ mẽ kot mar xwỳnhjê jahkre hã harênh

Xiakre 5.1-5

24Nhũm Jejus nhãm hkôt mẽ pa ho mẽ pa xwỳnhjê nhĩhkô hã mẽ kot Tĩrtũm kôt amnhĩ nhĩpêx o pa hkêt xwỳnhjê hwỳr apkjê. Nẽ mẽ omu nẽ tanhmã mẽ kãm kapêr to. Mẽ hikukrêx rũnh xwỳnhjê kumrêx mã kapêr nẽ mẽ kãm:

- E kwa mẽ o kora mẽ akukrêx rûnh xwÿnhjaja. Na ka htem ãm akukrêx rûnh pix mã ajamaxpêr o ri apa nê gryk ã Tirtûm mã ajamaxpêr o apa hkêt nê. Jao mẽ amã kapêr mar prãm kêt nê. Nê ãm akukrêx rûnh mã ajamaxpêr pê akĩnh nê ri apikunhar o ri apa. Tã kot ka mẽ nhÿrmã ty hãmri nhũm akĩnh xàja apê hapêx.
- 25 Nê mẽ amã Tirtûm kôt ri amnhĩ nhĩpêx prãm kêt xwÿnhjaja. Kot kaj mẽ nhÿrmã akaprĩ htÿx kãm tee ri amnhĩ to hwÿr kaprÿ kãm ga. Koja mẽ amar kêt nê.
- Nê mẽ atÿx ri mẽ ate tanhmã amnhĩ tomnuj to hkukamã ajamaxpêr nê apikunhar pê amnhĩ tomnuj o apa xwÿnhjaja. Kot kaj mẽ nhÿrmã ã mẽ ate amnhĩ nhĩpêx anhÿrja mÿrapê mẽ kot amnhĩ xà htÿx kamã hamak o pa htũm xà hwÿr ma apa. Hãmri nê kamã akaprĩ xaj amÿr rãhã ho ri apa. Jakamã kwa mẽ o kora mẽ amã Tirtûm prãm kêt xwÿnhjaja. Kêr ka mẽ ixkapêr ma nê axkãm ajamak rom nê ri apa.
- 26 Amnepêr mẽ pakukamã mẽ pa xwÿnhjaja na prem Tirtûm kapêr o hkwÿjê jahkre ho pa. Nom axtem nê hkwÿm ri tanhmã mẽ kãm ho hêx to nhũm mẽ kuma nhũm ja mẽ kãm mex nê nhũm mẽ amnhĩm mẽ mex ã mẽ harê. No ãm mẽ mex kêt. Tã mẽ kajaja. Mẽ kot mẽ urak nê axpên mã mẽ amex ã mẽ ajarênh tã Tirtûm mã mẽ amex kêt. Jakamã kot kaj mẽ amex kêt nê. Anê.

Mẽ kãm mẽ pahkurê xwÿnhjê jarênh

Matêwre 5.38-48; Rukre 23.34; mãânên Atre 7.60; Rômãn 12.14

27 Hãmri nhũm Jejus hpãnhã mẽ piitã mẽ ahkre nê mẽ kãm:

—E mẽ ate inhmar xwÿnhjaja. Kêr ka mẽ kot mẽ atomnuj xwÿnhjaja amnhĩ tã tanhmã mẽ ho hkêt nê. ãm mẽ ho mex pix o ri apa hkukamã mãn ajamaxpêr.

28—Nê mẽ kot mẽ ato kapêr punuj xwÿnhjaja. Kêr ka mẽ amnhĩ xwar amnhĩ tã tanhmã mẽ ho akapêr punuj to hkêt nê. ãm tãm mẽ kãm akapêr pê mẽ kãm akapêr mex o ri apa. Nê mẽ kot tanhmã ri mẽ ato ho pa xwÿnhjaja ka mẽ ho mex pix o ri apa. Nê mẽ ho Tirtûm wÿr pix kukamã mãn ajamaxpêr.

29—Nê koja mẽhõ anhĩnep akura ka ãm omu nê tanhmã amnhĩ tã ho hkêt nê. Te ate kãm ihkjê pêr nhũm kot ihkjê kamã akuranh pyrãk o amnhĩ nhĩpêx nhũm ja amã mex nê. No kêr ka mẽ amnhĩ tã tanhmã mẽ ho hkêt nê.

—Nê koja mẽhõ apê anhĩnôhkà py ka tanhmã hã kãm nê hkêt nê. Kwãr mãmrĩ apê kupy. Ka mãânên te ate kry pê anhĩnôhkà hpakà ry

jagiênh xwÿnhhta anhĩnôhkâ hkôt kãm ôr pyrâk o hipêx. Nom kamã agryk kãm kãm ôr kêt nê.

30—Nê koja mêhõ kêp amrakati kumrêx nê awÿr tẽ nê mêmoj tâ awÿ. Ka anhõ mêmoj japêr nê mãmri kãm mêmoj gõ. Kêp anhõxÿ hkêt kamã kãm mêmoj gõ. Rÿ koja mêhõ apê mêmoj to ahkĩ ka axâhkurê hkêt nê. Nê tanhmã hã ho hkêt nê. 31 Mẽ piitã mẽ kot tãm mẽ anhĩpêxja na mẽ amã hprãm. Tã kêr ka mẽ amnhĩ pyrã nê tãm mẽ piitã mẽ hipêx o ri apa. Mẽ kot tãm mẽ anhĩpêx kêt tã kêr ka mẽ axãmnhĩx ri anhõxÿ hkêt nê tãm mẽ hipêx o ri apa.

32—Nom kot kaj mẽ amã mẽ piitã mẽ ho mex o apa hprãm kêt japêr. Nê ãm mẽ kot mẽ ato mex xwÿnhjê pix ka mẽ amã mẽ ho mex prãm. Xã koja Tĩrtũm ja hã mẽ apumu nhũm ja kãm mex nê? Nã koja kãm mex kêt nê. Koja mêhõ mẽ ato mex kêt tã ka mẽ amnhĩ rom ho mex nê nhũm Tĩrtũm ja hã mẽ apumu hãmri nê mẽ amex ã mẽ ajarê. Mẽ kot amnhĩ tomnuj o mẽ pa xwÿnhjaja na htem ãm mẽ kot mẽ ho mex xwÿnhjê pixjaja nhũm htem amnhĩ xwar mẽ ho mex o pa. No tãm mẽ kot amnhĩ nhĩpêx o mẽ pa xwÿnhjaja na htem mẽ piitã mẽ ho mex o pa. Mẽ kot tãm amnhĩ nhĩpêx xwÿnhjaja nê mẽ kot amnhĩ tomnuj xwÿnhjaja nhũm mẽ ho hpimràatã mẽ ho mex o axpên pyrâk o pa.

33-36—Nê mẽ kot amnhĩ tomnuj xwÿnhjaja na htem ãm mẽ kot mẽ ho mex xwÿnh pixjaja nhũm htem amnhĩ xwar mẽ ho mex o pa. No mẽ kajaja. Kêr ka mẽ mãmri mẽ piitã mẽ kamã axukapri pix nê. Jao axãmnhĩx ri mẽ piitã mẽ kãm mêmoj nhõr o ri apa. Nhũm Tĩrtũm ja hã mẽ apumu nê ja hã mẽ ato mex nê.

—Jakamã kêr ka mẽ amarĩ mẽ kãm akurê xwÿnhjê ho mex nê. Nê mẽ kamã axukapri nê. Nê mẽ piitã mẽ kãm mêmoj nhõr o ri apa. Kê nhÿrmã Tĩrtũm maati mẽ hã mẽ amã mêmoj nhõr rax nê. Nê mẽ ate kot amnhĩ nhĩpêx kôt amnhĩ nhĩpêx xwÿnh ã mẽ ajarê. Tĩrtũm na hte mẽ kot amnhĩ tomnuj xwÿnhjê kamã ukapri ho pa. Jakamã kêr ka mẽ urâk nê ã mẽ hipêx anhÿr o ri apa. E kêr ka mẽ ã axpên nhĩpêx anhÿr rãhã nê. Anê.

Mẽ pahte axpên to pakapêr punuj kêt ã mẽ pamã karõ

Matêwre 7.1-5; mãânên Rõmãn 2.1-3, 14.1; Wam Korit 4.5; Xiakre 4.11-12

37 Nhũm Jejus arĩ mẽ ahkre nê mẽ kãm:

—Nê kêr ka mẽ atÿx ri amnhĩ krã hkôt tanhmã mẽ kot amnhĩ tomnuj to hã tanhmã axpên jarênh to ho ri apa hkêt nê. Kêr kê Tĩrtũm mẽ apyrã nê ã mẽ ajarênh anhÿr kêt nê.

—Nê kêr ka mẽ tanhmã mêhõ kot ra atomnuj tota mã ajamaxpêr rãhã hkêt nê. ãm ho ajamakêtkati tokyx anê nê axte kãm ajamaxpêr kêt nê. Kêr kê Tĩrtũm ja hã mẽ apumu nê mẽ apyrã nê axte tanhmã mẽ ate amnhĩ tomnuj to mã hamaxpêr kêt nê.

38—Nê kêr ka mẽ axpên kamã axukapří pê tanhmã axpên to mex to ho ri apa. Kêr kê Tirtũm ja hã mẽ apumu nê mẽ apyrà nê mẽ akamã ukapří pê tanhmã mẽ ato mex to ho pa. Na hte mẽ pahte axpên kamã paxukapří hã mẽ pahpumunh xà hkôt tanhmã mẽ pakamã ukapří to.

39—Nom kêr ka mẽ atỳx ri tanhmã axpên to akapêr to hkêt nê. Mẽ ate aprĩ hã axpên jamaxpêr kôt axpên pumunhre hã. Jakamã kot kaj mẽ atỳx ri mẽhõ ho akapêr punuj hãmri nê te mẽ nohkre xwỳnhjê hõ kot mẽmoj pumunh kêt tãã te kot no ho omunh nê tanhmã harênh to pyràk o amnhĩ nhĩpêx. 40Tirtũmja tapxipix na kot mẽ pajamaxpêr kôt mẽ pahpumunh par. Mẽ axàhpumunh tỳx o mẽ pahte hakrenh kêt jakamã kwa kêr ka mẽ ãm hkôt pix mã amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nê gaa nê uràk nê mẽ piitã mẽ kamã axukapří pix o ri apa. 41-42Jao mẽhõ kot tanhmã amnhĩ tomnuj to hã omu hãmri nê tanhmã hã kãm nê tokyx anhỳr kêt nê. Akumrêx ate tanhmã amnhĩ tomnuj to hã amnhĩ pumu nê hkaga hãmri nê rĩ kormã mẽhõta hwỳr tẽ nê kot tanhmã amnhĩ tomnuj to hã kãm akapêr to. Anê.

Mẽ pajamaxpêr xà hkôt mẽ pakapêr ã mẽ pajarênh

Matêwre 7.16-20, 12.33-37

43-45Nhũm Jejus arĩ mẽ ahkre nê mẽ kãm:

—Nê koja mẽmo pĩ hpàr mex nê ô mex nê. Nom koja pàr punuj hãmri nê ômnuj nê.

—Nê na htem mẽmo xõ pumu nê hkôt tanhmã pàr kute hã omu. No na htem rãrãj pumu nê kêp akunĩ kamã mrõnhĩ xõ hã hkamnhĩx kêt nê. Na htem mẽmo xỳ hpàr pumu nê ô xànhre hã hkamnhĩx kêt nê. Ja pyrà nê koja mẽhõ hamaxpêr punuj nê mããnên hakwa ho kapêr punuj pix nê. Nê htỳx tanhmã amnhĩ tomnuj to ho ri pa. Nom koja hamaxpêr mex nê hãmri nê mããnên hakwa ho kapêr mex o pa. Na htem ahpỳnhã amnhĩ jamaxpêr xà hkôt tanhmã hakwa ho kapêr to ho ri pa. Anê.

Ixkre pijakrut jarênh

Matêwre 7.24-27; mããnên Xiakre 1.22-25; Wam Juãw 2.3-6

46Nhũm Jejus arĩ mẽ hkôt mẽ pa ho pa xwỳnhjê jahkre ho nhỹ nê mẽ kãm:

—Nê kot kaj mẽ ixpê mẽ anhõ pahihti hã ijarê hã kot kaj mẽ ixkapêr kôt amnhĩ nhĩpêx rãhã ho ri apa.

47—E pa mẽ amã ixprĩ hã mẽ kot ixkôt amnhĩ nhĩpêx xwỳnhjê kot amnhĩ nhĩpêx jarê ka mẽ aprĩ hã inhma. 48Mẽ kot amnhĩ nhĩpêxja te mẽhõ hamaxpêr mex pê aptỳx kãm amnhĩm òrkwỹ nhĩpêx pyràk. Koja aptỳx kãm òrkwỹ nhĩpêx nhũm mẽmo arĩgro hã na wrỳk rax nê. Nê gô htãm rax nê hanhi nom nhũm arĩ ãm tỳx nê xa. Tã kot kaj mẽ ixkôt amnhĩ nhĩpêx ã kot kaj mẽ te ixkre jarênhja pyràk. Jao amex nê

ajamakêtkati nê ri apa. Te gô htàm kot ixkre janhir tã nhũm ãm tỳxta pyræk. 49Nom koja mēhō hamaxpēr mex kêt nê htỳx mō nê gô mỳri gyw rerek kãm amnhĩm òrkwỹ nhĩpêx. Hãmri nhũm mēmo arĩgro hã na wrỳk rax nê. Nê hã gô htàm rax nê òrkwỹ janhi nê kêp grành pa. Tã koja mēhō ixkôt amnhĩ nhĩpêx kêt nê te ho mēhō kot gô mỳri gyw rerek kãm ixkre nhĩpêxta pyræk. Jao mex kêt nê pa. Jakamã kwa mē ixkapēr mar tỳx nê te gô htàm kot ixkre janhir nê grành parta pyræk o amnhĩ nhĩpêx o apa hkêt nê. Anê.

Jejus kot mēhō mã àpênh xwỳnh o mex ã harênh

Matêwre 8.5-13

7 1Tã nhũm Jejus mē kãm ujarênh pa hãmri nê ma akupỹm Kapanau hwỳr mō. 2Nê mōō nê ra hwỳr pøj. Nhũm krĩ kamã pōristi krãhtũm mã àpênh xwỳnhja à htỳx nê nō. Ra htyk kaxyw nê nō nhũm ò patrãw tee ri omu nê kãm hapê jakamã tee ri hkukamã hamaxpēr o hkaprĩ nê. 3Hãmri nê Jejus pōx ã harênh ma nê hwỳr Ijaew pigêt kwỳjê rê nê mē kãm:

—Kwa mē ma Jejus wỳr mra nê kãm ijarê kê tokyx man ixwỳr tẽ nê inhmã àpênh xwỳnhnta o mex. Anê.

4-5Hãmri nhũm mē kuma nê ma hwỳr mra nê omu nê kãm:

—Pa. Na pōristi krãhtũm na awỳr mē inhmẽ pa mē mra. Mē pahkĩnhã kêp Ijaew kêt tã kãm mē pahkĩnh nê. Tãm na pre mē inhō krĩ kamã mē inhmã Tĩrtũm kapēr o mē ahkre xà hã ixkreja nhĩpêx. Tã na kãm àpênh xwỳnhnta kêp à htỳx nê nō nhũm apōx hã ajarênh ma nê man awỳr mē inhmẽ. Kwa ma hwỳr tẽ nê kãm ho mex nà? Anê.

6Hãmri nhũm mē kuma nê mē kãm:

—Tôe. Ma pu mē hwỳr. Anê.

Hãmri nê ma mē hkôt tẽ. Hãmri nê kormã òrkwỹ htêp o htêm mē nhũm axte kutã hkrãmnhwỳ hkwỳ rê nhũm mē ma kutã mra. Hãmri nê mra nê mē hkaxpa nê Jejus pumu nê kãm:

—Pa? Kwa na pōristi krãhtũmta ã awỳr karō anê. Na mē inhmã: “E kêr ka mē mra nê nhỹri Jejus kaxpa nê kãm awjarê kê ãm ata rũm kapēr pix o inhmã à xwỳnhnta o mex. Kĩnh ã ixpê Ijaew kêt jakamã ixte amnhĩ kuk ã ixpijaam tỳx. Jakamã kot paj pam hwỳr ixtêm kêt nê. Kwa kãm anê kê ata rũm kapēr pix o inhmã akupỹm ho mex. 7-8Ixpê mē hkrãhtũm jakamã na pa hte inhō pōristi mã mēmoj tã karō nhũm mē inhmar xà hkôt inhmã mēmoj tanhmã hipêx to. Na pa hte mē kãm: ‘E mē ma mra nê ã amnhĩ nhĩpêx anê.’ Anê nhũm mē inhma nê ma mrrar kurê kumrêx. Rỳ pa mē kãm: ‘E mē amnê ixwỳr mra nê ã amnhĩ nhĩpêx anê.’ Anê nhũm mē inhma nê ixwỳr mra. No kêt Jejus na hte ixrom tanhmã mē à kuteja mã kapēr nhũm kuma nê mē kêp hapøj nê ma mrrar kurê kumrêx. Jakamã koja ata rũm kapēr pix o

inhmã ho mex.” Anhÿr o awÿr karõ. Jakamã na pa mẽ akutã mra nẽ akaxpa nẽ ã amã kapër jarënh anẽ. Anẽ.

9Hãmri nhũm Jejus amnhĩ jaêr pê mẽ kapër ma nẽ hkĩnh nẽ. Hãmri nẽ hkõt mẽ kot mar o pa xwÿnhjê mã kãm:

— Kwa xà na ka mẽ ã kot ixwÿr karõ xwÿnh jamaxpër anhÿrta ã ama? Mẽ pahkĩnhã kęp Ijaew kêt tâ mẽ arom amnhĩ kaxyw inhmã hamaxpër tÿx nẽ. Aa mẽ atõ uràk nẽ ate amnhĩ kaxyw ã inhmã ajamaxpër tÿx anhÿr kêt tâ nhũm mẽ arom kãm àpênh xwÿnh kaxyw inhmã hamaxpër tÿx nẽ. Anẽ.

10Nhũm pre ã mẽ kãm kapër anẽ hãmri nhũm pòristi krãhtũm krãmnhwÿjaja kuma nẽ awjanã nẽ ma akupÿm hkrãhtũm nhõrkwÿja wÿr mra. Nhũm ra Jejus kãm àpênh xwÿnhnta akupÿm ho mex nhũm mex nẽ ri mra. Hãmri nhũm mẽ akupÿm pøj nẽ akupÿm mex ã omu.

Jejus kot akupÿm mẽhõ hkra ho htĩr ã harënh

Juãw 11.1-46

11Tã nhũm Jejus ma krĩ pê Naĩ hwÿr hkõt mẽ pa ho mẽ pa xwÿnhjê mẽrohã mõ nhũm mẽ ohtõ nẽ mẽ hkõt mra. 12Nhũm mẽ ra Naĩ hwÿr hpõx o mõ. Nẽ hwÿr agjê. Axpër kãm agjê nẽ mõ nhũm kęp mjên htyk xwÿnhja mẽ kutã tẽ. Nhũm hkra myja ham kęp ty. Kra pyxi htã kęp ty nhũm mẽ kasãw kamã kuxà nẽ kumÿ nẽ kot haxàr kaxyw o mõ nhũm katorxà mẽ hkõt mÿr o mõ. Nhũm krĩ nhõ xwÿnh kwÿjaja ma hkõt mõ. Piitã hkaprĩ nẽ hkõt mÿr o mõ. 13Tã nhũm Jejus mẽ hkwÿja mẽ mõ nẽ mẽ hkaxpa nẽ katorxà mÿr ã omu nhũm Jejus kãm hkaprĩ nẽ. Hãmri nẽ xa nẽ kãm:

— Pa? Kwa amÿr kêt nẽ. Anẽ.

14Hãmri nẽ kasãwta wÿr tẽ nẽ hã ìhkra xi nhũm mẽ kot mÿnh xwÿnhjaja omu nẽ amarĩ kãm o xa. Hãmri nhũm htyk xwÿnhnta mã kapër nẽ kãm:

— E kwa kãnhmã nhÿ. Anẽ.

15Pu nhũm kãnhmã ÿr kurê kumrêx. Nẽ kapër o nhÿ. Hãmri nhũm Jejus nita mã kãm:

— E ota akrata. Na akupÿm amã htĩr. Anẽ.

Hãmri nhũm akupÿm htĩr ã omu nẽ hkĩnh tÿx kumrêx. 16Hãmri nhũm mẽ kot omunh xwÿnhjaja amnhĩ jaêr pê akupÿm hkra htĩr kãm omu nẽ ÿ hã haxwÿja hkĩnh nẽ. Nẽ Tĩrtũm mã mex o mex ã harẽ nẽ axpën mã:

— Kwa ãm hãmri na Tĩrtũm ã mẽ panhĩpêx anẽ nẽ mẽ pahwÿr ÿ hã kapër jarënh xwÿnhnta mẽ nhũm mẽ pahwÿr mõ. Tĩrtũm mẽ pakamã ukaprĩ jakamã na ã mẽ panhĩpêx anẽ. Nà ãm hãmri na ã mẽ panhĩpêx anẽ. Anẽ.

17Hāmri nê piitã ma pikaja rŭm mē kãm harēnh o hprôt nhŭm mē piitã harēnh ma.

Juãw Paxis tee ri Jejus kukamã hamaxpēr ã harēnh

Matêwre 11.2-6, 11.22; Rukre 4.16-21

18Rôm nhŭm Juãw Paxisja kêp prês nê hkrī nhŭm hte hkôt mē pa xwŷnhjaja hwÿr mra nê kãm Jejus kot tanhmã amnhĩ nhĩpêx to ho pa hã harê. Hāmri nhŭm harēnh ma nê tee ri hkukamã hamaxpēr. Hāmri nê hkôt mē pa xwŷnh wa ho axkrut nê wa kuta 19nê Jejus wÿr wa kumê nê wa kãm:

— Kwa wa ma hwÿr tē nê hkukja. Nê kãm: “Xà ka na pre Tĩrtŭm mē ixwÿr amē nà? Nà xà kormã axtem hō na pa mē kormã amnhĩ wÿr hamār o ri ixpa?” Anê. E wa ma hwÿr tē nê ã hkukjêr anê nê tanhmã kot amnhĩ jarēnh to hã ama hāmri nê man akupÿn tē nê inhmã harê. Anê.

20-21Hāmri nhŭm wa kuma nê ma hwÿr tē. Nhŭm Jejus kormã mē ho mex o xa. Mē nohkre xwŷnhjaja nhŭm akupÿm mē no ho mex. Nê mēkarōmnuti kot mē hwÿr gjêx xwŷnhjaja nhŭm mē nê mē hapôx o ãm rãhã nhŭm wa ra hwÿr tē nê kormã hã mē omunh o xa. Hāmri nê kãm Juãw Paxis kapêr jarê. 22Hāmri nhŭm wa kuma nê wa kãm:

— Tÿ. Nã ãm hāmri na ja hã ijarê. Ixpê mē ate ixkamã ajamak o apa xwŷnhhta na pa. Jakamã e. Wa kam nê tanhmã ixte amnhĩ nhĩpêx to hã ixpumu hāmri nê ma akupÿm hwÿr tē nê aprī hã kãm ijarê. Mē nohkre xwŷnhjaja na pa akupÿm mē no ho mex. Nê mē hkànhy xwŷnhjaja pa akupÿm mē hkà ho mex. Nê mē hyk o mē pa xwŷnhjaja pa akupÿm mē ho mex. Nê mē htyk xwŷnhjaja pa akupÿm mē ho htĩr. Nê mē kêp amrakati nê ri mē pa xwŷnhjê mã mēmoj mex jarēnh o ri ixpa. Na pa hte ã mē ho mex o ri mē hkôt ixpa anê. Jakamã e kwa wa ma akupÿm hwÿr tē nê ã kãm ijarēnh anê. 23Kê ijarēnh ma nê arī amnhĩ kaxyw ixkôt hamaxpēr tÿx rãhã nê. Kojã ã amnhĩ nhĩpêx anê nê hamakêtkati nê ri pa. Nê tee ri ijarēnh kukamã hamaxpēr kêt nê. E wa tokyx ma akupÿm hwÿr tē nê ã kãm ijarēnh anê. Anê.

Jejus kot Juãw Paxis mex ã harēnh

Matêwre 11.7-19

24-25Nhŭm pre ã Jejus wa kãm amnhĩ jarēnh anê nhŭm wa kuma nê ma akupÿm Juãw Paxis wÿr tē. Hāmri nhŭm Jejus mē kot mar o kuhê xwŷnhjê mã tanhmã Juãw Paxis jarēnh to nê mē kãm:

— Na ka prem kapôt ã mar kaxyw ma hwÿr mra. Nom ê mex ã omunh kaxyw rÿ hpijaãm kãm tanhmã kapêr to hã mar kaxyw hwÿr amrar kêt nê. 26Kêp Tĩrtŭm nhÿ hã kapêr xwŷnh jakamã na ka prem mar kaxyw ma hwÿr mra. Tĩrtŭm nhÿ hã kot ixkukamã ijarēnh o pa xwŷnh na. Ixpê Tĩrtŭm kot mē akaxyw ixãm xwŷnh ã na pre mē amã ijarēnh o pa. Nê

hprĩ hã tanhmã mẽ amã ijarẽnh to. Jakamã na kapẽr mex o kot wam Tĩrtũm nhỹ hã kapẽr jarẽnh o mẽ pa xwỹnhjẽ kapẽr jakrenh. 27Tĩrtũm kapẽr ã kagà htũm kot Juãw kukamã tanhmã harẽnh to nẽ harẽnh kot:

Kot paj Ixkra hkukamã ma mẽ hwỳr harẽnh o pa xwỹnh mẽ kê
ma ri hkukamã mẽ kãm harẽnh o ri pa. Kê mẽ kuma nẽ
kutêp tãm amnhĩ nhĩpêx.

Anhỹr o Tĩrtũm Juãw Paxis kukamã harẽ nhũm mẽ hã kagà. Tã nhũm mẽ awỳr kumẽ. 28Juãwja mex kumrêx. Na pre hprĩ hã ixkukamã tanhmã ijarẽnh to ho pa. Nom ixkõt mẽ pa ho mẽ pa xwỹnhjẽ hkĩnhã ixkõt pa ho pa hkêt ãm ixkukamã ijarẽnh o pa. Jakamã ixkõt mẽ pa ho mẽ pa xwỹnhjaja na mex o kot Juãw Paxisja jakrenh. Mẽ kot ixkõt hprĩ hã inhmar o pa jakamã mẽ mex o kot hakrenh. Anẽ.

29Nhũm pre ã Jejus mẽ kãm Juãw Paxis jarẽnh anẽ. Mẽ kot Juãw mar o kuhẽ xwỹnh kwỳjaja na pre htem tanhmã amnhĩ tomnuj to ho pa. Tã Juãw kot mẽ kãm Tĩrtũm kapẽr jarẽnh ma nẽ axpẽn mã Tĩrtũm mex ã harẽ. Nẽ axpẽn mã:

— Nà ãm hãmri. Tĩrtũm kapẽr na mex kumrêx. Anẽ.

Hãmri nẽ amnhĩ tomnuj kaga nẽ Tĩrtũm kõt amnhĩ xunhwỳ. Jakamã nhũm Juãw Paxis Tĩrtũm mã mẽ hkrã kumrã.

30No nhũm Parijew nhõ xwỹnhjẽ mẽ Tĩrtũm kapẽr tũm o mẽ ahkre ho mẽ pa xwỹnhjaja jajê hkĩnhã Juãw Paxis kaga kumrêx. Jakamã nhũm mẽ hkrã kumrãr kêt nẽ. Mẽ kot Tĩrtũm kapẽr kaga jakamã na pre htem Jejus kapẽr ma nẽ ãm kuma. 31Hãmri nhũm Jejus mẽ kãm:

— E pa mẽ amã mẽ piitã htỹx ri hamaxpêr ã tanhmã mẽ harẽnh to ka mẽ kot amnhĩ nhĩpêx ã mẽ harẽnh ma. 32Te mẽ kot mẽhprĩre kot amnhĩ nhĩpêx pyrãk. Mẽhprĩrejaja na htem òrkwỳ kapem hije nẽ mẽmoj to amnhĩkati ho hkrĩ. Nẽ tee ri hkwỳjê kot amnhĩ nhĩpêx pumu nẽ mẽ kãm:

Kwa na pa mẽ amã gre htã ka mẽ ixkutã anhõkrepõx kêt nẽ. Pa
mẽ ja hã mẽ apumu nẽ hpãnhã mẽ amã mẽ htyk jarẽ htã
ka mẽ akaprĩ nẽ amỳr kêt nẽ. Kwa mẽ ri ã amnhĩ nhĩpêx
anhỹr kêt nẽ.

Anhỹr o axpẽn mã kapẽr. Tã te mẽ ate mẽ uràk. Tĩrtũm kot mẽ awỳr ã hã kapẽr xwỹnhjẽ rẽnh tã ka mẽ te mẽhprĩre kot amnhĩ nhĩpêxta pyrà nẽ mẽ ama ãm mẽ ama nẽ mẽ hkõt amnhĩ nhĩpêx kêt nẽ.

33— Juãw Paxis na pre mẽ awỳr mõ nẽ ixpyrà nẽ apkur mex o ri pa hkêt nẽ. Nẽ ixpyrà nẽ wĩhti ho hkõm kêt nẽ pa. Tã ka mẽ ja hã omu nẽ hkaga nẽ atỹx ri Satanasti nhỹ hã kot tanhmã amnhĩ nhĩpêx to ho pa hã hkamnhĩx nẽ ri harẽnh o ri apa. Hãmri nẽ mẽhprĩre kot amnhĩ nhĩpêx pyrà nẽ hkõt amnhĩ nhĩpêx kêt nẽ. 34Tã pa Juãw pãnhã mẽ awỳr mõ. Nẽ kurom apkati mẽ ixàpkur mex o ri ixpa. Nẽ kurom wĩhti hkwỳ ho ixkõm o ri ixpa. Ka mẽ ja hã ixpumu nẽ atỹx ri ixàpkur rũnh nẽ ixpipãnh o ri ixpa hã ixkamnhĩx nẽ ã axpẽn mã ixto akapêr anhỹr o ri apa. Nẽ mẽ

kot amnhĩ tomnuj xwỳnhjê hkôt ri ixpa hã axpên mã ijarênh o ri apa. Ā na ka htem axpên mã ijarênh anê. Jao te mẽ ate Juāw Paxis nhĩpêx pyrã nê ixkaga nê ixkôt amnhĩ nhĩpêx kêt nê. Na hte ã htỳx ri tanhmã mẽ hamaxpêr to ho mẽ pa xwỳnhjaja amnhĩ nhĩpêx anhỹr o ri pa.

35—No tãm ri mẽ hamaxpêr o mẽ pa xwỳnhjaja na htem ahpỳnhã Juāw mẽ wa ixte amnhĩ nhĩpêx ã wa ixpumu nê axpên mã wa ijarênh o: “Nà ahpỳnhã wa kot amnhĩ nhĩpêx tã wa hamê ãm hãmri Tirtũm nhỹ hã kapêr jarênh mex o pa. E pu mẽ wa urak nê Tirtũm kôt amnhĩ xunhwỳ.” Anhỹr o axpên mã wa ijarênh o pa. Anê.

Parijew nhõ xwỳnh pê Simāwre jarênh

Matêwre 26.6-13; Makre 14.3-9; Juāw 12.1-8

36Tã nhũm Parijew nhõ xwỳnh pê Simāwreja amnhĩ nhõrkwỹ hwỳr Jejus mẽ hkôt mẽ pa ho pa xwỳnhjê mẽ kuwỳ. Mẽ kot kutã apkur kaxyw amnhĩ wỳr mẽ kuwỳ nhũm mẽ õrkwỹ hwỳr mra nê mẽ hwỳr agjê nê apkur kaxyw hkrĩ. 37Hãmri nhũm mẽhõ nija mẽ hwỳr axà. Na pre hte amnhĩ tomnuj pix o pa. Hãmri nê Jejus õ krĩ hwỳr hpôx nê Simāwre nhõrkwỹ kamã apkur ã harênh ma nê ma hwỳr tẽ. Mẽ hkuxwaxà hã à py nê ma hwỳr o tẽ. 38Hãmri nê hwỳr axà nê Jejus pumu nê hwỳr tẽ nê pum xa. Nê tee ri tanhmã kot amnhĩ tomnuj to ho paja mã hamaxpêr nê hpijaam nê hkaprĩ nê mỳr o xa. Hãmri nê Jejus kutã hkõn krã ho tẽm nê nhỹ nê no kagô ho hpar go. Hãmri nê amnhĩ krã kĩ ho hpar grã nê kupã hãmri nê hpãnhã mẽ hkuxwa xà ho kuxwa. Kãm hkĩnh xaj ã hipêx anê. 39Hãmri nhũm Simāwre tee ri ja hã omu nê hamaxpêr o:

—Tk. Kwa jahti kot amnhĩ tomnuj pix o pa xwỳnh tã mẽ ixwỳr axà nê ã Jejus nhĩpêx anê nhũm amnhĩ nê hanor kêt nê. Kêp ãm hãmri Tirtũm nhỹ hã kapêr jarênh o pa xwỳnh ronhỹx ja hã omu nê amnhĩ nê hanor kurê kumrêx. Anê.

40Hãmri nhũm Jejus amnhĩ tã hamaxpêr ã omu nê hêx rom kãm kapêr nê kãm:

—E Simāwre. Pa amã awjarê ka inhma. Anê.

Hãmri nhũm kãm:

—Tôe. Mex. Mãmri inhma awjarê pa ama. Anê.

41Hãmri nhũm kãm:

—Nà koja mẽhõ my wa hamêxkrut. Nhũm hõja mẽhõ pê kàxpore ho rax kumrêx nê ho ipresta. Nhũm hõja ãm kêp ho grire nê ho ipresta. Hãmri nê wa hamê kàxpore ho hapêx pa. 42Hãmri nê akupỹm kot kêp ho ipresta xwỳnhhta mã hpãnhã õr kaxyw tee ri amnhĩ kukamã hamaxpêr. Ra kot ho hapêx par jakamã tee ri amnhĩ kukamã hamaxpêr. Tã nhũm kot wa kãm ho ipresta xwỳnhhta wa hwỳr tẽ nê wa kãm: “Kwa wa tee ri amnhĩ kukamã ajamaxpêr kêt nê. Na pa ra war ate ixto tewên ã kagàta kaxõnh pa nhũm ja hapêx. Kot paj axte kãm ijamaxpêr kêt nê.

Jakamã wa mãmri ajamakêtkati nê axàmnhĩx ri apa.” Anhÿr o wa kãm kapêr. ã mẽ ujarênh kot anhÿr. Anê.

Nhũm pre ã Jejus Simãwre mã ujarênh anê. Hãmri nê hã hkukja nê kãm:

—E nhÿ myja koja we kãm ho tewên xwÿnhhta kĩnh tÿx nê wehe? Anê.

43Hãmri nhũm kãm:

—Nà kot kêp ho rax nê ho ãpresta xwÿnhhta koja kãm hkĩnh tÿx o hõta jakre. Anê.

Hãmri nhũm kãm:

—Tÿ. Nà ãm hãmri na ka ã harênh anê. 44Tã mãn ka ni kot ã inhĩpêx anhÿr xwÿnhhta pumu. Na ka amnhĩ nhõrkwÿ hwÿr ixwÿ pa axà nom ka inhmã gô hkwÿ pa ho amnhĩ par kuhõnh kêt nê. Tã nhũm nija arom ã inhĩpêx anê nê no kagô ho ixpar kuhõ nê amnhĩ krã kĩ ho grã ho nhÿ.

45—Nê anhõrkwÿ hwÿr ixarta ã ka ixkahti hkõt inhmÿnh nê ixpãr kêt nê. Tã kêt nija arom xatã ixpar pãr o nhÿ. 46Nê ate orti ho ixkrã gregrer kêt tã nhũm arom mẽ hkuxwaxà ho ixpar kuxwa ho nhÿ. Mëhkukwaxà hã kãxpore xohtô htã nhũm àmnhĩx ho ixpar kuxwa ho nhÿ. 47Ãm hãmri na pa amã ja jarê. Nija kot amnhĩ tomnuj tÿx tã pa ra nê kot amnhĩ tomnuj o ãjapêx pa. Ra kot amnhĩ tomnuj tÿx xwÿnh ã amnhĩ pumunh jakamã na amnhĩ kaxyw inhmã hamaxpêr pê kãm ixkĩnh nê ã inhĩpêx anê. No ka na ka hte uràk nê amnhĩ tomnuj tÿx o apa htã uràk nê tee ri ja hã amnhĩ pumunh kêt nê. Tã nita kĩnhã ate amnhĩ tomnuj kaga hkêt jakamã na ka ãm amã ixkĩnh grire. Anê.

Nhũm pre ã Jejus Simãwre mã kapêr anê. 48-50Hãmri nê nija mã kapêr nê kãm:

—E kãnhmã xa. Ra ate amnhĩ kaxyw inhmã ajamaxpêr jakamã na pa ra ate amnhĩ tomnuj piitã amnhĩ katut kõt rênh pa. Kot paj axte kãm ãjamaxpêr kêt nê. Jakamã mãmri ma ajamakêtkati nê axàmnhĩx anhõrkwÿ hwÿr tẽ. Anê.

Hãmri nhũm mẽ kot axpên kutã apkur xwÿnhjaja tee ri kot kãm kapêr anhÿrja ã kuma nhũm ja mẽ kãm mex kêt nê. Jakamã nhũm mẽ ri axpên mã harênh o:

—Tk. Kwa mẽhõ na hte ri kot Tĩrtũm kot amnhĩ nhĩpêx pyrãk o amnhĩ nhĩpêx nê mẽ kot amnhĩ tomnuj o hapêx ã amnhĩ jarênh o we ri pahti? Anê.

Mênijê hkwÿ kot Jejus kõt pa hã mẽ harênh

Makre 15.40-41, 16.9

8 1Tã nhũm Jejus ma mẽ piitã mẽ kãm Tĩrtũm kapêr o mẽ ahkre ho ri mẽ hkõt pa. Krĩ rũnh kamã nê krĩ hkryre kamã. Mẽ kot amnhĩ tomnuj kaga nê Tĩrtũm kõt amnhĩ xunhwÿr nhũm kot amnhĩ tã mẽ

omunh nê mẽ ho hkra kaxyw nhũm ri mẽ hkôt mẽ kãm harênh o pa. Nhũm ý hã mẽ ahkre ho mẽ pa xwỳnh pê 12jaja ma hkôt ri pa. 2Nê mēni hkwỳjaja. Na pre ra Jejus mẽ hkwỳjê nê mẽkarômnuti japôj. Nê mẽ hkwỳjaja tanhmã mẽ à kute xwỳnhjaja nhũm akupỹm mẽ ho mex. Xwỳnhjaja nhũm prem haxwỳja ma hkôt ri pa. Hô pê na pre Marir Matarên nhũm pre ra Jejus nê mẽkarômnuti ho 7 nê hapôj. 3Nê Joanã. Joanã mjên Kujahti na pre kêp pahihtu Erox mã mẽ àpênh xwỳnhjê krãhtũm. Nê Sujãre. Nê kaxyw mēnijê ohtô nê Jejus kôt tanhmã mẽ ho ajuta hto ho mẽ hkôt pa. Jao mẽ hikàxpore ho mẽmoj japrô nê ho mẽ kãm mẽ õ nhĩpêx o ri mẽ hkôt pa.

Mêmo hy hkre xwỳnh

Matêwre 13.1-9; Makre 4.1-9

4Tã nhũm mẽ ra krĩ piitã rũm Jejus wỳr akuprô. Jakamã nhũm mẽ ohtô rax kumrêx nhũm Jejus mẽ kãm ujarênh o nhỹ. No ãm hprĩ hã ujarênh kêt nê. Mẽ kot Tĩrtũm kapêr mar nê tanhmã hkôt amnhĩ nhĩpêx to nhũm hã kuxi nê mẽ kãm hã ujarênh o nhỹ. 5Nê mẽ kãm:

—E mẽ inhma. Kojã mēhõ ma pur mã mō nê pur kãm mẽmo hy ho ukapêr o ri pa. Nom nhũm piitã amex kãm rôrôk kêt nê. Kwỳ ahpỹnhã nhỹri rôrôk. Hãmri nhũm hkwỳ aptỳx kãm rôrôk nhũm kuwênhre omu nê hwỳr mra nê hkrêr pa.

6—Nê kên kãm hy hkwỳ rôrôk nê higrôt kutã nojarêr nê higrôt pa. No nhũm kamã aptỳx nê kamã kêp pika hkryre jakamã nhũm higrôt nhũm hã myt apha nê arĩgro htỳx mẽ nhũm grã pa. Kamã kên nhũm amgo mex kêt jakamã nhũm grã pa.

7—Nê mrônhi kamã rôrôk xwỳnhja haxwỳja higrôt tã no nhũm utĩ kêp amýtã nhũm ô hkêt nê.

8—No hirã kamã pika mex kãm rôrôk xwỳnhja. Hãmri hirã kamã rôrôk nê higrôt mex nê piitã ô rax nê. Piitã kamã ô kêp 100. ã mẽ ujarênh kot anhỹr. E kwa mẽ ixujarênh ma nê kãm ajamaxpêr tỳx rãhã ho ri apa. Anê.

9Nhũm pre ã Jejus mẽ kãm ujarênh anê. Hãmri nhũm hkôt mẽ pa ho mẽ pa xwỳnhjaja kuma nê tee ri hkukamã hamaxpêr nê kãm:

—Kwa na pa mẽ ixprĩ hã axujarênh kôt mẽmoj pumunh kêt nê. Aprĩ hã mẽ inhmã tanhmã harênh to pa mẽ ixprĩ hã kuma nã? Anê.

10Hãmri nhũm mẽ kãm:

—Tôe. Nã kot paj mẽ amã harê. Tĩrtũm kãm mẽ ate aprĩ hã mar prãm jakamã kot paj ixprĩ hã mẽ amã harê. Mẽ kot amnhĩ tomnuj kaga nhũm Tĩrtũm kot ja hã mẽ omunh nê mẽ ho hkra. Ja na pa harê.

—No mũjjaja na mẽ akĩnhã kãm mar prãm nõkati. Jakamã na htem ixujarênh ma nê ãm kuma nê htỳx ri pa. Anê.

Jejus kot prĩ hã mēmo hy jarēnh

Matêwre 3.18-23; Makre 4.13-20

11 Hãmri nhũm Jejus hkôt mē pa ho mē pa xwỳnhjê mã:

— E kot paj ixprĩ hã mē amã mēmo hy ho ukapêr ã mē ujarēnhhta jarē ka mē inhma.

— Nã mēmo hyta te kêp Tĩrtũm kapêr pyræk. Nê ahpỳnhã hy rôrôk ã pikata te kêp ahpỳnhã mē kot Tĩrtũm kapêr mar xwỳnhjê kot amnhĩ nhĩpêx pyræk. 12 Mē kot mar xwỳnh kwỳjaja te kot aptỳx kãm hy rôrôk nhũm kuwênh kot hwỳr mrar nê hkrêr par xwỳnhhta pyræk. Jao Tĩrtũm kapêr ma nhũm Satanasti te kuwênh kot hy hkrêr parta pyrã nê mē kot amnhĩ kaxyw Tĩrtũm kapêr kôt hamaxpêr nê hkôt amnhĩ xunhwỳr pymaj tanhmã nê mē hkrã hto. Jakamã nhũm mē kapêr ma nom ho hamakêtkati tokyx anê nê axte kãm hamaxpêr nê hkôt amnhĩ nhĩpêx kêt nê.

13— Nê mē kot mar xwỳnh kwỳjaja te kot kênre kamã hkwỳ rôrôk nê higrôt nê grã par tokyx anhỳr xwỳnhhta pyræk. Jao Tĩrtũm kapêr ma nê hkĩnh nê. Nê kãm mar prãm nê. Tã nhũm mēhõ tē nê Tĩrtũm nê tanhmã kãm kapêr to nhũm mē kuma nê Tĩrtũm kaga. Te mēmo hy higrôt nê grã par tokyx anhỳrta pyræk.

14— Nê mē kot mar xwỳnh kwỳjaja te kot mrônhi kamã hkwỳ rôrôk nê higrôt nhũm mrônhi kot kêp àmnar xwỳnhhta pyræk. Jao kãm Tĩrtũm kapêr mar prãm nê. No ãm mãânēn kãm hikukrêx rax nê hikàxpore rax prãm xaj ãm ja pix mã hamaxpêr o pa. Nê gaa nê ra gryk ã axte Tĩrtũm kapêr mã hamaxpêr nê hkôt amnhĩ nhĩpêx kêt nê.

15— Nê mē kot mar xwỳnh kwỳjaja te hirã kamã pika mex kãm hy hkwỳ rôrôk nê higrôt nê ô raxta pyræk. Nê ixkapêr ma nê amnhĩ krã him hagjênh tỳx nê ixkôt ri amnhĩ nhĩpêx mex rãhã ho ri pa. Jakamã te ra mēmo hy hkreta ô rax mex pyræk. E. ã ixujarēnh kot anhỳr. Anê.

Kanê mē guhkrax wa harēnh

Makre 4.21-25

16 Nhũm Jejus arĩ mē kãm ujarēnh o nhỹ nê mē kãm:

— E mē inhma. Xà na htem kanê hpôk hãmri nê guhkrax o hpro rỳ par krak ri unhwỳ? Nã na htem ã hipêx anhỳr kêt nê. Na htem hpôk nê kỳxpê kuhê xà kamã unhwỳ nhũm hirã mex o kuhê. Nhũm htem ixkrem agjê nê hirã kamã mēmoj pumunh mex nê. Ja pyrã nê na pa hte mē ate inhmar tỳx kaxyw ixprĩ hã mē amã awjarê. 17 Kormã mē ate mēmoj pumunh nê aprĩ hã mar kêt tã kot kaj mē tokyx aprĩ hã omu nê ama. Te mēmoj kot mē apê hpimxur pyræk tã koja tokyx mē amã amnhĩ to amnhĩrit ka mē aprĩ hã omunh pa. Te mē ate kanê hpôk kãm aprĩ hã mēmoj pumunh mexta pyræk. 18 Jakamã kêr ka mē ixkapêr mar tỳx nê

hkôt ajamaxpêr rãhã ho ri apa. Jao ixkapêr piitã mar tÿx nê. Nom kot ka mẽ mar tÿx kêt nê hã ano hkêt pa nê axte kãm ajamaxpêr o apa hkêt nê. Anê.

Jejus kot tanhmã katorxà mẽ htõjê jarênh to hã harênh

Matêwre 12.46-50; Makre 3.31-35; mãânên Eprêw 2.11-12

19Nhũm Jejus arĩ mẽ ahkre ho nhỹ. Rôm nhũm katorxà nê htõjaja nhỹhÿnh hwÿr mõn pøj. No nhũm mẽ kot mẽ hã htu rax jakamã nhũm mẽ tee ri hwÿr gjêx kaxyw nê kormã kapôt ã kuhê. 20Hãmri nhũm mẽhõja mẽ omu nê Jejus mã mẽ harê nê kãm:

—Kwa Pahihti. Ota ra akatorxà mẽ atõjaja awÿr pøj nê tee ri awÿr gjêx mã. O mũj mẽ kormã kapôt ã kuhê. Anê.

21Hãmri nhũm mẽ kuma nê mẽ kãm:

—Tõe pa ixkato nê mẽ omu. Inhmã mẽ hapêê. Nom kot kaj mẽ atõ Tirtũm kapêr ma nê hkôt amnhĩ xãm nê hkôt amnhĩ nhĩpêx. Hã kot kaj te apê ixtõ rÿ ixkatorxà kot amnhĩ nhĩpêx pyrãk o pu mẽ axpên nhĩpêx. Pa te inhmã mẽ hapê pyrã nê inhmã mẽ ajapê nê. Anê.

Jejus kot kôk mã kapêr ã harênh

Matêwre 8.23-27; Makre 4.35-41

22Tã nhũm apkati hõ hã nhũm Jejus himô rax ã rêr kaxyw nojarêr nê hkôt mẽ pa ho mẽ pa xwÿnhjê mã kãm:

—E kot puj mẽ jarãhã ma xarmã mõ. Anê.

Hãmri nê mẽ pãr mã gjêx pa nê ma xarmã mõ. Garirej rũm kato nê ma xarmã pika hõ hwÿr kormã mõ. 23Nhũm ra Jejus õtxwa nê pãr kre kamã gõr nê nõ. Pu nhũm kôk àpêr tÿx nê nhũm gô axpên tak tÿx nê kãnhmã harĩ. Nê pãr kre kamã pikapír rax nhũm pãrta mẽ kãm àr o mõ nhũm mẽ tee ri amnhĩ nhĩpêx. No nhũm Jejus arĩ htÿx gõr nê nõ. 24Hãmri nhũm mẽ tee ri amnhĩ kukamã hamaxpêr nê kumra nê kãm:

—Kwa Pahihti kãnhmã nhỹ. Kot puj mẽ jarãhã pahtyk pa. Anê.

Hãmri nhũm kãnhmã nhỹ nê kôk mã kapêr nê kãm:

—E. Kwa hãmri anhĩkrê. Anê.

Hãmri nhũm hpinhkrênh par mẽ nhũm gô tãm nõr kurê kumrêx. 25Hãmri nhũm Jejus hkwyjê hwÿr apkjê nê mẽ kãm:

—Kwa kormã te mẽ ate amnhĩ kaxyw Tirtũm mẽ wa inhmã ajamaxpêr tÿx kêt pyrãk. Anê.

Hãmri nhũm mẽ amnhĩ jaêr pê kot ã amnhĩ nhĩpêx anhÿr ã omu nê no hawênh rũnh nê tee ri axpên pumunh pê hamaxpêr o kuhê nê axpên mã:

—Kokÿÿ. Jejus kêp mẽ panhĩõ hkêt. Mẽ pahtõ kot pu we te kot amnhĩ nhĩpêx pyrã nê we kôk mã pakapêr nhũm we pama anhĩkrê? Nã Jejus mẽ parom àhpumunh tÿx o àhpumunh tÿx. Jakamã na ã anê. Anê.

Jejus kot mēhō nē mēkarōmnuti kator ā harēnh

Matêwre 8.28-34; Makre 5.1-20

26Tã nhũm mē ra himô nhĩhkjê hã krĩ pê Geras wỳr rē. Himô nhĩkjê hã na pre pika pê Garirej. Nē Garirej nhĩkjê hã na Gerasja. Jakamã nhũm mē ra hwỳr rē. 27-29Hãmri nē pàr kre rũm hapôj nē api nē mra nhũm mēhō myja mē kutã tē. Na pre ra hwỳr mēkarōmnuti hkwy agjê nhũm mē y hã oprê htỳx nē hkēnh nē ri mra. Nē òrkwỳ kamã hkrĩ hkêt nē. Ām ri kapôt ā pa ho pa. Mē htykjê hã pika kamã kēn kre kaêx kôt ri pa. Na pre ra krĩ nhõ xwỳnhjaja xatã tee ri unê nē hkaxpre. Tee ri kàx o ri hkaxpre htã no nhũm amnhĩ nē rēnh pa. Nhũm mēkarōmnutija tanhmã hkrã hto nhũm kapôt pix ā ri mra. Jakamã nhũm Jejus mē pàr rũm hapôj nē api nhũm mē omu nē mē kutã tē nē Jejus kaxpa. Nhũm amnhĩ wỳr omu nē nē tanhmã mēkarōmnuti mã kapēr to. Hãmri nhũm my xoprēja hwỳr tē nē kutã hkõn krã ho tēm nē nhỹ. Hãmri nē kàxpêê amnhĩ tã kãm kapēr. Nom tãm kapēr kêt nē. Mēkarōmnuti nhỹ hã kãm kapēr nē kãm:

—Pa Tĩrtũm Kra Jejus? Kwa mo kaxyw na ka mē ixwỳr tē? Kwa tanhmã mē ixto hkêt nē. Anē.

30Hãmri nhũm mē kãm:

—Kwa tanhmã na mē anhĩxi kute? Anē.

Nhũm mē kãm:

—Nà mē ixpê Mēohtôhti. Anē.

Mēkarōmnuti ra kot hwỳr ohtô nē gjêx jakamã na prem ā kãm amnhĩ nhĩxi jarēnh anē. 31-32Hãmri nē Jejus mã:

—Kwa jahti nē mē ijapôj nē mē kot amnhĩ xà htỳx kamã hamak tũm xà hwỳr mē ixrēnh kêt nē. Hagrô hkwy mũj wỳr mãn mē ixrē pa mē hpãnhã hwỳr mãn hagiê nà? Anē.

Hagrôja kii mē kēp amỳm hixêt ā ri apkur o pa nhũm mē ā Jejus mã mē hwỳr amnhĩ to hwỳr anē. Hãmri nhũm mē kãm:

—Tôe. Tô mē tãm hwỳr mãn mra. Anē.

33Hãmri nhũm mē kuma nē myta pê hapôj nē ma hagrôja wỳr mrar kurê kumrēx nē mē kãm gjêx pa. Hãmri nhũm myja akupỳm tãm hkrã. No nhũm hagrôja mēkarōmnuti pymaj amỳra nē axkahkũm nē hprôt nē himô hã krã hixêt ā axpum rôrôk nē gôx kãm mrô nē pikaprãr pa. 34Hãmri nhũm hagrô jamãr xwỳnhjaja tee ri omu hãmri nē ma mē ò patrãw wỳr akupỳm mē piitã mē kãm harēnh o hprôt nē mra. 35-36Nhũm mē tee ri mē kuma hãmri nē ma kot Jejus pumunh mã hwỳr mra nē hkaxpa. Nē kuri myta pumu nhũm ra akupỳm tãm hkrã nē tãm amnhĩ nhĩpêx nē ê kamã mex nē nhỹ. Nhũm mē kot hã omunh xwỳnhjaja mē kãm ujarēnh pa. Nhũm mē kuma nē tee ri amnhĩ kukamã hamaxpēr o ra kãm ma nē. 37-39Hãmri nē amnhĩ nē Jejus mã kapēr nē kãm:

—E kwa mẽ tokyj ma akupỹm amrar kurê kumrêx. Anê.

Hãmri nhũm mẽ kuma nê awjanã nê ma akupỹm pâr wỳr mra nê agjê. Nhũm akupỹm mex xwỳnhhta mẽ hkôt hkrà nom nhũm Jejus kãm:

—Nà kot kaj mẽ ixkôt amõr kêt nê. Ma akupỹm anhõ krĩ hwỳr măn tẽ nê Tĩrtũm kot tanhmã akupỹm ato mex to hã mẽ kãm amnhĩ jarênh o ri mẽ hkôt apa. Anê.

Hãmri nhũm kuma nê ma akupỹm krĩm tẽ nê ri mẽ kãm Jejus kot tanhmã ho mex to hã harênh ri mẽ hkôt pa.

Jejus kot wa ho axkrut nê wa ho mex ã harênh

Matêwre 9.18-26; Makre 5.21-43

40Tã nhũm Jejus mẽ ma akupỹm xarmã mõi nê rê nê mẽ kutêp mẽ pikuprõnh xwỳnhjê pumu. Nhũm mẽ ra amnhĩ wỳr mẽ omu nê mẽ kutêp gô jakàx ã pikuprõnh rax nê. Jakamã nhũm mẽ mẽ hwỳr pøj nhũm mẽ amnhĩ wỳr Jejus pumu nê hkĩnh nê. 41-42Hãmri nhũm Jajti ma hwỳr tẽ. Ijaew nhõ Tĩrtũm kapêr o mẽ ahkre xà hã ixkre jamãr xwỳnh na pre. Nhũm pre hkra ni pyxire. Hã amgrà pê 12. Tã ra kêp à htỳx nê htyk kaxyw nê nõ. Hãmri nhũm hipêêxàja tee ri omu hãmri nê Jejus wỳr tẽ nê kutã hkõnkrã ho tẽm nê nhỹ nê ho kuwỳ nê kãm:

—Pa akupỹm mẽ ixto mex xwỳnh maati. E awỳr na pa tẽ. Na ra ixkra ixpê htyk kaxyw. Pa tee ri omu nê kaxyw amã ijamaxpêr nê awỳr tẽ. Kwa ma ixkôt inhõrkwỳ hwỳr tẽ nê inhmã omu nê tokyx inhmã ho mex nã? Anê.

Hãmri nhũm kuma nê ma hkôt tẽ. Nhũm mẽ ohtô nê wa hkôt pry hã mra nê axpên nhĩgã nê axpên kujahêk o hkôt mra. 43Hãmri nhũm mẽhõ nija haxwỳja wa hkôt tẽ. Na pre hte hkamrô hkryre rãhã ho pa hã ra amgrà kêp 12. Nhũm tõtô tee ri kot ho mex kaxyw hkane kaprỳ ho pa. 44Jakamã nhũm tee ri amnhĩ kukamã hamaxpêr hãmri nê Jejus jarênh ma nê ma mẽ hkôt hwỳr htẽm kurê kumrêx. Nom nhũm mẽ ohtô rax nê hkôt mõi jakamã nhũm mẽ hkaêx kôt hwỳr tẽ nê hkatut kôt kêp ê nhĩrê kupê. Hãmri nê ãm kêp ê pix kupênh tã akupỹm mex. 45Hãmri nhũm Jejus kot kêp ê kupênh ã amnhĩ tã omunh tã hêx rom mẽ ho hakêx nê mẽ omu nê mẽ kãm:

—Kwa mẽ atõ na ka ri amnhĩ kaxyw inhmã ajamaxpêr tỳx pẽ ixpê ixê kupê? Anê.

Hãmri nhũm mẽ piitã tee ri axpên pumu nê kãm amnhĩ tã aprã. Hãmri nhũm Simãw Pêtre kãm:

—Mẽ kot apê amnàr griã kot ka kêt ri mẽhõ kot apê hkupênh xwỳnh ã ri mẽ hkukja. Kwa măn ãm mẽhõ amarĩ apê hkupê. Anê.

46Hãmri nhũm kãm:

—Nã mẽhõja amarĩ hkupênh kêt nê. Na amnhĩ kaxyw inhmã hamaxpêr tỳx pẽ ixpê hkupê. Tã ixàhpumunh tỳx xàja kôt na akupỹm

mex. Nom ixte mēhō kot ixpê hkupênh xwÿnhja pumunh jakamã na pa ixêx rom ã amnhĩ tã ri mē hkukjêr anê. Kwa mē atō inhmã amnhĩ jarê. Anê.

47Hãmri nhũm mēhō nita kuma nê tee ri kêp kot amnhĩ to hpimxur prãm kaprÿ. Hãmri nê hpijaàm kãm hwÿr httert o tē nê kutã hkõn krã ho tēm nê nhÿ nê kãm amnhĩ jarê nê kãm:

—Ma pa na pa inhmã inhmex prãm xaj apê axê kupê. Tã na pa akupÿm inhmex. Anê.

48Hãmri nhũm Jejus kuma nê kãm:

—Tôe. Nà ra ate amnhĩ kaxyw inhmã ajamaxpêr tÿx kôt ate ã amnhĩ nhĩpêx anhÿr jakamã na ka akupÿm amex. E mãmri ajamakêtkati nê ma akupÿm tē. Anê.

Hãmri nhũm kuma nê hkĩnh nê ma akupÿm tē. 49Rôm nhũm Jajti mã àpênh xwÿnhjê hō òrkwÿ rũm ma ò patrãw kutã tē nê wa hkaxpa nê Jajti mã kãm:

—Kwa na ra apê akra ty. Jakamã mo kaxyw kot ka kêt amnhĩ kôt hwÿr Jejus o mō? Kwãr mãmri ma akupÿm tē. Anê.

50Hãmri nhũm Jejus kuma nê Jajti mã kãm:

—Kwa tee ri akra hkukamã ajamaxpêr kêt nê. Kaxyw inhmã mãn ajamaxpêr tÿx nê. Koja te ra apê htyk tã koja akupÿm amã htír. Anê.

51-53Hãmri nhũm mē mō nê òrkwÿ hwÿr pøj nê hwÿr axà nê mē omu nhũm mē ra htyk xwÿnhhta ã htu rax nê. Nê omũj ri mur. Hãmri nhũm Jejus mē hwÿr axà nê mē mÿr ã mē omu nê mē kãm:

—Kwa mē hãmri amÿr kêt nê. Na nireta mē apê htyk kêt na ãm gôr nê nō. Anê.



Rukre 8.40-42, 49-56

Hāmri nhũm ra mẽ kot htyk ã omunh mex jakamã kuma nẽ ãm kuma nẽ axtem nẽ ri axpên mã hã hpêr o axkê. Hāmri nhũm Jejus htyk xwỳnhta wỳr hitom wỳr àr kaxyw nẽ amnhĩ kôt Juãw nẽ Xiakre nẽ Pêtre nẽ kaxyw htyk xwỳnh katorxà nẽ hipêêxàja. Jajê pix na pre amnhĩ kôt mẽ ho agjê. 54Hāmri nẽ htyk xwỳnhta wỳr tẽ nẽ hpa hã kupy nẽ kãm:

—Pa? Kwa tokyx kànhmã nhỹ. Anẽ.

55Hāmri nhũm akupỹm htĩr nẽ kànhmã ãr kurê kumrêx. Hāmri nhũm Jejus mẽ kãm:

—E kwa mẽ tokyx kãm mẽmoj japêr kê kukrê. Mãn ra kãm prãm nẽ. Anẽ.

56Hāmri nhũm katorxà mẽ hipêêxà wa amnhĩ jaêr pê akupỹm htĩr kãm omu nẽ kamã no pyma ho hkĩnh tỳx nẽ. Hāmri nhũm Jejus wa kãm:

—E wa inhma. Kêr ka wa akupỹm ixte war amã ho htĩr ã ri mẽ kãm ijarênh o ri apa hkêt nẽ. ãm kwarĩ ho kwarĩ. Anẽ.

Jejus kot mẽ ho 12 nẽ ahpỹnhã mẽ rênh ã harênh

Matêwre 10.1, 10.5-15; Makre 6.7-13; Rukre 10.1-12;

mããnên Atre 13.49-50, 18.6

9 1-2Tã nhũm Jejus hkôt mẽ pa ho mẽ pa xwỳnh pê 12jê mã kapêr nẽ mẽ kãm:

—E mẽ amnẽ ixwỳr mra nẽ ixkapêr ma. Na pa ra mẽ amã ixàhpumunh tỳx xà hkwy gô. Jakamã kêr ka mẽ inhỹ hã ma ri akwỳjê hkôt tanhmã mẽ ho mex to ho ri mẽ hkôt apa. Mẽ à xwỳnhjê ho mex o ri mẽ hkôt apa. Nẽ mẽ hkwyjê nê mẽkarômnuti japôj. Nẽ mẽ piitã mẽ kãm anẽ kê mẽ tokyx Tĩrtũm kôt amnhĩ xunhwỳ kê mẽ ho hkra. 3Nom kêr ka mẽ amnhĩ kôt akukrêx ho ohtô nẽ ri ho apa hkêt nẽ. Nẽ amnhĩ kaxpar xà hã kô ho apa hkêt nẽ. Nẽ kawà htur nẽ ho apa hkêt nẽ. Nẽ amnhĩ kôt axàpkur xà hã anhô ho apa hkêt nẽ. Rỳ akàxpore rax nẽ ho apa hkêt nẽ. ãm mẽ anhô kamıs ho pixi nẽ haxà nẽ ri hã apa. Nẽ anhỹ kamã ã ri mẽ hkôt apa anẽ. Kê mẽ kot mẽ akapêr mar xwỳnhjaja tãm mãn mẽ amã mẽ anhô ho pa.

4—Nẽ kêr ka mẽ nhỹri krĩ hõ hwỳr pôj nẽ apôx xà kamã mẽhõ nhôrkwỹ kamã hkôt ri apikamênh tãmtã kurũm akupỹm ajapôj nẽ ma hpãnhã nhãm krĩ hõ hwỳr apa. Nom atỳx ri nhãm mẽ hwỳr amrar nẽ nhãm mẽ hwỳr amrar kêt nẽ.

5—Nẽ koja mẽ nhỹri mẽ akapêr kaga ka mẽ amnhĩ tã mẽ kamã ama nẽ tokyx mẽ kurũm ajapôj nẽ ma nhãm apa. Nẽ anojarêr nẽ mẽ noo mã akuhê nẽ amnhĩ par ã awjagrô kapĩ. Mẽ kot Tĩrtũm kaga hã amnhĩ pumunh nhũm Tĩrtũm kot amnhĩ pyrà nẽ mẽ hkaga hã mẽ kot omunh kaxyw ka mẽ ã mẽ noo mã amnhĩ nhĩpêx anẽ. Hāmri nẽ ma hpãnhã krĩ hõ hwỳr apa. Anẽ.

6Nhũm pre ã Jejus mẽ kãm mẽ àpênh ã karõ anê. Nhũm mẽ kuma hãmri nê hapôj nê ma mẽ hkôt pa. Ma krĩ piitã hkôt akupỹm mẽ à xwỳnhjê ho mex nê Tĩrtũm kapêr o tanhmã mẽ ahkre hto ho ri mẽ hkôt pa.

Pahi Erox tee ri kot Jejus kukamã hamaxpêr ã harênh

Matêwre 14.1-12; Makre 6.14-29

7-8Hãmri nhũm pika pê Garirej kamã mẽ piitã Jejus jarênh ma nê ahpỹnhã ri tanhmã axpên mã harênh to. Mẽ hkwỳjaja kêp finat Juãw Paxis akupỹm htĩr ã ri harê. Nhũm mẽ hkwỳjaja amnepêm mẽ hkukamã Tĩrtũm nhỹ hã kapêr jarênh xwỳnhjê hõ ra akupỹm htĩr ã harê. Nhũm mẽ hkwỳjaja kêp finat Eris ã axpên mã harê. Jakamã nhũm pahihiti Eroxa mẽ kot ahpỹnhã tanhmã ri harênh toja ma nê tee ri hkukamã hamaxpêr. 9Nê hamaxpêr o:

—Kwa mẽhõ na hte we ri ã amnhĩ nhĩpêx anhỹr o pa wehe? Nà finat Juãw Paxis kêt. Ra ixte amnepêm hã ixàmnhên nhũm mẽ kot inhmã mut krãhyr nê hpĩr kênã. Kwa mẽhõ na hte we ri ã amnhĩ nhĩpêx anê?

Anhỹr o hamaxpêr hãmri nê kãm omunh prãm nê.

Jejus kot mẽ ho ohtô nê mẽ kãm mẽ õ hã harênh

Matêwre 14.13-21; Makre 6.30-44; Juãw 6.1-14

10Tã nhũm Jejus nhỹ hã kapêr o mẽ pa xwỳnhjaja akupỹn hwỳr mran pôj nê mẽ kot ri tanhmã amnhĩ nhĩpêx to ho pa hã kãm amnhĩ jarê. Hãmri nhũm mẽ kuma nê ma krĩ pê Pesêj wỳr kormã mẽ o mõ. 11Hãmri nhũm krĩ hkwy nhõ xwỳnhjaja ra ma mẽ mõi ã mẽ harênh ma nê ohtô nê ma mẽ hkôt mra nê nhỹri mẽ hkôt pôj. Nhũm Jejus amnhĩ kôt mẽ omu hãmri nê tanhmã mẽ ho mex to ho xa. Kôt mẽ à nê mẽ pa xwỳnhjaja nhũm akupỹm mẽ ho mex. Hãmri nê Tĩrtũm kapêr o mẽ ahkre nê mẽ kãm:

—E kot kaj mẽ atõ amã amnhĩ tomnuj kaga hprãm xàj Tĩrtũm kôt amnhĩ xãm nhũm amnhĩ tã apumu nê ato hkra. Hãmri ka ajamakêtkati nê amex nê axàmnhĩx ri apa.

Anhỹr o mẽ kãm kapêr pê mẽ ahkre ho xa.

12Tã nhũm myt àr kaxyw nhũm Jejus nhỹ hã mẽ ahkre ho mẽ pa xwỳnhjê pê 12jaja hwỳr mra nê kãm:

—Kwa na ra kamàt o mõ. Mẽ hano kê mẽ amnhĩ to krĩ hõ japêr nê tokyx amnhĩm mẽmoj japrõ nê kuku nê hikwỹ nê gõi. Mo mẽ panhõ? ãm jar kapôt pix kênã. Anê.

13-14Hãmri nhũm mẽ kuma nê mẽ kãm:

—Kwa ka mẽ kamjaja mẽ kãm mẽmoj gõi kê mẽ kuku. Anê.

Nhũm mẽ ohtô rax nê mẽ hkôt mra. Memyjaja kêp 5.000 nê kaxyw mẽ hprõ nê mẽ hkrajaja. Jakamã nhũm mẽ kêp 12jaja Jejus kot ã mẽ kãm kapêr anhỹrja ma nê tee ri mẽ hkukamã hamaxpêr nê kãm:

—Kwa nà mo mẽ panhõ rax? Mẽ panhõ pãwti kêp sîk nẽ kaxyw tep grà axkrutre kênã kot kêt we mẽ piitã mẽ hipêx pa. Xà kot paj mẽ ma mra nẽ nhÿri mẽ kãm mẽ apkur xà japrõ nhũm mẽ kuku? Anẽ.

Hãmri nhũm mẽ kãm:

—Nà pu mẽ kãm mẽmoj japrõr kêt nẽ. Mẽ panhõta kot puj mẽ kãm ho anhrã. E mẽ kãm anẽ kê mẽ ahpÿnhã ri hije nẽ hkrĩ nẽ apku. Anẽ.

15Hãmri nhũm mẽ kuma nẽ mẽ kãm anẽ nhũm mẽ piitã hkrĩ pa. 16Hãmri nhũm Jejus pãwti mẽ tepta jamÿ nẽ kànhmã kaxkwa hwÿr rît nẽ kànhmã kupẽ nẽ Tirtũm mã harẽ nẽ kãm:

—Pa Papaj? Apê mẽ inhmã mẽ inhõ xwÿnh jakamã amex o amex. Anẽ.

Hãmri nẽ mẽ kãm ho hkry hpa nẽ hkõt mẽ pa ho mẽ pa xwÿnhjê mã kugõ nhũm mẽ ô ri ho xa nẽ ho mẽ hipêx par kumrêx. 17Nhũm mẽ piitã apkur mex o hkrĩ. Mẽõja mẽ kêp greire htã nhũm Jejus tanhmã mẽ kãm ho rax to nhũm mẽ ohtô rax tã piitã kuku nẽ ho õhy htu hpa. Nhũm arĩ mẽõ jakrêx prã nhũm Jejus kõt mẽ pa ho mẽ pa xwÿnhjaja akupÿm hakrêx o pikuprõnh pa nẽ ho kawà ho 12 nẽ ho nÿt pa.

Jejus kot amnhĩ tã hkõt mẽ pa xwÿnhjê kukjêr ã harênh

Matêwre 16.13-19; Makre 8.27-29

18Tã nhũm arĩgro hõ hã nhũm Jejus nhÿri ahte Tirtũm mã amnhĩ jarênh o nhÿ nhũm hkõt ri mẽ pa ho mẽ pa xwÿnhjaja ma hwÿr mra. Hãmri nhũm amnhĩ wÿr mẽ omu nẽ amnhĩ tã tanhmã mẽ hkukjêr to nẽ mẽ kãm:

—Kwa mẽ inhmã mẽmoj jarẽ. Tanhmã na htem ahpÿnhã axpên mã ijarênh to wehe? Anẽ.

19Hãmri nhũm mẽ kãm:

—Nà na htem ahpÿnhã tanhmã ajarênh to. Na hte kamã mẽ hkwyjaja ato finat Juãw Paxis ã ajarẽ. Nhũm kamã mẽ hkwyjaja ato finat Eris ã ajarẽ nhũm mẽ hkwyjaja tõtã apê Tirtũm nhÿ hã kapêr jarênh xwÿnhjê hõ ra akupÿm htir ã ajarẽ. ã na htem ahpÿnhã ajarênh anẽ. Anẽ.

20Hãmri nhũm mẽ kuma nẽ mẽ kãm:

—No mẽ kajaja? Ixpê mẽhõ hã na ka htem ixkamnhix? Anẽ.

Hãmri nhũm Simãw Pêtre kãm:

—Nà mẽ pajaja na pa htem apê Tirtũm kot mẽ ixkaxyw axãm nẽ mẽ ixwÿr amênh xwÿnh ã ajarẽ. Nẽ apê mẽ ixpiitã mẽ inhõ Pahi Maati hã ajarẽ. ã na pa htem ajarênh anẽ. Anẽ.

21Hãmri nhũm kuma nẽ mẽ kãm:

—Tỳ. Nà ãm hãmri na ka htem ã ijarēnh anē. Ā ixte anhÿr kēnā. Nom kēr ka mē inhmar kumrēx. Kēr ka mē kormā ã akwÿjê mā ijarēnh anhÿr o ri apa hkēt nē. Anē.

Jejus kot amnhĩ kukamā amnhĩ jarēnh

Matêwre 16.21; Makre 8.31-33

22Nhũm Jejus arĩ hkôt mē pa ho pa xwÿnhjê mā kapēr nē hprĩ hã tanhmā mē kām amnhĩ jarēnh to nē mē kām:

—Nà ãm hãmri na Simāw Pêtre ijarē. Mē kajaja ra mē ate ja hã ixpumunh mex. No mē pahkwÿjaja na mē akĩnhã mē kām ja hã ijarēnh mar nē ja hã ixpumunh prām kêt. Ijaew pigêtjaja nē Tirtũm kapēr tũm o mē ahkre o mē pa xwÿnhjaja nē patre krãhtũmjaja mē kām ja hã ixpumunh prām kêt. Jakamā koja mē nhÿrmā ixpynē nē ixtak rax nē. Hãmri nē ixpĩ. Nom kot paj ixtyk ã apkati axkrunēpxi nhũm Tirtũm akupÿm ixto ixtĩr. Anē.

Jejus krajaja tanhmā kot amnhĩ nhĩpêx to hã mē harēnh

Matêwre 10.31, 16.24-28; Makre 8.34-9.1; Rukre 14.25-33; Juāw 12.24-26; mǎānēn Karatas 5.24; Piripos 2.4; Wam Pêtre 4.1-2; Apokarip 2.10-12

23Nhũm pre ã Jejus amnhĩ kukamā hkôt mē pa ho mē pa xwÿnhjê mā amnhĩ jarēnh anē hãmri nē hpãnhã mē kot mar o kuhê xwÿnh piitã mē kām kapēr nē mē kām:

—E kot ka mē atõ ate ixkôt amnhĩ xãm ã amnhĩ jarē hãmri nē mǎānēn ã amnhĩ jarēnh anē nē amnhĩ jarēnh o: “Jejus kēp inhõ Pahihti jakamā kot paj kapēr kôt pix mā amnhĩ nhĩpêx rãhã ho ri ixpa. Kwār ixkwÿjaja tanhmā hã inhĩpêx to.” Anhÿr o apkati mē ã amnhĩ jarēnh anē.

24—Koja mē ixtã mē atõx pĩ rÿ tanhmā mē atõ hto ka ty. Tã koja akaxwÿnh ma inhõ krĩ mex wÿr àpir kurê kumrēx. Hãmri nē kamā atĩr tũm nē amex rãhã apa ho apa. Nom kot kaj mē jar atĩr prām xàj ixkaga hãmri nē hwÿr axàpir kêt nē.

25—Nē koja mēhõ hikukrêx rax gryk ã Tirtũm kaga. Hã koja nhÿrmā ty nē ÿ kamā kuwy hwÿr ma mō nē amnhĩ kôt hikukrêx õ hpÿr nē o mōr kêt nē. Kojã tee ri kuwy hwÿr mōr pymaj amnhĩ nē hikukrêx rax o amnhĩ pãnhã amnhĩrer prām kaprÿ.

26—Nē koja mēhõ ixte mē ahkre hã inhma nhũm ja kēp omnuj nhũm ixkaga japêr. Hã kot paj nhÿrmā akupÿn mē ato amnhĩptār kaxyw akupÿn wrÿ nē amnhĩ xwar kot ixkaga xwÿnhnta kaga. Ām hãmri na pa ã mē amã amnhĩ jarēnh anē. Kot paj nhÿrmā man akupÿn inhõ Papaj nhÿ hã ixte mē ho amnhĩptār kaxyw akupÿn wrÿ. Nhũm kapēr o mē wrÿk xwÿnhjaja man ixkôt wrÿ. Pa mē wrÿ hãmri nē mē kot ixkaga xwÿnhjaja pa amnhĩ pyrã nē mē hkaga. 27 Ām hãmri na pa ã mē amã amnhĩ jarēnh anē. Kot paj nhÿrmā akupÿn ixte mē ato amnhĩptār kaxyw

mě awỳr wrỳ. Tã kot kaj mẽ akwỳjaja kormã atĩr ri ja kukamã tanhmã ixte amnhĩ nhĩpêx to hã ixpumu. Anẽ.

Jejus kot kên prêk nhĩmõk ã hirã kamã ãm ã harênh

Matêwre 17.1-8; Makre 9.2-8; mãänën Sikũn Pêtre 1.16-18

28Tã nhũm semãnja hapêx nhũm Jejus Simãw Pêtre nẽ Xiakre nẽ Juãw wa mẽ kãm kapêr nẽ mẽ kãm:

—E pu mẽ ma hixêt prêk mũj wỳr mỗ nẽ hwỳr api nẽ himõk ã Tĩrtũm mã amnhĩ jarẽ. Anẽ.

Hãmri nẽ ma amnhĩ kôt hwỳr mẽ o mỗ nẽ hwỳr mẽ ho api. 29-32Hãmri nhũm Jejus Tĩrtũm mã amnhĩ jarênh o xa. Nom nhũm hkôt hixêt wỳr mẽ mỗr xwỳnhjaja õtxwa htỳx nẽ ra gõr nẽ hikwỳ. Pu nhũm Jejus axtem hkuk nẽ xa. Nẽ ê haka htỳx nẽ xa. Hãmri nhũm ja wa kaxkwa rũm wrỳ nẽ kuri kãm kapêr o xa. Finat Mojes mẽ finat Erisja wa kuri kãm kapêr o xa. Na pre ra amnepê m Tĩrtũm amnhĩ wỳr wa ho api. Tã nhũm wa ra akupỹn wrỳ nẽ Jejus mã kapêr o xa. Mẽ hpimràatã hirã htỳx kãm axpên mã kapêr o kuhê. Jejus kormã krĩ pê Jerujarẽ kapem mẽ kot hpĩr kêt ri nhũm wa mẽ axpên mã htyk kukamã harênh o kuhê. Nhũm wa kãm:

—Nà Tĩrtũm jamaxpêr xà hkôt kot kaj ã amnhĩ nhĩpêx anẽ.

Anhỹr o Jejus tyk kukamã kãm hamaxpêr o hihtỳx o wa xa.

Rôm nhũm mẽ õt xwỳnhjaja hkrã hapôj nẽ tee ri Jejus pumu. Nhũm mex kumrêx nẽ hirã htỳx kãm xa nhũm mẽ omu nẽ kuri wa ãm xwỳnhta wa omu. 33Hãmri nhũm Mojes mẽ Eris wa ra akupỹm nojarêt nhũm Simãw Pêtre tee ri ja hã wa omu nẽ Jejus mã kãm:

—Kwa Pahihti. Nã ãm hãmri na pu mẽ amnẽ mỗ. Kwa pu mẽ kritpê m jar axkamẽ nẽ tokyx panojarêt kêt nẽ. Pa mẽ amã pô nhĩrõnh o axkrunêpxi nẽ hipêx. Amã hõ nhĩpêx nẽ Mojes mã hõ nhĩpêx nẽ Eris mã hõ nhĩpêx ka mẽ kamã akrĩ. E kwa pa mẽ amã ho anẽ nã? Anẽ.

Nhũm amnhĩ krã hkôt ã kãm kapêr anẽ. 34Hãmri nẽ kormã kãm kapêr rôm nhũm kakrã jaka tỳxja wrỳ nẽ mẽ hkunor nhũm wa mẽ kamã kuhê. Hãmri nhũm Simãw Pêtre mẽ Juãw mẽ Xiakreja mẽ tee ri kakrã kot amnhĩ nhĩpêx ã omu nẽ kãm ma nẽ. 35Hãmri nhũm kakrã kamã Tĩrtũm mẽ kãm kapêr nẽ mẽ kãm:

—E ota Ixkra xa. Mẽ ate kamã ajamak o apa xwỳnhta na. Inhmã hapêê. Kêr ka mẽ ãm tapxipix kapêr mar tỳx o ri apa. Anẽ.

36Hãmri nhũm mẽ kuma nẽ kãnhmã rĩt nẽ ãm Jejus pix pumu nhũm ahte xa. Nhũm kuri wa ãm xwỳnhta wa ra ma akupỹm api nhũm mẽ Jejus pix pumu.

Mẽ tapxipixjaja na prem ã Jejus kot amnhĩ nhĩpêx anhỹr ã omu nom taxy kormã nhãm hkwỳjê mã harênh kêt nẽ. ãm axpên pix mã harênh pê hkukamã hamaxpêr o ri Jejus kôt pa.

Jejus kot mēhō nē mēkarōmnuti janor ā harēnh

Matêwre 17.14.21; Makre 9.14-29

37Tã nhũm apkati nhũm mē ma akupỹm ahparmã hkwỳjê hwỳr wrỳk o mō. Nē mē hwỳr hpôx o mō nhũm mē ra mē kutêp pikuprōnh rax nē kuhê. 38Hãmri nhũm mēhō myja amnhĩ wỳr mē omu nē mē kutã tē nē mē hkaxpa nē Jejus pumu nē kãm:

—Pa Jejus. Kwa ixkamã axukaprĩ nē inhmã ixkra ho mex. Ām ixpê pyxire. 39Na hte mēkarōmnuti xatã ixpê tanhmã ho nhũm ỹ hã amỹra nē mra nē rôrôk nē hakwa jamrô ho hikwỹ nhũm tokyx kãm urer kêt nē. Nhũm ra ixpê homnuj tỳx nē. 40Hãmri pa akôt mē pa ho mē pa xwỳnhjê hwỳr o tē nhũm mē kot inhmã ho mex kaxyw tee ri tanhmã ho hkaprỳ. Anê.

41Hãmri nhũm kuma nē hkôt mē pa ho pa xwỳnhjê mã kãm:

—Hêxta waa nê. Na ka mē ra ixte Tirtũm nhỹ hã mē ho mex ā ixpumunh o ixkôt apa ryy tã kormã ixpyrà nē ā mē hipêx anhỹr kêt nē. Mãn ka mē kormã mē kaxyw Tirtũm kôt ajamaxpêr tỳx kêt nē. Anê.

Hãmri nē myta mã kãm:

—E amnê ixwỳr akra ho tē pa inhno ho omu. Anê.

42Hãmri nhũm hwỳr o tē nhũm mēkarōmnuti axte kêp ho pika kura nhũm amỹra nē tēm nē nō. Hãmri nhũm Jejus omu nē nê mēkarōmnuti kator nhũm akupỹm mex nē kànhmã nhỹ. Hãmri nhũm akupỹm hipêxã mã kugô. 43Hãmri nhũm mē amnhĩ jaêr pê Jejus kot ā hipêx anhỹrja ā omu nē ri axpên mã harēnh o:

—Kokỹỹ. Hêxta waa nê. Pêr âm Tirtũmja âm àhpumunh o àhpumunh. Anê.

Jejus kot htyk kukamã amnhĩ jarēnh

Matêwre 17.22-23; Makre 9.30-32

44Hãmri nhũm Jejus hkôt mē pa ho mē pa xwỳnhjê mã kãm:

—E kot paj mē amã tanhmã amnhĩ jarēnh to ka mē inhmar tỳx nē. Na pa pre mē ate aa mēmoj pumunh kêt kwỳ ho anhỹr o ixpa pix kaxyw mē awỳr ixwỳr kêt nē. Kojã mē tokyx mē kãm ixtã amỹnê nhũm mē ixpĩ. E kwa kêr ka mē ja ma nē hã anohtỳx nē ho apa. Anê.

45Hãmri nhũm mē tee ri kot ā amnhĩ jarēnh anhỹrja ma nē axpên mã:

—Kwa mo na pêr ri ā amnhĩ jarēnh anê? Kêp mē panhō Pahi Maati hã kot amnhĩ jarēnh kênã kot kêt mēhō kupĩ.

Anhỹr o axpên mã ri harēnh o kuhê. Hãmri nē mē kãm ā kot amnhĩ jarēnh anhỹrja mar prãm kêt jakamã hprĩ hã tanhmã hã hkukjêr to hkêt nê. Ām akryk mar o kuhê.

Mê kot amnhĩ to rũnh xwỳnhjê jarênh

Matêwre 18.1-5; Makre 9.33-37; Rukre 22.24-27;

mããnêh Piripos 2.3-9; Wam Pêtre 5.5

46Tã nhũm Jejus kôt mẽ pa ho mẽ pa xwỳnhjaja tanhmã amnhĩ kukamã hamaxpêr to hãmri nê axpên mã:

—Kwa mẽ pahtô kot puj we nhỹrmã pahpê pahi nê mẽ ho amnhĩptâr rax o pahkwỳ jakre? Anê.

Hãmri nê ja hã axpên kukjêr o Jejus kôt mỗ nê axpên mã: “Nà pa.” Nhũm mẽ hkwỳja: “Nà kêt pa.” Anhỹr o hkôt mỗ. 47Hãmri nhũm Jejus mẽ kuma nê mẽ hamaxpêr kôt mẽ omu. Hãmri nê xa nê amnhĩ wỳr mễhprijê mã hpa ho apê nhũm hwỳr tẽ nê kuri xa. 48Hãmri nhũm Jejus hkôt mẽ pa ho pa xwỳnhjê mã tanhmã harênh to nê mẽ kãm:

—E mẽ inhma. Kêr ka mẽ apê pahi pyrâk o tanhmã amnhĩ jarênh to ho ri apa hkêt nê. ãm te amarĩ ri mẽ apa pyrâk o amnhĩ nhĩpêx o ri apa. Jao nhỹri mễhpriêr hỏ pumu nê kamã axukaprĩ ho kãm mẽmoj tanhmã ho rỳ kãm mẽmoj gỏ. Hãmri nê te pa ate tanhmã ixto mex to pyrâk o amnhĩ nhĩpêx. Nê kot ka mẽ atô pa tanhmã ixto mex to nê te ate Tĩrtũm tanhmã ho mex to pyrâk o amnhĩ nhĩpêx. Kot kaj mẽ ã amnhĩ nhĩpêx anhỹr o ri apa nhũm Tĩrtũm ja hã mẽ apumu nê mẽ ate amnhĩ to rũnh kêt tã nhũm tãm mẽ ate amnhĩ to rũnh xwỳnh ã mẽ ajarê. E kot kaj mẽ amã amnhĩ to rũnh prãm nê ã amnhĩ nhĩpêx anhỹr o ri apa. Anê.

Mêhỏ kot Jejus nhỹ hã tanhmã amnhĩ nhĩpêx to hã harênh

Makre 9.38-41

49Hãmri nhũm Jejus kôt mẽ pa ho pa xwỳnhjê hỏ pê Juãwja nhỹhỹnh hwỳr hpôx o tẽ nê kãm:

—Kwa Pahihti. O mũj mêhỏ kêp mẽ pahkwỳ hkêt tã anhĩxi jarênh kôt mẽ nê mẽkarỏmnuti janor o pa. Pa mẽ tee ri kot ã amnhĩ nhĩpêx anhỹr ã omu nê nê kãm ixkapêr. Kêp mẽ pahkwỳ hkêt kênã kot kêt ã mẽ hanor anhỹr o pa. Anê.

50Hãmri nhũm kuma nê kãm:

—Kwa nà ja nê tanhmã kãm nê hkêt nê. Kojã mêhỏ mẽ pahkwỳm ri tanhmã mẽ ahkre hto hkêt nê hãmri nê kêp mẽ panhĩỏỏ. Ra mẽ pahkôt kot amnhĩ nhĩpêx o pa mã kênã. Jakamã kwa mẽ ja nê tanhmã kãm akapêr to hkêt nê. Kwãr mãmrĩ ã amnhĩ nhĩpêx anhỹr o ri pa. Ja mex kênã. Anê.

Samar nhỏ xwỳnhjaja kot Jejus kaga hã mẽ harênh

Atre 8.14-15

51Hãmri nhũm Jejus akupỹm kaxkwa hwỳr àpir kaxyw ra hwỳr apkati grêre ho mỏr jakamã nhũm hamaxpêr o:

—E pa ma akupým Jerujarê hwÿr mō. Nà kot paj anê. Mě kot kamã tanhmã ixto mã tã kot paj ma akupým mẽ hwÿr mō. Anê.

52Hãmri nê amnhĩ kukamã mẽ hkwÿjê rê nhũm mẽ ma mẽ hkukamã Samar nhõ krĩ kamã nhÿri mẽ kot amnhĩm hikranh xà japêr o mō. 53Nom nhũm Samar nhõ xwÿnhjaja kêp Jerujarê nhõ xwÿnhjê hprãm nõkati jakamã Jerujarê hwÿr mōr ã mẽ harênh ma nê amnhĩ nê mẽ hkurê. 54Hãmri nhũm mẽ tee ri amnhĩ tã mẽ kuma nê awjanã nê akupým Jejus wÿr mra nê kãm mẽ harê. Hãmri nhũm Juãw mẽ Xiakre wa mẽ harênh ma nê mẽ kamã gryk nê nê Jejus mã:

—Kwa Pahihti. Nà na mẽ axtem nê amnhĩ nê mẽ pahkurê. Jakamã e kwa pu mẽ kaxkwa rùm mẽ hipy kuwy hpôk kwÿ rê kê mẽ hkaxàr pa nà? Anê.

55Hãmri nhũm wa kuma nê wa kãm:

—Tk. Kwa nà wa ajamaxpêrja mex kêt. Pu mẽ ã ri mẽ hipêx anhÿr kêt nê. Koa Tĩrtũm kãm ja ho anhÿr prãm nê rĩ tãm tanhmã mẽ ho. No mẽ papajaja pu mẽ ri mẽ kamã pagryk xàj tanhmã mẽ hipêx to hkêt nê. Pu mẽ ã mẽ hipêx anê nê ra amnhĩ tomnuj tÿx nê. Kwa wa ri ã ajamaxpêr anhÿr kêt nê. Anê.

56Hãmri nê mẽ ma Samar rùm hapôj nê hpãnhã nhãm krĩ hõ hwÿr pa.

Mě hkwÿjaja kãm Jejus kôt pa hprãm ã mẽ harênh

Matêwre 8.18-22

57Tã nhũm Jejus mẽ kormã mōr ri nhũm mēhõja hwÿr tẽ nê kãm:

—Pa Jejus? E kot paj ma akôt ixpa ho ixpa. Anê.

58Hãmri nhũm kuma nê kãm:

—Ko ka mã. Kam nê rĩ ma ixkôt ri apa ho apa. Nom kêr ka inhmar kumrêx nê rĩ kormã ixkôt apa. Na hte xore pika hkre kamã hikwÿ xà. Nê kuwênhre pĩ nhĩmök ã hikwÿ xà. No pa na Tĩrtũm kot mẽ awÿr inhmênh xwÿnh tã jajê hkĩnhã inhõrkwÿ hkêt. Na pa hte ãm nhãm krĩ hõ hwÿr ixpa nê nhãm ixpa. Tã xà kot kaj ixpyrà nê ã amnhĩ nhĩpêx anhÿr o ri apa nà? Anê.

59Nhũm pre ã kãm kapêr anê hãmri nê nhãm mēhõja wÿr apkjê nê kãm:

—Pa? No ka? Xà kot ka ma ixkôt apa ho apa nà? Anê.

Hãmri nhũm kãm:

—Tÿ no ãm kormã. Koa nhÿrmã inhĩpêêxàja tanhmã amnhĩ to nê ty mãn. Pa haxà hãmri nê rĩ kormã ma akôt ixpa ho ixpa. Anê.

60Hãmri nhũm Jejus kuma nê kãm:

—Kwa nà ri ã ajamaxpêr anhÿr kêt nê. Ma ixkôt apa ho apa kurê kumrêx. Kê mẽmoj ano kupyw rÿ inhnê apê amnàr kêt nê. Kwãr mẽ hfĩr tũm nê mẽ pa hkêt mã xwÿnhjaja mãn axwakre kamã amã anhĩpêêxà jamãr o pa nhũm nhÿrmã ty kê mẽ amã haxà. Ka mãmrĩ ma Tĩrtũm

kapēr o mẽ ahkre ho ri mẽ hkôt apa. Kê mẽ ama nẽ mẽ hkwỳjaja hkôt amnhĩ xunhwỳ nhũm mẽ ho hkra. Anẽ.

61Nhũm pre ã kãm kapēr anẽ hãmri nhũm nhãm mẽhõ myja haxwỳja hwỳr tẽ nẽ kãm:

—E. Pa kot pa ma akôt ri ixpa ho ixpa. Nom kormã. Pa ma akupỳm tẽ nẽ ixkwỳjê mã amnhĩ jarẽ nẽ tanhmã amnhĩ to hpa mãn. Hãmri nẽ mẽmo arĩgro hã rĩ kormã ma akôt ixpa ho ixpa. Anẽ.

62Hãmri nhũm tee ri kuma nẽ kãm:

—Kwa nà. Kot kaj ã ajamaxpēr anẽ hãmri nẽ ixkôt apa htã te amnhĩ katut kôt arĩt rãhã ho ri apa pyrãk o amnhĩ nhĩpêx. Kwa ã ajamaxpēr anhỳr kêt nẽ ma ixkôt apa kurê kumrêx. Anẽ.

Jejus kot mẽ hwỳr mẽ kêp 72 rênh ã harênh

Matêwre 10.1, 10.5-15; Makre 6.7-13; Rukre 9.1-6, 9.10-11;

mããnẽn Atre 13.50-51, 18.6

10 1Tã nhũm Jejus axte amnhĩ kaxyw mẽ ho 72 nẽ mẽ kurê. Hãmri nẽ mẽ ho axkrut kapên nẽ ma nhỹhỹm krĩ hkwỳ hkôt amnhĩ kukamã mẽ kurê. Mẽ kot mẽ hkôt ri Tĩrtũm kapēr o mẽ ahkre ho pa kaxyw. 2Hãmri nẽ mẽ kãm:

—Na mẽ ohtô rax nẽ kormã Tĩrtũm kapēr mar kêt nẽ. No ãm kormã mẽ ate mẽ kãm harênh o apa kaxyw mẽ agrêre. Te pur kãm harôj kamrêk pa nẽ ãm tã no ãm kaxyw hikênh xwỳnh grêre pyrãk. Jakamã kwa mẽ ho Tĩrtũm wỳ kê axte mẽ kaxyw mẽ hkwỳjê rê.

3—E kot paj ma mẽ hwỳr mẽ arê. Ma mẽ hkôt mẽ ate Tĩrtũm kapēr o mẽ ahkre ho ri apa kaxyw. Jakamã kot kaj mẽ te ate ôwêhti kot mry xoprê hwỳr amnhĩ to mrrar nhũm kot hkwỳ hpar pyrãk o amnhĩ nhĩpêx. Koja mẽ hkwỳjaja mẽ ate mẽ ahkre ma nhũm ja mẽ kêp omnuj nẽ nhũm mẽ hã tanhmã mẽ anhĩpêx to. Tã kêr ka mẽ tee ri amnhĩ kukamã ajamaxpēr nẽ amã mẽ uma hkêt nẽ.

4—Nẽ kêr ka mẽ hwỳr anojarêt nẽ amnhĩ kôt amrykã rỳ akawà rỳ aparkã hõ ho apa hkêt nẽ. ãm anhỹ kamã ma mẽ hwỳr apa. Nẽ mẽ hwỳr mra nhũm mẽ nhỹri pry hã mẽ atõ kaxpa nẽ amã kapēr o xa ka wa axpên mã akapēr ry hkêt nẽ. Anojarêt kãm kãm akapēr krãnre nẽ mẽ hakre nẽ ma krĩm apa.

5—Nẽ kêr ka mẽ hwỳr pøj nẽ nhỹri mẽ ôrkwỹ hwỳr agjê nẽ mẽ kãm: “Xà kot paj mẽ ato Tĩrtũm wỳ kê mẽ ato mex nẽ ka mẽ ajamakêtkati nẽ ri apa?” Anẽ. 6Hãmri nhũm mẽ ama nhũm ja mẽ kãm mex japêr nhũm mẽ hkĩnh nẽ amã: “Ỗ kam nẽ mãmrĩ mẽ ixto awỳ.” Anẽ. Hãmri ka mẽ ama nẽ tanhmã mẽ ho Tĩrtũm wỳr to. No koja mẽ apê ja kaga ka mẽ ho hwỳr kêt nẽ.

7—Nẽ kêr ka mẽ nhỹri mẽ ôrkwỹ kamã mẽ hwỳr pøj hãmri nẽ mẽ hkôt ri apikamênh tãmtã nẽ akupỳm mẽ kurũm ajapøj nẽ ma hpãnhã

krĩ hõ hwỳr apa. Nẽ mẽ axàmnhĩx mẽ kuri axàpkur o ri apa. Mẽmoj to akõm o ri apa. Ra mẽ ate mẽ ho mex pẽ mẽ kãm Tĩrtũm kapẽr o mẽ ahkre ho apa kẽnã. Jakamã kwãr mẽ mãmrĩ amnhĩ pãnhã mẽ amã mẽ axàpkur xà gõ ka mẽ kuri mẽ apku.

8—Nẽ kër ka mẽ nhỹri mẽ hwỳr pøj nhũm mẽ ato mex nẽ. Nẽ mẽ amã mẽmo mẽ apkur xà gõ ka mẽ mãmrĩ axàmnhĩx aku. Aa kormã mẽ ate mẽmojta kur kêt tã mãmrĩ ajamakêtkati nẽ aku. No tee ri amnhĩ kukamã tanhmã ajamxpẽr to hkêt nẽ.

9—Nẽ kër ka mẽ ã mẽ kãm akapẽr anẽ nẽ mẽ kãm: “Tĩrtũm kãm mẽ ato hkra hprãm. Na hte amnhĩ wỳr mẽ awỳ.” Anẽ hãmri nẽ akupỹm mẽ kãm mẽ à xwỳnhjê ho mex. ã kot kaj mẽ mẽ kãm amnhĩ nhĩpêx anhỳr o ri mẽ hkõt apa.

10—Nẽ kër ka mẽ nhỹri mẽ hwỳr pøj nhũm mẽ ãm mẽ apumu nẽ amnhĩ nhõrkwỹ hwỳr mẽ awỳr kêt japẽr. Hãmri ka mẽ tee ri amnhĩ tã mẽ omu hãmri nẽ ra ma nhãm apa kaxyw. 11Hãmri nẽ anojarêt nẽ mẽ kãm: “E mẽ inhma. Tĩrtũm kot mẽ pahwỳr mẽnh xwỳnhnta na mẽ awỳr wa inhmẽ pa wa mẽ awỳr mõ. Wa ixte Tĩrtũm kapẽr o mẽ ajahkre kaxyw. Kãm mẽ ato hkra hprãm nhũm wa ixte mẽ amã harẽnh kaxyw na pa pre wa ã mẽ awỳr inhmõr anẽ. Tã ka mẽ harẽnh ma nẽ wa ixkaga. Jakamã kot paj wa jar mẽ anhõ krĩ kamã amnhĩ par kà hã awjagrõ kapĩ. Mẽ ate Tĩrtũm kaga hã amnhĩ pumunh nhũm Tĩrtũm kot amnhĩ pyrã nẽ mẽ akaga hã mẽ ate omunh kaxyw kot paj wa mẽ anoo mã ã amnhĩ par kà hã awjagrõ kapĩr anẽ. Kot kaj mẽ nhỹrmã tee ri ã amnhĩ nhĩpêx anhỳrja mã ajamxpẽr nẽ akaprĩ htỳx kumrêx kãm ga. ãm hãmri na pa wa mẽ amã ja jarẽ.” Anhỳr o mẽ kãm akapẽr nẽ mẽ kệp ajapøj nẽ ma hpãnhã nhãm krĩ hõ hwỳr apa kurê kumrêx.

12—Koja nhỹrmã Tĩrtũm mẽ kot amnhĩ tomnuj mỳrapê tanhmã mẽ ho. Na pre ra ã krĩ pẽ Sotõ nhõ xwỳnhjê nhĩpêx anẽ. Na prem amnhĩ tomnuj tỳx o pa nhũm Tĩrtũm tanhmã mẽ kot amnhĩ tomnuj tỳx ã tanhmã mẽ ho. Tã jar mẽ kot kãm ixkapẽr mar prãm kêt nẽ mẽ kot ixkaga xwỳnhjaja. Koja Tĩrtũm ixtã mẽ omu nẽ kot Sotõ nhõ xwỳnhjê nhĩpêx pyrãk o mẽ hipêx nom tanhmã mẽ ho htỳx o mẽ hakre.

—E kër ka mẽ ma krĩ hkwỳ hkõt apa nẽ ã mẽ kãm akapẽr anhỳr o ri apa. Anẽ.

Mẽ kot Tĩrtũm kõt hamaxpẽr kêt xwỳnhjê jarẽnh

Matêwre 11.20-24

13-14Tã nhũm Jejus krĩ hkwỳ nhõ xwỳnhjê mã kapẽr o xa nẽ mẽ kot amnhĩ tomnuj ã mẽ kãm akir. Krĩ pẽ Korajĩ mẽ Pesêj nhõ xwỳnhjê kumrêx mã kapẽr nẽ mẽ kãm:

—E mẽ inhma. Amnepêm krĩ pẽ Sitõ mẽ Xir wa kamã mẽ pa xwỳnhjaja na prem tanhmã amnhĩ tomnuj tỳx to ho pa nhũm Tĩrtũm

mě omu nê hã mẽ homnuj tỳx nê. Tã kwa mẽ o kora Korajĩ mẽ Pesêj wa kamã mẽ apa xwỳnhjaja. Ra ixte mẽ amã mẽ ate mẽmoj pumunh kêt o anhỳr rax o ixpa htã ka mẽ omu nê arĩ amnhĩ tomnuj o ri apa nê tokyx amnhĩ tomnuj kaga hkêt nê. Jakamã kot kaj mẽ amex kêt nê. Kop apu Sitõ rỳ Xir kamã mãn ixte mẽ kãm aa mẽ kot mẽmoj pumunh kêt kwỳ ho anhỳr o ri ixpa ronhỳx mẽ omu nê mẽ arom amnhĩ kaxyw ixkôt hamaxpêr kurê kumrêx. Nê tee ri tanhmã amnhĩ tomnuj to ho pa hã amnhĩ pumu nê hkaprĩ nê ã amnhĩ nhĩpêx anhỳr kaga hpa. No mẽ kajaja na pa tee ri mẽ amã tanhmã amnhĩ nhĩpêx to ho ri ixpa kaprỳ. Ka mẽ ja hã ixpumu nê ãm ixpumu nê amnhĩ tomnuj kaga hkêt nê. Tã koja nhỹrmã Tĩrtũm mẽ piitã mẽ kot amnhĩ tomnuj mỳrapê tanhmã mẽ hipêx to. Hãmri nê tanhmã Sitõ mẽ Xir wa kamã mẽ pa xwỳnhjê jarênh to nhũm mẽ kot amnhĩ tomnuj mỳrapê amnhĩ xà htỳx kamã hamak o ri pa. No mẽ kajaja mẽ ate amnhĩ tomnuj tỳx o mẽ hakrenh jakamã koja Tĩrtũm mẽ hkĩnhã mẽ atomnuj tỳx o mẽ atomnuj tỳx. Ka mẽ amnhĩ xà htỳx kamã ajamak rãhã ho ri apa ho apa. Anê.

15Nhũm pre ã Jejus mẽ kãm kapêr anê. Hãmri nê hpãnhã Kapanau nhõ xwỳnhjê mã kapêr nê mẽ kãm:

— No mẽ apê Kapanau nhõ xwỳnhjaja. Kot kaj mẽ ajaxwỳja mẽ amex kêt nê. Mẽ ate amnhĩ tomnuj kagare pyrã nê Tĩrtũm nhõ krĩ hwỳr akra ho apa. Nom kot kaj mẽ atõ hwỳr axàpir kêt nê. Kot kaj mẽ ma kuwy maati hwỳr ajapêx pa kãm ga.

16Anhỳr o mẽ kãm kapêr hãmri nê hpãnhã hkôt mẽ pa ho mẽ pa xwỳnhjê mã kapêr nê mẽ kãm:

— Kot kaj mẽ Tĩrtũm kapêr o mẽ ahkre ho ri apa nhũm mẽhõ ama nê akapêr kôt amnhĩ nhĩpêx. Hã koja te pa kot ixkôt amnhĩ nhĩpêx pyrãk o amnhĩ nhĩpêx. No koja amar kêt nê akaga hãmri nê te pa kot inhmar kêt nê ixkaga pyrãk o amnhĩ nhĩpêx. Jao mããnên Tĩrtũm kaga.

Anê hãmri nhũm mẽ kuma hãmri nê anhgrã nê axkrut kapên nê ma ahpỹnhã krĩ hkôt anhgrã.

Mẽ hkĩnh nê ri mẽ pa xwỳnhjê jarênh

Apokarip 3.5

17Tã nhũm mẽ kêp 72jaja krĩ hkwỳ rũm akupỹn Jejus wỳr pøj. Piitã hkĩnh nê hpôx pa. Hãmri nê kãm:

— Kwa Pahihti. Na pa prem anhỹ hã mẽ nê mẽkarõmnuti japôx rax nê. Na pa prem mẽ nê mẽ hano nhũm mẽ ãm mẽ kurũm hapôx kurê kumrêx. Anê.

18Hãmri nhũm mẽ kuma nê mẽ kãm:

— Tôe. Ixàhpumunh tỳx o ixte Satanasti jakrenh jakamã na ka htem inhỹ hã mẽ hano nhũm mẽ tee ri mẽ akutã hihtỳx prãm. Hãmri nê te na

haxênh prêprêk pyrâk o amnhĩ nhĩpêx nê mẽ kurũm hapôx kurê kumrêx pa ja hã mẽ omu. 19-20 Mêkarômnuti te kot kagã xoprê rỳ te kot makre pyrâk. Tã ra ixte mẽ amã ixãhpumunh tỳx xà hkwỳ nhôr jakamã na ka prem mẽ kãm akapêr nhũm mẽ tee ri akutã tanhmã amnhĩ tỳx to hprãm. Tã koja Satanasti tee ri mẽ ate nhỹrmã Tĩrtũm mẽ wa ixri atĩr tũm nê apa pymaj tanhmã mẽ ano kupyri to kaprỳ. Ra Tĩrtũm kot ô kagã kamã mẽ atĩr tũm nê mẽ apa kaxyw mẽ anhĩxi hã kagã kênã. Jakamã kwa mẽ jam ajamaxpêr o akĩnh nê ajamakêtkati nê ri apa. No kêt mẽkarômnuti kot mẽ akapêr mar nê mẽ kurũm hapôxta ã mẽ omunh xà hkôt pix mã akĩnh nê ri apa hkêt nê. Anê.

Jeus kĩnh kãm kot Hipêêxã mã amnhĩ jarênh

Matêwre 11.25-27

21 Tã nhũm Tĩrtũm Karô tanhmã Jeus to nhũm ỹ hã hkĩnh nê xa. Hãmri nê Tĩrtũm mã kapêr nê kãm:

— Pa Papaj? Nà apê mẽ ixpiitã mẽ inhô Pahi Maati na ka. Pikap ri mẽ pa xwỳnhjaja nê kaxkwa kamã mẽ pa xwỳnhjaja apê mẽ ixpiitã mẽ inhô Pahi Maati na ka. ãm hãmri na ka hte amnhĩ nhĩpêx mex o ri apa. Na ka hte mẽ àhpumunh tỳx ã mẽ kot amnhĩ jarênh xwỳnhjê mã axàhpumunh tỳx o amnhĩrit kêt nê. ãm mẽ àhpumunh kêt ã mẽ kot amnhĩ jarênh xwỳnhjê pix mã na ka hte ja ho amnhĩrit nhũm mẽ tapxipixjaja ja hã apumu. ãm hãmri na ka hte amã hprãm xà hkôt ã mẽ piitã mẽ hipêx anhỹr o ri apa. Jakamã mẽ kot amnhĩ to hkryre xwỳnh pixjaja na htem ate amnhĩ nhĩpêx ã apumunh o pa.

22— Na ka pre inhĩhkra kamã mẽmoj piitã haxàr pa. Ixte ho amnhĩptàr o ri ixpa kaxyw. Jakamã kapxipix na ka hte ixpê akra hã ixpumunh par. No jar ri mẽ pa xwỳnhjaja na mẽ kot ja hã ixpumunh kêt. Nê mããnnên papxipix na ixte ate tanhmã amnhĩ nhĩpêx to hã apumunh par. Jakamã na pa hte ã amnhĩ nhĩpêx anê nê inhmã hprãm xà hkôt mẽ hkwỳjê mã ato amnhĩrit o ri ixpa nhũm mẽ ixpyrà nê ate tanhmã amnhĩ nhĩpêx to ho apa hkôt apumu. Anê.

Jeus kôt mẽ pa xwỳnhjaja kot hkôt omunh o pa hã mẽ harênh

Matêwre 13.16-17

23-24 Nhũm pre Jeus ã Tĩrtũm mã amnhĩ jarênh anê hãmri nê hpãnhã hkôt mẽ pa ho mẽ pa xwỳnhjê mã kapêr nê mẽ kãm:

— E na ka htem ixkôt mẽ ano ho ixte tanhmã amnhĩ nhĩpêx to hã ixpumunh o ri apa. Nê mẽ ajamak o ixkapêr mar o ri ixkôt apa. No amnepêm mẽ akukamã pahijaja nê Tĩrtũm nhỹ hã kapêr jarênh o ri mẽ pa xwỳnhjaja kãm ixpumunh prãm tỳx o pa htã mẽ akĩnhã ixpumunh kêt rãhã htyk pa. Kormã ixwrỳk nê jar ixkator kêt jakamã na prem

ixpumunh kêt rāhā ty. Nē mẽ kām ixkapēr mar prām tã mẽ akīnhā ixkapēr mar kêt nē. Ām mẽ kapxipixjaja na ka mẽ mỳr pē ixte amnhĩ nhĩpêx ā ixpumunh nē ixkapēr mar o ixkôt apa. Tã mẽ kurom mẽ ate ano ho ixpumunh nē ajamak o ixkapēr mar jakamã kwa mẽ ja hã amnhĩ pumu nē tãm amnhĩ nhĩpêx o akīnh nē ri apa. Anē.

Samar nhõ xwỳnh jarēnh

Matêwre 22.34-40; Makre 12.28-34; mǎānēn Wam Juāw 3.17-18

25Tã nhũm Tĩrtũm kapēr tũm o mẽ ahkre o mẽ pa xwỳnhja Jejus wỳr tē nē hêx rom kot kamã hamak kaxyw kām:

— Pa? E kwa inhmã mẽmoj jarē. Tanhmã kot paj we nhỹrmã Tĩrtũm ri ixtĩr tũm nē ixpa kaxyw amnhĩ nhĩpêx to wehe? Anē.

26Hāmri nhũm kām:

— Tanhmã na ka hte Tĩrtũm kapēr ā kagà htũm kot mẽ htĩr tũm nē pa hã kagà kamã harēnh nē mar to? Anē.

27Hāmri nhũm kām:

— Nà harēnh kot:

Kêr ka mẽ anhĩ piitã ho amã Tĩrtũm kīnh o ri apa. Mẽ amã hkīnh tỳx o mẽmoj piitã hakrenh par o ri apa.

Nē kêr ka mẽ amã mẽ piitã hã ma ho te ka amã amnhĩ tã ma pyrāk o mẽ hipêx o ri apa. Jao tãm mẽ hipêx o ri apa. Anē.

Ā Tĩrtũm kapēr ā kagà htũm kamã ja jarēnh kot anhỹr. Anē.

28Hāmri nhũm Jejus kuma nē kām:

— Tỳ. Nà am hāmri na ka harē. Kot kaj ā mẽ hipêx anhỹr o ri apa nē nhỹrmã Tĩrtũm mẽ wa ixri atĩr tũm nē apa ho apa. Anē.

29Hāmri nhũm kuma nom kām mẽ piitã mẽ ho mex prām kêt nē. Ām amnhĩ kwỳ pixjaja nhũm kām mẽ ho mex o pa hprām. Jakamã hêx rom kām:

— Kwa no mẽmojaja kot pa we ri ā mẽ hipêx anhỹr o ri ixpa? Xà mẽ pahkwỳ pē Ijaew pixjaja nà? Anē.

30Hāmri nhũm kuma nē tanhmã kām ujarēnh to. Nom hã kuxi nē kām awjarē nē kām:

— E pa amã awjarē ka inhma. Koja Ijaew nhõ xwỳnhja ma Jerujarē rũm Jeriko hwỳr ahpar mã ma mō. Mōo nhũm ra mẽ ahkīnh xwỳnhjaja kutã mra. Hāmri nē pry kahti ri hwỳr kato nē unê nē htak rax nē. Nē kêp ê hkwrỳnh pa nē ma kurũm hprôt nē mra nē akunok nhũm mẽ kot htak o hkà rēnh rāhā ra htyk kaxyw nē nō. 31Hāmri nhũm patreja tē nē omu. No am omunh o hãnh tē nē hkupu nē ma tē. Urāk nē kêp Ijaew tã am omu nē tanhmã ho ajuta hto hkêt nē hãnh omunh o tē nē hkupu nē ma tē. 32Hāmri nhũm patre ho ajuta xwỳnhja mǎānēn tē. Nē patre pyrā nē omu nē am omu nē hkupu nē ma tē. Urāk nē kêp Ijaew tã omu nē am omu nē hkupu nē ma tē.

33—Tã nhũm Samar nhõ xwỳnhja mãänën mõ. Samar nhõ xwỳnhjê mẽ Ijaew na prem kãm axpën kính kêt tã nhũm mõ nê omu nê kamã ukapří nê. Kêp Ijaew ã omunh tã tee ri omu nê kamã ukapří nê. 34Hãmri nê hwỳr tẽ nê omu nê kãm mẽ kot htak o hkà rênh xà kane nê kãm hkupu pa. Hãmri nê kànhmã ãm nê hkrit jumênre hã kumê nê ma nhỹri mẽ kot amnhĩm hikranh xà hã ixkre hwỳr o mõ nê hwỳr o pôj. Hãmri nê omunh mex o apkati. 35Hãmri nê akupỹm nojarêt nê kàxpore hwỳ jamỳ nê o tẽ nê kot mẽ kãm õ xwỳnhja mã kugõ nê kãm: “E kot paj hãmri ma mõ. Ota ixkàxporeta. Kêr ka inhmã ã xwỳnhta tânopxar mex nê. Nê inhmã omunh mex kê akupỹm mex. Kojã kàxporeja apê grire hã kot paj nhỹrmã akupỹn mõ nê axte hkôt amã hwỳ gõ.” Anhỹr o kãm kapër nê ma akupỹm mõ. ã mẽ ujarênh kot anhỹr. Anê.

36Nhũm pre ã Jejus kãm ujarênh anê. Hãmri nê kãm:

—E nhỹ na pre kãm mẽ kot htak xwỳnhta kaprí ho te tãm kãm amnhĩ tã ma pyræk wehe? Anê.

Hãmri nhũm Tĩrtũm kapër tũm o mẽ ahkre xwỳnhta kãm:

—Nà kot kamã ukapří xwỳnhta na pre omu nê kamã ukapří nê ho mex o te tãm kãm amnhĩ tã ma pyræk o hipêx. Anê.

37Hãmri nhũm Jejus kãm:

—Tỳ. Nà ãm hãmri na ka harê. Uræk nê kêp Ijaew kêt tã kamã ukapří nê ho mex nê. Tã kêr ka uræk nê ã mẽ piitã mẽ hipêx anhỹr o ri apa. Uræk nê mẽ kêp akwỳ hkêt tã mẽ kamã axukapří ho ri apa. Anê.

Jejus kot Matre mẽ Marir wa hwỳr mõi ã harênh

Rukre 12.29-31

38Tã nhũm Jejus krĩ rũm kato hãmri nê hkôt mẽ pa ho mẽ pa xwỳnhjê mẽ mẽ ma nhãm krĩ hõ hwỳr mõ. Mõi nê hwỳr pôj. Hãmri nhũm Matre mẽ omu nê amnhĩ nhõrkwỹ hwỳr mẽ kuwỳ nhũm mẽ ma hwỳr mõ nê õrkwỹ hwỳr pôj. 39Hãmri nhũm Jejus mẽ ahkre ho nhỹ nhũm Matre htõx Marirja arĩ hpar pê mar o nhỹ. 40Hãmri nhũm Matre mẽ hwỳr axà nê omu. Nê tee ri àpênh rax kukamã hamaxpër nê Jejus wỳr tẽ nê kãm:

—Xê ma Pahihti. Kormã ixàpênh rax tã nhũm Marir ixto ajuta hkêt nê. ãm akapër pix mar gryk ã ixkôt htêm nê ixto ajuta hkêt nê. Pa ahte mẽ panhõ hã ixàpênh o xa. Xà amã ja mex? Xê kãm anê kê tokyx ixkôt tẽ pa wa hã axkrut nê mẽ panhõ hã ixàpênh tokyx anê. Anê.

41Hãmri nhũm tee ri kuma nê kãm:

—Kwa Matre. Na ka ãm mẽ panhõ pix kukamã ri ajamaxpër nê gryk ã tee ri amnhĩ nhĩpêx. 42Ãm hãmri na Marir kãm ixkapër mar prãm nê. Jakamã kot paj ri amnhĩ nê akôt hanor kêt nê. Anê.

Mê pahte tanhmã Tĩrtũm mã amnhĩ jarẽnh to hã mẽ pamã karõ

Matêwre 6.9-13, 7.7-11

11 ¹Tã nhũm apkati hõ hã nhũm Jejus nhỹri Tĩrtũm mã amnhĩ jarẽnh o nhỹ. Nẽ kãm amnhĩ jarẽnh pa nhũm hkõt mẽ pa ho mẽ pa xwỳnhjaja kot kãm amnhĩ jarẽnh ã omu nẽ hwỳr mra nẽ kãm:

—Kwa Pahihti. Amnhĩ pyrã nẽ mẽ ixte Tĩrtũm mã amnhĩ jarẽnh kaxyw tanhmã mẽ ijahkre hto. Kêr pa mẽ apyrã nẽ tanhmã kãm amnhĩ jarẽnh to ho ri ixpa. Na pre finat Juãw Paxisja hkõt mẽ pa ho mẽ pa xwỳnhjê mã ja jahkre nhũm mẽ kuma nẽ tãm kãm amnhĩ jarẽ. E kwa mẽ inhmã tanhmã ja jahkre hto nã? Anẽ.

2Hãmri nhũm mẽ kãm:

—Tõe. Nã kêr ka mẽ kãm amnhĩ jarẽnh kaxyw nẽ mãmrĩ amnhĩ krã hkõt tanhmã kãm amnhĩ jarẽnh to. Rỳ kãm amnhĩ jarẽnh o:

Pa Měinhĩpêêxã maati? Nã amex o amex Tĩrtũm.

Apê mẽ ijamãr mex xwỳnh maati na ka.

3 Nẽ kwa kêr ka apkati mẽ mẽ inhmã mẽmo gõ pa mẽ akukwak ri ho ixàpkur o ri ixpa.

4 Nẽ na pa hte tõiã amnhĩ tomnuj nẽ Tĩrtũm. Nom mẽ kot tanhmã ixtomnuj to xwỳnhjaja na pa hte ãm mẽ omu nẽ amnhĩ tã tanhmã mẽ ho hkêt nẽ. Nẽ ja ho ijamakêtkati kurê kumrêx. ã na pa hte amnhĩ nhĩpêx anhỹr o ri ixpa.

Jakamã kwa kêr ka ja hã ixpumu nẽ ixpyrã nẽ ixte tanhmã amnhĩ tomnuj to hã ixpumu nẽ hã tanhmã ixto hkêt nẽ. ãm ho ajamakêtkati kurê kumrêx nẽ axte kãm ajamexpêr kêt nẽ.

Nẽ kot paj tanhmã amnhĩ tomnuj to kaxyw japêr ka ja hã ixpumu nẽ ixte ã amnhĩ nhĩpêx anhỹrja nẽ ixto htỳx nẽ pa ja ho anhỹr kêt nẽ.

E ãm ja pix na hapêx. Anẽ.

E kêr ka mẽ ã Tĩrtũm mã amnhĩ jarẽnh anhỹr o ri apa. Anẽ.

Mẽ pahte amnhĩ to Tĩrtũm wỳr rãhã hã mẽ pamã karõ

Matêwre 7.7, 15.21-28; Makre 11.24; Rukre 18.1-8; Juãw 14.13-14; mããnẽn Rõmãn 12.12; Epes 6.18; Wam Tesarõn 5.17-18

5-6Nhũm Jejus arĩ hkõt mẽ pa ho pa xwỳnhjê jahkre ho nhỹ nẽ mẽ kãm:

—Nẽ ja. Koja mẽ akràmnhwỳjê hõ. Nhũm kõt ã kamàt nhũm nhỹhỹnh awỳr mõn põi. Ka anhõ mẽmoj kêt hãmri nẽ anhĩjuk ri akràmnhwỳ hwỳr tẽ. Hãmri nhũm ra amnhĩ tã kahê nẽ nõ. Ka tee ri omu hãmri nẽ hakwa krem xa nẽ kãm akapêr nẽ kãm: “Pa ixkràmnhwỳ. Na ka mẽ ra gõr? Kwa kãnhmã nhỹ nẽ inhmã anhõ mẽmoj japêr. Na ra ham

ixkràmnhwÿta mōn pōj. Nē kām prām tÿx nē mō nom kaxyw inhō hkêt. Kwa kànhmā nhÿ nē inhmā anhō mēmoj japêr nē inhmā hkwy pa ma o tē kē kukrē. Ām inhō hkêt kumrēx. Ām hāmri na pa amā amnhī jarē. Kwa tokyj kànhmā nhÿ nē inhmā mēmoj japêr nà?” Anhÿr o kām akapêr. 7Hāmri nhūm ama nom kām kànhmā ÿr prām kêt nē. Nē amā: “Tk. Nà ra mē ixte amnhī tā kahē hpar nē inhīkwÿ kēnā kot pa kêt kànhmā nhÿ nē amā mēmoj japêr.” Anē. 8Ka tee ri ama nē xatā kām: “Kwa ā inhīpêx anhÿr kêt nē ixkràmnhwÿ. Kwa tokyx.” Anhÿr o xa. Nē xatā kām anojarêt o xa. Hāmri nhūm ra kām amar kaga hāmri nē tā kànhmā nhÿ nē amā ate ho presija xwÿnhta gō. No ām kēp akràmnhwÿ hā ate hā axàhwÿr tipxi hā amā òr kêt nē. Ām xatā ate ho presija htÿx xwÿnhja mā hamaxpêr nē tā kànhmā nhÿ nē amā kugō. Ā mē ujarēnh kot anhÿr.

9-10—Tā kēr ka mē ja pyrā nē amnhī to Tirtūm wÿr rāhā ho ri apa nhūm ama nē ate mēmoj tā hwÿrta amā kugō. Ām xatā ate hā axàhwÿr o ri apa nhūm amā kugō. Ām mēmoj to hwÿr rāhā ho ri apa nhūm ama hāmri nē amā mēmoj tanhmā hipêx to. Te ho mēhō kām tep xành nē gōx kām xatā tep rēnh xà rēnh o ām pyrā nē xatā mēmoj tā hwÿr o ri apa. Hāmri nhūm ama nē amā hprām xwÿnhta gō. Te ho tep kanhêr xwÿnhta tā kot tep ò kanhêr pyrāk o anhīpêx nē amā mēmoj prām xwÿnhta gō. Anē.

Tirtūm kot hkrajê mā mēmoj mex nhōr ā harēnh

Makre 7.9-11

11Nhūm Jejus arī hkôt mē pa ho mē pa xwÿnhjê jahkre nē mē kām: —Nē xà koja akra kām tep xành nē hā awÿ ka ama nē axtem nē kām kagā xoprê hō py nē agō? 12Rÿ nhūm krāhyre gre hā awÿ ka axtem nē kām makre hō py nē agō? Nà na ka htem ā akrajê nhīpêx anhÿr kêt nē. Na ka htem mē kot mēmoj tā àhwÿr xà hkôt kām mēmoj gō. 13Mē kamjaja mē ate amnhī tomnuj o ri apa htā ka htem akrajê ho mex o ri apa. Tā kaxkwa kamā Tirtūmja na hte mē pahto mex o mē ate mē akrajê ho mexta jakrenh. Kām mē pajapê htÿx kôt na hte mē pamā mēmoj mex nhōr o pa. Nē mǎānēn amnhī Karōja na hte mē pamā kugō. Jakamā kot kaj mē atō Karō hā awÿ nhūm ama nē awÿr kumē nhūm wrÿ nē akarō mā axà. Ā na hte Tirtūm kām mē pajapê xàj mē pamā mēmoj mex nhōr o pa anē. Anē.

Jejus mē Satanasti wa harēnh

Matêwre 12.22-32; Makre 3.20-30

14Tā nhūm Jejus nhÿri axte mēhō nē mēkarōmnuti kator. Na pre ra mēkarōmnuti tanhmā ho nhūm kapêr kêt nē pa. Hāmri nhūm Jejus omu nē nē kator nhūm akupÿm kapêr mex nē. Nhūm mē piitā amnhī jaêr pē

omu nê no hawênh rûnh nê omunh o kuhê. 15Nom nhûm mẽ hkwỳjaja Jejus kot ã hipêx anhÿr ã omu nê htÿx ho kêp mẽkarômnuti hkwỳ há hkamnhÿx nê axpên mã harênh o:

—Tk pêr hinhu nhĩkôôti nhÿ há na hte mẽ nê amnhĩ kwỳjê japôx o pa. Anê.

Hinhu nhĩkôôti nhĩxi hõ pê Satanasti nhûm prem Satanasti nhÿ há Jejus kot ã amnhĩ nhĩpêx anhÿr o pa há hkamnhÿx. 16Jakamã nhûm mẽ hkwỳjaja hwÿr mra nê kãm:

—Kwa mẽ inhmã aa mẽ ixte mẽmoj pumunh kêt ô ho anê. Pa mẽ omu nê ate Tĩrtũm nhÿ há tanhmã amnhĩ nhĩpêx to ho apa há apumunh kurê kumrêx. Anê.

Nom hêx rom mẽ kot kamã hamak kaxyw ã kãm kapêr anê. 17Nhûm ra Jejus mẽ hamaxpêr kôt mẽ omunh mex jakamã mẽ kapêr ma nê mẽ kãm:

—Kwa mẽ inhma mẽ ate ixpê Satanasti hkwỳ há ixkamnhÿx xwÿnhjaja. Koja pika nhõ xwÿnhjaja axpên kutã amnhĩ xunhwÿ nê axpu hãmri nê angrã nê ma ahpÿnhã ri pa. Hãmri nê amnhĩ krã hkôt ri tanhmã amnhĩ to ho ri pa. Jakamã nhûm mẽ ô pahi mẽ hamãr o pa hkêt nê. Rÿ koja krĩ nhõ xwÿnhjaja. Mẽ kot axpên to hkwỳ xwÿnhjaja mẽmoj tã axpên kãm gryk nê axpên kutã amnhĩ xunhwÿ hãmri nê axpên pê angrã nê ahpÿnhã pa hãmri nhûm mẽ ô pahi tee ri kãm mẽ hamãr o pa hprãm. Mo ô krĩ kamã mẽ hkwỳ kot ri mẽ hamãr o pa? No na pre mẽ ô pahi tãm amnhĩ nê mẽ hanor kêt nê.

18—Tã ja pyrã nê ixte Satanasti nhÿ há tanhmã amnhĩ nhĩpêx to ho ixpa ronhÿx pa mẽ nê amnhĩ kwỳjê janor o ri ixpa hkêt nê. Nhÿx Satanasti ixte mẽ nê mẽ hanor kaxyw tanhmã inhmã nê hkêt nê.

19—No kêt mẽ akwỳjaja? Xà Satanasti nhÿ há na htem mẽ nê mẽ hapôx o pa nã? Kêp apu pa ixte ÿ há mẽ nê mẽ hapôx ronhÿx mẽ akwỳjaja ixpyrã nê ÿ há mẽ nê mẽ hapôx o pa. Nã Tĩrtũm nhÿ há mẽ ixte mẽ nê mẽ hapôx o mẽ ixpa kênã. Jakamã ã mẽ ate ijarênh anhÿr o apaja mex kêt. 20Tĩrtũm Karõ nhÿ há ixte mẽ nê mẽ hapôx o ri ixpa kênã. Jakamã kwa mẽ ja há ixpumu nê Tĩrtũm kot ixte mẽ ato amnhĩptãr kaxyw mẽ awÿr inhmênh kôt ixpumunh kurê kumrêx kêt wehe. Pa na ka htem ixkamã ajamak o apa.

21-22—Satanastija àhpumunh tÿx jakamã na htem tee ri kêp mẽ kot hkôt amnhĩ xunhwÿr xwÿnhjê pytãr kaxyw nhûm mẽ nê mẽ omunh mex nê. Nom ixàhpumunh tÿx o ixte Satanasti jakrenh jakamã pa na pa hte kêp mẽ utã nhûm mẽ hpãnhã ixkôt ri amnhĩ nhĩpêx.

23—Mẽ amã ixkapêr mar prãm tã na ka mẽ kormã ixkôt amnhĩ xunhwÿr kêt nê. Kwa wem ma amnhĩ to amõr gri nê tokyx ixkôt amnhĩ xunhwÿ kêt wehe. Kot kaj mẽ anhÿr kêt nê hãmri nê te mẽ ate ixkutã amnhĩ xunhwÿr xwÿnh pyrãk o amnhĩ nhĩpêx. 24Mẽ ate ixkôt amnhĩ

xunhwÿr kêt xwÿnhjaja te mẽ ate mẽhõ nê mẽkarõmnuti japõx xwÿnh pyræk. Nhũm te kêp kator nê ma mõ nê nhÿri amgrà kamã ri pa. Nhũm ja kêp omnuj nhũm tee ri kamã nhÿri hkõkõt xà japêr o pa. Nom tee ri hapêr o pa nê hamaxpêr o: “E kot paj ma akupÿm mẽ kot nê ixkator xwÿnhhta wÿr tẽ nê hwÿr axà nê hkõt mãn ixpa.” Anê. **25**Hãmri nê ma akupÿm hwÿr tẽ. Nom kormã akupÿm hwÿr àr kêt ri nhũm kamã amrakati nê pa. **26**Jakamã nhũm ma akupÿm hwÿr tẽn axà. Nom ahte àr kêt nê. Ra amnhĩ kõt amnhĩ kwÿjê ho 7 nê hwÿr mẽ ho agjê. Nê hwÿr gjêx pa. Mẽ kêp 7jaja nê wamta mẽ nhũm mẽ piitã hwÿr gjêx pa. No mẽ kêp 7jaja omnuj tÿx o kot wamta jakrenh jakamã nhũm mẽ kot hwÿr gjêx xwÿnhhta mẽ ÿ hã amnhĩ tomnuj tÿx o pa. Oprê htÿx nê. Wam pyxire nê kot hwÿr àr nhÿ hã amnhĩ tomnuj o ri pa nom ãm kawax pê oprê. Tã axte hwÿr mẽ ohtõ nê gjêxta nhÿ hã oprê htÿx kumrêx. Ja pyrà nê kot kaj mẽ tokyx ixkõt amnhĩ xunhwÿr kêt nê hãmri nê ãm amnhĩ tomnuj tÿx pix o ri apa. Anê.

Mẽ hkĩnh nê mẽ pa xwÿnhjê jarênh

Rukre 8.19-21

27Nhũm pre ã Jejus mẽ ahkre anê nhũm mẽhõ nija kuma nê kãm:
—Hêxta gàu nê. Mãn akatorxà ã ate amnhĩ nhĩpêx anhÿr o apa hã apumu nê hkĩnh nê. Anê.

28Hãmri nhũm kãm:

—Tÿ. Nà kot anhÿr kênã. Nom kot ka mẽ atõ Tĩrtũm kapêr ma nê hkõt amnhĩ nhĩpêx hãmri nê akĩnh rax o ixkatorxà kot ixpumunh nê hkĩnhhta jakre. Anê.

Jejus kot tanhmã Jõhti jarênh to

Matêwre 12.38-42; Makre 8.12

29Tã nhũm mẽ ohtõ nê Jejus ã akuprõ nê mẽmoj tã kuwÿ nê kãm:
—Pa. Kwa mẽ inhmã aa mẽ ixte mẽmoj pumunh kêt õ ho anê pa mẽ omu. Anê.

Hãmri nhũm mẽ kuma nê mẽ kãm:

—Tk. Kwa mẽ ajamaxpêr punuj pix o na ka htem ri ajamaxpêr o apa. Ixpê Tĩrtũm kot mẽ awÿr inhmênh xwÿnh tã ka mẽ ja hã ixkõt ajamaxpêr kêt nê. Tã mẽ ate aa mẽmoj pumunh kêt kwÿ ixte mẽ amã ho anhÿr kaxyw hã inhmã karõ. Nà kot paj kormã mẽ amã ho anhÿr kêt nê. Kot paj nhÿrmã te amnepê m finat Jõhti kot amnhĩ nhĩpêx pyræk o amnhĩ nhĩpêx ka mẽ hã ijarênh ma nê kormã ja hã ixpumu. **30**Tĩrtũm nhÿ hã kapêr xwÿnh pê Jõhtija amnepê m na pre tep rax kukrê. Tã nom nhũm htĩr rãhã õxàhkre rũm kato nhũm mẽ omu nê Tĩrtũm kot mẽ hwÿr mẽnh ã omu. Tã kot paj nhÿrmã Jõhti pyrà nê tanhmã amnhĩ nhĩpêx to nhũm mẽ ja hã ixpumu nê Tĩrtũm kot mẽ awÿr inhmênh xwÿnh ã ixpumunh kurê kumrêx.

31—Ně koja nhỹrmã Tĩrtũm akupỹm mẽ htyk ně mẽ hikwỹ xwỹnh piitã akupỹm mẽ ho htĩr hãmri nhũm mẽ piitã Inhĩpêêxã mẽ wa ixkutã hkrĩ. Pa wa mẽ piitã tanhmã mẽ harẽnh to. Tĩrtũm mẽ wa ixkuri mẽ htĩr tũm ně mẽ pa ho mẽ pa mã xwỹnh ã mẽ hkwyjê jarẽ. Ně wa ixkuri mẽ pa ho mẽ pa hkêt xwỹnhjê jarẽ. Mẽ piitã ã mẽ harẽnh anẽ. Amarĩ mẽ pa xwỹnhjaja ně mẽ õ pahijaja. Hãmri nhũm sur kãm mẽ õ pahi niti Tĩrtũm mã tanhmã amnhĩ jarẽnh to hãmri ně hpãnhã tanhmã mẽ ajarẽnh to ně kãm mẽ ajarẽnh o: “Na pa pre inhmã pahi Sarumãw kot anhỹ hã àhpumunh tỳx ã harẽnh ma hãmri ně inhmã mar prãm xàj ma awry hã õ pika hwỳr ixpa ně omu ně kapěr ma. Hãmri ně ma akupỹm inhõ pika hwỳr ixpa ně ixkwỹjê mã àhpumunh tỳx ã harẽnh o ixpa. Tã Akra Jejus na àhpumunh tỳx o pahi Sarumãw jakrenh tã or war akutã mẽ hkrĩ xwỹnh kwỹ mũj na prem kapěr ma no ãm ixkĩnhã kãm mar prãm kêt ně. Na prem kuma ně ãm kuma.” Anhỹr o wa inhmã mẽ ajarẽ. Hãmri ně ja hã mẽ amã akir ka mẽ tee ri mar o akrĩ ně amnhĩ kamã agryk o akrĩ.

32—Hãmri nhũm hpãnhã Nĩnĩwe nhõ xwỹnhjaja wa inhmã tanhmã amnhĩ jarẽnh to. Jõhti kot mẽ hwỳr mõi mẽ mẽ kãm Tĩrtũm kapěr jarẽnh o pa xwỹnhjaja nhũm mẽ tanhmã wa inhmã amnhĩ jarẽnh to. Hãmri ně pahi nita pyrã ně wa inhmã tanhmã mẽ ajarẽnh to ně wa inhmã: “Na pre Jõhti man mẽ inhõ krĩ hwỳr mõi mẽ mẽ inhmã akapěr jarẽnh o ri mẽ ixkõt pa. Pa prem kuma ně mẽ ixte amnhĩ tomnuj kaga ně akõt amnhĩ xunhwỳr kurê kumrêx Tĩrtũm. Nom or war akutã mẽ hkrĩ xwỹnh kwỹ mũj na pre Akra Jejus tãm mẽ hwỳr mõi mẽ mẽ kãm kapěr o ri mẽ hkõt pa nhũm prem kuma no ãm mẽ ixkĩnhã amnhĩ tomnuj kaga ně hkõt amnhĩ xunhwỳr kêt ně. Mẽ kot Akra mar tã amnhĩ kaxyw kãm hamaxpěr kêt ně.” Anhỹr o koja mẽ wa inhmã mẽ ajarẽ ka mẽ tee ri mẽ ama ně amnhĩ kamã agryk tỳx ně. Jakamã e kwa ixte mẽ amã ã ixkapěr anhỹrja ma ně kãm ajamaxpěr tỳx rãhã ho ri apa. Anẽ.

Mẽ pajamaxpěr mex te kot kanê hpòk mex pyrãk ã harẽnh

Matêwre 5.15, 6.22-23

33Nhũm Jejus arĩ mẽ ahkre ho nhỹ ně mẽ kãm:

—Xà na htem kanê hpòk ně poti ho hpro? Nà na htem ho anhỹr kêt ně. Na htem hpòk ně kỳx pẽ mẽmoj nhĩmõk ã unhwỳ nhũm mẽ piitã mẽ kãm hirã mex nhũm htem ixkrem agjê ně hirã kamã mẽmoj pumunh mex o mra. 34Ja pyrã ně kot ka mẽ atõ ixkapěr ma ně ixkõt amnhĩ nhĩpêx ně tãm amnhĩ nhĩpêx o ri apa. Ně tãm mẽ hipêx o ri apa. Jao te hirã kamã mẽ rĩt mex xwỹnhjaja kot amnhĩ nhĩpêx pyrãk. Nom koja mẽhõ inhma ně ãm inhma ně ixkwỹm ri tanhmã amnhĩ nhĩpêx to ho pa. Jao te kamãt kô kamã mẽ rĩt mex kêt xwỹnhjaja kot htỳx amnhĩ nhĩpêx o pa pyrãk o amnhĩ nhĩpêx.

35—E kêr ka mẽ ã amnhĩ nhĩpêx anhÿr pymaj ixkapêr ma nê kãm ajam taxpêr tÿx rãhã ho ri apa. 36Kot kaj mẽ ixkapêr ma nê ixkôt amnhĩ nhĩpêx. Hãmri nê te mẽ ate kanê hpôk mex nhĩrã kamã ri apa pyrãk o amnhĩ nhĩpêx. Jao aprĩ hã ixkapêr ma nê aprĩ hã ixte tanhmã amnhĩ nhĩpêx to hã ixpumunh mex nê. Anê.

Jejus kot tanhmã Parijew nhõ xwÿnhjê jarênh to

Matêwre 23.25-26

37Tã nhũm Jejus ra mẽ ahkre pa. Hãmri nhũm Parijew nhõ xwÿnhja hwÿr tẽ nê kãm:

—Pa. E kwa ma ixkôt tẽ nê mẽ ixkutã apku. Anê.

Hãmri nhũm kuma nê kãm:

—Tôe. Nà kot paj ma akôt tẽ. Anê

Hãmri nê ma hkôt tẽ nê ôrkwÿ hwÿr axà nê apkur kaxyw mẽ ãhkô hã nhÿ. 38No ãm mẽ hkukamã mẽ hpãmjê pyrã nê amnhĩ nhĩhkra kuhõnh ryy hkêt nê. ãm amnhĩ nhĩhkra htyk pix kuhõnh tokyx anê nê nhÿ. Nê ô prat kuhõnh ryy hkêt rãhã apkur kaxyw nhÿ. Jakamã nhũm kot amnhĩ kôt hwÿr xwÿnhhta tee ri ja hã omu nê ham taxpêr o:

—Tk. Kwa na hte mẽ ixte amnhĩ nhĩpêx kôt amnhĩ nhĩpêx mex kêt nê.

39Anê nhũm Jejus amnhĩ tã ham taxpêr ã omu nê kãm:

—Nà mẽ apê Parijew nhõ xwÿnhjaja te mẽ ate mẽ kot apkur kaxyw prat kre kuhõnh punuj tã mex ã harênh pyrãk o amnhĩ nhĩpêx. Nê ãm mẽ akrã hkà rũm pix mã na mẽ amex. Nê mẽ noo mã te mẽ amex pyrãk no ãm mẽ anhõxàhkre kaxwÿnh kãm mẽ ajam taxpêr mex kêt. ãm mẽ akapêr prãm. Nê mẽ axàhkurêê. Nê mẽ anhõxÿÿ. 40Mê ate atÿx ri amnhĩ nhĩpêx o ri mẽ apa xwÿnh kênã. Kwa kêr ka mẽ ãm akrãhkã pix rũm amex nê ri apa hkêt nê. Mê mãñnên anhõxàhkre kaxwÿnh kãm ajam taxpêr mex o ri apa. Nê tãm mẽ piitã mẽ hipêx o ri apa. 41Kêr ka mẽ tãm ajam taxpêr o tãm mẽ hipêx o ri apa. Nê axãmnhix ri mẽ kêp amrakati xwÿnhjê mã mẽmoj nhõr o ri apa. Kot kaj mẽ ã amnhĩ nhĩpêx anê hãmri nhũm Tirtũm ja hã mẽ apumu nê amnhĩm mẽ amex ã mẽ ajarê. No na ka htem mẽ amã mẽ amnhĩ to mex prãm xaj tee ri amnhĩ kuhõnh japjê kaprÿ. Anê.

Jejus kot Parijew nhõ xwÿnhjaja mex kêt kukamã mẽ harênh

Matêwre 23.4, 23.7, 23.13-24, 23.27-38; Makre 12.38-39

42Nhũm Jejus arĩ Parijew nhõ xwÿnhjê jahkre nê mẽ kãm:

—Kwa mẽ okora Parijew nhõ xwÿnhjaja. Kot kaj mẽ amex kêt nê. Na ka htem Tirtũm kapêr piitã hkôt amnhĩ nhĩpêx o apa hkêt nê ãm hkwÿ kôt pix mã amnhĩ nhĩpêx o ri apa. Nê ãm kapêr o hpÿnhre nê hkôt amnhĩ nhĩpêx hãmri nê hã amnhĩ pumu nê ate amnhĩ to mex xwÿnh ã

amnhĩ to jarkrar o ri apa. Nom Tĩrtũm kãm hprãm xà piitã hkõt amnhĩ nhĩpêx hkêt nê. Mẽ ate tãm mẽ piitã mẽ hipêx o ri apa hã kot mẽ amã karõja. Nê mẽ amã Tĩrtũm kĩnh ã kapêr kõt amnhĩ nhĩpêx o ri apa hã karõja mẽ ate mar mex tã hkõt amnhĩ nhĩpêx kêt nê. Mẽ ate kapêr piitã hkõt amnhĩ nhĩpêx ronhỹx ja mẽ amã mex kumrêx.

43—Kwa mẽ o kora. Mẽ piitã mẽ kot amnhĩm mẽ ate amnhĩ to rũnh xwỳnh ã amnhĩm mẽ ajarênhja na mẽ amã hprãm. Nê mẽ piitã mẽ kot amnhĩm mẽ apê mẽ ahkre mex xwỳnh maati hã mẽ ajarênhja na mẽ amã hprãm.

44—Kwa mẽ o kora. Kot ka mẽ amex kêt nê. Mẽ kot mẽ akapêr mar nê mẽ akõt amnhĩ nhĩpêx xwỳnhjaja te mẽ kot htỳx ri mẽ hã pika nhĩmõk ã ri mẽ pa xwỳnh kot amnhĩ nhĩpêx pyræk. Jao mẽ ate amnhĩ to mex ã amnhĩ kamnhĩx nom mẽ ate amnhĩ to mex kêt. Te mẽ kot pika mex ã hkamnhĩx nê htỳx ri mẽ hã pika nhĩmõk ã ri mẽ pata pyræk o na htem amnhĩ nhĩpêx. Anê.

Nhũm pre ã Jejus Parijew nhõ xwỳnhjê mã mẽ kot amnhĩ nhĩpêx jarênh anê.

Jejus kot Tĩrtũm kapêr tũm o mẽ ahkre xwỳnhjê mã kapêr

Matêwre 23.1-4, 23.13, 23.29-36

45Hãmri nhũm Tĩrtũm kapêr tũm o mẽ ahkre ho pa xwỳnhja kuma nê kànhmã xa nê kãm:

—Kwa na ka ã Parijew nhõ xwỳnhjê jarênh punuj anhỹr jao mãânên ã mẽ paja jarênh anê nà? Mẽ ixte amnhĩ nhĩpêxja ãm tipxi kênã. Anê.

46Hãmri nhũm kãm:

—Tỳ. Mãânên mẽ kajaja. Kwa o kora mẽ apê Tĩrtũm kapêr tũm o mẽ ahkre xwỳnhjaja. Kot kaj mẽ uræk nê amex kêt nê. Na ka htem mẽ kãm mẽmoj tã karõ ho ri apa nê mẽ kãm: “E kêr ka mẽ ã amnhĩ nhĩpêx anê nê ã amnhĩ nhĩpêx anê.” Anhỹr tã no ãm mẽ kajaja amnhĩ kapêrja kõt amnhĩ nhĩpêx kêt nê. Te mẽ ate mêhõ kot mẽ katut ã mẽ kãm mẽ jênh pytĩ janhõr tã mẽ ho ajuta nê hkwỳ htur kêeta pyræk o na ka htem amnhĩ nhĩpêx o ri apa.

47-49—Na pre Tĩrtũm amnepêm mẽ pahpãmjê hkukamã tanhmã mẽ harênh to. Ahpumunh tỳx xà hkõt tanhmã mẽ hkukamã mẽ harênh to nê mẽ harênh o: “Kot paj ma mẽ hwỳr inhỹ hã ixkapêr jarênh xwỳnhjê rê. Nom koja mẽ omu nê ãm mẽ omu nê kêp mẽ hprãm nõkati nê tanhmã mẽ hipêx to ho pa. Nê ixpê mẽ hkwỳjê hpar o pa. ã koja mẽ inhỹ hã ixkapêr jarênh xwỳnhjê nhĩpêx anê.” Anhỹr o mẽ hkukamã mẽ harê. Tã ã mẽ harênh anhỹr xà hkõt nhũm prem ã mẽ hipêx anê nê mẽ hkwỳjê hpa nê mẽ hkwỳjê pynê nê mẽ hagjê.

—Amnepêm mẽ akukamã mẽ kot ã mẽ hipêx anhỹr nhũm mẽ ate mẽ ano ho ja hã mẽ omunh kêt tã ka htem arĩ mẽ hã pika ho mex o ri apa.

Te mẽ amã mẽ hapê nê mẽ ho ajamak pyrã nê mẽ hã pika ho mex o ri apa. Nom mẽ amã mẽ hapê hã ho mex hkêt nê. Âm ra mẽ htyk nê hapêx nê mẽ amã Tirtũm kapêr jarênh o pa hkêtja ã na ka htem akĩnh nê ã axêx rom mẽ hã pika ho mex anhÿr o ri apa.

50-51—Na prem Tirtũm nhÿ hã kapêr jarênh o mẽ pa xwÿnhjê nhĩmex rax nê. Amnepê m panhĩ kator krax rũm finat Atãw kra finat Apewja na pre Tirtũm nhÿ hã kapêr o pa nhũm htõ kãm mar prãm kêt nê kupĩ. Tã nhũm Tirtũm axte mẽ hwÿr ÿ hã kapêr jarênh o mẽ pa xwÿnh kwÿjê rê nhũm prem mã mẽ ho anê nê mẽ hkwÿjê nhĩmex. Nhũm pre xatã mẽ hwÿr mẽ hkwÿjê rê nhũm mẽ xatã mẽ kupa. ã Apew rũm finat Jakaris wÿr na prem mẽ himex rax anê. Nê hpãnhã Jakarisja nhũm prem Tirtũm mã amnhĩ jarênh xà hã ixkre kamã kupĩ. Tã ka mẽ ajaxwÿja amã Tirtũm kapêr mar prãm kêt nê mẽ urak nê amã ÿ hã kapêr jarênh o mẽ pa xwÿnhjê nhĩmex prãm. Tã ã mẽ pahpãmjê mẽ ato hpimràatã mẽ ate mẽ hipêx anhÿrja mÿrapê koja Tirtũm ja hã mẽ apê mẽ hkanrêhã mẽ htãmnhwÿjaja tanhmã mẽ ato htÿx to ka mẽ amnhĩ xà htÿx kamã ajamak o ri apa rãhã nê kãm ga.

52—Jakamã kwa mẽ o kora mẽ apê Tirtũm kapêr tũm o mẽ ahkre xwÿnhjaja. Mẽ ajaxwÿja na ka htem Parijew nhõ xwÿnhjê pyrã nê Tirtũm kapêr o mẽ ahkre ho apa. Nê aprĩ hã mar mex tã no âm amnhĩ kaxyw hkôt ajamaxpêr nê hkôt amnhĩ nhĩpêx kêt nê. Hãmri nê mẽ kot mẽ amar o pa xwÿnhjê mã atÿx ri tanhmã mẽ ahkre hto nhũm htem mẽ ama nê mẽ apyrã nê amnhĩ kaxyw Tirtũm kôt hamaxpêr nê hkôt amnhĩ nhĩpêx kêt nê. Mẽ kãm hprĩ hã kapêr mar mex prãm tã mẽ amar xà hkôt mẽ ate amnhĩ nhĩpêx pyrãk o amnhĩ nhĩpêx o pa. Nom mẽ kajaja na ka htem mẽ kãm mẽ hamaxpêr mex nhõr kêtja mÿrapê nhũm htem ã amnhĩ nhĩpêx anhÿr o pa. Jakamã kwa mẽ o kora kot kaj mẽ amex kêt nê. Anê.

Nhũm pre ã Jejus mẽ kãm kapêr anê. 53-54Hãmri nê kato nê ma tẽ. Nhũm Tirtũm kapêr tũm o mẽ ahkre ho mẽ pa xwÿnhjê mẽ Parijew nhõ xwÿnhjaja hãmri kot tanhmã mẽ kãm kapêr toja ma nê kamã gryk tÿx nê. Jakamã ma hkôt mra. Hêx rom mẽmoj tã hkukjêr o hkôt mra. Nê hã hkukjêr kãm hihtÿx o hkôt mra. Kot tanhmã mẽ kãm ujarênh to nhũm mẽ kot mar nê ra hã àmnênh kaxyw ma hkôt àhkukjêr o mra.

Mẽ pahte Tirtũm pê mẽ pajamaxpêr punuj o pahpimxur kêt

Matêwre 10.26-33

12 1-3Tã nhũm mẽ Jejus ã htu rax kumrêx nê hã axpên nhĩgãnh o kuhê. No nhũm kormã mẽ kãm tanhmã kapêr to hkêt nê. Âm kormã hkôt mẽ pa ho mẽ pa xwÿnhjê kumrêx mã kapêr nê mẽ kãm:

—Mẽ piitã kãm amnhĩ kwÿjê pê hamaxpêr punuj o hpimxur hprãm tã koja nhÿrmã mẽ hamaxpêr piitã amnhĩrĩt pa. Nê mẽmoj piitã ra hpimxur mex tã koja nhÿrmã piitã amnhĩrĩt pa. Nê mẽ kot kamãt kô

kamã hpimxur pê mëmoj jarënh tâ koja mẽ piitã nhÿrmã kot mëmoj jarënhhta ma. Nê mẽ kot hitom kãm kawax pê axpën mã mëmoj punuj jarënh tâ koja nhÿrmã mẽ piitã mëmoj jarënhhta ma. Jakamã kwa kêr ka mẽ tanhmã Parijew nhõ xwÿnhjaja kot amnhĩ nhĩpêx to ho pa hã mẽ omu nê ãm mẽ omu nê mẽ hkôt amnhĩ nhĩpêx kêt nê. Te mẽ kot tãm amnhĩ nhĩpêx pyræk o amnhĩ nhĩpêx tâ no ãm tãm amnhĩ nhĩpêx o pa hkêt. Na htem ãm htÿx ri tanhmã amnhĩ to hêx to ho pa. Tã kêr ka mẽ uræk nê ã amnhĩ nhĩpêx anhÿr kêt nê. Anê.

Mê pahte pahkwÿjê pumaj Tirtũm kaga hkêt ã mẽ pamã karõ

Matêwre 10.28-31

4Nhũm Jejus arĩ hkôt mẽ pa ho mẽ pa xwÿnhjê mã kapêr nê mẽ kãm:

—E ixkrãmnhwÿjaja. Kêr ka mẽ amã akwÿjê puma rÿ nhãm mẽ hkwÿjê puma ho ri apa hkêt nê. Koja mẽ apar tâ ãm mẽ anhĩ pix pa nom tanhmã mẽ akarõ hto hkêt nê. 5Tirtũmja tapxipix na hte mẽ ï nê mẽ hkarõ ho hpimràatã mẽ kot amnhĩ xà htÿx kamã hamak tũm xà hwÿr mẽ kurê. Tã kêr ka mẽ ja pumaj Tirtũm kapêr kwÿm tanhmã ri amnhĩ nhĩpêx to ho apa hkêt nê.

6-7—Nê Tirtũm kot mẽ pahto hapêx par pumunh tâ mããnën kot mẽ pajamãr pumunh mex. Mãn ka htem kuwênhre pumu. Na hte Tirtũm hamãr mex o pa. Mẽ piitã mẽ kot ãm kuwênhre pumunh o pa htã nhũm Tirtũm mẽ kurom hamãr mex o pa. Nê htãnopxar rãhã ho pa. Nom kãm mẽ pajapê htÿx o kuwênhre jakrenh jakamã kwa mẽ tee ri amnhĩ kukamã ajamxpêr o ri akaprĩ nê apa hkêt nê. Koja Tirtũm mẽ pahtãnopxar rãhã ho pa. Ra kot tanhmã mẽ pakute hã mẽ pahpumunh par. Nê ahpÿnhã tanhmã mẽ pahkrã hkĩ kute hkôt mẽ pahpumunh par. Tã kot mẽ pahtãnopxar rãhã jakamã mo kaxyw kot kaj kêt mẽ ri amã mêhõ puma ho ri apa?

8—Jakamã kwa mẽ mãmrĩ mẽ kãm mẽ apê ixkra hã amnhĩ jarënh o ri apa nê amã mẽ uma xàj tee ri amnhĩ nhĩpêx o ri apa hkêt nê. Kot ka mẽ kãm ra mẽ ate ixkôt amnhĩ xunhwÿr ã amnhĩ jarê. Pa ja hã mẽ apumu hãmri nê mẽ apyrà nê kaxkwa kamã Tirtũm kapêr o mẽ wrÿk xwÿnhjê mã ra mẽ ate ixkôt amnhĩ xunhwÿr ã mẽ ajarê. 9Nom kot ka mẽ kot ixtã tanhmã mẽ ato pymaj apê ixkwÿ hã amnhĩ jarënh kêt japêr. Pa ja hã mẽ apumu hãmri nê nhÿrmã amnhĩ xwar mẽ kãm mẽ apê ixkwÿ hkêt ã mẽ ajarê. Jakamã kwa mẽ mãmrĩ mẽ kãm apê ixkwÿ hã amnhĩ jarënh o ri mẽ hkôt apa kê mẽ ama nê tanhmã inhmã hamaxpêr to. 10Koja mẽ ama nê ãm ama nê kãm ixprãm kêt japêr. Hãmri nhũm Tirtũm ixtã mẽ omu nom tokyx ixtã tanhmã mẽ ho hkêt nê. Koja kormã amnhĩ tâ mẽ hamãr o pa. Karõ kot axte mẽ kãm ijarënh o amnhĩrĩt nhũm mẽ hkwÿjaja kot mar nê kãm ixprãm nê ixkôt amnhĩ xunhwÿr kaxyw nhũm kormã amnhĩ tâ mẽ hamãr o pa. Nom koja Karõ xatã mẽ kãm ixto

amnhĩrīt tā nhũm mẽ kuma nẽ ãm kuma nẽ te mẽ kot kêp amnhĩ jamak pro pyræk o amnhĩ nhĩpêx o pa. Jao Karõ hã hpijaàm kêt mỳrapê koja Tĩrtũm nhỹrmã amnhĩ xwar te kot mẽ kêp amnhĩ jamak pro pyræk o mẽ hipêx nhũm mẽ tee kãm amnhĩ kaprĩ kaprỹ. Hãmri nẽ amnhĩ xà htỳx kamã hamak tũm xàta wỳr ma pa nẽ kamã pa ho pa. Jakamã kwa mẽ mãmri mẽ kãm mẽ apê ixkra hã amnhĩ jarênh o ri mẽ hkôt apa nẽ tanhmã mẽ kãm ijarênh to ho ri apa. **11** Koja mẽ ama nẽ kãm mẽ amar prãm kêt japêr hãmri nẽ ixtã mẽ apynê nẽ tanhmã mẽ anhĩpêx to kaxyw. Nẽ Ijaew nhõ Tĩrtũm kapêr o mẽ ahkre xà hã ixkre hwỳr mẽ ato mrrar japêr. Rỳ mẽ õ pahi hwỳr mẽ ato mrrar nẽ tanhmã kãm mẽ ato hêx to. Nom kêr ka mẽ mẽ kãm amnhĩ jarênh kaxyw nẽ tee ri amnhĩ kukamã ajamxpêr o amã mẽ uma kêt nẽ. **12** Koja Tĩrtũm Karõ ja kaxyw mẽ amã mẽ ajamxpêr mex gõ hãmri ka mẽ õ ri mẽ kãm amnhĩ jarê. Jakamã kwa mẽ tee ri mẽ kãm amnhĩ jarênh kukamã ajamxpêr o ri mẽ amã mẽ uma ho apa hkêt nẽ. Anẽ.

Mẽ hikukrêx rũnh pix kukamã hamaxpêr xwỳnhjê jarênh

Wam Ximotre 6.9-10; Xiakre 4.13-17, 5.1-6

13 Nhũm Jejus arĩ mẽ ahkre o xa nhũm mẽ mar o kuhê. Rôm nhũm mẽhõ myja hwỳr tẽ nẽ kãm kapêr nẽ kãm:

— Pa? Kwa ot pa awỳr amã mẽmoj jarênh mã tẽ. Na pre inhĩpêxà ty nhũm ixtõ ixrom amnhĩm õ mẽmoj piitã ho àrĩk pa. Õ pika nẽ hkrit nẽ hikukrêx nẽ ãm mẽmoj piitã ho àrĩk par kumrêx. Kwa ma ixkôt tẽ nẽ kãm anẽ pa wa amnhĩm ho axkjê nà? Anẽ.

14 Hãmri nhũm kuma nẽ kãm:

— Tk. Kokỹ. Na pa pre mẽ amã mẽ mẽmoj to ixpikjêr kaxyw mẽ awỳr ixwrỳk kêt nẽ. Anẽ.

15 Hãmri nẽ mẽ kot mar o kuhê xwỳnh piitã mẽ kãm kapêr nẽ mẽ kãm:

— Kwa kêr ka mẽ amã anhõ mẽmoj rũnh prãm o ri apa hkêt nẽ. Na htem mẽmoj rũnh kukwak ri Tĩrtũm wỳr apir kêt nẽ. Mẽmojta kêp pika pix nhõ xwỳnh na.

16 Anhỹr o mẽ kãm kapêr hãmri nẽ mẽ kãm awjarê. Mẽ hkukrêx rax ã kuxi nẽ mẽ kãm awjarê nẽ mẽ kãm:

— Nà koja mẽhõ õ mẽmoj rax nẽ. Nẽ hpur kãm õ rax nẽ. No ãm õ jaxwỳr xà hã ixkre kêp grire. **17** Hãmri nhũm tee ri hpur kãm õ rax kukamã hamaxpêr nẽ hamaxpêr o: “Kwa tanhmã kot pa amnhĩ to nẽ ja piitã nhỹri haxwỳ wehe? Inhmã amarĩ mẽ kêp amrakati xwỳnhjê mã hkwy nhõr prãm kêt. Kot paj ãm amnhĩm piitã ir pa nẽ kritpêh hkur o ixpa. Nom ixpê haxwỳr xà hã ixkreja ixpê grire.” Anẽ.

18— Hãmri nẽ hamaxpêr o: “Nà na pa ra ijamaxpêr. Kot paj ixkre grireta grã nẽ hpãnhã rax õ nhĩpêx. Hãmri nẽ ixpur kãm inhõta jamỳ nẽ

kamã ir pa. Nê ixàpênh xà hã ixkukrêx piitã kamã haxwÿr pa. Nà kot paj ho anê.” Anê.

19—Hãmri nê ra ixkreja grãnh pa nê hpãnhã rax ò nhípêx. Nê hipêx pa hãmri nê kamã hpur kãm òta xir pa. Nê àpênh xà hã hikukrêx piitã kamã unhwÿ. Hãmri nê omu nê hkĩnh nê. Nê hamaxpêr o: “Nà hãmri. Kot paj tokyx axte mêmoj tã ixàpênh kêt nê. Ra inhõ rax kumrêx kênã. Kot paj kritpêm ho ixàpkur mex o ixpa. Nà ãm hãmri na pa amnhĩ kukamã ijamaxpêr mex pê ixkre rax nhípêx.” Anê. 20Tã nhũm Tĩrtũm tee ri ã kot amnhĩ nhípêx anhÿr ã omu nhũm ja kãm mex kêt nê. Hãmri nhũm hã kãm kapêr nê kãm: “Nà na ka atÿx ri anhõ rax mẽ akukrêx rax o apikuprõnh kaprÿ. Na ka ãm amnhĩ pix kukamã ajamaxpêr o apa pê ã amnhĩ nhípêx anê. Nom kot kaj kamàt ja kamã ty nê anhÿ kamã ma mō nê amnhĩ kôt anhõ mêmoj rax ò ho amōr kêt nê. Koja hpãnhã mēhō amÿr pê ho amnhĩptàr pa ka rĩ amnhĩ pumu.” Anê. Nhũm ã Tĩrtũm kãm kapêr anê. ã mẽ ujarênh kot anhÿr.

21—Mê kot amnhĩ nhõ nê amnhĩ kukamã pix mã hamaxpêr o mẽ pa xwÿnhjaja na htem myja pyrã nê Tĩrtũm mã hamaxpêr o pa hkêt nê. Jakamã koja mẽ nhÿrmã ty hãmri nê hkukrêx pix kukamã hamaxpêr nê amnhĩ mã pix mã hamaxpêr o paja mÿrapê Tĩrtũm mẽ wa ixri htĩr tũm nê mex nê pa ho pa hkêt nê. Mẽ kot amnhĩ nhõ pix kukamã hamaxpêr xwÿnhjaja nê amnhĩ kukamã pix mã mẽ hamaxpêr xwÿnhjaja nê mẽ kamã ukaprĩ hkêt xwÿnhjaja mẽ ò mêmoj rũnh tã koja mẽ nhÿrmã ty hãmri nê amnhĩ kôt hõ ho pixi nê o mōr kêt nê. Koja mẽ mêmoj piitã rer pa nê ma ÿ kamã ma mō. Jakamã kwa kêr ka mẽ jajê pyrã nê anhõ mêmoj to anhõxÿ ho ri apa hkêt nê. Anê.

Mê pahte tee ri amnhĩ kukamã pajamaxpêr kêt ã mẽ pamã karõ

Matêwre 6.25-34; mãânên Wam Pêtre 1.3-9

22Tã nhũm Jejus hpãnhã tanhmã hkôt mẽ pa ho mẽ pa xwÿnhjê jahkre hto nê mẽ kãm:

—Kwa kêr ka mẽ tee ri amnhĩ kukamã ajamaxpêr o ri apa hkêt nê. Amnhĩ xàpkur xà rÿ axê ka mẽ tee ri hkukamã ajamaxpêr kêt nê. Nê mẽ ãm mêmoj piitã hkukamã tee ri ajamaxpêr kêt nê. 23Tĩrtũm àhpumunh tÿx o àhpumunh tÿx xwÿnh na. Na pre àhpumunh tÿx o mẽ anhípêx ka mẽ kukwak ri atĩr nê apa. Tã xà kot mẽ amã mẽ anhõ ho pa hkukamã àhpumunh kêt? Nà ja kukamã àhpumunh xihtÿx kênã. Kêp mẽ anhípêx xwÿnh jakamã mãânên kêp mẽ amã mẽ anhõ ho pa xwÿnh. Nê kêp mẽ amã mẽ axê nhõr o pa xwÿnh.

24—Mãn ka htem kuwênhre pumu. Na hte tee ri amnhĩ xàpkur xà hkukamã hamaxpêr o hkaprĩ nê ri pa hkêt nê. Na hte Tĩrtũm tãm kot kãm ò ho pa. Tã kãm mẽ pajapê htÿx o kuwênhre jakrenh jakamã koja uràk nê mẽ pamã mẽ panhõ mex o pa rãhã nê. 25-26Jakamã kwa kêr ka

mě mẽmo arĩgro hã axàpkur xà hkryre pumu nẽ ate amnhĩ pê hkrẽr par nẽ amã prãm o akaprĩ nẽ apa hkukamã tee ri ajamaxpẽr kêt nẽ. 27 Tĩrtũm kamnàr rom axàmnhĩx anhõ hkryreta ku nẽ akĩnh kãm tanhmã amnhĩ nhĩpêx to ho ri apa. Xà kot ka anhõ mry grire pumu nẽ akaprĩre nhũm ra tanhmã amã amnhĩ to rax to? Na htem ãm tee ri mẽmo hkukamã hamaxpẽr o hkaprĩ nẽ pa kaprỳ. Jakamã kêr ka mẽ ã ri ajamaxpẽr anhỹr o akaprĩ nẽ apa hkêt nẽ.

27—Mãn ka htem akunĩ kamã pixõrãre pumu. Na hte tee ri tanhmã amnhĩ kute hkukamã hamaxpẽr o hkaprĩ nẽ harir kêt tã muxre nẽ harir ka mẽ omu. Te ho amnepêm finat pahihti Sarumãw xê mex pyràk nom ãm mex o kot hakrenh.

28—Pixõrãreja arĩgro ja hã htĩr nẽ muxre nẽ harir tã koja mẽmo arĩgro hã grã pa nẽ hapêx. Kêp pixõrã pix nẽ hapêx tokyx anhỹr tã na hte Tĩrtũm ho mex nẽ nhũm mux nẽ harir. Nom mẽ pajaja na hte mẽ pahto mex o pixõrãre ho mexja jakrenh. Jakamã kwa mẽmo kaxyw kot ka mẽ tee ri amnhĩ xê hkukamã ajamaxpẽr o akaprĩ nẽ apa? Nà kot kaj mẽ anẽ nẽ amnhĩ kaxyw Tĩrtũm mã ajamaxpẽr tỳx kêt nẽ.

29—Kwa mẽ tee ri amnhĩ xàpkur xà hkukamã ajamaxpẽr rãhã o ri akaprĩ nẽ apa hkêt nẽ. Nẽ mẽ tee ri amnhĩ kukamã tanhmã ajamaxpẽr to ho ri akaprĩ nẽ apa hkêt nẽ. 30 Mẽ kot Tĩrtũm kôt amnhĩ xunhwỳr kêt xwỳnhjaja na htem ã ri hamaxpẽr anhỹr o hkaprĩ nẽ pa. Tã kêr ka mẽ ho mẽ uràk kêt nẽ. Tĩrtũm kot mẽ panhõ mẽmoj kêt kôt mẽ pahpumunh mex kênã. 31 Jakamã kêr ka mẽ ãm hkôt ri amnhĩ nhĩpêx rãhã nẽ. Nẽ amã ja pix kukamã ajamaxpẽr o ri apa hprãm. Hãmri nhũm amnhĩ tã mẽ apumu hãmri nẽ apkati mẽ tãm mẽ amã mẽmoj nhõr o pa. Anẽ.

Kaxkwa kamã mẽ pakukrêx rax jarênh

Matêwre 6.19-21; mãânên Sikũn Ximotre 4.8; Eprêw 10.34; Wam Pêtre 1.4

32 Nhũm Jejus arĩ mẽ kãm kapẽr nẽ mẽ kãm:

—E mẽ ate ixkôt amnhĩ xunhwỳr xwỳnhjaja. Ra Tĩrtũm kot mẽ ato hkra jakamã kwa mẽ axàmnhĩx hkamnàr rom ri tanhmã amnhĩ nhĩpêx to ho ri apa. Na hte mẽ apê hkra hã mẽ apumu nẽ hkĩnh nẽ. Koja nhỹrmã kaxkwa kamã õ krĩ hwỳr mẽ ato api ka mẽ kamã wa ixkuri amex nẽ atĩr tũm nẽ apa ho apa. Ja na mex o kot jar pika ja kôt mẽ õ mẽmoj rũnh nẽ pa xwỳnhhta jakrenh. 33 Jakamã kêr ka mẽ axàmnhĩx ri akukrêx kwỳ ho wênê nẽ hpãnhã kàxpore jamỳ nẽ mẽ kêp amrakati xwỳnhjê mã ho apigrànho o ri mẽ hkôt apa. Kot kaj mẽ ã amnhĩ nhĩpêx anẽ hãmri nẽ kaxkwa kamã akukrêx rax nẽ. Mo kaxkwa kamã mẽ àhkĩnh xwỳnh koja mẽ apê ho ahkĩ? Nẽ kamã mo amnhõre kot mẽ apê homnu? Kaxkwa kamã ja amrakati kumrêx. Jakamã Tĩrtũm kot mẽ amã mẽ akukrêx nhõr mã xwỳnhhta koja aa apê omnuj nẽ hapêx kêt kumrêx. 34 Kot kaj mẽ jar

pika ja kamã akukrêx rax hãmri nê tanhmã apê omnu hto pix kukamã ajamaxpêr rãhã ho ri apa. Nom kot kaj mē apê Tirtũm kra hã kot kaj mē jar akukrêx rax kêt tã kaxkwa kamã akukrêx pix kukamã ajamaxpêr rãhã ho ra akĩnh nê ri apa. Anê.

Mē pahte Jejus kutêp tanhmã amnhĩ nhĩpêx to hã mē pamã karõ

Matêwre 24.42-43; Makre 13.32-37; Rukre 21.34-36;

mããnên Wam Tesarõn 5.4-8

35Nhũm pre Jejus arĩ mē ahkre nê mē kãm:

—E na pa pre ra mē apê ixkõt mē apa ho apa xwỳnhjê mã tanhmã amnhĩ kukamã amnhĩ jarênh to. Ixyk nê akupỹm ixtĩr nê ma akupỹm ixàpir hãmri nê mēmo arĩgro hã akupỹn mē awỳr ixwrykja na pa pre ra mē amã ja hã amnhĩ jarê. Tã kwa kêr ka mē ixwakre kamã ixte mē amã ã amnhĩ jarênh anhỹrja mã ajamaxpêr tỳx pê ixkõt amnhĩ nhĩpêx rãhã ho ri apa.

36-38—Te mē õ patrãw mã mē àpênh mex xwỳnhjaja kot amnhĩ nhĩpêx pyrãk o amnhĩ nhĩpêx o ri apa. Koja mē õ patrãw ma mē kot axpên mã wa rer mã xwỳnh pumunh mã ma nhỹhỹm tē. Hãmri nhũm kãm mē àpênh xwỳnhjaja arĩ kutêp òrkwỹ kamã hkrĩ. Axkãm hamak rom nê kutêp hkrĩ. Akupỹn htēm nhũm mē kot amnhĩ wỳr mar nê kãm kahê xà mēnh tokyx anhỹr kaxyw arĩ kutêp òt kêt nê hkrĩ. Kõt ã kamàt nhũm akupỹn hpõx o htēm rỳ arĩgro hwỳr hpõx o htēm nhũm mē kot amnhĩ wỳr mar nê kãm kahê xà mēnh tokyx anhỹr kaxyw kutêp òt kêt nê hkrĩ. Akupỹn hpõx ã omunh hãmri nê tokyx apkur kaxyw kãm õ nhĩpêx kaxyw. Kêr kê akupỹn pøj nê ã mē kot amnhĩ nhĩpêx anhỹr ã mē omu nê hkĩnh nê. Tã kêr ka mē àpênh xwỳnhjtajê pyrã nê ixwakre kamã inhmã ajamaxpêr rãhã ho ri apa. Jao ixkamã ajamak o apa ho ixkõt amnhĩ nhĩpêx mex rãhã nê. No kot paj akupỹn mē awỳr wrỳ hãmri ka mē àpênh xwỳnhjê pyrã nê inhmã mēmoj nhõr kêt nê. Kêt pa kot paj mē õ patrãwta kurom mē amã mēmoj mex gõ.

39—Na htem mē kêp àhkĩnh pymaj amnhĩ nhõrkwỹ jamãr rãhã ho pa. 40Ja pyrã nê mē ate akupỹn ixwryk xà hã arĩgro pumunh kêt jakamã kêr ka mē òrkwỹ nhõ dõnta pyrã nê ixkutêp axkãm ajamak rom rãhã nê ri apa. Jao tãm amnhĩ nhĩpêx rãhã nê. Anê.

Mē õ patrãw mã mē àpênh mex xwỳnhjê jarênh

Matêwre 24.45

41Nhũm pre ã Jejus hkõt mē pa ho pa xwỳnhjê jahkre anê. Hãmri nhũm Simãw Pêtre kuma nê kãm:

—Kwa Pahihti. Xàn ka mē piitã mē kãm ã akapêr anê nà? Xà ãm mē papxipixjê mã? Anê.

42Hãmri nhũm kãm:

—Nà ãm ixwakre kamã mẽ ate ixkõt tanhmã inhmã amnhĩ nhĩpêx to ho mẽ apa xwÿnh piitã mẽ amã na pa ã ixkapêr anê. Koja mẽ àpênh xwÿnhjê hõ õ patrãw mã àpênh mex o pa nhũm amnhĩ tã omu nê ma nhÿhÿm mör kaxyw nê ïhkram mẽmoj piitã haxàr pa. Hãmri nê kãm: “E kêr ka ixwakre kamã inhmã inhörkwÿ htãnopxa. Nê mẽ àpênh xwÿnhjê mã õ mex kê mẽ apkur mex o pa.” Anê. Koja ã kãm mẽmoj tã karõ anê hãmri nê kato nê ma nhÿhÿm mõ. ⁴³Hãmri nhũm kãm àpênh mex xwÿnhhta wakre kamã kãm àpênh mex o pa. Jakamã nhũm õ patrãw akupÿn hpõx o mõ nhũm amnhĩ wÿr harênh ma nê hkĩnh nê. Nê mẽmoj tã amnhĩ tã kamã kahak kêt nê. Rÿ tee ri wakre kamã kãm àpênh punuj ã amnhĩ pumu nê tee amnhĩ kukamã hamaxpêr kêt nê. Kot wakre kamã kutêp àpênh mex jakamã akupÿn hpõx ã harênh ma nê hkĩnh nê.

44—Jakamã nhũm õ patrãwja akupÿn pøj nê kot kãm àpênh mex ã omu nê haxwÿja hkĩnh nê. Hãmri nê kot kãm hamãr o pa kaxyw kãm mẽmoj piitã ïhkram haxàr pa. ⁴⁵Nom koja kãm àpênh xwÿnhhta axtem nê wakre kamã kãm àpênh mex kêt nê. Nê tokyx akupÿn mör kêt ã hkamnhix nê wakre kamã kãm mẽ àpênh xwÿnhjê htak nê pipãnh pix nê mẽ kãm gõ xành xwÿnhjê kõt pix mã pa japêr. ⁴⁶Hãmri nhũm õ patrãw haêr pê akupÿn pøj nê tee ri ã amnhĩ nhĩpêx anhÿr ã omu. Hãmri nê gryk tÿx nê tanhmã homnuj to. Hãmri nê kãm mẽ àpênh punuj xwÿnhjê mẽ mẽ ho pimràatã amnhĩ nê mẽ hanor pa. Tã kêr ka mẽ ixwakre kamã ho mẽ uràk kêt nê. Mẽ kurom ixkapêr kõt tãm amnhĩ nhĩpêx mex rãhã ho ri apa.

47-48—Nê koja mẽhõ kormã Tirtũm kapêr mar kêt nê htÿx ri tanhmã amnhĩ tomnuj to ho pa. Hã koja Tirtũm ja hã omu nê nhÿrmã kot amnhĩ tomnuj o pata mÿrapê tanhmã ho nhũm amnhĩ xà htÿx kamã hamak tũm xà kamã pa. Nom akrãnhmã amnhĩ xà kamã hamak o pa. Aa kot Tirtũm kapêr mar kêt jakamã koja ãm akrãnhmã amnhĩ xà kamã hamak o pa. Nom koja mẽhõ kapêr mar mex tã ãm kuma nê hkõt amnhĩ nhĩpêx kêt nê. Nê xatã hirõp kuhê nê tanhmã amnhĩ tomnuj to. Hã koja Tirtũm tee ri ja hã omu nê nhÿrmã tanhmã homnuj tÿx to. Hãmri nhũm wamtajê pyrã nê amnhĩ xà htÿx kamã hamak tũm xàta kamã pa ho pa nom mẽ kĩnhã amnhĩ xà htÿx kamã hamak rãhã ho pa. Anê.

Jejus kot nhÿrmã mẽ kot amnhĩ tomnuj xà ho hapêx ã harênh

Matêwre 10.34-36

49Nhũm Jejus arĩ hkõt mẽ pa ho mẽ pa xwÿnhjê jahkre nê mẽ kãm: —Nà ixte mẽ omnu xà piitã ho ijapêx par nê mẽ kot tanhmã amnhĩ tomnuj to piitã ho ijapêx par kaxyw na pa pre wrÿ. Tã ra ixte piitã ho ijapêx par o inhmör ronhÿx ja inhmã mex kumrêx. Nom kormã. ⁵⁰Kot paj amnhĩ xà htÿx kãm ijamak rax o mẽ kot amnhĩ tomnuj o ijapêx o hkrax. Hãmri nê nhÿrmã ho ijapêx pa. Na pa ra ixyk kaxyw ixte amnhĩ

kà xà kamã ijamak kukamã ijamexpër o ra amnhĩ kamã ixkahak nẽ ri ixpa. Tã kot paj ja ho ijapêx pa nẽ ixkĩnh tỳx kumrêx. Anẽ.

Mẽ kot Jejus ã axpẽn kutã amnhĩ xunhwỳr ã mẽ harênh

Matêwre 10.21, 10.34-35

51Nhũm Jejus arĩ mẽ ahkre nẽ mẽ kãm:

—Nẽ ra mẽ awỳr ixwrỳk tã koja mẽ piitã ixkukwak ri hamakêtkati nẽ àmnhĩx ri pa hkêt nẽ. Kormã. Koja mẽ akwỳjaja ixkapër ma nẽ mẽ apyrã nẽ amnhĩ kaxyw ixkôt hamaxpër. No nhũm mẽ akwỳjaja mẽ akĩnhã kuma nẽ ãm kuma. Hãmri nẽ ixtã tanhmã mẽ anhĩpêx to ka mẽ ixpyrã nẽ amnhĩ xà htỳx kamã ajamak o ri apa.

52—Nẽ koja tanhmãn ixkre pyxi kamã mẽmojaja ohtôn pa. Nhũm war axkrutre nẽ ixkôt amnhĩ xunhwỳ nhũm mẽ axkrunêpxi nẽ ixkwỳm ri amnhĩ nhĩpêx nẽ ixkutã amnhĩ xunhwỳ. 53Nhũm mẽ hipêêxà hkra my mẽ wa ixtã axpẽn kutã amnhĩ xunhwỳ. Nhũm mẽ katorxà hkra ni mẽ wa ixtã axpẽn kutã amnhĩ xunhwỳ. Nhũm mẽ wỳj umregêx mẽ wa haxwỳja ixtã axpẽn kutã amnhĩ xunhwỳ. Koja mẽ ã ixtã axpẽn nhĩpêx anhỳr o pa. Anẽ.

Mẽ pahte amnhĩ tomnuj kaga nẽ Tirtũm kôt amnhĩ nhĩpêx ã

mẽ pamã karõ

Matêwre 5.25-26, 16.2-4

54Nhũm Jejus hpãnhã mẽ kot hkôt amnhĩ xunhwỳr kêt xwỳnhjê mã kapër nẽ mẽ kãm:

—Kwa mẽ inhma mẽ ate ixkôt amnhĩ xunhwỳr kêt xwỳnhjaja. Na htem kaxkwa kamã na htyk rax pumu nẽ na wrỳk mã hamaxpër kurê kumrêx. Hãmri nhũm na wrỳ. 55Nẽ amgrã pê kôk krihkritja nhũm htem kuma nẽ arĩgro htỳx mã hamaxpër kurê kumrêx. Hãmri nhũm arĩgro htỳx nẽ. 56-57 ã na ka htem aprĩ hã mẽmoj pumunh kôt mẽmoj kukamã ajamaxpër mex o ri apa anẽ. Nom nhũm Tirtũmja mẽ ate tanhmã amnhĩ tomnuj to mỳrapê tanhmã mẽ ato kaxyw nhũm mẽ ate ja hã amnhĩ pumunh tã tokyx amnhĩ tomnuj kaga hkêt nẽ.

58-59—Na htem tanhmã axpẽn tomnuj to. Hãmri nhũm kot tanhmã war axpẽn to xwỳnhhta pahi hwỳr htêm nẽ kãm tanhmã kot ho xwỳnhhta jarênh kaxyw. Hãmri nhũm kamã gryk xwỳnhhta kot pahi mã harênh kaxyw ã harênh ma nẽ hãmri tokyx hwỳr tẽ nẽ wa tãm akupỳm axpẽn xãm. Na htem ã amnhĩ nhĩpêx anẽ. Pahi kot ja mar nẽ tanhmã mẽ ho pymaj na htem ã amnhĩ nhĩpêx anẽ nẽ tokyx akupỳm tãm axpẽn xunhwỳ. No koja mẽ ã amnhĩ nhĩpêx anhỳr kêt nẽ nhũm pahija mẽ harênh ma hãmri nẽ tanhmã kot hõ ho xwỳnhhta pynê nẽ haxã nhũm tee kãm kator prãm o hkrĩ kaprỳ. Hãmri nẽ tanhmã amnhĩ to nẽ amnhĩ pãnhã kãm amnhĩ rer pa nhũm pahihtija kormã mẽ kãm anẽ nhũm mẽ

kãm ure nhũm kato. Ja pyrã nẽ kêr ka mẽ Tĩrtũm tanhmã kot mẽ anhĩpêx to pymaj tokyx mẽ ate amnhĩ tomnuj kaga nẽ hkõt amnhĩ nhĩpêx rãhã ho ri apa. Anẽ.

13 ¹Tã nhũm axtem mẽ hkwỳjaja Jejus wỳr mra nẽ kãm: —Pa? Kwa xàn ka ra Garirej nhõ xwỳnh kwỳjê jarẽnh ma nà? Na xep prem Jerujarẽ hwỳr mra nẽ ham mẽ kot Tĩrtũm mã amnhĩ jarẽnh xà hã ixkre kamã kãm amnhĩ jarẽnh kaxyw kormã kãm mry hpar o kuhê nhũm xep pahĩti Piratja mẽ harẽnh ma nẽ mẽ hã amỳnê nhũm mẽ ma mẽ hwỳr mra nẽ mẽ himex pa. Kwa mãn mẽ kot amnhĩ tomnuj tỳx o mẽ pajakrenh ã na prem mẽ himex nà? Anẽ.

2-3Hãmri nhũm mẽ kãm:

—Nà mẽ kot amnhĩ tomnuj tỳx mỳrapê mẽ kot mẽ himex kêt. Mẽ apiitã mẽ ate amnhĩ tomnuj o axpẽn pyrãk kênã. Tã kot ka mẽ amnhĩ tomnuj kaga nẽ Tĩrtũm kõt amnhĩ xunhwỳr kêt hã kot ka mẽ nhỹrmã ty hãmri nẽ õ krĩ hwỳr axàpir kêt nẽ. ⁴No Jerujarẽ kamã ixkre prêkja mẽ kot kãm “Siroe” anhỹr xwỳnhnta mẽ ho 18 nẽ mẽ hipy htem nẽ mẽ himex par xwỳnhjaja. Xà mẽ kot amnhĩ tomnuj tỳx mỳrapê na prem ty? Xà mẽ kot amnhĩ tomnuj tỳx o Jerujarẽ kamã arĩ mẽ htĩr xwỳnhjê jakrenh? ⁵Nà kot anhỹr kêt. Mẽ apiitã mẽ ate amnhĩ tomnuj o axpẽn pyrãk. Jakamã kot kaj mẽ ã amnhĩ nhĩpêx anhỹr kaga nẽ Tĩrtũm kõt amnhĩ nhĩpêx kêt nẽ hãmri nẽ mẽ urak nẽ nhỹrmã ty hãmri nẽ Tĩrtũm nhõ krĩ hwỳr axàpir kêt nẽ. Jakamã kwa mẽ ixkapêr ma nẽ kãm ajamaxpêr tỳx rãhã ho ri apa. Anẽ.

Tĩrtũm kot mẽ pakamã gryk tokyx anhỹr kêt ã harẽnh

Rõmãn 2.4; Sikũn Pêtre 3.8-9

⁶Tã nhũm Jejus kê axte tanhmã mẽ ahkre hto. Nẽ Tĩrtũm kot tanhmã mẽ panhĩpêx to hã kuxi nẽ mẽ kãm awjarẽ nẽ mẽ kãm:

—Koja hpur nhõ dõn mẽmo pàr kre nhũm ra hprêk mex nẽ ô mã tãm nẽ. Tã aa ô hkêt ã ra hã amgrã axkrunêpxi. ⁷Hãmri nhũm kot hkre xwỳnhja tee ri omu nẽ kãm àpênh xwỳnh wỳr tẽ nẽ kãm: “E kwa ma tẽ nẽ mẽmo pàr mỳj krãhta nẽ amẽ. Mexiti hã. Ra ô hkêt ã amgrã axkrunêpxi kênã. Koja pêr aa ô hkêt nẽ. Mo kaxyw kot kêt ô hkêt tã ô mex xwỳnh kaêx ã mẽ kêp àmnàr o kuhê? E hwỳr tẽ nẽ krãhta nẽ amẽ.” Anẽ. ⁸⁻⁹Hãmri nhũm tee ri kot kãm hã karõja ma nẽ kãm: “Kwa nà kormã. Pa kop ixãmnhĩx pàr krax ã mẽmo japôk kwỳ kapĩ nẽ kop hamã mãn. Kê axte hã amgrã pyxi nẽ hapêx nẽ ô hkêt pa kormã krãhta nẽ kumẽ. Koja amgrã ja kamã amã ô japêr ka omu nẽ akĩnh nẽ.” Anẽ. ã mẽ ujarẽnh kot anhỹr. Anẽ.

Nhũm Jejus ã mẽ kãm ujarẽnh anẽ. Mẽ kot amnhĩ tomnuj tỳx o pa htã nhũm Tĩrtũm kot pur nhõ dõn mã àpênh xwỳnhnta pyrã nẽ mẽ kamã gryk tokyx anhỹr kêt ã nhũm ã hã kuxi nẽ mẽ kãm ujarẽnh anẽ.

Jejus kot arĩgromnu hã mēhõ ho mex ã harēnh

Rukre 14.1-6; Juãw 5.16-17

10Tã nhũm mẽ õ arĩgromnu pē sap kato nhũm Jejus Ijaew pikuprõnh xà hã ixkre hwỳr axà nē kamã Tĩrtũm kapēr o mẽ ahkre ho nhỹ. 11Nhũm kamã mēhõ ni hikõt rãhã nē pa xwỳnhja nhỹ. Na pre ra amnepēm mēkarõmnuti tanhmã ho nhũm katàt nē ri mrrar kêt kumrēx. ãm hikõt rãhã nē ri pa hã ra hã amgrà pē 18. 12-13Hãmri nhũm Jejus omu nē amnhĩ wỳr kãm hpa ho apē nhũm hwỳr tē nhũm hã ãhkra xi nē kãm:

— E na ka ra akupỹm amex.

Anē nhũm akupỹm katàt nē mex kurē kumrēx. Hãmri nē amnhĩ pumu nē hkĩnh tỳx nē Tĩrtũm mã mex o mex ã harēnh o xa. 14Nom nhũm mẽ pikuprõnh xà hã ixkre jamãr xwỳnhj maatiija tee ri ja hã omu hãmri nē Jejus kamã gryk tỳx nē. Mē õ arĩgromnu hã akupỹm kot ho mex jakamã nhũm kamã gryk tỳx nē. Hãmri nē mẽ pikuprõnh xwỳnhjê mã kãm:

— Tk. Kwa semãn ã mẽ àpēnh xà hã arĩgro xohtõ. Kêp 6. Kot kaj mẽ mãmri tãmĩk nē sikũn nē tēs nē kwata nē kĩa nē sēsta ja ã ka mẽ apē rỳ mãmri Jejus wỳr amnhĩ to mra kê akupỹm tanhmã mẽ ato mex to. No sap ã kwarĩ. Sap kêp mẽ pahpē Ijaew nhõ arĩgromnu kēnã. Na pu htem hã paxàpēnh kêt nē. Jakamã arĩgro ja hã kot akupỹm mẽ ato mexja mex kêt. Anē.

15Hãmri nhũm Jejus kuma nē kãm:

— Kwa xà mẽ kajaja na ka htem sap ã axàpēnh kêt nē apa? Nà mẽ ate hã axàpēnh kēnã. Xàn ka htem sap ã akrit kawar nē akrit mõx ma mẽ ho apa nē mẽ hkõm kêt nē? Nà na ka htem ma mẽ ho apa nhũm htem ixkõ. Mot ka kêt mẽ ri axtem nē mẽ kot sap ã tanhmã amnhĩ toja nē mẽ kãm akapēr? 16Ixte ni ho mex xwỳnhjta mẽ pahpyrà nē kêp finat Apraãw kagrõt nyw õ na. Nhũm pre Satanasti te kot kãm ê nē ri o pa pyrãk o hipêx jakamã nhũm ã hã hikõt nē ri paja ã ra hã amgrà kêp 18. Tã pa nē te ixte Satanasti ho ixkrihkrit nē ixte kêp utàr pyrãk o hipêx nē akupỹm ho mex. Mo kot pa kêt ri omu nē ãm omu nē arĩgromnu hã ho mex kêt nē? Nà ixte arĩgro piitã hã akupỹm mẽ ho mex o ixpa xwỳnhj kēnã. Anē.

17Hãmri nhũm mẽ kot kãm kapēr mar prãm kêt xwỳnhjaja kuma nē kamã gryk nē. Te ho mēhprijet mã mẽ hamaxpēr nhõr pyrãk o mẽ hipêx pyrãk jakamã nhũm mẽ amnhĩ tã kuma nē kamã gryk nē. No nhũm mẽ kot ra ã amnhĩ nhĩpêx anhỹr o pa hã omunh xwỳnhjaja ja hã omu nē kãm hkĩnh nē.

Jejus te kot mēmo hy pyrãk ã harēnh

Matêwre 13.31-33; Makre 4.30-32

18-19Nhũm Jejus arĩ mẽ ahkre nē tanhmã mẽ kãm amnhĩ tã ujarēnh to nē mẽ kãm:

—Nē Tirtūm kot mē awȳr ixte mē ato amnhĩptàr kaxyw inhmēnh ã ijarēnhja. Te ixte mēmo hy pixire pyrāk. Na htem hkre nhūm higrōt. Nē gaa nē rĩ hprēk. Hāmri nē pa anhgrà nhūm kuwēnhre hw̄ȳr mra nē hō pytĩ kamã amnhĩm haê nhĩpêx. Tã kot paj nhỹrmã mēmo hy jarēnhhta pyrà nē ixpixi htã kot paj pika piitã hkôt mē ho amnhĩptã nē mē omunh mex rãhã ho ri ixpa. Anē.

Jejus te kot pãwti kaxkrit xà pyrāk ã harēnh

Matêwre 13.33-35

20-21 Nhūm Jejus arĩ mē ahkre ho xa. Nom hprĩ hã amnhĩ jarēnh kêt nē. ãm amnhĩ tã kuxi nē mē kãm awjarē nē mē kãm:

—E kot pa hpãnhã tanhmã mē amã pãwti kaxkrit xà jarēnh to. Koja mēnijê hō ãm hkw̄ȳ ho grire nē kupy nē kaxyw mēmo xôm kãm kumē nē ho pihkàr pa nē ho pãwti nhĩpêx. Nhūm kaxkrit xàja grire htã pãwti piitã ho kaxkrit mex nē. Ja pyrà nē kot paj ixpyxi htã koja mē nhỹrmã pika piitã hkôt ixkôt amnhĩ nhĩpêx mex o pa. Anē.

Nhūm pre ã Jejus mē kãm amnhĩ tã pãw kaxkrit xàja xi nē harēnh anē.

Kaxkwa hw̄ȳr hakwa kre kahê xà jarēnh

Matêwre 7.13-14, 7.21-23; Juãw 10.7-10

22Tã nhūm Jejus arĩ krĩ pê Jerujarē hw̄ȳr krĩ hkôt ri mē ahkre ho mē hkôt ri pa. 23Hāmri nhūm mēhō myja hw̄ȳr tē nē mēmoj tã hkukja nē kãm:

—Pa. Kwa inhmã mēmoj jarē. Xà koja mē ohtô nē nhỹrmã Tirtūm ri htĩr tūm nē papa ho nà koja mē grêre? Anē.

24Hāmri nhūm kuma nē mē kot mar o kuhê xw̄ȳnh piitã kãm:

—Nà mē kot Tirtūm kôt amnhĩ xunhw̄ȳr xw̄ȳnhjê pix koja mē õ krĩ hw̄ȳr agjê. W̄ȳr mē gjêx xàja ãm pixii nom koja mē ohtô nē kãm hkôt w̄ȳr gjêx prãm kêt nē. Na htem te hw̄ȳr mē gjêx xà hō japêr o pa pyrāk. Nom pa na te ixpê hw̄ȳr mē gjêx xà pixita pyrāk. Jakamã kwa kêr ka mē tokyx ixkôt amnhĩ xunhw̄ȳr t̄yx nē ixkôt ri amnhĩ nhĩpêx o ri apa. Na htem ohtô nē kãm ixkôt amnhĩ xunhw̄ȳr prãm kêt nē. Ixte amnhĩ nhĩpêxja mē kēp hiht̄yx jakamã nhūm htem ixkaga.

25—Tã koja mē nhỹrmã ty nē tee ri kãm Tirtūm w̄ȳr gjêx prãm kapr̄ȳ. Kot paj te mē kēp kahê pyrāk o mē hipêx nhūm mē kapôt ã kuhê nē tee ri amnhĩ tã ixpumu nē inhmã: “Kwa mē inhmã kahê xà mē pa mē awȳr agjê Pahihti.” Anē. Hāmri pa mē kãm: “Nà ixte mē apumunhre hã kot pa kêt ri mē amã kurê.” Anē.

26—Hāmri nhūm mē tee ri inhma nē inhmã: “Kwa nà ra ate mē ixpumunh mex kēnã. Na ka pre mē inhō krĩ kamã mē ijahkre ho ri apa nē mē ixkutã axàpkur o ri apa.” Anē. 27Hāmri pa mē kãm: “Tk. Ixte mē

akutã ixàpkur tã mẽ ate ixkôt amnhĩ xunhwỳre hã. Jakamã e mẽ ma mra. Mẽ ate amnhĩ tomnuj pix o mẽ apa xwỳnh jakamã kot kaj mẽ ixwỳr agjêx kêt nê.” Anê. Kot paj ã mẽ kãm ixkapêr anê.

28—Hãmri nhũm mẽ amỳm ri mẽ inhmex ã mẽ ixpumunh o kuhê. Kaxkwa kamã mẽ ixkĩnh nê ri mẽ inhmex nê ixpa hã amỳm mẽ ixpumunh o kuhê. Apraãw nê Ijak nê Jako nê Tĩrtũm kapêr jarênh o mẽ pa xwỳnh piitã nhũm mẽ amỳm mẽ ixkĩnh nê mẽ ixàpkur mex ã mẽ ixpumunh o kuhê. Hãmri nê tee ri mẽ ixwỳr kãm gjêx prãm kaprỳ nê hkaprĩ nê mur nê amnhĩ krã hkĩ jarê nê amnhĩ kà nhê nê amnhĩ kamã gryk tỳx nê. No ãm tee ri amnhĩ kamã gryk kaprỳ. ã koja mẽ amnhĩ nhĩpêx anê. 29Nom Tĩrtũm kôt mẽ kot amnhĩ xunhwỳr xwỳnhjaja koja mẽ kurom pika piitã kurũm axpên wỳr akuprõ nê Tĩrtũm wỳr agjê nê kuri hkĩnh nê apkur mex o hkrĩ. Mẽ akwỳjaja nê pika piitã kurũm hohtô rax nê axpên wỳr akuprõ nê hwỳr agjê nê kuri apkur mex nê hkĩnh nê pa ho pa.

30—Mẽ apê Ijaewjaja mẽ amã Ijaew kêt xwỳnhjê hprãm nõkati htã koja mẽ hkwỳjaja mẽ akwỳjê rom Tĩrtũm ri axpên wỳr akuprõ nê hkĩnh nê axpên kutã apkur mex o hkrĩ. Jakamã kwa kot kaj mẽ uràk nê amã Tĩrtũm mẽ wa ixwỳr agjêx prãm hã kot kaj mẽ ixkôt amnhĩ xunhwỳ nê ixkapêr kôt amnhĩ nhĩpêx mex o ri apa. Anê.

Jejus kãm Jerujarê nhõ xwỳnhjê japê hã harênh

Matêwre 23.37-39

31Hãmri nhũm Parijew nhõ xwỳnh kwỳjaja Jejus wỳr mra nê kãm:

—Pa. E ot pa mẽ awỳr mra. Kwa kêr ka ma Jerujarê hwỳr amõr kêt nê. Na ra mẽ hkĩnh wỳr pahi Eroxa pøj nê kot tanhmã ato kaxyw atã amnhĩ jarê pa mẽ kuma. Jakamã kwa mẽ hwỳr amõr kêt nê. Nhãm krĩ hõ hwỳr mãn mõ. Anê.

32Hãmri nhũm mẽ kuma nê mẽ kãm:

—Tk. Nà kot pa umaj nhãm krĩ hõ hwỳr inhmõr kêt nê. Kot paj ma mẽ hkwỳjê nê mẽkarõmnuti japõx pê mẽ hkwỳjê ho mex o ma hwỳr mõ. Pahi Erox kãm mẽ hpar pix prãm. E mẽ mãmri ma akupỳm hwỳr mra nê ã kãm ixkapêr jarênh anê. No kot paj umaj nhỹhỹm ixprõt nê ixtêm nê kêp ixpimxur kêt nê. Ra ixte õ krĩ hwỳr inhnojarê kênã. Anê.

33Hãmri nê mẽ kot mar xwỳnhjê mã amnhĩ jarê nê mẽ kãm:

—Kot paj tanhmã amnhĩ nhĩpêx to ho ri ixpa rãhã Jerujarê hwỳr mõn pøj nê kamã ty. Kamã na htem mẽ kot Tĩrtũm nhỹ hã kapêr jarênh xwỳnhjê nhĩmex. Tã hwỳr kot paj mõ. Anê.

Nhũm pre ã Jejus mẽ kãm amnhĩ jarênh anê. 34Hãmri nê te ra kot Jerujarê nhõ xwỳnhjê pumunh o ãm nê mẽ kãm kapêr pyræk o kapêr nê mẽ kãm:

—Hêxta waa nê mẽ apê Jerujarê nhõ xwỳnhjaja. Tĩrtũmja xatã mẽ awỳr y hã kapêr jarênh o mẽ pa xwỳnhjê rênh tã ka mẽ kapêr mar kêt

ně. Ně axtem ně kěn o mẽ htak o mẽ himex o apa. Na ka htem ã amnhĩ tomnuj o apa aně. Tã arĩ inhmã mẽ ajamãr o ri ixpa hprãm. Te ho krãhyre kot nore hpro ně ho hikwỹ pyrãk o na pa inhmã mẽ anhĩpêx prãm tã ka mẽ apê ixprãm nõkati ně ixkaga. ³⁵Mýrapê koja Tĩrtũm mẽ anhõ krĩ jamãr kêt ně. Kot paj tokyx ty ně mẽ apiitã mẽ are ně ma akupỹm api ka mẽ axte ixpumunh kêt ně. ãm akupỹn ixwrỹk xã hã arĩgrota pix ã koja mẽ akwỹjaja mẽ amỹr pê krĩ ja hwỹr ixwrỹk kãm ixpumu. Hãmri ně mẽ akurom ixpumu ně hkĩnh tỹx ně. Ně tã ixkõt amnhĩ xunhwỹ ně axpẽn mã ijarẽnh o:

E ota Tĩrtũm kot mẽ pahwỹr mẽnh xwỹnhhta pøj. Nã ãm hãmri na mẽ pahwỹr wrỹ. Na mex kumrêx. Aně.

Jejus kot axte arĩgromnu hã mẽhõ ho mex ã harẽnh

Rukre 13.10-17

14 ¹Tã nhũm sap nhũm Jejus ma Parijew nhõ xwỹnhjê krãhtũm kutã apkur kaxyw õrkwỹ hwỹr tẽ. Hãmri nhũm mẽ wa hã htu rax ně Jejus apkur ã tãnopxar o kuhê. Mẽ kot amnhĩ nhĩpêx kwỹm ri tanhmã amnhĩ nhĩpêx to nhũm mẽ kot hã omunh ně ra hã ãmnẽnh kaxyw nhũm mẽ kuri htãnopxar o kuhê. ²Nhũm ixkreja kamã mẽhõ my hte hikot xwỹnh mẽ kuri xa. ³Hãmri nhũm Jejus omu ně hã Parijew nhõ xwỹnhjê mẽ Tĩrtũm kapêr tũm o mẽ ahkre xwỹnhjê kukja ně mẽ kãm:

—Kwa mẽ inhmã mẽmoj jarẽ. Jarãhã na mẽ panhõ arĩgromnu pẽ sap. Tanhmã na pre finat Mojesja Tĩrtũm nhỹ hã mẽ pahte sap ã tanhmã amnhĩ nhĩpêx to hã mẽ pamã karõ hto? Xã kot puj mẽ akupỹm mẽ ho mex nã? Kot puj mẽ ãm mẽ omu ně akupỹm mẽ ho mex kêt ně? E mẽ atõ inhmã ja jarẽ. Aně.

⁴Hãmri nhũm mẽ kuma ně tanhmã kutã kãm ně hkêt ně. ãm akryk mar o kuhê. Mẽ kot tanhmã kãm ně nhũm kot ta pãnhã mẽ kãm tanhmã ně pymaj nhũm mẽ akryk mar o kuhê ně tanhmã kutã kãm ně hkêt ně. Hãmri nhũm tee ri mẽ omu hãmri ně myja ã ihkra xi ně akupỹm ho mex. Hãmri ně hano nhũm ma akupỹm mex ně hkĩnh ně ma tẽ. ⁵Hãmri nhũm Jejus mẽ kãm:

—E mẽ inhma. Xã koja mẽ akra sap ã mẽ apê ahkrehti xupỹm kãm tẽm ka mẽ ãm omu ně arĩgro mex jamãr pẽ tokyx ho axãpir kêt ně? Nã kot kaj mẽ ho axãpir kurê kumrêx. Rỹ koja akrit mõx gyw mã axã xat ka mẽ omu ně ãm omu ně arĩgro mex jamãr pẽ tokyx hkaxàr kêt ně? Nã kot kaj mẽ hkaxàr kurê kumrêx. Na htem sap ã tanhmã mẽ ho mex to ho pa. Mẽ panhõ arĩgromnu htã pu htem hã tanhmã mẽ ho mex to. Jakamã na pa ã hã myta ho mex kurê kumrêx aně ně ri arĩgro mex jamãr kêt ně. Aně.

⁶Nhũm pre ã Jejus mẽ kãm amnhĩ jarẽnh aně nhũm mẽ kuma nom kutã kãm mẽmoj jarẽnh kêt ně. Ra kot akupỹm ho mex jakamã nhũm mẽ tanhmã hã kãm ně hkêt ně kuhê.

Mê pahte amnhĩ to hkryre hã mẽ pajarênh

Matêwre 23.6-14; Rukre 6.32-36; mãânên Xiakre 4.10; Wam Pêtre 5.5-6

7Hãmri nhũm mẽ apkur kaxyw mẽ hkrĩ xà hã hkrĩ hpa. Nhũm mẽ hkwyjaja hkwyjê pê amnhĩ to wa nẽ mẽ hkrĩ xà mex kãm hkrĩ hpa. Hãmri nhũm Jesus ja hã mẽ omunh o xa nẽ axte mẽ kãm mẽmoj jarê. No ãm mẽmoj tă kuxi nẽ mẽ kãm awjarê nẽ mẽ kãm:

8—Nà koja mẽ axpên mã mẽhõ rer kaxyw nẽ amnhĩ wỳr mẽ atã karõ. Mẽ ate kutã axàpkur kaxyw. Hãmri kêr ka mẽ hwỳr mra nẽ axàpkur kaxyw nẽ kupĩp kãm akrĩ kurê kumrêx. No kot kaj mẽ kêp amnhĩ to wa nẽ mẽ hkrĩ xà mex pytã nẽ hã akrĩ nhũm ra kot amnhĩ to rax xwỳnhjê hõja hapu hã mẽ akõt tẽn axà. 9Hãmri nhũm ixkre nhõ dõn kot amnhĩ wỳr mẽ awỳr xwỳnhhta mẽ hkrĩ xà mexta ã mẽ awỳ nẽ mẽ amã: “Kwa mẽ atõ kànhmã xa nẽ kãm mẽ hkrĩ xà kaprã.” Anê. Hãmri ka nhãm xa nẽ kãm anhỳr xàta gõ. Hãmri nẽ apijaàm kãm hpãnhã kupĩp kãm nhỹ. 10Ja pymaj kêr ka mẽ kupĩp kãm akrĩ kurê kumrêx. Kê ixkre nhõ dõnja tee ri ja hã mẽ apumu nẽ mẽ amã: “Tk. Kwa ixkrãmnhwỳjaja. Mẽ kupĩp kãm akrĩ hkêt nẽ. Kwa mẽ mra nẽ jar mẽ hkrĩ xà mex ã mãn akrĩ.” Anê hãmri nhũm ja mẽ amã mex nẽ. Nhũm mẽ piitã kot mẽ ato mex ã mẽ atã omu ka mẽ ajaxwỳja amnhĩ tă omu nẽ akĩnh nẽ ajamakêtkati nẽ akrĩ.

11—Nẽ koja mẽhõ te amnhĩ to rax o hkwyjê jakrenh pyrãk o amnhĩ nhĩpêx o ri pa hãmri nhũm Tĩrtũm ja hã omu nẽ tanhmã hã ho. Hãmri nhũm ra amnhĩ to grire hã amnhĩ pumunh o ri pa nẽ rĩ amnhĩ pumu. Nom koja mẽhõ amnhĩ to rax o hkwyjê jakrenh pyrãk o amnhĩ nhĩpêx o ri pa hkêt nhũm Tĩrtũm ja hã omu hãmri nẽ tãm amnhĩm kot amnhĩ to rax xwỳnh ã harê. Anê.

Mê pahte mẽ kêp amrakati xwỳnhjê ho mex ã mẽ pamã karõ

12Nhũm pre ã Jesus mẽ ahkre anê hãmri nẽ hpãnhã mẽ apkur xà hã ixkre nhõ dõnja mã kapêr nẽ kãm:

—Nà na ka hte amnhĩ wỳr akwỳjê pix wỳ. Atõjê hwỳ nẽ akrãmnhwỳjê hwỳ. Nẽ mẽ hikàxpore rũnh xwỳnhjê hwỳ. Nom nhỹrmã mẽ kot amnhĩ xwar amnhĩ nhõrkwỹ hwỳr awỳr pix kaxyw na ka hte ã amnhĩ wỳr mẽ hwỳr anê. 13No kêt amnhĩ wỳr mẽ no kre xwỳnhjê mãn wỳ. Nẽ mẽ hyk o mẽ pa xwỳnhjê mãn wỳ. Nẽ mẽ hkrã pipãnh puro xwỳnhjê mãn wỳ. Nẽ mẽ hpigêx tỳx xwỳnhjê mãn wỳ. Nẽ mẽ hirot nẽ àpênh kêt xwỳnhjê mãn wỳ. Kêr ka amnhĩ wỳr jajê mãn wỳ kê mẽ awỳr mra nẽ akutã apku. 14Mo mẽ kot amnhĩ xwar awỳr kaxyw mẽ õ mẽmoj? Mẽ kêp amrakati. Tã kot kaj mãmrĩ amnhĩ wỳr mẽ awỳ nhũm Tĩrtũm mẽ hã apumu hãmri nẽ nhỹrmã kot akupỹm mẽ ho htĩr xà hã arĩgrota ã mẽ hã amã mẽmoj mex gõ nẽ ato mex nẽ. Hãmri ka akĩnh nẽ. Anê.

Tĩrtũm kutã mẽ paxàpkur xà maati jarẽnh

Matêwre 8.11, 25.1-10, 26.29; mããnẽn Apokarip 19.9

15Hãmri nhũm mẽ apkur kaxyw hkrĩ pa nhũm Jejus nhĩhkô hã mẽ apkur o mẽ krĩ xwỳnhjê hõja tanhmã Jejus mã kapẽr to nẽ kãm:

—Hêxta waa nẽ. Kot puj mẽ nhỹrmã Tĩrtũm nhõ krĩ hwỳr api nẽ kutã paxàpkur o pahkrĩ nẽ pahkĩnh tỳx kumrẽx. Anẽ.

16Hãmri nhũm kuma nẽ kê axte mẽ ahkre. Mẽ kot Tĩrtũm kutã apkur kaxyw kot amnhĩ wỳr mẽ hwỳrta ã nhũm mẽ ahkre. No ãm hã kuxi nẽ tanhmã mẽ kãm ujarẽnh to nẽ mẽ kãm:

—Koja mẽhõ amnhĩ wỳr mẽ ho ohtô nẽ mẽ kot kutã mẽ apkur mex kaxyw mẽ kuwỳ. 17Hãmri nẽ mẽ hwỳr kãm àpẽnht xwỳnh mẽ nẽ kãm: “E ma tẽ nẽ mẽ kãm awjarẽ kê mẽ tokyx mra pa mẽ apku.” Anẽ 18Hãmri nhũm kuma nẽ ma mẽ hwỳr mẽ kãm ujarẽnh o tẽ. Hãmri nẽ wamta mã anẽ nhũm kuma hãmri nẽ hitõt nẽ kãm: “Nà kot paj hwỳr ixtẽm kêt nẽ. Na pa ham amnhĩm pika hkwy japrô. Jakamã kot paj ma hwỳr tẽ nẽ ixprĩ hã omu mãn. Kwa kêr ka kãm ijarẽ kê ixte tanhmã hã nẽ xà hkôt ã ixte amnhĩ nhĩpẽx anhỹrja mã hamaxpẽr kêt nẽ.” Anẽ.

19—Hãmri nhũm kuma nẽ hpãnhã nhãm ja wỳr tẽ nẽ kãm awjarẽ nhũm kuma nẽ haxwỳja hitõt nẽ kãm: “Nà kot paj hwỳr ixtẽm kêt nẽ. Na pa ham amnhĩm môx o 10 nẽ haprô. Jakamã kot paj ma hwỳr tẽ nẽ ixprĩ hã ri omu mãn. Kwa kêr ka kãm ijarẽ kê tee ri tanhmã hamaxpẽr to hkêt nẽ. Ixte tanhmã hã nẽ xà hkôt ã ixte amnhĩ nhĩpẽx anhỹr kêt.” Anẽ.

20—Hãmri nhũm kuma nẽ hpãnhã ma ihõta wỳr tẽ nẽ kãm awjarẽ nhũm kuma nẽ haxwỳja hitõt nẽ kãm: “Nà kot pa hwỳr ixtẽm kêt nẽ. Na pa kormã ham ixprõ. Kormã ixprõ nyw nẽ inhmã rer prãm kêt jakamã kot paj ma hwỳr ixtẽm kêt nẽ.” Anẽ.

21—Hãmri nhũm kãm àpẽnht xwỳnhhta tee ri mẽ kuma nẽ awjanã nẽ ma akupỹm tẽ. Kot ma mẽ hwỳr mẽnht xwỳnhhta wỳr ma akupỹm tẽ nẽ kãm mẽ harẽ. Hãmri nhũm tee ri mẽ harẽnh ma nẽ mẽ kamã gryk nẽ. Hãmri nẽ hpãnhã mẽ kêp amrakati xwỳnhjê hwỳr kãm àpẽnht xwỳnhhta mẽ. Mẽ hkrã pipãnh puro xwỳnhjê hwỳr kumẽ. Nẽ mẽ hpigẽx tỳx xwỳnhjê hwỳr kumẽ. Nẽ mẽ hiroto nẽ àpẽnht hkêt xwỳnhjê hwỳr kumẽ nhũm ma mẽ kãm ujarẽnh o tẽ. Hãmri nẽ amnhĩ kôt mẽ kuwỳ nhũm mẽ kuma nẽ wamtajê rom hkôt mrar kurẽ kumrẽx. Hãmri nẽ agjê nẽ apkur kaxyw mẽ hkrĩ xà kamã hkrĩ hpa. 22Hãmri nhũm kãm àpẽnht xwỳnhja õ patrãw wỳr tẽ nẽ kãm mẽ harẽ nẽ kãm: “E ate mẽ hã karõ xàta kôt na mẽ ra hkrĩ hpa htã arĩ mẽ hkrĩ xà hkwy hkapyr.” Anẽ.

23—Hãmri nhũm kuma nẽ kãm: “Hêxta waa nẽ. Kêt ãm mẽ hkrĩ xàta hipu mex ronhỹx pa omu nẽ ixkĩnh nẽ. No ãm kormã piitã hipu hkêt. Kwa ma krĩ pu hã ri mẽ hapẽr o mra. Nẽ nhỹri mẽ hkwyjê pumu nẽ mẽ

haprô nê man amnhĩ kôt mẽ o mra kê mẽ hkrĩxà ho hipu hpa. 24No kêt wam ixte amnhĩ wỳr mẽ hwỳr xwỳnhhtaja. Mẽ hitôt xwỳnhhaja kot paj axte amnhĩ wỳr mẽ hwỳr kêt nê.” Anê. Ǻ mẽ ujarênh kot anhỳr. Na hte Ǻ Tĩrtũm amnhĩ wỳr mẽ piitǺ mẽ hwỳr anê. Anê.

Mẽ pamǺ Jejus kĩnh tỳx Ǻ mẽ pamǺ karô

Matêwre 10.37-38; Makre 8.34; Rukre 9.23-25; JuǺw 12.26

25TǺ nhũm Jejus mẽ ôrkwỳ rũm kato nê kormǺ Jerujarê hwỳr mō nhũm mẽ hohtô rax nê hkôt mō. HǺmri nhũm Jejus xa nê mẽ ho hakêx nê mẽ omu nê mẽ kǺm:

26—E kot ka mẽ atō amǺ ixkôt amnhĩ xǺm prǺm nê Ǻ amnhĩ nhĩpêx anê. Nê amǺ atō nê atōx nê anhĩpêêxǺ nê akatorxǺ japê htỳx tǺ kêr ka amǺ ixkĩnh tỳx o wa mẽ hakrenh pa. Nê amǺ aprô nê akrajê japê htỳx tǺ kêr ka amǺ ixkĩnh tỳx o wa mẽ piitǺ mẽ hakrenh pa. Nê amǺ ixkĩnh tỳx o amǺ amnhĩ japê jakre. Kêr ka mẽ atō ixkôt amnhĩ xǺm kaxyw nê Ǻ amnhĩ nhĩpêx anê.

27—Koja mẽ ixpĩ pa mẽ anê ty. TǺ mẽ ate ixkôt amnhĩ nhĩpêx o mẽ apa xwỳnhhaja. Koja mẽ ixtǺ mẽ apar mǺ tǺ kêr ka mẽ amǺ ixkĩnh tỳx o mẽ umaj ixkaga hkêt nê. KwǺr mẽ mǺmri tanhmǺ ixtǺ mẽ ato. Kot kaj mẽ nhỹrmǺ Tĩrtũm mẽ wa ixri axte amnhĩ xǺ kamǺ ajamak kêt nê atĩr tũm nê amex rǺhǺ apa ho apa. Nom kot kaj mẽ ixkĩnhǺ jar pika ja kamǺ amǺ amex nê apa hprǺm xǺj ixkaga hǺmri nê nhỹrmǺ wa ixri atĩr tũm nê apa hkêt nê. Anê.

Mẽ pahte amnhĩ kukamǺ pajamaxpêr mex Ǻ mẽ pamǺ karô

28Nhũm Jejus arĩ mẽ kǺm kapêr nê mẽ kǺm:

—Kwa kêr ka mẽ ixkôt amnhĩ xunhwỳr kaxyw nê amnhĩ kukamǺ ajamaxpêr mex nê. Na htem amnhĩm ôrkwỳ rũnh nhĩpêx kaxyw hǺmri nê hkukamǺ hamaxpêr mex nê. Nê kaxyw krax mǺ kuhê xǺ hkukamǺ hamaxpêr. Nê kaxyw kỳx pê kǺm hikwỳ xǺja kukamǺ hamaxpêr. Nê ôkwaêja kukamǺ hamaxpêr. Nê hǺ pôja kukamǺ hamaxpêr. Ǻ na htem amnhĩm ôrkwỳ rũnh nhĩpêx kaxyw hkukamǺ hamaxpêr mex anê. 29Nom kot kaj mẽ hkukamǺ ajamaxpêr mex kêt nê Ǻm kaxyw pĩ ho grêre nê hakǺ. Rỳ ra hǺ axǺpênh rax kurê ra amǺ ho anhỳr kaga nê hkaga hpa nê hatur xǺm mẽnh kêt nê. HǺmri nhũm mẽ hkwỳjaja hǺnh mra nê omu nê atǺ hpêr o axkê. 30Nê axpênh mǺ ri ajarênh o: “E ga mẽ ixkre mỳj pumu. Na pre hipêx xwỳnhhja hkurê kǺm kaga nê hipêx par kêt nê.” Anhỳr o axpênh mǺ ajarê. Ja pyrǺ nê kêr ka mẽ ixkôt amnhĩ xunhwỳr kaxyw nê amnhĩ kukamǺ ajamaxpêr mex nê. Nê ajamaxpêr o: “NǺ mẽ kot Jejus Ǻ tanhmǺ ixto htỳx tǺ kot paj hkaga hkêt nê. Kot paj hkôt amnhĩ nhĩpêx rǺhǺ ho ri ixpa.” Anhỳr o amnhĩ kukamǺ ajamaxpêr. HǺmri nê rĩ kormǺ ixkôt amnhĩ xǺm. No kot ka mẽ umaj

ixkaga hkukamã ajamxpêr hãmri nê ixkôt amnhĩ xãm kêt kurê kumrêx.

31—Nê koja krĩ hõ kamã pahihti nhõ pôristi xohtô nê. Nê kutã nhãm krĩ hõ kamã pahihti nhõ pôristija grêre. Tã nhũm wa hpijapu kaxyw nhũm krĩ hõ rũm pahihti nhõ pôristi xohtôja mẽ grêreta wỳr mra. Hãmri nhũm kutã krĩ hõ kamã mẽ ô pôristi grêre nhõ pahi nhỹ nê tee ri mẽ amnhĩ kukamã hamaxpêr nê hamaxpêr o: “Kwa koja apu krĩ hõ rũm pôristi xohtô raxja nhũm inhõ pôristi grêreja mẽ axpên kutã kuhê nê axpu nhũm mẽ inhnê mẽ himex. Nà inhõ pôristi grêre kênã.” Anhỹr o hamaxpêr.

32—Hãmri nê pahi hõta wỳr ô kôwenatô mẽ. Kormã krĩ hõ rũm mẽ hohtôtaja mẽ htêp kêt nhũm mẽ kutã kumẽ nhũm ma mẽ kutã tẽ. Hãmri nê awry hã mẽ hkaxpa nê mẽ ô pahihti mã kãm: “E na mẽ inhõ pahihti akutã inhmẽ pa tẽ. Na inhmã: ‘Ma tẽ nê mẽ kãm awjarẽ. Kot puj pêr mẽ papijapu hkêt nê. Kwarĩ. Kot puj mẽ tãm axpên xunhwỳ.’ Anhỹr o kapêr nê mẽ akutã inhmẽ pa tẽ.” ã mẽ ujarênh kot anhỹr. Ja pyrã nê na htem mẽmoj kukamã hamaxpêr mex nê rĩ kormã tanhmã amnhĩ nhĩpêx to.

33—Tã kêr ka mẽ atõ amã ixkôt amnhĩ xãm prãm hãmri nê pahita pyrã nê amnhĩ kukamã ajamaxpêr tỳx nê rĩ kormã tanhmã amnhĩ nhĩpêx to. Kêr ka ate inhmã tanhmã amnhĩ nhĩpêx to ho apa kaxyw hãmri nê inhgryk ã te ate amã amnhĩ japê hkêt pyrãk o mẽmoj piitã mã anhĩhkra karo pyrãk o amnhĩ nhĩpêx. Hãmri nê rĩ kormã ixkôt amnhĩ xãm. 34-35No kot kaj mẽ amnhĩ kukamã ajamaxpêr kêt nê atỳx ri ixkôt amnhĩ xunhwỳr japêr. Hãmri nê mẽmo arĩgro hã mẽ kot ixtã tanhmã mẽ ato xwỳnhjê pymaj ra ixkaga mã. Hã kot kaj mẽ te mẽ ate kaxwa punu pyrãk o amnhĩ nhĩpêx. Kaxwaja mẽ apkur xà kamã mex. Na htem amnhĩm ho ô xành nê kuku. Nom koja mẽhõ kamã pika hkwy mẽ nê ho ahkà hãmri tanhmã kot mẽ ho nê akupỳm ho mex? ãm mẽ kot hkapĩr pix kaxyw koja mex. Ja pyrã nê kot ka mẽ atõ ate inhmã tanhmã amnhĩ nhĩpêx to ho apa hã amnhĩ jarênh tã gaa nê amã ixkôt amnhĩ nhĩpêx prãm nõkati. Hãmri nê ra te ate kaxwa punu kapĩr mã tãmta pyrãk. E kwa mẽ mẽmoj tã ixujarênhja ma nê mẽ urãk nê amnhĩ kukamã ajamaxpêr mex nê. Anẽ.

Ôwêhti pikunor jarênh

Matêwre 18.12-14

15 ¹Tã nhũm mẽ kot pahihti mã hkwyjê pê kàxpore hkwy jamỳnh xwỳnhjê mẽ mẽ kot amnhĩ tomnuj xwỳnhjaja Jejus kapêr mar kaxyw hwỳr mra. ²Hãmri nhũm Parijew nhõ xwỳnhjê mẽ mẽ kot Tirtũm kapêr tũm o mẽ ahkre xwỳnhjaja mẽ hã Jejus pumu. Hãmri nê kê wem axte axpên mã tanhmã ho kapêr punuj to nê axpên mã:

—Tk. Kwa na hte mǔjti axtem nē mẽ kot amnhĩ tomnuj xwỳnhjaja amnhĩ wỳr mẽ kuwỳ nē tōhã mẽ kutã apku. Kwa mẽ kot amnhĩ tomnuj xwỳnh kēnã kot kêt mẽ kutã apkur o pa. Anē.

3Hāmri nhũm Jejus amnhĩ tã mẽ kuma nē tanhmã mẽ kãm kapēr to. Nom hprĩ hã mẽ kãm kapēr kêt nē. Kê ãm amnhĩ tã kuxi nē mẽ kãm ôwêhti pikunor jarē nē mẽ kãm:

4—Koja mēhō ô ôwêhti xohtô nē. Nē ma nhỹri hamār o pa. Hāmri nhũm pyxire nē hkwỳ kaga nē ma nhỹhỹm ahte tē nē akunok. Hāmri nhũm ô dōnja ma kot akupỹm piitã o mōr kaxyw hkwỳ ho pikuprōnh pa hāmri nē tee ri hkwỳ kaêx ã pikunor xwỳnhhta japêr. Hāmri nē ma hkwỳ ho mō nē nhỹri kure. Kot nhỹri kutêp apkur o ri pa kaxyw kure hāmri nē ma akupỹm pikunor xwỳnhhta japêr o tē. Hāmri nē hapêr ryy nē nhỹri hwỳr kato. 5Nē omu nē hkĩnh tỳx nē. Hāmri nē amnhĩ kre hã kumē nē ma akupỹm hkwỳ hwỳr o tē. 6Hāmri nē mẽ ãhkô hã kumē nē hkĩnh nē hkrãmnhwỳjê ho akuprō nē ôrkwỳ htã mẽ ôrkwỳ xwỳnhjê ho akuprō nē mẽ kãm: “Kwa na pre ixpê ixkriita ô akunok. Pa pre hapêr kãm ixihitỳx nē kãm ixkato nē omu nē ixkĩnh nē. Jakamã kwa wem mãânēn inhỹ hã akĩnh.” Anē.

—Ã mẽ ujarēnh kot anhỹr. 7Ja pyrã nē koja mẽ kot amnhĩ tomnuj tỳx xwỳnhjê hō tee ri amnhĩ pumu nē kot amnhĩ tomnuj kaga nē Tĩrtũm kôt amnhĩ xãm. Hāmri nhũm kaxkwa kamã mẽ piitã ja hã omu nē hkĩnh tỳx nē. Te ho my kot ôwêhti hpikunor xwỳnh mã kator nē hkĩnh tỳxta pyrãk. Na hte Tĩrtũm tãm mẽ kot amnhĩ nhĩpêx o mẽ pa xwỳnhjê pumu nē hkĩnh nē. Tã koja mēhō kot amnhĩ tomnuj tỳx tã ã amnhĩ nhĩpêx anhỹrja kaga nē Tĩrtũm kôt amnhĩ xãm hāmri nhũm amnhĩ tã omu nē hkĩnh tỳx nē. Jakamã na pa hte mẽ akurom ã mẽ kot amnhĩ tomnuj xwỳnhjê hkôt Tĩrtũm kapēr o mẽ ahkre rãhã ho ri ixpa. Anē.

Nhũm pre ã Jejus mẽ kot tanhmã ho kapēr punuj to xwỳnhjê mã amnhĩ jarēnh anē.

Kàxpore pikunor jarēnh

8Nhũm Jejus arĩ mẽ kãm awjarē nē mẽ kãm:

—Nē ja. Koja mēhō ni hikàxpore kêp 10. Àpênh o arĩgro pê 10 pãnhã kàxpore kêp 10. Tã ho pyxi nē ho akunok. Hāmri nē tee ri hapêr nē hkaprĩ nē. Hāmri nē kanê hpôk nē hitom kapōnh pê hprĩ hã hapêr o ri pa nē kãm kato. 9Hāmri nē kupy nē hkĩnh nē hkrãmnhwỳjê ho akuprō nē ôrkwỳ htã mẽ ôrkwỳ xwỳnhjê ho akuprō nē mẽ kãm amnhĩ jarē nē mẽ kãm: “Xê na pre ixpê ixkàxpore hōta akunok pa tee ri hapêr tã akupỹm kãm ixkato nē kupy nē ixkĩnh nē. Jakamã xê wem inhỹ hã mãânēn akĩnh.” ã mẽ ujarēnh kot anhỹr.

10—Ja pyrã nē koja mẽ kot amnhĩ tomnuj xwỳnhjê hō pyxire nē amnhĩ tomnuj kaga nē ixkôt amnhĩ xãm. Hāmri nhũm kaxkwa kamã mẽ

piitã ja hã omu nê hkĩnh nê. Te mêhõ ni kot kàxpore pikunor xwỳnh mã kator nê hkĩnh ta pyràk. Anê.

Mê hkra pikunor jarênh

11 Nhũm Jejus arĩ mê ahkre ho xa. Tĩrtũm kãm mê piitã mê hapê htỳx ã mê ahkre ho xa. No kê ãm hã kuxi nê kê we tanhmã mê kãm ujarênh to nê mê kãm:

— Nê koja mêhõ hkra my wa axkrut. 12 Hãmri nhũm kot hapu õ papaj wỳr tẽ nê kãm: “E papaj. Ot pa awỳr tẽ. Kot kaj nhỹrmã ty pa wa amỳr pê akukrêx o ixarĩk. Jakamã e kwa tokyx atĩr ri amnhĩ kamã wa inhmã ho axkjê pa inhõ ho amnhĩptar kurê kumrêx nà?” Anê. Hãmri nhũm kuma nê wa kãm hikukrêx o axkjê. Kot wa mã hkwỳ gõ nê kot hapu mã hkwỳ gõ. 13 Hãmri nhũm kot haputa ãm ri hipêêxã hkõt pa hkrãnre hãmri nê kot kãm hikukrêx nhõr jamỳnh pa nê ma nhỹhỹm o mõi nê ho wênê hpa. Hãmri nê hpãnhã kàxpore jamỳ nê ma nhỹhỹm mõi. Nhỹhỹm awry hã pika hõ hwỳr ma mõi. Mõi hãmri nê krĩ hõ kamã htỳx ri tanhmã amnhĩ tomnuj to ho ri pa. Hãmri nê gaa nê ra mê hkuprỳjê hã kàxpore ho hapêx pa. Nê kagõxyhti hã ho hapêx pa. Nê gaa hãmri nê hikàxpore hkêt nê ri pa.

14— Rõm nhũm pikaja kamã mê hã na wrỳk kêt ry rax nê. Nê gaa nhũm mê hpur kãm mê kêp mê apkur xã hã mõi ja hapêx pa. Jakamã nhũm mê hkra kot haputa kêp amrakati nê kãm prãm tỳx nê ri pa. Hãmri nê tee ri amnhĩ kukamã hamaxpêr. 15 Hãmri nê amnhĩ to krĩ nhõ xwỳnhjê mar o ri pa. Kot mê kãm tanhmã ãpênh to nê hpãnhã apkur kaxyw. Hãmri nhũm mêhõ kot kãm hkrit hagrõ jamãr kaxyw hã kumê nhũm ma hwỳr tẽ nê kãm hamãr o pa. Nom kot kãm hamãr o pata pãnhã ãm kãm mêmõj nhõr kryre nhũm arĩ kãm prãm tỳx kumrêx.

16 Nê tee ri kot hagrõ kutã õta kur prãm nê tee ri omunh o pa. 17— Nê gaa hãmri nê tanhmã hamaxpêr to. Nê tee ri kot tanhmã amnhĩ tomnuj toja ã amnhĩ pumu nê hamaxpêr o: “Hêxta waa nê. Mãn mũtar inhõ krĩ kamã inhõ papaj mã mê ãpênh xwỳnhjaja ixrom apkur mex o pa. ãpkur mex nê nhũm mõi jakrêx prãr rũnh tã pa jar mê hkĩnhã prãm xaj ra ixtyk o mõi. 18 Nã kot paj ma akupỹm mõi. Hãmri nê inhõ papaj pumu nê ã kãm amnhĩ jarênh anê nê kãm: ‘Kwa Papaj. Na pa pre ixpê akra hã amnhĩ tomnuj tỳx kumrêx nhũm ja apê omnuj nê. Nhũm Tĩrtũm pê ja omnuj nê. 19 Jakamã na pa ixpê akra hã amã amnhĩ jarênh ã ixpijaãm nê. Ixte tãm kêt kumrêx. Jakamã kwa xã kot pa amã mêmõj tã ixãpênh o ri ixpa ka hpãnhã inhmã inhõ pa apku nã?’ Anhỹr o kot pa kãm amnhĩ jarê. Nã kot paj anê.”

20— Anhỹr o amnhĩ kukamã hamaxpêr hãmri nê ma akupỹm mõi. Mõi nê ra hpõx o mõi. Nê kormã amỹm mõi ri nhũm õ papaj hwỳr rĩt nê omu nê amnhĩ kra hã omunh kurê kumrêx nê hkĩnh nê ma kutã hprõt

ně tě. Omu ně kām hkaprī ně. Ně hwÿr hprôt ně hkaxpa ně kahti hkôt kumÿ. 21Hāmri nhūm kām amnhī jarē ně kām: “Kwa papaj. Na pa pre amnhī tomnuj ně nhūm ja apē omnuj ně. Ně Tirtūm pê ja omnuj ně. Jakamā ixte ixpê akra hā amā amnhī jarēnh ā xpijaām. Ixte tām kêt kumrêx.” Anē. 22Nom kormā kām amnhī jarēnh par kêt ri nhūm hipêêxà kām mẽ àpēnh xwÿnhjê mã akir ně mẽ kām: “E kwa mẽ atō ma tě ně kām ê mex ò py ně akupÿn ixkrata wÿr ho aprôt ně kām haxà. Ně hpar kà ně ìhkra kamā kàx ně amnē kām hamÿ ně ho aprôt. 23Ně



Rukre 15.11-24

akupÿm aprôt ně môx kra htwÿm mexta ò pumu ně unē ně apī. Ně mẽ ho anē pu mẽ ixkra hā pahkīnh ně apku. E mẽ amnhī prêprêk ně tokyx ā amnhī nhīpêx anē. 24Na pre ma ixpê mōr o te ixpê htyk pyrāk. Tā akupÿn mō ně ixwÿr pōj ně te akupÿm inhmā htír pyrāk. Jakamā e mẽ tokyj.” Anhÿr jakamā nhūm mẽ hā môx kra pī ně ho anē ně hkīnh ně hā apkur o hkrī.

25—Rôm nhūm hkra kot wata kormā pur kām htÿx àpēnh o xa. Àpēnh o ām tā akupÿn hpôx o tě. Hāmri ně amnhī kukamā mẽ kot ri mēmoj tatak ně mẽ grer ma. 26Hāmri ně tee ri hamaxpêr o tě ně òrkwÿ hwÿr pōj ně kormā kapem xa ně mẽ hā mẽ àpēnh xwÿnhjê hō kukja ně kām: “Kwa mēmoj tā na ka wem ā akīnh rax anē?” 27Anē nhūm kām: “Nà mēhō hkêt. Atō na akupÿn pōj nhūm anhīpêêxà omu ně hkīnh tÿx ně. Ně mẽ inhmā anē pa mẽ hā môx kra htwÿm mexja pī ně hā ho anē ně hā ixkīnh ně hkur o ixkrī.” Anē. 28Hāmri nhūm tee ri htō jarēnh ma ně gryk tÿx ně. Hāmri ně gryk xàj kapem hkuk punuj o mẽ omunh o xa ně mẽ hwÿr àr kêt ně. Hāmri nhūm hipêêxàja tee ri omu ně hwÿr kato ně tee ri kot mẽ hwÿr ho àr kaxyw ho anhÿr kaprÿ. 29Hāmri nhūm kām: “Tk. Kwa na pa hte amā ixàpēnh rūnh rāhā ho ri ixpa hā ra ixtā amgrà xohtō ně. Ně aa akapêr nhīrôp tanhmā ixām to hkêt. Tā ka hte ixpumunh ně akīnh ně ixtā mēmoj tōx pīr kêt ně. 30Tā nhūm akra kot haputa apē akukrêx kwÿ jamÿnh pa ně ma o mō ně axtem ně mẽ hkuprÿjê mã òr par tā akupÿn mō ně pōj. Ka omu ně akīnh ně hā môx kra twÿmta pī. Nà kot paj mẽ awÿr ixàr kêt ně.” Anē.

—Hāmri ně gryk tÿx ně xa. 31Hāmri nhūm ò papaj tee ri kuma ně kām: “Kwa nà ri ā akapêr anhÿr kêt ně. Inhmā ajapê kēnā. Na ka hte ixkôt apa ho apa rāhā ně. Ně ixkukrêx piitā kēp anhō. 32No atōja na

pre te ixpê htyk pyræk tã arĩ hťır. Nê te pikunor pyræk tã te ra akupým kator pyræk jakamã na pa omu nê ixkĩnh nê. Nê inhmã hapê ho te mãânên inhmã ajapê pyræk.” Anê.

— ã mẽ ujarênh kot anhър. Ja pyrà nê koja mẽhõ te kot amnhĩ tomnuj tỳx o ri pa htã amnhĩ kaxyw Tirtũm mã hamaxpêr nê amnhĩ to kuwỳ nê hkõt amnhĩ xãm. Hãmri nhũm amnhĩ tã omu nê hkĩnh nê. Nê kãm hprãm nê. No mẽ kajaja. Mẽ apê Parijew nhõ xwỳnhjê mẽ Tirtũm kapêr tũm o mẽ ahkre xwỳnhjaja. Na ka htem mẽ kot amnhĩ tomnuj xwỳnhjaja kot Tirtũm kapêr mar o kuhê hã mẽ omu nê Tirtũm kĩnhã akĩnh kêt nê. Nê te hkra kot wata jamaxpêr pyræk o ajamaxpêr nê tee ri ja hã mẽ omu nê mẽ kamã agryk nê. Nê mẽ amã mẽ hprãm nõkati. Anê.

Mẽ panhõxỳ nê Jejus kot mẽ pamã karõ

16 ¹Tã nhũm kê Jejus axte hkõt ri mẽ pa ho mẽ pa xwỳnhjê jahkre. No ãm mẽmoj tã kuxi nê mẽ kãm tanhmã ujarênh to nê mẽ kãm:

— Nà koja mẽhõ hikàxpore rax xwỳnhja kãm àpênh xwỳnh mã mẽmoj to wênê ho pa kaxyw ãm. No nhũm kãm ho mex kêt nê. Axtem nê kêp amarĩ mẽ kãm mẽmoj to fiat par o mõ. Hãmri nhũm ra mẽhõ kot ã amnhĩ nhĩpêx anhър ã omu nê ma õ patrãw wỳr tẽ nê kãm harê. ²Hãmri nhũm tee ri harênh ma nê amnhĩ wỳr hã karõ. Hãmri nhũm hwỳr tẽ nê axà nhũm kãm: “Pa. Kwa xà ãm hãmri na mẽ inhmã ajarê? Kwa nà mon ka ri axtem nê ã ixpê inhõ mẽmoj nhĩpêx anê? E inhmã ate mẽ kãm ho fiat par xwỳnhjê nhĩxi hã kagà nê inhmã agõ hãmri nê ma tẽ. Kot ka axte inhmã axàpênh kêt nê rĩ amnhĩ pumu.” Anê.

³— Hãmri nhũm kuma nê tee ri amnhĩ kukamã hamaxpêr nê hamaxpêr o: “Hêxta waa nê. Tanhmã kot paj amnhĩ to? Ixihtỳxre hã kot pa mẽhõ mã pur ã apê. Nom inhmã amarĩ ri ixàhwỳr o ri ixpa hprãm kêt. Ixte amnhĩ kuk ã ixpijaàm.” Anê. ⁴Hãmri nê tanhmã amnhĩ kukamã hamaxpêr to nê hamaxpêr o: “Nà kot paj amnhĩ wỳr ixte mẽ kãm ho fiat xwỳnhjê hã karõ. Nê mẽ kãm mẽ õ kõõta ahpap mã hkamê kê mẽ ãm inhõ patrãw mã hkwỳ pix gõ. Kêr kê mẽ amnhĩ tã ixpumu nê kãm ixkĩnh nê. Hãmri nê inhõ patrãw kot ixkaga hã ixtã harênh ma nê ixkamã ukaprĩ japêr. Hãmri nê amnhĩ wỳr ixwỳ pa ahpỳnhã mẽ kutã ixàpkur o ri ixpa nhũm prãm ixpĩr kêt nê. Nà kot paj anê.” Anê.

⁵Hãmri nê amnhĩ wỳr mẽ hã karõ nhũm mẽ hwỳr mra. Nhũm mẽ omu nê ja mã kãm: “E tanhmã na ka pre inhõ patrãw pê mẽmoj to fiat to? E inhmã harê.” Anê. ⁶Hãmri nhũm kãm: “Na pa pre kêp orti hã à ho 100 nê ho fiat. Ota hã kagàta. Tã pa kormã kãm amnhĩrer kêt nê.” Anê nhũm kuma nê kãm: “Tõe ka inhma. Kot paj amã anhõ kõt o gri ka ãm kãm ho 50 pix nê agõ pa ixte anhõ kõt ho ijapêx par pyræk o anhĩpêx.” Anê. ⁷Hãmri nê hpãnhã nhãm ja mã kãm: “No ka. Tanhmã na ka pre

kêp mêmoy to fiat to?” Anê nhũm kãm: “Na pa pre kêp pãy hã xak o 1.000 nê ho fiat. Tã pa kormã hpãnhã kãm amnhĩrer kêt nê.” Anê nhũm kãm: “Tõe. Kot paj hãmri amã anhõ kõt o gri ka âm kãm ho 800 pix nê agõ pa ixte anhõ kõt ho ijapêx par pyrãk o anhĩpêx.” Anê. Nhũm ã mẽ hipêx anê. Hãmri nê hamaxpêr o: “E. Na pa mẽ kãm mẽ õ kõt o hkry pa. Koja mẽ amnhĩ tã kãm ixkĩnh japêr.” Anê.

8—Hãmri nhũm õ patrãwja ã kot mẽ hipêx anhỹr ã harênh ma nê kãm: “Tk. Kwa ate pa ixkukamã ajamaxpêr nê inhmã mêmoy to anhỹr mex kêt tã ka amnhĩ kukamã ajamaxpêr mex pê ã mẽ hipêx mex anê.” Anê. ã mẽ ujarênh kot anhỹr. Anê.

Nhũm pre ã Jejus mẽ kãm ujarênh anê. Hãmri nê mẽ kãm:

—Tã ja pyrã nê na hte mẽ kot Tĩrtũm kõt amnhĩ xunhwỹr kêt xwỹnhjaja âm amnhĩ pix kukamã hamaxpêr mex o pa. Jao amnhĩ kaxyw pix mã mẽ piitã tanhmã mẽ ho mex to ho pa. Mẽ kot amnhĩ tã mẽ omunh nê mẽ kãm mẽ hkĩnh nê amnhĩ xwar tanhmã mẽ ho mex to kaxyw nhũm htem ã amnhĩ nhĩpêx anhỹr o pa. Tã mẽ ate ixkõt amnhĩ xunhwỹr xwỹnhjaja. Tĩrtũm kot tanhmã mẽ ate amnhĩ kwỹjê ho mex to hã amnhĩm mẽ ajarênh kaxyw kêr ka mẽ amnhĩ mẽ mẽ piitã mẽ hkukamã ajamaxpêr mex nê. Pê tanhmã mẽ ho mex to ho ri apa. ã mẽ ate amnhĩ nhĩpêx anhỹrja na mex. Nom kormã mẽ ate ã amnhĩ nhĩpêx anhỹr kêt.

9—Hêxta waa nê. Mon ka htem mẽ urãk nê ã axpên to mex anhỹr kêt nê? Kwa mẽ àpênh xwỹnhhta kot amnhĩ nhĩpêx pyrã nê tanhmã axpên to mex to o ri apa hkêt wehe. Jao akukrêx nê akàxpore ho anhõxỹ hkêt nê. Kêr ka nhỹrmã ty nê Tĩrtũm wỹr api nhũm ja hã mẽ ato mex rax nê. Te ho kot õ patrãw mã àpênh xwỹnhhta kot tanhmã mẽ ho mex to xwỹnhjê hwỹr mrar nhũm mẽ kot amnhĩ xwar tanhmã ho mex tota pyrãk.

10-11—Na hte Tĩrtũm tanhmã mẽ pakute hã mẽ pahpumunh mex nê. Koja mẽ amã mêmoy gõ ka mẽ kãm hprãm xà hkõt ho anhõxỹ hkêt nhũm ja hã mẽ apumu nê axte mẽ amã mêmoy gõ. Nom hpãnhã mẽ amã õr rax o wamta jakre nê kugõ. Nom kot ka mẽ ri mêmoyta o anhõxỹ ho ri apa nhũm tee ri ja hã mẽ apumu nê axte mẽ amã mêmoy nhõr kêt nê. Koja mẽ amã mêmoy gõ ka mẽ ho anhõxỹ ho ri apa nhũm ja kêp homnuj nê.

12—Nê kot kaj mẽ jar Tĩrtũm kot mẽ amã mêmoy nhõr xwỹnhja ho anhõxỹ ho ri apa. Hã koja nhỹrmã kaxkwa kamã mẽ amã mêmoy mex nhõr kêt nê.

13—Nê kot kaj apyxi nê anhõ patrãw hamêxkrut nê arĩgro pyxi hã hamê wa kãm axàpênh o amỹkry hkêt nê. Kot kaj anê nê hõ gryk ã hõ kaga. Ja pyrã nê kot kaj mẽ jar pika ja kamã akàxpore nê akukrêx pix kukamã ajamaxpêr o ri apa hã kot kaj mẽ amã hapê htỹx nê mẽ kêp ho anhõxỹ ho ri apa. Nê akukrêx rax gryk ã Tĩrtũm kãm hprãm xà hkõt

akukrêx o tanhmã axpên to ajuta hto ho ri apa hkêt nê. Ja pymaj kwa kêr ka mê âm Tirtûm pix mã mân ajamaxpêr rãhã ho ri apa. Jao te akukrêx nê akàxpore mã axàmnhîx ri anhihkra karo ho ri apa pyrâk. Anê.

Nhũm pre ã Jejus mê ahkre anê. 14Hãmri nhũm Parijew nhõ xwỳnhjaja mar o kuhê. Na prem ra mê hikàxpore rax gryk ã Jejus kaga. Jakamã ã kot mê kãm kàxpore jarênh anhÿrja ma nhũm ja mê kêp omnuj nê nhũm mê hã hpêr o pikênh o kuhê. 15Hãmri nhũm amnhĩ tã mê kuma nê mê kãm:

— Nà na ka htem te mê ate tãm mê kot amnhĩ nhĩpêx xwỳnh pyrâk o amnhĩ nhĩpêx nom ri mê kãm amnhĩ to axêx o ri apa. No nhũm Tirtûmja kot tanhmã mê ate amnhĩ nhĩpêx to nê tanhmã mê ajamaxpêr to hkôt mê apumunh par. Nê hprĩ hã mê anhõxÿ hã mê apumu. Te mê ate tãm amnhĩ nhĩpêx pyrâk nom mê anhõxÿ kamã na ka htem apa. Mẽmoj te mex pyrâk nhũm htem omu nê mex ã hkamnhîx. No nhũm Tirtûm àhpumunh tÿx xà hkôt hprĩ hã mẽmojta pumu nhũm kêp omnuj nê. Mê akurom omnuj ã omunh kurê kumrêx. Na hte hprĩ hã mê ate amnhĩ nhĩpêx ã mê apumu. Anê.

Tirtûm kapêr aa hapêx kêt ã harênh

Matêwre 5.17-18

16Nhũm Jejus arĩ mê ahkre nê mê kãm:

— Nê na pre finat Mojesja kumrêx mê kãm Tirtûm kapêr kwÿ hã kagà. Tã nhũm hpãnhã Tirtûm nhÿ hã kapêr jarênh xwỳnh kwÿjaja mãânên mê kãm hkwy hã kagà. Nhũm prem kuma nê mê hkôt amnhĩ nhĩpêx o ri pa. Tã nhũm finat Juãw Paxisja mê hpãnhã kato nê Tirtûm kapêr o mê ahkre ho ri pa. Tã pa hpãnhã ho mê ajahkre ho ri ixpa nhũm mê ohtô nê ixkôt amnhĩ xunhwÿ nê kãm ixkapêr kôt pix mã amnhĩ nhĩpêx o ri pa hprãm nê.

17— Tirtûm kapêr tũmja mex o mex. Kojã aa hapêx kêt nê. Kojã nhÿrmã kaxkwa nê pika wa hapêx pa no nhũm Tirtûm kapêr tũmja aa hapêx kêt nê. Kojã rãhã ho rãhã nê aa ihkê ho mênh kêt nê. Anê.

Mê pahte axpên kaga hkêt ã mê pamã karõ

Matêwre 5.31-32, 19.9-12; Makre 10.2-12

18Nhũm Jejus arĩ mê ahkre nê mê kãm:

— Nê kêr ka mê aprõ kaga hkêt nê apa. Kot kaj mê hkaga nê hpãnhã nhãm hõ ho aprõ nhũm Tirtûm noo mã te ate wam aprõ kamã nhãm ho amnhĩkati pyrâk. Nhũm ja kêp omnuj nê. Rÿ ka ra mēhõ kot hprõ kaga xwỳnhta ka hpãnhã ho aprõ. Nhũm Tirtûm noo mã te ate wam mjên pê ho amnhĩkati pyrâk. Nhũm Tirtûm pê ja omnuj nê. Anê.

Hikàxpore rax xwỳnh mẽ kệp amrakati xwỳnh wa harênh

Rukre 6.20-26

19Nhũm Jejus arĩ mẽ ahkre kamã mẽ kãm awjarẽ nẽ mẽ kãm:

—Koja mẽhõ kàxpore rax xwỳnh ê mex pix kãm ri pa. Nẽ apkati mẽ apkur mex o pa. 20Nhũm amrakati xwỳnh pê Rajareja hkà nhyre nẽ arĩ pry kamã àhwỳr o hkrĩ. Nhũm htem hamỳ nẽ ma o pa nẽ hikàxpore rax xwỳnh nhõrkwỳ jakwakrem haxwỳ. 21Nhũm õ jakrêx kwỳ hkrêr prãm xàj hakwa krem àhwỳr o hkrĩ. Nhũm rop hwỳr mra nẽ hkà nhy kunhnwỳnh o kuhê.

22—Tã nhũm Rajare ty nhũm Tirtũm kapêr o mẽ wrỳk xwỳnhjaja hwỳr wrỳ nẽ ma akupỳm kaxkwa hwỳr hkarõ ho mỗ nẽ ho api. Hãmri nhũm kaxkwa kamã mẽ pahpãm Apraãw nhĩhkõ hã hkĩnh nẽ apkur mex o hkrĩ.

—Tã nhũm hikàxpore rax xwỳnhhta mããnẽnh hkõt ty. Nhũm hkwỳjaja hã akuprõ nẽ hã mur nẽ ma o tẽ nẽ haxà. 23Hãmri nhũm hkarõ ma mẽ kot amnhĩ xà htỳx kamã hamak tũm xà pê kuwy maatita wỳr ma mỗ. Nẽ kamã amnhĩ xà htỳx kãm hamak rãhã ho pa. Hãmri nẽ amnhĩ xà hã maj kànhmã rĩt nẽ kaxkwa kamã Apraãw pumu. Nhũm Rajare ra kuri mex nẽ nhỹ. 24Hãmri nhũm tee ri wa omu nẽ Apraãw mã akapêr nẽ kãm: “Kwa Apraãw. Kwa we ixkamã axukaprĩ nẽ ixwỳr Rajare mẽ kê ixwỳr tẽ nẽ ìhkrakrã ho gô htok nẽ ho inhõhto jakry. Na pa kuwy kamã amnhĩ xà htỳx kãm ijamak tỳx kumrêx.” Anẽ. 25Hãmri nhũm kuma nẽ kãm: “Tk. Nà kot pa awỳr mẽnh kêt nẽ. Na ka pre atĩr ri amex nẽ akĩnh nẽ ri apa. No nhũm Rajare akĩnhã hkà nhy rax nẽ amnhĩ xà htỳx kãm hamak rãhã ho ri pa. Tã ra jar inhĩhkõ hã hkĩnh nẽ pa. Ka pre kurom amex nẽ apa htã kot kaj hpãnhã amnhĩ xà htỳx kãm ajamak rãhã ho ri apa. 26Nẽ pahkaêx kãm ahkaprỳ griã. Jakamã nhỹhỹnh kot kêt awỳr rê? Ka ajaxwỳja nhỹhỹnh kot ka kêt mẽ ixwỳr rê?” Anẽ.

27—Nhũm ã kãm kapêr anẽ nhũm tee ri kuma nẽ kãm: “Kwa tô ma inhõ krĩ hwỳr mãn amẽ kê ma ixkwỳjê hwỳr wrỳ. 28O mũj arĩ inhõ krĩ kamã ixtõ kệp 5 nẽ arĩ htĩr nẽ pa. Kê wa mẽ kãm awjarẽ kê mẽ amnẽ kuwy hwỳr pa pymaj tokyx amnhĩ tomnuj kaga nẽ Tirtũm kõt mãn amnhĩ xunhwỳ



Rukre 16.19-31

ně hkôt ri amnhĩ nhĩpêx o pa.” Aně.

29—Hāmri nhũm Apraãw kām: “Nà pa mẽ hwỳr mẽnh kêt nê. Ra mẽ kuri Tĩrtũm kapêr jarênh xwỳnhjê mẽ Mojes kot Tĩrtũm kapêr ã kagà kênã. Kê mẽ kamã harê nê ja ma nê rĩ tãm tanhmã amnhĩ nhĩpêx to.” Aně. 30Hāmri nhũm tee ri kuma nê kām: “Kwa nà. Koja mẽ kagàja mar kêt nê. No kêt Rajare na pre ra htyk tã akupỹm htĩr jakamã koja mẽ hwỳr wrỳ nê mẽ kām awjarê nhũm mẽ akupỹm htĩr ã omu nê kapêr ma hāmri nê amnhĩ tomnuj kaga kurê kumrêx. Kwa nà ã ri anhỳr kêt nê mẽ hwỳr amê hêxta waa nê.” Aně.

31—No nhũm kām: “Nà koja mẽ Tĩrtũm kapêr ã kagà mar kêt ã koja mẽ mǎnên Rajare tyk nê akupỹm htĩr nê mẽ hwỳr wrỳk nê kot mẽ kām tanhmã ujarênh to hã mar kêt nê. Jakamã kwarĩ pa mẽ hwỳr mẽnh kêt nê. Kot paj ho aně nê ãm ixte mẽ hwỳr mẽnh kaprỳ pyræk o amnhĩ nhĩpêx.” Aně. Æ mẽ ujarênh kot anhỳr. Aně.

Mě kot Jejus nê mẽ no kupyř ã mẽ harênh

Matêwre 18.6; Makre 9.42; mǎnên Rômãn 1.32; Sikũn Pêtre 2.1, 2.18

17 1-2Tã nhũm Jejus hkôt mẽ pa ho mẽ pa xwỳnhjê jahkre ho nhỹ nê mẽ kām:

—E kot paj mẽ kot ixkôt amnhĩ xunhwỳr tohtuj anhỳr xwỳnhjê jarê ka mẽ inhma. Nà koja mẽhõ mẽ hwỳr tẽ nê inhnê mẽ kām kapêr. Mě kot mẽ mar nê amnhĩ tomnuj prãm xàj tanhmã mẽ kām kapêr to. Hāmri nhũm mẽ mar xà hkôt tanhmã amnhĩ tomnuj to. Hã koja Tĩrtũm ja hã omu nê kot inhnê tanhmã kām nê xwỳnhta pumu nê ja hã homnuj tỳx nê. Te mẽ kot mẽhõ pynênh nê mut ã kên pytĩ hõ nhôr nê ma o htêm nê gô rax kām mẽnh pyræk o koja hipêx. Te ho ja pyræk no ãm homnuj tỳx o ja jakre. Jakamã kwa mẽ ixkapêr ma nê kām ajamaxpêr tỳx rãhã ho ri apa. Aně.

Mě pahte amnhĩ tã tanhmã mẽhõ hto hkêt ã mẽ pamã karõ

Matêwre 18.21; Makre 11.25-26; mǎnên Epes 4.32; Korosê 3.13

3Nhũm Jejus arĩ mẽ ahkre nê mẽ kām:

—Ně koja ixkôt atõjê hõ tanhmã atomnuj to. Ka amnhĩ tã omu hāmri nê ma hwỳr tẽ nê ja hã kām akapêr nê kām: “Kwa mon ka axtem nê ri ã inhĩpêx aně ixtõ? Kwa nà ri ã inhĩpêx anhỳr kêt nê.” Aně hāmri nhũm amnhĩ tã ama nê amã: “Nà na pa tee ri ixte tanhmã atota ã amnhĩ pumu nê ixkaprĩ nê. Nà kot paj axte ã ri anhĩpêx anhỳr kêt nê. Kwa kêr ka axte tanhmã ja mã ajamaxpêr to hkêt nê. Te ate amnhĩ katut kôt mẽnh pyræk o hipêx pu akupỹm tãm axpên nhĩpêx o papa.” Aně. Koja ã amã kapêr aně ka amnhĩ tã ama hāmri nê axte tanhmã kot atoja mã ajamaxpêr kêt nê.

4—Koja arĩgro pyxi hã xatã tanhmã atomnuj to japêr. Hāmri nê xatã tee ri ja hã amnhĩ pumu nê awỳr mra nê xatã amnhĩ tã amã kapêr nê

amã: “Pa ot pa awÿr tẽ. Na pa ra ixkaprĩ nẽ. Kwa ixte ã anhĩpêx anhÿrja pumu nẽ ãm omu. Kot paj axte hkêt nẽ.” Anhÿr o xatã amã kapêr. Nẽ ra axte tanhmã atomnuj to nẽ kê axte awÿr tẽ nẽ ã amnhĩ tã amã kapêr anẽ. Nom kêr ka ama nẽ kamã agryk kêr nẽ. ãm xatã kãm: “Nà kot puj anẽ nẽ akupÿm tãm axpẽn nhĩpêx. Kot paj axte tanhmã ate ixtota mã ijamaxpêr kêr nẽ. Kot puj ja ho pajapêx nẽ tãm axpẽn nhĩpêx o akupÿm papa.” Anhÿr o kêr ka mẽ xatã axpẽn nhĩpêx anhÿr rãhã ho ri apa nẽ aa jam anhÿrer kêr nẽ. Anẽ.

Mẽ pahte mẽmoj tã Tĩrtũm wÿr hã mẽ pajarẽnh

Matêwre 17.20-21, 21.21-22; Makre 11.23

5Tã nhũm Jesus nhÿ hã mẽ ahkre ho mẽ pa xwÿnhjaja hãmri kãm:

—Kwa Pahihti. Tanhmã mẽ ixto pa mẽ amnhĩ kaxyw Tĩrtũm kôt ijamaxpêr tÿx rãhã ho ri ixpa. Anẽ.

6Hãmri nhũm mẽ kãm:

—Nà ra mẽ ate amnhĩ kaxyw hkôt ajamaxpêr jakamã na ra amnhĩ tã mẽ apumu. Jakamã mẽ ate hkôt amnhĩ nhĩpêx kukwak ri na ka htem mẽmoj tã awÿ nhũm mẽ ate mẽmoj tã hwÿr xà hkôt mẽ amã tanhmã mẽmoj nhĩpêx to. Te mẽ ate pĩ hpàr mÿj mã akapêr nẽ kãm: “E amnhĩ jarẽ nẽ ma tẽ nẽ gô xujanãr kãm mãn mrõ.” Anẽ nhũm kot amar nẽ amar xà hkôt ã kot amnhĩ nhĩpêx anhÿrta pyrãk. Ja pyrã nẽ kot kaj mẽ ate Tĩrtũm kôt amnhĩ nhĩpêx o apa kukwak ri mẽmoj tã awÿ nhũm mẽ ama nẽ mẽ amã mẽmoj tanhmã ho. Rÿ mẽ amã mẽmoj gõ. Anẽ.

Te mẽ pahpê Tĩrtũm mã paxapênh xwÿnh pyrãk

7Nhũm Jesus arĩ mẽ ahkre nẽ mẽ kãm:

—Nẽ ja. Kot kaj mẽ amã mẽ àpênh xwÿnh kwÿjaja nhũm hõ amã mẽmoj tã àpênh o pa nẽ ho anhÿr pa. Hãmri tanhmã kot kaj kãm akapêr to wehe? Xà kot kaj kãm: “E hãmri axapênhhta kaga nẽ tẽ nẽ nhÿ nẽ apku.” Anhÿr o kãm akapêr? 8Nà kot kaj kãm anhÿr kêr nẽ. Kot kaj kãm: “E kwa tokyx tẽ nẽ hpãnhã inhmã inhõ hã apê. Kot pa ixàpkur pa ka ixpãnhã nhÿ nẽ apku.” Anhÿr kãm akapêr. Kêp amã àpênh xwÿnh jakamã ka ã kãm akapêr anẽ. 9Ja pyrã nẽ kot puj mẽ Tĩrtũm kot mẽ pamã mẽmoj tã karõ xà hkôt tanhmã kãm amnhĩ nhĩpêx to ho ri papa. Mẽ õ patrãwta pyrã nẽ kot tanhmã mẽ pamã karõ hto xà hkôt pu mẽ amnhĩ nhĩpêx.

—Xà na htem mẽ õ patrãw mã mẽmoj tã àpênh pa hãmri nẽ hkwÿjê mã amnhĩ to jarkrar o ri pa nẽ mẽ kãm: “E ka mẽ ixpumu. Na pa hte inhõ patrãw mã ixàpênh mex o mẽ hakre ka mẽ ja hã ixpumu. Hêxta waa nẽ. Mon pa hte ri axtem ã amnhĩ nhĩpêx anẽ?” Anhÿr o xà kot kaj mẽ kãm amnhĩ to jarkrar o ri apa? Nà na ka htem ã amnhĩ nhĩpêx anhÿr kêr nẽ.

10—Tã pa hte mẽ õ patrãwta pyrã nẽ tanhmã mẽ amã mẽmoj tã karõ hto ho ixpa. Jakamã kêr ka mẽ inhma nẽ ixte mẽ amã mẽmoj tã karõ xà hkõt tanhmã inhmã amnhĩ nhĩpêx to ho ri apa. Hãmri nẽ hã amnhĩ to jarkrar pê amnhĩ jarênh o: “Ăm hãmri na pa ã Jejus mã amnhĩ nhĩpêx anẽ. Hêxta waa nẽ. Ixpê Jejus mã tanhmã ixte amnhĩ nhĩpêx to mex xwỳnh na pa.” Anhỹr o amnhĩ to jarkrar kêt nẽ. Kêt ãm amnhĩ jarênh o: “Nà ixte kãm tanhmã amnhĩ nhĩpêx to ho ixpa xwỳnh pix na pa. Na hte mẽmoj tã inhmã karõ pa kuma nẽ ỹ hã tanhmã kãm amnhĩ nhĩpêx to.” Anhỹr o amnhĩ jarênh o ri apa. No ri amnhĩ krã hkõt atỳx tanhmã amnhĩ to jarkrar to ho ri apa hkêt nẽ. Anẽ.

Jejus kot mẽ ho 10 nẽ akupỹm mẽ ho mex ã harênh

Matêwre 8.1-4

11Tã nhũm Jejus arĩ Garirej rũm pika pê Samar hkàx ã Jerujarê hwỳr kormã mỗ. 12Nẽ nhỹri krĩ hõ htêp o mỗr mẽ nhũm krĩ pu hã ri mẽ pa xwỳnhjaja kêp 10 nẽ kutã mra. Mẽ hkànhy hkro htỳx xwỳnhjaja kutã mra nẽ hkaxpa nẽ amỳm kuhê nẽ omu. 13Hãmri nẽ kãm:

—Pa Pahihti. Kwa mẽ ixpumu nẽ mẽ ixkamã axukaprĩ nẽ tanhmã mẽ ixto mex to. Anẽ.

14Hãmri nhũm mẽ kãm:

—Tôe. Nà kot paj mẽ ato mex. E mẽ mãmri awjanã nẽ ma akupỹm mẽ anhõ patrejê hwỳr mra kê mẽ akupỹm mẽ akà mex ã mẽ apumu. Anẽ.

Hãmri nhũm mẽ kuma nẽ kapêr mar xà hkõt awjanã. Kà nhy rãhã awjanã nẽ ma akupỹm patre hwỳr mra. Nẽ kormã akupỹm hwỳr pry hã mrar rãhã piitã hkà mex pa. 15Hãmri nhũm ãm pyxi nẽ hkwỳjê rom awjanã nẽ akupỹm Jejus wỳr Tĩrtũm mã mex o mex ã harênh o hwỳr tẽ. 16Hãmri nẽ Jejus kaxpa nẽ kutã hkõnkrã ho tẽm nẽ nhỹ nẽ amnhĩ tã kãm kot ho mex ã kãm amnhĩ jarẽ. Kwỳjê hkĩnhã kêp Ijaew kêt axtem kêp Samar nhõ xwỳnh tã mẽ kurom akupỹn hwỳr tẽ nẽ kãm mex o mex ã harê. 17-19Hãmri nhũm amnhĩ tã kuma nẽ kãm:

—No mẽ akwỳjaja? Ixte mẽ ato 10 nẽ mẽ ato mex tã ka ãm kapxipix awjanã nẽ akupỹn ixwỳr tẽ. Akwỳjê hkĩnhã apê Ijaew kêt tã akupỹm amnhĩ mex ã amnhĩ pumu hãmri nẽ mẽ kurom awjanã nẽ Tĩrtũm mã mex o mex ã harênh o ixwỳr tẽ. Hêxta waa nẽ. Mo na hte ixkwỳjaja apyrã nẽ amnhĩ kaxyw ixkõt hamaxpêr kêt nẽ? E kànhmã xa nẽ mãmri ma ajamakêtkati nẽ akĩnh nẽ ma akupỹm tẽ. Anẽ.

Jejus akupỹn wrỳk xà hã arĩgro jarênh

Matêwre 24.23-24, 24.37-44; Makre 13.32-37;

mãânên Wam Tesarôn 5.2-8; Sikũn Pêtre 3.3-10

20-21Tã nhũm Parijew nhõ xwỳnh kwỳjaja Jejus wỳr mra nẽ omu nẽ kãm:

—Kwa mẽ inhmã mẽmoj jarẽ. Xà koja apu Tirtùm tokyx kot mẽ pahwỳr mēnh mã xwỳnhhta mẽ nhũm mẽ pahwỳr wrỳ nẽ mẽ pahto amnhĩptàr kurẽ kumrẽx nà kormã? Anẽ.

Hãmri nhũm mẽ kuma nẽ mẽ kãm amnhĩ jarẽ. Te ho nhãm mẽhõ jarẽnh pyrã nẽ mẽ kãm:

—Nà ra kot mẽ ho amnhĩptàr o pa kẽnã. Nom nhỹri hkrĩ xà kamã mẽ ho amnhĩptàr o hkrĩ hkêt nẽ. Na htem amnhĩ kaxyw hkõt hamaxpěr nẽ hkõt amnhĩ xunhwỳ hãmri nhũm kęp mẽ õ pahihti hã mẽ ho amnhĩptàr o pa. Nẽ mẽ kãm mẽ hamaxpěr mex gõ nhũm htem hkõt ri hamaxpěr mex o pa. Anẽ.

22Hãmri nẽ hpãnã hkõt mẽ pa ho mẽ pa xwỳnhjẽ mã kapěr. Mẽ kot nhỹrmã tee ri kamã hamak o pa hã mẽ kãm kapěr nẽ mẽ kãm:

—Kot kaj mẽ nhỹrmã tee ri amã tokyx akupỳn ixwrỳk nẽ ixte mẽ ato amnhĩptàr prãm xàj tee ri inhmã anojarêt kaprỳ ho ri apa. Nẽ axpẽn mã ri ijarẽnh o: “Hêxta waa nẽ. Mo na we Pahihti tokyx akupỳn mẽ pahwỳr wrỳk kêt nẽ?” Anhỹr o inhmã anojarêt o ri apa pẽ ixkamã ajamak rãhã ho apa.

23—Nẽ koja mẽ ra akupỳn ixwrỳk ã tanhmã mẽ amã ixto hêx to ho pa. Nhỹri ixkuhẽ nhũm mẽ kot ixpumunh ã mẽ amã ixto hêx o pa. Nom kër ka mẽ ama nẽ ãm mẽ ama. 24Kot paj nhỹrmã akupỳn mẽ awỳr ixwrỳk kaxyw nhũm mẽ pika piitã hkõt akupỳn ixwrỳk kãm anhĩpê ixpumu. Te mẽ piitã mẽ kot anhĩpê na jaxênh pumunh pyrãk o kot kaj mẽ apiitã ixpumu. 25Nom kormã jar pika ja kamã ixpa ri koja mẽ ohtõ nẽ ixkaga pa amnhĩ xà htỳx kamã ijamak kãm ty. Hãmri nẽ mẽmo arĩgro hã ma akupỳm kaxkwa hwỳr api. Hãmri nẽ nhỹrmã akupỳn mẽ awỳr wrỳ.

26—Nà kot paj nhỹrmã man akupỳn mẽ awỳr wrỳ. Akupỳn ixwrỳk xà hã arĩgrota ã koja jar pika ja kamã mẽ pa xwỳnhjaja htỳx ri tanhmã amnhĩ tomnuj to ho pa. Te amnepêm finat Noehti htĩr ri mẽ kot htỳx ri tanhmã amnhĩ tomnuj to ho pa pyrãk o koja mẽ amnhĩ nhĩpêx o pa. 27Na prem amnhĩ kaxyw Tirtùm mã hamaxpěr o pa hkêt nẽ. Nẽ ãm jar pika ja kamã mẽ kot amnhĩ nhĩpêx pix kukamã hamaxpěr o ri paja o ãm kõt pix mã tanhmã ri amnhĩ nhĩpêx to ho pa. Rôm nhũm Noehti gõ htàm pymaj pàr raxja nhĩpêx nẽ kãm axà. Nhũm prem hã omu nẽ ãm omunh o pa nẽ tanhmã ri amnhĩ kukamã hamaxpěr to hkêt nẽ. Tã nhũm nata mẽ haêr pẽ wrỳ. Hãmri nẽ wrỳk rax o ra pika piitã hanhi nhũm mẽ piitã pikaprãr pa.

28—Akupỳn ixwrỳk xà hã arĩgrota ã koja mẽ mããnẽn te amnepêm Sotõ nhõ xwỳnhjaja kot htỳx ri tanhmã amnhĩ tomnuj to pyrãk o amnhĩ nhĩpêx. Finat Rohti kormã htĩr ri mẽ kot htỳx ri tanhmã amnhĩ tomnuj to ho pata pyrãk o koja mẽ amnhĩ nhĩpêx. Na pre hte Sotõ nhõ xwỳnhjaja ãm pika ja kamã mẽ kot amnhĩ nhĩpêx pix kukamã hamaxpěr o ri pa. Nẽ ãm kõt pix mã ri amnhĩ nhĩpêx o pa. Nẽ htỳx ri amnhĩ xàpkur xà pix

kukamã hamaxpêr. Nê mẽ hpur kãm ri àpênh pix kukamã hamaxpêr. Nê ri amnhĩ xujaprôr pix kukamã hamaxpêr nê axpên mã mẽmoj to wênê pix kukamã hamaxpêr. Nê amnhĩm òrkwỹ nhĩpêx pix kukamã hamaxpêr. Æ na prem pika ja kamã mẽ kot amnhĩ nhĩpêx pix kukamã hamaxpêr o ri pa anhỹrja o amnhĩ kaxyw Tĩrtũm mã hamaxpêr o pa hkêt nê.

29—Tã nhũm Rohti mẽ ò krĩ rũm kator mẽ nhũm Tĩrtũm krĩ nhõ xwỹnhjaja kot amnhĩ tomnuj tỳx o paja mỳrapê mẽ himex pa. Jao kaxkwa rũm mẽ hipy mẽmo hpòk kwỹ rê nhũm mẽ hkaxàr pa. 30Tã akupỹn mẽ awỳr ixwrỹkja mẽ koja mẽ te Rohti nhõ krĩ kamã mẽ kot amnhĩ nhĩpêx pyrã nê htỳx ri amnhĩ tomnuj pix o pa.

31—Nê akupỹn ixwrỹta ã ka mẽ anhòrkwỹ nhĩmòk ã hkrãmnhênh o akrĩ japêr nê akupỹn ixwrỹk kãm ixpumu. Hãmri nê akukrêx wỳr axàr nê hõ hpyr mã ajamaxpêr kêt nê. Rỳ ka mẽ apur kãm axàpênh o akuhê japêr nê akupỹn ixwrỹk kãm ixpumu. Hãmri nê akupỹm anhòrkwỹ hwỳr atêm mã ajamaxpêr kêt nê. Mo kaxyw kot ka kêt hwỳr tê? Kêt ãm inhmã mẽ ajapê hã akupỹn mẽ awỳr ixwrỹk mã ajamaxpêr o akĩnh nê ixpumunh o akuhê.

32—Nê kêr ka mẽ Rohti prõ kot tanhmã amnhĩ nhĩpêx toja mã ajamaxpêr rãhã ho ri apa. Na pre Tĩrtũm kapêr nhĩròp xa nê amnhĩ katut kòt Sotòta wỳr rĩt hãmri nê ã amnhĩ nhĩpêx anhỹrja mỳrapê htyk kurê kumrêx. Tã kêr ka mẽ ho urak nê amã akukrêx rax japê xaj ixkòt amõr kaxyw anhĩtòt kêt nê.

33—Nê kwa kêr ka mẽ jar pika ja kamã tanhmã mẽ ate amnhĩ nhĩpêx to pix kukamã ajamaxpêr o ri apa hkêt nê. Nê mẽ akukrêx rax pix kukamã ajamaxpêr kêt nê. Koja nhỹrmã ja piitã mẽ apê hapêx pa. Mẽ ate kãm anhĩhkra karo hpar pyrak o piitã hipêx hãmri nhũm Tĩrtũm ja hã mẽ apumu nê hpãnhã nhỹrmã mẽ amã mẽmoj mex nhõr rax nê.

34—Nê kot paj kamat kãm akupỹn ixwrỹk japêr nhũm nhỹri mẽhõ ra ixkòt amnhĩ xãm xwỹnh mẽ mẽhõ kot ixkòt amnhĩ xãm kêt xwỹnh wa par kãm nõr japêr. Hãmri pa amnhĩ wỳr ra ixkòt kot amnhĩ xãm xwỹnhhta o api nhũm kot ixkòt amnhĩ xãm kêt xwỹnhhta arĩ gõr nê nõ. 35Rỳ pa arĩgro hã akupỹn ixwrỹk japêr nhũm mẽnijê hõ wa hamêxkrut nê haròj kahuk o ãm japêr. Hãmri pa ra kot ixkòt amnhĩ xãm xwỹnhja ho api nhũm kot ixkòt amnhĩ xãm kêt xwỹnhja ahte arĩ haròj kahuk o xa. Hãmri nê hamaxpêr mex kêt kumrêx o xa. 36Rỳ koja mẽmyjê hõ wa axkrut nê hpur kãm àpênh o ãm japêr. Pu pa amnhĩ wỳr kot ixkòt amnhĩ xãm xwỹnhhta o api nhũm kot ixkòt amnhĩ xãm kêt xwỹnhhta pur kãm ahte arĩ apênh o xa. Hãmri nê tee ri hkrãmnhwỳ hkukamã hamaxpêr o xa. Anê.

Nhũm pre ã Jejus hkòt mẽ pa ho mẽ pa xwỹnhjê mã amnhĩ jarênh anê. 37Hãmri nhũm mẽ kuma nê kãm:

—Kwa nhỹri koja mẽmoj ã amnhĩ nhĩpêx anê? Anê.

Hãmri nhũm mẽ kãm:

—Nà koja nhÿri mēmojja ã amnhĩ nhĩpêx anê ka mē omunh kurê kumrêx. Te nhÿri mēmoj kro nê nôr nhũm nhônhti kot omunh nê hã htor nê hpinhĩpanh nhũm mē kot hã omunh kurê kumrêxta pyrâk. Anê.

Mē pahte Tirtũm mã amnhĩ jarênh rãhã ho papa hã mē pamã karõ

Rukre 11.5-8; mãânên Wam Tesarõn 5.17

18 ¹Tã nhũm Jejus hkõt mē pa ho mē pa xwÿnhjê mã mēmoj tã karõ. Mē kot tanhmã Tirtũm mã amnhĩ jarênh to hã mē kãm karõ. Mē kot xatã kãm amnhĩ jarênh o pa nê amnhĩ kaxyw kãm hamaxpêr rãhã ho pa kaxyw. No ãm hã kuxi nê tanhmã mē kãm hã ujarênh to nê mē kãm:

2—Koja nhÿri krĩ hõ kamã juistija kãm Tirtũm prãm nõkati. Nê mãânên kãm amnhĩ kwÿjê hprãm nõkati htã kêp juisti nê tanhmã mē kãm kapêr to ho hkrĩ. ³Jakamã nhũm mēhõ ni pê mjên htyk xwÿnh. Nhũm hte mēhõ xatã tanhmã kêp õ mēmoj to ho pa. Hãmri nhũm tee ri amnhĩ tã omu nê xatã juistita wÿr mra nê kãm harê nê kãm: “Xê gàa nê. Na hte pahkwÿjê hõja ixtomnuj rãhã ho pa. Xê ixtã tanhmã kãm akapêr to kê tãm inhĩpêx.” Anê. Nê xatã hwÿr mra nê amnhĩ to kuwÿ nê xatã hwÿr mra nê amnhĩ to kuwÿ. ⁴⁻⁵No nhũm kuma nê ãm kuma. Kãm hkwyjê ho ajuta hprãm kêt jakamã ãm kuma. Tã nhũm xatã hwÿr mra. Gaa nhũm rĩ kãm mar kaga nê. Hãmri nê hamaxpêr o: “Tk. Hêxta waa nê. Jahti na hte xatã ixwÿr mra nê tanhmã inhmã amnhĩ jarênh to. Nê ãm xatã ixwÿr mra. Nà na pa ra inhmã mar kagyk nê. E pa tokyx tanhmã nê kot tanhmã ho xwÿnhhta mã ixkapêr to. Inhmã Tirtũm puma kamã rÿ inhmã ixkwÿjê kaprĩ kamã pa tanhmã nê kãm nê hkêt tã kot pa anhÿr kêt nhũm amnhĩ tã inhmã harênh pix nê pa ra mar kurê ixkrã tãtãk nê.” Anhÿr o hamaxpêr. ã mē ujarênh kot anhÿr.

6—Juisti tãm hamaxpêr kêt tã nhũm nija xatã hwÿr mra nê amnhĩ to hwÿr jakamã nhũm jatã tanhmã ho ajuta hto. ⁷⁻⁸No kêt Tirtũmjã. Xàn ka htem mēmoj tã awÿ nhũm juisti punutita pyrã nê mē ama nê ãm mē ama? Nà koja ã amnhĩ nhĩpêx anhÿr kêt nê. Kot ka mēmoj tã kãm amnhĩ jarê nhũm ama nê tanhmã amã mēmoj to rÿ tanhmã amã amnhĩ nhĩpêx to. Juistita rom mē pakamã ukaprĩ xwÿnh na. Tã kot paj nhÿrmã akupÿn wrÿ nê mē apumu ka mē arĩ amnhĩ kaxyw hkõt ajamaxpêr mex pê kãm amnhĩ jarênh rãhã ho ri apa pa ja hã mē apumu nê ixkĩnh tÿx nê. Ja na inhmã hprãm. Anê.

Tanhmã mē kot Tirtũm mã amnhĩ jarênh to hã mē harênh

Matêwre 6.5-8; mãânên Wam Pêtre 5.5-6

⁹Tã nhũm Jejus mē kot amnhĩ to mex o hkwyjê jakrenh ã amnhĩ to jarkrar o ri mē pa xwÿnhjê pumu nê tanhmã mē kãm kapêr to. Nom mē kot amnhĩ to jarkrarta ã kuxi nê mē kãm awjarê nê mē kãm:

10—Koja mēhō wa hamēxkrut nē Tirtūm mā amnhī jarēnh kaxyw wa tē. Ja kēp Parijew nhō xwỳnh nhūm hōja kēp mē ō pahi mā hkwỳjê pê kàxpore hkwỳ jamỳnh xwỳnh. Nhūm wa Tirtūm mā amnhī jarēnh xà hā ixkre hwỳr wa tēn axà. 11-12Hāmri nhūm Parijew nhō xwỳnhnta kumrēx tē nē nhỳri mē piitā mē noo mā Tirtūm mā amnhī jarē. Nē amnhī to jarkrar pê kām amnhī jarēnh o: “Pa Tirtūm. E ra ate ixpumunh mex. Na pa hte amnhī to mex pix o ri ixpa. Ra ate ja hā ixpumunh mex. Na pa hte kàxpore hkwỳ jamỳnh xwỳnh nēj rom tām amnhī nhīpēx. Nē semān piitā hā ixàpkur kêt rāhā amā amnhī jarēnh rāhā ho ixtā apkati axkrut. Nom ja pix kêt. Na pa hte mǎānēn ixàpēnh pānhā kàxpore jamỳ nē mē kot amā tanhmā amnhī nhīpēx to ho pa xwỳnhjê mā hkwỳ nhōr o ixpa. Nē na pa hte ri ixàhkīnh o ri ixpa hkêt nē. Nē nhām mē kēp mē hprō ho amnhīkati ho ri ixpa hkêt nē. Na pa hte mē piitā mē kurom tām amnhī nhīpēx ā amnhī pumu nē ixkīnh tỳx kumrēx. Hēxta waa nē. Mon pa hte ri ā amnhī to mex o ixpa anē?” Anhỳr o Tirtūm mā amnhī to jarkrar pê kām amnhī jarēnh o xa.

13—Hāmri nhūm hpānhā mē kēp kàxpore hkwỳ jamỳnh xwỳnhnta haxwỳja Tirtūm mā amnhī jarē. No ām Parijew nhō xwỳnhnta rom ki hkwỳjê pê awry nē ahte hipō nē kām amnhī jarē. Nē kām amnhī jarēnh pê amnhī tak nē mur nē kām: “Kwa Tirtūm. Na pa hte amnhī tomnuj tỳx o ri ixpa. Nē ixtỳx ri amā prām xà kuhpa hā tanhmā amnhī nhīpēx to. Na pa tee ri ja hā amnhī pumu nē ixkaprī htỳx nē. Ā inhmā amnhī nhīpēx anhỳr o ri ixpa hprām kêt tā pa hte ā amnhī nhīpēx anhỳr o ri ixpa. Kwa xà kot ka ixkamā axukaprī nē amnhī katut kôt ixte amnhī tomnuj rēnh pa Tirtūm?” Anhỳr o kām amnhī jarē.

14—Hāmri nhūm Tirtūm hamē wa kot kām amnhī jarēnh ma no ām wamta ma nē ām kuma. No kêt hkôt hōja ma hāmri nē kot kām amnhī tā àhwỳr xà hkôt amnhī katut kôt kot amnhī tomnuj rēnh pa nē ho hkra. Jakamā nhūm mex nē hkīnh nē pa. Ra tām hkrā hāmri nē hkīnh nē ma htēm kurē kumrēx. Ā mē ujarēnh kot anhỳr. Ām hāmri na pa mē amā ja jarē. Koja mēhō Parijew nhō xwỳnhnta pyrā nē kot amnhī to mex xwỳnh ā amnhī kamnhīx hāmri nē Tirtūm kot amnhī katut kôt kot amnhī tomnuj rēnh kaxyw amnhī to hwỳr kêt nē. Koja ām kām amnhī to jarkrar pix nē. Jakamā koja Tirtūm te kot mar nē ām mar pyrāk o hipēx. No koja mēhō kot kàxpore hkwỳ jamỳnh xwỳnhnta pyrā nē tee ri tanhmā amnhī tomnuj to hā amnhī pumu nē hkaprī nē. Hāmri nē amnhī to Tirtūm wỳ nhūm kuma nē tanhmā ho mex to. Anē.

Jejus kot amnhī wỳr mēhprīrejê hwỳr ā harēnh

Matêwre 19.13-15; Makre 10.13-16

15Tā nhūm Jejus mē hkôt mē pa ho mē pa xwỳnhjaja arī pry hā Jerujarē hwỳr mō nhūm Ijaew kwỳjaja mē omu nē mē hkrare jamỳ nē

Jejus wỳr mẽ o mra. Kot mẽ hã ìhkra jaxwỳr nẽ mẽ ho Tirtũm wỳr kaxyw. Hãmri nhũm hkõt mẽ pa ho mẽ pa xwỳnhjaja tee ri ja hã mẽ omu nẽ nẽ mẽ kãm kapẽr nẽ mẽ kãm:

—Tk. Kwa mẽ ma akupỹm mẽ akrata o mra nà? Mo kaxyw na ka mẽ Jejus wỳr mẽ o mra? Kormã mẽ ràxre kênã. Anẽ.

16Hãmri nhũm amnhĩ tã mẽ kuma nẽ mẽ kãm:

—Tk. Kwa nà mẽ ri inhnẽ mẽhprĩjê kurê hkêt nẽ. Kwār mẽ mãmri iwxwỳr mẽ o mra. Anẽ.

Hãmri nẽ amnhĩ wỳr mẽ kãm hpa ho apê nhũm mẽ hwỳr mẽ o mra nhũm mẽ kuri kuhê. Hãmri nhũm hkõt mẽ pa ho mẽ pa xwỳnhjê mã kãm:

—E mẽ jareja mẽ omu. Na htem hamakêtkati nẽ hkĩnh nẽ ri pare. Nẽ kãm amnhĩ to rũnh prãm kêt nẽ ri pa. Tã Tirtũm kõt mẽ kot amnhĩ nhĩpêx xwỳnhjaja na htem mẽ uràk nẽ kãm amnhĩ to rũnh prãm kêt nẽ ri pa.

17—Jarejaja na htem hipêêxà nẽ katorxà wa kapẽr ma nẽ wa hkõt ri amnhĩ nhĩpêx mex o ri pa. Tã ixpê Tirtũm kot mẽ awỳr inhmẽnh xwỳnh kot ka mẽ amã ixkõt amnhĩ xunhwỳr prãm. Hã kot kaj mẽ te ho jarejê kot amnhĩ nhĩpêx pyràk o amnhĩ nhĩpêx. Jao ixkapẽr ma nẽ ixkõt ri tanhmã amnhĩ nhĩpêx mex to ho ri apa. Anẽ.

Kàxpore rax xwỳnh jarẽnh

Matêwre 19.16-30; Makre 10.17-31; mãânẽn Wam Ximotre 6.6

18Tã nhũm Ijaew nhõ pahihti hõja Jejus wỳr tẽ nẽ kãm kapẽr nẽ kãm:

—Pa? Mẽ ijahkre xwỳnh maati? Kwa inhmã mẽmoj jarẽ. Tanhmã kot pa we nhỹrmã Tirtũm ri ixtĩr tũm nẽ ixpa kaxyw amnhĩ nhĩpêx mex to ho ri ixpa wehe? Anẽ.

19Hãmri nhũm kãm:

—Xà ate ixpê Tirtũm kwỳ hã ixpumunh kõt na ka ixte uràk nẽ amnhĩ to mex xwỳnh ã ijarẽ? Tirtũm pix na kot amnhĩ to mex rãhã xwỳnh jakamã kot kaj ã ijarẽnh anhỹr jao ixpê Kra hã ijarẽ. Nẽ uràk nẽ ixte amnhĩ to mex xwỳnh ã ijarẽ. Nà xàn ka ãm atỳx ri amnhĩ krã hkõt ã ijarẽnh anẽ?

20—Tirtũmja mex o mex xwỳnh jakamã kot kaj amã nhỹrmã kuri atĩr tũm nẽ apa hprãm hãmri nẽ ra kot mẽmoj tã mẽ amã karõ xà hkõt amnhĩ nhĩpêx o ri apa. Ra ate mar mex kênã. Na pre mẽ amã:

Kêr ka mẽ axpẽn pê axàhkĩnh hkêt nẽ.

Nẽ mẽ axpẽn par kêt nẽ.

Nẽ mẽ axpẽn to axêx o ri apa hkêt nẽ.

Nẽ mẽ axpẽn pê aprõ ho amnhĩkati hkêt nẽ.

Nẽ mẽ anhĩpêêxà mẽ akatorxà wa hã apijaam pê wa kutã anojarêt pix o ri apa.

E kot kaj amã nhÿrmã Tirtũm kuri atĩr tũm nẽ apa hprãm hã kër ka ã amnhĩ nhĩpêx anhÿr o ri apa. Anẽ.

21Nhũm pre ã Jejus kãm kapêr anẽ nhũm kuma nẽ kãm:

— Kwa ixprĩre ri ra ã ixte amnhĩ nhĩpêx anhÿr o ri ixpa kênã. Nom ixte ixtĩr tũm nẽ ixpa kaxyw kormã ixte tãm kêt pyrãk. Anẽ.

22Hãmri nhũm Jejus kãm:

— Nã kormã mẽmoj pyxire nẽ arĩk. Na ka amã akukrêx rax japê htÿx o Tirtũm jakre. Jakamã kër ka ma akupÿm tẽ nẽ akukrêx o wênê hpa nẽ hpãnhã kàxpore jamÿ hãmri nẽ ma mẽ kêp amrakati xwÿnhjê mã òr pa. Hãmri nẽ rĩ akupÿn ixwÿr tẽ nẽ ixkõt apa ho apa. Anẽ.

23Hãmri nhũm kuma nẽ tee ri amnhĩ kukamã hamaxpêr. Kãm kukrêx rax japê nẽ kãm ìhkra karo hprãm kêt nẽ. Jakamã tee ri Jejus kot ã kãm hã karõ anhÿrja ma nẽ awjanã nẽ ma akupÿm tẽ. 24Hãmri nhũm tee ri ja hã omu nẽ hã mẽ kot mar xwÿnhjê mã kapêr nẽ mẽ kãm:

— Hêxta waa nẽ. Koja mẽ hikukrêx rũnh xwÿnhjaja ohtõ nẽ kãm mẽ hikukrêx japê xàj Tirtũm mẽ wa ixri htĩr tũm nẽ pa ho papa hkêt nẽ. Wa ixte amnhĩ nhĩpêxja mẽ kêp hihtÿx. 25Na htem kãm hikukrêx rax mã ìhkra karo hprãm kêt rãhã tee ri kãm Tirtũm kõt amnhĩ nhĩpêx prãm kaprÿ. Te ho mẽhõ kot menh kagõ hã hkre nẽ kãm kagõ katõk prãm kêt rãhã kãm guhkrax kãm àr prãm kaprÿta pyrãk. Anẽ.

Nhũm pre ã Jejus mẽ kãm kapêr anẽ. 26Hãmri nhũm mẽ kuma nẽ tee ri amnhĩ kukamã hamaxpêr nẽ kãm:

— Kwa nom mẽ ixpiitã mẽ inhmã mẽ ixkukrêx japê kênã. Jakamã xà kot paj mẽ ixpiitã nhÿrmã war ari ixtĩr tũm nẽ ixpa ho ixpa hkêt nẽ nà? Anẽ.

27Hãmri nhũm mẽ kãm:

— Nã kot kaj mẽ amnhĩ krã hkõt mẽ amã mẽ akukrêx japêja mã anhũrer kêt nẽ. Tirtũm pix na hte ã mẽ kot amnhĩ nhĩpêx anhÿr kaxyw tanhmã mẽ hkrã hto nhũm mẽ kãm mẽ hikukrêx japê htÿx kêt nẽ. Jao mẽ kêp Tirtũm mẽ wa ixri htĩr tũm nẽ mẽ pa ho pa mã xwÿnh. Anẽ.

28Hãmri nhũm Simãw Pêtre kãm:

— Kwa Pahihti no mẽ pajaja? Na pa prem agryk ã mẽmoj piitã hkaga hpa nẽ akõt ixpa ho ixpa. Jakamã kot paj mẽ nhÿrmã war ari ixtĩr tũm nẽ ixpa ho ixpa nà? Anẽ.

29Hãmri nhũm kãm:

— Tÿ. Nã ka mẽ atõ inhmã tanhmã amnhĩ nhĩpêx to ho apa kaxyw akwÿjê re nẽ ma inhmã tanhmã amnhĩ nhĩpêx to ho ri apa. Anhõrkwÿ re rÿ atõ rÿ atõx rÿ aprõ nẽ akrajê re. Rÿ akatorxà nẽ anhĩpêêxà war are. Rÿ akukrêx piitã rer pa hãmri nẽ ma ixkapêr o mẽ piitã mẽ ahkre ho ri mẽ hkõt apa. 30Hã kot paj ja hã mẽ apumu nẽ mẽ ato mex rax nẽ. Hãmri ka mẽ ma nhÿhÿm apa nẽ nhÿri mẽ kãm ixkapêr jarênh o ri mẽ hkõt apa nhũm mẽ kot mẽ amar xwÿnh kwÿjaja mẽ ama nẽ ra

kãm mẽ akĩnh nẽ. Nẽ ra mẽ ate akwỳjê rer par tã nhũm mẽ tãmjaja te mẽ apê mẽ hkra rỳ mẽ htõ rỳ mẽ htõx pyræk o mẽ anhĩpêx nẽ tanhmã mẽ ato mex to ho pa. Hãmri ka mẽ nhỹrmã ty nẽ ma Tĩrtũm mẽ wa inhõ krĩ hwỳr api hãmri nẽ wa ixkuri amex kumrêx nẽ atĩr tũm nẽ apa ho apa. Anẽ.

Nhũm pre ã Jejus Simãw Pêtre mẽ hkwỳjê mã kapêr anẽ.

Jejus kot axte htyk kukamã amnhĩ jarênh

Matêwre 20.17-19; Makre 10.32-34

31Tã nhũm Jejus mẽ kot ã hã kapêr jarênh o mẽ pa xwỳnh pê 12jaja mẽ hkwỳjê pê mẽ ho kato. Nẽ nhỹri mẽ hkàx ã mẽ o xa nẽ tanhmã mẽ kãm amnhĩ jarênh to nẽ mẽ kãm:

—Amnepêm Tĩrtũm nhỹ hã kapêr jarênh xwỳnhjaja na prem ixkukamã tanhmã mẽ kot inhĩpêx to hã ijarê nẽ ixtã kagà. Tã pu mẽ ra Jerujarê hwỳr mõi. Kamã koja mẽ tanhmã ixto rax nẽ. Ra mẽ kot ixkukamã ijarênh nẽ ixtã kagà xà hkõt koja mẽ ixto anẽ. 32-33Koja mẽ kãm ixkurê xwỳnhjaja ixpynê nẽ Rõm nhõ xwỳnhjê nhõ pòristi hwỳr ixto tẽ nẽ mẽ kãm ixto hêx nhũm mẽ kuma nẽ mẽ mar xà hkõt tanhmã inhĩpêx to. Nẽ mẽ hkwỳjaja ixtã hpêr o axkê nẽ akunha. Nẽ mẽ hkwỳjaja ixto kapêr punuj nẽ ijayrỳ nẽ ixtã argõx rẽ nẽ ixtak. Hãmri nẽ ixpĩ. ã koja mẽ inhĩpêx anẽ. Nom kot paj ãm ixtyk ã apkati axkrunêpxi nhũm Tĩrtũmja akupỹm ixto ixtĩr. Anẽ.

34Hãmri nhũm mẽ kuma nẽ tee ri htyk nẽ akupỹm htĩrja kukamã hamaxpêr no ãm hprĩ hã hkõt hamaxpêr kêt nẽ.

Jejus kot no hkre xwỳnh o mex ã harênh

Matêwre 20.29-34; Makre 10.46-52

35Tã nhũm Jejus mẽ kormã Jerujarê hwỳr Jerikoja têp o mõi. Hãmri nhũm pry nhĩhkjê hã no hkre xwỳnhja àhwỳr o nhỹ. 36Hãmri nẽ amnhĩ wỳr mẽ mrar ma. Mẽ ohtõ nẽ Jejus kõt mẽ mrar xwỳnhjê mrar ma nẽ mẽ kãm:

—Kwa mẽmoj ri? Mẽmoj wỳr na ka mẽ axohtõ nẽ mra? Anẽ.

37Hãmri nhũm mẽ kãm:

—Nà Jejus pê Najare nhõ xwỳnh kõt na pa mẽ mõi. Anẽ.

38Hãmri nhũm mẽ kuma nẽ kàx pê Jejus mã kapêr nẽ kãm:

—Pa Jejus? Apê mẽ inhõ Pahihti mex na ka. Te apê amnepêm anhĩgêt pahihti Tawi kot amnhĩ nhĩpêx pyræk. Jakamã kwa ixkamã axukaprĩ nẽ akupỹm ixto mex kêt wehe. Ixte amnhĩ kaxyw akõt ijamaxpêr xwỳnhjê hõ na pa. Anẽ.

39Hãmri nhũm Jejus kukamã mẽ mrar xwỳnhjaja tee ri kuma nẽ kãm:

—Tk. Kwa akapêr kêt nẽ nhỹ nà. Anẽ.

Tã no nhũm ãm mẽ kuma nẽ xatã amnhĩ to hwỳr o nhỹ. Kàx pê kãm kapēr o nhỹ. **40**Hãmri nhũm Jejus kuma nẽ xa nẽ amnhĩ wỳr hã karō nhũm mẽ hpa hã kupy nẽ hwỳr o tẽ nhũm kãm:

41—Pa mo na? Tanhmã kot pa ato? Anẽ.

Nhũm kãm:

—Nà akupỹm inhmã ixrĩt mex prãm. Anẽ.

42Hãmri nhũm kãm:

—Tõe. Nà ra ate amnhĩ kaxyw inhmã ajamaxpēr tỳx jakamã kot kaj akupỹm ri rĩt. Anẽ.

43Hãmri nhũm akupỹm rĩt mex kurê kumrêx nẽ ja hã amnhĩ pumu nẽ hkĩnh tỳx nẽ. Hãmri nẽ ma Jejus kôt Tĩrtũm mã mex o mex ã harênh o mẽ hkôt tẽ. Hãmri nhũm mẽ kot hã omunh xwỳnhjaja haxwỳja Tĩrtũm mã mex o mex ã harênh o Jejus kôt mō.

Jakew kãm Jejus pumunh prãm ã harênh

Rukre 3.8, 3.12-13

19 ¹Tã nhũm Jejus arĩ Jerujarê hwỳr mō nẽ Jeriko hwỳr pōj. Hãmri nẽ krĩ kahti hkôt pry hã mō. ²Nhũm mẽ ra hkôt htu rax nẽ hkôt omunh o mō. Jakamã nhũm Jakew pê Rôm nhõ pahi mã kwỳjê pê kàxpore hkwy jamỳnh xwỳnhjê krãhtũm xwỳnhja. Na pre hikàxpore rax nẽ. ³Tã haxwỳja kãm Jejus pumunh prãm nẽ. Nom ãm hakooti nẽ hprĩhti jakamã tee ri kot omunh kaxyw amnhĩ nhĩpêx nhũm mẽ kêp àmnar rax nẽ. ⁴Hãmri nhũm ra hamaxpēr nẽ ma kukamã hprôt nẽ tẽ nẽ nhỹri pry mỳri pĩ xãm pumu nẽ hã api nẽ kutêp ajêt. Hãmri nhũm Jejus mō nẽ hapa. ⁵Nẽ kãnhmã rĩt nẽ omu nẽ kãm:

—Pa Jakew. E kwa tokyx tẽn wrỳ pa ma akôt anhōrkwy hwỳr tẽ nẽ ari amnhĩm hikra. Anẽ.

⁶Hãmri nhũm kuma nẽ hkĩnh nẽ. Nẽ wrỳk kurê kumrêx nẽ ma amnhĩ kôt nẽ o tẽ. ⁷Hãmri nhũm mẽ kot omunh o kuhê xwỳnhjaja tee ri ja hã omu nhũm ja mẽ kêp omnuj nẽ nhũm mẽ axpên mã harênh o:

—Tk. Kwa nà. Jakew kot amnhĩ tomnuj xwỳnh tã nhũm Jejus ma hkôt tẽ nẽ kuri pōj. Anẽ.

⁸Hãmri nhũm wa òrkwy hwỳr axà nẽ nhỹ nhũm Jakew Jejus mã amnhĩ jarênh o:

—E. Nà ra ixte pahihiti mã kàxpore jamỳnh xwỳnhhta na pa pre hte ho prês jakre nẽ amnhĩm hamỳnh rax nẽ. Tã kot paj akupỹm mẽ kãm òr pa. Na pa pre hte mẽ hkwyjê pê ho 10 nẽ hamỳ. Tã kot paj hipy ho 40 nẽ kurê nẽ akupỹm mẽ kãm ho ixpigrành pa. ã kot paj mẽ hipêx anẽ. Nẽ ixkàxpore jakrêx kot paj ho axkjê nẽ mẽ kêp amrakati xwỳnhjê mã ho ixpigrành pa. Anẽ.

⁹Hãmri nhũm kuma nhũm ja kãm mex nẽ. Jakamã nhũm kãm:

—Nà ãm hãmri. Ate pahkukamã panhîgêt Apraãw pyrã nê jarãhã ate amnhî tomnuj kaga jakamã na ra jarãhã anhôrkwÿ hwÿr mē mex xà axà. Koja Tirtũm jarãhã amnhî katut kôt ate amnhî tomnuj rēnh pa nê axte kãm hamaxpēr kêt nê. 10-11 Mē ate amnhî tomnuj xwÿnhjê hwÿr na pre Tirtũm inhmē pa wrÿ. Te nhÿri mē apikunor nhũm ixte mē ajapêr o ixpa kaxyw Tirtũm kot mē awÿr inhmēnh nhũm ixwrÿk nê nhÿri ixte mē ajapêr o ixpa nê mē amã ixkator nê ixkĩnh nê ma akupÿm hwÿr mē ato inhmôrta pyrãk. Anê.

Mē pahte Tirtũm mã tanhmã amnhî nhîpêx to

Matêwre 25.14-30

Hãmri nhũm mē ohtô nê Jejus mar o hkôt Jerujarē hwÿr mra. Na prem htÿx tanhmã kot amnhî nhîpêx to hã hkamnhix o hkôt mō nê axpēn mã:

—E ma pu mē hkôt. Koja Jerujarē hwÿr pōj hãmri nê kēp mē pahpê Ijaew nhō pahi nê mē pahto amnhîptār kurê kumrēx. E kwa ma pu mē hkôt. Anê.

12Nhũm Jejus mē hamaxpēr kôt mē omunh mex nê. Jakamã kot mē piitã mē ho amnhîptār xà hã arĩgro hã mē kãm amnhî jarēnh kaxyw. Kormã Jerujarē hwÿr ahtêp kêt ri mē kãm amnhî jarēnh kaxyw. Nom hprĩ hã mē kãm hã amnhî jarēnh kêt nê. ãm amnhî tã kuxi nê mē kãm awjarē nê mē kãm:

—Koja nhÿri krĩ hō kamã mēhō myja. Kot amnhî to rax o hkwÿjê jakrenh xwÿnhja. Nê krĩ hō kamã krĩ piitã hkôt pahi nhō pahihtija hãmri harēnh ma nê amnhî wÿr kuwÿ. Kot ma hwÿr mōr nhũm ò krĩ kamã nê mãänēn krĩ hkwÿ kamã kēp mē ò pahi kaxyw kot ãm kaxyw nhũm hwÿr nojarêt. 13Hãmri nê amnhî wÿr kãm mē àpēnh xwÿnhjê ho 10 nê tanhmã mē hã karō hto. Nhũm mē hwÿr mra nhũm mē kãm amnhî jarē nê mē piitã mē kãm kàxpore hkwÿ gō. Ahpÿnhã mē kãm hpÿnh nê kugō nê mē kãm: “E ota ixkàxpore hkwÿta. Kot kaj mē ixkutêp tanhmã ri inhmã ho rax to. Kêr pa mēmo arĩgro hã akupÿn mō kê ra ixahã inhmã ho ohtô nê pa hamÿ.” Anhÿr o mē kãm kapêr hãmri nê ma mō. 14Hãmri nhũm ò krĩ nhō xwÿnhjaja ra kēp mē ò pahi kaxyw harēnh ma nhũm ja mē kēp omnuj nê. Nê mē kãm hkĩnh kêt jakamã ma krĩ hō kamã kot mē kaxyw ãm xwÿnhhta wÿr hkwÿ rē nhũm mē ma hwÿr mra nê hwÿr pōj. Hãmri nê kot mē kaxyw ãm mã xwÿnhhta pumu nê kãm: “Pa. E ot pa mē awÿr mra. Kwa na ka xep ra mē ixkaxyw mē inhîõja xãm kaxyw. Kwa nã mē inhmã jahti hkĩnhhti hã. Kwa mē ixkaxyw ãm kêt nê nã?” Anhÿr o kãm kapêr.

15—Tã no nhũm ãm mē kuma nê ãm mē kuma nhũm mē awjanã nê mã akupÿm mra. Hãmri nhũm pahija mē kaxyw mē kãm hkĩnh kêt xwÿnhhta xãm nhũm ma akupÿm ò krĩ hwÿr mō. Mōõ nê ra pōj hãmri nê

amnhĩ wỳr kãm mẽ àpênh xwỳnhjê hã karō nê mẽ kãm: “E no ixte mẽ amã kàxpore nhõr xwỳnhhta? Tanhmã na ka prem ixkutêp inhmã ho rax to? E mẽ inhmã agõ pa omu.” Anê.

16—Hãmri nhũm wamta kãm: “Ota akàxpore ate inhmã õr xwỳnhhta. Na ka pre inhmã ho pyxi nê agõ pa kupy nê ho mẽmo hy hkwy japrô nê hkre. Nhũm ô pa mẽ kãm ho wênê ho ri ixpa nê hpãnhã kàxpore jamy nê hipy amã kurê nhũm ra kêp 10. Ota. E amỳ.” Anê.

17—Hãmri nhũm kuma nê hkĩnh nê. Hãmri nê kãm: “Nà ãm hãmri na ka ã inhmã ho rax anê. Ixte amã ho pyxi nê õr tã ka pre inhmã hamãr mex nê nhũm kànhmã axkamê nê ra kêp 10. Tã ra ixpê krĩ hkwy kamã mẽ õ pahi jakamã kot ka inhmã krĩ ho 10 nê inhmã hamãr o ri apa. Jakamã kwa mãmri amnhĩm kàxporeta o arĩk.” Anê.

18—Hãmri nhũm hpãnhã hõja hwỳr tẽ nê kãm: “E ota akàxporeta. Na pa pre ho mẽmo hy hkwy japrô nê hkre nhũm ô pa mẽ kãm ho wênê nê hpãnhã kàxpore jamy nê hipy amã kurê nhũm ra kêp 5. Tã ota. E amỳ.” Anê. 19Hãmri nhũm kuma nê kãm: “Nà ãm hãmri. Hãmri na ka ã inhmã ho rax anê. Jakamã kot kaj hpãnhã inhmã krĩ ho 5 nê ho amnhĩptar o apa. E mãmri amnhĩm kàxporeta o arĩk.” Anê.

20-21—Hãmri nhũm hpãnhã hkõt hõta tẽ. Nom hkwyjê hkĩnhã õ patrãw mã tanhmã kàxpore ho rax to hkêt nê. ãm tanhmã hamaxpêr punuj to nê htỳx ri kot kêp ho õxỳ nê amnhĩm piitã hamỳnh par nê akupỳm kãm hkwy nhõr kêt ã hkamnhĩx. Jakamã tanhmã kãm ho rax to hkêt nê. ãm hkupu nê o tẽ nê nhỹri kutêp kuxi. Hãmri nhũm õ patrãw amnhĩ wỳr hã karō nhũm hwỳr tẽ nê amnhĩ nê kãm kapêr punuj nê kãm: “Tk. Ota akàxporeta. Ixte amã tanhmã ho rax tore hã. Ixte amã ho rax ronhỹx ka amnhĩm piitã hamỳnh pa nê akupỳn inhmã hkwy nhõr kêt nê. Rỳ ixte tanhmã apê homnuj to ronhỹx ka hã inhmã akir. Jakamã na pa tanhmã amã ho rax to hkêt nê. ãm hkupu nê o tẽ nê ho amũxu nhũm arĩ akutêp hikwỹ. Tã ota.” Anhỹr o amnhĩ nê õ patrãw mã kapêr punuj nê. 22-23Hãmri nhũm tee ri amnhĩ tã kuma. Kot amnhĩ to mex xwỳnh nê kãm mẽ àpênh xwỳnhjê ho mex o pa xwỳnh tã ã kãm àpênh xwỳnh kot kãm kapêr anhỹrja ma nê amnhĩ tã kamã gryk nê. Hãmri nê kãm: “Tk. Kwa xà ã ixte amnhĩ nhĩpêx anhỹr? Nà ixte ã amnhĩ nhĩpêx anhỹr kêt. ã ixte amnhĩ nhĩpêx anhỹr nhũm amã ixpuma ronhỹx ka pre amã ixpuma xaj ixkàxporeta py nê ixwakre kamã amnhĩ krã hkõt tanhmã inhmã ho rax to. Tã nhỹx pa pre ra akupỳn awỳr tẽ nê hamỳ. Nà na ka ã ijarênh anhỹr o axêx nê amnhĩ krã hkõt tanhmã inhmã ho rax to hkêt nê. Mỳrapê kot paj atomnuj tỳx nê ka rĩ amnhĩ pumu. Pêr ãm ajamaxpêr punuj.”

24—Nhũm pre ã kãm kapêr anê hãmri nê mẽ kot mar o kuhê xwỳnhjê mã kãm: “E mẽ atõ kêp kàxpore py nê wam kot ho 10 nê hamỳnh xwỳnhhta mã agõ.” Anê. 25Hãmri nhũm mẽ tee ri kuma nhũm

ja mẽ kêp omnuj nhũm mẽ kãm: “Kwa nà ra hikàxpore rax kênã. Ra ate kãm ho 10 nê òr kênã.” Anê. 26Hãmri nhũm mẽ kãm: “Ýy nom tãã. Mãmri kãm agô. Koja mēhō inhmã àpênh mex pa amnhĩ tã omu nê kot inhmã àpênh mexta pãnhã ho mex nê. No koja inhmã àpênh mex kêt nê pa tee ri ja hã omu nê ho mex kêt nê. E mãmri kãm agô.” Anê. 27Hãmri nê hpãnhã mẽ kãm: “E hpãnhã mẽ kãm ixprãm nõkati xwỳnhjaja. Ixte mẽ ho amnhĩptàr mã tã mẽ kãm ixprãm nõkati xwỳnhjaja. Mẽ ma mẽ hwỳr mra nê mẽ ho akuprô nê akupỳn amnê ixwỳr mẽ o mra nê inhnoo mã mẽ himex pa.” Anê. ã mẽ ujarênh kot anhỳr. Anê.

Nhũm pre Jejus ã mẽ kãm ujarênh anê. Te tãm kêp patrãwta pyrã nê ã amnhĩ jarênh anê. Mẽ kot tanhmã amnhĩ nhĩpêx to ho pa hã mẽ omunh xà hkôt tanhmã mẽ hipêx to hã amnhĩ jarê.

Jejus kot Jerujarê hwỳr àr ã harênh

Matêwre 12.1-11; Makre 11.1-11; Juãw 12.12-19

28Nhũm Jejus kormã Jerujarê hwỳr mō. 29Hãmri nê ra Petake mẽ Petãn wa htêp o mō. Hixêt pê Oriwêhti kahti ri na krĩ wa xa. Jakamã nhũm Jejus hkôt mẽ pa ho mẽ pa xwỳnh wa ho axkrut nê amnhĩ kukamã wa kumê. 30Nê wa kãm:

—E. Wa ma krĩ mũj wỳr mẽ ixkukamã wa tẽ. Nê wa hwỳr pôj nê nhỹri jumênre nyw mã ê nê ãm ata pumu. Kormã mẽ kot hã hkrĩ hkêt xwỳnhhta. Ka wa omu nê kãm ê xà hpôt nê man akupỳn ixwỳr o tẽ. 31Nhũm mēhō ja hã war apumu nê hã tanhmã war amã kapêr to ka wa kãm ã ijarênh anê nê kãm: “Mẽ panhō Pahihti na hã karō pa wa hwỳr tẽ.” Anhỳr o wa kãm ijarê. E wa ma hwỳr tẽ. Anê.

32Hãmri nhũm wa kuma nê ma hwỳr htêm kurê kumrêx. Nê wa krĩm pôj nhũm Jejus kot wa kãm harênh xà hkôt jumênreta pumu. 33Hãmri nê kãm ê xà hpôt o xa nhũm ò dõnjaja mra nê hã wa omu nê wa kãm:

—Tk. Kwa mo kaxyw na ka wa ri mẽ ixpê mẽ ixkrit mã ê xà pôt o wa xa? Kwa xà kot kaj wa mẽ ixpê ho ahkĩ nà? Anê.

34Hãmri nhũm wa mẽ kãm:

—Nà mẽ panhō Pahihti na wa inhmã anê pa wa tẽ. Wa ixte ma akupỳm kutã ho inhmōr kaxyw. Anê.

Hãmri nhũm mẽ wa kuma nê wa kãm:

—Tôe. Nà wa mãmri ma kãm o tẽ. Anê.

35Hãmri nhũm wa ma akupỳm Jejus wỳr o tẽ. Hãmri nê kaxyw amnhĩ xê hkwỳ hopôj nê kãm ho hkô kahty nê kãm ho htỳx nê o xa nhũm hã nhỹ nê mō. 36Kormã Jerujarê hwỳr hixêt ã àpir o mō. Nhũm mẽ kot omunh o mrrar xwỳnhjaja hkĩnh nê ma hkukamã kot pry ho mex kaxyw amnhĩ xê hkwỳptyr o mō. 37Hãmri nhũm mẽ hixêt ã api nê kormã ahpar mã wrỳk o mō. Hãmri nhũm Jejus kôt mẽ pa ho pa xwỳnhjaja kàx pê Tirtũm mex o mex ã harênh o hkôt mō. Ra mẽ kot hkôt pikamênh ry nê

kot mẽ kãm aa mẽmoj pumunh kêt kwỳ ho anhỹr rax ã omunh jakamã hkĩnh nẽ nẽ Tĩrtũm mex o mex ã harẽnh o hkôt mō. **38**Nẽ harẽnh o:

E ota Tĩrtũm kot mẽ pahwỳr mẽnh xwỳnhhta na ra pōj.

Ãm hãmri na mẽ pahwỳr wrỳ. Na mex kumrẽx.

Kêp mẽ panhõ Pahihtĩ mex na. Ãm hãmri na pre Tĩrtũm mẽ pahwỳr kumẽ.

Tĩrtũmja mex kumrẽx. Mex o mex. Kukwak ri pix mã na pu htem pajamakêtkati nẽ paxãmnhĩx ri papa rãhã ho papa.

Anhỹr o Jejus kôt harẽnh o mō. Ra kot mẽ ho amnhĩptàr kurẽ kumrẽx ã hkamnhĩx jakamã hkĩnh nẽ hkôt ã kapẽr o mōr anẽ. **39**Hãmri nhũm Parijew nhõ xwỳnh kwỳjaja mẽ hkôt mra nẽ tee ri mẽ kuma hãmri nẽ Jejus mã kãm:

—Kwa Jejus. Mẽ kãm anẽ kê mẽ anhĩkrẽ nà? Anẽ.

40Hãmri nhũm mẽ kãm:

—Tk. Nà kot paj mẽ kãm anhỹr kêt nẽ. ã mẽ kapẽr anhỹrja na inhmã mar hprãm. Kwãr mẽ mãmri Tĩrtũm mã mex o mex ã harẽnh o ixkôt mō. Kot mẽ anhỹr kêt nhũm ra pikap kẽn nhĩkwỹ xwỳnhja tee ri ja hã mẽ omu hãmri nẽ tãm tanhmã amnhĩ nhĩpêx to nẽ mẽ hpãnhã tãm Tĩrtũm mã mex o mex ã harẽnh o hikwỹ. Jakamã kwãr mẽ mãmri kapẽr anẽ. Anẽ.

Jejus tee ri kot Jerujarẽ hkukamã hamaxpẽr ã harẽnh

Rukre 23.27-31

41Nhũm mẽ kormã Jerujarẽ hwỳr hpõx o mō. Kormã hixêt rũm ahpar mã hwỳr wrỳk o mō. Hãmri nhũm Jejus amỹm amnhĩ hkukamã Jerujarẽ nhõ xwỳnhjẽ pumunh o mō nẽ mẽ hkukamã hamaxpẽr o hkaprĩ nẽ. Hãmri nẽ hkaprĩ xàj mỳr o mō. **42**Hãmri nẽ te kot mẽ kuri mẽ omunh o ri pa pẽ mẽ kãm kapẽr pyrak o mẽ kãm kapẽr nẽ mẽ kãm:

—Hêxta waa nẽ Jerujarẽ nhõ xwỳnhjaja. Kot kaj mẽ amex kêt nẽ. Mẽ ate amnhĩ kukamã axãhpumunh mex ronhỹx ka mẽ ra mẽ kãm mẽ akurẽ xwỳnhjẽ pumaj ixkôt amnhĩ xunhwỳr kurẽ kumrẽx nhũm mẽ tee ri tanhmã mẽ ato mã. Ka mẽ ra ixkukwak ri amex nẽ ajamakêtkati nẽ akĩnh nẽ ri apa ho apa. **43-44**Tĩrtũm tãm kot mẽ awỳr inhmẽnũh tã ka mẽ amã ixprãm kêt nẽ. Jakamã koja nhỹrmã mẽ kãm mẽ akurẽ xwỳnhjaja mẽ awỳr mra nẽ mẽ anhõ krĩm hipok pa. Hãmri ka mẽ amnhĩ wỳr mẽ omu nẽ tee ri ajapõx kaxyw nhũm mẽ awỳr agjẽ nẽ mẽ anhĩmex pa nẽ mẽ anhõ krĩa grãnh pa. Nẽ ahpỹnhã ri mẽ anhõrkwỹ grãnh pa. ã koja mẽ mẽmoj piitã grãnh par anẽ. Anẽ.

Jejus kot Tĩrtũm nhõrkwỹ hwỳr àr ã harẽnh

Matêwre 21.12-17; Makre 11.15-19; Juãw 2.13-22

45-46Tã nhũm Jejus Jerujarẽ hwỳr axà nẽ jumẽnre rũm wrỳ hãmri nẽ ma Tĩrtũm mã amnhĩ jarẽnh xà hã ixkreja wỳr tẽ. Hãmri nẽ hwỳr axà

ně tee ri kamã mẽ pa xwỳnhjê pumunh o xa. Nhũm mẽ ra axtem mẽ môx mẽ ôwêhti mẽ tuuti ho wênê ho kuhê. Mẽ kot haprôr mẽ Tĩrtũm mã hpar mẽ kãm ôr pê kãm amnhĩ jarênh kaxyw mẽ kãm ho wênê ho kuhê. Nẽ axtem mẽ mẽ kãm hã ohtô rax kãm mẽ kãm ho wênê. Hãmri nhũm Jejus mẽ hwỳr axà mẽ tee ri mẽ omu mẽ kãm akir mẽ mẽ kãm:

—Tk. Kwa nà. Tĩrtũm kapêr ã kagà htũm kot ôrkwỹ jarênh kot:
Inhôrkwỹja âm mẽ ate inhmã amnhĩ jarênh xà hã ixkre pix
kaxyw na.

Anhỹr o kot harênh tã ka mẽ axtem mẽ kamã ã amnhĩ nhĩpêx anhỹr o apa. E mẽ ajapôj mẽ ma ajapêx tokyx anê.

Anhỹr o mẽ kãm kapêr hãmri mẽ ixkre nê mẽ kator nhũm mẽ ma hapêx pa.

47Tã nhũm Jejus apkati mẽ Tĩrtũm mã amnhĩ jarênh xà hã ixkreja wỳr mra mẽ kamã mẽ ahkre ho hkrĩ. Hãmri nhũm mẽ ô patre krãhtũm mẽ Tĩrtũm kapêr tũm o mẽ ahkre xwỳnhjê mẽ mẽ kot amnhĩ to rũnh xwỳnhjaja kot mẽ ahkre ma nhũm ja mẽ kêp omnuj mẽ nhũm mẽ kãm hpĩr prãm nê. 48Nom nhũm amarĩ mẽ pa xwỳnhjaja mẽ kurom kãm mar prãm mẽ akryk mar o kuhê. Jakamã nhũm mẽ tee ri ja hã mẽ omu mẽ tanhmã mẽ kot hpĩr to hkukamã hã axpên ma.

Mêhõ nhỹ hã Jejus kot mẽ ahkre hã harênh

Matêwre 21.23-27; Makre 11.27-33

20 1Nhũm arĩgro hõ hã nhũm Jejus kê axte Tĩrtũm mã amnhĩ jarênh xà hã ixkreja wỳr axà mẽ mẽ ahkre ho nhỹ. Tanhmã mẽ kot amnhĩ nhĩpêx to mẽ nhỹrmã Tĩrtũm mẽ wa kuri htĩr tũm mẽ pa hã mẽ kãm kapêr o nhỹ. Hãmri nhũm Ijaew nhõ pahijê mẽ mẽ kot Tĩrtũm kapêr tũm o mẽ ahkre xwỳnhjê mẽ mẽ ô patre krãhtũmjaja hêx rom mar o kuhê. 2Hãmri mẽ kãm:

—Kwa mẽ inhmã amnhĩ jarê. Mêhõ nhỹ hã na ka hte ã amnhĩ nhĩpêx anhỹr o ri apa? Na ka hte akupỹm mẽ ho mex o apa mẽ tanhmã mẽ ahkre hto ho apa. Xà amnhĩ krã hkôt na ka hte ã amnhĩ nhĩpêx anê nà? Anê.

3Hãmri nhũm mẽ kãm:

—Nà ixkumrêx kot paj mẽmoj tã mẽ akukja. Ka mẽ inhma mẽ inhmã harê pa rĩ kormã tanhmã mẽ amã amnhĩ jarênh to. 4Finat Juãw Paxisja ã kot paj mẽ akukja. Mêhõ nhỹ hã na pre mẽ hkrã kumrãr o pa? Xà amnhĩ krã hkôt nà xà Tĩrtũm nhỹ hã? E mẽ atô inhmã harê. Anê.

5-6Hãmri nhũm mẽ kuma mẽ tee ri kot tanhmã kutã kãm harênh to hkukamã hamaxpêr mẽ axpên mã:

—Kwa tanhmã kot puj mẽ kãm harênh to? Jar mẽ kot mar xwỳnhjaja na htem kêp Tĩrtũm nhỹ hã kapêr jarênh o pa xwỳnh ã harênh o pa. Tã kot puj mẽ kãm kot amnhĩ krã hkôt mẽ hkrã kumrãr o pa hã harê nhũm mẽ tee ri mẽ pama mẽ mẽ pakamã gryk tỳx nê. Nẽ mẽ paxêx rom mẽ

pahte kām pakapēr ā mẽ pahpumunh kurê kumrêx nê kên o mẽ pahtak o mẽ panhîmex. Nom kot puj mẽ kām Tirtûm nhỹ hã mẽ hkrã kumrâr ā harê nhũm mẽ pamã kapēr o: “Ā kot anhyr kênã na ka prem kapēr ma nê ra ixkôt amnhĩ xunhwÿr kêt nê?” Anê. Nà kot puj mẽ kām tanhmã harênh to hkêt nê. Kot puj mẽ âm kãm aa te mẽ pahte ja jarênh mar kêt pyræk o harê. Anê.

Mẽ kot tanhmã kãm nê nhũm kot ta pãnhã tanhmã mẽ kãm nê pymaj nhũm mẽ âm tee ri kãm tanhmã nê hprãm kaprÿ o kuhê.

7Hãmri nê kãm:

— Konên. Mẽ ixte mēhõ nhỹ hã kapēr o pa hã omunhre hã. Anê.

8Hãmri nhũm mẽ kuma nê mẽ kãm:

— Tk. Tôe kot pa xep ijaxwÿja mẽ amã tanhmã amnhĩ jarênh to hkêt nê. Ijaxwÿja ixte mēhõ nhỹ hã ā ixte amnhĩ nhĩpêx anhyr o ri ixpa hã amnhĩ pumunhre hã. Anê.

Mẽ àpênh punuj xwÿnhjê jarênh

Matêwre 21.33-46; Makre 12.1-12

9Nhũm Jejus arĩ Ijaew nhõ pahijê mã kapēr. Nê mẽ kot tanhmã hipêx to hkukamã mẽ kãm tanhmã amnhĩ jarênh to. No âm amnhĩ tâ kuxi nê mẽ kãm awjarê nê mẽ kãm:

— Kojã mēhõ hpur ā hkwyjê kot kamã kãm àpênh kaxyw mẽ kãm karõ. Hãmri nhũm mẽ ma hwÿr mra nê kamã mẽmo hy hkre nê hkre pa. Hãmri nhũm ra hpur nhõ dõnja nhỹhÿm nojarêt nê kãm mẽ àpênh xwÿnhjê mã tanhmã hpur jarênh to nê mẽ kãm: “E or ixpur nõ. Kê kamã mẽmoj hkà hpa ka mẽ mãmri kamã axujamÿnh pa nê ho axkjê. Nê ixkutêp inhõ jaxwÿ nê mãmri mẽ anhõ tanhmã ho hprãm xà hkôt tanhmã ho.” Anê.

— Nhũm ā mẽ kãm kapēr anê hãmri nê ma nhỹhÿm mõi.

10— Tã nhũm ra hkà hpa. Nom nhũm hpur nhõ dõnja kormã krĩ hõ kamã ri hã ujahkre ho ri pa. Tã kuri kãm àpênh xwÿnhjê hõja nhũm akupÿm mẽ hwÿr kumê. Mẽ kot kãm kwÿ nhõr nhũm ma kot kãm o mõi kaxyw ma mẽ hwÿr kumê nhũm ma mẽ hwÿr mõi. Mõi nê mẽ hwÿr põi nhũm mẽ omu nê axtem nê unê nê htak nê akupÿm hano nhũm ma akupÿm ÿ kamã mõi. 11Hãmri nê põi nhũm õ patrãwja tee ri omu nê hpãnhã ja mẽ nhũm ma mẽ hwÿr mõi. Mõi nê mẽ hwÿr põi nhũm kê wem mã ho anê nê unê nê htak nê akupÿm hano nhũm wamta pyrã nê ma akupÿm ÿ kamã mõi.

12— Hãmri nhũm kê axte hkôt ja mẽ nhũm ma mẽ hwÿr mãânên mõi. Ma mẽ hwÿr mõi nê põi nhũm mẽ te ho wamta wa hipêx pyræk o hipêx nê unê nê htak rax nê amnhĩ nê hano nê pur nê kapôt ā kumê. Hãmri nhũm ma akupÿm mãânên ÿ kamã mõi. 13Nhũm mẽ õ patrãw tee ri mẽ omu nê hamaxpêr o: “Hêxta waa nê. Tanhmã kot paj amnhĩ nhĩpêx to?”

Nà kot paj mẽ hwỳr ixkra mǎn mẽ. Inhmǎ hapê htǎ kot paj mẽ hwỳr kumê kê ma mẽ hwỳr mō. Hāmri nhũm mẽ kêp ixkra hǎ omu nê tanhmǎ ixpê ho hkêr nê. Nê tǎ inhmǎ kǎm inhōja kwỳ gō.” Anhỳr o hamaxpêr hāmri nê ma mẽ hwỳr kumê nhũm ma mẽ hwỳr mō.

14—Tǎ ra mẽ hwỳr hpōx o mō nhũm mẽ amnhĩ wỳr omu nê kêp hkra hǎ omu nê hǎ axpên mǎ amỳnê nê axpên mǎ: “E onêj hpur nhō dōn krata tê. Kojǎ nhỹrmǎ ô papaj mỳr pê amnhĩm pur ǎ pyka pytà nê ho ô. Kwa pu mẽ hpĩr kurê kumrêx nê kêp hpurja o panhō. E tokyj pu mẽ kupĩ ri.” Anê.

15—Hāmri nhũm tê nê mẽ hwỳr pōj nhũm mẽ unê nê pur nê ho kato nê ma o tê nê kupĩ. ǎ mẽ ujarênh kot anhỳr. Anê.

Nhũm pre ǎ Jejus mẽ kǎm ujarênh anê nê hǎ tanhmǎ mẽ hkukjêr to nê mẽ kǎm:

—E kojǎ hpur nhō dōnja hkra jarênh ma hāmri nê tǎm mẽ hwỳr mō nê tanhmǎ mẽ hipêx to wehe? 16Kojǎ ma mẽ hwỳr mō hāmri nê mẽ himex pa. Hāmri nê hpǎnhǎ hpur ǎ nhǎm mẽmojjê rê nhũm mẽ tǎ kǎm hamǎr mex o pa. Anê.

Nhũm pre ǎ Jejus mẽ kǎm ujarênh anê hāmri nhũm mẽ kot mar xwỳnhhtaja ujarênh kamǎ amnhĩ jarênh mar kurê kumrêx. Mê kot Tĩrtũm kot mẽ hwỳr rênh xwỳnhjê kapêr mar kêt nhũm mỳrapê mẽ kǎm mẽ hkurê xwỳnhhaja kot mẽ kêp mẽ ô pika pytàr nê mẽ himex par ǎ amnhĩ jarênh ma nhũm ja mẽ kêp omnuj tỳx nê. Hāmri nê hêx rom Jejus mǎ kǎm:

—Tk. Kwa nà nhỹx pre kêt pur nhō dōnja ǎ mẽ hipêx anhỳr kêt nê. Anê.

17Hāmri nhũm mẽ kuma nê mẽ omunh o xa. Nê mẽ omunh pê mẽ no kagàr mǎ mẽ kǎm kapêr nê mẽ kǎm:

—Nà ǎ mẽ hipêx anhỳr mǎ mẽ tǎm kênǎ. Mǎn ka prem ra Tĩrtũm kapêr ǎ kagà htũm kot ja jarênh ma. Harênh kot:

Mê kot kên o amnhĩm ôrkwỹ nhĩpêx kaxyw nê kên maati pumu nê htỳx omnuj ǎ hkamnhĩx nê hkaga.

Mê kot hkaga htǎ Tĩrtũm mẽ kurom mex o kot kên piitǎ hakrenh par ǎ omunh kurê kumrêx. Anê.

ǎ Tĩrtũm kapêr ǎ kagà htũm kot mẽ ajarênh te mẽ kot kên maati punuj ǎ hkamnhĩx nê hkaga xwỳnhjê jarênh pyrǎk o ǎ mẽ ajarênh kot anhỳr. Anê.

18Nhũm pre ǎ Jejus mẽ kǎm te kêp kên maati pyrǎk o mẽ kǎm amnhĩ jarênh anê. Hāmri nê axte amnhĩ tǎ kuxi nê mẽ kǎm axte kên jarênhta pyrǎ nê mẽ kǎm:

—Nà kot kaj mẽ atō ixkaga hāmri nê te mēhō htỳx htêm nê kên pumunh kêt nê hǎ htêk nê têm pyrǎk o amnhĩ nhĩpêx. Jao ixkutǎ amnhĩ xǎm. Rỳ ka tanhmǎ amnhĩ to nê ixkaga nhũm te kên maati hō htêm nê kot anhĩpy htêm nê axôm par pyrǎk o anhĩpêx ka amex kêt nê. Anê.

19Nhũm pre ã Jejus mẽ kãm ujarẽnh kãm mẽ harẽnh anẽ. Hãmri nhũm Tĩrtũm kapẽr tũm o mẽ ahkre xwỳnhjê mẽ mẽ õ patre krãhtũmjaja kot mẽ kãm kẽn jarẽnh o te mẽ tãm harẽnh pyrãkja ma nhũm ja mẽ kệp omnuj tỳx nẽ. Jakamã nhũm mẽ kãm Jejus pynẽnh nẽ haxàr prãm nẽ. Nom amnhĩ tã kãm mẽ kot mar o kuhê xwỳnhjê puma nẽ.

Mẽ kot hêx rom Jejus kukjêr ã mẽ harẽnh

Matêwre 22.15-22; Makre 12.13-17; mããnẽn Rômãn 12.1, 13.6-7

20Hãmri nhũm Tĩrtũm kapẽr tũm o mẽ ahkre xwỳnhjê mẽ mẽ õ patre krãhtũmjaja Jejus tãnopxar o kuhê. Hãmri nẽ ra amnhĩ wỳr mẽmy hkwy hã karõ nẽ mẽ kãm:

— E. Mẽ ma Jejus wỳr mra nẽ te mẽ ate hkõt amnhĩ xunhwỳr kaxyw pyrãk o amnhĩ nhĩpêx nẽ mẽmoj tã ri hkukja. Mẽmoj tã hkukjêr rax nẽ. Kêr kê Rôm nhõ pahi Sesti kapẽr kwỳm ri tanhmã mẽ amã kapẽr to ka mẽ ama nẽ man akupỳn mra nẽ mẽ inhmã harẽnh kurê kumrêx. Pa mẽ ama nẽ ma hwỳr mra nẽ hã unê nẽ ma Sesti nhỹ hã mẽ pahto amnhĩptàr xwỳnhta wỳr o tẽ nẽ ìhkram haxà. Anẽ.

21Hãmri nhũm mẽ kuma nẽ mẽ kãm:

— Tôe. Nà kot paj mẽ anẽ. Anẽ.

Hãmri nẽ ma hwỳr mra nẽ hêx rom kãm kapẽr nẽ kãm:

— Pa Jejus? Nà ãm hãmri na ka hte Tĩrtũm kapẽr o mẽ ahkre mex o ri apa. Na ka hte mẽ kamã akahak kêt nẽ. Nẽ mẽ kot tee ri tanhmã ato kapẽr punuj to htã ka aprĩ hã mẽ ahkre mex o ri apa. 22Kwa mẽ inhmã mẽmoj jarẽ. Rôm nhõ pahihti kot mẽ pahte kãm kàxpore hkwy nhõr ã mẽ pahpê Ijaew mã karõta. Kwa xà we ja amã mex nà? Xà kot pu mẽ kãm kugõ nà xà kot pu mẽ kãm õr kêt nẽ? E kwa mẽ inhmã tanhmã harẽnh to. Anẽ.

23Nhũm prem ã hêx rom kãm kapẽr anhỹr tã nhũm ra mẽ hamaxpêr ã mẽ omu nẽ mẽ kãm:

24— E mẽ atõ anhõ kàxpore htỳxre japêr nẽ inhmã hõ gõ pa omu. Anẽ.

Hãmri nhũm mẽ kãm ja gõ nhũm kupy nẽ omu nẽ kànhmã mẽ kãm kupê nẽ mẽ kãm:

— E mẽhõ nhĩxi nẽ mẽhõ karõ na ja hã? Anẽ.

Hãmri nhũm mẽ kãm:

— Pahi Sesti karõ nẽ hixi na hã kênã. Anẽ.

25Hãmri nhũm mẽ kuma nẽ mẽ kãm:

— Tỳ. Tô kêr ka mẽ mãmrĩ kãm hkwy nhõr o apa. Hã hkarõ nẽ hã hixi. Tãm kot hipêx xwỳnh jakamã õ na. No mẽ kajaja na pre Tĩrtũm mẽ anhĩpêx nhũm mẽ apê õ jakamã kwa kêr ka mẽ kapẽr kõt pix mã ri amnhĩ nhĩpêx o ri apa. Anẽ.

26Nhũm pre ã Jejus mẽ kãm kapẽr anẽ nhũm mẽ piitã mar o kuhê. Nhũm mẽ kot hêx rom kãm kapẽr mã xwỳnhjaja amnhĩ jaêr pẽ ã kot

kàxpore jarènh anhÿrja ma. Hāmri nē tee ri axte mēmoj tā hkukjêr nhūm kot pahi Sesti kwÿm ri kot tanhmā harènh to kaxyw ām tee ri tanhmā hkukjêr to kaprÿ. Hāmri nē axte tanhmā kām nē hkêt nē ām akryk omunh pê mar o kuhê.

Akupÿm mē htír jarènh

Matêwre 22.23-33; Makre 12.18-27; Juāw 5.21, 6.39; mǎānēn Wam Korīt 6.14, 15.12-28; Wam Tesarōn 4.13-18, 6.14; Apokarip 20.4

27Tā nhūm Satusew nhō xwÿnh kwÿjaja. Mē kot akupÿm mē htír mǎ hamaxpêr kêt jakamā mē htyk nē mē hapêx ā mē hkamnhīx. Jakamā na prem tanhmā axpēn mǎ Jejus jarènh to nē axpēn mǎ:

—E kwa pu mē ma hwÿr mra nē mēmoj xihÿx ā hkukja kê mē pama nē tee ri tanhmā mē pamā harènh to hkukamā hamaxpêr. Hāmri nhūm mē piitā ja hā omu nē àhpumunh tÿx kêt ā omunh kurê kumrêx. E ma pu mē hwÿr.

Anē nē ma hwÿr mra nē Parijew nhō xwÿnhjê pyrā nē hêx rom ahkukja nē kām:

28—Pa Jejus? Kwa mē inhmā mēmoj jarē. Na pre finat Mojesja Tirtūm nhÿ hā mē panhīgêt mǎ ā karō anē. Mē hkra hkêt rāhā mē pa nē mē htyk xwÿnhjaja nhūm mē harènh o:

Koja mēhō hprō nē kormā kamā hkra hkêt rāhā pa nē ty. Hā koja hkôt htōja hpānhā hprōta o hprō nē kamā hkra. Hāmri nhūm kato nē te kêp htō htyk xwÿnhhta hkra pyrāk. Anē.

Na pre ā Mojes mē kām karō anē. 29Jakamā kwa ga mē ixujarènh ma. Koja mē kot axpēn to htō xwÿnhjaja kêp 7. Nhūm kot waja mēhō ho hprō nē wa pa nhūm kamā hkra hkêt rāhā ty. Nhūm hkôt htō hōta hpānhā hprō ho hprō 30nē wa axpēn to pa. Nhūm mǎānēn ty. Kamā hkra hkêt rāhā ty.

31—Nhūm htō hōta. Haxwÿja hpānhā tām o hprō nē wa axpēn to pa grire nhūm haxwÿja kamā hkra hkêt rāhā ty. Hāmri nhūm htō hkwÿjaja piitā nija pyxi nē axpēn pānhā ho hprō hpa. No ām mēhō kamā hkra hkêt rāhā ra htyk pa. 32Hāmri nhūm mē hprōta mē hkôt amnhī to hapu nē ty. 33Tā Tirtūm kot akupÿm nhÿrmā mē ho htír ronhÿx nhÿ nhÿx kêp nija mjên kumrêx? Ra piitā kot ho hprō kēnā. E mē inhmā ja jarē. Anē.

34Hāmri nhūm Jejus mē kām:

—Nà kaxkwa kamā mē kot amnhī nhīpêxja axtem na. Pika ja kamā na htem pa nē àptār nhūm mē axpēn mǎ mē kure. Ja mex. 35No mē kot Tirtūm kôt amnhī xunhwÿr xwÿnhjaja na htem ty hāmri nē Tirtūm nhō krī kamā kuri axte kām hprō hprām kêt nē ri pa. Rÿ ni japêr nē kām mjên prām kêt nē ri pa. 36Hāmri nē Tirtūm kapêr o mē wrÿk xwÿnhjê pyrā nē axte htyk kêt nē. Ām htír tūm rāhā nē pa ho pa. Tirtūm ra akupÿm kot mē ho htír jakamā koja mē kêp hkra nē kuri

htír tũm nẽ mex nẽ pa ho pa nẽ axte kãm hprõ rỳ mjên prãm kêt nẽ ri pa.

37—Nom mẽ ate akupỹm mẽ htír mã ajamaxpër kêt ã harẽnhja kot paj mẽ amã harẽ. Amnepêm na pre Tĩrtũmja pĩ hpõk kamã Mojes mã kapër nẽ kãm:

Ixpê Apraãw nhõ Tĩrtũm na pa. Nẽ mããnẽn ixpê Apraãw kra Ijak mẽ htãmnhwỳ Jako wa õ Tĩrtũm na pa.

Anhỹr o Mojes mã amnhĩ jarẽ nhũm kuma nẽ hã kagà. 38Kêp apu arĩ mẽ htyk rãhã nhỹx pre ã mẽ harẽnh anhỹr kêt nẽ. Nhỹx pre mẽ harẽnh o: “Amnepêm Apraãw nẽ hkra nẽ htãmnhwỳ mẽ htír ri ixpê mẽ õ Tĩrtũm na pa pre.” Anhỹr o nhỹx pre mẽ harẽ. Nom na pre ã amnhĩ jarẽnh anhỹr kêt nẽ. Mẽ pamã te Apraãwja mẽ htyk nẽ mẽ hapêx pyrãk. Nom nhũm prem ra Tĩrtũm ri akupỹm htír nẽ mex nẽ pa ho pa. Tã ka htem Tĩrtũm kapër kwỹm ri akupỹm mẽ htír kêt ã mẽ harẽnh o apa. Anẽ.

39Nhũm pre ã Jejus mẽ kãm kapër anẽ. Hãmri nhũm Tĩrtũm kapër tũm o mẽ ahkre ho mẽ pa xwỹnh kwỳjaja kuma nẽ tee ri axte tanhmã kãm nẽ hprãm kaprỳ nẽ kãm:

—Tỳ. Nã ãm hãmri na ka ã ja jarẽnh anẽ. Anẽ.

40Hãmri nhũm mẽ axte mẽmoj tã hkukjêr kêt nẽ. Tanhmã kot wem amnhĩ to nẽ hamaxpër o hakre? Na prem ãm tee ri kãm hamaxpër o hakrenh prãm kaprỳ ho kuhê. Jejus kot mẽmoj piitã hkukamã àhpumunh tỳx o àhpumunh tỳx.

Jejus kêp pahi finat Tawi nhõ Pahihti hã kot amnhĩ jarẽnh

Matêwre 22.41-46; Makre 12.35-37; mããnẽn Rõmãn 1.3-4

41Tã nhũm Jejus kãnhmã xa nẽ amnhĩ tã tanhmã mẽ kot mar o kuhê xwỹnhjê hkukjêr to. Nom te nhãm mẽhõ hã mẽ hkukjêr pyrã nẽ mẽ kãm:

—E kwa mẽ inhmã mẽmoj jarẽ. Tĩrtũm kot mẽ akaxyw ãm mã xwỹnhta ã na pa mẽ akukja. Mo na htem axpẽn mã kêp finat pahi Tawi kanrêhã htãmnhwỳ pix ã harẽ nẽ mããnẽn kêp õ pahihti hã harẽnh kêt nẽ? 42Na pre Tawi Tĩrtũm kapër kwỳ hã kagà nẽ tanhmã harẽnh to. Tĩrtũm mex ã mẽ grer xàja kwỳ kamã harẽ nẽ hã kagà nẽ hã kagà ho:

Na pre Tĩrtũm inhõ Pahihti mã ã kapër anẽ nẽ kãm: “E amnẽ ixwỳr tẽ nẽ inhĩhkõ hã nhỹ nẽ inhmã mẽ ho amnhĩptãr o akrĩ.

43Kot paj mẽ kot kãm akurê xwỹnh piitã mẽ unênh pa nẽ awỳr mẽ o mra nẽ anhĩhkram mẽ haxàr pa.” Anhỹr o pre kãm kapër. Anẽ.

44Na pre ã Tawija Tĩrtũm kot Kris mã kapër jarẽnh anẽ. Mẽ kajaja na ka htem ãm kêp Tawi kanrêhã tãmnhwỳ pix ã ri axpẽn mã harẽnh o ri apa. No kêt Tawi na pre kêp õ Pahihti hã harẽnh o pa. Anẽ.

Jejus kot tanhmã Tirtũm kapër tũm o mẽ ahkre xwỳnhjê jarênh to*Matêwre 23.1-12; Makre 12 38-40*

45Nhũm pre ã Jejus mẽ kãm kapër anê nhũm mẽ piitã mar o kuhê. Hãmri nhũm hpãnhã hkôt mẽ pa ho mẽ pa xwỳnhjê mã kapër nê mẽ kãm:

—Kwa mẽ o kora. Kêr ka mẽ Tirtũm kapër tũm o mẽ ahkre xwỳnhjê kot amnhĩ nhĩpêx o amnhĩ nhĩpêx kêt nê. Âm mẽ omu nê âm mẽ omu nê mẽ kot amnhĩ nhĩpêx kôt amnhĩ nhĩpêx o ri apa hkêt nê. 46Na htem mẽ piitã mẽ kot mẽ hã hpijaam kaxyw mẽ ê mex pix kãm ri pa. Nê mẽ kãm mẽ piitã mẽ kot amnhĩm mẽ rũnh xwỳnh ã mẽ harênh o mẽ paja na mẽ kãm hprãm. Nê mẽ panhõ Tirtũm kapër o mẽ ahkre xà hã ixkre kamã mẽ kãm amnhĩ to rũnh xwỳnhjê hkrĩ xà mex pix ã na mẽ kãm mẽ hkrĩ hprãm. Nê mẽmoj tã mẽ hkĩnh ã arĩgro hã nhũm htem mẽ apkur xà hã ixkre hwỳr akuprõ nê mẽ kãm mẽ kot amnhĩ to rũnh xwỳnhjê hkrĩ xà mex pix ã mẽ kãm mẽ hkrĩ hprãm. ã na htem amnhĩ nhĩpêx anhỹr o pa.

47—Nê mẽ kêp mẽ mjên htyk xwỳnhjê ho ajuta ho pa hã amnhĩ jarênh tã âm amnhĩ to hêx nê axtem nê mẽ nokupyr pê mẽ kêp mẽ hikukrêx piitã ho hapêx par o pa. Nê mẽ kêp mẽ ôrkwỹ pytã. Nê mẽ hêx rom te tãm mẽ kot amnhĩ nhĩpêx pyrã nê Tirtũm mã amnhĩ jarênh japjêê ho kuhê. Mỳrapê koja mẽ mex kêt nê. Koja Tirtũm tanhmã ja hã mẽ hipêx to rax nê. Jakamã kwa kêr ka mẽ ã mẽ kot amnhĩ nhĩpêx anhỹr xwỳnhjê hkôt amnhĩ nhĩpêx o apa hkêt nê. Âm kwarĩ ho kwarĩ. Anê.

Kêp mjên htyk xwỳnh jarênh*Makre 12.41-44*

21 1Nhũm Jejus kormã Tirtũm mã amnhĩ jarênh xà hã ixkre kamã mẽ omunh o xa. Na pre hte Ijaew piitã ixkreta ho mex kaxyw kãm mẽ hikàxpore hkwỳ nhõr o pa. Jakamã nhũm mẽ hikàxpore rũnh xwỳnhjaja hwỳr agjê nê kamã kàxpore gjênh xà kamã hkwỳ gjê nê ma akupỹm mra. 2Jakamã nhũm mẽhõ ni pê mjên htyk xwỳnh haxwỳja hwỳr axà. Kêp amrakati kumrêx nê hikàxpore tỳxre âm axkrutre htã mẽ hpãnhã hwỳr axà. Nê kãm Tirtũm kĩnh xàj hamê kamã kuxà hãmri nê kato nê ma akupỹm tẽ. 3-4Hãmri nhũm Jejus arĩ omunh o xa. Kot ã amnhĩ nhĩpêx anhỹr ã omunh o xa nhũm ja kãm mex nê. Hãmri nê hkôt mẽ pa ho pa xwỳnhjê mã harê nê mẽ kãm:

—E mãn ka mênire htêm mũj pumu. Kêp amrakati nê hikàxpore âm kêp grire htã amnhĩ pê ôr pa. Kwỳjê rom kãm Tirtũm kĩnh xàj amnhĩ pê ôr par kumrêx. Apkur xà hã hikàxpore na. Mẽ hkwỳjaja na htem hikàxpore hkwỳ ho mra nê kugjê nom arĩ mẽ hikàxpore rax. No nhũm nire nêj mẽ kurom kãm hikàxpore japê hkêt nê. Nê ho ôxỳ hkêt nê âmnhix piitã Tirtũm mã ôr pa. Anê.

Mê kot amnhĩ tomnuj xwỳnhjê hkukamã mẽ harênh

Matêwre 24.1-2; Makre 13.1-2

5Tã hãmri nhũm Jejus kôt mẽ pa ho mẽ pa xwỳnhjaja kormã Tĩrtũm mã amnhĩ jarênh xà hã ixkre kaxwỳnh pumunh o kuhê nê axpẽn mã harê nê axpẽn mã harênh o:

—Hêxta waa nê. Ixkreja mex kumrêx. Kênh rũnh o mẽ kot hipêx jakamã mex o mex. Nê mẽ kot ri Tĩrtũm mã hkĩnh xà nhôr nêj haxwỳja piitã mex. Anê.

Hãmri nhũm Jejus mẽ kuma nê mẽ kãm:


6—Nà mex tã koja nhỹrmã mẽ kãm Tĩrtũm kurê xwỳnhjaja grành pa. Koja arĩ kên õ axkrutre nê axpẽn mỳnh nê nôr kêt nê. Koja piitã angrà nê ahpỳnhã ri hikwỳ. Anê.

7Nhũm pre ã mẽ kot hipêx anhỹrja kukamã mẽ kãm mẽ harênh anê nhũm mẽ tee ri hkukamã hamaxpêr nê kãm:

—Kwa xà koja mẽ ã hipêx anê? Kwa mẽ inhmã aprĩ hã mẽ kot ixkre grành parta jarê. Xà koja mẽ tokyx ho anê nà xà kormã? Kwa mẽmo koja wỳj ri tanhmã amnhĩ nhĩpêx to? Anê.

8Hãmri nhũm mẽ kãm:

—Nà nhỹrmã mẽmoj piitã hapêx kaxyw tanhmã amnhĩ nhĩpêx to kumrêx kot paj mẽ amã harê ka mẽ inhma. Koja mẽ ohtô nê mẽ apê ixkrajê hwỳr mra nê hêx rom te pa ixte amnhĩ nhĩpêx pyrãk o amnhĩ nhĩpêx o pa. Nê tanhmã mẽ amã amnhĩ jarênh to nê amnhĩ jarênh o: “E mẽ ixpumu. Pa na pre Tĩrtũm mẽ awỳr inhmê. Ixpê kaxkwa rúm ixwrỳk xwỳnh na pa.” Anhỹr o mẽ akôt mẽ amã amnhĩ to hêx o pa. Hãmri nê mẽ amã: “E ot pa ra mẽ ato amnhĩptàr kaxyw mẽ awỳr wrỳ.” Anhỹr o amnhĩ jarênh o mẽ akôt pa. Nom kêr ka mẽ ãm mẽ ama nê ãm mẽ ama. ãm mẽ kot mẽ amã amnhĩ to hêx o pa kênã. Kormã akupỳn ixpôx xà hã arĩgrota kormã.



Rukre 21.5-7

9—Ně koja mẽ nhÿri awry hã axpẽn par o pa. Ně mẽ atãã axpẽn par o pa. Nom kër ka mẽ harẽn h ma nẽ ri tee ri tokyx mẽmoj piitã hapêx kukamã ajamaxpěr kêt nẽ. Mẽmoj piitã hapêx xà hã arĩgrota kormã.

10 Koja mẽmoj piitã hapêx kaxyw nhũm ahpÿnhã ri pika piitã hkõt mẽ pa xwÿnhjaja axpẽn kutã amnhĩ xunhwÿ nẽ pijapu nẽ axpẽn pa.

11 Nẽ koja pika piitã hkõt tanhmã ahpÿnhã mẽ à kute mẽ hamÿ nhũm mẽ amnhĩ xà htÿx kamã hamak o pa.

Nẽ koja pikaja tertet tÿx nẽ.

Nẽ koja mẽ nhÿri pika hkwy kamã prãm xaj hpikaprãr pa.

Nẽ koja kaxkwa kamã mẽmoj tanhmã amnhĩ anhĩpêx to nhũm pika nhõ xwÿnhjaja tee ri omu nẽ kãm ma htÿx kumrêx nẽ htertet o kuhê.

Koja mẽmoj ã amnhĩ nhĩpêx anẽ pa rĩ kormã akupÿn mẽ awÿr wrÿ nhũm mẽmoj piitã hapêx pa. Koja mẽmoj ã amnhĩ nhĩpêx anẽ.

12—E Tirtũm mã amnhĩ jarẽn hã hã ixkre grãnh par xwÿj ri mẽmoj tanhmã hkukamã kot amnhĩ nhĩpêx to hã mẽ ate ixkukjêr xwÿnhhta kot paj hpãnhã mẽ amã harẽ ka mẽ inhma. Koja mẽ kãm ixkurê xwÿnhjaja mẽ awÿr mra nẽ ixtã mẽ apynê nẽ tanhmã ixtã mẽ anhĩpêx to. Nẽ ma mẽ pikuprõnh xà hã ixkreja wÿr mẽ ato mra nẽ kamã mẽ kãm tanhmã mẽ ato kapěr punuj to. Nhũm mẽ kuma hãmri nẽ ma mẽ ato mra nẽ mẽ ajagjê. Mẽ ate ixkõt apa ho apa jakamã koja mẽ ã mẽ anhĩpêx anẽ. Nẽ mẽ õ pahihiti hwÿr mẽ ato mra nẽ mẽ kãm tanhmã mẽ ato kapěr punuj to. 13Tã kër ka mẽ kutã akrĩ nẽ axãmnhĩx mãmrĩ tanhmã mẽ kãm ijarẽn h to ho akrĩ.

14—Nom kwa kër ka mẽ kãm tanhmã amnhĩ jarẽn h to hkukamã tee ri ajamaxpěr o ri mẽ amã mẽ uma hkêt nẽ. Rÿ mẽ ajamaxpěr o: “Hêxta waa nẽ. Tanhmã koja we mẽ kot ixkukjêr ã arĩgrota ã pa we ri mẽ kãm ixkapěr to?” Anhÿr o tee ri amnhĩ kukamã ajamaxpěr kêt nẽ. ãm amnhĩ kaxyw inhã pix mã ajamaxpěr tÿx rãhã nẽ. 15Tanhmã mẽ kot mẽ anhĩpêx to hã arĩgrota ã kot paj tanhmã mẽ akrã hto ka mẽ inhÿ hã tanhmã mẽ kãm amnhĩ jarẽn h to. Hãmri nhũm mẽ amnhĩ tã mẽ ama nẽ axte tanhmã mẽ ato kapěr to hkukamã tee ri hamaxpěr o kuhê.

16—Nẽ koja mẽ anhĩpêxã nẽ mẽ akatorxã nẽ mẽ atõ nẽ mẽ akrãmnhwÿjaja. Nẽ kaxyw krĩ hkõt mẽ akwÿjaja ixtã mẽ atã amÿnê nẽ ma mẽ õ pahi hwÿr mẽ ato mra nhũm mẽ ajagjê nẽ mẽ akwÿjê pa. 17Koja mẽ piitã ixtã mẽ akamã gryk nẽ kãm mẽ akurê nẽ. 18-19Nom mẽ kot ã mẽ anhĩpêx anhÿr mã tã kër ka mẽ amnhĩ to htÿx nẽ ixkaga hkêt nẽ. Mẽ kot mẽ apar tã ka mẽ kaxkwa kamã akupÿm atĩr kurê kumrêx. Hãmri nẽ ã mẽ kot mẽ anhĩpêx anhÿr xwÿnhjê rom Tirtũm mẽ wa ixri atĩr tũm nẽ amex rãhã apa ho apa. Mẽ kot tanhmã mẽ ato htã mẽ ate

kaxkwa kamã atĩr tũm nẽ apa mã xwỳnh jakamã kwa kêr ka mẽ tee ri amnhĩ kukamã ajamxpêr o ri apa hkêt nẽ.

20—Koja nhỹrmã nhỹhỹnh p̄oristi ohtô nẽ mra nẽ Jerujarẽ hwỳr p̄oj hãmri nẽ mẽ kãm hipôk pa nẽ kuhê. Ka mẽ ja hã mẽ omu nẽ mẽ kot krĩja grãnh par mã ajamxpêr kurê kumrêx. 21Koja mẽ ã amnhĩ nhĩpêx anẽ ka mẽ amỹm amnhĩ wỳr mẽ omu hãmri nẽ ajapôj nẽ ma aprôt nẽ amrar kurê kumrêx. Mẽ apê jar pika pê Jutej kamã mẽ apa xwỳnhjaja ka mẽ omu nẽ mẽ kot mẽ apar pymaj ma aprôt nẽ amrar kurê kumrêx. Hixêt prêk wỳr ajapôj nẽ aprôt nẽ ma mra.

—Nẽ kê Jerujarẽ nhõ xwỳnhjaja mẽ umaj haxwỳja hapôj nẽ ma hprôt nẽ ma mrrar o mra.

—Nẽ jar kapôt ã ri mẽ pa xwỳnhjaja kê mẽ akupỹm krĩ hwỳr gjêx kêt nẽ. ãm ma mẽ umaj hprôt nẽ mrrar kurê kumrêx.

22—Mẽ kot amnhĩ tomnuj mỳrapê koja Tĩrtũm ã mẽ hwỳr mẽ kãm mẽ hkurê xwỳnhjê rênh anẽ. Kapêr ã kagã htũm ra kot mẽ hkukamã ja jarênh kot anhỹr. Jakamã koja mẽ nhỹrmã mẽ hkukamã mẽ harênh xãja kôt ã mẽ hipêx anẽ.

23—No mẽ htujarô xwỳnhjaja nẽ mẽ hkra karãre xwỳnhjaja koja mẽ kêp mẽmoj omnuj tỳx nẽ. Tanhmã kot mẽ amnhĩ to nẽ hprôt tỳx? Nã pika ja kamã koja mẽ piitã mex kêt nẽ. Mẽ kot amnhĩ tomnuj mỳrapê koja Tĩrtũm ã mẽ hipêx anẽ. 24Koja mẽ nhỹhỹnh krĩ hõ rũm mẽ hwỳr mra nẽ mẽ unê nẽ mẽ hkamnhwỳr o mẽ kupa. Nẽ mẽ hkwyjê pynê nẽ ma nhỹhỹm ahpỹnhã mẽ õ pika hwỳr amnhĩ kôt mẽ o pa nhũm mẽ kamã mẽ hkôt pa ho pa. Koja mẽ kêp Ijaew kêt xwỳnhjaja Jerujarẽ o amnhĩptã nẽ ã mẽ hipêx anẽ. Nẽ kamã pa ho pa rãhã nhũm Tĩrtũm nhỹrmã akupỹm nê mẽ kator pa. Tã koja mẽ nê mẽ kator parja o pa ra akupỹn mẽ awỳr inhnojarêt. Anẽ.

Nhũm pre ã Jejus mẽ kãm mẽ kot Jerujarẽ grãnh par xwỳnhjê hkukamã harênh anẽ.

Akupỹn Jejus wrỳk xwỳj ri mẽmoj kot tanhmã amnhĩ nhĩpêx to

Matêwre 24.29-35; Makre 13.24-31; mããnẽn Sikũn Pêtre 3.10; Apokarip 1.7

25Nhũm Jejus arĩ hkôt mẽ pa ho pa xwỳnhjê mã kapêr nẽ mẽ kãm:

—Nẽ kot paj nhỹrmã akupỹn mẽ awỳr inhnojarêt nhũm kaxkwa kamã kanhêti nẽ myyti nẽ mytwrỳre axtem tanhmã ri amnhĩ nhĩpêx to. Nhũm gô xujanãr haxwỳja hkoko htỳx jao xpên tak tỳx nẽ. Hãmri nhũm pika piitã hkôt mẽ pa xwỳnhjaja kuma nẽ omu nẽ nẽ kãm ma htỳx nẽ mur nẽ httertet nẽ tee ri amnhĩ kukamã hamaxpêr.

26—Nẽ koja Tĩrtũm tanhmã kaxkwa ho ãk to nhũm kanhêti piitã pikarêr pa. Hãmri nhũm pika hkôt ri mẽ pa xwỳnhjaja omu nẽ tee ri amnhĩ kukamã hamaxpêr o amnhĩ japrãr pa nẽ hikwỹ. 27-28Koja ã mẽmoj amnhĩ nhĩpêx anẽ ka mẽ ja hã omu nẽ akupỹn mẽ awỳr


inhnojarêť mǎ ajamaxpêť kurê kumrêx. Hāmri nê mē kot ixkôt amnhĩ xunhwÿť kêt xwÿnhjê rom akĩnh kām ijapêť arĩť o akuhê.

—Nǎ kot paj akupÿn mē awÿť wrÿ. Kakra kama hirǎ htÿx kām akupÿn ixihtÿx kām mē awÿť wrÿ. Hāmri ka mē apiitǎ pika piitǎ hkôt ano ho ixpumu. Kot paj ǎ ixwrÿk anê hāmri nê mēmoť punuj piitǎ pē mē apytǎť pa. Jakamǎ ka mē ǎ mēmoť kot amnhĩ nhĩpêx anhÿťja ǎ omu hāmri nê tokyx ixkôt axapirta mǎ ajamaxpêť nê akĩnh tÿx nê. Anê.

29—E ga mē pĩ hpǎť mÿj pumu. 30Na hte mēmoť mytwrÿ hǎ rǎ nhũm mē omu nê ô hkukamǎ hamaxpêť. 31Ja pyrǎ nê koja ǎ mēmoť amnhĩ nhĩpêx par anhÿť mē ka mē omu nê akupÿn mē awÿť ixwrÿkja mǎ ajamaxpêť kurê kumrêx. 32Koja akupÿn ixpôx kêt ri mē kot ǎ mēmoť kot amnhĩ nhĩpêx anhÿť pumunh xwÿnhjaja kormǎ piitǎ htyk kêt ri pa ra akupÿn wrÿ.

33—Nê koja nhÿrmǎ pika nê kaxkwa wa hapêx pa. Tǎ no ǎm ixkapêť koja wa urǎk nê aa hapêx kêt nê. Kojǎ ǎm rǎhǎ ho rǎhǎ. Kot paj aa ihkjê ho tanhmǎ mēnh to hkêt nê.

34-35—Nê kwa mē o kora. Mē axkām ajamak rom. Mē kot ixkôt amnhĩ xunhwÿť kêt xwÿnhjaja na htem kām tanhmǎ amnhĩ nhĩpêx to hprǎm xǎ hkôt pix mǎ tanhmǎ amnhĩ nhĩpêx to ho ri pa. Jao ǎm amnhĩ xǎpkur xǎ nê amnhĩ to mex xǎ nê kǎxpore pix kukamǎ hamaxpêť o pa. Nê htÿx ri tanhmǎ amnhĩ tomnuť to ho pa. Nê pipǎnh kām tanhmǎ amnhĩ to ho pa. Tǎ koja mē ǎ amnhĩ nhĩpêx anhÿť o pa rǎhǎ pa ra mē haêť pē akupÿn wrÿ nhũm mē tee ri ixpumu nê kām ma htÿx kumrêx. Te tutre htÿx ri harôť kajyr o pa nê rapuuti hwÿť ǎť nhũm kot haêť nê unênh nhũm tee kām kator prǎm pyrǎk. Kojǎ mē ǎ amnhĩ nhĩpêx anê. Nom kêť ka mē ho mē urǎk kêt nê. ǎm pa inhmǎ hprǎm xǎ hkôt pix mǎ tanhmǎ inhmǎ amnhĩ nhĩpêx to rǎhǎ ho ri apa.



Rukre 21.34-35

36—Tǎ kêť ka mē ǎ mē kot amnhĩ tomnuť o pa anhÿťja kôt amnhĩ nhĩpêx o apa pymaj amnhĩ to Tĩrtũm wÿť rǎhǎ ho apa. Kêť tanhmǎ mē ato hihtÿx to ka mē ŷ hǎ ho mē urǎk kêt nê. Kêť pa nhÿrmǎ akupÿn wrÿ ka mē ixpumu nê mē kurom amnhĩ kamǎ akahak kêt nê akĩnh tÿx nê man ixwÿť mra. Anê.

Nhũm pre ǎ Jeťus hkôt mē pa ho mē pa xwÿnhjê jahkre anê.

37Hāmri nê apkati mē Tĩrtũm mǎ amnhĩ jarênh xǎ hǎ ixkre kamǎ mē pikuprônh xwÿnhjê jahkre ho hkrĩ. Nhũm kamǎť nhũm hkôt mē pa ho mē pa xwÿnhjê mē mē krĩ rũm hapôť nê ma hixêť prêk pē Oriwêhti hwÿť mra nê kamǎ amnhĩm hikra nê hikwÿť. 38Nhũm kwÿhtǎ nhũm mē

kànhmã hkrĩ nẽ ma akupÿm krĩm mra nẽ ixkreja wÿr agjê. Hãmri nhũm mẽ piitã hã akuprõ nẽ kot mẽ ahkre hã mar o hkrĩ.

Mẽ kot Jejus ã àmnênh ã mẽ harênh

Matêwre 26.14-16; Makre 14.1-2; Juãw 11.47-57

22 ¹Tã nhũm Ijaew kĩnhã arĩgro pê Pasja àhtêp o mõi. Pas ã na htem amnepêm Tĩrtũm kot pika pê Ejit pê mẽ hpãmjê kator mã hamaxpêr kaxyw axpên wÿr akuprõ nẽ hã hkĩnh. Na htem arĩgroja jarênh o: “Pas” anhÿr ã harê. Nẽ mãânên harênh o: “Mẽ pahte pãw kaxkrit kêt kur ã arĩgro.” Anhÿr o harê. ²Jakamã nhũm mẽ õ patre krãhtũmjê mẽ Tĩrtũm kapêr tũm o mẽ ahkre xwÿnhjaja ra kãm Jejus pĩr prãm nẽ. No mẽ kãm hkõt mẽ kot kapêr mar xwÿnhjê pyrna nẽ. Nẽ tee ri kot tanhmã ho hkukamã hamaxpêr nẽ axpên mã:

—Hêxta waa nẽ. Kwa tanhmã kot puj wem ho nẽ mẽ kêp kupĩ? Kot puj mẽ noo mã tanhmã ho nhũm mẽ hã mẽ pakamã gryk tÿx kumrêx. Anẽ.

Jut Kariot kot Jejus ã àmnênh ã harênh

Matêwre 26.14-16; Makre 14.10-11; Juãw 13.21-30

³⁻⁴Tã nhũm Jut Kariotja. Jejus nhÿ hã mẽ ahkre ho pa xwÿnh pê 12 hõ na pre. Tã axtem nẽ tanhmã hamaxpêr to nẽ Satanasti nhÿ hã ma mẽ õ patre krãhtũm mẽ Tĩrtũm mã amnhĩ jarênh xã hã ixkre jamãr xwÿnh krãhtũmjê hwÿr tẽ. Hãmri nẽ tanhmã Jejus o mẽ mar to nẽ mẽ kãm:

—E ot pa mẽ amã Jejus jarênh o tẽ. Xã kot paj mẽ amã hã amÿnê ka mẽ hpãnhã inhmã amnhĩre nà? Anẽ.

⁵Hãmri nhũm mẽ kuma nẽ hkĩnh nẽ. Hãmri nẽ kãm:

—Nà kot paj mẽ amã amnhĩre.

⁶Hãmri nhũm mẽ kot kãm amnhĩrer ã harênh ma nẽ hkĩnh nẽ mẽ kãm:

—Tõe. Nà kot paj mẽ amã ho anẽ. Anẽ.

Hãmri nẽ ma tẽ nẽ kato. Nẽ Jejus pynênh kaxyw htãnopxar o ri hkõt pa. Mẽ kot mar o pa xwÿnhjê hkàx ã nhÿri unênh nẽ ma mẽ hwÿr o htêm kaxyw.

Jejus kot ÿ hã mẽ ahkre xwÿnhjê kutã apkur ã harênh

Matêwre 26.17-25; Makre 14.12-21; Juãw 13.21-20

⁷Tã nhũm Pasja kato. Amnepêm Ijaewjê nhĩgêjtaja na prem ôwêhti hkrare hkwy hpar o pa. Tĩrtũm kot ja hã mẽ omunh nẽ Ejit kãm mẽ kãm mẽ hkurê xwÿnhjê nhĩhkra nẽ mẽ kator kaxyw nhũm prem ã amnhĩ nhĩpêx anẽ. Jakamã na htem arĩ mẽ kêp mẽ hkanrêhã mẽ htãmnhwÿyjaja arĩgro pê Pas ã axpên wÿr akuprõ nẽ mẽ kãm hamaxpêr pê mẽ uràk nẽ

ôwêhti hkrare hkwỳ hpa. Hāmri nē pāwti kaxkrit kêt kām kuku. 8Jakamā nhūm Jejus ý hã mē ahkre ho mē pa xwỳnhjê wa ho axkrut nē mē amnhĩ kukamã wa kumê. Simãw Pêtre mē Juãwja nhūm wa mē amnhĩ kukamã wa kumê nē wa kãm:

—E wa ma mē ixkukamã tē nē mē ixkutêp Pas ã mē panhõ hã apê. Anê.

9Hāmri nhūm wa kuma hāmri nē kãm:

—Tôe. Nhỹri kot paj we wa tē nē mē akutêp hã apê? Anê.

10Hāmri nhūm wa kãm:

—Nà wa māmri ma Jerujarê hwỳr wa tē. Nē hwỳr axà nē mēhõ mytita pumunh kurê kumrêx. Nhūm amnhĩm gô ru nē amnhĩ kre hã poti xãm nē o tē. Ka wa omu nē hã ajêt nē ma hkôt ôrkwỳ hwỳr tē. 11Hāmri nē ixkre nhõ dôn pumu nē kãm: “E jar na pa wa awỳr tē. Jejus na wa inhmê pa wa awỳr tē. Na awỳr pēr mēnh o: ‘Nhỹri kot paj ixkôt ri mē pa ho mē pa xwỳnhjê mē axpên kutã Pas ã apku?’ Anê. Na ã awỳr hpēr mēnh anê.” Anê.

12—E ã kãm akapêr anê kê war ama nē ra war amã ôrkwỳ nhĩmõk ã ixkre rax ô jahkre. Kamã ra kaxyw mē paxàpkur xà hã mēmoj piitãã. Ka wa omu hāmri nē māmri mē ixkutêp kamã mēmoj tã apê. Anê.

13Hāmri nhūm wa kuma nē ma krĩm tē. Ma tē nē hwỳr axà hāmri nē ra kot wa kãm mēmoj jarênh xà hkôt mēmoj piitã omu hāmri nē mē kutêp mēõ hã àpênh o wa xa.

14Tã nhūm myt axà nhūm mē wa hkôt mō nē ixkreta wỳr àpir pa. Hāmri nē apkur kaxyw hkrĩ hpa nhūm Jejus mē ìhkô hã nhỹ. 15Hāmri nē mē kãm tanhmã amnhĩ jarênh to nē mē kãm:

—E na pa inhmã Pas ã mē anhĩhkô hã ixàpkur prãm nē. Kormã ixte amnhĩ xà htỳx kãm ijamak xwỳj ri. 16Kwa mē inhma. Kot paj axte mē akutã Pas ã ixàpkur kêt ry rax nē. Nom koja nhỹrmã Tĩrtũm akupỳn ixte mē ato amnhĩptàr kaxyw inhmê hāmri pu mē rĩ kormã axte arĩgro mex maatija ã pahkĩnh kãm axpên kutã paxàpkur rax nē. Anê.

17Nhūm ã mē kãm amnhĩ jarênh anê nē hpãnhã wĩhti py nē o xa nē Tĩrtũm mã harê nē kãm:

—Pa Papaj. Nà ãm hāmri na ka hte mē inhnê mē kãm mē ixkurê xwỳnhjê pumunh mex nē mē ìhkra pē mē ijapôj. Amex o amex. Anê.

Hāmri nē hpãnhã hkôt mē pa ho mē pa xwỳnhjê hõ mã kugõ nē kãm:

—E mĩ. Apy nē mē axpên pãnhã hkwỳ ho ixkõ. 18ãm hāmri na pa mē amã amnhĩ jarê. Kot paj axte wĩhti ho ixkõm kêt rãhã nhūm nhỹrmã Inhõ Papaj akupỳn mē awỳr inhmê. Hāmri pu mē rĩ kormã akupỳn ixpõx xà hã arĩgrota ã pahkĩnh rax nē. No ãm ra axtem tanhmã hã mē pahkĩnh to. Anê.

19Hāmri nē hpãnhã pāwti py nē mã ho anê nē Tĩrtũm mã harê. Hāmri nē ho hkry hpa nē mē piitã mē kãm ôr pa nē mē kãm:

—E na pa ã pãwti ho hkry nê mē amã õr anê. Koja mē ã inhîpêx anê nê te mē kot ixto hkry hpar pyrãk o inhîpêx pa amnhî xà htÿx kamã ijamak kãm ty. Nom mē anê kot paj ty. Jakamã kêr ka mē ixwakre kamã tõhã axpên wÿr akuprõ nê ixte mē ate amnhî tomnuj pãnhã amnhîrer kaxyw mē anê ixtykja mã ajamaxpêr pê akînh nê pãwti hkur o akrî. E mē mãmrî axãmnhîx aku. Anê.

Nhũm pre ã mē kãm amnhî jarênh anê nhũm mē mar pê pãwtita hkur o hkrî. 20Hãmri nê ra hkur pa. Hãmri nhũm Jejus axte kopta py nê mē kãm:

—Mê kot ixpîr xà hã arîgro hã koja ixkamrô axkapî. Nom koja mē amarî ixpîr nhũm ixkamrô amarî hpikapîr kêt nê. ãm paa. Pa kot paj mē anê mē îhkram amnhî jaxã nhũm mē ã inhîpêx anê. Koja ixkamrô axkapî nhũm Tirtũm omu nê ixkukwak ri mē anê mē ate amnhî tomnuj piitã te amnhî katut kôt rênh par pyrãk o hipêx nê mē ato hkra. Amnepêm kot ja hã amnhî jarênh xà hkôt. Jakamã e mē ixkamrô pikapîrta mã ajamaxpêr pê wîhti hkwy ho ixkõ. Anê.

Jejus ã mē kãm àmnênh xwÿnh jarênh

Matêwre 26.21-25; Makre 14.18-21; Juãw 13.18-19

21Nhũm Jejus arî mē kãm kapêr nê mē kãm:

—Nê kot mē kãm ixtã àmnênh mã xwÿnhhta na jar mē pahkaêx ã mē pakutã apkur o nhÿ. 22Tirtũm kãm hprãm xà hkôt koja mē tanhmã ixto rax nê ixpî. Nom kot mē kãm ixtã àmnênh mã xwÿnhhta hêxta waa nê. ã kot inhîpêx anhÿrja mÿrapê koja amnhî xà htÿx kãm hamak rax kumrêx. Anê.

23Nhũm pre ã Jejus mē kãm amnhî jarênh anê. Nhũm mē kuma nê tee ri axpên pumunh o hkrî. Hãmri nê ri axpên kukja nê axpên mã:

—Kwa nã mē pahtõ kot pu we ã ri hipêx anê? Nã pa hkêt.

Anhÿr o tee ri axpên kukjêr o hkrî.

Mê pamã amnhî to rũnh prãm kêt ã mē pamã karõ

Matêwre 20.20-28; Makre 10.35-45; mããnênh Rõmãn 12.3-5, 12.10, 12.16;

Epes 4.2-4; Piripos 2.3-8; Xiakre 4.1-10; Wam Pêtre 5.3

24Tã nhũm Jejus nhÿ hã mē ahkre ho mē pa xwÿnhjaja axpên mã tanhmã kapêr to ho hkrî nê axpên mã:

—Kwa mē pahtõ kot puj wem nhÿrmã pahpê pahi nê mē ho amnhîptàr rax o ri papa? Anê.

Hãmri nê mē axpên mã: “Nã pa.” Anê nê nhãnh axpên mã: “Nã kêt paa.” Anê. Hãmri nhũm mē nêtãnh axpên mã: “Nã kêt pa kênã.”

25Anhÿr o axpên mã kapêr o hkrî. Hãmri nhũm Jejus tee ri axpên mã mē kuma nhũm mē ã hamaxpêr anhÿrja kêp omnuj nê nhũm mē kãm tanhmã hã kapêr to nê mē kãm:

—E mẽ inhma. Na hte Ijaew kêt xwỳnhjê nhõ pahijaja ã amnhĩ nhĩpêx anhỹr o ri pa nê amarĩ hkrĩ xà kamã hkrĩ ho hkrĩ. Àhpumunh tỳx jakamã na htem amarĩ ixkre hkre jakry kamã kãm mẽ àpênh xwỳnhjê mã mẽmo mẽ àpênh ã karõ ho hkrĩ. Na htem ã amnhĩ nhĩpêx anhỹr o pa. Nê mẽ kot amnhĩm mex ã harênh kaxyw tanhmã mẽ ho mex to ho pa. 26-27Tã kêr ka mẽ ho mẽ uràk kêt nê. Kêt ãm te amarĩ ri mẽ apa xwỳnh pyràk o axpên nhĩpêx. Ixpyrà nê amarĩ mẽmoj to mẽ kutã anojarêt rãhã ho ri apa. No mẽ ate mẽ ho amnhĩptàr rax kukamã ajamaxpêr kêt nê. 28Na prem axpên mã ixto hêx nê tanhmã ixto kapêr punuj to htã ka mẽ ama nê ãm mẽ ama nê arĩ ixkôt ri apa rãhã nê. ãm hãmri na ka htem arĩ ixkôt ri apa anê. 29-30Kot paj amnhĩ tã mẽ ato mex rax nê. Na pre ra Tirtũm nhỹrmã ixte mẽ ato amnhĩptàr o ixkrĩ kaxyw ixãm. Tã ot pa amnhĩ pyrã nê mẽ pahkwỳ Ijaew kaxyw mẽ axunhwỳ ka mẽ nhỹrmã mẽ piitã mẽ ho amnhĩptàr o apa. Nê mẽ apê ixkràmnhwỳ hã nhỹrmã ixkutã axàpkur o apa. Anê.

Jejus kot Simãw Pêtre mã kapêr ã harênh

Matêwre 26.31-35; Makre 14.27-31; Juãw 13.36-38

31Tã nhũm Jejus Simãw Pêtre mã kapêr nê kãm:

—Kwa Simãw. Na Satanasti kãm hprĩ hã ixtã mẽ apiitã mẽ kamã hamak prãm nê. Tanhmã kot mẽ akrã hto nhũm mẽ ate mẽ kãm ixkurê xwỳnhjê pumaj ixkaga hã kãm mẽ akamã hamak prãm tỳx nê. Jakamã ã kot mẽ anhĩpêx anhỹr kaxyw na pre ra amnhĩ to Inhõ Papaj ma nhũm kãm: “Tõe. Kam nê mãmri tanhmã mẽ kamã ajamak to.” Anê.

32—Tã ate mẽ umaj ixkaga nê axte ate amnhĩ kaxyw inhmã ajamaxpêr kêt pymaj na pa ra ato Inhõ Papaj wỳr kãm ixihitỳx nê Simãw Pêtre. Jakamã kêr ka mẽmo arĩgro hã tee ri ixkaga hã amnhĩ pumu hãmri nê tokyx tãm akupỳm ixkôt amnhĩ xãm tỳx nê. Kêr kê nhỹrmã akwỳjê hõ tanhmã amnhĩ tomnuj to nê tee ri amnhĩ kukamã hamaxpêr ka ja hã omu hãmri nê kãm ate tanhmã amnhĩ tomnuj tota jarê. Kê mẽ ã ate amnhĩ nhĩpêx anhỹr ã ajarênh ma nê apyrã nê tokyx akupỳm tãm ixkôt amnhĩ xãm tỳx kurê kumrêx. E kêr ka ã akupỳm ixkôt mẽ piitã mẽ hipêx anhỹr o ri apa Simãw Pêtre. Anê.

Nhũm pre ã Simãw Pêtre kot tanhmã amnhĩ nhĩpêx to hkukamã kãm ujarênh anê. 33Hãmri nhũm tee ri amnhĩ tã kuma nê kãm:

—Kwa nà Pahihti. Kot paj ri akwỳm tanhmã amnhĩ tomnuj to hkêt nê. Koja mẽ te ajaxà nê apĩ htã kot paj arĩ akôt ri ixpa ho ixpa nhũm mẽ pahto amỳrà nê tanhmã pahto. Anê.

34Hãmri nhũm kuma nê kãm:

—Nà koja apkati hkôt krãhyre hkàr kêt ri ka ra mẽ umaj ate ixkôt apa hkêt ã mẽ kãm amnhĩ tã axàprãr o axkrunêpxi kãm ga. Anê.

Jejus kot hkwyjê mã mẽmoj tâ karõ

Matêwre 10.5-15; Rukre 9.1-3

35Hãmri nhũm Jejus arĩ hkõt mẽ pa ho pa xwỳnhjê mã kapêr nẽ mẽ kãm:

— E wam ixte mẽ hwỳr mẽ arênhta ã na ka prem amnhĩ kõt aparkà hkwy ho apa hkêt nẽ. Nẽ kawà jamàn nẽ ho apa hkêt nẽ. Nẽ mrykà jamàn nẽ amnhĩ kõt ho apa hkêt nẽ. Âm mẽ anhỹ kamã mẽ hwỳr apa hã na pa pre mẽ amã karõ. Tã xàn ka prem ã mẽ hwỳr apa anẽ nhũm mẽ amnhĩ wỳr awỳr kêt nẽ? Nà xà na prem amnhĩ wỳr mẽ awỳ? Anẽ.

Hãmri nhũm mẽ kãm:

— Tỳ na prem amnhĩ wỳr mẽ ixwỳ. Mẽ ixte amnhĩ kõt mẽmoj to ixpa hkêt tâ na pa prem amarĩ mẽ kutã ixàpkur mex o ri mẽ hkõt ixpa. Anẽ.

36-37Hãmri nhũm mẽ kãm:

— Tôe. Nà mẽ kot mẽ ato mex tâ nom koja mẽ hpãnhã axtem hõ ho mẽ anhĩpêx. Jakamã kêr ka mẽ akupỹm mẽ kãm ijarênh o apa kaxyw anojarêt hãmri nẽ anhõ mrykà rỳ akawà htu nẽ ma amnhĩ kõt ho apa. Nẽ awapo. Kot kaj mẽ awapo hkêt japêr hãmri nẽ apipro xà ho wẽnê nẽ amnhĩm hõ japrõ nẽ ma amnhĩ kõt ho apa. E kêr ka mẽ ã amnhĩ nhĩpêx anẽ.

— Nẽ Tĩrtũm kapêr ã kagà htũm kot ra ixkukamã tanhmã ijarênh to nẽ kot ijarênh kot:

Koja mẽ hipêx o te mẽ kot amnhĩ tomnuj tỳx xwỳnh nhĩpêx pyrãk. Anẽ.

Ã mẽ kot inhĩpêx anhỹr kukamã ijarênh kot anhỹr. Tã na mẽ ra ã inhĩpêx anhỹr kaxyw. Anẽ.

38Nhũm pre ã Jejus mẽ kãm kapêr anẽ nhũm mẽ kuma nẽ kãm:

— Ota mẽ panhõ wapohti hamẽxkrut Pahihti. Anẽ.

Hãmri nhũm mẽ kãm:

— Tôe. Nà hãmri. Mẽ amnhĩm axi nẽ ho amnhĩm mẽmoj to anẽ. Anẽ.

Jejus kot Tĩrtũm mã amnhĩ jarênh

Matêwre 26.36-46; Makre 14.32-42

39Tã nhũm Jejus kê axte krĩja rũm kato nẽ hixêt pê Oriwêhti hwỳr tẽ nẽ api nhũm hkõt mẽ pa ho mẽ pa xwỳnhjaja ma hkõt mra. 40Hãmri nẽ nhỹri hixêt kahti ri hkrĩ nhũm Jejus mẽ kãm:

— E kwa kêr ka mẽ ixkutêp amnhĩ to Inhõ Papaj wỳr o akrĩ. Kê mẽ ixkõt tanhmã mẽ ato htã ka mẽ amã mẽ uma xàj ixkaga hkêt nẽ. Arĩ mẽ kutã amnhĩ to htỳx nẽ akuhê. Anẽ.

41Hãmri nẽ mẽ kurũm htêm grire nẽ Tĩrtũm mã amnhĩ jarênh kaxyw hkõn krã ho tẽm nẽ nhỹ. 42Hãmri nẽ kãm:

—Kwa Papaj. Nà na pa ra amnhĩ xà htỳx kukamã ijamaxpěr nẽ amnhĩ kamã ixkahak tỳx kumrẽx. Inhmã amnhĩ xà kamã ijamak prãm kêt o ijamak prãm kêt. Jakamã kot kaj amã inhnê ho ajapêx prãm nẽ mãmri inhnê ho ajapêx nhũm mẽ kãm ixkurê xwỳnhjaja tanhmã ixto hkêt nẽ. Rỳ ko. Kot kaj amã mẽ kot tanhmã ixto hprãm hã kê mẽ mãmri tanhmã inhĩpêx to. Nom pam inhmã hprãm xà hkôt kêt. Anẽ.

Nhũm pre ã Jejus amnhĩ to Hipêêxà Tirtũm wỳr anẽ. 43Hãmri nhũm kuma nẽ hwỳr kapěr o wrỳk xwỳnhja mẽ nhũm hwỳr wrỳ nẽ kuri xa. Hãmri nẽ õxàhkre kaxwỳnh kãm tanhmã ho hihtỳx to. 44Nhũm kê axte amnhĩ to Hipêêxà hwỳr kãm hihtỳx nẽ. Tee ri amnhĩ kukamã hamaxpěr pê amnhĩ kamã kahak tỳx kumrẽx. Jao hã gô rax nẽ te hkamrô xàhàr pyrak o pikap ahà. 45Hãmri nẽ kànhmã xa nẽ akupỳm hkôt mẽ pa ho mẽ pa xwỳnhjê hwỳr tẽ nẽ mẽ omu nhũm mẽ ra õt pa nẽ hikwỳ. Mẽ kot tee ri Jejus kot mẽ kãm amnhĩ jarênhja kukamã hamaxpěr o hkaprĩ nẽ õt pa nẽ hikwỳ. 46Hãmri nhũm Jejus tẽ nẽ tee ri mẽ omu nẽ mẽ kumra nẽ mẽ kãm:

—Kwa nà. Mẽ ri ã amnhĩ nhĩpêx anhỳr kêt nẽ. Kwa mẽ kànhmã akrĩ nẽ amnhĩ to Inhõ Papaj wỳ kê mẽ ato mẽ axihtỳx. Hãmri nhũm mẽ tanhmã ixkõt mẽ ato ka mẽ inhỹ hã mẽ kutã amnhĩ to htỳx nẽ akuhê. Anẽ.

Mẽ kot Jejus pynênh ã mẽ harênh

Matêwre 26.47-56; Makre 14.43-50; Juãw 18.1-11

47Nhũm pre ã Jejus mẽ kãm kapěr anhỳr rôm nhũm hkôt pa ho pa xwỳnh pê Jut Kariotja amnhĩ kôt mẽ kot Jejus pynênh xwỳnhjê ho tẽ. Mẽ ho htêm rax nẽ. Hãmri nẽ kot Jejus kahti hkôt mỳnh kaxyw hwỳr tẽ 48nhũm amnhĩ tã omu nẽ kãm:

—Kwa Jut. Xà mẽ kahti hkôt mẽ hamỳnh nẽ mẽ hpār o na htem mẽ kãm mẽ hã amỳnê? Anẽ.

49Hãmri nhũm hkôt mẽ pa ho mẽ pa xwỳnhjê hõja tee ri mẽ kot amnhĩ nhĩpêx ã mẽ omu hãmri mẽ õ wapota mã hamaxpěr kurê kumrẽx nẽ Jejus mã:

—Kwa Pahihti. Xà kot paj mẽ panhõ wapohti py nẽ ho mẽ panê mẽ hkwy hpa? Anẽ.

50Hãmri nhũm hõta kuma nẽ mẽ kaxyw ja kapa. Nhũm mẽ õ patre maati mã àpênh xwỳnhja mẽ hkôt tẽ nhũm omu nẽ kãm wapo ho apê. Nẽ kot ho hkrã nhĩpônã mã tã kuhpaw nẽ ho upôk rũm hamak nhĩkjê pix krãhta. 51Hãmri nhũm Jejus omu nẽ nẽ kãm kapěr nẽ kãm:

—Kwa nà ri ã amnhĩ nhĩpêx anhỳr kêt nẽ. Amarĩ xa. Anẽ.

Hãmri nẽ hamakja py nẽ akupỳm kãm hamak ã kuxi nẽ ho mex. 52-53Hãmri nẽ mẽ kot unênh mã xwỳnhjê mã tanhmã kapěr to. Mẽ õ patre krãhtũmjê mẽ Tirtũm mã amnhĩ jarênh xà hã ixkre jamãr xwỳnhjê

krähtüm mẽ Ijaew nhõ pahijê mẽ nhũm mẽ ho pimràatã mẽ kãm kapêr nê mẽ kãm:

—Kwa na pa pre apkati mẽ Tirtüm nhõrkwÿ kamã mẽ kãm ixkapêr o ixpa ka prem tokyx ixpynênh kêt tâ jarãhã te ixte amnhĩ tomnuj xwÿnh pyræk o inhĩpêx nê ixwÿr wapo nê kô hã akapên nê ixwÿr ã atêm rax anê. No ãm ra mẽ ate tanhmã ixto kaxyw arĩgro kator kênã. Jakamã kot kaj mẽ mãmri tanhmã amã ixto hprãm xà hkôt mãmri tanhmã ixto. Satanasti nhÿ hã ã mẽ ate inhĩpêx anhÿr mã kênã. Anê.

Simãw Pêtre kot Jejus kôt pa hkêt ã kot amnhĩ jarênh
Matêwre 26.69-75; Makre 14.66-72; Juãw 18.15-18, 18.25-27

54Tã nhũm mẽ Jejus pynê nê ma o tẽ. Ma mẽ õ patre maati nhõrkwÿ hwÿr o tẽ. Nhũm Simãw Pêtre ma hapu hã mẽ hkôt hã mẽ omunh o tẽ. 55Nhũm mẽ patre maati nhõrkwÿ hwÿr Jejus o axà nê hkôt gjêx pa hãmri nhũm Simãw Pêtre kítare hwÿr axà nê mẽ kuri xa. Nhũm mẽ kítare kamã amnhĩm kuto nê hã ànhunh o hkrĩ nhũm 56mẽ ìhkô hã ànhunh o nhÿ. Hãmri nhũm mẽ kãm àpênh xwÿnh niti hirã kamã hprĩ hã omunh kurê kumrêx nê mẽ kãm:

—Xê pêr myti ja kêp Jejus kôt mẽ pa ho mẽ pa xwÿnhjê hõ na. Anê.

57Hãmri nhũm tee ri amnhĩ tâ kuma nê kãm mẽ uma nê mẽ kãm amnhĩ tâ aprã nê kãm:

—Tk. Kokÿ. Ixte mēhõ my ata pumunhre hã. Anê.

58Tã nhũm hpãnhã mēhõ myja kãm:

—Kwa nã. ãm hãmri na ajarê. Apê Jejus kôt ri mẽ pa xwÿnhjê hõ na ka.

Anê nhũm kuma nê kê axte kãm:

—Kwa mẽ ri ã amnhĩ krã hkôt ri ixto axêx anhÿr kêt nê. ãm ixte aa mēhõta pumunh kêt kumrêx. Anê.

59Tã nhũm ja haxwÿja axte omu nê kãm:

—Kwa ãm hãmri na mẽ ajarê. Apê Jejus kwÿ hõ na ka. Uræk nê te apê Garirej nhõ xwÿnh pyræk kênã. Anê.

60Hãmri nhũm tee ri kuma nê mẽ kãm amnhĩ tâ àprãr kãm hihtÿx nê mẽ kãm:

—Tk. Ixpê Garirej nhõ xwÿnh kêt. ãm ixte mēhõ mÿj pumunh kêt kumrêx tâ ka mẽ ãm xatã hkôt ixpa ho ixpa xwÿnh ã ixkamnhix o akuhê.

Anhÿrja o ra mẽ kãm amnhĩ tâ aprãr o axkrunêpxi mẽ nhũm krãhyre kà. 61Hãmri nhũm Jejus arĩ ixkre kamã ãm tâ Simãw Pêtre ho hakêx nê omu. Hãmri nhũm amnhĩ tâ no pumu nê kot hkukamã kãm ã amnhĩ nhĩpêx anhÿr jarênhja mã hamaxpêr kurê kumrêx. Krãhyre hkàr kêt ri kot mẽ kãm amnhĩ tâ àprãr o axkrunêpxi hã harênhja mã hamaxpêr nê kãnhmã hakry hpar o tẽ nê hkaprĩ htÿx

ně. 62Hāmri ně hkaprī xàj kītare pē kato ně tě ně awry hã xa ně mỳr rax kumrēx.

Mě kot Jejus tak ã mě harēnh

Matêwre 26.67-68; Makre 14.65

63Hāmri nhũm mẽ kot Jejus pumunh o kuhê xwỳnhjaja hã hpēr o axkē ně htak o kuhê. 64Ně no hpro ně htak ně kām:

—E atak xwỳnh nhĩxi jarē. Apê Tirtũm Kra hã ate amnhĩ jarēnh jakamã mãn uràk ně axàhpumunh tỳx. Jakamã e hixi jarē. Aně.

65Hāmri ně xatã haprỳ ně kām kapēr punuj ně.

Mě kot mẽ hkrãhtũm wỳr Jejus o htēm ã mẽ harēnh

Matêwre 26.57-68; Makre 14.53-65; Juãw 18.19-24

66Tã nhũm myt kator o mōr mẽ nhũm Ijaew nhõ pahijê mẽ patre krãhtũmjê mẽ Tirtũm kapēr tũm o mẽ ahkre xwỳnhjaja axpēn wỳr pikuprõnh pa. Hāmri nhũm mẽ ma mẽ hwỳr Jejus o tě. 67-68Nhũm mẽ omu ně tanhmã kot amnhĩ jarēnh to hã hkukja ně kām:

—Kwa mẽ inhmã amnhĩ jarē. Xà ka na apê Tirtũm kot mẽ ixkaxyw axãm xwỳnhnta? Xà ka kot kaj Rõm nhõ xwỳnhjê pē mẽ ixpytã ně mẽ ixto amnhĩptàr o apa? Aně.

Hāmri nhũm mẽ kām:

—Nà kot paj tanhmã mẽ amã amnhĩ jarēnh to ka mẽ ixkõt ajamaxpēr kêt ně. Ixte ãm hāmri mẽ amã amnhĩ jarēnh tã ka mẽ inhma ně ãm inhma. Nễ kot pa amnhĩ xwar mēmoj tã mẽ akukja ka mẽ amnhĩ xwar inhmã tanhmã harēnh to hkêt ně. ãm mẽ axêx rom mẽ ate ã ixkukjêr anhỳr kênã. 69Tã nom kot paj tokyx ma akupỳm Inhĩpêxã Tirtũm wỳr api. Hihtỳx o hihtỳx rãhã ně pa ho pa xwỳnh na. Jakamã kot paj hwỳr api nhũm amnhĩ nhĩhkô hã inhỳr pa upòk rũm mẽ apiitã mẽ ato amnhĩptàr o ixkrĩ. Hāmri ně nhỳrmã paa tanhmã mẽ ajarēnh to. Aně.

70Hāmri nhũm mẽ tee ri kot ã amnhĩ jarēnh anhỳrja ma ně kām:

—Tk. Kwa akatàt kôt mẽ inhmã amnhĩ jarē nà. Xà apê Tirtũm Kra na ka? Aně.

Hāmri nhũm mẽ kām:

—Tỳ ixpê Kra na pa. Aně.

71Hāmri nhũm mẽ tee ri ã amnhĩ jarēnh anhỳrja ã kuma ně axpēn mã:

—Kwa mo kaxyw kot puj mẽ axte mẽ hkwỳjê japêr nhũm mẽ tanhmã kot amnhĩ tomnuj to hã harê? Tãm kêp Tirtũm Kra hã amnhĩ to hêx nhũm mẽ pahte pahpiitã mar kênã. E kwa tokyx pu mẽ ma Rõm nhõ pahihiti hwỳr o tě kē mẽ pamã hã amỳnê ně mẽ pamã kupĩ. Aně.

Mê kot pahi Pirat wỳr Jejus o htêm ã mẽ harênh

Matêwre 27.1-2, 27.11-26; Makre 15.1-5; Juãw 18.28-38

23 ¹Tã nhũm mẽ Jejus o kato nê nhãm Pahihti Pirat wỳr o tẽ. ²Hãmri nê kutã ãm nê tanhmã kãm ho hêx to nê kãm:

—E ot pa mẽ awỳr jahti ho tẽ. Na hte mẽ inhmã hêx rũnh o pa. Mẽ ixte Pahihti Sesti kapêr kwỳm ri amnhĩ nhĩpêx prãm xàj tanhmã mẽ inhmã mẽmoj tã karõ hto ho pa. Nê axtem nê mẽ ixte Sesti mã kàxpore hkwy nhõr kêt ã mẽ inhmã karõ. Nê Tĩrtũm kot mẽ pakaxyw kêp mẽ panhõ pahi hã ãm xwỳnh ã amnhĩ jarẽ. ã na hte mẽ inhmã amnhĩ to hêx anhỳr o pa. Anẽ.

³Hãmri nhũm Pirat mẽ kuma nê Jejus pumu nê kãm:

—E kwa inhmã amnhĩ jarẽ. Xà apê Ijaew nhõ pahi na ka? Xà ka na htem amnhĩ wỳr akãm hamak o pa? Anẽ.

Hãmri nhũm kãm:

—Nà ãm hãmri na ka ã ijarênh anẽ. Anẽ.

⁴Hãmri nhũm Pirat tanhmã hkukjêr to nê tee ri kot amnhĩ jarênh ã kuma hãmri nê patre krãhtũmjê mã kãm:

—Kwa mẽmo mỳrapê kot pa tanhmã mẽ amã hã ixãmnhênh to? Kot tanhmã amnhĩ tomnuj tore hã. Nà kot pa kãm inhũre. Anẽ.

⁵Hãmri nhũm mẽ tee ri kuma nê kot mẽ kãm hã ãmnhênh prãm xàj hã kãm kapêr kãm hihtỳx nê. Nê kãm:

—Kwa nà. Na pre hte pika pê Jutej kamã tanhmã mẽ kãm hêx to ho pa. Hãmri nhũm mẽ ra hã axpên kutã amnhĩ xunhwỳ nê hã pijapu rũnh o pa. Tã mãânênh Garirej kamã ã amnhĩ nhĩpêx anhỳr o hkrax nê hpãnhã amnẽ mẽ pahwỳr ã amnhĩ nhĩpêx anhỳr kaxyw mõi anẽ. Anẽ.

Mê kot Erox wỳr Jejus o htêm ã mẽ harênh

Rukre 9.7-9

⁶Hãmri nhũm Pahi Pirat mẽ kuma nê mẽ kãm:

—Kwa xà kêp Garirej nhõ xwỳnh na? Anẽ.

Hãmri nhũm mẽ kãm:

—Tỳ. Kêp Garirej nhõ xwỳnh kênã.

⁷Anẽ nhũm mẽ kãm:

—Tô mẽ ma pahihti Erox ãxipas wỳr mãn o tẽ. Kêp Garirej nhõ xwỳnhjê nhõ pahi na. Tã ra jar Jerujarê kamã ham pôi. No axtem ixpê Jutej kamã mẽ pa xwỳnhjê nhõ pahi jakamã kwa mẽ ma õ pahita wỳr mãn o tẽ kê tãm tanhmã mẽ amã ho. Anẽ.

⁸Hãmri nhũm mẽ kuma nê ma pahi Erox ãxipas wỳr o tẽ. Na pre ra Erox ãxipasja xatã Jejus jarênh ma nê kãm omunh prãm nê. Kãm aa kot mẽmoj pumunh kêt õ ho anhỳr ã omunh prãm tỳx jakamã nhũm mẽ ma hwỳr o tẽ nhũm omu nê hkĩnh nê. ⁹Hãmri nê tee ri mẽmoj tã

hkukja no nhũm akryk xa nẽ tanhmã kãm nẽ hkêt nẽ. 10Hãmri nhũm mẽ õ patre krãhtũmjê mẽ Tĩrtũm kapër tũm o mẽ ahkre xwỳnhjaja kãm ho kapër punuj nẽ ho hẽx kãm hihtỳx nẽ. 11Hãmri nhũm pahi Erox Æxipas mẽ kuma hãmri nẽ õ pòristi mẽ wa kãm kapër punuj nẽ hã hpër o axkẽ nẽ tanhmã ri haprỳ to. Hãmri nẽ hã hpër o pikẽnh kãm kẹp pahi hã mẽ ê mexja py nẽ kãm haxà nẽ akupỹm pahi Pirat wỳr kumẽ.

12Na pre Pahi Pirat mẽ Pahi Erox Æxipasja wa kãm axpẽn kĩnh kêt nẽ. Tã hãmri nhũm Erox Æxipasja tee ri Jejus kot kãm tanhmã amnhĩ jarẽnh to hã mar prãm xàj tee ri hkukamã hamaxpër hãmri nẽ Pirat ã hpijaam kaxyw akupỹm hwỳr kumẽ. Hãmri nhũm amnhĩ tã omu hãmri nẽ wa ra akupỹm kãm axpẽn kĩnh nẽ. Nẽ akupỹm axpẽn mã hpër o axkẽ nẽ pikunhar o pa pẽ akupỹm axpẽn to hkrãmnhwỳ.

Pirat kot Jejus pĩr ã àmnẽnh

Matêwre 27.15-26; Makre 15.6-15; Juãw 18.39-19.16; määnẽn Atre 3.13-14

13Tã nhũm Pirat akupỹm amnhĩ wỳr mẽ hã karõ. Ijaew kwỳjaja nẽ mẽ õ pahijaja nẽ mẽ õ patre krãhtũmjaja nhũm akupỹm amnhĩ wỳr mẽ piitã mẽ hã karõ. 14Hãmri nhũm mẽ akupỹm hwỳr gjẽx pa nẽ kuhẽ nhũm mẽ kãm:

—E na ka mẽ ixwỳr mytita o tẽ nẽ tanhmã inhmã harẽnh to. Kot mẽ akwỳjê mã tanhmã hẽx to ho pa hã harẽ. Tã pa ra jar mẽ anoo mã tanhmã hkukjêr to nẽ tee ri kot inhmã tanhmã amnhĩ jarẽnh to hã kuma. Te kot amnhĩ to mex xwỳnh pyrãk. Mẽ ate tanhmã ho akapër to htã nom kot anhỳr kêt. Kot amnhĩ to mex xwỳnh na. 15Pahi Eroxja ra ixpyrà nẽ tee ri tanhmã hkukjêr to nom nhũm tanhmã kãm nẽ hkêt nẽ. Nhũm tee ri ja hã omu nẽ akupỹn ixwỳr kumẽ. Jakamã kwa mẽmo mỳrapê kot paj mẽ amã hã amỳnê nhũm mẽ amã kupĩ? Tanhmã kot amnhĩ tomnuj tore hã. 16Kot paj ãm mẽ kãm anẽ kê mẽ htak nẽ kãm ure kê mãmri ma tẽ. Anẽ.

17Arĩgro pẽ Pas ã na pre hte mẽ õ pahi mẽ kot mẽ ho prês nhũm mẽ hkrĩ xwỳnhjaja nhũm pre htem mẽ ho hpỳnh nẽ mẽ kãm ure. Jakamã na pre ã mẽ kãm kapër anẽ nẽ kot Jejus tak nẽ kãm urer mã. 18-19Nom nhũm mẽ kuma nhũm ja mẽ kẹp omnuj nẽ nhũm mẽ kãm:

—Kwa nà. Apĩ ri. Apĩ nẽ mẽ inhmã Parapas mã mãn anhũre. Anẽ.

Parapas na pre mẽ õ krĩ kamã õ pòristi mẽ pahi Piratja mẽ kutã amnhĩ xãm nẽ kẹp õ pòristi hõxpĩ. Mỳrapê na prem ra haxà nhũm hkrĩ ho hkrĩ. Jakamã nhũm mẽ Pirat kot kãm urer kaxyw ã kãm kapër anẽ. 20Nom nhũm kãm Jejus mã urer prãm jakamã axte hã mẽ hkukja nẽ mẽ kãm:

—Kwa nom mẽmoj mỳrapê kot paj mẽ kãm hã amỳnê nhũm mẽ amã kupĩ?

21 Anhÿr tã nhũm mẽ kuma nẽ ãm kuma. Nẽ xatã kãm:

—Kwa tokyx pĩ kahpa hã anhô kê ty. Anẽ.

22 Hãmri nhũm tee ri mẽ kuma nẽ mẽ kãm:

—Tk. Kwa nà. Tanhmã kot amnhĩ tomnuj tore hã kot pa kêt hã kunhõ nhũm ty. Nà kot paj ãm mẽ kãm anẽ kê mẽ htak nẽ kãm ure kê ma tẽ. Anẽ.

23 Hãmri nhũm mẽ xatã hã kãm kapēr kãm hihtÿx nẽ kãm:

—Kwa nà. Pĩ kahpa hã mãn anhô kê ty.

Anhÿr o ãm xatã kàx pẽ àmra kamã kãm hã amÿnê. 24 Hãmri nhũm Pirat tee ri mẽ kuma hãmri nẽ tã mẽ kãm hprãm xà hkõt mẽ kãm ã amÿnê. 25 Hãmri nẽ mẽ kãm Parapas mã ure. Ra kot pahi Pirat pẽ õ pôristi kutã amnhĩ xãm nẽ kêp hõx pĩr tã nhũm mẽ kãm hprãm xà hkõt akupÿm kãm ure. Hãmri nẽ mẽ ìhkram Jejus jaxà. Mẽ kãm hprãm xà hkõt ri mẽ kot tanhmã hipêx to kaxyw.

Mẽ kot pĩ kahpa hã Jejus nhõr ã mẽ harênh

Matêwre 27.31-43; Makre 15.21-32; Juãw 19.17-20, 19.27-31;

mãânên Atre 7.59-8.1

26 Tã nhũm pôristijaja Jejus o kato nẽ ma kapõt mã o tẽ. Nẽ kãm õ pĩ kahpa gõ nhũm amnhĩ kaxyw kumÿ nẽ o tẽ. Nom mẽ kot htak rax kurê nhũm hirot tÿx nẽ nhũm mẽ ja hã omu nẽ mēhõ kot ho ajuta kaxyw mẽ hkapi ho xa. Hãmri nẽ Sirên nhõ xwÿnh Simãw hkà htyk pumu. Nhũm pre htÿx hamakêtkati nẽ mẽ kutã krĩm tẽ. Hãmri nhũm mẽ haêr pẽ unê nẽ kãm Jejus o ajuta kaxyw hã karõ nhũm kãm õ pĩ kahpaja mÿ nẽ mẽ hkõt o tẽ.

27 Hãmri nhũm mẽ ohtõ nẽ Jerujarê rùm Jejus kõt mõi. Nhũm mēni hkwyjaja omu nẽ kãm hkaprĩ xàj mÿr o hkõt mõi. 28 Hãmri nhũm mẽ mÿr ã mẽ kuma nẽ mẽ ho hakêx nẽ mẽ omu nẽ mẽ kãm:

—Kwa nà Jerujarê nhõ xwÿnhjaja. Mẽ amã ixkaprĩ xàj amÿr kêt nẽ. Kêt mẽ kamjaja amã amnhĩ kaprĩ xàj mãn mur. Nẽ mẽ akrajê kamã axukaprĩ xàj mãn mur. 29 Koja mẽ nhÿrmã mẽ apê mẽ anhõ krĩ grành pa ka mẽ apunuj nẽ amnhĩ xà htÿx kamã ajamak o ri apa. Nẽ tee ri mẽ akrajê hkukamã tanhmã ajamaxpēr to nẽ ajamaxpēr o: “Hêxta gàa nẽ. Na ixkrajaja ixpê amnhĩ xà htÿx kãm hamak o pa. Kêp apu mẽ hkra hkêt xwÿnhjê pyrà nẽ ixkra hkêt nẽ ixpa ro nhÿx inhãmã mex nẽ. Nhÿx pa ixkĩnh nẽ.” Anhÿr o kot kaj mẽ nhÿrmã ajamaxpēr nom ã ajamaxpēr anhÿr kaprÿ.

30 — Nẽ kot kaj mẽ apiitã mẽmo punujta pymaj tee ri amã tokyx atyk nẽ ajapêx par prãm kaprÿ nẽ axpẽn mã akapēr o: “Hêxta gàa nẽ. Kot kẽn prêk mũj mẽ panhĩpy rôrõk nẽ tokyx mẽ panhĩmex par ronhÿx mẽ pamã ja mex.” Anhÿr tã no ãm tee ri ã ajamaxpēr anhÿr kaprÿ. 31 Nom kêt pa. Aa ixte tanhmã amnhĩ tomnuj to hkêt tã nhũm mẽ ã inhĩpêx anẽ. Nom

mě ate amnhĩ tomnuj mỳrapê koja mẽ nhỹrmã tanhmã mẽ ato rax o ã mẽ kot inhĩpêx anhỹrja jakrenh pa. Hêxta waa nê. Na pa mẽ akukamã ijamaxpêr nê ixkaprĩ htỳx nê. Anê.

32Tã nhũm mẽ ja wa ho hamẽxkrut nê tanhmã wa kot amnhĩ tomnuj toja mỳrapê Jejus kôt wa hpĩr kaxyw hkôt mããnên wa o tẽ. 33Jakamã nhũm mẽ ra kên nhĩxête te kot mẽ hkrã hi pyrãk xwỳnhhta wỳr mẽ o pôj. Mẽ kot kãm “mẽ hkrã hi xà” anhỹr jarênhja wỳr mẽ o pôj. Hãmri nê Jejus pê ê kapa nê pĩ kahpa hã kuxi nê prek o ãhkra nê hpar o htỳx pa. Hãmri nê kãnhmã pĩ kahpa xãm nê ho htỳx nhũm xa. Hãmri nhũm mẽ hpãnhã wa kot amnhĩ tomnuj xwỳnhhta mã wa ho anê nê. Nê prek o wa ãhkra nê wa hpar o htỳx pa hãmri nê akutã ho Jejus nhĩjê nê wa ãm nhũm wa ajêt. 34Hãmri nhũm Jejus kỳx pê amnhĩ xà htỳx kumrêx kamã hamak o jêt rãhã mẽ ho Tĩrtũm wỳ nê kãm:

—Kwa Papaj. ãm ixtã jajê pumu. Mẽ kot mẽmoj mex pumunh kêt jakamã na mẽ ã inhĩpêx anê. Jakamã ãm ixtã mẽ omu nê mẽ kamã axukaprĩ nê. Anê.

Hãmri nhũm hparpê pôristi hkwỳjaja axpên mã ê hkwỳ ho pigrãnh kaxyw hã kênre ho jôka ho hkrĩ. 35Nhũm mẽ ohtô rax nê Jejus parpê omunh o kuhê. Nhũm mẽ ô pahijaja mẽ noo mã hã hpêr o axkê nê mẽ kãm:

—E jahti na pre te kêp mẽ pakaprĩ xwỳnh ã amnhĩ jarênh o ri pa. Nê Tĩrtũm kot mẽ pakaxyw ãm xwỳnh ã amnhĩ jarênh o ri pa. Jakamã e kwa pu mẽ xa nê kot amnhĩ kaxàr nê wrỳk kãm omu. Anê.

36Nhũm pôristi mããnên tanhmã hã hpêr o pikênh to. Nê hparpê kãm wĩhti punuti jahkre nê kãm:

—Kwa wrỳ nê mẽ ixkutã ja hkwỳ ho ixkô nà. Anê.

37Hãmri nê kãm:

—E apê Ijaew nhõ pahi hã kot kaj amnhĩ kapa nê akupỳn wrỳ. Kwa tokyx pa mẽ ja hã apumu. Anê.

38Nhũm pôristija tapti hõ py nê tanhmã hã kagà hto. Nê hã kagà ho:

IJAEW NHÕ PAHI NA JA

Anhỹr o hã kagà hãmri nê Jejus wỳr api nê mỳ ri kunhõ.

Wa kot Jejus nhĩjê nê wa jêt xwỳnh wa harênh

Matêwre 27.44; Makre 15.32

39Hãmri nhũm wa kot ãhkô hã jêt xwỳnhhta ô haxwỳja kãm kapêr punuj nê kãm:

—Kwa kot kaj apê Tĩrtũm kot mẽ ixkaxyw axãm xwỳnh hã kot kaj amnhĩ kapa nê wrỳ. Nê mããnên amnhĩ kôt wa ixto wrỳ. Anê.

40-41Hãmri nhũm ihõta kuma nê hã kãm akir nê kãm:

—Tk. Kwa amarĩ ajêt. Xà amã Tĩrtũm pyma hkêt ã na ka ã kêp Krata mã akapêr anê? Nà koja kãm wrỳk prãm nê kot wrỳ. No pajamê pahte

amnhĩ tomnuj mỳrapê koja mẽ pahpĩ. No tãm kot tanhmã amnhĩ tomnuj to hkêt tâ nhũm mẽ amarĩ ã hipêx anê.

42Anhỹr o kãm kapêr hãmri nê Jejus mã kãm:

—Kwa Jejus. Kêr ka nhỹrmã mẽ ixto amnhĩptã hãmri nê inhmã ajamaxpêr nê ixkamã axukapri nê ixto mex nê. Anê.

43Hãmri nhũm kãm:

—Nã kot kaj jarãhã ma ixkôt kaxkwa hwỳr api nê hpãnhã ixkuri amex nê atĩr tũm nê apa ho apa. ãm hãmri na pa ã amã ixkapêr anê. Anê.

Jejus tyk ã harênh

Matêwre 27.45-56; Makre 15.33-41; Juãw 19.28-30

44Tã nhũm kaxkwa nhĩpôk ri myt nhỹr mẽ nhũm te ra kamãt pyrãk nhũm kamãt kô rax kumrêx. Nê kamãt kô ho ra hã awry nê. Ja mẽ nhũm akupỹm myt katêr o mỗ. 45-46Nom nhũm kormã kamãt kôta ã nhũm Jejus ra htyk kaxyw nê àmra kamã Tĩrtũm mã kapêr nê kãm:

—E Papaj. Mãmrĩ ixkarõ ho amnhĩptã.

Anhỹrja kôt hãmri ty. Pu nhũm Tĩrtũm mã amnhĩ jarênh xã hã ixkre kamã hakwakre hã kupêxêja axkjê nê amnhĩ kahê xã mênh kurê kumrêx. Utĩ rax tã kôt ã axkjê nê amnhĩ kahê xã mẽ. Te Jejus htyk o kot mẽ pahte hkôt amnhĩ xunhwỳr xwỳnhjê mã Tĩrtũm wỳr pry jakwa kre kahê xã mênh pyrãk o ã amnhĩ nhĩpêx anê. 47-49Hãmri nhũm mẽ piitã mẽmoj ã kot amnhĩ nhĩpêx anhỹr ã omunh o kuhê xwỳnhjaja. Nê kaxyw Jejus



Rukre 23.44-46

kràmnhwỳjaja nhùm mē amỳm omunh o kuhê. Nê Garirej rùm mēni kot Jejus kôt mē pa ho mē pa xwỳnhjaja mǎānēn mē kuri amỳm hkaprī nē omunh o kuhê. Nhùm pōristi krāhtũmjê hōja ǎ mēmoj kot amnhĩ nhĩpêx anhỹr ǎ omu nē tee ri hamaxpêr o:

—Hêxta waa nê. Pêr ǎm hāmri na pre hte tǎm amnhĩ nhĩpêx o pa. Tǎ pa mē amarĩ mē mar xà hkôt ixtỳx kupĩ. Anê.

Nhùm ǎ hamaxpêr anhỹrja kôt Tĩrtũm mǎ mex o mex ǎ harēnh o xa. Nhùm amarĩ mē kuhê xwỳnhjaja mǎānēn mēmoj ǎ kot amnhĩ nhĩpêx anhỹrta pumu nē tee ri hkukamǎ hamaxpêr o ra kǎm ma htỳx nê. Hāmri nē awjanǎ nē ma akupỹm krĩm mrrar kurê kumrêx.

Mē kot Jejus jaxàr ǎ mē harēnh

Matêwre 27.57-61; Makre 15.42-47; Juǎw 19.38-42

50-51 Tǎ nhùm axtem Juje pê Arimatej nhō xwỳnhja. Arimatejja pika pê Ijaew kamǎ na. Nhùm Jujeja kot amnhĩ to mex jakamǎ Tĩrtũm kôt amnhĩ nhĩpêx o pa. Jakamǎ na pre hkwỳjê rom Tĩrtũm kot mē pahwỳr Jejus mēnh xwỳnh ǎ omu nē hkôt hamaxpêr. Kêp Ijaew nhō pahi hō htǎ hkwỳjê hkôt hamaxpêr kêt nê. Jakamǎ nhùm prem kot Jejus pĩr ǎ amỹnê nhùm tee ri harēnh ma nhùm ja kêp omnuj nê. 52 Jakamǎ nhùm Jejus ty nhùm Juje ma pahi Pirat wỳr tē nê ĩ hǎ kuwỳ nê kǎm:

—Pa? E ot pa awỳr tē. Kwa inhmǎ htyk xwỳnhhta gō pa ma o tē nê haxà. Anê.

53 Hāmri nhùm kuma nē kǎm kugō nhùm ma o tē nê haxà. Kaxyw kupêxê hō py nê ho hkupu nê ma o tē nê kēn kre kaprỳ kamǎ haxà. Mē kot kormǎ kamǎ mēhō jaxàr kêt nhùm mē kamǎ Jejus jaxà. 54 Arĩgro pê sêsta hǎ nhùm prem kupĩ nhùm myt xàr o mōr mē nhùm Juje ma o tē nê haxà. Ijaew kôt xà hǎ arĩgromnuja wỳr haxà. 55 Nhùm Garirej rùm mēni hkwỳ kot Jejus kôt pa xwỳnhjaja ma hkôt mra nē kot haxàr kǎm omu. Mē hkuxwaxà ho gregrer kêt rǎhǎ haxàr kǎm omu. 56 Hāmri nē ma akupỹm krĩm mra nē kaxyw mē hkuxwaxà hkwỳ ho anê.

Tǎ nhùm apkati nhùm mē ò arĩgromnu pê sap kator jakamǎ nhùm mē kormǎ akupỹm hwỳr mrrar kêt nê. Hāmri arĩgro mex jamǎr pê arĩ hkôkôt o hkrĩ.

Jejus akupỹm htĩr jarēnh

Matêwre 28.1-10; Makre 16.1-8; Juǎw 20.1-10

24 1 Tǎ nhùm apkati nhùm tōmĩk. Hāmri nhùm mēnijaja kwỳhtǎ kǎnhmǎ hkrĩ nē ma akupỹm kēn kreta wỳr mē hkuxwaxà ho mra. 2 Hāmri nē hwỳr àhtêp o mra nhùm ra hakwakre kahê xà raxta kahê xà hkàx ǎ xa nhùm mē tee ri omu. 3 Hāmri nē kēn kre wỳr agjê nē kamǎ tee ri Jejus japêr no nhùm kamǎ amrakati. 4 Nhùm mē tee ri axpēn pumunh pê hkukamǎ hamaxpêr.

Hāmri nhũm Tirtũm kapêr o wrỳk xwỳnh wa axkrut nê mẽ haêr pê mẽ hwỳr kato nê wa xa. Wa ê jaka nê hirã htỳx kãm wa xa. 5Nhũm mẽ tee ri wa omu nê kãm wa uma htỳx nê. Nê wa umaj hkôn krã ho rôrôk nê hkrĩ hpa. Nhũm wa mẽ omu nê mẽ kãm:

— Kwa mon ka mẽ ri mẽ htykjê kamã ra akupỹm htĩr xwỳnhhta japêr o ri apa? 6Jar amrakati. Na ra akupỹm htĩr. Kormã Garirej kamã pa ri kot mẽ amã amnhĩ jarênh xà hkôt na ra akupỹm htĩr. Mãn ka mẽ arĩ kot ã mẽ amã amnhĩ jarênh anhỳrja ã anohtỳx japêr. 7Mê kot unênh nê pĩ kahpa hã nhôr nhũm htyk nê htyk ã apkati axkrunêpxi hãmri nê akupỹm htĩr ã kot mẽ amã amnhĩ jarênhhta mãn ka mẽ arĩ hã anohtỳx japêr.

8Anhỳr o mẽ kãm kapêr nhũm mẽ kuma hãmri nê ra Jejus kot mẽ kãm ã amnhĩ jarênh anhỳrja mã hamaxpêr kurê kumrêx. 9Hãmri nê awjanã nê ma akupỹm krĩm hkĩnh nê mra. Nê hwỳr pøj nê mẽ kot Jejus nhỹ hã mẽ ahkre ho mẽ pa xwỳnhjê mã awjarê. Mê kêp 11 xwỳnhhtajê mẽ kaxyw hkwyjê mã awjarê. 10Mêni kot mẽ kãm ujarênh xwỳnhhtajê nhĩxi na pre Marir Matarênh nhũm ja kêp Joanã. Nê Xiakre katorxà Marir ôta. Nê kaxyw mẽni hõja. Jakamã nhũm mẽ ma akupỹm Jejus nhỹ hã mẽ ahkre ho mẽ pa xwỳnhjê hwỳr mra nê mẽ kãm awjarê. 11Nom nhũm mẽ kuma nê ãm mẽ kuma nê htỳx ho amnhĩ krã hkôt mẽ kot ri ã harênh anhỳr ã mẽ hkamnhĩx nê ãm mẽ kuma. 12Nhũm Simãw Pêtre hamaxpêr hãmri nê kànhmã xa nê ma kên kreta wỳr hprôt nê htêm kurê kumrêx. Hãmri nê tee ri kên kre kaprỳ kamunh o xa nê kamã Jejus kupu xà pix pumu nê tee ri hkukamã hamaxpêr hãmri nê ma akupỹm tê.

Jejus kot Emau hwỳr wa mõi xwỳnh wa hwỳr kator ã harênh

Makre 16.12-13

13Tã nhũm ra amỹkry ho mõi nhũm Jejus kwỳjê hõ wa hamêxkrut nê Jerujarê rũm kato nê ma akupỹm wa õ krĩ pê Emau hwỳr wa mõi. Jerujarê rũm Emau hwỳr ahkrãnre. 14Jakamã nhũm wa hwỳr pry hã axpên mã tanhmã Jejus jarênh to ho mõi. Kên kre kamã mẽ kot haxàr nhũm ra ĩ pikunorja nhũm wa axpên mã harênh o wa mõi. Nê tee ri hkukamã hamaxpêr o wa mõi. 15Hãmri nhũm Jejus tãm tẽ nê wa hã ajêt nê wa hkôt tẽ. 16Nom nhũm wa hprĩ hã omunh kêt nê. Tỳx ho nhãm mēhõ hã hkamnhĩx nê wa arĩ axpên mã harênh o wa mõi. 17Hãmri nhũm Jejus hêx rom wa kãm:

— Kwa mẽmon ka wa axpên mã harênh o wa mõi? Anê.

Hãmri nhũm wa hkaprĩ kamã kãm harê. 18Ihõ pê Kroptija kãm:

— Kwa xà na ka Jerujarê kamã ri apa htã kamã mẽ kot tanhmã amnhĩ nhĩpêx toja jarênh mar kêt nê? Kurũm amõi kênã na ka ri mẽmoj mar kêt nê ri apa. Anê.

19Hãmri nhũm wa kãm:

—Nà amrakati ixte mēmoj maare hã. Kwa mo na wehe? Kwa war aprĩ hã inhmã harẽ pa kuma. Anẽ.

Hãmri nhũm wa kãm:

—Nà mẽ kot mẽ ixpê tanhmã Jejus pê Najare nhõ xwỳnhhta to kênã. Kêp Tĩrtũm nhỹ hã kapêr jarênh o pa xwỳnh na pre. Nẽ Tĩrtũm nhỹ hã tanhmã amnhĩ nhĩpêx to ho pa nhũm prem piitã amnhĩm mex ã harẽ. 20Tã nhũm mẽ panhõ patre krãhtũmjê mẽ mẽ panhõ pahijaja axtem nẽ mẽ kãm hã amỳnê. Mẽ kot pĩ kahpa hã nhôr nhũm htyk kaxyw mẽ kãm hã amỳnê. 21Pa prem ixtỳx ho kêp Tĩrtũm kot mẽ pahwỳr mênh xwỳnh ã hkamnhĩx nẽ kot Rõm nhõ xwỳnhjê pê mẽ ixpytãr ã hkamnhĩx tã nhũm prem mẽ ixpê kupĩ. Jãã na prem ã hipêx anẽ nẽ kupĩ. Na ra htyk ã apkati axkrunêpxi.

22-23—Nẽ jarãhã kwỳhtã mēni hkwỳjaja ma haxàr xà hã kēn kre hwỳr mra nẽ xep tee kamã hapêr nẽ omunh kêt nẽ. Xep ãm Tĩrtũm kapêr o wrỳk xwỳnhja wa ho axkrut nẽ wa omu nhũm wa xa. Nhũm mẽ kãm ra akupỳm htĩr ã harẽ nhũm mẽ akupỳn mẽ ixwỳr mra nẽ mẽ ijaêr pê mẽ inhmã harẽ. 24Hãmri nhũm mẽ ixkwỳjaja ma mẽ hpãnhã kēn kreta wỳr mra nhũm ra mẽ kot harênh xà hkôt tee ri kamã hapêr nom nhũm kamã amrakati kumrêx. Anẽ.

25Hãmri nhũm Jejus amnhĩ tã wa kuma nẽ wa kãm tanhmã amnhĩ jarênh to nẽ wa kãm:

—Hêxta waa nẽ. Pêr ãm mẽ ate mēmoj mã ajamaxpêr tỳx mex kêt kumrêx. Na pre ra Tĩrtũm nhỹ hã kapêr jarênh xwỳnhjaja Tĩrtũm kapêr ã kagã htũm kamã ã kot amnhĩ nhĩpêx anhỳrja kukamã hprĩ hã harẽ nẽ hã kagã. Mẽ akukamã mẽ anhĩgêtjê mã harẽ nẽ hã kagã. Tã ka mẽ kormã aprĩ hã mar tỳx kêt nẽ. 26Kêt mẽ anê na Tĩrtũm kot ãm xwỳnhhta ty. Tã ra akupỳm htĩr nẽ akupỳm kaxkwa hwỳr àpir kaxyw. Kot mẽ ato amnhĩptãr kaxyw ra akupỳm hwỳr àpir mã. 27Amnepêr na pre finat Mojesja tanhmã hkukamã mẽ anhĩgêtjê mã harênh to nẽ hã kagã. Nẽ hprĩ hã harênh o pa. Nhũm hpãnhã Tĩrtũm nhỹ hã kapêr jarênh o mẽ pa xwỳnhjaja ma anẽ nẽ mẽ kãm harênh o pa. Anẽ.

Nhũm pre ã Jejus wa hkôt hprĩ hã wa kãm amnhĩ jarênh anhỳr o tẽ. Te ho nhãm mēhõ jarênh pyràk nom tãm wa kãm amnhĩ jarênh o wa hkôt tẽ. No nhũm kormã wa hprĩ hã kêp Jejus ã omunh kêt nẽ.

28-29Nhũm ã wa kãm amnhĩ jarênh anhỳr o mõr rãhã nhũm mẽ ra wa õ krĩ hwỳr hpõx o mõ. Nhũm ra kamãtre nhũm Jejus te kot wa rer nẽ nhỹhỹm ma htēm kaxyw pyràk o amnhĩ nhĩpêx nhũm wa tee ri omu nẽ kãm:

—Kwa xà kot kaj wa ixre nẽ ma tẽ? Ra kamãt o mõr kênã. Kwa ma wa ixkôt tẽ nẽ wa inhõrkwỹ kamã mãn wa ixri pøj. Anẽ.

Hãmri nhũm wa kuma nẽ ma wa hkôt tẽ. 30Nẽ mẽ wa õrkwỹ hwỳr pøj nẽ hwỳr agjê. Hãmri nẽ apkur kaxyw hkrĩ nhũm Jejus tãm pãwti

py nê Tirtũm mã harê nê hpãnhã ho axkjê nê wa kãm kugõ. ³¹Hãmri nhũm wa atã kêp Jejus ã omunh kurê kumrêx. Jao nhũm wa kêp akunok nhũm wa tee ỹr xà kamã hapêr nhũm hkaprỹ mex nê xa. ³²Hãmri nhũm wa tee ri axpên pumu nê ri hkukamã hamaxpêr nê axpên mã:

— Hêxta waa nê. Xep tãm na. Tãm na pahkõt mõ nê pry hã hprĩ hã pamã Tirtũm kapêr ã kagã jarê pu hkõt pahkĩnh nê mar o mõ. Hêxta waa nê. Xep tãm na. Anê.

³³⁻³⁵Hãmri nê wa kãnhmã xa nê kato nê ujanãr kurê kumrêx. Hãmri nê ma akupỹm Jerujarê hwỳr wa hkwyjê hwỳr tẽ. Nê mẽ hwỳr pøj nê axà. Nhũm Jejus nhỹ hã mẽ ahkre ho mẽ pa xwỳnh pê 11jaja ra axpên wỳr akuprõ nê hkrĩ. Mẽ hkwyjê mẽ axpên wỳr akuprõ nê axpên mã tanhmã Jejus jarênh to ho hkrĩ. Hãmri nhũm wa mẽ hwỳr axà nhũm mẽ wa omu nê wa kãm:

— Kwa na xep ra Jejus akupỹm htĩr nê Simãw Pêtre hwỳr kato. Anê. Hãmri nhũm wa mẽ kuma nê mẽ kãm:

— Tỳ na akupỹm htĩr kênã. Na pa wa ijaxwỳja ham omu. Na pry hã wa ixtã ajêt nê ma wa ixkõt mõ nê wa inhõrkwỹ kamã pøj. Hãmri pa mẽ ixàpkur kaxyw ixkrĩ nhũm pãwti py nê Tirtũm mã harê nê ho axkjê nê wa inhmã kugõ pa wa ixprĩ hã kêp Jejus ã omunh kurê kumrêx. Ixprĩ hã omunh jao nhũm wa ixpê hapêx. Anê.

Jejus kot hkwyjê piitã hwỳr kator ã harênh

Matêwre 28.16-17; Makre 16.14; Juãw 20.19-23

³⁶Nhũm mẽ kormã axpên mã Jejus jarênh o hkrĩ rôm nhũm tãm nhỹhỹnh mẽ hwỳr axà nê xa. Mẽ haêr pê mẽ hwỳr nhỹhỹnh axà nê mẽ kãm:

— Pa? Xàn ka mẽ arĩ akrĩ? Anê.

³⁷Hãmri nhũm mẽ amnhĩ jaêr pê omunh jao kãnhmã hakry hpar o mra. Jao hakryk kãm ma htỳx kãm omunh o hkrĩ. ³⁸Hãmri nhũm mẽ kãm:

— Kwa mon ka mẽ amã ixpyma kamã tee ri ixpumunh o akrĩ? Kwa mẽ ixkarõ hã ixkamnhĩx nê amã ixpyma hkêt nê. ³⁹Na pa akupỹn inhĩ ho mẽ awỳr ixkato nê xa. Ga mẽ inhĩhkra kamã prek tatak xàja pumu. Nê ixpar kãm omu. Kwa mẽ amã ixpyma hkêt nê. E mẽ mãmrĩ mra nê anhĩhkra ho ixkupê. Kêp apu ixkarõ hpix ronhỹx ka mẽ inhĩ kupênh kêt nê. Mo mẽhkarõja i? Nà na pa akupỹm ixtĩr nê inhĩ ho mẽ awỳr ixkato. Anê.

⁴⁰Hãmri nê mẽ kãm amnhĩ nhĩhkra hpê nê mẽ kãm amnhĩ par pẽ. ⁴¹Tã nom nhũm mẽ arĩ akryk omunh o hkrĩ. Mẽ kot omunh nê hkĩnh tã tee ri omunh o hkrĩ. Hãmri nhũm tee ri ja hã mẽ omu nê mẽ kãm:

—E kwa mẽ inhmã mẽmoj japêr pa kukrê. Anê.

42Hãmri nhũm mẽ kãm tep gôj kãm ãmta gô 43nhũm kupy nê hkur o nhỹ nhũm mẽ arĩ hã omunh o hkrĩ. Jao ra akupỹm htĩr ã omunh kurê kumrêx.

Jejus akupỹm nojarêr nê hkwỳjê mã mẽmoj tâ karô

Matêwre 28.18-20; Makre 16.15-18; mãânên Atre 1.6-8

44-45Hãmri nhũm Jejus hprĩ hã mẽ kãm Tĩrtũm kapêr ã kagà htũm kot hkukamã harênh ã amnhĩ jarê nê mẽ kãm:

—Nà kormã ixytk kêt ri na pa pre ixprĩ hã mẽ amã amnhĩ kukamã amnhĩ jarê. Tĩrtũm kapêr ã kagà htũm kot tanhmã mẽ kot inhĩpêx to hkukamã ijarênhja. Na pre finat Mojes Tĩrtũm nhỹ hã ixkukamã tanhmã ijarênh to. Nê Tĩrtũm nhỹ hã kapêr jarênh o mẽ pa xwỳnhjaja Mojes mỳr pê haxwỳja ixkukamã tanhmã ijarênh to. Nê Tĩrtũm mex o mex ã mẽ grer ã kagà xwỳnhjaja haxwỳja ixkukamã tanhmã ijarênh to. Jajê piitã na prem Tĩrtũm kapêr ã kagà htũm kamã ixkukamã ijarê. 46Nê ijarênh o:

Tĩrtũm kot mẽ pakaxyw ãm xwỳnh pê Krisja koja nhỹrmã ty. Nê htyk o apkati axkrunêpxi nê akupỹm htĩr.

Anhỹr o mẽ kot ijarênh. Tã pa ra mẽ kot ixkukamã ijarênh xà hkôt ã mẽ anê amnhĩ nhĩpêx anê.

47—No ãm Tĩrtũm kapêr ã kagà htũm kot papxipix ixkukamã ijarênh kêt. Kamã mãânên mẽ kajaja tanhmã mẽ akukamã mẽ ajarênh kute. Mẽ apê ixkôt amnhĩ xunhwỳr xwỳnhjaja ixwakre kamã tanhmã mẽ ate inhmã amnhĩ nhĩpêx to ho apa hkukamã tanhmã mẽ ajarênh kute. Nê mẽ ajarênh kot:

E mẽ ate ixkôt amnhĩ xunhwỳr xwỳnhjaja. Kêr ka mẽ ma pika piitã hkôt mẽ kãm Tĩrtũm kot mẽ awỳr mênh xwỳnhhta jarênh o ri mẽ hkôt apa. Mẽ kot mẽ amar nê amnhĩ tomnuj kaga nê Tĩrtũm kôt amnhĩ xunhwỳr kaxyw. Kêr kê Tĩrtũm ja hã mẽ omu nê amnhĩ katut kôt mẽ kot amnhĩ tomnuj rênh pa. E kêr ka mẽ ma krĩ piitã hkôt mẽ kãm ã ja jarênh anhỹr o ri mẽ hkôt apa. Krĩ pê Jerujarê kumrêx kãm hãmri nê rĩ kormã pu hã krĩ kuhê xwỳnh piitã hkôt ajapôj nê mẽ kãm harênh o ri apa. Anê.

Ã Tĩrtũm kapêr ã kagà htũm kot mẽ akukamã mẽ ajarênh kot anhỹr. 48Tã kêr ka mẽ ã mẽ kãm tanhmã ijarênh to ho ri apa anê. 49No ãm kormã. Kêr paj ma akupỹm kaxkwa hwỳr api hãmri nê amnhĩ pãnhã mẽ awỳr Tĩrtũm Karô rê mãn. Tĩrtũm kot ixte amnhĩ nhĩpêx ã ijarênh xà hkôt kot paj amnhĩ pãnhã mẽ awỳr kurê. Tã kêr ka mẽ kormã krĩ ja kamã kutêp apa. Kêr kê mẽ awỳr wrỹ nê mẽ amã agjê ka mẽ rĩ kormã anhrã nê ma y hã mẽ kãm ijarênh o ri mẽ hkôt apa. Anê.

Jejus kot akupỹm kaxkwa hwỳr àpir ã harēnh

Makre 16.19-20; mããnēn Atre 1.9-11

50Tã nhũm Jejus Jerujarē rũm hkôt mẽ pa ho pa xwỳnhjê kator nẽ ma krĩ pẽ Petãn wỳr mẽ o mỗ. Nẽ kormã hwỳr mẽ o mỗr ri nhỹri mẽ o xa nẽ kànhmã ãhkra pẽ nẽ mẽ ho Tĩrtũm wỳ. 51 ã mẽ ho hwỳr anhyrja rôm nhũm Tĩrtũm amnhĩ wỳr ho àpir o mỗ nhũm mẽ noo mã ma akupỹm tẽn api. 52Hãmri nhũm mẽ kãm mex o mex ã harēnh pẽ ma akupỹm àpir kãm omunh o kuhê. Nhũm ma tẽ nẽ mẽ kệp kakrãm axà nẽ mẽ kệp akunok. Hãmri nhũm mẽ awjanã nẽ ma akupỹm Jerujarē hwỳr hkĩnh nẽ pa. 53Hãmri nẽ apkati mẽ Tĩrtũm mã amnhĩ jarēnh xà hã ixkre hwỳr agjê nẽ kamã Tĩrtũm mã mex o mex ã harēnh o hkrĩ rãhã nẽ.

Tã ãm ja pix ixkrãmnhwỳ Teopre. Ixpê Rukre na pa awỳr kagàja nhĩpêx nẽ kamã Jejus kot tanhmã amnhĩ nhĩpêx to hã harẽ nẽ hã kagà nẽ awỳr kumẽ.

Juãw

Juãw kot tanhmã Jesus kot amnhĩ nhĩpêx to ho pa hã kagà

Juãw na pre kagàja nhĩpêx. Na pre määnên Wam Juãw nê Sikũn Juãw nê Hapuhã Juãw nê Apokarip nhĩpêx. Juãw Paxis kêt axtem Juãw õ. Nê Jesus kôt mẽ pa ho mẽ pa xwỳnhjê hõ na pre. Nê ÿ hã mẽ ahkre ho pa xwỳnhjê hõ na pre. Nom kormã ã amnhĩ nhĩpêx anhỹr o pa hkêt ri na pre kêp tep kanhêr xwỳnh. Nê kêp Jesus kràmnhwỳ mex na pre. Jakamã na pre kagàja nhĩpêx nê kamã Jesus kot tanhmã amnhĩ nhĩpêx hã harê nê hã kagà. Nê tanhmã kapêr to hã kagà.

Na pre Jesus kêp Tĩrtũm Kra hã harê nê hã kagà. Nê ãm pix kukwak ri Tĩrtũm wa kuri mẽ pahĩr tũm nê mẽ papa ho mẽ papa hã harê nê hã kagà. ã na pre Juãwja mẽ pamã Jesus jarê nê hã kagà anê.

Jesus te kot Tĩrtũm pyràk ã harênh

Matêwre 1.23; Juãw 8.12, 8.58, 10.30, 20.28;

määnên Atre 10.36; Sikũn Korĩt 4.4; Piripos 2.6-11; Korosê 1.13-17, 2.9;

Xitre 2.13; Eprêw 1.1-4; Wam Juãw 1.1-4, 5.20; Apokarip 1.17-18

1 1Amnepê mã kormã mẽmoj kêt ri nhũm kot Tĩrtũm kapêr o amnhĩrĩt xwỳnhja Tĩrtũm kôt pa ho pa. Te kêp uràk nê pa. Wa kot amnhĩ nhĩpêxja ãm tipxi. Nê wa àhpumunh ãm tipxi. Nê wa hkarõ määnên ãm tipxi. ãm wa tipxi rãhã nê pa ho pa. 2Kormã mẽmoj kêt ri na pre Tĩrtũm kapêr o amnhĩrĩt xwỳnhhta Tĩrtũm kôt ri pa ho pa. 3Nê Tĩrtũm nhỹ hã na pre mẽmoj piitã hã apê nê ho kato. Jao pyka ho kato nê kaxkwa ho kato nê gô xujanãr o kato. Nê kamã mẽmoj piitã Tĩrtũm nhỹ hã ho kator pa. Kop apu mẽmoj to kator kêt ronhỹx mẽmoj amrakati kumrêx.

4Nê Tĩrtũm o amnhĩrĩt xwỳnhhta pix kukwak ri na hte mẽmoj piitã htĩr nê pa. Nê ãm pix kukwak ri na htem Tĩrtũm ri htĩr tũm nê pa ho pa. Nê te myyti kot mẽ pamã mẽmoj piitã hirã ho pa pu mẽ kukwak ri mẽmoj piitã omunh mexja pyrã nê na pre hte mẽ pahpiitã mẽ pamã mẽ pahte amnhĩ nhĩpêx nyw nê mẽ pajamaxpêr nyw o amnhĩrĩt pu mẽ

pahprĩ hã mar mex nẽ. 5Ja kaxyw na pre wrỳ nẽ ri mẽ kãm Tĩrtũm kapẽr jarẽnh o ri mẽ hkõt pa. Jao mẽ kot amnhĩ nhĩpêx nyw jarẽ nhũm mẽ kot amnhĩ tomnuj xwỳnhjaja tee ri kuma nẽ kãm mar prãm kêt nẽ. Nẽ tee ri kãm kapẽr o hapêx prãm kaprỳ.

Juãw Paxis kumrêx kot tanhmã Jejus jarẽnh to hã harẽnh

Matêwre 3.1-3; Makre 1.1-4; Rukre 3.2-6

6Tã nhũm kormã Jejus mẽ kãm kapẽr o pa hkêt ri nhũm Juãw Paxis kumrêx mỗ nẽ hkukamã Tĩrtũm nhỹ hã mẽ kãm tanhmã harẽnh to ho pa. 7Mẽ kãm mẽ kot amnhĩ nhĩpêx nyw nhõr xwỳnh pê Jejus Kris kukamã mẽ kãm harẽnh o ri mẽ hkõt pa. Mẽ kot mar nẽ amnhĩ kaxyw Jejus kõt hamaxpêr kaxyw. 8No Juãw Paxisja na pre hte mẽ kãm mẽ kot amnhĩ nhĩpêx nyw nhõr o pa hkêt nẽ. Na pre ãm kot mẽ kãm òr xwỳnhhta kukamã mẽ kãm harẽnh o pa. 9Jakamã na pre hte mẽ kãm harẽnh o ri pa nẽ mẽ kãm harẽnh o:

—E ot pa mẽ amã mẽhõ jarẽnh o ri ixpa. Kot mẽ pamã mẽ pahte amnhĩ nhĩpêx nyw nhõr xwỳnhhta. Kojã tokyx mẽ pakamã pøj pu mẽ omu. Kojã pøj nẽ mẽ piitã mẽ kãm Tĩrtũm kapẽr jarẽnh o ri pa. Mẽ pahte pahprĩ hã mar mex kaxyw. Anẽ.

Tĩrtũm kot mẽ ho hkra hprãm xwỳnhjê jarẽnh

Rõmãn 8.14; Karatas 3.26; Epes 1.5

10Tã nhũm Jejus man kot mẽmoj piitã ho kator xwỳnhhta wỳr wrỳ nẽ mẽ hkõt ri pa. No nhũm mẽ kot kêp mẽmoj piitã ho kator xwỳnh ã omunh kêt jakamã na prem kapẽr ma nẽ ãm kuma nẽ amnhĩ kaxyw hkõt hamaxpêr kêt nẽ. 11Na pre wrỳ nẽ mẽ pakamã ì ho kato. Kêp mẽ pahpiitã mẽ pahto kator xwỳnh tã nhũm mẽ ohtõ nẽ omu nẽ ãm omu nẽ hkõt amnhĩ nhĩpêx kêt nẽ. 12Na prem ãm grêre nẽ kuma nẽ amnhĩ kaxyw hkõt hamaxpêr nẽ hkõt amnhĩ xunhwỳ. Hãmri nhũm amnhĩ tã mẽ omu nẽ mẽ kãm:

—E nã ãm hãmri. Ra mẽ ate amnhĩ kaxyw ixkõt ajamaxpêr nẽ ixkõt amnhĩ xunhwỳr jakamã na ka mẽ ixkukwak ri apê Tĩrtũm kraa. Anẽ.

13Na htem ã kêp Tĩrtũm kra hprãm xaj Jejus kõt amnhĩ xunhwỳr anẽ. No na htem mẽ katorxà nhõxà hkre rũm hapõx kõt kêp Tĩrtũm kra hkêt nẽ. Rỳ amnhĩ krã hkõt tanhmã amnhĩ nhĩpêx to kukwak ri kêp hkra hkêt nẽ. ãm Tĩrtũm tãm kot mẽ ho hkra pix kukwak ri na htem kêp hkra.

Jejus wrỳk nẽ ì ho kator ã harẽnh

Matêwre 1.20; mããnẽn Rõmãn 1.2-4; Pĩrĩpos 2.6-7;

Eprêw 2.9, 4.15; Wam Juãw 4.2

14Jakamã na pre Tĩrtũm o amnhĩrĩt xwỳnhhta mẽ pahwỳr wrỳ nẽ mẽ pakamã ì ho kato nẽ mẽ pakamã pa. Kêp Tĩrtũm Kra hã pixi mex na pre.

Ně kot amnhĩ nhĩpêxja te Tĩrtũm kot amnhĩ nhĩpêx pyræk. Uræk nẽ mex o mex. Nẽ uræk nẽ mẽ pakutã nojarêť xwỳnh. Na pre hte katàť kôt Tĩrtũm kapêr jarênh o ri mẽ hkôt pa. Pa prem kuma nẽ mex o mex ã omu.

15Nhũm Juãw Paxis na pre hkukamã mẽ kãm harênh o ri pa nẽ mẽ kãm:

—E ra ixte mẽ amã harênh o ri ixpa xwỳnhhta na ra pøj. Te pa ixte wa nẽ ixkator pyræk nom amnepê mã kormã ixkêť ri nhũm htĩr rãhã nẽ pa ho pa. Ham ĩ ho kator tã kêp Tĩrtũm Kra jakamã uræk nẽ rãhã ho rãhã hã pa xwỳnh na. Jakamã kot amnhĩ to rax o kot ijakrenh par. Anẽ.

16Nẽ kêp mẽ pakutã nojarêť rãhã nẽ pa ho pa xwỳnh jakamã na hte mẽ pahto mex rãhã pu mẽ kukwak ri pamex nẽ ri papa ho papa.

17Na pre finat Mojesja mẽ panhĩgêťjê mã Tĩrtũm kapêr jarênh o ri mẽ hkôt pa nẽ mẽ kãm:

—Na pre Tĩrtũm mẽ pahte tãm amnhĩ nhĩpêx o papa hã mẽ pamã karõ. Jakamã kot puj mẽ kot mẽ pamã mẽmoj tã karõ xà hkôt ã amnhĩ nhĩpêx anhỹr o papa nẽ ra tãm amnhĩ nhĩpêx o papa. Anẽ.

Nhũm pre Mojesja ã mẽ kãm kapêr o pa anẽ. Hãmri nhũm mẽ kuma no ãm tee ri kãm Tĩrtũm kôt tãm amnhĩ nhĩpêx o pa hprãm kaprỳ. Jakamã nhũm hpãnhã Jejus Krisja wrỳ nẽ mẽ pamã kapêr õ ho kapêr o pa nẽ mẽ pamã:

—E mẽ ate Tĩrtũm kôt amnhĩ nhĩpêx o apa hkêť tã nhũm arĩ kãm mẽ ajapê nẽ. Nẽ kãm mẽ ato mex prãm. Jakamã kot kaj mẽ amnhĩ to awỳ nhũm tanhmã mẽ akrã hto ka mẽ ra tãm ri amnhĩ nhĩpêx o apa. ãm hãmri na pa ã mẽ amã ja jarênh anẽ.

Anhỹr o mẽ pamã Tĩrtũm kapêr jarênh o pa. Tĩrtũm kapêr na mex o mex.

18Nẽ aa mẽ pahtõ mẽ pahte pano ho Tĩrtũm pumunh kêt. ãm Kraja pix na kot no ho omunh. Kaxkwa kamã kuri ri pa ho pa jakamã kot omunh mex. Nẽ te kot Hipêêxàja pyræk jakamã na pre wrỳ nẽ hprĩ hã tanhmã kute hã mẽ pamã harênh o pa. Jakamã na pu mẽ ra pahpiitã Tĩrtũm kot amnhĩ nhĩpêx ã omu nẽ mar mex nẽ.

Juãw Paxis kot mẽ kãm Jejus jarênh o pa hã harênh

Matêwre 3.1-12; Makre 1.1-8; Rukre 3.15-17; mããnên Atre 19.4

19-28Na pre Juãw Paxis ma hkwỳjê hkôt mẽ kãm Jejus jarênh o pa nhũm mẽ hkwỳjaja kuma nẽ amnhĩ kaxyw Jejus kôt hamaxpêr nẽ hkôt amnhĩ xunhwỳ. Hãmri nhũm Juãw Paxis ja hã mẽ omu nẽ Tĩrtũm mã mẽ hkrã kumrã. Pyhti pê Jotãw nhĩkjê hã krĩ pê Petãn tã ri mẽ hkrã kumrãr o pa. Hãmri nhũm krĩ pê Jerujarê kamã Ijaew krãhtũmjaja harênh ma nẽ ma hwỳr hkwỳjê rê. Mẽ kot tanhmã hkukjêť to nhũm kot mẽ kãm tanhmã amnhĩ jarênh to kaxyw. Jakamã nhũm mẽõ patre hkwỳjê mẽ Tĩrtũm mã amnhĩ jarênh xà hã ixkre kamã mẽ ho ajuta

xwÿnh kwÿjê mẽ Parijew nhõ xwÿnh kwÿjê mẽ nhũm mẽ ma hwÿr mra. Juãw Paxis wÿr mra nẽ omu nẽ kãm:

— Pa. E ot pa mẽ awÿr mra. Kwa mẽ inhmã amnhĩ jarẽ. Apê mẽ atõ na ka we? Xà ka na apê Tirtũm kot mẽ ixkaxyw axãm mã xwÿnhnta na ka nà? Xà ka na pa htem amnhĩ wÿr akamã ijamak o ixpa? Anẽ.

Hãmri nhũm mẽ kuma nẽ mẽ kãm: “Nà pa hkêt.” Anẽ hãmri nhũm mẽ kãm:

— Tô mãn xep apê amnepê mã Tirtũm nhÿ hã kapêr jarênh xwÿnh pê finat Erisja. Hã na ka tanhmã amnhĩ to nẽ akupÿm atir nẽ mẽ ixkõt apa nà? Anẽ.

Hãmri nhũm mẽ kãm:

— Nà ixpê Eris kêt. Anẽ.

Hãmri nhũm mẽ kãm:

— Tô mãn xep apê finat Mojes kot mẽ kãm harênh o pa xwÿnhnta na ka nà? Anẽ.

Hãmri nhũm mẽ kuma nẽ kê axte mẽ kãm:

— Nà ixpê tãm kêt. Anẽ.

Hãmri nhũm mẽ tee ri kot ã amnhĩ tã aprãr anhÿrja ma nẽ kãm:

— Kwa apê jajê hõ hkêt tã na ka hte mẽ hkrã kumrãr o ri apa. Kwa nà akatãt kõt mẽ inhmã amnhĩ jarẽ. Pa mẽ ama nẽ ma akupÿm mra nẽ mẽ kot awÿr mẽ ixrênh xwÿnhjê mã tanhmã ajarênh to. Tanhmã na ka hte mẽ kãm amnhĩ jarênh to ho ri apa? E kwa mẽ inhmã amnhĩ jarẽ pa mẽ ama. Anẽ.

Hãmri nhũm tã hprĩ hã mẽ kãm amnhĩ jarẽ. Amnepê mã mẽ hkukamã Tirtũm nhÿ hã kapêr jarênh xwÿnh pê finat Ijais kot hkukamã tanhmã harênh to nẽ hã kagà xà hkõt nhũm mẽ kãm amnhĩ jarẽ nẽ mẽ kãm:

— Tôe. Nà kot paj ixprĩ hã mẽ amã amnhĩ jarẽ ka mẽ inhma. Amnepê Tirtũm kapêr jarênh xwÿnhjê hõ pê finat Ijaisja na pre hte mẽ kãm mẽhõ hkukamã harênh o ri pa. Mẽhõ kot mẽ panhõ Pahihti hkukamã htẽm nẽ kapõt ã kutêp mẽ kãm harênh o pa xwÿnhnta nhũm pre hkukamã harênh o ri pa. Nẽ mẽ kãm harênh o:

Koja nhÿrmã mẽhõja kapõt ã mõn pøj nẽ mẽ kãm tanhmã

ujarênh to ho ri pa. Nẽ mẽ kãm ujarênh o: “E mẽ inhma.

Koja Tirtũm tokyx mẽ pahwÿr mẽ panhõ Pahihti mẽ nhũm

wrÿ nhũm mẽ piitã omu. Jakamã kwa mẽ tokyx kutêp tãm

amnhĩ nhĩpêx o ri apa. Te ho mẽ kot mẽhõ kutêp pry ho

mex pyrãk o amnhĩ nhĩpêx o ri pa. Jao amnhĩ nhĩ ho tãm

amnhĩ nhĩpêx nẽ tãm axpẽn nhĩpêx o ri apa. Pahihtita

kutêp.”

— Anhÿr o na pre hte finat Ijaisja kot Pahihti hkukamã harênh o ri pa xwÿnhnta kukamã harênh anẽ. Tã paa. Pa na pre Ijaisja ã ixkukamã

ijarênh anhÿr o pa. Pa na pa hte ã Pahihti kutêp mẽ kãm harênh o ri ixpa anê. Tã ã ixte harênh anhÿr xwÿnhhta na ra mẽ pakamã pa ka mẽ kormã ja hã omunh kêt nê. Kukamã na pa hte mẽ piitã mẽ kot hkôt amnhÿ xunhwÿr ã mẽ omunh kaxyw gô pix o mẽ hkrã kumrãr o ri mẽ hkôt ixpa. Nom na pre ra mẽ pahwÿr Tirtûm kot mẽ pakaxyw ãm xwÿnhhta tãm mẽ pahwÿr wrÿ. Àhpumunh tÿx o kot ijakrenh jakamã na pa hte ãm kukwak ri ixpa nê amnhÿ tã hã xpijaàm o ri ixpa. Anê.

Juãw Paxis kot mẽ kãm Jejus jahkre hã harênh

Matêwre 3.11; Makre 1.10; Rukre 3.22

29Tã nhûm apkati nhûm Juãw Paxis amnhÿ wÿr Jejus pumu nê mẽ kot mar o kuhê xwÿnhjê mã ìhkra ho ahkre nê mẽ kãm:

—E. Onêj Tirtûm kot mẽ pakaxyw ãm xwÿnhhta tẽ. Mẽ pahpê Ijaew na pu htem xatã pahte amnhÿ tomnuj pãnhã amnhÿrer kaxyw Tirtûm mã pahkrit ôwêhti hkra nyw kwÿ hpa nê ho amnhÿ pãnhã kãm amnhÿrer o papa. No kêt htêm nêj koja nhÿrmã kãm mẽ pahpiitã mẽ pahte amnhÿ tomnuj pãnhã amnhÿrer pa. 30Na pa pre ra mẽ amã harênh o: “Te pa ixte wa nê ixkator nê ixtir nê ixpa pyrãk. Nom amnepêm kormã ixkêt ri na pre htir rãhã nê pa ho pa. Nê ì ho wrÿk nê jar kator tã kêp Tirtûm Kra jakamã urak nê rãhã nê pa ho pa xwÿnh na. Jakamã kot amnhÿ to rax o kot ijakrenh par.” Anhÿr o pa pre mẽ amã harênh o ri ixpa ka prem inhma.

31—Ixte mẽ amã ã harênh anhÿr tã ijaxwÿja kormã ixte kêp Tirtûm Kra hã omunh kêt nê ãm hkukamã Tirtûm nhÿ hã mẽ amã ã harênh anhÿr o ri ixpa. Nê hkukamã Tirtûm mã mẽ akrã kumrãr o ri ixpa. Tã na pa kêp Tirtûm Kra hã omu nê ã mẽ amã ahkre anê ka mẽ omu. Anê.

32-33Nhûm pre ã Juãw Paxis mẽ kãm Jejus jahkre anê nê mẽ kãm:

—Nà Tirtûm na pre ixte mẽ akrã kumrãr o ixpa kaxyw inhmã hã karõ. Tã na inhmã kot mẽ pakaxyw ãm xwÿnhhta o amnhÿrit nê inhmã harênh o: “Koja nhÿrmã Ixkarõja mēhõ hwÿr wrÿ nê kuri arik. Ka ja hã omu nê kêp Ixkra hã omunh kurê kumrêx. Koja amnhÿ xõ ri amnhÿ pyrã nê mẽ kãm Ixkarõ nhõr o pa nhûm mẽ hkarõ mã agjê.” Anhÿr o inhmã harê. Tã na pa ra omu. Na pre Tirtûm Karõ kaxkwa rûm te tuuti pyrã nê hwÿr wrÿk o tẽ nê ìkre hã xa. 34Pa ã kot hipêx anhÿr ã omu nê kêp Tirtûm Kra hã omunh kurê kumrêx. Jakamã na pa ã mẽ amã ahkre nê mẽ amã harênh anê. Anê.

Juãw Paxis kôt pa xwÿnh wa kot Jejus kôt pa hã wa harênh

Atre 19.4

35Tã nhûm apkati nhûm Juãw Paxis axte Jejus pumu. Kot hkôt ri pa ho pa xwÿnh mẽ wa nhÿri xa nê omunh o xa. 36Nhûm ra mẽ hãnh tẽ nhûm Juãw Paxis omu nê hkôt ri pa xwÿnh wa kãm:

—E oněj Tirtùm kot mẽ pakaxyw ãm xwỳnhhta tẽ. Něj koja mẽ pahte amnhĩ tomnuj pãnhã amnhĩre. Anẽ.

37Hãmri nhũm wa kuma nẽ omu nẽ ma hkõt tẽ nẽ hã ajêt. 38Nhũm wa omu nẽ wa kãm: “Pa mo na?” Anẽ nhũm wa kot kêp mẽ ahkre xwỳnh ã omunh jakamã kãm:

—Nà wa ixte ma akõt ixtẽm nẽ nhỹri anhõrkwỹ pumunh mã na pa wa akõt tẽ. Anẽ.

39Hãmri nhũm wa kãm:

—Tõe. Nà wa kam nẽ rĩ ma ixkõt tẽ. Anẽ.

Hãmri nhũm wa kuma nẽ ma hkõt wa tẽ nẽ õrkwỹ hwỳr pøj nhũm ra amỹkry nhũm wa hkõt axà nẽ kuri ỹr o kamàt hãmri nẽ kato nẽ ma akupỹm tẽ. 40Kõt htẽm xwỳnhjê hõta na pre kêp Andre. Simãw Pêtre htõ na pre. Něj kaxyw hõja. Wa kumã na pre Juãw Paxis Jejus jahkre nẽ harẽ nhũm wa ma hkõt tẽ. Tã wa ra akupỹm wa tẽ. 41Hãmri nhũm Andreja htõ Simãw wỳr tẽ nẽ kãm:

—Kwa na pa wa jarãhã Tirtùm kot mẽ pakaxyw ãm xwỳnhhta pumu. Ma pu hwỳr ka wa ixwar ano ho omu nà. Anẽ.

Ijaew kapêr kãm “Tirtùm kot mẽ pakaxyw ãm xwỳnh” anhỹrja te kot Gres kapêr kãm “Kris” anhỹr jarẽnh pyràk. Ijaew na prem ã Jejus jarẽnh anẽ nẽ harẽnh o: “Tirtùm kot mẽ pakaxyw ãm xwỳnh.” Anhỹr o harẽ. 42Jakamã nhũm ã Andreja htõ mã harẽnh anẽ nẽ ma akupỹm hwỳr o tẽ. Něj wa hwỳr pøj nhũm wa omu. Wa kêp Juãw kra hã wa omu hãmri nẽ Simãw mã kapêr nẽ kãm:

—Pa Simãw. Nà apê Simãw tã kot paj axte atã anhĩxi hõ mẽ. Kot kaj mããnẽn apê Septi. Anẽ.

Mẽ pakapêr kãm Septija te kêp “kẽn” jarẽnh pyràk. No Gres kapêr kãm te kêp “Pêtre” jarẽnh pyràk. No Ijaew kapêr kãm kêp “Septi.” Jakamã nhũm pre Jejus ã Simãw Pêtre hã hixi mẽnh anẽ.

Jejus kot amnhĩ kõt Firipti mẽ Natãnaew wa hwỳr ã harẽnh

43-44Tã nhũm apkati nhũm ra Jejus pyka pê Garirej wỳr nojarêt nẽ nhỹri Firipti pumu. Firiptija Andre mẽ Simãw Pêtre wa uràk nẽ krĩ pê Pesêj nhõ xwỳnh na pre. Jakamã nhũm Jejus nhỹri omu nẽ amnhĩ kõt kuwỳ nẽ kãm:

—E kwa ma ri ixkõt apa ho apa. Anẽ.

45Hãmri nhũm kuma nẽ ma tẽ nẽ nhỹri Natãnaew pumu nhũm nhỹri pĩ hpàr parpê nhỹ nhũm omu nẽ kãm:

—Kwa na pa jarãhã finat Mojes kot amnepêm mẽhõ hã kagà xwỳnhhta pumu. Tirtùm kot mẽ pakaxyw ãm xwỳnhhta na. Tirtùm nhỹ hã kapêr jarẽnh o mẽ pa xwỳnhjaja kot hkukamã harẽnh nẽ hã kagà xwỳnhhta. Kêp Najare nhõ xwỳnh nẽ mããnẽn kêp finat Juje hkra. E kwa tokyx pu hwỳr ka ixkuxwar ano ho omu. Anẽ.

46Hãmri nhũm tee ri kot tanhmã harẽnh toja ma nẽ kãm:

—Tk. Kokỹ. Najare nhõ xwỳnh piitã kot amnhĩ to mexti hã kot kêt we hõ kệp Tĩrtũm kot mẽ pakaxyw ãm xwỳnh. Anẽ.

Hãmri nhũm kãm:

—Kwa nà ã akapẽr anhỹr kêt nẽ. Ma ixkõt tẽ nẽ ixpyrà nẽ ano ho omu mãn. Nẽ rĩ ã ri akapẽr anẽ. Anẽ.

Hãmri nhũm kuma nẽ ma hkõt tẽ. 47Hãmri nhũm Jejus amnhĩ wỳr wa omu nẽ kuri mẽ kuhê xwỳnhjê mã Natãnaew jarẽnh kurê kumrẽx nẽ harẽnh o:

—E onẽj Ijaew õja mẽ pahwỳr hpõx o tẽ. ãm hãmri na hte tãm amnhĩ nhĩpêx o pa. Na hte higêt finat Jako kurom hêx rom ri tanhmã mẽ kãm amnhĩ to hêx to ho pa hkêt nẽ. Na hte ãm kapẽr mex pix o ri kapẽr o pa. Anẽ.

48Hãmri nhũm tee ri amnhĩ tã kuma nẽ kãm:

—Kwa mẽhõ na pre ã amã ijarẽnh anẽ? Aa ixte nhỹri apumunh kêt kumrẽx tã ka ri ãm hãmri ã ijarẽnh anẽ. Anẽ.

Hãmri nhũm kãm:

—Nà mẽhõ kot tanhmã inhmã ajarẽnh to hkêt. ãm pa na pa hte inhno ho apumunh o ixpa. Kormã Firipti kot awỳr htẽm nẽ amã ijarẽnh kêt ri pa ra ixprĩ hã inhno ho apumu. Na ka kormã pĩta parpê nhỹ pa apumu. Anẽ.

49Hãmri nhũm tee ri kot hprĩ hã harẽnh ã amnhĩ tã kuma nẽ kãm:

—Kwa mẽ ijahkre xwỳnh. Pẽr ãm hãmri apê Tĩrtũm Kra kumrẽx jakamã na ka ã ijarẽnh anẽ. Xep ka na mẽ ixte amnhĩ wỳr akãm ijamak o ixpa xwỳnhhta na ka. Nà ka na apê mẽ ixpê Ijaew nhõ Pahihti. Anẽ.

50Hãmri nhũm Jejus kuma nẽ kãm:

—Nà ãm hãmri na ka ixte pĩ hpar pê apumunh ã ajarẽnhja ma nẽ hkõt pix mã ixpê Tĩrtũm Kra hã ixpumu. Tã kot kaj ja nhĩrõ pê axte mẽmoj mex o kot ja jakrenh pumu. 51Koja nhỹrmã kaxkwa axkjê nhũm Tĩrtũm kapẽr o mẽ wrỳk xwỳnhjaja kurũm axpẽn japa ka mẽ omu. Finat Jako pyrã nẽ mẽ omu. Ixte Tĩrtũm kot mẽ akaxyw ixãm xwỳnh wỳr koja mẽ ã wrỳk nẽ amnhĩ nhĩpêx anẽ ka ja hã mẽ omu. Kwa jam ajamxpẽr tỳx rãhã ho apa. Anẽ.

Jejus kot gõ ho mẽ kãm wĩhti nhĩpêx ã harẽnh

2 1Tã nhũm apkati axkrut nẽ hapêx nhũm Jejus arĩ Garirej kamã pa. Nhũm krĩ pê Kanã kamã axpẽn mã wahõj wa rer kaxyw nhũm Jejus katorxà ma mẽ hwỳr mõ. 2Hãmri nhũm mẽ amnhĩ wỳr Jejus mẽ hkõt ri mẽ ixpa xwỳnhjê wỳ pa mẽ ijaxwỳja ma mẽ hwỳr mõ nẽ ra mẽ hwỳr põj. 3Hãmri nẽ mẽ hkõt wa hã ixkĩnh nẽ apku nẽ wĩhti hkwy ho ixkõm o ixkrĩ. Tã nhũm ra wĩhti mẽ kệp hapêx nhũm Jejus katorxàja harẽnh ma nẽ Jejus mã harẽ nẽ kãm:

— Xê Jejus. Na xep ra mẽ kêp wĩhti hapêx pa. Xàt ka tanhmã mẽ ho ajuta hto mẽ? Anẽ.

4Hãmri nhũm kãm:

— Tôe. Kwa tee ri ajamaxpêr kêt nẽ. Kot paj tanhmã mẽ kãm ho. Nom kot paj kormã ixpê Tĩrtũm kot mẽ akaxyw ixãm xwỳnh ã pa kormã amnhĩ to amnhĩrit kêt nẽ. Anẽ.

5Hãmri nhũm katorxà kuma nẽ mẽ kãm mẽ àpênh xwỳnhjê hwỳr tẽ nẽ mẽ kãm:

— An koja Jejus mẽ awỳr tẽ nẽ tanhmã mẽ amã mẽmoj tã karõ hto ka mẽ ama nẽ kãm ho anhỳr kurê kumrêx. Anẽ.

6Nhũm mẽ kuri kên o poti kêp 6 nẽ kuhê. Piitã umpỳm rũnh kumrêx. Kojã hõ pyxi nẽ nỳt nẽ kamã gô kêp 80 rit nẽ hkwy kamã kêp 100 rit. Ijaew na htem apkur kaxyw nẽ amnhĩ nhĩhkra kuhõnh japjê rũnh nẽ kormã apku. Nẽ apkur pa nẽ axte amnhĩ nhĩhkra kuhõ. ã mẽ kot xatã amnhĩ nhĩhkra kuhõnh jakamã nhũm pre htem amnhĩ ri ã poti rũnh kwỳ xunhwỳr anẽ. No nhũm ra hkapyr nẽ kuhê. 7Hãmri nhũm Jejus tẽ nẽ omu mẽ àpênh xwỳnhjê mã kãm:

— E mẽ ma mra nẽ gô ru nẽ ho poti kuhê mũj piitã ho nỳt pa. Anẽ.

Nhũm mẽ kuma nẽ ma mra nẽ ho nỳt pa. 8Hãmri nhũm mẽ kãm:

— Nà hãmri. Pãnhã hõ kamã gô hkwy janhi nẽ o tẽ nẽ mẽ anhõ patrãw mã agõ kê hkwy ho ixkõ nẽ kamã ama. Anẽ.

Hãmri nhũm mẽ mar xà hkõt kãm hkwy janhi nẽ hwỳr o tẽ nẽ kãm kugõ. 9-10Nom nhũm gõja arĩ kêp gô kumrêx kêt nẽ. Jejus kot tanhmã ho jakamã nhũm ra hpãnhã kêp wĩhti. Jakamã nhũm mẽõ patrãw wỳr hkwy ho tẽ nẽ kãm kugõ nhũm hkaki nẽ kamã ama. Nom Jejus kot gô ho hipêx ã omunh kêt nẽ. ãm htỳx ho wĩhti kumrêx ã hkamnhĩx nẽ mex kumrêx ã hkaki. Hãmri nẽ amnhĩ wỳr mjên nyw xwỳnh mã hpa ho apê nhũm hwỳr tẽ nhũm kãm:

— Kwa na htem wĩhti mex o wa nẽ mẽ kãm kugõ hãmri nhũm mẽ hpenh pa nhũm mẽ rĩ kormã hkõt omnu ho hapu nẽ mẽ kãm kugõ. Tã ka pêr mẽ axtem nẽ wam mẽ kãm omnu nhõr pa hãmri nẽ kormã mex kumrêxja o hapu nẽ mẽ kãm agõ. Kêt wĩhti ja na mex kumrêx. ãm mex o mex. Anẽ.

Jejus kot gô ho hipêx ã omunh kêt jakamã nhũm ã kãm kapêr anẽ. ãm mẽ àpênh xwỳnh pixjaja na prem ja hã omu. 11Nhũm Jejus kormã mẽ kãm aa mẽ kot mẽmoj pumunh kêt õ ho anhỳr kêt tã krĩ pê Kanã kamã ã mẽ kãm amnhĩ nhĩpêx anhỳr o hkra. Jao amnhĩ to rax o amnhĩ to rax ã mẽ inhmã amnhĩ to amnhĩrit. Pa mẽ ixpê hkõt ri ixpa xwỳnhjaja ã kot amnhĩ nhĩpêx anhỳr ã omu hãmri nẽ kêp Tĩrtũm kot mẽ pakaxyw ãm xwỳnh ã omunh kurê kumrêx.

12Tã nhũm Jejus hpãnhã ma krĩ pê Kapanaũ hwỳr mõ. Pa mẽ hkõt ri ixpa xwỳnhjaja nẽ katorxà nẽ htõjaja pa mẽ ma ixpiitã hkõt mõ.

Hãmri nê hwÿr pøj nê kamã mẽ hkôt ixpa hã ixtã apkati grêre nê ma hpãnhã krí hõ hwÿr ixpa.

Jejus kot Tirtũm nhõrkwÿ hwÿr àr ã harênh

Matêwre 21.12-13; Makre 11.15-19; Rukre 19.45-46

13Tã nhũm ra arĩgro pê Pas ahtêp o mõ. Pasja ã mẽ ixpê Ijaew na pa htem amnepêm Tirtũm kot pika pê Ejit rúm mẽ inhĩgêjtê kator mã ijamaxpêr kaxyw axpên wÿr akuprõ nê hã ixkĩnh. Jakamã nhũm Jejus ma hkwyjê hkôt krí pê Jerujarê hwÿr mõ. Pa mẽ ixpê hkôt ri ixpa xwÿnhjaja pa mẽ ma hkôt ixpa. Hãmri nê hwÿr pøj 14nê Tirtũm mã amnhĩ jarênh xà hã ixkre hwÿr mra nê ixkre puhã kahêja wÿr agjê. Nhũm mẽ kamã axtem nê mẽmoj to wênê ho kuhê. Mõx o wênê nê ôwêhti ho wênê nê tutre ho wênê ho kuhê. Mẽ kot haprôr nê ho Tirtũm mã hkĩnh xà kaxyw mẽ kãm ho wênê. Nê kàxpore ho pinhpanh xwÿnhjaja haxwÿja mẽ kuri hkrí. 15Hãmri pa mẽ Jejus kôt mẽ hwÿr agjê nê ja hã mẽ omu hãmri nhũm Jejus pê ja omnuj tÿx nê. Jakamã nhũm tee ri mẽ omu hãmri nê amnhĩm mry hkà ho mẽ htak xà nhĩpêx nê ho ixkreja nê mẽ piitã mẽ kator pa. Nê mõx nê ôwêhti nê mẽmoj piitã kator pa. Nê kàxpore ho pinhĩpanh xwÿnhjaja nhũm mẽ kêp mẽ õ mẽsti rênh pa nhũm mẽ hikàxpore pykap rôrôk pa nê anhgrã nê hikwÿ. 16Hãmri nhũm Jejus tutre ho wênê xwÿnhjê mã kãm:

—Kwa mẽ anhõ tutre jamÿ nê tokyx ma mra. Na htem Inhĩpêêxà nhõrkwÿ kamã mẽmoj to wênê hkêti nê. Kêp mẽ ujaarôr xà hã ixkre hkêti. E kwa mẽ tokyx ma mra. Anê.

Nhũm pre ã mẽ kãm kapêr anê nhũm mẽ tee ri kuma hãmri nê ma mrar kurê kumrêx. 17Pa mẽ hkôt mẽ ixpa ho ixpa xwÿnhjaja ã kot mẽ hipêx anhÿr ã omu hãmri nê ra Tirtũm kapêr ã kagà htũm kot ã amnhĩ nhĩpêx anhÿrja kukamã hã kagàta mã ijamaxpêr kurê kumrêx. Kagà kot amnepêm Jejus kukamã te ra ã kapêr anhÿr pyrãk o harênh. Nê harênh kot:

Na pa hte Tirtũm nhõrkwÿ ho mex rãhã ho ixpa. Nhũm mẽmoj punuj hwÿr axà pa omu nhũm ja inhmã mex kêt nê.

Anhÿr o kot hkukamã harênh jakamã na pa mẽ ã Jejus kot mẽ hipêx anhÿrja ã omu hãmri nê ra hkukamã hã kagàta mã ijamaxpêr kurê kumrêx.

Ijaew krãhtũmjaja kot Jejus kukjêr ã mẽ harênh

18Tã nhũm Ijaew krãhtũmjaja tee ri Jejus kot ixkreja nê mẽ kator ã omu hãmri nê hwÿr mra nê kãm:

—Pa. Kwa mon ka ri ã Tirtũm mã amnhĩ jarênh xà hã ixkreja nê mẽ kator anê? Mêhõ na we mẽ ixwÿr amê ka ÿ hã ã mẽ hipêx anêhti? Nà xà Tirtũm na mẽ ixwÿr amê? E mẽ inhmã aa mẽ ixte mẽmoj pumunh kêt õ

ho anē. Pa mē ja hã apumu hãmri nē Tirtūm kot mē ixwÿr amēnh xwÿnh ã apumunh kurê kumrêx. E kwa tokyx mē inhmã ho anē. Anē.

19Hãmri nhūm mē kuma nē mē kãm amnhĩ jarē. Nom amnhĩ tã kuxi nē mē kãm awjarē nē mē kãm:

— Nã kot paj aa mē ate mēmoj pumunh kêt õ ho pixi nē mē amã ho anē ka mē omu. Tirtūm nhõrkwÿ jaa. Kot kaj mē agrã pa ixtã apkati axkrunēpxi nē akupÿm hipêx ka mē ja hã ixpumu.

20-22 Anhÿr o mē kãm kapēr. No ãm ixkreja jarēnh kêt nē. Na pre ãm amnhĩ tã kuxi nē ã mē kãm kapēr anē. Mē kot hpĩr nhūm htyk ã apkati axkrunēpxi nē akupÿm htĩr ã mē kãm ã amnhĩ jarēnh anē. Te mē kot Tirtūm mã amnhĩ jarēnh xã hã ixkreta grãnh nhūm hã apkati axkrunēpxi nē akupÿm kot hipêx parta pyrãk ã hã kuxi nē ã mē kãm amnhĩ jarēnh anē. Jakamã nhūm mēhprĩ hã mar mex kêt nē. ãm tee ri kuma nē kãm:

— Tk. Kwa ixkre ja na prem hipêx kaxyw nē hã amgrã xohtõ rax nē hipêx. Hã amgrã pê 46 nē hipêx par kēnã kot ka kêt atã apkati axkrunēpxi pix nē akupÿm hipêx. Anē.

Mē kot hprĩ hã mar kêt jakamã na prem ã kãm kapēr anē. Pa mē hkõt mē ixpa ho ixpa xwÿnhjaja ã mē kãm kapēr anhÿrja ã kuma nē hã inhnõhtÿx rãhã ho ri ixpa. Tã nhūm mē kot Jejus pĩr nhūm hã apkati axkrunēpxi nē akupÿm htĩr nhõ arĩgrota ã pa mē kot ã amnhĩ jarēnh anhÿrja mã ijamaxpēr kurê kumrêx. Nē axpēn mã:

— Hēxta waa nē. Xep ãm hãmri na pre Pahihti amnhĩ kukamã ã amnhĩ jarēnh anē. Mē kot hpĩr nhūm htyk ã apkati axkrunēpxi nē akupÿm htĩr ã amnhĩ kukamã amnhĩ jarēnh mex nē. Te mē kot Tirtūm nhõrkwÿ grãnh par nhūm hã apkati axkrunēpxi nē akupÿm hipêx ã amnhĩ jarēnh pyrãk. ãm hãmri na pre amnhĩ kukamã ã amnhĩ jarēnh anē. Anē.

Jejus kot mē pajamaxpēr kõt mē pahpumunh ã harēnh

23Tã nhūm Jejus mē hkõt mē ixpa ho ixpa xwÿnhjaja arĩ Jerujarē kamã ri ixpa ho ixpa. Nhūm ra arĩgro pê Pasja kato nhūm mē piitã hkĩnh kaxyw axpēn wÿr akuprõ. Nhūm Jejus mē kãm aa mē kot mēmoj pumunh kêt kwÿ ho anhÿr o ri mē hkõt pa. Nhūm mē omu nhūm mē hkwÿjaja Tirtūm kot mē pakaxyw ãm xwÿnh ã hkõt hamaxpēr tã no ãm hkõt hamaxpēr tÿx kêt nē. 24Jakamã nhūm Jejus amnhĩ tã mē hamaxpēr ã mē omu nē hamaxpēr o:

— Nã mē kot ixkõt hamaxpēr kryre xwÿnhjaja koja mē hã apkati grēre nē ixto hamakētkati nē htÿx ri pa. Anē.

25Jejus kot mē pahte pahtÿx ri amnhĩ tomnuj o papa hã mē pahpumunh par. Nē pahtÿx ri pajamaxpēr punuj o papa hã mē pahpumunh par. Jakamã na pre ã mē harēnh anē.

Jejus mẽ Nĩkotẽ wa kot axpẽn mã kapẽr ã wa harẽnh

Juãw 1.12-13; mããnẽn Wam Pẽtre 1.23

3 1Tã nhũm Parijew nhõ xwỳnhjê õ pê Nĩkotẽ. Mããnẽn kệp Ijaew krãhtũmjê hõ. 2Jakamã na pre Jejus jarẽnh ma nẽ kãm omunh prãm nẽ. Hãmri nẽ hkwỹ pymaj kamàt kãm hwỳr tẽ nẽ omu nẽ kãm:

—Pa mẽ ijahkre xwỳnh. E ot pa awỳr tẽ. Ra mẽ ixte apumunh mex. Tĩrtũm na pre ate mẽ ijahkre ho apa kaxyw mẽ ixwỳr amẽ ka mẽ ixwỳr wrỳ. Mẽhõ koja apyrà nẽ aa mẽ inhmã mẽ kot mẽmoj pumunh kêt kwỳ ho anhỳr o pa? Nà amrakati kumrẽx. Kop apu Tĩrtũm kot mẽ ixwỳr amẽn kêt ronhỳx ka ã amnhĩ nhĩpẽx anhỳr kêt nẽ. Anẽ.

3Hãmri nhũm kuma nẽ tanhmã kãm kapẽr to. No ãm amnhĩ tã kuxi nẽ kãm awjarẽ nẽ kãm:

—Na htem piitã mẽ katorxà nhõxà hkre rũm hapõj. Tã Tĩrtũm kãm mẽ piitã axte mẽ hapõx prãm. Jakamã kot kaj mẽ akator o axkrut kêt nẽ hãmri nẽ nhỹrmã Tĩrtũm ri atĩr tũm nẽ apa ho apa hkêt nẽ. ãm hkrajê pix na htem kuri htĩr tũm nẽ pa ho pa. Jakamã kwa jam ajamaxpẽr tỳx nẽ ri ho apa. Anẽ.

4Hãmri nhũm Nĩkotẽja kuma nẽ tee ri ã kot kãm kapẽr anhỹrja kukamã hamaxpẽr nẽ kãm:

—Kwa ra ixaptàr kẽnã kot pa kêt tanhmã amnhĩ to nẽ akupỹm ixkatorxà nhõxà hkre hwỳr axà nẽ axte kurũm ixkato. Anẽ.

5-7Hãmri nhũm Jejus kãm:

—Nà na hte mẽ hkrarejaja mẽ katorxà nhõxà hkre rũm kagõ hkõt hapõj hãmri nẽ kệp katorxà mẽ hipêxà wa hkwỹy. Jao wa kot amnhĩ nhĩpẽx kõt amnhĩ nhĩpẽx o pa. Ja pyrà nẽ ka mẽ atõ amã apê Tĩrtũm kra hprãm hã kot kaj amnhĩ to awỳ nhũm wa Ixkarõja akarõ mã axà hãmri ka ra apê hkraa. Te ra axte akator pyràk o amnhĩ nhĩpẽx. Nẽ te mẽ hkra kot katorxà nẽ hipêxà wa kot amnhĩ nhĩpẽx kõt amnhĩ nhĩpẽx o pata pyrà nẽ apãm Tĩrtũm kot amnhĩ nhĩpẽx kõt amnhĩ nhĩpẽx o ri apa. Nom koja Tĩrtũm mẽ wa Ixkarõja akarõ mã àr kêt nẽ ka apê hkra hkêt nẽ. Jao te axte akator kêt pyràk o amnhĩ nhĩpẽx. Jakamã na pa amã te ate akator pijakrut o amnhĩ nhĩpẽx pyràk o amã ã ja jarẽnh anẽ. Kwa jam ajamaxpẽr tỳx rãhã ho ri apa. No ama nẽ tee ri amnhĩ kukamã ajamaxpẽr kêt nẽ.

8—E pa ixprĩ hã amã ja jarẽ ka inhma. Na hte kòk kãm nhỹhỹm àpêr prãm xà hkõt àpêr o pa. Pu mẽ kamã ama no ãm pano ho nhỹhỹnh mõr xà hkõt omunh kêt nẽ. Nẽ nhỹhỹm ma mõr xà hkõt omunh kêt nẽ. Ja pyrà nẽ na hte Tĩrtũm mẽ wa Ixkarõja mẽ hkaxwỳnh mã agjê nẽ mẽ ho Tĩrtũm kra nom nhũm mẽhprĩ hã kot tanhmã mẽ ho hã amnhĩ tã omunh kêt nẽ. Anẽ.

9Hãmri nhũm Nĩkotẽ ã Jejus kot kãm kapẽr anhỹr ã kuma nẽ tee ri hamaxpẽr nẽ kãm:


—Kwa na pa ixprĩ hã amar kêt nẽ. Anẽ.

10Hãmri nhũm kãm:

—Kwa mon ka hte Tĩrtũm kapẽr tũm o Ijaew jahkre ho apa tã aprĩ hã ixkapẽr mar kêt nẽ? 11Ixte mẽmoj pumunh xà hkõt ixte mẽ amã harẽnh o ixpa htã ka mẽ apẽ Ijaew krãhtũmjaja mẽ amã ixkapẽr mar prãm kêt nẽ. ã mẽ ate anhỹr kumrẽx. Kwa jam ajamaxpẽr tỳx nẽ. 12Na pa ra Tĩrtũm kot jar tanhmã amnhĩ nhĩpêx to hã harẽnh o ixpa htã ka mẽ am ama nẽ ixkõt ajamaxpẽr kêt nẽ. Jakamã xà kot pa hpãnhã mẽ amã kaxkwa kamã tanhmã kot amnhĩ nhĩpêx to hã harẽ ka mẽ ama nẽ mar tỳx nẽ? Nà kot ka mẽ ama nẽ am ama nẽ hkõt ajamaxpẽr kêt nẽ. 13Mẽhõ na we ra ma kaxkwa hwỳr api nẽ kamã mẽmoj mex pumu nẽ man akupỹn mẽ awỳr wrỳ nẽ mẽ amã tanhmã harẽnh to? Nà amrakati kumrẽx. Am paxipix ixpẽ Tĩrtũm kot mẽ akaxyw ixãm xwỳnh na pa pre amnẽ kurũm mẽ awỳr wrỳ hãmri nẽ ixprĩ hã mẽ amã tanhmã harẽnh to ho ri ixpa.

14—Amnepẽm finat Mojesja kormã kapõt ã mẽ o pa ri na pre mẽ kãm kax o kagã karõja nhĩpêx nẽ kỳxpẽ mẽ kãm kunhõ. Kagã kot mẽ hkamnar xwỳnhjaja kot hwỳr rĩt nẽ omunh nẽ akupỹm mex kaxyw mẽ kãm kunhõ. Tã ixpẽ Tĩrtũm kot mẽ akaxyw ixãm xwỳnh kot paj nhỹrmã kagã karõta pyrã nẽ kỳx pẽ pĩ kahpa hã ajêt. 15Ka mẽ te mẽ kot kagã karõ pumunh nẽ akupỹm mexta pyrã nẽ amnhĩ kaxyw inhmã ajamaxpẽr nẽ ixkõt amnhĩ xunhwỳ hãmri nẽ nhỹrmã Tĩrtũm mẽ wa ixri atĩr tũm nẽ amex rãhã nẽ apa ho apa.

16—Tĩrtũm kãm pika piitã hkõt mẽ apiitã mẽ ajapê htỳx. Nẽ mẽ ajapê xaj na pre ixpẽ Kra hã ixpyxi hã mẽ awỳr inhmẽ. Ka mẽ atõ amnhĩ kaxyw ixkõt ajamaxpẽr nẽ ixkõt amnhĩ xãm. Hãmri nẽ nhỹrmã atyk tã nhũm Tĩrtũm akupỹm ato atĩr ka wa ixkuri atĩr tũm nẽ amex rãhã nẽ apa ho apa. Hãmri nhũm Tĩrtũm aa amnhĩ nẽ nhỹhỹm amẽnh kêt kumrẽx. 17No mẽ ate amnhĩ tomnuj mỳrapẽ tanhmã ixte mẽ anhĩpêx to kaxyw na pre mẽ awỳr inhmẽnh kêt nẽ. Am ixkukwak ri mẽ atĩr tũm nẽ mẽ amex rãhã apa ho apa hprãm xaj na pre mẽ awỳr inhmẽ pa mẽ awỳr wrỳ. 18Jakamã kot ka mẽ atõ amnhĩ kaxyw ixpẽ Tĩrtũm Kra hã ixkõt ajamaxpẽr nẽ ixkõt amnhĩ xãm nhũm Tĩrtũm ixtã apumu nẽ



Juãw 3.14-17

ate amnhĩ tomnuj mÿrapê tanhmã anhĩpêx to hkêtnê. No kêt mē kot ixkôt amnhĩ xunhwÿr kêt xwÿnhjaja na Tĩrtũm ma mē kot amnhĩ xà htÿx kamã hamak tũm xà hwÿr mē pa mã xwÿnhjê hã mē harê. Mē kot ixkôt amnhĩ xunhwÿr kêt mÿrapê. Anê.

Mē kot amnhĩ tomnuj o hpimxur prãm kaprÿ ã mē harênh

19Nhũm Jejus arĩ Nĩkotê mã kapêr nê kãm:

—Na pre Tĩrtũm amnê pika hwÿr mē awÿr inhmê. Mē ate amnhĩ tomnuj xwÿnh ã amnhĩ pumunh kaxyw mē awÿr inhmê. Tã nhũm mē ohtô nê amnhĩ tomnuj gryk ã kãm kapêr mar prãm kêt nê. Jao ixkaga nê kãm ixkapêr mar prãm kêt nê. 20Ra ixprĩ hã ixte mē kot tanhmã amnhĩ tomnuj to ho pa hã mē omunh mex jakamã mē kãm ixkapêr mar prãm kêt. Nê ixte mē kot tanhmã amnhĩ tomnuj to ho pa hã mē harênh pymaj ixkôt kãm pa hprãm hkêtnê. 21No kêt mē kot ixkôt amnhĩ xunhwÿr xwÿnhjaja na mē kot amnhĩ nhĩpêx o pa hã hpijaàm kêt. Na htem ànnhĩx ixkôt amnhĩ nhĩpêx o pa. Jakamã koja mē piitã ja hã mē omu nê Tĩrtũm kot tanhmã mē hkrã hto nhũm mē ra kãm hkôt pix mã amnhĩ nhĩpêx ho pa hprãm ã mē omunh kurê kumrêx. Anê.

Nhũm pre ã Jejus Nĩkotêja mã kapêr anê.

Juãw Paxis kot Jejus jarênh o pa hã harênh

Juãw 1.19-28

22Tã pa mē ixpê Jejus kôt ri ixpa ho ixpa xwÿnhjaja Jejus kôt Jerujarê rũm ijapôj nê pika pê Jutej kwÿ kamã ixpa. Jejus nhÿ hã Tĩrtũm mã mē hkrã kumrãr o ri mē hkôt ixpa. 23Nhũm finat Juãw Paxis haxwÿja mē ixpyrà nê mē hkrã kumrãr o pa. Krĩ pê Sarĩ htã krĩ pê Enô mÿri pyhti rax jakamã nhũm pre htem hwÿr mra nhũm kamã mē hkrã kumrã. 24Kormã mē kot haxàr kêt ri nhũm kamã mē hkrã kumrãr o pa.

25Rôm nhũm Ijaew hõja Juãw Paxis kôt mē pa ho mē pa xwÿnhjê hwÿr tē nê Juãw Paxis kot mē hkrã kumrãr ã tanhmã mē hkukjêr to nhũm mē kuma nê tee ri hã axpên kukjêr o kuhê. 26Hãmri nê akupÿm Juãw Paxis wÿr tē nê kãm:

—Kwa mē ijahkre xwÿnh. Pyhti pê Jotãw nhĩkjê hã ate mēhõ pumunh nê tanhmã mē inhmã harênh to xwÿnhhta kôt mē pa ho mē pa xwÿnhjaja na xep htem apyrã nê mē hkrã kumrãr o pa nhũm xep mē ra ohtô nê mē pahkaga nê mē hkôt pa. Kwa xà ja amã mex nà? Anê.

27Hãmri nhũm mē kuma nê mē kãm:

—Tÿ ja mex kênã. Tĩrtũm kãm hprãm xà hkôt na htem mē hwÿr mra nhũm mē ixpãnhã mē hkrã kumrã. Nà ja mex. 28Ixpê Tĩrtũm kot mē pakaxyw ãm xwÿnh kêt. Na pa pre ra mē amã ja hã amnhĩ jarê ka prem inhma. ãm hkukamã na pre Tĩrtũm amnê inhmê pa mō nê ã jar ri ixpa anê.

29—Te ixte mẽ umre kot amnhĩ nhĩpêx pyrãk. Na htem axpên mã mẽ rer kaxyw nhũm mẽ umreja myta wỳr tẽ nẽ hpa hã kupy nẽ ma ni hwỳr o tẽ nẽ axpên mã wa kure. Hãmri nhũm hpãnhã mễhõja axpên tã wa hakre. Nhũm umreja wa kuri hkĩnh nẽ mar o xa. Tã te ixte mẽ umre kot amnhĩ nhĩpêx pyrãk jakamã koja mẽ ma Tĩrtũm kot mẽ pakaxyw ãm xwỳnhhta wỳr mra nẽ kapêr ma pa mẽ harênh ma nẽ ixkĩnh nẽ. 30Na htem mẽ umre hã hkĩnh kêt nẽ. Mjên nyw xwỳnhja ã na htem hkĩnh. Tã ja pyrã nẽ koja mẽ axte ixte mẽ kãm Jejus jarênh mar kaxyw ixwỳr mra kêt nẽ. ãm hwỳr koja mẽ hpãnhã mra nẽ tãm mar o kuhê. Ja mex kumrêx. 31Jesús kêp kaxkwa rũm amnẽ mẽ pahwỳr wrỳk xwỳnh jakamã kot amnhĩ to rax o kot mẽ pahpiitã mẽ pajakrenh par. Mẽ papajaja mẽ pahpê pika nhõ xwỳnh jakamã Jejus kĩnhã mẽ pahte mẽmoj piitã omunh tohtuj anhỳr. Nẽ pika nhõ xwỳnhjê jamaxpêr pix o pajamaxpêr o ri papa.

32—Na hte Jejus mẽ kãm kaxkwa kamã kot mẽmoj pumunh xwỳnh kwỳjê jarênh o pa. Nẽ kamã kot mẽmoj mar xwỳnh kwỳ jarênh tã nhũm mẽ ohtô nẽ kuma nẽ ãm kuma. 33No mẽ kot mar nẽ amnhĩ kaxyw hkôt hamaxpêr xwỳnhjaja na htem kuma nẽ axpên mã harênh o: “Nà ãm hãmri na ã Tĩrtũm kapêr jarênh anẽ. Nà Tĩrtũm kapêr mex kumrêx.” Anhỳr o axpên mã harê.

34—Tĩrtũm na pre mẽ pahwỳr Jejus mẽ nhũm amnẽ mẽ pahwỳr wrỳ nẽ Tĩrtũm Karõ nhỹ hã mẽ pamã kapêr jarênh o ri mẽ pahkôt pa. 35Tĩrtũm kãm Krata japê htỳx kumrêx jakamã na pre ãhkram mẽmoj piitã haxàr pa nhũm uràk nẽ hihtỳx o hihtỳx nẽ mẽmoj piitã ho amnhĩptàr o pa. 36Jakamã mẽ kot amnhĩ kaxyw hkôt hamaxpêr nẽ hkôt amnhĩ xunhwỳr xwỳnhjaja koja mẽ nhỹrmã wa kuri htĩr tũm nẽ mex rãhã nẽ pa ho pa. No mẽ kot hkaga xwỳnhjaja koja mẽ ã amnhĩ nhĩpêx anhỳr kêt nẽ. Koja Tĩrtũm mẽ kot amnhĩ xà htỳx kamã hamak tũm xàta wỳr mẽ rênh pa. Anẽ.

4 1Tã nhũm Parijew nhõ xwỳnhjaja Jejus jarênh ma. Nẽ hkôt mẽ pa xwỳnhjaja ohtô rax o Juãw Paxis kôt mẽ pa xwỳnhjê jakrenh ã mẽ harênh ma. Nẽ Jejus kot mẽ hkrã kumrãr rax o Juãw Paxis jakrenh ã harênh ma. 2Nom Jejus na pre mẽ hkrã kumrãr kêt nẽ. ãm mẽ ixte hkôt ri mẽ ixpa ho mẽ ixpa xwỳnhjaja na pa prem kãm mẽ hkrã kumrãr o ri ixpa. 3Jakamã nhũm Jejus amnhĩ tã Parijew nhõ xwỳnhjê jarênh ma hãmri nẽ mẽ kêp kato nẽ hpãnhã ma akupỳm Garirej wỳr mỗ pa mẽ ma hkôt ixpa.

Mễhõ ni kot amnhĩ nhĩpêx nyw o amnhĩ nhĩpêx ã harênh

Juãw 7.37-39; mãanẽn Apokarip 22.1, 22.17

4Tã pa mẽ mỗ nẽ kormã pyka pê Samar mã axà nẽ hkôt ixpa. 5Hãmri nẽ krĩ pê Sika hwỳr ixpôx o mỗ. Amnepê m finat Jako kot hkra Juje mã pyka nhõr xwỳnh tã krĩa xa pa mẽ ra hwỳr ixpôx o mỗ. 6Nẽ amnepê m

Jako kot gôm kakwÿnhhta wÿr pøj. Nhũm ra kaxkwa nhĩpøk ri myt nhÿr mẽ nhũm Jejus ra mrar ryy kurê hkêngrà nê. Hãmri nê gôm kakwÿnh mÿ ri tẽm nê hkôkôt o nhÿ. 7-8Hãmri pa mẽ kure nê mẽ ixàpkur xà japrôr kaxyw ma krĩm ijapêx.

Rôm nhũm Samar nhõ xwÿnh nija amnhĩm gô runh mã tẽ nhũm Jejus omu nê kãm:

—Kwa inhmã anhõ gôta kwÿ pa ho ixkõ. Anê.

9Nhũm amnhĩ jaêr pê amnhĩ tã kuma. Ijaew na pre htem Samar nhõ xwÿnhjê kutã apkur rÿ mẽ hkôt ri pa rÿ mẽ ho mjên kêt nê. Rÿ mẽ kutã hkôm kêt nê. Tã nhũm Jejus ã gô hã nija wÿr anê nhũm tee ri amnhĩ tã kuma nê kãm:

—Xê pêr apê Ijaew tã axtem nê ri gô hã ixwÿ. Xà ate ixpê Samar nhõ xwÿnh ã ixpumunh kêt? Hãn ka ri hã ixwÿ. Anê.

10Hãmri nhũm kuma nê kãm amnhĩ jarê. No ãm amnhĩ tã kuxi nê kãm kapêr nê kãm:

—Nà aprĩ hã ate ixpumunh ro nhÿx ka kam gô hã ixwÿ pa amã hkwÿ. Inhõ gô na axte mã. Tĩrtũm kãm amarĩ mẽ amã òr prãm. Na htem ho ixkõ hãmri nê mex nê htĩr tũm nê pa ho pa. Anê.

11Hãmri nhũm tee ri kot ã õ gô jarênh anhÿrja ã kuma nê htÿx ho gôm kakwÿnh kamã gô hã hkamnhĩx nê tee ri hkukamã hamaxpêr nê kãm:

—Xê tanhmã kot ka kêt amnhĩ to nê inhmã gôta kwÿ janhi? Mo kaxyw anhõ gô janhir xà? Gôm kakwÿnhhta upÿm rax kênã kot ka kêt tanhmã amnhĩ to nê hkwÿ janhi. Nhÿhÿnh kot ka anhõ gô jarênh xwÿnhhta kwÿ janhi pa ho ixkõ hãmri nê ixĩr tũm nê ixpa ho ixpa? 12Mê inhõ gôm kakwÿnhja amnepê mã mẽ panhĩgêt finat Jako nhõ gôm kakwÿnh na pre. Jako hkwyjaja na prem hkakwÿ nhũm kamã gô kato nhũm pre htem hanhi nê ho hkôm o pa. Nê hkrajaja nê hkrit piitã ho hkôm o pa. Jakamã na pre mẽ ixpê hkanrêhã htãmnhwÿjê mã hkaga. Tã xep axtem anhõ gô. Mẽ kot ho hkôm nê htĩr tũm kaxyw na xep. Jakamã xê xà ate amnhĩ to rax o mẽ panhĩgêt Jako jakrenh mẽ? Anê.

13Hãmri nhũm Jejus kãm:

—Nà mẽ anhõ gôta na htem ho ixkõ nê arĩ kãm kôr o pa. 14No ixte amã gô jarênh xwÿnhhta kot ka hkwy ho ixkõ hãmri nê axte amã kôr kêt kumrêx nê apa. Nhũm te akaxwÿnh kãm hinore hprôt pyrãk o ka amnhĩ nhĩpêx. Hãmri nê te hinore kamã gôja aa grã hkêt pyrã nê aa ajapêx kêt kumrêx. Nhÿrmã atyk tã akupÿm atĩr nê atĩr tũm nê amex rãhã apa ho apa. Anê.

15Nhũm nija kuma hãmri nê kãm:

—Xôwehe? Xê tô tokyx inhmã anhõ gôta kwÿ. Pa ho ixkõ nê axte inhmã kôr kêt nê ixpa. Nê axte amnê amnhĩm gô janhir mã inhmarr kêt nê. Xê tokyx inhmã hkwy mẽ? Anê.

Tÿx gô kumrêx ã hkamnhĩx nê ã hã àhwÿr anê. 16Hãmri nhũm kãm:

— Tô ma akupÿm krĩm tẽ nẽ amjên japrô nẽ man akupÿn ixwÿr wa tẽ. Anẽ.

17Hãmri nhũm tee ri kuma nẽ kãm:

— Ma mo inhmjên? Inhmjên kêt na pa hte ri ixpa. Anẽ.

Hãmri nhũm kãm:

— Tÿ. Nà ãm hãmri na ka ã amnhĩ jarẽnh anẽ. 18Na ka pre ra amjên kêp 5. Nẽ my mẽ ri war apa xwÿnh ata te kêp amjên pyrãk nom kêp amjên kumrêx kêt. Anẽ.

19Hãmri nhũm amnhĩ jaêr pê kot ã kãm kapêr anhÿrja ma hãmri nẽ kãm:

— Xê pêr aprĩ hã ate ixpumunh par pyrãk. Mãn apê Tĩrtũm nhÿ hã kapêr jarẽnh o mẽ pa xwÿnhjê hõ mãn ka mẽ? 20Xê inhmã mẽmoj jarẽ. Nhÿhÿm kot paj wem axpên kôt mra nẽ Tĩrtũm mã mex o mex ã harẽ? Amnepê mã mẽ panhĩgêjtaja na prem hixêt mÿj nhĩmök ã api nẽ hã kãm amnhĩ jarẽ nẽ kãm mex o mex ã harẽ. No mẽ apê Ijaew na ka htem krĩ pê Jerujarẽ pix kãm mẽ ixte axpên kôt mrar nẽ ã amnhĩ nhĩpêx anhÿr ã mẽ inhmã karõ. Xà hixêt nhĩmök ã mẽ ixte kãm amnhĩ jarẽnhja xà apê omnuj mẽ? Ma xà apê omnuj kêt? Anẽ.

21Hãmri nhũm Jejus kãm:

— Nà kot kaj mẽ nhÿrmã ãm Jerujarẽ pix kãm rÿ hixêt mÿj nhĩmök pix ã axpên wÿr akuprô nẽ Tĩrtũm mã amnhĩ jarẽnh kêt nẽ. 22Mẽ apê Samar nhõ xwÿnhjaja mẽ ate Tĩrtũm mã mex o mex ã harẽnh o apa htã aprĩ hã kot amnhĩ nhĩpêx ã omunh kêt. Nẽ tanhmã hamaxpêr to ho pa hã omunh kêt. No mẽ ixpê Ijaew na pa mẽ arom kot tanhmã amnhĩ nhĩpêx to nẽ tanhmã hamaxpêr to hã omunh mex. Mẽ inhĩõ kukwak ri koja Tĩrtũm mẽ kot hkôt amnhĩ xunhwÿr xwÿnh piitã nẽ mẽ kot amnhĩ tomnuj rênh pa. 23Tã koja mẽ piitã Mẽpahpãm Tĩrtũm mã mex o mex ã harẽnh kaxyw nhÿhÿm pa hkêt nẽ. Koja mẽ nhÿri pa xà kamã mẽ õpinh xà kaxwÿnh kãm ã kãm amnhĩ jarẽnh anhÿr o pa. Ja na Tĩrtũm kãm hprãm. No nhÿhÿm mrar nẽ nhÿri kuhê xà pix kamã kãm amnhĩ jarẽnhja nhũm kãm hprãm kêt nẽ.

24— Nẽ Tĩrtũmja mẽ pahpyrà nẽ ã hkêt jakamã na te kaxkwa nẽ pika piitã hkôt pa ho pa. Jakamã na htem nhÿri pa nẽ õpinh xà kaxwÿnh kãm amnhĩ kaxyw kãm hamaxpêr nẽ kãm mex o mex ã harẽ nhũm ra amnhĩ tã mẽ kuma. ã mẽ kot amnhĩ nhĩpêx anhÿrja na kãm hprãm. Anẽ.

25Nhũm pre ã Jejus nija mã kapêr anẽ nhũm kuma nẽ kãm:

— Ma koja xep nhÿrmã Tĩrtũm kot mẽ pakaxyw ãm mã xwÿnh pê Krisja mẽ pahwÿr wrÿ hãmri nẽ hprĩ hã mẽ pamã mẽmoj piitã ho amnhĩrĩt pu mẽ kuma. Anẽ.

26Hãmri nhũm kãm:

— Kwa nhũm paa. Ixte amã ixkapêr xwÿnhja ixpê Kris na pa. Jakamã na pa ixprĩ hã amã ã ixkapêr anẽ. Anẽ.

27Nhũm pre ã kãm amnhĩ jarẽnh anhỹrja rôm pa mẽ ixte hkôt ri mẽ ixpa ho ixpa xwỳnhjaja ra ixujaprôr pa nẽ akupỳn hwỳr ixpôx o mra. Hãmri nẽ amnhĩ jaer pê kot Samar nhõ xwỳnh nita mã kapêr ã omu nẽ tee ri hkukamã ijamaxpêr nom tanhmã hã hkukjêr to hkêt nẽ. Nija kêp Samar nhõ xwỳnh tã nhũm àmnhĩx kãm kapêr o nhỹ. Pa mẽ omu nẽ ãm omu nẽ tanhmã hã kãm nẽ hkêt nẽ. 28Hãmri nhũm nita gôm kakwỳnh mỳr ri õ poti re nẽ ma akupỳm krĩm tẽ nẽ hkwỳjê mã awjarê. 29Nẽ mẽ kãm:

— Xê mẽ tokyx ma ixkôt gôm kakwỳnh wỳr mra nẽ mỳ ri mẽhõ my mũj pumu. Tĩrtũm kot mẽ pahwỳr mẽnh mã xwỳnhnta na. Aa kot nhỹri ixpumunh kêt tã kot hprĩ hã ixpumunh par. Ixte tanhmã amnhĩ nhĩpêx to hã ixpumunh par. Xê mẽ ma ixkôt mra nẽ ixpyrà nẽ kapêr ã ama. Anẽ.

30Hãmri nhũm mẽ kuma nẽ ma hkôt Jejus wỳr mrar kurê kumrêx.

31Rôm pa mẽ ixte Jejus kôt ri ixpa ho ixpa xwỳnhjaja tee ri mẽ ixàpkur xà ho Jejus ma nẽ kãm:

— E ota mẽ panhõta. Kwa mẽmoj py nẽ aku mãn.

32Anhỹr tã nhũm mẽ inhma nẽ tanhmã mẽ inhmã amnhĩ jarẽnh to. Nom amnhĩ tã kuxi nẽ amnhĩ jarẽ nẽ mẽ inhmã:

— Nà kormã. Inhõja axtem na. Mẽ ate inhõja pumunh kêt. Anẽ.

33Hãmri pa mẽ kuma nẽ tee ri hã axpên kukja nẽ axpên mã:

— Kwa mãn ra mẽhõ mẽ paxwakre kamã kãm mẽmoj to tẽ nhũm kukrê nà? Anẽ.

34Hãmri nhũm mẽ inhma nẽ mẽ inhmã:

— Nà mẽhõ kot kêt ri inhmã mẽmoj to mra pa kuku? Kot paj kot mẽ awỳr inhmẽnh xwỳnhnta mã tanhmã amnhĩ nhĩpêx to hãmri nẽ te ra ixàpkur mex nẽ hã ixihtỳx mex pyræk o amnhĩ nhĩpêx. Tã kot paj ã kãm amnhĩ nhĩpêx anhỹr o ri ixpa rãhã ho ijapêx pa. Jao te ixàpkur rax pyræk.

35Anhỹr o mẽ inhmã amnhĩ jarẽ. Hãmri nẽ ra Samar nhõ xwỳnhjaja mẽ ixwỳr mrar ã mẽ omu nẽ mẽ inhmã tanhmã mẽ harẽnh to nom mẽ hã kuxi nẽ mẽ harẽ nẽ mẽ harẽnh o:

— Kot kaj mẽ axte mẽ atã mytwrỳ kêp 4 hãmri nhũm ra mẽ apur kãm mẽ anhõja hamỳnh mã tãm nẽ. Nom kormã. E ka mẽ pahwỳr mẽ mrar xwỳnh něj pumu. Ra mẽ kot amnhĩ kaxyw ixkôt hamaxpêr nẽ ixkôt amnhĩ xunhwỳr mã tãm jakamã te mẽ apur kãm ra mẽ anhõ jamỳnh mã tãm pyræk. Jakamã ka mẽ atõ ma mẽ hwỳr mõ nẽ mẽ kot amnhĩ kaxyw ixkôt hamaxpêr nẽ ixkôt amnhĩ xunhwỳr kaxyw mẽ kãm ijarê. Hãmri nẽ te ate ixpur kãm inhmã inhõ jamỳnh xwỳnh pyræk o amnhĩ nhĩpêx.

36— Jakamã koja mẽhõ kumrêx mẽ hwỳr tẽ nẽ mẽ kãm Tĩrtũm kapêr jarẽ hãmri nẽ te kêp õ pahi mã hpur kãm ahkre ho pa pyræk. Nhũm mẽ kot mar xwỳnhjaja kuma nom kormã hprĩ hã mar tỳx kêt nẽ. Tã kot kaj mẽ atõ wanta kôt mẽ hwỳr tẽ nẽ mẽ kot ixkôt amnhĩ xunhwỳr kaxyw

apří hã mẽ kãm ijarênh o mẽ hkôt apa hãmri nê te apê mẽ anhõ pahi mã hpur kãm axujamýnh xwýnh pyræk. Hãmri nhũm mẽ hkwýjaja mẽ ama nê ixkôt amnhĩ xunhwý nê ixkôt ri amnhĩ nhĩpêx o pa. Hã koja nhỹrmã mẽ apyrà nê Tĩrtũm mẽ wa ixri mex rãhã nê htĩr tũm nê pa ho pa. Ka mẽ amnhĩ tã mẽ omu nê akĩnh nê apa. Te mẽ kot mẽ hpur kãm ahkre xwýnhjaja nê mẽ kot hamýnh xwýnhjaja mẽõ rũnh pumunh nê hkĩnhhta pyræk.

37—Na htem tũhã ã mẽ pur kãm mẽ àpênh xwýnhjê jarênh anê nê mẽ harênh o: “Axtem mẽ ahkre xwýnhjaja nê axtem mẽ kot hamýnh xwýnhjaja.” Anê. Tã te mẽ ate mẽ ujarênh ja pyræk. 38Na pa pre ra ma mẽ hwýr mẽ arê. Mẽ ate aprĩ hã mẽ kãm ijarênh nhũm mẽ kot mẽ amar nê amnhĩ kaxyw ixkôt hamaxpêr nê ixkôt amnhĩ xunhwýr kaxyw. Nom mẽ kajaja na ka prem akumrêx mẽ hwýr amrar nê mẽ kãm ijarênh kêt nê. Tĩrtũm kapêr jarênh o mẽ pa xwýnhjaja na prem kumrêx mẽ hwýr mra nê ixkukamã mẽ kãm ijarênh o ri mẽ hkôt pa. Te mẽ kot hpur kãm ahkre ho pata pyræk. Tã kot kaj mẽ hpãnhã mẽ kot amnhĩ kaxyw ixkôt amnhĩ xunhwýr kaxyw aprĩ hã mẽ kãm ijarênh o apa. Jakamã te mẽ ate mẽ hpur kãm mẽõ jamýnh xwýnh kot amnhĩ nhĩpêxta pyræk. Anê.

Mẽ hkwý kot amnhĩ nhĩpêx nyw o amnhĩ nhĩpêx ã mẽ harênh

Sikũn Korĩt 5.17; Wam Juãw 4.14

39Rũm nhũm Samar nhõ xwýnh kwýjaja nija kot mẽ kãm amnhĩ jarênh ma hãmri nê uræk nê amnhĩ kaxyw Jejus kôt hamaxpêr. Na pre ra amnhĩ tã tanhmã mẽ kãm Jejus jarênh to nê mẽ kãm harênh o:

—Ma aa kot nhỹri ixpumunh kêt tã ra kot hprĩ hã ixpumunh par. Ixte tanhmã amnhĩ nhĩpêx to hã ixpumunh par.

Anhỹr jakamã nhũm mẽ kuma nê uræk nê amnhĩ kaxyw hkôt hamaxpêr kurê kumrêx.

40Hãmri nê man mẽ ixwýr mra nê Jejus pumu nê amnhĩ wýr kuwý nê kãm:

—Pa. E kwa mẽ tokyx anojarêr kêt nê. Mẽ ma mẽ ixkôt mẽ inhõ krĩ hwýr mõ nê mẽ ixkôt ri apa grire nê arĩ ma mõ. Anê.

Hãmri nhũm mẽ kuma nê mẽ kãm:

—Tõe. Nà kot paj mẽ anê. Anê.

Hãmri pa mẽ ma mẽ hkôt mõ nê mẽ õ krĩ kamã mẽ hkôt ri ixpa hã apkati axkrut. 41Nhũm Jejus mẽ kãm Tĩrtũm kapêr jarênh o ri mẽ hkôt pa nhũm mẽ axte ohtõ nê kuma nê nita pyrà nê hkôt amnhĩ xunhwý. 42Hãmri nê nita wýr mra nê kãm:

—E nã ãm hãmri. Akumrêx na ka mẽ inhmã Jejus o amnhĩrĩt. Pa mẽ akôt ma hwýr mra nê mẽ pam omu nê kapêr ã kuma. Jao apyrà nê amnhĩ kaxyw hkôt ijamaxpêr nê hkôt amnhĩ xunhwý. Pêr ãm hãmri kêp pyka piitã hkôt mẽ pahte amnhĩ tomnuj pãnhã amnhĩrer mã xwýnhhta na. Anê.

Garirej nhõ xwÿnhjaja kot Jejus pumunh ã mẽ harênh

Matêwre 13.57

43Tã pa mẽ Jejus kôt Samar rûm ixkato nẽ ma pika pê Garirej wÿr mõi. Kamã Jejus nhõ krĩ pê Najare htã pa mẽ hwÿr inhmõr kêt nẽ. 44Na pre ra Jejus mẽ inhmã tanhmã õ krĩ nhõ xwÿnhjê jarênh to nẽ mẽ harênh o:

—Tirtûm nhÿ hã kapêr jarênh o mẽ pa xwÿnhjaja na htem amnhĩ nhõ krĩ kamã mẽ kãm Tirtûm kapêr jarênh o pa nhûm mẽ kuma nẽ ãm kuma. Jakamã kot paj Najare hwÿr inhmõr kêt nẽ. Mẽ kãm ixkapêr mar prãmre hã.

45Anhÿr jakamã na pa prem hwÿr inhmõr kêt nẽ. Pãnhã nhãm krĩ hõ hwÿr mõi nẽ hwÿr pøj hãmri nhûm mẽ amnhĩ wÿr Jejus pumu nẽ hkĩnh nẽ. Na prem ra krĩ pê Jerujarê kamã arĩgro pê Pas ã mẽ hkĩnh kãm tanhmã kot amnhĩ nhĩpêx to ho pa hã omu. Jakamã amnhĩ wÿr omu nẽ hkĩnh nẽ.

Jejus kot mēhõ hkra ho mex ã harênh

46Tã pa mẽ kormã Garirej kamã ixpa nẽ akupÿm krĩ pê Kanã hwÿr mõi. Kamã na pre Jejus mẽ kãm gõ ho wĩhti nhĩpêx. Jakamã pa mẽ akupÿm mẽ hwÿr mõi. Nhûm mẽõ pahi nhõ kôwenatôjê hõ hkra myja kêp à htÿx nẽ nõ. Nom Kanã kamã hkêt axtem krĩ hõ pê Kapanãũ kamã. 47Jakamã nhûm hipêêxàja tee ri hkra pumu hãmri nẽ ra Jejus kot Jutej rûm Kanã hwÿr hpõx ã harênh ma nẽ hkra kaxyw kãm hamaxpêr nẽ ma hwÿr mõi kurê kumrêx. Hãmri nẽ nhÿri omu nẽ hwÿr tẽ nẽ kãm kapêr kãm hihtÿx nẽ kãm:

—Pa. E ot pa awÿr tẽ. Na ra ixkra ixpê htyk kaxyw. Kwa ixkamã axukapri nẽ ma ixkõt mõi nẽ akupÿm inhmã ho mex. Anẽ.

48Hãmri nhûm kuma nẽ kãm:

—Kwa pêr ãm ixte mẽ amã aa mẽ ate mẽmoj pumunh kêt kwÿ ho anhÿr ã ixpumunh kôt pix mã na ka htem amnhĩ kaxyw ixkõt ajamaxpêr. Nom amarĩ amnhĩ kaxyw ixkõt ajamaxpêr kêt nẽ. Anẽ.

49Hãmri nhûm tee ri kuma nẽ kãm:

—Kwa tokyx. Kot kaj tokyx ixkõt amõi kêt koja ixpê ty. Anẽ.

50Hãmri nhûm kãm:

—Nã koja apê htyk kêt nẽ. Ra ixte akupÿm amã ho mex kênã. Mãmrĩ ma akupÿm mõi nẽ tokyx omu. Na ra akupÿm amã mex. Anẽ.

Hãmri nhûm kuma nẽ kaxyw hkõt hamaxpêr kurê kumrêx nẽ ma akupÿm hwÿr mõi. Nẽ mõi o apkati. 51Nẽ kormã õ krĩ hwÿr hpõx o mõi ri nhûm ra kãm mẽ àpênh xwÿnhjaja kutã mra nẽ nhÿri pry hã hkaxpa nẽ kãm:

—Pa. Kwa na ra akra hkà hakry nẽ akupÿm amã mex. Anẽ.

52Hãmri nhũm mẽ kuma nẽ hkĩnh tỳx nẽ. Nẽ mẽ kãm:

—Kwa xô wehe? Mẽmo ore hã na pre we ra hkà hakry? Anẽ.

Nhũm mẽ kãm:

—Nà jáã na pre kaxkwa nhĩpòk ri myt nhỹ nhũm hkà hakry nẽ akupỹm amã mex kurê kumrẽx. Anẽ.

53Hãmri nhũm mẽ kuma nẽ mẽ kãm:

—Hêxta waa nẽ. Kwa pẽr ãm hãmri Jejus kot inhmã akupỹm mex ã harẽnh xà hã ore kamã na pre akupỹm inhmã mex. Nà ãm hãmri. Anẽ.

Hãmri nẽ amnhĩ kaxyw Jejus kôt hamaxpẽr kurê kumrẽx. Nhũm òrkwỹ kamã ri mẽ pa xwỳnhjaja uràk nẽ amnhĩ kaxyw hkôt hamaxpẽr.

54Nhũm Jejus ã kãm hkra ho mex anẽ. Na pre ra pika pê Garirej kamã mẽ kot mẽmoj pumunh kêt ò ho anhỹr o tipxi nẽ mẽ kãm gô pix o wĩhti nhĩpêx. Tã ra pyka pê Jutej rũm akupỹm mẽ hwỳr mō nẽ ã akupỹm mẽ hkrata o mex anẽ.

Jejus kot himô mỳ ri akupỹm mẽhō ho mex ã harẽnh

Juãw 7.23, 10.30-33

5 1Tã mẽ ixpê Ijaew mẽ ixte Tĩrtũm ã ixkĩnh kaxyw Jerujarẽ hwỳr akuprõ nhũm Jejus haxwỳja ma hwỳr mō. Pa mẽ hkôt mẽ ixpa ho mẽ ixpa xwỳnhjaja ma hkôt mō. 2Jerujarẽ kamã na himôja hikwỹ. Nhỹhỹnh mẽ kot krĩ hwỳr ôwêhti ho gjêx xà htã hikwỹ. Himôja nhĩxi pê na Petes. Nẽ pu hã mẽ à xwỳnhjê nhĩkwỹ xà hã ixkre kêp 5. 3Piitã kamã na pre hte tanhmã mẽ à kute xwỳnhjaja hikwỹ. Mẽ nohkre xwỳnhjaja nẽ mẽ hyk o mẽ pa xwỳnhjaja nẽ mẽ ì kamã mẽ htyk xwỳnhjaja. ãm ahpỹnhã tanhmã mẽ à kute xwỳnhjaja ixkre hkwyja kamã akupỹm mex prãm xaj hikwỹ. 4Na pre hte Tĩrtũm kapẽr o mẽ wrỳk xwỳnhja tōhã himô hwỳr wrỳ nẽ gô xok. Hãmri nhũm mẽ à xwỳnhjê hō kot amnhĩ to wa nẽ kumrẽx hwỳr wrỳk nẽ kamã mrõr xwỳnhja akupỹm mex. Kwỳjê rom akupỹm mex kurê kumrẽx. Jakamã nhũm pre hte mẽ à xwỳnhjaja akupỹm mex prãm xaj gô xok jamãr o hikwỹ. 5Jakamã nhũm mẽhō myja ixkre hō kamã hikwỹ. Te omnuj nẽ arĩ hikwỹ hã amgrà xohtō rax nẽ. Ra hã amgrà kêp 38. 6Jakamã nhũm Jejus mẽ hwỳr tẽ nẽ omu. Nẽ hprĩ hã omu nẽ hamaxpẽr o:

—Kwa mũj na hte omnuj nẽ ri pa hkêt ã amgrà xohtō rax nẽ. E pa akupỹm ho mex.

Anhỹr o hamaxpẽr hãmri nẽ kãm:

—Pa. E kwa inhmã amnhĩ jarẽ. Xà amã akupỹm amex prãm? Anẽ.

7Hãmri nhũm kuma nẽ kãm:

—Ku nhũm. Inhmã tokyx akupỹm inhmex prãm tỳx kumrẽx kênã. No mẽhō kot tokyx inhmỳ nẽ mẽ kêp ixto wa nẽ ixkumrẽx gô xok kamã

inhmrôr? Na pa tee ri ixkumrêx hwÿr ixtêm nê inhmã inhmrôr prãm nhũm mē xatã ixpê amnhĩ to wa nê mra nê kamã mrô. Anê.

8Hãmri nhũm Jejus kãm:

—Tÿ? Tôe. E na ka akupÿm amex. E kànhmã xa nê akupĩp py nê ma akupÿm anhörkwÿ hwÿr tē. Anê.

9Hãmri nhũm kuma nê ra akupÿm mex nê kànhmã xa nê ri mra. Nê hkĩnh tÿx nê hikupĩp py nê ma akupÿm örkwÿ hwÿr tē. Ijaew nhô arĩgromnu pê sap ã nhũm Jejus kot akupÿm ho mex 10nhũm ma akupÿm pry hã hikupĩp py nê o tē. Nhũm Ijaew nhô pahi hkwÿja nhÿhÿnh mra nê tee ri kot sap ã hpyr nê o htēm ã omu nê kãm:

—Tk. Kwa mē pahpê Ijaew na pu htem mē panhō arĩgromnu hã paxapênh kêt nê. Finat Mojes kot ja nê mē pahkurê htã ka axtem nê akupĩpta py nê nhÿhÿm o tē. Anê.

11Hãmri nhũm mē kuma nê mē kãm:

—Tÿ. Kot anhÿr tã kot ixto mex xwÿnhta na ã inhmã kapêr anê pa mar xà hkôt kupy nê akupÿm inhörkwÿ hwÿr tē. Anê.

12Hãmri nhũm mē tee ri kuma nê kãm:

—Kwa mēhō na we ã ri amã karō anê? Anê.

13Nhũm kormã kot Jejus nhĩxi mar kêt jakamã kot mē kãm ahkre kaxyw hakêx nê tee ri hkwÿjê kaêx ã hapêr rīt o xa. Nom nhũm mē ohtō nê pry hã mrar jakamã nhũm tee ri hapêr nhũm Jejus ra ma nhÿhÿm tē.

14Tã nhũm hã ahtũmre nhũm Jejus Tĩrtũm mã amnhĩ jarênh xà hã ixkre hwÿr tē nê axà nê kot ho mex xwÿnhta pumu nê kãm:

—Pa. E na ka ra akupÿm amex. Nom kwa kêr ka axte tanhmã amnhĩ tomnuj to ho ri apa hkêt nê. Kot kaj axte ã amnhĩ nhĩpêx anê hãmri nê apunuj tÿx o wam ate apunujta jakre kãm ga. Anê.

15Hãmri nhũm kuma nê ma tē nê kato. Nê ma mē õ pahijê hwÿr tē nê mē kãm:

—E na pa ra kot ixto mex xwÿnhta nhĩxi ma. Xep kêp Jejus. Anê.

16Hãmri nhũm mē hixi ma nê hã tanhmã axpên mã ho kapêr punuj to. Mē õ arĩgromnu hã kot mē ho mex o pa jakamã nhũm mē axpên jakwa kamã ri hixi ho rê nê nhÿri omu nê tanhmã hã kãm àkjêr to.

17Hãmri nhũm amnhĩ tã mē kuma nê mē kãm:

—Ku nhũm. Inhĩpêêxà Tĩrtũm na hte apkati mē tanhmã mē pahto mex to ho pa. Jakamã pa hte uràk nê ã mē ho mex rãhã ho ri ixpa anê nê aa mēmo arĩgro hã ja ho anhÿr kaga hkêt nê.

18Anhÿr o mē kãm amnhĩ jarê nhũm mē kuma nê kamã gryk tÿx nê. Nom mē õ arĩgromnu hã kot mē ho mexja pix mÿrapê kamã gryk kêt. Mãänên Tĩrtũm kêp hipêêxà hã harênhja mÿrapê nhũm prem kamã gryk tÿx kumrêx nê axpên mã:

—Tk. Kwa na ã amnhĩ jarênh anhÿr jao te kêp Tĩrtũm pyràk ã amnhĩ jarê. E kwa pu mē kupĩ ri. Anê.

Tirtùm Kra kot Hipêêxà nhỹ hã amnhĩ nhĩpêx ã harênh

Juãw 14.10-13

19Hãmri nhũm Jejus axte mẽ kêp Ijaew nhõ pahijê mã kapêr nê mẽ kãm:

—Na pa hte amnhĩ krã hkôt tanhmã amnhĩ nhĩpêx to ho ri ixpa hkêt nê. Na pa hte Inhĩpêêxà kot tanhmã amnhĩ nhĩpêx to hã omunh xà hkôt uràk nê mẽ ho mex o ri ixpa. Kwa mẽ amnhĩ krã him ja jaxà nê kãm ajamaxpêr tỳx nê ho apa.

20—Inhĩpêêxàja kãm ijapêê. Na hte inhmã kot tanhmã mẽ ho mex to piitã ho amnhĩrít. Ixte omunh nê uràk nê ÿ hã tanhmã mẽ ho mex to ho ri ixpa kaxyw. Jakamã kot paj ãm akupỹm mẽ à xwỳnhjê ho mex pix o ri ixpa hkêt nê. Kot paj mãânên mẽ kãm mêmoj mex o ja jakrenh o anhỹr o ri ixpa ka mẽ hã ixpumu nê ixkamã ano puma ho apa.

21—Nê Inhĩpêêxà kot akupỹm mẽ htyk xwỳnhjê ho htír jakamã kot paj uràk nê akupỹm mẽ htyk xwỳnhjê ho htír o ri ixpa. Anê.

Mê htír tùm nê mẽ pa mã xwỳnhjê jarênh

Juãw 3.16-17, 3.36, 6.27, 6.40, 6.60, 10.28, 17.2-3; Rômãn 6.23; Karatas 6.8;

Xitre 1.2, 1.37; Wam Juãw 2.25, 5.11-13

22Nhũm Jejus arĩ mẽ kêp Ijaew nhõ pahijê mã kapêr nê mẽ kãm:

—Koja nhỹrmã Inhĩpêêxàja mẽ htír tùm nê mẽ pa ho mẽ pa mã xwỳnhjê jarênh kêt nê. Ja kaxyw na pre pa ixãm. 23Tã mẽ piitã mẽ kot ja hã ixpumunh nê ixtã hpijaàm o ri pa kaxyw na pre mẽ kaxyw ixãm. Te mẽ kot Inhĩpêêxà hã hpijaàmta pyrã nê pa ixtã hpijaàm o pa kaxyw. Jakamã koja mêhõ ixtã hpijaàm kêt nê hãmri nê mãânên Inhĩpêêxà hã hpijaàm kêt ã amnhĩ to amnhĩrít. Tãm kot mẽ awỳr inhmênh kênã. 24Jakamã koja mêhõ ixkapêr ma nê amnhĩ kaxyw kot mẽ awỳr inhmênh xwỳnhhta kôt hamaxpêr nê ixkôt amnhĩ xãm. Hã koja nhỹrmã htyk tã ma mẽ kot amnhĩ xà htỳx kamã hamak o pa htùm xàta wỳr mõi kêt nê. Koja Inhĩpêêxà akupỹm ho htír nhũm wa ixri htír tùm nê mex kumrêx nê pa ho pa. Jakamã koja mêhõ ixkôt amnhĩ xãm hãmri nê ra kêp wa ixri htír tùm nê pa ho pa mã xwỳnh. Kwa mẽ jam ajamaxpêr tỳx rãhã ho apa.

25—No mẽ kãm ixkapêr mar prãm kêt xwỳnhjaja kêp Inhĩpêêxà mẽ wa ixri mẽ htír tùm nê mẽ pa mã xwỳnh kêt. Tã ixpê Tirtùm Kra jakamã koja mẽ ixkapêr ma nê ixkôt amnhĩ xunhwỳ. Hã kot paj amnhĩ tã mẽ omu nê mẽ htír tùm nê mẽ pa mã xwỳnh ã mẽ harê nhũm mẽ àmnhĩx ri hkĩnh nê pa ho pa. Kwa mẽ jam ajamaxpêr tỳx rãhã ho apa.

26—Nê Inhĩpêêxà tãm kêp mẽ ho mẽ htír xwỳnh. Tã ixpê Kra jakamã na pre amnhĩ pyrã nê ja kaxyw ixãm.

27—Ra kot mẽ akaxyw ixãm jakamã na pre mãânên ixte tanhmã mẽ ajarênh to kaxyw ixãm. Wa ixri mẽ atír tùm nê apa ho apa mã xwỳnhjê

hã mẽ ajarẽnh rỳ wa ixri mẽ atĩr tũm nẽ apa hkêt mã xwỳnhjê hã mẽ ajarẽnh kaxyw. 28-30 Jakamã kot paj nhỹrmã ra mẽ htyk nẽ mẽ hikwỹ xwỳnh piitã mẽ kãm ixkapẽr nhũm mẽ inhma. Koja mẽ ixkapẽr ma hãmri nẽ akupỹm htĩr nẽ pika rũm hapôx pa. Hãmri nhũm mẽ kot kormã htĩr ri Tĩrtũm kapẽr kôt amnhĩ nhĩpêx hkêt xwỳnhjaja mẽ kot amnhĩ tomnuj mỳrapê ma mẽ kot amnhĩ xà htỳx kamã hamak tũm xàta wỳr ma hapêx pa. Nom nhũm mẽ kot amnhĩ to mex xwỳnhjaja. Ra mẽ kot Tĩrtũm kôt amnhĩ nhĩpêx jakamã koja mẽ ma Tĩrtũm mẽ wa ixwỳr api nẽ wa ixri mex nẽ hkĩnh rãhã htĩr tũm nẽ pa ho pa.

—Kot paj ja kaxyw tanhmã mẽ apiitã mẽ ajarẽnh to. Nom kot paj amnhĩ krã hkôt inhmã hprãm xà hkôt tanhmã mẽ ajarẽnh to hkêt nẽ. Kot paj Inhĩpêxà kot mẽ awỳr inhmẽnh xwỳnhnta nhỹ hã àhpumunh tỳx xà hkôt tanhmã mẽ ajarẽnh to. Jao ãm hãmri mẽ ajarẽ. Kwa mẽ jam ajamaxpẽr tỳx nẽ. No ã ixte mẽ amã amnhĩ jarẽnh anhỹrja ma nẽ tee ri ajamaxpẽr kêt nẽ. Anẽ.

Mẽ kot Jejus kêp Tĩrtũm Kra hã harẽnh xwỳnhjê jarẽnh

Juãw 8.18; Wam Juãw 5.6-8

31Nhũm Jejus arĩ mẽ kêp Ijaew nhõ pahijê mã kapẽr nẽ mẽ kãm:

—E na pa ra tanhmã mẽ amã amnhĩ jarẽnh to. Nom kop ãm papxipix ixte ã amnhĩ jarẽnh anhỹr ronhỹx ka mẽ inhma nẽ ajamaxpẽr o: “Ko. Na apu ãm hãmri ã mẽ inhmã amnhĩ jarẽnh anẽ rỳ apu ãm amnhĩ to hêx.” Anhỹr o ajamaxpẽr. 32Nom papxipix na pa hte ã amnhĩ jarẽnh anhỹr kêt nẽ. Inhĩpêxà haxwỳja na hte ã ijarẽnh anẽ. Nẽ ãm hãmri na hte tanhmã ijarẽnh to ho pa. Tĩrtũmja hêx kêt. 33No mẽ amã pika nhõ xwỳnhjê pix kapẽr mar prãm jakamã na ka prem finat Juãw Paxisja wỳr akwỳjê rẽ nhũm mẽ ma hwỳr mra nẽ ixtã hkukja nhũm mẽ kãm tanhmã ijarẽnh to. Nẽ hprĩ hã mẽ kãm ijarẽ. 34No mẽ apê pika nhõ xwỳnhjaja mẽ ate axpẽn mã tanhmã ijarẽnh toja na ixpê tanhmã kute hkêt. Koja mẽhõ tanhmã ixto kapẽr punuj to rỳ tanhmã ijarẽnh mex to pa amnhĩ jarẽnh ma nẽ tee ri amnhĩ kukamã ijamaxpẽr o ixkaprĩ hkêt nẽ. Tã nom Juãw Paxis kapẽrja mẽ amã mex jakamã na pa ã mẽ amã harẽnh anẽ. Ka mẽ ra kot tanhmã ijarẽnh toja ma nẽ amnhĩ kaxyw ixkôt ajamaxpẽr nẽ ixkôt amnhĩ xunhwỳ nẽ nhỹrmã ty nẽ ma mẽ kot amnhĩ xà htỳx kamã hamak tũm xàta wỳr apa hkêt nẽ.

35—Juãw Paxis na pre te kanê hpôk mex nẽ mẽmoj to amnhĩrĩt mex pyrã nẽ mẽ amã Tĩrtũm kapẽr o amnhĩrĩt mex o pa. Ka prem te maripôtre kot kanê hã htu pyrã nẽ hwỳr akuprõ nẽ mar o akuhê. Nom hkôt ajamaxpẽr tỳx kêt nẽ. 36Na pre hprĩ hã mẽ amã ijarẽnh o ri pa.

—Tã pa pam mẽ awỳr wrỳ nẽ Inhĩpêxà nhỹ hã mẽ akamã aa mẽ ate mẽmoj pumunh kêt kwỳ ho anhỹr o ri ixpa. Mẽ ate ja hã ixpumunh nẽ Inhĩpêxà tãm kot mẽ awỳr inhmẽnh kôt ixpumunh kaxyw.

37—Nē Inhĩpêêxàja mãânēn ixpê Kra hã mẽ amã ixto amnhĩrĩt. Ra mẽ anhõpinh xà kaxwỳnh kãm kot mẽ amã ixto amnhĩrĩt tã ka mẽ ama nē ãm ama nē ixkõt ajamaxpêr kêt nē. 38Mẽ amã mẽ ate hkõt amnhĩ nhĩpêx o apa hprãm kêt. Mẽ ate kapêr mar tỳx ronhỹx ka mẽ ixkapêr ma nē amnhĩ kaxyw ixkõt ajamaxpêr kurê kumrêx. Ixpê Tĩrtũm kot mẽ awỳr inhmēnh xwỳnh kēnã.

39—Nē Tĩrtũm kapêr ã kagà htũm haxwỳja kot tanhmã ijarēnh to. Ka htem wa ixri atĩr tũm nē apa ho apa hprãm xàj kamã harēnh rãhã ho ri apa. Nē kot tanhmã pa ijarēnh to htã ka mẽ ixkapêr ma nē amnhĩ kaxyw ixkõt ajamaxpêr kêt nē. Anē.

Ijaew nhõ pahijaja kot Jejus kaga hã mẽ harēnh

40Nhũm Jejus arĩ mẽ kêp Ijaew nhõ pahijê mã kapêr nē mẽ kãm:

—Nē pa na ixte Inhĩpêêxà mẽ wa ixri ixte mẽ ho mẽ htĩr tũm nē mẽ pa mã xwỳnh ã mẽ harēnh tã ka mẽ amnhĩ kaxyw ixkõt ajamaxpêr kêt nē. 41Nom mẽ ate inhmex ã ijarēnh kêt tã ja ixpê tanhmã kute hkêt. ãm Inhĩpêêxà pix kot inhmex ã ijarēnhja na inhmã hprãm. 42Ra ixte mẽ apumunh mex. Mẽ amã Tĩrtũm kĩnh kêt. 43Tãm kot mẽ awỳr inhmēnh tã ka mẽ ixpumu nē ixkaga nē ixkõt amnhĩ nhĩpêx kêt nē. Nom koja mẽhõ amnhĩ krã hkõt mẽ awỳr tē nē tanhmã mẽ ajahkre hto ka mẽ ama nē hkõt amnhĩ nhĩpêx kurê kumrêx.

44—ãm pika nhõ xwỳnh pixjaja kot mẽ amex ã mẽ ajarēnhja na mẽ amã hprãm. No Tĩrtũm kot amnhĩm mẽ amex ã mẽ ajarēnhja mẽ amã hprãm ã mẽ ate amnhĩ jarēnh tã mẽ amã ja prãm kêt. Jakamã na ka htem ixkaga kumrêx. 45-46Tã nom kot paj pam nhỹrmã Tĩrtũm mã mẽ apê ixkwỳ hkêt ã mẽ ajarēnh kêt nē. Mo kaxyw kot pa kêt ri ã kãm mẽ ajarēnh anē? Finat Mojes tãm koja ja hã kãm mẽ ajarē. Na ka htem tanhmã ajamaxpêr to nē ajamaxpêr o: “Kot paj finat Mojes kot mẽ inhmã tanhmã kapêr to hkõt amnhĩ nhĩpêx o ri ixpa hãmri nē nhỹrmã Tĩrtũm ri ixĩr tũm nē inhmex nē ixpa ho ixpa.” Anhỹr o ajamaxpêr nom hkõt amnhĩ nhĩpêx kêt nē. Mojes na pre hte pa ijarēnh o pa. Tã mẽ ate kapêr kõt amnhĩ nhĩpêx ronhỹx ka mẽ amnhĩ kaxyw ixkõt ajamaxpêr nē ixkõt amnhĩ xunhwỳ. No mẽ ate ixkaga jakamã koja Mojes tãm Tĩrtũm mã mẽ apê ixkwỳ hkêt ã mẽ ajarē. 47Mẽ ate Mojes kapêr kõt amnhĩ nhĩpêx kêt jakamã kot kaj mẽ mãânēn ixkõt amnhĩ nhĩpêx hkêt nē. Anē.

Nhũm pre ã Jejus Ijaew nhõ pahijê mã kapêr anē.

Jejus kot mẽ ho 5.000 nē mẽ kãm mẽ õ hã harēnh

Matêwre 14.13-21; Makre 6.30-44; Rukre 9.10-17

6 1-4Tã nhũm ra arĩgro pē Pas ahtêp o mõ. Pasa ã mẽ ixpê Ijaewjaja na pa htem axpēn wỳr akuprõ nē hã õwēhti hkra nyw kwỳ pa nē ã hkur o ixkrĩ. Amnepēm Tĩrtũm kot pika pē Ejit rũm mẽ inhĩgêtjê kator

kaxyw nhũm prem nojarê t nê ã hkwỳ hpar nê ã hkur anê. Tã arĩ mē xpe mē hkanrêhã mē htãmnhwỳjaja jam ijamaxpêr pē ixkĩnh kaxyw ã amnhĩ nhĩpêx anê. Jakamã nhũm Jejus pãr krem axã nê ma himô pē Garirej ã rêr kaxyw ma xarmã mō nê rê. Himôja nhĩxi hō pē na Tipe nhũm hã xarmã mō nê rê. Pa mē hkôt ixpa ho ixpa xwỳnhjaja ma hkôt ixpa.

Hãmri nhũm pika nhõ xwỳnh kwỳjaja Jejus ma mōr kãm omu hãmri nê ma gō kape hã pikap mē inhĩhkrep mra. Na pre ra Jejus mē kamã mē à xwỳnhjê ohtô nê akupỹm mē ho mex nhũm mē axte omu hãmri nê ma mē inhĩhkrep gō mỳ ri hpar o pa.

Tã pa mē xarmã rê nê pãr rũm ijabôj nê gō mỳ ri kỳxpê ixkrĩ hpa.

5Hãmri nhũm mē inhĩhkrep mē mrrar xwỳnhjaja mē ixwỳr hpôx o mra nhũm Jejus amnhĩ wỳr mē omu nê mē inhĩõ pē Firipti mã kapêr nê kãm:

—Kwa Firip. Mēmoj kot puj mē pahwỳr mē mōr nējje mã ho anê nhũm mē kuku? Tanhmã kot puj mē amnhĩ to nê nhỹri mē kãm mēmoj japrô nhũm mē kuku? Anê.

6Ra tãm kot tanhmã mē kãm õ hto hã amnhĩ pumunh mex tã ã mē hã Firipti kamã hamak kaxyw mē hã hkukjêr anê. 7Hãmri nhũm kuma nê tee ri mē hkukamã hamaxpêr nê kãm:

—Konên. Mē ohtô rax kumrêx kênã. Mo mē kaxyw mē pakàxpore rax? Kot pu mē pakàxpore ho 200 nê ho mē kãm mēmoj japrôr tã nhũm mē ãm ho hkryre nê kuku nê ho õhy htu hkê t nê. Mē ohtô rax o mē ohtô rax kênã. Anê.

8-9Hãmri nhũm mē inhĩõja kuma nê Jejus wỳr tē nê kãm kapêr. Simãw Pêtre htõ Andreja hwỳr tē nê kãm:

—E ota mēhõ hkrata amnhĩ kôt õ hkwỳ ho mō. No ãm grire. Na pãwti kêp 5 nê kaxyw õ tep axkrutre. No mē ohtô gri ã kot kêt mē hipêx pa. Anê.

10Hãmri nhũm kuma nê hkôt mē ixpa ho mē ixpa xwỳnhjê mã kapêr nê mē inhmã:

—Tôe. Nã hãmri. E mē kãm anê kê mē hkrĩ pa. Anê.

Hãmri pa mē kãm anê nhũm mē pō kamã hkrĩ hpa. Na prem ohtô kumrêx. Mēmyjê pixjaja kêp 5.000. Nê kaxyw mē hprô nê mē hkrajaja. Na prem ohtô ho ohtô. Tã piitã hkrĩ pa. 11-12Hãmri nhũm Jejus mēhõ hkrata pē õ pãwti jamỳ nê o xa nê Tĩrtũm mã harê nê kãm:

—Pa Papaj. Na ka hte mē inhmã mē inhõ ho apa. ãm kapxipix amex o amex. Anê.

Hãmri nê mē inhmã pãwtija gō pa mē ô ri mē hkrĩ xwỳnhjê mã õr o mra nê ho mē piitã mē hipêx pa. Pãwtija ãm hkryre htã nhũm Jejus tanhmã ho nhũm ra ohtô rax kumrêx. Jakamã pa mē ô ri mē kãm õr o mra nê ho mē piitã mē hipêx pa. Nhũm Jejus hpãnhã tep axkrutreta py nê mã ho anê nê Tĩrtũm mã harê hãmri nê amnhĩ xô ri mē inhmã kugõ

pa mẽ mã ho anẽ nẽ. Te ho pãwti nhĩpêx pyrã nẽ ho mẽ piitã mẽ hipêx. Hãmri pa mẽ ixpiitã apku nẽ inhõhy htu nhũm arĩ mẽõ jakrêx kwỳ hprã. Hãmri nhũm Jejus mẽ inhmã:

— E kwa mẽ hkõt mra nẽ mẽõ jakrêx o akuprõ kê omnu hkêt nẽ. Anẽ.

13Hãmri pa mẽ kuma nẽ ho akuprõ nẽ kawà o 12 nẽ ho nỳt. Pãwti hkryreja ãm kêp 5 pix tã nhũm Jejus tanhmã ho nhũm rũnh kumrêx. Jakamã pa mẽ hakrêx prãr o kawà ho 12 nẽ ho nỳt pa. 14Hãmri nhũm mẽ inhĩkrep mẽ mõi xwỳnhjaja amnhĩ jaêr pẽ Jejus kot mẽ kãm mẽõ ho rax ã omu nẽ ri axpẽn mã harênh o:

— Kokỹỹ. Tãm mãn pre finat Mojesja amnepêm mẽ panhĩgêtjê mã harênh o ri pa. Tã ra mẽ pahwỳr wrỳ nà? 15Kwa pu mẽ kãm pakapêr kãm paxihtỳx nẽ ma akupỳm amnhĩ kõt o mõi nẽ amnhĩ kaxyw ãm kê mẽ pahto amnhĩptàr o pa. Anẽ.

Hãmri nhũm Jejus amnhĩ tã mẽ kapêr ma nhũm ja kêp omnuj nẽ. Jakamã nhũm mẽ kêp kato nẽ ma hpãnhã ahte nhỹri hixêt õ hwỳr tẽ.

Jejus kot gõ krãhkã hã htêm ã harênh

Matêwre 14.22-27; Makre 6.45-52

16Tã nhũm ra kamãtre pa mẽ Jejus kõt ri ixpa ho ixpa xwỳnhjaja ma akupỳm himõ hwỳr mra. 17Nhũm kormã Jejus mẽ ixwỳr akupỳn htêm kêt jakamã pa mẽ tee ri kamã ama hãmri nẽ akupỳm pãr mã axà nẽ ma akupỳm Kapanau hwỳr xarmã ixrêr o mõi.

18Pu nhũm ra kõk àpêr tỳx nhũm gõ xatã kãnhmã harĩ nẽ axpẽn wỳr mra nẽ axpẽn tak tỳx nẽ. 19Pa mẽ kormã gõ nhĩpõk ri mõi. Nẽ tee ri rrêmti ho gõ rênh nhĩpêx kaprỳ nom kormã ixrêr kêt nẽ. Nẽ kormã inhmõi o ixtã 5 kirõm pix nẽ. Hãmri nhũm ra Jejus gõ krãhkã hã hpar o mẽ ixkõt tẽ. Pa mẽ ixprĩ hã amnhĩ wỳr omunh mex kêt nẽ ixtỳx mẽkarõ hã hkamnhĩx nẽ mẽ inhmã uma htỳx kumrêx. 20Tã nhũm mẽ inhmã ixkapêr nẽ mẽ inhmã:



Juãw 6.16-20

—Tk. Kwa mẽ amã ma hkêt nê. Pa na pa mẽ akôt tẽ. Anê.

21Hãmri pa mẽ kapêr ma nê ixkĩnh nê. Nê amnhĩ wỳr pàr kre hwỳr ho api nhũm axà pa mẽ xarmã ixrêr kurê kumrêx nê pàr kre rũm ijapôx pa.

Mẽ kot Jejus japêr mrar ã mẽ harênh

22Tã nhũm apkati nhũm xarpê mẽ kot Jejus wỳr mrar nhũm kot mẽ kãm õ xwỳnhjaja tee ri hapêr o pa nê axpên mã:

—Kwa nhỹhỹm mãn pre we tẽẽ? Na pre hkôt ri mẽ pa xwỳnhjaja pix mẽ õ pàr kãm ma akupỹm xarmã mỗ nom nhũm Jejusja mẽ hkôt htẽm kêt nê. Nà mãn kormã jar nhỹhỹm ri mrar jakamã pu mẽ kormã omunh kêt nê. Anê.

23Rôm nhũm Tipe rũm pàr kwỳja mẽ hwỳr pøj. Jejus kot mẽ apkur xà ho Tĩrtũm wỳr nê mẽ kãm ho rax xà hã pikata wỳr nhũm mỗn pøj.

24Hãmri nhũm mẽ amnhĩ wỳr omu nê tee ri pàr kãm Jejus mẽ hkôt mẽ ixpa ho mẽ ixpa xwỳnhjê japêr hãmri nê axpên mã:

—E kwa pu mẽ ma mẽ hkôt xarmã mỗ nê Kapanauĩ kamã mẽ hapêr. Anê.

Hãmri nê mẽ kãm amnhĩ jarê nê mẽ õ pàr kwỳ hwỳr agjê nê ma mẽ hkôt xarmã mỗn rê. 25Hãmri nê ra mẽ ixwỳr rê nê mẽ ixkôt pøj nê mẽ ixkaêx ã Jejus pumu nê hwỳr mra nê kãm:

—Pa mẽ ijahkre xwỳnh. Kwa na pa prem tee ri xarpê ajapêr hãmri nê man akôt mỗn rê. Kwa tanhmã na ka pre we amnhĩ to nê man tẽn rê? Anê.

26Hãmri nhũm mẽ kãm:

—Nà mẽmo kaxyw na ka wem ri ijapêr o ri ixkôt apa? ãm jãã mẽ ate ixkutã axàpkur nê anhõhy htu jakamã na ka mẽ axte ixkutã axàpkur pix kaxyw ijapêr o ri apa. No ixte ã mẽ amã amnhĩ nhĩpêx anhỹr ã ixpumu nê ixpê Tĩrtũm Kra hã ixkôt ajamaxpêr kêt nê. Kwa mẽ ixpê Kra hã inhmã ajamaxpêr tỳx nê kêt wehe. Anê.

Jejus te kêp kaxkwa rũm mẽ paxàpkur xà maati pyràk ã kot amnhĩ jarênh

27Nhũm Jejus arĩ hwỳr mẽ mrar xwỳnhjê mã kapêr nê mẽ kãm:

—Kwa kêr ka mẽ ri axàpkur xà pix kukamã ajamaxpêr o ri apa hkêt nê. Na htem mẽ apkur xà kukwak ri Tĩrtũm mẽ wa ixri htĩr tũm nê pa ho pa hkêt nê. No kot kaj mẽ amnhĩ kaxyw pa ixkôt ajamaxpêr nê ixkôt amnhĩ xunhwỳ. Hã kot kaj mẽ ixkukwak ri nhỹrmã atĩr tũm nê wa ixri amex nê apa ho apa. Te ixpê mẽ kot mẽ apkur xà hkur nê ÿ hã htĩr tũm nê pa ho pa xwỳnh pyràk. Ja kaxyw na pre Inhĩpêêxà Tĩrtũm mẽ awỳr papxipix inhmẽ pa mẽ awỳr wrỳ. Anê.

28Hãmri nhũm mẽ kuma nê kãm:

—Kwa tanhmã kot paj wem amnhĩ nhĩpêx to nhũm Tĩrtũm hã mẽ ixpumu nẽ mẽ ixto mex nẽ? Anẽ.

29Hãmri nhũm mẽ kuma nẽ axte mẽ kãm amnhĩ jarẽ nẽ mẽ kãm:

—Nà kot kaj mẽ amnhĩ kaxyw pa Tĩrtũm kot mẽ awỳr inhmẽnh xwỳnh kôt ajamaxpêr hãmri nhũm ixtã mẽ apumu nẽ tanhmã mẽ akrà hto ka mẽ ajamakêtkati nẽ axãmnhĩx akĩnh nẽ tanhmã amnhĩ nhĩpêx to ho ri apa. Anẽ.

30Hãmri nhũm mẽ kuma nẽ kãm:

—Tôe. Kwa axte mẽ inhmã aa mẽ ixte mẽmoj pumunh kêt ô ho anẽ. Pa mẽ ja hã apumu nẽ amnhĩ kaxyw akôt ijamaxpêr kurê kumrêx. E mẽmo kot ka mẽ inhmã ho anẽ? Kwa tokyx mẽ inhmã axte mẽmoj tanhmã ho pa mẽ omu. 31Amnepêr finat Mojes pyrã kot kapôt ã mẽ panhĩgêjtê ho pa ri na pre hte apkati mẽ mẽ kãm mẽõ mẽ kot kãm “manã” anhỳr xwỳnhhta gõ nhũm pre htem hkur o pa. Tĩrtũm kapêr ã kagã htũm kot ja jarênh kot:

Na pre kaxkwa rũm mẽ hwỳr mẽ apkur xà rẽ nhũm mẽ hkur o pa. Anhỳr o kot harênh. Tã kot kaj Mojes nẽ apkati mẽ mẽ inhmã mẽ inhõ ho ri apa pa mẽ ja hã apumu nẽ rĩ kormã amnhĩ kaxyw akôt ijamaxpêr japêr. Anẽ.

32Hãmri nhũm mẽ kãm:

—Xà Mojes na pre hte mẽ kãm kaxkwa rũm mẽ apkur xà rênh o pa? Nà tãm kêt. Inhĩpêxã na pre hte mẽ hwỳr kurê nhũm mẽ hkawrà nẽ kuku nẽ kukwak ri hihtỳx nẽ htĩr nẽ pa. Tã nhũm ra mẽ awỳr hpãnhã pa ixpê Kra hã inhmẽ. Kwa mẽ ixkapêr ma nẽ amnhĩ krãm haxàr tỳx nẽ. 33Na pre Tĩrtũm inhĩpêx o te amnepêr kot mẽ hwỳr kaxkwa rũm mẽ apkur xà rênhhta pyrã nẽ amnẽ pika hwỳr inhmẽ. Jakamã te ixpê kaxkwa rũm mẽ apkur xà maati wrỳk xwỳnhhta pyrãk. Mẽ ate amnhĩ kaxyw ixkôt ajamaxpêr nẽ ixkôt amnhĩ xunhwỳr hãmri nẽ ixkukwak ri wa ixri atĩr tũm nẽ apa ho apa kaxyw. Anẽ.

34Nhũm pre ã Jejes mẽ kãm amnhĩ jarênh anẽ nhũm mẽ kuma nom hprĩ hã mar mex kêt nẽ. Âm htỳx ho axtem mẽ apkur xà mex pix ã harênh ã hkamnhĩx nẽ kãm:

—Kwa tô mẽ inhmã mẽ apkur xà maatita kwỳ gõ pa mẽ apkati mẽ hkur o ri ixpa. Anẽ.

35Hãmri nhũm mẽ kuma nẽ amnhĩ tã mẽ kãm:

—Nà mẽ apkur xà kumrêxja âm paa. Te ixpê mẽ apkur xà maati pyrãk. Jakamã kot kaj mẽ atõ amnhĩ kaxyw ixkôt ajamaxpêr nẽ ixkôt amnhĩ nhĩpêx o apa hã kot kaj mẽ akĩnh nẽ apa. Te ra axàpkur nẽ anhõhy htu nẽ akĩnh o ri apa pyrãk. Jao amnhĩ tã ixpumu nẽ akĩnh nẽ ajamakêtkati nẽ ri apa.

36—Ra mẽ ate ixpumunh mex tã kormã amnhĩ kaxyw ixkôt ajamaxpêr kêt nẽ. Kwa mẽ ixkapêr ma nẽ amnhĩ krãm haxàr tỳx nẽ.

37Tirtúm kot inhmã mẽ õr mã xwÿnhjaja koja mẽ ixpumu nẽ amnhĩ kaxyw ixkõt hamaxpêr mex kurê kumrêx. ã mẽ kot amnhĩ nhĩpêx anhÿr xwÿnhjaja kot paj aa amnhĩ nẽ mẽ hanor kêt nẽ.

38—Nẽ ixte amnhĩ krã hkõt kaxkwa rûm ixwrÿk nẽ inhmã hprãm xà hkõt tanhmã amnhĩ nhĩpêx to ho ixpa kaxyw na pa pre ixwrÿk kêt nẽ. Inhĩpêêxà kot mẽ awÿr inhmênh jakamã kãm hprãm xà hkõt pix mã na pa hte tanhmã amnhĩ nhĩpêx to ho ri ixpa.

39—Tã mo na hte Inhĩpêêxà kãm hprãm? Nà kot inhmã mẽ õr mã xwÿnh piitã nhÿrmã wa ixkuri htír tùm nẽ mex nẽ pa ho paja na kãm hprãm. Jakamã nhÿrmã akupÿm mẽ htír ã arĩgrota ã ixte akupÿm mẽ ho htír nhũm ixte ãm pixire nẽ ho ixpikunor kêtja na kãm hprãm.

40—Tã kot ka mẽ atõ ixpê Tirtúm Kra hã ixpumu nẽ amnhĩ kaxyw ixkõt ajamaxpêr nẽ ixkõt amnhĩ xãm. Hã kot kaj nhÿrmã atyk tã pa akupÿm mẽ atír xà hã arĩgrota ã akupÿm ato atír ka wa ixkuri atír tùm nẽ amex nẽ apa ho apa. Ja na Inhĩpêêxàja kãm hprãm. Anẽ.

Nhũm pre ã Jejus mẽ kãm amnhĩ jarênh anẽ. 41Hãmri nhũm Ijaew nhõ pahijaja mẽ kuri mar o kuhê nẽ tee ri kêp kaxkwa rûm mẽ apkur xà maati pyrãk ã amnhĩ jarênh ma nhũm ja mẽ kãm mex kêt nhũm mẽ kamã gryk nẽ. 42Jakamã axpên mã ri harênh o:

—Tk. Kwa mo na ri ã amnhĩ jarênh anẽ? Kêp mẽ panhĩõ kênã kot kêt ri kêp kaxkwa nhõ xwÿnh ã amnhĩ jarê. Kêp Juje mẽ Marir wa hkra na. Mẽ pahte katorxà mẽ hipêêxà wa omunh mex kênã kot kêt axtem nẽ kêp kaxkwa nhõ xwÿnh ã amnhĩ jarê. Anẽ.

43Hãmri nhũm amnhĩ tã mẽ kuma nẽ mẽ kãm:

—Kwa mẽ ã ijarênh anhÿr kêt nẽ. 44Koja Inhĩpêêxà kot mẽ awÿr inhmênh xwÿnhhta tanhmã mẽ hkrã hto nhũm mẽ rĩ kormã amnhĩ tã ja hã ixpumu nẽ amnhĩ kaxyw ixkõt hamaxpêr. Tã ã mẽ kot amnhĩ nhĩpêx anhÿr xwÿnhjaja koja mẽ nhÿrmã htyk tã pa akupÿm mẽ ho mẽ htír nhũm mẽ wa ixri htír tùm nẽ mex kumrêx nẽ pa ho pa.

45—Amnepêm Tirtúm kapêr jarênh o mẽ pa xwÿnhjaja na prem ã ja jarênh anhÿr o:

Koja Tirtúm mẽ hkrã kaxwÿnh kãm tanhmã mẽ kãm kapêr o amnhĩrit to ho pa.

Anhÿr o harênh. Jakamã mẽ kot Tirtúm kapêr mar nẽ hkõt amnhĩ nhĩpêx xwÿnhjaja koja mẽ mãânên amnhĩ kaxyw pa ixkõt hamaxpêr nẽ ixkõt ri amnhĩ nhĩpêx o pa.

46—Nẽ mẽ apê pika nhõ xwÿnhjê hõ aa mẽ ate ixkĩnhã ano ho Inhĩpêêxà pumunh kêt. ãm papxipix na ixte omunh. Kurũm na pa pre mẽ awÿr wrÿ. 47Tã kot ka mẽ atõ amnhĩ kaxyw ixkõt ajamaxpêr. Hã kot kaj nhÿrmã wa ixkuri atír tùm nẽ amex nẽ apa ho apa. Kwa mẽ jam ajamaxpêr tÿx nẽ.

48—Nē ixpê mẽ axàpkurxà maati jakamã pa na ixpê akupÿm mẽ ho mẽ htír xwÿnh. 49Amnepêm mẽ panhīgêjtjaja kormã kapôt ã mẽ pa ri mẽ kot “manã” anhÿr xwÿnhhta kur o ri pata ã na prem kukwak ri htír tũm nẽ pa ho pa hkêť nẽ. Na prem ri pa nẽ gaa nẽ rĩ hpigêť nẽ htyk pa. 50Axtem kaxkwa rũm mẽ apkur xà maati jarênh xwÿnhhta pix kukwak ri na htem nhÿrmã htyk tã akupÿm htír nẽ wa ixri htír tũm nẽ mex nẽ pa ho pa. 51Ăm paa. Pa na htem inhĩ hkwÿ hkrẽ hãmri nẽ wa ixri htír tũm nẽ mex nẽ pa ho pa. Na pa pre ra amnhĩ grõnh kôt mẽ awÿr wrÿ. Jakamã ka mẽ atõ inhĩ hkwÿ hkrẽ hãmri nẽ nhÿrmã atyk tã pa akupÿm ato atír ka Tĩrtũm mẽ wa ixri atír tũm nẽ amex nẽ apa ho apa. Anẽ.

52Nhũm pre ã Jejus Ijaew mã amnhĩ jarênh anẽ. No ãm mẽ kãm amnhĩ tã kuxi nẽ amnhĩ jarẽ. Jakamã nhũm mẽ tee ri kuma hãmri nẽ tanhmã hã axpẽn mã kapër to. Mẽ kot hprĩ hã mar kêt nẽ ãm mẽ kot ĩ hkwÿ hkrêrja pix jarênh mar jakamã tee ri hamaxpër nẽ axpẽn mã:

—Kwa tanhmã kot kêt we amnhĩ to nẽ mẽ pamã amnhĩ nhĩ hkwÿ gõ pu mẽ kuku? Anẽ.

53-54Hãmri nhũm amnhĩ tã mẽ kuma nẽ mẽ kãm:

—Nà mẽ kot inhĩ hkwÿ hkrêr nẽ ixkamrõ hkwÿ ho hkõm xwÿnh pixjaja koja mẽ nhÿrmã Tĩrtũm mẽ wa ixri htír tũm nẽ pa ho pa. Ixte akupÿm mẽ ho mẽ htír xà hã arĩgrota ã kot paj mẽ ho mẽ htír nhũm mẽ wa ixri htír tũm nẽ mex nẽ pa ho pa. No kot kaj mẽ inhĩ hkwÿ hkrêr kêt nẽ ixkamrõ hkwÿ ho akõm kêt hãmri nẽ wa ixri atír tũm nẽ amex nẽ apa ho apa hkêť nẽ. Kwa mẽ jam ajamaxpër tÿx rãhã nẽ. 55Kêt inhĩja kêp mẽ apkur xà maati na. Nẽ ixkamrõja kêp mẽ hkõm xà maati na. Jakamã na htem inhĩ hkwÿ hkrẽ nẽ ixkamrõ hkwÿ ho ixkõ nẽ ra kêp wa ixri mẽ htír tũm nẽ mẽ pa ho mẽ pa mã xwÿnh. 56Jakamã kot ka mẽ atõ inhĩ hkwÿ hkrẽ nẽ ixkamrõ hkwÿ ho ixkõ. Hãmri pa amnhĩ tã apumu nẽ akarõ mã axà ka te apê pa pyràk o amnhĩ nhĩpêx o apa. 57Inhĩpêêxà kot mẽ awÿr inhmênh xwÿnhhta kukwak ri na pa hte ixtír tũm nẽ ixpa ho ixpa. Tã ja pyrã nẽ kot kaj mẽ inhĩ hkwÿ hkrẽ hãmri nẽ ixkukwak ri wa ixri atír tũm nẽ apa ho apa mã xwÿnh.

58—Jakamã na pa ã mẽ amã ixpê kaxkwa rũm mẽ axàpkur xà maati hã amnhĩ jarênh anẽ. Amnepêm mẽ panhīgêjtjaja na pre htem kapôt ã mẽõta kur o pa hãmri nẽ gaa nẽ hpigêť nẽ htyk pa. No kêt pa koja mẽ inhĩ hkwÿ hkrẽ hãmri nẽ mẽ kurom wa ixri htír tũm nẽ mex nẽ pa ho pa. Anẽ.

59Nhũm pre ã Jejus mẽ kãm amnhĩ jarênh anẽ. Kormã Kapanau kamã Tĩrtũm kapër o mẽ ahkre xà hã ixkre kamã ã mẽ ahkre anhÿr o xa.

Mê ohtô nê mê kot Jejus kaga hã mê harênh

Sikûn Korîť 3.6; Sikûn Pêtre 3.16

60Hãmri nhùm mê kot Jejus kôt mar o mê pa xwÿnhjaja ohtô nê ã kapêr anhÿrja ma nê tee ri amnhĩ kukamã hamaxpêr nê hã axpên mã:

—Tk. Kwa pêr kapêrja ãm ri katii. Mêhõ koja we kuma nê hkôt hamaxpêr nê hkamrô nê ĩ kur o ri hkôt pa? Nà mê piitã mê kãm ja mexti hã. Anê.

61Hãmri nhùm amnhĩ tã mê kuma nê mê kãm:

—Kwa xà ixkapêrja mê apê omnuj? 62Nà kot paj nhÿrmã ma akupÿm kaxkwa hwÿr api. Ixpê Tirtûm kot mê akaxyw ixãm xwÿnh ã ma akupÿm hwÿr api. Hãmri ka mê ã ixte amnhĩ nhĩpêx anhÿr ã ixpumu nê rĩ kormã ixkôt amnhĩ xunhwÿr japêr. 63Na htem mêmoj kur kukwak ri kêp Tirtûm mê wa ixri htĩr tûm nê pa ho pa xwÿnh kêt nê. Rÿ amnhĩ krã hkôt tanhmã amnhĩ nhĩpêx to ho kêp wa ixri htĩr tûm nê pa ho pa mã xwÿnh kêt nê. Tirtûm mê wa Ixkarõ tãm na hte mê hkarõ mã agjê nê mê ho Tirtûm wa ixkuri mê htĩr tûm nê mê pa ho mê pa mã xwÿnh. Tã ÿ hã na pa ã mê amã ixkapêr anê. Nom mê amã amnhĩ tã kuxi nê amnhĩ jarê. Tã kot kaj mê ixkapêr ma nê ixkôt amnhĩ nhĩpêx. Hã kot kaj mê nhÿrmã wa ixri atĩr tûm nê amex nê apa ho apa. 64-65No mê akwÿjjaja na ka mê ixkapêr ma nê ãm ama nê ixkôt ajamaxpêr kêt nê. Jakamã na pa ã mê amã ixkapêr anê nê mê amã: “Koja Inhĩpêxàja tanhmã mê akrã hto ka mê rĩ kormã amnhĩ tã ixpumu nê amnhĩ kaxyw ixkôt ajamaxpêr.” Anhÿr o mê amã ixkapêr. Anê.

Nhùm ã Jejus mê kãm kapêr anê. Ra kot mê hkukamã mê omunh mex. Ra kot amnhĩ kaxyw mê kot hkôt hamaxpêr mã xwÿnhjê pumunh nê mãânên mê kamã kot mēõ pahi nhĩhkram haxàr mã xwÿnhja nhùm mãânên ra kot amnhĩ kukamã omunh mex. Jakamã nhùm ã mê kãm kapêr anê. 66Hãmri nhùm mê kot hkôt kapêr mar o mê pa xwÿnh kwÿjjaja tee ri kuma hãmri nê hkaga nê axte hkôt pa hkêt nê. 67Hãmri nhùm tee ri mê kot hkaga nê ma mê mrar ã mê omu nê mê ixpê hkôt ixpa ho ixpa xwÿnh pê 12jê mã kapêr nê mê inhmã:

—Pa? No mê kajaja. Xà kot kaj mê uràk nê ixkaga nê ma akupÿm mra nà? Anê.

68Hãmri nhùm Simãw Pêtre kãm:

—Nà kot paj mê akaga hkêt nê. Kapxipix na htem amnhĩ kaxyw akôt hamaxpêr jao kêp Tirtûm mê war akuri htĩr tûm nê pa ho pa mã xwÿnh. 69Ka na pre Tirtûm mê ixwÿr amê. Jakamã na pa mê amnhĩ kaxyw akôt ijamaxpêr o ri ixpa. Nà kot paj mê aa akaga hkêt nê. Anê.

70Hãmri nhùm kuma nê kãm:

—Nà ixte amnhĩ kaxyw mê apê 12jê rênh tã na ka mê atõ akwÿjê hkĩnhã axtem nê Satanasti hkôt amnhĩ xãm. Anê.

71Nhũm pre ã finat Jut Kariot kot mẽ inhõ pahijê nhĩhkram haxàrja kukamã mẽ inhmã harênh anê. Mẽ inhĩ õ na pre. Nê kêp Simãw Kariot kra na pre. Tã ra kot mẽ ãhkram haxàr kaxyw nhũm Jejus kot amnhĩ kukamã omunh jakamã ã mẽ inhmã harênh anê.

Jejus tøjaja kot mẽ hkĩnh wỳr amnhĩ kôt hwỳr ã mẽ harênh

Matêwre 10.36, 13.57-58

7 1Tã nhũm Jejus arĩ Garirej kamã ri pa nê kormã akupỹm Jutej wỳr mõi kêt nê. Jutej kamã Ijaew nhõ pahijaja ra kot hã àmnênh nhũm mẽ kot hpĩr ã harênh jakamã nhũm mẽ umaj kormã hwỳr mõi kêt nê.

2Tã mẽ ixpê Ijaew mẽ ixte ixkre hkryre nhĩpêx nê hã ixkĩnh ã arĩgroja ra ahtêp o mõi. Mẽ ixkĩnhã ã na pa pre htem ixpiitã Jutej wỳr axpên wỳr akuprõ nê ahpỹnhã ri amnhĩm ixkre hkryre nhĩpêx nê kamã ixkrĩ.

3Jakamã nhũm Jejus tøjaja hwỳr mra nê kãm nojarêt nê amnhĩ kôt kuwỳ nê kãm:

—E kwa tokyx pu mẽ pahkwỳjê hkôt. Ka mẽ kãm aa mẽ kot mẽmoj pumunh kêt kwỳ ho anhỹr o ri mẽ hkôt apa kê mẽ kãm akapêr mar prãm xwỳnhjaja ja hã apumu. 4Na ka hte jar te apimxur pyræk o amnhĩ nhĩpêx. E kwa tokyx ma pu mẽ hkôt. Anê.

5Katorxà hkôt mẽ kêp Jejus tõi htã kormã amnhĩ kaxyw hkôt hamaxpêr kêt jakamã na prem ã kãm kapêr anê. 6Hãmri nhũm mẽ kãm:

—Nà kormã. Kormã ixte mẽ kãm amnhĩ to amnhĩrĩt xà hã arĩgro kormã kator kêt. Jakamã kot ka mẽ amã mẽ hkôt amrar prãm nê mãmri ma mẽ hkôt mra. 7Koja mẽ apumu nê kãm mẽ akurê hkêt nê. Nê mẽ akamã gryk kêt ka mẽ ri tanhmã amnhĩ nhĩpêx to ho mẽ hkôt apa. No pa kot paj mẽ hwỳr mõi nê mẽ kãm mẽ kot amnhĩ tomnuj o pa hã mẽ harênh o ri mẽ hkôt ixpa nhũm mẽ tee ri amnhĩ tã inhma nê ixkamã gryk nê. 8Jakamã mẽ mãmri ma mẽ hkôt mõi. Kot paj kormã. Kormã ixte mẽ kãm amnhĩ to amnhĩrĩt xà hã arĩgroja kormã kator kêt.

9Anê nhũm mẽ tee ri kuma hãmri nê kure nê ma mẽ hkwyjê hkôt Jutej wỳr mõi. Nhũm Jejus kormã Garirej kamã ri pa hã apkati grêre. 10Hãmri nê kormã ma hapu hã mẽ hkôt mõi. Pa mẽ hkôt ri ixpa ho ixpa xwỳnhjaja ma hkôt ixpa.

Mẽ kot ahpỹnhã tanhmã Jejus jarênh to hã mẽ harênh

Juãw 7.37-44, 9.22, 10.19-21, 12.42-43

11Rôm nhũm ra mẽ ixpê Ijaew nhõ pahijaja mẽ hkĩnhja kamã mẽ pikuprõnh xwỳnhjê kaêx ã Jejus japêr o ri mra. Nê hã axpên kukjêr o mra nê axpên mã:

—Kwa nok? Nhỹri mãn we? Anê.

12Nhũm Ijaew piitã tanhmã axpên mã Jejus jarênh to ho pa. Nê kamã mẽ hkwyjaja harênh o:

—Nà kot amnhĩ to mex o pa xwỳnh na.

Anhỹr o harēnh o pa. Nē kamā mẽ hkwỳjaja axtem nē harē nē harēnh o:

—Tk. Kot mẽ no kupyw o pa xwỳnh kēnã. Anē.

13Nom mẽ õ pahi pymaj mẽ piitã mẽ nom tanhmã harēnh to hkêt nē. ãm axpēn mã pix mã tanhmã harēnh to ho pa.

Jejus kot mẽ hkĩnh xwỳnhjê jahkre hã harēnh

Matêwre 3.53-58; Makre 3.22; Juãw 5.16

14Tã pa mẽ mẽ hwỳr pøj. Jejus mẽ pa mẽ hkôt ixpa ho ixpa xwỳnhjaja mẽ hwỳr pøj. Kormã mẽ hkĩnhja hapêx kêt ri. Hãmri pa mẽ Jejus kôt Tĩrtũm mã amnhĩ jarēnh xà hã ixkreja wỳr mra nē agjê nhũm Jejus mẽ ahkre ho nhỹ. 15Hãmri nhũm mẽ inhõ pahijaja tee ri kot tanhmã mẽ ahkre hto hã kuma nē hã axpēn kukja nē axpēn mã:

—Kwa mẽ pahkĩnhã kot Tĩrtũm kapēr o istuda hkêt tã ã mẽ ahkre anē. Anē.

16Hãmri nhũm amnhĩ tã mẽ kuma nē mẽ kãm:

—Nà na pa hte amnhĩ krã hkôt tanhmã ri mẽ ajahkre hto hkêt nē. ãm kot mẽ awỳr inhmēnh xwỳnhnta nhỹ hã na pa hte ã mẽ ajahkre anhỹr o ri mẽ akôt ixpa. 17Tã kot kaj mẽ amã Tĩrtũm kãm hprãm xà hkôt amnhĩ nhĩpêx prãm hã kot kaj mẽ ixte y hã ixkapēr ã ixpumunh kurê kumrêx. 18Amnhĩ krã hkôt mẽ kãm kapēr o ri mẽ pa xwỳnhjaja na htem mẽ kot mẽ mar nē mẽ hã hpijaàm pix kaxyw tanhmã mẽ kãm kapēr to ho ri pa. No kêt pa na mẽ ate ixkapēr mar nē kot mẽ awỳr inhmēnh xwỳnhnta ã apijaàm pix kaxyw na pa hte tanhmã mẽ amã ixkapēr to ho ri ixpa. Jakamã ãm hãmri na pa hte mẽ amã ixkapēr o ri ixpa.

19—Finat Mojes na pre mẽ panhĩgêtjaja kot tanhmã amnhĩ nhĩpêx to ho pa nhũm Tĩrtũm kot mẽ kãm hã karõ jarēnh o ri mẽ hkôt pa htã ka mẽ hkôt amnhĩ nhĩpêx kêt nē. Tã ixte hkôt amnhĩ nhĩpêx kêt ã ixto axêx nē mẽ ate ixpĩr kaxyw ixtã amnhĩ jarēnh ri apa. Anē.

20Hãmri nhũm mẽ ã Jejus kot mẽ kãm kapēr anhỹrja ma nē hêx rom kãm:

—Kwa mẽ ixtõ na pa apĩr mã ka ri ã mẽ ijarēnh anē? Amrakati kēnã. Kwa mãn ka akrã xpã nà? Hã na ka ã ri akapēr anē. Anē.

21Hãmri nhũm mẽ kãm:

—Nà ixte mẽ pahkôt xà hã arĩgro hã akupỳm mēhõ myta ho mex jakamã na ka prem ja hã ixpumu nhũm ja mẽ apê omnuj nē. Nē te ixte mẽ pahkôt xà hã arĩgro hã ixpijaàm kêt xwỳnh pyrak ã ijarē.

22Nom na ka htem ixpyrà nē mẽ panhõ arĩgromnu hã mẽmoj tã axapēnh o ri apa. E pa mẽ amã mẽmoj jarē ka mẽ inhma. Na pre finat Mojes mẽ pamã mẽ pahte mẽ pahkra myre pê my kwryt kã jakar ã mẽ pamã karõ. Kukamã higêtjaja kot kãm ja hã karõ xà hkôt. Jakamã na

htem mẽ hkra myre hapôj nẽ hã semãn pyxi nẽ hapêx nhũm mẽ kêp mẽmy hkwrýt kà jakà. **23**Mẽ pahkôt xà hã arĩgro hã hõ kator tãã nhũm mẽ hã semãn pyxi nẽ mẽ panhõ arĩgromnu hõ hã kêp my kwrýt kà hkwy krãhta. Mojes kot Tĩrtũm nhỹ hã ja hã mẽ pamã karõ xà hkôt. Jao mẽ panhõ arĩgromnu hã apê. Tã pa pre mẽ apyrà nẽ arĩgromnu hã ixàpênh pê akupỹm mẽhõ myta ho mex ka mẽ ja hã ixpumu nẽ axtem nẽ ixtỳx ri ixte amnhĩ nhĩpêx o ixpa xwỳnh ã ijarẽ nẽ mẽ ate ixpĩr kaxyw ã amnhĩ jarẽ. **24**Kwa mẽ amnhĩ krã hkôt tanhmã mẽ harênh to ho ri apa hkêt nẽ. ãm mẽ kot tanhmã amnhĩ nhĩpêx to ho pa hã mẽ omu nẽ ajamaxpêr o: “Kwa xà we Tĩrtũm kãm ja mex nà?” Anhỹr o mãn kêt mẽ ajamaxpêr nẽ rĩ kormã tanhmã mẽ harênh to. Anẽ.

25Hãmri nhũm Jerujarẽ nhõ xwỳnh kwỳjaja ja hã kuma nẽ tee ri hkukamã hamaxpêr. Hãmri nẽ hã axpên kukja nẽ axpên mã:

—Kwa xà tãm na mẽ panhõ pahijaja mẽ kot hpĩr kaxyw hã amỹnê? **26**Ota jar mẽ pakamã ri pa htã nhũm mẽ ãm omu nẽ kãm tanhmã nẽ hkêt nẽ. Mãn mẽ ãm hãmri kêp Kris ã hkamnhĩx jakamã kapêr ma nẽ ãm kuma nẽ kêp Kris ã tanhmã ho hkêt nẽ. Anẽ.

27Hãmri nhũm mẽhõja kuma nẽ kãm:

—Tk. Nà kêp Tĩrtũm kot mẽ pahwỳr mẽnh xwỳnhre hã. Kêp Najare nhõ xwỳnh kênã. Mẽ pahte hipêêxà mẽ katorxà wa omunh mex. No kêt Tĩrtũm kot mẽ pahwỳr mẽnh mã xwỳnhhta koja xep mẽ pahwỳr kato pu mẽ nhỹhỹnh htẽm xà hkôt omunh kêt nẽ. Anẽ.

28Rôm nhũm Jejus arĩ Tĩrtũm mã amnhĩ jarênh xà hã ixkreja kamã mẽ ahkre ho nhỹ. Jakamã mẽ kot axpên mã harênh ã amnhĩ tã mẽ kuma nẽ mẽ kãm:

—Xà mẽ ate aprĩ hã ixpumunh nẽ nhỹhỹnh ixtẽm xà hkôt ixpumunh? Nà mẽ ate ja hã ixpumunh kêt. Na pa pre amnhĩ hkrã hkôt mẽ awỳr inhmõr kêt nẽ. Na pre mẽhõ mẽ awỳr inhmẽ. Nom kot mẽ awỳr inhmẽnh xwỳnhja kormã mẽ ate omunh kêt. **29**ãm papxipix na ixte omunh. Kurũm ixwrỳk xwỳnh na pa. Kot mẽ awỳr inhmẽnh nhũm kurũm ixwrỳk jakamã ixte ixprĩ hã omunh par. Anẽ.

30Hãmri nhũm mẽ hkwỳjaja tee ri ã kot amnhĩ jarênh anhỹrja ma nẽ ri axpên mã harênh o:

—Kwa Tĩrtũm kot mẽ pahwỳr mẽnh ã kot amnhĩ to hêx kênã. E kwa pu mẽ ã kot amnhĩ to hêx anhỹr ja ã unẽ nẽ haxà nà?

Anhỹr o axpên mã hã amỹnê. Nom kormã mẽ kot unênh nẽ haxà xà hã arĩgroja kormã kator kêt jakamã nhũm Tĩrtũmja nẽ mẽ omunh mex nẽ nhũm mẽ ãm kãm unênh prãm kaprỳ. **31**No nhũm mẽ hkwỳja mẽ kurom kuma nẽ kêp Tĩrtũm kot mẽ pakaxyw ãm xwỳnh ã omunh kurê kumrêx nẽ amnhĩ kaxyw hkôt hamaxpêr. Hãmri nẽ axpên mã harênh o:

—Kwa mǎn kĕp Tĩrtũm kot mĕ pahwỳr mĕnh mǎ xwỳnhhta mǎn nà? Mĕ pahťo kot pu uràk nĕ aa mĕ kǎm mĕ kot mĕmoj pumunh kĕt o anhỳr rax o ri papa? Amrakati kumrĕx. Nà pĕr tǎm kĕnǎ. Anĕ.

Pōristi hkwỳ kot Jejus pynĕnh kaxyw ǎ mĕ harĕnh

32Nhũm prem ǎ axpĕn mǎ Jejus jarĕnh anhỳr o kuhĕ hǎmri nhũm Parijew nhō xwỳnhjaja hǎ mĕ kuma. Hǎmri nĕ patre krǎhtũmjĕ mĕ mĕ ma Jejus wỳr mĕō pōristi hkwỳ rĕ nĕ mĕ kǎm:

—E mĕ ma Jejus wỳr mra nĕ unĕ nĕ man akupỳn o tĕ. Anĕ.

33Hǎmri nhũm mĕ kuma nĕ ma hwỳr mra nĕ omu nom tokyx unĕnh kĕt nĕ. Kormǎ kapĕr ǎ mar o kuhĕ. Nhũm Jejus arĩ mĕ kǎm kapĕr o xa nĕ mĕ kǎm:

—Nà kot paj jar mĕ akōt ri ixpa hǎ mytwrỳ grĕre hǎmri nĕ ma akupỳm kot mĕ awỳr inhmĕnh xwỳnhhta wỳr api. 34Ka mĕ tee ri jar ijapĕr o ri apa nom nhỳri ixpumunh kĕt nĕ. Nĕ ma inhmōr xàta wỳr kot kaj mĕ atō ma ixkōt amōr kĕt nĕ. Anĕ.

35Hǎmri nhũm mĕ tee ri ǎ kot amnhĩ jarĕnh anhỳrja ma nĕ axpĕn mǎ:

—Kwa nhỳhỹm koja we ma mō pu mĕ hkōt papa hkĕt nĕ? Mǎn mĕ pahkwỳjaja kot Gresjĕ kamǎ mĕ pa xwỳnhjĕ hwỳr koja ma mō nĕ hpǎnhǎ mĕ hkōt mĕ ahkre ho pa nà? Hǎ na ǎ mĕ pamǎ amnhĩ jarĕnh anĕ? 36Mo na ri mĕ pahťe tee ri hapĕr o papa hǎ mĕ pajarĕ nĕ mĕ pahťe hkōt pamrar kĕt ǎ mĕ pajarĕ? Anĕ.

Tĩrtũm Karō te kĕp gō nyw pyrǎk ǎ harĕnh

Juãw 4.13-14; Apokarip 22.1, 22.17

37Tǎ nhũm ra mĕ hkĩnhja hapĕx kaxyw hitep xà hǎ arĩgro maatija kato. Jakamǎ nhũm Jejus kǎnhmǎ xa nĕ kỳxpĕ mĕ hpikuprōnh xwỳnhjĕ mǎ kapĕr nĕ mĕ kǎm:

—E te mĕ amǎ kōr o apa pyrǎk xwỳnhjaja. Mĕ amnĕ ixwỳr akuprō. Kot kaj mĕ amnhĩ kaxyw ixkōt ajamxpĕr pa tanhmǎ mĕ ato ka mĕ apĕ Tĩrtũm mĕ wa ixri atĩr tũm nĕ apa ho apa mǎ xwỳnh.

38—Kot kaj mĕ ja hǎ amnhĩ pumu hǎmri nĕ ma mĕ kǎm ixkapĕr jarĕnh o ri mĕ hkōt apa. Te mĕ kǎm kōr nhũm mĕ ate mĕ kǎm gō hkwỳ nhũm mĕ kot ho hkōm pyrǎk o mĕ hipĕx o ri mĕ hkōt apa. Hǎmri nhũm mĕ ama nĕ mĕ apyrǎ nĕ amnhĩ kaxyw ixkōt hamxpĕr. Pa ixte tanhmǎ mĕ atoja pyrǎ nĕ tanhmǎ mĕ ho nhũm mĕ apyrǎ nĕ kĕp wa ixri htĩr tũm nĕ pa ho pa mǎ xwỳnh. Anĕ.

39Nhũm pre ǎ Jejus mĕ kǎm kapĕr anĕ. No ǎm hǎ kuxi nĕ mĕ kǎm kapĕr nĕ hprĩ hǎ harĕnh kĕt nĕ. Tĩrtũm Karō kot nhỳrmǎ mĕ kot amnhĩ kaxyw Jejus mǎ hamxpĕr xwỳnhjĕ karō mǎ gjĕjja nhũm ǎ mĕ kǎm hǎ kuxi nĕ harĕnh anĕ. No kormǎ akupỳm kaxkwa hwỳr àpir nĕ mex o mex nĕ hkrĩ hkĕt jakamǎ kormǎ mĕ hwỳr Karō rĕnh kĕt nĕ.

Mě kot ahpÿnhã tanhmã Jejus jarënh to hã mẽ harënh

Juãw 7.11-13, 7.25, 10.19-21

40Hãmri nhũm mẽ kot Jejus mar o hkrĩ xwÿnhjaja ã kapër anhÿrja ã kuma nẽ ahpÿnhã tanhmã harënh to nẽ harënh o:

—Kwa finat Mojes pyrã nẽ kęp Tĩrtũm nhÿ hã kapër jarënh o pa xwÿnh na nã? Anẽ.

41Nhũm kamã mẽ hkwÿjaja mẽ kãm:

—Nà Tĩrtũm kot mẽ pakaxyw ãm xwÿnhnta na. Anẽ.

Nhũm kamã mẽ hkwÿjaja ja hã mẽ kuma nẽ mẽ kãm:

—Tk. Nà kęp Garirej nhõ xwÿnh kënë kot kêt Tĩrtũm mẽ pakaxyw ãm. 42Tĩrtũm kapër ã kagà htũm kot kęp Garirej nhõ xwÿnh ã harënh kêt. Kęp Pahi Tawi hkanrêhã hkagrõt nyw jakamã koja uràk nẽ Jutej kamã krĩ pẽ Perěj kamã kato. Jao koja uràk nẽ kęp Jutej nhõ xwÿnh.

Anhÿr o ri axpën mã harẽ. Mě kot htÿx Jejus pika pẽ Garirej kamã kator ã hkamnhĩx jakamã ã axpën mã harënh anẽ. Nom pika pẽ Jutej kamã na pre kato. Krĩ pẽ Perěj kamã. Tã no nhũm mẽ hkwÿjaja ja hã mar kêt jakamã kęp Tĩrtũm kot mẽ pahwÿr mën timer xwÿnh kêt ã hkamnhĩx.

43Jakamã nhũm mẽ ã ahpÿnhã axpën mã harënh anẽ. 44Nhũm mẽ hkwÿjaja ra kot unënh kaxyw tã tokyx unënh kêt nẽ.

Põristi kot Jejus pynënh kêt ã mẽ harënh

Matêwre 7.28-29

45Tã nhũm patre nhõ pôristijaja. Mě kot Jejus pynënh mã hwÿr mrar tã hãmri ã kapër anhÿrja ã kuma nẽ tee ri hamaxpër nẽ unënh kêt nẽ. Nẽ awjanã nẽ ahte ÿ kamã ma akupÿm patre krãhtũmjê mẽ Parijew nhõ xwÿnhjê hwÿr mra. Hãmri nhũm mẽ omu nẽ mẽ kãm:

—Pa nok? Tanhmã na ka mẽ amnhĩ to nẽ unënh nẽ ho amõr kêt nẽ? Anẽ.

46Hãmri nhũm mẽ kãm:

—Nà na pa mẽ unënh kêt nẽ. Kapër mex kënë. Te kot mẽ pakapër pyrãk kêt jakamã pa mẽ tee ri kapër ã kuma nẽ unënh kêt nẽ. Anẽ.

47Hãmri nhũm Parijew nhõ xwÿnhjaja mẽ kuma nẽ mẽ kãm:

—Tk. Kwa mãn ka mẽ ra mẽ uràk nẽ tanhmã kot amnhĩ to hêx toja ma nẽ hkõt ajamaxpër nã? 48Mě ixpẽ Parijew nhõ xwÿnhjaja nẽ mẽ panhõ pahijaja na pa htem hkõt ijamaxpër kêt nẽ. 49No kêt mẽ kot mar nẽ hkõt hamaxpër xwÿnhntijaja na htem mẽ ixkĩnhã finat Mojes kapër mar kêt nẽ. ãm Jejus kapër pix na htem kuma nẽ hkõt hamaxpër. Mÿrapẽ koja Tĩrtũm tanhmã mẽ homnuj tÿx to nhũm mẽ rĩ amnhĩ pumu. Anẽ.

Nìkotē kot Jejus xyr pê kapēr ã harēnh

Juãw 3.1-21

50Hāmri nhūm Nìkotēja mẽ mar o xa. Mẽ uràk nẽ kêp Parijew nhõ xwỳnh tã na pre ra kamàt õ hã Jejus wỳr tẽ nẽ kãm kapēr. Jakamã tee ri hã mẽ kapēr ma hāmri nẽ yr pê mẽ kãm kapēr nẽ mẽ kãm:

51—Tk. Kwa kormã mẽ pahte pahprĩ hã kapēr mar nẽ tanhmã kot amnhĩ nhĩpêx to hã omunhre hã. Na pre finat Mojesja Tĩrtũm nhỹ hã mẽ panhĩgêjtê mã ja jarēnh o:

Kêr ka mẽ aprĩ hã mẽ kapēr ã mẽ ama nẽ mẽ kot amnhĩ nhĩpêx ã mẽ omu nẽ rĩ kormã tanhmã mẽ harēnh to.

Anhỹr tã ka mẽ kormã aprĩ hã Jejus kot amnhĩ nhĩpêx ã omunh kêt tã ra kot amnhĩ tomnuj xwỳnh ã harê. Anê.

52Hāmri nhūm mẽ tee ri kuma nẽ kãm:

—Tk. Kwa xà we uràk nẽ apê Garirej nhõ xwỳnh hã na ka ã yr pê akapēr anê? Xà Tĩrtũm kapēr ã kagà htũm kot Garirej nhõ xwỳnhjê hõ kêp ỹ hã kapēr jarēnh o pa xwỳnh ã harēnh? Nà ã kot harēnh anhỹr kêt. Anê.

53Nhūm mẽ ã Nìkotē mã kapēr anê hāmri nẽ anhgrà nẽ Tĩrtũm nhõrkwỹ rũm hapòj nẽ ma akupỹm òrkwỹ hwỳr àhkurê ho mra.

Mêhõ ni kot nhãm mẽ mjên o amnhĩkati hã harēnh

Xiakre 2.10-13

8 1Tã nhūm Jejus Tĩrtũm nhõrkwỹ kamã mẽ ahkre hpa hāmri nẽ kato nẽ ma hixêt prêk pê Oriwêhti hwỳr tẽ. Hāmri nẽ hã api nẽ nhỹri nõ nẽ ra gõr.

2Tã nhūm apkati nẽ myt kator o mõi mẽ nhūm kànhmã nhỹ nẽ akupỹm wrỳ nẽ Tĩrtũm mã amnhĩ jarēnh xà hã ixkre hwỳr tẽ. No ãm kormã ixkre pu hã kahê hkre kamã nhỹ. Nhūm krĩ nhõ xwỳnhjaja omu nẽ hã hturax nẽ nhūm tanhmã mẽ ahkre hto ho nhỹ. 3Hāmri nhūm Parijew nhõ xwỳnhjê mẽ Tĩrtũm kapēr tũm o mẽ ahkre ho mẽ pa xwỳnhjaja hwỳr mẽhõ nija o tẽ. Na ra ham mẽhõ pê mjên o amnhĩkati ho nõ nhūm mẽ ja hã omu nẽ unê nẽ hpa hã kupy nẽ ma Jejus wỳr hkjênh o mõi. Hāmri nẽ mẽ kot mar o kuhê xwỳnhjê kutã ãm nhūm xa. 4Hāmri nhūm mẽ Jejus mã:

—E ot pa mẽ awỳr jahti ho tẽ ka omu. Na ham mẽhõ pê mjên o amnhĩkati ho nõ. Pa mẽ ja hã omu nẽ unê nẽ man awỳr o tẽ. 5E tanhmã kot puj mẽ hipêx to? Na pre finat Mojes Tĩrtũm nhỹ hã mẽ panhĩgêjtê mã ja jarēnh o:

Koja mēnijê hõ axtem nẽ nhãm mẽhõ pê mjên o amnhĩkati ho nõ ka mẽ ja hã omu nẽ apiitã ahpỹnhã kên rũnh jamỳ nẽ ho htak o apĩ.

Anhÿr o kot harënh. No ka? Tanhmã kot kaj mẽ inhmã ja jarënh to? Tanhmã kot paj mẽ hipêx to nhũm amã mex nê? E mẽ inhmã tanhmã mẽ ixte hipêx to jarë. Anê.

6Nhũm mẽ ã hêx rom nija ã Jejus kukjêr anê. Kot mẽ kot hpÿr nê mẽ kãm kapêr nhũm mẽ kot hã mar nê mẽ hkrãhtũmjê hwÿr môr nê kãm kot Mojes kapêr kwÿm ri mẽ ahkre hã harënh kaxyw nhũm mẽ hêx rom ã hkukjêr anê. Hãmri nhũm mẽ kuma nê tanhmã hã mẽ kãm nê hkêt nê. ãm htÿx hikôt nê ìhkrakrã ho pyka kagà ho nhÿ. 7Nhũm mẽ tee ri omu nê axte hã hkukja nhũm kãnhmã xa nê mẽ kãm:

— Tôe. Nà kot ka mẽ atõ aa tanhmã amnhĩ tomnuj to hkêt kumrêx ã amnhĩ pumu hãmri nê kam nê rĩ kaxyw kën õ py nê akumrêx ho hkura. Kê akwÿjaja rĩ kormã akôt hkwy jamÿ nê ho htak. Anê.

8Hãmri nê akupÿm hikôt nê pyka kagà ho nhÿ. 9Hãmri nhũm mẽ tee ri kapêrja kôt kuma hãmri nê mẽ kot mar o kuhê xwÿnhjê rũm angrã nê ma mra. Mẽ piitã mẽ kot amnhĩ tomnuj xwÿnh ã amnhĩ pumunh mex jakamã tee ri ã kot mẽ kãm kapêr anhÿrja ma nê angrã nê ma akupÿm hpÿnh nê axpên kôt mrar o xa. Mêhpigêt kumrêx nê hpãnhã mẽ nywjaja nhũm mẽ hpÿnh nê ma axpên kôt mrar o ãm kãm hapêx. Nhũm Jejus mênija pix wa ahte mẽ kot mar xwÿnhjê kutã wa arík. 10Hãmri nhũm Jejus kãnhmã xa nê nita mã kapêr nê kãm:

— Pa? No mẽ kot ato kapêr xwÿnhhta mẽ? Xà na mẽhõ kën o akuranh kêt nê? Anê.

11Nhũm kãm: “Ma amrakati.” Anê nhũm kãm:

— Tôe. Nà kot paj ijaxwÿja tanhmã ato hkêt nê. E mamrĩ ma akupÿm anhõrkwÿ hwÿr tẽ. No ãm kêr ka axte ã amnhĩ nhípêx anhÿr kêt nê. ãm kwarĩ ho kwarĩ. Anê.

Jejus kot hprĩ hã amnhĩ jarënh

Juãw 1.4; Rõmãn 13.12-14; Epes 5.8-14; Wam Tesarõn 5.5-8

12Tã nhũm arĩgro hõ hã nhũm Jejus axte Tĩrtũm nhõrkwÿ hwÿr tẽ nê kamã mẽ ahkre ho nhÿ nê mẽ kãm:

— Nà te ixpê mẽ piitã mẽ õ kanê pyrãk. Na hte kanêja mẽ kãm hirã mex nê nhũm mẽ kamã rĩt mex o pa. Jao kamãt kô kamã ri pa hkêt nê. Ja pyrã nê na pa hte Tĩrtũm kot amnhĩ nhípêx o amnhĩrĩt mex o ri ixpa. Kot ka mẽ atõ amnhĩ kaxyw inhmã ajamaxpêr nê ixkôt amnhĩ xãm hãmri nê tanhmã amnhĩ tomnuj to ho apa hkêt nê. ãm Tĩrtũm kãm hprãm xà kôt pix mã tanhmã ri amnhĩ nhípêx to ho ri apa. Jao te ate kanê hpòk nhĩrã kamã arĩt mex pyrã nê apê wa ixri atĩr tũm nê apa ho apa mã xwÿnh. Anê.

13Hãmri nhũm Parijew nhõ xwÿnhjaja tee ri ã kapêr anhÿr ã kuma nê kãm:

—Tk. Kapxipix na ka ã amnhĩ jarēnh anē. Mēhõ kot ã ate amnhĩ jarēnh anhỹrja kõt kot mē inhmã ajarēnhre hã. Jakamã kot paj mē ama nē ãm ama. Anē.

14Hãmri nhũm mē kãm:

—Nà mēhõ kot ã ijarēnh anhỹr kêt tã no ãm hãmri na pa mē amã amnhĩ jarē. Ixêx kêt. Mē arom ixte nhỹhỹnh ixwryk xà hã amnhĩ pumunh mex. Nē mē arom ma akupỹm nhỹhỹm ixàpir xà hã amnhĩ pumunh mex. Jakamã ãm hãmri na pa ã mē amã amnhĩ jarēnh anē. 15Na ka htem amnhĩ krã hkõt tanhmã ri ijarēnh to. No pa na pa kormã amnhĩ xwar tanhmã mē ajarēnh to hkêt nē. 16Ixte tanhmã mē ajarēnh to ronhỹx pa ãm hãmri mē ajarē. Nhỹx pa ãm papxipix amnhĩ krã hkõt tanhmã mē ajarēnh to hkêt nē. Nhỹx mãänēn Inhĩpêêxà pê kot mē awỹr inhmēnh xwỹnhta inhĩhkõ hã pa wa ãm hãmri axpēn kõt tanhmã mē ajarēnh to. Mē ate amnhĩ to mex ã mē ajarē rỹ mē ate amnhĩ tomnuj ã mē ajarē. 17Tĩrtũm kapēr ã kagà htũm kot ja jarēnh kot:

Koja mēhõ wa hamēxkrut nē tanhmã mēmoj jarēnh to nē ãm axpēn kõt harēnh o htipxi. Hã kot kaj mē wa ama nē ãm hãmri wa kot harēnh kõt ajamaxpēr kurê kumrēx.

18Anhỹr o kot harēnh. Tã pa ã amnhĩ jarēnh anē nhũm Inhĩpêêxà kot mē awỹr inhmēnh xwỹnhta mãänēn ã ijarēnh anē. Wa ixpijakrut tã ã wa ixte axpēn kõt amnhĩ jarēnh anhỹr jakamã kwa mē ixte tanhmã amnhĩ jarēnh toja ma nē ixkõt ajamaxpēr kêt wehe. Anē.

19Nhũm pre ã Jejus mē kãm kapēr anē. Hãmri nhũm mē kuma nē kãm:

—No nhỹri na we anhĩpêêxà ja? Anē.

Hãmri nhũm mē kãm:

—Nà mē ate Inhĩpêêxà pumunhre hã. Mē ate aprĩ hã ixpumunh ronhỹx ka mē mãänēn aprĩ hã Inhĩpêêxà pumunh mex kurê kumrēx. Nom mē ate ixpumunh mex kêt jakamã na ka mē mãänēn omunh mex kêt nē. Anē.

20Nhũm pre ã Jejus mē kãm kapēr anē. Arĩ Tĩrtũm mã amnhĩ jarēnh xà hã ixkreja kamã mē ahkre ho xa. Mē kot kàxpore gjēnh xà kuri mē ahkre ho xa. Nhũm mē kãm hkurê xwỹnhjaja tee ri kot tanhmã mē ahkre htoja ma nē kãm unēnh nē haxàr prãm nē. Nom kormã mē kot ã hipêx anhỹr ã arĩgro kormã kator kêt jakamã nhũm Tĩrtũmja nē mē omunh mex nē nhũm mē ãm kãm unēnh prãm kaprỹ.

21Hãmri nhũm Jejus arĩ mē kãm kapēr o xa nē mē kãm:

—Nà kot paj nhỹrmã mē arũm ixkato nē ma akupỹm api. Ka mē tee ri ijapēr nom nhỹri ixpumunh kêt nē. Hãmri nē mē ate amnhĩ tomnuj o apa rãhã ty nē mē atõ ixwỹr axàpir kêt nē. Anē.

22Hãmri nhũm Ijaew nhõ pahijaja tee ri ã kapēr anhỹrja ã kuma nē axpēn mã hã hpēr o pikēnh o kuhê nē axpēn mã:

—Kwa mǎn ra kot amnhĩ pĩr kaxyw ǎ na ri hkõt mẽ paxàpir kêt ǎ mẽ pajarēnh anē nà? Anē.

23Hāmri nhũm amnhĩ tǎ mẽ kuma nē mẽ kām:

—Nà mẽ kajaja mẽ apê pyka nhõ xwỳnh na ka mẽ. No pa na mẽ arom ixpê kaxkwa nhõ xwỳnh jakamǎ mẽ pajamaxpěr kot axpẽn pyràk kêt. 24Kot kaj mẽ ixpê kaxkwa rũm ixwrỳk xwỳnh ǎ ixpumu nē amnhĩ kaxyw inhmǎ ajamaxpěr nē ixkõt amnhĩ xunhwỳr kêt hǎ kot kaj mẽ ate amnhĩ tomnuj o apa rǎhǎ nhỹrmǎ atyk o mẽ kamjaja Tĩrtũm mǎ amnhĩ pǎnhǎ amnhĩre. Anē.

25Nhũm Jejus ǎ mẽ inhõ pahijê hkukamǎ mẽ kot amnhĩ nhĩpêx jarēnh anē nhũm mẽ tee ri amnhĩ tǎ kuma nē kām:

—Kwa mẽ atõ na ka we ri ǎ mẽ inhmǎ akapěr anē? Anē.

Hāmri nhũm mẽ kām:

—Nà ra ixte mẽ amǎ amnhĩ jarēnh kēnǎ. Xàn ka mẽ kormǎ aprĩ hǎ inhmar kêt nē? 26Kot paj nhỹrmǎ mẽ amǎ mẽ ate amnhĩ tomnuj piitǎ ho amnhĩrĩt pa. Na pa kot mẽ awỳr inhmēnh xwỳnhnta pix xõ ri tanhmǎ mẽ amǎ ixkapěr to ho ri ixpa. ǎm hāmri na hte tanhmǎ mẽmoj jarēnh to. Na hte hêx kêt nē. Anē.

27Nhũm pre ǎ Jejus mẽ kām Hipêêxǎ kot mẽ hwỳr mēnh ǎ harēnh anhỹr tǎ no nhũm mẽ Hipêêxǎ kēp Tĩrtũm ǎ hkõt hamaxpěr kêt nē. 28Jakamǎ nhũm mẽ kām:

—Nà koja mẽ nhỹrmǎ pĩ kahpa hǎ inhõ ka mẽ rĩ kormǎ aprĩ hǎ ixpê Tĩrtũm rũm mẽ awỳr ixwrỳk xwỳnh ǎ ixpumu. Nē ixte amnhĩ krǎ hkõt ixkapěr o ri ixpa hkêt ǎ ixpumu. Nē ǎm Inhĩpêêxǎ xõ ri ixprĩ hǎ ixkapěr o ri ixpa hǎ ixpumu. 29Ixte kām hprǎm xǎ hkõt pix mǎ tanhmǎ ri amnhĩ nhĩpêx to ho ri ixpa jakamǎ na hte ixtǎnopxar mex o ixkõt pa ho pa. Koja aa ixkaga hkêt nē. Anē.

30Hāmri nhũm mẽ hkwỳja kuma nē hkwỳjê rom kapěr kõt hamaxpěr 31nhũm amnhĩ tǎ mẽ omu nē mẽ kām:

—Nà ǎm hāmri na ka mẽ tǎ ixkõt ajamaxpěr. Tǎ kēr ka mẽ ixkõt amnhĩ xunhwỳ nē ixkapěr kõt pix mǎ ri amnhĩ nhĩpêx mex o ri apa. Hāmri pa ja hǎ mẽ apumu nē mẽ apê ixkwỳ kumrêx ǎ mẽ ajarê. 32ǎm hāmri na pa hte ǎ ixkapěr anhỹr o ri ixpa. Tǎ kot kaj mẽ ixkõt ri amnhĩ nhĩpêx o ri apa hāmri nē aprĩ hǎ inhmar tỳx nē. Nom na hte kormǎ mẽmoj kot amnhĩ tǎ mẽ ato htỳx pyràk o mẽ anhĩpêx ka mẽ tee ri amnhĩ krǎ hkõt kām anhũrer prǎm kaprỳ. Tǎ kot kaj mẽ ixkõt amnhĩ xunhwỳ nē ixkõt ri amnhĩ nhĩpêx hāmri nē Tĩrtũm nhỹ hǎ tǎm amnhĩ nhĩpêx. Jao ỹ hǎ ate amnhĩ tomnuj mǎ anhũre. Anē.

33Nhũm pre ǎ Jejus mẽ kām kapěr anē hāmri nhũm mẽ tee ri kuma nē kām:

—Kwa mẽ ixpê mẽ pahpàr krax finat Apraãw kanrêhǎ htàmnhwỳ kēnǎ. Na pre mẽmoj te kot amnhĩ tǎ ho htỳx pyràk o hipêx kêt nē.

Jakamã mẽmo kot we mẽ ixpê hkanrêhã htàmnhwỳjê ho htỳx ka we ri ã mẽ ijarênh anê? Nà amrakati kênã. Tã kwa mon ka ã mẽ ijarênh anê? Anê.

34Hãmri nhũm Jejus hprĩ hã mẽ kãm awjarê nê mẽ kãm:

— Kwa mẽ ixkapêr ma nê amnhĩ krãm haxàr tỳx nê. Nà mẽ kot amnhĩ tomnuj o mẽ pa xwỳnhjaja te mẽ kot amnhĩ tomnuj tãm ri kot amnhĩ tã mẽ ho htỳx pyræk o mẽ hipêx. Jakamã nhũm mẽ urer kêt rãhã nê pa ho pa. Nê ã amnhĩ nhĩpêx anhỹr rãhã ho pa. **35**Jakamã ixkĩnhã mẽ kêp Tĩrtũm kwỳ hkêt. No pa na ixpê Tĩrtũm Kra jakamã mãânên ixpê hkwỳ na pa. **36**Tã mẽ kajaja. Kot kaj mẽ ixpê Tĩrtũm Kra hã ixkôt amnhĩ xunhwỳ hã kot pa tanhmã mẽ ato ka mẽ ixpyrà nê apê wa ixkwỳy. Hãmri nhũm mẽ ate amnhĩ tomnuj te kot mẽ amã urer pyræk o mẽ anhĩpêx ka mẽ ra wa ixkôt amnhĩ nhĩpêx o ri apa. Anê.

Mẽ kêp Tĩrtũm kra hkêt xwỳnhjê jarênh

37Nhũm Jejus arĩ mẽ kãm kapêr nê mẽ kãm:

— Nà ãm hãmri na ka mẽ apê finat Apraãw kanrêhã htàmnhwỳ hã amnhĩ jarê. Nom mẽ apê hkanrêhã htàmnhwỳ htã uræk nê amnhĩ kaxyw Tĩrtũm kôt ajamaxpêr kêt nê. Jakamã na ka htem ixkapêr ma nê ãm ama nê ixkaga. Nê axtem nê ixpĩr mã. Kop apu Apraãw arĩ mẽ akamã pa ronhỹx ã inhĩpêx anhỹr kêt nê. **38**Na pa hte Inhĩpêêxà hkôt pix mã ri amnhĩ nhĩpêx o ri ixpa. No mẽ kajaja axtem nê mẽ ate nhãm mẽ kapêr kôt amnhĩ nhĩpêx jakamã na ka htem ixkĩnhã Inhĩpêêxà hkôt amnhĩ nhĩpêx kêt nê. Anê.

39Hãmri nhũm mẽ tee ri amnhĩ tã kuma nê kãm:

— Tk. Kwa mon ka ã mẽ ijarênh anê? Mẽ ixte Apraãw kôt amnhĩ nhĩpêx o ri ixpa kênã. Anê.

Hãmri nhũm mẽ kãm:

— Nà. Mẽ ate hkôt ri amnhĩ nhĩpêx o apa ronhỹx ka mẽ uræk nê Inhĩpêêxà kapêr kôt amnhĩ nhĩpêx. **40**No na ka mẽ ra axtem nê ixpĩr mã. ãm hãmri na pre Tĩrtũm inhmã awjarê pa ô ri tanhmã mẽ amã mẽmoj jarênh to ho ri ixpa htã ka mẽ ra axtem nê ixpĩr mã. Kwa xà na pre Apraãwja ã mẽ hipêx anhỹr o pa? Nà na pre ã mẽ hipêx anhỹr kêt nê. **41**Mẽ ate hkôt amnhĩ nhĩpêx xwỳnhhta axtem na. Kêp Apraãw kêt. Nê mãânên kêp Tĩrtũm kêt. Anê.

Hãmri nhũm mẽ tee ri kuma nê kãm:

— Tk. Kwa nà ã mẽ ijarênh anhỹr kêt nê. Mẽ ixte Apraãw kôt amnhĩ nhĩpêx xwỳnh kênã. Tã ka ri axtem nê ã mẽ ijarênh anê. Mẽhõ hkôt kot pa kêt wem ri axtem amnhĩ nhĩpêx o ri ixpa? Anê.

42Hãmri nhũm mẽ kãm:

— Nà mẽ ate Apraãw kôt amnhĩ nhĩpêx ronhỹx ka mẽ ixpumu nê uræk nê amã ixprãm nê. Apraãw kot hkôt amnhĩ nhĩpêx o pa xwỳnhhta

tãm kot mẽ awÿr inhmẽnh nhũm mẽ awÿr ixwrÿk kênã. Na pa pre amnhĩ krã hkôt man mẽ awÿr ixwrÿk kêt nẽ. Tãm na pre mẽ awÿr inhmẽ pa wrÿ. 43Kwa mon ka mẽ aprĩ hã ixkapër mar mex kêt nẽ? Nã mẽ amã ixkôt amnhĩ nhĩpêx prãm kêt jakamã na ka mẽ tee ri ixkapër ma nẽ aprĩ hã mar mex kêt nẽ. 44Mẽ ate hkôt amnhĩ nhĩpêx xwÿnhhta Satanasti na. Aa tãm kot amnhĩ nhĩpêx kêt kumrêx. Kêp mẽ hpar o pa xwÿnhjê hpãm maati na. Nẽ kêp mẽ kãm hêx o pa xwÿnhjê pãm maati na. Á kot amnhĩ nhĩpêx kot anhÿr. Nẽ kãm mẽ kapër mex mar prãm kêt o pa. Nẽ ãm hêx pix o pa jakamã kêp mẽ hêx xwÿnhjê pãm. Á kot amnhĩ nhĩpêx anhÿr xwÿnh tã ka htem hkôt amnhĩ nhĩpêx o ri apa.

45—Na pa hte kurom ãm hãmri ixkapër o ri ixpa. No mẽ kajaja mẽ apê hêx nhi xwÿnh maati ja hkra jakamã mẽ amã ixkapër mar prãm kêt. 46Xà na ka pre mẽ atõ ixte tanhmã amnhĩ tomnuj to hã ixpumu? Nã amrakati. Ixte amnhĩ to mex o ri ixpa xwÿnh na pa. Nẽ tãm ixkapër o ri ixpa xwÿnh tã ka mẽ inhma nẽ ãm inhma nẽ ixkôt ajamaxpër kêt nẽ. Kwa mon ka mẽ ja hã ixpumunh nẽ ixkôt ajamaxpër nẽ ixkôt amnhĩ xunhwÿr kêt nẽ? 47Tirtũm krajaja na htem kapër mar tÿx nẽ hkôt amnhĩ nhĩpêx o pa. No mẽ apê hkra hkêt jakamã mẽ amã kapër mar prãm kêt. Anẽ.

Mẽ kot Jejus kêp Satanasti hkwy hã harẽnh

48Hãmri nhũm mẽ ã Jejus kot mẽ harẽnh anhÿrja ma nẽ kamã gryk tÿx kumrêx. Hãmri nẽ kãm:

—Tk. Kwa ate amnhĩ tomnuj o apa xwÿnhhti kênã. Ra Satanasti hkwy pê mẽkarõmnuti tanhmã kot akrã hto jakamã na ka ã mẽ inhmã akapër anẽ. Anẽ.

49Hãmri nhũm mẽ kãm:

—Nã mẽkarõmnuti kot tanhmã ixto hkêt. Na pa hte Inhĩpêxã hã xpijaàm pix o ri ixpa. Tã mẽ ate ixkĩnhã hã apijaàm kêt jakamã mããnen pa ixtã apijaàm kêt nẽ. 50Na pa hte amnhĩ krã hkôt mẽ piitã mẽ kot ixtã hpijaàm prãm xaj tanhmã mẽ kãm ixkapër to hkêt nẽ. No mẽ piitã mẽ kot ixtã hpijaàm o paja na Inhĩpêxã kãm hprãm. Tã koja nhÿrmã amnhĩ nẽ ixtã mẽ hpijaàm kêt xwÿnhjaja mẽ kot amnhĩ xà htÿx kamã hamak tũm xàta wÿr mẽ rẽnh pa.

51—Nẽ kot ka mẽ atõ wa ixkapër ma nẽ ixkôt amnhĩ nhĩpêx. Hã kot kaj wa ixri atĩr tũm nẽ apa ho apa. Kwa mẽ ixkapër ma nẽ amnhĩ krãm haxàr tÿx nẽ. Anẽ.

Nhũm pre ã Jejus Ijaew nhõ pahijê mã kapër anẽ. 52Nhũm mẽ kuma nẽ kãm:

—Kwa pẽr ãm hãmri na ka hte Satanasti nhÿ hã ã mẽ htĩr tũm nẽ mẽ pa ho pa hã mẽ harẽnh anhÿr o ri axêx o ri apa. Finat Apraãw na pre ri paa nẽ ty. Tã mẽ kot Tirtũm nhÿ hã kapër jarẽnh o mẽ pa xwÿnhjaja na

prem uràk nê ri paa nê mãânên htyk pa. Tã ka axtem nê mẽ kot akapêr kôt amnhĩ nhĩpêx o mẽ pa xwỳnhjaja ari htĩr tũm nê pa ho pa hã mẽ harê. Nà na ka ãm mẽ inhmã mẽ ho axêx o xa. ⁵³Na pre mẽ pahpãm Apraãwja kot amnhĩ to rax tã ty nê hapêx. Nhũm mẽ kot Tĩrtũm nhỹ hã kapêr jarênh xwỳnhjaja mãânên mẽ kot amnhĩ to rũnh tã htyk pa nê hapêx. Mẽ kot amnhĩ to rũnh tã htyk pa nê hapêx kênã kot kêt mẽ tanhmã amnhĩ to nê ari htĩr tũm nê pa. ãm mẽ ixte akapêr mar nê atã ixpijaàm pix prãm xàj na ka ã mẽ inhmã mẽ htĩr tũm nê pa hã mẽ harênh anê. Nom na ka ã mẽ harênh anhỹr kaprỳ. Kot paj mẽ ri akapêr mar kêt nê. Anê.

⁵⁴Hãmri nhũm mẽ kuma nê mẽ kãm:

—Nà na pa hte amnhĩ krã hkôt mẽ ate ixtã apijaàm hprãm xàj tanhmã mẽ amã ixkapêr to hkêt nê. Kot paj anê nê ãm ixtỳx ã amnhĩ nhĩpêx anhỹr kaprỳ. No Inhĩpêêxà tãm kãm mẽ apiitã mẽ ate ixtã apijaàm o apaja nhũm kãm hprãm. Mẽ ate Tĩrtũm kôt amnhĩ nhĩpêx o apa hã amnhĩ to axêx xwỳnhhta tãm na kãm mẽ ate ixtã apijaàmja nhũm kãm hprãm. Tã ka htem ã amnhĩ nhĩpêx anhỹr kêt nê. Na ka htem ixkuk pumu nê axtem nê ixte Satanasti nhỹ hã mẽ amã ixêx o ri ixpa hã ijarê. ⁵⁵Mẽ ate Inhĩpêêxà hkôt amnhĩ nhĩpêx ã amnhĩ jarênh tã ãm amnhĩ to axêx o ri apa. No pa na pa hte mẽ arom ãm hãmri hkôt amnhĩ nhĩpêx mex o ri ixpa. ⁵⁶Amnepêm mẽ pahpàr krax Apraãwja na pre mẽ awỳr ixwrỳk kukamã ijarênh ma nê mẽ arom inhỹ hã hkĩnh tỳx nê pa. Anê.

Nhũm pre ã Jejus mẽ kãm amnhĩ jarênh anê. ⁵⁷Hãmri nhũm mẽ kuma nê tee ri kot mẽ kãm tanhmã Apraãw jarênh toja ma nê kãm:

—Tk. Xà na ka pre finat Apraãwja ano ho omu? Nà kormã anyw kênã. Apraãw amnepêm htyk nê hapêx kênã kot ka kêt kot akukamã ajarênh mar nê hkĩnh tỳx ã harê. Xàn ka pre ano ho omu? Kormã akator kêt ri na pre amnepêm htyk nhũm mẽ haxàr kênã. Nà na ka ãm mẽ inhmã amnhĩ to axêx. Te amnepêm mẽ hkukamã apa nê ate mẽ omunh nê mẽ harênh pyræk. Kwa akatàt kôt mẽ inhmã awjarê. Anê.

Jejus kêp rãhã ho rãhã xwỳnh ã harênh

⁵⁸Hãmri nhũm Jejus mẽ kãm:

—Nà ixêx kêt. ãm hãmri na pa ã mẽ amã amnhĩ jarênh anê. Amnepêm kormã Apraãw kator kêt ri na pa pre ixrãhã ho ixrãhã ixpa na pa. Ixrãhã ho ixrãhã ixpa xwỳnh jakamã na pa pre hte inhno ho Apraãw pumunh mex o ri ixpa. Kwa mẽ ixkapêr ma nê amnhĩ krã him haxàr tỳx nê. Anê.

⁵⁹Hãmri nhũm mẽ tee ri kot ã amnhĩ jarênh anhỹrja ã kuma nê kamã gryk tỳx nê. Nê axpên mã:

—Kwa tanhmã kot we amnhĩ to nê amnepêm rãhã nê pa ho pa xwỳnh ã amnhĩ jarê? Tĩrtũm pix na rãhã ho rãhã pa xwỳnh. Anê.

Hãmri nẽ kamã gryk xàj kẽn rũnh kwỳ kawrà ho ri hprõt nẽ kot ho htak o hpĩr kaxyw. Nom nhũm ra amnhĩ tã mẽ omu nẽ mẽ kęp akunok nẽ Tĩrtũm mã amnhĩ jarẽnh xà hã ixkreja rũm kato nẽ ma tẽ.

Jejus kot no hkre xwỳnh o mex ã harẽnh

Makre 8.22-26

9 ¹Hãmri nhũm Jejus ma tẽ pa mẽ hkõt ri mẽ ixpa ho mẽ ixpa xwỳnhjaja ma hkõt mra. Hãmri nẽ nhỹri no hkre xwỳnh pumu. Katorxà nhõxà hkre rũm na pre no hkre nẽ kato. Hãmri nẽ ra hprêk nẽ hpri kamã àhwỳr o hkrĩ. ²Tã hãmri pa mẽ mra nẽ omu nẽ hã Jejus kukja nẽ kãm:

—Kwa mẽmoj mỳrapê na pre we myti něj no hkre nẽ kato? Xà tãm kot tanhmã amnhĩ tomnuj to mỳrapê nà? Xà katorxà rỳ hipêêxà kot amnhĩ tomnuj mỳrapê na pre ã no hkre nẽ kator anẽ? Anẽ.

³Hãmri nhũm mẽ inhmã:

—Nà mẽhõ kot tanhmã amnhĩ tomnuj to mỳrapê no hkre nẽ kator kêt. ãm Tĩrtũm kot ho mex nhũm mẽ kot ja hã omunh kaxyw na pre ã no hkren kator anẽ. Tã kot paj Tĩrtũm nhỹ hã no ho mex ka mẽ ja hã ixpumu. Na pa hte kormã jar pikap ri ixpa ri Tĩrtũm mã tanhmã amnhĩ nhĩpêx mex to ho ri ixpa. ⁴Na htem arĩgro hã mẽmoj tã apê nhũm kamàt nhũm mẽ kãm ure nẽ àpênh kêt nẽ. Ja pyrà nẽ na pu htem kormã pahĩr ri jar pikap ri papa ri Tĩrtũm mã tanhmã amnhĩ nhĩpêx to ho ri papa. Tã kot puj mẽ nhỹrmã ty hãmri nẽ axte jar ã amnhĩ nhĩpêx anhỹr kêt nẽ. Jakamã kwa kêr pu mẽ ri jar pikap ri papa ri kãm tanhmã amnhĩ nhĩpêx mex to ho ri papa. ⁵Na pa hte ã kãm amnhĩ nhĩpêx anhỹr jao te kanê hirã mex pyrà nẽ ixprĩ hã mẽ kãm Tĩrtũm kot amnhĩ nhĩpêx o amnhĩrĩt mex o ri ixpa. Anẽ.

⁶Nhũm pre ã Jejus mẽ inhmã amnhĩ jarẽnh anẽ. Hãmri nẽ kot nohkre xwỳnhhta no o mex kaxyw hikõt nẽ argõx mẽ nẽ ho gyw kwỳ nhĩpêx nẽ kãnhmã xa nẽ ho no kukõ. ⁷Hãmri nẽ kãm:

—E ma gõ gjênh xà pê Siroe hwỳr tẽ nẽ kamã amnhĩ no kuhõ. Anẽ.

Mẽ pakapêr kãm Siroeja mẽ kot kãm: “Nhỹhỹm mẽnh xwỳnh” anhỹr jarẽnh pyræk. Tã nhũm Jejus hwỳr kumẽ nhũm ma hwỳr tẽ. Hãmri nẽ kamã amnhĩ no hã gyw kuhõnh pa jao rĩt mex kurê kumrêx. Hãmri nẽ rĩt mex ã amnhĩ pumu nẽ hkĩnh tỳx nẽ ma akupỹm òrkwỹ hwỳr tẽ. ⁸Hãmri nhũm òrkwỹ kuri mẽ òrkwỹ xwỳnhjaja nẽ mẽ kot pry kamã ahwỳr o hkrĩ hã omunh xwỳnhjaja amnhĩ jaêr pê ra rĩt mex ã omu nẽ tee ri hã axpẽn kukja nẽ axpẽn mã:

—Kwa pêr pry kamã àhwỳr o hkrĩ xwỳnhhta na nà? Anẽ.

⁹Hãmri nhũm kamã mẽ hkwỳjaja mẽ kãm:

—Tỳ. Tãm na. Anẽ.

Nhũm kamã mẽ hkwỳjaja mẽ kãm:

— Nà tãm kêt. Axtem mēhō na. Te kot uràk nom tãm kêt. Anē.

Anhỹr o ri axpēn mã harē. Tã nhũm tãm mē kãm amnhĩ jarē nē mē kãm:

— Tỳ pa kēnã. Pa na pa pre hte inhno hkre nē ri ixpa htã ra ixrĩt mex. Anē.

10Hãmri nhũm mē tee ri kuma nē kãm:

— Kwa no tanhmã na ka we amnhĩ to nē ra arĩt mex?

11Anē nhũm mē kãm:

— Nà mē kot kãm “Jejus” anhỹr xwỳnhta na ixwỳr tē nē ixkaxyw gyw kwỳ kagō nē ho inhno kukō. Hãmri nē mē kot gō mã: “Siroe” anhỹr xwỳnhta kamã ixte amnhĩ no kuhōnh kaxyw hwỳr inhmã anē pa ma hwỳr tē nē kamã amnhĩ no kuhō nē ixrĩt mex kurê kumrēx. Anē.

12Hãmri nhũm mē kuma nē kãm:

— No nhỹhỹm na ato mex xwỳnhja ma tē? Anē.

Hãmri nhũm mē kãm:

— Konēn. Ixte nhỹhỹm htēm xà hkôt omunhre hã. Anē.

13Hãmri nhũm mē kuma nē ma Parijew nhō xwỳnhjê hwỳr o mō nē mē kãm harē. 14Nē mē kãm:

— E ot pa mē awỳr jahti ho tē. Na xep Jejusja jarãhã akupỹm kãm no ho mex. Mē panhō arĩgromnu htã nhũm hã no ho mex. Anē.

15Hãmri nhũm mē tee ri mē kuma nē myta pumu nē kãm:

— E mē inhmã amnhĩ jarē. Tanhmã na ka pre we amnhĩ to nē anohkre nē akrĩ htã ra ano mex nē? Anē.

Hãmri nhũm mē kãm:

— Nà na pre Jejus gyw o inhno kukō nē inhmã anē pa gō ho amnhĩ no kuhō nē ixrĩt kurê kumrēx. Anē.

16Hãmri nhũm mē kuma nē tee ri Jejus ã axpēn kukjêr o kuhê nē axpēn mã harēnh o:

— Kwa mē panhō arĩgromnu hã kot ho mex jakamã kēp Tĩrtũm rũm mē pahwỳr wrỳk xwỳnh kêt. ãm kot amnhĩ tomnuj xwỳnh kēnã. Anē.

Nhũm mē hkwỳjaja harēnh o:

— Kwa nà. Kot amnhĩ tomnuj xwỳnh ronhỹx àhpumunh tỳx kôt no ho mex kêt nē. Anē.

17Hãmri nē hpãnhã no mex xwỳnhta mã kãm:

— No ka? Ate kot ano ho mex xwỳnh ã amnhĩ tã harēnh jakamã mēhō hã na ka hkamnhĩx? Mēhō na wehe? Anē.

Hãmri nhũm mē kãm:

— Konēn. Mãn kēp Tĩrtũm kapêr jarēnh o ri mē pa xwỳnh mãn. Hã na ã inhno ho mex anē. Anē.

18Hãmri nhũm mē tee ri kuma nē axpēn mã:

—Kwa pēr aa nohkre hkêt kênã. Na pre ãm amnhĩ to hêx o pa. E kwa pu mẽ amnhĩ wỳr katorxà nê hipêêxà wa hã karõ kê wa man tẽ nê tanhmã mẽ pamã harênh to. Anê.

Hãmri nê wa hã karõ 19nhũm wa mẽ hwỳr tẽn axà nhũm mẽ wa kãm:

—Pa. E mẽ inhmã mẽmoj jarê. Xà we wa akrata na ãm ja nà? Xà tãm na ka hte wa nohkre nê kator ã harê? Kwa tanhmã na we amnhĩ to nê ra rĩt mex? Anê.

20Hãmri nhũm wa mẽ kãm:

—Ỗy wa ixkra kênã. Na pre wa ixpê nohkre nê kato. 21Tã ra tanhmã amnhĩ to nê ra rĩt mex. No wa ixte kot ho mex xwỳnhhta pumunh kêt. Kwa mẽ tãm mãn hkukja nê ama. Ra àptàr kênã. Kê tãm mãn mẽ amã tanhmã amnhĩ jarênh to ka mẽ ama.

22Anhỳr o mẽ kãm wa hkrata jarê. No ãm wa kãm mẽ uma nê ã mẽ kãm kapêr anê nê mẽ kãm Jejus nhĩxi jarênh kêt nê. Na pre Parijew nhõ xwỳnhjaja ra Jejus nê mẽ kãm kapêr nê mẽ kãm:

—Ka mẽ atõ Tĩrtũm kot mẽ pakaxyw Jejus xãm ã harê hãmri nê axte Tĩrtũm kapêr o mẽ ahkre xà hã ixkreja wỳr agjêx kêt kumrêx nê rĩ amnhĩ pumu.

23Anhỳr o nê mẽ hkurê jakamã nhũm wa mẽ umaj ã mẽ kãm hkra jarênh anê nê kot ho mex xwỳnh nhĩxi jarênh kêt nê. 24Hãmri nhũm mẽ axte amnhĩ wỳr no mex xwỳnhhta ã karõ nê kãm:

—Kwa akatàt kôt mẽ inhmã amnhĩ jarê. Ate kot ano ho mex ã harênh xwỳnhhta na kot amnhĩ tomnuj pix o pa xwỳnh kênã kot kêt ano ho mex. Jakamã kwa Tĩrtũm noo mã akatàt kôt mẽ inhmã amnhĩ jarê nê axêx kêt nê. Anê.

25Hãmri nhũm mẽ kãm:

—Ko ixte ja hã omunh kêt. ãm ja pix na ixte omunh. Na pa pre inhno hkre nê ri ixpa htã ra ixrĩt mex nê. Anê.

26Hãmri nhũm mẽ tee ri kot amnhĩ jarênhja ã kuma nê kãm:

—No tanhmã na we mytita amnhĩ to nê amã ano ho mex? Anê.

27Hãmri nhũm tee ri axte mẽ kot hã hkukjêr ã mẽ kuma nê mẽ kãm:

—Kwa ra ixte mẽ amã ãm hãmri amnhĩ jarênh griã. Tã ka mẽ inhma nê ãm inhma nê arĩ hã ixkukja. Mãn ka mẽ amã hkôt amnhĩ xunhwỳr prãm hã na ka mẽ aprĩ hã ixkukja nà? Mẽ ate kot amnhĩ nhĩpêx ã aprĩ hã harênh mar nê hkôt amnhĩ xunhwỳr prãm xàj na ka mẽ aprĩ hã amã harênh prãm nê. Anê.

28Hãmri nhũm mẽ tee ri kuma nê kamã gryk nê. Nê hã kãm akir nê kãm:

—Tk. Ka na ka hte kapêr kôt amnhĩ nhĩpêx. No kêt mẽ pajaja na pa htem finat Mojes kapêr kôt pix mã amnhĩ nhĩpêx. 29Mojes mã na pre hte Tĩrtũm kapêr o pa. Jakamã pa htem ãm hkôt pix mã amnhĩ nhĩpêx o ri ixpa. No ate kot ano ho mex ã harênh xwỳnhhta mẽ ixte omunh kêt.

Ně mēhō nhỹ hã kot tanhmã amnhĩ nhĩpêx to ho pa xwỳnhja mẽ ixte omunh kêt. Aně.

30Hãmri nhũm tee ri mẽ kuma nẽ mẽ kãm:

—Kwa kot inhmã inhno ho mex nhũm ra ixrĩt mex tã ka mẽ tee ri hkukamã ajamaxpěr nẽ mēhō nhỹ hã kot ã amnhĩ nhĩpêx anhỹr o pa hã omunh kêt ã amnhĩ jarẽ. **31**Mẽ pahte Tĩrtũm kot amnhĩ nhĩpêx ã omunh mex. Kojã mēhō kot amnhĩ tomnuj xwỳnh mẽmoj tã kuwỳ nhũm kuma nẽ ãm kuma. No kêt mẽ kot hkôt ri amnhĩ nhĩpêx xwỳnhjaja. Nẽ mẽ kot kãm mex o mex ã harēnh xwỳnhjaja na htem mẽmoj tã kuwỳ nhũm mẽ kuma nẽ mẽ kãm tanhmã mẽmoj nhĩpêx to rỳ mẽ kãm mẽmoj gō. **32**Tã aa mẽ pahte mēhō kot mẽ no ho mex ã harēnh mar kêt tã nhũm ã Jejus inhmã inhno ho mex aně. **33**Kêp Tĩrtũm kwỳ hkêt ronhỹx pre inhno ho mex kêt nẽ. Aně.

34Hãmri nhũm mẽ kuma hãmri nẽ kãm:

—Tk. Kwa pěr ãm akator kôt ate amnhĩ tomnuj o ri apa htã na ka ã mẽ inhmã akapěr aně. Kwa ixkreja rũm akato nẽ ma atēm kurê kumrêx.

Anhỹr o kãm kapěr hãmri nẽ mẽ amnhĩ nê hano nhũm kato nẽ ma tẽ.

35Tã nhũm Jejus ra mẽ kot amnhĩ nê hanor ã harēnh ma nẽ ma hapêr o tẽ nẽ nhỹri omu. Hãmri nẽ amnhĩ tã hkukja nom te nhãm mēhō hã hkukjêr pyrã nẽ kãm:

—Pa? Xàn ka ra Tĩrtũm kot mẽ awỳr mẽnh xwỳnhhta amnhĩ kaxyw hkôt ajamaxpěr nà? Aně.

36Hãmri nhũm kormã kot no ho omunh kêt jakamã kêp Jejus ã omunh kêt nẽ. Na pre kormã no hkre nẽ ãm kapěr pix ma. Tã ra akupỹm rĩt mex nom kormã no ho omunh kêt nẽ. Jakamã nhũm Jejus hwỳr tẽ nẽ ã kãm kapěr aně nhũm omu nẽ kormã kêp Jejus ã omunh kêt nẽ kãm:

—Tỳ kot kaj inhmã ahkre pa omu nẽ hkôt amnhĩ xãm kurê kumrêx. Aně.

37Hãmri nhũm kãm:

—Kwa paa. Ixte amã ixkapěr xwỳnhhta pa na pa. Aně.

38Hãmri nhũm kãm:

—Kwa xōwehe Pahihti? Nà kot paj amnhĩ kaxyw akôt pix mã ijamaxpěr nẽ akôt pix mã amnhĩ nhĩpêx o ri ixpa. Aně.

Hãmri nẽ kutã hkôn krã ho tēm nẽ nhỹ nẽ kãm mex o mex ã harēnh o nhỹ. **39**Hãmri nhũm Jejus kãm:

—Nà ixte mẽ apiitã tanhmã mẽ ajarēnh to kaxyw na pa pre kaxkwa rũm man mẽ awỳr wrỳ. Ahpỹnhã mẽ amã ixprãm xwỳnhjê jarēnh nẽ ahpỹnhã mẽ kãm ixprãm kêt xwỳnhjê jarēnh kaxyw. Mẽ kãm ixprãm kêt xwỳnhjaja kot hprĩ hã Tĩrtũm kapěr mar mex kêt tã na htem htỳx ri kot mar mex ã amnhĩ jarēnh o pa. Jakamã te mẽ nohkre xwỳnhjaja kot amnhĩ nhĩpêx pyrãk. Nom kojã mẽ Tĩrtũm kapěr ma nẽ ixkôt amnhĩ

xunhwÿr japêr. Hãmri nê te ra rît mex pyrãk o amnhĩ nhĩpêx. Jao ra hprĩ hã Tirtũm kapêr mar mex o pa. Anê.

40Nhũm pre ã Jejus kãm kapêr anê. Nhũm Parijew nhõ xwÿnh kwÿjaja kot kuri mar o kuhê xwÿnhjaja ã kapêr anhÿr ã kuma nê amnhĩ tã kãm:

—Kwa nà. Xà we mẽ pajaja na ka ã mẽ inhnohkre hã mẽ ijarênh anê? Xà mẽ ixte ixprĩ hã Tirtũm kapêr mar mex kêt ã na ka mẽ ijarê nà? Anê.

41Hãmri nhũm mẽ kãm:


—Ûÿ kop apu mẽ ate aprĩ hã kapêr mar mex kêt ã amnhĩ jarênh ronhÿx ja mẽ amã mex nê. Tã mẽ ate aprĩ hã mar mex ã amnhĩ to axêx o apa jakamã na ka mẽ ra amnhĩ tomnuj tÿx nê. Na hte Tirtũm ja hã mẽ apumu nê amnhĩm mẽ ate amnhĩ tomnuj xwÿnh ã mẽ ajarê. Anê.

Ôwêhti jarênh

Matêwre 9.36, 12.11-12; Rukre 15.3-7

10 ¹Nhũm Jejus arĩ Ijaew mã kapêr nê mẽ kãm: —E pa mẽ amã awjarê ka mẽ inhma nê amnhĩ krã him haxàr tÿx nê ho apa. Mẽ hkrit ôwêhti kot paj mẽ amã harê ka mẽ inhma. Na hte ôwêhti jamãr o pa xwÿnhjaja ôwêhti apkur kaxyw mẽ o pa hãmri nhũm kamàt nhũm akupÿm kahê hwÿr mẽ o pa. Kahê jakwakreja ãm pixii. Tã koja mẽhõ kahê xà hkôt hwÿr àr kêt nê axtem nê tẽ nê nhÿhÿnh kahê hã api nê ôwêhti hwÿr àr japêr nhũm mẽ omu nê kot hkwy ho àhkĩnh ã omunh kurê kumrêx.

2—No ôwêhti jamãr o pa xwÿnhja na hte mẽ kurom katàt kôt kahê jakwakre rũm ôwêhti hwÿr agjê. ³Nhũm kahê xà jamãr xwÿnhja amnhĩ wÿr omu nê kãm kahê xà rênh kurê kumrêx nhũm axà. Na hte apkati mẽ ma nhÿhÿm apkur kaxyw mẽ o pa. Nê nojarêt nê mẽ kãm akir. Ahpÿnhã tanhmã mẽ hixi kute hã mẽ omunh xà hkôt mẽ kãm àkjêr o pa. Hãmri nhũm mẽ kuma nê hwÿr mra nê hã pikuprõnh pa nhũm mẽ



Juãw 10.1-5

ho hapôj nê ma nhÿhÿm ri mẽ apkur kaxyw mẽ o pa. 4Ma mẽ apkur kaxyw nhÿhÿm mẽ o pa. Nhÿm ôwêhti ra kot kapêr mar mex jakamã ma amnhix ri hkôt apkur o pa.

5—Na hte hamãr o pa xwÿnh pix kapêr ma nê hkôt pa nê nhãm mẽhõ hkôt ri pa hkêt nê. Kot kapêr mar kêt jakamã tee ri kuma nê umaj axkakhÿm nê hprôt nê ma mra. Na hte ôwêhti ã amnhĩ nhĩpêx anê. Anê.

Jejus te kêp ôwêhti gjênh xà hã hakwakre pyræk

6Nhÿm pre ã Jejus mẽ kãm ujarênh anê. Nê ujarênhja kamã amnhĩ kwÿjê jarê nê mããnênh tãm amnhĩ jarê. Nom mẽ amnhĩ tã kuxi nê mẽ kãm amnhĩ jarênh o te ho ôwêhti jarênh pyræk nhÿm mẽ tee ri kuma nê mar mex kêt nê. 7Jakamã nhÿm axte mẽ kãm awjarê nê mẽ kãm:

—E pa ixprĩ hã mẽ amã ixujarênhja jarê ka mẽ inhma. Te ixpê ôwêhti jagjênh xà hã hakwakre pyræk. Kwa mẽ ja ma nê amnhĩ krã him haxàr tÿx nê. 8Na pre ra ixkukamã mẽ ohtô nê te ãm hãmri mẽ amã Tirtÿm kapêr jarênh pyræk o mẽ akôt ri pa. Nom mẽ amã hêx o pa. Te mẽ kot ôwêhti o àhkĩnh xwÿnhja kot amnhĩ nhĩpêx pyræk. Nom na hte ôwêhtija ãm hamãr xwÿnh pix kapêr ma nê nhãm mẽhõ kapêr mar kêt nê. Ja pyræk nê mẽ kot ixkôt amnhĩ xunhwÿr xwÿnhjaja na htem Tirtÿm kapêr o hêx o mẽ pa xwÿnhjê ma nê ãm mẽ kuma nê mẽ hkôt amnhĩ nhĩpêx kêt nê. Na htem ãm ixkapêr pix ma nê ixkôt pix mã amnhĩ nhĩpêx o pa.

9-10—Te ixpê ôwêhti gjênh xà hã hakwakre pyræk. Na hte ôwêhti mẽmoj punuj pymaj kahê hwÿr agjê nê kamã mex nê kuhê. Nê kurÿm hapôj nê ma apkur o pa. Ja pyræk nê mẽ kot ixkôt amnhĩ xunhwÿr xwÿnhjaja koja mẽ ixkukwak ri hkĩnh nê mex nê hamakêtkati nê pa ho pa. Nê nhÿrmã Tirtÿm mẽ wa ixri htĩr tÿm nê pa ho pa. Ja kaxyw na pa pre man mẽ awÿr pika hwÿr wrÿ.

—No ôwêhti ho àhkĩnh xwÿnhjaja na htem amnhĩm ho ahkĩ nê kupa nê ma amnhĩm o pa. Tã mẽ kot Tirtÿm kapêr o hêx o mẽ pa xwÿnhjaja te mẽ kot jajaja kot amnhĩ nhĩpêx pyræk. Anê.

Jejus te kêp ôwêhti jamãr xwÿnh pyræk

Eprêw 13.20; Apokarip 7.17

11—Nê ôwêhti jamãr mex xwÿnhja koja nhÿri mẽhõ kêp ôwêhti hõxpĩr kaxyw hwÿr htêm ã omu nê wa hã axpu. Nhÿm ho àhkĩnh mã xwÿnhja ôwêhti jamãr xwÿnh pĩ nhÿm ôwêhti nê ty. Tã ixkwÿjaja hamakêtkati nê mex nê pa kaxyw na pa pre amnhĩ grõnh kôt mẽ hwÿr wrÿ. Jakamã kot paj te ôwêhti jamãr xwÿnh kot amnhĩ nhĩpêx pyræk o amnhĩ nhĩpêx.

12-13—Nê na htem tõhã ôwêhti jamãr xwÿnh nhÿhÿm pa kaxyw nê mẽhõ mã amnhĩre nhÿm wakre kamã kãm hkrit jamãr o pa. Kãxpore pix prãm xaj kãm hamãr o pa. Jakamã koja nhÿhÿnh mry xoprê ra hwÿr

kato nhũm amnhĩ wỳr omu nẽ umaj ôwêhti re nẽ ma hprôt nẽ tẽ. Kãm ôwêhti japê hkêt âm kãm htír pix prãm xàj ôwêhti mã hamaxpêr kêt nẽ rer pa nẽ ma tẽ. Nhũm mry xoprêta ôwêhti hwỳr hprôt nẽ hkwỳ pynê nhũm hkwỳ umaj axkakhkũm nẽ hprôt nẽ ma mra. No kêt pa na te ixte ôwêhti mã hamaxpêr kêt nẽ kot rer nẽ ma hprôt nẽ htẽm xwỳnhhta pyræk kêt. Kot paj aa ixkwỳjê rer kêt nẽ. Kot paj mẽ hkôt ixpa ho ixpa rãhã nẽ.

14-15—Te ixte ôwêhti jamãr xwỳnh mex pyræk jakamã na pa hte uræk nẽ ahpỳnhã mẽ kot ixkôt amnhĩ xunhwỳr xwỳnhjê pumunh mex o ri mẽ hkôt ixpa. Te mẽ kêp ixkrit ôwêhti pyræk nhũm te ixpê mẽ hamãr mex o ri mẽ hkôt ixpa nẽ aa mẽ rer kêt xwỳnhhta pyræk.

—Nẽ mẽ kot ixkôt amnhĩ xunhwỳr xwỳnhjaja ra mẽ ixte amnhĩ nhĩpêx kôt axpẽn pumunh mex. Nẽ mẽ inhmã axpẽn japêê. Te Inhĩpêêxà mẽ wa inhmã axpẽn japê pyræk. Tã kot paj nhỹrmã mẽ nẽ tanhmã amnhĩ nhĩpêx to.

16—Mẽ kot ixkôt amnhĩ xunhwỳr xwỳnhjaja piitã kêp Ijaew pix kêt. Koja Ijaew kêt xwỳnh kwỳjaja mããnẽn ixkapêr ma nẽ ixkôt amnhĩ xunhwỳ nẽ ixkôt amnhĩ nhĩpêx. Jao ra te kêp ixkrit ôwêhti pyræk. Tã kot paj mẽ ho ixpimràa tã mẽ ho tipxi nẽ mẽ hamãr o ri mẽ hkôt ixpa.

17—Nẽ mẽ kot ixkôt amnhĩ nhĩpêx o mẽ pa xwỳnhjaja mẽ mex kaxyw na pa pre amnhĩ grôn h kôt mẽ hwỳr wrỳ. Jakamã kot paj nhỹrmã mẽ nẽ ty. Tã inhmã mẽ nẽ ixtyk puma hkêt jakamã na Inhĩpêêxà kãm ijapêê. Koja akupỹm ixto ixtír. 18Kop apu inhmã mẽ nẽ ixtyk prãm kêt ronhỹx mẽ kãm ixkurê xwỳnhjaja tee ri kãm ixpír prãm kaprỳ. Nom ixte mẽ kot ixkôt amnhĩ nhĩpêx xwỳnhjê nẽ amnhĩ grôn h kôt mẽ hwỳr ixwrỳk kênã. Jakamã kot paj arĩ mẽ kãm amnhĩ grôn h kôt amnhĩ gô nẽ arĩ mẽ kãm xa nhũm mẽ ixpĩ. Nom kot paj akupỹm ixtír. Mẽhõ koja tanhmã ixto nẽ ixpír o ixpĩ? Nà koja mẽhõ ixpír o ixpír kêt nẽ. Inhĩpêêxà nhỹ hã kot paj nhỹrmã ã amnhĩ nhĩpêx anẽ nẽ akupỹm ixtír. Anẽ.

Nhũm pre ã Jejus mẽ kãm amnhĩ jarẽnh anẽ. 19Hãmri nhũm Ijaew tee ri ã kot amnhĩ jarẽnh anhỹr ã kuma nẽ kê axte axpẽn kwỳm ri tanhmã harẽnh to ho kuhê. 20Nẽ kamã mẽ hkwỳjaja harẽnh o:

—Tk. Kwa mẽ mar kêt nẽ. Satanasti nhỹ hã na hte htỳx ri ã mẽ pamã amnhĩ jarẽnh anhỹr o pa. Anẽ.

21Hãmri nhũm mẽ hkwỳjaja mẽ kuma nẽ mẽ kãm:

—Nà kot anhỹr kêt. Xà na htem Satanasti nhỹ hã ã kapêr mex anẽ nẽ ã mẽ no hkre xwỳnhjê ho mex anẽ? Nà kot anhỹr kêt. Satanastija ukaprĩre hã. Anẽ.

Ijaew nhõ pahijaja kot Jejus kaga hã mẽ harẽnh

Juãw 5.18, 8.59

22Tã nhũm ra amgrà hapêx pa mẽ ixpê Ijaew akupỹm krĩ pê Jerujarê kamã axpẽn wỳr akuprõ. Axte mẽ ixte mẽ ixkĩnh kaxyw axpẽn wỳr

akuprõ. Amnepê mē inhîgêtjaja kot akupÿm Tirtûm mã amnhî jarênh xà hã ixkre ho mex pa nê ho Tirtûm wÿr mã hamaxpêr nê hã ixkînh ã arîgroja ã pa mē hwÿr akuprõ. 23Hãmri nhûm Jejus ma mē ixkõt Tirtûm mã amnhî jarênh xà hã ixkreta wÿr tē no ãm hwÿr àr kêt nê. ãm ixkre hpu hã kahê xà kape hã ri pa. Mē kot kãm: “Pahi finat Sarumãw pa xà” anhÿr xwÿnhnta kamã ri pa. 24Hãmri nhûm kê ra mē inhõ pahijaja omu nê hã akuprõ nê hêx rom kãm kapêr nê kãm:

—Kwa tokyx aprî hã mē inhmã amnhî jarê. Xà apê Tirtûm Kra na ka na? Xà ka na pre Tirtûm mē ixkaxyw axãm? Kwa aprî hã mē inhmã amnhî jarê pa mē ama. Mon ka hte aprî hã mē inhmã amnhî jarênh kêt nê? Na pa mē tee ri ate amnhî nhîpêx ã apumu nê akukamã ijamaxpêr rûnh kumrêx o ri ixpa. Xà ãm hãmri apê Tirtûm kot mē ixkaxyw axãm xwÿnhnta na ka? Anê.

25Hãmri nhûm mē kãm:

—Tk. Ra ixte mē amã amnhî jarênh xohtõ htã ka mē inhma nê ãm inhma. Na pa hte xatã Inhîpêêxà nhÿ hã mē amã mē ate aa mēmoj pumunh kêt kwÿ ho anhÿr o ri ixpa ka mē ja hã ixpumu nê ãm ixpumu nê ixkõt ajamaxpêr kêt nê. 26Mē apê ixkwÿ hkêt jakamã na ka mē ixkõt ajamaxpêr kêt nê. Te mē apê ixkrit ôwêhti pyrãk kêt. 27Ixkwÿjaja na te ho ôwêhti kot hamãr xwÿnh kapêr mar nê hkõt ri pata pyrã nê ixkapêr ma nê ixkõt amnhî nhîpêx o pa. Ixpê mē õ pahihiti hã mē kot ixpumunh mex jakamã na htem ixkõt amnhî nhîpêx mex o pa. Ixte ja hã mē omunh mex nê. 28Koja mē nhÿrmã htyk tã no ãm ixkukwak ri akupÿm htîr hãmri nê Tirtûm mē wa ixri htîr tûm nê pa ho pa nê aa hapêx kêt nhûm mēhõ ixpê mē utàr kêt nê. Te inhîhkra hpo nhîpôk ri mē hkrî nhûm te mē hã inhîhkra pikamÿr pyrãk nhûm mēmoj tee ri ixpê tanhmã mē ho hprãm kaprÿ. 29-30Inhîpêêxà tãm kot inhmã mē õr kênã. Hihtÿx o kot mē piitã mē hakrenh par jakamã koja mē inhîhkra po nhîpôk ri hkrî nê mãânên Inhîpêêxà nhîhkra hpo nhîpôk ri hkrî. Te ixpê Inhîpêêxà Tirtûm pyrãk jakamã mēhõ kot wa ixpê wa inhîhkra rûm mē utã? Nà amrakati kumrêx.

Anhÿr o mē kãm amnhî jarê. 31Hãmri nhûm mē te kêp Tirtûm pyrãk ã amnhî jarênh ã kuma nê kamã gryk tÿx nê. Hãmri nê kot kên o htak kaxyw ra kaxyw hkwy kawrà ho ri hprõt. 32Hãmri nhûm amnhî tã mē omu nê mē kãm:

—Kwa ra ixte Inhîpêêxà nhÿ hã mē amã aa mē ate mēmoj pumunh kêt kwÿ ho anhÿr rax o ixpa. Jao tanhmã mē ho mex to pix o ri ixpa. Tã ka mē axtem nê ã inhîpêx anhÿr kaxyw. Anê.

33Hãmri nhûm mē kãm:

—Nà ã ate amnhî nhîpêx anhÿr ja mÿrapê hkêt. Kêt apê mē inhîõ htã ri axtem nê te apê Tirtûm pyrãk ã amnhî jarênhja mÿrapê na pa mē kên o atak kaxyw. Na pu htem ã amnhî jarênh anhÿr o papa hkêt nê. Anê

34Hãmri nhûm mē kãm:

—No ãm hãmri ixte ã amnhĩ jarẽnh anhỹr kẽnã. Tanhmã na Tĩrtũm kapẽr ã kagã htũm kot ja jarẽnh to wehe? Na pre Tĩrtũm Ijaew nhõ pahijê mã kapẽr nẽ mẽ kãm:

E mẽ ate inhỹr hã mẽ ho amnhĩptàr jakamã te mẽ apê pa ixpê
Tĩrtũm pyràk.

Anhỹr o kot mẽ harẽnh. 35 ãm hãmri na Tĩrtũm kapẽrja. Tãm kot ã mẽ harẽnh kot anhỹr. Mẽ kot ÿ hã mẽ kãm kapẽr jakamã te mẽ kêp uràk ã mẽ harẽnh anhỹr kẽnã. 36 Tã tãm kot ã mẽ harẽnh anhỹr tã hpãnhã mẽ akaxyw pa ixpê Kra hã ixãm nẽ mẽ awỹr inhmẽnh nhũm ixwryk nẽ ixpê Kra hã amnhĩ jarẽnh tã ka mẽ ja hã inhma nẽ ãm inhma nẽ ixkõt ajamxpẽr kêt nẽ. Kwa mon ka mẽ ja hã ixpumunh nẽ ixkõt ajamxpẽr kêt nẽ? 37 Kot paj Inhĩpêêxã mẽ wa ixàhpumunh kõt mẽ amã aa mẽ ate mẽmoj pumunh kêt kwỹ ho anhỹr kêt ka mẽ ja hã ixpumu nẽ mẽ rĩ kam nẽ mãmrĩ ixkõt ajamxpẽr kêt nẽ. 38 Mẽ amã ixkapẽr mar prãm kêt tã kwa ixte Tĩrtũm pyrã nẽ aa mẽ ate mẽmoj pumunh kêt kwỹ ho anhỹr ã ixpumu nẽ Inhĩpêêxã mẽ wa ixte amnhĩ nhĩpêx tipxi hkõt ajamxpẽr. Anẽ.

39 Hãmri nhũm mẽ kuma nhũm ja mẽ kêp omnuj tỳx nẽ. Te kot Tĩrtũm pyràk ã amnhĩ jarẽnhja nhũm mẽ kêp omnuj nẽ. Jakamã nhũm mẽ ra kot unẽnh nẽ ixkre rũm ho kator nẽ kapõt ã mẽnh nẽ kẽn ho hta kaxyw nhũm kê axte mẽ kêp akunok nẽ ma nhỹhỹm nẽ.

Jejus kot Jotãw nhĩhkjê hã ri pa hã harẽnh

40 Tã nhũm Jejus ma tẽ nẽ pyhti pê Jotãw ã rê. Pa mẽ hkõt ri ixpa ho ixpa xwỹnhjaja ma hkõt mõ. Finat Juãw Paxis kot Tĩrtũm mã wam mẽ hkrã kumrãr o pa xàta wỳr. 41 Hãmri nhũm mẽ ohtõ nẽ mẽ ixwỹr mra nẽ Jejus kapẽr ma nẽ kot tanhmã amnhĩ nhĩpêx to hã omunh o kuhê. Hãmri nẽ hã tanhmã axpẽn mã kapẽr to nẽ axpẽn mã:

—Kwa ãm hãmri na pre finat Juãw Paxisja mẽ pamã Jejus jarẽnh o pa. Aa kot mẽ pamã mẽ pahte mẽmoj pumunh kêt kwỹ ho anhỹr kêt tã ãm xatã hkukamã mẽ pamã harẽnh o pa. Kêp Tĩrtũm Kra hã Juãw rom hihtỳx o hihtỳx ã harẽnh o pa. Nẽ Tĩrtũm kot mẽ pakaxyw ãm xwỹnh ã nhũm mẽ pamã harẽnh o pa. Nã ãm hãmri na pre ã mẽ pamã harẽnh anẽ. Anẽ.

42 Hãmri nhũm mẽ ohtõ nẽ amnhĩ kaxyw Jejus kõt hamxpẽr nẽ hkõt amnhĩ xunhwỳ.

Rajare htyk jarẽnh

Juãw 5.21-29, 6.40

11 1 Rõm nhũm krĩ pê Petãn kamã mẽhõ my pê Rajareja ra à htỳx nẽ nõ. Na pre htõx wa hamẽxkrut. Hõ kêp Matre nhũm hõ kêp Marir. 2 Marir na pre kormã arĩgro hõ hã kot Jejus o mex kaxyw mẽ

hkuxwaxà ho hkuxwa nê amnhĩ kĩ ho hpar põnh kaxyw. Nom kormã. Jakamã nhũm wa hkamyja wa kêp à htỳx nê nõ. 3Hãmri nhũm wa tee ri hkukamã hamaxpêr nê ma krĩ hõ hwỳr Jejus wỳr mễhõ mễ nhũm ma hwỳr tễ. Nê hwỳr pỏj nê omu nê kãm:

—Pa Pahihti. E ot pa awỳr tễ. Na ra amã akràmnhwỳ japê htỳx xwỳnhta à htỳx nê nõ nhũm htỏx wa tee ri hkukamã hamaxpêr nê awỳr inhmê pa tễ. Kwa tokyx pu ma hwỳr tễ ka akupỳm wa kãm ho mex nà? Anê.

4Hãmri nhũm kuma nê kãm:

—Nà à htỳx nê nõr tã koja akupỳm mex. Mễ kot akupỳm mex ã harênh mar hãmri nê Tỉrtũm mễ wa ixtã hpijaàm nê wa ixihỳx o wa ixihỳx ã wa ixpumunh kaxyw na ã à htỳx nê nõr anê. Nê pa ixpê Tỉrtũm Kra hã akupỳm ho mex ã ixpumunh nê ixkỏt hamaxpêr kaxyw na ã à htỳx nê nõr anê. Anê.

5Na pre Jejus kãm Rajare mễ htỏx wa mễ hapê nê. 6Tã à htỳx ã harênh ma nê hwỳr mỏr tokyx anhỳr kêt nê. Pa mễ arĩ amnhĩm hikranh xà kamã ri ixpaja o ixtã axte apkati axkrut. 7Hãmri nhũm rĩ kormã hwỳr nojarêt nê mễ inhmã:

—E ma pu mễ jarãhã akupỳm Jutej kamã Rajare hwỳr mỏ nê omu. Anê.

8Hãmri pa mễ tee ri ja hã kuma nê kãm:

—Kwa ham mễ panhõ pahijaja kot kên o atak o apĩr mã tã ka ra akupỳm mễ hwỳr akrà. Kwa pu mễ hwỳr pamỏr kêt nê nà? Anê.

9Hãmri nhũm mễ inhmã:

—Nà koja mễ kormã tanhmã ixto hkêt nê. Kormã ixte Tỉrtũm mã tanhmã amnhĩ nhĩpêx to jatur xàm mễnhre hã. Te ixte kormã arĩgro hã ixrĩt mex nê ixpa pyrà nê kormã Tỉrtũm kot mễmoj tã inhmã karỏ xà hkỏt pix mã tanhmã amnhĩ nhĩpêx to ho ri ixpa. 10Tã kot paj hatur xàm kumê nhũm te myt àr nhũm ra kamàt kỏ pyràk nhũm mễ rĩ kormã tanhmã ixto nê ixpĩ. Jakamã e ma pu mễ hwỳr. Koja mễ tokyx tanhmã ixto hkêt nê. Anê.

11Hãmri nê mễ inhmã Rajare jarênh o:

—Na mễ pahkràmnhwỳ Rajareta ra gỏr nê nõ. Tã kot puj mễ ma hwỳr mỏ pa kumra. Anê.

12-13Ra htyk ã omunh tã ã mễ inhmã harênh anê. Pa mễ kuma nê ixtỳx ho ãm ỏt nê nõr ã hkamnhĩx nê kãm:

—Kwa mãn ra akupỳm amnhĩ kãm hamak o mỏr jakamã na ra amnhĩ krit nê gỏr nê nõ. Kwa pu mễ awjanã nê hwỳr pamỏr kêt nê nà? Anê.

14Hãmri nhũm mễ inhma nê hprĩ hã mễ inhmã harê nê mễ inhmã:

—Nà na pre ty. 15Nom kormã à nê hikwỳta ã na pa hwỳr inhmỏr kêt nê. Tã kot paj ma hwỳr mỏ nê hã mễ amã ixàhpumunh tỳx ã amnhĩ to

amnhĩrit. Ka mẽ ja hã ixpumu nẽ amnhĩ kaxyw ixkõt ajamaxpẽr tỳx o ri apa. ã mẽ ate amnhĩ nhĩpêx anhỹr kaxyw na pa kormã à nẽ nõr ã hwỳr inhmõr kêt nẽ. E ma pu mẽ hwỳr. Anẽ.

16Hãmri nhũm mẽ inhĩõ pê Tomas pihpohti tee ri ã kapẽr anhỹrja ã kuma nẽ mẽ inhmã:

—Tõe ma pu mẽ hkõt. Kê mẽ mamrĩ hkõt mẽ pahto hpimràatã mẽ panhĩmex pa ri. Anẽ.

17Tã pa mẽ ma hkõt mẽ hwỳr mõi nẽ ra Rajare nhõ krĩ hwỳr ixpõx o mõi hãmri nẽ harẽnh ma. Ra htyk nhũm mẽ kot haxàr ã arĩgro pê kwat ã harẽnh ma. 18-19Nhũm Matre mẽ Marir wa hkamy ho hamak xàj arĩ mỳr o hkrĩ. Jakamã nhũm Ijaew kwỳjaja Jerujarẽ rũm ma wa hwỳr mra. Mẽ kot wa kãm kapẽr nhũm tokyx akupỹm tãm wa hkrã kaxyw nhũm mẽ wa hwỳr mra. Wa õ krĩ pê Petãnja Jerujarẽ hwỳr ãm 3 kirõm pix jakamã nhũm mẽ ma wa hwỳr mra nẽ wa kuri wa kãm kapẽr o hkrĩ. 20Rõm nhũm Matre Jejus hpõx o mõi ã harẽnh ma nẽ kànhmã xa nẽ man mẽ ixkutã tẽ. No nhũm Marir arĩ mỳr o nhỹ nẽ hkõt htẽm kêt nẽ. 21Hãmri nhũm Matre mẽ ixkutã tẽ nẽ mẽ ixkaxpa nẽ Jejus pumu nẽ mỳr kamã kãm kapẽr nẽ kãm:

—Hêxta gàu nẽ Pahihti. Na pre ra wa ixkamy wa ixpê ty. Kop apu jar mẽ ixkõt ri apa ronhỹx pre htyk kêt nẽ. Xê mon ka pre we tokyx mẽ ixwỳr atẽmre hkêt nẽ? 22Tã na pa arĩ akõt ijamaxpẽr tỳx nẽ. Kot kaj mẽmoj tã tanhmã Tĩrtũm wỳr to nhũm ama nẽ tanhmã amã mẽmoj to. Ra ixte ja hã apumunh mex kẽnã. Anẽ.

23Hãmri nhũm Jejus kuma nẽ kãm:

—Kwa tee ri ajamaxpẽr nẽ akaprĩ hkêt nẽ. Koja akamy akupỹm war amã htĩr kãm ga. Anẽ.

24Hãmri nhũm kuma nẽ kãm:

—Ma koja anẽ. Nhỹrmã Tĩrtũm kot mẽ piitã akupỹm mẽ ho htĩr xà hã arĩgrota ã koja akupỹm htĩr. Anẽ.

Kamy akupỹm htĩr ã harẽnh mar tã Jejus kot akupỹm ho htĩr tokyx anhỹr ã hkamnhĩx kêt nẽ ã kãm kapẽr anẽ.

25-26Jakamã nhũm kãm:

—Nà pa na ixpê akupỹm mẽ ho mẽ htĩr xwỳnh. Jakamã mẽ kot amnhĩ kaxyw ixkõt hamaxpẽr nẽ ixkõt amnhĩ xunhwỳr xwỳnhjaja koja mẽ htyk tã koja mẽ hkarõ Tĩrtũm mẽ wa ixri htĩr tũm nẽ mex nẽ pa ho pa. Xà ate ja kaxyw ixkõt ajamaxpẽr tỳx nà? Anẽ.

27Hãmri nhũm Matre kuma nẽ kãm:

—Xê nhũm. Apê Tĩrtũm Kra hã na pre mẽ ixkaxyw axãm. Ka na pa htem amnhĩ wỳr akãm ijamak o ixpa. Anẽ.

Hãmri nhũm Jejus kãm:

—Nà ãm hãmri na ka ã ijarẽnh anẽ. E ma akupỹm tẽ nẽ atõx mã anẽ kê tokyx man ixwỳr tẽ pa omu. Anẽ.

28Hãmri nhũm kuma nẽ ma akupỹm tẽ. Hãmri nẽ Marir wỳr axà nẽ kãm Jejus jarẽ. Kõt mẽ hkrĩ xwỳnhjê hkàx ã kãm harẽ nẽ kãm:

— An xê hãmri amỳr kêt nẽ. Na ra mẽ pajahkre xwỳnhhta hpôx o mỗ nẽ mũtar nhỹ nẽ atã karõ. Anẽ.

29Hãmri nhũm kuma nẽ kànhmã xa nẽ ma mẽ ixwỳr htẽm kurê kumrêx. 30Hãmri pa mẽ kormã krĩm ixpôx kêt nẽ. Arĩ Matreja Jejus wỳr htẽm xà kamã arĩ ixkrĩ. 31Jakamã nhũm Matre ma tẽ nẽ Marir mã Jejus jarẽ nhũm kato nẽ man mẽ ixwỳr tẽ. Hãmri nhũm Jerujarẽ rũm wa hwỳr mẽ mrrar xwỳnhjaja omu nẽ htỳx kot hkamy hã pika pumunh nẽ mỳr kaxyw htẽm ã hkamnhĩx nẽ man hkõt mra. 32Hãmri nhũm Marir mẽ hkukamã mẽ ixwỳr tẽ nẽ Jejus pumu nẽ hpar pẽ tẽm nẽ kãm kapẽr pẽ hipô nẽ mỳr o nhỹ. Nẽ kãm:

— Hêxta gàu nẽ Pahihti. Na pre ra wa ixkamy wa ixpê ty. Kop apu jar mẽ ixkõt ri apa ronhỹx pre htyk kêt nẽ. Hô mon ka pre we tokyx man mẽ ixwỳr atẽmre hkêt nẽ? Anẽ.

33Hãmri nhũm Jejus kuma nẽ mỳr ã omu. Nẽ hkõt mẽ mrrar xwỳnhjaja mẽ mỳr ã mẽ omu nẽ kãm mẽ hkaprĩ nẽ. 34Hãmri nẽ mẽ kãm:

— Nhỹri na ka prem haxà? E mẽ hwỳr ixto tẽ pa omu. Anẽ.

Hãmri nhũm mẽ kuma nẽ ma hã pyka hwỳr mẽ ixto mỗ 35nhũm Jejus mẽ urak nẽ hwỳr mỳr o tẽ 36nhũm mẽ ja hã omu nẽ axpẽn mã:

— Kwa mãn kãm hapê htỳx. Hã na ho ama nẽ hwỳr mỳr o tẽ. Anẽ.

37Nom nhũm mẽ hkwyjaja axtem nẽ mẽ kãm:

— Tk. Ra kot no hkre xwỳnhhta o mex tã mo na we tokyx man kormã htĩr ri hwỳr htẽm nẽ omunh nẽ akupỹm ho mex kêt nẽ? Anẽ.

Jejus kot akupỹm Rajare ho htĩr ã harẽnh

38Tã pa mẽ ra kẽn kre kamã mẽ kot Rajare jaxàr xàta wỳr ixpôx o mỗ nhũm Jejus hkaprĩ nẽ hwỳr tẽ nẽ omu. Nhũm prem ra kẽn rax o hitom 39nhũm omu nẽ mẽ kãm:

— E mẽ akwỳjaja nhãm inhmã nê kahê xà mẽ. Anẽ.

Hãmri nhũm Matre kuma nẽ tee ri hamaxpẽr nẽ kãm:

— Xê ma Jejus. Mẽ ri ã anhỹr kêt nẽ. Ra htyk ã arĩgro kệp 4 kẽnã. Mãn ra hkatõk nẽ hkro htỳx kumrêx. Anẽ.

40Hãmri nhũm kuma nẽ kãm:

— Kwa ri ã ajamaxpẽr anhỹr kêt nẽ Matre. Na pa ra amã ixkapẽr nẽ amã ixkapẽr o: “Kot kaj amnhĩ kaxyw ixkõt ajamaxpẽr tỳx nẽ. Hã kot kaj Tĩrtũm mẽ wa ixihtỳx o wa ixihtỳx xàja pumu.” Anhỹr o amã ixkapẽr. Jakamã kwa ja kaxyw Tĩrtũm mẽ wa ixkõt mãn ajamaxpẽr tỳx nẽ hkêt wehe. Anẽ.

Hãmri nhũm kuma nẽ kãm:

— Ma ãm hãmri na ka inhmã akapẽr. Ma kot paj kaxyw war amã ijamaxpẽr tỳx nẽ. Anẽ.

41Rôm nhũm mẽ kãm nhãm kën jakwa kre kahê xà mẽ. Hãmri nhũm Jejus Tirtũm mã amnhĩ jarênh kaxyw kànhmã kaxkwa hwỳr rít nê kãm:

—Pa Papaj. Nà na pa hte tanhmã mẽmoj tã awỳr to ka inhma nê tanhmã inhmã mẽmoj nhĩpêx to. Amex o amex Papaj. 42Na ka hte ã inhmã amnhĩ nhĩpêx anê. Tã pa jajê noo mã ã amã ixkapêr anê. Ate inhmar nê tanhmã Rajare hto nhũm mẽ kot ja hã ixpumunh nê ixte anhỹ hã pix mã tanhmã amnhĩ nhĩpêx to ho ri ixpa hã ixpumunh kaxyw. Nê ka ate mẽ hwỳr inhmênh ã apumunh kaxyw. Anê.

43Nhũm pre ã Tirtũm mã kapêr anê. Hãmri nê kỳx pê Rajare mã kapêr nê kãm:

—Pa Rajare. Kwa tokyx kànhmã nhỹ nê amnê mẽ ixwỳr tẽ nê akato. Anê.

44Puh nhũm akupỹm htĩr nê hkupu xà rãhã tẽ nê mẽ ixwỳr kato nê xa. Arĩ hkuk nê ihkra nê hpar kupu rãhã mẽ ixwỳr kato nê xa. Hãmri nhũm Jejus mẽ kãm:

—Kwa mẽ atõ nê kupu xà hpôt kê ma akupỹm òrkwỹ hwỳr tẽ. Anê.

45Hãmri nhũm mẽ kot Marir mẽ Matre wa hwỳr mrar xwỳnh kwỳjaja ã Jejus kot Rajare nhĩpêx anhỹr ã omu nê amnhĩ kaxyw hkôt hamaxpêr nê hkôt amnhĩ xunhwỳr kurê kumrêx. 46Nom nhũm mẽ hkwỳjaja axtem nê omu nhũm ja mẽ kêp omnuj nê. Jakamã nhũm mẽ ma Parijew nhõ xwỳnhjê hwỳr mra nê mẽ kãm harê.

Mẽ kot Jejus pĩr ã amnhĩ grõnh

Matêwre 26.1-5; Makre 14.1-2; Rukre 22.1-2

47Hãmri nhũm Parijew nhõ xwỳnhjaja tee ri Jejus kot akupỹm Rajare ho htĩr ã harênh ma hãmri nê patre krãhtũmjê mẽ amnhĩ wỳr mẽ inhõ juisti ho akuprõ nê axpên mã Jejus o kapêr punuj pê hã axpên mar o hkrĩ. Hãmri nhũm mẽhõ mẽ kãm:

—Kwa tanhmã kot puj mẽ ho? Na ra mẽ kãm mẽmoj pumunh kêt kwỳ ho anhỹr rax o pa. 48Kot puj mẽ ãm omu nê tanhmã ho hkêt nhũm mẽ pahkwỳjaja kot ã amnhĩ nhĩpêx anhỹr ã omu nê htỳx ãm hãmri ã kot



Juãw 11.1-44

amnhĩ nhĩpêx anhÿr ã hkamnhĩx. Hãmri nê amnhĩ kaxyw hkôt hamaxpêr nê hkôt amnhĩ xunhwÿ. Jao ra amnhĩ kaxyw kêp mē õ pahihtĩ hã ãm. Koja mē ã amnhĩ nhĩpêx anê nhũm Rôm kamã pahihtija mē kot kator nê hpãnhã Jejus xãm ã harênh ma. Hãmri nê gryk xaj mē pahwÿr õ pôristi hkwȳ rē nhũm mē pahwÿr mra nê mē panhĩmex pa nê Tĩrtũm nhõrkwȳ grãnh pa. Kwa tanhmã kot puj wem tokyx amnhĩ nê ho? Anê.

49Hãmri nhũm Kajpas mē kãm kapêr. Kajpasja na pre amgrãja kamã kêp mēõ patre nhõ pahi maati. Jakamã mē kãm:

— Nà na pa ra ijamaxpêr. Kwa mē inhma. 50Nà kot puj mē hpĩr tokyx anê kê tapxipix ty pu mē arĩ mÿrpê pahpiitã pajamakêtkati nê ri papa. Anê.

51Nhũm pre ã mē kãm kapêr anê. Nom amnhĩ krã hkôt ã mē kãm kapêr anhÿr kêt nê. Arĩ kêp mēõ patre krãhtũmjê nhõ pahi maati jakamã Tĩrtũm nhÿ hã Jejus kot Ijaew nê tykja kukamã ã harênh anê. Nom ja hã amnhĩ pumunh kêt nê. 52Na pre Jejus mē ixpê Ijaew pix nê htyk kêt nê. Krĩ piitã hkôt Tĩrtũm krajê nê na pre ty. Mē piitã mē kot axpên to hkwȳ nê ri axpên to pa kaxyw na pre mē nê ty. 53Hãmri nhũm ã Kajpas mē kãm kapêr anê nhũm mē inhõ pahijaja kuma nhũm ja mē kãm mex nê. Jakamã nhũm mē kot tanhmã Jejus ã ãmnênh to nhũm mē kot mē kãm tanhmã hpĩr to kaxyw ã axpên mar anhÿr o pa. 54Jakamã nhũm Jejus axte mē noo mã ri pa hkêt nê. Hãmri ma krĩ pê Epraĩ hwÿr ma mō. Pa mē hkôt ixpa ho ixpa xwÿnhjaja ma hkôt ixpa. Epraĩja kapôt ã krĩ na pre. Jakamã pa mē ma hwÿr mō hãmri nê kamã ri ixpa.

55Tã nhũm arĩgro pê Pasja ra ahtêp o mō. Amnepêm finat Mojes kot Ejit rúm mē panhĩgêjtê kator mã hamaxpêr kaxyw na pa pre htem hã ixkĩnh kaxyw Pas ã Jerujarê hwÿr akuprõ. Na pa pre htem hwÿr pøj nê kamã Tĩrtũm noo mã mē inhmex kaxyw tanhmã amnhĩ nhĩpêx to.

56-57Jakamã nhũm ra Ijaew ohtô nê ma Jerujarê hwÿr pa. Nê kãm Jejus pumunh prãm xaj Tĩrtũm mã amnhĩ jarênh xà hã ixkre wÿr mra nê hwÿr agjê nê kamã hapêr nê axpên mã:

— Kwa nok? Xà koja mē hpakĩnh wÿr mōr kêt nê nà? Anê.

Nhũm Parijew nhõ xwÿnhjê mē mē inhõ patre krãhtũmjaja haxwÿja hapêr o kuhê. Nom mē kot axtem nê unê nê haxàr kaxyw. Jakamã mē kãm hã karõ nê mē kãm:

— E kêr ka mē nhÿri Jejus pumu nê man mē ixwÿr mra nê mē inhmã harênh kurê kumrêx. Anê.

Marir kot Jejus kuxwa hã harênh

Matêwre 26.6-13; Makre 14.3-9; Rukre 7.36-50

12 1Tã nhũm ra Pas wÿr apkati grêre. Ra hwÿr apkati kêp 6. Jakamã pa mē ma akupÿm krĩ pê Petãn wÿr Jejus kôt mō. Jejus kot akupÿm Rajare ho htĩr xwÿnhnta mē õ krĩ hwÿr pa mē akupÿm mō

nê Rajare nhõrkwỹ hwỳr pøj nê mẽ hwỳr agjê. 2Hãmri nhũm mẽ Jejus pumu nê hkĩnh nê. Nê mẽ inhmã mẽmoj mex nhĩpêx pa mẽ ixàpkur o ixkrĩ. Nhũm Rajare haxwỳja mẽ ixkutã apkur o nhỹ. Nhũm htõx Matre mẽ inhmã mẽõ ho pa nê mẽsti hã unhwỳr o xa. 3Hãmri nhũm wa htõx Marir Jejus kukamã tanhmã hamaxpêr to nê hamaxpêr o:

—Ma kot paj tokyx mẽ kot mẽ ixpê hpĩr kukamã mẽ hkuxwaxà ho hkuxwa. Anê.

Hãmri nê kàx rax kãm mẽ hkuxwaxàja py nê o tẽ. Ra rit kahti hkõt hitep xà nhũm kupy nê hwỳr o tẽ. Mẽ kot mẽmo htwỳm o mẽ hkuxwaxà mex nhĩpêxja na pre hã kàxpore xohtô rax kumrêx. Jakamã nhũm kupy nê Jejus wỳr o tẽ nê hpar ã hkapĩr pa nê amnhĩ krã hkĩ ho hpar grà ho nhỹ nhũm ra ixkre kuxwa htỳx kumrêx. 4Hãmri nhũm mẽ inhĩõ pê Jut Kariotja. Kot kormã mẽ ìhkram Jejus nhõr mã xwỳnhta tee ri ã kot amnhĩ nhĩpêx anhỳr ã omu nhũm ja kêp omnuj nê 5nhũm mẽ inhmã:

—Tk. Kwa pêr mẽ hkuxwaxà hã kàxpore xohtô rax kumrêx tã nhũm ri axtem nê Jejus par ã hkapĩr pa. Mo na ma o htẽm nê ho wẽnê nê hpãnhã kàxpore ho rax nê hpyr nê ho mẽ kêp amrakati xwỳnhjê nhĩpêx kêt nê? Kot ho wẽnê ronhỹx hpãnhã kàxpore ho rax kumrêx nê kupy nê ho mẽmoj japrõr rax o rax. Tã axtem nê amarĩ Jejus par ã hkapĩr pa. Anê.

6Te kãm mẽ kêp amrakati xwỳnhjê japê pyræk tã kãm mẽ hapê hkêt. ãm hêx rom ã kapêr anê. Na pre hte mẽ inhmã mẽ ixkàxpore jamỳ nê mẽ ixkõt mẽ inhmã hamãr o pa. Nom tõiã axtem nê mẽ ixpê hkwỳ ho ahkĩ nê ho amnhĩm mẽmoj japrõ. Jakamã Marir kot mẽ hkuxwaxà ho hapêx par ã omu nê tee ri hpãnhã kàxpore rax mã hamaxpêr nê kamã gryk nê ã mẽ inhmã kapêr anê. 7Hãmri nhũm Jejus amnhĩ tã hamaxpêr ã omu nê kãm:

—Tk. Kwa tanhmã kãm akapêr to hkêt nê. Ixtyk nhũm mẽ kot ixkuxwa hkukamã na ã inhĩpêx anê. 8Na hte mẽ kêp amrakati xwỳnhjaja mẽ akõt pa rãhã nê. Ka mẽ amã mẽmo arĩgro hã tanhmã mẽ ho ajuta hto hprãm nê rĩ mẽ ho ajuta nê mẽ kãm mẽmoj gõ. No kêt pa kot paj ri mẽ akõt ixpa ka mẽ ixto mex ry ho apa hkêt nê. Kot paj tokyx mẽ apiitã mẽ are. Jakamã ãm hãmri na ã inhĩpêx anê. Anê.

Patre krãhtũmjaja kot Rajare hã àmnênh ã harênh

9Rôm nhũm Jerujarê nhõ xwỳnhjaja ra Jejus Petãn wỳr hpõx ã harênh ma nê kot omunh mã ma hwỳr mra. No ãm tapxipix pumunh mã hwỳr mrar kêt nê. Mãânên kot akupỹm ho htĩr xwỳnhta pumunh mã nhũm mẽ ma hwỳr mra. 10-11Na pre ra Ijaew ohtô nê Jejus kot akupỹm Rajare ho htĩr ã harênh ma hãmri nê mẽ inhõ patre kaga nê Jejus kõt amnhĩ xunhwỳ. Jakamã nhũm patre krãhtũmjaja tee ri ja hã mẽ omu nê axpên mã:

— Nà kot puj mẽ Jesus pix pĩr kêt nẽ. Kot puj mẽ mããnẽn hkõt Rajare pĩ hãmri nhũm wa hixi hamẽ mẽ kêp hapêx japêr. Anẽ.

Jesus kot Jerujarẽ hwỳr àr ã harênh

Matêwre 21.1-11; Makre 11.1-11; Rukre 19.28-40

12Tã nhũm apkati nhũm Ijaew Jerujarẽ kamã mẽ hkĩnhja kryx nẽ Jesus ra mẽ hwỳr àhtêp o mõi ã harênh ma. 13Hãmri nẽ axpẽn mã:

— Kwa ma pu mẽ mõi nẽ pô hkwỳ jakà nẽ kutã ho mra. Anẽ.

Hãmri nẽ hkwỳ jakà nẽ hamỳ nẽ ma kutã ho mra. Hãmri nẽ ra hkaxpa nẽ omu nẽ hkĩnh nẽ. Nẽ kãm:

Pa. Nã ãm hãmri na ka mẽ ixwỳr mõi. Tĩrtũm na pre mẽ ixwỳr amẽ ka ã amõi anẽ.

Tĩrtũmja mex o mex. ãm hãmri na pre mẽ ixwỳr amẽ.

Kot kaj mẽ inhõ pahi hpãnhã mẽ ixto amnhĩptar o ri apa. Anẽ.

14Hãmri nhũm Jesus nhỹri jumẽnre pumu nẽ hwỳr tẽ nẽ hã nhỹ nhũm mẽ pimràatã ma akupỹm Jerujarẽ hwỳr mõi. Tĩrtũm kapêr ã kagà htũm ra kot ja jarênh kot:

15 Pa Jerujarẽ nhõ xwỳnhjaja. Kwa mẽ tee ri amnhĩ kukamã ajamxpêr ho amã ma hkêt nẽ.

Ota mẽ anhõ pahi nyw ra mẽ awỳr jumẽnre hã nhỹ nẽ hpõx o tẽ. Anẽ.

16No Jesus kõt mẽ ixpa ho mẽ ixpa xwỳnhjaja pa mẽ ã kot amnhĩ nhĩpêx anhỹrja ã omu nẽ tee ri hkukamã ijamxpêr nẽ axpẽn mã:

— Kwa mo na ri ã amnhĩ nhĩpêx anẽ nẽ jumẽnre hã nhỹ nẽ mẽ hkõt mõi? Anẽ.



Juãw 12.12-15

Tã nhũm arĩgro hõ hã ty nẽ akupỹm kaxkwa hwỳr api pa prem hã omu hãmri nẽ kormã Tĩrtũm kapẽr ã kagà htũm kot hkukamã ã harẽnh kot anhỳrja mã ijamaxpẽr kurẽ kumrẽx. Hãmri nẽ axpẽn mã harẽnh o:

—Kwa ãm hãmri na Tĩrtũm kapẽr ã kagà htũm kot ra ã Kraja jumẽnre hã ỹr nẽ mẽ hkõt mõr ã hkukamã kot harẽnh anhỳrta. Anẽ.

17Hãmri nhũm Jejus kot Rajare mã kapẽr pẽ akupỹm ho htĩr ã omunh xwỳnhjaja arĩ nhãm mẽ hkwỳjẽ mã ujarẽnh o pa. 18Nhũm mẽ kuma nẽ ma Jejus wỳr omunh mã mra. 19Hãmri nhũm Parijew nhõ xwỳnhjaja tee ri ja hã mẽ omu nẽ axpẽn mã:

—Kwa na pu mẽ tee ri Jejus nẽ mẽ kãm pakapẽr kaprỳ nhũm mẽ pamar kêt nẽ ra piitã hkõt amnhĩ nhĩpêx o pa. Kwa nà. Anẽ.

Ijaew kêt xwỳnhjẽ jarẽnh

20Tã nhũm ra Gres kwỳjaja Ijaew kõt hkĩnh kaxyw ma Jerujarẽ hwỳr mẽ hkõt mra nẽ mẽ ãhkõ hã Tĩrtũm mã mex o mex ã harẽnh o hkõt mra.

21Jakamã nhũm mẽ nhỹri mẽ inhõ pẽ Firipti pumu nẽ hwỳr mra. Firipti kęp pyka pẽ Garirej kamã krĩ pẽ Pesêj nhõ xwỳnh nhũm Gres nhõ xwỳnhjaja omu nẽ hwỳr mra nẽ kãm:

—Pa. Kwa na pa mẽ inhmã Jejus pumunh prãm nẽ. Tanhmã kot pa wem amnhĩ to nẽ omu nẽ kãm ixkapẽr? Anẽ.

22Hãmri nhũm mẽ kuma nẽ ma Andre hwỳr mẽ o mra nẽ kãm mẽ harẽ. Hãmri nẽ wa ma Jejus wỳr mẽ o mra nẽ kãm mẽ harẽ nẽ kãm:

—Pa Pahihti. Ota Gres nhõ xwỳnhjaja kãm apumunh prãm nẽ awỳr mõ. Mẽ pahkĩnhã mẽ kęp Ijaew kêt tã mẽ kãm apumunh prãm nẽ. Anẽ.

Jejus kot amnhĩ kukamã amnhĩ jarẽnh

Matêwre 16.24-28; mããnẽn Apokarip 2.10, 12.11

23Hãmri nhũm Jejus mẽ omu nẽ mẽ kãm tanhmã amnhĩ jarẽnh to. Kot mẽ ohtõ nẽ mẽ nẽ htyk nhũm mẽ kukwak ri Tĩrtũm wa kuri htĩr tũm nẽ pa ho pa hã mẽ kãm amnhĩ jarẽ nẽ mẽ kãm:

—Nà na ra ixtyk ã arĩgro hwỳr apkati grẽre. Ixpẽ Tĩrtũm kot mẽ akaxyw ixãm xwỳnh jakamã kot paj mẽ apiitã mẽ anẽ ty hãmri nẽ akupỹm ixĩr nẽ ma kaxkwa hwỳr akupỹm api. 24Mẽ axohtõ nẽ nhỹrmã Tĩrtũm mẽ wa ixri atĩr tũm nẽ apa ho apa kaxyw kot paj ã amnhĩ nhĩpêx anẽ. Kwa mẽ ã ixte amnhĩ jarẽnh anhỳrja ma nẽ mẽ amnhĩ krãm haxàr tỳx nẽ ri hã apa. Te ixte mẽmo hy kot amnhĩ nhĩpêx pyræk. Na htem pikap hagjẽ nhũm te htyk pyrà nẽ pika kaxwỳnh kãm hikwỹ. Tã gaa nẽ higrõt nẽ hprêk nẽ ô. Nẽ ô rax kumrẽx. Hyja pyxire nẽ hikwỹ htã kamã ô rax kumrẽx. Nom koja mẽ hkre hkêt nẽ nhũm ô hkêt nẽ. Na hte ã mẽmo hyja amnhĩ nhĩpêx anẽ. Ja pyrà nẽ kot paj mẽ anẽ ixtyk kêt nẽ te mẽ kot mẽmo hy hkre hkêt nhũm hprêk nẽ ô hkêeta pyræk ka mẽ ixkukwak ri

Tĩrtũm mẽ wa ixri atĩr tũm nẽ apa hkêt nẽ. Jakamã kot paj mẽ anê ty nhũm mẽ ijaxà. Hãmri pa akupỹm ixtĩr ka mẽ axohtô nẽ ixkukwak ri wa ixri atĩr tũm nẽ apa ho apa.

25—Nẽ koja mẽ ixpĩ pa mẽ anê ty. Tã mẽ ate ixkôt amnhĩ nhĩpêx o apa xwỹnhjaja. Koja mẽ ixtã mẽ apar mã tã kwa kêr ka mẽ atyk pymaj ixkaga hkêt nẽ. Kwãr mẽ mãmrĩ tanhmã ixtã mẽ ato ka mẽ nhỹrmã Tĩrtũm mẽ wa ixri axte amnhĩ xà kamã ajamak kêt kumrêx nẽ atĩr tũm nẽ amex nẽ apa ho apa. No kot kaj mẽ ixkĩnhã jar amã amex pix prãm hãmri nẽ nhỹrmã wa ixri atĩr tũm nẽ apa hkêt nẽ. 26Kot kaj mẽ ã ixkôt amnhĩ nhĩpêx anhỹr o ri apa hãmri nhũm mẽ kot inhĩpêx pyræk o mẽ anhĩpêx. Hãmri ka mẽ nhỹrmã ma ixkôt kaxkwa hwỹr api nẽ kamã ixri atĩr tũm nẽ apa ho apa. Hãmri nhũm Inhĩpêêxà ixtã mẽ apumu nẽ mẽ ato mex kumrêx. Anẽ.

Tĩrtũm kot Jejus mã kapêr ã harênh

Matêwre 3.17, 17.5

27Tã nhũm Jejus tee ri amnhĩ kukamã htyk mã hamaxpêr nẽ hkaprĩ htỹx nẽ. Nẽ hkôt mẽ ixpa ho mẽ ixpa xwỹnhjê mã amnhĩ jarẽ nẽ mẽ inhmã:

—Hêxta waa nẽ. Na pa tee ri amnhĩ kukamã ijamaxpêr. Nẽ tee ri amnhĩ xà htỹx kamã ijamak kukamã ijamaxpêr pê ra amnhĩ kamã ixkahak nẽ. Nom ixte pika piitã hkôt mẽ kot ixkôt amnhĩ xunhwỹr xwỹnhjê nẽ ixyk kaxyw ixwryk kênã. Jakamã kot paj Inhĩpêêxà kot mẽ kêp ixpytâr kaxyw tanhmã amnhĩ to hwỹr to hkêt nẽ. Anẽ.

28Hãmri nẽ hpãnhã Hipêêxà mã kapêr nẽ kãm:

—Pa Papaj. ãm mẽmoj pixi na inhmã hprãm. Kê mẽ piitã ixkukwak ri amex o amex ã apumu. Ja na kêt inhmã hprãm tỹx kumrêx.

Anhỹr o Tĩrtũm mã amnhĩ jarẽ. Hãmri nhũm kuma nẽ kaxkwa rũm kãm kapêr. Kỹxpê kãm kapêr nẽ kãm:

—Nà na pa pre ra ã mẽ kãm amnhĩ to amnhĩrĩt anê nhũm mẽ ja hã ixpumu. Tã kot paj axte akukwak ri amnhĩ to amnhĩrĩt nhũm mẽ piitã axte inhmex o inhmex ã ixpumu. Anẽ.

29Nhũm pre ã Tĩrtũm Jejus mã kapêr anê. Hãmri nhũm mẽ kot mẽ ixkuri mar o kuhê xwỹnhjaja kuma no ãm hprĩ hã kot kãm tanhmã kapêr toja mar mex kêt nẽ. Nẽ htỹx ho ãm mẽmoj tã hkamnhĩx. Jakamã nhũm mẽ hkwyjaja axpên mã:

—Kwa mo na wehe? Na mãn katõtøk nà? Anẽ.

Nhũm mẽ hkwyjaja mẽ kãm:

—Nà na katõtøk kêt. Tĩrtũm kapêr o wryk xwỹnh mãn tanhmã kãm kapêr to. Anẽ.

30Hãmri nhũm Jejus mẽ kãm:

—Nà Tirtũm tãm na inhmã kapêr. Nom pa ixte mar kaxyw inhmã kapêr kêt nê. Mê kajaja mê ate ixtã mar kaxyw na kÿx pê ã inhmã kapêr anê. Anê.

Hãmri nê mê kãm:

31—E hãmri. Kot paj tokyx mẽ apiitã mẽ ate amnhĩ tomnuj pãnhã amnhĩrer kaxyw tanhmã amnhĩ nhĩpêx to. Jao mãñnên Satanasti pê hihtÿx xà ho ijapêx. 32Koja mẽ pĩ kahpa hã inhô pa kÿxpê ajêt. Tirtũm kot mẽ awÿr inhmênh tã nhũm mẽ ã inhĩpêx anê pa ty. Jakamã koja pika piitã hkôt mẽ ohtô nê ixkôt amnhĩ xunhwÿ nê amnhĩ kaxyw inhmã hamaxpêr rãhã ho pa. Anê.

33Mê ixte tanhmã htyk to hã harênh mar kaxyw nhũm pre ã mẽ inhmã amnhĩ jarênh anê. 34Hãmri nhũm mẽ kot mẽ ixkuri mar o kuhê xwÿnhjaja tee ri kot htyk ã amnhĩ jarênhja ma nê kãm:

—Kwa mẽ ixte amnhĩ wÿr kamã ijamak o ixpa xwÿnhja htĩr tũm nê pa ho pa xwÿnh na. Tirtũm kapêr ã kagà htũm kot ã harênh kot anhÿr tã ka ã ri mẽ kot apĩr nhũm atyk ã amnhĩ jarênh anê. Ate Tirtũm kot mẽ ixwÿr amênh xwÿnh ã amnhĩ jarênh tã ã ri atyk ã amnhĩ jarênh anê. Kwa xà apê mẽ ixte amnhĩ wÿr kamã ijamak o ixpa xwÿnh kêt? Anê.

35Hãmri nhũm mẽ kuma nê amnhĩ tã mẽ kãm:

—Tÿ ixpê tãm kênã. Tã kot paj tokyx mẽ are. Jakamã kêr ka mẽ ixte arĩ mẽ akamã ixpa ri ixkôt amnhĩ xunhwÿ nê amnhĩ kaxyw ixkôt ajamaxpêr o ri apa. Te ixpê kanê hpôk pyrãk jakamã na pa hte mẽ kãm Tirtũm kapêr o mẽ ahkre o ri ixpa. Nom kot paj kritpêm mẽ akôt ixpa ry hkêt nê. Jakamã kwa kêr ka mẽ tokyx te mẽ kot kanê hpôk nhĩrã kamã ri mẽ pa xwÿnh kot amnhĩ nhĩpêx pyrã nê Tirtũm kôt amnhĩ nhĩpêx o ri apa. Kormã mẽ akôt ixpa ri. Kot paj tokyx ma mỗ nhũm te ra kamàt kô pyrãk. Na hte kamàt kô kamã mẽ pa xwÿnhjaja tee ri rĩt mex mã nom rĩt mex kêt nê. Nê mẽmoj pumunh mex kêt nê. 36Jakamã kwa mẽ tokyx ixte arĩ mẽ akamã ixpa ri amnhĩ kaxyw inhmã ajamaxpêr nê ixkôt amnhĩ xunhwÿ. Te ixpê kanê hpôk nhũm kamã mẽ arĩt mex pyrãk. Jao ixpyrà nê te mẽ apê kanê hpôk nhĩrã mex pyrãk o amnhĩ nhĩpêx. Nê ixpyrà nê tãm ri amnhĩ nhĩpêx o apa. Anê.

Nhũm pre ã mẽ kãm kapêr anê hãmri pa mẽ kêp ixkato nê ma nhãm mỗ.

Mê hkwÿjaja kot Jejus kôt hamaxpêr kêt ã mẽ harênh

37Na pre hte Jejus mẽ noo mã mẽ kot aa mẽmoj pumunh kêt kwÿ ho anhÿr rax o pa. Tã nom nhũm mẽ ohtô nê hã omu nê ãm hã omu nê kêp Tirtũm kot mẽ pahwÿr mênh xwÿnh ã hkôt hamaxpêr kêt nê. 38Nom ra mẽ hkukamã Tirtũm nhÿ hã kapêr jarênh o pa xwÿnh pê finat Ijaisja mẽ hkukamã ja hã mẽ harê nê hã kagà. Nê hã kagàja o:

Pa Pahi Maati. Nà ra ixte mẽ kãm ajarēnh o ixpa ryy htã no nhũm mẽ inhma nê ãm inhma.

Nê mẽ kot axihtỳx o axihtỳx ã ajarēnh mar tã no ãm ajarēnh ma nê amnhĩ kaxyw akôt hamaxpěr kêt nê. Anê.

39Mẽ kãm Tĩrtũm kapěr mar prãm kêt jakamã na prem mããnēn Jejus kệp Tĩrtũm kot mẽ pahwỳr mēnh xwỳnh hkôt hamaxpěr kêt nê. Nhũm pre finat Ijaisja axte mẽ hkukamã ja hã mẽ harē nê mẽ hã kagà. Nê hã kagà ho:

40 Na pre Tĩrtũmja tanhmã amnhĩ nê mẽ hkrã hto nhũm mẽ hkôt hamaxpěr kêt nê.

Ra mẽ kot hihtỳx o hihtỳx ã omunh tã omu nê ãm omu.

Nê mẽ kot kapěr mar tã amnhĩ tomnuj kaga hkêt nê.

Nê Tĩrtũm kot mẽ nê mẽ kot amnhĩ tomnuj o hapêx prãm xàj hkôt amnhĩ xunhwỳr kêt nê. Anê.

41Kormã Jejus mẽ hwỳr wrỳk kêt ri nhũm finat Ijaisja hpimtir kãm kot amnhĩ to rax kumrēx ã omu nê hkukamã ã harēnh nê hã kagà anê.

42Hãmri nhũm Ijaew krãhtũm kwỳjaja hkwỳjê rom amnhĩ kaxyw Jejus kôt hamaxpěr nê hkôt amnhĩ xunhwỳ. Tã Parijew nhõ xwỳnhjaja kot ã mẽ kot amnhĩ nhĩpêx anhỳr ã mẽ harēnh mar pymaj ja hã amnhĩ to amnhĩrít kêt nê. Mẽ kot Tĩrtũm kapěr o mẽ ahkre xà hã ixkreja nê mẽ kator pymaj nhũm mẽ kãm amnhĩ to amnhĩrít kêt nê. 43Na prem hamaxpěr o:

— Nà kot paj ja hã amnhĩ to amnhĩrít nhũm mẽ amnhĩ nê ixtomnuj nê. Hãmri nê amnhĩ pyrã nê axpēn mã inhmex ã ijarēnh kêt nê.

Anhỳr o mẽ umaj amnhĩ kukamã hamaxpěr o pa. Nom Tĩrtũm tãm kot amnhĩm mẽ mex ã mẽ harēnhja nhũm mẽ hkukamã hamaxpěr kêt nê.

Jejus kot Hipêêxà nhỹ hã kapěr ã harēnh

44Nhũm Jejus axte mẽ kãm kapěr nê kỳx pê kapěr nê mẽ kãm:

— Nà koja mẽhõ amnhĩ kaxyw ixkôt hamaxpěr hãmri nê ixkôt pix mã hamaxpěr kêt nê. Mããnēn amnhĩ kaxyw kot mẽ awỳr inhmēnh xwỳnhja kôt hamaxpěr. 45Wa ixte amnhĩ nhĩpêxja te tipxi pyrãk jakamã koja mẽ tanhmã ixte amnhĩ nhĩpêx to hã ixpumu nê te kot Tĩrtũm kot amnhĩ nhĩpêx ã omunh pyrãk.

46— Nê te ixpê kanê hpôk nhũm inhĩrã kamã mẽ apa pyrãk kaxyw na pre Inhĩpêêxà mẽ awỳr inhmē pa mẽ awỳr wrỳ. Ixte kapěr o mẽ ajahkre ho ri mẽ akôt ixpa kaxyw. Jakamã koja mẽhõ amnhĩ kaxyw ixkôt hamaxpěr nê ixkôt amnhĩ xãm hãmri nê te kanê hpôk nhĩrã kamã rít mex o pa pyrãk o amnhĩ nhĩpêx. Jao amnhĩ nhĩpêx nyw o amnhĩ nhĩpêx o pa. 47-48No mẽ kot ixkapěr mar nê ãm mar xwỳnhjaja te mããnēn Inhĩpêêxà kapěr mar nê ãm mar pyrãk. Mỳrapê koja mẽ nhỹrmã

ma kuwy hwÿr pa nê mẽ kot amnhĩ tomnuj mÿrapê kamã pa ho pa. Tã no ã mẽ ate amnhĩ nhĩpêx anhÿr o ri mẽ apa kaxyw na pa pre mẽ awÿr ixwryk kêt nê. Ixte mẽ ate amnhĩ tomnuj pãnhã amnhĩrer par kaxyw na pa pre mẽ awÿr wrÿ.

49—Nê na pa hte amnhĩ krã hkôt tanhmã ri mẽ amã ixkapêr to ho ri ixpa hkêt nê. ãm kot mẽ awÿr inhmênh xwÿnhja nhÿ hã na pa hte tanhmã mẽ amã ixkapêr to ho ri mẽ akôt ixpa. 50Tã mẽ kot Tĩrtũm kapêr mar nê amnhĩ kaxyw hkôt hamaxpêr xwÿnhjaja koja mẽ nhÿrmã wa ixri htĩr tũm nê mex nê pa ho pa. Jakamã na pa hte tanhmã kot inhmã karõ hto xà hkôt pix mã tanhmã mẽ amã ixkapêr to ho ri ixpa. Anê.

Jejus kot hkwyjê hpar kuhõnh ã harênh

Rukre 22.24-27

13 1Tã nhũm ra Pas ã mẽ ixkĩnhta ahtêp. Pas ã na hte mẽ ixpê Ijaewjaja axpên wÿr akuprõ nê hã ôwêhti hkra nyw pa nê ho anê nê hkur o ixkrĩ. Amnepê m Tĩrtũm kot pika pê Ejit rũm mẽ inhĩgêxjê kator kaxyw nhũm mẽ nojarêr nê ã hkwy hpar nê ho anhÿr nê hkwy hkurta pyrãk. Na prem nojarêr nê mẽ hkra my kot wa mẽ kêp htyk pumaj ôwêhti hkra nyw kwÿ hpa nê ho anê nê ĩ hku. Jakamã nhũm arĩ mẽ ixpê mẽ hkanrêhã mẽ htãmnhwÿjaja ã mẽ kot amnhĩ nhĩpêx anhÿrja mã ijamaxpêr nê hã ixkĩnh kaxyw mẽ urãk nê hkwy hpa nê kuku. Jakamã nhũm ra Pas ahtêp nhũm Jejus amnhĩ kukamã tanhmã hamaxpêr to kurê kumrêx. Ra ma akupÿm Hipêêxà hwÿr àpir xà hã arĩgro hwÿr apkati grêre. Jakamã nhũm akupÿm nojarêr ã amnhĩ pumu nê kãm mẽ pahte hkôt amnhĩ xunhwÿr xwÿnhjê japê jakamã kãm mẽ pajapê rãhã mẽ panê htyk mã. 2Tã nhũm myt axà pa mẽ Pas ã ixàpkur o ixkrĩ. Nhũm Simãw Kariot kra Jut Kariotja mããnen mẽ ixkutã apkur o nhÿ. Kêp mẽ ixkwÿ htã nhũm pre Satanasti tanhmã hkrã hto nhũm ra axtem nê kot mẽ kãm Jejus kurê xwÿnhjê nhĩhkram haxàr kaxyw.

3-4Tã pa mẽ kormã axpên kutã ixàpkur kaxyw ixkrĩ hpa nhũm Jejus kãnhmã xa nê hinõkà kapa nê toajti py nê ho amnhĩ krax pre. Kot amnhĩ to rax ã amnhĩ pumunh tã ja hã amnhĩ to jarkrar pê tanhmã ri mẽ inhnoo mã amnhĩ nhĩpêx to ho pa hkêt. Kêp mẽ inhõ pahi htã te kêp mẽ inhmã àpênh xwÿnh pyrãk o amnhĩ nhĩpêx o pa. 5Jakamã toajti py nê ho amnhĩ krax pre nê pasiiti hõ py nê kamã gô hkwy ru nê ho mẽ ixpar kuhõ nê toajti o mẽ ixpar grã ho mō. 6ã mẽ inhĩpêx anhÿr o mō. Pê ra hpãnhã Simãw Pêtre hpar kuhõnh kaxyw nhũm tee ri amnhĩ tã omu nê kãm:

—Tk. Kwa apê inhmã axàpênh xwÿnh kêt kênã kot ka kêt ri axtem nê ixpar kuhõ Pahihti. Apê mẽ inhõ Pahi kênã kot ka kêt ã mẽ inhĩpêx anê. Anê.

7Hãmri nhũm kãm:

—Kwa nà. Kormã ate ja hã amnhĩ tã ixpumunh mex kêt. Nom kot kaj nhỹrmã aprĩ hã amnhĩ tã ixpumu. Anẽ.

8Hãmri nhũm kãm:

— Nà nom kot kaj ãm ixpar kuhõnh kêt nẽ. Kwarĩ. Anẽ.

Hãmri nhũm Jejus kãm:

— Tôe. Kot paj apar kuhõnh kêt nẽ ka te apê ixkwý hkêt pyræk. Anẽ.

9Hãmri nhũm tee ri kuma nẽ kãm:

— Tôe mamrĩ ixpar kuhõ. Nom ixpar pix kuhõnh kêt nẽ. Mãänën inhĩkra kuhõ nẽ ixkuk kuhõ. Inhmã ixte apyræk prãm tỳx kumrëx kênã. Anẽ.

10Hãmri nhũm Jejus kãm:

— Nà amỹkry hkõt mẽ wỳr xwỳnhjaja na htem mex nẽ axte wỳr kêt rãhã hikwý. Na htem ãm amnhĩ par pix kuhõ nẽ hikwý. Ja pyrã nẽ Tĩrtũm kot mẽ anê mẽ ate amnhĩ tomnuj ho hapêx par xwỳnhjaja te amỹkry hwỳr mẽ axwỳr nẽ amex pyræk. Ka mẽ te mẽ kot amnhĩ par pix kuhõnh ta pyrã nẽ axte tanhmã amnhĩ tomnuj to hãmri nẽ Tĩrtũm mã amnhĩ jarënh kurê kumrëx kê anê amnhĩ katut kõt ate amnhĩ tomnujta mẽ nẽ ho hapêx. Na pre ra mẽ anê mẽ ate amnhĩ tomnuj o hapêx. No ãm mẽ apiitã hkêt. Ota arĩ mẽ anhĩõja pyxire nẽ arĩ amnhĩ tomnuj rãhã ri pa. Jakamã te wỳr kêt nẽ arĩ grã htyk rax kãm ri pa pyræk. Anẽ.

11Nhũm pre ã Jejus mẽ inhmã kapêr anẽ. Ra kot hprĩ hã mẽ kot kãm hkurê xwỳnhjê mã õr mã xwỳnhja pumunh jakamã te wỳr kêt nẽ arĩ grã htyk rax kãm ri pa pyræk ã ã harënh anẽ.

12Tã mẽ ixpar kuhõnh pa nẽ akupỹm hinõkà py nẽ haxà nẽ nhỹ hãmri nẽ mẽ inhmã:

— E mẽmo kaxyw na pa we ã mẽ apar kuhõnh anẽ? Kot paj ixprĩ hã mẽ amã amnhĩ jarê ka mẽ inhma. 13-14Na ka htem ixto “mẽ ijahkre xwỳnh” nẽ ixto “pahihti” anhỹr o ijarënh o ri apa. ãm hãmri na ka htem ã axpën mã ijarënh anẽ. Ixpê mẽ ajahkre xwỳnh nẽ mãänën ixpê mẽ anhõ pahihti htã inhmã mẽ ate tanhmã axpën nhĩpêx to ho apa hprãm xàj na pa ã mẽ apar kuhõnh anẽ. Tã kêr ka mẽ ixpyrà nẽ tanhmã axpën to mex to ho ri apa. 15Jao amnhĩ kuxwar axpën to mex pê mẽmoj to axpën kutã anojarêt rãhã ho ri apa. 16Kwa mẽ ixkapêr ma nẽ kãm amnhĩ krãm haxàr tỳx rãhã ho ri apa. Mẽ ate amnhĩ to rax o ijakrenh kêt. Te ixpê mẽ anhõ patrãw nhũm mẽ ate inhmã tanhmã amnhĩ nhĩpêx to ho apa xwỳnh pyræk. Nẽ te ixte mẽmoj tã mẽ amã karõ nhũm mẽ ate inhmar nẽ inhmã tanhmã mẽmoj nhĩpêx to pyræk. Tã te ixpê mẽ anhõ patrãw pyræk tã pa ã mẽ apar kuhõnh anẽ. Ka mẽ amnhĩ tã ixpumu hãmri nẽ amnhĩ xwar tanhmã axpën to ajuta hto ho ri apa. No ri axpën pumu nẽ ajamaxpêr o: “Tk. Nà ixte amnhĩ to rax o hakrenh kênã kot pa kêt ri tanhmã ho ajuta hto. Kê tãm mãn pa ixto ajuta.” Anhỹr o ajamaxpêr o ri apa hkêt nẽ.

17—E na pa ã mẽ amã ixujarênh anê. Kot kaj mẽ inhma nê ixujarênh kôt ã axpên nhîpêx anhÿr o ri apa. Hã kot kaj mẽ akînh nê ri apa. Anê.

Jejus kot amnhî tâ hã àmnênh xwÿnh o amnhîrit ã harênh

Matêwre 26.20-25; Makre 14.17-21; Rukre 22.21-23

18Nhũm Jejus arî mẽ inhmã kapêr nê mẽ inhmã:

—Kot kaj mẽ apiitã mẽ akînh nê apa hkêr nê. Ixte mẽ arênh xwÿnhjaja mẽ apiitã mẽ apumunh mex. Jakamã na pa Tirtũm kot mẽ apiitã mẽ ate amnhî tomnuj o hapêx par kêt ã mẽ anhîõja jarê. Tirtũm kapêr ã kagà htũm kot harênh kot:

Ixkutã apkur o ÿr xwÿnhjê hõ koja axtem nê mẽ kot kãm ixkurê xwÿnhjê nhîhkram ijaxà. Kêp ixkôt pa ho pa xwÿnh tâ koja axtem nê ã inhîpêx anê.

Anhÿr o kot harênh. Tã koja tokyx ã inhîpêx anê. 19Nom kormã kot ã inhîpêx anhÿr kêt ri na pa hkukamã mẽ amã harê. Jakamã koja ã inhîpêx anê ka mẽ ja hã ixpumu nê ra ixte amnhî kukamã mẽ amã amnhî jarênhhta mã ajamaxpêr nê ixpê Tirtũm rũm mẽ awÿr ixwrÿk xwÿnh kôt ajamaxpêr tÿx kurê kumrêx.

20—Kwa mẽ ixkapêr ma nê amnhî krã kamã kãm ajamaxpêr tÿx o ri apa. Koja mêhõ ixte mẽ hwÿr mẽ arênh xwÿnhjê hã tanhmã mẽ ato mex to. Hãmri nê te pa kot tanhmã ixto mex to pyrãk. Nê koja mêhõ tanhmã pa ixto mex to nê mãânên te kot mẽ awÿr inhmênh xwÿnhhta tanhmã ho mex to pyrãk. Anê.

21Nhũm pre ã Jejus mẽ inhmã kapêr anê. Hãmri nê tee ri amnhî kukamã hamaxpêr nê hkaprî nê mẽ inhmã:

—Hêxta waa nê. Nà kot kaj mẽ atõ mẽ kot kãm ixkurê xwÿnhjê nhîhkram ijaxà. Kwa mẽ amnhî krã kamã ixkapêrja mã ajamaxpêr tÿx nê. Anê.

22Hãmri pa mẽ amnhî tâ kuma nê tee ri axpên pumunh o ixkrî. 23Ixpê Juãw na pa pre ixpê Jejus krãmnhwÿ mex ã ìhkô hã ixàpkur o inhÿr 24nhũm Simãw Pêtreja ixpumu nê inhmã nomgôr nê kawax pê inhmã:

—Kwa mẽ pahtõ nhîxi hã hkukja nà? Anê.

25Hãmri pa kuma nê Jejus mã kãm:

—Kwa Pahihti. Mẽ ixtõ koja we ã anhîpêx anê? Anê.

26Hãmri nhũm mẽ inhmã:

—Nà kot paj pãwti hõ py nê guhkrax kãm ho mry kagô nhek nê kot mẽ ìhkram ijaxàr mã xwÿnhhta mã kugô ka mẽ hkôt omu. Anê.

Hãmri nê kupy nê ho mry kagô nhek nê Simãw Kariot kra Jut Kariotja mã kugô nhũm kupy. 27Pyrja kôt nhũm Satanasti tanhmã hkrã hto. Hãmri nhũm Jejus te kot kãm amnhî to nojarêr pyrãk o amnhî tâ kãm kapêr nê kãm:

—E kwa tokyx nà. Aně.

28-30Hāmri nhũm kuma nē kato nē ma kamàt kô kamã htēm kurê kumrëx. Hāmri pa mē ixàpkur o ixkrī xwýnhjaja Jejus kot ã kãm kapër anhÿrja ã kuma nē tee ri hkukamã ijamaxpër. Hāmri nē kot ma mē hkĩnh ã mēõ hwýr japrôr kaxyw ma htēm ã hkamnhĩx. Nhũm mē ixkwýjaja axtem Jejus kot mē kêp amrakati xwýnhjê mã mēmoj nhõr ã kãm karõ nhũm ma mē hwýr htēm ã hkamnhĩx. Kêp mē inhmã mē ixkàxpore jamãr o pa xwýnh jakamã pa mē ã ixtýx mēmoj tã hkamnhĩx aně.

Jejus akupým nojarêt nē mē kãm mēmoj tã karõ hã harënh

Matêwre 22.39-40; mãâněn Wam Juãw 3.11-24

31-32Hāmri nhũm Jejus mē inhmã:

—Nà kot kaj mē tokyx mēmoj pumu nē Tirtũm mã mex o mex ã harë nē ijaxwýja inhmã inhmex o inhmex ã ijarë. Kot kaj mē tokyx mēmojta pumu kãm ga.

33—Te mē apê ixkra pyrãk tã kot paj arĩ ri mē akôt ixpa grire hãmri nē ma akupým api. Kot kaj mē tee ri jar ijapêr o ri apa nom nhÿri ixpumunh kêt nē. Nē kormã tokyx ma ixkôt apa hkêt nē.

34—E kot paj axte mē amã mēmoj tã karõ. Kormã ixte mē amã ja hã karõ hkêt. Kêr ka mē amã axpën kĩnh o ri apa. Te pa inhmã mē ajapê pyrãk o axpën nhĩpêx rãhã ho ri apa. **35**Kot kaj mē ã amnhĩ nhĩpêx aně nhũm mē akwýjaja ja hã mē apumu nē mē apê ixkwý hã mē apumunh kurê kumrëx. Aně.

Simãw Pêtre kot Jejus ã amnhĩ to hêx kukamã harënh

Matêwre 26.31-35; Makre 14.27-31; Rukre 22.31-34

36Nhũm Jejus ã kot mē ixrer nē ma nhÿhým mõr ã amnhĩ jarënh aně hãmri nhũm Simãw Pêtre tee ri kot amnhĩ jarënh ma nē kãm:

—Kwa Pahihti. Nhÿhým kot kaj kêt mõ pa mē akôt ixpa hkêt nē? Aně.

Hãmri nhũm kãm:

—Nà ma inhmõr xàta wýr kot kaj mē kormã ma ixkôt apa hkêt nē. Nom kot kaj mē nhÿrmã ma ixkôt apa. Aně.

37Hãmri nhũm Simãw Pêtre kãm:

—Kwa mo kot pa mē omu nē tokyx ma akôt inhmrar kêt nē? Inhmã akôt ixyk puma hkêt kênã. Kwãr mē mãmrĩ atã ixpĩ. Inhmã ajapê htýx kumrëx kênã. Aně.

38Hãmri nhũm Jejus kãm:

—Xà ãm hãmri na ka ã inhmã amnhĩ jarënh aně Simãw Pêtre? Xà amã ixkôt atyk puma hkêt? Kwa o kora. Kojã apkati hkôt krãhyre hkàr kêt ri ka ra mē umaj ate ixkôt apa hkêt ã amnhĩ tã axãprãr o axkrunëpxi kãm ga. Kwa amnhĩ krã kamã ixkapërja mã ajamaxpër týx nē. Aně.

Jejus kot Tirtũm nhõ krĩ jarẽnh

Eprẽw 11.16

14 ¹Nhũm Jejus arĩ mẽ inhmã kapẽr nẽ mẽ inhmã: —Kwa ã ixte mẽ amã amnhĩ jarẽnh anhyrja ma nẽ tee ri amnhĩ kukamã ajamaxpẽr nẽ akaprĩ hkêt nẽ. Arĩ amnhĩ kaxyw Tirtũm mẽ wa inhmã ajamaxpẽr tỳx rãhã ho ri apa. ²Inhĩpêêxà nhõ krĩ kamã ixkre xohtôô. Âm hãmri na pa ã mẽ amã harẽnh anẽ. Tã kot paj ma akupỹm hwỳr api nẽ mẽ akutêp mã amã mẽ anhõrkwỹ ho mex. ³Hãmri nẽ ho mex pa nẽ rĩ man akupỹn mẽ awỳr wrỳ. Hãmri nẽ ma akupỹm amnhĩ kõt mẽ ato ixàpir pa ka mẽ Tirtũm mẽ wa ixkõt apa rãhã apa ho apa. Jakamã kwa mẽ ri akaprĩ nẽ apa hkêt nẽ. Anẽ.

Jejus te kêp Tirtũm wỳr pry pyræk

Epes 2.18

⁴—Nẽ ma nhỹhỹm inhmõr xàta ra mẽ ate harẽnh mar mex. Nẽ hwỳr pryja mããnẽn mẽ ate harẽnh mar mex. Anẽ.

⁵Hãmri nhũm Tomas tee ri kuma nẽ kãm:

—Kwa mẽ ixte nhỹhỹm amõr xàta pumunhre hã kot pa kêt mẽ hwỳr pryja pumu. Anẽ.

⁶Hãmri nhũm kãm:

—Kwa paa. Te ixpê Inhĩpêêxà hwỳr pry pyræk. Na htem amnhĩ kaxyw inhmã hamaxpẽr nẽ ixkõt amnhĩ xunhwỳ hãmri nẽ nhỹrmã ixkukwak ri pix mã ma Inhĩpêêxà mẽ wa inhõ krĩ hwỳr api. Ixkukwak ri pix mã na htem hprĩ hã Tirtũm kapẽr ma. Nẽ ixkukwak ri pix mã na htem wa ixri htĩr tũm nẽ pa ho pa. ⁷Kot kaj mẽ aprĩ hã ixpumũ nẽ mããnẽn te aprĩ hã Inhĩpêêxà pumunh pyræk. Tã ra mẽ ate tanhmã ixte amnhĩ nhĩpêx to hã ixpumunh mex jakamã mããnẽn te ra mẽ ate Inhĩpêêxà kot amnhĩ nhĩpêx ã omunh mex pyræk. Anẽ.

Jejus mẽ Tirtũm wa kot amnhĩ nhĩpêx tipxi hã wa harẽnh

Juãw 1.1, 10.30; Piripos 2.6; Korosẽ 2.9

⁸Nhũm Jejus ã mẽ inhmã kapẽr anẽ nhũm Firipti kuma nẽ kãm:

—Kwa nom mẽ inhmã inhno ho Anhĩpêêxà pumunh prãm. Kot pa mẽ omũ nẽ ixkĩnh tỳx kumrẽx. Anẽ.

⁹Hãmri nhũm Jejus kãm:

—Kwa na pa pre ra mẽ akõt ri ixpa ryy nẽ. Ka mẽ aprĩ hã ixpumunh mex nẽ. Kêt ra mẽ kot ixpumunh mex xwỳnhjaja te mẽ kot mããnẽn Inhĩpêêxàja no ho omunh mex pyræk. ¹⁰Wa ixte amnhĩ nhĩpêxja âm tipxi. Xà ate kormã amnhĩ krã hi mã ixkapẽr jaxàr tỳx kêt? Inhĩpêêxà mẽ wa ixte amnhĩ nhĩpêxja âm tipxi. Nẽ kot axpẽn pyræk. Jakamã na pa hte amnhĩ krã hkõt ri tanhmã amnhĩ nhĩpêx to ho ri ixpa hkêt nẽ. Âm

Inhĩpêêxà nhỹ hã na pa hte ri tanhmã mẽ amã ixkapêr to ho ri ixpa. Nê hihtỳx xà ho tanhmã amnhĩ nhĩpêx to ho ri ixpa. Ka mẽ ja hã ixpumu nê te ano ho Inhĩpêêxà pumunh pyràk. 11Kwa mẽ ixkapêr ma nê hkôt ajamaxpêr tỳx nê. Inhĩpêêxà mẽ wa ixte amnhĩ nhĩpêxja ãm tipxi. Nê kot axpên pyràk. Rỳ ka mẽ tee ri ja kukamã ajamaxpêr japêr hãmri nê ixte aa mẽ ate mẽoj pumunh kêt kwỳ ho anhỹr ã mãn ixpumu nê ja hã wa ixte amnhĩ nhĩpêx tipxi kôt ajamaxpêr.

12—Kwa mẽ ixkapêr ma nê amnhĩ krã kamã amnhĩ krãm haxàr tỳx nê. Mẽ ate amnhĩ kaxyw ixkôt ajamaxpêr xwỳnhjaja kot kaj mẽ ixte tanhmã amnhĩ nhĩpêx to ho ixpa hã ixpumu nê ixkôt ã amnhĩ nhĩpêx anhỹr o ri apa. Kot paj akupỹm Inhĩpêêxà hwỳr api nê kuri ixpa ho ixpa. Ka mẽ ixwakre kamã ixihtỳx xà ho tanhmã mẽ akwỳjê mã amnhĩ nhĩpêx to ho ri apa.

13—Nê kot kaj mẽ apê ixkwỳ hã tanhmã mẽoj tã ixwỳr to pa mẽ ama nê mẽ amã tanhmã mẽoj nhĩpêx to. Mẽ kot omunh nê Inhĩpêêxà mex o mex ã omunh kurê kumrêx kaxyw. 14Nà kot kaj mẽ apê ixkwỳ hã mẽoj tã ixwỳ pa mẽ ama nê mẽ amã tanhmã mẽoj to. Anê.

Jejus kot mẽ pahwỳr Tĩrtũm mẽ wa Karõ rênh ã kot amnhĩ jarênh

Juãw 7.37-39, 16.7-17; Ate 2.1-4;

mãänên Rõmãn 5.5; Wam Korĩt 12.7-11; Epes 3.16; Wam Juãw 2.27

15Nhũm Jejus arĩ mẽ inhmã kapêr nê mẽ inhmã:

—Nà kot kaj mẽ amã ixkĩnh hã kot kaj mẽ ixkapêr kôt pix mã ri amnhĩ nhĩpêx rãhã ho ri apa.

16—Kot paj akupỹm kaxkwa hwỳr api hãmri nê mẽ ato Inhĩpêêxà wỳ nhũm inhma nê mẽ awỳr kot mẽ ato ajuta xwỳnh maatita rê nhũm man mẽ awỳr wrỳ nê mẽ akaxwỳnh mã agjê. Hãmri nê mẽ akôt tanhmã mẽ ato ajuta hto ho pa rãhã ho pa. 17Wa Ixkarõ koja mẽ awỳr kurê nhũm mẽ amã agjê. Hãmri nê hprĩ hã mẽ amã Tĩrtũm kapêr o amnhĩrĩt o mẽ akôt pa ka mẽ aprĩ hã mar mex nê. No mẽ kêp Tĩrtũm kra hkêt xwỳnhjaja koja hprĩ hã wa Ixkarõ jarênh mar kêt nê. Mẽ kot wa ixkôt amnhĩ xunhwỳr kêt jakamã koja mẽ hkarõ mã gjêx kêt nê. ãm mẽ ate ixkôt amnhĩ nhĩpêx o apa xwỳnhjê pix wỳr koja wrỳ nê mẽ awỳr agjê nê mẽ akamã pa ho pa.

18—Nê ixte mẽ arer nê ma inhmõr mã tã kot kaj mẽ te mẽ hã awrãre pyrã nê ahte atỳx ri apa pyrãk kêt nê. Kot paj te pa akupỹn mẽ awỳr ixwrỳk pyrã nê mẽ awỳr wa Ixkarõ rê nhũm mẽ akãm agjê nê mẽ akamã pa ho pa.

19—Nê koja tokyx mẽ kot amnhĩ kaxyw Tĩrtũm mã hamaxpêr kêt xwỳnhjaja axte ixpumunh kêt nê. No mẽ papajaja kot puj mẽ tokyx axte nhỹri axpên pumu.

—Nê kot paj akupÿm ixtîr hãmri nê ixtîr tûm nê ixpa ho ixpa ka mē ixkukwak ri ajaxwÿja nhÿrmã Tîrtûm mē wa ixri atîr tûm nê apa ho apa.

20—Tã koja wa Ixkarõ mē awÿr wrÿ nê mē akarõ mã agjê ka mē aprî hã Tîrtûm mē wa ixte amnhî nhîpêx ã wa ixpumunh mex kurê kumrêx. Te wa ixte amnhî nhîpêx tipxi pyrãk o ka mē hã wa ixpumu. Nê mãânên mē papajaja te ra mē pahtipxi nê ri mē papa pyrãk ka mē hã amnhî pumunh mex kurê kumrêx.

21—Nê mē kãm ixkînh xwÿnhjaja na htem ixkapêr ma nê hkôt amnhî nhîpêx o pa. Jakamã nhûm Tîrtûm ixtã mē omu nê kãm mē hapê htÿx nê. Pa mãânên amnhî tã mē omu nê inhmã mē hapê htÿx nê. Jakamã kot paj mē kãm amnhî to amnhîrît nhûm te mē kot no ho ixpumunh pyrãk. Anê.

Nhûm pre ã Jejus hkôt mē ixpa ho mē ixpa xwÿnhjê mã amnhî jarênh anê. 22Hãmri nhûm Jutre hõja. Jut Kariot kêt axtem Jutre hõja Jejus axte kot mē inhmã pix mã kot amnhî to amnhîrît ã harênhja ma nê kãm:

—Kwa aprî hã mē inhmã mēmoj jarê mē ijahkre xwÿnh. Mon ka mē kêp akwÿ hkêt xwÿnhjê mã axte amnhî to amnhîrît kêt ã amnhî jarê? Nê ãm mē papxipix mã amnhî to amnhîrît ã amnhî jarê? Anê.

23Hãmri nhûm kãm:

—Nã mē amã ixkînh xwÿnhjaja na ka htem ixkapêr ma nê hkôt amnhî nhîpêx. Nhûm Inhîpêêxã ja hã mē apumu nê ixtã kãm mē ajapê htÿx nê. Hãmri pa wa mē akôt ixpa ho ixpa. Jao mē amã amnhî to amnhîrît mex o ixpa. 24Na pa hte amnhî krã hkôt ri mē kãm ixkapêr o ixpa hkêt nê. ãm Inhîpêêxã nhÿ hã na pa hte mē kãm ixkapêr o ri ixpa. Kot mē awÿr inhmênh xwÿnhhta nhÿ hã. Tã nhûm mē kãm inhmar prãm kêt jakamã na pa hte wa mē kãm mē apyrã nê amnhî to amnhîrît o ixpa hkêt nê.

25—E na pa kormã ixte mē akôt ri ixpa ri ã mē amã amnhî jarênh anê. 26Tã koja Inhîpêêxã ixpãnhã mē awÿr wa Ixkarõ rê. Ixte hã mē amã ixãhwÿr xã hkôt. Hãmri nhûm man mē awÿr wrÿ nê mē akaxwÿnh mã agjê nê mē akôt ri tanhmã mē ato ajuta hto ho pa. Nê ra ixte ã mē amã ixkapêr anhÿrja koja hprî hã mē amã ho amnhîrît mex nê. Ka mē amnhî krã kamã kãm ajamaxpêr nê hã ano htÿx nê ho apa. Anê.

Jejus kêp mē pajamakêtkati nhôr xwÿnh

Rômãn 5.1; Karatas 5.22; Piripos 4.7; Korosê 3.15

27Nhûm Jejus arî mē inhmã kapêr nê mē inhmã:

—Nê mē kêp ixkwÿ hkêt xwÿnhjaja na htem tee ri amnhî kukamã hamaxpêr o ri pa. Jao hkaprî nê pa. No pa na pa hte mē kurom ijamakêtkati nê ixkînh nê ri ixpa ho ixpa. Tã kot paj tanhmã mē ato ka mē ixpyrã nê ajamakêtkati nê axãmnhîx akînh nê ri apa. Jakamã kwa

mẽ ixte amnhĩ jarẽnh ma nẽ tee ri amnhĩ kukamã ajamaxpër o amã ma ho ri apa hkêt nẽ.

28—Na pa pre ra mẽ amã ma ixàpir nẽ nhÿrmã man akupÿn mẽ awÿr ixwÿrk ã mẽ amã amnhĩ jarẽ. Tã na pa ra ma akupÿm Inhĩpêêxà hwÿr ixàpir mã. Kot amnhĩ to rax o kot ijakrenh. Kot paj akupÿm hwÿr api nẽ kuri inhmex nẽ ixpa ho ixpa. Tã ka mẽ amã ixkĩnh hã kot kaj mẽ ma akupÿm hwÿr ixàpir ã ijarẽnh ma nẽ inhÿ hã akĩnh nẽ.

29—Kormã ma akupÿm ixàpir kêt ri na pa ã mẽ amã amnhĩ kukamã amnhĩ jarẽnh anẽ. Kêr pa mẽmo arĩgro hã ma akupÿm api ka mẽ ja hã ixpumu nẽ ajamaxpër o: “Nà ãm hãmri na pre mẽ inhmã amnhĩ kukamã akupÿm Hipêêxà hwÿr àpir ã amnhĩ jarẽ.” Anhÿr o ajamaxpër. Jao ixkôt ajamaxpër tÿx rãhã ho ri apa.

30—Kot paj tokyx axte tanhmã mẽ amã ixkapër to hkêt nẽ. Mẽ kêp ixkwÿ hkêt xwÿnhjê nhõ pahihti Satanastija na ra kot tanhmã ixto kaxyw. Nom koja tee ri tanhmã kãm ixto hprãm kaprÿ. Kurom ixihtÿx o ixihtÿx o ixte hakrenh par jakamã koja tanhmã ixto hkêt nẽ. 31Kwãr kãm tanhmã ixto hprãm xà hkôt tanhmã ixto pa omu. Inhmã Inhĩpêêxà hkôt ixte amnhĩ nhĩpêx prãm jakamã kot paj jahti mã arĩ xa nhũm te tanhmã kot ixto pyræk o inhĩpêx nom tanhmã ixto hkêt nẽ. Mẽ ate inhmã Inhĩpêêxà japê htÿx ã ixpumunh kaxyw kot paj ã mẽ anoo mã amnhĩ nhĩpêx anẽ. Nẽ mẽ ate ixte kãm tanhmã amnhĩ nhĩpêx to ho ri ixpa rãhã mẽ kot ixpĩr ã ixpumunh kaxyw. E hãmri. Ma pu mẽ mõi nẽ amnhĩ to Tĩrtũm wÿ. Anẽ.

Nhũm pre ã Jejus hkôt mẽ ixpa ho mẽ ixpa xwÿnhjê mã kapër anẽ. Pa mẽ kuma nẽ kãnhmã ixkuhê nẽ inhnojarêt nhũm axte mẽ inhmã awjarẽ.

Jejus te kêp mẽmo krô pyræk

Karatas 2.20; Wam Juãw 2.28

15 1Nhũm Jejus arĩ mẽ inhmã kapër nẽ mẽ inhmã: —Nà te ixpê mẽmo pĩ pê “uwa” anhÿr xwÿnhhta kakhô maati pyræk. Nẽ Inhĩpêêxàja te kot uwa hkre nẽ hamãr o pa xwÿnhhta pyræk. 2Nẽ mẽ kot ixkôt amnhĩ xunhwÿr xwÿnhjaja te mẽ kot uwa kakhô rũm krô pyræk. Na hte mẽ hkwÿjaja htÿx ri kêp ixkwÿ hã amnhĩ jarẽnh ã amnhĩ to hêx. Jao te kot krôja rã htã ô hkêt pyræk. Koja rã htã ô hkêt nẽ nhũm kot hamãr xwÿnhja tee ri omu nẽ kakhô nẽ krãhta nẽ kumẽ. No koja ô mex nẽ nhũm omu nẽ hkĩnh nẽ. Hãmri nẽ rã nẽ ô rax kaxyw tanhmã ho mex to. Tã na hte Tĩrtũm uwa krô jamãr xwÿnhhta pyrã nẽ ã mẽ ate ixkôt amnhĩ xunhwÿr xwÿnhjê nhĩpêx anẽ. 3No mẽ kajaja na ka prem mẽ kot ixkwÿ hã amnhĩ to hêx xwÿnhjê rom ixkapër mar tÿx nẽ. Nẽ amnhĩ kaxyw inhmã ajamaxpër nẽ ixkôt amnhĩ nhĩpêx mex o apa. Jao te mẽ ate krô rã nẽ ô rũnh pyræk o amnhĩ nhĩpêx.



Juãw 15.1-10

4—Na hte krôja amnhĩ krã hkôt ô hkêt nê. Âm kakhô pix kukwak ri na hte rã nê ô. Ja pyrã nê kot kaj mẽ ixkukwak ri pix mã inhmã hprãm xà hkôt ri tanhmã amnhĩ nhĩpêx to ho apa. Jakamã kwa kêr ka mẽ ixkapêr pix mãn mar o apa pa mẽ akôt ixpa ho ixpa. 5Te ixpê kakhô nhũm te mẽ apê krô pyrãk jakamã kot kaj mẽ inhmã hprãm xà hkôt tanhmã amnhĩ nhĩpêx to ho ri apa nê te krô rã nê ô rũnh pyrãk o amnhĩ nhĩpêx. No kot kaj mẽ amnhĩ krã hkôt ri amnhĩ nhĩpêx o ri apa nê te krô grã nê ô hkêt pyrãk o amnhĩ nhĩpêx.

6Na hte uwa krô nhô dônja nhỹri hã krô grã pumu hãmri nê kakhô nê hakà nê ma o mra nê kuwy kamã kurê nê ho hxêt pa. Ja pyrã nê mẽ kot htỳx ri ixkôt amnhĩ xunhwỳr ã amnhĩ jarênh xwỳnhjaja koja mẽ nhỹrmã amnhĩ xà htỳx kamã hamak rãhã ho pa.

7—Tã no mẽ kajaja. Kêr ka mẽ ixkapêr kôt pix mã amnhĩ nhĩpêx rãhã ho ri apa. Te mẽ pahtipxi nê ri papa pyrãk o amnhĩ nhĩpêx. Hãmri nê mãmri amã hprãm xà hkôt mẽmoj tã Tĩrtũm wỳ nhũm ama nê amã mẽmoj tã ate hwỳr xàta kôt kugô. 8Kot kaj mẽ Inhĩpêêxà mẽ wa ixkapêr kôt amnhĩ nhĩpêx o ri apa nhũm mẽ piitã ja hã mẽ apumu nê hamaxpêr o: “Hêxta waa nê. Jajaja na htem Tĩrtũm kot amnhĩ nhĩpêx o amnhĩ nhĩpêx o pa. Mãn Tĩrtũmja mex o mex.” Anhỹr o hamaxpêr.

9—Nê na pa hte Inhĩpêêxà kãm ijapê pyrãk o inhmã mẽ ajapê nê. Tã kêr ka mẽ amarĩ inhmã mẽ ajapê hã ri ixkôt amnhĩ nhĩpêx mex o apa. 10Na pa hte âm Inhĩpêêxà kapêr kôt pix mã ri amnhĩ nhĩpêx o ri ixpa. Jakamã na pa hte kãm ijapê hã ixkĩnh nê ri ixpa. Tã kêr ka mẽ ixpyrà nê ixkapêr kôt pix mã tanhmã amnhĩ nhĩpêx to ho ri apa. Nê ixpyrà nê inhmã mẽ ajapê hã amnhĩ pumu nê akĩnh nê ri apa.

11—E na pa ã mẽ amã ixkapêr anê. Mẽ ate inhmar nê ixpyrà nê axãmnhĩx ajamakêtkati nê akĩnh nê ri apa kaxyw. Tã kêr ka mẽ ã amnhĩ nhĩpêx anê nê te pa ixte ã amnhĩ nhĩpêx anhỹr pyrãk. Anê.

Jejus kot mẽ pamã axpên kĩnh tỳx ã mẽ pamã karô

12Nhũm Jejus arĩ mẽ inhmã kapêr nê mẽ inhmã:

—E kêr ka mẽ te inhmã mẽ ajapê pyrãk o mẽ amã axpên japê ho mẽ

amã axpën kính o ri apa. Jao axpën to mex o ri axpën kôt apa. **13**Koja mēhō kām hkràmnhwỳ japê htỳx nē nhũm ra mēhō mēmo mỳrapê kot kēp hpĩr mã nhũm tee ri hã omu nē nē kām amnhĩ mē nhũm kupĩ. Hãmri nhũm mē ja hã omu nē kām hkràmnhwỳ japê htỳx ã nē htyk ã axpën mã harē.

14-15—E kot paj axte mē apê inhmã mē axapênh xwỳnh ã mē ajarēnh kêt nē. Na hte mē ô patrãwjaja hprĩ hã kām mē apênh xwỳnhjê mã amnhĩ jarēnh kêt nē. Na htem ãm mē apênh pix ã mē kurē. Nom mē kajaja mē ate ixkapēr mar nē hkôt pix mã amnhĩ nhĩpêx jakamã kot paj hpãnhã mē apê ixkràmnhwỳ hã mē ajarē. Na htem axpën to hkràmnhwỳ nē ma nhỹhỹm pa kaxyw nē tanhmã amnhĩ kukamã hkràmnhwỳ mã amnhĩ jarēnh to. Tã mē apê ixkràmnhwỳ jakamã na pa hte ã amnhĩ kukamã mē amã amnhĩ jarēnh anē. Nom ja pix jarēnh kêt nē. Na pa hte mãänēn Inhĩpêêxà xô ri mē amã mēmoj piitã ho amnhĩrit o mē akôt ixpa.

16—Nē mē kajaja na ka prem ixpê mē akràmnhwỳ kaxyw ixãm kêt nē. Pa na pa pre amnhĩ kaxyw inhmã mē aprãm. Ixkapēr kôt pix mã ri mē ate tanhmã amnhĩ nhĩpêx to ho apa kaxyw. Te uwa krô ô rũnh nē aa grã hkêeta pyrãk. Jakamã kot kaj mē mēmoj tã Inhĩpêêxà wỳ nhũm mē ama nē mē ate mēmoj tã hwỳr xà hkôt amã kugô.

17—E. Kwa kêr ka mē amã axpën kính nē tanhmã axpën to ajuta hto ho axpën mã mēmoj kutã anojarêt pix o mãn kêt ri apa. Nà ja na kêt inhmã hprãm. Anē.

Mē kot Jejus kwỳjê kamã gryk xwỳnhjê jarēnh

Matêwre 10.22; mãänēn Juãw 7.7, 17.14; Wam Juãw 3.13

18—Nē koja ixkwỳ hkêt xwỳnhjaja kām mē aprãm nōkati. Tã kêr ka mē amnhĩ tã mē omu nē tee ri amnhĩ kukamã ajamaxpēr kêt nē. Ixkumrêx na prem kām ixprãm nōkati. Tã koja mē mã ixtã mē ato anē nē kām mē aprãm kêt nē. **19**Mē apê mē hkwỳ ronhỹx mē amnhĩ tã mē apumu nē kām mē ajapê nē. Nom apê mē hkwỳ hkêt. Ra ixte amnhĩ kaxyw mē arēnh jakamã na htem tee ixtã mē apumu nē kām mē akĩnh kêt o kām mē akurê nē. **20**Koja mē ixtã hpijaàm kêt nē nē mãänēn mē atã hpijaàm kêt nē. Nē mē anhĩpêx o te mē kot pa ixpê mē anhō patrãw nhĩpêx pyrãk. Ka mē ixpyrà nē amnhĩ xà htỳx kām ajamak o ri apa. Na pa pre ra mē amã ja jarē. Nom koja mē akwỳjaja jajê rom te ra mē kot ixkapēr mar nē hkôt amnhĩ nhĩpêxta pyrã nē mãänēn mē akapēr ma nē hkôt amnhĩ nhĩpêx o pa. Kwa kêr ka mē ixkapērja mã mãn ajamaxpēr tỳx rãhã ho ri apa.

21—Koja mē ixtã tanhmã mē anhĩpêx to. Mē kot Tĩrtũm kapēr kôt amnhĩ nhĩpêx kêt jakamã koja mē ã ixtã mē anhĩpêx anē. Tĩrtũm kot mē awỳr inhmēnh kôt hamaxpēr kêt nē ã mē anhĩpêx anē. **22**Ixwỳrỹk nē mē

kãm Tirtũm kapẽr jarẽnh o ri ixpa htã nhũm mẽ inhma nẽ ãm inhma nẽ ixkõt amnhĩ nhĩpêx kêt nẽ. Jakamã koja mẽ kot amnhĩ tomnuj xwỳnh ã amnhĩ to hpimxur kêt nẽ.

23—Nẽ koja mẽhõ kêp ixprãm nõkati nẽ mãânẽn te kêp Inhĩpêxà prãm nõkati pyrãk. 24Na pa pre mẽ piitã mẽ hkõt aa mẽ kot mẽmoj pumunh kêt kwỳ ho anhỹr o ri mẽ hkõt ixpa nhũm mẽ hã ixpumu. ãm papxipix na pa pre ã amnhĩ nhĩpêx anhỹr o ri mẽ hkõt ixpa nhũm mẽ hã ixpumu. Kêp ãm mẽ kot ja hã ixpumunh kêt ronhỹx prem axpẽn mã ijarẽnh o: “Tk. Mẽ pahte mẽhõja nhỹhỹnh mẽ pahwỳr hpõx ã omunhre hã kot puj kêt mẽ ri hã pahpijaãm o ri papa.” Anhỹr o nhỹx prem axpẽn mã ijarẽ. Tã ra mẽ kot ja hã ixpumunh mex tã axtem nẽ Inhĩpêxà mẽ wa mẽ kãm wa ixkurê nẽ. Jao mẽ kot amnhĩ tomnuj xwỳnh ã amnhĩ to hpimxur kêt nẽ. 25No Tirtũm kapẽr ã kagà htũm kot mẽ hkukamã mẽ harẽnh nẽ mẽ hã kagà nẽ kot mẽ hã kagà kot:

Mẽmo tanhmã kute mỳrapê na htem kãm ixkurê? Nã ãm amarĩ na htem kãm ixkurê ho pa. Anẽ.

Tã ã ixtã kagà kot anhỹr xà hkõt na htem ã kãm ixkurê anẽ. Jakamã koja mẽ mãânẽn ixtã kãm mẽ akurê nẽ. Nom kêr ka mẽ arĩ mẽ kãm ixkapẽr jarẽnh o ri mẽ hkõt apa nẽ tee ri amnhĩ kukamã ajamaxpẽr kêt nẽ.

26—Nẽ tokyx ma akupỹm Inhĩpêxà hwỳr ixàpir mã tã kot paj hwỳr pøj nẽ aa mẽ ato ijamakêtkati hkêt nẽ. Kot paj amnhĩ pãnhã mẽ awỳr wa Ixkarõ rẽ. Mẽ kot kãm: “Mẽ kutã nojarêt xwỳnh maati” anhỹr xwỳnhhta kot paj mẽ awỳr kurẽ nhũm ixpãnhã mẽ awỳr wrỳ nẽ mẽ amã agjê nẽ hprĩ hã mẽ amã Tirtũm mẽ wa ixto amnhĩrit o ri mẽ akõt pa. 27Kot kaj mẽ ama hãmri nẽ ma mẽ piitã mẽ hkõt ri mẽ kãm ixkapẽr jarẽnh o ri apa. Na pa pre ra mẽ kãm Tirtũm kapẽr jarẽnh ryy ho mẽ hkõt ri ixpa ka mẽ ixkõt ri inhmar o apa ry nẽ. Jakamã kêr ka mẽ ixwakre kamã arĩ mẽ kãm ixkapẽr jarẽnh o ri mẽ hkõt ri apa. Anẽ.

16 ¹Nhũm Jejus arĩ mẽ inhmã kapẽr nẽ mẽ inhmã: —Nẽ mẽ kot nhỹrmã ixtã tanhmã mẽ anhĩpêx to nhũm mẽ ate tee ri amnhĩ kukamã ajamaxpẽr nẽ mẽ umaj ixkaga pymaj na pa hte ã mẽ amã ixprĩ hã mẽmoj jarẽnh ry anẽ. ²Kot kaj mẽ kãm ixkapẽr jarẽnh o ri apa nhũm mẽ hkwỳjaja tee ri mẽ ama nhũm ja mẽ kêp omnuj nẽ. Nhũm mẽ Tirtũm kapẽr o mẽ ahkre xà hã ixkreja rũm amnhĩ nẽ mẽ ajano nẽ mẽ akwỳjê hpar o pa. Hãmri nẽ hamaxpẽr o: “E pu mẽ axte mẽ hkwỳjê pynê nẽ mẽ kupa. Tirtũm kãm ja mex kênã.” Anhỹr o htỳx hamaxpẽr o pa. ³Mẽ kot hprĩ hã Inhĩpêxà mẽ wa ixkapẽr mar mex kêt nẽ ã htỳx wa inhmã ja mex ã wa ijarẽnh anẽ. ⁴Nom mẽ ate ixkõt amnhĩ xunhwỳrta krax kãm na pa pre ã mẽ amã mẽ harẽnh anhỹr kêt nẽ. Arĩ mẽ akõt ixpa kênã. Kot ka mẽ ixkõt apa rãhã amã mẽ uma hkêt nẽ. Tã pa ra akupỹm inhnojarêt nẽ ã mẽ amã mẽ harẽnh anẽ. Jakamã koja mẽ nhỹrmã ã mẽ anhĩpêx anẽ ka mẽ amnhĩ tã mẽ omu nẽ ra ixte mẽ

akukamá ã mẽ harēnh anhỹrja mã ajamaxpēr kurê kumrēx nē tee ri amnhĩ kukamá ajamaxpēr kêt nē. E kwa ixkapērja mǎn mẽ amnhĩ krǎ him haxàr tỳx nē ri hǎ apa. Anē.

Jejus mẽ Tirtũm wa hkarõ jarēnh

5-6Nhũm Jejus arĩ mẽ inhmǎ kapēr nē mẽ inhmǎ:

—E na pa ra kot mẽ awỳr inhmēnh xwỳnhhta wỳr ra akupỹm inhnõjarēt ka mẽ ixte amnhĩ jarēnh ã inhma nē akaprĩ nē. Nē tee ri amnhĩ kukamá ajamaxpēr tǎ mẽ atõ aprĩ hǎ ma inhmõr xà ã ixkukjêr kêt nē. Rỳ inhmǎ: “Kwa mo kaxyw kot kaj kêt mẽ ixre nē ma akupỹm mõ? Xà we ja amǎ mex?” Anhỹr o mẽ atõ ixkukjêr kêt nē. 7Kêt ma akupỹm ixàpirja mẽ amǎ mex kumrēx. Kop ãm akupỹm ixàpir kêt ronhỹx mẽ amǎ mẽmoj kutǎ nojarēt xwỳnhhta ixpǎnhǎ mẽ awỳr wrỳk kêt nē. Tǎ kot paj ma akupỹm api nē amnhĩ pǎnhǎ mẽ awỳr kurê. Jakamǎ kwa mẽ ja ma nē tǎm ajamaxpēr o ri apa. 8Kõja ixpǎnhǎ mẽ awỳr wrỳ hǎmri nē mẽ kēp ixkwỳ hkêt xwỳnhjê mã mẽmoj to axkrunēpxi nē ho amnhĩrīt. Kõja mẽ kǎm mẽ kot tanhmǎ amnhĩ tomnuj to xà ho amnhĩrīt. Nē mãānēn mẽ kǎm tanhmǎ mẽ kot amnhĩ to mex to xà ho amnhĩrīt. Nē mãānēn Tirtũm kot nhỹrmǎ mẽ kot amnhĩ tomnuj mỳrapê tanhmǎ mẽ homnuj to xàta nhũm mãānēn mẽ kǎm ho amnhĩrīt. Kõja mẽ kǎm ja piitǎ ho amnhĩrīt.

9—Jakamǎ kõja mẽ ja kukamǎ tanhmǎ hamaxpēr to nē hamaxpēr o: “Kwa kot paj xep amnhĩ tomnuj kaga nē amnhĩ kaxyw Tirtũm Kra Jejus mã ijamaxpēr nē hkõt amnhĩ xǎm kêt nhũm Tirtũm nhỹrmǎ ixte amnhĩ tomnuj mỳrapê tanhmǎ ixto. 10Nà kot paj hkõt amnhĩ xǎm hǎmri nē ra uràk nē Tirtũm kapēr kõt tǎm ri amnhĩ nhĩpêx o ixpa. Na pre Jejus tǎm ri amnhĩ nhĩpêx o pa nhũm Tirtũm amnhĩ wỳr ho api pa mẽ axte jar nhỹri omunh kêt nē. 11Na xep Tirtũm nhỹrmǎ kot ma kuwy hwỳr mẽ kēp Jejus kwỳ hkêt xwỳnhjê nhõ pahi maatija mēnh ã ra amnhĩ kukamǎ hǎ amnhĩ jarê. Jakamǎ kwa arĩ ixpê hkwỳ jakamǎ kot paj tokyx Jejus kõt amnhĩ xǎm kêt nhũm hkõt kuwy hwỳr inhmē.” Anhỹr o hamaxpēr. Kõja ã wa Ixkarõja mẽ kēp ixkwỳ hkêt xwỳnhjê mã mẽmoj to amnhĩrīt mex anē.

12—Nē na pa kormǎ mẽ amǎ mẽmoj piitǎ ho amnhĩrīt kêt nē. Kormǎ mẽ ate aprĩ hǎ mẽmoj pumunh nē mar mã tǎm kêt. 13Tǎ kõja ixpǎnhǎ wa Ixkarõ mẽ awỳr wrỳ nē mẽ akarõ mã agjê hǎmri nē hprĩ hǎ mẽ amǎ Tirtũm kot amnhĩ nhĩpêx o amnhĩrīt o mẽ akõt pa ho pa. Nom kõja amnhĩ krǎ hkõt tanhmǎ mẽ amǎ ho amnhĩrīt to hkêt nē. Kõja ãm Tirtũm pix xõ ri mẽ amǎ ho amnhĩrīt o mẽ akõt pa. Jao hprĩ hǎ mẽ amǎ ixkõt mẽ ate amnhĩ nhĩpêx nyw o mẽ amǎ amnhĩrīt o mẽ akõt pa. ã kõja hprĩ hǎ ra ixte mẽ amǎ ixujarēnh xà hkõt axte mẽ amǎ mẽmoj to amnhĩrīt mex o pa anē.

14—Ně koja hprĩ hã mẽ amã pa ixto amnhĩrĩt o pa. Jao mẽ amã inhmex o inhmex ã ixto amnhĩrĩt o mẽ akõt pa. 15Inhĩpêêxà mẽ wa ixkapêrja ãm htipxi. Tã koja wa Ixkarõ ixkapêr xõ ri ã mẽ amã mẽmoj to amnhĩrĩt anẽ. Jao ra wa ijamẽ wa ixkapêr o amnhĩrĩt mex o pa. Kojã ã wa mẽ apê ixkwỳ hã mẽ ato mex o pa anẽ. Anẽ.

Mẽ kot akupỹm Jejus tĩr ã omunh ã mẽ harẽnh

16Nhũm Jejus arĩ mẽ inhmã kapêr nẽ mẽ inhmã:

—Ně kot paj tokyx mẽ ano pê akunok ka mẽ axte amnhĩ kaêx ã ixpumunh kêt nẽ. Nom kwa kêr ka mẽ tee ri ixkapêrja kukamã ajamaxpêr kêt nẽ. Kot paj ixtã apkati grêre ka mẽ axte ixpumu. Anẽ.

17-18Nhũm pre ã Jejus hkõt mẽ ixpa ho mẽ ixpa xwỳnhjê mã kapêr anẽ. Pa mẽ tee ri ã kapêr anhỹr ã kuma nẽ axpẽn mã:

—Kwa mo na ri ã amnhĩ jarẽnh anẽ? Nẽ tokyx mẽ pano pê pikunor tã hã apkati grêre nhũm axte mẽ pahte omunh ã amnhĩ jarẽ nẽ akupỹm Hipêêxà hwỳr àpir ã amnhĩ jarẽ. Pêr kapêrja ãm ri katii. Anẽ.

19Nhũm amnhĩ tã mẽ inhma nẽ mẽ inhmã:

—Kwa xà na ka mẽ kormã aprĩ hã ixkapêr ã inhmar kêt nẽ? 20Kot paj ty nhũm mẽ kêp ixkwỳ hkêt xwỳnhjaja ijarẽnh ma nẽ hkĩnh nẽ. No mẽ kajaja kot kaj mẽ akaprĩ nẽ amỳr o apa. Nẽ gaa nẽ akupỹm akĩnh nẽ. Kwa mẽ ixkapêrja ma nẽ kãm ajamaxpêr tỳx o apa. 21Te mẽ ate mẽ hpijagri xwỳnh kot amnhĩ nhĩpêx pyrãk. Na htem õhy xà nẽ gaa nẽ ra õhy xà htỳx nẽ. Nẽ hkĩnh kêt nẽ tee ri amnhĩ nhĩpêx o hikwỳ. Tã gaa nẽ hpijagri nhũm hkrare kato nhũm omu nẽ akupỹm hkĩnh nẽ axte õhy xà htỳx mã hamaxpêr kêt nẽ. 22Tã ã mẽ ate amnhĩ nhĩpêx anhỹr kaxyw. Kot kaj mẽ akĩnh kêt nẽ ri apa. Tã kot paj akupỹm tokyx ixtĩr nẽ axte mẽ awỳr ixkato ka mẽ ixpumu nẽ akĩnh nẽ. Hãmri nẽ akĩnh rãhã ri apa ho apa. Nhũm mẽhõ mẽ apumu nẽ tee ri tanhmã mẽ akĩnh nẽ mẽ ato kaprỳ ka mẽ arĩ akĩnh rãhã ri apa ho apa.

23—Ně ixte akupỹm kaxkwa hwỳr ixàpir nẽ amnhĩ pãnhã mẽ awỳr wa Ixkarõ rẽnh nhũm mẽ awỳr wrỳk nẽ hprĩ hã mẽ amã mẽmoj piitã ho amnhĩrĩt jakamã kot kaj mẽ axte amã mẽmoj tã ixkukjêr prãm kêt nẽ. Anẽ.

Jejus kwỳjaja kot àmnhĩx mẽmoj tã Tĩrtũm wỳr

Matêwre 18.19-20; Juãw 14.13-14

Nhũm Jejus arĩ mẽ inhmã kapêr nẽ mẽ inhmã:

—E kwa mẽ ã ixkapêr anhỹrja ma nẽ amnhĩ krã kamã kãm ajamaxpêr tỳx nẽ ho apa. Kot kaj mẽ apê ixkwỳ hã mẽmoj tã Inhĩpêêxà wỳ nhũm mẽ ama nẽ mẽ ate hã axàhwỳr xà hkõt mẽ amã mẽmoj tanhmã ho rỳ mẽ amã mẽmoj gõ. 24Na ka mẽ kormã apê ixkwỳ hã mẽmoj tã axàhwỳr kêt nẽ. Tã kêr ka mẽ amã mẽmoj tã hwỳr prãm nẽ mãmri

mëmoj tã hwÿr o apa. Kê më ama hãmri nê tanhmã më amã mëmoj nhÿpêx to ka më amnhÿ tã omu nê akÿnh nê.

25—Nê na pa pre më amã mëmoj jarênh kaxyw nê mëmoj tã haxwÿ nê më amã ixujarênh rax nê. Nom kot paj axte ã më amã ri ixujarênh anhÿr kêt nê. Kot paj tã ixprÿ hã më amã tanhmã Inhÿpêêxà jarênh to ka më aprÿ hã mar mex kurê kumrêx. 26Hãmri nê më kamjaja më apê ixkwÿ hã tanhmã amnhÿ to hwÿr to ho apa. Jakamã mo kaxyw kot pa kêt axte tanhmã më ato hwÿr to? Kot kaj më kamjaja amnhÿ to hwÿr jakamã arÿ ixte më ato hwÿr kaxyw ixto presija hkêt nê.

27—Na ka më ra amã ijapê nê. Nê ixte Inhÿpêêxà rÿm më awÿr ixwÿrk ã ixpumu. Jakamã nhÿm Inhÿpêêxàja ixtã mãânên kãm më ajapê nê. Tã kot kaj më kamjaja mëmoj tã amnhÿ to hwÿr o apa nhÿm më ama nê kãm më ajapê htÿx kãm më amã mëmoj gô.

28—Na pa pre Inhÿpêêxà rÿm amnê më awÿr wrÿ. Hãmri nê kãm hprãm xà hkôt tanhmã amnhÿ nhÿpêx to hpar o mō nê ra akupÿm hwÿr inhnojarêt kaxyw. Anê.

Nhÿm pre ã Jejus më inhmã amnhÿ jarênh anê. 29Pa më tã ixprÿ hã mar mex nê. Hãmri nê kãm:

—Tÿ. Nà na pa më tã ixprÿ hã ate amnhÿ jarênh ma. Ka amnhÿ tã haxwÿr nê axujarênh kêt jakamã pa më tã ixprÿ hã amar mex nê. 30Pêr ãm ate mëmoj piitã omunh par xwÿnh na ka. Jakamã ate më ijamaxpêr piitã hkôt aprÿ hã më ixpumunh par kumrêx kênã kot ka tanhmã më ijamaxpêr to hã më ixkukja. ãm hãmri na ka Tÿrtÿm rÿm awÿrk ã amnhÿ jarê. Anê.

31Hãmri nhÿm më inhma nê më inhmã:

—Xà ãm hãmri na ka më ixkôt ajamaxpêr tÿx nê? 32Kwa më o kora. Kot kaj më tokyx më umaj ixre nê anhgrà nê ma ahpÿnhã më anhō krÿ hwÿr mra. Mê kot ixkôt tanhmã më anhÿmex to pymaj kot kaj më ã amnhÿ nhÿpêx anê kãm ga. Kot paj ahte më kãm ixãm pyrãk o amnhÿ nhÿpêx nom ahte ixãm kêt nê. Inhÿpêêxà aa kot ixrere hã.

33—E ixkukwak ri më ajamakêtkati nê axãmnhÿx më apa kaxyw na pa ã më amã ixkapêr anê. Nom më kêp ixkwÿ hkêt xwÿnhjaja koja nhÿrmã ixtã më atomnuj tÿx o pa. Tã kêr ka më amã më uma nê tee ri amnhÿ kukamã ajamaxpêr o ri apa hkêt nê. Nhÿrmã ixte mëmoj punuj piitã ho ijapêx par ã arÿgrota ã kot paj më atã më ho ijapêx par kumrêx. Anê.

Jejus kot amnhÿ to Tÿrtÿm wÿr ã harênh

Rômãn 8.34; Eprêw 7.25

17 1Tã nhÿm Jejus më inhmã kapêr pa nê hpãnhã kaxkwa hwÿr rÿt nê Tÿrtÿm mã amnhÿ jarê nê kãm:

“Pa Papaj. E na pa ra amã hprãm xà hkôt tanhmã amã amnhÿ nhÿpêx to hpar o mō nê akupÿm awÿr inhnojarêt kaxyw. Jakamã

kot kaj ixpê Akra hã ma akupým amnhĩ wỳr ixto api. Mẽ kot ja hã ixpumunh nẽ amã amex o amex ã ajarẽnh o pa kaxyw. ²Na ra pyka piitã hkôt ri mẽ pa xwỳnh kwỳjaja amnhĩ kaxyw ixkôt hamaxpêr nẽ ixkôt amnhĩ xunhwỳ nom ka na ka pre inhmã mẽ agõ. Ixte mẽ htĩr tũm nẽ mẽ pa mã xwỳnh ã mẽ harẽnh kaxyw. Jakamã koja mẽ nhỹrmã ixkukwak ri pakuri htĩr tũm nẽ pa ho pa. ³Na mẽ ra ixkapêr mar mex nẽ. Nẽ ixpê Jejus Kris pê ate mẽ hwỳr inhmẽnh xwỳnhja kôt hamaxpêr mex nẽ. Nẽ apê Tĩrtũm ã ãm apyxi mex ã mããnẽn akôt hamaxpêr mex nẽ. Nẽ amex o amex ã akôt hamaxpêr nẽ kãm akĩnh nẽ. Jakamã koja mẽ nhỹrmã pakuri htĩr tũm nẽ pa ho pa. Nà koja mẽ anẽ.

⁴Amnepê m amnẽ pyka ja hwỳr inhnojarêr nhũm ate tanhmã ixte amnhĩ nhĩpêx to hã inhmã karõta na pa ra hatur xãm mẽn kaxyw. Na pa xatã mẽ kãm akapêr jarẽnh o ri mẽ hkôt ixpa. Jao ra mẽ kãm apê Pahi Maati hã apixi mex ã ajarẽ nẽ amex o amex nẽ axàhpumunh o axàhpumunh ã mẽ kãm ajarẽnh o ri ixpa. ⁵Jakamã e Papaj. Kêr ka tokyx ixpê akra hã ma akupým amnhĩ wỳr ixto api. Pa akupým awỳr pøj nẽ te amnepê m akuri ixpaja pyrã nẽ axte akuri ixpa ho ixpa.” Anẽ.

Jejus kot hkwỳjê ho Tĩrtũm wỳr ã harẽnh

Nhũm Jejus arĩ Tĩrtũm mã kapêr nẽ kãm:

⁶“E Papaj. Nà ra ate pyka hkôt inhmã mẽ õr xwỳnhjaja na pa ra mẽ kãm akapêr jarẽnh ryy ho ri mẽ hkôt ixpa nhũm mẽ akapêr kôt pix mã amnhĩ nhĩpêx o pa. ⁷Tã ixte anhỹ hã tanhmã amnhĩ nhĩpêx to ho ri ixpaja ra mẽ kot ja hã ixpumunh mex. ⁸Na pa pre hte axô ri mẽ ahkre ho ri ixpa nhũm mẽ amnhĩ kaxyw ixkôt hamaxpêr mex nẽ. Nẽ ate mẽ hwỳr inhmẽnh nhũm mẽ hwỳr ixwỳrkja ã mẽ kot ixpumunh mex.

⁹⁻¹⁰Tã ot pa mẽ ho awỳr o xa. Nom na pa mẽ kêp ixkwỳ hkêt xwỳnhjê ho awỳr kêt nẽ. ãm ate inhmã mẽ õr xwỳnhjê pix o na pa awỳ. Mẽ kêp akra jakamã mããnẽn mẽ kêp ixkraa. Jakamã na htem pamã pamex o pamex ã pajarẽnh o ri pa.

¹¹Axihtỳx o axihtỳx jakamã na ka pre amnhĩ xwar inhmã axihtỳx xà hkwỳ gõ pa te ixte axihtỳx pyrãk. Tã na pa ra akupým awỳr inhnojarêr kaxyw. Kot paj jar pyka hkôt ri ixpa ry hkêt nẽ. Nom ixkwỳjaja koja mẽ arĩ kamã pa jakamã kwa Papaj. Kêr ka inhmã mẽ omunh mex nẽ kê mẽ inhỹ hã tãm ri amnhĩ nhĩpêx o pa. Nẽ pahpyrã nẽ te ixkre tipxi kamã mẽ htipxi nẽ mẽ pa pyrãk o axpẽn kôt pa.

¹²Kormã mẽ kamã ixpata ã ate inhmã axihtỳx xà hkwỳ nhõrta o pa mẽ htãnopxar mex o ri mẽ hkôt ixpa. Jakamã nhũm mẽ ri ixkôt

amnhĩ nhĩpêx o pa. ãm Jut Kariot pix koja mẽ hkĩnhã tanhmã amnhĩ tomnuj to nê hapêx. No ãm ra akapêr ã kagã kot hkukamã ã kot amnhĩ nhĩpêx anhÿr ã harênh xàja kôt koja ã amnhĩ nhĩpêx anê nê hapêx.

13Tã na pa ra akupÿm awÿr inhnojarêt kaxyw jakamã na pa ixte tokyx mẽ rer mã xwÿnhjê ho awÿr o xa. Kormã mẽ hkôt ri ixpa ri. Mẽ kot inhmar nê ixpyrà nê hkĩnh nê hamakêtkati nê ri pa kaxyw.

14Na pa pre ra mẽ kãm akapêr jarênh ry nê nhũm mẽ ixpyrà nê akôt pix mã amnhĩ nhĩpêx o ri pa. Jakamã nhũm hte mẽ kêp ixkwÿ hkêt xwÿnhjaja tee ri ja hã mẽ omu nê axtem nê kãm mẽ hkurê nê. Nom mẽ kêp mẽ hkwÿ hkêt jakamã na htem ã mẽ kamã gryk anê.

15Tã na pa ã mẽ ho awÿr anhÿr o xa. Nom mẽ kot amnhĩ tomnuj xwÿnhjê hkàx ã mẽ pa kaxyw na pa mẽ ho awÿr kêt nê. Koja mẽ arĩ mẽ hkôt ri pa. Nom mẽ uràk nê amnhĩ tomnuj o pa pumaj na pa ã mẽ ho awÿr anê. 16Mẽ kêp mẽ hkwÿ hkêt. Axtem mẽ kot amnhĩ nhĩpêx. Te mẽ kot mẽ pahte amnhĩ nhĩpêx pyrãk jakamã kê mẽ amarĩ mẽ hkôt pa htã mẽ kot amnhĩ nhĩpêx kôt amnhĩ nhĩpêx o pa hkêt nê. ãm pahkôt pix mã amnhĩ nhĩpêx o pa. 17Akapêr pix na mex o mex jakamã koja mẽ hkôt amnhĩ nhĩpêx o pa nê gaa nê te pahte amnhĩ nhĩpêx pyrãk o amnhĩ nhĩpêx.

18Na ka pre amnê mẽ hwÿr inhmê pa pre ixte mẽ kãm akapêr jarênh o ri ixpa kaxyw mẽ hwÿr wrÿ. Nê amnhĩ pyrã nê mẽ kot akapêr jarênh o mẽ hkôt pa kaxyw pa mẽ kurê nê ma mẽ hwÿr mẽ kurê. 19Inhmã mẽ hapê jakamã kot paj amnhĩ grônh kôt nhãm mẽ kot axpên mã ri inhgrônh o pa xwÿnhjê mã amnhĩ gô. Amã hprãm xà hkôt. Ixkwÿjaja kot ja hã ixpumunh nê ixpyrà nê amã hprãm xà hkôt pix mã tanhmã amnhĩ nhĩpêx to ho pa kaxyw.” Anê.

Jejus kot hkrajê piitã ho Tĩrtũm wÿr

20Nhũm Jejus arĩ Tĩrtũm mã amnhĩ jarê nê kãm:

“Tã na pa ã jajê ho awÿr anê Papaj. Nom ixkôt mẽ pa ho mẽ pa xwÿnhjê pix o na pa awÿr kêt nê. Mããnên mẽ ô ri nhÿrmã mẽ kot ixkôt amnhĩ xunhwÿr mã xwÿnhjaja na pa mẽ ho ixpimràã tã mẽ ho awÿ. 21Kê mẽ pahpyrà nê te hamaxpêr tipxi pyrã nê ri axpên to pa. Nê pahte amnhĩ nhĩpêx kôt pix mã amnhĩ nhĩpêx o pa. Koja mẽ ã amnhĩ nhĩpêx anhÿr o pa nhũm mẽ kêp pahkwÿ hkêt xwÿnhjaja pahtã mẽ omu nê ate mẽ hwÿr inhmênh ã apumunh kurê kumrêx.

22Nê koja mẽ ixkukwak ri panhÿ hã te pahpyrà nê hamaxpêr tipxi nê ri pa pyrãk o amnhĩ nhĩpêx o pa. 23Na pa htem te ixkre tipxi kamã mẽ ixtipxi pyrãk o axpên nhĩpêx o ri ixpa. Te pahte axpên nhĩpêxta pyrãk. Tã koja mẽ ixwakre kamã ã axpên nhĩpêx anhÿr o pa nhũm mẽ kêp pahkwÿ hkêt xwÿnhjaja ja hã mẽ omu nê

hamaxpër o: 'Nà pë̃r ãm hãmri na pre Tirtũm tãm mẽ pahwÿr Jejus mẽ. Kãm hapê htÿx tã mẽ pahwÿr kumê nhũm wrÿ nê amnhĩ xwar kãm hkwyjê japê nê.' Anhÿr o koja axpën mã pajarênh o pa.

²⁴Amnepêm amrakati ri pa pre amã ijapê hã ri ixpa. Tã ot pa jajê ho awÿ. Ka na ka pre inhmã mẽ agõ. Tã ma awÿr inhmõr mã xàta wÿr na pa inhmã mẽ àpir prãm nê. Koja mẽ nhÿrmã ma pahwÿr api pu mẽ pahpiitã pahpimràatã pamã axpën japê hã ri papa ho papa.

²⁵E Papaj. Amex o amex tã mẽ kêp ixkwÿ hkêt xwÿnhjaja na kormã ate mẽ hwÿr inhmênh xwÿnh ã ixkõt hamaxpër kêt nê. Nom mẽ kot ixkõt amnhĩ xunhwÿr xwÿnhjaja na mẽ kurom ja hã ixkõt hamaxpër mex nê.

²⁶Na pa ra ixprĩ hã mẽ kãm akapër o amnhĩrĩt o ri ixpa. Tã kot paj axte mẽ kãm akapër kwÿ jarê. Amã ijapêta pyrã nê mẽ kãm axpën kĩnh ã axpën to pa kaxyw na pa mẽ kãm hã karõ. Kot paj inhĩ hã mẽ hkõt ixpa hkêt tã koja Pahkarõja mẽ hwÿr wrÿ nê mẽ hkarõ mã agiê nê te pa mẽ hkõt ixpa pyrãk o mẽ hipêx. Ja na pa inhmã hprãm. Tã koja anê. Jakamã na pa ã mẽ ho awÿr anê. Tã ãm ja pix Papaj." Anê.

Nhũm pre ã Jejus õ Papaj mã mẽ inhnoo mã amnhĩ jarênh anê pa mẽ ixpiitã hã kuma.

Mẽ kot Jejus pynênh ã mẽ harênh

Matêwre 26.47-56; Makre 14.43-50; Rukre 22.47-53

18 ¹Tã nhũm Jejus mẽ ixto Hipêêxà hwÿr pa. Hãmri nê ixkreja rũm ma tẽ nê Jerujarê rũm kato nê ma gõ pê Kirõ hwÿr tẽ pa mẽ hkõt ixpa ho ixpa xwÿnhjaja ma hkõt mra. Nê gõ hã rê nê hikjê hã mẽ kot mẽmo pĩ hkõ hkre xwÿnhja wÿr mra nê parpê ixkrĩ hpa. ²Na pre hte Jejus xatã hwÿr amnhĩ kõt mẽ ixto pa ho kuhê. Jakamã nhũm Jut Kariot kot mẽ kãm õr mã xwÿnhhta ra kot hwÿr mẽ ixpa ho ixkuhê xàta pumunh mex. ³Jakamã pa mẽ hwÿr pøj nê ixkrĩ hpa nhũm mẽ mẽ ixwÿr mra. Jut Kariot mẽ pòristijaja. Rõm nhõ xwÿnhjê nhõ pòristijê mẽ patre nhõ pòristijaja nhũm mẽ mẽ ixwÿr Jut Kariot kõt mra. Ijaew nhõ pahijê nhÿ hã mẽ ixwÿr mra. Piitã wapohti jamÿ nê pô hpõk nê kanê jamÿ nê mẽ ixwÿr hpõk o kato. ⁴⁻⁵Hãmri nhũm Jejus amnhĩ wÿr mẽ omu nê kãnhmã xa nê ma mẽ kutã tẽ. Jut Kariot kot mẽ kãm õr kaxyw nhũm amnhĩ tã omunh mex jakamã amnhĩ wÿr mẽ omu nê ma mẽ kutã tẽ. Hãmri nê mẽ hkaxpa nê mẽ omunh o xa nhũm Jut Kariot mẽ kuri xa nhũm Jejus mẽ omu nê mẽ kãm:

—Pa. Mêmioj japêr na ka mẽ pô hpõk o ri apa? Anê.

Hãmri nhũm mẽ kãm:

— Nà Jejus pê Najare nhõ xwÿnh japêr o na pa mẽ ri ixpa. Anê.
Hãmri nhũm mẽ kãm:

— Tÿ ot pa xa. Pa na ixpê Jejus. Anê.

6Hãmri nhũm mẽ kuma nê tee ri axpên pumu nê umaj katê ho axkamê nê kuhê. Nom katê ho pikamênh o ra rôrôk pa nê hikwÿ. 7Hãmri nê kànhmã kuhê hpa nhũm Jejus axte mẽ kãm:

— Kwa mẽ inhmã amnhĩ jarê. Mêhõ japêr o na ka mẽ apa? Anê.
Hãmri nhũm mẽ kãm:

— Jejus pê Najare nhõ xwÿnhta japêr o na mẽ ri ixpa kênã. Anê.

8Hãmri nhũm mẽ kãm:

— Kwa ra ixte mẽ amã amnhĩ jarênh kênã. Paa. Ijapêr o na ka mẽ ri apa. Jakamã kwa kêr ka mẽ ixkôt ri mẽ pa xwÿnhtaja tanhmã mẽ ho hkêt nê. Kê mẽ mãmri anhrã nê ma mra.

9Anhÿr o mẽ inhnê mẽ kãm kapêr. Na pre ra ham Hipêêxà mã mẽ ixtã kãm amnhĩ jarê nê kãm:

— Kormã mẽ kamã ixpa ri ate inhmã ixihÿx xà nhõrta o na pa mẽ htãnopxar mex o ri mẽ hkôt ixpa.

Anhÿr o mẽ ixtã kãm amnhĩ jarênh jakamã nhũm ã mẽ inhnê mẽ kot unênh mã xwÿnhjê mã kapêr anê.

Simãw Pêtre kot mêhõ pê hamak krãhyr ã harênh

Matêwre 26.51-54; Makre 14.47; Rukre 22.49-51

10Hãmri nhũm Simãw Pêtre tee ri Jejus ã mẽ omu hãmri nê õ wapo kapa nê jam ho apê nê ho hamak nhĩkjê krãhta. Mawti jamak krãhta. Mawtija mẽõ patre mã apênh xwÿnhjê hõ na pre nhũm Simãw Pêtre hamak krãhta. 11Hãmri nhũm Jejus ja hã omu nê nê kãm kapêr nê kãm:

— Tk. Kwa nà amarĩ xa nê akupÿm awapota hkàm haxà. Ixte mẽ anê amnhĩ xà htÿx kamã ijamak kaxyw na pa pre Inhĩpêêxà rũm amnê mẽ awÿr pika hwÿr wrÿ. Kê inhmã kãm hprãm xà hkôt pix mã na inhmã tanhmã amnhĩ nhĩpêx to ho ixpa hprãm. Jakamã kwãr mẽ mãmri tanhmã kãm ixto hprãm xà hkôt mãmri tanhmã ixto. Anê.

Mê kot Anas wÿr Jejus o htêm ã mẽ harênh

Matêwre 26.57-58; Makre 14.53-54; Rukre 22.54

12Tã nhũm pôristi mẽ mẽ hkrãhtũm nê mẽõ patre nhõ pôristijaja Jejus pynê nê hpa hpre hpa 13nê ma Anas wÿr o tẽ. Anasja Kajpas piinhõ na pre. Nhũm Kajpas kormã amgrãja ã Anas pyrã nê kêp mẽõ patre maati. 14Jakamã na pre ra Ijaew nhõ pahijê mã Jejus jarênh o:

— Nà kot puj mẽ Jejus pĩr tokyx anê. Kê tapxipix ty pu mẽ arĩ mÿrpê pahpiitã pajamakêtkati nê ri papa. Anê.

Jakamã nhũm mẽ Jejus pynê nê kormã ma patre maati hwÿr o tẽ.

Simãw Pêtre kot Jejus kôt pa hkêt ã kot amnhĩ jarênh

Matêwre 26.69-75; Makre 14.66-72; Rukre 22.54-62

15Hãmri pa ixpê Juãw mẽ ixkràmnhwỳ Simãw Pêtre mẽ pa wa ma mẽ hkôt wa tẽ. Nhũm mẽ ra mẽ inhõ patre maati nhõrkwỹ hwỳr Jejus o axà. Nhũm patre maati kot ixpumunh jakamã nhũm kãm àpênh xwỳnhja ixpumu nẽ inhmã anẽ pa mẽ hkôt axà. 16Nom nhũm Simãw Pêtre arĩ kapôt ã hakwa krem xa. Hãmri pa omu nẽ akupỹm hwỳr tẽ nẽ mẽhõ niti kot hakwa kre jamãr o ãm xwỳnhja mã anẽ nhũm kãm kahê xà mẽ nhũm mẽ ixkôt axà. 17Hãmri nhũm nita hprĩ hã omu nẽ kãm:

— Xêê. Pêr apê mẽ kot unênh nẽ o mõi mũj kôt ri mẽ pa xwỳnhjê hõ na ka mê? Anẽ.

Hãmri nhũm kuma nẽ kãm:

— Tk. Nà ixte mẽhõ myti ata pumunhre hã. Anẽ.

18Hãmri nhũm ra kôt ã kamàt nẽ ra kryy nẽ nhũm mẽ àpênh xwỳnh kwỳ mẽ mẽõ patre nhõ pôristi hkwỳjaja amnhĩm kuto nẽ hã ànhunh o kuhê. Nhũm Simãw Pêtre mẽ omu nẽ mẽ hwỳr tẽ nẽ mẽ ãhkô hã ànhunh o xa.

Patre maati kot Jejus kukjêr ã harênh

Matêwre 26.59-66; Makre 14.55-64; Rukre 22.66-71

19Rôm nhũm Anasja hêx rom tanhmã Jejus kukjêr to nẽ kãm:

— E kwa inhmã amnhĩ jarê. Tanhmã na ka hte we akôt mẽ pa ho mẽ pa xwỳnhjê jahkre hto ho apa wehe? Anẽ.

20Hãmri nhũm amnhĩ tã kãm:

— Nà na pa hte mẽ piitã mẽ noo mã ri mẽ kãm ixkapêr o ixpa. Tĩrtũm kapêr o mẽ ahkre xà hã ixkre kamã nẽ Tĩrtũm mã amnhĩ jarênh xà hã ixkre kamã pa hte mẽ piitã mẽ noo mã ri mẽ kãm tanhmã ixkapêr to ho ri ixpa. Na pa hte nhỹri ixpimxur pê ri mẽ kãm tanhmã ixkapêr to ho ri ixpa hkêt nẽ. 21Tã ka ixtã mẽ kot inhmar o kuhê xwỳnhjaja tanhmã ixtã mẽ hkukjêr to hkêt nẽ. ãm papxipix ri ixkukja. Kwa ixtã mẽ hkukja kê mẽ kot tanhmã ixkapêr mar to xà hkôt tanhmã amã ijarênh to nà? Anẽ.

22Hãmri nhũm patre nhõ pôristi hõja kuma nẽ hwỳr tẽ nẽ kãm:

— Tk. Kwa na htem ã patre maati mã kapêr anhỹr kêt nẽ. Na htem hã hpĩaam o kãm kapêr. Tã na ka axtem nẽ ri ã kãm akapêr anẽ. Anẽ.

Hãmri nẽ hinep hkura.

23Hãmri nhũm Jejus amnhĩ tã omu nẽ kãm:

— Kwa kot pa tanhmã mẽ amã amnhĩ to ixêx to ka mẽ hã inhma nẽ rĩ kormã tanhmã axpên mã ixto akapêr to rỳ hã ixtak. Nom ãm hãmri ixte mẽ amã amnhĩ jarênh tã ka axtem nẽ ri inhĩnep ixtak. Anẽ.

24Hãmri nhũm Anas tanhmã mar to hpa hãmri nẽ umre Kajpas wỳr kumê. Na pre Kajpasja kormã hitom kãm ri tanhmã amnhĩ nhĩpêx to

ho nhỹ nhũm Anas mẽ kãm anẽ nhũm mẽ kuma nẽ hwỳr Jejus o tẽ nẽ ho axà. Arĩ hpa hpre rãhã hwỳr o tẽ nẽ ho axà nhũm xa nẽ kãm amnhĩ jarẽ.

Simãw Pêtre kot axte Jejus kôt pa hkêt ã amnhĩ tã aprãr ã harẽnh

Matêwre 26.71-75; Makre 14.69-72; Rukre 22.58-62

25Nhũm Simãw Pêtre arĩ mẽ ãhkô hã ànhunh o xa nhũm mẽhõja kãm kapẽr nẽ kãm:

—Kwa pẽr apê Jejus kôt ri mẽ pa xwỳnhjê hõ na ka. Anẽ.

Hãmri nhũm kuma nẽ kãm:

—Tk. Kokỹ ixte mẽhõ nẽj pumunhre hã. Anẽ.

26Hãmri nhũm hpãnhã mẽõ patre maati mã àpênh xwỳnhja mãânẽn omu. Simãw Pêtre kot kêp hamak krãhyr xwỳnhhta kwỳ na pre. Jakamã nhũm hprĩ hã omunh mex kurê kumrẽx nẽ kãm:

—Kwa nà ka na ka mũtar pĩ hkôta kamã mẽ ãhkô hã xa pa apumu. Anẽ.

27Hãmri nhũm tee ri kuma nẽ axte mẽ kãm amnhĩ tã aprãr kãm hihtỳx nẽ. Jao ra mẽ kãm amnhĩ tã aprãr o axkrunẽpxija mẽ nhũm krãhyre hkàr kurê kumrẽx. Ra Jejus kot hkukamã harẽnh xà hkôt kêp hkwy hkêt ã amnhĩ tã aprãr o axkrunẽpxi.

Jejus kot Pirat mã amnhĩ jarẽnh

Matêwre 27.1-2, 27.11-31; Makre 15.1-20; Rukre 23.1-5, 23.13-25

28Hãmri nhũm mẽ ixpê Ijaew hkrãhtũmjaja ra Kajpas rũm Jejus o kato nẽ ma Pirat wỳr o tẽ. Piratja na pre te Rômjê nhõ pahi pẽ Sesti mã mẽ ixpê Ijaew jamãr o pa nhũm mẽ ma hwỳr o tẽ. Nhũm ra myt kator grire nhũm mẽ hwỳr o tẽ nẽ òrkwỹ kapem o xa. Pirat kêp Ijaew kêt jakamã nhũm mẽ òrkwỹ hwỳr gjêx kêt nẽ kapôt ã kuhê. Na hte Ijaew kormã Pas ã hkĩnh hãmri nẽ nhãm mẽ kêp Ijaew kêt xwỳnhjê nhõrkwỹ hwỳr gjêx kêt nẽ. Koja mẽ hwỳr agjê nẽ amnhĩ tomnu nẽ Pas ã apkur kêt nẽ. Jakamã nhũm mẽ Pirat wỳr Jejus o tẽ no ãm hwỳr o àr kêt nẽ. ãm ixkre kapem o xa. 29Hãmri nhũm Pirat mẽ hwỳr kato nẽ omu nẽ hã mẽ hkukja nẽ mẽ kãm:

—Kwa tanhmã na we amnhĩ tomnuj to ka mẽ ixwỳr o tẽ? Anẽ.

30Hãmri nhũm mẽ kãm:

—Nà kot amnhĩ tomnuj o pa xwỳnh kênã. Jakamã na pa mẽ awỳr o tẽ. Ate tanhmã kot amnhĩ tomnuj to hã harẽnh mar nẽ mỳrapê tanhmã ho kaxyw. Anẽ.

31Hãmri nhũm mẽ kuma nẽ mẽ kãm:

—Tk. Kwa mẽ kamjaja ma amnhĩ kôt o tẽ nẽ amnhĩ krã hkôt tanhmã ho. Mẽ ate tanhmã kot amnhĩ nhĩpêx to hã omunh xà hkôt. Anẽ.

Hãmri nhũm mẽ tee ri kuma nẽ kãm:

—Kwa amnepê mē ixpê Ijaewjaja na pa pre htem kên o mē kot amnhĩ tomnuj xwÿnhjê tak o mē kupa. Tã na ra Rôm nhõ pahihtija mē pamjaja mē ixte mē hpar nê mē ixkurê. Tapxipix kãm mē hpar ã àmnênh prãm. Jakamã kot kaj ÿ hã mē inhmã tanhmã hã axàmnhênh to kê mē kupĩ. Ra ja kaxyw mē kot mē ixkaxyw axãm kênã. Anê.

32Rôm nhõ xwÿnhjaja na htem mē kot amnhĩ tomnuj xwÿnhjê hpar kaxyw nê pĩ kahpa hã mē hanhõ nê mē kupa. Nhũm Jejus amnhĩ kukamã tanhmã mē kot hpĩr to hã mē omunh mex jakamã ra hprĩ hã mē inhmã mē kot tanhmã hipêx to hã mē harê. Jakamã nhũm pre ã Ijaew Pirat kot mē kãm hpĩr prãm xaj ã kãm kapêr kãm xihitÿx anê. 33Hãmri nhũm mē kuma nê akupÿm ôrkwy hwÿr axà nê amnhĩ wÿr Jejus ã karõ nhũm hwÿr axà nhũm kãm:

—E kwa inhmã amnhĩ jarê. Xà apê Ijaew nhõ pahi na ka? Xà ka na htem amnhĩ wÿr akãm hamak o pa? Anê.

34-36Hãmri nhũm kãm:

—Tÿ ãm hãmri na ka ã ijarênh anê. Nom jar pika ja kamã ixpê mēõ pahi hkêt. Axtem ixpê mēõ pahi na pa. Mo kaxyw na ka ã ixkukjêr anê? Xà na pre mēhõ ixte mē anhõ pahi Sesti kutã ixãm ã amã ijarê ka ama nê tee ri ixkukamã ajamaxpêr? Nà xà ãm hãmri amã Tirtũm kot Ijaew wÿr inhmênh ã ixpumunh prãm? Mo kaxyw na ka ã ixkukjêr anê? Anê.

Hãmri nhũm tee ri kuma nê kãm:

—Tk. Mo kot pa kêt ri axtem nê Tirtũm kot Ijaew wÿr amênh ã akukja? Mē apyrã nê ixpê Ijaew kêt kênã. Mē kot ixwÿr ato htêm xwÿnhjaja na mē ã ate amnhĩ jarênh anhÿr ã ajarênh anê. Nà mē akwÿjê mē mē anhõ patre krãhtũmjaja na mē ã inhmã ajarênh anê. Jakamã e aprĩ hã inhmã amnhĩ jarê. Tanhmã na ka we amnhĩ tomnuj to nhũm mē ixwÿr ato tẽ? Anê.

Hãmri nhũm kuma nê kê axte kãm:

—Nà ixpê pyka ja kamã mē õ pahi hkêt. Kop ãm ixpê pyka ja kôt mē õ pahi ronhÿx ra ixkôt ri mē pa xwÿnhjaja tanhmã ixtã mē ato. Nom jar ixpê mē õ pahi hkêt. ãm axtem ixpê mē õ pahi na pa. ãm hãmri na pa ã amã amnhĩ jarênh anê. Anê.

37Nhũm ã kãm amnhĩ jarênh anê hãmri nhũm tee ri kuma nê kãm:

—Xà apê mē õ pahi hõ na ka? Anê.

Hãmri nhũm kãm:

—Tÿ. Nà ãm hãmri na ka ã ijarênh anê. Na pa pre amnê pikaja wÿr wrÿ nê jar mē akamã ixkato nê mē akamã ixaptãr. Ixte tanhmã mē kãm ixkapêr to ho ri ixpa kaxyw na pa pre wrÿ nê mē akamã ixpa nê ãm hãmri mē kãm ixkapêr o ri ixpa. Na pa hte tãm ixkapêr o ri ixpa. Tã mē kot ixkapêr mar nê ixkôt ri amnhĩ nhĩpêx o mē pa xwÿnhjaja na htem ixpê mē õ pahihiti hã ijarênh o pa. Anê.

38Hãmri nhũm Pirat kot tãm kãm kapër ã amnhĩ jarẽnhja ã kuma nẽ kãm:

—Tk. Aa ixte pika ja kamã mẽhõ pumunh nhũm tãm kapër o pare hã. Anẽ.

Hãmri nẽ kapër ã kuma nẽ tee ri hkukamã hamaxpër. Hãmri nẽ akupỹm Ijaew wỳr ho kato nẽ mẽ kutã o xa nẽ mẽ kãm:

—Kwa tanhmã kot amnhĩ tomnuj tore hã. 39E mẽ inhma. Na pa hte amgrã mẽ arĩgro pẽ Pas kãm mẽ amã mẽ hagjẽnh xà rũm mẽ akwỳjẽ ho hpỹnh nẽ mẽ hapõj nhũm mẽ hamakẽtkati nẽ amnhĩx ri pa. Ka mẽ ja hã omu nẽ Pas ã akĩnh nẽ. Jakamã e. Pa mẽ amã mẽ anhõ “pahihti” jarẽnhja mã inhũre. E na pa ra kãm inhũre. Anẽ.

40Hãmri nhũm mẽ tee ri ã kapër anhỳr ã kuma nhũm ja mẽ kęp omnuj tỳx nẽ. Nhũm mẽ hã kàx pẽ gryk kamã kãm kapër kãm hihtỳx nẽ kãm:

—Tk. Kwa nà kãm anhũrer kêt nẽ. Kêt Parapas mã mãn anhũre. Anẽ.

Parapasja na pre hte tanhmã amnhĩ tomnuj tỳx to ho ri pa nhũm prem mỳrapẽ unẽ nẽ haxà. Tã nhũm mẽ axtem nẽ Pirat kot kãm urer prãm xaj Jejus kaga.

Mẽ kot Jejus tak ã mẽ harẽnh

Matêwre 27.27-31; Makre 15.16-21; Rukre 23.20-25

19 1Tã nhũm Pirat akupỹm òrkwỹ hwỳr Jejus o axà nẽ ò pòristijẽ mã hã amỳnẽ nhũm mẽ hwỳr mra nẽ htak o kuhẽ. 2Hãmri nẽ kęp pahi hã hpër o pikẽnh kaxyw kãm pahi hã mẽ ahkã nhĩpẽx nẽ hkrãm haxà. Nom axtem mẽmo mrõnhĩ te kot ronh kanẽre pyrãk xwỳnhja nhũm mẽ hikãx nẽ hkrãm haxà. Nẽ kęp pahi hã mẽ ê kamrêk py nẽ kãm haxà. 3Hãmri nẽ xatã hwỳr mra nẽ hinep htak nẽ hã hpër o pikẽnh o xa nẽ kãm:

—E apẽ Ijaew nhõ pahi punuti na ka. Anẽ.

4Hãmri nhũm Piratja akupỹm Ijaew wỳr kato nẽ mẽ kãm:

—E koja inhõ pòristi akupỹm mẽ awỳr ho kato ka mẽ omu. Na pa tee ri kot tanhmã amnhĩ tomnuj to hã hkukja. Për tanhmã kot amnhĩ tomnuj to hkêt kẽnã. Anẽ.

5Hãmri nhũm Jejus kato nẽ arĩ pahi hã àhkã tu nẽ ê kamrêk jaxà nẽ o xa nhũm Pirat mẽ kãm:

—E kwa mẽ omu nẽ kamã axukaprĩ hkêt wehe. Anẽ.



Juãw 19.1-3

6Hãmri nhũm patre krãhtũmjê mẽ mẽõ pôristijaja tee ri ja hã kuma nhũm ja mẽ kêp omnuj nê. Hãmri nê hã kãm kapêr kãm hihtỳx nê kãm:

— Tk. Kwa nà pĩ kahpa hã mãn anhô. Kê pĩ kahpa hã mãn ajêr nê ty. Anê.

Hãmri nhũm tee ri hã mẽ kuma nê mẽ kãm:

— Nà mẽ kam nê ma amnhĩm o tẽ nê mẽ kam amnhĩm ho anê. No pa kot paj ho anhỳr kêr nê. Mo mỳrapê kot pa kêr hã amỳnê nhũm mẽ kupĩ? Nà kwarĩ kot pa ho anhỳr kêr nê. Anê.

7Hãmri nhũm mẽ tee ri kuma nê kãm:

— Kwa kêp Tĩrtũm Kra hã amnhĩ jarênh kênã. Mẽ inhĩgêjtaja na prem ã mẽ ixte amnhĩ jarênh anhỳrja nê mẽ inhmã kapêr pa htem ã amnhĩ jarênh anhỳr kêr nê. Kojã mẽhõ ã ri amnhĩ jarênh anê nhũm mẽ ja mỳrapê kupĩ. Anê.

8Hãmri nhũm Pirat tee ri Jejus kêp Tĩrtũm Kra hã amnhĩ jarênhja ma nê kãm uma nê kãm tanhmã ho hprãm kêr nê. 9Hãmri nê akupỹm ôrkwỹ hwỳr ho axà nê axte hkukja nê kãm:

— Kwa aprĩ hã inhmã amnhĩ jarê. Nhỹhỹnh na ka pre mẽ ixwỳr mỗ? Anê.

Nom nhũm axte tanhmã kãm nê hkêr nê. ãm arĩ akryk mar o xa.

10Nhũm tee ri omu hãmri nê kãm:

— Kwa xà ate ixpumunh kêr? Inhỹ hã na htem mẽ kupa nê inhỹ hã akupỹm mẽ hapôj. Tã ka pêr aprĩ hã inhmã tanhmã amnhĩ jarênh to hkêr nê ri akryk akuhê. Anê.

11Hãmri nhũm Jejus kãm:

— Nom Tĩrtũm nhỹ hã pix mã na ka hte ã amnhĩ nhĩpêx anê. Kêp ãm Tĩrtũm kãm ja prãm kêr ronhỹx ka tee ri tanhmã amã ixto hprãm hkapyrỹ. Tãm kot mẽ ixkaxyw axãm kênã. Tã mẽ kot awỳr inhmênh nê ri ixtyk ã ijarênh xwỳnh pê Ijaew nhõ pahijaja. Ra mẽ kot ixkaga jakamã na mẽ ã amã ijarênh anê. Jakamã mẽ kot amnhĩ tomnuj tỳx o ajakrenh. Anê.

12Hãmri nhũm Piratja tee ri ã kapêr anhỳr ã kuma nê kot kãm urer prãm nê. Hãmri nê akupỹm Ijaew wỳr kato nê hã mẽ kãm kapêr nhũm mẽ tee ri kot kãm urer kaxyw ã amnhĩ jarênhja ma nê kãm ja prãm kêr kumrêx. Jakamã kaxpêr nê kãm kapêr nê kãm:

— Kwa nà ra kêp mẽ inhõ pahi hã kot amnhĩ to hêx kênã. Kot mẽhõ ã ri amnhĩ jarênh anê nhũm Rôm kamã mẽ panhõ pahi Sestija ja hã harênh ma nê kamã gryk tỳx nê. Tã kot kaj kãm anhũre nhũm ajarênh ma nê akamã gryk nê. Anê.

13Hãmri nhũm tee ri mẽ kuma hãmri nê ma pahi kot tanhmã mẽ harênh to xà hã kên pota wỳr ma tẽ nê hã nhỹ. Mẽ ixpê Ijaew kapêr kãm mẽ ixte kãm: “Kapata” jarênh xwỳnhhta wỳr kot tanhmã Jejus jarênh to kaxyw ma hwỳr tẽ nê hã nhỹ nhũm mẽ hwỳr o tẽ.

14Hāmri nhũm ra arĩgro pê sêsta. Mẽ ixpê Ijaewjaja mẽ ixte Pas ã amnhĩ tomnuj mỳrapê mry hkwỳ hpar nê Tĩrtũm kôt pix mã amnhĩ nhĩpêx ã amnhĩ jarênh xà hã arĩgroja kato. Jakamã nhũm kaxkwa nhĩpôk ri myt nhỹ nhũm Piratja mẽ kot Jejus kator ã harênh prãm xàj arĩ mẽ kãm ho mẽ õ pahi hã harê nê mẽ kãm:

—E ota mẽ anhõ Pahihtita. Anẽ.

15Hāmri nhũm mẽ tee ri ã harênh anhỹrja ã kuma nê kãm:

—Kwa apĩ ri. Ma o tẽ nê pĩ kahpa hã anhõ kê tokyx ty.

Anẽ nhũm tee ri mẽ kuma nê mẽ kãm:

—Kwa nà. Kêp mẽ anhõ pahi kênã kot paj kêt ri axtem nê mẽ apê kupĩ. Anẽ.

Hāmri nhũm mẽ kãm:

—Nà kêp mẽ inhõ pahi hkêt. Pahi Sesti pix na kêp mẽ inhõ pahi. Anẽ.

Mẽ kãm Sesti hkĩnh kêt tã ã kãm Jejus htyk prãm xàj ri harênh anẽ.

16Hāmri nhũm Pirat tee ri ja hã mẽ kuma nê tã Jejus ã pôristi mã karõ nê mẽ kãm:

—E mẽ mãmri ma o tẽ nê pĩ kahpa hã anhõ kê ty. Anẽ.

Hāmri nhũm mẽ kuma nê ma o tẽ.

Mẽ kot pĩ kahpa hã Jejus nhôr ã mẽ harênh

Matêwre 27.32-44; Makre 15.21-32; Rukre 23.26-43

17Hāmri nhũm pôristija Jejus mã õ pĩ kahpa gõ nhũm kutu nê ma mẽ hkôt hkjênh o mõ. Nhũm mẽ krĩ rũm ho kato nê ma hixêt prêk wỳr o tẽ. Hixêt prêkja mẽ kot harênh o: “Korkot” anẽ. No mẽ ixpê Ijaewjê kapêr kãm na pa pre htem harênh o “Mẽ hkrã hi xà” anhỹr xwỳnhta wỳr nhũm mẽ ma o tẽ nê hã ho api. 18Hāmri nê pikap pĩ kahpa xi nê hã Jejus xi nhũm hã nõ nhũm mẽ prek o ãhkra ho htỳx nê hpar o htỳx. Hāmri nê kaxyw hkakwỳ nê hkakwỳnh pa nê kamã pĩ kahpata xãm nê hity hpa nhũm Jejus kỳx pê ajêt. Hāmri nhũm mẽ määnên wa ho hamêxkrut nê pĩ kahpa hã wa kunhõ nhũm wa kuri ajêt. Wa kot tanhmã amnhĩ tomnuj to xwỳnhja wa ho akutã Jejus nhĩjê nhũm wa urãk nê kỳxpê ajêt.

19Hāmri nhũm Piratja õ pôristi mã anẽ nhũm mẽ tap õ py nê hã tanhmã kagà hto nê kagà ho:

IJAEW NHÕ PAHI JEJUS NA JA

KÊP NAJARE NHÕ XWỠNH

20Nom mẽ ixpê Ijaew kapêr pix kãm hã kagà hkêt nê. Määnên Gresjê kapêr kãm nê Raxĩjê kapêr kãm nhũm mẽ määnên hã kagà nê Jejus mỳri kunhõ. Hāmri nhũm Ijaew kwỳjaja Jerujarê rũm hwỳr mra nê mẽ kot ã hã kagà nhĩpêx anhỹrta pumu nê kamã harê. Jerujarêja hixêt prêta wỳr jawỳ jakamã nhũm mẽ kurũm ohtô nê hwỳr mra nê omunh o kuhê.

21Hāmri nhũm patre hkrãhtũmjaja tee ri ã Jejus jarênh anhỹr ã kagàta

pumu nhũm ja mẽ kêp omnuj nê. Jakamã nhũm mẽ ma Pirat wÿr mra nê kãm:

— Kwa mon ka ri hã mẽ kãm anê nhũm mẽ axtem nê ã ri kagà nhĩpêx anê? Kwa nà kêp mẽ inhõ pahi hkêt. ãm htÿx ri kot ã kot amnhĩ jarênh anhÿr o pa kênã. Kwa hã kagàja o anhĩpa nê hpãnhã hã kagà ho: “Kêp Ijaew nhõ pahi hã kot amnhĩ to hêx xwÿnh.” Anhÿr o hpãnhã hã hipêx nê anhõ nà? Anê.

22Hãmri nhũm mẽ kuma nê mẽ kãm:

— Tk. Nà pa ho ixpinhpanh kêt nê. Ra ixte hã kagà hpar kênã. Anê.

Pôristijaja kot axpên mã Jejus xê ho pigràn

Matêwre 27.35-36, 27.55-56; Makre 15.24; Rukre 23.34

23Hãmri nhũm pôristijaja kot axpên mã Jejus xê o pigràn kaxyw amnhĩ tã haxwÿr o tẽ. Mẽ kêp 4 no nhũm Jejus xê kêp 5 jakamã nhũm mẽ amnhĩ kôt ho 4 nê haxwÿ nhũm pyxi nê hprã. Ê rytita. Na pre hipêx muxre. Nhÿhÿnh hkayr xà pumunh kêt kumrêx. 24Jakamã nhũm mẽ omu nê kãm hkĩnh nê. Hãmri nhũm hõ kot amnhĩm hpyr nê ho arĩk kaxyw nhũm mẽ hã kênre ho jôka. Na pre ra Tirtũm kapêr ã kagà htũm kot mẽ hkukamã ja hã mẽ harênh nê mẽ harênh kot:

Na prem axpên mã ixê o anhgrà nê hã kênre ho jôka ho hkrĩ.

Anhÿr o kot mẽ hkukamã mẽ harênh. Tã nhũm mẽ ra hkôt ã amnhĩ nhĩpêx anhÿr o hkrĩ.

Jejus kot Juãw nhĩhkram katorxà jaxàr ã harênh

25Nhũm Jejus par pê katorxà xa. Nê htõx nê Kropti hprõ Marir nê Marir Matarên mẽ nhũm mẽ Jejus katorxà nhĩhkô hã Jejus pumunh o kuhê. Nhũm amnhĩ tã mẽ omu 26nê mẽ kuri pa ixpê Juãw pumu. Hãmri nê kêp ixkrãmnhwÿ mex ã ixtã katorxà mã kapêr nê kãm:

— E ota Juãwta. Kojã ixpãnhã te kêp akra pyrãk o anhĩpêx nê tanhmã ato ajuta hto ho pa. Anê.

27Hãmri nê hpãnhã pa inhmã kapêr nê inhmã:

— E Juãw. Kêr ka te kêp akatorxà pyrãk o inhmã hipêx mex o ri apa.

Anhÿr jakamã pa kuma nê kot inhmã hã karõ xà hkôt inhõrkwÿ hwÿr haxà nê amnhĩ kôt ri ho ixpa.



Juãw 19.25-27

Jejus htyk ã harênh*Matêwre 27.45-56; Makre 15.33-41; Rukre 23.44-49*

28Tã nhũm Jejus ra amnhĩ pumu hãmri nê hamaxpêr o:

— Nà Inhĩpêêxà kot mêmoj tã inhmã karõta na pa ra kãm ho anhÿr o hitep xà xir kaxyw. Anê.

Hãmri nê kãm kôr ã amnhĩ jarê. Nom ra hkukamã Tirtũm kapêr ã kagà htũm kot htyk kaxyw nê kãm kôr kukamã harênh jakamã nhũm ã amnhĩ jarênh anê nê kapêr o:

Nà na pa ra inhmã kôr nê. Anê.

29Nhũm hpar pê guhkrax kãm wĩhti punureta ãm jakamã nhũm mē ã kot amnhĩ jarênh anhÿrja ma nê kaxyw mēmo rerek py nê o tē nê kaxyw pĩ ryti hō py nê ho hkanhwÿ. Nê akupÿn o tē nê ho wĩhti mã haxà nê kãm kupê. 30Nhũm hkaō nê hkaōr pa hãmri nê kapêr o:

E nã hãmri na pa ra mē piitã mē kot amnhĩ tomnuj pãnhã
amnhĩrer pa. Jao ra Inhĩpêêxà kãm hprãm xà hkôt kãm
tanhmã amnhĩ nhĩpêx to jatur xàm kumê.

Anhÿr o amnhĩ jarênhja kôt ahpar mã hkrã nê ty.

Mê kot kô xwa ho Jejus kamnhwÿr ã harênh*Wam Juãw 5.6-8*

31Nhũm ra sêsta nhũm apkati nhũm mē inhō arĩgromnu pê sap kaxyw. Sapja ã na hte mē ixpê Ijaew mē ixkĩnh pê Pas ã ixkĩnh rũnh o ixpa. Nhũm mē kãm sap ã arĩ mē htyk nê mē harir xwÿnhjê pumunh prãm kêt jakamã nhũm Ijaew krãhtũmjaja ma Pirat wÿr mra nê kãm:

— Kwa pôristi mã anê kê mē tokyx mē hte hi kukê kê mē htyk tokyx anê. Kê mē tokyx mē o wrÿ nê ma mē o mra nê mē hagjê. Kormã sap kêt ri. Anê.

32Hãmri nhũm mē kuma nê õ pôristijê mã anê nhũm mē ma mē hwÿr mra nê akutã wa kot Jejus nhĩjê nê jêt xwÿnhnta wa kumrêx wa hte hi hkwÿr. 33Hãmri nê hpãnhã Jejus wÿr tē nê omu nhũm ra htyk mex nê ajêt nhũm mē ja hã omu nê kêp hte hi hkwÿnh kêt nê. 34Nhũm pôristi hōja kô xwa py nê ho ihkjê rũm hkanhwÿ nhũm hkamrô mē ĩ kagô ahkã nê hprôt nhũm mē hkwÿja omunh o kuhê. 35Nê ixpê Juãw na pa pre ijaxwÿja mē ĩhkô hã xa nê ja hã omunh jakamã pa ã mē amã hã kagà anê. ãm hãmri na pa mē amã harê nê hã kagà. Mē ate kamã harênh nê harênh mar nê hkôt ajamaxpêr kaxyw. 36Na pre ra Tirtũm kapêr ã kagà htũm kamã ra hkukamã tanhmã kot mē pahwÿr mēnh xwÿnhnta jarênh to nê hã kagà. Nê hã kagà kot:

Koja mē nhÿhÿnh hi hkwÿnh kêt nê. Anê.

Tã nhũm mē ra hã kagàja kôt ã hipêx anê nê kêp hi hkwÿnh kêt nê. 37Nê Tirtũm kapêr ã kagà htũmja mãânēn ja hã harênh kot:

Mê kot hpîr nê hkanhwÿr xwÿnhja koja mẽ hpar pê omunh o kuhê. Anê.

Tĩrtũm kapêr ã kagà htũm kamã ã Jejus tyk kukamã harênh kot anhÿr.

Mê kot Jejus jaxàr ã mẽ harênh

Matêwre 27.57-61; Makre 15.42-47; Rukre 23.50-56

38Tã nhũm Juje pê Arimatej nhõ xwÿnhja Jejus ra htyk ã omu nê ma Pirat wÿr tẽ nê hã kãm kapêr. Kot ma o mõi nê tokyx haxàr kaxyw. Na pre ra Jejus kõt amnhĩ xãm nom Ijaew krãhtũmjê pymaj mẽ kãm amnhĩ to amnhĩrit kêt nê. Jakamã nhũm ma Pirat wÿr tẽ nê hã kãm kapêr nê kãm:

— Pa e ot pa awÿr tẽ. Ixte mẽmoj tã amã ixkapêr kaxyw. Kot kaj apu inhmã “ÿ” anhÿr japêr. Kwa xà kot pa ma Jejus o mõi nê haxà? Anê.

Hãmri nhũm kuma nê kãm: “Nà mãmrĩ ho anê.” Anê hãmri nhũm ma hwÿr tẽ nê ho wrÿ nê kumÿ nê ma haxàr mã o mõi. 39Nhũm Nĩkotêja ma hkõt tẽ. Amnepê mã kot kamàt kãm Jejus wÿr htẽm nê wa axpẽn mã kapêr o ÿr xwÿnhja. Jakamã ma Juje hkõt tẽ. Nê amnhĩ kõt mẽ hkuxwa xà hkwÿ ho mõi. ãm ho mõi rax kumrêx. Ho 34 kir nê kutu nê o mõi. Mẽ hkuxwa xàja na pre mẽ kot mẽmo kuxwa xà mã “mĩra” nê “aroe” anhÿr jarênhja nhũm kaxyw hkwÿ jakà nê ho ahkà nê ho mẽ hkuxwa xà nhĩpêx. Hãmri nê kutu nê ma Juje kot Jejus jaxàr nhũm kot ho hkuxwa kaxyw hkõt o mõi. 40Hãmri nhũm wa ho kupêxê kukõnh pa nê ho Jejus kupu. Mẽ ixpê Ijaew mẽ ixte mẽ htykjê jagjênh kaxyw ã mẽ hipêx anhÿr xà hkõt nhũm wa ã hipêx anê nê haxà. 41Nhũm ra mẽ kot pĩ kahpa hã nhõr xà tã mẽ kot mẽmo pĩ ho pa nê hkre xwÿnh kwÿ kuhê. Nê kamã kên kre nyw. Kormã mẽ kot kamã mẽ htykjê hõ jaxàr kêt xwÿnhja. 42Jakamã nhũm wa omu nê axpẽn mã:

— E kwa pu hwÿr Jejus o tẽ nê kamã mãn tokyx haxà. Kêr pu kormã sap kêt ri ra tanhmã amnhĩ to hpa. Anê.

Hãmri nê hwÿr kumÿ nê o tẽ nê kamã haxà nê hã hitom pa hãmri nê ma akupÿm krĩm wa tẽ.

Jejus akupÿm htĩr ã harênh

Matêwre 28.1-10; Makre 16.1-8; Rukre 24.1-12

20 1Tã nhũm sap tẽ nê hapêx nê hpãnhã semãn nyw krax xà pê tãmĩk. Hãmri nhũm Marir Matarên kwÿhtã kãnhmã nhÿ. Kormã myt kator kêt ri kãnhmã nhÿ nê ma kên kreta wÿr tẽ. Nê hwÿr põi nê tee ri hitom xà hã kên rax pumu. Nhũm ra nhãm hakwa kre kuhpa hã ri hikwÿ nhũm omu nê tee ri hkukamã hamaxpêr pê omunh o xa. 2Hãmri nê awjanã nê ma akupÿm hprõt nê nhÿri Simãw Pêtre nê pa ixpê Jejus krãmnhwÿ mex ã wa ixpumu nê hkaprĩ kamã wa inhmã harê nê wa inhmã:

— Xê na pěr mẽ pahpê mẽ panhō Pahihti kapa nê nhỹhỹm ma o tẽ. Xê nhỹhỹm mãn pre wem o tẽ? Anẽ.

3Hãmri pa wa kuma nê hwỳr ixprõt kurê kumrêx. 4Hãmri pa Simãw Pêtre mã wa nê ixkumrêx hwỳr pøj. 5Nom kormã kên kre hwỳr ixàr kêt ri kormã hakwa krem inhikôt nê kaxwỳnh kãm nør xà kamã Jejus japêr ixrît o xa. Nhũm kupêxê nhĩrê pix nõ pa omu. 6Hãmri nhũm Simãw Pêtre ixkôt tẽ nê ixrom krem àr kurê kumrêx nê kupêxê nhĩrêta pumu. 7Nê hkrã kupu xà pumu nhũm axtem hkrã muxre nê ahte nõ. 8Hãmri pa hkôt axà nê nør xà kaprỳ pumu nê ijamaxpêr o:

— Hêxta waa nê. Nà mãn akupỹm htĩr. Hã na nør xà hkaprỳ mex nê. Nà mãn akupỹm htĩr kãm ga. Anẽ.

9Ra Tirtũm kapêr ã kagà htũm kot ja kukamã akupỹm htĩr ã harênh tã pa wa kormã ixprĩ hã ja hã omunh kêt nê. Tã kên kre kaprỳ pumu nê kãm ijamaxpêr kurê kumrêx. 10Hãmri nê wa ixkato nê awjanã nê ma akupỹm wa ixkwỳjê hwỳr wa tẽ.

Jejus kot Marir Matarên wỳr kator ã harênh

Makre 16.9-11

11No nhũm Marir Matarênja arĩ kên kre kapem hkaprĩ nê mỳr o xa. Nê mỳr pê hikôt nê kên kre kamu 12nê kamã Tirtũm kapêr o wrỳk xwỳnh wa ho axkrut nê wa omu. Nhũm wa ê jakajre kamã wa nhỹ. Nhũm hõja hkrãm nhỹ nhũm hõja htem nhỹ. 13Hãmri nê wa Marir Matarên mã kapêr nê kãm:

— Kwa mon ka ri omu nê amỳr o xa? Anẽ.

Nhũm kãm:

— Xê nhũm. Na prem ma nhỹhỹm mẽ ixpê mẽ inhõ Pahihtija mỳ nê ma o tẽ nê hpãnhã nhỹri kuxi. Anẽ.

14Rôm nhũm Jejus tãm tẽ nê hkatut kôt xa nhũm Marir Matarên ho hakêx nê omu nom hprĩ hã omunh kêt nê. Omu nê htỳx ho axtem mẽhõ hã hkamnhĩx. 15Hãmri nhũm kãm:

— Kwa mon ka ri amỳr o xa? Mẽhõ na ka ri hapêr arĩt pê amỳr o xa? Anẽ.

Hãmri nhũm kuma nê htỳx ho pĩ hkre jamãr xwỳnh ã hkamnhĩx nê kãm:

— Xê xà ka na ka mẽ ixpê mẽ inhõ Pahihti ho ahkĩ nê ma o tẽ nê nhỹri axi mẽ? Xê ka japêr nê akatàt kôt inhmã harê. Nhỹri inhmã nør xà jarê pa ma hwỳr tẽ nê kumỳ nê man akupỹn o tẽ nê akupỹm kên kre kamã kuxi. Anẽ.

16Hãmri nhũm Jejus kãm hixi jarê nê kãm:

— Kwa Marir Matarên. Amnẽ ixpumu nê arĩ ã akapêr anẽ nà. Anẽ.

Hãmri nhũm jatã hprĩ hã kuma nê ho hakêx nê amnhĩ jaêr pê hprĩ hã omu nê kãm:

—Xê Pahihti. Xep ka na ka. Hêxta gâà nê. Anê.

Nom mê ixpê Ijaew kapêr kãm Pahita jarênh o: “Raponĩ” anê. Nhũm ã kãm kapêr anê hãmri nê axte ma nhỹhỹm kêp htêm pymaj hpa hã kupy. 17Hãmri nhũm kãm:

—Kwa inhmã anhũre. Na pa kormã ma akupỹm Inhĩpêêxà hwỳr ixàpir kêt nê. E tokyx ma akupỹm tẽ nê ixtõ nê ixtõxjê mã ijarê. Na ka prem apê ixkràmnhwỳ pix tã ra mê apê ixtõ nê ixtõx na ka mê. Jakamã ma akupỹm mê hwỳr tẽ nê mê kãm ijarê. Nê mê kãm: “Na Jejus mê awỳr pêr mênh o: ‘Kot paj tokyx ma akupỹm Inhĩpêêxà Tĩrtũm wỳr api. Nom kêp pa Inhĩpêêxà pix kêt mãânên kêp mê Anhĩpêêxà na. Nê mãânên kêp mê anhõ Tĩrtũm na.’ Anhỹr o mê awỳr pêr mê.” Anê. E ma akupỹm mê hwỳr tẽ nê tokyx ã mê kãm ijarênh anê. Anê.

18Hãmri nhũm kuma nê ma akupỹm mê ixwỳr tẽ nê mê inhmã awjarê nê mê inhmã:

—Xê na pa ham mê panhõ Pahihtita pumu. Na akupỹm mê pamã htĩr. Anê.

Hãmri nê mê inhmã kot tanhmã kãm kapêr to hã harê pa mê kuma nê tee ri hkukamã ijamaxpêr.

Jejus kot hkwỳjê hwỳr kator ã harênh

Rukre 24.36-43

19Tã nhũm tòmĩk nê kamàt pa mê Jejus kôt ixpa ho ixpa xwỳnhjaja axpên wỳr akuprõ hãmri nê Ijaew krãhtũmjê pymaj hakwakre kahê hpa nê axpên mã ixkapêr o ixkrĩ. Nhũm Jejus mê ijaêr pê nhỹhỹnh mê ixwỳr axà nê mê ixkuri xa nê mê inhmã:

—Pa. Xà kormã mê anhõt kêt? Anê.

20Hãmri nê mê inhmã amnhĩ nhĩhkra kamã prek tatak xà jahkre nê hakỳx kôt mê kot hkanhwỳr xàja nhũm mê inhmã hahkre. Pa mê akupỹm htĩr kãm omu nê ixkĩnh tỳx kumrêx. 21Hãmri nhũm mê inhmã:

—E kwa kêr ka mê tee ri amnhĩ kukamã ajamaxpêr o amã ma ho ri apa hkêt nê. Na pre Inhĩpêêxàja mê awỳr inhmê pa pre wrỳ. Tã kot paj amnhĩ pyrã nê mê piitã mê hwỳr mê arê. Anê.

22Hãmri nê mê ixkaxyw htyyxà mê nê mê inhmã Tĩrtũm mê wa Karõ jarê nê mê inhmã:

—E koja Tĩrtũm mê wa Ixkarõja wrỳ nê mê akarõ mã gjêx pa. 23Ka mê ÿ hã ma mê piitã mê hwỳr apa nê mê kãm Tĩrtũm kapêr jarênh o ri mê hkôt apa. Nê nhỹri mênhõ pumu nê inhỹ hã kãm: “Kot kaj Tĩrtũm kôt amnhĩ xãm nhũm amnhĩ tã apumu nê anê ate amnhĩ tomnuj rênh pa.” Anê. Ka mê ã kãm akapêr anê nhũm mê ama nê hkôt amnhĩ xãm nhũm Tĩrtũm amnhĩ tã omu nê nê kot amnhĩ tomnuj rênh pa. Nom koja mê ama nê ãm mê ama nê hkôt amnhĩ xãm kêt japêr ka mê inhỹ hã kãm: “Nà kot kaj Tĩrtũm kôt amnhĩ xãm kêt nê nhũm anê ate amnhĩ tomnuj

rênh kêt nê.” Anhÿr o kãm akapêr nhũm Tirtũm ho anê nê nê rênh kêt nê. E kêr ka mē ã inhÿ hã amnhĩ nhĩpêx anhÿr o ri apa. Anê.

Nhũm pre ã Jejus mē inhmã kapêr anê hãmri nê kato nê ma nhÿhÿm tẽ.

Jejus kot Tomas mã kapêr ã harênh

Matêwre 28.17

24No nhũm mē inhĩõ pê Tomas pihpohtita kormã mē ixkĩnhã akupÿm Jejus htĩr kãm omunh kêt nê. Na pre ma kape hã tẽ nhũm wakre kamã mē ixwÿr axà nê mē inhmã kapêr hãmri nê ma nhÿhÿm tẽ. Jakamã nhũm Tomas akupÿn mē ixwÿr tẽ nê axà pa mē kãm harê nhũm tee ri mē inhma nê mē ixkôt hamaxpêr kêt nê. 25Nê mē inhmã:

—Nà kot pa ãhkra kamã prek tatak xà pumu nê kamã inhĩhkra hkrã jaxà. Nê hakÿx kôt hkanhwÿr xàta pa mã ho anê nê omu nê kamã inhĩhkra hkrã jaxà nê rĩ kormã akupÿm htĩr kôt ijamaxpêr. Anê.

26Tã nhũm semãn pyxi nê hapêx pa mē axte axpên wÿr akuprõ nê axte Ijaew krãhtũmjê pymaj amnhĩ tã kahê htÿx nê ixkrĩ. Nhũm Tomas tã mē ixkuri nhÿ. Hãmri nhũm Jejus axte nhÿhÿnh mē ixwÿr axà nê mē inhmã:

—Pa. Na ka mē rĩ akrĩ. Anê.

27Hãmri nê Tomas pumu nê hwÿr tẽ nê kãm ãhkra pẽ nê kãm:

—E ota inhĩhkra kamã prek tatak xàta. Mãmrĩ kamã anhĩhkra hkrã jaxà. Nê hpãnhã ijakÿx kôt mē kot ixkanhwÿr xà kamã mã ho anê nê haxà nê akupÿm ixtĩr kôt ixpumunh kurê kumrêx. Anê.

28Hãmri nhũm kuma nê kãm:

—Nà pêr ãm hãmri apê inhõ Pahihti Tirtũm na ka. Anê.

29Hãmri nhũm kãm:

—Tÿ. ãm ano ho ixpumunh kôt pix mã na ka ixkôt ajamaxpêr. Tã no ãm koja mē nhÿrmã mē amÿr pê mē pa xwÿnhjaja mē akĩnhã mē no ho ixpumunh kêt tã akupÿm ixtĩr ã ijarênh mar pix tã ixkôt hamaxpêr. Ja na mex kumrêx. Anê.

Juãw kot tanhmã amnhĩ jarênh to hã harênh

Rômãn 15.4; Wam Juãw 5.13

30Na pre Jejus kormã mē ixto pa ri mē inhnoo mã mêmoj tanhmã hipêx to rax nê nom kot paj kagàja kamã piitã hã kagà hpar kêt nê. 31Ãm hkwy pix na pa mē amã hã kagà. Mẽ ate mē ixpyrà nê omunh nê kêt Tirtũm Kra hã kot mē pakaxyw ãm xwÿnh ã omunh nê hkôt amnhĩ xunhwÿr kaxyw na pa ã mē amã harênh nê hã kagà anê. Tã kot kaj mē amnhĩ kaxyw hkôt ajamaxpêr nê hkôt amnhĩ xunhwÿr hãmri nê nhÿrmã atyk tã nhũm akupÿm mē ato mē atĩr ka mē ixpyrà nê kuri amex nê atĩr tũm nê apa ho apa. Tã pa ã mē amã mêmoj piitã harênh nê hã kagà anê.

Jejus kot hkwyjê hwÿr kator ã harênh

Matêwre 26.32, 28.7, 28.10

21 ¹Tã nhũm Jejus axte hkôt mẽ ixpa ho mẽ ixpa xwÿnh kwÿjê hwÿr kato. Himô pê Tipeja mÿri. ²Pa mẽ ixpê 7 nê axpên wÿr akuprô. Na pre Simãw Pêtre nê Tomas pihpohti nê Natãnaew. Natãnaewja Garirej kamã krí pê Kanã nhô xwÿnh na pre. Nê wa pa wa ixpê Jepetew krata wa nê wa inhîô wa pijakruuta wa. Pa prem wa mẽ nhÿri axpên wÿr akuprô. ³Hãmri nhũm Simãw Pêtre mẽ inhmã:

— E pa jarãhã ma tep wÿr tẽ nê hkwyÿmnê. Anê.

Pa mẽ kuma nê kãm:

— Tôe. Nà pa mẽ ijaxwÿja ma akôt mō. Anê.

Hãmri nê mẽ ma himô rax pê Tipeja wÿr mō nê kanôre mã agjê nê gôx kãm kryhti rênh o ixkuhê. Nom tee ri ho tep ômnênh kaxyw rênh o ixkuhê nê hōmnênh kêt nê ixtã apkati nhũm tep amrakati kumrêx.

⁴Tã nhũm myt kato nhũm Jejus gô mÿri xa. Pa mẽ ixpiitã omu no ãm ixprí hã kêp Jejus ã omunh kêt nê. Tã no nhũm tãm xa. ⁵Hãmri nê mẽ inhmã kapêr nê mẽ inhmã:

— Pa. E mãn ka mẽ ra tep kwÿÿmnênh rax nê nà? Anê.

Hãmri pa mẽ kãm:

— Tk. Nà mo tep? Amrakati kumrêx kênã. Anê.

⁶Hãmri nhũm mẽ inhmã;

— Xô wehe? Tôe. Axte mẽ axupôk rũm kryhti mẽ nê omu. Anê.

Hãmri pa mẽ mar xà hkôt ho anê nê kumê. Hãmri nhũm kamã tep hipu rax kumrêx nhũm utí rax nê. Pa mẽ tee ri ixte ho ixàpir kaxyw ri hkukjê. ⁷Hãmri pa kêp Jejus ã omunh kurê kumrêx nê Simãw Pêtre mã kãm:

— Kwa pêr mẽ panhō Pahihitita na. Anê.

Hãmri nhũm inhma nê hkĩnh tÿx nê akupÿm hinôkà jaxà nê gôx kãm mrô nê ma hwÿr ho nana ho tẽ. ⁸Hãmri pa mẽ hkôt kanôre kamã kryhti kjênh o mō. Ra amgrã hwÿr amgrire. Wÿr 100 met pix jakamã pa mẽ hwÿr ixpôx tokyx anê. ⁹Nê pàr o hkre kura nê kuxi nê ijapôx pa nê Jejus wÿr ixprôt nê mra. Nhũm ra mẽ ixkutêp kuto nê par nhípêx nê nhÿhÿnh tep kwÿ par kãm haxwÿ nê



Juãw 21.1-8

ho àr o nhỹ. Nẽ kaxyw pãwti nẽ amnhĩ ri haxwỳ nẽ o nhỹ. 10Hãmri nẽ mẽ ixpumu nẽ mẽ inhmã:

—E mẽ amně anhõ tep o mra pu mẽ hkuxôt nẽ kuku. Anẽ.

11Hãmri nhũm Simãw Pêtre akupỹm pàr wỳr tẽ nẽ kryhti ho htỳx xà hpôt nẽ amgrà hwỳr hkjênh o mỗ. Kamã tep rũnh pix. Nẽ ohtô nẽ. Kamã kệp 153 nẽ hikwỳ htã nhũm nhỹhỹnh kryhti hkwy pìkaxônh kêt nẽ. 12Hãmri nhũm Jejus mẽ inhmã:

—E kwa mẽ tokyx mra pu mẽ apku. Anẽ.

Hãmri pa mẽ kuma nẽ hwỳr mra nẽ ixkrĩ pa. Hãmri nẽ tee ri omunh o ixkrĩ. Mẽ ixprĩ hã omunh mex kêt tã kot ã mẽ inhmã amnhĩ nhĩpêx anhỹr ã omu nẽ kệp mẽ inhõ Pahihti hkôt omunh kurê kumrêx jakamã hixi hã hkukjêr kêt nẽ. ãm akryk omunh o ixkrĩ. 13Hãmri nhũm mẽ inhmã pãwti ho hkry pa. Nẽ hpãnhã tep jamỳ nẽ mã ho anẽ nẽ ho hkry pa nẽ ho mẽ inhĩpêx pa pa mẽ ixàpkur o ixkrĩ.

14Nhũm Jejus akupỹm htĩr kãm ra ahpỹnhã mẽ ixwỳr hapôx o axkrunêpxi.

Jejus kot akupỹm tãm Simãw Pêtre xãm

Ate 20.28-31; Wam Pêtre 5.1-4

15Tã pa mẽ ra ixàpkur pa nẽ kànhmã ixkuhê nẽ gô mỳ ri mra. Hãmri nhũm Jejus Juãw hkra Simãw Pêtre mã tanhmã kapêr to. Nom ixpê Juãw nhũm kệp ixkra hkêt axtem Juãw õ hkra na pre. Jakamã nhũm Jejus kãm kapêr nẽ kãm:

—Kwa Simãw. Xà we amã ijapê ho ate pika hkôt mẽmoj piitã hakrenh par nà? Anẽ.

Hãmri nhũm kuma nẽ kãm:

—Tỳ inhmã ajapê htỳx kênã Pahihti. Ra ate ja hã amnhĩ tã ixpumunh mex. Inhmã ajapêê. Anẽ.

Hãmri nhũm kuma nẽ kãm:

—Tôe. Nà kêt ka inhmã mẽ kot ixkôt amnhĩ xunhwỳr xwỳnhjê jahkre mex o ri mẽ hkôt apa. Te ho ôwêhti hkrare jamãr xwỳnh kot hamãr mex o ri hkôt pata pyræk. Anẽ.

Hãmri nhũm kãm:

—Tôe. Nà kot paj amã mẽ ho anẽ. Anẽ.

16Tã nhũm hã ahtũmre nhũm kê axte kãm:

—Kwa Simãw. Xà we ãm hãmri na ka inhmã amnhĩ jarê. Xà we amã ijapêê nà? Anẽ.

Hãmri nhũm kãm:

—Tỳ. Ra ate inhmã ajapê hã ixpumunh kênã. Anẽ.

Hãmri nhũm kê axte kãm:

—Tôe. Kêt ka inhmã mẽ kot ixkôt amnhĩ xunhwỳr mã xwỳnhjê

jahkre mex o ri mẽ hkôt apa. Te ho ôwêhti jamãr xwÿnh kot ôwêhti jamãr mex o hkôt pa xwÿnh kot amnhĩ nhĩpêx pyrãk. Anê.

Hãmri nhũm kãm:

— Nà kot paj amã mẽ ahkre mex o ri mẽ hkôt ixpa. Anê.

17Tã hãmri nhũm hã ahtũmre nhũm kê axte kãm:

— Kwa Simãw. Xà we ãm hãmri na ka inhmã amnhĩ jarê? Xà we amã ijapê htÿx kumrêx nã? Anê.

Hãmri nhũm tee ri amnhĩ tã kuma nê hkaprĩ nê. Ra kot amnhĩ tã hkukjêr o axkrunêpxi jakamã nhũm hkaprĩ nê tee ri hamaxpêr. Hãmri nê kãm:

— Kwa Pahihti. Ate mẽmoj piitã omunh par. Nê ate inhmã ajapê htÿx ã ixpumunh par kênã. Anê.

Hãmri nhũm kê axte kãm:

— Tôe. Kêr ka inhmã mẽ kot ixkôt amnhĩ xunhwÿr mã xwÿnhjê jahkre mex o ri mẽ hkôt apa. Te ho ôwêhti jamãr xwÿnh kot hamãr mex o ri pata pyrãk. Anê.

Hãmri nhũm kãm:

— Nà kot paj amã mẽ ho anê Pahihti. Anê.

Simãw Pêtre tanhmã htyk to hkukamã harênh

18Nhũm Jejus arĩ Simãw Pêtre mã kapêr nê kãm tanhmã htyk to hkukamã harênh to nê kãm:

— Kwa ixkapêr ma nê amnhĩ krã him haxàr tÿx nê hã apa Simãw Pêtre. Nà kormã anyw ri na ka pre hte ma nhÿhÿm apa kaxyw nê anojarêr hãmri nê anhĩnôhkà mex jagjê nê ma nhÿhÿm amã apa hprãm xà hkôt ri apa. Tã kot kaj apigêr nhũm mẽ apynê nê akahti hpre nê apa hpre nê ma nhÿhÿm ato mõi mẽ kãm amnhĩ gõi nê amnhĩ nê tanhmã mẽ kãm nê hkêr nê. Amã mẽ hkôt amõr prãm kêr tã mãmrĩ mẽ kãm amnhĩ gõi mẽ ma nhÿhÿm ato mõi. 19Tã kêr ka arĩ ixkôt amnhĩ xãm tÿx nê atĩr prãm xaj mẽ umaj axte ixkaga hkêr nê. Hãmri nhũm mẽ apĩ nê tanhmã atyk to hã apumu nê amã Tĩrtũm kĩnh ã apumunh mex kurê kumrêx. Hãmri nê atã Pahi Maati Tĩrtũm mex o mex ã harê. Anê.

Nhũm pre ã Jejus Simãw Pêtre tyk kukamã kãm ujarênh anê. Hãmri nê kãm:

— E kêr ka ixte amnhĩ to htÿx nê amarĩ mẽ kãm ixãm nhũm mẽ kot ixpĩrja pyrã nê ã amnhĩ nhĩpêx anê. Anê.

Hãmri nhũm kuma nê kãm:

— Tôe. Nà kot paj hãmri tã ã amnhĩ nhĩpêx anê Pahihti. Anê.

Juãw tyk kukamã tanhmã harênh to hkêr ã harênh

20Nhũm pre ã Jejus Simãw Pêtre mã tanhmã htyk to hkukamã harênh anê. Hãmri nhũm kuma nê ixpê Juãw ã ixto hakêx nê ixpê Jejus

kràmnhwỳ mex ã ixpumu. Kormã Jejus htyk kêt ri kamàt kãm mẽ ixàpkur o ixkríta ã na pa pre ìhkô hã ixàpkur o nhỹ nê kot mẽ kãm òr mã xwỳnhta nhĩxi hã hkukja. ²¹Jakamã nhũm Simãw Pêtre ixto hakêx nê ixpumu nê ixtã Jejus kukja nê kãm:

—Kwa no pěr pahkôt mōr mũj? Tanhmã koja we htyk to? Anê.

Hãmri nhũm kãm:

22—Nà kot paj amã tanhmã htyk to hkukamã harênh hkêt nê. Kot pa inhmã arĩ kritpêm pa rãhã pa akupỹn ixwrỳk prãm nhũm arĩ pa nê htyk kêt rãhã pa akupỹn wrỳ. Kêr ka ri htyk kukamã tee ri tanhmã ajamaxpěr to hkêt nê. ãm ixkôt pix mã ate amnhĩ nhĩpêx tỳx pix kukamã mã ajamaxpěr o ri apa.

23Anhỹr o kãm ijarênh jakamã nhũm mẽ ixkwỳjaja kot ã ijarênh anhỹrja ã kuma ma nê htỳx nhỹrmã ixtyk kêt ã ixkamnhĩx. Nê gaa nê rĩ piitã axpên mã ã ijarênh anhỹr o pa. Nom na pre ã ijarênh anhỹr kêt nê. Na kêt pre ijarênh o:

—Kot pa inhmã arĩ ri kritpêm pa rãhã pa akupỹn ixwrỳk prãm nhũm arĩ pa nê htyk kêt rãhã pa akupỹn wrỳ.

Anhỹr o ijarê. Nom ãm hãmri ixtyk kêt rãhã nhũm akupỹn wrỳk ã ijarênh kêt nê.

**Juãw kot Jejus kot tanhmã amnhĩ to hã kagà hpar kêt ã
kot amnhĩ jarênh**

Juãw 20.30-31

24E na pa mẽ amã Jejus kot tanhmã amnhĩ nhĩpêx to ho pa hã harê nê hã kagà. Ixpê hkôt ri ixpa ho ixpa xwỳnhjê hõ na pa ãm hãmri ã hã kagà anê. Ka mẽ kamã harê nê ama nê ãm hãmri ixte kagà nhĩpêx kôt ixpumunh mex kurê kumrêx. ²⁵No na pre Jejus ãm ja pix o anhỹr o pa hkêt nê. Na pa ãm mẽ amã hkwỳ pix jarê nê hã kagà. Na pre tanhmã ri mẽmoj to rax kumrêx o ri pa. Nom kêp ãm ixte kot tanhmã ri amnhĩ nhĩpêx to piitã hã kagà hpar ronhỹx hã kagàja katutxô rax kumrêx. Jao te ra kaxkwa htêp o mōr pyræk.

Tã ãm ja pix. Na hapêx.

Atre

Jejus nhỹ hã mẽ ahkre ho mẽ pa xwỳnhjaja kot tanhmã amnhĩ nhĩpêx to ho pa hã mẽ harênh

Rukre na pre kagàja nhĩpêx. Na pre kêp tôtô nê hkwỳjê kane ho pa. Nê Jejus nhỹ hã mẽ ahkre ho pa xwỳnh pê Pawre kôt pa ho pa. Hãmri nê hamaxpêr nê hkràmnhwỳ Teopre mã kagàja nhĩpêx nê hwỳr kumê. Nê kagàja kamã Jejus nhỹ hã mẽ ahkre ho mẽ pa xwỳnh maatijaja kot Jejus mỳr pê tanhmã amnhĩ nhĩpêx to ho pa hã mẽ harê.

Nê Ijaew nhõ patrejaja nê mẽ hkwỳ pê Parijew nhõ xwỳnhjaja nê mẽ hkwỳ pê Satusew nhõ xwỳnhjaja kot Tirtùm kapêr ã kagà htùm kamã harênh nê mar nê hkôt amnhĩ nhĩpêx tã Tirtùm Kra Jejus kôt amnhĩ nhĩpêx kêt ã mẽ harê. Mẽ kot kêp Tirtùm Kra hkêt ã hkamnhĩx jakamã na prem kãm mẽ kot hkôt amnhĩ xunhwỳr xwỳnhjê kurê nê. Tã nhũm Simãw Pêtre mẽ Pawre mẽ Jejus nhỹ hã mẽ ahkre ho mẽ pa xwỳnh kwỳjaja mẽ uràk nê kêp Ijaew tã mẽ kurom Jejus hkôt amnhĩ xunhwỳ nhũm mẽ tee ri ja hã mẽ omu mẽ kamã gryk tỳx nê tanhmã mẽ hipêx to ho pa. Tã nom nhũm mẽ tee ri amnhĩ kukamã hamaxpêr nê Jejus kaga hkêt nê. Mẽ kot mẽ hipêx kati htã na prem arĩ Tirtùm Karõ nhỹ hã mẽ piitã mẽ kãm tanhmã Jejus kot mẽ panê amnhĩ nhĩpêx to hã harênh o pa. Kam nê kapit 1 kamã wesik 8 japêr nê kamã harê. Hãmri nhũm Rukre ã mẽ kot amnhĩ nhĩpêx anhỹrja piitã hã kagà nê Teopre hwỳr kumê. Nê kãm mẽ harênh o:

Tirtùm Karõ jarênh

Matêwre 28.16; Makre 16.14; Rukre 24.36; Juãw 20.19

1 1 Pa Teopre? Xà amex? E ot pa axte awỳr kagà nhĩpêx nê kumê. Nà wam ixte awỳr kagà nhĩpêx nê mênhta kamã na pa pre amã Jejus kot tanhmã amnhĩ nhĩpêx to hã harê nê hã kagà. Kot tanhmã amnhĩ nhĩpêx to ho pa nê tanhmã mẽ ahkre hto ho paja krax rùm pa pre piitã hã kagà hpa nê awỳr kumê. 2-4 Kormã akupỳm kaxkwa hwỳr àpir xwỳj ri na pre ÿ hã mẽ ahkre ho pa kaxyw hkôt mẽ pa xwỳnh kwỳjê rê. Tã nhũm mẽ kãm hkurê xwỳnhjaja kupĩ nhũm amnhĩ xà htỳx kãm hamak rax kãm ty. Hãmri nhũm Tirtùm akupỳm ho htĩr. Nom nhũm ma akupỳm kaxkwa hwỳr àpir kurê kumrêx kêt nê. Na pre xatã mẽ kot ÿ hã

mě ahkre ho mẽ pa xwỳnh maatiijê hwỳr hapôj nhũm mẽ akupỳm htír kãm omu. Na pre hte nhỳri mẽ hwỳr hapôj nê tanhmã mẽ ahkre hto nê mẽ kãm:

—Na pre Tirtũm mẽ ato hkra nê tãm mẽ ate amnhĩ nhĩpêx o apa kaxyw mẽ axunhwỳ.

Anhỳr o mẽ ahkre hã arĩgro ho 40. Hãmri nê kormã mẽ kamã pa ri axte tanhmã mẽ kãm kapêr to. Tirtũm Karõ nhỹ hã mẽ kãm kapêr nê mẽ kãm:

—E kêr ka mẽ krĩ ja kamã ri apa nê tokyx ma nhỹhỹm apa hkêt nê. Kê Inhĩpêxà Tirtũm mẽ awỳr amnhĩ Karõ rê mãn. Ra ixte mẽ amã harênh xà hkôt koja mẽ awỳr kurê nhũm mẽ awỳr wrỳ nê mẽ akarõ mã agjê ka mẽ rĩ kormã anhrà nê ma nhỹhỹm krĩ hkôt ri mẽ kãm kapêr jarênh o ri mẽ hkôt apa.

5—Juãw Paxis na pre hte Tirtũm mã gôx kãm mẽ hkrã kumrãr o pa. Tã koja Tirtũm tokyx mẽ awỳr amnhĩ Karõ rê. Kot ixpãnhã amnhĩ kaxyw mẽ ato mẽ amã ma hkêt kaxyw mẽ awỳr kurê. Koja hã apkati grêre nhũm mẽ awỳr kurê nhũm ixpãnhã mẽ awỳr wrỳ nê mẽ amã agjê nê mẽ akamã mẽ akôt pa ho pa. Ka mẽ rĩ kormã Jerujarê rũm ajapôj nê ma mẽ kãm Tirtũm kapêr jarênh o ri mẽ hkôt apa. Anê.

Jeus akupỳm kaxkwa hwỳr àpir ã harênh

Makre 16.19; Rukre 24.50

6Tã nhũm mẽ axte akuprõ. Jeus nê ÿ hã mẽ ahkre ho mẽ pa xwỳnh maatiijaja nhũm mẽ hixêt pê Oriwêhti nhĩmök ã axte axpên wỳr akuprõ. Hãmri nhũm mẽ amnhĩ tã Jeus kukja nê kãm:

—Kwa Pahihti mẽ inhmã mẽmoj jarê. Xà kot kaj tokyx apê Tirtũm kot mẽ ixwỳr amênh xwỳnh ã amnhĩ jarê nê Rõm nhõ xwỳnhjê nê mẽ pahpê Ijaew kator nà? Hãmri pa mẽ pamjaja amnhĩ to amnhĩptàr o ri ixa. Anê.

7Hãmri nhũm mẽ kãm:

—Nà Inhĩpêxà pix na ã mẽmoj kot anhỳrja kukamã àhpumunh. Tapxipix na kot mẽmoj tanhmã ho hã arĩgro nê mẽmoj tanhmã ho hã mytwrỳ pumunh mex. No mẽ kajaja mo kaxyw kot ka mẽ amnhĩ katorta kukamã amnhĩ jarênh ma? 8Nà kot paj ãm mẽ amã mẽmoj to pyxire nê hkukamã harê. Koja Tirtũm tokyx mẽ awỳr amnhĩ Karõ rê nhũm ixpãnhã kot mẽ ato amnhĩptàr kaxyw mẽ akarõ mã agjê. Hãmri ka mẽ ma pyka piitã hkôt anhrà nê ma mẽ kãm ixkapêr jarênh o ri mẽ hkôt apa. Jar Jerujarê kamã nê pika pê Jutej kôt nê nhãm pika pê Samar kamã nê pika piitã hkôt mẽ kãm ijarênh o ri mẽ hkôt apa. ã mẽ ate amnhĩ nhĩpêx anhỳr pix kukamã kot paj mẽ amã harê. Anê.

9Nhũm pre ã Jeus mẽ kãm kapêr anê hãmri nê mẽ kêp kãnhmã àpir o tẽ nê mẽ noo mã ma kaxkwa hwỳr àpir o tẽ nê kakrãm axà nê mẽ kêp

akunok. 10Hāmri nhũm mẽ tee ri hapêr o kuhê rãhã nhũm mēhõ myja wa axkrut nê mẽ hwỳr wrỳ nê mẽ kutã wa xa. Wa ê hakaj nê wa xa. 11Hāmri nê mẽ kãm:

— Pa Garirej nhõ xwỳnhjaja? Kwa mo kaxyw na ka mẽ tee ri kaxkwa pumunh o akuhê? Tĩrtũm na akupỹm amnhĩ wỳr Kra Jejus o api ka mẽ àpir kãm omu. E mẽ tee ri hkukamã ajamaxpêr kêt nê. Koja nhỹrmã man akupỹn mẽ awỳr wrỳ. Te mẽ arũm kaxkwa hwỳr àpirja pyrà nê akupỹn mẽ awỳr wrỳ ka mẽ omu. Anê.

Akupỹm Jerujarê hwỳr mẽ mrar ã mẽ harênh

Rukre 24.52

12Tã nhũm Jejus nhỹ hã mẽ ahkre ho mẽ pa xwỳnh maatijaja wa kuma nê awjanã nê ma akupỹm krĩm mra. Hixêt pê Oriwêhti rũm ma akupỹm Jerujarê hwỳr mra. Wỳr jawỳ nhũm mẽ akupỹm hpõx tokyx anê. 13Hāmri nê akupỹm kỳx pê ixkreja wỳr api nê agjê. Na pre

Simãw Pêtre nê

Juãw nê

Xiakre nê

Andrehti nê

Firipti nê

Tomas nê

Patoromew nê

Matêwre nê

Xiakre hõ pê Apew kraja nê

Simãw Jerox nê

Jut pê Xiakre hkraja.

Mẽ piitã Jejus nhỹ hã mẽ ahkre ho mẽ pa xwỳnh maatijaja na pre mẽ.

14Nê mãânên mẽ hkôt mẽ hkwỳjaja. Jejus katorxà Marir nê Jejus tøjaja nê Jejus kot tanhmã mēni ho mex to xwỳnh kwỳjaja nhũm prem kỳx pê ixkreja wỳr Jejus nhỹ hã mẽ ahkre ho mẽ pa xwỳnh maatijê hkôt gjêx pa. Hāmri nê xatã axpên wỳr akuprõ nê Tĩrtũm mã amnhĩ jarênh o hkrĩ.

Tĩrtũm kot Jut Kariot pãnhã mēhõ xãm ã harênh

Matêwre 27.3-10; Juãw 15.27

15-19Tã nhũm mẽ kot Jejus kôt amnhĩ xunhwỳr xwỳnhjaja ra kêp 120. Jakamã nhũm mẽmo arĩgro hã axpên wỳr akuprõ nê hkrĩ. Nhũm Simãw Pêtre kànhmã xa nê tanhmã mẽ kãm Jut Kariot jarênh to nê mẽ kãm:

— E Jejus kôt ixtõ nê ixtõxjaja. Pa mẽ amã tanhmã finat Jut Kariot jarênh to ka mẽ inhma. Na pre axtem nê mẽ pahkwỳjê mã Jejus ã amỹnê nê hpãnhã kàxpore hkwỳ jamỳ nê o tẽ nê ho amnhĩm pyka hkwỳ japrõ. Tã tanhmã amnhĩ to nê nhỹri õ pyka kamã tēm nê amnhĩ tu katõk nê

hkrêx kato nê ty nê hkamrô ho ô pyka xy hpa. Jakamã nhũm Jerujarê nhô xwÿnhjaja harênh ma nê pykaja ã hixi mē nhũm kêp “pyka kamrôhti.” No mē pahpê Ijaew kapêr kãm kêp “Ajetãm.” Amnepêm na pre Tirtũm Karô finat Tawi mã Jut Kariot kukamã tanhmã harênh to. Kormã kator nê kot tanhmã amnhĩ to hkêt tã nhũm ra hkukamã omu nê Tawi mã harê. Kot axtem nê mē kãm Jejus ã àmnênhja nhũm hkukamã omu nê Tawi mã harê nhũm kuma nê ô ri hã kagà. Tã nhũm kot hkukamã hã kagà hkôt nhũm ã Jejus nhĩpêx anê. Jut Kariotja mē panhĩo na pre. Na pre Jejus mē pahpyrà nê amnhĩm kuta. Mē pahpyrà nê ÿ hã kapêr jarênh o pa kaxyw. Tã nhũm axtem nê ã hipêx anê.

20Nom na pre Tawi kot Tirtũm mex ã greer ã kagà kot ra hkukamã tanhmã harênh to. Kagà hkwy pê Sam kamã kot harênh kot:

Kot amnhĩ tomnuj xwÿnhhta nhôrkwy koja hkaprÿn kuhê ho kuhê nhũm mēhøj mÿr pê kamã pa hkêt kumrêx. Koja ãm arĩ hkaprÿn kuhê ho kuhê.

Nom kot Jejus mã tanhmã amnhĩ nhĩpêx to ho paja kê mēhøj mÿr pê ho amnhĩptã nê hpãnhã Jejus nhÿ hã mē ahkre ho pa. Anê.

Ã Tirtũm kapêr ã kagà htũm kot Jut Kariot kukamã harênh kot anhÿr. 21Jakamã e ixkwÿjaja. Kot puj mē hpãnhã mē atõ xãm ka Jut mÿr pê mē pahpê Jejus nhÿ hã mē ahkre ho ixpa xwÿnhjê hkôt Jejus akupÿm htĩr ã harênh o apa. 22E mē atõ na ka pre mē ixpyrà finat Juãw Paxis kot Jejus hkrã kumrãr ã omu? Nê Jejus kot ri tanhmã amnhĩ nhĩpêx to ho pa xà hkrax rũm ka mē ixkôt ri omunh o ri apa? Nê htyk kãm omu nê akupÿm htĩr kãm omu nê ma akupÿm kaxkwa hwÿr àpir kãm omu? E mē atõ na ka pre mē ixpyrà ã kot amnhĩ nhĩpêx anhÿr ã omunh par o ri hkôt apa? ã mē ate kot amnhĩ nhĩpêx anhÿr ã omunh o apa xwÿnhjê hõ kot paj mē ata ka Jut Kariot mÿr pê mē ixpyrà ma mē kãm Jejus akupÿm htĩr ã harênh o ri apa. Anê.

23Nhũm pre ã Simãw Pêtre mē kãm kapêr anê. Hãmri nhũm mē kuma nê axpên pumunh o hkrĩ hãmri nê Maxitre mē Jujere wa kãm hamaxpêr. Jujere na pre hixi axkrunêpxi. Na pre kêp Jujere nê kêp Pasapas nê kêp Justi. 24-25Hãmri nhũm mē wa hã Tirtũm kukja nê kãm:

—Pa Tirtũm? Nã na pre finat Jut Kariotja Jejus kaga nê ty nê kot amnhĩ tomnuj mÿrapê ma mē kot amnhĩ xà htÿx kamã hamak tũm xàta wÿr ma mō. Tã ot pa mē ixte mēhøj kot mÿr pê mē ixpyrà nê Jejus nhÿ hã mē ahkre ho pa kaxyw mēhøj hã akukjêr kaxyw akuprō. Ate mē xpiitã tanhmã mē ixte amnhĩ nhĩpêx to ho ixpa hã mē ixpumunh par Tirtũm. Ate mē ijamaxpêr kôt mē ixpumunh par nê mē ixte tanhmã amnhĩ nhĩpêx to hã mē ixpumunh par. Jakamã e. Ota Maxitre mē Jujereja wa nhÿ. Nhÿ kot kaj amnhĩm ata? Kot paj mē kên pijakrutja ã wa hixi xi nê

ho àk nê hõ py. Hãmri ka amã hprãm xwÿnhnta ta. Kêr pa mẽ kên pumunh kêt rãhã hõ py nê hã hixi pumu nê amã hprãm xwÿnh kôt omunh kurê kumrêx. Anê.

26Nhũm prem ã Tĩrtũm mã kapêr anê hãmri nê kênja o axkamur nê ho àk nê omunh kêt rãhã ja py nê omu nhũm hã Maxitre nhĩxi nõ. Jakamã nhũm Jejus nhỹ hã mẽ ahkre ho mẽ pa xwÿnh maatijaja amnhĩ kôt kumê nhũm mẽ akupÿm kêp 12.

Tĩrtũm Karõ kot mẽ hwÿr wrÿk ã harênh

Rukre 24.49; Atre 4.31, 8.15, 10.44, 19.2

2 1Tã nhũm mẽ hkĩnh pê Pêtekos kato nhũm mẽ kot Jejus kôt amnhĩ xunhwÿr xwÿnhjaja nhỹri axpên wÿr akuprõ nê hã hkĩnh. Pêtekosja ã na pre hte Ijaew mẽ hpur kãm mẽõ rũnh ã hkĩnh kaxyw axpên wÿr akuprõ nê hã hkĩnh.

Jakamã nhũm mẽ kot Jejus kôt amnhĩ xunhwÿr xwÿnhjaja haxwÿja axpên wÿr akuprõ. 2Hãmri nê kaxkwa kamã mẽmoj ma. Nhũm mẽmoj te kôk xapêr tÿx krihkrit pyrãk o mẽ hwÿr wrÿk o mõ nê mẽ pikuprõnh xà hã ixkreja wÿr axà nhũm mẽ piitã kuma. 3Hãmri nhũm mẽmoj te kuwy jakrax pyrãkja ahpÿnhã mẽ hwÿr anhgrã nê mẽ hkrã nhĩmõk ã hikwÿ. 4-13Tĩrtũm Karõ na pre. Tãm mẽ hwÿr wrÿk jakamã ã ri mẽ hipêx anê. Hãmri nê kot mẽ ho amnhĩptar kaxyw mẽ hkarõm gjêx pa nhũm mẽ ÿ hã tanhmã kapêr to ho kuhê. Nom mẽ kapêr o kapêr kêt nê. Axtem mẽ



Atre 2.2-3

kapêr kwÿ ho kapêr. Tĩrtũm Karõ kot tanhmã mẽ ho jakamã nhũm mẽ axtem mẽ kapêr kwÿ ho kapêr. Jao ahpÿnhã mẽ kapêr kwÿ ho Tĩrtũm mã mex o mex ã harê. Na pre Ijaew kwÿjaja ahpÿnhã pyka hõ kamã ri mẽ hkôt pa nê mẽ kapêr ma nê ho kapêr o pa. Tã akupÿm Jerujarê hwÿr pan pøj nê kamã ri pa ho pa. Hãmri nê mẽmojta ma nê ma Jejus kwÿjê hwÿr hprõt nê ahpÿnhã mẽ kapêr ã mẽ kuma nê tee ri mẽ omunh o kuhê. Amnhĩ jaêr pê mẽ kuma nê tanhmã axpên mã mẽ harênh to ho:

—Kokÿÿ. Garirej nhõ xwÿnhjaja kot mẽ pakapêr mar kêt tã ra tanhmã amnhĩ to nê ahpÿnhã ri mẽ pakapêr o kapêr. Ahpÿnhã mẽ pakapêr nê ahpÿnhã mẽ panhõ pyka htã nhũm mẽ ã ri mẽ pakapêr o kapêr anê.

Na pika pê Pat
 nê Met
 nê Erãw
 nê Mēsopotãm
 nê Jutej
 nê Kapatos
 nê Pôt
 nê As
 nê Prik
 nê Pãpir
 nê Ejit
 nê Sirên wÿr Ripja
 nê krí pê Rôm
 nê gô hipôk pê Kret
 nê Arap.

Nê mẽ pahkwÿjaja mẽ pahpê Ijaew kumrêx

nê mẽ pahkwÿjaja amarĩ ri amnhĩ to Ijaew.

ãm ahpÿnhã mẽ panhõ pyka nê ahpÿnhã ri mẽ pakapêr.

— Tã pu mẽ ahpÿnhã mẽ pakapêr kãm mẽ kapêr ma. Tĩrtũm mex ã mẽ kot axpên mã harênhja pu mẽ hã mẽ mar mex nê. Anê.

Nhũm prem ã axpên mã mẽ harênh anê nê tee ri mẽ omunh o kuhê. Amnhĩ jaêr pê amnhĩ kapêr kãm mẽ kapêr ma nê tee ri hamaxpêr nê axpên mã:

— Kokÿÿ. Tanhmã mãn pre wem amnhĩ to nê ra mẽ pakapêr ma nê mẽ pakapêr o kapêr? Anê.

Nhũm mẽ hkwyÿjaja axtem nê ri mẽ hã hpêr o axkê nê axpên mã:

— Tk. ãm mẽ pipãnh ã ã ri mẽ kot amnhĩ nhĩpêx anhÿr kênã. Anê.

Simãw Pêtre kot mẽ kãm ujarênh

Atre 3.12-26

14Hãmri nhũm Simãw Pêtre ã mẽ kapêr anhÿrja ma hãmri nê kÿx pê mẽ kãm kapêr nê mẽ kãm:

— E Jerujarê nhõ xwÿnhjaja nê mẽ apê ixkwÿ Ijaew. Pa mẽ amã mẽmoj jarê ka mẽ inhma nê inhmar tÿx nê. 15Na ka mẽ atÿx ri mẽ ixpipãnh ã mẽ ixkamnhix. Mẽ ixkrã pipãnh kêt. Kormã myt kaxkwa nhĩpôk wÿr htêm kênã. Na hte Ijaew kwÿhtã kagôxÿhti ho hkôm kêt nê. 16Ja na pre Tĩrtũm amnepê mã ã mẽ ixte amnhĩ nhĩpêx anhÿrja kukamã mẽ ijarê nhũm ÿ hã kapêr o pa xwÿnh finat Joew mẽ ixkukamã hã kagà. Nê hã kagà ho:

17 Kojã nhÿrmã mẽmoj piitã hapêx kaxyw pa mẽ piitã mẽ hwÿr

Ixkarõ rê nhũm ma mẽ hwÿr wrÿ nê mẽ hkarõ mã agjê.

Hãmri nhũm mẽ hkanrêhã mẽ hkra xaptãr nywjaja ma mẽ

kãm ixkapër jarënh o ri mẽ hkôt pa. Koja mẽ hpimtir kãm amnhĩ kukamã mẽmoj pumu. Nẽ mẽhpigêtjaja haxwỳja. Kot paj mẽ hpimtir kãm tanhmã mẽ kãm ixkapër to.

18 Nẽ kot paj mẽ kot ixkôt ri tanhmã amnhĩ nhĩpêx to ho mẽ pa xwỳnhjê hwỳr Ixkarõ rê nhũm mẽ ã hã ma mẽ kãm tanhmã ixkapër jarënh to ho ri mẽ hkôt pa.

19 Kot paj kaxkwa kamã nẽ pyka kamã aa mẽ kot mẽmoj pumunh kêt kwỳ ho anẽ nhũm mẽ amnhĩ jaêr pê omu. Jao nhỹri mẽ hkamrô pumu nẽ kuwy pumu nẽ kuwy hkũm pumu hãmri nẽ tee ri amnhĩ kukamã hamaxpër.

20 Nẽ koja myyti ahtyk nhũm mytwrỳre haxwỳja te mry kamrô pyræk. Pahihti Jejus akupỹn hpôx xà hã arĩgro xwỳj ri koja mẽmoj ã amnhĩ nhĩpêx anẽ. Akupỹn hpôx xà hã arĩgro koja mex kumrêx.

21 Tã koja mẽhõ mẽmoj kot ã amnhĩ nhĩpêx anhỹr ã omu nẽ amnhĩ kaxyw inhmã hamaxpër nẽ amnhĩ to ixwỳ pa kuma nẽ ho ixkra nẽ mẽmoj punujta pê utà. Anẽ.

Na pre ã Tĩrtũm kapër anẽ nhũm finat Joewja mẽ pamã hã kagà. 22E pa mẽ amã tanhmã Jejus jarënh to ka mẽ inhma. Nà Najare nhõ xwỳnh na pre. Mẽ pahte Tĩrtũm nhỹ hã kot tanhmã amnhĩ nhĩpêx to ho pa hã omunh kaxyw na pre Tĩrtũm mẽ pahwỳr kumẽ nhũm ã hã mẽ panoo mã tanhmã amnhĩ nhĩpêx to ho pa. Nẽ aa mẽ pahte mẽmoj pumunh kêt kwỳ ho anhỹr o pa pu prem hã omu.

23—Tã ka prem tanhmã kaxyw ajamaxpër punuj to nẽ apĩ. Tĩrtũm ra kot amnepê mã ja kukamã ja hã mẽ apumunh mex tã mẽ pahwỳr kumẽ ka mẽ axtem nẽ apĩ. Jao mẽ kot htỳx ri amnhĩ nhĩpêx o mẽ pa xwỳnhjê mã agõ nhũm mẽ kupĩ. Pĩ kahpa hã kunhõ nhũm ty. No ãm mẽ kajaja na ka prem mẽ kãm hã amỹnê nhũm mẽ ã mẽ amã hprãm xà hkôt hipêx anẽ nẽ mẽ amã kupĩ.

24—Tã nhũm Tĩrtũm akupỹm ho htĩr nhũm akupỹm htĩr o htĩr nhũm mẽ htykja tee ri kot amnhĩ kôt mẽnh prãm kaprỳ. 25Amnepêm na pre finat Tawija Jejus akupỹm htĩr kukamã harê. Te Jejus tãm kapër pyræk o kapër nẽ kapër o:

Na hte Pahi Maati ixkôt pa ho pa rãhã nẽ. Kot inhĩhkô hã ixtãnopxar o pa jakamã kot paj inhmã ma hkêt nẽ ri ixãmnhĩx ijamakêtkati nẽ ri ixpa.

26-27 Pa Tĩrtũm? Nà kot paj nhỹrmã ixtyk tã arĩ amnhĩ wỳr akãm ama. Kot kaj mẽ htykjê kamã ixkarõ rer kêt nẽ. Ixte akapër kôt amnhĩ nhĩpêx mex o ri ixpa jakamã koja inhĩ kormã omnu nẽ hkro hkêt ri ka akupỹm ixto ixtĩr. Jakamã na pa inhmã ixtyk pyma hkêt nẽ ixkĩnh nẽ ijamakêtkati nẽ ri ixpa. Nẽ amnhĩ kĩnh jarënh rãhã ho ri ixpa.

28 Na ka pre akupÿm ixto ixtÿr ã amnhÿ jarẽ pa ixtÿr tÿm nẽ ixpa ho ixpa kaxyw. Tã ate ixkõt ri apa rãhã jakamã pa ixkÿnh nẽ ri ixpa. Anẽ.

29 ã na pre mẽ panhÿgêt finat Pahi Tawija Jejus htyk nẽ akupÿm htÿr kukamã harẽnh anẽ. No tãm amnhÿ jarẽnh kêt nẽ. Tawija na pre ty nhÿm mẽ haxà nhÿm htem arÿ haxàr xà hã pika ho mex o pa. Tã tãm ã kot amnhÿ jarẽnh anhÿr ro nhÿx akupÿm htÿr nhÿm mẽ arÿ haxàr xà kaprÿ ho mex o pa hkêt nẽ. 30 Pahi Tawi kêp Tÿrtÿm nhÿ hã kapër jarẽnh o pa xwÿnh jakamã nhÿm Tÿrtÿm kãm hkanrêhã htãmnhwÿ Jejusja kukamã harẽ nẽ kãm:

Koja nhÿrmã akanrêhã atãmnhwÿjê hõ amÿr pê apyrà nẽ mẽ ho amnhÿptàr o pa. ãm hãmri na pa amã ja jarẽ. Anẽ.

31 Nhÿm pre ã Tÿrtÿm Tawi mã mẽ pakaxyw ãm mã xwÿnhhta jarẽnh anẽ nhÿm kuma. Nẽ mar tÿx jakamã hkukamã htyk nẽ akupÿm htÿr ã harẽ nẽ hã kagà. Nẽ hã kagà ho:

Koja Tÿrtÿm mẽ htykjê kamã hkarõ rer kêt nẽ nhÿm aa ï omnu nẽ hkro kêt. Anẽ.

ã na pre finat Tawija Jejus Kris kukamã harẽ nẽ hã kagà anẽ. 32 Kot harẽnh xwÿnh Jejusja tãm na pre Tÿrtÿm akupÿm ho htÿr pa mẽ pamjaja akupÿm htÿr kãm omu. Hãmri nẽ mẽ ixte omunh xà hkõt ã mẽ amã harẽnh anẽ. Anẽ.

Nhÿm pre ã Simãw Pêtre mẽ kãm Jejus jarẽnh anẽ. Hãmri nẽ mẽ kãm:

33—Na pre Tÿrtÿm akupÿm amnhÿ wÿr Kra Jejus o api. Hãmri nẽ kãm anẽ nhÿm ïhkô hã mẽmoj piitã ho amnhÿptàr o hkrÿ. Hãmri nhÿm Tÿrtÿm kot kãm amnhÿ jarẽnh xà hkõt kãm amnhÿ Karõ gõ. Tã nhÿm ra amnhÿ pyrà nẽ mẽ ixwÿr kurẽ nhÿm jarãhã mẽ ixwÿr te kuwy jakrax pyrà nẽ mẽ ixwÿr wrÿ nẽ mẽ ixkarõ hwÿr gjêx pa. Hãmri pa mẽ ÿ hã ahpÿnhã mẽ akapër o ixkapër ka mẽ inhma. Tã mẽ akwÿyjaja axtem nẽ mẽ ixpipãnh ã mẽ ixkamnhÿx. 34 No finat Tawija na pre tãm kaxkwa hwÿr àpir ã amnhÿ jarẽnh kêt nẽ. Jejus kot ï ho kaxkwa hwÿr àpirja na pre harẽ nẽ harẽnh o:

Na pre Tÿrtÿm inhõ Pahihti mã kapër nẽ kãm:

35 “E jar inhÿhkô hã nhÿ.

Pa amã mẽ kãm akurê xwÿnhjê gõ ka mẽ ho amnhÿptàr o akrÿ.”

Anẽ.

ã na pre finat Tawija Tÿrtÿm kapër jarẽnh anẽ. Nom tãm ï rãhã kaxkwa hwÿr àpir ã amnhÿ jarẽnh kêt nẽ. Pahihti Jejus na pre ã hã harẽnh anẽ. 36 Jakamã kwa ixkwÿ Ijaew. Mẽ inhma nẽ inhmar tÿx nẽ. Mẽ ate Jejus ã axãmnhẽnh nhÿm mẽ kot mẽ amã pÿ kahpa hã hpÿr xwÿnhhta. Tãm na pre Tÿrtÿmja kêp mẽ panhõ Pahihti kaxyw ãm. Nẽ kêp mẽ papytãr xwÿnh kaxyw mẽ pakaxyw ãm. Anẽ.

37Nhũm pre ã Simãw Pêtre mẽ kãm ujarênh anhÿr o xa. Hãmri nhũm mẽ tee ri ujarênhja ma nê hkaprĩ nê. Nê tee ri amnhĩ kukamã hamaxpêr nê hamaxpêr o:

— Hêxta waa nê. Pêr ãm hãmri na pre Jejus mẽ pamã amnhĩ jarênh tã pu prem amnhĩ kaxyw hkôt pajamaxpêr kêt nê axtem nê kupĩ. Anê.

Hãmri nê amnhĩ tã mẽ hkukja nê Simãw Pêtre mã:

— Kwa ã kot anhÿr jakamã tanhmã kot paj mẽ amnhĩ nhĩpêx to? Anê.

38Hãmri nhũm mẽ kãm:

— Nà kêr ka mẽ tee ri ate amnhĩ tomnuj mã ajamaxpêr nê akaprĩ nê. Hãmri nê Jejus Kris kôt amnhĩ xunhwÿ. Pa mẽ ja hã mẽ apumu nê Jejus nhÿ hã mẽ akrã kumrã. Hãmri nhũm Tĩrtũm ja hã mẽ apumu nê te amnhĩ katut kôt mẽ ate amnhĩ tomnuj piitã rênh par pyrà nê axte kãm hamaxpêr kêt nê. Hãmri nê mẽ ixkuxwar mẽ awÿr amnhĩ Karõ rê. 39Kãm mẽ awÿr rênh prãm. Mẽ amã nê mẽ akanrêhã mẽ akra nê mẽ atãmnhwÿjê mã nê mẽ kot kormã Tĩrtũm kapêr mar kêt xwÿnhjê mã. ãm mẽ kot amnhĩ to hwÿr xwÿnh piitã nhũm kãm mẽ hwÿr rênh prãm. Anê.

40Nhũm pre ã Simãw Pêtre mẽ kãm ujarênh anê. Mẽ kãm kapêr xihtÿx o kapêr ry nê. Hãmri nê mẽ kãm:

— Kojã nhÿrmã Tĩrtũm mẽ kot tanhmã amnhĩ tomnuj to ho mẽ pa xwÿnhjaja tanhmã mẽ homnuj tÿx to. Jakamã kwa mẽ tokyx mẽ ate amnhĩ tomnuj kaga kê tanhmã mẽ ato hkêt nê. Anê.

41Hãmri nhũm mẽ hkwyjaja kapêr mar tÿx nê amnhĩ kaxyw Jejus kôt hamaxpêr nê hkôt amnhĩ xunhwÿ. Mẽ ohtô rax nê hkôt amnhĩ xunhwÿ. Mẽ kêp 3.000 nê hkôt amnhĩ xunhwÿ. Hãmri nhũm mẽ kot Jejus nhÿ hã kapêr jarênh o mẽ pa xwÿnhjaja mẽ hkrã kumrãr pa. Mẽ kêp Jejus kwÿ hã amnhĩ to amnhĩrĩt kaxyw mẽ hkrã kumrãr pa.

42Hãmri nhũm mẽ ra mẽ kot Jejus kôt amnhĩ nhĩpêx xwÿnhjê hkôt amnhĩ nhĩpêx o pa nhũm Jejus nhÿ hã mẽ ahkre xwÿnh maatijaja apkati mẽ Jejus kapêr o mẽ ahkre nhũm mẽ mar tÿx nê ra Jejus kôt amnhĩ nhĩpêx mex o mō. Nê gaa nê hkôt amnhĩ nhĩpêx mex o pa. Mẽ kãm kapêr mar prãm tÿx jakamã na pre htem axpên wÿr akuprō nê axpên kutã apku nê Tĩrtũm mã amnhĩ jarênh o hkrĩ. Nê mẽ kãm axpên to mex pix prãm o axpên kôt pa ho pa.

Jejus kwÿ kot tanhmã amnhĩ nhĩpêx to hã mẽ harênh

Atre 4.32-35

43Tã nhũm Jejus nhÿ hã mẽ ahkre ho mẽ pa xwÿnh maatijaja xatã Tĩrtũm nhÿ hã aa mẽ kot mẽmoj pumunh kêt kwÿ ho anhÿr o ri krĩ nhō xwÿnhjê hkôt pa nhũm mẽ piitã ja hã mẽ omu. Amnhĩ jaêr pê mẽ omu nê mẽ kamã no puma ho tee ri tanhmã Tĩrtũm mã hamaxpêr to. 44Nhũm mẽ kot Jejus kôt amnhĩ xunhwÿr xwÿnh piitã mẽmoj to axpên kutã

nojarêto o pa. Jao axpên pê ri mêmôj to ôxy hkêt nê pa. ⁴⁵Jakamã nhũm mēhō kēp amrakati nhũm mē ja hã omu hãmri nê ô pyka hkwỳ ho wēnê rỳ mē hikukrêx kwỳ ho wēnê nê kàxpore jamỳ nê ma o mra nê mē kãm kugō. Na pre hte ã mē kot Jejus kôt amnhĩ xunhwỳr xwỳnhjaja axpên nhĩpêx anhỹr o pa. ⁴⁶Hãmri nê apkati mē Tĩrtũm mã amnhĩ jarēnh xà hã ixkre hwỳr mra nê kãm mex o mex ã harē. Nê hamakêtkati nê àmnhĩx ri hkĩnh kãm axpên nhōrkwỳ hkôt ri apkur o pa. ⁴⁷Pê Tĩrtũm mã mex o mex ã harēnh o ri axpên kôt pa. ã mē kot amnhĩ nhĩpêx anhỹr o pa jakamã nhũm krĩ nhō xwỳnh piitã kãm mē hkĩnh nê. Nê mē hkwỳjaja apkati mē mē hwỳr mra nê mē hkôt axkamē nê mē urak nê Jejus kôt amnhĩ xunhwỳ nhũm Tĩrtũm ja hã mē omu nê mē ho hkra. Jakamã nhũm mē ra ohtô rax kumrêx o mō.

Te grà xwỳnh jarēnh

Juãw 14.12-14; Atrẽ 14.8-10

3 ¹Tã nhũm apkati hō hã nhũm Simãw Pêtre mē Juãw wa ma Tĩrtũm mã amnhĩ jarēnh xà hã ixkre hwỳr wa tē. Na pre hte myt àhpanh grire nhũm mē piitã kot Tĩrtũm mã amnhĩ jarēnh kaxyw hwỳr mra. Jakamã nhũm Simãw Pêtre mē Juãw wa haxwỳja ma hwỳr wa mra. ²Nhũm mēhōja hakwakrem hkrĩ. Katorxà nhōxà hkre rũm hte grà nê kator xwỳnhhta. Nê arĩ hkrĩ ho hkrĩ nê aa kànhmã ãm nê ri pa hkêt nê. Nhũm hte hkràmnhwỳjaja apkati mē hamỳ nê ma o pa nê Tĩrtũm mã amnhĩ jarēnh xà hã ixkre jakwakrem hkrĩ nhũm mē hwỳr o hkrĩ. Hakwakreja mē kot kãm: “Mē gjêx xà mex” anhỹr xwỳnhhta kapem hwỳr mē mrar xwỳnhjê hwỳr o hkrĩ. ³Tã nhũm Simãw Pêtre mē Juãw wa tē nê ixkreja wỳr wa àr o tē nhũm hte grà xwỳnhhta wa omu nê kàxpore hã wa kuwỳ ⁴nhũm Simãw Pêtre omu nê kãm:

— E amnê wa ixpumu. Anê.

⁵Hãmri nhũm kuma nê htỳx ho wa kot kãm kàxpore hkwỳ nhōr ã wa hkamnhĩx nê wa omu ⁶nhũm Simãw Pêtre kãm:

— Nà ixkàxpore hkêt. Nom kot paj Jejus Kris xàhpumunh xà ho tanhmã anhĩpêx to. E pa Jejus Kris pê Najare nhō xwỳnhhta nhỹ hã amã ixkapêr jakamã tokyx kànhmã xa nê ri mra. Anê.

⁷Hãmri nê upōk rũm hpa hã kupy nê kànhmã ãm nhũm hte mex nê kànhmã xa nê amnhĩ te karo ho ri mra. ⁸Hãmri nê hte mex ã amnhĩ pumu nê hkĩnh tỳx nê. Nê hkĩnh xàj ma wa hkôt harĩ ho tē nê wa hkôt ixkrem axà. Tĩrtũm mã mex o mex ã harēnh pê harĩ ho wa hkôt tēn axà. ⁹Hãmri nhũm mē piitã amnhĩ jaêr pê akupỹm mex ã omu nê kamã no puma nê. ¹⁰Nê axpên mã:

— Kokỹỹ mũjti na pre hte mē gjêx xà mex kamã mē hwỳr rãhã ho hkrĩ htã nhũm Tĩrtũm tanhmã ho nhũm kànhmã xa nê ri mrar mex kurê kumrêx. Hêxta waa nê. Anê.

Simāw Pêtre kot mẽ kām ujarênh

Rukre 24.46-47; Atre 2.14-36

11Hāmri nhũm hte mex xwỳnhja Simāw Pêtre mẽ Juāw wa hkôt ixkre hwỳr axà nẽ wa kuri xa. Nhũm mẽ piitã amnhĩ jaêr pê harênh ma nẽ hwỳr hprôt nẽ agjê nẽ omu. Mẽ kot ixkre nhĩkjê jarênh o: “Pahi Sarumāw nhõ” anhỹr xwỳnh jarênhja wỳr nhũm mẽ hprôt nẽ hte mex xwỳnhhta kamã no pyma ho kuhê. Nẽ kuri Simāw Pêtre mẽ Juāw wa omu nẽ axpẽn mã wa harênh o:

— Hêxta waa nẽ. Tanhmã na we wa amnhĩ to nẽ akupỹm kãm hte ho mex nhũm ri mra?

Anẽ nẽ wa kamã no pyma nẽ. 12Hāmri nhũm Simāw Pêtre mẽ kuma nẽ mẽ kãm:

— Pa ixkwỳjaja. Kwa mẽmo na ka mẽ ri mẽ ixkamã ano pyma ho akuhê? Xà wa ixàhpumunh tỳx xà ho na pa wa ho mex? Nà ja kot anhỹr kêt. Rỳ xà wa ixte Tĩrtũm kôt amnhĩ nhĩpêx mex o ixpaja o na pa wa ho mex? Nà mãănẽn ja kot anhỹr kêt. 13-17Mẽ ate omunh xwỳnhhta Jejus tãm kot ho mex kênã. Kot amnhĩ kaxyw kãm hamaxpêr tỳx jakamã nhũm akupỹm ho mex ka mẽ omu.

— Finat Apraāw nẽ Ijak nẽ Jako mẽ hkwỳjaja kot hkôt amnhĩ nhĩpêx o pa xwỳnh pê Tĩrtũmja. Tãm na pre akupỹm Kra Jejus o htĩr nẽ mex o mex ã harê. Mẽ ate hã axàmnnênh nhũm mẽ kot hpĩr xwỳnhhta. Pahihti Pirat kot kãm urer kaxyw tã ka mẽ nê kãm akapêr kãm axihtỳx nẽ. Nom Jejus tãm kot amnhĩ nhĩpêx o pa xwỳnh na pre. Na pre hte amnhĩ nhĩpêx mex rãhã ho pa htã ka mẽ axtem nẽ hkaga. Nhũm pahihti Pirat mẽ ate kot kãm urer kêt ã axihtỳx nhũm kãm urer kêt nẽ õ pôristi mã kugõ nhũm mẽ amã kupĩ. Mẽ kajaja mẽ amã hprãm xà hkôt mẽ amã kupĩ. Tĩrtũm kot mẽ pahwỳr mẽnh tã ka mẽ axtem nẽ apĩ.

— Nom mẽ ate kêp Tĩrtũm Kra hã omunh kêt jakamã na ka prem ã hipêx anê. Mẽ kot mẽ ato amnhĩptàr xwỳnhjê mẽ na ka prem amarĩ apĩ. Na prem mẽ axàmnnênh xà hkôt mẽ amã pĩ kahpa hã kunhõ nẽ ã hpĩr anê. Kêp akupỹm mẽ pahto mẽ pahtĩr xwỳnh tã ka prem axtem nẽ apĩ. No nhũm Tĩrtũm akupỹm ho htĩr pa prem akupỹm htĩr kãm omu.

18— Amnepêm Tĩrtũm nhỹ hã kapêr jarênh o mẽ pa xwỳnhjaja na prem Tĩrtũm kot mẽ pakaxyw ãm xwỳnhja kukamã tanhmã harênh to nẽ hã kagà nẽ mẽ kãm harênh o pa. Kot amnhĩ xà htỳx kãm hamak kãm htykja kukamã nhũm pre htem harênh o pa. Tã ã Tĩrtũm kot kukamã harênh anhỹr xàja kôt ka mẽ ã hipêx anê nẽ apĩ.

19— Jakamã kwa mẽ tee ri mẽ ate amnhĩ tomnuj ã amnhĩ pumu nẽ tokyx hkaga. Hāmri nẽ amnhĩ to Tĩrtũm wỳ kê mẽ anê mẽ ate

amnhĩ tomnuj piitã amnhĩ katut kôt rēnh pa. 20Hāmri nē mē ato mex nē ka mē kukwak ri akīnh nē ajamakêtkati nē axàmnhĩx ri apa. Koja nhỹrmã akupỹn mē pahwỳr Jejus mē. Ra kot mē pakaxyw ãm kēnã.

21—Nom koja tokyx akupỹn wrỳk kêt nē. Koja kormã kaxkwa kamã pa rãhã nhũm Tĩrtũm akupỹm kot mēmoj piitã ho mex par mē nhũm rĩ kormã akupỹn mē pahwỳr wrỳ. Amnepēm Tĩrtũm nhỹ hã kapēr jarēnh o pa xwỳnhjaja kot ja kukamã harēnh nē hã kagà xà hkôt.

22—Na pre finat Mojes haxwỳja Tĩrtũm nhỹ hã mē pahpãmjê mã tanhmã ja jarēnh to nē harēnh o:

Koja nhỹrmã mē panhõ Pahi Maati Tĩrtũmja te kot ra mē akaxyw pa ixãmja pyrã nē axte mē panhiõ xãm. Mē panhiõ koja. Koja nhỹrmã inhmỳr pē mōn pōj nē mē amã Tĩrtũm kapēr jarēnh o pa. Ka mē kapēr ma nē mar tỳx nē kapēr kôt amnhĩ nhĩpêx o ri apa.

23 Koja mēhõ kuma nē ãm kuma nē hkôt amnhĩ nhĩpêx kêt nē nhũm Tĩrtũm tee ri ja hã omu nē kêp hkra hkêt ã harēnh kurê kumrêx. Anē.

24Ã na pre finat Mojesja mē kãm Jejus kukamã ujarēnh anē. No ãm tapxipix na pre ã harēnh anhỹr kêt nē. Tĩrtũm nhỹ hã mē kapēr o mē pa xwỳnh piitã na prem ã mē kãm harēnh anhỹr o pa. Kot harēnh o pa xwỳnh kot wa finat Sãmuewja nē hkôt mē hkwỳjê piitã ã Jejus kukamã hkwỳjê mã harēnh anhỹr o pa.

25—Tã mē pahpê mē hkamrô hkwỳ na pu mē. Mē pahpê mē hkanrêhã mē htàmnhwỳy. Mē pakaxyw na pre Tĩrtũm ã mē kãm kapēr anē. Nē Kraja kukamã finat Apraãw mã kãm:

Koja nhỹrmã akanrêhã atàmnhwỳjê hõ pyka piitã hkôt mē piitã mē ho mex o pa nhũm mē kukwak ri mex kumrêx nē ri pa. Anē.

26Ã kot Kra hkukamã harēnh anhỹr tã mē pakumrêxjê hwỳr na pre kumê. Kot mē pahto mex nhũm mē pahte amnhĩ tomnuj kaga kaxyw nhũm mē pahpê Ijaew kumrêxjê hwỳr kumê. Anē.

Nhũm pre ã Simãw Pêtreja hte grã xwỳnh pumunh o mē kuhê xwỳnhjê mã ujarēnh anē.

Simãw Pêtre mē Juãw wa kot mē àptàr tũmjê mã kapēr ã wa harēnh

Rukre 21.12-13

4 1-4Nhũm Simãw Pêtre mē Juãw wa arĩ mē kãm Tĩrtũm kapēr jarēnh o wa xa nē mē kãm:

—Nã na pre Jejus ty nhũm Tĩrtũm akupỹm ho htĩr. Tã kot akupỹm ho htĩr jakamã koja nhỹrmã uràk nē akupỹm mē htyk xwỳnh piitã mē ho htĩr pa. Anē.

Hāmri nhũm mẽ kot wa mar o kuhê xwỳnh kwỳjaja wa kuma nê wa hkôt hamaxpêr nê wa urà nê Jejus kôt amnhĩ xunhwỳ. Jakamã nhũm ra mẽ kot Jejus kôt amnhĩ xunhwỳr xwỳnhjaja ohtô rax kumrêx. Ra mẽ kêp 5.000.

Hāmri nhũm axtem mẽ hkwỳjaja wa hwỳr mra nê wa mar o kuhê. Mẽ õ patre nhõ pôristi krãhtũm mẽ Satusew nhõ xwỳnh kwỳjê mẽ nhũm mẽ ma Simãw Pêtre mẽ Juãw wa hwỳr mra nê tee ri wa kot mẽ ahkre hã wa mar o kuhê. Nê mẽ kãm akupỹm mẽ htĩr jarênhja ma nê wa kamã gryk nê. Satusew nhõ xwỳnhjaja na pre htem akupỹm mẽ htĩr kôt hamaxpêr kêt jakamã nhũm wa akupỹm mẽ htĩr jarê nhũm mẽ tee ri wa kuma nê hamaxpêr punuj nê wa kamã gryk kato. Hāmri nê wa hã amỳnê nhũm mẽ wa unê nê ma wa o tẽ nê mẽ hagjênh xà kamã wa haxà. Ra myt grire nhũm mẽ wa haxà. Wa kot mẽ hagjênh xà kamã hã apkati nhũm rĩ kormã mẽ kot ujarênh ã tanhmã wa ho kaxyw.

5-6Tã nhũm apkati nhũm mẽ ohtô nê wa ujarênh ã wa mar kaxyw Jerujarê kamã axpên wỳr akuprõ. Ijaew pigêtjaja nê mẽ àptàr tũm kwỳjaja. Nê mẽ kot finat Mojes kapêr o mẽ ahkre ho mẽ pa xwỳnhjaja. Nê mẽ õ patre maati Anas mẽ hkwỳja. Nê Ijaew nhõ juisti Kajpas mẽ Juãw õ mẽ Aresãnja. Nhũm mẽ kot Simãw Pêtre mẽ Juãw wa mar kaxyw axpên wỳr akuprõ. 7Hāmri nê wa hã karõ nhũm pôristi wa hwỳr tẽ nê wa haprõ nê ma mẽ hwỳr wa o tẽ nê wa ho axà nê mẽ kutã wa ỳr nhũm wa nhỹ. Hāmri nhũm mẽ wa omu nê wa kãm:

— E mẽ inhmã amnhĩ jarê. Mẽhõ xàhpumunh xà ho na ka pre wa hte grã xwỳnhhta ho mex? Mẽhõ na pre hwỳr war amê ka wa ho mex? Anê.

8Hāmri nhũm Simãw Pêtre mẽ kãm awjarê. Tĩrtũm Karõ kot kãm hamaxpêr o hihtỳx jakamã nhũm ỳ hã Ijaew pigêtjê mẽ mẽ àptàr tũmjê mã awjarê nê mẽ kãm:

9— Tôe mẽhõ kot ho mex xwỳnhja ã mẽ ate wa ixkukjêr 10jakamã kot paj mẽ amã harê ka mẽ ixte harênhja ma. Wa ixpyrà nê mẽ apê Ijaew kêr ka mẽ wa ixkapêr mar tỳx nê. Jejus Kris pê Najare nhõ xwỳnhhta. Mẽ ate hpĩr nhũm Tĩrtũm kot akupỹm ho htĩr xwỳnhhta. Tãm na pre àhpumunh tỳx o akupỹm hte grã xwỳnhhta o mex. Ỡ hã ixte kaxyw kãm ixkapêr nhũm tãm akupỹm ho mex. 11Tĩrtũm kot mex o mex ã harênh nê mẽ pakaxyw ãm tã ka prem axtem nê hkaga. Nom Tĩrtũm kapêr ã kagà htũm kot ra mẽ akukamã ã mẽ ate amnhĩ nhĩpêx anhỹr ã mẽ ajarênh nê mẽ ajarênh kot:

Mẽ kot kên o amnhĩm òrkwỹ nhĩpêx kaxyw nê nhỹri kên maati pumu nê htỳx omnuj ã hkamnhĩx nê hkaga. Mẽ kot hkaga htã nhũm Tĩrtũm mẽ kurom mex o kot kên piitã hakrenh par ã omunh kurê kumrêx.

Anhỹr o kot mẽ ajarênh. Te mẽ ate kên maati kaga xwỳnh ã mẽ ajarênh pyrãk. Tã ka mẽ ã mẽ kot mẽ akukamã mẽ ajarênh anhỹrja kôt te mẽ

ate kên maati kaga pyrà nê Jejus kaga nê apĩ. Tirtũm kot amnhĩm mex o mex ã omunh nê harênh tâ ka prem axtem nê hkaga. **12**Tapxipix na hte mẽ panê mẽ pahte amnhĩ tomnuj rê. Mêhõ koja uràk nê àhpumunh tỳx o mẽ panê kurê? Mêhõ koja ahpỳnhã pyka piitã hkôt uràk nê ã mẽ panhĩpêx mex anê? Nà ãm amrakati kumrêx. ãm Jejus pix. Tapxipix na pre Tirtũm ja kaxyw ãm jakamã tapxipix na kêp mẽ pahkaprĩ xwỳnh maati. Anê.

13Nhũm pre ã Simãw Pêtreja mẽ kãm kapêr anê. Hãmri nhũm mẽ amnhĩ jaêr pê kuma nê axpên mã:

—Kwa wa kãm mẽ pahpyma wa hã hkwy jêt kêt kumrêx. Te ri wa htỳx ri wa pa pyràk tâ wa hamaxpêr tỳx kumrêx. Mãn wa kêp Jejus kôt mẽ pa ho mẽ pa xwỳnh kwỳ jakamã na wa ã kapêr anê nà? Anê.

14Hãmri nê tee ri kot tanhmã mẽmoj tâ wa kãm àkjêr to hkukamã hamaxpêr. No nhũm hte grà xwỳnh ra kot mẽ hwỳr àr nê Simãw Pêtre wa kuri mex nê ãm nhũm mẽ kot no ho omunh jakamã wa kãm àkjêr kêt nê. **15**Hãmri nê wa kãm anê nhũm wa mẽ kêp kato nê kapôt ã xa nhũm mẽ tanhmã wa kãm nê kaxyw wa hã axpên ma nê axpên mã:

16—Kwa tanhmã kot puj mẽ wa ho? Ra jar Jerujarê kamã mẽ piitã mẽ kot akupỳm hte grà xwỳnhhta mex ã wa omunh kênã kot puj kêt mẽ kãm wa kot ho mex hkêt ã wa harê. **17**Tã mẽ kot harênh o hprôt pymaj kot puj mẽ axte Jejus jarênh o pa nê wa hkurê. Kê hte grà xwỳnh jarênhja ãm jar mẽ pakamã hapêx. Nà kot puj mẽ ã wa kãm karõ anê. Anê.

18Nhũm mẽ wa hã axpên mar pa hãmri nê akupỳn wa hã karõ nhũm wa akupỳn mẽ hwỳr axà nhũm mẽ wa kãm:

—E Simãw Pêtre mẽ Juãw wa. Wa mãmrĩ ma tẽ. Nom kêr ka wa mẽ ixkapêr mar kumrêx. Kêr ka wa axte ri tanhmã mẽ kãm Jejus jarênh to ho ri apa hkêt nê. ãm kwarĩ ho kwarĩ. Anê.

19Hãmri nhũm wa tee ri mẽ kuma nê mẽ kãm:

—Nà Tirtũm tãm kot ja hã wa inhmã karõ kênã kot pa kêt wa mẽ akapêr ma nê harênh o ixpa hkêt nê. **20**Na pa pre wa Jejus kôt ri ixpa nê xatã kot tanhmã amnhĩ nhĩpêx to hã omunh o hkôt ixpa. Nê xatã tanhmã mẽ ahkre hto hã mar o hkôt ixpa. Nê akupỳm htĩr kãm omu. Jakamã tanhmã kot pa wa amnhĩ to nê mẽ kãm ja jarênh kêt nê? Nà kot pa wa mẽ akapêr mar xà hkôt ã amnhĩ nhĩpêx anhỳr hkêt nê. Anê.

21-22Hãmri nhũm mẽ kuma nê tee ri mẽ kot tanhmã wa ho kaxyw. Te grà xwỳnhhta hte grà nê hkrĩ ho hã amgrà pê 40 tâ ra akupỳm mex nhũm mẽ piitã ja hã omu nê hã axpên mã Tirtũm mex o mex ã harênh o ri pa. Jakamã nhũm mẽ utàr xwỳnhjaja mẽ kuma nê kãm mẽ uma nê.

Hāmri nē mē umaj tanhmã Simãw Pêtre mē Juãw wa ho hkêt nē. Âm axte wa kot Jejus jarênh o pa nê wa kãm kapêr kãm hihtÿx nê wa hano nhũm wa ma tẽ.

Mê kot amnhĩ to Tĩrtũm wÿr ã mē harênh

Matêwre 18.19-20

23Tã nhũm Simãw Pêtre mē Juãw wa ma akupÿm Jejus kôt htõ nê htõxjê hwÿr wa tẽ nê mē kãm amnhĩ jarê. Nê patre krãhtũmjê mē mē àptàr tũmjaja kot Jejus kapêr jarênh nê wa hkurê kamã hihtÿxja nhũm amnhĩ tã mē kãm mē harê. 24Hāmri nhũm mē wa kuma nê amnhĩ to Tĩrtũm wÿr kurê kumrêx nê kãm:

—Pa Pahi Maati? Nà mēmoj piitã ho akator xwÿnhhta na ka. Na ka pre kaxkwa ho akato nê pyka ho akato nê gô xujanãr o akato. Hāmri nê kamã mēmoj piitã ho akator pa. 25-26Amnepêm na pre mē inhigêt Tawija amã tanhmã amnhĩ nhĩpêx to ho pa. Nê Akarõ nhÿ hã akapêr kwÿ jarê nê hã kagà. Nê kagàja kamã mē kot Pahihti Jejus kutã amnhĩ xunhwÿr xwÿnhjê jarê nê mē hã kagà. Mē hkukamã mē hã kagà nê mē hã kagà ho:

Mêmo mÿrapê na prem Ijaew kêt xwÿnhjaja Tĩrtũm kutã amnhĩ xunhwÿ?

Nê Ijaew haxwÿja. Mêmo mÿrapê na prem htÿx ri hamaxpêr o ri pa?

Nê pyka piitã hkôt pahijaja na prem Pahi Maati kutã amnhĩ xunhwÿr pa.

Nê kot mē pakaxyw âm xwÿnh Jejus Krisja nhũm mē määnên kutã amnhĩ xunhwÿr pa.

Nê mē kot hpĩr kaxyw mē kãm hã amÿnê.

Kwa mēmo mÿrapê na prem axtem nê ã amnhĩ nhĩpêx anê? Anê. ã na pre finat Tawija Akarõ nhÿ hã mē harê nê hã kagà anê Tĩrtũm. 27Âm hāmri na pre mē hkukamã mē hã kagà. Ra mē kot ã amnhĩ nhĩpêx anhÿr kênã. Krĩ ja kamã na prem ã amnhĩ nhĩpêx anhÿr kaxyw axpên wÿr akuprõ. Pahi Eroxo nê pahi Põn Pirat nê mē ixkwÿjaja nê mē kêt Ijaew kêt xwÿnhjaja axpên wÿr akuprõ nê Akra Jejus kutã amnhĩ xunhwÿ nê mē kot hpĩr kaxyw hã amÿnê. Kot tãm amnhĩ nhĩpêx o pa nhũm ate mē ixkaxyw âm xwÿnhja nhũm mē axtem nê kutã amnhĩ xunhwÿ.

28—Nom amnepêm kormã mē ixkêt ri na ka pre mē hkukamã ã mē kot amnhĩ nhĩpêx anhÿr ã mē omu. Mē kot tanhmã apê Akra Jejus to nê hpĩrta kukamã ka pre hã mē omu. Tã mē ixwÿr amê nhũm prem kupĩ. No âm ajamaxpêr xà hkôt.

29—Tã ka mē omu. Na mē Jejus ã mē ixkamã gryk tÿx nê tanhmã hã mē ixto kaxyw. Jakamã kot kaj mē ixpê amã tanhmã amnhĩ nhĩpêx to

ho ixpa xwÿnhjaja ka tanhmã mẽ ixkrã hto pa mẽ inhmã mẽ uma hkêt nẽ mẽ hkôt ixpa ho ixpa. Mẽ kot tanhmã mẽ ixto hã mẽ ixkagrõnh tâ pa mẽ inhmã mẽ uma hkêt nẽ ixàmnhĩx ri ixkĩnh nẽ ri ixpa. Nẽ anhỹ hã mẽ kutã amnhĩ to htÿx nẽ arĩ mẽ kãm akapër jarẽnh o ri mẽ hkôt ixpa. Mẽ kot Jejus ã tanhmã mẽ ixto htãã.

30—Akra Jejus mex o mex jakamã kot paj mẽ àhpumunh tÿx xà ho tanhmã mẽ piitã mẽ ho mex to ho ri mẽ hkôt ixpa. Mẽ à xwÿnhjaja akupÿm mẽ o mex. Nẽ mẽ kot aa mẽmoj pumunh kêt kwÿ ho anẽ. Kê mẽ omu nẽ axàhpumunh o axàhpumunh ã apumunh mex kurê kumrêx. E ãm ja pix na ra hapêx. Anẽ.

31Nhũm prem ã amnhĩ to Tĩrtũm wÿr anẽ. Puh nhũm ixkreja mẽ kãm htertet tÿx nẽ nhũm Tĩrtũm Karõ axte tanhmã mẽ hkrã hto nhũm mẽ ÿ hã kãm mẽ uma hkêt nẽ. ãm amnhĩ to htÿx nẽ mẽ kãm Tĩrtũm kapër jarẽnh rãhã ho ri mẽ hkôt pa.

Jejus kwÿjaja tanhmã kot axpẽn nhĩpêx to hã mẽ harẽnh

Atre 2.42-47

32-33Nhũm Jejus nhỹ hã mẽ ahkre ho mẽ pa xwÿnh maatijaja. Na pre Tĩrtũmja mẽ ho mẽ kãm ma hkêt jakamã nhũm pre htem akupÿm Jejus htĩr kôt mẽ kãm harẽnh o ri mẽ hkôt pa. Nhũm Tĩrtũm mẽ kot Jejus kôt amnhĩ xunhwÿr xwÿnh piitã mẽ kutã nojarêt rãhã ho pa nhũm mẽ ra ohtô rax nẽ. Nẽ mẽ kãm axpẽn to mex pix prãm o ri axpẽn kôt pa. Mẽ ohtô htã te mẽ tipxi pyræk. Nẽ axpẽn pê mẽmoj to õxÿ hkêt nẽ. Na pre htem axpẽn mã mẽ hikukrêx nẽ mẽ apkur xà jarẽnh o: “Inhõ pix kêt mẽ pahpiitã mẽ panhõ na.” Anhÿr o ri mẽmoj tâ axpẽn kutã nojarêt o ri pa. No kêt axpẽn mã mẽmoj jarẽnh o: “Tk. Nà ãm inhõ pix na.” Anhÿr o harẽnh kêt nẽ. 34-35Na pre htem tõhã õ ixkre hõ ho wẽnê. Rÿ õ pyka hkwy ho wẽnê nẽ kàxpore jamÿ nẽ ma o mra nẽ Jejus nhỹ hã mẽ ahkre ho mẽ pa xwÿnhjê mã kugõ nhũm mẽ hamÿ nẽ mẽ kệp amrakati xwÿnhjê mã ho anhrã. Hãmri nhũm mẽ amnhĩm hamÿ nẽ ho amnhĩm awjaprô. Jakamã na pre hte mẽ hkwyjaja kãm prãm nẽ ri pa rÿ ê hkêt nẽ ri pa hkêt nẽ.

36-37Jujere na pre ã amnhĩ nhĩpêx anẽ nẽ mẽ kaxyw õ pika hkwy ho wẽnê. Hãmri nẽ kàxpore py nẽ o tẽ nẽ Jejus nhỹ hã mẽ ahkre xwÿnh maatijê mã kugõ. Jujereja Ijaew nhõ patre ho ajuta xwÿnh na pre. Gõ hipòk pê Sipre kamã na pre kato. Kệp Jujere htã no nhũm Jejus nhỹ hã mẽ ahkre ho mẽ pa xwÿnhjaja na prem kãm: “Panãpe” Anẽ. Mẽ kapër kãm Panãpeja te kệp “mẽ hamaxpër o mẽ hihtÿx o pa xwÿnh” anhÿr pyræk. Jakamã nhũm õ pika hkwy ho wẽnê nẽ kàxpore py nẽ o tẽ nẽ Jejus nhỹ hã mẽ ahkre xwÿnhjê mã kugõ nhũm mẽ kupy nẽ mẽ kệp amrakati xwÿnhjê mã ho anhrã.

Ananís mẽ Sapire wa kot amnhĩ to hêx ã wa harênh

Karatas 6.7; Eprêw 10.26-31

5 ¹Tã nhũm Ananís mẽ hprõ Sapire wa Jujere jarênh ma nê uràk nê õ pyka hkwỳ ho wênê. ²Hãmri nê kàxpore py. Nom na pre wa ra hã axpên ma. Jakamã nhũm Ananís Jujere kĩnhã kàxpore hkwỳ pix py nê o tẽ nê Jejus nhỹ hã mẽ ahkre xwỳnh maati-jê mã kugõ. Nom katàt kôt mẽ kãm òr ã amnhĩ jarênh kêt nê. Kot kàxpore ho pikjêr nê amnhĩm hkwỳ ho àrìk ã amnhĩ jarênh kêt nê. ãm mẽ kãm amnhĩ jarênh o hêx. Te piitã òr par pyràk o amnhĩ nhĩpêx nê mẽ kãm:

—E ota ixkàxporeta. Na pa wa inhõ pika hkwỳ ho wênê nê kàxpore hpy nê hpãnhã Jujere pyrã nê man mẽ awỳr piitã o tẽ. Anê.

³Hãmri nhũm Simãw Pêtre ra ã kot amnhĩ nhĩpêx anhỹr ã omu hãmri nê kãm:

—Tk. Kwa mon ka axtem nê Satanasti kapêr ma nê hkôt amnhĩ nhĩpêx nê te akàxpore piitã òr pyrãk ã amnhĩ to axêx anê? Te ate piitã òr pyrãk tã no ãm hkwỳ pix gõ. Hêxta waa nê. Na ka axtem nê Tĩrtũm Karõ mã akàxpore nhõr par o axêx. ⁴Anhõ pyka kênã. Nê hpãnhã kàxporeja anhõ kênã. Kot kaj amã tanhmã ho hprãm xà hkôt mãmrĩ tanhmã ho. Amã piitã ho axàrìk prãm nê mãmrĩ piitã ho arìk. Rỳ amã hkwỳ hpix nhõr prãm nê mãmrĩ hkwỳ pix gõ. No ri ate òr par pyrãk o amnhĩ to axêx kêt nê. Te ate mẽ inhmã pix mã axêx pyrãk nom mẽ inhmã pix mã hkêt. Na ka mãänên te Tĩrtũm mã axêx pyrãk. Anê.

⁵⁻⁶Nhũm pre ã Simãw Pêtre Ananís mã kapêr anê nhũm kuma nê pykap tẽm nê htyk kurê kumrêx. Hãmri nhũm mẽ àptàr nywjaja hwỳr tẽ nê kupêxê ho hkupu nê kumỳ nê ma o tẽ nê haxà. Hãmri nhũm mẽ kot ã kot amnhĩ nhĩpêx anhỹr ã harênh mar xwỳnhjaja tee ri harênh ma nê kãm ma htỳx nê.

⁷Tã nhũm ra hã ahtũm nê. Ra hã 3 ore nê hapêx nhũm Ananís prõ Sapireja htỳx hamakêtkati nê mẽ hwỳr tẽ nê axà. Kormã mjên htyk ã harênh mar kêt nê hamakêtkati nê hkĩnh nê mẽ hwỳr tẽ nê axà. ⁸Hãmri nhũm Simãw Pêtre omu nê hêx rom hkukja nê kãm:

—Pa? E kwa inhmã mẽmoj jarê. Tanhmã na prem war anhõ pykaja pãnhã war amã amnhĩrer to? Xà ãm hãmri na amjên mẽ inhmã harê nà? Anê.

Hãmri nhũm kuma nê mjên pyrã nê kãm ho hêx nê kãm:

—Ỗỹ. ãm hãmri kot amã harênh kênã. Anê.

⁹Hãmri nhũm Simãw Pêtre tee ri kuma nê kãm:

—Tk. Hêxta waa nê. Kwa mon ka war ajamê war akàxpore ho te Tĩrtũm mã axêx pyrãk? Mãn ka wa ajamaxpêr o: “Koja Tĩrtũm ja hã wa ixpumu nê ãm hã wa ixpumu nê tanhmã hã wa ixto hkêt nê.” Anhỹr o mãn ka wa ajamaxpêr nà? Nom na ka wa ãm kãm axêx kaprỳ. Onêj ra

mě kot amjên jaxàr xwỳnhjaja akupỳn hpòx o mra. Koja mẽ anhĩpêx o te hipêx pyrà nê mãânên ato tẽ nê ajaxà ka rĩ amnhĩ pumu.

10Anê nhũm kuma nê mjên pyrà nê pykap tẽm nê htyk kurê kumrêx. Hãmri nhũm mẽ kot mjên jaxàr xwỳnhjaja mra nê mẽ hwỳr agjê nê omu nhũm ra htyk mex nê nõ nhũm mẽ kumỳ nê ma o tẽ nê mjên nhĩhkô hã haxà.



Atre 5.1-11

11Hãmri nhũm mẽ piitã wa harênh ma nê kãm ma htỳx nê. Mẽ kot Jejus kôt amnhĩ xunhwỳr xwỳnhjê mẽ amarĩ ri mẽ pa xwỳnhjaja nhũm mẽ tee ri wa hkukamã hamaxpêr o kãm ma htỳx kumrêx.

Mẽ kot aa mẽmoj pumunh kêt kwỳ ho anhỳr ã mẽ harênh

Makre 16.17-20; Atre 19.11-12

12-14Na pre hte Jejus kôt mẽ kot amnhĩ xunhwỳr xwỳnhjaja xatã Tĩrtũm mã amnhĩ jarênh xà hã ixkre hwỳr akuprô. Mẽ kot ixkre nhĩkjê mã: “Pahi Sarumãw nhõ” anhỳr xwỳnh jarênhja wỳr nhũm pre htem akuprô. Nhũm mẽ piitã kãm mẽ hkĩnh nê mẽ ohtô nê mẽ hkôt akuprô nê mẽ uràk nê Jejus kôt amnhĩ xunhwỳ. Mênijaja nê mẽmyjaja. No nhũm mẽ hkwỳja Ananĩs mẽ Sapire wa kot amnhĩ nhĩpêxja mã hamaxpêr nê kãm mẽ hkôt mrar pyma nê. Kãm mẽ hkĩnh tã kãm mẽ hkôt mrar pyma nê.

Nhũm pre hte Jejus nhỹ hã mẽ ahkre ho mẽ pa xwỳnhjaja aa mẽ kot mẽmoj pumunh kêt kwỳ ho anhỳr o ri mẽ piitã mẽ hkôt pa. 15Jakamã nhũm pre htem mẽ à xwỳnhjê jamỳ nê ma mẽ hwỳr mẽ o mra nê Simãw Pêtre kutêp pry kamã mẽ haxwỳ nê mẽ kãm:

—E mẽ jar anhĩkwỹ. Kê Simãw Pêtre ja kôt mẽ ajãnh tẽ nê mẽ akupênh o akupỹm mẽ ato mex rỳ nhũm hkarô pix mẽ atã harir ka mẽ akupỹm amex japêr.

Anhỳr o mẽ kãm kapêr hãmri nhũm mẽ kupĩp kãm kutêp hikwỹ. 16Nê Jerujarê pu hã krĩ hkwỳ kamã. Mẽ à xwỳnhjaja nê mẽkarõmnuti kot tanhmã mẽ ho xwỳnhjaja nhũm pre htem mẽ hamỳ nê ma mẽ ìhkrep mẽ o mra nhũm mẽ piitã akupỹm mex pa.

Mẽ kot Jejus kwỳjê jagjênh ã mẽ harênh

Rukre 21.12-15; Juãw 15.26-27; Atre 4.1-22

17Tã nhũm mẽ õ patre maati mẽ hkrãmnhwỳ Satusew nhõ xwỳnhjaja tee ri akupỹm mẽ mex ã mẽ harênh ma nê axpẽn mã:

—Tk. Kwa na mẽ ra ohtô nê Jejus gryk ã mẽ pahte mẽ ahkre kaga nê ãm hkôt pix mã ri amnhĩ nhĩpêx o pa. Anê.

Hãmri nê Jejus nhỹ hã mẽ ahkre maati xwỳnhjê kamã gryk nê ra

tanhmã mẽ ho kaxyw. 18Hãmri mẽ unê nê mẽ hãgê nhũm mẽ hãgênh xà kamã hkrĩ hpa.

19Tã nhũm kamàt nhũm Tirtũm kapêr o mẽ wrỳk xwỳnhja ma mẽ hãgênh xà hwỳr mẽ hwỳr wrỳ nê mẽ hwỳr axà nê mẽ kãm hakwakre kahê xà mẽ nê mẽ kator pa. Hãmri nê mẽ kãm:

20—E mẽ ma akupỹm Tirtũm mã amnhĩ jarênh xà hã ixkre hwỳr mra nê axte mẽ kãm awjarê. Tanhmã mẽ kot amnhĩ nhĩpêx to nê Jejus kôt amnhĩ nhĩpêx nyw o amnhĩ nhĩpêx ã mẽ kãm hã karõ kê mẽ ama. Anê.

21Hãmri nhũm mẽ kuma nê ma akupỹm hwỳr hapêx kurê kumrêx. Nhũm myt kator o mõi mẽ nhũm mẽ hwỳr agjê nê mẽ kãm Tirtũm kapêr jarênh o kuhê.

Tã nhũm mẽõ patre maati mẽ hkôt ri mẽ pa xwỳnhjaja amnhĩ wỳr mẽ àptar tũm xwỳnhjê hwỳ nhũm mẽ piitã axpên wỳr pikuprõnh pa. Hãmri nê htỳx arĩ Jejus kwỳjaja mẽ hãgênh xà kamã mẽ hkrĩ hã mẽ hkamnhĩx nê amnhĩ wỳr mẽ hã karõ. 22Nhũm põiistijaja ma kot mẽ haprõi kaxyw mẽ hãgênh xà hã ixkre hwỳr mra nê tee ri kamã mẽ hapêr nhũm mẽ kamã amrakati. Hãmri nhũm mẽ akupỹm mẽ pikuprõnh xwỳnhjê hwỳr hprõt nê mẽ kãm:

23—Nà na põiisti hkwyjaja arĩ hakwakrem ixkre jamãr mex nhũm hakwakre arĩ kahê htỳx nê xa. Tã pa mẽ hwỳr agjê nê tee ri hkre kamã mẽ hapêr nhũm mẽ kamã amrakati kumrêx. Anê.

24Hãmri nhũm mẽ kuma nê tee ri hamaxpêr. 25Rôm nhũm ja mẽ hwỳr tẽn axàn mẽ kãm:

—Kwa jãã mẽ ate mẽ hãgênh xwỳnhjaja na mẽ axte Tirtũm mã amnhĩ jarênh xà hã ixkre kamã mẽ ahkre ho kuhê pa ham mẽ omu nê mẽ kurũm tẽ. Anê.

26Hãmri nhũm patre nhõ põiisti krãhtũmja kuma nê mẽ hwỳr põiisti hkwy rẽ nhũm mẽ ma mẽ hwỳr mra nê mẽ hwỳr agjê nê kê axte mẽ unê nê akupỹm mẽ o mra. Nom tanhmã mẽ ho hkêt nê. Mẽ kot hkôt ri mẽ pikamênh xwỳnhjê pymaj mẽ ho mex nê mẽ o mõi. Nê mẽ hã axpên mã:

—Nà kot puj mẽ tanhmã mẽ ho nhũm mẽ ja hã mẽ pahpumu nê kên o mẽ pahkapê nê tanhmã amnhĩ to nê hã mẽ panhĩmex. Anê.

27Hãmri nê mẽ ho mex nê akupỹm mẽ o mõi mẽ hwỳr mẽ ho agjê nê mẽ pikuprõnh xwỳnhjê kutã mẽ hkrĩ. Hãmri nhũm mẽõ patre maatija mẽ kãm:

28—Kwa ra mẽ ixte Jejus kapêr jarênh nê mẽ akurê htã ka xep mẽ ãm mẽ inhma nê arĩ mẽ kãm harênh o ri apa. Nê jar Jerujarê kamã mẽ piitã mẽ kãm harê. Nê mẽ pajaja mẽ ixte Jejus pĩr ã ka mẽ ri mẽ kãm mẽ ijarênh o apa. Anê.

29Hãmri nhũm Simãw Pêtre mẽ kuma nê mẽ amnhĩ tã mẽ kãm kapêr nê mẽ kãm:

—Tỳ kot kaj mẽ Tirtũm kapēr kuhpa hã mẽ inhmã mẽmoj tã karõ pa mẽ ama nẽ ãm mẽ ama nẽ ãm Tirtũm kapēr pix ma nẽ hkõt ri amnhĩ nhĩpêx. **30**Amnepêm mẽ panhĩgêjtaja na prem Tirtũm kõt pix mã amnhĩ nhĩpêx o pa. Tã ka prem axtem nẽ kêp mẽ kãm Kra Jejus ã amÿnê nhũm mẽ pĩ kahpa hã kunhõ nẽ kupĩ. Nom nhũm Tirtũm akupÿm ho htĩr **31**nẽ kêp mẽ panhõ Pahihti hã harẽ. Nẽ kêp mẽ pahkaprĩ xwÿnh mex ã harẽ. Hãmri nẽ ra amnhĩ ri ÿr nhũm ïhkõ hã mẽmoj piitã ho amnhĩptar o hkrĩ. Nhũm kãm: “Koja Ijaew mẽ kot amnhĩ tomnuj kaga nẽ akõt amnhĩ xunhwÿ pa ja hã mẽ omu nẽ amnhĩ katut kõt mẽ kot amnhĩ tomnuj rênh pa nẽ mẽ ho ixkra.” Anẽ. **32**Tã mẽ pajaja mẽ ixte Jejus htyk nẽ akupÿm htĩr ã omunh mex jakamã na pa hte Tirtũm Karõ nhÿ hã ã mẽ amã harênh anẽ. Karõja na pre Tirtũm mẽ ixte hkõt amnhĩ nhĩpêx xwÿnhjê hwÿr kurê nhũm mẽ ixwÿr wrÿ nẽ mẽ ixkarõ mã agjê. Tã ÿ hã na pa htem ri ã harênh anhÿr o ri mẽ akõt ixpa. Anẽ.

33Hãmri nhũm mẽ kuma nẽ mẽ kãm gryk tÿx nẽ. Nẽ mẽ kãm mẽ himex prãm nẽ mẽ kãm mẽ hã amÿnê. **34**Hãmri nhũm Kamariewtija tee ri ja hã mẽ omu hãmri nẽ kànhmã xa nẽ Jejus nhÿ hã mẽ ahkre xwÿnh maatiê xyr pê hkwÿjê mã kapēr. Parijew nhõ xwÿnh na pre. Nẽ kêp Tirtũm kapēr ã kagã htũm o mẽ ahkre ho pa xwÿnhjê hõ na pre. Nhũm mẽ piitã kãm hkĩnh nẽ. Jakamã nhũm kànhmã xa nẽ pòristi mã anẽ nhũm mẽ amnhĩ nê Jejus nhÿ hã mẽ ahkre ho mẽ pa xwÿnhjê kator nhũm mẽ kapõt ã kuhê. **35**Hãmri nhũm Kamariewtija mẽ nê tanhmã mẽ kãm kapēr to nẽ mẽ kãm:

—E ixkwÿjaja. Kwa kêr pu mẽ tanhmã mẽ ho hkukamã pajamxpêr mex nẽ. **36**Mãn arĩ mẽ ate finat Tetastija jarênh ã anohtÿx nẽ ho apa japêr. Mytwrÿ hõ hã na pre mẽ kãm amnhĩ to rax ã amnhĩ jarênh o pa. Hãmri nhũm hkõt ri mẽ pa xwÿnhjaja ohtõ nẽ. Mẽ kêp 400. Tã nhũm prem mẽ kêp Tetasti pĩ nhũm hkõt ri mẽ pa xwÿnhjaja axpên pê anhgrã nẽ ma hapêx.

37—Tã nhũm mẽ kot mẽ piitã mẽ ho kõta xà hã arĩgroja ã nhũm Garirej nhõ xwÿnh pê finat Jut haxwÿja hkõt mẽ pa xwÿnhjaja ohtõ nẽ. Tã nhũm mẽ mãânên mẽ kêp kupĩ nhũm hkõt ri mẽ pa xwÿnhjaja haxwÿja axpên pê anhgrã nẽ ma hapêx.

38—Jakamã kwa pu mẽ tanhmã jajê ho hkêt nẽ. Pu mẽ ãm mẽ omu. Koja mẽ amnhĩ krã hkõt ã ujarênh anhÿr o pa japêr hã koja Tetasti mẽ Jut wa hkõt pa xwÿnhjê pyrã nẽ tokyx axpên pê anhgrã nhũm Jejus jarênh o paja hapêx o hapêx. **39**Nom koja mẽ ãm hãmri Tirtũm nhÿ hã ã mẽ ahkre ho pa anhÿr japêr hã kot puj mẽ tee ri ja ho pajapêx mã. Jakamã kwarĩ. Kot puj mẽ tanhmã mẽ ho nẽ te mẽ pahte Tirtũm kutã amnhĩ xunhwÿr pyrãk. Anẽ.

Nhũm pre ã Kamariewti Jejus nhÿ hã mẽ ahkre ho mẽ pa xwÿnh maatiê xyr pê hkwÿjê mã kapēr anẽ. **40**Hãmri nhũm mẽ kuma nẽ kãm:

—Tỳ nà ãm hãmri na ka ã akapêr anê. Kot puj xep mẽ tanhmã mẽ ho hkêt nê. Anê.

Hãmri nê akupÿn mẽ hã karõ nhũm mẽ akupÿn mẽ hwÿr agjê. Hãmri nhũm mẽ pôristi mã mẽ hã amÿnê nhũm mẽ htak. Hãmri nhũm mẽ àptàr tũmrejaja mẽ kãm:

—E mẽ mãmri ma akupÿm mra. Nom kêr ka mẽ axte mẽ kãm Jejus kapêr jarênh o ri apa hkêt kumrêx. Anê.

41Hãmri nhũm mẽ kãm ure nhũm mẽ ma mra. Kĩnh nê ma mra nê xepn mã:

—Nà kwãr mẽ Jejus ã mẽ pahtak nê tanhmã hã mẽ pahto. Kwãr mẽ mãmri ã hã mẽ pahto anê. Kot pu mẽ hkaga hkêt nê. Ra Tĩrtũm kot ja hã mẽ pahpumunh mex kênã.

Anhÿr o xepn mã kapêr o xepn jamaxpêr o hihtÿx mex o pa.

42Hãmri nê arĩ apkati mẽ hkwÿjê mã Jejus kapêr jarênh o mẽ ahkre ho mẽ hkôt pa. Tĩrtũm mã amnhĩ jarênh xà hã ixkre kamã nê nhãm mẽ òrkwÿ kamã ri mẽ ahkre ho pa. Tĩrtũm kot mẽ pakaxyw Jejus xãm ã mẽ kãm harênh o ri mẽ hkôt pa.

Mê kêp mẽ mjên htyk xwÿnhjê jarênh

Wam Ximotre 3.8-9

6 1Tã nhũm mẽ kot Jejus kôt amnhĩ xunhwÿr xwÿnhjaja ohtô rax kumrêx o mō. Mẽ piitã kêp Ijaew no nhũm mẽ hkwÿjaja axtem Gres kapêr o kapêr nhũm mẽ hkwÿjaja Ijaew kapêr o kapêr. Na pre hte Ijaew kapêr o kapêr xwÿnhjaja apkati mẽ mẽ kêp mẽ mjên htyk xwÿnhjê mã mẽõ ho pa. No ãm mẽ piitã mẽ hipêx o xepn pyræk kêt jakamã nhũm Gres kapêr o mẽ kapêr xwÿnhjaja tee ri ã mẽ kot amnhĩ nhĩpêx anhÿr ã mẽ omu nê mẽ kamã gryk nê. Hãmri nê mẽ kãm:

—Kwa na ka htem amnhĩ kamã mẽ kêp mẽ mjên htyk xwÿnhjê mã mẽõ ho rũnh nê agō. No mẽ ixkamã jajê mã na ka htem ãm ho hkryre nê agō. Kwa mẽ ri ã mẽ hipêx anhÿr kêt nê. Mẽ hipêx o xepn pyræk nà. Anê.

2Hãmri nhũm Jejus nhÿ hã mẽ ahkre xwÿnh maatijaja mẽ hã mẽ kapêr ma hãmri nê mẽ piitã mẽ ho akuprō nê mẽ kãm:

—Kwa kêr ka mẽ ja hã xepn mã axækjêr kêt nê. E pu mẽ kot mẽ kêp mẽ mjên htyk xwÿnhjê mã õ ho pa kaxyw mẽ akwÿjê rê. No mẽ pajaja kot paj ja ho anhÿr o ri ixpa hkêt nê. Kot pa mẽ anê nê Jejus kapêr o ri mẽ ajahkre hkêt nê nhũm ja mex kêt nê. Jakamã mẽ atō kot kaj mẽ akatàt kôt mẽ kãm mẽ õ ho apa? 3E mẽ amnhĩ kamã mẽ ho 7 nê mẽ arê pu mẽ kêp mẽ mjên tyk xwÿnhjê mã õ ho pa kaxyw mẽ unhwÿ.

Tãm mẽ hamaxpêr xwÿnhjaja.

Nê mẽ ate xepn mã mẽ mex ã mẽ harênh xwÿnhjaja.

Nē Tirtūm Karō nhỹ hã mẽ kot amnhĩ nhĩpêx o mẽ pa
xwỳnhjaja.

Ã mẽ kot amnhĩ nhĩpêx anhỹr xwỳnhjaja ka mẽ ho 7 nẽ arê pu mẽ kaxyw mẽ unhwỳ. 4Nom mẽ pajaja kot paj mẽ akôt arĩ mẽ amã Tirtūm kapêr jarênh o ri mẽ ajahkre pix tãnopxar o ri ixpa. Anẽ.

5Hãmri nhũm mẽ kuma nhũm ja mẽ kãm mex nẽ. Nhũm mẽ ma mra nẽ axpên mã hkwyjê nhĩxi jarê hãmri nẽ mẽ ho 7 nẽ mẽ kurê. Ã mẽ hixi kot anhỹr.

Estewãw. Estewãwja na pre Jejus kôt amnhĩ nhĩpêx mex o pa.
Tirtūm Karō kaxwỳnh mã àr nẽ ho amnhĩptàr jakamã
nhũm pre hte tãm ri amnhĩ nhĩpêx o pa.

Nẽ kaxyw Firipti

nẽ Prokot

nẽ Nìkanõ

nẽ Timã

nẽ Parmēnti

nẽ Nìkoraw. Nìkorawja krĩ pê ãxiok nhõ xwỳnh na pre. Kêp
Ijaew kêt tã kãm Tirtūm kĩnh o pa. Tã ra mãänēn Kra
Jejus kôt amnhĩ xãm.

6Jakamã nhũm mẽ mẽ kêp 7tajê rê nẽ Jejus nhỹ hã mẽ ahkre xwỳnh maati-jê hwỳr mẽ o mra. Hãmri nhũm mẽ omu nẽ mẽ àpênh ã mẽ unhwỳr kaxyw mẽ hã ìhkra jaxwỳ nẽ mẽ ho Tirtūm wỳ. Hãmri nhũm mẽ kêp mẽ mjên htyk xwỳnhjê mã mẽ õ ho pa nẽ mẽ piitã mẽ hipêx o axpên pyræk.

7Tã nhũm mẽ ra ohtô rax nẽ Tirtūm kapêr ma nẽ hkôt amnhĩ nhĩpêx o pa. Jakamã nhũm Jerujarê kamã mẽ kot Jejus kôt amnhĩ xunhwỳr xwỳnhjaja ra ohtô rax kumrêx. Nẽ mẽ õ patre hkwy haxwỳja ohtô nẽ mẽ uræk nẽ amnhĩ kaxyw hkôt hamaxpêr nẽ hkôt amnhĩ xunhwỳ.

Mẽ kot Estewãw pynênh ã mẽ harênh

Rukre 21.14-15

8Tã nhũm Estewãwja. Kot mẽ kêp mẽ mjên htyk xwỳnhjê mã mẽ õ ho pa xwỳnhjê hõja. Tirtūm kot kutã nojarêr mex jakamã na pre hte ÿ hã àhpumunh tỳx o aa mẽmoj pumunh kêt kwỳ ho anhỹr o ri mẽ hkôt pa. 9Hãmri nhũm Ijaew kwỳjaja tee ri ja hã omu nhũm ja mẽ kêp omnuj tỳx nẽ nhũm mẽ hã kãm akir. Uræk nẽ mẽ kêp Ijaew nẽ Jerujarê kamã ri mẽ hkôt pa htã ahpỳnhã mẽ õ pyka. Mẽ kot kãm “Ripetat” xwỳnh kwỳ na pre mẽ. Nẽ ahpỳnhã mẽ õ krĩ.

Mẽ hkwyjaja kêp Sirên nhõ xwỳnh.

Nẽ mẽ hkwyjaja kêp Aresãn nhõ xwỳnh.

Nẽ mẽ hkwyjaja kêp Siris nhõ xwỳnh.

Nẽ mẽ hkwyjaja kêp As nhõ xwỳnh.

Ahpÿnhã mẽõ pika nẽ mẽ õ krĩ htã na prem Jerujarẽ kamã ri axpẽn kõt pa ho pa. Tã Estewãw kot ã amnhĩ nhĩpêx anhÿr o pa hã omu nhũm ja mẽ kêp omnuj tÿx nẽ nhũm mẽ hã kãm akir. **10**No nhũm Tĩrtũm Karõ nhÿ hã hamaxpêr tÿx o mẽ kãm kapêr nhũm mẽ kuma nẽ tee ri kutã tanhmã kãm nẽ hprãm kaprÿ. **11**Hãmri nẽ ma mra nẽ tanhmã ho hêx to kaxyw amnhĩ kwÿjê rê nẽ mẽ kãm hã amÿnê nẽ mẽ kãm:

—E kêr ka mẽ krĩ nhõ xwÿnhjê mã Estewãw o axêx nẽ tanhmã mẽ kãm ho akapêr punuj to ho ri mẽ hkõt apa. Kê mẽ ama nẽ kamã gryk kato. Kot kaj mẽ ã amnhĩ nhĩpêx anê pa mẽ hpãnã mẽ amã amnhĩre. Anê.

Hãmri nhũm mẽ kuma nẽ ma mra nẽ hapôj nẽ ma krĩ nhõ xwÿnhjê mã tanhmã ho hêx to ho ri mẽ hkõt pa nẽ mẽ kãm:

—E mẽ amnê akuprõ nẽ mẽ inhma. Kwa kêr ka mẽ Estewãwti kapêr mar kêt nê. Na hte finat Mojes mẽ Tĩrtũm wa ho kapêr punuj pix o ri pa. Pa mẽ ra kot wa ho kapêr punuj ã kuma. Anê.

12Hãmri nhũm mẽ kuma. Krĩ nhõ xwÿnhjê mẽ nẽ mẽ àptàr tũmrejê mẽ Tĩrtũm kapêr tũm o mẽ ahkre ho mẽ pa xwÿnhjaja nhũm mẽ tee ri mẽ kot Estewãw o hêxja ma nẽ kamã gryk nê. Hãmri nẽ ma hwÿr mra nẽ unê nẽ ma mẽ õ juisti hwÿr o tẽ. **13**Hãmri nhũm mẽ kãm ho hêx xwÿnhjaja mẽ hkõt mra nẽ juisti mã tanhmã ho hêx to nẽ mẽ kãm:

—E jahti na hte finat Mojes kot Tĩrtũm nhÿ hã mẽ pahte tanhmã amnhĩ nhĩpêx to hã karõ ho hêx rãhã ho pa. Nẽ Tĩrtũm mã amnhĩ jarênh xà hã ixkreja nhũm tanhmã ho hêx to pa mẽ kuma. **14**Na hte mẽ kãm: “Koja nhÿrmã Jejus pê Najare nhõ xwÿnh Tĩrtũm mã amnhĩ jarênh xà hã ixkreja grãnh pa kãm ga.” Anhÿr o mẽ kãm hêx o pa. Nẽ Mojes kot mẽ pahte amnhĩ nhĩpêx ã karõ nê mẽ pahkurê pa prem kuma. Anê.

15Nhũm prem ã mẽõ juisti mã Estewãw o hêx anê. Hãmri nhũm mẽ kuma nẽ Estewãw wÿr rĩt nẽ hkuk pumu nhũm te kot Tĩrtũm kapêr o mẽ wrÿk xwÿnhjê kuk nhĩrã rax pyrã nẽ xa nhũm mẽ tee ri omu nẽ kamã no pyma nê.

Estewãw kot juistijê mã ujarênh

7 **1**Hãmri nhũm mẽ õ patre maatija Estewãw mã kapêr nẽ kãm:
—E mẽ inhã amnhĩ jarê. Xà ãm hãmri na mẽ ri ã ajarênh anê nà? Anê.

2Hãmri nhũm kuma nẽ mẽ piitã mẽ kãm kapêr. Mẽ kãm kapêr ryy nẽ mẽ kãm:

—Tõe kot paj mẽ amã mẽ panhĩgêt finat Apraãw tanhmã harênh to ka mẽ inhma. Amnepêm na pre Tĩrtũm maatija Apraãw wÿr kato. Kormã pyka pê Mêsopotãm kamã pa ri. Kormã kot ma krĩ pê Arã hwÿr mör kêt ri

nhũm hwỳr kato nẽ kãm: 3“E kër ka mẽ anhõ krí pê akato nẽ akwỳjê re nẽ ma mỗ. Kot paj ma nhỹhỹm hpãnhã pyka hõ hwỳr mẽ ato mỗ.” Anẽ.

4—Hãmri nhũm kuma nẽ amnhĩ to akuprõ nẽ ma mỗ. Ô pyka pê Katej pê kato nẽ ma krí pê Arã hwỳr mỗ nẽ hpãnhã kamã pa. Tã nhũm hipêêxà Terahti kệp ty nhũm Tirtũm amnẽ jar mẽ panhõ pyka hwỳr kumẽ. Jar mẽ papaxà hwỳr kumẽ.

5—Nom nhũm kormã kãm pykaja nhõr kêt nẽ. Kormã kãm hkwỳ ho grire nẽ òr kêt nẽ. Na pre ãm kãm:

E kot paj nhỹrmã amã pykaja gõ. Amã nẽ akanrêhã akra nẽ atãmnhwỳjê mã kugõ ka mẽ kamã ri apa ho apa.

Anhỹr o kãm mẽ panhõ pika pê Kanaãja jarẽ. Apraãw kormã hkra hkêt ri nhũm ã kãm kapẽr anẽ. 6Hãmri nẽ kãm:

Koja akanrêhã atãmnhwỳjaja nhỹrmã ma nhỹhỹm pyka hõ hwỳr pa nẽ hpãnhã kamã pa. Mẽ õ pyka kamã pa hkêt tã nhãm pyka hõ kamã pa hãmri nẽ pika nhõ xwỳnhjê mã àpênh rũnh o pa nhũm pyka nhõ xwỳnhjaja mẽ hipêx kati rũnh o pa. Nẽ mẽ àpênh ã mẽ kãm amnhĩrer kêt nẽ. ãm mẽ homnuj o pa hã amgrà xohtô rax kumrêx. Nhũm mẽ hã amgrà pê 400.

7 Nom kot paj mẽ hã mẽ homnuj tỳx nẽ. Akanrêhã atãmnhwỳjê hã mẽ homnuj tỳx nẽ nhũm mẽ rĩ kormã mẽ kurũm kato nẽ man akupỹn pa nẽ jar pỏj. Hãmri nẽ jar inhmã inhmex o inhmex ã ijarênh rãhã ho pa. Anẽ.

8Hãmri nẽ kãm:

E pu axpên ma. Koja ka nẽ akanrêhã akra nẽ atãmnhwỳjaja ka mẽ ixkôt ri amnhĩ nhĩpêx o apa hã kot paj mẽ ato ixkra. Tã koja ja amã mex japêr hã kër ka mẽ amnhĩ my kwrýt kà hkwỳ jakà. Nẽ koja mẽ akrajaja hapỏj nẽ my ka mẽ mã mẽ ho anẽ nẽ mẽ kệp mẽmy kwrýt kà hkwỳ jakà. Mẽ piitã mẽ kot mẽ apê ixkra hã mẽ apumunh kaxyw kot kaj mẽ ã amnhĩ nhĩpêx anẽ.

Anhỹr o Apraãw mã kapẽr nhũm kuma nẽ mar xà hkôt hkra Ijak my kwrýt kà hkwỳ krãhta. Kormã hkaràre ri. Kormã hã arĩgro pê 8 pix ri nhũm kệp hkwỳ krãhta.

—Tã nhũm Ijak hprêk nẽ hprõ nẽ hkra. Hãmri nẽ mã hkra Jako ho anẽ nẽ. Nhũm Jako hprêk nẽ mã hkra pê 12jê ho anẽ nẽ mẽ piitã mẽmy kwrýt kà hkwỳ jakàr pa. ã na pre mẽ pahpàr kraxjaja amnhĩ nhĩpêx anhỹr o pa.

9—Jako hkrajê hõ na pre kệp Juje. Nhũm Juje htỏjaja hipêêxà hkôt kamã gryk nẽ axtem nẽ mẽ urojê mã ho wênê nhũm mẽ kệp haprỏ nẽ ma pyka pê Ejit wỳr o mỗ. Amarĩ Ejit nhõ xwỳnhjê mã àpênh o pa kaxyw. Tã no nhũm Tirtũm arĩ tãnopxar rãhã ho hkôt pa. 10Hãmri nẽ Ejit kãm mẽ kot homnuj xwỳnhjê nhĩhkra rũm hkapa nẽ tanhmã hkrã

hto nhũm àhpumunh tỳx nê hamaxpêr mex nê. Jakamã nhũm Ejit nhõ xwỳnhjê nhõ pahi Paraohtija omu nê kãm hkĩnh nê. Kot tãm amnhĩ nhĩpêx nê àhpumunh tỳx kôt omu nê kãm hkĩnh nê. Hãmri nê amnhĩ ri kumê nhũm ãhkô hã àpênh o pa. Kãm òrkwỹ pumu nê Ejit nhõ xwỳnhjê ho amnhĩptàr o pa.

11—Rôm nhũm mẽ hpur kãm mẽmoj nhĩgrôt mex kêt nê nhũm mẽ kêp mẽ apkur xà hã mẽ ôja ra ri mẽ kêp kryre. Ejit kamã nê jar Kanaã kamã nhũm mẽ apkur xà hã mẽ ôja mẽ kêp hapêx par o mō. Nhũm mẽ piitã prãm xàj ra hiire nê kãm prãm tỳx o pa nhũm mẽ panhĩgêjtaja hãmri prãm xàj tee ri amnhĩ xàpkur xà hã mẽmoj japêr.

12—Tã nhũm Jakoja Ejit kãm arĩ mẽ apkur xà hã mẽ ô rax ã harênh ma nê ma hwỳr hkra hkwỳjê rê. Mẽ panhĩgêjtaja nhũm ma mẽ hwỳr mẽ kurê nhũm mẽ ma mẽ hwỳr mra. Hãmri nê mẽ hwỳr pøj nê mẽ kêp mẽmo hy hkwỳ japrô nê ma akupỹm o mra. Wam mẽ mōrta ã mẽ kêp mẽmoj japrô nê ma akupỹm o mra.

13—Tã nhũm mẽ kêp mẽmo hy japrôr xwỳnhja hapêx nhũm mẽ axte akupỹm mẽ hwỳr mra. Hãmri nhũm mẽ htõ Juje mẽ kãm amnhĩ to amnhĩrit nê kêp mẽ htõ hã mẽ kãm amnhĩ jarê. Mẽ kot ra htyk ã hkamnhix tã nhũm mẽ kãm amnhĩ jarê. Hãmri nhũm Paraohti mẽ kêp Juje htõ hã mẽ harênh ma.

14—Tã nhũm Juje amnhĩ wỳr hipêêxà Jako mẽ htãmnhwỳjaja mẽ hã karõ nhũm mẽ piitã ma Ejit wỳr hapêx. Mẽ kêp 75 nê ma Ejit kamã Juje hwỳr hapêx hãmri nê kamã pa ho pa.

15—Á kot anhỹr jakamã nhũm Jakoja ma Ejit wỳr mō nê hpãnhã kamã pa ho pa. Tã hãmri kamã ty. Nhũm hkrajê piitã Ejit kãm pa hãmri nê gaa nê htyk pa. 16Hãmri nhũm mẽ hkanrêhã mẽ hkrajaja mẽ hamỳ nê ma akupỹm Kanaã hwỳr krĩ pê Sikê hwỳr mẽ o pa nê kamã mẽ hagjê. Na pre mẽ hkukamã finat Apraãw kot Amõr krajê pê kênkre japrô nê kamã hprõ jaxà. Jakamã nhũm prem mỳr pê ma hwỳr mẽ o pa nê kamã mẽ hagjê hãmri nê ma akupỹm Ejit wỳr pa.

17—Tã gaa nê rĩ ohtô rax kumrêx o mō. Mẽ panhĩgêjtaja ohtô rax kumrêx o mō. Hãmri nhũm Tĩrtũm kot Apraãw mã mẽ ô pyka jarênh xwỳnhja nhũm kot mẽ kãm òr kaxyw. 18No nhũm Ejit nhõ pahi kot Juje ho mex xwỳnhnta na pre ra ty nhũm axtem hpãnhã hõja mẽ ho amnhĩptàr o pa. Nê aa Juje jarênh mar kêt nê. Kormã pahi xàr nyw kêt ri htyk jakamã nhũm mỳr pê harênh mar kêt nê. 19Hãmri nê hkwỳjê homnuj o pa. Tanhmã mẽ panhĩgêjtê nhĩpêx to ho pa. Nê mẽ kãm mẽ hkra my hapôx xwỳnhjê hã amỹnê. Mẽ hapôx nhũm mẽ kot pikap mẽ rênh nhũm mẽ htyk kaxyw nhũm mẽ kãm mẽ hã amỹnê.

20—Rôm nhũm finat Mojesja kato. Nê mexre. Hãmri nhũm katorxà Ejit nhõ xwỳnhjê kot kêp hpĩr pymaj òrkwỹ kamã ri mẽ kêp ho hpimxur o pa hã mytwrỹ axkrunêpxi.

21—Tã nhũm ra htỳxre nhũm katorxà mẽ hipêêxà wa tee ri hkukamã hamaxpêr hãmri nê mẽ kot wa kêp hpĩr pymaj kumỳ nê ma o tẽ nê kaxyw à nhĩpêx nê nhỹri gô nhĩpôk ri pô kamã ho amũxu. Tã nhũm Paraohti hkra nija ra gôx mã wỳr mã tẽ nê ra omu hãmri nê amnhĩm kumỳ nê ma o tẽ nê ho hkra. 22Jakamã nhũm Mojes Ejit nhõ xwỳnhjê kamã hprêk. Hãmri nê mẽ àhpumunh xà hã kagà pumunh pa. Nê hihtỳx nê mẽ kãm kapêr kãm hihtỳx mex o pa.

23—Tã hãmri ra hã amgrà pê 40 nê hapêx nhũm Mojes hamaxpêr nê ra kãm amnhĩ kwỳ pê Ijaewjê pumunh prãm nê ma mẽ hwỳr tẽ. 24-25Hãmri nê htêm kôt ja wa omu. Nhũm Ejit nhõ xwỳnhja Ijaewja homnuj o xa nhũm Mojes tẽn tee ri hã omu nê hamaxpêr o: “E pa ma wa hwỳr tẽ nê ixkwỳ mỳj ã Ejit nhõ xwỳnhhta pĩ kê ixkwỳjaja ja hã ixpumu nê Tĩrtũm kot mẽ hwỳr inhmênh ã ixpumu. Ixte Ejit nhõ xwỳnhjê nê mẽ kator kaxyw mẽ ja hã ixpumunh kurê kumrêx.”

—Anhỹr o hamaxpêr hãmri nê wa hwỳr tẽ nê amnhĩõja nê Ejit nhõ xwỳnh pĩ. Tã no nhũm hkwyjaja kot hpĩr ã harênh mar tã tanhmã amnhĩ kaxyw kãm hamaxpêr to hkêt nê. 26Nhũm apkati nhũm mễhõja war axkrut nê axte pijapu ho wa xa. Hamẽ wa kêp Ijaew. Jakamã nhũm Mojes akupỳm mẽ hwỳr tẽ nê tee ri axpên tã wa omu nhũm ja kêp omnuj nê. Hãmri nhũm wa hwỳr tẽ nê axpên nê wa kãm kapêr nê wa kãm: “Pa? Kwa war ajamẽ war apê Ijaew kênã na ka wa ri axtem nê ã axpên nhĩpêx anê.” Anê. 27Hãmri nhũm kot amnhĩ kaxyw hkryx xwỳnhja kuma nê nhãm amnhĩ nê hkujate nê kãm: “Tk. Kwa xà apê mẽ inhõ pahi hã na ka ã wa inhmã akapêr anê? Nà apê mẽ inhõ pahi hkêt kênã. 28Kot kaj inhĩpêx o te ate Ejit nhõ xwỳnhhta nhĩpêx pyrà nê wa ixtô hpĩr kêt nê.” Anê.

29—Hãmri nhũm tee ri kuma nê ra kãm ma nê Ejit rũm kator kurê kumrêx nê ma pyka pê Mijiã hwỳr mỗ nê kamã hpãnhã pa. Kamã hprô nê hkra. Nhũm hkra myja wa hamêxkrut.

30—Tã nhũm Mijiã kamã pa hã axte hã amgrà pê 40. Hãmri nê mêmemo arĩgro hã kapôt ã krã hakỳx pê Sinai kape hã ri pa nhũm Tĩrtũm kãm kapêr. Nom nhũm Mojes omunh kêt nê. ãm utĩ kaok kamã kuwy hpôk pix pumu. 31Amnhĩ jaêr pê ã kot amnhĩ nhĩpêx anhỹr ã omu hãmri nê amnhĩ tã hprĩ hã omunh kaxyw hwỳr tẽ nhũm Tĩrtũm kãm:

32 Pa Mojes? E ixpê Tĩrtũm na pa. Ixpê akukamã anhĩgêt Apraãw nhõ Tĩrtũm na pa. Nê ixpê Apraãw kra Ijak mẽ htãmnhwỳ jako wa õ Tĩrtũm na pa. Anê.

Hãmri nhũm tee ri kuma nê kãm ma xàj httertet tỳx nê. Hãmri nê umaj axte pĩ hpôkja wỳr rĩt kêt nê. ãm nhãm hkrã nê rĩt o xa. 33Hãmri nhũm Tĩrtũm kãm:

E kwa ixpê Tĩrtũm maati hã ixtã apijaàm ã aparkà kapa nê apar kênh nê xa.

34 Na pa ra ixkra Ijaewjaja Ejit kām mẽ omu. Na ra Ejit nhõ xwỳnhjaja ixpê mẽ homnuj tỳx kumrêx rāhā ho pa nhũm mẽ amnhĩ xà hã maj tee ri amnhĩ nhĩpêx. Pa ja hã mẽ omu nẽ inhmã mẽ hkaprĩ nẽ. Jakamã kot paj Ejit nhõ xwỳnhjê nhĩhkra rũm mẽ kator pa. E ka kot paj mẽ hwỳr amê ka ma akupỳm mẽ hwỳr mỗ nẽ mẽ kurũm mẽ kator.

Anhỳr o kām mẽ kaxyw karõ. 35Ra Ijaew kot Mojes hkaga tã nhũm mẽ kaxyw âm nẽ ma akupỳm kot mẽ hwỳr mēnh kaxyw. Na prem ra omu nẽ hkaga. Te mẽ ate Jejus kagaja pyrã nẽ hkaga. Jakamã nhũm pijapu xwỳnhta tee ri amnhĩ tã omu nẽ kamã gryk nẽ amnhĩ nê kām kapêr nẽ kām: “Tk. Kwa xà apê mẽ inhõ pahi hã na ka ã wa inhmã akapêr anê? Nà apê mẽ inhõ pahi kêt.” Anhỳr tã nhũm Tĩrtũm mẽ kaxyw tãm xãm. Kot mẽ ho amnhĩptar nẽ Ejit nhõ xwỳnhjê rũm mẽ kator kaxyw. Ja kaxyw na pre pĩ hpòk kamã kām kapêr nẽ mẽ kaxyw âm.

36—Jakamã nhũm Mojes ma akupỳm Ejit wỳr mỗ nẽ mẽ kurũm hkwyjê kator nẽ ma mẽ o pa. Na pre mẽ ho mex nẽ Tĩrtũm nhỹ hã mẽ kām aa mẽ kot mẽmoj pumunh kêt kwỳ ho anhỳr o ri mẽ o pa. Ejit kamã nẽ mãanēn mẽ kot gô xujanār mã: “Gô kamrêk” anhỳr xwỳnhta kamã. Nẽ kapôt ã mẽ kām ã amnhĩ nhĩpêx anhỳr o mẽ o pa. Nẽ kapôt ã ri mẽ o pa ho ra hã amgrã pê 40.

37—Tã tãm na pre mẽ panhĩgêjtjê mã mēhõ hkukamã mẽ kām tanhmã harēnh to nẽ mẽ kām harēnh o: “Koja Tĩrtũm nhỹrmã te ra mẽ akaxyw pa ixãm pyrã nẽ inhmỳr pê mẽ panhĩõ xãm. Ỡ hã mẽ amã kapêr jarēnh o pa kaxyw nhũm nhỹrmã mẽ akaxyw âm ka mẽ omu.”

—Anhỳr o ã Jejus kukamã harēnh anê. 38Na pre Mojes kapôt ã mẽ panhĩgêjtjê ho pa nhũm mẽ krã hakỳx pê Sinaija wỳr pa. Mẽ panhĩgêjtjaja hãmri hwỳr pa nhũm Tĩrtũm kapêr o mẽ wrỳk xwỳnhjaja mẽ kaxyw Mojes mã kapêr nhũm ô ri mẽ kām awjarê nẽ hã kagà. Mẽ kot mar nẽ hkôt amnhĩ nhĩpêx nyw o amnhĩ nhĩpêx o pa kaxyw nhũm mẽ kām Tĩrtũm kapêr jarēnh o pa. Nẽ mẽ pajaxwỳja. Mẽ pahte hkôt amnhĩ nhĩpêx nyw o amnhĩ nhĩpêx o papa kaxyw na pre mẽ pamã hã kagà. 39Tã no nhũm mẽ panhĩgêjtjaja Mojes ma nẽ âm kuma nẽ hkaga kumrêx nẽ akupỳm Ejit wỳr hkrã. 40Jakamã nhũm Mojes kormã nhỹri mẽ kaxyw Tĩrtũm mã kapêr o âm rôm nhũm mẽ wakre kamã htõ Arãw wỳr mra nẽ kām: “Kwa Mojes ra kot tanhmã amnhĩ to kēnã. Kot Ejit rũm mẽ pakator nẽ mẽ pahto mōr tã ra nhỹri arĩk nẽ tanhmã amnhĩ to. Jakamã e. Kwa hpãnhã mẽ inhmã mẽmo karõ nhĩpêx pu mẽ ho panhõ sãnti kê tãm ma akupỳm Ejit wỳr mẽ pahto pa.” Anê.

41—Hãmri nhũm mẽ kuma nẽ mẽ kām kàx o mōx krare karõ ho sãnti nhĩpêx nẽ mẽ kām âm. Hãmri nhũm mẽ axtem nẽ te ho Tĩrtũm nhĩpêx pyrãk o hipêx nẽ kām ôwēhti hkwyj pa nẽ kām haxwỳ nẽ hã apku. Hãmri nẽ ã amnhĩ nhĩpêx anhỳr ã amnhĩ pumu nẽ hkĩnh nẽ. 42Hãmri nhũm

Tirtūm tee ri ja hã mẽ omu nhũm ja kêp omnuj tỳx nê nhũm mẽ hkaga hpa. Jakamã nhũm prem amnhĩ krã hkôt ri myyti nê mytwrỳre nê kanhêti karõ nhĩpêx nê te mẽ kot Tirtūm nhĩpêx pyrãk o hipêx o pa. Hãmri nê amnhĩ kaxyw kumã pix mã hamaxpêr o pa hã amgrà xohtô nê. Tã nhũm Tirtūm nhỹ hã kapêr jarênh o mẽ pa xwỳnhjaja tanhmã mẽ kãm kapêr to nê mẽ hã kagà. Te Tirtūm tãm mẽ kãm kapêr pyrãk o mẽ kãm kapêr nê hã kagà kot:


Pa mẽ apê Ijaewjaja? E mẽ inhma. Amnepê m mẽ ate kapôt ã ri mẽ apa hã amgrà pê 40ta ã. Xà we inhmã na ka prem akrit kwỳ hpar o apa?

43 Nà inhmã hkêt. Na ka prem axtem nê ri amnhĩ krã hkôt amnhĩm mẽmo karõ nhĩpêx nê hipêx o te mẽ ate pa inhĩpêx pyrãk. Pê kãm akrit kwỳ hpar nê òr o ri apa. Mẽ anhõ mẽmo karõ nhĩpêxta mẽ ate amnhĩm hã hixi pê Mõrok mẽnh xwỳnhja ka pre htem à kamã amnhĩ kôt ho apa. Nê amnhĩm kanhêti karõ nhĩpêx nê hã hixi mẽ nhũm kêp Repã. Ka mẽ ixkuhpa hã wa kêp mẽ apãm ã harênh o ri apa. Tã ã mẽ ate amnhĩ nhĩpêx anhỳrja mỳrapê kot paj pãnhã nhỹhỹm mẽ arê.

Koja mẽ akutã amnhĩ xunhwỳr xwỳnhjaja mẽ apynê nê ma pyka pê Papirõn rũm hamũ mẽ ato hapêx ka mẽ amarĩ mẽ kãm axapênh rũnh o ri apa kãm ga. Anẽ.

Ã na pre Tirtūm mẽ panhĩgêtjê mã kapêr anẽ nhũm ã hã kapêr jarênh o pa xwỳnhja mẽ kãm hã kagà.

44—Tã nhũm mẽ panhĩgêtjaja kormã kapôt ã ri pa ri amnhĩ kôt mrykà ho ixkre ho pa. Tirtūm mã kapêr xà hã ixkreja nhũm prem amnhĩ kôt ri o pa. Mẽ kot kãm “Tirtūm nhõrkwỹ kaàkre” anhỳr xwỳnhja. Tirtūm



Atre 7.44-45

kot mẽ kãm hã karõ xà hkõt nhũm mẽ hipêx nẽ amnhĩ kõt ri o pa. Na pre Tĩrtũm hprĩ hã Mojes mã tanhmã kot hipêx to hã karõ nhũm mẽ hkõt hipêx nẽ amnhĩ kõt ri o pa.

45—Tã nhũm Mojes ty nhũm hpãnhã Jojueja amnhĩ kõt mẽ o pa. Ma Tĩrtũm kot mẽ kãm pyka mex nhõrta wỳr Mojes mỳr pẽ mẽ o pa. Hãmri nẽ hwỳr mẽ o pøj nhũm Tĩrtũm mẽ nẽ mẽ kot ra kamã mẽ pa ho mẽ pa xwỳnhjê japøj nhũm mẽ pãnhã kamã pa ho pa. Nẽ amnhĩ kõt Tĩrtũm nhõrkwỹ kaàkreta o pa. Rãhã nhũm finat Tawija mẽ hpãnhã mẽ ho amnhĩptã. 46Na pre Tĩrtũm Tawi kot tanhmã amnhĩ nhĩpêx to ho pa hã omu nẽ kãm hapê nẽ. Jakamã nhũm Tawi kãm kapêr nẽ kãm: “Pa Tĩrtũm? Kwa xà kot paj amã ixkre mex õ nhĩpêx nà? Mẽ ixpê Ijaewjaja mẽ ixte kamã amã amex o amex ã ajarênh o ixkrĩ kaxyw pa hipêx. Xà kot paj amã hipêx?” Anhỳr tã no nhũm Tĩrtũm kormã kãm ja prãm kêt nẽ. 47Jakamã nhũm Tawi hkra Sarumãwja hipêêxà mỳr pẽ hpãnhã kệp mẽ õ pahi nẽ kãm hipêx. 48Nom xà na hte Tĩrtũm maatija mẽ pahte kãm panhĩhkra ho ixkre nhĩpêx xwỳnh kamã hkrĩ? Nà kaxkwa kamã na hkrĩ xà. Na pre ra Tĩrtũm nhỹ hã kapêr jarênh o pa xwỳnhja Tĩrtũm kot tanhmã mẽ pajamãr to ho pa hã kagà nẽ hã kagà ho:

49 Na pa hte kaxkwa rùm pyka hkõt mẽ piitã mẽ hamãr mex o ixkrĩ.

Tã tanhmã kot paj amnhĩ to nẽ mẽ ìhkra ho mẽ kot inhmã ixkre nhĩpêxta wỳr axà nẽ kamã ixpa ho ixpa?

50 Nà ixte mẽmoj piitã ho ixkator xwỳnh kênã kot pa kêt ã amnhĩ nhĩpêx anẽ. Anẽ.

Nhũm pre ã Tĩrtũm amnhĩ tã mẽ kãm kapêr anẽ nhũm ỹ hã kapêr jarênh xwỳnhja ô ri mẽ pamã hã kagà.

51—E kwa mẽ inhma ixkwỳjaja. Mẽ akrã hihtỳx kumrêx jakamã mẽ amã Tĩrtũm kapêr mar prãm kêt. Na ka htem mẽ panhĩgêttjê pyrã nẽ amnhĩ nẽ Tĩrtũm Karõ kaga nẽ kapêr mar kêt nẽ. 52Na pre hte Tĩrtũm nhỹ hã kapêr o mẽ pa xwỳnhjaja mẽ panhĩgêttjê hwỳr mra nẽ mẽ kãm kapêr jarênh o ri mẽ hkõt pa. Tã nhũm mẽ hkaga nẽ mẽ hipêx kati ho pa. Na pre htem Jejus wrỳk kukamã mẽ kãm: “E koja nhỹrmã kot Tĩrtũm kapêr mar nẽ hkõt amnhĩ nhĩpêx mex rãhã xwỳnh maatija mẽ pahwỳr wrỳ.” Anhỳr o mẽ kãm harênh o pa. Tã no nhũm mẽ kãm ja mar prãm kêt jakamã axtem nẽ hã mẽ hpar o pa. Mẽ kot mẽ kãm Jejus jarênh o mẽ pa xwỳnhjê hpar o pa. Tã nhũm tãm mẽ pahwỳr wrỳ ka mẽ omu nẽ mẽ kot amnhĩ nhĩpêxta pyrã nẽ hã amỹnê nhũm prem mẽ amã kupĩ.

53—Tĩrtũm kapêr o mẽ wrỳk xwỳnhjaja kot Tĩrtũm nhỹ hã tanhmã mẽ pahte amnhĩ nhĩpêx to ho papa hã mẽ pamã karõ nhũm mẽ ate mar tã mẽ apê hprãm nõkati. Nẽ ama nẽ ãm ama nẽ hkõt amnhĩ nhĩpêx o ri apa hkêt nẽ. Anẽ.

Mê kot Estewāw pīr ā mẽ harēnh

Rukre 21.16-19, 23.34; Atre 22.20

54Hāmri nhũm juistijaja tee ri Estewāw xujarēnh ma nẽ kamã gryk tỳx nẽ kãm kapēr punuj nẽ. 55Nom nhũm Tĩrtũm Karõja tanhmã hkrã hto nhũm kãm mẽ uma hkêt nẽ. Hāmri nẽ kãnhmã rĩt nẽ kaxkwa pumunh o xa nẽ kamã Tĩrtũm rũm hirã rax pumu. Nhũm Jejus Tĩrtũm nhĩhkõ hã xa nhũm omu nẽ hkĩnh nẽ mẽ kãm:

56—Kokỹỹ. Na kaxkwa axkjê nhũm kamã Tĩrtũm nhỹ pa omu. Nhũm kuri kot mẽ pahwỳr mẽnh xwỳnh Jejusja xa. Hêxta waa nẽ. Nà na pa jarãhã wa omu nẽ ixkĩnh tỳx kumrêx. Anẽ.

57Hāmri nhũm mẽ kuma nẽ kamã gryk tỳx nẽ. Hāmri nẽ kãm mar prãm kêt nẽ kêp amnhĩ jamak pro. Hāmri nẽ gryk xàj àmra htỳx nẽ hwỳr hprõt 58nẽ unê nẽ krĩ pê ho kato nẽ ma o tẽ nẽ nhỹri o xa. Hāmri nẽ kẽn o htak o hpĩr kaxyw amnhĩ nhĩnõkà hkwrỳ nẽ mẽhõ my pê Sawti mã kugõ nhũm mẽ kãm hamỳ. Hāmri nhũm mẽ kẽn rũnh kwỳ jamỳ nẽ o mra nẽ Estewāw wỳr rēnh prêprêk o kuhê. Nẽ ho ĩ kamã htak nẽ hkrãx pê htak. 59Hāmri nhũm ra htyk kaxyw nẽ Jejus mã amnhĩ jarẽ nẽ kãm:

—Pa Pahihti Jejus? E koja ixkarõ awỳr api ka ixto amnhĩptà. Anẽ.

60Hāmri nẽ hkõn krã ho tẽm nẽ nhỹ nẽ axte kãm amnhĩ jarẽ nẽ mẽ kot hpĩr xwỳnhjê nẽ kãm kapēr nẽ kãm:

—Kwa Pahihti. Mẽ kot ixpĩr tã kwa tanhmã ixtã mẽ ho hkêt nẽ. Anhỹr o mẽ nẽ Jejus mã kapêrja kõt ra ty.



Atre 7.54-8.2

Mě kot Estewāw jaxàr ã mẽ harěnh

Atre 22.4, 26.9-11

8 1-2Hāmri nhũm mẽ kot Jejus kôt amnhĩ nhĩpêx xwỳnhjaja Estewāw wỳr mra nẽ htyk kãm omu nẽ hkaprĩ nẽ. Nẽ mur nẽ kumỳ nẽ ma o mỗ nẽ haxà. Nom nhũm Sawtija mẽ kot hpir ã omu nhũm ja kãm mex nẽ.

Sawti kot Jejus kwỳjê nhĩpêx kati ho pa hã harěnh

Atre 1.8

Tã nhũm Jerujarẽ kamã Ijaewjaja mẽ kot Jejus kôt amnhĩ xunhwỳr xwỳnhjê homnuj tỳx o pa. Hāmri nhũm mẽ tee ri amnhĩ kukamã hamaxpêr nẽ mẽ hkwỳjaja mẽ umaj hapôj nẽ ma pika hkwỳ hkôt hpigrành pa. Mẽ hkwỳjaja Jutej wỳr ma pa nhũm mẽ hkwỳjaja Samar hwỳr ma pa. ã na prem mẽ umaj nhỹhỹm hpigrành par anẽ. ãm Jejus nhỹ hã mẽ ahkre xwỳnh maati pixjaja na prem Jerujarẽ kamã arĩk nẽ nhỹhỹm mỗr kêt nẽ. Simāw Pêtre nẽ Juāw nẽ Xiakre nẽ Andre nẽ Firipti nẽ Patoromew nẽ Matêwre nẽ Makre nẽ Tomas nẽ Xiakre hōja nẽ Simāw ò nẽ Maxitreja. ãm jajaja pix na prem arĩk.

3Nhũm Sawti haxwỳja Jejus kôt mẽ kot amnhĩ xunhwỳr xwỳnhjê homnuj o pa. Mẽ kot Jejus kaga hprãm xàj tanhmã mẽ hipêx to ho pa. Na pre hte mẽ òrkwỳ hwỳr agjê nẽ mẽ unê. Měmyjê pynê nẽ mēnijê pynê nẽ ma mẽ o mra nẽ mẽ hagiênh xà kamã mẽ hagiê. Mẽ uràk nẽ kêp Ijaew tã ã mẽ hipêx anhỹr o pa.

4Tã nhũm mẽ umaj Jerujarẽ rũm pika hō hwỳr mẽ hpigrành xwỳnhhtaja amarĩ pika hkwỳ hkôt ri pa hkêt nẽ. Na prem ma mẽ piitã mẽ kãm Jejus kapêr jarěnh o ri mẽ hkôt pa. Kêp Tirtũm kot mẽ pakaxyw ãm xwỳnh ã harěnh rãhã ho ri mẽ hkôt pa.

Wajaga kot amnhĩ tã Firipti mar ã harěnh

Juāw 2.23-24

5-12Tã nhũm Firipti haxwỳja ma mỗ. Ma krĩ pê Samar hwỳr mỗ nẽ kamã mẽ kãm Tirtũm kot mẽ pakaxyw ãm xwỳnhhta jarěnh o pa. Samar kamã na pre wajaga Simāwti ri Samar nhõ xwỳnhjê hkôt mẽ no kupyrrãhã ho ri mẽ hkôt pa. Nẽ àhpumunh tỳx ã amnhĩ to jarkrar o ri pa. Jakamã nhũm mẽ kot amnhĩ nhĩpêx ã omu nẽ kamã no pyma nẽ. Nẽ htỳx ho ãm hāmri kot amnhĩ jarěnh ã hkamnhĩx. Jakamã nhũm pre mẽ kãm tanhmã ri amnhĩ to hêx to ho pa pê mẽ no kupyrrãhã ho ri pa nhũm mẽ amnhĩ jaêr pê omu. Mẽ kot amnhĩ to hkryre xwỳnhjaja nẽ mẽ kot amnhĩ to rũnh xwỳnhjaja nhũm mẽ amnhĩ jaêr pê kot tanhmã amnhĩ nhĩpêx to hã omunh o hkôt pa. Nẽ ri axpên mã harěnh o:

—Kokỹỹ. Wajagaja àhpumunh tỳx kumrëx. Tirtùm nhỹ hã măn te ã amnhĩ nhĩpêx anhỹr o pa nà? Măn pre Tirtùm kãm àhpumunh xà hkwy gô nhũm ỹ hã ã amnhĩ nhĩpêx anhỹr o pa. Anẽ.

Hãmri nẽ hkôt hamaxpêr o ri hkôt amnhĩ nhĩpêx o pa.

Tã nhũm Firipti mẽ õ krĩ hwỳr mỗ nẽ mẽ kãm Jejus Kris jarënh o ri mẽ hkôt pa nẽ mẽ kãm:

—Jesús kêp Tirtùm kot mẽ pahwỳr mênh xwỳnh jakamã kot kaj mẽ amnhĩ kaxyw hkôt ajamaxpêr nẽ hkôt amnhĩ xunhwỳ nhũm Tirtùm hã mẽ apumu nẽ mẽ ato hkra. Anẽ.

Hãmri nẽ Tirtùm nhỹ hã akupỹm tanhmã mẽ kute xwỳnhjê ho mex to ho pa. Mẽ ĩ kamã mẽ htyk xwỳnhjaja nẽ mẽ hyk o mẽ pa xwỳnhjaja nhũm mẽ ohtô nẽ akupỹm mẽ ho mex o pa. Nẽ mẽ hkwyjê nẽ mẽkarõmnuti hkwy jano nhũm mẽ àmra htỳx o mẽ hkaga nẽ ma mẽ kurũm hapôx nẽ mra. Ǻ Firiptija Jejus nhỹ hã mẽ ho mex o pa anẽ nhũm mẽ piitã ja hã omu nẽ kapêr ma nẽ hkĩnh nẽ. Nẽ kapêr mar tỳx nẽ hkôt hamaxpêr. Jao wajaga Simãwti kaga nẽ hpãnhã amnhĩ kaxyw Jejus kôt pix mã hamaxpêr nẽ hkôt amnhĩ xunhwỳ. Hãmri nhũm Firipti ja hã mẽ omu nẽ mẽ hkrã kumrã. Měmyjaja nẽ mēnijaja nẽ mẽ piitã mẽ hkrã kumrã. Ra mẽ kot Jejus kôt amnhĩ xunhwỳr ã mẽ piitã mẽ kãm amnhĩ to amnhĩrit kaxyw nhũm mẽ hkrã kumrãr pa.

13Hãmri nhũm wajaga Simãwti haxwỳja Jejus kapêr ma nẽ mẽ uràk nẽ amnhĩ kaxyw hkôt hamaxpêr nẽ hkôt amnhĩ xãm nhũm Firipti hkrã kumrã. Hãmri nhũm hkĩnh nẽ Firipti hkôt ri pa. Nẽ aa mẽ kot mẽmoj pumunh kêt kwỳ ho anhỹr o ri pa hã omu nẽ kamã no pyma ho hkôt ri pa. Nẽ kot Tirtùm nhỹ hã akupỹm mẽ ho mex ã omu nẽ tee ri hamaxpêr.

14Tã hãmri nhũm Jerujarẽ kamã Jejus nhỹ hã mẽ ahkre xwỳnh maatiijaja Samar nhõ xwỳnhjê jarënh ma. Ra mẽ kot Tirtùm kapêr kôt amnhĩ nhĩpêx ã mẽ harënh ma nẽ hkĩnh nẽ. Hãmri nẽ ma mẽ hwỳr Simãw Pêtre mẽ Juãw wa kumẽ. 15-17Hãmri nhũm wa ma mẽ hwỳr wa mỗ nẽ pøj. Hãmri nhũm Firipti wa omu nẽ wa kãm krĩ nhõ xwỳnhjê jarẽ nẽ wa kãm:

—Nà na pa pre mẽ kãm Jejus kapêr jarẽ nhũm mẽ inhma nẽ hkôt amnhĩ xunhwỳ. Jakamã pa pre mẽ hkrã kumrã. Nom na kormã Tirtùm Karõja mẽ hkarõ mã gjêx kêt nẽ. Anẽ.

Hãmri nhũm wa mẽ harënh ma nẽ mẽ himõk ã wa ĩhkra jaxwỳr o ri mẽ hkôt mra. Ja kôt nhũm Tirtùm Karõ mẽ hwỳr wrỳ nẽ mẽ hkarõ mã gjêx pa. 18-19Hãmri nhũm wajaga Simãwja mẽ amnhĩ tã wa omunh o xa nẽ hamaxpêr o:

—Kokỹỹ. Kwa wa kot mẽ hã ĩhkra jaxwỳrja kôt na hte Tirtùm Karõ mẽ hkarõ mã agjê. Hêxta waa nẽ. Inhmã ã mẽ hipêx anhỹr o ri ixpa hprãm tỳx. E pa ixkàxpore hkwy jamỳ nẽ o tẽ nẽ wa kãm kugô kê wa

tanhmã ixto pa wa uràk nê ã mẽ hipêx anhÿr o ri ixpa. Nà kot paj anê. Anê.

Hãmri nê wa hwÿr tẽ nê wa kãm:

—E ota ixkàxporeta. Kwa amnhĩm apy nê hpãnhã tanhmã ixto pa war apyrà nê mẽ hã inhĩkra jaxwÿr o ri mẽ hkôt ixpa kê Tirtũm Karõja mẽ hkarõ mã agjê. Inhmã ja ho anhÿr prãm tÿx. Anê.

20-23Hãmri nhũm wa tee ri ã kapêr anhÿrja ã omu nhũm Pêtre kãm:

—Tk. Kwa ajamxpêrja mex kêt. Xà na htem kàxpore ho Tirtũm mã amnhĩrer pê ÿ hã mẽ ho hwÿr o pa nhũm Karõ mẽ hwÿr agjê? Nà na htem kàxpore ho Tirtũm Karõ japrôr kêt nê. Kot kaj wa ixpyrà nê ã mẽ hipêx anhÿr kêt nê. Ajamxpêrja mexre hã. Kormã ate Tirtũm kôt amnhĩ xãm tÿx kêt jakamã na ka atÿx ã ri ajamxpêr anê.

—Na ka ã wa ixte Tirtũm nhÿ hã mẽ hipêx anhÿr ã wa ixpumu nê amã wa ixpyrà nê ã mẽ hipêx anhÿr o ri apa hprãm xaj ajamxpêr punuj nê. Nhũm ajamxpêr punuj te kot apa hã apyr ka tee ate kêp amnhĩ kjênh pyràk. Kwa tokyx ajamxpêr punuj ã amnhĩ pumu nê akaprí nê tokyx hkaga. Hãmri nê amnhĩ to Tirtũm wÿ kê amnhĩ katut kôt ajamxpêr punujja mẽ ka axte ã ajamxpêr anhÿr kêt nê. ã mẽ hamxpêr punuj anhÿr xwÿnhjaja koja mẽ nhÿrmã ma kuwy hwÿr pa. Anê.

24Hãmri nhũm tee ri amnhĩ tã kuma nê hkaprí nê wa kãm:

—Kwa xà wehe? Tô tokyx ixto Tirtũm wÿ kê ã ijamxpêr anhÿrja mÿrapê hwÿr inhmênh kêt nê. Anê.

25Tã nhũm Simãw Pêtre mẽ Juãw wa Samar nhõ xwÿnhjê mã Pahihti Jejus kapêr jarênh pê ho mẽ ahkre hãmri nê ma akupÿm Jerujarê hwÿr mō. Ma pyka pê Samar hkôt mẽ kãm Jejus kapêr jarênh o ma akupÿm mō.

Firipti mẽ Exiop nhõ xwÿnh wa harênh

Ijais 53.7-8

26Hãmri nhũm Firipti arĩ Samar kamã arĩk. Hãmri nhũm Tirtũm kapêr o mẽ wrÿk xwÿnhja hwÿr wrÿ nê kãm:

—Pa? E ot pa awÿr wrÿ nê tẽ. Nà kêr ka tokyx akato nê ma mō nê Jerujarê rũm kãnhmã Kas wÿr pry kahpêr ta nê hã juk nê ma hã mō. Kapôt ã pry nōrta kahpêr ta nê hã mō. E kwa tokyj.

Anhÿr o kãm kapêr hãmri nê ma akupÿm tẽ nê kaxkwa hwÿr api.

27Hãmri nhũm Firipti kuma nê kato nê ma hwÿr mōr kurê kumrêx. Mōõ hãmri nê pryja kahpêr ta nê hã mō.

Hãmri nhũm ra mẽhõ myja mō. Exiop nhõ xwÿnh na pre. Exiop kamã mẽõ pahi na pre niti. Hixi pê na pre Kãtatre. Nhũm pry hã mōr xwÿnhja kêp kãm kàxpore jamãr o pa xwÿnh. Exiop kamã te kêp mẽ õ kōwenatô pyràk. Tã kot Tirtũm mã mex o mex ã harênh kaxyw ma Jerujarê hwÿr mō. 28Hãmri nê akupÿm Exiop wÿr kormã mō. Õ pãr kãm nhÿ nê Tirtũm



Atre 8.26-40

kapēr ā kagà htūm kamā kapēr o mō. Tirtūm nhỹ hã kapēr o pa xwỳnh pē Ijais kot Tirtūm kapēr ā kagà htūmja nhūm kamā kapēr o mō.
 29Hāmri nhūm Tirtūm Karō Firipti mā harē nē kām:

— E mēhō mīj wỳr aprōt nē tē nē hã ajēt nē ma hkôt tē. Anē.

30Hāmri nhūm kuma nē ma hwỳr hprōt nē hã ajēt nē kot kagà kamā kapēr ā kuma. Ijais kot Tirtūm kapēr ā kagà htūm kamā kapēr ā kuma nē kām:

— Pa? Mãn ka aprĩ hã ate kamā akapēr xwỳnhhta ma nà? Anē.

31Hāmri nhūm kām:

— Nà ixte maare hã. Mēhō kot hprĩ hã inhmã harē pa ixprĩ hã kuma? Xàt ka ixwỳr api nē ixri nhỹ nē aprĩ hã inhmã harēnh o ixkôt mō nà? Anē.

Hāmri nhūm kuma nē hwỳr api nē ìhkô hã nhỹ nē kagàta pumunh o nhỹ. 32Nhūm hã kagà kot:

Na htem ôwēhti par kaxyw nhūm amarĩ mē kām akryk kuhê.

Nē mē kot kēp hkĩ jakàr kaxyw nhūm ma anē nē amarĩ mē kām akryk kuhê.

Tã na pre mēhōja ôwēhti kot amnhĩ nhĩpêx pyràk o amnhĩ nhĩpêx.

Jakamã nhūm mē kot tanhmã hipêx to htã no nhūm arĩ mē kām akryk xa. Amnhĩ nē tanhmã mē kām kapēr punuj to hkêt nē. ãm arĩ mē kām xa.

33 Na prem homnuj tỳx nē ri hipêx kati rax nē.

Aa kot tanhmã amnhĩ tomnuj to hkêt kumrêx tã nhūm mē ã

hipêx anê nhũm mēhō yr pê tanhmã nê mē kãm kapêr to
hkêr nhũm prem kupĩ.

Nhũm amnhĩ kanrēhã hkra hkêr rãhã ty. Jakamã kot puj mē
hkrajê nhĩxi mar kêt nê. Kra hkêr rãhã htyk kênã. Anê.

34Nhũm pre ã Exiop nhõ xwỳnh Tĩrtũm kapêr ã kagà htũm kamã harēnh
anê. Hãmri nê tee ri ã kot mēhō jarēnh anhỹrja kukamã hamaxpêr nê
hã Firipti kukja nê kãm:

— Kwa aprĩ hã inhmã mēhōja jarē. Mēhō na prem ã hipêx rax anê?
Xà kot kagà xwỳnhhta na prem ã hipêx anê nà xà nhãm mēhō na prem ã
hipêx anê? E kwa aprĩ hã inhmã harē pa ã mē kot hipêx anhỹr xwỳnh
kôt omu. Anê.

35Hãmri nhũm kãm:

— Tōe kot paj amã harē. Nà Jejus na prem ã hipêx anê nhũm prem
hã kagà. Anê.

Hãmri nê hprĩ hã kãm kot kamã harēnh xwỳnhhta jarē. Jejus kot
tanhmã mē panê amnhĩ nhĩpêx toja nhũm hprĩ hã kãm harēnh o hkôt mō.

36Hãmri nhũm wa kormã mō nê pry htã himô hãnh mō nhũm Exiop
nhõ xwỳnh omu nê Firipti mã kãm:

— E mũj gô mũj nō. Xà kot kaj kamã ixkrã kumrã nà? Anê.

37Nhũm kãm:

— Nà kot kaj amnhĩ kaxyw Jejus Kris kôt ajamaxpêr nê hkôt amnhĩ
xãm hã kot paj akrã kumrãr kurê kumrêx. Anê.

Hãmri nhũm kãm:

— Tỳ. Kêp Tĩrtũm Kra kênã kot paj kêt amnhĩ kaxyw hkôt ijamaxpêr
kêt. Anê.

38Hãmri nê pàr o mrrar xwỳnh mã anê nhũm pàr o nō nhũm wa kato
nê himô hwỳr wrỳ nhũm Firipti hkrã kumrã. Kot Jejus kôt amnhĩ xãm
ã hkrã kumrã. 39Hãmri nê wa akupỹm api nhũm Tĩrtũm Karõ Firipti mỳ
nê ma nhỹhỹm o mō nhũm Exiop nhõ xwỳnhja axte omunh kêt nê.
Hãmri nê ma akupỹm papxà hwỳr mō. Ra kot Jejus kôt amnhĩ xãm
jakamã hkĩnh nê ma akupỹm mō.

40Rôm nhũm Firipti krĩ pê Ajôt kamã pøj. Tĩrtũm Karõ kot Exiop nhõ
xwỳnh pê kator nê tanhmã ho nê Ajôt wỳr o mō hãmri nê kamã kumê.
Hãmri nhũm mē kãm Jejus kot tanhmã mē panê amnhĩ nhĩpêx to hã
harēnh pê ma krĩ hō hwỳr mē kãm ujarēnh anhỹr o pa rãhã krĩ pê Sejurej
wỳr mō nê pøj.

Sawti kot Jejus kôt amnhĩ xãm ã harēnh

Atre 22.6-11, 26.12-18

9 1Rôm nhũm Sawtija xatã Jerujarē kamã Pahihti Jejus kôt mē kot
amnhĩ xunhwỳr xwỳnhjaja tanhmã mē homnuj tỳx to ho ri mē hkôt
pa. Kãm mē himex par prãm jakamã na pre hte ã amnhĩ nhĩpêx anhỹr

pix o pa. Tã ra hamaxpêr nê ma patre maati hwÿr tẽ nê mẽ hã amnhĩ jarê nê kãm:

2—E ot pa awÿr tẽ. Kwa inhmã kagà nhĩpêx pa kupy nê ma krĩ pê Tamas kãm mẽ pahpê Ijaew xàptàr tũmrejê hwÿr o mỗ nê mẽ kãm kugõ. Kê mẽ kamã harê nê omu hãmri nê hkôt inhĩkra kamã Jejus kôt mẽ kot amnhĩ nhĩpêx xwÿnhjê jagjê. Mênijaja nê mẽmyjaja. Hãmri pa mẽ unê nê man akupÿn awÿr mẽ o mỗ ka mẽ omu nê kam tanhmã mẽ hipêx to. Anê.

Hãmri nhũm kuma nhũm ja kãm mex nê. Hãmri nhũm kãm kagà nhĩpêx nê kugõ nhũm kupy nê hkôt mẽ pa xwÿnhjê mẽ ro hã ma Tamas wÿr mẽ hwÿr mõi kurê kumrêx.

3Mõ mẽ ra hpõx o mõi mẽ nhũm puh kaxkwa rũm hirã rax kumrêx wrÿ nê hã ajêt nhũm hipõk ri xa. 4Hãmri nê tee ri omu nê kãm ma xàj pykap tẽm nê akryk nõ. Hãmri nhũm kaxkwa rũm mẽhõ kãm kapêr nê kãm:

—Pa Sawti? Hêxta waa nê. Kwa mon ka hte ixtomnuj tÿx o ri apa? Anê.

5Hãmri nhũm amnhĩ jaêr pê kuma nê kãm:

—Kwa mẽ atõ na ka ã inhmã akapêr anê pahihti? Anê.

Hãmri nhũm kãm:

—Kwa nhũm ixpê Jejus ixte amã ixkapêr kênã. Pa na ka hte ixpê ixkôt mẽ kot amnhĩ xunhwÿr xwÿnhjê nhĩpêx kati ho apa. Jao te pa ate ixtomnuj tÿx pyrãk. 6Nom kot kaj axte ã amnhĩ nhĩpêx anhÿr kêt kumrêx. E kànhmã xa nê mãmrĩ ma krĩ hwÿr tẽ. Kot kaj hwÿr pøj nhũm mẽhõ awÿr tẽ nê mẽmoj tã amã karõ ka ama nê hkôt amnhĩ nhĩpêx. Anê.

7Nhũm pre ã Jejus Sawti mã kapêr anê. Nhũm hkôt mẽ pa xwÿnhjaja mẽmoja ma no ãm hprĩ mar nê mẽmoj pumunh kêt nê. Hãmri nê tee ri hamaxpêr nê kãm ma xàj akryk kapêr kêt kumrêx nê kuhê. 8Hãmri nhũm Sawti kànhmã xa nom rĩt kêt nê tee ri rĩt mã nhũm mẽ hpa hã kupy nê ma krĩm o mỗ. 9Nê Tamas wÿr o pøj nê nhÿri mẽhõ nhõrkwÿ hwÿr ho axà nhũm kamã nohkre nê arĩ hkrĩ. Tee ri amnhĩ kukamã hamaxpêr o hkrĩ. Nê apkur kêt nê hkõm kêt o ra hã apkati axkrunêpxi.

10Tamas kamã na pre mẽhõ my pê Ananĩsja pa. Kot Jejus kôt amnhĩ xunhwÿr xwÿnhjê hõ na pre. Jakamã nhũm Jejus hwÿr kato nê kãm kapêr. Te hpimtir kãm hwÿr kator nê kãm kapêr pyrã nê kãm:

—Pa Ananĩs? Anê.

Nhũm kãm:

—ÿ? Ot pa xa. Mo na Pahihti? Anê.

11Nhũm Jejus kãm:

—E kêr ka akato nê ma mẽ kot kãm: “Pry katàt” anhÿr xwÿnhhta wÿr tẽ. Hãmri nê kamã Jut nhõrkwÿ japêr. Kamã na Tas nhõ xwÿnh pê Sawtijaja hkrĩ. Na no hkre nê inhmã amnhĩ jarênh o hkrĩ. Ka hwÿr axà nê

omu. 12Ate hwỳr atēm nē inhỹ hã hã anhĩkra xir nhũm akupỹm rĩt mex kaxyw na ato amỹti. Jakamã e ma hwỳr tē nē ã hipêx anē. Anē.

13Hãmri nhũm Ananĩs tee ri kuma nē kãm Sawti puma ho amnhĩ kamã kahak nē. Hãmri nē kãm:

—Kwa nà Pahihti. Tãm na xep hte Jerujarē kamã mẽ kot amnhĩ kaxyw akôt mẽ hamaxpēr xwỳnhjê nhĩpêx kati ho pa. Pa ra mẽ hã harēnh ma. 14Tã na xep ra jar Tamas wỳr pøj. Patre krãhtũm kapēr nhỹ hã kot mẽ ixpê akôt amnhĩ xunhwỳr xwỳnhjê pynēnh nē ma akupỹm hwỳr mẽ ixto mōr kaxyw. Tãn ka ri hwỳr ijano. Kwa nà ri ixto anhỹr kêt nē Pahihti. Anē.

15Nhũm Jejus kãm:

—Nà mamrĩ ma hwỳr tē. Ra ixte amnhĩ kaxyw ãm kēnã. Jakamã koja ã mẽ anhĩpêx anhỹrta hpãnhã ma mẽ piitã mẽ kãm ixkapēr jarēnh o pa. Mẽ apê Ijaew mã nē mẽ anhõ pahi hkwỳjê mã nē mẽ kêp Ijaew kêt xwỳnhjê mã. Koja mẽ piitã mẽ kãm ixkapēr jarēnh mex o ri mẽ hkôt pa. 16Koja mẽ ixtã homnuj tỳx nē nhũm amnhĩ xà htỳx kamã hamak o pa. Nom kot paj ixprĩ hã mẽ kot tanhmã ixtã hipêx to hkukamã kãm ixujarēnh pa nhũm amnhĩ kukamã amnhĩ jarēnh ma. E tokyx mãmri ma axãmnhix hwỳr tē. Anē.

17Hãmri nhũm kuma nē kato nē ma Sawti hwỳr htēm kurê kumrêx. Hãmri nē ixkre hwỳr axà nē omu nē hkrã hã ãhkra xi nē kãm:

—Pa Jejus kôt ixtõ Sawti? E na Pahihti Jejus awỳr inhmẽ pa awỳr tē. Pry kahti ri kot awỳr kator xwỳnhnta. Tã akupỹm arĩt nhũm Tĩrtũm Karõ kot akarõ mã ãr kaxyw na awỳr inhmẽ pa tē. Anē.

18Hãmri nhũm mēmoj te tep kà pyrãkja Sawti no rũm hapøj nē rōrōk nhũm akupỹm rĩt mex kurê kumrêx. Hãmri nē kãnhmã xa nhũm Ananĩs hkrã kumrã. Ra amnhĩ kaxyw Jejus kôt hamaxpēr ã hkrã kumrã. 19Hãmri nhũm nhỹ nē apku nē akupỹm hihtỳx.

Sawti kot Tamas kamã Jejus kapēr jarēnh

Sikũn Korĩt 11.22-23

Nhũm Sawti Tamas kãm mẽ kot Jejus kôt amnhĩ xunhwỳr xwỳnhjê hkôt amnhĩ xãm nē mẽ hkôt ri pa nē tokyx ma akupỹm mōr kêt nē. 20Kormã mẽ hkôt ri pa nē Ijaew nhõ Tĩrtũm kapēr o mẽ ahkre xà hã ixkre hwỳr mra nē kamã mẽ kãm Jejus kapēr jarē. Kêp Tĩrtũm Kra hã harēnh o kuhê. 21Hãmri nhũm mẽ amnhĩ jaêr pē ã harēnh anhỹrta ma nē tee ri hamaxpēr nē axpēn mã:

—Kokỹỹ. Kwa tãm na xep pre Jerujarē kamã amnhĩ kaxyw Jejus kôt mẽ kot amnhĩ xunhwỳr xwỳnhjê homnuj tỳx o pa. Tã xep jar kot mẽ hkwỳjê pynēnh nē ma mẽ o mōr nē Jerujarē kamã patre krãhtũmjê mã mẽ òr kaxyw na pre man mẽ pahwỳr mō. Tã ra tanhmã hamaxpēr to nē axtem nē mẽ pamã Jejus kapēr jarēnh o mẽ pajahkre ho pa. Anē.

22Hāmri nhũm Sawti arĩ Tamas kām Ijaew mã tanhmã Jejus jarēnh to kamã hihtỳx o mẽ hkôt pa nẽ mẽ kām:

—Nà Jejus Krisja na pre Tirtũm mẽ pakaxyw ãm nẽ mẽ pahwỳr kumẽ. ãm hāmri na pa mẽ amã ja jarẽ. Anẽ.

Hāmri nhũm mẽ kuma nẽ tee ri kutã tanhmã kapēr to hkukamã hamaxpēr.

23Tã ra hã apkati xohtô nẽ nhũm Tamas kām Ijaew kwỳjaja kot Sawti pĩr kaxyw hã axpẽn ma. 24Hāmri nhũm mẽhõja hã ama nẽ Sawti hwỳr tẽ nẽ kãm mẽ harẽ nẽ kãm:

—Kwa Sawti kêr ka axkãm ajamak rom. Na mẽ pahkwỳjaja atã amỳnẽ. Na mẽ ra krĩ puhã kahê xà hã hakwakre piitã hamār ho kuhê. Kot kaj nhỹhỹm akato nhũm mẽ apumu nẽ apynẽ nẽ apĩ. Anẽ.

25Jakamã nhũm kamàt nhũm Sawti hkôt ri mẽ pa xwỳnhjaja kawà rax õ mỳ nẽ hwỳr o tẽ nẽ kãm ãm nhũm hwỳr axà nẽ nhỹ. Hāmri nhũm mẽ hkagrĩ nẽ kẽn o krĩ puhã kahêja nhĩrô pê ho wrỳ nhũm mẽ kêp kato nẽ ma mõ.

Sawti kot Jejus kwỳjê hkôt pikamēnh ã harēnh

Karatas 1.15-24

26Tã nhũm Sawti krĩ pê Tamas rũm kato nẽ ma akupỹm Jerujarẽ hwỳr mõ hāmri nẽ hwỳr pøj. Hāmri nẽ mẽ kot Jejus kôt amnhĩ xunhwỳr xwỳnhjê hkôt amnhĩ jarēnh kaxyw mẽ hwỳr tẽ. Hāmri nhũm mẽ tee ri amnhĩ wỳr omu nẽ kot Jejus kôt amnhĩ xãm ã amnhĩ to hêx ã hkamnhĩx hāmri nẽ amnhĩ kamã kahak o amnhĩ nẽ hkurê nẽ mẽ piitã kãm uma nẽ.



Atre 9.23-25

27 ãm Panãpe pix ãm hãmri kot Jejus kôt amnhĩ xãm kôt hamaxpër. Hãmri nê ma hwÿr tẽ nê haprô nê ma Jejus nhÿ hã mẽ ahkre xwÿnh maatijsê hwÿr o tẽ nê yr pẽ mẽ kãm kapër nê mẽ kãm:

— Kwa ãm hãmri na Sawti amnhĩ jarẽ. Na ra mẽ pahpyrà nê Jejus kôt amnhĩ xãm. Na xep pre Tamas wÿr pry hã kormã mỗ nhũm xep Pahihti Jejus hwÿr kato nê kaxkwa rũm kãm kapër nhũm kuma nê hkôt amnhĩ xãm. Jakamã nhũm xep ra axtem kot amnhĩ nhĩpêx nyw o Tamas nhõ xwÿnhjê mã Jejus kapër jarẽnh o ri mẽ hkôt pa. Ra amnhĩ kamã kãm mẽ uma hkêt nê àmnhĩx ri mẽ kãm harẽnh o ri mẽ hkôt pa. Anẽ.

28 Hãmri nhũm mẽ kuma nê amnhĩ kôt Sawti mẽ nhũm mẽ hkôt ri pa. Hãmri nê Jerujarẽ kamã mẽ piitã mẽ kãm Jejus kapër jarẽnh o pa. Kãm Jejus kôt amnhĩ xunhwÿr kêt xwÿnhjê puma hkêt nê àmnhĩx ri mẽ kãm kapër jarẽnh o ri mẽ hkôt pa. 29 Nê Ijaew kwÿ pẽ Gresjê kapër o mẽ kapër xwÿnhjê mã nhũm xatã mẽ kãm Jejus jarẽnh o ri mẽ hkôt pa. Kêp Tirtũm kot mẽ pakaxyw ãm xwÿnh ã harẽnh rãhã ho ri mẽ hkôt pa. No nhũm mẽ kãm mar prãm kêt nê ra kot Jejus ã hpĩr mã. 30 Hãmri nhũm mẽ kot Jejus kôt amnhĩ xunhwÿr xwÿnh kwÿjaja mẽ harẽnh ma nê mẽ kêp ho kato nê ma krĩ pẽ Sejarej wÿr o mỗ. Hãmri nê kurũm ma akupÿm õ krĩ pẽ Tas wÿr kumẽ nhũm ma akupÿm mỗ.

31 Tã ra Sawti kot Jejus kôt amnhĩ xãm jakamã nhũm mẽ kãm mẽ hkurê xwÿnhjaja axte Jejus ã tanhmã hkwÿjê hto hkêt nhũm mẽ piitã hamakêtkati nê àmnhĩx ri pa. Pika pẽ Jutej kamã nê Garirej kamã nê Samar kamã nhũm mẽ piitã hamakêtkati nê àmnhĩx ri pa. Hãmri nê Tirtũm mã mex o mex ã harẽnh o ri pa. Nhũm Tirtũm Karõ tanhmã mẽ hkrã hto nhũm mẽ ra kapër kôt amnhĩ nhĩpêx mex o mỗ. Hãmri nhũm mẽ ohtô rax nê mẽ urak nê Jejus kôt amnhĩ xunhwÿr nê hkwÿjê hkôt axkamẽ.

Enejti akupÿm mex ã harẽnh

Atre 3.1-10

32 Tã nhũm Simãw Pêtreja ma mẽ kot Jejus kôt amnhĩ xunhwÿr xwÿnhjê mã Tirtũm kapër jarẽnh o mẽ ahkre kaxyw ma krĩ piitã hkôt pa. Jakamã krĩ pẽ Rit wÿr mỗ 33 nê hwÿr pøj nê kamã Enejti pumu. Nhũm ì kamã htyk pa nê kupĩp kãm hikwÿ rãhã hã amgrã pẽ 8. 34 Hãmri nhũm Simãw Pêtre omu nê Jejus nhÿ hã kãm kapër nê kãm:

— Pa Enejti? E na Jejus Kris akupÿm ato mex. Jakamã e kãnhmã xa nê akupĩpta py. Anẽ.

Hãmri nhũm akupÿm mex nê kãnhmã xa nê amnhĩ pumu nê hkĩnh o hkĩnh. 35 Hãmri nhũm krĩja kamã nê krĩ hõ pẽ Sarõ kamã mẽ piitã harẽnh ma nê mẽ kot amnhĩ tomnuj kaga hpa nê hpãnhã Jejus kôt amnhĩ xunhwÿr nê hkôt amnhĩ nhĩpêx o pa.

Tapitre akupÿm htír ã harênh*Rukre 8.49-56; Atre 20.7-12*

36Nhũm Tapitreja krí pê Jope kamã na pre pa. Gres kapêr kãm hixi pê Nokre. Mẽ kapêr kãm Nokreja te kêp “karà” anhÿr jarênh pyræk. Na pre ra Tapitre pê Nokreja Jejus kôt amnhĩ xãm nẽ mẽ piitã mẽ ho mex o ri mẽ hkôt pa. Nẽ mẽ kêp amrakati xwÿnhjê kamã ukaprĩ ho ri mẽmoj to mẽ kutã nojarêr o ri mẽ hkôt pa. 37Tã ra à htÿx nẽ hãmri ty. Hãmri nhũm mẽ tee ri omu nẽ hkaprĩ nẽ mÿr rax nẽ. Nẽ kumÿ nẽ kuhõ hãmri nẽ kormã haxàr kêt ri kÿx pê ixkre kamã kuxi nẽ kuri mÿr o hkrĩ.

38Nhũm Simãw Pêtre kormã krí hõ pê Rit kamã ri pa. Rit rũm Jope hwÿr jawÿ jakamã nhũm Jope kamã mẽ kot Jejus kôt amnhĩ xunhwÿr xwÿnhjaja Simãw Pêtre jarênh ma hãmri nẽ hwÿr ja wa ho hamëxkrut nẽ wa kumẽ. Nhũm wa ma hwÿr tẽ nẽ hwÿr pøj nẽ omu nẽ kãm:

—Pa? E jar na pa wa awÿr tẽ. Na Jejus kôt mẽ pahtõx Tapitre ham mẽ pahpê ty. Kwa tokyx kormã mẽ kot haxàr kêt ri ma wa ixkôt hwÿr tẽn omu nã? Anẽ.

39Hãmri nhũm wa kuma nẽ ma wa hkôt htêm kurê kumrêx. Hãmri nẽ Jope hwÿr pøj nẽ mẽ hwÿr tẽ nhũm mẽ kÿx pê htyk nẽ nõr xwÿnhja wÿr ho api nhũm hwÿr axà. Nhũm kuri mẽ kêp mẽ mjên htyk xwÿnhjaja hkaprĩ nẽ mÿr o hkrĩ. Hãmri nhũm Simãw Pêtre mẽ hwÿr axà nhũm mẽ omu nẽ kãm Tapitre kormã htír ri kot tanhmã mẽ ho mex to hã harê. Nẽ mẽ ê hkwy jamÿ nẽ kãm kupê nẽ kãm:

—Ga ja pumu. Tyk xwÿnhhta na pre mẽ inhmã hkay nẽ kugõ. Na pre hte mẽ ixto mex o pa. Tã mẽ ixpê ty. Hêxta gàà nẽ. Na pa mẽ ixkaprĩ htÿx kumrêx. Anẽ.

40Hãmri nhũm mẽ kuma nẽ mẽ kator pa hãmri nẽ htyk xwÿnhhta ri hkõn krã ho nhÿ nẽ ho Tirtũm wÿ. Hãmri nẽ htyk xwÿnhhta mã kapêr nẽ kãm:

—Pa Tapitre? E kwa kãnhmã nhÿ. Anẽ.

Pu nhũm no amra nẽ Simãw Pêtre pumu nẽ kãnhmã nhÿ. 41Hãmri nhũm hpa hã kupy nẽ kãnhmã ãm nẽ kapôt ã mẽ kuhê xwÿnhjê mã anẽ nhũm mẽ akupÿm wa hwÿr agjê nhũm mẽ kãm:

—E ota. Na Tirtũm akupÿm mẽ amã ho htír. Anẽ.

Hãmri nhũm mẽ amnhĩ jaêr pê omu nẽ hkĩnh tÿx nẽ. 42Hãmri nhũm Jope kamã mẽ piitã harênh ma nẽ mẽ ohtô nẽ amnhĩ kaxyw Jejus kôt hamaxpêr nẽ hkôt amnhĩ xunhwÿ. 43Hãmri nhũm Simãw Pêtre Jope kamã ri pa hã apkati xohtô nẽ tokyx mẽ kurũm kato nẽ ma krí hõ hwÿr mör kêt nẽ. Na pre mry kà ho mẽmoj nhípêx o pa xwÿnh pê Simãw ri pøj nẽ kuri pa hã apkati xohtô nẽ.

Konëre kot Simāw Pêtre hã karô hã harênh

Rukre 7.1-10

10 ¹Tã nhũm Ijaew kêt xwỳnh Konëre. Kêp Rômjê nhõ pôristi krãhtũm na pre. Õ pôristija pika pê Itar nhõ xwỳnh na pre mẽ nhũm Konëre kêp mẽ hkrãhtũm. Krĩ pê Sejarej kamã. ²Konëreja kot amnhĩ to mex o pa xwỳnh na pre. Kêp Ijaew kêt tã na pre hte òrkwỹ kamã hkwyjê mẽ Tĩrtũm ã hpijaãm nê kãm mex o mex ã harênh o pa. Apkati mẽ kãm amnhĩ jarê. Nê mẽ kêp amrakati xwỳnhjê mã kàxpore hkwy nhõr o pa. ³Jakamã nhũm mẽmo arĩgro hã ra myt japanh grire nhũm mẽmoj pumu. Te hpimtir kãm kot omunh pyrã nê kaxkwa kamã Tĩrtũm kapêr o wrỳk xwỳnh pumu. Nhũm hwỳr wrỳ nê tanhmã kãm kapêr to nê kãm:

—Pa Konëre? Anê.

⁴Nhũm tee ri omu nê kãm ma htỳx kumrêx. Hãmri nê kãm:

—Mo na? Anê.

Hãmri nhũm kãm:

—Nà ate amnhĩ to Tĩrtũm wỳr o apaja nhũm ra amnhĩ tã ama nhũm ja kãm mex nê. Nê ate mẽ kêp amrakati xwỳnhjê mã kàxpore hkwy nhõr o apaja nhũm ja mããnên kãm mex nê.

⁵—Jakamã e inhma. Kêr ka ma Jope hwỳr amã mẽ àpênh xwỳnh kwỳ rê kê mẽ ma hwỳr mra nê kamã mẽhõ pê Simāw Pêtre japrô nê man akupỳn awỳr o mō. ⁶Simāw kot mry kà ho mẽmoj nhĩpêx o pa xwỳnhnta nhõrkwỹ kamã na hte pa. Òrkwỹja gô mỳ ri na. E hwỳr mẽ arê kê mẽ ma hwỳr mō nê haprô nê man awỳr o mō kê amã mẽmoj mex jarê ka ama. Anê.

⁷Nhũm pre ã Tĩrtũm kapêr o wrỳk xwỳnhja Konëre mã kapêr anê hãmri nê kato nê ma akupỳm api. Hãmri nhũm kot mar xà hkôt jajê rê nê Simāw Pêtre hwỳr mẽ kurê. Kãm àpênh xwỳnhjê ho hamêxkrut nê kaxyw ò pôristi hõ. Pôristija na pre hte Konëre pyrã nê Tĩrtũm ã hpijaãm o pa. ⁸Jakamã nhũm mẽ kurê nê mẽ kãm kapêr hãmri nê ma Jope hwỳr Simāw Pêtre hwỳr mẽ kurê nhũm mẽ kato nê ma hwỳr mō. ⁹Hãmri nhũm apkati nhũm kaxkwa nhĩpôk ri myt nhỹ nhũm mẽ hwỳr hpôx o mō.

Simāw Pêtre tanhmã hpimtir to hã harênh

Atre 11.5; Garatas 2.11-21

Rôm nhũm Simāw Pêtre kot Tĩrtũm mã amnhĩ jarênh kaxyw ixkre nhĩmôk ã api nê himôk po hã kãm amnhĩ jarênh o nhỹ. ¹⁰Hãmri nê ra kãm prãm nê nom nhũm mẽ kormã kãm ò hã àpênh jakamã nhũm arĩ ixkre nhĩmôk ã Tĩrtũm mã amnhĩ jarê.

Hãmri nê Konëre pyrã nê te hpimtir kãm kot mẽmoj pumunh pyrã nê mẽmoj pumu nhũm Tĩrtũm Konëre hkukamã tanhmã kãm mẽmoj to



Atre 10.10-16

amnhĩrit to. No ãm hã kuxi nẽ kãm harẽnh jakamã nhũm Simãw Pêtre te hpimtir kãm kot mẽmoj pumunh pyrã nẽ mẽmoj pumu. 11Nhũm kaxkwa katêr nhũm kurũm mẽmoj te kot mẽ hpiro xã pyrãk xwỳnhja pyka hwỳr wrỳk o mỗ. Nẽ hatur xã piitã axpẽn tã akuprõ nẽ ajêt nẽ wrỳk o mỗ nhũm omu. 12Mẽ hpiro xãta kamã mẽmo mry piitã hikwỹ. Mẽmo mry hpar o ri pa xwỳnhjaja nẽ htu mỳr pê ri pa xwỳnhjaja nẽ mẽmo àk kỳx pê htor o ri mrar xwỳnh piitã mẽ hpiro xãja kamã hikwỹ nhũm omu. 13Hãmri nhũm Tĩrtũm kãm:

—Pa Simãw Pêtre? Mãn ka ra amã prãm nẽ nà? E kànhmã xa nẽ axàmnhĩx mãmri mryta õ kapi nẽ apĩ nẽ ho anẽ nẽ aku. Piitã mẽ ate hkur mã mex. Anẽ.

14Hãmri nhũm tee ri kuma nẽ kãm:

—Kwa nà Pahi Maati. Mẽ ixpê Ijaew mẽ ixte mry piitã hkur kêt. ãm hkwy pix na pa htem kuku. No mry jaja aa mẽ ixte hõ hkwy hkrêr kêt. Anẽ.

15Hãmri nhũm Tĩrtũm kãm:

—Nà kot anhỹr tã kot paj pam amã mẽmoj jarẽ ka kamã anhõkre kahak kêt nẽ. Mãmri amnhĩm hõ kapi nẽ apĩ nẽ ho anẽ nẽ axàmnhĩx hkwy hkre. Anẽ.

16Nhũm pre ã kãm mry hã karõ anhỹr o axkrunẽpxi. Simãw Pêtre kot mãmri Ijaew kêt xwỳnhjê hkõt pa nẽ àmnhĩx ri mẽ kutã apkur nhũm Tĩrtũm kãm ja mex nhũm kot hã amnhĩ pumunh kaxyw nhũm ã kãm harẽnh anhỹr o axkrunẽpxi. Hãmri nhũm mẽ hpiro xãja ma akupỹm kaxkwa hwỳr àpir o mỗ nẽ akunok. 17Hãmri nhũm Pêtre te hkrãkator pyrãk jao tee ri hpimtir kukamã hamaxpêr o nhỹ nẽ hamaxpêr o:

—Kwa mo kaxyw na Tirtũm ã inhmã ja hã karõ anê? Anê.

Rõm nhũm Konêre kot hwÿr mẽ rênh xwÿnhjaja ra hwÿr hpõx o mõ. Ijaew kêt xwÿnhtaja Simãw nhõrkwÿ hã mẽ hkukjêr o mõ nê hwÿr pøj nê hakwakrem kuhê. 18Hãmri nê õrkwÿ nhõ xwÿnhjê mã kãm:

—Pa na ka mẽ arĩ akrĩ? E Simãw Pêtre hwÿr na pa mẽ mõ. Xà jar na hte pa nà? Anê.

Hãmri nhũm mẽ kãm: —Tỳ. Omũj kÿx pê ixkre nhĩmõk ã na nhÿ. Anê.

19Nhũm Simãw Pêtre arĩ kot mẽmoj pumunhta kukamã hamaxpêr o nhÿ nhũm Tirtũm Karõ kãm mẽ hpõx xwÿnhjê jarê nê kãm:

—E Simãw Pêtre. Ota Ijaew kêt xwÿnhjaja axkrunêpxi nê ajapêr o mõ nê ra anhõrkwÿ hwÿr pøj. 20Mẽ hwÿr wrÿ nê mẽ kot amã mẽmoj jarênh ma nê mãmrĩ axãmnhix ma mẽ hkõt mõ. Tanhmã ajamaxpêr to hkêt nê. Pa na pa awÿr mẽ kumê nhũm mẽ mõ. Anê.

21Hãmri nhũm kuma nê mẽ hwÿr wrÿ nê mẽ omu nê mẽ kãm:

—Pa? Xà pa na ka mẽ ijapêr o mõ? E ot pa xa. Kam nê mẽ inhmã mẽmoj jarê pa mẽ ama. Mẽmo kaxyw na ka mẽ ixwÿr mõ? Anê.

22Hãmri nhũm mẽ kãm:

—Nà mẽ inhõ patrãw Konêre na awÿr mẽ inhmẽ pa mẽ mõ. Na hte tãm amnhĩ nhĩpêx o pa. Nê Tirtũm ã hpijaam nê kãm mex o mex ã harênh o pa. Nhũm mẽ inhõ krĩ kamã Ijaew kãm hkĩnh nê. Tã na Tirtũm kapêr o wrÿk xwÿnhja ham hwÿr wrÿ nê kãm ajarê. Kot amnhĩ wÿr atã karõ nhũm ate hwÿr amõr nê kãm axujarênh kaxyw kãm ajarênh jakamã nhũm mẽ ixte ajaprõr kaxyw awÿr mẽ inhmẽ pa mẽ man awÿr mõ. Anê.

23Hãmri nhũm mẽ kuma nê mẽ kãm:

—Tõe nà na pa mẽ ama. E mẽ agjê nê akrĩ nê jar mẽ ixri nõ kê apkati pu mẽ rĩ ma akupÿm mõ. Anê.

Hãmri nhũm mẽ kuma nê mẽ hwÿr agjê.

Tã nhũm apkati nhũm mẽ akupÿm nojarêr nhũm Simãw Pêtre ma mẽ hkõt mõ. Nhũm Jope kamã mẽ kot Jesus kõt amnhĩ xunhwÿr xwÿnh kwÿjjaja ma mẽ hkõt mõ. Nhũm mẽ mõr o kamàt.

24Hãmri nhũm apkati nhũm mẽ Sejarej wÿr hpõx o mõ. Nhũm ra Konêre mẽ kutêp amnhĩ wÿr hkwyjê ho akuprõ nhũm mẽ Simãw Pêtre kutêp õrkwÿ kamã akuprõ nê hkrĩ. 25Hãmri nhũm mẽ hwÿr pøj nê mẽ hwÿr àr kaxyw nhũm Konêre amnhĩ wÿr omu nê kànhmã xa nê kutã tẽ nê hpar pê hkõnkrã ho tẽm nê nhÿ. 26Hãmri nhũm tee ri ja hã omu nê pa hã kupy nê kànhmã ãm nê kãm:

—Kwa kànhmã xa. Ixpê Tirtũm kêt tã ka ri ã inhĩpêx anê. Anê.

27Hãmri nê hkõt õrkwÿ hwÿr axà nê kutêp mẽ pikuprõnh xwÿnhjê pumu nê mẽ kãm:

28—Pa na ka mẽ arĩ akrĩ? E mãn ra mẽ ate mẽ ixpê Ijaew kot amnhĩ nhĩpêx ã mẽ ixpumunh mex. Na pa htem mẽ apê axtem nhõ xwÿnhjê

hkôt ri ixpa hkêt nê. Nê mẽ anhörkwỹ hwỳr inhgjêx kêt nê. Tã ham Tĩrtũm inhmã mẽ ixte ã amnhĩ nhĩpêx anhỹr o ixpaja nê ixkurê nê inhmã: “Kot paj pam mẽ hkwyjaja mex ã mẽ harê ka mẽ kamã anhökre kahak kêt nê.”

29—Anhỹr jakamã ka xep pre ixtã karõ pa inhĩtõt kêt nê man mẽ awỳr inhmõr kurê kumrêx. E mẽ inhmã mẽmoj jarê pa mẽ ama. Mẽmo kaxyw na ka mẽ ixtã karõ? Anê.

30Hãmri nhũm Konêre kãm:

—Nà jãã na pa pre jar inhörkwỹ kamã Tĩrtũm mã amnhĩ jarênh o nhỹ. Ra myt xàpanh grire pa kãm amnhĩ jarê. Hãmri nhũm Tĩrtũm kapêr o wrỳk xwỳnh ixwỳr wrỳ nê hirã rax kãm xa. 31Hãmri nê inhmã: “Pa Konêre? E na hte Tĩrtũm ate kãm amnhĩ jarênhhta mar o hkrĩ. Nê ate mẽ kêp amrakati xwỳnhjê ho mex o apaja nhũm hã apumu.

32Jakamã e ma Jope hwỳr amã mẽ àpênh xwỳnh kwỳ rê kê mẽ ma hwỳr mỗ nê kamã Simãw Pêtre japrô nê man akupỹn awỳr o mỗ. Mry kà ho mẽmoj nhĩpêx o pa xwỳnh Simãw nhörkwỹ kamã na hte pa. Örkwyja gô mỳ ri na.” Anê.

33—Á kot inhmã kapêr anhỹr jakamã na pa kuma hãmri nê awỳr jajê rênh kurê kumrêx. Tã ka mẽ hkôt man mẽ ixwỳr mỗ nê ã apôx anê. Âm hãmri na ka mẽ hkôt mỗ. Mẽ apê Ijaew kot amnhĩ nhĩpêx kuhpa hã amnhĩ nhĩpêx nê axàmnhix man mẽ ixwỳr mỗ. Tã ot pa mẽ Tĩrtũm noo mã ixkrĩ. Kam nê mãmri ỹ hã mẽ inhmã mẽmoj jarê pa mẽ ama. Anê.

Simãw Pêtre kot Konêre mã ujarênh

34Hãmri nhũm Simãw Pêtre Konêre kot kãm amnhĩ jarênhja ma nê mẽ kãm awjarê nê mẽ kãm:

—Nà âm hãmri na Tĩrtũm mẽ akukamã tanhmã inhmã kapêr to. Xep kãm mẽ ixpê Ijaew pix japê hkêt. Kãm mẽ pahpiitã mẽ pajapê nê mẽ panhĩpêx o axpên pyræk. 35Koja ahpỹnhã pyka piitã hkôt mễhõ mẽ ixpyrà nê kêp Ijaew kêt tãã hkôt amnhĩ xãm nê hã hpijaàm pê kãm mex o mex ã harê nê tãm amnhĩ nhĩpêx. Hãmri nhũm Tĩrtũm ja hã omu nhũm ja kãm mex nê.

36—Na pre ra mẽ ixpê Ijaew mã tanhmã Kra Jejus Kris jarênh to. Jejus kot mẽ panê htyk kukwak ri na hte mẽ ixte hkôt amnhĩ xunhwỳr xwỳnhjê ho hkra. Tã ra mããnên ã mẽ apê Ijaew kêt xwỳnhjê mã ã amnhĩ jarênh anê nê Jejus htyk kukwak ri mẽ ate mẽ ixpyrà nê hkôt amnhĩ xunhwỳr xwỳnhjê ho hkra. Jakamã Jejus Krisja kêp mẽ pahpiitã mẽ panhõ Pahihti.

37-38—Mãn ka prem ra harênh ma. Mẽ ixpê Ijaew nhõ pika pê Jutej kumrêx kãm na pre Juãw Paxisja Jejus kukamã mẽ kãm harê nê mẽ hkrã kumrãr o pa. Mẽ piitã mẽ kot amnhĩ tomnuj kaga nê Tĩrtũm kôt amnhĩ xunhwỳr ã mẽ omunh xà hkôt mẽ hkrã kumrã. Jejusja krĩ pê Najare

kamã na pre hprêk. Tã hwÿr na pre Tirtũm amnhĩ Karõ mẽ nhũm wrÿ nẽ hkarõ mã axà nẽ hkõt pa ho pa. Jakamã nhũm àhpumunh o àhpumunh nẽ ma krĩ piitã hkõt tanhmã mẽ ho mex to ho ri mẽ hkõt pa. Pika pê Garirej kumrêx kamã mẽ piitã ri mẽ kãm Tirtũm kapêr jarênh o pa. Nẽ mẽkarõmnuti kot Satanasti nhÿ hã tanhmã mẽ ho xwÿnhjaja nhũm mẽ nẽ mẽkarõmnuti japôx o pa. ã na pre Tirtũm nhÿ hã amnhĩ nhĩpêx anhÿr o pa.

39—Tã Jejus nhÿ hã hkrajê jahkre ho mẽ ixpa xwÿnhjaja na pa prem kot ri tanhmã amnhĩ to ho pa hã omunh par o ri hkõt ixpa. Mẽ ixpê Ijaew nhõ pyka kamã nẽ mẽ inhõ krĩ pê Jerujarê kamã kot ri tanhmã amnhĩ nhĩpêx to ho paja pa prem piitã omunh o hkõt ri ixpa. Tã nhũm prem axtem nẽ mẽ ixpê pĩ kahpa hã kunhõ nẽ kupĩ. 40Hãmri nhũm htyk o apkati axkrunêpxi nhũm Tirtũm akupÿm ho htĩr nẽ akupÿm mẽ ixwÿr kumẽ pa prem akupÿm htĩr kãm omu. 41No nhũm mẽ piitã akupÿm htĩr kãm omunh kêt nẽ. ãm mẽ ixwÿr pix na pre kato nẽ mẽ ixkutã apku pa mẽ papxipixjaja akupÿm htĩr ã omu. Hãmri nhũm Tirtũm mẽ ixte ma mẽ piitã mẽ kãm akupÿm htĩr ã harênh o ri ixpa kaxyw mẽ ixrê. 42-43Amnepêem Tirtũm nhÿ hã kapêr jarênh o mẽ pa xwÿnhjaja na prem Jejus kukamã tanhmã hã kagà hto nẽ mẽ kãm harênh o pa. Nẽ mẽ kãm:

Koja nhÿrmã mẽhõja man mẽ pahwÿr wrÿ nẽ mẽ panê tanhmã amnhĩ nhĩpêx to. Ka mẽ atõ amnhĩ kaxyw hkõt ajamaxpêr nẽ hkõt amnhĩ xãm hã koja Tirtũm ja hã apumu nẽ mẽhõ kot tanhmã mẽ panê amnhĩ nhĩpêx to xwÿnhnta kukwak ri amnhĩ katut kõt ate amnhĩ tomnuj rênh pa nẽ axte kãm hamaxpêr kêt nẽ. Anẽ.

Na pre Tirtũm nhÿ hã kapêr jarênh o mẽ pa xwÿnhjaja Jejus kukamã ã harênh nẽ hã kagà anẽ. Tã koja Jejus nhÿrmã akupÿn wrÿ hãmri nẽ mẽ htyk xwÿnhjê nẽ arĩ mẽ htĩr xwÿnhjê mẽ pahto pimràatã tanhmã mẽ pajarênh to. Mẽ pahte tanhmã amnhĩ nhĩpêx to ho papa hã mẽ pahpumunh kõt tanhmã mẽ pajarênh to. Hãmri nẽ Tirtũm mẽ wa kuri mẽ pahĩr tũm nẽ mẽ papa ho papa mã xwÿnhjê jarê nẽ mãânên wa kuri mẽ htĩr tũm kêt xwÿnhjê jarê. Mẽ pahpiitã tanhmã mẽ pajarênh to kaxyw na pre Tirtũm mẽ pakaxyw Jejus xãm. Tã ã kot mẽ pajarênh anhÿrja kukamã na pre mẽ ixte mẽ amã tanhmã harênh to ho ixpa kaxyw mẽ awÿr mẽ ixrê. Mẽ ate kapêr mar nẽ tokyx Jejus kõt amnhĩ xunhwÿr kaxyw. Anẽ.

44Nhũm Simãw Pêtre ã mẽ kãm ujarênh anhÿr rôm nhũm Tirtũm mẽ kot mar o hkrĩ xwÿnhjê hwÿr amnhĩ Karõ rẽ nhũm mẽ hwÿr wrÿ nẽ mẽ hkarõ mã gjêx pa. 45-46Hãmri nhũm mẽ Tirtũm mã mex o mex ã harênh o hkrĩ. No ãm mẽ kapêr kãm harênh kêt nẽ. Mẽ kapêr kwÿ hõ ho kãm mex o mex ã harê. Aa mẽ kot mẽ kapêr mar kêt tã ra ho kapêr mex nẽ. Jakamã nhũm Jope rũm mẽ kot Simãw Pêtre hkõt mẽ mõi xwÿnhjaja.

Ijaew kwỳ kot ra Jejus kôt amnhĩ xunhwỳr xwỳnhjaja amnhĩ jaer pè ja hã mẽ omu nê axpẽn mã:

—Hêxta waa nê. Mẽ kệp Ijaew kêt tâ nhũm Tirtũm kot mẽ panhĩpêx pahpyrà nê mẽ hwỳr amnhĩ Karõ rẽ nhũm mẽ hwỳr wrỳ nê mẽ kãm agjê. Nà ãm hãmri na mẽ pahpyrà nê ã mẽ hipêx anê. Anê.

Hãmri nhũm Simãw Pêtre mẽ kuma nê mẽ kãm:

47—Kwa pu mẽ hkrã kumrãr kurê kumrêx. Ra Tirtũm Karõ kot mẽ pahpyrà nê mẽ hkarõ mã gjêx kênã kot kêt mêmõ mẽ nê tanhmã mẽ pahpê àmnàr to. Ra mẽ kot mẽ pahpyrà nê Jejus kôt amnhĩ xunhwỳr kênã. Anê.

48Hãmri nê Konêre mẽ hkwỳjê mã kãm:

—E kot paj mẽ ate Jejus Kris kôt amnhĩ xunhwỳr ã mẽ akrã kumrã. Anê.

Hãmri nê mẽ hkrã kumrãr pa nhũm mẽ Simãw Pêtre mã kãm:

—Kwa kormã anojarêt kêt nê. Kritpêm ri mẽ ixkôt ri apa hã atã apkati grêre nê kormã ma akupỹm mõ. Anê.

Hãmri nhũm mẽ kuma nê mẽ hkôt ri pa hã apkati grêre hãmri nê nojarêt nê ma akupỹm mõ.

Simãw Pêtre kot hkwỳjê mã Konêre jarênh

Atre 10.1-48

11 1-2Hãmri nhũm Simãw Pêtre ma akupỹm mõ. Jutej kamã krĩ pè Jerujarê wỳr ma akupỹm mõ hãmri nê pøj. Hãmri nhũm Jutej kamã Jejus nhỹ hã mẽ ahkre xwỳnh maatiê mẽ mẽ kot Jejus kôt amnhĩ xunhwỳr xwỳnhjaja Ijaew kêt xwỳnhjê jarênh ma. Konêre mẽ hkwỳ kot mẽ uràk nê Jejus kôt amnhĩ xunhwỳr ã mẽ harênh ma. Jakamã nhũm Simãw Pêtre akupỹm mẽ hwỳr pøj nhũm mẽ omu nê mẽ hã àhkukjêr kurê kumrêx. Hãmri nhũm mẽ hkwỳjaja mẽ hã kãm akir nê kãm:

3—Kwa mẽ pahpê Ijaew pyrà nê mẽ kot amnhĩ my kwrýt kà jakàr kêt tâ ka mêmõ hwỳr mẽ hwỳr mõ mẽ kuri pøj nê mẽ kutã apku. Anê.

4Hãmri nhũm Pêtre tee ri mẽ kuma hãmri nê hprĩ hã mẽ kãm amnhĩ jarê. Nê tanhmã Tirtũm kot kãm Ijaew kêt xwỳnhjê jarênh to hã mẽ kãm harê nê mẽ kãm:

5—Kwa mẽ ã ri ajamaxpêr anhỹr kêt nê. E pa mẽ amã amnhĩ jarê ka mẽ inhma mãn. Nà na pa pre jãã Jope kamã Tirtũm mã amnhĩ jarênh o nhỹ nê te ixpimtir kãm mêmõj pumunh pyràk. Nhũm mêmõjja te mẽ hpiro xà pyrà nê kaxkwa rũm ixwỳr wrỳk o mõ pa ixprĩ hã omu.

6Nhũm kamã mry piitãã. Mry xoprê nê mry xuwapô nê mry hpar o ri pa xwỳnhjaja nê mry htu mỳr pè ri pa xwỳnhjaja nê àk. Nê mẽ pahte hkur xwỳnhjaja nê mẽ pahte hkur kêt xwỳnhjaja. 7Kamã mry piitã pa omu. Hãmri nhũm Tirtũm inhmã: “Pa Simãw Pêtre? Mãn ka ra amã

prãm nê nà? E kànhmã xa nê axàmnhĩx mãmri mryta õ kapi nê apĩ nê ho anê nê aku. Piitã mē ate hkur mã mex.” Anê.

8—Pa tee ri kuma nê kãm: “Kwa Pahi Maati. Mē ixpê Ijaewjaja mē ixte mryja piitã hkur kêt. ãm hkwỳ hpix na pa htem kuku. No ja hkwỳ aa mē ixte hõ hkwỳ hkrêr kêt.” Anê. 9Nhũm inhmã: “Nà nom kot anhỹr tãã. Kot paj pam amã mēmoj jarê ka kamã anhõkre kahak kêt nê. Jakamã e mãmri amnhĩm hõ kapi nê apĩ nê ho anê nê axàmnhĩx hkwỳ hkrê.” Anê.

10—Na pre ã Ijaew kêt xwỳnhjê hwỳr inhmõr kukamã inhmã karõ ho axkrunêpxi anê. Nom hã kuxi nê inhmã mē pahte mry kur kêeta jarê. Hãmri nhũm mē hpiro xàja ma akupỹm kaxkwa hwỳr api nê kakrãm axà nê akunok. 11Hãmri nhũm Ijaew kêt xwỳnhjaja mē ixwỳr axkrunêpxi nê mra nê pøj. Konêreja Sejarej rùm ixwỳr mē rênh xwỳnhjaja nhũm mē mra nê ixwỳr pøj. 12Hãmri nhũm Tirtũm Karõ ma mē hkõt inhmê. Mē kêp Ijaew kêt tã nhũm ixàmnhĩx ma mē hkõt ixpa kaxyw mē hkõt inhmê pa ma mē hkõt mõ. Nhũm Jope kamã mē kot Jejus kõt amnhĩ xunhwỳr xwỳnh kwỳjaja kêp 6ja ma mē ixkõt mõ. Pa mē mõ nê Sejarej kamã Konêreja wỳr pøj. 13Hãmri nhũm mē ixpumu nê mē inhmã amnhĩ jarê. Tirtũm kapêr o wrỳk xwỳnh kot hwỳr wrỳk nê õrkwỳ hwỳr àr nê tanhmã kãm kapêr toja nhũm inhmã harê. Na xep pre kãm: “E kêr ka ma Jope hwỳr amã mē àpênh xwỳnh kwỳjê rê kê mē ma hwỳr mõ. Hãmri nê kamã Simãw Pêtre japrõ nê man akupỹn awỳr o mõ kê tanhmã mē amã ujarênh to. 14Koja mē amã tanhmã mē apê Tirtũm kra hprãm xàj tanhmã mē ate amnhĩ nhĩpêx to hã mē amã karõ ka mē ama nê mar tỳx nê hkõt amnhĩ nhĩpêx. Ka mē anhõrkwỳ kamã akwỳjê mē apimràatã ama nê mar tỳx nê. Hãmri nê kot mē amã hã karõ xà hkõt amnhĩ nhĩpêx nhũm Jejus mē ate amnhĩ tomnuj pê mē apytãr pa.” Anê.

—Na xep pre ã Tirtũm kapêr o wrỳk xwỳnhja kãm ijarênh anê. Jakamã nhũm ixwỳr jajê rê pa ma mē hkõt mõ. 15Hãmri nê kormã mē kãm tanhmã Jejus jarênh to. Tanhmã kot mē panê amnhĩ nhĩpêx to hã harê. Nê kormã mē kãm ixujarênh o ixãm rôm nhũm Tirtũm Karõ te wam kot mē panhĩpêxta pyrã nê mē hwỳr wrỳ nê mē hkarõ mã gjêx pa. 16Pa ja hã mē omu nê Pahihti Jejus kot akupỹm kaxkwa hwỳr nojarêr nê tanhmã mē pamã kapêr tota mã ijamaxpêr kurê kumrêx. Na pre mē pamã: “Finat Juãw Paxis na pre hte gõ ho mē hkrã kumrãr o pa. Tã koja Tirtũm ta hpãnhã mē awỳr amnhĩ Karõ rê nhũm mē akarõ mã agjê.” Anê.

—ã na pre Pahihti Jejus akupỹm nojarêr nê mē pamã kapêr anê. Jakamã pa ã kot mē hipêx anhỹr ã mē omu nê ã kapêr anhỹrja mã ijamaxpêr kurê kumrêx. 17Na pu prem Pahihti Jejus Kris kõt amnhĩ xunhwỳ nhũm Tirtũm ja hã mē pahpumu nê mē pahwỳr amnhĩ Karõ rê. Tã te kot mē panhĩpêxta pyrã nê mããnên Ijaew kêt xwỳnhhtajê hwỳr kurê

nhũm mẽ hkarō mā agjê. Mẽ kêp Ijaew kêt tâ nhũm mẽ pahpyrà nẽ mẽ hwỳr kurê nhũm mẽ hkarō mā agjê. Tirtũm tãm kot amnhĩ krã hkôt mẽ hwỳr rênh kênã kot pa kêt mẽ nê tanhmã kêp ixàmnàr to. Anẽ.

18Nhũm pre ã Simãw Pêtre mẽ kãm amnhĩ jarênh anẽ nhũm mẽ kuma nẽ tãm hamaxpêr nẽ hkĩnh nẽ. Nẽ axte mẽ hã tanhmã kãm nẽ hkêt nẽ. ãm mẽ hã Tirtũm mã mex o mex ã harẽ. Hãmri nẽ axpên mã:

—Nà ãm hãmri. Mẽ kêp Ijaew kêt tâ na prem Jejus kôt amnhĩ xunhwỳ nhũm Tirtũm kot mẽ panhĩpêxta pyrà nẽ amnhĩ katut kôt mẽ kot amnhĩ tomnuj rênh pa. Nhỹrmã wa hkuri mẽ pahpyrà nẽ htĩr tũm nẽ pa ho pa kaxyw nhũm ã mẽ hipêx anẽ. Nà ãm hãmri na ã kot mẽ panhĩpêx pyrà nẽ mẽ hipêx anẽ. Anẽ.

Ãxiok kamã Jejus kwỳ jarênh

Atre 4.36-37

19Tã ra mẽ kot kên o Estewãw kapêr o hpĩr xwỳj ri mẽ kot ã hipêx anhỹrta pyrà nẽ mẽ kot Jejus kôt amnhĩ xunhwỳr xwỳnhjaja omnuj tỳx o pa. Jakamã nhũm mẽ hkwỳjaja mẽ umaj ma ahpỹnhã krĩ hkwỳ hkôt pigrãnh pa. Wẽnĩs wỳr nẽ Sipre hwỳr nẽ ãxiok hwỳr nhũm mẽ ma ahpỹnhã krĩ hkwỳ hkôt anhrã nẽ kamã pa ho pa. Nẽ mẽ kãm tanhmã Pahihti Jejus kot mẽ panê amnhĩ nhĩpêx to hã harênh o ri mẽ hkôt pa. No ãm kormã Ijaew pix mã harênh o pa.

20Tã hãmri nhũm mẽ hkwỳjaja Sipre mẽ Sirên rũm ãxiok hwỳr pan pøj. Hãmri nẽ kamã mẽ kêp Ijaew kêt xwỳnhjê mã Pahihti Jejus kot amnhĩ nhĩpêx jarênh o pa. ã mẽ kot amnhĩ nhĩpêx anhỹr jakamã na mẽ ra ahpỹnhã ri mẽ kãm harênh o ri pa. Ijaew mã nẽ mããnên Ijaew kêt xwỳnhjê mã 21nhũm mẽ ma mẽ hkôt ri Pahihti Jejus nhỹ hã mẽ kãm kapêr jarênh o ri mẽ hkôt pa. Hãmri nhũm mẽ ohtô nẽ amnhĩ nhĩpêx tũm kaga hpa nẽ hpãnhã amnhĩ kaxyw Jejus kôt hamaxpêr nẽ hkôt amnhĩ xunhwỳ.

22Hãmri nhũm Jerujarê kamã Jejus kwỳjaja mẽ harênh ma nẽ mẽ hwỳr Panãpe mẽ. ãxiok hwỳr mẽ hwỳr kumẽ. Ma mẽ hwỳr môr nẽ Jejus kôt mẽ hamaxpêr o hihtỳx kaxyw. 23Hãmri nhũm ma mẽ hwỳr mō nẽ mẽ hwỳr pøj nẽ mẽ omu. Tirtũm kot mẽ ho mex ã mẽ omu hãmri nẽ mẽ ỹ hã hkĩnh nẽ. Nẽ mẽ kãm:

—Nà ãm hãmri na ka mẽ ra Jejus kôt amnhĩ xunhwỳ nẽ hkôt amnhĩ nhĩpêx mex o ri apa. Tã kêr ka mẽ ãm kapêr kôt pix mã ri amnhĩ nhĩpêx rãhã ho ri apa nẽ aa hkaga hkêt nẽ. Anẽ.

24Panãpeja na pre tãm amnhĩ nhĩpêx o pa. Nẽ amnhĩ kaxyw Jejus kôt pix mã hamaxpêr mex o pa. Nẽ Tirtũm Karō hkôt amnhĩ nhĩpêx rãhã jakamã na pre hte ỹ hã mẽ kãm Pahihti Jejus kot mẽ panê tanhmã amnhĩ nhĩpêx to hã harênh o ri mẽ hkôt pa. Hãmri nhũm mẽ kuma nẽ ohtô nẽ Jejus kôt amnhĩ xunhwỳ.

25Tã nhũm Panãpe Āxiok rūm kato nē kot Sawti japrôr kaxyw ma krĩ pê Tas hwÿr mō. 26Hãmri nē hwÿr pōj nē Sawti pumu nē haprô nē ma akupÿm amnhĩ kôt Āxiok hwÿr o mō. Hãmri nē kamã mē kot Jejus kôt amnhĩ xunhwÿr xwÿnhjê hkôt wa ri pa hã amgrà pyxi nē hapêx. Nē mē ho ohtô nē ri mē kãm Jejus kapêr o mē ahkre ho ri mē hkôt pa. Jakamã nhũm krĩ nhõ xwÿnhjaja mē kot Jejus kôt amnhĩ nhĩpêx xwÿnhjê pumu nē mē hã mē hixi rē nē mē harēnh o: “Kris tō nē htōxjaja” anhÿr o mē harē. Āxiok kumrêx kãm na prem ã mē kot Jejus kôt amnhĩ xunhwÿr xwÿnhjê jarēnh anē. Jakamã nhũm mē piitã ã mē harēnh anhÿr o pa.

27Tã nhũm Panãpe mē Sawti wa kormã Āxiok kamã paja rôm nhũm Tirtũm nhÿ hã kapêr jarēnh xwÿnh kwÿjaja mē hwÿr mran pōj. Jerujarē rūm mē hwÿr mran pōj. 28Hãmri nhũm mē piitã mē kot mē kapêr mar kaxyw mē hwÿr akuprô. Jakamã nhũm hõ pê Akapôja kànhmã xa nē tanhmã mē kãm ujarēnh to. Tirtũm Karô nhÿ hã mēmoj kukamã mē kãm awjarē nē mē kãm:

—Kwa okora kêr ka mē axkãm ajamak rom. Kojã tokyx pika piitã hkôt mē apkur xà hã mēõja mē kêp hkryre nē mē piitã mē hipêx kêt nē. Anē.

Tã nhũm gaa nē ujarēnh xaja kôt mēmoj ã amnhĩ nhĩpêx anē. Kormã Pahiiti Krawti kot mē ho amnhĩptâr ri nhũm mēmoj ã amnhĩ nhĩpêx anē. No nhũm kormã ã amnhĩ nhĩpêx anhÿr kêt ri nhũm Akapôja kukamã ã mē kãm ujarēnh anē. 29Hãmri nhũm mē kuma nē tee ri Jutej kamã Jejus kôt mē hkwÿjê hkukamã hamaxpêr nē axpên mã:

—E kwa pu mē Jutej kamã Jejus kôt mē pahtô nē pahtōxjê mã pahkàxpore hkwÿ gō kê mē ho amnhĩm awjaprô nē hkur o pa. Anē.

Hãmri nē mē kaxyw kàxpore hkwÿ ho akuprô. Nhũm mē hikàxpore hkryre xwÿnhjaja ãm mē kãm ho hkryre nē kugõ nhũm mē hikàxpore rũnh xwÿnhja mē kãm ho rũnh nē kugõ. 30Jakamã nhũm mē ho hpikuprõnh pa nē Panãpe mē Sawti wa kot mē hwÿr o mōr nē mē kãm òr kaxyw wa kãm kugõ. Hãmri nhũm wa hamÿ nē ma Jutej kamã Jerujarē hwÿr mē hwÿr o mō. Hãmri nē hwÿr pōj nē mē kot Jejus kapêr o mē ahkre xwÿnhjê mã kugõ. Hãmri nhũm mē kãm Jejus kôt mē htô nē htōxjê mã o anhrà nhũm mē hamÿ nē hkĩnh nē ho amnhĩm awjaprô.

Mē kot Simãw Pêtre pynênh nē haxàr ã mē harēnh

Matêwre 18.19-20

12 1Tã nhũm mē ò pahi Eroxa ò pôristi mã Kris kwÿjê hã amÿnê nhũm mē mē hipêx kati nē nhũm mē amnhĩ xà htÿx kamã hamak o pa. 2Juãw tō Xiakreja nhũm mē pahi Erox nhÿ hã unê nē hkanhwÿr o kupĩ. 3Hãmri nhũm Ijaew kãm ja mex jakamã nhũm pahi Erox hpãnhã mē kãm Simãw Pêtre hã amÿnê nhũm unê nē haxà. Mē kot pãwti kaxkrit kêt kur ã mē hkĩnh xà hã arĩgro pê Pasja ã nhũm prem unê. 4Na pre Erox Simãw Pêtre hkukamã hamaxpêr o:

— Nà koja mẽ hkĩnh hapêx pa Ijaew nom kupĩ nhũm rĩ amnhĩ pumu. Anẽ.

Hãmri nhũm pôristi kot Simãw Pêtre jamãr xwỳnhjaja kêp 16. Nhũm mẽ axpẽn pãnhã kêp 4 kapẽn nẽ hamãr rãhã ho kuhê. 5Nhũm arĩ mẽ hagjênh xà kamã hkrĩ ho hkrĩ. Hãmri nhũm Kris kôt htõ nẽ htõxjaja harênh ma nẽ tee ri hkukamã hamaxpêr hãmri nẽ axpẽn wỳr akuprõ nẽ ho Tĩrtũm wỳr rãhã ho hkrĩ.

Tĩrtũm kapêr o wryk xwỳnh kot Simãw Pêtre kator ã harênh

6Tã nhũm ra mẽ hkĩnh hapêx nhũm kamàt. Hãmri nhũm pahi Erox kot tanhmã Simãw Pêtre ho xà hã arĩgroja wỳr nhũm kamàt nhũm pôristijaja arĩ mẽ hagjênh xà kamã hamãr mex o kuhê. Nhũm kuri wa hamêxkrut nẽ akutã hijê nẽ hamãr o nõ. Kàx o akutã kãm ê nẽ wa ho nõ nhũm wa hkaêx kãm htỳx gôr nẽ nõ. Nhũm ja wa hakwa krem mãânên hamãr o xa. 7Puh nhũm Tĩrtũm kapêr o wryk xwỳnhjê hõja mẽ hwỳr axà nẽ wryhtak rax kãm xa. Hãmri nẽ Simãw Pêtre grêk nẽ kumra nẽ kãm:

— Pa Simãw Pêtre? E kwa tokyj kànhmã xa pu mõ. Anẽ.

Hãmri nhũm hkrãkato nẽ omu nẽ kànhmã ãm kurê kumrêx nhũm kaxprexã hã kàxja axrê nẽ pykap rôrôk nẽ hikwỹ. No nhũm kuri pôristi wa nõr xwỳnhhta wa mar kêt nẽ. Wa arĩ ôt tỳx nẽ nõ. 8Hãmri nhũm Tĩrtũm kapêr o wryk xwỳnhjaja Simãw Pêtre mã:

— E tokyx anhõ kamĩs jaxà nẽ amnẽ ixkôt tẽ pu pakato nẽ ma tẽ. Anẽ.

9Hãmri nhũm kamĩs nẽ hparkà jaxà nẽ ma hkôt tẽ. No ãm kormã amnhĩ pumunh mex kêt nẽ. Te hpimtir kãm ã kot amnhĩ nhĩpêx anhỹr pyrãk ã amnhĩ kamnhĩx. 10Hãmri nhũm wa hakwakrem pôristi wa kot hamãr o wa ãm xwỳnhjaja hãnh wa tẽ nẽ wa hakre nẽ hpãnhã ihõja wa hãnh wa tẽ no nhũm mẽ ôt tỳx nẽ hkrĩ nẽ wa omunh kêt nẽ. Nhũm wa



Atre 12.1-11

hakwakre nhĩtep xà hkôt wa tẽn kato nẽ hpãnhã krĩ nẽ kahê xà hã hakwakreja wỳr wa tẽ. Hãmri nhũm tãm wa kãm amnhĩ kahê xà mẽ nhũm wa kato nẽ pry hã tẽ. Ja kôt nhũm Tĩrtũm kapẽr o wrỳk xwỳnhja akunok nhũm Simãw Pẽtre axte omunh kêt nẽ. 11Hãmri nẽ hprĩ hã amnhĩ pumunh kurê kumrẽx nẽ hamaxpẽr o:

—Kwa te ixpimtir kãm ã ixte amnhĩ nhĩpêx anhỹr pyræk tã xep ixpimtir kêt. Tĩrtũm na ixwỳr kapẽr o wrỳk xwỳnhja mẽ nhũm ixwỳr wrỳ nẽ mẽ kêp ixkator. Pahi Erox ra kot ixpĩr nhũm ixkwỳ Ijaew kãm ja prãm tã nhũm mẽ kêp ixkator. Nà ãm hãmri na Tĩrtũm ã mẽ kêp ixkator anẽ. Anẽ.

12Hãmri nẽ Marir nhõrkwỹ hwỳr htẽm kurê kumrẽx. Juãw Makre katorxà Marirja nhũm õrkwỹ hwỳr tẽ nhũm mẽ ra kamã hpikuprõnh rax nẽ ho Tĩrtũm wỳr o hkrĩ nhũm tãm mẽ hwỳr tẽ. 13Hãmri nẽ kormã kapôt ã hakwa krem mẽ kãm kahê xà tatak o xa nhũm ixkre kamã mẽ kãm àpênh xwỳnh Rotreja kuma nẽ hwỳr tẽ. 14Hãmri nhũm kãm kapẽr nhũm amnhĩ jaêr pê kuma nẽ hkĩnh nẽ. Nẽ kormã kãm kahê xà mẽnh kêt ri ma akupỹm tẽ nẽ mẽ kot ho Tĩrtũm wỳr xwỳnhjê hwỳr axà nẽ mẽ kãm:

—Xê pẽr Simãw Pẽtre na tẽ nẽ kapôt ã hakwakrem xa nẽ inhmã kapẽr.

15Hãmri nhũm mẽ tee ri kuma nẽ kãm:

—Kwa arĩ mẽ hagjênh xà kamã hkrĩ kênã. Mãn ka tanhmã amnhĩ krã amnhĩ to hã na ka ri atỳx ã akapẽr anẽ. Anẽ.

Hãmri nhũm mẽ kãm:

—Ma tanhmã kot pa kêt ri ixkrã amnhĩ to? ãm hãmri na pa mẽ amã harê. Mẽ kam nẽ mra nẽ omu. Anẽ.

Nom nhũm mẽ kuma nẽ ãm kuma nẽ kãm:

—Nà tãm kêt. Kaxkwa rũm Tĩrtũm mã hamãr o pa xwỳnh mã amã kapẽr nom tãm kêt. Anẽ.

16Rôm nhũm Simãw Pẽtre arĩ hakwakre tatak o xa. Hãmri nhũm mẽ jatã hwỳr mra nẽ kãm kahê xà mẽ nẽ amnhĩ jaêr pê omu nẽ hkĩnh nẽ. 17Hãmri nhũm kãnhmã mẽ kãm ãhkra hpẽ nẽ mẽ ho hpinhkrênh pa nẽ mẽ kãm:

—Nà Tĩrtũm na ixwỳr kapẽr o wrỳk xwỳnhja mẽ nhũm ixwỳr wrỳ nẽ pôristi pê ixkator. Anẽ.

Hãmri nẽ mẽ kãm:

—E kêr ka mẽ Xiakre nẽ Jejus kôt mẽ pahtõ nẽ pahtõxjê mã ijarê kê mẽ ijarênh mar kurê kumrẽx. Nom kot paj ixkato nẽ ma krĩ hõ hwỳr mõ. Anẽ.

Hãmri nẽ mẽ kêp kato nẽ ma mõ.

18Tã nhũm apkati nhũm pôristi kot hamãr o hkrĩ xwỳnhjaja hkrã hapôj nẽ tee hapêr nẽ nhỹri omunh kêt nẽ. Hãmri nẽ tee ri amnhĩ kukamã hamaxpẽr o kãm ma htỳx kumrẽx nẽ axpên mã:

—Kwa tanhmã na pre we amnhĩ to nẽ mẽ pahpê akunok? Tanhmã koja we pahi Erox hã mẽ pahkukja pu mẽ harênh to? Anẽ.

19Hãmri nhũm pahi Erox hpikunor ã harênh ma nẽ axtem pôristi hkwyjê mã anẽ nhũm mẽ mra nẽ tee ri mẽ hagjênh xà kamã hapêr nom nhỹri omunh kêt nẽ. Hãmri nhũm Erox mẽ kot hamãr xwýnhjê kamã gryk týx kumrêx nẽ amnhĩ wýr mẽ hã karõ nẽ mẽ kãm:

—Kwa nok? Mẽ ate hamãr rãhã ho akuhê hã ixte mẽ amã karõ htã nhũm tanhmã amnhĩ to nẽ akunok. Nà kot paj mẽ anhĩmex ka mẽ rĩ amnhĩ pumu. Anẽ.

Hãmri nhũm mẽ tee ri kãm amnhĩ tã àprãr kaprý nhũm mẽ hã amýnê nhũm mẽ ho kator nẽ ma mẽ o mra nẽ mẽ himex. Hãmri nhũm pahi Erox Jutej rũm kato nẽ ma Sejarej wýr mõ nẽ hpãnhã kamã pa ho pa.

Pahi Erox tanhmã htyk to hã harênh

Wam Pêtre 1.24-25

20Krĩ pê Xir mẽ Sito wa kamã mẽ pa xwýnhjaja na pre htem pahi Erox nhõ pyka hwýr pa nẽ mẽ kêp amnhĩm apkur xà hã mẽõ japrõr o pa. Tã nhũm Erox kot mẽmoj mýrapê mẽ kamã gryk jakamã nhũm mẽ tee ri mẽ kêp ujaprõr kaxyw mẽ hwýr mra nom nhũm mẽ kãm mẽmoj kwý ho wênê hkêt nẽ. Hãmri nhũm mẽ tee ri amnhĩ kukamã hamaxpêr nẽ pahi Erox nhõ kôwenatô Pratôja wýr mra nẽ kãm:

—E awýr na pa mẽ mra. Kwa mẽ ixyr pê pahi Erox mã tanhmã akapêr to kê ama nẽ mẽ ixkamã gryk kêt nẽ. Pa mẽ axte mẽ awýr mra nẽ mẽ apê mẽmoj kwý japrõr o ri ixpa. Anẽ.

21Hãmri nhũm mẽ kuma nẽ hwýr tẽ nẽ mẽ yr pê tanhmã kãm kapêr to nhũm kuma hãmri nẽ kot tanhmã mẽ kãm kapêr to kaxyw mẽ kãm arĩgro hta.

Tã nhũm ra kot arĩgro hyr xwýnhhta kato nhũm Erox kêp pahi hã ê mex jaxà nẽ tẽ nẽ kêp pahi hã mẽ hkrĩ xà kamã nhỹ nẽ tanhmã mẽ kãm kapêr to. 22Mẽ kãm kapêr ryy nẽ. Hãmri nhũm mẽ kuma nẽ hêx rom kãm mex o mex ã harê. Nẽ kýt pêpê axpên mã harê nẽ harênh o:

—Kwa pahi Erox kêp mẽ panhĩõ hkêt. Pêr kaxkwa rũm Mëpahpãm na pre mẽ pahwýr wrý nẽ ã mẽ pamã kapêr mex anẽ. Anẽ.

Hãmri nẽ te kêp Tĩrtũm pyrãk o hipêx nẽ kãm mex o mex ã harê. Nom hêx rom ã harênh anẽ. Kot mẽ mar nẽ kãm mẽ hkĩnh nẽ akupým mẽ kãm mẽmoj to wênê hprãm xaj nhũm mẽ hêx rom ã axpên mã mex ã harênh anẽ. 23Hãmri nhũm mẽ kuma nhũm ja kãm mex nẽ nhũm hkĩnh nẽ mẽ mar o nhỹ nẽ kêp Tĩrtũm pyrãk ã harênhja nẽ tanhmã mẽ kãm nẽ hkêt nẽ. Jakamã nhũm tee ri amnhĩ tã omu nẽ hwýr kapêr o wrýk xwýnhjê hõ mẽ nhũm hwýr wrý nẽ tanhmã ho nhũm õhy kamã kutõj rax nẽ htyk tokyx anẽ.

Panāpe mẽ Sawti wa akupỹm Āxiok hwỳr mōr ã wa harēnh

Atre 11.27-30

24Tã nhũm mẽ ra ohtô nẽ Tĩrtũm Kra Jejus kot tanhmã mẽ panê amnhĩ nhĩpêx to hã harēnh ma nẽ hkôt amnhĩ xunhwỳ.

25Hãmri nhũm Panāpe mẽ Sawti wa ra Kris kôt htõ nẽ htõxjê mã kàxporeta jamỳ nẽ ma Jerujarē hwỳr o mō nẽ mẽ kãm kugō. Hãmri nẽ ma akupỹm Āxiok hwỳr nojarêr nẽ war amnhĩ kôt Juãw Makre o mō. Hãmri nẽ mẽ ma mō nẽ akupỹm mẽ hwỳr pøj.

Tĩrtũm kot Panāpe mẽ Sawti wa hyr

Atre 9.15-16; Rômãn 1.1

13 1Āxiok kamã Kris kôt mẽ kot axpẽn to htõjaja kot Tĩrtũm nhỹ hã kapêr o mẽ ahkre ho pa xwỳnhjê nhĩxi ã kot anhỹr. Na pre Panāpe nẽ Sawti nẽ Simeãw kà htykre nẽ Rusti pê Sirẽn nhõ xwỳnh nẽ pahi Erox kràmnhwỳ Mãnahēja. 2Jakamã nhũm prem mẽmo arĩgro hã axpẽn wỳr akuprõ nẽ Tĩrtũm mã mex o mex ã harēnh kaxyw apkur kêt rãhã kãm amnhĩ jarēnh o hkrĩ. Hãmri nhũm Tĩrtũm Karõ mẽ kãm tanhmã kapêr o amnhĩrĩt to nẽ mẽ kãm:

—E kêr ka mẽ Panāpe mẽ Sawti war ata nẽ wa kot inhmã tanhmã amnhĩ nhĩpêx to ho pa kaxyw wa ãm. Anẽ.

3Hãmri nhũm mẽ kuma nẽ wa hyr kurê kumrêx nẽ wa himõk ã mẽ ĩhkra jaxwỳ nẽ wa ho Tĩrtũm wỳ. Hãmri nẽ wa kot Tĩrtũm mã tanhmã amnhĩ nhĩpêx to ho pa kaxyw wa kumẽ nhũm wa ma mō.

Wajaga kot Jejus nẽ hkràmnhwỳ kurê hã harēnh

Atre 8.9-24

4-5Tã nhũm Tĩrtũm Karõ krĩ pê Serêw wỳr Panāpe mẽ Sawti wa kumẽ nhũm wa ma hwỳr mō. Nẽ amnhĩ kôt Juãw Makre ho mō. Kot tanhmã wa ho ajuta hto ho wa hkôt pa kaxyw. Hãmri nẽ wa mẽ mō nẽ Serêw wỳr pøj nẽ pàr krem axà nẽ ma gô hipòk pê Sipre hwỳr mō. Hãmri nẽ gô hipòk ã krĩ pê Saramĩn wỳr pøj nẽ Ijaew nhõ Tĩrtũm kapêr o mẽ ahkre xà hã ixkre hwỳr tẽ nẽ kamã Jejus kot mẽ panê tanhmã amnhĩ nhĩpêx to hã mẽ kãm harēnh o wa xa.

6-8Tã nhũm mẽ krĩa rùm kato nẽ hpãnhã gô hipòk kôt mō nẽ hatur xà kamã krĩ pê Papos wỳr pøj. Hãmri nẽ kamã wajaga Pajejus pumu. Gresjê kapêr kãm hixi pê Erĩm. Erĩm haxwỳja kêp Ijaew. Na pre hte hêx rom te kêp Tĩrtũm nhỹ hã kapêr jarēnh o pa xwỳnh pyræk o amnhĩ nhĩpêx nẽ ma mẽ kãm ujarēnh o ri mẽ hkôt pa. No ãm mẽ kãm amnhĩ to hêx o pa. Gô hipòkja ã pahi Sejupaw hkràmnhwỳ na pre. Pahi Sejupawja àhpumunh tỳx jakamã na pre Panāpe mẽ Sawti wa harēnh ma nẽ kãm wa kapêr mar prãm nẽ wa kot kãm Tĩrtũm kapêr jarēnh

kaxyw amnhĩ wỳr wa kuwỳ. Nom nhũm hkràmnhwỳ wajaga Erĩmja kãm wa hkĩnh kêt nê wa nê kãm kapêr kãm hihtỳx nê kãm:

— Kwa nà wa kapêr mar kêt nê. Kot kaj war ama nê wa uràk nê amnhĩ kaxyw Jejus kôt ajamaxpêr nê hkôt amnhĩ xãm. Kwarĩ wa kapêr mar kêt nê. Anê.

9Hãmri nhũm Sawti ra axtem pãnhã hixi. Ra hpãnhã kêp Pawre. Nhũm Tĩrtũm Karõ ra hkarõ mã àr jakamã nhũm ÿ hã wajagata pumu nê wa nê hkràmnhwỳ mã kapêr ã kãm akir nê kãm:

10— Tk. Kwa pêr apê Satanasti hkwy hã na ka ã wa inhnê kãm akapêr anê. Na ka hte mẽmoj punuj pix kukamã ajamaxpêr nê mẽmoj mex nê mẽ no kupyrr o apa. Tĩrtũm kapêr mex kumrêx tã ka axtem nê nê mẽ hkurê ho ri apa. 11Ã ate amnhĩ nhĩpêx anhỳrja mỳrapê koja Tĩrtũm tanhmã ato ka ano hkre nê arĩt kêt o atã apkati xohtô nê kãm ga. Anê.

Hãmri nhũm no hkre kurê kumrêx nê tee ri rĩt kaxyw no pikrar pỳnh o xa nom mẽmoj pumunh kêt nê. Hãmri nê mẽhõ kot hpa hã hpyr nê òrkwỳ hwỳr ho mõi kaxyw ri amnhĩ pu hã mẽ hapêr pênh o xa. 12Hãmri nhũm hkràmnhwỳ pahihtija tee ri ja hã omu nê amnhĩ kaxyw Jejus kôt hamaxpêr nê hkôt amnhĩ xãm kurê kumrêx. Hãmri nê Pawre mẽ Panãpe wa kot tanhmã Tĩrtũm kapêr jarênh to hã wa kuma nê hamaxpêr o:

— Hêxta waa nê. Aa ixte ã mẽhõ kapêr kot anhỳr mar kêt tã pa jarãhã kuma. Nà ãm hãmri na Jejus jarênhja. Anê.

Pawre mẽ Panãpe Āxiok õ hwỳr wa mõi ã wa harênh

Atre 15.38

13Tã nhũm Pawre mẽ Panãpe mẽ Juãw Makre wa mẽ krĩ pê Papos rũm kato nê hpãnhã ma pyka hõ hwỳr mõi. Pàr kãm ma pyka pê Pãpir wỳr mõi nê kamã krĩ pê Perke hwỳr pøj. Hãmri nhũm Juãw Makre tanhmã hamaxpêr to nê tee ri axte wa hkôt mõi kukamã hamaxpêr hãmri nê wa hkaga nê awjanã nê ma akupỳm Jerujarê hwỳr ahte mõi. 14Jakamã nhũm Pawre mẽ Panãpe wa ahte Perke rũm kato nê hamũ pika pê Pisit kãm krĩ pê Āxiok wỳr mõi nê hwỳr pøj. Nhũm Ijaew nhõ arĩgromnu pê sap kato nhũm wa Tĩrtũm kapêr o mẽ ahkre xà hã ixkre hwỳr wa tẽ nê hwỳr axà nê nhỹ. 15Hãmri nhũm mẽhõ mẽ kãm Tĩrtũm kapêr ã kagà htũm kwỳ kamã harênh o xa. Mojes mẽ Tĩrtũm nhỹ hã kapêr o mẽ pa xwỳnh kot kapêr ã kagà hkwy kamã nhũm mẽ kãm kamã harênh o xa. Hãmri nê kamã harênh pa nhũm mẽ ahkre xwỳnhjaja Pawreja wa omu nê wa hwỳr mẽhõ mẽ nhũm wa hwỳr tẽ nê wa kãm:

— E na mẽ ijahkre xwỳnhjaja war ate mẽ inhmã axujarênh prãm nê mãmri mẽ inhmã mẽmoj jarênh kaxyw nhũm mẽ war atã anê. Anê.

16Hãmri nhũm wa kuma nhũm Pawre kãnhmã xa nê mẽ hpinkrênh kaxyw mẽ kãm kãnhmã ìhkra nhũm mẽ omu nê hpinkrênh pa nhũm mẽ kãm awjarê. Amnhĩ kwỳ pê Ijaewjê mẽ mẽ kêp Ijaew kêt xwỳnhjê

kãm Tirtũm kĩnh xwỳnhjê mã nhũm mẽ kãm awjarẽ. Nẽ mẽ kãm kapẽr ryy nẽ. Tirtũm kot tanhmã mẽ hkukamã Ijaew nhĩgêť nẽ pãmjê nhĩpêx to hã mẽ kãm awjarẽ nẽ mẽ kãm:

—E kot paj mẽ amã awjarẽ ka mẽ inhma. 17Nã mẽ ixpê Ijaew nhõ Tirtũmja amnepêm na pre mẽ ixpê Ijaew pãmjê rê. Kormã Ejit kãm mẽ pa ri nhũm amnhĩ kaxyw mẽ kurê nẽ mẽ ho ohtô rax kumrêx. Hãmri nẽ mẽ kaxyw hihtỳx jakamã Ejit rũm mẽ kator pa. 18Hãmri nẽ mẽ ho mex ryy ho mẽ hkôt pa. Mẽ kot kapôt ã ri pa hã amgrã pê 40 kamã mẽ kot htỳx ri tanhmã amnhĩ nhĩpêx to ho pa htã nhũm mẽ kamã ukapřĩ ryy ho mẽ hkôt pa. 19-20Na pre mẽ kãm pyka pê Kanaã kamã mẽ pa xwỳnhjê nhĩmex pa. Kanaã kamã mẽ pa xwỳnhjaja ahpỳnhã axpẽn kaxyw mẽõ krĩ pê 7ja nhũm mẽ kãm mẽ ho hapêx pa. Hãmri nẽ hpãnhã mẽ inhĩgêťjê mã pykaja o hpigrãnh pa. Mẽ ixpê Ijaew nhĩgêťjê mã ho hpigrãnh pa nhũm mẽ kamã pa hã amgrã xohtô nẽ. Hã amgrã pê 450. Tã nhũm Tirtũm hpãnhã mẽ kãm juisti hkwy rê nẽ mẽ kaxyw mẽ unhwỳ nhũm mẽ ho pa. Tã nhũm hpãnhã Sãmuew mẽ ho amnhĩptã nẽ mẽ o pa. Kêp Tirtũm nhỹ hã kapẽr jarênh o pa xwỳnhjê hõ nhũm Tirtũm mẽ kaxyw ãm.

21—Tã nhũm mẽ ixpãmjaja axpẽn ma nẽ ra te krĩ hkwy kamã mẽ urak nẽ mẽõ pahi kot Sãmuew pãnhã mẽ ho amnhĩptãr o pa hprãm xaj amnhĩ to Tirtũm wỳ nẽ kãm: “Pa Tirtũm. Kwa mẽ ixkaxyw pahi hõ xãm kê mẽ ixto amnhĩptãr o pa nã. Ja na mẽ inhmã hprãm tỳx kumrêx.”

—Anhỹr o amnhĩ to hwỳr jakamã nhũm mẽ kuma nẽ mẽ kaxyw Sawti xãm. Kisti hkra na pre. Nẽ mẽ inhĩgêť Pêjamĩ kanrêhã htãmnhwỳ na pre. Hãmri nhũm Tirtũm mẽ kaxyw ãm nhũm kêp mẽõ pahi nẽ mẽ ho amnhĩptãr o pa hã amgrã pê 40. 22Tã nhũm Tirtũm kator nẽ hpãnhã mẽ kaxyw Tawi xãm. Hãmri nẽ harênh o: “Nã Jese hkra Tawija na hte inhmã hprãm xà hkôt amnhĩ nhĩpêx mex o pa.” Anẽ.

23—Tã Jejus kêp Tawi hkanrêhã htãmnhwỳ na pre. Kukamã na pre Tirtũm mẽ ixpê Ijaew nhĩgêťjê mã harê nẽ harênh o: “Koja nhỹrmã Tawi hkanrêhã htãmnhwỳjê hõ mẽ ate amnhĩ tomnuj pê mẽ apytã.” Anhỹr o hkukamã mẽ kãm harê. 24No nhũm kormã Jejus kot mẽ ixpê Ijaewjê mã amnhĩ to amnhĩřĩt kêt ri nhũm Juãw Paxis kumrêx hkukamã mẽ ixwỳr mõ nẽ mẽ inhmã Tirtũm kapẽr jarênh o ri mẽ ixkôt pa. Nẽ mẽ ixte amnhĩ tomnuj kaga nẽ hpãnhã tãm amnhĩ nhĩpêx o ixpa hã mẽ ixpumunh kôt mẽ ixkrã kumrãr ã mẽ inhmã karõ ho pa.

25—Tã mẽ kãm kapẽr o pa ryy nẽ ra hatur xãm mẽnh kaxyw nẽ amnhĩ tã tanhmã mẽ inhmã kapẽr to nẽ mẽ inhmã: “Na ka mẽ ixpumu nẽ atỳx Tirtũm kot mẽ akaxyw pa ixãm ã ixkamnhĩx nom pa hkêt. Kot mẽ pakaxyw ãm mã xwỳnhhta kukamã na pa pre mõ. Tãm kot amnhĩ to rax o ijakrenh. Nẽ kot amnhĩ to mex o kot ijakrenh. Jakamã na pa hte ãm kukwak ri ixpa nẽ amnhĩ tã hã ixpijaãm o ixpa.” Anẽ.

—Na pre ã Juãw Paxisja mẽ inhmã Jejus jarênh anhÿr o pa.

26—Tã kwa mẽ inhma mẽ apê Apraãw kanrêhã htãmnhwÿjaja nê mẽ apê Ijaew kêt xwÿnh kãm Tirtũm kĩnh xwÿnhjaja. E mẽ apiitã ixkapêr ma nê kãm ajamaxpêr tÿx rãhã ho ri apa. Nã mẽ pahpiitã mẽ pakaxyw na Tirtũm kapêrja. Kot mẽ pahte amnhĩ tomnuj pê mẽ papytãr ã amnhĩ jarênhja mẽ ixpê Ijaew pix kaxyw kêt. Mẽ pahpiitã mẽ pakaxyw na. Mẽ pahpiitã mẽ pahte ja mar nê hkôt amnhĩ nhĩpêxja na Tirtũm kãm hprãm. 27Nom Jerujarê nhõ xwÿnhjê mẽ mẽ aptãr tũmrejaja na prem Jejus kêp Tirtũm kot mẽ pakaxyw ãm xwÿnh ã harênh mar tã hkôt hamaxpêr kêt nê. Na pre htem mẽ inhõ arĩgromnu pê sap ã akuprõ nê axpên mã Tirtũm kapêr ã kagã htũm kamã ujarênh o hkrĩ. Kagãja kamã Tirtũm nhÿ hã mẽ kapêr o mẽ pa xwÿnhjaja kot hprĩ hã Jejus jarênh nê hã kagã nhũm mẽ kot mar tã hprĩ hã mar tÿx kêt nê. Jakamã na prem axtem nê mẽ kãm hã amÿnê. Tirtũm nhÿ hã kapêr jarênh xwÿnhjaja kot mẽ hkukamã mẽ harênh xàja kôt nhũm mẽ kot hpĩr kaxyw mẽ kãm hã amÿnê.

28-29Kot tanhmã amnhĩ tomnuj to hkêt tã nhũm mẽ amarĩ hã pahi Pirat wÿ. Kot mẽ kãm hã àmnênh nhũm õ pòristijaja kot hpĩr kaxyw nhũm mẽ hã kuwÿ nhũm mẽ kãm kupĩ. Ra Tirtũm kapêr ã kagã htũm kot mẽ hkukamã mẽ harênh xà hkôt. Hãmri nhũm mẽ kot hkôt pa ho pa xwÿnhjaja pĩ kahpa nê ho wrÿ nê ma o tẽ nê kên kre kamã haxã. 30Tã nhũm Tirtũm akupÿm ho htĩr 31nhũm xatã hkôt mẽ pa ho pa xwÿnhjê hwÿr hapôj. Kormã htyk kêt ri ra Garirej rũm Jerujarê hwÿr hkôt mẽ pa ho mẽ pa xwÿnhjê hwÿr xatã mẽ hwÿr hapôx o pa. Jao hã arĩgro xohtõ nê nhũm prem piitã omu. Tã mẽ tãmjaja na htem mẽ ixpê Ijaew mã harênh o pa.

32-33—Amnepêm Tirtũm na pre mẽ ixpê Ijaew nhĩgêtjê mã tanhmã Kra Jejus jarênh to. Kormã mẽ pahwÿr wrÿk kêt ri tanhmã mẽ kãm harênh to. Jakamã ra kot hkukamã harênh xà hkôt nhũm pre mẽ pahwÿr wrÿ nê tanhmã mẽ panê amnhĩ nhĩpêx to. Tã mẽ ate harênh mar kaxyw na pa wa man mẽ awÿr mõ. Amnepêm finat Tawi na pre Tirtũm kapêr kwÿ hã kagã. Tirtũm mex ã mẽ grer xà pê Sam 2ja kamã hã kagã. Te Tirtũm tãm Jejus mã kapêr pyrãk o hã kagã nê hã kagã ho:

Apê Ixkra na ka.

Tã mẽ piitã mẽ kot apê Ixkra hã apumunh kurê kumrêx kaxyw na pa jarãhã mẽ kãm ato amnhĩrĩt. Anê.

Nhũm pre ã Tirtũm Jejus mã kapêr anê nhũm Tawi ô ri mẽ pamã hã kagã.

34—Amnepêm na pre Tirtũm tanhmã Kra Jejus kukamã harênh to. Mẽ kot hpĩr nhũm kot akupÿm ho htĩr kukamã hã amnhĩ jarê. Ĩ hkro pymaj kot mẽ htykjê pê hkaxãr nê akupÿm ho htĩr ã nhũm hkukamã hã amnhĩ jarê. Te Kraja mã amnhĩ jarênh pyrã nê amnhĩ jarênh o:

E kot paj ato mex rax nê. Ixte Tawi mã amnhĩ jarênh xà hkôt. Anhÿr o hkukamã harênh xà hkôt akupÿm ho htĩr nhũm axte htyk kêt ã harê.

35—Nê kagàja nhãm hô hô kot tanhmã Jejus jarênh kute. Te Jejus tãm Tĩrtũm mã kapêr pyrã nê harênh o:

Ixpê Akra hã ixte akapêr kôt ri amnhĩ nhĩpêx rãhã ho ixpa jakamã kot kaj ixpumunh mex pa inhĩ hkro hkêt nê. Anê.

Tĩrtũm kapêr ã kagà htũm kot ã Jejus jarênh kot anhÿr. 36Nom ã Tawi jarênh anhÿr kêt nê. Tawi na pre Tĩrtũm kapêr kôt amnhĩ nhĩpêx mex o pa hãmri nê ty nhũm prem mẽ panhĩgêjtê nhĩhkô hã haxà hãmri nhũm ã hkro nê hapêx.

37—Tã no Jejusja Tĩrtũm kot akupÿm ho htĩr jakamã nhũm Tawi pyrãn ã hkro nê hapêx kêt nê.

38—E mẽ inhmar tÿx nê ixkwÿjaja. Kra Jejus pix kukwak na hte Tĩrtũm amnhĩ katut kôt mẽ pahte amnhĩ tomnuj rê. 39Jakamã kot kaj mẽ ãm Mojes kapêr kôt pix mã ri amnhĩ nhĩpêx nhũm Tĩrtũm tee ri ja hã mẽ apumu nê amnhĩ katut kôt mẽ ate amnhĩ tomnuj rênh kêt nê. Jejusja tapxipix na pre htyk o Tĩrtũm mã mẽ pahte amnhĩ tomnuj piitã hpãnhã amnhĩrer pa. 40-41 Amnepêm na pre Tĩrtũm kapêr nhÿ hã kapêr xwÿnhjê hõja mẽ kãm Tĩrtũm kapêr jarê nê hã kagà. Te Tĩrtũm tãm mẽ kot kapêr ã hpêr o pikênh xwÿnhjê mã kapêr pyrã nê mẽ kãm:

E kot paj aa mẽ ate mẽmoj pumunh kêt õ ho anê.

Nhũm mēhõ mẽ amã harê ka mẽ harênh ma nê ãm ama.

Nhũm mẽ kot omunh mex xwÿnhjê hõ kot hprĩ hã mẽ amã harênh tã ka mẽ ãm ama nê hkôt ajamaxpêr kêt nê.

Hãmri nê tee ri tanhmã kãm ajamaxpêr to ho ri apa. Anê.

Ã Tĩrtũm mẽ kãm kapêr anhÿr jakamã kwa mẽ o kora. Apu mẽ kajaja na pre ã mẽ ajarênh anê rÿ ko. Anê.

42Nhũm pre ã Pawre mẽ kãm ujarênh ryy anê. Hãmri nê Panãpe mẽ wa ixkreta rũm kator kaxyw nhũm mẽ kot mar o hkrĩ xwÿnhjaja tee ri ma wa mõi ã wa omu nê ma wa hkôt mra nê wa kãm:

—Kwa war axujarênhja na mex kumrêx. Mẽ inh mã axte mar prãm. Xà koja axte sap kato ka wa akupÿn mẽ ixwÿr wa tẽ nê axte mẽ inh mã awjarê? Anê.

Hãmri nhũm wa mẽ kãm:

—Tõe. Nà kot paj war anê. Anê.

43Hãmri nê wa ma tẽ nhũm mẽ hkwÿja ma wa hkôt mra. Ijaew kwÿjaja nê Ijaew kêt xwÿnh kãm Tĩrtũm kĩnh xwÿnhjaja nhũm mẽ ma wa hkôt mra. Hãmri nhũm wa pry hã mẽ kãm kapêr o mõi. Tĩrtũm kot mẽ kutã nojarêr rãhã ho pa nhũm mẽ kot amnhĩ tã omunh nê hkôt amnhĩ nhĩpêx tÿx rãhã ho pa nê hkaga hkêt ã mẽ kãm kapêr o mõi.

44Tã nhũm axte sap nhũm krĩ nhõ xwỳnh piitã axte Tĩrtũm kapẽr mar kaxyw ixkre wỳr akuprõ. Ijaewjaja nẽ Ijaew kêt xwỳnhjaja. 45Hãmri nhũm Ijaew kwỳjaja tee ri mẽ amnhĩ wỳr Ijaew kêt xwỳnhjê pumu nẽ mẽ hã Pawre mẽ Panãpe wa kamã gryk nẽ. Mẽ kãm Ijaew kêt xwỳnhjaja kot Tĩrtũm kapẽr mar prãm kêt jakamã mẽ hã wa kamã gryk nẽ. Hãmri nẽ Pawre kapẽr ma nẽ xatã kãm kapẽr punuj nẽ kãm:

— Tk. Kwa na ka Tĩrtũm kapẽr jarẽnh o axêx. Ja kot anhỳr kêt. Anẽ.

46Nom nhũm wa kãm mẽ uma hkêt nẽ. Wa ãm Tĩrtũm Karõ nhỹ hã amnhĩ to htỳx nẽ wa mẽ kãm kapẽr. Nẽ amnhĩ tã tanhmã mẽ kãm kapẽr to nẽ mẽ kãm:

— Nà wa ixpyrà nẽ mẽ apê Ijaew jakamã na pa mẽ akumrêxjê mã Tĩrtũm kot mẽ pakaxyw Jejus xãm ã harẽ. Tã ka mẽ ama nẽ ãm ama nẽ te mẽ ate hkaga pyrà nẽ ã wa inhmã akapẽr anẽ nẽ wa ixte kapẽr o ixêx ã wa ijarẽ. Pêr ãm mẽ ate mẽ amã Tĩrtũm mẽ Kra wa kuri mẽ atĩr tũm nẽ mẽ apa hprãm kêt. Jakamã kot paj wa mẽ apê ixkato nẽ hpãnhã ma Ijaew kêt xwỳnhjê mã Jejus kapẽr jarẽnh o ri mẽ hkôt ixpa. 47Tĩrtũm kapẽr ã kagà htũm ã kot mẽ ixte amnhĩ nhĩpêx anhỳrja kukamã mẽ ijarẽ nẽ mẽ ijarẽnh o:

Mẽ ate Ijaew kêt xwỳnhjê mã ixkapẽr jarẽnh o ri apa kaxyw na pa pre mẽ kaxyw mẽ arê.

Jakamã koja pyka piitã hkôt mẽ pa xwỳnhjaja ohtô nẽ mẽ akapẽr ma nẽ ixkra hkôt amnhĩ xunhwỳ.

Koja mẽ ã amnhĩ nhĩpêx anẽ pa ja hã mẽ omu nẽ mẽ ho ixkra. Anẽ.

Tĩrtũm kot ã ja kukamã mẽ ijarẽnh anhỳr jakamã kot paj wa mẽ apê ixkato nẽ mẽ apãnhã ma Ijaew kêt xwỳnhjê mã Tĩrtũm kapẽr jarẽnh o ri mẽ hkôt ixpa. Anẽ.

48Hãmri nhũm Ijaew kêt xwỳnhjaja amnhĩ tã wa kapẽrja ma nẽ hkĩnh nẽ Tĩrtũm kapẽr mex o mex ã harẽ. Hãmri nhũm ra Tĩrtũm kot nhỹrmã amnhĩ ri mẽ htĩr tũm nẽ mẽ pa ho mẽ pa kaxyw mẽ rênh xwỳnhjaja amnhĩ kaxyw Pahihti Jejus kôt hamaxpêr nẽ hkôt amnhĩ xunhwỳ.

49Tã nhũm pika pê Æxiok kamã mẽ piitã Tĩrtũm kapẽr jarẽnh ma. 50Nom nhũm Ijaew xaptãr tũmrejaja kãm Pawre mẽ Panãpe wa hkĩnh kêt jakamã na prem krĩ hkôt mẽ kot amnhĩ to rũnh xwỳnhjê mã wa ho kapẽr punuj o pa. Mẽ õ pahi mẽ mēni kot amnhĩ to rũnh xwỳnhjaja nhũm mẽ kãm tanhmã wa ho kapẽr to nhũm mẽ kuma nẽ mẽ hkôt hamaxpêr. Mēnijaja kãm Tĩrtũm prãm tã amnhĩ kaxyw Jejus kôt hamaxpêr kêt jakamã tanhmã mẽ kot Pawre mẽ Panãpe wa ho hêx toja ma nẽ hkôt hamaxpêr nẽ wa kamã gryk nẽ. Jakamã nhũm mẽ ohtô nẽ tanhmã wa hipêx to nẽ amnhĩ nê wa hano. 51Hãmri nhũm wa mẽ kêp kato nẽ xa nẽ mẽ kot Tĩrtũm kapẽr kaga hã amnhĩ pumunh kaxyw mẽ noo mã wa hparkã kapa nẽ nê awjagrô kapĩ nẽ ma wa tẽ. Hãmri nẽ ma

krĩ pê Ikõn wỳr hpãnhã wa mō. ⁵²Hãmri nhũm Āxiok kamã mẽ kot Jejus kôt amnhĩ xunhwỳr xwỳnhjaja hkĩnh nẽ ri pa. Tĩrtũm Karō kot mẽ hkarō mã gjêx jakamã nhũm mẽ hkĩnh nẽ ri pa ho pa.

Pawre mẽ Panãpe wa kot Ikõn wỳr mōr ã wa harẽnh

Matêwre 10.34-35

14 ¹Hãmri nhũm Pawre mẽ Panãpeja wa Āxiok rũm kato nẽ hpãnhã ma krĩ pê Ikõn wỳr wa mō. Hãmri nẽ hwỳr pøj nẽ Ijaew nhõ Tĩrtũm kapêr o mẽ ahkre xà hã ixkre hwỳr wa tẽ nẽ kamã mẽ kãm Jejus jarẽnh o nhỹ. Mẽ kãm harẽnh kãm hihtỳx jakamã nhũm mẽ hkwỳjaja wa kuma nẽ amnhĩ kaxyw hkôt hamaxpêr nẽ hkôt amnhĩ xunhwỳ. Ijaew kwỳjaja nẽ mẽ kêp Ijaew kêt xwỳnh kwỳjaja nhũm mẽ ohtô nẽ Jejus kôt amnhĩ xunhwỳ.

²Tã nhũm mẽ hkwỳjaja kãm Jejus jarẽnh mar prãm kêt nẽ. Hãmri nẽ kato nẽ ma Ijaew kêt xwỳnh kwỳjê hwỳr mra nẽ tanhmã mẽ kãm Pawre mẽ Panãpe wa ho hêx to nẽ wa ho kapêr punuj nẽ nhũm mẽ mar xà hkôt wa kamã gryk nẽ. ³Nom nhũm wa tokyx kator nẽ ma mōr kêt nẽ arĩ Tĩrtũm Karō nhỹ hã amnhĩ to htỳx nẽ mẽ kãm Tĩrtũm kapêr jarẽnh o ri mẽ hkôt pa. Nẽ kêp mẽ kutã nojarêt xwỳnh ã harẽnh o pa. Nẽ y hã mẽ kãm aa mẽ kot mẽmoj pumunh kêt kwỳ ho anhỳr o ri mẽ hkôt pa. Jakamã nhũm mẽ hkwỳjaja ja hã wa omu nẽ wa kapêr ma nẽ hamaxpêr o:

— Kwa ãm hãmri na wa Tĩrtũm kêp mẽ pakamã ukapĩ xwỳnh ã harẽ. Pêr y hã wa kot ã amnhĩ nhĩpêx anhỳr o pa kênã. Anẽ.

⁴Hãmri nhũm Ijaew kêt xwỳnh kwỳjaja wa hkôt hamaxpêr nẽ wa hkôt amnhĩ xunhwỳ. No nhũm mẽ hkwỳjaja wa hkôt hamaxpêr kêt nẽ. Ra mẽ kot Ijaew kwỳ kot tanhmã wa ho kapêr punuj toja ma nẽ mẽ hkôt hamaxpêr jakamã nhũm krĩ nhõ xwỳnhjaja axpên kwỳm ri tanhmã wa hkôt hamaxpêr to ho pa. Jao axpên kwỳm ri wa hkôt hamaxpêr o pa.

⁵Tã nhũm wa hkôt hamaxpêr kêt xwỳnhjaja axpên wỳr akuprô nẽ wa hã amỳnê. Ijaew kwỳjaja nẽ Ijaew kêt xwỳnh kwỳjaja nẽ mẽ õ pahijaja nhũm mẽ kot kên o wa htak o wa hpĩr kaxyw wa hã amỳnê.

⁶Hãmri nhũm wa amnhĩ tã ama nẽ mẽ kêp kato nẽ hpãnhã ma pika hõ hwỳr mō. Ma Rikõn kãm krĩ hkwy hwỳr hpãnhã mō. Risti wỳr nẽ Tepe wỳr nẽ pu hã krĩ hkwy hwỳr wa mō. ⁷Wa mō nẽ pøj nẽ ma mẽ kãm Jejus kot tanhmã mẽ panê amnhĩ nhĩpêx to hã harẽnh o ri mẽ hkôt pa.

Te grã xwỳnh jarẽnh

Atre 3.1-10

⁸Nhũm Risti kamã mẽhõ my hte grã nẽ hkrĩ xwỳnhja. Katorxà nhõxã kre rũm hte grã nẽ kator jakamã ri pa hkêt nẽ arĩ hkrĩ xà kamã hkrĩ ho hkrĩ. ⁹Jakamã nhũm Pawre mẽ kãm ujarẽnh o xa nhũm kuri mar o nhỹ. Hãmri nẽ hamaxpêr o:

—Nà pēr Tirtūm àhpumunh o àhpumunh. Mãn kot ixto mex kaxyw àhpumunh tỳx. Nà koja ixto mex. Anē.

Hāmri nhūm Pawre ã hamaxpēr anhỹr ã omu 10nē kàx pē kām kapēr nē kām:

—E kwa kànhmã xa. Anē.

Hāmri nhūm kuma nē kànhmã ãm kurê kumrêx nē ri mra. Nē amnhĩ te kamã hamak o ri mra nē hkĩnh tỳx kumrêx. 11Hāmri nhūm kuri mẽ kuhê xwỳnhjaja Pawre kot ã hipêx anhỹrja ã omu nē htỳx wa kêp kaxkwa kamã mẽhpãm ã wa hkamnhĩx nē hkĩnh nē axpên mã:

—Kwa pēr mẽpahpãm na wa. Mẽpahpãm Jupti mẽ Měkurtija na wa panhĩ hã amnhĩ jahkre nē mẽ pahwỳr wrỳ. Nà ãm hāmri na wa mẽ pahwỳr wrỳ. Anē.

Nom mẽ kapēr pē Rikaôn o axpên mã kapēr jakamã nhūm Pawre mẽ Panãpe wa mẽ mar kêt nē. Wa kot mẽ kapēr mar kêt jakamã ã mẽ kot wa harênh anhỹrja mar kêt nē htỳx wa xa. 12Nhūm mẽ ã wa kêp mẽhpãm ã wa harênh anē nē hkĩnh tỳx nē. Panãpeja nhūm prem kêp mẽ hpãm Jupti hã hkamnhĩx no Pawreja nhūm prem kêp mẽhpãm Měkurti hã hkamnhĩx. Pawreja Měkurti pyrã nē kapēr japjê rũnh jakamã nhūm mẽ kêp hã hkamnhĩx. 13Na prem krĩ htã mẽhpãm Juptija mã amnhĩ jarênh xà hã ixkre nhĩpêx nē hkarõ nhĩpêx. Hāmri nē hwỳr akuprõ nē kām mex o mex ã harê nē amnhĩ to hwỳr o pa. Jakamã nhūm Jupti nhõ patrejaja Pawre mẽ Panãpe wa kêp mẽhpãm ã wa harênh ma hāmri nē wa hã hkwỳjê mã kām:

—Kwa pu mẽ wa kām mōx kwỳ hpa nē pixôrà hkwy rê. Hāmri nē wa kām wa mex o wa mex ã wa harê nē wa kêp mẽpahpãm ã amnhĩ to wa kuwỳ. Wa kêp mẽpahpãm kênã. Anē.

Hāmri nē ra ã wa hipêx anhỹr kaxyw 14nhūm wa tee ri mẽ kot amnhĩ nhĩpêx ã mẽ omu nhūm ja wa kêp omnuj tỳx nē. Jakamã nhūm wa amnhĩ pē hinõkà kaxõnh pa nē mẽ kutã hprõt nē ã mẽ kot wa hipêx anhỹrja nē mẽ kām kapēr kām hihtỳx nē. 15Nē mẽ kām:

—Kwa mẽ ri ã wa inhĩpêx anhỹr kêt nē. Wa ixpê mẽapãm kêt kênã kot ka kêt mẽ ã wa inhĩpêx anē. Nom mẽapãmja na ka htem ãm amnhĩ to hwỳr kaprỳ nē kām mex o mex ã harênh kaprỳ o ri apa. Tã mẽ ate ã amnhĩ nhĩpêx anhỹr kaga nē hpãnhã Tirtūm kôt amnhĩ xunhwỳr nē amnhĩ to pix wỳr o apa kaxyw na pa pre wa mẽ awỳr mō nē pøj. Tirtūmja mẽ ate mẽ apãm jarênhta rom htír o htír. Na pre mẽmoj piitã ho kato. Kaxkwa ho kato nē pyka ho kato nē gô xujanãr o kato. Nē kamã ri mẽmoj piitã ho kator pa.

16—Amnepêm mẽ pa xwỳnhjaja na pre htem amnhĩ krã hkõt pix mã tanhmã ri amnhĩ nhĩpêx to ho pa nhūm Tirtūm ja hã mẽ omu nē ãm mẽ omu nē tanhmã mẽ ho hkêt nē. 17Mẽ pahte amnhĩ tã omunh kaxyw na hte amarĩ tanhmã mẽ pahto mex to ho pa. Na hte mẽ pahwỳr na rē nhūm

mẽ pahpur go mex nẽ. Nhũm mẽ pamã tanhmã mẽ pahpur kãm mẽmo hyja to nhũm ra mẽ pamã ô rũnh nẽ. Pu htem hamỳ nẽ ho paxàpkur mex nẽ pahkĩnh nẽ ri papa. Tĩrtũm pix kukwak ri na pu htem ã amnhĩ nhĩpêx anhỹr o ri papa. Anẽ.

18Nhũm pre ã Pawre mẽ kot wa kãm môx parja nê mẽ kãm kapêr kãm hihtỳx anẽ. No nhũm mẽ kuma nẽ ãm kuma nẽ wa kãm mry hkwy hpar kaxyw wa hã hihtỳx nẽ. Jakamã kritpêm nhỹx prem wa kãm hkwy pa. Tã tanhmã hamaxpêr to nẽ hkaga nẽ wa kãm hpar kêt nẽ.

Mẽ kot Pawre pĩr ã àmnênh ã mẽ harênh

Sikũn Ximotre 3.10-11

19Tã nhũm Ijaew kwỳjaja mẽ hwỳr mran pøj. Krĩ pê Āxiok mẽ Ikõn rũm ma mẽ hwỳr mran pøj nẽ mẽ kãm Pawre ho hêx o mẽ hkôt pa nhũm mẽ kuma nẽ axtem nẽ Pawre kamã gryk kato. Hãmri nẽ mẽ kot hpĩr kaxyw kên runh kwỳ jamỳ nẽ ho htak prêprêk o kuhê. Hãmri nhũm amnhĩ xà htỳx kamã ama nẽ tẽm nẽ akryk nõ nhũm mẽ omu nẽ htỳx ho ra htyk ã hkamnhĩx. Hãmri nẽ hwỳr tẽ nẽ hpa hã kupy nẽ ma hkjênh o mô nẽ krĩ pum kumẽ nẽ ma akupỹm mra. 20Hãmri nhũm Jejus kôt mẽ kot axpên to htôjaja tee ri ã mẽ kot hipêx anhỹr ã omu nẽ hkaprĩ htỳx nẽ hwỳr hprôt nẽ omu nẽ mỳr o kuhê. Hãmri nhũm te htyk pyrà nẽ nõr tã Jejus nhỹ hã akupỹm hihtỳx mex nẽ kànhmã nhỹ hãmri nẽ ma akupỹm mẽ hkôt krĩm tẽ.

Tã nhũm apkati nhũm Panãpe mẽ wa krĩja rũm kato nẽ ma wa mô. Pãnhã ma krĩ pê Tepe hwỳr wa mô.

Pawre mẽ Panãpe akupỹm Āxiok wỳr wa mõi ã wa harênh

21-22Tã nhũm wa ma Tepe hwỳr mõi nẽ pøj. Hãmri nẽ kamã mẽ kãm Jejus tanhmã kot mẽ panê amnhĩ nhĩpêx to hã harênh o ri mẽ hkôt wa pa nhũm mẽ wa kuma nẽ ohtô nẽ Jejus kôt amnhĩ xunhwỳ.



Atre 14.19-20

Tã nhũm wa kato nẽ awjanã nẽ ma akupỹm pika pê Pisit wỳr wa mō. Nẽ kamã krĩ hkwỹ hkõt ri ra mẽ kot Jejus kõt amnhĩ xunhwỳr xwỳnhjê jahkre ho ri mẽ hkõt pa. Krĩ pê Risti nẽ Ikõn nẽ Āxiokja kõt. Nẽ mẽ ahkre kamã Jejus kõt mẽ ho mẽ hihtỳx o wa pa nẽ mẽ kãm:

—E ra mẽ ate Jejus kõt amnhĩ xunhwỳr jakamã koja mẽ kãm Jejus kurê xwỳnhjaja tee ri ja hã mẽ apumu nẽ hã tanhmã mẽ anhĩpêx to. Tã kêr ka mẽ âm amnhĩ tã mẽ omu nẽ âm mẽ omu nẽ Jejus kaga hkêt nẽ. Nẽ arĩ hkõt amnhĩ nhĩpêx mex o ri apa rãhã nhỹrmã ma õ krĩ hwỳr api nẽ Tĩrtũm wa kuri amex kumrêx nẽ atĩr tũm nẽ apa ho apa. Anẽ.

23Hãmri nẽ ahpỹnhã krĩ piitã hkõt ri mẽ kot pastô nhỹ hã mẽ ahkre kaxyw mẽ hkwỹjê rê nẽ mẽ kaxyw mẽ unhwỳ nẽ mẽ ho Tĩrtũm wỳ. Āpkur kêt rãhã mẽ ho kuwỳ nẽ kãm:

—Pa Tĩrtũm? E jajê pumu. Mẽ kot krĩ ja kamã pastô nhỹ hã akrajê jahkre ho pa kaxyw na pa wa mẽ unhwỳ. Jakamã e kêr ka mẽ kutã anojarêt rãhã ho ri mẽ hkõt apa. Anẽ.

Hãmri nẽ wa mẽ kêp kato nẽ ma hpãnhã nhỹhỹm wa mō. 24Pyka pê Pisit kamã mō nẽ hpãnhã nhãm pyka pê Pãpir kõt mō. Wa ma mẽ kãm tanhmã Jejus kapêr jarênh to ho mẽ hkõt mō. 25Hãmri nẽ krĩ pê Perke hwỳr wa pøj nẽ kamã mẽ kãm Jejus kot tanhmã amnhĩ nhĩpêx to hã harê hãmri nẽ mẽ kurũm kato nẽ axte mō. Pãnhã ma krĩ pê Atari hwỳr wa mō. 26Hãmri nẽ hwỳr pøj nẽ hpãnhã kurũm akupỹm Āxiok wỳr wa mō. Pàr rax kãm ma akupỹm mō. Āxiokja kamã na pre wa nojarêt nhũm Jejus kõt wa htõ nẽ wa htõxjaja wa ho Tĩrtũm wỳ nẽ ma krĩ hkwỹ hwỳr wa kumê. Wa kot ma mẽ hkõt tanhmã Jejus kot mẽ panê amnhĩ nhĩpêx to hã harênh o wa pa kaxyw wa kumê. Jakamã nhũm wa ra ja ho anhỹr pa nẽ akupỹm mẽ hwỳr wa mō. 27Hãmri nẽ wa akupỹm pøj nẽ Jejus kõt mẽ kot axpên to htõ nẽ htõxjê ho akuprõ nẽ mẽ kãm amnhĩ jarê nẽ mẽ kãm:

—Nà âm hãmri na pa wa ra ixkàhkĩnh pê akupỹn mẽ awỳr pøj. Na pre Tĩrtũm wa ixkutã nojarêt rãhã ho wa inhĩhkõ hã pa. Jakamã pa pre wa ma ỹ hã Ijaew kêt xwỳnhjê mã Jejus jarênh o ixpa nhũm mẽ hkwỹjaja wa inhma nẽ hkõt amnhĩ xunhwỳ.

28Anhỹr o wa mẽ kãm kapêr hãmri nẽ wa tokyx ma nhỹhỹm krĩ hõ hwỳr axte mõr kêt nẽ. War arĩ Āxiok kamã Jejus kõt wa htõ nẽ htõxjê hkõt ri pa.

Jerujarê kamã Jejus kwỳ hpikuprõnh ã mẽ harênh

Matêwre 23.1-4; Karatas 2.1-5, 5.1-16

15 1Tã hãmri nhũm Ijaew kwỳjaja Āxiok wỳr Jejus kwỳ pê Ijaew kêt xwỳnhjê hwỳr mõn pøj. Pika pê Jutej rũm mẽ hwỳr pøj nẽ tanhmã mẽ ahkre hto ho pa. Nom axtem nẽ Tĩrtũm kapêr kuhpa hã mẽ ahkre nẽ mẽ kãm:

—Kot ka mẽ amã Jejus kõt amnhĩ xunhwỳr prãm hãmri nẽ mẽ ixpyrà

ně finat Mojes kot mẽ pamã karõ xà hkôt amnhĩ my kwrýt kà kwỳ jakà nẽ rĩ kormã hkôt amnhĩ xunhwỳ. Kot kaj mẽ ã amnhĩ nhĩpêx anhỹr kêt nẽ nhũm Tĩrtũm tee ri ja hã mẽ apumu nẽ amnhĩ katut kôt mẽ ate amnhĩ tomnuj rěnh nẽ mẽ ato hkra hkêt nẽ. Anẽ.

2Hãmri nhũm Pawre mẽ Panãpe tee ri mẽ kapěr anhỹrja ma nhũm wa kęp ja omnuj tỳx nẽ. Hãmri nhũm wa mẽ kãm:

— Tk. Kwa kot anhỹr kêt. Na hte Tĩrtũm mẽ pahte amnhĩ my kwrýt kà jakà ã mẽ pahpumunh kôt mẽ pahto hkra hkêt nẽ. Anẽ.

Hãmri nẽ tee ri mẽ kapěrja nẽ mẽ kãm kapěr no nhũm mẽ ãm wa kuma nẽ wa hkôt hamaxpěr kêt nẽ. Nẽ arĩ ã mẽ ahkre anhỹr o mẽ hkôt pa. Jakamã nhũm mẽ ja hã axpẽn mã kapěr rax nẽ. Hãmri nhũm Jejus kwỳ pê Ijaew kêt xwỳnhjaja amnhĩ tã Pawre mẽ Panãpe wa hkukja nẽ wa kãm:

— Kwa xà kot paj mẽ apyrã nẽ amnhĩ my kwrýt kà jakà nhũm Tĩrtũm kãm ja mex nẽ nã? Kwa wa ma akupỹm Jerujarẽ hwỳr mỗ nẽ ja hã Jejus nhỹ hã mẽ ahkre xwỳnh maatijê mẽ mẽ kot Jejus kwỳ jahkre xwỳnhjê kukja nẽ hã mẽ ama. Nẽ ota mẽ ixkwỳjaja koja ma war akôt mra. Kê mẽ tanhmã mẽ amã ja jarěnh to ka mẽ ama nẽ man akupỹn mẽ ixwỳr mra nẽ tanhmã mẽ inhmã mẽ kapěr jarěnh to. Anẽ.

Hãmri nhũm wa mẽ kãm: “Tôe. Nà kot paj mẽ anẽ.” Anẽ. 3Hãmri nẽ wa mẽ ma Jerujarẽ hwỳr mỗ. Ma pyka pê Wẽnĩs mẽ Samar hkôt ma hwỳr mỗ. Hãmri nẽ nhỹri Jejus kôt mẽ htõ nẽ htõxjê pumu nẽ mẽ kãm Ijaew kêt xwỳnhjê jarẽ. Mẽ hkwỳjaja mẽ uràk nẽ Jejus kôt amnhĩ xunhwỳr ã mẽ harěnh o mỗ. Hãmri nhũm mẽ harěnh ma nẽ mẽ ỹ hã hkĩnh nẽ. 4Hãmri nhũm mẽ ra Jerujarẽ hwỳr Jejus kôt mẽ htõjê hwỳr mõn pøj. Hãmri nẽ mẽ ahkre xwỳnhjê mẽ Jejus nhỹ hã mẽ ahkre xwỳnh maatijê pumu nhũm mẽ haxwỳja amnhĩ wỳr mẽ omu nẽ hkĩnh nẽ. Nẽ tanhmã mẽ ho mex to nẽ mẽ kãm kapěr mex nẽ. Hãmri nhũm Pawre mẽ Panãpe wa mẽ kãm amnhĩ jarẽ. Tĩrtũm kot wa ãhkõ hã wa hkôt pa nhũm wa ỹ hã kot Ijaew kêt xwỳnhjê mã kapěr o pa nhũm mẽ hkwỳja kot wa mar nẽ Jejus kôt amnhĩ xunhwỳr ã nhũm wa mẽ kãm amnhĩ jarẽ. 5Nhũm Jejus kwỳjê kamã mẽ kęp Parijew nhõ xwỳnh kwỳjaja. Mẽ kęp Parijew tã hkwỳjê rom Jejus kôt amnhĩ xunhwỳ. Jakamã nhũm mẽ tee ri Pawre mẽ Panãpe wa kot Ijaew kêt xwỳnhjê jarěnh ma nẽ kànhmã kuhê nẽ wa kãm:

— Kwa kê mẽ pahpyrã nẽ amnhĩ my kwrýt kà jakà nẽ finat Mojes kot Tĩrtũm nhỹ hã mẽ pamã mẽmoj tã karõ hkôt amnhĩ nhĩpêx o pa. No kot mẽ ã amnhĩ nhĩpêx anhỹr kêt nhũm ja mẽ pahpê omnuj nẽ. Anẽ.

6Hãmri nhũm Jejus nhỹ hã mẽ ahkre xwỳnh maatijê mẽ mẽ hkwỳjê jahkre xwỳnhjaja mẽ kuma nẽ hapøj nẽ nhỹri akuprõ. Ijaew kêt xwỳnh kot Jejus kôt amnhĩ xunhwỳr xwỳnhjaja kot tanhmã amnhĩ nhĩpêx to hã axpẽn mar kaxyw nhỹri akuprõ. 7Hãmri nẽ mẽ hã axpẽn mar ryy nẽ. Hãmri nhũm Simãw Pêtre tã kànhmã xa nẽ mẽ kãm:

—Nà na pre Tirtùm mẽ pahkapi nẽ Ijaew kêt xwỳnhjê kaxyw pa ixta. Ixte mẽ kãm Jejus kot tanhmã mẽ panê amnhĩ nhĩpêx to hã harênh o ri mẽ hkôt ixpa nhũm mẽ kot inhmar nẽ hkôt amnhĩ xunhwỳr kaxyw nhũm mẽ kaxyw ixta. Ra mẽ ate ja hã ixpumunh mex. 8-9Tirtùm kot tanhmã ri mẽ pakute hkôt mẽ pahpumunh par jakamã te kot ra mẽ panhĩpêxta pyrã nẽ mãânên Ijaew kêt xwỳnhjê nhĩpêx. Mẽ kot mẽ pahpyrã nẽ amnhĩ kaxyw Jejus kôt hamaxpêr jakamã nhũm Tirtùm te ra mẽ panhĩpêx pyrã nẽ amnhĩ katut kôt mẽ kot amnhĩ tomnuj rẽ nẽ mẽ ho hkra. Hãmri nẽ mẽ hwỳr amnhĩ Karõ rẽ nhũm mẽ hkarõ mã agjê. Tirtùm tãm kot amnhĩm mẽ rênh kênã.

10—Tã xà mẽ pahpê Ijaew na pu htem wam Tirtùm kot finat Mojes mã kapêr kôt amnhĩ nhĩpêx mex o papa? Nà na pu htem hkôt amnhĩ nhĩpêx mex kêt nẽ. Nẽ mẽ panhĩgêjtaja na xep prem haxwỳja hkôt amnhĩ nhĩpêx mex o pa hkêt nẽ. Mẽ pahpiitã mẽ pahpê hiltỳx kênã. Tã Ijaew kêt xwỳnhjaja kot hkôt amnhĩ nhĩpêx o pa hã ka mẽ ra mẽ kãm karõ kaxyw. Kwa kot kaj mẽ anẽ nhũm Tirtùm tee ri ja hã mẽ apumu nhũm ja kêp omnuj nẽ. Kãm ja prãm kêt. 11Kwa mẽ ã mẽ kãm hã karõ anhỳr kêt nẽ. Mẽ panhõ pahihiti Jejus na hte mẽ pahpiitã mẽ pakutã nojarêr o axpên pyrãk. Jakamã Ijaew kêt xwỳnhjaja nẽ mẽ pahpê Ijaewjaja kot puj mẽ amnhĩ kaxyw hkôt pajamaxpêr nẽ hkôt amnhĩ xunhwỳ. Hãmri nhũm Tirtùm ja hã mẽ pahpumu nẽ mẽ panhĩpêx o axpên pyrã nẽ Jejus kukwak ri amnhĩ katut kôt mẽ pahte amnhĩ tomnuj rẽ nẽ mẽ pahto hkra. No na hte mẽ pahte amnhĩ my kwỳr kà jakàr rỳ finat Mojes kapêr kôt amnhĩ nhĩpêx ã mẽ pahpumunh kôt mẽ pahto hkra hkêt nẽ. Anẽ.

12Nhũm pre ã Simãw Pêtre mẽ kãm kapêr anẽ. Hãmri nhũm hpãnhã Panãpe mẽ Pawreja mẽ kãm amnhĩ jarê. Tirtùm kot tanhmã wa ho nhũm wa kot Ijaew kêt xwỳnhjê hwỳr wa mõi ã amnhĩ jarê. Nẽ Tirtùm nhỹ hã mẽ kãm aa mẽ kot mẽmoj pumunh kêt kwỳ ho anhỳr o ri mẽ hkôt pa hã mẽ kãm amnhĩ jarê nhũm mẽ piitã akryk wa mar o hkrĩ nẽ wa ujarênhta hkukamã hamaxpêr. 13Hãmri nhũm Simãw Pêtre mẽ Panãpe wa mẽ kãm ujarênh pa hãmri nhũm Xiakre wa hpãnhã kànhmã xa nẽ mẽ kãm kànhmã ìhkra pẽ nẽ mẽ kãm:

14—E pa ijaxwỳja mẽ amã ixkapêr ka mẽ inhma. Nà na pu mẽ ra Simãw Pêtre kapêr ma. Tirtùm kot wam amnhĩ kaxyw Ijaew kêt xwỳnh kwỳjê rênh ã mẽ harênhja pu mẽ ra kuma. 15Ãm hãmri na ã mẽ harênh anẽ. Amnepêm Tirtùm kapêr nhỹ hã mẽ kapêr o mẽ pa xwỳnhjaja na prem ra ja kukamã Tirtùm kot tanhmã mẽ hipêx to hã amnhĩ jarênh kukamã hã kagà. Te ho tãm kot kãm kapêr pyrã nẽ hã kagà ho:

16 Amnepêm finat Tawija na pre hte inhmã amnhĩ kwỳjê ho amnhĩptàr o pa.

Mẽ kêp Ijaewjaja nhũm pre inhmã mẽ ho amnhĩptàr o pa.
Hãmri nhũm mẽ gaa nẽ axpên pê angrã nẽ ahpỳnhã ri pa.

Tã ixpê Tirtùm kot paj nhỹrmã ma mẽ hwỳr wrỳ nê axte mẽ ho akuprô nê tãm mẽ unhwỳr pa.

17 Jakamã Ijaewjê kukwak ri koja Ijaew kêt xwỳnh kwỳjaja mããnên ixkôt amnhĩ xunhwỳ.

Pa te ixte Ijaewjê nhĩpêx pyrã nê mẽ ho ixkra.

18 ã mẽ hkukamã ijamaxpêr anhỹr xà hkôt.

19 Anhỹr o mẽ harênh jakamã nhũm ra mẽ hkwỳjaja mẽ higêt kot amnhĩ nhĩpêx kaga hpa nê hpãnhã Tirtùm kôt amnhĩ xunhwỳ. Jakamã kwa kêr pu mẽ axte ja nhĩjuk ri mẽ kãm mẽmoj tã karô hkêt nê. Ja pix na mex. 20 ãm ja pix kot puj mẽ kãm hã karô nê hã kagã nê mẽ hwỳr kumê:

Mê kot sãnti hã mẽ õ hkur nê kot puj mẽ hkurê.

Nê mẽ kot mẽmo mry hpar nê hkamrô runh kêt rãhã hkur nê mẽ hkurê.

Nê mẽ kot mẽmo mry kamrô kur nê mããnên mẽ hkurê.

Nê mẽmyjaja kot amnhĩ prô pix tãnopxar ã mẽ kãm karô.

Nê mẽnijaja haxwỳja kot amnhĩ mjên pix tãnopxar ã mẽ kãm karô.

— ãm ja pix kot puj mẽ kãm hã kagã nê mẽ kãm hã karô. 21 Mẽ panhĩgêjtê mã finat Mojes kot ã mẽ kãm karô anhỹrja na htem arĩ krĩ piitã hkôt ã mẽ kãm hã karô anê. Mẽ panhõ arĩgromnu pê sap ã na htem arĩ ri Tirtùm kapêr o mẽ ahkre xà hã ixkre kamã ã mẽ kãm hã karô anê. Anê.

Mê kot Ijaew kêt xwỳnhjê hwỳr kagã mẽnh ã mẽ harênh

Karatas 5.1

22 Hãmri nhũm mẽ Xiakre kapêr mar o hkrĩ. Jejus nhỹ hã mẽ ahkre ho mẽ pa xwỳnh maatijaja nê mẽ kot hkwỳjê jahkre xwỳnhjaja nê Kris kwỳjê piitã Xiakre kapêr ma nhũm ja mẽ kãm mex nê. Jakamã nhũm mẽ axpên mã:

— Tôe. Nã ãm hãmri na Xiakre ã Ijaew kêt xwỳnhjê jarênh anê. Nã ja mex. Pu mẽ ã ãxiok nhõ xwỳnhjê mã ja hã kagã anê hãmri nê mẽ hwỳr kumê. Koja Pawre mẽ Panãpeja wa kupy nê ma akupỹm mẽ hwỳr o mỗ nê mẽ kãm kugõ. E mẽ pahtõ kot puj mẽ ma wa hkôt mẽ hwỳr mỗ? Anê.

Hãmri nhũm mẽ kuma nê Siras mẽ Jut Pasapas wa kuta. Jejus kôt mẽ kot axpên to htõ nê htõxjaja kot axpên mã hamê wa kot amnhĩ to mex xwỳnh ã wa harênh jakamã nhũm mẽ ma Pawre mẽ Panãpe wa hkôt mỗr kaxyw wa kuta. 23 Hãmri nê ãxiok kamã Kris kwỳ pê Ijaew kêt xwỳnhjê kaxyw kagã nhĩpêx nê kamã ã mẽ kãm kapêr anê nê mẽ kãm:

Pa? ãxiok mẽ Sir mẽ Siris kamã Ijaew kêt xwỳnhjaja? Xà mẽ amex? Mẽ ixpê Jejus kôt mẽ atõjaja na pa mẽ awỳr kagãja nhĩpêx nê mẽ awỳr kumê. Mẽ ixpê Jejus kôt mẽ kot amnhĩ xunhwỳr

xwÿnhjê jahkre ho ixpa xwÿnhjaja nê Jejus nhÿ hã mẽ ahkre ho mẽ pa xwÿnh maatijsaja pa mẽ awÿr kumê.

24Na xep ra ja rûm mẽ ixkwÿjaja ma mẽ awÿr mô nê mẽmoj tâ tanhmã mẽ amã karô hto. Mẽ ate amnhĩ my kwÿrèt kà jakàr nê amnepêm mẽ inhĩgêt Mojes kapêr kôt amnhĩ nhĩpêx o apa hã mẽ amã karô. Ka xep mẽ tee ri ja kukamã ajamaxpêr. No mẽ pajaja na pa prem mẽ awÿr mẽ rênh kêt nê. Âm amnhĩ krã hkôt na prem mẽ awÿr mô nê ã mẽ amã ja hã karô anê.

25Tã pa tee ri mẽ harênh ma nhũm ja mẽ ixpê omnuj tÿx nê. Jakamã na pa mẽ jar akuprô nê mẽ akaxyw mẽ inhĩôja wa kuta. Wa kot ma Panãpe mẽ Pawre wa hkôt mẽ awÿr wa môr nê mẽ amã mẽ ixkapêr jarênh kaxyw. Panãpe mẽ Pawreja mẽ inhmã wa hapê htÿx. 26Na hte mẽ amã Pahihti Jejus Kris kapêr jarênh o pa kaxyw wa amnhĩ grôn h kôt mẽ amã harênh o pa.

27Tã pa mẽ akupÿm mẽ awÿr wa kumê nê wa hkôt mẽ pahtô Jut mẽ Siras wa kumê. Mẽ ixte mẽ amã kagà kamã mẽ ixkapêrja nhũm wa kot hprĩ hã mẽ amã harênh kaxyw pa mẽ wa hkôt mẽ awÿr wa kumê.

28-29E ja pix nê kot paj mẽ akurê:

Kêr ka mẽ sãnti hã mẽ ô hkur kêt nê.

Nê mẽmo mry kamrô kur kêt nê. Jao mẽmo mry pa nê hkamrô runh kêt rãhã hkur kêt nê. Kamrô runh pa nê rĩ kormã tanhmã ho nê aku.

Nê kêr ka mẽ amyjaja amnhĩ prô pix tânopxar o apa.

Nê mẽ anijaja ajaxwÿja amnhĩ mjên pix tânopxar o apa.

E âm ja pix kot paj mẽ amã hã karô. Tĩrtũm Karô kãm ja mex. Nê mẽ inhmã mããnên ja mex. Kot kaj mẽ ã amnhĩ nhĩpêx anhÿr o ri apa nê amex nê apa.

Tã âm ja pix. Mẽ ixpê Jejus kwÿjê jahkre xwÿnhjê mẽ Jejus nhÿ hã mẽ ahkre xwÿnh maatijsê mẽ pa mẽ mẽ awÿr kagàja nhĩpêx nê kumê. E kêr ka mẽ amex nê akĩnh nê ri axpên kôt apa. Âm ja pix na hapêx. Anê.

Nhũm prem ã kagà kamã mẽ kãm mẽmoj tâ karô anê. 30Hãmri nê Jut wa mẽ kãm kugô nê ma Āxiok wÿr wa mẽ kumê nhũm wa mẽ ma akupÿm hwÿr o mô. Jut nê Siras nê Pawre nê Panãpeja nhũm wa mẽ ma akupÿm mẽ hwÿr o mẽ mô. Mõõ hãmri nê mẽ hwÿr pôj. Hãmri nê Jejus kwÿjê ho akuprô nê mẽ kãm kagàja gô 31 nhũm mẽ kupy nê kamã harê nê kuma. Kamã mẽ kot mẽ kãm mẽmoj tâ karô kamã harê nê kuma nê ÿ hã hkĩnh nê akupÿm tãm hamaxpêr.

32Jut mẽ Siras wa kêp Tĩrtũm nhÿ hã kapêr o pa xwÿnh na pre wa. Jakamã na prem mẽ hwÿr môn pôj hãmri mẽ kãm tanhmã ujarênh to

ho pa. Mě kot Jejus kôt pix mã hamaxpêr o pa kaxyw mẽ kãm ujarênh o pa nê mẽ kãm:

— E kêr ka mẽ mãmri Jejus kôt amnhĩ nhĩpêx mex rãhã ho ri apa nê aa hkaga hkêt nê. Anê.

33Hãmri nê mẽ hkôt ri pa hã apkati xohtô nê. Hãmri nê wa akupỹm Jerujarê hwỳr nojarêr nê mẽ kãm amnhĩ jarê nhũm mẽ wa kuma nê wa kãm:

— Tôe. Nà wa mãmri ma akupỹm mỗ. Koja Tĩrtũm war apumunh mex nê ka wa ma akupỹm amex nê akà hkĩnh pê akwỳjê hwỳr akato. Anê.

34Hãmri nhũm wa nojarêr tã nhũm Siras tanhmã hamaxpêr to nê hitôt nê mẽ kuri arĩk nhũm Jut Pasapas pix ma akupỹm hkwỳjê kot mẽ hwỳr wa mẽnh xwỳnhjê hwỳr mỗ.

35Hãmri nhũm Pawre mẽ Panãpe wa Siras pyrã nê kormã Åxiok kamã pa. Hãmri nê Jejus kôt mẽ htô hkwỳjê mẽ pimràatã mẽ ahkre ho pa. Tĩrtũm kapêr o mẽ hkôt mẽ ahkre ho pa.

Pawre mẽ Panãpe wa kot axpên pê pikjêr ã wa harênh

Atre 13.13; Korosê 4.10

36Hãmri nhũm Pawre mẽ Panãpe war arĩ mẽ hkôt ri pa hã apkati xohtô nê. Tã nhũm Pawre hamaxpêr nê Panãpe mã:

— Kwa ma pu ma akupỹm ra pahte krĩ hkwy hkôt mẽ kãm Jejus jarênh o papa xwỳnhjê hkôt akupỹm mỗ. Pu ma mẽ hwỳr mỗ nê Jejus kôt pahtô nê pahtõxjê kot tanhmã ri amnhĩ nhĩpêx to hã mẽ omu. Anê.

37Hãmri nhũm kuma nê kãm:

— Tôe. Nà pu ma mỗ. Nom kêr pu ma amnhĩ kôt Juãw Makre ho mỗ kê axte pahto ajuta ho pahkôt mỗ. Anê.

38Hãmri nhũm Pawre tee ri kuma nhũm ja kêp omnuj nê nhũm kãm:

— Tk. Kwa na pre pahkôt pa htã Pãpir kamã tanhmã hamaxpêr to nê pahkaga nê ma akupỹm Jerujarê hwỳr mỗ. Jakamã kwarĩ koja axte pahkôt mỗr kêt nê. Anê.

39Hãmri nhũm Panãpe tee ri hã hihtỳx no nhũm kêp hkaga kumrêx. Jakamã nhũm wa ja hã axpên pê axkjê nê ma ahpỹnhã mỗ. Nhũm Panãpe amnhĩ kôt Juãw Makre ho mỗ nê wa ma pàr kãm gô hipôk pê Sipre hwỳr wa mỗ. 40Nhũm Pawre axtem amnhĩ kôt Siras wỳ nê ma wa mỗ. Hãmri nê wa nojarêr nhũm Jejus kôt wa htôjaja wa ho Tĩrtũm wỳ nê kãm:

— Pa Tĩrtũm. E koja Pawre mẽ Siras wa ma krĩ hkwy hkôt mẽ kãm akapêr jarênh o ri wa pa. Jakamã kêr ka wa htãnopxar o ri wa hkôt apa. Anê.

Hãmri nhũm wa kato nê ma krĩ hkôt ri Jejus kapêr o mẽ ahkre ho wa pa. 41Wa ma pyka pê Sir mẽ Siris kôt Jejus kôt mẽ htô nê mẽ htõxjê pumunh nê Jejus kôt mẽ ho mẽ hihtỳx o wa pa kaxyw.

Ximotre kot Pawre mẽ Siras wa hkõt ri pa hã harënh*Wam Ximotre 1.1-2; Sikũn Ximotre 1.5; Piripos 2.19-22*

16 ¹⁻³Tã nhũm Pawre mẽ Siras wa ma akupỹm krĩ pẽ Tepe hwỳr wa mõi nẽ hwỳr pøj nẽ hpãnhã kurũm ma Risti hwỳr mõi. Hãmri nẽ wa hwỳr pøj nẽ kamã Ximotre pumu. Ximotre na pre ra katorxà pyrà nẽ Jejus kõt amnhĩ xãm nhũm mẽ kot Jejus kõt axpẽn to htõ xwỳnhjaja kãm hapẽ nẽ. Nẽ kot Jejus kapër kõt amnhĩ nhĩpêx mex o pa hã axpẽn mã harẽ.

Krĩ pẽ Risti mẽ Ikõn kamã nhũm prem ã axpẽn mã Ximotre jarënh anhỹr o pa. Jakamã nhũm Pawre mẽ Siras wa mõi nẽ mẽ hwỳr pøj nẽ Ximotre kot amnhĩ nhĩpêx ã omu nhũm Pawre kãm war amnhĩ kõt o mõi prãm nẽ. Nom Ximotre hkamrõ pihkàr na pre. Katorxà kệp Ijaew nhũm hipêêxà kệp Gres jakamã nhũm ã Ximotre hkamrõ pihkàr anẽ. Nhũm Ijaew kot katorxà hkõt kệp Ijaew ã omunh jakamã nhũm Pawre hamaxpër nẽ mẽ kaxyw kệp my kwỳt kà krãhta nẽ arĩ kormã mẽ hwỳr amnhĩ kõt o mõi. ⁴Hãmri nẽ mẽ ma krĩ hkwyỳ hkõt mõi. Mõi nẽ Ijaew kêt xwỳnhjaja ra kot amnhĩ kaxyw Jejus kõt hamaxpër xwỳnhjê jahkre ho mẽ hkõt pa. Ra Jerujarẽ kãm mẽ kot Jejus kwỳjê jahkre ho pa xwỳnhjê mẽ Jejus nhỹ hã mẽ ahkre xwỳnh maatijaja mẽ kot mẽ kãm mẽmoj tã karõta nhũm mẽ ma mẽ kãm harënh o ri mẽ hkõt pa. ⁵Hãmri nhũm mẽ kuma nẽ ra Jejus kõt amnhĩ nhĩpêx mex o mõi. Hãmri nhũm apkati mẽ krĩ nhõ xwỳnh kwỳjaja mẽ uràk nẽ Jejus kõt amnhĩ xunhwỳ. Jakamã nhũm mẽ ra ohtõ rax o mõi.

Pawre tanhmã hpimtir to hã harënh*Rõmãn 15.18-21*

⁶Tã nhũm Pawre mẽ Siras mẽ Ximotre mẽ ma pyka pẽ As wỳr nojarêt. Mẽ kot mẽ kãm tanhmã Jejus jarënh to ho pa kaxyw mẽ hwỳr nojarêt tã nhũm Tĩrtũm Karõ kormã mẽ nẽ mẽ hkurẽ. Jakamã nhũm mẽ hpãnhã ma pyka hkwyỳ pẽ Prik mẽ Karatas wa hkõt pa. Ixpẽ Rukre na pa pre mẽ hã ajêt nẽ ma mẽ hkõt ixpa ho ixpa. ⁷Hãmri nẽ mẽ pyka pẽ Mĩs ã mõi nẽ hpãnhã ma Pitĩn wỳr inhmõi mã tã no nhũm Tĩrtũm Karõ axte kê mẽ nẽ mẽ ixkurẽ. ⁸Jakamã pa mẽ arĩ Mĩs jakàr ã mõi nẽ gõ xujanàr mỳ ri krĩ pẽ Tõx wỳr pøj.

⁹Tã nhũm kamàt pa mẽ ixpiitã gõi nẽ inhĩkwỳ nhũm Pawre tanhmã hpimtir to. Nhũm xep pika pẽ Masetõn nhõ xwỳnhja mẽ amnhĩ wỳr hwỳr kãm hihtỳx o xa nhũm hprĩ hã omu nẽ kapër ma. Nhũm xep pre kãm:

—Pa Pawre? Kwa amnẽ Masetõn wỳr mẽ ixwỳr mõi nẽ tanhmã mẽ ijahkre hto. Anẽ.

¹⁰Hãmri nhũm Pawre hkrãkato nẽ mẽ inhmã hpimtir jarẽ. Pa mẽ kuma nẽ axpẽn mã:

—Tô kwa tokyx pu mẽ hwỳr. Tirtùm kot mẽ hwỳr mẽ parënh kênã. E pu mẽ ma mẽ hwỳr mō nê mẽ kãm Jejus jarënh o mẽ ahkre. Anê. Hãmri nê amnhĩ to akuprô nê mẽ hwỳr inhnojarêt kurê kumrêx.

Ritre kot Jejus kôt amnhĩ xãm ã harënh

Piripos 1.1

11Hãmri pa mẽ ma Masetôn wỳr mō. Tôx rùm ma pàr kãm hwỳr mō. Hãmri nê gô nhĩpòk pê Samôtas wỳr pøj nhũm mẽ hã pàr nhô. Hãmri nhũm apkati pa mẽ axte mō nê Masetôn kamã krĩ pê Nêap wỳr pøj. 12Hãmri nê pàr rùm ijapøj nê hpãnhã kurùm hamũ krĩ pê Piripos wỳr ixpar o mō. Piriposja Masetôn kamã krĩ maati na. Rôm nhô xwỳnhjaja na prem ho kato. Jakamã pa prem ma hwỳr mō nê pøj nê tokyx axte kurùm nhỹhỹm inhmôr kêt nê. 13Hãmri nhũm sap kato pa mẽ axpên mã:

—Kwa pyhti mỳri mãn hte Ijaewjaja axpên wỳr akuprô nê Tirtùm mã amnhĩ jarënh o hkrĩ nà. E kwa pu mẽ hwỳr nê gô mỳri mẽ hapêr o ri papa. Anê.

Hãmri nê ma hwỳr mra nê mẽ hapêr o ri ixpa nhũm ãm mēni pixjaja axpên wỳr akuprô. Pa mẽ omu nê mẽ kuri ixkrĩ nê mẽ kãm Jejus kapêr jarënh o mẽ ahkre o ixkrĩ. 14Nhũm mẽ kot mẽ inhmar o hkrĩ xwỳnhjê hō pê Ritreja. Krĩ pê Xijaxir nhô xwỳnh na pre. Nê kêp kupêxê mex o wênê xwỳnh. Na pre hte kãm Tirtùm prãm o pa. Jakamã nhũm Pawre kot mẽ ahkre ho ýrja rôm nhũm Pahihti Jejus tanhmã Ritre hkrã hto nhũm hprĩ hã Pawre kapêr mar tỳx nê. 15Hãmri nê amnhĩ kaxyw Jejus kôt hamaxpêr nê hkôt amnhĩ xãm kurê kumrêx. Ôrkwỹ kamã hkwyjê mẽ nhũm mẽ hkôt amnhĩ xunhwỳr pa. Jakamã pa mẽ kêp Jejus kwỳ hã mẽ hkrã kumrã. Mẽ piitã mẽ kot mẽ kêp Tirtùm kra hã mẽ omunh kaxyw. Hãmri nhũm Ritre amnhĩ kôt mẽ ixwỳ nê mẽ inhmã:

—An kot kaj mẽ ixte Jejus kôt amnhĩ xãm tỳx ã ixpumu hã kot kaj mẽ ma ixkôt mō nê hpãnhã inhörkwỹ kamã pøj nê apa. Anê.

Pa mẽ kuma nê ma hkôt mō.

Mẽ kot Pawre mẽ Siras wa haxàr ã mẽ harënh

Makre 1.23-26, 1.34

16Tã nhũm arĩgro hō hã pa mẽ Tirtùm mã amnhĩ jarënh kaxyw axte pyhti mỳri mẽ pikuprôn h xàja wỳr mō. Hãmri nê pry kamã mẽ kãm àpênh xwỳnh nija pumu. Ra mẽkarômnuti kot tanhmã hkrã hto nhũm ý hã àhpumunh tỳx xwỳnhja. Nhũm hte mẽkarômnuti nhỹ hã mẽ kãm mẽmo hkukamã tanhmã ujarënh to ho pa. Jakamã nhũm ò patrãwjaja kukwak ri ujamỳnh rũnh pê hkĩnh nê pa. 17Jakamã pa mẽ mō nhũm nija mẽ ixpumu nê mẽ ixtã ajêt nê ma mẽ ixkôt mō. Hãmri nê mẽ kãm mẽ ijarënh o mẽ ixkôt mō nê mẽ kãm:

—Xê mẽ mran jajê pumu. Na htem Tirtùm maati mã tanhmã amnhĩ

nhîpêx mex to ho pa. Tirtûm kot mẽ ate amnhî tomnuj pê tanhmã mẽ apytâr to hã mẽ amã ujarênh kaxyw na mẽ awÿr mra. Anê.

18Nê ãm xatã mẽ kãm mẽ ijarênh o mẽ ixkôt paja o ra hã apkati xohtô nê. Tã nhûm Pawre ra kãm mar kaga nê nê mẽkarõmnuti mã kapêr nê kãm:

—Tk. Kwa kêp akato nê ma tẽ. Pa Jejus Kris nhÿ hã amã ixkapêr ka inhma nê kêp akato nê ma atẽm kurê kumrêx. Anê.

Hãmri nhûm kuma nê kêp kato nhûm akupÿm tãm hkrã. 19Jakamã nhûm õ patrãwjaja tee ri ja hã omu nê gryk tÿx nê axpên mã:

—Kwa ra mẽkarõmnutijaja kêp kator jakamã koja axte mẽmoj kukamã tanhmã ujarênh to hkêt nê. Pu mẽ kukwak ri axte paxujamÿnh kêt nê. Anê.

Hãmri nê Pawre mẽ Siras wa kamã gryk tÿx nê. Hãmri nê wa unê nê ma mẽ kot axpên mar xà hã ixkre hwÿr wa hkjênh o tẽ 20nê mẽ kot mẽ ho amnhîptâr xwÿnhjê mã tanhmã wa ho hêx to nê mẽ kãm:

—Kwa mẽ amnê Ijaewja wa omu. Na hte wa mẽ panhõ krî kamã hêx pix o pa nhûm mẽ tee ri wa kapêr ma nê wa kamã gryk tÿx nê. 21Mê ixte amnhî nhîpêx te kot axpên pyrãk kêt tã nhûm wa mẽ kot amnhî nhîpêx o mẽ pajahkre kaxyw nhÿhÿnh mẽ pahwÿr mō. Nom mẽ pahpê Rôm nhõ xwÿnhjaja axtem mẽ pahte amnhî nhîpêx kênã kot pu kêt wa kuma nê wa kapêr kôt amnhî nhîpêx. Anê.

22Hãmri nhûm mẽ kuma nê piitã wa kamã gryk tÿx nê. Hãmri nhûm mẽ ho amnhîptâr xwÿnhjaja wa kêp wa ê kaxõnh o hkapa nê wa hã mẽ õ pôristi mã amÿnê nê mẽ kãm:

—E mẽ ma wa o tẽ nê mẽ htak xà ho wa htak. Anê.

23Hãmri nhûm mẽ kuma nê ma wa o tẽ nê wa htak rax nê. Hãmri nê wa haxà nê mẽ hagjênh xà jamãr xwÿnh mã kãm:

—E kêr ka ja wa omunh mex nê kê wa kator kêt nê. Anê.

24Hãmri nhûm mẽ kuma nê wa o tẽ nê ixkre jatur xà kamã wa haxà nê wa kator pymaj hamê wa htem pî jaxà nê ho htÿx nhûm wa arî hte tÿx nê nhÿ.

25Tã nhûm kamãt. Nê kôt ã kamãt nhûm wa Tirtûm mã amnhî jarê nê mex o mex ã wa grer o wa nhÿ nhûm wa urãk nê mẽ hagjênh xwÿnhjaja wa mar o hkrî. 26Puh nhûm pyka mẽ kãm htertet tÿx nê nhûm mẽ hã ixkreja amnhî to àpêr tÿx nê amnhî kahê xà rênh pa. Nhûm mẽ hagjênh xwÿnhjê kaxpre xà piitã mẽ nê pirênh pa. 27Hãmri nhûm mẽ hamãr o kuhê xwÿnhja



Atre 16.21-24

pika tertet kamã ama nê hkrãkato. Hãmri nê mê hã ixkre jakwakre kahê xà rênh parja pumu nê mê hagjênh xwÿnhjaja hapôx par ã mê hkamnhîx nê tee ri amnhî kukamã hamaxpêr. Hãmri nê pahi kot mê hã hpîr pymaj ò wapo kapa nê ra tãm kot ho amnhî pîr kaxyw. **28**Hãmri nhûm Pawre tee ri ja hã omu nê kàx pê kãm amÿra nê kãm:

— Kwa amnhî pîr kêt nê. Ot pa mê arî ixpiitã ixkuhê. Na pa mê ixtõ ixkator nê ixprõt kêt nê. Anê.

29Hãmri nhûm kuma nê kanê hã ahwÿ nê kuwy nê mê hwÿr axà nê mê piitã mê omu. Hãmri nê Pawre mê Sirasja wa omu nê wa hwÿr kãm ma ho htertet o tẽ. Hãmri nê wa hã hpijaàm kaxyw wa kutã tẽm nê hkônkrã ho nhÿ. **30**Hãmri nê kànhmã xa nê wa ho kato nê ixkre kapem wa o xa nê wa kãm:

— Kwa tanhmã kot pa amnhî nhîpêx to kê Tirtûm war apyrã nê ixte amnhî tomnuj pê ixpytã? Anê.

31Hãmri nhûm wa kãm:

— Nã kot kaj amnhî kaxyw Jejus Kris kôt ajamaxpêr nê hkôt amnhî xãm nhûm Tirtûm ja hã apumu nê amnhî katut kôt ate amnhî tomnuj piitã rênh pa. Nhûm anhörkwÿ kamã akwÿjaja apyrã nê Jejus kôt amnhî xunhwÿ nhûm ã mê hipêx anê. Anê.

32Hãmri nê wa ma hkôt örkwy hwÿr tẽ nê hprî hã mê kãm Tirtûm kapêr jarê nhûm mê wa mar o hkrî. **33**Hãmri nhûm mê hagjênh xà jamãr xwÿnhja wa kãm wa htak xà kuhõ. Kormã kamãt kô hkwy kamã wa kãm kuhõ nê hkane. Hãmri nhûm wa mê kot Jejus kôt amnhî xunhwÿr par ã mê omu nê mê hkrã kumrã. Mê hamãr xwÿnh mê hkwyjê mê hkrã kumrãr pa. **34**Hãmri nhûm mê kot amnhî kaxyw Tirtûm kôt hamaxpêr jakamã piitã hkînh nê. Hãmri nhûm mê hamãr xwÿnhja örkwy hwÿr Pawre mê Siras wa o tẽ nê wa kãm ò nhûm wa apku nhûm ma akupÿm mê hagjênh xà hwÿr wa o tẽ nê akupÿm wa haxà.

Mê kot Pawre mê Siras wa kãm urer ã mê harênh

Atre 22.25-29

35Hãmri nhûm apkati nhûm krî pytãr xwÿnhjaja mê ò pôristi mã anê nhûm mê hagjênh jamãr xwÿnh wÿr tẽ nê kãm:

— E na mê papytãr xwÿnhjaja ate Pawre mê Siras wa kãm anhürer nhûm wa mãmrî ma akupÿm htẽm kaxyw hã karõ. Anê.

36Hãmri nhûm mê kuma nê wa hwÿr axà nê wa kãm:

— E na krî pytãr xwÿnhjaja ixte war akator kaxyw war atã inhmã karõ. Jakamã e wa mãmrî axãmnhîx ma mõi. Anê.

37Hãmri nhûm Pawre kãm:

— Nã wa ixte tanhmã amnhî tomnuj to hkêt tã nhûm mê kot wa ixpynênh nê wa ixtak. Wa ijaxwÿja wa ixpê Rõm nhõ xwÿnh tã nhûm prem axtem nê mê piitã mê noo mã wa ixtak nê wa ijaxà. Mê kot amarî

Rõm nhõ xwÿnh tak nẽ mẽ hagiênh kêt tã nhũm mẽ ã mẽ noo mã ã wa inhîpêx anê. Kormã wa ixte tanhmã amnhĩ tã ixàprâr to hkêt tã nhũm mẽ ã wa inhîpêx anê. Jakamã kwarĩ kot kaj mẽ no hkàx ã wa ixkator kêt nẽ. Kê mẽ kot wa ijaxàr xwÿnhjaja tãm man mra nẽ wa ixkator pa war arĩ ma mõi. Anê.

38Hãmri nhũm pòristija kuma nẽ ma akupÿm mẽ hwÿr mra nẽ mẽ kãm wa kapêr jarê. Hãmri nhũm mẽ tee ri mẽ uràn wa kêp Rõm nhõ xwÿnh ã wa harênh ma nẽ kãm ma htÿx nẽ. 39Hãmri nẽ ma wa hwÿr tẽ nẽ wa hwÿr axà nẽ wa kãm:

—Pa? E mãmrĩ war akato nẽ axàmnhĩx ma mõi. Na pa prem war anhîpêx kati rax nẽ. Tã kêr ka wa axte ja mã ajamexpêr hkêt nẽ. Kê ja ãm jar mẽ pakamã hapêx. Anê.

Hãmri nẽ wa kator nẽ wa kãm:

—E kwa wa mẽ inhõ krĩ pê akato nẽ ma nhÿhÿm mõi. Anê.

40Hãmri nhũm wa kuma nẽ kato nẽ ma akupÿm Ritre nhõrkwÿ hwÿr wa tẽ. Hãmri nẽ Jejus kôt wa mẽ htõjê pumu nẽ wa mẽ kãm amnhĩ jarê nẽ mẽ kãm:

—E kot paj hãmri wa mã mõi. Nom kêr ka mẽ arĩ Jejus Kris kôt amnhĩ nhîpêx mex rãhã ho ri apa nẽ aa hkaga hkêt nẽ. Anê.

Hãmri nẽ wa mẽ kurũm kato nẽ ma krĩ hõ hwÿr wa mõi.

Tesarõn kamã mẽ kot wa kamã gryk ã mẽ harênh

Wam Tesarõn 1.1, 2.13-14

17 1-2Tã nhũm Pawre mẽ Sirasja wa ma krĩ hkwy hkôt pa. Piripos rũm ma Apiporip mẽ Apòrõn kôt wa mõi hãmri nẽ ra Tesarõn wÿr wa pøj. Na pre hte Pawre nhÿri pøj nẽ Ijaew nhõ Tirtũm kapêr o mẽ ahkre xà hã ixkre hwÿr agjê nẽ kamã mẽ kãm Jejus kapêr jarênh o kuhê. Jakamã nhũm wa mõi nẽ Tesarõn wÿr pøj nẽ ixkre hwÿr mẽ hwÿr tẽ nẽ mẽ kãm ujarênh o xa. Nẽ mẽ kãm ujarênh o hã arigromnu pê sap o axkrunêpxi. 3Nẽ hprĩ hã mẽ kãm tanhmã Tirtũm kapêr jarênh to nẽ mẽ kãm:

—Nà Tirtũm kapêr ã kagà htũm kot mẽ pakaxyw ãm xwÿnh jarênh. Amnhĩ xà htÿx kamã hamak kãm htyk hãmri nẽ akupÿm htĩr ã nhũm kot hkukamã harênh. Tã na pre Jejusja ã amnhĩ nhîpêx anê. Tãm kêp Krisja. Tirtũm kot mẽ pakaxyw ãm xwÿnhhta na. Anê.



Atre 17.1-4

4Hāmri nhūm mẽ hkwỹja kuma nẽ wa hkõt hamaxpẽr nẽ wa urak nẽ Jejus kõt amnhĩ xunhwỳ. Ijaew kwỳjê nẽ Ijaew kêt xwỳnh kwỳjaja nẽ mẽni kot amnhĩ to rũnh xwỳnh kwỳjaja nhūm mẽ ohtô nẽ amnhĩ kaxyw Jejus kõt hamaxpẽr nẽ hkõt amnhĩ xunhwỳ. 5Tã nhūm Ijaew kwỳjaja tee ri hkwỹ kot wa hkõt amnhĩ xunhwỳr ã mẽ omu nẽ mẽ hã Pawre mẽ Siras wa kamã gryk tỳx nẽ. Hāmri nẽ ma mra nẽ wa kaxyw mẽ kot amnhĩ tomnuj tỳx xwỳnh kwỳjê ho akuprô nẽ mẽ kãm wa hã amỳnẽ. Jakamã nhūm mẽ ma kapẽr punuj pẽ wa hapêr o ri mra nhūm mẽ piitã mẽ omu nẽ mẽ kuma. Hāmri nhūm mẽ wa hapêr o ra Jasãw nhõrkwỹ hwỳr mra. Nẽ mẽ kot Pawre mẽ Siras pynênh nẽ ma mẽ utar xwỳnhjê hwỳr wa o htêm kaxyw mẽ kệp kahê xà mẽ nẽ mẽ hwỳr agjê. 6Hāmri nẽ tee ri õrkwỹ kamã wa hapêr nhūm wa kamã amrakati. Jakamã nhūm mẽ Jasãw mẽ kot Jejus kõt axpẽn to htõ xwỳnh kwỳjê pynê nẽ ma mẽ kot mẽ ho amnhĩptar xwỳnhjê hwỳr mẽ o mra. Hāmri nẽ mẽ kãm tanhmã Pawre mẽ Siras wa ho hêx to. ãm kapẽr punuj kãm kax pẽ mẽ kãm wa harẽ nẽ mẽ kãm:

—Kwa na hte Pawre mẽ Siras wa pyka piitã hkõt mẽ kãm ri mẽmoj to hêx o pa. Tã wa ra mẽ panhõ krĩ hwỳr pøj nẽ jar mẽ pamã ri tanhmã hêx to ho ri mẽ pahkõt pa. 7Jasãw nhõrkwỹ kamã na pre wa pøj nhūm amnhĩ wỳr wa kuwỳ. Na hte wa hkõt mẽ hamaxpẽr xwỳnhjaja pahihiti Sesti kapẽr kwỳm ri kuhpa hã kapẽr o pa nẽ axtem nẽ mẽõ pahi pẽ “Jesús” anhỹr xwỳnhja kapẽr kõt amnhĩ nhĩpêx o pa. Anẽ.

8Hāmri nhūm mẽ kot mẽ ho amnhĩptar xwỳnhjê mẽ krĩ nhõ xwỳnhjaja mẽ kuma nẽ gryk tỳx kumrêx. 9Hāmri nẽ Jasãw mã kãm:

—E kot paj mẽ apê mẽ akaxpore hkwỹ jamỳ. Ka mẽ ajapøj nẽ ma mẽ panê Pawre mẽ Siras wa hano nhūm wa kato nẽ ma mẽ pa rĩ akupỳm mẽ amã kugõ. Anẽ.

Hāmri nẽ mẽ kệp mẽ hikaxpore hkwỹ jamỳ.

Pawre mẽ Siras kot Perej wỳr mõi ã wa harênh

10Tã nhūm ra kamat nhūm mẽ kot Jejus kõt axpẽn to htõjaja hāmri Pawre mẽ Sirasja wa ma krĩ pẽ Perej wỳr wa kumẽ. Hāmri nhūm wa kato nẽ ma hwỳr mẽ nẽ hwỳr pøj. Hāmri nẽ Ijaew nhõ Tĩrtũm kapẽr o mẽ ahkre xà hã ixkre hwỳr htêm kurê kumrêx nẽ wa axà. 11Perej kamã Ijaew na pre te mẽ kot Tesarõn kamã Ijaew pyrak kêt nẽ. Mẽ kurom mẽ kãm Tĩrtũm kapẽr mar prãm nẽ. Jakamã nhūm pre Pawre mẽ Siras Tĩrtũm kapẽr o mẽ ahkre ho pa. Apkati mẽ mẽ ahkre mex o pa nhūm mẽ wa kuma nẽ hkĩnh nẽ. Nẽ Tĩrtũm kapẽr ã kagà htũm kamã wa kot mẽ ahkreta japêr nẽ kamã omu nẽ axpẽn mã wa harênh o:

—Nà ãm hāmri na wa ã Tĩrtũm kapẽr o mẽ pajahkre anẽ. Tĩrtũm kapẽr ã kagà htũm hkõt na hte wa mẽ pajahkre. Anẽ.

12Hāmri nē ohtô nē Jejus kôt amnhĩ xunhwỳ. Ijaew kwỳ nē Ijaew kêt xwỳnh kwỳ nē mēni kot amnhĩ to rũnh xwỳnhjaja nhũm mē ohtô nē Jejus kôt amnhĩ xunhwỳ.

13Tã nhũm Tesarõn kãm Ijaewjaja Pawre jarēnh ma. Kot Perej nhõ xwỳnhjê mã Tĩrtũm kapēr jarēnh o pa hã harēnh ma. Hāmri nē ma mē hwỳr mra nē mē kãm tanhmã ho hêx to nhũm krĩ nhõ xwỳnhjaja mē kuma nē ra Pawre kamã gryk tỳx nē. 14Jakamã nhũm Jejus kôt mē htõjaja mē harēnh ma nē mē umaj Pawre kator nē ma gô xujanār wỳr o mō. No nhũm Siras mē Ximotre wa Perej kamã mē kuri arĩk. 15Hāmri nhũm mē hkwỳjaja ma Pawre o mō. Ma krĩ pē Atenas wỳr o mō. Hāmri nē hwỳr o pøj nē kamã kure. Hāmri nē ra akupỳm Perej wỳr nojarêt nhũm Pawre mē kãm:

—E kêr ka mē ma akupỳm mō nē Siras mē Ximotre wa kãm ijarē kê war amnhĩm nojarêt nē tokyx man ixkôt wa mō. Anē.

Pawre kot Atenas nhõ xwỳnhjê mã kapēr ã harēnh

Rômãn 1.18-20

16Tã nhũm Pawreja kormã Atenas kamã pa. Siras mē Ximotre wa kamã hamak o ri kormã kamã mē kot amnhĩ nhĩpêx ã mē omunh o pa. Na pre Atenas nhõ xwỳnhjaja sãnti ho ohtô rax nē mē õ krĩ kamã unhwỳ nhũm Pawre ri omunh o ri kuhê ho pa. Na pre htem ahpỳnhã mēmo karõ nhĩpêxja o te Tĩrtũm nhĩpêx pyrã nē kutã hkõn krã ho rôrõk nē hkrĩ nē kãm mex o mex ã harēnh o pa. Hāmri nhũm Pawre tee ri ja hã mē omunh o ri mē hkôt pa nē hkaprĩ nē. 17Hāmri nē ma amnhĩ kwỳjê nhõ Tĩrtũm kapēr o mē ahkre xà hã ixkre hwỳr pa nē kamã mē ahkre ho kuhê. Ijaewjê mē Ijaew kêt xwỳnh kot Tĩrtũm ã hpijaàm xwỳnhjê mã nhũm Tĩrtũm kapēr jarēnh o kuhê. Nē apkati mē mē kot mēmoj to wēnê xà hwỳr mra nē mē ujaarõr xwỳnhjê mã Tĩrtũm kapēr jarēnh o kuhê. 18Hāmri nhũm mē mar o pa. Atenas nhõ xwỳnhjaja na prem axpēn kôt amnhĩ nhĩpêx o pa hkêt nē. Mē hkwỳjaja kēp Epikure hkôt amnhĩ nhĩpêx xwỳnh. Nē mē hkwỳjaja axtem kēp Etok kôt amnhĩ nhĩpêx xwỳnh. Hāmri nhũm Pawre mē kãm Jejus kot tanhmã mē panê amnhĩ nhĩpêx to hã harēnh o pa nē akupỳm htĩr ã harēnh o pa. Hāmri nhũm mē tee ri kuma nē hã axpēn kukjêr o kuhê nē axpēn mã:

—Tk. Kwa mo na hte myti ata harēnh o pa? Anē.

Nhũm mē hkwỳja mē kãm:

—Ko. Axtem mēpahpãm õ na hte tanhmã harēnh to. Anē.

19-21Atenas nhõ xwỳnhjê mē axtem krĩ hõ nhõ xwỳnhjaja na prem kãm mē ujarēnh nyw mar prãm nē. Jakamã nhũm prem mēmoj jarēnh nyw ma hāmri nē ãm axpēn mã harēnh pix o ri pa. Tã ra Pawre xujarēnh nyw ma nē ma amnhĩ kôt mē kot axpēn mar xà hã ixkre hwỳr o tē. Ixkre pē Areopja wỳr nhũm prem amnhĩ kôt o tē nē kãm:

—E kwa aprĩ hã mẽ inhmã ate mẽmo jarēnh nywta jarē pa mẽ ama. Mẽ inhmã mar prãm. Anẽ.

22Hãmri nhũm mẽ kuma nẽ mẽ kãm ujarēnh o xa. Mẽ kot axpēn mar xà hã ixkre kamã Atenas nhõ xwỳnhjê mã awjarē nẽ mẽ kãm:

—E nà na ka htem anhõ mẽmo karõ nhĩpêx xohtôta ã apijaàm pẽ kãm amnhĩ jagrer o ri apa. Pa hte ja hã mẽ apumunh o mẽ akõt ixpa. 23Na pa ra mẽ anhõ sãnti piitã hkõt omunh o ri ixpa nẽ o mũj hõ kuhê xà kaprỹja wỳr ixkato. Nhũm himõk ã mẽmo karõ nhĩpêx amrakati nom à hã kagà kot:

MĒPAHPĀM PUMUNH KĒT KUHÊ XÀ NA JA

Ã mẽ ate hã kagà kot anhỹr. Mẽ ate omunh kêt tã ka htem arĩ hã apijaàm o ri apa. No pa na ixte mēhõja jarēnh mar mex. Tã kot paj mẽ amã harẽ ka mẽ inhma.

24—Mēpahpãm mẽ ate omunh kêt ã amnhĩ jarēnhta Tĩrtũm na. Tãm na pre pyka ho kato nẽ kamã mẽmoj piitã ho kator pa. Gõ ho kato nẽ mry ho kato nẽ panhĩ ho kato. ãm mẽmoj piitã ho kator par kumrêx. Na hte pika kamã nẽ kaxkwa kamã mẽmoj piitã ho amnhĩptàr mex rãhã ho pa. Jakamã mẽmo kaxyw kot puj mẽ jar kãm õrkwỹ nhĩpêx? Tãm kēp mẽmoj piitã ho kator xwỳnh jakamã kot mẽmoj to presija hkêt. 25Kēp mẽmoj piitã hpãm jakamã mẽmoj piitã õ na. Jakamã tanhmã kot pu wem amnhĩ to nẽ kãm mẽmoj gõ? Tãm kot mẽmoj piitã ho kator nẽ ho htĩr nẽ kot mẽmoj piitã õr kēnã kot puj kêt mẽ amnhĩ pyrã nẽ kãm mẽmoj gõ. 26Na pre mẽ pahkukamã ahpỹnhã mẽ pahpiitã mẽ papapxà jarē nẽ mẽ pakator hã arĩgro jarē. Na pre mẽ pahpãm kot wa Atãwja nhĩpêx. Jakamã nhũm Atãw kēp mẽ pahpiitã mẽ pahpàr krax.

27—Tã mẽmo kaxyw na pre ã Tĩrtũm mẽ panhĩpêx mex anẽ? Nà ãm mẽ pahte amnhĩ kaxyw hkõt pajamaxpēr nẽ hkõt amnhĩ xunhwỳr kaxyw na pre mẽ panhĩpêx. Ja mẽ pahpê hihtỹx kêt. Koja mēhõ kãm Tĩrtũm prãm nhũm amnhĩ tã omunh kurê kumrêx.

28—Nẽ Tĩrtũm pix kukwak ri na pu htem pahtĩr nẽ tanhmã amnhĩ nhĩpêx to ho ri papa. Mẽ akwỳ kot kagà jahkre xwỳnhja na pre ja hã kagà nẽ hã kagà ho: “Mẽ pahpê mẽpahpãm kra na pu htem papa.” Anẽ. ã hã kagà kot anhỹr.

29—Tã ka prem amnhĩm mẽmo karõ nhĩpêx. Ôr o hkwỳ nhĩpêx nẽ prat o hkwỳ nhĩpêx nẽ kēn o hkwỳ nhĩpêx. Hãmri nẽ hipêx pa nẽ ho mẽpahpãm ã harẽ nẽ ri hã apijaàm o apa. No mẽ ãm amnhĩ krã hkõt mẽ ate hipêx. Tĩrtũm te kot ja pyrãk kêt.

30—Amnepēm mẽ pa xwỳnhjaja na prem mẽ apyrã nẽ ã mẽmoj nhĩpêx anhỹr o pa nhũm Tĩrtũm ja hã mẽ omu nẽ ãm mẽ omu nẽ hã tanhmã mẽ hipêx to hkêt nẽ. Kormã mẽ kot kapēr mar kêt jakamã nhũm pre ja hã mẽ omu nẽ ãm mẽ omu. Tã na ra mẽ pahte mẽmo karõ nhĩpêx o mẽpahpãm nẽ mẽ pamã kapēr. Mẽ pahte hpãnhã amnhĩ kaxyw ãm kõt

pix mã pajamaxpër o papaja na kãm hprãm. ³¹Koja nhÿrmã tanhmã mẽ pahte amnhĩ nhĩpêx to ho papa hã mẽ pahpumunh kôt tanhmã mẽ pajarênh to. Nê amnhĩ ri mẽ htĩr tũm nê mẽ pa ho pa xwÿnhjê jarê nê amnhĩ ri mẽ pa hkêt xwÿnhjê jarê. Na pre ra ã mẽ harênh anhÿr kaxyw arĩgro hta. Arĩgrota ã kot hprĩ hã kãm tanhmã mẽ pajarênh to kaxyw na pre ra Jejusja xãm. Kaxyw na pre akupÿm ho htĩr. Nê akupÿm ho htĩr jao kot nhÿrmã kãm tanhmã mẽ pajarênh to xwÿnh ã ho amnhĩrĩt. Anê.

³²Nhũm pre ã Pawre mẽ kãm Tĩrtũm kapêr jarênh anê nhũm mẽ mar o kuhê. Kot mẽ kãm Jejus tyk nê akupÿm htĩr ã harê nhũm mẽ mar o kuhê. Nhũm mẽ hkwÿjaja kuma nê ãm kuma nê axtem nê ri hã akunha. Nom nhũm mẽ hkwÿjaja mẽ kurom mar tÿx nê Pawre mã kãm:

—E kwa mẽ inhmã ja mar prãm. Apkati hõ hã ka axte mẽ inhmã ja jarê pa mẽ ixprĩ hã mar mex nê. Anê.

³³Hãmri nhũm Pawre akupÿm nhÿri hpõx xà hã ixkre hwÿr ma tẽ. ³⁴Hãmri nhũm Xiõnis pê Areop kãm mẽ kãm kapêr xwÿnh nê mẽhõ ni pê Tãmariis nê mẽ hkwÿjaja kapêr mar tÿx nê amnhĩ kaxyw Jejus kôt hamaxpër nê hkôt amnhĩ xunhwÿ. Hãmri nê Pawre kôt pa.

Pawre Korĩt wÿr mõi ã harênh

Wam Korĩt 1.1-3

18 ¹Tã nhũm Pawre krĩ pê Atenas rũm kato nê ma krĩ pê Korĩt wÿr mõi nê pøj. ²Hãmri nê nhÿri Akirti pumu. Haxwÿja kêp Ijaew. Krĩ pê Põt kamã na pre kato. Tã ma pyka pê Itar wÿr mõi nê Itar kamã krĩ pê Rõm kamã hpãnã pa. Pa ho pa htã nhũm mẽ õ pahihtĩ Krawti tanhmã hamaxpër to hãmri nê mẽ amnhĩ nê Ijaew piitã mẽ hanor pa. Jakamã nhũm Akirti kato nê hprõ Prisire mẽ wa ma Korĩt wÿr mõi. Hãmri nê hwÿr pøj nê kamã pa ho pa. Jakamã nhũm Pawre Korĩt wÿr pøj nê wa omu ³nê wa kuri pøj nê wa hkôt ri pa. Nê Siras mẽ Ximotre wa kamã hamak pê wa ãhkõ hã ãpênh o pa. Wa uràk nê kupêxê pytĩ ho ixkre nhĩpêx nê ho wêñê ho ri wa hkôt pa. ⁴Hãmri nhũm sap kato nhũm ma Tĩrtũm kapêr o mẽ ahkre xà hã ixkre hwÿr pa nê kamã mẽ kãm Tĩrtũm kapêr jarênh o hkrĩ. Ijaew mẽ Ijaew kêt xwÿnhjê mã nhũm mẽ kãm ujarênh o hkrĩ. Nê mẽ kãm Jejus kot mẽ panê tanhmã amnhĩ nhĩpêx to hã harê.

⁵Tã nhũm Siras mẽ Ximotre wa ma Masetõn rũm Pawre wÿr mõi pøj. Jakamã nhũm Pawre axte ixkre nhĩpêx ã ãpênh kêt nê. Pãnã apkati mẽ Ijaewjê jahkre ho pa. Mẽ kãm tanhmã Jejus jarênh to ho ri mẽ hkôt pa. Kêp Tĩrtũm kot mẽ pakaxyw ãm xwÿnh ã harênh o ri mẽ hkôt pa. Xatã mẽ kãm ujarênh o pa. ⁶Nom nhũm mẽ kãm mar prãm kêt nê kamã gryk kato nê kãm kapêr punuj nê. Nhũm Pawre tee ri amnhĩ tã mẽ kuma nê mẽ kãm:

—E ixte mẽ amã Jejus kot mẽ panê tanhmã amnhĩ nhĩpêx to hã harênh tã ka mẽ amã mar prãm kêt nê. Nà mẽ kam nê mẽ mãmrĩ ate

amnhĩ tomnuj kãm ty nê arĩ kam amnhĩ pumu no ãm amnhĩ tã tanhmã inhmã nê hkêt nê. Ra mē ate Tĩrtũm kapēr kaga kênã. Nà kot paj mē akaga nê ma hpãnhã Ijaew kêt xwỳnhjê hkôt ri mē kãm ja jarēnh o ri ixa. Anê.

Hãmri nê kànhmã xa nê hinôkà kapa nê ho apê. Mē kot hkaga hã amnhĩ pumunh kaxyw nhũm mē noo mã ã amnhĩ nhĩpêx anê. 7Hãmri nê ixkre rũm kato nê hijuk ri Ijaew kêt xwỳnh pê Xijutre nhõrkwỹ hwỳr tē nê hpãnhã Xijutre hkôt pa ho pa. Xijutre kēp Ijaew kêt tã amnhĩ kaxyw Tĩrtũm mã hamaxpēr rãhã ho pa.

8Tã nhũm Ijaew õ pê Kriptija hkwyjê rom amnhĩ kaxyw Pahihti Jejus kôt hamaxpēr nê hkôt amnhĩ xãm. Kēp Ijaew nhõ Tĩrtũm kapēr o mē ahkre xà hã ixkre kamã mē ahkre xwỳnh na pre. Jakamã õrkwỹ kamã hkwyjê mē mē hpimràatã Pahihti Jejus kôt amnhĩ xunhwỳr pa. Nê krĩja kamã ra Ijaew kêt xwỳnh ohtô nê Kripti pyrã nê amnhĩ kaxyw Jejus kôt hamaxpēr nê hkôt amnhĩ xunhwỳ. Jakamã nhũm Pawre mē kēp Jejus kwỳ hã mē piitã mē hkrã kumrã.

9Tã nhũm kamàt nhũm Pawre gõr nê nõ nê amyti nhũm kēwe Pahihti Jejus axte hwỳr kato nê kãm kapēr nê kãm:

—Pa Pawre? E kwa kēr ka mãmri axãmnhĩx ri atar mē kãm ijarēnh rãhã ho ri apa nê amnhĩ kamã akahak o ri mē hkôt apa hkêt nê. 10Kot paj atãnopxa nhũm mēhõ tanhmã ato hkêt nê. Krĩ ja kamã koja mē ohtô nê ixkôt amnhĩ xunhwỳ. Anê.

11Nhũm pre ã Pahihti Jejus Pawre hpimtir kãm kãm kapēr anê. Jakamã nhũm Korĩt kãm arĩ ri mē hkôt pa ryy nê. Arĩ mē hkôt pa hã amgrã pyxi nê hkôt mytwrỹ kēp 6. Jao Tĩrtũm kapēr o mē ahkre ho ri mē hkôt pa.

12Tã nhũm Korĩt nhõ xwỳnhjê nhõ pika pê Gres kamã mē ho amnhĩptar xwỳnh nyw Gartija. Korĩt kãm pa jakamã nhũm Ijaew xaptar tũmrejaja Pawre pynê nê ma hwỳr o tē nê kãm tanhmã ho hêx to. 13Jakamã nhũm Ijaew pikuprõnh xà hã ixkre kamã mē kãm kapēr xwỳnh Sostenesja Garti mã Pawre o hêx nê kãm:

—Kwa jahti na hte mē ixpê Ijaew kot amnhĩ nhĩpêx kwỳm ri mē ahkre ho pa. Jao mē ixte axtem nê tanhmã Tĩrtũm kôt ri amnhĩ nhĩpêx to ho ri ixa kaxyw mē inhmã karõ ho pa. Nom mē ixte amnhĩ nhĩpêx kuhpa hã mē inhmã karõ. Anê.

14Hãmri nhũm ra Pawre kot Garti mã amnhĩ jarēnh mã tã nhũm Garti amnhĩ to wa nê hã mē kãm kapēr nê mē kãm:

—Tk. Kwa kot tanhmã amnhĩ tomnuj tore hã. Kot tanhmã amnhĩ tomnuj to nhũm mē ate inhmã harēnh ronhỹx pa arĩ mē ama nê tanhmã mē amã hipêx to. 15No xep ãm kot mē axaptar tũmrejaja kot amnhĩ nhĩpêx kuhpa hã pix mã kot amnhĩ nhĩpêx o pa kênã. Nê mē ate mē ahkre kuhpa hã kot ri mē ahkreja pix mỳrapê na ka mē kamã agryk nê

ã inhmã ho akapër anë. Nà kot paj ja hã tanhmã ho hkêt nê. Ka mẽ kam nê amnhĩ krã hkôt tanhmã ho hprãm xà hkôt tanhmã ho. Anë.

16Hãmri nê amnhĩ nê mẽ hano. 17Hãmri nhũm mẽ tee ri kuma nê ra Sostenes kamã gryk nê. Kot Garti mã tanhmã Pawre jarënh to htã nhũm kuma nê ãm mar jakamã nhũm mẽ hã Sostenes kamã gryk. Hãmri nê unê nê Garti noo mã htak o xa. Nê htak rax nê. Nom nhũm hã mẽ omu nê ãm mẽ omu nê nê tanhmã mẽ kãm nê hkêt nê.

Pawre kot akupỹm Āxiok wỳr mõi ã harënh

18Tã nhũm Pawre arĩ Korĩt kamã mẽ hkôt pa nê gaa nê nojarêt nê Jejus kôt htõjê mã amnhĩ jarë nê mẽ kãm:

— E kot paj ma akupỹm pika pê Sir wỳr mõi. Anë.

Hãmri nê mẽ kêp kato nê ma hwỳr mõi. Nê ma amnhĩ kôt Akirti mẽ hprõ Prisire wa o mõi. Mõi nê krĩ pê Sënkrej wỳr põi. Nhũm Pawre amnhĩ kukamã mẽmoj tã tanhmã Tĩrtũm mã amnhĩ jarënh to nê amnhĩ jarënh xà hkôt amnhĩ krã hkênh pa. Ijaew kot amnhĩ nhĩpêx xà hkôt ã amnhĩ nhĩpêx anë. Hãmri nê mẽ pàr wỳr agjê nê Sënkrej rũm kato nê ma Sir wỳr mõi. 19-21Mõi nê krĩ pê Epes wỳr põi. Hãmri nhũm Pawre mẽ hkwyjaja pàr rũm hapõi nê krĩ hwỳr agjê nê Ijaew nhõ Tĩrtũm kapër o mẽ ahkre xà hã ixkre hwỳr mra nê hwỳr agjê nhũm Pawre mẽ kãm Tĩrtũm kapër jarënh o nhỹ. Hãmri nhũm mẽ kuma nê kãm mar prãm nê. Nê kãm:

— Kwa anojarêt kêt nê. Kritpêm mẽ ixkôt ri apa ryre nê Tĩrtũm kapër o mẽ ijahkre. Mẽ inhmã ja mar prãm.

Anhỹr tã no nhũm mẽ kãm:

— Nà kot paj ma mõi. Nom koja Tĩrtũm nhỹrmã akupỹn mẽ awỳr inhmẽ pa man akupỹn mẽ awỳr mõi nê axte kapër o mẽ ajahkre. Anë.

Hãmri nê ma mõi. Ma Epes rũm pàr kãm mõi. Nom nhũm Akirti mẽ Prisireja wa Epes kamã arĩk nê hpãnhã kamã pa ho pa.

22Tã nhũm Pawre krĩ pê Sejarej wỳr põi. Hãmri nê hpãnhã kurũm ma akupỹm Jerujarë hwỳr mõi. Kot Jejus kôt htõjê pumunh mã ma mẽ hwỳr mõi. Hãmri nê mẽ hwỳr põi nê mẽ omu nê tanhmã mẽ kãm amnhĩ jarënh to nê mẽ kêp kato nê ma akupỹm Āxiok wỳr mõi. 23Hãmri nê hwỳr põi nê kamã mẽ hkôt ri pa ryy nê mẽ kurũm kato nê hpãnhã ma akupỹm pyka pê Prik mẽ Karatas wa hwỳr mõi. Nê kamã mẽ kot Jejus kôt amnhĩ xunhwỳr xwỳnhjê jahkre ho pa. Mẽ kot Jejus kôt amnhĩ nhĩpêx tỳx rãhã ho pa kaxyw mẽ hkôt mẽ ahkre mex o ri mẽ hkôt pa.

Apor kot Epes kãm Tĩrtũm kapër jarënh

Epes 1.1-2; Wam Korĩt 3.6-9

24Tã nhũm Epes wỳr Ijaew õ pê Aporja mõi nê hwỳr põi. Krĩ pê Aresãn kamã na pre kato. Na pre hte amnhĩ kaxyw Tĩrtũm kôt pix mã

hamaxpër nê kapër ã kagà htùm mar tỳx nê. Jakamã mê kãm harênh mex o pa nhũm mê piitã kãm mar prãm nê. **25**Nom kormã Jejus jarênh jatur xà mar kêt jakamã ãm mê kãm hkrax pix jarênh o pa. Juãw Paxis kot tanhmã mê ahkre htoja nhũm mar tỳx nê. Nê tanhmã kot mê hkrã kumrãr to ho paja nhũm mããnên mar tỳx nê. Jakamã na pre hte mê kãm ja pix jarênh o pa. No Jejus kêp Tirtũm kot mê pahwỳr mênh xwỳnh ã harênhja nhũm kormã mar kêt nê. Tã Epes wỳr mỗ nê pỏj. **26**Hãmri nê Ijaew nhỗ Tirtũm kapêr o mê ahkre xà hã ixkre hwỳr axà nê kamã mê kãm ujarênh o nhỹ. Amnhĩ kamã kahak kêt nê àmnhĩx ri mê kãm ujarênh mex nê. Hãmri nhũm Prisire mê Akirti wa kot mê kãm ujarênh ã kuma nê war axpên mã:

—Kwa mãn kormã Jejus jarênh piitã mar kêt. E pu amnhĩ kôt panhõrkwỳ hwỳr o tẻ nê pahprĩ hã kãm harênh jatur xàm kumê kê hprĩ hã mar pa. Anê.

Hãmri nê war amnhĩ kôt kuwỳ nê hprĩ hã kãm ujarênh jatur xàm kumê nhũm hprĩ hã harênh piitã mar tỳx nê.

27Tã ra pyka pê Gres wỳr nojarêr nê Jejus kôt htỏjê mã amnhĩ jarê nhũm mê kuma nhũm ja mê kãm mex nê. Hãmri nê Gres kamã Jejus kôt mê htỏjê mã kagà nhĩpêx. Apor kot mê hwỳr amnhĩ kôt o mỗr nê mê kãm ỏr nhũm mê kot omunh nê kamã harênh nê ho mex kaxyw mê kãm hipêx. Hãmri nê hipêx pa nê kãm kugỗ nhũm kupy nê mê kurũm kato nê ma mê hwỳr mỗ. Hãmri nê mê hwỳr pỏj. Gres nhỗ xwỳnh kwỳjaja na prem ra Jejus kôt amnhĩ xunhwỳ. Tirtũm kot mê kutã nojarêr jakamã nhũm mê ra hkôt amnhĩ xunhwỳ. Jakamã nhũm Apor mê hwỳr pỏj hãmri nê mê ãhkỏ hã tanhmã mê ho ajuta hto ho pa. **28**Nê xatã Ijaew mã tanhmã Jejus jarênh to kamã hihtỳx o mê hkôt pa nê mê kãm:

—Nà Jejusja tãm na pre Tirtũm mê pakaxyw ãm. Tirtũm kapêr ã kagà htùm kamã ã harênh kot anhỹr. Anê.

Pawre akupỳm Epes wỳr mỗr ã harênh

Rukre 3.15-16

19 ¹Tã nhũm Apor kormã Korĩt kãm pa ri nhũm Pawre ma akupỳm Epes wỳr mỗ. Ma krãhakỳx kôt akupỳm hwỳr mỗ. Hãmri nê hwỳr pỏj nê mê kot Jejus kôt amnhĩ nhĩpêx o mê pa xwỳnhjê pumu. Nhũm mê kormã Jejus jarênh jatur xà mar kêt nê. ²Jakamã nhũm Pawre mê hwỳr mỗ nê mê omu nê Tirtũm Karỗ hã mê hkukja nê mê kãm:

—Kwa mê ate Jejus kôt amnhĩ xunhwỳr xà hã arĩgrota ã xà na pre Tirtũm Karỗ mê akarỗ mã agjê? Anê.

Hãmri nhũm mê kuma nê kãm:

—Nà mê ixte Tirtũm Karỗ jarênh mar kêt. Anê.

3Hãmri nhũm mê kãm:

—No mễmoj kôt na prem mê akrã kumrã? Anê.

Nhũm mẽ kãm:

— Nà Juãw Paxis kot mẽ hkrã kumrãr o paja kôt na prem mẽ ixkrã kumrã. Anẽ.

4Hãmri nhũm Pawre mẽ kãm:

— Nà Juãw Paxis na pre Ijaew mã kapër o: “Kot kaj mẽ mẽ ate amnhĩ tomnuj kaga nẽ hpãnhã tãm amnhĩ nhĩpêx pa hã mẽ akrã kumrã.” Anhỹr o mẽ kãm kapër o pa. Nẽ mẽ kãm Jejus jarênh o: “Koja tokyx mēhō ixkôt hapu hã mẽ pahwỳr kato nẽ tanhmã amnhĩ nhĩpêx to ho pa. Ka mẽ omu nẽ amnhĩ kaxyw hkôt ajamaxpër nẽ hkôt amnhĩ xunhwỳ.” Anẽ. Tã Jejusja na pre ã mẽ kãm harênh anhỹr o pa. Anẽ.

5Nhũm pre ã Pawre mẽ kãm Juãw Paxis mẽ Jejus wa harênh anẽ nẽ hpãnhã Jejus nhỹ hã mẽ hkrã kumrã. 6Hãmri nẽ hpãnhã mẽ hã ìhkra jaxwỳ nhũm Tirtũm Karō mẽ hwỳr wrỳ nẽ mẽ hkarō mã gjêx pa. Hãmri nhũm mẽ ỹ hã ahpỳnhã axtem mẽ kapër kwỳ ho kapër nẽ ỹ hã Tirtũm mex o mex ã harênh o kuhê. 7Ã mẽ kot amnhĩ nhĩpêx anhỹr xwỳnhjaja kêp 12.

8Tã nhũm Pawre Epes kãm Ijaew nhõ Tirtũm kapër o mẽ ahkre xà hã ixkre hwỳr mrrar ã mytwrỳ axkrunêpxi. Amnhĩ kamã kahak kêt nẽ hprĩ hã Ijaew mã hprĩ hã Jejus jarê nẽ mẽ kãm:

— E pa mẽ amã Jejus jarê ka mẽ inhma. Nà Tirtũm kot mẽ pahwỳr mēnh xwỳnhhta na. Nẽ mẽ pahte kamã pajamak o papa xwỳnhhta na. Jakamã kot ka mẽ amnhĩ kaxyw hkôt ajamaxpër nẽ hkôt amnhĩ xunhwỳ nhũm Tirtũm ja hã mẽ apumu nẽ mẽ ato hkra. Anẽ.

Hãmri nhũm mẽ hkwỳjaja kuma nẽ hkôt hamaxpër kurê kumrêx. 9Nom nhũm mẽ hkwỳjaja kuma nẽ ãm kuma nẽ Jejus o kapër punuj nẽ. Mẽ piitã mẽ noo mã kuhê nẽ ho kapër punuj tỳx nẽ. Nhũm Pawre tee ri ja mẽ omu hãmri nẽ mẽ kurũm kato. Mẽ pikuprõnh xà hã ixkreta rũm kato nẽ hpãnhã nhãm mẽ kot kãm “Xirãn kot mẽ ahkre xà hã ixkre” anhỹr xwỳnhja wỳr hpãnhã mō. Nẽ amnhĩ kôt mẽ kot Jejus kôt amnhĩ xunhwỳr xwỳnhjê ho pa nẽ hpãnhã ixkreta kamã mẽ ahkre ho pa. Apkati mẽ hwỳr mra nẽ mẽ ahkre. 10Jao hã amgrã axkrut. Jakamã nhũm pyka pê As kamã mẽ piitã Pahihti Jejus jarênh ma. Ijaew nẽ Ijaew kêt xwỳnhjaja nhũm mẽ piitã harênh ma.

Wajaga hkwỳ jarênh

11Tã nhũm Pawre Tirtũm nhỹ hã mẽ kãm aa mẽ kot mẽmoj pumunh kêt kwỳ ho anhỹr o ri mẽ hkôt pa. 12Jakamã nhũm pre htem hwỳr mra nẽ kêp ê hkwỳ jamỳ nẽ ma mẽ à xwỳnhjê hwỳr o mra nẽ mẽ hã haxwỳ nhũm mẽ akupỹm mex. Nẽ mẽkarõmnuti kot tanhmã mẽ ho ho pa xwỳnhjê hã nhũm prem mãänēn mẽ hã ê kwỳ jaxwỳ nhũm mẽkarõmnutija mẽ kurũm hapôj nẽ ma mrrar kurê kumrêx nhũm mẽ akupỹm tãm hkrã.

13-14Tã nhũm mẽõ patre maati Sewahtija hkra my kêp 7 nê piitã kêp wajaga. Hãmri nê mẽ kãm Pawre pyrã nê mẽ nê mẽkarõmnuti japõx o pa hprãm nê. Jakamã kormã Jejus kõt amnhĩ xunhwỳr kêt tã mẽ kot ỹ hã Pawre pyrã nê mẽhõ nê hkwy janor kaxyw nê kãm:

—E Pawre kot Jejus jarênh o ri pa xwỳnhhta nhỹ hã kot paj amã ixkapêr. Jakamã e kwa tokyx myta rùm akato nê ma tẽ. Anẽ.

15Hãmri nhũm mẽkarõmnutija mẽ kuma nê ãm mẽ kuma nê mẽ kãm:

—Tk. Mẽ apê Jejus mẽ Pawre wa hkwy hkêt tã mẽ nê ã mẽ inhmã akapêr anhỹr o apa. Nã Jejus mẽ hkwy pixjaja na htem Tĩrtũm nhỹ hã mẽ kêp mẽ ijapõx o pa. Mẽ apê mẽ hkwy hkêt kênã. Nã pa ixkatoore kaxyw ã. Anẽ.

16Hãmri nhũm mẽkarõmnuti kot tanhmã ho xwỳnhhta mẽkarõmnuti nhỹ hã wajagajê pynê nê mẽ htak rax o kêp mẽ ê kaxõnh pa nhũm mẽ tee ri amnhĩ nhĩpêx. Hãmri nê hkênh nê õrkwỹ rùm hapõj nê ma umaj hprõt nê mra. 17Hãmri nhũm Epes kamã mẽ piitã ã kot mẽ hipêx anhỹr ã mẽ harênh ma nê tee ri hamaxpêr nê kãm ma nê. Ijaew nê Ijaew kêt xwỳnhjaja nhũm mẽ piitã tee ri kãm hamaxpêr o pa. Nê Pahihti Jejus mã mex o mex ã harê. 18Jakamã nhũm mẽ kot Jejus kõt amnhĩ xunhwỳr nyw xwỳnhjaja piitã tanhmã amnhĩ jarênh to. Nê mẽ hkwyjaja amnhĩ jarênh o:

—Nã kormã ixte Jejus kõt amnhĩ xãm kêt ri na pa pre ã amnhĩ tomnuj anhỹr o ri ixpa. Tã Jejus kõt amnhĩ xãm hãmri nê axte ã amnhĩ nhĩpêx anhỹr kêt nê. Anẽ.

Nhũm mẽ hkwyjaja kêp wajaga htã mẽ uràk nê Jejus kõt amnhĩ xunhwỳ hãmri nê amnhĩ jarênh o:

—Nã ijaxwỳja kormã Jejus kõt amnhĩ xãm kêt ri na pa pre hte nê mẽ no kupyw nê mẽ y pix o ri mẽ hkõt ixpa. Tã Jejus kõt amnhĩ xãm hãmri nê axte ã amnhĩ nhĩpêx anhỹr kêt nê. Pãnhã axtem amnhĩ nhĩpêx nyw o amnhĩ nhĩpêx o ri ixpa. Anẽ.

19Hãmri mẽ õ wajaga xàhpumunh xà hã kagà jamỳ nê ma o mra nê kaxyw kuto nê kamã rênh pa nê mẽ piitã mẽ noo mã ho xêt pa. Wajaga xàhpumunh xà hã kagàja ã kàxpore xohtô rax kumrêx tã nhũm mẽ Jejus gryk ã hamỳ nê o mra nê ho hxêt pa nhũm hapêx. 20Hãmri nhũm krĩ nhõ xwỳnhjaja ã mẽ kot amnhĩ nhĩpêx anhỹr ã mẽ omu nê ohtô rax nê mẽ uràk nê Jejus kõt amnhĩ xunhwỳ.

Pawre kot Rõm wỳr hkrã hã harênh

Rõmã 1.13-15, 15.22-29

21Tã nhũm Pawre ra akupỹm Jerujarê hwỳr nojarêt nê hamaxpêr o:

—E kot paj ixkato nê hpãnhã ma Masetõn mẽ Gres wa hkõt ma akupỹm Jerujarê hwỳr mõ. Ma mẽ kot Jejus kõt amnhĩ xunhwỳr

xwÿnhjê pumunh o mẽ hkôt mō. Hāmri nê Jerujarê hwÿr pōj nê kamã tanhmã amnhĩ to hpa hāmri nê hpãnhã ma Rôm wÿr mō. Anê.

22Hāmri nê hkôt ho ajuta ho wa pa xwÿnh Ximotre mẽ Eras wa kãm amnhĩ jarê nê wa kãm:

—E kêr ka wa ma ixkukamã Masetõn wÿr wa mō. Kot paj kormã jar As kamã ixpa grire hāmri nê ma war akôt mō pu mẽ hamũ ma Jerujarê hwÿr mō. Anê.

Hāmri nhũm wa kuma nê kato nê ma hkukamã Masetõn wÿr mō.

Mẽ kot sãnti hã Pawre mã àkjêr ã mẽ harênh


Sikũn Korõt 1.8-9

23Rôm nhũm Epes nhõ xwÿnhjaja tee ri Pawre kot tanhmã Pahihti Jejus jarênh to hã kuma nhũm ja mẽ kêp omnuj nê. Nhũm mẽ Jejus ã kamã gryk tÿx nê. 24Na prem amnhĩ kaxyw Tirtũm kôt hamaxpêr kêt nê. Na prem axtem sãnti ho mẽ hpãm nê amnhĩ to hwÿr pê hã hpijaàm nê kãm mex o mex ã harênh o pa. Mẽ õ sãntija ni Xiãre na pre. Nhũm mẽ kãm ixkre nhípêx nê kamã hkarõ nhípêx xãm. Hāmri nê hwÿr akuprõ nê hã hkĩnh nê hkarõ hã hpijaàm nê kãm mex o mex ã harê. Nhũm pre hte Temêtja Xiãre nhõrkwÿ karõ hkryre hkwÿ nhípêx nê mẽ kãm ho wênê ho pa. Prat o hipêx nê ho wênê ho pa. Jao ra hã mẽ àpênh xwÿnhjê mẽ nhũm mẽ kot haprõr xwÿnhjê kukwak ri kàxpore jamÿnh rũnh o pa.

25—Jakamã nhũm Pawre mẽ hwÿr mō nê pōj nê mẽ kãm Mèpahpãm Tirtũm jarênh o ri mẽ hkôt pa nhũm Temêt tee ri kuma nhũm ja kêp omnuj nê. Hāmri nhũm hamaxpêr nê mẽ kot uràk nê Xiãre nhõrkwÿ karõ hkryre nhípêx nê ho wênê ho pa xwÿnhjê ho akuprõ nê mẽ kãm:

—E kwa mẽ inhma. Na pu htem mẽpanã Xiãre nhõrkwÿ karõ hkryre pãnhã kàxpore jamÿnh rũnh o papa. 26Tã mãn ka mẽ ra ham hpõx xwÿnh Pawreja pumu nê kapêr ma. Na hte jar mẽ panhõ krĩ kamã nê As piitã hkôt mẽ kãm mẽpanã Xiãre karõ nê mẽ kãm kapêr o pa. Xep mẽ pahte mẽ hkarõ nhípêxja kêp mẽpanã kumrêx kêt ã mẽ kãm harênh o pa nhũm xep mẽ ohtõ nê kuma nê ra hkôt hamaxpêr.

27—Kwa ja mex kêt. Koja mẽ kapêr ma nê hkôt amnhĩ nhípêx hāmri nê axte mẽ pahte ixkre karõ hkryre nhípêx xwÿnhhta japrõr kêt nê. Hāmri



Atre 19.23-41

ně mẽ paxàpênh o kapêr punuj nê. No âm ja pix omnuj kêt. Koja mẽpanã Xiânre mã amnhĩ jarênh xà hã ixkreja kaga hpa. Nê haxwỳja karôja kaga. Mẽ piitã kãm hapê kênã. As kamã nê pyka piitã hkôt mẽ piitã kãm hapê nê hwỳr mra nê amnhĩ to hwỳr o pa. Kêp mẽpanã mex kumrêx tã koja mẽ Pawre kapêr gryk ã hkaga hpa nê axte kãm hamaxpêr kêt nê. Hãmri pu mẽ axte mẽ kukwak ri pakàxpore rax nê papa hkêt nê. Kwa tanhmã kot puj mẽ amnhĩ nhĩpêx to? Anê.

28Hãmri nhũm mẽ tee ri ã kapêr anhỹr ã kuma nê Pawre kamã gryk tỳx kumrêx. Nê gryk xàj kàx pêê kapêr nê xatã kapêr tỳx kãm kapêr punuj nê. Nê kapêr o:

— Xiânre na mex kumrêx. Kêp mẽ pahpê Epes nhõ xwỳnhjê nã maati na.

Anhỹr o kàxpêê kapêr o kuhê. 29Hãmri nhũm krĩ nhõ xwỳnh piitã mẽ kuma nê mẽ hwỳr hprôt nê haxwỳja gryk nê kàxpêê mẽ hkôt ã harênh anhỹr o kuhê. Hãmri nê gryk xàj Pawre hkôt ri wa pa xwỳnhja wa unê nê ma mẽ kot axpên mar xà hã ixkre hwỳr wa hkjênh o tẽ. Masetôn nhõ xwỳnh wa kêp Gajore mẽ Aristakja nhũm mẽ wa unê. 30Hãmri nhũm Pawre mẽ kot wa unênh ã mẽ omu nê tee ri wa hkukamã hamaxpêr nê mẽ hkôt hprôt nê mẽ kãm tanhmã kapêr to kaxyw nom nhũm mẽ kot Jesus kôt amnhĩ xunhwỳr xwỳnhjaja ja nê kãm kapêr kãm hihtỳx nê. 31Hãmri nhũm As kamã mẽ kot mẽ ho amnhĩptar xwỳnh kwỳjaja ã mẽ kot amnhĩ nhĩpêx anhỹr ã mẽ omu nê Pawre hwỳr hpêr mẽ. Mẽ kãm hkĩnh jakamã kot mẽ hkôt htêm nhũm mẽ kot hpĩr pymaj hwỳr hpêr mẽ nê mẽ hkôt htêm nê hkurê kamã hihtỳx nê.

32Rôm nhũm mẽ piitã mẽ kot axpên mar xà hã ixkre hwỳr pikuprôn h pa nê kàx pê kapêr punuj o kuhê. Nom axpên kôt kapêr kêt nê. Âm axpên kwỳm ri kàx pê tanhmã kapêr punuj to ho. Nhũm mẽ hkwỳjaja hprĩ hã mẽ mar kêt tã amarĩ amnhĩ krã hkôt kàx pê kapêr punuj nê. 33Nhũm Ijaew kwỳjaja tee ri ja hã mẽ omu nê axpên mã:

— Tk. Kwa okora. Koja mẽ nã Xiânre hã gryk hãmri nê tanhmã mẽ pahpê Ijaew to nà? Anê.

Hãmri nê hamaxpêr nê mẽ hwỳr amnhĩõ pê Aresãnja mẽ nê kãm:

— Kwa ma mẽ hwỳr tẽ nê mẽ kãm tanhmã mẽ pahtã axàprãr to. Pawre kêp mẽ pahkwỳ htã tãm na mẽ kãm mẽ gryk jaxà. No mẽ papajaja na pu mẽ kãm mẽ gryk jaxàr kêt nê. Anê.

Hãmri nhũm mẽ kuma nê mẽ hwỳr tẽ nê xa nê tee ri kot mẽ ho hpinhkrênh kaxyw kànhmã mẽ kãm ìhkra pêr kaprỳ. 34Nhũm mẽ omu nom hpinhkrênh kêt nê arĩ kàx pêê kapêr punuj ã 2 or. Nê kàx pê kapêr o:

— Mẽpanã Xiânreja mex o mex. Kêp mẽ pahpê Epes nhõ xwỳnhjê nã mex na. Anê.

35Tã nhũm mẽ õ pahi nhõ kôwenatô jatã tanhmã Epes nhõ xwỳnhjê ho hpinhkrênh to hãmri nê ja nê mẽ kãm kapêr nê mẽ kãm:

—Kwa mẽ anhkîrê. Mẽ piitã kot Xiãre mex o mex ã omunh kênã. Nẽ mẽ pahpê kãm amnhî jarênh xà hã ixkre jamâr xwÿnh ã mẽ kot mẽ pahpumunh mex. Nẽ kaxkwa rûm karõ kot mẽ pahwÿr tẽm nhũm mẽ pahpê hamâr o papa xwÿnh ã nhũm mẽ kot mẽ pahpumunh mex. 36Jakamã mẽhõ kot kêt we mẽ pahpê hamâr xwÿnh kêt ã mẽ pajarê? Ra mẽ piitã mẽ kot ja hã mẽ pahpumunh jakamã kwa mẽ anhkîrê nẽ ri ã akapêr anhÿr kêt nẽ. 37No mẽ ate wa unênh nẽ amnhî kôt wa ho atẽm xwÿnhhta wa. Wa kot tanhmã mẽpanã Xiãre ho kapêr punuj to rÿ kêp õ ixkre kamã àhkînh kêt tã ka mẽ amarî wa unê nẽ amnẽ amnhî kôt wa o tẽ.

38—Kwa kê Temêt mẽ hkwyjaja kãm tanhmã wa ho kapêr to hprãm nẽ ma pahihtî hwÿr wa o tẽ nẽ kumã mãn tanhmã wa ho kapêr to. Mẽmoj tã axpẽn mã mẽ kapêr xà hã arĩgrota ãã. 39Rÿ ka mẽ amã mẽmoj jarênh prãm nẽ arĩgroja ã mãn rĩ kormã mẽmoj jarê. 40No jarãhã mẽ ate amnhî nhĩpêxja te mẽ ate pahihtî kutã amnhî xunhwÿr nẽ ho akapêr punuj pyræk. Kojã Rõm nhõ xwÿnhjê nhõ pahi mẽ ajarênh ma hãmri nẽ mẽ ate kamã agryk ã amnhî kamnhix. Hãmri nẽ mẽ atã ixkukja pa tanhmã kãm mẽ ajarênh to? Mẽhõ nhÿ hã na ka mẽ ã apikuprõnh nẽ amnhî nhĩpêx anê? Nà amnhî krã hkôt na ka mẽ akuprõ nẽ ã amnhî nhĩpêx anê. Anê.

41Hãmri nẽ mẽ kãm kapêr pa nẽ mẽ hano nhũm mẽ anhrã nẽ ma akupÿm õrkwÿ hwÿr hapêx.

Pawre ma Masetõn mẽ Gres wa hwÿr mõi ã harênh

20 1Hãmri nhũm Pawre ra nojarêt. Jerujarê hwÿr mõi mã nom kormã pika pê Masetõn kumrêx wÿr mõi nẽ kurúm ma akupÿm Jerujarê hwÿr mõi mã. Hãmri nẽ nojarêt nẽ mẽ kot Jesus kôt amnhî xunhwÿr xwÿnhjê ho akuprõ nẽ mẽ kãm amnhî jarê nẽ mẽ kãm:

—E kot paj ma mõi. Nom kêr ka mẽ arĩ ixwakre kamã Tĩrtũm kapêr kôt amnhî nhĩpêx mex rãhã ho ri apa nẽ aa hkaga hkêt nẽ. Anê.

Hãmri nẽ mẽ kãm:

—E mẽ mãmrĩ ixwa kre kamã axãmnhix ajamakêtkati nẽ ri apa. Anê.

Hãmri nẽ kato nẽ ma Masetõn wÿr mõi. 2Nẽ hwÿr pøj nẽ kamã krĩ hkwy hkôt mõi nẽ nhÿri mẽ kot Jesus kôt amnhî xunhwÿr xwÿnhjê pumu nẽ Tĩrtũm kapêr o mẽ ahkre. Mẽ kot hkôt amnhî nhĩpêx mex nẽ kãm hprãm xà hkôt pix mã amnhî nhĩpêx kaxyw mẽ kãm kapêr o ri mẽ hkôt pa. Hãmri nẽ kato nẽ ma mõi nẽ pyka pê Gres wÿr pøj. 3Nẽ kamã mẽ hkôt pa hã mytwrÿ axkrunêpxi hãmri nẽ akupÿm pyka pê Sir wÿr nojarêt. Nẽ ma pàr kãm hwÿr mõi kaxyw nẽ amnhî tã Sir kamã Ijaew kwÿ kot tanhmã harênh to hã amnhî jarênh ma. Na prem ra hã axpẽn mã amÿnê nẽ axpẽn mã:

—E kojã amnẽ mẽ pahwÿr mõi pu mẽ nhÿri omu nẽ hpĩr kurê kumrêx. Anê.

Hāmri nhūm Pawre amnhĩ tã mẽ kapēr ma nẽ pàr kaga nẽ mẽ hwỳr mōr kêt nẽ. Hāmri nẽ awjanã nẽ Jerujarẽ hwỳr Masetōn kamã pa. 4Nhūm Jejus kôt htō hkwỳjaja ma hkôt mō. Ā mẽ hixi kot anhỳr.

Perej nhõ xwỳnh Sopatôja. Piro hkra na pre.

Nẽ Tesarōn nhõ xwỳnh Aristak mẽ Sikūn wa.

Nẽ Tepe nhõ xwỳnh Gajoreja.

Nẽ As nhõ xwỳnh Xikitre mẽ Torow wa.

Nẽ Ximotreja.

Jajaja na prem ma Pawre hkôt Jerujarẽ hwỳr mō. 5Nẽ pa ixpê Rukre ixte mẽ amã ja jarēnh nẽ hã kagã xwỳnhja na pa axte Pawre hã ajêt nẽ hkôt mō. Jakamã nhūm jajaja piitã ma wa ixkukamã Tôx wỳr mō nẽ kamã wa ixkãm hamak o pa.

6Tã pa wa ma krĩ pẽ Piripos rŭm ixkato nẽ pàr kãm ma mẽ hkôt mō. Arĩgro pẽ Pas jakãnh mẽ ma mẽ hkôt mō.

Tã wa ixtã arĩgro pẽ 5 nẽ mẽ hkôt Tôx wỳr pøj nẽ kamã mẽ omu nẽ mẽ hkôt ixpa hã ixtã ũ semãn.

Pawre kot akupým Exik o htír Ā harēnh

Juãw 5.21; Atre 9.36-43

7Tã nhūm sap nẽ kamàt pa mẽ kot Jejus kôt amnhĩ xunhwỳr xwỳnhjê hkôt akuprō nẽ axpẽn kutã apku nhūm Pawre mẽ kãm kapēr. Ra apkati hkôt mẽ inhnojarêt kaxyw jakamã nhūm mẽ kãm Tirtŭm kapēr jarēnh ryy nẽ. Ra kôt Ā kamàt nhūm arĩ mẽ kãm harēnh o nhỹ. 8-9Ixkre hprêk axpẽn nhĩpy axkruněpxi nhĩtep xà kamã na pa prem akuprō nẽ mar o ixkrĩ. Ixkreja kamã kanê ohtō nẽ hpòk o harir. Jakamã nhūm Pawre arĩ mẽ kãm ujarēnh o nhỹ nhūm mēhõ xàptàr nyw Exikja ra òtxwa htỳx nẽ mẽ ixkuri òt o nhỹ. Janere hã òt o nhỹ. Tã ra gōr nẽ janere pẽ kato nẽ ahparmã tẽ nẽ pykap tēm. Pa mẽ tee ri omu nẽ ahparmã hwỳr ixprôt nẽ wrỳ nẽ omu nhūm htyk mex nẽ nō. Kỳj rŭm ahpar mã htēm ryy jakamã htyk mex nẽ nō. Hāmri nhūm hkwỳjaja tee ri omu nẽ hkaprĩ htỳx nẽ kumỳ nẽ mỳr o hkrĩ. 10Hāmri nhūm Pawre mẽ ixkôt wrỳ nẽ hwỳr tẽ nẽ htyk Ā omu nẽ kumỳ nẽ mẽ kãm:

—E mẽ amỳr kêt nẽ. Ra htyk tã koja Tirtŭm akupým mẽ pamã ho htír.



Atre 20.7-12

Anhÿrja kôt nhũm akupÿm htĩr. 11-12Hãmri nhũm mẽ akupÿm htĩr ã omu mẽ hkĩnh tÿx kumrẽx. Hãmri pa mẽ akupÿm kÿx pẽ ixkre hwÿr api nhũm Pawre mẽ inhmã pãwti hkwy nhĩrẽ mẽ mẽ inhmã kugõ pa mẽ Jejus kot mẽ panẽ htyk mã ijamaxpẽr pẽ kuku. Hãmri nhũm Pawre axte mẽ kãm kapẽr o ÿr rãhã nhũm myt kato pa mẽ kẽp anhgrã mẽ ma ixpa.

Pawre Mĩrẽt wÿr mõr ã harẽnh

13Hãmri pa mẽ inhnojarẽt nhũm Pawre mẽ ixte hkõt mẽ inhmõr xwÿnhjẽ mã:

— E kẽr ka mẽ ma pãr kãm ixkukamã mẽ. Kot paj ahte ma kÿx pẽ mẽ akõt ixpar o Asõt wÿr mẽ. Hãmri mẽ hwÿr põj mẽ mẽ anhõ pãr mã axã pu mẽ ma pahpimràãtã ma hamũ mẽ. Anẽ.

14Hãmri pa mẽ kuma mẽ ma mẽ mẽ mẽmemo arĩgro hã Asõt kamã axpẽn wÿr põj. Hãmri nhũm Pawre mẽ ixkõt pãr wÿr axã pa mẽ ma krĩ pẽ Mĩtirẽn wÿr mẽ. 15Nẽ hwÿr põj mẽ kurũm kormã mẽ nhũm apkati pa mẽ gõ hipõk pẽ Kiw jakrenh o mẽ. Nẽ hakre mẽ mẽ nhũm apkati pa mẽ gõ hipõk pẽ Sãm wÿr põj mẽ hã pãr nhõ. Hãmri nhũm apkati pa mẽ axte mẽ mẽ Mĩrẽt wÿr põj. 16Nom nhũm ra Pawre nojarẽt mẽ. Kãm tokyx As rũm kator mẽ Jerujarẽ hwÿr mõr mẽ tokyx hpõx prãm mẽ. Kãm mẽ hkĩnh pẽ Pẽtekos xwÿj ri hwÿr hpõx prãm jakamã nojarẽt tÿx pa mẽ Epes wÿr inhmõr kêt mẽ.

Pawre kot Epes kamã Kris kwÿjẽ mã amnhĩ jarẽnh

17Tã pa mẽ Mĩrẽt wÿr põj nhũm Pawre amnhĩ wÿr Epes wÿr Jejus kwÿ jahkre ho mẽ pa xwÿnhjẽ hã karõ. 18Hãmri nhũm mẽ man mẽ ixwÿr mẽ nhũm Pawre mẽ omu mẽ mẽ mẽ kãm amnhĩ jarẽ mẽ mẽ kãm:

— Nã ixte mẽ amã amnhĩ jarẽnh kaxyw na pa mẽ atã karõ. Ra mẽ ate tanhmã ixte amnhĩ nhĩpẽx to hã ixpumunh mex. Wam mẽ awÿr As wÿr ixpõxtã ã ka prem aprĩ hã ixpumunh mex mẽ. 19Na pa pre mẽ akõt ri mẽ amã tanhmã amnhĩ nhĩpẽx to ho ri ixpa. Te ixpẽ mẽ amã ixapẽn xwÿnh pyrãk. Nẽ Pahĩti Jejus mã tanhmã amnhĩ nhĩpẽx to ho ri mẽ akõt ixpa. Nẽ ixkwÿ Ijaew kwÿ kot Jejus kapẽr kaga hã mẽ omu mẽ ixkaprĩ mẽ inhmÿr o ixpa. Nhũm prem Jejus ã ixtomnuj pa amnhĩ xã htÿx kamã ijamak o ri mẽ hkõt ixpa. 20Nom arĩ ri Tĩrtũm kapẽr o mẽ ajahkre ho ri mẽ akõt ixpa rãhã mẽ aa hkaga hkêt mẽ. Mẽ anhõrkwy kamã mẽ mẽ ahkre xã hã ixkre kamã. Mẽ ate tãm amnhĩ nhĩpẽx prãm xaj pa pre ã mẽ ajahkre mex anhÿr rãhã ho ri mẽ akõt ixpa.

21— Nẽ mẽ ixpẽ Ijaewjẽ mẽ mẽ apẽ Ijaew kêt xwÿnhjẽ mẽ pa pre mẽ ajahkre ho axpẽn pyrãk. Mẽ apiitã mẽ ate amnhĩ tomnuj kaga mẽ hpãnhã Tĩrtũm kõt amnhĩ nhĩpẽx kaxyw. Nẽ amnhĩ kaxyw mẽ panhõ Pahĩti Jejus Kris kõt ajamaxpẽr kaxyw na pa pre mẽ akõt ri mẽ ajahkre rãhã ho ri ixpa.

22—Tã ra Tirtũm Karõ kot akupỹm Jerujarẽ hwỳr inhmẽnh jakamã pa kormã hwỳr mõ. Kot paj hwỳr pøj nhũm krĩ nhõ xwỳnhjaja Jejus ã ixtomnuj nẽ nom tanhmã mẽ kot ixtoja kukamã ixte ixprĩ hã ixàhpumunh kêt. 23Ja pix na ixte omunh. Na pa hte nhỹri pøj nhũm htem Jejus ã ixpynê nẽ mẽ hagjẽnh xà kamã ijagjê nẽ tanhmã inhĩpêx to. Tirtũm Karõ na pre ra ã mẽ kot inhĩpêx anhỹrja kukamã inhmã mẽ harẽ. Jakamã ixte amnhĩ kukamã amnhĩ tã ixàhpumunh mex. Kot paj xep akupỹm Jerujarẽ hwỳr pøj nhũm mẽ ixpumu nẽ Jejus ã tanhmã inhĩpêx to. 24Tã no pa amnhĩ kamã ixkahak kêt o inhmã mẽ uma hkêt nẽ. Koja mẽ kãm ixpĩr prãm nẽ mãmri xpi. Inhmã ixtyk pyma hkêt. ãm mẽmoj pixi na inhmã hprãm. Ra Pahihti Jejus kot mẽmoj tã inhmã karõ xàja na inhmã kormã ixtĩr ri hatur xàm mẽnh prãm. Tirtũm kãm mẽ pajapê hã kot mẽ pahto mex prãm xàj mẽ pahwỳr Kra Jejus mẽnh nhũm mẽ panê tanhmã amnhĩ nhĩpêx to hã harẽnhja na inhmã mẽ piitã mẽ kãm harẽnh jatur xàm mẽnh prãm.

25—Tã e ixkràmnhwỳjaja. Na pa pre mẽ akõt mẽ ajahkre rãhã ho ri ixpa. Mẽ ate Jejus kõt amnhĩ nhĩpêx mex rãhã ho ri apa kaxyw. Tã kot puj pẽr mẽ axte axpẽn pumunh kêt nẽ.

26-27—Na pa pre ra mẽ amã Tirtũm kapẽr piitã harẽnh pa. Mẽ ate mar tỳx nẽ hkõt pix mã amnhĩ nhĩpêx o apa kaxyw. Jakamã koja mẽ anhõ krĩ nhõ xwỳnhjê hõ amnhĩ kaxyw Jejus kõt hamaxpẽr prãm kêt nẽ rĩ tãm. Kwãr mãmri kot amnhĩ tomnuj kamã ty nẽ arĩ tãm amnhĩ pumu no ãm kê amnhĩ tã tanhmã inhmã nẽ hkêt nẽ.

28—E mẽ ate Kris kwỳ jahkre ho apa xwỳnhjaja. Kêr ka mẽ amnhĩ pumunh mex o ri apa. Nẽ mẽ kot Jejus kõt amnhĩ xunhwỳr xwỳnhjê jamãr mex o ri apa. Ja kaxyw na pre Tirtũm Karõ mẽ kaxyw mẽ axunhwỳ. Tirtũm Kra Jejus kot htyk o Tirtũm mã mẽ pahte amnhĩ tomnuj piitã hpãnhã amnhĩrer pa jakamã kêr ka mẽ kãm mẽ omunh mex o ri mẽ hkõt apa. Te ôwêhti jamãr xwỳnh kot ôwêhti jamãr mex o ri pata pyrãk.

29—Kot paj ma mõ nhũm mẽmojjaja ixpãnhã mẽ awỳr pøj nẽ mẽ ate Jejus kaga hprãm xàj tanhmã mẽ amã hêx to ho ri mẽ akõt pa. 30Nẽ mẽ akwỳjaja mẽ urà nẽ tanhmã hamaxpẽr punuj to nẽ mẽ ate Jejus kaga hprãm xàj hêx rom tanhmã mẽ amã kapẽr to ho ri mẽ akõt pa. 31Jakamã kwa mẽ o kora. Kêr ka mẽ axkãm ajamak rom nẽ ri apa. Kê jajaja nhỹrmã ã mẽ amã kapẽr anê ka mẽ ama nẽ mẽ hkõt ajamaxpẽr kêt nẽ. Mẽ ate mẽ mar nẽ mẽ hkõt ajamaxpẽr pymaj na pa pre mẽ akõt ri mẽ ajahkre ho ri ixpa hã ixtã amgrà axkrunẽpxi. Arĩgro hã nẽ kamàt kãm mẽ ajahkre rũnh o ri ixpa. Nẽ mẽ ate mẽ amã mẽ hêx xwỳnhjê hkõt amnhĩ xunhwỳr pymaj mẽ ajahkre pê te inhmỳr pyrãk o ri mẽ akõt ixpa.

32—E kot paj Tirtũm nhĩhkram mẽ ajagjẽnh pa. Koja mẽ atãnopxar o ri mẽ akõt pa nẽ mẽ akutã nojarêt rãhã ho pa. Hãmri ka mẽ ãm hkõt

pix mã amnhĩ nhĩpêx. Jao Jejus kaga hkêt nê. Hãmri nhũm nhỹrmã Tĩrtũm mẽ pahpê hkrajê piitã tanhmã mẽ pahto mex to.

33—Na pa pre mẽ akôt ixpa ry htã no ãm aa mẽmoj tã mẽ awỳr kêt nê. Mẽ axê hkwỹ hã mẽ awỳ rỳ mẽ akàxpore hã mẽ awỳr o ri ixpa hkêt nê. 34Na pa pre amnhĩ pa kukwak ri amnhĩm ixujaprôr pê ixàpkur o ri mẽ akôt ixpa. Nê ixkôt mẽ pa xwỳnhjê mã ixujaprôr o ri ixpa. Ra mẽ ate ja hã ixpumunh mex.

35—Tã mẽmo kaxyw na pa pre ã mẽ akôt amnhĩ nhĩpêx anhỳr o ri ixpa? Nã mẽ ate ja hã ixpumunh nê ixpyrà nê ã amnhĩ nhĩpêx anhỳr o ri apa kaxyw. Nê ixpyrà nê tanhmã mẽ kute xwỳnhjê ho ajuta hto ho ri mẽ apa kaxyw. Na pre Pahihti Jejus ja jarênh o: “Koja mẽhõ amã mẽmoj gõ ka amnhĩm apy nê akĩnh nê. Nom kot kaj kam nhãm mẽhõ mã mẽmoj gõ hãmri nê akĩnh tỳx o ate mẽhõ mã mẽmoj nhõrta jakre.” Anê.

36Na pre ã Pawre mẽ kãm ujarênh anhỳr pa hãmri pa mẽ ra inhnojarê. Hãmri nhũm mẽ piitã hkõnkrã ho hkrĩ pa nhũm Pawre mẽ ho Tĩrtũm wỳ. 37-38Hãmri nhũm mẽ piitã kãm Pawre hkĩnh tỳx jakamã mỳr rax o kuhê. Tee ri kot axte mẽ kot axpên pumunh kêt ã mẽ kãm amnhĩ jarênhja ma nê hkaprĩ htỳx nê. Nê hkaprĩ xàj kahti hkôt hamỳ nê mur. Hãmri nê ma Jerujarê hwỳr hkujaêk kaxyw mẽ ixkôt pàr wỳr hkaprĩ nê mẽ ixkôt mỳr o mỗ.

Pawre kot Jerujarê hwỳr hpôx ã harênh

21 1Tã pa mẽ gô mỳri Jejus kôt mẽ ixtõjê re nê pàr krem agjê nê axte mỗ. Ma gô hipôk pê Kosti hwỳr ixkatat kôt mỗ nê hã ajê. Hãmri nhũm apkati pa mẽ axte hamũ mỗ nê hpãnhã gô hipôk pê Roxti hwỳr mỗ nê hwỳr pôj nê hã pàr xi. Hãmri nê hpãnhã axte krĩ pê Patar wỳr mỗ. 2Hãmri nê hwỳr pôj nê pàr rũm ijapôj nê pàr õ pumu. Nhũm ra pyka pê Wẽnĩs wỳr nojarê. Pa mẽ hwỳr agjê nê ma kamã axte mỗ. 3Mỗ nê amỳm amnhĩ kukamã gô hipôk pê Sipre pumu. Hãmri nê upôk rũm hakrenh mã mỗ nê pyka pê Sir wỳr mỗ nê kamã Xir hwỳr pôj nê hã pàr nhô. Pàr pãm kot krĩ kamã pàr kukrêx rer kaxyw pa mẽ kormã hã ajê nê tokyx axte nhãm inhmôr kêt nê. 4Hãmri pa mẽ kutêp api nê krĩ kamã mẽ kot Jejus kôt axpên to htõ nê htõx xwỳnhjê japêr o mỗ. Hãmri nê nhỹri mẽ omu nê mẽ hkôt ri ixpa ho ixtã ù semãn. Nhũm prem Tĩrtũm Karõ nhỹ hã Pawre mã kapêr nê kãm:

—Kwa Pawre mẽ inhma. Kot ka Jerujarê hwỳr pôj nhũm xep mẽ kãm akurê xwỳnhjaja tanhmã anhĩpêx to. Tĩrtũm Karõ na ã akukamã mẽ inhmã ajarênh anê. Jakamã kwa hwỳr amõr kêt nê. Na pa mẽ tee ri akukamã ijamaxpêr. Anê.

5Hãmri nhũm amnhĩ tã mẽ kuma nê ãm mẽ kuma nê Jerujarê wỳr hkrã kamã hihtỳx nê. Jakamã nhũm semãn hapêx pa mẽ axte inhnojarê. Axte Jerujarê hwỳr kormã inhmôr kaxyw inhnojarê. Nhũm Jejus kôt

mě ixtōjaja mẽ kot mẽ ixkujaêk kaxyw piitã pàr wỳr mẽ ixkôt mō. Mẽ hprō nẽ mẽ hkrajê mẽ nhũm mẽ pimràatã mẽ ixkôt mō. Hãmri pa mẽ pàr wỳr pōj nẽ gô mỳ ri ixpiitã ixkônkrã ho ixkrĩ hpa nẽ amnhĩ to Tĩrtũm wỳ. 6Hãmri nẽ mẽ kãm amnhĩ jarẽnh pa nẽ mẽ noo mã pàr krem agjê nẽ ma axte mō nhũm mẽ awjanã nẽ ma akupỳm òrkwỳ hwỳr hapêx. Hãmri pa mẽ kurũm kormã ma Jerujarẽ hwỳr mō. 7Mõõ nẽ krĩ pê Poremax wỳr pōj nẽ hã ajê. Hãmri nẽ pàr rũm ijpōj nẽ axte krĩ kamã Jejus kôt mẽ ixtō nẽ mẽ ixtōxjê japêr o mō nẽ nhỹri mẽ omu nẽ mẽ kuri amnhĩm hikra.

8Tã nhũm apkati pa mẽ axte mō. Pãnhã ma krĩ pê Sejarej wỳr mō. Hãmri nẽ hwỳr pōj nẽ Firipti kuri pōj. Firiptija kormã nyw ri mẽ kot Jerujarẽ kamã mẽ mjên htyk xwỳnhjê mã mẽ apkur xà nhõr ho pa kaxyw mẽ ho 7 nẽ mẽ unhwỳr xwỳnhajê hõ na pre. Tã hpãnhã kêp Tĩrtũm kapêr jarẽnh o pa xwỳnh. 9Nhũm hkra nijaja kêp kwat. Piitã mjên kêt nẽ hkukrit rãhã pa. Mẽ kêp Tĩrtũm nhỹ hã kapêr o mẽ pa xwỳnh na pre mẽ. Jakamã pa mẽ mẽ kuri pōj. 10Hãmri nẽ mẽ hkôt ri ixpa hã ixtã apkati grêre nhũm Akapô Jutej rũm man mẽ ixwỳr mõn pōj. Kêp Tĩrtũm nhỹ hã kapêr jarẽnh o pa xwỳnh na pre. 11Hãmri nẽ mẽ ixwỳr pōj nẽ Pawre pumu nẽ hkukamã kot tanhmã harẽnh to kaxyw hwỳr tẽn kêp hprexà kapa nẽ ho amnhĩ te hpre nẽ ho amnhĩ pa hpre nẽ xa. Hãmri nẽ mẽ inhnoo mã Tĩrtũm Karõ nhỹ hã mẽ kot tanhmã hipêx to hkukamã kãm awjarẽ nẽ kãm:

— E kot kaj Jerujarẽ hwỳr pōj nhũm Ijaew xaptàr tũmjaja apumu nẽ ã anhĩpêx anẽ nẽ apa hpre nẽ ate hpre hãmri nẽ Ijaew kêt xwỳnhjê nhĩhkram ajaxà. Koja mẽ ã anhĩpêx anẽ. Anẽ.

12Hãmri pa mẽ tee ri ã ujarẽnh anhỹrja ma nẽ Pawre kamã ixkahak tỳx nẽ ixkaprĩ nẽ inhmỳr o ixkrĩ. Nẽ xatã kot mẽ hwỳr mõr nẽ kãm ixkapêr kãm ixihtỳx nẽ kãm:

— Kwa mẽ ixkapêr ma Pawre. Mẽ hwỳr amõr kêt o mẽ hwỳr amõr kêt. Anẽ.

13Hãmri nhũm mẽ inhmã:

— Tk. Kwa mẽ amỳr kêt nẽ. Na pa mẽ apumu nẽ ixkaprĩ nẽ. Nà kot paj ma mẽ hwỳr mō. Kwãr mẽ mãmri Pahihti Jejus ã tanhmã ixto rỳ hã xpĩ. Ixte amnhĩ kamã ixkahak kêt. Anẽ.

14Hãmri pa mẽ tee ri mẽ hwỳr mõr nẽ hkurê kaprỳ nẽ kãm:

— Tôe. Nà kam nẽ Tĩrtũm kãm hprãm xà hkôt mãmri mẽ hwỳr mō rỳ mẽ hwỳr amõr kêt nẽ. Anẽ.

15Tã pa mẽ ra inhnojarê. Nẽ amnhĩ to ixpikuprõnh pa nẽ ma Pawre hkôt Jerujarẽ hwỳr tã ma mō. 16Hãmri nhũm Sejarej kamã Jejus kôt mẽ ixtō hkwỳjaja ma mẽ ixkôt mō. Pa mẽ mōõ nẽ Jerujarẽ hwỳr pōj. Hãmri nhũm mẽ ixkôt mẽ mõr xwỳnhajaja mẽ ixto mō nẽ Mẽnasõ nhõrkwỳ hwỳr mẽ ixto pōj. Mẽnasõja Sipre kamã na pre kato. Tã hpãnhã Jerujarẽ hwỳr

ahpa nê kamã ri pa ho pa. Na pre ra Jejus kôt amnhĩ xãm ã hã amgrã xohtô nê. Tã pa mê kuri pøj.

Pawre mê Xiakre wa harênh

Atre 15.3-21; Wam Korîť 9.19-22, 10.32-33

17Tã pa mê Jerujarê hwÿr pøj nhũm Jejus kôt mê ixtøjaja mê ixpumu nê hkĩnh nê. 18Hãmri nhũm apkati pa mê ma Pawre hkôt Xiakre hwÿr mō. Nhũm mê kot Tĩrtũm kapêr o mê ahkre xwÿnh piitã ra kuri akuprō nê mê ixkutêp hkrĩ. 19Jakamã nhũm Pawre mê hwÿr axã nê mê kãm tanhmã amnhĩ nhĩpêx to ho pa hã amnhĩ jarê nê mê kãm:

— Pa na ka mê rĩ akrĩ. E ot pa axte mê apumunh mã mō. Ixte mê amã amnhĩ jarênh ã amnhĩ jarênh kaxyw. Nã na pa pre ma Ijaew kêt xwÿnhjê hkôt ixpa nê mê kãm Jejus kot mê panê tanhmã amnhĩ nhĩpêx to jarênh o ri mê hkôt ixpa. Nhũm Tĩrtũm inhĩhkô hã ixkutã nojarêť mex jakamã nhũm prem inhma nê ohtô rax nê mê pahpyrà nê Jejus kôt amnhĩ xunhwÿ. Anê.

20-25Hãmri nhũm mê Ijaew kêt xwÿnh kwÿjaja kot Jejus kôt amnhĩ xunhwÿr ã mê harênh ma nê mê ÿ hã hkĩnh nê mê hã Tĩrtũm mã mex o mex ã harê. Hãmri nê Pawre mã kãm:

— Nã na pa prem ra mê harênh ma. Hãmri nê mê kãm kagã nhĩpêx nê mêmōj tã mê kãm karō nê mê hwÿr kumê. Mê kot omunh nê kamã harênh nê hkôt amnhĩ nhĩpêx o pa kaxyw.

Na pa prem kagãja kamã mê kot sãnti nhō hkur nê mê hkurê.

Nê mry kamrō hkur nê mê hkurê.

Nê mêmō mry hpar nê hkamrō runh kêt rãhã hkur nê mê hkurê.

Nê mê kot amnhĩ prō pix tãnopxar kaxyw mê kãm hã karō.

Nê mênijaja kot amnhĩ mjên pix tãnopxar kaxyw mê kãm hã karō.

Nê nhãm mê kot axpên to amnhĩkati nê mê hkurê.

Ã na pa prem ja hã kagã nê mê hwÿr mênh anê. Jakamã e mê inhma. Na ra mê pahpê Ijaew kwÿjaja ohtô rax kumrêx nê mê pahpyrà nê Jejus kôt amnhĩ xunhwÿ. Mã ka pre mê harênh ma. Na htem Jejus kôt amnhĩ nhĩpêx o pa jao mããnên Tĩrtũm nhÿ hã Mojés kapêr kôt amnhĩ nhĩpêx mex o pa. Tã nhÿri mê kot tanhmã ato hêx to hã ajarênh ma. Na ka xep hte Ijaew kêt xwÿnhjê nhō krĩ kamã pøj hãmri nê mê õ krĩ kamã Ijaew kwÿjê pumu nê mêmōj nê tanhmã mê kãm akapêr to ho ri apa. Nom Ijaew kêt xwÿnhjê mã ka xep hte ã mêmōj nê akapêr anhÿr kêt nê. Am Ijaew mã pix mã ka xep hte mê kot finat Mojés kapêr kôt amnhĩ nhĩpêx nê mê hkurê ho ri apa. Nê mê panhĩgêť kot amnhĩ nhĩpêx kuhpa hã mê kot mê hkra my kwÿrýt kã jakàr nê ka xep hte mê hkurê ho ri apa. Nê mê kot mê panhĩgêť kôt amnhĩ nhĩpêx nê ka xep hte mããnên mê hkurê ho ri apa. Mê kêp Ijaew tã ka xep pre hte ã mêmōj nê mê hkurê anhÿr ho

ri apa. Na prem jar ã Ijaewjê mã ato hêx o pa anê nhũm mẽ kuma nê mẽ hkôt hamaxpêr kurê kumrêx. Jao ra ate mẽ pahpê Ijaew kot amnhĩ nhĩpêx kôt amnhĩ nhĩpêx kêt ã akamnhĩx.

—Tã ra mẽ kot apôx ã ajarênh mar jakamã tanhmã kot kaj we mẽ kãm amnhĩ tã axàprãr to? Nê tanhmã kot kaj we mẽ noo mã amnhĩ nhĩpêx to kê mẽ arĩ mẽ pahte amnhĩ nhĩpêx kôt ate amnhĩ nhĩpêx o apa hã apumu? E na pa mẽ ra ijamaxpêr. Kot ka ã amnhĩ nhĩpêx anê. Na ra jar mẽ pahkwỳjaja kêp kwat nê Tĩrtũm mã tanhmã amnhĩ jarênh to jatur xàm mênh kaxyw amnhĩ krã hkênh mã. Jakamã e kêr ka ma mẽ hkôt tẽ nê mẽ urak nê amnhĩ krã hkênh nê kam nê mẽ ate amnhĩ krã kênhta pãnhã amnhĩre. Kot kaj ã mẽ hkôt amnhĩ nhĩpêx anê hãmri nhũm mẽ pahkwỳjaja arĩ mẽ pahte amnhĩ nhĩpêx o ate amnhĩ nhĩpêx o apa hã apumu nê mẽ kot ato hêx ã apumunh kurê kumrêx. Nê arĩ ate finat Mojes kapêr kôt amnhĩ nhĩpêx o ri apa hã apumu. Anê.

26Hãmri nhũm Pawre mẽ kuma nê mẽ kãm:

—Tôe. Nà ãm hãmri na ka mẽ inhmã awjarê. Nà kot paj ã amnhĩ nhĩpêx anê. Anê.

Jakamã nhũm apkati nhũm ma mẽ kêp 4tajê o mō nê mẽ mex kaxyw tanhmã amnhĩ nhĩpêx to. Hãmri nê Tĩrtũm mã amnhĩ jarênh xà hã ixkre hwỳr mra nê agjê nê mẽ õ patre mã mẽ amnhĩ jarê nê kãm:

—E ot pa mẽ awỳr mra. Na pa prem ra mẽmoj tã tanhmã Tĩrtũm mã amnhĩ jarênh to. Tã kot paj mẽ axte ixtã ã semãn hãmri nê hatur xàm mênh kaxyw akupỳn awỳr mra nê amã mẽmoj gō ka mẽ inhmã Tĩrtũm mã agō nê hkôt kãm mẽ ijarê. Nê pa kot paj mẽ ixpiitã hpãnhã amã amnhĩre. Anê.

Mẽ kot Pawre pynênh ã mẽ harênh

Atre 24.12

27Tã nhũm semãnja hapêx kaxyw nhũm pika pê As rũm Ijaew kwỳjaja ma mra nê Tĩrtũm mã amnhĩ jarênh xà hã ixkre hwỳr agjê. Hãmri nê kamã Pawre pumu nê kamã gryk tỳx nê hwỳr hprôt nê unê nê tanhmã hkwyjê mã ho hêx to nê ho kapêr punuj nê. Nê mẽ kãm:

28—E mẽ amnê mra nê jahti pumu. Na hte krĩ piitã hkôt ri mẽ pahkwỳjê mã tanhmã ri hêx to ho pa. Tĩrtũm nhỹ hã finat Mojes kapêr nhũm mẽ kãm ho kapêr punuj o pa. Nê mẽ pahte Tĩrtũm mã amnhĩ jarênh xà hã ixkreja nhũm hte mããnên tanhmã mẽ kãm ho kapêr punuj to. Mẽ pahpyrà nê kêp Ijaew tã mẽ pahpê hkwỳ ho kapêr o pa. Tã ra axtem nê amnhĩ kôt Tĩrtũm nhõ ixkre hwỳr Ijaew kêt xwỳnh kwỳjê ho agjê. Mẽ kot hwỳr gjêx kêt kumrêx tã nhũm axtem nê amnhĩ kôt mẽ ho agjê. Anê.

29Na pre krĩa kamã Ijaew kêt xwỳnh Topĩa Pawre hkôt pa nhũm mẽ omu. Kêp Epes nhõ xwỳnh nhũm mẽ kot pry ã Pawre hkôt pa hã

omu. Tã hã ahtũm nẽ Tĩrtũm mã amnhĩ jarẽnh xà hã ixkre kamã Pawre pumu nẽ htỳx amnhĩ kôt Topĩ ho àr ã hkamnhĩx nẽ ã mẽ kãm harẽnh anẽ. 30Hãmri nhũm mẽ kuma nẽ Pawre kamã gryk tỳx nẽ. Nẽ hwỳr hprõt nẽ unê nẽ ixkre rũm ho kato nẽ kêp hakwa kre kahê. 31-32Hãmri nẽ ma o tẽ nẽ htak rax nẽ. Ra mẽ kot htak o hpĩr mã tã nhũm mẽhõja pôristi krãhtũm wỳr hprõt nẽ kãm awjarẽ nẽ kãm:

—Kwa o mũj mẽ ra kot axpẽn nhĩmex kaxyw pijapu ho kuhê. Anẽ.

Hãmri nhũm tee ri kuma nẽ pôristi hkwyjê mã anê nẽ mẽ ma mẽ hwỳr hprõt kurê kumrêx. Nhũm mẽ arĩ Pawre htak tã amnhĩ wỳr mẽ omu nẽ mẽ umaj kãm ure. 33Hãmri nhũm pôristi krãhtũm Pawre hã amỳnê nhũm pôristijaja unê nẽ kàx o mẽ hkaxprexà ho axkrut nẽ ho hkaxpre pa. Hãmri nhũm mẽ hkrãhtũm Pawre hã mẽ hkukja nẽ mẽ kãm:

—Kwa mẽ atõ inhmã jahti jarẽ. Tanhmã na hixi te? Tanhmã na we amnhĩ tomnuj to hã na ka mẽ ã hipêx anẽ? Anẽ.

34Hãmri nhũm mẽ kuma nẽ piitã anhĩpê kàxpê kãm tanhmã harẽnh to. Nom axpẽn kwỳm tanhmã ri kãm harẽnh to. Hãmri nhũm tee ri hprĩ hã kot mẽ mar kaxyw hãmri nẽ pôristi mã anê nhũm mẽ kêp Pawre ho kato nẽ ma mẽ àpênh xà hã ixkre hwỳr o tẽ. 35-36Hãmri nhũm Ijaew kwỳ ohtô nẽ pry hã axpẽn nhĩgãnh o hkôt mra. Nẽ gryk xàj kapêr punuj tỳx o mẽ hkôt mỗ nẽ kàx pê pôristi mã kapêr nẽ mẽ kãm:

—Kwa mẽ apĩhti ri. Mexti hã. Mẽmo kaxyw na ka mẽ ri amã hapê ho apahti? Anẽ.

Jakamã nhũm pôristija tee ri mẽ kuma hãmri nẽ mẽ kot tanhmã ho pymaj kumỳ nẽ kỳx pê mẽ kêp kupê nẽ o mỗ. Jao ixkreja wỳr mẽ àpir xà hã ho àpir o mỗ. 37Nẽ kot ho àr kaxyw tã nhũm Pawre mẽ hkrãhtũm mã kãm:

—E pa amã mẽmoj jarẽ ka inhma. Anẽ.

Mẽ kapêr o kãm kapêr hãmri nhũm amnhĩ jaêr pê kuma nẽ kãm:

—Kwa xà na ka mẽ ixpyrà nẽ Gresjê kapêr o akapêr? 38Na pa ixtỳx apê Ejit nhõ xwỳnh pê mẽ hpar o apa xwỳnhhta ã akamnhĩx. Ham na pre mẽ inhõ pahĩhti kutã amnhĩ xãm nẽ kot hkurê kaxàr kaxyw mẽ ho ajuta xwỳnhjê ho 4.000 nẽ mẽ hkurê nẽ ma kapôt ã mẽ o pa. Nom tãm na xep Gresjê kapêr o kapêr kêt nẽ. Anẽ.

39Hãmri nhũm Pawre kãm:

—Nà ixpê Ejit nhõ xwỳnhhta kêt. Ixpê Ijaew na pa. Pyka pê Siris kamã krĩ rax pê Tas kamã na pa pre ixkato. E xà kot paj ixkôt mẽ mỗr xwỳnh něj mã ixkapêr nà? Anẽ.

40Hãmri nhũm kãm:

—Tôe. Kam nẽ mãmri tanhmã mẽ kãm akapêr to. Anẽ.

Hãmri nhũm mẽ àpir xàta ã kỳx pê mẽ mỳri xa nẽ kãnhmã mẽ kãm ìhkra pê nhũm mẽ omu nẽ hpĩnhkrênh pa nhũm mẽ kãm amnhĩ jarẽ.

Pawre kot kãm hkurê xwỳnhjê mã amnhĩ jarẽnh

Atre 9.1-19, 26.1-23

22 1-2Nhũm Pawre amnhĩ kwỳ Ijaew kapẽr o mẽ kãm kapẽr nẽ mẽ kãm:

—E ixkwỳjaja. Pa mẽ amã amnhĩ jarẽ ka mẽ inhma. Anẽ.

Hãmri nhũm kot mẽ kapẽr o kapẽr ma nẽ hpinhkrênh pa nẽ akryk mar o kuhê nhũm mẽ kãm:

3—Nà ixpê mẽ anhĩõ na pa. Ijaxwỳja ixpê Ijaew. Pyka pê Siris kamã krĩ pê Tas kamã na pa pre ixkato no ãm jar Jerujarẽ kamã na pa pre ixàptàr. Kamariew na pre hte ijahkre ho pa. Finat Mojes kot Tirtũm nhỹ hã mẽ panhĩgêjtê mã kapẽrja nhũm pre hprĩ hã ho ijahkre ho pa. Na pa pre mẽ apyrà nẽ inhmã Tirtũm kôt amnhĩ nhĩpêx prãm nẽ.

4—Jakamã na pa pre mẽ pahkwỳ kot Jejus kôt amnhĩ xunhwỳr xwỳnhjê japêr o ixpa nẽ nhỹri mẽ kãm ixkato nẽ mẽ unê. Měmyjê pynê nẽ mēnijê pynê. Hãmri nẽ mẽ kot mẽ hpar kaxyw mẽ hagjênh o ri ixpa. 5Na pa pre ã mẽ hipêx o ri ixpa anẽ. Mẽ panhõ patre maati nẽ mẽ àptàr tũmrejaja ra mẽ kot ja hã ixpumunh mex. Mẽ tãmjaja na prem krĩ pê Tamas kãm mẽ pahkwỳjê kaxyw kagà nhĩpêx nẽ inhmã kugõ pa kupy nẽ ma mẽ hwỳr o mō. Ixte mẽ õ krĩ kamã Jejus kwỳjê pynênh par nẽ man akupỹn Jerujarẽ hwỳr mẽ ho inhmõr nhũm mẽ kot tanhmã mẽ ho kaxyw.

6—Tã ra myt apha pa mẽ hwỳr ixàhtêp o mō. Puh nhũm kaxkwa rũm hirã rax kumrêxja ixwỳr wrỳ nẽ ixtã ajêt pa hipòk ri xa. 7Hãmri nẽ umaj pykap tẽm nhũm mēhõ kapẽr nẽ inhmã: “Pa Sawti? Hêxta waa nẽ. Kwa mon ka hte axtem nẽ ixtomnuj tỳx o ri apa?” Anẽ. 8Hãmri pa kãm: “Kwa mẽ atõ na ka ri ã inhmã akapẽr anẽ pahihti?” Anẽ nhũm inhmã: “Ixpê Najare nhõ xwỳnh Jejus. Pa na ka hte ixpê ixkôt mẽ kot amnhĩ xunhwỳr xwỳnhjê homnuj tỳx o ri apa. Jao te pa ixtomnuj pyræk.”

9—Anhỹr o inhmã kapẽr nhũm ixkôt mẽ pa xwỳnhjaja kuma no ãm hprĩ hã mar mex kêt nẽ. ãm hirã raxta pix pumu. 10Tã pa kãm: “No tanhmã kot pa we amnhĩ to Pahihti?” Anẽ nhũm inhmã: “E kànhmã xa nẽ mãmrĩ ma Tamas wỳr mō. Kot kaj hwỳr pøj nhũm mēhõ awỳr tẽ nẽ mēmoj tã amã karõ ka ama nẽ hkôt amnhĩ nhĩpêx.” Anẽ.

11—Nhũm pre ã inhmã kapẽr anẽ. Hãmri pa hirã rax pumunh o ixãm kurê ra inhno hkre nẽ ixrĩt kêt nhũm ixkôt mẽ pa xwỳnhjaja ixpa hã ixpy nẽ ma Tamas wỳr ixto mō nẽ ixto pøj.

12—Tã nhũm Tamas nhõ xwỳnh pê ãnãñisti ixwỳr tẽ. Na pre hte Tirtũm kapẽr ã kagà htũm kôt amnhĩ nhĩpêx mex nhũm Tamas kamã Ijaew piitã kãm hkĩnh nẽ axpẽn mã mex ã harẽ. 13Jakamã nhũm ixwỳr tẽ nẽ inhmã: “Pa Jejus kôt ixtõ Sawti? E akupỹm rĩt.” Anhỹrja kôt pa akupỹm ixrĩt mex kurê kumrêx nẽ omu. 14Hãmri nhũm inhmã: “Nà mẽ panhĩgêjtê nhõ Tirtũm na amnhĩ kaxyw ata. Ate kapẽr mar nẽ hkôt

tanhmã amnhĩ nhĩpêx to ho apa kaxyw. Nê ate kaxkwa kamã Kra mex pumunh nê kapêr mar kaxyw. Tã ka xep ham hirã rax kamã omu nê kapêr ma. 15Jakamã kêr ka ma mẽ piitã mẽ kãm ate omunh xwỳnhja jarênh o ari mẽ hkôt apa. Nê mẽ kãm kapêr jarênh o mẽ ahkre ho ri apa. 16E tokyx kànhmã xa nê Jejus mã amnhĩ jarê nê hkôt amnhĩ xãm kê anê ate amnhĩ tomnuj rênh pa. Hãmri pa apê hkwỹ hã akrã kumrã ka ma mẽ kãm kapêr jarênh o ri apa.” Anê.

—Nhũm pre ã Ânãnĩsti inhmã kapêr anê.

17—Tã pa man akupỳn jar Jerujarê hwỳr mẽ awỳr mō. Hãmri nê jar Tĩrtũm mã amnhĩ jarênh xà hã ixkre kamã kãm amnhĩ jarênh o ixãm rôm axte mẽmoj pumu. 18Nhũm Jejus axte ixwỳr kato nê xa nê inhmã kapêr nê inhmã: “E inhma. Jerujarê nhõ xwỳnhjaja kãm ixkapêr mar prãm kêt jakamã kot kaj mẽ kãm ixkapêr jarê nhũm mẽ amar kêt nê. Jakamã kwa tokyx akato nê hpãnhã ma nhỹhỹm mō.” Anê.

—Hãmri pa tee ri ã kapêr anhỹrja ã kuma nê kãm: 19“Kwa nà koja mẽ inhma Pahihti. Ra mẽ kot ixte amnhĩ nhĩpêx ã ixpumunh mex. Ixte amnhĩ nhĩpêx tũmta kôt mẽ kot ixpumunh mex. Na pa pre hte krĩ piitã hkôt mra nê Tĩrtũm kapêr o mẽ ahkre xà hã ixkre kamã mẽ kot akôt amnhĩ kaxyw hamaxpêr xwỳnhjê pynê nê mẽ htak nê mẽ hagiênh xà kamã mẽ hagiê nhũm mẽ kot ja hã ixpumunh mex. 20Nhũm mẽ kot akapêr jarênh o pa xwỳnh Estewãw pĩrta pa pre hã mẽ omu nhũm ja inhmã mex pa mẽ kãm mẽ hinôkà jamỳnh o hã mẽ omunh o xa. Na pa pre ã amnhĩ nhĩpêx anhỹr o ri ixpa. Tã hpãnhã akôt amnhĩ xãm hãmri nê akôt amnhĩ nhĩpêx o ri ixpa. Jakamã koja mẽ ixte amnhĩ nhĩpêx nyw ã ijarênh ma nê kãm ixkapêr mar prãm nê.” Anê.

21—Pa pre ã Jejus mã amnhĩ jarênh anê nhũm inhmã: “Nà. Kêr ka mãmrĩ krĩa rũm akato nê ma nhỹhỹm mō. Kot paj hpãnhã ma Ijaew kêt xwỳnhjê hwỳr amê ka hpãnhã ma mẽ hwỳr mō nê mẽ hkôt mẽ kãm ixkapêr jarênh o ri apa.” Anê.

22Nhũm pre Pawre ã amnhĩ hkwỹjê mã amnhĩ jarênh anê nhũm mẽ arĩ mar o kuhê rãhã Ijaew kêt xwỳnhjê jarênh ma nê kamã gryk tỳx nê. Ijaew kêt xwỳnhjaja kot mẽ urak nê Tĩrtũm kapêr marja nhũm mẽ kãm hprãm kêt jakamã nhũm Pawre ã mẽ harênh anê nhũm mẽ kuma nê kamã gryk tỳx kumrêx. Nê gryk xàj kapêr punuj nê kapêr o:

—Kwa mẽ mãmrĩ apĩhti ri. Am hpĩr mã htãmti kênã. Anê.

23Hãmri nê gryk xàj amnhĩ nhĩnôkà hkwrỳ nê ho apê nê pyka jamỳ nê kànhmã ri ho ahkapê.

Pawre kot pôristi krãhtũm mã amnhĩ jarênh

Atre 16.35-39

24Hãmri nhũm pôristi krãhtũmja tee ri ã mẽ kot amnhĩ nhĩpêx anhỹr ã mẽ omu nê mẽ kapêr ma nê pôristijê mã kapêr nê mẽ kãm:

—Kwa tanhmã na we jahti amnhĩ tomnuj to nhũm mẽ ã kamã gryk tỳx anê? E mẽ tokyx ixkre hwỳr ho axà nê mẽ htak xà ho htak kê mẽ pamã tanhmã amnhĩ jarênh to. Anê.

25Hãmri nhũm mẽ kuma nê ho axà nê htak kaxyw kormã hpre ho xa. Hãmri nhũm pôristi krãhtũm nhõ kôwenatôja mẽ hkôt axà nê hã mẽ omunh o xa nhũm Pawre omu nê amnhĩ tã kãm kapêr nê kãm:

—Kwa kormã ixte tanhmã mẽ amã amnhĩ jarênh to hkêt tã ka mẽ ixtak kaxyw. Ixpê Ijaew tã mãânên ixpê Rôm nhõ xwỳnh kênã. Xà na htem ã Rôm nhõ xwỳnhjê nhĩpêx anê? Anê.

26Hãmri nhũm tee ri ã amnhĩ jarênh anhỳrja ã kuma nê pôristi krãhtũmja wỳr hprôt nê kãm:

—Kwa taxy pu mẽ tanhmã ho hkêt nê. Xep kêp Rôm nhõ xwỳnh kênã. Anê.

27Hãmri nhũm tee ri kuma nê Pawre hwỳr axà nê kãm:

—Kwa xà ãm hãmri na ka amnhĩ jarê? Xà apê Rôm nhõ xwỳnh na ka? Anê.

Hãmri nhũm kãm:

—Tỳ. ãm hãmri ixte mẽ amã amnhĩ jarênh kênã. Ixpê Rôm nhõ xwỳnh na pa. Anê.

28Hãmri nhũm kãm:

—Kwa pa na pa pre amnhĩ to Rôm nhõ xwỳnh prãm xàj amnhĩ pãnhã mẽ kãm amnhĩrer rax nê. Anê.

Nhũm Pawre kãm:

—Tỳ nom pa na pa pre amnhĩ pãnhã mẽ kãm amnhĩrer kêt nê. Inhĩpêêxà hkôt ixpê Rôm nhõ xwỳnh na pa. Anê.

29Hãmri nhũm mẽ kuma nê tee ri hamaxpêr o kãm ma nê. Nê kãm ma ho hkaga kurê kumrêx. Nhũm mẽ hkrãhtũm nhõ pahija mãânên kãm ma nê. Kêp Rôm nhõ xwỳnh tã nhũm mẽ axtem nê kot unênh nê kàx o hkaxpreja mã hamaxpêr nê kãm ma nê. Na htem ã Rôm nhõ xwỳnhjê nhĩpêx anhỳr kêt nê. Na htem tanhmã mẽ hkukjêr to nê hprĩ hã mẽ kuma nê rĩ kormã tanhmã mẽ hipêx to.

Pawre kot Ijaew xàptàr tũmrejê mã amnhĩ jarênh

Matêwre 23.27-28

30Tã nhũm apkati nhũm pôristi krãhtũmja Ijaew kwỳ ho akuprõ. Mêõ patre maati nê patre krãhtũmjaja nê mẽ àptàr tũmrejaja nhũm kot mẽ kãm tanhmã Pawre jarênh to kaxyw mẽ ho hpikuprõnh pa. Hãmri nê Pawre pê hkaxpre xà rê nê ma mẽ hwỳr o tẽ nê mẽ kutã ỳr.

23 ¹Hãmri nhũm mẽ omu nê mẽ kãm amnhĩ jarê nê mẽ kãm: —E ixkwỳjaja. Pa mẽ amã amnhĩ jarê ka mẽ inhma. Na pa hte Tĩrtũm nom tãm amnhĩ nhĩpêx o ixpa nê mẽ pahpê Ijaew mẽ pahte amnhĩ nhĩpêx kwỳm ri tanhmã amnhĩ nhĩpêx to hkêt nê. Anê.

2Hāmri nhūm mẽ õ patre maati Ānānīsti kuma nē kamā gryk nē. Axtem Ānānīsti hō na pre. Hāmri nē ã Pawre kot amnhĩ jarēnh anhỹrja ã kuma nē kamā gryk nē. Hāmri nē mẽ kot mar o kuhê xwỳnhjê mã kām:

—Kwa mẽ atõ hakwap hkurahti ri. Tãm kot amnhĩ nhĩpêxti hã. Na ãm mẽ pamã amnhĩ to hêx o xa. Anẽ.

3Hāmri nhūm Pawre kuma nē hwỳr rĩt nē omu nē kām:

—Nà ka koja Tĩrtũm akura kãm ga. Te ate finat Mojes kot ỹ hã kapêr kõt amnhĩ nhĩpêx pyrãk tã ri axtem nē ri mẽ kot ijakwap ixkuranh kaxyw ri mẽ kãm ixtã amỳnê. Anẽ.

4Hāmri nhūm kuri mẽ kuhê xwỳnhja tee ri ã kãm kapêr anhỹrja ã kuma nē kãm:

—Kwa kêp patre maati kênã kot ka kêt ri ã kãm akapêr anẽ. Anẽ.

5Hāmri nhūm amnhĩ jaêr pê ja hã kuma nē kãm:

—Kwa ixte ja hã omunh kêt jakamã na pa ã ixtỳx kãm ixkapêr anẽ. Ixte kêp patre maati hã omunh ronhỹx pa ã kãm ixkapêr anhỹr kêt nē. Tĩrtũm kapêr ã kagã htũm kot ja nê mẽ pamã kapêr kênã. Mẽ pahte tanhmã mẽ panhõ pahi ho pakapêr punuj to nê mẽ pamã kapêr. Tã pa ãm ixtỳx ã kãm ixkapêr anẽ. Anẽ.

6-8Hāmri nē hprĩ hã mẽ kot mar o hkrĩ xwỳnhjê pumu. Nhūm mẽ kamã Satusew nhõ xwỳnh kwỳ nē Parijew nhõ xwỳnh kwỳ. Satusew mẽ Parijew nhõ xwỳnhjaja na htem axpên kwỳm ri tanhmã mẽ htykjê jarēnh to. Satusew nhõ xwỳnhjaja na htem mẽ htyk nē mẽ hkarõ mẽ ro hã mẽ hapêx o mẽ hapêx ã mẽ hkamnhĩx. Nê Tĩrtũm kapêr o mẽ wrỳk xwỳnh kêt ã mẽ harēnh o pa. No Parijewjaja na hte mẽ kurom mẽ htyk nē akupỳm mẽ htĩr ã mẽ hkamnhĩx nê Tĩrtũm kapêr o mẽ wrỳk xwỳnh ã mẽ hkamnhĩx. Nhūm Pawre kot ja hã mẽ omunh jakamã tanhmã hamaxpêr to hãmri nē mẽ kãm kapêr. Na pre Parijew nhõ xwỳnhjê pyrã nē mẽ htyk nē akupỳm mẽ htĩr kõt hamaxpêr nê Tĩrtũm kapêr o mẽ wrỳk xwỳnh kõt hamaxpêr. Jakamã mẽ omu nē kax pê mẽ kãm kapêr nē mẽ kãm:

—Nà ijaxwỳja ixpê Parijew nhõ xwỳnh. Nhūm inhĩpêêxã haxwỳja kêp Parijew nhõ xwỳnh. Jakamã na pa hte mẽ apê Parijew nhõ xwỳnhjê pyrã nē mẽ htyk nē akupỳm mẽ htĩr kõt ijamaxpêr. Tã ãm ja pix mỳrapê na ka mẽ ixpynê nê ã inhĩpêx anẽ. Anẽ.

Hāmri nhūm Parijew mẽ Satusew nhõ xwỳnhjaja kuma nē ja hã axpên kãm gryk nē. Nê hã axpên mã akir. 9Hāmri nē ra axpên mã àkjêr rax nē. Hāmri nhūm Parijew kwỳ pê Mojes kapêr o mẽ ahkre ho mẽ pa xwỳnhjaja kãnhmã kuhê nē mẽ kãm Pawre hã àprãr kãm hihtỳx nē mẽ kãm:

—Kwa pêr tanhmã kot amnhĩ tomnuj tore hã. Mãn ãm hpimtir kãm na pre ã ri kaxkwa kamã mẽmoj mar anẽ. Rỳ apu Tĩrtũm kapêr o wrỳk xwỳnh kãm tanhmã kapêr to nhūm pre Tamas wỳr pry kamã mar o xa rỳ ko. Anẽ.

10Hāmri nhūm Satusew nhõ xwỳnhjaja tee ri Tĩrtũm kapēr o mẽ wryk xwỳnh kot kām kapēr ã harēnhja ma nē hã axpēn mã àkjēr rax nē. Hāmri nhūm pōristi krãhtũmja tee ri mẽ kot axpēn mã àkjēr ã mẽ omu hāmri nē pōristi mã kãm:

—Kwa mẽ Pawre hwỳr tē nē mẽ kēp utà nē ma akupỹm o tē nē haxà. Kot ka mẽ ho anhỳr kēt nhũm mẽ tanhmã hamaxpēr to nē gryk xàj axpēn nhĩhkra kamã hkaxônh pa. Anē.

Hāmri nhũm mẽ kuma nē hwỳr tē nē mẽ kēp utà nē akupỹm o tē nē ixkre hwỳr ho axà.

Jejus kot Pawre jamaxpēr o hihtỳx ã harēnh

Atre 18.9-10

11Tã nhũm kamàt nhũm Jejus tãm Pawre hwỳr kato nē kãm:

—Pa Pawre? Kwa tee ri amnhĩ kukamã ajamaxpēr o amnhĩ kamã akahak kēt nē. Kot kaj te ra ate jar Jerujarē kamã mẽ kãm ijarēnhta pyrà nē ma krĩ pē Rõm wỳr mō nē krĩ nhõ xwỳnhjê mã ijarē. Anē.

Mẽ kot Pawre hã àmnēnh ã mẽ harēnh

Sikũn Ximotre 4.18

12-13Tã nhũm apkati nhũm Ijaew kwỳjaja axpēn wỳr akuprõ. Měmyjaja kēp 40 nē axte hkõt mẽ hkwỳjaja axpēn wỳr akuprõ. Mẽ kot Pawre pĩr kaxyw hã axpēn mar kaxyw hã akuprõ nē hã axpēn mã amỳnē nē xpēn mã:

—Tõe. Nà kot puj mẽ hpĩr kaxyw amnhĩ jagri htỳx o paxàpkur kēt rãhã kupĩ nē rĩ kormã apku nē ixkõ. Nà kot puj mẽ ho anē. Ra Tĩrtũm noo mã mẽ pahte ja hã amnhĩ jarēnh kēnã. Anē.

14Hāmri nē mẽ ma mẽ õ patre krãhtũmjê mẽ mẽ àptàr tũmrejê hwỳr mra nē mẽ kãm hã amnhĩ jarē nē mẽ kãm:

—Ot pa mẽ amã amnhĩ jarēnh mã mra. Nà kot paj mẽ tã Pawre pĩ. Kot paj mẽ kormã hpĩr kēt ri ixàpkur kēt rãhã kupĩ. Ra mẽ ixte Tĩrtũm noo mã ja hã amnhĩ jarēnh xà hkõt. 15Jakamã e mẽ inhma. Kēr ka mẽ axêx rom pōristi krãhtũm mã anē kē apkati kē man mẽ awỳr Pawre ho tē. Te mẽ ate aprĩ hã hkukjēr kaxyw pyràk o kãm axêx. Koja mẽ kormã mẽ awỳr ho hpõx kēt ri pa mẽ unēn kupĩ. Anē.

16Hāmri nhũm Pawre tàmnhwỳ mẽ kot ã hã amnhĩ jarēnh anhỳrja ma hāmri nē ma pōristi xàpēnh xà hã ixkrej wỳr Pawre hwỳr hprõt nē kãm mẽ harē. 17Hāmri nhũm kuma nē amnhĩ wỳr pōristi krãhtũm nhỹ hã mẽ hamãr xwỳnh ã karõ nē kãm:

—Kwa ma mẽ akrãhtũm wỳr ixtàmnhwỳta o tē kē kãm mẽmoj jarē nà? Anē.

18Hāmri nhũm kuma nē ma hwỳr o tē nē kãm:



Atre 23.12-22

—E Pawre na inhmã anê pa awÿr htàmnhwÿ ho tẽ. Kot tanhmã amã ujarênh to kaxyw. Anê.

19Hãmri nhũm omu nê hpa hã kupy nê o tẽ nê ahte mẽ hkàx ã o xa nê kãm:

—E mãmri inhmã mẽmoj jarê pa ama. Mẽmo na ka te inhmã harênh kaxyw? Anê.

20-21Hãmri nhũm kãm:

—Nà Ijaew xàptàr tùmrejaja na mẽ kot inhìgêt Pawre pĩr kaxyw hã amnhĩ jarê pa amã harênh o tẽ. Koja xep mẽ hã awÿ. Xep apkati nhũm ate ma mẽ hwÿr mẽ hkukjêr xà hã ixkre hwÿr ho amõr nhũm mẽ kot hprĩ hã kot amnhĩ nhĩpêx ã hkukjêr kaxyw. Nom koja mẽ ãm amã amnhĩ to hêx. Koja xep mẽ kêp 40 nê pry kamã kutêp amũxu nê kuhê. Na mẽ ra hã axpên mar pa nê axpên mã: “Kot puj mẽ paxàpkur kêt rãhã Pawre pĩ nê rĩ kormã apku nê ixkõ.” Anhÿr o amnhĩ jarê pa mẽ kuma. Jakamã na mẽ kormã ate mẽ hwÿr mẽnh kaxyw akãm ama. Kwa mẽ hwÿr ho amõr kêt nê. Anê.

22Hãmri nhũm kuma nê kãm:

—Tõe. Nà na pa ra ama. Mãmri ma akupÿm tẽ. Nom kêr ka inhmar kumrêx. Kêr ka nhãm mẽhõ mã ja jarênh kêt kumrêx. ãm kwarĩ ho kwarĩ. Anê.

Hãmri nhũm kuma nê kato nê ma akupÿm tẽ.

Mẽ kot Ijaew pymaj nhÿhÿm Pawre mẽnh ã mẽ harênh

23-24Tã nhũm pòristi krãhtũmja amnhĩ wÿr ÿ hã pòristi jamãr o mẽ pa xwÿnh wa ho hamêxkrut nê wa hã karõ nê wa kãm:

—E wa inhma. Koja kôt ã kamàt ka wa ma krĩ pê Sejarej wÿr Pawre ho mõ kê hkà hkĩnh pê pahihter Peris wÿr pøj.

Nê amnhĩ kôt pòristi ho 200 nê o mõ.

Nê kê mẽ kêp 70 nê kawar ã hkrĩ nê mẽ akôt mõ.

Nē kê mẽ kêp 200 nē wapo jamỳ nē mẽ akôt o mō.

Kê mẽ ã ohtô rax anē.

Nē Pawre kot kawar ã ỳr nē mōr kaxyw ka mẽ kãm hō ho mō.

E kêr ka mẽ ã axohtô nē hkôt amōr anē kê hkà hkĩnh pê pahihti Peris wỳr pōj. Anē.

25Hāmri nē pahihti Peris mã kagà nhĩpêx nē kamã kãm Pawre jarē nē kãm:

26Pa pahihti Peris? Xà amex? Ixpê Kraw Risas na pa awỳr kagà mẽ.

27E ot pa awỳr Ijaew pê Pawre mẽ. Na pre hkwyja kot hpĩr kaxyw unênh tâ pa mãânên kêp Rōm nhō xwỳnh ã harênh ma hāmri nē hwỳr inhō pôristi rē nhũm mẽ hwỳr hprôt nē mẽ kêp utà.

28Hāmri nē Ijaew xàptàr tũmrejê hwỳr o tē. Mẽ kot inhmã tanhmã kot amnhĩ tomnuj to hã harênh kaxyw. 29Tanhmã kot amnhĩ tomnuj to nhũm mẽ kot haxàr rỳ hpĩr ronhỹx ja mex nē. No xep ãm kot mẽ higêtjê kot amnhĩ nhĩpêx kôt amnhĩ nhĩpêx kêt pix mỳrapê na mẽ kamã gryk.

30Tã pa mẽ kot hpĩr kaxyw hã mẽ harênh ma nē mẽ umaj awỳr kumē. Hāmri nē kamã mẽ gryk xwỳnhjê mã ajarē. Jakamã koja mẽ mẽmo arĩgro hã awỳr pōj nē tanhmã kot amnhĩ nhĩpêx to hã amã harē ka kam ja hã mẽ ama nē tanhmã ho.

Tã ãm ja pix na pa amã harē. Ixpê Kraw Risas na pa awỳr kagàja mẽ. Tã mãn ka arĩ ixte amã harênhja ma. Anē.

31Tã nhũm kamàt nhũm mẽ hkrãhtũm kot mẽ kãm karō xà hkôt nhũm pôristijaja ma Pawre o mō. Hāmri nē krĩ pê Āxipat wỳr pōj nē kamã amnhĩm hikra.

32Nhũm apkati nhũm mẽ kot mẽ hkôt pykap mōr xwỳnhjaja mẽ ò pahi kot mẽ kãm hã karō xà hkôt awjanã nē ma akupỳm mō nhũm kawar ã mẽ mōr xwỳnh pixjaja ma Pawre ho mō. 33Hāmri nē mō nē Sejarej wỳr pōj nē pahihti Peris nhĩhkram Pawre jaxà nē kãm kagàja gō nē awjanã nē ma akupỳm hapêx. 34Hāmri nhũm Perisa kagàja py nē omu. Nē omunh pa nē Pawre mã kãm:

— E inhmã amnhĩ jarē. Tanhmã na anhō pyka hixi te? Anē.

Nhũm kãm:

— Kêp Siris. Anē.

35Nhũm kãm:

— Tôe. Kê mẽ kot ato kapêr xwỳnhjaja pōj pa kormã ixprĩ hã mẽ kot tanhmã ajarênh to ma mãn. Anē.

Hāmri nē ò pôristi mã anē nhũm mẽ ma Pawre o tē. Ma pahi Erox htyk xwỳnh nhōrkwỹ hwỳr o tē nē kamã haxà nhũm hkrĩ ho hkrĩ.

Ijaew kot tanhmã Pawre ho kapêr punuj to hã mẽ harênh*Rukre 21.12-13; Atre 25.7*

24 ¹Tã nhũm arĩgro kêp 5 nê hapêx nhũm Ijaew kwỳjaja Sejarej wỳr pøj. Mẽ õ patre maati ãnãñisti nê Tetur nê kaxyw mẽ àptàr tũmrejaja nhũm mẽ ma hwỳr mỗ nê pøj. Tetur kêp axiwôkat ã mẽ yr pê kapêr xwỳnh jakamã nhũm mẽ kot tanhmã Pawre o kapêr punuj to kaxyw pahi Peris wỳr amnhĩ kôt o mỗ. ²Hãmri nhũm mẽ amnhĩ wỳr Pawre hã karõ nhũm pôristi haprõ nê mẽ hwỳr o tẽn ho axà. Hãmri nhũm Teturja pahihti Peris mã Pawre kot tanhmã amnhĩ tomnuj to hã harẽ nê kãm:

—E pahihti inhma. Nà na ka hte tãm mẽ inhĩpêx nê mẽ ixto mex o apa. Jakamã nhũm hte nhãm pika hkwy nhõ xwỳnhjaja mẽ ixkurê kaxàr kaxyw mẽ ixwỳr hprõt kêt nê. Pa htem ixpiitã akukwak ri ijamakêtkati nê ixamnhĩx inhmex nê ixpa. ³Nê mẽ ixkĩnh rãhã ho ixpa. Hêxta waa nê. Mẽ ixpiitã inhmã akĩnh. ⁴E kot paj amã awjarẽ ka inhma. Kot paj ixujarênh o hakotre ka inhma nê tokyx ma akupỳm tẽ. ⁵Nà Pawre na hte amnhĩ tomnuj pix o pa. Kêp Jesus pê Najare nhõ xwỳnhta kôt amnhĩ nhĩpêx o mẽ pa xwỳnhjê nhõ pahi na. Jakamã na hte pyka piitã hkôt mẽ ixpê Ijaew tanhmã axpên kaxyw mẽ ixkryx to ho pa. ⁶Jãã na pre Tĩrtũm mã amnhĩ jarênh xà hã ixkre hwỳr amnhĩ kôt mẽ kêp Ijaew kêt xwỳnh kwỳjê ho agjê nê mẽ ixpê ixkreja omnu kaxyw mã tã pa mẽ omu nê unê. ⁷Tã nhũm pôristi krãhtũm Risasja mẽ ixpê utã ⁸nê awỳr mẽ ixte tanhmã amã harênh to xwỳnhjê rẽ. Tã ot pa mẽ ixkrĩ. Nê ota Pawre nhỹ. Kam kot amnhĩ nhĩpêx ã hkukja kê tanhmã amã amnhĩ jarênh to ka ama nê ixte amã harênh xà hkôt tanhmã mar to. Anẽ.

⁹Hãmri nhũm Ijaew hkwy haxwỳja kãm:

—Nà ãm hãmri na ã amã harênh anẽ pahihti. Anẽ.

Pawre kot pahihti mã amnhĩ jarênh*Rukre 21.14-19*

¹⁰Hãmri nhũm pahihti Peris Pawre mã anẽ nhũm kot kãm amnhĩ tã àprãr kaxyw kãnhmã xa nê kãm:

—Nà na ka ra inhõ pyka kamã mẽ ixto amnhĩptàr mex o atã amgrã xohtõ nê pahihti. Jakamã na pa pre ate ixkapêr mar kaxyw ã ajarênh ma nê ixkĩnh nê.

¹¹—E kot paj amã amnhĩ jarê ka inhma. Ham na pa pre Jerujarẽ hwỳr mỗ nê pøj. Na pa hwỳr ixpõx ã ixtã arĩgro pê 12 pix. Kam nê ixtã ixkwỳjê kukja nê mẽ ama. Ixte Tĩrtũm mã amnhĩ jarênh xà hã ixkre kamã Tĩrtũm mã mex o mex ã harênh kaxyw na pa pre hwỳr mỗ. ¹²No na pa pre nhỹri axpên kaxyw tanhmã ri mẽ hkryx to hkêt

ně. Ně mẽ ixte Tirtũm mã amnhĩ jarěnh xà hã ixkre kamã rỳ kapěr o mẽ ahkre xà hã ixkre kamã rỳ nhỹri pry kamã tanhmã axpěn kaxyw ri mẽ hkryx to hkět ně. Ām amrakati ho amrakati. 13Mě kot ā ri ijarěnh anhỹrja amrakati kumrěx. Měhõ kot ā ixte amnhĩ nhĩpěx anhỹr ā xipumunh kět tã na htem amnhĩ krã hkõt amã ijarěnh o hěx. 14Na htem mẽ ixte Jesus kõt amnhĩ nhĩpěx xwỳnhjaja mẽ ixte amnhĩ nhĩpěx mex kět ā mẽ ijarě nom kot anhỹr kět. Ām mẽ inhĩgětjê nhõ Tirtũm kapěr nywja kõt na pa hte amnhĩ nhĩpěx mex o ri ixpa rãhã ně. Nhũm ixkwỳjaja htỳx axtem kapěr õ hkõt ixte amnhĩ nhĩpěx o ixpa hã ixkamnhĩx no ām kapěr õ hkět. Ijaxwỳja na pa hte mẽ uràk ně finat Mojes kapěr ā kagà mar o ixpa. Ně Tirtũm nhỹ hã mẽ kapěr o mẽ pa xwỳnh kot kapěr ā kagàja pa hte mẽ uràk ně hkõt amnhĩ nhĩpěx mex o ri ixpa. 15Ně mẽ uràk ně Tirtũm kot nhỹrmã akupỳm mẽ ho htĩr kõt pa hte ijaxwỳja ijamaxpěr tỳx ně. Mě htyk xwỳnh piitã. Mě kot amnhĩ to mex xwỳnhjê mẽ mẽ kot amnhĩ tomnuj xwỳnhjê mẽ mẽ ho hpmiràtã akupỳm mẽ ho htĩrja kõt pa hte mẽ uràk ně ijamaxpěr tỳx o ri ixpa. 16Jakamã na pa hte tãm amnhĩ nhĩpěx rãhã ně. Tirtũm noo mã ně mẽ piitã mẽ noo mã tãm ri amnhĩ nhĩpěx mex rãhã ně.

17—Tã na pa pre pyka hkwỳ hkõt ri ixpa hã ixtã amgrã xohtõ ně. Hãmri ně ma akupỳm Jerujarě hwỳr ixkwỳjê hwỳr mõ. Amarĩ ixte mẽ kãm kàxpore hkwỳ nhõr kaxyw pa akupỳm mẽ hwỳr mõ. Ně mãăněn Tirtũm mã mẽmoj nhõr kaxyw. 18Hãmri ně mẽ ixte amnhĩ nhĩpěx xà hkõt pa mẽ amnhĩ to mex pa ně ma tẽn Tirtũm mã amnhĩ jarěnh xà hã ixkre hwỳr axà nhũm mẽ kamã xipumu. Nom na pa pre ri ixkreja kamã tanhmã amnhĩ tomnuj to hkět ně. Rỳ tanhmã ixkapěr punuj to hkět ně. Na pa prem ām inhgrêre ně akryk ixkuhê nhũm mẽ xipumu. 19Pika pê As rũm Ijaew kwỳjaja na prem ixkre kamã xipumu. Nar mẽ tãmjaja mãn awỳr mra ně tanhmã amã ijarěnh to.

20—Ně jar mẽ kot ixto kapěr xwỳnhjaja. Na pa pre mẽ àptàr tũmrejê mã amnhĩ jarěnh pa nhũm mẽ inhma ně tanhmã inhmã ně hkět ně. Kam ně ja hã mẽ hkukja ně mẽ ama. 21Rỳ ko. Koja apu mẽ amã ām ja pix ā ijarěnh japêr. Na pa pre mẽ kãm ixkapěr ně mẽ kãm: “Na pa hte mẽ htyk ně akupỳm mẽ htĩr kõt ijamaxpěr tỳx ně. Tã ja pix mỳrapê na ka prem xpyne ně ā inhĩpěx aně.” Anhỹr o mẽ kãm ixujarěnh jakamã nhũm apu mẽ hkwỳjaja kêp ja omnuj ně. Jakamã koja apu mẽ amã ja hã ijarěnh japêr. Nom ja pix jarě. Aně.

Ā na pre Pawreja pahi Peris mã amnhĩ jarěnh aně.

Peris mẽ hprõ wa kot Pawre mar ā wa harěnh

22Tã nhũm pahihti Peris kot mẽ kot Jesus kõt amnhĩ xunhwỳr xwỳnhjê kot amnhĩ nhĩpěx ā mẽ omunh mex jakamã hãmri Pawre mar pa ně ho kapěr xwỳnhjê mã kãm:

—Nà hāmri. Na pa ra mē ama. E mē mamrī ma mra. Kê pôristi krāhtūm Risasja mō nē pōj pa wa ixprī hā mē ate tanhmā harēnh toja ma nē rī kormā tanhmā Pawre jarēnh to. Anē.

23Hāmri nē hpānhā pôristi pytār xwŷnh mǎ Pawre jarē nē kām:

—E mē ma akupŷm ixkre hwŷr o tē nē kamā hamār o apa. No ãm kwār māmri àmnhīx ri ixkre kamā tanhmā amnhī to ho ri pa. Nē kê hkrāmnhwŷjaja māmri hwŷr mēmoj to mra kê kuku. Anē.

Hāmri nhūm mē kuma nē ma o tē nē akupŷm ixkre hwŷr ho axà nhūm kamā pa ho pa.

24Tā ra hā apkati grēre nhūm Peris mē hprō wa ma Pawre hwŷr tē. Prō haxwŷja kēp Ijaew. Hixi pē na pre Turujire. Jakamā nhūm wa ma Pawre nhōrkwŷ hwŷr wa tē. Nhūm Peris Pawre hā karō nhūm kato nē wa hwŷr tē nē wa kām awjarē. Tanhmā wa kot amnhī to nē amnhī kaxyw Jejus Kris kōt hamaxpēr nē hkōt amnhī xām prām xàj hprī hā wa kām harē. 25Nē wa kām:

—Nà na htem Jejus Kris kōt amnhī nhīpêx nē tām ri amnhī nhīpêx o pa. Kām tanhmā amnhī tomnuj to hprām tā ho anhŷr kêt nē. Nē arī Jejus kot amnhī nhīpêx kōt amnhī nhīpêx o pa. Kōja Tirtūm nhŷrmā mē pahpiitā mē pahte tanhmā amnhī nhīpêx to ho papa hā mē pahpumunh xà hkōt tanhmā mē pajarēnh to. Mē pahte tām amnhī nhīpêx xwŷnh ã mē pajarē rŷ mē pahte amnhī tomnuj xwŷnh ã mē pajarē. Anē.

Nhūm pre ã Pawre Peris mē Turujire wa kām kapēr anē. Hāmri nhūm Peris tee ri ujarēnhja ma nē kām ma nē. Kot amnhī tomnuj o pa xwŷnh ã amnhī pumu nē ã kām kapēr anhŷrja mar puma nē. Hāmri nē Pawre mǎ kām:

—E hāmri. Nà na pa wa ra ama. Mamrī ma akupŷm tēn axà. Kot paj mēmo arīgro hā mēmoj to anhŷr kêt nē axte amnhī wŷr atā karō ka axte tanhmā wa inhmā axujarēnh to. Anē.

26Nē htŷx hamaxpēr o:

—Nà kot paj mēmo arīgro hā axte amnhī wŷr hā karō kê ixwŷr tē nē ixte kator prām xàj inhmā amnhīrer japēr. Anē.

Hāmri nē xatā amnhī wŷr hā karō htā no nhūm aa kot kator kaxyw tanhmā kām nē hkêt nē.

27Tā nhūm amgrà axkrut nē hapêx nhūm Pos Pesti pahi Peristi hpānhā kēp mē ō pahi nē mē ho amnhīptà. Jakamā nhūm Peris akupŷm ō krī hwŷr nojarêt nē Pawre mǎ ihkra karo hkêt rāhā ma mō. Na pre hamaxpēr o:

—Nà kot paj Pawre kator nhūm Ijaew ja hā ijarēnh ma nē ixkamā gryk nē. Nà kwār mē hagjēnh xà hā ixkre kamā hkrī ho hkrī. Kot paj kator kêt nē. Anē.

Hāmri nē kām ihkra karo hkêt rāhā ma akupŷm ō krī hwŷr mō. Jakamā nhūm Pawre arī ixkre kamā kēp prēs nē hkrī ho hkrī.

Pawre Rôm wÿr hkrà ã harēnh

25 ¹Tã nhũm pahi nyw Pos Pesti krĩ pê Sejarej wÿr mōn pōj. Hãmri nē kamã ri pa hã apkati axkrunēpxi pix nē ma Jerujarē hwÿr mō. ²Hãmri nē hwÿr pōj nhũm Ijaew kwÿjaja omu nē hwÿr mra nē kãm Pawre ho kapēr nē hã hwÿr kurê kumrēx. Mēō patre krãhtũmjê mē Ijaew xàptàr tũmrejaja nhũm mē hwÿr mra nē kãm:

³—Pa pahihti? E ot pa mē awÿr mra. Kwa xà kot ka Pawre hã karō kê man awÿr mō ka jar kot tanhmã amnhĩ tomnuj to hã hkukja nē ama? Anē.

No ãm hêx rom ã hã kãm kapēr anē. Kot hã karō nhũm mē kot pry hã hpĩr kaxyw nhũm mē hêx rom ã kãm kapēr anē. ⁴Hãmri nhũm mē kuma nē mē kãm:

—Tk. Kwa ra Sejarej kamã kêp prês nē hkrĩ kênã kot pa kêt amnhĩ wÿr hã karō. Kot pa tokyx ma akupÿm hwÿr mō. ⁵Jakamã kêr ka mē axàptàr tũmjaja ma ixkôt mra. Hãmri nē Sejarej kamã inhmã tanhmã kot amnhĩ tomnuj to hã harēnh to pa mē ama nē rĩ kormã tanhmã harēnh to. Anē.

⁶Hãmri nē mē kamã pa hã apkati grêre nē ma akupÿm Sejarej wÿr mō. Hãmri nē hwÿr pōj nhũm apkati nhũm mē hkukjêr xà hã ixkre hwÿr tē nē mē kot mē mar xà hã mē hkrĩ xà kamã nhÿ nē amnhĩ wÿr Pawre hã karō. ⁷Nhũm mē hwÿr o tē nē ÿr nhũm hkwy kot Jerujarē rũm mē mōr xwÿnhjaja kãm hipôk nē pahi Pos Pesti mã tanhmã ho kapēr to nē ho kapēr punuj tÿx nē. Kot tanhmã amnhĩ tomnuj to ho pa hã ho kapēr o kuhê. Nom mē kot ã kot amnhĩ nhĩpêx anhÿr ã omunh kêt tã ãm amnhĩ hkrã hkôt ri tanhmã ho hêx to. ⁸Jakamã nhũm Pawre tee ri amnhĩ tã mē kot ho hêxja ma nē kànhmã xa nē Pos Pesti mã amnhĩ tã aprã nē mē kãm:

—Nà aa ixte ã amnhĩ nhĩpêx anhÿr kêt. Na pa finat Mojes kot Tĩrtũm nhÿ hã kapēr nhĩrôp ixãm nē hkwyòm ri tanhmã amnhĩ nhĩpêx to hkêt nē. Nē mē ixte Tĩrtũm mã amnhĩ jarēnh xà hã ixkre kamã ri tanhmã ixtÿx ri amnhĩ nhĩpêx to hkêt. Nē pahihti Sesti kapērja pa pre hirôp ixãm nē tanhmã amnhĩ tomnuj to hkêt nē. Aa ixte ã amnhĩ nhĩpêx anhÿr kêt kumrēx. Anē.

⁹Hãmri nhũm Pos Pesti kuma nē tanhmã hkukamã hamaxpēr to nē hamaxpēr o:

—Kwa nhÿ krĩ kamã kot pa we Pawre kot inhmã tanhmã amnhĩ jarēnh toja ma nhũm Ijaew ja hã kãm ixkĩnh japêr? Nà mēō krĩ pê Jerujarē hwÿr kot paj akupÿm mē hwÿr o mō nē kamã mãn hkukja nē kuma. Nà ja na mex. Nà kot paj anē. Anē.

Hãmri nē Pawre mã kãm:

—E xà kot puj ma akupÿm Jerujarē hwÿr mō pa kamã axte mē kot ajarēnh ma nē tanhmã ajarēnh to nà? Anē.

10Hāmri nhũm kām:

—Nà jar ixte pahihti Sesti nhỹ hã mẽ kot mẽ hkukjêr xà hã ixkre kamã inhỹr nẽ amnhĩ jarênh kênã. Jar na htem mẽ hkukja nẽ tanhmã ri mẽ mar to. Na pa pre tanhmã ixkwỳjê ho hkêt nẽ. Mẽmo kaxyw kot pa akupỹm mẽ hwỳr mỗ nẽ axte mẽ kãm amnhĩ jarẽ? 11Kop apu pa tanhmã ixte amnhĩ tomnuj to ronhỹx mẽ mãmri ja hã ixpĩ pa mẽ kêp tanhmã ri amnhĩ to hkêt nẽ. Nom mẽ kot ixto hêx pix o ã ijarênh anhỹr kênã. Jakamã mẽmo mỳrapê kot kaj mẽ ìhkram ijaxà? E Rôm kãm pahi maati Sesti hwỳr mãn inhmẽ pa kumã mãn amnhĩ jarẽ. Anẽ.

Pahi Sesti kêp pyka piitã hkôt mẽ ho amnhĩptàr xwỳnh maati jakamã nhũm Pawre kot mar kaxyw hwỳr hkrà. 12Hāmri nhũm Pos Pesti kuma nẽ ma tẽ nẽ hã ò kôwenatôjê ma. Hāmri nẽ hã axpên mar pa nẽ akupỹm hwỳr tẽ nẽ kãm:

—Tôe. Nà kot paj pahi maati Sesti wỳr amẽ. Ra hwỳr akrà kênã. Anẽ.

Pos Pesti kot Akrip mã Pawre jarênh

13Tã nhũm apkati grêre nẽ hapêx nhũm pahi hõ pê Akripja ma Pos Pesti hwỳr mỗ. Tõx Perênis mẽ wa mỗ. 14Hāmri nẽ wa hwỳr pøj nẽ kuri wa pa hã apkati grêre nhũm Pos Pesti wa kãm Pawre jarẽ nẽ wa kãm:

—E pa war amã mẽhõ jarẽ. Na pre pahi Perisja mẽ hagjênh xà kamã mẽhõ jaxà nẽ kormã kator kêt ri nhũm mẽ àpênh nê kator pa hpãnhã àpênh o amnhĩptã. 15Tã ra ma Jerujarẽ hwỳr mỗ nhũm Ijaew nhõ patre krãhtũmjê mẽ mẽ àptàr tũmrejaja inhmã ho kapêr punuj rax nẽ. Nẽ ixte mẽ kãm hpĩr kaxyw inhmã hã àmnênh kãm hihtỹx nẽ. 16Nom pa mẽ kêp ja kaga nẽ mẽ kãm: “Nà mẽ ixpê Rôm nhõ xwỳnhjaja na pa htem ã mẽ hipêx anhỹr kêt nẽ. Na pa htem mẽ kot ho kapêr xwỳnh noo mã tanhmã hkukjêr to nhũm tanhmã amnhĩ tã àprãr to pa htem kuma nẽ rĩ kormã tanhmã mẽ ho. No na pa htem kormã mẽ kot tanhmã amnhĩ jarênh to hkêt ri tanhmã mẽ ho hkêt nẽ.” Anẽ.

17—Jakamã nhũm prem kaxyw Sejarej wỳr pøj nhũm apkati pa hã mẽ hkukjêr kurê kumrêx. Nẽ mẽ kot mẽ hkukjêr xà hã mẽ hkrĩ xà kamã nhỹ nẽ ixte hkukjêr kaxyw amnhĩ wỳr Pawre hã karõ. 18Na pa pre ijamaxpêr o: “Mãn pre tanhmã amnhĩ tomnuj tỳx to hã na mẽ inhmã harênh kaxyw.” 19Anhỹr ã hkamnhĩx tã te kot amnhĩ to mex xwỳnh pyrãk. Âm kot mẽ hkôt amnhĩ nhípêx kêt pix ã nhũm mẽ inhmã harê. Nẽ kaxyw mẽhõ htyk xwỳnh jarẽ. Mẽ kot kãm “Jejus” anhỹr xwỳnhja na xep hte mẽ kãm akupỹm htĩr ã harênh o pa. Âm ja pix na prem inhmã harê. 20Pa tee ri ixte nhỹri ixprĩ hã tanhmã mẽ kot harênh to hã mẽ mar kaxyw hkukamã ijamaxpêr. Hāmri nẽ hã Pawre kukja nẽ kãm: “Xà kot puj ma akupỹm Jerujarẽ hwỳr mỗ pa axte akwỳ kot tanhmã ajarênh to ma nẽ rĩ kormã tanhmã ajarênh to nà?” 21Anhỹr tã no nhũm akupỹm Jerujarẽ hwỳr mỗr kaga kumrêx nẽ amnhĩm Rôm kãm pahi maati Sesti

jarê. Ixte ma hwÿr mênh nhũm kot kãm amnhĩ jarênh nhũm kot mar nê tãm tanhmã harênh to kaxyw. Jakamã pa kormã ixte hwÿr mênh kaxyw amnhĩ xa hã akupÿm mẽ hagiênh xà kamã haxà nhũm arĩ hkrĩ ho hkrĩ. Anê.

22Hãmri nhũm Akrip kuma nê kãm:

—Xôwehe? Kwa na pa inhmã tanhmã kapêr to mar prãm nê. Anê.

Hãmri nhũm kãm:

—Tôe. Nà kê apkati pa hã karô ka tanhmã kapêr mar to. Anê.

23Jakamã nhũm apkati nhũm Akrip mẽ htôx Perênĩs wa pahi hã mẽ ê mex jagjê nê ma mẽ hkukjêr xà hã ixkre hwÿr wa tẽ. Pôristi krãhtũm kwÿjê mẽ Sejarej kamã mẽ kot amnhĩ to rũnh xwÿnh kwÿjê mẽ nhũm mẽ hwÿr akuprô. Nhũm mẽ piitã Akrip mẽ htôx wa kêp pahi hã wa ê mex ã wa omu nê wa kamã no pyma nê. Hãmri nhũm Pos Pesti Pawre hã karô nhũm mẽ haprô nê ma mẽ hwÿr o tẽ. 24Hãmri nhũm Pos Pesti omu nê Akrip mẽ htôx mẽ mẽ kot mar o hkrĩ xwÿnhjê mã kãm:

—E pahihiti Akrip mẽ mẽ apikuprônh xwÿnhjaja. Ota Pawre xa. Jerujarê kamã nê jar Sejarej kamã na pre hkwÿjaja inhmã ho kapêr rax nê. Hãmri nê ixte hpĩr kaxyw inhmã hã àmnênh kãm hihtÿx nê. 25Nom mêmoy mÿrapê kot pa kêt kupĩ? Tã nhũm amnhĩm pahi maati Sesti jarê pa ma hwÿr mênh kaxyw. 26-27Nom na htem amarĩ pahi maati Sesti hwÿr mẽ rênh kêt nê. Na htem kãm mẽ kot tanhmã amnhĩ tomnuj to hã kagà nê hwÿr kagà mẽ ro hã mẽ kurê. No jahti kot tanhmã amnhĩ tomnuj toja na ixte omunh kêt. Te inhmã tanhmã kot amnhĩ tomnuj to hkêt pyrãk. Jakamã na pa mẽ awÿr o tẽ. Mẽ ate kapêr mar nê kot tanhmã amnhĩ tomnuj to hã inhmã harênh nhũm ixte hã kagà nê pahi Sesti hwÿr mênh kaxyw. Jakamã e mẽ kam nê hkukja nê ama nê tanhmã mar to. Anê.

Pawre kot pahihiti Akrip mã amnhĩ jarênh

Atre 8.3, 9.1-19, 22.1-21

26 1Hãmri nhũm Akrip Pos Pesti kot tanhmã Pawre jarênh toja ma nê Pawre mã kãm:

—E mãmri mẽ inhmã amnhĩ jarê pa mẽ ama. Anê.

Hãmri nhũm kuma nê kãm amnhĩ jarênh kaxyw kãnhmã kãm ìhkra pẽ nê kãm:

2-3—Hêxta waa nê. Nà na pa amã amnhĩ jarênh kaxyw nê ixkĩnh nê pahi Akrip. Ra ate mẽ ixpê Ijaew kot amnhĩ nhĩpêx ã mẽ ixpumunh mex. Nê mẽ ixte tanhmã amnhĩ nhĩpêx to hã mẽ ixte axpên kukjêrta ate hã mẽ ixpumunh mex. Jakamã na pa amã amnhĩ jarênh kaxyw nê ixkĩnh nê. E tokyx anojarêrê kêt nê inhma. Pa amã ixujarênh jatur xàm kumê ka aprĩ hã inhma. 4Nà ixkwÿjaja ra mẽ kot ixte amnhĩ nhĩpêx ã ixpumunh mex. Ixprĩre rùm ixpapxà kamã nê mãânên Jerujarê kamã ixte tanhmã

amnhĩ nhĩpêx to ho ixpaja mẽ kot hã ixpumunh mex. 5Ixpê mẽ hkwỹ pê Parijew nhõ xw̃ynh kw̃ỹjê hã mẽ kot ixpumunh. Koja mẽ apu ja hã amã ijarênh japêr r̃y ko. Mẽ ixpê Parijew nhõ xw̃ynhjaja na pa htem amnepêm finat Mojes kot Tirtũm nhỹ hã mẽ inhĩgêjtê mã mẽmoj tã karõ xà hkôt amnhĩ nhĩpêx mex o ixkw̃ỹjê jakre.

6—Amnepêm na pre Tirtũm mẽ inhĩgêjtê mã tanhmã amnhĩ jarênh to. Kot nhỹrmã mẽ piitã akupỹm mẽ ho htĩr ã amnhĩ jarê. Tã ixte ja kôt ijamaxpêr pix m̃yrapê na prem kot hã amã ixto kapêr kaxyw aw̃ỹr ixto m̃õ. 7Mẽ ixpê Ijaew nhĩgêjtê piitã na prem Tirtũm kapêr kôt hamaxpêr o ri pa. Kot nhỹrmã akupỹm mẽ ho htĩr ã amnhĩ jarênh kôt hamaxpêr t̃yx o pa. Amnepêm finat Jako mẽ hkra pê 12jaja na prem hkôt hamaxpêr. Nẽ ixpê mẽ hkanrêhã mẽ htãmnhw̃ỹ na pa hte ijaxw̃ỹja ja kôt ijamaxpêr t̃yx rãhã ho ri ixpa. Tã ãm mẽmoj pixi m̃yrapê na ixkw̃ỹjaja ã amã ixto kapêr punuj anê. 8Mẽ kot ixpyrà nẽ ja kôt hamaxpêr ã amnhĩ jarênh tã nhũm pre Tirtũm akupỹm Kra Jejus o htĩr nom nhũm mẽ ixkĩnhã ja kôt hamaxpêr kêt. Nom Tirtũm kêp akupỹm mẽ pahto pahtĩr xw̃ynh kênã.

9—Amnepêm kormã Jejus kôt ijamaxpêr kêt ri na pa pre ijaxw̃ỹja mẽ uràk nẽ akupỹm htĩr kôt ijamaxpêr kêt nẽ. Nẽ ixt̃yx ijamaxpêr o: “Kot paj Jejus pê Najare nhõ xw̃ynh kôt mẽ kot amnhĩ xunhw̃ỹr xw̃ynhjê nhĩpêx kati ho ixpa nhũm Tirtũm ja hã ixpumu nhũm ja kãm mex nẽ.”

10—Anh̃ỹr jakamã pa pre hte tanhmã mẽ homnuj t̃yx to ho ri ixpa. Jao Jerujarê kamã mẽ inhõ patre krãhtũmjê nhỹ hã mẽ unê nẽ mẽ hagjênh xà kamã mẽ hagjênh o ixpa nhũm mẽ kot mẽ himex kaxyw mẽ hã inhmã amnhĩ jarê nhũm ja inhmã mex nẽ. Pa mẽ harênh ma nẽ ixkĩnh nẽ. 11Pa pre hte xatã tanhmã mẽ hipêx to nẽ mẽ kot Jejus kaga hprãm xàj mẽ hipêx kati rũnh nẽ. Tirtũm kapêr o mẽ ahkre xà hã ixkre piitã kamã pa pre hte ã mẽ hipêx anê. Nẽ mẽ kamã inhgryk t̃yx jakamã ma krĩ hkwỹ hkôt mẽ hapêr o ri ixpa. ã na pa pre mẽ hipêx anh̃ỹr o ri ixpa.

12—Tã axte ixte mẽ hkwỹjê pynênh nẽ mẽ hagjênh kaxyw ma Tamas w̃ỹr m̃õ. Mẽ inhõ patre krãhtũmjê nhỹ hã ma mẽ hw̃ỹr m̃õ. 13Hãmri nhũm ra kaxkwa nhĩpôk ri myt nhỹ pa kormã pry hã inhmõr ri kaxkwa rũm mẽmo nhĩrãja pumu. Nhũm hirã ht̃yx o myt jakre nẽ ixtã ajêt pa ixkôt ri mẽ pa xw̃ynhjê mẽ hipôk ri ixkuhê. 14Hãmri nẽ mẽ inhmã ma xàj pykap ixrôrôk pa nhũm kaxkwa rũm mẽhõj inhmã kapêr. Mẽ ixpê Ijaew kapêr o kapêr nẽ inhmã: “Pa Sawti? Hêxta waa nẽ. Kwa mon ka hte axtem nẽ ixtomnuj t̃yx o ri apa? Nom na ka tee ri ã amnhĩ nhĩpêx anh̃ỹr kapr̃ỹ.” Anê. 15Hãmri pa tee ri kuma nẽ kãm: “Kwa mẽ atõ na ka ã inhmã akapêr anê?” Anê.

—Hãmri nhũm inhmã: “Ixpê Jejus na pa amã ixkapêr. Pa na ka hte ixpê ixkôt mẽ kot amnhĩ xunhw̃ỹr xw̃ynhjê homnuj t̃yx o apa ho te pa ixtomnuj t̃yx pyrãk. 16E kãnhmã xa. Ate inhmã tanhmã amnhĩ nhĩpêx to ho apa kaxyw na pa amã amnhĩ to amnhĩr̃it. Jarãhã ate ixpumunh xà

hkôt ate mẽ kãm ma ijarënh nẽ mẽ kãm ixkapër jarënh o mẽ ahkre ho ri mẽ hkôt apa kaxyw na pa amnhĩ kaxyw ata. Kot paj nhỹrmã axte awỳr ixkato nẽ tanhmã amã ixkapër to ka inhma nẽ ma mẽ kãm ixkapër jarënh o ri mẽ hkôt apa. Ja kaxyw na pa amnhĩm ata.” Anhỹr o inhmã kapër. 17Hãmri nẽ inhmã: “E kot paj Ijaew mẽ Ijaew kêt xwỳnhjê hwỳr amẽ nẽ anẽ mẽ omunh mex nẽ nhũm mẽhõ apĩr kêt nẽ. 18Kêr ka ma mẽ hkôt mẽ kãm ixkapër jarënh o ri apa kê mẽhprĩ hã kuma. Mẽ kot amnhĩ tomnuj kaga nẽ amnhĩ kaxyw ixkôt hamaxpër nẽ ixkôt amnhĩ xunhwỳr kaxyw. Hãmri nhũm Tĩrtũm ja hã mẽ omu nẽ ixkukwak ri amnhĩ katut kôt mẽ kot amnhĩ tomnuj piitã rënh pa nẽ axte kãm hamaxpër kêt nẽ. Hãmri nẽ mẽ ho hkra. Koja mẽ ã amnhĩ nhĩpêx anẽ hãmri nẽ axte Satanasti nhỹ hã tanhmã amnhĩ nhĩpêx to hkêt nẽ. Pãnhã Tĩrtũm kôt pix mã amnhĩ nhĩpêx o pa.” Anẽ.

19—Ã na pre Pahihti Jejus inhmã kapër anẽ. Tã kot kaxkwa rũm inhmã ixàpênh jarënh ã karõja pa pre mar tỳx nẽ hkôt amnhĩ nhĩpêx rãhã ho ri ixpa pahi Akrip. 20Jakamã na pa pre ma mẽ hkôt mẽ kãm kapër jarënh o ri ixpa. Tamas kumrêx hwỳr nẽ hpãnhã Jerujarê hwỳr nẽ hpãnhã pika pê Jutej piitã hkôt Ijaew mã kapër jarënh o ri ixpa. Tã hpãnhã Ijaew kêt xwỳnhjê mã harê. Na pa hte mẽ kãm ixkapër o: “Kwa mẽ ate amnhĩ tomnuj kaga nẽ hpãnhã Tĩrtũm kôt amnhĩ xunhwỳ. Hãmri nẽ hkôt pix mã amnhĩ nhĩpêx o ri apa. Mẽ piitã mẽ kot apê hkwy hã mẽ apumunh kaxyw.” Anẽ.

21—Ãm ja pix mỳrapê na pre ixkwỳjaja ixpynê. Tĩrtũm mã amnhĩ jarënh xà hã ixkre kamã ixpynê nẽ ra mẽ kot ixpĩr kaxyw. 22-23Nom na hte Tĩrtũm ixtãnopxa nẽ ixto ixihitỳx mex rãhã ho pa pa arĩ mẽ kãm harënh o ri ixpa. Mẽ kot amnhĩ to rũnh xwỳnhjê mã nẽ mẽ kêp amrakati xwỳnhjê mã nẽ mẽ piitã mẽ kãm harënh o ri ixpa. Finat Mojes mẽ Tĩrtũm nhỹ hã kapër jarënh o mẽ pa xwỳnhjaja kot ra hkukamã tanhmã harënh to xà hkôt pa hte mẽ kãm harënh o ri ixpa. Nẽ mẽ kãm: “Tĩrtũm kot mẽ pakaxyw ãm xwỳnhta na pre amnhĩ xà htỳx kamã hamak kãm ty. Tã nhũm Tĩrtũm akupỳm ho htĩr. Kumrêx na pre akupỳm ho htĩr jakamã kumrêx na pre tanhmã mẽ kãm kapër to ho ri mẽ hkôt pa. Mẽ kot amnhĩ kaxyw hkôt hamaxpër nẽ hkôt amnhĩ xunhwỳr xwỳnh piitã urak nẽ nhỹrmã Tĩrtũm mẽ wa õ krĩ kamã htĩr tũm nẽ pa ho pa hprãm xaj mẽ harënh o pa. Mẽ ixpê Ijaew nẽ mããnên mẽ apê Ijaew kêt xwỳnhjaja nhũm pre ã mẽ pajarënh anẽ.” Anhỹr o pa hte mẽ kãm harënh o ri mẽ hkôt ixpa pahi Akrip. Anẽ.

24Nhũm Pawre kormã kot mẽ kãm amnhĩ jarënh par kêt ri nhũm Pos Pesti tee ri tanhmã Jejus jarënh to hã kuma nẽ kàx pê kãm kapër nẽ kãm:

—Kwa na ka akrã axpã nà? Pêr ate kagà pumunh tỳx kurê akrã pipãnh pyrak o ri atỳx ã ri mẽ inhmã axujarënh anẽ. Anẽ.

25Hãmri nhũm kãm:

— Nà ixkrã pipãnh kêt. ãm hãmri na pa mẽ amã awjarẽ. 26 Jerujarẽ kamã na prem Jejus pĩ nhũm mẽ piitã omu. Tã nhũm akupỹm htĩr hãmri nẽ hpimxur pê ri pa hkêt nẽ. Na pre mẽ ohtô nẽ akupỹm htĩr kãm omu. Pahi Akrip ra kot ja mar mex jakamã na pa ixãmnhĩx ã mẽ amã harẽnh anẽ.

27 Anhỹr o kãm kapẽr hãmri nẽ pahi Akrip wỳr rĩt nẽ kãm:

— Kwa pahi Akrip. Xà Tirtũm nhỹ hã kapẽr jarẽnh o mẽ pa xwỳnhjaja kot Jejus kukamã tanhmã harẽnh toja kôt na ka hte ajamaxpẽr? Nà ra hkôt ajamaxpẽr kẽnã. Ra ixte ajamaxpẽr kôt apumunh mex. Anẽ.

28 Hãmri nhũm tee ri kuma nẽ kãm:

— Tk. Kwa xà kot kaj ã inhmã akapẽr anẽ pa ama nẽ apyrã nẽ amnhĩ kaxyw Jejus kôt ijamaxpẽr? Nà na ka ixte ã ate Jejus jarẽnh anhỹrja kôt ijamaxpẽr ã ixkamnhĩx kaprỹ. Anẽ.

29 Hãmri nhũm Pawre kãm:

— Ko. Kot kaj ixpyrà nẽ amnhĩ kaxyw hkôt ajamaxpẽr pa ixkĩnh nẽ. Nom kaxipix kêt. Mẽ apiitã mẽ ate inhmar o akrĩ xwỳnhjaja mããnẽn. Mẽ ate mẽ ixpyrà nẽ Jejus kôt amnhĩ xunhwỳr na inhmã hprãm. ãm ixpyrà nẽ mẽ apê prẽs pix na inhmã hprãm kêt. Anẽ.

30 Hãmri nhũm pahi Akrip nẽ htõx Perẽnĩs nẽ pahi Pox Pesti nẽ mẽ hkôt mẽ mõi xwỳnhjaja kãnhmã kuhê nẽ ma mrar kaxyw. 31 Nẽ nojarêt nẽ Pawre hã axpẽn mã:

— Kwa tanhmã kot amnhĩ tomnuj to hkêt kẽnã kot kêt mẽ haxà rỳ kupĩ. Anẽ.

32 Hãmri nhũm Akripja Pos Pesti mã kãm:

— Kwa kop apu kot amnhĩ kaxyw pahi maati Sesti hwỳr hkrã hkêt ronhỹx pu mẽ ra kator. Anẽ.

Mẽ kot Rõm wỳr Pawre mẽnh ã mẽ harẽnh

Atre 23.11, 25.12

27 1 Tã nhũm mẽ pyka pê Itar wỳr pahi maati Sesti hwỳr Pawre mẽnh kaxyw. Itar kamã mẽ õ krĩ maati na pre kệp Rõm. Jakamã nhũm Pawre mẽ mẽ kot mẽ hagjẽnh xà kamã mẽ hkrĩ xwỳnh mẽ ho hpimràatã ma mẽ o mra nẽ põiристи krãhtũm Jurti nhĩhkram mẽ haxàr pa. Kot ma Rõm wỳr mẽ o mõi kaxyw. Jurtija kệp Itar kamã mẽ õ pahi maati hã põiристи krãhtũm nhũm prem ma mẽ kãm mẽ o mõi kaxyw ãhkram mẽ hagjẽnh pa. Ixpê Rukre na pa pre inhmã Pawre hkôt inhmõi prãm nẽ mẽ hã ajêt nẽ mẽ hkôt mõi.

2 Tã pa mẽ ra inhnojarêt nhũm Aristak haxwỳja ma mẽ ixkôt mõi. Pyka pê Masetõn nhõ xwỳnh na pre. Õ krĩ pê na pre Tesarõn. Jakamã nhũm ma wa ixkôt mõi. Hãmri nhũm pãrja nojarêt. Atamĩx rũm pàr nhũm ra As wỳr nojarêt pa mẽ hwỳr inhgjêx pa nẽ ma kamã mõi. 3 Hãmri nhũm apkati pa mẽ krĩ pê Sito hwỳr pøj nẽ hã pàr xi. Nhũm põiристи

krähtũm Jurtija Pawre ho mex jakamã pa mẽ Sito hwỳr pøj nhũm Pawre mã anẽ pa mẽ ixkato nẽ ma ixkrãmhvỳjẽ hwỳr mra nẽ mẽ kutã apku nẽ ma akupỹm pàr wỳr mra.

4Tã pa mẽ axte mỗ. Nom nhũm kôk mẽ ixkutã àpêr tỳx jakamã pa mẽ umaj juk nẽ gô hipôk kupu ho mỗ. Gô hipôk pê Sipreja pa mẽ upôk rũm ma hkupu ho mỗ nhũm mẽ inhnê kôk pê àmnàr mex nẽ. 5Hãmri pa mẽ mỗ nẽ pyka pê Siris mẽ Pãpir wa hakrenh o mỗ nẽ pyka pê Ris kamã Mira hwỳr pøj nẽ hã pàr xi nẽ ijapôx pa. 6Hãmri nhũm pôristi Krähtũmja Aresãnrir rũm pàr pumu nhũm ra Itar wỳr nojarêr. Pa mẽ hwỳr inhgjêx kurê kumrêx hãmri nẽ ma kamã axte mỗ. 7Hãmri nhũm pàrja kôk kutã tee ri mỗr prêprêk kaxyw nẽ ãm amnhĩm hprĩ nẽ mỗr ã apkati xohtô nẽ pa mẽ tokyx ixpôx kêt nẽ. Tã Sito hwỳr ixãhtêp o mỗ nom nhũm kôk mẽ ixkutã hihtỳx rax kumrêx. Jakamã pa mẽ juk nẽ gô hipôk pê Kret jatur xà jahpa nẽ ma kape hã mỗ nhũm mẽ inhnê kôk pê àmnàr mex nẽ. Hãmri pa mẽ ma Sarmôn jakrenh o mỗ 8nhũm pàr kôk kutã amnhĩm hprĩ nẽ kape hã mỗ. Pa mẽ mỗ nẽ jatã Rasej tã pàr nhĩkwỹ xà mex wỳr pøj nẽ kamã pàr xi. 9Nom pàr kot amnhĩm hprĩ nẽ mỗr jakamã nhũm ra kôk xàpêr tỳx nẽ kamã kry htỳx ã mytwrỳ mẽ ixtã kato. Mytwrỳja ã mẽ kot kôk xàpêr tỳx pymaj nhỹhỹm pàr kãm mrar kêt. Jakamã nhũm Pawre tokyx mẽ inhmỗr nẽ pàr nhỗ xwỳnhjẽ mã kapêr kãm hihtỳx nẽ mẽ kãm:

10—Kwa pu mẽ jar kôk xàpêr tỳx jamãr o ri papa nà. Kê kôk mẽ kry htỳxja hapêx pu mẽ rĩ kormã axte mỗ. Kot puj mẽ anhỹr kêt nẽ kôk xàpêr tỳx kãm mỗ nhũm nhỹri pàrja mẽ pahpê axà nhũm gô mẽ apê mẽ akukrêx o hapêx pa. Pu mẽ pajaxwỳja axkaprã.

11Anhỹr o mẽ kãm kapêr tã no nhũm mẽ kuma nẽ ãm kuma. Pàr pãm mẽ pàr o mrar xwỳnh wa nojarêr tỳx nẽ kapêr ma nẽ ãm kuma. Nhũm pôristi Krähtũm wa nojarêr ã wa kuma nẽ haxwỳja Pawre mar kêt nẽ. 12Nhũm mẽ kot pàr nhĩkwỹ xà mex jarênhja mẽ kot mex ã harênh tã mẽ kêp omnuj nẽ. Hã na wrỳk nẽ kôk xàpêr tỳx nhũm mẽ kêp omnuj tỳx nẽ. Jakamã nhũm mẽ piitã Pawre rom ra nojarêr nẽ. Mẽ kãm tokyx krĩ pê Wẽnĩs wỳr hpôx prãm jakamã nojarêr tỳx nẽ. Gô hipôk pê Kret kamã na Wẽnĩsja. Nẽ kamã kôk xàpêr tỳx kêt jakamã nhũm mẽ hwỳr nojarêr nẽ axpẽn mã:

—E kwa pu mẽ tokyx Wẽnĩs wỳr mỗ nẽ kamã mãn kôk xàpêr tỳx japêx jamãr o papa. Anẽ.

Hãmri nẽ piitã hwỳr nojarêr.

Kôk kot pàr o àpêr tỳx ã harênh

13Tã nhũm kahpa hkôt kôk xàpêrja katàt kôt kawax pê apê nhũm mẽ kamã ama nẽ axpẽn mã:

—E hãmri. Tokyx pu mẽ mỗ. Anẽ.

Jakamã pa mẽ pàr o htỳx xà ho api nẽ axte mỗ. Ma gô hipôk pê Kret

jakàr ã mō. 14Puh nhūm na wrỳ nē kōk àpêr tỳx kumrêx. Mě kot kām “kōk xàpêr tỳx maati” anhỹr xwỳnhja gō hipōk rūm mẽ ixto àpêr tỳx kumrêx o mō. 15Hāmri nē mẽ ixkutã àpêr tỳx nhūm pàr tee ri kutã hkarôt. Pa mẽ kormã Wēnĩs wỳr ixpōx kêt ri ra ho awjanã nhūm amnhĩ krã hkôt kōk kôt mō. 16-17Hāmri nē mō nē gō hipōk pê Krawti jahpa nē hakàr ã mō nhūm mẽ inhnê kōk pê amýtã nhūm amnhĩm hprĩ nē kawax pê apê. Hāmri pa mẽ pàr krare kot mẽ ixkôt mōr xwỳnhja pa mẽ kumỳ nē pàr rax kām kumē. Ra kamã gō rax tã pa mẽ ixkarôt tỳx nē nē hkapĩr pa nē ho api nē pàr rax kām kumē nē ho htỳx. Hāmri nē hpãnhã kōk xàpêr tỳx pymaj pàr rax kaxpre hpa. Hāmri nē kōk kot pykahti grã maati pê Sirteja wỳr pàr mēnh nhūm kot amnhĩ to pykahti xãm o htēm pymaj nhūm mẽ kot ho mrrar xà hã kupêxê rax o wrỳ nhūm pàr amnhĩ krã hkôt ma kōk kôt mō.

18Tã nhūm apkati nhūm kōk arĩ mẽ ixpê pàr o àpêr tỳx nē arĩ na wrỳk rax rãhã nē. Jakamã pa mẽ pàr àr pymaj nē mẽ hikukrêx kwỳ gōx kãm rēnh pa. Kaxkritre nē àr kêt kaxyw.

19Tã nhūm apkati pa mẽ hpãnhã pàr kre kamã ri nē hikukrêx kwỳ rê nē gōx kãm kurê. 20Nhūm kōk arĩ àpêr tỳx kumrêx ã apkati xohtô nē. Nē na wrỳk rax rãhã jakamã pa mẽ kanhêti pumunh kêt nē myt pumunh kêt o mẽ ixtã apkati xohtô rax kumrêx. Hāmri nē tee ri ahkapi nē tee ri amnhĩ kukamã ijamaxpêr. Nē ixtyk par pix kukamã ijamaxpêr o ixkaprĩ nē ixkrĩ.

21Hāmri nē mẽ inhmã ma xàj ixàpkur kêt ryy nē. Hāmri nhūm Pawre tee ri ja hã mẽ ixpumu nē pàr nhō xwỳnh wa kãm kapêr nē wa kãm:

—Kwa na pa pre tee ri Kret kãm man mẽ pamōr nē war amã ixkapêr. Kop apu mūtãr mãn mẽ kuri arĩ ri mẽ hkôt mẽ papa ronhỹx pu mẽ pajamakêtkati nē paxãmnhĩx ri papa. Tã nhỹx pu mẽ ri mẽ hikukrêxja gōx kãm rēnh par kêt nē. 22Nom kwa kêr ka mẽ tee ri amnhĩ kukamã ajamaxpêr kêt nē. Kot puj mẽ pahtō pahtyk kêt nē. Âm pàrja pix koja axà nē hapêx. 23Ixpê Tĩrtũm krajê hō na pa. Na pa hte kãm tanhmã amnhĩ nhĩpêx to ho ri ixpa. Jakamã na pre kamãt ja kamã ixwỳr kapêr o wrỳk xwỳnhjê hō mẽ nhūm ixwỳr wrỳ nē inhmã awjarê 24nē inhmã: “Pa Pawre? Kwa tee ri amnhĩ kukamã ajamaxpêr o amã ma hkêt nē. Kot kaj akã hkĩnh pê ma Itar kamã Rōm wỳr mō nē pōj nē pahi maati Sesti pumu nē kãm amnhĩ jarê. Jakamã koja Tĩrtũm akôt mẽ mōr xwỳnh piitã omunh mex nē ka mẽ atō tanhmã amnhĩ to hkêt nē.” Anê.

25—Ã kot inhmã kapêr anhỹr jakamã kwa mẽ amnhĩ to htỳx nē tee ri amnhĩ kukamã ajamaxpêr kêt nē. Tĩrtũm kapêr o wrỳk xwỳnh kot inhmã ujarēnh xà hkôt koja Tĩrtũm ã mẽ panhĩpêx anê. Ixte ja hã omunh mex kēnã. 26Koja xep kōkja nhỹri gō hipōk ã pàr krakrak pa. Nom mẽ papajaja kot puj mẽ pahkã hkĩnh pê hwỳr pahpōx pa. Anê.

27Tã pa mẽ mōō nē ã inhmōr anhỹrja ã ixtã semãn axkrut nē ra gō

rax pê Ariax kôt axà. Kamàt kãm hkôt axà nhũm kôkja arĩ pàr o apêr tỳx rãhã ho mō. Hãmri nhũm kôt ã kamàt nhũm pàr o mrar xwỳnhja ra pàr kot pykahti grà htêp ã hkamnhĩx. 28Jakamã nhũm mẽ gô xupỳm pumunh xà ho gô pumu nhũm upỳm kêp 36 met. Hãmri nhũm hã ahtũmre nê axte omu nhũm ra hpãnhã kêp 27 met pix. Jao ra pàr kot gô kokwe htêp o mōr ã omu. 29Hãmri nê kot kên kuranh nê hã pikrakrak pymaj katê rúm ho htỳx xà ho 4 nê gôx kãm kurê nhũm arĩ ajêt. Hãmri nhũm mẽ tokyx kãm arĩgro hprãm o arĩgro mã nojarêt o hkrĩ. 30Hãmri nhũm pàr kãm mẽ àpênh xwỳnhjaja tanhmã hamaxpêr to nê hêx rom pàr krare ho wrỳk o tẽ. Mẽ kot mẽ ixrer nê ahte xarmã mōr nê rêr nê tokyx gô hipôk wỳr hpôx kaxyw. No ãm hêx rom te mẽ kot axte pàr krã rúm ho htỳx xà hō mênh kaxyw pyrãk o amnhĩ nhĩpêx nê kaxyw ho wrỳk o tẽ. 31Nom nhũm Pawre mẽ hamaxpêr ã mẽ omu hãmri nê pōristi mẽ mẽ hkrãhtũm mã mẽ harê nê mẽ kãm:

—Kwa koja mũjjaja mẽ pare nê ahte pàr krare kamã xarmã mōn rê ka mẽ apikaprãr pa kãm ga. Anê.

32Hãmri nhũm mẽ tee ri kuma nê mẽ hwỳr hprôt nê mẽ kêp pàr krare pê hkaxpre xà jakà nhũm gôx kãm tẽm nê ma gô hkôt hkaprỳn mō.

33Tã hãmri nhũm ra myt kator o mō nhũm Pawre akupỳm mẽ piitã mẽ ho mẽ hamaxpêr o hihtỳx kaxyw mẽ kãm:

—Kwa na ka mẽ tee ri amnhĩ kukamã ajamaxpêr o akaprĩ nê axàpkur kêt o atã semãn axkrut. 34E pu mẽ mẽmoj krê nê ho amnhĩ xihtỳx. Kot puj mẽ pahtō pahtyk kêt nê. ãm hãmri na pa mẽ amã ixkapêr. Anê.

35Hãmri nê mẽmoj py nê mẽ noo mã Tĩrtũm mã harê nê hkur o xa 36nhũm mẽ ja hã omunh xà hkôt akupỳm tãm hamaxpêr o mō. Hãmri nê amnhĩm mẽõ hkwy jamỳ nê kumẽ kuku. 37Pàr kãm mẽ inhmōr xwỳnhjaja na pa prem ixpê 276. 38Tã pa mẽ ra ixàpkur pa. Hãmri nê pàr kaxkrit kaxyw mẽ apkur xà hã mẽmoj y jakrêxja gôx kãm hkapĩr pa.

Pàr mẽ kêp pikrakrak ã harênh

39Tã nhũm ra myt kator mex nê nhũm mẽ amnhĩ kukamã gô hipôk pumu nê axpên mã:

—Kwa nhỹ pika na mũj wehe? Anê.

Hãmri nê nhỹri hakàx ã amnhĩm nōr xà mex pumu nê hwỳr pàr o mōr kaxyw hã axpên ma. 40Hãmri nê kaxyw pàr o htỳx xà jakà nhũm axrê nê gôx kãm rōrôk pa. Nê pĩ ho pàr o juk xà nhō xê xàja nhũm mẽ mãänên krãhta. Hãmri nê akupỳm mrar xà hã kupêxê nhô nhũm kôk ho hikot nê ma gô jakàx wỳr o mō. 41Nom nhũm pàr kormã hakàx pê awry hã mōr ri amnhĩ to kokwe kura nê pyka nhĩmôk ã nō nhũm mẽ tee ri kot hkaxàr nê akupỳm gô xupỳm mã mênh kaxyw. Nom nhũm gô kot pàr nhĩxô htak tỳx kurê nhũm mẽ ixpê pikrakrak par o mō. 42Jakamã nhũm pōristijaja tee ri omu hãmri nê ra mẽ kêp prêsjê nhĩmex kaxyw.

Mě kot gôx kãm rôrôk nê gô hipôk wÿr hpa ho nana nê mẽ kêp pikunor pymaj kot mẽ himex kaxyw. ⁴³Nom nhũm mẽ hkrãhtũmja kãm Pawre pĩr prãm kêt jakamã ja nê mẽ hkurê nê mẽ inhmã:

—E mẽ ate apa ho gô rênh mex xwÿnhjaja. Akumrêx mra nê mrõ nê ho nana ho mra nê rê. ⁴⁴No mẽ ate apa ho nana punuj xwÿnhjaja kêr ka mẽ tapti rÿ pàr kukrêx õ mÿ nê hã ajêt nê hã ma môn rê. Anê.

Hãmri pa mẽ ã amnhĩ nhĩpêx anê nê xpiitã ixkã hkĩnh pê ixrêr pa.

Gô hipôk pê Maw kamã mẽ pa hã mẽ harênh

Makre 16.17-18

28 ¹Tã pa mẽ xpiitã ixkã hkĩnh pê ixrêr pa. Nhũm gô hipôk ã mẽ pa xwÿnhjaja mẽ inhmã gô hipôk nhĩxi jarê nhũm xep kêp Maw. ²Nhũm Maw nhõ xwÿnhjaja mẽ ixto mex nê. Nhũm axte na wrÿk rax nê nhũm kry htÿx kumrêx nhũm mẽ ixkamã ukapri nê mẽ inhmã kuto nê mẽ inhmã kapêr mex nê. ³Hãmri nhũm Pawre kuwy kaxyw ri pĩ kawrà ho mra nê kuwy hwÿr o tẽ nê hã haxwÿr o xa. Hãmri nhũm kagã xoprê õ wênên xihitÿxja kuwy kagro pymaj pĩ rũm kato nê ãhkra hã kunha nê hã àpêr o ajêt. ⁴⁻⁵Hãmri nhũm Pawre omu nê amnhĩ nê ho apê nê kuwy kamã kumê nhũm kamã tẽm nê xêt pa. Hãmri nhũm gô hipôk nhõ xwÿnhjaja tee ri ja hã omu nê axpên mã:

—Kwa ga mẽmyti mũj pumu. Mãn kêp mẽ hpar o pa xwÿnh na. Hã na kagã õ wênên xihitÿxta kunha. Nà koja ty nê rĩ amnhĩ pumu. Ra hkã hkĩnh pê gô rũm mẽ pahwÿr rêr tã koja tã ty kãm ga. Anê.

⁶Hãmri nhũm mẽ tee ri kot tanhmã amnhĩ to hã hkamnhĩx nê hamãr o kuhê. À htÿx nê ãhkra hikot rÿ htyk kurê kumrêx ã hkamnhĩx tã nhũm tanhmã amnhĩ kamã hamak to hkêt nê. ãm htÿx ri hkĩnh nê kapêr nê hpikunhar o ri mra. Hãmri nhũm mẽ tee ri omu nê axpên mã:

—Kwa tanhmã kot amnhĩ tore hã. Kêp mẽ hpar o pa xwÿnh kêt. Mãn kêp kaxkwa kamã mẽpahpãmjê hõ nà? Hã na kagã kunha nhũm tanhĩ to hkêt nê. Anê.

⁷Nhũm gô hipôk ã mẽ õ pahihtu pê Puptija. Õrkwÿ hã jawÿ jakamã nhũm amnhĩ kôt mẽ ixwÿ pa mẽ ma hkôt mō nê kuri hkôt ixpa ho ixtã apkati axkrunêpxi nhũm mẽ ixto mex nê. ⁸Nhũm ra Pupti nhĩpêxã kêp



Atre 28.1-6

à nê nō. Kà kagro htỳx nê haôk. Hāmri nhũm Pawre hwỳr tễ nê omu nê hã ìhkra xi nê ho Tĩrtũm wỳ nhũm akupỳm ho mex kurê kumrêx. 9Hāmri nhũm gô hipôk nhô xwỳnhja harênh ma nê Pawre hwỳr mễ à xwỳnh piitã o mra nhũm mễ omu nê Tĩrtũm nhỹ hã akupỳm mễ ho mex pa. 10-11Hāmri nhũm gô hipôk nhô xwỳnhjaja mễ ixto mex rax nê.

Pawre axte Rôm wỳr nojarêt ã harênh

Rômãn 1.10-12, 15.30-32

Tã pa mễ gô hipôôta kamã ixpa hã mytwrỳ axkrunêpxi. Hāmri nhũm kôk xàpêr tỳxta hapêx pa mễ axte inhnojarêt nê ma mỗ. Pàr ò kamã hpãnhã mỗ. Aresãnrir rũm pàrja pa mễ hpãnhã kamã mỗ. Mễ kot kãm “sãnti pihpo” anhỹr xwỳnhnta kamã. Na pre gô hipôk kamã haxwỳja kôk xàpêr tỳx hapêx jamãr xa hã hikwỳ htã ra axte nojarêt. Hāmri nhũm gô hipôk nhô xwỳnhja ma mễ inhmôr xà hã mễ inhmã mễ ixàpkur xà hkwỳ nhôr rax nê. Hāmri pa mễ pàr wỳr inhgiêx pa nê ma kamã mỗ. 12Mỗ nê Sirakus wỳr pôj nê hã pàr xi. Hāmri nê krĩja kamã mễ ixtã apkati axkrunêpxi nê axte mỗ. 13Mỗ hāmri nê Rekre hwỳr pôj nê hã pàr xi. Hāmri nê kamã mễ ixtã apkati. Nhũm ra kahpa hkôt kôkja kawax pê àpêr mex jakamã pa mễ ma hkôt mỗ. Nê mễ ixtã apkati axkrut nê Potew wỳr pôj nê hã pàr xi. 14Hāmri nê pàr rũm ijarôj nê krĩ kamã Jesus kôt mễ ixtô nê htôx kwỳjê pumu nhũm mễ amnhĩ wỳr mễ ixwỳ. Pa mễ ma mễ hkôt mra nê mễ hkôt ri ixpa hã ixtã ù semãn. Hāmri nê ma Rôm wỳr hpãnhã ixpar o mỗ. 15Hāmri nê kormã amỳm inhmôr ri nhũm Rôm kãm Jesus kôt mễ ixtô nê ixtôxjaja mễ ijarênh ma nê man mễ ixkutã mra. Ma krĩ pê Prasxi Apja mễ “Wên Pijakrunêpxi” anhỹr xwỳnh jarênhja wa hwỳr mễ ixkutã mra. Hāmri pa mễ axpên kaxpa nhũm Pawre mễ omu nê hkĩnh nê. Nê mễ hã Tĩrtũm mã amnhĩ jarê nê kãm:

— Pa Tĩrtũm? Nà ãm hāmri na ka mễ ixkutã jajê rê. Na pa mễ omu nê ixkĩnh nê. Nà amex o amex Tĩrtũm. Anê.

16Hāmri pa mễ ma mễ hkôt Rôm wỳr mỗ nê pôj. Jatã Itar kãm Rôm wỳr pôj. Hāmri nhũm pôristi krãhtũm Pawre mã:

— E kot paj mễ hagjênh xà kamã ajaxàr kêt nê. Kot kaj amã nhỹri ixkre kamã apa hprãm nê mamrĩ kamã apa. Nom koja pôristi hõ akôt pa ho pa.

Anhỹr jakamã nhũm nhỹri ixkre kamã pahihtu Sesti kot mar kaxyw kamã hamak o pa.

Pawre kot Rôm kamã tanhmã amnhĩ nhĩpêx to hã harênh

Atre 17.5-6

17Tã nhũm Pawre Rôm kamã hã apkati axkrunêpxi nê amnhĩ wỳr Ijaew xaptar tũmrejê hwỳ nhũm mễ hã akuprô nhũm mễ kãm amnhĩ jarê nê mễ kãm:

—E ixkwỳjaja. Pa mẽ amñhĩ jarẽ ka mẽ inhma. Nà na pa pre mẽ panhĩgêtjê kapër nhĩrôp tanhmã ixãm to hkêt nẽ rỳ ixte tanhmã mẽ pahkwỳjê hõ hto hkêt tã nhũm mẽ pahkwỳjaja amarĩ ixpynê. Jerujarẽ kamã ixpynê nẽ Rõm nhõ xwỳnhjê nhĩhkram ijaxà. 18Hãmri nhũm mẽ ixte amnhĩ nhĩpêx ã ixkukja nẽ tee ri mẽ kot mẽmoj mỳrapê ixpĩr kaxyw tanhmã ixkukjêr to kaprỳ. Jakamã nhũm mẽ kãm ixkator prãm nẽ. 19Nom nhũm mẽ pahkwỳjaja kãm ja mex kêt jakamã pa pre jar pahi maati Sesti kot ixte kãm amnhĩ jarênh ã inhmar kaxyw amnhĩm harê nẽ man hwỳr mõ. Kot paj tanhmã kãm mẽ pahkwỳjê ho ixkapër punuj to hkêt nẽ. ãm ixte amnhĩ tã tanhmã mar to hpix kaxyw na pa hwỳr mõ.

20—Tã pa amnhĩ wỳr mẽ awỳ. Ixte mẽ amñhĩ jarênh kaxyw. Mẽ pahkaprĩ xwỳnhhta. Mẽ pahte kormã kamã pajamak o papa xwỳnh Jejusta. ãm ixte amnhĩ kaxyw hkõt ijamaxpër pix mỳrapê na prem ã kàx o ixkaxpre anẽ. Anẽ.

21Hãmri nhũm mẽ kuma nẽ kãm:

—Nà jar tanhmã ajarênh kute hkêt. Na pre Jutej kamã mẽ pahkwỳjaja tanhmã ajarênh to hã kagà nẽ mẽ ixwỳr mênh kêt nẽ. Nẽ ham mẽ kurũm mẽ hpõx xwỳnhjaja na prem tanhmã mẽ inhmã ajarênh to hkêt nẽ. 22No na xep hte pyka piitã hkõt mẽ kãm mẽ ate Jesus kõt amnhĩ xunhwỳr xwỳnhjê kurê nẽ. Na pa pre mẽ ajarênh ma nẽ mẽ inhmã axujarênh mar prãm nẽ. Anẽ.

23Hãmri nhũm mẽ kot mar kaxyw arĩgro hta.

Tã nhũm mẽ kot arĩgro hyr kato nhũm mẽ Pawre nhõrkwỹ hwỳr pikuprõnh rax nẽ nhũm mẽ kãm awjarê. Mẽ kãm ujarênh ry nẽ. Nẽ ho kamàt. Nẽ mẽ kãm:

—Nà mẽ pahte amnhĩ wỳr kamã pajamak o papa xwỳnh Jejusta. Kot kaj mẽ atõ amnhĩ kaxyw hkõt ajamaxpër nẽ hkõt amnhĩ xãm nhũm Tĩrtũm ja hã apumu nẽ ato hkra. Anẽ.

Nhũm pre ã mẽ kãm kapër anẽ. Nẽ finat Mojes kot Tĩrtũm nhỹ hã Jejusta kukamã tanhmã hã kagà htoja nhũm mẽ kãm harê. Nẽ Tĩrtũm nhỹ hã kapër jarênh o mẽ pa xwỳnhjaja kot tanhmã hã kagà htoja nhũm mẽ kãm harê. 24Hãmri nhũm mẽ hkwỳjaja kuma nẽ hkõt hamaxpër nẽ amnhĩ kaxyw Jejusta kõt hamaxpër nẽ hkõt amnhĩ xunhwỳ. No nhũm mẽ hkwỳjaja kuma nẽ ãm kuma nẽ kãm axte mar prãm kêt nẽ.

25-29Jakamã kànhmã kuhê nẽ nojarêr nhũm Pawre mẽ kãm:

—Nà amnepêm na pre Tĩrtũm finat Ijaisti mã tanhmã kapër to. Ý hã kot mẽ panhĩgêtjê mã tanhmã kapër jarênh to kaxyw. Tĩrtũm Karõ nhỹ hã kot mẽ kãm kapër nẽ tanhmã mẽ harênh to kaxyw. Te Tĩrtũm tãm mẽ kãm kapër pyrak mẽ kãm kapër. Nẽ ãm hãmri tanhmã mẽ pahkwỳjê jarênh to. Na pre mẽ kãm:

E Ijaisti. Kêr ka ma akwỳjê hkõt ri mẽ kãm tanhmã ixkapër jarênh to ho ri apa.

Ně mẽ kãm: “Kot kaj mẽ ajamak o axumar tỳx tã aprĩ hã ixkapěr mar kêt nẽ.

Ně mẽ ano ho arĩt tỳx tã aprĩ hã ixte amnhĩ nhĩpêx ã ixpumunh kêt nẽ.

Mẽ amã ixkapěr mar prãm kêt jakamã te mẽ ate mar pymaj amnhĩ jamak pro pyræk o amnhĩ nhĩpêx o ri apa.

Ně mẽ amã ixte amnhĩ nhĩpêx ã ixpumunh prãm kêt jakamã te mẽ ate ixte amnhĩ nhĩpêx ã ixpumunh pymaj te mẽ anomnhõt pyræk o amnhĩ nhĩpêx o ri apa.

Jao amnhĩ kaxyw ixkõt ajamaxpěr kêt nẽ.

Kop mẽ amã ixkapěr mar prãm ronhỹx ka mẽ aprĩ hã inhmar tỳx nẽ.

Ně aprĩ hã ixte amnhĩ nhĩpêx ã ixpumunh mex nẽ.

Jao amnhĩ tomnuj kaga hpa nẽ ixkõt amnhĩ xunhwỳ.

Pa ja hã mẽ apumu nẽ mẽ ato mex nẽ.

Tã ka mẽ ã amnhĩ nhĩpêx anhỹr kêt nẽ.” Anhỹr o kêt ka mẽ kãm ixkapěr jarênh o ri mẽ hkõt apa Ijaisti. Anẽ.

Na pre ã Tĩrtũm mẽ panhĩgêjtjê kaxyw Ijaisti mã kapěr anẽ nhũm ô ri mẽ kãm ujarênh o pa nẽ mẽ pamã hã kagà. Jakamã kwa mẽ okora. Kêt ka mẽ jajê pyrà nẽ ã amnhĩ nhĩpêx anhỹr hkêt nẽ. Kwa mẽ inhma nẽ inhmar tỳx nẽ. Ijaew kêt xwỳnhjaja kot kapěr marja na ra Tĩrtũm kãm hprãm nẽ. Jakamã koja mẽ hwỳr mẽ kot kapěr jarênh o mẽ pa xwỳnh kwỳjê rẽ nhũm mẽ hkõt mẽ kãm ujarênh o pa nhũm mẽ kuma nẽ mẽ akurom kãm mar prãm nẽ. Anẽ.

Hãmri nhũm mẽ kuma nẽ hapôx pa nẽ ma akupỹm axpẽn mã tanhmã kapěr jarênh to ho mra. ³⁰Hãmri nhũm pahi maati Sesti tokyx amnhĩ wỳr Pawre hwỳ nẽ tanhmã mar to hkêt nhũm òrkwỹ kamã kêp prês nẽ pa ho hã amgrà axkrut. Nẽ tãm òrkwỹ pãnhã mẽ kãm amnhĩre. Nhũm pre krĩ nhõ xwỳnhjaja ohtô nẽ hwỳr mra nhũm amnhĩ wỳr mẽ omu nẽ hkĩnh nẽ. ³¹Na pre hte amnhĩ wỳr mẽ kuwỳ nẽ mẽ kãm Tĩrtũm kapěr jarênh o hkrĩ. Mẽ kot Tĩrtũm Kra Pahihti Jejus Kris kõt amnhĩ xunhwỳr nhũm Tĩrtũm kot ja hã mẽ omunh nẽ amnhĩ katut kõt mẽ kot amnhĩ tomnuj rênh par nẽ mẽ ho hkra hã mẽ kãm ujarênh o hkrĩ. Nẽ mẽ kot hkõt amnhĩ xunhwỳr xwỳnhjê jahkre. Tanhmã mẽ kot Jejus kõt amnhĩ nhĩpêx mex to ho pa hã mẽ kãm karõ ho hkrĩ. Hãmri nhũm mēhõ ja nẽ tanhmã kãm kapěr to hkêt nẽ.

Tã ãm ja pix Teopre. Ixpê Rukre na pa awỳr kagàja nhĩpêx nẽ kumẽ. Nẽ kamã amã tanhmã mẽ pahkwỳjê jarênh to. Tã ãm ja pix na hapêx.

Rõmãn

Pawre kot Rõm kãm Jejus kõt hkwỳjê hwỳr kagà nẽ mẽn

Kagà ja na pre Pawre hipêx. Kêp Jejus nhỹ hã mẽ ahkre ho pa xwỳnh na pre. Na pre hte mry kà ho ixkre nhỹpêx nẽ mẽ kãm ho wẽnê ho mẽ hkõt pa pẽ mẽ piitã mẽ kãm Tĩrtũm kapêr jarênh o pa. Tã krĩ pẽ Rõm kamã mẽ kot Jejus kõt amnhĩ xunhwỳr xwỳnhjê hwỳr kagàja nhỹpêx nẽ mẽ hwỳr kumẽ. Kormã ma mẽ hwỳr mõi nẽ mẽ omunh kêt ri.

Nẽ Jejus kêp Tĩrtũm mã tanhmã mẽ pajarênh to xwỳnh ã nhũm pre mẽ kãm harê nẽ hã kagà. Jejus kot mẽ pahte amnhĩ tomnuj pãnhã mẽ panê htyk jakamã na hte Tĩrtũm mẽ pahte hkõt amnhĩ xunhwỳr ã mẽ pahpumu nẽ Jejus kukwak ri mẽ pahte amnhĩ to mex xwỳnh ã mẽ pajarẽ.

Nẽ Tĩrtũm Karõ nhỹ hã mẽ kot amnhĩ nhỹpêx nyw nẽ hamaxpêr nyw o pa hã nhũm Pawre mẽ kãm karõ nẽ hã kagà. ã na pre mẽ kãm mẽmoj jarê nẽ hã kagà anẽ. Nẽ hã kagà ho:

1 1Pa Rõm nhõ xwỳnhjaja? Xà mẽ amex? E ot pa mẽ awỳr kagà nhỹpêx nẽ kumẽ. Tĩrtũm na pre mẽ akaxyw ixãm. Ixte mẽ amã Jejus kot tanhmã mẽ panê amnhĩ nhỹpêx to hã harênh o ri ixpa kaxyw. Na pre ixpê Pawre hã ixpumu nẽ ixãm. Jakamã na pa ã mẽ awỳr kagà nhỹpêx nẽ mẽnh anẽ. Ixte Jejus nhỹ hã mẽ ahkre ho ri ixpa xwỳnh na pa. Na pa hte kãm tanhmã amnhĩ nhỹpêx to ho ri ixpa. Tã ã mẽ awỳr kagà nhỹpêx nẽ mẽnh anẽ.

2Amnepêm na pre Tĩrtũm nhỹ hã kapêr jarênh o ri mẽ pa xwỳnhjaja mẽ pakukamã mẽ panhĩgêjtê mã Jejus kukamã tanhmã harênh to ho ri pa. Nẽ mẽ kãm kapêr jarênh o mẽ hkõt pa nẽ mẽ kãm:

—Koja nhỹrmã Tĩrtũm mẽ pahpiitã mẽ panê tanhmã kot amnhĩ nhỹpêx to mã xwỳnh mẽ nhũm mẽ hpiitã hprĩ hã harênh ma nẽ omu. Anẽ.

Nhũm prem ã Jejus kukamã mẽ kãm harênh anhỹr o ri mẽ hkõt pa. Tĩrtũm kapêr ã kagà htũm kamã harênh xà hkõt tanhmã mẽ kãm harênh to. 3Tĩrtũm Kra Jejus Krisja na pre mẽ kãm harênh o ri mẽ hkõt pa. Mẽ

panhõ Pahihti na. Kêp Tirtũm Kra htã na pre mẽ pahpyrà nẽ ĩ ho amnhĩ nhĩpêx nẽ wrỳ nẽ katorxà nhõxà hkre rũm kato. Jakamã kêp Tirtũm Kra pix kêt mãânẽn katorxà hkõt kêp higêt Tawi hkanrêhã htãmnhwỳ.

4Kêp Tirtũm Kra htã nhũm prem axtem nẽ tanhmã hamaxpêr to nẽ kupĩ. Nom nhũm Tirtũm kêp amnhĩ Kra hã akupỹm ho htĩr. Jakamã na pu htem harênh ma nẽ kãm pajamaxpêr o:

—Jejus kêp Tirtũm Kraa. Mẽ kot kêp hpĩr tã nhũm akupỹm ho htĩr. Jakamã nhũm Tirtũm pyrã nẽ hihtỳx o hihtỳx. Anẽ.

5Tã ã Tirtũm kot Kra nhĩpêx anhỳrja ri na mãânẽn pa ixto mex nẽ mẽ akaxyw ixãm. Jakamã na pa hte ma krĩ piitã hkõt mẽ kãm tanhmã Jejus Kris jarênh to ho ri mẽ hkõt ixpa. Ijaew mã nẽ Ijaew kêt xwỳnhjê mã. Mẽ kot harênh mar nẽ amnhĩ kaxyw kãm hamaxpêr nẽ kapêr kõt pix mã amnhĩ nhĩpêx mex kaxyw. 6-7Nẽ mẽ apê Rôm nhõ xwỳnhjaja. Na ka prem Jejus kõt amnhĩ xunhwỳ nhũm Tirtũm ja hã mẽ apumu nẽ mẽ ato hkra nẽ mẽ apê Jejus mẽ wa hkwỳ hã mẽ ajarê. Mẽ ate hkõt amnhĩ nhĩpêx kaxyw nhũm pre ã mẽ ajarênh anẽ.

Tã ot pa kagà nhĩpêx nẽ mẽ awỳr mẽnh kaxyw. Tirtũm kot mẽ ato hkra xwỳnhjê hwỳr. Tirtũm kãm mẽ ajapêê.

Na pa hte mẽ ato mẽ panhĩpêêxã maati Tirtũm mẽ Pahihti Jejus Kris wa hwỳr rãhã ri ixpa. Nẽ mẽ ato wa hwỳr o:

—Kwa kêr ka wa Rôm kamã war akrajê pumunh mex nẽ mẽ kutã anojarêt rãhã nẽ. Kê mẽ hamakêtkati nẽ àmnhĩx ri tanhmã amnhĩ nhĩpêx to ho ri pa. Anẽ.

Pawre kot Rôm nhõ xwỳnhjê pumunh prãm ã amnhĩ jarênh

Atrẽ 28.15-16; Rômãn 15.22-29

8Nẽ na ka prem amnhĩ kaxyw Jejus Kris mã ajamaxpêr nẽ hkõt amnhĩ xunhwỳ nhũm krĩ piitã hkõt mẽ pa xwỳnhjaja mẽ ajarênh ma. Nẽ mẽ ate amnhĩ nhĩpêx nyw ã mẽ ajarênh ma nẽ axpẽn mã tanhmã mẽ ajarênh to ho pa. Nẽ mẽ ajarênh o:

—Kwa na xep Rôm kãm mẽ hkwỳjaja amnhĩ kaxyw Jejus mã hamaxpêr tỳx nẽ. Nẽ hkõt amnhĩ nhĩpêx mex rãhã ho ri pa. Anẽ.

Pa ã mẽ kot mẽ ajarênh anhỳrja ma nẽ ixkĩnh tỳx nẽ. Nẽ Tirtũm mã mẽ anhỹ hã ixkĩnh ã amnhĩ jarênh o ri ixpa. 9Na pa hte mẽ ato hwỳr rãhã ho ri ixpa. Nẽ nhỹri mẽ kãm Tirtũm Kra Jejus kapêr jarênh o ri ixpa nẽ mẽ amã ijamaxpêr nẽ mẽ ato kuwỳ. Nẽ tanhmã Tirtũm mã amnhĩ nhĩpêx to ho ixpa pê mẽ amã ijamaxpêr nẽ mẽ ato kuwỳ. Tirtũm kot ja hã ixpumunh mex. 10Na pa hte tanhmã kãm amnhĩ jarênh to kaxyw nẽ mẽ akaxyw amnhĩ to kuma nẽ kãm:

—Pa Tirtũm? Na pa ra inhmã ma Rôm wỳr inhmõr nẽ kamã akõt ixkwỳjê pumunh prãm tỳx kumrêx. Xà kot ka tokyx mẽ hwỳr inhmẽ nà? Anẽ.

11Na pa ra inhmã mẽ awỳr inhmõr prãm tỳx nẽ. Na pre Tĩrtũm Karõ tanhmã ixkrã hto pa ỹ hã kapẽr ã kagà mar tỳx nẽ. Nẽ hkõt mẽmoj mex pumunh rax nẽ. Tã ra inhmã ma mẽ awỳr inhmõr nẽ amnhĩ xô ri mẽ amã harẽnh prãm nẽ. Mẽ ate inhmar nẽ aprĩ hã Jejus Kris kõt amnhĩ xunhwỳr tỳx nẽ hkõt amnhĩ nhĩpêx mex rãhã ho ri apa kaxyw. 12Kot paj nhỹrmã ma mẽ awỳr mõ. Nẽ mẽ awỳr pøj pu mẽ axpẽn pumu nẽ pahkĩnh nẽ. Mẽ pahte amnhĩ kaxyw Jejus Kris mã pajamaxpẽr mex o papa hã axpẽn pumu nẽ pahkĩnh nẽ. Nẽ mẽ pahpiitã hkõt amnhĩ nhĩpêx mex o ri papa.

13E ixkwỳjaja. Xatã ixte mẽ awỳr ixkrã htã nhũm mẽmoj xatã tanhmã ixpê àmtàr to pa kormã jar ixpa. Nom kot paj nhỹrmã ma mẽ awỳr mõ. Mẽ ate ja hã inhmar kaxyw na pa ã Tĩrtũm noo mã mẽ amã amnhĩ jarẽnh anẽ. Na pa pre krĩ hkwỳ kamã mẽ apê Ijaew kêt xwỳnh kwỳjê hwỳr ixpa. Nẽ mẽ kãm Jejus kot mẽ panê tanhmã amnhĩ nhĩpêx to hã harẽnh o ri mẽ hkõt ixpa. Nhũm mẽ hkwỳjaja inhma nẽ hkõt amnhĩ xunhwỳ. Ja kaxyw na pa inhmã ma mẽ anhõ krĩ hwỳr inhmõr prãm nẽ. Mẽ akwỳjaja kot ixkapẽr mar nẽ mẽ apyrà nẽ Jejus kõt amnhĩ xunhwỳr kaxyw. 14Na pre ra Tĩrtũm ixte kapẽr o mẽ ajahkre ho ixpa kaxyw mẽ piitã mẽ kaxyw ixãm. Tanhmã ri mẽ kute xwỳnhjê kaxyw. Mẽ kãm ma ho mẽ pa xwỳnhjê mẽ mẽ kãm ma hkêt o mẽ pa xwỳnhjê mã. Nẽ mẽ kot kagà pumunh xwỳnhjê mẽ mẽ kot kagà pumunh kêt xwỳnhjê mã. Mẽ piitã mẽ kaxyw na pre ixãm. Ixte mẽ kãm Jejus kot tanhmã mẽ panê amnhĩ nhĩpêx to hã harẽnh o ri mẽ hkõt ixpa kaxyw. 15Jakamã na pa ra inhmã mẽ apê Rõm nhõ xwỳnhjê hwỳr inhmõr prãm nẽ. Ixte mẽ anhõ krĩ kamã mẽ piitã mẽ kãm ja jarẽnh o ri ixpa nhũm mẽ kot inhmar nẽ mẽ pahpyrà nẽ Jejus kõt amnhĩ xunhwỳr kaxyw.

Jejus kot mẽ panê htyk ã harẽnh

Sikũn Ximotre 1.6-12

16Nẽ Jejus kot mẽ panê htyk ã harẽnhja ãm hãmri na. Harẽnhja mex o mex. Na htem kuma nẽ kãm hamaxpẽr nẽ amnhĩ kaxyw hkõt hamaxpẽr nẽ hkõt amnhĩ xunhwỳ. Hãmri nhũm Tĩrtũm ja hã mẽ omu nẽ mẽ nẽ mẽ kot amnhĩ tomnuj o hapêx pa nẽ mẽ ho hkra. Nom mẽ ixpê Ijaew nhõ xwỳnhjê pix kêt. Mããnẽn mẽ apê Ijaew kêt xwỳnhjaja nhũm kãm mẽ pajapê ho axpẽn pyrãk. Jakamã na pu htem Jejus kõt amnhĩ xunhwỳ nhũm Tĩrtũm ja hã mẽ pahpumu nẽ mẽ pahto hkra. Ja kaxyw àhpumunh tỳx o àhpumunh tỳx. 17Ãm mẽ kot amnhĩ kaxyw Jejus mã hamaxpẽr xwỳnh pixjaja na hte mẽ ho hkra. Kapẽr ã kagà htũm kot tanhmã ja jarẽnh to nẽ harẽnh kot:

Na hte Tĩrtũm mẽ kot amnhĩ kaxyw Kra mã hamaxpẽr ã mẽ omunh xà hkõt mẽ ho hkra nhũm mẽ amnhĩ kaxyw kãm hamaxpẽr rãhã ho pa. Jao ra ô ri tãm amnhĩ nhĩpêx o pa. Anẽ.

Mê pahpiitã mẽ pahte amnhĩ tomnuj xwỳnh ã mẽ pajarênh

Atre 14.15, 17.22-29; Apokarip 9.20-21

18Nê mẽ kot amnhĩ tomnuj o ri mẽ pa xwỳnhjaja na hte Tĩrtũm axtem tanhmã mẽ harênh to. Na htem Tĩrtũm kapêr ma nom amnhĩ tomnuj gryk ã ãm kuma. Nê mẽ hkwỳjaja kot kapêr mar pymaj kapêr õ ho mẽ kêp àmnàr rãhã ho ri pa nhũm Tĩrtũm ja hã mẽ omu nhũm ja kêp omnuj nê. 19-20Te mẽ kot Tĩrtũm kot amnhĩ nhĩpêx ã omunh kêt pyrãk o amnhĩ nhĩpêx tã mẽ kot omunh mex. Tĩrtũm kot mẽmoj to kator krax rũm ra kot mẽ pamã amnhĩ to amnhĩrit mex. Pu mẽ pano ho omunh kêt tã no ãm kot amnhĩ nhĩpêx kôt ra kêp Tĩrtũm ã omunh mex nê. Nê kêp mẽmoj piitã ho kator xwỳnh ã omunh mex nê. Nê mex o mex ã omu nê hihtỳx o hihtỳx hã omu. Tĩrtũm kot amnhĩ nhĩpêx kot amnhĩrit mex nhũm mẽ kot omunh mex tã hkôt amnhĩ xunhwỳr kêt nê. Nê axtem nê hamaxpêr o:

— Tk. Tĩrtũm kot inhmã amnhĩ to amnhĩritre hã kot pa kêt ri hkôt amnhĩ nhĩpêx. Kot pa inhno ho omu nê rĩ kormã hkôt amnhĩ nhĩpêx japêr. Anê.

Ra mẽ kot amnhĩ nhĩpêx ã omunh mex tã ri ã hamaxpêr anê. Jakamã nhũm Tĩrtũm tee ri ja hã mẽ omu nhũm ja kêp omnuj tỳx nê. 21Mê kot amnhĩ nhĩpêx ã omunh mex tã amnhĩ kaxyw tanhmã kãm hamaxpêr hto hkêt. Rỳ arĩ hamaxpêr japêr nê kãm:

— Nà Tĩrtũm. ãm hãmri amex kumrêx. ãm amex o amex. Apê Tĩrtũm ã ãm apixi mex kumrêx na ka. ãm hãmri na ka hte mẽ ixto mex o apa.

Anhỳr o amnhĩ kaxyw kãm kapêr kêt nê. Nê ãm htỳx tanhmã hamaxpêr punuj to pix o ri pa. Te kamàt kô kamã ri mẽ pa xwỳnhjê kot amnhĩ nhĩpêx pyrã nê mẽmoj mex pumunh kêt nê.

22Mê kot àhpumunh tỳx ã amnhĩ to jarkrar o ri pa htã no ãm te mẽ hkrã kanhĩn kêt nê mẽ hamaxpêr kêt pyrãk o amnhĩ nhĩpêx. 23Jakamã na htem amnhĩm mẽmo karõ nhĩpêx. Mẽmo htyk mã xwỳnhjê hõ karõ nhĩpêx. Tanhmãn panhĩ karõ rỳ mẽmo mry karõ rỳ mẽmo kuwênh karõ. Rỳ mẽmo kagã karõ nhĩpêx. Hãmri nê ho õ sãnti nê te ri ho Tĩrtũm nhĩpêx pyrãk o hipêx. Jao hpar pê hkõn krã ho rôròk nê amnhĩ to kuwỳ nê kãm amnhĩ jagrer pê kãm mex o mex ã harê. Tĩrtũmja sãnti rom htĩr o htĩr tã nhũm mẽ axtem nê sãnti gryk ã hkaga nê ã amnhĩ nhĩpêx o pa anê. 24Jakamã nhũm tee ri ã mẽ kot amnhĩ nhĩpêx anhỳr ã mẽ omu nê amnhĩ pyrã nê mẽ hkaga nê ãm mẽ omu. Jakamã nhũm mẽ ãm amnhĩ krã hkôt tanhmã ri amnhĩ tomnuj to ho pa. Nê axpên kãm ri tanhmã hpijaam kêt to. ã na htem htỳx ri amnhĩ tomnuj anhỳr o pa.

25Tĩrtũm kapêrja ãm hãmri htã nhũm mẽ axtem nê te amnhĩ pum rênh pyrãk o hipêx nê kãm hamaxpêr kêt nê. Nê hpãnhã ri mẽ hêx xwỳnhjê kapêr pix ma nhũm ja te mẽ kãm mex pyrãk. Na htem ã amnhĩ

nhîpêx anê hãmri nê axtem nê Tirtũm kot mẽmoj nhîpêx pix parpê rôrôk nê amnhĩm mex o mex ã harê. Nom kot hipêx xwÿnh Tirtũm parpê mân ã amnhĩ nhîpêx anhÿr kêt nê. Nom kot mẽmoj nhîpêx xwÿnhhta mex o mex jakamã koja mẽ kot hkôt amnhĩ nhîpêx xwÿnhjaja jajê rom kãm mex o mex ã harênh tũm rãhã ho ri pa. 26No mẽ kot amnhĩ tomnuj xwÿnhjaja na hte Tirtũm amnhĩ pyrã nê mẽ hkaga nhũm mẽ htÿx amnhĩ krã hkôt ri tanhmã amnhĩ tomnuj to ho ri pa. Jao mẽni hkwÿjaja axtem nê axpên gryk ã mjên kaga nê axpên nhĩõ ho mjên. 27Nhũm mẽmy hkwÿjaja mãânên axtem nê amnhĩ kwÿjê my gryk ã hprõ kaga nê axpên nhĩõ ho hprõ. Na htem ã axpên kamã hpijaam kêt o pa anê. Mÿrapê koja mẽ à pix kãm amnhĩ xà htÿx kamã hamak o pa. 28Na htem amnhĩ tomnuj gryk ã Tirtũm mã hamaxpêr kêt nhũm tee ri amnhĩ tã mẽ omu nê hamaxpêr o:

—Mê kãm amnhĩ tomnuj pix prãm jakamã kwãr mẽ mãmrĩ ã amnhĩ nhîpêx anê. Kot paj axte ja nê tanhmã mẽ kãm ixkapêr to hkêt nê. Anê.

Jakamã nhũm mẽ arĩ htÿx ri amnhĩ krã hkôt tanhmã amnhĩ tomnuj to ho ri pa rãhã nê.

29 Hãmri nê mẽmoj punuj pix mã hamaxpêr.

Nê kãm amnhĩ mex pix prãm mã hamaxpêr.

Nê kãm axpên tomnuj pix prãm.

Nê mẽmoj tã axpên kãm gryk pix prãm.

Nê mẽ kãm axpên par pix prãm.

Nê mẽmoj tã ri kãm axpên mã àkjêr prãm.

Nê mẽmoj tã kãm axpên mã hêx prãm.

Nê kãm axpên kaxyw tanhmã hamaxpêr punuj to pix prãm.

Nê kãm tanhmã axpên to kapêr punuj to pix prãm.

30 Nê kãm mẽmoj tã axpên to hêx pix prãm.

Nê kãm Tirtũm prãm kêt o ri pa.

Nê mẽmoj tã axpên mã àkjêr o ri pa.

Nê mẽmoj tã amnhĩ to jarkrar rãhã ho ri pa.

Nê tanhmã amnhĩ tomnuj to pix kukamã hamaxpêr. Nhũm mẽ katorxà nê mẽ hipêêxà tee ri ja nê tanhmã mẽ kãm kapêr to no nhũm mẽ mar kêt kumrêx.

31 ã mẽ kot amnhĩ nhîpêx anhÿr o ri mẽ pa xwÿnhjaja na hte Tirtũm kãm mẽmoj mex nhũm mẽ kêp omnuj nê nhũm Tirtũm kêp mẽmoj omnuj nhũm mẽ kãm mex nê. Nê axpên mã mẽmoj tanhmã ho hã amnhĩ jarênh tã ho anhÿr kêt nê. Nê axpên kãm ukaprĩ ho ri pa hkêt nê.

32Tirtũm kapêr ã kagà htũm kot tanhmã mẽ hkukamã mẽ harênh to nê mẽ harênh kot:

ã mẽ kot amnhĩ nhîpêx anhÿr o ri mẽ pa xwÿnhjaja koja mẽ nhÿrmã ty hãmri nê amnhĩ xà htÿx kamã hamak rãhã ho ri pa ho pa. Anê.

Nhũm mẽ kot amnhĩ tã ja mar tỳx tã aa amnhĩ tomnuj kaga hkêt nê. Arĩ ã amnhĩ nhĩpêx anhỹr o pa rãhã nê. Nhũm mẽ hkwỳjaja mẽ kot amnhĩ tomnuj ã mẽ omu nê mẽ uràk nê ã amnhĩ nhĩpêx anhỹr o ri mẽ hkôt pa nhũm mẽ amnhĩ pyrà nê mẽ omu nê hkĩnh nê. Na htem ã amnhĩ nhĩpêx anhỹrja gryk ã Tĩrtũm kaga nhũm tee ri amnhĩ tã mẽ omu nê amnhĩ pyrà nê mẽ hkaga nê ãm mẽ omu. Jakamã nhũm mẽ amnhĩ tomnuj tỳx pix rãhã ho pa.

Mẽ kot amnhĩ tomnuj xwỳnhjê hkukamã mẽ harênh

Matêwre 7.1-5; Sikũn Tesarôn 1.6; Eprêw 9.27; Sikũn Pêtre 2.4, 3.7;

Jutre 6.14; Apokarip 6.15, 20.11

2 1Nê kot ka mẽ atõ ã mẽ kot amnhĩ tomnuj anhỹr xwỳnhjê kot amnhĩ nhĩpêx ã mẽ harênh ma nê ã ajamxpêr anê nê ajamxpêr o:

—Tk. Mẽ kot amnhĩ tomnuj pix o ri pa xwỳnh kênã. No pa na ã ixte amnhĩ nhĩpêx anhỹr o ri ixpa hkêt. Mẽ kurom ixte tãm amnhĩ nhĩpêx o ri ixpa xwỳnh na pa.

Anhỹr o amnhĩ jarê. Kwa nà mẽ ã ajamxpêr anhỹr kêt nê. Mẽ pajaxwỳja na pu htem tõiã mẽ uràk nê tanhmã amnhĩ tomnuj to. Tã ka mẽ ã mẽ kot amnhĩ tomnuj ã mẽ harênh anê nê te ka ate amnhĩ jarênh pyràk. 2Tĩrtũm kapêr ã kagã htũm kot mẽ kot amnhĩ tomnuj o ri mẽ pa xwỳnhjê jarênh kot:

Mẽ kot amnhĩ tomnuj mỳrapê koja mẽ nhỹrmã amnhĩ xà htỳx kamã hamak rãhã ho ri pa. Anê.

ãm hãmri ã mẽ harênh kot anhỹr. 3Mãn ka mẽ atõ tanhmã amnhĩ kukamã ajamxpêr to nê ajamxpêr o:

—Nà koja Tĩrtũm nhỹrmã amnhĩ nê kuwy hwỳr mẽ kot amnhĩ tomnuj xwỳnhjê rê. No pa koja hwỳr inhmênh kêt nê. Anê.

Kwa mẽ ã ajamxpêr anhỹr kêt nê. Kot ka mẽ ã amnhĩ kukamã ajamxpêr anhỹr tã tõiã mẽ uràk nê tanhmã amnhĩ tomnuj to. Jakamã koja Tĩrtũm mẽ uràk nê hã tanhmã mẽ ato. 4Kot kaj mẽ atõ tanhmã amnhĩ tomnuj to hãmri nê ãm ja hã amnhĩ pumu nê ajamxpêr o:

—Ixte amnhĩ tomnuj xwỳnh tã na hte Tĩrtũm ja hã ixpumu nê ãm ixpumu nê hã tanhmã ixto hkêt nê. Kêp mẽ ixkamã ukapĩrĩ xwỳnh jakamã na hte gryk tokyx anhỹr kêt nê. Jakamã kot paj arĩ tanhmã amnhĩ tomnuj to ho ri ixpa nê aa jam inhũrer kêt nê. Tĩrtũm kot ja hã tanhmã ixtore kaxyw hã.

Anhỹr o ajamxpêr. No ãm ja kot anhỹr kêt. Na hte Tĩrtũm kormã amnhĩ tã mẽ pajamã. Mẽ pahte amnhĩ tomnuj kaga nê hpãnhã hkôt amnhĩ xunhwỳr kaxyw na hte kormã amnhĩ tã mẽ pajamã. Jakamã na kormã tanhmã ate amnhĩ tomnuj tota ã tanhmã ato hkêt nê.

5Mẽ akrã hihtỳx jakamã mẽ amã hkôt amnhĩ xunhwỳr prãm kêt. Na ka htem tanhmã amnhĩ tomnuj to pix kukamã ajamxpêr o ri apa. Nê

gaa nê ra anhÿr kumrêx. Nhũm Tirtũm tee ri ja hã mẽ apumu nhũm ja kêp omnuj tÿx o mō. Jakamã koja nhÿrmã tanhmã mẽ ajarênh to nê gryk tÿx kãm tanhmã mẽ atomnuj tÿx to. Âm hãmri na hte mẽ pahte amnhĩ nhĩpêx ã mẽ pahpumunh xà hkôt ahpÿnhã tanhmã mẽ panhĩpêx to.

6Koja nhÿrmã mẽ pahpiitã kormã mẽ pahtir ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. Mẽ kot amnhĩ to mex o ri mẽ pa xwÿnhjaja nhũm mẽ ho mex nê. Nê mẽ kot amnhĩ tomnuj o ri mẽ pa xwÿnhjaja nhũm mẽ homnuj nê. Koja nhÿrmã mẽ pahpiitã mẽ pahto hpimràatã ã mẽ panhĩpêx anê. 7Mẽ kot hkôt tãm ri amnhĩ nhĩpêx o pa pê kãm Tirtũm kot amnhĩm mẽ mex ã mẽ harênh prãm xwÿnhjaja koja nhÿrmã amnhĩm mẽ mex ã mẽ harê. Hãmri nhũm mẽ kuri htir tũm nê hkĩnh nê mex kumrêx nê pa ho pa. 8Nom mẽ kot amnhĩ mã pix mã ri hamaxpêr o ri mẽ pa xwÿnhjaja. Nê mẽ kot tanhmã amnhĩ tomnuj to gryk ã Tirtũm kapêr kaga xwÿnhjaja koja kãm mẽ hkĩnh kêt nê tanhmã mẽ homnuj tÿx to. 9Mẽ kot amnhĩ tomnuj xwÿnh piitã koja mẽ nhÿrmã amnhĩ xà htÿx kamã hamak rãhã nê pa ho pa. Ijaew kumrêxjaja nê hpãnhã Ijaew kêt xwÿnhjaja nhũm mẽ amnhĩ xà htÿx kamã hamak rãhã nê pa ho pa. Mẽ kot amnhĩ tomnuj tÿx o paja mÿrapê.

10No kêt tãm mẽ kot amnhĩ nhĩpêx xwÿnhjaja koja Tirtũm mẽ ho mex rax rãhã ho pa ho pa. Nê amnhĩm mẽ kot amnhĩ to mex xwÿnhjê hã mẽ harê. Nê tanhmã mẽ ho mex to nhũm mẽ kamã amnhĩ krit nê pa ho pa. Hamakêtkati nê hkĩnh nê àmnhĩx ri pa ho pa. Ijaew kwÿ kumrêxjaja nê mãânên Ijaew kêt xwÿnh kwÿjaja nhũm mẽ mex nê hamakêtkati nê hkĩnh nê àmnhĩx ri pa ho pa. 11Koja Tirtũm nhÿrmã ahpÿnhã mẽ pahte amnhĩ nhĩpêx ã mẽ pahpumunh xà hkôt tanhmã mẽ pajarênh to pê tanhmã mẽ panhĩpêx to. Mẽ ixpê Ijaewjaja nê mẽ apê Ijaew kêt xwÿnhjaja nhũm ã mẽ pahpiitã mẽ panhĩpêx anê.

12Amnepêm na pre finat Mojes mã tanhmã kapêr to nhũm kuma nê ô ri hã kagã hpa. Mẽ ixpê Ijaew ri na kapêr ã kagãja. Ra mẽ ixte mar tÿx jakamã koja mẽ ixtō ra kapêr mar tÿx tã hkôt amnhĩ nhĩpêx kêt hãmri nhũm Tirtũm tee ri amnhĩ tã omu nê ã amnhĩ nhĩpêx anhÿrja mÿrapê nhÿrmã ma mẽ kot amnhĩ xà htÿx kamã hamak tũm xàta wÿr kumê. Kot kapêr mar tÿx tã hkôt amnhĩ nhĩpêx kêt mÿrapê nhũm ã hipêx anê. No kêt mẽ apê Ijaew kêt xwÿnhjaja mẽ ixkĩnhã mẽ ari Tirtũm kapêr ã kagã hkêt jakamã koja mẽ ate kapêr nhĩrôp mẽ akuhê hã mẽ apumunh kôt tanhmã mẽ anhĩpêx to hkêt nê. Koja hpãnhã mẽ ate tanhmã amnhĩ tomnuj to ho apa mÿrapê mẽ kot amnhĩ xà htÿx kamã hamak o pa tũm xàta wÿr mẽ arê.

13Na hte mẽ kot kapêr mar ã mẽ omunh xà hkôt amnhĩm mẽ kot amnhĩ to mex xwÿnh ã mẽ harênh kêt nê. Âm mẽ kot kapêr kôt amnhĩ nhĩpêx ã mẽ omunh xà hkôt pix mã na hte amnhĩm mẽ kot amnhĩ to

mex xwỳnh ã mẽ harẽ. 14No mẽ hkwỳjaja kormã kot kapẽr mar kêt tâ te ra mẽ kot mar mex pyrãk o amnhĩ nhĩpêx. Jao amnhĩ krã hkôt tãm ri amnhĩ nhĩpêx kurê kumrêx. Te kot Ijaew pyrã nẽ Tĩrtũm kapẽr mar tỳx nẽ hkôt amnhĩ nhĩpêx o ri pata pyrãk. 15Na htem amnhĩ krã hkôt tanhmã amnhĩ nhĩpêx mex to. Te Tĩrtũm kapẽr kot mẽ hkrãm gjêx pyrãk o amnhĩ nhĩpêx o pa. Jakamã tee ri tanhmã amnhĩ tomnuj to hã amnhĩ pumu nẽ hkaprĩ nẽ. Nẽ tãm amnhĩ nhĩpêx ã amnhĩ pumu nẽ hkĩnh nẽ.

16Tã koja nhỹrmã Tĩrtũm Jejus Kris mã anẽ nhũm kuma hãmri nẽ mẽ piitã kormã mẽ htĩr ri tanhmã mẽ kot amnhĩ nhĩpêx to hã mẽ omunh xà hkôt tanhmã mẽ harẽnh to. Nẽ mẽ hamaxpẽr kôt mẽ omunh mex xà hkôt tanhmã mẽ harẽnh to. Mẽ papajaja mẽ pahte axpẽn jamaxpẽr kôt axpẽn pumunh kêt tâ Jejus kot mẽ pajamaxpẽr kôt mẽ pahpumunh par.

Tã na pa hte mẽ kãm Jejus kot tanhmã amnhĩ nhĩpêx to hã harẽnh o ixpa pẽ ã mẽ kãm ixujarẽnh anhỹr o ri ixpa.

Pawre kot hkwỳjê mã kapẽr

Rômãn 3.19-20

17Nẽ ixpyrà nẽ mẽ apê Ijaew kwỳjaja na ka mẽ axtem nẽ Ijaew kêt xwỳnhjê mã tanhmã amnhĩ to jarkrar o ri apa nẽ mẽ kãm:

—Nà mẽ ixpê Ijaew ri Tĩrtũm kapẽr ã kagà jakamã ãm mẽ papxipixjaja na hte Tĩrtũm amnhĩm mẽ inhmex ã mẽ ijarẽ. Nẽ ãm mẽ papxipixjaja na hte mẽ ixto hkra. 18Nẽ mẽ papxipixjaja na mẽ ixte Tĩrtũm kãm hprãm xà hkôt mẽmoj pumunh par nẽ mẽ kot amnhĩ to mex xà pumunh par nẽ mẽ kot amnhĩ tomnuj xà pumunh par. Mẽ apê Ijaew kêt xwỳnhjê rom mẽ ixte mẽmoj piitã omunh par kumrêx. Anẽ.

19-20Nẽ amnhĩ jarẽnh o:

—Nà te mẽ ixpê mẽ nohkre xwỳnhjê pa hã mẽ hamỳnh nẽ ri mẽ ho ixpa xwỳnh pyrãk. Jakamã Ijaew kêt xwỳnh pẽ htỳx ri mẽ pa xwỳnhjaja na pa htem mẽ kãm Tĩrtũm kapẽr tũm o mẽ ahkre mex o ri ixpa. Kormã mẽ kot hprĩ hã mar kêt jakamã na pa htem ho mẽ ahkre ho ri mẽ hkôt ixpa. Mẽ kurom mẽ ixte mar par kẽnã.

21Anhỹr ã amnhĩ jarẽnh nẽ mẽ ate kapẽr o mẽ ahkre ho apa htã hkôt amnhĩ nhĩpêx kêt nẽ.

Nẽ mẽ ate mẽ kot axpẽn pẽ àhkĩnh nẽ mẽ hkurê htã no ãm mẽ kamjaja axpẽn pẽ axàhkĩnh o ri apa.

22 Nẽ mẽ amã sãnti hkĩnh kêt ã amnhĩ jarẽnh tã axtem nẽ hwỳr agjê nẽ hpar pẽ kàxpore nhĩkwỹ xwỳnh o axàhkĩnh o ri apa.

Nẽ mẽ kot axpẽn prõ ho amnhĩkati nẽ mẽ hkurê ho apa htã mẽ kamjaja ã ri amnhĩ nhĩpêx anhỹr o ri apa.

23 Nẽ mẽ ate Tĩrtũm kapẽr ã kagà mex o mex ã harẽnh tã hkôt amnhĩ nhĩpêx hkêt nẽ. Jakamã nhũm mẽ akwỳjaja ja hã mẽ apumu nẽ mẽ apyrã nẽ Tĩrtũm ã hpijaãm kêt o pa.

24Tirtũm kapêr ã kagà htũm kot tanhmã mẽ ate amnhĩ nhĩpêx ã mẽ ajarênh to nê mẽ ajarênh kot:

Mẽ kêp Ijaew kêt xwỳnhjaja na htem Ijaew kot htỳx ri amnhĩ nhĩpêx o ri mẽ pa hã mẽ omu nê mẽ ã hã tanhmã Tirtũm o kapêr punuj to ho ri pa. Anê.

25Mẽ pahpê Ijaew na pu htem mẽ pahkrajaja mẽ hapôx kôt kormã mẽ hkryre ri pu htem mẽ kêp mẽmy kwrỳt kà jakà. Finat Mojes kot Tirtũm nhỹ hã mẽ panhĩgêjtê mã hã karô xà hkôt na pu htem ã mẽ hipêx anê. Mẽ pahte Tirtũm mã mẽ pahkrajê nhôr ã amnhĩ to amnhĩrit kaxyw. Jakamã na pu htem arĩ Mojes kapêr kôt ã mẽ hipêx anê nhũm Tirtũm kãm ja mex nê. Nom kot pu mẽ kapêr kwỳm ri tanhmã amnhĩ nhĩpêx to ho papa nhũm ja kêp omnuj tỳx nê hãmri pu mẽ tee ri mẽ pahkrajê my kwrỳt kà jakàr kaprỳ. Na hte Tirtũm ã mẽ pahkrajê nhĩpêx anhỹr ã mẽ pahpumunh kôt amnhĩm mẽ pamex ã mẽ pajarênh kêt nê. Nom mẽ pahte kapêr kôt amnhĩ nhĩpêx mex o papa pê mẽmy kwrỳt kà jakàrja nhũm kãm mex nê. 26Ijaew kêt xwỳnhjaja kot ã mẽ hkrajê nhĩpêx anhỹr kêt tã ra mẽ hkwỳjaja Tirtũm kapêr ma nê hkôt amnhĩ nhĩpêx o ri pa. Jao te mẽ kot amnhĩ my kwrỳt kà jakàr pyràk o amnhĩ nhĩpêx. Jakamã nhũm Tirtũm ja hã mẽ omu nê mẽ kãm:

— Nà ãm hãmri. Mẽ ate amnhĩ my kwrỳt kà jakàr kêt tã mẽ apê ixkra na ka mẽ. Anê.

27Mẽ kot amnhĩ jakàr kêt tã Tirtũm kapêr kôt amnhĩ nhĩpêx mex o ri pa nhũm amnhĩ tã mẽ omu nê mẽ arom amnhĩm mẽ kot amnhĩ to mex xwỳnh ã mẽ harê. Mẽ kot amnhĩ jakàr kêt tãã.

No mẽ kajaja mẽ ate Tirtũm nhỹ hã Mojes kapêr ã kagà mar tỳx tã hkôt amnhĩ nhĩpêx kêt nê. Ja mỳrapê koja ja hã mẽ apumu nê Ijaew kêt xwỳnhjê kĩnhã mẽ ate amnhĩ tomnuj xwỳnh ã mẽ ajarê. Ra mẽ ate amnhĩ jakàr tã mẽ ate amnhĩ tomnuj xwỳnh ã mẽ ajarê.

28Nê kot ka mẽ atô tanhmã amnhĩ to jarkrar to nê amnhĩ jarênh o:

— Nà ixpê Ijaew jakamã na hte Tirtũm mẽ kot inhmy kwrỳt kà krãhyr kôt ixto kraa. Anê.

Nom xà na hte Tirtũm ã mẽ pahte amnhĩ nhĩpêx anhỹr ã mẽ pahpumunh kôt mẽ pahto hkra? Nà kot anhỹr kêt. Na htem ãm htỳx ã amnhĩ to jarkrar anhỹr kaprỳ ho pa.

29Nê Tirtũm Karô kot mẽ hkarô mã gjêx xwỳnhjaja kêp Tirtũm kra jakamã na htem Tirtũm kãm hprãm xà hkôt amnhĩ nhĩpêx. Nom ri amnhĩ krã hkôt tanhmã amnhĩ nhĩpêx to ho pa hkêt nê. Rỳ htỳx hamaxpêr o:

— Nà kot paj Mojes kapêr ã kagà hkôt amnhĩ nhĩpêx nhũm Tirtũm ja hã ixpumu nê amnhĩm inhmx ã ijarê nê ixto hkra.

Anhỹr o hamaxpêr kêt nê. Na htem hamaxpêr o:

— Nà ra Tirtũm Karô kot ixkarôm àr jakamã ixpê hkra nhũm

amnhĩm inhmex ã ijarẽ. Jakamã kot paj ãm kôt pix mã ri amnhĩ nhĩpêx o ri ixpa rãhã ty. Kwãr mãmrĩ ixkwỳjaja amnhĩm inhmex kêt ã ijarẽ. Anẽ.

Kêr ka mẽ ã ajamaxpêr anhỹr o ri pa. ã mẽ hamaxpêr anhỹr na mex o mex.

3 1Nẽ mãn ka mẽ ra tee ri tanhmã amnhĩ kukamã ajamaxpêr to nẽ ajamaxpêr o:

—Kwa mo kaxyw na pa ixpê Ijaew? Mon pa pre we ixpê Ijaew kêtêr hkêt nẽ? Mẽ kêp Ijaew kêt xwỳnhjaja kot amnhĩ jakàr kêt tã nhũm Tĩrtũm mẽ pahpyrà nẽ mẽ ho hkra. Anẽ.

Kwa mẽ ã ri ajamaxpêr anhỹr kêt nẽ. 2Mẽ pahpê Ijaew na pre Tĩrtũm Ijaew kêt xwỳnhjê rom mẽ pahto mex rax nẽ. Na pre amnepê mã mẽ panhĩgêr mã tanhmã kapêr to. Mẽ pahpiitã mẽ pahte mar nẽ hkôt amnhĩ nhĩpêx kaxyw. Nom Ijaew kêt xwỳnhjê nhĩgêr mã ã kapêr anhỹr kêt nẽ. ãm mẽ pahpê Ijaew nhĩgêr pix mã kapêr. Jakamã mẽ pahpê Ijaew mã ja mex kumrêx. 3Nom kot kaj mẽ atõ ja ma nẽ ajamaxpêr o:

—Nà Tĩrtũm kot mẽ ixto mex mã mẽ ixtã amnhĩ jarênh tã no nhũm xep mẽ inhĩgêr kwỳjaja hkôt amnhĩ nhĩpêx kêt nẽ. Na xep prem kapêr kwỳm ri amnhĩ tomnuj o pa. Jakamã ko. Kojã Tĩrtũm mẽ ixpê mẽ hkanrêhã mẽ htãmnhwỳjaja tanhmã mẽ ixto mex to japêr ko. Anẽ.

4Kwa mẽ ri ã ajamaxpêr anhỹr kêt nẽ. Tĩrtũm na hte mẽ pahpiitã mẽ pakurom mẽmoj tã amnhĩ jarênh o hêx kêt nẽ. Tã ra kot tanhmã mẽ pahpã amnhĩ jarênh to xà hkôt kojã ã mẽ pahto mex anẽ. Kapêr ã kagã htũm kot mẽhõ tanhmã Tĩrtũm mã kapêr to nẽ harênh kot:

Pa Tĩrtũm. Nà ãm kapxipix na ka hte mẽmoj tã amnhĩ jarênh xà hkôt amnhĩ nhĩpêx o ri apa.

Jakamã na htem ãm axpên mã axêx ã akapêr ã ajarênh kaprỳ.

Anhỹr o harê.

5No kot ka mẽ atõ atỳx ajamaxpêr nẽ ajamaxpêr o:

—Xà kojã Tĩrtũm tanhmã mẽ ixte amnhĩ tomnuj to hã mẽ ixpumu nẽ gryk? Nà kojã gryk kêt nẽ. Jakamã kot paj arĩ amnhĩ tomnuj o ri ixpa. Kê mẽ piitã ja hã ixpumu nẽ ixrom Tĩrtũm tapxipix kot amnhĩ to mex o pa xwỳnh ã harênh o pa. Nà ja mex. Jakamã kot paj arĩ amnhĩ tomnuj rãhã ho ri ixpa nhũm mẽ Tĩrtũm pix mã mãn kot tãm amnhĩ nhĩpêx xwỳnh ã harê. Hãmri nhũm Tĩrtũm amnhĩ tã ixpumu nẽ tanhmã ixto hkêt nẽ. Kojã tanhmã ixto japêr hãmri nẽ ixpyrà nẽ amnhĩ tomnuj nẽ. Anẽ.

Kot kaj mẽ ã ajamaxpêr anẽ nẽ ãm amnhĩ krã hkôt ã ajamaxpêr anhỹr kaprỳ. Nom ã ajamaxpêr anhỹrja Tĩrtũm jamaxpêr kôt kêt. 6Kwa mẽ ri ã ajamaxpêr punuj anhỹr kêt nẽ. Tĩrtũm kot mẽ pahpyrà nẽ aa kot amnhĩ tomnujre hã. Kop ãm mẽ pahpyrà nẽ tanhmã kot amnhĩ tomnuj to ronhỹx tanhmã kot we amnhĩ to nẽ mẽ pahte amnhĩ tomnuj xwỳnh ã

mẽ pajarẽ? Nhỹx mẽ pahpyrà nẽ ã amnhĩ jarẽnh anẽ. Nà ã mẽ ajamaxpẽr anhỹrja mex kêt.

7-8E pa ixprĩ hã mẽ amã ja jarẽ ka mẽ inhma. Kot kaj mẽ atõ amnhĩ kukamã ajamaxpẽr o:

—E kot paj mãmri ri mẽmoj tã ixêx o ri ixpa kê mẽ ixêx nhi hã ixpumu nẽ ixrom Tĩrtũm pix mã mãn kot amnhĩ to mex ã harẽ. Nẽ ãm pix mã mãn hêx kêt xwỹnh ã harẽ. Hãmri nhũm Tĩrtũm amnhĩ tã ixpumu nẽ mẽ ã mẽ kot harẽnh anhỹrja ma nhũm ja kãm mex nẽ nhũm hkĩnh nẽ. Jakamã ixêx o ri ixpaja ã tanhmã ixto hkêt nẽ. Ra mẽ kot ixrom tãm kot amnhĩ nhĩpêx o pa xwỹnh ã harẽnh jakamã nhũm ixêx nhita ã tanhmã ixto hkêt japêr. Jakamã kot paj ixte amnhĩ tomnuj o ri ixpaja mã inhũrer kêt nẽ. Kêr kê mẽ ja hã ixpumu nẽ ixrom Tĩrtũm tapxipix kot amnhĩ to mex xwỹnh ã harẽ.

Anhỹr o ajamaxpẽr nom mẽ ajamaxpẽrja kot anhỹr kêt. Na hte akwỹjaja pa ixpê Pawre ixêx o ixpa hã ri axpẽn mã ijarẽ no na pa hte ixêx o ri ixpa hkêt nẽ. ã mẽ ajamaxpẽr anhỹr o ri apa xwỹnhjaja koja Tĩrtũm mẽ atomnuj tỳx nẽ kãm ga.

Mẽ mẽ pahte amnhĩ tomnuj xwỹnh ã mẽ pajarẽnh

Wam Korĩt 6.9; Karatas 3.22; Xitre 3.3

9Tã tanhmã kot puj mẽ pahpê Ijaew amnhĩ jarẽnh to? Xà kot pu mẽ pahte amnhĩ to mex o Ijaew kêt xwỹnhjê jakrenh ã amnhĩ jarẽ? Nà mẽ pahte ã amnhĩ nhĩpêx anhỹyre hã. Mẽ pahpê Ijaew nẽ Ijaew kêt xwỹnhjaja. Mẽ pahpiitã mẽ pahte amnhĩ tomnuj o axpẽn pyræk. Na pa pre ra mẽ amã ja jarẽ. 10Tĩrtũm kapêr ã kagã htũm kot ja jarẽnh kot:

Mêhõ na we aa kot amnhĩ tomnuj kêt kumrêx nẽ pa?

11 Nẽ mêhõ na we kot mẽmoj mex piitã omunh par?

Nẽ mêhõ na kãm Tĩrtũm prãm?

12 Nà amrakati kumrêx. Na mẽ ra piitã hkaga hpa.

Nẽ kapêr kwỹm ri tanhmã amnhĩ tomnuj to ho pa.

ãm mêhõ pyxire nẽ amnhĩ to mex o ri pa hkêt kumrêx.

13 Na htem kapêr punuj pix o ri pa.

Jakamã Tĩrtũm noo mã mẽ kot amnhĩ nhĩpêxja te kot mẽmoj tyk nẽ hkro punuj pyræk.

Na htem ãm ri hêx pix kukamã ri hamaxpẽr o pa. Tanhmã mẽ hêx to xàja te kêp kagã xoprê nhõ wenên xihitỳx pyræk.

14 Nẽ na htem mẽ piitã mẽmoj nhĩxi ho ri axpẽn mã mẽ hixi jarẽnh o pa. Nẽ ri tanhmã axpẽn japrỳ hto ho pa.

15 Nẽ tanhmã kapêr mã gêt kãm mẽ kãm kapêr to.

16 Nẽ tanhmã mẽ hkwyjê homnuj to. Jakamã nhũm mẽ piitã ri hkaprĩ nẽ mex kêt nẽ pa.

17 Nhũm htem ãm axpẽn mã mẽ gryk xà pix o kapêr o pa.

18 Nê Tirtũm ã hpijaàm kêt o pa. Na htem kapêr ma nê ãm kuma nê kãm hkĩnh kêt o pa.

Ã na htem amnhĩ nhĩpêx anhÿr rãhã ho pa. Anê.

Ã Tirtũm kapêr ã kagã htũm kot mẽ pajarênh anhÿr. 19Mê pahpê Ijaew ra mẽ pahte ja jarênh mar tÿx. Tirtũm kapêr ã kagã htũm kwÿ na. Na hte ã mẽ kot amnhĩ tomnuj xwÿnhjê jarênh anê. Nê mãânên mẽ papajaja. Mẽ pahpê Ijaew na hte ã mẽ pajarênh anê. No ãm mẽ papapxipix hkêt. Krĩ piitã hkôt ri mẽ pa xwÿnhjaja nhũm ã mẽ harênh kot anhÿr. Ijaew kêt xwÿnhjaja nê mẽ pahpê Ijaew. Mẽ pahpiitã mẽ pahte amnhĩ tomnuj xwÿnh jakamã mẽmo kaxyw kot pu mẽ pahte amnhĩ tomnuj kêt ã ri amnhĩ to jarkrar o papa? Kot puj mẽ ã amnhĩ jarênh anhÿr kaprÿ. Jakamã koja Tirtũm mẽ pahpiitã mẽ pahte amnhĩ tomnuj mÿrapê tanhmã mẽ panhĩpêx to. 20Mê pahtô koja mẽ pahte kapêr kôt pix mã amnhĩ nhĩpêx o papa hã mẽ pajarê? Nê mẽ pahtô mã koja mẽ pamã kapêr nê mẽ pamã:

— Nã na ka hte akatãt kôt ixkapêr kôt pix mã amnhĩ nhĩpêx mex nê. ãm hãmri na ka hte ã amnhĩ nhĩpêx anhÿr o apa.

Anhÿr o mẽ pahtô mã kot we ã kapêr anê? Nã aa kot mẽ pahtô mã kapêr anhÿr kêt. Na pu htem ãm kapêr ma nê tee ri amnhĩ kukamã pajamãxpêr. Mẽ pahte amnhĩ tomnuj ã amnhĩ pumunh kaxyw na pre mẽ pamã kapêr ã kagã htũmja gã. Mẽ pahtô mẽ pahte kapêr ã kagã hkôt amnhĩ nhĩpêx mex o papa hkêt kênã kot kêt ri amnhĩm mẽ pahte amnhĩ to mex xwÿnh ã mẽ pajarê.

Tanhmã Tirtũm kot mẽ pahto hkra to hã harênh

Atre 17.30-31; Karatas 2.16-21; Piripos 3.7-9; Xitre 3.5; Xiakre 2.10

21Nê na hte Tirtũm mẽ pahte kapêr kôt amnhĩ nhĩpêx ã mẽ pahpumunh kôt amnhĩm mẽ pahte amnhĩ to mex xwÿnh ã mẽ pajarênh kêt nê. Jakamã mẽhõ kukwak ri koja we ã mẽ pajarênh anê? Nã nhãm mẽhõ kot tãm amnhĩ nhĩpêx rãhã ho pa hã omunh pix kukwak ri koja ã mẽ pajarênh anê. Tã mẽhõ kukwak ri kot ã mẽ pajarênh anhÿr xwÿnhhta na pre ra mẽ pamã ho amnhĩrĩt. Amnepêm Tirtũm kapêr ã kagã htũm kamã na pre mẽhõ hkukamã tanhmã harênh to. Nê Tirtũm nhÿ hã mẽ kapêr jarênh o pa xwÿnhjaja haxwÿja kukamã tanhmã harênh to ho pa. 22Jejus Krisja na prem hkukamã harênh o pa. Tãm na pu htem hkôt amnhĩ xunhwÿ nê amnhĩ kaxyw kãm pajamãxpêr rãhã ho papa nhũm Tirtũm ja pix ã mẽ pahpumunh kôt amnhĩm mẽ pahte amnhĩ to mex xwÿnh ã mẽ pajarê. Mẽ kot Jejus kôt amnhĩ xunhwÿr xwÿnh piitãã. Mẽ ixpê Ijaew nê mẽ apê Ijaew kêt xwÿnhjaja. Mẽ pahpiitã mẽ pahte axpên pyrãk jakamã kot puj mẽ pahtô Jejus kôt amnhĩ xãm nhũm Tirtũm Kra Jejus kot amnhĩ to mex pix o pa kukwak ri mẽ pahpumu nê amnhĩm pajarênh o:

— Nà ãm hãmri. Ra kot ixkra Jejus kôt amnhĩ xãm jakamã ra inhmã te Jejus kot amnhĩ nhĩpêx pyrã nê amnhĩ to mex o pa. Anê.

23No mẽ pahtõ na mẽ pahte Tĩrtũm mẽ Jejus wa uràk nê amnhĩ nhĩpêx mex rãhã ho ri papa? Nà amrakati kumrêx. Mẽ pahpiitã mẽ pahte amnhĩ tomnuj xwỳnh kênã. 24Tã Tĩrtũm kot mẽmoj tã mẽ pakutã nojarêr rãhã jakamã na hte Jejus Kris kukwak ri amarĩ amnhĩm mẽ pahte amnhĩ to mex xwỳnh ã mẽ pajarênh o pa. Mẽ pahte Jejus kôt amnhĩ xunhwỳr xwỳnh piitã nhũm ã mẽ pajarênh anê. Ra Jejus kot htyk o mẽ pahte amnhĩ tomnuj piitã hpãnhã amnhĩrer par jakamã na hte Tĩrtũm Jejus kukwak ri amarĩ mẽ pahte amnhĩ to mex xwỳnhjê hã mẽ pajarê. Te mẽ pahte amnhĩ tomnuj kêt kumrêx pyrãk mẽ pajarê. 25-26Na pre mẽ pahwỳr Jejus mẽ nhũm mẽ pahwỳr wrỳ nê mẽ panê ty nê htyk o mẽ pahte amnhĩ tomnuj piitã hpãnhã amnhĩrer pa. Jakamã kot pu mẽ pahtõ amnhĩ kaxyw hkôt pajamxpêr nhũm Tĩrtũm ja hã mẽ pahpumu nê Kra kukwak ri amnhĩ katut kôt mẽ pahte amnhĩ tomnuj piitã rênh pa. Jao te aa mẽ pahte amnhĩ tomnuj kêt kumrêx pyrãk ã mẽ pahpumu.

No kêt amnepêm kormã Jejus wrỳk nê mẽ panê htyk kêt ri mẽ pa xwỳnhjaja. Tanhmã na pre Tĩrtũm mẽ kot hkôt amnhĩ xunhwỳr xwỳnhjê nhĩpêx to? Kormã Jejus mẽ panê htyk kêt ri mẽ pa xwỳnhjaja tanhmã na pre mẽ hipêx to? Nà na pre mẽ hkwỳjaja amnhĩ kaxyw Tĩrtũm kôt hamaxpêr nê hkôt amnhĩ xunhwỳ nhũm amnhĩ tã mẽ omu nê amnhĩm mẽ harênh o:

— Nà ãm hãmri. Koja nhỹrmã Ixkra ma mẽ hwỳr wrỳ nê mẽ nê ty nê htyk o mẽ kot amnhĩ tomnuj pãnhã amnhĩrer pa. Jakamã koja mẽ tãmjaja amnhĩ tomnuj pãnhã amnhĩrer kêt nê. Anê.

Tã nhũm Jejus tãm mẽ pahwỳr wrỳ nê mẽ pahpiitã mẽ panê ty. Jakamã nhũm Tĩrtũm ra mẽ pahte hkôt amnhĩ xunhwỳr xwỳnhjaja Kra kukwak ri amnhĩ katut kôt mẽ pahte amnhĩ tomnuj piitã rênh pa. No na hte amarĩ ã mẽ panhĩpêx anhỹr kêt nê. ãm Jejus tyk pix kukwak ri na hte ã mẽ panhĩpêx anê. ãm hãmri na hte ã mẽ panhĩpêx mex anê. Na hte tãm mẽ panhĩpêx rãhã ho pa. 27Jakamã kot puj mẽ ã pajamaxpêr anê nê pajamaxpêr o:

— Nà na pa hte amnhĩ to mex rãhã o ri ixpa. Amnhĩ to mex o mẽ piitã mẽ hakrenh pa.

Anhỹr o pajamaxpêr kêt nê. Koja mẽhõ ã hamaxpêr anê nê ãm amnhĩ jarênh o hêx. Na hte Tĩrtũm mẽ pahte amnhĩ to mex ã mẽ pahpumunh kôt amnhĩm mẽ pahte amnhĩ to mex xwỳnh ã mẽ pajarênh kêt nê. Mẽ pahte amnhĩ to mex rãhãre hã. Nom na pu htem amnhĩ kaxyw Jejus mã pajamaxpêr nê hkôt amnhĩ xunhwỳ nhũm ja hã mẽ pahpumu nê rĩ kormã amnhĩm mẽ pamex ã mẽ pajarê.

28E pa axte tanhmã mẽ amã ja jarênh to ka mẽ aprĩ hã inhma. Mẽmoj pumunh kôt na hte Tĩrtũm mẽ pahte amnhĩ to mex xwỳnh ã mẽ pajarênh

wehe? Xà mẽ pahte kapêr tũm kôt amnhĩ nhĩpêx o ri papa hã mẽ pahpumunh kôt? Nà na hte ja hã mẽ pahpumunh kôt ã mẽ pajarênh anhỹr kêt nê. Mẽ pahte hkôt amnhĩ nhĩpêx rãhã ho papare hã. ãm mẽ pahte amnhĩ kaxyw Kra Jejus kôt pajamaxpêr nê hkôt amnhĩ xunhwỳr ã mẽ pahpumunh kôt pix mã na hte mẽ pahte amnhĩ to mex xwỳnh ã mẽ pajarê. Ja pix ã mẽ pahpumunh kôt na hte ã mẽ pajarênh anê.

29Nê xà Tĩrtũm kêp mẽ ixpê Ijaew pix nhõ Tĩrtũm pix na? Nà kêp mẽ ixpix nhõ Tĩrtũm kêt. Kêp mẽ ixpê Ijaew nhõ Tĩrtũm nê mãânên kêp mẽ apê Ijaew kêt xwỳnhjê nhõ Tĩrtũm.

30Nê Tĩrtũm ãm pyxi mex. Axtem hõ kêt. Na hte mẽ pahpiitã mẽ panhĩpêx o axpên pyrãk. Jakamã na hte mẽ kot amnhĩ kaxyw Jejus kôt hamaxpêr o mẽ pa xwỳnhjê pumu nê mẽ kot amnhĩ to mex xwỳnh ã mẽ harê. Mẽ ixpê Ijaew nê mãânên mẽ apê Ijaew kêt xwỳnhjaja.

31Tã koja mẽhõ htỳx hamaxpêr o:

— Nà ixte amnhĩ kaxyw Jejus kôt ijamaxpêr mex o ixpa nhũm Tĩrtũm kot amnhĩm inhmex ã ijarênh jakamã kot paj axte kapêr kôt amnhĩ nhĩpêx kêt nê. Kot paj ãm amnhĩ krã hkôt amnhĩ nhĩpêx o ri ixpa. Ra Tĩrtũm kot ixto hkra kênã.

Anhỹr o ajamaxpêr japêr. Kwa mẽ ã ri ajamaxpêr anhỹr kêt nê. Na htem amnhĩ kaxyw Jejus kôt hamaxpêr hãmri nê kãm hkôt amnhĩ nhĩpêx prãm rãhã nê pa ho pa.

Apraãw kot amnhĩ kaxyw Tĩrtũm kôt hamaxpêr

Karatas 3.6-18; Xiakre 2.23

4 1Nê mẽ panhĩgêt finat Apraãwja kêp mẽ pahpê Ijaew pàr krax. Tã mẽmoj tã na pre Tĩrtũm omu nê kot amnhĩ to mex xwỳnh ã harê? 2Xà kot kãm tanhmã amnhĩ nhĩpêx to hã karõ xà hkôt amnhĩ nhĩpêx mex ã omunh xà hkôt nhũm pre ã harênh anê? Nà ja kôt kêt. Kop apu ja kôt ã kot harênh anhỹr ronhỹx Apraãw amnhĩ tã omu nê Tĩrtũm mã amnhĩ to jarkrar nê kãm:

— Pa Tĩrtũm? E mãn ka ixpumu. Na pa hte akapêr kôt amnhĩ nhĩpêx mex o ri ixpa.

Anhỹr o nhỹx pre kãm amnhĩ to jarkrar. No na pre tanhmã kãm amnhĩ to jarkrar to hkêt nê. 3Tã mẽmoj tã omunh xà hkôt na pre Tĩrtũm amnhĩm mex ã harê? Nà Tĩrtũm kapêr ã kagã htũm kot tanhmã Apraãw jarênh to kot:

Na pre Apraãw amnhĩ kaxyw Tĩrtũm kôt hamaxpêr nê hkôt amnhĩ xãm nhũm amnhĩ tã omu nê amnhĩm mex ã harê.

Anê.

4Mẽ õ patrãwjaja na htem kãm mẽ àpênh xwỳnhjaja àpênh mex ã mẽ omunh xà hkôt mẽ kãm amnhĩre. 5No Tĩrtũm na hte ã mẽ panhĩpêx anhỹr kêt nê. Na hte mẽ pahte tãm amnhĩ nhĩpêx ã mẽ pahpumunh kôt

amnhĩm mẽ pahte amnhĩ to mex xwỳnh ã mẽ pajarẽnh kêt nẽ. ãm mẽ pahte amnhĩ kaxyw Kra Jejus kôt pajamxpêr nẽ hkôt amnhĩ xunhwỳr ã mẽ pahpumunh kôt pix mã na hte amnhĩm ã mẽ pajarẽnh anẽ. Ra mẽ pahte amnhĩ tomnuj o ri papa htã hpãnhã amnhĩ kaxyw Jejus kôt pajamxpêr xwỳnh pixjaja na hte ã mẽ pajarẽnh anẽ.

6Jakamã na hte mẽ pamã amnhĩ jarẽnh o:

—Ixte mẽ amex ã mẽ ajarẽnh tã no ãm mẽ ate amnhĩ to mex kôt mẽ apumunh kôt na pa ã mẽ ajarẽnh anhỳr kêt nẽ. ãm mẽ ate amnhĩ kaxyw Ixkra mẽ wa ixkôt ajamxpêr nẽ wa ixkôt amnhĩ xunhwỳr ã mẽ apumunh kôt na pa hte ã mẽ ajarẽnh anẽ. Anẽ.

Pu mẽ ã kot pamã kapêr anhỳr ã amnhĩ tã kuma nẽ pahkĩnh nẽ. Pahi finat Tawi na pre haxwỳja ja jarẽnh o:

7 Na hte Tĩrtũm amnhĩ katut kôt mẽ pahte amnhĩ tomnuj piitã rẽnh pa nẽ axte kãm hamaxpêr kêt nẽ.

Jakamã pu mẽ ja hã amnhĩ pumu nẽ pahkĩnh nẽ.

8 Nẽ amnhĩ kukamã pajamxpêr o: “Hêxta waa nẽ. Na pa pre amnhĩ tomnuj o ixpa nẽ tee ri ja hã amnhĩ pumu nẽ ixkaprĩ nẽ.

Hãmri nẽ amnhĩ to Tĩrtũm wỳ nhũm inhma nẽ ixte amnhĩ tomnuj o hapêx pa nẽ axte kãm hamaxpêr kêt nẽ.

Nà ãm hãmri. Ja mex kumrêx.” Anẽ.

9Tã mẽ kot ja hã amnhĩ pumunh nẽ hkĩnh xwỳnhjaja mẽmojaja na mẽ? Xà mẽ kot amnhĩ my kwrỳt kà jakàr xwỳnh pix kwỳjaja na pre pahi Tawija ã mẽ harẽnh anẽ nà? Nà mẽ tapxipixjaja kêt. Mããnẽn mẽ kot amnhĩ jakàr kêt xwỳnh kwỳjaja. Tanhmã na pre ra Tĩrtũm kapêr ã kagà htũm kot finat Apraãw jarẽnh to? Na pre harẽnh o:

Na pre Apraãw amnhĩ kaxyw Tĩrtũm kôt hamaxpêr nẽ hkôt amnhĩ xãm nhũm amnhĩ tã omu nẽ amnhĩm mex ã harẽ.

Anẽ.

10Xà Apraãw ra kot amnhĩ my kwrỳt kà krãhyr nhĩrô pê na pre Tĩrtũm amnhĩm mex ã harẽ? Nà kormã kot amnhĩ krãhyr kêt ri na pre ã harẽnh anẽ. 11Kormã kot amnhĩ krãhyr kêt ri kãm kapêr nẽ kãm:

—E ate amnhĩ kaxyw inhmã ajamxpêr nẽ ixkôt amnhĩ xãm ã ixte apumunh kôt na pa amnhĩm amex ã ajarẽ.

Anhỳr o kãm kapêr hãmri nẽ rĩ kormã kãm tanhmã amnhĩ krãhyr to hã kãm karô nhũm kuma nẽ mar xà hkôt amnhĩ my kwrỳt kà hkwỳ krãhta. Kot Tĩrtũm mã amnhĩ nhõr ã amnhĩ to amnhĩrĩt kaxyw ã amnhĩ nhĩpêx anẽ.

Nom kormã amnhĩ krãhyr kêt ri na pre Tĩrtũm amnhĩm mex ã harẽ. Tã Ijaew kêt xwỳnhjaja kot amnhĩ jakàr kêt tã mẽ hkwỳjaja Apraãw pyrã nẽ amnhĩ kaxyw Tĩrtũm mã hamaxpêr nẽ kãm amnhĩ nhõr jakamã Apraãw te kêp mẽ hpàr krax maati pyràk. 12Nẽ mããnẽn mẽ

pahpê Ijaew. Kot puj mẽ pahtõ amnhĩ kaxyw Tĩrtũm kõt pajamaxpêr nhũm amnhĩ tã mẽ pahpumu nê mẽ pamex ã mẽ pajarê. No ãm mẽ pahte amnhĩ jakàr ã mẽ pahpumunh kõt ã mẽ pajarênh anhÿr kêt nê. ãm Apraãw pyrã nê amnhĩ kaxyw Tĩrtũm kõt pajamaxpêr pix ã mẽ pahpumunh kõt na hte mẽ pamex ã mẽ pajarê. Kormã Apraãw kot amnhĩ my kwryt kà krãhyr kêt ri ra kot amnhĩ kaxyw Tĩrtũm mã hamaxpêr jakamã kêp mẽ pahpê Ijaew mẽ pahte uràk nê amnhĩ kaxyw Tĩrtũm mã pajamaxpêr xwÿnhjê hpàr krax maati. Ijaew kêt xwÿnhjê pyrã nê kêp mẽ pahpàr krax maati.

Tĩrtũm kot Apraãw mã mẽmoj mex jarênh

Karatas 3.22

13Amnepêem na pre Tĩrtũm Apraãw mã tanhmã kapêr to nê kãm:

—E koja nhÿrmã akanrêhã akra nê atãmnhwÿjaja amÿrpê apyrã nê krĩ piitã hkõt mẽ kêp mẽ õ pahi. Anê.

Tã tanhmã Apraãw kot amnhĩ nhĩpêx to hã omunh xà hkõt na pre ã kãm kapêr anê? Xà kot kãm tanhmã amnhĩ nhĩpêx to hã karõ nhũm kot hkõt amnhĩ nhĩpêx mex ã omunh xà hkõt na pre hkĩnh nê ã kãm kapêr anê? Nà kot anhÿr kêt. Mẽ pahtõ kot pu we Tĩrtũm kapêr xà hkõt pix mã amnhĩ nhĩpêx mex rãhã ho ri papa? Mẽ pahpê hihtÿx kênã. ãm kot amnhĩ kaxyw Tĩrtũm kõt hamaxpêr nhũm kot amnhĩ tã omunh nê amnhĩm mex ã harênh kõt pix mã na pre ã kãm kapêr anê. 14Kop apu kot kãm tanhmã kapêr to nê kãm:

—E Apraãw. Kot kaj ixkapêr piitã ama nê hkõt amnhĩ nhĩpêx mex rãhã ho ri apa. Hã koja nhÿrmã akanrêhã akra nê atãmnhwÿjaja kêp krĩ piitã hkõt mẽõ pahihti.

Anhÿr o kãm kapêr ronhÿx ãm kãm ã kapêr anhÿr kaprÿ. Apraãw aa kot kapêr piitã hkõt amnhĩ nhĩpêx mex o pare hã. Kop apu ã kãm kapêr anhÿr ronhÿx pre kuma nê tee ri amnhĩ kukamã hamaxpêr nê hamaxpêr o:

—Kwa nã. Ra ixte Tĩrtũm kõt amnhĩ xãm tã tanhmã kot pa amnhĩ to nê kapêr piitã hkõt amnhĩ nhĩpêx mex rãhã ho ri ixpa? Kot paj tee ri inhmã ã amnhĩ nhĩpêx anhÿr o ixpa hprãm kaprÿ. Jakamã koja nhÿrmã ixkanrêhã ixkra nê ixtãmnhwÿjaja kêp mẽ õ pahi hkêt nê pa. Hêxta waa nê. 15Koja Tĩrtũm ixte kapêr kwÿm ri tanhmã ixte amnhĩ tomnuj to hã ixpumu nê tanhmã ixtomnuj to. No mẽhõ kot we kapêr piitã hkõt amnhĩ nhĩpêx mex rãhã ho pa? Nà amrakati kumrêx.

Anhÿr o nhÿx pre hamaxpêr. 16No na pre Tĩrtũm ã kãm kapêr anhÿr kêt nê. Ra kot hprĩ hã mẽ pahte amnhĩ nhĩpêx ã mẽ pahpumunh mex kênã. Na pre ãm kãm:

—E ate amnhĩ kaxyw ixkõt ajamaxpêr nê ixkõt amnhĩ xãm jakamã kot paj amarĩ ato mex nê. Anê.

Tĩrtũm na hte mẽmoj tã amnhĩ jarẽnh o amnhĩ to hẽx kêt nẽ. Na hte mẽmoj tã amnhĩ jarẽnh xà hkõt tanhmã mẽmoj nhĩpẽx to ho ri pa. Jakamã koja mẽ pahte Apraãw pyrã nẽ amnhĩ kaxyw hkõt pajamxpẽr xwỳnh piitã mẽ pahto mex nẽ.

Nẽ xà na pre ã mẽ pamã kapẽr anẽ nẽ mẽ pamã:

—E kot kaj mẽ ixkapẽr kõt pix mã ri amnhĩ nhĩpẽx o ri apa hã kot paj mẽ ato mex rax nẽ.

Anhỹr o mẽ pamã kapẽr? Nà na pre ã mẽ pamã kapẽr anhỹr kêt nẽ. Na pre mẽ pamã:

—Kot kaj mẽ finat Apraãw pyrã nẽ amnhĩ kaxyw ixkõt ajamxpẽr nẽ ixkõt amnhĩ xunhwỳ hã kot paj mẽ ato mex nẽ.

Anhỹr o mẽ pamã kapẽr. Tã Apraãw kumrẽx kot mẽ pakukamã amnhĩ kaxyw hkõt hamaxpẽr jakamã te kẽp mẽ pahpiitã mẽ pahte uràk nẽ ã amnhĩ nhĩpẽx anhỹr xwỳnhjẽ pàr krax maati pyràk.

17Amnepẽm na pre Tĩrtũm tanhmã Apraãw mã kapẽr to. Kot tanhmã kãm kapẽr toja Tĩrtũm kapẽr ã kagã htũm kamã na. Na pre kãm:

Kot kaj apẽ ahpỹnhã ri mẽ urojẽ hpàr krax. Anẽ.

Kormã Apraãw kra hkõt tã nhũm hkra hkukamã ã kãm kapẽr anẽ. Hãmri nhũm kuma nẽ hkõt hamaxpẽr kurẽ kumrẽx nẽ hamaxpẽr o:

—Hẽxta waa nẽ. Ra ixprõ mẽ wa ijamẽ wa ixpigêt tỳx nẽ wa ixkra hkõt kumrẽx. Kot paj wa tanhmã amnhĩ to nẽ tokyx ty. Tã ra Tĩrtũm kot ixkra nẽ ixtãmnhwỳjẽ hkukamã ã inhmã mẽ harẽnh anhỹr kẽnã. Jakamã kot pa xep wa ixpigêt tỳx tã tanhmã amnhĩ to nẽ ixkra. Nà kot pa xep wa anẽ. Nẽ koja ixkraja tanhmã amnhĩ to nẽ ixpẽ htyk japẽr tã koja Tĩrtũm akupỹm inhmã ho htĩr. Nà koja inhmã ho anẽ. Ra kot inhmã ixkra nẽ ixkanrẽhã ixtãmnhwỳ xohtõ jarẽnh kẽnã. Anẽ.

18-19Na pre ra hpigêt tỳx nẽ. Ra hã amgrã pẽ 100 nẽ hkurẽ kêt nẽ pa. Nhũm hprõ mããnẽn hpigêx tỳx nẽ. Nẽ õhy kamã hkra hkõt kumrẽx. Kormã wa hkra hkõt tã nhũm Tĩrtũm Apraãw mã hkra nẽ htãmnhwỳ xohtõ hã harẽ. Nẽ kẽp mẽ urojẽ xohtõjẽ pàr krax ã kãm harẽ. Hãmri nhũm kuma nẽ amnhĩ kaxyw hkõt hamaxpẽr tỳx kurẽ kumrẽx. 20Nẽ ã amnhĩ nhĩpẽx anhỹr rãhã ho pa. Na pre war amnhĩ kra hã amnhĩ jarẽnh ma nẽ tee ri amnhĩ kukamã hamaxpẽr kêt nẽ. ãm Tĩrtũm tãm kot wa kãm wa hkra jarẽnh pix mã hamaxpẽr pẽ amnhĩ kaxyw kãm hamaxpẽr tỳx o ri wa pa. Nẽ hamaxpẽr o:

—Nà ra wa ixpigêt tỳx kumrẽx tã koja xep Tĩrtũm wa inhmã wa ixkra hõ gõ. Nà koja wa inhmã kugõ. Hẽxta waa nẽ. ãm hãmri Tĩrtũmja mex o mex. 21Nà kot wa inhmã wa ixkra jarẽnh xà hkõt koja wa inhmã kugõ. Ja kaxyw àhpumunh o àhpumunh. Tĩrtũmja hẽx kêt. Anẽ.

22Hãmri nhũm Tĩrtũm ã hamaxpẽr anhỹr ã omu nẽ amnhĩm mex ã harẽ. Nẽ kot kãm amnhĩ jarẽnh xà hkõt wa kãm wa hkraja gõ.

23Nom na pre amnhĩm Apraãwja pix mex ã harẽnh kêt nẽ. 24Kot puj

mê pahtõ uräk nê amnhĩ kaxyw hkõt pajamaxpêr nhũm amnhĩ tã mê pahpumu nê ra kot Apraãw jarênhta pyrã nê amnhĩm mê pamex ã mê pajarê. Na pre mê panhõ Pahihti Jejus ty nhũm Tĩrtũm akupỹm ho htĩr. Tã mê papajaja na pu prem amnhĩ kaxyw Jejus kõt pajamaxpêr nhũm Tĩrtũm ja hã mê pahpumunh kõt mê pahte amnhĩ to mex xwỹnh ã mê pajarê. 25Na pre mê pahwỳr Kra Jejus mê nhũm mê pahwỳr wrỳ. Tã nhũm mê axtem nê kupĩ nom nhũm amarĩ htyk kêt nê. Na pre htyk o mê pahte amnhĩ tomnuj pãnhã amnhĩrer pa. Ja kaxyw na pre Tĩrtũm mê pahwỳr kumê. Jakamã nhũm prem kupĩ nhũm akupỹm ho htĩr. Tã mẽmo kaxyw na pre Tĩrtũm ã mê pahwỳr Kraja mẽnh nhũm mê panê htyk anê nhũm akupỹm ho htĩr? ãm kot kukwak ri amnhĩm mê pahte amnhĩ kaxyw hkõt pajamaxpêr xwỹnhjaja mê pahte amnhĩ to mex xwỹnh ã mê pajarênh pix kaxyw.

Tĩrtũm kot mê pahto hkwy hã harênh

Matêwre 5.12; Sikũn Korĩt 4.8, 5.18-21; Xiakre 1.2-4; Wam Pêtre 4.12, 5.9

5 1Nê na pu prem amnhĩ tomnuj o ri papa nhũm Tĩrtũm ja hã mê pahpumu nhũm ja kêp omnuj nê. Jakamã nhũm Jejus amnhĩ grõnh kõt wrỳ nê mê panê ty. Nhũm Tĩrtũm htykja kukwak ri mê pahto hkwy. Mê pahte amnhĩ kaxyw hkõt pajamaxpêr nê hkõt amnhĩ xunhwỳr ã mê pahpumu hãmri nê ã mê panhĩpêx anê pu mê ra pahpê hkwy hã papa. 2Na pre Jejus Tĩrtũm mã mê pajarênh o:

—E jajê pumu. Na mê ra amnhĩ kaxyw pamã hamaxpêr nê pahkõt amnhĩ xunhwỳ. Anê.

Hãmri nhũm kuma nê mê pahto mex nê mê pakutã nojarêt rãhã ho pa. Tã kot puj mê pahpê hkrajaja nhỹrmã pano ho Tĩrtũm mex o mex xwỹnhja pumu. Jakamã na pu htem amnhĩ kukamã ã pajamaxpêr anhỹr o pahkĩnh nê papa nê pajamaxpêr o:

—Hêxta waa nê. Kot paj nhỹrmã inhno ho Tĩrtũm mex o mex ã omu nê kuri ixpa ho ixpa. Nã ãm hãmri. Inhmã omunh prãm tỳx kumrêx. Anê.

3-4Nê na htem Jejus ã mê pahtomnuj nê pu mê pahpunuj nê ri papa. Pamex kêt nê tã tee ri amnhĩ kukamã pajamaxpêr o ri pahkaprĩ nê papa hkêt nê. Kwãr mê mãmri ã mê panhĩpêx anê. Pu mê pahpunuj kurê Jejus kõt amnhĩ xunhwỳr tỳx o kormã mõ. Nê mê umaj hkaga hkêt nê. Arĩ amnhĩ wỳr kamã pajamak o papa. Jao amnhĩ kaxyw kumã pix mã kãm pajamaxpêr tỳx rãhã pahkĩnh nê ri papa.

Kot puj mê ã amnhĩ nhĩpêx anhỹr o ri papa nhũm Tĩrtũm ja hã mê pahpumu nhũm ja kãm mex nê. Hãmri nhũm ja kaxyw tanhmã mê pahto paxihtỳx to pu mê pahpunuj tã hkõt pajamaxpêr tỳx rãhã nê.

5Nê ra mê kot Jejus ã tanhmã mê panhĩpêx to htã pu mê amnhĩ kaxyw tee ri kãm pajamaxpêr kaprỳ hkêt nê. Ra kot mê pamã amnhĩ Karõ nhõr nhũm kot mê pahkarõ mã gjêx kênã kot pu kêt mê ri tee ri

amnhĩ kaxyw kãm pajamaxpër kaprÿ. Na hte Karõja mẽ pahkarõ kamã mẽ pamã Tirtũm kapër jarënh o amnhĩrĩt nẽ kãm mẽ pajapê htÿx ã harënh o amnhĩrĩt rãhã nẽ.

6Amnepê mã na pre mẽ piitã amnhĩ tomnuj o ri pa nẽ tee ri kãm amnhĩ to mex rãhã hprãm kaprÿ. Mẽhõ kot we ja kaxyw tanhmã mẽ hkrã hto? Jakamã nhũm Tirtũm ja hã mẽ omu hãmri nẽ mẽ kaxyw Kra Jejus mã kãm:

—E inhma. Ka kot kaj mẽ kot tanhmã amnhĩ tomnuj to ho paja ã ma mẽ hwÿr wrÿ. Ixte mẽ nẽ atyk kaxyw agrõnh kõt mẽ hwÿr amënh jakamã kot kaj wrÿ nẽ mẽ kãm ixkapër jarënh o ri mẽ hkõt apa. Rãhã nhũm mẽ hkwÿjaja apĩ ka mẽ piitã mẽ nẽ ty. Anẽ.

Hãmri nhũm kuma nẽ kãm:

—Tõe. Nà kot paj amã hprãm xà hkõt ã amnhĩ nhĩpêx anẽ. Anẽ.

Hãmri nẽ man amnhĩ grõnh kõt mẽ pahwÿr wrÿ. 7-8Xà koja mẽhõ kãm axpën japê xàj axpën nẽ ty nã? Xà kot mẽhõ tãm kot amnhĩ nhĩpêx xwÿnh tã nhũm mẽ kot hpĩr kaxyw nhũm hkrãmnhwÿja kãm hapê nẽ. Nẽ nẽ amnhĩ grõnh kõt mẽ kãm xa nhũm mẽ kupĩ nhũm nẽ ty? Nà kot apu nẽ htyk japêr ko. No mẽ papajaja. Na pu htem mẽhõ hkrãmnhwÿta kĩnhã arĩ amnhĩ tomnuj rãhã ho ri papa htã nhũm Tirtũmja arĩ kãm mẽ pajapê nẽ. Nẽ kãm mẽ pajapê xàj mẽ pahwÿr Kris mẽ nhũm mẽ panê ty. Arĩ mẽ pahte amnhĩ tomnuj rãhã ho papa tãã. Na pre ã Tirtũmja kãm mẽ pajapê hã ã mẽ pahwÿr mẽnh anẽ. 9Na pre ty nhũm hkamrõ hkwÿ axkapĩ nhũm Tirtũm ja hã omunh xà hkõt tãm amnhĩm mẽ paxunhwÿ. Tã Jejus kukwak ri koja ma mẽ kot amnhĩ xà htÿx kamã hamak tũm xàta wÿr mẽ parënh kêt nẽ. Mẽ pahpê hkwÿ kënã kot kêt hwÿr mẽ parê.

10Nom kormã mẽ pahpê hkwÿ hkêt ri na pu prem te ra kutã amnhĩ xunhwÿr pyrak o amnhĩ nhĩpêx. Tã nhũm Kra mẽ panê ty pu mẽ hkõt amnhĩ xunhwÿ. Jakamã nhũm Tirtũm Jejus tyk kukwak ri mẽ pahto hkwÿ. Nẽ ra akupÿm Kra ho htĩr jakamã kot puj mẽ pahte hkõt amnhĩ xunhwÿr xwÿnhjaja nhÿrmã wa urak nẽ wa kuri pahĩr tũm nẽ pamex kumrêx nẽ papa ho papa.

11Nẽ mẽ pahpê kuwy rax wÿr mẽ papa mã xwÿnh kêt jakamã na pu htem pahkĩnh nẽ pajamakêtkati nẽ ri papa. Nom ja pix ã na pu htem ã amnhĩ nhĩpêx anhÿr kêt nẽ. Mẽ pahpê Tirtũm krãmnhwÿ jakamã na pu htem mãânën pahkĩnh nẽ ri papa. Pahihti Jejus Kris kot mẽ panê htyk ã omunh xà hkõt na pre Tirtũm mẽ pahte hkõt amnhĩ xunhwÿr xwÿnhjê ho hkwÿ jakamã na pu htem pahkĩnh nẽ pajamakêtkati nẽ ri papa.

Atãw mẽ Kris wa harënh

Wam Korĩt 15.20-22, 45-49

12-13Nẽ amnepêm na pre Tirtũm finat Mojes mã tanhmã kapër to. Hãmri nhũm kuma nẽ Ijaew kot tanhmã amnhĩ nhĩpêx to ho pa kaxyw

mê kãm mêmojta ã karõ nê mê kãm hã hkagã. Mê kot kamã harênh nê mar nê Tirtúm kôt amnhĩ nhĩpêx kaxyw. Hãmri nhũm mê tee ri ã kot mê kãm mêmojtã karõja ma nê tanhmã axpên mã kapêr to nê axpên mã:

—Kwa na pu htem ã amnhĩ nhĩpêx anhÿr kêt nê. Na pu htem ãm amnhĩ tomnuj tÿx kumrêx o ri papa nê amnhĩ to mex kêt kumrêx. Anê.

Ãm hãmri na prem ã amnhĩ jarênh anê. Mê pahpiitã mê pahte amnhĩ tomnuj xwÿnh kênã. My kot wa pê finat Atãwja kumrêx na pre tanhmã mê pahte amnhĩ tomnuj to ho hkra. Mÿrapê na pre htír tũm nê ri pa ho pa hkêt nê. Na pre ri pa nê gaa nê rĩ hpigêt tÿx nê ty. Tã mÿr pê ri mê papa xwÿnhjaja na pu htem urãk nê tanhmã amnhĩ tomnuj to ho ri papa. Mÿrapê na pu htem ri papa nê gaa nê Atãw pyrã nê pahtyk pa. Tirtúm kot mê pahtã Atãw mã kapêr xã hkôt. 14-19 Jakamã na prem kormã Mojes kator xwÿj ri pika piitã hkôt ri pa nê gaa nê haxwÿja htyk pa. Mê kot amnhĩ tomnuj mÿrapê ty. Atãw pyrã nê Tirtúm kot mêmoxõ nê hkurê xwÿnhhta krêr kêt tã urãk nê tanhmã amnhĩ tomnuj to ho ri pa. Hãmri nê mÿrapê ty.

Na pre ã Atãwja mê pahpiitã mê pamã Tirtúm kapêr nhĩrõp ãm nê amnhĩ tomnuj o hkra anê nê mêmoxõta krê. Jao te mê pahpiitã mê pahte urãk nê kumê hkur pyrãk o mê panhĩpêx. Mÿrapê nhũm htem arĩ pika piitã hkôt hapõj nê kormã hprĩre htã ra Atãw pyrã nê tanhmã amnhĩ tomnuj to ho ri pa. Jakamã nhũm Tirtúm Atãw kot tanhmã amnhĩ tomnuj to hã omunh xã hkôt mê pakukamã hamaxpêr o:

—Nã koja mê Atãw pyrã nê amnhĩ tomnuj o ri pa. Mÿrapê kot paj ma mê kot amnhĩ xã htÿx kamã hamak tũm xãta wÿr mê rênh pa. Anê.

Tã Jejus Kris mê Atãw wa harênhja kot axpên pyrãk jakamã na hte Atãw kanrêhã hkra nê htãmnhwÿjjaja Atãw kot amnhĩ nhĩpêx kôt amnhĩ nhĩpêx o ri pa rãhã nê. Urãk nê amnhĩ tomnuj rãhã ho ri pa. Nhũm axtem Jejus kôt mê kot amnhĩ xunhwÿr xwÿnhjaja Jejus kôt amnhĩ nhĩpêx rãhã ho ri pa. Te mê kêp hkanrêhã hkra nê htãmnhwÿjê pyrã nê urãk nê tãm amnhĩ nhĩpêx. Na htem ã ahpÿnhã amnhĩ nhĩpêx anhÿr o ri pa. Na pre Jejus mê pahte amnhĩ tomnuj pãnhã amnhĩrer par kaxyw mê panê ty. Jakamã mê pahte hkôt amnhĩ xunhwÿr xwÿnhjaja na hte Tirtúm ja hã mê pahpumunh kôt mê pahto hkra. Kot puj mê nhÿrmã pahtyk tã nhũm akupÿm mê pahto mê pahtír pu mê wa kuri pahtír tũm nê papa ho papa.

Atãw kot Tirtúm kapêr nhĩrõp ãm jakamã na hte Tirtúm mê pahpiitã mê pahte amnhĩ tomnuj xwÿnh ã mê pajarê. Nom nhũm Jejus Atãw rom kot Tirtúm kapêr mar nê hkôt amnhĩ nhĩpêx rãhã jakamã na hte Tirtúm mê pahte hkôt amnhĩ xunhwÿr xwÿnhjaja amnhĩm mê pahte amnhĩ to mex xwÿnh ã mê pajarê.

Nhũm Atãw kot Jejus kĩnhã Tirtúm kapêr nhĩrõp ãm mÿrapê na hte mÿr pê mê pa xwÿnhjaja ohtõ nê pa nê gaa nê Atãw pyrã nê htyk pa.

HãMRI nê kormã htír ri amnhĩ to mex o pa hkêt mýrapê ma mẽ kot amnhĩ xà htýx kamã hamak tũm xàta wýr ma hapêx. Tã nhũm Tĩrtũmja mex o mex jakamã na hte JeJus Kris mẽ wa mẽ pakamã ukaprĩ nê. Jakamã na pre mẽ pahwýr JeJus mẽ nhũm mẽ pahwýr wrý hãMRI nê htyk o mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhýr kukwak ri mẽ pahte hkôt amnhĩ xunhwýr xwýnhjaja amarĩ tanhmã mẽ pahto mex to ho ri pa. Atãw kot amnhĩ tomnuj pix pumunh kôt na pre Tĩrtũm mẽ pahpiitã mẽ pahte amnhĩ tomnuj xwýnh ã mẽ pajarê. Tã nhũm JeJus mẽ pakamã ukaprĩ nê mẽ panê ty nhũm Tĩrtũm ja hã omunh xà hkôt ra mẽ pahte amnhĩ kaxyw hkôt pajamaxpêr xwýnhjaja te mẽ pahte aa tanhmã amnhĩ tomnuj to hkêt pyrãk o mẽ panhĩpêx. Na hte amarĩ ã mẽ panhĩpêx anê.

Nê Atãw kot amnhĩ tomnuj mýrapê na htem piitã ri pa nê tanhmã amnhĩ to nê ty rý ri pa nê gaa nê wejre nê ty. No na pre JeJus Krisja aa kot amnhĩ tomnuj kêt kumrêx tã amarĩ mẽ panê ty. Jakamã nhũm Tĩrtũm ra kukwak ri mẽ pahte hkôt amnhĩ xunhwýr xwýnhjê kutã nojarêr rãhã nê mẽ pakukamã hamaxpêr o:

— Nã mẽ kot Ixkra hkôt amnhĩ xunhwýr xwýnhjaja na pa mẽ omunh pa. Tã kot paj Ixkrata kukwak ri tãm mẽ unhwý nhũm mẽ nhýrmã wa ixri mex nê htír tũm nê pa ho pa. Anê.

20-21 Nê na pre Tĩrtũm tanhmã finat Mojes mã kapêr to. Mẽ piitã mẽ kot amnhĩ tomnuj o ri mẽ pa hã amnhĩ pumunh kaxyw. HãMRI nê mẽ kot kapêr mar nê hkôt amnhĩ nhĩpêx o pa kaxyw tanhmã mẽ kaxyw Mojes mã kapêr to. Nhũm kuma nê amnhĩ xô ri mẽ kãm hã kagã nê mẽ kãm harênh o ri mẽ hkôt pa. No nhũm prem kapêr ma nê ãm kuma nê hkwým pix mã ri tanhmã amnhĩ tomnuj to ho pa. Nê pika piitã hkôt ja arĩ rãhãã. Ja mýrapê koja mẽ nhýrmã ty nê ma mẽ kot amnhĩ xà htýx kamã hamak tũm xàta wýr ma pa. Nom Tĩrtũm arĩ kãm pika piitã hkôt mẽ papa xwýnhjê japê nê. Mẽ pahte amnhĩ tomnuj o papa tã nhũm kãm mẽ pahto mex prãm nê. Jakamã na pre mẽ pahwýr Kra JeJus Kris mẽ nhũm mẽ pahwýr wrý. Mẽ panê htyk o kot mẽ pahte amnhĩ tomnuj pãnhã amnhĩrer kaxyw. Tã kukwak ri kot puj mẽ pahte amnhĩ kaxyw hkôt pajamaxpêr xwýnhjaja nhýrmã Tĩrtũm mẽ wa kuri pahtrĩ tũm nê pa mex nê papa ho papa.

Mẽ kot mẽ pahkrã kumrãr ã mẽ harênh

Sikũn Korĩt 5.17; Karatas 2.19-20, 5.24, 6.14; Epes 4.17-24;

Korosê 3.1-11; Wam Pêtre 4.1-6

6 1 Nê mẽ pahte arĩ tũhã tanhmã amnhĩ tomnuj to htã nhũm Tĩrtũm arĩ kãm mẽ pajapê nê. Nê arĩ mẽ pakutã nojarêr rãhã nê. Jakamã xà kot kaj mẽ atõ ã harênh anhýrja ma nê atýx ri ã ajamaxpêr anê nê ajamaxpêr o:

—Nà Tirtũm kãm ijapê nê kot ixkutã nojarêt rãhã ho ri pa jakamã mo kaxyw kot pa Jesus kôt amnhĩ nhĩpêx o ri ixpa? Nà kot paj ho anhỹr kêt nê. Anê.

Ka ã mẽ atõ atỳx ri ajamaxpêr anhỹr japêr. Kwa xà ajamaxpêrja mex? Nà mex kêt. 2^ã ajamaxpêr anhỹrja mẽ hamaxpêr mex xà hkôt kêt. Ra mẽ pahte Jesus kôt amnhĩ xunhwỳr nê mẽ pahte amnhĩ tomnuj kaga jakamã nhũm mẽ pahte amnhĩ tomnujja te ra mẽ pahpê hapêx pyrãk. Jakamã kot puj mẽ arĩ tanhmã amnhĩ tomnuj to ho ri papa hkêt nê. 3^Mẽmo kaxyw na htem Tirtũm mã mẽ pahkrã kumrã? Nà mẽ pahte ra Jesus kôt amnhĩ xunhwỳr ã amnhĩ to amnhĩrĩt kaxyw. Te Jesus htyk nhũm mẽ pahte amnhĩ tomnujja haxwỳja hkôt htyk nê hapêx par pyrãk o amnhĩrĩt kaxyw. Jakamã na pu htem pajamaxpêr o:

—Nà kot paj axte tanhmã amnhĩ tomnuj to ho ri ixpa hkêt nê. Anê.

4^{Na} htem Tirtũm mã gôx kãm mẽ pahkrã kumrã nhũm mẽ pahte amnhĩ nhĩpêx tũmja te mẽ kot Jesus kôt haxwỳja haxàr pyrãk. Hãmri nhũm mẽ akupỳm mẽ pahto api. Te Tirtũm hihtỳx o hihtỳx o kot akupỳm Kra Jesus ho htĩr pyrãk. Te mẽ pahtyk tã nhũm akupỳm kot mẽ pahto mẽ pahĩr pyrãk. Pãnhã mẽ pahte amnhĩ nhĩpêx nyw o amnhĩ nhĩpêx kaxyw. 5^{Nhũm} mẽ pahte amnhĩ nhĩpêx tũmja te Jesus kôt htyk nê hapêx par pyrãk. Nê mẽ pahte amnhĩ nhĩpêx nywja te Jesus akupỳm htĩr pyrãk o amnhĩ nhĩpêx.

6^{Amnepê}m na pu pre htem amnhĩ tomnuj rãhã ho ri papa. Te mẽ kãm mẽ àpênh xwỳnhjaja kot mẽ õ patrãw mã àpênh rãhãta pyrãk. Tã nhũm Kris mẽ panê ty. Kot mẽ panê mẽ pahte amnhĩ tomnuj pãnhã amnhĩrer nê ho hapêx par kaxyw mẽ panê ty. Jakamã te mẽ pahte amnhĩ tomnuj mẽ pajamaxpêr punujja te pĩ kahpa hã Jesus kôt harir nê htyk nê hapêx par pyrãk. Pãnhã mẽ pahte amnhĩ nhĩpêx nyw pix o amnhĩ nhĩpêx kaxyw. Nê mẽ pajamaxpêr nyw pix o pajamaxpêr papa kaxyw. 7^{Na} hte mẽ htyk xwỳnhjaja axte tanhmã amnhĩ tomnuj to hkêt nê. Tã kêr pu mẽ urãk nê axte ã amnhĩ nhĩpêx anhỹr kêt nê. 8^{Na} pu prem Jesus kot mẽ panê htyk ã harênh ma nê pajamaxpêr o:

—Nà ra Jesus kot mẽ panê htyk jakamã kot paj ixte amnhĩ nhĩpêx tũm kaga hpa nê hpãnhã kot amnhĩ nhĩpêx kôt pix mã ri amnhĩ nhĩpêx o ri ixpa. Te ra ixtyk nê axte tanhmã ixte amnhĩ tomnuj to ho ri ixpa hkêt pyrãk. Jao amnhĩ nhĩpêx nyw pix o amnhĩ nhĩpêx o ri ixpa. Anê.

9^{Nê} Jesus htyk nhũm Tirtũm akupỳm ho htĩr jakamã koja axte htyk kêt nê. Ra mẽ pahte ja mar mex. 10^{Na} pre ãm htyk tipxi htã htykja o mẽ pahpiitã mẽ pahte amnhĩ tomnuj pãnhã amnhĩre. Tã ra akupỳm htĩr o htĩr nê kaxkwa kamã Tirtũm mã tanhmã amnhĩ nhĩpêx to ho ri pa. 11^{Tã} mẽ papajaja kot puj mẽ ã kot amnhĩ nhĩpêx anhỹrja ma nê ã pajamaxpêr anê nê pajamaxpêr o:

—Nà ãm hãmri. Te ixte Jejus pyrã nê ra ixtyk pyrãk jakamã kot paj axte amnhĩ tomnuj o ri ixpa hkêt nê. Te ixte Jejus pyrã nê akupým ixtĩr nê ãm Tĩrtũm kôt pix mã amnhĩ nhĩpêx o ri ixpata pyrãk o kot paj hpãnhã amnhĩ nhĩpêx o ri ixpa. Anê.

12Jakamã kot ka mẽ atõ nhỹrmã tanhmã amnhĩ kukamã ajamaxpêr punuj to japêr hãmri nê ajamaxpêr o:

—Nà inhmã ã amnhĩ tomnuj anhỹr prãm nê. Omnuj tã kot paj ho anê. Nà ixte ho anhỹr mã kênã.

Anhỹr o ajamaxpêr japêr tã kwa mẽ ã ajamaxpêr anhỹr kêt nê.

13Kêt Tĩrtũm mã mãn amnhĩ gõ nê hkôt amnhĩ nhĩpêx o ri apa. Hãmri nê amnhĩ krã kamã mẽmoj mex pix mã ajamaxpêr nê tãm akapêr. Nê mẽ kot amnhĩ to mex xwỳnhjê kôt pix mã mãn ri apa.

Na ka pre htem akapêr punuj nê.

Nê ajamaxpêr punuj nê.

Nê mẽ kot amnhĩ tomnuj o mẽ pa xwỳnhjê hkôt ri apa.

Nê kagôxỳhti japrô nê ho akôm o ri mẽ hkôt apa.

Tã ra hpãnhã Tĩrtũm mã amnhĩ gõ nê axte ã amnhĩ nhĩpêx anhỹr kêt nê.

14Amnepêm na pu prem tanhmã mẽ pahte amnhĩ nhĩpêx to ho papa hkukamã pajamaxpêr nê pajamaxpêr o:

—Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa nê amnhĩ to mex o ri ixpa nhũm Tĩrtũm ja hã ixpumu nê amnhĩm inhmex ã ijarê. Nà kot paj anê.

Anhỹr tã no ãm tee ri mẽ pamã hkôt amnhĩ nhĩpêx o ri papa hprãm kaprỹ nê arĩ ri kapêr kwým tanhmã amnhĩ nhĩpêx to ho ri papa. Tã ra hpãnhã axtem pajamaxpêr o:

—Nà Tĩrtũm kot ixkutã nojarêr rãhã ho pa xwỳnh. Tã ra ixte hkôt amnhĩ xãm jakamã koja tanhmã ixto pa hkôt amnhĩ nhĩpêx mex o ri ixpa. Nà koja ixto anê.

Anhỹr jakamã ra amnhĩ kaxyw kãm pajamaxpêr tỳx o mẽmoj punuj kutã amnhĩ to htỳx nê.

Mê pahte Tĩrtũm mã tanhmã amnhĩ nhĩpêx to hã mẽ pajarênh

Juãw 8.34

15Tã ã kot anhỹr jakamã tanhmã kot puj wem pajamaxpêr to? Xà kot pu mẽ ã pajamaxpêr anê nê pajamaxpêr o:

—Nà na hte Tĩrtũmja ixte kapêr kôt amnhĩ nhĩpêx o ixpa hã ixpumunh kôt amnhĩm inhmex ã ijarênh kêt nê. ãm kêp ixkutã nojarêr rãhã nê amarĩ amnhĩm inhmex ã ijarênh xwỳnh jakamã kot paj arĩ amnhĩ tomnuj rãhã nê aa ja kaga hkêt nê.

Anhỹr o kot puj mẽ pajamaxpêr? Nà kot puj mẽ ã pajamaxpêr anhỹr kêt nê. ã mẽ pajamaxpêr anhỹrja mex kêt. 16Koja mẽhõ nhỹri kot amnhĩ tomnuj tỳx xwỳnhjê hõ pumu nê kãm amnhĩ jarênh japêr nê kãm:

—E inhma. Kot paj ãm akôt pix mã tanhmã amnhĩ nhĩpêx to ho ri ixa. Jakamã e inhmã mẽmoj tã karõ pa ama nê amã tanhmã ho ho ri ixa.

Anhỹr o kãm kapêr japêr. Hãmri nê ã amnhĩ nhĩpêx anhỹr tã amnhĩ tomnuj pix o ri pa. Tã ã mẽ kot amnhĩ nhĩpêx anhỹr o mẽ pa xwỳnhjaja koja nhỹrmã ty hãmri mẽ kot amnhĩ xà htỳx kamã hamak tũm xàta wỳr ma hapêx.

No koja mẽhõ Tĩrtũm mã amnhĩ jarênh nê kãm:

—Pa Tĩrtũm. E kot paj ãm akapêr kôt pix mã ri amnhĩ nhĩpêx o ri ixa.

Anhỹr o kãm amnhĩ jarê nê hkôt amnhĩ nhĩpêx mex o pa. Nê tãm amnhĩ nhĩpêx o ri pa. Hãmri nê nhỹrmã ty nê ma õ krĩ hwỳr api nê Jejus mẽ Tĩrtũm wa kuri htĩr tũm nê mex rãhã nê pa ho pa.

17Tã mẽ kajaja na ka xep prem tee ri mẽ amã mẽ ate amnhĩ tomnuj mã anhũrer prãm tã nhũm te tãm kot amnhĩ tã mẽ ato htỳx pyrãk o mẽ anhĩpêx ka mẽ tee ri kãm anhũrer prãm kaprỳ. Tã nhũm Tĩrtũm tanhmã mẽ akrã hto ka mẽ kapêr ma nê amnhĩ kaxyw hkôt ajamaxpêr tỳx nê ãm hkôt pix mã amnhĩ nhĩpêx. Pa ja hã mẽ ajarênh ma nê mẽ anhỹ hã ixkĩnh nê. Nê Tĩrtũm mã ixte mẽ ajarênh mar nê mẽ anhỹ hã ixkĩnh ã amnhĩ jarê. 18Na pre Tĩrtũm tanhmã mẽ akrã hto ka mẽ amnhĩ tomnuj mã anhũrer pa nê hpãnhã hkôt pix mã amnhĩ nhĩpêx.

19E kot paj ixprĩ hã tanhmã mẽ amã ja jarênh to. Te ixte ixkrajê jahkre pyrãk o kot paj mẽ amã awjarê. Nà amnepêm na ka prem ajamaxpêr punuj kôt amnhĩ tomnuj o ri apa. Nê gaa nê ra amnhĩ tomnuj pix kukamã ajamaxpêr. Tã kêr ka mẽ arĩ ã amnhĩ nhĩpêx anhỹr kêt nê. Pãnhã tãm ri ajamaxpêr o ri apa. Jao gaa nê ra Tĩrtũm kãm hprãm xà hkôt tãm amnhĩ nhĩpêx mex nê. 20Na ka prem tee ri amã amnhĩ tomnuj mã anhũrer prãm kaprỳ. Te tãm kot amnhĩ tã mẽ ato htỳx nê amnhĩ kôt mẽ ato pa pyrãk o mẽ anhĩpêx. 21Xàn ka prem ã amnhĩ tomnuj anhỹr o apa nê akĩnh nê ajamakêtkati nê ri apa? Nà na ka prem akĩnh nê apa hkêt nê. Tã na ka prem Jejus kôt amnhĩ xunhwỳ nê tee ri ate tanhmã amnhĩ tomnuj to hã amnhĩ pumu nê akaprĩ nê apijaàm nê. ã mẽ kot amnhĩ tomnuj anhỹr o pa xwỳnhjaja na htem ja mỳrapê ty nê ma mẽ kot amnhĩ xà htỳx kamã hamak tũm xàta wỳr pa. 22No na pre ra Tĩrtũm tanhmã mẽ akrã hto ka mẽ amnhĩ tomnuj kaga hpa. Te Tĩrtũm tãm kot hpãnhã amnhĩ tã mẽ ato htỳx nê amnhĩ kôt mẽ ato pa pyrãk ka mẽ ra ãm hkôt pix mã amnhĩ nhĩpêx mex o ri apa. Nê hpãnhã amã kapêr kôt pix mã amnhĩ nhĩpêx mex prãm. Nê hkôt pix mã amnhĩ nhĩpêx hprãm. Jakamã kot kaj mẽ nhỹrmã kuri amex kumrêx nê atĩr tũm nê ri apa ho apa.

23Na hte mẽ kãm àpênh o ri mẽ pa xwỳnhjaja mẽ kãm mẽmoj tã apê nê àpênh pa nê hpãnhã amnhĩrer xà jamỳ. Ja pyrã nê koja mẽ kot amnhĩ

tomnuj xwÿnhjaja nhÿrmã ty hãmri nẽ ma mẽ kot amnhĩ xà htÿx kamã hamak tũm xàta wÿr ma pa.

No mẽ pahte amnhĩ kaxyw Jejus Kris kôt pajamaxpër xwÿnhjaja na hte Tirtũm ja hã mẽ pahpumu nẽ mẽ pajarẽnh o:

— Nà ãm hãmri. Jajaja koja nhÿrmã Ixkra mẽ wa Ixkuri mex kumrẽx nẽ htĩr tũm nẽ pa ho pa. Hêxta waa nẽ. Nà ãm hãmri koja mẽ anẽ. Anẽ.

Xà tãm mẽ pahte amnhĩ nhĩpêx ã mẽ pahpumunh kôt na hte ã mẽ pajarẽnh anẽ? Nà ãm mẽ pahte Kra Jejus Kris kôt amnhĩ xunhwÿr ã mẽ pahpumunh kôt pix mã na hte ã mẽ pajarẽnh anẽ.

**Mẽ pahte amnhĩ tomnuj kot axte amnhĩ tã mẽ pahto
htÿx kêt ã harẽnh**

Rômãn 8.2, 10.4; Karatas 4.1; Epes 2.2; Korosẽ 3.7

7 ¹E Jejus kôt ixkwÿjaja. Nà Tirtũm kot mẽ pakaxyw tanhmã Mojes mã kapër tota na ka mẽ ra mar tÿx nẽ. Na pu htem kormã pahtĩr ri hkôt amnhĩ nhĩpêx o ri papa. Tã ty hãmri nẽ axte hkôt amnhĩ nhĩpêx kêt nẽ. Ra mẽ ate ja mar tÿx. E pa mẽ amã ja hã ejêp jarẽ ka mẽ inhma. ²Nà finat Mojes kot Tirtũm nhÿ hã mênijaja kot tanhmã amnhĩ nhĩpêx to ho pa hã mẽ kãm karõja. Koja mẽhõ ho mjên hãmri nẽ ãm kôt pix mã ri pa ho pa nẽ aa hkaga hkêt nẽ. No koja nhÿrmã mjên kêp ty nhũm ahte ri pa. Hãmri nẽ kãm axte mẽhõ ho mjên prãm nẽ mãmrĩ axte mẽhõ ho mjên. Ja tanhmã kute hkêt. ³Nom koja wam mjên arĩ htĩr japêr nhũm hprõ tanhmã hamaxpër to nẽ hkaga nẽ hpãnhã nhãm mẽhõ ho mjên. Hã koja Tirtũm pê ja homnuj nẽ. Nom koja mjên ra kêp ty nhũm mÿrpê axte kãm mẽhõ ho mjên prãm nẽ mãmrĩ ho mjên. Ja na Tirtũm pê homnuj kêt. Ra wam mjênja htyk kênã. ã Tirtũm kot Mojes mã mẽ pakaxyw mẽmoj tã karõ kot anhÿr.

⁴Tã ja pyrã nẽ na pu prem amnepêm pajamaxpër o:

— Ixte Tirtũm kapër kôt pix mã amnhĩ nhĩpêx o ri ixpa jakamã nhũm Tirtũm ja hã ixpumu nẽ amnhĩm inhmex ã ijarẽ. Anẽ.

Tã pu mẽ ra tanhmã pajamaxpër to nẽ hpãnhã pajamaxpër õ ho pajamaxpër o:

— Nà na xep hte Tirtũm mẽ ixte kapër kôt amnhĩ nhĩpêx ã mẽ ixpumunh kôt amnhĩm mẽ inhmex xwÿnh ã mẽ ijarẽnh kêt nẽ. Mẽ ixte hkôt amnhĩ nhĩpêx mex o ri ixpare hã. Kêt ãm Kris kot mẽ inhnê htyk nhũm mẽ ixte amnhĩ kaxyw hkôt ijamaxpër nẽ hkôt amnhĩ xunhwÿr pix ã mẽ ixpumunh kôt na hte mẽ inhmex ã mẽ ijarẽ. ãm ja pix ã mẽ ixpumunh kôt na hte mẽ ixto hkra nẽ mẽ ixkutã nojarêt o pa. Kra Jejus pix kukwak ri na hte ã mẽ inhĩpêx anhÿr o pa. Anẽ.

ã mẽ pajamaxpër nyw kot anhÿr. Jakamã te mẽ pahte mẽhõ kot mjên nyw xwÿnh gryk ã axte mjên htyk xwÿnh mã hamaxpër kêeta pyrãk o na pu htem amnhĩ nhĩpêx o papa. Jao Kris kapër kôt pix mã amnhĩ

nhĩpêx o ri papa. Nê Tirtũm noo mã tãm ri amnhĩ nhĩpêx. Nê axte mẽ pahte amnhĩ tomnuj kukamã tanhmã pajamaxpêr to hkêt nê.

5Nê amnepê mã mẽ pahte amnhĩ krã hkôt tanhmã mẽ pahte amnhĩ nhĩpêx to ho ri papata ã na pu prem amnhĩ tomnuj pix o ri papa. Ra mẽ pahte Tirtũm kapêr mar tỳx tã kuma nê ãm kuma nê ri papa nê ri hkôt amnhĩ nhĩpêx kêt nê. Mỳrapê nhũm Tirtũm tee ri ja hã mẽ pahpumu nê mẽ pahtyk nê ma mẽ kot amnhĩ xà htỳx kamã hamak tũm xà hwỳr papa mã xwỳnhjê hã mẽ pajarê.

6Nê amnepêm na pu pre htem ã pajamaxpêr anhỳr o:

— Nà kot paj Tirtũm kapêr kôt pix mã amnhĩ nhĩpêx o ri ixpa nhũm amnhĩ tã ixpumu nê ixte amnhĩ tomnuj kêt xwỳnh ã ijarê.

Anhỳr o pajamaxpêr no ãm tee ri ã pajamaxpêr anhỳr kaprỳ. Nê arĩ tanhmã amnhĩ tomnuj to ho ri papa. Tã hpãnhã te Jejus Kris kôt pahtyk pyrak o amnhĩ nhĩpêx nê hpãnhã Karõ nhỹ hã tãm amnhĩ nhĩpêx. Jao ra tee ri mẽ pamã Tirtũm kapêr kôt amnhĩ nhĩpêx prãm kaprỳ hkêt nê. Ra Tirtũm Karõ nhỹ hã amnhĩ nhĩpêx nyw o amnhĩ nhĩpêx mex o ri papa.

Tirtũm kapêr ã kagà htũm kot tanhmã mẽ pajarênh to

Rômãn 3.20, 5.20; Karatas 3.23-24

7Tã Tirtũm mẽ pahte kapêr kôt ri amnhĩ nhĩpêx ã mẽ pahpumunh kôt amnhĩm mẽ pamex ã mẽ pajarênh kêt jakamã mẽmo kaxyw na kapêr ã kagà htũmja? Nà mẽ pahte mar nê pahprĩ hã Tirtũm noo mã mẽ kot amnhĩ tomnuj xà jarênh mar nê omunh mex kaxyw na. Na hte mẽ pahkwỳjê kukrêx kĩnh o pamã ho panhõ hprãm nê mẽ pamã karõ. Æ kot mẽmoj punuj piitã nê mẽ pamã karõ kot anhỳr. Tã mẽ pahte ja mar kêt ronhỳx pu mẽ Tirtũm kêp ja homnuj ã harênh mar kêt nê. 8Tã ra mẽ pahte harênh mar nê kêp ja homnuj ã harênh ma. Mẽ pamã axpên kukrêx kĩnh o ho pamã panhõ hprãmja mããnên kêp ja homnuj ã harênh mar tã nom aa hkaga hkêt nê arĩ pamã axpên kukrêx kĩnh o pamã ho panhõ hprãm tỳx rãhã ho ri papa. Kop ãm Tirtũm kapêr kêt ronhỳx pu mẽ kot amnhĩ tomnuj xàja aa mar kêt kumrêx nhũm te mẽ pamã amrakati pyrak. 9Amnepê mã ixte Tirtũm kapêr mar kêt ri na pa pre ixtỳx ri amnhĩ kukamã ijamaxpêr o ri ixpa nê ijamaxpêr o:

— E kot paj nhỹrmã Tirtũm ri ixtĩr tũm nê inhmex nê ixpa ho ixpa.

Anhỳr tã hpãnhã pamã axpên kukrêx kĩnh o ho pamã panhõ hprãm nê kapêrta ma nê ja hã amnhĩ pumunh kurê kumrêx. Hãmri nê tee ri amnhĩ kukamã ijamaxpêr nê ijamaxpêr o:

— Hêxta waa nê. Nà ã ixte amnhĩ nhĩpêx anhỳr o ixpa jakamã kot paj nhỹrmã ty nhũm Tirtũm akupỳm ixto ixtĩr pa kuri ixtĩr tũm nê ixpa ho ixpa hkêt nê. Hêxta waa nê. Ixte amnhĩ tomnuj xwỳnh na pa. Kot paj nhỹrmã ty nhũm Tirtũm ma mẽ kot amnhĩ xà htỳx kamã hamak tũm xàta wỳr amnhĩ nê inhmê. Anê.

Hãmri nê ixkaprĩ nê tee ri amnhĩ kukamã ijamaxpêr o ri ixpa. ¹⁰Tã hpãnhã axtem ijamaxpêr o:

— Nà kot paj Tĩrtũm kapêr kôt pix mã mãn ri amnhĩ nhĩpêx o ri ixpa hãmri nê nhỹrmã ixtyk tã hwỳr api nê kuri ixtĩr tũm nê inhmex nê ixpa ho ixpa. Nà kot paj anê.

Anhỹr ã ijamaxpêr tã no ãm tee ri inhmã hkôt amnhĩ nhĩpêx o ixpa hprãm kaprỳ. Na pa pre xatã kapêr nhĩrôp ixkuhê nê tee ri ja hã amnhĩ pumu nê ijamaxpêr o:

— Kwa tanhmã kot pa amnhĩ nhĩpêx to nê ãm Tĩrtũm kôt pix mã ri amnhĩ nhĩpêx? Na pa hte tee ri inhmã ã amnhĩ nhĩpêx anhỹr prãm tỳx kaprỳ. ãm ixte amnhĩ tomnuj pix o ri ixpa xwỳnh jakamã ãm hãmri koja amnhĩ nê kuwyta wỳr inhmê. Nà koja ixto anê. Hêxta waa nê. Tanhmã kot paj we ja nê kãm ixkapêr to? Anê.

¹¹No mêhõ koja Tĩrtũm kapêr kôt amnhĩ nhĩpêx mex o ri pa? Na pu htem pahpiitã tee ri pamã ho anhỹr prãm kaprỳ. Mê pahpê hihtỳx kumrêx jakamã na pa pre ixtỳx ixte Tĩrtũm kuri ixtĩr tũm nê ri ixpa hã amnhĩ kukamã amnhĩ jarênh kaprỳ. ãm xatã kapêr nhĩrôp ixkuhê nê amnhĩ tomnuj pix o ri ixpaja mỳrapê koja mê kot amnhĩ xã htỳx kamã hamak tũm xàta wỳr amnhĩ nê inhmê. ¹²Kot anhỹr tã tanhmã kot puj mê Tĩrtũm kapêr ã kagã htũmta jarênh to? Nà kot mê pamã mê pahte amnhĩ nhĩpêx ã karõta mex kumrêx. Mex o mex. ¹³Mex kumrêx tã na htem kuma nê tee ri kãm hkôt amnhĩ nhĩpêx hprãm kaprỳ. Jao nhỹrmã ty nê ma kuwy hwỳr pa. Kêt pa na pa pre ra mar nê omunh mex tã hkôt amnhĩ nhĩpêx mex kêt nê. Jao ra ixte amnhĩ tomnuj xwỳnh ã amnhĩ pumu. Na pa pre tee ri inhmã hkôt amnhĩ nhĩpêx o ri ixpa hprãm tã no ãm xatã kapêr nhĩrôp ixkuhê nê hkwỳm ri amnhĩ nhĩpêx rãhã ho ri ixpa. Tã ra tee ri ja hã amnhĩ pumu nê amnhĩ kukamã ijamaxpêr o:

— Nà na pa hte ãm tee ri inhmã Tĩrtũm kôt amnhĩ nhĩpêx prãm kaprỳ no ãm ho anhỹr kêt nê. ãm ixte amnhĩ tomnuj pix o ixpa xwỳnh na pa. Ja mỳrapê koja Tĩrtũm amnhĩ nê ma kuwy hwỳr inhmê. Nà koja ixto anê. Anê.

**Mê pahte mê pamã amnhĩ tomnuj kaga hprãm
kaprỳ hã mê pajarênh**

Karatas 5.17

¹⁴Nê Tĩrtũm kapêr ã kagã htũmta Tĩrtũm kapêr na. Nê Tĩrtũm kĩnhã ãm inhĩ pix na pa ri ixpa jakamã tanhmã kot pa amnhĩ to nê kapêr kôt ri amnhĩ nhĩpêx mex o ri ixpa? ¹⁵Inhmã tãm ixte amnhĩ nhĩpêx prãm tã no ãm amnhĩ tomnuj pix o ri ixpa. Mêmioj ixpê omnuj tã pa hte ra hkôt tanhmã amnhĩ tomnuj to ho ri ixpa. Hãmri nê ja hã amnhĩ pumu nê tee ri amnhĩ kukamã ijamaxpêr o:

—Hêxta waa nê. Mon pa hte axtem nê ã amnhĩ nhĩpêx anhÿr o ri ixpa? Mëmoj ixpê omnuj nhũm inhmã ho anhÿr prãm kêt tâ ra ho anê. Nhũm mëmoj mex nhũm inhmã ho anhÿr prãm tâ ho anhÿr kêt nê. Mon pa hte axtem nê ã amnhĩ nhĩpêx anhÿr o ri ixpa? Anê.

16Ã ixte amnhĩ nhĩpêx anhÿr o ri ixpa htã ra Tĩrtũm kapêr mexta ma hãmri nê ra ijamaxpêr o:

—Nà Tĩrtũm kapêrja mex kumrêx tâ pa tee ri inhmã hkôt amnhĩ nhĩpêx mex hprãm kaprÿ ho ri ixpa. Hêxta waa nê. Anê.

17Inhmã amnhĩ tomnuj prãm kêt tâ arĩ ixkaxwÿnh kãm ijamaxpêr punuj nhÿ hã ã amnhĩ nhĩpêx anhÿr o ri ixpa. 18Nê inhmã tãm amnhĩ nhĩpêx prãm tâ no ãm tee ri ã inhmã amnhĩ nhĩpêx anhÿr prãm kaprÿ. Tanhmã kot pa amnhĩ to nê tãm amnhĩ nhĩpêx o ri ixpa? Na pa tee ri inhmã ja ho anhÿr prãm kaprÿ. Ixte amnhĩ tomnuj xwÿnh na pa. Nê aa ixte amnhĩ to mex kêt kumrêx xwÿnh. 19Inhmã mëmoj mex kôt pix mã amnhĩ nhĩpêx prãm tâ no ãm ã amnhĩ nhĩpêx anhÿr kêt nê. Nê ãm hkwỹm ri tanhmã amnhĩ tomnuj to ho ri ixpa. Mëmoj ixpê omnuj tâ pa hkôt amnhĩ nhĩpêx o ri ixpa. 20Ixte Tĩrtũm kapêr kôt amnhĩ nhĩpêx kêt jakamã na pa hte ã amnhĩ tomnuj anhÿr o ri ixpa. Mëmoj ixpê omnuj pa inhmã ho anhÿr prãm kêt tâ ra hkôt amnhĩ nhĩpêx. Ixte Tĩrtũm kapêr kôt amnhĩ nhĩpêx kêt jakamã ã amnhĩ nhĩpêx anhÿr o ri ixpa. 21Nê mëmoj mex nhũm inhmã hkôt amnhĩ nhĩpêx prãm tâ ra hkwỹm ri amnhĩ nhĩpêx. ã ixte amnhĩ nhĩpêx anhÿr xwÿnh na pa. 22Nê inhmã Tĩrtũm kapêr mar nê hkôt ri amnhĩ nhĩpêx prãm tâ 23nom ixte amnhĩ tomnuj xwÿnh jakamã hkôt amnhĩ nhĩpêx kêt nê. Na pa tee ri ja hã amnhĩ pumu nê amnhĩ kukamã ijamaxpêr o:

—Nà kot paj axte amnhĩ tomnuj kêt nê. Kot paj ãm amnhĩ to mex pix kukamã ijamaxpêr o ri ixpa.

Anhÿr tâ no ãm arĩ amnhĩ tomnuj o ri ixpa nê amnhĩ to mex kêt. Ixte amnhĩ tomnuj xwÿnh jakamã na pa hte ã amnhĩ nhĩpêx anhÿr rãhã ho ri ixpa nê tee ri inhmã amnhĩ tomnuj kaga hprãm kaprÿ. 24Hêxta waa nê. Na pa ixkaprĩ htÿx nê ri ixpa. ã ixte amnhĩ nhĩpêx anhÿr o ri ixpaja mÿrapê kot paj nhÿrmã ty nê ma mẽ kot amnhĩ xà htÿx kamã hamak tũm xàta wÿr ma mō. Mēhō kot tanhmã ixkrã hto pa ã amnhĩ nhĩpêx anhÿrja kaga? 25Nà mẽ panhō Pahihti Jejus Krisja pix. Tãm koja ixte amnhĩ tomnuj kutã tanhmã ixto ixihtÿx to. Jakamã na pa axte tee ri amnhĩ kukamã ijamaxpêr kêt nê. Pãnhã ixkĩnh nê ri ixpa nê Tĩrtũm mã kãm:

—Pa Tĩrtũm. Nà ãm hãmri amex o amex. Anê.

Tã ra ixte Jejus Kris kôt amnhĩ xãm jakamã koja tãm tanhmã ixto ixihtÿx to pa rĩ kormã Tĩrtũm kapêr kôt amnhĩ nhĩpêx mex o ri ixpa. No kot pa pam amnhĩ krã hkôt amnhĩ tomnuj rãhã ho ri ixpa. ã ixte anhÿr xwÿnh na pa.

Tirtũm Karõ kot mẽ pahto tãm mẽ pahte amnhĩ nhĩpêx xwỳnh ã harênh
Karatas 5.16-26

8 ¹Nê Jejus Kris kêp mẽmoj punuj kutã mẽ pahto mẽ paxihtỳx xwỳnh jakamã mẽ pahte hkõt amnhĩ xunhwỳr xwỳnhjaja na pu htem ỹ hã amnhĩ tomnuj o ri papa hkêt nê. Jao mẽ pahte kuwy hwỳr papa mã xwỳnh kêt. ²Te ra mẽ pahtyk nhũm Tirtũm kot akupỹm mẽ pahto mẽ pahtĩr pyræk jakamã nhũm Karõja mẽ pahkarõ mã agjê pu mẽ ỹ hã tãm amnhĩ nhĩpêx o ri papa. Te tãm kot amnhĩ nhĩpêx pyræk o amnhĩ nhĩpêx nhũm Karõ mẽmoj punuj piitã kutã mẽ pahto mẽ paxihtỳx. Kêp mẽ pajamxpêr punuj kutã mẽ pahto mẽ paxihtỳx xwỳnh jakamã kot puj mẽ nhỹrmã mẽ kot amnhĩ xà htỳx kamã hamak tũm xàta wỳr papa hkêt nê.

³Nom kormã mẽ pahte Jejus kõt amnhĩ xunhwỳr kêt ri na pu prem tee ri pamã Tirtũm kapêr piitã hkõt amnhĩ nhĩpêx prãm kaprỳ nhũm mẽ pahpê hihtỳx kumrêx. Jakamã tanhmã koja Tirtũm amnhĩ to nê amnhĩ mã mẽ pamex xwỳnh ã mẽ pajarê? Na pre tee ri amnhĩ tã mẽ pajamã hãmri nê mẽ pahwỳr Kraja mẽ nhũm man mẽ pahwỳr wrỳ nê mẽ pahpyrà nê ĩ ho mẽ pakamã kato. Nom mẽ parom aa tanhmã amnhĩ tomnuj to hkêt kumrêx nê ri pa. Tã mẽ kot hpĩr tã nhũm amarĩ htyk kêt nê. Na pre htyk o mẽ pahte amnhĩ tomnuj piitã hpãnhã amnhĩrer pa. Jakamã tãm kêp mẽ pajamxpêr punuj kutã mẽ pahto paxihtỳx xwỳnh. Na pu htem hkõt amnhĩ xunhwỳ hãmri nê kukwak ri amnhĩ tomnuj o ri papa hkêt nê. ⁴Pãnhã Tirtũm kot amnhĩ nhĩpêx kõt amnhĩ nhĩpêx o ri papa nê axte mẽ pahte amnhĩ nhĩpêx tũm kõt amnhĩ nhĩpêx kêt nê. Hãmri hpãnhã Tirtũm Karõ kot amnhĩ nhĩpêx kõt pix mã amnhĩ nhĩpêx. Nê hamaxpêr kõt pix mã pajamxpêr. Ja kaxyw na pre Tirtũm mẽ pahwỳr Kraja mẽ nhũm wrỳ nê mẽ pahpiitã mẽ panê ty.

⁵Nê mẽ kot amnhĩ krã hkõt tanhmã amnhĩ nhĩpêx to ho ri mẽ pa xwỳnhjaja na htem htỳx ri tanhmã hamaxpêr to xà hkõt amnhĩ nhĩpêx o ri pa. No kêt Tirtũm Karõ kot mẽ pahkarõ mã gjêx xwỳnhjaja na pu htem mẽ kurom te Jejus jamaxpêr pyræk o pajamxpêr o papa.

⁶Nê mẽ kot amnhĩ krã hkõt amnhĩ nhĩpêx xwỳnhjaja koja mẽ nhỹrmã ty nê ma kuwy hwỳr pa nê kamã pa ho pa. No mẽ pahte Tirtũm Karõ hkõt amnhĩ nhĩpêx xwỳnhjaja kot puj mẽ pajamxpêr nyw o pajamxpêr nê amnhĩ nhĩpêx nyw o amnhĩ nhĩpêx. Jao paxãmnhĩx ri pajamakêtkati nê ri papa. Nê nhỹrmã ty hãmri nê Tirtũm mẽ Jejus wa kuri akupỹm pahtĩr tũm nê pamex kumrêx nê papa ho papa.

⁷Nê mẽ kot amnhĩ krã hkõt ri amnhĩ nhĩpêx xwỳnhjaja kãm Tirtũm kĩnh kêt. Nê kãm kapêr mar prãm kêt jakamã tanhmã kot mẽ amnhĩ to nê hkõt amnhĩ nhĩpêx? ⁸Koja mêhõ amnhĩ krã hkõt kãm hprãm xà hkõt pix mã amnhĩ nhĩpêx hãmri nhũm Tirtũm tee ri ja hã omu nê hkĩnh kêt

ně. 9No mẽ papajaja na pu htem mẽ uràk nẽ ã amnhĩ nhĩpêx anhÿr kêt nẽ. Ra Tĩrtũm Karõ kot mẽ pahkarõ mã gjêx jakamã na pu htem hkõt pix mã amnhĩ nhĩpêx hprãm. No koja Tĩrtũm Karõ mẽhõ kaxwÿnh mã àr kêt nẽ nhũm kêp hkra hkêt nẽ.

10-11Tã mẽ papajaja. Mẽ pahte amnhĩ tomnuj mÿrapê koja mẽ pakrãhkàja nhÿrmã ty. No nhũm Tĩrtũm ra kot amnhĩm mẽ pahte amnhĩ to mex xwÿnh ã mẽ pajarẽnh nhũm Kris Karõ kot mẽ pahkarõ mã gjêx jakamã koja mẽ pahkarõja htyk kêt nẽ. Mẽ pakrãhkà pix koja ty nhũm mẽ pahkarõja ma kaxkwa hwÿr àpir kurê kumrêx. Tã nhũm nhÿrmã Tĩrtũm akupÿm mẽ pakrãhkà ho htĩr nẽ akupÿm mẽ pahkarõja mẽ pakrãhkàm hagiê pu mẽ wa kuri pahĩr tũm nẽ papa ho papa. 12Jakamã e kwa ixkwÿjaja. Kêr pu mẽ axte ri mẽ pajamaxpêr tũm kõt amnhĩ nhĩpêx o ri papa hkêt nẽ. 13Kot puj mẽ arĩ ã amnhĩ nhĩpêx anhÿr o ri papa hãmri nẽ nhÿrmã ty nẽ ma mẽ kot amnhĩ xà htÿx kamã hamak tũm xàta wÿr papa. Jakamã kêr pu mẽ mẽmo arĩgro hã pamã tanhmã amnhĩ tomnuj to hprãm hãmri nẽ amnhĩ kukamã pajamaxpêr o:

— Nà inhmã ã amnhĩ nhĩpêx anhÿr prãm tã kot paj Tĩrtũm Karõ nhÿ hã ja kutã amnhĩ to htÿx nẽ ho anhÿr kêt nẽ. Anẽ.

Kot puj mẽ ã pajamaxpêr anẽ hãmri nẽ nhÿrmã kuwy wÿr papa hkêt nẽ. Pãnhã Tĩrtũm mẽ Jejus wa kuri pamex nẽ pahĩr tũm nẽ ri papa ho papa. 14Mẽ kot Tĩrtũm Karõ hkõt amnhĩ nhĩpêx xwÿnhjaja kêp Tĩrtũm kraa.

15Nom amnepêem kormã mẽ pahte hkõt amnhĩ xunhwÿr kêt ri. Nẽ kormã mẽ pamã kapêr mar prãm kêt ri nhũm kot amnhĩ tã mẽ pahpumunh nẽ tanhmã mẽ pahto pumaj na pu prem pamã uma ho ri papa. Tã hkõt amnhĩ xunhwÿ nhũm Karõja mẽ pahkarõ mã gjêx jakamã na pu htem ra pamã uma hkêt nẽ ri papa. Karõ kot mẽ pahpê Tĩrtũm kra hã mẽ pajarẽnh jakamã pu mẽ amnhĩ kamã kot tanhmã mẽ panhĩpêx to puma hkêt nẽ ri papa. Nẽ paxãmnhĩx pajamakêtkati nẽ kãm amnhĩ jarẽ nẽ kãm amnhĩ jarẽnh o:

— Pa Inhĩpêêxã maati? Ot pa ixpê akra hã amã amnhĩ jarẽnh kaxyw amnhĩ kaxyw amã ijamaxpêr. Anẽ.

Jao ra mẽ pamã uma hkêt nẽ ri papa. 16Karõ kot mẽ pahkarõ mã gjêx nhũm mẽ pahte amnhĩ tã omunh jakamã na pu htem pajamaxpêr o:

— Nà Tĩrtũm Karõ kot ixkarõ mã àr jakamã ixpê hkra na pa. Anẽ.

Nhÿrmã mẽmoj piitã akupÿm mex par ã harẽnh

Sikũn Korõt 4.16-18; Korosẽ 3.4; Wam Pêtre 4.13

17Nẽ mẽ kãm Tĩrtũm prãm kêt xwÿnhjaja na htem te mẽ kot Tĩrtũm Kra Jejus nhĩpêx pyrãk o mẽ panhĩpêx pu mẽ pahpunuj nẽ ri papa. Nom kot puj mẽ nhÿrmã Tĩrtũm mex o mex xwÿnhja kuri pamex kumrêx nẽ papa. Mẽ pahpê hkra jakamã kot puj mẽ Kra Jejus pyrã nẽ õ krĩ kamã

kuri pamex kumrêx nê ri papa ho papa. 18Jar Jejus ã mē pahpunuj nê ri papa htã kot puj mē nhÿrmã kuri pamex kumrêx nê papa ho papa. Hãmri nê mē pamex o pamex ã amnhĩ pumu nê jar pika ja kamã tanhmã mē pahpunuj toja mã axte pajamexpêr kêt kumrêx.

19Nê pika hkôt Tirtûm kot mēmoj ho kator xwÿnhjaja na htem Tirtûm kot mē pahto mex par jatur xãm mēnh ã arÿgro jamãr rãhã ho pa. Àk nê mry nê pĩ nê gô nê mēmoj piitã mē pajamãr o pa. Te kot mē pakukamã hamaxpêr o:

—Kwa mēmo arÿgro hã koja Tirtûm hkrajê piitã ho amnhĩrît nê mē ho mex par jatur xãm kumê pu mē ja hã mē omu? Hêxta waa nê. Inhmã tokyx ja hã mē omunh prãm tÿx. Koja tokyx ã mē hipêx anê pa ixkĩnh tÿx kumrêx.

Anhÿr o hamaxpêr pyrãk. 20Mēmo kaxyw na hte mryja ã mē pakukamã hamaxpêr anê? Nà amnepê mã Tirtûm kot mēmoj piitã ho katorta ã nhÿm pre piitã mex o mex. Pĩ nê mry nê gô. Mēmoj piitã mex kumrêx rãhã nê. Aa grã nê htyk kêt kumrêx. Tã Atãw kot amnhĩ tomnuj mÿrapê nhÿm ra ÿ hã mēmoj piitã homnu par jakamã na hte mēmoj htÿr nê pa nê gaa nê ty nê hapêx. Nê mē pahpur kãm ahkagrôt punuj hapôj. Atãw kot amnhĩ tomnuj mÿrapê nhÿm Tirtûm kapêr xà hkôt ã mēmoj omnu hpar anê. 21Nom koja arÿ rãhã ho rãhã hkêt nê. Koja nhÿrmã Tirtûm akupÿm mēmoj piitã ho mex pa nhÿm mex o mex nê axte grã rÿ axte htyk nê hapêx kêt nê. Nê axte omnu nê hikwÿ hkêt nê. Koja mē pahpyrà nê mex o mex. Jakamã na htem Tirtûm kot mē pahto mex par jatur xãm mēnh xà hã arÿgro jamãr rãhã ho pa. 22Te mēhõ ni hpijagri kaxyw õhy xà htÿx nê tokyx kãm hpijagri hprãm xaj àmra ho nôr pyrãk o amnhĩ nhÿpêx pê mē pahto mex jatur xãm mēnh ã arÿgrota jamãr o pa.

23Nê mē papajaja na pu htem tanhmã pahpunuj to nê jajê pyrà nê te amnhĩ kamnhêr o ri papa pyrãk. Rÿ tanhmã paxà kute nê ri papa. Rÿ pamã prãm nê paxàa nê ri papa. Nê tanhmã mē pahpunuj to nê ri papa. Jao te pĩ nê gô nê mryja pyrà nê amnhĩ tã Tirtûm kot mē pahto mex par jatur xãm mēnh ã arÿgro jamãr rãhã ho ri papa.

Na pre Tirtûm mē pahwÿr Karõ rê nhÿm mē pahkarõ mã agjê nê mē pakukamã Tirtûm tanhmã kot mē pahto mex to hã mē pamã ho amnhĩrît nê mē pamã ho amnhĩrît o:

—Koja nhÿrmã Tirtûm mē ato mex par jatur xãm kumê nê mē piitã mē kãm mē apê hkra hã mē ato amnhĩrît. Hãmri nê mē amã mē anhĩ nyw gõ ka mē axte axà nê ri apa nê atyk kêt nê. Hãmri nê Tirtûm ri amex kumrêx nê ri apa ho apa. Nà kot kaj mē nhÿrmã ã amnhĩ nhÿpêx anê. Anê.

Ã Tirtûm Karõ kot mē pakukamã mē pajarênh anhÿr jakamã na pu htem amnhĩ tã kot mē pahto mex jatur xãm mēnh pix jamãr o ri papa. 24Nom na kormã ã mē pahto mex anhÿr kêt nê. Kormã mē pamã mē

panhĩ nyw nhõr kêt nẽ. Nom ra kot mẽ pahto hkra jakamã pu mẽ ja hã amnhĩ pumu nẽ pajamxpêr o:

—Nà ra Tĩrtũm kot ixto hkra jakamã koja nhỹrmã mãänën inhmã inhĩ nyw gõ. Nà koja inhmã kugõ.

25Anhỹr o pajamxpêr tã kormã. Na pu htem kormã amnhĩ tã hamãr rãhã ho ri papa nẽ aa hkaga hkêt nẽ papa.

Mẽ pahte Tĩrtũm Karõ nhỹ hã Tĩrtũm mã amnhĩ jarênh

26Nẽ na pu htem Tĩrtũm mã amnhĩ jarênh kaxyw nhũm hte Karõja mẽ pahto ajuta pu mẽ ỹ hã pakatàt kôt kãm tanhmã amnhĩ jarênh to. No kot puj mẽ amnhĩ krã hkôt kãm amnhĩ jarênh mex kêt nẽ. Na pu htem ja kaxyw tee ri amnhĩ kukamã pajamxpêr o:

—Kwa tanhmã kot pa Tĩrtũm mã amnhĩ jarênh to? Tanhmã kot pa mẽmoj tã ixàhwỳr to rỳ amnhĩ to hwỳr to? Nà kot paj amnhĩ krã hkôt ja ho anhỹr mex kêt nẽ. Hêxta waa nẽ. Anẽ.

No nhũm Tĩrtũm Karõ ra kot mẽ pahkarõ mã gjêx jakamã na hte tanhmã mẽ pahkrã hto pu mẽ ỹ hã kãm amnhĩ jarênh mex nẽ pakatàt kôt mẽmoj tã kuwỳ. Te Karõja tanhmã mẽ pakute hã mẽ pahpumunh nẽ mẽ pakamã ukapri xàj tãm mẽ pahto hwỳr pyræk.

27Jakamã pu mẽ ỹ hã tanhmã Tĩrtũm mã amnhĩ jarênh to nhũm mẽ pamar kurê kumrêx. Ra kot mẽ pajamxpêr kôt mẽ pahpumunh par kênã. Nhũm ra Karõ kot mẽ pahkarõ mã gjêx jakamã na pu htem kãm hprãm xà hkôt kãm amnhĩ jarẽ nẽ tanhmã amnhĩ to paxàhwỳr to.

Tĩrtũm kot mẽ pamã mẽmoj piitã ho mex ã harênh

Rômãn 8.37; Piripos 1.12; Wam Pêtre 5.10

28Nẽ mẽ pamã Tĩrtũm kĩnh xwỳnhjaja. Tĩrtũm kot mẽ pahto hkra xwỳnhjaja. Koja mẽmoj mẽ pakamã tanhmã amnhĩ to htã kêt pu mẽ ãm ja hã amnhĩ pumu nẽ tee ri amnhĩ kukamã pajamxpêr kêt nẽ. Koja te mẽ pahpê omnuj pyræk tã koja nhỹrmã hpãnhã mẽ pamã mex nẽ. Koja Tĩrtũm nhỹrmã tanhmã mẽ pamã mẽmojta o mex to. 29Amnepê mã mẽmoj piitã hkêt ri na pre Tĩrtũm mẽ pakukamã tanhmã mẽ pajarênh to nẽ mẽ pajarênh o:

—E kot paj nhỹrmã mẽ kot Ixkra Jejus kôt amnhĩ xunhwỳr xwỳnhjê ho ixkra jakamã nhũm mẽ Jejus pyrã nẽ kêp ixkraa. Nẽ uræk nẽ ixkapêr kôt amnhĩ nhĩpêx o pa. Jao pa ra ixkra xohtô nẽ. Nà ja na inhmã hprãm. Anẽ.

30Tã pu htem pajapôj nẽ ri papa. Hãmri nẽ kapêr ma nẽ amnhĩ kaxyw Kra Jejus kôt pajamxpêr nẽ hkôt amnhĩ xunhwỳ. Hãmri nhũm Tĩrtũm ja hã mẽ pahpumu nẽ pahto hkra nẽ amnhĩm mẽ pamex xwỳnh ã mẽ pajarê nẽ mẽ pahto mex nẽ. Nẽ te ho Kra Jejus nhĩpêx pyræk o mẽ

panhîpêx. Jao nhÿrmã wa kuri mẽ pahtîr tũm nê papa ho papa mã xwÿnh ã mẽ pajarê.

Mêhõ kot Tirtũm pê aa mẽ papytâr kêt ã harênh

Rômãn 5.1

31Tã ã Tirtũm kãm mẽ pajapê nê mẽ pahto mex kot anhÿr. ã kot mẽ panhîpêx mex anhÿr jakamã ra mẽ pahkõt pa ho pa rãhãã. Jakamã mêhõ koja ïhkra pê mẽ pahpytà? Nê mêhõ koja tanhmã ri kêp mẽ pahto? Nã koja kêp mẽ papytâr rÿ tanhmã kêp mẽ pahto hkêt nê. 32Tirtũm kãm Kra Jejus japê htÿx tã na pre mẽ pahpê nê hkêt nê mẽ pahwÿr kumê. Te kot mẽ pamã õr pyrãk o hipêx nhũm mẽ pahwÿr wrÿ nê mẽ panê ty. Tã ra Tirtũm kot mẽ pamã õr jakamã koja mããnên kãm mẽ pahte Kra hkõt amnhî xunhwÿr xwÿnhjê japê nê mẽ pahto mex rãhã ho ri pa. Nã koja ã mẽ pahto mex anê.

33Jakamã mêhõ koja kãm mẽ pahte amnhî tomnuj xwÿnh ã mẽ pajarê? Ra tãm kot mẽ pahto hkra nê mẽ pahte amnhî to mex xwÿnh ã mẽ pajarênh kênã kot kêt mêhõ kãm tanhmã mẽ pahto kapêr punuj to nhũm mẽ kuma. Koja mẽ tee ri kãm tanhmã mẽ pahto kapêr to kaprÿ. 34Na pre ra Jejus Kris mẽ pahte amnhî tomnuj pãnhã amnhîrer kaxyw mẽ panê ty nhũm Tirtũm akupÿm ho htîr. Hãmri nhũm ma akupÿm kaxkwa hwÿr api nê Pahi Maati krî xà kamã Tirtũm nhîhkô hã hkrî ho hkrî. Nê Tirtũm mã mẽ pakutã nojarêr rãhã ho kuri hkrî ho hkrî. Jakamã mêhõ koja kêp mẽ kot amnhî xà htÿx kamã hamak tũm xàta wÿr mẽ pajano? Nã amrakati kumrêx.

35Nê Krisja kaxkwa kamã Tirtũm nhîhkô hã hkrî ho hkrî htã mããnên jar mẽ pahkõt pa ho pa. Kãm mẽ pajapê htÿx jakamã kot puj mẽ tanhmã pahpunuj to htã nhũm arî kãm mẽ pajapê nê mẽ pahkõt pa ho pa.

Rÿ nhũm mẽ kot hkõt amnhî xunhwÿr kêt xwÿnhjaja tanhmã hã mẽ pahto htã nhũm arî kãm mẽ pajapê kamã mẽ pahkõt pa ho pa.

Rÿ mẽ pamã prãm nê ri papa. Rÿ mẽ paxê hkêt nê pamã kry nê ri papa htã nhũm arî kãm mẽ pajapê kamã mẽ pahkõt pa ho pa.

Rÿ ra mẽ kot hã mẽ panhîmex kaxyw rÿ hã mẽ pahpar kumrêx. Tã nhũm arî kãm mẽ pajapê kamã mẽ pahkõt pa ho pa rãhã nê.

Kãm mẽ pajapê kamã mẽ pahkõt pa ho pa rãhã jakamã pu mẽ tee ri amnhî kukamã pajamaxpêr kêt nê. ãm hkõt paxãmnhîx ri pajamakêtkati nê ri papa ho papa. 36Tirtũm kapêr ã kagà htũm te mẽ papajaja mẽ pahte kãm tanhmã amnhî jarênh to pyrã nê mẽ pajarênh kot:

Pa Tirtũm. Na htem atã mẽ ixtomnuj tÿx o pa.

Nê ra mẽ kot mẽ inhîmex kaxyw.

Ně mẽ inhĩpêx o te mẽ kot ôwêhti ho mõi mẽ hpar kaxyw tanhmã hipêx to pyrãk.

Jakamã na pa mẽ ra ixtyk kaxyw.

Anhỹr o kot mẽ pajarênh. 37Tã kwãr mẽ ã mẽ panhĩpêx anê. Arĩ Kris kãm mẽ pajapê kamã mẽ pahkõt pa ho pa rãhã jakamã mẽ kot tanhmã mẽ pahto htã pu mẽ arĩ amnhĩ kaxyw kãm pajamaxpêr tỳx rãhã ho ri papa. Nhũm arĩ mẽ kutã mẽ pahto paxihtỳx pu mẽ arĩ mẽ kãm pakuhê.

38Mêmoj koja tanhmã mẽ pahto nhũm Tĩrtũm tee ri ja hã mẽ pahpumu mẽ kãm mẽ pajapê hkêt nê? Nà amrakati kumrêx. Koja mẽhõ rỳ mẽmoj mẽ pahpê àmnàr kêt nê. Na hte jar pika ja kamã Kris kãm mẽ pajapê kamã mẽ pahkõt pa ho pa. Nê kot puj mẽ nhỹrmã ty nhũm arĩ kãm mẽ pajapê kamã mẽ pahkõt pa ho pa rãhã nê. Jakamã koja mẽkarõ rỳ mẽkarõmnuti rỳ jar pika ja kamã mẽ kãm Tĩrtũm prãm kêt xwỳnhjaja mẽ pahpê àmnàr kêt nê. Rỳ mẽmoj tanhmã kute. Rỳ kormã hapu hã mẽmoj tanhmã kute. Koja mẽmoj piitã tee ri tanhmã kêp mẽ pahto htã nhũm Kris arĩ kãm mẽ pajapê kamã mẽ pahkõt pa ho pa rãhã nê nhũm mẽmoj tee ri mẽ pahpê àmnàr kaprỳ. 39Nê koja kỳj rũm mẽmoj wrỳ nê tanhmã kêp mẽ pahto japêr. Rỳ pyka rũm mẽmoj kato mẽ tanhmã kêp mẽ pahto japêr. Rỳ kuwy rỳ kòk xàpêr tỳx tanhmã kêp mẽ pahto. Tã nhũm mẽ panhõ Pahihti Jejus Kris arĩ kãm mẽ pajapê kamã mẽ pahkõt pa ho pa rãhã nê. Te Tĩrtũm kãm mẽ pajapê pyrãk o kãm mẽ pajapê htỳx kãm mẽ pahkõt pa ho pa rãhã jakamã nhũm mẽmoj tee ri mẽ pahpê àmnàr kaprỳ.

Ijaew jarênh

Atrẽ 3.25; Rômãn 3.1-2

9 1-2Nê na pa tee ri ixkwỳ Ijaew kot tanhmã amnhĩ nhĩpêx to ho pa hã mẽ omu mẽ ixkaprĩ nê. Ixpyrà mẽ mẽ kêp Ijaew tã ixkĩnhã amnhĩ kaxyw Kris kõt hamaxpêr kêt jakamã nhũm Kris tee ri kãm mẽ hamakêtkati mẽ àmnhĩx ri mẽ pa hprãm kaprỳ. Pa tee ri mẽ hkukamã ijamaxpêr mẽ ixkaprĩ mẽ ri ixpa. Nê aa ixkaprĩ ixpê kator kêt kumrêx. Mẽ kot inhmã mẽ hkĩnh kêt ã amnhĩ tã ijarênh tã inhmã mẽ hkĩnh kênã. ãm hãmri na pa ã amnhĩ jarênh anê. Tĩrtũm Karõ kot ja hã ixpumunh mex mẽ inhmã:

— Nà ãm hãmri na ka amã mẽ hkĩnh ã amnhĩ jarê. Anê.

3Mê kêp ixkwỳ na mẽ. Mẽ ixpàr kraxja ãm pixi mex. Tã nhũm mẽ ixkĩnhã amnhĩ kaxyw Kris kõt hamaxpêr kêt jakamã kop ãm Tĩrtũm kot mẽ nê kuwy hwỳr pa inhmênh ronhỹx ja inhmã mex. Nhỹx pa kãm:

— Kwa Tĩrtũm. Amnhĩ nê kuwy hwỳr ixkwỳjê rênh kêt nê. Inhmã mẽ hapê htỳx kumrêx. Mẽ hpãnhã pa mãn mẽ nê hwỳr inhmê nà.

Anhỹr o nhỹx pa kãm ixkapêr. Nom kot paj amnhĩ to ã ixàhwỳr anhỹr kaprỳ. Tĩrtũm kot mẽ kamã ukaprĩ htã no nhũm mẽ amnhĩ kaxyw Kris

mã hamaxpër kêt jakamã tanhmã koja amnhĩ to nê mẽ hpãnhã pa mẽ nê kuwy wÿr inhmẽ nhũm mẽ ixrom kuri htĩr tũm nê pa ho pa? Mẽ kot hkõt amnhĩ xunhwÿyre hã. 4Mẽ ixpê Ijaew nhĩgêjtaja na pre Tĩrtũm amnepê mã mẽ ho mex rax nê. Nê kãm mẽ ho hkra hprãm nê. Nhũm prem tanhmã kot amnhĩ nhĩpêx mex to hã no ho omunh o pa. Nê hirã htÿx kãm ri pa hã omu nhũm mẽ kãm:

—E kot kaj mẽ ixkapêr ma nê ixkõt amnhĩ nhĩpêx o ri apa. Hã kot paj mẽ akõt ixpa ho ixpa nê mẽ ato mex nê ka mẽ axpên kanrêhã axãmnrã rax nê. Hãmri pa mẽ amã pika mex gõ ka mẽ kamã ajamakêtkati nê axãmnhĩx ri apa ho apa.

Anhÿr o mẽ kãm kapêr. Hãmri nê mẽ kaxyw Mojes mã tanhmã kapêr to nê mẽ kaxyw kãm mẽmoj piitã hã karõ. Mẽ kot tanhmã amnhĩ tomnuj to hãmri nê tee ri ja hã amnhĩ pumunh nê tanhmã amnhĩ to Tĩrtũm wÿr to nhũm kot mẽ mar nê mẽ nê ja ho hapêx par kaxyw. Finat Mojes kot amnhĩ xõ ri mẽ kãm ujarênh nhũm mẽ kot mar nê hkõt amnhĩ nhĩpêx mex o ri pa kaxyw. 5Mẽ ixkukamã mẽ ixpãmjaja. Apraãw nê Ijak nê Jako kanrêhã mẽ hkra nê mẽ htãmnhwÿjaja na pre mẽ. Mẽ hwÿr na pre Tĩrtũmja Kra Jejus Kris mẽ nhũm mẽ hwÿr wrÿ nê mẽ kamã ĩ ho ĩ ho kator jakamã haxwÿja kêp Ijaew na pre. Kêp Měpahpãm nê mex o mex nê hihtÿx o hihtÿx tã Ijaew wÿr wrÿ nê mẽ kamã kato. Hãmri nhũm Ijaew kêt xwÿnhjaja harênh ma nê tee ri hamaxpêr nê hamaxpêr o:

—Hêxta waa nê. Kêp ãm Jejus mẽ papa kamã mãn kator ronhÿx mẽ pamã mex kumrêx. Anê.

6No nhũm kormã Ijaew hwÿr wrÿk kêt ri nhũm Tĩrtũm ra kot mẽ ho hkra kaxyw mẽ hã amnhĩ jarê nhũm mẽ hkwyjja kãm ja prãm kêt nê hkaga. Tã xà na pre Tĩrtũm kot mẽ ho hkra hã amnhĩ jarênh ã amnhĩ to hêx? Nà aa hêx kêt kênã kot kêt ri mẽmoj tã amnhĩ jarê nê hã amnhĩ to hêx. Jakamã na pre mẽ hkwyjja hkwyjê rom hkaga hkêt nê nhũm amnhĩ tã mẽ omu nê mẽ ho hkra. Nom mẽ piitã mẽ ho hkra hkêt nê. Mẽ hkwyjja kot hkaga jakamã nhũm ãm mẽ hkwyjê pix o hkra.

7Nê finat Apraãwja na pre hkanrêhã hkra nê htãmnhwÿ xohtõ nê. Tã xà na pre Tĩrtũm htãmnhwÿ piitã mẽ ho hkra hã amnhĩ jarê? Nà mẽ piitã ã mẽ harênh anhÿr kêt nê. ãm mẽ hkwyjê pix na pre mẽ ho hkra hã mẽ harê. Apraãw kra Ijak kõt hkanrêhã htãmnhwÿ pixjaja nhũm kot mẽ ho hkra hã mẽ harê.

8-9Nê Apraãw kormã hprõ kamã hkra hkêt ri na pre kãm àpênh xwÿnh kamã hkra nhũm kato nê myre nê hixi pê Ismael. Nom kêp Apraãw prõ kumrêx kamã hkra hkêt. Prõ kuprÿ kamã hkra na pre. Tã nhũm Tĩrtũm kãm hkra kumrêx kukamã harê nê kãm:

—E kot paj ma tẽ hãmri nê mẽmo arĩgro hã akupÿn awÿr tẽ nhũm ra aprõ hpĩjagri nhũm war akra myre. Anê.

Tã nhũm hprõ Saraja htujarô. Nê gaa nê hpijagri nhũm hkraja myre. Hixi pê Ijak. Kêp Apraãw prõ kamã hkra jakamã Tirtũm nom kêp Apraãw kra kumrêx. Jakamã hkra Ijak kanrêhã htãmnhwÿjaja na pre Tirtũm kot mē ho hkra hã mē harē. Ra kot Apraãw mã ja hã amnhĩ jarēnh xà hkôt.

10Tã nhũm Ijakja hprêk nê Repek o hprõ. Nê gaa nê ra haxwÿja wa hkra nhũm hkraja wa ahpo nê kato nê wa hamē my. Kot wa pê Ejau nhũm kot hapu pê Jako. 11-12Nom nhũm kormã wa kator kêt ri nhũm Tirtũm wa hkukamã tanhmã wa harēnh to. Àhpumunh xà hkôt wa katorxà mã wa harē nê kãm:

—E kot paj amã war akra wa hkukamã tanhmã wa harēnh to ka inhma. Nà koja wa kato nê gaa nê hprêk hãmri nhũm kot haputa amnhĩ to rax o kot wa jakre. Anē.

Kot wata koja kot hapu kĩnhã amnhĩ to grire nê ri pa nhũm ã wa hkukamã wa harēnh anē. Kãm wa kot tanhmã amnhĩ nhĩpêx to hprãm xà hkôt ã wa harēnh anē. Kormã wa kot tanhmã amnhĩ tomnuj to rÿ tanhmã amnhĩ to mex to hã kot wa omunh kêt tã kãm hprãm xà hkôt ã wa hkukamã wa harēnh anē. 13Tirtũm kapêr ã kagà htũm kot wa harēnh nê wa hã kagà kot:

Ejau rom Jako kanrêhã hkra nê htãmnhwÿ pixjaja na pre Tirtũm amnhĩm mē ho hkra. Anē.

14Mãn ka mē Tirtũm kot ã wa harēnh anhÿrja ma nê ajamaxpêr o:

—Tk. Kwa ja mexti hã. Mo na pre hamē wa hkanrêhã wa hkra nê wa htãmnhwÿ piitã ho hkra hkêt nê? Anē.

Kwa mē ã ajamaxpêr anhÿr kêt nê. Tirtũm na hte kãm hprãm xà hkôt tanhmã mē panhĩpêx to ho pa pu mē kot tanhmã mē panhĩpêx to hã omu nê ãm omu nê amnhĩ tã tanhmã kãm nê hkêt nê. 15Na pre finat Mojes mã amnhĩ jarēnh o:

Inhmã hprãm xà hkôt na pa hte mē omu nê tanhmã mē kamã ixukaprĩ hto ho ri ixpa.

Nê inhmã hprãm xà hkôt na pa hte ahpÿnhã tanhmã mē hipêx to ho ri ixpa.

Anhÿr o kãm amnhĩ jarē. 16Nom tanhmã mē pahte amnhĩ nhĩpêx to hã mē pahpumunh kôt na hte mē pakamã ukaprĩ hkêt nê. ãm tãm kãm hprãm xà hkôt na hte tanhmã mē pakamã ukaprĩ hto ho pa. 17Amnepê mã Ejit kãm mē õ pahihti Paraohti hwÿr na pre Mojes mē nhũm ma hwÿr mō nê kãm tanhmã Tirtũm kapêr jarēnh to nê kãm:

—E Tirtũm na awÿr inhmē pa mō. Tãm na pre apê Ejit nhõ xwÿnhjê nhõ pahi kaxyw axãm. Akrã hihtÿx tã nhũm mē kaxyw axãm. Tã ra xatã àhpumunh tÿx o tanhmã anhĩpêx to. Krĩ piitã hkôt ri mē pa xwÿnhjaja kot atã harēnh mar nê àhpumunh o àhpumunh ã omunh kaxyw. Tã ixte amã ja jarēnh kaxyw na pre awÿr inhmē pa man awÿr mō. Anē.

18Ã na hte Tirtũm kãm hprãm xà hkõt tanhmã mẽ panhĩpêx anhỹr to ho pa. Jao mẽ hkwỳjê kamã ukaprĩ ho pa. No mẽ hkwỳjaja nhũm tee ri mẽ hkrã hihtỳx ã mẽ omu nê ãm mẽ omu nhũm mẽ amnhĩ krã hkõt ri tanhmã amnhĩ tomnuj to ho ri pa.

Tirtũm kêp mẽ pakamã ukaprĩ xwỳnh ã harênh

19Nê kot kaj mẽ atõ Tirtũm kot ã mẽ hipêx anhỹrja ã harênh ma nê tanhmã hã ixkukjêr to nê inhmã:

—Kwa na xep hte Tirtũm ahpỳnhã tanhmã mẽ hipêx to. Nê mẽ hkwỳjê kamã ukaprĩ ho pa nê mẽ hkwỳjaja mẽ hkrã hihtỳx ã mẽ omu nê ãm mẽ omu nê mẽ kamã ukaprĩ hkêt nê. Jakamã kwa mo na hte mẽ kot amnhĩ tomnuj xwỳnh ã mẽ harê? Tãm kot ã mẽ hipêx anhỹr kênã kot kêt mẽ kot amnhĩ tomnuj xwỳnh ã mẽ harê.



Rômãn 9.19-21

Anhỹr o ajamaxpêr japêr. 20Kwa mẽ ri ã atỳx Tirtũm jarênh anhỹr kêt nê. E pa mẽ amã ejêp jarê ka mẽ inhma. Xà kot mẽhõ gyw kwỳ ho amnhĩm poti nhĩpêx nhũm tee ri amnhĩ tã omu nê amnhĩ tã tanhmã kãm kapêr to nê kãm: “Tk. Kwa mon ka ri ã inhĩpêx anê?” Anhỹr o amnhĩ tã kãm kapêr? Nà koja kãm tanhmã nê hkêt nê. 21Hipêx xwỳnh kãm hprãm xà hkõt kot ã hipêx anhỹr kênã kot kêt amnhĩ tã kãm akir. Koja amnhĩm gyw kwỳ kakwỳ nê ho poti ho axkrut nê hipêx. Nê hõ ho muxre. Ho mex kumrêx nhũm xa. Nhũm ihõja mã ho anê nê hipêx no ãm wamta kĩnhã ho hanhàjti nhũm omnajti nê xa. No ãm tãm kot hamê wa hipêx prãm xà hkõt wa hipêx kênã.

22Tã na hte ã Tirtũm mẽ panhĩpêx anê. Te poti pynajre pyrã nê mẽ pahkwỳjê nhĩpêx nhũm mẽ kãm kapêr mar prãm kêt nê htỳx ri tanhmã amnhĩ tomnuj to ho ri pa. Hãmri nhũm amnhĩ tã mẽ omu nê te amnhĩ nê mẽ rênh kaxyw pyrãk o mẽ hipêx no ãm kormã hamaxpêr o:

—Nà kot paj nhỹrmã mẽ kot amnhĩ tomnuj mỳrapê mẽ ho ijapêx pa nhũm mẽ piitã ja hã ixpumu nê inhmã ixàhpumunh o ixàhpumunh ã ijarê. Nê inhmã mẽmoj punuj piitã hkĩnh kêt kumrêx ã axpên mã ijarê. Anê.

23Nom na hte jajê rom mẽ pahkwỳjê nhĩpêx o te poti mexta nhĩpêx pyrã nê amnhĩ kaxyw mẽ paxunhwỳ nê mẽ pahto hkra kaxyw. Nê mẽ pajarênh o:

—Nà koja mẽ amnhĩ kaxyw Ixkra Jejus mã hamaxpêr nê hkõt amnhĩ xunhwỳ pa ja hã mẽ omu nê mẽ kamã ixukaprĩ ho ri ixpa. Nê mẽ ho mex pê mẽ kutã inhnojarêr rãhã ho ri ixpa. Hãmri nhũm mẽ nhỹrmã

Ixkra mẽ wa ixri htĩr tũm nẽ mex nẽ pa ho pa. Kot paj ã mẽ ho mex anẽ nhũm mẽ amnhĩ tã ixpumu nẽ inhmã inhmex o inhmex ã ijarẽnh o pa. Anẽ.

Ã na hte Tĩrtũm ahpỹnhã mẽ pahpiitã mẽ panhĩpẽx anẽ.

24 Nẽ na hte mẽ ixpẽ Ijaew pix o hkra hkêt nẽ. Na hte mããnẽn mẽ apẽ Ijaew kêt xwỹnhjẽ ho hkra. 25 Amnepẽ mã mẽ kãm kapẽr jarẽnh o ri mẽ pa xwỹnhjẽ hõ pẽ finat Ojejja na pre te Tĩrtũm tãm kot Ijaew kêt xwỹnhjẽ jarẽnh pyrã nẽ mẽ harẽnh o:

Amnepẽm na pa pre mẽ ho ixkra hkêt tã kot paj mẽ hkwyjẽ ho ixkra.

Na pa pre mẽ kamã ixukaprĩ hkêt tã pa ra inhmã mẽ hapẽ nẽ.

26 Nẽ ixte mẽ kẽp ixkra hkêt ã mẽ harẽnh tã kot paj ra mẽ kẽp ixkra hã mẽ harẽ.

Ixpẽ mẽõ Tĩrtũm kot paj ã mẽ harẽnh anẽ. Anẽ.

27 Hãmri nhũm finat Ijais Ojej pãnhã tanhmã Ijaew jarẽnh to. Ijaisja Tĩrtũm nhỹ hã kapẽr jarẽnh o ri pa xwỹnhjẽ hõ na pre. Jakamã nhũm Tĩrtũm kãm tanhmã mẽ ijarẽnh to nhũm kuma nẽ ô ri mẽ ixkukamã mẽ inhĩgẽxjẽ mã ujarẽnh o pa nẽ hã kagã. Nẽ hã kagã ho:

Ijaew na mẽ ohtõ rax kumrẽx.

Te gõ xujanãr mỳri pykahti grã hkryre xohtõ pyrãk.

Tã koja mẽ piitã ixkõt amnhĩ xunhwỳr kêt nẽ.

Koja mẽ ãm grẽre nẽ amnhĩ kaxyw inhmã hamaxpẽr nẽ ixkõt amnhĩ xunhwỳ.

Jakamã mẽ tapxipixjaja koja hkwyjẽ rom nhỹrmã inhõ krĩ hwỳr api.

28 No mẽ kot amnhĩ kaxyw inhmã mẽ hamaxpẽr kêt xwỹnhjaja kot paj tokyx tanhmã mẽ harẽnh to.

Mẽ kot amnhĩ tomnuj mỳrapẽ tanhmã mẽ harẽnh to nhũm mẽ ma mẽ kot amnhĩ xã htỳx kamã hamak tũm xãta wỳr ma pa.

Nã kot paj tokyx ã mẽ hipẽx anẽ.

Anhỹr o mẽ harẽ. 29 Nom nhũm kormã ã mẽ harẽnh anhỹr kêt ri nhũm ra wam tanhmã mẽ harẽnh to nẽ mẽ harẽnh o:

Amnepẽm Sotõ mẽ Komo kamã mẽ pa xwỹnhjaja na prem amnhĩ tomnuj tỳx rãhã ho ri pa.

Mỳrapẽ nhũm Tĩrtũm xãhpumunh o ãhpumunh xwỹnhja tee ri ja hã mẽ omu hãmri nẽ kaxkwa rũm mẽ ô krĩ wa hipy mẽmoj põõta rẽ.

Nhũm mẽ hã rõrõk nẽ mẽ ho hkaxàr pa nhũm mẽ hapẽx.

Tã na pu htem mẽ uràk nẽ amnhĩ tomnuj o ri papa.

Jakamã kop ãm Tĩrtũm kot mẽ pahkwỳjẽ kamã ukaprĩ kêt ronhỹx pu mẽ ra mẽ uràk nẽ pahpiitã pajapẽx pa. Anẽ.

Ijaew kwỳ kot Jejus kôt amnhĩ xunhwỳr kêt ã mẽ harênh

Rômãn 10.1-4

30Nê Ijaew kêt xwỳnhjaja na prem Ijaew pyrà nê kãm Tĩrtũm prãm kêt tã Jejus jarênh ma nê Ijaew rom amnhĩ kaxyw hkôt hamaxpêr nê hkôt amnhĩ xunhwỳ. Hãmri nhũm Tĩrtũm ja hã mẽ omu nê mẽ ho hkra nê mẽ kot amnhĩ to mex xwỳnhjê hã mẽ harê. 31-32Hãmri nhũm Ijaew tee ri mẽ kot Jejus kôt amnhĩ xunhwỳr ã mẽ omu nhũm ja mẽ kãm mex kêt nê. Hãmri nhũm mẽ hamaxpêr o:

—Tk. Kwa ra mẽ ixte finat Mojes kapêr kôt amnhĩ nhĩpêx mex o ri mẽ ixpa xwỳnh jakamã koja Tĩrtũm ja hã mẽ ixpumu nê mẽ ixte amnhĩ to mex xwỳnhjê hã mẽ ijarê nê mẽ inhnê mẽ ixte amnhĩ tomnuj rênh pa. No kot paj mẽ Ijaew kêt xwỳnhjê pyrà nê Jejus kôt amnhĩ xunhwỳr kêt nê. ãm kwarĩ ho kwarĩ.

Anhỹr ã amnhĩ jarê. No ãm ã mẽ hamaxpêr anhỹrja mex kêt. Na prem htỳx Tĩrtũm noo mã kot amnhĩ to mex ã amnhĩ jarênh kapỳ nê arĩ ri tanhmã amnhĩ tomnuj to ho ri pa. Te pry kamã kên nôr nhũm mẽ kot nhãm nê mẽnh kaxyw hkamnâr nê ho amnhĩ par krã hi kukênh pyræk o na htem amnhĩ nhĩpêx. Jao amnhĩ krã hkôt tanhmã amnhĩ nhĩpêx to ho pa hprãm xàj te Jejus kapêrja nhãm amnhĩ nê rênh pyræk o hipêx. Jakamã koja mẽ Tĩrtũm nhõ krĩ hwỳr àpir kêt nê. 33Tĩrtũm kapêr ã kaga htũm kot ja jarênh kot:

E mẽ inhma. Kot paj nhỹrmã Ijaewjê hwỳr mẽhõ mẽ nhũm mẽ hkôt kapêr o pa.

Nom koja mẽ kapêr mar kêt nê. Koja mẽ kuma nê ãm kuma. Te pry kamã kên nôr nhũm mẽ kot nhãm pry nê mẽnh kaxyw hkamnâr nê ho amnhĩ par krã hi kukênh pyræk o koja mẽ amnhĩ nhĩpêx.

No te mẽ kot nhãm pry nê mẽnh kaxyw hkamnâr kêt pyræk xwỳnhjaja koja mẽ kurom nhỹrmã ma Tĩrtũm nhõ krĩ hwỳr api.

Hãmri nê hkĩnh nê pa ho pa. Anê.

Nom kên kumrêx jarênh kêt nê. Na prem Jejus ã kuxi nê ã harênh anê. Ijaew te mẽ kot kên nhĩpêx pyræk o Jejus nhĩpêx nê amnhĩ kaxyw hkôt hamaxpêr kêt nê axtem nê hkaga nê ãm kamã gryk pix o ri pata ã nhũm mẽ harê. No mẽ kot amnhĩ kaxyw hkôt hamaxpêr ronhỹx Jejus te kên kot mẽ kêp àmnâr pyræk kêt nê. Jakamã ã mẽ harênh kot anhỹr.

10 1Hêxta waa nê. Ijaxwỳja ixpê Ijaew. Mẽ kêp ixkwỳ jakamã kêp apu mẽ kot amnhĩ kaxyw Jejus mã hamaxpêr nê hkôt amnhĩ xunhwỳr ronhỹx pa ixkĩnh tỳx kumrêx. Inhmã mẽ kêp Tĩrtũm kra hprãm tỳx kumrêx kênã. Inhmã ja prãm xàj na pa hte mẽ ho Tĩrtũm wỳr rãhã ho ri ixpa. 2Ra ixte mẽ omunh mex. Mẽ kãm Tĩrtũm mã tanhmã amnhĩ

nhîpêx to hprãm tâ no ãm mẽ kot hprî hã kapêr mar kêt. Jakamã na htem tee ri tanhmã kãm amnhî nhîpêx to ho ri pa hprãm kaprÿ. ³Nhũm pre Tirtũm tee ri amnhî tâ mẽ omu nẽ hamaxpêr o:

—Koja mẽhõ amnhî kaxyw Ixkra Kris kôt hamaxpêr nẽ hkôt amnhî xãm pa ja hã omu nẽ kot amnhî to mex xwÿnh ã harẽ nẽ ho ixkra kurê kumrêx. Nom na hte Ijaew ohtô nẽ ã amnhî nhîpêx anhÿr kêt nẽ.

Anhÿr o mẽ harẽ. ãm hãmri na ã mẽ harênh anẽ. Na htem ãm axtem nẽ hamaxpêr o:

—Tk. Kot paj amnhî kaxyw Kris kôt ijamaxpêr nẽ hkôt amnhî xãm kêt nẽ. Kot paj ãm pam amnhî krã hkôt tãm ri amnhî nhîpêx o ri ixpa. Mẽ ixpê Ijaewjê mẽ ixte amnhî nhîpêx xà hkôt. Hãmri nhũm Tirtũm ja hã ixpumu nẽ amnhîm inhmex ã ijarẽ. Nom kot paj Kris kôt amnhî xãm kêt nẽ. ãm kwarî ho kwarî.

Anhÿr ã amnhî jarẽ. ⁴Nom na htem ãm htÿx ri amnhî krã hkôt amnhî to mex o pa hã amnhî kamnhix kaprÿ. Koja mẽ tee ri kãm finat Mojes kapêr kôt amnhî nhîpêx o ri pa hprãm kaprÿ. Jejus tapxipix na pre tãm amnhî nhîpêx mex rãhã ho pa. Na pre Tirtũm kapêr kôt amnhî nhîpêx mex o ri pa nẽ aa kapêr õ nhîrôp ãm nẽ hkwÿm ri tanhmã amnhî tomnuj to hkêt nẽ. Kot amnhî tomnuj kêt xwÿnh ã ãm pixi mex na. Jakamã tapxipix kukwak ri na hte Tirtũm amnhîm mẽ pahte amnhî to mex xwÿnh ã mẽ pajarẽ.

Tirtũm kãm mẽ pahpiitã mẽ pahto hkra hprãm ã harênh

⁵Nẽ amnepêm na pre finat Mojes Tirtũm nhÿ hã Ijaew mã tanhmã ujarênh to nẽ hã kagã. Nẽ mẽ kãm ujarênh o:

—E kot kaj mẽ atõ Tirtũm nhÿ hã ixujarênh ma nẽ hkôt amnhî nhîpêx mex o ri apa nẽ hkwÿm ri tanhmã amnhî nhîpêx to hkêt nẽ. Hã koja Tirtũm hã apumu nẽ amnhîm ate amnhî to mex xwÿnh ã ajarẽ ka nhÿrmã kuri atîr tũm nẽ amex nẽ apa ho apa. Anẽ.

⁶Ã mẽ kãm kapêr anhÿr tâ mẽ pahte Mojes kapêr xà hkôt amnhî nhîpêx o papaja na mẽ pahpê hihtÿx kumrêx. Tirtũm kapêr tũm na. Kapêr ã kagã kamã kot mẽ pamã mẽ pahte tanhmã amnhî nhîpêx to hã karõja ohtô rax kumrêx jakamã pu mẽ tee ri pamã piitã hkôt amnhî nhîpêx prãm kaprÿ. Nhũm Tirtũm tee ri amnhî tâ mẽ pajamã hãmri nẽ mẽ pahwÿr Kra Jejus mẽ. Jakamã na pu htem amnhî kaxyw hkôt pajamaxpêr nẽ hkôt amnhî xunhwÿ nhũm Tirtũm hã mẽ pahpumu nẽ kukwak ri mẽ pahto hkra kurê kumrêx. Kra kukwak ri kot mẽ pahto hkra kaxyw kot mẽ pahwÿr mênh nhũm mẽ kot hpîr nhũm akupÿm ho htîr jakamã na pu htem harênhja ma nẽ pajamaxpêr o:

—Nà na xep pre Jejus ixto ixpê Tirtũm kra. Anẽ.

Nom xà na hte Tirtũmja ã mẽ pamã kapêr anẽ nẽ mẽ pamã:

—E kot kaj mẽ ma kaxkwa hwỳr api nẽ Kris japrô nẽ man amnhĩ kôt akupỳn o wrỳ pa ja hã mẽ apumu nẽ mẽ ato ixkra.

Anhỳr o mẽ pamã kapêr? Nà na hte ã mẽ pamã kapêr anhỳr kêt nẽ. Tanhmã kot puj mẽ amnhĩ to nẽ ã amnhĩ nhĩpêx anê? 7Rỳ xà na hte ã mẽ pamã kapêr anê nẽ mẽ pamã:

—E na pre Krisja ty. Jakamã mẽ kam nẽ ma hwỳr mra nẽ akupỳm amnhĩm ho htír. Hãmri pa ja hã mẽ apumu nẽ mẽ ato ixkra.

Anhỳr o mẽ pamã kapêr? Nà na hte ã mẽ pamã kapêr anhỳr kêt nẽ. Tanhmã kot pu mẽ amnhĩ to nẽ akupỳm ho htír? Ja pyrã nẽ na hte Tirtùm mẽ pamã mẽmoj tã karõ pu mẽ kãm ho anhỳr nhũm ja hã mẽ pahpumunh kôt mẽ pahto hkra hkêt nẽ. 8Ăm mẽ pahte amnhĩ kaxyw Jejus kôt pajamxpêr nẽ hkôt amnhĩ xunhwỳr ã mẽ pahpumunh kôt pix mã na hte mẽ pahto hkra. Hãmri nẽ mẽ pahwỳr Karõ rẽ nhũm mẽ pahkarõ mã gjêx jakamã mẽ pahte Tirtùm kãm hprãm xà hkôt amnhĩ nhĩpêx o papaja na mẽ pahpê hihtỳx kêt. Te kapêr ra mẽ pahkrã hi kaxwỳnh kãm hikwỳ pyrãk o pu mẽ piitã mẽ kãm harênh o ri mẽ hkôt papa. Jakamã na pa hte mẽ piitã mẽ kot amnhĩ kaxyw Jejus kôt hamaxpêr kaxyw tanhmã mẽ kãm harênh to ho ri mẽ hkôt ixpa nẽ mẽ kãm:

9—Kot ka mẽ atõ Jejus kêp anhõ Pahihti hã harẽ nẽ Tirtùm kot akupỳm ho htír kôt ajamxpêr. Hã koja Tirtùm ja hã apumu nẽ anê ate amnhĩ tomnuj o hapêx nẽ ato hkra. Ăm ja pix ã mẽ pahpumunh kôt na hte mẽ pahto hkra. Anẽ.

10Nẽ na pu htem mẽ pahkrãhi kaxwỳnh kãm amnhĩ kaxyw Jejus mã pajamxpêr. Nẽ mẽ pajakwa ho kêp mẽ panhõ Pahihti hã harẽ. Hãmri nhũm Tirtùm ja hã mẽ pahpumu nẽ amnhĩm mẽ pahte amnhĩ to mex xwỳnh ã mẽ pajarẽ nẽ mẽ pahto hkra. 11-13Tã mẽ pahte amnhĩ kaxyw Jejus kôt pajamxpêr nẽ hkôt amnhĩ xunhwỳr xwỳnhjaja kot puj mẽ pahkĩnh nẽ papa ho papa. Mẽ pahpiitãã. Ijaew nẽ Ijaew kêt xwỳnhjaja. Mẽ pahpiitã mẽ panhõ Pahi Maatija ãm pyxi mex na. Jakamã koja Ijaewjê hõ rỳ Ijaew kêt xwỳnhjê hõ amnhĩ to kuwỳ nhũm kuma nẽ ho hkra. Kapêr ã kagã htũm kot ja jarênh kot:

Mẽ kãm kêp Tirtùm kra hprãm xwỳnhjaja koja mẽ amnhĩ to
Tirtùm wỳ nhũm mẽ kuma nẽ Jejus kot mẽ nẽ htyk
kukwak ri mẽ nẽ mẽ kot amnhĩ tomnuj o hapêx nẽ mẽ ho
hkra nhũm mẽ hkĩnh nẽ pa. Anẽ.

14-15Xà na htem kormã amnhĩ kaxyw Kris mã hamaxpêr kêt rãhã amnhĩ to Tirtùm wỳ nhũm mẽ kuma nẽ mẽ ho hkra? Nà tanhmã kot wem amnhĩ to nẽ amnhĩ kaxyw kãm hamaxpêr kêt rãhã amnhĩ to kuwỳ? Na hte Tirtùm ma mẽ hwỳr mẽ hkwỳjê rẽ nhũm mẽ ma mẽ hwỳr mra nẽ Tirtùm kapêr o mẽ ahkre ho ri mẽ hkôt pa. Nhũm mẽ hkwỳjaja mẽ kuma nẽ amnhĩ kaxyw Jejus kôt hamaxpêr nẽ amnhĩ to Tirtùm wỳ. Kapêr ã kagã htũm kot ja jarênh kot:

Koja mẽmoj mex jarēnh xwỳnhjaja ma mẽ hwỳr mra.

Ně mẽ hwỳr hpôx o mỗ nhũm mẽ amỳm amnhĩ wỳr mẽ omu nẽ
hkĩnh nẽ. Anẽ.

16Tã ra mẽ piitã kot kapēr mar tã piitã amnhĩ kaxyw hkôt hamaxpēr kêt
nẽ. Jakamã nhũm finat Ijais tee ri ja hã mẽ omu nẽ Tĩrtũm mã mẽ harēnh
o:

Pa Pahi Maati. Kwa ra mẽ kot akapēr mar tỳx tã akôt amnhĩ
nhĩpêx kêt nẽ. Mẽ kãm akapēr kôt amnhĩ nhĩpêx o pa
hprãm kêt. Na htem ãm grêre nẽ akôt amnhĩ xunhwỳ nẽ
akôt amnhĩ nhĩpêx o ri pa. Anẽ.

17Kot anhỳr tã ãm mẽ kot Kris kapēr jarēnh mar kôt pix mã na htem
amnhĩ kaxyw hkôt hamaxpēr. Koja mẽ harēnh mar kêt tã tanhmã koja
wem amnhĩ to nẽ amnhĩ kaxyw hkôt hamaxpēr nẽ hkôt amnhĩ xunhwỳ?

18Mãn ka mẽ atõ atỳx ã ajamaxpēr anhỳr o:

—Ko mãn Ijaew kormã Jejus kot mẽ panê tanhmã amnhĩ nhĩpêx to
hã harēnh mar kêt jakamã na mẽ kormã hkôt amnhĩ xunhwỳr kêt nẽ.

Anhỳr o ajamaxpēr. Nom ja kot anhỳr kêt. Ijaew piitã ra mẽ kot
harēnh mar kênã. Tĩrtũm kapēr ã kagà htũm kot ja hã mẽ harēnh kot:

Na prem ma mẽ piitã mẽ kãm ja jarēnh o ri mẽ hkôt pa nhũm mẽ
piitã kuma. Anẽ.

19Tã mãn ka prem ra ja ma nẽ atỳx ajamaxpēr o:

—Kot anhỳr tã no mãn kormã hprĩ hã Jejus jarēnh mar kêt jakamã
mẽ hkôt amnhĩ xunhwỳr kêt nẽ. Anẽ.

Nom ja haxwỳja kot anhỳr kêt. Ra mẽ kot hprĩ hã harēnh mar mex
tã kuma nẽ ãm kuma nẽ amnhĩ kaxyw kãm hamaxpēr kêt nẽ. No mẽ apê
Ijaew kêt xwỳnh kwỳjaja na ka mẽ kurom harēnh ma nẽ amnhĩ kaxyw
hkôt ajamaxpēr nẽ hkôt amnhĩ xunhwỳr kurê kumrêx. Hãmri nhũm
Ijaew tee ri ja hã mẽ apumu nẽ mẽ akamã gryk tỳx nẽ. Nom ra Tĩrtũm
kot ã mẽ hkukamã mẽ kot amnhĩ nhĩpêx anhỳr ã mẽ omunh nẽ mẽ
harēnh kot anhỳr kênã. Na pre finat Mojes mẽ kãm tanhmã hã kagà hto.
Te Tĩrtũm tãm kot mẽ hã kagà pyrã nẽ kapēr ã kagà htũm kamã kot mẽ
harēnh kot:

Mẽ ate mẽ kamã mẽ akahak o apa xwỳnhjaja.

Mẽ kot htỳx ri amnhĩ nhĩpêx o mẽ pa hã mẽ ate mẽ harēnh tã no
kot paj mẽ arom amnhĩm mẽ kot amnhĩ to mex xwỳnhjê
hã mẽ harê.

Kot kaj mẽ tee ri ja hã mẽ omu nẽ mẽ kamã agryk tỳx kumrêx.

Nẽ mããnēn pa ixte mẽ ho mex ã ixpumu nẽ mẽ hã ixkamã agryk
nẽ. Anẽ.

20Ně finat Ijais na pre haxwỳja ã mẽ harēnh anẽ. Na pre kãm amnhĩ kwỳ
pê Ijaew puma hkêt nẽ xatã Tĩrtũm nhỹ hã tanhmã mẽ kãm Ijaew kêt
xwỳnhjê jarēnh to ho pa. Te Tĩrtũm tãm kot mẽ harēnh pyrãk o mẽ kãm:

Nà Ijaew kêt xwỳnhjaja kot Tĩrtũm japêr kêt tã koja tãm mẽ kãm amnhĩ to amnhĩrĩt nhũm mẽ hkõt amnhĩ xunhwỳ.

Mẽ kot kormã amnhĩ kaxyw kãm hamaxpêr kêt tã koja tãm mẽ kãm amnhĩ to amnhĩrĩt. Anẽ.

21 ã Ijaew kêt xwỳnhjê jarẽnh kot anhỹr. Nẽ axte mã tanhmã Ijaewjê jarẽnh to kot:

Te mẽ katorxà kot tanhmã hkrajê ho mex to kaxyw tee ri amnhĩ wỳr mẽ kãm àkjêr pyræk o na hte Tĩrtũm Ijaewjê nhĩpêx o pa.

Jao tee ri kãm tanhmã mẽ ho mẽ mex to hprãm tã no nhũm mẽ amnhĩ tã kuma nẽ ãm kuma nẽ hkõt amnhĩ nhĩpêx kêt nẽ. Anẽ.

Tĩrtũm kot Ijaew kamã ukapĩrĩ hã harẽnh

Matêwre 13.10-17

11 ¹Tã ra Ijaew kot Tĩrtũm kaga jakamã mãn ka mẽ atõ mẽ harẽnh ma nẽ ajamaxpêr o:

—Mãn pre Tĩrtũm tee ri amnhĩ tã mẽ omu nẽ amnhĩ pyrà nẽ mẽ hkaga.

Anhỹr o ajamaxpêr. Nom na pre mẽ hkaga hkêt nẽ. Ijaxwỳja ixpê Ijaew na pa. Mẽ uræk nẽ ixpê Ijaew pàr krax pê finat Apraãw kanrêhã htãmnhwỳ Pêjamĩ kanrêhã hõ na pa. Tã xà na pre Tĩrtũm ixkaga? Nà kot ixkaga hkêt. ²Amnepêm kormã mẽmoj piitã hkêt ri na pre mẽ ixpê Ijaew hkukamã mẽ ixto hkra hã amnhĩ jarẽ. Tã nhũm amgrà xohtõ nẽ hapêx nhũm mẽ hapôj hãmri nẽ Tĩrtũm kõt amnhĩ nhĩpêx o pa hkêt nẽ. Hãmri nhũm finat Erisja tee ri mẽ kot amnhĩ nhĩpêx ã mẽ omunh o pa nẽ Tĩrtũm mã tanhmã mẽ harẽnh to nẽ mẽ hã kagà. Nẽ hã kagà ho:

³ Kwa Tĩrtũm. Mẽ ixte amã amnhĩ jarẽnh xà hã mêtĩ hkwy na prem ra hkrakrak pa. Nẽ anhỹ hã akapêr jarẽnh o ri mẽ pa xwỳnh kwỳ nhĩmex rax nẽ. ãm papxipix na pa arĩ ixtĩr nẽ ri ixpa nom nhũm mẽ ra kot ixpĩr kaxyw ixtã amnhĩ jarẽ. Anẽ.

⁴Tã tanhmã na Tĩrtũm kutã kãm kapêr to? Na pre kãm:

Nà kapxipix na ka arĩ atĩr kêt nẽ. Arĩ mẽ ohtõ nẽ apyrà nẽ amnhĩ kaxyw ixkõt hamaxpêr. Mẽ ohtõ. Arĩ mẽ kêp 7.000 nẽ akwỳjê rom ri sãnti Paaw kutã hkõnkrã ho hkrĩ nẽ kãm mex ã harẽnh kêt nẽ. Anẽ.

⁵Tã arĩ ã jarãhã mẽ kot ã amnhĩ nhĩpêx anhỹr kênã. Tĩrtũm kãm Ijaew japê jakamã mẽ kamã ukapĩrĩ. Jakamã nhũm ra mẽ hkwyjaja mẽ pahpyrà nẽ amnhĩ kaxyw Kris kõt hamaxpêr nhũm Tĩrtũm mẽ ho hkra.

⁶Nom mẽ kot amnhĩ to mex ã mẽ omunh xà hkõt mẽ ho hkra hkêt nẽ. Amarĩ kãm mẽ hapê htũm xà hkõt na hte mẽ ho hkra. Kop apu mẽ kot

amnhĩ to mex ã mẽ omunh xà hkôt kot mẽ ho hkra ronhỹx amarĩ mẽ ho hkra hkêt nê. Nhỹx mẽ kot tanhmã amnhĩ nhĩpêx to ho pa hã mẽ omunh xà hkôt pix mã mẽ ho hkra.

7Ijaew piitã Tĩrtũm kot amnhĩm mẽ mex ã mẽ harênh prãm tã no ãm mẽ grêre nê hamaxpêr xà hkôt Jejus kôt amnhĩ xunhwỳ. Na htem ohtô rax nê kapêr ma nê ãm kuma nê tee ri kot amnhĩm mẽ mex ã mẽ harênh prãm xàj amnhĩ krã hkôt tanhmã amnhĩ nhĩpêx to ho ri pa. Nom ra mẽ kot Jejus kaga jakamã ã amnhĩ nhĩpêx anhỹr kaprỳ. Mẽ kot hkaga jakamã te ri mẽ hamak kro nê Tĩrtũm kapêr mar kêt pyrã nê pa. 8Tĩrtũm kapêr ã kagã htũm kot mẽ harênh kot:

Tĩrtũm na hte mẽ kãm kapêr mar prãm kêt xwỳnhjê pumu nê ãm mẽ omu nhũm htem htỳx ri pa ho pa. Nê Tĩrtũm mã hamaxpêr kêt o ri pa. Mẽ kot kapêr mar tã hprĩ hã mar tỳx kêt nê. Nê mẽ kot kapêr ã kagã kamã harênh tã hprĩ hã mar tỳx kêt nê. Jakamã na htem amnhĩ kaxyw hkôt hamaxpêr kêt o pa.

Tã na htem arĩ jarãhã ã amnhĩ nhĩpêx anhỹr o ri pa. Te mẽ nohkre nê mẽ hamak kro xwỳnh kot amnhĩ nhĩpêx pyrãk. Anê.

9Nê amnepêr na pre pahi finat Tawija amnhĩ kwỳ Ijaew jarênh o: Na htem htỳx ri hkĩnh kãm apkur o pa.

Te tutre kãm prãm nê kot rapuuti hwỳr àr nê tee ri kãm kator prãm kaprỳ pyrãk.

Ja pyrã nê mẽ kot Tĩrtũm kapêr mar kêt mỳrapê koja Tĩrtũm tanhmã mẽ ho nhũm mẽ tee ri kãm mex prãm kaprỳ.

10 Te mẽ nohkre xwỳnhjaja tee ri mẽ hpa nhĩpêx o pa pyrãk.

Nê omnuj nê ã nê ho gjêx o ri pa pyrãk o amnhĩ nhĩpêx o ri pa.

Anhỹr o mẽ harê. 11Tã arĩ Ijaew Jejus kaga nê kãm kapêr mar prãm kêt jakamã xà na Tĩrtũm tee ri ja hã mẽ omu nê mẽ hkaga kumrêx? Nà kot mẽ hkaga hkêt. ãm mẽ tãmjaja kêp Jejus prãm nòkati jakamã nhũm tee ri ja hã mẽ omu nê mẽ hpãnhã Ijaew kêt xwỳnhjê mã amnhĩ to amnhĩrĩt nê mẽ hkwỳjê ho hkra. Jakamã koja Ijaew kwỳjaja ja hã mẽ omu nê tee ri hamaxpêr nê hamaxpêr o:

—Kwa na xep Ijaew kêt xwỳnh kwỳjaja Jejus kôt amnhĩ xunhwỳ nhũm Tĩrtũm ja hã mẽ omu nê mẽ ho hkra. Kwa mon pu prem axtem nê ri Jejus kaga? E pu mẽ kuxwar amnhĩ kaxyw hkôt mãn pajamxpêr nê hkôt amnhĩ xunhwỳ kê Tĩrtũm ja hã mẽ pahpumu nê Ijaew kêt xwỳnhjê pyrã nê mẽ pahto hkra. Hãmri nê amnhĩ mã mẽ pahte amnhĩ to mex xwỳnh ã mẽ pajarê. Anê.

ã Ijaewjaja hamaxpêr anhỹr kaxyw na pre Tĩrtũm Ijaew kêt xwỳnhjê mã amnhĩ to amnhĩrĩt. 12Hãmri nhũm mẽ amnhĩ tã omu nê hkĩnh nê pa. No nhũm Ijaew kwỳjaja. Mẽ kãm Jejus prãm nòkati ho mẽ pa

xwÿnhjaja mẽ hkĩnhã hkaprĩ nẽ pa. Tã koja mẽ nhÿrmã amnhĩ kaprĩ hã amnhĩ pumu nẽ amnhĩ kĩnh kêt ã amnhĩ pumu hãmri nẽ Tĩrtũm kôt amnhĩ xunhwÿr nẽ amnhĩ kaxyw Kra Jejus Kris mã hamaxpẽr japêr. Koja mẽ ã amnhĩ nhĩpêx anẽ hãmri nẽ Ijaew kêt xwÿnhjê pyrã nẽ hkĩnh nẽ ri pa. Hãmri nhũm Tĩrtũm ja hã mẽ omu nẽ Ijaew kêt xwÿnhjê mẽ mẽ ho hpimràatã mẽ ho mex rax nẽ nhũm mẽ hkĩnh nẽ hamakêtkati nẽ pa ho pa.

Tĩrtũm kot Ijaew kêt xwÿnhjê ho hkra hã harẽnh

13E kot paj hpãnhã mẽ apê Ijaew kêt xwÿnhjê mã ixkapẽr nẽ mẽ atã kagã. Na pre Jejus ma mẽ awÿr inhmẽ. Y hã ixte mẽ ajahkre ho ri mẽ akôt ixpa kaxyw. Pa pre ma krĩ hkwy kamã mẽ akwÿjê hwÿr mō nẽ ixkĩnh kãm mẽ kãm kapẽr jarẽnh o ri mẽ hkôt ixpa. Nhũm mẽ hkwyjaja inhma nẽ amnhĩ kaxyw Jejus kôt hamaxpẽr nẽ hkôt amnhĩ xunhwÿ. 14Tã koja apu ixkwÿjaja mẽ harẽnh mar japêr. Ijaew tee ri mẽ apê Ijaew kêt xwÿnhjê jarẽnhja ma hãmri nẽ ra amnhĩ kamã gryk japêr. Jao mẽ apyrã nẽ Jejus kôt amnhĩ xunhwÿ nẽ nhÿrmã kuri htĩr tũm nẽ mex nẽ pa ho pa. 15Kormã mẽ kot amnhĩ kaxyw kãm hamaxpẽr kêt jakamã na pre Tĩrtũm hpãnhã mẽ apê Ijaew kêt xwÿnhjê mã amnhĩ to amnhĩrit. Ka mẽ ra krĩ piitã hkôt axohtô nẽ hkôt amnhĩ xunhwÿ nẽ hkôt amnhĩ nhĩpêx mex o ri apa. Tã koja Ijaewjaja nhÿrmã amnhĩ kaxyw Tĩrtũm mã hamaxpẽr nẽ mẽ apyrã nẽ Jejus kôt amnhĩ xunhwÿr japêr. Hãmri nẽ te mẽhõ hkra kêp htyk nhũm hkaprĩ htã nhũm hkraja tanhmã amnhĩ to nẽ akupÿm kãm htĩr nhũm kot omunh nẽ hkĩnh tÿx kumrẽxta pyrãk o amnhĩ nhĩpêx. Jao Tĩrtũm mẽ kot hkôt amnhĩ xunhwÿr ã mẽ omu nẽ hkĩnh nẽ. Pu mẽ pahpimràatã urãk nẽ pahkĩnh nẽ ri papa.

16E pa mẽ amã mẽ ujarẽnhja ã ejêp kwÿ jarẽ. Koja mẽmo pĩ hpàr jarẽ mex nẽ hã koja pàr mex nẽ xa. Ja pyrã nẽ Ijaew pàr krax finat Apraãwja kumrẽx na pre amnhĩ kaxyw Tĩrtũm mã hamaxpẽr nhũm ho hkra. Jakamã koja nhÿrmã hkanrêhã htãmnhwÿjaja urãk nẽ amnhĩ kaxyw kãm hamaxpẽr nhũm mã mẽ ho anẽ nẽ mããnẽn mẽ ho hkra nhũm mẽ mex nẽ pa. Te kot mẽmo pĩ hpàr jarẽ mexja nhÿ hã pàr mexta pyrãk.

17Nẽ na htem akunĩ kamã mẽmo pĩ hpa jakã nẽ hamÿ nẽ ma amnhĩ kôt o mra. Nẽ ixkre kapem ra mẽ kot mẽmo pĩ hkreja hpa jakãr nẽ rẽnh xwÿnh xwakre kamã wam pĩ hpa jakãr xwÿnhhta nhõ nẽ axpẽn tã hkaxpre nẽ gaa nẽ axpẽn jamÿnh mex nẽ grã hkêt nẽ. Nẽ arĩ htĩr mex nẽ. Te kêp hpa kumrẽx pyrãk. Tã Ijaew kwÿ kot amnhĩ kaxyw Jejus kôt hamaxpẽr xwÿnhjaja te mẽ kêp ixkre kapem pĩ hpãrta pyrãk. No mẽ hkwyjaja mẽ kot Jejus kaga xwÿnhjaja te mẽ kêp mẽ kot kêp hpa jakãr nẽ rẽnhhta pyrãk. Jakamã nhũm Tĩrtũm te mẽ kot pàr pê hpa jakãr nẽ rẽnhhta pyrãk o mẽ hipêx nẽ mẽ hkaga. Nẽ axtem te mẽ kot mẽmoj pàr pa jakãr nẽ hpãnhã kamã axtem pĩ hpa janhõr nẽ hã hkaxpreta pyrãk o

mê apê Ijaew kêt xwÿnhjê nhîpêx nê mê amã amnhî to amnhîrît. Ka mê ra amnhî kaxyw Jejus mã ajamexpêr nê hkôt amnhî xunhwÿ nhũm Tîrtũm mê ato mex nê.

18Tã kêr ka mê arî Ijaew o mex o ri apa. Tanhmã ri mê hipêx to mã ajamexpêr to hkêt nê. Rÿ ajamexpêr o:

— Nã ãm hãmri na Tîrtũm mê hkaga nê ãm kãm mê papxipixjê japê.

Anhÿr o ajamexpêr kêt nê. Ijaew te ixkre kapem pî hpàr mexta pyræk. No mê kajaja te mê ate akunî rũm pî hpa kot ixkre kapem pàr mex pix kukwak ri htîr nê hã hariirta pyræk. Kêt akunî rũm pî hpa jakàr kukwak ri na hte ixkre kapem pàrta htîr nê kuhê hkêt nê. Kop apu pàrta mex kêt ronhÿx ra akunî rũm hpaja grà pa. Ja pyrã nê Ijaew kukwak ri kot kaj mê nhÿrmã Tîrtũm ri atîr tũm nê apa ho apa. Jakamã kwa kêr ka mê ate amnhî to rũnh o mê hakrenh ã amnhî to jarkrar kêt nê. 19Mãn ka mê atô ajamexpêr o:

— Ra Tîrtũm kot Ijaew kaga nê hpãnhã mê pajaja mê ixto hkra jakamã mãn kãm mê ijapê ho mê hakre. Ra mê hpãnhã mê ixto hkra kênã. Anê.

20Nã ãm hãmri na pre Tîrtũm Ijaew kwÿ kaga. Mê kot Jejus kôt amnhî xunhwÿr kêt mÿrapê na pre te mêmô pî hpa jakàr nê rênhta pyræk o mê hipêx. Ka mê ra mê kurom amnhî kaxyw hkôt ajamexpêr jakamã nhũm Tîrtũm te kot akunî kamã pî hpa jakàr nê ho htêm nê ixkre kapem pî hpàr mex ã hanhôr nê hã hkaxpre pyræk o mê anhîpêx. Nom kwa kêr ka mê ja hã amnhî pumu nê ri hã Ijaewjê mã amnhî to jarkrar kêt nê. ãm amnhî to mex nê Tîrtũm kapêr kôt amnhî nhîpêx mex o ri apa. No kot kaj mê ã amnhî nhîpêx anhÿr kêt nhũm amnhî tã mê apumu nê ra kot Ijaew kwÿ nhîpêxta pyrã nê tanhmã mê ato nê mê akaga.

21 ã Ijaew jarênh kot anhÿr. Te mê kêp pàr mex pyræk. Tã nhũm mê kot Jejus kôt amnhî xunhwÿr kêt jakamã nhũm Tîrtũm te kot pî hpa jakàr nê rênhta pyræk o mê hipêx nê mê homnuj nê. Kot kaj mê uræk nê ã amnhî nhîpêx anê nhũm mã mê ato anê nê. 22Ijaew kot Jejus kôt amnhî xunhwÿr kêt jakamã nhũm Tîrtũm mê hpãnhã mê apê Ijaew kêt xwÿnhjê mã amnhî to amnhîrît. Tã ka mê Ijaew rom amã Jejus prãm nhũm Tîrtũm ja hã mê apumu nê amnhî pyrã nê kãm mê aprãm nê mê akamã ukaprî rãhã nê pa ho pa. Tã kwa mê okora. Kêr ka mê hkôt pix mã amnhî nhîpêx o ri apa rãhã ty. Kot kaj mê hkaga nhũm amnhî tã mê apumu nê te Ijaew kot hkaga xwÿnhjê nhîpêx pyræk o mê anhîpêx nê mê akaga.

23Koja Ijaew nhÿrmã Jejus kôt amnhî xunhwÿr japêr nhũm Tîrtũm ja hã mê omu nê mê ho hkra. Te mê kot pàr pa jakàr nê rênh nhũm grà par xwÿnh nhũm kot akupÿm amnhîm hamÿnh nê ixkre kapem pàr wÿr o htêm nê akupÿm hã hanhôr nê hã hkaxpre ho htÿx nhũm kukwak ri akupÿm htîrta pyræk. Ja kêp tanhmã kute hkêt. Kot ã hipêx anhÿr kaxyw

àhpumunh tỳx. **24**Mê apê Ijaew kêt xwỳnhjaja te mẽ ate akunĩ kamã pĩ hpa jakàr nê ixkre kapem pàr ã hanhôr nê hã kaxpreta pyràk. Jao Jejus kôt amnhĩ xunhwỳ nhũm mẽ ato hkra kurê kumrêx. No Ijaew te mẽ kêp ixkre kapem pàrta pyràk jakamã Tĩrtũm kot akupỳm hanhôrta tanhmã kêp kute hkêt. Kêp Tĩrtũm kênã kot tanhmã kêp kute. Jakamã koja mẽ hkôt amnhĩ xunhwỳ nhũm amnhĩ tã mẽ omu nê mẽ ho hkra kurê kumrêx.

Tĩrtũm kot mẽ piitã mẽ kamã ukaprí hã harênh

Matêwre 23.37-39; Rukre 21.24; Juãw 10.16

25E kot paj mẽ amã mẽmoj to amnhĩrĩt ka mẽ inhma. Nà na pa ra mẽ amã Ijaew krã xihtỳx xwỳnhjê jarê ka mẽ harênh ma. Ra mẽ kot Jejus kaga hã mẽ harênhja. Tã koja mẽ ã amnhĩ nhĩpêx anhỳr o pa rãhã hkêt nê. Na hte Tĩrtũm kormã amnhĩ tã mẽ apê Ijaew kêt xwỳnhjê jamãr o pa. Amnepê m na pre amnhĩ kaxyw mẽ akukamã tanhmã mẽ akwỳjê jarênh to. Tã kot kaj mẽ kot tanhmã mẽ ajarênh to xwỳnh piitã Jejus kôt amnhĩ xunhwỳr pa nhũm rĩ Ijaew amnhĩ to hapu nê kormã hkôt amnhĩ xunhwỳ. ã mẽ kot amnhĩ nhĩpêx anhỳr kaxyw. Jakamã kwa kêr ka mẽ ri ja hã amnhĩ to jarkrar o ri mẽ hkôt apa hkêt nê. Mẽ pahpyrà nê mẽ kot Jejus kôt amnhĩ xunhwỳr mã xwỳnh kênã. **26**Koja Tĩrtũm nhỹrmã Ijaew piitã ho hkra. Kapêr ã kagà htũm kot mẽ harênh kot:

Nhỹrmã kot mẽ ate amnhĩ tomnuj pê mẽ apytàr mã xwỳnhja
Ijaew ò koja.

Jako hkanrêhã htãmnhwỳjê hõ koja.

Koja nhỹrmã wrỳ nê mẽ ate amnhĩ tomnuj pê mẽ apytã nê mẽ
ate amnhĩ tomnuj o hapêx pa. Anê.

Anhỳr o kot harênh. **27**Nê mããnê ja:

Kot paj mẽ nê mẽ kot amnhĩ tomnuj o ijapêx pa.

Amnepê mã ixte mẽ hkukamã mẽ hã amnhĩ jarênh xà hkôt. Anê.

28Nom arĩ mẽ kãm Jejus mar prãm kêt jakamã te mẽ kot kutã amnhĩ xunhwỳr pyràk o amnhĩ nhĩpêx. Tã ã mẽ kot amnhĩ nhĩpêx anhỳrja ri ka mẽ kamjaja mẽ hpãnhã mẽ apê Tĩrtũm kra. Nom nhũm Tĩrtũm arĩ kãm mẽ hapêê. Na pre amnepê mã kot tanhmã mẽ ho mex to hkukamã tanhmã mẽ hã amnhĩ jarênh to. Mẽ hpàr kraxjê mã tanhmã mẽ hã amnhĩ jarênh to. Finat Apraãw mẽ Ijak mẽ Jakoja mã mẽ hkanrêhã mẽ htãmnhwỳjê hã tanhmã amnhĩ jarênh to.

29Na hte Tĩrtũm mẽmoj tã tanhmã amnhĩ jarênh to nê ãm hãmri hã amnhĩ jarê nê amnhĩ jarênh xà hkôt tanhmã hipêx to. No na hte mẽmoj tã amnhĩ jarênh tã gaa nê ho hamakêtkati hkêt nê. Rỳ hpãnhã axtem tanhmã hipêx to hkêt nê. Na hte mẽmoj tã amnhĩ jarênh xà hkôt tanhmã hipêx to. Tã ra amnepê mã kot Ijaew o mex ã amnhĩ jarênh jakamã koja nhỹrmã mẽ ho mex rax nê ã mẽ hipêx anhỳrja o hamakêtkati hkêt nê.

30No mẽ kajaja mẽ apê Ijaew kêt xwÿnhjaja. Amnepêm na ka prem ajaxwÿja Tĩrtũm kôt amnhĩ nhĩpêx kêt nê. Tã nhũm mẽ akamã ukapřĩ nê kãm mẽ ajapê nê. Ka mẽ ra harênh ma nê hkôt amnhĩ xunhwÿ nê hkôt amnhĩ nhĩpêx mex nê. No ãm Ijaew kukwak ri. Mẽ kot kapêr kôt amnhĩ nhĩpêx o pa hkêt jakamã nhũm Tĩrtũm mẽ hpãnhã nhãm mẽ amã amnhĩ to amnhĩřĩt nê mẽ ato mex rax nê. Jakamã te Ijaew kukwak ri mẽ amex nê ri mẽ apa pyrãk. 31Tã koja nhÿrmã kot mẽ anhĩpêxta pyrã nê Ijaew ho hkra. Nê mẽ apyrã nê mẽ kamã ukapřĩ nê. Mẽ kot mẽ apyrã nê amnhĩ kaxyw Kra hkôt hamaxpêr xwÿnhjaja nhũm mẽ apyrã nê mẽ ho hkra nê mẽ ho mex nê. 32Mẽ apê Ijaew kêt xwÿnhjaja nê mẽ ixpê Ijaew mẽ pahte xepên pyrãk. Na pu htem pahpiitã Tĩrtũm kapêr piitã hkôt amnhĩ nhĩpêx rãhã ho ri papa hkêt nê. Tã kot puj mẽ tee ri ja hã amnhĩ pumu nê amnhĩ to kuwÿ nhũm mẽ pama nê amarĩ mẽ pakamã ukapřĩ nê mẽ pahto mex nê.

Pawre kot Tĩrtũm mex o mex ã harênh
Epes 3.20; Korosê 1.16; Wam Korĩt 2.9, 2.16

33Tĩrtũmja àhpumunh tÿx o àhpumunh tÿx. Nê ukapřĩ ho ukapřĩ nê mex o mex. Mẽ pahtõ na pu urãk nê ã amnhĩ nhĩpêx anhÿr o papa? Nã amrakati kumrêx. Nê mẽ pahtõ na pahte Tĩrtũm jamaxpêr kôt omunh? Nã mẽ pahte hamaxpêr kôt omunh kêt. 34Kapêr ã kagã htũm kot ja jarênh kot:

Mẽ pahte Tĩrtũm jamaxpêr kôt omunh kêt.

Nê kot pu mẽ pahtõ mẽmoj tã hakre hkêt nê.

Mẽ parom àhpumunh o àhpumunh xwÿnh kênã.

35 Nê mẽ pahtõ kot puj we kãm pakapêr nê kãm: “Kwa Tĩrtũm. Ra ixte amã mẽmoj nhõrta pãnhã kwa amnhĩ xwar inhmã mẽmoj gõ.” Anê.

Nã mẽmoj piitã õ kênã kot puj kêt ri ã kãm mẽmoj nhõr ã amnhĩ jarênh anê. Anê.

36Tãm na pre amnhĩ kaxyw mẽmoj piitã ho kator pa. Nê ãm pix kukwak ri na mẽmoj piitã htĩr nê pa. Jakamã kwa pu mẽ kãm mex o mex ã mãn harênh rãhã ho ri papa.

Mẽ pahte Tĩrtũm mã amnhĩ nhõr ã mẽ pajarênh
Wam Korĩt 6.20; Epes 4.1; Piripos 4.8-9; Korosê 1.10;
Wam Tesarõn 4.1-3; Wam Pêtre 2.11

12 1Kwa Jejus kôt ixkwÿjaja. Tĩrtũm na hte mẽ pahto mex nê mẽ pakamã ukapřĩ rãhã jakamã na pa ã mẽ amã ixkapêr anê. Kwa mẽ tokyx kãm amnhĩ jarê nê kãm amnhĩ gõ. Te mẽ ate kãm hkĩnh xà nhõr pyrãk o amnhĩ nhĩpêx nê kãm amnhĩ gõ. Jao mẽ amã kapêr kôt pix mã amnhĩ nhĩpêx o ri apa hprãm ã kãm amnhĩ jarê. Nê kãm hprãm xà

hkôt pix mã tanhmã amã amnhĩ nhĩpêx to ho ri apa hprãm ã kãm amnhĩ jarê. Kot kaj mẽ ã kãm amnhĩ jarênh anê nhũm amnhĩ tã mẽ ama nê hkĩnh nê. ã mẽ pahte kãm amnhĩ jarênh anhỹrja na kãm mar prãm.

2Nê kêr ka mẽ kãm Tĩrtũm prãm kêt xwỳnhjaja kot amnhĩ nhĩpêx o ri amnhĩ nhĩpêx o ri apa hkêt nê. Nê mẽ amnhĩ to Tĩrtũm mãn wỳ kê mẽ amã mẽ ajamaxpêr mex jagjê. Koja mẽ ama nê mẽ amã hagiê ka mẽ ra aprĩ hã hamaxpêr xà hkôt mẽ pahte amnhĩ to mex xà pumunh mex nê. Na pu htem hkôt amnhĩ nhĩpêx o ri papa nhũm amnhĩ tã mẽ pahpumu nê hkĩnh nê. Pu mẽ pajaxwỳja ỹ hã pahkĩnh nê ri papa.

Kris kwỳjaja kot tanhmã axpên nhĩpêx to hã mẽ kãm karô

Rômãn 12.1-11; Epes 4.11-16; Wam Pêtre 4.10-11

3Nê na pre Tĩrtũm ixto mex nê. Nê mẽ akaxyw ixãm. Ixte mẽ amã Kra Jesus kot tanhmã mẽ panê amnhĩ nhĩpêx to hã harênh o ri mẽ akôt ixpa kaxyw. Tã na pa ã kagàja kamã mẽ amã harênh anê.

Jakamã kwa kêr ka mẽ amnhĩ to jarkrar o ri mẽ kãm apa hkêt nê. ãm kwarĩ ho kwarĩ. Rỳ atỳx ri ajamaxpêr o:

— Nà pa na ixte amnhĩ to mex o ixte ixkwỳjê piitã mẽ hakrenh par.

Anhỹr ã amnhĩ to jarkrar o ri mẽ hkôt apa hkêt nê. Kêt mẽ ãm amnhĩ jarênh o:

— Na pa pre amnhĩ kaxyw Jesus kôt ijamaxpêr nhũm Tĩrtũm ixpumu nê ixto hkra. Jakamã na pa hte Jesus Kris pix kukwak ri tãm amnhĩ nhĩpêx o ri ixpa. No amnhĩ krã hkôt ã amnhĩ nhĩpêx anhỹr kêt nê. Anê.

4E pa mẽ amã mẽmoj jarê ka mẽ inhma. Nà mẽ panhĩja pyxi htã kamã mẽmoj xohtôô. Na kamã mẽ pano nê mẽ pajakwa. Nê kamã mẽ pajamak nê mẽ pahte. Na pu htem mẽ pano ho rĩt nê mẽ pajakwa ho pakapêr. Nê mẽ pajamak o ri ama nê mẽ pahte ho ri mra. 5Ja pyrã nê Kris kôt mẽ pahte amnhĩ xunhwỳr xwỳnhja ãm pyxi tã hkôt mẽ pahte amnhĩ xunhwỳr xwỳnhjaja mẽ paxohtôô. Jakamã na pu htem ahpỳnhã tanhmã axpên to mex to ho ri papa. Jao Kris kôt axpên to pahtô nê pahtôx o papa.

6Tĩrtũm na hte mẽ pahpê hkwỳ hã ahpỳnhã mẽ pamã tanhmã mẽmoj tã karô to nê kaxyw mẽ pahto mẽ paxihtỳx. Tã kêr pu mẽ ra kot mẽ pamã mẽmoj tã karô xà hkôt kãm amnhĩ nhĩpêx rãhã ho ri papa. Jakamã koja mẽhõ ate Tĩrtũm kapêr jarênh o ri apa kaxyw axãm nê amã anê ka Tĩrtũm kamnàr rom mẽ kãm kapêr jarênh mex o ri mẽ hkôt apa.

7 Rỳ ate akwỳjê mã tanhmã axàpênh to ho ri apa kaxyw axãm ka mẽ kãm axàpênh mex o ri mẽ hkôt apa.

Rỳ ate Tĩrtũm kapêr ho mẽ ahkre ho ri apa kaxyw axãm ka ho mẽ ahkre mex o ri apa.

8 Rỳ ate Tĩrtũm kapêr o ri Jesus kôt mẽ akwỳjê jamaxpêr o hihtỳx o ri apa kaxyw axãm ka mẽ kãm kapêr jarênh pê mẽ ho mẽ hihtỳx mex o ri mẽ hkôt apa.

Rỳ ka mẽ atõ akukrêx rax japêr nê ate mẽ kêp amrakati xwỳnhjê mã mẽmoj nhõr o ri apa kaxyw axãm ka axàmnhĩx ri mẽ kãm mẽmoj nhõr o ri mẽ hkõt apa.

Rỳ ate akwỳjê ho amnhĩptàr kaxyw axãm ka mẽ ho amnhĩptàr mex o ri apa.

Rỳ ate tanhmã mẽ akwỳjê ho mex to nê mẽmoj to mẽ kutã anojarêr o ri apa kaxyw axãm ka akĩnh kãm ã mẽ hipêx anhỹr rãhã ho ri apa nê tanhmã akapêr punuj to hkukamã ri ajamaxpêr o ri mẽ hkõt apa hkêt nê.

9Nê kêr ka mẽ apiitã amã axpên kĩnh kãm axpên to mex rãhã ho ri apa nê ri axêx rom amã axpên kĩnh ã amnhĩ jarênh o ri apa hkêt nê. Nê mẽ kot amnhĩ tomnuj xà piitã hkaga hpa nê hpãnhã mẽ kot amnhĩ to mex xà pix pyr tỳx nê hkõt amnhĩ nhĩpêx rãhã ho ri apa. 10Nê mẽ apê Kris kwỳ hã amã axpên kĩnh kãm tãm axpên nhĩpêx o ri apa. Nê mẽ akwỳjaja mẽ kot amnhĩ to mex xwỳnh ã mẽ harênh o ri mẽ hkõt apa. No mẽ ri atỳx ajamaxpêr o:

— Nà koja mẽhõ ixkumrêx ixte tãm amnhĩ nhĩpêx xwỳnh ã ijarê pa rĩ kormã amnhĩ xwar tãm kot amnhĩ nhĩpêx xwỳnh ã harê.

Anhỹr o ajamaxpêr kêt nê. Kêr ka akumrêx tãm kot amnhĩ nhĩpêx xwỳnh ã harê.

11Nê kêr ka mẽ Tĩrtũm mã mẽmoj to anhỹr kaxyw nê kamã amã kaga hkêt kãm tanhmã kãm mẽmoj to ho ri apa. Jao akĩnh kamã kãm ho anhỹr mex nê. 12Nê mẽ nhỹrmã Tĩrtũm kot kaxkwa kamã mẽ ato mex rax kukamã ajamaxpêr nê akĩnh rãhã kãm mẽmoj to anhỹr o ri apa.

Nê kêr ka mẽ tanhmã amnhĩ to rỳ nhũm mẽhõ tanhmã mẽ ato ka mẽ akaprĩ nê ri apa htã no ãm tee ri amnhĩ kukamã ajamaxpêr o Tĩrtũm kaga hkêt nê. Arĩ amnhĩ to hwỳr rãhã ho ri apa. 13Nê koja Kris kõt atõjê hõ kêp amrakati ka mẽ ja hã omu nê anhõ mẽmoj japêr nê mãmri kãm hkwy gõ. Nê amnhĩ wỳr awỳ nê tanhmã ho mex to.

14Nê mẽ kot tanhmã mẽ atomnuj to xwỳnhjaja kêr ka mẽ amnhĩ tã mẽ omu nê agryk nê wajaga kot tanhmã amã ho kaxyw hwỳr atêm nê kãm tanhmã hã axàmnhênh to hkêt nê. Kêt ãm ho Tĩrtũm pix wỳ nê kãm:

— Pa mẽ ijamãr mex xwỳnh maati. Nà na ixkwỳjê hõja ã inhĩpêx anê. Tã nom kêr ka ixtã tanhmã homnuj to hkêt nê. ãm tanhmã ho mex to.

Anhỹr o mãn mẽ ho awỳ.

15Nê koja akwỳjê hõ mẽmoj tã hkĩnh nê. Ka omu nê urak nê ỹ hã



Rômãn 12.14

akĩnh nê. No koja mẽmoj tã hkaprĩ nê mỳr o nhỹ ka omu nê ra uràk nê ÿ hã akaprĩ nê.

16Nê kêt ka mẽ piitã mẽ hipêx o axpên pyràk o ri apa. Te mẽ ate amnhĩ to rax o akwỳjê jakrenh o te mẽmoj kamã akahak o amnhĩ nhĩpêx pyràk kêt nê. Nê axàhpumunh tỳx o ate mẽ piitã mẽ hakrenh par pyràk o ri amnhĩ nhĩpêx o ri apa hkêt nê.

17Nê koja mẽhõ tanhmã ato htã ka ãm amnhĩ tã omu nê tanhmã amnhĩ tã ho hkêt nê. Nê mẽ piitã mẽ noo mã tãm ri amnhĩ nhĩpêx o ri apa.

18-19Nê kêt ka mẽ tãm ri axpên mã akapêr rãhã ho ri apa.

Nê kot kaj akràmnhwỳ mẽ wa tanhmã axpên nhĩpêx to. Hãmri ka wa akupỹm tãm axpên xãm kaxyw kãm akapêr tã nhũm ama nê ãm ama nê akaga. Ka ãm amnhĩ tã omu nê kamã agryk kêt nê. Koja Tĩrtũm tãm tanhmã atã ho. Kapêr ã kagà htũm kot ja jarênh kot:

Kêt ka mẽ amnhĩ tã tanhmã kot ato xwỳnh to hkêt nê. Pa kot paj mẽ atã tanhmã ho. Anê.

Nê harênh kot:

20 Kêt ka mẽ amã mẽ kãm mẽ akurê xwỳnhjê o mex pix o ri apa.

Kê mẽ kãm prãm ka ja hã mẽ omu nê mẽ kamã axukaprĩ nê mẽ kãm mẽmoj kwỳ gô kê mẽ kuku.

Rỳ nhũm mẽ kãm kôr ka mẽ kãm gô hkwỳ kê mẽ ho ixkõ.

Kot kaj mẽ ã amnhĩ tã mẽ hipêx mex anê nhũm mẽ tee ri amnhĩ tã mẽ apumu nê amnhĩ kamã hpijaàm jao mẽ atã amnhĩ kamã gryk nê. Anê.

21Nom kot kaj mẽ amnhĩ tã tanhmã mẽ homnuj to hãmri nê ajaxwỳja uràk nê amnhĩ tomnuj nê. Ja pymaj kêt ka mẽ amnhĩ rom tãm mẽ hipêx. Hãmri nhũm mẽ amnhĩ tã mẽ apumu nê mẽ apyrà nê tãm mẽ anhĩpêx japêr.

E kêt ka mẽ ã axpên nhĩpêx o ri apa anê.

Mẽ pahto amnhĩptàr xwỳnhjê jarênh

Matêwre 22.21; Xitre 3.1; Wam Pêtre 2.13-17

13 1Nê kêt ka mẽ kot mẽ ato amnhĩptàr xwỳnhjê kapêr ma nê kapêr kôt ri amnhĩ nhĩpêx rãhã ho ri apa. Tĩrtũm kot mẽ pakaxyw mẽ unhwỳr kênã. Mẽ kot mẽ pahto amnhĩptàr o pa kaxyw na hte mẽ unhwỳ. 2Jakamã koja mẽhõ mẽ kapêr ma nê ãm kuma nê hkôt amnhĩ nhĩpêx kêt nê hãmri nê te kot Tĩrtũm kapêr mar nê ãm mar pyràk o amnhĩ nhĩpêx. Hãmri nhũm Tĩrtũm tee ri ja hã omu nê nhỹrmã tanhmã hã ho.

3Xà na hte tãm mẽ kot amnhĩ nhĩpêx xwỳnhjaja kãm mẽ kot mẽ ho amnhĩptàr xwỳnhjê puma ho pa? Nà na htem kãm mẽ uma hkêt kãm ri pa. ãm mẽ kot amnhĩ tomnuj xwỳnh pixjaja na amnhĩ kamã kãm mẽ

uma ho pa. Tã ka mẽ amã mẽ kot mẽ ato amnhĩptàr xwỳnhjê pyna hprãm kêt xwỳnhjaja kêt ka mẽ kapêr ma nê hkôt amnhĩ nhĩpêx kêt amnhĩ tã mẽ apumu nê hkĩnh nê. Nê amnhĩm mẽ ate amnhĩ to mex xwỳnh ã mẽ ajarê. 4Tĩrtũm nhỹ hã mẽ panhõ pahi kot mẽ pahto amnhĩptàr jakamã na htem mẽ kãm mẽ pahto mex prãm nê. Nê kot pu mẽ pahtõ axtem nê tanhmã amnhĩ tomnuj to hãmri nhũm tee ri ja hã pajarênh ma nê tanhmã hã mẽ pahto. ãm hãmri na hte ã mẽ pahto amnhĩptàr xwỳnhjaja mẽ panhĩpêx anê. Tĩrtũm kãm hprãm xà hkôt. 5Jakamã kwa mẽ kapêr ma nê hkôt ri amnhĩ nhĩpêx mex rãhã ho ri apa. Nom amã kot tanhmã ato pix pymaj hkôt ri amnhĩ nhĩpêx kêt nê. Mããnên ã amnhĩ kukamã ajamaxpêr anê nê ajamaxpêr o:

— Nà Tĩrtũm kot mẽ ixkaxyw unhwỳr jakamã na pa hte kapêr ma nê hkôt amnhĩ nhĩpêx mex o ri ixpa.

Anhỹr o ajamaxpêr.

6Nê mẽ pahto amnhĩptàr xwỳnhjaja kot Tĩrtũm nhỹ hã tanhmã mẽ panhĩpêx to ho pa jakamã na pu htem mẽ àpênh pãnhã mẽ kãm amnhĩre. Mẽ pahpiitã axpên kaxyw kãm kàxpore ho hkryre nê kugõ. Tanhmã kot ho mẽ pamã mẽmoj to mex to kaxyw. 7Jakamã kêt ka mẽ hã apijaàm o ri apa kamã mãmri mẽ kãm kàxpore hkwỳ ho hkryre nê òr o ri apa. Mẽ kot hã àhwỳr xà hkôt.

Mẽ pahte tanhmã axpên nhĩpêx to hã mẽ pamã karõ

Matêwre 22.39-40; Karatas 5.13-15; Wam Juãw 3.11-24

8Nê kêt ka mẽhõ ho tewên japêr nê tokyx kãm amnhĩre. Nê mẽ amã axpên kĩnh o aa ho ajamakêtkati hkêt nê. Jao mẽmoj to axpên kutã anojarêr rãhã ho ri apa. Kot kaj mẽ ã axpên nhĩpêx anê nê Tĩrtũm kapêr piitã hkôt amnhĩ nhĩpêx mex o ri apa.

9Amnepê mã na pre finat Mojesja Tĩrtũm nhỹ hã Ijaew mã mẽmoj tã karõ nê mẽ kãm:

Kêt ka mẽ aprõ pix tãnopxa nê nhãm mênijê hõ kamã ri akurê ho apijaàm kêt o apa hkêt nê.

Nê mẽ anijaja mẽ amjên pix tãnopxa nê nhãm ri mẽmyjê hõ kamã akurê ho apijaàm kêt o ri apa hkêt nê.

Nê mẽ ri axpên par kêt nê.

Nê mẽ ri axpên pè axàhkĩnh o ri apa hkêt nê.

Nê mẽ amã ri axpên kukrêx kĩnh o ri amã ho anhõ hprãm o ri apa hkêt nê. Anê.

Nê mããnên ja:

Kêt ka mẽ nhãm mẽ axpên nhĩpêx o te ka amã amnhĩ tã ma pyrãk. Jao tãm axpên nhĩpêx o ri apa. Anê.

ã kot mẽ kãm hã karõ kot anhỹr. Kot puj mẽ ã pamã pahkwỳjê kĩnh anê nê mããnên wam finat Mojes kot mẽmoj tã mẽ panhĩgêjtê mã karõ hkôt

amnhĩ nhĩpêx o ri papa rãhã nê. Jao axpên par kêt nê. Nê axpên pê paxãhkĩnh kêt nê. Nê axpên kutã panojarêr rãhã nê. **10**Koja mēhō kãm amnhĩ tã ma pyrãk o hkwyjê nhĩpêx nê mē ho mex pix o pa. Jakamã kot kaj mē amã ri axpên kĩnh nê mēmoj to axpên kutã anojarêr pix nê. Jao Tĩrtũm kapêr piitã hkôt amnhĩ nhĩpêx mex o ri apa.

11Amnepê mã mē pahte amnhĩ kaxyw Jejus kôt pajamaxpêr xã hã arĩgrota ã na pre kormã akupỹn mē pahwyr hpôx xã hã arĩgro kormã hwyr awry rax nê. Tã ra hwyr ahtêp o mō. Koja tokyx akupỹn mē pahwyr wrỹ nê ma akupỹm kaxkwa hwyr mē pahto api. Jakamã kwa kêr pu mē arĩ hamãr rãhã ho ri apa. Jao tanhmã amnhĩ tomnuj to kaxyw nê pajamaxpêr o:

—Kwa koja Jejus tanhmã amnhĩ to nê jarãhã akupỹn wrỹk japêr. Tã kot pa ri ã amnhĩ nhĩpêx anê nhũm wrỹ nê tee ri ja hã ixpumu pa amnhĩ kamã ixpijaãm tỹx nê. Nã kot paj ã amnhĩ tomnuj anhỹr kêt nê. Anê.

Hãmri nê Jejus kamã ajamak pê kutêp Tĩrtũm kapêr kôt pix mã ri amnhĩ nhĩpêx mex rãhã ho ri papa.

12Na pu htem kamãt kãm gôr nê arĩgro jamãr pê kamã pajamak o panhĩkwỹ. Arĩgro te kêp Jejus akupỹn wrỹk pyrãk. Jakamã kwa pu mē kamã pajamak pê kãm panojarêr rãhã ho ri papa nê amnhĩ nê tanhmã mē omnu xã kute pumunh mex o ri papa. Te ho pôristi kot amnhĩ nê mē kot kãm mē hkurê xwỹnhjê pumunh mex pyrãk o Jejus kutêp tãm amnhĩ nhĩpêx o ri papa. Na pre tanhmã mē pahkrã hto pu mē y hã tãm ri amnhĩ nhĩpêx. Tã kêr pu mē arĩ ã amnhĩ nhĩpêx anhỹr o ri papa nê te mē pahte arĩgro hã mē pa xwỹnhjê kot amnhĩ nhĩpêx pyrãk o amnhĩ nhĩpêx. **13**Kot puj mē ã amnhĩ nhĩpêx anê nê mē piitã mē noo mã tee ri tanhmã mē pahte amnhĩ tomnuj to mã pajamaxpêr kêt nê. Jao amnhĩ kamã pahpijaãm nê ri papa hkêt nê. Nê pajamakêtkati nê paxãmnhĩx ri papa. Te ho hirã kamã ri mē pa xwỹnhjê kot amnhĩ nhĩpêx pyrã nê ãm ri paxãmnhĩx tãm amnhĩ nhĩpêx o ri papa.

Nê mē pahprô pix tânopxar o ri papa.

Nê mē pahpipãnh nê ri papijapu ho ri papa hkêt nê.

Nê mēmoj tã axpên mã paxãkjêr hkêt nê.

Nê mēmoj tã axpên kãm pagryk kêt nê.

14Nom kot puj mē axtem nê ã amnhĩ tomnuj anê nê mē pahte amnhĩ nhĩpêx tũm kôt pix mã amnhĩ nhĩpêx. Tã kêr pu mē ã amnhĩ nhĩpêx anhỹr pumaj hpãnhã amnhĩ to Pahihti Jejus Kris wỹ nê kãm:

—Pa Jejus. Nã kormã jar apa ri na ka pre mē kot tanhmã amnhĩ tomnuj to kutã axihtỹx o axihtỹx nê aa tanhmã amnhĩ tomnuj to hkêt nê. Tã inhmã apyrã nê ixte amnhĩ tomnuj kutã ixihtỹx o ixihtỹx o ixpa hprãm. Anê.

Jao mē pajamaxpêr tũmja te ra kot amnhĩ tã mē pahto htỹx kêt pyrãk o pu mē amnhĩ nhĩpêx o ri papa.

Mě pahte Kris kôt pahkwỳjê mã paxàkjêr kêt ã mẽ pamã karõ

Matêwre 7.1-5; Römãn 2.1; Wam Korõt 10.23-33; Xiakre 4.11

14 ¹Ně koja mēhõ kormã Jejus kôt amnhĩ xãm nyw ri kormã hkõt hamaxpěr tohtuj aně. Hãmri nē htỳx tanhmã hamaxpěr to nē mẽmoj mex kaga. Ka mẽ ja hã omu nē ãm omu nē hã tanhmã kãm nē hkêt nē. Kwār mãmri ã amnhĩ nhĩpêx aně. Koja gaa nē rĩ hprĩ hã Tĩrtũm kapěr mar tỳx nē hãmri nē hkõt mẽmojta pumunh mex nē. ²Jakamã koja Jejus kôt akwỳjê hõ mẽ apkur xà piitã hkur pymaj tanhmã hõ kute hã harě nē hkaga nē hamaxpěr o:

— Nà kot pa ja hkur kêt nē. Kot pa apu kuku nē hkur o amnhĩ tomnuj nē. Aně.

Kwār mãmri ã hamaxpěr aně nē hkur kêt nē. Nom mẽ pahte Jejus kôt amnhĩ xunhwỳr tỳx xwỳnhjaja na pu htem paxãmnhĩx Jejus kamnàr rom mẽmoj piitã kuku. Nom mẽ pahkĩnhã ham mẽ kot hkõt amnhĩ xunhwỳr xwỳnhjaja kormã kapěr piitã mar kêt jakamã kwār mẽ mãmri aně nē mẽmoj kur kêt nē. ³Nom kër ka mẽ ri tanhmã hã mẽ kãm akapěr to hkêt nē. Rỳ mẽ kãm:

— Kwa mẽ ixpyrà nē mẽmoj piitã aku.

Anhỳr o mẽ kãm akapěr kêt nē. Ano ho ãm hã mẽ omu.

Ně mẽ ate mẽmoj piitã hkur kêt xwỳnhjaja kêt ka mẽ ajaxwỳja mẽ ixte mẽmoj piitã hkur ã tanhmã mẽ inhmã axàkjêr to hkêt nē. Mě ixte mẽmoj piitã hkur o ixpa hã mẽ ixpumu nē ãm hã mẽ ixpumu nē hã tanhmã mẽ inhmã axàkjêr to hkêt nē. Rỳ hã mẽ inhmã:

— Kwa nà kot kaj mẽ ja kur o amnhĩ tomnuj nē.

Anhỳr o hã mẽ inhmã akapěr kêt nē. Ano ho ãm ja hã mẽ ixpumu. Mě pahte ahpỳnhã tanhmã paxàpkur to htã Tĩrtũm kot mẽ pahte Kra Jejus kôt amnhĩ xunhwỳr xwỳnh piitã mẽ pahto hkra kênã. ⁴Jakamã kwa mẽmoj tã tanhmã axpẽn mã axàkjêr to ho ri apa hkêt nē. Koja Kris kôt atõjê hõ axtem tanhmã hamaxpěr to ka mẽ tee ri ja hã omu nē tanhmã hã kãm nē hkêt nē. Rỳ ajamaxpěr o:

— Tk. Na hte ã ri amnhĩ nhĩpêx anhỳr o pa. Ja omnuj. Pa na pa hte ã amnhĩ nhĩpêx anhỳr kêt nē.

Anhỳr o ri axpẽn kukamã ajamaxpěr hkêt nē. Mě pahpê Tĩrtũm kêt kênã kot pu kêt mẽ ã ri axpẽn kukamã pajamaxpěr aně. Tĩrtũm pix na hte tanhmã mẽ pajarěnh to xwỳnh. Àhpumunh o àhpumunh xwỳnh jakamã koja tanhmã mẽ hkrã hto nhũm mẽ rĩ kormã tãm hamaxpěr pẽ ãmnhĩx ri tanhmã amnhĩ nhĩpêx to ho pa.

⁵Ně koja Jejus kôt atõjê hõ mẽmo arĩgromnu jarě nē hã àpěnh kêt nē. Ka mẽ apẽ hwỳjjaja tee ri ja hã omu nē ajamaxpěr o:

— Nà arĩgro piitã mẽ pamã mex kênã. Kot paj mãmri arĩgro piitã hã apê.

Anhÿr o ajamaxpër japêr. Nom kêr ka mẽ ja hã axpên mã tanhmã axàkjêr to hkêt nê. Na pu htem ahpÿnhã pamã tanhmã mẽ pahte amnhĩ nhĩpêx to hprãm xà hkôt tanhmã amnhĩ nhĩpêx to. No tanhmã ri hã axpên mã paxàkjêr to ho ri papa hkêt nê. 6Kêt mẽ kot arĩgromnu jarênh xwÿnhjê mẽ mẽ pahte arĩgro piitã mex ã harênh xwÿnhjaja mẽ pahpiitã mẽ pahpê Tirtũm kraa. Jakamã mẽ pahpiitã na pu htem pajamaxpër o:

—Na pa hte Tirtũm kãm hprãm xà hkôt ã amnhĩ nhĩpêx anhÿr o ri ixpa. Anê.

Nê mẽ pahte mẽmoj piitã hkur xwÿnhjaja nê mẽ kot mẽmoj kwÿ hkur kêt xwÿnh piitã mẽ pahpê Tirtũm kraa. Mẽ pahpiitã mẽ pamã kãm hprãm xà hkôt amnhĩ nhĩpêx prãm jakamã na pu htem paxàpkur kaxyw nê Tirtũm mã amnhĩ jarê nê kãm:

—Pa mẽ ijamãr mex xwÿnh maati. Nã ãm hãmri na ka hte apkati mẽ mẽ inhmã mẽ inhõ ho apa. Amex o amex Tirtũm.

Anhÿr o kãm amnhĩ jarê. Hãmri nê kormã hkamnàr rom paxàmnhĩx ri tanhmã mẽõ kuteta ku. 7-8Mẽ pahpê Tirtũm kra jakamã na pre ra mẽ pakukamã tanhmã mẽ pajarênh to. Mẽ pakukamã pahtyk ã arĩgro jarê nê mẽ pahte pahtĩr ri tanhmã ri amnhĩ nhĩpêx to ho papa hkukamã hamaxpër. No mẽ papajaja na pu htem amnhĩ krã hkôt tanhmã mẽ pahte amnhĩ nhĩpêx to kukamã paxàhpumunh kêt. 9Jakamã na pre Kris ja hã mẽ pahpumu nê tãm mẽ pakaxyw amnhĩ to kêp mẽ panhõ Pahihti nê mẽ panê ty. Hãmri nê akupÿm htĩr. Kêp mẽ panhõ Pahihti hã akupÿm htĩr. Kêp mẽ pahte hkôt amnhĩ xunhwÿr xwÿnhjê nhõ Pahihti kaxyw. Jakamã kêp ra mẽ pahkwÿ htyk xwÿnhjê nhõ Pahihti nê mããnên kêp arĩ mẽ pahtĩr xwÿnhjê nhõ Pahihti. 10No mẽ papajaja mẽ pahpê Kris kôt mẽ pahkwÿjê nhõ pahi hkêt jakamã kêr mẽ Kris kôt akwÿjê hõ tanhmã amnhĩ nhĩpêx to hã omu hãmri nê tanhmã ho akapêr to hkêt nê. Rÿ ajamaxpër o:

—Kwa na ã amnhĩ nhĩpêx anê. Inhmã ja mex kêt.

Anhÿr o ajamaxpër kêt nê. Koja nhÿrmã Tirtũm tãm mẽ pahpiitã tanhmã mẽ pahte amnhĩ nhĩpêx to hã mẽ pahpumunh xà hkôt tanhmã mẽ pajarênh to. Nom kêr pu mẽ papajaja amnhĩ hkrã hkôt ã axpên jarênh anhÿr kêt nê. 11-12Kot puj mẽ nhÿrmã pahpiitã Tirtũm kutã pahkrĩ nê kãm tanhmã amnhĩ jarênh to. Kormã mẽ pahtĩr ri tanhmã mẽ pahte amnhĩ nhĩpêx to ho papa hã kãm pahprĩ hã amnhĩ jarê. Kê mẽ pama nê tanhmã mẽ pajarênh to. Kapêr ã kagà htũm kot mẽ pakukamã mẽ pajarênh kot:

Koja nhÿrmã mẽ piitã ixpê mẽ õ pahi hã ixkutã hkõn krã ho rôrõk nê hkrĩ nê inhmã inhmex o inhmex ã ijarê.

Nê mẽ piitã ixpê Tirtũm ã ixpyxi mex ã ijarê. ãm hãmri na pa ã mẽ hkukamã mẽ harênh anê. Anê.

Mê pahte Kris kôt pahkwỳjê ho mex ã mẽ pamã karõ

Wam Korît 8.9-13

13Nê kwa kêr ka mẽ akwỳ kot Jejus kôt amnhĩ xunhwỳr tohtuj anhỳr xwỳnhjaja tanhmã mẽ kot amnhĩ nhĩpêx to ho pa hã mẽ omu nê ja nê tanhmã mẽ kãm akapêr to hkêt nê. ãm mẽ noo mã tãm ri amnhĩ nhĩpêx rãhã ho ri apa. Mẽ kot ja hã mẽ apumunh nê mẽ akôt amnhĩ nhĩpêx kaxyw. No kot ka mẽ kot tanhmã amnhĩ nhĩpêx toja ã kãm akapêr nhũm ama nê tee ri amnhĩ kukamã hamaxpêr nê hkaprĩ nê.

14E kot pa hpãnhã mẽ paxàpkur xà hã tanhmã mẽ panhõ jarênh to. Ixte Pahihti Jejus jamaxpêr xà hkôt tanhmã ijamaxpêr to ho ri ixpa jakamã kot paj ixkatat kôt mẽ amã tanhmã mẽ panhõ jarênh to nê ãm hãmri harê. Nà mẽ paxàpkur xàja ãm pixi nê omnu hkêt. Piitã mex o mex. Nom koja mễhõ tee ri mẽmo mẽ apkur xà hõ pumu nê hamaxpêr o:

— Nà kot paj ja hkur kêt nê. Kot paj apu kuku nê ho amnhĩ tomnuj nê. Anê.

Hãmri nê hkur kêt nê. Tã kwãr mãmrĩ ã hamaxpêr anê nê hkur kêt nê. Nom na ãm amnhĩ krã hkôt Tĩrtũm kêp ja omnuj ã hkamnhĩx. Kêp omnuj kêt. Ra kot mẽmo mẽ paxàpkur xà piitã mex ã harênh. 15Tã kot kaj mẽ kot mẽmoj kur kêt xwỳnhhta py nê o tẽ nê kot hkaga xwỳnh noo mã hkur o xa nhũm apumu nê tee ri hamaxpêr nê hkaprĩ nê. Jakamã kot ka mẽ ã noo mã amnhĩ nhĩpêx anhỳrja o ho mex kêt nê. Kwa mẽ ã ri axpên nhĩpêx anhỳr hkêt nê. Kot ka mẽ ã axpên nhĩpêx anê nê te amnhĩ pix kukamã ajamaxpêr pyrak o amnhĩ nhĩpêx. Jao akwỳjê ho mex kukamã ajamaxpêr kêt nê. Kris kãm mẽ hapê htỳx kôt mẽ kot amnhĩ tomnuj pãnhã amnhĩrer kaxyw ra nê htyk kênã kot ka kêt mẽ axtem nê ri ã mẽ noo mã mẽ kot mẽmoj kur kêeta kur anê. Rỳ koja apu tee ri kot mẽmoj kur kêeta kur ã mẽ apumu nê tanhmã amnhĩ tomnuj to. Jao Kris kaga japêr. Jakamã kwa mẽ ã mẽ noo mã mẽmojta kur kêt nê. 16Mẽmo mẽ apkur xàja mex tã nhũm mẽ akwỳjê hõ kãm mex kêt japêr ka mẽ noo mã hkur kêt nê. Nê tanhmã hã kãm nê hkêt nê. Kot kaj mẽ anê nhũm Kris kra hkêt xwỳnhjaja tee ri ja hã mẽ apumu nê tanhmã axpên mã mẽ apê Kris kwỳjê ho kapêr punuj to. 17Mẽ pahpê Tĩrtũm krajaja na pu htem paxàpkur xà nê pahkõm xà pix kukamã pajamaxpêr o ri papa hkêt nê. Na pu htem amnhĩ mẽ pahkwỳjê mex kukamã pajamaxpêr. Nê mẽ pahte tãm amnhĩ nhĩpêx kukamã pajamaxpêr. Nê tãm axpên nhĩpêx kukamã pajamaxpêr. Kot puj mẽ ã amnhĩ nhĩpêx anê nhũm Tĩrtũm Karõ ja hã mẽ pahpumu nê mẽ pahto mẽ pahkĩnh nê. Pu mẽ pahkĩnh nê pajamakêtkati nê ri axpên kôt papa. 18Tã kot puj mẽ ã Kris mã tanhmã amnhĩ nhĩpêx to ho ri papa anê nhũm Tĩrtũm ja hã mẽ pahpumu nhũm ja kãm mex nê. Nê Kris kôt mẽ pahkwỳjê mã haxwỳja ja mex nê.

19Jakamã kêr pu mẽ tãm axpẽn mã pakapêr o ri papa. Nê pajamakêtkati nê axpẽn kôt ri pajapôj. Nê Kris kôt tanhmã axpẽn to paxihtÿx to ho ri papa. 20No kot ka mẽ axàpkur xà gryk ã akwÿ hkukamã ajamaxpêr kêt nê atÿx ri mēhõ noo mã mẽmoj kur japêr. Kêp omnuj tã ka mẽ ãm amnhĩ pix kukamã ajamaxpêr nê noo mã hkur japêr. Hãmri nhũm ja hã mẽ apumu nê ra kot Tirtũm kaga mã. Ra kèp hkra jakamã kwa mẽ noo mã mẽ kot mẽmoj punuj ã harēnh xwÿnhhta kur kêt nê. Nom mẽ paxàpkur xàja piitã mex. Tirtũm kot mẽ pamã òr jakamã piitã mẽ panhõõ. Tã koja akwÿjê hõ Tirtũm kêp mẽmoj omnuj ã hkamnhĩx tã ka mẽ noo mã aku nê ho amnhĩ tomnuj nê. 21Kêr pu mẽ pahkwÿjaja tanhmã kot amnhĩ tomnuj to pymaj pu mẽ pahte amnhĩ nhĩpêx kukamã pajamaxpêr mex o papa. Mẽmo mẽõ nê mẽmo kagô pê wĩhtija. Tirtũm kot mẽ pamã mẽmoj piitã òr tã no nhũm mẽ pahkwÿjaja kêp ja omnuj nê pu mẽ noo mã hkur rÿ ho pahkõm kêt nê. Mẽmo mry nê mẽmo wĩhti pu mẽ noo mã hkur rÿ ho pahkõm kêt nê.

22Nê kêr ka mẽ atõ mẽmoj krêr kaxyw nê hkukamã ajamaxpêr o:
— Nà kot paj ja krê. Tirtũm kãm ja mex kênã. Anê.

Hãmri nê mãmrĩ Tirtũm kamnàr rom axàmnhĩx akrê. Kãm ja mex kênã kot ka kêt ri tee ri hkrêr kaxyw hkukamã ajamaxpêr nê hkaga. 23No kot kaj mẽ atõ mẽmoj to anhÿr kaxyw nê tee ri amnhĩ kukamã ajamaxpêr nê ajamaxpêr o:

— Ko kot paj apu ja ho anê nhũm Tirtũm hã ixpumu nhũm ja kêp omnuj nê rÿ ko. Anê.

Hãmri nê tee ri amnhĩ kukamã ajamaxpêr. Tã ra ã amnhĩ nhĩpêx anê nê akrê rÿ mẽmoj to anê. Hãmri nhũm Tirtũm tee ri ã ate amnhĩ nhĩpêx anhÿr ã apumu nhũm ja kêp omnuj nê. Ate hkamnàr rom mẽmoj to anhÿr kêt nê amarĩ amnhĩ krã hkôt ho anhÿr jakamã ho amnhĩ tomnuj nê.

Mẽ pahte amnhĩ pix kukamã pajamaxpêr kêt ã mẽ pamã karõ

Makre 10.45; Wam Korõt 10.24; Piripos 2.3-5

15 1Nê kêr pu mẽ pahte ra Jejus kôt amnhĩ xunhwÿr tÿx xwÿnhjaja amnhĩ kôt kormã mẽ kot Jejus kôt amnhĩ xunhwÿr totuj janhÿr xwÿnhjê jamãr mex nê. Jao mẽ kamã pagryk tokyx anhÿr kêt nê. ãm mẽ kutã panojarêt pix o papa. Jao ra amnhĩ pix kukamã pajamaxpêr kêt nê. 2Määnēn amnhĩ mẽ Kris kôt mẽ pahkwÿjê hkukamã mãn mẽ pajamaxpêr. Jao mẽ kot tãm amnhĩ nhĩpêx kaxyw mẽ ho mex o ri papa. 3Kris na pre jar pa ri amnhĩ pix kukamã hamaxpêr kêt nê. Na pre määnēn õ Papaj kukamã hamaxpêr. Jakamã Tirtũm kapêr ã kagà htũm kot kãm kapêr jarēnh kot:

Pa Papaj. Na hte mẽ pahkurê xwÿnhjaja ixto kapêr punuj nê.
Nom määnēn ã ato kapêr o pa anê. Anê.

4Mê pakaxyw na Tirtûm kapêr ã kagàja. Mê pahte kamã harênh nê mar nê amnhĩ kaxyw hkôt pajamaxpêr tÿx o ri papa kaxyw. Jakamã na pu htem tanhmã pahpunuj to htã kapêr kwÿ ma nê pahkĩnh nê. Jao tee ri amnhĩ kukamã pajamaxpêr o ri pahkaprĩ hkêt nê. ãm nhÿrmã Tirtûm kot mê pahto mex kukamã pajamaxpêr o akupÿm paxihtÿx nê pahkĩnh nê ri papa. Mê pahkĩnh nê ri papa kaxyw na Tirtûm kapêr ã kagàja. 5-6Na pu htem Tirtûm kamnãr rom pahkĩnh nê. Nê axpên kamã paxukaprĩ ho ri papa. Jakamã na pa hte tanhmã mê ato Tirtûm wÿr to nê kãm:

— Pa Tirtûm. Apê mê ijamãr xwÿnh maati na ka. Nê apê mê inhõ Pahihti Jejus Kris nhõ Papaj na ka. Nã xep ra Rôm nhõ xwÿnh kwÿjaja kãm akapêr kôt amnhĩ nhĩpêx prãm jakamã kwa tanhmã mê hkrã ho mex to kê mê hamakêtkati nê ajamaxpêr kôt hamaxpêr rãhã ho ri akôt pa. Hãmri nhũm mê amnhĩ tã apumu nê piitã amex o amex ã ajarê.

Anhÿr o pa hte mê ato kuwÿ.

Ijaew kêt xwÿnhjê jarênh

Atre 10.34; Rômãn 9.24; Karatas 3.28

7Nê kwa kêr ka mê amã axpên tã ma ho ri apa. Te ho Kris kãm mê pahtã mata pyrãk. Jao axpên to mex pix o apa. Kot kaj mê ã axpên nhĩpêx anê nhũm mê piitã axpên tã mê apumu nê mê anhÿ hã Tirtûm mã mex o mex ã harê.

8Amnepê m Tirtûm Ijaew mã tanhmã Kris jarênh to. Kormã pika hwÿr wrÿk kêt ri nhũm hkukamã nhÿrmã mê hwÿr wrÿk nê mê kamã kator ã harê.

Tã nhũm mê hwÿr wrÿ nê mê kamã kato. Ijaew hkanrêhã htãmnhwÿjê kamã kato nê mê ho mex o ri mê hkôt pa. Mê kot amnhĩ tã omunh nê ã hamaxpêr anhÿr kaxyw. Nê hamaxpêr o:

— Amnepê m Tirtûm kot mê panhĩgê m mã hkukamã harênh xà hkôt na mê ixwÿr Kraja mê nhũm wrÿ nê mê ixto mex o ri pa. Nã ãm hãmri na pre mê ixwÿr kumê.

Anhÿr o hamaxpêr kaxyw. 9Nê mê apê Ijaew kêt xwÿnhjaja mê ajaxwÿja mê ate tanhmã kot amnhĩ nhĩpêx to hã harênh mar nê Tirtûm mã mex o mex ã harênh kaxyw. Nê Tirtûm kot mê akamã ukaprĩ hã mê ate amnhĩ tã omunh nê mex o mex ã harênh kaxyw na pre wrÿ. Tirtûm kapêr ã kagà htũm kot tanhmã mê ixpê Ijaew jarênh to nê mãânên tanhmã mê apê Ijaew kêt xwÿnhjê jarênh to nê mê pajarênh kot:

Kot paj Ijaew kêt xwÿnhjê jamak mã amã amex ã ajarênh o ri mê hkôt ixpa.

Nê amex ã inhgrer o ri mê hkôt ixpa. Anê.

10Nê ja:

Kwa mẽ apê Ijaew kêt xwỳnh mẽ mẽ apê Ijaew. Kêr ka mẽ apiitã Tirtũm nhỹ hã akĩnh nê ri apa. Anê.

11 Nê mãn nê ja:

E kêr ka mẽ apê Ijaew kêt xwỳnhjaja nê krĩ piitã hkôt mẽ apa xwỳnhjaja mẽ apiitã Tirtũm mã mex o mex ã harênh o ri apa.

Anhỹr o kot harênh. 12 Nê Tirtũm nhỹ hã kapêr o pa xwỳnh finat Ijais haxwỳja Ijaew mã Jejus jarênh o:

Koja nhỹrmã Jese kanrêhã htãmnhwỳjê hõja mẽ pahwỳr kato.

Hãmri nê mẽ pahpê Ijaew mẽ Ijaew kêt xwỳnhjê ho amnhĩptàr o pa.

Jakamã nhũm mẽ amnhĩ kaxyw hkôt hamaxpêr o pa. Anê.

13 Nê na pa hte tanhmã mẽ ato Tirtũm wỳr to ho ri ixpa nê kãm:

—Pa Tirtũm. Kwa kêr ka Rôm nhõ xwỳnhjê ho mex kê mẽ amnhĩ kaxyw Akra hkôt hamaxpêr mex o ri pa. Jao hkôt hkĩnh nê hamakêtkati nê ri axpên to pa. Nê kê Akarõ mẽ ho mẽ hihtỳx o pa kê mẽ amnhĩ kaxyw amã mãn hamaxpêr tỳx rãhã ho ri pa. Anê.

Pawre kot hprĩ hã amnhĩ jarênh

Sikũn Pêtre 1.12-13

14 E Kris kôt ixkwỳjaja. Nà ra ixte mẽ ajarênh mar mex. Na ka xep htem amnhĩ to mex o ri apa. Nê mẽmoj to axpên kutã anojarêr rãhã ho ri apa. Nê mẽ kot tanhmã Tirtũm kapêr kôt amnhĩ nhĩpêx to xàja ka mẽ omunh mex nê ho axpên jahkre ho ri apa. 15 Tã ot pa kagà ja kamã mẽ amã ixujarênh kãm ixihỳx nê. Tirtũm nhỹ hã. Ra mẽ ate mẽmoj mar mex tã pa axte mẽ amã harê. Mẽ ate mar tỳx nê hã anohtỳx kaxyw. Nà ã ixte amnhĩ nhĩpêx anhỹr kaxyw na pre Tirtũm mẽ akaxyw ixãm. 16 Ixte Jejus Kris mã mẽ apê Ijaew kêt xwỳnhjê mã kapêr jarênh o ri mẽ akôt ixpa kaxyw. Nê mẽ ato hwỳr o ri ixpa kaxyw. Tã pa hte krĩ hkwy kamã ã mẽ akwỳjê mã harênh anhỹr o ri mẽ hkôt ixpa. Nê Jejus jarênhja pa hte mẽ hkôt mẽ kãm harênh o ri ixpa. Mẽ kot mar nê hkĩnh kãm hkôt amnhĩ nhĩpêx mex kaxyw. Hãmri nhũm Tirtũm Karõ mẽ kãm mẽ hamaxpêr nyw jagjê nhũm Tirtũm hã mẽ omu nhũm ja kãm mex nê nhũm hkĩnh nê hamaxpêr o:

—Nà ãm hãmri. Koja mẽ nhỹrmã wa ixri htĩr tũm nê mex nê pa ho pa. Anê.

17 Tã na pa ixte Jejus Kris nhỹ hã Tirtũm mã tanhmã amnhĩ nhĩpêx to ho ixpa hã amnhĩ pumu nê ixkĩnh nê. 18-19 Na pa hte ã hã mẽ apê Ijaew kêt xwỳnhjê mã Tirtũm kapêr jarênh o ri mẽ akôt ixpa. Nê mẽ anoo mã tanhmã ri Kris kot mẽ amã amnhĩ nhĩpêx to hã harê. Nê mẽ amã aa mẽ kot mẽmoj pumunh kêt kwỳ ho anhỹr o ri mẽ akôt ixpa. Tirtũm Karõ nhỹ hã. Nhũm hte mẽ akwỳjaja amnhĩ jaêr pê omu nê kamã

no puma nê. Hãmri nê mẽ pahpyrà nê Jejus kôt amnhĩ xunhwỳ. Nom pa hte ã amnhĩ nhĩpêx anhỳr ã amnhĩ pumu nê ri hã amnhĩ to jarkrar kêt nê. ãm ixte Kris pix nhỹ hã mẽ kãm ixkapêr ã mẽ kãm amnhĩ jarênh o ri mẽ hkôt ixpa. Tã pa ra Jerujarê rũm Irir wỳr krĩ piitã hkôt mẽ kãm Kris kapêr jarê. Tĩrtũm Karõ kot tanhmã ixto hihtỳx to jakamã pa mẽ piitã mẽ kãm harênh mex nê. 20Na pa hte mẽ hwỳr inhnojarêr nê ã ijamaxpêr anê nê ijamaxpêr o:

— Kormã mẽ kot Kris jarênh mar kêt xwỳnhjê hwỳr kot paj mỗ. Nom ra mẽ kot harênh mar xwỳnhjê nhõ krĩ hwỳr inhmõrja inhmã prãm kêt. Anê.

21Tĩrtũm kapêr ã kagã htũm kot kapêr mar kêt xwỳnhjê jarênh kot: Kormã mẽ kot Tĩrtũm kapêr mar kêt xwỳnhjaja koja mẽ kuma nê hprĩ hã mar tỳx nê. Anê.

Pawre kot Rõm wỳr hkrà hã amnhĩ jarênh

Rõmãn 1.8-15

22Hêxta waa nê. Inhmã mẽ apumunh prãm tỳx nê Rõm kãm Jejus kôt ixkwỳjaja. Na pa hte xatã mẽ awỳr ixkrà nom kormã mẽ awỳr inhmõr kêt nê. Kormã ixte krĩ hkwỳ kamã mẽ kãm Kris jarênh o ri ixpa jakamã kormã mẽ awỳr inhmõr kêt nê. 23Na pa ra xatã mẽ awỳr ixkrà hã ixtã amgrà xohtõ nê. Tã ra jar mẽ kãm Kris kot mẽ panê tanhmã amnhĩ nhĩpêx toja jarênh pa. 24Jakamã kot paj tokyx ma mẽ awỳr mỗ. Hãmri nê mẽ awỳr pøj pu mẽ axpên pumu nê pahkĩnh nê axpên mã pakapêr o papa. Pa mẽ akôt ri ixpa tãmtã hamũ pyka pê Espãnhã wỳr ma mỗ. Nê kot paj inhnojarêr ka mẽ ixto Tĩrtũm wỳ nê inhmã ixàpkur xà hkwỳ gõ pa ma mẽ hwỳr pry hã hkur o mỗ.

25-26No na pa kormã mẽ awỳr inhnojarêr kêt nê. Kot paj ja rũm awjanã nê akupỹm Jerujarê hwỳr mỗ. Kamã Kris kôt mẽ pahkwỳjaja kêp amrakati nê ri pa nhũm pika pê Gres mẽ Masetõn kamã Kris kôt mẽ pahkwỳjaja mẽ harênh ma nê mẽ kãm kàxpore hkwỳ ho akuprõ nê mẽ kaxyw inhmã kugõ. Tã kot paj ma mẽ hwỳr o mỗ nê mẽ kãm kure nê rĩ kormã ma mẽ awỳr mỗ. 27Jerujarê kamã Kris kôt mẽ pahkwỳjaja Ijaew na mẽ. Mẽ kumrêx na prem Kris kôt amnhĩ xunhwỳ. Hãmri nhũm mẽ hkwỳjaja ma mẽ apê Ijaew kêt xwỳnhjê mã kapêr jarênh o ri mẽ akwỳ hkôt pa. Hãmri nhũm pika pê Gres kamã mẽ pa xwỳnhjaja mẽ kapêr ma nê mẽ uràk nê Kris kôt amnhĩ xunhwỳr kurê kumrêx. Jakamã amnhĩ xwar kãm nhãm krĩ hõ kamã Kris kôt mẽ pahkwỳjê ho mex prãm nê. Hãmri mẽ kãm kàxpore hkwỳ ho akuprõ nê mẽ kaxyw inhmã kugõ.

28-29Tã kot paj ma Jerujarê hwỳr mẽ kãm o mỗ nê mẽ kãm kure hãmri nê awjanã nê rĩ kormã ma Rõm wỳr mẽ awỳr mỗ. Hãmri nê mẽ awỳr pøj pu mẽ axpên pumu nê pahkĩnh nê. Nê axpên mã Jejus Kris mex

o mex ã harẽ nẽ kãm tanhmã amnhĩ jarẽnh to ho papa. Jao pahkĩnh nẽ papa. Tã pa hpãnhã hamũ ma Espãnhã wỳr mỗ.

30Nẽ na pu prem Jejus Kris o panhõ Pahihti. Jao te mẽ pahpê hkõt axpẽn to pahtõ nẽ pahtõx pyræk o axpẽn nhĩpêx. Nẽ Karõ nhỹ hã pamã axpẽn kĩnh nẽ. Jakamã kwa Jejus kõt ixkwỳjaja. Kêr ka mẽ ixpê mẽ atõ hã ixto Tĩrtũm wỳr kãm axihtỳx nẽ. 31Kêr pa ma pyka pê Jutej kamã Jerujarẽ kamã Kris kõt mẽ pahkwỳjê hwỳr mỗ nẽ mẽ kãm kàxporeta gõ nhũm mẽ omu nẽ Ijaew kêt xwỳnhjê kot mẽ kãm õr ã mẽ omunh tã tee ri hamaxpêr kêt nẽ. ãm hkĩnh kãm mãmri ãmnhĩx hamỳ nẽ ho amnhĩm awjaprõ.

Nẽ kêr ka mẽ ixto awỳ kê inhnê mẽ kêp mẽ pahkwỳ hkêt xwỳnhjê pumunh mex nẽ.

32E kêr ka mẽ ã ixto Tĩrtũm wỳr anẽ. Kê ixte ma Jerujarẽ rũm ma Rõm wỳr pàr kãm inhmõrta ã kê ixpumunh mex nẽ. Pa inhmex pê mẽ kurũm ma mẽ awỳr mõn pøj pu mẽ tokyx axpẽn pumu nẽ pahkĩnh nẽ. Pa mẽ ate tanhmã amnhĩ nhĩpêx to ho ri apa hã mẽ apumunh o mẽ akõt ri ixpa nẽ ixkĩnh nẽ. 33Tã ãm ja pix. Kê Tĩrtũm mẽ akõt pa ho pa. Tãm na hte tanhmã mẽ pahto pu mẽ ý hã pajamakêtkati paxãmnhĩx ri pahkĩnh nẽ ri papa.

Pawre kot ahpỹnhã hkrãmnhwỳjê mã kapêr

16 1Ku nẽ mããnẽn ja. Ot pa mẽ awỳr Kris kõt pahtõx Pepreja mẽ awỳr kumẽ. Na hte krĩ pê Sênkrej kamã Kris kõt mẽ pahkwỳjê tanhmã mẽ ho mex to ho ri mẽ hkõt pa. 2Nẽ mããnẽn pa na hte tanhmã ixto mex to. Tã kê mẽmo arĩgro hã mẽ awỳr pøj ka mẽ kêp Kris kõt mẽ pahtõx ã omu nẽ ho mex nẽ tanhmã ho ajuta hto.

3Nẽ kêr ka mẽ atar Kris kõt ixkrãmnhwỳjê mã ijarẽ. Na pa hte mẽ kãm ijamaxpêr rãhã ho ri ixpa. Nẽ Akirti mẽ hprõ Prisireta ka mẽ wa kãm ijarẽ. Na pre hte wa inhĩhkõ hã Jejus Kris mã tanhmã amnhĩ nhĩpêx mex to ho wa pa. 4Jao wa amnhĩ grõnh kõt mẽ kãm ixkurê xwỳnhjê pê ixpytã. Pa amnhĩ tã wa omu nẽ inhmã wa hkĩnh nẽ. No ãm papxipix inhmã wa hkĩnh kêt nẽ. Na pre Ijaew kêt xwỳnh kwỳ pê Kris kwỳjaja ixtã wa harẽnh ma nẽ haxwỳja kãm wa hkĩnh nẽ.

5Nẽ na hte Kris kwỳjaja wa õrkwỹ kamã axpẽn wỳr akuprõ. Mẽ kot Tĩrtũm mã amnhĩ jarẽnh nẽ kapêr ã kagã hkwỳ mar kaxyw axpẽn wỳr akuprõ. Tã kêr ka mẽ mẽ kãm ijarẽ.

Nẽ Kris kõt mẽ pahtõ Epẽnre mã ijarẽ. Kêp ixkrãmnhwỳ mex na. Inhmã hkĩnh. Kumrêx na pre jar pika pê As kamã amnhĩ kaxyw Kris kõt hamaxpêr nẽ hkõt amnhĩ xãm.

6Nẽ Kris kõt mẽ pahtõx Marir ka mẽ kãm ijarẽ. Na xep hte tanhmã mẽ ato mex to rũnh o pa.

7Nē Kris kôt mē pahtō Ārōhti mē Jūhti wa kām ijarē. Ixpyrà nē wa kēp Ijaew na wa. Kormā ixte Kris kôt amnhī xām kêt ri na pre wa kumrêx hkôt amnhī xām. Na hte Jejus nhỹ hã mē ahkre ho mē pa xwÿnhjaja wa kot Kris kapēr jarēnh mex ã wa harē. Tã ã amnhī nhĩpêx anhỹrja mÿrapê na pre mē hkwyjaja wa unê nē wa haxà pa prem ixpimràatã ixpê prês nē mē hagiênh xà kamã ixkrĩ.

8Nē Kris kôt mē pahtō Āpître mã ka mē ijarē. Kēp Kris kôt ixkràmnhwÿ mex na.

9Nē Kris kôt mē pahtō Upânre mã ijarē. Na hte ixpyrà nē Kris mã tanhmã amnhī nhĩpêx to ho ri pa.

Nē Kris kôt mē pahtō Etaki mē ijarē. Kēp ixkràmnhwÿ mex na.

10Nē Kris kôt mē pahtō Apes ka mē kām ijarē. Na prem ra Kris ã hipêx punuj nē no nhũm mē kutã amnhī to htÿx nē Kris kaga hkêt nē.

Nē Aristopti nhõrkwÿ kamã hkwyjê mã ijarē.

11Nē Kris kôt mē pahtō Erojàwti mã ijarē. Ixpyrà nē kēp Ijaew na.

Nē Nasisti nhõrkwÿ kamã Kris kwÿjaja ka mē kām ijarē.

12Nē Kris kôt mē pahtōx Xiripēre mē Xiripos wa kām ijarē. Wa kēp Pahihti Jejus mã tanhmã amnhī nhĩpêx mex to xwÿnh na wa.

Nē Kris kôt mē pahtōx Pesixti mã ijarē. Haxwÿja kēp ixkràmnhwÿ na. Na hte Pahihti Jejus mã tanhmã amnhī nhĩpêx mex to ho ri pa.

13Nē Kris kôt mē pahtō Rupti mã ijarē. Na hte Kris kôt amnhī nhĩpêx mex o ri pa. Nē katorxà mã ijarē. Na pre te ixpê hkra nhĩpêx pyrãk o inhĩpêx.

14Nē Kris kôt mē pahtō Asĩnre mã nē Prekõxti nē Emes nē Patopas nē Emas mē. Jajê piitã mē pahkwÿ kot mē hwÿr pikuprõnh xwÿnhjê mē mē ho apimràatã mē kām ijarē.

15Nē Kris kôt mē pahtō Pirorti mã nē mē pahtōx Juure mē Nērew wa nē htõxja nē mē pahtō Orĩpti wa mē kām ijarē. Nē mē pahkwÿ kot mē hwÿr pikuprõnh xwÿnhjê mē mē ho apimràatã mē kām ijarē.

E kêr ka mē jajê piitã mē kām ijarē. Na pa hte mē kām ijamaxpēr rãhã ho ri ixa.

16Nom mē tapxipixjaja kêt. Ā mē apiitã mã na pa hte ijamaxpēr rãhã ho ixa.

Nē ota jar Kris kwÿjaja mē awÿr hpēr mē.

17Kwa ixkràmnhwÿjaja. Na ka mē ra aprĩ hã Tĩrtũm kapēr mar tÿx nē. Tã kêr ka mē amnhī nê mē kot Tĩrtũm kapēr o hêx xwÿnhjê pumunh mex o apa. Mē kām axpên nê mē ato hpigrãnh par prãm. Nē mē ate Kris kaga nē hpãnhã mē kot amnhī nhĩpêx o amnhī nhĩpêxja mē kām hprãm jakamã kwa mē amnhī nê mē omunh mex nē axkãm ajamak rom. 18Na htem ã amnhī nhĩpêx anhỹr o Pahihti Kris mã tanhmã amnhī nhĩpêx to ho pa hkêt nē. Ām amnhī hkrã hkôt tanhmã ri hkwyjê jahkre hto ho pa. Kot mē no kupyw kaxyw tanhmã mē kām

hêx to ho ri mẽ hkôt pa. Te mẽ ahkre mex pyræk tâ mẽ ahkre mex kêt nê. Jakamã nhũm htỳx ri mẽ pa xwỳnhjaja mẽ kot mẽ ahkreja ma nhũm te mẽ kãm mex pyræk. Jakamã kwa mẽ okora mẽ amnhĩ nê mẽ omunh mex nê. **19**Na ka htem mẽ kurom Kris kôt amnhĩ nhĩpêx mex nê nhũm xep mẽ piitã mẽ apumu nê axpên mã ja hã mẽ ajarênh o ri pa. Pa mẽ ajarênh ma nê ixkĩnh nê. Tã kêr ka mẽ arĩ ajamaxpêr mex rãhã ho ri ajamaxpêr o apa. Nê amnhĩ nhĩpêx mex rãhã nê. No tanhmã ajamaxpêr punuj to ho ri amnhĩ tomnuj o ri apa hkêt nê. Ǻ mẽ ate amnhĩ nhĩpêx anhỳrja na inhmã hprãm.

20Nê na hte Satanasti mẽ hkwỳjaja mẽ ate Jejus kaga hprãm xaj mẽ akôt tanhmã ri mẽ anhĩpêx to ho ri pa htã kêr ka mẽ amnhĩ tâ mẽ omu nê tee ri amnhĩ kukamã ajamaxpêr kêt nê. Koja gaa nhũm Tĩrtũm mẽ hipêx o te mẽ kot kagã xoprê hkrã xôm nê hpĩr pyræk o mẽ hipêx. Jakamã Ǻ mẽ kot mẽ anhĩpêx anhỳr tâ koja Tĩrtũm mẽ amã mẽ ajamakêtkati xàja gô. Tapxipix na kot mẽ pajamakêtkati xà nhôr kaxyw àhpumunh tỳx.

Nê na pa hte mẽ ato Pahihti Jejus wỳ nê kãm:

— Pa Pahihti. Kwa kêr ka Rôm kãm akwỳjê pumu nê mẽ ho mex nê mẽmoj to mẽ kutã anojarêr rãhã ho ri apa. Anê.

21Nê ota mẽ pahtô Ximotreja mẽ awỳr hpêr mẽ. Na hte inhĩhkô hã Kris mã tanhmã amnhĩ nhĩpêx to ho ri pa. Nê ixtô Rusti mẽ Jasãwti mẽ Sosipa wa mẽ haxwỳja mẽ awỳr hpêr mẽ.

22Nê kot inhmã ixkapêr Ǻ kagã xwỳnh Testi haxwỳja mẽ awỳr hpêr mẽ. Kêp Kris kôt mẽ pahtô na. **23**Nê Kris kôt mẽ pahtô Gajre haxwỳja mẽ awỳr hpêr mẽ. Ôrkwỹ kamã na hte Kris kwỳjaja axpên wỳr akuprô nê kamã Tĩrtũm mã amnhĩ jarê nê kapêr Ǻ kagã kamã harê nê mar o hkrĩ. Ôrkwỹ kamã na pa pre pøj.

Nê mẽ pahtô Eras haxwỳja mẽ awỳr pêr mẽ. Na hte jar krĩ ja kamã Rôm nhô pahihti mã ô kàxpore jamãr pê ho mẽmoj to anhỳr o pa.

Nê Kris kôt pahtô Kwatre haxwỳja mẽ awỳr hpêr mẽ. E jajaja piitã na mẽ awỳr hpêr rê.

24E kê Pahihti Jejus Krisja mẽ akutã nojarêr rãhã ho pa.

Pawre kot Tĩrtũm mex o mex Ǻ harênh

Epes 1.3, 3.20-21; Wam Ximotre 1.17; Eprêw 13.20; Jutre 24-25

25Nê kwa kêr pu mẽ Tĩrtũm mã mex Ǻ harênh rãhã ho ri papa.

Nê ixte mẽ amã Jejus Kris jarênhhta Ǻ ka prem ama nê hkôt amnhĩ xunhwỳ. Tã koja mẽ ato mẽ axihtỳx ka mẽ hkôt axihtỳx kãm hkôt ri amnhĩ nhĩpêx mex o ri apa. Amnepêm na pre Tĩrtũm mẽ apê Ijaew kêt xwỳnhjê ho hkra kaxyw hã amnhĩ jarênh kêt nê. Kormã ja ho hpimxur ryy nê. **26**Tã Ǻ mẽ anhĩpêx anhỳrja o amnhĩrĩt nê ý hã mẽ kapêr jarênh o ri pa xwỳnhjê mã kapêr nê mẽ kãm:

—E Jejus kot tanhmã amnhĩ nhĩpêx to ho pata kêr ka mẽ piitã mẽ kãm hã kagà kê mẽ pyka piitã hkôt kamã harẽ nẽ kuma. Nom kê Ijaew pixjaja mar kêr nẽ. Kê pika piitã hkôt kamã harẽ nẽ kuma. Panhĩ nẽ kupẽ nẽ kupẽ hkà htykre nẽ mẽ hkà haka nẽ mẽ hkà kamrêkjaja. Kê mẽ piitã Jejus jarênh ma nẽ amnhĩ kaxyw hkôt hamaxpêr nẽ hkôt amnhĩ xunhwỳ. Hãmri nẽ hkôt amnhĩ nhĩpêx mex o ri pa. Anẽ.

Nhũm pre ã mẽ pakaxyw mẽ kãm kapêr anẽ nhũm prem kuma nẽ hã kagà.

27Nà Tĩrtũmja tapxipix na àhpumunh tỳx xwỳnh ã ãm pyxi mex. Nẽ tapxipix kêp mẽ pahpiitã Mẽpahpãm. Tã kêr pu mẽ Jejus Kris kot mẽ panê htyk ã omunh xà hkôt Tĩrtũm pix mã mex o mex ã mãn harênh rãhã ho papa.

Tã ãm ja pix. Ixpê Pawre na pa ã mẽ awỳr ixpêr mẽnh anẽ. Na hapêx.

Wam Korĩt

Pawre kot Korĩt kãm Jejus kôt hkwỳjê hwỳr kagà nê mênh

Pawre na pre kagàja nhĩpêx. Jejus nhỹ hã kapêr jarênh o pa xwỳnhjê hõ na pre. Na pre hipêx nê ma krĩ pê Korĩt kãm Jejus krajê hwỳr kumê. Nê kagàja kamã mẽ kãm tanhmã mẽmoj tã karõ hto. Na pre mẽ kot àhpumunh tỳx ã amnhĩ to jarkrar o pa nê mẽ kãm kapêr. Nê tanhmã amnhĩ tomnuj to nê mẽ kãm kapêr. Nê mẽ hprõ nê mẽ mjên xwỳnhjaja tanhmã wa kot axpên nhĩpêx to hã mẽ kãm karõ. Nê mẽ kot Tĩrtũm mã mex o mex ã harênh kaxyw axpên wỳr mẽ pikuprõnh nê tanhmã amnhĩ nhĩpêx to hã nhũm mẽ kãm karõ. ã na pre Pawre mẽ kãm mẽmoj tã karõ nê hã kagà anê. Nê mẽ kãm:

1 1Pa Korĩt kãm Jejus kôt ixkwỳjaja. Xà mẽ amex? Ot pa mẽ awỳr kagàja nhĩpêx nê kumê. Ixpê Pawre na pa Kris kôt mẽ pahtõ Sostenes mẽ wa awỳr ixpêr mẽ. Tã kagàja nhĩpêx nê mẽ awỳr kumê. Tĩrtũm na pre ixte Jejus Kris nhỹ hã mẽ ajahkre ho ri ixpa kaxyw ixãm. 2Tã ot pa mẽ awỳr kagà nhĩpêx nê mênh mã. Korĩt kãm ixpyrà nê mẽ apê Tĩrtũm krajê hwỳr.

Tĩrtũm kot amnhĩ kaxyw mẽ axunhwỳr jakamã na ka prem amnhĩ tomnuj kaga nê Kris kôt amnhĩ xunhwỳ nê hkôt amnhĩ nhĩpêx mex o ri apa. Krĩ piitã hkôt mẽ kot amnhĩ to Jejus Kris wỳr o mẽ pa xwỳnhjê pyrà nê. Mẽ panhõ Pahihti Jejus Krisja ãm pixi mex na.

3Nê Tĩrtũm kêp Mẽpahpãm maati nê Jejus Kris kêp mẽ panhõ Pahihti jakamã na pa hte mẽ ato wa hwỳr rãhã o ri ixpa nê mẽ ato wa hwỳr o:

—Kwa Tĩrtũm mẽ Jejus wa. Kêr ka wa Korĩt nhõ xwỳnhjê kutã anojarêr rãhã ho wa ri apa. Nê mẽ ho mex rãhã nê. Kê mẽ amnhĩ tã war apumunh kôt ri hamakêtkati nê hkĩnh nê àmnhĩx tanhmã ri amnhĩ nhĩpêx to ho ri pa. Anê.

Tĩrtũm kot Jejus Kris kukwak ri mẽ pahto mex ã harẽnh

Sikũn Pẽtre 1.2; Wam Tesarõn 5.23-24

4Nẽ mẽ ate amnhĩ kaxyw Jejus Kris kõt ajamaxpẽr o ri apa jakamã na hte Tĩrtũm mẽ ato mex nẽ. Tã pa hte kãm amnhĩ jarẽnh kaxyw nẽ kãm mẽ ajarẽnh o:

— Pa Tĩrtũm. ãm hãmri na ka pre Korĩt nhõ xwỳnh kwỳjê ho akra. Nà ja mex o mex. Anẽ.

5Nẽ ra mẽ ate Kris kõt amnhĩ xunhwỳr jakamã na ka mẽ ra amex kumrẽx nẽ ri apa. Nẽ aprĩ hã Kris kot amnhĩ nhĩpẽx pumunh mex nẽ aprĩ hã akwỳjê mã harẽnh o ri mẽ hkõt apa. 6Na pa pre mẽ awỳr mõ nẽ mẽ amã Kris kot amnhĩ nhĩpẽx ã harẽnh o ri mẽ akõt ixpa. Ka prem inhma nẽ hkõt amnhĩ xunhwỳr tỳx kurê kumrẽx. 7Jakamã nhũm Tĩrtũm mẽ ate kãm tanhmã amnhĩ nhĩpẽx to ho apa kaxyw mẽ ato mẽ axihtỳx. Nẽ kaxyw mẽ amã mẽ ate axpẽn to mex xà piitã mẽ amã kugõ. Mẽ ate Jejus kot akupỳn mẽ pahwỳr wrỳk jamãr pẽ hapêr arĩt o apa pẽ tanhmã kãm axpẽn nhĩpẽx to ho apa kaxyw. 8Koja Tĩrtũm tanhmã mẽ akrã hto ka mẽ hkõt pix mã ri amnhĩ nhĩpẽx rãhã nhũm Pahihti Jejus Krisja akupỳn mẽ pahwỳr wrỳ. Hãmri nẽ mẽ ate amnhĩ nhĩpẽx ã mẽ apumu nẽ mẽ ajarẽnh o:

— Nà ãm hãmri na hte jajaja amnhĩ to mex pix o ri pa. Anẽ.

9Nẽ koja Tĩrtũm ra kot amnhĩ jarẽnh xà hkõt mẽ ato mex nẽ. Ra kot mẽ ate Pahihti Jejus Kris kõt apa kaxyw amnhĩm mẽ axunhwỳr jakamã koja ra kot amnhĩ jarẽnh xà hkõt mẽ ato mex rãhã nẽ.

Mẽ pahte mẽmoj tã axpẽn pẽ pahpigrãnh kêt ã mẽ pamã karõ

Rõmãn 15.5-6; Sikũn Korĩt 13.11; Epes 4.1-6; Piripos 2.1-4; Wam Pẽtre 3.8

10-11E Kris kõt ixkwỳjaja. Na ka xep htem mẽmoj tã axpẽn mã axàkjêr pix o ri apa nhũm pre Krojre hkwỳjaja amnẽ ixwỳr põj nẽ inhã mẽ ajarẽ. Kwa nà mẽ ã amnhĩ nhĩpẽx anhỳr kêt nẽ. Kêr ka mẽ axpẽn kõt ri amnhĩ nhĩpẽx rãhã ho ri apa. Nẽ axpẽn kõt ri ajamaxpẽr rãhã nẽ. Te ixkre tipxi kamã mẽ ri apa pyrãk o mãn kêt mẽ axpẽn nhĩpẽx o ri axpẽn kõt apa. Nẽ mẽ axpẽn kutã anojarêt rãhã ho ri apa. No mẽmoj tã axpẽn mã axàkjêr pẽ axpẽn pẽ apigrãnh kêt nẽ. Na pa Pahihti Jejus Kris nhỹ hã mẽ amã ã ja hã karõ anẽ.

12Nẽ na ka xep htem ahpỳnhã ri mẽ apê mẽ ixkwỳ hã amnhĩ jarẽnh o ri apa. Jao mẽ akwỳjaja pa ixkõt ri amnhĩ nhĩpẽx xwỳnh ã amnhĩ jarẽ. Nẽ mẽ akwỳjaja axtem Apor kõt ri amnhĩ nhĩpẽx xwỳnh ã amnhĩ jarẽ. Nẽ mẽ akwỳjaja axtem Simãw Pẽtre hkõt amnhĩ nhĩpẽx xwỳnh ã amnhĩ jarẽ. Nẽ mẽ akwỳjaja axtem Kris kõt amnhĩ nhĩpẽx o ri apa xwỳnh ã amnhĩ jarẽ. ã na ka xep htem ahpỳnhã amnhĩ jarẽnh anhỳr o ri apa.

13Kwa nà ka mẽ ã ahpỳnhã amnhĩ jarẽnh anẽ nẽ te mẽ ate Kris o

apigrànĥ pyràk o hipêx. Kwa mon ka hte mẽ akwỳjaja apê ixkwỳ ĥã amnhĩ jarê? Xà pa na pa pre pĩ kahpa ĥã ajêť nê mẽ anê ty? Nà Kris pix na pre mẽ panê ĥã ajêť nê ty. Xà mẽ apê pa ixkwỳ ĥã amnhĩ jarêĥ kaxyw na prem mẽ akrã kumrã? Nà mẽ apê Kris kwỳ ĥã amnhĩ jarêĥ kaxyw na prem ã mẽ anhĩpêx anê. Mẽ kot ja ĥã mẽ apumunĥ xwỳĥjaja kot mẽ apê Kris kwỳ ĥã mẽ apumunĥ kaxyw. Tã na ka xep htem axtem nê ã ri ahpỳĥã mẽ kãm amnhĩ jarêĥ anhỳr o ri apa.

14-15Kop ãm ixte amnhĩ kôt mẽ axunhwỳr prãm ronĥỳx pa mẽ ato mẽ axohtô nê mẽ akrã kumrã nê mẽ amã: “E ra mẽ apê ixkwỳ na ka mẽ.” Anê. Nom na pa pre ã mẽ amã ixkapêr anhỳr kêt nê. ãm ĥãmri na pa pre ãm mẽ ato grêre nê mẽ akrã kumrã. ãm Kripti mẽ Gajre wa pix. 16Ku nê xep mããĥn Estepti nê kaxyw mẽ ĥkwỳjaja. ãm jajê pixjaja. Nom ko apu axte mẽ ĥkwỳ ko. Ixte mẽ ĥkrã kumrãr xwỳĥĥê mã ijamaxpêr tỳx kêt. 17Na pre Kris ixte mẽ ĥkrã kumrãr o ri ixpa kaxyw ixãm kêt nê. ãm ixte mẽ kãm kapêr jarêĥ o ri mẽ ĥkôt ixpa pix kaxyw na pre ixãm.

Nê na pa hte amnhĩ krã ĥkôt ri ixujarêĥ o ri mẽ akôt ixpa ĥkêt nê. Kot pa ã amnhĩ nhĩpêx anê nhũm mẽ ixkapêr mex ã inhma nê pa ixkôt amnhĩ xunhwỳ. Ja pymaj na pa hte amnhĩ krã ĥkôt ri tanĥmã ixujarêĥ to ho ri ixpa ĥkêt nê. Na pa hte ãm ixprĩ ĥã Kris kot tanĥmã mẽ panê amnhĩ nhĩpêx to ĥã harêĥ o ri mẽ ĥkôt ixpa. Mẽ pahpiitã mẽ panê htyk ã harêĥja pa hte mẽ kãm harê. Mẽ kot ĥprĩ ĥã mar nê ĥkôt amnhĩ xunhwỳr kaxyw. Jao amnhĩ krãm mẽ ujarêĥ mexta jagjêĥ nê ĥã no htỳx kaxyw. Pa ja ĥã mẽ omu nê ixkĩĥ nê ijamaxpêr o:

—Na htem ixkapêr ma nê Jejus kôt amnhĩ xunhwỳr kurê kumrêx. Nà ãm ĥãmri na pa hte mẽ kãm ixkapêr kaprỳ ho ri ixpa ĥkêt nê. Anê.

18No kêt mẽ pahte Tĩrtũm kot mẽ pahto ĥkra xwỳĥjaja ra mẽ pahte Kris pĩ kahpa ĥã mẽ panê htyk ã harêĥ mar nê pahkĩĥ nê papa xwỳĥ na pu mẽ. Jakamã na pu htem pajamaxpêr o:

—Nà ãm ĥãmri na Tĩrtũm Kraja htyk kukwak ri mẽ ixto mex nê mẽ ixto ĥkra. Mẽ ujarêĥja mex kumrêx. Anê.

No kêt mẽ kêp ĥkra ĥkêt xwỳĥjaja na htem tee ri Kris tyk ã harêĥ ma nê ĥamaxpêr o:

—Tk. Tanĥmã kot kêt we amnhĩ to nê mẽ panê ty? ãm amarĩ mẽ kot amnhĩ krã ĥkôt pĩ kahpa ĥã nhôr nê ĥpĩr kênã. Anê.

Tĩrtũm kra ĥkêt xwỳĥĥê jarêĥ

Matêwre 11.25-26; Wam Korĩt 3.19

19Nê Tĩrtũm kapêr ã kagã htũm kot mẽ kêp ĥkra ĥkêt xwỳĥĥê jarêĥ kot:

Mẽ kot htỳx ri àĥpumunĥ tỳx ã amnhĩ to jarkrar o pa ĥtã kot paj mẽ kêp ja ho ijapêx pa nhũm mẽ ã amnhĩ jarêĥ anhỳr kaprỳ. Anê.

20Jakamã mẽ àhpumunh tỳx ã mẽ kot amnhĩ to jarkrar xwỳnhjaja nẽ mẽ kot Mojes kapêr o mẽ ahkre ho ri mẽ pa xwỳnhjaja nẽ mẽ kapêr rũnh xwỳnhjaja. Mẽ kot Tĩrtũm Kra hkôt amnhĩ xunhwỳr kêt jakamã te mẽ àhpumunh kêt pyràk. Tĩrtũm kra hkêt xwỳnhjaja kot mẽ àhpumunh tỳx ã mẽ harênh tã no ãm Tĩrtũm noo mã te mẽ àhpumunh kêt pyràk. Nẽ te htỳx ri mẽ kot amnhĩ nhĩpêx o pa pyràk. 21Tĩrtũm àhpumunh o àhpumunh jakamã na pre ra mẽ hkukamã hamaxpêr o:

—Nà kot paj mẽ àhpumunh tỳx ã mẽ omunh xà hkôt mẽ ho ixkra hkêt nẽ. ãm mẽ kot ixkra Jejus kot mẽ nê htyk ã harênh mar nẽ amnhĩ kaxyw hkôt hamaxpêr pix ã mẽ omunh xà hkôt kot paj mẽ ho ixkra. Anẽ.

22-24No Ijaewjaja kãm amnhĩ krã hkôt pix mã amnhĩ nhĩpêx prãm jakamã na pa hte mẽ ixpê Jejus kwỳjaja mẽ hwỳr mra nẽ mẽ kãm Kris kapêr jarênh o ri ixpa nhũm mẽ inhma nẽ ãm mẽ inhma. Nẽ te mẽ kot mẽ inhmar kêt pyrã nẽ mẽ inhmã:

—Tk. Nà kot paj mẽ tokyx axujarênh kôt amnhĩ nhĩpêx kêt nẽ. Kot kaj mẽ inhmã mẽ ixte aa mẽmoj pumunh kêt õ ho anẽ pa mẽ ja hã apumu nẽ axihtỳx ã apumu nẽ rĩ kormã hkôt amnhĩ nhĩpêx.

Anhỳr o inhmã kapêr. Tã no pa mẽ kãm ã amnhĩ nhĩpêx anhỳr kêt nẽ. ãm Kris kot mẽ panê pĩ kahpa hã htykja pix pa htem mẽ kãm harênh o ri ixpa. Ja kamã nhũm mẽ hkwỳjaja mẽ inhma nẽ ãm mẽ inhma nẽ Kris xihtỳx kêt ã ãm amarĩ htyk ã harê. No mẽ hkwỳjaja. Tĩrtũm kot amnhĩ kaxyw mẽ unhwỳr xwỳnhjaja na htem mẽ kurom mẽ inhma nẽ ra mẽ inhmar tỳx kurê kumrêx. Nẽ mẽ inhmã kapêr o:

—Nà ãm hãmri na Krisja Tĩrtũm pyrã nẽ hihtỳx o hihtỳx. ãm hãmri na ka ã harênh anẽ. Anẽ.

No Ijaew kêt xwỳnhjaja na Ijaew pyrã nẽ kãm amnhĩ krã hkôt amnhĩ nhĩpêx o pa hprãm kêt nẽ. Nẽ mẽ kãm mẽ àhpumunh tỳx pix prãm o pa. Jakamã na pa htem mẽ kãm Kris kapêr jarênh o ri mẽ hkôt ixpa nhũm mẽ hkwỳjaja mẽ inhma nẽ Ijaew kwỳjê pyrã nẽ ãm mẽ inhma nẽ mẽ inhmã:

—Tk. Nà na ka htem ãm ri axêx o ri apa. Kot pa mẽ akapêr mar kêt nẽ. Kot paj mẽ axàhpumunh tỳx ã mẽ apumu nẽ rĩ kormã mẽ ama nẽ mẽ akôt amnhĩ nhĩpêx.

Anhỳr tã pa mẽ ãm arĩ Kris kot mẽ panê htykja pix pa mẽ kãm harênh o ri mẽ hkôt ixpa. Nhũm mẽ hkwỳjaja mẽ inhma nẽ mẽ inhmã:

—Nà mẽ axàhpumunh kêt jakamã na ka htem atỳx ri ã ja jarênh anẽ.

Anhỳr tã no nhũm mẽ hkwỳjaja. Tĩrtũm kot amnhĩ kaxyw mẽ unhwỳr xwỳnhjaja na htem mẽ inhma nẽ mẽ inhmã kapêr o:

—Nà ãm hãmri na ka mẽ ã Krisja jarênh anẽ. Tĩrtũm pyrã nẽ àhpumunh o àhpumunh kênã. Anẽ.

25Tĩrtũm mẽ Jejus wa mẽ pakurom àhpumunh o àhpumunh nẽ hihtỳx o hihtỳx.

Tirtùm mẽ parom hihtỳx o hihtỳx ấ harễnh*Matêwre 11.25; Sikũn Korit 12.7-10; Xiakre 2.5*

26E Kris kôt ixtõ nễ ixtõxjaja. Amnepê mã Tirtùm kot amnhĩm mẽ axunhwỳrta ấ tanhmã na ka prem amnhĩ nhĩpêx to ho ri apa? Nà na ka prem axohtô nễ jar mẽ noo mã axàhpumunh kêt nễ ri apa. Nễ mẽ apê pahĩ hkêt nễ ri apa. Mễ axohtô nễ amnhĩ to hkryre nễ ri apa. 27Tã nhũm Tirtùm amnhĩ kôt mẽ ate amnhĩ to hkryre xwỳnhjê xunhwỳ. Koja nhỹrmã kot tanhmã mẽ pahpiitã mẽ pajarễnh to xà hã arĩgrota kato hãmri nhũm mẽ àhpumunh tỳx ấ amnhĩ to jarkrar xwỳnhjaja Tirtùm kot mẽ kurom mẽ pahto hkra hã mẽ pahpumu hãmri nễ tee ri amnhĩ kukamã hamaxpêr nễ amnhĩ kamã hpijaàm tỳx nễ. Nễ mẽ hihtỳx ấ amnhĩ to jarkrar xwỳnhjaja haxwỳja. Nhũm Tirtùm kot mẽ kurom mẽ pahto hkra hã mẽ pahpumu nễ tee ri amnhĩ kukamã hamaxpêr nễ amnhĩ kamã hpijaàm tỳx nễ.

28Na hte Tirtùm amnhĩ kaxyw mẽ kot amnhĩ to hkryre xwỳnhjê xunhwỳ. Nễ mẽ kot mẽ kamã kahak o pa xwỳnhjê xunhwỳ. Jar pyka ja kamã mẽ hkwỳ kot mẽ hkaga htã nhũm Tirtùm amnhĩ mã mẽ unhwỳ. Mễmemo kaxyw na hte ấ amnhĩm mẽ unhwỳr anễ? Nà mẽ kot nhỹrmã tee ri mẽ àhpumunh tỳx ấ amnhĩ jarễnh xwỳnhjê pumunh nễ axpẽn mã mẽ harễnh o:

—Kwa mẽ pahte mẽ àhpumunh tỳx ấ mẽ harễnh tã nhũm Tirtùm mẽ pahpyrà nễ amnhĩ kaxyw mẽ unhwỳr kêt nễ. Nà te mẽ àhpumunh kêt pyràk.

Anhỹr o axpẽn mã mẽ harễnh kaxyw na pre Tirtùm amnhĩm mẽ kot amnhĩ to hkryre xwỳnhjê xunhwỳ. 29Jakamã kot puj mẽ nhỹrmã Tirtùm mã amnhĩ to jarkrar pê tanhmã kãm amnhĩ jarễnh to hkêt nễ. Rỳ kãm:

—Kwa ga ixpumu Tirtùm. Na pa hte ấ amnhĩ nhĩpêx anễ nễ ấ amnhĩ nhĩpêx anễ. Kwa ja hã ixpumu nễ ixto akra nà?

Anhỹr o amnhĩ to hwỳr kêt nễ. 30Ấm Jejus pix kukwak ri na hte Tirtùm mẽ pahto hkra. Tãm na pre Tirtùm noo mã amnhĩm mẽ paxunhwỳ. Mễ pahte uràk nễ pahpê hkra kaxyw. Jakamã na pu htem ấm pix kukwak ri amnhĩ nhĩpêx mex o ri papa. Nhũm mẽ pamã àhpumunh tỳx xà hkwỳ gõ. Tã ra kot mẽ pahte amnhĩ tomnuj pê mẽ papytãr jakamã kot puj mẽ nhỹrmã pahtyk tã no ấm akupỳm pahtĩr nễ Tirtùm mẽ wa kuri pahtĩr tũm nễ pamex kumrêx nễ papa ho papa. 31Tã ấ Jejus kot mẽ panhĩpêx kot anhỹr jakamã Tirtùm kapêr ấ kagà htũm kot ja jarễnh kot:

Kot ka mẽ amã mẽmoj tã jarkrar prãm nom kêr ka mẽ kamjaja amnhĩ to jarkrar kêt nễ. Mễ panhõ Pahihtĩ ra kot mẽ panễ tanhmã amnhĩ nhĩpêx toja pix ấ tanhmã ho jarkrar to ho ri apa. Anễ.

Pawre kot tanhmã Kris jarēnh to hã harēnh

Sikũn Korĩt 4.1-7; Wam Pêtre 3.15

2 1-2E Kris kôt ixtõ nẽ ixtõxjaja. Amnepê mã ixte mẽ awỳr inhmõrta ã na pa pre inhnojarêť nẽ ijamaxpěr o:

—Kot paj ma mẽ hwỳr mõ nẽ mẽ kãm Kris kapěr jarē. Kot amnhĩ grõnh kõt mẽ inhnê htykja pa mẽ kãm harē. ãm ja pix jarēnh o ri mẽ hkõt ixpa. Nom kot paj mẽ kapěr japjê xwỳnhjê pyrã nẽ mẽ kãm ixkapěr japjê hkêt nẽ. Rỳ mẽ uràk nẽ te ixàhpumunh tỳx o ri ixkapěr japjê pyràk o ri mẽ kãm ixkapěr japjê hkêt nẽ. Kot paj ãm ixkatat kõt ri mẽ kãm tanhmã Jejus jarēnh to pix o ri mẽ hkõt ixpa.

Anhỳr o mẽ akukamã ijamaxpěr. Hãmri nẽ ma mẽ awỳr mõ nẽ mẽ awỳr pøj nẽ mẽ amã Jejus kot mẽ panê htyk nẽ akupỳm htĩrja pix jarēnh rãhã ho ri ixpa. 3Na pa pre tee ri amnhĩ kukamã ijamaxpěr nẽ ijamaxpěr o:

—Hêxta waa nẽ. Tanhmã kot pa we mẽ kãm Tĩrtũm kapěr jarēnh to nhũm mẽ inhmar tỳx nẽ hkõt amnhĩ xunhwỳr kurê kumrêx wehe? Kot paj amnhĩ krã hkõt mẽ kãm harēnh kêt nẽ. Ja kaxyw ijamaxpěr tỳx kêt kênã. Kot paj amnhĩ krã hkõt mẽ kãm harē nhũm mẽ ãm inhma nẽ hkõt amnhĩ xunhwỳr kêt nẽ. Nà kot paj Tĩrtũm nhỹ hã mẽ kãm tanhmã ixkapěr to kê tãm tanhmã mẽ hkrã hto kê mẽ inhma nẽ hkõt amnhĩ xunhwỳr japêr.

Anhỳr o ijamaxpěr. 4Nẽ mẽ ate inhmar kaxyw na pa pre ixêx rom tanhmã mẽ ano kupyw to ho ri ixpa hkêt nẽ. Rỳ mẽ pajaja mẽ ixàhpumunh xà hkõt tanhmã mẽ amã ixkapěr to hkêt nẽ. Na pa pre ãm Tĩrtũm Karõ nhỹ hã mẽ amã awjarê. Mẽ ate mar nẽ hihtỳx o hihtỳx ã omunh kaxyw. 5Jakamã na ka prem Tĩrtũm xihtỳx ã omu nẽ amnhĩ kaxyw hkõt ajamaxpěr kurê kumrêx. No pa ixàhpumunh tỳx ã ixpumunh kõt ixkõt ajamaxpěr kêt nẽ. Na ka prem ixkapěr ma nẽ ajamaxpěr o:

—Nà Tĩrtũm na mẽ parom àhpumunh o àhpumunh nẽ hihtỳx o hihtỳx.

Anhỳr o ajamaxpěr kõt ajamaxpěr kurê kumrêx.

Tĩrtũm Karõ kot mẽ pamã àhpumunh xà nhõr ã harēnh

Matêwre 7.6; Juãw 14.22, 16.13-15; Xiakre 3.13-18

6Nẽ na hte Tĩrtũm kra hkwỳjaja Tĩrtũm kot amnhĩ nhĩpêx ã omunh mex. Nẽ hamaxpěr ã omunh mex. Jakamã na pa hte mẽ ahkre japjê ho mẽ hkõt ixpa. Nom jar pika ja kamã mẽ pajamaxpěr tỳx xà ho mẽ ahkre hkêt nẽ. Rỳ pika piitã hkõt mẽ utar xwỳnhjê jamaxpěr tỳx xà ho ri mẽ ahkre ho ri ixpa hkêt nẽ. Kojã nhỹrmã mẽ àhpumunh xàja mẽ kêp hapêx pa. 7Jakamã na pa hte ãm Tĩrtũm xàhpumunh xà pix o mẽ ahkre o ri ixpa.

Amnepê mã kormã mẽmoj piitã hkêt ri na pre Tĩrtũm amnhĩ kukamã amnhĩ jarẽnh o:

— Mẽ kot amnhĩ kaxyw Ixkra hkôt mẽ hamaxpẽr o mẽ pa xwỳnhjaja kot paj mẽ ho ixkra nhũm mẽ mex kumrẽx nẽ pa ho pa.

Anhỹr o mẽ harẽ. Nom mẽ kot hkôt amnhĩ xunhwỳr kêt xwỳnhjaja nhũm kormã mẽ kãm ja ho amnhĩrĩt kêt nẽ. Tã ja na pa hte ra mẽ kãm harẽnh rãhã ho ri mẽ hkôt ixpa nhũm mẽ Tĩrtũm kãm mẽ pahto hkra hprãm hã harẽnh ma. ⁸Nom pika piitã hkôt mẽ ho amnhĩptãr xwỳnhjaja na mẽ kormã ja mar kêt nẽ. Kêp apu mẽ kot mar ronhỹx prem pĩ kahpa hã mẽ panhõ Pahihti nhõr nẽ hpĩr kêt nẽ. Mex o mex tã nhũm prem axtem nẽ ã hipêx anẽ. ⁹Mẽ kot mẽmoj mex pumunh kêt tã Tĩrtũm kapẽr ã kagã htũm kot mẽmoj mex jarẽnh kot:

Na pre Tĩrtũm mẽ kãm hkĩnh xwỳnhjê kutêp mẽmoj mex kwỳ
jaxwỳ nhũm mex o mex nẽ mẽ ahã hikwỳ.

Aa mẽhõ kot mẽmoj mex o mexja pumunh kêt.

Nẽ aa mẽhõ kot ã mẽmoj kot anhỹr pumunh kêt.

Nẽ aa ã mẽmoj mex kot anhỹr kukamã hamaxpẽr kêt.

Tã nhũm Tĩrtũm mẽ kutêp hkwỳ jaxwỳ.

Anhỹr o kot harẽnh tã no nhũm mẽ kot hkôt amnhĩ xunhwỳr kêt xwỳnhjaja ã kapẽr anhỹrja mar kêt nẽ. ¹⁰Mẽ pamã na pre Tĩrtũm ja ho amnhĩrĩt. Na pre ra mẽ pamã Karõ gõ nhũm mẽ pamã gjêx o mẽ pamã mẽmoj to amnhĩrĩt mex nẽ. Tĩrtũm Karõja àhpumunh tỳx o àhpumunh tỳx. Nẽ kot hprĩ hã Tĩrtũm jamaxpẽr pumunh par. ¹¹No mẽ papajaja na pu htem axpẽn jamaxpẽr kôt axpẽn pumunh kêt nẽ. Na pu htem papam amnhĩ jamaxpẽr ã amnhĩ pumu. Ja pyrã nẽ Tĩrtũm Karõ pix na hte Tĩrtũm jamaxpẽr pumunh. ¹²No mẽ pahpê hkrajaja na hte mẽ pahkarõja pix mẽ pakamã pa hkêt nẽ. Na hte mããnẽn Tĩrtũm Karõja mẽ pakamã pa nẽ mẽ pamã tanhmã mẽmoj to amnhĩrĩt to ho mẽ pahkôt pa. Nẽ Tĩrtũm kot mẽ pakutêp mẽmoj mex jaxwỳrja nhũm ja kukamã mẽ pamã harẽnh o amnhĩrĩt.

¹³Jakamã na pa htem amnhĩ krã hkôt ri mẽ kãm ixujarẽnh kêt nẽ. ãm Tĩrtũm Karõ nhỹ hã na pa hte ixprĩ hã mẽ kãm kapẽr jarẽnh o ri mẽ hkôt ixpa. Ra Tĩrtũm Karõ kot mẽ amã gjêx xwỳnhjê mã pa ã hã ixkapẽr. ¹⁴No mẽ kãm Tĩrtũm Karõ kapẽr mar prãm kêt xwỳnhjaja na htem Tĩrtũm kot amnhĩ nhĩpêx pumu nẽ hprĩ hã omunh kêt nẽ. Mẽ kãm kapẽr mar prãm kêt jakamã na htem ri kot tanhmã mẽ pahto mex to hã harẽnh ma nẽ hamaxpẽr o:

— Tk. Kwa mo kaxyw na htem ri ã Tĩrtũm jarẽnh anẽ? Tanhmã kot we amnhĩ to nẽ mẽ pahto mex? Nã kot anhỹr kêt. Anẽ.

¹⁵Nom mẽ pahpê Tĩrtũm kra hkwỳ hã mẽ pahte Karõ kapẽr mar mex xwỳnhjaja na pu hte mẽ kurom Tĩrtũm kot amnhĩ nhĩpêx ã omunh mex nẽ. Nẽ Karõ xõ ri mar mex nẽ nhũm mẽ kot Karõ kapẽr mar kêt

xw̃nhjaja tee ri ã mẽ pahte amnhĩ nhĩpêx anh̃yr ã mẽ pahpumu. Nom hprĩ hã mẽ pahte Tĩrtũm kõt amnhĩ nhĩpêx pumunh kêt nê. 16Tĩrtũm kapêr ã kagà htũm kot ja jarênh kot:

Mêhõ na kot Tĩrtũm jamaxpêr pumunh?

Nê mẽhõ na pre we kãm hamaxpêr gõ?

Nà amrakati kumrêx. Tapxipix na àhpumunh t̃yx o àhpumunh t̃yx. Anê.

Tã mẽ papajaja mẽ pahte Tĩrtũm Karõ kapêr mar t̃yx xw̃nhjaja na pu htem Kris xõ ri pahprĩ hã hamaxpêr kõt omunh mex nê.

Mê kot Tĩrtũm mã tanhmã amnhĩ nhĩpêx to xw̃nhjê jarênh

Wam Korĩt 14.20; Karatas 5.16-21; Epes 4.14; Eprêw 5.11

3 1E Kris kõt ixtõ nê ixtõxjaja. Pa mẽ amã mẽmoj jarê ka mẽ inhma nê kãm ajamxpêr. Nà amnepê mã kormã mẽ ate Kris kõt amnhĩ nhĩpêx tohtuj anh̃yrta ã tanhmã na ka prem amnhĩ nhĩpêx to ho ri apa wehe? Na ka prem arĩ ajamxpêr tũm kõt pix mã amnhĩ nhĩpêx. Kormã mẽ ate Tĩrtũm Karõ hkõt amnhĩ nhĩpêx mex kêt jakamã na ka pre htem mẽhprĩre kot amnhĩ nhĩpêx pyrãk o amnhĩ nhĩpêx. Nê mẽ urak nê kormã mẽmoj piitã omunh kêt nê. Jakamã na pa pre mẽ amã ixujarênh kaxyw nê te mẽ ate kormã Tĩrtũm kapêr mar kêt xw̃nhjê pyrãk o mẽ anhĩpêx nê mẽ amã tanhmã ixujarênh to. 2Mê hkarãre na htem mẽ hkà kagõ pix kaõ nê kormã mẽ apkur xà mex kur kêt nê. Ja pyrã nê na pa pre te ixte mẽ ato hpjiaõr pyrã nê mẽ amã Tĩrtũm kapêr piitã harênh par kurê kumrêx kêt nê. Am mẽ amã hkw̃y pix jarê ka prem ama nê Jesus kõt amnhĩ xunhw̃y. Tã na pa hte arĩ mẽ amã hkw̃y pix jarênh o ri ixpa nê kormã piitã ho mẽ ajahkre jatur xàm mênh kêt nê. 3Na ka htem arĩ te mẽ apê Kris kw̃y hkêt pyrãk o amnhĩ nhĩpêx o apa. Nê mẽmoj kõt axpên kãm agryk axpên mã axakjêr o apa. ã amnhĩ nhĩpêx anh̃yr jao arĩ mẽ ate amnhĩ nhĩpêx tũm kõt amnhĩ nhĩpêx rãhã nê.

4Na hte mẽ akw̃yjaja amnhĩ jarênh o: “Ixpê Pawre hkw̃y na pa.” Anê. Nê mẽ akw̃yjaja amnhĩ jarênh o: “Pa na ixpê Apor kw̃y na pa.” Anê. Kwa na ka htem ã amnhĩ jarênh anh̃yr o te mẽ apê Kris kw̃y hkêt pyrãk. 5Apor mẽ pa am wa ixte Tĩrtũm kapêr o mẽ ajahkre xw̃nh pix na pa wa. Wa ixpê mẽ anhõ pahihiti hkêt kênã kot ka kêt mẽ axtem nê mẽ apê ahp̃ynhã wa ixkw̃y hã amnhĩ jarê. Na pa pre wa mẽ amã Tĩrtũm kapêr jarênh o ri mẽ akõt ixpa ka prem wa inhma nê amnhĩ kaxyw hkõt ajamxpêr t̃yx nê. Nê hkõt amnhĩ xunhw̃y nom wa pa wa ixkõt amnhĩ xunhw̃y kêt nê. Na pa wa am Tĩrtũm kapêr o mẽ ajahkre nom amnhĩ kõt mẽ axunhw̃y kêt nê.

6-9E pa ixprĩ hã mẽ amã war amnhĩ jarê ka mẽ inhma. Te wa ixpê Tĩrtũm pur kãm wa ixapênh xw̃nh pyrãk no mẽ kajaja te mẽ apê hpur pyrãk. Na htem hpur karê nhũm hirã nhũm mẽ kamã ahkre ho pa. Ja

pyrà nê na pa pre ixkumrêx mē awÿr ixpa nê mē amã Tĩrtũm kapêr jarênh o ri mē akôt ixpa. Te mē kot pur kãm ahkre ho ri pata pyræk. Tã nhũm Apor ixpãnhã ma mē awÿr pa nê te mē kot pur karêrta pyræk o mē anhĩpêx nê mē amã Tĩrtũm kapêr o mē ajahkre mex o ri pa. Xà na hte pur karêr xwÿnhja rÿ kamã ahkre xwÿnhja tãm tanhmã mēmo hy hto nhũm ra higrôt nê hprêk nê ô? Nà na htem ãm ahkre hpa nhũm arĩ hikwÿ. Nhũm Tĩrtũm tãm tanhmã hyta to nhũm higrôt nê hprêk nê ô. Ja pyrà nê na hte Tĩrtũm mē ho hkra nê tanhmã mē ho nhũm mē amnhĩ kaxyw hkôt hamaxpêr tÿx nê hkôt amnhĩ nhĩpêx mex o pa. Nom mē kãm harênh o pa xwÿnhhta kôt amnhĩ xunhwÿr kêt nê.

Nê na hte pur karêr xwÿnh rÿ kamã ahkre xwÿnhja tãm tanhmã hyta to nê ho htĩr kêt nê. Tĩrtũm pix na hte tanhmã ho nhũm higrôt. Ja pyrà nê na pa hte Tĩrtũm kapêr o mē ajahkre o ri mē akôt ixpa nom pa tanhmã mē ato ka mē apê Tĩrtũm kra nê ri apa hkêt nê. Tanhmã kot pa mē ato ka mē apê hkra? Tapxipix na kot mē pahto hkra kaxyw àhpumunh. Nê tapxipix na hte tanhmã mē pahkrã hto pu mē kãm hprãm xà hkôt amnhĩ nhĩpêx mex o ri papa.

Nê pur karêr xwÿnh mē pur kãm ahkre xwÿnhja wa. Hamê wa àpênh mex jakamã koja hamê wa kot pur kãm àpênh pãnhã amnhĩm ujamÿnh rax nê. Ja pyrà nê kot paj mē ixte Tĩrtũm kapêr o mē ajahkre ho ri mē akôt ixpa xwÿnhjaja nhũm Tĩrtũm nhÿrmã mē ixàpênh pãnhã mē inhmã amnhĩrer mex nê.

Nê te mē ate Tĩrtũm nhõ ixkre pyræk. **10**Nê pa te ixpê Tĩrtũm mã ixkre hã ixàpênh xwÿnh pyræk jakamã na pre Tĩrtũm mē akaxyw tanhmã ixto pa mē amã tanhmã kot amnhĩ nhĩpêx to hã harênh o ri mē akôt ixpa. Te ixte õ ixkre kaxyw ãm xà maati xãm pyræk o mē anhĩpêx. Jao mē amã kapêr jarênh o ri mē akôt ixpa. Mē ate amnhĩ kaxyw hkôt ajamaxpêr nê hkôt amnhĩ xunhwÿr kaxyw. Tã na ka prem hkôt amnhĩ xunhwÿ nhũm ixpãnhã Tĩrtũm kapêr o mē ahkre ho mē pa xwÿnh kwÿjaja mē awÿr mra nê mē amã kapêr jarênh jatur xãm kurê. Nê hprĩ hã ho mē ajahkre ho ri mē akôt pa. Te ho mē kot ixkre krax nhĩpêx pyræk o mē anhĩpêx.

Nê kwa mē ate mē ahkre o mē apa xwÿnhjaja kêr ka mē akatàt kôt mē ahkre mex rãhã ho ri mē hkôt apa.

11Nê Jesus Kris tapxipix na pu htem hkôt amnhĩ xunhwÿ nhũm mē panê mē pahte amnhĩ tomnuj o hapêx. Jakamã te kêp kÿxpê ixkre nhĩmõk ã nõr xà maatita pyræk.

12Nê na htem tõhã ixkre nhĩpêx kaxyw nê pĩ htÿx jakà nê ho hipêx nhũm kritpê mē kãm mex ry nê kuhê. No na htem tõhã nojarêt kãm ixkre hã apê nê pĩ rerek o hipêx nhũm mē kãm mex ry hkêt nê. Koja rôr nhyre hwÿr mra nê mē kêp hapôk nê homnu. Ja pyrà nê na hte Tĩrtũm kapêr o mē ahkre ho ri mē pa xwÿnh kwÿjaja te mē kot katàt kôt pĩ htÿx o ixkre nhĩpêxta pyrà nê katàt kôt mē ahkre ho ri mē hkôt pa. No nhũm

mě hkwỳjaja axtem nẽ te mẽ kot pĩ rerek o ixkre nhĩpêxta pyræk o amnhĩ nhĩpêx nẽ htỳx ri Tĩrtũm kapêr kwỳm ri tanhmã mẽ ahkre hto ho pa. Jao hkwỳm ri amnhĩ nhĩpêx rãhã ho ri pa.

13Nẽ koja mẽhõ pĩ htỳx pix o amnhĩm òrkwỳ nhĩpêx hãmri nhũm mẽmo arĩgro hã tanhmã amnhĩ to nẽ kêp pôr. No ãm hã põja pix xêt pa nhũm kãm hikwỳ xà nẽ òkwa êja arĩ piitã mex nhũm ixkre hpãm axte hã pô janhôr o nyw. No koja pĩ rerek o hipêx nhũm mẽmo arĩgro hã kêp pôr hãmri nẽ piitã kêp kaxàr pa. Ja pyrã nẽ koja nhỹrmã Krisja akupỳn mẽ pahwỳr wrỳ hãmri nẽ mẽ pahte kãm tanhmã amnhĩ nhĩpêx to ho papaja piitã hã mẽ pahpumunh kôt tanhmã mẽ pajarênh to. Koja mẽ pahkwỳjaja mẽ pahte mẽ kot pĩ htỳx o ixkre nhĩpêxta pyrã nẽ Tĩrtũm mã mẽ pahte amnhĩ nhĩpêx mex o mẽ papa xwỳnhjê xàpênh pumu nẽ mẽ pahte amnhĩ to mex xwỳnh ã mẽ pajarê. Hãmri nẽ hpãnhã mẽ kot pĩ rerek o ixkre nhĩpêxta pyrã nẽ mẽ kot kãm amnhĩ nhĩpêx mex kêt xwỳnhjê pumu nẽ mẽ kot amnhĩ to mex kêt xwỳnh hã mẽ harê.

14Nẽ pĩ htỳxja na hte tanhmã amnhĩ to nẽ hpôr no ãm arĩ mex nẽ kuhê nhũm mẽ piitã arĩ mex ã omu. Ja pyrã nẽ koja Krisja mẽ kot kãm tanhmã amnhĩ nhĩpêx mex to ho mẽ pa xwỳnhjê pumu nẽ mẽ kot tanhmã kãm amnhĩ nhĩpêx to hpãnhã mẽ kãm amnhĩre nhũm mẽ piitã mẽ kot amnhĩ to mex ã mẽ omu. 15No pĩ rerekja na hte pôr nẽ kaxàr pa. Ja pyrã nẽ mẽ kot Kris mã amnhĩ nhĩpêx mex hkêt xwỳnhjaja koja Tĩrtũm mẽ kãm amnhĩrer kêt nẽ. Nom arĩ mẽ kêp hkra jakamã koja mẽ arĩ kuri hfĩr tũm nẽ pa. No ãm mẽ kot Tĩrtũm mã amnhĩ nhĩpêx mex kêt jakamã koja mẽ hkwỳjê hkĩnh ã amnhĩm mẽmoj mex kwỳ jamỳnh kêt nẽ. Te mẽhõ nhòrkwỳ kêp hpôr nhũm mẽ hkukrêx kwỳ jamỳnh kêt nẽ ỹ kamã kurũm hapôx pyræk.

16-17E pa mẽ amã mẽmoj jarê. Ra mẽ ate mar tã mãn ka mẽ ra tanhmã amnhĩ to nẽ hã ano hkêt rỳ ko. Nà te mẽ pahpê Tĩrtũm nhòrkwỳ pyræk. Tĩrtũm nhòrkwỳja ò na. Tã mẽ pahpê hkra nhũm Karõ kot mẽ pakaxwỳnh mã gjêx jakamã te mẽ pahpê òrkwỳ pyræk. Jakamã mẽ kot kapêr kwỳm ri mẽ ajahkre o ri mẽ pa xwỳnhjaja te mẽ kot Tĩrtũm nhòrkwỳ grành xwỳnh pyræk. Koja mẽ nhỹrmã amnhĩ xà htỳx kamã hamak o pa.

Mẽ pahte amnhĩ to jarkrar kêt ã mẽ pamã karõ

Wam Korĩt 1.10-25

18Nẽ kot kaj mẽ atõ axàhpumunh tỳx o amnhĩ to jarkrar o ri apa japêr. Kwa mẽ jam anhũre nẽ axte ri ã amnhĩ nhĩpêx anhỹr kêt nẽ. Nẽ te mẽ ate amnhĩ nẽ axàhpumunh tỳx xàja nhãm rênh par pyræk o amnhĩ nhĩpêx. Mẽ paxàhpumunh xàja pika kamã mẽ àhpumunh pix jakamã kêr ka mẽ te amnhĩ nẽ nhãm rênh pyrã nẽ hpãnhã Tĩrtũm xàhpumunh xà hkôt pix mã amnhĩ nhĩpêx o ri apa. 19No pika kamã mẽ àhpumunh

xwÿnhjaja Tĩrtũm noo mã te mẽ hkrã pipãnh nẽ htÿx ri pata pyrãk. Tĩrtũm kapẽr ã kagã htũm kot mẽ harẽnh kot:

Pika ja kamã mẽ àhpumunh tÿx ã mẽ kot amnhĩ to jarkrar
xwÿnhjaja Tĩrtũm noo mã te mẽ kot amnhĩ to hẽx o pa
pyrãk. Anẽ.

20Nẽ mããnẽn mẽ harẽnh kot:

Mẽ kot amnhĩ xàhpumunh tÿx ã amnhĩ to jarkrar o ri mẽ pa
xwÿnhjaja na hte Tĩrtũm mẽ omu nẽ mẽ kot ã amnhĩ
jarẽnh anhÿr kaprÿ hã mẽ harẽ. Anẽ.

21-22Jakamã kwa kêr ka mẽ axte mẽ apê ixkwÿ rÿ mẽ apê Apor kwÿ hã
amnhĩ jarẽnh o ri apa hkêt nẽ. Mẽ apê wa ixkwÿ hkêt kẽnã. Nẽ mẽ apê
nhãm mẽhõ hkwy hkêt. Mẽ pahpiitã mẽ pahpê Kris kwÿ na pu mẽ.

Nẽ kot puj mẽ nhÿrmã pahtyk tã akupÿm pahĩr nẽ Tĩrtũm mẽ Jejus
wa kuri pamex nẽ pahĩr tũm nẽ ri papa. Jakamã kwa mẽ tee ri amnhĩ
kukamã ajamaxpẽr kêt nẽ.

Nẽ jarãhã mẽmoj piitã mẽ panhõõ. Nẽ kormã mẽmoj kot amnhĩrĩt
kêt xwÿnhjaja haxwÿja mẽ panhõ na. ãm mẽmoj piitã mẽ panhõ jakamã
te mẽ pahpê mẽmoj piitã mẽõ pahi pyrãk. 23No mẽ papajaja axtem Kris
kêp mẽ panhõ Pahihti. Nẽ Tĩrtũm kêp Kris nhõ Pahihti.

Tĩrtũm pix kot tanhmã mẽ pajarẽnh to xwÿnh ã harẽnh

Eprẽw 13.17

4 1Nẽ mẽ pajaja mẽ ixpê mẽ anhõ pahi hkêt. ãm mẽ ixte Kris mã
tanhmã amnhĩ nhĩpẽx to ho ixpa xwÿnh pix jakamã Tĩrtũm kormã
kapẽr kwÿ ho amnhĩrĩt kêtja na pa htem mẽ amã ho amnhĩrĩt o ri mẽ
akõt ixpa. Ja kaxyw na pre mẽ ixunhwÿ. 2Na pre Kris tanhmã mẽ inhmã
kapẽr to nẽ mẽ inhmã:

—E kêr ka mẽ ixkapẽr pix o mãn mẽ ahkre ho ri mẽ hkõt apa. Anẽ.

3-4Kumã pix mã ixte amnhĩ nhĩpẽx o ri ixpa jakamã koja tapxipix
ixte kãm amnhĩ nhĩpẽx ã ixpumunh kõt tanhmã ijarẽnh to. Ixte kãm
amnhĩ nhĩpẽx mex ã ijarẽ rÿ ixte kãm amnhĩ nhĩpẽx mex kêt ã ijarẽ. ãm
tapxipix koja tanhmã ijarẽnh to. No koja nhãm mẽhõ rÿ mẽ atõ ã ijarẽnh
anẽ pa ama nẽ ãm ama. Rÿ papam tanhmã kãm ixte amnhĩ nhĩpẽx mex
to hã kãm amnhĩ jarẽnh japêr hãmri nẽ ãm ixtÿx kãm ã amnhĩ nhĩpẽx
anhÿr ã amnhĩ jarẽnh kaprÿ. Pahihti Kris pix kot hprĩ hã mẽ pahte
amnhĩ nhĩpẽx kõt pahpumunh jakamã tapxipix koja tanhmã mẽ
pajarẽnh to.

5Jakamã kwa kêr ka mẽ ri mẽ kot Tĩrtũm mã tanhmã amnhĩ nhĩpẽx
to hã mẽ omunh xà hkõt tanhmã mẽ harẽnh to hkêt nẽ. Koja nhÿrmã
Pahihti Krisja akupÿn mẽ pahwÿr wrÿ nẽ rĩ tãm tanhmã mẽ pahte amnhĩ
nhĩpẽx to hã mẽ pahpumunh xà hkõt tanhmã mẽ pajarẽnh to. Nẽ mẽ kot
hpimxur pẽ tanhmã amnhĩ tomnuj to ho mẽ pa xwÿnhjaja nhũm mẽ

piitã mẽ noo mã mẽ kãm ja ho amnhĩrĩť nhũm mẽ ja hã mẽ omu. Nẽ mẽ pahpiitã mẽ pajamaxpêr xà ho amnhĩrĩť nhũm mẽ piitã hprĩ hã ja hã axpên pumu. Hãmri nhũm Tĩrtũm rĩ kormã mẽ pahte kãm tanhmã amnhĩ nhĩpêx mex to ho pa xwỳnhjê jarê.

6E Jejus kôt ixkwỳjaja. Nà na pa ã mẽ amã Apor mẽ wa amnhĩ jarênh anê. Mẽ ate inhmar nê Tĩrtũm kapêr ã kagà hkôt tanhmã wa ijarênh to kaxyw. Kot kaj mẽ ã amnhĩ nhĩpêx anê hãmri nê ahpỳnhã tanhmã mẽ ixte Kris kapêr jarênh xwỳnhjê jarênh to hkêt nê. Nẽ axpên mã mẽ ijarênh o:

— Nà tãm kot Kris kapêr jarênh mex o kot hkwỳjê jakrenh jakamã kot paj hkôt pix mã mãn ri ixa.

Anhỹr o axpên mã mẽ ixtõ jarênh kêt nê. Kot kaj mẽ ã mẽ ixtõ jarênh anê nê te mẽ ixto jarkrar pyràk o amnhĩ nhĩpêx. 7Kwa mēhõ na pre mẽ amã tanhmã ri mẽ ijarênh to ka mẽ mar xà hkôt ã mẽ ijarênh anê? Nẽ mẽ ixkapêr mex ã mẽ ixkwỳjê jarê nê mẽ ixkapêr mex kêt ã mẽ ixkwỳjê jarê. Nà na ka mẽ ãm amnhĩ krã hkôt ã mẽ ijarênh anê nom Kris xàhpumunh xà ho ã mẽ ijarênh anhỹr kêt nê. ãm mẽ ixte Tĩrtũm kapêr o mẽ ajahkre xwỳnhjaja na pa prem mẽ amã mẽmoj jarê ka mẽ ama nê mẽ inhỹ hã hkôt axàhpumunh mex nê. No amnhĩ krã hkôt mẽ axàhpumunh kêt kênã kot ka kêt mẽ ã ahpỳnhã tanhmã mẽ ixto jarkrar anhỹr to ho ri apa.

8Te mẽ ate Apor mẽ wa ixrom Tĩrtũm kapêr mar par nê hkôt amnhĩ nhĩpêx mex pyràk. Te wa ixrom mẽ ate Jejus nhĩhkõ hã mẽ ho amnhĩptàr pyràk. Hêxta waa nê. Kop apu ãm hãmri mẽ ate ãhkõ hã mẽ ho amnhĩptàr ronhỹx pa ijaxwỳja mẽ apyrà nê ã amnhĩ nhĩpêx anê. Hãmri nê ixkĩnh tỳx kumrêx. 9Nom ja kot anhỹr kêt.

Jejus nhỹ hã mẽ ahkre xwỳnhjê jarênh

Sikũn Korĩť 4.8-10; Eprêw 12.1

Nẽ mẽ ixpê Jejus nhỹ hã mẽ ajahkre ho mẽ ixpa xwỳnhjaja te Tĩrtũmja axtem tanhmã mẽ inhĩpêx to pyràk pa mẽ inhmex kêt nê ixpa. Te mẽ ixte gyw kãm amnhĩ rênh nhũm mẽ kot mẽ ixkamã ôkre kahak pyràk o na htem mẽ inhĩpêx. Jakamã na hte mẽ hkwỳjaja mẽ ixpumu nê mẽ ixkapêr ma nê ãm mẽ inhma nê axpên mã mẽ ijarênh o:

— Tk. Kot mẽ ahkreja mexti hã. Kwa pu mẽ himex ri.

Anhỹr jakamã te ra mẽ ixtyk nê mẽ inhĩkwỹ nhũm mẽ piitã mẽ ixtã htu nê mẽ ixpumunh nê ma pa pyràk o amnhĩ nhĩpêx. Jakamã na htem mẽ ixte mẽ ahkre ma nê ãm kuma nê ma pa. Nom Tĩrtũm kapêr o mẽ wrỳk xwỳnhjaja na htem ja hã mẽ pahpumu nê axpên mã mẽ pajarênh o:

— Kwa mẽ kot Jejus ã mẽ hipêx kati htã nhũm mẽ arĩ hkôt amnhĩ nhĩpêx mex nê aa hkaga hkêt nê. Hêxta waa nê. Nà ãm hãmri na htem ã amnhĩ nhĩpêx anhỹr o pa. Anê.

10Na hte mẽ kot mẽ ixkapër mar xwỳnh kwỳjaja kãm mẽ ixkĩnh kêt nẽ tanhmã mẽ ixto kapër punuj to. No mẽ kajaja nhũm mẽ ã mẽ ato kapër anhỳr kêt nẽ. Na htem mẽ ixkrã pipãnh ã mẽ ijarẽ no mẽ kajaja nhũm mẽ Kris nhỹ hã mẽ axàhpumunh tỳx ã mẽ ajarẽ. Nẽ mẽ ixte Tĩrtũm kapër kôt amnhĩ nhĩpêx mex kêt ã mẽ ijarẽ no mẽ kajaja na htem Tĩrtũm kôt mẽ ate amnhĩ nhĩpêx mex ã mẽ ajarẽ. Nẽ mẽ kot mẽ ixkamã òkre kahak tỳx tã mẽ akamã òkre kahak kêt nẽ mẽ kãm mẽ akapër mar prãm nẽ. 11Na pa htem arĩ Kris ã ixpunuj nẽ ixpa. Nẽ mẽ inhmã prãm nẽ mẽ inhmã kôt nẽ ri ixpa. Nẽ mẽ ixẽ pikaxônhre nẽ ri ixpa. Nhũm htem Kris ã mẽ ixtak rũnh nẽ. Pa mẽ inhõrkwỹ hkêt nẽ nhãm ri ixpa nẽ nhãm ri ixpa. Na pa htem arĩ ã amnhĩ nhĩpêx anhỳr o ri ixpa. 12-13Nẽ ixàpkur xà kaxyw ixàpênh rũnh o ri ixpa. Nhũm hte mẽ kãm Jesus prãm kêt xwỳnhjaja mẽ ijapry ho pa htã pa mẽ amnhĩ kurom mẽ kãm ixkapër mex nẽ mẽ kãm:

—E kê Tĩrtũm mẽ ato mex nẽ ka mẽ amex nẽ apa. Anẽ.

Nẽ mẽ kot mẽ inhĩpêx kati htã pa htem mẽ kutã amnhĩ to htỳx nẽ arĩ mẽ hkôt ixpa. Na htem te mẽ kot ahpunuj nhĩpêx pyrãk o mẽ inhĩpêx nẽ mẽ ixwỳr mrrar kêt nẽ. ã na htem mẽ ixte Jesus nhỹ hã mẽ ahkre o mẽ ixpa xwỳnhjẽ nhĩpêx anẽ.

Pawre te kệp mẽ hpãm pyrãk ã kot amnhĩ jarẽnh

Wam Tesarõn 2.11-12

14-15E Kris kôt ixkwỳjaja. Na pa ã mẽ amã kagà nẽ mẽnh anẽ. Nom mẽ ate inhmar nẽ amnhĩ kamã apijaàm kaxyw kêt. Inhmã mẽ ajapê jakamã na pa ã mẽ amã ixkapër nẽ hã kagà nẽ mẽnh anẽ. Na mẽ ra ohtô nẽ ixpãnhã mẽ awỳr pa nẽ mẽ amã Tĩrtũm kapër o mẽ ajahkre. Nom ixkumrẽx na pa pre mẽ amã kapër jarẽ ka prem inhma nẽ Kris hkôt amnhĩ xunhwỳ nẽ amnhĩ kaxyw hkôt ajamaxpër tỳx nẽ. Jakamã paxipix te ixpê mẽ apãm nhũm te mẽ apê ixkra pyrãk. 16Jakamã kwa mẽ ixte amnhĩ nhĩpêx kôt ixpumu nẽ ixkôt mãn kêt mẽ amnhĩ nhĩpêx o ri apa. 17Ã mẽ ate amnhĩ nhĩpêx anhỳr kaxyw na pa pre ijamaxpër nẽ ma mẽ awỳr Ximotre mẽ. Haxwỳja Kris kôt te kệp ixkra pyrãk. Nẽ inhmã hapêê. Na hte jar Kris mã tanhmã amnhĩ nhĩpêx mex to ho pa. Tã pa pre mẽ awỳr kumẽ. Kojã ma mẽ awỳr mõi nẽ pøj nẽ mẽ amã Kris kapër jarẽnh o ri mẽ akôt pa. Nẽ mẽ amã tanhmã ijarẽnh to nẽ mẽ amã:

—Nà Pawre na hte Jesus Kris jamaxpër kôt hamaxpër o pa. Nẽ kot amnhĩ nhĩpêx kôt amnhĩ nhĩpêx o pa. Nẽ krĩ piitã hkôt mẽ kot urãk nẽ ã amnhĩ nhĩpêx o pa anhỳr kaxyw mẽ ahkre mex o pa. Anẽ.

18Nẽ na xep mẽ akwỳjaja te ra àhpumunh tỳx pyrã nẽ tanhmã ijarẽnh to nẽ ijarẽnh o:

—Pawreja akupỹn mẽ pahwỳr mõi ã amnhĩ jarẽnh tã kojã akupỹn mõi kêt nẽ kãm ga. ãm kapër kati xwỳnh na.

19Anhÿr ã ijarēnh tā koja Tĩrtũm kãm tokyx ma mẽ awÿr inhmõr prãm hã kot pa ma mẽ awÿr inhmõr kurê kumrêx. Hãmri nê pøj nê ixprĩ hã ã mẽ kot ixto kapêr anhÿr xwÿnhhtajê pumu. Nê mẽhõ kot ã mẽ kãm ijarēnh anhÿr xwÿnhhta ã ahkukja. 20Tĩrtũm krajaja na htem hkõt pix mã amnhĩ nhĩpêx jakamã na htem hkõt tanhmã amnhĩ nhĩpêx to hã mẽ omu nê rĩ kormã kêp hkra hã mẽ harê. Tã kot paj nhÿrmã mẽ awÿr pøj nê ã ixto kapêr anhÿr xwÿnhjê pumu nê ixprĩ hã mẽ kot amnhĩ nhĩpêx ã mẽ omu nê rĩ kormã tanhmã mẽ harēnh to. Jao Tĩrtũm nhÿ hã mẽ kot mẽ ajahkre hã mẽ omu rÿ amnhĩ krã hkõt mẽ kot mẽ ajahkre hã mẽ omu nê rĩ kormã tanhmã mẽ harēnh to. 21Jakamã kwa mẽ tokyx ixkutêp tãm amnhĩ nhĩpêx o ri apa. Kêr pa mõi nê mẽ awÿr pøj nê mẽ ate tãm amnhĩ nhĩpêx ã mẽ apumu nê ixkĩnh nê. Nê mẽmoj tã mẽ amã ixàkjêr kêt nê. Nê mẽ amã ixkapêr mex pix o ri mẽ amã ixkapêr. Te mẽ hipêêxà kot hkrajê mã kapêr mex pyræk o mẽ amã ixkapêr mex nê. Hãmri pu mẽ xpêñ pumu nê pahkĩnh nê.

Mêhõ kot tanhmã amnhĩ tomnuj to hã harēnh

Sikũn Korīt 2.5-11

5 1Nê kwa na pa pre tee ri mẽ anhĩõja jarēnh ma nê ixkaprĩ htÿx nê. Na xep hte amnhĩ tomnuj tÿx pê nã puro hã hpijaam kêt o pa. Kwa mẽ pahpê Kris kwÿjjaja mẽ pahte ã amnhĩ nhĩpêx anhÿr kêt nhũm mẽ kot Kris kõt amnhĩ xunhwÿr kêt xwÿnhjaja haxwÿja ã amnhĩ nhĩpêx anhÿr kêt tã nhũm ra mẽ anhĩõja kot Kris kõt amnhĩ xãm tã ã amnhĩ nhĩpêx anê. Kwa ja omnuj tÿx kumrêx. 2Na xep ri ã amnhĩ nhĩpêx anhÿr o pa ka mẽ ja hã omu nê ãm omu nê nê tanhmã kãm nê hkêt nê. Amarĩ hã omunh o ri hkõt apa. Mẽ ate Tĩrtũm kõt axãhpumunh tÿx ã amnhĩ jarēnh tã no ãm ja hã omu nê ãm hã omu nê nê tanhmã kãm nê hkêt nê. Kwa nà. Mẽ tee ri kot ã amnhĩ nhĩpêx anhÿrja ã omu nê akaprĩ nê hkêt wehe. Nê mẽ tokyx amnhĩ nê hano kê mẽ akõt Tĩrtũm mã amnhĩ jarēnh xà hã ixkre hwÿr axte mrrar kêt nê.

3-5Ixte mẽ apê awry htã ã kot amnhĩ nhĩpêx anhÿr ã harēnh ma nê hkukamã tanhmã ijamaxpêr to. Nà ra ixte mẽ awÿr ixpõx ronhÿx pa mẽ ato akuprõ. Pahihti Jejus nhÿ hã mẽ ato akuprõ nê mẽ amã kot amnhĩ tomnuj xwÿnhhta jarê nê mẽ anê hanor kurê kumrêx. Jakamã e kêr ka mẽ mãmri ã amnhĩ nê hipêx anê. Mẽ panhõ Pahihti Jejus nhÿ hã amnhĩ nê hano nê te Satanasti mã rer pyræk kê tee ri ja hã amnhĩ pumu nê tokyx kãm urer japêr. Hãmri nê akupÿm tãm amnhĩ nhĩpêx. Kê nhÿrmã Pahihti akupÿn mẽ pahwÿr wrÿ nhũm ma mẽ pahkõt õ krĩ hwÿr api.

6Mẽ ate Tĩrtũm kapêr jarēnh mar mex ã amnhĩ jarēnh tã kormã amnhĩ nê ã kot amnhĩ nhĩpêx anhÿr xwÿnhhta janor kêt nê. Kwa mẽ tokyx amnhĩ nê hano. Na htem pãwti nhĩpêx kaxyw nê kamã kot ho hikot xà ho hkryre nê kamã kurê nê gaa nê rĩ ho piitã hikot pa. Ja pyrã nê kot ka

mẽ amnhĩ nê kot amnhĩ tomnuj xwỳnhhta janor kêt nê hãmri nê gaa nê ra uràk nê apiitã ã amnhĩ nhĩpêx anhỹr o ri apa.

7Kwa mẽ tokyx amnhĩ nê hano. Kêr ka mẽ arĩ amnhĩ to mex pix o ri axpên kôt apa nê tãm ri amnhĩ nhĩpêx o ri axpên kôt apa. Na pre ra Jejus Kris mẽ pahte amnhĩ to mex o papa kaxyw mẽ panê ty. Mẽ pahpiitã mẽ panê ty. 8Jakamã na pu htem ãm amnhĩ to mex pix o ri papa. Nê tãm amnhĩ nhĩpêx o ri papa. Jao tanhmã amnhĩ tomnuj to ho ri papa hkêt nê.

9Nê wam ixte mẽ awỳr kagà nê mênhta kamã na pa pre mẽ amã:

— Kêr ka mẽ nhãm mẽ kot mênijê kamã hpijaàm kêt o mẽ pa xwỳnhjê hkôt ri apa hkêt nê. ãm ri mẽ hkàx ã apa.

Anhỹr o mẽ amã hã karõ. 10-11Nom na pa pre mẽ piitã ã mẽ nê mẽ akurê anhỹr kêt nê. ãm mẽ kêp Kris kwỳ hã amnhĩ jarênh tã ã ri amnhĩ tomnuj anhỹr xwỳnh pixjaja na pa pre mẽ nê mẽ akurê. Koja mēhõ kêp Kris kôt mẽ pahtõ rỳ mẽ pahtõx ã amnhĩ jarênh tã mẽ kamã hpijaàm kêt o ri pa ka mẽ ja hã omu nê hkôt ri apa hkêt kurê kumrêx.

Nê mẽ kãm nhãm mẽ hkukrêx kĩnh o kãm ho õ hprãm o ri mẽ pa xwỳnhjaja.

Nê sãnti kutã hkõn krã ho rôrõk nê hkrĩ nê kãm mex ã harênh o ri mẽ pa xwỳnhjaja.

Nê mẽ kot axpên to kapêr punuj o ri mẽ pa xwỳnhjaja.

Nê mẽ pipãnh o ri mẽ pa xwỳnhjaja.

Nê axpên pê ri mẽ àhkĩnh o mẽ pa xwỳnhjaja.

Koja mēhõ kêp Kris kwỳ hã amnhĩ jarênh tã ã amnhĩ nhĩpêx anhỹr o ri pa ka mẽ ja hã mẽ omu nê hkôt ri apa hkêt kumrêx. Nê mẽ kutã axàpkur kêt nê. ãm mẽ hkàx ã ri mra.

No mẽ kêp Kris kwỳ hkêt xwỳnhjê nê na pa pre ã mẽ akurê anhỹr kêt nê. Mẽ piitã ã mẽ kot amnhĩ nhĩpêx anhỹr o pa kênã. Na htem axpên kãm hpijaàm kêt o ri pa.

Nê mẽ kãm axpên kukrêx kĩnh o kãm ho õ hprãm o ri pa.

Nê sãnti kutã hkõn krã ho rôrõk nê hkrĩ nê kãm amnhĩ jagrer pê amnhĩ to hwỳr o pa.

Nê mẽ axpên pê àhkĩnh pix o pa.

Kris kwỳ hkêt xwỳnhjaja na htem ã amnhĩ nhĩpêx anhỹr o pa. Tã tanhmã kot ka wem amnhĩ to nê mẽ hkàx ã ri apa? Mẽ piitã ã mẽ kot amnhĩ nhĩpêx anhỹr kênã. Kot puj mẽ nhỹrmã Tĩrtũm nhõ krĩ mex wỳr api nê rĩ kormã mẽ hkàx ã ri papa.

12-13Nê mẽ kêp Kris kwỳ hkêt xwỳnhjaja na pa hte mẽ kot amnhĩ tomnuj ã mẽ omu nê ãm mẽ omu nê tanhmã hã mẽ kãm nê hkêt nê. Tĩrtũm tãm koja nhỹrmã ja hã tanhmã mẽ hipêx to. No koja Kris kôt mẽ pahtõ rỳ mẽ pahtõxjê hõ tanhmã amnhĩ tomnuj to ho pa pu mẽ pahtõ ja hã omu nê nê tanhmã kãm pakapêr to kurê kumrêx. Tĩrtũm kapêr ã kagà htũm kot ja jarênh kot:

Kêr ka mẽ amnhĩ nê Kris kôt akwỳjê hõ kot tanhmã amnhĩ tomnuj to ho pa xwỳnhjê jano. Ǽ harênh kot anhỹr.

Mẽ pahte Kris kwỳjê ho pakapêr kêt

Matêwre 5.38-40

6 1Nê na ka xep htem Kris kôt atõ rỳ atõxjê hõ mẽ ka wa tanhmã axpên tomnuj to nê axtem nê juisti hwỳr axpên to mra. Mẽ apyrà nê kêp Kris kwỳ hkêt tã ka htem ma hwỳr amnhĩ to mra nhũm war axpên tã war ama nê tanhmã war ajarênh to. Kwa mon ka htem axtem nê Ǽ Kris kwỳ hkêt xwỳnhjê hwỳr mẽ amnhĩ to amrar anê? Kêt mẽ Kris kôt anhĩõ hwỳr mãn kêt mẽ amnhĩ to mra nê kumã mãn amnhĩ jarê kê axpên tã war ama nê axpên tã tanhmã war amã kapêr to.

2Ra mẽ ate ja mar tỳx tã hkôt amnhĩ nhĩpêx kêt nê. Mẽmoj Ǽm greire htã ka wa tokyx akupỹm hã tãm axpên xãm kêt nê. Rỳ Kris kôt war atõjê hõ hwỳr wa amnhĩ to atêm nhũm akupỹm tãm axpên tã war axãm kêt nê. Ǽm axtem nê mẽ kêp Kris kôt mẽ atõ hkêt xwỳnhjê hwỳr amnhĩ to mra. Kwa mẽ Ǽ amnhĩ nhĩpêx anhỹr kêt nê. Mẽ pahpê Kris kwỳjaja kot puj mẽ nhỹrmã Kris nhĩhkô hã mẽ kêp hkwỳ hkêt xwỳnhjê tanhmã mẽ harênh to. 3Nê Tĩrtũm kapêr o mẽ wrỳk xwỳnhjaja kot puj mẽ mǼanên nhỹrmã tanhmã mẽ harênh to ho pahkrĩ. Jakamã kwa mǼmrĩ Ǽ mẽ pahte amnhĩ nhĩpêx anhỹrja kukamã akupỹm tanhmã axpên xunhwỳr to ho apa. Mẽmoj tã mẽ atõjê hõ wa kot tanhmã axpên to hã wa omu nê tokyx akupỹm axpên tã wa kãm akapêr kê wa tokyx akupỹm tãm axpên nhĩpêx. Ǽ mẽ kot axpên nhĩpêx anhỹr o paja na kêt mex. 4No na ka xep htem arĩ Kris kôt mẽ akwỳ hkêt xwỳnhjê hwỳr axpên to mra nê mẽ kãm amnhĩ jarê. Kwa mẽ ri Ǽ amnhĩ nhĩpêx anhỹr kêt nê. 5Mẽ tokyx tee ri ja hã amnhĩ pumu nê amnhĩ kamã apijaàm kêt wehe. Xà mẽ akamã Kris kôt mẽ atõjê hõ pixire nê kot tãm akupỹm mẽ axunhwỳr kaxyw amrakati kumrêx? 6Na ka xep htem mẽmoj tã axpu. Kris kôt mẽ atõjê hõ mẽ mẽmoj tã axpu nê ra mẽ kêp Kris kwỳ hkêt xwỳnhjê hwỳr amnhĩ to mra. Kot tãm akupỹm mẽ unhwỳr xwỳnhjê hwỳr amnhĩ to mra.

7Mẽ apijapu ho apa jakamã na ka mẽ amnhĩ tomnuj tỳx nê. HǼmri nê te mẽ apê Kris kwỳ hkêt xwỳnh pyrà nê mẽ hwỳr amnhĩ to mra. Kwa kwǽr Kris kôt anhĩõ mǼmrĩ apê ahkĩ rỳ tanhmã anhĩpêx to. Ka mẽ Ǽm amnhĩ tã omu kê tapxipix tanhmã amnhĩ tomnuj to. 8Ja mex tã mẽ ate Ǽ amnhĩ nhĩpêx anhỹr kêt. Na ka htem axpên pê ahkĩ. Mẽ ate Kris kôt axpên to atõ nê atõx tã axtem nê Ǽ axpên nhĩpêx anê. Te mẽ apijaàm kêt pyràk o amnhĩ nhĩpêx o ri apa. 9-10Mẽ kot tanhmã amnhĩ tomnuj to xwỳnhjaja koja mẽ nhỹrmã ma Tĩrtũm nhõ krĩ mex wỳr àpir kêt nê. Ra mẽ ate ja jarênh mar tỳx.

Mẽmyjê hõ kot nhãm mẽnijê hõ ho amnhĩ kati xwỳnhjaja.

Nê mẽnijê hõ kot nhãm mẽmyjê hõ ho amnhĩ kati xwỳnhjaja.

Ně mēnijaja axtem ně mē kot amnhĩo ho mjēn o ri mē pa
xwỳnhjaja.

Ně mēmyjaja haxwỳja axtem ně amnhĩo ho hprō ho ri mē pa
xwỳnhjaja.

Ně mē àhkĩnh o ri mē pa xwỳnhjaja.

Ně mē kām nhām mē hkukrēx kĩnh o kām ho ō hprām o ri mē pa
xwỳnhjaja.

Ně ri mē pipānh o mē pa xwỳnhjaja.

Ně ri axpēn to kapēr punuj o mē pa xwỳnhjaja.

Ně mē kot amnhĩ to sānti hwỳr o mē pa xwỳnhjaja.

Ā mē kot amnhĩ nhĩpēx anhỳr xwỳnh piitā koja mē Tĩrtũm nhō krĩ hwỳr
àpir kēt nē.

11Kormā mē ate Kris kōt amnhĩ xunhwỳr kēt ri na ka pre mē
akwỳjaja ā amnhĩ nhĩpēx anhỳr o ri apa. Tā amnhĩ kaxyw Jejus kōt
ajamaxpēr ně hkōt amnhĩ xunhwỳ. Hāmri nhũm Tĩrtũm Karō mē Pahihti
Jejus Krisja wa mē anē mē ate amnhĩ tomnuj piitā rēnh pa ně mē apē
Tĩrtũm kra hā mē axunhwỳ ně amnhĩm mē ate amnhĩ to mex xwỳnh ā
mē ajarē.

Mē pahte tām amnhĩ nhĩpēx o papa hā mē pamā karō

Matēwre 5.27; Rōmān 12.1-2; Epes 5.3; Korosē 3.5; Wam Tesarōn 4.1-8

12Ně na ka hte mē akwỳjaja amnhĩ jarēnh o:

—Nà na pa hte pa inhmā tanhmā amnhĩ nhĩpēx to hprām xà hkōt
amnhĩ krā hkōt amnhĩ nhĩpēx o ri ixpa. Anē.

Mē ate ā amnhĩ jarēnh anhỳr tā no ām mē ate amnhĩ jarēnhja mex
kēt. Mēmoj piitā mē pamā mex kēt. Na pu htem pamā hprām xà hkōt
mēmoj to anē ně gaa ně ra ho amnhĩ pyrā ně ho anhỳr pix o papa. Ně
gaa ně kām panhūrēr kēt kumrēx. Jao ra pahpipānh pix o ri papa. Rỳ
paxēx pix o ri papa. Rỳ paxàhkĩnh pix o ri papa. Jakamā kēr pu mē pamā
tanhmā amnhĩ nhĩpēx to hprām xà hkōt tanhmā amnhĩ nhĩpēx to ho
papa hkēt nē. Ām amnhĩ mē amnhĩ kaxyw Jejus mā pajamaxpēr pix nē.

13Ně na htem amnhĩ jarēnh o:

—Nà kot paj inhmā prām ně māmřĩ mēmoj ku. Ně inhmā nhām
mēhō kamā ixpijaàm kēt prām ně māmřĩ ā amnhĩ nhĩpēx anē. Ja tanhmā
inhmā kute hkēt. Anē.

Tā koja nhỹrmā Tĩrtũm mē panhĩja o hapēx pa. Na pre mē pahte
nhām mē kamā pahpijaàm kēt o papa kaxyw mē panhĩpēx kēt nē. Ām
mē pahte mē panhĩpēx xwỳnh maatija mā tanhmā amnhĩ nhĩpēx mex to
ho papa pix kaxyw na pre mē panhĩpēx.

14Ně na pre Pahihtija ty nhũm Tĩrtũm akupỹm ho htĩr. Ja pyrā ně
kot puj mē nhỹrmā mē pajaxwỳja ty nhũm akupỹm mē pahto mē pahťĩr.
Ja kaxyw tapxipix pix na àhpumunh tỳx o àhpumunh tỳx. 15Na pu htem

Kris kôt amnhĩ xunhwỳr kôt pahpê hkwỳ nê te pahpê ĩ pyràk. Jakamã kwa mẽ ja hã anohtỳx nê axte nhãm mẽ hkuprỳjê hwỳr amrar nê mẽ ho amnhĩkati hkêt nê. Tĩrtũm kêp ja omnuj. Te mẽ pahte Kris nhĩ pyràk jakamã kot kaj mẽ ã amnhĩ nhĩpêx anhỳr jao te Kris tãm kot ã amnhĩ nhĩpêx anhỳr o pa pyràk. Kwa ja mex kêt. Xà kot we Krisja ã amnhĩ nhĩpêx anê? Nà koja ã amnhĩ nhĩpêx anhỳr kêt nê. 16Tĩrtũm kapêr ã kagà htũm kot ja jarênh kot:

Kot ka mẽ atõ mênijê hõ ho aprõ nhũm kêp aprõ kumrêx. Hãmri nê te ra war atipxi pyràk o axpên nhĩpêx. Anê.

Ã kot aprõ mẽ wa ajarênh anhỳr jakamã kwa kêr ka mẽ atỳx ri nhãm mẽ hkuprỳjê hwỳr apa hkêt nê. Kot kaj mẽ ã amnhĩ nhĩpêx anê nê Tĩrtũm noo mã te ate aprõ kuhpa hã hkuprỳta o aprõ pyràk. Te wam aprõta kuhpa hã war atipxi pyràk. 17Na pu htem Pahihti Jejus Kris kôt amnhĩ xunhwỳ nhũm amnhĩ tã mẽ pahpumu nê mẽ pamã Karõ gõ nhũm mẽ pamã agjê. Pu mẽ ra Karõja kôt te ra Jejus mẽ wa pahtipxi nê ri papa pyràk o axpên nhĩpêx. Jao Kris jamaxpêr mẽ mẽ pajamaxpêrja te wa kot axpên pyràk. Nê Kris kot amnhĩ nhĩpêx mẽ mẽ pahte amnhĩ nhĩpêxja te kot axpên pyràk.

18Jakamã kwa kêr ka mẽ amnhĩ prõ pix tãnopxar o ri apa. Nê mẽ anijaja amjên pix tãnopxar o ri apa. No mẽ nhãm mêmeyjê ho amnhĩkati ho ri apa hkêt nê. Nê mẽ amyjaja nhãm mênijê ho amnhĩkati ho ri apa hkêt nê. Kot ka mẽ nhãm mẽmoj tanhmã omnuj kute ho anê no ãm amnhĩ nhĩ homnu hkêt nê. Nom kot kaj mẽ nhãm mênijê ho amnhĩkati rỳ nhãm mêmeyjê ho amnhĩkati hãmri nê ra amnhĩ nhĩ homnu hpa. 19Mê panhĩ kamã na hte Tĩrtũm Karõ agjê nê kamã hkrĩ. Tĩrtũm na pre mẽ pahwỳr kurê nhũm mẽ pahkarõ mã agjê pu mẽ te mẽ pahpê òrkwỳ pyràk. Jakamã na pu htem amnhĩ krã hkôt pahtỳx ri mẽmoj tanhmã ho ho papa hkêt nê. ãm Tĩrtũm jamaxpêr xà hkôt pix mã na pu htem tanhmã mẽmoj nhĩpêx to ho papa. 20Na pre ra Jejus mẽ pahte amnhĩ tomnuj pãnhã amnhĩrer kaxyw mẽ pahpiitã mẽ panê ty. Te htyk o amnhĩm mẽ pajaprõr pyràk o mẽ panhĩpêx. Jakamã kwa kêr pu mẽ ãm hkôt pix mã mãn ri amnhĩ nhĩpêx rãhã ho ri papa. Kê mẽ pahkwỳjaja ja hã mẽ pahpumunh kôt Tĩrtũm mã mex o mex ã harênh o ri pa.

Mê mjên mẽ mẽ hprõ wa kot axpên to mex ã mẽ pamã karõ

Epes 5.22; Korosê 3.18; Eprêw 13.4

7 1Nê ota mẽ ate ixwỳr kagà nê mênhta na pre ixwỳr pøj pa omu. Nê kamã mẽ ate mẽ aprõ hã ixkukjêr xwỳnhhta pa kamã harê nê omu. Tã kot paj mẽ amã tanhmã harênh to ka mẽ inhma.

Nà kot ka mẽ amyjê hõ amã aprõ hkêt nê ahte ri apa hprãm nê kam nê aprõ hkêt apa. Ja tanhmã kute hkêt. Nom kêr ka mẽ hkuprỳjê ho presija ho ri apa hkêt nê. 2Na htem tõhã kãm hprõ hprãm kêt nê ri pa

nē gaa nē mē hkuprÿjê hō pumu rÿ mē kēp mē hprōjê hō pumu nē kamā hpjjaam kêt o ri pa. Ja pymaj kēr ka mē amyjaja māmri aprō nē mē anijaja māmri amjên.

3Nē mē anijaja. Koja mē amjên akamā hkurē ka mē māmri kām amnhĩ gō kē mē anĩ. Nē mē amyjaja määnēn. Koja mē aprō mē akamā hkurē ka mē māmri mē anĩ. 4Ām ka amā tanhmā amnhĩ nhĩpêx to hprām xà hkôt pix mā amnhĩ nhĩpêx kêt nē. Määnēn amā aprō kot kām tanhmā amnhĩ nhĩpêx to hprām xà hkôt määnēn hkôt kām amnhĩ nhĩpêx.

5Nē kot kaj mē mēmo arĩgro hã amā Tirtũm mā amnhĩ jarēnh ryy hprām japēr. Hāmri nē aprō mā:

—E kot puj jarāhã axpēn to amnhĩkati hkêt nē. Kot puj ãm Tirtũm pix mā amnhĩ jarēnh o amÿkry. Anē.

Hāmri nē māmri ã amnhĩ nhĩpêx anē. No kwa kēr ka mē ãm ja ho anhÿr o apkati pixi nē kām anhÿre. Nhũm jãã ka mē amā axpēn to amnhĩkati hprām nē māmri tanhmā axpēn nhĩpêx to. No kot kaj mē ã amnhĩ nhĩpêx anhÿr kêt o hã atã apkati xohtō nē gaa nē ra akurē xàj axtem nē Satanasti jamaxpēr o ajamaxpēr. Jao nhãm mēhō ni hwÿr mra nē aprō kuhpa hã kamā akurē ho kamā apijaam kêt. Rÿ nhũm mēnijaja nhãm mēmyjê hō hwÿr mra nē mjên kuhpa hã kamā hkurē ho war axpēn kamā hpjjaam kêt.

6E mē ate ja hã ixkukjêr jakamā na pa ã ixprĩ hã mē amā ja jarēnh anē. Ka mē akwÿjaja amā aprō hprām nē māmri aprō nē ri apa. Nē mē akwÿjaja amā aprō hprām kêt nē māmri aprō hkêt nē ri apa. Nom kot pa paa mē amā mē aprō hã ixamnēnh kêt nē. Ka mē kam amnhĩ krã hkôt ajamaxpēr xà hkôt tanhmā amnhĩ nhĩpêx to. 7Na pa hte ixprō hkêt nē ri ixpa nom inhmã ja mex pa hte ahte ixpa.

Mē mjên kêt nē mē hprō kêt xwÿnhjê jarēnh

Nē kormã mē aprō hkêt xwÿnhjaja. Ka mē ixpyrà nē aprō hkêt nē ri apa ronhÿx inhmã ja mex nē. Na hte mēmy hkwÿjaja hprō kêt nē ri pa nhũm Tirtũm ja hã mē omu nē tanhmã mē ho nhũm mē mex nē ri pa nē mēnijê kamā hkurē ho mē kamā hpjjaam kêt o ri pa hkêt nē. No na hte mē hkwÿjaja hprō hkêt nē ri pa nē gaa nē ra hkurē xàj mēnijê kamā hpjjaam kêt. Ā mē ate amnhĩ nhĩpêx anhÿr pymaj kēr ka mē amā aprō hprām nē māmri aprō. Tirtũm mā ja mex kēnã.



Wam Korĩt 7.1-5

8E mẽ aprõ hkêt nẽ mẽ amjên kêt xwýnhjaja. Nẽ ra mẽ apê mẽ aprõ htyk rỳ mẽ amjên htyk xwýnhjaja. Pa mẽ amã mẽmoj jarẽ. Nà kot kaj mẽ ixpyrà nẽ mẽ aprõ hkêt nẽ ri apa rỳ mẽ amjên kêt nẽ ri apa nhũm ja inhmã mex nẽ. 9No kot ka mẽ atõ ra akurẽ japêr nẽ mãmri aprõ rỳ mãmri amjên. Ja mãñnẽn tanhmã kute hkêt.

Mẽ pahte xypên kaga hkêt ã mẽ pamã karõ

Matêwre 5.31, 19.3-9; Makre 10.2

10E kot paj hpãnhã ra mẽ ate xypên to amjên nẽ xypên to aprõ xwýnhjê mã ixkapêr. Nom kot paj amnhĩ krã hkôt tanhmã ixkapêr to hkêt nẽ. Pahihti Jejus Kris kapêr xà hkôt kot paj mẽ amã ixkapêr. Jakamã e kêr ka mẽ anijaja mẽ amjên kaga hkêt nẽ. 11Nom kot kaj mẽ tanhmã ajamaxpêr to nẽ hkaga japêr hãmri nẽ ahte ri apa nẽ axte nhãm mẽhõ ho amjên kêt nẽ. Rỳ tee ri amnhĩ kukamã ajamaxpêr nẽ mãmri akupým amjênta wýr tẽ nẽ akupým hkôt ri apa. No kêr ka mẽ axte nhãm mẽhõ ho amjên kêt nẽ.

Nẽ ra mẽ amyjaja kêr ka mẽ ajaxwýja ã amnhĩ nhĩpêx anẽ nẽ mẽ aprõ kaga hkêt nẽ. E kêr ka mẽ ã amnhĩ nhĩpêx anhýr o ri apa.

12Nẽ mẽ ate ixwýr kagã mẽnh kamã xypên tã ixkukjêrta kot paj hpãnhã mẽ amã harẽ. Na Pahihti Jejusja ja hã tanhmã inhmã nẽ hkêt nẽ. ãm amnhĩ krã hkôt kot paj mẽ amã tanhmã harẽnh to ka mẽ inhma.

Ka mẽ amyjê hõ ra Kris kôt amnhĩ xãm nom nhũm aprõ kormã hkôt amnhĩ xãm kêt japêr. Nom koja kãm arĩ ri akôt pa hprãm ka hkaga hkêt nẽ. Kê arĩ ri akôt pa. 13Nẽ mẽ anijaja. Ka mẽ ajaxwýja ra apê Kris kwý hã ri apa nhũm amjên kêt hwý hkêt tã arĩ ri akôt pa hprãm nẽ arĩ ri akôt pa ka hkaga hkêt nẽ. 14Kêp Kris kwý hkêt tã koja akôt Kris kwýjê hkôt ri pa. Rỳ mẽ aprõ kêt Kris kwý hkêt tã koja akôt Kris kwýjê hkôt ri pa. Jao Tirtúm kapêr mar o pa nẽ gaa nẽ apyrã nẽ hkôt amnhĩ xãm japêr. Nẽ mẽ akra kêt Kris kwý hkêt xwýnhjaja haxwýja mẽ akôt Kris kwýjê hkôt ri pa nẽ Tirtúm kapêr mar o pa nẽ gaa nẽ akôt Jejus kôt amnhĩ xunhwýr japêr.

15Nom koja aprõ kêt Kris kwý hkêt ã kãm akaga hprãm nẽ rĩ tãm mãmri akaga. Rỳ amjên kêt Kris kwý hkêt ã kãm akaga hprãm nẽ rĩ tãm mãmri akaga. Kêr ka mẽ kot akaga nê tee ri kãm tanhmã akapêr to hkêt nẽ. Kwãr mãmri akaga ka ahte ajamakêtkati nẽ axãmnhix ri apa. Mẽ pajamakêtkati nẽ mẽ pamex nẽ ri papaja na Tirtúm kãm hprãm.

16No koja amjên kêt Kris kwý hkêt tã kãm mẽ akaga hprãm kêt nẽ ka mẽ hkaga hkêt nẽ. Rỳ aprõ kêt Kris kwý hkêt tã ka mẽ kam hkaga hkêt nẽ. Koja arĩ ate amnhĩ nhĩpêx ã apumunh o ri akôt pa nẽ gaa nẽ rĩ apyrã nẽ Kris kôt amnhĩ xãm japêr. 17Jakamã kot ka mẽ aprõ rỳ amjên ra Kris kôt ahte amnhĩ xãm. Hãmri nẽ wa arĩ ri xypên kôt ri apa ho apa. Na pa hte krĩ piitã hkôt Jejus kôt mẽ pahkwýjê mã ã ixujarênh anhýr o ri ixpa. Tã kêr ka mẽ ã amnhĩ nhĩpêx anhýr o ri apa.

Kris kôt amnhĩ xunhwÿr kêt ri tanhmã mẽ pakute hã mẽ pajarênh

18Ja pyrã nê kot kaj mẽ ra amy kwrÿt kà jakàr japêr. Tã ra Kris kôt amnhĩ xãm nê arĩ arãhã ri apa. Rÿ amnhĩ jakàr kêt rãhã hkôt amnhĩ xãm japêr nê arĩ arãhã ri apa. Mo kaxyw kot ka kêt amnhĩ jakà? 19Tĩrtũm na hte mẽ pahte amnhĩ my kwrÿt kà jakàr ã mẽ pahpumunh kôt tanhmã mẽ pajarênh to hkêt nê. Rÿ mẽ pahte amnhĩ jakàr kêt ã mẽ pahpumunh kôt mããnên tanhmã mẽ pajarênh to hkêt nê. ãm mẽ pahte hkôt amnhĩ nhĩpêx pix ã mẽ pahpumunh kôt na hte tanhmã mẽ pajarênh to. 20Jakamã kêr pu mẽ pahte Kris kôt amnhĩ xunhwÿr kêt ri tanhmã mẽ pakuteja arĩ rãhã ri papa. 21Ka mẽ akwÿjaja ate nhãm mẽ kãm mẽ axapênh o apa htã Jejus kôt amnhĩ xunhwÿ. Tã kêr ka mẽ mãmrĩ mẽ kãm axapênh o ri apa. Nom koja anhõ patrãwja amnhĩ nê mẽ ajano ka mẽ mãmrĩ ma mra nê amnhĩ mã tanhmã axapênh to ho ri apa.

22Nê koja mẽhõ Kris kôt amnhĩ xãm. Tanhmãn kêp mẽ õ patrãw rÿ kot mẽ kãm mẽ apênh xwÿnhjê hõ. Tã Kris kôt amnhĩ xãm hãmri nê arĩ amnhĩ nhĩpêx tũm kôt ri amnhĩ nhĩpêx o pa hkêt nê. Ra Kris kôt amnhĩ nhĩpêx nyw o amnhĩ nhĩpêx o pa. Jao ra tanhmã amnhĩ tomnuj to hkêt nê. Te kot õ patrãw punuj kaga nê hpãnhã õ patrãw mex kapêr kôt amnhĩ nhĩpêx pix o pa pyrãk.

23Na pre Jejus mẽ pahte amnhĩ tomnuj piitã hpãnhã amnhĩrer kaxyw mẽ panê ty. Te htyk o kot amnhĩm mẽ pajaprõr pyrãk o mẽ panhĩpêx. Jakamã kwa kêr ka mẽ jar mẽ anhõ patrãw kôt pix mã amnhĩ nhĩpêx o ri apa hkêt nê. Mẽ mããnên Tĩrtũm kapêr kôt amnhĩ nhĩpêx o ri apa. 24Jakamã kêr pu mẽ pahte Kris kôt amnhĩ xunhwÿr kêt ri tanhmã mẽ pakuteta pu mẽ arĩ rãhã ri hã papa.

Ra mẽ pahte amnhĩ jakà rÿ mẽ pahte amnhĩ jakàr kêt.

Rÿ ra mẽ pahte nhãm mẽhõ mã paxapênh o papa rÿ amnhĩ mã paxapênh o papa.

Rÿ ra mẽ pahprõ nê ri papa rÿ mẽ pahprõ hkêt nê ri papa.

Pu mẽ pahte Kris kôt amnhĩ xunhwÿr kêt ri tanhmã mẽ pakuteta ãm arĩ rãhã hã ri papa. Jao Tĩrtũm kãm hprãm xà kôt pix mã amnhĩ nhĩpêx o ri papa.

Mẽ hprõ nê mẽ mjên kêt xwÿnhjê jarênh

Matêwre 19.10-12

25Nê mẽ ate ixwÿr kagã mênhta kamã na ka mẽ mããnên kormã mẽ hprõ hkêt xwÿnhjê hã ixkukja. Tã kot paj mẽ amã tanhmã mẽ harênh to. Nom Pahihti Jejus Kris na pre ja hã tanhmã inhmã nê hkêt nê. ãm pa kot paj ãm amnhĩ krã hkôt tanhmã hã mẽ amã ixkapêr to. Na pre Pahihti mẽ akaxyw tanhmã ixkrã hto pa hte ÿ hã tanhmã mẽ amã mẽmoj tã karõ hto ho ri ixpa. Jakamã e mẽ inhma nê inhmar tÿx nê.

26-27 Nà ra mẽ kãm mẽ pahkurê xwỳnhjaja Kris ã mẽ pahtomnuj o pa jakamã koja ixpyrà nê mẽ hprõ hkêt rãhã mẽ pa xwỳnhjaja ahte ri pa nhũm ja mex nê. Nhũm mẽ umaj amnhĩ pix tãnopxar o ri pa. Nê mẽ aprõ xwỳnhjaja kêr ka mẽ kãm mẽ pahkurê xwỳnhjê pymaj mẽ aprõ kaga hkêt nê. ãm pix tãnopxar o ri apa.

28 Tã kot ka mẽ atõ amã aprõ hprãm nê mãmrĩ aprõ. Ja mããnên tanhmã ixpê kute hkêt. Nê mẽ anijaja mẽ amã amjên prãm nê mãmrĩ amjên. Ja tanhmã ixpê kute hkêt. Nom kot ka mẽ akwỳjê pyrà nê aprõ rỳ amjên. Nê gaa nê akra. Hãmri nê tanhmã mẽmoj kute kamã ka tee ri wa mẽ amnhĩ kukamã ri ajamaxpêr o ri apa. Ja pymaj na pa hte mẽ amjên kêt nê mẽ aprõ hkêt ã mẽ amã awjarê.

29 Nê Kris tokyx akupỳn mẽ pahwỳr wrỳk kaxyw jakamã kwa ra mẽ aprõ nê apa xwỳnhjaja. Kêr ka mẽ amnhĩ prõ nê amnhĩ kra pix kukamã ajamaxpêr o ri apa hkêt nê. Te ho mẽ hprõ hkêt nê mẽ pa xwỳnhjaja kot amnhĩ nhĩpêx pyrà nê Kris kutêp kumrêx mã ajamaxpêr pê tanhmã amnhĩ nhĩpêx to ho apa nê arĩ kormã aprõ nê akrajê ho hapu nê tanhmã mẽ kutã anojarê to ho apa.

30 Kris kot tokyx akupỳn mẽ pahwỳr wrỳk jakamã kwa mẽ ri amỳr o ri mẽ apa xwỳnhjaja. Kêr ka mẽ kutêp tee ri amnhĩ kaprĩ pix mã ajamaxpêr o akaprĩ nê ri apa hkêt nê. Nê mẽ akĩnh nê ri apikunhar o ri mẽ apa xwỳnhjaja kêr ka mẽ Kris kutêp amnhĩ kĩnh xà pix mã ajamaxpêr o ri apa hkêt nê. Nê ri mẽ axujaprõr o ri mẽ apa xwỳnhjaja kêr ka mẽ Kris kutêp tanhmã axujaprõr to pix kukamã ri ajamaxpêr kêt nê. 31 Nê mẽ apê mẽ ate mẽmoj to wênê ho ri mẽ apa xwỳnhjaja Kris kutêp ãm ri mẽ akukrêx pix kukamã ajamaxpêr kêt nê. Koja mẽ panhõ pika piitã hkôt mẽ pakukrêxja nê mẽmoj piitã arĩ rãhã hkêt nê. 32 Jakamã kot kaj mẽ akukrêx pix kukamã ajamaxpêr nê amnhĩ pix kukamã ajamaxpêr nhũm ja apê omnuj nê. Kris kwỳ pê mẽ hprõ hkêt xwỳnhjaja na htem Pahihti Jejus Kris kãm hprãm xà hkôt pix mã kãm tanhmã amnhĩ nhĩpêx to ho ri pa hprãm. Jao ãm pix kutã tanhmã nojarê to rãhã ho ri pa. 33 No kêt ra mẽ hprõ nê mẽ pa xwỳnhjaja na htem hprõ pix kukamã kãm tanhmã amnhĩ nhĩpêx to ho pa hprãm. Jao pix kukamã amnhĩ nhĩpêx o pa. 34 Mẽ kãm Tirtũm kapêr kôt amnhĩ nhĩpêx prãm tã no ãm mããnên kãm hprõ kapêr mar nê hkôt kãm tanhmã amnhĩ nhĩpêx to ho ri pa hprãm.

Nê mẽnijaja kot Jejus kôt amnhĩ nhĩpêx nê kormã mẽ mjên kêt xwỳnhjaja na htem kãm Pahihti Jejus kãm hprãm xà hkôt pix mã kãm tanhmã amnhĩ nhĩpêx to ho pa hprãm. Nê ãm pix mã hamaxpêr o pa. Nê ãm hkôt pix mã amnhĩ nhĩpêx o pa. No ra mẽ mjên nê mẽ pa xwỳnhjaja na htem arĩ ri mẽ hikukrêx tãnopxar o pa. Nê mjên mã hprãm xà hkôt tanhmã kãm amnhĩ nhĩpêx to ho pa. Jakamã tanhmã kot wem amnhĩ to nê Jejus kãm prãm xà hkôt pix mã amnhĩ nhĩpêx o pa?

35E ixte mẽ ato ajuta kaxyw na pa ã mẽ amã ixkapêr anê. Jakamã na pa mẽ ate mẽhõ ho aprõ nê mẽ akurê hkêt nê. ãm mẽ ate Tirtũm kapêr kõt pix mã amnhĩ nhĩpêx o apa hã na pa mẽ amã karõ. Mẽ ate kumã pix mã ajamaxpêr o ri apa pix kaxyw. Nê kumã pix mã tanhmã ri amnhĩ nhĩpêx to ho apa kaxyw na pa mẽ amã tanhmã mẽmoj tã karõ hto.

Mẽ kot mẽ hprõ mã xwỳnhjê jarênh

36E kot paj hpãnhã mẽ ate mẽhõ ho aprõ mã xwỳnhjê mã ixkapêr ka mẽ ixkapêr ma. Nà kot kaj mẽ atõ ate ho aprõ mã xwỳnhhta kukamã ajamaxpêr o:

— Nà kot paj ho ixprõ hkêt nê. Inhmã hkĩnh tỳx tã kot paj ho ixprõ hkêt nê. Kot paj ãm ixprõ hkêt nê ahte ri ixpa. Anê.

Hãmri nê ahte ri apa. Tã ra tee amnhĩ kurê kamã ama nê ajamaxpêr o:

— Hêxta waa nê. Mon pa pre ho ixprõ hkêt nê ahte ri ixpa? Anê.

Hãmri nê mãmrĩ ma hwỳr tẽ nê kãm amnhĩ jarê nê ho aprõ. Ra ate aprõ hkêt nê ahte ri apa hã amnhĩ jarênh tã no ãm mãmrĩ ho aprõ. Ja tanhmã kute hkêt kênã. 37Nom kot kaj ho aprõ hkêt ã amnhĩ jarê nê mããnên akurê hkêt nê ri apa. Hãmri nê mãmrĩ ho aprõ hkêt nê ri ahte ri apa. Ja mããnên tanhmã kute hkêt. 38Kot ka ho aprõ nê war amex nê apa. Rỳ kot ka ho aprõ kêt nê mããnên amex kumrêx nê ri apa. Ja na mex o ate mẽhõ ho aprõ nê ho apata jakrenh.

Mẽ kêp mẽ mjên tyk xwỳnhjê jarênh

39E kot paj hpãnhã mẽ apê mẽ amjên tyk xwỳnhjê mã ixkapêr. Nà koja amjên arĩ htĩr ri ka ãm hkõt pix mã axkamẽ nê hkaga hkêt nê. No koja nhỹrmã apê ty hãmri ka tee ri amnhĩ kukamã ajamaxpêr hãmri nê amã axte amjên prãm nê mãmrĩ axte amjên. Nom kwa kêr ka mẽ amnhĩ pyrã nê Kris kõt akwỳjê hõ pix o amjên. No mamrĩ nhãm mẽhõ ho amjên kêt nê. 40No kot ka mẽ axte amjên kêt nê ahte ri apa hãmri nê axãmnhĩx ri ajamakêtkati nê apa. No na pa ãm amnhĩ krã hkõt mẽ amã ã ja jarênh anê. Mãn Tirtũm Karõ mã mããnên ja mex nê.

Sãnti hã mẽ apkur xà jarênh

Rõmãn 14.13-23; Wam Korõt 10.14-22, 13.2; Karatas 5.13;

Wam Pêtre 4.8; Wam Juãw 3.18

8 1Nê mẽ ate ixwỳr kagã mênhta kamã na ka prem mããnên sãnti hã mẽ apkur xà hã ixkukja. Tã kot paj mẽ amã tanhmã ja jarênh to ka mẽ inhma.

Nà na hte Kris kõt pahkwỳ hkêt xwỳnhjaja mẽmo karõ ho sãnti nhĩpêx mã mẽõ hkwỳ nhĩpêx nê hwỳr o mra. Hãmri nê hpar pê haxwỳ nê kutã hkõn krã ho rõrõk nê hkrĩ nê kãm mex o mex ã harê nê kãm amnhĩ jagrer pê amnhĩ to kuwỳ. Hãmri nê kãm amnhĩ jagrer pa nê

akupỹm amnhĩm mẽõta jamỳ nẽ ma o mra nẽ hkwỳjê mã ho wẽnê. Na htem ã amnhĩ nhĩpêx anhỹr o pa. Tã na ka prem kagãta kamã mẽ ate mẽ kêp mẽõ japrõr nẽ hkur ã ixkukja. Nã ra mẽ ate sãnti pumunh mex. ãm mẽ kot ãhkra pix o hipêx ã omunh mex jakamã na pu htem hã pamã mẽ apkur xãta hkur prãm nẽ mãmrĩ paxãmnhĩx ri kuku. Ja tanhmã Tĩrtũm pê kute hkêt. Ra mẽ pahte ja pumunh mex. Tã nom kwa kêr pu mẽ ja hã Kris kõt mẽ pahkwỳjê mã amnhĩ to jarkrar o ri papa hkêt nẽ. Nẽ ja hã mẽ kurom paxãhpumunh tỳx ã mẽ kãm amnhĩ to jarkrar hkêt nẽ. Kot pu mẽ ã amnhĩ nhĩpêx anhỹr o mẽ hamaxpêr o hihtỳx hkêt nẽ. Kêr pu mẽ ãm mẽ kamã paxukapřĩ pê tanhmã mẽ ho mex to ho papa. Nẽ Kris kõt mẽ hamaxpêr o hihtỳx o papa. ã mẽ pa hte amnhĩ nhĩpêxja na Tĩrtũm kãm hprãm. 2No koja mẽhõ mẽmoj pumunh tỳx ã amnhĩ to jarkrar o ri pa nẽ ãm tee ri ã amnhĩ jarênh anhỹr kapřy. 3No koja mẽhõ ãhpumunh tỳx kêt tã kãm Tĩrtũm kĩnh nhũm amnhĩ tã omu nẽ kãm hapê nẽ ho hkra. Kêt ja na mex o mex.

4E kot paj ixpřĩ hã mẽ amã tanhmã sãnti hã mẽ apkur xãta jarênh to ka mẽ inhma. Nã Mẽpahpãmja pixii. Axtem hõ hkêt. Nom mẽ kot sãnti nhĩpêxta ãm mẽ kot ãhkra o hipêx jakamã htĩr kêt. Ra mẽ pahte ja jarênh mar tỳx nẽ omunh mex. 5Na htem ohtõ nẽ ri sãnti kêp Mẽpahpãm ã hkamnhĩx o pa. Kaxkwa kamã mẽmo karõ nhĩpêxja nẽ pika kamã mẽmo karõ nhĩpêxja nhũm htem kêp Mẽpahpãm ã harênh ho pa. Nom ja kot anhỹr kêt. 6Mẽpahpãmja ãm pixi ho pixi mex. Mẽ panhõ Tĩrtũmja. Tãm na pre mẽmoj piitã ho kator pa. Jakamã na pu htem kapêr kõt pix mã amnhĩ nhĩpêx o ri papa.

Nẽ mẽ panhõ Pahihti haxwỳja pixii. Pahihti Jejus Krisja. Na pre Tĩrtũm nhĩhkõ hã mẽmoj piitã ho kator pa. Na pu htem ja hã omunh xã hkõt ri pamex nẽ ri papa. Ra mẽ pahte ja jarênh mar tỳx nẽ omunh mex. Jakamã na pu htem paxãmnhĩx ri mẽmoj piitã hkur o papa. Tĩrtũm kot mẽmoj piitã ho kator par kênã. 7Tã no ãm ham mẽ kot Kris kõt amnhĩ xunhwỳr xwỳnhjaja na htem mẽ pahkĩnhã kãm sãnti hã mẽ apkur xã hkur puma nẽ. Ham mẽ kot sãnti kaga nẽ amnhĩ kaxyw Kris kõt amnhĩ xunhwỳr jakamã kormã Tĩrtũm kõt amnhĩ nhĩpêx tohtuj anẽ. Jakamã na htem tee ri sãnti hã mẽ apkur xãja pumu nẽ hamaxpêr o:

—Nã kot paj ja kur kêt nẽ. Kot paj anẽ nhũm apu Tĩrtũmja pê ja omnuj nẽ. Anẽ.

8Nom na kêt hte Tĩrtũm mẽ paxãpkur xã hã mẽ pahpumunh kõt mẽ pahte amnhĩ to mex xwỳnh ã mẽ pajarênh kêt nẽ. Kot puj mẽ mẽmoj ku rỳ mẽmoj kur kêt nẽ nhũm ja hã mẽ pahpumunh kõt tanhmã mẽ pamex ã pajarênh to hkêt nẽ. Jakamã na pu htem mãmrĩ paxãmnhĩx ri mẽmoj tã mẽ apkur xã hkur o papa nẽ tanhmã amnhĩ to hkêt nẽ. 9-10Nom kwa mẽ okora. Kêr ka mẽ sãnti mã amnhĩ jarênh xã hã ixkre hwỳr agjêx nẽ kamã axãpkur hkêt nẽ. Kot kaj mẽ atõ ã

amnhĩ nhĩpêx anê nhũm mēhō kormã kot Kris kôt amnhĩ xãm tohtuj anhỹr xwỳnhja ja hã mē apumu nē tee ri hamaxpêr. Axàhpumunh tỳx ã ate amnhĩ jarēnh tã sãnti nhōrkwỳ kamã axàpkur o nhỹ nhũm ja hã apumu nē tanhmã amnhĩ nhĩpêx to wehe? Koja ja kêp omnuj tã apyrà nē tē nē axà nē mē kutã apku. Hãmri nē apkur pa nē tee ri amnhĩ kukamã hamaxpêr o:

—Hêxta waa nē. Kwa mon pa axtem nē ri ã mēmojja kur anê? Nà na pa anê nē ra amnhĩ tomnuj tỳx nē. Anê.

Hãmri nē hkaprĩ nē pa. **11**Ate axàhpumunh tỳx ã amnhĩ jarēnh tã amnhĩ kôt atōja mex kukamã ajamaxpêr kêt nē. Kris ra mỳrapê htyk tã nhũm ã ate sãnti hã mēō hkur ã apumu nē tee ri hamaxpêr o Jesus hkôt amnhĩ nhĩpêx mex kêt nē. **12**Kormã kot Kris kôt amnhĩ xãm tỳx kêt tã tee ri ja hã mē apumu nē hamaxpêr mex kêt nē. Jakamã ka Kris noo mã amnhĩ tomnuj nē. **13**Tã ã ixte Kris kôt ixkwỳjê nhĩpêx anhỹr pymaj koja ixtōjê hō kãm mēmoj kur pyna nē. Nē htỳx ho Tĩrtũm kêp omnuj ã hkamnhĩx. Pa ja hã omu nē ijaxwỳja axte hkur kêt nē. Ixte mex ã omunh tã no ãm kot tee ri ja hã ixpumunh nē hamaxpêr o:

—Kwa Tĩrtũm kêp ja mex kêt tã nhũm Pawreja ri kuku. Jakamã kot paj ijaxwỳja uràk nē kuku. Omnuj tãã.

Anhỹr o hamaxpêr pymaj kot paj uràk nē mēmota kur kêt nē. Na pa hte ã Kris kôt ixtōjê mex kukamã ri ijamaxpêr anhỹr o ixpa.

Pawre kot amarĩ Tĩrtũm kapêr o mē ahkre hã amnhĩ jarēnh

Atre 9.1-18, 20.33-35; Sikũn Korĩt 11.7-9

9 **1**Nē ixte Jesus nhỹ hã mē ahkre ho mē pa xwỳnhjê hō jakamã na pa hte Tĩrtũm kapêr o mē ajahkre ho ri ixpa. Na pa pre inhno ho mē panhō Pahihti Jesus pumu nē mē amã harēnh o ri mē akôt ixpa ka prem inhma nē hkôt amnhĩ xunhwỳ. **2**Mē hkwỳjaja kot axpên mã ixpê Jesus nhỹ hã mē ahkre xwỳnh kêt ã ijarēnh tã mē kajaja mē ate ja hã ixpumunh mex. Ixte mē amã mē ujarēnh mexja jarēnh nhũm mē ate mar nē hkôt amnhĩ xunhwỳrja kukwak ri na ka mē apê Jesus kwỳy. **3**Jakamã koja mē atã ixto kapêr japêr kot paj ã mē kãm mē ajarēnh anê. **4**Nē ixte Jesus nhỹ hã kapêr jahkre o ixpa xwỳnh jakamã kot paj inhmã Kris kwỳjê kutã amarĩ ixàpkur prãm nē mãmri mē kutã apku. Ja tanhmã kute hkêt tã kot paj ã amnhĩ nhĩpêx anhỹr kêt nē. Kot paj ixàpkur kaxyw nē amnhĩ pãnhã amnhĩre nē rĩ kormã apku. Na pa hte ã amnhĩ nhĩpêx anhỹr o ri mē akôt ixpa. **5**Rỳ kot pa ixkwỳjê pyrà nē inhmã Kris kôt ixkwỳjê hō ho ixprō hprãm nē mãmri ho ixprō. Nē wa ma krĩ piitã hkôt Kris kwỳjê kukwak ri ixàpkur o ixpa hprãm nē wa mãmri ã amnhĩ nhĩpêx anhỹr o ixpa. Ja mex kênã. Na hte ã Simãw Pêtre mē Jesus tō kot hapujaja amnhĩ nhĩpêx anhỹr o pa nhũm ja tanhmã kêp kute hkêt. No ãm mē hkĩnhã ixprō hkêt na pa hte ri ixpa.

6Nē ixkwỳjaja na htem apkur xà hpānhã àpēnh o pa hkêt nē. Na htem Jejus nhỹ hã kapēr jarēnh o ri pa nhũm hte Jejus kwỳjaja mē kām mē apkur xà gō nhũm mē amarĩ hkur o pa. Tã no pa na pa hte Panāpe mē wa ã amnhĩ nhĩpêx anhỹr kêt nē. Na pa hte wa mry kà ho ixkre nhĩpêx nē mē kām ho wēnê nē hpānhã amnhĩm awjaprô. Na pa hte wa ã amnhĩ pa kukwak ri ixujaprô nē ho ixàpkur o ri ixpa anē.

7Mē kām pur kām harôj jamýnh o mē pa xwýnhjaja na htem amarĩ hkwỳ jamý nē ho apkur o pa. Nē motre jamār o mē pa xwýnhjaja haxwỳja amarĩ hkà kagô janê nē ho hkôm o pa. Nē pôristijaja na hte mē õ pahija mē àpēnh pānhã mē kām amnhĩrer o pa. Jajê piitã na htem mē àpēnh pānhã mē kām amnhĩrer o pa. Ja pyrã nē te ixpê mē amã ixàpēnh o ixpa xwýnh pyrãk jakamã ixte mē ajahkreta pānhã kot ka mē inhmã inhô ho apa nhũm ja määnēn mex nē. 8No ãm papxipix na pa hte ja mex ã harēnh kêt nē. Tĩrtũm kapēr ã kagã htũm haxwỳja kot ja mex ã harēnh. 9Kamã na pre finat Mojesja Tĩrtũm nhỹ hã harēnh kot:

Koja akrit amã àpēnh o pa ka omu nē ho mex nē. Kām õ mex nē. Anhỹr o kot harēnh. Xà na pre Tĩrtũmja ãm mē pahkrit pix kukamã ukaprĩ nē ã harēnh anē nã? Nã kot anhỹr kêt. 10Määnēn mē pahpê panhĩ kaxyw na pre ã ja jarēnh anē. Mē pahte mē hpur kām paxãhkre xwýnhjaja nē mē pahte kamã paxujamýnh o papa xwýnhjaja. Jajê kaxyw mē pahte pur kukwak ri amarĩ paxàpkur o ri papa kaxyw ã pre ã ja jarēnh anē. 11Tã ja pyrã nē na pa hte mē awýr mō nē mē amã Tĩrtũm kapēr jarēnh o ri mē akôt ixpa. Nē mē akôt ho mē ajahkre ho ri ixpa ka htem inhmã ixàpēnhã pānhã amnhĩrer kêt nē. Ixkwỳjaja kot Tĩrtũm kapēr o mē ajahkre hpānhã mē ate mē kām amnhĩrer tã pa inhmã amnhĩrer kêt nē. Na pa pre mē ajahkreta pānhã mēmoj tã mē awýr kêt nē. ãm nhãm ixàpēnh õta kukwak ri na pa hte ixàpkur o ri ixpa.

12Nē na hte mē ixkwỳjaja mē awýr mra nē Tĩrtũm kapēr o mē ajahkre o ri mē akôt pa. Hãmri nē hpānhã mē apkur xà hã mē awý ka mē kām mēmoj gō. No kêt pa na pa hte mē urãk nē ixàpkur xà hã mē awýr kêt nē. Kot pa apu hã mē awý ka mē tanhmã ixto akapēr to nē axpēn mã ijarēnh o:

—Pēr ãm mē pahte kām amnhĩrer pix kaxyw na hte Pawre mē pahwýr mra nē mē pamã Jejus Kris kot tanhmã mē panê amnhĩ nhĩpêx to hã harēnh o pa. Pēr ãm apkur xà pix prãm xaj ã kot mē pamã ujarēnh anhỹr o pa. Jakamã kot puj mē kuma nē ãm kuma.

Anhỹr o axpēn mã ijarēnh pymaj na pa hte mē ajahkre hpānhã mēmoj tã mē awýr kêt nē. Na pa hte ãm mry kà ho ixkre nhĩpêx nē ho wēnê nē ja pix kukwak ri ixàpkur o ri ixpa. Nē amarĩ ri mē ajahkre ho ri mē akôt ixpa.

13Nē Tĩrtũm mã amnhĩ jarēnh xà hã ixkre kamã mē àpēnh xwýnhjaja na htem hwýr mē mrrar xwýnhjaja mē àpēnh pānhã mē kām amnhĩre.

Ně mẽ kot mẽ kãm Tĩrtũm mã mẽmoj nhõr o kuhê xwỳnhjaja na htem mãânèn mẽ àpênh pãnhã mẽ kãm amnhĩre. 14Ně Pahihti Krisja na pre ja hã mẽ pakukamã pahtã karõ kot:

— Kêr ka mẽ kot tanhmã mẽ amã ijarênh to ho ri mẽ pa xwỳnhjê mã amnhĩrer o ri apa. Aně.

15Tã no na pa hte aa mẽmoj tã ixàhwỳr kêt nê. Ně mẽ ate inhmã amnhĩrer kaxyw pa mẽ amã ja jarênh kêt nê. Aa ixte mẽmoj tã mẽ awỳr kêt. Kot paj apu aně nê ixpijaam nê. Rỳ kot pa apu aně nê mẽ akukwak ri ixàpkur o ri ixpa hãmri nhũm mẽ akwỳjaja ja hã ixpumu nê hã ijarênh o:

— Tk. Na hte amarĩ mẽ pajahkre o ri pa hkêt nê. Ām mẽ apkur xà pix prãm xàj na hte ã mẽ pajahkre ho pa aně. Aně.

Jakamã na pa hte mẽmoj tã mẽ awỳr kêt nê. 16Ixte mẽ amã mẽ ujarênh mexja jarênh o ri ixpa htã na pa hte ja hã amnhĩ to jarkrar o ri ixpa hkêt nê. Pahihti Jejus na pre ja hã inhmã karõ pa hte kãm ho anhỳr o ri ixpa. Kot paj kãm ho anhỳr kêt nê ixpunuj nê ri ixpa. 17Kêp ãm amnhĩ krã hkõt mãn tanhmã mẽ amã ixujarênh to ho mẽ akõt ri ixpa ronhỹx pa hpãnhã ixãmnhĩx kàxpore hã mẽ awỳ. No ãm ã ixte amnhĩ nhĩpêx anhỳr kêt. Tĩrtũm tãm kot inhmã ja hã karõ jakamã na pa hte amarĩ ixãmnhĩx ri mẽ amã kapêr jarênh o mẽ ajahkre ho ri mẽ akõt ixpa nê mẽmoj tã ixàhwỳr o ri ixpa hkêt nê. 18Ixte amarĩ ri mẽ amã mẽ ujarênh mexta jarênh o ri ixpaja na inhmã hprãm. Ja na inhmã mex. Na pa hte ã amnhĩ nhĩpêx anhỳr o ri ixpa nhũm ja inhmã mex pa ixkĩnh nê ri ixpa. Jakamã na pa hte hpãnhã ixàhwỳr kêt nê. Nê inhmã mẽmoj prãm o ri ixpa hkêt nê. 19Ně nhãm mẽ kãm tanhmã ixàpênh to ho ixpa hkêt tã pa hte mẽ piitã tanhmã mẽ kãm amnhĩ nhĩpêx to ho ri ixpa. Pê mẽ kãm Jejus kapêr jarênh o ri ixpa. Jakamã na mẽ ra ohtõ nê ixujarênh ma nê amnhĩ kaxyw Jejus kõt hamaxpêr nê hkõt amnhĩ xunhwỳ.

Pawre kot tãm mẽ piitã mẽ hipêx o pa hã amnhĩ jarênh

Wam Korĩt 10.33

20Ně na pa hte Ijaewjê hwỳr ixpa nê mẽ kot amnhĩ nhĩpêx kõt amnhĩ nhĩpêx o ri mẽ hkõt ixpa. Ixte mẽ kurom Tĩrtũm kot finat Mojes mã mẽmoj tã karõ hkõt amnhĩ nhĩpêx o ixpa hkêt tã mẽ hkõt ri ixpa nê mẽ uràk nê hkõt amnhĩ nhĩpêx o ri ixpa. Mẽ kot ja hã ixpumunh nê ixte mẽ kãm Jejus jarênh mar nê ixpyrà nê amnhĩ kaxyw hkõt hamaxpêr kaxyw.

21Tã pa hpãnhã mẽ kêp Ijaew kêt xwỳnhjê hwỳr ixpa nê mẽ kot amnhĩ nhĩpêx kõt amnhĩ nhĩpêx o ri mẽ hkõt ixpa. Mẽ kot ja hã ixpumunh nê ixkapêr mar nê ixpyrà nê amnhĩ kaxyw Jejus kõt hamaxpêr kaxyw. Tĩrtũm mẽ Kris wa hamaxpêr xà hkõt na pa hte ahpỳnhã mẽ kot amnhĩ nhĩpêx xwỳnhjê hwỳr mra nê ã amnhĩ nhĩpêx anhỳr o ri mẽ hkõt ixpa.


22Nē na pa hte kormã mẽ kot Kris kôt amnhĩ xunhwỳr tohtuj anhỳr xwỳnhjê hkôt ri ixpa nê te ixte ho mẽ urak nê kormã hkôt amnhĩ xãm nyw pyrak o amnhĩ nhĩpêx o ri mẽ hkôt ixpa. Mẽ kot ja hã ixpumunh nê ixkapêr mar nê hkôt amnhĩ nhĩpêx mex kaxyw. ã na pa hte mẽ piitã mẽ hkôt ri ixpa nê mẽ hkôt amnhĩ nhĩpêx o ri ixpa anê. Mẽ kot ja hã ixpumunh nê inhmar nê ixpyrà nê Kris kôt amnhĩ nhĩpêx tỳx kaxyw. 23Mẽ kot mẽ ujarênh mex mar kaxyw na pa hte mẽ piitã mẽ hkôt ã amnhĩ nhĩpêx anhỳr o ri ixpa. Tĩrtũm kot mẽ ho hkra nê mẽ ho mex kaxyw. Nê mãnên pa kot mẽ hã ixto mex kaxyw.

Pawre kot htỳx ri amnhĩ nhĩpêx kêt ã kot amnhĩ jarênh

Sikũn Ximotre 4.7; Eprêw 12.1-3

24Mẽ hprôt xwỳnhjaja na htem hprôt tỳx no nhũm mēhō pixi nê wam hkwỳjê re nê wam tēn pōj nhũm htem ja hã omu nê kãm mẽ hkĩnhxà gō. Ja pyrà nê kêr ka mẽ apiitã tãm amnhĩ nhĩpêx mex rãhã ho ri apa kê Tĩrtũm mẽ apumu nê nhỹrmã ja pãnhã mẽ amã mẽmoj mex gō.

25Nē mẽ hprôt xwỳnhjaja na htem mẽ hkĩnhxà hpyr prãm xàj mẽ hprôt xà hã arĩgro hwỳr apkati mẽ hprôt o kuhê. Prôt tỳx prãm xàj. Tã mẽ hprôt xà hã arĩgrota ã nhũm hkwỳjê pē amnhĩ to wa nê amnhĩm hkĩnhxà py. Nom koja hkĩnhxàja kritpēm kãm mex ry hkêt nê. Koja gaa nê hapêx tokyx anê. Tã nom kot puj mẽ Tĩrtũm kapêr kôt amnhĩ nhĩpêx mex o ri papa. Nê mẽ hprôt xwỳnhjê kot hkĩnhxà hpyr prãm xàj apkati mẽ hprôt o kuhêta pyrà nê apkati mẽ hkôt amnhĩ nhĩpêx mex o ri papa. Hãmri nhũm amnhĩ tã mẽ pahpumu nê nhỹrmã mẽ pamã hkĩnhxà mex õ gō. No ãm jar hkĩnhxà kurom koja aa mẽ pahpê hapêx kêt nê. Koja mẽ pamã mex rãhã ho rãhã.



Wam Korĩt 9.24-25

26Nē na hte mẽ hprôt xwỳnhjaja htỳx ri tanhmã hprôt to ho pa hkêt nê. Na htem hkwỳjê pē amnhĩ to wa kaxyw hprôt nê nhỹri mẽ àhuk xàta pix pumunh pē hwỳr hprôt nê mra hãmri nê kamã ahtwỳ. Nê kamã àhuk pix kukamã hamaxpêr o hprôt tỳx nê mra. Ja pyrà nê na pa hte apkati mẽ Tĩrtũm kôt pix mã amnhĩ nhĩpêx o ri ixpa. Nhỹrmã kot inhmã mẽmoj mex nhõr kaxyw.

Ně mẽ pijapu mex xwýnhjaja na htem htýx ri nhýhýnh axpën tak kêt nẽ. Na htem nhýhýnh kot mẽ htak o mẽ rënh xà pix kamã mẽ htak o mẽ rënh kukamã hamaxpër pẽ kamã mẽ htak. Ja pyrã nẽ na pa hte ixtýx ri tanhmã amnhĩ nhípêx to ho ri ixpa hkêt nẽ. Na pa hte Tirtùm mã ijamaxpër pẽ tanhmã amnhĩ nhípêx to rãhã ho ixpa. Kot nhýrmã inhmã mẽmoj mex nhõr kaxyw. 27No na pa hte ixtýx ri amnhĩ jamaxpër xà hkôt tanhmã amnhĩ nhípêx to ho ri ixpa hkêt nẽ. Kot pa ã amnhĩ nhípêx anẽ nẽ ixte mẽ kãm Jejus kapër jarënh o ri ixpa htã ãm ri ixtýx ri ã amnhĩ nhípêx anhýr kaprý nhùm Tirtùmja tee ri ja hã ixpumu nẽ inhmã mẽmoj mex nhõr kêt nẽ.

Ijaew kot amnhĩ nhípêx

Rômãn 15.4; Eprêw 3.8-11; Jutre 5

10 ^{1E} Kris kôt ixkwýjaja. Kot paj mẽ amã amnepê mã mẽ ixpê Ijaew hkukamã mẽ inhĩgêjtjaja tanhmã mẽ harënh to ka mẽ inhma. Mẽ kot pahi finat Mojes kôt ri mẽ pa xwýnhjaja kot paj mẽ amã harẽ. Mẽ pahte mẽ urak nẽ pahtýx ri amnhĩ nhípêx pymaj kot paj mẽ amã tanhmã mẽ harënh to ka mẽ inhma. Mãn ka mẽ arĩ mẽ harënh ã anohtýx japër. Na prem piitã pika pẽ Ejit kamã pa htã kurùm kator pa. Hãmri nẽ ma kapôt ã kakrã pumunh o hkôt pa ho pa. Pry hkêt jakamã nhùm pre Tirtùm tanhmã kakrã hto nhùm ma mẽ hkukamã pa nhùm mẽ omu nẽ hkôt pa. Hãmri nẽ ra gô xujanãr mẽ kot kãm: “Gô kamrêk” anhýr xwýnhja wýr pôi nẽ tee ri rêr prãm xaj amnhĩ kukamã hamaxpër. Hãmri nhùm Tirtùm mẽ kãm hkôt ã ho amgrã nhùm mẽ hkôt mex pẽ rêr pa nẽ axte kakrã hkôt pa ho pa. ²Finat Mojes kot mẽ o pa jakamã nhùm prem kêp hkwý hã amnhĩ jarẽ nẽ kãm amnhĩ jarënh o:

—Nà kot paj mẽ akapër ma nẽ akôt ri amnhĩ nhípêx o ixpa. Anẽ.

Te mẽ pahpê Kris kwý hã amnhĩ jarënh kaxyw mẽ kot gôx kãm mẽ pahkrã kumrãr nhùm mẽ pahte Kris mã amnhĩ jarënhhta pyrãk. ³Na prem kapôt ã ri pa nhùm Tirtùm tãm kaxkwa rùm mẽ hwýr mẽ apkur xà rẽ nhùm mẽ hkawrà nẽ ho apkur o pa. ⁴Tã ra kôr xaj hirot nhùm Tirtùm tanhmã mẽ kãm kën prêkja to nhùm kurùm mẽ kãm gô axkapĩ nhùm mẽ ho ixkõ nẽ akupým hihtýx. ã Krisja mẽ hkôt mẽ ho mẽ hihtýx o pa anẽ. Mẽ kot no ho omunh kêt tã nhùm mẽ hkôt mẽ ho mẽ hihtýx o pa.

⁵Tã no nhùm mẽ ohtô nẽ Tirtùm kôt amnhĩ nhípêx kêt nẽ. Kot mẽ ho mex kumrëx tã nhùm mẽ ãm amnhĩ tã omu nẽ ãm omu nẽ kapër kôt amnhĩ nhípêx kêt nẽ. ãm kapër kwým ri tanhmã amnhĩ tomnuj to ho pa nhùm tee ri amnhĩ tã mẽ omu nẽ tanhmã mẽ ho nhùm mẽ hkwýja hpikaprãr pa. Hãmri nhùm arĩ mẽ htír xwýnhjaja kapôt ã mẽ hagjênh pa nẽ axte ma pa.

6Jakamã kwa kêr pu mẽ kot ã amnhĩ nhĩpêx anhÿr ã mẽ harênh ma nê hã pano htÿx nê ho papa hãmri nê ho mẽ uràk kêt nê. Mẽ uràk nê pahtÿx ri tanhmã amnhĩ nhĩpêx to ho ri papa hkêt nê.

7Nê na pre mẽ hkwÿjaja sãnti kutã hkôn krã ho rôrôk nê hkrĩ nê kãm amnhĩ jagrer pê amnhĩ to kuwÿ. Tĩrtũm kapêr ã kagà htũm kot mẽ kot amnhĩ nhĩpêx anhÿr ã mẽ harênh kot:

Na prem sãnti kutã apkur o hkrĩ nê kãm amnhĩ jagrer o hkrĩ nê gaa nê pipãnh pix o pa. Jao axpên kamã hpijaàm kêt o pa. Anhÿr jakamã kwa kêr pu mẽ ã mẽ kot amnhĩ nhĩpêx anhÿrja ã pano htÿx nê ho mẽ uràk hkêt nê.

8Nê na pre mẽ hkwÿjaja htÿx ri mjên nê hprô kuhpa hã nhãm ri mẽ kamã hpijaàm kêt o pa. Mÿrapê nhũm arĩgro pixi hã mẽ ohtô rax kumrêx nê axkaprã. Mẽ kêp 23.000 nê pikaprãr pa. Tã ã Tĩrtũm kot mẽ panhĩpêx anhÿr pymaj kêr pu mẽ ja hã pano htÿx nê ho mẽ uràk kêt nê. Âm kwarĩ ho kwarĩ.

9Nê na pre mẽ hkwÿjaja axtem nê htÿx ri tanhmã axpên mã Tĩrtũm jarênh to nê harênh o:

—Nà Tĩrtũmja gryk tokyx anhÿr kêt jakamã kwa pu mẽ ã amnhĩ tomnuj anhÿr o papa. Koja mẽ pahpumu nê tanhmã mẽ pahto hkêt nê.

Anhÿr tã nhũm tee ri ja hã mẽ kuma nê mẽ omu nhũm ja kãm mex kêt nê nhũm mẽ hwÿr kagã xoprê nhõ wenên xihtÿx kwÿ rê nhũm mẽ hwÿr mra nê mẽ hkamnhar o mẽ hkwÿjê pa. Tã ã kot mẽ panhĩpêx anhÿr pymaj kwa kêr pu mẽ ja hã pano htÿx nê mẽ uràk nê amnhĩ tã Tĩrtũm kamã pajamak o papa hkêt nê. Kwarĩ ho kwarĩ.

10Nê na pre mẽ hkwÿjaja axtem nê Tĩrtũm o kapêr punuj nê nhũm tee ri amnhĩ tã mẽ kuma nê mẽ hwÿr kapêr o wrÿk xwÿnh mẽ nhũm ma mẽ hwÿr wrÿ nê ÿ hã mẽ hkwÿjê nhĩmex. Tã ã kot mẽ panhĩpêx anhÿr pymaj kwa kêr pu mẽ ja hã pano htÿx nê ho mẽ uràk nê Tĩrtũm o pakapêr punuj kêt nê.

11Na pre mẽ ixpê Ijaew nhĩgêjtjaja ã htÿx ri amnhĩ nhĩpêx o pa anê. Tĩrtũm kapêr ã kagà htũm kot ã mẽ kot amnhĩ nhĩpêx anhÿr piitã harênh par. Mẽ panhõ ejêp kaxyw. Mẽ pahte kamã harênh nê mẽ harênh mar tÿx nê mẽ uràk nê ã amnhĩ nhĩpêx anhÿr kêt kaxyw. Ra Jejus akupÿn mẽ pahwÿr wrÿk xà hã arĩgro hkukamã grêre jakamã kwa kêr pu mẽ kutêp mẽ kurom kapêr kôt pix mã ri amnhĩ nhĩpêx mex rãhã ho ri papa.

Mẽ pahte mẽmoj punuj nê amnhĩ to htÿx ã mẽ pamã karõ

Matêwre 4.1, 6.9-13; Wam Korīt 1.8; Sikũn Pêtre 2.9; Jutre 24

12Tã kêr ka mẽ ã Ijaew kot amnhĩ nhĩpêx anhÿr ã mẽ harênhja ma nê ã ajamaxpêr anhÿr kêt nê. Rÿ mẽ ajamaxpêr o:

—Nà mẽmoj piitã kutã ixihitÿx kênã kot pa hkêt mẽ uràk nê ã amnhĩ nhĩpêx anhÿr o ri ixpa.

Anhÿr o mẽ ajamaxpër kêt nê. Kot kaj mẽ ã amnhĩ jarênh anê nê ra mẽ uràk nê tanhmã amnhĩ tomnuj to.

13Nê na prem kapôt ã pare ri omnuj nê ri pa. Nhũm mẽkarõmnuti tanhmã mẽ hkrã hto nhũm mẽ tanhmã amnhĩ tomnuj to ho pa. Ja pyra nê na hte arĩ mẽ pahte amnhĩ tomnuj hprãm xaj tanhmã mẽ pahkrã hto ho pa. Mẽ pahpiitã ã mẽ pahto anhÿr o ri mẽ pahkôt pa. Nom nhũm Tirtũm ra kot mẽ pamã amnhĩ jarênh xà hkôt mẽ panê omunh mex rãhã ho pa. Jakamã na pu htem tanhmã amnhĩ tomnuj to hkukamã pajamaxpër nhũm ja hã mẽ pahpumu nê mẽ panê mẽkarõmnuti mã kapër. Nê kutã mẽ pahto paxihtÿx nê pu mẽ ÿ hã amnhĩ tomnuj kêt nê. Nê ãm kôt pix mã amnhĩ nhĩpêx mex o ri papa.

Mẽ kot sãnti mã mẽmoj nhõr xwÿnhjê jarênh

Wam Korîť 8.1-13; Karatas 4.8; Apokarip 9.20

14Jakamã e Kris kôt ixkwÿjaja. Kêr ka mẽ amnhĩ kaxyw sãnti hkôt ajamaxpër o ri apa hkêt nê. Nê amnhĩ to hwÿr kêt nê. ãm kwarĩ ho kwarĩ.

15E mẽ axàhpumunh tÿx ã amnhĩ jarênh jakamã kot paj mẽ amã mẽmoj jarê ka mẽ aprĩ hã inhmar tÿx japêr. 16Nã na pu htem tõhã Jejus kot mẽ panê htyk mã pajamaxpër kaxyw axpên wÿr akuprõ. Hãmri nê mẽmo kagõ hkwy ru nê Tirtũm mã mex ã harê nê mẽmoj o pahkõm pê Jejus kot mẽ panê hkamrõ pikapĩr mã pajamaxpër. Nê hpãnhã pãwti hõ py nê axpên mã ho hkry nê mẽ kot Kris pĩr nê ĩ kamã hkamnhwÿr nhũm mẽ panê htykja mã pajamaxpër pê kuku. 17Pãwtita ãm pixire htã pu htem axpên mã ho hkry nê pahpiitã kuku. Mẽ pahpê Kris kwÿ hã mẽ pahte amnhĩ jarênh nhũm mẽ pahkwÿ kot ja hã mẽ pahpumunh kaxyw. Te mẽ pahtipxi nê ri mẽ papa pyrãk nê pãwti pixire htã pu mẽ pahpiitã kuku.

18E kot paj hpãnhã mẽ amã amnepê mã Ijaew kot tanhmã amnhĩ nhĩpêx to jarê ka mẽ inhma. Na pre htem Tirtũm mã mex ã harênh nê kãm amnhĩ nhõr ã kot amnhĩ tã mẽ omunh kaxyw nhũm prem tanhmã amnhĩ nhĩpêx to. Jao kãm mẽ apkur xà hkwy gõ nê kãm mex o mex ã harê. Hãmri nê amnhĩ mã mẽmojta kwÿ xà nê hkur o hkrĩ. Jao ra Tirtũm mã mex o mex ã harê nê kãm kêp hkra hã amnhĩ jarê.

19Nom mẽ kot sãnti mã mẽmoj nhõr xwÿnhjaja na htem kãm mẽmo mẽ apkur xà hkwy gõ nom ãm kãm õr kaprÿ. Tanhmã kot we amnhĩ to nê amnhĩ tã mẽ omu? Mo rĩt kaxyw no? ãm mẽ ĩhkra ho mẽ kot amnhĩm hipêx kênã. Jakamã na htem ãm kãm mẽ apkur xà hkwy nhõr kaprÿ. 20Mẽ kot sãnti mã mẽmoj nhõr xwÿnhjaja na htem Tirtũm mã õr kêt nê. Mẽkarõmnuti mã na htem kugõ. Jakamã kot kaj mẽ uràk nê sãnti mã mẽmoj gõ nê apê mẽkarõmnuti hkwy hã amnhĩ to amnhĩrĩt nê apê hkwy hã ri apa. Jakamã mẽ ate sãnti mã mẽmoj nhõrta na inhmã hprãm kêt

kumrêx. **21**Kot kaj mẽ panhõ Pahihti Jejus kot mẽ panê htyk ã mẽmoj kagô hkwỳ ho ixkõ hãmri nê ma mra nê hpãnhã sãnti pê mẽkarõmnuti hã mẽmoj to ixkõ. Hãmri nhũm Tĩrtũmja tee ri ja hã mẽ apumu nhũm ja kêp omnuj tỳx nê. Rỳ ka mẽ Pahihti Jejus kot mẽ panê htyk ã pãwti hkwỳ hku nê hpãnhã ma mra nê sãnti pê mẽkarõmnuti hã mẽmoj hku. Hãmri nhũm Tĩrtũm kêp ja omnuj tỳx nê. Mẽ pahte ã amnhĩ nhĩpêx anhỳrja na axpên kuhpa hã. **22**Jakamã kot ka mẽ ã amnhĩ nhĩpêx anê nê te ra mẽ amã mẽkarõmnuti hkĩnh nê mããnên amã Tĩrtũm kĩnh pyrãk o amnhĩ nhĩpêx. Nê te Tĩrtũm kurom mẽ kajaja mẽ axàhpumunh tỳx pyrãk o amnhĩ nhĩpêx. Nhũm tee ri amnhĩ tã mẽ apumu nê mẽ akamã gryk tỳx nê. Kwa mẽ okora. Kojã Tĩrtũm akamã gryk ka amex kêt kumrêx.

Mẽ pamã Kris kôt mẽ pahkwỳjê hkĩnh pê mẽ ho mex ã mẽ pamã karõ

Matêwre 20.28; Rõmãn 14.1-15.7; Piriłos 2.1-4

23Nê na htem tõhã amnhĩ jarênh o:

— Nà kot pa inhmã mẽmoj to anhỳr prãm nê ixãmnhĩx ã amnhĩ nhĩpêx anhỳr o ri ixpa. Anê.

Tã no ãm mẽmoj piitã mẽ pamã mex kêt. Na htem kãm mẽmoj to anhỳr prãm xà hkôt mẽmoj piitã tanhmã ho ho ri pa nê tanhmã amnhĩ tomnuj to. Hãmri nhũm mẽ hkwỳjaja ja hã mẽ omu nê mẽ urak nê tanhmã ri amnhĩ tomnuj to. Jao Kris kôt amnhĩ xunhwỳr tỳx kêt nê. **24**Jakamã kwa kêt pu mẽ amnhĩ pix kukamã pajamxpêr pê tanhmã amnhĩ nhĩpêx to ho papa hkêt nê. Mããnên amnhĩ kwỳjê hkukamã pajamxpêr pê tanhmã mẽ ho mex to ho ri papa pê tãm ri amnhĩ nhĩpêx o papa.

25Nê kot kaj mẽ amnhĩ xàpkur xà japrõr kaxyw ma nhỹhỹm mra nê mãmrĩ axãmnhĩx ri amã mẽmoj prãm xà hkôt mẽmoj japrõ. Nom kêt ka mẽ axujaprõrja kêp sãnti xàpkur xà hã mẽ hkukjêr kêt nê. ãm axãmnhĩx ri mẽ kêp mẽmoj japrõr o ri apa. **26**Tĩrtũm kapêr ã kagã htũm kot ja jarênh kot:

Pika piitã hkôt mẽmoj piitã kêp Tĩrtũm nhõ na. Anê.

Jakamã mẽ mãmrĩ axãmnhĩx ri mẽmoj piitã haprõ nê mẽmoj piitã hkur o apa.

27Tã kojã mẽ kêp Kris kwỳ hkêt xwỳnhjê hõ ate kutã axàpkur kaxyw amnhĩ wỳr awỳ ka amã hwỳr amõr prãm nê mãmrĩ ma hwỳr mõ. Nhũm mẽmoj to amã anhõ ka axãmnhĩx ri mãmrĩ aku. No ri tee ri amnhĩ kukamã ajamxpêr nê tanhmã hã hkukjêr to hkêt nê. Rỳ kãm:

— Kwa xà we mryja sãnti hã mẽ apkur xà na nà?

Anhỳr o hã mẽ hkukjêr kêt nê. ãm mãmrĩ axãmnhĩx hkur o akrĩ. **28-29**Nom kojã Kris kôt mẽ kot amnhĩ xãm tohtuj anhỳr xwỳnhjê hõ mẽ awỳr axà nê tee ri ja hã apumu nê amã:

—Kwa sãnti hã mẽ apkur xà na ka ri mẽ kutã hkur o akrĩ.

Anhÿr o amã kapêr ka ama nê hkaga kurê kumrêx nê hkur kêt nê. Amã mex tã Kris kôt atôja kêp omnuj jakamã ka hkaga nê hkur kêt nê. No kot ka ãm ama nê arĩ hkur o anhÿr japêr. Kot amã harênh xwÿnhnta kêp omnuj tã ka arĩ noo mã hkur japêr. Nhũm ja hã apumu nê tee ri Tĩrtũm kapêr kukamã tanhmã hamaxpêr to. Hãmri nê apyrã nê kuku nê gaa nê tee ri amnhĩ kukamã hamaxpêr nê amnhĩ mã:

—Hêxta waa nê. Sãnti nhôja mex kêt tã pa ri kuku. Kwa na pa pêr hkurja o amnhĩ tomnuj nê. Hêxta waa nê. Anê.

Hãmri nê tee ri amnhĩ kukamã hamaxpêr o hkaprĩ nê. ã kot amnhĩ nhĩpêx anhÿr pymaj koja mēhõ ã mēmo mẽ apkur xà nê amã kapêr anê ka ama nê hkaga kurê kumrêx. Jao amnhĩ pix kukamã ajamaxpêr kêt nê. Mãânên Kris kôt atô nê atôxjê mex kukamã ajamaxpêr. Nom koja amã kêp sãnti hã mẽ apkur xà hã harê ka ama nê ã ajamaxpêr anhÿr japêr nê ajamaxpêr o:

—Nà kêp omnuj tã kot paj mamrĩ kuku. Ja inhmã mex kênã. ³⁰Ra ixte Tĩrtũm mã harênh nê ixãmnhĩx hkur o inhÿr kênã kot kêt ã nê inhmã kapêr anê. Anê.

Kwa mẽ ã ajamaxpêr anhÿr kêt. Kot kaj mẽ ã ajamaxpêr anê hãmri nê Kris kôt atô rÿ atôx mex kukamã ajamaxpêr kêt nê.

³¹Jakamã kêr ka mẽ tãm tanhmã amnhĩ nhĩpêx to ho ri apa. Nê axapênh mex nê. Kêr kê mẽ piitã ja hã mẽ apumu nê mẽ apumunh kôt amnhĩm Tĩrtũm mex ã harê. ³²Nê kêr ka mẽ piitã mẽ noo mã tãm ri amnhĩ nhĩpêx o apa. Ijaew noo mã nê Ijaew kêt xwÿnhjê noo mã. Nê Jejus kwÿjê noo mã. Mẽ piitã mẽ noo mã tãm ri amnhĩ nhĩpêx rãhã ho ri apa. Mẽ kot tee ri mẽmoj tã mẽ apumunh nê hpijaàm pymaj ka mẽ tãm ri mẽ piitã mẽ noo mã tanhmã amnhĩ nhĩpêx mex to ho ri apa. ³³Na pa hte ã amnhĩ nhĩpêx anhÿr o ri ixpa. No na pa hte pa amnhĩ pix kukamã ijamaxpêr kêt nê. Mẽ piitã mẽ mex kukamã na pa hte ijamaxpêr o ri ixpa. Pê tanhmã amnhĩ nhĩpêx to ho ri ixpa. Mẽ kot ja hã ixpumunh nê ixpyrà nê Jejus kôt amnhĩ xunhwÿr nê ãm kôt pix mã ri amnhĩ nhĩpêx o pa kaxyw.

11 ¹Na pre hte Kris ã ã amnhĩ nhĩpêx anê nê mẽ piitã mẽ mex kukamã hamaxpêr rãhã ho ri pa. Tã na pa hte urãk nê ã amnhĩ nhĩpêx anê. Jakamã kwa kêr ka mẽ ixpyrà nê ã amnhĩ nhĩpêx anhÿr o mãn ri apa.

Mënijaja mẽ mjên ã hpijaàm ã mẽ kãm karõ

Epês 5.22; Wam Pêtre 3.1-6

²Nê na ka xep htem arĩ ra ixte tanhmã mẽ amã ixkapêr toja mã ajamaxpêr tÿx o ri apa. Na pa pre Kris kôt mẽ pahtõ nê mẽ pahtõxjaja xpên wÿr pikuprõnh nê tanhmã amnhĩ nhĩpêx to hã mẽ amã karõ ka

prem inhma nê mē urāk nê ã amnhĩ nhĩpêx anê. Ām hāmri na ka htem ã amnhĩ nhĩpêx anhỹr o apa. Ja na inhmã mex.

3Na pa pre krĩ hō kamã mēnijaja kot amnhĩ krã hpro hã mē amã mē harê. Ka prem inhma nhũm mē akwỳjaja kãm ja mex nê nhũm mē akwỳjaja tee ri ja kukamã ajamxpêr. No mēmo kaxyw na hte mēnijaja amnhĩ krã hpro? E kot paj ixprĩ hã mē amã ja jarê ka mē inhma. Nà Tirtũm kêp Kris jamār xwỳnh nhũm Kris kêp Tirtũm mã mē inhmyjê jamār xwỳnh. No mē anijaja mē amjên kêp Kris mã mē ajamār xwỳnh. Na hte mēnijaja ohtô nê ra mē mjên ã amnhĩ to amnhĩrĩt kaxyw amnhĩ krã hpro nê ri pa. No mē inhmyjaja na pa htem ã amnhĩ nhĩpêx anhỹr kêt nê. Na pa htem amarĩ ixkrã hkênh nê ixpa. 4Jakamã na pa htem Tirtũm kapêr mar xà hã ixkre hwỳr axpên wỳr akuprô nê Tirtũm nhỹ hã mē anijê mã kapêr jarênh o ixkuhê. Rỳ Tirtũm mã tanhmã mē pajarênh to. No ãm amnhĩ krã hpro hkêt rãhã kãm mē ajahkre rỳ kãm mē pajarê. Kot pa mē amnhĩ krã hpro nê te mē apê ixprôjaja mē apê mē ijamār xwỳnh ã mē ajarênh pyrāk. Jao te mē ixte mē ijamār xwỳnh Kris ã ixpijaàm kêt pyrāk o amnhĩ nhĩpêx. 5No mē anijaja mē ixte Kris mã mē ajamār xwỳnh jakamã na ka htem Tirtũm nhỹ hã mē inhmã kapêr jarênh rỳ kãm mē pajarênh kaxyw nê amnhĩ krã hpro. Mē ixte Kris mã mē ajamār xwỳnhjê hã apijaàm kaxyw ã amnhĩ nhĩpêx anê nê mē amnhĩ krã hpro. Kot ka mē ã amnhĩ nhĩpêx anhỹr kêt nê te mē ate mē ixtã apijaàm kêt pyrāk o amnhĩ nhĩpêx nhũm mē amjên tee ri ja hã apumu nê hpijaàm nê. Te ate amnhĩ krã hkênh nê ri apa nhũm tee ri apumunh nê hpijaàm pyrāk. 6Kot kaj mē amnhĩ krã hkênh nê ri apa nê amnhĩ kamã apijaàm nê ri apa. Mē anijaja na ka htem akrã hkĩ japjê nê kamã amex nê ri apa. No kot ka mē amnhĩm akrã hkênh nê apunuj nê amnhĩ kamã apijaàm nê ri apa. Jakamã kêr ka mē Tirtũm mã amnhĩ jarênh kaxyw nê amnhĩ krã hpro. Nom kot ka mē amjên ã apijaàm kêt nê ri apa hprãm japêr nê mamrĩ amnhĩm akrã hkênh nê ri amnhĩ kuk ã apijaàm kêt nê ri apa.

7No mē inhmyjaja na pa htem amnhĩ krã hpro hkêt nê. Te mē ixpê Tirtũm pyrāk nhũm mē anijaja te mē apê Tirtũm kra pyrāk o na pu htem axpên nhĩpêx. Tirtũm krajaja na htem mēmoj tã Tirtũm mã karô hkêt nê. Ja pyrã nê mē anijaja na ka htem mē inhmyjê mã mēmoj tã karô kamã axihtỳx o apa hkêt nê. Na ka htem mē ixtã apijaàm kãm mēmoj tã mē ixwỳ.

8Amnepê mã Tirtũm kot mēmoj to kator krax rũm na pre myja kumrêx nhĩpêx hāmri nê kêp ôkwa i hō kapa nê ho kãm hprô nhĩpêx. No na pre nija kumrêx nhĩpêx nê ôkwa i ho kãm mjên nhĩpêx kêt nê. 9Myja mã na pre hprô nhĩpêx. No nija mã mjên nhĩpêx kêt nê. 10Jakamã kêr ka mē anijaja amjên ã apijaàm ã amnhĩ to amnhĩrĩt kaxyw hāmri nê mē inhmã Tirtũm nhỹ hã tanhmã akapêr jarênh to kaxyw rỳ kãm amnhĩ

jarënh kaxyw hãmri nê amnhĩ krã hpro nê akuhê. Hãmri nhũm Tirtũm kapêr o mē wryk xwỳnhjaja ja hã mē apumu nê hkĩnh nê tee ri mē akukamã hamaxpêr kêt nê.

11-12Nê wam ni kator xwỳnhnta na pre myja rũm kato. Tã na pa htem jarãhã mē inhmyjaja hpãnhã mē anijê rũm ijapôj. Tirtũm jamaxpêr xà hkôt. Tãm na pre ã mē pahte amnhĩ nhĩpêx anhỹr kaxyw ã mē panhĩpêx anê. Tã mē ixpê Pahihti Kris kwỳ hã mē inhmyjaja nê mē anijaja na pu htem ri ahte papa hkêt nê. Na pu htem axpên kutã pamã axpên hkĩnh o papa nê mēmoj to axpên kutã panojarêr o ri papa. Nê axpên to presija ho papa. Na hte mē anijaja mē amjên o presija ho apa. Nê mē amyjaja na ka htem mē aprô ho presija ho apa. Tã kêr ka mē anijaja mē amjên ã apijaãm o ri hkôt apa. 13Jakamã kwa mē kot amnhĩ krã hproja kukamã ajamaxpêr tỳx nê. Xà mē anhô krĩ kamã mēnijaja mē mjên ã hpijaãm ã amnhĩ to amnhĩrit kaxyw amnhĩ krã hpro nã? Kojã mē ja kaxyw ã amnhĩ nhĩpêx anhỹr japêr kê mē rĩ mē anoo mã Tirtũm mã amnhĩ jarënh kaxyw nê kupê xê hkwy ho amnhĩ krã hprô nê rĩ kãm amnhĩ jarê. Nom kojã mē ã amnhĩ nhĩpêx anhỹr kêt nhũm mēmyjaja tee ri ja hã mē omunh nê ho kapêr hkêt japêr hãmri kê mē rĩ amnhĩ krã hpro hkêt nê ri pa.

14Mê kot mē pahte amnhĩ nhĩpêx ã mē pahpumunh nê hkĩnh kaxyw na pu htem tanhmã amnhĩ nhĩpêx to ho ri papa. Na htem mē pahkrã hkĩ jarënh o: “Kojã mēmyjaja hkrã hkĩ japjê nê ri pa nê ra kamã omnajti.” Anhỹr jakamã na pa htem amnhĩ krã hkênh nê ri ixpa. 15No mē anijaja na htem mē ajarënh o: “Mēnijaja na htem hkrã hkĩ japjê nê ri pa nê kamã muxti.” Anhỹr jakamã na ka htem akrã hkĩ japjê nê ri apa. Mē akĩ te kêp mē akrã hpro xà pyrãk. Na ka htem ã amnhĩ nhĩpêx anhỹr o apa.

16E na pa ra mē amã krĩ hkwy kamã Kris kwỳ nijaja kot mjên ã hpijaãm ã amnhĩ to amnhĩrit kaxyw tanhmã amnhĩ nhĩpêx to hã mē harê. Tã kojã mēhõ nija tee ri ja ma nhũm ja kêp omnuj japêr. Nhũm amnhĩ jarënh o:

—Kêt. Kot paj tanhmã inhmã amnhĩ nhĩpêx to hprãm xà hkôt tanhmã ri amnhĩ nhĩpêx to ho ri ixpa. Kojã inhmjên ja hã ixpumu nê hpijaãm nê rĩ tãm.

Anhỹr ã amnhĩ jarê ka mē tee ri ã kot amnhĩ jarënh anhỹrja ã ama nê kãm:

—Kwa nã ã ri ajamaxpêr anhỹr kêt nê. Na hte Kris kwỳjaja ã hamaxpêr anhỹr kêt nê. Anê.

**Jejus tyk mã mē pajamaxpêr pê tanhmã mē pahte
amnhĩ to hã mē pajarënh**

Matêwre 26.26-30; Makre 14.22-26; Rukre 22.19-20

17Nê na ka xep htem Tirtũm mã amnhĩ jarënh xà hã ixkre hwỳr axpên wỳr akuprô nê kamã amnhĩ to mex kêt nê. Na ka htem tanhmã

amnhĩ tomnuj to pa tee ri mẽ ajarēnh ma nẽ ixkaprĩ nẽ. Nẽ amnhĩm mẽ amex ã mẽ ajarēnh kêt nẽ. 18Na ka xep htem axpẽn wỳr akuprõ nẽ mẽmoj tã axpẽn mã akir nẽ axpẽn pẽ anghrà. Nẽ ahpỳnhã mẽmoj mã ajamaxpěr jao ra mẽ amã axpẽn kĩnh kêt nẽ. Na pa tee ri ã mẽ ajarēnh anhỳrja ma nẽ ixkaprĩ htỳx nẽ. 19Xà na hte Tĩrtũm ahpỳnhã tanhmã mẽ pahte amnhĩ anhĩpêx to hã mẽ pahpumunh kôt kãm mẽ pajapê hkêt ã amnhĩ jarẽ? Nà na hte ã amnhĩ nhĩpêx anhỳr kêt nẽ. Kãm mẽ pajapê ho axpẽn pyræk kênã.

20Nẽ na hte Kris kwỳjê piitã tũhã axpẽn wỳr akuprõ nẽ Jejus tyk mã hamaxpěr kaxyw pãwti hkwy hku. Tã mẽ kajaja na ka xep htem ja kaxyw axpẽn wỳr akuprõ nom axtem nẽ Jejus tyk mã ajamaxpěr pẽ axàpkur kêt nẽ. ãm mẽ axàpkur pix kukamã ajamaxpěr nẽ axtem nẽ axàpkur rũnh o akrĩ. 21Jao amnhĩ pix kukamã ajamaxpěr. Mẽ akwỳjaja wam mrar nẽ hpõx nẽ mẽ apkur xà hã mẽ hkrĩ xwỳnhjaja na xep htem hkwyjê rom mẽõta pinh pa. Nẽ wĩhtija nhũm mẽ mããnēn hpenh pa nẽ axtem nẽ ho axpã. Jakamã nhũm mẽ akwỳjaja kot amnhĩ to hapu nẽ hpõx xwỳnhjaja mẽmojta ã hprãr pa. 22Kwa mon ka mẽ amã hprãm nẽ anhõrkwỳ kamã axàpkur kêt nẽ? Mẽ kot Tĩrtũm mã amnhĩ jarēnh xà hã ixkre kamã na htem apkur rũnh hkêt nẽ. Ka mẽ ã amnhĩ nhĩpêx anẽ nhũm mẽõ hkêt xwỳnhjaja amnhĩ to hapu nẽ mra nẽ mẽõ hã prã nẽ amnhĩ kamã hpijaàm nẽ. Kwa xà kot pa ã mẽ ate amnhĩ nhĩpêx anhỳr ã mẽ ajarēnh ma nẽ ixkĩnh nẽ mẽ ate amnhĩ nhĩpêx mex ã mẽ ajarẽ? Nà kot paj ã mẽ ajarēnh anhỳr kêt nẽ.

23Pahihti Jejus na pre ja hã tanhmã inhmã kapěr to nẽ inhmã:

— Kêr ka mẽ tũhã axpẽn wỳr akuprõ nẽ axàpkur pẽ ixtyk mã mãn mẽ ajamaxpěr pẽ ã amnhĩ nhĩpêx anẽ nẽ ã amnhĩ nhĩpêx anẽ. Anẽ.

Jakamã kot paj ixprĩ hã amnhĩ xõ ri mẽ amã kot tanhmã inhmã kapěr tota jarẽ ka mẽ inhma. Nà Jejus kormã htyk kêt ri Jut Kariot ra kot põristi mã hã àmnēnh kaxyw nhũm kamàt nhũm Jejus mẽ ỹ hã mẽ ahkre xwỳnhjê mẽ apkur kaxyw hkrĩ hpa. Hãmri nhũm Jejus pãwti hõ py nẽ o xa 24nẽ Tĩrtũm mã harẽ nẽ kãm:

— Pa Papaj. Nà ãm hãmri na ka hte mẽ inhmã mẽ inhõ mex o apa. Anẽ.

Nẽ hpãnhã pãwja o hkry pa nẽ ho mẽ kot ỹ hã mẽ ahkre ho mẽ pa xwỳnhjê nhĩpêx pa nẽ mẽ kãm:

— E na pa ã pãwti ho hkry nẽ mẽ amã õr anẽ. Koja mẽ ã inhĩpêx anẽ nẽ te mẽ kot ixto hkry hpar pyræk o inhĩpêx pa amnhĩ xà htỳx kamã ijamak kãm ty. Nom mẽ anẽ kot paj ty. Jakamã e kêr ka mẽ ixwakre kamã tũhã axpẽn wỳr akuprõ nẽ ixte mẽ ate amnhĩ tomnuj pãnhã amnhĩrer kaxyw mẽ anẽ ixtyk mã ajamaxpěr pẽ akĩnh nẽ pãwta kur o akrĩ. E mẽ mãmri axãmnhĩx aku. Anẽ.

25Hãmri nẽ hpãnhã kop kãm wĩhtita py nẽ o xa nẽ mẽ kãm:

—E kop kãm wĩhtija te kęp Tirtũm kot mẽ atã amnhĩ jarẽnh nyw xà jarẽnh pyræk. Ixtyk kukwak ri koja mẽ ato hkra. Kot paj ty nhũm ixkamrô mẽ anê axkapĩ. Jakamã e. Mẽ kopja kamã wĩhti ho akõm o axpẽn nhĩpêx. Nê ho akõm pê ixte mẽ anê ixtyk mã ajamaxpêr. Anê.

26Tã ã kot amnhĩ jarẽnh anhỹr jakamã na pu htem axpẽn wỳr akuprõ nê pãwti hkwy hku nê mẽmo kagô hkwy o ixkõ. Nê ho pahkõm pê axpẽn mã Jejus tyk jarẽnh o pahkrĩ. Tã kêr pu mẽ arĩ ã amnhĩ nhĩpêx anhỹr o ri papa rãhã nhũm Jejus akupỹn mẽ pahwỳr wrỳ. 27Jakamã kot kaj mẽ tõiã mẽmo arĩgro hã kot mẽ panê htykja mã ajamaxpêr kaxyw axpẽn wỳr akuprõ. Hãmri nhũm mẽ anhĩõ mẽ awỳr axà nê nhỹ. Nom axtem nê Jejus tyk mã hamaxpêr kêt japêr. Nê htỳx pãwti kur o nhỹ. Nê hkõt amarĩ mẽmo kagô ho hkõm o nhỹ. Koja ã htyk mã hamaxpêr kêt rãhã amnhĩ nhĩpêx anê nê te Jejus o kapêr pyræk o amnhĩ nhĩpêx. Te ho kapêr o:

—Nà Jejus amarĩ htyk nhũm hkamrô amarĩ hpikapĩr kênã. Na pre mẽ panê htyk kêt nê.

Anhỹr o ho kapêr pyræk. 28Jakamã kwa kêr ka mẽ ate pãwta kur kaxyw nê taxy kormã tanhmã ate amnhĩ nhĩpêx to mã ajamaxpêr nê ajamaxpêr o:

—Kwa mãn pa Tirtũm kapêr kõt amnhĩ nhĩpêx mex rãhã ho ri ixpa nã?

Anhỹr o mãn ajamaxpêr. Hãmri nê ate hkõt amnhĩ nhĩpêx mex ã amnhĩ pumu nê amarĩ axãmnhix aku. No kot ka mẽ kormã mẽmoj punuj kaga hkêt nê arĩ ri ho anhỹr o pa hãmri nê kãm ajamaxpêr nê hkur kêt nê. Rỳ tanhmãn tee ri tanhmã ate amnhĩ tomnuj tota mã ajamaxpêr nê akapri nê. Hãmri nê tokyx Tirtũm mã amnhĩ jarẽ nê amnhĩ to mex prãm xaj amnhĩ to awỳ hãmri nê arĩ kormã axãmnhix pãwtita ku. 29Koja mõiõ mẽ akõt axà nê mẽmoj kukamã hamaxpêr pê htỳx pãwti nhĩrênhta õ py hkur o nhỹ. Hãmri nhũm Tirtũm tee ri ja hã omu nê hã tanhmã ho. 30Na ka mẽ ra axohtõ nê ã amnhĩ nhĩpêx anê nê atỳx ri mẽmoj kukamã ajamaxpêr pê pãwta ku. Jejus kot mẽ panê htykja mã ajamaxpêr kêt pê atỳx tanhmã ajamaxpêr to pê hkwy hkur o akrĩ. Mỳrapê na ka mẽ ra ja hã axà nê ri apa. Nê mẽ akwỳjaja ra htyk rax nê. 31Nom kot ka mẽ axpẽn wỳr akuprõ hãmri nê akupỹm tãm axpẽn kõt ajamaxpêr nê axpẽn kõt amnhĩ nhĩpêx nê rĩ kormã pãwtita ku. Hãmri nhũm Tirtũm ja hã mẽ apumu nê tanhmã mẽ ato hkêt nê. 32Na hte mẽ pahte tanhmã amnhĩ tomnuj to hã mẽ pahpumu nê hã tanhmã mẽ pahto. Mẽ pahte ja hã amnhĩ pumunh nê axte ã amnhĩ nhĩpêx anhỹr kêt kaxyw na hte ã mẽ pahpê hkrajê nhĩpêx anê. Jakamã kot puj mẽ nhỹrmã mẽ kęp hkra hkêt xwỳnhjê hkõt kuwyta wỳr ma papa hkêt nê. 33Jakamã e Kris kõt ixtõ nê ixtõxjaja. Kêr ka mẽ axte Pahihti Jejus tyk mã ajamaxpêr kaxyw axpẽn wỳr akuprõ. Hãmri nê ra axpẽn wỳr apikuprõnh pa hã axpẽn pumu nê rĩ kormã pãwti hkwy hku nê hkur pê Jejus kot mẽ panê htyk

mã ajamaxpêr o akrĩ. ³⁴Nê ka mẽ atõ ra amã prãm japêr nê anhõrkwỹ kamã apku nê rĩ kormã mẽ hkõt tẽ. Jao ra anhõhy htu nê ajamakêtkati nê akwỹjê jamãr o nhỹ. Kê mẽ hpõx pa ka mẽ atipxi nê Pahihti Jejus tyk mã ajamaxpêr pê hkur o akrĩ. Hãmri nhũm Tĩrtũm ja hã mẽ apumu nê hkĩnh nê tanhmã mẽ ato hkêt nê.

Na ka prem mẽ ate inhmã kagà nê mênhta kamã mẽmoj tã ixkukjêr rax nê. Tã na pa ra kagà ja kamã mẽ amã hkwỹ jarênh rax nê. Nom kot paj piitã harênh par kêt nê. Kot paj ãm mẽ amã hkwỹ pix jarê. Hãmri nê nhỹrmã ma mẽ awỹr mõ nê mẽ apumu nê kormã axte mẽ amã harênh jatur xãm kumẽ.

Mê kot Tĩrtũm kapêr o hêx xwỹnhjê jarênh

Rõmãn 12.6-8; Wam Korīt 14.29; Wam Pêtre 4.10-11; Wam Juãw 4.1-2

12 ¹Nê kot paj hpãnhã mẽ amã tanhmã Tĩrtũm Karõ jarênh to ka mẽ inhma. Tanhmã kot mẽ pahkrã hto nhũm mẽ pahte ahpỹnhã tanhmã kãm amnhĩ nhĩpêx to ho papaja kot paj mẽ amã harê. ²Amnepê mã kormã mẽ ate Kris kõt amnhĩ xunhwỹr kêt ri na ka prem sãnti hkõt ri amnhĩ nhĩpêx o ri apa. Kapêr kêt tã ka prem hkõt ri amnhĩ nhĩpêx rãhã ho ri apa. Te kot mẽ ano kupyrr pyrãk ka mẽ kãm mex o mex ã harênh o ri apa. Nê kãm amnhĩ jagrer pê amnhĩ to hwỹr o ri apa. ã na ka prem amnhĩ nhĩpêx anhỹr o ri apa. ³Tã ra hpãnhã Tĩrtũm kõt amnhĩ xunhwỹ.

Na htem ohtõ nê Tĩrtũm nhỹ hã kapêr jarênh o pa hã amnhĩ jarênh tã no ãm mẽ hkwỹjaja ja hã amnhĩ to hêx. Tã kot paj ixprĩ hã mẽ amã tanhmã mẽ harênh to. Koja mẽhõ mẽ kãm Tĩrtũm nhỹ hã kapêr jarênh o pa hã amnhĩ jarê hã koja Jejus o kapêr punuj o pa hkêt nê. Koja harênh o:

—Jejus kêp mẽ panhõ Pahihti jakamã kwa pu mẽ hkõt amnhĩ xunhwỹ nê hkõt amnhĩ nhĩpêx o ri papa.

Anhỹr o harê. Koja mẽhõ ã mẽ amã kapêr anê ka mẽ ama nê mẽ kot Tĩrtũm nhỹ hã kapêr jarênh o pa xwỹnh ã omunh kurê kumrêx. No koja mẽ amã ã kapêr anhỹr kêt nê ka mẽ ama nê Tĩrtũm kapêr o hêx o pa hã omunh kurê kumrêx.

Tĩrtũm Karõ kãm mẽ pahte axpên to mex prãm ã harênh

Rõmãn 12.6; Epes 4.7; Wam Pêtre 4.10

⁴Nê ahpỹnhã kot tanhmã mẽ panhĩpêx to xwỹnhja ãm pixii. Kêp Tĩrtũm Karõ. Na hte mẽ pahkarõ mã agjê nê ahpỹnhã tanhmã mẽ pahte axpên to mex kaxyw tanhmã mẽ panhĩpêx to. Kot tanhmã mẽ panhĩpêx to xãja ohtõ. Mẽ pahte ahpỹnhã ri tanhmã kãm amnhĩ nhĩpêx to nê tanhmã axpên to mex to ho ri papa kaxyw na. Tĩrtũm Karõ na hte ja kaxyw tanhmã mẽ pahkrã hto.

5Ně mẽ pahte kãm tanhmã amnhĩ nhĩpêx to ho papa xwỳnhja haxwỳja ãm pixii. Kêp Pahihti Jejus. Tã na pu htem ahpỳnhã kãm tanhmã amnhĩ nhĩpêx to ho ri papa.

6Ně kot mẽ pahto ajuta nhũm mẽ pahte ahpỳnhã tanhmã axpẽn to mex to ho papa xwỳnhja haxwỳja ãm pyxii. Kêp Tĩrtũm. Na pu htem ahpỳnhã tanhmã hkõt axpẽn xunhwỳr tỳx to kaxyw tanhmã axpẽn to mex to ho papa.

7Ně Karõja na hte ahpỳnhã tanhmã axpẽn kaxyw mẽ panhĩpêx to pu mẽ axpẽn to ajuta mex o ri papa.

8 Jakamã na pu hte mẽ pahkwỳjaja Tĩrtũm Karõ nhỹ hã ma mẽ pahkwỳjê mã Tĩrtũm kapêr jarênh o ri mẽ hkõt papa.

Ně mẽ pahkwỳjaja ma ỹ hã paxàhpumunh mex pê ma ri kapêr o mẽ ahkre ho mẽ hkõt papa.

9 Ně mẽ pahkwỳjaja Karõ nhỹ hã Tĩrtũm kot tanhmã mẽ pahto ajuta hto kaxyw hkõt pajamaxpêr tỳx nê.

Ně mẽ pahkwỳjaja akupỹm mẽ à xwỳnhjê ho mex o papa nhũm mẽ akupỹm mex nê pa.

10 Ně mẽ pahkwỳjaja aa mẽ kot mẽmoj pumunh kêt kwỳ ho anhỳr o ri mẽ hkõt papa.

Ně mẽ pahkwỳjaja Tĩrtũm kapêr mar tỳx nê ô ri mẽ kãm harênh o mẽ hkõt ri papa.

Ně mẽ pahkwỳjaja Tĩrtũm Karõ nhỹ hã tanhmã mẽ kot amnhĩ nhĩpêx to hã mẽ omunh o papa. Rỳ pahprĩ hã mẽkarõmnuti nhỹ hã mẽ kot amnhĩ nhĩpêx ã mẽ omunh o papa.

Ně mẽ pahkwỳjaja nhãm mẽ kapêr mar kêt tã ra mẽ kapêr o pakapêr.

Ně mẽ pahkwỳjaja mẽ kapêr o pakapêrja ma nê mẽ kot mar kêt xwỳnhjê mã harê. Kormã aa pahte mar kêt tã ra pahprĩ hã mar mex nê mẽ kãm harê.

11 ã na hte Tĩrtũm Karõ kãm hprãm xà hkõt tanhmã mẽ panhĩpêx to pu mẽ ahpỳnhã ỹ hã ã axpẽn nhĩpêx anhỳr o ri axpẽn kõt papa.

Te mẽ pahpê Kris nhĩ pyrãk ã mẽ pajarênh

Rõmãn 12.3-8; Epes 1.22-23, 4.11-16; Korosê 3.15

12E pa hpãnhã mẽ amã mẽ panhĩ kamã tanhmã mẽmoj jarênh to ka mẽ inhma nê hã anohtỳx nê. Mẽ panhĩja ãm pixi htã no ãm kamã mẽmoj xohtôô. Kamã mẽ pahte nê kamã mẽ pahpa nê kamã mẽ pajakwa. Nê mẽ panhĩnhu nê mẽ pano. ã mẽ panhĩ kamã mẽmoj xohtô kot anhỳr. Ja pyrã nê Kris nhĩja ãm pixi htã te mẽ pahpê ĩ kamã mẽmoj xohtôta pyrãk. Mẽ pahkwỳjaja te mẽ pahpê hte pyrãk. Nê mẽ pahkwỳjaja te mẽ pahpê ĩhkra pyrãk. Nê mẽ pahkwỳjaja te mẽ pahpê no pyrãk.

13Mē pahpê Kris kwỳjaja axpēn kaxyw mē paxohtôô. Mē ixpê Ijaewjaja nê mē apê Ijaew kêt xwỳnhjaja. Nê amarī ri mē kām mē axàpēnh o mē apa xwỳnhjaja nê amnhī mā ri mē axàpēnh o mē apa xwỳnhjaja. Ā ahpỳnhã mē paxohtô kot anhỳr tā nhũm Tĩrtũm Karō te mē pahpê Kris nhī pixi pyrāk o mē panhĩpêx. Nhũm Krisja mē pahpiitã mē pamã Karō gō nhũm mē pahkarō mā agjê. Pixi htã mē pahpiitã mē pahkarō mā agjê.

14Nê mē panhĩja pixi tā kamã tanhmã mē pakute xàja ohtôô. Tã Kris nhĩja te kot mē panhĩja pyrāk. Urāk nê kamã mē paxohtôô. Jakamã na pu htem ahpỳnhã tanhmã kām amnhī nhĩpêx to ho ri papa. Karō kot tanhmã amnhī kaxyw mē panhĩpêx to xà hkôt.

15Nê kop ãm mē pahparja kapēr ronhỳx tee ri mē panhĩkra pumu nê amnhī mã:

—Hêxta waa nê. Kêp ãm ixpê mē ãhkra ronhỳx pa inhmex nê ijarir. No ãm ixpê mē hpar pix jakamã pēr ãm mē hkĩnhã ixpê mē hkwỳ hkêt ãm ixpê mē hatur xà pix na pa.

Anhỳr o amnhī jarēnh japêr. Nom ja kot anhỳr kêt. Axtem nhỹhỹm kot mē pahto pa kaxyw na mē pahparja. Nê axtem mẽmoj tā mē paxàpēnh rỳ mẽmoj jamỳnh kaxyw na mē panhĩhkraja. Na pu htem hamē wa ho presija rãhã ho papa. Ja pyrã nê kot puj mē pahkwỳjê hō mē parom Tĩrtũm Karō nhỹ hã mẽmoj tā àpēnh tỳx ã omu nê hkĩnhã mē pahte amnhī to warê hkêt ã amnhī jarēnh o papa hkêt nê.

16Nê mē pajamakja kapēr ronhỳx kapēr o:

—Hêxta waa nê. Kêp apu ixpê mē no ronhỳx pa inhmex nê ijarir. No ãm ixpê mē umar xà pix jakamã pēr ãm ixte ho warê hkêt kumrêx.

Anhỳr o amnhī jarēnh japêr. Nom ja kot anhỳr kêt. Hamē wa mex kênã. Axtem ho mē paxumar kaxyw na mē pajamakja. Nê axtem ho mē parīt kaxyw na mē panoja. 17Kêp ãm mē pano pix ronhỳx pu mē parīt pix nê paxumar kêt nê ri papa. Rỳ kêp ãm pajamak pix ronhỳx pu mē paxumar pix nê parīt kêt nê mē paxupār kêt nê ri papa. 18Mē panhĩja pixi htã kamã hikukrêx xohtôô. Na pre Tĩrtũm amnhī krã hkôt kamã mẽmoj piitã hipêx nê hanhō. 19Kêp ãm mē panhĩja kamã ãm mẽmoj pixi ronhỳx pu mē pamex kêt nê papa. 20Tã no ãm kot anhỳr kêt. Mē panhĩja ãm pixi htã kamã hikukrêx xohtôô. 21Jakamã na hte mē panoja amnhī nê mē panhĩkra mã kām:

—Tk kwa ma tẽ. Ixte ato presijare hã.

Anhỳr o kãm kapēr kêt nê. Rỳ mē pahkrãja amnhī nê mē pahpar mã kãm:

—Tk kwa ma tẽ. Na pa ato presija hkêt nê.

Anhỳr o kãm kapēr kêt nê. Ja pyrã nê kot puj mē nhỹri Kris kôt panhĩo pumu nê pamex o pahte hakrenh ã amnhī jarēnh kêt nê. 22Nê mē panhĩ kamã mẽmoj kwỳ te hirerek pyrāk tā no pu mē arĩ pamã hapê

ně. Ja pyrà ně kêr pu mẽ kormã mẽ kot Kris kôt amnhĩ xunhwỳr tohtuj anhỳr xwỳnhjaja pu mẽ pamã mẽ hkĩnh kãm tanhmã mẽ kutã panojarêt to ho ri papa.

23-24Ně na pu htem mẽ panhĩ kamã mẽ pakukrêx kwỳ hã pahpijaàm ně hpro ně ri ho papa. Ně hkwỳ hã pahpijaàm kêt ně hpro hkêt ně ho ri papa. Ně hkwỳ mẽ pahpê omnajti htã pu mẽ ho mex ně ri ho papa. Tĩrtũm kot ã mẽ panhĩpêx anhỳr jakamã na pu htem mẽ pakamã mẽ pakukrêx kwỳ mẽ pahpê omnajti htã pu mẽ ho mex ně ri ho papa. Ja pyrà ně kêr pu mẽ Tĩrtũm kôt mẽ pahtõ ně mẽ pahtõx piitã ho mex o ri papa. Ně tãm mẽ hipêx. Mẽ pahkwỳjaja muxre ně mẽ pahkwỳjaja omnajti htãã. Tanhmã mẽ kute htã pu mẽ kêp mẽ Jesus kôt mẽ pahtõ ně mẽ pahtõx ã mẽ ho mex o ri papa.

25Ně na hte mẽ panhĩ kamã mẽ pahpar ně mẽ panhĩhkra ně piitã axpẽn kôt àpênh mex o pa. No na hte mẽ pahparja nhỹhỹm ma mra nhũm ihõja hkwỳm nhỹhỹm ma mrrar kêt ně. Na hte wa axpẽn kôt àpênh mex o pa. Ja pyrà ně kêr pu mẽ pahpê Tĩrtũm krajaja axpẽn kôt amnhĩ nhĩpêx rãhã ho ri papa. Ně axpẽn to mex rãhã ho ri papa. No ri axpẽn kwỳm ri tanhmã amnhĩ nhĩpêx to ho ri papa hkêt ně.

26Na pu htem tõhã nhỹhỹnh panhĩ kamã paxà ně ri papa. Pahkrã tãtãk rỳ pakatut gêk. Jao te mẽ panhĩ piitã kamã mẽ paxà pyrãk. Ně nhỹhỹnh akupỹm pamex ně te panhĩ piitã hkôt akupỹm pamex pyrãk. Ja pyrà ně koja Kris kôt panhĩõ nhỹhỹnh à ně ri pa. Rỳ tanhmã amnhĩ to ně ra hkaprĩ ně ri pa pu mẽ ja hã omu ně ỹ hã pahkaprĩ ně papa. No koja mẽmoj tã hkĩnh ně pa pu mẽ ja hã omu ně ỹ hã pahkĩnh ně papa.

Te mẽ pahpê Kris nhĩ pixi pyrãk ã mẽ pa jarênh

27Ně mẽ pahpê Kris kwỳjaja te mẽ pahpê Kris nhĩ pixi pyrãk. Ahpỹnhã mẽ pahte tanhmã amnhĩ nhĩpêx to ho papa htã mẽ pahpê Kris kwỳ jakamã te mẽ pahpê ĩ pixi pyrãk.

28Ně mẽ pahte Kris kôt tanhmã pahkwỳjê ho ajuta hto ho papa kaxyw na pre Kris ahpỹnhã tanhmã mẽ paxunhwỳr to.

Mẽ pahkwỳjaja mẽ pahte ỹ hã nhãm mẽ kãm kapêr jarênh o papa kaxyw mẽ paxunhwỳ.

Ně mẽ pahkwỳjaja mẽ pahte ỹ hã tanhmã kapêr jarênh to ho ri papa kaxyw mẽ paxunhwỳ.

Ně mẽ pahkwỳjaja Tĩrtũm kapêr jarênh o mẽ ahkre ho ri mẽ papa kaxyw mẽ paxunhwỳ.

Ně mẽ pahkwỳjaja mẽ pahte aa mẽ kot mẽmoj pumunh kêt kwỳ ho anhỳr o ri papa kaxyw mẽ pa xunhwỳ.

Ně mẽ pahkwỳjaja akupỹm mẽ à xwỳnhjê ho mex o mẽ papa kaxyw mẽ pa xunhwỳ.

Nē mẽ pahkwỳjaja mẽ kapēr o mẽ hihtỳx o mẽ papa kaxyw mẽ pa xunhwỳ.

Nē mẽ pahkwỳjaja mẽ pahte tanhmã mẽ ho ajuta ho ho ri papa kaxyw mẽ pa xunhwỳ.

Nē mẽ pahkwỳjaja nhãm mẽ kapēr ò ho mẽ pakapēr o mẽ papa kaxyw mẽ pa xunhwỳ.

Ã na pre ahpỳnhã mẽ pahpê hkwỳjê piitã mẽ paxunhwỳr anê. **29**No na pu htem pahpiitã axpên kôt Tĩrtũm kapēr o mẽ ahkre ho ri papa hkêt nê.

Nē mẽ pahpiitã ỳ hã tanhmã pakapēr to ho ri papa hkêt nê.

Nē mẽ pahpiitã kapēr jarēnh o ri papa hkêt nê.

Nē mẽ pahpiitã aa mẽ kot mẽmoj pumunh kêt kwỳ ho anhỳr o ri papa hkêt nê.

30 Nē mẽ pahpiitã akupỳm mẽ à xwỳnhjê ho mex o ri papa hkêt nê.

Nē mẽ pahpiitã mẽ kapēr ò ho ri pakapēr o ri papa hkêt nê.

Nē mẽ pahpiitã ri mẽ kapērja ma nê pakapēr kãm pahkwỳjê mã harēnh o ri papa hkêt nê.

Na pu htem ahpỳnhã tanhmã Kris kôt mẽ pahkwỳjê ho ajuta hto ho ri papa. **31**Tã kēr pu mẽ pahpiitã pamã axpên kĩnh pê tanhmã axpên to mex to ho ri papa. Ja na mex o kot mẽmoj piitã hakrenh par. E kot paj ixprĩ hã tanhmã mẽ amã ja jarēnh to ka mẽ inhma.

Mẽ pahte axpên kamã paxukapřĩ ho papa hã mẽ pamã karõ

Juãw 13.31-35; Karatas 5.13-15; Korosê 3.12-14

13 ¹Kot pa ma mẽ piitã ahpỳnhã mẽ kapēr kãm mẽ kãm Tĩrtũm kapēr jarēnh o ri ixpa japêr. ãm mẽ piitã mẽ kapēr o ixkapêr mex o mẽ kãm harēnh o ri ixpa japêr. Nê Tĩrtũm kapēr o mẽ wrỳk xwỳnhjê kapēr o mẽ ahkre ho ri ixkwỳjê hkôt ixpa japêr. Tã inhmã mẽ hkĩnh kêt kãm ixte mẽ ahkre ho ri ixpa ronhỳx mẽ inhma nê ãm inhma. Nhũm ixkapêrja te ixte rat tatak pyræk o pa tee ri Tĩrtũm kapēr o mẽ ahkre kapřỳ ho ri mẽ hkôt ixpa nhũm Tĩrtũm tee ri inhmã mẽ hkĩnh kêt ã ixpumu nê inhmã:

—Nà amã mẽ hkĩnh kêt jakamã na ka tee ri ixkapêr o mẽ ahkre kapřỳ. Anê.

²Rỳ kot paj Tĩrtũm xàhpumunh tỳx o mẽ kãm kapêr pimxur kwỳ jarēnh o ri ixpa japêr. Rỳ Tĩrtũm mẽ kurom inhmã mẽmoj to amnhĩrĩt pa omu nê mẽ kãm harēnh o ri ixpa japêr. Rỳ pa Tĩrtũm kot amnhĩ nhĩpêx piitã omunh par japêr. Rỳ ixte amnhĩ kaxyw hkôt ijamaxpêr tỳx kôt ỳ hã kēn krã hprêk ò mã ixkapêr nhũm kot inhmar nê inhmar xà hkôt nhãm pikamēnh japêr. Tã inhmã ixkwỳjê hkĩnh kêt kãm ã amnhĩ nhĩpêx anê nhũm Tĩrtũm tee ri ja hã ixpumu nê inhmã:

—Nà amã mẽ hkĩnh kêt jakamã te axàhpumunh tỳx kêt kumrêx pyræk. Na ka tee ri ã mẽ kãm ixkapêr jarênh anhỹr o ri apa kaprỳ. Anê.

3Rỳ pa mẽ kêp amrakati xwỳnhjê mã ixkukrêx nhôr par japêr. Rỳ Kris ã mẽ kãm amnhĩ grôngh kôt mẽ kãm xa nhũm mẽ hã ixpĩr japêr. Tã inhmã mẽ hkĩnh kêt kãm ã amnhĩ nhĩpêx anê nhũm Tĩrtũm tee ri ja hã ixpumu nê inhmã:

—Nà ã ate mẽ kãm amnhĩ nhĩpêx anhỹr o ri apa htã amã mẽ hkĩnh kêt jakamã na ka tee ri ã mẽ kãm amnhĩ nhĩpêx anhỹr kaprỳ. Anê.

4Kot puj mẽ pamã axpên kĩnh hã kot puj mẽ kritpêm mẽ piitã mẽ kãm pahprĩ ho papa.

Jao axpên kãm pagryk tokyx anhỹr kêt nê.

Nê pamã axpên to mex pix prãm.

Nê mẽmoj tã axpên kamã pagryk kurê kumrêx kêt nê.

Nê mẽmoj tã amnhĩ to jarkrar o ri papa hkêt nê.

Kot puj mẽ pamã axpên kĩnh hã kot puj mẽ ã amnhĩ nhĩpêx anhỹr o ri papa hkêt nê.

5Nê kot puj mẽ axpên kamã paxukaprĩ ho papa hã kot puj mẽ tãm axpên nhĩpêx rãhã ho papa. Jao amnhĩ pix kukamã pajamaxpêr o ri papa hkêt nê. Nê mẽ pagryk tokyx anhỹr kêt nê. Rỳ axpên kãm pagryk tokyx anhỹr hkêt nê. Rỳ koja mẽhõ tanhmã mẽ panhĩpêx kati hto pu mẽ ãm amnhĩ tã omu nê axte kot tanhmã mẽ panhĩpêx tota mã pajamaxpêr kêt nê.

6Nê kot puj mẽ pamã axpên kĩnh o papa hã kot puj mẽ tee ri mẽhõ kot tanhmã amnhĩ tomnuj to hã omu nê pahkaprĩ nê. Rỳ tanhmã kot amnhĩ to mex to hã omu nê pahkĩnh nê.

7Nê kot puj mẽ pamã axpên kĩnh o papa hã kot puj mẽ arĩ Tĩrtũm kot mẽ pahto mex par jatur xà mênh xà hã arĩgro jamãr rãhã ho ri papa. Nê mẽ kot Kris ã tanhmã mẽ pahto htã pu mẽ tee ri amnhĩ kukamã tanhmã pajamaxpêr to hkêt nê. ãm mẽ kutã amnhĩ to htỳx nê mẽ kãm pakuhê nê arĩ amnhĩ kaxyw Tĩrtũm mã pajamaxpêr tỳx rãhã nê.

8Nê kot puj mẽ pamã axpên kĩnh o papa hãmri nê aa mẽ pahte ã amnhĩ nhĩpêx anhỹrja mã panhũrer kêt nê. Nê arĩ mẽ pamã axpên kĩnh rãhã ho papa ho papa. Jar pika ja kamã mẽ pahte Tĩrtũm nhỹ hã mẽ kãm kapêr jarênh o ri papa htã kot puj mẽ nhỹrmã ma õ krĩ hwỳr api hãmri nê kuri axte ã kãm amnhĩ nhĩpêx anhỹr kêt nê. Mo kaxyw kot puj mẽ axte ri mẽhõ mã kapêr jarê? Kot puj mẽ õ krĩ hwỳr api nê ra mẽ pahpiitã paxàhpumunh o axpên pyræk.

Nê na pu htem tũhã mẽ kapêr õ ho pakapêr o ri papa. Nom kot puj mẽ nhỹrmã Tĩrtũm nhõ krĩ hwỳr api hãmri nê kuri axte nhãm ri mẽ kapêr o pakapêr kêt nê.

Nê na pu htem jar mẽ pahkwỳjaja mẽ paxàhpumunh mex kôt Tĩrtũm kapêr jarênh o ri papa. Tã kot puj mẽ nhỹrmã õ krĩ hwỳr api hãmri nê

axte ã amnhĩ nhĩpêx anhÿr kêt nê. ãm mẽ pamã axpên kĩnh pixja kot puj mẽ arĩ õ krĩ kamã mẽ pamã axpên kĩnh tũm rãhã papa ho papa. ⁹Jar mẽ pahpiitã mẽ paxãhpumunh tohtuj anhÿr o pakapêr jakamã na pu htem kormã Tĩrtũm kapêr jarênh tohtuj anhÿr o ri papa. ¹⁰Tã kot puj mẽ nhÿrmã õ krĩ hwÿr api nê kuri paxãhpumunh jatur xãm mẽnh pa. Jakamã nhũm jar mẽ paxãhpumunh tohtuj anhÿr xwÿnhhta mẽ pahpê hapêx.

¹¹E pa mẽ amã ja hã ejêp jarê ka mẽ inhma. Nã amnepê mã ixprĩre ri na pa pre ixtÿx ri mẽhprĩjê kot amnhĩ nhĩpêx o amnhĩ nhĩpêx nê mẽ hamaxpêr o ijamaxpêr. Nê mẽ kapêr mex kêt o ixkapêr o ri ixpa. Tã ra ixãptãr hãmri nê mẽ ãptãrjê jamaxpêr o ijamaxpêr o ri ixpa. Te ra mẽ pahte kaxkwa kamã mẽ paxãhpumunh jatur xãm mẽnh parta pyrãk mẽ aptãrjê jamaxpêr o ijamaxpêr o ri ixpa.

¹²Ja pyrã nê na pu htem kormã Tĩrtũm kot amnhĩ nhĩpêx ã omunh tohtuj anhÿr. Te mẽ pahte amnhĩ pumunh xã pynajre kamã pahprĩ hã amnhĩ pumunh mex kêêta pyrãk. Nom kot puj mẽ nhÿrmã õ krĩ hwÿr api hãmri nê pahprĩ hã paxãhpumunh jatur xãm kumê. Te Tĩrtũm kot hprĩ hã tanhmã mẽ pakute hã mẽ pahpumunh parja pyrãk.

¹³E arĩ mẽ pahte Tĩrtũm kôt amnhĩ nhĩpêx o papa xàja na axkrunêpxi. Mẽ pahte hkôt amnhĩ nhĩpêx o papa rãhã ho papa kaxyw. Wamta na ja: Kêr pu mẽ arĩ amnhĩ kaxyw Tĩrtũm mã pajamaxpêr mex rãhã ho ri papa. Nê hkôt ja: Kêr pu mẽ arĩ Tĩrtũm kot mẽ pahto mex par jatur xã mẽnh xã hã arĩgro jamãr rãhã ho papa. Nê hkôt ja: Kêr pu mẽ arĩ pamã axpên kĩnh pê tanhmã axpên to mex to rãhã ho papa. Ja na mex o kot wamta wa hakrenh. E kêr pu mẽ ã amnhĩ nhĩpêx anhÿr rãhã ho ri papa.

Tĩrtũm Karõ kot mẽ pahto mẽ paxihtÿx ã harênh

Wam Korĩt 12.7-11, 12.27-31

14 ¹E kêr ka mẽ arĩ amã axpên kĩnh pê axpên to mex rãhã ho ri apa nê aa jam anhÿrer nê ho ajamakêtkati hkêt nê. Nê amnhĩ to Tĩrtũm Karõ mãn amnhĩ to awÿ kê mẽ amã tanhmã mẽ ajamaxpêr to ka mẽ ahpÿnhã tanhmã axpên to mex to ho ri axpên kôt apa. Nê kêr ka mẽ ã ajamaxpêr anê nê ajamaxpêr o:



Wam Korĩt 13.11-12

—Inhmã mẽ hkính o ri ixpa hprãm tỳx. Nễ Tirtũm Karõ kot tanhmã ixto nhũm ixte ahpỳnhã tanhmã mẽ ho ajuta hto ho ixpaja pa mãânẽn inhmã ho anhỳr prãm. Nễ kot tanhmã ijakwa hto nhũm ixte ahpỳnhã mẽ kapễ õ ho ixkapễrja pa mãânẽn inhmã ho anhỳr hprãm. No kêt ixte Tirtũm nhỹ hã mẽ kãm kapễ jarẻnhja na inhmã ho anhỳr prãm tỳx kumrẻx. Anẻ.

2-4Mẻ pakamã mẽ kapễ õ ho Tirtũm mã kapễ xwỳnhjaja na htem Tirtũm Karõ nhỹ hã ăm kumã pix mã kapễ õta o kãm kapễ nhũm tapxipix mẽ kuma. No mẽ papajaja na pu htem tee ri mar o pahkrĩ nom mar kêt nẻ. ăm kapễ xwỳnhhta pix koja mẽ pakurom amnhĩ ma. Nom koja mẽ pakapễ kãm Tirtũm mã amnhĩ jarẻ pu mẽ mar mex nẻ. Nhũm mẽ pakapễ kãm Tirtũm nhỹ hã mẽ pamã kapễ jarẻ pu mẽ pahprĩ hã kuma. Jao mẽ pamã kapễ kôt amnhĩ nhĩpẻx prãm nẻ. Nễ mẽmoj tã pahkaprĩ nẻ ri papa htã mẽ kuma nẻ amnhĩ kaxwỳnh kãm amnhĩ to paxihtỳx.

5Mẻ apiitã mẽ ate nhãm mẽ kapễ õ ho Tirtũm mã amnhĩ jarẻnhja na mex. Nom mẽ ate mẽ akapễ o mẽ akwỳjẻ mã Tirtũm kapễ jarẻnh o ri mẽ apaja na mex o wamta jakre. Kot ka mẽ nhãm mẽ kapễ õ ho Tirtũm mã amnhĩ jarẻ nhũm mẽ akwỳjaja mẽ amar kêt jakamã ka mẽ ả akapễ anhỳrja o Kris kôt mẽ ho mẽ hamaxpễ o hihtỳx kêt nẻ. ăm kapxipix amnhĩ ma. Rỳ koja kapễ õja mar mex xwỳnhjẻ hỏ amar japẻ nẻ mẽ akapễ kãm akwỳjẻ mã harẻ. Hã koja ja mex nẻ. Nom kot kaj mẽ apiitã ma mẽ kapễ kãm mẽ kãm Tirtũm kapễ jarẻnh o ri apa nhũm mẽ piitã hprĩ hã amar mex nẻ. Nễ amar xà hkôt Tirtũm kapễ kôt amnhĩ nhĩpẻx mex nẻ. 6Jakamã e Kris kôt ixtỏ nẻ ixtỏxjaja. Kot paj apu nhỹrmã ma mẽ awỳr mỏ hãmri nẻ nhãm mẽ kapễ õ ho mẽ amã ixkapễ japẻ ka mẽ inhmar kêt nẻ. Nom kot paj mẽ akapễ o mẽ amã ixkapễ ka mẽ apiitã aprĩ hã inhmar mex nẻ. Pa Tirtũm nhỹ hã mẽ amã mẽmoj jarẻ rỳ tanhmã kot amnhĩ nhĩpẻx toja pa mẽ amã harẻ. Rỳ Karõ nhỹ hã mẽ amã mẽmoj jarẻnh o ả mẽ amã Tirtũm kapễ jarẻnh anẻ ka mẽ aprĩ hã inhmar mex nẻ. 7Nom mẽ kapễ õ ho mẽ kapễ o mẽ akôt ri mẽ pa xwỳnhjaja te mẽhỏ kot htỳx ri wiorảwti kakrẻnh xwỳnh pyràk. Koja htỳx ri hkakrẻnh o xa nhũm mẽ tee ri kot grer mar mã. Rỳ nhũm mẽhỏ htỳx ri pifti kakỏr o xa nhũm mẽ tee ri mẽmo mẽ grer mar mã.

8Pỏristijaja na htem amarĩ ri tanhmã amnhĩ nhĩpẻx to ho pa nhũm mẽ hkrảhtũnja mẽ kãm pifti kakỏ nhũm mẽ kuma nẻ mẽ pijapu mã hamaxpẻ kurẻ kumrẻx nẻ hwỳr hprỏt. Nom koja kawax pẻ hkakỏ rỳ htỳx ri tanhmã hkakỏ to nhũm mẽ kuma nẻ ăm kuma. 9Ja pyrỏ nẻ kot kaj mẽ kapễ õ ho akwỳjẻ mã akapễ nhũm mẽ ama nẻ ăm mẽ ama. Ka te ăm mẽ kãm ajakwa momok pyràk o axãm o amnhĩ nhĩpẻx.

10Nẻ ahpỳnhã mẽ pakapễ xohtỏỏ. Na htem ahpỳnhã mẽ kapễ o amnhĩ kwỳjẻ mã kapễ nẻ axpẻn mar mex nẻ. 11Nom koja mẽhỏ

nhỹhỹnh pika hō rūm ixwỳr mō nē mẽ kapēr o inhmā kapēr pa mar kêt nē. Nē amnhĩ xwar kutā ixkapēr o kām ixkapēr nhũm ixpyrà nē inhmar kêt nē. 12Jakamā kot kaj mẽ amā Tĩrtũm Karō xihtỳx xà ho amā tanhmā kām amnhĩ nhĩpêx to ho apa hprām hã kot kaj mẽ amnhĩ to awỳ nē kām:

—Kwa amnhĩ kôt ijamaxpēr o axihtỳx Tĩrtũm. Pa anhỹ hã ixkapēr o ma Kris kôt ixkwỳjê ho mẽ hamaxpēr o ixihtỳx o ri mẽ hkôt ixpa. Kê mẽ akapēr ma nē Kris kôt amnhĩ xunhwỳr tỳx nē. Nē hkôt amnhĩ nhĩpêx mex o ri pa. Anē.

13Nē kêt ka mẽ nhām mẽ kapēr õ ho Tĩrtũm mã amnhĩ jarênh xwỳnhjaja amnhĩ to Tĩrtũm Karō wỳ nē kām:

—Ixte mẽ kapēr õ ho ixkapēr tã ixte amnhĩ mar kêt. Jakamā kwa tanhmā ixto ijamaxpēr mex to pa amnhĩ mar mex nē ixkapēr kām ixprĩ hã Kris kôt ixkwỳjê mã ja jarê kê mẽ inhmar tỳx nē. Anē.

14Nom kot paj nhām mẽ kapēr õ ho Tĩrtũm mã mex ã harênh tã amnhĩ mar kêt nē. Te ixpimtir kām ixkarō pix kapēr pyrāk. No kot paj pam amnhĩ krã hkôt ixkapēr o kām mex ã harê hãmri nē ra amnhĩ mar mex nē. 15Nà ja na inhmā mex jakamā kot paj nhām mẽ kapēr õ ho Tĩrtũm mã mex ã harê nē kām gre. Nē mãânên ijamaxpēr xà hkôt ixkapēr o mãânên kām mex ã harê nē kām gre. Nà ja na inhmā mex. 16Nom kot puj mẽ ma mẽ kot Tĩrtũm kapēr mar xà hã ixkre hwỳr mra nē kamā Tĩrtũm mã mex ã harê. Tã pa nhām mẽ kapēr õ ho kām ixkapēr japêr. Ka mẽ ate inhmar o akrĩ xwỳnhjaja tee ri inhma. Jakamā tee ri inhma nē ixkôt Tĩrtũm mã akapēr kêt nē. Rỳ kām:

—Nà ãm hãmri na ã amex ã ajarênh anê Tĩrtũm.

Anhỹr o kām akapēr kêt nē. Mẽ ate inhmaare hã kot ka mẽ ã kām akapēr anê. Jakamā kot paj ri mẽ akamā mẽ kapēr õ ho ixkapēr kêt nē. ãm mẽ akapēr pix o mẽ anom Tĩrtũm mã mex ã harê. 17Kot paj mẽ kapēr õ ho Tĩrtũm mã mex o mex ã harênh mex tã ka mẽ mẽmo mẽ kapêrja aprĩ hã mar kêt jakamā inhmar pê Tĩrtũm kôt amnhĩ xunhwỳr tỳx kêt nē.

18Na pa hte tōhã mẽ arom nhām mẽ kapēr õ ho Tĩrtũm mã amnhĩ jarê. Nom nhỹri ahte nhỹ nē ã kām amnhĩ jarênh anê. ãm hãmri na pre Tĩrtũm ja kaxyw tanhmā ixto pa hte ã amnhĩ nhĩpêx anhỹr o ri ixpa.

19Tã na pu htem Tĩrtũm mã mex o mex ã harênh kaxyw nē ma mẽ kot kām amnhĩ jarênh xà hã ixkreta wỳr axpên wỳr mra pa mẽ pikuprõnh xwỳnhjê kapēr o mẽ kām ixkapēr. Nom kot paj nhām mẽ kapēr õ ho mẽ kām ixkapēr ry rax kumrêx tã no nhũm mẽ inhmar kêt nē. Nom kot paj mẽ kapēr o ãm ixkapēr krãnre htã no nhũm mẽ inhmar mex kurê kumrêx. Ja na inhmā mex. 20Kwa mẽ ixkapēr ma nē mar tỳx nē. Nē mẽhprĩrêjê jamaxpēr o ajamaxpēr kêt nē. ãm Kris kôt mẽ àptàr tũmjê jamaxpēr o mãn kêt mẽ ajamaxpēr o ri apa. ãm mẽmoj pixire hkôt kot kaj mẽ ãm hãmri te mẽhprĩjê jamaxpēr pyrāk o ajamaxpēr.

Mêhprījaja na htem mëmoj punuj kukamã hamaxpêr kêt nê. Na htem âm htÿx pa. Tã kêr ka mê uràk nê mëmoj punuj kukamã ajamaxpêr o ri apa hkêt nê.

²¹Amnepê m na pre Tirtũm tanhmã Ijaewjê mã kapêr to. Mê kapêr o mê kãm kapêr tã no nhũm mê kuma nê âm kuma. Jakamã nhũm tee ri ja hã mê omu nê amnhĩ tã tanhmã mê harênh to. Tanhmã mê harênh toja Tirtũm kapêr ã kagà htũm kamã na. Kot mê harênh kot:

E kot paj ma mê hwÿr axtem pika hõ rũm pôristi hkwȳ rê kê mê ma mê hwÿr mra nê mê unê. Hãmri nê amnhĩ kapêr o mê kãm kapêr nhũm mê tee ri mê kuma no âm hkôt mëmoj pumunh kêt nê.

Koja mê ã mê hipêx anhÿr tã nhũm mê arĩ kãm ixkapêr mar nê amnhĩ kaxyw ixkôt hamaxpêr prãm kêt nê. Anê.

Tirtũm kapêr ã kagà htũm kot ã mê harênh kot anhÿr. ²²Jakamã kot kaj mê Tirtũm mã amnhĩ jarênh xà hã ixkre hwÿr akuprõ nê mê kapêr õ ho Tirtũm mã amnhĩ jarênh japêr. Nhũm Kris kôt amnhĩ xunhwÿr kêt xwÿnhjaja mê akôt agjê nê hkrĩ nê tee ri mê akapêr ma nê Kris kôt amnhĩ xunhwÿr kêt nê. Tanhmã kot mê amnhĩ to nê hkôt amnhĩ xunhwÿ? Mê kot akapêrta maare hã. No kot ka mê akapêr o Tirtũm nhÿ hã mê kãm akapêr nhũm mëhprĩ hã amar mex nê. Jao tanhmã hamaxpêr to nê mê apyrà nê Kris kôt amnhĩ xunhwÿr japêr. ²³Nom kot ka mê apiitã nhãm mê kapêr õ ho Tirtũm mã mex ã harê nhũm amarĩ ri mê pa xwÿnhjaja mê awÿr agjê nê mê akapêr ã mê ama nê hã mê apumu. Hãmri nê tee ri hamaxpêr nê mê akrã pipãnh ã axpên mã mê ajarê. ²⁴Nom koja mê awÿr agjê ka mê akatãt kôt mê amnhĩ kapêr o Tirtũm kapêr jarênh o akuhê nhũm mëhprĩ hã mê amar mex nê. Hãmri nê amnhĩ kapêr o akapêr ma nê hamaxpêr o:

—Hêxta waa nê. Xep ixte amnhĩ tomnuj xwÿnh na pa. Nã âm hãmri na mê Tirtũm kapêr jarê. Nã âm hãmri na kêt ja. Anê.

²⁵Hãmri nê mê amã tanhmã kot amnhĩ tomnuj to hã amnhĩ jarênh pa hãmri nê hkaga nê Jejus kôt amnhĩ xunhwÿ. Nê hkõnkrã ho htêm nê hkrĩ nê Tirtũm mã mex o mex ã harê. Hãmri nê mê amã:

—Nã âm hãmri na hte Tirtũm mê akamã pa ho pa. Anê.

**Tirtũm nhõrkwÿ kamã mê pahte tanhmã amnhĩ nhĩpêx to hã
mê pamã karõ**

Atrẽ 2.42, 5.12-13; Eprêw 10.25

²⁶E Jejus kôt ixkwÿjaja. Kot paj hpãnhã axtem mê amã mëmoj tã karõ. Mê kot Tirtũm mã amnhĩ jarênh xà hã ixkre kamã tanhmã mê ate amnhĩ nhĩpêx to hã karõ ka mê inhma.

Nã kêr ka mê axpên wÿr akuprõ nê akrĩ ka mê atõ amã Tirtũm mã mex ã harênh ã mê grer o agrer prãm hãmri nê mãmrĩ kãm ho gre.

Hāmri nē agrer pa kê apānhã mēhō kànhmã xa nē Tirtūm kapēr kwỳ ho mē ajahkre. Nē ho anhỳr pa nhūm hpānhã mēhō kànhmã xa nē Tirtūm kot tanhmã ho mex to hã mē amã amnhĩ jarē. Nē amnhĩ jarēnh pa hāmri nhūm mēhō nhām mē kapēr ō ho mē amã ujarēnh japêr. Hāmri nē ujarēnh pa kê mēhō hpānhã mē akapēr o hprĩ hã mē amã kapërta jarē.

E kêr ka mē axpēn wỳr akuprō nē Kris kôt axpēn to axihtỳx kaxyw ă axpēn pānhã amnhĩ nhĩpêx anē.

27Nē ka mē atō amã nhām mē kapēr ō ho mē kām akapēr prām japêr. Nom kêr ka mē axohtō nē ă mē kām amnhĩ nhĩpêx anhỳr kêt nē. Ăm mē atō wa axkrutre rỳ axkrunēpxire nē mē kapēr ō ho mē kām akapēr. Hāmri nē axpēn pānhã akapēr pa kê mēhō kot hprĩ hã mē kapēr ōta mar japêr nē mē apānhã xa nē mē akapēr o mē kām harē kê mēhprĩ hã mar mex nē. 28Nom koja ja kaxyw mēhō amrakati japêr ka mē kapēr ō ho akapēr kêt nē. Ăm kapxipix nhỹri ahte Tirtūm mã akapēr.

29Nē kê Tirtūm nhỹ hã kapēr jarēnh xwỳnhjê hō wa axkrut rỳ axkrunēpxi nē mē ajahkre ka mē aprĩ hã mar o akrĩ. Hāmri nē mar pa nē tanhmã mē harēnh to. Ăm hāmri Tirtūm nhỹ hã kapēr ă mē harē rỳ ho hêx ă mē harē.

30Nē koja mēhō Tirtūm nhỹ hã mēmoj jarēnh o xa. Rôm nhūm Tirtūm mē kaxyw mē atō mã ajamaxpēr kwỳ gō. Ka kapēr o ăm xwỳnhhta mã kànhmã anhĩkra pē kê apumu nē anhĩkrê. Hāmri ka hpānhã xa nē mē kām tanhmã ajamaxpēr tota jarē. 31Nom kêr ka mē anhĩpê mē kām akapēr hkêt nē. Ăm axpēn pānhã Tirtūm kapēr o axpēn jahkre nē ho axpēn jamaxpēr o axihtỳx. Ja mex. 32-34Nom kêr ka mē axpēn wỳr akuprō nē apiitã anhĩpê atỳx ri akapēr kêt nē. Ja na Tirtūm kêp hprām nōkati. Mē ate axpēn pānhã axpēn mã akapērja na kām hprām. Jakamã kê mē kot Tirtūm nhỹ hã mē kapēr jarēnh o pa xwỳnhjaja taxy axpēn jahkre hã axpēn jamã. Nhūm mēhō kumrêx kapēr pa hāmri ka hpānhã mē kām akapēr.

Nē kê mēnijaja amarĩ mē ahkreja mar o hkrĩ. Ijaew kot amnhĩ nhĩpêx xà hkôt. Jakamã kwa mē anijaja. Kêr ka mē amarĩ akryk mē mar o akrĩ nē axpēn mã akapēr o akrĩ hkêt nē. 35No kot kaj mē tee ri mēmoj ma nē mar mex kêt japêr tã hã axpēn kukjêr kêt nē. Ăm akryk arĩ mar o akrĩ. Hāmri nē akupỳm anhōrkwỳ hwỳr tē nē rĩ kormã hã amjên kukja. Nom kot ka mē apikuprōnh xà hã ixkre kamã axpēn mã akapēr o akrĩ nhūm mē amjênjaja tee ri ja hã mē apumu nē hpijaàm nē.

36E na pa ă Tirtūm mã amnhĩ jarēnh xà hã ixkre kamã tanhmã mē pahte amnhĩ nhĩpêx to hã mē amã karō anē. Tã te mē apê ja mex kêt pyràk. Kwa mon ka wem ja ma nhūm mē apê omnuj nē? Xà mē ate Tirtūm kapēr mar mex o ijakrenh kôt na ka mē ă ajamaxpēr anē? Xà na pre Tirtūm mē akumrêx mã kapēr? Hã na ka mē ă ajamaxpēr anē? Rỳ xà mē kapxipix mã na pre kapēr? Hã na ka mē ixkapēr ma nhūm mē apê

omnuj nê? Nà ixkumrêx na pa pre mẽ awÿr inhmôr nê mẽ amã Tirtûm kapêr jarênh kênã kot ka kêt mẽ axtem nê ã ajamaxpêr anê. 37Kot kaj mẽ atô ã ajamaxpêr anhÿr japêr nê ajamaxpêr o:

— Nà na pre Tirtûm tanhmã inhmã kapêr to pa ô ri mẽ kãm ixujarênh mex o ri ixpa.

Anhÿr o ajamaxpêr. Rÿ ajamaxpêr o:

— Nà na pre Tirtûm Karô mẽ kaxyw tanhmã ixto pa ÿ hã tanhmã mẽ ho mex to ho ri ixpa.

Anhÿr o ajamaxpêr. Kot kaj mẽ ã ajamaxpêr anê hãmri nê mãânên pa ã ixte amnhĩ nhĩpêx anhÿr ã ixpumunh mex kurê kumrêx. Amnhĩ pyrã nê ixte Tirtûm nhÿ hã mẽ kãm ixkapêr xwÿnh ã ixpumunh nê hã ijarênh kurê kumrêx. 38Nom koja ja hã ijarênh kêt ka mẽ ja hã omu hãmri nê tanhmã kot mẽ amã kapêr toja ma nê ãm ama.

39E Kris kôt ixtô nê ixtôxjaja. Kêr ka mẽ amnhĩ to Tirtûm Karô wÿ kê ma mẽ ate mẽ kãm Tirtûm kapêr jarênh o ri apa kaxyw mẽ ato mẽ axihtÿx.

Nê koja mẽhõ kãm nhãm mẽ kapêr ô ho kapêr prãm ka mẽ ja nê kãm akapêr kêt nê. Kwãr mãmrĩ ã amnhĩ nhĩpêx anê. 40Nom kêr ka mẽ ate Tirtûm mã amnhĩ jarênh xà hã ixkre kamã axpên pãnhã axpên mã akapêr nom anhĩpê kãm akapêr hkêt nê.

Kris akupÿm htĩr kumrêx ã harênh

Atre 2.23-36, 10.39-41; Wam Korîť 6.14

15 1E Kris kôt ixkwÿjaja. Kot paj axte mẽ amã Jejus kot mẽ panê tanhmã amnhĩ nhĩpêx to hã harê ka mẽ inhma. Na pa pre ra mẽ amã ja jarê ka mẽ ama nê hkôt amnhĩ xunhwÿ. Nê hkôt amnhĩ nhĩpêx mex o ri apa. 2Na pa pre mẽ amã harê ka mẽ amnhĩ kaxyw kãm ajamaxpêr tÿx nê nhũm Tirtûm mẽ ato hkra. Tã ka htem arĩ kapêr kôt amnhĩ nhĩpêx mex o ri apa. Koja mẽhõ kot Tirtûm kapêr mar tã amnhĩ kaxyw hkôt hamaxpêr kêt nê nhũm Tirtûm tee ri amnhĩ tã omu nê ho hkra hkêt nê.

3Na pa pre amnhĩ krã hkôt mẽ amã tanhmã Kris jarênh to hkêt nê. Ixte kapêr mar xà hkôt na pa hte amnhĩ xô ri mẽ amã tanhmã harênh to ho ri ixpa. Jejus jarênhja na mex o kot mẽ ujarênh piitã hakrenh par kumrêx. Tã tãm kot paj mẽ amã harê. Na pre Krisja mẽ pahte amnhĩ tomnuj pãnhã amnhĩrer kaxyw mẽ panê ty. Tirtûm kapêr ã kagà htũm kot hkukamã harênh xà hkôt. 4Hãmri nhũm mẽ kên kre kamã haxà nhũm kamã nõr o apkati. Nê axte hã apkati. Hãmri nhũm Tirtûm akupÿm ho htĩr. Kapêr ã kagà htũm kot hkukamã harênh xà hkôt. 5Tã nhũm Simãw Pêtre kumrêx akupÿm htĩr ã omu nhũm hpãnhã Jejus nhÿ hã mẽ ahkre ho mẽ pa xwÿnh maatijaja haxwÿja omu. 6Hãmri nhũm mẽ kot hkôt mẽ pa xwÿnh pê 500 jakrenh xwÿnh piitã anhĩpê

haxwỳja akupỳm htīr kām omu. Na pre ra mẽ hkwyjaja ty nhũm mẽ hkwyjaja arī htīr nẽ pa. ⁷Jakamã nhũm prem ra akupỳm htīr kām omu. Hãmri nhũm hpãnhã Xiakreja omu. Nhũm hpãnhã ỹ hã mẽ ahkre o mẽ pa xwỳnh piitã omu. Akupỳm htīr kām omu. ⁸Tã pa na pa pre ijaxwỳja amnhĩ to hapu nẽ akupỳm htīr kām omu. Te ixpê mẽ hkra kot hapu pyrã nẽ amnhĩ to hapu nẽ omu. Na pre kaxkwa kamã inhmã kapēr o xa pa ixprĩ hã omu. ⁹No mẽ kot ixpyrã nẽ Kris nhỹ hã mẽ ahkre ho mẽ pa xwỳnh maati hkwyjaja na mẽ mex o kot ijakrenh. Na pa pre hte mẽ hkĩnhã amnhĩ tomnuj tỳx nẽ. Jao Kris pẽ hkrajê homnuj tỳx o ri ixpa. Tã hkõt amnhĩ xãm hãmri nẽ tee ri ã amnhĩ nhĩpêx anhỹr ã amnhĩ pumu nẽ amnhĩ kamã xipiijaàm tỳx nẽ. Jakamã na pa hte Kris nhỹ hã kapēr jarēnh o ixpa hã amnhĩ pumu nẽ ixte hkõt amnhĩ xãm kêt ri tanhmã ixte amnhĩ nhĩpêx toja mã ijamaxpēr nẽ xipiijaàm nẽ. ¹⁰Na pa pre amnhĩ tomnuj tỳx o ixpa htã nhũm Tĩrtũm arī kãm ijapê nẽ. Nẽ ixkamã ukapřĩ nẽ. Pa pre hkõt amnhĩ xãm nhũm ixto hkra pa ra kãm tanhmã amnhĩ nhĩpêx to mex rãhã ho ixpa. Jakamã na hte tee ri amnhĩ tã ixpumu nẽ tanhmã hamaxpēr to hkêt nẽ. Rỳ hamaxpēr o:

—Hêxta waa nẽ. Inhmã Pawre japê nẽ ixte ho mex tã nhũm ixkõt amnhĩ nhĩpêx kêt kumrêx.

Anhỹr o tee ri hamaxpēr kêt nẽ. Na pa hte kãm tanhmã amnhĩ nhĩpêx to ho ixpa rũnh o ỹ hã mẽ kapēr o pa xwỳnh kwỳjê jakre ho ixpa. Nom amnhĩ krã hkõt mẽ ahkre hkêt nẽ. Ja kaxyw na pre Tĩrtũmja ixto ixihitỳx pa ỹ hã kãm tanhmã amnhĩ nhĩpêx to ho ri ixpa nhũm ja hã ixpumu nẽ hkĩnh nẽ.

¹¹Nẽ Jejus jarēnhja ãm pixii. Axtem hõ hkêt. Nẽ ỹ hã mẽ ahkre ho mẽ pa xwỳnhjê kapērja nẽ pa ixte mẽ amã harēnhja kot axpẽn pyrãk. Harēnh tipxi. Kris kot mẽ pahte amnhĩ tomnuj mỳrapê mẽ panê htyk nhũm Tĩrtũm kot akupỳm ho htīr ã wa harēnhja na pa hte pix jarēnh o ri mẽ akõt ixpa. Ka prem inhma nẽ amnhĩ kaxyw hkõt ajamaxpēr tỳx nẽ.

Tĩrtũm kot akupỳm mẽ pahto mẽ pahtĩr ã harēnh

Rukre 20.37

¹²Nẽ kwa ra ixte mẽ amã Kris htyk nẽ akupỳm htīr ã harēnh tã ka xep mẽ akwyjaja axtem nẽ mẽ htyk nẽ akupỳm mẽ htīr kêt ã mẽ hkamnhĩx o ri apa. ¹³Kwa mẽ ajamaxpērja mex kêt. Kêp apu ãm hãmri mẽ ate ã mẽ harēnh anhỹr ronhỹx pre Kris haxwỳja akupỳm htīr kêt nẽ. Nhỹx pre htyk o ty.

¹⁴Nẽ kêp apu Kris akupỳm htīr kêt ronhỹx pa mẽ ãm mẽ amã kapēr jarēnh o ixpa kapřy. Ka mẽ ajaxwỳja amnhĩ kaxyw hkõt ajamaxpēr kapřy.

- 15 Nē kēp ãm akupÿm mẽ htĩr kêt ronhÿx pa mẽ ixte mẽ amã
Tĩrtũm kapēr jarēnh o ri ixpa xwÿnhjaja mẽ amã ho ixēx
o ri ixpa. Na pa htem mẽ amã Tĩrtũm ra kot akupÿm Jejus
o htĩr ã harēnh o mẽ akôt ixpa. Tã kēp apu akupÿm mẽ
htĩr kêt ronhÿx pa mẽ ãm mẽ amã harēnh o ixēx.
- 16 Nē kēp apu akupÿm mẽ htĩr kêt ronhÿx pre Kris haxwÿja
akupÿm htĩr kêt nē. Nhÿx pre ãm amarĩ tyn hapēx.
- 17 Nē Kris amarĩ htyk nē hapēx ronhÿx kot pu mẽ ri amnhĩ kaxyw
hkôt pajamxpēr nē hkôt amnhĩ xunhwÿr kaprÿ.
Nē Kris amarĩ htyk nē hapēx ronhÿx pre Tĩrtũm Jejus kukwak ri
mẽ panē mẽ pahte amnhĩ tomnuj o hapēx kêt nē. Nhÿx pu
mẽ pahpiitã nhÿrmã ma kuwy hwÿr pajapēx pa.
- 18 Nē kēp apu Kris htyk nē hapēx ronhÿx ra mẽ kot amnhĩ kaxyw
hkôt hamaxpēr tã ra htyk xwÿnhjaja ma mẽ kot amnhĩ
tomnuj mÿrapê kuwyta wÿr hapēx.
- 19 Nē kēp apu Kris htyk kumrēx nē hapēx ronhÿx pu mẽ kormã
pahtyk kêt xwÿnhjaja tee ri amnhĩ wÿr kamã pajamak o ri
papa kaprÿ. Nē pahpê hkra hã amnhĩ jarēnh kaprÿ. Jao
pahkaprĩ htÿx o mẽmoj piitã hakrenh par kumrēx nē ri
papa.

Kris kumrēx akupÿm htĩr ã harēnh

Atre 26.23; Sikũn Korīt 4.14; Piripos 3.10-11;

Wam Tesarõn 4.15-18; Apokarip 20.1-15

20Nã mẽ htyk nē nhÿrmã akupÿm mẽ htĩr kêt ã mẽ harēnhja kot
anhÿr kêt. Ra Tĩrtũm kot akupÿm Kris o htĩr jakamã koja mããnēn hkra
htyk xwÿnhjaja nhũm mẽ piitã Jejus pyrã nē nhÿrmã akupÿm mẽ ho htĩr
pa. Jakamã na pu htem Kris akupÿm htĩrja mã pajamaxpēr nē amnhĩ
kukamã pajamaxpēr o:

—Nã ra Tĩrtũm kot akupÿm Jejus o htĩr jakamã koja uràk nē nhÿrmã
akupÿm mẽ pahte hkôt amnhĩ xunhwÿr xwÿnh piitã mẽ pahto mẽ
pahtĩr. Nã koja ã mẽ panhĩpēx anē. Ja kaxyw àhpumunh tÿx kumrēx
xwÿnh kēnã. Anē.

21Nē amnepēm na pre Tĩrtũm my kot waja nhĩpēx. Hãmri nhũm kot
tanhmã amnhĩ tomnuj to ho ra mẽ htykja o hkrax. Tã nhũm wamta kôt
my hõta wamta rom amnhĩ to mex o mẽ htyk tã akupÿm mẽ ho htĩr o
hkrax. 22-23Tã mẽ pahpê wam my pê Atãw kanrēhã tãmnhwÿ jakamã
kot puj mẽ uràk nē nhÿrmã ty. No ãm mããnēn mẽ pahpê Kris kraa. Kris
kumrēx na pre akupÿm htĩr. Tã koja nhÿrmã akupÿn mẽ pahwÿr wrÿ
hãmri nhũm Tĩrtũmja kot hipēx pyrã nē akupÿm mẽ pahto mẽ pahtĩr.
Mẽ pahte hkôt amnhĩ xunhwÿr ã mẽ pahpumunh kôt akupÿm mẽ pahto
mẽ pahtĩr pa. No ãm kormã.

Kris nhỹrmã kot mẽ htyk o hapêx ã harênh

*Juãw 11.25; Rõmãn 6.23; Wam Korīt 15.54;
Sikũn Ximotre 1.10; Eprêw 2.14; Apokarip 20.14*

24-28Nê koja Kris arĩ mẽ ho amnhĩptàr rãhã nhũm Tĩrtũm mẽ kot kutã amnhĩ xunhwỳr xwỳnhjê pê mẽ hihtỳx xà ho hapêx pa. Kapêr ã kagà htũm kot ja jarênh kot:

Koja nhỹrmã Tĩrtũm Kris kot kãm mẽ ho amnhĩptàr kaxyw ãm.
Anê.

Jakamã Jejus tapxipix koja mẽ ho amnhĩptàr o pa. Koja Tĩrtũm pix mẽ ho amnhĩptàr kêt nê. Nom koja pahi hkwỳjê hõ axte nhãm mẽ ho amnhĩptàr kêt kumrêx.

Tã mẽ kot mẽkarõmnuti hkõt kãm tanhmã amnhĩ to ho mẽ pa xwỳnhjaja koja Tĩrtũm ma amnhĩ nê kuwy hwỳr mẽ rênh pa. Nê mẽhtykja o hapêx nhũm mẽhõ axte htyk kêt kumrêx. Jakamã koja Jejus Kris mẽmoj punuj piitã ho hapêx nê Mêpahpãm Tĩrtũm nhĩhkram akupỹm mẽmoj piitã haxàr pa. Tĩrtũm jamaxpêr xà hkõt ã mẽmoj to anhỹr par anê hãmri nê ìhkram mẽmoj jaxàr pa. Nê mãanên tãm kãm amnhĩ gõ. Jakamã nhũm Tĩrtũm tapxipix mẽmoj piitã ho amnhĩptàr pa.

Mẽ htyk xwỳnhjê jarênh

29Nê na hte mẽ pahkwỳjaja kormã kêp Tĩrtũm kra hkêt tã Jejus kõt mẽ kot amnhĩ xunhwỳr nê mẽ htyk xwỳnhjê mã hamaxpêr o pa. Hãmri nê mẽ kãm nhỹrmã axte mẽ omunh prãm xàj mẽ uràk nê Jejus kõt amnhĩ xunhwỳ nhũm mẽ hkrã kumrã. Tã akupỹm mẽ htĩr kêt ronhỹx mẽ ãm ã pajamaxpêr anhỹr kaprỳ. 30Nê paa. Na pa hte ma mẽ kãm Tĩrtũm kapêr jarênh o ri mẽ hkõt ixpa. Nhũm mẽ hkwỳjaja ja hã inhma nê ixkamã gryk nê ixtã amỳnê pa mẽ mỳrapê ixpunuj nê ri ixpa. No ãm amnhĩ to htỳx nê arĩ ri mẽ kãm Kris kapêr jarênh o ri mẽ hkõt ixpa. Tã kêp ãm nhỹrmã akupỹm ixtĩr mã kêt ronhỹx pa tee ri ã amnhĩ nhĩpêx anhỹr o ri ixpa kaprỳ. 31Na htem apkati mẽ ixtã tanhmã ãnnên to ho ri pa. ãm hãmri na pa mẽ amã ã mẽ harênh anê. Nom na pa hte tee ri amnhĩ kukamã ijamaxpêr o ri ixkaprĩ nê ixpa hkêt nê. Mẽ kot ixpĩr mã tã pa hte mẽ ate Pahihti Jejus Kris kõt amnhĩ nhĩpêx mex ã mẽ apumunh kõt ixkĩnh nê ri ixpa. Nhũm te ixkamã mẽmoj kêt pyràk pa hte ri ixpa. 32Na pa hte jar Epes kamã mẽ oprê xwỳnhjê kutã amnhĩ to htỳx pê mẽ kãm Jejus kapêr jarênh o ri mẽ hkõt ixpa nhũm mẽ kãm mar prãm kêt jakamã hã ixtomnuj tỳx nê. No nhỹrmã ixyk nê akupỹm ixtĩr mã kêt ronhỹx pa mẽ kêp Kris kwỳ hkêt xwỳnhjê jamaxpêr o ijamaxpêr nê mẽ uràk nê ijamaxpêr o:

Ixe ixyk ã arĩgro pumunh kêt jakamã kot paj mãmrĩ mẽmoj piitã hkur o ri ixpa.

Nē māmri mēmoj piitã ho ixkõm o ri ixpa.

Nē māmri mēmoj piitã ri tanhmã ho ho ri ixpa.

Ixyk nē axte ixte ã amnhĩ nhĩpêx anhÿr o ixpare kaxyw ã.

Anhÿr o nhÿx pa ijamaxpêr o ixpa. Kêp ãm Tirtũm kot akupÿm mẽ pahto mẽ pahÿr mã kêt ronhÿx pu mẽ ã mẽ kêp Kris kwÿ hkêt xwÿnhjê jamaxpêr anhÿrja kôt pajamaxpêr pix o ri papa. No ãm ja kot anhÿr kêt.

33Na htem mēmoj jarēnh o:

—Mē kot htÿx ri amnhĩ tomnuj xwÿnhjê hkôt ri mẽ pa xwÿnhjaja koja mẽ gaa nē mẽ kot amnhĩ nhĩpêx kôt amnhĩ nhĩpêx o ri pa. Anē.

Ãm hãmri na ã mẽ harēnh anhÿrja. Jakamã kwa mẽ okora. Kêr ka mẽ ã amnhĩ nē mẽ kot amnhĩ nhĩpêx anhÿr o mẽ pa xwÿnhjê pumunh mex o ri apa. 34Kwa mẽ tokyx mẽ ate tanhmã amnhĩ tomnuj to hã amnhĩ pumu nē axte ã amnhĩ nhĩpêx anhÿr kêt nē. Nē mẽ ate Tirtũm kot akupÿm mẽ ho htĩr kêt ã harēnh xwÿnhjaja. Te mẽ ate Tirtũm kot amnhĩ nhĩpêx ã omunh kêt pyræk. Tã mẽ ate tokyx ja hã amnhĩ pumunh nē amnhĩ kamã apijaàm kaxyw na pa ã mẽ amã ixkapêr anē.

Mē panhĩ nyw jarēnh

Rukre 20.34-36; Rõmãn 8.10-11; Sikũn Korit 5.1; Piriapos 3.20-21

35Nē mãn ka mẽ atõ akupÿm mẽ htĩr ã mẽ harēnh ma nē tee ri mẽ hkukamã ajamaxpêr nē hã ri tanhmã axpēn kukjêr to nē axpēn mã:

—Kwa tanhmã koja we Tirtũm akupÿm hkra htyk xwÿnhjê ho htĩr to? Ra mẽ htyk nē mẽ ĩ katõk nē hapêx par mã kēnã. Tanhmã kot wem amnhĩ to nē akupÿm htĩr? Nē tanhmã koja we mẽ ĩ nywja kute wehe? Anē.

36Nã na ka mẽ atÿx ri ã ajamaxpêr anē nē tee ri mẽ hkukamã ajamaxpêr. E kot paj ixprĩ hã ja hã ejêp jarē ka mẽ inhma. Nã na htem mēmo y hkre. Te mẽ kot mẽ htyk jaxàr pyræk o hipêx nē hkre nhũm hikwÿ nē gaa nē higrõt hapõj. Nom te kêp mēmo yta pyræk kêt. 37Ãm hy pix na htem hkre. No higrõt kre hkêt nē. Rÿ tanhmãn pàr nywja kre hkêt nē. Ãm hy pix na htem hkre. Tã nhũm higrõt hapõj nē hprêk nē gaa nē ô. 38Tirtũm na hte hamaxpêr xà hkôt tanhmã ho nhũm higrõt hapõj nē hprêk nē ô. Tã ja pyrã nē kot puj mẽ Tirtũm jamaxpêr xà hkôt pahtyk tã koja akupÿm mẽ pahto mẽ pahÿr nē mẽ pamã mẽ panhĩ nyw gõ.

39Nē mēmo hy piitã te kot axpēn pyræk kêt. Ahpÿnhã na. Ja pyrã nē ahpÿnhã ri mēmoj piitã ĩ. Na axtem mẽ panhĩ nē axtem mry nhĩ nē axtem àk nhĩ nē axtem tep nhĩ. Mēmoj piitã ahpÿnhã ri ĩ.

40-41Nē kaxkwa kamã haxwÿja mēmoj piitã ahpÿnhã no ãm muxre. Myytija mex. Nē mytwrÿreja axte mã no ãm haxwÿja mex. Nē kanhêti haxwÿja mex. Haxwÿja axte mã. Kamã hkwy hpõk kryre nē kamã hkwy hpõk rÿnhti no ãm piitã mex.

Nē jar pika ja kamā haxwỳja mēmoj piitā mex. No ām te kot kaxkwa kamā mēmoj jarir xwỳnhja mex pyrāk kêt. Axtem na raa.

42Tā koja mē panhĩ nywja haxwỳja axte mā. Te kot panhĩ htũm pyrāk kêt. Na htem ty nhũm mē ma mē o mra nē mē hagjê. Nhũm mē hikwỳ nē gaa nē ĩ rerek nē hapêx. Tā koja Tirtũm akupỹm tanhmā mē pahto mē pahtĩr to pu mē hpānhā pamex kumrêx. Hāmri nē axte mā mē panhĩ nyw mex o mex jakamā koja axte htyk nē ĩ rerek kêt nē.

43Na htem ty nhũm mē hagjê nhũm htyk xwỳnhhta tanhmā amnhĩ to hkêt nē amarĩ hikwỳ. Omnuj nē ĩ nhenhek nē hikwỳ. Tā koja Tirtũm akupỹm mē ho mē htĩr nē mē kām mē ĩ nyw gō nhũm mē hpānhā mex kumrêx nē hihtỳx nē Tirtũm nhõ krĩ kamā pa ho pa.

44Mē htyk nhũm mē kot mē hagjênh xwỳnhjaja na htem arĩ ĩ htũm ā hikwỳ. Ām jar pika ja pix kām ri mē papa kaxyw na mē panhĩ htũmja. No mē panhĩ nywja axtem Tirtũm nhõ krĩ kamā ri mē papa kaxyw jakamā koja mē panhĩ nywja axte mā. Tirtũm Karõ koja mē pamā kugō.

Mē panhĩ nyw te kot Kris nhĩ pyrāk ā harênh

Rukre 20.34-36

45-46Nē Tirtũm kapêr ā kagà htũm kot Atāw jarênh kot:

Na pre Tirtũm my kot wa Atāwja nhĩpêx. Jakamā Atāw kêp pika nhõ xwỳnh na pre. Anê.

Ā Atāw jarênh kot anhỹr. Ja pyrā nē na pu htem pakatorxà nhõhy rũm pajapôj nē Atāw pyrā nē pahpê pika nhõ xwỳnh. Tā nhũm Atāwja pa nē gaa nē hpigêt nē ty. Jakamā kot puj mē urāk nē papa nē gaa nē ty. Nom nhũm Krisja Atāw kurom kêp akupỹm mē ho mē htĩr xwỳnh jakamā kot puj mē pahpê hkwỳjaja Atāw pyrā nē nhỹrmā mē pahtyk tā nhũm Kris akupỹm mē pahto mē pahtĩr. Hāmri nhũm Tirtũm Karõ mē pamā mē panhĩ nyw gō pu mē axte pahtyk kêt nē. Pānhā axte mā mē pahpê kaxkwa nhõ xwỳnh.

47Nē Atāw na pre Tirtũm pika ho hipêx nē ho htĩr nhũm ri pa. Nom Kris na pre Atāw rom kaxkwa rũm mē pahwỳr wrỳ. 48Tā mē pahpê pika nhõ xwỳnhjaja te mē pahpê Tirtũm kot wam my nhĩpêx xwỳnhhta pyrāk. No mē pahte kaxkwa hwỳr ma papa mā xwỳnhjaja te mē pahte kaxkwa rũm my kot mē pahwỳr wrỳk xwỳnh Krista pyrāk. 49Tā kormā mē pahpê pika nhõ xwỳnh jakamā te mē pahpê my pika ho hipêx xwỳnhhta nhĩ pyrāk. Nom kot puj mē nhỹrmā ty hāmri nē hpānhā te pahpê kaxkwa rũm my kot mē pahwỳr wrỳk xwỳnhhta nhĩ pyrāk.

Axte mē pahtyk kêt kumrêx ā mē pajarênh

Juāw 11.25; Sikũn Korit 5.4; Wam Tesarõn 4.13-18

50Nē kot puj mē panhĩ htũm rāhā Tirtũm nhõ krĩ hwỳr paxàpir kêt nē. Panhĩ htũm na hte ty nē rerek nē hapêx. Jakamā koja Tirtũm Karõ

mě pamã mě panhĩ nyw gõ pu mẽ rĩ kormã ma õ krĩ hwÿr pajapêx pa nẽ kamã papa ho papa.

51-52E mẽ inhma. Na pre kormã Tĩrtũm mẽ amã mẽmoj to amnhĩrĩt kêt tã ra inhmã ho amnhĩrĩt. Jakamã kot paj ÿ hã mẽ amã harẽ ka mẽ inhma. Nà kot puj mẽ pahpiitã mẽ pahtyk kêt nẽ. Koja nhÿrmã Tĩrtũm kapêr o mẽ wryk xwÿnhjê hõja mẽ pamã pifti kakõ. Mẽ pajaêr pê hkakõ. Hãmri nhũm Tĩrtũm kra ra mẽ htyk nẽ mẽ hikwÿ xwÿnhjaja akupÿm ĩ nyw o htĩr kurê kumrêx. Nẽ kormã mẽ pahtyk kêt xwÿnhjaja kot pu mẽ mẽ pahtyk kêt ri mẽ uràk nẽ panhĩ nyw kurê kumrêx. Hãmri pu mẽ pahpiitã pahĩr o pahĩr tũm nẽ papa. 53Koja Tĩrtũm mẽ panhĩpêx o te mẽ pahte paxê htũm o papinhĩpanh nẽ hpãnhã paxê nyw jagiênh pyræk. Jao mẽ panhĩ htũm o hapêx nẽ hpãnhã mẽ pamã mẽ panhĩ nyw gõ pu mẽ axte pahtyk kêt kumrêx nẽ ri papa ho papa. 54Tĩrtũm kapêr ã kagã htũm kot ja jarênh kot:

Na ra Tĩrtũmja mẽhtyk ho hapêx pa. Anẽ.

Te ra kot ho hapêx par pyræk o ã harênh kot anhÿr. No ãm kormã. Jakamã kot puj mẽ nhÿrmã panhĩ nyw nẽ ri papa nẽ mẽ pahtõ axte pahtyk kêt kumrêx. 55Mẽ pahtykja te mẽ kot makre par nhũm axte kot mẽ hkamnhwÿr kêtja pyræk. Urà nẽ koja Tĩrtũm akupÿm mẽ pahto mẽ pahĩr pu mẽ axte pahtyk kêt nẽ. Nẽ axte ri pamã ma hkêt nẽ papa. Nẽ axte paxà hkêt nẽ. 56Tĩrtũm kapêr ã kagã htũmja ã mẽ pakukamã mẽ pajarênh kot anhÿr. Mẽ pahte amnhĩ tomnuj xwÿnh jakamã kot puj mẽ nhÿrmã ty. 57Nom nhũm Tĩrtũm àhpumunh tÿx o àhpumunh tÿx jakamã na hte Pahihti Jejus Kris kukwak ri mẽ pahte hkõt amnhĩ xunhwÿr xwÿnhjê nẽ mẽ pahte amnhĩ tomnuj rênh pa. Pu mẽ nhÿrmã mẽ pahtyk tã nhũm akupÿm mẽ pahto pahĩr.

Mẽ pahte Jejus mã tanhmã amnhĩ nhĩpêx mex to hã mẽ pamã karõ

Karatas 6.9; Korosẽ 1.10

58Jakamã e kwa Jejus kõt ixkwÿjaja. Kêr ka mẽ arĩ Pahihti Jejus kõt mãn amnhĩ xunhwÿr tÿx rãhã ho ri apa. Nẽ kapêr kõt pix mã ri amnhĩ nhĩpêx rãhã nẽ kãm tanhmã amnhĩ nhĩpêx mex to ho ri apa. Kot kaj mẽ ã amnhĩ nhĩpêx anẽ hãmri nẽ kãm tanhmã amnhĩ nhĩpêx to kapÿr ho ri apa hkêt nẽ. ãm hãmri kãm mẽmoj to anhÿr mex rãhã ho ri apa.

Mẽ kêp amrakati xwÿnhjê jarênh

Atre 11.27-30; Rõmãn 15.25-27; Sikũn Korõt 8.1-24, 9.1-5; Wam Ximotre 6.18

16 1Nẽ na pa pre krĩ pê Karatas kamã tanhmã Jerujarẽ kamã Kris kwÿjê jarênh to. Ijaew kwÿ kot mẽ pahpyrà nẽ Jejus kõt amnhĩ xunhwÿr ã mẽ harẽ nẽ mẽ kêp amrakati hã mẽ harẽ hãmri nẽ mẽ kãm:

—E. Kwa kêr ka mẽ kãm mẽ akàxpore hkwÿ ho akuprõ nẽ ma mẽ hwÿr amẽ.

Anhÿr o mẽ kãm ixkapêr. Jakamã kwa kêr ka mẽ uràk nê mẽ kaxyw mẽ kãm kàxpore hkwÿ ho akuprô. 2Mê panhõ arĩgromnu pê sap ã hkwÿ ho akuprô. Kot kaj mẽ akàxpore rax japêr nê mẽ kaxyw hkwÿ ho rax nê axi. Nom kot kaj akàxpore grire japêr nê mẽ kaxyw mẽ kãm ho grire nê agõ. Kêr pa mẽmo arĩgro hã ma mẽ awÿr mõi ka mẽ ra mẽ kaxyw ho apikuprõnh rax nê.

3Nê ma mẽ kot mẽ kãm ho mõi mã xwÿnhjaja ka mẽ ixkutêp mẽ akwÿjê rê. Kêr pa põi nê mẽ omu hãmri nê mẽ kaxyw kagã nhĩpêx nê kamã mẽ harê. Nê mẽ kãm kugõ nhũm mẽ ma Jerujarê hwÿr kàxpore mẽ ro hã amnhĩ kõt o mõi nê mẽ kãm kugõ. Mẽ kot kamã harênh nê mar hãmri nê mẽ kamjaja mẽ ate mẽ kaxyw mẽ rênh ã mẽ ajarênh ma. 4Rÿ kot ka mẽ amã mẽ hkõt inhmênh prãm nê mãmri mẽ hkõt inhmê pa ma mẽ hkõt mõi.

Pawre kot amnhĩ kukamã amnhĩ jarênh

Atre 19.21-22

5Nom kot paj tokyx mẽ awÿr inhmõi kêt nê. Kot paj ja rũm ixkato nê hpãnhã ma pika pê Masetõn wÿr mõi. Hãmri nê mẽ hkõt ixpa grire nê ma kormã mẽ awÿr Korīt wÿr mõi. 6Hãmri nê põi nê mẽ akõt ri ixpa ryy nê. Nê ixtã amgrã pixi nê hapêx nê rĩ kormã ma axte nhãm krĩ hõ hwÿr mõi. Nê inhnojarêr ka mẽ ixto Tĩrtũm wÿ nê inhmã ixàpkur xà hkwÿ gõi pa ma mẽ hwÿr pry hã hkur o mõi. 7No ixte mẽ awÿr ixpõx nê tokyx mẽ akurũm ixkator nê hpãnhã ma nhãm krĩ hõ hwÿr inhmõi na inhmã hprãm kêt. Jakamã koja Tĩrtũm kãm ja mex pa arĩ ri mẽ akõt ri ixpa hã ixtã mytwrÿ xohtõ nê tokyx ma nhãm inhmõi kêt nê. 8Kot paj kormã jar Epes kamã ri ixpa rãhã nhũm mẽ hkĩnh pê Pêtekos kato nê hapêx pa rĩ kormã ma Masetõn wÿr mõi. 9Na pa hte jar kormã mẽ kãm Jejus kapêr jarênh o ri mẽ hkõt ixpa nhũm mẽ ohtõ nê inhmar o pa. Mẽ kãm mar prãm. Tã no nhũm mẽ hkwÿjaja ohtõ nê mẽ kêp ja omnuj nê nhũm mẽ hã ixkamã gryk nê ixtomnu o pa.

Mẽ kot Ximotre ho mex ã mẽ harênh

Hapuhã Juãw 5

10Nê kwa koja Ximotre mẽmo arĩgro hã mẽ awÿr põi ka mẽ omu nê ho mex nê. Nê mẽ amnhĩ nhõrkwÿ hwÿr awÿ kê mẽ akutã apkur o pa. Na hte ixpyrã nê Pahihti Jejus mã tanhmã amnhĩ nhĩpêx to mex o pa. 11Kormã mẽ pahkĩnhã nyw tã kêr ka mẽ tee ri ja hã omu nê ri axpẽn mã tanhmã harênh to hkêt nê. Mẽ ãm akapêr mex pix o kãm akapêr. Nê koja akupÿn nojarêr ka mẽ pry hã kãm apkur xà hkwÿ gõi kê mex pê man akupÿn ixwÿr mõi pa tokyx omu. Kot paj jar mẽ pahkwÿjê mẽ akupÿn hpõx kamã ijamak o ixpa.

12Nē na pa hte xatā jar mē pahtō Aporja ma mē awȳr mōr kaxyw mē awȳr hano. Kot jar mē pahtō hkwỳjê mē ma mē awȳr mōr kaxyw. Nom kormā. Koja xep mē jar tanhmā amnhĩ to hpa nē rĩ kormā ma mē awȳr mō.

Kagà jatur xà kamā Pawre kot mēmoj tā karō

Epes 6.10-12; Sikūn Ximotre 1.7; Wam Pêtre 5.8-9

13E kwa kêr ka mē arĩ amnhĩ wỳr Jejus kamā ajamak rāhā ho ri apa. Nē hamār pê kutêp tām amnhĩ nhĩpêx o ri apa. Nē amnhĩ kaxyw hkôt ajamaxpêr tỳx rāhā nē.

14Nē mē amā xepên kĩnh pê tanhmā xepên to mex to.

15Mān ka mē ra Estepti mē hkwỳjê jarênh ma. Mē hkumrêxjaja na prem pika pê Gres kamā Kris kôt amnhĩ xunhwỳ. Tā xep mē ra Kris kôt hkwỳjê ho mex o ri mē hkôt pa. 16Kêr ka mē ã mē kot amnhĩ nhĩpêx anhỹr xwỳnhjê kapêr ma nē hkôt ri amnhĩ nhĩpêx o ri apa. Mē kot Kris mā mē ajamār xwỳnh piitā kêr ka mē kapêr ma nē mē hkôt ri amnhĩ nhĩpêx mex nē.

17Nē ota Estepti nē Akajkre nē Putunatrete na mē ra jar pōj. Pa mē Sostenes mē wa mē omu nē wa ixkĩnh nē. Te ixte mē apumunh nē ixkĩnh tỳxta pyrāk. 18Na xep prem ma mē awȳr mō nē tanhmā mē amā kapêr to ka prem mē ama nē akĩnh nē. Tā mē ra amnē ixwỳr mō nē tanhmā inhmā kapêr mex to pa mē kuma nē ijaxwỳja ixkĩnh nē. Kwa kêr pu mē ã mē kot mē panhĩpêx anhỹr xwỳnhjê ho mex o papa.

19-20Nē ota jar pika pê As kamā Kris kôt mē pahkwỳjaja piitā mē awȳr hpêr mē. Nē Akir mē hprō Prisireja wa. Nē wa ōrkwỳ kamā mē kot Tĩrtūm mā amnhĩ jarênh kaxyw mē pikuprōnh xwỳnh piitā mē awȳr hpêr mē.

Nē kêr ka mē nhỹri xepên pumu nē mē apê Kris kôt mē ate xepên to atō nē atōx ã xepên mā akapêr mex nē akĩnh nē.

21E kot paj kagà jatur xà kamā inhĩhkra ho mē amā amnhĩ nhĩxi nhĩpêx ka mē omu. Koja inhmā ixkapêr ã kagà xwỳnhhta ja hā kagà hkêt nē. Pa kot paj hipêx. Ixpê Pawre na pa ã amnhĩ nhĩxi nhĩpêx anē ka mē omu.

22Nē kwa kêr ka mē arĩ amā Pahihti Jejus kĩnh o ri apa. Koja mēhō kām hkĩnh kêt hā koja Tĩrtūm ja hā homnuj tỳx kumrêx.

E “maranat.” Mē pakapêr kām na htem maranat jarênh o: “Kwa tokyx akupỳn mē ixwỳr wrỳ Pahihti.” Anē.

23E kê Pahihti Jejus Krisja mē ato mex nē mē akutā nojarêr rāhā ho pa. 24Ixpyrà nē mē apê Jejus Kris kwỳ jakamā na pa hte inhmā mē akĩnh nē.

Tā ãm ja pix. Ixpê Pawre na pa ã mē awȳr kagà nhĩpêx nē mēnh anē.

Sikũn Korĩt

Pawre wam Korĩt kãm Jejus kõt hkwỳjê hwỳr kagà nê mênh kõt kagà hõ mênh

Pawre na pre kagàja nhĩpêx. Kêp mry hkà ho ixkre nhĩpêx nê ho wênê ho pa xwỳnh na pre. Tã hpãnhã kêp Jejus nhỹ hã hkrajê jahkre ho pa xwỳnh. Jakamã na pre kagàja nhĩpêx nê Korĩt kãm mē kot Jejus kõt amnhĩ xunhwỳr xwỳnhjê hwỳr kumê. Na pre ra mē hwỳr wamta nhĩpêx nê kumê. Wam kagà nhĩxi pê Wam Korĩt. Tã axte hkõt ja nhĩpêx nê mē hwỳr mênh jakamã kagà nhĩxi pê Sikũn Korĩt.

Na pre Korĩt kãm Jejus kõt mē htõjê hõ axtem nê nã puro kamã hpijaàm kêt o pa nhũm Pawre tee ri harênh ma nê mē hwỳr wam kagàta mē nê kamã tanhmã mē kot hipêx to hã mē kãm karõ. Tã kagà ja kamã axte tanhmã hã mē kãm karõ hto.

Na pre ra Korĩt wỳr mē kêp Kris nhỹ hã mē ahkre hã amnhĩ to hêx xwỳnhjaja mē hwỳr pøj nê tanhmã mē kãm kapêr jarênh to ho mē hkõt pa. Nê tanhmã mē kãm Pawre ho hêx to. Jakamã nhũm kagàja kamã tanhmã mē kãm amnhĩ tã àprãr to nê kãm mē hkĩnh tỳx ã amnhĩ jarê. ã na pre Pawre mē kãm mēmoj jarênh nê hã kagà anê. Nê mē kãm hã kagà ho:

1 1Pa Korĩt kãm Tĩrtũm krajaja. Xà mē apiitã mē amex na ka mē apa? E ot pa mē awỳr kagà nhĩpêx nê kumê. Mē amã nê mē anhõ pika pê Gres kamã Tĩrtũm krajê mē mē ato ixpimràatã mē awỳr hipêx nê kumê. Ixpê Pawre na pa hte Tĩrtũm jamaxpêr xà hkõt ma Jejus Kris nhỹ hã krĩ piitã hkõt hkrajê jahkre ho ri ixpa. Tã Kris kõt mē pahtõ Ximotre mē wa mē awỳr hipêx nê kumê.

2E kê Měpahpãm Tĩrtũm mē Pahihti Jejus Kris wa mē ato mex rãhã ho pa. Nê mēmoj to mē akutã nojarêr rãhã ho pa. Ka mē wa kukwak ri ajamakêtkati nê amex nê ri akĩnh nê apa ho apa.

Pawre kãm amnhĩ xà htỳx kamã hamak pyma hkêt ã harênh

Rõmãn 1.11-12; Korosê 1.11; Sikũn Tesarõn 2.16

3-4Nã Tĩrtũm kêp mē panhõ Pahihti Jejus Kris nhĩpêxã na. Nê kêp Měpahpãm maati jakamã na hte mē pakamã ukapri nê tanhmã mē pahto

mex to ho pa. Kot puj mẽ mẽmoj tă tanhmã amnhĩ to nẽ pahkaprĩ nẽ ri papa nhũm ja hã mẽ pahpumu hãmri nẽ hamaxpẽr pix o akupỹm mẽ pahto mẽ paxihtỳx. Mẽmo kaxyw na hte ã mẽ pahto mex anẽ? Nà mẽ pahte amnhĩ tă omunh nẽ amnhĩ pyrãk mẽ hkaprĩ nẽ ri mẽ pa xwỳnhjẽ jamaxpẽr o hihtỳx o mẽ hkõt papa kaxyw. Ja kaxyw na hte mẽ pajamaxpẽr o hihtỳx. Jakamã kwa pu mẽ kãm mex o mex ã mãn harẽnh rãhã ho papa.



Sikũn Korõt 1.3-4

5Na htem tũhã ixto Kris nhĩpẽx pyrã nẽ tanhmã ixto pa amnhĩ xà htỳx kamã ijamak o ri ixpa. Tã nhũm Tĩrtũm inhĩpẽx o te Kris nhĩpẽx pyrã nẽ hamaxpẽr pix o tanhmã ixkrã hto pa mẽ kutã amnhĩ to htỳx nẽ arĩ mẽ hkõt ixpa. 6-7Na pa hte mẽ amã Kris kapẽr jarẽnh o ixpa. Mẽ ate inhmar nẽ hkõt amnhĩ nhĩpẽx kaxyw. Jakamã na hte mẽ kãm Tĩrtũm kapẽr mar prãm kêt xwỳnhjaja tũhã mẽ atã ixtomnuj nẽ pa amnhĩ xà htỳx kamã ijamak o ri ixpa. Tã kwãr mẽ mãmri ã inhĩpẽx anẽ. Mẽ ate Jejus kõt amnhĩ xunhwỳr tỳxja na inhmã hprãm. Na htem tanhmã Kris ã inhĩpẽx to nhũm Tĩrtũm mẽ hã ixpumu nẽ tanhmã ixkrã hto pa inhmã amnhĩ xà htỳx kamã ijamak pyma hkêt nẽ ixpa. Nẽ arĩ mẽ hkõt mẽ kãm kapẽr jarẽnh rãhã ho ri ixpa. Na hte Tĩrtũm amarĩ ã inhĩpẽx anhỳr kêt nẽ. Mẽ ate ã kot inhĩpẽx anhỳr ã ixpumunh nẽ ixpyrã nẽ amnhĩ kaxyw kãm ajamaxpẽr tỳx kaxyw na hte ã inhĩpẽx anẽ. Mẽ ate ja hã ixpumunh nẽ ã ajamaxpẽr anhỳr kaxyw nẽ mẽ ajamaxpẽr o:

— Nà kot pa nhỹrmã Pawre pyrã nẽ tũhã mẽ mỳrapẽ amnhĩ xà htỳx kamã ijamak o ixpa. Hãmri nhũm Tĩrtũm ja hã ixpumu nẽ te ho Pawre nhĩpẽx pyrã nẽ tanhmã ixto pa inhmã amnhĩ xà htỳx kamã ijamak pyma hkêt nẽ ixpa. Nà koja ã inhĩpẽx anẽ.

Anhỳr o mẽ ajamaxpẽr kaxyw na hte Tĩrtũm mẽ kutã ixto ixihtỳx. Mẽ ate ja hã ixpumunh nẽ akupỹm tãm ajamaxpẽr pẽ Karõ nhỹ hã amnhĩ to axihtỳx kaxyw. Jakamã na pa tee ri mẽ akukamã ijamaxpẽr kêt nẽ.

Tĩrtũm kẽp mẽ papytãr xwỳnh ã harẽnh

8E Kris kõt ixkwỳjaja. Kot paj ixprĩ hã mẽ amã tanhmã amnhĩ jarẽnh to ka mẽ inhma. Na pa pre ma pika pẽ As wỳr mũ nẽ mẽ kãm Jejus kapẽr jarẽnh o ri mẽ hkõt ixpa. Hãmri nhũm mẽ hkwỳjaja ja hã ixtomnuj tỳx nẽ pa amnhĩ xà htỳx kamã ijamak pẽ mẽ hkõt ixpa. Kironhỳx pa pre mẽ kamã ty. 9Na pa pre tee ri amnhĩ kukamã ijamaxpẽr o:

—Koja pēr mē ixpī. Tanhmā kot pa we amnhī to nē tokyx mē kēp amnhī pytā? Kot paj tee ri inhmā mē kēp amnhīptār prām. Tīrtūm pix na ja kaxyw mē kutā àhpumunh tỳx. Rỳ nhūm mē kot ixpīr tā nhūm kot akupỹm ixto ixtīr kaxyw tapxipix na àhpumunh tỳx. Nà kot paj amnhī kaxyw tapxipix mǎ mǎn ijamaxpēr o ri ixpa nhūm amnhī tā ixpumu nē hkīnh nē. Ā ixte amnhī nhīpêx anhỹr o ixpaja na kām hprām. Anē.

10Tā nhūm pre ā inhīpêx anē nē xatā mē kēp ixpytār o ixkôt pa. Koja ā mē kēp inhīpêx anhỹr rāhā ho pa. Nà ā kot inhīpêx anhỹr mǎ kēnā.

11Nom kwa kêr ka mē apiitā arī ixto Tīrtūm wỳr rāhā ho ri apa kê mē ama nē mē kām ixkurê xwỳnhjê kutā ixto ixihțỳx rāhā ho pa. Nē ixto mex rāhā nē. Hāmri nhūm mē ohtô nē kot mē kēp tanhmā ixpytār to hā ixtā omu nē ixtā kām mex o mex ā harē.

Pawre kot mē kām amnhī tā aprār ā harēnh

Wam Korīt 2.1-5

12Nē na xep pre atar Kris kôt mē pahkwỳjaja tanhmā ixto kapēr punuj to nē Jejus kot mē awỳr inhmēnh kêt ā mē amā ixto hêx. Nē ijakwa nhīkjê ho inhmā mē akīnh nē ijakwa nhīkjê ho mē ato ixkapēr punuj ā ijarēnh o ri pa. Nom ixte ā amnhī nhīpêx anhỹr kêt. Aa ixte tanhmā mē ano kupyrr to hkêt. Ām hāmri na pa mē amā amnhī jarē nē tām mē amā ixkapēr o ri ixpa nē tām ri mē anhīpêx o ri ixpa. No ijamaxpēr tūm kôt tanhmā mē anhīpêx to hkêt nē. Ām Tīrtūm kot mēmoj to mē pakutā nojarêt ā omunh xà hkôt pix mǎ na pa hte ỳ hā mē ato mex o ri ixpa. Ijamaxpēr nyw o. Na pa hte Tīrtūm pyrā nē mē piitā mē ho mex nē. No mē kajaja ixpyràn mē apê hkra jakamā na pa hte mē ato mex kumrêx o ri ixpa. 13Na pa hte mē amā kagà hkwy nhīpêx nē ixprī hā mē amā tanhmā mēmoj jarēnh to. Mē ate kamā harēnh nē mar mex kurê kumrêx kaxyw. No na pa hte mē amā tanhmā ixêx to rỳ tanhmā mē ano kupyrr to hkêt nē. 14Ā ixte amnhī nhīpêx anhỹr o ri ixpa htā kormā mē apiitā ja hā ixpumunh mex kêt nē. Nē Jejus kot mē awỳr inhmēnh ā ixpumunh mex kêt nē. Jakamā na hte mē akwỳjaja ixto akapēr punuj o pa. Tā kot kaj mē nhỹrmā ām hāmri Jejus kot mē awỳr inhmēnh ā xpên mǎ ijarē pa mē ama nē ixkīnh nē. Hāmri nhūm nhỹrmā mē panhō Pahihti Jejus mē pahwỳr akupỹn wrỳ pa kām mē ajarē nē kām:

—E Pahihti. Jajê mǎ na pa pre akapēr jarēnh o ixpa nhūm mē inhma nē akôt amnhī xunhwỳr kurê kumrêx nē tām amnhī nhīpêx mex o pa.

Anhỹr o kām mē ajarē. Hāmri nē ā mē ate amnhī nhīpêx anhỹr ā mē apumunh kôt ixkīnh nē. Ka mē ajaxwỳja akīnh pê tanhmā kām ijarēnh to ho akuhê.

Pawre hêx kêt ã kot amnhĩ jarênh*Wam Korīt 16.5-6*

15-16 Nê na pa pre ra mẽ awỳr ixkrà. Ixte ma mẽ awỳr inhmõr nhũm mẽ ate ixpumunh nê akĩnh ã mẽ akamnhĩx nê mẽ awỳr ixkrà nê ijamaxpêr o:

— Nà ma Masetõn wỳr inhmõr xwỳj ri kot paj ma Korīt kumrêx wỳr mō. Hāmri nê Kris kôt ixkwỳjê pumu nê rĩ kormã hamũ Masetõn wỳr mō. Nê mẽ kamã ri ixpa tãmtã awjanã nê akupỳn Korīt wỳr mō nê axte mẽ omu. Jao Tĩrtũm kapêr o mẽ ahkre ho axkrut nhũm mẽ amnhĩ tã ixpumu nê hkĩnh nê. Hāmri pa akupỳm Jutej wỳr inhnojarêr nhũm mẽ pry hã ixàpkur xà hã inhmã mẽmoj kwỳ nhõr japêr.

Anhỳr o ijamaxpêr. 17 Tã kormã jar tanhmã amnhĩ nhĩpêx to ho ixpa ka xep mẽ tee ri amnhĩ wỳr ixkãm ama nê axpên mã ijarênh o:

— Kwa Pawre kot ra mẽ pahwỳr nojarêr ã amnhĩ jarênh tã amnhĩm nojarêr kêt kumrêx. Mãn pre ãm mẽ pamã amnhĩ to hêx nà? Ra kot mẽ pamã amnhĩ jarênh tã tokyx hpôx kêtêre hã. Anê.

18 Kwa mẽ ri ã inhmã ajamaxpêr anhỳr kêt nê. Na pa pre mẽ amã ixêx kêt nê. Na pa hte Tĩrtũm noo mã ãm hāmri mẽmoj jarênh o ri ixpa nê mẽ amã mẽmoj jarênh o ixêx kêt nê. Nà ãm hāmri na pa pre ma mẽ awỳr inhmõr ã amnhĩ jarê.

19 Na pa pre ra Ximotre mẽ Siras mẽ wa mẽ amã Jejus Kris jarênh o ri mẽ akôt ixpa. Jejus kêp Tĩrtũm Kra hã harê nê kot amnhĩ nhĩpêx te kot Tĩrtũm kot amnhĩ nhĩpêx pyrãk ã harênh o ri ixpa. Jejus haxwỳja amnhĩ to hêx kêt. Kot mẽmoj tã amnhĩ jarênh xà hkôt na hte ãm hāmri tanhmã amnhĩ nhĩpêx to. Tã ã kot amnhĩ nhĩpêx anhỳrja kôt na pa inhmã ixte amnhĩ nhĩpêx o ixpa hprãm nê. 20 Ra Tĩrtũm Jejus Kris kukwak ri kot mẽ pahto mex ã amnhĩ jarênh jakamã na pu htem axpên mã harênh o:

— Koja Tĩrtũm Jejus kukwak ri mẽ pahto mex rax nê. Ra kot mẽ pahtã amnhĩ jarênh xà hkôt. Nà Tĩrtũm mex o mex. Anê.

Tĩrtũm kot mẽ pa hwỳr Karõ rênh ã harênh*Rômãn 8.14; Epes 1.13*

21 Nà Tĩrtũmja mex o mex. Kot mẽ pahpê hkra kaxyw amnhĩm mẽ paxunhwỳr jakamã na hte tanhmã mẽ pahkrã hto pu mẽ Kris kôt amnhĩ nhĩpêx mex o papa.

22 Na pu htem Kris kôt amnhĩ xunhwỳ nhũm Tĩrtũm ja hã mẽ pahpumu nê mẽ pahwỳr Karõ rê nhũm mẽ pahwỳr agjê. Mẽ piitã mẽ kot mẽ pahpê hkra hã mẽ pahpumunh kaxyw. Te mẽ kot tanhmã mẽ hikukrêx kagã hto nhũm mẽ kot kêp õ dõn ã omunhta pyrãk. Tã koja Tĩrtũm Karõ mẽ pakamã hkrĩ pu mẽ ja hã amnhĩ pumunh kôt Tĩrtũm

kot nhỹrmã mẽ pahto mex rax ã amnhĩ tã omunh kurê kumrêx. Ra kot mẽ pahto mex tã koja nhỹrmã mẽ pahto mex rax o wam kot mẽ pahto mex raxta jakre.

Pawre kãm mẽ kãm àkjêr prãm kêt ã kot amnhĩ jarênh

Wam Korīt 4.21; Sikūn Korīt 10.1-2

23E Kris kôt ixtō nê ixtōxjaja. Kot paj kormã ma mẽ awỳr inhmōr kêt ri ixprĩ hã mẽ amã tanhmã amnhĩ jarênh to ka mẽ ixte amnhĩ jarênh ma. Tĩrtũm tãm mẽ arom kot ijamaxpêr kôt ixpumunh mex jakamã kot paj noo mã ixprĩ hã mẽ amã tanhmã amnhĩ jarênh to ka mẽ inhma.

Na pa pre ra mẽ awỳr inhnojarêt tã no ãm tee ri amnhĩ kukamã ijamaxpêr nê ijamaxpêr o:

—Nà kot paj taxy kormã ma mẽ hwỳr inhmōr kêt nê. Kot paj tokyx mẽ hwỳr mōn pōj nê kot amnhĩ tomnuj xwỳnhta ã mẽ kãm akir nê nê tanhmã mẽ kãm ixkapêr to. Hãmri nhũm mẽ amnhĩ tã inhma nê hkaprĩ nê tee ri amnhĩ kukamã hamaxpêr. ã mẽ kot amnhĩ nhĩpêx anhỹr pymaj kot paj kormã mẽ hwỳr inhmōr kêt nê.

Anhỹr o ijamaxpêr. 24Inhmã ma mẽ awỳr inhmōr nê tanhmã mẽ ate amnhĩ nhĩpêx to hã axte mẽ amã karō kamã ixihỹx prãm kêt. Mẽ akwỳjê rom ra mẽ ate Kris hkôt amnhĩ xunhwỳr tỳx kênã. Tã mẽ ate hkôt amnhĩ nhĩpêx mex o akĩnh nê apaja na inhmã hprãm.

2 1Na pa pre ma mẽ awỳr mō nê mẽmoj tã mẽ amã akir nê nê tanhmã mẽ amã ixkapêr to ka prem inhma nê akaprĩ nê ri apa. Tã inhmã akupỹm mẽ awỳr inhmōr nê axte mẽ amã ixàkjêr prãm kêt jakamã na pa kormã mẽ awỳr inhmōr kêt nê. 2Kot kaj mẽ akĩnh nê apa pa ijaxwỳja ixkĩnh nê ixpa. No kot paj ma mẽ awỳr mō nê mẽmoj tã mẽ amã akir ka mẽ tee ri inhma nê akaprĩ nê. Pa mẽ apumu nê ijaxwỳja ixkaprĩ nê.

3Ja pymaj na pa pre wam ixte mẽ awỳr kagà mēnhhta kamã mẽmoj nê tanhmã mẽ amã ixàkjêr to. Mẽ ate kamã harênh nê mar nê tokyx kormã mẽ awỳr inhmōr xwỳj ri tanhmã mẽ ate amnhĩ tomnuj tota kaga nê tãm amnhĩ nhĩpêx kaxyw. Kêr pa mẽmo arĩgro hã ma mẽ awỳr mōn pōj nê mẽ ate tãm amnhĩ nhĩpêx o apa hã mẽ apumu nê ixkaprĩ hkêt nê ixkĩnh nê. Ka mẽ ajaxwỳja ixpumu nê akĩnh nê. 4Jakamã na pa pre ã mẽ amã kagàta nhĩpêx nê mẽ awỳr mēnh anê. Nê kamã mẽmojta nê tanhmã mẽ amã ixàkjêr to. Na pa pre ixkaprĩ htỳx nê tee ri mẽ akukamã ijamaxpêr o inhmỹr rax pê mẽ amã mẽmojta ã kagà. No ãm mẽ akaprĩ kaxyw na pa pre mẽ amã hipêx kêt nê. ãm mẽ ate kamã harênh nê inhmar nê ajamaxpêr o:

—Hêxta waa nê. Nà Pawre na kãm mẽ pahkĩnh tỳx kumrêx. Hã na pre mẽ pahte tanhmã amnhĩ tomnuj to hã mẽ pajarênh ma nê tee ri mẽ pakukamã hamaxpêr pê kagàja kamã hã mẽ pamã akir nê mẽ pahwỳr

kumẽ. Nà kãm mẽ pahkĩnh tỳx kãm na ã mẽ pamã kapẽr kãm hihtỳx anẽ.

Anhỹr o ajamaxpẽr kaxyw na pa pre hipẽx nẽ mẽ awỳr kumẽ.

Mẽ kot axte amnhĩ tomnuj mã hamaxpẽr kêt ã mẽ kãm karõ

Rukre 17.3-4; Wam Korĩt 5.1-13; Karatas 6.1-2

5-9Nẽ wam kagàta kamã na pa pre mẽ amã mẽ akwỳjê hõ kot nã kaakre kamã hpijaàm kêeta pa mẽ amã tanhmã hã karõ hto. Ra mẽ ate harẽnh mar tã nẽ kãm akapẽr kêt nẽ. Tã mẽ ate inhmar nẽ nẽ tanhmã kãm akapẽr to nẽ amnhĩ nẽ hanor kaxyw na pa pre mẽ awỳr kagàja mẽ. Hãmri nẽ ijamaxpẽr o:

—Ko. Kojã mẽ ixkapẽr mar xà hkõt amnhĩ nẽ hanor japẽr. Anẽ.

Tã ka xep prem kamã harẽ nẽ ama nẽ tee ri ja hã amnhĩ pumu nẽ akaprĩ nẽ. Nẽ ixpyrà nẽ apijaàm nẽ. Hãmri nẽ ijamaxpẽr xà hkõt amnhĩ nẽ hanor kãm axihtỳx nẽ. ãm hãmri na ka prem ã hipẽx anẽ. Nhũm xep tee ri ja hã amnhĩ pumu nẽ hkaprĩ nẽ hkaprĩ xàj ri mỳr o pa. Jao ra ã amnhĩ nhĩpẽx anhỹrta kaga nẽ akupỹm tãm amnhĩ nhĩpẽx. Tã ra ã kot amnhĩ nhĩpẽx anhỹr jakamã kwa mẽ tokyx akupỹm amnhĩ wỳr awỳ kêt axte mẽ awỳr mra nẽ mẽ akõt pa. Ra kot amnhĩ tomnujta kaga jakamã kêt ka mẽ axte kãm ajamaxpẽr kêt nẽ. Akupỹm tãm kãm akapẽr kêt tokyx akupỹm tãm hamaxpẽr nẽ hkĩnh nẽ pa. Kot kaj mẽ tokyx ã hipẽx anhỹr kêt nẽ nhũm tee ri amnhĩ kukamã hamaxpẽr nẽ hkaprĩ nẽ pa. Ja pymaj kwa mẽ amã hkĩnh ã kãm amnhĩ jarẽ nẽ akupỹm tãm kãm akapẽr pẽ tãm hipẽx o ri apa. Kê amnhĩ tã mẽ apumu nẽ akupỹm hkĩnh nẽ tãm hamaxpẽr. 10E kêt ka mẽ axte kot tanhmã amnhĩ tomnuj tota mã ajamaxpẽr kêt nẽ. Kwarĩ ho kwarĩ. Kot kaj mẽ ã hipẽx anẽ pa ijaxwỳja ma hipẽx anẽ. No pa na pre tanhmã ixtomnuj to hkêt nẽ. ãm Jejus kapẽr kwỳm na pre ri ã amnhĩ nhĩpẽx anẽ. Tã ra kot amnhĩ tomnujta kaga jakamã kot paj Jejus nhỹ hã akupỹm tãm hipẽx nẽ kot amnhĩ tomnujta o ijamakêtkati tokyx anẽ nẽ axte kãm ijamaxpẽr kêt nẽ. Mẽ apiitã mẽ amex nẽ ri mẽ apa kaxyw. Jakamã kêt ka mẽ ajaxwỳja mẽ amex nẽ apa kaxyw ã amnhĩ nhĩpẽx anẽ nẽ axte kãm ajamaxpẽr kêt nẽ. 11Kwa mẽ tokyx ja ho ajamakêtkati. Kê Satanasti tee ri ja hã mẽ apumu nẽ mẽ amã mẽ ate tanhmã amnhĩ tomnuj to hprãm xàj tee ri tanhmã ri mẽ ato ho pa kaprỳ. Kêr pu mẽ Satanasti kot amnhĩ nhĩpẽx kêt amnhĩ nhĩpẽx o ri papa hkêt nẽ. Ra mẽ pahte Tĩrtũm kapẽr kuhpa hã tanhmã kot amnhĩ nhĩpẽx to ho pa hã omunh mex kênã.

Pawre kot Xitre japẽr o pa hã harẽnh

12Nẽ na pa pre ja rũm ixkato nẽ ma Tôx wỳr mõ. Ixte mẽ kãm Kris jarẽnh o mẽ hkõt ixpa kaxyw ma mẽ hwỳr mõ. Nhũm Pahihti Kris ixkukamã tanhmã mẽ hkrã hto jakamã pa pre mẽ hwỳr pøj nhũm mẽ

piitā kām ixujarēnh mar prām nē. Pa pre mē kām Tirtūm kapēr jarēnh ryy ho mē hkôt ixpa. ¹³Na pa pre Xitre ra mē hwÿr ixkukamā hpôx ā hkamnhix tā nhÿri omunh kêt nē. Hāmri nē ijamaxpēr o:

— Hêxta waa nē. Inhmā Korīt kām Jejus kwÿjê jarēnh mar prām. Na pa tee ri mē hkukamā ijamaxpēr o ixpa. Nom kormā Xitre mē kurūm akupÿn hpôx kêt. Mān kormā Masetōn kamā pa.

Anhÿr o ijamaxpēr hāmri nē mē kām amnhī jarē nē ixkato nē ma Masetōn wÿr krī hkwȳ hkôt hapēr o mō. Tā ra hwÿr ixkato nē omu.

Te mē pahpê mēhkuxwa xà pyrāk ā mē pajarēnh

Epes 5.2; Piripos 4.18

14-16Na Tirtūmja mex o mex. Na hte mē pahto mex rāhā ho pa. Nē mē kot mē panê àmnār xwÿnhjaja nhūm hte tanhmā mē ho pu mē ma paxàmnhix ri mē hkôt mē kām Kris kapēr jarēnh o ri papa. Te mē pahte mē hkuxwa xà ho ri mē hkuxwa ho papa pyrāk. Mē pahte Kris kôt amnhī nhīpêx jakamā Tirtūm mā te mē pahkuxware nē ri mē papa pyrāk. Nē te mē kām Kris jarēnh o ri papa pê te mē hkuxwa xà ho mē hkuxwa ho ri mē hkôt papa pyrāk. Nhūm hte mē hkwȳjaja mē pama nē kām mar prām nē. Nē mē paxujarēnhja haxwÿja te kot mē hkuxwa xà kuxwa mex nhūm htem hpār nē kām ho amnhī kuxwa hprām pyrāk. Jao kām mē pamar prām nē Kris kôt amnhī xunhwÿ. No nhūm mē hkwȳjaja axtem nē mē kēp mē pamar prām nōkati. Mē kumā Tirtūm kapērja te kēp wenēn kuxȳ htÿx nhūm mē kot hpār nē htyk pymaj amÿm kuhê pyrāk. Jao kapēr kaga nē kēp amÿm amnhī xunhwÿ.

Nē na pu htem amnhī krā hkôt mē kām Kris kapēr jarēnh o ri papa hkêt nē. Ām Tirtūm nhÿ hā pix mā tanhmā harēnh to ho papa.

Pawre kot katāt kôt Tirtūm kapēr o mē ahkre hā harēnh

17Na hte mē kot mē kēp Kris nhÿ hā mē ahkre hā amnhī to hêx xwÿnhjaja te Tirtūm kapēr o wēnê pyrāk o mē hkôt pa. Jao kàxpore hprām xāj amnhī krā hkôt tanhmā mē kām harēnh to nhūm htem mē kuma nē hpānhā tanhmā mē kām amnhīrer to. Nom pa na pa hte ā amnhī nhīpêx anhÿr kêt nē. Nē mē urāk nē amnhī krā hkôt Tirtūm kapēr jahkre ho ixpa hkêt nē. Tirtūm kot mē akaxyw ixām jakamā na pa hte ixkatāt kôt Kris nhÿ hā amarī mē amā kapēr jarēnh o ri mē akôt ixpa. No mē urāk nē kàxpore prām xāj mē amā harēnh kêt nē. Tirtūm kot ja hā ixpumunh mex.

3 ¹Mē kēp Kris nhÿ hā mē ahkre hā amnhī to hêx xwÿnhjaja na htem nhÿhÿm nojarêt nē mē kot mar xwÿnhjê mā:

— E kot paj ma nhām krī hō hwÿr mō nē Tirtūm kapēr o mē ahkre. Jakamā kwa mē kaxyw inhmā kagā nhīpêx nē kamā ixte Tirtūm kapēr o mē ajahkre mex xwÿnh ā ijarē nē hā kagā. Hāmri nē inhmā agō pa ma

amnhĩ kôt o mō nē mẽ kot inhmar mā xwỳnhjê mã kugô kê mẽ kamã harê nē ijarênh ma nē kãm ixkapêr mar prãm nē.

Anhỹr o na htem amnhĩ to mẽ hwỳr o pa. No pa na inhmã ã amnhĩ nhĩpêx anhỹr prãm kêt. Inhmã nhãm mẽ kãm amnhĩ to jarkrar prãm kêt. Mẽ ate ja hã ixpumunh mex. Ra mẽ piitã mẽ kot ixkatàt kôt ixte Tĩrtũm kapêr jarênh mex ã ixpumunh mex jakamã mo kaxyw kot pa ri amnhĩ kôt kagã jamỳ nē ho ixpa? Nà kot pa amnhĩ kôt hō ho inhmōr kaxyw hã ixàhwỳr kêt nē. 2-3Mẽ kajaja te mẽ apê inhō kagã pyrãk. Na ka prem ixte mẽ ajahkre ma nē Jesus kôt amnhĩ xunhwỳr kurê kumrêx. Hãmri nhũm Tĩrtũm mẽ amã amnhĩ Karō rē nhũm mẽ amã agjê ka mẽ ỹ hã amnhĩ nhĩpêx nyw o amnhĩ nhĩpêx o apa. Hãmri nhũm mẽ akwỳjaja amnhĩ jaêr pê mẽ ate amnhĩ nhĩpêx nyw ã mẽ apumu nē mẽ atã xypên mã ijarênh o:

—Hêxta waa nē. Pêr ãm hãmri na pre Kris mẽ hwỳr Pawre mẽ. Na pre ma mẽ hwỳr mō nē mẽ kãm Tĩrtũm kapêr o mẽ ahkre nhũm mẽ kuma nē amnhĩ tomnuj kaga hpa nē hpãnhã Tĩrtũm kapêr kôt amnhĩ nhĩpêx nē tãm ri amnhĩ nhĩpêx o pa. ãm hãmri na hte Pawre mẽ ahkre mex o pa. Hêxta waa nē.

Anhỹr o mẽ atã ijarênh jakamã mo kaxyw kot pa kagã hkwyj jamỳ nē amnhĩ kôt ho ixpa? Nà mẽ kajaja te mẽ apê inhō kagã pyrãk.

4Na pa pre Jesus kôt amnhĩ xãm nhũm Tĩrtũm ja hã ixpumu nē tanhmã inhmã kapêr o amnhĩrit to nē inhmã:

—E Pawre. Kêr ka ma mẽ kãm ixkapêr jarênh o ri mẽ hkôt apa.

Anhỹr jakamã na pa hte Tĩrtũm kamnàr rom ã amnhĩ nhĩpêx anhỹr o ri mẽ hkôt ixpa. 5Nom amnhĩ krã hkôt mẽ ahkre hkêt nē. Tanhmã kot pa we amnhĩ to nē amnhĩ krã hkôt mẽ kãm kapêr o mẽ ahkre mex nē? Nà Tĩrtũm pix na hte ja kaxyw tanhmã ixkrã hto pa ô ri mẽ ahkre ho ri ixpa.

Tĩrtũm kapêr nyw jarênh

6Nē Tĩrtũm na hte tanhmã ixkrã hto pa Karō nhỹ hã mẽ piitã mẽ kãm kapêr nyw jarênh o ri ixpa. Amnepêm Tĩrtũm kot Ijaew mã mẽmoj tã karō xwỳnhhta. Mojes kot kapêr tũm jarênh o pa xwỳnhhta mex tã no nhũm mẽ tee ri hkôt kãm amnhĩ nhĩpêx prãm o pa. Nē xatã kamã harê nē omunh tã tee ri kot hkôt kãm amnhĩ nhĩpêx prãm. Tã mẽ kot hkôt amnhĩ nhĩpêx kêt mỳrapê na prem pikaprãr pan hapêx. No kêt Tĩrtũm kapêr nywja. Jesus jarênhja. Na hte Tĩrtũm Karō tanhmã mẽ pahkrã hto pu mẽ Jesus kôt amnhĩ nhĩpêx o ri papa. Jao mẽ pahpê pahtĩr tũm nē papa mã xwỳnh. No na hte nhãm mẽ hkwyjaja kãm harênhja mar prãm kêt nē amnhĩ jarênh o:

—Nà kot paj amnhĩ krã hkôt ã amnhĩ nhĩpêx anê nē ã amnhĩ nhĩpêx anê nhũm Tĩrtũm ja hã ixpumu nē ixtĩr tũm nē ixpa mã xwỳnh ã ijarê.

Anhÿr tã no ãm ã amnhĩ jarênh anhÿr kaprÿ. Tĩrtũm Karõ nhÿ hã mẽ kot amnhĩ to mex o mẽ pa xwÿnh pixjaja koja mẽ htĩr tũm nẽ pa ho pa.

7Nẽ Tĩrtũm kapêr tũmta na pre Mojes mẽ kãm harênh kaxyw nhũm mẽmoj tanhmã amnhĩ nhĩpêx to rax kumrêx. Naja hkrakrak nẽ haxênh nẽ kamã kamàt kô htyk. Hãmri nhũm Tĩrtũm mẽ kot hkôt amnhĩ nhĩpêx kaxyw kên po hã mẽ kãm mẽmoj tã karõ nhũm Mojes kumÿ nẽ mẽ hwÿr o wrÿ nẽ mẽ kãm kamã harê. Tĩrtũm kot hirã htÿx kamã kãm kapêr nhũm kuri mar o ãm jakamã uràk nẽ ÿ hã hkuk nhĩrã htÿx kumrêx nẽ mẽ kãm kapêr jarênh o xa. Jakamã nhũm mẽ tee ri kot hprĩ hã omunh mex kaxyw no ãm nom gêk tÿx nẽ. Tã gaa nhũm hkuk kãm hirãja amnhĩm hprĩ nẽ hapêx o mõi. Na pre ã Tĩrtũm Ijaewjê mã kapêr tũm nhõr anê. Hãmri nhũm Mojesja ô ri mẽ kãm kamã harê nẽ harênh pa hãmri nẽ mẽ kãm:

—E kêr ka mẽ Tĩrtũm kapêr mar tÿx nẽ hkôt amnhĩ nhĩpêx mex rãhã ho ri apa. Kêr ka mẽ nhÿrmã atyk tã kê akupÿm mẽ ato mẽ atĩr ka mẽ õ krĩ kamã kuri atĩr tũm nẽ amex nẽ apa ho apa. Anê.

Hãmri nhũm mẽ kuma nẽ kãm:

—Tõe. Nà kot paj mẽ hkôt pix mã ri amnhĩ nhĩpêx mex rãhã ho ri ixpa.

Anhÿr ã amnhĩ jarênh tã no ãm hkôt amnhĩ nhĩpêx kêt nẽ nhũm Mojes tee ri mẽ kot amnhĩ nhĩpêx ã mẽ omu nẽ mẽ kãm:

—Nà mẽ ate Tĩrtũm kapêr kôt amnhĩ nhĩpêx kêt jakamã kot kaj mẽ nhÿrmã ty nẽ Tĩrtũm pê awry rax kumrêx nẽ ri apa. Anê.

8Tã na hte Tĩrtũm jarãhã axtem tanhmã mẽ pamã kapêr to. Pãnhã kapêr nyw o kapêr nẽ mẽ pamã:

—Kot kaj mẽ Ixkra Jejus kôt amnhĩ xunhwÿ pa hã mẽ apumu nẽ mẽ ato ixkra. Hãmri nhũm Ixkarõ mẽ amã agjê. Anê.

Kapêr ja na mex kumrêx o kot kapêr tũm jakrenh. 9Kapêr tũmja mex tã nhũm htem hkôt amnhĩ nhĩpêx kêt nẽ. Jakamã na htem ty nẽ Tĩrtũm pê awry rax ã ri pa. No kapêr nywja na tũmta rom mex o mex. Na hte Tĩrtũm mẽ pamã kapêr nywja jarênh o:

—Kot paj tanhmã mẽ akrã hto ka mẽ amnhĩ to mex pix o ri apa. Jao ixkôt ri amnhĩ nhĩpêx mex o ri apa. Anê.

10Nẽ kapêr tũmja te kot kanê hpôk kryre pyrãk. No kapêr nywja mex o kot tũm jakrenh jakamã te kot mẽmo hpôk rũnh o kanê hpôk kryre jakrenh pyrãk. Jakamã nhũm mẽ kot hirã rax kãm ri mrar gryk ã hpôk grire nhĩrã kamã mrar kêt pyrãk. 11Tĩrtũm kapêr tũm te kot Mojes kuk pyrãk. Na pre kamã hirã rax tã gaa nẽ amnhĩm hprĩ nẽ kamã hirã hapêx o mõi. Nẽ gaa nẽ hapêx. No kêt Tĩrtũm kapêr nywja te kot Tĩrtũm nhĩrã htÿx rãhã ho rãhãta pyrãk. Koja uràk nẽ aa hapêx kêt kumrêx.

Ijaewjê jarênh*Rõmãn 11.7-10*

12Nê Tĩrtũm kapêr nywja mex o mex jakamã na pa hte ixãmnhĩx mẽ kãm harênh o ri ixpa. 13Te ixte Mojes kot amnhĩ nhĩpêx pyræk kêt. Na pre hte Mojes ixkĩnhã àmnhĩx Ijaewjê mã Tĩrtũm kapêr jarênh o ri pa hkêt nê. Mẽ kot hkuk kãm hirãta ra hapêx o mõi ã omunh nhũm hpijaãm pymaj na pre kupêxê puroore ho amnhĩ kuk pro nê ri mẽ hkõt pa. 14Jakamã nhũm prem hprĩ hã hkuk kãm hirã pumunh mex kêt nê. Nê Tĩrtũm kapêr ã kagà htũmja nhũm prem mããnên hprĩ hã mar mex kêt nê. Mẽ hkrã hihtỳx jakamã te mẽ kot amnhĩ jamak pro nê mẽmoj mar mex kêt pyræk jakamã mẽ kot mar tã hprĩ hã mar kêt nê. Nê hkõt ri amnhĩ nhĩpêx mex kêt nê. No mẽ kot Kris kõt amnhĩ xunhwỳr xwỳnhjaja na hte Tĩrtũm amnhĩ tã omu nê te mẽ nê mẽ hamak hpro xàta rênh par nê rênh pyræk o mẽ hipêx nhũm mẽhprĩ hã kapêr mar tỳx nê.

15Tã na hte Ijaewjaja arĩ jarãhã Mojes kot Tĩrtũm kapêr ã kagà htũm kamã harênh o pa. Nom arĩ mẽ hkrã hihtỳx jakamã te mẽ kot amnhĩ jamak pro nê kamã harênh o pa pyræk o amnhĩ nhĩpêx jakamã kormã hprĩ hã mar kêt nê. 16Tã koja mẽ hkwỳjaja Pahihti Jejus Kris kõt amnhĩ xunhwỳ nhũm amnhĩ tã omu nê te kot mẽ hamak nê hpro xà hpyr nê mẽnh pyræk o mẽ hipêx nhũm mẽhprĩ hã kapêr nyw mar tỳx nê. 17Pahihti mẽ Karõja wa htipxi jakamã na hte mẽ pakamã agjê nê hprĩ hã mẽ pamã kapêr o amnhĩrĩt o pa. 18Ra mẽ pahte Pahihti Kris kõt amnhĩ xunhwỳr jakamã te mẽ pahte mẽ kot amnhĩ jamak pro xwỳnh kot amnhĩ nhĩpêx pyræk kêt. Nhũm Pahihti Karõja tanhmã mẽ panhĩpêx to pu mẽ ra hkõt amnhĩ nhĩpêx mex o mõi. Jakamã na htem mẽ pahte amnhĩ nhĩpêx nyw pumunh kõt Tĩrtũm kot tãm amnhĩ nhĩpêx ã omunh kurê kumrêx. Kormã mẽ pahte hkõt amnhĩ nhĩpêx mex kumrêx kêt tã ra hkõt amnhĩ nhĩpêx mex o mõi. Jao te tãm kot amnhĩ nhĩpêx pyræk o amnhĩ nhĩpêx o mõi.

Jejus kapêr te kêp kanê pyræk ã harênh*Wam Korõt 2.1-5; Sikũn Korõt 1.12; Wam Tesarõn 2.1*

4 1Nê na pre Tĩrtũm ixto mex nê tanhmã kãm ixapênh to hã inhmã karõ. Ixte ma mẽ kãm kapêr jarênh o ri mẽ hkõt ixpa kaxyw. Jakamã na pa hte ixãmnhĩx mẽ hkõt mẽ kãm harênh o ri ixpa. 2Nhũm mẽ hkwỳjaja axtem nê ixêx o ri ixpa hã ijarênh tã ixte ã amnhĩ nhĩpêx anhỳr kêt. Na pa hte amnhĩ tomnuj o ri ixpa hkêt nê. Mẽ hkwỳjaja kot mẽ no kupyw kaxyw mẽ kãm Tĩrtũm kapêr o hêx o pa htã pa na pa hte ã amnhĩ nhĩpêx anhỳr kêt nê. Ixprĩ hã mẽ kãm harênh o ixpaja na inhmã hprãm jakamã na pa hte ixkatãt kõt harênh o ri mẽ hkõt ixpa. Mẽ piitã mẽ kot ixêx kêt kõt ixpumunh mex kaxyw. Tĩrtũm kot ixêx kêt kõt

ixpumunh mex. ³No nhÿrmã mẽ htyk nê ma kuwy hwÿr mẽ pa mã xwÿnh pixjaja na htem hprĩ hã ixkapêr mar mex kêt nê. ⁴⁻⁶Satanasti tãm kêp mẽ hpãm. Kêp mẽ kãm Tirtûm kapêr mar prãm kêt xwÿnh piitã mẽ hpãm. Jakamã na pa hte mẽ kãm tanhmã Jejus jarênh to. Kêp Tirtûm Kra hã harê nê te kot Tirtûm kot amnhĩ nhĩpêx pyrãk ã harênh o ri ixpa. Hãmri nhũm Satanasti tee ri ja hã ixpumu nhũm ja kêp omnuj nê. Jakamã nhũm tanhmã Tirtûm nê mẽ hkrã hto nê te mẽ hamak pro pyrãk o mẽ hipêx. Mẽ kot hprĩ hã Jejus jarênh mar nê hkôt amnhĩ xunhwÿr pymaj nhũm ã nê mẽ hipêx anê. Jejus jarênh te kêp kanê hpøk mex pyrãk jakamã mẽ kot mar kêt xwÿnhjaja te kamàt kô kamã ri mẽ pa pyrãk. No nhũm Satanasti tãm kot nê mẽ no kupyw jakamã nhũm htem ã ri kamàt kô kamã mẽ pa pyrãk o amnhĩ nhĩpêx anê.

Amnepê mã kormã mẽmoj kêt ri nhũm kamàt kô pix. Tã nhũm Tirtûm tanhmã kapêr to nê kapêr o:

—E kê hirã kato. Anê.

Hãmri nhũm ra kapêr xà hkôt hirã kator kurê kumrêx. Tã ja pyrã nê na pa pre kamàt kô kamã ixtÿx ri ixpa pyrãk nhũm Tirtûm te kot inhmã kanê hpøk nhũm hirã pyrãk o inhĩpêx pa mex o mex ã omunh kurê kumrêx. Hãmri nê Jejus Kris kot amnhĩ nhĩpêx ã omu nê te Tirtûm kot amnhĩ nhĩpêx ã omunh pyrãk. Wa kot amnhĩ nhĩpêx te kot axpên pyrãk.

Nê na pa hte pam tanhmã amnhĩ jarênh to ho ri ixpa hkêt nê. ãm Jejus Krisja pix na pa hte harê. Tapxipix na kêp mẽ panhõ Pahihti. Jakamã hkĩnhã te ixpê mẽ amã ixapênh xwÿnh pyrãk o na pa hte mẽ amã kapêr jarênh o ri mẽ akôt ixpa.

Pawre te kêp poti grãre nhĩpêx pyrãk ã harênh

Wam Korîť 2.4-5; Sikûn Korîť 11.23, 12.9

⁷Nê Tirtûm ixrom hihtÿx o hihtÿx. No pa na hkĩnhã ixihtÿx kêt. Te ixpê poti grãre nhĩpêx pyrãk jakamã na pa hte Tirtûm xihhtÿx xwÿnh pix nhÿ hã mẽ kãm kapêr jarênh o ri mẽ hkôt ixpa. Nhũm htem inhma nê ãm hãmri ixte ÿ hã ixkapêr ã ixpumunh kurê kumrêx. No pa ixte amnhĩ krã hkôt ixkapêr ã ijarênh kêt nê.

⁸Na pa hte mẽ hkôt mẽ kãm Jejus jarênh o ri ixpa nhũm mẽ hkwÿja tãhã inhma nê ja hã inhĩpêx kati nê pa amnhĩ xà htÿx kamã ama. Nom nhũm Tirtûm mẽ kutã tanhmã ixkrã hto pa inhmã amnhĩ xã kamã ijamak pywa hkêt nê arĩ mẽ kãm kapêr jarênh o ri mẽ hkôt ixpa. Nê amnhĩ kaxyw Jejus kôt pix mã ijamaxpêr tÿx rãhã pê tee ri amnhĩ kukamã ijamaxpêr o ri ixpa hkêt nê.

⁹Nê mẽ kãm ixkurê xwÿnhjaja ohtô. Na htem xatã Jejus ã tanhmã ixtomnuj to htã pa kormã ixtÿk kêt nê. Na pa hte Tirtûm kamnàr rom arĩ mẽ hkôt ixpa nhũm Tirtûm ixkôt pa ho pa. ¹⁰Na htem Jejus pyrã nê ixpĩr kaxyw tanhmã inhĩpêx to. No ãm ko. Kojã mẽ nhÿrmã ixpĩ rÿ ko.

Ixe amnhĩ kukamã ixàhpumunh kêt. Kot paj ãm arĩ ixtĩr ri mẽ kãm Jejus jarēnh o ri mẽ hkôt ixpa. Kêr kê mẽ hkwỳjaja ixkapēr ma nē axpēn mã tanhmã Jejus jarēnh to nē harēnh o:

— Nà pēr ãm hãmri na pre Jejus akupỹm htĩr nē tanhmã hkwỳjê ho mex to. ãm hãmri na hte Pawre ja hã harē. Anē.

11Mẽ kot Jejus ã ixpĩr mã tã pa arĩ mẽ kãm akupỹm htĩr ã harē. Tĩrtũm na hte ja kaxyw tanhmã ixkrã hto pa arĩ mẽ kãm harēnh o ri mẽ hkôt ixpa. 12Na pa pre ra mẽ amã harē ka prem inhma nē Jejus kôt amnhĩ xunhwỳr kurê kumrēx nē amnhĩ nhĩpêx nyw o amnhĩ nhĩpêx o ri apa. Jakamã ixpyrà nē mẽ apê atĩr tũm nē apa mã xwỳnh. Nhũm htem piitã mẽ ate Jejus kôt amnhĩ xunhwỳr ã mẽ apumu. Tã nhũm mẽ kot Jejus ã ixpĩr kaxyw. Nom kwãr mẽ mãmri xpi. Ja inhmã tanhmã kute hkêt. Mẽ kot ixpĩr mã tã kot paj arĩ Jejus kapēr jarēnh o ri ixpa rãhã ty. Ra mẽ kot ixkapēr mar nē Jejus kôt amnhĩ xunhwỳr xwỳnhjaja mẽ pahpyrà nē kēp htĩr tũm nē pa ho pa mã xwỳnh kēnã. 13Jakamã kwãr mẽ mãmri xpi. Na pa hte arĩ amnhĩ kaxyw Tĩrtũm kôt ijamaxpēr mex rãhã nē. Amnepê mã na pre Pahi finat Tawija tanhmã Tĩrtũm kapēr jarēnh to nē harēnh o:

ãm hãmri na Tĩrtũm kapērja. Hêx kêt jakamã na pa hte mẽ kãm harēnh rãhã ho ri ixpa. Anē.

Tã pa hte Tawi pyrà nē mẽ piitã mẽ kãm Tĩrtũm kapēr jarēnh o ri ixpa. Tĩrtũm kot mẽ pamã tanhmã mẽmoj to hêx to hkêt. 14Ra kot amnhĩ jarēnh xà hkôt akupỹm Pahihti Jejus o htĩr jakamã kot puj mẽ nhỹrmã uràk nē ty nhũm akupỹm mẽ pahto mẽ pahĩr nē ma war amnhĩ wỳr mẽ pahto api.

15Amnepêm na pa pre ma mẽ awỳr mō nē mẽ akôt mẽ amã Tĩrtũm kapēr jarēnh o ri ixpa. Ka prem inhma nē Jejus kôt amnhĩ xunhwỳ nē ixpyrà nē Tĩrtũm mã mex o mex ã harē. Jakamã kwãr mẽ mãmri Jejus ã tanhmã inhĩpêx to. Kojã mẽ gaa nē rĩ mẽ hkwỳjaja mẽ pahpyrà nē Jejus kôt amnhĩ xunhwỳ nē Tĩrtũm mã mex o mex ã harē.

Pawre tee ri amnhĩ kukamã hamaxpēr kêt ã kot amnhĩ jarēnh

Rômãn 8.17; Sikūn Korīt 1.7; Wam Pêtre 1.3-9, 4.12-16, 5.10

16Jakamã na pa tee ri amnhĩ kukamã ijamaxpēr o ixkaprĩ nē ixpa hkêt nē. Mẽ kot Jejus ã tanhmã ixtomnuj to htãã pa hte ixãmnhĩx kapēr jarēnh o ri ixpa. Ra ixpigêt nē ixirerek o inhmōr tã inhōpinh xà kaxwỳnh kãm ijamaxpēr o Jejus kôt amnhĩ nhĩpêx mex o mō. 17Mẽ kãm ixkurê xwỳnhjaja na htem Jejus ã inhĩpêx kati htã ã inhĩpêx anhỹr japjê hkêt nē. Nom kot paj nhỹrmã ty nhũm Jejus akupỹm ixto ixtĩr pa Tĩrtũm mẽ wa kuri inhmex kumrēx nē ixpa ho ixpa. Mẽ kot ixtomnujja na mẽ ho apkati grêre no kot paj nhỹrmã Tĩrtũm mẽ Krata wa kuri inhmex kumrēx nē ixtĩr tũm nē ri ixpa ho ixpa. Jao rãhã ho rãhã.

18Jakamã na pa tee ri mẽ kot tanhmã ixtomnuj tota kukamã ijamaxpêr o ri ixpa hkêt nê. Ja koja tokyx hapêx. Na pa hte âm nhÿrmã Tirtúm nhõ krĩ kamã inhmex nê ixkĩnh rãhã ri ixpaja pix kukamã ijamaxpêr o ri ixpa.

Mẽ panhĩ nyw jarênh

Piripos 3.21; Sikūn Pêtre 1.13-14

5 1Nê mẽ panhija te kot tyrti hô ho ixkre pyræk. Na htem tyrti hô ho ixkre nhĩpêx nhũm gaa nê hapêx. Tã mẽ panhija na hte uræk nê hapêx tokyx anê. Na pu htem ri papa nê gaa nê pawej nê ty. Tã nhũm Tirtúm hpãnhã mẽ pahpê hkrajê mã mẽ panhĩ nyw gõ pu mẽ kuri õ krĩ kamã pamex kumrêx nê pahtĩr tũm nê papa ho papa. 2-3Na pu htem jar pahpunuj nê papa. Nê mẽ paxà nhi nê mẽ pahkaprĩ nê. Mẽ panhĩ htũmja te kot mẽ paxê htũm pyræk jakamã na pu htem ty nê te paxê htũm kwrÿnh nê hpãnhã nyw jagiênh pyræk o amnhĩ nhĩpêx. Tã na pu htem amnhĩ kukamã panhĩ nywja mã pajamaxpêr o ri papa. Kot pu mẽ kaxkwa kamã pahkarõ pix nê ri papa hkêt nê. Mẽ panhĩ nyw ã kot puj mẽ ri papa ho papa.

4Nê na pu htem jar pahpunuj nê pamex kêt nê ri papa. Nê tokyx mẽ pahtyk nê panhĩ htũm o pajapêx nê hpãnhã panhĩ nyw ã mẽ papa hprãm. Tã koja Jesus tokyx akupÿn wrÿk japêr pu mẽ pahtyk kêt rãhã tokyx panhĩ nywta o panhĩ nyw. Nom koja tokyx akupÿn wrÿk kêt japêr pu mẽ nhÿrmã ty nhũm Tirtúm akupÿm mẽ pahto mẽ pahtĩr nê mẽ pamã mẽ panhĩ nyw gõ pu mẽ ho panhĩ nyw. 5-6Na pre ra Tirtúm mẽ panhĩ nyw kukamã hamaxpêr nê mẽ pahtã tanhmã amnhĩ jarênh to. Nê mẽ pahwÿr Karõ rê nhũm mẽ pahkarõ mã agjê pu mẽ ja hã amnhĩ pumu nê pahkĩnh nê pajamaxpêr o:

—Nà ra Tirtúm kot ixwÿr amnhĩ Karõ mẽnh nhũm ixkarõ mã àr jakamã koja mãänên nhÿrmã inhmã inhĩ nyw gõ. Kormã inhĩ htũm kamã ixpa nê Pahihti Jesus mẽ wa õ krĩ kamã ixpa hkêt tã koja nhÿrmã inhmã inhĩ nywja gõ pa inhĩ nyw o wa kuri ixpa ho ixpa. Nà koja ã inhĩpêx anê.

Anhÿr o pajamaxpêr pê pahkĩnh nê papa.

7Nê mẽ pahte jar pano ho nhÿri Jesus pumunh kêt tã no âm panhõpinh xà kaxwÿnh kãm kãm pajamaxpêr mex nê. 8Jakamã na pu mẽ tee ri amnhĩ kukamã pajamaxpêr o papa hkêt nê. Na pu htem âm tokyx mẽ pahtyk nê ma Pahihti Jesus nhõ krĩ hwÿr paxàpir jamãr o papa. Õ krĩja kêp mẽ papapxà kumrêx jakamã na pu htem ma hwÿr paxàpir pix kukamã pajamaxpêr rãhã nê. 9No âm mẽ pamã ja pix prãm kêt. Na pu htem mãänên pamã Jesus mã hprãm xà hkôt nhÿri tanhmã kãm amnhĩ nhĩpêx to ho ri papa hprãm o papa. Jar mẽ panhĩ htũm rãhã rÿ mũtar kuri õ krĩ mex kãm mẽ panhĩ nyw ã tanhmã kãm amnhĩ nhĩpêx to ho ri papaja na mẽ pamã hprãm.

10Nê na hte Krisja jar mē pahte tanhmã amnhĩ nhĩpêx to hã mē pahpumunh o hkrĩ. Mē pahte tãm amnhĩ nhĩpêxja nê mē pahte amnhĩ tomnujja nhũm hte hã mē pahpumunh rãhã ho hkrĩ. Tã koja nhỹrmã kot mē pahte tanhmã amnhĩ nhĩpêx to hã mē pahpumunh kôt tanhmã mē panhĩpêx to. Mē pahte tãm amnhĩ nhĩpêx o ri papa xwỳnhjaja koja ra mē panê htyk kukwak ri mē pahto mex nê. No mē kot amnhĩ tomnuj o mē pa xwỳnhjaja koja mē homnuj tỳx nê. Jakamã na pa inhmã kãm hprãm xà hkôt pix mã amnhĩ nhĩpêx o ixpa hprãm nê.

Mē pajamexpêr nyw jarênh

Rômãn 6.4-6; Sikûn Korîit 4.2; Epes 4.22-24; Korosê 3.9-10

11Nê Tĩrtũm kot hprĩ hã mē pahpumunh rãhã ho hkrĩ jakamã inhmã kãm hprãm xà hkôt pix mã amnhĩ nhĩpêx o ri ixpa hprãm. Mãn ka mē ra ja hã ixpumunh mex nê rỳ ko. Mē piitã mē kot hkôt amnhĩ xunhwỳr prãm xàj na pa hte mē kãm kapêr jarênh o ri ixpa. 12Nom ixte ja hã amnhĩ to jarkrar o ri ixpa hkêt. ãm mē ate inhmar nê mē kêp Kris nhỹ hã mē ahkre hã amnhĩ to hêx xwỳnhjê mã tanhmã ijarênh to kaxyw na pa ã mē amã amnhĩ jarênh anê. Mē kot Tĩrtũm kapêr jahkre mex kumrêx ã amnhĩ to jarkrar tã na htem hkôt amnhĩ nhĩpêx kêt nê. Tã mē ate aprĩ hã ixte Tĩrtũm kapêr kôt amnhĩ nhĩpêx mex ã ixpumunh nê tanhmã mē kãm ijarênh to kaxyw na pa ã te ixte amnhĩ to jarkrar pyrãk o mē amã amnhĩ jarênh anê. 13-14Mē kot ixkrã pipãnh ã ijarênh tã Tĩrtũm na mē akaxyw ixãm pa hte mē amã kapêr jarênh o ri mē akôt ixpa. Ixkrã pipãnh kêt. Ixte Tĩrtũm kãm hprãm xà hkôt tanhmã amnhĩ nhĩpêx to xwỳnh na pa. Tã mēmo kaxyw na pa hte ã kapêr jarênh rũnh anhỹr o ri mē akôt ixpa? Nã inhmã mē akĩnh kênã. Mē ate Tĩrtũm kôt tãm amnhĩ nhĩpêx prãm xàj na pa hte ã mē amã kapêr jarênh anhỹr rãhã nê. Kris na pre tanhmã ixto pa inhmã mē akĩnh nê. Te tãm kãm mē ajapê pyrãk. Na pre Kris amnhĩ grõnh kôt mē pahpiitã mē nê ty. Tĩrtũm kot mē pahte amnhĩ tomnuj mỳrapê tanhmã mē pahto pymaj nhũm mē pahpiitã mē panê ty. Jakamã te mē pahpiitã Jejus kôt mē pahtyk pyrãk o na pu htem amnhĩ nhĩpêx. Jao te mē pahte amnhĩ nhĩpêx tũmja mē pahpê hapêx par pyrãk o pu mē amnhĩ nhĩpêx nyw o amnhĩ nhĩpêx o ri papa. 15Mē pajamexpêr nyw o tãm mē pahte amnhĩ nhĩpêx o papa kaxyw na pre Jejus mē panê ty. Jakamã na pu htem axte amnhĩ pix kukamã ri pamã mēmoj prãm o ri papa hkêt nê. Na pu htem mããnên Tĩrtũm kãm hprãm xà hkôt tanhmã kãm amnhĩ nhĩpêx to ho ri papa. Ja kaxyw na pre Tĩrtũm akupỹm Kris o htĩr pu mē kukwak ri pajamexpêr nyw o amnhĩ nhĩpêx o papa. 16Jao mē piitã mē hkrã hkà hã mē omunh xà hkôt pix mã tanhmã mē harênh to hkêt nê. Mē kot amnhĩ tomnuj ã mē harênh rỳ mē kot amnhĩ to mex ã mē harênh kêt nê. Amnepê mã na pa pre ã Kris jarênh anê nê harênh o:

—Nà Krisja na hte mẽ pahte amnhĩ nhĩpêx kôt amnhĩ nhĩpêx kêt nê. Ām ri kot mẽ pahte amnhĩ nhĩpêx kwỳm ri amnhĩ nhĩpêx jakamã kot amnhĩ tomnuj tỳx xwỳnh na.

Anhỹr ã harênh o ixpa. Tã axte ã harênh anhỹr hkêt nê. Kot amnhĩ tomnuj xwỳnh kêt jakamã na pa hte hpãnhã hkôt pix mã tanhmã kãm amnhĩ nhĩpêx to ho ri ixpa.

Mẽ pahpê Tirtũm kràmnhwỳ há mẽ pajarênh

Römãn 5.1, 5.10; Epes 6.20; Korosê 1.20

17Nê koja mēhō Kris kôt amnhĩ xãm nhũm kot amnhĩ nhĩpêx tũmja kêp hapêx nhũm hpãnhã kot amnhĩ nhĩpêx nyw pix o amnhĩ nhĩpêx nê hamaxpêr nyw pix o hamaxpêr. 18Tirtũm na hte tanhmã mẽ pahto pu mẽ ã amnhĩ nhĩpêx anhỹr o ri papa. Na pu prem pamã hkurê htã nhũm Kris kukwak ri mẽ pahte hkôt amnhĩ nhĩpêx xwỳnhjê ho hkràmnhwỳ. Hãmri nê tanhmã mẽ pahte amnhĩ nhĩpêx to hã mẽ pamã karō nê mẽ pamã:

—E kêt ka mẽ ma krĩ piitã hkôt ri mẽ kãm ixkapêr jarênh o ri apa kê mẽ ama nê mẽ apyrã nê Kris kôt amnhĩ xunhwỳ. Pa ja hã mẽ omu nê ixte mẽ anhĩpêx pyrã nê mẽ ho ixkràmnhwỳ. Anê.

19Jakamã na pa hte ma mẽ kãm kapêr jarênh o ri mẽ hkôt ixpa nê mẽ kãm:

—E pa mẽ amã mẽmoj mex jarê ka mẽ inhma. Nà na pre Krisja mẽ pahte amnhĩ tomnuj mỳrapê mẽ panê ty. Nê htyk o Tirtũm mã mẽ pahpãnhã amnhĩrer par kumrêx. Jakamã na ra Tirtũmja Kris kukwak ri kãm mẽ pahpiitã mẽ pahto hkràmnhwỳ prãm. Koja kukwak ri mẽ pahte amnhĩ tomnuj piitã ho hamakêtkati nê axte kãm hamaxpêr kêt kumrêx. Kãm mẽ pahto hkràmnhwỳ hprãm jakamã koja ã mẽ panhĩpêx anê. Jakamã e kwa mẽ tokyx Kris kôt amnhĩ xunhwỳ kê Tirtũm kot inhĩpêx pyrã nê mẽ ato hkra nê mẽ ato hkràmnhwỳ.

Anhỹr o mẽ kãm harênh o ri mẽ hkôt ixpa. 20Kris kot mẽ apiitã mẽ awỳr inhmênh jakamã na pa hte y hã mẽ amã kapêr jarênh o ri mẽ akôt ixpa nê mẽ amã:

—E Tirtũm kãm mẽ ajapê jakamã na mẽ awỳr inhmê pa mō. Jakamã kwa mẽ tokyx amnhĩ tomnuj kaga nê hkôt amnhĩ xunhwỳ. Kê amnhĩ tã mẽ apumu nê mẽ ato hkràmnhwỳ. Anê.

21Krisja aa kot tanhmã amnhĩ tomnuj to hkêt kumrêx tã nhũm pre Tirtũmja te mẽ kot amnhĩ tomnuj tỳx kumrêx xwỳnh pyrãk o hipêx. Tã mẽmo kaxyw na pre ã hipêx anê? Nà mẽ panê kênã. Mẽ pahte hkôt amnhĩ xunhwỳr nhũm kot mẽ panhĩpêx o te aa mẽ pahte amnhĩ tomnuj kêt kumrêx xwỳnh pyrãk o mẽ panhĩpêx kaxyw na pre ã mẽ panê Krata nhĩpêx anê.

6 1Tã kot ã Kra nhípêx anhÿr jakamã kwa mẽ ixkapêr ma nê mar tÿx nê. No mẽ ama nê ãm mar kêt nê. Tirtūm kãm mẽ pajapê htÿx jakamã mẽ pakutã nojarêr rãhã ho pa. Kumã na pa hte ã mẽ amã kapêr jarênh anhÿr o ri mẽ akôt ixpa. 2Amnepê mã na pre Ijaew mã kapêr nê mẽ kãm:

Na ka prem amex kêt nê ri apa nê amnhĩ to ixwÿ pa pre mẽ ama nê mẽmojta pê mẽ apytà nê mẽ ato mex nê. Anê.

Jakamã kwa mẽ inhma. Tirtūm kãm mẽ ate amnhĩ tomnuj pê mẽ apytàr prãm tÿx jakamã kwa mẽ tokyx amnhĩ to awÿ kê ã kêp mẽ apytàr anê.

Mê kot Kris ã tanhmã Pawre nhípêx to hã mẽ harênh

Sikūn Korīt 4.7, 11.23-33; Korosê 1.10

3-4Nê mẽ kot Tirtūm kapêr mar nê hã ixtomnuj tã pa hte amnhĩ katut kôt mẽ kot tanhmã ixtomnuj toja rê nê ho ijamakêtkati tokyx anê. Nê arĩ mẽ kãm kapêr jarênh rãhã ho ri mẽ hkôt ixpa. Mẽ kot mar nê ãm mar nê hkaga pymaj na pa hte ã amnhĩ nhípêx anhÿr rãhã nê. Mẽ kot ja hã inhípêx punuj tã pa arĩ mẽ kãm harênh o ri mẽ hkôt ixpa. 5Mẽ kot Kris ã ixtak nê ijagjênh nê tanhmã ixto kaxyw ixtã htu htã pa hte mẽ kutã amnhĩ to htÿx nê ixkuhê. Na pa pre hte Tirtūm mã mẽ kãm kapêr jarênh rax nê. Jao tōhã inhôt kêt nê inhôtswa ho ri mẽ hkôt ixpa. Nê tōhã inhmã prãm tÿx nê ri ixpa. Tã no ãm arĩ mẽ kãm kapêr jarênh rãhã nê. 6Inhmã tanhmã ixte amnhĩ tomnuj to hprãm kêt. Inhmã Tirtūm kot amnhĩ nhípêx kôt pix mã amnhĩ nhípêx prãm. Nê inhmã inhgryk tokyx anhÿr prãm kêt. ãm inhmã mẽ piitã mẽ hkĩnh kãm mẽ ho mex pix prãm. ã na pa hte Tirtūm Karō nhÿ hã amnhĩ nhípêx anhÿr o ri mẽ hkôt ixpa. Mẽ kot ja hã ixpumunh nê ra Tirtūm kapêr ma nê hkôt amnhĩ xunhwÿr kaxyw. 7Na pa hte ixkatat kôt mẽ kãm ixkapêr mex pix nê. Tirtūm xihtÿx xwÿnhja nhÿ hã ri mẽ kãm kapêr jarênh jao tãm amnhĩ nhípêx nê tãm ri ijamaxpêr o ri mẽ hkôt ixpa. Jakamã na htem ja hã ixpumu nê ixte Tirtūm kapêr jarênh ma nê hkôt amnhĩ xunhwÿ. 8Na hte mẽ hkwÿjaja kãm ixkĩnh nê nhūm mẽ hkwÿjaja axtem kãm ixkurê nê. Nê mẽ hkwÿjaja amnhĩm inhmex ã ijarê nhūm mẽ hkwÿjaja axtem axpên mã tanhmã ixto kapêr punuj to. Mẽ kot ixêx nhi hã ijarênh tã pa hte ixkatat kôt mẽ kãm ixkapêr o ri ixpa. Nom kwãr mẽ mãmri tanhmã ri ixto kapêr to. Ja tanhmã inhmã kute hkêt. 9Na hte mẽ hkwÿjaja ixkamã òkre kahak nê pika piitã hkôt axpên mã tanhmã ijarênh to ho pa. Mẽ kãm ixpĩr prãm tã no pa arĩ ixtĩr nê ixpa. Mẽ kot Jejus ã ixtomnuj tÿx tã kormã ixpĩr kêt nê pa ri ixtĩr nê ixpa. 10Ixe Kris ã amnhĩ xà htÿx kamã ijamak o ri ixpa htã arĩ ixkĩnh nê ixpa. Nê ixkàxpore hkêt tã nhūm mẽ ohtô nê ixte mẽ kãm Jejus kapêr jarênh kukwak ri mex nê pa. Nê ixkukrêx rax kêt tã nhūm Tirtūm ixto mex nê pa inhmex nê ixpa. Tã kot paj nhÿrmã ò krĩ kamã kuri inhmex kumrêx nê ixtĩr tūm nê ixpa ho ixpa. Jakamã na pa hte arĩ mẽ kãm Jejus kapêr

jarēnh o ri mẽ hkôt ixpa. ¹¹E Korīt kām ixkràmnhwỳjaja. Na pa ixprĩ hã mẽ amã amnhĩ nhĩpêx jarēnh par kumrêx. ¹²Inhmã mẽ akĩnh tỳx tã te mẽ amã ixkĩnh kêt pyràk. ¹³Kwa te mẽ ate ixto mẽ akatut nê akuhê pyràk o inhĩpêx kêt nê. Amnhĩ pyrã nê amã ixkĩnh nê hkêt wehe. Te mẽ apê ixkra pyràk o na pa ã mẽ amã ixkapêr anê.

Te mẽ pahpê Tĩrtũm nhõrkwỳ pyràk ã mẽ pajarēnh

Wam Korīt 10.20-22, 15.33; Epes 5.3-14; Sikūn Ximotre 2.4;

Xiakre 4.4-5; Wam Pêtre 2.11, 4.1-6

¹⁴Nê kêt ka mẽ kot Kris kôt amnhĩ xunhwỳr kêt xwỳnhjê mẽ mẽ mẽmoj tã tanhmã axpên mar to hkêt nê. Rỳ mẽhõ ho amjên rỳ mẽhõ ho aprõ hkêt nê. Ahpỳnhã mẽ pajamxpêr kênã. Tanhmã kot we mẽ hamaxpêr nyw xwỳnhjaja nê mẽ hamaxpêr tũm xwỳnhjaja amnhĩ to nê axpên kôt hamaxpêr nê ri axpên kôt pa? Nà koja mẽ ã amnhĩ nhĩpêx anhỳr kêt nê. Ahpỳnhã mẽ pajamxpêr. Na hte hirã htỳxja kamàt kô mẽ pihkàr kêt nê. ¹⁵Xà na hte Kris mẽ Satanasti wa axpên kôt hamaxpêr? Nà wa kot axpên kôt hamaxpêr kêt. Ahpỳnhã wa hamaxpêr nê ahpỳnhã wa kot amnhĩ nhĩpêx. Nê ahpỳnhã hirã nê ahpỳnhã kamàt kô. Nê mẽ pahpê Kris kwỳjaja nê mẽ kêp hkwỳ hkêt xwỳnhjaja ahpỳnhã mẽ pajamxpêr nê ahpỳnhã mẽ pahte amnhĩ nhĩpêx. ¹⁶Na pu htem Tĩrtũm mã amnhĩ jarēnh xà hã ixkre kamã sãnti xunhwỳr nê amnhĩ to hwỳr pê kãm mex o mex ã harēnh kêt nê. Axtem na sãntija. Mẽ panhõ Tĩrtũmja sãnti rom htĩr tũm rãhã nê pa ho pa xwỳnh. Nê mẽ papajaja te mẽ pahpê Tĩrtũm nhõrkwỳ pyràk. Kapêr ã kagà htũm kot ja jarēnh kot:

Ixkrajaja te kêp inhõrkwỳ nhũm ixpê õ dõn pyràk. Te ixpê inhõrkwỳ kamã ixpa xwỳnh pyràk jakamã kot paj ixkrajê kamã ri ixpa ho ixpa. Ixpê Mẽhpãm na pa. Anê.

¹⁷⁻¹⁸Ã Tĩrtũm xihtỳx xwỳnhja kot amnhĩ jarēnh anhỳr jakamã na hte mẽ kot amnhĩ tomnuj xwỳnhjê nê mẽ pahkurê ho:

Kêr ka mẽ hkôt ri apa hkêt nê. Kwarĩ ho kwarĩ.

Nê mẽ hkôt ri amnhĩ nhĩpêx o apa hkêt nê.

Kot kaj mẽ ixkapêr ma nê ixkôt amnhĩ nhĩpêx hã kot paj amnhĩ wỳr mẽ awỳ nê mẽ ato ixkra.

Nê pa kot paj ixpê Mẽapãm maati. Anê.

7 ¹Tã ã Tĩrtũm kot mẽ pahto hkra nê mẽ pahkôt pa ho pa hã amnhĩ jarēnh kot anhỳr jakamã kwa ixkràmnhwỳjaja. Kêr pu mẽ kapêr ma nê tanhmã amnhĩ tomnuj to hkêt nê. Nê mẽmoj punuj kukamã pajamxpêr kêt nê. Nê ãm kapêr kôt pix mã amnhĩ nhĩpêx mex rãhã nê.

Pawre kot Korīt nhõ xwỳnhjê nhỹ hã hkĩnh ã harēnh

²Nê kwa Kris kôt ixtõ nê ixtõxjaja. Kêr ka mẽ tee ri amnhĩ tã tanhmã inhmã ajamxpêr to hkêt nê. Na pa pre tanhmã mẽ atõ hto hkêt nê. Rỳ

tanhmã mẽ atõ hto ka mẽ ja hã ixpumu nẽ ixkõt tanhmã amnhĩ tomnuj to hkêt nẽ. Rỳ pa pre ixêx rom tanhmã mẽ anokupyr to ho ri ixpa hkêt nẽ. Kwa mẽ amã ixkĩnh nẽ tokyx ixkõt ajamexpêr kêt wehe. 3Mẽ ate inhmar nẽ amnhĩ tã apijaàm kaxyw na pa ã mẽ amã ixkapêr anhỹr kêt nẽ. Inhmã mẽ akĩnh kênã. Na pa pre inhmã mẽ akĩnh ã amnhĩ jarênh rax nẽ. Inhmã ri mẽ akõt ixpa rãhã ho ixpa hprãm. Rỳ ka mẽ nhỹrmã apiitã apikaprãr par japêr pa inhmã mẽ akõt ixtyk prãm nẽ. 4Na pa hte ra mẽ amã ijamexpêr pẽ ixkĩnh nẽ ixpa. Nà kot kaj mẽ ixkapêr ma nẽ Jejus kõt amnhĩ nhĩpêx mex nẽ. Tã kêr ka mẽ ã amnhĩ nhĩpêx anhỹr rãhã nẽ. Na pa hte jar ra amnhĩ xà htỳx kamã ijamak o ri ixpa htã no ãm mẽ amã ijamexpêr nẽ ixkĩnh nẽ.

5Nẽ na pa pre amnẽ Masetõn wỳr kormã Xitre japêr o mõi. Hãmri nẽ Masetõnja wỳr pøj nẽ hapêr pẽ mẽ kãm Jejus kapêr jarênh o ri mẽ hkõt ixpa. Hãmri nhũm mẽ kãm ixkurê xwỳnhjaja Kris ã inhĩpêx punuj nẽ hã inhmã àkjêr pix o pa. Hãmri nẽ ma Masetõn kamã krĩ piitã hkõt ri mẽ kãm ixto kapêr punuj nẽ pa amnhĩ tã mẽ mar o ri mẽ hkõt ixpa. Nẽ mẽ kajaja mẽ ate Kris kaga nẽ nhãm mẽ hamaxpêr kõt amnhĩ nhĩpêx pymaj na pa pre tee ri mẽ akukamã ijamexpêr o ri mẽ hkõt ixkaprĩ nẽ ixpa. 6Tã Tirtũm kệp mẽ hkaprĩ xwỳnhjê pumunh nẽ akupỹm mẽ ho mẽ hkĩnh xwỳnh jakamã na pre ixkaprĩ hã ixpumu nẽ ixwỳr Xitre mẽ. Pa pre omu nẽ akupỹm ixkĩnh nẽ tãm ijamexpêr. 7No ãm Xitre pumunh kõt pix mã ixkĩnh kêt. Na pre ixwỳr pøj nẽ tanhmã inhmã mẽ ajarênh to nẽ mẽ ate tanhmã ho mex to hã mẽ ajarẽ. Nẽ mẽ amã ixpumunh prãm tỳx ã mẽ ajarẽ. Nẽ Kris kõt mẽ atõta hpijaàm kêt o pa nhũm ixte kagã kamã hã mẽ amã ixàkjêr nhũm mẽ ate ja hã omunh nẽ ra amnhĩ kamã apijaàm o akaprĩ htỳx ã mẽ ajarẽ. Nhũm Tirtũm kot inhnê mẽ kãm ixkurê xwỳnhjê pumunh mex kaxyw mẽ ate ixto hwỳr ã mẽ ajarẽ. Na pre ã inhmã mẽ ajarênh anẽ pa kuma nẽ mẽ anhỹ hã ixkĩnh tỳx kumrêx.

8-9Nẽ wam ixte mẽ amã kagãta nhĩpêx kêt ri na pa pre tee ri mẽ ate amnhĩ nhĩpêx ã mẽ ajarênh ma nẽ mẽ akaxyw hipêx. Nẽ kamã mẽ ate hpijaàm kêt xwỳnhhta kot tanhmã amnhĩ nhĩpêx to hã omunh nẽ ãm omunh o arĩ hkõt apa hã kagãta kamã mẽ amã akir hãmri nẽ Xitre mã kugõ nhũm kupy nẽ ma mẽ awỳr o mõi. Tã ka xep prem kamã harẽ nẽ ama nẽ amnhĩ kamã apijaàm nẽ. Nẽ akaprĩ nẽ ajamexpêr o:

—Hêxta waa nẽ. ãm hãmri na Pawre ã mẽ ijarênh anẽ. Na pa mẽ ã amnhĩ nhĩpêx anẽ nẽ amnhĩ tomnuj tỳx nẽ. Anẽ.

Tã nhũm Xitre akupỹn ixwỳr pøj nẽ inhmã mẽ ajarẽ. Pa mẽ ajarênh ma nẽ tee ri ijamexpêr nẽ ijamexpêr o:

—Hêxta waa nẽ. Mon pa pre axtem nẽ ã ri mẽ kãm ixàkjêr anẽ? Nà na xep prem kagãta kamã harẽ nẽ kuma nẽ hkaprĩ htỳx nẽ. Anẽ.

Tã ãm hãmri na pa pre ã mẽ akaxyw hipêx nẽ mêmõjta ã mẽ amã ixàkjêr anẽ. Na ka xep prem kamã harẽ nẽ ama nẽ tee ri ajamexpêr o ra

akaprī nē. Nom Tīrtūm kām hprām xà hkôt na ka prem ja hã amnhī pumu nē ã akaprī anē. Tã xep ra akupým tãm amnhī nhīpêx nē akupým Tīrtūm kôt amnhī nhīpêx mex nē. Jao akupým akīnh nē ri apa. Jakamã ãm hãmri na pa pre mẽ awÿr wam kagàta mēnh nē mẽmoj tã ã mẽ amã ixàkjêr anē.

10Koja Tīrtūm krajê hõ tanhmã amnhī tomnuj to. Hãmri nē tee ri ja hã amnhī pumu nē amnhī kamã hpijaàm nē akupým Tīrtūm kôt tãm amnhī nhīpêx. Hãmri nē akupým mex nē tãm hamaxpêr pê hkīnh nē ri pa. Nē axte tee ri amnhī kukamã hamaxpêr hkêt nē. Ja na Tīrtūm kām hprām. Tã koja mẽ kêp hkra hkêt xwÿnhjê pyrã nē tanhmã amnhī tomnuj to nē ra hpijaàm japêr. Nom hkwyjaja kot ja hã omunh pix mÿrapê hpijaàm nē arī Tīrtūm kôt amnhī nhīpêx kêt japêr. Hã koja nhÿrmã ty nē Tīrtūm kra kot akupým hkôt tãm amnhī nhīpêx xwÿnhjê kīnhã Tīrtūm pê awry rax kumrêx nē ri pa.

11Mẽ pahte Tīrtūm kapêr kwÿm ri tanhmã amnhī nhīpêx to hã tee ri amnhī pumunh nē amnhī kamã hpijaàm nē akupým tãm amnhī nhīpêxja na Tīrtūm kām hprām. Tã na ka xep ã amnhī nhīpêx anē. Wam ixte mẽ awÿr kagà mēnhta na ka xep prem kamã tanhmã ixte nã puro kamã hpijaàm kêt xwÿnhta ã mẽ amã ixàkjêr tota kamã akapêr nē ama. Hãmri nē tee ri mẽ ate kormã kot amnhī tomnuj ã kãm axàkjêr kêt ã amnhī kukamã ajamaxpêr nē amnhī kamã apijaàm nē. Nom Tīrtūm kām hprām xà hkôt. Mẽ ate jam ajamaxpêr pê amnhī kamã apijaàmja na kãm hprām. Tã ka mẽ hpijaàm xwÿnhta kamã agryk nē kãm akapêr o:

—Kwa mẽ pahpê Jesus kwÿjaja mẽ pahte ã amnhī nhīpêx anhÿr kêt tã ka ã amnhī nhīpêx anē. Nà na ka amnhī tomnuj tÿx kumrêx. Kot kaj ã amnhī nhīpêx anē pa mẽ hã apumu nē gaa nē apyrã nē ã amnhī tomnuj anē. Kwa ja kaga nē axte ã amnhī nhīpêx anhÿr kêt nē. Nē akupým Tīrtūm kôt amnhī xãm tÿx nē hkôt amnhī nhīpêx rãhã ho ri apa. Anē.

Hãmri nhũm krī nhõ xwÿnhjaja ja hã mẽ ajarēnh ma nē mẽ apê jamnuj ã mẽ apumunh kurê kumrêx. ãm hãmri na ka prem ã kãm akapêr anē.

12Nē ixte mẽ awÿr kagà nē mēnhta kamã na pa pre nã puro kamã hpijaàm kêt xwÿnhta mã tanhmã ixàkjêr to hkêt nē. Rÿ nã purota mã tanhmã ixàkjêr to hkêt nē. Na pa pre mẽ apê Kris kwÿjê hwÿr kagà nhīpêx nē kamã tanhmã mẽ amã hpijaàm xwÿnhta ã karõ hto. Mẽ ate kamã harēnh hãmri nē inhÿ hã amnhī nē hanor nhũm Korīt nhõ xwÿnh piitã kot ã mẽ ate amnhī nhīpêx anhÿr ã mẽ apumunh kaxyw. Nē mẽ ate Tīrtūm nom ã hipêx anhÿr jao mẽ amã ixkīnh pê ixkapêr kôt ã hipêx anhÿr ã amnhī pumunh kaxyw.

13Tã nhũm Xitre ixwÿr pøj nē tanhmã inhmã mẽ ajarēnh to. Na xep pre mẽ awÿr nojarêr nē tee ri amnhī kukamã hamaxpêr. Mẽ ate kagàta kamã harēnh nē ijarēnh mar nē kamã agryk pymaj tee ri amnhī kukamã

hamaxpēr. Tã ma mẽ awÿr mōn pōj nē mã amã kugō. Ka xep prem kamã harē nē ama nē hkôt amnhĩ nhĩpêx kurê kumrêx nhũm mẽ ate amnhĩ nhĩpêx ã mẽ apumu nē hkĩnh nē. Hãmri nē tãm hamaxpēr. Tã ra akupÿn ixwÿr mō nē inhmã mẽ ajarē pa mẽ ajarēnh ma nē ijaxwÿja ixkĩnh nē. 14Na pre kormã mẽ awÿr nojarê pa kãm tanhmã mẽ amex ã mẽ ajarēnh to. Tã nhũm xep ma mẽ awÿr mōn pōj nē mẽ apumu nē hamaxpēr o:

—Nà pēr ãm hãmri na pre Pawre inhmã mẽ mex ã harē. Mẽ mex kênã. Anē.

15Tã nhũm pre mẽ arũm kato nē ra man akupÿn ixwÿr mōn pōj nē inhmã mẽ ajarēnh o:

—Na pa pre ma mẽ hwÿr mō nē mẽ kãm ixkapēr o ri mẽ hkôt ixpa nhũm mẽ ixkapēr ma nē ixkôt amnhĩ nhĩpêx kurê kumrêx nē ixto mex nē. Kormã ixte mẽ hwÿr inhmōr kêt tã mẽ harēnh ma nē inhmã mẽ hkĩnh nē. Tã pa ma mẽ hwÿr mō nhũm mẽ ixto mex rax nē pa ra inhmã mẽ hkĩnh tÿx kumrêx. Anē.

16Ã inhmã mẽ ajarēnh anē pa mẽ ajarēnh ma nē ixkĩnh tÿx nē. ãm hãmri na ka htem mẽmoj tã amnhĩ jarēnh xà hkôt tanhmã amnhĩ nhĩpêx to ho apa.

Mẽ kot Kris kôt mẽ hkwÿjê pê õxÿ hkêt ã mẽ kãm karō

Atre 11.27-30; Rõmãn 15.25-27; Wam Korīt 16.1-4

8 1E Kris kôt ixkwÿjaja. Kot paj hpãnhã mẽ amã jar Masetōn kamã tanhmã Jejus kwÿjaja kot amnhĩ nhĩpêx to hã mẽ harē ka mẽ harēnh ma. Na hte Tĩrtũm mẽ kutã nojarê nhũm mẽ mex nē pa. 2Mẽ hkwÿjaja kot Kris ã mẽ hipêx kati nhũm mẽ kot amnhĩ xà htÿx kãm hamak o pa htã hkĩnh nē hamakêtkati nē ri pa. Nē mẽ hkàxpore hkryre htã ho õxÿ hkêt nē pa. Na htem àmnhĩx ri mẽ kêp amrakati xwÿnhjê mã hkwÿ nhõr o pa.

3-4Tã na prem Jerujarē kamã Kris kôt mẽ pahkwÿjê jarēnh ma. Mẽ kêp amrakati hã mẽ harēnh ma nē kãm mẽ hkaprĩ nē. Nē mẽ kãm mẽ hwÿr mẽmoj rēnh nē mẽ ho ajuta hprãm nē. No ãm pa ixte mẽ kãm hã karō xà hkôt kêt. Mẽ tãmjaja mẽ hamaxpēr xà hkôt na prem ã hamaxpēr anē nē mẽ kaxyw kàxpore ho pikuprõnh rax nē. Hãmri nē inhmã kugō nē inhmã:

—Kwa na pa prem Jerujarē kamã Kris kôt mẽ pahkwÿjê jarēnh ma nē mẽ inhmã mẽ hkaprĩ nē mẽ kãm mẽ ixkàxpore hkwÿ ho akuprō. Jakamã e amÿ nē ma mẽ hwÿr o mō nē mẽ kãm agō kê mẽ tokyx ho amnhĩm awjaprō nē kuku. Anē.

5Pa mẽ kuma nē ixtÿx ho ãm kàxpore grire hã hkamnhĩx nē ijamaxpēr o:

—Kwa mo mẽ hikàxpore rax koja mẽ ri ho akuprō nē mẽ kãm kugō? ãm mẽ hikàxpore hkryre kênã.

Anhÿr o ijamaxpēr tā no nhūm mẽ kaxyw ho rax nē ho akuprō. Mẽ hikàxpore hkryre htā mẽ kām ōr rax nē. Hāmri nē inhmā amnhĩ jarēnh o:

— Na pa mẽ ra Pahihti Jejus Kris mã amnhĩ gō. Mẽ ixte tanhmã kām amnhĩ nhĩpêx to ho ri ixpa kaxyw. Jakamã e tanhmã mẽ inhmã mẽmoj tā karō hto. Kot pa mẽ ama nē akapēr kôt amnhĩ nhĩpêx. Ja na pa mẽ inhmā hprām nhūm Tirtūm haxwÿja kām ja prām. Anē.

6Na pa pre ã mẽ kot amnhĩ nhĩpêx anhÿr ã mẽ omu nē mẽ apê Korīt nhō xwÿnhjê mã ijamaxpēr kurê kumrêx. Hāmri nē Xitre mã mẽ ajarē. Na pre mẽ awÿr mō nē mẽ amã Jerujarē nhō xwÿnhjê jarē. Mẽ ate mẽ kām kàxpore hkwÿ ho apikuprōnh kaxyw. Tã pa pre jam ijamaxpēr nē ra akupÿm mẽ awÿr mẽnh mã nē kām:

— Kwa ma akupÿm Korīt wÿr mō nē mẽ kām anē kê mẽ ra kot amnhĩ jarēnh xà hkôt Jerujarē nhō xwÿnhjê kaxyw kàxpore hkwÿ ho akuprō nē tokyx mẽ hwÿr kumē. Ra mẽ kām Kris kôt mẽ hkwÿjê hkĩnh ã amnhĩ jarēnh kēnã. E kwa tokyj. Anē.

7Na ka htem amnhĩ to mex o ri apa. Nē amnhĩ kaxyw Kris hkôt ajamaxpēr tÿx nē. Nē ma mẽ kām Tirtūm kapēr jarēnh mex o ri mẽ hkôt apa. Nē mẽ ajamaxpēr mex nē. Nē mẽ piitã mẽ ho mex o ri apa. Nē mẽ amã ixkĩnh o ri apa. Jakamã kwa kêr ka mẽ axàmnhĩx mẽ kēp amrakati xwÿnhjê mã mẽ akàxpore hkwÿ nhōr o apa. Jao mẽ amã Tirtūm kĩnh tÿx ã amnhĩ to amnhĩrīt. 8Ixe ã mẽ amã ja hã karō anhÿr tã hã mẽ atã ixihitÿx kêt nē. ãm mẽ kamã axukapri hkôt mẽ ate mẽ kām axàmnhōr o apa kaxyw na pa ã mẽ amã ixkapēr anē. Masetōn kamã mẽ pahkwÿjaja kot amnhĩ nhĩpêxta pyrã nē. 9Ra mẽ ate Jejus Kris kām mẽ pajapê hã kot tanhmã amnhĩ nhĩpêx to hã mar mex. Amnepēm na pre kaxkwa kamã mex kumrêx nē ri pa ho pa nhūm mẽmoj piitã kēp ō htã nhūm rer pa nē mẽ pahwÿr wrÿ nē mẽ pakamã kēp amrakati nē ri pa. Hikàxpore hkêt nē ri pa. Tã mẽmo kaxyw na pre ã mẽmoj mex piitã rer par nē mẽ pahwÿr wrÿk anē? ãm kot mẽ pahto mex pix kaxyw. Kot mẽ pahto mex nhūm mẽ pahte kukwak ri mẽ paxàmnhĩx ri mẽ pajamakêtkati nē mẽ papa kaxyw na pre ã amnhĩ nhĩpêx anē. Mẽ pahte nhÿrmã urāk nē kaxkwa kamã pamex kumrêx nē ri papa ho papa kaxyw.

10E kwa kêr ka mẽ tokyx kàxpore hkwÿ ho apikuprōnh pa nē Jerujarē nhō xwÿnhjê hwÿr amē. Mẽ akumrêxjaja na ka prem ham amgrã hapêxta kamã ra mẽ kaxyw ho apikuprōnhja krax. Mẽ amã mẽ ho mex prām xàj ham ho hkrax tã no ãm kormã hatur xàm mẽnh nē mẽ hwÿr mẽnh kêt nē. 11Kwa mẽ tokyx ja ho ajapêx nã. Na ka prem ate ho anhÿr krax ã akĩnh pê kàxpore hkwÿ ho apikuprōnh o apa. Tã kêr ka mẽ arĩ akĩnh rãhã ho apikuprōnh par jatur xàm amē. No mẽ ri atÿx tanhmã ajamaxpēr to hkêt nē. Rÿ mẽ ajamaxpēr o:

—Nà kormã. Kot paj nhÿrmã ixkàxpore rax nê rĩ kormã mẽ hwÿr hkwy mẽ.

Anhÿr o mẽ ri ajamaxpêr hkêr nê. Mẽ ate tanhmã akàxpore hkre kamã kute hã omunh xà hkôt mẽ kãm hkwy pix gô. ¹²Kêr ka mẽ axàmnhix akĩnh kãm mẽ kãm ho akuprô. Ate amnhĩ kàxpore pumunh xà hkôt. Ka mẽ akàxpore rax nê mẽ kãm ho rax nê agô. Rÿ mẽ akàxpore grire nê mẽ kãm ho grire nê agô. Ja na kêt mex. ¹³No mẽ ate mẽ kãm ôr par nhũm mẽ arom mẽ hikàxpore rax nê ri paja mex kêt. ¹⁴Nom ra mẽ akàxpore rũnh jakamã kwa mẽ amnhĩ kutã mẽ kãm hkwy ho hkryre nê ho akuprô kê mẽ apyrã nê hikàxpore nê ri pa. Kêr ka mẽ nhÿrmã tanhmã amnhĩ to nê axã nê nhũm akàxpore apê hapêx nhũm mẽ ajarênh ma nê amnhĩ kuxwar mẽ ato ajuta nê mẽ amã hkwy ho akuprô nê mẽ awÿr kumê. Ka mẽ akàxpore ho axpên pyrã nê ri apa. ¹⁵Amnepêm Tĩrtũm kot kaxkwa rũm Ijaewjê hwÿr mẽô rênh nhũm mẽ kot apkati mẽ amnhĩm hkawrà nê ho apkur o pata ã na pre Tĩrtũm kapêr ã kagã htũmja ã mẽ harênh anê nê mẽ harênh kot:

Na pre mẽ hkra xohtô xwÿnhjaja mẽ apkur xà hkawrà rũnh nê.

Nê gôj kãm unhwÿ nê kuku nê piitã ho ôhy htu. Nhũm mẽ hkra grêre xwÿnhjaja haxwÿja hkwy kawrà no ãm ho hkryre nê hkawrà. Nê gôj kãm unhwÿ nê kuku nê haxwÿja ho ôhy htu hpa. Na pre htem apkati mẽ ã amnhĩ nhĩpêx anhÿr o pa. Anê.

Ja pyrã nê kêr ka mẽ akàxpore ho axpên pyrãk o ri ho apa.

Xitre mẽ hkràmnhwÿjê jarênh

¹⁶Nê Xitre na pre ixpyrà nê kãm mẽ ato ajuta hprãm nê. Na pre inhmã mẽ atã amnhĩ jarê pa pre kuma nhũm ja inhmã mex nê pa ixkĩnh nê. Nê ijamaxpêr o:

—Nã ãm hãmri na Tĩrtũm tanhmã Xitre hkrã hto nhũm ã hamaxpêr mex anê. Anê.

¹⁷Tã pa ma akupÿm mẽ awÿr môr ã hkukja nhũm inhma nê hkĩnh nê mẽ awÿr nojarêr kurê kumrêx. Nom kormã ixte kãm mẽ ajarênh kêt ri nhũm tãm amnhĩ kukamã hamaxpêr nê mẽ awÿr hkrã. ¹⁸Tã na ra nojarêr kaxyw. Kot paj ma hkôt Kris kôt mẽ pahtôjê hõ mẽ kê ma hkôt mô. Kôt ixte mênh xwÿnhhta na hte mẽ kãm Tĩrtũm kapêr jarênh mex nê nhũm htem amnhĩm mex ã harê. ¹⁹Na pre jar Jejus kwÿjaja kot ma ixkôt Jerujarê hwÿr kàxpore hkwy ho môr kaxyw nhũm prem amnhĩm mẽ kurê. Tã koja Xitre mẽ wa mẽ awÿr môn pôj ka mẽ kãm kàxporeta gô nhũm man akupÿn o mô pa wa rĩ kormã ma Jerujarê hwÿr mẽ kãm o mô. Mẽ kot hamÿnh nê mẽ pamã mẽ hkĩnh ã kot amnhĩ tã mẽ pahpumunh kaxyw. Nê Tĩrtũm mã mex o mex ã harênh kaxyw. ²⁰⁻²¹Nom kàxpore rax nhũm ixte mẽ hwÿr o inhmôr nhũm mẽ kot hã

ixkamnhīx pymaj kot paj ma amnhī kôt Kris kôt mẽ pahtōta o mō. Ixte Xitre hkôt mẽ awỳr mēnh xwỳnhhta pa ma amnhī kôt o mō. Nom ixàhkīnh o ixpare hã. Tirtũm kot ja kôt ixpumunh mex tã kot paj ma amnhī kôt o mō.

22Nē ot pa ma Xitreta wa hkôt axte mẽ awỳr ja mẽ. Kêr kê mẽ axkrunēpxi nē ma ixkukamã mẽ awỳr mō. Ixte wa hkôt mēnh xwỳnhhta ixte kot amnhī nhīpêx ã omunh mex. Na hte kãm mẽ piitã mẽ ho ajuta ho pa hprãm nē. Tã mẽ ajarēnh ma nē inhmã mẽ ajarēnh o:

— Nà koja mẽ Jerujarē nhō xwỳnhjê mã kàxpore nhōr rax nē kãm ga. Mẽ kot amnhī to mex kēnã. Anē.

Jakamã ra mẽ awỳr hkrã. Tã koja ma Xitre wa hkôt mō nē mẽ ato ajuta ka mẽ tokyx kàxpore ho apikuprōnh pa.

23Nē koja mēhō tanhmã Xitre hã mẽ akukjêr to ka mẽ kēp ixkràmnhwỳ mex ã harē. Nē kot inhīhkô hã mẽ ho ajuta mex o pa hã harē. Na pre ra jar Kris kwỳjaja mẽ akaxyw kuta nē ma mẽ awỳr kumē. Jakamã koja ma mẽ awỳr mō nhũm Kris kôt mẽ pahtōjê hō wa pijakrutja wa ma hkôt mō. Na hte wa haxwỳja Kris kôt amnhī nhīpêx mex o pa. 24Koja mẽ awỳr pōj ka mẽ omu nē mẽ ho mex nē. Nē mẽ amã mẽ hkīnh nē. Kê krī piitã hkôt Kris kôt mẽ pahkwỳjê piitã mẽ hã mẽ ajarēnh ma nē axpēn mã mẽ amex ã mẽ ajarē. Nē mẽ ajarēnh o:

— Pēr ãm hãmri na pre Pawreja mẽ pamã Korīt kãm mẽ pahkwỳjê jarē. Na xep pre Xitre mẽ hkwỳta ma mẽ hwỳr mō nhũm mẽ ho mex rax nē. Ra Pawre kot mẽ pamã mẽ harēnh xà hkôt. Anē.

Mẽ kot kàxpore ho pikuprōnh ã mẽ harēnh

9 1-2Kwa ixkràmnhwỳjaja. Kot paj Jerujarē nhō xwỳnhjê kaxyw mẽ atã ixihtỳx kêt nē. Ra mẽ amã mẽ ho ajuta hprãm jakamã na pa pre Masetōn kamã Kris kôt mẽ pahkwỳjê mã mẽ ajarēnh o:

— Pika pê Gres kamã Kris kôt mẽ pahkwỳjaja na prem ham amgrã hapêxta kamã Jerujarē kamã mẽ pahkwỳjê jarēnh ma nē kãm mẽ ho ajuta hprãm. Anē.

Hãmri nhũm mẽ ajarēnh ma nē mẽ apyrã nē kãm tanhmã mẽ ho ajuta hto hprãm. 3-4Tã ot pa mẽ awỳr Xitre mẽ hōta wa mẽ ho ixpimràatã wa mẽ kumē. Mẽ kot kàxpore hã mẽ akukjêr kaxyw. Kêr pa mytwrỳ hō hã ma Masetōn nhō xwỳnh kwỳjê mẽ mẽ awỳr mō nē ra ixte mẽ kãm kàxpore hkwy ho mẽ apikuprōnh ã mẽ ajarēnh kôt mẽ ate ho apikuprōnh rax ã mẽ apumu nē ixkīnh nē. Nom kot pa mō nē tee ri hapêr nē te ixte Masetōn nhō xwỳnhjê mã mẽ ato ixêx pyrã nē ixpijaàm nē. Ka mẽ ajaxwỳja amnhī kamã apijaàm nē. 5 ã mẽ pahte amnhī nhīpêx anhỳr pymaj na pa ã mẽ amã kagàja nhīpêx nē Xitre mã òr nē ma amnhī kukamã mẽ awỳr mēnh anē. Nē hkôt wa mōr mã xwỳnhhta mẽ ho ixpimràatã amnhī kukamã wa mẽ kumē. Tã kê mẽ awỳr pōj nē mẽ amã

kagàja gõ ka mẽ kamã harẽ nẽ ama nẽ tokyx kàxpore ho apikuprõnh jatur xàm amẽ. Kêr pa mẽ hapu hã mẽ awÿr mõ ka mẽ ra mẽ ixkutêp ho apikuprõnh pa nẽ mẽ kãm agõ nẽ ajamakêtkati nẽ apa. No pa ixte mẽ amã mẽ ate ho apikuprõnh kaxyw mẽ atã ixihtÿx kêt. 6Na htem piitã ã hamaxpêr anhÿr o pa nẽ hamaxpêr o:

—Kot ka apur rax nẽ kamã anhõ rax nẽ. Nom kot ka apur grire nẽ kamã anhõ grire.

Anhÿr o hamaxpêr jakamã kêr ka mẽ apiitã ajamakêtkati nẽ Jerujarẽ nhõ xwÿnhjê mã kàxpore nhõr mex nẽ. Kêr ka mẽ ho apikuprõnh pa nhũm rax nẽ. Te mẽhõ ihpur rax nẽ kamã õ raxta pyrãk. Kê Tirtũm ã mẽ ate amnhĩ nhĩpêx anhÿr ã mẽ apumu nẽ nhÿrmã mẽ ato mex nẽ. 7Nom kêr ka mẽ anhõxÿ kamã mẽ kãm õr kêt nẽ. Mẽ pahte pahkĩnh kãm panhõxÿ hkêt kãm mẽ kêp amrakati xwÿnhjê mã mẽmoj nhõr o papaja na Tirtũm kãm hprãm. 8-9Koja mẽ hã mẽ apumu hãmri nẽ amnhĩm mẽ amex ã mẽ ajarênh rãhã ho pa. Mẽ kãm Tirtũm kĩnh xwÿnhjaja na htem àmnhĩx ri mẽ kêp amrakati xwÿnhjê mã mẽmoj nhõr o pa. Te Tirtũm kot amnhĩ nhĩpêx pyrãk. Na hte àmnhĩx ri mẽ pamã mẽmoj nhõr o pa. Mẽ pahwÿr na rẽ nhũm wrÿ. Nhũm mẽ pamã mẽ paxàpkur xà nhõr o pa. Nẽ tanhmã mẽ pahto pu mẽ paxà hkêt nẽ pajamakêtkati nẽ paxàpênh o papa. Nẽ pamex nẽ ri papa. Panhõ rũnh nẽ ri papa. Jakamã kwa pu mẽ urãk nẽ paxàmnhĩx ri mẽ kêp amrakati xwÿnhjê mã mẽmoj nhõr o papa.

10E pa ixprĩ hã mẽ amã ja jarẽ ka mẽ inhma. Nà na hte ã Tirtũm mẽ pamã mẽ paxàpkur xà nhõr o pa anẽ. Kot kaj apur kãm ahkre nhũm tanhmã amã mẽmo hyta nhĩpêx to nhũm amã hapõx mex nẽ amã õ rũnh nẽ ka anhõ rax nẽ. Nẽ hkwy ho axàpkur o apa nẽ axte hkwy hkre. Tã kêr ka mẽ ã Tirtũm kot mẽ ato mex anhÿr ã amnhĩ pumu hãmri nẽ urãk nẽ axàmnhĩx ri mẽ kêp amrakati xwÿnhjê mã axàmnhõr pẽ mẽ ho mex o ri apa. Nhũm Tirtũm mẽ hã mẽ apumu nẽ mẽ amã mẽmoj nhõr rãhã nẽ. Ka mẽ amnhĩ pyrã nẽ mẽ kêp amrakati xwÿnhjê mã hkwy nhõr o apa. 11Koja Tirtũm mẽ ato mex rax nẽ ka mẽ anhõ mẽmoj rax nẽ. Ja o amnhĩ xwar mẽ kêp amrakati xwÿnhjê kaxyw kàxpore hkwy jaxwÿ. Kêr pa mẽ amã hkwy jamÿ nẽ ma Tirtũm kõt mẽ pahkwÿjê mã o mõ nẽ mẽ kãm kugõ kê mẽ omu nẽ hkĩnh nẽ. Nẽ mẽ atã Tirtũm mã mex o mex ã harẽ. 12Hãmri nẽ mẽ akukwak ri mex nẽ ri pa. Nẽ axpên mã Tirtũm mex



Sikũn Korõt 9.7

o mex ã harẽnh o ri pa. **13**Koja mẽ amnhĩ tã mẽ apumu nẽ hkĩnh nẽ. Hãmri nẽ Tĩrtũm mã amnhĩ tã tanhmã mẽ ajarẽnh to nẽ kãm:

—Pa Tĩrtũm. Nà ãm hãmri na pre Korĩt kãm akõt mẽ ixkwỳjaja amnhĩ jarẽ. Na htem akõt pix mã amnhĩ nhĩpêx mex o ri pa. Jao mẽ ixpê õxỳ hkêt nẽ mẽ inhmã kàxpore hkwy nhõr rax nẽ. Àmnhĩx ri hamakêtkati nẽ mẽ inhmã hkwy nhõr rax nẽ. No ãm mẽ papxipix na htem ã mẽ inhĩpêx anhỹr kêt nẽ. Na htem mẽ kêp amrakati xwỳnh piitã ã mẽ hipêx anhỹr o pa. ãm hãmri na ka pre tanhmã mẽ hkrã hto nhũm mẽ anhỹ hã ã amnhĩ nhĩpêx anhỹr o pa. Amex o amex Tĩrtũm. Anẽ.

14Hãmri nẽ mẽ ato hwỳr o:

—Pa Tĩrtũm. ãm hãmri na hte Korĩt nhõ xwỳnhjaja amnhĩ pyrã nẽ mẽmoj to mẽ ixkutã nojarêt o pa. Jakamã aa mẽ ixte amnhĩ tã mẽ inhno ho mẽ omunh kêt tã mẽ inhmã mẽ hkĩnh nẽ. Kwa kêr ka mẽ ixtã mẽmoj to mẽ kutã anojarêt rãhã ho apa Tĩrtũm.

Anhỹr o mẽ ato kuwỳ. **15**Tĩrtũmja mex o mex. Nom na hte mẽ pahto mex pê mẽ pamã kàxpore nhõr kêt nẽ. Kra Jejusja na pre mẽ pamã kugõ. Kãm mẽ pajapê ho mẽ pahwỳr kumẽ nhũm mẽ pahwỳr wrỳ nẽ mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Ja na mex o kot mẽ pamã kàxpore nhõr jakrenh. Mẽhõ koja uràk nẽ ã mẽ panê htyk anẽ? Nà amrakati ho amrakati. ãm Jejus pix na pre ã amnhĩ nhĩpêx anẽ.

Pawre kêp Tĩrtũm Karõ nhỹ hã kapêr xwỳnh ã harẽnh

Epes 6.10-20; Wam Tesarõn 5.8

10 ^{1E} Kris kõt ixkwỳjaja. Nà ixpê Pawre kot paj mẽ akwỳ kot tanhmã ixto kapêr to xwỳnhjê mã amnhĩ jarẽ ka mẽ apiitã inhma. Nà na hte Kris mẽ pakamã gryk tokyx anhỹr kêt nẽ. Na hte mẽ pahto mex japjê nẽ. Tã inhmã uràk nẽ ã mẽ anhĩpêx anhỹr prãm nẽ. No na hte mẽ akwỳjaja axpẽn mã tanhmã ixto kapêr punuj to nẽ ri axpẽn mã:

—Pawre na hte nhỹri krĩ kamã pa nẽ mẽ pamã kagã nhĩpêx nẽ mẽ pahwỳr kurẽ nẽ kamã mẽmoj tã mẽ pamã kapêr kãm hihtỳx nẽ hã mẽ pamã akir. Tã amnẽ mẽ pahwỳr mõ hãmri nẽ te kãm mẽ pahpyma pyrãk o mẽ pamã kapêr o pa.

Anhỹr o ijarẽ. **2**Nom inhmã mẽ awỳr inhmõr nẽ mẽmoj tã mẽ amã ixàkjêr prãm kêt tã kot paj nhỹrmã mẽ awỳr mõ ka mẽ tanhmã amnhĩ tomnuj to ho apa japêr. Pa ja hã mẽ apumu nẽ hã mẽ amã akir kãm ga. **3**Na pa htem jar pika ja kamã Tĩrtũm kwỳ hkêt xwỳnhjê kaêx ã ri ixpa nom mẽ uràk nẽ amnhĩ krã hkõt tanhmã amnhĩ nhĩpêx to ho ixpa hkêt nẽ. Nẽ mẽ uràk nẽ amnhĩ krã hkõt tanhmã ijamaxpêr to ho ixpa hkêt nẽ. Na pa htem Tĩrtũm Karõ nhỹ hã àhpumunh xà ho amnhĩ nhĩpêx o ri ixpa. **4**Nẽ Tĩrtũm xàhpumunh tỳx xà ho mẽ kãm kapêr jarẽnh o ri ixpa.

Mē kot mar nē hkôt amnhī nhīpêx kaxyw. Nē àhpumunh tỳx o na pa htem mē kot Tirtūm kôt amnhī xunhwỳr pymaj mē kêp àmnàr xwỳnhjaja tanhmã mē nē mē ho. 5Na htem htỳx ri tanhmã Tirtūm nē hkwyjê mã kapêr to ho pa. Amnhī kaxyw hkôt mē hamaxpêr kêt kaxyw tanhmã nē mē kãm kapêr to. Na pa htem ja hã mē omu nē Tirtūm xàhpumunh tỳx xà ho tanhmã mē kãm ixkapêr to nhūm mē tee ri inhma nē axte mē kêp àmnàr kêt nē. Pa mē kãm Tirtūm kapêr jarê nhūm mē ohtô nē kuma nē Kris kôt amnhī xunhwỳ nē hkôt amnhī nhīpêx o pa. 6Tã mē kajaja kot kaj mē Tirtūm kôt amnhī nhīpêx mex tã mē atô ra kapêr nhīrôp xa nē tanhmã amnhī tomnuj to. Pa ja hã apumu rỳ hã ajarênh ma nē hã amã akir. 7Mē ate Tirtūm kot mē awỳr inhmênh kêt ã xypên mã ijarênh tã kot kaj mē atô ãm hãmri apê Kris kwỳ hã amnhī pumu nē ra mãânên pa ixpê hkwy hã ixpumunh kurê kumrêx. Mē apyrà nē ixpê hkwy kênã. 8Na pa pre ma mē awỳr mō nē tanhmã mē amã amnhī jarênh to nē mē amã:

—Tirtūm na pre mē awỳr inhmê pa mō. Ixte ÿ hã mē amã kapêr jarênh o ri mē akôt ixpa kaxyw. Anê.

Tã pa hte arī ã amnhī jarênh anhỳr o ri ixpa. ãm hãmri na pre Tirtūm mē awỳr inhmê pa hte ãm hãmri mē amã kapêr jarênh o ri mē akôt ixpa. Na pa hte Tirtūm nhỹ hã mē amã ixkapêr nē kapêr o ixêx o amnhī to jarkrar kêt nē. Ixte tanhmã mē atomnuj to ho ri ixpa kaxyw na pre Tirtūm mē awỳr inhmênh kêt. Mē amã ixkapêr mex nhūm mē ate inhmar nē Kris kapêr kôt amnhī nhīpêx mex o apa kaxyw na pre mē awỳr inhmê. 9E kwa Kris kôt ixkwỳjaja. Na pa hte mē amã ixpuma kaxyw mē awỳr kagà rênh kêt nē. Mē ate kamã harênh nē tee ri amnhī kukamã ajamaxpêr o amnhī kamã amã ma kaxyw kêt. 10Mē akamã mē kãm ixkĩnh kêt xwỳnhjaja na htem ijarênh o:

—Pawre na hte awry hã pa nē mē pahwỳr kagà rênh nē kamã te kêp pahi ho amnhī nhīpêx pyrà nē mēmoj tã mē pamã kapêr kãm hihtỳx nē. Tã mē pahwỳr pôj hãmri nē kapêr kaxyw nom kapêr kãm hihtỳx o kapêr kêt nē. Jakamã mo kaxyw kot puj mē hwỳr mra nē kapêr ma?

Anhỳr o ijarê. 11Nom ã ixte anhỳr kêt. Kwa mē inhma. Kot paj nhỹrmã ma mē awỳr mō hãmri nē te kagà ja kamã mē amã ixkapêr pyrak o mē amã ixkapêr nē ixkapêr xihtỳx o mē amã ixkapêr kãm ga.

12Na hte mē akwỳjaja kot amnhī to mex o mē ajakrenh ã amnhī to jarkrar o ri pa. No ãm amnhī krã hkôt pix mã na htem ã ri amnhī jarênh anê. Na hte Tirtūm ã mē harênh anhỳr kêt nē. 13Tã inhmã mē urak nē ã amnhī jarênh anhỳr prãm kêt. ãm ixte Tirtūm kot tanhmã inhmã karô hto xà hkôt amnhī nhīpêx o ixpaja na inhmã hprãm. Tã mē kajaja mē awỳr na pre inhmê. 14Ra kot mē awỳr inhmênh jakamã ixkumrêx na pa pre mē awỳr mō nē mē akôt ri mē amã tanhmã Kris jarênh to ho ri ixpa. Tirtūm kãm nhỹhỹm ixpa hprãm xà pix wỳr na inhmã ixpa hprãm.

15No kêt mẽ kot amnhĩ krã hkôt htỳx ri Tĩrtũm kapẽr jahkre o mẽ pa xwỳnhjaja na htem nhỹri krĩ kamã mẽ kot Kris kôt amnhĩ xunhwỳr ả mẽ harẽnh ma nẽ mẽ hã amnhĩ to jarkrar o ri pa. Te tãm kot mẽ hwỳr mỗr nẽ mẽ kãm ujarẽnh nhũm mẽ kot mẽ mar xà hkôt Kris kôt amnhĩ xunhwỳr pyràk. Nẽ mẽ hã amnhĩ to jarkrar o:

—E na pa pre ma mẽ hwỳr mỗ nẽ mẽ kãm Tĩrtũm kapẽr jarẽ nhũm mẽ inhma nẽ hkôt amnhĩ xunhwỳr kurẽ kumrẽx. Ixkukwak ri na prem ả amnhĩ nhĩpẽx anẽ. Anẽ.

Nom ả amnhĩ nhĩpẽx anhỹrja ả amnhĩ to hẽx. No pa na pa hte ho mẽ uràk kêt nẽ. Koja Tĩrtũm ma nhỹri krĩ hwỳr ixkwỳjẽ hõ mẽ nhũm ma hwỳr mỗ nẽ mẽ kãm Kris kapẽr jarẽ. Hãmri nhũm mẽ kuma nẽ Kris kôt amnhĩ xunhwỳ. Pa mẽ harẽnh ma nẽ mẽ ỹ hã ixkĩnh nẽ nom pa ixkukwak ri mẽ kot hkôt amnhĩ xunhwỳr ả amnhĩ to jarkrar kêt nẽ. Ixte mẽ hwỳr ixpa nẽ mẽ kãm ixujarẽnhre hã kot pa hkết mẽ hã amnhĩ to jarkrar. Ầm Tĩrtũm kãm nhỹhỹm ixpa hprãm xà pix wỳr na pa hte ixpa nẽ mẽ kãm kapẽr jarẽ. Jakamã kot kaj mẽ nhỹrmã Kris kôt amnhĩ nhĩpẽx mex o ri apa pa ja hã mẽ apumu nẽ mẽ are nẽ hpãnhã ma krĩ hõ hwỳr Kris kot mẽ hwỳr inhmẽn xà hõ hwỳr mỗ. Ka mẽ ja hã ixto Tĩrtũm wỳr o apa. 16Kot paj mẽ anhõ krĩ kamã mẽ piitã mẽ kãm Jejus kapẽr jarẽnh pa hãmri nẽ hpãnhã ma krĩ hkwyỳ hkôt ijapỏx o ri ixpa nẽ kamã mẽ kãm harẽnh o ri mẽ hkôt ixpa. Kormã aa mẽ kot mar kêt kumrẽx xwỳnhjẽ mã harẽnh o ri mẽ hkôt ixpa. Na pa hte ả mẽ hwỳr ixpa nẽ mẽ kãm ixujarẽnh anẽ. Jakamã nhũm mẽ ja hã ixpumu nẽ mẽ kot Tĩrtũm kapẽr mar xwỳnhjẽ pix wỳr ixpa hã ijarẽnh kêt nẽ.

17Nẽ Tĩrtũm kapẽr ả kagà htũm kot mẽmoj tã mẽ kot amnhĩ to jarkrar ả harẽnh kot:

Kêr ka mẽ kamjaja amnhĩ mex ả amnhĩ to jarkrar kêt nẽ. Ầm
Tĩrtũm pix mã mãn mex o mex ả harẽnh o ri ho jarkrar o
ri apa. Anẽ.

18Kot pu mẽ Tĩrtũm noo mã amnhĩ to mex ả amnhĩ to jarkrar nẽ ầm amnhĩ to jarkrar kaprỹ. Nom koja Tĩrtũm tãm ja hã mẽ pahto jarkrar nẽ ầm hãmri mẽ pahte amnhĩ to mex xwỳnh ả pahto jarkrar.

Jejus kot mẽ hwỳr mẽ rẽnũh ả amnhĩ to hẽx xwỳnhjẽ jarẽnh

Matêwre 7.15; Rômãn 16.17; Karatas 1.6-9; Korosẽ 2.8; Sikũn Pêtre 2.1

11 1E kot paj te mẽ hkrã pipãnh xwỳnh kot htỳx ri amnhĩ jarẽnh pyràk o tanhmã mẽ amã amnhĩ to jarkrar to. Kwa mẽ inhma nẽ ixkamã agryk kêt nẽ. No mẽ ixkapẽr kumrẽx mãn ma. 2Inhmã mẽ akĩnh. Te ho Mẽpahpãm Tĩrtũm kãm mẽ akĩnhta pyràk. Te mẽ apẽ mẽhõ kukrit kãm my hkĩnh nẽ kot ho mjên prãm xwỳnhta pyràk. Kãm mẽmyjẽ piitã mẽ hkĩnh kêt ầm kãm pix kĩnh. Ja pyrà nẽ kêr ka mẽ amã Kris kĩnh o nhãm amã mẽ hkĩnh xwỳnhjẽ jakre. Te ho mẽhõ ni kot kãm myta pix

kĩnh nẽ kãm ho mjên prãm xwỳnhhta pyræk. Ja na pa inhmã hprãm. ³Ra mẽ amã Kris kĩnh tỳx o apa nẽ hkõt amnhĩ nhĩpêx mex o ri apa htã nhũm mẽ kot amnhĩ krã hkõt htỳx ri Tĩrtũm kapêr jahkre ho mẽ pa xwỳnhjaja tee ri ja hã mẽ ajarênh ma nẽ axpên mã mẽ ajarênh o:

—Kwa nà ja mex kêt. Koja mẽ Pawre kapêr ma nẽ ãm kuma nhũm ja mex nẽ. No mẽ pahkõt mẽ kot amnhĩ nhĩpêxja na mẽ pamã mex. Ja na kêt mẽ pamã mex o mex. Anẽ.

Hãmri nẽ ra kot Kris nẽ tanhmã mẽ amã hêx to kaxyw. Te amnepê mã kagã kot mẽ panã kot wa pê Ewa mã hêx nhũm kot mar nẽ hkõt amnhĩ nhĩpêxta pyræk. ⁴Na pa pre ra mẽ awỳr mỗ nẽ mẽ amã tanhmã Jesus jarênh to. Nẽ tanhmã mẽ amã Tĩrtũm Karõ jarênh to. Nẽ tanhmã wa kot mẽ pahto hkra hto hã mẽ amã wa harẽ ka prem inhma nẽ mar tỳx nẽ. Tã nhũm ra mẽ kot htỳx ri Tĩrtũm kapêr jahkre xwỳnhjaja ixpãnhã mẽ awỳr mỗ nẽ Jesus kapêr kwỳm ri tanhmã mẽ amã ujarênh to nẽ mẽ amã harênh o hêx rãhã ho pa. Nẽ Tĩrtũm Karõja nhũm mẽ amã tanhmã ho hêx to. Nẽ ixte mẽ amã Tĩrtũm kapêr jarênh kwỳm ri ixpãnhã tanhmã mẽ amã harênh to ho pa. Na ka prem mẽ ama nẽ ãm hãmri harênh ã hkamnhĩx. Kwa kêr ka mẽ ri mẽ ujarênh piitã mar nẽ hkõt amnhĩ nhĩpêx kêt nẽ. Mẽ kot Jesus jarênh tã no ãm katat kõt harênh kêt nẽ. ãm ri ho hêx o pa. Ka htem ama nẽ ãm hãmri harênh ã hkamnhĩx nẽ mẽ amã mẽ mar prãm nẽ. Mẽ kot mẽ amã harênh o hêx o pa htã ka mẽ ama nẽ ra mẽ hkõt amnhĩ nhĩpêx kaxyw. Kwa mẽ ri ã amnhĩ nhĩpêx anhỳr hkêt nẽ. ⁵Kris kot mẽ awỳr mẽ rênh ã mẽ kot amnhĩ jarênh tã amnhĩ to hêx. Ka prem ama nẽ ãm hãmri mẽ kot mẽ amã harênh ã mẽ hkamnhĩx. Nom na pre Krisja mẽ awỳr mẽ rênh kêt nẽ. Kêt pa na pre mẽ awỳr inhmẽ. ⁶Mẽ hkĩnhã ixkapêr krór pyræk tã no ãm ixte Tĩrtũm kapêr mar tỳx. Nẽ kot amnhĩ nhĩpêxja na ixte omunh par. Ra mẽ ate ja hã ixpumunh mex.

⁷Na pa pre mẽ akõt ri mẽ amã Jesus jarênh o ri ixpa no ãm hpãnhã mẽmoj tã mẽ awỳr o ri ixpa hkêt nẽ. Xà amarĩ ixte mẽ amã harênh nẽ hpãnhã mẽmoj tã mẽ awỳr kêtja mẽ apê omnuj? ⁸⁻⁹Kormã ixte mẽ amã Tĩrtũm kapêr jarênh o ri ixpata ã na pa pre hte tõhã kàxpore ho presija no ãm aa hã mẽ awỳr kêt nẽ. Jar Masetõn kamã Kris kõt mẽ pahkwỳjaja na prem ixwỳr hkwy rênh o pa pa ho ixàpkur xà japrôr o ri mẽ akõt ixpa. Mẽ kumã ixte Tĩrtũm kapêr jarênh o ri ixpa hkêt tã pa hte mẽ kukwak ri mẽ akõt ho ixàpkur o ri ixpa. Tã kot paj arĩ ã mẽ akõt ixpa nẽ ã amnhĩ nhĩpêx anẽ nẽ mẽmoj tã mẽ awỳr o ri ixpa hkêt nẽ. ¹⁰Ja inhmã mex. Jakamã kot paj amarĩ mẽ anhõ pika pê Gres kãm ã mẽ amã Tĩrtũm kapêr jarênh o ixpa anẽ nẽ mẽmoj tã mẽ awỳr kêt nẽ. ãm hãmri na pa ã mẽ amã amnhĩ jarênh anẽ. Kris pyrã nẽ ixêx kêt kênã. ¹¹Xà we inhmã mẽ akĩnh kêt kõt na pa hte ã mẽ amã Tĩrtũm kapêr jarênh pãnhã mẽ awỳr kêt anẽ? Nà inhmã mẽ akĩnh jakamã na pa hte kapêr jarênh pãnhã mẽ

awÿr o ri ixpa hkêt nê. Inhmã mẽ akĩnh tÿx kênã. Tirtũm kot ja hã ixpumunh mex. **12**No mẽ kot amnhĩ krã hkôt htÿx ri Tirtũm kapêr jahkre xwÿnhjaja na htem mẽ ajahkre hpãnhã kàxpore hã mẽ awÿr pix o pa. Nê mẽ amã tanhmã amnhĩ to hêx to nê mẽ amã:

— Nã mẽ ixte Pawre kot amnhĩ nhĩpêx pyrãk. Mẽ ixte amnhĩ nhĩpêxa kot axpên pyrãk.

Anhÿr o mẽ amã amnhĩ to hêx. Nom ixte ho mẽ urãk kêt kumrêx. Mẽ ixte amnhĩ nhĩpêx kot axpên pyrãk ronhÿx pa mẽ urãk nê kàxpore hã mẽ awÿr o ri ixpa. Nom ixte ã amnhĩ nhĩpêx anhÿr kêt. Kot paj aa ã amnhĩ nhĩpêx anhÿr o ixpa hkêt nê. **13**Ã mẽ kot amnhĩ nhĩpêx anhÿr xwÿnhjaja na pre Tirtũm mẽ awÿr mẽ rênh kêt nê. Mẽ kot Kris nhÿ hã mẽ ahkre xwÿnh ã amnhĩ jarênh tã ãm amnhĩ to hêx. **14**Mẽ õ pahi Satanastija te mẽmoj mex jarênh pyrãk tã no ãm na hte mẽ pano kupyrr pê mẽ pamã tanhmã hêx to ho mẽ pahkôt pa. Te kot mẽmoj mex ã ãm hãmri kot harênh pyrãk tã no ãm ho hêx. **15**Tã hkôt mẽ kot amnhĩ nhĩpêx xwÿnhjaja na htem urãk nê te tãm mẽ kot amnhĩ nhĩpêx xwÿnhjê pyrã nê mẽ pahwÿr mra nê tanhmã mẽ pamã hêx to. Satanasti pyrã nê mẽ pano kupyrr kaxyw tanhmã mẽ pamã hêx to. Nom koja Tirtũm nhÿrmã mẽ pahã mẽ homnuj tÿx kumrêx nhũm mẽ rĩ amnhĩ pumu.

Tanhmã mẽ kot Kris ã Pawre nhĩpêx to ã mẽ harênh

Atre 9.23-25

16E kot paj axte te ixtÿx ri amnhĩ to jarkrar pyrãk o mẽ amã tanhmã amnhĩ jarênh to ka mẽ inhma nê ixkamã agryk kêt nê. **17**Pahilhti Kris nhÿ hã kot paj mẽ amã amnhĩ jarênh kêt ãm amnhĩ krã hkôt kot paj mẽ amã amnhĩ jarê. **18**Na htem ohtô nê mẽ ate mẽ hã apijaãm kaxyw tanhmã mẽ amã amnhĩ to jarkrar to ho pa. Tã kot paj mẽ urãk nê amnhĩ krã hkôt mẽ amã amnhĩ to jarkrar ka mẽ inhma. **19**Mẽ ate amnhĩ xàhpumunh tÿx ã amnhĩ jarênh tã ka htem htÿx ri mẽ kot amnhĩ to jarkrar o ri mẽ pa xwÿnhjê kapêr ma nê mẽ hkôt ajamaxpêr nê mẽ hkôt amnhĩ nhĩpêx kurê kumrêx. **20**Mẽ kot Kris nhÿ hã mẽ ahkre hã amnhĩ to hêx xwÿnhjaja mẽ pakurom mẽ kot amnhĩ to rax xwÿnh ã amnhĩ jarênh jakamã na htem mẽmoj tã mẽ amã karõ ho pa.

Nê mẽ kãm hprãm xà hkôt nhÿhÿm mẽ arê nê nhÿhÿm mẽ arê.

Nê mẽ apa pix kukwak ri apkur o pa.

Nê mẽmoj tã mẽ ajakwap mẽ atak o pa.


Ã mẽ kot mẽ anhĩpêx anhÿr tã ka te mẽ ate atũm kêt pyrã nê atÿx ri mẽ kapêr ma nê mẽ hkôt amnhĩ nhĩpêx o ri apa. **21**Tã ixte mẽ urãk nê ã mẽ anhĩpêx anhÿr kêt tã kot paj mẽ urãk nê mẽ amã tanhmã amnhĩ to jarkrar to ka mẽ inhmar japêr. Te ixtÿx ri amnhĩ jarênh pyrãk o kot paj mẽ amã amnhĩ jarê nom ãm hãmri mẽ amã amnhĩ jarê. **22**Mẽ kot Jejus

nhỹ hã mẽ ahkre hã amnhĩ to mẽ hêx xwỳnhjaja na htem mẽ amã tanhmã amnhĩ to jarkrar to nê mẽ amã:

—E mẽ inhma. Mẽ ixpê Ijaew na pa mẽ. Mẽ arom mẽ ixpê finat Apraãw kanrêhã htãmnhwỳ jakamã kwa mẽ ixkapêr ma nê mẽ ixkôt amnhĩ nhĩpêx. Anê.

Nom ijaxwỳja ixpê Ijaew tã pa hte mẽ uràk nê ja hã amnhĩ to jarkrar hkêt nê. 23Nê mẽ kot Kris kapêr jarênh mex o pa hã amnhĩ jarênh tã pa na pa hte harênh mex o mẽ hakre. Te ixkrã pipãnh pyrãk o ã mẽ amã amnhĩ jarênh anhỹr tãã.

E pa mẽ amã tanhmã amnhĩ jarênh to ka mẽ inhma. Nà na pre Kris ã mẽ kãm ixkurê xwỳnhjaja mẽ kot amnhĩ to jarkrar xwỳnhjê hkĩnhã Kris ã ixpynênh nê ijagjênh xohtô nê. Nê mẽ hkĩnhã tôhã ixtak rũnh kumrêx. Pa mẽ hkĩnhã xatã mẽ kot tanhmã ixto hã kritpêm ronhỹx pa pre ty. 24Na pre Ijaew krãhtũmjaja Kris ã ixkatut kãm ixtak rũnh nê. Nê ixtak xàja pĩ hã mry kà janhôr o ixtak. Nê ixtak kaxyw nê ixtak xà jatur xà kamã kàx xwa gixre janhô nê ho ixtak rũnh o ixkatut kà rê. Ixtak o 39 hãmri nê rĩ kormã mẽ kot ixpĩr pymaj inhmã ure. Na pre htem nhỹri ixpynê nê ã inhĩpêx anê. Na prem ã inhĩpêx anhỹr o 5 wês.



Sikũn Korĩt 11.23-25

25Nê na prem ra mẽ kot ixpĩr kaxyw nê kên rũnh kwỳ jamỳ nê ho ixtak o kuhê. Nê Rõm nhõ xwỳnhjaja haxwỳja pĩ ho ixtak rax kumrêx. ã inhĩpêx anhỹr o axkrunêpxi.

Nê na pa pre hte gô xujanãr kãm nhỹhỹm Jejus jarênh o ri ixpa kaxyw pãr kãm mẽ hwỳr ixpa nhũm pãrja tanhmã amnhĩ to nê agjê. Kritpêm nhỹx pre hte gôja ixpĩ. Pa pre ã amnhĩ nhĩpêx anhỹr o axkrut. Tã arĩgro hõ hã kê axte pãr õ mã axà nê ma axte krĩ hõ hwỳr mõ. Nhũm kê pãrta axte mẽ ixpê axà nhũm gôja nhỹx kê axte ixpĩ. Pa pãr jakà hã kumỳ nê hã ijêt o amỹkry. Nê ho apkati. Tã nhũm nhỹhỹnh pãr ôja mõ nhũm kamã mẽ mõi xwỳnhjaja ixpumu nê ixwỳr pãr o mõi nê amnhĩ wỳr ixto api nê ma amnhĩ kôt ixto mõi.

26Na pa pre amnhĩ xà htỳx kamã ijamak o ri ã mẽ kãm Kris kapêr jarênh o ri ixpa anê. Kironhỹx pre gô tãmja ixpĩ. Nhũm mẽ àhkĩnh nhi xwỳnhjaja kironhỹx prem määnên ixpĩ. Nê Ijaew nê Ijaew kêt xwỳnhjaja tôhã tanhmã ixtomnuj to ho pa. Pa pre krĩ hkwy hwỳr ixpa rỳ kapôt ã ixpa nhũm mẽ ixtã amỹnê. Pa pre gô xujanãr kãm pãr kãm ri ixpa nê

nhÿx kamā ty. Nhūm mẽ kêp Kris kwÿ hā amnhĩ to hêx xwÿnhjaja haxwÿja tanhmā ixtomnuj to pa mẽ ŷ hā amnhĩ xà htÿx kamā ijamak o ri ixpa. Ā na prem Kris ā inhĩpêx anhÿr o pa.

27Nê na pa Jejus kapêr jarênh o ri ixpa kurê ixkêngrà nê ri ixpa. Nê tōhā inhôt kêt ā ixtā apkati. Nê tōhā inhmā prām nê inhmā kôr nê ri ixpa. Nê tōhā ixê mex kêt nê inhmā kry nê ri ixpa. 28Na pa hte Kris kapêr jarênh o ri ixpa pê ā amnhĩ nhĩpêx anê. Nom ja pix kêt. Na pa hte krĩ piitā hkôt Kris kwÿjê hkukamā tee ri ijamaxpêr nê ijamaxpêr o:

—Hêxta waa nê. Mãn mẽ arĩ Kris kôt amnhĩ nhĩpêx mex japêr rÿ ko. Mãn mẽ ra kapêr kwÿm ri tanhmā amnhĩ tomnuj to rÿ ra hkaga.

Anhÿr o ijamaxpêr o ixpa.

29Nê na hte mêhō Tirtūm kapêr nhĩrôp xa nê tanhmā amnhĩ tomnuj to pa tee ri omu nê ixkaprĩ htÿx kumrêx. Koja mêhō tanhmā Tirtūm nê mêhō mã kapêr to nhūm kuma nê Tirtūm kôt amnhĩ nhĩpêx kêt pa tee ri ja hā omu nê nê kêp àmnàr xwÿnhhta kamā inhgryk tÿx kumrêx.

30E Kris kôt ixkwÿjaja. Na pa ā mẽ amā amnhĩ jarênh anê. Te ixte amnhĩ to ijarkrar pyrāk no ãm mẽ ate ixirerek xwÿnh ā ixpumunh pix kaxyw. 31Ām hāmri na pa ā mẽ amā amnhĩ jarênh anê. Ixêx kêt. Pahihti Jejus nhĩpêxà Tirtūm kot ja hā ixpumunh mex. Tirtūmja mex o mex. Koja mex o mex tūm nê pa rāhā ho pa. Tām kot ixirerek ā ixpumunh mex. 32Kormā krĩ pê Tamas kām ixpare ri na pre mẽ õ pahi Arêtja mẽ kām ixtā amÿnê nhūm pōristijaja krĩ hpu hā kahê xà nhō hakwakre piitā kām hipôk pa nê ixkām hamak o kuhê. Pa tee inhmā nhÿhÿnh ixkator nê ma mẽ umaj ixprôt nê ixtêm prām nê ixirerek xwÿnh ā amnhĩ pumunh kurê kumrêx. 33Tā nhūm Kris kôt mẽ pahkwÿjaja hamaxpêr nê kawà rax mÿ nê o tē nê inhmā ãm pa hwÿr axà nê kamā nhÿ. Hāmri nhūm mẽ pàr nhôr o kahê nhĩrô pê ixto wrÿ pa ixkato nê mẽ kêp amūxu nê amnhĩm ixprĩ nê ma tē nê mẽ kêp akunok. Ā na pre Tirtūm ixirerek xwÿnh ā inhmā ixto amnhĩrīt anê.

Tirtūm kot Pawre mã mẽmoj to amnhĩrīt ā harênh

12 1E Kris kôt ixkwÿjaja. Nà inhmā amnhĩ to jarkrar hprām kêt tã kot paj tanhmā mẽ amā amnhĩ jarênh to ka mẽ inhma nê hā ixtā apijaam japêr. Na hte Tirtūm tōhā inhôt kām ixkarō mã tanhmā kapêr to. 2-3Amnepê mã amgrà hō hā na pre tanhmā ixkrā hto nê õ krĩ hwÿr amnhĩ wÿr ixto api. Na pre ra hā amgrà pê 14 ãn. Apu inhĩ rāhā ixto api rÿ apu ãm ixkarō pix o api rÿ ko. Ixte ja hā amnhĩ pumunh mex kêt. Tirtūm pix kot ja hā ixpumunh. 4Na pre ixto api pa pôj nê õ krĩ kamā axtem tanhmā mẽ kapêr to hā mẽ kuma. Na prem mẽmoj mex kumrêx jarê pa kuma nê ixkĩnh nê. Nê inhmā mar prām nê. Hāmri nê ijamaxpêr o:

—Hêxta waa nê. Mẽmoj jarênhja mex kumrêx. Nà kot paj akupÿm wrÿ nê ixkwÿjê mã harê kê mẽ ixpyrà nê kuma. Nà kot paj anê.

Anhỹr tã nhũm Tĩrtũm Karõ ja nẽ ixkurẽ nẽ inhmã:

— Nã kër ka mẽ kãm ja jarẽnh kêt nẽ. ãm kapxipix kot kaj ama nẽ ri hã apa.

5Anhỹr jakamã pa pre paxipix mẽ arom mẽmojja pumu nẽ kuma nom kot paj ri hã amnhĩ to jarkrar kêt nẽ. Kot paj ãm Jejus pix tanhmã harẽnh to ho ri ixpa. Jao ixrom mex o mex ã harẽ. Nẽ ixrom hihtỹx o hihtỹx nẽ àhpumunh o àhpumunh ã harẽnh o ri ixpa.

6Nẽ ixte Tĩrtũm nhõ krĩ hwỳr ixàpirja ãm hãmri ixte hã amnhĩ jarẽnh tã kot paj ja hã amnhĩ to jarkrar o ri ixpa hkêt nẽ. Mẽ ate ja hã inhmar kõt inhmex ã ijarẽnhja na inhmã hprãm kêt. Nom kot ka mẽ ixte tãm amnhĩ nhĩpêx ã ixpumu nẽ tãm ixkapêr ã inhma hãmri nẽ rĩ kormã inhmã inhmex ã ijarẽ. ã mẽ ate amnhĩ nhĩpêx anhỹrja na inhmã hprãm. 7Na pre Tĩrtũm inhõt kãm inhmã mẽmoj mex kwỳ jarẽnh rax nẽ. Hãmri nẽ hpãnhã inhmã:

— E na ka akwỳjê rom inhõ krĩ hwỳr api nẽ mẽ kurom mẽmoj mex pumunh rax nẽ. Tã ate ja hã amnhĩ pumunh nẽ ma mẽ kãm hã amnhĩ to jarkrar o ri apa pymaj kot paj Satanasti mã anẽ nhũm inhma nẽ tanhmã atomnuj to ho pa. Nom ijamaxpêr xà hkõt koja ã anhĩpêx anẽ.

Anhỹr jakamã nhũm tanhmã inhĩpêx to pa inhmex kêt nẽ ixpa. Te mrõnhĩ rax nhỹhỹnh kot ixkamnhwỳr nhũm inhmã tee ri hkaxàr prãm kaprỳ nẽ ỹ hã ho inhgiêx rãhã nẽ ixpaja pyræk. 8Tã pa tee ri ja hã amnhĩ pumu nẽ amnhĩ to Jejus wỳ nẽ kãm:

— Kwa Pahшти. Na pa ra mẽmojta nhỹ hã ixpunuj nẽ ixirerek nẽ ixpa. Kwa inhnẽ ata pa akupỹm ixihỹx nẽ ijamakêtkati nẽ ri ixpa nã?

Anhỹr o amnhĩ to hwỳr o axkrunêpxi. 9Hãmri nhũm inhmã:

— Nã kot paj anẽ hyr kêt nẽ. Kot paj ãm akutã inhnojarêt rãhã ho ri akõt ixpa. Ka axirerek nẽ apa htã ixihỹx xwỳnh ã ixpumunh kõt ixkamnàr rom tanhmã inhỹ hã amnhĩ nhĩpêx to ho ri apa. Anẽ.

ã inhmã kapêr anhỹr jakamã na pa ixpunuj nẽ ri inhĩrot nẽ ixpa htã ixrom hihtỹx xwỳnhhta nhỹ hã ixkĩnh nẽ ixpa. Nẽ kurom ixirerek xwỳnh pix ã amnhĩ to jarkrar o ri ixpa. 10Jakamã kot paj Kris ã ixpunuj nẽ ri ixpa htã ixkĩnh nẽ ijamakêtkati nẽ ri ixpa. Kwãr mẽ mãmrĩ hã tanhmã ixto kapêr to nẽ tanhmã hã inhĩpêx to pa amnhĩ xà htỹx kamã ijamak o ri ixpa. Nẽ ixpê amrakati nẽ inhĩrot nẽ ri ixpa htã Kris nhỹ hã tanhmã kãm amnhĩ nhĩpêx mex to rãhã ho ri ixpa.

Pawre kot tee ri mẽ hkukamã hamaxpêr ã harẽnh

11Tã mẽmo kaxyw na pa ã mẽ amã amnhĩ jarẽnh anẽ? Nã mẽ ate ixtã apijaam kêt jakamã na pa ã mẽ amã amnhĩ jarẽnh anẽ. Mẽ kêp Kris nhỹ hã mẽ ajahkre xwỳnh ã amnhĩ to hêx xwỳnhjaja na ka htem ixrom kot amnhĩ to rũnh xwỳnh ã mẽ harẽ nẽ mẽ hã apijaam o ri apa. Nom ixte

amnhĩ to grire xwỳnh tã mẽ kot amnhĩ to rũnh o ijakrenh kêt. **12**Na pa pre mẽ akamã ri ixpa nê Tĩrtũm nhỹ hã aa mẽ ate mẽmoj pumunh kêt kwỳ ho anhỹr rax o ri mẽ akôt ixpa. Nê ỹ hã akupỹm mẽ à xwỳnhjê ho mex. Nê mẽ nohkre xwỳnhjê no ho mex. Na pa pre hte ã mẽ amã mẽmoj nhĩpêx anhỹr o ri mẽ akôt ixpa. Amnhĩ xà htỳx kamã ijamak o ri ixpa htã Tĩrtũm xihtỳx xà ho amnhĩ to htỳx nê ã mẽ amã mẽmoj to anhỹr o ri mẽ akôt ixpa. Mẽ ate omunh nê Tĩrtũm àhpumunh tỳx ã omunh kurê kumrêx kaxyw. Nê ixpê Kris nhỹ hã mẽ ajahkre hã ixpumunh kurê kumrêx kaxyw na pa pre ã mẽ amã amnhĩ nhĩpêx anhỹr o ri mẽ akôt ixpa. **13**Xàn pa pre nhãm krĩ hkwy kamã Kris kôt mẽ pahkwỳjê ho mex tã mẽ kajaja tanhmã mẽ ato mex to hkêt nê? Nà na pa pre hte mẽ anhĩpêx o axpẽn pyræk. ãm mẽmoj pixire na pa pre mẽ uræk nê mẽ awỳr kêt nê. Nhãm krĩ hkwy kamã ixpata ã na pa pre mẽmoj to presija nhũm prem inhmã òr o pa. Tã pa pre mẽ mỗ nê mẽ akôt ixpa nê mẽmoj to presija htã hã mẽ awỳr kêt nê. Kwa mẽ ã ixte amnhĩ jarênh anhỹrja ma nê ixkamã agryk kêt nê.

14Tã ot pa ra akupỹm mẽ awỳr inhnojarêt kaxyw. Na pa pre ra mẽ awỳr inhmõr o axkrut. Tã ra axte mẽ awỳr inhnojarêt kaxyw. Kot paj mẽ awỳr mỗ nê mẽ akôt ixpa nom te wam ixtêmta pyrà nê mẽmoj tã ri mẽ awỳr kêt nê. ãm mẽ amã ixkĩnh pix na inhmã hprãm. Mẽ apiitã te mẽ apê ixkra pyræk. Na hte mẽ hkrarejaja mẽ katorxà nê mẽ hipêêxà mã ujaarõr o pa hkêt nê. Mẽ hipêêxà nê mẽ katorxà na hte hkrare mã kot mẽmoj to presija xà hkôt kãm haprõr o pa nom mẽmoj tã hwỳr kêt nê. Ja pyrà nê kot paj mẽ apê ixkra pyræk ã mẽmoj tã mẽ awỳr kêt nê. **15**Kot kaj mẽ mẽmoj to presija japêr nê inhmã harê pa ixàmnhĩx ixkĩnh kãm mẽ amã ixkàxpore piitã òr par pyræk o amnhĩ nhĩpêx. Nê mẽ amã tanhmã amnhĩ nhĩpêx to ho ixpa rãhã ixtykja na inhmã hprãm. Inhmã mẽ akĩnh tỳx kumrêx tã mẽ kajaja mẽ amã ixkĩnhja mẽ atã hkwy jêt kêt kumrêx. **16**Ixte amnhĩ mã mẽmoj tã mẽ awỳr kêt tã na hte mẽ akwỳjaja ixêx rom ixte nhãm mẽ kêp amrakati xwỳnhjê mã kàxpore hã mẽ awỳr o ixpa hã ixkamnhĩx.

17Kwa tanhmã na pa pre ri mẽ ano kupyrr to? Xà ja kaxyw na pa pre mẽ awỳr ixkràmnhwỳta wa kumê? **18**Na pa pre Xitre hã ixihitỳx nê mẽ awỳr kumê. Nê Kris kôt mẽ pahtõja pa Xitre hkôt kumê nhũm wa ma mẽ awỳr mỗ. Tã xà na pa pre Xitre tanhmã mẽ ano kupyrr to? Nà na pre ã mẽ anhĩpêx anhỹr kêt nê. Tã wa ixte amnhĩ nhĩpêx nê wa ijamaxpêrja kot axpẽn pyræk. Nà na pa hte uræk nê mẽ ano kupyrr o ri ixpa hkêt nê. **19**Mãn ka mẽ axpẽn mã mẽ ijarênh o:

—Nà Pawre mẽ hkwyjaja mẽ kãm amnhĩ to rũnh xwỳnh prãm jakamã na ã Pawre kagàja kamã mẽ pamã amnhĩ tã àprãr anê.

Anhỹr o mẽ ijarênh japêr nom mẽ inhmã amnhĩ tã tanhmã ixàprãr to hprãm kêt. ãm mẽ inhmã mẽ akĩnh nê mẽ ato mex prãm jakamã na

pa htem tanhmã mẽ amã amnhĩ nhĩpêx to ho ri ixpa. Na pa Tirtũm noo mã Kris nhỹ hã ã mẽ amã mẽ amnhĩ jarênh anê.

20Tã kot paj jatã ma mẽ awỳr mō ka mẽ akwỳjaja tanhmã amnhĩ tomnuj to japêr.

Mẽmoj tã axpên mã axàkjêr o apa.

Rỳ mẽmoj tã axpên kãm agryk.

Rỳ axpên kãm agryk tokyx anhỳr o apa.

Rỳ axpên pê anhōxỳ.

Rỳ axpên to akapêr punuj o apa.

Rỳ mẽ ajakwa kamã nhãm mẽ hixi ho rêr o ri apa.

Rỳ amnhĩ to rũnh prãm xàj anhmã amnhĩ nhĩpêx to ho apa.

Kot kaj mẽ ã amnhĩ nhĩpêx anhỳr o ri apa pa ja hã mẽ apumu nê ixkaprĩ htỳx kumrêx ka mẽ tee ri amnhĩ tã ixpumu. 21Xà kot paj mẽ awỳr mō nê mẽ apumu ka mẽ akwỳjaja arĩ mẽ aprō kuhpa hã nhãm mênijê ho amnhĩkati ho ri apa? Rỳ arĩ tanhmã ajamaxpêr punuj to ho apa? Rỳ atỳx ri apijaàm kêt o apa? Kot ka mẽ arĩ ã amnhĩ nhĩpêx anê pa ja hã mẽ apumu nê ixkaprĩ xàj inhmỳr rax nê. Nê mẽ anhỹ hã Tirtũm noo mã ixpijaàm tỳx kumrêx.

Pawre kot tanhmã amnhĩ kukamã mẽ kãm karō hto

13 1Tirtũm kapêr ã kagà htũm tanhmã mẽ kot amnhĩ tomnuj to xwỳnhjê jarênh kot:

Koja mẽhō tanhmã amnhĩ tomnuj to nhũm mẽhō pyxi nê ã amnhĩ nhĩpêx anhỳr ã omu nê awỳr tẽ nê amã harê ka mẽ ama nê ãm ama nê hkôt ajamaxpêr kêt nê. No koja mẽmojaja axkrut rỳ axkrunêpxi nê hã omu nê awỳr mra nê axpên kôt amã harê ka mẽ ama nê mẽ hkôt ajamaxpêr kurê kumrêx. Anê.

Tã ra mẽ awỳr inhmōr o axkrut tã kot paj akupỹm mẽ awỳr mō nê mẽ apumu. 2Hapu hã mẽ awỳr inhmōrta ã na pa pre mẽ akwỳ kot tanhmã amnhĩ tomnuj to hã mẽ omu nê hã mẽ kãm akir nê mẽ kãm:

—Kot kaj mẽ amnhĩ tomnuj kaga nê tãm amnhĩ nhĩpêx kêt kot paj nhỹrmã akupỹn mẽ awỳr mō nê ã mẽ ate amnhĩ nhĩpêx anhỳr ã mẽ apumu nê hã mẽ atomnuj tỳx kumrêx kãm ga. Anê.

Jakamã kot paj mẽ ma mẽ awỳr mō nhũm mẽ akwỳjaja arĩ mẽ ate amnhĩ tomnuj o apa hã inhmã mẽ ajarê pa mẽ atã mẽ kuma nê tanhmã mẽ ato htỳx nê. 3Kot kaj mẽ ja hã ixpumu nê aprĩ hã ixte Kris nhỹ hã ixkapêr xwỳnh ã ixpumunh tỳx kurê kumrêx. Kris ixrom hihtỳx o hihtỳx. Na pre ra mẽ ate amnhĩ tomnuj o apata mỳrapê tanhmã mẽ anhĩpêx to. Tã kot kaj mẽ kormã ã ate amnhĩ nhĩpêx anhỳrja kaga hkêt hã koja tee ri ja hã mẽ apumu nê mẽ anhĩpêx kati nê. 4Amnepêm na pre Krisja te hihtỳx kêt pyrã nê ãm arĩ mẽ kãm xa nhũm mẽ unê nê pĩ kahpa ã kunhō

nẽ kupĩ. Tã nhũm Tĩrtũmja àhpumunh tỳx o akupỹm ho htĩr nhũm akupỹm htĩr o htĩr nẽ Tĩrtũm nhỹ hã hihtỳx o hihtỳx ã amnhĩ to amnhĩrĩt. Ja pyrà nẽ wam mẽ awỳr inhmõrta ã na pa pre hte mẽ akamã te Kris kormã htyk kêt ri hihtỳx kêêta pyrà nẽ mẽ akõt ixpa. Tã kot paj ma akupỹm mẽ awỳr mõi hãmri nẽ te Kris ra akupỹm htĩr nẽ hihtỳx o hihtỳxta pyrà nẽ Tĩrtũm xihtỳx xà ho tanhmã mẽ kot amnhĩ tomnuj xwỳnhjê nhĩpêx to. Hãmri nhũm mẽ amnhĩ tã ixpumu nẽ Tĩrtũm nhỹ hã ijamaxpêr tỳx ã ixpumunh kurê kumrêx.

5Kwa mẽ aprĩ hã tanhmã mẽ ate amnhĩ nhĩpêx to hã amnhĩ pumu. Xàn ka htem ãm hãmri amnhĩ kaxyw Jejus Kris kõt ajamaxpêr o ri apa nã? Kot kaj mẽ apê hkwy hã koja mẽ akaxwỳnh kãm mẽ akamã hkrĩ rãhã nẽ. Nom koja mẽ akaxwỳnh kãm mẽ akamã hkrĩ hkêt ka mẽ ãm apê hkwy hã amnhĩ jarênh kaprỳ. 6No pa na ixte ja hã amnhĩ pumunh mex. Ixpê Jejus kwỳ na pa. Ra ixkamã hkrĩ nẽ ixkõt pa ho pa jakamã ixpê hkwy na pa. Tã mẽ ate ja hã ixpumunh mexja na inhmã hprãm. Na pa hte ixpê Jejus kwỳ hã amnhĩ jarênh kaprỳ hkêt nẽ.

7Nẽ na pa hte mẽ ato tanhmã Tĩrtũm wỳr to ho ri ixpa nẽ mẽ ato hwỳr o:

— Pa Tĩrtũm. Kwa tanhmã Korĩt nhõ xwỳnhjê hkrã hto kê mẽ tanhmã amnhĩ tomnuj to ho pa hkêt nẽ.

Anhỹr o mẽ ato kuwỳ. Mẽmo kaxyw na pa hte ã mẽ ato hwỳr anẽ? Ixte mẽ ajahkre mex ã amnhĩ to amnhĩrĩt kaxyw kêt. ãm mẽ ate amnhĩ to mex rãhã ho ri apa kaxyw. Kot kaj mẽ ã amnhĩ nhĩpêx anhỹr o ri apa hãmri nhũm axtem mẽhõ mẽ awỳr mõi pøj nẽ tanhmã mẽ amã mẽ ijarênh to nẽ mẽ ijarênh o:

— Kwa Pawre mẽ hkwyjaja na htem Tĩrtũm kapêr kwỳm ri Korĩt nhõ xwỳnhjê jahkre ho pa.

Anhỹr tã pa amnhĩ tã mẽ kuma nẽ ãm mẽ kuma. 8Na pa hte Tĩrtũm kapêr kutã amnhĩ xunhwỳr kêt nẽ. Na pa hte ãm mẽ ate hkõt amnhĩ nhĩpêx o ri apa hã mẽ amã karõ kamã ixihitỳx rãhã ho ri mẽ akõt ixpa. 9Jakamã kot kaj mẽ hkõt amnhĩ nhĩpêx mex o apa pa ja hã mẽ apumu nẽ ixkĩnh nẽ. Mẽ kot axpên mã ixirerek ã ijarênh o pa htãã. ã mẽ ate amnhĩ nhĩpêx anhỹr o apa kaxyw na pa hte mẽ ato Tĩrtũm wỳr o ri ixpa nẽ kãm:

— Pa Tĩrtũm. Kwa tanhmã Korĩt nhõ xwỳnhjê hkrã hto kê mẽ kot amnhĩ tomnuj kaga hpa nẽ hpãnhã akapêr kõt pix mã mãn amnhĩ nhĩpêx rãhã nẽ. Anẽ.

10Tã pa kormã mẽ awỳr inhmõr xwỳj ri ã amnhĩ kukamã kagã nhĩpêx nẽ mẽnh anẽ. Mẽ ate kamã harênh nẽ mar nẽ tokyx akupỹm tãm amnhĩ nhĩpêx kaxyw. Kot pa mẽ awỳr mõi nẽ Pahihti nhỹ hã mẽ ate amnhĩ tomnuj ã mẽ amã akir. Nom inhmã ã mẽmoj tã mẽ amã ixàkjêr anhỹr prãm kêt. ãm y hã kapêr o mẽ ajahkre mex nhũm mẽ ate inhmar nẽ hkõt amnhĩ nhĩpêx rãhã ho apaja na inhmã hprãm.

11E Kris kôt ixkwỳjaja. Ām ja pix. Kwa kêr ka mẽ ixkapẽr mar tỳx nẽ hkôt amnhĩ nhĩpêx mex nẽ. Nẽ Tĩrtũm kôt pix mã ri tanhmã amnhĩ nhĩpêx to ho apa rãhã ho apa. Nẽ tãm ri amnhĩ nhĩpêx. Nẽ axpẽn kôt ajamakêtkati nẽ akĩnh nẽ axàmnhĩx ri apa. Kot kaj mẽ ã amnhĩ nhĩpêx anhỹr o apa nhũm Tĩrtũm mẽ akôt pa ho pa. Kãm mẽ pajapê htỳx kumrêx. Kêp mẽ pamã mẽ pahkĩnh nẽ mẽ pajamakêtkati jagjênh xwỳnh.

12-14Nẽ ota jar Kris kôt mẽ pahkwỳjaja pa mẽ ixpimràatã mẽ awỳr ixpẽr mẽ. Mẽ ixpiitã mẽ inhmã mẽ akĩnh tỳx jakamã na pa mẽ awỳr ixpẽr mẽ.

Nẽ kê Pahihti Jejus Kris mẽmoj to mẽ akutã nojarêr rãhã ho pa. Nhũm Tĩrtũm arĩ kãm mẽ ajapê rãhã ho pa. Nhũm Karõ tanhmã mẽ akrã hto ka mẽ axpẽn to mex pix kukamã mãn ajamaxpẽr o apa.

Tã e ixkwỳjaja. Ām ja pix. Ixpê Pawre na pa mẽ awỳr kagàja nhĩpêx nẽ ã mẽn anẽ.

Karatas

Pawre kot Karatas kamã Jejus kôt hkwỳjê hwỳr kagà nê mênh

Pawre na pre kagàja nhípêx nê pika pê Karatas kamã Kris kwỳjê hwỳr kumê. Na pre ra Ijaew kwỳjaja mē hwỳr mra nê Tirtũm kapêr kwỳm ri mē ahkre ho pa nê mē kãm:

—Kot kaj mē amnhĩ kaxyw Jejus Kris kôt ajamaxpêr hãmri nê mããnên mē ixpê Ijaew nhĩgêr kot amnhĩ nhípêx kôt amnhĩ nhípêx. Kê Tirtũm ja hã mē apumu nê mē ato hkra. Anê.

Nom ã mē kapêr anhỹrja kot anhỹr kêt. Mē pahte amnhĩ kaxyw Jejus Kris kôt pajamaxpêr nê hkôt amnhĩ xunhwỳr pix ã mē pahpumunh kôt na hte Tirtũm mē pahto hkra. Tã nhũm prem ã mē kãm ho hêx anhỹr o pa nhũm Pawre tee ri ã mē kapêr anhỹrja ã mē harênh ma nhũm ja kêp omnuj nê. Jakamã nhũm Karatas nhõ xwỳnhjê mã kagàja nhípêx nê mē hwỳr kumê. Nê kamã hprĩ hã Tirtũm kot mē ho hkra kaxyw tanhmã amnhĩ nhípêx to hã mē kãm harê nê hã kagà. Nê mē kãm:

1 1-2Pa Karatas nhõ xwỳnhjaja? Xà mē amex? Ixpê Pawre na pa mē awỳr ixpêr mē nê mēmoj tã mē amã karõ.

Mêpahpãm Tirtũm mē Jejus Kris na pre wa mē akaxyw ixãm. Ixte wa ÿ hã ma ri mē akôt mē ajahkre o ri ixpa kaxyw. Na pre Jejus ty nhũm Tirtũm akupỳm ho htĩr. Hãmri nhũm wa mē akaxyw ixãm. Pyka ja kamã na pre mēhõ mē akaxyw ixãm kêt nê. Tirtũm mē Jejus Kris na pre wa ixãm. Jakamã na pa ã mē awỳr kagà nhípêx nê mênh anê. Mē apê Tirtũm krajê hwỳr.

Nê ota jar krĩ ja kamã ixpyrà nê Kris kôt mē pahkwỳjaja mē awỳr hpêr mē.

3E kê Mêpahpãm Tirtũm mē Pahihti Jejus Kris wa mēmoj to mē akutã nojarêr rãhã ho pa. Nê mē ato mex rãhã nê. Ka mē wa ÿ hã akĩnh nê ajamakêtkati nê axãmnhĩx ri apa.

4Nà na pre Krisja amnhĩ grõnh kôt mē pahwỳr wrỳ nê mē panê ty. Mē pahte amnhĩ tomnuj pãnhã amnhĩrer kaxyw mē panê ty. Mêpahpãm

Tirtüm kãm hprãm xà hkôt. Tã mẽmo kaxyw na pre ã mẽ panê amnhĩ nhĩpêx anê? Nà pika ja kamã mẽ kot amnhĩ nhĩpêxja omnuj tỳx jakamã nhũm amnhĩ grônkhôt te mẽ kot amnhĩ tomnuj pẽ mẽ papytâr pyrâk o mẽ panhĩpêx nê ã mẽ panê htyk anê. 5Jakamã kwa kêr pu mẽ Tirtüm mã mex o mex ã mãn harênh o ri papa. Nà kot puj mẽ ã amnhĩ nhĩpêx anhỹr rãhã ho ri papa.

Mẽ ujarênh pixi ãm hãmri hã harênh

Rômãn 16.17; Sikũn Korõt 11.3-4; Epes 4.14; Korosẽ 2.8; Sikũn Pêtre 2.1-3

6Kwa ixkrãmnhwỳjaja. Na pa pre mẽ ate tanhmã amnhĩ nhĩpêx to hã mẽ ajarênh ma nê ixkaprĩ nê tee ri mẽ akukamã ijamaxpêr. Na pre Tirtümja Kris kukwak ri mẽ ato mex nê. Nê mẽ ate hkôt amnhĩ nhĩpêx o apa hprãm xàj te kot amnhĩ wỳr mẽ awỳr pyrâk o mẽ anhĩpêx ka mẽ hkôt amnhĩ xunhwỳ. Tã xep tanhmã mẽ ajamaxpêr to nê ra hkaga kaxyw. Ra axtem mẽ ujarênh ôja ma nê gryk ã Tirtüm kaga kaxyw. Pa tee ri mẽ ajarênh ma nê ixkaprĩ nê. Kwa mon ka mẽ axtem nê ri ã amnhĩ nhĩpêx anhỹr mã? 7Jejus jarênh pix na ãm hãmri. Mo mẽ ujarênh mex õ kot ka kêt mẽ ama nê hkôt amnhĩ nhĩpêx? Nà amrakati kumrêx. ã mẽ amã ujarênh anhỹr xwỳnhjaja na htem Kris kapêr o pihkâr rũnh kumrêx o pa nê katat kôt harênh kêt nê. Ka xep mẽ ama nê ajamaxpêr kati rũnh nê.

8Na pa pre ma mẽ awỳr mỗ nê ãm hãmri mẽ amã Jejus kot tanhmã mẽ panê amnhĩ nhĩpêx to hã harê ka prem inhma. Tã koja mễhõ mẽ awỳr mỗ nê mẽ amã nhãm mẽ ujarênh õ jarê nhũm Tirtüm ja hã omu nê nhỹrmã ma mẽ kot amnhĩ xà htyx kamã hamak tũm xà hwỳr kumê nhũm ma hwỳr mỗ nê aa kator kêt nê. Mẽ pahtõ rỳ Tirtüm kapêr o wrỳk xwỳnhjê hõ koja ã amnhĩ nhĩpêx anê nhũm ja hã omu nê ma kuwy pẽ himõta wỳr amnhĩ nê kumê. 9E kot paj axte mẽ amã ja jarê ka mẽ aprĩ hã inhma. Koja mễhõ mẽ awỳr mỗ nê mẽ ate hkôt amnhĩ xunhwỳr xwỳnhnta kwỳm ri tanhmã mẽ amã ujarênh to. Hã koja Tirtüm omu nê nhỹrmã ma mẽ kot amnhĩ xà htyx kamã hamak tũm xà hwỳr kumê nhũm ma hwỳr mỗ nê kamã pa ho pa nê aa kator kêt kumrêx.



Karatas 1.8-9

Tirtùm pix kãm Pawre hkính hprãm ã kot jarênh

Juãw 5.44; Atre 26.9-20; Karatas 2.6

10Nê koja mêmojaja ixkapêr ma nê kãm mar prãm kêt o kãm ixkính kêt japêr nê mãmri kãm ixkính kêt. Tirtùm kãm ixkínhja pix na inhmã hprãm. Kop apu mê piitã kãm ixkínhja mãn inhmã hprãm ronhÿx pa Kris nhÿ hã kapêr jarênh o ri ixpa hkêt nê.

Tirtùm kot Pawre mã Kra Jejus o amnhîrit ã harênh

Sikün Korît 1.12; Wam Tesarôn 2.4

11-12E Jejus kôt ixkrãmnhwÿjaja. Nã ixte mê ujarênh mex jarênh o ixpaja na pre jar pika ja kamã mêmõ amnhî krã hkôt inhmã harênh rÿ inhmã ahkre hkêt nê. Jejus Kris tãm na pre ixwÿr kato nê inhmã ho amnhîrit. Jakamã mex o kot pika jakamã mê ujarênh piitã hakrenh par. 13-15E kot paj ixprî hã mê amã tanhmã amnhî jarênh to ka mê inhma. Tanhmã Tirtùm kot amnhî kaxyw ixãm to hã pa mê amã amnhî jarê. Nã na pre kormã ixkêt ri ixkukamã hamaxpêr nê amnhîm ixta nê amnhî kaxyw ixãm nê kot ixto mex ã ixtã amnhî jarê. Tã pa pre ixkato nê gaa nê ixaptâr nom kormã Jejus Kris kôt amnhî xãm kêt nê. Na pa pre axtem nê inhmã mê ixpê Ijaew kot amnhî nhîpêx kôt pix mã amnhî nhîpêx o ri ixpa hprãm nê. Nhùm pre ixpyrà nê arî mê nywjaja haxwÿja kãm mê hkôt pix mã ri amnhî nhîpêx o pa hprãm nê. No inhmã mê hkôt amnhî nhîpêx mex o mê hakrenh par prãm jakamã na pa pre mê inhîgêt kôt amnhî nhîpêx mex kumrêx o ri ixpa. Mê kapêr piitãã hkôt amnhî nhîpêx mex nê. Tã ã amnhî nhîpêx anhÿr o ixpa kaprÿ. Na pa pre axtem nê mê kot Tirtùm Kra Jejus Kris kôt amnhî xunhwÿr xwÿnhjê nhîpêx kati ho ri mê hkôt ixpa nê inhmã mê himex prãm tÿx kumrêx. ã na pa pre amnhî nhîpêx anhÿr o ri ixpa. Ra mê ate ja hã ixpumunh mex.

16-17Tã pa pre ma Tamas wÿr mõ. Kamã tanhmã Kris kwÿjê nhîpêx to kaxyw ma mê hwÿr mõ. Hãmri nê kormã mê hwÿr ixãhtêp o inhmõr mê nhùm Tirtùm tanhmã ixto nê inhmã Kra Jejus o amnhîrit pa jatã omu. Kêp Tirtùm Kra hã pa ixprî hã omu. Nhùm inhmã kapêr nê ixte kãm tanhmã amnhî nhîpêx to ho ri ixpa kaxyw ixãpênh ã inhmã karõ nê Ijaew kêt xwÿnhjê hwÿr inhmê. Ixkwÿ Ijaew wÿr inhmênh kêt nê. Na pre inhmã:

—E kêr ka ma Ijaew kêt xwÿnhjê hkôt ri mê kãm ixkapêr jarênh o ri apa.

Anhÿr jakamã pa pre kuma nê hkôt amnhî xãm kurê kumrêx nê ã amnhî nhîpêx anhÿr o ri ixpa. Jao tanhmã ixte kêp hkwyjê nhîpêx tota kaga nê ma pyka pê Arap wÿr mõ. Nom tanhmã amnhî tã Jejus kwÿjê kujêr to hkêt nê. Nê Jerujarê hwÿr inhmõr nê Jejus nhÿ hã mê ahkre xwÿnh maatijaja tanhmã amnhî tã mê kujêr to hkêt nê. ãm Tirtùm kot

inhmã hã karõ xà hkõt ma Arap wÿr mõi nẽ kamã kapõt ã ri ixpa. Kamã na pre Tirtũmja inhmã Jejus Kris kot tanhmã amnhĩ nhĩpêx to ho amnhĩrit o pa. Hãmri nẽ inhmã kapêr pa amnhĩ tã kuma hãmri nẽ ma akupÿm Tamas wÿr mõi.

18Tã nhũm ra amgrã axkrunêpxi nẽ hapêx pa Tamas rũm ixkato nẽ ma Jerujarẽ hwÿr Simãw Pêtre hwÿr mõi. Hãmri nẽ kuri pøj nẽ hkõt ixpikamênh ã ixtã semãn axkrut. 19Nom mẽ kot Jejus nhÿ hã hkwÿjê jahkre ho mẽ pa xwÿnh maati hkwÿjê hõ pumunh kêt kumrêx. ãm Simãw Pêtre mẽ Pahihti Jejus tõi Xiakreja pix wa omu. 20ãm hãmri na pa ã amnhĩ jarênh anẽ. Tirtũm kot ja hã ixpumunh mex. 21Tã pa pre mẽ kurũm ixkato nẽ hpãnhã ma pika hkwÿ hkõt ijarpõx o mẽ hkõt ixpa. Ma pika pê Sir mẽ Sirisja wa hwÿr mõi.

**Mẽ kot amnhĩ jaêr pê Pawre kot amnhĩ nhĩpêx nyw ã
omunh ã mẽ harênh**

22Nom Jutej kamã Kris kwÿjaja na prem kormã ixpumunh kêt nẽ. ãm Simãw Pêtre mẽ Xiakre pix na pre wa ixpumu. 23Na pre ra mẽ hkwÿjaja tanhmã hkwÿjê kot expên mã ijarênh toja ma. Na prem ijarênh o:

—Kwa Jejus ã mẽ panhĩpêx kati htÿx o pa xwÿnhhta na pre tanhmã hamaxpêr to nẽ hpãnhã mẽ kãm Jejus kapêr jarênh o ri mẽ hkõt pa. Mẽ kot amnhĩ kaxyw hkõt hamaxpêr kaxyw. Ra kot Jejus nẽ mẽ pahkurê htã hpãnhã mẽ kãm kapêr jarênh o ri mẽ hkõt pa. Anẽ.

24Hãmri nhũm Kris kwÿjaja amnhĩ jaêr pê ijarênh ma nẽ inhÿ hã hkĩnh nẽ. Nẽ ixtã Tirtũm mã mex o mex ã harê.

**Pawre kot Kris kwÿ hkrãhtũmjê mã amnhĩ jarênh
Atre 15.1-11**

2 1-2Tã nhũm amgrã pê 14 nẽ hapêx nhũm Tirtũm akupÿm Jerujarẽ hwÿr inhmẽ pa ma akupÿm mõi. Panãpe nẽ Xitre mẽ pa mẽ mõi nẽ mẽ hwÿr pøj. Hãmri nẽ Kris kwÿ hkrãhtũmjê hwÿr mra nẽ mẽ kãm amnhĩ jarê. Mẽ tapxipixjê mã amnhĩ jarê nẽ ixte Ijaew kêt xwÿnhjê mã Jejus kapêr jarênh o ixpa hã amnhĩ jarê. Na pa pre ra amnhĩ kukamã ijamaxpêr o:

—Koonên. Kot pa apu mẽ kãm amnhĩ jarê nhũm mẽ inhma nẽ ixte Tirtũm kapêr kwÿm ri mẽ ahkre ho ixpa hã ixkamnhĩx rÿ hã inhmã akir. Na pa hte Ijaew kêt xwÿnhjê mã Kris jarênh o ixpa no ãm mẽ ixpê Ijaew pyrã nẽ finat Mojes kapêr kõt mẽ kot amnhĩ my kwrÿt kà jakàr ã mẽ kãm karõ hkêt nẽ. ãm mẽ kot Kris kõt amnhĩ xunhwÿr pix kaxyw na pa hte mẽ kãm hã karõ ho ixpa. Tã kot paj Kris kõt mẽ ixkrãhtũmjê mã ja hã amnhĩ jarê nhũm mẽ inhma nẽ tanhmã hamaxpêr to nhũm ja mẽ kêp omnuj japêr nhũm mẽ tanhmã amnhĩ to nẽ ixte Kris kapêr jarênh o

ixpaja nê ixkurê. Jakamã nhũm ra ixte mē kãm Kris kapēr jarēnh o ixpa nhũm mē kot inhmar xwỳnhjaja ijarēnh ma nê tee amnhĩ kukamã hamaxpēr o ra hkaprĩ nê pa.

Anhỹr o ijamaxpēr. 3Tã na prem ixte amnhĩ jarēnhja ma nê ja nê tanhmã inhmã nê hkêt nê. Pa mē kãm amnhĩ jarēnh pa nhũm mē inhma nhũm Ijaew kêt xwỳnhjaja kot amnhĩ jakàr kêtja nhũm mē kãm mex nê. Mē kêp tanhmã kute hkêt nê. Nhũm Ijaew kêt xwỳnhj Xitre ixkôt pa nhũm mē kot omunh tã kot mē ixpyrà nê amnhĩ my kwryt kà krãhyr ã kãm karõ hkêt nê.

4Tã nhũm mē kêp Jejus kwỳ hã amnhĩ jarēnh o hêx xwỳnhjaja mē ixtã akuprõ. Nom hêx rom mē ixte Kris kôt amnhĩ nhĩpêx ã mē ixpumunh pix kaxyw. Hãmri nê ixkapēr ma nê Xitre hã inhmã akir nê inhmã:

—Kwa na pre Xitre Jejus kôt pix mã amnhĩ xãm nom finat Mojes kot mē pahpê Ijaew kot amnhĩ nhĩpêx ã karõ hkôt amnhĩ nhĩpêx kêt nê. Kwa ja mex kêt. Na htem Jejus kôt amnhĩ xunhwỳ nê mããnen finat Mojes kapēr kôt amnhĩ nhĩpêx. Jakamã kwa kãm anê kê amnhĩ my kwryt kà krãhta. Finat Mojes kot mē panhĩgêjtjê mã hã karõ xà hkôt.

5Anhỹr tã pa prem mē kuma nê ãm mē kuma. Kot pa ri mē kãm ja hã karõ hkêt nê. ãm Jejus kapēr kôt pix mã kot puj mē amnhĩ nhĩpêx o papa nê finat Mojes kapēr mē Jejus kapēr o papihkàr kêt nê. Kot puj mē anhỹr o Jejus kapēr o ahkà nhũm ja mex kêt nê. Jejus kapēr kãm mo mē kot mēmy kwryt kà jakàr ã mē kãm karõ? Amrakati. Jakamã na pa pre ãm mē pano kupyr o mē pa xwỳnhjtajê kapēr ma nê ãm mē kuma.

6Tã pa pre ra Ijaew kwỳ pê Jejus kôt ixkwỳ hkrãhtũmjê mã amnhĩ jarēnh pa. Tanhmã ixte Ijaew kêt xwỳnhjê mã Jejus kapēr jarēnh to hã mē kãm amnhĩ jarē nhũm mē inhma nhũm ja mē kãm mex nê. Jakamã Ijaew kêt xwỳnhjaja kot mē ixpê Ijaew pyrà nê finat Mojes kapēr kôt amnhĩ nhĩpêxja nhũm mē tanhmã mē kaxyw inhmã hã karõ hto hkêt nê. Tĩrtũm na hte mē kêp mē hkrãhtũm ã mē omunh xà hkôt mē hkwỳjê rom tanhmã mē ho mex to hkêt nê. Na hte mē pahpiitã mē panhĩpêx o axpên pyràk. Jakamã na pa hte ijaxwỳja Jejus kôt mē ixkrãhtũmjaja kot amnhĩ to rax o ijakrenh ã tanhmã ijamaxpēr to hkêt nê. 7Na pa pre mē kãm amnhĩ jarēnh pa nhũm mē inhma nê axpên mã:

—Nà ãm hãmri na pre Tĩrtũm ahpỹnhã Pawre mē Simãw Pêtre wa kãm wa ãpênh ã karõ nê Ijaewjê hwỳr Simãw Pêtre mē nê axtem Ijaew kêt xwỳnhjê hwỳr Pawre mē. Wa kot ahpỹnhã mē hkôt mē kãm Jejus kapēr jarēnh o ri pa kaxyw. Nà ãm hãmri na hte wa ã amnhĩ nhĩpêx anhỹr o pa. Nà ja mex. Anê.

8Ra Tĩrtũm kot Ijaew wỳr Simãw Pêtre mēnh tã hpãnhã Ijaew kêt xwỳnhjê kaxyw pa ixãm. Ỹ hã wa ixte mē kãm Jejus kapēr jarēnh o ri mē hkôt wa ixpa kaxyw. 9Jakamã nhũm mē ixkrãhtũm Xiakre mē

Simāw Pêtre mẽ Juāwja ixte mẽ kām amnhĩ jarēnh ma nē hkĩnh nē. Tĩrtũm kot ixto mex nē Ijaew kêt xwỳnhjê hwỳr inhmēnh ã ixte amnhĩ jarēnhja ma nē hkĩnh nē. Hāmri nē Panāpe mẽ wa inhmã kapēr nē wa inhmã:

— Nà ãm hāmri. Kot puj xep mẽ anē. Ka mẽ Panāpe wa kot kaj wa ma Ijaew kêt xwỳnhjê hkôt mẽ kām Jejus kapēr jarēnh o ri apa. No mẽ pajaja kot paj mẽ axtem mẽ pahkwỳ Ijaew kêt harēnh o ri ixpa. ã kot puj mẽ ahpỳnhã mẽ hwỳr papa anē. ¹⁰Nom kêr ka wa inhmar kumrêx. Kêr ka wa mẽ ixpyrà nē Kris kêt mẽ pahkwỳjê pê amrakati xwỳnhjê ho mex o ri apa. Mẽmoj to mẽ kutã anojarêt rãhã ho ri apa.

Anhỹr o wa inhmã kapēr pa wa mẽ kuma nē mẽ kãm:

— Tõe. Nà kot paj wa anē. Ra ã wa ixte amnhĩ nhĩpêx anhỹr kaxyw kênã. Anē.

Pawre kot Simāw Pêtre mã àkjêr ã harēnh

Atre 10; Rômãn 3.21-31, 6.1-14

11-14Tã nhũm Simāw Pêtreja man mẽ ixwỳr krĩ pê ãxiok wỳr mỗ. Nē jar mẽ ixkôt ri pa. Ixpyrà nē kêp Ijaew tã Kris kêt Ijaew kêt xwỳnhjê hkôt pa nē mẽ kutã apkur o pa. Ixpyrà nē àmnhĩx ri mẽ kutã apkur o ri mẽ hkôt pa. Ijaew kêt xwỳnhjaja kot amnhĩ my kwỳt kã jakàr kêt jakamã na pa htem mẽ kutã ixàpkur kêt nē. Tã ra mẽ ixte Kris kêt amnhĩ xunhwỳr jakamã ja mẽ ixpê tanhmã kute hkêt. Na pa htem ixàmnhĩx mẽ hkôt ixpa nē mẽ kutã apku. Ra mẽ ixte Kris kêt amnhĩ xunhwỳr kênã kot pa hkêt ri mẽ hkôt ixpa hkêt. Na pa htem ixàmnhĩx mẽ hkôt tanhmã amnhĩ nhĩpêx to ho ri ixpa.

Tã nhũm Xiakre kot mẽ ixwỳr mẽ rēnh xwỳnhjaja haxwỳja mẽ ixwỳr mỗ. Mẽ ixpyrà nē mẽ kêp Ijaew tã mẽ ixpyrà nē Kris kêt amnhĩ xunhwỳ. Jakamã ra mỗ nē mẽ ixwỳr pøj. Hāmri nhũm Simāw Pêtre mẽ omu nē mẽ umaj axte Ijaew kêt xwỳnhjê kutã apkur kêt nē. Axtem nē oja py nē o tē nē mẽ hkàx ã ahte apkur o nhỹ. Hāmri nhũm ra mẽ ixri Ijaew kwỳ pê Kris kêt mẽ pahkwỳjaja ja hã omu nē piitã uràk nē ã amnhĩ nhĩpêx anē nē Simāw Pêtre ri Ijaew kêt xwỳnhjê hkàx ã apkur o hkrĩ. Nhũm ixkôt pa xwỳnh Panāpeja haxwỳja ja hã mẽ omu nē mẽ uràk nē ã amnhĩ nhĩpêx anē nē mẽ hkàx ã apku. Hāmri pa tee ri ja hã mẽ omu nhũm ja inhmã mex kêt nē. Na prem ã amnhĩ nhĩpêx anhỹr o Tĩrtũm kapēr ã kagà htũm kamã mẽ ujarēnh mex kwỳm ri amnhĩ nhĩpêx. Jakamã pa ã mẽ kot amnhĩ nhĩpêx anhỹrja nē Simāw Pêtre mã ixkapēr. Mẽ piitã mẽ noo mã xa nē ã kot amnhĩ nhĩpêx anhỹrja nē kãm ixkapēr nē kãm:

— Tk. Kwa nà Simāw Pêtre. Ri ã amnhĩ nhĩpêx anhỹr kêt nē. Pahpê Ijaew tã kormã pahkwỳjaja hpôx kêt ri ka hte ixpyrà nē axàmnhĩx Ijaew kêt xwỳnhjê kutã axàpkur o ri apa. Tã amnhĩ wỳr mẽ pahkwỳjê pumu nē axtem nē mẽ hkàx ã axàpkur o akrĩ. Kwa nà na ka ã amnhĩ nhĩpêx

anê nê ra axtem amnhĩ nhĩpêx. Te ate mẽ kãm akapêr nê mẽ kãm: “Kot kaj mẽ ixpyrà nê amnhĩ my kwryt kà jakà pa rĩ mẽ akôt ri ixpa nê mẽ akutã ixàpkur o ixpa.” Anhÿr pyràk. Kwa ja mex kêt.

15—Mẽ pahpê Ijaew na pu htem mẽ kêp Ijaew kêt xwÿnhjê jarênh o: “Mẽ kot mẽ pahte amnhĩ nhĩpêx kôt amnhĩ nhĩpêx kêt xwÿnhjaja.” Anê. 16Tã mẽ pahpê Ijaew tã na hte Tirtùmja mẽ pahte mẽ panhigêt kot amnhĩ nhĩpêx kôt mẽ pahte amnhĩ nhĩpêx ã mẽ pahpumunh kôt mẽ pahto hkra hkêt nê. Ra mẽ pahte ja pumunh mex. ãm mẽ pahte amnhĩ kaxyw Jejus Kris kôt pajamxpêr ã mẽ pahpumunh kôt pix mã na hte mẽ pahto hkra. Kot pu mẽ amnhĩ kaxyw hkôt pajamxpêr nhũm ja hã mẽ pahpumunh kôt pix mã mẽ pahto hkra.

17—Mẽ pahpê Kris kwÿ jakamã na hte Tirtùm amnhĩm mẽ pamex ã mẽ pajarê nê mẽ pahte amnhĩ tomnuj xwÿnh kêt ã mẽ pajarê. Jakamã na pu htem paxãmnhix ri Ijaew kêt xwÿnhjê kot Kris kôt amnhĩ xunhwÿr xwÿnhjê hkôt ri papa ho papa. Ra Tirtùm kot mẽ pahpyrà nê amnhĩm mẽ mex ã mẽ harênh kênã. Tã koja mēhō kormã ja mar kêt nê tanhmã hã mẽ pajarênh to nê mẽ pajarênh o: “Tk. Ra mẽ kot amnhĩ kaxyw Kris kôt hamaxpêr tã axtem nê Ijaew kêt xwÿnhjê hkôt ri pa. Jakamã arĩ mẽ kot amnhĩ tomnuj xwÿnh kênã.” Anhÿr o mẽ pajarênh japêr. Nom ãm mẽ pahte amnhĩ tomnuj xwÿnh ã mẽ pajarênh kaprÿ. Na pu htem Kris kôt amnhĩ nhĩpêx nê ra tãm amnhĩ nhĩpêx mex o papa. 18No kot pu mẽ hkôt ri amnhĩ nhĩpêx o papa htã tanhmã pajamxpêr to nê pahte amnhĩ nhĩpêx tũm o awjanã hãmri nê amnhĩ tomnuj tÿx kumrêx.

19—Tã tanhmã kot puj wem amnhĩ to nê mẽ panhigêt kot amnhĩ nhĩpêx piitã hkôt amnhĩ nhĩpêx mex o ri papa? Na pu htem pajamxpêr o: “Kot paj ã amnhĩ nhĩpêx anê nê ã amnhĩ nhĩpêx anê nhũm Tirtùm ja hã ixpumu nê amnhĩm inhmex ã ijarê.” Anhÿr o pajamxpêr. Hãmri nê finat Mojes kot mẽ panhigêjtê mã kapêr piitã hkôt ri amnhĩ nhĩpêx o papa nom tōhã hkwÿm ri tanhmã amnhĩ tomnuj to. Jakamã nhũm Tirtùm ja hã mẽ pahpumunh kôt mẽ pamex ã mẽ pajarênh kêt nê. Kapêr ã kagã htũm kot ã ja jarênh kot anhÿr. Nom kot puj mẽ amnhĩ kaxyw Kris kôt pajamxpêr nhũm ja hã mẽ pahpumunh kôt amnhĩm mẽ pamex ã mẽ pajarê. Hãmri pu mẽ Tirtùm kôt amnhĩ nhĩpêx o ri papa nê axte mẽ pahpê Ijaew nhĩgêjtê kot amnhĩ nhĩpêx kôt amnhĩ nhĩpêx hkêt nê. Te ra mẽ pahtyk nê axte hkôt amnhĩ nhĩpêx kêt pyrà nê pãnhã Tirtùm kapêr kôt pix mã ri amnhĩ nhĩpêx o ri papa.

20—Nê na prem pĩ kahpa hã Kris nhô nê kupĩ nhũm mẽ pahte amnhĩ tomnuj te ãhkô hã jêt nê haxwÿja htyk pyràk. Jakamã na pu htem amnhĩ tomnuj kaga nê Kris kôt amnhĩ xunhwÿ nhũm Karō mẽ pahkarôm agjê pu mẽ te Jejus Kris kot amnhĩ nhĩpêx pyràk o amnhĩ nhĩpêx o papa. Jao hpãnhã mẽ pahte amnhĩ nhĩpêx nyw pix o amnhĩ nhĩpêx o ri papa. Kris kãm hprãm xà hkôt pix mã tanhmã ri amnhĩ nhĩpêx to ho papa. Kris kêp

Tĩrtũm Kra htã kãm mẽ pajapê kamã mẽ panê htyk jakamã na pu htem amnhĩ kaxyw kôt pix mã pajamaxpêr rãhã ho papa.

21— ãm hãmri na pre Tĩrtũm mẽ pahto mex kumrêx nê mẽ pahwÿr Krisja mẽ nhũm mẽ pahwÿr wrÿ nê mẽ panê ty. Tã na pa pre kapêrja ma nê mar tÿx nê hã ri ixpa nê ho ijamakêtkati hkê t nê. Tã kop apu Tĩrtũm kot mẽ pahte mẽ panhĩgê t jê kot amnhĩ nhĩpêx o amnhĩ nhĩpêx ã mẽ pahpumunh kôt mẽ pamex ã mẽ pajarênh ronhÿx pre Krisja ãm mẽ panê htyk kaprÿ. Mo kaxyw nhÿx pre mẽ panê ty? Anê.

Ã na pa Simãw Pêtre mã ixkapêr anê nhũm mẽ piitã apkur pê hã inhmar o hkrĩ.

Mẽ pahte amnhĩ krã hkôt pahpê Tĩrtũm kra hkê t ã mẽ pajarênh

Karatas 5.16-23; Epes 2.8; Piripos 3.9; Sikũn Ximotre 1.9; Xitre 3.4-7

3 1Kwa Karatas nhõ xwÿnhjaja. Te ri mẽ ajamaxpêr kêt kumrêx pyrãk. Amnepê mã mẽ awÿr inhmõrta ã na pa pre mẽ amã tanhmã Kris htykja jarênh to. Pĩ kahpa hã mẽ panê htyk ã harê ka mẽ aprĩ hã inhma. Tã nhũm Tĩrtũm kapêr jarênh o mẽ hêx xwÿnhjaja ixpãnhã mẽ awÿr mra nê tanhmã mẽ amã ujarênh to ka mẽ ama nê mẽ ajamaxpêr o apihkãr rax nê. Jao axte Kris tyk mã ajamaxpêr kêt nê. 2E mẽ inhmã mẽmoj jarê. Mẽmoj tã mẽ apumunh kôt na pre Tĩrtũm mẽ awÿr amnhĩ Karõ rê nhũm mẽ awÿr agjê? Xà mẽ anhĩgê t kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt? Nã na pre ja hã mẽ apumunh kôt mẽ awÿr rênh kêt nê. Na ka prem Kris jarênh ma nê amnhĩ kaxyw hkôt ajamaxpêr nhũm ja hã mẽ apumunh kôt mẽ awÿr kurê nhũm mẽ awÿr agjê.

3Na pu htem amnhĩ krã hkôt tanhmã amnhĩ nhĩpêx to ho pahpê Tĩrtũm kra hkê t nê. Tĩrtũm Karõ pix kukwak ri na pu htem pahpê hkra. Tã ka mẽ axtem nê ajamaxpêr o:

— Nã Tĩrtũm ra kot ixto hkra jakamã kot paj arĩ ri mẽ inhĩgê t kot amnhĩ nhĩpêx kôt amnhĩ nhĩpêx o ixpa rãhã nê inhmex kumrêx nê ri ixpa. Anê.

Kwa ã mẽ ajamaxpêr anhÿrja mex kêt. 4Mẽ akwÿ kot Kris ã mẽ atomnuj tã ka mẽ amnhĩ xà htÿx kamã ajamak o ri apa htã Kris kaga hkê t nê. Tã ra axtem nê mẽ kapêr o mẽ hêx xwÿnhjê jamaxpêr kôt ajamaxpêr o te Kris ã amnhĩ xà kamã ajamak kaprÿ pyrãk. Kwa nã mẽ ri mẽ hkôt ajamaxpêr kêt nê. 5Na pre Tĩrtũm mẽ awÿr amnhĩ Karõ rê nhũm mẽ awÿr agjê nê mẽ amã aa mẽ ate mẽmoj pumunh kêt kwÿ ho anhÿr o ri mẽ akamã pa ho pa. Xà mẽ anhĩgê t kot amnhĩ nhĩpêx kôt mẽ ate amnhĩ nhĩpêx ã mẽ apumunh kôt na pre ã mẽ amã amnhĩ nhĩpêx anê? Nã ja kôt kêt. ãm mẽ ate Kris kapêr mar nê amnhĩ kaxyw hkôt ajamaxpêr ã mẽ apumunh kôt pix mã na pre ã mẽ amã amnhĩ nhĩpêx anê.

Tirtúm kot amnhĩ tã finat Apraãw pumunh kôt mex ã harênh

Rômãn 4.1-25; Xiakre 2.23

6Nê mẽ ixpê Ijaew pàr krax finat Apraãw na pre amnhĩ kaxyw Tirtúm kôt hamaxpêr nhũm amnhĩ tã omu nê kãm:

Nà ate amnhĩ kaxyw inhmã ajamaxpêr tỳx jakamã na pa amnhĩm amex ã ajarê. Amex kumrêx Apraãw.

7Anhỹr o kãm kapêr jakamã mẽ pahte uràk nê amnhĩ kaxyw hkôt pajamaxpêr xwỳnhjaja te mẽ pahpê Apraãw tàmnhwỳ pyràk. 8Nê mẽ apê Ijaew kêt xwỳnhjaja. Na hte Tirtúm mẽ pahto hpimràk tã mẽ pahte amnhĩ kaxyw kãm pajamaxpêr ã mẽ pahpumunh kôt amnhĩm mẽ pamex ã mẽ pajarê nê mẽ pahto hkra. Amnepêm na pre Apraãw mã kapêr nê kãm:

E ate amnhĩ kaxyw ixkôt ajamaxpêr jakamã kot paj akukwak ri pyka piitã hkôt mẽ piitã mẽ ho mex nê.

Anhỹr o kãm kapêr jao mãănên mẽ apê Ijaew kêt xwỳnhjê jarê. 9Jakamã mẽ pahte Apraãw pyrà nê amnhĩ kaxyw Tirtúm kôt pajamaxpêr xwỳnhjaja kot puj mẽ pahpiitã uràk nê pamex kumrêx nê papa ho papa.

**Tanhmã Tirtúm kot mẽ panê pĩ kahpa hã jêt
xwỳnh nhípêx to hã harênh**

Rômãn 4.14, 7.10; Wam Korit 15.56

10Nê koja mễhõ hamaxpêr o:

—E kot paj finat Mojes kapêr kôt ri amnhĩ nhípêx o ri ixpa nhũm Tirtúm ja hã ixpumu nê amnhĩm inhmex ã ijarê nê ixto hkra. Anê.

No ãm ja kot anhỹr kêt. Tirtúm kapêr ã kagà htũm kot ja jarênh kot:

Ixte amnhĩm mẽ mex ã mẽ harênh kaxyw mẽ kot Mojes kapêr kôt amnhĩ nhípêx xwỳnhjaja koja mẽ ãm mẽmoj pixire nê hirôp kuhê. Rỳ mẽmoj pixire nê hkôt amnhĩ nhípêx kêt pa ja hã mẽ omu nê hã mẽ homnuj tỳx kumrêx.

Anhỹr jakamã tanhmã kot pu mẽ amnhĩ to nê Mojes kapêr piitã hkôt amnhĩ nhípêx nê aa ho pixi nê hirôp pakuhê hkêt? Nà kot puj mẽ ho anhỹr kêt nê. Kot puj mẽ tee ri pamã ja ho anhỹr prãm kaprỳ. Jakamã Tirtúm kot amnhĩm mẽ mex ã mẽ harênh kaxyw mẽ kot ã amnhĩ nhípêx anhỹr mã xwỳnhjaja koja mẽ mex kêt nê.

11Na hte Tirtúm mẽ kot finat Mojes kapêr kôt amnhĩ nhípêx o mẽ pa hã mẽ omunh xà hkôt mẽ mex ã mẽ harênh kêt nê. ãm mẽ kot amnhĩ kaxyw hkôt hamaxpêr xwỳnh pixjaja na hte ã mẽ harênh anê. Kapêr ã kagà htũm kot mẽ harênh kot:

Mẽ kot amnhĩ kaxyw ixkôt hamaxpêr xwỳnhjaja na pa hte mẽ mex ã mẽ harênh o ixpa. Mẽ tapxipixjaja koja mẽ nhỹrmã Ixkra mẽ wa ixri mex kumrêx nê htĩr tũm nê pa ho pa. Anê.

12Nom na htem amnhĩ kaxyw Tĩrtũm mã hamaxpẽr pẽ finat Mojes kapẽr kõt amnhĩ nhĩpẽx o pa hkõt nẽ. Mojes kapẽr ă kagà kot ja jarẽnh kot:

Mẽ kot ixkapẽr piitã hkõt amnhĩ nhĩpẽx mex o mẽ pa xwỳnh pixjaja koja mẽ htĩr tũm nẽ pa ho pa. Anẽ.

13Tã kot pu mẽ ăm kapẽr o pixire nẽ hirõp pakuhẽ hãmri nẽ mỳrapẽ pahtĩr tũm nẽ papa hkõt nẽ. Nẽ hpãnhã mẽ kot amnhĩ xà htỳx kamã hamak tũm xàta hwỳr ma papa. Ja pymaj na pre Krisja ĩ ho mẽ pahwỳr wrỳ nẽ mẽ pahte amnhĩ tomnuj mỳrapẽ mẽ panẽ ty. Tĩrtũm kot mẽ pahte amnhĩ tomnuj mỳrapẽ tanhmã mẽ pahto pymaj ă mẽ panẽ htyk anẽ. Jakamã nhũm Tĩrtũm mẽ pahte amnhĩ tomnuj ă mẽ pahpumunh kõt mẽ pakuhpa hã Kraja homnuj nẽ. Kapẽr ă kagà htũm kot ja jarẽnh kot:

Pĩ kahpa hã jêt xwỳnhhta na pre Tĩrtũm homnuj tỳx kumrẽx. Anẽ.

Mẽ kot amnhĩ kaxyw Kris kõt mẽ hamaxpẽr xwỳnhjẽ jarẽnh

14Tã ă Jejus Kris kot mẽ panẽ amnhĩ nhĩpẽx anhỳr kukwak ri na pre Tĩrtũm kot Apraãw nhĩpẽx pyrã nẽ mẽ ixpẽ Ijaew pix o mex kêt nẽ. Mããnẽn mẽ apẽ Ijaew kêt xwỳnhjẽ ho mex nẽ. Jakamã koja mẽhõ. Ijaew õ rỳ Ijaew kêt xwỳnhjẽ hõ amnhĩ kaxyw Kris kõt hamaxpẽr nhũm Tĩrtũm hã omu nẽ ho hkra nẽ hwỳr Karõ mẽ nhũm kãm axã.

Tĩrtũm kot finat Mojes kukamã mẽ pahto mex ă harẽnh

Rõmãn 3.19-20, 5.20-21, 11.32; Eprẽw 6.13-18

15E ixkrãmnhwỳjaja. Kot paj ixprĩ hã mẽ amã ja jarẽ ka mẽ inhma. Nã koja mẽhõ wa hamẽxkrut nẽ mẽmoj tã axpẽn ma. Pika hã war axpẽn ma rỳ mẽmoj tã war axpẽn ma. Hãmri nẽ wa hã axpẽn mar pa nhũm ja ăm hãmri nẽ ăm rãhãã. Koja nhãm mẽhõ tẽ nẽ axtem tanhmã harẽnh to hkõt nẽ. 16Ja pyrã nẽ na hte ă Tĩrtũm mẽmoj tã amnhĩ jarẽnh anẽ. Na hte mẽmoj jarẽ nhũm arĩ rãhãã. Na hte jarãhã mẽmoj jarẽ nhũm jãã nhũm axtem hijuk ri mẽmoj jarẽnh kêt nẽ. Na hte ăm kapẽr pỳnh nẽ. Tã na pre Apraãw mã hkanrẽhã htãmnhwỳjẽ hõ kukwak ri Apraãw o mex ă amnhĩ jarẽ. Tãmnhwỳ piitã kukwak ri ho mex ă amnhĩ jarẽnh kêt nẽ. Ăm kanrẽhã htãmnhwỳ Krisja pix kukwak ri ă Apraãw o mex ă kãm amnhĩ jarẽnh anẽ.

17E kot paj hpãnhã axtem tanhmã mẽ amã harẽnh to. Na hte Tĩrtũm kot mẽmoj tã amnhĩ jarẽnh xà hkõt tanhmã mẽmoj to ho pa rãhã nẽ. Ă na pre finat Apraãw mã kot ho mex ă amnhĩ jarẽnh anẽ. Tã ra hã amgrã pẽ 430 nẽ hapẽx nhũm hpãnhã finat Mojes mã kapẽr. Kot mar nẽ amnhĩ xõ ri Ijaew mã harẽnh o ri mẽ hkõt pa kaxyw. Tã no nhũm ra kot Apraãw mã mẽmoj jarẽnhhta arĩ hã no htỳx rãhã nẽ aa ho hamakẽtkati hkõt nẽ. Nẽ kot Mojes mã tanhmã kapẽr toja nẽ Apraãw mã tanhmã kapẽr toja

nhũm hamẽ wa ho hamakêtkati hkêt nẽ. Nhũm wa hamẽ arĩ rãhã ho rãhã. 18Tã mẽ ano kupyw o ri mẽ pa xwỳnhjaja na htem htỳx tanhmã mẽ amã harẽnh to nẽ mẽ amã harẽnh o:

—Kwa kot puj mẽ Mojes kapêr kôt amnhĩ nhĩpêx o papa hkêt nẽ nhũm Tĩrtũm tee ri ja hã mẽ pahpumu nẽ mẽ pahto mex kêt nẽ. Anẽ.

Nom ja kot anhyr kêt. Kop apu ã kot anhyr ronhyx Tĩrtũm ra wam kot tanhmã Apraãw mã kapêr tota ra ho hamakêtkati. Nom na hte arĩ kãm hamaxpêr rãhã nẽ ho pigrãnh nẽ ho hapêx kêt nẽ. Na pre Apraãw mã kãm:

Kot kaj amnhĩ kaxyw ixkôt ajamaxpêr hã kot paj ato mex kumrêx. Anẽ.

Tã kot ho mex ã amnhĩ jarẽnhja arĩ rãhãã. Na hte arĩ mẽ kot amnhĩ kaxyw hkôt hamaxpêr xwỳnhjê ho mex nẽ. Nom mẽ kot Mojes kapêr kôt amnhĩ nhĩpêx o pa hã mẽ omunh xà hkôt mẽ ho mex kêt nẽ. ãm mẽ kot amnhĩ kaxyw hkôt hamaxpêr xwỳnh pixjaja na hte mẽ ho mex.

Mo kaxyw na Mojes kapêr ã kagà?

Rômãn 3.20, 5.20, 7.7

19-20Tã mo kaxyw na Mojes kapêr ã kagàja? Nà mẽ pahte tanhmã amnhĩ tomnuj to ho papa hã amnhĩ pumunh nhũm Tĩrtũm kot ã mẽ pahte amnhĩ nhĩpêx anhyrja nẽ mẽ pahkurê kaxyw. Na pre Mojes Tĩrtũm nhỹ hã mẽmoj nẽ mẽ pahkurê. Mẽ pahte axpẽn pẽ paxàhkĩnh nẽ mẽ pahkurê. Nẽ mẽ pahte axpẽn mã paxêx o ri papa nẽ mẽ pahkurê. ã mẽmoj nẽ mẽ pahkurê anẽ. Mẽ pahprĩ hã kapêr mar nẽ tãm amnhĩ nhĩpêx o papa kaxyw. Ja kaxyw na pre Tĩrtũm Ijaew kaxyw Mojes mã kapêr gõ. Na pre kaxkwa rũm kapêr o wrỳk xwỳnhjaja kumrêx kãm harẽ nhũm kuma nẽ Ijaew mã hã kagà. Jakamã na htem harẽnh o: “Mojes kapêr” anhyr o harẽ.

Tã Apraãw kanrẽhã htãmnhwỳ Krisja kormã kator kêt ri nhũm Ijaew Mojes kapêr ma nẽ hkôt ri amnhĩ nhĩpêx o pa. Tã nhũm Krisja kator o Mojes kapêr o hapêx. Ra Tĩrtũm kot Kris kukamã ho mex ã amnhĩ jarẽnh xà hã arĩgrota kator mẽ nhũm Mojes kapêr hapêx.

No na pre Tĩrtũm Ijaew mã ujarẽnh kaxyw tãm mẽ kãm ujarẽnh kêt nẽ. Kapêr o wrỳk xwỳnhjê mã na pre harẽ nhũm mẽ amnhĩ xõ ri Mojes mã mẽ kaxyw kãm awjarẽ. Kot mẽ ô ri mẽ kãm harẽnh kaxyw. No Apraãw mã na pre Tĩrtũm tãm kapêr. Na pre hwỳr kapêr o wrỳk xwỳnhjê hõ mẽnh kêt nẽ. Tãm kot kãm kapêr jakamã kapêrja na mex o Ijaew kaxyw Mojes mã kapêr jakrenh.

21Nẽ na pre Tĩrtũm tanhmã mẽ pamã kapêr o amnhĩrĩt to nẽ mẽ pamã:

—E kot paj amnhĩ kaxyw ixkôt mẽ ajamaxpêr ã mẽ apumunh kôt pix mã mẽ amex ã mẽ ajarẽ.

Anhÿr o mẽ pamã kapër. Tã xà na pre kapërja nhÿjuk ri axte amnhÿ jarẽ nẽ amnhÿ jarẽnh o:

— E kot paj mẽ ate Mojes kapër kôt amnhÿ nhÿpêx mex o apa hã mẽ apumunh kôt mẽ amex ã mẽ ajarẽ.

Anhÿr o mẽ pamã kapër? Xà na hte mẽmoj jarẽ nhũm jãã nhũm ra hijuk ri axtem mẽmoj jarẽ? Nà Tÿrtũm kapër ãm hpÿnh kênã. Kop ãm mẽ pahte Mojes kapër kôt amnhÿ nhÿpêx o papa hã mẽ pahpumunh kôt mẽ pamex ã mẽ pajarẽnh ronhÿx mẽ pamã:

— ãm ja pix ã mẽ apumunh kôt kot paj mẽ amex ã mẽ ajarẽ. Anẽ.

22Nom na pre ã kapër anhÿr kêt nẽ. Kapër ã kagã htũm kot ja jarẽnh o:

Mẽ apiitã mẽ ate amnhÿ tomnuj o mẽ apa xwÿnh na ka mẽ.

Anhÿr jakamã tanhmã kot puj mẽ amnhÿ to nẽ Mojes kapër kôt amnhÿ nhÿpêx mex o papa? Mẽ pahpiitã mẽ pahte amnhÿ tomnuj xwÿnh kênã. Mẽ pahte kapër piitã hkôt amnhÿ nhÿpêx kêt jakamã koja Tÿrtũm ja hã mẽ pahpumunh kôt mẽ pamex ã mẽ pajarẽnh kêt nẽ. Koja ãm mẽ pamã kapër o:

— Kot kaj mẽ amnhÿ kaxyw Jejus Kris mã ajamaxpër pa ja hã mẽ apumunh kôt mẽ amex ã mẽ ajarẽ nẽ mẽ ato ixkra nẽ mẽ ato mex o ri ixpa. Anẽ.

Mojes kapër te kęp Kris xwÿj ri mẽ hamãr xwÿnh pyrãk ã harẽnh

Rõmãn 10.4; Karatas 4.1

23Nẽ kormã Kris kot mẽ pahwÿr wrÿk nẽ mẽ panẽ htyk xwÿj ri na pre Ijaew Mojes kapër ma nẽ hkôt amnhÿ nhÿpêx o ri pa. Nhũm kapërja te kot amnhÿm mẽ unênh nhũm mẽ kot hkôt pix mã amnhÿ nhÿpêx o ri pa pyrãk. Na prem Tÿrtũm kot mẽ mex ã mẽ harẽnh prãm xaj ãm pix ma nẽ hkôt amnhÿ nhÿpêx o pa. Nom kapër piitã hkôt amnhÿ nhÿpêx mex kêt nẽ. 24Te mẽhprÿre nhũm Mojes kapër te kęp mẽ hamãr xwÿnh pyrãk. Mẽhprÿ jamãr xwÿnhjaja na htem mẽhprÿjẽ pumu nẽ tãm mẽ kot amnhÿ nhÿpêx kaxyw tanhmã mẽ ahkre hto ho mẽ hkôt pa. Ja pyrã nẽ na pre Ijaew tãm amnhÿ nhÿpêx o pa kaxyw Mojes kapër ma nẽ hkôt amnhÿ nhÿpêx o ri pa. Jejus Kris kutêp ã amnhÿ nhÿpêx anhÿr o ri pa. Tã nhũm Jejus tãm kaxkwa rũm wrÿ pa mẽ ixkwÿ pixjaja mẽ ixkwÿjẽ rom amnhÿ kaxyw hkôt ijamaxpër. Hãmri nhũm Tÿrtũm ja hã mẽ ixpumunh kôt mẽ inhmex ã mẽ ijarẽnh kurê kumrẽx.

Jejus kukwak ri mẽ pahpê Tÿrtũm kra ã mẽ pajarẽnh

Juãw 1.12; Rõmãn 8.14; Epes 1.5

25-26Tã ra mẽ ixte amnhÿ kaxyw Kris kôt ijamaxpër jakamã na pre Tÿrtũm mẽ ixto hkra pa mẽ ra te ixpê hkra xaptãr pyrãk o amnhÿ nhÿpêx nẽ kapër kôt amnhÿ nhÿpêx mex o ri ixpa. Jao Mojes kapër kaga. Te mẽhprÿre ra mẽ ahkre kamã mẽ aptãr nẽ kot mẽ ahkre xwÿnh kaga

pyràk. Hāmri pa mẽ ixpê Tĩrtũm kra xàptàrjaja hāmri axte Mojes kapêr kôt amnhĩ nhĩpêx hkêt nê.

27Tã mẽ kajaja na ka pre mẽ ixpyrà nê amnhĩ kaxyw Kris kôt ajamaxpêr nhũm mẽ akwỳ kot mẽ apê Jejus kwỳ hã mẽ apumunh kaxyw nhũm mẽ akrã kumrã. Hāmri ka mẽ Jejus kot amnhĩ nhĩpêx kôt pix mã amnhĩ nhĩpêx o ri apa. 28Tã ra mẽ pahpê Jejus Kris kôt amnhĩ xunhwỳr xwỳnh jakamã na hte Tĩrtũm ahpỳnhã ri tanhmã mẽ pakute hkôt mẽ pahpumunh kêt nê. Mẽ pahpê Ijaew rỳ mẽ pahpê Ijaew kêt xwỳnhjaja. Rỳ mẽ pahpê nhãm mẽ kãm paxàpênh xwỳnh rỳ amnhĩ mã mẽ paxàpênh xwỳnh nhũm hte ja hã mẽ pahpumunh kôt tanhmã mẽ pajarênh to hkêt nê. Rỳ mẽ anijê hkôt rỳ mẽ inhmyjê hkôt mẽ pahpumunh kôt tanhmã mẽ pajarênh to kêt nê. ãm mẽ pahte Jejus Kris kôt amnhĩ xunhwỳr ã mẽ pahpumunh kôt pix mã na hte ã mẽ pahpumunh o pa anê.

29Nê na pre Tĩrtũm Apraãw mã hkanrêhã htãmnhwỳ Jejus Kris o mex ã amnhĩ jarê. Tã Kris kêp mẽ panhõ Pahihti jakamã pu mẽ Tĩrtũm noo mã uràk nê te mẽ pahpê Apraãw tãmnhwỳ pyràk. Jakamã koja Apraãw nhĩpêxta pyrà nê mẽ pahto mex rax nê.

Mojes kapêr te axte mẽ pahpynênh kêt pyràk ã harênh

Rômãn 7.1, 8.14-17; Karatas 3.23

4 1E kot paj axte mẽ amã tanhmã mẽhprĩjê jarênh to ka mẽ inhma. Kojã mẽhõ ra hkra mã mẽmo hikukrêx nhõr kaxyw. Hikukrêx nê õ pika. Õ mẽmoj piitã õr kaxyw. No nhũm hkraja kormã hprĩre nê hamaxpêr mex kêt jakamã nhũm kormã hprêk jamãr o pa. Nhũm hkraja arĩ te kãm àpênh o pa xwỳnh kot amnhĩ nhĩpêx pyrà nê amnhĩ krã hkôt ri amnhĩ nhĩpêx o pa hkêt nê. Kormã hipêêxà kapêr kôt ri amnhĩ nhĩpêx o pa. Nhũm hipêêxàja kot kãm õ mẽmoj piitã õr kaxyw no ãm kormã hprêk jamã. 2Tã kormã hkraja hprĩre ri nhũm hipêêxà tanhmã amnhĩ to nê ty. Nom nhũm hkraja mỳr pê kormã õ mẽmoj o amnhĩptàr kêt nê. Kormã hprĩre jakamã nhũm hipêêxà mỳr pê kot kãm hamãr o pa xwỳnhja kormã kãm hamãr o pa. Tã nhũm hipêêxà kot kãm amgrà jarênh xwỳnhhta kato nhũm tãm mẽmoj piitã ho amnhĩptã. Ra àptàr mex nê hamaxpêr mex nê amnhĩm ho amnhĩptàr pa. 3Tã Ijaew na prem ã amnhĩ nhĩpêx anê. Amnepêm kormã mẽ kot Mojes kapêr kôt ri amnhĩ nhĩpêx o pata ã na prem te mẽhprĩre hamaxpêr kêeta pyràk. Te kormã mẽ àptàr kêt pyrà nê jar pika ja kamã mẽ kot amnhĩ nhĩpêx tũm kôt pix mã amnhĩ nhĩpêx o pa. Mẽ kot amnhĩ nhĩpêx tũm te kot amnhĩm mẽ unênh nê mẽ kãm ê pyràk o mẽ hipêx nhũm mẽ hkôt pix mã amnhĩ nhĩpêx o ri pa. 4Tã nhũm Tĩrtũm kot Kra hkukamã mẽ pahwỳr mẽnh xà hã arĩgrota kato hāmri nhũm mẽ pahwỳr kumê nhũm mẽ pahwỳr wrỳ nê mẽ pahpyrà nê mẽhõ nhõhy rũm kato. Nê mẽ pahpyrà nê gaa nê hprêk nê mẽ ixpê Ijaew rom Mojes kapêr piitã hkôt amnhĩ nhĩpêx mex kumrêx o ri pa. 5Jao te kot Mojes kapêr pê

mě papytâr pyrâk o mẽ panhîpêx pu mẽ hpãnhã pahpê Tîrtûm kra kaxyw. 6Tã mẽ ixpê Ijaew kwÿjaja nê mẽ apê Ijaew kêt xwÿnh kwÿjaja ra mẽ pahpê Tîrtûm kra jakamã na pre mẽ pahwÿr Kra Jejus Karôja rê nhùm mẽ pamã agjê. Hãmri nê mẽ pamã kapêr o:

— Ra mẽ apê Tîrtûm kra jakamã kêr ka mẽ kãm amnhî jarênh kaxyw nê kãm: “Pa Papaj” anê. Kêr ka mẽ ã kãm akapêr anê. Anê.

7Jakamã na pu mẽ ra te pahpê mẽ kãm paxâpênh xwÿnh pyrâk kêt nê. Ra mẽ pahpê Tîrtûm kra jakamã na hte mẽ panhîpêx o te Kra Jejus nhîpêx pyrã nê mẽ pahto mex nê.

Mojes kapêr kôt mẽ kot amnhî nhîpêx xwÿnhjê jarênh

Sikûn Korît 11.3-4; Korosê 2.16-19; Eprêw 6.1; Wam Pêtre 1.14

8Nê amnepê mã kormã mẽ ate amnhî kaxyw Jejus kôt ajamaxpêr kêt ri na ka prem Tîrtûm jarênh mar kêt nê. Âm atÿx ri sãnti mã mex ã harê nê kãm amnhî jagrer o ri apa. Nê amã mẽmoj kÿnh nê amã hprãm xàj tanhmã amnhî to hwÿr to ho ri apa. Te mẽ kãm mẽ àpênh o mẽ pa xwÿnhjaja kot amnhî nhîpêx pyrã nê sãnti mã tanhmã amnhî nhîpêx to ho ri apa. Nom sãntija kêp Tîrtûm kêt.

9Tã ka prem Tîrtûm jarênh ma nê hkôt amnhî xunhwÿ nhùm amnhî tã mẽ apumu. Tã tãm kot amnhî kaxyw mẽ paxunhwÿr jakamã kwa mon ka mẽ ra axtem nê akupÿm sãnti hkôt amnhî nhîpêx kaxyw? Nà mẽ ajamaxpêrja mex kêt. Sãnti nhîpêxta tanhmã koja amnhî to nê mẽ ato ajuta? Âm mẽ kot ïhkra ho hipêx pix jakamã hihtÿxti hã. Amarî kuhê xà kamã kuhê ho kuhê xwÿnh kênã. Tã te kot akupÿm amnhî kôt mẽ arênh kaxyw pyrâk o mẽ anhîpêx ka mẽ ra axtem nê akupÿm hkôt amnhî nhîpêx kaxyw. Kwa nà mẽ ã ri amnhî nhîpêx anhÿr kêt nê.

10Nê na ka htem amnhî kukamã ajamaxpêr o:

— Na pre hte Ijaewjaja Mojes kapêr xà hkôt arÿgro hkwy hã axtem tanhmã amnhî nhîpêx to nê mẽmo mytwrÿ hã tanhmã amnhî nhîpêx to nê mẽmo amgrã hã tanhmã amnhî nhîpêx to. Tã kot paj mẽ urâk nê ã amnhî nhîpêx anhÿr o ixpa. Kê Tîrtûm ja hã ixpumu nê inhmex ã ijarê. Anê.

Kwa mẽ ã ajamaxpêr anhÿr kêt nê. Mon ka htem axtem nê ri ã ajamaxpêr anê? Na hte Tîrtûm ã mẽ pahte amnhî nhîpêx anhÿr ã mẽ pahpumunh kôt mẽ pamex ã mẽ pajarênh kêt nê. 11Na pa ja hã mẽ ajarênh ma nê tee ri mẽ akukamã ijamaxpêr. Te ixte Tîrtûm kapêr o mẽ ajahkre kaprÿ ho ri ixpa pyrâk.

Karatas nhô xwÿnhjaja kot Pawre ho mex ã mẽ harênh

Wam Korît 9.21-23

12Kwa ixkrãmnhwÿjaja. Ixpê Ijaew tã te ixpê Ijaew kêt pyrâk o amnhî nhîpêx o ri mẽ apê Ijaew kêt xwÿnhjê hkôt ri ixpa. Jao Kris

kapêr gryk ã mẽ inhîgêtjaja kot amnhî nhîpêx kaga nê axte hkôt amnhî nhîpêx kêt nê. Tã kwa mẽ ixpyrà nê ã amnhî nhîpêx anê. Wem ma amnhî to amôr gri kêt wehe. Wam ixte mẽ awÿr inhmôrta ã na pa pre mẽ amã Tirtûm kapêr jarênh o ri mẽ akôt ixpa ka prem inhma nhûm ja mẽ amã mex nê ka mẽ ja hã tanhmã ixto hkêt nê. **13**Na pa pre ixàà nê mẽ awÿr mō nhûm ixàja ixto htÿx nê pa tokyx ixkator nê ma akupÿm mẽ arûm inhmôr kêt nê arí mẽ amã Tirtûm kapêr jarênh o ixpa. **14**Kormã ixà nê tanhmã ixkute htã ka prem ja hã ixpumu nê ixto mex nê ixkamã anhôkre kahak kêt nê. Na ka prem te ixto Jesus Kris nhîpêx pyrãk o inhîpêx. Nê te ixto Tirtûm kapêr o wrÿk xwÿnh nhîpêx pyrãk o inhîpêx. **15**Jao mẽ amã ixkînh nê ã inhîpêx anê nê mẽ amã ixto mex pix prãm. Nê nhÿri ixpumu nê ixkamã axukaprî nê inhmã akapêr o:

—Hêxta waa nê. Anopxàà. Inhmã amnhî no kaxàr nê amã ôr prãm nom tanhmã kot pa mẽ amnhî to nê hkapa nê amã kugô? Anê.

Nê mẽ amã inhmã mẽmoj mex pix nhôr prãm. Tã ra tanhmã ajamxpêr to nê axtem nê te mẽ amã ixkînh kêt pyrãk o inhîpêx.

Mê no kupyw xwÿnhjaja kot mẽ hamaxpêr o pihkàr ã mẽ harênh

16Nê na pa pre ãm hãmri mẽ amã Tirtûm kapêr jarênh o ri mẽ akôt ixpa. Nom ra mẽ amã mar prãm kêt jakamã na ka mẽ axtem nê inhîpêx o te ixte mẽ akutã amnhî xãm pyrãk. **17**Mê amã Tirtûm kapêr o mẽ hêx xwÿnhjaja te mẽ kãm mẽ akînh pyrãk o mẽ anhîpêx no ãm mẽ kãm akînh kêt. Na htem mẽ amex kaxyw tanhmã mẽ amã kapêr to hkêt nê. ãm mẽ ate mẽ mar nê mẽ gryk ã ixkaga nê mẽ hkôt ri amnhî nhîpêx o apa pix prãm xàj na htem mẽ akôt tanhmã mẽ amã hêx to ho pa. **18**Pa mẽ harênh ma hãmri nê mẽ kamã inhgryk o ã mẽ amã mẽ harênh anhÿr kêt nê. Koja mēhō mẽ awÿr mra nê ixwakre kamã rÿ inhnoo mã mẽ amã mẽmoj mex jarê nhûm ja inhmã mex nê. No nhûm mẽ amã mẽ hêx xwÿnhjaja axtem nê mẽ ajamxpêr o pihkàr pix kaxyw na htem mẽ awÿr mrar nê mẽ amã ã ujarênh o pa anê.

Pawre kot tee ri mẽ hkukamã hamaxpêr ã harênh

19Te mẽ apê ixkra pyrãk jakamã na pa hte mẽ ate amnhî nhîpêx ã mẽ apumu nê tee ri ijamxpêr nê ixkaprî htÿx nê. Te nhÿhÿnh ixà htÿx nê ixte amnhî xà htÿx kamã ijamak o ri ixpaja pyrãk. Rÿ te mẽ hpijagri ho mẽ hikwÿ xwÿnh ôhy xà htÿxta pyrãk. Mẽ ate Kris kôt amnhî nhîpêx mex o apa hprãm xàj na pa hte ã amnhî nhîpêx anhÿr o ri ixpa. **20**Hêxta waa nê. Kop apu ra mẽ awÿr ixpôx nê mẽ akôt ixpa ronhÿx pa ixkînh tÿx kumrêx. Nhÿx pa ra ixprî hã mẽ amã ixkapêr ka mẽ inhma. Nê amnhî tã inhmã mẽ akînh tÿx ã mẽ akamã inhgryk kêt ã ixpumunh kurê kumrêx. No kagã pix kãm ixkapêrja ka mẽ kamã harê nom aprî hã

inhmar mex kêt nê. Na pa tee ri mē akukamā ijamaxpēr o ixkaprī htỳx nê ixpa.

Mojes kapēr kôt mē kot amnhĩ nhĩpêx xwỳnhjê jarênh

Eprêw 12.18-29

21Kwa mē amā arĩ Mojes kapēr kôt amnhĩ nhĩpêx o ri mē apa hprām xwỳnhjaja. Mãn ka mē kormā aprĩ hã Mojes kapēr piitã mar par kêt jakamā na ka mē amā hkôt amnhĩ nhĩpêx prãm. E pa ixprĩ hã mē amā tanhmã harênh to ka mē inhma. 22Nà Tĩrtũm kapēr ã kagã htũm kot finat Apraãw jarênhja. Na pre hkra myja wa hamêxkrut. Prõ Sara kamã ja nê kot amnhĩm haprôr nhũm ri kãm àpênh o pa xwỳnh Aga kamã ja. 23Kãm àpênh xwỳnh kamã ja na pre mē pahpiitã mē pahpyrà nê amarĩ kato. No hprõ Sara kamã ja. Sara na pre ra hpigêx tỳx nê. Ra hkamrô hkêt ryy nê pa htã nhũm Tĩrtũm kot wa hkra hkukamã wa kãm ujarênh xà hkôt nhũm Apraãwja htu nhũm wa hkrata kato. Tĩrtũm kot hkukamã wa kãm harênh xà hkôt nhũm kamã hkra nhũm kato.

24-25Tã wa nita ã wa harênh kot anhỹr. Na pre Tĩrtũm mẽmoj jarê. Te ho wa uràk o wa harê no ãm hã kuxi nê ã wa harênh anê. Jakamã ni wa harênhja te kot Tĩrtũm kapēr pijakruuta pyrãk. Wam ni Agata te kot hixêt prêk pê Sinai nhĩmôk ã Tĩrtũm kot Mojes mã kapêrta pyrãk. Hixêjtja pika pê Arap kamã na pre. Jakamã nhũm Tĩrtũm Ijaew kaxyw Mojes mã kapêr nhũm kuma nê amnhĩ xô ri mē kãm hã kagã. Tã na hte arĩ jarãhã mē hkwyjaja hamaxpēr o:

—E kot paj mē panhĩgêt finat Mojes kapêr kôt amnhĩ nhĩpêx o ri ixpa nhũm Tĩrtũm ja hã ixpumu nê amnhĩm inhmex ã ijarê nê ixto hkra.

Anhỹr o hamaxpēr no ãm ã hamaxpēr anhỹr kaprỳ. ã mē hamaxpēr anhỹr xwỳnhjaja te mē kêp Apraãw mã àpênh xwỳnh Aga hkrata pyrãk. Nê krĩ pê Jerujarê kêp Ijaew nhõ krĩ jakamã haxwỳja te kêp Agata pyrãk. Nhũm krĩ nhõ xwỳnhjaja haxwỳja te mē kêp Aga hkrata pyrãk. Na htem htỳx Tĩrtũm kot mē omunh nê mē ho hkra hprãm xaj Mojes kapêr kôt amnhĩ nhĩpêx o pa hã amnhĩ jarênh kaprỳ. Jakamã haxwỳja te mē kêp mē kãm mē àpênh o pa xwỳnh pyrãk.

Jejus kôt mē kot amnhĩ kaxyw hamaxpêr xwỳnhjê jarênh

26Nê hapu hã Tĩrtũm kapêrta. Apraãw prõ kumrêx Saraja te kêp kaxkwa kamã Jerujarê ôja pyrãk. Krĩ ja kamã mē pa mã xwỳnhjaja te mē kêp mē kãm mē àpênh xwỳnhjê pyrãk kêt. Ra mē kot amnhĩ kaxyw Kris mã hamaxpêr nê hkôt amnhĩ xunhwỳr jakamã na htem hamaxpêr o:

—Ixte amnhĩ kaxyw Kris mã ijamaxpêr nê hkôt amnhĩ xãm jakamã na Tĩrtũm ixpumu nê amnhĩm inhmex ã ijarê nê ixto hkra. Anê.

Ăm hāmri na mẽ ã wamtajê rom hamaxpêr anê. Tã ã mẽ hamaxpêr anhÿr xwÿnhjaja te mẽ kêp Sara hkra pyræk.

27Tirtûm kapêr ã kagà htûm kot ja jarênh kot:

E kormã akra hkêt nê apa htã kêr ka mãmri akînh nê ri apa.

Nê kormã apijagri hkêt tã kêr ka akînh tÿx nê ri apa.

Kormã amjên kot akamã hkra hkêt nê te kot akaga pyræk tã kot kaj akra nê akanrêhã atàmnhwÿ sohtô rax nê.

Mê ohtô rax o ra amjên kot nhãm hprô hõ kamã hkrata jakre.

Anê.

Ă kapêr kot anhÿr o mẽ kot amnhÿ kaxyw Kris kôt hamaxpêr xwÿnhjê hkukamã mẽ ohtô hã mẽ harê.

28E ixkràmnhwÿjaja. Te mẽ apê Ijak kanrêhã htàmnhwÿ pyræk. Koja mēhõ amnhÿ kaxyw Kris kôt hamaxpêr hāmri nê te kêp Apraãw mẽ hprô Sara wa hkra Ijak kanrêhã htàmnhwÿ pyræk. Na pre Tirtûm amnepê mã kormã Ijak kator kêr ri ra hkukamã hamaxpêr nê Apraãw mã harê. Nê mẽ papajaja nhûm Tirtûm Ijak pyrã nê mẽ pakukamã mẽ pamã hamaxpêr nê amnhÿm mẽ paxunhwÿr ã amnhÿ jarê. Tã ra mẽ ate amnhÿ kaxyw Kris kôt ajamaxpêr jakamã te mẽ apê Ijak kanrêhã htàmnhwÿ pyræk.

29Nhûm Apraãw kot Aga kamã hkra Ismaewja na pre hprô kumrêx kamã hkrata pumu nê kãm hkînh kêt nê kamã gryk pix o pa. Nê tanhmã hipêx to pê ri haprÿ ho ri hkôt pa. Tã mẽ kot amnhÿ krã hkôt amnhÿ to Tirtûm kra hprãm xwÿnhjaja na htem ã mẽ pahte Kris kôt amnhÿ xunhwÿr xwÿnhjê nhîpêx anhÿr o pa. Na htem Tirtûm kot mẽ pahto hkra hã mẽ pahpumu nê Ismaew kot Ijak nhîpêx pyrã nê mẽ pakamã gryk pix o pa. Nê tanhmã mẽ pahptomnuj to pê mẽ pahto kapêr o ri pa. 30Tã no ãm kwãr mẽ mãmri ã mẽ panhîpêx anê. Koja mẽ pahpyrã nê nhÿrmã Tirtûm nhõ krÿ hwÿr àpir kêt nê. Tirtûm kapêr ã kagà htûm kot mẽ harênh kot:

Na pre Tirtûm Apraãw mã kapêr nê kãm: “E kêr ka amnhÿ nê ate haprôr nhûm kot amã àpênh o ri pa xwÿnh mẽ hkrata wa hano. Koja hkrata amÿr pê amnhÿm mẽmoj to àrik kêt nê.

Ate aprô kumrêx kamã akrata pix koja hõja rom amÿr pê mẽmoj piitã ho amnhÿptàr pa.” Anê.

31Tã te mẽ pahpê àpênh xwÿnh kamã hkrata pyræk kêt. Te mẽ pahpê Apraãw prô kumrêx kamã hkrata pyræk. Te Tirtûm kot Ijak kukamã hamaxpêr pyræk o na pre mẽ pakukamã hamaxpêr.

5 1Nê Kris kot mẽ pahte amnhÿ nhîpêx tûm pê mẽ papytãr jakamã kwa ixkràmnhwÿjaja. Kêr ka mẽ arÿ ate amnhÿ nhîpêx tûm kôt amnhÿ nhîpêx kêt nê. Ra Kris kot ja pê mẽ papytãr nhûm mẽ paxàmnhÿx ri papa kênã.

Mê pahpê Tirtûm kra hprãm xàj tanhmã mê pahte amnhĩ nhĩpêx to

Juãw 8.32, 8.36; Korosê 2.20

2E mê inhma. Kot kaj mê atõ Tirtûm kot ato hkra hprãm xàj amnhĩ my kwryt kà krãhta hã kot kaj mê ãm amarĩ ã amnhĩ nhĩpêx anhÿr kaprÿ. Na hte Tirtûm ja hã mê omu nê ãm hã mê omu. Kot kaj ã amnhĩ nhĩpêx anê nhũm Krisja ãm ate amnhĩ tomnuj mÿrapê anê htyk kaprÿ pyrãk o amnhĩ nhĩpêx. 3Hãmri nhũm Tirtûm tee ri ja hã mê apumu nê te kot ã mê amã kapêr anhÿr pyrã nê mê amã kapêr o:

—E ra amã apê Kris kwÿ hprãm xàj amnhĩ my kwryt kà krãhyr jakamã kot kaj mãânên Mojes kapêr piitã hkôt amnhĩ nhĩpêx o ri apa. Anhÿr o mê amã kapêr pyrãk.

4Nom kot kaj mê atõ amnhĩ kukamã ajamexpêr o:

—Nã kot paj Mojes kapêr piitã hkôt amnhĩ nhĩpêx o ri ixpa nhũm Tirtûm ja hã ixpumu nê inhmex ã ijarê nê ixto hkra kãm ga. Anê.

No ãm ja kot anhÿr kêt. Na hte Tirtûm ã mê pahte amnhĩ nhĩpêx anhÿr ã mê pahpumunh kôt mê pahto hkra hkêt nê. Jakamã kot kaj mê ã amnhĩ nhĩpêx anê nê te ate Kris kutã amnhĩ xãm pyrãk nhũm Tirtûm ato mex kêt nê. 5Nom kot ka mê axtem ajamexpêr o:

—Ra ixte amnhĩ kaxyw Kris kôt ijamexpêr nê hkôt amnhĩ xãm jakamã koja Tirtûm hã ixpumu nê inhmex ã ijarê. Karõ ra kot ã inhmã ja ho amnhĩrit anhÿr kênã.

Anhÿr o ajamexpêr. ãm hãmri ã mê ajamexpêr anhÿrja. 6Jakamã mê pahpê Kris kôt amnhĩ xunhwÿr xwÿnhjê kamã ra mê kot amnhĩ my kwryt kà jakàr xwÿnhjaja nhũm mê pahkwÿjaja ã amnhĩ nhĩpêx anhÿr kêt nê. Tã nhũm Tirtûm ja hã mê pahpumu nhũm ja tanhmã kêp kute hkêt. Na hte mê pahte amnhĩ my kwryt kà jakàr ã mê pahpumu nê ãm hã mê pahpumu. No kot pu mê Jesus Kris kôt amnhĩ nhĩpêx mex o ri papa. Nê amnhĩ kaxyw hkôt pajamexpêr tÿx o ri papa. Nê mê pamã axpên kĩnh pê tãm ri axpên nhĩpêx o ri papa. Ja na kêt Tirtûm kãm hprãm.

7Ra mê ate Kris kôt amnhĩ nhĩpêx mex o ri apa htã nhũm mê hêx xwÿnhjaja mê awÿr mra nê tee ri ã mê ate amnhĩ nhĩpêx anhÿr ã mê apumu nê tanhmã mê amã Tirtûm kapêr o hêx to. Ka mê ama nê axte Tirtûm kôt amnhĩ nhĩpêx mex hkêt nê. 8No ãm ã mê kot mê amã mê ujarênh anhÿr xwÿnhjaja na pre Tirtûm mê awÿr mê rênh kêt nê. Tirtûm kot amnhĩ wÿr mê awÿr xwÿnh kênã kot kêt axtem nê mê awÿr kapêr o mê amã hêx o mê pa xwÿnhjê rê.

9Nê koja mēhõ pixi nê tanhmã amnhĩ tomnuj to nhũm mê piitã ja hã omu nê urãk nê kãm tanhmã amnhĩ tomnuj to hprãm. 10No kêt mê apê Kris kwÿ na ka mê. Ixte ja hã mê apumunh mex. Kot kaj mê axte ixkapêr ma nê akupÿm Kris kôt amnhĩ nhĩpêx mex o ri apa. Nã kot kaj mê ã

amnhĩ nhĩpêx anê nê axte mẽ kot mẽ apê àmnàr xwỳnhjê kapêr mar nê mẽ hkôt amnhĩ nhĩpêx kêt nê. Koja Kris mẽ atã mẽ homnuj tỳx kumrêx nhũm mẽ rĩ amnhĩ pumu.

Pawre kot mẽ kot amnhĩ jakàr ã mẽ kãm karô hkêt ã harênh

11Nê na hte Tĩrtũm kapêr o mẽ hêx xwỳnhjaja tanhmã mẽ amã ixto hêx to ho pa. Ixte mẽ kãm Tĩrtũm kot mẽ ho hkra kaxyw mẽ kot amnhĩ my kwrỳt kà jakàr ã mẽ kãm karô hã ixto ri hêx o pa. Nom ixte anhỹr kêt ixkrãmnhwỳjaja. Kop apu ixte mẽ kãm ja hã karô ho ixpa ronhỹx Ijaew krãhtũmjaja ja hã ijarênh ma nhũm ja mẽ kãm mex nê nhũm mẽ axte Kris ã tanhmã inhĩpêx to hkêt nê. Nom ixte ja hã mẽ kãm karô hkêt. ãm ixte mẽ kãm Kris kot mẽ panê pĩ kahpa hã htyk jarênh pix mỳrapê na htem ixkamã gryk nê.

12Hêxta waa nê. Mẽ kot mẽ amã hêx o pa pê mẽ ajamaxpêr o pihkàr xwỳnhjaja kop mẽ ãm mẽ anhô krĩ rũm hapôx nê ma nhỹhỹm hapêx ronhỹx pa ixkĩnh tỳx kumrêx.

Mẽ pahte axpên to mex o papa hã mẽ pamã karô

Wam Korĩt 13; Eprêw 13.3, 13.16; Wam Pêtre 1.22; Wam Juãw 3.11

13-14Kwa ixkrãmnhwỳjaja. Nà na pre Kris amnhĩ kaxyw mẽ parê. Axte mẽ pahte amnhĩ nhĩpêx tũm kôt amnhĩ nhĩpêx kêt kaxyw. Ra kot ã mẽ pahte amnhĩ nhĩpêx anhỹr pê mẽ papytãr jakamã kêr ka mẽ amnhĩ tã ja ma nê axte atỳx ri amã hprãm xà hkôt tanhmã amnhĩ nhĩpêx to ho ri apa hkêt nê. Mẽ ãm amã axpên kĩnh pix o ri axpên kôt apa. Nê nhãm mẽ hipêx o te ka amã amnhĩ tã ma pyrãk o mẽ hipêx. Jao mẽ piitã tãm mẽ hipêx o ri apa. Kot kaj mẽ ã amnhĩ nhĩpêx anê nê te mẽ ate wam Tĩrtũm kapêr piitã hkôt amnhĩ nhĩpêx pyrãk. 15No kot kaj mẽ axtem nê axpên kãm axoprê ho ri apa hãmri nê te ra mẽ ate axpên to ajapêx par o amôr pyrãk o amnhĩ nhĩpêx. Te mry xoprê kot axpên par o pata pyrãk. Kwa mẽ ã amnhĩ nhĩpêx anhỹr hkêt nê. Mẽ ãm axpên to mex pix nê mẽ axpên kãm axukaprĩ ho ri axpên kôt apa.

Mẽ pahte amnhĩ nhĩpêx nyw jarênh

Matêwre 26.41; Rômãn 8.1-11

16Nê kwa kêr ka mẽ amnhĩ to Tĩrtũm Karô wỳ kê mẽ amã mẽ ate amnhĩ nhĩpêx nyw jagjê ka mẽ axte ate amnhĩ nhĩpêx tũm kôt amnhĩ nhĩpêx hkêt nê. ãm mẽ ate amnhĩ nhĩpêx nyw kôt pix mã mãn amnhĩ nhĩpêx o ri apa. 17Tĩrtũm Karô kot amnhĩ nhĩpêxja nê mẽ pahte amnhĩ nhĩpêx tũmja wa kot axpên pyrãk kêt. Te wa kot axpên kutã amnhĩ xãm

ně wa pijapu pyrək. Jakamā kot puj mẽ pahte amnhĩ nhĩpêx tũm o amnhĩ nhĩpêx nê Tĩrtũm Karõ mã hprām xà hkõt amnhĩ nhĩpêx hkêt nê. 18No kot puj mẽ Tĩrtũm Karõ hkõt amnhĩ nhĩpêx nê ra jar pika ja kamā mẽ kot amnhĩ nhĩpêx kõt ri amnhĩ nhĩpêx kêt nê. Ra axtem mẽ pahte amnhĩ nhĩpêx nyw o amnhĩ nhĩpêx. 19Jar mẽ kot amnhĩ nhĩpêx tũmta mex kêt. Ra mẽ piitã mẽ kot ja pumunh mex.

Na htem htỳx ri hkwỳjê kamā hpijaàm kêt o pa.

Jaو mẽmyjaja hprõ kuhpa hã nhãm mēnijê ho amnhĩkati.

Nhũm mẽ hprõjaja mẽ mjên kuhpa hã nhãm mẽmyjê ho amnhĩkati.

Nẽ mẽmy hkwỳjaja axtem nê mẽmyjê hkwỳ ho amnhĩkati.

Nẽ mẽni hkwỳ haxwỳja axtem nê mẽnijê hkwỳ ho amnhĩkati.

20 Nẽ mẽ kãm mẽmoj mẽ hikukrêx japê htỳx o kãm Tĩrtũm kĩnh ja-kre.

Nẽ mẽmoj kaxyw ma wajaga hwỳr amnhĩ to pa.

Nẽ hkwỳjê kamā oprê ho ri pa.

Nẽ mẽmoj tã axpẽn kãm gryk pix nê.

Nẽ mẽmoj to axpẽn pê õxỳ nê.

Nẽ mẽmo mỳrapê axpẽn pê anhrà nê amỳm ahpỳnhã ri pa.

21 Nẽ mẽmoj tã axpẽn kamnhĩx rãhã ho ri pa.

Nẽ axpã nê mẽ grer kãm ri axpẽn kãm hpijaàm kêt o ri pa.

Ã na htem mẽ kot amnhĩ nhĩpêx tũm kõt amnhĩ nhĩpêx o ri mẽ pa xwỳnhjaja amnhĩ nhĩpêx anê. Ã mẽ kot amnhĩ nhĩpêx anhỳr xwỳnhjaja koja mẽ Tĩrtũm nhõ krĩ hwỳr gjêx kêt nê. Ra ixte mẽ amã ja jarênh tã pa axte mẽ amã harê. Mẽ ate hã ano htỳx rãhã ho ri apa kaxyw. 22No mẽ kot amnhĩ nhĩpêx nywja axtem na.

Tĩrtũm Karõ hkõt mẽ kot amnhĩ nhĩpêx nyw o amnhĩ nhĩpêx xwỳnhjaja na htem axtem kãm axpẽn kĩnh nê.

Nẽ hkĩnh nê ri hamakêtkati nê àmnhĩx ri axpẽn kõt pa.

Nẽ gryk tokyx anhỳr hkêt nê. Am axpẽn to mex pix o ri axpẽn kõt pa.

Nẽ tãm axpẽn nhĩpêx.

Nẽ kot mẽmoj tã amnhĩ jarênh xà hkõt tanhmã mẽmoj to.

23 Nẽ axpẽn mã kapêr mã hprĩ ho ri axpẽn mã kapêr.

Nẽ mẽmoj punuj piitã nê amnhĩ to htỳx o ri pa.

Ã na hte mẽ kot Tĩrtũm Karõ hkõt amnhĩ nhĩpêx o mẽ pa xwỳnhjaja Karõ nhỹ hã amnhĩ nhĩpêx nyw o amnhĩ nhĩpêx anhỳr o pa. Jaو mãanēn Mojes kapêr kwỳm ri amnhĩ nhĩpêx hkêt nê. Jakamā koja mẽhõ mẽ pahte amnhĩ nhĩpêx nyw nê tanhmã mẽ pahkurê hto hkêt nê. 24Tã mẽ pahpê Jejus Kris kwỳ jakamã na pu mẽ pahte amnhĩ nhĩpêx tũmja nhĩpêx o te mẽ pahte amnhĩ nê hpĩr pyrà nê axte hkõt amnhĩ nhĩpêx kêt nê.

**Tirtũm Karõ hkõt mẽ pahte amnhĩ nhĩpêx ã
mẽ pamã karõ**

Epes 4.23-24; Korosẽ 3.10

25Tã ra Tirtũm Karõ kot mẽ pahto hkra jakamã kwa kêr pu mẽ ãm kõt pix mã amnhĩ nhĩpêx nyw o amnhĩ nhĩpêx o ri papa. 26Kot puj mẽ ã amnhĩ nhĩpêx anẽ hãmri nẽ mẽmoj tã mẽ pahkwỳjê mã amnhĩ to jarkrar o ri papa hkêt nẽ. Kot puj mẽ ã amnhĩ nhĩpêx anẽ nhũm mẽ pakamã gryk nẽ. Jakamã kêr pu mẽ ã amnhĩ nhĩpêx anhỹr o ri papa hkêt nẽ.

Mẽ pahte tanhmã axpẽn to ajuta hto hã mẽ pamã karõ

Matêwre 18.15-17; Rukre 17.3-4; Sikũn Tesarõn 3.14-15; Xiakre 5.19-20

6 1-3Kwa ixkrãmnhwỳjaja. Mẽ apê Tirtũm Karõ hkõt amnhĩ nhĩpêx o ri mẽ apa xwỳnhjaja. Kojã Kris kõt akwỳjê hõ tanhmã amnhĩ tomnuj to ka mẽ ja hã omu nẽ ã amnhĩ nhĩpêx anhỹrja nẽ kãm akapêr. Nom kêr ka mẽ kamã agryk kamã kãm tanhmã nẽ hkêt nẽ. ãm kãm akapêr mã aprĩ ho kãm akapêr nẽ akupỹm tãm ãm. Nom kwa kêr ka mẽ amnhĩ pumunh mex nẽ uràk nẽ ã amnhĩ tomnuj anhỹr kêt nẽ.

Kot ka mẽ atõ ã kot amnhĩ nhĩpêx anhỹr ã omu nẽ ãm omu nẽ nẽ tanhmã kãm akapêr to hkêt nẽ. Nẽ ajamexpêr o:

—Tk. Kwãr mãmrĩ ã amnhĩ nhĩpêx anẽ. Pa ja nẽ tanhmã kãm ixkapêr to hkêt nẽ. Kurom ixte amnhĩ nhĩpêx mex o ri ixpa kẽnã.



Karatas 6.1-3

13Te mẽ kot finat Mojes kapër kôt ri amnhĩ nhĩpêx pyræk tâ no na htem ã amnhĩ nhĩpêx anhÿr kêt nê. Ra mẽ kot amnhĩ jakàr tâ no ãm Mojes kapër piitã hkôt amnhĩ nhĩpêx hkêt nê. ãm hkwỳ hkôt pix mã amnhĩ nhĩpêx o pa. Nom kot kaj mẽ ama nê mẽ uræk nê amnhĩ jakà nhũm mẽ ja hã mẽ apumu nê hkĩnh nê. Nê ma ri mẽ hkwỳjê mã mẽ atã amnhĩ to jarkrar o ri pa nê mẽ kãm:

—E Karatas nhõ xwÿnhjaja na pa prem mẽ kot amnhĩ my kwrỳt kà jakàr ã mẽ kãm karõ nhũm mẽ inhma nê mẽ pahpyrà nê ã amnhĩ nhĩpêx anê. Anê.

14No pa na pa hte ã mẽ kãm mẽmoj tâ karõ anhÿr o ri ixpa hkêt nê. ãm Tĩrtũm kot mẽ pahto hkra kaxyw mẽ panhõ Pahihti Jejus Kris kot mẽ nê htykja pix na pa hte mẽ kãm harê. Ra kot inhnê htyk jakamã te pa ixte kuri ijêť nê ixtyk pyræk. Jakamã ra jar pika ja kamã mẽ kot amnhĩ nhĩpêxja te ixpê htyk nê hapêx pyræk pa axte hkôt amnhĩ nhĩpêx kêt pyræk.

15No mẽ kot amnhĩ my kwrỳt kà jakàr xwÿnhjaja nê mẽ kot amnhĩ jakàr kêt xwÿnhjaja na hte Tĩrtũm ja hã mẽ omu nê ãm mẽ omu. ãm mẽ pahte amnhĩ nhĩpêx nyw o amnhĩ nhĩpêx o ri papaja pix na kãm hprãm. 16Kot kaj mẽ ã amnhĩ nhĩpêx anhÿr o ri apa nê apê Tĩrtũm kra mex nhũm mẽ ato mex rax nê. Nê mẽmoj to mẽ akutã nojarêť rãhã nê. Ka mẽ axãmnhĩx ajamakêtkati nê ri apa ho apa.

17Nê na prem Kris ã ixtak rax nê nhũm ixkatut ã ixtak xà arĩ rãhã nê pa hte hã ixpa. Ixte Jejus Kris mã tanhmã amnhĩ nhĩpêx to xwÿnh ã ixto amnhĩrĩť xà na. Jakamã kê mẽhõ axte Jejus kot mẽ awÿr inhmênh ã tee ri ixpumu nê tanhmã hã ixkukjêť to hkêt nê.

18E ixkrãmnhwÿjaja. Kê Pahihti Jejus Kris mẽmoj to mẽ akutã nojarêť nê mẽ ato mex rãhã ho pa. Nà koja mẽ ato anê.

ãm ja pix na hapêx. Ixpê Pawre na pa ã mẽ amã kagà nhĩpêx nê mẽ awÿr mẽnh anê.

Epes

Pawre kot Epes kãm Jejus kôt hkwỳjê hwỳr kagà nê mênh

Pawre na pre kagàja nhípêx. Jejus nhỹ hã hkrajê jahkre o pa xwỳnhjê hõ na pre. Jakamã na pre krĩ pê Epes kãm Kris kwỳjê hwỳr hipêx nê kumê. Epes nhõ xwỳnhjaja Ijaew kêt xwỳnh na pre mẽ. Nhũm pre ra Pawre ma mẽ hwỳr mỗ nê mẽ kãm Tĩrtũm kapêr jarênh o ri mẽ hkôt pa nhũm mẽ hkwỳjaja kuma nê Jejus kôt amnhĩ xunhwỳ.

Na pre hte Pawre ma krĩ piitã hkôt ri Tĩrtũm kapêr jarênh o ri mẽ hkôt pa. Hãmri nhũm mẽ hkwỳjaja Jejus ã unê nê krĩ pê Rõm wỳr kumê nê kamã haxà nhũm arĩ hkrĩ ho hkrĩ. Nom amarĩ hkrĩ hkêt nê. Na pre hte mẽ kot hwỳr mrar xwỳnhjê mã Tĩrtũm kapêr jarê. Nê krĩ hkwỳ hkôt Jejus kôt hkwỳjê mã kagà nhípêx nê mẽ hwỳr kurê. Jakamã na pre Epes kamã hkwỳjê hwỳr kagàja nhípêx nê mẽ hwỳr kumê.

Nê kagàja kamã hprĩ hã mẽ kot Jejus kôt amnhĩ xunhwỳr xwỳnhjê kot tanhmã amnhĩ nhípêx to ho pa hã mẽ kãm karõ. Ra mẽ kot hkôt amnhĩ xunhwỳr jakamã te mẽ htpixi nê ri mẽ pa xwỳnh kot amnhĩ nhípêx pyræk o amnhĩ nhípêx o pa hã mẽ kãm hã karõ. Nê jar pika hkôt te mẽ kêp Kris nhĩ pyrà nê pa hã mẽ harê. ã na pre Pawre mẽ kãm mẽmoj jarê nê hã kagà anê nê mẽ kãm:

1 ¹Pa Epes kãm Kris kôt ixkwỳjaja. Xà mẽ amex na ka mẽ apa? E ot pa mẽ awỳr kagà nhípêx nê kumê. Ixpê Pawre na pa hipêx nê mẽ awỳr kumê. Ixpê Jejus Kris nhỹ hã mẽ ahkre ho mẽ ixpa xwỳnh na pa. Tĩrtũm kãm hprãm xà hkôt. Tã pa ã mẽ awỳr kagà nhípêx nê mẽ awỳr mênh anê. Mẽ apê Tĩrtũm krajê hwỳr. Na ka xep htem Jejus Kris kôt amnhĩ nhípêx mex o ri apa. ãm hãmri na ka htem ã amnhĩ nhípêx anê.

²E kê Měpahpãm Tĩrtũm mẽ Pahihti Jejus Kris wa mẽ ato mex nê mẽmoj to mẽ akutã nojarêr rãhã ho pa. Ka mẽ wa ỹ hã axàmnhĩx ajamakêtkati nê akĩnh pê tanhmã amnhĩ nhípêx to ho ri apa.

Tĩrtũm kot mẽ pakukamã amnhĩm mẽ parênh ã harênh

Rõmãn 8.28-30; Wam Korõt 1.21-22; Wam Tesarõn 1.4;

Sikũn Tesarõn 2.13; Wam Pêtre 1.2

³Na hte mẽ panhõ Pahihti Jejus Kris nhĩpêêxà Tĩrtũmja mẽ pahto mex rãhã ho pa. Mẽ pahpê Kra Kris kwỳ hã mẽ pahpumunh kõt tanhmã mẽ pahto mex to ho pa. Ra wa Karõja mẽ pahkarõ mã gjêx jakamã te ra mẽ pahte kaxkwa kamã wa kuri mẽ pamex nẽ mẽ papa pyrãk. Tã ra mẽ pahte jar pika ja kamã paxãmnhĩx pajamakêtkati mẽ pamex nẽ ri papa jakamã kwa kêr pu mẽ amnhĩm ãm mex o mex ã harênh rãhã nẽ.

⁴⁻⁵Amnepê mã kormã mẽmoj kêt ri na pre Tĩrtũm mẽ pakukamã amnhĩm mẽ parê. Kris kukwak ri amnhĩm mẽ parê. Tã mẽmo kaxyw na pre ã mẽ pakukamã mẽ parênh anê? ãm mẽ pahte kapêr kõt pix mã amnhĩ nhĩpêx o ri papa kaxyw. Jao tãm kot amnhĩ nhĩpêx pyrã nẽ noo mã tãm amnhĩ nhĩpêx o ri papa. Kãm mẽ pajapê jakamã na pre mẽ pakukamã tanhmã hamaxpêr to nẽ hamaxpêr o:

—Nà Ixkra Jejus Kris koja nhỹrmã ma mẽ hwỳr wrỳ nẽ mẽ nê ty. Tã mẽ kot mẽ nê htyk ã harênh mar nẽ amnhĩ kaxyw hkõt hamaxpêr xwỳnhjaja kot paj mẽ ho ixkra. Nà kot paj ã mẽ hipêx anê. Anê.

⁶No mẽ papajaja tanhmã mẽ pahte amnhĩ nhĩpêx mex to hã mẽ pahpumunh kõt na pre ã mẽ pahto hkra hã mẽ pajarênh anhỹr kêt nẽ. ãm Kra Kris pix kukwak ri na pre ã mẽ pajarênh anê. Kãm Kra japê jakamã na hte mẽmoj to mẽ pahpê hkwy hã mẽ pakutã nojarêr rãhã ho pa. Jakamã na pu htem amnhĩ tã kãm mex o mex ã harênh o papa.

⁷⁻⁸Na pre Krisja mẽ panê htyk o Tĩrtũm mã mẽ pahte amnhĩ tomnuj pãnhã amnhĩre. Nhũm Tĩrtũm ã kot amnhĩ nhĩpêx anhỹr ã omunh xà hkõt mẽ pahte hkõt amnhĩ xunhwỳr xwỳnhjê nẽ mẽ pahte amnhĩ tomnuj rênh pa. Koja aa tanhmã hã mẽ pahto hkêt nẽ. Pu mẽ axte amnhĩ amnhĩ tomnuj o papa hkêt nẽ. Hêxta waa nẽ. Kãm mẽ pajapê htỳx kumrêx jakamã na pre ã mẽ pahto mex rax anê. ãm mex o mex nẽ àhpumunh o àhpumunh.

⁹⁻¹⁰Amnepêm na pre hamaxpêr o:

—Nà na pa ra kaxkwa ho ixkato nẽ kamã mẽmoj piitã ho ixkato. Nẽ pika ho ixkato nẽ kamã mẽmoj piitã ho ixkato. Tã koja nhỹrmã Ixkra Kris mẽmoj piitã ho amnhĩptàr o pa. Kaxkwa kamã nẽ pika piitã hkõt mẽmoj piitã ho amnhĩptã nẽ tapxipix inhỹ hã kêp mẽõ Pahihti. Koja ã amnhĩ nhĩpêx anhỹr xà hã arĩgro kato nhũm ã amnhĩ nhĩpêx o pa anê. Nà ja na inhmã hprãm. Anê.

Ã Tĩrtũm amnhĩ kukamã hamaxpêr anhỹrja kõt na pre Kris kêp mẽ panhõ Pahihti hã harê. Tã nhỹrmã mẽ pahto amnhĩptàr kaxyw koja mẽ pakaxyw ãm. Amnepêm ri mẽ pa xwỳnhjê mã kot kormã ja ho amnhĩrĩt kêt tã ra jarãhã mẽ pamã ho amnhĩrĩt.

¹¹Kris kukwak ri na pre amnhĩm mẽ parê. Ra kot mẽ pakukamã mẽ pahťã amnhĩ jarênh xà hkôt. ¹²Tã mẽ ixpê Ijaew kwỳ kumrêx mẽ ixte Kris kôt amnhĩ xunhwỳr jakamã koja mẽ piitã mẽ inhỹ hã Tĩrtũm mã mex o mex ã harênh o ri pa.

¹³Nê mẽ kajaja na ka prem mẽ ixpyrà nê Tĩrtũm kapêr ma nê ajaxwỳja hkôt amnhĩ xunhwỳ. Âm hãmri na Tĩrtũm kapêrja. Tã ka prem ama nê hkôt amnhĩ xunhwỳ. Hãmri nhũm amnhĩ tã mẽ apumu nê kot inhĩpêx pyrà nê mẽ anê mẽ ate amnhĩ tomnuj piitã rênh pa nê mẽ ato hkra. Hãmri nê mẽ awỳr Karõ rê nhũm mẽ awỳr wrỳ nê mẽ akarõ mã agjê nê mẽ akamã pa ho pa. Kris kukwak ri na pre mẽ awỳr kurê. Amnepê mã na pre mẽ pakukamã hamaxpêr o:

—Koja mẽ Ixkra hkôt amnhĩ xunhwỳ pa ja hã mẽ omu nê mẽ ho ixkra nê mẽ hwỳr Ixkarõ rê. Hãmri nhũm mẽ hkarõ mã agjê nê mẽ kamã hkrĩ ho hkrĩ.

¹⁴Anhỹr jakamã na pre mẽ pahwỳr kurê nhũm mẽ pahwỳr wrỳ nê mẽ pahwỳr agjê nê mẽ pakamã hkrĩ ho hkrĩ. Pu mẽ ja hã amnhĩ pumu nê pajamaxpêr o:

—Nà ra Tĩrtũm kot ixwỳr Karõ mênh jakamã na ixkarõ hwỳr axà nê kamã hkrĩ ho hkrĩ. Tã koja ra kot mẽ ixtã amnhĩ jarênh xà hkôt ja hã ixto mex nê. Ra kot ixto hkra kênã. Jakamã koja nhỹrmã ma amnhĩ wỳr ixto api pa kuri inhmex kumrêx nê ixpa ho ixpa. Hãmri nê kukwak ri axte tanhmã amnhĩ tomnuj to ho ri ixpa hkêt nê. Anê.

Jakamã koja mẽ piitã ã kot mẽ ho mex anhỹr ã amnhĩ tã kamã ama nê amnhĩ tã omu nê kãm mex o mex ã harênh rãhã ho pa.

Pawre kot Epes nhõ xwỳnhjê ho Tĩrtũm wỳr ã harênh

Piripos 1.9; Korosê 1.9-12; Wam Tesarõn 5.23;

Sikũn Tesarõn 1.11, 2.16; Eprêw 13.20

¹⁵Nê na ka xep htem amnhĩ kaxyw Kris kôt ajamaxpêr tỳx pê amã Tĩrtũm krajê piitã mẽ hkĩnh o mẽ ho mex o apa. Na pa pre mẽ ajarênh ma nê ixkĩnh tỳx nê. ¹⁶⁻¹⁸Nê xatã mẽ ato Tĩrtũm wỳr o ri ixpa nê mẽ ato hwỳr o:

—Pa Mêinhĩpêxã maati Tĩrtũm. Nà amex o amex. Ka na ka pre mẽ ixwỳr mẽ inhõ Pahihtĩ Jejus Krisja mẽ nhũm mẽ ixwỳr wrỳ nê hprĩ hã mẽ inhmã ate tanhmã amnhĩ nhĩpêx to ho apa hã ato amnhĩrĩt. Tã Epes kãm akrajaja na xep htem akôt pix mã ri amnhĩ nhĩpêx rãhã ho ri pa. Âm hãmri na htem ã amnhĩ nhĩpêx anê.

—Nê kwa Tĩrtũm. Kê Akarõ tanhmã mẽ hkrã hto kê mẽhprĩ hã akapêr mar tỳx rãhã ho pa. Jao ra ate mẽ ixkukamã mẽ ixtã tanhmã mẽ ixto mex to hã amnhĩ jarênhja kê mẽ kãm hamaxpêr tỳx rãhã ho pa. Nê ate nhỹrmã mẽ ixpê akrajaja mẽ ixpiitã tanhmã mẽ ixto mex to jarênhja kê mẽ kãm hamaxpêr tỳx pê hkĩnh rãhã ho pa ho pa.

19-20—Nê kê mẽ axàhpumunh o axàhpumunh ã ate akupỹm Akra Kris o htír ã apumunh mex nê Tĩrtũm. Na ka pre axàhpumunh xà ho akupỹm ho htír nê ma akupỹm anhõ krĩ hwỳr ho api nê amnhĩ nhĩhkõ hã ỹr nhũm arĩ hkrĩ ho hkrĩ. Apyrà nê kot mẽ ixto amnhĩptàr kaxyw. Æ axàhpumunh xà htỳx kot anhỳr. Tã kê akrajê piitã ja hã apumu nê axàhpumunh tỳx o ate tanhmã mẽ ixto ajuta hto ho apa hã apumu.

Anhỳr o na pa hte mẽ ato hwỳr o ri ixpa.

21 Nê Krisja àhpumunh tỳx o mẽkarõmnuti piitã hakrenh. Nê hihtỳx o mẽ hakrenh jakamã krĩ nhõ xwỳnhjê mã te mẽ àhpumunh tỳx kêt pyràk o na htem htỳx ri amnhĩ nhĩpêx o pa pyràk. Nê Krisja hihtỳx o pika piitã hkõt pahi piitã mẽ hakrenh par kumrêx. Nê hihtỳx o kot pika piitã hkõt mẽmoj piitã mẽ hakrenh par. Jakamã mẽhõ koja we tanhmã kot amnhĩ nhĩpêx to hã kãm karõ rỳ kãm hamaxpêr gõ? Nà amrakati kumrêx. Ra kot ã amnhĩ nhĩpêx anhỳr rãhã nê pa ho pa xwỳnh kênã. Nê hihtỳx o hihtỳx rãhã nê pa ho pa xwỳnh. Nê àhpumunh o àhpumunh rãhã nê pa ho pa xwỳnh. Nê hihtỳx o kot jar pika ja kõt mẽ pajakrenh par nê hihtỳx o Tĩrtũm nhõ krĩ kamã mẽ mẽmoj piitã hakrenh par. Tã koja mẽmoj piitã ho amnhĩptàr rãhã htír tũm nê pa ho pa.

Kris te kêp mẽ pahkrã pyràk ã harênh

Rõmãn 12.4; Wam Korõt 12.12; Epes 4.16; Korosê 3.25

22 Na pre Tĩrtũmja Kra Kris nhĩhkram mẽmoj piitã haxàr pa. ỹ hã kot nhỹrmã ho amnhĩptàr o pa kaxyw. Jakamã kot mẽ pahto amnhĩptàr xwỳnh ã kêp mẽ panhõ Pahihti. Nê te kêp mẽ pahkrã pyràk. Nê mẽ papajaja te mẽ pahpê ã pyràk jakamã na pu htem hkõt ri amnhĩ nhĩpêx o papa. 23 Na hte mẽ panhĩa mẽ pahkrã kamã mẽ pajamaxpêr xà hkõt tanhmã amnhĩ nhĩpêx to. Ja pyrã nê na pu htem mẽ pahkrã pyràk xwỳnh Krisja kapêr ma nê hkõt tanhmã ri amnhĩ nhĩpêx to ho ri papa.

Koja mẽhõ ãm hkrã pix nê ã hkêt nê pa hãmri nê mex kêt nê. Na htem hkrã nê mããnên ã nê pa nê mex nê. Ja pyrã nê na hte Kris mẽ pahte hkõt amnhĩ nhĩpêx o papa hã mẽ pahpumu nê hkĩnh nê mex nê pa. Pu mẽ pajaxwỳja hkõt ri amnhĩ nhĩpêx ã amnhĩ pumu nê pahkĩnh nê pamex nê papa ho papa.

Tanhmã Tĩrtũm kot mẽ pahto hkra hto ã harênh

Wam Korõt 6.11; Xitre 2.11-3.7

2 1 Nê amnepê mã na pu pre htem Tĩrtũm kàx ã tanhmã amnhĩ tomnuj to ho ri papa. 2 Nê jar mẽ kot amnhĩ nhĩpêx o amnhĩ nhĩpêx. Jao amnhĩ tomnuj pix o ri papa. Nê mẽkarõmnuti nhõ pahi Satanasti kapêr kõt pix mã ri amnhĩ nhĩpêx rãhã nê. Na pre hte tanhmã mẽ pahkõt mẽ pahto ho pa. Mẽ pahte tanhmã amnhĩ tomnuj to kaxyw mẽ pamã mẽ

pajamxpër punuj jagjê. Pu mẽ amnhĩ tã omunh kêt tã ÿ hã amnhĩ tomnuj o papa. Satanastija kêp mẽ kot Tĩrtũm kapêr kwỳm ri amnhĩ nhĩpêx o mẽ pa xwỳnhjê nhõ pahihtĩ na. Tã pu pre htem pahtỳx ri hkôt amnhĩ nhĩpêx pix o ri papa. ³Mẽ pahpiitã tanhmã amnhĩ tomnuj to hprãm xà hkôt pix mã tanhmã amnhĩ nhĩpêx to. Nẽ mẽmoj punuj kukamã pajamxpêr nẽ ra hkôt ã amnhĩ tomnuj anẽ. ã na pu prem mnhĩ nhĩpêx anẽ nhũm Tĩrtũm ja hã mẽ pahpumu nhũm ja kãm mex kêt nẽ. Jakamã nhũm tee ri mẽ pakukamã hamaxpêr nẽ hamaxpêr o:

—Hêxta waa nẽ. Na htem ixkapêr kwỳm ri tanhmã amnhĩ tomnuj to rãhã ho pa. ã mẽ kot amnhĩ nhĩpêx anhỳr o mẽ pa xwỳnhjaja koja mẽ nhỹrmã ixri htĩr tũm nẽ mex nẽ pa ho pa hkêt nẽ. Ixkĩnhã mẽ kot amnhĩ tomnuj xwỳnh jakamã tanhmã kot mẽ amnhĩ to nẽ ixri htĩr tũm nẽ pa ho pa? Nà mẽ kot amnhĩ tomnuj mỳrapê koja mẽ nhỹrmã ma amnhĩ xà htỳx kamã hamak tũm xàta wỳr ma hapêx pa. Nà koja mẽ anẽ. Hêxta waa nẽ. Inhmã ma hwỳr mẽ pa prãm kêt tã ra ma hwỳr mẽ pa kaxyw.

Anhỳr o hamaxpêr. ⁴⁻⁵Nẽ anepêem kormã mẽ pahte amnhĩ tomnuj o papata ã te mẽ pahte amnhĩ xà htỳx kamã pajamak tũm xà hwỳr pryta ã mẽ papa pyræk. Nom Tĩrtũm kãm mẽ pajapê nẽ mẽ pakamã ukapřĩ jakamã na pre mẽ pahto mex rax nẽ. Nẽ akupỳm Kris o htĩrja ri te ra mẽ pahte amnhĩ xà htỳx kamã pajamak tũm xà hwỳr pryta nẽ mẽ pahto ujanãr pyræk o mẽ panhĩpêx. Mẽ pakamã ukapřĩ nẽ kãm mẽ pajapê ho ã mẽ panhĩpêx anẽ. Amarĩ ã mẽ panhĩpêx anẽ nẽ mẽ panê mẽ pahte amnhĩ tomnuj rênh pa. Jakamã kot puj mẽ pahte Kra hkôt amnhĩ xunhwỳr xwỳnhjaja nhỹrmã amnhĩ xà htỳx kamã mẽ hamak tũm xàta wỳr papa hkêt nẽ. ⁶Ra Tĩrtũm akupỳm Jejus Kris o htĩr jakamã te ra Jejus kôt akupỳm mẽ pahpê hkwỳjê ho mẽ pahtĩr pyræk. Jakamã te ra õ krĩ kamã ihkõ hã mẽ pamex kumrêx nẽ pahkrĩ pyræk. ⁷Mẽmo kaxyw na pre Tĩrtũm kãm mẽ pajapê hkôt ã mẽ pahwỳr Jejus Kris mẽnh nhũm mẽ panê htyk anẽ? Nà kãm mẽ pajapê htỳx ã mẽ pahte pahpřĩ hã amnhĩ tã omunh kaxyw na pre ã mẽ pahwỳr mẽnh anẽ. Tã kot puj mẽ nhỹrmã kaxkwa kamã hwỳr pøj nhũm mẽ pamã amnhĩ jarênh o:

—E mẽ amnẽ ixpumu. Inhmã mẽ ajapê htỳx jakamã na pa pre mẽ akamã ixukapřĩ xàj ma mẽ awỳr Ixkra Jejus Krisja mẽ nhũm amnhĩ grõnh kôt mẽ awỳr wrỳ nẽ mẽ anê ty. Inhmã mẽ ajapê htỳx jakamã na pa pre ã mẽ awỳr mẽnh nhũm mẽ anê htyk anẽ. Inhmã mẽ apê ixkrajê japê xàj na pa pre ã mẽ ato mex rax anẽ.

Anhỳr o mẽ pamã kapêr hãmri nẽ mẽ pahto mex rãhã ho pa. ⁸⁻⁹Xà na pu prem pahpê hkra hprãm xàj amnhĩ krã hkôt mẽ papamjaja kãm tanhmã amnhĩ to mex to nẽ kãm:

—E kwa Tĩrtũm. Na pa ã amnhĩ to mex anẽ nẽ ã amnhĩ to mex anẽ. Jakamã kwa ja hã ixpumu nẽ ixto akra nà?

Anhÿr o na pu prem amnhĩ to kuwÿ? Nà na pu prem ã amnhĩ to hwÿr anhÿr kêt nê. Na pu prem amnhĩ kaxyw hkôt pajamexpêr nê hkôt amnhĩ xunhwÿ nhũm ja pix ã mẽ pahpumunh kôt mẽ panê mẽ pahte amnhĩ tomnuj rê nê mẽ pahto hkra. Kãm mẽ pajapê nê mẽmoj to mẽ pakutã nojarêt rãhã ho pa jakamã na hte ã mẽ panhĩpêx mex anê. Jakamã na pu htem amnhĩ tã omu nê pajamexpêr o:

—Nà na xep hte Tĩrtũmja mẽ pahte tanhmã amnhĩ nhĩpêx to ho papa hã mẽ pahpumunh kôt mẽ pahto hkra hkêt nê. ãm mẽ pahte amnhĩ kaxyw kãm pajamexpêr ã mẽ pahpumunh kôt pix mã na hte mẽ pahto hkra. Anê.

¹⁰Nê Tĩrtũm tapxipix na hte tanhmã mẽ pahto pu mẽ amnhĩ to mex rãhã ho papa. Nom kormã kot mẽ pahto hkra hkêt ri na pu prem ã amnhĩ nhĩpêx anhÿr kêt nê. Tã Jejus Kris kôt amnhĩ xunhwÿ nhũm Tĩrtũm ja hã mẽ pahpumu nê mẽ pamã mẽ pahte amnhĩ nhĩpêx nyw jagjê pu mẽ ÿ hã tãm amnhĩ nhĩpêx o ri papa. Amnepêm tanhmã kot mẽ pakukamã hamexpêr to xà hkôt. No na hte tanhmã mẽ pahte amnhĩ krã hkôt amnhĩ nhĩpêx to hã mẽ pahpumunh kôt mẽ pahto hkra hkêt nê.

Tĩrtũm krajaja te kot axpên to htõ nê htõx pyrãk

Karatas 3.28; Korosê 1.21-23

¹¹E mẽ apê Ijaew kêt xwÿnhjaja. Na ka htem mẽ akatorxà nhõhy rũm ajapõj hãmri nê mẽ ixpê Ijaew pyrã nê amnhĩ my kwrÿt kà jakàr kêt nê. Jakamã na pre ixkwÿjaja mẽ akurom amnhĩ jakàr ã amnhĩ to jarkrar o ri pa nê amnhĩ jarênh o:

—Ra mẽ ixte amnhĩ my kwrÿt kà jakàr ã mẽ ixpumunh kôt na hte Tĩrtũm mẽ ixto hkra. Tã Ijaew kêt xwÿnhjaja kot mẽ ixkĩnhã amnhĩ jakàr kêt jakamã mẽ kêp hkra hkêt. Nê mãänên mẽ kêp mẽ pahkwÿ hkêt.

Anhÿr o mẽ ajarênh o pa. ¹²ãm hãmri na prem mẽ apê mẽ ixkwÿ hkêt ã mẽ ajarê. Na pa prem mẽ akurom amnhĩ my kwrÿt kà jakà nê mẽ akurom Kris kamã ijamak o ri ixpa. Jakamã nhũm Tĩrtũm kot mẽ ixto mex ã amnhĩ jarê pa mẽ mẽ apyrã nê tee ri amnhĩ kukamã ijamexpêr o ri ixpa hkêt nê. Nê mẽ akurom amnhĩ kaxyw Tĩrtũm mã ijamexpêr. Nà ãm hãmri na prem mẽ apê mẽ ixkwÿ hkêt ã mẽ ajarê. ¹³Te Tĩrtũm kàx ã ri mẽ apa pyrãk tã ka mẽ arĩ ã amnhĩ nhĩpêx anhÿr kêt nê. Jejus Kris kot mẽ panê htyk nhũm mẽ ate hkôt amnhĩ xunhwÿr jakamã ra mẽ apê hkwyÿ. Jao arĩ hkàx ã ri apa hkêt nê. Te mẽ ixpê Ijaew kwÿ pyrã nê hpãnhã kuri ra ri apa pyrãk. ¹⁴Jakamã na pu htem Kris kukwak ri ra axpên nhĩpêx nyw o axpên nhĩpêx o ri papa. Mẽ ixpê Ijaewjaja nê mẽ apê Ijaew kêt xwÿnhjaja na pu htem te ra ixkre tipxi kamã ri papa pyrãk. Nom amnepêm na pu prem ã axpên nhĩpêx anhÿr kêt nê. Mẽ pahte amnhĩ nhĩpêx tũmja ahpÿnhã na pre. Na pu prem pamã axpên

kurê nê axpên kàx ã ri papa. Nê nhÿri axpên pumu nê te pahte axpên pumunh kêt pyrã nê nhãm parit o ri mra. Tã nhũm Kris mẽ panê htyk o mẽ pahte amnhĩ tomnuj piitã hpãnhã amnhĩrer pa. Mẽ ixpê Ijaew nê mẽ apê Ijaew kêt xwÿnhjaja. Nê htyk o te ra kot mẽ pahte axpên nhõrkwÿ hwÿr axpên wÿr o papa pyrãk. Jao mẽ pamã axpên kurê ho hapêx nê hpãnhã tãm axpên kaxyw mẽ paxunhwÿ pu mẽ hpãnhã axpên to mex rãhã ho ri papa. ¹⁵Amnepêm Mojes kot Tirtũm nhÿ hã mẽ ixpê Ijaew mẽ ixte tanhmã amnhĩ nhĩpêx to ho ixpa hã karõja. Na pa prem mẽ apê Ijaew kêt xwÿnhjaja mẽ ate Tirtũm kõt amnhĩ nhĩpêx kêt ã mẽ apumu nê mẽ akamã inhgryk nê. Nê axpên mã mẽ ajarênh o:

—Nã mẽ pahkĩnhã mẽ kot Mojes kapêr kõt amnhĩ nhĩpêx kêt jakamã koja Tirtũm mẽ ho hkra hkêt nê.

Anhÿr tã nhũm Kris mẽ pahwÿr wrÿ nê mẽ pahpiitã mẽ panê htyk o mẽ pahte hkõt amnhĩ xunhwÿr ã mẽ pahpumunh kõt pix mã mẽ pahto Tirtũm kra. Jakamã pa mẽ axte mẽ ate Mojes kapêr kõt amnhĩ nhĩpêx kêt ã mẽ apumunh kõt mẽ apê Tirtũm kra hkêt ã mẽ ajarênh kêt nê. Hãmri nê mẽ ixpê Ijaew nê mẽ apê Ijaew kêt xwÿnhjaja pu mẽ axte axpên kãm pagryk o ri papa hkêt nê. Ra te ixkre tipxi kamã mẽ pahte axpên kõt ri papa pyrãk.

¹⁶Kris na pre pĩ kahpa hã mẽ panê htyk o ã mẽ panhĩpêx anê nê mẽ pahte axpên kõt amnhĩ nhĩpêx o papa kaxyw mẽ paxunhwÿ. Nom Tirtũm jamaxpêr xã hkõt ã mẽ panhĩpêx anê. Jakamã na pu htem arĩ pamã axpên kurê ho papa hkêt nê. ¹⁷Na pre Kris mẽ pahwÿr wrÿ nê ã mẽ panhĩpêx anê. Mẽ apê Ijaew kêt xwÿnhjaja mẽ ate kormã Tirtũm kapêr mar kêt xwÿnhjaja nê mããnên mẽ ixpê Ijaew mẽ ixte kapêr mar mex xwÿnhjaja nhũm pre akupÿm tãm mẽ pahte axpên kõt amnhĩ nhĩpêx o papa kaxyw mẽ paxunhwÿ. ¹⁸Hãmri nhũm Tirtũm mẽ pahwÿr amnhĩ Karõ rê nhũm mẽ pahkarõ mã agjê. Kris kukwak ri pix mã mẽ pahwÿr kurê pu mẽ ÿ hã paxãmnhĩx ri kãm tanhmã amnhĩ jarênh to ho ri papa. ¹⁹Hãmri nê te mẽ pahpê nhãm axpên kaxyw mẽ urojê pyrã nê axpên kàx ã ri papa hkêt nê.

Te mẽ pahpê Tirtũm nhõrkwÿ pyrãk ã mẽ pajarênh

Wam Korit 3.16; Sikũn Korit 6.16; Wam Pêtre 2.5

²⁰Nê mẽ pahpê Jejus kwÿ jakamã te mẽ pahte ixkre tipxikamã ri papa pyrãk. Nê te mẽ pahpê ixkre nhĩpêx mex pyrãk. Nê Kris te kêp ixkre hkrax mã kuhê xã nê kÿxpê kãm nõr xã maatija pyrãk. Nê mẽ kot Jejus nhÿ hã mẽ ahkre xwÿnhjaja nê mẽ kot Tirtũm nhÿ hã kapêr o ri mẽ pa xwÿnhjaja te mẽ kêp ixkre nhõkwa êja pyrãk. Nê mẽ papajaja te mẽ pahpê ixkre nhĩmõk ã põja pyrãk. ²¹Ixkre mã kuhê xã nê kÿxpê kãm nõr xã maati kukwak ri pix mã na hte õkwa ê nê hã põja kÿxpê mex nê

axpën tâ harir. Ja pyrà nê ãm Kris kukwak ri pix mã na pu htem te ixkre tipxi kamã ri papa pyræk o axpën nhîpêx mex o ri papa. Te mẽ pahpê mẽ kot ixkre rax kumrêx nhîpêx o mör nhũm muxre nê ãm xwÿnhhta pyræk.

²²Na htem amnhĩm òrkwÿ nhîpêx nê hipêx pa nê hwÿr agjê nê kamã pa ho pa. Ja pyrà nê na hte Tĩrtũm Karõja mẽ pahpê hkrajê karõ mã agjê nê mẽ pakamã pa ho pa. Te mẽ pahpê Tĩrtũm nhõrkwÿ pyræk. Mẽ ixpê Ijaew nê mẽ apê Ijaew kêt xwÿnhjaja Tĩrtũm mã te mẽ pahpê òrkwÿ pyræk.

Pawre kot Ijaew kêt xwÿnhjê mã mẽmoj to amnhĩrit ã harênh

Rõmãn 15.14-21; Korosẽ 1.24-30

3 ¹Tã te mẽ pahpê Tĩrtũm nhõrkwÿ pyræk jakamã na pa hte jar mẽ hagjênh xà kamã mẽ ato hwÿr rãhã ho ixkrĩ. Na pa pre hte ma mẽ apê Ijaew kêt xwÿnhjê hwÿr ixpa nê ixprĩ hã mẽ amã Jejus kapêr jarênh o ri mẽ akõt ixpa. Mÿrapê na prem ixpynê nê ijaxà pa arĩ jar ixkrĩ ho ixkrĩ. Nom arĩ amnhĩ kaxyw Tĩrtũm mã ijamaxpêr tÿx pê mẽ ato hwÿr rãhã ho ixkrĩ. ²Na pre kãm ijapê hã mẽ apê Ijaew kêt xwÿnhjê kaxyw ixãm. Ma ixte ri mẽ akõt ixpa nê mẽ amã kapêr jarênh o ri mẽ akõt ixpa kaxyw. Ra mẽ ate ja hã ijarênh mar mex. ³Na pre mẽ pahto hpimràatã tanhmã mẽ pahto mex to hã inhmã amnhĩ to amnhĩrit pa pre omu. Mẽ kajaja nê mẽ pajaja. Pika piitã hkõt mẽ piitãã tanhmã mẽ ho mex to. Na pre kormã kot mēhõ mã ja jarênh kêt tâ inhmã ho amnhĩrit pa pre omu. Tã kagà ja kamã kot paj mẽ amã hkwy ho grêre nê ho amnhĩrit nê mẽ amã hã kagà ka mẽ ixpyrà nê kamã harê nê ama. ⁴Jao aprĩ hã mar mex nê. ⁵Amnepêm mẽ pahkêt ri mẽ pa xwÿnhjê mã Tĩrtũm kot ja ho amnhĩrit kêt tâ nhũm Karõ mẽ ixkwÿjê kumrêx mã ho amnhĩrit. ÿ hã kapêr o ri mẽ pa xwÿnh mẽ mẽ ixpê Jejus nhÿ hã mẽ ajahkre o mẽ ixpa xwÿnhjê kumrêx mã ho amnhĩrit. Mẽ ixte kãm tanhmã amnhĩ nhîpêx to ho ixpa xwÿnhjê mã ho amnhĩrit pa prem omu. ⁶Na pre mẽ inhmã tanhmã mẽ ato amnhĩrit to pa prem ja hã mẽ apumu nê mẽ akukamã ijamaxpêr o:

—Nà ãm hãmri koja xep Ijaew kêt xwÿnhjaja mẽ ixpê Ijaew pyrà nê Tĩrtũm kapêr ma nê Jejus Kris kêt amnhĩ xunhwÿ nhũm Tĩrtũm ã mẽ kot amnhĩ nhîpêx anhÿr ã mẽ omu nê mẽ ixpyrà nê mẽ ho hkra nê mẽ ho mex o pa. Anê.

⁷Tã nhũm Tĩrtũmja mẽ awÿr inhmẽ. Ixte mẽ amã ja jarênh o ri mẽ akõt ixpa nhũm tokyx mẽ ate mar kaxyw. Na pre ixto mex nê kãm hprãm xà hkõt mẽ akaxyw ixãm nê ixte ÿ hã kãm tanhmã amnhĩ nhîpêx to ho ixpa kaxyw ixto ixihitÿx nê mẽ awÿr inhmẽ. ⁸Tã mo kaxyw na pre mẽ akaxyw ixãm? Te ixte ja kaxyw inhmex kêt pyræk. Ixkwÿjaja ja kaxyw mex o kot ijakrenh tâ nhũm pre ixpumu nê tanhmã hamaxpêr to nê

mẽ akaxyw ixãm nẽ mẽ awỳr inhmẽ. Ixte mẽ amã mẽmoj mex kumrẽx jarẽnh o ri mẽ akõt ixpa kaxyw. Na pre inhmã:

—Kêr ka ma Ijaew kêt xwỳnhjê hwỳr mỗ nẽ mẽ kãm Jejus Kris kapêr jarẽnh o ri mẽ hkõt apa. Nẽ mẽ kãm: “Kot kaj mẽ Jejus Kris kôt amnhĩ xunhwỳ hãmri nẽ kukwak ri amex nẽ apa.” Anẽ. ⁹Koja mẽ apê Ijaew kwỳjê pyrã nẽ amnhĩ kaxyw Ixkra Kris kôt hamaxpêr nẽ hkõt amnhĩ xunhwỳ pa hã mẽ omu nẽ mẽ ho ixkra. Kormã aa ixte mẽ kãm ja hã amnhĩ to amnhĩrĩt kêt tã pa akumrẽx mã harẽ. E ma mẽ hkõt ri mẽ kãm ã ijarẽnh anhỳr o ri apa kê mẽ ijarẽnh ma.

Anhỳr o mẽ pahto kator xwỳnh maati ja inhmã kapêr. ¹⁰Tã mẽmo kaxyw na hte mẽ pahto hpimrãatã mẽ pahto hkra? Nã kaxkwa kamã kapêr o mẽ wrỳk xwỳnh pytãr xwỳnhjaja nẽ mẽkarõmnuti kot mẽ pahte amnhĩ nhĩpêx nyw o papa hã mẽ pahpumunh kôt axpên mã tanhmã Tĩrtũm jarẽnh to kaxyw. Nẽ harẽnh o:

—Kokỹy. Tĩrtũm àhpumunh tỳx o àhpumunh tỳx jakamã na hte tanhmã mẽ hipêx to nhũm mẽ tãm amnhĩ nhĩpêx mex o pa. Nã Tĩrtũm àhpumunh o àhpumunh nẽ hihtỳx o hihtỳx. Anẽ.

Koja mẽ ate amnhĩ to mex o apa hã mẽ apumu nẽ ã axpên mã Tĩrtũm jarẽnh anẽ.

¹¹Amnepêm kormã mẽmoj kêt ri na pre Tĩrtũm mẽ pakukamã mẽ pahpãm tanhmã amnhĩ jarẽnh to hãmri nẽ Jejus kukwak ri ã mẽ panhĩpêx anẽ. Jao mẽ piitã mẽ kãm àhpumunh o àhpumunh ã amnhĩ to amnhĩrĩt. ¹²Tã pu mẽ ra Jejus kukwak ri amnhĩ kamã pamã Tĩrtũm pyma hkêt nẽ. Kãm mẽ pajapê kênã kot pu kêt mẽ ri amnhĩ kamã pamã uma ho papa. Kot puj mẽ paxãmnhĩx ri kãm amnhĩ jarẽnh rãhã ho ri papa. Te ra pahte hwỳr paxàpir nẽ pano ho omunh nẽ kãm pakapêr o pakuhê pyrãk. ¹³Jakamã kwa kêr ka mẽ kot mẽ atã tanhmã ixtomnuj to hã ijarẽnhja ma nẽ tee ri ixkukamã ajamaxpêr hkêt nẽ. Kwãr mẽ mãmrĩ tanhmã inhĩpêx to. ãm ixte mẽ amã amnhĩ jarẽnh ma nẽ axpên mã ijarẽnh o:

—Hêxta waa nẽ. Mãn Pawre kãm mẽ pajapê hã na pre amnhĩ grõnh kôt mẽ pamex kaxyw mẽ pahwỳr mra nẽ mẽ pamã Tĩrtũm kapêr jarẽnh o pa. Mẽ kot ja hã tanhmã hipêx kati hto htã nhũm jam urer kêt nẽ. Anẽ.

Kris kãm mẽ pajapê kamã tanhmã mẽ panê amnhĩ nhĩpêx to

Juãw 3.16; Wam Juãw 3.1

¹⁴Nẽ na pa hte mẽ ato Mẽpanhĩpêxã maati hwỳr kãm ixihtỳx o ixpa. ¹⁵Kêp mẽ pahte hkõt amnhĩ xunhwỳr xwỳnhjê nhõ Pahi Maati mex kumrẽx na. Kra hkwyjaja ra kaxkwa kamã kuri htĩr tũm nẽ pa ho pa nẽ arĩ pyka ja kamã mẽ pahpê hkwyjaja kormã jar papa. Nom te mẽ pahpiitã mẽ pahte ixkre tipxi kamã Tĩrtũm kôt ri papa pyrãk. ¹⁶Jakamã na pa hte mẽ ato hwỳr o:

—Pa Tirtūm. Nà amex o amex. E ot pa Epes nhõ xwỳnhjê ho awỳr o ixkrĩ. Kwa kê Akarõ mẽ kãm axàhpumunh xà hkwy gõ kê mẽ akõt ri amnhĩ nhĩpêx rãhã ho pa.

17—Nê kê mẽ amnhĩ kaxyw Kris kõt hamaxpêr tỳx o pa. Te mẽmo pĩ hpàr jarê kot pika kaxwỳnh kãm pimành nê pika jamỳnh tỳxta pyràk. Nhũm kòk xàpêr tỳx tã tee kot kãm mênh prãmta pyràk. Kê mẽ pĩ hpàr jarê kot pika jamỳnh pyrà nê kãm axpên kĩnh o pa. Jao mẽmoj to axpên kutã nojarêr rãhã ho pa.

18-19—Nê kê krĩ piitã hkõt mẽ akrajê pyrà nê amnhĩ tã Kris kãm mẽ hapê htỳx o mẽ hapê htỳx ã amnhĩ pumu. Jao uràk nê mẽ kãm axpên kĩnh tỳx o pa. Nê kê mẽ ate amnhĩ nhĩpêx pix o amnhĩ nhĩpêx rãhã ho pa. Nê ajamaxpêr pix o hamaxpêr rãhã ho pa. Jao te mẽmo pĩ hpàrta pyrà nê akõt hihtỳx nê. Anê.

20Kot puj mẽ ã amnhĩ to Tirtūm wỳr anê nhũm mẽ pama nê ra àhpumunh tỳx xà ho ã mẽ panhĩpêx anê. Ra kot mẽ pakamã pa ho pa kênã. 21 ã Tirtūm Jejus Kris kukwak ri mẽ pahpê hkrajê nhĩpêx anhỳr jakamã kwa pu mẽ pahpê hkra xwỳnhjaja kêr pu mẽ kãm mex o mex ã harênh rãhã ho papa. Nà kot puj mẽ ã kãm anhỳr o papa.

Te ixkre tipxi kamã axpên kõt ri mẽ papa pyràk

Rômãn 15.5; Piripos 2.1-4; Korosê 3.12-17; Wam Pêtre 3.8

4 1 Nê ra mẽ kot Kris ã ijaxàr nhũm ixkrĩ htã pa ã inhmã mẽ akĩnh xàj mẽ amã ixkapêr nê hã kagà anhỳr o ixkrĩ. Kwa kêr ka mẽ Tirtūm kot amnhĩ nhĩpêx kõt amnhĩ nhĩpêx mex rãhã ho ri apa. Ja kaxyw na pre amnhĩ kõt mẽ awỳ ka prem hkõt amnhĩ xunhwỳ.

2 Nê kêr ka mẽ amã amnhĩ to rax o akwỳjê jakrenh prãm o ri apa hkêt nê. Nê mẽ agryk tokyx anhỳr kêt nê. ãm axpên kãm axukaprí pix o mãn ri axpên kõt apa. Kê mẽhõ tee tanhmã ri mẽ ato htã ka mẽ kamã agryk tokyx anhỳr kêt nê. ãm mẽ amã ri axpên hkĩnh pix o mãn ri axpên kõt apa. 3 Ra Tirtūm Karõ kot mẽ pahkarõ mã gjêx par jakamã te mẽ pahte ixkre tipxi kamã axpên kõt ri mẽ papa pyràk. Jakamã kêr ka mẽ axpên to mex pix kukamã mãn kêt ajamaxpêr o ri axpên kõt apa. Nê tãm axpên nhĩpêx. Jao ajamakêtkati nê axàmnhix ri axpên kõt ri apa ho apa. 4 Te mẽ pahte ixkre tipxi kamã ri axpên kõt papa pyràk jakamã mẽ pahpiitã mẽ pahkarõ kamã Tirtūm Karõja hkrĩ ho hkrĩ. Jakamã kot puj mẽ nhỹrmã ma õ krĩ hwỳr api nê kamã mẽ pamex rãhã papa ho papa.

5 Nê mẽ panhõ Pahihtija ãm pixii. Na pu prem pahpiitã amnhĩ kaxyw hkõt pajamaxpêr jao ra mẽ pahpê hkraa. Tã mẽ pahpê Kris kwỳ hã amnhĩ to amnhĩrĩt kaxyw na prem Tirtūm mã mẽ pahkrã kumrã. Á mẽ panhĩpêx anhỳr o axpên pyràk o mẽ panhĩpêx o pa anê.

6 Nê Tirtūm haxwỳja ãm pixii. Kêp mẽ pahpiitã mẽ panhĩpêêxà maati na. Na hte mẽ pahpê hkrajê mã àhpumunh xà hkwy gõ pu mẽ ã hã kãm

tanhmã amnhĩ nhĩpêx to ho papa. Nhũm hte mẽ pahkarõ kamã pa ho pa. Jakamã te mẽ pahte ixkre tipxi kamã ri axpên kôt papa pyræk.

Kris kot ahpÿnhã tanhmã mẽ pahto mex to hã harênh

Rõmãn 12.3-8; Wam Korõt 12.1-12; Wam Pêtre 4.10-11

7-8 Nê Tĩrtũm kapêr ã kagà htũm kot Kris jarênh kot:

Na pre mẽ kot kutã amnhĩ xunhwÿr xwÿnhjê pytâr pa nê ma akupÿm kaxkwa hwÿr api.

Tã arĩ jar pika hkôt mẽ pahpê hkwÿjê mã tanhmã mẽ pahto paxihtÿx to ho pa.

Na hte Krisja tanhmã mẽ pahte ahpÿnhã kãm amnhĩ nhĩpêx to ho papa kaxyw tanhmã mẽ pahto paxãhpumunh to. Kãm hprãm xà hkôt. 9 Tĩrtũm kapêr ã kagà htũm kot akupÿm kaxkwa hwÿr àpir ã harênh. ãm tapxipix na pre ã pika hwÿr wrÿk nê akupÿm kaxkwa hwÿr àpir anê. Na pre ty nhũm mẽ haxà. Hãmri nhũm akupÿm htĩr nê kato nê ma akupÿm api. Tapxipix na pre ã amnhĩ nhĩpêx anê. 10 Tã akupÿm kaxkwa hwÿr àpir xwÿnhta na hte kaxkwa kamã nê pika hkôt amnhĩm mẽmoj piitã tanhmã ho ho hkrĩ. 11 Na pre ahpÿnhã tanhmã mẽ pahto mex to. Ahpÿnhã mẽ pahte tanhmã kãm amnhĩ nhĩpêx to ho papa kaxyw na pre mẽ paxunhwÿ.

Nê mẽ pahkwÿjaja mẽ pahte krĩ piitã hwÿr pamrar nê ÿ hã hkrajê mã kapêr jarênh o papa kaxyw mẽ paxunhwÿ.

Nê mẽ pahkwÿjaja mẽ pahte krĩ pixi kamã Tĩrtũm nhÿ hã hkrajê jahkre ho ri mẽ hkôt papa kaxyw mẽ paxunhwÿ.

Nê mẽ pahkwÿjaja mẽ pahte pahprĩ hã mẽ piitã mẽ kãm tanhmã mẽ kot amnhĩ nhĩpêx to nê Jesus kôt amnhĩ xunhwÿr ã mẽ kãm harênh o papa kaxyw mẽ paxunhwÿ.

Nê mẽ pahkwÿjaja mẽ pahpê pastô kaxyw mẽ paxunhwÿ.

Nê mẽ pahkwÿjaja mẽ pahte mẽ kãm Tĩrtũm kapêr ã kagà jarênh o mẽ ahkre ho papa kaxyw mẽ paxunhwÿ.

12 ã kot puj mẽ pahpiitã ahpÿnhã Kris mã tanhmã amnhĩ nhĩpêx to ho ri papa anê. Kot puj mẽ ã mẽ hipêx anhÿr o ri papa nhũm mẽ pamar tÿx nê. Nê gaa nê mẽ pahpyrà nê Tĩrtũm mã amnhĩ nhĩpêx mex o pa. Pu mẽ pahpiitã hkôt amnhĩ nhĩpêx mex o papa. 13 Nê gaa nê mẽ pahpiitã mẽ pahpê Tĩrtũm kra hã Jesus kot amnhĩ nhĩpêx kôt omunh mex nê. Nê amnhĩ kaxyw hkôt pajamxpêr tÿx nê. Jao te ra hkôt mẽ paxãptâr mex pyræk. Nê te kot amnhĩ nhĩpêx pyræk o amnhĩ nhĩpêx.

14 Mèhprĩrejaja na htem nhãm hamaxpêr nê nhãm hamaxpêr o pa. Te kôk xãpêr nê nhãm mẽmoj to mrar nê nhãm mẽmoj to mrar pyræk. Nom kêr pu mẽ ho mẽ uræk kêt nê. ãm Kris kôt pix mã pajamxpêr tÿx o papa. Jakamã nhũm mẽ tee ri mẽ pahte hkwÿm ri tanhmã amnhĩ tomnuj to

hprãm xàj tanhmã mẽ pahto kaprỳ. Nom kêr pu mẽ mẽ mar kêt nẽ. Âm pakatàt kôt mẽ àptàr kot amnhĩ nhĩpêx o amnhĩ nhĩpêx o papa. Jao Kris kôt axpẽn to paxihtỳx o papa. ¹⁵Tãm axpẽn mã pakapêr nẽ pamã axpẽn kĩnh o axpẽn mã paxêx kêt nẽ. Kwa kêr pu mẽ ã amnhĩ nhĩpêx anhỹr o mãn papa. Jao te mẽ pahkrã Kris kot amnhĩ nhĩpêx pyràk o amnhĩ nhĩpêx mex o mỗ.

¹⁶Nẽ mẽ panhĩ kamã tanhmã mẽ pakuteja piitã na hte mẽ pahkrã kamã mẽ pajamxpêr xà hkôt axpẽn kôt ahpỹnhã tanhmã axpẽn to ajuta hto. Te ixkre pixi kamã mẽ pahte axpẽn kôt tanhmã axpẽn to ajuta hto ho ri papa pyràk.

Kris kôt mẽ pahte amnhĩ nhĩpêx nyw ã mẽ pamã karõ

Korosẽ 3.5-11; Wam Pêtre 4.7

¹⁷E kot paj Pahihti nhỹ hã mẽ amã mẽmoj jarẽ nẽ nẽ mẽ amã ixkapêr kãm ixihtỳx nẽ ka mẽ inhma. Nà kêr ka mẽ axte mẽ kêp Tĩrtũm kra hkêt xwỳnhjê kot amnhĩ nhĩpêx o amnhĩ nhĩpêx o ri apa hkêt nẽ. Na htem htỳx ri tanhmã hamaxpêr punuj to ho ri amnhĩ tomnuj o pa. ¹⁸Jao Tĩrtũm mã hamaxpêr kêt nẽ pa. Kãm hamaxpêr prãm kêt kumrêx nẽ pa. Te mẽ kot omunh nẽ nhãm hkrã pyràk o amnhĩ nhĩpêx. Rỳ te mễhõ wa kot axpẽn kãm gryk kãm axpẽn nhĩpêx pyràk o hipêx. Jao te kamàt kô kamã ri pa pyrã nẽ Tĩrtũm kot amnhĩ nhĩpêx pumunh kêt nẽ pa. Jakamã koja mẽ nhỹrmã kuri htĩr tũm nẽ pa hkêt nẽ. ¹⁹Na htem tanhmã amnhĩ tomnuj to htã amnhĩ kamã hpijaàm kêt nẽ pa. Nẽ axpẽn kamã hpijaàm kêt rãhã ho pa. Âm amnhĩ pix kukamã hamaxpêr nẽ tanhmã amnhĩ tomnuj to ho ri pa. ²⁰⁻²¹Nom Jejus Krisja ã kot amnhĩ nhĩpêx anhỹr kêt. Mẽ kurom tãm kot amnhĩ nhĩpêx mex o pa xwỳnh nẽ tãm kapêr o pa xwỳnh na. Na pa pre ma mẽ awỳr mỗ nẽ ixprĩ hã mẽ amã ja hã harẽ ka prem inhma nẽ inhmar tỳx nẽ. ²²Na pa pre mẽ amã:

—Kwa mẽ ri axte amnhĩ nhĩpêx tũm kôt amnhĩ nhĩpêx o ri apa hkêt nẽ. Ja na omnuj tỳx. Na ka prem ã amnhĩ nhĩpêx anẽ nẽ ajamxpêr punuj pix o ri apa. Jao amnhĩ tomnuj rãhã nẽ. Tã kêr ka mẽ amnhĩ nẽ awry hã mẽnh pyrã nẽ axte ã amnhĩ tomnuj anhỹr o ri apa hkêt nẽ.

²³—Nẽ kêr ka mẽ axte mẽ ajamxpêr tũm nẽ mẽ ate amnhĩ nhĩpêx tũm kôt ri amnhĩ nhĩpêx kêt nẽ. Nẽ mẽ ajamxpêr nyw nẽ mẽ ate amnhĩ nhĩpêx nyw kôt pix mã ri amnhĩ nhĩpêx o ri apa. Te mẽ kot mẽ ê htũm kwrỳnh nẽ rẽnũh nẽ hpãnhã nyw jagjêx nẽ ri hã pata pyrã nẽ âm amnhĩ nhĩpêx nyw kôt pix mã amnhĩ nhĩpêx o ri apa. ²⁴Mẽ ajamxpêr nyw nẽ mẽ ate amnhĩ nhĩpêx nywja axtem na. Te Tĩrtũm jamaxpêr nẽ kot amnhĩ nhĩpêxta pyràk. Jakamã kwa kêr ka mẽ kãm hprãm xà hkôt pix mã tanhmã amnhĩ nhĩpêx to ho ri apa. Jao kãm amnhĩ nhĩpêx mex o ri apa. Nẽ kapêr kôt ri amnhĩ nhĩpêx. Anẽ.

Na pa pre ã mẽ amã ixkapêr anê. Tã kêr ka mẽ arĩ ixkapêr kôt pix mã amnhĩ nhĩpêx. ²⁵Mẽ pahpê Kris nhĩ jakamã te pahte ixkre htipxi kamã axpên kôt amnhĩ nhĩpêx pyrãk jakamã kwa mẽ axte axpên mã mẽmoj to axêx kêt nê. Nê amarĩ axpên xô ri axpên mã mẽmoj to axêx kêt nê. ãm tãm axpên mã mẽmoj jarênh o ri apa.

²⁶Nê kot kaj mẽ mẽmoj tã agryk japêr. Rỳ mẽhõ kamã agryk rỳ amarĩ agryk japêr. Tã kêr ka ho ajapêx tokyx anê agryk japjê hkêt nê. Kêr kê kormã kamãt kêt ri ka akupỹm tãm akrã nhũm ja amã mex nê. ²⁷Nom kot ka mẽ arĩ kamã agryk o ri apa nhũm mẽkarõmnuti nhõ pahi Satanastija ja hã mẽ apumu nê te mẽ ate amnhĩ tomnujta ã mẽ apynênh pyrãk o mẽ anhĩpêx. Ka mẽ ra hkôt tanhmã amnhĩ tomnuj to. Ja pymaj kêr ka mẽ agryk japjê hkêt nê. Satanasti kãm hprãm xà hkôt ã amnhĩ nhĩpêx anhỹr kêt nê.

²⁸Nê mẽ axàhkĩnh o mẽ apa xwỹnhjaja kêr ka mẽ axte mẽ kêp axàhkĩnh hkêt nê. Mẽmoj tã apê nê hpãnhã kàxpore jamỳ nê ho amnhĩm awjaprõ. Nê mẽ kêp amrakati xwỹnhjê mã mẽmoj japrõr o ri apa. Kêr ka mẽ ate amnhĩ nhĩpêx tũmta pãnhã ã amnhĩ nhĩpêx nyw o amnhĩ nhĩpêx anhỹr o ri apa.

²⁹Nê kêr ka mẽ amã axpên kĩnh kamã tãm axpên mã akapêr o ri apa. Nê akapêr mã agêt kãm ri axpên mã akapêr kêt nê. ãm axpên mã akapêr mã aprĩ ho axpên mã akapêr. Nê mẽ amã axpên kĩnh nê mẽ amã axpên to mex pix prãm xaj tãm axpên mã ri akapêr o ri apa.

³⁰Tĩrtũm na pre mẽ pahwỳr amnhĩ Karõ rê nhũm mẽ pahpê hkra hã mẽ pahkarõ mã agjê nê mẽ pakamã hkrĩ ho hkrĩ. Koja mẽ pakamã hkrĩ ho hkrĩ rãhã nhũm nhỹrmã Tĩrtũm amnhĩ wỳr mẽ pahto api pu mẽ kuri pahtĩr tũm nê papa ho papa. Jakamã kwa kêr ka mẽ tanhmã amnhĩ tomnuj to ho amnhĩ kamã Tĩrtũm Karõ mã hkaprĩ jagjênh kêt nê. Nê kãm hpijaãm jagjênh kêt nê. Koja mẽ pahte amnhĩ tomnuj ã mẽ pahpumu nê mẽ pahkaga hkêt tã tee ri ja hã mẽ pahpumu nê hkaprĩ nê. Jakamã kêr pu mẽ ãm kãm hprãm xà hkôt pix mã tanhmã ri amnhĩ nhĩpêx to ho ri papa.

³¹Nê kêr ka mẽ axte ri axàhkurê ho ri apa hkêt nê. Nê agryk kãm axpên mã tanhmã akapêr punuj to hkêt nê. Rỳ axpên japrỳ ho ri apa hkêt nê. Nê atỳx ri axpên tã apêr o apikênh kêt nê. Nê ri axpên tã mẽ kãm axàmnnênh kêt nê. ³²Kêt mẽ ãm axpên to mex pix nê axpên kãm axukaprĩ ho ri apa. Nhũm mẽhõ tanhmã mẽ ato ka mẽ ãm amnhĩ tã omu nê tanhmã ho hkêt nê tanhmã kot atoja ho ajamakêtkati kurê kumrêx. Tĩrtũm na pre Kris kukwak ri mẽ pahte amnhĩ tomnuj grãnh pa nê axte kãm hamaxpêr kêt nê. Tã kêr ka mẽ urãk nê mẽhõ kot tanhmã atomnuj tota tokyx ho ajamakêtkati nê axte kãm ajamaxpêr kêt nê.

5 ¹Nê koja mẽhõ kãm hkra japê nhũm amnhĩ tã omu nê hkĩnh nê. Hãmri nê nhỹrmã hkra nê amnhĩ pyrã nê kãm hapê nê. Ja pyrã nê Tĩrtũm kãm mẽ pahpê hkwyjê japê jakamã kêr pu mẽ amnhĩ pyrã nê

pamã pahkwỳjê hkĩnh tỳx o papa. ²Kris haxwỳja kãm mẽ pajapê jakamã na pre htyk o mẽ panê mẽ pahte amnhĩ tomnuj pãnhã amnhĩrer pa. Kêp Tĩrtũm Kra htã amnhĩ mex pix kukamã hamaxpêr kêt nê ã mẽ panê amnhĩ nhĩpêx anê. Tã ã kãm mẽ pajapê anhỹr jakamã nhũm Tĩrtũm ja hã omu nhũm ja kãm mex nê. Te ho mẽ hkuxwa xà mex kuxwa pyræk. Jakamã kêr pu mẽ amnhĩ tã omu nê uræk nê pamã axpên kĩnh o axpên to mex o mãn ri papa.

Mẽ pahte amnhĩ tomnuj kaga hã kot mẽ pamã karô

Sikũn Korĩt 6.14-7.1; Korosê 3.16-17; Wam Juãw 1.5-10, 2.15

³Nê mẽ pahpê Tĩrtũm kra jakamã kêr pu mẽ pahprô pix tãnopxar o ri papa nê nhãm mênijê hõ kamã pahpijaàm kêt o ri papa hkêt nê.

Nê kêr pu mẽ amnhĩ pix kukamã pajamaxpêr kêt nê. ãm ja ho anhỹr hkêt kumrêx. Mẽ pahpê Tĩrtũm kra kênã kot pu kêt axtem nê ã amnhĩ nhĩpêx anhỹr o ri papa. Tĩrtũm krajaja na htem ã amnhĩ nhĩpêx anhỹr kêt nê.

⁴Nê mãânên mẽ pakapêrja. Kêr pu mẽ ri tanhmã axpên mã pakapêr punuj to hkêt nê. Nê ri axpên japryê hkêt nê. Nê amnhĩ krã hkôt pahtỳx ri tanhmã pakapêr to hkêt nê. ãm tãm axpên mã pakapêr mex nê axpên mã Tĩrtũm mex o mex ã harênh o ri papa.

⁵Nê Tĩrtũm kapêr kôt amnhĩ nhĩpêx kêt xwỳnhjaja nê axpên kãm mẽ hpijaàm kêt xwỳnhjaja nê amnhĩ pix kukamã mẽ hamaxpêr o pa xwỳnhjaja. ã mẽ kot amnhĩ nhĩpêx anhỹr xwỳnhjaja kêp Tĩrtũm mẽ Kris wa hkra hkêt. Na htem ã amnhĩ nhĩpêx anhỹrja gryk ã wa kãm hamaxpêr kêt nê.

⁶Nê koja nhỹrmã mêhõ mẽ awỳr mõ nê mẽ ate tanhmã amnhĩ tomnuj to prãm xàj hêx rom amã kapêr nê mẽ amã:

—Kwa mon ka hte mẽ ixpyrà nê ã amnhĩ nhĩpêx anhỹr kêt nê? Ja mex kênã. Anê.

Koja ã mẽ amã kapêr anê ka mẽ ama nê ãm ama. ã mẽ kot amnhĩ nhĩpêx anhỹr xwỳnhjaja koja Tĩrtũm nhỹrmã ja hã mẽ homnuj tỳx kumrêx. ⁷Jakamã kwa kêr ka mẽ ate ho mẽ kot amnhĩ nhĩpêx pyræk pymaj mẽ hkôt ri apa hkêt nê. Kwarĩ ho kwarĩ.

Mẽ pahte amnhĩ nhĩpêx nyw jarênh

Juãw 1.4, 3.19, 8.12, 12.35; Rõmãn 13.12;

Wam Tesarõn 5.5; Wam Juãw 1.5

⁸Amnepêm kormã mẽ ate Tĩrtũm kôt amnhĩ xunhwỳr kêt ri na ka prem te kamàt kô kamã ri apa pyrà nê atỳx ri tanhmã amnhĩ tomnuj to ho ri apa. Tã ra Jejus kôt amnhĩ xunhwỳ hãmri nê te hirã kamã mẽ apa xwỳnh pyræk. Jakamã kwa kêr ka mẽ hpãnhã Tĩrtũm kãm hprãm xà hkôt

pix mã mǎn ri amnhĩ nhĩpêx o apa. Ra mẽ apê hirã kamã mẽ apa xwỳnh kênã. ⁹Kot kaj mẽ ã amnhĩ nhĩpêx anê nê tãm amnhĩ nhĩpêx mex nê tãm akapêr o apa. ¹⁰Jao Tĩrtũm kãm hprãm xà hkôt pix mã amnhĩ nhĩpêx o ri apa ¹¹⁻¹²nê te kamàt kô kamã ri mẽ pa xwỳnhjaja kot amnhĩ nhĩpêx pyràk o amnhĩ nhĩpêx kêt nê. ã mẽ kot amnhĩ nhĩpêx anhỹr xwỳnhjaja na htem hpimxur pê tanhmã amnhĩ tomnuj tỳx to ho pa. Nom kot paj ixprĩ hã mẽ amã tanhmã mẽ kot amnhĩ tomnuj to hã mẽ harênh kêt nê. Kot pa mẽ amã harê nê ixpijaàm tỳx nê. Ixte harênh mã xwỳnhja omnuju. Tã kêr ka mẽ uràk nê ã amnhĩ nhĩpêx anhỹr kêt nê. ãm mẽ noo mã tãm ri amnhĩ nhĩpêx o ri apa. ¹³Mẽ kot ja hã mẽ apumunh nê tee ri tanhmã kot amnhĩ tomnuj to hkukamã hamaxpêr kaxyw. Jao amnhĩ tomnuj kaga japêr. ¹⁴Te mẽ kot kanê hpôk rax kãm mẽmoj piitã omunh mexta pyràk. Tĩrtũm kapêr ã kagà htũm kot ja jarênh kot:

Mẽ amã Tĩrtũm prãm kêt xwỳnhjaja te ra mẽ atyk nê mẽ anhĩkwỹ pyràk.

Nê te kamàt kô kamã mẽ anhôt nê mẽ anhĩkwỹ pyràk.

Jakamã kwa te mẽ akrã hapôx nê kànhmã mẽ akrĩ pyràk o amnhĩ nhĩpêx nê Tĩrtũm kôt amnhĩ xunhwỳ.

Kê Kris tanhmã mẽ akrã hto ka mẽ te myt kato nhũm mẽ ate arĩgro hã ri apa pyràk o amnhĩ nhĩpêx. Anê.

Tĩrtũm krajaja kot tanhmã amnhĩ nhĩpêx to hã mẽ kãm karô

Korosê 4.5; Sikũn Ximotre 4.2

¹⁵Nê kwa kêr ka mẽ amnhĩ pumunh mex o ri apa. Nê mẽ ri htỳx ri mẽ kot amnhĩ nhĩpêx xwỳnhjê hkôt amnhĩ nhĩpêx kêt nê. Nê ãm amnhĩ to mex pix o ri apa. ¹⁶Na htem ra Kris ã mẽ pahtomnuj o pa pu mẽ pamex kêt nê ri papa. Tã nom kêr pu mẽ apkati mẽ arĩ Tĩrtũm mã tanhmã amnhĩ nhĩpêx to ho papa mã panhũrer kêt nê.

¹⁷Nê ãm Tĩrtũm pix mã amnhĩ jarênh o ri papa nê kãm:

—Pa Tĩrtũm. Inhmã akôt pix mã amnhĩ nhĩpêx prãm jakamã kwa ixte amã mẽmoj to anhỹr kaxyw ixkrãm ijamaxpêr mex jagjê nê ho amnhĩrit mex pa tanhmã amã amnhĩ nhĩpêx to ho ri ipxa.

Anhỹr o amnhĩ to kuwỳ. Nom kêr pu mẽ pahtỳx ri pajamaxpêr kôt tanhmã kãm amnhĩ nhĩpêx to hkêt nê.

¹⁸Nê kêr pu mẽ ri pahpipãnh o papa hkêt nê. Kwarĩ ho kwarĩ. Kot puj mẽ ã amnhĩ nhĩpêx anê nê te kagôxỳhti kot amnhĩ tã mẽ pahkaxpre pyràk o mẽ panhĩpêx pu mẽ tee ri pamã hkaga hprãm kaprỳ. Te kot amnhĩm mẽ pahto àrik pyràk o mẽ panhĩpêx nhũm ja mex kêt nê. Na htem pipãnh kãm hamaxpêr mex kêt nê ãm htỳx ri tanhmã amnhĩ nhĩpêx to ho pa. Tã kêr pu mẽ ã amnhĩ nhĩpêx anhỹr hkêt nê ãm Tĩrtũm Karô pix hkôt mǎn ri amnhĩ nhĩpêx o ri papa.

19Nê kêr pu mẽ axpên wÿr akuprô nê pahkĩnh kãm Tĩrtũm mã mex o mex ã harênh pê ho pagrer o pahkrĩ. 20Nê mẽ pamex nê ri papa rÿ pahpunuj nê ri papa htã arĩ kãm mex o mex ã harênh rãhã ho ri papa. Kêp Mêpanhĩpêêxã maati jakamã mẽ pahpê Pahihti Jejus Kris kwÿ hã pu mẽ kãm mex ã harênh rãhã ho papa nê aa ho pajamakêtkati hkêt nê.

21Nê kêr ka mẽ Kris ã apijaãm rãhã o ri apa. Jao axpên kôt ajamxpêr nê axpên kôt ri amnhĩ nhĩpêx mex o ri apa.

Tanhmã mẽ hprô nê mẽ mjên kot axpên nhĩpêx to hã mẽ kãm karô

Wam Korõt 11.3; Korosê 3.18-19; Wam Pêtre 3.1-7

22Nê kêr ka mẽ anijaja mẽ amjên ã apijaãm o ri apa. Nê mẽ hamaxpêr mex ã mẽ omu nê mẽ hkôt ri amnhĩ nhĩpêx o ri apa. Te mẽ ate Pahihti Kris kapêr kôt amnhĩ nhĩpêx o ri apata pyrãk. 23Kris kêp mẽ pakamã ukaprĩ xwÿnh nê kêp mẽ papytãr xwÿnh jakamã te kêp mẽ pahpiitã mẽ pahkrã pyrãk. Nê mẽ papajaja te mẽ pahpê ĩ pyrãk. Jakamã na pu htem pahpê ĩja te mẽ pahkrã kot tanhmã hamaxpêr to xã hkôt amnhĩ nhĩpêx o papaja pyrãk. Ja pyrã nê kêr ka mẽ anijaja mẽ amjên jamaxpêr mex ã mẽ omu nê mẽ hkôt amnhĩ nhĩpêx mex nê. 24Mê pahpê Kris kwÿ jakamã na pu htem hkôt amnhĩ nhĩpêx mex o ri papa. Ja pyrã nê kêr ka mẽ amjên kôt amnhĩ nhĩpêx mex o ri apa.

25Nê mẽ amyjaja. Kêr ka mẽ amã aprô hã ma ho ri apa. Te ho Kris kot mẽ pahtã ma ho pata pyrãk. Na pre kãm mẽ pajapê xaj amnhĩ grônh kôt mẽ pahwÿr wrÿ nê mẽ panê ty. Tã kêr ka mẽ urãk nê ã amã aprô hã ma ho apa anê. 26Na pre Kris kãm mẽ pajapê xaj mẽ pahte amnhĩ tomnuj pê mẽ pahpytã. Te mẽhõ my kãm mẽhõ ni hkĩnh nê mẽmoj punuj pê utãr nê ho hprôta pyrãk. Nhũm te mẽ kot axpên mã wa rer kaxyw nhũm nija ma gôx mã htêm nê wÿr nê amnhĩ to mex nhũm mẽ kot axpên kaxyw wa ho mexta pyrãk. Hãmri nê te ra axpên mã wa rer nhũm wa kot axpên kôt pa ho pata pyrãk.

Ja pyrã nê na pre Jejus kãm mẽ pajapê nê kãm amnhĩ kuri mẽ papa ho mẽ papa hprãm xaj mẽ pahwÿr wrÿ nê mẽ pahte amnhĩ tomnuj pê mẽ pahpytã nê mẽ pamã Tĩrtũm kapêr jarênh o pa. Tã mẽ pahpê hkrajaja na pu htem kapêr ma nê hkôt amnhĩ nhĩpêx o papa ho amnhĩ tomnuj



Epes 5.24-25

kaga. Te gôx kãm mẽ paxwÿr nẽ mẽ pahte amnhĩ nê amnhĩ grã htyk kuhõnh par pyræk. Jao Tĩrtũm kapẽr kõt pix mã amnhĩ nhĩpêx o ri papa. Te ra paxwÿr nẽ amnhĩ nê tanhmã mẽ pahte amnhĩ tomnuj to grãnh par pyræk. Nẽ te mjên mã xwÿnh wÿr nẽ amnhĩ to mex pyræk.

²⁷ã mẽ pahte amnhĩ nhĩpêx anhÿr jakamã te mẽ pamex nẽ ri papa pyræk. Hãmri nhũm Krisja ja hã mẽ pahpumu nẽ kãm mẽ pajapê htÿx nẽ. Jakamã koja nhÿrmã akupÿn wrÿ nẽ ma akupÿm amnhĩ kõt mẽ pahto api pu mẽ kuri pa htĩr tũm nẽ papa ho papa.

²⁸Nẽ xà mẽ amyjaja mẽ amã amnhĩ japêê? Nã mẽ amã amnhĩ japê ho na ka htem amã amnhĩ tã ma ho apa. Tã kêr ka mẽ aprõ nhĩpêx o te ka amã amnhĩ tã mata pyræk. Jao tãm mẽ hipêx o ri apa. Te war apixire nẽ war apa pyræk o wa axpẽn nhĩpêx. Kot kaj mẽ tanhmã hipêx to nẽ te ate amnhĩ nhĩ tanhmã hipêx to pyræk. ²⁹⁻³⁰Na htem amnhĩ nhĩ ho mex pix o pa nẽ kamã gryk kêt nẽ. Nẽ kãm prãm nẽ apku. Nẽ kãm kôr nẽ ixkõ. Nẽ nhÿhÿnh à nẽ amnhĩ kane. Na pu htem ã amnhĩ to mex o ri papa anẽ. Ja pyrã nẽ te mẽ pahpê Kris nhĩ pyræk jakamã na hte mẽ pahto mex o pa. Te mẽ pamã mẽ papa mẽ pahte amnhĩ nhĩ hã mata pyræk. ³¹Tĩrtũm kapẽr ã kagã htũm kot ja jarẽnh kot:

Koja mẽmyjê hõ hprõ kaxyw hãmri nẽ hipêêxà nẽ katorxà wa òrkwÿ kaga nẽ ãm hprõ kõt pix mã hpãnhã ri pa ho pa. Te wa tipxi nẽ ri pa pyræk o wa axpẽn nhĩpêx o pa. Anẽ.

³²Na pre Tĩrtũm ã ja jarẽnh anẽ. Kapẽrja mex tã amnepê mã mẽ pa xwÿnhjaja na prem hprĩ hã mar tÿx kêt nẽ. Na prem htÿx mẽ mjên kot tanhmã mẽ hprõ nhĩpêx to pix ã hkamnhĩx no ãm ja pix kêt. Mããnen te mẽ pahpê Kris nhĩ pyrã nẽ tãm mẽ pahte amnhĩ nhĩpêx nẽ axpẽn nhĩpêx o papa hã ã mẽ pajarẽnh kot anhÿr. Te ixkre tipxi kamã mẽ pahte Kris kõt mẽ papa pyræk o ã mẽ pajarẽnh anẽ.

³³Jakamã kwa kêr ka mẽ amyjaja mẽ amã mẽ aprõ japê ho ri apa. Te ka amã amnhĩ tã ma pyræk o mẽ hipêx. Jao tãm mẽ hipêx. Nẽ mẽ anijaja kêr ka mẽ ajaxwÿja mẽ amjên ã apijaàm o ri apa.

**Mẽ hkrajaja kot tanhmã hipêêxà nẽ katorxà nhĩpêx
to hã mẽ kãm karõ**

Korosẽ 3.20-21

6 ¹Nẽ mẽ apê mẽ hkrajaja kêr ka mẽ anhĩpêêxà nẽ mẽ akatorxà wa kapẽr ma nẽ hã ano htÿx nẽ wa hkõt ri amnhĩ nhĩpêx rãhã ho ri apa. Mẽ amã Pahihti Kris kõt amnhĩ nhĩpêx prãm xaj ã amnhĩ nhĩpêx anhÿr o ri apa. Kot kaj mẽ ã amnhĩ nhĩpêx anhÿrja o amnhĩ nhĩpêx mex o ri apa. ²⁻³Tĩrtũm kapẽr ã kagã htũm kot ja jarẽnh kot:

Kêr ka mẽ anhĩpêêxà nẽ mẽ akatorxà wa kapẽr ma nẽ wa hkõt ri amnhĩ nhĩpêx. Kot kaj mẽ ã amnhĩ nhĩpêx anẽ nẽ amex nẽ kritpêm atĩr nẽ ri apa ry nẽ.

Anhÿr jakamã kot kaj mẽ amã kritpêm atÿr nẽ ri apa hprãm hã kær ka mẽ ã amnhĩ nhĩpêx anhÿr o ri apa. Kormã mẽ aprĩre htã ã amnhĩ nhĩpêx anẽ. E kær ka mẽ ã mẽ anhĩpêxã nẽ mẽ akatorxã nhĩpêx anhÿr o ri apa.

⁴Nẽ mẽ apê mẽ hipêxã nẽ mẽ katorxã kær ka mẽ akrajê gryk kaxyw mẽ kãm apêr o apikênh hkêr nẽ. Tãm mẽ kãm akapêr nẽ Pahihti Jejus kapêr o mẽ ahkre ho ri apa. E kær ka mẽ ã akrajê nhĩpêx anhÿr o ri apa.

**Mẽ pahte mẽ panhõ patrãw kapêr kôt amnhĩ nhĩpêx
ã mẽ pamã karõ**

Korosẽ 3.22-4.1; Wam Ximotre 6.1-2; Xitre 2.9-10; Wam Pêtre 2.18-25

⁵Nẽ mẽ ate mẽ kãm mẽ axapênh o mẽ apa xwÿnhjaja kær ka mẽ anhõ patrãw kapêr ma nẽ hkôt amnhĩ nhĩpêx mex o ri apa. Te mẽ ate Kris kapêr mar nẽ hkôt amnhĩ nhĩpêx pyrãk. Jao mẽ hã apijaãm rãhã nẽ. ⁶Nom kær ka mẽ ãm mẽ noo mã pix mã ri mẽ kãm axapênh mex kêt nẽ. Mãânẽn mẽ wa kre kamã mẽ kãm axapênh mex rãhã nẽ. Ja na Tĩrtũm kãm hprãm. Mẽ apê Tĩrtũm Kra Kris mã tanhmã amnhĩ nhĩpêx to ho apa xwÿnh jakamã kær ka mẽ anhõ patrãw mã axapênh mex o ri apa. ⁷Nẽ mẽ akĩnh kãm mẽ kãm axapênh mex nẽ. Te mẽ ate Pahihti mã akĩnh kãm tanhmã kãm amnhĩ nhĩpêx to pyrã nẽ mẽ kãm tãm amnhĩ nhĩpêx pẽ axapênh mex o ri apa. ⁸Kot puj mẽ amnhĩ kaxyw Tĩrtũm mã pajamaxpêr pẽ pahkĩnh kãm tãm amnhĩ nhĩpêx o ri papa nhũm Pahihti ja hã mẽ pahpumu nẽ nhÿrmã ja hã mẽ pahto mex rax nẽ. Mẽ pahpê hkrajê piitãã. Mẽ pahte mẽ kãm paxapênh xwÿnhjaja nẽ amnhĩ mã mẽ paxapênh xwÿnhjaja nhũm nhÿrmã mẽ pahpiitã mẽ pahte tãm amnhĩ nhĩpêx xwÿnhjê ho mex rax nẽ.

Mẽõ patrãwjaja kot tanhmã kãm mẽ apênh xwÿnhjê nhĩpêx to

Korosẽ 4.1

⁹Nẽ mẽ apê mẽ õ patrãwjaja kær ka mẽ amã mẽ apênh xwÿnhjê ho mex nẽ mẽ apênh ã mẽ kãm axakjêr o ri apa hkêr nẽ. Tãm mẽ hipêx. Kaxkwa kamã mẽ panhõ Pahi Maatija mãânẽn kêp mẽ õ Pahi Maati jakamã ã mẽ hipêx mex anhÿr o apa. Tãm na kãm mẽ pahpiitã mẽ pajapê ho axpên pyrãk. E kær ka mẽ ã mẽ hipêx anhÿr o ri apa.

**Tanhmã mẽ pahte Satanasti kutã amnhĩ to htÿx
to hã mẽ pamã karõ**

*Rõmãn 16.20; Sikũn Korõt 10.3-5; Wam Tesarõn 5.8-11;
Xiakre 4.7; Wam Pêtre 5.8-11*

¹⁰E kot paj hpãnhã tanhmã mẽ pahte mẽkarõmnuti nhõ pahi Satanasti kutã amnhĩ to htÿx to jarê ka mẽ inhma. Kær ka mẽ Pahihti nhÿ hã kutã amnhĩ to htÿx rãhã nẽ apa. Ate tanhmã amnhĩ tomnuj to hprãm

xàj tanhmã kot ato htã ka Tĩrtũm xihtỳx o anhõpinh xà kaxwỳnh kãm kutã amnhĩ to htỳx nẽ. Rỳ koja ate mẽmoj mex o anhỹr nẽ tanhmã ato ka mẽ amnhĩ tã hamaxpẽr ã omu nẽ ãm omu nẽ arĩ Tĩrtũm xihtỳx nhỹ hã tãm ajamaxpẽr mex rãhã ho ri apa. ¹¹Na hte põristijaja pijapu kaxyw hãmri nẽ amnhĩ nẽ kàx o mẽ ê jagjê nhũm mẽ tee ri kãm mẽ hkamnhwỳr prãm hkapyrỳ. Tã ja pyrã nẽ koja Satanasti mẽ ate kapẽr kõt tanhmã amnhĩ nhĩpêx to hprãm xàj tanhmã mẽ ato ka mẽ amnhĩ tã hamaxpẽr ã omu hãmri nẽ Tĩrtũm xihtỳx nhỹ hã kutã amnhĩ to htỳx nẽ. Jao mẽ ate amnhĩ nhĩpêx nyw pix o amnhĩ nhĩpêx nẽ mẽ ajamaxpẽr nyw pix o ajamaxpẽr. Kot kaj mẽ ã amnhĩ nhĩpêx anẽ nhũm Satanasti tee ri tanhmã kãm mẽ ato hprãm hkapyrỳ.

¹²Mẽ pahpê Tĩrtũm kra jakamã mẽ kot mẽ pakutã amnhĩ xunhwỳr xwỳnh maatijaja axtem na mẽ. Mẽ kêp mẽkarõmnuti jakamã mẽ pahkĩnhã mẽ ĩ hkêt. ãm mẽ hkarõ kaxkrit pix na mẽ. Na htem kòk kõt tanhmã amnhĩ tomnuj tỳx to ho pa. Nẽ mẽ hihtỳx. Na htem arĩ jar pika ja kamã mẽ kêp Tĩrtũm kra hkêt xwỳnhjê ho amnhĩptã nhũm htem mẽ hkõt ri htỳx tanhmã ri amnhĩ tomnuj tỳx to ho pa. Nom amnhĩ tã mẽ omunh kêt nẽ. ¹³Jakamã kwa kêr ka mẽ Tĩrtũm kot mẽ akarõ mã amnhĩ Karõ jagjênh xwỳnhhta kõt pix mã amnhĩ nhĩpêx o apa. Jao mẽ ate amnhĩ nhĩpêx nyw kõt pix mã mãn ri mẽ amnhĩ nhĩpêx. Kêr kê mẽkarõmnuti



Epes 6.10-20

tee ri kãm tanhmã mẽ ato hprãm kaprÿ ka mẽ arĩ Tĩrtũm Karõ xihtÿx nhÿ hã kutã amnhĩ to htÿx rãhã ho apa.

14Jakamã kwa kêr ka mẽ axkãm ajamak rom nẽ te ho sõrdat kot pijapu kaxyw ê jagjênh pyrãk o amnhĩ nhĩpêx. Na htem amnhĩ nẽ môx kà ho mẽ ê jagjê nẽ mẽ hpre xà ho amnhĩ pre hpa. Nẽ hipy kàx o mẽ hinô kà jagjê. Hãmri nẽ rĩ kormã ma mẽ kãm mẽ hkurê xwÿnhjê kutã mra nẽ axpu. No mẽ kajaja kêr ka mẽ kurom amnhĩ krãm Tĩrtũm kapêr jaxàr tÿx nẽ hkôt pix mã ri ajamaxpêr rãhã ho ri apa. Nẽ hkôt ri amnhĩ nhĩpêx mex nẽ. Jao te sõrdat pijapu kaxyw kot amnhĩ nhĩpêxta pyrãk.

15Na hte sõrdatjaja hpar kà jagjê nẽ aa hopôx kêt nẽ. ãm rãhã gõr nẽ hikwÿ. Jao ra mẽ kutã pijapu kaxyw amnhĩ grõnh rãhã gõr nẽ hikwÿ. Tã kêr ka mẽ ma mẽ kãm Jejus kot tanhmã mẽ panê amnhĩ nhĩpêx to hã harênh o apa kaxyw nẽ sõrdat pyrã nẽ amnhĩ grõnh kôt ma mẽ hwÿr apa nẽ amnhĩ kamã akahak kêt nẽ.

16Nẽ sõrdatjaja na htem amnhĩ nẽ amnàr xà hã kàx po jamÿ nẽ ho kuhê nhũm mẽ tee ri kãm mẽ hkamnhwÿr prãm kaprÿ. Ja pyrã nẽ koja Satanasti tanhmã mẽ ato ka mẽ Tĩrtũm kêp mẽ anhõ pahi hã hihtÿx o kot Satanasti jakrenhja mã ajamaxpêr kurê kumrêx nẽ ãm hkôt pix mã amnhĩ nhĩpêx. Na hte Satanasti te kot mẽ pahwÿr krur rênh pyrãk o mẽ panhĩpêx. Jao xatã mẽ pahte Tĩrtũm kaga hprãm xaj tanhmã mẽ pahto. Nẽ mẽ pahte Tĩrtũm mã tanhmã amnhĩ nhĩpêx to pymaj xatã tanhmã mẽ pahto kaprÿ. Pu mẽ amnhĩ tã omu hãmri nẽ Tĩrtũm Karõ xihtÿx nhÿ hã Tĩrtũm kôt pix mã amnhĩ nhĩpêx.

17Nẽ na hte sõrdatjaja kàx o mẽ hkrãjapap jagjê nẽ pijapu kaxyw mẽ kutã mra nhũm mẽ tee ri mẽ hkrã jayr prãm kaprÿ. Ja pyrã nẽ kêr ka mẽ amnhĩ kaxyw Tĩrtũm kôt pix mã ajamaxpêr rãhã ho ri apa. Nẽ ra kot mẽ ato hkra mã ajamaxpêr rãhã nẽ. Kê Satanasti tee ri kãm mẽ akrã kamã mẽ amã mẽ ajamaxpêr punuj jagjênh prãm hkaprÿ.

Nẽ sõrdatjaja na htem mẽ kutã wapo jamÿ nẽ ho kuhê. Nom mẽ papajaja mẽ panhõ wapoja na axtem kêp Tĩrtũm kapêr. Na hte Tĩrtũm Karõ mẽ pahkrã kamã kapêr o amnhĩrĩt pu htem pix mã pajamaxpêr o papa nhũm Satanasti tee ri kãm mẽ pahkrãm mẽ pajamaxpêr punuj jagjênh prãm kaprÿ. Te mẽ papijapu nhũm mẽ pahte amnhĩ nẽ ho pakrihkrit pyrãk o hipêx.

18ã Satanasti pê mẽ pahte amnhĩ nẽ amnhĩ nhĩpêx kot anhÿr. Jakamã kêr pu mẽ amnhĩ to Tĩrtũm pix wÿr o ri papa kê Satanasti kutã mẽ pahto paxihtÿx pu mẽ hkôt tanhmã amnhĩ tomnuj to hkêt nẽ.

Nẽ kêr pu mẽ mẽmoj to anhÿr kaxyw nẽ ra Tĩrtũm Karõ nhÿ hã amnhĩ to Tĩrtũm wÿ. Nẽ kãm amnhĩ jarênh rãhã ho papa nẽ aa ja ho pajamakêtkati hkêt nẽ. Nẽ Tĩrtũm krajê piitã mẽ ho hwÿr rãhã ho ri papa.

19Nẽ kwa kêr ka mẽ mããnên ixto Tĩrtũm wÿr rãhã nẽ. Kot tanhmã ixto nhũm ixãmnhix ixte mẽ kãm kapêr jarênh mex o ri mẽ hkôt ixpa

kaxyw. Mě kot ja hã tanhmã ixto htã pa arĩ ixàmnhĩx mẽ kãm harěnh mex o ri mẽ hkôt ixpa. Ně ixprĩ hã mẽ kãm Jejus kot tanhmã mẽ panê amnhĩ nhĩpêx to hã harě. Kormã mẽ kot hprĩ hã ja mar mex kêt. ²⁰Tã ixte mẽ kãm ja jarěnh kaxyw na pre Tĩrtũm mẽ hwỳr inhmẽ nhũm prem hã ijaxà pa arĩ mẽ hãgjěnh xà kamã ixkrĩ ho ixkrĩ. Jakamã kwa mẽ ixto Tĩrtũm wỳ kêt tanhmã ixto ixihtỳx to pa arĩ mẽ kãm kapěr jarěnh o ixkrĩ. Ja na Tĩrtũm kãm hprãm nẽ ijaxwỳja inhmã ja prãm.

Kagà jatur xà

Korosẽ 4.7-8

²¹Ně ot pa mẽ awỳr Xikitre mẽ. Kot paj mẽ amã kagàja nhĩpêx pa nẽ kãm kugõ nhũm kupy nẽ ma mẽ awỳr o mỗ. Hãmri nẽ mẽ awỳr o pøj nẽ mẽ amã kugõ nẽ mẽ amã tanhmã ijarěnh to ka mẽ ijarěnh ma nẽ akĩnh nẽ. Xikitre na hte Pahihti mã tanhmã amnhĩ nhĩpêx mex to o pa. Kris kôt mẽ pahtõ na. Ně inhmã hapêê. ²²Tã ot pa mẽ awỳr kumẽ. Kê mẽ awỳr pøj nẽ mẽ amã ijarẽ ka mẽ kam ama nẽ akupỳm tãm akrã nẽ tee ri ixkukamã ajamaxpěr kêt nẽ. ²³E ixkràmnhwỳjaja. Kê Měpahpãm Tĩrtũm mẽ Pahihti Jejus Krisja wa tanhmã mẽ akrã hto ka mẽ ajamakêtkati nẽ axàmnhĩx ri apa. Ně mẽ amã axpẽn kĩnh o ri axpẽn kôt apa. Ně mẽ apiitã wa hkôt ajamaxpěr mex o ri apa. ²⁴E mẽ amã mẽ panhõ Pahihti Jejus Kris kĩnh rãhã ho apa xwỳnhjaja. Kê Tĩrtũm mẽ ato mex nẽ mẽmoj to mẽ akutã nojarêt rãhã ho pa.

Tã ãm ja pix na hapêx. Ixpê Pawre na pa mẽ awỳr kagàja nhĩpêx nẽ kumẽ.

Piripos

Pawre kot Piripos kamã Jejus kôt hkwỳjê hwỳr kagà nê mênh

Pawre na pre kagàja nhípêx. Jejus nhỹ hã mẽ ahkre o mẽ pa xwỳnhjê hõ na pre. Na pre Jejus ã mẽ kãm hkurê xwỳnhjaja unê nê ma krĩ pê Rõm wỳr kumê nê kamã haxà nhũm mẽ hagdênh xà kamã hkrĩ ho hkrĩ. Tã nhũm arĩ hkrĩ rãhã Piripos kamã Jejus kôt hkwỳjê hwỳr kagàja nhípêx nê kumê. Na prem Pawre jarênh ma nê kãm ukaprĩ nê. Jakamã axpên kaxyw kàxpore hkwỳ ho akuprõ nê hwỳr kumê. Hãmri nhũm omu nê hkĩnh nê amnhĩ tã kagàja nhípêx nê kamã mẽ kãm amnhĩ jarê nê mẽ hwỳr kumê. Kot amnhĩ xà htỳx kamã hamak o hkrĩ htã arĩ hwỳr mẽ mrar xwỳnhjê mã Tĩrtũm kapêr jarênh rãhã ho hkrĩ hã amnhĩ jarê. Nê kãm Jejus kot amnhĩ nhípêx kôt pix mã amnhĩ nhípêx o pa hprãm ã amnhĩ jarê. Nê kãm Jejus jamaxpêr kôt pix mã hamaxpêr prãm ã amnhĩ jarê. ã na pre Pawre kagàja kamã mẽ kãm amnhĩ jarênh anê. Nê mẽ kãm:

1 1Pa Piripos kamã Jejus Kris kôt ixkwỳjaja. Xà mẽ amex na ka mẽ apa? E ixpê Pawre na pa mẽ amã kagàja nhípêx nê kamã mẽ amã amnhĩ jarê nê mẽ awỳr kumê. Nhũm Ximotre haxwỳja kãm ja mex nê. Wa ixpê Jejus mã tanhmã amnhĩ nhípêx to ho wa ixpa xwỳnh jakamã na pa wa mẽ awỳr hipêx nê kumê. Mẽ ate Tĩrtũm kapêr o mẽ ajahkre xwỳnhjê hwỳr nê mẽ kãm mẽ ate tanhmã amnhĩ to xwỳnhjê hwỳr nê mẽ ate mẽ mar o akrĩ xwỳnhjê hwỳr. Mẽ apê Kris kôt wa ixtõ nê wa ixtõxjê ho ixpimràatã mẽ awỳr hipêx nê kumê. 2E kê Mẽpanhĩpêxà maati Tĩrtũm mẽ Pahihti Jejus Kris wa mẽmoj to mẽ akutã nojarêr rãhã nê ka mẽ axàmnhĩx ri ajamakêtkati nê ri apa ho apa.

Pawre kot Piripos nhõ xwỳnhjê ho Tĩrtũm wỳr ã harênh

Epes 1.15-19; Korosê 1.9-12

3Na pa hte xatã mẽ amã ijamaxpêr o ixkrĩ nê mẽ panhõ Tĩrtũm kot tanhmã mẽ ato mex toja pa kãm ijamaxpêr nê ixkĩnh nê ixkrĩ. 4Nê Tĩrtũm mã mẽ ajarênh nê mẽ ato kuwỳ. Ixkĩnh kãm mẽ ato kuwỳ.

5Wam ixte mẽ awÿr inhmõrta ã na pa pre mẽ amã Jejus kot mẽ panê tanhmã amnhĩ nhĩpêx to hã harênh o ri mẽ akõt ixpa. Ka prem inhma nê hkõt amnhĩ xunhwÿr tÿx nê hkõt amnhĩ nhĩpêx o ri apa. Jakamã inhmã axpên kaxyw ri kàxpore hkwÿ nhõr o apa. Te ham mẽ ate ixwÿr mênhta pyræk pa pre mẽ akukwak ri amnhĩm ho ixujaprõr o ri ixpa pê nhãm ri mẽ kãm Jejus jarênh o ri mẽ hkõt ixpa. Na pa hte arĩ jam ijamaxpêr rãhã ho ixkĩnh nê ixkrĩ. Nê Tirtũm mã mẽ ate ixto mex ã kãm mẽ ajarênh o ixkrĩ.

6Nê na pa pre ma mẽ awÿr mõi nê mẽ amã Jejus jarê ka prem inhma nê hkõt amnhĩ xunhwÿr nhũm Tirtũm ja hã mẽ apumunh mex nê. Hãmri nê mẽ ate hkõt amnhĩ to htÿx kaxyw tanhmã mẽ ato mẽ axihtÿx to. Tã koja arĩ mẽ ato mẽ axihtÿx rãhã nhũm Jejus Kris nhÿrmã akupÿn mẽ pahwÿr wrÿ. Koja ã mẽ ato mex anê. 7Na hte tanhmã ixto mex tota pyrã nê tanhmã mẽ ato mex to ho pa nê mẽ akutã nojarêr rãhã ho pa.

Nê kormã mẽ kot ijaxàr kêt ri pa pre ma mẽ piitã mẽ kãm Jejus jarênh o ri ixpa. Nê ãm hãmri mẽ kãm harê. Mẽ kot mar nê hkõt amnhĩ xunhwÿr tÿx kaxyw pa pre mẽ hkõt harênh rãhã ho ri ixpa. Ka prem ja kaxyw inhmã kàxpore hkwÿ gõi pa pre ho amnhĩm ixujaprõr pê mẽ hkõt ri mẽ kãm harênh o ri ixpa. Tã nhũm prem jar Rõm kamã ijaxà pa arĩ ixkrĩ htã ka mẽ axte ixwÿr hkwÿ mẽ. Jakamã na pa hte mẽ amã ijamaxpêr rãhã ho ixkrĩ nê inhmã mẽ akĩnh tÿx nê. 8Te Jejus Kris kãm mẽ ajapê htÿx pyræk. Tirtũm kot ja hã xpumunh mex.

9-10Na pa hte mẽ ato kuwÿ nê kãm:

— Pa Tirtũm. E Piripos nhõ xwÿnhjê pumu. Na mẽ ra kãm axpên kĩnh o axpên kõt pa. Kwa tanhmã mẽ hipêx to kê mẽ arĩ kãm axpên kĩnh tÿx pix nê. Jao axpên to mex rãhã ho pa. Nê tanhmã mẽ hkrã hto kê mẽ amnhĩ krãm akapêr jaxàr tÿx nê. Jao tãm amnhĩ nhĩpêx mex nê hamaxpêr mex o ri pa. Nom kormã mẽ kot ja pumunh tohtuj anhÿr. Tã kêr ka tanhmã mẽ ho kê mẽ ã amnhĩ nhĩpêx anhÿr rãhã Jejus Kris akupÿn mẽ ixwÿr wrÿ.

Anhÿr pa hte mẽ ato hwÿr o ixpa. 11Nã koja Jejus Kris mẽ akaxwÿnh kãm mẽ ato mẽ axihtÿx ka mẽ ÿ hã axihtÿx pê tãm ri amnhĩ nhĩpêx nê tãm axpên nhĩpêx o ri axpên kõt apa. Nhũm mẽ piitã ja hã mẽ apumu nê axpên mã Tirtũm mex o mex ã harê.

Pawre kãm Kris kõt amnhĩ nhĩpêx prãm ã harênh

Atre 28.30-31; Epes 6.19-20; Sikũn Ximotre 2.9

12E Kris kõt ixtõ nê ixtõxjaja. Kot paj mẽ amã tanhmã amnhĩ jarênh to ka mẽ inhma. Na prem ra Jejus ã ixtomnuj tÿx nê hã ijaxà pa amnhĩ xà htÿx kamã ijamak o ixkrĩ. Nom mẽ kot ã inhĩpêx anhÿr tã pa hte arĩ ixkrĩ xà kamã mẽ kãm Jejus jarênh o ixkrĩ. Jakamã na mẽ ra ohtõ nê tanhmã kot mẽ panê amnhĩ nhĩpêx to hã harênh ma. 13Põristi kot

inhĩhkô hã ixtãnopxar xwỳnhjê mē ixwỳr mē mrar xwỳnh piitã ixte Kris kapēr jahkre ho ixpa pix ã mē kot ijaxàr ã ijarēnh ma. 14Nē jar Kris kôt mē pahtô nē mē pahtôxjaja haxwỳja ijarēnh ma nē ohtô nē ixpyrà nē Kris nhỹ hã amnhĩ to htỳx nē arĩ hkwỳjê mã kapēr jarēnh rãhã ho pa. Ixpyrà nē kãm mē uma hkêt nē mē kutã amnhĩ to htỳx pê mē kãm harēnh rãhã ho pa.

15-18Nē na pre mē hkwỳjaja ixte mē amã Kris jarēnh o ixpa hã ijarēnh ma nē hã ixkamã gryk nē axtem hamaxpēr nē ixwakre kamã gryk kãm mē kãm Kris kapēr jarēnh o pa. Na htem hamaxpēr o:

— E kot paj ma Pawre kot ra mē hwỳr mōr xwỳnhjê hwỳr mō nē kot ra mē kãm Jesus kapēr jarēnh nhĩpy axte mē kãm harēnh o ri mē hkôt ixpa. Hãmri nhũm mē inhma nē inhgryk ã Pawre kaga. Hãmri nhũm mē hagjēnh xà kamã arĩ hkrĩ tã tee ri mē hã ijarēnh ma nē hkaprĩ nē rĩ amnhĩ pumu. Nà kot paj anē.

Anhỹr o hamaxpēr tã pa mē harēnh ma nē ixkaprĩ hkêt nē. Mē kot mē amã hprĩ hã Kris kapēr jarēnh kēnã kot pa kêt tee ri mē harēnh ma nē ixkaprĩ. Kwār mē mãmri ri ixkamã gryk kãm kapēr jarēnh o ri pa. Pa mē harēnh ma nē ixkĩnh nē. Nom na hte mē hkwỳjaja jajê rom kãm ixkĩnh kãm mē kãm Kris kapēr jarēnh o pa. Nē tãm hamaxpēr pê mē kãm harēnh o pa. Ra mē kot ixpumunh mex jakamã nhũm Tĩrtũm kot jar mē hwỳr inhmēnh nhũm ixte ãm hãmri mē kãm kapēr mex jarēnh o ri ixkrĩ hã ixpumunh mex. Jakamã kwār mē mãmri tanhmã inhmã hamaxpēr to xà hkôt mē ujarēnh mexja jarēnh o pa. Mē kãm ixkĩnh kãm harē rỹ ixkamã gryk kãm ri harēnh o pa. ãm hãmri Kris kapēr jarēnh o pa jakamã pa mē harēnh ma nē ixkĩnh nē.

19Nē ra mē ate ixto Tĩrtũm wỳr o apa jakamã koja Karōja ixkaxyw tanhmã jar Rôm kamã pahihti nhĩpêx to nhũm tokyx ixkator japêr. Pa ixãmnhĩx ijamakêtkati nē ri ma mē akôt ixpa. 20Nom inhmã Jesus kãm hprãm xà hkôt pix mã tanhmã amnhĩ nhĩpêx to ho ixpa hprãm. Jakamã koja mē ixkator pa ixkĩnh nē arĩ kãm tanhmã amnhĩ nhĩpêx to ho ri ixpa. Nom koja mē tanhmã hamaxpēr to nē ixpĩ pa mē kutã mē kãm amnhĩ to htỳx nē ixãm rãhã nhũm mē ixpĩ pa ijamakêtkati nē ty. Kê mē ja hã ixpumu nē ixtã Kris mex o mex ã harê. ãm Jesus kãm hprãm xà hkôt pix mã na inhmã amnhĩ nhĩpêx prãm. 21Tã kot paj tanhmã amnhĩ to nē arĩ ixtĩr japêr hã kot paj ãm kôt pix mã amnhĩ nhĩpêx rãhã ho ixpa. Nom koja mē tanhmã hamaxpēr to nē hã ixpĩ pa ty nhũm Tĩrtũm ma kaxkwa hwỳr ixkarō ho àpir kurê kumrêx. Pa Tĩrtũm mē Krata wa kuri inhmex o inhmex nē wa kuri ixpa ho ixpa. 22-23Tã nhỹ na we inhmã mex o hõ jakrenh wehe? Na pa tee ri amnhĩ kukamã ijamaxpēr. Inhmã tokyx ixyk nē Kris kuri ixpa hprãm. Ja na inhmã hprãm o inhmã hprãm. Nom ko. Kot pa arĩ ixtĩr nē arĩ mē kãm Jesus kot tanhmã mē panê amnhĩ nhĩpêx to hã harēnh rãhã ho ri ixpa. Ko. Ja mããnēn inhmã mex. 24No mē amã

na arĩ ixtĩr nẽ ixpaja mẽ amã hprãm 25jakamã kot paj pẽr tokyx ixtyk kêt nẽ. Kot paj arĩ ri mẽ amã Kris kôt mẽ ato mẽ axihtỳx o ri mẽ akôt xpa. Jao ãm ho hkrãnre ka mẽ ra amnhĩ kaxyw kãm ajamaxpẽr nẽ hkôt amnhĩ xunhwỳr tỳx nẽ. Jao akĩnh nẽ apa. 26Tã kot paj nhỹrmã akupỳm ixtĩr rãhã mẽ awỳr mỗ ka mẽ ixpumu nẽ akĩnh nẽ. Jejus Kris kot akupỳm ixkator ã akĩnh nẽ. Hãmri nẽ ixtã Jejus mã mex o mex ã harẽ.

Mẽ pahte Jejus ã pahpunuj tã mẽ pahte amnhĩ to htỳx ã mẽ pamã karõ

Rukre 6.22; Sikũn Korĩt 2.14-16; Xiakre 1.12; Jutre 3

27Jakamã e kêt ka mẽ Jejus Kris kapẽr kôt pix mã amnhĩ nhĩpêx. Nẽ axpẽn kôt axpẽn to axihtỳx pẽ mẽ kãm Jejus kot tanhmã mẽ panê amnhĩ nhĩpêx to hã harẽnh o ri apa kê mẽ ama nẽ mẽ pahpyrà nẽ hkôt amnhĩ xunhwỳ. E kêt ka mẽ ã amnhĩ nhĩpêx anhỹr o ri apa. Kêt pa nhỹrmã mẽ hagjênh xàja rũm ixkator japêr nẽ nhỹri ja hã mẽ ajarênh ma rỳ ma mẽ anhõ krĩ hwỳr mỗ nẽ ja hã mẽ apumu nẽ ixkĩnh nẽ. 28Nom kwa kêt ka mẽ amã mẽ kot Kris ã tanhmã mẽ ato xwỳnhjê puma hkêt nẽ. Mẽ kot tanhmã mẽ anhĩpêx kati hto htã kêt ka mẽ kutã amnhĩ to htỳx nẽ mẽ hkôt apa. Kêt kê mẽ amnhĩ tã mẽ apumu nẽ tee ri hamaxpẽr hãmri nẽ axpẽn mã:

—Kwa mẽ pahte Kris ã tanhmã mẽ hipêx to htã na htem amnhĩ to htỳx nẽ arĩ mẽ pamã harẽnh o ri pa. Pẽr mẽ kãm mẽ pahpuma hkêt. Mãn hte Tĩrtũm tanhmã mẽ ho nhũm mẽ ỹ hã kãm mẽ pahpuma hkêt nà? Kwa tanhmã kot puj mẽ ho nhũm mẽ Jejus kapẽr jarênh o pata kaga? Nà kot puj mẽ ãm tee ri hã tanhmã mẽ ho kaprỳ. Mãn ãm hãmri na htem nhỹrmã Tĩrtũm kuri htĩr tũm nẽ pa ho pa hã amnhĩ jarênh o pa nà? Anẽ.

Koja mẽ ã mẽ ajarênh anẽ. Tĩrtũm kot mẽ ato mẽ axihtỳx ã mẽ apumunh kôt. 29Na pre tanhmã mẽ ato ka mẽ Kris kôt amnhĩ xunhwỳ. Tã mẽ kot tanhmã hã mẽ anhĩpêx to htã na hte Tĩrtũm mẽ kutã tanhmã mẽ ato ka mẽ ỹ hã amnhĩ to htỳx nẽ apa. 30Ijaxwỳja na pa hte amnhĩ xà htỳx kamã ijamak o ixkrĩ. Na pre htem Jejus ã ixtomnuj o pa ka prem ja hã ijarênh ma nẽ hã ixpumu. Tã ota kê mẽ ra axte tanhmã hã inhĩpêx to. Pa kê amnhĩ xà htỳx kãm ijamak o ixkrĩ ka mẽ ijarênh ma. Tã xep mẽ ixpyrà nẽ Kris ã amnhĩ xà htỳx kamã ajamak o apa. Nom kwa kêt ka mẽ tee ri amnhĩ kukamã ajamaxpẽr o akaprĩ nẽ apa hkêt nẽ.

Jejus kãm mẽ pajapê xaj tanhmã kot amnhĩ nhĩpêx to hã harẽnh

Rõmãn 15.5-6; Epes 4.1-6; Piripos 2.18

2 1Nẽ ra mẽ pahte Jejus kôt amnhĩ xunhwỳr jakamã pu mẽ tee ri amnhĩ kukamã pajamaxpẽr o pahkaprĩ nẽ ri papa hkêt nẽ. ãm kãm mẽ pajapêja mã pajamaxpẽr rãhã ho pahkĩnh nẽ pajamakêtkati nẽ ri papa. Nhũm Karõ mẽ pahkarõ mã agjê nẽ mẽ pahto mex nẽ mẽmoj to mẽ pakutã nojarêr o ri mẽ pakamã pa. 2Tã kêt ka mẽ axpẽn mar mex nẽ

měmoj tã axpën mã axàkjêr o ri apa hkêt nê. Te ri ixkre pixi kamã mẽ atipxi nê axpën kôt amnhĩ nhĩpêx pyræk. Nê Tirtũm kãm hprãm xà hkôt pix mã ajamaxpêr o ri apa. Nê mẽ amã axpën kĩnh o ri apa. Kot kaj mẽ ã amnhĩ nhĩpêx anê pa ja hã mẽ apumu rỳ hã mẽ ajarênh ma nê ixkĩnh tỳx kumrêx.

3Nê kwa kêr ka mẽ axpën pumu nê ã ajamaxpêr anhỹr kêt nê. Mẽ ajamaxpêr o:

—Tk. Kot pa ri tanhmã jahti ho ajuta hto ho ixpa hkêt nê. Ixte amnhĩ to rax o hakrenh kênã kot pa hkêt ri ho ajuta. Kê tãm mãn tanhmã ixto ajuta hto.

Anhỹr o ajamaxpêr kêt nê. Kêt nhỹri mẽhõ pumu nhũm tanhmã kute ka hã omu nê ajamaxpêr o:

—Hêxta waa nê. Kwa tanhmã kot pa we ho ajuta htoo?

Anhỹr o ajamaxpêr hãmri nê ajamaxpêr xà hkôt tanhmã ho ajuta hto.

4Jao Jejus pyrà nê mẽmoj to axpën kutã anojarêt o ri apa. No ri amnhĩ pix kukamã ajamaxpêr o apa hkêt nê. 5Kêr pu mẽ te Jejus tanhmã hamaxpêr toja pyræk o pajamaxpêr o ri papa.

6 Kêp Tirtũm Kra kumrêx jakamã te uræk tã xà na pre ja hã amnhĩ pumu nê amnhĩ pix kukamã ã hamaxpêr anê nê hamaxpêr o:

Te ixte Tirtũm pyræk jakamã mẽmoj piitã inhõ na. Jakamã kot paj jar kaxkwa kamã inhmex nê ixkĩnh nê ixpa ho ixpa nê aa rer nê nhỹhỹm inhmõr kêt kumrêx. Anhỹr o na pre hamaxpêr? Nà na pre ã hamaxpêr anhỹr kêt nê.

7-8 Kãm mẽ pajapê xàj na pre kaxkwa kamã mẽmoj mex piitã rer pa nê man mẽ pahwỳr wrỳ nê mẽ pahpyrà nê ì ho katorxã nhõhy rũm kato.

Kêp mẽ panhõ Pahihti htã te kêp mẽ panhĩõ nê te kot amnhĩ to grire pyræk o amnhĩ nhĩpêx o ri pa.

Nê Tirtũm kãm hprãm xà hkôt pix mã amnhĩ nhĩpêx o pa. Nê ãm kôt pix mã amnhĩ nhĩpêx o pa rãhã nhũm prem kupĩ nhũm arĩ mẽ kãm xa nê tanhmã amnhĩ tã mẽhõ hto hkêt nê.

Na prem hipêx kati nê. Te kêp mẽ kot amnhĩ tomnuj tỳx xwỳnhjê nhĩpêx pyræk o hipêx nê pĩ kahpa hã kunhõ nê kupĩ.

Tã no nhũm mẽ kêp tanhmã amnhĩmnuj to hkêt nê arĩ mẽ kãm xa. Mẽ panê na pre ã amnhĩ nhĩpêx anê.

9 Hãmri nhũm Tirtũm ã kot amnhĩ nhĩpêx anhỹr ã omu nê akupỹm ho htĩr nê akupỹm amnhĩ wỳr ho api.



Piripos 2.3-4

Ně mex o mex ã harě.

Ně kot nhỹrmã mẽ pahpiitã mẽ pahto amnhĩptãr kaxyw mẽ pakaxyw ãm.

10 Jakamã kot puj mẽ nhỹrmã pahpiitã Jejus kutã pahkõnkrã ho rôrõk ně pahkrĩ hpa ně kàx pêê kãm mex o mex ã harě.

Mě pahpiitãã. Kaxkwa kamã mẽ pa xwỳnhjaja ně pika piitã hkõt mẽ papa xwỳnhjaja.

Ně mẽ htyk xwỳnh piitã koja mẽ akupỹn htĩr pu mẽ pahpimràatã Jejus kutã pahkõnkrã ho parõrõk ně pahkrĩ hpa ně kãm mex o mex ã harě.

11 Ně kãm:

Pa Pahihti Jejus. Nà ãm hãmri na apê mẽ inhõ Pahi Maati hã apyxi mex na ka.

Jakamã mẽ ixtõ kot paj mẽmoj tã tanhmã amã karõ hto? Nà kot paj mẽ ixtõ ã amnhĩ nhĩpêx anhỹr kêt ně. Aně.

Kot puj mẽ nhỹrmã ã Jejus mã pakapěr aně.

Jao mããněn Tĩrtũm hihtỳx o hihtỳx ně àhpumunh o àhpumunh ã omu. Ně mex o mex ã omu.

Te mẽ pahpê kanhêti pyrãk ã mẽ pajarěnh

Matêwre 5.14-16

12-13Tã kwa ixkrãmnhwỳjaja. Inhmã mẽ akĩnh. Kwa kêr ka mẽ arĩ Tĩrtũm kõt amnhĩ nhĩpêx mex rãhã ně. Te ixte mẽ akamã ixpare ri mẽ ate amnhĩ nhĩpêx mexta pyrãk o ixwakre kamã amnhĩ nhĩpêx mex o ri apa. Na pre ra Tĩrtũm mẽ panê mẽ pahte amnhĩ tomnuj rê ně tanhmã mẽ pahto pu mẽ ỹ hã kapěr kõt amnhĩ nhĩpêx o ri papa. Jakamã kwa kêr pu mẽ axte tanhmã amnhĩ tomnuj to ho papa hkêt ně. Ně mẽ pahte Tĩrtũm kapěr kwỳm ri amnhĩ nhĩpêx pymaj ãm hkõt pix mã amnhĩ nhĩpêx o ri papa.

14Ně kêr ka mẽ mẽmoj to anhỹr kaxyw ně agryk kãm tanhmã ri ho hkêt ně. Ně mẽmoj tã axapěnh kaxyw ně ri hã axpěn mã akapěr kati kamã ho anhỹr kêt ně. 15-16Mě kot amnhĩ tomnuj xwỳnhjaja na htem ã amnhĩ nhĩpêx anhỹr o pa. No kêt mẽ kajaja. Mě ate mẽ hkõt apa htã kêr ka mẽ hkõt amnhĩ nhĩpêx kêt ně. Mě kurom mẽ apê Tĩrtũm kra jakamã kêr ka mẽ hkõt pix mã amnhĩ nhĩpêx o ri apa. Ně tanhmã amnhĩ tomnuj to rỳ tanhmã ajamxpěr punuj to hkêt ně. Mě kot amnhĩ tomnuj xwỳnhjaja te ri kamàt kô kamã ri mẽ kệp àhkĩnh o ri mẽ pa xwỳnhjê kot amnhĩ nhĩpêx pyrãk. Tã kot kaj mẽ hkõt tãm ri amnhĩ nhĩpêx o apa ně te ate kanhêtija kamàt kô kamã hirã ho harir pyrãk o amnhĩ nhĩpêx. Jao mẽ kãm Tĩrtũm kapěr jarěnh o ri mẽ hkõt apa. Mě kot amar ně apyrà ně nhỹrmã kuri htĩr tũm ně pa ho pa kaxyw. Kot kaj mẽ ã amnhĩ nhĩpêx aně nhũm nhỹrmã Jejus Kris akupỹn mẽ pahwỳr wrỳk ã arĩgrota ã pa

mě apumu ně ixkính ně. Ně ixkính kām Jejus mā mẽ ajarẽ ně kām mẽ ajarẽnh o:

—Kwa Pahihti. E jajê pumu. Na pa pre mẽ kām akapêr jarẽnh o ri mẽ hkôt ixpa nhũm mẽ inhmar tỳx ně mẽ akapêr kôt amnhĩ nhĩpêx o ri pa. Jakamã na pa pre mẽ kām akapêr jarẽnh kaprỳ hkêt ně.

Anhỹr o kām mẽ ajarẽ. 17Na pa pre mẽ akôt mẽ amã Tĩrtũm kapêr jarẽnh o ri ixpa ka prem inhma ně hkôt amnhĩ xunhwỳ. Jakamã te ixte Tĩrtũm mā mẽ ato ixkính xà ně kām mẽ anhõr pyræk.

Ně koja jar Rõm nhõ pahihtija tanhmã ixto hkêt japêr. Rỳ tanhmã ixto. Nom kwār mẽ māmri tanhmã kām ixto hprãm xà hkôt tanhmã ixto rỳ xipĩ. Koja mẽ ã ixte mẽ anhĩpêx anhỹr ã xipĩ pa ixkính ně. Ně tanhmã ijamaxpêr to hkêt kām ty. Jakamã na pa ra ã mẽ kot inhĩpêx anhỹrja kukamã mẽ amã amnhĩ kính ã amnhĩ jarẽ ka mẽ inhma. 18Tã kêt ka mẽ ixpyrà ně ajaxwỳja ixtã akính ně apa.

Ximotre mẽ Eparoxit wa harẽnh

19Ně koja Pahihti Jejus kām ja prãm hã kot paj ma mẽ awỳr Ximotre mẽ nhũm ma mẽ awỳr mō ně ri mẽ akôt pa ně tanhmã mẽ ate amnhĩ nhĩpêx to hã mẽ apumu. Hãmri ně man akupỹn ixwỳr mō ně inhmã mẽ ajarẽ pa mẽ ajarẽnh ma ně ixkính ně tee ri mẽ akukamã ijamaxpêr o ixkrĩ hkêt ně. ãm tãm mẽ akukamã ijamaxpêr o ixkrĩ. 20Ximotre tapxipix na ixpyrà ně kām mẽ akính ně kām mẽ ato ajuta hprãm. Na hte mẽ ajarẽnh rãhã ho pa. 21Nom jar mẽ piitã Ximotre kínhã amnhĩ mex pix kukamã hamaxpêr o pa ně kām Jejus Kris kôt tanhmã amnhĩ nhĩpêx to ho pa hprãm kêt ně.

22Ximotre te kêp ixkra pyræk. Na hte ixkôt pa ně ixpyrà ně Jejus mā tanhmã amnhĩ nhĩpêx mex to ho pa. Pa pre wa ijamẽ mẽ kām mẽ ujarẽnh mex jarẽnh o wa ri mẽ hkôt ixpa. 23Tã koja mẽ tanhmã ixtã axpẽn mar to. Apu mẽ kot ixpĩr ã amnhĩ jarẽ rỳ ixkator ã amnhĩ jarẽ. Pa tanhmã amnhĩ tã mẽ mar to ně rĩ kormã ma mẽ awỳr Ximotre mẽ kê ma mẽ awỳr mō ně mẽ amã tanhmã ijarẽnh to.

24Ně koja Pahihti Jejus kām ja mex pa ijaxwỳja ma mẽ awỳr mō pu mẽ axte axpẽn pumu.

25Ně kot paj tokyx ma akupỹm mẽ awỳr Kris kôt mẽ pahtõ Eparoxit mẽ. Na ka prem kām kàxpore gõ nhũm man ixwỳr o mō ně inhmã kugõ. Hãmri ně jar inhmã àpênh rax ně ixpyrà ně mẽ ujarẽnh mexja jarẽnh o pa. 26-27Tã ra à htỳx ně. Kironhỹx pre mẽ pahpê ty. Tã nhũm Tĩrtũm omu ně kamã ukapĩrĩ ně. Ně määnẽn pa ixkamã ukapĩrĩ ně. Ně tee ri ixte à htỳx ã omunh ně ixkapĩrĩ htỳx pymaj akupỹm inhmã ho mex nhũm ra akupỹm mex ně ri pa. Hãmri ně kām mẽ apumunh prãm ně. Mẽ ate à htỳx ã harẽnh mar ně akapĩrĩ hã mẽ ajarẽnh ma ně tee ri mẽ akukamã hamaxpêr. 28Jakamã inhmã akupỹm tokyx mẽ awỳr

mēnh prām. Tã koja mēmo arĩgro hã mē awÿr pøj ka mē omu nē akĩnh nē tãm ajamaxpēr. Pa ijaxwÿja jar ixkĩnh nē tãm ijamaxpēr. 29-30 Na ka prem ixwÿr amē nhũm man ixwÿr mō nē jar ixri mē kãm Kris kapēr jarēnh o ri mē hkõt pa rãhã nhÿx hã ty nom kot amnhĩ kamã kahak kêt. Jakamã kê akupÿm mē awÿr pøj ka mē omu nē akĩnh nē. Nē kahti hkõt amÿ nē ho mex nē. Kêp Kris kôt mē pahtō mex kēnã. ã na htem Kris mã mē kot tanhmã amnhĩ nhĩpêx to ho mē pa xwÿnhjê nhĩpêx mex anhÿr o pa.

**Mēmoj tã mē pahpumunh kôt Tĩrtũm kot tãm mē
paxunhwÿr ã harēnh**

Piripos 2.18, 4.4

3 1E Kris kôt ixtō nē ixtōxjaja. Kris kêp mē panhō Pahihiti jakamã kwa mē jam ajamaxpēr nē akĩnh rãhã ho ri apa.

Na pa ra mē amã mēmoj jarēnh rax nē. Nē hã kagà rax tã kormã inhmã ja ho anhÿr kaga hkêt nē. Kot paj axte mē amã hkwy hã kagà. Mē ate hã ano htÿx nē ho apa kaxyw. 2Jakamã e kwa mē okora. Kêr ka mē amnhĩ nē mē kot Tĩrtũm kapēr o hêx xwÿnhjê pumunh mex o ri apa. Na htem tanhmã mē amã kapēr ho pa nē mē amã:

—Kot kaj mē ixpê Ijaewjê pyrà nē amnhĩ my kwrÿt kà jakà hãmri nē apê Tĩrtũm kra. Anē.

3Nom ja kot anhÿr kêt. Mē pahte amnhĩ jakàr kôt mē pahpê Tĩrtũm kra hkêt. ã kot anhÿr ronhÿx pu mē amnhĩ krã hkõt tanhmã amnhĩ nhĩpêx to ho pahpê hkra. Nom ja kot anhÿr kêt. Mē ate amnhĩ jakàr kêt tã mē ixpyrà nē amnhĩ kaxyw Jejus Kris mã ajamaxpēr jakamã mē ixpyrà nē mē apê Tĩrtũm kra na ka mē. Na ka htem mē ixpyrà nē Karō nhÿ hã kãm mex o mex ã harēnh o ri apa nē mē ixpyrà nē Jejus kukwak ri akĩnh nē ri apa. Nom na pu htem pahpê hkra kaxyw amnhĩ jakàr kêt nē. 4Kop ãm amnhĩ krã hkõt mē pahte amnhĩ to Tĩrtũm kra ronhÿx pa ra amnepêm amnhĩ to hkra nē ri ixpa. Na pa pre ixpê hkra hprãm xaj amnhĩ krã hkõt tanhmã ri amnhĩ nhĩpêx to rax o ixpa nom ã amnhĩ nhĩpêx anhÿr kaprÿ. E pa ja hã mē amã amnhĩ jarē ka mē ijarēnh ma.

5Na pa pre ixkato nē kormã ixtã semãn pixire nhũm mē ixpê Ijaew ã inhmy kwrÿt kà krãhta. Nom pa ã mē kot inhĩpêx anhÿr kôt ixpê Tĩrtũm kra hkêt nē. Nē inhĩpêxã hkõt ixpê finat Pějãmĩ kanrēhã htãmnhwÿ jakamã ixpê Ijaew mex na pa. Nē Ijaew kapēr o ixkapēr o ri ixpa. Nom ja kôt ixpê Tĩrtũm kra hkêt. Nē mããnēn ixpê Parijew nhō xwÿnh jakamã na pa pre Tĩrtũm kot finat Mojes mã mē pakaxyw mēmoj tã karō kôt pix mã amnhĩ nhĩpêx o ixpa hprãm. 6Jao tee ri mē kot Jejus kôt amnhĩ nhĩpêx xwÿnhjê pumu nē mē homnuj tÿx o ri ixpa. Na pa pre ijamaxpēr o: “Nã mÿjjaja na htem mē ixkwÿm ri amnhĩ nhĩpêx o pa.” Anē nē mē hipêx kati ho ri ixpa. Nē ijamaxpēr o: “Ra ixte finat Mojes kot Tĩrtũm

nhỹ hã kapēr piitã hkôt amnhĩ nhĩpêx mex jakamã na pa hte tanhmã ri amnhĩ tomnuj to ho ri ixpa hkêt nê.” Anê.

7^Å na pa pre ixpê Tĩrtũm kra hprãm xaj amnhĩ nhĩpêx anhỹr o ixpa. Tã nom ãm ã amnhĩ nhĩpêx anhỹr hkaprỹ. Na htem ã ri amnhĩ nhĩpêx anhỹr kôt kêp Tĩrtũm kra hkêt nê. Tã pa hpãnhã amnhĩ kaxyw Kris kôt ijamaxpêr nhũm ixto hkra kurê kumrêx.

8^{Ra} ixte Jejus Kris kôt amnhĩ xãm jakamã Jejus kêp inhõ Pahihti pa inhmã kapêr kôt pix mã amnhĩ nhĩpêx o ri prãm. No hkrax rũm ixte amnhĩ nhĩpêx tũmja na pa ra Jejus gryk ã hkaga hpa. Te ixte mêmoj punuj pyr nê amnhĩ katut kôt mênh nê axte kãm ijamaxpêr kêt pyræk. Jao amnhĩ kaxyw Jejus kôt pix mã ijamaxpêr o ri ixpa. 9^{Nom} kormã ã ijamaxpêr anhỹr kêt ri na pa pre ixtỹx ri ijamaxpêr o:

—Nà ixte Mojes kot Tĩrtũm nhỹ hã kapêr kôt amnhĩ nhĩpêx o ixpa jakamã koja Tĩrtũm ja hã ixpumu nê ixto hkra.

Anhỹr tã nom ja kot anhỹr kêt. Na htem amnhĩ krã hkôt tanhmã ri amnhĩ nhĩpêx to ho pa nhũm Tĩrtũm ãm ja hã mẽ omu nê ãm hã mẽ omu nê mẽ ho hkra hkêt nê. Nom koja mẽ Kris kôt amnhĩ xunhwỹ nhũm ja hã mẽ omu nê mẽ ho hkra kurê kumrêx. Jakamã ixte Kris kôt amnhĩ xãm ã ixpumunh kôt pix mã na pre ixto hkra nê inhmex ã ijarê. 10^{Hãmri} pa ra inhmã Kris kôt pix mã amnhĩ nhĩpêx o ri ixpa hprãm. Na pre ty tã akupỹm htĩr nê hihtỹx nê àhpumunh tỹx o tanhmã amnhĩ nhĩpêx to ho pa. Tã ijaxwỹja inhmã urãn ã amnhĩ nhĩpêx anhỹr prãm. Nê inhmã uræk nê amnhĩ xà htỹx kutã amnhĩ to htỹx nê ixpa hprãm. Mẽ kot hã ixpĩr mã tã pa uræk nê Tĩrtũm kapêr kaga hkêt nê ãm kôt pix mã amnhĩ nhĩpêx o ri ixpa rãhã uræk nê hã ty. Ja na inhmã ho anhỹr prãm. 11^{Kê} Tĩrtũm kot hipêxta pyrã nê akupỹm ixto ixtĩr pa wa kuri ixtĩr tũm nê ixpa ho ixpa. 12^{Inhmã} Kris kôt pix mã amnhĩ nhĩpêx o ixpa hprãm tỹx kumrêx. Kormã ixte hkôt amnhĩ nhĩpêx o inhmõr nê kormã hatur xãm mênh kêt tã inhmã tokyx hatur xãm mênh prãm. Na pa ã inhmã amnhĩ nhĩpêx anhỹr prãm tỹx kumrêx.

Nê na pa hte ixte amnhĩ tomnuj kêt ã amnhĩ to jarkrar o ri ixpa hkêt nê. Na pa hte arĩ tõhã tanhmã amnhĩ tomnuj to nom inhmã ã amnhĩ nhĩpêx anhỹr prãm kêt. Nê na pa kormã ixprĩ hã Kris kot amnhĩ nhĩpêx mar o inhmõr nê hatur xãm mênh kêt tã inhmã hkôt amnhĩ nhĩpêx o inhmõr nê tokyx hatur xãm mênh prãm. Ja kaxyw na pre Jejus Kris amnhĩ kaxyw ixta. 13^{Na} pa hte mẽ akurom papxipix ixte Jejus kãm hprãm xà hkôt amnhĩ nhĩpêx o ixpa hã amnhĩ to jarkrar kêt nê. Nom ra ixte tanhmã amnhĩ tomnuj to ho ixpata pa axte kãm ijamaxpêr kêt nê. Te amnhĩ katut kôt ixte rênh par pyræk o hipêx nê axte kãm ijamaxpêr kêt nê. Nê Jejus kãm hprãm xà hkôt pix mã amnhĩ nhĩpêx prãm xaj amnhĩ kaxyw kãm ijamaxpêr o ri ixpa.

14^{Koja} nhỹrmã Tĩrtũm ixpê Kris kwỹ hã amnhĩ wỹr ixwỹ nê inhmã:

—E amnẽ ixwÿr api Pawre. Kot kaj jarãhã amnẽ mẽ ixwÿr api.

Anhÿr o nhÿrmã inhmã kapẽr jakamã na pa hte amnhĩ tã ãm pix jamãr rãhã ho ixpa. Pẽ ra Jejus kot amnhĩ nhĩpẽx piitã omunh par o mõi. Nà kot paj gaa nẽ hkõt pix mã amnhĩ nhĩpẽx mex o ri ixpa. 15Kwa kêr pu mẽ pahpiitã ã pajamaxpẽr anẽ. Jao amnhĩ wÿr hamãr pê hkõt pix mã amnhĩ nhĩpẽx o ri papa. Mẽ pahpiitã mẽ pahpẽ Kris kwÿ kênã. Nom kot ka mẽ atõ ja kaxyw tee ri amnhĩ kukamã ajamaxpẽr nẽ ajamaxpẽr o:

—Nà tanhmã kot paj we amnhĩ to nẽ Jejus kõt amnhĩ nhĩpẽx mex rãhã o ri ixpa? Ja kaxyw ixãhpumunh tÿxre hã. Anẽ.

Hãmri nẽ ã ajamaxpẽr anhÿr o apaja apẽ hihtÿx japẽr. Hã koja Tirtũm hprĩ hã tanhmã amã ja kukamã harẽnh to nẽ kaxyw ato axihtÿx ka ixpyrà nẽ hkõt pix mã ri amnhĩ nhĩpẽx o apa. 16Jakamã kêr pu mẽ ãm Tirtũm kãm hprãm xà hkõt pix mã tanhmã kãm amnhĩ nhĩpẽx to ho papa. Ra mẽ pahte hkõt amnhĩ nhĩpẽx o papa xàja kõt pix mã arĩ amnhĩ nhĩpẽx rãhã ho papa.

17E Kris kõt ixtõ nẽ ixtõxjaja. Na pa ra mẽ anoo mã Jejus kõt tãm ri amnhĩ nhĩpẽx o ri ixpa. Tã kêr ka mẽ ja hã ixpumu nẽ ixpyrà nẽ hkõt amnhĩ nhĩpẽx o ri apa. Hãmri nẽ nhÿri mẽ kot ixpyrà nẽ ã amnhĩ nhĩpẽx anhÿr xwÿnhjẽ hõ pumu nẽ uràk nẽ ã amnhĩ nhĩpẽx anẽ. 18-19Jesús kot mẽ pamã mẽ pahte amnhĩ tomnuj mÿrapê pĩ kahpa hã mẽ panê htykja nhũm mẽ ra ohtõ nẽ hprĩ hã mar tã hkõt amnhĩ xunhwÿr kêt nẽ. Mẽ kãm ã kot amnhĩ nhĩpẽx anhÿrja ã mar prãm nõkati. Jakamã te mẽ kãm Jejus kurê xwÿnh pyrãk. Na htem hã hpijaam kêt kãm tanhmã ri amnhĩ tomnuj to ho pa. Nẽ kãm amnhĩ mex pix prãm. Nẽ tanhmã amnhĩ tomnuj to nẽ ja hã amnhĩ pumu nẽ hkĩnh nẽ. Nom tee ri ja hã amnhĩ pumu nẽ hkaprĩ nẽ ri pa hkõt nẽ. Tã ã mẽ kot amnhĩ nhĩpẽx anhÿr jakamã koja mẽ nhÿrmã ma mẽ kot amnhĩ xà htÿx kamã hamak o pa tũm xàta wÿr hapẽx. Nà koja mẽ ã amnhĩ nhĩpẽx anẽ. Ra ixte mẽ amã ja hã mẽ harẽnh rax tã pa axte mẽ amã mẽ harẽ. Inhmã mẽ hkaprĩ hkõt na pa hte xatã mẽ amã ja hã mẽ harẽ. 20Kêt mẽ papajaja mẽ kurom mẽ pahpẽ kaxkwa nhõ xwÿnh nom kormã. Koja nhÿrmã Jejus Kris akupÿn mẽ pahwÿr kaxkwa rũm wrÿ. Mẽ papytãr xwÿnh maati Pahihtija akupÿn wrÿ hãmri nẽ ma akupÿm amnhĩ kõt mẽ pahto api. Jakamã na pu htem arĩ pahkĩnh pê amnhĩ wÿr kamã pajamak rãhã ho ri papa. 21Na pu htem jar pyka ja kamã Jejus kĩnhã paxirerek nẽ pahpunuj nẽ ri papa. Nom koja nhÿrmã akupÿn mẽ pahwÿr wrÿ hãmri nẽ amnhĩ pyrã nẽ mẽ pamã mẽ panhĩ nyw gõ pu mẽ uràk nẽ paxihtÿx kãm pahtÿr tũm nẽ papa ho papa. ã kot mẽ panhĩpẽx anhÿr kaxyw àhpumunh o àhpumunh. Tã koja àhpumunh tÿx kãm mẽmoj piitã ho amnhĩptãr pa. Pu mẽ pahpiitã hkõt amnhĩ nhĩpẽx mex rãhã ho ri papa.

Pawre kot mēmoj tā mẽ kām karō

Epes 4.3; Piripos 2.2; Korosē 3.15

4 ¹E Kris kōt ixtō mẽ ixtōxjaja. Inhmã mẽ ajapêê. Na pa hte mẽ ato ijamak o ixkrī mẽ mẽ amã ijamaxpēr mẽ ixkĩnh mẽ. Nẽ jar mẽ pahkwỳjê mã mẽ ajarēnh o ri ixkrī. E kwa kêr ka mẽ arī Pahihti kapēr kōt pix mã mãn amnhĩ nhĩpêx mex rãhã ho ri apa.

²Nẽ wa ka Ewox mẽ Sĩxika wa. Na ka xep hte wa mẽmoj tā axpẽn kamã agryk rãhã ho ri apa. Kwa wa ã amnhĩ nhĩpêx anhỹrja mã anhũre mẽ tãm axpẽn nhĩpêx. Pahihti Kris kōt war ate axpẽn to war atōx kēnã kot ka kêt wa axtem mẽ mẽmoj tā axpẽn kamã agryk o ri apa.

³Nẽ ka Xikitre. Apê ixkrãmnhwỳ mex jakamã kêr ka axpẽn tā wa nita wa kãm akapēr kãm axihtỳx mẽ kê war ama mẽ akupỳm tãm axpẽn nhĩpêx. Na pre wa ra Kremēn mẽ hkwyjê mẽ hpimràâtã ixpyrà mẽ Jejus kot tanhmã mẽ panê amnhĩ nhĩpêx to hã harēnh o ri pa. Tĩrtũm nhõ kagà kamã mẽ hixi piitã hikwỹ. Mẽ pahtĩr tũm mẽ mẽ papa mã xwỳnhjaja ra Tĩrtũm nhõ kagà kamã mẽ panhĩxi jaxwỳr par.

⁴Nẽ kêr ka mẽ apê Pahihti hkwy hã akĩnh mẽ ri apa. Mẽ ate ã amnhĩ nhĩpêx anhỹr o apaja na pa inhmã hprãm tỳx jakamã kot paj axte mẽ amã harẽ. Kwa kêr ka mẽ akĩnh mẽ ri axpẽn kōt apa.

⁵Pahihti Jejus ra akupỳn mẽ pahwỳr nojarêt jakamã kêr ka mẽ kutêp mẽ piitã ri mẽ ho mex o ri mẽ hkōt apa.

⁶Nẽ kêr ka mẽ tee ri amnhĩ kukamã ajamaxpēr o ri apa hkêr mẽ. Arĩ amnhĩ to Tĩrtũm wỳr rãhã mẽ. Kot ka mẽ mẽmo arĩgro hã apê amrakati japêr mẽ tee ri ja hã amnhĩ pumu mẽ amnhĩ to awỳ kê mẽ ama mẽ mẽ amã mẽmoj gō. Rỳ mẽ ate mẽmoj tā hwỳr xwỳnhnta tanhmã mẽ amã hipêx to ka mẽ amnhĩ tā omu mẽ kãm:

— Nà ãm hãmri na ka ã inhĩpêx anẽ mẽ inhmã ja gō Tĩrtũm. Amex o amex.

Anhỹr o kãm amnhĩ jarẽ. ⁷Kot kaj mẽ ã amnhĩ to hwỳr anhỹr o ri apa nhũm tanhmã mẽ akrã hto ka mẽ mẽ apê Jejus Kris kwỳ hã ajamakêtkati mẽ axãmnhĩx ri apa. Hãmri mẽ mẽmoj tā tee ri amnhĩ kukamã ajamaxpēr o ri akaprĩ mẽ apa hkêr mẽ. ãm akĩnh rãhã ri apa. Tĩrtũm kot tanhmã mẽ pahto nhũm mẽ pajamakêtkati mẽ ri mẽ papaja mẽ pahte amnhĩ tā omunh kêr. ãm tapxipix kot ã mẽ panhĩpêx anhỹr kukamã àhpumunh tỳx.

⁸E Kris kōt ixtō mẽ ixtōxjaja. Nà ixkapêr ã kagà jatur xà na ja. Kwa kêr ka mẽ ixujarēnh mar tỳx mẽ hkōt amnhĩ nhĩpêx o apa.

Nẽ kêr ka mẽ axapênh mex pix kukamã ri ajamaxpēr o apa.

Nẽ mẽmoj mex pix kukamã ri ajamaxpēr.

Nẽ axpẽn mã akapêr mex pix kukamã ri ajamaxpēr.

Nē akatàt kôt akapēr xàptàr pix o axpën mã akapēr hkukamã ri
ajamaxpēr o ri apa.

Nē tãm ri amnhĩ nhĩpêx hkukamã mãn ajamaxpēr o ri apa.

Nē mẽ piitã ri mẽ ho mex o apa hkukamã ajamaxpēr.

Nē mẽ akapēr mex pix kukamã mãn ajamaxpēr o ri apa.

E kêr ka mẽ ã amnhĩ nhĩpêx anhÿrja kukamã ajamaxpēr rãhã ho ri apa.

9Nē mẽ akôt ixpare ri na pa pre Kris kôt amnhĩ to mex pix nē tãm
ixkapēr o ri ixpa. Tã kêr ka mẽ ixpyrà nē ã amnhĩ nhĩpêx anē. Koja
Tĩrtũm ja hã mẽ apumu nē mẽ akôt ri pa ho pa. Kêp mẽ pamã mẽ
paxàmnhĩx pajamakêtkati xà nhõr xwÿn na.

Mẽ kot Pawre hwÿr mẽmoj mẽnh nhũm kot omunh nē hkĩnh ã harênh

Sikũn Korĩt 11.7-9; Piripos 1.5

10Nē amnepêm na ka prem xatã tanhmã ixto mex to ho ri apa. Tã
axte ã inhĩpêx anhÿr prãm nom mẽ apê awry nē ixpa jakamã ka xep
prem tee ri tanhmã ixto mex to hkukamã ajamaxpēr kaprÿ. Tã jar mẽ
kot ijaxàr ã ijarênh ma nē ixwÿr Eparoxit mẽ nhũm man ixwÿr mõ nē
inhmã kàxporeta gõ. Mẽ amã ijapê hã ixwÿr amē pa omu nē ixkĩnh tÿx
nē. Nē ixkĩnh kãm Tĩrtũm mã mẽ ajarê. ãm hãmri na ka prem ixwÿr
amē.

11-12Nē na pa hte tanhmã ixkute htã arĩ ixkĩnh nē ijamakêtkati nē ri
ixpa. Jakamã kot pa mẽmo arĩgro hã ixpê amrakati nē inhmã prãm japêr
tã no ãm tee ri amnhĩ kukamã ijamaxpēr o ri ixkaprĩ hkêt nē. Arĩ ixkĩnh
rãhã ixàmnhĩx ri ixpa. Rÿ pa inhõ mẽmoj rax japêr nē mãânên ixkĩnh
nē ixàmnhĩx ri ixpa. Na pa pre tõiã inhõ rax nē ixpa. Nē tõiã inhõ hkêt
nē ixpa. Tã arĩ ixkĩnh rãhã nē ixpa ho ixpa. 13Na hte Kris mẽmoj piitã
hkukamã ixto ixihtÿx pa ÿ hã mẽmoj kutã ixihtÿx nē ixpa. Jao mẽmo
arĩgro hã inhmã prãm tÿx nē ri ixpa htã ÿ hã kutã ixihtÿx nē ixàmnhĩx
ri ixpa. 14Tã jar ixpunuj nē ixkrĩ ka mẽ ijarênh ma nē ixwÿr kàxpore
hkwÿ rē. ãm hãmri na ka prem ixwÿr arē. 15Amnepêm na pa pre mẽ
anhõ pika pē Masetõn rũm ixkato nē mẽ piitã mẽ kãm Jejus kot tanhmã
mẽ panê amnhĩ nhĩpêx to hã harênh o ri ixpa ka mẽ xatã ixwÿr kàxpore
hkwÿ rē pa ho amnhĩm ixujaprõr o ri mẽ hkôt ixpa. Mẽ apê Piripos kamã
Kris kôt ixtõ nē ixtõx pixjaja na ka prem ã inhĩpêx anē. Krĩ hkwÿ kamã
Kris kôt mẽ pahkwÿjaja na mẽ akĩnhã ã inhĩpêx anhÿr kêt nē. ãm mẽ
kapxipix na ka pre ã ixto mex anē. 16Tesarõn kamã ixpare ri na pa pre
ixpê amrakati kumrêx nē ri mẽ hkôt ixpa ka mẽ xatã ixwÿr kàxpore
hkwÿ rē pa pre ho amnhĩm ixujaprõr rãhã ho ri mẽ hkôt ixpa. 17Nom
mẽ ate ixwÿr hkwÿ rēnh kaxyw mẽ akamã ijamak o ri ixpa hkêt nē. Rÿ
ijamaxpēr o:

—Ko. Koja Piripos nhõ xwÿnhjaja ijarênh ma nē kãm ixkaprĩ nē
ixwÿr kàxpore hkwÿ rēnh japêr.



Piripos 4.10-18

Anhÿr o mẽ akukamã ijamaxpêr kêt nê. Nom ra mẽ ate ixwÿr hkwy rênh jakamã koja Tirtũm ja hã mẽ apumu nê mẽ ato mex nê. ã mẽ pahte axpên kutã panojarêt anhÿrja na kãm hprãm.

18Tã nhũm Eparoxitja ham mẽ arũm kato nê man ixwÿr mō nê inhmã kàxporeta gō. Kwa na ka mẽ inhmã òr rax nê. Koja tokyx ixpê hapêx kêt pa kritpêm ho ixàpkur o ixkrĩ. Tã ot pa ho kōta nê tanhmã hkre kamã kute pumunh xà hkôt hã kagà nê mẽ awÿr kumê. Nà mẽ ate ixwÿr axàmnhōrta na Tirtũm omu nê ixtã mẽ apumu nhũm ja kãm mex kumrêx. Te mẽ kot mẽ hkuxwaxà hpâr nhũm mẽ kãm mexta pyræk nhũm ja kãm mex nê. 19Nà koja Tirtũm mẽ apê Jejus Kris kwÿ hã mẽ amã mẽ ate mẽmoj to presija xà nhōr rãhã ho pa. Mẽmoj piitã kêp ò kênã.

20E kêr pu mẽ Mẽpanhĩpêêxà maati Tirtũm mã mẽ mex o mex ã harênh rãhã o papa. Ja na inhmã hprãm.

21-22Nê ot pa mẽ jar ixpiitã mẽ apê Jejus Kris kôt mẽ ixkwÿjê hwÿr kagàja kamã mẽ ixpêr mẽ. Mẽ ixpyrà nê mẽ apê Tirtũm kra hã. Pa nê Kris kôt mẽ pahťō nê mẽ pahťōxjaja. Nê Rōm nhō pahi mã mẽ àpênh xwÿnh kot Kris kôt amnhĩ xunhwÿr xwÿnhjaja mãânên. ãm jar mẽ ixpê Tirtũm krajê piitã pa mẽ awÿr ixpêr mẽ.

23E kê Pahihti Jejus Kris mẽmoj to mẽ akutã nojarêt rãhã nê. Jao mẽ ato mex o pa.

Tã ãm ja pix. Ixpê Pawre na pa mẽ awÿr kagàja nhĩpêx nê kumê.

Korosẽ

Pawre kot Koros kamã Jejus kôt hkwỳjê hwỳr kagà nẽ mênh

Pawre na pre kagàja nhípêx. Jejus nhỹ hã hkrajê jahkre o mẽ pa xwỳnhjê hõ na pre. Tã nhũm mẽ kêp Jejus kra hkêk xwỳnh kwỳjaja Jejus ã unê nẽ haxà nhũm arĩ hkrĩ ho hkrĩ. Hãmri nẽ krĩ pê Koros kamã Jejus krajê mã kagà nhípêx nẽ mẽ hwỳr kumẽ. Koros kamã Jejus kwỳjê kamã Ijaew kwỳ nẽ kamã Ijaew kêk xwỳnh kwỳ nhũm Pawre mẽ ho hpimràatã mẽ hwỳr kumẽ. Kormã mẽ hwỳr mõi nẽ mẽ omunh kêk tãã. Nẽ kagàja kamã mẽ kot tanhmã Jejus o hêx to ho pa xwỳnhjê jarênh to. Jejus kêp Tĩrtũm Kra hkêk ã mẽ kot ho hêx xwỳnhjê jarê nẽ mẽ nê mẽ kãm kapêr. Mẽ kot mẽ hkôt amnhĩ nhípêx kêk kaxyw mẽ kãm kapêr nẽ hã kagà nẽ mẽ hwỳr kumẽ nẽ mẽ kãm:

1 1 Pa Koros kamã Kris kôt ixkwỳjaja. Xà mẽ amex na ka mẽ apa? Ixpê Pawre na pa mẽ awỳr kagàja nhípêx nẽ mẽ awỳr kumẽ. Kris kôt mẽ pahtõ Ximotre mẽ wa kumẽ. Ixte Jejus Kris nhỹ hã mẽ ahkre ho mẽ ixpa xwỳnhjê hõ na pa. Tĩrtũm kãm hprãm xà hkôt. 2Tã pa mẽ awỳr kagà nhípêx nẽ kumẽ. Mẽ apê Kris kôt mẽ ixtõ nẽ ixtõx na ka mẽ. Na ka xep htem Kris kapêr kôt amnhĩ nhípêx mex o ri apa. E kê Tĩrtũm mẽ apê hkra hã mẽ akutã nojarêk rãhã nẽ. Ka mẽ amex nẽ ajamakêtkati nẽ axãmnhĩx ri tanhmã amnhĩ nhípêx ho ri apa.

Koros nhõ xwỳnh kwỳjaja kot Jejus kôt amnhĩ xunhwỳr ã mẽ harênh
Wam Tesarõn 1.2-5

3-4Na pa ra Ximotre mẽ wa mẽ ajarênh ma. Mẽ ate amnhĩ kaxyw Jejus Kris kôt ajamaxpêr tỳx nẽ hkôt amnhĩ nhípêx mex o apa hã mẽ ajarênhja ma. Nẽ mẽ kot Tĩrtũm kôt amnhĩ xunhwỳr xwỳnh piitã mẽ amã mẽ hkĩnh ã mẽ ho mex o apa hã mẽ ajarênhja ma nẽ wa ixkĩnh nẽ. Jakamã na pa wa Pahihti Jejus Nhípêxà Tĩrtũm mã amnhĩ jarênh kaxyw nẽ kãm mẽ anhỹ hã wa ixkĩnh ã amnhĩ jarê. 5Na pre Epas ma mẽ awỳr mõi nẽ mẽ amã Jejus kot tanhmã mẽ panê amnhĩ nhípêx to hã harênh o mẽ akôt pa. ãm hãmri kot mẽ amã harênhja. Tã ka xep prem

ama nê amnhĩ kaxyw hkôt ajamxpêr nê hkôt amnhĩ xunhwỳ. Hãmri nê amnhĩ wỳr Jejus jamâr o ri apa. Koja nhỹrmã akupỹn mē pahwỳr wrỳ nê amnhĩ pyrã nê ma akupỹm kaxkwa hwỳr mē pahto api nê mē pahto mex kumrêx o mē pahkôt pa ho pa. Tã ka xep htem amnhĩ kaxyw hkôt ajamxpêr tỳx nê ã kot amnhĩ nhĩpêx anhỹr kutêp amnhĩ wỳr kamã ajamak rãhã nê. Nê mē amã mē kot Tĩrtũm kôt amnhĩ xunhwỳr xwỳnhjê hkĩnh tỳx nê.

6Na hte Tĩrtũm ãm hãmri mē pahto mex pix rãhã ho pa. Nê mēmoj to mē pakutã nojarêr rãhã nê. Tã wam mē ate harênh marta ã ka mē hkôt amnhĩ xunhwỳr kurê kumrêx nê ri kapêr kôt axpên kôt amnhĩ nhĩpêx mex pix o ri apa. Jao hkôt pix mã amnhĩ nhĩpêx mex nê. Tã na hte pika piitã hkôt ri mē pa xwỳnh kwỳjaja mē apyrã nê Jejus jarênh ma nê hkôt amnhĩ xunhwỳ. Nê mē apyrã nê axtem hkôt pix mã amnhĩ nhĩpêx nê kapêr kôt amnhĩ nhĩpêx mex o ri pa.

7Nê mē awỳr môrta ã na pre Epasja mē amã Tĩrtũm kapêr jarênh o ri mē akôt pa ka prem ama nê amnhĩ kaxyw hkôt ajamxpêr nê hkôt amnhĩ xunhwỳ. Epasja wa ixpyrã nê kot Kris mã tanhmã amnhĩ nhĩpêx to ho pa xwỳnh. Nê wa inhmã hapêê. Na pre katat kôt mē amã Tĩrtũm kapêr jarênh pa. Kot mēmoj to mē pakutã nojarêr rãhã hã harênh o ri mē akôt pa. 8Tã man akupỹn wa ixwỳr môn pøj nê wa inhmã tanhmã mē ajarênh to. Tĩrtũm Karõ nhỹ hã mē amã Kris kôt atõ nê atõx piitã mē hkĩnh o ri apa hã mē ajarê. Pa wa mē ajarênh ma nê wa ixkĩnh tỳx kumrêx.

**Pawre mē Ximotre wa kot Koros kãm hkwỳjê
ho Tĩrtũm wỳr ã wa harênh**

*Epes 1.15-23, 3.14-21; Piripos 1.9; Wam Tesarõn 5.23-24;
Sikũn Tesarõn 1.11, 2.16*

9Nê na pre Epas akupỹn wa ixwỳr pøj nê wa inhmã tanhmã mē ajarênh to. Mē ate amnhĩ kaxyw Jejus kôt ajamxpêr o apa nê mē amã Kris kôt akwỳjê piitã mē hkĩnh o ri apaja nhũm wa inhmã mē ajarê. Pa wa mē ajarênh ma nê mē ato Tĩrtũm wỳr rãhã o jar mē hagjênh xà kamã ixkrĩ. Nê arĩ mē ato hwỳr rãhã ho ixkrĩ. Nê mē ato hwỳr o:

—Pa Tĩrtũm. Ot pa Ximotre mē wa Korosê nhõ xwỳnhjê ho awỳr kaxyw amã mē harê. Kwa tanhmã mē hamxpêr to kê mē amã hprãm xà hkôt pix mã amã tanhmã amnhĩ nhĩpêx to ho pa. Nê Akarõ nhỹ hã hprĩ hã akapêr ma nê ãm hkôt pix mã tanhmã amnhĩ nhĩpêx to ho pa. Anê.

10Na pa hte wa ã mē ato Tĩrtũm wỳr anhỹr rãhã ho ixkrĩ. Kot kaj mē ã amnhĩ nhĩpêx anhỹr o ri apa nê Jejus kot amnhĩ nhĩpêx o amnhĩ nhĩpêx mex o ri apa. Nê aprĩ hã Tĩrtũm kot amnhĩ nhĩpêx ã omunh mex o mō. Jao mēmoj to axpên kutã anojarêr pix o ri apa hprãm. Hãmri

nhũm Tirtũm ja hã mẽ apumu nẽ hkĩnh nẽ. 11Tirtũmja mẽ pakurom mẽmoj piitã kaxyw àhpumunh o àhpumunh. Nẽ mẽmoj piitã kaxyw hihtỳx o hihtỳx. Jakamã na pa hte wa mẽ ato hwỳr o:

— Pa Tirtũm. Kwa tanhmã Koros nhõ xwỳnhjê ho kê mẽ axihtỳx nhỹ hã mẽmoj punuj kutã amnhĩ to htỳx nẽ. Mẽ kot Jejus ã tanhmã mẽ ho nhũm mẽ kot amnhĩ xà kamã hamak tã kê mẽ tee ri amnhĩ kukamã hamaxpêr o hkaprĩ nẽ ri pa hkêt nẽ. Âm anhỹ hã mẽ hkurê xwỳnhjê kutã amnhĩ to htỳx nẽ hkĩnh kãm ri pa ho pa. Anẽ.

Na pa hte wa ã mẽ ato hwỳr anẽ.

12Na pre ra Tirtũm amnhĩ ri mẽ pakutêp mẽmoj mex kwỳ jaxwỳ. Mẽ pahpê hkrajê mã haxwỳ. Tã ka mẽ ỹ hã tãm amnhĩ nhĩpêx o apa jao mẽ ate mẽmoj mex jamỳnh mã tãm. Ô krĩ nhĩrã rax kumrêx kamãã. Jakamã kwa mẽ kot Jejus ã tanhmã mẽ pahto htã kêr pu mẽ arĩ Tirtũm mã mex o mex ã harênh rãhã ho ri papa.

13Nẽ Satanasti kêp kamàt kô kamã mẽ kot amnhĩ tomnuj ho mẽ pa xwỳnhjê pãm. Tãm na hte mẽ ho amnhĩptàr o pa nẽ hkôt na pu prem amnhĩ nhĩpêx o papa rãhã nhũm Tirtũm tee ri ja hã mẽ pahpumu. Hãmri nẽ kãm kêp mẽ papytãr prãm xàj mẽ pahwỳr Kra japê htỳx kumrêx xwỳnhja mẽ. Nhũm mẽ pahwỳr wrỳ nẽ mẽ panê htyk o mẽ pahte amnhĩ tomnuj pãnhã kãm amnhĩre. Tã pu prem hkôt amnhĩ xunhwỳ nhũm Tirtũm hã mẽ pahpumu nẽ mẽ panê mẽ pahte amnhĩ tomnuj o hapêx pa. Te kot amnhĩ katut kôt rênh par pyrãk. Jao Satanasti pẽ mẽ pahpytã nhũm hpãnhã Jejusja tãm kêp mẽ pahto amnhĩptàr o pa xwỳnh.

14Ra htyk o mẽ pahte amnhĩ tomnuj piitã hpãnhã amnhĩrer jakamã na pu htem hkôt amnhĩ xunhwỳ nhũm mẽ pahte amnhĩ tomnuj o hapêx pu mẽ axte Satanasti hkôt ri amnhĩ nhĩpêx kêt nẽ. Âm Jejus kôt pix mã amnhĩ nhĩpêx o ri papa.

**Kris mẽ Tirtũm wa kot amnhĩ nhĩpêx te wa kot
axpên pyrãk ã harênh**

Juãw 1.1-5; Korosê 2.9; Eprêw 1.1-14

15Nẽ Krisja te kot Tirtũm pyrãk. Mẽ pahte pano ho Tirtũm pumunh kêt tã Kra Kris kot amnhĩ nhĩpêx ã harênh mar kôt mããnên Tirtũm kot amnhĩ nhĩpêx ã omunh mex nẽ. Amnepê mã kormã mẽmoj kêt ri nhũm Jejus pa ho pa rãhã nẽ. Jakamã kot amnhĩ to rax o Tirtũm kot mẽmoj to katorja piitã hakrenh par kumrêx. 16Na pre hipêêxã Tirtũm nhỹ hã mẽmoj piitã ho kator pa. Kaxkwa kamã nẽ pika hkôt mẽmoj piitã ho kator pa. Nẽ kaxkwa kamã mẽ pahte pano ho mẽmoj pumunh par xwỳnhjaja nhũm pre ho kato. Nẽ kamã mẽ pahte pano ho mẽmoj pumunh kêt xwỳnhjaja nhũm pre mããnên ho kato. Nẽ kapêr o wrỳk xwỳnhjaja nẽ mẽ hkrãhtũmjaja nhũm pre mẽ ho kato. Nẽ pika kamã mẽ

ho amnhĩptàr xwỳnhjaja nhũm pre mẽ piitã mẽ ho kator pa. Kãm hprãm xà hkôt Tĩrtũm nhỹ hã mẽmoj piitã ho kator pa.

17Tã na hte arĩ kaxkwa kamã nẽ pika hkôt mẽmoj piitã hamãr rãhã ho pa. Kêp apu kot hamãr kêt ronhỹx mẽmoj piitã akupỹm hapêx pa.

18Nẽ tãm na hte mẽ pahpê hkrajê ho amnhĩptàr o pa. Te kêp mẽ pahkrã nhũm te mẽ pahpê ĩ pyrãk jakamã na pu htem kapêr kôt pix mã amnhĩ nhĩpêx o papa. Kumrêx na pre akupỹm htĩr o htĩr jakamã kot amnhĩ to rax o mẽmoj piitã hakrenh par.

19Nẽ na pre Tĩrtũm ã hamaxpêr anẽ nẽ hamaxpêr o: “Nà Ixkra mẽ wa ixte amnhĩ nhĩpêxja te kot axpên pyrãk. Nẽ wa ixihtỹx mãânên te kot axpên pyrãk. Nẽ wa inhmex xà mẽ wa ixãhpumunhja te kot axpên pyrãk. ã wa ixte amnhĩ nhĩpêx kot anhỹr. Wa ixte amnhĩ nhĩpêxja na mex kumrêx.” Anẽ.

20Tã Jejus kot pĩ kahpa hã mẽ panê tyk nẽ hkamrô pikapĩr kukwak ri na hte Tĩrtũm mẽ kot hkôt amnhĩ xunhwỳr xwỳnh piitã mẽ ho hkra nhũm mẽ hamakêtkati nẽ àmnhĩx pa ho pa. Kaxkwa kamã nẽ pika piitã hkôt mẽ kot Jejus kôt amnhĩ xunhwỳr xwỳnhjaja na htem ã amnhĩ nhĩpêx mex anhỹr o pa. ã Jejus kot mẽ panê htyk anhỹr jakamã kot amnhĩ to rax o kot mẽmoj piitã hakrenh par.

Jejus kêp tãm mẽ paxunhwỳr xwỳnh ã harênh

21Nẽ mẽ papajaja na pu prem pamã Tĩrtũm prãm kêt o ri papa. Te hkax ã ri papa pyrã nẽ kutã amnhĩ xunhwỳ nẽ pajamaxpêr punuj nẽ tanhmã amnhĩ tomnuj to pix o ri papa. 22Tã Jejus kôt amnhĩ xunhwỳ nhũm amnhĩ tã mẽ pahpumu. Hãmri nẽ ra mẽ panê htyk jakamã amnhĩ tã mẽ pahpumu nẽ Tĩrtũm noo mã tãm mẽ paxunhwỳ. Te aa mẽ pahte tanhmã amnhĩ tomnuj to hkêt pyrãk o mẽ panhĩpêx nẽ tãm mẽ paxunhwỳ. Pu mẽ arĩ pahpê Tĩrtũm kutã amnhĩ xunhwỳr xwỳnh kêt nẽ hpãnhã pahpê hkrãmnhwỳy. 23Na pre Tĩrtũm mẽ pahte amnhĩ kaxyw Kra Kris kôt pajamaxpêr nẽ hkôt amnhĩ xunhwỳr ã mẽ pahpumunh kôt ã mẽ pahto mex anẽ. Tã kêr pu mẽ arĩ hkôt amnhĩ nhĩpêx o ri papa nẽ aa hkaga hkêt nẽ. Mẽ kot Kris ã tanhmã mẽ pahto htã pu mẽ arĩ hkôt amnhĩ nhĩpêx mex rãhã ho ri papa.

Kormã mẽ kot jar ijaxàr kêt ri na pa pre hte mẽ kãm ã harênh anhỹr o ri mẽ hkôt ixpa. Tã ka prem Jejus jarênh ma nẽ hkôt amnhĩ xunhwỳr kurê kumrêx. Nhũm krĩ piitã hkôt ri mẽ pa xwỳnh kwỳjaja mẽ apyrã nẽ harênh ma nẽ hkôt amnhĩ xunhwỳ nẽ hkôt amnhĩ nhĩpêx o pa.

Pawre kêp Ijaew kêt xwỳnhjê mã Jejus jarênh xwỳnh ã harênh

Epes 3.1-13

24Nẽ ixte mẽ amã Kris kot tanhmã mẽ panê amnhĩ nhĩpêx to hã harênh o ixpaja ã na prem tanhmã ixto htỹx nẽ pa amnhĩ xà htỹx kãm

ijamak o ri ixpa. Tã arĩ Tĩrtũm kãm hprãm xà hkõt ã amnhĩ nhĩpêx anhỹr jakamã na pa ixkĩnh nẽ jar ixkrĩ. Ixte Kris kwỳjê kaxyw amnhĩ xà kamã ijamak tỳx o ixkrĩ. Te mẽ apê Kris nhĩ pyràk xwỳnhjê mãã. Tã pa te ixpê Kris kot amnhĩ nhĩpêx pyràk o mẽ akaxyw amnhĩ xà htỳx kãm ijamak o ixkrĩ.

25Na pre Tĩrtũm mẽ apê Ijaew kêt xwỳnhjê kaxyw ixãm. Ixte mẽ amã kapêr piitã harênh par nhũm mẽ ate mar nẽ hkõt amnhĩ nhĩpêx mex o ri apa kaxyw. 26Na pre kormã mēhō mẽ awỳr mōr nẽ mẽ amã harênh kêt nẽ. Tã ra Tĩrtũm kãm mẽ ate mar prãm nẽ. Kãm mẽ apê Ijaew kêt xwỳnhjê mẽ mẽ pahpê Ijaew xwỳnhjê japê o axpẽn pyràk. Nom na pre amnepêm ri mẽ pa xwỳnhjê mã kormã ja hã amnhĩ to amnhĩrĩt kêt nẽ. Tã ra jarãhã mẽ pahpê Kris kwỳjê mã ja ho amnhĩrĩt. Mããnên kãm mẽ apê Ijaew kêt xwỳnhjê japê hã amnhĩ to amnhĩrĩt. 27Mẽ apê Ijaew kêt tã na ka prem Kris kôt amnhĩ xunhwỳ nhũm Tĩrtũm Karō mẽ akarō mã agjê nẽ mẽ akamã pa ho pa. Ka mẽ ra hkõt amnhĩ nhĩpêx jakamã kot kaj mẽ ixpyrà nẽ nhỹrmã kuri atĩr tũm nẽ amex rãhã ho apa ho apa. Ja na mex kumrêx. Tã ja na Tĩrtũm kãm mẽ ate mar prãm nẽ mẽ akaxyw ixãm. 28Jakamã na pa pre Ximotre mẽ wa mẽ apiitã mẽ amã Kris kot mẽ panê tanhmã amnhĩ nhĩpêx to hã harênh kãm ixihitỳx o ri mẽ akõt ixpa. Nẽ kapêr o mẽ ajahkre ho ri mẽ akõt wa ixpa. Nẽ jar mẽ hagiênh xà kamã krĩ piitã hwỳr kaga nhĩpêx nẽ mẽ hwỳr kurê. Mẽ kot kamã harênh nẽ mar nẽ amnhĩ tomnuj kaga nẽ hpãnhã Kris kôt amnhĩ xunhwỳr nẽ ãm kôt pix mã amnhĩ nhĩpêx o pa kaxyw. Kêr pa nhỹrmã kãm mẽ ate inhmar nẽ hkõt amnhĩ xunhwỳr xwỳnhjê jahkre nẽ kãm:

—E Pahihti. Ota akwỳjaja. Na htem akõt amnhĩ nhĩpêx mex rãhã ho ri pa. Anẽ.

29Ã ixte kãm mẽ piitã mẽ harênh anhỹrja na inhmã hprãm. Ja kaxyw na pre Jejus ixto ixihitỳx. Jakamã na pa hte Tĩrtũm nhỹ hã tanhmã kapêr o mẽ ahkre hto ho ri mẽ hkõt ixpa. Jao mẽ ho Tĩrtũm wỳr o ri ixpa nẽ mẽ kãm kaga nhĩpêx nẽ mẽ hwỳr kurê nẽ kamã kapêr o mẽ ahkre o ri ixpa.

Pawre kot Jejus kapêr o Koros nhõ xwỳnhjê o hihitỳx ã harênh

Epes 3.14-19; Piripos 1.9

2 1E kot paj mẽ amã tanhmã amnhĩ jarênh to ka mẽ inhma. Na pa hte mẽ ato Tĩrtũm wỳr rãhã ho ixkrĩ. Mẽ kajaja nẽ krĩ pê Ratisej kamã Jejus kôt mẽ pahkwỳjaja. Kormã ixte mẽ apumunh kêt tã pa hte mẽ ato Tĩrtũm wỳr kãm ixihitỳx rãhã ho ixkrĩ. 2Mẽmo kaxyw na pa hte ã mẽ ato hwỳr anê? Nẽ mẽmo kaxyw na pa hte mẽ amã kaga nhĩpêx nẽ mẽ awỳr kurê? Nã ãm mẽ ate kamã harênh nẽ mar nẽ Jejus kapêr kôt axpẽn to axihitỳx o ri apa kaxyw. Nẽ mẽ amã axpẽn kĩnh o ri apa kaxyw.

Pê te mẽ ate ixkre tipxi kamã axpẽn kôt amnhĩ nhĩpêx o ri apa pyrãk. Jao aprĩ hã Tĩrtũm kot amnhĩ nhĩpêx pumunh mex nê amnhĩ kaxyw hkôt ajamaxpêr tỳx nê. Kot kaj mẽ ã amnhĩ nhĩpêx anê nê Kris kot amnhĩ nhĩpêxta pumunh pa. Na pre Tĩrtũm tokyx mẽ kãm Kris o amnhĩrĩt kêt tã ra mẽ pamã ho amnhĩrĩt. 3Tĩrtũm kot amnhĩ nhĩpêx nê kapêrja na pu htem Kris nhỹ hã pahprĩ hã omunh nê mar mex nê. 4Jakamã koja mẽmojaja mẽ awỳr mra hãmri nê hêx rom Tĩrtũm kapêr kwỳm ri tanhmã mẽ amã mẽmoj jarênh to. Te mẽ àhpumunh tỳx pyrãk o mẽ amã harê no ãm mẽ àhpumunh kêt. Ka mẽ ama nê ãm mẽ ama nê Kris kaga hkêt nê.

5Nê kormã arĩ Jejus ã ijaxàr nê ixkrĩ nê kormã mẽ akôt ixpa hkêt tã ot pa hte mẽ amã ijamaxpêr rãhã ho ixkrĩ. Nê ra tanhmã mẽ ajarênh mar to. Na ka xep htem Kris kôt amnhĩ nhĩpêx tỳx o ri apa. Te ahkrô pê kukryt mut kuxêeti kot pĩ kupu htỳxta pyrãk. Nê ka xep htem arĩ amnhĩ kaxyw Kris mã ajamaxpêr tỳx o ri apa. Pa mẽ ajarênh ma nê ixkĩnh tỳx nê.

6Na ka prem Pahihti Jejus Kris kôt amnhĩ xunhwỳr pa. Tã kêt ka mẽ arĩ hkôt amnhĩ nhĩpêx mex rãhã ho apa. Kêp mẽ panhõ Pahihti kênã. 7Jakamã mẽ ãm kôt pix mã amnhĩ xunhwỳr tỳx nê aa hkaga hkêt nê. Te mẽmo pĩ hpàr jarêja pika kaxwỳnh kãm pimãnh nê kot pika jamỳnh tỳxta pyrãk. Nhũm kòk xàpêr tỳx tã tee kot mẽnh kaxyw pyrãk. Tã kêt ka mẽ pĩ hpàrta pyrã nê hkôt amnhĩ xunhwỳr tỳx nê hkôt amnhĩ nhĩpêx mex o ri apa. Ra Epas kot mẽ ajahkre ho pa xà hkôt. Nê amnhĩ krãm Kris kapêr jaxàr tỳx nê aa ho ajamakêtkati hkêt nê. Pê akĩnh kãm Tĩrtũm mã mex o mex ã harênh rãhã ho ri apa.

8Nê kwa kêt ka mẽ kot hêx rom mẽ amã tanhmã kapêr to ho mẽ pa xwỳnhjaja ka mẽ amnhĩ nê mẽ omunh mex nê. Nê mẽ kapêr mar hkêt nê. Mẽ ate Kris kaga hprãm xàj na htem tanhmã mẽ amã hêx to ho ri mẽ akôt pa. Te amnepêm mẽ kot Tĩrtũm kapêr kwỳm ri tanhmã mẽ ahkre hto xwỳnhjê pyrãk. Hinhu hikôoti kapêr kôt na htem tanhmã mẽ amã hêx to nom Kris nhỹ hã mẽ amã kapêr kêt nê. Jakamã kwa mẽ amnhĩ nê mẽ omunh mex nê.

9Nê Kris mẽ Tĩrtũm wa kot amnhĩ nhĩpêx kot axpẽn pyrãk. Nê wa hamaxpêr kot axpẽn pyrãk. 10Tã kêt pu mẽ pajaxwỳja wa hamaxpêr o pajamaxpêr nê wa kot amnhĩ nhĩpêx o amnhĩ nhĩpêx. Jakamã kwa mẽ kot Tĩrtũm kapêr kwỳm ri tanhmã mẽ kapêr to xwỳnhjê kot amnhĩ nhĩpêx o amnhĩ nhĩpêx kêt nê. Nê mẽ kapêr ma nê ãm mẽ ama. Kris na hihtỳx o hihtỳx o kot mẽkarõmnuti nhõ pahi piitã mẽ hakrenh par. Nê hihtỳx o hihtỳx o kot Tĩrtũm kapêr o mẽ wrỳk xwỳnhjê piitã mẽ hakrenh par. Nê àhpumunh o àhpumunh o kot mẽmoj piitã hakrenh par jakamã kêt ka mẽ kapêr kôt pix ma nê hkôt pix mã ri amnhĩ nhĩpêx o ri apa.

Mê pahte amnhĩ nhĩpêx nyw jarênh

Rômãn 6.3; Karatas 5.24

11Nê na hte ixkwỳ Ijaewjaja mẽ hkra nhỹrmã hprêk nê Tĩrtũm kôt amnhĩ nhĩpêx ã mẽ harênh kaxyw mẽ kêp mẽmy kwryt kà jakà. Tã mẽ kajaja. Mẽ apê Ijaew kêt xwỳnhjaja na pre Kris mẽ anhiêpêx o te mẽ kot amnhĩ jakarta pyræk. Jao te kot mẽ anê mẽ ate amnhĩ nhĩpêx tũm jakar par pyræk o mẽ anhiêpêx ka mẽ ra amnhĩ nhĩpêx nyw o amnhĩ nhĩpêx o apa. Nhũm htem mẽ ate amnhĩ nhĩpêx nyw ã mẽ apumu nê mẽ ate Jejus kapêr kôt amnhĩ nhĩpêx ã mẽ apumunh kurê kumrêx. 12Tã na pu htem jarãhã mẽ pahte Tĩrtũm kôt amnhĩ nhĩpêx o papa hã amnhĩ jarênh kaxyw amnhĩ jakar kêt nê. Na pu htem hpãnhã amnhĩ kaxyw Tĩrtũm xihtỳx o hihtỳx xwỳnhja kôt pajamaxpêr. Kot mẽ panê pahte amnhĩ tomnuj rênh par kôt pajamaxpêr hãmri nhũm mẽ gôx kãm mẽ pahkrã kumrã. Te mẽ pahte gôx kãm mẽ pahte amnhĩ nhĩpêx tũm rer par pyræk o amnhĩ nhĩpêx. Te Jejus htyk nhũm mẽ kot haxar nhũm nôr nhũm mẽ pahte amnhĩ tomnujja ãhkhõ hã nôr nê hapêx par pyræk. Tã pu htem ra gôj rũm pahkrã hapôj. Te Tĩrtũm kot akupỳm Kris o htĩr pyræk. Jao ra mẽ pahte Kris kôt amnhĩ nhĩpêx nyw o amnhĩ nhĩpêx o papa hkrax ã amnhĩ to amnhĩrit. 13Amnepê mormã mẽ pahte Jejus kôt amnhĩ xunhwỳr kêt ri na pu prem ri amnhĩ tomnuj to nê tanhmã pajamaxpêr punuj to ho ri papa. Tĩrtũm noo mã te ra mẽ pahtyk pyræk. Tã Tĩrtũm te akupỳm Kris kôt mẽ pahto pahfĩr pyræk o mẽ panhiêpêx nê mẽ panê mẽ pahte amnhĩ tomnuj piitã ho hapêx nê axte kãm hamaxpêr kêt kumrêx. 14Te mẽ pahte tanhmã amnhĩ tomnuj to ho papa nhũm Tĩrtũm kot ja hã mẽ pahpumunh nê mẽ pahte amnhĩ tomnuj piitã hã kagà hpar pyræk. Nê kot kagàja pyr nê Kris nhĩkhõ hã pĩ kahpa hã nhôr pyræk. Jao te kot mẽ pahte amnhĩ tomnuj ã kagata hkaxõnh nê rênh par pyræk o hipêx. 15Hãmri nhũm Krisja pĩ kahpa hã htykja o mẽkarõmnuti mẽ mẽ õ pahi Satanasti wa mẽ ho hirerek pa. Jao hihtỳx o kot mẽ hakrenh par ã amnhĩ to amnhĩrit. Te mẽ kot kutã amnhĩ xunhwỳr xwỳnh piitã mẽ noo mã mẽ ho krihkrit par nê ma akupỳm õ krĩ hwỳr hkĩnh nê grer o mõrta pyræk.

16Nê koja mẽmojaja mẽ awỳr mra nê tee ri mẽ ate mẽmoj kur o akri hã mẽ apumu nê mẽ amã:

—Kwa na hte Tĩrtũm kôt mẽ kot amnhĩ xunhwỳr xwỳnhjaja ja kur kêt nê. Nê ja ho hkõm kêt nê. Nê mẽ panhõ arĩgromnu pê sap ã ri mẽmoj tã àpênh kêt nê. Nê mytwrỳ nyw ã mẽmoj tã àpênh kêt nê. Na htem ã Tĩrtũm ã hkĩnh o pa anê. Tã ã mẽ ate mẽ ixkõt amnhĩ nhĩpêx anhyr kêt jakamã mãn mẽ apê Tĩrtũm kra hkêt nà. Anê.

Tã nom kêr ka mẽ kapêr ma nê ãm ama. 17Amnepê mormã mẽ pahte Kris kôt amnhĩ xunhwỳr kêt ri na pu prem ã amnhĩ nhĩpêx anhyr

o papa. Tã Jejus kôt amnhĩ xunhwỳ hãmri nê axte ã amnhĩ nhĩpêx anhỹr kêt nê. Pãnhã kapêr pix ma nê hkôt pix mã amnhĩ nhĩpêx o ri papa.

**Mê pahte mê kot Tĩrtũm kapêr o mê hêx xwỳnhjê
mar kêt ã mê pamã karõ**

18Nê koja mêmojaja mê awỳr mra nê hêx rom tanhmã mê amã amnhĩ jarênh to nê mê amã:

—Na pre Tĩrtũm ãm mê papxipix mê inhmã amnhĩ to amnhĩrĩt. Jakamã kwa mê ixkapêr ma. Kot kaj mê inhmar kêt nê hãmri nê mê amex kêt nê apa.

Anhỹr o mê amã kapêr japêr ka mê ama nê ãm mê ma. Rỳ nhũm mê amã:

—Tĩrtũm mê parom kot amnhĩ to rax o kot mê pahpiitã mê pajakrenh par jakamã kwa mê tanhmã amnhĩ to hwỳr to hkêt nê. Kot ka mê anê nhũm mê ama nê mê akamã gryk nê. No kêt mê amnhĩ to kapêr o wrỳk xwỳnhjê mãn wỳ. Koja mê ama nê mê akamã gryk kêt nê tanhmã mê amã mêmoj nhĩpêx to. Anê.

Koja mê ã mê amã kapêr anê ka mê ama nê ãm mê ama. Te ho mê àhpumunh tỳx kãm mê kot ã mê amã kapêr anhỹr pyrãk no ãm mê kapêrja mex kêt. Na htem amnhĩ krã hkôt te amnhĩ to rax pyrãk o ã mê amã kapêr jao mê hamaxpêr tũm o hamaxpêr o ri pa. No mê apyrã nê mê hamaxpêr nyw o hamaxpêr kêt nê. 19 ãm mê kot Tĩrtũm kapêr kwỳm ri mê ahkre jakamã mê kêp Jejus kwỳ hkêt. No mê papajaja mê pahpê Jejus kwỳ na pu mê. Nhũm Jejus kêp mê panhõ Pahшти jakamã na hte tanhmã mê pahto paxihtỳx to pu htem kukwak ri tanhmã xepên to ajuta hto ho ri papa. Nê hkôt xepên to paxihtỳx o ri papa. Mê pahpiitã mê pahte hkôt amnhĩ nhĩpêx mex o ri papa kaxyw. Tĩrtũm kãm hprãm xà hkôt.

Mê pahte amnhĩ krã hkôt tãm amnhĩ nhĩpêx kêt ã mê pajarênh

Karatas 3.1-5, 5.1-9; Epes 2.8; Piripos 3.9

20-21Nê wam mê pahte amnhĩ nhĩpêx tũm nê mê pajamaxpêr tũmta te kot Kris kôt htyk nê mê pahpê hapêx par pyrãk jakamã na pu htem arĩ hkôt amnhĩ nhĩpêx kêt nê. Nê mêkarõmnuti hkôt amnhĩ nhĩpêx kêt nê. Tã no nhũm xep ra mēhõja mê awỳr mō nê hêx rom mêmoj nê tanhmã mê amã kapêr to nê mê amã:

—Kwa mê ja jamỳnh kêt nê. Nê ja hkur kêt nê. Nê ja kupênh kêt nê.

Anhỹr o mêmoj nê mê akurê ho pa. Xep mê ã mêmoj nê mê akurê anê ka xep mê ama nê mê hkôt amnhĩ nhĩpêx. Kwa nã mon ka mê ri axtem nê mê hkôt amnhĩ nhĩpêx? 22Tĩrtũm kot mêmojja nê tanhmã mê pahkurê htore hã. ãm mê kot amnhĩ krã hkôt mêmoj nê mê akurê ka mê ama nê mê hkôt amnhĩ nhĩpêx. Mêmoj kur nê mê akurê xwỳnhta na

htem kuku nhũm hapêx kurê kumrêx. Mo koja we Tirtũm omu nhũm kêp omnuj? Nà ja kot anhÿr kêt kênã. Mẽ âm amnhĩ krã hkôt mẽ kot ja nê mẽ akurê. 23Tã ã mẽmoj nê mẽ akurê anhÿr xwÿnhjaja na ka htem nhÿri mẽ omu nẽ mẽ kapêr ma nẽ atÿx ajamaxpêr o:

— Nà te Tirtũm kôt amnhĩ nhĩpêx mex o pa pyrãk. Te mẽ àhpumunh tÿx pyrãk o ã mẽ inhmã mẽmoj jarênh anê. Anê.

No âm mẽ kot mẽmoj jarênhja kot anhÿr kêt. ã mẽ kot amnhĩ nhĩpêx anhÿr xwÿnhjaja kêp Tirtũm kra hkêt. Na htem âm amnhĩ krã hkôt mẽmoj nê mẽ akurê ho pa. Nẽ hã amnhĩ to jarkrar o ri pa. Mẽ ate ja hã mẽ mar nẽ mẽ kot amnhĩ to rũnh ã mẽ hkamnhĩx kaxyw. Na htem kot amnhĩ tomnuj pymaj tanhmã amnhĩ nhĩ hto ho pa. No âm ri ã amnhĩ nhĩpêx anhÿr kaprÿ. Nẽ âm htÿx Tirtũm kapêr o mẽ wrÿk xwÿnhjê hwÿr kaprÿ ho pa.

Mẽ pajamaxpêr nyw nẽ mẽ pahte amnhĩ nhĩpêx nyw jarênh

Rômãn 6.4-11

3 1Nẽ na pre Tirtũm akupÿm Kris o htĩr nhũm mẽ pahte hkôt amnhĩ xunhwÿr jakamã te Tirtũm kot Kris nhĩpêx pyrã nẽ akupÿm mẽ pahto mẽ pahtĩr pyrãk o mẽ panhĩpêx. Jakamã kwa kêr pu mẽ axte pahte amnhĩ nhĩpêx tũm kôt amnhĩ nhĩpêx kêt nê. Te Kris pyrã nẽ ra kaxkwa hwÿr paxàpir nẽ kamã ri papa pyrãk o amnhĩ nhĩpêx. Jao pajamaxpêr nyw pix o pajamaxpêr nẽ pahte amnhĩ nhĩpêx nyw pix o amnhĩ nhĩpêx o ri papa. Te Kris kot amnhĩ nhĩpêx pyrãk. Na pre akupÿm kaxkwa hwÿr api nẽ Tirtũm nhĩhkô hã mẽ ho amnhĩptãr xà kamã hkrĩ ho hkrĩ.

2-3Nẽ ra mẽ pahte Kris kôt amnhĩ xunhwÿr jakamã te jar pika hkôt pajapêx par nẽ Tirtũm wa kuri kaxkwa kamã pamex nẽ papa ho papa pyrãk. Jakamã kwa kêr pu mẽ pahte amnhĩ nhĩpêx nyw mã mãn pajamaxpêr rãhã ho papa. Nẽ axte mẽ pahte amnhĩ nhĩpêx tũm mã pajamaxpêr kêt nê.

4Kris kêp akupÿm mẽ pahto mẽ pahtĩr xwÿnh. Koja nhÿrmã akupÿn mẽ pahwÿr wrÿ hãmri nhũm Tirtũm te ho mex raxta pyrãk o mẽ panhĩpêx nẽ mẽ pahto mex rax kumrêx.

Mẽ pahte akupÿm amnhĩ nhĩpêx tũm o paxujanãr kêt ã mẽ pamã karô

Epes 4.17-5.2

5Jakamã kwa kêr ka mẽ axte ate amnhĩ nhĩpêx tũm kôt amnhĩ nhĩpêx kêt nê. Te ra mẽ apê htyk nẽ hapêx par pyrã nẽ axte kãm ajamaxpêr kêt nê.

Jakamã axte ri axpên mjên rÿ axpên prô ho amnhĩkati hkêt nê.

Nẽ nhãm ri mẽmyjê hõ rÿ mênijê hõ ho amnhĩkati hkêt nê.

Nẽ mẽ amã tanhmã amnhĩ tomnuj to hprãm kêt nê.

Nē mē amā akukrêx rax prām kêt nē. Kot ka mē ã amnhĩ nhĩpêx anê nē gaa nē akukrêx rax gryk ã axte Tirtũm mã ajamaxpêr kêt nē.

6 ã mē kot amnhĩ nhĩpêx anhỹr xwỳnhjaja Tirtũm kãm mē hprãm kêt. Kojã nhỹrmã tanhmã ja hã mē homnuj tỳx to. 7 Amnepêm kormã mē ate Kris kôt amnhĩ xunhwỳr kêt ri na ka prem ã amnhĩ nhĩpêx anhỹr o ri apa. 8-9 Tã kêt ka mē axte ã amnhĩ nhĩpêx anhỹr kêt nē.

Nē mē ri axpên kãm agryk o ano hkà karôt o axpên pumunh kêt nē.

Nē mē axpên kamã axàhkurê hkêt nē. Ri tanhmã axpên tomnuj to ho apa hkêt nē.

Rỳ axpên jakwa kamã mēmoj ma nē ri axpên xô ri tanhmã ri axpên mã ho axêx to ho ri apa hkêt nē.

Nē mē akapêr mã agêt o ri mē kãm akapêr kêt nē.

Nē mē ri mēmoj to axpên mã axêx hkêt nē.

Ã mē ate amnhĩ nhĩpêx anhỹr tũmta ra mē apê hapêx par kênã.

Mē pahte amnhĩ nhĩpêx nyw kôt amnhĩ nhĩpêx ã mē pamã karô

Rômãn 12.2; Epes 4.23; Wam Pêtre 2.11

10 Nē na ka mē ra mē ate amnhĩ nhĩpêx nyw o amnhĩ nhĩpêx o ri apa. Jao ra mē pahto kator xwỳnh maatija kôt amnhĩ nhĩpêx mex o mō. Kot kaj mē gaa nē rĩ hkôt amnhĩ nhĩpêx mex kumrêx o ri apa. Kãm hprãm xà hkôt.

11 Nē mē pahpê Kris kwỳjaja ahpỳnhã na pu mē. Na mē pakamã Ijaew nē Ijaew kêt xwỳnhjaja. Nē mē pakamã panhĩ nē kupê. Nē mē kãm àpênh xwỳnhjaja nē mē kot amnhĩ mã ri àpênh xwỳnhjaja. ãm ahpỳnhã mē pahpê Kris kwỳjaja mē pahte anhỹr tã na hte Tirtũm tanhmã mē pakute hkôt mē pahpumunh kêt nē. Na hte mē panhĩpêx o axpên pyrà nē mē pahpiitã mē pakamã pa ho pa pu htem pahpimràatã hkôt ri amnhĩ nhĩpêx o papa.

12 Nē Tirtũm kãm mē pajapê nē kãm mē pajapê xàj mē pakukamã amnhĩm mē parê. Mē pahte kãm tanhmã amnhĩ nhĩpêx to ho ri papa kaxyw mē pakukamã mē parê.

Jakamã kêt ka mē axpên kamã axukapri ho ri axpên kôt apa.

Nē axpên to mex pix o ri axpên kôt apa.

Nē mē amã amnhĩ to rax o axpên jakrenh prãm kêt nē.

Nē mē ãm amnhĩ pix kukamã ri ajamaxpêr kêt nē. Amnhĩ mē nhãm mē hkukamã ajamaxpêr o ri apa.

Nē mē ri agryk tokyx anhỹr kêt nē.

13 Nē kojã mēhō tanhmã mē ato ka mē amnhĩ tã omu nē tanhmã amnhĩ tã ho hkêt nē. ãm ja ho ajamakêtkati kurê kumrêx nē axte kãm ajamaxpêr o ri apa hkêt nē. Ra Jejus kot mē

panê mẽ pahte amnhĩ tomnuj piitã rênh par kênã kot pu kêt mẽ amnhĩ tâ tanhmã mēhō hto. Tã kêr ka mẽ axpên to mex o ri apa nê amnhĩ tâ tanhmã axpên to ho ri apa hkêt nê.

14E kêr ka mẽ ã axpên nhĩpêx anhỹr o ri apa. No ãm ja pix kêt. Nê mẽ määnên amã axpên kĩnh pê axpên kutã anojarêt rãhã nê. Kot kaj mẽ ã amnhĩ nhĩpêx anê nê määnên ra ixte mẽmoj tâ mẽ amã karõta ka mẽ ho anhỹr mex kurê kumrêx. Mẽ pamã axpên kĩnhja na mex kumrêx o kot mẽmoj piitã hakrenh par.

15Nê kêr ka mẽ Kris kukwak ri anhõxàhkre kaxwỳnh kãm akĩnh nê ajamakêtkati nê tãm ri axpên nhĩpêx o ri axpên kôt apa. Te ixkre tipxi kamã mẽ ate axpên kôt ri amnhĩ nhĩpêx pyrãk. ã mẽ pahte amnhĩ nhĩpêx anhỹr o papa kaxyw na pre Tĩrtũm amnhĩ wỳr mẽ pahwỳ. Mẽ pahte hkôt amnhĩ xunhwỳr kaxyw.

Nê kêr ka mẽ Tĩrtũm mã amnhĩ jarênh kaxyw nê kãm Kra Jejus ã akĩnh ã amnhĩ jarênh o ri apa.

Mẽ pahte Tĩrtũm mã mex ã pagrer ã mẽ pamã karõ

Epes 5.19

16Nê kêr ka mẽ Kris kapêr piitã hkôt amnhĩ nhĩpêx mex nê. Nê kapêr o axpên jahkre mex o ri axpên kôt apa. Tĩrtũm kot amnhĩ nhĩpêx o axpên jahkre ho ri axpên kôt apa. Nê kãm agrer o ri apa. Kãm mex o mex ã agrer o ri axpên kôt apa. Nê kãm kukwak ri akĩnh ã amnhĩ jarênh o kãm gre.

17Nê kêr ka mẽ Mẽpahpãm Tĩrtũm mã amnhĩ jarênh o:

—Pa Tĩrtũm. Nà ãm hãmri na ka pre mẽ ixwỳr Akra Jejus mẽ nhũm mẽ ixwỳr wỳr nê mẽ inhnê ty.

Anhỹr o kãm amnhĩ jarê. Hãmri nê ãm Pahihti Jejus kot amnhĩ nhĩpêx kôt pix mã tanhmã ri amnhĩ nhĩpêx to rỳ ãm kôt pix mã tanhmã akapêr to ho ri apa.

Tanhmã mẽ pahte axpên nhĩpêx to hã mẽ pamã karõ

Epes 5.22-6.9

18Nê mẽ anijaja. Tĩrtũm kot myja kumrêx nhĩpêx nê hkôt kãm hprõ nhĩpêx jakamã kêr ka mẽ amjên ã apijaam o apa. Nê mẽ hamaxpêr mex ã mẽ omu nê mẽ hkôt ri amnhĩ nhĩpêx mex nê. ã mẽ ate amnhĩ nhĩpêxja na Tĩrtũm kãm hprãm.

19Nê mẽ amyjaja kêr ka mẽ amã mẽ aprõ japê nê. Te amã amnhĩ tâ ma pyrãk o mẽ hipêx o ri apa. Jao tanhmã mẽ homnuj to hkêt nê.

20Nê mẽ apê mẽ hkrajaja kêr ka mẽ anhĩpêxã nê akatorxã wa hã apijaam nê wa kapêr ma nê wa hkôt ri amnhĩ nhĩpêx. ã mẽ ate amnhĩ nhĩpêx anhỹrja na Tĩrtũm kãm hprãm. Kojã ã mẽ ate amnhĩ nhĩpêx anhỹr ã mẽ apumu nê hkĩnh nê.

21Nê kêr ka mẽ apê mẽ hipêêxà nê mẽ katorxà mẽ akra gryk kaxyw mẽ kãm apêr o apikênh kêt nê. Kot kaj mẽ ã mẽ hipêx anê nhũm mẽ tee ri amnhĩ tâ mẽ ama nê hkaprĩ nê.

22Nê mẽ ate mẽ kãm tanhmã amnhĩ nhĩpêx to ho ri mẽ apa xwỳnhjaja kêr ka mẽ anhõ patrãw kapêr ma nê hkôt amnhĩ nhĩpêx. Nê mẽ noo mã mẽ kãm tanhmã amnhĩ nhĩpêx mex to nê mãânên mẽ wa kre kamã mẽ kãm tanhmã amnhĩ nhĩpêx mex to. Nom mẽ kot axàpênh ã apumunh nê hã kãm akĩnh pix kaxyw axàpênh mex kêt nê. Mãânên mẽ amã Pahihti Kris kĩnh ã akatàt kôt mẽ kãm mẽmoj tâ axàpênh mex nê. Mẽ noo mã nê mãânên mẽ wakre kamã. 23Nê mẽ akĩnh kãm mẽ kãm axàpênh mex o ri apa. Te mẽ ate Pahihti mã akĩnh kãm tanhmã kãm amnhĩ nhĩpêx to pyrà nê tãm amnhĩ nhĩpêx o tãm mẽ kãm axàpênh mex o ri apa. 24Te mẽ anhõ patrãw pix mã axàpênh pyrãk nom kumã pix mã hkêt. Mãânên mẽ panhõ Pahihti Krisja mã. Jakamã kot kaj mẽ ã amnhĩ kaxyw Tĩrtũm mã ajamaxpêr pê akĩnh kãm anhõ patrãw mã mẽmoj tâ apê nhũm Pahihtija ja hã mẽ apumu nê nhỹrmã mẽ ato mex rax nê. 25E kêr ka mẽ ã mẽ anhõ patrãw mã axàpênh mex o ri apa anê. No kot kaj mẽ kapêr kwỳm amnhĩ krã hkôt ri tanhmã amnhĩ nhĩpêx to nhũm Tĩrtũm tee ri ja hã mẽ apumu hãmri nê nhỹrmã tanhmã hã mẽ anhĩpêx to. Na hte ã mẽ kot amnhĩ tomnuj xwỳnhjê piitã mẽ hipêx anê nê mẽ hipêx o axpên pyrãk. Jakamã kwa kêr ka mẽ anhõ patrãw mã axàpênh mex rãhã ho ri apa.

4 1Nê mẽ apê mẽ õ patrãw kêr ka mẽ kot mẽ amã mẽ àpênh xwỳnhjê ho mex nê tanhmã mẽ homnuj to hkêt nê. Mẽ urãk nê kaxkwa kamã mẽ anhõ Patrãw maatija hkrĩ. Kot mẽ pahte tanhmã amnhĩ nhĩpêx to nê tanhmã mẽ pajamaxpêr to hã mẽ pahpumunh rãhã jakamã kêr ka mẽ noo mã mẽ ho mex rãhã ho ri apa.

E kêr ka mẽ apiitã ã axpên to mex anhỹr o ri apa.

Mẽ pahte Tĩrtũm mã amnhĩ jarênh rãhã hã mẽ pamã karõ

Matêwre 7.7; Rukre 11.1-8; Atre 1.14; Epes 6.18

2Nê kêr ka mẽ xatã Tĩrtũm mã amnhĩ jarênh rãhã ho ri apa. Nê tanhmã mẽhõ kot amnhĩ nhĩpêx to hã harênh ma nê ho Tĩrtũm wỳ. Nê mẽ ate kãm amnhĩ jarênh kamã kãm mex o mex ã harê. 3-4Nê mãânên ixto awỳ kê mẽ tokyx ixkator japêr. Pa ixàmnhĩx mẽ kot kormã Kris jarênh mar kêt xwỳnhjê mã harênh o ri mẽ hkôt ixpa. ã ixte amnhĩ nhĩpêx anhỹrta ã na prem ixpynê nê ijaxà pa kormã jar ixkrĩ. Jakamã kwa mẽ mãmri ja hã ixto Tĩrtũm wỳr o apa.

Mẽ pahte apkati mẽ mẽ pahkwỳjê mã Jejus jarênh ã mẽ pamã karõ

Epes 5.16

5Nê kêr ka mẽ kêp Kris kwỳ hkêt xwỳnhjê hkôt nhỹhỹm ri apa nê tãm ri Tĩrtũm kapêr kôt amnhĩ nhĩpêx o mẽ hkôt ri apa.

6Nê kê mēhō awỳr tē nē tanhmā Jejus ā akukjêr to ka amā hkĩnh ā aprĩ hā kām awjarê. Ahpỹnhā tanhmā mē kot hā akukjêr to xà hkôt tanhmā mē kām harēnh to kê mēhprĩ hā mar mex nē.

Pawre kot Koros wỳr Xikitre mē Ones wa mēnh ā harēnh

Epes 6.21-22

7-8Nê ot pa mē awỳr mē pahtō Xikitre mēnh mā. Kot ma mē awỳr ixte mē amā ixkapêr ā kagā nhĩpêx o mōr kaxyw. Na hte ixkôt Tĩrtũm mā amnhĩ nhĩpêx o ri pa. Inhmā hapêê. Tā kot paj mē awỳr kumê kê ma mē awỳr mō nē hprĩ hā mē amā ijarê. Mē ate ijarēnh mar nē tām ajamaxpêr nē akĩnh kaxyw. 9Mē akwỳ Onesti hkôt koja ma mē awỳr mō. Māānēn Kris kôt kēp mē pahtō hā mē pamā hapê xwỳnh na. Na hte Tĩrtũm kapêr kôt amnhĩ nhĩpêx mex rāhā ho ri pa. Tā Xikitre mē koja wa ma mē awỳr mō. Hāmri nē mē awỳr pōj nē jar tanhmā mē ixte amnhĩ nhĩpêx to hā mē ijarê ka mē ama.

Kris kôt mē hkwỳ kot mē hwỳr hpêr mēnh ā mē harēnh

10Nê ota Aristakja ixpyrà nē kēp prēs nē hkrĩ. Tā mē awỳr hpêr mē. Nē Panāpe htō Juāw Makreja māānēn mē awỳr hpêr mē. Na pa pre ra mē amā Juāw Makre jarê. Tā koja mēmo arĩgro hā akupỹn mē awỳr mōr japêr ka mē omu nē ho mex nē.

11Nê Jejus Justija māānēn mē awỳr hpêr mē. Jajaja mē ixpyrà nē kēp Ijaew. Tā mē tapxipixjaja na htem ixpyrà nē mē ixpê Ijaew kwỳjê rom mē kām Tĩrtũm kapêr nyw o mē ahkre ho ri mē hkôt pa. Tĩrtũm kot Kra Kris kôt mē kot amnhĩ xunhwỳr xwỳnhjê ho hkra hā harēnh nywja na htem mē kām harēnh o ri mē hkôt pa. Pa ja hā mē omu nē ixkĩnh nē. 12Nê mē anhiō Epasja māānēn mē awỳr hpêr mē. Na hte Jejus Kris mā tanhmā amnhĩ nhĩpêx mex to ho pa. Nē mē ato Tĩrtũm wỳr rāhā ho pa nē mē ato hwỳr o:

— Pa Tĩrtũm. E kwa tanhmā Koros kamā akrajê ho kê mē akôt amnhĩ xunhwỳr tỳx nē. Nē amā hprām xà hkôt pix mā amnhĩ nhĩpêx o ri pa. Nē amnhĩ kaxyw Kris kôt pix mā hamaxpêr tỳx rāhā nē. Anê.

13Ām hāmri na hte mē ato hwỳr o pa. Nom mē kapxipix o hwỳr kêt nē. Māānēn krĩ pê Ratisej kamā nē krĩ pê Jerop kamā Kris kôt mē pahtōjê ho hwỳr o ri pa. Mē ate Tĩrtũm kôt amnhĩ nhĩpêx mex o apa kaxyw. Ixte ja hā omunh mex.

14Nê jar mē pahtō tōtō Rukre mē Tēmtija wa māānēn mē awỳr hpêr mē. Tōtō Rukreja kēp ixkrāmnhwỳ mex na.

15Nê kêr ka mē krĩ pê Ratisej kamā Kris kôt mē pahkwỳjê mā ijarê. Nē Nĩpare mā nē ōrkwỳ hwỳr mē pikuprōnh nē Tĩrtũm mā mex o mex ā harēnh o mē hkrĩ xwỳnhjê mā māānēn ijarê.

16Nē e kêr ka mẽ ixte mẽ awỳr kagà mẽnhja kamã harēnh pa nē hpānhã krī pê Ratisej kamã Kris kôt mẽ pahkwỳjê hwỳr amē kê mẽ apyrà nē kamã harē nē piitã kuma. Nē mẽ kãm anē kê ra ixte mẽ hwỳr kagà mẽnh xwỳnhhta kê mẽ amã kugõ ka mẽ kuxwar kamã harē nē ama.

17Nē kêr ka mẽ Akip mã ijarē kê ra Tĩrtũm kot kãm mẽmoj tã karõ xwỳnhhta kê ho anhỳr jatur xàm kumē. Kêp hkra hã kê tãm kãm àpēnh jatur xàm kumē.

18Tã ãm ja pix. E paj pam amnhĩ nhĩhkra ho hatur xà hã kagà. Mē ate ixte mẽmoj tã kagà pumunh nē hkôt inhmã ajamaxpēr kaxyw. Nē ixte mẽ awỳr mẽnh ã ijarēnh mar kaxyw. Kwa kêr ka mẽ arĩ ixpê prês ã ixto Tĩrtũm wỳr rãhã ho ri apa.

E kê Tĩrtũmja mẽmoj to mẽ akutã nojarêť nē mẽ ato mex nē ka mẽ amex nē ajamakêtkati nē apa ho apa. Tã ãm ja pix. Ixpê Pawre na pa mẽ awỳr kagàja nhĩpêx nē ã mẽ awỳr mẽnh anē.

Wam Tesarõn

Pawre kot Tesarõn kamã Jejus kõt hkwÿjê hwÿr kagà nê mênh

Pawre na pre kagàja nhîpêx. Kêp Jejus nhÿ hã mẽ ahkre ho pa xwÿnhjê hõ na pre. Jakamã na pre kagàja nhîpêx nê ma krî pê Tesarõn kamã Jejus kõt hkwÿjê hwÿr kumê. Tesarõn kamã Jejus ã kãm mẽ hkurê xwÿnhjaja na prem Jejus ã mẽ homnuj o pa nhũm mẽ amnhî xà htÿx kamã hamak o pa. Hãmri nhũm Pawre mẽ harênh ma nê kagàja nhîpêx nê mẽ hwÿr kumê. Kot mẽ kãm mẽ hamaxpêr o hihtÿx kaxyw mẽ kot arî Jejus kõt amnhî nhîpêx mex o pa nê aa hkaga hkêr ã mẽ kãm karõ. Nê nhÿrmã Jejus akupÿn kaxkwa rũm mẽ pahpê hkwÿjê hwÿr wrÿk nê ma akupÿm amnhî kõt mẽ pahto àpirja nhũm mẽ kãm harê. Á na pre mẽ kãm mẽmoj jarê nê hã kagà anê nê mẽ kãm:

1 1Pa mẽ apê Tesarõn kamã Jejus kwÿ hã axpên wÿr mẽ apikuprõnh xwÿnhjaja? Xà mẽ amex na ka mẽ apa? Ixpê Pawre na pa mẽ awÿr kagàja nhîpêx nê mẽ awÿr kumê. Siras mẽ Ximotre mẽ pa mẽ awÿr kumê. Mẽ pahpê Mẽpanhîpêxà maati Tirtũm mẽ Pahihti Jejus Kris wa hkwÿ jakamã na pa htem mẽ ato Tirtũm wÿr rãhã ho ri ixpa. Kot mẽ akutã nojarêr rãhã nhũm mẽ ajamakêtkati nê axãmnhix mẽ apa kaxyw.

2-3Nà mẽmoj kêt. Na pa htem mẽ amã ijamaxpêr nê mẽ anhÿ hã ixkĩnh nê ixpa hãmri nê mẽ awÿr kagàja mẽ. Na pa htem mẽ ato Tirtũm wÿr rãhã ho ri ixpa nê kãm mẽ ajarênh o:

—Pa Tirtũm. E mãn ka Tesarõn kamã akrajê pumu. Ám hãmri na ka pre tanhmã mẽ hkrã hto nhũm mẽ akõt amnhî nhîpêx mex o pa. Na htem amnhî kaxyw akõt hamaxpêr tÿx nê. Jao mẽ piitã mẽ kamã ukaprî kamã tanhmã mẽ ho ajuta hto ho pa. Nhũm mẽ kãm mẽ ixkurê xwÿnhjaja Pahihti Jejus Kris ã tanhmã mẽ ho ho pa htã nhũm mẽ tee ri amnhî kukamã hamaxpêr o hkaprî nê Jejus mẽ war akaga hkêr nê. Arî war anhÿ hã amnhî to htÿx nê Pahihti Jejus kutêp tanhmã kãm amnhî nhîpêx to ho pa. Ám hãmri na htem ã amnhî nhîpêx anê Tirtũm. Na pa htem mẽ kot ã amnhî nhîpêx anhÿrja mã ijamaxpêr nê ixkĩnh nê.

Anhÿr o pa htem mẽ ato kuwÿ. 4E Kris kõt ixkwÿyjaja. Nà Tirtũm kãm

mẽ ajapê jakamã na pre amnhĩm mẽ arê. Kot mẽ ato hkra nhũm nhỹrmã kuri mẽ amex nê atĩr tũm nê apa ho apa kaxyw. Ra mẽ ixte ja hã mẽ ajarênh mar mex.

Mẽ piitã mẽ kot Tesarõn nhõ xwỳnhjê jarênh mar ã mẽ harênh

5Nẽ na pa prem ma mẽ awỳr mỗ nê mẽ amã Jejus jarênh o mẽ akõt ixpa. Kot mẽ panê tanhmã amnhĩ nhĩpêx to hã harênh o ri mẽ akõt ixpa. Nom pa mẽ amnhĩ krã hkõt mẽ amã ixujarênh kêt nê. Âm Tĩrtũm Karõ nhỹ hã na pa prem hihtỳx xà ho tanhmã mẽ amã ixkapêr to ka prem mẽ inhma nê mẽ ixkõt ajamexpêr kurê kumrêx. Na pa prem tãm amnhĩ nhĩpêx o ri ixpa ka mẽ ja hã mẽ ixpumunh o ri mẽ ixkõt apa. 6Tã Jejus kõt amnhĩ xunhwỳ nê hkõt amnhĩ nhĩpêx mex nê. Nê mẽ ixkõt amnhĩ nhĩpêx mex nê. Mẽ kot Jejus ã tanhmã mẽ ato htã ka htem Tĩrtũm Karõ nhỹ hã akĩnh nê hkõt amnhĩ nhĩpêx mex rãhã ho ri apa. 7Tã nhũm pika pê Masetõn mẽ Gres wa kamã Jejus kõt mẽ pahkwỳjaja ã mẽ ate amnhĩ nhĩpêx anhỹr ã mẽ ajarênh ma nê mẽ apyrà nê ã amnhĩ nhĩpêx anhỹr o pa. 8Na ka prem tanhmã Jejus kot mẽ panê amnhĩ nhĩpêx to hã harênh o ri mẽ hkõt apa nhũm mẽ piitã mẽ akapêr ma. Nom mẽ tapxipixjaja mar kêt nê. Na mẽ ra ohtô nê mẽ ajarênh ma nê mẽ apyrà nê ma mẽ kãm Jejus jarênh o pa. Ra mẽ ate Jejus kõt amnhĩ xunhwỳr ã amnhĩ jarênh o ri apa nhũm mẽ piitã kot mẽ amar jakamã mẽ pajaja na pa htem mẽ kãm ã mẽ ajarênh anhỹr kêt nê. Mo kaxyw? Ra mẽ kot mẽ ajarênh mar mex kênã. 9Na pa htem nhỹri krĩ hõ hwỳr pỏj nhũm mẽ ixpumu nê ra mẽ tãmjaja mẽ inhmã mẽ ajarênh kurê kumrêx. Nê mẽ ajarênh o:

—Kwa Tesarõn kamã Kris kõt mẽ pahkwỳjaja na xep kãm mẽ akĩnh nê. Amnepêm na pre htem amnhĩm sãnti nhĩpêx nê kêp mẽhpãm ã harê nê amnhĩ to hwỳr o pa. Tã ka xep prem ma mẽ hwỳr mỗ nê mẽ kãm Tĩrtũm kapêr jarê nhũm mẽ ama nê Tĩrtũmja sãnti rom ãm hãmri hã omunh kurê kumrêx. Hãmri nê gryk ã sãnti kaga hpa nê Tĩrtũm kõt amnhĩ xunhwỳ nê hkõt pix mã amnhĩ nhĩpêx mex o pa. 10Nẽ amnhĩ wỳr Tĩrtũm Kra kamã hamak rãhã ho ri pa. Anê.

Âm hãmri na ka htem amnhĩ wỳr kamã hamak rãhã ho apa. Na pre ty nhũm Hipêêxà Tĩrtũm akupỹm ho htĩr. Tã koja nhỹrmã akupỹn mẽ pahwỳr kumê nhũm akupỹn mẽ pahwỳr wrỳ. Hãmri pu mẽ âm pix kukwak ri mẽ kot amnhĩ xà htỳx kãm hamak o pa htũm xàta wỳr papa hkêt nê.

Pawre kot amnhĩ jarênh

Sikũn Korĩt 1.12, 4.1-6

2 1-2Nẽ kormã mẽ awỳr mẽ inhmõr kêt ri na pa prem kormã Piripos nhõ xwỳnhjê mã Tĩrtũm kapêr jarênh o ri mẽ hkõt ixpa. Nom nhũm mẽ hkwỳjaja kãm mẽ inhmar prãm kêt nê. Na prem Jejus ã mẽ inhmã

kapêr punuj nê mē inhîpêx kati pa prem amnhî xà htỳx kamã ijamak o mē hkôt ixpa. Na ka prem ja hã mē ijarênh ma. Ǻ mē kot mē inhîpêx anhỳr tã pa mē tee ri amnhî kukamã ijamaxpêr pê Tirtũm kapêr jarênh kaga hkêt nê. Na pa prem arĩ mē kãm Jejus kot tanhmã mē panê amnhî nhîpêx to hã harênh o ri mē hkôt ixpa. Tã mē awỳr inhnojarêt nê Tirtũm nhỹ hã amnhî to htỳx nê ma mē awỳr mō. Hãmri nê mē amã tanhmã Jejus jarênh to ho ri ixpa. Ka prem mē inhma hãmri nê axohtô nê hkôt amnhî xunhwỳ. 3Nom pa prem ixêx rom tanhmã mē amã ixkapêr to hkêt nê. Rỳ mē inhmã mēmoj prãm xàj mē ano kupy r pê mē amã ixkapêr kêt nê. 4Rỳ mē ate mē ixkapêr mar nê mē inhmex ã mē ijarênh kaxyw pa tanhmã mē amã ixkapêr to hkêt nê. Ǻm Tirtũm kot mē inhmar nê tapxipix mē inhmex ã mē ijarênh pix prãm xàj na pa prem mē amã kapêr jarênh o ri mē akôt ixpa. Tirtũm tapxipix na hte tanhmã mē pakute hkôt mē pahpumunh rãhã ho pa. Tãm na pre mē ixte kapêr jarênh o ri ixpa kaxyw mē ixunhwỳ.

5Xàn pa prem mē ijakwa nhĩkjê ho mē ate tãm amnhî nhîpêx ã mē ajarê hãmri nê mē ijakwa nhĩkjê ho mē ato ixkapêr punuj nê? Nà na pa prem ã amnhî nhîpêx anhỳr kêt nê. Na pa prem ixkatat kôt mē ate amnhî nhîpêx ã mē apumunh kôt tanhmã mē ajarênh to ho ri ixpa.

Nê xà mē ate mē ixkapêr mar nê akĩnh nê hpãnhã mē inhmã amnhĩrer kaxyw na pa prem mē awỳr mō nê mē amã Jejus kapêr o mē ajahkre? Nà na pa prem kàxpore prãm xàj mē amã ixkapêr kêt nê. Tirtũm kot ja kôt mē ixpumunh mex.

6Rỳ xà mē ate mē inhmex ã mē ixto jarkrar kaxyw na pa prem mē awỳr mō? Nà mãânên ja kaxyw kêt. Ǻ mē ate mē ijarênh anhỳr prãm xàj na pa htem Tirtũm kapêr o mē ajahkre ho ri ixpa hkêt nê.

7Rỳ xàn pa pre mē awỳr mō nê mē amã amnhî jarênh o:

—E mē ixte Jejus nhỹ hã ixkapêr o ixpa xwỳnh jakamã kot paj mē amã tanhmã ixkapêr to ka mē inhma nê hpãnhã mē inhmã amnhĩre.

Anhỳr o mē amã ixkapêr? Nà na pa pre ã mē amã ixkapêr anhỳr kêt nê. Na pa prem te mē katorxà kot hkrajê nhîpêx pyrak o mē anhîpêx nê amarĩ mē ajahkre ho ixpa nê mēmoj tã mē awỳr kêt nê.

8Mê inhmã mē akĩnh jakamã na pa prem mē amã ixprĩ hã Tirtũm kapêr piitã harênh par o mē akôt ixpa nê mē kot ja hã tanhmã mē ixto pymaj tee ri amnhî kukamã ijamaxpêr o ri ixkaprĩ hkêt nê. Ǻm ixãmnhĩx ri tanhmã Jejus kot mē panê amnhî nhîpêx to hã harênh o mē akôt ixpa. 9Mê apê mē ixkwỳ jakamã na pa prem tanhmã mē amã ixkapêr to hpãnhã mē ixàpkur xà rỳ mēmoj tã mē awỳr kêt nê. Na pa prem mē pamjaja mēmoj tã ixàpênh pê mē amã ixkapêr o ri ixpa. Nê ixàpênh rũnh kumrêx. Arĩgro hã nê kamàt kãm. Mãn arĩ mē ate ã mē ixte amnhî nhîpêx anhỳrja ã anohtỳx japêr ko. 10Na pa prem tãm amnhî nhîpêx o mē akôt ixpa. Tirtũm kãm hprãm xà hkôt. Jao tanhmã amnhî to mex to

rãhã ho ri ixpa ka prem amnhĩ tã mẽ ixpumu. Nhũm Tĩrtũm haxwỳja ja hã mẽ ixpumu. **11**Na pa pre mẽ apê mẽ ixkra pyrãk mẽ anhĩpêx o ri mẽ akõt ixpa. **12**Jaõ mẽ amã ixkapêr mex nê. Nê mẽ akapĩ nê apa xwỳnhjaja pa prem akupỳm mẽ ajamaxpêr o mẽ axihtỳx hãmri nê mẽ apiitã mẽ amã ixkapêr nê mẽ amã:

—Kwa kêr ka mẽ Tĩrtũm kõt amnhĩ nhĩpêx mex rãhã ho ri apa nê aa hkaga hkêr nê. Anê.

Tĩrtũm tãm na pre amnhĩ wỳr mẽ pahwỳ pu prem hkõt amnhĩ xunhwỳ. Tã koja nhỹrmã amnhĩ wỳr mẽ pahto api pu mẽ Kra Jejus kukwak ri wa kuri pamex kumrêx nê ri papa ho papa. Jakamã kwa kêr ka mẽ hkõt amnhĩ nhĩpêx mex rãhã ho ri apa.

Jejus kwỳjaja kãm Jejus kõt amnhĩ xunhwỳr hkêr xwỳnhjê pyma hkêr

Atre 17.1-9

13Nê ma mẽ awỳr mẽ inhmõrta ã na pa prem mẽ amã Tĩrtũm kapêr jarênh o ri mẽ akõt ixpa ka prem mẽ inhma nê mẽ ixte amnhĩ krã hkõt mẽ ixkapêr ã mẽ ixkamnhix kêt nê. Na ka prem ãm hãmri mẽ ixte Tĩrtũm kapêr jarênh ã mẽ ixpumunh kurê kumrêx nê amnhĩ kaxyw hkõt ajamaxpêr nê Jejus mẽ Hipêêxà wa hkõt amnhĩ xunhwỳ. Jakamã na pa hte mẽ amã ijamaxpêr nê mẽ anhỹ hã ixkĩnh nê. Hãmri nê Tĩrtũm mã mẽ anhỹ hã ixkĩnh jarênh o ri ixpa. Nà na ka htem arĩ Tĩrtũm kapêr kõt amnhĩ nhĩpêx mex nê. **14**Nhũm hte mẽ akwỳjaja tee ri ja hã mẽ apumu nê Jejus ã mẽ atomnuj nê. Nom mẽ kapxipixjaja ã mẽ anhĩpêx anhỹr kêt nê. Jutej kamã Ijaew kwỳjaja na prem mẽ apyrà nê Jejus kõt amnhĩ xunhwỳ nhũm mẽ hkwỳjaja tee ri ja hã mẽ omu nê hã mẽ hipêx kati ho pa.

15Amnepêr Ijaew na prem Tĩrtũm nhỹ hã mẽ kãm kapêr o mẽ pa xwỳnhjê homnuj nê mẽ hkwỳjê hpar o pa. Hãmri nhũm hpãnhã mẽ hkanrêhã mẽ htãmnhwỳjaja mẽ urãk nê Pahihti Jejusja pĩ. Tã jarãhã mãânên ã Jejus ã mẽ panhĩpêx anê nhũm Tĩrtũm tee ri mẽ pahtã mẽ omu nhũm ja kêp omnuj tỳx kumrêx nhũm mẽ pahtã mẽ kamã gryk nê.

Na hte mẽ apê Ijaew kêt xwỳnhjê ho hkra nhũm Ijaew kãm ja prãm kêt **16**jakamã na htem mẽ akwỳ kot Tĩrtũm kõt amnhĩ xunhwỳr pymaj mẽ anê mẽ ixkurê nê mẽ inhmã:

—Kwa Ijaew kêt xwỳnhjê mã Tĩrtũm kapêr jarênh kêt nê. Ja mex kêt. Anê.

Mê ate Jejus kõt amnhĩ xunhwỳr nê nhỹrmã Tĩrtũm wa kuri atĩr tũm nê apaja mẽ kãm hprãm kêt jakamã na htem ã mẽ anê àmnàr o pa anhỹrja o amnhĩ tomnuj nê. Mê kot amnhĩ tomnuj tỳx o mẽ pa xwỳnh jakamã na Tĩrtũm mẽ kamã gryk nê. Koja nhỹrmã mẽ kot amnhĩ xà htỳx kamã hamak tũm xà hwỳr mẽ rênh pa.

Pawre akupÿm Tesarõn nhõ xwÿnhjê hwÿr hkrà hã harênh*Atre 17.10-13*

17Nê ma mẽ awÿr mẽ inhmõr tã mẽ anhõ krĩ kamã mẽ kêp Kris kwÿ hkêt xwÿnhjaja na pre mẽ ixpumu nê mẽ anê mẽ ijano pa prem ijapôj nê hpãnhã ma nhÿhÿm krĩ hõ hwÿr ixpa. Nom arĩ mẽ amã ijamaxpêr rãhã nê mẽ ato ijamak o ri ixpa nê xatã akupÿm mẽ awÿr ixkrà. 18Na pa prem inhmã akupÿm mẽ awÿr inhmõr prãm tÿx nê. Ixpê Pawre na pa pre xatã mẽ awÿr ixkrà htã nhũm Satanasti tanhmã mẽ anê ixpê amnàr to pa kormã mẽ awÿr inhmõr kêt nê. Âm tee ri inhmõr prãm kaprÿ. 19-20Mê inhmã mẽ akĩnh tÿx. Mẽ ate Tĩrtũm kôt amnhĩ nhĩpêx mex jakamã koja nhÿrmã Pahihti Jejus akupÿn mẽ pahwÿr wrÿ pa mẽ akuri xa nê kãm mẽ ajarênh o:

—Pa Pahihti. E Tesarõn nhõ xwÿnhjê pumu. Na ka pre mẽ hwÿr inhmẽ pa mẽ hwÿr mõ nê mẽ kãm ajarê nhũm prem inhma nê amnhĩ kaxyw akôt hamaxpêr tÿx nê akôt amnhĩ xunhwÿ. Tã na htem akôt tãm amnhĩ nhĩpêx rãhã ho pa.

Anhÿr o kãm mẽ ajarê nê mẽ anhÿ hã ixkĩnh tÿx kumrêx.

Pawre kot Tesarõn wÿr Ximotre mẽnh ã harênh*Atre 17.14-15, 18.5*

3 1-5Nê kormã mẽ akôt ixpa ri na pa pre Kris kwÿ hkêt xwÿnhjaja kot Kris ã tanhmã mẽ atomnuj to hkukamã mẽ amã mẽ harê ka prem mẽ inhma. Na htem ã Kris ã mẽ pahkurê xwÿnhjaja mẽ panhĩpêx anhÿr o pa. Tã nhũm prem ã mẽ anhĩpêx anê pa mẽ ajarênh ma nê tee ri mẽ akukamã ijamaxpêr nê axpên mã mẽ ajarênh o:

—Hêxta waa nê. Kwa mẽ kot Jejus ã tanhmã mẽ homnuj toja mÿrapê mãn mẽ tee ri amnhĩ kukamã hamaxpêr nê Jejus kaga rÿ ko. Mãn ra Satanasti tanhmã mẽ kãm Jejus o hêx to nhũm mẽ kuma nê tanhmã hamaxpêr to nê hkaga. Kwa mãn pu prem âm mẽ kãm Tĩrtũm kapêr jarênh kaprÿ nà? Anê.

Hãmri nê tee ri mẽ akukamã ijamaxpêr nê mẽ awÿr Ximotre mẽnh kaxyw nê kãm:

—Mãn ra Tesarõn nhõ xwÿnhjaja Jejus ã tanhmã mẽ homnuj to nhũm mẽ amnhĩ xà htÿx kamã hamak o ra tee ri amnhĩ kukamã hamaxpêr. Kwa ma mẽ hwÿr mõ nê ja hã mẽ omu. Hãmri nê mẽ kot Kris kôt amnhĩ xunhwÿr tÿx kaxyw mẽ hamaxpêr o axihtÿx. Hãmri nê akupÿn wa ixwÿr mõ nê wa inhmã tanhmã mẽ harênh to. Kot paj Siras mẽ wa akutêp jar Atenas kamã wa arĩk. Anê.

Hãmri nê mẽ awÿr kumê. Ximotre na hte Siras mẽ wa inhĩhkô hã mẽ kãm Tĩrtũm kapêr jarênh o pa. Nê Kris kot tanhmã mẽ panê amnhĩ

nhîpêx toja nhûm wa inhîhkô hã mẽ kãm harênh o pa. Tã pa pre mẽ awÿr kumê nhûm ma mẽ awÿr mô pa Siras mẽ wa Atenas kamã kutêp arík.

Ximotre akupÿn mõi nê Pawre mã mẽ harênh

6Tã nhûm ra ham akupÿn mẽ arûm wa ixwÿr mô nê wa inhmã tanhmã mẽ ajarênh to pa wa mẽ ajarênh ma nê ixkînh nê. Na ka xep htem arî amnhî kaxyw Kris kôt ajamaxpêr tÿx rãhã nê. Jao mẽ amã mẽ piitã mẽ hkînh nê tanhmã mẽ ho mex to ho ri apa. Nê arî mẽ inhmã ajamaxpêr nê ixpyrà nê mẽ amã mẽ ixpumunh prãm o ri apa. 7Nà ãm hãmri na ka htem ã amnhî nhîpêx anê. Na pa wa ra jar ixpunuj nê ixpa nê Kris ã amnhî xà htÿx kamã ijamak tã mẽ ajarênh ma nê tãm ijamaxpêr. 8Tesarõn nhõ xwÿnhjaja kot Kris ã tanhmã mẽ anhîpêx to htã ka mẽ arî hkôt amnhî xunhwÿr tÿx rãhã nê. Pa wa mẽ ajarênh ma nê mẽ anhÿ hã ixkînh pê tanhmã Pahihti Jejus mã amnhî nhîpêx to ho ri ixpa. 9Nà na pa hte wa mẽ anhÿ hã ixkînh nê. Nê xatã Tirtûm mã mẽ ajarê nê kãm:

— Pa Tirtûm. Nà ãm hãmri na ka pre amnhî kôt Tesarõn kãm akwÿjê xunhwÿr tÿx nê nhûm htem akôt amnhî nhîpêx mex rãhã ho pa. ãm hãmri na ka hte ã mẽ hipêx anê. Na pa hte mẽ kot amnhî nhîpêx mã ijamaxpêr o ri ixpa nê ixkînh nê.

Anhÿr o kãm mẽ ajarê. 10-11 Nom kãm ja pix jarênh kêt nê. Na pa hte wa mãânên arîgro hã nê kamãt kãm amnhî to Mêpanhîpêêxà Tirtûm mẽ Pahihti Jejus Kris wa hwÿr kãm ixiltÿx rãhã ho ixpa nê wa kãm:

— Kwa Tirtûm mẽ Jejus wa. Na pa wa ra inhmã Tesarõn wÿr inhmõi nê mẽ pahkwÿjê pumunh prãm tÿx nê. Kormã mẽ kot akapêr jatur xà mar kêt. Tã wa inhmã akupÿm mẽ hwÿr wa inhmõi nê mẽ kãm akapêr jatur xàm mẽnh prãm. Mẽ kot mar nê akôt amnhî nhîpêx mex o pa kaxyw. Kwa xat ka wa akupÿm mẽ hwÿr wa inhmê nà? Anê.

Na pa hte wa ã amnhî to wa hwÿr rãhã ho ixpa anê. Tã koja wa akupÿm mẽ awÿr wa inhmê pa wa ma mẽ awÿr inhmõi kurê kumrêx. 12Koja Tirtûm tanhmã mẽ akrã hto ka mẽ amã axpên kînh pê tanhmã axpên to ajuta hto ho ri apa. Nê mẽ amã akwÿjê hã ma ho te mẽ kam amã amnhî tã ma pyrãk o ri apa. ã kot kaj mẽ apiitã axpên nhîpêx anê. Te wa inhmã mẽ akînh pê tanhmã mẽ ato mex to pyrãk. 13Koja Tirtûm ja kaxyw tanhmã mẽ akrã hto ka mẽ tãm ajamaxpêr mex nê. Kêr kê Jejus nhÿrmã akupÿn wrÿ. Mẽ kot hkôt amnhî xunhwÿr xwÿnhjê mẽ ro hã akupÿn wrÿ. Hãmri ka mẽ Mêpanhîpêêxà Tirtûm kutã amnhî kukamã ajamaxpêr nê tãm mẽ ate amnhî nhîpêx ã amnhî pumunh kôt akînh nê apikunhar o kuri akuhê. No ri tee ri amnhî kamã ajamaxpêr nê ajakwamnajre nê akuhê hkêt nê.

Tĩrtũm kãm mēmõj prãm ã harẽnh*Rõmãn 13.11-14; Epes 5.3-14*

4 ¹E Jejus kõt ixkwỳjaja. Na pa prem ma mẽ awỳr mõi nẽ Tĩrtũm kapẽr o mẽ ajahkre ho ri mẽ akõt ixpa. Mẽ ate mar nẽ Tĩrtũm kãm hprãm xà hkõt tanhmã amnhĩ nhĩpẽx to kaxyw. Ka prem mẽ inhma nẽ hkõt amnhĩ nhĩpẽx mex o ri apa. Tã kot paj axte ja hã tanhmã mẽ amã karõ hto. Pahihti Jejus nhỹ hã axte mēmõj tã mẽ amã karõ. Jakamã kwa kẽr ka mẽ arĩ Tĩrtũm kapẽr kõt pix mã ri amnhĩ nhĩpẽx mex nẽ ỹ hã amnhĩ to htỳx pẽ ã amnhĩ nhĩpẽx anhỳr o ri apa. ²Na pa prem ra Jejus nhỹ hã mẽ amã mēmõj tã karõ. Mẽ ate hkõt amnhĩ nhĩpẽx prãm xàj mẽ amã hã karõ ka prem mẽ inhma. ³Nà mẽ pahte tãm amnhĩ nhĩpẽx o papaja na Tĩrtũm kãm hprãm. No kêt mẽ pahtỳx ri nhãm mẽnijẽ ho amnhĩkati o papaja na kãm hprãm kêt. ⁴Jakamã kwa kẽr ka mẽ amyjaja aprõ pix tãnopxar o ri apa. No mẽ ri nhãm mẽnijẽ ho amnhĩkati ho ri apa hkêt nẽ. Nẽ mẽ anijaja kẽr ka mẽ amjên pix tãnopxar o ri apa. No mẽ ri nhãm mēmỹjẽ ho amnhĩkati ho ri apa hkêt nẽ. ⁵Jejus kwỳ hkêt xwỳnhjaja kot htỳx ri kãm hprãm xà hkõt mẽnijẽ hwỳr mrar nẽ mẽ ho amnhĩkati htã kẽr ka mẽ ho mẽ urak kêt nẽ. Kwarĩ ho kwarĩ. ⁶Ã mẽ kot amnhĩ nhĩpẽx anhỳr xwỳnhjaja koja Tĩrtũm nhỹrmã mẽ homnuj tỳx kumrẽx. Na pa prem ra mẽ amã ja jarẽ ka prem mẽ inhma. Jakamã kwa kẽr ka mẽ ã amnhĩ nhĩpẽx anhỳr o ri apa hkêt nẽ. ⁷Xà na pre Tĩrtũm ã mẽ pahte amnhĩ nhĩpẽx anhỳr kaxyw amnhĩ wỳr mẽ pahwỳ nẽ mẽ pahto hkra? Nà ja kaxyw na pre mẽ pahto hkra hkêt nẽ. ãm mẽ pahte tãm amnhĩ nhĩpẽx o ri papa kaxyw nẽ tãm ri axpẽn nhĩpẽx o ri papa kaxyw na pre mẽ pahto hkra. ⁸Jakamã kot kaj mẽ atõ ja hã mẽ inhma nẽ ãm mẽ inhma nẽ arĩ ã amnhĩ nhĩpẽx anẽ. Hãmri nẽ mẽ pajaja mẽ ixkapẽr nhĩrõp axãm kêt nẽ. Tĩrtũm kapẽr nhĩrõp kot kaj xa. Nẽ mããnẽn kot mẽ pahwỳr Karõ mẽn h xwỳnhja kapẽr nhĩrõp kot kaj xa.


⁹Nẽ mẽ amã axpẽn kĩnh pẽ axpẽn to mex o apa hprãm xàj na pre Tĩrtũm tanhmã mẽ amã kapẽr o amnhĩrit to ka htem ã axpẽn nhĩpẽx anhỳr o ri apa. Jakamã kot paj mẽ axte ja hã tanhmã mẽ amã nẽ hkêt nẽ. ¹⁰Na ka mẽ ra amã axpẽn kĩnh pẽ te mẽ kam amã amnhĩ tã ma pyrak o axpẽn nhĩpẽx o ri apa. Nẽ pika pẽ Masetõn kamã Kris kõt mẽ akwỳjaja ka mẽ mããnẽn amã mẽ hkĩnh pẽ ã mẽ hipẽx anẽ. Tã kẽr ka mẽ arĩ ã amnhĩ nhĩpẽx anhỳr rãhã nẽ. ¹¹Kot kaj mẽ ã amnhĩ nhĩpẽx anẽ hãmri nẽ ajamakẽtkati nẽ axãmnhĩx axapẽn pix tãnopxar o ri apa. Jao mẽ hakwa kamã nhãm tanhmã mẽ hixi jarẽnh to ho ri apa hkêt nẽ. Nẽ ãm amnhĩ pix tãnopxar o ri apa. Nẽ amnhĩ pa kukwak ri axapkur kaxyw amnhĩm axapẽn mex o ri apa. Na pa prem ra ã ja hã mẽ amã karõ anẽ. ¹²Kot kaj mẽ ã amnhĩ nhĩpẽx anẽ hãmri nẽ amã prãm xàj axahwỳr o ri apa hkêt nẽ. Nhũm Kris kwỳ hkêt xwỳnhjaja mẽ ate amnhĩ nhĩpẽx ã mẽ

apumu nẽ axpẽn mã mẽ ate tãm amnhĩ nhĩpêx xwỳnhjê hã mẽ ajarẽnh kurê kumrêx.

Kris kwỳ htyk xwỳnhjê jarẽnh

Matêwre 24.29-31; Wam Korõt 15.51-58

13E Kris kõt ixkwỳjaja. Na ka xep mẽ tee ri Kris kõt akwỳ htyk xwỳnhjê hkukamã ajamaxpêr. Jakamã kot paj ixprĩ hã tanhmã mẽ amã mẽ harẽnh to ka mẽ inhma. Nã Kris kwỳ hkêt xwỳnhjaja na htem ty nhũm mẽ hkwỳjaja tee ri mẽ hkukamã hamaxpêr o hkaprĩ nẽ. Mẽ htyk nẽ ma Jejus wỳr àpir kêt jakamã na htem mẽ mỳr pê hkaprĩ htỳx nẽ pa. No mẽ papajaja na pu htem ho mẽ uràk kêt nẽ. 14Jesús na pre ty nhũm Tĩrtũm akupỳm ho htĩr. Tã ra ã kot hipêx anhỳr jakamã koja nhỹrmã Jejus akupỳn wrỳ nẽ mẽ kot hkõt amnhĩ xunhwỳr nẽ htyk xwỳnhjê karõ nhũm man amnhĩ kõt kaxkwa rũm mẽ o wrỳ. Na pu htem ã ja kõt pajamaxpêr anẽ. 15-16Na pre Pahihti Jejus inhmã hkõt mẽ pahkwỳ htyk xwỳnhjê jarẽnh o:



—Kot paj nhÿrmã akupÿn mẽ awÿr wrÿ ka mẽ ate ixkõt amnhÿ nhÿpêx xwÿnh piitã ma ixkutã axàpir o mõi. Nom kot kaj mẽ arÿ atÿr nê apa xwÿnhjaja akumrêx axàpir kêt nê. Kormã. Koja Tÿrtÿm kapêr o mẽ wrÿk xwÿnh krãhtÿmja Tÿrtÿm mã pifti kakõ. Kakõr tÿx pa ixkwÿ htyk nê hikwÿ xwÿnhjê mã ixkapêr nê ixãmra kamã mẽ kumra. Nhÿm mẽ hkarõ akupÿn mẽ hwÿr wrÿ nê mẽ kãm gjêx pa. Hãmri nhÿm mẽ akupÿm htÿr nê kãnhmã hkrÿ hpa nê ma kumrêx ixkutã àpir o mõi. 17Hãmri ka mẽ ate ixkõt amnhÿ xunhwÿr xwÿnh arÿ mẽ atÿr nê apa xwÿnhjaja ka mẽ hã ajêt nê mẽ atÿpxi nê ma ixkutã axàpir o mõi pu mẽ kakrã kamã axpên kaxpa. Hãmri nê mẽ pahpimràåtã ma kaxkwam api nê inhõ krÿ hwÿr pøj. Kaj mẽ Tÿrtÿm mẽ wa ixkuri amex kumrêx nê atÿr tÿm nê apa ho apa. Anê.

18Ã Pahihti Jejus inhmã mẽ pakukamã mẽ pajarênh anê. Jakamã kwa kêr ka mẽ tee ri mẽ pahkwÿ htyk xwÿnhjê hkukamã ajamxpêr hkêt nê. Ã ixujarênh anhÿrta ã anohtÿx pê axpên jamaxpêr o axihtÿx o ri axpên kõt apa.

Mẽ pahte akupÿn Jejus wrÿk xà hã arÿgro pumunh kêt ã harênh

Matêwre 24.32-25.13; Wam Pêtre 3.8-13

5 1-2Nê mẽ pahte Jejus akupÿm wrÿk xà hã arÿgro pumunh kêt jakamã kot paj mẽ amã tanhmã hã kagã hto hkêt nê. Koja nhÿrmã akupÿn mẽ pahwÿr nojarêt hãmri nê te kot mẽ ahkÿnh xwÿnh kot amnhÿ nhÿpêx pyrã nê mẽ pajaêr pê mẽ pahwÿr wrÿ. 3Jakamã koja kormã wrÿk kêt ri nhÿm Kris kwÿ hkêt xwÿnh kot amnhÿ wÿr kamã hamak kêt xwÿnhjaja hãmri mex nê pa hã amnhÿ pumu nê hkÿnh nê pa. Nê axpên mã kapêr o:

—Nà koja Tÿrtÿm tanhmã mẽ pahto hkêt nê. Arÿ mẽ pamex nê ri mẽ papa kênã. Nà kot puj mẽ paxãmnhÿx ri pajamakêtkati nê ri papa ho papa.

Anhÿr o axpên mã kapêr rôm nhÿm puh Jejus mẽ haêr pê akupÿn wrÿ. Hãmri nê ma mẽ kot amnhÿ xà htÿx kamã hamak o pa htÿm xà hwÿr mẽ rênh pa nhÿm mẽ tee ri kêp hpimxur prãm kaprÿ. Te mẽ htujarõ xwÿnh kot amnhÿ nhÿpêx pyrãk. Na htem mex nê pa htã hpijagri kaxyw õhy xà htÿx kumrêx nê tee ri kãm õhy xà hkêt prãm kaprÿ ho hikwÿ. 4Nom mẽ kajaja kot kaj mẽ urã nê amnhÿ jaêr pê akupÿm wrÿk kãm omu nê tee ri amnhÿ kukamã ajamxpêr o akaprÿ hkêt nê. 5Mê pahpê Jejus kwÿ jakamã na pu htem kapêr kõt ri tãm amnhÿ nhÿpêx o ri papa. Jao te mẽ pahte mẽ kêp Jejus kwÿ hkêt xwÿnhjê kot amnhÿ nhÿpêx pyrãk kêt. 6Na htem mẽ pahkÿnhã akupÿn wrÿk kukamã hamaxpêr kêt nê. Te htÿx ri mẽ õt rãhã ho hikwÿ pyrãk. Nom mẽ papajaja na pu htem akupÿn wrÿk kamã pajamak o papa pê kãm tanhmã amnhÿ nhÿpêx mex to rãhã ho ri papa. 7Te kot ja pyrãk. Na htem kamãt

kãm gõr nẽ mẽmoj mã hamaxpër kêt nẽ htỳx hikwỹ. Nẽ mẽ hkwyjaja kamàt kãm axpã nẽ htỳx ri tanhmã amnhĩ tomnuj to ho pa. Jao hamaxpër mex kêt nẽ. Tã mẽ kệp Jejus kwỳ hkêt xwỳnhjaja hte mẽ uràk nẽ htỳx ri tanhmã amnhĩ tomnuj to ho pa nẽ akupỹn Jejus wrỳk mã hamaxpër kêt nẽ. **8**No kêt mẽ papajaja. Mẽ pahte hkôt amnhĩ xunhwỳr xwỳnhjaja. Kêr pu mẽ ho mẽ uràk kêt nẽ. Satanasti kãm mẽ pahte amnhĩ tomnuj prãm tã mẽ pahte kãm hprãm xà hkôt amnhĩ nhípêx pymaj kêr pu mẽ mẽmoj punuj pê amnhĩ to htỳx rãhã ho ri papa.

Nẽ amnhĩ kaxyw Jejus kôt pajamaxpër tỳx rãhã nẽ.

Nẽ mẽ pamã mẽ piitã mẽ hkĩnh pê mẽ kutã panojarêt rãhã ho ri papa.

Nẽ nhỹrmã Tĩrtũm mẽ hkra Jejus wa kuri pahtĩr tũm nẽ papa ho papa hkukamã mãn pajamaxpër rãhã o ri papa.

Kot puj mẽ ã amnhĩ nhípêx anẽ hãmri nhũm Satanasti tee ri mẽ pahte amnhĩ tomnuj prãm xàj mẽ pahkrãm pajamaxpër punuj jagjênh kaprỳ.

9Xà na pre Tĩrtũm mẽ pakamã gryk kãm mẽ kot amnhĩ xà htỳx kamã hamak tũm xà hwỳr mẽ pajanor kaxyw mẽ parê? Nà na pre ja kaxyw mẽ parênh kêt nẽ. ãm Pahihti Jejus Kris kukwak ri kot amnhĩ katut kôt mẽ pahte amnhĩ tomnuj rênh par nẽ mẽ pahto hkra kaxyw na pre mẽ parê.

10Tã mẽmo kaxyw na pre Krisja mẽ panê ty? Nà nhỹrmã Tĩrtũm mẽ wa kuri mẽ pamex kumrêx nẽ pahtĩr tũm nẽ papa ho papa hprãm xàj na pre mẽ panê ty. Jakamã koja nhỹrmã akupỹm amnhĩ kôt ma mẽ pahto àpir kaxyw akupỹn mẽ pahwỳr wrỳ pu mẽ amnhĩ kaxyw hkôt pajamaxpër xwỳnh piitã ma hkôt kaxkwa hwỳr api hãmri nẽ Tĩrtũm wa kuri pamex nẽ pahtĩr tũm nẽ papa ho papa. Kormã mẽ pahtĩr ri mẽ papa xwỳnhjaja nẽ ra mẽ htyk nẽ hikwỹ xwỳnhjaja nhũm akupỹm mẽ ho htĩr. Hãmri nẽ mẽ pahto hpimràatã amnhĩ kôt mẽ pahto àpir pa. Mẽ pahte hkôt amnhĩ xunhwỳr xwỳnh piitã koja Jejus nhỹrmã akupỹn wrỳ nẽ ã mẽ panhípêx mex anẽ.

11Tã ã kot anhỹr jakamã kwa kêr ka mẽ jam ajamaxpër o apa pê axpên jamaxpër o hihtỳx o ri axpên kôt apa. Nẽ Jejus kôt axpên jamaxpër o hihtỳx o ri axpên kôt apa. Ra ã mẽ ate axpên nhípêx anhỹr tã kêr ka mẽ arĩ ho anhỹr rãhã ho ri apa nẽ aa hkaga hkêt nẽ.

Tĩrtũm kapër o mẽ pajahkre xwỳnhjê jarênh

Karatas 6.6; Wam Ximotre 5.17-19

12Nẽ kwa Kris kôt ixkwỳjaja. Na hte mẽ kot Tĩrtũm kapër o mẽ ajahkre xwỳnhjaja mẽ ajahkre mex pê Tĩrtũm mã mẽ ajamãr mex o pa. Na htem ã mẽ anhípêx mex anhỹr rãhã ho ri mẽ akôt pa. Tã kwa kêr ka mẽ amnhĩ tã mẽ omu nẽ mẽ kapër mar tỳx nẽ. **13**Nẽ mẽ hã apijaam pê tanhmã mẽ ho mex to ho apa.

Ně kwa kêr ka mẽ tãm axpẽn nhĩpêx nẽ axãmnhĩx ri ajamakêtkati nẽ axpẽn kôt ri apa ho apa.

Mẽ pahte tanhmã Kris kôt mẽ pahkwỳjê nhĩpêx to hã mẽ pamã karõ

Epês 4.1-6

14 Nẽ koja Kris kôt mẽ anhiõ kãm kaga nẽ pa ka mẽ ja hã omu nẽ kãm anẽ kê ã amnhĩ nhĩpêx anhỹr kêt nẽ. Kê hpãnhã amnhĩ xàpkur xà kaxyw àpênh o pa.

Nẽ mẽ kãm ma ho mẽ pa xwỳnhjaja ka mẽ kãm mẽ hamaxpêr o axihtỳx o ri mẽ hkôt apa.

Nẽ kormã amnhĩ kaxyw Jejus kôt mẽ hamaxpêr tohtuj anhỹr xwỳnhjaja ka mẽ tanhmã Jejus kôt mẽ ho mẽ axihtỳx to kê mẽ hkôt amnhĩ nhĩpêx mex o pa.

E kêr ka mẽ ã mẽ axpẽn nhĩpêx anhỹr o ri apa nẽ axpẽn kamã agryk tokyx anhỹr kêt nẽ.

15 Nẽ koja mẽhõ tanhmã atomnuj to ka mẽ ãm omu nẽ amnhĩ tã tanhmã ho hkêt nẽ. ãm ho mex o ri apa. Nẽ mẽ piitã tanhmã mẽ ho mex to hpix kukamã ajamaxpêr rãhã nẽ.

16 ã mẽ pahte amnhĩ nhĩpêx anhỹr o papaja na Tĩrtũm kãm hprãm.

Mẽ pahpê hkra hã pahkĩnh rãhã papaja na kãm hprãm.

17 Nẽ mẽ pahte Tĩrtũm mã amnhĩ jarênh rãhã ho papaja na mããnên kãm hprãm.

18 Nẽ tanhmã mẽ pakute htã arĩ Tĩrtũm mã mex o mex ã harênh o papaja na mããnên kãm hprãm. Mẽ pahkĩnh nẽ papa kamã kãm mex o mex ã harê. Rỳ mẽ pahpunuj nẽ papa htã arĩ kãm mex o mex ã harê. Rỳ nhũm mẽhõ tanhmã mẽ panhiêpêx to htã pu mẽ arĩ kãm mex o mex ã harê.

ã mẽ pahte amnhĩ nhĩpêx anhỹr o papaja na Tĩrtũm kãm hprãm.

Mẽ pahte tanhmã Tĩrtũm Karõ nhĩpêx to hã mẽ pamã karõ

19 Nẽ koja Tĩrtũm Karõ mẽ amã mẽmoj tã tanhmã kapêr o amnhĩrĩt to ka mẽ ama nẽ hkôt amnhĩ nhĩpêx kurê kumrêx. Rỳ mẽhõ mã tanhmã akapêr to kurê kumrêx. No kêr ka mẽ ama nẽ ãm ama nẽ atỳx ri hã apa hkêt nẽ. 20 Rỳ nhũm mẽhõ Tĩrtũm Karõ nhỹ hã tanhmã mẽ amã kapêr to ka mẽ ama nẽ agryk nẽ tanhmã ho akapêr punuj to hkêt nẽ. 21 Koja Tĩrtũm kapêr kôt tanhmã mẽ amã mẽmoj jarênh to nẽ ãm hãmri Tĩrtũm Karõ nhỹ hã harênh ã amnhĩ jarê. Ka mẽ ama nẽ hkôt amnhĩ nhĩpêx. 22 No koja Tĩrtũm kapêr kwỳm ri tanhmã mẽmoj jarênh to hãmri nẽ Tĩrtũm Karõ nhỹ hã ja jarênh kêt nẽ. ãm amnhĩ krã hkôt harê. Ka mẽ tee ri ama nẽ amnhĩ krã kamã kapêr xir tỳx kêt nẽ. Jao hkôt amnhĩ nhĩpêx kêt nẽ.

Tanhmã Pawre kot mẽ ho Tirtũm wỳr to hã harẽnh*Wam Tesarõn 3.3, 3.16*

23Nẽ na pa hte mẽ ato Tirtũm wỳr o ri ixpa nẽ kãm:

— Pa Tirtũm. Nà ate mẽ inhmã mẽ ijamakêtkati xà nhõr jakamã na pa htem anhỹ hã ixàmnhĩx ijamakêtkati nẽ ri ixpa. Jakamã kwa kêr ka tanhmã Tesarõn kamã akwỳjê ho kê mẽ amnhĩ to mex rãhã ri pa. Jao tãm amnhĩ nhĩpêx nẽ tãm ri hamaxpêr rãhã nhũm Pahihti Jejus Kris akupỹn mẽ ixwỳr wrỳ.

Anhỹr o mẽ ato kuwỳ. 24Tã koja ã mẽ anhĩpêx anẽ. Ra kot amnhĩ jarẽnh xà hkôt. ã mẽ anhĩpêx anhỹr kaxyw na pre amnhĩm mẽ arẽ.

Kagà jatur xà

25E Kris kôt ixkwỳjaja. Kwa kêr ka mẽ amnhĩ xwar ixto Tirtũm wỳr o apa.

26Nẽ kêr ka mẽ atar Kris kôt mẽ pahkwỳjê piitã mẽ kãm mẽ ijarẽ.

27-28Nẽ kê Pahihti Jejus Kris mẽ akutã nojarêr rãhã ho pa. Ixte Pahihti nhỹ hã ã mẽ amã ixkapêr nẽ hã kagà anhỹr jakamã kêr ka mẽ atar Kris kwỳjê piitã mẽ kãm kamã harẽ kê mẽ piitã ixkapêr ma.

Tã ãm ja pix na hapêx. Ixpê Pawre na pa ã mẽ amã kagà nhĩpêx nẽ mẽ awỳr mẽnh anẽ.

Sikũn Tesarõn

Pawre kot Tesarõn kamã Jejus kôt kwỳjê hwỳr wam kagà nê mênh kôt hõ kagà nê mênh

Pawre na pre kagàja nhípêx nê ma Tesarõn kamã Jejus kôt hkwỳjê hwỳr kumê. Na pre hte Tesarõn kamã mẽ kãm Jejus ã mẽ hkurê xwỳnhjaja Jejus ã tanhmã mẽ homnuj to nhũm mẽ amnhĩ xà htỳx kamã hamak o pa. Hãmri nhũm Pawre mẽ harênh ma nê kagàja nhípêx nê mẽ hwỳr kumê. Nê kamã mẽ kãm mẽ hamaxpêr o hihtỳx. Nê mẽ kot arĩ Tĩrtũm kôt amnhĩ nhípêx mex o pa nê hamaxpêr kôt hamaxpêr o pa hã mẽ kãm karõ. Nê nhỹrmã Jejus akupỳn kaxkwa rũm mẽ pahpê hkrajê hwỳr wrỳk nê pika ho hapêx par ã mẽ kãm harê. ã Na pre Pawre mẽ kãm kagàja kamã mẽ kãm ujarênh anê. Nê mẽ kãm:

1 1Pa Tesarõn nhõ xwỳnh kot Tĩrtũm kapêr mar kaxyw axpên wỳr mẽ apikuprõnh xwỳnhjaja? Xà mẽ amex na ka mẽ apa? Ixpê Pawre na pa axte mẽ awỳr kagà nhípêx nê kumê. Siras mẽ Ximotre mẽ pa mẽ awỳr kumê. Nà mẽ pahpê Měpanhĩpêxà maati Tĩrtũm mẽ Kra Jejus Kris kwỳ na pu mẽ. 2Jakamã na pa htem mẽ ato wa hwỳr rãhã ho ri ixpa. Wa kot mẽ akutã nojarêr rãhã ka mẽ ajamakêtkati nê apa kaxyw. Nê mẽmoj to mẽ akutã wa nojarêr rãhã ho pa kaxyw.

Tĩrtũm kot nhỹrmã hkrajê nhípêx kati xwỳnhjê homnuj tỳx ã harênh
Wam Pêtre 4.12-19

3Nê na ka htem amnhĩ kaxyw Tĩrtũm mã ajamaxpêr tỳx mex o ri apa. Nê axpên kutã anojarêr rãhã nê. Na pa htem ã mẽ ate amnhĩ nhípêx anhỹrja mã ijamaxpêr nê mẽ anhỹ hã ixkĩnh nê Tĩrtũm mã mẽ anhỹ hã ixkĩnh ã amnhĩ jarê. 4Nê nhỹhỹm ixpa nê nhỹri krĩm agjê nê kamã Tĩrtũm kôt mẽ pahkwỳjê mã mẽ ato amỹra nê mẽ kãm:

—E pa mẽ amã Tesarõn kamã Kris kwỳjê jarê ka mẽ inhma. Nà mẽ õ krĩ kamã mẽ hkwỳjaja na htem Kris ã mẽ hipêx kati ho pa nhũm htem amnhĩ xà htỳx kamã hamak pê mex kêt nê pa. Tã nom tee ri amnhĩ kukamã hamaxpêr o Jejus kaga hkêt nê. Na htem arĩ hkôt amnhĩ nhípêx mex rãhã ho pa. Anê.

5Ā mẽ ate mẽ kutā amnhĩ nhĩpêx anhÿr o apaja na hte Tirtūm hã mẽ apumu nê hkĩnh nê pa. Nê mẽ akukamã hamaxpêr o:

— Mẽ kot Ixkra Jesus ã tanhmã mẽ hipêx to ho pa htã âm hãmri na htem mẽ kutā amnhĩ to htÿx o pa nê mẽ umaj wa ixkaga hkêt nê. Na htem ã amnhĩ nhĩpêx anê nê mẽ kêp ixkra hã amnhĩ to amnhĩrit mex nê. Nà koja mẽ nhÿrmã wa ixri mex kumrêx nê htĩr tūm nê pa ho pa.

Anhÿr o hamaxpêr. 6Nê mẽ kot Kris ã mẽ anhĩpêx punuj xwÿnhjaja koja Tirtūm nhÿrmã mẽ atã mẽ homnuj tÿx nê nhũm mẽ amnhĩ xà htÿx kamã hamak rãhã ho pa. Âm hãmri koja ã mẽ atã mẽ hipêx anê. 7-10Koja Pahihti Jejusja nhÿrmã man akupÿn pika hwÿr hirã htÿx kãm wrÿ nhũm Tirtūm kapêr o mẽ wrÿk xwÿnh xihtÿx xwÿnhjaja man hkôt wrÿ. Koja mẽ wrÿ hãmri nê mẽ kot amnhĩ tomnuj xwÿnhjê homnuj tÿx kumrêx. Jao ma mẽ kot amnhĩ xà htÿx kamã hamak tūm xàta wÿr mẽ rênh pa nhũm mẽ kamã htĩr tūm nê amnhĩ xà htÿx kamã hamak rãhã ho pa ho pa. Koja ã Pahihtija amnhĩ nê mẽ kot hkôt amnhĩ xunhwÿr kêt xwÿnhjê rênh anê nhũm mẽ pahkĩnhã Tirtūm mẽ Krata wa kuri mex nê pa hkêt nê. Nê mẽ pahkĩnh ã wa mex o wa mex nê wa hihtÿx o wa hihtÿx ã wa omunh kêt nê. Koja Pahihti Jesus nhÿrmã akupÿn wrÿ nê ã mẽ panê mẽ hipêx anê. Koja wrÿ pu mẽ amnhĩ kaxyw hkôt pajamaxpêr xwÿnhjaja amnhĩ wÿr omu nê pahkĩnh nê. Hãmri nê amnhĩ nhĩ nyw ã amnhĩ pumu nê kãm:

— Hêxta waa nê. Amex o amex Pahihti. Na ka pre mẽ inhnê ty hãmri nê mẽ inhmã mẽ inhĩ nyw gō. Kot paj mẽ Tirtūm mẽ war ari inhmex kumrêx nê ixtĩr tūm nê ixpa ho ixpa. Âm hãmri na ka ã mẽ ixto mex anê. Nà amex kumrêx o amex kumrêx Pahihti. Anê.

Ā kot puj mẽ pahpê hkwyjaja amnhĩ tã kãm mex o mex ã harênh anê. Ra mẽ ate mẽ ixkapêr mar nê hkôt amnhĩ xunhwÿr jakamã kot kaj mẽ ixpyrà nê ã kãm mex o mex ã harênh anê.

Pawre kot Tesarōn nhõ xwÿnhjê ho Tirtūm wÿr ã harênh

11-12Nê na pa htem mẽ ato Tirtūm wÿr rãhã ho ixpa nê kãm:

— Pa Tirtūm? E Tesarōn kãm akrajaja na pa mẽ ho awÿ. Na ka hte Akra Pahihti Jesus Kris mẽ wa mẽ ho mex rax o apa. Jao amnhĩm mẽ arê nhũm mẽ ra kãm amnhĩ to mex prãm nê. Na htem amnhĩ kaxyw Jesus mã hamaxpêr rãhã pê mẽmoj to axpên kutã nojarêr o pa. Jakamã kwa tanhmã mẽ hkrã hto kê mẽ akôt ã amnhĩ nhĩpêx anhÿr rãhã ho pa. Kêr ka mẽ kot akôt amnhĩ nhĩpêx o pa hã mẽ omu nê akĩnh nê mẽ kãm mẽ mex ã mẽ harê. Nhũm mẽ ate tanhmã mẽ ho mex to hã amnhĩ tã apumu hãmri nê mẽ amnhĩ pyrà nê amã amex o amex ã ajarênh rãhã ho pa. Anê.

Kot amnhĩ tomnuj tỳx kumrēx xwỳnh maati jarēnh*Matêwre 24.23-25; Makre 13.14-23; Rukre 21.20-24;**Wam Juāw 2.18-19; Apokarip 13.1-18*

2 1Ně koja nhỹrmã mẽ panhõ Pahihti Jejus Kris akupỳn wrỳ pu mẽ ma kutã api nẽ kakrã kamã hkaxpa. Jakamã kwa Jejus kôt ixkwỳjaja. 2Koja mēhõ mẽ awỳr mō nẽ mẽ amã Jejus ra akupỳn wrỳk ã harēnh japêr. Rỳ tanhmã mẽ amã Jejus hpôx xà hã arĩgro jarēnh o hêx to nẽ mẽ amã:

—Kwa na ra Jejus akupỳn nojarê. Kojã tokyx akupỳn mẽ pahwỳr wrỳ. Semã ja kamã rỳ ko. Apu hõ hã koja apu wrỳ rỳ ko.

Anhỹr o harẽ. Nẽ Tĩrtũm Karõ nhỹ hã ã kot mẽ amã harēnh anhỹr ã amnhĩ jarẽ rỳ nhãm mēhõ kot ã kãm harēnh anhỹr ã harẽ. Rỳ pa ixte harēnh nẽ hã kagã hã ijarẽ. Nom kwa kêr ka mẽ kapêr ma nẽ ãm ama nẽ hkôt ajamaxpêr kêt nẽ. Rỳ ama nẽ tee ri amnhĩ kukamã ajamaxpêr kêt nẽ. Kojã mēhõ ã mẽ amã Jejus tokyx wrỳk ã harēnh anẽ nẽ ãm amnhĩ krã hkôt ã harēnh anhỹr o hêx. Nom Tĩrtũm Karõ nhỹ hã rỳ pa inhỹ hã rỳ nhãm Kris kôt mẽ panhĩõ nhỹ hã ã harēnh anhỹr kêt nẽ. 3-4Jakamã kêr ka mẽ ãm mẽ kot harēnh o hêxja ma nẽ hkôt ajamaxpêr kêt nẽ. Kormã Pahihti Jejusja akupỳn nojarê kêt. E kot paj ixprĩ hã mẽ amã ja jarẽ ka mẽ inhma. Nã kormã Pahihti akupỳn nojarê kêt ri koja mẽ ohtô rax kumrēx nẽ Tĩrtũm kutã amnhĩ xunhwỳ nẽ kãm hkurê ho pa. Nẽ amnhĩ tomnuj tỳx o pa. Hãmri nhũm ra kot amnhĩ tomnuj tỳx kumrēx xwỳnh maatija amnhĩ to amnhĩrĩt. Nom na pre ra Tĩrtũm tanhmã kot hipêx to hkukamã hã amnhĩ jarẽ. Kojã xep gaa nẽ ma mẽ kot amnhĩ xà htỳx kamã hamak tũm xàta wỳr kumẽ nhũm kamã amnhĩ xà htỳx kamã hamak o pa rãhã nẽ pa ho pa.

Tã nom kormã Pahihtija akupỳn wrỳk nẽ ma hwỳr mēnh kêt ri koja mẽ piitã omu nẽ kêp Mēhpãm maati pixi hã harēnh kaxyw mẽ kêp mẽ õ sãnti piitã hkrakrak pa. Nẽ mẽ kot mēmo karõ ho amnhĩ pãm ã harēnh xwỳnhja nhũm piitã hkrakrak pa. Hãmri nẽ axtem nẽ Tĩrtũm mã amnhĩ jarēnh xà hã ixkre jatur xà kamã hitom wỳr axà nẽ kamã nhỹ nẽ hêx rom mẽ piitã mẽ kãm kêp Tĩrtũm ã amnhĩ to hêx nẽ mẽ kãm:

—E mẽ amnẽ ixpumu. Ixpê mẽ anhõ Tĩrtũm na pa. Pa kot kaj mẽ inhmã inhmex o inhmex ã ijarẽ. No kêr ka mẽ anhõ sãnti ho apãm o apa hkêt nẽ. Kwarĩ ho kwarĩ. ãm paxipix ixpê Mēapãm maati nẽ paxipix ixpê mẽ anhõ Tĩrtũm.

Anhỹr o amnhĩ to hêx. 5Na pa pre arĩ mẽ akôt ixpa ri ã mẽ amã harēnh anẽ. Mãn arĩ mẽ ate ja hã anohtỳx rỳ ko. 6Nom kormã ã kot amnhĩ nhĩpêx anhỹr xà hã arĩgrota kormã kator kêt. Mēhõ kormã

kot kēp àmnàr jakamã nhūm kormã kator kêt nê. Ra mẽ ate kēp àmnàr xwỳnhja jarēnh mar. Tã koja hpôx xà hã arígro kato nhūm kēp àmnàr xwỳnhhta kãm pry kaprã nhūm rĩ kormã mō. 7Nom na hte ra hpimxur pê Tĩrtūm nê mẽ piitã mẽ hkurê ho pa. Mẽ kot Tĩrtūm kôt amnhĩ xunhwỳr pymaj tanhmã nê mẽ ho ho pa. Nom kormã kēp àmnàr xwỳnhja kēp àmnàr jakamã nhūm hte mẽ noo mã tanhmã mẽ ho hkêt nê. Tã koja Tĩrtūm nhỹrmã kēp àmnàr xwỳnhja mã anê nhūm kuma nê kãm ure nhūm rĩ kormã amnhĩ to amnhĩrĩt nê mẽ piitã mẽ noo mã mō nê Tĩrtūm nê tanhmã mẽ kãm hêx to ho pa. 8-12Koja kato nê Satanasti mẽ wa mẽ piitã tanhmã mẽ nokupyr to ho ri mẽ hkôt pa. Nê hêx rom mẽ kãm aa mẽ kot mẽmoj pumunh kêt kwỳ ho anhỹr o ri pa. Koja wa hêx rom te Tĩrtūm kot amnhĩ nhĩpêx pyrãk o ã amnhĩ nhĩpêx anê. Hãmri nhūm mẽ kot Jejus kôt amnhĩ xunhwỳr kêt xwỳnhjaja ja hã wa omu nê wa hkôt hamaxpêr kurê kumrêx. Nê ãm hãmri wa kapêr ã wa hkamnhĩx. Kop apu ra mẽ kot Tĩrtūm kapêr mar nê hkôt amnhĩ xunhwỳr ronhỹx ra Tĩrtūm amnhĩ tã mẽ omu nê mẽ ho hkra. Nom koja mẽ kãm kapêr mar prãm kêt nê. ãm wa kot amnhĩ to hêx o wa pa xwỳnhhta kôt pix mã koja mẽ kãm amnhĩ nhĩpêx prãm.

Ja mỳrapê koja Tĩrtūm tee ri ja hã mẽ omu hãmri nê mẽ nê wa kot amnhĩ tomnuj tỳx xwỳnhhta wa omunh kêt nhūm wa tanhmã mẽ kãm amnhĩ nhĩpêx to nhūm mẽ wa omu nê wa hkôt hamaxpêr kurê kumrêx. Hãmri nê wa gryk ã Tĩrtūm kaga jakamã nhūm nhỹrmã mẽ kot amnhĩ xà htỳx kamã hamak tūm xàja wỳr mẽ rēnh pa.

Koja Satanasti mẽ kot amnhĩ tomnuj tỳx kumrêx xwỳnh maatita ã hêx rom tanhmã mẽ no kupyr to anhỹr o pa rãhã nhūm Pahihti Jejusja hirã rax kãm akupỳn mẽ pahwỳr wrỳ. Hãmri nê kot amnhĩ tomnuj tỳx kumrêx xwỳnh maatita ã amỳnê nhūm mẽ kãm hpĩr kurê kumrêx nhūm hapêx. Koja ã amnhĩ nhĩpêx anê.

Tĩrtūm kot tanhmã mẽ pahto mex to hã harēnh

Rōmã 8.28-30; Wam Tesarōn 2.13, 5.23-24

13Nê amnepêm kormã mẽmoj kêt ri na pre Tĩrtūm amnhĩm mẽ arê. Mẽ ate kapêr mar nê hkôt amnhĩ xunhwỳr nhūm kot mẽ ato hkra kaxyw mẽ arê. Kãm mẽ ajapêê. Na pre mẽ awỳr amnhĩ Karō rē nhūm mẽ akarō mã agjê nê tanhmã mẽ ajamaxpêr to ka mẽ y hã tãm amnhĩ nhĩpêx rãhã ho ri apa. Na pa htem ja hã mẽ amã ijamaxpêr nê mẽ anhỹ hã ixkĩnh kãm Tĩrtūm mã mẽ ajarēnh o ri ixpa. 14Na pre mẽ awỳr mẽ ixrê. Mẽ ixte mẽ awỳr ixpa nê mẽ amã tanhmã Jejus kot mẽ panê amnhĩ nhĩpêx to hã harēnh o ixpa kaxyw. Mẽ ate mẽ inhmar nê Jejus kôt amnhĩ xunhwỳr nhūm Tĩrtūm kot Pahihti Jejus Kris o mex pyrã nê tanhmã mẽ ato mex to kaxyw. 15Jakamã kwa kêr ka mẽ ra mẽ ixte wam mẽ awỳr kagã

mẽnhta kamã harẽ nõ mar tỳx nõ. Nẽ mẽ akõt mẽ ixpa ri tanhmã mẽ ixte mẽ ajahkre htoja mã ajamaxpẽr mex nõ hã ano htỳx nõ hkõt amnhĩ nhĩpêx rãhã ho ri apa. Jao Jejus kõt amnhĩ nhĩpêx mex o ri apa Kris kõt ixkwỳjaja.

16Mẽpanhĩpêxã maati mẽ Pahihti Jejus Kris wa kãm mẽ pajapê htỳx kumrêx. Na hte wa tanhmã mẽ pajamaxpẽr o hihtỳx to ho pa pu mẽ wa ỹ hã tãm pajamaxpẽr o ri papa. Nẽ wa ỹ hã nhỹrmã wa kuri pamex nõ pahĩr tũm nõ papa hkukamã pajamaxpẽr kaprỳ ho papa hkêt nõ. 17Na pa htem mẽ ato wa hwỳr o ixpa nõ wa kãm:

—Pa Tĩrtũm mẽ Jejus wa? Kwa kêr ka wa tanhmã Tesarõn kamã akrajê mã mẽ hamaxpẽr o hihtỳx to kê mẽ war anhỹ hã tãm amnhĩ nhĩpêx nõ tãm hamaxpẽr. Jao kapẽr mex rãhã nõ pa ho pa. Anẽ.

**Tanhmã mẽ pahte axpẽn to Tĩrtũm wỳr to hã kot
mẽ pamã karõ
Korosẽ 4.2-4**

3 1Nẽ kwa Kris kõt mẽ ixtõ nõ ixtõxjaja. Kêr ka mẽ amnhĩ xwar mẽ ixto Tĩrtũm wỳr rãhã ho ri apa. Mẽ ixte krĩ piitã hkõt mẽ kãm Jejus jarẽnh o ri mẽ hkõt ixpa nhũm mẽ kot mẽ inhmar nõ amnhĩ kaxyw Jejus kõt hamaxpẽr kaxyw. Jao mẽ apyrã nõ hkõt amnhĩ nhĩpêx mex o pa kaxyw. 2Nom koja mẽ piitã ã amnhĩ nhĩpêx anhỹr kêr nõ. Mẽ hkwỳjaja kãm Jejus jarẽnh mar prãm kêr jakamã kwa mẽ ixto Tĩrtũm wỳr kê mẽ inhnê mẽ omunh mex nõ nhũm mẽ Jejus ã tanhmã mẽ ixto hkêt nõ.

3Nẽ koja Pahihti tanhmã mẽ akrã hto ka mẽ ajamaxpẽr mex nõ ỹ hã hkõt amnhĩ xunhwỳr tỳx o ri apa. Jakamã nhũm Satanasti mẽ ate amnhĩ tomnuj hprãm xaj tee ri tanhmã mẽ anhĩpêx to kaprỳ nhũm Pahihti mẽ anê omunh mex nõ. Ra kot mẽ atã amnhĩ jarẽnh xà hkõt. 4Koja ã mẽ anê hipêx anê ka mẽ ỹ hã tanhmã mẽ ixte mẽmoj tã mẽ amã karõ xà hkõt amnhĩ nhĩpêx mex o ri apa. 5Tã kê Pahihti tanhmã mẽ akrã hto ka mẽ Tĩrtũm pyrã nõ mẽ piitã mẽ kamã axukaprĩ ho ri apa. Nẽ Pahihti Kris pyrã nõ mẽmoj punuj kutã amnhĩ to htỳx nõ. Jao hkõt amnhĩ nhĩpêx mex rãhã ho ri apa.

Mẽ kãm kaga xwỳnhjê jarẽnh

Wam Korõt 4.12; Epes 4.28; Wam Tesarõn 4.9-12

6E kot paj hpãnhã Kris kõt mẽ pahkwỳ kãm kaga xwỳnhjê jarẽ ka mẽ inhma. Pahihti Jejus nhỹ hã kot paj mẽ amã tanhmã mẽ harẽnh to. Nã koja mẽ akwỳjaja kãm kaga nõ amnhĩm mẽmoj tã àpênh kêr japêr. Nẽ mẽ ixte mẽ axàpênh mex o apa hã mẽ amã karõja kuhpa hã amnhĩm mẽmoj tã àpênh kêr japêr. Koja mẽ ã amnhĩ nhĩpêx anê


ka mẽ ja hã mẽ omu hãmri nẽ mẽ hkôt ri apa hkêt nẽ. 7-8 Xa mẽ pajaja na pa prem ma mẽ awÿr mō nẽ mẽ akôt inhmã kaga nẽ mẽmoj tã ixapênh kêt nẽ ri ixpa? Nà na pa prem mẽ apa kukwak ri ixàpkur pymaj ixapênh rûnh nẽ amnhĩ pa pix kukwak ri ixàpkur o ri ixpa. Na ka prem mẽ inhmã mẽmo mẽ apkur xà ho mra pa prem amarĩ amnhĩm hamÿnh nẽ hkur kêt nẽ. Na pa prem hpãnhã mẽ amã amnhĩre nẽ kormã kuku. Tã kêr ka mẽ ã amnhĩ nhĩpêx anhÿr o ri axpên kôt apa nẽ amnhĩ pa pix kukwak ri apku. Nẽ mẽ amã kaga hã nhãm akwÿjê hpa kukwak ri axàpkur o ri apa kêt nẽ. 9 Na pa prem amnhĩ pa pix kukwak ri ixàpkur o ri mẽ akôt ixpa. Mẽ ate ja hã mẽ ixpumunh nẽ mẽ ixpyrà nẽ ã amnhĩ nhĩpêx anhÿr kaxyw. Nom mẽ ixte Jejus mã tanhmã mẽ ajahkre hto nhũm mẽ ate mẽ inhmar nẽ hpãnhã mẽ inhmã mẽ ixàpkur xà nhōrja Jejus mã tanhmã kute hkêt tã pa prem ã amnhĩ nhĩpêx anhÿr kêt nẽ. Mẽ ate ja hã mẽ ixpumunh nẽ mẽ ixpyrà nẽ ã amnhĩ nhĩpêx anhÿr kaxyw na pa prem amnhĩ pa pix kukwak ri ixàpkur o ri mẽ akôt ixpa. 10 Na pa prem mẽ amã ja hã karō ho:

—Koja mẽhō kãm kaga nẽ àpênh kêt nẽ ka mẽ ja hã omu nẽ kãm ò hkêt nẽ. Kwār mãmri apkur kêt nẽ kãm prãm nẽ ri pa nẽ amnhĩ pumu. Anẽ.

11 Tã xep ra mẽ akwÿjaja ã amnhĩ nhĩpêx anẽ nẽ kãm kaga nẽ àpênh kêt nẽ amarĩ ri pa. Nẽ xep htÿx ri axpên jakwa kamã nhãm mẽ hixi ho rêr o ri pa. 12 Kwa mẽ inhma Jejus kôt ixkwÿjaja. Kot paj Pahihti Jejus nhÿ hã mẽ amã mẽ kot ã amnhĩ nhĩpêx xwÿnhjê jarê ka mẽ inhma nẽ mẽ inhmar tÿx nẽ. Kêr ka mẽ kãm kaga xwÿnhjê mã anẽ kê mẽ jam ure nẽ hpãnhã àpênh mex o pa. Jao mẽ apyrà nẽ amnhĩ pa kukwak ri apkur o pa. Kêr ka mẽ ã mẽ kãm ixkapêr jarênh anẽ.

13 Nẽ kwa kêr ka mẽ axpên to mex o apata kaga hkêt nẽ.

14 E na pa mẽ ã Tirtum nhÿ hã mẽmoj tã mẽ amã karō nẽ hã kagã anẽ. Tã koja mẽhō kamã harê nẽ kuma nẽ ãm kuma nẽ hkôt amnhĩ nhĩpêx kêt ka mẽ ja hã omu nẽ hkôt ri apa hkêt nẽ. Tokyx kot ja hã amnhĩ pumunh nẽ amnhĩ tã hpijaam kaxyw. 15 Nom arĩ Kris kôt kêp mẽ akwÿ jakamã kêr ka mẽ arĩ kêp mẽ atō rÿ atōx ã tãm hipêx nẽ kãm akapêr mex o ri apa. Nom te ho kêp mẽ akwÿ hkêt pyrāk o kãm akapêr kêt nẽ.



Sikūn Tesarōn 3.13-15

Tanhmã Pawre kot mẽ ho Jejus wỳr to hã harẽnh

16-18 Nẽ na pa hte mẽ ato Pahihti Jejus wỳr rãhã ho ixa. Kot mẽ pamã mẽ pajamakêtkati xà nhõr jakamã na pa htem mẽ ato kuwỳ nẽ kãm:

— Pa Pahihti? Kwa kêr ka Tesarõn kamã akwỳjê pumu nẽ mẽmoj to mẽ kutã anojarêr rãhã ho ri mẽ hkôt apa. Kê mẽ hamakêtkati nẽ àmnhĩx pa ho pa. Anẽ.

Tã ãm ja pix. Ixpê Pawre na pa kagà jatur xà kamã inhĩkra ho amnhĩ nhĩxi nhĩpêx. Na hte kagà nhĩpêx xwỳnh inhmã ixkapêr ã kagà. Nẽ hã kagà hpa pa hpãnhã hatur xà kamã pam inhĩxi nhĩpêx. Tã na hapêx.

Wam Ximotre

Pawre kot Ximotre hwÿr kagà nê mênh

Pawre na pre kagàja nhípêx. Kêp Jejus nhÿ hã hkrajê jahkre ho pa xwÿnhjê hô na pre. Nê Ximotre kêp Pawre ho ajuta ho hkôt pa xwÿnh na pre. Tã hpãnhã krî pê Epes kamã arîk nê Tirtûm kapêr o Jejus kôt hkwÿjê jahkre ho pa. Hãmri nhûm Pawre krî hô kamã pa nê kagàja nhípêx nê hwÿr kumê. Nê kamã kãm mêmôj tã karô. Na pre ra Epes kamã mê hkwÿjaja Tirtûm kapêr o hêx o mê ahkre ho pa nhûm Pawre mê harênh ma nê kagàja kamã Ximotre mã tanhmã mê harênh to. Nê kot Tirtûm kapêr o Jejus kwÿjê jahkre mex xwÿnhjê xunhwÿr kaxyw kãm karô. Nê Tirtûm kãm hprãm xà hkôt pix mã mê ahkre ho pa hã kãm karô nê hwÿr kagà nê kumê. Nê kãm:

1 1Pa Ximotre? Xà amex? Ixpê Pawre na pa awÿr kagà nhípêx nê kumê. Ixte Jejus Kris nhÿ hã mê ahkre ho ixpa kaxyw na pre Mëpapytâr xwÿnh Tirtûm mê Jejus Kris wa ixta nê ixãm. Jejus kamã na pu htem pajamak rãhã ho ri papa.

2Nà ra ate ixkapêr mar xà hkôt Jejus kôt amnhÿ xãm jakamã te apê ixkra pyrãk Ximotre. Jakamã na pa hte ato Mëpanhípêxã maati Tirtûm mê panhõ Pahihti Jejus Kris wa hwÿr o ixpa nê ato wa hwÿr o:

—Pa Tirtûm mê Pahihti wa. E Ximotre ho na pa war awÿr kaxyw. Kwa kêr ka wa kamã axukapri nê kutã war anojarêr rãhã ho wa ri apa. Kot kaj wa ã ho mex anê nhûm war anhÿ hã hamakêtkati nê àmnhÿx pa ho pa.

Anhÿr o na pa hte war ato kuwÿ

Tirtûm kapêr o mê ahkre xwÿnhjê jarênh

Rômãn 16.17; Wam Ximotre 6.3; Sikûn Ximotre 2.23; Xitre 1.5-16

3Nê na pu pre wa Epes kamã papa tã pika pê Masetõn wÿr panojarêr nê tee ri Epes kamã Tirtûm kapêr ho hêx o mê ahkre xwÿnhjê kapêr ma. Jakamã na pa pre amã:

—E Ximotre kêr ka Masetõn wÿr ixkôt amõr kêt nê. ãm jar Epes kamã arîk nê ixwakre kamã Tirtûm kapêr o mê hêx xwÿnhjê mã akapêr nê ã mê hêx anhÿrja nê mê hkurê ho ri mê hkôt apa.

Anhÿr o amã harẽ hãmri nẽ Epes kamã are nẽ ma Masetõn wÿr ahte mõi. 4Mẽ hẽx xwÿnhjaja amnepẽm panhĩgõtjaja kot tanhmã amnhĩ nhĩpẽx to nẽ tanhmã ujarẽnh toja nhũm htem mẽ kãm harẽnh pix o pa. Nẽ mẽ hixi piitã harẽnh o pa. Na htem ã amnhĩ krã hkõt hkwÿjê mã ujarẽnh anhÿr o pa. Jao axpẽn kwÿm ri mẽ ahkre nẽ mẽ hã axpẽn mã àkjêr o pa. ã mẽ kot amnhĩ nhĩpẽx anhÿr jao Tirtũm nhÿ hã kãm hprãm xà hkõt mẽ ahkre hkêt nẽ. Koja mẽhõ Tirtũm nhÿ hã kapër o mẽ ahkre hãmri nẽ amnhĩ kaxyw kãm hamaxpër tÿx pẽ tanhmã mẽ ahkre hto. Nom ixte amã mẽ harẽnh xwÿnhjaja Tirtũm nhÿ hã mẽ ahkre hkêt jakamã na pa pre inhnojarêt nẽ ã amã mẽ harẽnh anẽ nẽ mẽ kuri Epes kamã are.

5Tã kër ka arĩ mẽ ahkre ho ri mẽ hkõt apa Ximotre. Nẽ Kris kõt mẽ pahkwÿjê mã anẽ kê mẽ amnhĩ kaxyw Jejus kõt hamaxpër tÿx pẽ hamaxpër mex o pa. Jao tanhmã hamaxpër punuj to hkõt amnhĩ nhĩpẽx kêt nẽ. Nẽ mẽ kãm anẽ kê mẽ te kãm amnhĩ tã ma pyrãk o nhãm kãm mẽ hã ma ho pa. 6Ixte amã mẽ hẽx xwÿnh jarẽnh xwÿnhjaja na htem ã mẽ ahkre anhÿr kêt nẽ. Na htem htÿx ri amnhĩ krã hkõt tanhmã mẽ ahkre hto. 7Tirtũm kot finat Mojes mã mẽmoj tã karõja mẽ kot mar tÿx ã amnhĩ kamnhĩx nẽ ho mẽ ahkre hprãm tã no ãm hprĩ hã mar kêt nẽ htÿx ri ho mẽ ahkre ho pa. 8Tirtũm kot Mojes mã mẽmoj tã karõja mex. Mẽ kot mar nẽ hkõt amnhĩ nhĩpẽx o pa kaxyw na pre. 9No na pre mẽ kot tãm amnhĩ nhĩpẽx xwÿnhjê mã ã hã karõ anhÿr kêt nẽ. ãm mẽ kot amnhĩ tomnuj xwÿnhjê mã na pre hã karõ.

Mẽ kot mẽ õ pahi kapër mar kêt xwÿnhjê mã.

Nẽ mẽ kot Tirtũm kapër nhĩrõp kuhê ho mẽ pa xwÿnhjê mã.

Nẽ Tirtũm ã mẽ hpijaam kêt xwÿnhjê mã.

Nẽ mẽ kot mẽ hipêxà nẽ mẽ katorxà hpar xwÿnhjê mã.

10 Nẽ mẽ hprõ kuhpa hã nhãm mẽnijê ho amnhĩkati xwÿnhjê mã.

Nẽ mẽ mjên kuhpa hã nhãm mẽmyjê ho amnhĩkati xwÿnhjê mã.

Nẽ mẽmyjaja kot mẽnijê kuhpa hã kãm amnhĩ kwÿ myjê hkĩnh nẽ mẽ ho amnhĩkati xwÿnhjê mã.

Nẽ mẽnijaja kot mẽmyjê kuhpa hã kãm amnhĩ kwÿ nijê hkĩnh nẽ mẽ ho amnhĩkati xwÿnhjê mã.

Nẽ mẽ kot mẽmoj to àhkĩnh nẽ nhãm mẽ kãm ho wẽnê o mẽ pa xwÿnhjê mã.

Nẽ ri mẽ hẽx o mẽ pa xwÿnhjê mã.

ã mẽ kot Tirtũm kapër kwÿm ri amnhĩ nhĩpẽx anhÿr o mẽ pa xwÿnh piitã mẽ kaxyw na pre Mojes mã mẽmojta ã karõ. Mẽ kãm Jejus prãm kêt xwÿnhjê mã. Mẽ kot mar nẽ tãm amnhĩ nhĩpẽx kaxyw. 11Tã pa na pa hte Pahikti kot tanhmã mẽ panê amnhĩ nhĩpẽx to hã harẽnh o ri mẽ hkõt ixpa. Ja kaxyw na pre Tirtũm ixãm. Tirtũmja mex o mex. Tãm na pre ja kaxyw ixãm.

Tanhmã Pahihti Jejus Kris kot Pawre ho mex to hã harênh

Atre 26.9-18

12Nê Pahihti Jejus Kris na hte ixto mex rãhã ho pa. Na hte tanhmã ixto pa ÿ hã mẽ piitã mẽ kãm tanhmã kot mẽ panê amnhĩ nhĩpêx to hã harênh o ri mẽ hkôt ixpa. Na pre ixte ã amnhĩ nhĩpêx anhÿrja kukamã inhmã ixapênh ã karõ nê inhmã:

—E ate amnhĩ kaxyw ixkôt ajamxpêr mex jakamã kêr ka ma mẽ piitã mẽ hkôt ri mẽ kãm ixkapêr jarênh o ri apa. Anê.

13Nom amnepêm na pa pre hkôt ijamxpêr kêt nê. ãm axtem nê haprÿ rûnh nê ho ixkapêr punuj o ri ixpa. Nê hkwyjê ho ixkrihkrit nê mẽ haprÿ nê mẽ htak. Nom kormã amnhĩ kaxyw Kris kôt ijamxpêr kêt jakamã ixtÿx ã mẽ hipêx anhÿr o ixpa nhũm Pahihti ja hã ixpumu nê ixkamã ukaprĩ nê mẽ hã tanhmã ixto hkêt nê. 14Nê kãm ijapê xàj mẽmoj to ixkutã nojarêt rãhã ho pa nê tanhmã ixkrã hto pa ra amnhĩ kaxyw hkôt ijamxpêr nê hkôt amnhĩ xãm. Hãmri nê kukwak ri ra inhmã hkwyjê hkĩnh nê hpãnhã mẽ ho mex o ri mẽ hkôt ixpa.

15Nê Jejus Kris ra wrÿk nê mẽ pahte amnhĩ tomnuj piitã hpãnhã amnhĩrer kaxyw mẽ panê htyk ã harênhja na pa hte harênh o ri ixpa. ã kot amnhĩ nhĩpêx anhÿrja na mex o mex. Kê mẽ piitã kuma nê hã nohtÿx rãhã ho pa.

Kormã ixte hkôt amnhĩ xãm kêt ri na pa pre amnhĩ tomnuj tÿx kumrêx o mẽ piitã mẽ hakrenh 16nhũm Tirtũm ixpumu nê ixkamã ukaprĩ nê. Hãmri nê amnhĩ kaxyw ixãm. Mẽ piitã mẽ kot ja hã ixpumunh nê axpên mã ã ijarênh anhÿr kaxyw. Nê ijarênh o:

—Kwa Pawre na pre amnhĩ tomnuj tÿx kumrêx o pa nhũm Jejus Kris ja hã omu nê kamã gryk tokyx anhÿr kêt nê. Na pre tanhmã hkrã hto nhũm ra tãm amnhĩ nhĩpêx o pa. Kwa pu mẽ urak nê amnhĩ kaxyw Jejus kôt pajamxpêr nê hkôt amnhĩ xunhwÿ. Kêr pu mẽ Pawre pyrã nê nhÿrmã Tirtũm mẽ Kraja wa kuri pamex nê pahÿr tũm nê papa ho papa.

Anhÿr o axpên mã ijarênh nê ixpyrã nê Jejus kôt amnhĩ xunhwÿr kaxyw na pre Tirtũm ã ixto mex anê. 17Jakamã na pa hte kãm amnhĩ jarênh kaxyw nê kãm:

—Pa Tirtũm? Nã kapxipix apê Pahi Maati. Nê arãhã ho arãhã nê amex o amex. Mẽ ixte inhno ho aa apumunh kêt tã kapxipix apê Mëinhĩpêêxã maati. Tã koja nhÿrmã mẽ piitã ã amã amex o amex ã ajarênh anhÿr o pa. Anê.

Ximotre kot tanhmã Epes nhõ xwÿnhjê jahkre hto hã kãm karõ

Wam Korit 5.1-5

18Nê te apê ixkra pyrãk Ximotre. Tã kot paj mẽmoj tã amã karõ ka inhma nê inhmar tÿx nê. Nã Pahihti Jejus mã ate tanhmã amnhĩ nhĩpêx

to ho apa kaxyw na pa prem axãm nhũm Tĩrtũm nhỹ hã kapẽr o mẽ pa xwỳnhjaja axapênh kukamã amã kapẽr nẽ amã:

—E ate ma mẽ kãm Pahihti Jejus jarênh o apa kaxyw Tĩrtũm kot axãm jakamã kêr ka ã amnhĩ nhĩpêx anhỹr o ri mẽ hkôt apa. Anẽ.

Tã kot paj ijaxwỳja kagàja kamã amã ixkapẽr nẽ mẽmoj tã amã karõ. Ka mar tỳx nẽ hkôt amnhĩ nhĩpêx mex pê Tĩrtũm mã amnhĩ nhĩpêx mex o ri apa. Jao aprĩ hã mẽ kãm tanhmã Jejus jarênh to ho ri mẽ hkôt apa. 19Nẽ amnhĩ kaxyw Jejus mã ajamaxpêr mex nẽ. Nẽ mẽmoj punuj pumu nẽ amã ho anhỹr prãm tã Jejus nhỹ hã nẽ amnhĩ to htỳx nẽ ho anhỹr kêt nẽ. Jao tãm amnhĩ nhĩpêx ã amnhĩ pumunh mex o ri apa. Nom kot kaj ja nẽ amnhĩ to htỳx kêt nẽ tanhmã amnhĩ tomnuj to hãmri nẽ te ate Pahihti Jejus kaga pyræk. Na pre pahkwỳjaja ã amnhĩ nhĩpêx anhỹr o hkaga nẽ axte kãm hamaxpêr kêt nẽ. 20Imẽnew mẽ Aresãnja na pre wa ã amnhĩ nhĩpêx anẽ nẽ tanhmã Tĩrtũm o kapẽr punuj to. Mỳrapê na pa pre Satanasti nhĩhkram wa haxà. Kot tanhmã wa ho nhũm wa kot tee ri amnhĩ tomnujta ã amnhĩ pumunh nẽ tokyx tãm amnhĩ nhĩpêx nẽ axte ã amnhĩ nhĩpêx anhỹr kêt kaxyw.

Tanhmã mẽ pahte Tĩrtũm mã amnhĩ jarênh to hã mẽ pamã karõ

Rukre 11.2-4; Atre 10.34-35; Epes 6.18

2 1E kot paj hpãnhã tanhmã mẽ pahte Tĩrtũm mã amnhĩ jarênh to hã amã karõ Ximotre. Ka inhma nẽ ixô ri ho mẽ pahkwỳjê jahkre ho ri mẽ hkôt apa. E ja kumrêx kot paj mẽ kaxyw amã hã karõ. Kêr ka mẽ piitã mẽ ho Tĩrtũm wỳr ho ri pa. Nẽ kãm mẽ harê nẽ mẽ kaxyw mẽmoj tã axàhwỳr o ri apa. Kêr kê ama nẽ tanhmã mẽ ho mex to. Kê mẽ amnhĩ tã omu nẽ ã kãm kapẽr anẽ nẽ kãm:

—Pa Tĩrtũm? Nà ãm hãmri na ka ã mẽ ixto mex anẽ. Amex o amex. Anẽ.

2Nẽ mẽ kãm anẽ kê mẽ õ pahi nẽ mẽ ho amnhĩptàr xwỳnh piitã mẽ ho ahwỳr o pa ho:

—Pa Tĩrtũm? Kwa kêr ka mẽ inhõ pahi mẽ mẽ kot mẽ ixto amnhĩptàr xwỳnh piitã tanhmã mẽ ho kê mẽ ixto mex o pa. Kêr pa mẽ ijamakêtkati nẽ ixãmnhĩx ixpa pê amã tanhmã amnhĩ nhĩpêx to ho ri ixpa. Nẽ ixãmnhĩx mẽ hkôt tãm amnhĩ nhĩpêx. Anẽ.

3Kot puj mẽ ã mẽ ho mẽ papytãr xwỳnh Tĩrtũmja wỳr o papa anẽ nhũm mẽ pama nhũm ja kãm mex nẽ.

E kêr ka ã mẽ kãm ja hã karõ anẽ Ximotre.

Tĩrtũm kãm mẽmoj prãm ã harênh

Sikũn Pêtre 3.9

4Nẽ mẽ piitã mẽ kot kapẽr mar nẽ amnhĩ kaxyw Jejus kôt hamaxpêr nẽ hkôt amnhĩ xunhwỳrja na Tĩrtũm kãm hprãm.

5Ja kaxyw na pre mẽ pahwỳr Kra Jejus mẽ nhũm man mẽ pahwỳr wrỳ. Tĩrtũmja tapxipix na kęp Mẽpahpãm. Nẽ Kra Jejusja tapxipix na kot Tĩrtũm mã tãm mẽ paxunhwỳr mã xwỳnh. Ja kaxyw na pre amnhĩ grõnh kõt wrỳ mẽ pahpyrà nẽ ĩ ho ĩ nẽ kato.

6Hãmri nẽ gaa nẽ àptàr hãmri nẽ mẽ pahpiitã mẽ panê ty. Jao Tĩrtũm mã mẽ pahte amnhĩ tomnuj piitã hpãnhã amnhĩrer pa. Tã mẽ pahpiitã mẽ pahte kot ã amnhĩ nhĩpêx anhỳr ã harẽnh mar nẽ tokyx hkõt amnhĩ xunhwỳrja na Tĩrtũm kãm hprãm.

7Ja kaxyw na pre ixãm. Ixte Ijaew kêt xwỳnhjê mã Tĩrtũm kapër jarẽnh o ri mẽ hkõt ixpa kaxyw. Nẽ Jejus nhỹ hã tanhmã mẽ kãm ixkapër to ho ri ixpa kaxyw. Nẽ tanhmã kot mẽ panê amnhĩ nhĩpêx to hã harẽnh kaxyw. ãm hãmri na pa ã amnhĩ jarẽnh anẽ. Ixêx kêt. Na pa hte Ijaew kêt xwỳnhjê hkõt ixpa nẽ ã mẽ kãm ixkapër anẽ nẽ mẽ kãm:

—E mẽ ate Tĩrtũm Kra Jejus kõt amnhĩ xunhwỳrja na Tĩrtũm kãm hprãm. Jakamã kwa mẽ tokyx amnhĩ kaxyw hkõt ajamaxpër nẽ hkõt amnhĩ xunhwỳ. Anẽ.

Ikrêsti kamã tanhmã mẽ pahte amnhĩ nhĩpêx to hã mẽ pamã karõ

8Nẽ kot kaj mẽ tõhã Tĩrtũm kapër mar kaxyw axpẽn wỳr akuprõ. Hãmri nẽ Tĩrtũm mã amnhĩ jarẽ nom kêt ka mẽ mẽmoj tã axpẽn kamã agryk kamã kãm amnhĩ jarẽnh kêt nẽ. Rỳ mẽmoj tã axpẽn mã axàkjêr kamã kãm amnhĩ jarẽnh kêt nẽ. ãm tãm mẽ ajamaxpër pix o kãm amnhĩ jarẽ. Nẽ tãm amnhĩ nhĩpêx kamã kãm amnhĩ jarẽ. Ja na inhãm hprãm. Tã kêt ka ã Epes nhõ xwỳnhjê mã ja hã akarõ anẽ Ximotre.

Mẽnijaja kot tanhmã amnhĩ nhĩpêx to kaxyw mẽ hã kãm karõ

Wam Korit 14.34; Epes 5.22; Xitre 2.3; Wam Pêtre 3.1-7

9Nẽ kot paj hpãnhã Kris kõt mẽ pahtõxjaja tanhmã kot amnhĩ nhĩpêx to hã mẽ kaxyw amã karõ ka inhma. Nã mẽmyjaja kot mẽ omunh nẽ kãm mẽ hkĩnh prãm xàj kê mẽ htỳx ri mẽ noo mã tanhmã amnhĩ nhĩpêx to hkêt nẽ. Nẽ ja prãm xàj tanhmã ê jagjênh to hkêt nẽ rỳ tanhmã ri mrar to hkêt nẽ. Rỳ mẽ kãm mẽ hkĩnh prãm xàj õkrexê mex jagjênh rỳ mẽ ìhkra kamã kàx mex jagjênh nẽ ri hã mẽ hkõt pa kêt nẽ. Rỳ ja kaxyw tanhmã ri amnhĩ kĩ jaxwỳr to nẽ ri hã mẽ hkõt pa kêt nẽ. Rỳ mẽ ê mex jagjê nẽ mẽ noo mã htỳx ri hpiaam kêt o pa hkêt nẽ. Kê mẽmyjaja kãm mẽ hkĩnh prãm xàj ã htỳx ri amnhĩ nhĩpêx anhỳr o pa hkêt nẽ. 10Mẽ kãm anẽ kê mẽ kãm Tĩrtũm mãn kĩnh xàj mẽ piitã mẽ kutã mẽmoj to nojarêt o pa.

11Nẽ mẽ kãm anẽ kê mẽ Tĩrtũm kapër mar kaxyw mẽ pikuprõnh xà hwỳr agjê nẽ akryk Tĩrtũm kapër mar o hkrĩ nẽ htỳx ri axpẽn mã kapër o hkrĩ kêt nẽ.

12Nê kê mê ikrêsti kamã Tirtùm kapêr o mëmyjê jahkre hkêt nê. Rÿ kamã mëmoj tâ tanhmã mê kãm karõ hto hkêt nê. Æm akryk Tirtùm kapêr mar o hkrî. 13Mêmo mÿrapê koja mê ã amnhî nhîpêx anê? Nà na pre Tirtùm my kot wa finat Atãwja kumrêx nhîpêx nê kormã hprõ Ewa o hapu nê hipêx. 14Nê Atãwja na pre kagã kapêr mar nê hkôt amnhî nhîpêx kêt nê. Prõ na pre mar xà hkôt Tirtùm kapêr nhîrõp xa nê tanhmã amnhî tomnuj to. 15Mÿrapê na htem mënijaja hpijagri ho hikwÿ nhũm mê hkrajaja à htÿx kãm hapõj. Tã nom koja mê Jejus kôt amnhî xunhwÿ nê ã ixte mê kaxyw amã mëmoj tâ karõ xà hkôt amnhî nhîpêx hãmri nê nhÿrmã mex kumrêx nê htîr tũm nê pa ho pa. E kêr ka ã mënijê mã mëmoj tâ karõ anê Ximotre.

Pastô kot tanhmã amnhî nhîpêx to kaxyw mê hã kãm karõ

Xitre 1.5-9

3 1E kot paj hpãnhã tanhmã pastô jarênh to. Koja mëhõ kãm kêp Kris kwÿjê nhõ pastô nê Tirtùm kapêr o më ahkre hprãm nê ãm hãmri ã hamaxpêr anê. Ja mex. 2Jakamã koja mëhõ kãm kêp pastô hprãm hãmri nê ã amnhî nhîpêx anhÿr o apa.

Koja mê piitã mê noo mã tãm ri amnhî nhîpêx.

Nê hprõ pix tânopxar o pa.

Nê mëmoj punuj kutã amnhî to htÿx nê.

Nê tãm hamaxpêr.

Nê àmnhîx amnhî wÿr mê piitã mê kuwÿ.

Nê Tirtùm kapêr o më ahkre mex nê.

3 No kê mê kagõxÿhti japrõr nê ho pipãnh o pa hkêt nê.

Nê àhkurê ho pa hkêt nê.

Nê mê piitã mê kamã ukaprî ho ri mê hkôt pa. Jao mê kutã nojarêt rãhã ho pa.

Nê amnhîm kàxpore rax o

pikuprõnh prãm xàj tanhmã

amnhî nhîpêx to hkêt nê.

4-5 Nê hkrajê jahkre mex o pa nhũm

mê kapêr ma nê hkôt am-

nhî nhîpêx. Nê hã hpijaàm

kãm tãm amnhî nhîpêx.

Koja mê hkrajê jahkre

mex kêt nê hãmri nê

mãänênh Kris kwÿjê ja-

hkre mex kêt nê. Jaka-

mã nhũm hkrajê mê Kris

kwÿjaja tãm amnhî nhî-

pêx kêt nê.



Wam Ximotre 3.4-5

6-7 Nē kē mẽ kot Jejus kôt amnhĩ xunhwỳr kêt xwỳnhjê noo mã tãm amnhĩ nhĩpêx rãhã ho pa.

Mẽ kot ja hã mẽ omunh nẽ mẽ hã hpijaam o pa kaxyw. Nom koja mẽ tanhmã amnhĩ tomnuj to nhũm mẽ tee ri ja hã mẽ omu nẽ mẽ ho kapêr punuj nẽ. Satanasti kãm hprãm xà hkôt.

Nē kē mẽ kot Kris kôt amnhĩ xunhwỳr nyw xwỳnhjaja kêp pastô hkêt nẽ.

Koja mẽ kêp pastô hãmri nẽ mẽmo arĩgro hã tanhmã hamaxpêr to nẽ amnhĩ to rax prãm xaj tanhmã amnhĩ to jarkrar to ho pa. Hãmri nhũm Tĩrtũm tee ri ja hã omu nẽ te kot Satanasti nhĩpêx pyrãk o hi-pêx nẽ tanhmã homnuj to. Ja pymaj kē mẽ kot Kris kôt amnhĩ xunhwỳr nyw xwỳnhjaja kêp pastô hkêt nẽ.

E pastô na hte ã amnhĩ nhĩpêx anhỳr o pa kamã Jejus kwỳjê jahkre nẽ tanhmã mẽ ho ajuta hto ho mẽ hkôt pa Ximotre.

**Mẽ kot Kris kôt hkwỳjê ho ajuta xwỳnhjê kaxyw
mẽ hã kãm karõ**

Atre 6.1

8Nē kot paj hpãnhã amã mẽ kot Kris kôt hkwỳjê ho ajuta xwỳnhjê jarẽ ka inhma Ximotre. Nà koja mẽhõ kãm Kris kôt hkwỳjê ho ajuta hprãm hã koja ã amnhĩ nhĩpêx anhỳr o pa.

Koja mẽ htỳx ri mẽmoj tã mẽ kãm hpêr o pikênh o pa hkêt nẽ.

Nẽ tanhmã mẽmoj to hêx to ho pa hkêt nẽ.

Nẽ kagôxỳhti japrôr nẽ ho pipãnh o pa hkêt nẽ.

Nẽ amnhĩm kàxpore ho pikuprõnh nẽ ho rax prãm xaj tanhmã amnhĩ nhĩpêx to hkêt nẽ.

9 Nē kē Tĩrtũm kapêr piitã hkôt hamaxpêr o pa. Ra Tĩrtũm kot mẽ pamã kapêr piitã ho amnhĩrĩt jakamã koja Kris kôt hkwỳjê ho ajuta xwỳnhjaja kapêr piitã hkôt hamaxpêr pê hkôt amnhĩ nhĩpêx mex rãhã ho pa.

10-13 Nē kē mẽ amnhĩ prõ pix tãnopxar o pa.

Nẽ pastô pyrã nẽ mẽ hkrajê jahkre mex nhũm mẽ hkôt ri amnhĩ nhĩpêx mex o pa.

Nẽ kē mẽ hprõjaja mjên pyrã nẽ mẽ piitã mẽ noo mã tãm ri amnhĩ nhĩpêx.

Nẽ hkwỳjê ho kapêr rỳ mẽ axpên jakwa kamã ri axpên mã mẽ hixi ho rêr o pa hkêt nẽ.

Nẽ mjên pyrã nẽ mẽmoj punuj kutã amnhĩ to htỳx o ri pa. Nẽ amnhĩ to mex rãhã nẽ.

E koja mēhō kām Kris kwỳjê ho ajuta ho pa hprãm hã koja ã amnhĩ nhĩpêx anhỹr o pa. Nom kêr ka mē kot mē ho ajuta kaxyw mē unhwỳr tokyx anhỹr kêt nê Ximotre. Taxy mē kamã ama nê aprĩ hã mē kot ri tanhmã amnhĩ nhĩpêx to hã mē omu mãn. Hãmri nhũm mē piitã mē mex ã mē harê ka mē hã mē ama nê rĩ kormã mē kot mē ho ajuta ho pa kaxyw mē unhwỳ. Hãmri nhũm mē amnhĩ tã omu nê axpẽn mã mex ã harê. Nê amnhĩ kaxyw Jejus Kris mã hamaxpêr mex o pa hã mē omu nê mē hã hpijaãm o pa.

Pawre kot Ximotre mã amnhĩ jarênh

14Nê inhmã awỳr inhmõr nê apumunh prãm Ximotre. Nom kot pa amnhĩ kukamã ã mēmoj tã amã karõ nê hã kagã anê. 15Kêr pa tokyx awỳr inhmõr kêt japêr ka ixte amã mēmoj ã kagãta kamã harê nê ixkutêp ho mē ahkre ho ri apa. Mē kot mar nê hprĩ hã mē õ pastõ nê mē kot mē ho ajuta ho mē pa xwỳnhjaja kot tanhmã amnhĩ nhĩpêx to hã mē harênh mar kaxyw.

Mê pahpê Kris kwỳjjaja mē pahpê Tĩrtũm kra jakamã na pu htem kapêr kôt ri amnhĩ nhĩpêx nê pakatãt kôt mē piitã mē kãm pakapêr o papa. Jao tanhmã mē kãm Jejus Kris jarênh to ho ri papa.

Pawre kot Jejus mex o mex ã mē grer jarênh

16Nê Jejusja mex o mex. Amnepêm kormã mē pahte harênh mar kêt tã pu prem harênh ma hãmri nê mex o mex ã pagrer o papa. Nê pagrer o: Kris kêp Měpahpãm tã na pre mē pahwỳr wrỳ nê mē pahpyrà nê ĩ ho ĩ nê kato.

Nhũm pre Tĩrtũm Karõja mex o mex ã harê.

Nhũm Tĩrtũm kapêr o mē wrỳk xwỳnhjaja omunh o pa.

Nhũm ahpỹnhã pika piitã hwỳr tanhmã kot mē panê amnhĩ nhĩpêx to hã harênhja anhrã.

Nhũm hte mē hkwỳjjaja harênh ma nê amnhĩ kaxyw hkôt hamaxpêr nê hkôt amnhĩ xunhwỳ.

Tã nhũm pika kamã ãpênh jatur xãm kumê nhũm Tĩrtũm akupỹm amnhĩ wỳr ho api.

Na pu htem ã Jejus mex o mex ã pagrer anê.

Mê kot Tĩrtũm kapêr kwỳm ri tanhmã Kris kwỳjê jahkre hto xwỳnhjê jarênh

Matêwre 24.4-13; Korosê 2.16-19; Sikũn Ximotre 3.1-9;

Sikũn Pêtre 2.1-3; Jutre 3-16

4 1Nê nhỹrmã Jejus akupỹn mē pahwỳr wrỳk kaxyw koja pika nhõ xwỳnh kwỳjjaja ma hkwỳjê mã tanhmã Tĩrtũm kapêr o hêx to ho pa. Na pre Tĩrtũm Karõ hprĩ hã mē hkukamã tanhmã mē harênh to. Koja xep Satanasti hkwỳjjaja Jejus kwỳjê hwỳr mra nê hêx rom tanhmã mē

kãm kapër to. Satanasti nhỹ hã mẽ kãm hêx o pa nhũm mẽ hkwỳjaja mẽ kuma nê mẽ hkôt hamaxpër nê Jejus kaga. ̂ koja mẽ Jejus akupỳn mẽ pahwỳr wrỳk kukamã amnhĩ nhĩpêx anê.

2Nê Satanasti nhỹ hã mẽ kãm mẽmoj to hêx xwỳnhjaja ăm Satanasti pix mar o pa jakamã koja mẽ hamaxpër mex kêt nê. Koja mẽ mẽmoj punuj pumu nê htỳx mex ă hkamnhĩx. 3Tã koja mẽ Tĩrtũm kapër kwỳm ri ă Jejus kwỳjê mã hêx ho pa anê nê mẽ kãm:

— Kwa kêt ka mẽ axpên mã ri mẽ rer o apa hkêt nê. Tĩrtũm kãm ja prãm kêt. ̂m ahte ri mẽ papaja na kãm hprãm. Anê.

Nê mẽ kot mẽmoj mex kur ă mẽ omu nê nê mẽ kãm kapër nê mẽ kãm:

— Kwa na htem ata hkur kêt nê. Tĩrtũm pê omnuj kênã kot ka kêt ri aku.

Anhỹr o koja mẽ kãm kapër o pa. 4Nom Tĩrtũm na pre mẽ pamã mẽ apkur xà piitã ho kato. Mẽ paxàmnhĩx mẽ pahte piitã hkur o papa kaxyw. Jakamã mẽ pahpê hkrajaja na pu htem mẽmoj kaga hkêt nê. Na pu htem mẽmoj kur kaxyw nê Tĩrtũm mã harê hãmri nê paxàmnhĩx kuku. 5Tĩrtũm kot mẽ paxàpkur xà piitã mex ă harênh jakamã na pu htem kãm harênh pê paxàmnhĩx piitã hkur o papa.

Pawre kot mẽmoj tã Ximotre mã karõ

Sikũn Ximotre 1.6-14; Xitre 2.1-8

6E Ximotre. Ixte mẽmoj tã amã karõta kêt ka ho Kris kôt pahkwỳjê jahkre mex o ri mẽ hkôt apa. Kot kaj ă mẽ ahkre anhỹr jao ra Jejus Kris mã axapênh mex nê. Na ka pre harênh ma nê hkôt amnhĩ xãm hãmri nê hkôt amnhĩ nhĩpêx mex nê. Tã kêt ka arĩ hkôt amnhĩ nhĩpêx mex rãhã kê mẽ piitã ja hã apumu.

7Nê mẽ ujarênhja kot paj tanhmã amã hã karõ hto. Mẽ panhĩgêt xujarênh kamã mo Tĩrtũm jarênh? Amrakati kumrêx. Jakamã kêt ka mẽ hkôt ajamaxpër o ri apa hkêt nê. ̂m Tĩrtũm kapër kôt pix mã ajamaxpër tỳx rãhã ho ri apa. Tĩrtũm kapêrja ăm hãmri na.

8Nê na htem amnhĩ karo hprãm xàj tanhmã amnhĩ karo hto ho pa. Ja mex. Tanhmã kute hkêt. Na htem tanhmã amnhĩ karo hto nê gaa nê ra hkarore nê pa. No kêt mẽ kot Tĩrtũm kapër kôt ri amnhĩ nhĩpêx o paja na mex o mẽ hkarota jakre. Na htem Tĩrtũm kapër kôt ri amnhĩ nhĩpêx hãmri nê mex nê hkĩnh nê pa ho pa. Hãmri nê nhỹrmã kaxkwa kamã Tĩrtũm mẽ Kra Jejus wa kuri mex nê htĩr tũm nê pa ho pa. Ja na mex o mex. 9Ăm hãmri ixte amã ja jarênh jakamã kwa kêt ka ja hã anohtỳx nê ri ho apa Ximotre.

10Nê Tĩrtũmja rãhã ho rãhã. Tã na pu pre amnhĩ kaxyw Kra Jejus kôt pajamaxpër nê hkôt amnhĩ xãm nhũm Tĩrtũm pahto hkra. Kãm mẽ piitã mẽ ho hkra hprãm jakamã na htem pahpyrà nê amnhĩ kaxyw Kra hkôt hamaxpër nê hkôt amnhĩ xunhwỳ nhũm amnhĩ tã mẽ omunh xà hkôt

mě ho hkra. Ja kaxyw na pu htem mě piitã mě kãm Jejus kot tanhmã mě panê amnhĩ nhĩpêx to hã harênh rãhã o ri mẽ hkôt papa. Jao Tĩrtũm mã paxapênh mex nê.

11E kêr ka ã ja ho pahkwỳjê jahkre anhỹr ho ri mẽ hkôt apa. Mě kot amar nê akapêr kôt amnhĩ nhĩpêx mex ho pa kaxyw.

12Nê kormã anyw tã kêr ka mẽ piitã mẽ noo mã tãm ri akapêr nê tãm amnhĩ nhĩpêx o apa. Mě kot Jejus ã tanhmã ato htã arĩ amnhĩ kaxyw kãm ajamxpêr tỳx nê. Nê mẽ piitã mẽ kutã anojarêr nê ajamxpêr mex pix o ri apa. Kot kaj kormã anyw tã ã mẽ noo mã amnhĩ nhĩpêx anê nhũm mẽ hã apumu nê kãm akapêr mar prãm nê. Anyw ã apumunh tã kãm akapêr mar prãm nê.

13Nê kêr ka mẽ ate Tĩrtũm kapêr mar kaxyw xypên wỳr akuprõ ka arĩ ixkutêp mẽ kãm Tĩrtũm kapêr tũm ã kagã kamã akapêr rãhã ho apa. Nê aprĩ hã tanhmã ho mẽ ahkre hto nê ho mẽ ahkre mex nê Ximotre.

14-15E kêr ka ã amnhĩ nhĩpêx anhỹr o ri mẽ hkôt apa nê amã ho anhỹr kaga hkêr nê. Mě piitã mẽ kot ate Jejus mã amnhĩ nhĩpêx mex o amõr ã apumunh kaxyw. Kormã ate mẽ kãm Jejus jarênh o apa hkêr ri na pre pastõ nhỹ hã mẽ kapêr xwỳnhjaja ate Jejus mã tanhmã amnhĩ nhĩpêx to ho apa kaxyw axãm. Hãmri nê anhĩmõk ã mẽ ìhkra jaxwỳ nê axapênh kukamã tanhmã ajarênh to nê ato Tĩrtũm wỳ. Hãmri nhũm ate mẽ kãm kapêr jarênh o ri apa kaxyw amã ajamxpêr o hihtỳx. Tã kêr ka y hã ã kãm amnhĩ nhĩpêx anhỹr rãhã ho ri apa.

16Nê kwa kêr ka amnhĩ pumunh mex nê Ximotre. Jao tãm ri amnhĩ nhĩpêx nê akatãt kôt Tĩrtũm kapêr o mẽ ahkre ho ri mẽ hkôt apa. Kot kaj ã amnhĩ nhĩpêx anê hãmri nhũm mẽ ama nê apyrã nê Jejus kôt amnhĩ xunhwỳ. Hãmri nê pahpyrã nê nhỹrmã Tĩrtũm wa kuri htĩr tũm nê pa ho pa.

**Tanhmã mẽ pahte Kris kôt mẽ pahkwỳjê nhĩpêx to kaxyw
mẽ pamã karõ**

Sikũn Ximotre 2.24-25

5 1-2E kot paj hpãnhã Kris kôt pahkwỳjê hõ kot tanhmã amnhĩ tomnuj to nhũm ate tanhmã ja nê kãm akapêr to hã amã karõ.

Nã koja mẽhõ tanhmã ri amnhĩ tomnuj to ka harênh ma hãmri nê ma hwỳr tẽ nê ja nê tanhmã kãm akapêr to. Nom kêr ka kãm akapêr mã agêr kêt nê.

Koja mẽwejjê õ tanhmã amnhĩ tomnuj to ka te kêp anhĩpêêxã rỳ akatorxã pyrãk o kãm akapêr. Jao hã apijaãm o tanhmã kãm akapêr to.

Rỳ koja apyrã nê mẽ nywjê hõ tanhmã amnhĩ tomnuj to ka te kêp atõ pyrãk o kãm akapêr.

Rỳ mēnijê nyw õ amnhĩ tomnuj japêr ka te kêp atõx pyræk o kãm akapêr. Jao hã apijaãm o kot amnhĩ tomnujja nê tanhmã kãm akapêr to.

E kêr ka mẽ kot amnhĩ tomnuj nê ã mẽ pahkwỳjê mã akapêr anhỹr o apa Ximotre.

Mê kêp mẽ mjên htyk xwỳnhjê jarēnh

Xiakre 1.27

3Nê kot paj hpãnhã Kris kôt pahkwỳ pê mẽ mjên htyk xwỳnhjê jarē. Nà koja mēhõ nija hkra hkêt nê htãmnhwỳ hkêt nê pa nhũm mjên kêp ty ka mẽ apê Kris kôt hkwỳjaja ja hã omu nê mẽmoj to kutã anojarêt rãhã ho ri apa. 4Nom koja ra hkra rỳ ra htãmnhwỳ japêr kê mẽ tãmjaja tanhmã ho ajuta hto ho pa. Kãm õ nê kãm mẽmoj nhõr o pa. Kormã mēhprĩre ri na pre mẽ õ wõwõ nê mẽ katorxà nê mẽ hipêêxà mẽ hamãr mex pê mẽ kãm õ ho pa. Tã ra mẽ àptàr jakamã kê mẽ amnhĩ pyrà nê mẽ hamãr mex pê mẽmoj to mẽ kutã nojarêt rãhã ho pa. Ja na Tĩrtũm kãm hprãm. ã mẽ kot hkwỳjê kamã ukaprĩ ho pa jakamã te mẽ kot Tĩrtũm mã àpēnh pyræk.

5No koja mēhõ ni ra wejre nê ahte ri pa. Nê hkra nê htãmnhwỳ hkêt nê ri pa. Tã kê ja hã amnhĩ pumu nê Tĩrtũm kamnàr rom amnhĩ to hwỳr o pa. Nê mẽ piitã mẽ ho hwỳr o pa. Jao tãm hamaxpêr. Ka mẽ apê Kris kôt hkwỳjaja ja hã omu hãmri nê mẽ kam nê tanhmã kutã anojarêt to ho ri apa. 6No koja mẽ ã amnhĩ nhĩpêx anhỹr kêt nê. Nê htỳx ri mẽ grer wỳr mra nê hpijaãm kêt o ri mra ka mẽ ja hã mẽ omu nê mẽ ho ajuta hkêt nê. Na htem ã amnhĩ nhĩpêx anhỹr o pa nê arĩ htĩr tã te ra htyk nê hikwỳ pyræk.

7E kêr ka ã ja hã Kris kôt pahkwỳjê mã karõ anê. Kê mẽ ama nê ã mẽ mjên htyk xwỳnhjê nhĩpêx anhỹr o pa. 8Nom koja mēhõ amnhĩ kwỳjê ho mex kêt japêr. Nê òrkwỳ kamã hprõ nê hkrajaja nê hipêêxà nê katorxà nhũm mẽ kãm mẽ apkur xà nhõr kêt japêr. Koja mẽ ã amnhĩ nhĩpêx anhỹr jao Jesus kaga nê te mẽ kot hkôt amnhĩ xunhwỳr kêt xwỳnhjaja kot amnhĩ nhĩpêx pyræk o amnhĩ nhĩpêx nom amnhĩ tomnuj tỳx o mẽ hakre.

9Nê mẽ mjên htyk nê mẽ hkra nê mẽ htãmnhwỳ hkêt xwỳnhjaja kêr ka mẽ tanhmã mẽ ho ajuta hto kaxyw hãmri nê mẽ hixi piitã hã kagà. Nom kwa kêr ka aprĩ hã tanhmã mẽ amnhĩ nhĩpêx to hã mẽ omu nê rĩ kormã mẽ hixi hã kagà.

Koja mēhõ kormã mjên htĩr ri tãm hipêx nê nhãm mẽmyjê ho amnhĩkati hkêt nê.

Nê ra hã amgrà pê 60 rỳ ra hã 60 jakre.

10-11 Nê tãm mẽ piitã mẽ hipêx o pa.

Nē hkrajaja kormã htĩr ri nhũm
mē hamãr mex nē mē
ahkre mex o pa.

Nē nhãm krĩ hõ nhõ xwỳnhjaja
õ krĩ hwỳr pøj nhũm mē
omu nē amnhĩ nhõrkwỹ
hwỳr mē kuwỳ.

Nē mē kēp amrakati xwỳnhjê
ho mex o pa.

Koja mē ã amnhĩ nhĩpêx anē ka ja hã
mē omu nē rĩ kormã mē ho ajuta
kaxyw mē hixi hã kagà. Nom mē hixi
hã kagà kaxyw nē mēmoj tâ mē hkukja
nē mē kãm:

— E kot kaj ã amnhĩ nhĩpêx anhỹr o apa hã inhmã amnhĩ jarē pa ama
nē rĩ kormã anhĩxi hã kagà.

Kot kaj axte amjên kêt nē.

Nē tanhmã Kris kôt akwỳjê ho mex to ho ri apa.

Nhũm mēhõ mēmo mỳrapê hkaprĩ nē pa ka ja hã omu nē
tanhmã ho ajuta hto.

E kot kaj ã amnhĩ nhĩpêx anhỹr o apa hã amnhĩ jarē pa ama nē anhĩxi
hã kagà. Hãmri nhũm Kris kôt akwỳjaja amã axàpkur xà nhõr o pa. Anē.

Ã mē kãm akapêr anē nhũm mē ama nē amã:

— Ý. Ma kot paj ã amnhĩ nhĩpêx anē.

Anhỹr ã amnhĩ jarē ka mē ama nē mē hixi hã kagà. No kormã mē hã
amgrà pē 60 kêt xwỳnhjaja kêr ka kormã mē hixi hã kagà hkêt nē. Koja
mē tanhmã mē kot amnhĩ nhĩpêx to ho pa hã mē kãm karõja ma nē wam
tajê pyrà nē amã:

— Ý. Ma kot paj ã amnhĩ nhĩpêx anē. Na pa Jejus Kris noo mã ã amnhĩ
jarēnh anē.

Anhỹr ã amnhĩ jarēnh tâ gaa nē ra hkurē hapøj nē ra kot amnhĩ
jarēnhta kwỳm ri tanhmã amnhĩ nhĩpêx to nē axte mjên. 12Ra amnhĩ
jarēnh o:

— Ma kot paj ãm Jejus mã pix mã tanhmã amnhĩ nhĩpêx to ho ri ixpa
nē axte inhmjên kêt nē.

Anhỹr tâ tanhmã hamaxpêr to nē kot amnhĩ jarēnh kwỳm ri axte
mjên. Jao te Jejus mã amnhĩ to hêx pyræk nhũm Tĩrtũm pē jamnuj. Ja
pymaj kêr ka mē kormã mē hã amgrà pē 60 kêt xwỳnhjê nhĩxi hã kagà
hkêt nē. Kormã mē hã amgrà pē 60 kêt xwỳnhjaja arĩ mē hkĩnh tỳx
13jakamã kot kaj mē kãm mē apkur xà nhõr o apa nhũm mē ja hã amnhĩ
tã mē apumu nē axte amnhĩm ãpênh kêt nē. ãm kãm kaga nē htỳx ri
nhãm mē hwỳr mra nē nhãm mē hwỳr mra. Nē amnhĩ pumunh mex kêt



Wam Ximotre 5.10-11

ně htýx ri axpěň jakwa kamã ri mẽ hixi ho rêr o pa. Ně nhÿri mẽmoj pumu rÿ tanhmã mẽmoj jarěnh mar to hãmri ně ma htýx ri hkwyjê mã harěnh o mra. Koja mẽ ã amnhĩ nhĩpêx anhÿr o pa hãmri nhũm mẽ kêp Kris kwÿ hkêť xwÿnhjaja ja hã mẽ omu ně mẽ hkôť mẽ pahpê Kris kôť pahkwÿjê ho kapêr punuj ně. 14Ă mẽ kot amnhĩ nhĩpêx anhÿr o pa pymaj kêr ka kormã mẽ nyw xwÿnhjê mã anê kê mẽ mãmri axte mjên ně o pa. Hãmri ně hkra ně hkrajê jamãr o pa. Ja na inhmã hprãm. Koja mẽ ã amnhĩ nhĩpêx anê hãmri nhũm mẽ kêp Kris kôť pahkwÿ hkêť xwÿnhjaja mẽ hkôť tanhmã mẽ pahto kapêr punuj to hkêť ně. 15Mãn ka ra Kris kôť pahkwÿjê nyw pê mẽ mjên htyk xwÿnh kwÿjaja tanhmã amnhĩ tomnuj to hã mẽ harěnh ma. Na prem Jesus kaga ně Satanasti hkôť amnhĩ nhĩpêx o pa.

16E kêr ka mẽ ã Kris kwÿ pê mjên htyk xwÿnhjê nhĩpêx o apa anê Ximotre. Nom koja mẽ akwÿ kamã mẽhõ nhõ wõwõ mjên rÿ katorxã mjên kêp ty kê tãm kãm õ ho pa. Kêr kê Kris kôť pahkwÿjaja ãm mẽ kêp mẽ mjên htyk xwÿnh pê mẽ hkra ně mẽ htãmnhwÿ hkêť ně ahte ri mẽ pa xwÿnh pixjaja tanhmã mẽ ho ajuta hto ho pa.

Mẽ pahpê Kris kôť pahkwÿjê hkrãhtũm kaxyw mẽ pahtã kãm karõ

Atre 14.23; Wam Korũť 9.7-14; Karatas 6.6;

Wam Tesarõn 5.12; Wam Pêtre 5.1-4

17-18Ně kot paj hpãnhã amã Kris kôť mẽ pahkrãhtũmjê jarê. Tĩrtũm kapêr ã kagã htũm kot mẽ harěnh kot:

Kêr ka Tĩrtũm kapêr o mẽ ajahkre xwÿnhjaja mẽ ahkre pãnhã mẽ kãm amnhĩre. Anê.

Ně mããnen mẽ harěnh ã kuxi ně mẽ harěnh o:

Koja akrit amã ãpênh o pa ka ho mex ně kãm õ mex o apa. Anê. Ă ja jarěnh kot anhÿr jakamã koja Kris kôť mẽ akrãhtũmja Kris mã tanhmã mẽ ato mex to ho pa ka mẽ amnhĩ tã kãm amnhĩrer mex o ri apa. Kot Tĩrtũm kapêr o mẽ ajahkre mex jakamã ka mẽ amnhĩ tã kãm amnhĩrer mex ně.

19Ně koja mẽhõ pixi ně mẽ awÿr tẽ ně amã Kris kôť mẽ akrãhtũm kot tanhmã amnhĩ tomnuj to hã harěnh to ka ama ně ãm ama. Nom koja wa hamêxkrut rÿ mẽ axkrunêpxi ně mẽ awÿr mra ně axpěň kôť tanhmã harěnh to ka mẽ ama ně ãm hãmri mẽ kot tanhmã kot amnhĩ tomnuj tota kôť ajamaxpêr. 20Hãmri ně Kris kwÿjê piitã mẽ noo mã kot amnhĩ tomnuj xwÿnhta mã tanhmã kot amnhĩ tomnuj to nê kãm akapêr kê axte ã amnhĩ nhĩpêx anhÿr kêť ně. Mẽ piitã mẽ kot hã amar ně nhÿrmã tanhmã amnhĩ tomnuj to nhũm ate uràk ně hã tanhmã mẽ kãm axàkjêr to pymaj tanhmã amnhĩ tomnuj to hkêť ně.

21E Tĩrtũm noo mã na pa ã amã mẽ kaxyw mẽmoj tã karõ anê Ximotre. Ně Jesus Kris mẽ Tĩrtũm kapêr o mẽ wrÿk xwÿnhjê noo mã

pa ã amã karõ anê. Jakamã kêr ka inhmar tÿx nê hkôt amnhĩ nhĩpêx o ri apa. Jao mẽ piitã mẽ hipêx o axpên pyrãk. Nom kêr ka akrãmnhwÿ kot tanhmã amnhĩ tomnuj to hã omu nê axtem nê ãm omu nê ajamaxpêr o:

— Nã kêp ixkrãmnhwÿ kênã kot paj kêt ja nê tanhmã kãm ixkapêr to. Pa ho anhÿr kêt nê.

Anhÿr o ajamaxpêr kêt nê. Mẽ piitã mẽ hipêx o axpên pyrãk.

22Nê kêr ka anojarêr kãm mẽ kot Tirtũm mã tanhmã amnhĩ nhĩpêx to ho mẽ pa kaxyw mẽ unhwÿr kêt nê. Aprĩ hã tanhmã mẽ kot amnhĩ nhĩpêx ã hã mẽ omu nê mẽ hkapi nê rĩ kormã mẽ unhwÿ rÿ tee ri mẽmoj tã mẽ omu nê mẽ hkaga.

Nê koja mẽhõ tanhmã amnhĩ tomnuj to ka ja hã omu rÿ harênh ma hãmri nê urãk nê ã amnhĩ nhĩpêx anhÿr kêt nê. Arĩ Tirtũm kôt amnhĩ nhĩpêx pê tãm ri amnhĩ nhĩpêx pix o apa. 23-25Na htem tõhã tanhmã amnhĩ tomnuj to nhũm mẽhõ ja hã mẽ omu nê mẽ harênh kurê kumrêx. Kris kôt mẽ hkrãhtũm kormã kot tanhmã hã kãm nê hkêr ri nhũm mẽ ja hã mẽ omu nê tanhmã mẽ harênh to. Nom na htem tõhã hpimxur pê tanhmã amnhĩ tomnuj to nhũm Tirtũm pix ja hã mẽ omu. Tã koja nhÿrmã mẽ piitã mẽ kãm ja ho amnhĩrĩt nhũm mẽ piitã harênh ma nê hkôt omu.

Nê mẽ kot amnhĩ to mex xwÿnhjaja haxwÿja. Na htem tõhã mẽ noo mã tanhmã mẽhõ ho mex to nhũm hkwyjaja ja hã omu nê axpên mã mex ã mẽ harê. Nê tõhã hpimxur pê tanhmã mẽhõ ho mex to nhũm mẽhõ ja hã omunh kêt nê. ãm Tirtũm pix ã kot amnhĩ nhĩpêx anhÿr ã omu. Tã koja nhÿrmã mẽ piitã mẽ kãm ja ho amnhĩrĩt nhũm mẽ piitã harênh ma nê hkôt omu.

Nê kwa Ximotre. Axã nê anhõhymnuj nê ri apa jakamã kwa kêr ka gô pix o akõm o apa hkêr nê. Mããnen wĩhti hkwy ho ixkõ kêr ka anhõhy mex japêr.

Mẽ kãm mẽ àpênh xwÿnhjê kaxyw mẽ hã kãm karõ

Epes 6.5-9; Korosê 3.22-4.1; Xitre 2.9-10; Wam Pêtre 2.18-25

6 1E kot paj mẽ akwyjaja mẽ kãm mẽ àpênh o mẽ pa xwÿnhjê kaxyw mẽmoj tã amã karõ. Mẽ kãm anê kê mẽ õ patrãw ã hpijaãm o ri pa. Jao mẽ kapêr ma nê hkôt kãm àpênh mex nê. Koja mẽ ã amnhĩ nhĩpêx anê nhũm amnhĩ tã mẽ omu nê hamaxpêr o:

— Kwa pêr Tirtũm kapêr na mex kumrêx. Inhmã àpênh xwÿnhja na hte hkôt amnhĩ nhĩpêx pê amnhĩ to mex o pa. Pêr ãm hãmri na hte Pawre ho mẽ ahkre ho pa.

Anhÿr o hamaxpêr. 2Nê koja mẽ õ patrãw ra Kris kôt amnhĩ xãm japêr ka kãm mẽ àpênh xwÿnhjê mã anê kê Kris kôt mẽ kêp mẽ htõ hã

mě kām àpênh mex o ri pa. Nom kê mẽ uràk nê kêp Kris kôt hkwỹ hã mẽ omu nê hamaxpêr o:

— Nà Kris kôt ixtô kênã kot paj kêt ri kapêr kôt amnhĩ nhĩpêx nê kām ixàpênh mex o ri ixpa.

Anhỹr o hamaxpêr kêt nê. Kê kêp Kris kôt htõ hã kām ho mex prãm xàj kām àpênh mex o pa.

E kêr ka mẽ kām mẽ àpênh o mẽ pa xwỳnhjê mã ã tanhmã mẽ àpênh to ho pa hã karõ anê Ximotre.

Tĩrtũm kapêr kwỳm ri mẽ ahkre xwỳnhjê jarênh

Rukre 12.13-21; Xiakre 5.1-6

3Nê na hte Kris kwỳ hkêt xwỳnh kwỳjaja Kris kwỳjê mã Tĩrtũm kapêr o hêx o pa. Nê htỳx ri Jejus kapêr kwỳm ri tanhmã harênh to ho pa. Âm hãmri na Tĩrtũm mẽ Pahihti Jejus Kris wa kapêr tã nhũm htem htỳx ri tanhmã ho hêx to ho ri mẽ hkôt pa. 4Mê kot amnhĩ to rũnh xwỳnh ã amnhĩ to jarkrar tã mẽ àhpumunh tỳx kêt. Na htem tanhmã Tĩrtũm kapêr kute hã axpên mã akir nê mẽmoj tã axpên kām gryk o pa. Nê axpên mã kapêr punuj nê mẽmoj tã axpên kamnhĩx o pa. 5Nê hamaxpêr mex kêt jakamã mẽmoj tã axpên mã àkjêr pix o pa. Na htem ã amnhĩ nhĩpêx anhỹr o Tĩrtũm kapêr mar tỳx kêt nê. Hãmri nê htỳx ri hamaxpêr nê hamaxpêr o:

— Kot paj Tĩrtũm kapêr o mẽ ahkre ho ixpa nhũm mẽ inhma nê inhmã amnhĩrer mex nê pa ixkàxpore rax nê ri ixpa. Nà kot paj ã amnhĩ nhĩpêx anhỹr o ri ixpa. Ja inhmã mex.

Anhỹrja o kām hikàxpore rũnh prãm o amnhĩ to amnhĩrĩt o pa.

Kàxpore jarênh


6-8E kot paj hpãnhã amã tanhmã kàxpore jarênh to ka inhma Ximotre. Xà na pu htem pakatorxà nhõhy rũm pajapôj nê amnhĩ kôt kàxpore hkwỹ jamỳ nê ho pajapôj? Nà na pu htem pahkênh nê panhỹ kamã pajapôj. Tã kot puj mẽ ja pyrã nê nhỹrmã ty nê mã ho anê nê panhỹ kamã ma papa. Jakamã kêr pu mẽ kormã pika ja kamã pahĩr nê papa ri paxàpkur xà nê mẽ paxê pix tãnopxar pê pahkĩnh nê ri papa. Pakàxpore rũnh kêt tã na pu htem Tĩrtũm kamnàr rom pahkĩnh nê pajamakêtkati nê papa. Jao pajamaxpêr o:

— Nà ixkàxpore rax kêt nê ixkukrêx rax kêt tã na hte Jejus ixkôt pa ho pa nê mẽmoj to ixkutã nojarêt rãhã ho pa. Jakamã ixkàxpore rax kêt tã ixkĩnh nê ijamakêtkati nê ixàmnhĩx ixpa.

Anhỹr o pajamaxpêr o papa.

9-10Mê kot amnhĩm kàxpore o pikuprõnh rũnh xwỳnhjaja na htem kàxpore pix kukamã hamaxpêr o pa nê gaa nê kàxpore rũnh gryk ã

amnhĩ tomnuj o pa. Na pre mẽ pahkwỳjaja kàxpore rũnh prãm xàj Jejus kaga. Tã ra mẽ hikàxpore rũnh tã hkĩnh nẽ hamakêtkati nẽ pa hkêtnẽ. Na htem omnuj nẽ hkaprĩ nẽ pa. ã na htem mẽ hikàxpore rũnh xwỳnh kwỳjaja amnhĩ nhĩpêx anhỹr o pa. Jao kàxpore pix kukamã hamaxpêr nẽ gaa nẽ ra gryk ã mẽ kot amnhĩ to mex xà kaga hpa nẽ htỳx ri tanhmã amnhĩ tomnuj to ho pa. Nẽ tanhmã hkwỳjê nhĩpêx punuj to. Te tutre kot harôj xành ã htỳx rapuuti hwỳr gjêx nẽ tee ri kãm kator prãm kaprỳ pyræk. ã mẽ kot amnhĩ nhĩpêx anhỹr o pa jakamã koja nhỹrmã Tĩrtũm ma mẽ kot amnhĩ xà htỳx kamã hamak tũm xà hwỳr mẽ kurẽ.



Wam Ximotre 6.9-10

Pawre kot Ximotre mã mẽmoj tã karõ

Korosẽ 4.17; Wam Ximotre 4.14; Sikũn Ximotre 2.1-7

11Nẽ kwa Ximotre kêr ka mẽ uræk nẽ kàxpore rax prãm xàj amnhĩ tomnuj o apa hkêtnẽ. Ate Tĩrtũm mã tanhmã amnhĩ nhĩpêx to ho apa xwỳnh jakamã kêr ka kãm hprãm xà hkôt pix mã amnhĩ nhĩpêx o ri apa. Jao Tĩrtũm pyrã nẽ ate amnhĩ jarênh xà hkôt amnhĩ nhĩpêx o ri apa. Nẽ amã Kris kôt akwỳjê hkĩnh pê mẽmoj to mẽ kutã anojarêt o ri apa. Nẽ Kris kôt mẽ hkwỳ hkêtnẽ xwỳnhjaja kot Kris ã tanhmã ato htã ka arĩ hkôt amnhĩ nhĩpêx mex nẽ mẽ piitã mẽ ho mex o ri mẽ hkôt apa. 12Na ka pre Kris kôt mẽ pahkwỳjê noo mã tanhmã amnhĩ jarênh to. Tĩrtũm kot amnhĩ wỳr awỳr nhũm ate Jejus kôt amnhĩ xãm nẽ amã kãm tanhmã amnhĩ nhĩpêx to ho apa hprãm ã amnhĩ jarê nhũm ikrêsti kamã mẽ piitã ja hã ama. Jakamã kwa kêr ka arĩ Jejus kôt amnhĩ nhĩpêx mex rãhã ho ri apa. Hãmri nẽ nhỹrmã Tĩrtũm mẽ Kra wa kuri amex kumrêx nẽ atĩr tũm nẽ apa ho apa.

13-14E na pa mẽmoj tã amã karõ rax ka piitã kamã harẽ nẽ mar pa. Tã kêr ka inhmã ja hã tanhmã amnhĩ jarênh to. Mẽmoj piitã ho htĩr xwỳnh Tĩrtũm mẽ Jejus Kris wa noo mã tanhmã ja hã inhmã amnhĩ jarênh to. Jejus htyk kaxyw nẽ àmnhĩx kot Pahi Põn Pirat mã amnhĩ jarênh xwỳnhhta noo mã amnhĩ jarê nẽ inhmã amnhĩ jarênh o:

—Nà kot paj ate mẽmoj tã inhmã karõ piitã hkôt amnhĩ nhĩpêx rãhã nhũm Pahihti Jejus Kris akupỹn mẽ pahwỳr wrỳ. ãm hãmri na pa ã amã amnhĩ jarênh anẽ Pawre.

Anhỹr o inhmã amnhĩ jarẽ.

Tĩrtũm mex o mex ã mẽ grer

15 Nẽ koja Tĩrtũm akupỹn mẽ pahwỳr Jejus mẽnh xà hã arĩgro jarê hãmri nhũm kot harênh xàta wỳr pøj nhũm akupỹn mẽ

pahwÿr kumẽ. Tÿrtÿmja mex o mex. Tapxipix kêp mẽmoj piitã ho amnhÿptãr xwÿnh maati. Nẽ kêp jar mẽ ho amnhÿptãr xwÿnh piitã mẽ õ Pahi Maati.

- 16 Nẽ tapxipix na rãhã ho rãhã nõ mex o mex jakamã puhã hirã rax kumrẽx. Tã hkÿnhã mẽ pahte amnhÿ tomnuj xwÿnh jakamã kot puj mẽ puhã hirã raxja kutã hkêt nõ. Jao hwÿr mẽ pamrar kêt nõ.

Nẽ aa mẽhõ kot no ho Tÿrtÿm pumunh kêt tã kwa kêr pu mẽ pahpiitã kãm mex o mex nõ hihtÿx o hihtÿx ã harẽnh rãhã ho papa.

Axte mẽ hikàxpore rÿnh xwÿnhjê jarẽnh

Rukre 16.9

17Nẽ kêr ka Kris kwÿjê kamã mẽ hikàxpore rÿnh xwÿnhjê mã anê kê mẽ kot amnhÿ to rÿnh kôt amnhÿ to àmra ho pa hkêt nõ. Nẽ amnhÿ kaxyw mẽ hikàxpore rÿnh kôt hamaxpêr o pa hkêt nõ. Kàxpore na hte hapêx tokyx anê. Mẽ kãm anê kê mẽ hpãnhã amnhÿ kaxyw Tÿrtÿm kôt mãn hamaxpêr tÿx rãhã ho pa. Na hte àmnhÿx tanhmã mẽ pahto mex to ho pa nõ mẽ pahpê õxÿ hkêt nõ. Jao mẽ pahwÿr na rẽ nhÿm mẽ pahpur go mex nõ pu mẽ kamã panhõ rÿnh o papa. Nẽ mẽ pamã myyti ho hirã pu mẽ kukwak ri parÿt mex pê mẽmoj tã paxàpênh o papa. ã Tÿrtÿm kot mẽ pahto mex kot anhÿr pu mẽ kukwak ri pahkÿnh nõ pajamakêtkati nõ ri papa. Tã kêr ka mẽ hikàxpore rÿnh xwÿnhjê mã anê kê mẽ amnhÿ kaxyw kumã pix mã mãn hamaxpêr rãhã ho pa. 18Nẽ mẽ kãm anê kê mẽ hikàxpore ho hkwÿjê pê õxÿ hkêt nõ ho tanhmã mẽ ho mex to ho pa. Nẽ àmnhÿx ho tanhmã mẽ kêp amrakati xwÿnhjê ho ajuta hto ho pa. 19Koja mẽ ã amnhÿ nhÿpêx anê nhÿm Tÿrtÿm ja hã mẽ omu nõ hkÿnh nõ õ krÿ kamã mẽ kutêp mẽ kãm mẽmoj mex o akuprõ. Jakamã nhÿm mẽ kormã jar htÿr nõ pa ri mex nõ pa nõ mããnen nhÿrmã kaxkwa kamã mex kumrẽx o jar pika ja kamã mex nõ pata jakre. E kêr ka ã mẽ hikàxpore rÿnh xwÿnhjê mã ja hã karõ anê Ximotre.

Pawre kot Ximotre mã mẽmoj tã karõ jatur xà

Korosê 4.17; Wam Ximotre 6.14; Sikÿn Ximotre 1.13, 4.5

20Nẽ ra Tÿrtÿm kot ate kapêr o mẽ ahkre ho apa kaxyw axãm jakamã kêr ka tãm amnhÿ nhÿpêx pê mẽ ahkre mex rãhã ho ri apa. Jao Tÿrtÿm kapêr o hêx o ri mẽ ahkre xwÿnhjê hkôt apa hkêt nõ. Na htem mẽ kuma nõ mẽ kapêr mex ã mẽ hkamnhÿx nom mẽ kapêr mex kêt. Jakamã kwa kêr ka mẽ kot tanhmã mẽ ahkre hto hã mẽ ama nõ ãm mẽ ama. 21Na pre ra mẽ pahkwÿjjaja mẽ kuma nõ mẽ kapêr gryk ã Jejus kaga.

E ãm ja pix. Kê Tÿrtÿm mẽ apiitã mẽ akutã nojarêr rãhã ho pa. Ixpê Pawre na pa ã amã ixkapêr ã kagà anê.

Sikũn Ximotre

Pawre kot Ximotre hwỳr wam kagà nẽ mẽn̄h kôt hõ mẽn̄h

Pawre na pre kagàja nhĩpêx. Na pre Jejus kwỳ hkêt xwỳnhjaja Jejus ã unê nẽ krĩ pê Rôm kamã haxà nhũm arĩ hkrĩ ho hkrĩ. Tã ra mẽ kot hpĩr kaxyw nhũm Ximotre mã kagàja nhĩpêx nẽ hwỳr kumẽ. Na pre Ximotre Pawre hkôt pa ho pa hã mytwrỳ xohtô nẽ. Tã hpãnhã krĩ pê Epes kamã arĩk nẽ Tĩrtũm kapêr o Jejus kôt hkwyjê jahkre ho ri mẽ hkôt pa. Jakamã nhũm Pawre kagàja nhĩpêx nẽ kamã kãm mẽmoj tã karõ nẽ hwỳr kumẽ. Nẽ nhỹrmã mẽ kot Pawre pyrã nẽ Jejus ã hpĩr mã htã tee ri amnhĩ kukamã hamaxpêr kêt ã kãm karõ.

Nẽ mẽ hkwyjaja kêp Tĩrtũm kra hã amnhĩ jarênh tã nhũm Pawre Tĩrtũm kãm hprãm xà kuhpa hã mẽ kot tanhmã amnhĩ nhĩpêx to ho pa hã Ximotre mã mẽ harẽ. Kot mẽ harênh mar nẽ Jejus kwỳjê nê mẽ omunh mex o pa kaxyw. Nẽ Ximotre kot Tĩrtũm kãm hprãm xà kot pix mã amnhĩ nhĩpêx o pa hã kãm karõ. ã na pre Pawreja Ximotre mã mẽmoj tã karõ kamã hihtỳx nẽ hã kagà nẽ hwỳr mẽn̄h anẽ. Nẽ kãm:

1 1Pa Ximotre? Xà amex? Ixpê Pawre na pa amã ixkapêr nẽ hã kagà nẽ awỳr kumẽ. Ixpê Jejus nhỹ hã hkwyjê jahkre ho ixpa xwỳnh na pa. Tĩrtũm na pre ja kaxyw ixãm. Tĩrtũm Kra Jejus Krisja kot puj mẽ pahpê hkwyjaja nhỹrmã kukwak ri pamex kumrêx nẽ pahĩr tũm nẽ ri papa ho papa.

Pawre kot Ximotre ho Tĩrtũm mẽ Jejus wa hwỳr ã harênh

Atre 16.1-2

2-3Te apê ixkra pyrãk Ximotre. Jakamã na pa hte ato Mẽpanhĩpêxã maati Tĩrtũm mẽ Pahihti Jejus Kris wa hwỳr rãhã ho ri ixpa. Na pa hte mẽ pakukamã mẽ panhĩgêt pyrã nẽ tãm ijamaxpêr o ixpa pê Tĩrtũm mã tanhmã amnhĩ nhĩpêx to ho ri ixpa. Jakamã na pa hte ato Kra Jejus mẽ wa hwỳr rãhã ho ri ixpa. Arĩgro hã nẽ kamãt kãm amã ijamaxpêr nẽ ato wa kuwỳ nẽ wa kãm:

—Pa Tirtūm mē Pahihti wa. E ixte ixkra puro Ximotre ho war awȳr kaxyw war amā ijamaxpēr. Na ka hte wa ho mex nhūm war akôt amnhī nhīpêx mex o pa. Te õ wôwô mē katorxà wa kot amnhī nhīpêx pyrāk. Na pa hte kot amnhī nhīpêx o paja mā ijamaxpēr nē ŷ hã ixkīnh nē. War ate kamā axukaprí ho ri apa kaxyw na pa ho war awȳ. War ate kutā war anojarêt rāhã ho ri war apa nhūm hamakêtkati nē àmnhīx ri pa ho pa kaxyw. Anē.

Pawre kot Ximotre nhỹ hã hkīnh ã harēnh

4Nē na ka pre hte ixkôt ixto ajuta ho ri ixkôt apa htã pa pre nhỹhỹm inhnojarêt nē axtem axàpēnh õ hã amā karõ hāmri nē Epes kamā are nē ma mō. Ka amā ijpapê xāj tee ri ma inhmōr ã ixpumu nē amȳr rax nē. Na pa hte arī ja hã inhnohtȳx nē ri ho ixpa Ximotre. Jao ra ato ama nē. Tã kot puj nhỹrmã axte axpēn pumu nē pahkīnh tȳx nē.

5Nē na pa hte akatorxà Enĩtre mē anhõ wôwôre Rojti wa kãm ijamaxpēr rāhã ho ri ixpa. Na pre wa kumrēx amnhī kaxyw Jejus kôt hamaxpēr nē hkôt amnhī xãm. Tã ka wa hkanrēhã wa urāk nē ã amnhī nhīpêx anē. Ixte ja hã apumunh mex. 6Na pa pre ate tanhmã Jejus mā amnhī nhīpêx to ho ri apa kaxyw axām kaxyw anhīmōk ã inhīhkra xi nē ato Tirtūm wỳ. Kot tanhmã akrã hto nhūm ate Karõ nhỹ hã tanhmã amnhī nhīpêx to ho apa kaxyw. Tã kêr ka arī ã kãm amnhī nhīpêx anhỹr rāhã ho ri apa. 7Na pu htem Tirtūm Karõ nhỹ hã pamã ma ho papa hkêt



Sikūn Ximotre 1.4-5

nē. Na pu htem ŷ hã pamã mē piitã mē hkīnh pē paxàmnhīx tanhmã mē ho ajuta hto ho papa. Nē ŷ hã kapēr o mē ahkre htỹx o ri mē hkôt papa. Nē mēmoj punuj kutã amnhī to htỹx rāhã nē. Jao amnhī to mex pix nē.

8Jakamã kwa kêr ka amã mē kãm Jejus jarēnh o apa pymaj tee ri amnhī kukamã ajamaxpēr kêt nē. Nē mē kot Jejus ã ijaxàr nhūm arī ixkrī hã ijarēnh ma nē mē kot ixkuxwar ajaxàr pymaj mē kãm Tirtūm kapēr o mē ahkre hkukamã tee ri ajamaxpēr kêt nē. Mē kot ã anhīpêx anhỹr mã tã kêr ka amnhī kamã akahak kêt nē. ãm Tirtūm nhỹ hã hihtỹx xà ho amnhī to htỹx nē ixpyrà nē ma mē kãm Jejus kot mē panē tanhmã amnhī nhīpêx to hã harēnh to rāhã ho ri mē hkôt apa. Mē kot tanhmã hã anhīpêx to htãã. 9Na pu htem Jejus kôt amnhī xunhwỳ nhūm Tirtūm ja hã mē pahpumu nē Jejus kukwak ri amnhī katut kôt mē pahte amnhī tomnuj

piitã rēnh pa nē mē pahto hkra. Hāmri nē mē pahte hkôt pix mã amnhĩ nhĩpêx o papa kaxyw mē paxunhwỳ. Âm Jejus pix kukwak ri na hte mē pahto hkra nē ã mēmoj to mē pakutã nojarêt rãhã ho pa anē. No na hte mē pahte amnhĩ to mex ã mē pahpumunh kôt mē pahto hkra hkêt nē. Amnepêm kormã mēmoj piitã hkêt ri na pre mē pakukamã hamaxpēr o:

—Koja mē nhỹrmã Ixkra Jejus Kris kôt amnhĩ xunhwỳ pa ja hã mē omu nē Ixkra kukwak ri mē ho mex nē. Anē.

10Tã kormã mē pahte amnhĩ tã ã kot mē pajarēnh anhỹrja mar kêt jakamã na pre Jejus mē pahwỳr wrỳ nē tanhmã mē pahto mex to. Na pre ty nhũm Tĩrtũm akupỹm ho htĩr. Jakamã na pu htem ra amnhĩ kaxyw hkôt pajamaxpēr nē hkôt amnhĩ xunhwỳ hāmri nē nhỹrmã mē pahtyk tã nhũm Tĩrtũm kot Kra Jejus nhĩpêx pyrã nē akupỹm mē pahto mē pahtĩr pu mē Jejus kukwak ri wa kuri pamex nē pahtĩr tũm nē papa ho papa. Jakamã na pu htem mē pamã pahtyk pyma ho papa hkêt nē.

11Amnepêm na pre Tĩrtũm ixãm nē tanhmã inhmã ixapênh ã karõ hto nē inhmã:

—E Pawre kêr ka Jejus nhỹ hã ma hkwỳjê jahkre ho ri mē hkôt apa. Nē ixkapēr o mē ahkre mex nē. Kêr ka ã amnhĩ nhĩpêx anhỹr rãhã ho ri mē hkôt apa. Anē.

12Tã ã kot inhmã kapēr anhỹr nhũm ixte kapēr kôt amnhĩ nhĩpêx o ixpaja mỳrapê na htem Jejus ã tanhmã inhĩpêx kati hto ho pa. Pa hte ixpunuj nē amnhĩ xà htỳx kamã ijamak o ri Jejus mã tanhmã amnhĩ nhĩpêx to ho ri mē hkôt ixpa. Tã nom tee ri ja hã amnhĩ pumu nē amnhĩ kamã xipijaãm nē ixkaprĩ hkêt nē. Ixte amnhĩ kaxyw hkôt ijamaxpēr xwỳnhja na ixte tanhmã kot amnhĩ nhĩpêx to hã omunh mex jakamã kot paj ty nhũm mē arĩ inhmỳr pê Tĩrtũm kapēr mar o pa. Mē kot ja hã xipĩr tã koja mē apê Kris kôt ixkwỳjaja inhmỳr pê arĩ mē kãm harēnh o apa. Koja mē ã axpēn mỳr pê amnhĩ nhĩpêx anhỹr o pa rãhã nhũm Pahihiti Jejus akupỹn mē pahwỳr wrỳ.

13Kwa Ximotre. Ra ixte amã mēmoj tã karõ rax jakamã kêr ka mar tỳx nē hkôt amnhĩ nhĩpêx rãhã o ri apa. Jao Jejus Kris nhỹ hã mē piitã mē noo mã amnhĩ kaxyw kãm ajamaxpēr tỳx rãhã nē. Nē mē piitã mē ho mex o ri apa. 14Ate mē kãm tanhmã Jejus jarēnh to ho ri apaja âm hāmri na. Tã koja mēhõ htỳx ri tanhmã ho kapēr punuj to rỳ axtem nē tanhmã harēnh to ka ja hã ama nē nē kãm akapēr kãm axihtỳx nē. Tĩrtũm Karõ ra kot akarõ hwỳr àr jakamã kêr ka ỹ hã ã Jejus jarēnhja jamãr mex o ri apa anē.

Pawre kot tanhmã amnhĩ jarēnh to

Sikūn Ximotre 4.16-18

15Nē mãn ka pre ra pika pê As kamã Kris kwỳ kot ixkaga hã mē harēnh ma. Na pre Pijerti mē Emosti mē mē ohtõ nē tanhmã hamaxpēr

to nē ixto ajuta hkêt nē. 16-18 Ām Onēsipti pix na pre mē kurom ijarēnh ma nē man ixwÿr Rōm wÿr mō nē ijpêr o ri mē hkôt mra nē ixwÿr kato. Hāmri nē xatā ixwÿr mra nē tanhmā ixto mex to. Jao akupÿm ijamaxpêr o hihtÿx. Ixpê prês nē ixkrī htā kêp ixkrāmnhwÿ hā amnhī jarēnh ā hpijaam kêt nē. Nē amnepê mormā krī pê Epes kamā ixpa ri na pre määnēn tanhmā ixto mex to ho pa. Tā ā kot inhīpêx mex anhÿr o pa jakamā na pa hte ho Pahihti Jejus wÿ nē kām:

—Pa Pahihti? Onēsipti o na pa awÿ. Kot ixto mex rāhā ho pa jakamā kwa kêr ka ixtā omu nē kutā anojarêt rāhā ho apa. Nē ôrkwÿ kamā hkwyjaja määnēn tanhmā mē ho mex to. Hāmri nē nhÿrmā akupÿn mē ixwÿr wrÿ nē ixtā kamā axukapri hā tanhmā ho mex to. Anē.

Mē pahte Jejus kôt amnhī nhīpêx pix prām ā mē pamā karō

Wam Ximotre 6.11-16

2 1E Ximotre. Jejus Kris kot mēmoj to mē pakutā nojarêt rāhā jakamā kwa kêr ka ÿ hā amnhī to htÿx nē kām tanhmā amnhī nhīpêx to ho apa hā amnhī kamā akahak o ri apa hkêt nē. 2Ra ate pa tanhmā Tirtūm kapêr o mē ahkre htoja mar jakamā kêr ka amnhī xō ri ā Jejus kôt mē pahkwÿjê jahkre ho apa anē. Mē kot amar nē pahpyràn axpên xō ri ho axpên jahkre ho pa kaxyw.

3-4Sôrdat na htem mē hkrāhtūm kām prām xà hkôt tanhmā amnhī nhīpêx to. Jao tanhmā kute htā kapêr ma nē hkôt amnhī nhīpêx. Tanhmān à rÿ kām prām rÿ tanhmā omnuj to htā kutā amnhī to htÿx nē mē hkrāhtūm kôt amnhī nhīpêx. Na htem amnhī xapênh kukamā tee ri hamaxpêr o pa hkêt nē. Ām mē hkrāhtūm kapêr kôt pix mā amnhī nhīpêx o pa hprām. Tā kêr ka mē urāk nē Pahihti Jejus kôt amnhī nhīpêx rāhā ho ri apa hprām. Mē kot hā tanhmā atomnuj to htāā.

5Nē mē hprôt tÿx xwÿnhjaja na htem hkwyjê pê amnhī to wa hprām xàj ām ja pix kukamā hamaxpêr. Hāmri nē hprôt tÿx prām xàj mēmoj kot mē ho hirerek kêt nē amnhī jagri htÿx nē. Hāmri nē hprôt tÿx o hkwyjê jakre nē amnhī to wa nē pōj nē kot amnhī to wa hā mēmoj to kånja. Tā kêr ka mē urāk nē amā Pahihti Jejus kot amnhī nhīpêx kôt pix mā amā amnhī nhīpêx prām.

6Nē pur kām mē àpênh xwÿnhjaja na htem mē hpur kām àpênh pix tånopxar o pa nē àpênh rÿnh nē. Kām kaga hkêt kām àpênh o pa. Tā àpênh rÿnhja kukwak ri ihpur kām ô rÿnh nē ho apkur mex o pa. Nom koja mē kām kaga nē àpênh mex kêt nē hāmri nē ô grire nē apkur mex kêt nē. Tā kêr ka pur kām mē àpênh rÿnh xwÿnhjê pyrā nē Pahihti Jejus mā amnhī nhīpêx mex o apa. Nē mē urāk nē amā kaga hkêt kām axapênh pix tånopxar o ri apa.

7E na pa ā ajahkre anē Ximotre. Tā kêr ka ixte ajahkreja ma nē kām ajamaxpêr rāhā nē. Kojā Pahihti tanhmā akrā hto ka aprī hā mar tÿx nē.

8Nē kēr ka Pahihti Jejus Kris mā ajamaxpēr rāhā ho ri apa. Na pre katorxà hkôt kēp Pahi finat Tawi kanrēhā htāmnhwỳ hā mē pahpyrà nē ĩ ho ĩ nē kato nē panhō pika kamā pa ho pa. Tā nhūm prem kupī nhūm amnhī xà htỳx kamā hamak kām ty. Hāmri nhūm Tirtūm akupỹm ho htír nhūm akupỹm htír o htír. Ā na pre hte harēnh anhỹr rāhā ho ri mē hkôt ixpa. 9Mýrapê na prem ijaxà pa arĩ jar ixkrĩ ho ixkrĩ. Na htem ixte amnhī tomnuj xwỳnh pyrək o inhīpêx nē axte ixte Jejus kapēr jarēnh o ixpa pymaj ijaxà. Tā ā mē kot inhīpêx anhỹr tā na hte Kris kôt pahtōjaja arĩ ixpānhā mē kām harēnh o ri pa. Koja mē tee ri kām Jejus jarēnh o hapêx prām kaprỳ. 10Jakamā kwār mē māmri ā inhīpêx anē. Koja mē arĩ Jejus kot tanhmā mē panē amnhī nhīpêx toja mar o pa nhūm mē hkwyjaja hkôt amnhī xunhwỳ nē nhỹrmā pahpyrà nē kēp Jejus Kris kwỳ hā Tirtūm mē wa kuri mex nē htír tūm nē pa ho pa.

Kris kwỳ kot tanhmā amnhī tā grer to hā mē harēnh

- 11 Na pu htem mē pahpê Kris kwỳ hā ā amnhī tā pagrer anē:
Mē kot Kris ā mē panhīmex tā kot puj mē akupỹm pahtír nē kuri pamex nē pahtír tūm nē papa ho papa.
- 12 Mē kot tanhmā Kris ā mē pahtomnuj to htā kot puj mē arĩ hkôt amnhī nhīpêx o papa rāhā ty nē nhỹrmā ĩhkô hā mē ho amnhīptār o papa.
Nom kot puj mē amnhī kamā pakahak pē mē pahpê Jejus kwỳ hkêt ā amnhī jarē hā koja Jejus amnhī xwar mē pahpê hkwy hkêt ā mē pajarē.
- 13 Nē mē pahte amnhī kaxyw Jejus kôt pajamaxpēr kēê tā tanhmā amnhī jarēnh to xà hkôt tanhmā amnhī nhīpêx to.
Aa kot mēmoj tā amnhī jarēnh kuhpa hā ri tanhmā amnhī nhīpêx to hkêt. Anē.

Mē kot Tirtūm kapēr o mē ahkre mex xwỳnhjê jarēnh

Wam Pêtre 3.15-16

14E Ximotre. Ixte ā mēmoj tā amā karō anhỹrja kēr ka ho mē ahkre rāhā ho ri mē hkôt apa. Kê mē ama nē kām hamaxpēr rāhā nē.

Nē mē kām anē kê mē Tirtūm kapēr o mē ahkre mex o ri pa nē kapēr ā tanhmā axpēn mā àkjêr to hkêt nē. Koja mē hā axpēn mā akir hāmri nē amnhī to mex kêt nē. Hāmri nhūm mē kot mē kapēr mar xwỳnhjaja ja hā mē omu nē tee ri Tirtūm kapēr kukamā hamaxpēr nē hkôt amnhī nhīpêx mex kêt nē.

15Nē na htem mē kām mē àpēnh mex xwỳnhjaja mē õ patrāw kapēr ma nē hkôt mēmoj tā àpēnh mex nē. Nhūm õ patrāwja hwỳr mra nē àpēnh ā omu. Hāmri nhūm amnhī wỳr omu nē àmnhīx noo mā apê. Kām àpēnh mex jakamā amnhī kamā kām uma hkêt nē. Ja pyrà nē kēr ka

Tirtūm noo mā kām amnhĩ nhĩpêx mex rāhā nē aprĩ hā kapêr o mẽ ahkre mex o ri mẽ hkôt apa. Kê ã ate amnhĩ nhĩpêx anhÿr ã apumu nē anhÿ hā hkĩnh nē. Ka àpênh xwÿnhhta pyrà nē amnhĩ kamā amā uma hkêt nē noo mā kām amnhĩ nhĩpêx mex o ri apa.

16No mẽ kot Tirtūm kapêr o hêx o mẽ pa xwÿnhjaja kêr ka mẽ hkôt ri apa hkêt nē. Nē mẽ kapêr mar nē ri mẽ hkôt axām hkêt nē. Na htem mẽ kapêr ma nē mẽ hkôt amnhĩ nhĩpêx o pa nē kām Tirtūm kapêr mar prām kêt nē. Nē gaa nē te kêp mar pumaj amnhĩ jamak pro pyràk o amnhĩ nhĩpêx. 17Tÿx ri tanhmā mẽ ahkre hto xàja te kot mẽ hkànhy aa mex kêt nē ra omnuj tÿx o mōrja pyràk. Jao mẽ kot mẽ kapêr mar o mẽ pa xwÿnhjaja mẽ mar pê ra mẽ hkôt amnhĩ tomnuj tÿx o mō. Na hte ra Imēnew mẽ Pijertija wa ã htÿx ri amnhĩ krā hkôt mẽ ahkre anhÿr o pa. 18Nē Tirtūm o hêx o mẽ hkôt pa nē nhÿrmā akupÿm mẽ pahto mẽ pahťir kêt ã harênh o pa. Hāmri nhūm mẽ amnhĩ tā wa kuma nē tee ri amnhĩ kukamā hamaxpêr pê Jejus kaga nē axte amnhĩ kaxyw hkôt hamaxpêr kêt nē. Nom wa kapêrja kot anhÿr kêt. 19Kêt Tirtūm kapêrja ãm hāmri na. Kot mẽmoj to hêx kêt jakamā na pu htem amnhĩ kaxyw hkôt pajamaxpêr kaprÿ hkêt nē. Kapêr ã kagà htūm kot tanhmā mẽ pahpê hkrajê jarênh to nē harênh kot:

Tirtūm na kot hkrajê piitā omunh mex rāhā ho pa xwÿnh.
Anhÿr o mẽ pajarênh. Nē mẽ pamā mẽmoj tā karō kot:

Kê mẽ kot Jejus kôt amnhĩ xunhwÿr xwÿnhjaja amnhĩ tomnuj o pa hkêt nē. Anē.

Tirtūm krajaja te kêp prat mex pyràk ã mẽ harênh

20Nē mẽ hikàxpore rūnh xwÿnhjaja mẽ õ xijere nē mẽ õ prat xohtôô. Prat kwÿ muxre nē hkwÿ omnajre. Prat pynajre na htem māmri kamā apku no prat muxreja ãm mẽmoj mex pix kaxyw na htem mēsti hā haxwÿ nē kamā apku. Kasamēt ã rÿ mẽ hkra krā hkênh ã mẽ hkĩnh nhūm htem mēsti hā haxwÿ nē kamā apku. 21Tā mẽ kot Tirtūm kapêr o hêx o mẽ pa xwÿnhjê hkôt hamaxpêr kêt nē mẽ hkôt amnhĩ tomnuj kêt xwÿnhjaja te mẽ kot prat muxre pyràk. Na htem tām amnhĩ nhĩpêx nē tanhmā hamaxpêr punuj to ho pa hkêt nē. Hāmri nhūm Tirtūm ja hā mẽ omu nē mẽ ÿ hā hkĩnh nē. Hāmri nē te mẽ kot prat muxre jaxwÿr nē kamā apkur pyrà nē mẽ kot kām tanhmā amnhĩ nhĩpêx to ho pa kaxyw mẽ unhwÿ.

Mẽ pahte tām amnhĩ nhĩpêx ã mẽ pamā karō

22Nē mẽ àptàr nyw jamaxpêr punujja kêr ka te ate hamÿnh nē amnhĩ katut kôt rēnh par pyràk o hipêx Ximotre. Jao axte ho ajamaxpêr o ri apa hkêt nē. Nom mẽ hamaxpêr mexja kêr ka hamÿ nē amnhĩ krā him hagjê nē ho ajamaxpêr rāhā ho ri apa. Jao tām amnhĩ nhĩpêx nē amnhĩ

kaxyw Tirtũm kôt ajamxpêr rãhã nê. Nê amã mẽ kêp Kris kôt akwỳjê hkĩnh pê tanhmã mẽ ho ajuta hto ho ri mẽ hkôt apa. Jao mẽmoj to mẽ kutã anojarêr rãhã nê. Na hte ã Pahihti Jejus kôt amnhĩ nhĩpêx xwỳnhjaja amnhĩ nhĩpêx anhỹr o pa.

23Nê kêr ka mẽ kot htỳx ri amnhĩ krã hkôt mẽ ahkre ho mẽ pa xwỳnhjê hkôt apa hkêr nê. Te ate mẽ kêp awry hã ri apa pyrã nê mẽ kapêr ma nê ãm ama. Na htem mẽ kapêr mar o pa nê ra hã axpên mã tanhmã àkjêr to ho pa. Jakamã kwarĩ mẽ hkôt ri apa hkêr nê. 24Mẽ pahte Tirtũm mã amnhĩ nhĩpêx o papa xwỳnhjaja na pu htem mẽ kurom mẽmoj tã axpên mã paxàkjêr o ri papa hkêr nê. Na pu htem ãm mẽ piitã mẽ kamã paxukaprĩ pê mẽ ho mex nê mẽ kamã pagryk tokyx anhỹr kêt nê. Nê Tirtũm kapêr o mẽ ahkre mex nê. Na hte ã mẽ pahte Tirtũm mã tanhmã amnhĩ nhĩpêx to xwỳnhjaja amnhĩ nhĩpêx o papa anê.

25-26Jakamã koja mẽhõ ate Tirtũm kapêr o mẽ ahkreja ma nê tanhmã ho amã kapêr to ka ama nê amnhĩ tã tanhmã kãm akapêr punuj to hkêr nê. ãm kamã axukaprĩ ho tanhmã hã kãm akapêr mex to. Na hte Satanasti te kot amnhĩm mẽ unênh pyrãk o mẽ hipêx nê tanhmã mẽ kãm Tirtũm kapêr o hêx to nhũm mẽ kuma nê hkôt hamaxpêr nê kapêr kôt amnhĩ nhĩpêx. Tã kot kaj mẽ kamã axukaprĩ ho mẽ kãm akapêr mex nê nhũm Tirtũm tanhmã mẽ hkrã hto nhũm mẽ ama nê hkôt amnhĩ xunhwỳr japêr. Te Tirtũm kot Satanasti pê amnhĩm mẽ utàr pyrãk. Jakamã nhũm mẽ hpãnhã Tirtũm kapêr mex ã harê nê harênh o:

—Nà pêr ãm hãmri na Tirtũm kapêrja. ãm mex o mex. Anê.

Jejus akupỳn wrỳk kukamã mẽ kot amnhĩ tomnuj xwỳnhjê jarênh

Matêwre 24.4-13; Korosê 2.16-19; Wam Ximotre 4.1-5;

Sikũn Pêtre 2.1-3; Jutre 3-16

3 1Nê Jejus akupỳn mẽ pahwỳr wrỳk xwỳj ri mẽ kot tanhmã amnhĩ nhĩpêx toja kot paj hpãnhã ixprĩ hã amã harê ka inhmar tỳx nê Ximotre. Koja Jejus akupỳn mẽ pahwỳr nojarêr pu mẽ pahpê hkwỳjaja pahpunuj nê papa. 2Nê Kris kwỳ hkêr xwỳnhjaja koja mẽ amnhĩ pix kukamã hamaxpêr o pa.

Jao hikàxpore rax o pikuprõnh pix kukamã hamaxpêr pê hkwỳjê pê õxỳ htỳx o pa.

Nê mẽmoj tã amnhĩ to jarkrar o pa.

Nê tanhmã hkwỳjê japrỳ hto ho pa.

Nê mẽ hipêxã nê mẽ katorxã hã hpijaàm kêt o pa.

Nê Tirtũm ã hpijaàm kêt o pa.

Nhũm mẽhõ tanhmã mẽ ho mex to nhũm mẽ amnhĩ tã mẽ omu nê ãm mẽ omu nê amnhĩ tã tanhmã mẽ kãm nê hkêr nê.

Rỳ mẽ kãm: “Nà ãm hãmri na ka ã ixto mex anê. Nà ja mex.” Anhỹr o mẽ kãm kapêr kêt nê.

3 Mẽ ukapřĩ hkêt jakamã koja
 mẽhõ tanhmã mẽ hom-
 nuj to nhũm amnhĩ tã
 mẽ omu nẽ kamã gryk
 kurê kumrẽx nẽ aa gryk
 o hapêx kêt nẽ.
 Nẽ amnhĩ tã tanhmã hkwỳjê
 ho hêx to ho pa.
 Nẽ htỳx ri kãm hprãm xà hkôt
 tanhmã amnhĩ tomnuj to.
 Nẽ oprê ho pijapu pix kukamã
 hamaxpêr.
 Nẽ axtem nẽ kãm mẽmoj mex
 pumunh prãm rỳ mẽmoj
 mex mar prãm kêt nẽ.



Sikũn Ximotre 3.1-2

4 Nẽ mẽhõ ho hkràmnhwỳ htã axtem nẽ mẽ kãm mẽ hkurê xwỳnh-
 jê nhĩhkram haxã.
 Nẽ hamaxpêr mex kêt o tanhmã amnhĩ tomnuj to rãhã ho ri pa.
 Nẽ amnhĩ to rũnh o mẽ piitã mẽ hakrenh par ã amnhĩ to jarkrar
 o ri pa.
 Nẽ amnhĩ krã hkôt kãm amnhĩ nhĩpêx prãm xà hkôt amnhĩ
 nhĩpêx o pa nẽ kãm Tĩrtũm kãm prãm xà hkôt amnhĩ
 nhĩpêx prãm kêt nẽ.

5 Hãmri nẽ mẽ kêp hkra hã amnhĩ jarênh o pa htã aa hkôt amnhĩ nhĩpêx
 kêt. Æ Tĩrtũm kra hkêt xwỳnhjaja amnhĩ nhĩpêx kot anhỳr jakamã kwa
 kêr ka ã mẽ hkôt apa hkêt nẽ Ximotre.

6-7 Na htem hêx rom hkwỳjê nhõrkwỳ hwỳr agjê nẽ kamã tanhmã
 mẽnijê mã hêx to. Mẽ kot mẽ mar nẽ tanhmã amnhĩ tomnuj to hãmri nẽ
 ja hã amnhĩ pumu nẽ tee ri amnhĩ kukamã hamaxpêr kaxyw. Nẽ mẽ kãm
 mẽ kapêr nyw mar prãm tã nhãm mẽ kapêr ma nẽ nhãm mẽ kapêr mar
 nẽ aa Tĩrtũm kapêr mar nẽ amnhĩ kaxyw hkôt hamaxpêr kêt nẽ. Jakamã
 nhũm mẽ kot amnhĩ tomnuj xwỳnhjaja hêx rom mẽ hwỳr mra nẽ mẽ
 õrkwỳ hwỳr agjê nẽ tanhmã mẽ kãm mẽmoj to hêx to. 8 Te kot amnepêm
 finat Jãnre mẽ finat Jãmtija wa kot amnhĩ nhĩpêxta pyrãk. Na pre finat
 Mojestija Tĩrtũm nhỹ hã tanhmã mẽ ahkre hto ho pa nhũm Jãnre mẽ
 Jãmti wa kãm mar prãm kêt nẽ. Nẽ tanhmã ja nẽ hkwỳjê mã kapêr to
 ho pa. Tã ã mẽ kot amnhĩ tomnuj anhỳr o mẽ pa xwỳnhjaja na htem wa
 urãk nẽ kãm Tĩrtũm kapêr mar prãm kêt nẽ kapêr nẽ tanhmã hkwỳjê mã
 kapêr to ho pa. Nhũm mẽ hamaxpêr mex kêt jakamã ãm mẽmoj punuj
 pix kukamã hamaxpêr nẽ mẽ kuma nẽ amnhĩ kaxyw Jejus kôt hamaxpêr
 kêt nẽ. 9 Tã nom koja mẽ hkwỳjaja tokyx hprĩ hã mẽ kot mẽmoj to hêx
 ã mẽ omu hãmri nẽ axte mẽ hkôt hamaxpêr kêt nẽ nhũm mẽ rĩ amnhĩ

pumu. Te amnepê mē kot hprī hā Jānre mē Jāmti wa kot tanhmā amnhī tomnuj to hā wa omunhta pyrāk.

Mē pahte Jejus ā pahpunuj tā hkaga hkēt ā mē pamā karō

Atre 13.50-14.7, 14.19-22

10E Ximotre. Ate ixkôt apa ryy jakamā ra ate tanhmā ixte amnhī nhīpêx ho ixpa hā ixpumunh mex.

Ixte tanhmā Tirtūm kapēr o mē ahkre hto ho ixpaja.

Nē inhmā mēmoj to anhÿr prām xwÿnhja.

Nē ixte amnhī kaxyw Kris kôt ijamaxpērja.

Nē inhgryk tokyx anhÿr kêtja.

Nē ixte tanhmā Kris kôt ixkwÿjê ho mex to ho ri ixpaja.

Nē ixpunuj nē ixpa htā arī Kris kôt amnhī nhīpêx mex o ixpaja.

Ā ixte amnhī nhīpêx anhÿr o ixpaja ate ixpumunh mex.

11Na pa pre krī pê Āxiok nē Ikōn nē Ristija kamā mē kām Jejus jarēnh o ixpa nhūm mē hkwyjaja Jejus ā tanhmā inhīpêx to pa amnhī xā htÿx kamā ijamak o ri mē hkôt ixpa. Tā nhūm Pahihti Kris xatā mē kēp ixpytā pa itÿr pê mē ĩhkra rūm ijapōx o ixpa. 12Na hte Kris kwÿ hkēt xwÿnhjaja mē pahte Kris kôt amnhī nhīpêx o papa hā mē pahtomnuj o pa.

13Nē mē kot Tirtūm kapēr o hêx o mē pa xwÿnhjaja koja arī mē kēp Kris kwÿ hā amnhī to hêx pê mē nokupyr. Nē mē kām Tirtūm kapēr o hêx o pa. Jao ra mē tāmjjaja amnhī nokupyr o pa nē amnhī tomnuj tÿx kumrêx.

Pawre kot tanhmā Tirtūm kapēr ā kagā jarēnh to

Rōmān 15.4; Sikūn Pêtre 1.19-21

14-15No ka Ximotre. Amnepêm aprīre rūm na pa pre mē ixohtō nē Tirtūm kapēr o ajahkre ho ixpa. Akatorxā nē anhō wōwōre nē pa nē Kris kwÿjaja pa prem ho ajahkre rāhā ho akôt ixpa ka mē inhmar tÿx nē amnhī kaxyw Jejus kôt ajamaxpēr. Jakamā kwa kēr ka arī hkôt ajamaxpēr mex rāhā ho ri apa. Tirtūm kapērja na htem mar pê amnhī kaxyw Jejus Kris kôt hamaxpēr nē hkôt amnhī xunhwÿ nhūm Tirtūm ja hā mē omunh xā hkôt mē ho hkra. 16Tirtūm kapēr ā kagāja Tirtūm kapēr na. Na htem ho mē ahkre ho pa. Koja mēhō hkwy m ri tanhmā amnhī tomnuj to nē kapēr ma nē tee ri amnhī tomnujja kukamā hamaxpēr o ra hkaprī nē. Rÿ tanhmā amnhī tomnuj to htā kapēr ā kagā kamā kapēr nē Tirtūm kot ā kot amnhī tomnuj anhÿrja nē mē pamā kapēr ā harēnh ma nē amnhī tomnujta kaga kurê kumrêx. Rÿ kamā kapēr nē Tirtūm kot tanhmā mē pahte amnhī to mex to hā mē pamā karō kamā harē nē kuma. Hāmri nē ŷ hā hkôt amnhī nhīpêx mex rāhā nē. Ā na hte Tirtūm kapēr kagāja mē kot mar nē hkôt amnhī nhīpêx xwÿnhjê

pikapĩrta pyræk. Kot paj tokyx ty nẽ jar ijapêx. 7Na pa ra Pahihti Jejus mã amnhĩ nhĩpêx mex o ri ixpa. Mẽ kot tanhmã hã ixtomnuj to htã pa hkaga hkêt nẽ arĩ hkôt amnhĩ nhĩpêx mex rãhã ra ixtyk kaxyw. 8Ixe Pahihti kãm hprãm xà hkôt amnhĩ nhĩpêx mex o ri ixpa jakamã koja amnhĩ tã tanhmã ixto mex to. Nom papxipix ixto mex kêt nẽ. Na hte ãm hãmri tãm mẽ pahpiitã mẽ panhĩpêx. Jakamã nhỹrmã kot mẽ piitã tanhmã mẽ harênh to xà hã arĩgrota ã koja mẽ pahkĩnh pẽ mẽ pahte amnhĩ wỳr kamã pajamak o papa xwỳnh piitã mẽ pamã mã mẽmoj mex gõ.

Pawre kot amnhĩ wỳr Ximotre hwỳr

9Kwa na pa ra ato ijamak tỳx nẽ Ximotre. Kwa kêt ka amnhĩm anojarêt nẽ tokyx tanhmã amnhĩ to hpa nẽ man ixwỳr mõ.

10Na pre ra Kresêx ma Karatas wỳr mõ nhũm Xitre ma pika pẽ Tawmas wỳr mõ. Nhũm Tẽmti ra tanhmã hamaxpêr to nẽ àpênh gryk ã ixkaga nẽ ma akupỹm Tesarõn wỳr mõ. 11Ãm Rukre pix na arĩ ixkôt pa jakamã kêt ka anojarêt hãmri nẽ ahte amõr kêt nẽ. Makre mã anẽ kê man akôt ixwỳr mõ nẽ tanhmã ixto ajuta hto ho pa.

12Nẽ Xikitre na pa pre ra Epes wỳr kumẽ.

13Nẽ Torõt kãm Kapti nhõrkwỹ kamã ixte kry pẽ inhõ kamĩs pa hkà ryti rer jakamã kêt ka anojarêt nẽ inhmã apy nẽ man inhmã o mõ. Nẽ inhõ kagàta ka mããnẽn inhmã amỳ nẽ o mõ. Nẽ mẽmo mry kà hã ixte mẽmoj tã kagàta ka mããnẽn apy nẽ mãn inhmã o mõ. E kêt ka anojarêt nẽ ixkukrêxja jamỳ nẽ ixwỳr ho mõ.



Sikũn Ximotre 4.13

Tanhmã Aresãnti kot Pawre nhĩpêx to hã harênh

14-15Nẽ na pre kàx o mẽmoj nhĩpêx xwỳnh Aresãntija ixtomnuj nẽ. Pa pre mẽ kãm Tĩrtũm kapêr o mẽ ahkre ho ri mẽ hkôt ixpa nhũm tee ri inhma nẽ kãm mar prãm kêt nẽ. Hãmri nẽ ixkutã amnhĩ xãm nẽ inhĩpêx kati nẽ. Nom koja Pahihti Jejus ixtã tanhmã ho. Kwa kêt ka amnhĩ nẽ omunh mex nẽ Ximotre.

Pahihti Jejus kot Pawre mã hamaxpêr o hihtỳx ã harênh

16Nẽ pahi kot mẽ mar xà hã ixkre kamã wam ixte mẽ kãm amnhĩ jarênhhta ã na pre mẽhõ ixyr pẽ mẽ kãm tanhmã ijarênh to hkêt nẽ. Na

prem piitã mẽ umaj ixkaga hpa. Nom kwãr mẽ mãmrĩ ã amnhĩ nhĩpêx anê. Tĩrtũm kot ixtã tanhmã mẽ hoja na inhmã hprãm kêt. **17** ãm Pahihti Jejusja pix na pre mẽ kurom ixkaga hkêt nê. Na pre ixto ixihtỳx nê pa ỳ hã mẽ kãm tanhmã mẽ panê kot amnhĩ nhĩpêx to hã harênh pa. Nhũm Ijaew kêt xwỳnh kot inhmar o hkrĩ xwỳnhjaja ixujarênh mar o hkrĩ nhũm Tĩrtũm inhnê tanhmã mẽ ho nhũm mẽ xpir kêt nê. **18** Koja Pahihti mẽ kutã ixto ixihtỳx rãhã nê mẽmo arĩgro hã amnhĩ wỳr ixto api. Pa Tĩrtũm mẽ wa kuri inhmex kumrêx nê ixtĩr tũm nê ixpa ho ixpa. Pahihti mex o mex jakamã kêr pu mẽ kãm mex o mex ã harênh rãhã ho papa nê aa jam panhũrer kêt nê.

Pawre kot tanhmã hkrãmnhwỳjê jarênh to

19 Nê kêr ka Prisire mẽ mjên Akir wa kãm ijarê. Nê Oněspti hprõ nê hkrajaja ka mããnên mẽ kãm ijarê. **20** No Eras kormã Korĩt kãm pa. Nê Toropty na pre à nê pa Mĩrêt kãm kure nhũm ixkôt mõi kêt nê.

21 Kwa kêr ka amnhĩm anojarêt nê amgrà pê man tokyx ixwỳr mõi Ximotre.

Nê ota Epti mẽ Prutêhti mẽ Rĩnre mẽ Krawreja awỳr hpêr mẽ. Nê jar Kris kôt pahkwỳjê piitã awỳr hpêr mẽ.

22 E kê Pahihti Jejus ato mex rãhã nê mẽ apiitã mẽ akutã nojarêt rãhã ho pa.

Tã ãm ja pix. Ixpê Pawre na pa awỳr kagàja nhĩpêx nê kumê.

Xitre

Pawre kot Xitre hwÿr kagà nê mênh

Pawre na pre kagàja nhîpêx. Kêp Jejus nhÿ hã hkrajê jahkre ho pa xwÿnhjê hô na pre. Nhûm pre Xitre Pawre hkôt pa hã mytwrÿ xohtô nê. Tã kêp Jejus kôt hkwÿjê nhô pastô kaxyw gô hipôk pê Kret ã arîk nê Tirtûm kapêr o mē ahkre ho mē hkôt pa. Jakamã nhûm Pawre kãm kagàja nhîpêx nê kamã kãm mēmoj tã karô. Tirtûm kapêr o mē hêx xwÿnhjaja tanhmã kot ja nê mē hkurê to hã kãm karô. Nê mē kot Tirtûm kapêr o mē ahkre mex pix xwÿnhjaja Jejus kwÿjê kaxyw kot mē rênh ã kãm karô. Nê Jejus kwÿjaja kot axpên to mex o pa hã kot mē kãm karô kaxyw kagàja kamã mē kaxyw kãm hã kagà. Æ na pre Pawre Xitre mã mēmoj tã karô nê hã kagà nê hwÿr mênh anê. Nê kãm:

1 1Pa Xitre? Xà amex? Ixpê Pawre na pa awÿr kagà nhîpêx nê kumê. Na pa hte Tirtûm mã tanhmã amnhî nhîpêx to ho ixpa. Nê ixpê Jejus Kris nhÿ hã hkrajê jahkre o ixpa xwÿnh jakamã na pa hte mē kot amnhî kaxyw hkôt hamaxpêr tÿx kaxyw tanhmã mē kãm ixkapêr to ho ri ixpa. Nê mē kot hprî hã mar kaxyw Tirtûm kapêr o mē ahkre mex nê. 2Mê kot inhmar nê nhÿrmã htyk nê ma Tirtûm mē Jejus wa hwÿr àpir nê wa kuri htîr tûm nê pa ho pa hã amnhî kukamã hamaxpêr kaxyw. Amnepê mē na pre Tirtûm ã mē pahpê hkrajê hkukamã mē pajarênh anê. Nê ãm hãmri ã mē pajarênh anê. Na hte mēmoj tã amnhî to hêx kêt nê. 3Tã ra mē pakukamã mē pamã mēmoj to amnhîrît nê inhmã kapêr o:

—E Pawre kêr ka ma mē hpiitã mē hkôt ri apa nê mē kãm ixkapêr jarê nê mē kãm: “Kot kaj mē amnhî kaxyw Tirtûm Kra hkôt ajamaxpêr nê hkôt amnhî xunhwÿ nhûm Tirtûm ja hã mē apumu nê mē ato hkra. Ka mē nhÿrmã atyk tã nhûm amnhî wÿr mē ato api ka mē wa kuri amex kumrêx nê atîr tûm nê apa ho apa.” Anhÿr o mē kãm ixkapêr jarênh o ri mē hkôt apa Pawre.

4Anhÿr o inhmã kapêr tã pa ã amã ixkapêr nê hã kagà anê Xitre. Pajamê pahte amnhî kaxyw Jejus kôt pajamaxpêr nê hkôt amnhî xãm jakamã te apê ixkra pyrâk. Jakamã na pa hte ato Mēpanhîpêxã maati Tirtûm mē mē papytâr xwÿnh Jejus Krisja wa hwÿr rãhã ho ri ixpa nê wa kãm:

— Pa Tirtüm mẽ Pahihti wa. Nà Xitre ho na pa wa awỳ. Kwa kêr ka wa kutã anojarêt rãhã ho ri apa. Kê wa akukwak ri hamakêtkati nê àmnhix pa ho pa. Anẽ.

**Kris kwỳ hkrãhtümjaja kot tanhmã amnhĩ nhĩpêx to kaxyw
mẽ hã kãm karõ**

Wam Ximotre 3.1-13

5 Nê na pa pre Kret rûm inhnojarêt hãmri nê amã axapênh ã karõ nê Kret kãm are nê man mõi. Na pa pre amã:

— E kêr ka jar arík nê mẽ kãm ixkapêr jarênh jatur xàm mênh o mẽ hkõt apa. Nê Kris kõt pahkwỳjê mã mẽ hkrãhtümjê xunhwỳ. Kret kãm krí piitã hkõt. Na pa pre ixprĩ hã tanhmã amã mẽ harênh to. Tã kêr ka ate inhmar xà hkõt mẽ hkwỳjê kapi nê mẽ unhwỳ. Koja mẽ ã amnhĩ nhĩpêx anhỹr o pa ka ja hã mẽ omu nê mẽ unhwỳ.

6 Koja mẽ tãm amnhĩ nhĩpêx o pa nhũm mẽ piitã axpên mã mẽ mex ã mẽ harê.

Nê mẽ hprõ pix tânopxar o pa nê kuhpa hã nhãm mênijê ho amnhĩkati hkêt nê.

Nê kê mẽ hkrajaja hipêêxà pyrã nê amnhĩ kaxyw Jejus kõt hamaxpêr o pa. Jao hipêêxà nê katorxã wa kapêr ma nê wa hkõt amnhĩ nhĩpêx. No ri htỳx ri amnhĩ tomnuj o pa hkêt nê.

Anhỹr o na pa pre mẽ hã amã karõ. 7 Jejus kõt pahkwỳjê hkrãhtümjaja kot Tirtüm nhỹ hã hkrajê mã kapêr mex o pa jakamã na htem tãm amnhĩ nhĩpêx o pa.

Nê amnhĩ pix kukamã hamaxpêr o pa hkêt nê.

Nê gryk tokyx anhỹr kêt nê.

Nê kagôxyhti japrôr nê ho pipãnh o pa hkêt nê.

Nê oprê ho pa hkêt nê.

Nê kàxpore rûnh prãm xàj hêx rom tanhmã amnhĩ nhĩpêx to hkêt nê.

Na htem ã amnhĩ nhĩpêx anhỹr hkêt nê.

8 ãm àmnhix amnhĩ nhõrkwy hwỳr mẽ hwỳr o pa.

Nê mẽ piitã mẽ kutã nojarêt rãhã nê.

Nê tãm hamaxpêr nê tãm mẽ piitã mẽ hipêx o pa.

Nê amnhĩ tomnuj pymaj amnhĩ to htỳx pê Tirtüm kõt amnhĩ nhĩpêx mex rãhã ho pa.

9 Nê mẽ kot Tirtüm kapêr mar tỳx jakamã kê mẽ arĩ hã nohtỳx nê mar tỳx xà hkõt amnhĩ xô ri ho hkwỳjê jahkre mex o pa.

Nê ho mẽ piitã mẽ hamaxpêr o hihtỳx o pa.

Nhũm mêhõ Tirtüm kapêr kwỳm ri tanhmã ujarênh to nhũm hã kuma nê hprĩ hã kãm tanhmã harênh to kê mar mex nê.

E Xitre. Na hte ã Jejus kwÿjê hkrähtümjaja amnhĩ nhĩpêx anhÿr o pa. Jakamã kêr ka aprĩ hã Kret kãm Jejus kôt pahkwÿjê kapi nê mẽ kot tanhmã amnhĩ nhĩpêx to ho pa hã mẽ omu. Nhũm mēhõ ã amnhĩ nhĩpêx anê ka ja hã omu hãmri nê kêp Jejus kwÿjê hkrähtüm kaxyw ãm.

Kret nhõ xwÿnhjaja kot tanhmã amnhĩ tomnuj to hã mẽ harēnh

Xitre 3.9-11


10Nê atar Kret kãm na hte mẽ ohtõ nê kãm mẽ õ pahi kapêr mar prãm kêt nê htÿx ri tanhmã Kris kwÿjê mã kapêr to ho pa. Na hte Ijaew kwÿjaja ã amnhĩ nhĩpêx anhÿr o pa. Jao Ijaew kêt xwÿnh kot Jejus kôt amnhĩ xunhwÿr xwÿnhjê mã kãm:

—Kwa mẽ ixpyrà nê mẽ ixpê Ijaewjê kot amnhĩ nhĩpêx kôt mãn amnhĩ nhĩpêx kêt wehe.

11Anhÿr o mẽ kãm kapêr jakamã kwa kêr ka ã mẽ kapêr anhÿrja nê mẽ kãm akapêr kãm axihtÿx nê. Na htem hpijaàm kêt o hikàxpore hprãm xàj ã mẽ kãm kapêr anhÿr o pa. Jao mẽ hamaxpêr o ahkà nhũm mẽ kuma nê tee ri hamaxpêr. 12Na pre ra mẽ hkwÿjê hõ tanhmã mẽ harēnh to. Mẽ ahkre xwÿnhjê hõja mẽ harēnh o:

—Kret nhõ xwÿnhjaja na htem hêx pix o pa. Nê oprê nê kãm kaga nê apkur xà pix kukamã hamaxpêr o pa. Anê.

13Ãm hãmri ã mẽ harēnh kot anhÿr. ã mẽ kot amnhĩ nhĩpêx anhÿr jakamã kwa mẽ kot amnhĩ nhĩpêxja nê mẽ kãm akapêr kãm axihtÿx o ri mẽ hkôt apa Xitre. Kê mẽ ã amnhĩ nhĩpêx anhÿr kêt nê. Nê mẽ kãm anê kê mẽ amnhĩ kaxyw Tirtüm kôt mãn hamaxpêr tÿx nê. 14Nê kê mẽ axte Ijaewjê xujarēnh nê mẽ kot amnhĩ nhĩpêx kôt amnhĩ nhĩpêx kêt nê. ã mẽ kot amnhĩ nhĩpêx o pa hã mẽ kãm karõ xwÿnhjaja na prem Tirtüm kapêr kaga hpa. 15Mẽ kot Jejus kôt amnhĩ xunhwÿr xwÿnhjaja tãm mẽ hamaxpêr o pa jakamã na htem Tirtüm kot mẽmoj piitã ho kator xwÿnh pumu nê piitã mex ã harê. No mẽ kêp Jejus kwÿ hket xwÿnhjaja na htem hamaxpêr punuj pix o pa. Nê mẽmoj mex pumu nê mex kêt ã harê. Mex tã nhũm mex kêt ã harēnh o pa. 16Nê mẽ kêp Tirtüm kra hã amnhĩ jarēnh tã amnhĩ tomnuj pix o pa. Jao kêp hkra hã amnhĩ jarēnh o hêx nê kapêr kwÿm ri amnhĩ nhĩpêx pix o pa. Nhũm Tirtüm tee ri ja hã mẽ omu nê kãm mẽ hkĩnh kêt nê. Tirtüm mã mẽ kot amnhĩ to mex kwÿ mẽ hã jêt kêt kumrêx.



Xitre 1.12

2 1E Xitre kot paj tanhmã ate mẽ ahkre hto hã amã karõ ka inhma nẽ amnhĩ xô ri mẽ kãm hã karõ ho ri apa.

**Měmy wejja kot tanhmã amnhĩ nhĩpêx to kaxyw
mẽ hã kãm karõ**

2Nẽ kêr ka mẽmy wejje mã anẽ kê mẽ amnhĩ to àptàr mex nẽ pa.

Nẽ pipãnh nẽ ri pa hkêt nẽ.

Nẽ mẽ gryk kaxyw htỳx ri hkwyjê hã hpêr o pikênh kêt nẽ.

Kê mẽ tãm hamaxpêr nẽ tãm amnhĩ nhĩpêx o pa.

Nẽ amnhĩ kaxyw Jejus kôt hamaxpêr tỳx rãhã nẽ.

Nhũm mẽ hkwyjaja kot mẽmoj tã tanhmã mẽ homnuj to htã kê mẽ arĩ tãm amnhĩ nhĩpêx o pa nẽ amnhĩ tã tanhmã mẽ ho hkêt nẽ.

E kêr ka ã mẽmy wejje mã ja hã akarõ anẽ.

**Měni wejja kot tanhmã amnhĩ nhĩpêx to kaxyw
mẽ hã kãm karõ**

Wam Korit 14.34-35; Wam Ximotre 2.9-15, 3.11; Wam Pêtre 3.1-6

3-4Nẽ mẽni wejje mã anẽ kê mẽ kãm Jejus kĩnh xaj tãm ri amnhĩ nhĩpêx o pa.

Jao axpêr jakwa kamã nhãm mẽ hixi ho rêr o pa hkêt nẽ.

Nẽ kagôxyhti ho pipãnh o pa hkêt nẽ.

Nẽ mẽ kãm anẽ kê mẽni xaptàr nywjê jahkre mex o pa. Mẽ kot mẽ mar nẽ mẽ urak nẽ tãm amnhĩ nhĩpêx kaxyw. Jao mẽ kãm mẽ mjên nẽ mẽ hkrajê japê hã mẽ kãm mẽmoj to anhỹr o mẽ kutã nojarêt rãhã ho pa.



Xitre 2.3-4

Kêr ka ã mẽni wejje mã akapêr anẽ.

**Měni xaptàr nywjaja kot tanhmã amnhĩ nhĩpêx to kaxyw
mẽ hã kãm karõ**

5Nẽ mẽni xaptàr nywjê mã anẽ kê mẽ tãm hamaxpêr pê tãm amnhĩ nhĩpêx o pa.

Nẽ mẽ òrkwy kamã àpênh mex o pa.

Nẽ mẽ mjên kapêr ma nẽ hkôt amnhĩ nhĩpêx.

E. ã mẽni xaptàr nywjê mã karõ anẽ. Kojã mẽ ã amnhĩ nhĩpêx anhỹr o pa hãmri nhũm mẽ piitã mẽ kot amnhĩ nhĩpêx ã mẽ omu nẽ mẽ harênh o:

—Tirtūm kapērja mex kumrēx. Mē kot hkôt amnhī nhīpêx o mē pa xwÿnhjaja na htem tām amnhī nhīpêx mex o pa. Anē.

**Měmy xàptàr nywjaja kot tanhmā amnhī nhīpêx to kaxyw
mē hā kām karō**

Wam Ximotre 4.12; Sikūn Ximotre 2.22; Wam Pêtre 5.5

6Nē kēr ka mēmy xàptàr nywjê mā anē kê mē mēmoj punuj pē amnhī to htÿx o pa. Mē hamaxpēr punuj nē mē kot tanhmā amnhī tomnuj to pē amnhī to htÿx o pa.

7Nē kēr ka ajaxwÿja tām amnhī nhīpêx rāhā ho ri mē hkôt apa Xitre. Mē kot ja hā apumunh nē akôt amnhī nhīpêx o pa kaxyw. Nom kēr ka tanhmā mē ahkre hto hkwÿm ri tanhmā amnhī nhīpêx to hkêt nē. Ām Tirtūm ā apijaam o akatāt kôt mē kām kapēr o mē ahkre pē tām amnhī nhīpêx o ri apa.

8Nē kēr ka tām akapēr rāhā ho ri apa. Kēr kê mē kām mē pahkurē xwÿnhjaja ja hā ama nē amnhī kamā hpijaam hāmri nē apē Kris kwÿ hā tanhmā ato kapēr punuj to hkêt japēr.

**Mē kām mē àpēnh xwÿnhjaja kot tanhmā amnhī nhīpêx to kaxyw
mē hā kām karō**

Epes 6.5-8; Korosē 3.22-25; Wam Ximotre 6.1-2; Wam Pêtre 2.18-25

9Nē kēr ka mē kām mē àpēnh o mē pa xwÿnhjê mā anē kê mē ò patrāw kām hprām xà hkôt amnhī nhīpêx o pa.

Jao mē kapēr ma nē hkôt amnhī nhīpêx mex nē.

Nē amnhī tā tanhmā mē kām kapēr punuj to hkêt nē.

10 Nē kê mē kēp mēmoj to àhkīnh kêt nē.

Nē tām mē hipêx rāhā nē.

Nē kām hkukrêx jamār mex o pa.

Koja mē ā amnhī nhīpêx anhÿr o pa nhūm mē ò patrāw amnhī tā mē omu nē mē ŷ hā hkīnh nē pa. Hāmri nē hamaxpēr o:

—Hêxta waa nē. Inhmā àpēnh xwÿnhhta na hte inhmā àpēnh mex o pa. Na hte ixkukrêx nē ixkrit jamār mex nē ixpê mēmoj to àhkīnh kêt nē. Nà mē kot Tirtūm kapēr kôt amnhī nhīpêx o mē pa xwÿnhjaja na htem tām amnhī nhīpêx o pa. Pēr Tirtūm kapēr ām hāmri na. Ām mex o mex. Anē.

E Xitre kēr ka mē kām mē àpēnh xwÿnhjê mā ā mē kot amnhī nhīpêx anhÿr ā karō.

Tanhmā Jejus kām mē pajapê xàj amnhī nhīpêx to hā harēnh

Epes 2.8-10; Wam Tesarōn 1.9-10

11Nē Tirtūm kot mēmoj to mē pakutā nojarêt rāhā ho pa jakamā na hte mē pahte Kra hkôt amnhī xunhwÿr xwÿnhjê ho hkra pu mē nhÿrmā

wa kuri pahťir tũm nẽ papa ho papa. 12Na hte ă mẽ pamă kapẽr o amnhĩrĩt anẽ nẽ mẽ pamă:

— E kър ka mẽ apê ixkra hă tăm amnhĩ nhĩpêx răhă ho ri apa nẽ axte tanhmă amnhĩ tomnuj to nẽ tanhmă ajamaxpър punuj to hkêť nẽ. Mẽ ate amnhĩ tomnuj pê amnhĩ to htỳx nẽ ixkapър kôt pix mă ri amnhĩ nhĩpêx răhă nẽ. Anẽ.

13Na pu htem ă amnhĩ nhĩpêx anhър o papa jao pahkĩnh nẽ mẽ papytăr xwỳnh Jejus Kris jamăr o papa. Koja nhърmă mẽ panhõ Tĩrtũm xihtỳx xwỳnhja akupỳn mẽ pahwър kumẽ pu mẽ mex o mex ă omu.

14Na pre Jejus amnhĩ grõnh kôt mẽ pahwър wrỳ nẽ mẽ pahpiită mẽ pahte amnhĩ tomnuj pănhă amnhĩrer kaxyw htyk o Tĩrtũm mă amnhĩrer pa. Mẽmo kaxyw na pre ă mẽ panê amnhĩ nhĩpêx anẽ? Nă mẽ pahpê hkwỳja na kăm hprăm. Nẽ mẽ pahte tăm ri Tĩrtũm kapър kôt amnhĩ nhĩpêx o papaja na kăm hprăm. Nẽ mẽ pahte urăk nẽ mẽ piită mẽ kută panojarêť răhă ho papaja na kăm hprăm. Jakamă na pre ă mẽ panê amnhĩ nhĩpêx anẽ.

15E Xitre. Ixte mẽmoj tă amă karõja kър ka ho Kris kwỳjê jahkre mex o apa kê mẽ ama nẽ kapър kôt amnhĩ nhĩpêx o pa. Nhũm mẽhõ tanhmă amnhĩ tomnuj to ka hă omu nẽ Tĩrtũm nhỳ hă tanhmă nê kăm akapър to kê axte hkêť nẽ. Tă măn ka inhma. Kър ka ă Kris kwỳjê jahkre mex o apa anẽ.

Tanhmă Kris kwỳ kot amnhĩ nhĩpêx to hă mẽ kăm karõ

Rõmăn 13.1-10; Epes 2.1-10

3 1Nẽ kър ka Kris kôt akwỳjê mă anẽ kê mẽ ho amnhĩptăr xwỳnhjê kapър ma nẽ mẽ hkôt amnhĩ nhĩpêx o pa. Nẽ mẽmoj to mẽ kută nojarêť răhă ho pa.

2Nẽ mẽ kăm anẽ kê mẽ tanhmă hkwỳjê mă kapър punuj to ho pa hkêť nẽ. Rỳ mẽmoj tă mẽ kăm ăkjêr kêť nẽ. Kê mẽ tăm mẽ hipêx nẽ mẽ kamă ukap_rĩ pê mẽ ho mex răhă ho pa. Na hte ă Kris kwỳjaja axpên nhĩpêx o pa anẽ. 3Kormă mẽ pahte hkôt amnhĩ xunhwър kêť ri na pu prem ă amnhĩ nhĩpêx anhър kêť nẽ. Na pu prem Tĩrtũm mă pajamaxpър kêť nẽ kapър kôt ri amnhĩ nhĩpêx hkêť nẽ. Nẽ amnhĩ tomnuj pix kukamă pajamaxpър o ri papa. Nẽ amnhĩ pix kukamă pajamaxpър. Jao mẽ pamă pam amnhĩ nhĩpêx prăm xà kôt pix mă tanhmă amnhĩ nhĩpêx to ho ri papa. Nẽ axpên tomnuj nẽ. Nẽ axpên kăm pagryk răhă ho papa. ă mẽ pahte amnhĩ nhĩpêx anhър ho papa jakamă nhũm pre mẽ piită kăm mẽ pahkĩnh kêť nẽ. Pu mẽ pajaxwỳja pamă mẽ hkĩnh kêť nẽ.

Tanhmă Tĩrtũm kot mẽ pahto mex to hă harênh

Rõmăn 5.6-8; Epes 2.4-10

4Tă pu prem Tĩrtũm kêp mẽ papytăr xwỳnh ă harênh ma. Kot tanhmă

mě panê amnhĩ nhĩpêx to hã harênh ma nê mex o mex nê mẽ pakamã ukaprĩ hã harênh ma. 5-6Hãmri nê amnhĩ kaxyw hkôt pajamxpêr nê hkôt amnhĩ xunhwỳ nhũm amnhĩ tã mẽ pahpumu nê mẽ pahto hkra. Nom mẽ pahte tanhmã amnhĩ to mex to hã mẽ pahpumunh kôt mẽ pahto hkra hkêt nê. Mẽ pahte tanhmã amnhĩ to mex tore hã. Na pre mẽ pakamã ukaprĩ nê ã mẽ papytâr anê. Tã tanhmã na pre mẽ papytâr to wehe? Nà na pre Jejus Kris kukwak ri te kot mẽ panê mẽ pahte amnhĩ tomnuj piitã kuhõnh par pyræk o mẽ panhĩpêx. Hãmri nê mẽ pahwỳr amnhĩ Karõ rê nhũm mẽ pahwỳr agjê nê mẽ pamã mẽ pahte amnhĩ nhĩpêx nyw gõ. ã na pre Tĩrtũm Jejus Kris kot mẽ panê htyk kukwak ri mẽ pahto mex rax anê hãmri nê mẽ pahwỳr amnhĩ Karõ rênh anê. 7Tã mẽmo kaxyw na pre ã mẽ pahto mex anê? Nà kãm mẽ pajapê jakamã na pre ã mẽ panhĩpêx anê. Mẽ pahte amnhĩ tomnuj xwỳnh tã kãm mẽ pajapê htỳx nê kãm tanhmã mẽ pahto hprãm kêt nê. Nê mẽ pahwỳr Kra Jejus mẽ nhũm wrỳ nê mẽ pahte amnhĩ tomnuj pãnhã mẽ panê ty. Jakamã mẽ pahte amnhĩ kaxyw hkôt pajamxpêr nê hkôt amnhĩ xunhwỳr xwỳnhjaja Jejus kukwak ri mẽ pahpê Tĩrtũm kraa. ã na pre Jejus mẽ pahto mex anê. Jakamã kot puj mẽ nhỹrmã Tĩrtũm mẽ wa kuri pahťir tũm nê pamex nê papa ho papa. Koja wa nhỹrmã ã mẽ pahto mex anê.

8Ãm hãmri na pa amã ã ja jarênh anê Xitre. Jakamã kwa kêr ka inhma nê inhmar tỳx nê. Nê ho amnhĩ kaxyw Tĩrtũm kôt mẽ hamaxpêr xwỳnhjê jahkre mex o ri apa. Kê mẽ amar xà hkôt tãm ri amnhĩ nhĩpêx o pa.

9Nê mẽ kot htỳx ri mẽmoj tã axpên mã àkjêr o mẽ pa xwỳnhjaja kêr ka mẽ hkôt apa hkêt nê. Nê mẽ hukamã mẽ higêt kôt apa hkêt nê. Rỳ finat Mojes kot Tĩrtũm nhỹ hã kapêr ã axpên mã mẽ àkjêr xwỳnhjê hkôt apa hkêt nê. Na htem ã ri axpên mã àkjêr anhỹr o pa nê tãm amnhĩ nhĩpêx kêt nê.

10Nê koja mẽ akwỳjê hõ amnhĩ krã hkôt tanhmã hkwỳjê mã kapêr to nhũm mẽ kuma nê hã axpên mã akir nê axpên pê pikjêr kaxyw. Ka ja hã omu nê ã kapêr anhỹrja nê kãm akapêr kê axte hkêt nê. Hãmri nhũm ama nê ãm ama nê arĩ ã mẽ kãm kapêr anhỹr japêr ka axte nê kãm akapêr. Tã ra ate nê kãm akapêr o axkrut tã nhũm arĩ ã kapêr anhỹr o axkrunêpxi japêr ka ja hã omu hãmri nê mẽ amnhĩ nê hano kê axte mẽ apê Kris kwỳjê hkôt ri pa hkêt nê. 11Ã mẽ kot amnhĩ nhĩpêx anhỹr o mẽ pa xwỳnhjaja na mẽ ra Jejus wỳr pry kaga nê htỳx ri tanhmã amnhĩ tomnuj to ho pa. Nê ã amnhĩ nhĩpêx anhỹr o pa jao kêp Kris kwỳ hkêt ã amnhĩ to amnhĩrĩt.

Pawre kot kagã jatur xà kamã tanhmã Xitre mã kapêr to

12Nê kot paj tokyx ma Nĩkop wỳr mõ. Kêr pa tokyx hwỳr pøj nê amgrã pê krĩ nhõ xwỳnhjê hkôt ixpa. Jakamã kot paj tokyx ma awỳr

Atēmti rỳ Xikitre mẽ. Kê mỗ nê awỳr pỏj ka tokyx tanhmã amnhĩ to hpa nê man ixwỳr mỗ pu mẽ Nìkop kamã axpẽn pumu.

13Nê ota mẽ akuri Apor mẽ axiwôkat Jêntija. Kojã wa mẽmo arĩgro hã ma krĩ hỏ hwỳr nojarêr ka wa kãm mẽ apkur xà hwỳr gỏ kê wa ma ỹ kamã mỏr kêt nê.

14Nê kêr ka Kris kwỳjê mã anê kê mẽ arĩ ỏrkwỹ pix kãm hkrĩ ho hkrĩ hkêt nê. Kê mẽ tanhmã axpẽn to mex to ho axpẽn kỏt pa. Nhũm mẽhỏ kêp amrakati kê mẽ tanhmã ho ajuta hto. Mẽ kãm anê kê mẽ ả axpẽn nhĩpêx anhỹr o pa.

15Nê ota jar Kris kỏt pahkwỳjê piitã awỳr hpêr mẽ Xitre. Nê kêr ka atar Kris kỏt mẽ pahkràmnhwỳjê mã mẽ ijarê.

E ảm ja pix. Kê Pahihti Jejus mẽ akutã nojarêr rãhã ho pa. Ixpê Pawre na pa amã ả ixkapêr nê hã kagà nê awỳr mẽnh anê.

Piremõ

Pawre kot Piremõ hwÿr kagà nê mênh

Pawre na pre kagàja nhípêx nê hkràmnhwÿ Piremõ hwÿr kumê. Na pre Piremõja amnhím kãm àpênh xwÿnh Onesti japrô. Kàxpore ho haprô nhúm amarí kãm àpênh o pa. Tã tanhmã hamaxpêr to nê hkaga nê ma umaj krí hô hwÿr hprôt nê tèn amúxu nê kamã pa ho pa. Hãmri nê Pawre pumu nê kãm amnhí jarê. Pawre arí kêp prês nê hkrí ho hkrí nhúm Onesti omu nê kãm amnhí jarê. Hãmri nhúm Pawre kãm Jejus jarê nhúm kuma nê hkôt amnhí xãm kurê kumrêx. Hãmri nhúm Pawre ja hã omu nê hkràmnhwÿ Piremõ mã kagà nhípêx nê kamã Onesti xyr pê kãm kapêr. Hãmri nê hipêx pa nê Onesti mã kugô nê ma akupÿm ô patrãw Piremõ wÿr kumê nhúm ma mô. Nhúm Pawre kagàja kamã kãm kapêr nê kãm:

1Pa ixkràmnhwÿ Piremõ? Xà amex? Ixpê Pawre na pa awÿr kagà nhípêx nê kumê. Apê Kris kôt ixtô hã inhmã akính. Na ka hte ixpyrà nê Kris mã tanhmã amnhí nhípêx to ho apa. Tã ot pa awÿr kagàja kamã ixpêr mê. 2Amã nê anhôrkwÿ kamã Tirtúm kapêr mar kaxyw mê kêp Jejus kwÿ hã mê pikuprôn h xwÿnhjê hwÿr. Nê Kris kôt pahtôx Apti mê Akip wa hwÿr kumê. Akipja na hte mê pahpyrà nê Pahihti Jejus mã tanhmã amnhí nhípêx to ho pa.

3Na pa hte mê ato Mëpanhípêêxà maati Tirtúm mê Pahihti Jejus Kris wa hwÿr rãhã ho ri ixpa. Kot mëmoj to mê akutã nojarêr rãhã nhúm wa ÿ hã mê ajamakêtkati nê axàmnhix apa ho apa kaxyw.

Pawre kot Piremõ nhÿ hã hkính ã harênh

4-5Na pa pre ajarênh ma Piremõ. Na htem xatã tanhmã inhmã ajarênh to nê ajarênh o:

— Hêxta waa nê. Piremõ na hte amnhí kaxyw Pahihti Jejus Kris kôt hamaxpêr tÿx nê kãm mê ixpê Kris kôt hkwyjê piitã hkính pê tanhmã mê ixto mex to ho ri mê ixkôt pa.

Anhÿr o inhmã ajarê pa mê kuma nê anhÿ hã ixkính nê ato Tirtúm wÿr rãhã ho ixpa nê ato hwÿr o:

—Pa Tirtũm. Na xep hte Piremõ kãm akĩnh tỳx nẽ akwỳjê ho mex rãhã ho pa. ãm hãmri na hte ã mẽ hipêx anhỹr o pa. 6Na xep mẽ piitã mẽ kãm tanhmã Jejus kot mẽ inhnẽ amnhĩ nhĩpêx to hã harênh o ri mẽ hkõt pa. Jakamã kêr ka tanhmã mẽ kot mar xwỳnhjê hkrã hto kê mẽhprĩ hã mar tỳx nẽ Kris kot tanhmã mẽ ho mex to hã amnhĩ tã omu.

Anhỹr o ato kuwỳ. 7Ate Kris kwỳjê ho mex o apa jakamã te ate pa ixto mex pyrãk Piremõ. Na htem anhỹ hã hkĩnh nẽ pa. Pa ijaxwỳja ajarênh ma nẽ anhỹ hã ixkĩnh tỳx nẽ jar mẽ hagjênh xà kamã ixkrĩ.

Piremõ kot Onesti kamã ukapřĩ hã Pawre kot kãm karõ

Rõmãn 15.7; Epes 4.31

8Nã ixte amã mẽmoj jarênhja tanhmã kute hkêt. Kot paj ãm amã mẽmoj jarẽ nẽ hã awỳ. Nom kot paj Kris nhỹ hã amã tanhmã hã karõ hto hkêt nẽ. 9Kot paj ãm pahte axpẽn to pahkrãmnhwỳ hã hã awỳ. Ra ixwej tỳx nẽ Kris ã arĩ mẽ hagjênh xà kamã ixkrĩ htã mẽmoj tã awỳ ka inhma nẽ inhmã ho anhỹr japêr ko.

10E amã àpênh xwỳnh Onestija na ixte amã harênh kaxyw. Na pre man ixwỳr mõ. Ixpê prês nẽ ixkrĩ nhũm ixwỳr mõ. Pa omu nẽ kãm Jejus jarẽ nhũm inhma nẽ pahpyrà nẽ amnhĩ kaxyw hkõt hamaxpêr nẽ hkõt amnhĩ xãm. Jakamã te kêp ixkra pyrãk. Hãmri nẽ ixto ajuta mex o pa. 11Xep kormã Jejus kõt amnhĩ xãm kêt ri na pre amã àpênh mex kêt nẽ. Nẽ kãm kaga nẽ htỳx ri tanhmã àpênh to ho pa. Tã ra Jejus kõt amnhĩ xãm hãmri nẽ katat kõt inhmã àpênh mex o pa. Nẽ ixto ajuta mex nẽ. Koja akupỳm amã apê hãmri nẽ amã àpênh mex nẽ.

12Jakamã ot pa akupỳm awỳr kumẽ ixkrãmnhwỳ. Nom inhmã hapê jakamã koja ma akupỳm mõ pa ho ama nẽ. Tã kot paj akupỳm awỳr kumẽ. 13Kot jar ixri arĩk nẽ apãnhã tanhmã ixto ajuta hto ho paja na inhmã hprãm. 14Jakamã kot kaj amã akupỳn ixwỳr mẽnh prãm nẽ mãmri ixwỳr amẽ. Nom ixte ja pumunh kêt. Kam nẽ amã hprãm xà hkõt tanhmã kãm akapêr to. Kãm anẽ kê akuri arĩk nẽ amã àpênh o pa rỳ akupỳn ixwỳr amẽ. 15Nom konẽn. Mãn akupỳm awỳr mõi nẽ kêp Kris kõt akwỳ hã amã àpênh mex kaxyw na pre Tirtũm ixwỳr kumẽ nhũm ixwỳr mõ nẽ ixri Jejus kõt amnhĩ xãm nẽ ixri pa hã mytwrỳ hkwỳ hapêx pa akupỳm awỳr kumẽ. 16Nom ra kêp amã àpênh xwỳnh pix kêt mããnẽn kêp Kris kõt atõõ. Jakamã kot kaj wa atar axpẽn kõt Pahihti Jejus kõt tãm amnhĩ nhĩpêx o ri apa. Nom mããnẽn kêp ixkrãmnhwỳ mex ã inhmã hapêê. 17Jakamã kot kaj ixpê Kris kõt akrãmnhwỳ hã ijarẽ hã kot kaj mããnẽn inhmã ho mex o apa.

18Nẽ wam amã àpênh o pata ã mãn pre apê mẽmoj to ahkĩ rỳ akàxpore hkwỳ ho ahkĩnh japêr. Tã pa kot paj hpãnhã amã amnhĩre. Ka inhmã tanhmã kàxpore jarênh to pa amã amnhĩre. 19Ixpê Pawre kot paj tanhmã kot ato tewẽn toja pãnhã amã amnhĩre. E pa amnhĩ nhĩhkra ho

ã amã amnhĩ jarēnh ã kagà anē. Nom ajaxwỳja na ka tanhmã ixto tewēn to Piremõ. Na pa pre amã Jejus kot mẽ panê htyk ã harê ka pre inhmar xà hkôt hkôt amnhĩ xãm. Jao ixpyrà nē atĩr tũm nē apa ho apa mã xwỳnhta pãnhã te ate ixto tewēn pyràk.

20E kwa ixkràmnhwỳ. Ixpyrà nē apê Kris kwỳ jakamã kêr ka ixkamã axukaprĩ hã inhmã Onesti ho mex nē. Kêr pa ja hã ajarēnh ma nē ixkĩnh nē tãm ijamaxpēr. 21Nà ra ixte apumunh mex kēnã. Kot kaj ixte hã awỳrta kôt hipêx. Ja kaxyw na pa amã kagàja nhĩpêx nē awỳr kumê. Nom kot kaj ãm ja pix ho anhỳr kêt nē. Kot kaj ixte hã awỳrja kôt amnhĩ krã hkôt tanhmã ho mex to. Nà kot kaj ho anē.

Pawre kãm Piremõ hwỳr mõi nē omunh prãm ã harēnh

22Nē Tĩrtũm kot mẽ awỳr inhmēnh kaxyw mẽ ate ixto hwỳr o apa jakamã koja apu tokyx ma mẽ awỳr inhmē. Jakamã kwa kêr ka ixkutêp tanhmã mẽmoj to mex to. Kêr pa mẽmo arĩgro hã mõi awỳr pøj ka ra ixkutêp tanhmã amnhĩ to hpa nē ãm ixpix kãm ajamak o apa.

23Nē ota Epasja awỳr hpēr mẽ. Na hte ixpyrà nē Jejus Kris ã mẽ hagjēnh xà kamã kêp prēs nē hkrĩ ho hkrĩ. 24Nē Makre nē Aristak nē Tēmti nē Rukre mẽ awỳr hpēr mẽ. Na htem ixpyrà nē Kris mã tanhmã amnhĩ nhĩpêx to ho pa nom ixrom mẽ kêp prēs kêt.

25E kê Pahшти Jejus Krisja akutã nojarêt rãhã ho pa. Tã ãm ja pix. Ixpê Pawre na pa amã kagà nē awỳr kumê.

Eprêw

Ijaew hwÿr kagà

Kagà ja na pre Ijaew ò amnhĩ kwÿjê mã hipêx nom mẽ pahte hipêx xwÿnh nhĩxi mar kêt. Na pre tanhmã hamaxpêr to nê amnhĩ nhĩxi hã kagà hkêt nê. Apu Pawre rÿ apu axtem mēhōja na pre hipêx. Ijaew kwÿjaja uràk nê Jejus kôt amnhĩ xunhwÿr xwÿnhjê mã na pre hipêx nê mẽ hwÿr kumê. Ijaewjaja mẽ hixi hō pê Eprêw. Jakamã nhũm kagà nhĩpêx xwÿnhja mẽ hwÿr hipêx nê kumê. Nê kamã mẽ kãm mẽmoj jarênh rax nê tanhmã Jejus jarênh to.

Nê mẽ hkwÿjaja hkwÿjê hkĩnhã kãm Jejus prãm kêt jakamã na prem hkaga nê mẽ kot amnhĩ nhĩpêx tũm o ujanãr prãm xàj tanhmã mẽ homnuj to ho pa. Jakamã nhũm kagà nhĩpêx xwÿnhja tanhmã ja hã mẽ kãm kapêr to.

Nê na pre tanhmã Tirtũm nhõrkwÿ kaàkre hã kagà hto. Nê kaxkwa kamã òrkwÿ mexja nhũm tanhmã hã kagà hto nê mex o òrkwÿ kaàkre jakrenh ã harê.

Nê mẽ kot Jejus ã amnhĩ xà htÿx kamã hamak o pa htã mẽ kot tee ri ja hã amnhĩ pumunh nê Jejus kaga nê mẽ hkurê kamã hihtÿx nê. ã mēhōja mẽ kãm kapêr anê nê hã kagà nê mẽ hwÿr kumê. Nê mẽ kãm kapêr o:

1 1Pa Kris kôt ixkwÿjaja? Xà mẽ amex? E ot pa mẽ amã kagà nhĩpêx nê mẽ awÿr kumê. Amnepê m Tirtũm na pre mẽ panhĩgêjtê hwÿr ÿ hã kapêr jarênh o ri mẽ pa xwÿnhjê rē nhũm mẽ xatã mẽ kãm kapêr jarênh o ri mẽ hkôt pa. Ahpÿnhã tanhmã mẽ kãm kapêr to ho amnhĩrit o mẽ hkôt pa. Nhũm Tirtũm xatã mẽ hkanrêhã mẽ hkra nê mẽ htãmnhwÿjê hwÿr mẽ hkwÿjê rē nhũm mẽ kãm kapêr jarênh o ri mẽ hkôt pa. Nom mẽ kãm kapêr piitã harênh kurê kumrêx kêt nê. Na prem ãm hkwy pix jarê. Tã nhũm hpãnhã mẽ hkwÿjaja wamtajê mÿr pê mẽ hwÿr mra nê axte mẽ kãm hkwy jarênh o ri pa. Jao ra mẽ kãm harênh jatur xãm mēnh o mō. 2-3Tã nhũm Tirtũm Kraja mẽ pahwÿr wrÿ nê mẽ pamã kapêr jarênh jatur xãm kumê. Kêp Tirtũm Kra jakamã te kot amnhĩ nhĩpêx pyrã nê pa. Uràk nê mex o mex. Nê wa hihtÿx xàja tipxi. Nê wa àhpumunh tÿxja mãânên tipxi. Jakamã mẽ pahte pano ho Tirtũm pumunh kêt tã Jejus pumunh pê te mẽ pahte Tirtũm pumunh pyrãk. Uràk nê kot amnhĩ to rax o mẽ pahpiitã mẽ pajakrenh par. Amnepê m kormã mẽmoj kêt ri nhũm Jejus Tirtũm kukwak ri mẽmoj piitã ho kator

pa. Tã koja Tirtũm nhỹrmã kãm mẽmoj piitã õr pa. Kaxkwa kamã mẽmoj piitã nẽ jar pika piitã hkõt nhũm kãm piitã õr pa.

Nẽ Jejus xàhpumunh xà pix kukwak ri na mẽmoja arĩ rãhãã. Na pre mẽ panê mẽ pahte amnhĩ tomnuj piitã hpãnhã amnhĩrer par kaxyw mẽ panê ty. Hãmri akupỹm htĩr hãmri nẽ ma akupỹm kaxkwa hwỳr api. Tirtũm xihtỳx o hihtỳx xwỳnhja wỳr akupỹm api. Nẽ õ krĩ kamã upõk rũm pahi maati hkrĩ xà hã kuri hkrĩ ho hkrĩ. Nẽ ìhkõ hã mẽ pahto amnhĩptàr rãhã ho hkrĩ.

Jejus mẽ Tirtũm kapẽr o mẽ wrỳk xwỳnhjẽ jarẽnh

4-5Nẽ Jejus kot amnhĩ to rax o Tirtũm kapẽr o mẽ wrỳk xwỳnhjẽ jakrenh jakamã na pre ã Tirtũm kãm kapẽr anẽ nẽ kãm:

Na ka amnhĩ to rax o mẽ kot ixkapẽr o mẽ wrỳk xwỳnhjẽ jakre.

Mẽ kot inhmã tanhmã amnhĩ nhĩpêx to ho mẽ pa xwỳnh na mẽ.

No mẽ kurom apê Ixkra kumrêx jakamã amex o ate mẽmoj piitã hakrenh par.

Nẽ apê pika nhõ xwỳnhjẽ hwỳr ixte amẽnh mã xwỳnh na ka. Nã apê Ixkra kumrêx.

Kot paj jarãhã ixpê anhĩpêxã hã mẽ piitã mẽ kãm amnhĩ to amnhĩrit. Pa na ixpê anhĩpêxã.

Anhỹr o Kra Jejus mã kapẽr. Na pre kapẽr o mẽ wrỳk xwỳnhjẽ mã ã kapẽr anhỹr kêt nẽ. Jejus mã pix mã ã kapẽr anẽ.

6Nẽ koja nhỹrmã akupỹn mẽ pahwỳr Kra mẽnh kaxyw hãmri nẽ kapẽr o mẽ wrỳk xwỳnhjẽ mã kãm:

E ota Ixkrata. Ixkra kumrêx na. Kot amnhĩ to rax o mẽ piitã mẽ hakrenh par.

Jakamã kêr ka mẽ apiitã kutã arõrõk nẽ kãm mex o mex ã harẽ.

Anhỹr o mẽ kãm kapẽr. 7Nẽ kapẽr o mẽ wrỳk xwỳnhjẽ na pre axtem tanhmã mẽ harẽnh to nẽ mẽ harẽnh o:

Ixkapẽr o mẽ wrỳk xwỳnhjaja na pa hte nhỹhỹm mẽ kurẽ nhũm htem inhmãr xà hkõt ma nhỹhỹm mra nẽ inhmã tanhmã amnhĩ nhĩpêx to.

Te ixte ma nhỹhỹm kõk nẽ kuwyja mẽnh nhũm ixkapẽr kõt nhỹhỹm mõrja pyrãk.

Anhỹr o mẽ harẽ. 8No ã Krata jarẽnh anhỹr kêt nẽ. Na pre tanhmã kãm kapẽr to nẽ amnhĩ pyrã nẽ kêp Tirtũm ã harẽ nẽ kãm:

Pa Tirtũm? E ka kot kaj mẽ ho amnhĩptàr rãhã ho akrĩ. Nẽ akatàt kõt mẽ ho amnhĩptã.

9 Koja mẽ tãm amnhĩ nhĩpêx ka ja hã mẽ omu nhũm ja amã mex nẽ.

No koja mẽ tanhmã amnhĩ tomnuj to ka ja hã mẽ omu nhũm ja apê omnuj nẽ. Mẽ kot tanhmã amnhĩ tomnuj to ho paja na omnuj tỳx.

Tã ate inhmã hprãm xà hkôt amnhĩ nhĩpêx jakamã na pa mẽ
kaxyw axãm ka akĩnh kãm mẽ ho amnhĩptà.

Ixpê anhõ Tĩrtũm na pa ã amã ixkapêr anê. Anê.

10Hãmri nê kãm:

Pa Pahihti. Nà amnepê mormã mẽmoj kêt ri na ka pre
ixkukwak ri pika nê kaxkwa ho akato. ãm hãmri na ka pre
ã amnhĩ nhĩpêx anê.

11 Tã nom koja nhỹrmã hamê wa hapêx pa. ãm kaxipix kot kaj
kurom arĩ arãhãã nê aa ajapêx kêt nê.

Kaxkwa nê pika koja wa nhỹrmã te ixkre hã pô htũm kot amnhĩ
nhĩpêx pyrãk.

12 Kot kaj wa hipêx o te mẽ kot ixkre nê pô htũm mã hikranh par
nê hpãnhã hã nyw janhôr pyrãk.

Jao pika nê kaxkwa htũm o ajapêx pa nê hpãnhã nyw nhĩpêx.
Kaxkwa nyw nhĩpêx nê pika nyw nhĩpêx.

Nom kot kaj pika nê kaxkwa tũmta pyrã nê aa awej nê axirerek
kêt nê.

Kot kaj arĩ anyw nê axihtỳx rãhã apa ho apa nê aa ajapêx kêt nê.
Arãhã atĩr tũm nê apa ho apa xwỳnh na ka.

13 E jar inhĩhkô hã nhỹ nê inhmã mẽ ho amnhĩptàr o akrĩ.

Kot paj mẽ kãm akurê xwỳnhjê pynênh pa nê man awỳr mẽ o
mra nê anhĩhkram mẽ haxàr pa. Anê.

ã na pre Tĩrtũmja Kra Jejus mã kapêr anê. No kapêr o mẽ wrỳk xwỳnhjê
mã ã kapêr anhỹr kêt nê.

14E kot paj hpãnhã ixprĩ hã mẽ amã Tĩrtũm kapêr o mẽ wrỳk
xwỳnhjê jarê ka mẽ inhma. Tĩrtũm mã na htem tanhmã amnhĩ nhĩpêx
to ho pa. Na hte nhỹrmã kuri mẽ htĩr tũm nê mẽ pa mã xwỳnhjê hwỳr
mê kurê nhũm mẽ ma mẽ hwỳr wrỳ nê tanhmã mẽ ho ajuta hto ho pa.
Na htem ã amnhĩ nhĩpêx anhỹr o pa.

Mẽ pahte Jejus kaga hkêt ã mẽ pamã karõ

2 1Tã ã Tĩrtũmja Kra kot amnhĩ to rax o kapêr o mẽ wrỳk xwỳnhjê
jakrenh ã harênh kot anhỹr jakamã kwa kêr pu mẽ kapêr mar tỳx
rãhã nê hkôt pix mã amnhĩ nhĩpêx o papa. Kot pu mẽ ho anhỹr kêt hãmri
nê gaa nê hkaga. 2Na pre Tĩrtũm kapêr o mẽ wrỳk xwỳnhjaja amnepê
mã mẽ panhĩgêtjê hwỳr wrỳ nê Tĩrtũm nhỹ hã mẽ kot tanhmã amnhĩ
nhĩpêx to ho pa hã mẽ kãm karõ nê ma akupỳm api. Nê katàt kôt ri mẽ
kãm Tĩrtũm kapêr jarênh o pa. Hãmri nhũm mẽ kot hkôt amnhĩ nhĩpêx
nê mar mex xwỳnhjaja nhũm mẽmoj mẽ kãm mex nê. No nhũm mẽ kot
mar nê ãm mar xwỳnhjaja koja mẽmoj mẽ kêp omnuj nê. 3Koja nhỹrmã
mẽmoj mẽ kêp omnuj tỳx kumrêx nhũm mẽ tee ri amnhĩ tã omu nê tee
ri kêp amnhĩptàr prãm kaprỳ nê mex kêt nê pa. Nom mẽ kot Tĩrtũm

kapêr mar tÿx xwÿnhjaja koja mêmôj mē kām mex o mex. Koja Tirtūm amnhī katut kôt mē kot amnhī tomnuj rēnh pa nē axte kām hamaxpêr kêt nhūm mē kuri htír tūm nē mex rāhā nē pa ho pa. Na pre Pahihti Jejus mē kot kapêr mar o kuhê xwÿnhjê kumrêx mā ã ja jarēnh anē nē mē kām:

— Nà kot kaj mē amnhī kaxyw inhmā ajamaxpêr nhūm Tirtūm ixtā mē apumu nē mē anē mē ate amnhī tomnuj piitā ho hapêx pa nē axte kām hamaxpêr kêt nē. Anē.

Hāmri nhūm mē kot kapêr mar nē hkôt mē pa ho mē pa nē xwÿnhjaja mar tÿx nē amnhī xô ri mē pamā harēnh o ri pa. Nē mē pamā:

— Nà ãm hāmri. Nà ã ja jarēnh kot anhÿr. Anē.

4Hāmri nē mē pamā aa mē pahte mêmôj pumunh kêt kwÿ ho anhÿr o ri mē pahkôt pa. Tirtūm Karô kot ja kaxyw mē ho mē àhpumunh tÿx jakamā nhūm mē ŷ hā ahpÿnhā tanhmā mē pamā amnhī nhîpêx to ho pa. Mē pahte ja hā mē omunh nē kamā pano pyma kaxyw. Nē ã mē pajamaxpêr anē nē pajamaxpêr o:

— Nà ãm hāmri na mē pamā ã Jejus jarēnh anē nē ŷ hā ã amnhī nhîpêx anhÿr o pa.

Anhÿr o pajamaxpêr kaxyw na prem ã mē pahkôt amnhī nhîpêx anhÿr o pa.

Mē pahpê Jejus tō nē htōx ã mē pajarēnh

Juāw 1.14; Rōmān 8.3-4; Piriapos 2.5-11; Korosê 2.9; Wam Juāw 4.2

5Nē na pre Tirtūm amnhī kukamā tanhmā amnhī jarēnh to nē nhÿrmā kot akupÿm mêmôj piitā ho nyw nē tām mêmôj piitā ho amnhîptār o pa hā amnhī jarē. No na pre kapêr o mē wrÿk xwÿnhjê mā ã mē kot amnhī nhîpêx anhÿr ã mē kām karô hkêt nē. Koja jajaja mē pahto amnhîptār o pa hkêt nē. 6Tirtūm kapêr ã kagà htūm kot ja jarēnh kot:

Kwa Tirtūm. Nà ãm hāmri na ka hte pika ja kamā ri mē ixpa xwÿnhjê jamār mex rāhā ho apa.

Akīnhā amarī ri mē ixpa xwÿnh tā amā mē ijapêê.

Nē mē ixkutā anojarêt rāhā ho apa.

7 Na ka hte tanhmā mē inhîpêx to pa mē te mē ixpê akapêr o mē wrÿk xwÿnhjê pyrāk.

Jao mē urāk nē akukwak ri mē inhmex nē ixpa ho ixpa.

Mē uràn mē ixàhpumunh nē ixihÿtÿx kêt tā mē inhmex nē ixpa.

8 Na ka pre ra ate mêmôj to akator xwÿnh piitā mē inhîhkram haxà.

Nà ãm hāmri na ka pre ã mē inhîpêx anē Tirtūm. Amex o amex.

Anē.

Na pre ra mêmôj piitāã mē panhîhkram haxà. Pika nē kaxkwa nē kapêr o mē wrÿk xwÿnhjaja nē mēkarōmnuti nē kot mêmôj piitāã hipêxja

nhũm mẽ panhĩhkram haxàr pa. Mẽ pahte ìhkô hã ho amnhĩptàr o papa kaxyw. No na pu mẽ kormã piitã ho amnhĩptàr kêt nẽ. 9No kêt Jejusja na Tĩrtũm mẽ pakurom ìhkram mẽmoj piitã haxàr par kumrêx. Kormã pika ja kamã ri pare ri na pre tanhmã amnhĩ nhĩpêx to nẽ Tĩrtũm kapêr o mẽ wrỳk xwỳnhjê hkĩnhã te amnhĩ to grire pyrã nẽ amnhĩ xà htỳx kamã hamak kãm ty. Tĩrtũm kãm mẽ pahto mex prãm xàj ã mẽ pahpiitã mẽ panê htyk anẽ. Tã nhũm Tĩrtũm akupỳm ho htĩr nẽ akupỳm amnhĩ wỳr ho api nẽ kêp Pahi Maati mex o mex ã harê. Na pre ã Jejusja mẽ panê amnhĩ nhĩpêx anẽ nhũm Tĩrtũm ja hã omu nẽ kukwak ri mẽ pahto mex nẽ.

10Nẽ Tĩrtũm kot mẽmoj piitã ho kator jakamã mẽmoj piitã õ na. Na pre mẽ pakukamã hamaxpêr o:

—Inhmã ixkra xohtô hprãm. Kot paj nhỹrmã man amnhĩ wỳr mẽ ho api kê mẽ ixri mex rãhã nẽ pa ho pa. Nà kot paj ã mẽ hipêx anẽ. Nẽ Ixkra Jejus koja kêp mẽ õ Pahihti. Koja mẽ uràk nẽ mẽmoj punuj pumunh o pa hãmri nẽ à htỳx kamã hamak o kêp mẽ õ Pahihti mã tãm. Anẽ.

11Na hte Jejus mẽ panê mẽ pahte amnhĩ tomnuj rê nẽ hpãnhã mẽ pamã mẽ pahte amnhĩ nhĩpêx nyw jagiê nhũm Tĩrtũm ja hã mẽ pahpumunh kôt mẽ pahto hkra. Kêp Jejus Nhĩpêêxã nẽ kêp Mẽpanhĩpêêxã maati jakamã nhũm Jejusja mẽ pahpê htô nẽ mẽ pahpê htôx ã mẽ pajarẽ nẽ mẽ panhỹ hã hkĩnh nẽ.

12Tĩrtũm kapêr ã kagã htũm ã mẽ pajarênh kot anhỹr. Kamã Jejusja Mẽpanhĩpêêxã maati mã mẽ pajarênh kot:

Koja ixtô nẽ ixtôxjaja akapêr mar kaxyw axpên wỳr akuprô pa
ma mẽ hkôt mra nẽ mẽ kãm akapêr jarê nẽ mẽ ìhkô hã
amex ã gre. Anẽ.

13Hãmri nẽ kãm:

Kot paj amnhĩ kaxyw akôt pix mã ijamaxpêr mex o ri ixpa. Anẽ.
Hãmri nẽ hpãnhã kãm:

Ot pa akrajê hkôt ri ixpa ho
ixpa.

Ka na ka pre mẽ kêp ixtô nẽ
ixtôx kaxyw inhmã mẽ
agõ.

Koja mẽ ixpyrà nẽ amnhĩ kaxyw
amã hamaxpêr rãhã ho pa
Tĩrtũm. Anẽ.

14Nẽ mẽ pahpê pika nhõ xwỳnhjaja na pu htem ãm ri panhĩ pix ã papa. Nẽ panhĩ kamã pahkamrô hã ri papa. Jakamã na pre Jejus kot mẽ panê htyk kaxyw mẽ pahwỳr wrỳ nẽ mẽ pahpyrà



Eprêw 2.12-13

nê ĩ ho mẽ pakamã kato. Tã mẽmo kaxyw na pre ĩ ho ĩ nê mẽ pahkôt pa? Nà ĩ ho htyk o Satanasti pê hihtÿx xà ho hapêx par kaxyw na pre ã amnhĩ nhĩpêx anê. Satanasti kêp mẽ kot amnhĩ tomnuj xwÿnhjê hpãm nê kêp mẽ htyk xwÿnhjê hpãm. 15Jakamã na hte kot mẽ pahtã ĩhkra pikamÿr pyrãk o mẽ panhĩpêx pu mẽ ÿ hã pamã pahtyk pyma nê ri papa. Tã ra Jejus kot mẽ pahwÿr wrÿk nê te kêp mẽ papytãr pyrãk o mẽ panhĩpêx jakamã pu mẽ tee ri pahtyk kukamã pajamaxpêr o ri pamã ma ho papa hkêt nê.

16Nê Tĩrtũm kapêr o mẽ wrÿk xwÿnhjê ho mex kaxyw na pre Jejus pika hwÿr wrÿk kêt nê. Mẽ panhĩgêt finat Apraãw pyrã nê mẽ panhĩ ho panhĩ xwÿnhjê ho mex kaxyw na pre wrÿ. 17Ijaew nhõ patrejaja na pre htem mẽ kot amnhĩ tomnuj mÿrapê mẽ hpãnhã Tĩrtũm mã mry hkwy pa nê hkamrô kapĩ nê mẽ ho Tĩrtũm wÿ. Kot hã mẽ omunh nê mẽ mex ã mẽ harênh kaxyw. Tã nhũm Jejus wrÿ nê mẽmo mryta pyrã nê ã mẽ panê hkamrô pikapĩr anê. Kaxyw na pre mẽ pahtõ maatija mẽ pahwÿr ĩ ho ĩ nê wrÿ nê mẽ pahpyrã nê ni nhõhy rũm kato. Jao kêp mẽ pahto Tĩrtũm wÿr xwÿnh maati. Na pre Tĩrtũm kãm hprãm xà hkôt mẽ panê mẽ pahte amnhĩ tomnuj pãnhã amnhĩrer pa. Tã kot mẽ pahpyrã nê mẽmoj punuj pumunh nê amnhĩ xà htÿx kamã hamak o pa jakamã kêp mẽ pakamã ukapĩr xwÿnh ã pixi mex na. 18Kormã htyk kêt ri na pre mẽ pahpyrã nê omnuj nê ri pa. Nhũm mẽkarõmnuti nhõ pahi kot tanhmã amnhĩ tomnuj to hprãm xaj tee ri hkôt kãm ahkrox o pa hkapyrÿ nhũm hkôt amnhĩ nhĩpêx kêt nê amnhĩ nê ho axtem nê. Jakamã koja Satanastija urãk nê tanhmã mẽ panhĩpêx to nhũm Jejus mẽ pahtã omu nê amnhĩ pyrã nê tanhmã kêp mẽ panhĩpêx to pu mẽ ÿ hã kutã amnhĩ to htÿx nê papa.

Jejus kot amnhĩ to rax o Mojes jakrenh ã harênh

Juãw 1.17-18

3 1E ixkrãmnhwÿjaja. Ra Tĩrtũm kot mẽ pahte kapêr mar nê tãm amnhĩ nhĩpêx o ri papa kaxyw mẽ pahto hkra jakamã kwa kêr ka mẽ Jejus kot tanhmã mẽ pamã amnhĩ nhĩpêx toja mã ajamaxpêr rãhã ho ri apa. Na pre Tĩrtũm mẽ pahwÿr kumê nhũm mẽ pahwÿr wrÿ nê Tĩrtũm kapêr o mẽ pajahkre ho ri mẽ pahkôt pa. Nê te kêp mẽ panhõ patre pyrã nê mẽ pahto Tĩrtũm wÿr o pa. 2Na pre Tĩrtũm finat Mojes kwÿ kaxyw Mojesja xãm nhũm kãm hprãm xà hkôt tanhmã mẽ hipêx to ho pa. Tã nhũm hpãnhã mẽ pakaxyw Kra Jejusja xãm nhũm Mojes pyrã nê Tĩrtũm kãm hprãm xà hkôt pix mã tanhmã mẽ panhĩpêx to ho pa. Hamẽ na pre wa Tĩrtũm jamaxpêr xà hkôt tanhmã kãm mẽ panhĩpêx to ho pa.

3Koja mẽhõ amnhĩm ixkre mex nhĩpêx nê hipêx pa nhũm hkwyjaja hwÿr mra nê omu nê mex kumrêx ã harê. Nom kot hipêx xwÿnhhta àhpumunh xà hkôt hipêx jakamã tãm na mex o kot ixkreta jakrenh. Ja

pyrà nê finat Mojes kot amnhĩ to rax tã nhũm Jejus kot amnhĩ to rax o kot hakrenh. Mojes te kêp ixkre nhĩpêxta pyrãk no Jejus te kêp ixkre nhĩpêx xwỳnhnta pyrãk jakamã kot amnhĩ to rax o kot Mojes jakrenh.

4Nê mẽ kot ahpỳnhã amnhĩ krã hkôt tanhmã ixkre nhĩpêx to jakamã kot hipêx xwỳnhnta na mex o ixkreja jakrenh. Tã ja pyrà nê Tĩrtũm kot mẽmoj piitã ho kator jakamã kot amnhĩ to rax o kot mẽmoj piitã ho kator xwỳnh jakrenh par.

5Nê finat Mojes na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nê ma kãm hkwỳjê piitã hkôt mẽ kãm kapêr jarênh o ri pa. Tĩrtũm tanhmã kot mẽ kãm kapêr tota kukamã nhũm mẽ kãm harênh o mẽ hkôt pa. No ãm Tĩrtũm mã tanhmã amnhĩ nhĩpêx to ho hpa xwỳnh pix na pre.

6Nê Kris haxwỳja na pre hte Tĩrtũm kãm hprãm xà hkôt tanhmã amnhĩ nhĩpêx to ho pa. Nom Mojes rom kêp Tĩrtũm Kra kumrêx jakamã kurom kêp mẽ panhõ Pahihti kumrêx. Tã kwa kêr pu mẽ kãm hprãm xà hkôt pix mã tanhmã kãm amnhĩ nhĩpêx to ho ri papa. Mẽ kot hã tanhmã mẽ panhĩpêx to htã pu mẽ ỹ hã mẽ kutã amnhĩ to htỳx nê papa nê pajamxpêr o:

—Nà ixpunuj nê ixpa htã kot paj ixpunuj rãhã ixpa ho ixpa hkêt nê. Koja nhỹrmã Tĩrtũm ixto mex kumrêx pa axte tanhmã ixpunuj to nê ixpa hkêt nê. Hêxta waa nê. Nà ja inhmã hprãm tỳx kumrêx.

Anhỹr o amnhĩ kukamã pajamxpêr o papa.

Mẽ pahte Tĩrtũm kaga hkêt ã mẽ pamã karõ

Wam Korõt 10.1-11; Jutre 5

7-8Amnepêm na pre mẽhõja tanhmã Tĩrtũm Karõ nhỹ hã kapêr to nê kapêr o:

E kêr ka mẽ Tĩrtũm kapêr mar tỳx o apa.

No ama nê ãm ama nê ri hã apa hkêt nê. Rỳ kapêr pê akrã hihtỳx o apa hkêt nê.

Mẽ akukamã mẽ anhĩgêjtaja na prem ã amnhĩ nhĩpêx anê nê Tĩrtũm kapêr pê hkrã hihtỳx o pa. Kapôt ã Mojes kôt mẽ pata ã na prem kãm Tĩrtũm kapêr mar prãm kêt nê. Nê tee ri amnhĩ kukamã hamaxpêr nê akupỹm Ejit wỳr hkrã nê axpên mã: “Kwa na pu mẽ ra pahpunuj tỳx nê papa nhũm Tĩrtũm ãm ja hã mẽ pahpumu nê tanhmã mẽ pahto mex to hkêt nê. Mãn ra mẽ pahkaga nà? E kwa pu mẽ awjanã nê ma akupỹm Ejit wỳr mãn papa.” Anê.

9-10 Na prem ã axpên mã kapêr anhỹr o ri pa hã amgrà pê 40.

Tĩrtũm xatã kot tanhmã mẽ ho mex to nhũm mẽ kot amnhĩ tã omunh tã ãm omu nê htỳx ri amnhĩ hkrã hkôt pa.

Nhũm tee ri amnhĩ tã mẽ omu nê mẽ kamã gryk nê.

Hāmri nê hamaxpêr o: “Nà pêr mē hamaxpêr kot mē hã hkwý jêt kêt kumrêx. Te mē hamak kre hkêt pyrã nê ixkapêr mar kêt nê.” Anhÿr o hamaxpêr.

- 11 Hāmri nê mē kãm: “E mē inhma. ã mē ate amnhĩ nhĩpêx anhÿrja mÿrapê kot kaj mē ma ixte mē amã pika mex nhõr mã xwÿnhhta wÿr apa hkêt nê.” Anhÿr o mē kãm kapêr. Anê.

Ã mēhõja Tirtũm Karõ nhÿ hã te Tirtũm tãm kot mē kãm kapêr pyrãk o mē harênh anê. 12Jakamã kwa mē okora ixkrãmnhwÿjaja. Kêr ka mē amnhĩ to mex o apa. Tirtũm kêp Mēpahpãm ã pixi mex tã kot kaj mē tanhmã ajamaxpêr punuj to rÿ amnhĩ kaxyw hkôt ajamaxpêr kêt hãmri nê te ate amnhĩ katut kôt ãm pyrãk o hipêx nê hkaga. Kwa mē ã amnhĩ nhĩpêx anhÿr kêt nê. 13Kêt mē Kris kôt axpên to axihtÿx o ri apa. Nê apkati mē ã axpên nhĩpêx anhÿr rãhã nê. Kot kaj mē anhÿr kêt hãmri nê mē amã Tirtũm kapêr mar prãm kêt ã amnhĩ to amnhĩrît. Jao tanhmã amnhĩ tomnuj to ho ri apa nê atÿx ajamaxpêr o: —Nà ixte ã amnhĩ tomnuj anhÿr tã nhũm Tirtũm ja hã ixpumu nê ãm hã ixpumu.

Anhÿr o ajamaxpêr japêr. Rÿ mē ajamaxpêr o:

—Nà na pa hte ã amnhĩ tomnuj anê nhũm Tirtũm ja hã ixpumu nhũm ja kãm mex nê.

Anhÿr o ajamaxpêr japêr. 14Kwa mē ri ã ajamaxpêr anhÿr kêt nê. Amnepê mã mē pahte Kris kôt amnhĩ xunhwÿr nhũm kot mē pahto hkrata ã na pu prem amnhĩ kaxyw hkôt pajamaxpêr o papa. Tã kêr pu mē arĩ ã amnhĩ nhĩpêx anhÿr tÿx o papa rãhã ty. 15Tirtũm kapêr ã kagã htũm kot ja jarênh kot:

E kêr ka mē Tirtũm kapêr ma nê mar tÿx nê.

No ama nê ãm mar nê ri hã apa hkêt nê.

Rÿ mē kot hkaga xwÿnhjê pyrã nê kêp akrã hihtÿx kêt nê. Anê.

16Mē panhĩgêjtaja na prem Mojes kôt pika pê Ejit rũm kato nê hkĩnh nê ma kapôt ã kormã pika mex wÿr pa. Nom Tirtũm kapêr mar nê hkôt amnhĩ nhĩpêx rãhã hkêt nê. Na prem kuma nê hkôt amnhĩ nhĩpêx o hã apkati grêre htã ra mēmoj nhÿ hã omnuj nê pa hã amnhĩ pumu nê tee ri amnhĩ kukamã hamaxpêr. 17Jao xatã kapêr nhĩrõp kuhê nê amnhĩ hkrã hkôt pix mã amnhĩ nhĩpêx o pa ho ra hã amgrã pê 40. Hãmri nhũm tee ri amnhĩ tã mē omu nhũm ja kêp omnuj nê. Jakamã nhũm mē piitã kapôt ã ri pa nê gaa nê pikaprãr pa. 18Mē kot kapêr mar kêt jakamã nhũm mē kãm:

—Nà ã mē ate amnhĩ nhĩpêx anhÿr o ri apaja mÿrapê kot kaj mē ixte mē amã mē amex nhõr mã xwÿnhhta wÿr apa hkêt nê. Anê.

19Tã mē kot amnhĩ kaxyw Tirtũm kôt hamaxpêr o pa hkêt jakamã na prem pika mexta wÿr hpõx kêt rãhã pikaprãr pa. Nhũm mē hkra nê mē htãmnhwÿjê pixjaja na prem mē mÿr pê hwÿr põj nê kamã pa.

Mê pahte Tirtûm kukwak ri pajamakêtkati nê ri papa hã mê pajarênh

4 ¹Mê pahte Tirtûm kukwak ri pajamakêtkati nê ri papa ho papaja Tirtûm kãm hprãm jakamã kwa kêr pu mê amnhĩ pumunh mex o papa. Nê wam mê panhîgêt rom Tirtûm kapêr mar tỳx nê hkôt mãn kêr ri amnhĩ nhîpêx mex rãhã nê. Kêr pu mê kurom mê pajamak kãm amnhĩ krit xã hã pika mexta wỳr pøj. ²Mê kot mê pahpyrà nê Tirtûm kapêr mar mex tã na htem amnhĩ kaxyw hkôt hamaxpêr kêr nê. Te mê kot mar kêr pyræk. ³Ãm mê kot amnhĩ kaxyw Kris mã hamaxpêr xwỳnh pixjaja na htem kukwak ri hamakêtkati nê ri pa ho pa. Amnepê mã mẽmoj piitã hkêt ri na pre Tirtûm mẽmoj piitã ho kator pa hãmri nhũm apkati nhũm axte mẽmoj tã àpênh kêr nê. Ãm õ krĩ kamã arĩ hamakêtkati nê hkòkòt o hkrĩ. Tã mê pahte uræk nê pajamakêtkati nê papa ho papaja na kãm hprãm. No wam ri mê pa xwỳnhjaja mê kot amnhĩ tomnuj mỳrapê na pre Tirtûm mê kot urà nê hamakêtkati nê paja nê mê hkurê. Kapêr ã kagà htũm kot harênh kot:

Na pre Tirtûm tee ri amnhĩ tã mê kot hipêx ã mê omu nhũm ja kêp omnuj nê. Hãmri nhũm mê kãm: “Nà kot kaj mê ixkukwak ri axàmnhĩx ajamakêtkati nê apa hkêt nê.” Anê.

4Nê kot harênh kot:

Na pre Tirtûm àpênh ã arĩgro kêp 6 hãmri nhũm arĩgro pê 7ta ã nhũm axte mẽmoj tã àpênh kêr nê. Na pre arĩ hkòkòt o nhỹ. Arĩgro pê 7 ã arĩ hamakêtkati nê hkòkòt o nhỹ. Anê.

5Nê mê kot kapêr mar nê ãm mar xwỳnhjê jarênh kot:

Kot kaj mê aa ixkukwak ri axàmnhĩx nê ajamakêtkati nê apa hkêt nê. Anê.

6Mê panhîgêjtaja kot amnhĩ kaxyw Tirtûm kòt hamaxpêr kêr jakamã na prem hamakêtkati nê ri pa hkêt nê. Tã mê papajaja na Tirtûm arĩ kãm mê paxàmnhĩx nê pajamakêtkati nê papa hprãm. ⁷Amnepêm Ijaew Tirtûm kòt hamaxpêr kêr jakamã na prem kapòt ã pikaprãr pa. Hãmri nhũm amgrà xohtô nê hapêx nhũm Tirtûm mê hkanrêhã mê htàmnhwỳjê hõ pê finat Tawija mã kapêr nhũm kuma nê mê pamã tanhmã kapêr tota ã kagà nê hã kagà kot:

Kwa kêr ka ixkapêr ma nê mar tỳx nê.

No mê anhîgêjtê pyrà nê akrã hiltỳx ho inhma nê ãm inhmar kêr nê. Anê.

Na pa pre ra mê amã ã ja jarênh anê. **8**Na pre finat Jojueja finat Mojes mỳr pê ma pika pê Kanaã hwỳr mê hkanrêhã mê hkrajê o pa nê hwỳr mê o pøj. Tã nhũm prem Jojue kukwak ri hamakêtkati nê pa ho pa hkêt nê. Kêp ãm kukwak ri ã amnhĩ nhîpêx anhỹ ronhỹx Tirtûm axte mê kãm mê hamakêtkati nê mê hamak kãm amnhĩ krit nê mê pata hkukamã harênh kêr nê. **9**Nom mê pahte kukwak ri pajamakêtkati nê pajamak

kãm amnhĩ krit nê ri papa ho papaja na Tirtũm arĩ kãm hprãm. 10 Na pre arĩgro pê 6ja ã mêmoj piitã ho kator pa nhũm apkati nhũm hamakêtkati nê hkôkôt o nhỹ. Tã kot puj mẽ pahpê hkrajaja amnhĩ to kuwỳ nhũm tanhmã mẽ pahkrã hto pu mẽ kukwak ri uràk nê paxàmnhĩx nê pajamakêtkati nê papa ho papa. Te Tirtũm àpênh pa nhũm apkati nhũm hamakêtkati nê hkôkôt o yrta pyràk. 11 Jakamã kwa kêr pu mẽ amnhĩ to kuwỳ kê ã mẽ panhĩpêx anê pu mẽ uràk nê ã amnhĩ nhĩpêx anhỹr rãhã ho papa. Nom kot pu mẽ pahkwỳ Ijaewjê pyrã nê kapêr kwỳm amnhĩ nhĩpêx o papa hãmri nê mẽ urã nê paxàmnhĩx pajamakêtkati nê papa hkêt nê.

Tirtũm kapêr te kot wapo xwa gix pyrãk ã harênh

12 Nê Tirtũm kapêrja te ĩ ho tanhmã kot mêmoj to kaxyw hihtỳx pyrãk. Nê te wapo xwa gix pyrãk. Koja mēhō õ wapo xwa mex nê ho mêmoj jakàr mex nê. Ho mry hi jakàr mex pê kaxwỳnh kãm hi kanhĩn o amnhĩrĩt. Ja pyrã nê na hte Tirtũm kapêr mẽ pajamaxpêr o amnhĩrĩt nê mex ã harê rỳ omnuj ã harê.

13 Nê na htem Tirtũm pê mêmoj to pimxur kêt nê. Na hte hprĩ hã mêmoj piitã omunh pa. Nê mẽ pajamaxpêr kôt mẽ pahpumunh pa. Na pu htem ã kot mêmoj piitã omunh par anhỹr xwỳnhja noo mã tanhmã amnhĩ nhĩpêx to rãhã ho papa.

Jejus kêp mẽ panhõ patre maati hã harênh

Eprêw 10.19-25; Wam Juãw 2.1-2

14 Nê Ijaew nhõ patrejaja na pre htem Tirtũm mã amnhĩ jarênh xã hã ixkre hwỳr agjê nê kamã mẽ ho Tirtũm wỳr o pa. Ja pyrã nê na pre ra Jejus Tirtũm nhõ krĩ hwỳr api nê kamã mẽ pahto hwỳr o hkrĩ. Kêp Kra kumrêx jakamã kêp mẽ pahto Tirtũm wỳr xwỳnh maati. Jakamã kwa kêr pu mẽ amnhĩ kaxyw hkôt pajamaxpêr tỳx rãhã ho papa. 15 Satanasti na pre te kot mẽ panhĩpêx pyrãk o Jejus nhĩpêx. Nê tee ri kot tanhmã kãm kapêr to nhũm kot mar nê tanhmã amnhĩ tomnuj to hprãm xaj ãm ri kãm ahkrox kaprỳ nhũm kutã amnhĩ to htỳx nê hkôt amnhĩ nhĩpêx kêt nê. Tã kot Satanasti kot amnhĩ nhĩpêx ã omunh mex jakamã na hte kêp mẽ pahtãnopxar mex o pa. Kot mẽ paxirerek kôt mẽ pahpumunh mex. 16 Jakamã kwa kêr pu mẽ amnhĩ tã kamã pahpijaãm kêt kãm paxàmnhĩx ri amnhĩ to hwỳr o papa. Kêp mẽ pakutã nojarêt xwỳnh nê kêp mẽ pakamã ukapri xwỳnh jakamã kêr pu mẽ tee ri mêmoj tã amnhĩ pumu nê amnhĩ to hwỳr kurê kumrêx. Hãmri nê ÿ hã paxàmnhĩx nê pajamakêtkati nê ri papa.

5 1 Nê mẽ panhõ patre maati Jejusja Tirtũm na pre mẽ pakaxyw ãm. Kêp mẽ pahkwỳ hã mẽ pakaxyw ãm nhũm hte mẽ pahto Tirtũm wỳr o pa. Nê kãm mẽ pahkĩnh xã nhõr o pa. Kot ja hã mẽ pahpumunh

ně mẽ pahte kapêr kwÿm tanhmã amnhĩ nhĩpêx to ho papa hã mẽ pakamã gryk o hapêx tokyx anhÿr kaxyw.

2Mẽ panhĩgêjtjaja na pre htem mẽ õ patre maati hwÿr mra mẽ kãm tanhmã amnhĩ tomnuj to hã amnhĩ jarê nhũm mẽ kuma mẽ mẽ kamã ukapřĩ mẽ. Mẽ urã mẽ kormã kot Tĩrtũm kôt amnhĩ nhĩpêx totuj anhÿr jakamã na pre mẽ kot tanhmã amnhĩ jarênh toja ma mẽ mẽ kamã ukapřĩ mẽ. 3Hãmri mẽ mẽ hpãnhã Tĩrtũm mã mẽmoj gõ mẽ mããnên amnhĩ pãnhã kãm mẽmoj gõ. Mẽ urãk mẽ kot amnhĩ tomnuj o paja mÿrapê amnhĩ pãnhã kãm mẽmoj gõ. 4No na pre hte patrejaja amnhĩ krã hkôt kêp patre maati kaxyw amnhĩ xunhwÿr kêt mẽ. Tĩrtũm kot mẽ kaxyw mẽ unhwÿr jakamã na pre mẽ kaxyw finat Arãwja xãm nhũm kêp mẽ õ patre maati hã mẽ ho Tĩrtũm wÿr o pa.

5Nẽ Kris haxwÿja kêp mẽ panhõ pahi maati hã tãm kot amnhĩ xãm kêt. Tĩrtũm na pre mẽ pakaxyw ãm mẽ tanhmã kãm kapêr to mẽ kãm:

Nà apê Ixkra na ka.

Kot paj jarãhã ixpê Anhĩpêêxã hã mẽ kãm amnhĩ jarê. Anê.

6Nẽ hpãnhã kãm:

Kot kaj Mekijetek pyrã mẽ apê patre maati hã mẽ ho ixwÿr rãhã ho ri apa. Anê.

7Jejus kormã pika ja kamã pa ri na pre amnhĩ to Tĩrtũm wÿr rãhã ho pa. Tõhã hkapřĩ mẽ tee ri mẽmoj tã amnhĩ pumu mẽ amnhĩ to kuwÿ. Nẽ tee ri mẽ kot hpĩrta kukamã hamaxpêr mẽ mÿr kãm amnhĩ to kuwÿ. Kop apu Tĩrtũm kãm mẽ kot kêp hpĩr prãm kêt ronhÿx pre tanhmã nê mẽ kãm hkurê xwÿnhjê ho nhũm mẽ hpĩr kêt mẽ. Jakamã nhũm pre ã amnhĩ to hwÿr anê. No ãm Tĩrtũm kãm prãm xã hkôt kãm amnhĩ nhĩpêx prãm jakamã nhũm kuma no ãm tanhmã nê mẽ ho hkôt nhũm prem kupĩ.

8Kêp Tĩrtũm Kra kumrêx tã amnhĩ xã htÿx kãm hamak kãm ty. Jao Tĩrtũm kãm hprãm xã hkôt amnhĩ nhĩpêx ã amnhĩ pumunh mex mẽ. 9Na pre amnhĩ xã htÿx kãm hamak o amnhĩ mex o amnhĩ mex ã mẽ kãm amnhĩ to amnhĩrĩt. Jakamã na hte mẽ kot kapêr kôt ri amnhĩ nhĩpêx o mẽ pa xwÿnhjê mã mẽ kot amnhĩ nhĩpêx nyw jagjê mẽ nhÿrmã Tĩrtũm mẽ wa kuri mẽ htĩr tũm mẽ mẽ pa mã xwÿnhjê hã mẽ harê. 10Jakamã na pre Tĩrtũm Mekijetek pyrã mẽ kêp patre maati kaxyw ãm.

Mẽ pahte Kris kaga nê mẽ pahkurê

Wam Korĩt 3.1-2, 13.11, 14.20; Epes 4.11-16

11Nẽ Jejus kêp mẽ pahto Tĩrtũm wÿr xwÿnh maati hã harênhja inhãm ixpřĩ hã mẽ amã harênh par prãm tã ka mẽ kormã inhmar tÿx kêt mẽ. Pa tee ri ixpřĩ hã mẽ amã harênh kapřÿ. Te mẽ amã mar prãm kêt o amõr pyrãk. 12Amnepê mã mẽ ate Kris kôt amnhĩ xunhwÿr mẽ kapêr mar tÿx tã kormã nhãm amnhĩ xõ ri ho amnhĩ kwÿjê jahkre ho ri apa hkêt mẽ. Te mẽ ate hã ano hkêt pyrãk jakamã na pa hte arĩ mẽ amã kapêr

kot amnhîrît mex xwÿnh kwÿ ho mē ajahkre ho pa. No kot amnhîrît mex kêt xwÿnh o mē ajahkre hkêt nē. Te mē hkaràre kot amnhî nhîpêx pyràk o na ka htem amnhî nhîpêx o apa. Na hte mē hkaràre mēo mex kur kêt nē. Ām kormã katorxà hkà pix kaô. Ja pyrà nē ām Tîrtûm kapêr kot amnhîrît mex xwÿnhhta pix na ka mē mar tÿx o apa nom kapêr kot amnhîrît mex kêt xwÿnhja ka mē mar mex kêt nē.

13Nē mē hkaràre kormã Tîrtûm kapêr mar kêt jakamã na htem kormã mēmoj mex nē mēmoj punuj pumunh kêt nē. Tã te mē ate mē kot amnhî nhîpêx pyràk.

14Mē kot Tîrtûm kapêr mar mex xwÿnhjaja na htem hprî hã kapêr piitã mar tÿx nē. Kot amnhîrît mex xwÿnhhta mar tÿx nē määnēn kot amnhîrît mex kêt xwÿnhja nhûm mēhprî hã piitã mar tÿx nē. Te ho mē àptàr kot mēo mex kur o pata pyràk. Jao ra mē àptàr jamaxpêr o hamaxpêr o ri pa nē hamaxpêr o:

—Kot paj tãm amnhî nhîpêx o ri ixpa nhûm ja inhmã mex nē. Nom kot paj axtem tanhmã amnhî tomnuj to nhûm ja ixpê omnuj nē. Jakamã kot paj tãm amnhî nhîpêx pix o ri ixpa nhûm Tîrtûm mã ja mex nē. Anē.

6 1-2Na pu prem ra Tîrtûm kapêr kot amnhîrît mex xwÿnhhta kwÿ ma. Tãm na ja:

Kris kot mē panê tanhmã amnhî nhîpêx to hã harênhja.

Nē mē pahte amnhî tomnuj kaga hã kot mē pamã karôja.

Nē amnhî kaxyw Tîrtûm kôt mē pajamaxpêr ã mē pamã karôja.

Nē mē pahpê Tîrtûm kra hã amnhî to amnhîrît kaxyw mē kot mē pahkrã kumrãr ã pamã karôja.

Nē mē pahte Tîrtûm mã tanhmã amnhî nhîpêx to ho papa hkukamã mē kot mē pahkrã hã ãhkra jaxwÿr nē mē pahto Tîrtûm wÿr ã mē pamã karôja.

Nē mē pahtyk nē akupÿm mē pahtîr ã mē pajarênhja.

Nē Tîrtûm kot nhÿrmã mē kot amnhî xà htÿx kãm hamak tûm xà hwÿr mē kêp hkra hkêt xwÿnhjê janorja.

Mēmojja piitã pu mē ra harênh mar tÿx nē. Prî hã kot amnhîrît mex. Tã kwa kêr pu mē hpãnhã hijuk ri kot amnhîrît mex kêt xwÿnh kwÿ ma. Jao mē pahpê Tîrtûm kra xàptàr mex nē ri papa. 3Jakamã kwa kêr pu mē kot amnhîrît mex xwÿnh kumrêx kwÿ ma nē hpãnhã hijuk ri kot amnhîrît mex kêt xwÿnh kwÿ ma. Nē axpên mã harênh rãhã ho ri papa. Nã koja Tîrtûm kãm ja prãm pu mē ã amnhî nhîpêx anhÿr rãhã o ri papa.

4-6Na pre ra mē pahkwÿjaja Kris kaga nē htÿx ri amnhî nhîpêx o pa. Mē kot kapêr mar tÿx tã axtem nē hkaga jakamã koja mē axte kapêr mar kêt nē. Ra mē kãm mar prãm kêt. Kot puj mē tee ri axte mē kãm harênh o papa kaprÿ. Na prem hprî hã kuma. Tîrtûm kãm mē ho hkra hprãm ã harênhja nhûm prem hprî hã kuma nē kãm mar prãm nē hkôt amnhî xunhwÿ. Hãmri nhûm Tîrtûm Karô te mē panhîpêx pyrà nē mē hkarô

mã agjê nê mẽ kot amnhĩ to mex o pa kaxyw tanhmã mẽ hkrã hto nhũm prem ỹ hã tanhmã kãm amnhĩ nhĩpêx to ho pa. Nê kãm Tĩrtũm kapêr mar prãm nê. Nê axpên mã mex o mex ã harênh o pa. Nê aa mẽ kot mẽmoj pumunh kêt kwỳ pumu nê axpên mã harênh o:

— Nà Krisja ãm hãmri àhpumunh tỳx o àhpumunh tỳx. Koja nhỹrmã akupỹn mẽ pahwỳr wrỳ nê axte mẽ pamã àhpumunh tỳx o amnhĩrĩt pu mẽ omu.

Anhỹr o kapêr tã tanhmã hamaxpêr to nê hkaga. Jakamã te mẽ kot axte Tĩrtũm pê Krata pĩ hã nhôr nê hpĩr pyræk. Nê te mẽ piitã mẽ noo mã tanhmã haprỳ hto nê tanhmã kãm kapêr punuj to pyræk. Jakamã kot pu mẽ tee ri akupỹm tãm mẽ unhwỳr prãm kaprỳ.

7Na hte Tĩrtũm mẽ pahto mex rãhã ho pa. Jao mẽ pamã mẽ pahpur ã na rê pu mẽ kamã panhõ rũnh nê. Jakamã mẽ kot amnhĩ kaxyw Kris kôt hamaxpêr nê hkôt amnhĩ xunhwỳr prãm xwỳnhjaja te mẽ hpur mex nê kamã mẽmoj ô rũnh pyræk. Nê uræk nê amnhĩ to mex o pa. 8Nom koja mẽ hpur kãm mẽmoj nhĩgrôt mex kêt japêr. Kamã mrônhi nê kahpare nê mẽmoj punuj pix hapôj nhũm mẽ tee ri omu nê hkaga kurê kumrêx. Tã mẽ kot Kris kaga xwỳnhjaja te pur punuj kot amnhĩ nhĩpêxta pyræk nhũm Tĩrtũm te kêp pur nhõ dôn pyræk. Jao tee ri amnhĩ tã mẽ kot amnhĩ nhĩpêx ã mẽ omu nê mẽ hkaga kurê kumrêx nê ma mẽ kot amnhĩ xà htỳx kãm hamak tũm xà pê kuwyta wỳr mẽ rênh pa.

9E ixkrãmnhwỳjaja. Inhmã mẽ akĩnh jakamã na pa ã mẽ amã mẽ kot Kris kaga xwỳnhjê jarênh anê. Nom te mẽ ate mẽ uræk kêt. Kris kôt mẽ ate amnhĩ xunhwỳr xwỳnh mex na ka mẽ. Ra mẽ ate hkôt amnhĩ xunhwỳr tỳx jakamã te mẽ apê pur mexta pyræk. 10Na ka htem Kris kôt mẽ akwỳjê ho mex o ri apa. Te mẽ amã amnhĩ tã ma pyræk o axpên nhĩpêx o ri apa nhũm Tĩrtũm ja hã mẽ apumu. Tã koja tanhmã ja hã mẽ ato mex to. Kot tãm mẽ panhĩpêx o pa jakamã koja tanhmã mẽ ate axpên nhĩpêx mex tota ã tanhmã mẽ ato mex to.

11Tã kêr ka mẽ arĩ ã axpên nhĩpêx anhỹr o ri apa rãhã ty kê nhỹrmã ja hã mẽ ato mex nê. ã mẽ ate amnhĩ nhĩpêx anhỹr o apaja na inhmã hprãm tỳx kumrêx. 12Kot kaj mẽ ã amnhĩ nhĩpêx anê hãmri nê amã kaga nê apa hkêt nê. Nê amnhĩ nhĩpêx o te Tĩrtũm kra hkwy htyk xwỳnhjaja kormã htĩr ri kot amnhĩ nhĩpêxta pyræk. Na prem amnhĩ kaxyw Tĩrtũm mã hamaxpêr tỳx rãhã ho pa. Kot mẽ ho mex ã mẽ hã amnhĩ jarênhja nhũm prem amnhĩ tã kamã hamak rãhã ho pa. Tã amnhĩ tã kamã hamak o pa ry rax rãhã ty nhũm Tĩrtũm ra kot mẽ hã amnhĩ jarênh xà hkôt mẽ ho mex nê. Tã kêr ka mẽ uræk nê ã amnhĩ nhĩpêx anhỹr o ri apa rãhã ty. 13-15 ã na pre finat Apraãwja amnhĩ nhĩpêx anê. Kormã hkra hkêt tã nhũm Tĩrtũm kãm hkra nê kanrêhã htãmnhwỳjê hkukamã tanhmã mẽ harênh to nê kãm:

— Pa Apraãw. E inhma. Kot paj aprõ mẽ war ato mex nê. Kot kaj war akra hãmri nê gaa nhũm akanrêhã war atàmnhwỳjaja ohtô rax kumrêx. Âm hãmri na pa ã mẽ hkukamã amã mẽ harênh anê. Kot paj amã amnhĩ jarênh xà hkôt ã anhĩpêx anê. Ixpê mẽ anhĩpêx xwỳnh na pa ã amã amnhĩ jarênh anê. Anê.

Tã ã kãm wa hkra jarênh anhỹr tã nhũm wa tokyx hkra hkêt nê. Nom tee ri ja hã amnhĩ pumu nê Tĩrtũm kot wa kãm hêx ã hkamnhĩx kêt nê. Âm hkamnàr rom ã hamaxpêr anê nê hamaxpêr o:

— Nà kot paj wa nhỹrmã ixkra. Tĩrtũm tãm kot wa inhmã wa ixkra jarênh kênã. Anê.

Tã nhũm amgrà sohtô rax kumrêx nê hapêx nhũm wa hkra. Nhũm axte amgrà hkwy hapêx nhũm wa hkanrêhã htàmnhwỳ hkwy. Ra Tĩrtũm kot mẽ hkukamã Apraãw mã mẽ harênh xà hkôt. Tĩrtũmja hihtỳx o hihtỳx nê àhpumunh o àhpumunh jakamã na pre amnhĩ jarênh xà hkôt ã wa kãm wa hkra nê wa htàmnhwỳjê nhôr anê. Kot ra wa kãm hã amnhĩ jarênh xà hkôt. No ri nhãm mêhõ nhĩxi jarênh kôt wa kãm wa hkra jarênh kêt nê. Mêhõ kot we hihtỳx o hihtỳx o Tĩrtũm jakre nhũm we ri hixi jarênh kôt ã wa kãm mẽ harênh anê? Amrakati kumrêx. Jakamã na pre wa kãm amnhĩ jarênh o:

— Nà ixàhpumunh xà hkôt na pa ã war amã war akra jarênh anê. Anê.

16No pika ja kamã na htem ã amnhĩ jarênh anhỹr kêt nê. Na htem mêhõ mã tanhmã mẽmoj tã amnhĩ jarênh to kaxyw nê mêhõ hihtỳx o kot hakrenh xwỳnh nhĩxi jarênh kôt amnhĩ jarê. Nê amnhĩ jarênh o:

— Nà ixte jahti noo mã ã amã amnhĩ jarênh anhỹr jakamã âm hãmri na pa ã amnhĩ jarênh anê. Anê.

Kot hã amnhĩ to hêx nhũm hihtỳx o kot hakrenh xwỳnhnta kot hã harênh mar nê hã tanhmã homnuj to pymaj na htem ã mẽ hixi jarênh kôt mẽmoj tã amnhĩ jarênh anê. Hãmri nê kot tanhmã hã ho pymaj ra kot amnhĩ jarênh xà hkôt tanhmã mẽmoj nhĩpêx to. **17**Nom Tĩrtũm na hte uràk nê nhãm mêhõ nhĩxi jarênh kôt ri mẽmoj tã amnhĩ jarênh kêt nê. Na hte tãm amnhĩ jarênh xà hkôt mẽmoj to anê nê aa hã amnhĩ to hêx kêt nê. Na pre mẽ pahpê hkrajê mã kãm:

— Kot paj nhỹrmã mẽ ato mex rax nê. Âm hãmri na pa mẽ amã amnhĩ jarê. Ixte amnhĩ pumunh xà hkôt na pa ã mẽ amã amnhĩ jarênh anê. Anê.

Mê pahte âm hãmri kot amnhĩ jarênhja mar nê amnhĩ to hêx kêt ã omunh kurê kumrêx kaxyw. Koja Tĩrtũm mẽmoj tã ã amnhĩ jarênh anê hãmri nê hijuk ri axtem hpãnhã tanhmã amnhĩ jarênh to hkêt nê. **18**Jakamã koja nhỹrmã ma amnhĩ wỳr mẽ pahto àpir ã amnhĩ jarê hãmri nê âm hãmri amnhĩ jarê nê amnhĩ jarênh o:

— Nà âm hãmri ixte amnhĩ pumunh xà hkôt na pa mẽ amã ja hã amnhĩ jarê. Anê.

Koja ã amnhĩ jarênh anê hãmri nê hijuk ri axte hpãnhã tanhmã mêmoy jarênh to hkêt nê. Ra kot ã amnhĩ jarênh anhÿrja koja arĩ rãhã nê. Jakamã e kwa kêr ka mē tee ri amnhĩ kukamã ajamaxpêr o ri apa hkêt nê. Ra mē pamex nê ri papa kaxyw Tirtũm kôt amnhĩ xunhwÿr jakamã kêr pu mē arĩ kot mē pahto mex rax xà hã arĩgrota jamãr rãhã ho ri papa.

19Na hte kanôre ho htÿx xàja kanôre ho htÿx nhũm ma gô hkôt pa hkêt nê. Ja pyrã nê kot puj mē Tirtũm kot mē pahto mex xà kamã pajamak o papa hãmri nê hkaga hkêt nê.

Amnepê mã na pre hte mē panhõ patre maatija Tirtũm mã amnhĩ jarênh xà hã ixkre hwÿr agjê nê hkôt ã kupêxê ho hitom maati hwÿr agjê nê kamã mē ho Tirtũm wÿr o kuhê. Tã nhũm Jesus akupÿm kaxkwa hwÿr api nê Tirtũm ri hkrĩ hãmri nê patre maatita pãnhã tãm mē pahto hwÿr o hkrĩ. 20Na pre ra mē pakukamã kaxkwa hwÿr api nê kamã pa ho pa nê finat Mekijetekja pyrã nê kêp mē panhõ patre maati. Tã koja mē pahto Tirtũm wÿr rãhã nê pa ho pa.

Patre Mekijetek jarênh

7 1-3E kot paj ixprĩ hã mē amã tanhmã finat Mekijetekja jarênh to ka mē inhma. Krĩ pê Sarê kamã na pre kêp mē õ pahi nê mãânên kêp mēõ patre. Sarêja mē pakapêr kãm kêp: “Mê hamakêtkati nê ri mē pa xwÿnhjê nhõ krĩ.” Jakamã Mekijetekja mē pakapêr kãm kêp: “Mê hamakêtkati nê ri mē pa xwÿnhjê nhõ pahi.” Nê mãânên kêp: “Pahi kot tãm amnhĩ nhípêx o pa xwÿnh.” Nê Mekijetek nhípêxã nê katorxã nê higêt nhixija mē pahte harênh mar kêt. Nê kator ã arĩgro nê htyk ã arĩgroja mãânên mē pahte harênh mar kêt. Tirtũm kapêr ã kagã htũm kot tanhmã ja jarênh to hkêt. ãm Jesus pyrã nê kêp patre hã mē ho Tirtũm wÿr rãhã ho pa xwÿnh pix ã kot harênh. ãm ja pix na mē pahte harênh mar. Nê kot amnhĩ to rax xwÿnh jakamã na pre Apraãw nhÿri omu nê hã hpijaãm kaxyw kãm hikukrêx kwÿ gô. Na pre hkwÿjê mē ra mē urojê kutã amnhĩ xunhwÿr nê pijapu nê mē kêp mē õ pahi ho 4 nê mē himex. Nê mē kêp mē hikukrêx kwÿptã nê hamÿ nê ma õ krĩ hwÿr o mō. Nê kormã pry hã mōr ri Mekijetek kaxpa nhũm amnhĩ wÿr omu nê kãm:

— Pa Apraãw? E kê Tirtũm ato mex nê ka amex nê apa. Anê.

Nhũm amnhĩ tã kuma nê hkĩnh nê. Hãmri nê kãm mē hikukrêx kwÿptãr xwÿnhhta hkwÿ gô nhũm hamÿ nê ma amnhĩm o mō. 4Na pre Apraãw kot amnhĩ to rax ã omu nê kãm mêmoyta kwÿ gô. Kêp mē pahpê Ijaew pãr krax jakamã mãânên kot amnhĩ to rax tã Mekijetekja urãk nê kot amnhĩ to rax ã omu nê kãm mēmota kwÿ gô. 5Finat Mojes kot Ijaew mã Tirtũm kapêr jarênh xà hkôt kãm kugô. Na pre mē kãm:

— Mē akwÿ pê finat Rewi hkanrêhã htãmnhwÿjaja kêp mē anhõ patre jakamã kêr ka mē kãm mē akukrêx kwÿ nhõr o ri apa. Kot kaj mē

akrit kêp 10 nê kãm ho pixi nê agõ. Nê mẽ akàxpore kêp 10 nê kãm hõ gõ. Kêr ka mẽ ã mẽ kãm mẽ akukrêx nê mẽ akrit kwỳ nhõr o apa anê. Nê kêr ka mẽ kãm mẽmoj mex pix gõ. Mẽ kêp mẽ akwỳ na mẽ. Mẽ apiitã mẽ apê Apraãw kanrêhã htàmnhwỳ jakamã kêr ka mẽ ã mẽ hipêx anhÿr o apa. Anê.

6Tã Mekijetekja kêp Rewi hkwỳ hkêt tã nhũm Apraãw amarĩ ã hipêx anê nê kãm pahi htyk xwỳnhjê kukrêxta kwỳ gõ. Jao hikukrêxta kamã mẽmoj kêp 10 nhũm omu nê kamã kãm ho hpÿnh nê kugõ. Na pre ã kãm mẽmoj nhõr anê. Hãmri nhũm amnhĩm hamỳ nê kãm:

— Nà ãm hãmri koja Tĩrtũm ato mex rax nê. Anê.

Ra Tĩrtũm kot Apraãw kanrêhã kãm htàmnhwỳ ho ohtô nê mẽ hkukamã mẽ harênh jakamã nhũm Mekijetekja ã kãm Tĩrtũm kot ho mex ã harênh anê. 7Mẽ kot amnhĩ to rũnh o mẽ hakrenh xwỳnh pixjaja Tĩrtũm kot mẽ ho mex kaxyw mẽ ho àhwÿr o pa jakamã na pre Apraãw o Tĩrtũm wỳ. Jao kot amnhĩ to rax o kot hakrenh ã amnhĩ to amnhĩrĩt. 8Hãmri nê Rewi hkanrêhã htàmnhwỳ kot amnhĩ nhĩpêx pyrã nê Apraãw o Tĩrtũm wỳ nê kêp mẽmojta jamỳ. Mẽ uràk nê mẽmoj kamã kêp 10ja rũm ho hpÿnh nê amnhĩm hamỳ. Nom kot amnhĩ to rax o Rewi hkanrêhã htàmnhwỳjê jakrenh. Tĩrtũm kapêr ã kagã htũm kot Rewi hkanrêhã htàmnhwỳjê htyk par ã mẽ harênh tã tanhmã Mekijetek htyk ã harênh to hkêt jakamã kot amnhĩ to rax o kot Rewi hkwyjê jakrenh.

9-10Nê kot pry kamã Apraãw kaxparta ã kormã Rewi kator kêt tã kêp Apraãw kanrêhã htàmnhwỳ mã xwỳnh. Jakamã nhũm Apraãwja Mekijetek mã mẽ hikukrêxta kwỳ nhõr jao te Rewi mã õr pyrãk. Tã nhũm amgrã xohtô nê hapêx nhũm Rewi hkanrêhã htàmnhwỳjajaja hapôj nê kêp mẽ õ patre nê ri pa. Jao Mekijetek pyrã nê mẽ kêp mẽ hikukrêx kwỳ jamÿnh o ri pa.

11Nê finat Mojes na pre Ijaewjê mã tanhmã Rewi hkanrêhã htàmnhwỳjê jarênh to. Kormã mẽ hapôx kêt ri nhũm hkwyjê mã tanhmã mẽ harênh to. Mẽ kêp patre hã mẽ harê. Tã nhũm mẽ hapôj nê hprêk nê mẽ ho Tĩrtũm wÿr o ri mẽ hkôt pa. Nom mẽ kot tãm amnhĩ nhĩpêx o pa kaxyw na prem tanhmã mẽ hkrã hto hkêt nê. Tanhmã kot mẽ amnhĩ to nê ã mẽ hipêx anê? Jakamã nhũm Tĩrtũm mẽ hpãnhã mẽ pahwÿr kÿj rũm mēhõja mẽ nhũm mẽ pahwÿr wrỳ. Nom kêp Rewi hkanrêhã htàmnhwỳ hkêt. Nê mãânên kêp Rewi hpãm Arãw kanrêhã htàmnhwỳ hkêt. Axtem te Mekijetek kot amnhĩ nhĩpêx pyrãk xwỳnh na pre. Jejus Krisja. Tãm na pre mẽ pahwÿr wrỳ hãmri nê tanhmã mẽ pahkrã hto pu mẽ ÿ hã tãm amnhĩ nhĩpêx o papa. 12No Mojes kapêr kot Rewi hkanrêhã htàmnhwỳ pixjaja kêp mẽ ho Tĩrtũm wÿr xwỳnh ã mẽ harênh. Tã nhũm Krisja mẽ pahwÿr wrỳ nê mẽ hpãnhã kêp mẽ pahto àhwÿr o pa xwỳnh. Jakamã na pu htem axte Mojes kapêr kôt amnhĩ nhĩpêx kêt nê. Pãnhã Jejus kapêr kôt pix mã amnhĩ nhĩpêx o papa.

13-14Nê Jejus kêp Rewi hkanrêhã htâmnhwÿ hkêt. Katorxà hkôt kêp Apraãw tàmnhwÿ Juta hkanrêhã htâmnhwÿ na pre. Ra mē pahte ja mar mex. Aa Juta hkanrêhã htâmnhwÿjaja kêp patre hkêt. Na pre Tirtûm jajê mã mē kot mēmoj nhõr xà hã mēsti kunih̄tita ã kãm mēmoj nhõr nê hkwÿjê ho hwÿr ã mē kãm karõ hkêt nê. ãm Apraãw tàmnhwÿ Rewi hkanrêhã htâmnhwÿjê mã pix mã na pre ã mē kãm ja hã karõ anê. Tã nhûm Jejus wrÿ nê mē hpãnhã mē pahto hwÿr o pa. Mē uràk nê kêp Rewi hkanrêhã htâmnhwÿ hkêt axtem kêp Juta hkanrêhã htâmnhwÿ htã Rewi hkwÿjê hpãnhã mē pahto Tirtûm wÿr o pa.

Mekijetek pyrã nê mē pahto Tirtûm wÿr xwÿnh jarênh

15-19Nê Ijaewja na prem Mojes kapêr mar tÿx nê hkôt amnhĩ nhĩpêx tã aa amnhĩ to mex kêt nhûm Tirtûm tee ri ja hã mē omu nê hamaxpêr o:

— Nã Rewi hkanrêhã htâmnhwÿjaja kêp mē õ patre nê mē ho ixwÿr o pa htã nhûm mē arĩ htÿx ri amnhĩ tomnuj pix o pa. Jakamã koja mē axte ri mē ho ixwÿr o pa hkêt nê. Anê.

Hãmri nê mē pakaxyw mē pahto àhwÿr xwÿnhja ta nê ãm. Kra Jejusja nhûm kuta nê ãm. Tãm na hte Rewi hkwÿjê rom tanhmã mē pahkrã hto pu mē kukwak ri tãm amnhĩ nhĩpêx nê Tirtûm kôt amnhĩ nhĩpêx mex nê. Jao nhÿrmã ma mē pahte Tirtûm nhõ krĩ hwÿr paxàpirja jamãr o papa.

Jejus na hte Mekijetek pyrã nê kêp mē panhõ patre maati nê mē pahto Tirtûm wÿr rãhã ho pa. Kêp Rewi hkanrêhã htâmnhwÿ hkêt tã Tirtûm pyrã nê kêp htĩr tûm nê pa ho pa xwÿnh jakamã na pre Tirtûmja mē pakaxyw kuta nê mē pahwÿr kumê. Kapêr ã kagã htûm kot harênh kot:

Kot kaj Mekijetek pyrã nê mē ho ixwÿr rãhã ho ri apa. Anê.

20-21No Rewi hkwÿjê mã na pre ã kapêr anhÿr kêt nê. ãm Jejus pix mã ã kapêr anê nê kãm:

E kot kaj apê mē ho ixwÿr rãhã o apa xwÿnh. Kot paj nhÿrmã apãnhã axtem mēhõ xãm kêt nê. ãm kapxipix kot kaj mē ho ixwÿr o apa rãhã ho rãhã. ãm hãmri na pa amã ã ixkapêr anê. Ixpê Pahi Maati hã ã ajarênh anê.

22Anhÿr jao Jejus kot amnhĩ to rax o Rewi hkwÿjê jakrenh par ã ho amnhĩrĩt. Mē kot Ijaew mã Tirtûm kapêr jarênh nhûm mē kot mar nom hkôt amnhĩ nhĩpêx kêt jakamã nhûm Tirtûm mē hpãnhã Jejus xãm. Tapxipix na hte tanhmã mē pahkrã hto pu mē tãm amnhĩ nhĩpêx mex o ri papa. 23Rewi hkwÿjaja na prem axpên mÿr pê kêp mēõ patre nê ri pa htã htyk pa nê hapêx. 24Nom Jejusja htĩr tûm nê pa ho pa xwÿnh jakamã koja mē uràk nê aa hapêx kêt. Kojã mē pahto Tirtûm wÿr rãhã ho pa nê aa jam urer kêt nê. 25ã Jejus kot amnhĩ nhĩpêx anhÿr jakamã te kêp

Tĩrtũm wỳr mẽ panhõ pry pyræk. Na pu htem hkõt amnhĩ xunhwỳ nhũm mẽ panê mẽ pahte amnhĩ tomnuj piitã rênh pa nê mẽ pahpê Tĩrtũm kra hã mẽ pajarê.

26 Nê ãm hãmri kêp mẽ pahto Tĩrtũm wỳr xwỳnh maati mex na. Mẽ pakurom tãm kot amnhĩ nhĩpêx mex o pa nê aa kot tanhmã amnhĩ tomnuj to hkêt. Tã ra Tĩrtũm kot amnhĩ wỳr ho àpir jakamã nhũm ra kuri mẽ pahto hwỳr rãhã ho pa. 27 Nê kot amnhĩ to rax o wam mẽõ patre maati jê jakrenh. Wamtaja na prem hkwỳjê pyrã nê amnhĩ tomnuj o pa. Jakamã na prem apkati mẽ amnhĩ tomnuj pãnhã Tĩrtũm mã mẽmoj gõ nê kãm amnhĩ jarê nê amnhĩ to kuwỳ. Hãmri nê rĩ kormã kot nhãm mẽ hwỳr mẽ mrar xwỳnhjê mã mẽ ho anê nê mẽ hpãnhã Tĩrtũm mã mẽmoj nhõr pê mẽ ho kuwỳ. No kêt Jejusja wam patre maati rom aa kot amnhĩ tomnuj kêt jakamã na pre hte mẽ uræk nê amnhĩ tomnuj pãnhã Tĩrtũm mã mẽmoj nhõr o pa hkêt nê. ãm mẽ papajaja na pre mẽ pahte amnhĩ tomnuj pãnhã htyk o kãm amnhĩre. ãm htyk tipxi htã mẽ pahpiitã mẽ pahpãnhã amnhĩrer pa. Jakamã koja axte ã amnhĩ nhĩpêx anhỳr kêt nê. Mo kaxyw kot kêt axte mẽ panê ty?

28 Mojes kapêr kõt na pre Ijaew amnhĩm Rewi hkwỳjê xunhwỳ nhũm mẽ kêp mẽ õ patre nê ri pa. Tã no nhũm mẽ uræk nê arĩ amnhĩ tomnuj o pa nhũm Tĩrtũm tee ri mẽ omu nê mẽ hpãnhã mẽ pakaxyw Krata xãm nê kãm:

— Nã kapxipix mẽ kurom ate tãm amnhĩ nhĩpêx o apa jakamã kapxipix kot kaj mẽ hpãnhã mẽ ho ixwỳr o apa rãhã ho rãhã. Anê.


Jejus kêp mẽ pahto Tĩrtũm wỳr xwỳnh maati hã harênh

Rukre 22.20; Sikũn Korĩt 3.6-11

8 1 E kot paj axtem tanhmã mẽ amã mẽ pahto Tĩrtũm wỳr xwỳnh maati jarênh to ka mẽ inhma. Na hte kaxkwa kamã Tĩrtũm nhĩhkõ hã hkrĩ. Ĩhkõ hã kêp Pahi Maati hã hkrĩ xà hã upõk rũm hkrĩ ho hkrĩ. 2 Wam patre maati jaja na prem Tĩrtũm nhõrkwỹ kaàkre wỳr mra nê kamã hitom maati kamã mẽ ho Tĩrtũm wỳr o pa. Nom nhũm Jejus na hte mẽ kurom kaxkwa kamã Tĩrtũm nhõrkwỹ mex kãm mẽ pahto àhwỳr o hkrĩ. Òrkwỹ kaàkreja na prem ĩhkra ho hipêx nom kaxkwa kamã òrkwỹ mexja na pre mẽhõ ĩhkra ho hipêx kêt nê. Tĩrtũm na pre tanhmã hipêx to nhũm kamã Jejusja mẽ pahto hwỳr o hkrĩ.

3 Nê mẽ pahpê Ijaew nhõ patre maati jaja na prem mẽ ho hwỳr kaxyw nê mẽ kot amnhĩ tomnuj pãnhã Tĩrtũm mã mẽmoj nhõr kõt mẽ ho kuwỳ. No Kris na hte ã amnhĩ nhĩpêx anhỳr kêt nê. Ra htyk o kot kãm amnhĩ nhĩ nhõr jakamã na hte wam patre maati pyrã nê xatã kãm mẽmoj nhõr kêt nê.

4 Tã na hte arĩ Ijaew Mojes kapêr kõt amnhĩm Rewi hkwỳ kêp mẽ õ patre kaxyw mẽ unhwỳ nhũm mẽ ho Tĩrtũm wỳr o pa. No Jejus kêp Rewi



Eprêw 8.5-6

hkanrêhã htàmnhwý hkêt. Katorxà hkôt kêp Juta hkanrêhã htàmnhwý jakamã kop apu arí jar pika ja kamã htír nê pa ronhýx Ijaew nhõ patre pyrã nê kêp mê ho Tirtúm wýr o pa xwýnh kêt. Am Rewi hkanrêhã htàmnhwý pixjaja na htem mê kaxyw kãm mêmoj gô nê hkôt mê ho kuwý. 5Jar na htem arí ã amnhĩ nhípêx anhýr o pa nom kaxkwa kamã na htem ã amnhĩ nhípêx anhýr hkêt nê.

Nê jar Tirtúm nhõrkwý kaàkreja te kot kaxkwa kamã õrkwý mexta pyrãk. Na pre Mojes õrkwý kaàkre nhípêx kaxyw nhúm Tirtúm tanhmã kãm hã karõ hto nê kãm:

—E jáã hixêt prêk nhímök ã axãmta ã na pa pre amã ixkreta kukamã ixprí hã tanhmã mê ate hipêx to hã amã karõ. Tã kêr ka ã hipêx anê. Anê.

Hãmri nhúm kuma nê kot kãm hã karõ xà hkôt hipêx. Hãmri nhúm mê õ patre maati ixkreja kamã mê ho Tirtúm wýr o pa. Na prem ã amnhĩ nhípêx anhýr o pa.

6Tã nhúm ra Tirtúm axtem mê hpãnhã mê pakaxyw Kris xãm nhúm hte mê pahto hwýr mex o wantajê jakre. Na hte kaxkwa kamã mê pahpiitã mê pahpumunh mex rãhã ho hkrí nê wantajê rom tanhmã mê pahkrã hto pu mê tãm amnhĩ nhípêx o ri papa. Tirtúm kot finat Mojes mã kapêrja mex nê nom axtem na pre. Tã kapêr nyw na mex o kot wam kapêr jakrenh. Kapêr nyw kôt kot puj mê pahtyk tã akupým pahtír nê nhýrmã Tirtúm mê Jejus wa kuri pamex nê pahtír tùm nê papa ho papa nê axte pahtyk kêt nê. 7Kêp apu Tirtúm kot Mojes mã kapêr kôt mê kot tãm amnhĩ nhípêx o pa ronhýx pre Tirtúm axte kapêr nyw ã kaga hkêt nê. 8Nom wam kapêr tũmta na pre mê mar týx htã arí amnhĩ tomnuj rãhã ho pa nhúm tee ri ja hã mê omu nê mê kãm:

Nà kot paj axte nhÿrmã mẽ apê Ijaew mã axtem tanhmã ixkapêr to.

9 Amnepêm mẽ anhîgêtjê mã na pa pre ixkapêr.

Na pa pre Ejit pê mẽ kator nê mẽ kot tanhmã amnhĩ nhîpêx to ho pa kaxyw tanhmã hã mẽ kãm karõ hto.

Nom na prem ixkapêr ma nê ãm kuma nê ixkôt amnhĩ nhîpêx kêt nê. Pa tee ri ja hã mẽ omu hãmri nê mẽ hkaga.

10 Tã kot paj mẽ apê mẽ hkanrêhã mẽ htãmnhwÿ nywjê mã axtem ixkapêr ka mẽ ixkapêr nywja ma.

Kot paj nhÿrmã tanhmã mẽ akrã hto ka mẽ ixkapêr nyw mar tÿx nê hã ano htÿx nê ho apa.

Nê akính nê apa.

Nê ixkôt ri amnhĩ nhîpêx mex o apa.

Nê axpên mã ijarênh o: “Nà ãm hãmri Tirtũm kêp mẽ panhõ Tirtũm na.” Anhÿr o ri axpên mã ijarênh o apa.

Pa amnhĩ tã mẽ ama nê mẽ apumu nê amnhĩ xwar mẽ apê ixkra hã amnhĩm mẽ ajarê.

11 Kot kaj mẽ apiitã ixte amnhĩ nhîpêx kôt ixpumunh mex o ri apa.

Mê akàxpore rũnh xwÿnhjaja nê mẽ akàxpore hkryre

xwÿnhjaja mẽ apiitã ixpumunh mex jakamã kot kaj mẽ ri

axte ixtã tanhmã axpên kukjêr to ho ri apa hkêt nê.

12 Nê kot paj mẽ ato mex rax o ixpa.

Nê axte tanhmã mẽ ate amnhĩ tomnu hto ho apaja mã ijamaxpêr kêt nê. Anê.

13 Nê koja mẽmoj ra htũm hãmri nê hapêx tokyx anê. Ja pyrã nê na pre Tirtũm mẽ pamã kapêr tũmta jarênh o:

— E kêr ka mẽ axte ixkapêr tũm mar kêt nê. Pãnhã ixkapêr nyw pix mãn mar o apa nê ãm kôt pix mã mãn amnhĩ nhîpêx rãhã ho ri apa. Anê.

Tirtũm nhõrkwÿ kaàkre jarênh

9 1 Nê amnepêm na pre finat Mojesja mẽ panhîgêt nê mẽ pahpãmjê mã tanhmã Tirtũm nhõrkwÿ kaàkre jarênh to. Tanhmã mẽ kot hipêx to nê kamã tanhmã amnhĩ nhîpêx to hã mẽ kãm karõ. Nê kamã tanhmã mẽ kot amnhĩ to Tirtũm wÿr to hã mẽ kãm karõ. Nê tanhmã mẽ hkwyjê ho hwÿr toja nhũm pre mãânên mẽ kãm hã karõ. No Tirtũm nhõrkwÿ kaàkreja kêp õrkwÿ kumrêx kêt. ãm mẽ kot omunh nê kaxkwa kamã õrkwÿ kumrêx mã hamaxpêr kaxyw na pre. 2 Jakamã nhũm prem Mojes kapêr ma nê hipêx. Kamã hitom hamêxkrut. Wam hitom kamã na pre kanê hprêeti xãm nê kutã mêsti xãm. Nê mêsti nhĩmõk ã Tirtũm mã õ pãwti jaxwÿ. Mẽ panhõ patre na pre htem Tirtũm mã kugõ nê mêsti ã kãm haxwÿ hãmri nê hkwyjê ho kuwÿ. Tã hitom ja na prem kêp Tirtũm nhõ hitom mex ã harê.


3-4 Nê hitom wa hkaêx kãm na pre kupêxê ho hakwakre kahê xàja ajêt. Haturxà kamã hitomja na prem Tirtùm nhõ hitom maati hã harê. Tirtùm na pre te hirã htÿx kãm hwÿr wrÿ nê te kamã hkrÿ pyrãk. Nê kamã na pre Tirtùm mã mêhkuxwa xà ho xêt xà hã mês kunihitja kuhê. Na prem ôr o hipêx nê kamã ãm nhùm kuhê. Nhùm pre hte mēõ patre hwÿr agjê nê kutã kuhê nê mē ho Tirtùm wÿ. Nê mês kunihiti haxwÿja hitom maati kamã kuhê. Na prem pÿ ho hipêx nê ôr o hpro nê kamã ãm. Mêstija kaxwÿnh kãm na pre htem mēmoj jagjê.

Tirtùm kot Ijaew mã tanhmã mē kot amnhÿ nhÿpêx to ho pa hã karõ nê kën po hã mē kãm hã kagàja nhùm prem kamã kuxà nhùm hikwÿ.

Nê mãânên ôr o xijereja xà nhùm hikwÿ. Nê xijere kamã amnepê mã Tirtùm kot kaxkwa rùm mē hwÿr mēõ rênh kwÿ hikwÿ. Mēõja mē kot kãm: “Manã” anhÿr xwÿnhja na prem hkwyê hkawrà nê xijere kamã kugjê hãmri nê mêsti kamã kuxà.

Nê finat Arãw nhõ kô kot ho amnhÿ kaxpar xà htÿmta nhùm prem kamã kuxà. Tirtùm kot tanhmã ho nhùm kurùm pixôrà muxre hapôx xwÿnhhta nhùm prem mãânên mês kunihiti kamã kuxà nhùm hikwÿ.

5 Nê himök ã Tirtùm kapêr o wrÿk xwÿnh wa hkarõ nhÿpêxja wa hamêxkrut nê axpên kutã wa hkôn krã ho hkrÿ. Axpên wÿr hara koror nê wa hkrÿ. Patre maati kot omunh nê Tirtùm kot mē hkôt pa ho paja mã hamaxpêr kaxyw. Nê wa hkaêx kãm ahkaprÿja Tirtùm kot mē nê mē kot amnhÿ tomnuj rênh mã hamaxpêr xà na pre.



Eprêw 9.2

Ã Tirtûm nhõrkwỹ kaàkre kot anhÿr. No kot paj ixprĩ hã mẽ amã piitã harênh par kêt nê. ⁶Na pre hte mẽõ patre apkati mẽ wam hitom wÿr agjê nê kamã Ijaew ho Tirtûm wÿr o pa. ⁷No hitom maatiã am mẽ õ patre maati pix na pre hwÿr agjê. Nom apkati mẽ hwÿr pa nê gjêx kêt am amgrã pÿnh kãm hwÿr gjêx pÿnh nê. Nê hwÿr gjêx kaxyw nê mẽmo mry pa nê hkamrô ru nê o pa nê hitom maati hwÿr ho agjê. Hãmri nê ho mẽs kunihti nhĩmõk kamĩ nê Tirtûm mã kãm:

—Pa Tirtûm. E ota mry kamrôta. Mẽ ixpê akwÿjaja mẽ ixte amnhĩ tomnuj jakamã na pa mẽ amnhĩ pãnhã mẽmo mry nhõkre jakã nê kupĩ nê hkamrô ru nê man awÿr o mra. Te kot mẽ ixte amnhĩ tomnuj mÿrapê htyk pyrãk. Jakamã kwa ã mẽ ixte amnhĩ nhĩpêx anhÿrja ã mẽ ixpumunh hkõt mẽ inhnê mẽ ixte amnhĩ tomnuj rê.

Anhÿr o mẽ amnhĩ to kuwÿ. ⁸Nê patre maati pix na pre hitom maatiã wÿr agjê nê mẽ ho Tirtûm wÿ. Ijaew na prem ixkre kapem hamãr o kuhê nê hwÿr gjêx kêt nê. Tirtûm Karõ kot hã mẽ kãm karõ xà hkõt. Te Tirtûm pê amÿm kuhê pyrãk. Tã na htem jarãhã arĩ Ijaew kanrêhã mẽ hkra nê mẽ htãmnhwÿjaja ã amnhĩ nhĩpêx anhÿr o pa. Jao mẽ higêjtê pyrã nê Tirtûm pê amÿm kuhê.

⁹Mẽ kot arĩ Tirtûm mã mry hpar nê hkamrô ho mẽmoj kamĩr nê amnhĩ to hwÿr o pa htã na htem arĩ hamaxpêr punuj pix o pa.

¹⁰Tirtûm kapêr tũm kot tanhmã mẽmoj tã mẽ kãm karõ hto.

Na pre tanhmã mẽ apkur xà hã mẽ kãm karõ hto nhũm htem pix kur o pa.

Nê tanhmã mẽ hkõm xà hã mẽ kãm karõ hto nhũm htem pix o hkõm o pa.

Nê tanhmã amnhĩmnuj to hã tanhmã mẽ kot amnhĩ kuhõnh to hã karõja nhũm htem hkõt pix mã tanhmã amnhĩ kuhõnh to ho pa.

Nê tanhmã mẽ kot ri mẽ hikukrêx kuhõnh to hã mẽ kãm karõja nhũm htem kõt pix mã tanhmã kuhõnh to ho pa.

Ã na pre Tirtûm Kris kukamã mẽ kãm mẽmoj tã karõ rax anê. Kris kutêp pix mã ã mẽ kot amnhĩ nhĩpêx anhÿr kaxyw. No mẽ pahte arĩ ã amnhĩ nhĩpêx anhÿr kaxyw kêt. Na pre ra Kris mẽ pahwÿr wrÿ nê Tirtûm kapêr tũm o hapêx nê hpãnhã mẽ pamã kapêr nyw jarê pu mẽ hpãnhã nywta kõt pix mã amnhĩ nhĩpêx o papa. Kapêr nywja mex o mex. Nê mex o wamta jakrenh.

Kris htyk o mẽ pahte amnhĩ tomnuj pãnhã amnhĩrer ã harênh

¹¹Tã na pre Krisja tãm mẽ pahwÿr wrÿ nê kêp mẽ pahto Tirtûm wÿr xwÿnh maati nê patre hpãnhã mẽ pahto hwÿr o pa. Nom jar pika ja kamã mẽ kot mẽ ãhkra ho Tirtûm nhõrkwỹ kaàkre nhĩpêxta wÿr ãr nê kamã mẽ pahto hwÿr kaxyw na pre wrÿk kêt nê. Na pre ra akupÿm

kaxkwa hwÿr api nê kamã örkwÿ mex wÿr axà nê kamã tanhmã mẽ pahto mex to nê tanhmã mẽ pahto Tirtûm wÿr to rãhã ho hkrĩ. 12Ã kaxkwa kamã Tirtûm nhõ hitom maatija wÿr àr tipxi htã mẽ pahpiitã mẽ pahte amnhĩ tomnuj pãnhã amnhĩrer pa. Nom mẽmo mry kamrô ho mẽ pahpãnhã amnhĩrer kêt nê. Mõx kamrô rÿ motre kamrô ho mẽ pahpãnhã amnhĩrer kêt nê. Amnhĩ kamrô ho na pre mẽ pahpãnhã amnhĩre. Tyk nê hkamrô pikapĩrta o mẽ pahpiitã mẽ pahpãnhã amnhĩrer pa.

13Nê amnepêm Ijaew kot Tirtûm kapêr tûm kôt amnhĩ nhĩpêx mex o pa hkêt jakamã nhûm tee ri mẽ omu nê mẽ kot amnhĩ tomnuj o mẽ pa xwÿnh ã mẽ harê. Jakamã na pre mẽõ patre xatã mry kamrô ho mẽ hkamĩ. Mõx kamrô nê motre kamrô ho mẽ hkamĩ. Na pre mõi krare hkwy hpa nê ho hxêt nê hprã ho hkwyjê kamĩ. ã na prem xatã mẽ hipêx anhÿr o pa. Tirtûm kot ja hã mẽ omunh nê mẽ mex ã mẽ harênh kaxyw. Nom te mẽ krãhkã pix mex pyrã nê mẽ hkrã kaxwÿnh kãm arĩ hamaxpêr punuj o pa. 14Ã na prem amnhĩ nhĩpêx anhÿr o pa. Nom Krisja mẽ kurom aa tanhmã amnhĩ tomnuj to hkêt jakamã na pre mẽ pahte amnhĩ tomnuj xwÿnhjê nê ty. Te mẽ kot amnhĩ nê mõi rÿ motre hpar nê hkamrô runhta pyrãk o amnhĩ nhĩpêx nê mẽ panê Tirtûm mã amnhĩ gõ nhûm pre mẽ kãm hkurê xwÿnhjaja kupĩ. Na pre Tirtûm Karõja ã kot mẽ panê htyk anhÿr kaxyw tanhmã ho hihtÿx to. Karõja aa hapêx kêt kumrêx rãhã nê pa ho pa xwÿnh jakamã na pre Kris tykja kukamã tanhmã ho hihtÿx to nhûm mẽ panê ty. Tapxipix na mẽ pahte tãm amnhĩ nhĩpêx o papa kaxyw kêp tanhmã mẽ pahkrã hto xwÿnh. Jakamã na pu htem ra pajamaxpêr nyw o pajamaxpêr o papa nê pajamaxpêr o:

—Na pa pre tee ri inhmã amnhĩ krã hkôt tãm amnhĩ nhĩpêx o ixpa hprãm kaprÿ nê ãm amnhĩ tomnuj pix o ri ixpa. Tã Kris kot inhnê htyk o hkamrô pikapĩr ã harênh ma nê amnhĩ kaxyw hkôt ijamaxpêr tÿx nê nhûm amnhĩ tã ixpumu nê ixte tãm amnhĩ nhĩpêx o ixpa kaxyw ixãm. Jakamã kot paj ãm Tirtûm pix mã kãm tanhmã amnhĩ nhĩpêx to ho ri ixpa. Tĩr rãhã nê pa ho pa xwÿnh jakamã kot paj nhÿrmã kuri urãk nê ixtĩr tûm nê ixpa ho ixpa. Anê.

15Nê amnepê mã na prem piitã Tirtûm kapêr tûm kôt amnhĩ nhĩpêx mex o pa hkêt nê. Mẽ kot xatã hkôt amnhĩ nhĩpêx o pa hã amnhĩ jarênh tã hkôt amnhĩ nhĩpêx kêt nê. Jakamã na pre Kris wrÿ nê mẽ pahte hkôt amnhĩ xunhwÿr mã xwÿnhjê mã Tirtûm kapêr nyw jarê nê mẽ pamã:

—Kot paj mẽ anê ty nhûm Tirtûm ã ixte amnhĩ nhĩpêx anhÿrja kukwak ri mẽ ato mex rãhã ho pa. Anê.

Hãmri nê amnhĩ jarênh xà hkôt mẽ pahte amnhĩ tomnuj piitã hpãnhã amnhĩrer kaxyw mẽ panê ty. 16-17Te jar pika ja kamã mẽhõ htyk kukamã hkrajê mã tanhmã amnhĩ jarênh to pyrãk. Na htem htyk kaxyw nê hkrajê mã:

—Nà kot paj mēmo arıgro hã ty ka mē inhmÿr pê ixpê ixkukrêx kwÿ o arık.

Anhÿr o na htem amnhĩ jarē. Hãmri nē ty nhũm hkrajaja amnhĩm õ mēmoj to àrık pa. Mē hipêêxà kukwak ri mē hikukrêx mex nē mÿr pê o pa. No kormã htır ri nhũm mē kormã kêp hamÿnh kêt nē. Ja pyrã nē na pre Tirtũmja Jejus htyk kukwak ri tanhmã mē pahto mex to pu mē kukwak ri mē pamex nē pahkĩnh nē ri papa.

18Nē Tirtũm kapêr tũm kôt na pre hte mē õ patre mry pa nē ãm hkamrô runh kôt pix mã mē ho Tirtũm wÿr o pa nhũm amnhĩ tã mē omunh xà hkôt mē kuma nē tanhmã mē ho mex to.

19Na pre finat Mojesja Ijaew mã Tirtũm kapêr tũm piitã harē nē harēnh pa hãmri nē môm õxpĩ nē kaxyw motre hõxpĩ. Hãmri nē xijere kamã hamē wa hkamrô runh pa nē kamã gô hkwÿ ru. Hãmri nē kaxyw mēmo pĩ hpa hkryre pê “isop” jarēnhja kwÿ kukē. Nē kaxyw ôwēhti hkĩ kamrêkre hkwÿ hpy nē isop mē ho pihkàr pa nē mry kamrô o go. Hãmri nē ho hkwÿjê kamĩ. Nē ho Tirtũm kapêr ã kagã tũmta kamĩ. 20-22Hãmri nē ho anhÿr pa nē mē kãm:

—Nà na Tirtũmja ixte mry kamrô ho mē akamĩr pumunh kôt mē pamã kapêr o: “E kot kaj mē ixkapêr kôt amnhĩ nhípêx o ri apa hã kot paj tanhmã mē ato mex to rãhã ho ri ixpa ka mē amex nē akĩnh nē ajamakêtkati nē ri apa. Jakamã kêr ka mē mry kamrô ho mēmoj piitã hkamĩr pa. Nē ho amnhĩ kamĩ. Kêr pa ja hã mē apumu hãmri nē axte tanhmã mē ate amnhĩ tomnuj tota mã ijamaxpêr kêt nē.” Anē. ã na Tirtũm mē pamã kapêr anē. Anē.

Hãmri nē hpãnhã mry kamrôta o òrkwÿ kaàkre kamĩ. Nē hkre kamã mēmoj kuhê xwÿnh piitã nhũm ho hkamĩr pa. ã na pre mē õ patre mē mex kaxyw mē hipêx anhÿr o pa. Mē kot tõhã mēmoj to hpÿnhre nē ho hkamĩr kêt jakamã kironhÿx pre mēmoj piitã ã hipêx anhÿr o pa. Kop apu mē kot mry hpar nē hkamrô runh kêt ronhÿx pre Tirtũm arĩ mē kot amnhĩ tomnuj mã hamaxpêr rãhã ho pa.

23Na prem ã Tirtũm nhõrkwÿ kaàkre kamã mēmoj kuhê xwÿnh piitã mex kaxyw hipêx anē. Te Tirtũm kot mē pahto mex nhũm mē pahte nhÿrmã ma kaxkwa hwÿr õ krĩ hwÿr paxàpirta pyrã nē. Nom mē kot mry hpar nē hkamrô runhta kukwak ri mē pamex nē papa hkêt. ãm mēhõ kamrô kukwak ri mē pamex xwÿnhhta pix kukwak ri na mē pahpê pahfır tũm nē papa mã xwÿnh. Ja na mex o mry kamrô piitã hakrenh pa. 24Jejus Krisja pix kukwak ri. Tãm na pre patre pyrã nē mē pahto Tirtũm wÿr kaxyw mē ãhkra ho Tirtũm nhõrkwÿ kaàkre nhípêxta wÿr gjêx kêt nē. ãm ixkre kaàkre pix na pre. Na pre kaxkwa kamã Tirtũm nhõ krĩ hwÿr axã. Tã arĩ kamã Tirtũm nhĩhkô hã mē pahto hwÿr rãhã ho hkrĩ.

25Nē Ijaew nhõ patre maati na hte amgrã mē òrkwÿ kaàkre kamã hitom maati hwÿr gjêx tipxi. Nē amnhĩ kôt mry kamrô ru nē ho agjê.

Tĩrtũm kot hã omunh nẽ axte mẽ kot amnhĩ tomnuj mã hamaxpẽr hkêt kaxyw. Nom Kris na pre mẽ uràk nẽ mẽmo mry pa nẽ Tĩrtũm mã hkamrô kapĩr kêt nẽ. Kamrô na pre mẽ panê axkapĩ. Nom patre pyrà nẽ amgrà mẽ ã amnhĩ nhĩpêx anhỹr kêt nẽ. Na pre htyk o Tĩrtũm mã amnhĩ nhõr tipxi. **26**Kêp apu patre pyrà nẽ amgrà mẽ mẽ panê htyk o pa ronhỹx ra mẽ panê htyk xohtô rax kumrêx. Nhỹx pre amnepê mã Tĩrtũm kot mẽmoj piitã ho katorta rũm amgrà mẽ mẽ panê htyk o pa ho hkrax. Jao xatã htyk o amgrà xohtô rax kumrêx. Nom ja kot anhỹr kêt. Na pre mẽ pahwỹr wrỹ nẽ mẽ panê htyk tipxi htã htykja o mẽ pahte amnhĩ tomnuj piitã hpãnhã amnhĩrer par kumrêx. Jakamã mo kaxyw koja axte ty?

27Ãm pahtyk tipxi htã koja Tĩrtũm nhỹrmã akupỹm mẽ pahpiitã mẽ pahto pahtĩr nẽ ahpỹnhã tanhmã mẽ pajarênh to nẽ ahpỹnhã tanhmã mẽ panhĩpêx to. Kormã mẽ pahtĩr ri mẽ pahte amnhĩ nhĩpêx ã mẽ pahpumunh xà hkôt tanhmã mẽ panhĩpêx to. **28**Ja pyrà nẽ na pre Krisja ãm mẽ panê htyk tipxi htã mẽ pahto ohtô nẽ mẽ panê mẽ pahte amnhĩ tomnuj piitã rênh pa. Hãmri nhũm Tĩrtũm akupỹm ho htĩr nẽ akupỹm amnhĩ wỹr ho api. Tã koja nhỹrmã akupỹn mẽ pahwỹr wrỹ. Nom axte mẽ pahte amnhĩ tomnuj pãnhã amnhĩ rer kaxyw mẽ panê htyk kaxyw wrỹk kêt nẽ. Ra kot mẽ pahte amnhĩ tomnuj pãnhã amnhĩrer kênã. Kojã akupỹn wrỹ nẽ mẽ pahte amnhĩ wỹr kamã pajamak o papa xwỹnhjaja ma akupỹm amnhĩ kôt kaxkwa hwỹr mẽ pahto àpir pa. Ra mẽ pahtyk tã nhũm akupỹm mẽ pahto mẽ pahtĩr nẽ ma amnhĩ kôt mẽ pahto àpir pa pu mẽ kuri pamex nẽ pahtĩr tũm nẽ papa ho papa.



Kris kot mẽ panê htyk tipxi hã harênh

10 **1**Nẽ arĩ mẽ kot Tĩrtũm kapẽr tũm kôt amnhĩ nhĩpêx o mẽ pa xwỹnhjaja kormã hprĩ hã Tĩrtũm kot tanhmã mẽ pahto mex to hã harênh mar tỹx kêt. Na prem kormã hkwỹ pix ma. Na hte mẽ õ patreja amgrà mẽ kãnhmã kaxkwa hwỹr mry kamrôta pẽ nẽ mẽ amnhĩ to Tĩrtũm wỹ. Kot ja hã mẽ omunh nẽ axte mẽ kot amnhĩ tomnuj mã hamaxpẽr hkêt kaxyw. Tã ã mẽ kot amnhĩ nhĩpêx anhỹr tã arĩ Tĩrtũm kapẽr kwỹm amnhĩ nhĩpêx rãhã **2**jakamã na prem xatã kãm mẽmo mry kamrô runh o pa. Kêp apu tãm amnhĩ nhĩpêx nẽ tãm ri hamaxpẽr ronhỹx arĩ ã amnhĩ nhĩpêx anhỹr o pa hkêt nẽ. Nẽ xatã amnhĩ pãnhã mry hpar

nê hkamrô ho Tirtûm nhôrkwỹ kaàkre kamã mêmôj kamír kêt nê. 3Nom na prem tãm amnhĩ nhĩpêx o pa hkêt nê. Mê kot amgrà mẽ Tirtûm kot mẽ nê mẽ kot amnhĩ tomnuj rênh kaxyw mẽ kot kãm mêmô mry hpar o pa htã no ãm hkôt amnhĩ nhĩpêx xwýnh ã amnhĩ jarênh kêt nê. Arĩ mẽ kot amnhĩ tomnuj o pa jakamã na prem mry hparta ã amnhĩ pumu nê tee ri amnhĩ kukamã hamaxpêr o hkaprĩ nê pa. 4Nom na hte môx kamrô rý motre kamrôja mẽ panê mẽ pahte amnhĩ tomnuj rênh kêt nê. 5-8Jakamã na pre Krisja mẽ pahwýr nojarêr nê Tirtûm mã amnhĩ jarênh o:

Pa Tirtûm? E kot paj ma mẽ hwýr wrý.

Mê kot amnhĩ pãnhã amã mry hparta apê hprãm nõkati nê amã hkĩnh kêt.

Ate mẽ nê mẽ kot amnhĩ tomnuj rênh kaxyw mẽ kot amã mêmô mry hparta amã hprãm kêt. ãm ixkukamã na ka pre ã mẽ kot amnhĩ nhĩpêx anhýr kaxyw mẽ kãm ja hã karô.

Mê kot mry nhĩpêx o te pa ixte mẽ nê ixtyk nê ixkamrô pikapír pyrãk o na prem ixkukamã ã amnhĩ nhĩpêx anê.


Jakamã na ka ra mẽ kaxyw inhmã inhĩ gô pa mẽ urãk nê inhĩ ho inhĩ.

Tã kot paj ma mẽ hwýr wrý. Ixte amã hprãm xà hkôt pix mã ixte tanhmã amã amnhĩ nhĩpêx to ho ixpa kaxyw. Akapêr ã kagà htũm kot tanhmã ixkukamã ijarênh to xà hkôt kot wrý nê ã amã amnhĩ nhĩpêx anê. Anê.

Hãmri nê man mẽ pahwýr wrý. 9Kot Tirtûm kapêr tũm o hapêx par nê hpãnhã tãm mẽ panê htyk kaxyw wrý. Jakamã na pre nojarêr nê Tirtûm mã amnhĩ jarênh o:

—E ixte amã hprãm xà hkôt amnhĩ nhĩpêx kaxyw kot paj ma mẽ hwýr wrý.

10Anhýr jakamã wrý nê Tirtûm kãm hprãm xà hkôt mẽ panê ty. Na pre nhãm mêhõ mẽ kãm hkurê xwýnhjê mã ôr nhũm mẽ kot hpír nhũm amarí htyk kêt nê. Na pre amnhĩ grõnh kôt mẽ kãm amnhĩ gô nhũm prem kupĩ. Hãmri nhũm



Eprêw 10.1-4



Eprêw 10.5-10

htyk o mẽ pahte hkôt amnhĩ xunhwÿr xwÿnhjê o Tirtũm kra. Mẽ kot xatã mry hparta rom htyk tipxi tã mẽ pahpiitã mẽ pahte amnhĩ tomnuj pãnhã amnhĩrer pa.

11 Nẽ mẽ õ patrejaja na htem apkati mẽ Tirtũm nhõrkwÿ kaàkre kamã kãm tanhmã amnhĩ nhĩpêx to. Nẽ apkati mẽ hkwyjê hpãnhã mry hkwy hpa nẽ hkamrô ru nẽ mẽ ho Tirtũm wÿ. Tã nom ja hã mẽ omunh xà hkôt mẽ nẽ mẽ kot amnhĩ tomnuj rênh kêt nẽ. 12 No kêt Kris na pre mẽ kot xatã mry hpar xwÿnhta rom ãm htyk tipxi htã mẽ pahte amnhĩ tomnuj piitã hpãnhã amnhĩre. Hãmri nẽ ma akupÿm kaxkwa hwÿr api nẽ Tirtũm nhĩhkô hã Pahi Maati hkrĩ xà kamã upôk rũm hkrĩ ho hkrĩ. 13 Koja kuri hkrĩ rãhã nhũm Tirtũmja ãhkram mẽ kot kutã amnhĩ xunhwÿr xwÿnhjê jaxàr pa. Ja kaxyw na kormã kuri hamãr o hkrĩ. 14 ãm htyk tipxi htã htykja o mẽ pahte hkôt amnhĩ xunhwÿr xwÿnhjê ho Tirtũm kra pu mẽ ra hpãnhã tãm amnhĩ nhĩpêx rãhã ho papa. Nẽ pajamaxpêr mex o ri papa. Tirtũm kãm hprãm xà hkôt.

15 Amnepêw mẽ kot Tirtũm nhÿ hã kapêr jarênh o mẽ pa xwÿnhjaja na prem mẽ panhĩgêjtê mã kapêr o pa. Tirtũm Karõ nhÿ hã mẽ kãm kapêr nẽ mẽ kãm:

16—E na Tirtũm mẽ pamã amnhĩ jarê nẽ amnhĩ jarênh o:

Kot paj nhÿrmã axtem ixkapêr nyw o mẽ amã ixkapêr.

Nẽ mẽ akrãm hagjê ka mẽ mar tÿx pê hã ano htÿx nẽ ho apa.

Ixkapêr tũm na pa pre mẽ amã kên pota ã hã kagã.

Nom ixkapêr nyw kot paj axtem mẽ akrãm hagjê.

17 Nẽ kot paj axte mẽ ate amnhĩ tomnuj mã ijamaxpêr kêt nẽ.

Anhÿr o mẽ pamã amnhĩ jarênh. Anê.

18 Tã ra axte mẽ pahte amnhĩ tomnuj mã hamaxpêr kêt ã kot amnhĩ jarênh jakamã mo kaxyw kot pu mẽ arĩ amnhĩ pãnhã kãm mẽmo mry hpar nẽ hkamrô runh o papa? Tã mẽ pahkwÿjjaja na hte arĩ kãm ja ho anhÿr prãm o pa. E kwa mẽ axte ã amnhĩ nhĩpêx anhÿr kêt nẽ ixkwÿjjaja.

Akupÿm mẽ pahte amnhĩ nhĩpêx tũm o paxujanãr kêt ã mẽ pamã karõ

Matêwre 27.51; Rukre 23.45; Rõmãn 5.1-2; Epes 3.12; Eprêw 4.14-16

19-20 E ixkrãmnhwÿjjaja. Ra Jejus kot mẽ panê htyk o hkamrô pikapÿr jakamã na pu htem arĩ tee ri amnhĩ kukamã pajamaxpêr hkêt nẽ. Tirtũm axte kot mẽ pahte amnhĩ tomnuj mã hamaxpêr kêt jakamã na pu htem paxãmnhĩx amnhĩ to hwÿr o papa. Te paxãmnhĩx õrkwÿ kaàkre kamã hitom maati hwÿr pagjêx nẽ kamã amnhĩ to hwÿrta pyrãk. Jao ra mẽ papamjaja amnhĩ to hwÿr o papa nhũm patre axte mẽ pahto hwÿr kêt nẽ. Jejus na pre htyk o mẽ pamã hitom maati wÿr hakwakre kahêxã hã kupêxêja kôt ã ho axkjê. Jao mẽ paxãmnhĩx hwÿr mẽ pagjêx kaxyw mẽ pamã kahê xà mẽ. 21 Tã ra kêp Tirtũm nhõ krĩ kamã mẽ pahto hwÿr xwÿnh maati na. Nẽ mex kumrêx o jar pika ja kamã patre kot mẽ ho

hwÿr o pa xwÿnhhta jakrenh. **22**Jakamã e kwa kêr pu mē māmri paxàmnhix amnhĩ to Tĩrtũm wÿr o papa. Ra Jejus kot mē panê htyk nhũm mē pahte amnhĩ kaxyw hkôt pajamexpêr rãhã ho papa jakamã kêr pu mē axte mē pahpê amnhĩ tomnuj xwÿnh ã amnhĩ jarênh kêt nê. Kêr pu mē nhÿrmã tanhmã pajamexpêr punuj to rÿ tanhmã amnhĩ tomnuj to hãmri nê tee ri ja hã amnhĩ pumu nê pahkapri kamã amnhĩ to Tĩrtũm wÿr kurê kumrêx. Jejus ra kot mē pahte amnhĩ tomnuj pãnhã amnhĩrer par jakamã kot puj mē Tĩrtũm mã tanhmã mē pahte amnhĩ tomnuj to hã amnhĩ jarê nhũm mē pama nê axte kãm hamaxpêr kêt nê. Pu mē te paxwÿr nê pahte amnhĩ nê pagrã htyk kuhõnh par nê akupÿm pamex pyrãk. Nê axte paxàmnhix amnhĩ to Tĩrtũm wÿr o papa.

23Nê mē kot Kris ã tanhmã mē pahto htã kwa kêr pu mē tee ri amnhĩ kukamã pajamexpêr kêt nê. Rÿ pajamexpêr o:

—Konên. Koja mē tanhmã hamaxpêr to nê Kris ã ixpĩ rÿ ko. Pa apu mē kot ixpĩr pymaj akupÿm ixte amnhĩ nhĩpêx tũm o awjanã nê akupÿm hkôt amnhĩ nhĩpêx japêr rÿ ko. Anê.

Kwa pu mē tee ri ã pajamexpêr anhÿr hkêt nê. Pu kêt mē pajamexpêr o:

—Nã mē kot Kris ã tanhmã ixto htã kot paj aa hkaga hkêt nê. Mē kot hã ixpĩr mã tã kot paj hkaga hkêt kumrêx.

Anhÿr ã amnhĩ jarê. **24**Nê kêr ka mē akwÿjê mã anê kê mē mēmoj to axpên kutã nojarêr rãhã ho ri axpên kôt pa. Jao tanhmã axpên to mex to o ri axpên kôt pa.

25Na pre ra mē pahkwÿjaja tanhmã hamaxpêr to nê axte mē pahkôt pikuprõnh nê Tĩrtũm kapêr mar o hkrĩ hkêt nê. No kêr pu mē ho mē urãk kêt nê. Kêr pu mē arĩ xatã axpên wÿr akuprõ nê mē pahte tee ri amnhĩ kukamã pajamexpêr nê axpên mã pakapêr o papa. Kêt mē panhõ Pahihtija ra akupÿn mē pahwÿr wrÿk kaxyw jakamã kwa kêr pu mē kutêp arĩ axpên mã pajamexpêr mex nhõr pê tãm axpên nhĩpêx mex rãhã ho ri papa.

26Mê pahkwÿjaja kot Tĩrtũm kapêr mar mex tã na htem kuma nê ãm kuma. Kwa kêr ka mē ho mē urãk kêt nê. Kris kot mē panê htyk ã harênhja mē kot mar mex tã na htem kuma nê ãm kuma nê hkaga kumrêx. Jakamã mēhõ koja Kris pyrã nê htyk o mē kot amnhĩ tomnuj pãnhã amnhĩre? Nã amrakati kumrêx. ãm Jejus pix na pre Tĩrtũm ja kaxyw ãm. Tapxipix na pre ã mē panê amnhĩ nhĩpêx anê. Tã nhũm mē kot hkagaja mÿrapê koja mē nhÿrmã mē tãmjaja mē kot amnhĩ tomnuj pãnhã amnhĩre. **27**Mê kot Tĩrtũm kutã amnhĩ xunhwÿr xwÿnh na mē. Amnepê m na pre Tĩrtũm mē kot kutã amnhĩ xunhwÿr xwÿnhjê kaxyw mē kot amnhĩ xà htÿx kamã hamak tũm xàta nhĩpêx. Tã ra mē kot Jejus kaga jakamã koja nhÿrmã ma hwÿr mē rênh pa nhũm mē tee ri kãm hwÿr pa hprãm kêt kaprÿ. **28**Amnepê m finat Mojesja kormã

htîr ri na pre hte mēhō pixi nē kapēr kaga nē akupÿm kot amnhî nhîpêx tûm o awjanā nē tanhmā amnhî tomnuj to nhûm hkwyjaja ja hã omu. Tanhmān axkrut rÿ axkrunēpxi nē ja hã omu. Hāmri nē ma Mojes wÿr mra nē axpēn kôt kām tanhmā kot amnhî tomnuj to hã harē. Hāmri nhûm harēnh ma nē mē kām hã amÿnē nhûm tee ri kām htîr prām kaprÿ. Mē kot akupÿm amnhî nhîpêx tûm o ujanār nē amnhî tomnuj o paja mÿrapê na prem mē kupa. Ā na pre htem mē hipêx anhÿr o pa.

29Nē koja mēhō tanhmā Tîrtûm Kra Jejus o kapēr punuj to. Tîrtûm kapēr ā kagā htûm kot ra mē kot kēp Tîrtûm Kra hã harēnh mar mex tā axtem nē tanhmā ho kapēr punuj to ho pa. Kot mē panê htyk nē hkamrô pikapîr kôt kot mē pahte amnhî tomnuj pānhā amnhîrer ā harēnh mar tā kuma nē ām kuma nē harēnh o:

—Nā mē pahpyrā nē kot amnhî tomnuj xwÿnh nhûm mē kot hã hpîr kēnā. Na pre mē panê htyk kêt nē.

Anhÿr ā harē. Nē Tîrtûm Karōja nhûm määnēn tanhmā ho kapēr punuj to. Kēp mē pakutā nojarêt xwÿnh tā nhûm axtem nē tanhmā ho kapēr punuj to. Mÿrapê koja nhÿrmā Tîrtûm tanhmā homnuj tÿx to. Homnuj tÿx o mē kot Mojes kapēr kaga nhûm mÿrapê kot mē hparta jakre. Jakamā kwa kêr ka mē ā amnhî nhîpêx anhÿr hkêt nē. 30Tîrtûm kapēr ā kagā htûm kot ja jarēnh kot:

Ixpê Tîrtûm kot paj mē kot amnhî tomnuj xwÿnhjê homnuj tÿx nē. Anē.

Nē mē kot tām amnhî nhîpêx xwÿnhjê jarēnh kot:

Mē kot amnhî to mex o mē pa xwÿnhjaja kot paj nhÿrmā mē ho mex rax nē. No mē kot amnhî tomnuj o mē pa xwÿnhjaja kot paj nhÿrmā mē homnuj tÿx nē. Anē.

Ra mē pahte ā kapēr anhÿr xwÿnhja kot amnhî nhîpêx ā omunh mex. 31Jakamā kwa mē okora. Kêr ka mē amnhî to mex rāhā ho ri apa. Tîrtûm rāhā ho rāhā nē hihtÿx o hihtÿx jakamā koja mēmoj tā akamā gryk ka amex kêt o amex kêt.

32Nē amnepēm mē ate Jejus kôt amnhî xunhwÿr krax kām na prem Jejus ā mē atomnuj tÿx tā ka prem mē umaj hkaga hkêt nē. Tā kêr ka mē arî ā amnhî nhîpêx anhÿrja kukamā mǎn ajamaxpēr nē hã anohtÿx rāhā ho apa. Jao arî ā amnhî nhîpêx anē nē mē umaj Jejus kaga hkêt nē. 33Na prem mē piitā mē noo mā tanhmā mē amā kapēr punuj to nē tanhmā mē anhîpêx to. Nē tōhā tanhmā mē akwÿjê homnuj tÿx to ka mē tee ri ja hã mē omu nē mē kamā axukaprî nē. Nē mē hkôt axkamē nhûm prem mā mē ato anē nē. 34Na prem mē akwÿjê jagjê ka prem ja hã mē omu nē ma mē hagjēnh xà hã ixkre hwÿr mē hwÿr mra nē tanhmā mē ho mex to. Nhûm prem mē apê mē akukrêx kwÿptā nē ma amnhîm o pa ka mē ām amnhî tā mē omu nē ajamaxpēr o:

—Kwâr mē māmri ma amnhīm hamÿn o pa. Koja nhÿrmã Tirtūm inhmã ixkukrêx mex o kot ja jakrenhta kwÿ nhôr rax nê pa amnhīm hamÿ nhūm aa ixpê hapêx kêt nê. Hāmri nhūm axte mēhō aa ixpê utâr kêt nê. Jar mē ixkukrêxta mexti hã. Anê.

Jao mē kot mē apê utâr tã ka mē akaprī nã apa hkêt nê. ã amnhī kukamã ajamaxpêr anhÿr pê akīnh nê apa. ãm hāmri na ka prem ã amnhī kukamã ajamaxpêr anê. ³⁵Na ka prem mē kutã amnhī to htÿx kãm ã apa anê. Tã kwa kêr ka mē arī ã amnhī nhÿpêx anhÿr o ri apa. Kêr kê nhÿrmã Tirtūm ja hã mē ato mex rax nê.

³⁶Nê kêr ka mē arī amnhī kaxyw Tirtūm mã ajamaxpêr rãhã ho ri apa. Mē kot Jejus ã tanhmã mē ato htã ka mē hkaga hkêt nê. Kot kaj mē ã amnhī nhÿpêx anhÿr o apa nhūm Tirtūm ja hã mē apumu nhūm ja kãm mex nê. Hāmri nhūm ra kot amnhī jarênh xà hkôt nhÿrmã amã mēmoj mex nhôr rax nê. Jakamã kwa mē kot tanhmã mē anhÿpêx to hã amnhī pumu nê tee ri amnhī kukamã ajamaxpêr o ri akaprī hkêt nê. Kot kaj mē Kris ã apunuj rãhã apa hkêt nê. ³⁷Tirtūm kapêr ã kagã htūm kot Jejus jarênh kot:

Koja mē pahwÿr wrÿk mã xwÿnhhta tokyx wrÿ. Na ra wrÿk kaxyw nojarêt. Anê.

³⁸Nê harênh kot:

Ixxôt mē kot amnhī nhÿpêx mex o mē pa xwÿnhjaja koja mē amnhī kaxyw ixkôt hamaxpêr tÿx rãhã nê. Jao nhÿrmã ixri htír tūm nê mex rãhã nê pa ho pa.

Nê koja mēhō ixkaga pa tee ri kãm ixkīnh kêt ã omu. Anê.

³⁹No mē papajaja te mē pahte mē kot Jejus kaga nhūm kot amnhī tã mē homnuj mã xwÿnhjê pyrãk kêt. Arī mē pahte amnhī kaxyw hkôt pajamaxpêr rãhã jakamã koja nhÿrmã amnhī wÿr mē pahto api.

Amnhī kaxyw Tirtūm kôt mē hamaxpêr mex xwÿnhjê jarênh

Sikūn Pêtre 3.5-7

11 ¹Nê na htem Kris ã mē panhÿpêx kati ho pa pu mē pahpunuj rãhã nê ri papa. Te Kris kot mē pahto mex kêt pyrãk pu htem mēmoj punuj pix kãm ri papa nê kormã Tirtūm kot mē pahto mex ã amnhī tã omunh kêt nê. Tã ã mē pahte anhÿr tã kwa kêr pu mē arī kapêr kôt amnhī nhÿpêx rãhã ho papa. Mē pahte pano ho Tirtūm pumunh kêt tã kot mē pahkôt pa ho pa hã amnhī kaxyw kãm pajamaxpêr tÿx rãhã ho papa. Jakamã na pu htem ãm kapêr kôt pix mã amnhī nhÿpêx o papa. ²Amnepê mã mē pakukamã mē panhÿgêjtjaja na prem no ho Tirtūm pumunh kêt tã amnhī kaxyw kãm hamaxpêr nê kapêr kôt amnhī nhÿpêx o pa nhūm amnhī tã mē omu nhūm ja kãm mex nê.

³Nê mē papajaja na pu htem pajaxwÿja mē pano ho omunh kêt tã amnhīm harênh o:

—Nà amnepê m kormã mêmoj piitã amrakati ri nhũm Tirtũm ãm kapêr pix o mêmoj piitã ho kato. Ixte inhno ho ja hã omunh kêt tã kot ã amnhĩ nhĩpêx anhÿr ã amnhĩ jarênhja jakamã kot paj hkôt ijamaxpêr tÿx rãhã ho ri ixpa. Anê.

4Na pre finat Atãw nhĩpêx nê kaxyw hprõ Ewa nhĩpêx. Hãmri nhũm wa hkra Apewja htõ Kaĩ rom amnhĩ kaxyw Tirtũm kôt hamaxpêr tÿx o pa. Jakamã nhũm wa Tirtũm mã mêmoj gõ. Nhũm Apew kot Kaĩ rom Tirtũm kãm hprãm xà hkôt kãm mêmoj nhõr jakamã nhũm amnhĩ tã omu nê kot amnhĩ to mex xwÿnh ã harê nê kot kãm õr xwÿnhnta nhũm mex ã harê. Tã Apew amnepê m htyk tã pu htem arĩ harênh mar rãhã ho papa nê kãm pajamaxpêr o:

—Apew na pre hte amnhĩ kaxyw Tirtũm kôt hamaxpêr tÿx rãhã ho pa.

Anhÿr ã kãm pajamaxpêr.

5Nê Atãw kanrêhã htãmnhwÿ Enokja na pre haxwÿja amnhĩ kaxyw Tirtũm mã hamaxpêr tÿx o pa. Jao hkamnàr rom kãm hprãm xà hkôt pix mã tanhmã kãm amnhĩ nhĩpêx to ho pa nhũm amnhĩ tã omu nê amnhĩm mex ã harê. Jakamã na pre htyk kêt nê. Na pre Tirtũm htĩr rãhã ma amnhĩ wÿr ho api nhũm hkwyjaja tee ri hapêr o pa. Jakamã na pu htem arĩ axpên mã Enok kot amnhĩ kaxyw Tirtũm kôt hamaxpêr mex o pa hã harênh o papa. 6Mê kot amnhĩ kaxyw Tirtũm mã mẽ hamaxpêr kêt xwÿnhjaja na hte Tirtũm mẽ mex ã mẽ harênh kêt nê. Tã mẽ papajaja kêr pu mẽ Enok pyrã nê amnhĩ kaxyw kãm pajamaxpêr tÿx rãhã ho papa. Nê pajamaxpêr o:

—Tirtũmja htĩr rãhã ho rãhã. Koja nhÿrmã mẽ ixte amnhĩ kaxyw hkôt ijamaxpêr xwÿnhjê ho mex rax nê. Nà koja mẽ ixto anê.

Anhÿr o mẽ pajamaxpêr nhũm Tirtũm amnhĩ tã mẽ pajamaxpêr ã mẽ pahpumu nê mẽ pahte amnhĩ to mex ã mẽ pajarê. No mẽ kot amnhĩ kaxyw kãm hamaxpêr kêt xwÿnhjaja na hte ã mẽ harênh anhÿr kêt nê.

7Nê Enok kanrêhã htãmnhwÿ Noehtija na pre haxwÿja amnhĩ kaxyw Tirtũm mã hamaxpêr tÿx o pa. Jao hkamnàr rom amnhĩm pàr raxja nhĩpêx. Na pre ra Tirtũm na rax kukamã tanhmã kãm ujarênh to. Kormã aa na wrÿk nhũm Noehiti kot omunh kêt tã Tirtũm kapêr ma nê mar xà hkôt amnhĩm pàr rax kumrêxta nhĩpêx. Õrkwy kamã hkwyjê mẽ mẽ amnhĩm hipêx. No mẽ kot Tirtũm kapêr mar nê ãm mar xwÿnhjaja na pre Tirtũm gõ tãm o mẽ hanhi nê mẽ himex pa. Nom Noehtija nhũm kot amnhĩ to mex xwÿnh ã harê. Kot amnhĩ kaxyw hkôt hamaxpêr rãhã ho pa jakamã nhũm pre ã mex ã harênh anê.

8Nê Noehiti kanrêhã htãmnhwÿ Apraãwja na pre haxwÿja amnhĩ kaxyw Tirtũm mã hamaxpêr tÿx o pa. Na pre Tirtũm kot kãm pika nhõr ã kãm amnhĩ jarê nê ra kot ma hwÿr mênh kaxyw. Hãmri nhũm Apraãw kuma nê hkamnàr rom õ pika kaga nê ma pika hõja wÿr pa. Aa kot ma

hwÿr mōr nē omunh kêt tā Tīrtūm kapēr mar xà hkôt ô pika kaga nē ma hwÿr pa ho pa. ⁹Hāmri nē hwÿr pōj nē omu nhūm Tīrtūm kām:

— E pika ja kot paj nhÿrmā akanrēhā akra nē atàmnhwÿjê mā kugō. Anē.

Hāmri nhūm kuma nē pikaja kamā pa ho pa. Ra kamā axtem mē uro hkwyjaja ri pa nhūm Tīrtūm kormā mē kator kêt ri nhūm mē ô pika hwÿr pōj nē mē kamā pa ho pa. Nom amnhīm ōrkwÿ mex nhîpêx kêt nē. Kormā kêp ô pika kumrêx kêt ā hkamnhix jakamā âm mry kà o ixkre nhîpêx nē kamā pa ho pa. Nē nhÿhÿm pa kaxyw nē kugrà nē ma amnhî kôt o pa. Amnhî kaxyw Tīrtūm mā hamaxpēr rāhā jakamā ā amnhî nhîpêx anhÿr o pa.

Nē Apraāw kra Ijak nē htàmnhwÿ Jakoja wa Apraāw pyrā nē mry kà ho ōrkwÿ nē ma amnhî kôt o pa. Nhūm Tīrtūm kot Apraāw mā kapēr pyrā nē wa kām wa hkanrēhā wa hkra nē wa htàmnhwÿjê mā pika nhōr ā amnhî kukamā wa kām amnhî jarē. ¹⁰Jakamā nhūm Apraāw kormā Tīrtūm nhō krī hwÿr àpir xa hā amnhî tā hamār pê kot ho ô pika mā xwÿnhjê kamā pa ho pa. Kaxkwa hwÿr àpir mā xwÿnhta mex kumrêx. Tīrtūm kot hipêx jakamā koja mry kà ho ixkre nhîpêxta rom aa hapêx kêt nē. Jakamā nhūm Apraāw mē pahpyrā nē ma kot hwÿr àpir xa hā amnhî tā Tīrtūm jamār rāhā ho pa. ¹¹⁻¹²Tā ra hpigêt tÿx nē hkurê hkêt nē pa. Te ra ri htyk kaxyw pa pyrāk. Nhūm hprō Sara haxwÿja hpigêx tÿx nē. Kamrô hkêt ā amgrā xohtô rax kumrêx. Nhūm wa aa hkra hkêt nē pa htā nhūm Tīrtūm nhÿrmā wa hkra hā wa kām awjarē nhūm wa kuma nē amnhî kaxyw hkôt hamaxpēr kurê kumrêx. Nom amnhî tā kuma nē tee ri amnhî kukamā hamaxpēr hkêt nē. Na pre wa kuma nē xpen mā:

— Nà kot puj xep hāmri tā pahkra. Tīrtūm kot hā ā pajarēnh anhÿr kēnā. Anē.

Tā ā wa kot hkra kaxyw Tīrtūm mā hamaxpēr anhÿr jakamā na pre Apraāwja hprō htu. Ra wa hamē hpigêt tÿx kumrêx tā nhūm htu. Nhūm wa hkra Ijakja gaa nē wa kām kato. Jakamā nhūm wa gaa nē rī wa hkanrēhā wa htàmnhwÿ xohtô rax o ohtô rax. Ohtô ho kaxkwa kamā kanhêti xohtô jakre. Nē ohtô ho gô xujanār mÿri pikahti grā hkryre jakre. Jakamā nhūm mē tee ri mē ho kōta hpar mā. Nhūm Apraāw kêp mē hpār krax. ¹³Tā nhūm Apraāw nē Ijak nē Jakoja mē ri pa tāmtā nē htyk pa nē hapêx. Tīrtūm kormā kot mē kām pika jarēnhta nhōr xwÿj ri ra htyk pa. Nom kormā mē htír ri tanhmā kām hamaxpēr to nē hamaxpēr o:

— Nà kormā Tīrtūm kot mē inhmā pika jarēnhja nhōr kêt tā koja nhÿrmā inhmÿr pê ixkanrēhā ixkra nē ixtàmnhwÿjê mā kugō. Nà koja mē kām kugō. Ra kot hā inhmā amnhî jarēnh kēnā kot kêt mē kām ōr kêt.

Anhÿr o kaxyw kãm hamaxpêr rãhã ho pa. Jao hkĩnh nê hamaxpêr o:

—Nà inhõ krĩa axtem na. Na pa hte jar pika ja kamã ri mẽ hkõt ri ixpa. Te ixpê mẽ uro pyrã nê ri mẽ hkõt ixpa nom jar inhõ krĩ hkêt. Inhõ krĩ na kêt axte mã. Anê.

14-15Na prem ã õ krĩ hõ hkukamã hamaxpêr anhÿr o pa. No õ krĩ htũmta mẽ kot hkaga nê pika hõ hwÿr mõi xwÿnhnta na prem ã harênh anhÿr kêt nê. Kop apu mẽ kot amnhĩm tãm mãn jarênh ronhÿx prem awjanã nê ma akupÿm hwÿr pa. Na prem axtem krĩ hõ jarê nê kormã hwÿr mõi kêt ã amnhĩ jarênh o pa. 16Tã nhÿ krĩ na prem ã harênh anê? Nà kaxkwa kamã Tĩrtũm nhõ krĩa. Tãm na mex kumrêx jakamã nhũm prem kormã hwÿr ma àpir xa hã mẽ pahpyrã nê amnhĩ tã Tĩrtũm jamãr rãhã ho pa nhũm amnhĩ tã mẽ omu nê hkĩnh nê. Nê mẽ kot tãm amnhĩ nhĩpêx ã mẽ omu nê mẽ kêp hkra hã mẽ harênh ã hpijaãm kêt nê. Hãmri nê mẽ kutêp tanhmã õ krĩ ho mex to ho pa.

17-18Na pre ra tanhmã Apraãw mã hkra Ijakja jarênh to nê kãm:

—Akra Ijak kanrêhã hkra nê htãmnhwÿjaja koja mẽ kêp ixkra. Anê.

Tã ra kot amnhĩ tã Apraãw kamã hamak kaxyw hkukamã hamaxpêr nê hamaxpêr o:

—Xà we Apraãw kãm ixkĩnh tÿx kumrêx nê kãm ixkõt amnhĩ nhĩpêx rãhã ho pa hprãm nà? Xà we kãm ixkĩnh tÿx o hkrata jakrenh? E pa kop we ja hã amnhĩ tã kamã ama nê omu mãn. Anê.

Hãmri nê kot hkra hpĩr nê kãm õr ã kãm karõ. Hãmri nhũm kuma nê ra kot kãm hpĩr kaxyw. Kot Tĩrtũm kot amnhĩ nhĩpêx ã omunh mex jakamã hkamnãr rom kot kãm hpĩr kaxyw. 19Nê hamaxpêr o:

—Nà Tĩrtũm akupÿm kot mẽ ho htĩr xwÿnh kênã.

Anhÿr jakamã kãm hkra hpĩr puma hkêt nê ra kot kãm hpĩr mã tã nhũm Tĩrtũm amnhĩ tã omu nê nê kãm kapêr nhũm kuma nê hpĩr kêt nê wa ma akupÿm õrkwÿ hwÿr mõi. Tã ã kot hkra nhĩpêx anhÿr jakamã Apraãw mã te Ijak htyk nê akupÿm htĩr pyrãk.

20Nê Ijakja na pre haxwÿja amnhĩ kaxyw Tĩrtũm mã hamaxpêr tÿx o pa. Jao hkamnãr rom amnhĩ kra wa kãm Tĩrtũm kot wa ho mex kukamã wa kãm harê. Kra Jako mẽ Ejauta wa kãm harê nê wa kãm:

—E koja nhÿrmã Tĩrtũm inhmÿr pê war ato mex rãhã ho pa. Anê.

21Nê Jakoja na pre haxwÿja amnhĩ kaxyw Tĩrtũm mã hamaxpêr tÿx o pa. Jao hkamnãr rom hkra Juje mã Tĩrtũm kot mẽ ho mex kukamã harê. Na pre Jakoja hkra nê htãmnhwÿ mẽ hpimràãtã hprãm xaj ma Ejit wÿr pa nê kamã pa ho pa. Tã nhũm Jako hpigêt tÿx nê ra htyk kaxyw. Hãmri nê hkra Juje mẽ hkra wa mẽ kãm kapêr nê mẽ kãm:

—E na pa tee amnhĩ kamã ama. Na pa ra ixyk kaxyw. Nom koja Tĩrtũm nhÿrmã inhmÿr pê mẽ ato mex rax nê. Anê.

Hãmri nê amnhĩ kaxpar xã hã pĩ hã amnhĩ kaxpa nê kãnhmã xa nê Tĩrtũm mã mex o mex ã harê. Hãmri nê akupÿm nõr xã kamã nõn ty.

22Nê Jujeja na pre haxwÿja amnhĩ kaxyw Tĩrtũm mã hamaxpêr tÿx o pa. Jao htyk kaxyw nê hkamnàr rom hkwyjê mã tanhmã amnhĩ jarênh to. Ra hpigêt nê htyk kaxyw nê hkwyjê mã tanhmã amnhĩ tâ karô hto nê mẽ kãm:

— E na pa ra ixyk kaxyw. Tã koja Tĩrtũm inhmÿr pê nhÿrmã Ejit rũm mẽ akator nê ma akupÿm mẽ panhõ pika hwÿr mẽ ato pa. Ra kot mẽ panhĩgêt Apraãw mã amnhĩ jarênh xà hkôt. Jakamã kwa mẽ inhma. Kêr ka mẽ akupÿm anojarêt nê ma amnhĩ kôt ixtã kasãwja mÿ nê amnhĩ kôt ixto mõi. Hãmri nê mũtar mẽ panhõ pika kamã mẽ anhõ krĩ htã ijaxà pa jawÿ mẽ akuri ixtã pyka. Anê.

23Nê Mojes katorxà mẽ hipêêxàja na pre wa haxwÿja jajê pyrã nê amnhĩ kaxyw Tĩrtũm mã hamaxpêr tÿx o pa. Juje hkanrêhã htãmnhwÿ na pre wa. Jakamã nhũm Ejit nhõ pahija tee ri Ijaew xohtô rax kumrêx ã mẽ omu nhũm ja kêp omnuj nê. Hãmri nhũm mẽ hkra myjaja mẽ hapôx kôt mẽ hamÿnh xwÿnhjaja kot mẽ hpar ã mẽ kãm karô. Tã nhũm Mojes kato nhũm hipêêxà mẽ katorxàja wa omu nhũm muxre nhũm wa tee ri hkukamã hamaxpêr. Hãmri nê pahi Paraohti mã mẽ hkra jamÿnh xwÿnh kot wa kêp hpĩr pymaj ho pimxur o hã mytwrÿ axkrunêpxi. Tĩrtũm kamnàr rom wa amnhĩ tâ kãm uma hkêt nê ã kêp hkra ho hpimxur anê.

24Nê Mojes na pre haxwÿja amnhĩ kaxyw Tĩrtũm mã hamaxpêr tÿx o pa. Kormã karàre ri na pre Paraohti hkra nija omu nê amnhĩm kumÿ nê ho hkra nê amnhĩ kôt o pa. Rãhã nhũm àptàr nhũm Ejit nhõ xwÿnhjaja kêp pahi Paraohti htãmnhwÿ hã axpên mã harê. Hãmri nhũm tee ri amnhĩ tâ mẽ kuma nê amnhĩ tâ mẽ kãm aprã nê mẽ kãm:

— Kwa mẽ ã ijarênh anhÿr kêt nê. Ixpê mẽ akwÿ hkêt. Anê.

25ãm kãm Tĩrtũm kwÿjê kôt pix mã ri pa ho pa hprãm. Nê kãm Ejit nhõ pahi hkôt amnhĩ tomnuj prãm kêt nê. ãm mẽ kot amnhĩ tomnuj pix o paja na mẽ kãm hprãm nhũm ja hã mẽ omu nê tee ri mẽ hkukamã hamaxpêr nê hamaxpêr o:

— Nà kot paj mẽ hkôt ri ixpa hkêt kumrêx. Mẽ hkĩnh nê pa htã koja mẽ gaa nê ty nhũm mẽ hkĩnhja mẽ kêp hapêx. Nà kot paj Tĩrtũm kwÿjê hkôt mãn ri ixpa ho ixpa. Mẽ kot Tĩrtũm ã mẽ inhĩpêx kati htã pa arĩ mẽ hkôt ixpa ho ixpa. 26Inhmã Ejit nhõ xwÿnhjê hkôt ixkukrêx rax nê ri ixpa hprãm kêt. Kwãr mẽ mãmrĩ Tĩrtũm ã tanhmã inhĩpêx to. Koja mẽ ã inhĩpêx anê pa ixpunuj nê ri ixpa htã koja Tĩrtũm nhÿrmã ixto mex rax nê. Nà kot paj Ejit nhõ pahihti hkôt ri ixpa hkêt nê.

Anhÿr jao ra mẽ pahpyrà nê Kris gryk ã mẽ hkaga. 27Tã akupÿm mẽõ pika hwÿr Ijaewjê ho mõi kaxyw nhũm Ejit nhõ pahihtija tee ri ja hã omu nê kamã gryk tÿx nê. No nhũm Mojesja amnhĩ kaxyw Tĩrtũm kôt hamaxpêr tÿx o hkamnàr rom kãm mẽ uma hkêt nê. Nê mẽ kêp hkwyjê kator pa nê ma akupÿm mẽõ pika hwÿr amnhĩ kôt mẽ o pa. Tĩrtũm kamnàr rom ã mẽ kêp mẽ ho kator anê. Aa kot no ho omunh kêt tâ amnhĩ

kaxyw kãm hamaxpêr tÿx nê hkamnâr rom mẽ kator nê hamakêtkati nê mẽ o pa. 28Nê hkamnâr rom mẽ hkĩnh ã arĩgro mẽ kot kãm “Pas” anhÿr xwÿnhnta ho hkrax. Kormã Ejit rÿm kator kêt ri. Nê kaxyw amnhĩ kwÿjê mã hã karõ nê mẽ kãm:

—E pa mẽ amã Tĩrtÿm kapêr jarê ka mẽ inhma. Nà kot puj xep mẽ jarãhã òwêhti hkwy pa nê hkamrô ru. Nê hkamrô ho panhõrkwÿ jakwakre hã pĩ kukõ. Hãmri nê ĩ kuxõt nê kuku. Koja kamàt nhÿm mẽ kot amnhĩ tomnuj xwÿnhjê pê mẽ hkra my kot wa piitã mẽ hpar mã xwÿnhja mõi. Hãmri nê mẽ pamÿ ri mõi nê ã mẽ pahte mẽ panhõrkwÿ nhĩpêx anhÿrja ã omu nê tanhmã mẽ pahkrajê ho hkêt nê. Tĩrtÿmja ã mẽ pahte amnhĩ nhĩpêx anhÿr kaxyw ã inhmã karõ anê. Jakamã e pu mẽ hkamnâr rom ã amnhĩ nhĩpêx anê kê mẽ pahkrajaja mẽ pahpê htyk kêt nê. Anê.

Hãmri nê ã mẽ kot Ejit rÿm kator xà hã arĩgrota ã mẽ hkĩnh o kator krax anê. Mẽ hkĩnhja na htem kãm “Pas” anê.

29Nê Ijaewjaja na prem haxwÿja Ejit rÿm kormã Mojes kôt mẽ pa ri urak nê amnhĩ kaxyw Tĩrtÿm mã hamaxpêr. Jakamã na prem ra gõ xujanâr pê “Gõ Kamrêk” anhÿr xwÿnhja mÿ ri kuhê nhÿm Tĩrtÿm mẽ kãm ho axkjê. Nê mẽ kãm hkõt ã ho amgrã nhÿm mẽ hã hkamnâr rom mex nê rêr pa. No nhÿm mẽ hkõt mẽ kot mẽ himex kaxyw mẽ mrrar xwÿnhjaja. Ejit nhõ pòristijaja nhÿm gõja akupÿm mẽ hã axkamur nê mẽ himex pa.

30-31Nê Ijaew kot Mojes mÿr pê Jojue hkõt pa ri mẽ urak nê amnhĩ kaxyw Tĩrtÿm kôt hamaxpêr o pa. Na prem ra Tĩrtÿm kot mẽ kãm pika nhõr xwÿnhnta wÿr pøj nhÿm Tĩrtÿm krĩ pê Jeriko hwÿr mẽ kurê. Mẽ kot kamã mẽ pa xwÿnh pê utâr kaxyw mẽ hwÿr mẽ kurê. Mẽõ krĩ pu hã kahêja kên tÿx pix o na pre. Nê hprêk rax kumrêx. Nê krĩ nhõ xwÿnhjaja kãm Tĩrtÿm kapêr mar prãm kêt. Hãmri nhÿm Tĩrtÿm mẽ hã Ijaewjê mã amÿnê nê mẽ kãm:

—E mẽõ krĩja kot paj mẽ amã kugõ nom kêr ka mẽ inhmar kumrêx. Kêr ka mẽ apkati mẽ mẽ õ krĩ hwÿr mra nê kupu hpÿnh o atã apkati kêp 7 nê rĩ ma akupÿm mra. Anê.

Hãmri nhÿm mẽ kuma nê mar xà hkõt ma Jeriko hwÿr mra. Hãmri nê hwÿr pøj nê Tĩrtÿm kamnâr rom krĩ puhã kahêja kupu hpÿnh o hã apkati kêp 7. Hãmri nhÿm apkati pê 7ta ã nhÿm kên tÿx o kahêja mẽ kêp amnhĩ krakrak nê rôrõk pa. Nhÿm mẽ mra nê hkõt krĩ hwÿr agjê nê krĩ nhõ xwÿnhjê nhĩmex pa. Nom krĩ kamã kuprÿ pê Raapja Ijaew pyrã nê amnhĩ kaxyw Tĩrtÿm mã hamaxpêr o pa jakamã nhÿm mẽ kormã mẽ himex kaxyw mẽ hwÿr mõi kêt ri amnhĩ kukamã mẽ hkwyjaja kot mẽ hã ukapi ho pa kaxyw mẽ hwÿr mẽ kurê. Hãmri nhÿm Raapja mẽ kêp amnhĩ pyrã nê Tĩrtÿm kôt hamaxpêr ã mẽ omu nê hkwy kot mẽ himex pymaj amnhĩ nhõrkwÿ kamã mẽ kêp mẽ ho amÿxu nhÿm mẽ hkã hkĩnh pê ma akupÿm hkwyjê wÿr mõi. Jakamã nhÿm mẽ kot mẽ himex kaxyw

mê hwÿr mra hãmri nê amnhĩ pyrà nê tanhmã Raap mê õ fãmii ho hkêt nhũm mê arĩ htĩr nê pa. Mê uràk nê amnhĩ kaxyw Tĩrtũm kôt hamaxpêr o pa hã omunh xà hkôt tanhmã mê ho hkêt nê.

32Ã na pre mê kot amnhĩ kaxyw Tĩrtũm kôt mê hamaxpêr xwÿnhjaja Tĩrtũm kamnàr rom amnhĩ nhĩpêx anhÿr o pa. Nom jajê pixjaja na prem ã amnhĩ nhĩpêx anhÿr hkêt nê. Mãänên Giteãw nê Parak nê Sãsõ nê Jepte nê Tawi nê Sãmuew nê Tĩrtũm nhÿ hã mê kapêr o pa xwÿnhjaja. Jajê piitã na prem wamtajê pyrà nê amnhĩ kaxyw Tĩrtũm kôt hamaxpêr tÿx rãhã ho pa. Nom kot paj ixprĩ hã tanhmã mê kot hkamnàr rom amnhĩ nhĩpêx to hã mê harênh kêt nê. Kot pa anê nê tokyx harênh par kêt nê. Mê ohtô rax kumrêx jakamã na pa ãm hkwȳ pix jarê nê hã kagà.

33Na prem hkwȳjaja Tĩrtũm kamnàr rom ma mê kot amnhĩ tomnuj xwÿnhjê nhõ krĩ hwÿr mra nê mê kêp mê õ pika pytà. Nê mê hkwȳjaja Tĩrtũm kamnàr rom mê ho amnhĩptàr mex o pa. Nhũm prem kãm Tĩrtũm kurê xwÿnhjaja mê hkwȳjê pynê nê ahkrehti kamã mry xoprê hkwȳ nhĩpy mê kurê. Nhũm prem amnhĩ tã mê omu nê amnhĩ kaxyw Tĩrtũm mã hamaxpêr kurê kumrêx nhũm amnhĩ tã mê omu mê nê te mry jakwa ho pikamÿr tÿx pyràk o mê hipêx nhũm ãm mê omunh o kuhê nê tanhmã mê ho hkêt nê. ã na prem Tĩrtũm kamnàr rom amnhĩ nhĩpêx anhÿr o pa.

34Nhũm mê kot kuwy rax kãm mê hkwȳjê rênh tã nhũm mê kot amnhĩ kaxyw Tĩrtũm mã hamaxpêr tÿx nhũm amnhĩ tã mê omu nê mê nê tanhmã kuwy ho nhũm mê hxêt kêt nê. Nhũm pre mê hkwȳjaja wapo ho mê hkamnhwÿr o mê hkwȳjê hpar kaxyw nhũm mê amnhĩ kaxyw Tĩrtũm mã hamaxpêr nhũm amnhĩ tã mê omu nê mê nê tanhmã mê ho nhũm mê amnhĩ rê nê mê umaj hprôt nê ma mra. Mê hihtÿx kêt tã Tĩrtũm kamnàr rom ÿ hã hihtÿx nê mê kãm mê hkurê xwÿnhjê ho krihkrit pa nhũm mê ma akupÿm hapêx.

35Nê mēni hkwȳjaja na prem haxwÿja amnhĩ kaxyw Tĩrtũm mã hamaxpêr tÿx o pa. Jao mê hkrajaja mê kêp htyk tã nhũm prem Tĩrtũm kamnàr rom mê ho kuwȳ nhũm mê kuma nê akupÿm mê kãm mê ho htĩr.

ã na prem amnhĩ kaxyw Tĩrtũm mã hamaxpêr pê mex nê pa anê. No na pre mê hkwȳjaja mê uràk nê amnhĩ kaxyw kãm hamaxpêr tÿx tã nhũm Tĩrtũm tokyx mê ho mex kêt nê. Na pre mê kãm mê hkurê xwÿnhjaja Tĩrtũm ã mê par kaxyw. Nê mê hkwȳjaja Tĩrtũm ã mê hipêx kati ho pa nhũm mê amnhĩ xà htÿx kãm hamak kãm ty. Nhũm mê himex kaxyw nê mê kãm:

—Kwa mê Tĩrtũm kaga. Kot kaj mê hkaga pa mê amã inhũre nê mê anhĩmex kêt nê. Anê.

No nhũm mê kuma nê ãm mê kuma nê amnhĩ kaxyw kãm hamaxpêr tÿx pê mê kãm:

—Nà mê kam nê mãmrĩ ixpĩ. Inhmã ixtyk pyma hkêt. Kot paj ty

nhũm Tĩrtũm akupỹm ixto ixtĩr pa kuri inhmex kumrẽx nẽ ri ixtĩr tũm nẽ ixpa ho ixpa.

Anhỹr o mẽ kãm amnhĩ jarẽnh jakamã hãmri Tĩrtũm kaga hkêt rãhã nhũm mẽ himex.

³⁶Nẽ mẽ kãm mẽ hkurê xwỳnhjaja na prem Kris ã mẽ hkwỳjê mã hpẽr o pikẽnh pê mẽ htak xà ho mẽ htak rũnh o pa. Nẽ kàx o mẽ hkwỳjê hpa hpre nẽ mẽ hte hpre nhũm mẽ kêp prês nẽ hkrĩ ho hkrĩ.

³⁷⁻³⁸Nhũm prem kẽn rũnh o mẽ hkwỳjê htak o mẽ kupa. Nẽ mẽ hayr o mẽ hkwỳjê pa. Nẽ mẽ hkamnhwỳr o mẽ hkwỳjê pa. ã na prem Kris kôt mẽ hamaxpẽr ã mẽ omunh xà hkôt mẽ hipêx anhỹr o pa. Jakamã na pre mẽ hkwỳjaja mẽ umaj mẽõ krĩ rũm hapôj nẽ ma hprôt nẽ mra. Nẽ te mẽ õ krĩ hkêt pyrã nẽ kapôt ã kêp amrakati nẽ ri pa. Mẽ ê hkêt nẽ ôwêhti hkà ho ê nẽ ri hã pa. Nẽ motre kà ho amnhĩ pre nẽ ri hã pa. Nẽ kẽn prêk ã api nẽ kre kamã hpimxur o pa. Nẽ pika hkre kamã hpimxur o pa. Nhũm mẽ kãm mẽ hkurê xwỳnhjaja te mẽ kêp ahpunu nẽ mẽ kêp ahkro pyrãk o mẽ hipêx nẽ axpẽn mã mẽ harẽnh o:

— Nà mẽ mexti hã. Kwa pu mẽ piitã mẽ himex paa ri.

Anhỹr o mẽ harẽnh tã nhũm Tĩrtũm mẽ uràk nẽ ã mẽ harẽnh anhỹr kêt nẽ. Na pre mẽ mex kumrẽx ã mẽ harẽ. Nẽ nhỹrmã kuri mẽ mex nẽ pa ho pa hkukamã mẽ harẽ.

³⁹ã na prem Tĩrtũm kamnàr rom mẽ kãm mẽ hkurê xwỳnhjê kutã amnhĩ to htỳx kãm htyk o pa anẽ. Nhũm Tĩrtũm ja hã mẽ omu nẽ hkĩnh nẽ kãm mẽ hapê htỳx nẽ. No nhũm mẽ kormã htĩr ri amnhĩm Tĩrtũm kot mẽ ho mex xà jamỳnh kêt rãhã ty. ⁴⁰Tã mo na pre Tĩrtũm kormã mẽ htĩr ri hkwỳjê pyrã nẽ mẽ ho mex kêt nẽ? Nà na pre kormã mẽ hkukamã hamaxpẽr o:

— Nà kot paj kormã mẽ ho mex kêt nẽ. Kot pa mẽ mỳr pê mẽ kot ixkôt amnhĩ xunhwỳr mã xwỳnhjê jamãr grire mãn. Kêr pa inhõ krĩ kamã mẽ ho ixpimràatã mẽ ho mex rax kumrẽx. Nà kot paj ã mẽ ho mex anẽ. Ja na kêt inhmã mex o kormã mẽ htĩr ri ixte mẽ ho mexta jakrenh. Anẽ.

Jao ra ã mẽ papajaja mẽ pakukamã hamaxpẽr anẽ.

Mẽ pahte Jejus pyrã nẽ mẽmoj kutã amnhĩ to htỳx ã mẽ pamã karõ

Piripos 3.12-26

12 ¹Na pre mẽ pakukamã mẽ panhĩgêt kwỳjaja amnhĩ kaxyw Tĩrtũm mã hamaxpẽr pê ã amnhĩ xà htỳx kamã hamak o pa anẽ. Tã te ra mẽ kot kỳj rũm kaxkwa rũm mẽ pahpumunh nẽ tanhmã mẽ pamã kapẽr to pyrã nẽ mẽ pamã kapẽr o:

— E mẽ inhma mẽ ixkanrêhã mẽ ixtãmnhwỳjaja. Na pa prem ã Tĩrtũm kamnàr rom amnhĩ nhĩpêx o ixpa anẽ. Mẽ kot ja hã mẽ inhĩpêx kati htã pa prem Jejus kaga hkêt nẽ. Tã kêr ka mẽ ixpyrã nẽ ã mẽ kãm

mê akurê xwÿnhjê kutã amnhĩ to htÿx anê. Nê mê ixpyrà nê amnhĩ kaxyw Tirtũm kôt pix mã ajamaxpêr tÿx rãhã ho ri apa. Anê.

Jakamã kwa kêr pu mê uràk nê ã amnhĩ nhĩpêx anhÿr rãhã ho mãn ri papa. Te mê hprôt xwÿnhjaja kot amnhĩ nhĩpêx pyrãk o amnhĩ nhĩpêx. Na htem hprôt tÿx kaxyw mẽmoj pytĩ jamÿnh nê ho hprôt hkêt nê. Na htem ý kamã hprôt o hprôt tÿx nê wam hkwyjê mã wa nê mra. Ja pyrà nê kêr pu mê pahte Tirtũm kapêr kôt amnhĩ nhĩpêx mex o papa kaxyw tanhmã mẽ pahte amnhĩ tomnuj to hã amnhĩ pumu nê hkaga kurê kumrêx. Mẽ pahte amnhĩ tomnuj o papa xãja te mex pyrãk no ãm mex kêt. Te ho mẽ hprôt xwÿnh kot axtem nê mẽmoj pytĩ mÿnh nê tee ri ho hprôt tÿxta pyrãk. Kot puj mẽ tanhmã amnhĩ tomnuj to ho papa nê Tirtũm kapêr kôt amnhĩ nhĩpêx mex kêt nê. Jakamã kwa kêr pu mẽ Tirtũm kapêr gryk ã amnhĩ tomnuj nê amnhĩ to htÿx rãhã ho papa. Te ho mẽ hprôt nê nhÿri mẽ àhuk xà pix kukamã hamaxpêr rãhã hprôt tÿx xwÿnhhta pyrà nê ãm Jejus mã pajamaxpêr tÿx rãhã ho papa.

2E kot paj mẽ amã Jejus kot tanhmã mẽ panê amnhĩ nhĩpêx toja jarê ka mẽ inhma. Nà kot mẽ panê mẽ pahte amnhĩ tomnuj pãnhã amnhĩrer kaxyw htyk nhũm mẽ pahte hkôt amnhĩ xunhwÿr jakamã na hte mẽ pamã pajamaxpêr nyw gô pu mẽ amnhĩ kaxyw hkôt pajamaxpêr ho ri papa. Na pre mẽ kãm hkurê xwÿnhjaja kot pĩ kahpa hã nhôr nê hpĩr mã nhũm mẽ kutã mẽ kãm amnhĩ to htÿx nê arĩ mẽ kãm xa nhũm prem kupĩ. Tã tee ri amnhĩ kukamã hamaxpêr o Tirtũm kaga hkêt nê. Na pre hamaxpêr o:

— Nà kwãr mẽ mãmrĩ ixpĩ. Kot paj ty nhũm Inhĩpêêxà akupÿm ixto ixtĩr pa kuri inhmex kumrêx nê ixtĩr tũm nê ixpa ho ixpa. Anê.

Tã na ra kaxkwa kamã Tirtũm xupôk rũm mex nê hkrĩ ho hkrĩ. 3Jakamã kwa kêr pu mẽ kot ã mẽ panê amnhĩ nhĩpêx anhÿrja mã pajamaxpêr rãhã ho ri papa. Mẽ kot hipêx kati htã nhũm mẽ kutã amnhĩ to htÿx nê xa. Tã kêr pu mẽ uràk nê mẽ kãm mẽ pahkurê xwÿnhjê kutã amnhĩ to htÿx rãhã ri papa. Jao tee ri amnhĩ kukamã pajamaxpêr o mẽ umaj Tirtũm kaga hkêt nê.

4Na ka htem ma mẽ kot amnhĩ tomnuj xwÿnhjê hwÿr mra nê mẽ kot amnhĩ tomnuj kaga kaxyw tanhmã mẽ kãm akapêr to nhũm mẽ ja hã mẽ ama nhũm ja mẽ kêp omnuj nhũm mẽ amnhĩ tã tanhmã mẽ atomnuj to. Nom wam mẽ kot mẽ pahkwÿjê nhĩpêxta pyrà nê kormã mẽ atôxpĩr kêt nê.

Tirtũm kot tanhmã hkrajê nhĩpêx to hã harênh

Juãw 15.1-2; Eprêw 5.7-8; Xiakre 1.2-4

5Nê mãn ka mẽ arĩ Tirtũm kapêr ã kagã htũm kwÿ hã ano htÿx japêr. Mẽ pahpê Tirtũm krajê mã kapêr jarênh kot:

Koja Pahi Maati tanhmã mẽ ate amnhĩ tomnuj to nê mẽ amã kapêr ka mẽ ama nê mar tỳx nê mẽmojta kaga kurê kumrêx. No mẽ ama nê tee ri kot nê akurê xwỳnhta kukamã ajamaxpêr o ri akaprĩ o axtem nê Tĩrtũm kaga hkêr nê. Ama nê kot amã mẽmoj nê kapêr xwỳnhta kaga kurê kumrêx.

6 Na hte Tĩrtũm kãm mẽ pajapê hã tanhmã mẽ pahte amnhĩ tomnuj to hã mẽ pahpumu nê hã tanhmã mẽ panhĩpêx to. Tãm mẽ pahte amnhĩ nhĩpêx o papa kaxyw. Kot mẽ pahpê hkra hã mẽ pajarênh jakamã na hte ã mẽ pahte tãm amnhĩ nhĩpêx o papa kaxyw mẽ panhĩpêx anê. Anê.

7 Jakamã kot kaj mẽ tanhmã amnhĩ tomnuj toja mỳrapê tanhmã apunuj kute nê ri apa htã no ãm tee ri amnhĩ kukamã ajamaxpêr hkêr nê. Kêr mẽ ãm ajamaxpêr o:

— Nà ixte tãm amnhĩ nhĩpêx kaxyw na Tĩrtũm ã inhĩpêx anê. Ixpê hkra hã ixte amnhĩ to mex o ixpa prãm xaj ã inhĩpêx anê.

Anhỹr o mãn kêr ajamaxpêr. Na hte mẽ hipêxã mẽ hkra kot amnhĩ to mex kaxyw ã mẽ hipêx anê. Tã Tĩrtũm na hte mẽ urak nê ã mẽ panhĩpêx anê. 8 No koja mẽhõ hkra kot tanhmã amnhĩ tomnuj to hã omu nê ãm omu nê hã tanhmã ho hkêr nê. Hã koja hkraja te hipêxã hkêr nê hã awrãre nê ri pa pyrak. Tã mẽ pahpê Tĩrtũm krajaja kot puj mẽ tanhmã amnhĩ tomnuj to nhũm ja hã mẽ pahpumu nê hã tanhmã mẽ pahto. Nom mẽ kêp hkra hkêr xwỳnhjaja nhũm hte ja hã mẽ omu nê ãm hã mẽ omu nê hã kormã tanhmã mẽ hipêx to hkêr nê.

9 Nê na hte mẽ panhĩpêxã mẽmoj tã mẽ pamã karõ pu htem kuma nê hkõt amnhĩ nhĩpêx. Ja mex. Nom kaxkwa kamã Měpahpãm maatija mẽ pahte mar nê hkõt amnhĩ nhĩpêxja na kêr mex kumrêx. Kot puj mẽ ã amnhĩ nhĩpêx anê nê nhỹrmã kuri pamex nê pahĩr tũm nê papa ho papa.

10 Nê mẽhprĩre na htem hamaakro nhũm mẽ hipêxã tanhmã hã mẽ ho. Hã mẽ hkaprêprêk rỳ hã mẽ kãm akir. Amnhĩ krã hkõt tanhmã mẽ hipêx to. Mẽ kot ja hã amnhĩ pumunh nê axte hkêr kaxyw. Ja mex. Tã mẽ papajaja. Mẽ pahpê Tĩrtũm kra na pu htem tõhã tanhmã amnhĩ tomnuj to nhũm mẽ pahpumu nê tanhmã hã mẽ pahto. Mẽ pahte amnhĩ pumunh nê axte hkêr kaxyw. Urak nê amnhĩ to mex pix o papa kaxyw.

11 Na hte mẽmoj tã tanhmã mẽ panhĩpêx to pu mẽ tee ri amnhĩ pumu nê pahkaprĩ nê pahkĩnh kêr nê ri papa. Nom kot puj mẽ tokyx tanhmã amnhĩ tomnuj tota kaga nê akupỹm Tĩrtũm kõt tãm amnhĩ nhĩpêx o papa nê akupỹm pahkĩnh nê pajamakêtkati nê ri papa.

Mẽ pahte Tĩrtũm kaga hkêr ã mẽ pamã karõ

12 Jakamã e kwa kêr ka mẽ amnhĩ to htỳx nê apa. Mẽ kot Kris ã tanhmã mẽ anhĩpêx to htãã. ãm Tĩrtũm kõt pix mã amnhĩ nhĩpêx mex pê

akĩnh nê apa. 13Kêr kê Kris kôt atôjê hõ tee ri mêmoj tâ amnhĩ pumunh kôt ra Tirtũm kaga kaxyw tâ ã mē ate amnhĩ nhĩpêx anhỹr ã mē apumu nê mē apyrà nê akupỹm hkôt amnhĩ xãm tỹx nê hkaga hkêt nê.

14Nê kêr ka mē tãm ri axpên nhĩpêx o ri apa. Jao axpên kôt ajamakêtkati nê ri apa nê amnhĩ to mex pix kukamã ajamexpêr. No kot kaj mē anhỹr kêt nê nhỹrmã mē panhõ Pahi Maati hwỹr axàpir nê kuri amex nê apa hkêt nê.

15Na hte Tirtũm mē pahto mex nê mêmoj to mē pakutã nojarêt rãhã o pa. Jakamã kwa kêr ka mē hkaga hkêt nê. Nê tanhmã ri ajamexpêr punuj to ho ri apa hkêt nê. Kot ka mē ã amnhĩ nhĩpêx anê nhũm Kris kôt mē pahkwỹjaja ja hã mē apumu nê mē apyrà nê tanhmã amnhĩ tomnuj.

16Nê kêr ka mē axpên kãm apijaàm kêt o ri apa hkêt nê. Nê te finat Ejau kot amnhĩ nhĩpêx pyræk o ri apa hkêt nê. Na pre Tirtũm ã hpijaàm kêt nê hkwyjê kamã hpijaàm kêt o pa. Nê Tirtũm mã hamexpêr kêt kumrêx. Kêp Ijak kra kot wa jakamã koja nhỹrmã hipêêxà mỳr pê kêp hikukrêx nê õ pika piitã ho àrĩk pa. Hãmri nhũm hipêêxà kot ho Tirtũm wỳr nhũm kot ho mex kaxyw mã tâ nhũm axtem nê mēmo arĩgro hã kãm prãm xàj kot kêp mêmoj to àrĩk mã xwỳnhta htõ Jako mã hkaga hpa. Mankwrytre gôj kãm ãm prãm xàj kãm hkaga hpa. Jakamã nhũm Jako hpãnhã te kêp Ijak kra kot wa pyrà nê mỳr pê õ mêmoj piitã ho àrĩk mã. 17Gaa nhũm Ejau tee ri ã amnhĩ nhĩpêx anhỹrja mã hamexpêr o hkaprĩ nê. Nê tee ri kãm Jako kot akupỹm kãm mêmojta nhõr prãm kaprỹ. Nê mur nê hã hipêêxà wỳ no nhũm axte kãm mêmoj nhõr kêt nê. Nhũm kot ho Tirtũm wỳr kaxyw tee ri amnhĩ to kuwỳ no nhũm kuma nê ãm kuma nê kãm ho anhỹr kêt nê.

18Nê amnepê mã Tirtũm kot mē panhĩgêxjê mã kapêr kaxyw na prem hixêt prêk pê Sinai jarênhja wỳr akuprõ nê hparpê kuhê. Hãmri nhũm hixêt nhĩmök ã kuwy hpøk rax kumrêx. Nê kuwy mỳr ri kakrã htyk ajêt. Nê kôk àpêr tỹx nê. Nhũm Ijaewjaja hixêt krax ã omu nê kãm maa ho htertet o kuhê. 19-21Hãmri nhũm mēhõ pifti kakô nhũm Tirtũm hixêt nê mē kãm kapêr nê mē kãm:

—E mē inhma. Kêr ka mē hixêt ã axàpir kêt nê. Kot kaj mē atõ hã api rỳ mē akrit õ hã api ka mē ja hã omu nê kaxyw kên rũnh kwỳ jamỳ nê ho htak o apĩ. Anê.

Hãmri nhũm mē piitã tee ri kuma nê kãm ma htỹx kumrêx nê amnhĩ nê kãm:

—Kwa hãmri Tirtũm. Axte mē inhmã mêmoj jarênh kêt nê. Mojes pix mã mãn mē ixkaxyw tanhmã kãm akapêr to. Anê.

Jakamã nhũm Mojes Tirtũm mã amnhĩ jarênh nê kapêr mar kaxyw hixêta ã api. Kãm ma nê htertet rãhã mō nê hã api. 22Nom mē kãm ma ho Tirtũm mã amnhĩ jarênh tâ mē papajaja na pu htem mē kurom

paxàmnhîx kãm amnhî jarênh o papa. Na pu htem kãm amnhî jarênh kaxyw nê hixêt prêk ã paxàpir kêt nê. Te ra mē pahte ma kaxkwa hwÿr ò krî hwÿr paxàpir nê pano ho omunh pê kãm amnhî jarênh pyrâk. Ò krîja mex o mex. Kamã kapêr o mē wrÿk xwÿnhjaja ohtô o ohtô. Na htem kamã hkînh rãhã ho pa ho pa.

23Nê ò krî hwÿr na hte hkra xàpir xwÿnhjaja ri pa. Nê mē papajaja na pu htem kãm amnhî jarênh kaxyw nê te kaxkwa kamã kuri pakuhê nê kãm amnhî jarênh pyrâk o amnhî nhîpêx. Te mē pahpê hkra kot wa pyrâk jakamã mē pamã uma hkêt. Nhûm pre Tîrtûm ra ò kagã kamã mē pakutêp amnhîm mē panhîxi hã kagã hpa. Na hte mēmoj piitã hamãr o hkrî. Nê krîja kamã amnepêp kormã Kris kot mē pahwÿr wrÿk kêt ri nhûm ra amnhî kaxyw Tîrtûm kôt hamaxpêr mex xwÿnhjaja haxwÿja ra kamã ri pa. Ra Tîrtûm kot mē ho hkra jakamã nhûm mē kuri ri pa ho pa. 24Nê Jejus haxwÿja kamã pa ho pa. Na pre mē panê htyk nê hkamrô pikapîrja o mē pahte amnhî tomnuj pãnhã amnhîre. Jakamã na pu htem hkôt amnhî xunhwÿ nhûm mē pahto hkra pu mē paxàmnhîx ri Tîrtûm mã amnhî jarênh nê amnhî to hwÿr o papa.

Amnepêp na pre Tîrtûm tee ri Kaî kot htô Apew pîr nê hkamrô pikapîrja ã omu nê hamaxpêr o:

—Nã ã kot amnhî nhîpêx anhÿr jakamã kot paj hã homnuj tÿx nê. Anê.

Tã ra hpãnhã Jejus kot mē panê htyk nê hkamrô pikapîrja ã omu nê ra axtem hamaxpêr o:

—Nã ãm hãmri na Ixkraja mē nê ty. Jakamã mē kot hkôt amnhî xunhwÿr xwÿnhjaja kot pa Ixkra kukwak ri mē kot amnhî tomnuj mÿrapê tanhmã mē ho hkêt nê.

Anhÿr o mē pakukamã hamaxpêr. ã hamaxpêr anhÿrja mex o mex.

25Na pre Mojes Tîrtûm nhÿ hã mē panhîgêxjê mã xatã mē kãm Tîrtûm kapêr jarênh o ri pa nhûm mē kuma nê hkôt amnhî nhîpêx o pa. Tã gaa nê ra hã nohkêt pa nê akupÿm mē kot amnhî nhîpêx tûm o awjanã nhûm Tîrtûm tee ri ja hã mē omu nê mÿrapê tanhmã mē hipêx to. Tã nhûm Kraja kaxkwa rûm mē pahwÿr wrÿ nê mē pamã kapêr. Jakamã kwa mē okora kêr pu mē panhîgêjtê pyrã nê mē pahte amnhî nhîpêx tûm o paxujanãr kêt nê. Kot puj mē anê nhûm Tîrtûm ja hã mē pahpumu nê mē urãk nê ja hã tanhmã mē panhîpêx to.

26Amnepêp Tîrtûm kot hixêt prêk pê Sinai kamã mē kãm kapêrja. Na pre kapêr tÿx o pika ho àk nhûm htertêp tÿx nê. Tã koja nhÿrmã axte pika ho àk nê kaxkwa ho àk nhûm wa hamê htertêp tÿx kumrêx. Koja axte ho anhÿr ho pixi nê axte ho anhÿr kêt nê. 27Tã nhÿrmã axte mēmoj to àk ã amnhî jarênh jakamã koja mēmoj to kator xwÿnhhta piitã ho àk. Nê mē pahte panhîhkra ho mēmoj nhîpêx xwÿnhja nhûm ho àk nhûm htertêp tÿx kãm hpigrãnh pa nê hapêx. Nhûm mēmoj htertêp nê hpigrãnh

kêt xwÿnh pixjaja arĩ rãhã ho rãhã. **28**No Tĩrtũm nhõ krĩ koja htertet nẽ hapêx kêt nẽ. Nẽ mẽ papajaja mẽ pahpê hkra jakamã te ra kuri õ krĩ kamã ri mẽ papa pyrãk. Jakamã kot puj mẽ mẽ urãk nẽ pajapêx kêt nẽ. Jakamã e kwa kêr pu mẽ amnhĩ tã Tĩrtũm mã mex o mex ã harênh nẽ hã pahpijaàm rãhã ho papa. Nẽ tanhmã amnhĩ tomnuj to hã amnhĩ pumu nẽ Tĩrtũm pumaj mẽmojta kaga kurê kumrêx. ã mẽ pahte amnhĩ nhĩpêx anhÿr o papaja na Tĩrtũm kãm hprãm. **29**Hihtÿx o hihtÿx jakamã koja mẽmoj tã akamã gryk kot kaj amex kêt o amex kêt.

Mẽ pahte Tĩrtũm kãm hprãm xà hkõt amnhĩ nhĩpêx ã mẽ pamã karõ

Rõmãn 12.1-2; Epes 4.1-3; Korosẽ 1.10-11; Wam Tesarõn 4.1-12;

Wam Pêtre 2.11-12; Wam Juãw 3.17-18

13 **1**Nẽ e kwa Kris kõt ixtõ nẽ ixtõxjaja. Kêr pu mẽ arĩ Kris kõt pahkwÿjê ho mex o mãn axpên kõt ri papa. Nẽ kêr pu mẽ tanhmã pahpunuj to hã amnhĩ pumunh tã axpên to mex mã panhũrer kêt nẽ. ã axpên nhĩpêx anhÿr rãhã ho papa.

2Nẽ amnepê mã na pre mẽmojaja nhÿhÿnh mra nẽ mẽ panhĩgêjtjê hõ hwÿr pøj. Hãmri nhũm mẽ omu nẽ htÿx axtem krĩ hõ nhõ xwÿnh ã mẽ hkamnhix tã no nhũm mẽ kêp Tĩrtũm kapêr o mẽ wrÿk xwÿnh kwÿ na prem. Hãmri nhũm amnhĩ nhõrkwÿ hwÿr mẽ kuwÿ nhũm mẽ ma hkõt mra nẽ kuri pøj nẽ kutã apku. Jakamã kwa koja nhÿhÿnh krĩ hõ rũm mẽmojaja ma mẽ awÿr mõ ka mẽ omu nẽ axãmnhix amnhĩ nhõrkwÿ hwÿr mẽ hwÿr kurê kumrêx kê mẽ ari pøj. ã mẽ hipêx anhÿr o apa hãmri nẽ nhÿrmã mẽ panhĩgêjtja pyrã nẽ amnhĩ wÿr Tĩrtũm kapêr o mẽ wrÿk xwÿnhjê hõ hwÿr japêr. Mẽ urãk nẽ ja hã mẽ omunh kêt tã atÿx amnhĩ wÿr mẽ awÿ nhũm ja mẽ amã mex o mex.

3Nẽ kêr ka mẽ ra mẽ kot Jejus ã mẽ akwÿjê pynênh nẽ mẽ hagjênh xwÿnhjê mã ajamxpêr rãhã ho ri apa nẽ mẽ ho ajamakêtkati hkêt nẽ. Te mẽ kajaja mẽ ãhkõ hã mẽ hagjênh xà kamã apunuj nẽ akrĩ pyrãk o mẽ kãm ajamxpêr o ri apa. Jao mẽ kamã axukaprĩ ho mẽ hwÿr mra nẽ mẽ kãm mẽmoj nhõr o ri apa.

4Nẽ mẽ kot axpên to hprõja na mex. Nom kêr ka mẽ amyjaja ãm aprõ pix tânopxar o ri apa. Nẽ mẽ anijaja mẽ ajaxwÿja amjên pix tânopxar o ri apa. No mẽ hkuprÿjê hwÿr mẽ mrrar xwÿnhjaja nẽ nhãm mẽ kêp mẽ hprõ ho amnhĩkati xwÿnhjaja nẽ nhãm mẽ kêp mẽ mjên o amnhĩkati xwÿnhjaja koja Tĩrtũm ja hã mẽ omu nẽ mẽ homnuj tÿx kumrêx.

5-6Nẽ kêr ka mẽ akãxpore rũnh kêt ã amnhĩ pumu nẽ tee ri amnhĩ kukamã ajamxpêr o akaprĩ hkêt nẽ. Na pre Tĩrtũm mẽ pamã kapêr o:

Kot paj akõt ri ixpa rãhã ho ixpa nẽ aa arer rÿ akaga hkêt kumrêx.

Anhÿr jakamã kot kaj mẽ akãxpore grire htã akaprĩ nẽ apa hkêt nẽ. Aa Tĩrtũm kot mẽ pahkaga hkêt ã amnhĩ jarênh jakamã mẽmoj kot pu wem

omu nê pamã nhãm ri mẽ uma ho papa? Tirtũm kot mẽ pahkõt pa ho pa kênã. Jakamã na pu htem pajamxpêr o:

Nà Pahi Maatija ra kot ixkõt pa ho pa xwÿnh jakamã mẽmo kot pa hkêt ri inhmã uma ho ixpa?

Mẽmo kot kêt ri tanhmã kêp ixto?

Anhÿr o pajamxpêr o papa. 7Nê mẽ kot Kris mã mẽ ajamãr o mẽ pa xwÿnh ra mẽ htyk xwÿnhjaja ka mẽ arĩ mẽ kot tanhmã amnhĩ nhĩpêx to ho paja mã ajamxpêr rãhã ho ri apa. Na prem Tirtũm kapêr o mẽ ajahkre mex nê. Nê tãm ri amnhĩ nhĩpêx o ri mẽ akõt pa. Nê amnhĩ kaxyw Tirtũm kõt pix mã hamxpêr rãhã ty. Tã kêr ka mẽ urak nê ã amnhĩ nhĩpêx anhÿr o ri apa rãhã ty.

8Nê Jejus Krisja arĩ rãhãã. Nê amnepê mã kot amnhĩ nhĩpêxja mããnên arĩ rãhãã. Aa kot amnhĩ nhĩpêxja nhĩjuk ri axtem tanhmã amnhĩ nhĩpêx to hkêt.

9Nê kwa kêr ka mẽ Tirtũm kõt amnhĩ nhĩpêx rãhã ho ri apa. Na hte kapêr o hêx xwÿnhjaja mẽ awÿr mra nê mẽ amã:

— Amnepêm mẽ ate Tirtũm kot mẽ amex ã mẽ ajarênh kaxyw mẽ ate kãm mẽmo mry nhõr nê akupÿm hamÿnh nê hkur o apa htã ra ja ho anhÿr kaga. Kwa mẽ ja ho awjanã nê axte ã amnhĩ nhĩpêx anhÿr o ri apa. Kê Tirtũm ja hã mẽ apumunh kõt mẽ amex ã mẽ ajarê.

Anhÿr o mẽ amã kapêr. Nom xà na hte Tirtũm ã mẽ pahte amnhĩ nhĩpêx anhÿr ã mẽ pahpumunh kõt mẽ pamex ã mẽ pajarê? Xà na htem mẽmo mẽ apkur xà hkur pê amnhĩ kaxyw Jejus kõt hamxpêr tÿx o pa? Nà na htem anhÿr kêt nê. Na pu htem mẽmoj kur kõt pamã Tirtũm kĩnh kêt nê. Kêt mẽ paxàpkur xàja mẽ panhĩ pix o hihtÿx kaxyw na. Na hte Jejus kõt mẽ pahto paxihtÿx kêt nê. ãm Tirtũm kot amarĩ kãm mẽ pajapê nê mẽmoj to mẽ pakutã nojarêr jakamã na pu htem ja hã amnhĩ pumu nê amnhĩ kaxyw hkõt pajamxpêr tÿx o papa.

10Tirtũmja Jejus kot mẽ panê htyk ã omunh xà hkõt ra kot mẽ pamex ã mẽ pajarênh jakamã mo kaxyw kot pu mẽ axte kot mẽ pamex ã mẽ pajarênh kaxyw kãm mẽmo mry gõ nê hkwÿ hku? Koja mēhõ akupÿm Tirtũm kapêr tũm o ujanãr jao Jejus kot nê htyk nê hkamrô pikapĩrja kaga. 11Amnepêm na pre patre maatijaja tõhã mẽ kãm mẽmo mry hpar xwÿnh hkamrô ru nê guhkrax kãm kuru nê hamÿ nê ma o mra nê Tirtũm nhõrkwÿ kaàkre hwÿr hitom maati hwÿr ho agjê. Tirtũm kot mẽ omunh nê axte mẽ kot amnhĩ tomnuj mã hamxpêr kêt kaxyw. Hãmri nhũm hpãnhã ĩ mÿ nê krĩ pê ho kato nê ma o mra nê nhÿri amÿm hkwÿjê hkàx ã ho hxêr pa. Tirtũm kapêr tũm kõt na prem ã amnhĩ nhĩpêx anhÿr o pa. 12Tã ja pyrã nê na prem ma krĩ pê amÿm Jejus o tẽ nê kupĩ nhũm hkamrô axkapĩ. Kot mẽ pahte amnhĩ tomnuj pãnhã amnhĩrer nê mẽ pahto mẽ pahpê Tirtũm kra kaxyw ã htyk nê hkamrô pikapĩr anê. 13Na prem Tirtũm kapêr tũm gryk ã Jejus kaga nê põristijê mã anê nhũm mẽ

ma krĩ pê ho kato nê o tẽ nê kupĩ. Tã kêr pu mẽ jajê rom Jejus gryk ã mãn Tĩrtũm kapêr tũm kaga. Kwâr mẽ mãmri Jejus pyrã nê Tĩrtũm ã tanhmã mẽ pahto nê amnhĩ nê nhỹhỹm mẽ pajano. 14Kêt jar mẽ papapxàja kêp mẽ papapxà kumrêx kêt. Nê jar mẽ panhõ krĩja kêp mẽ panhõ krĩ kumrêx kêt. Mẽ pamã te kot pô nhĩrõnh o ixkre pix pyrãk. No kêt mẽ panhõ krĩ kumrêx koja jar mẽ panhõ krĩ rom aa hapêx kêt nê. Tã tãm na pu mẽ kormã ma hwỳr papa kaxyw arĩ amnhĩ tã Tĩrtũm jamãr o papa.

15Nê na htem Ijaew arĩ ohtô nê amnhĩ pãnhã Tĩrtũm mã mry hpar ho pa. Nom mẽ papajaja kot puj mẽ axte ã amnhĩ nhĩpêx anhỹr hkêt nê. Kot puj mẽ ãm Jejus kukwak ri Tĩrtũm mã mex o mex ã harênh rãhã ho mãn papa. Jao te mẽ pahte kãm hkĩnh xà nhõr pyrãk o amnhĩ nhĩpêx.

16Nê kêr pu mẽ arĩ axpên to mex o ri axpên kôt papa. Nê kê mẽhõ kêp amrakati japêr ka ja hã omu nê amnhĩ kutã kãm anhõ mẽmoj kwỳ. ã kot puj mẽ axpên nhĩpêx anhỹr rãhã ho ri axpên kôt papa. Kot puj mẽ anê nê te mẽ pahte Tĩrtũm mã hkĩnh xà nhõr pyrãk o amnhĩ nhĩpêx. ã mẽ pahte amnhĩ nhĩpêx anhỹrja na mex o mex.

17Nê kêr ka mẽ Kris kôt mẽ akrãhtũmjê kapêr ma nê mẽ hkôt amnhĩ nhĩpêx mex nê. Na htem Tĩrtũm mã mẽ ajamãr o ri mẽ akôt pa. Koja mẽ nhỹrmã mẽ kot tanhmã mẽ anhĩpêx to hã Tĩrtũm mã amnhĩ jarê. Jakamã mẽ kãm mẽ ato ajuta prãm. Tã kêr ka mẽ kapêr ma nê mẽ hkôt ri amnhĩ nhĩpêx mex o ri apa. Kêr kê mẽ amnhĩ tã mẽ apumu nê hkĩnh nê. No kot kaj mẽ ama nê ãm mẽ ama nhũm mẽ tee ri amnhĩ tã mẽ apumu nê hkaprĩ nê. Jao tee ri kot tanhmã mẽ ato ajuta mex to hkukamã hamaxpêr.

18Nê kwa kêr ka mẽ ixto Tĩrtũm wỳr rãhã ho apa. Inhmã Tĩrtũm noo mã tanhmã amnhĩ tomnuj to hprãm kêt. ãm inhmã amnhĩ to mex pix o ri ixpa hprãm.

19Nê kêr ka mẽ ixto awỳ kê tokyx akupỹm mẽ awỳr inhmẽ. Na pa ra inhmã mẽ apumunh prãm tỳx nê.

Kaga nhĩpêx xwỳnh kot tanhmã mẽ ho Tĩrtũm wỳr to hã harênh

Epes 3.14-19; Piripos 1.0-11; Wam Tesarõn 3.9-13, 5.23;

Sikũn Tesarõn 1.11-12, 2.16-17

20Nê mẽ panhõ Pahihiti Jejus Krisja na hte mẽ panhĩpêx o te ôwêhti jamãr xwỳnh kot hkrit jamãr pyrãk o pa. Jakamã kêp mẽ pajamãr xwỳnh maati mex na. Na pre mẽ panê ty nhũm Tĩrtũm akupỹm mẽ pamã ho htĩr nê mẽ pamã harênh o:

—E ra Ixkra kot mẽ anê htyk jakamã kêr ka mẽ ãm ixkapêr nyw kôt pix mã ri amnhĩ nhĩpêx o ri apa. Kot kaj mẽ ã amnhĩ nhĩpêx anê hãmri nê nhỹrmã ty pa akupỹm mẽ ato mẽ atĩr ka mẽ ixri atĩr tũm nê apa ho apa. Anê.

Tĩrtũm kêp mẽ pahto mẽ pajamakêtkati nê ri mẽ papa xwỳnh na.
 21Tã na pa hte tanhmã mẽ ato hwỳr to ho ixa nê mẽ ato hwỳr o:

—Pa Tĩrtũm. E kwa tanhmã ixkwỳjê ho mex to kê mẽ kãm akapêr kôt pix mã amnhĩ nhĩpêx o pa hprãm. Nê mẽ kãm tãm amnhĩ nhĩpêx o pa hprãm. Nê kê Jejus haxwỳja tanhmã mẽ ho mex to kê mẽ war amã hprãm xà hkôt pix mã war amã tanhmã ri amnhĩ nhĩpêx to ho pa. Anê.
 E kêr pu mẽ arĩ Jejus Kris mã mex o mex ã harênh rãhã ho papa.

Kagà jatur xà kamã mẽmoj jarênh

22E Kris kôt ixkràmnhwỳjaja. Nà na pa ã mẽ amã kagà nhĩpêx anê. Jejus kôt mẽ ato mẽ axihtỳx kaxyw. No na pa ho ry nê hipêx kêt nê. Ixte ho grire nê hipêx jakamã kwa kêr ka mẽ kamã harê nê mar tỳx nê hkôt amnhĩ nhĩpêx mex o ri apa.

23Nê mãn ka mẽ ra Ximotre jarênh mar japêr. Na pre Kris ã mẽ hagjênh xà kamã hkrĩ hã apkati xohtô nê. Tã nhũm xep mẽ ra kator. Tã koja kormã mẽ awỳr inhmõr xwỳj ri man ixwỳr mỗ nê hpôx japêr kot paj ma amnhĩ kôt mẽ awỳr o mỗ ka mẽ omu.

24Nê kêr ka mẽ kot Kris mã mẽ ajamãr xwỳnhjê mã ijarê. Nê atar Tĩrtũm krajê piitã mẽ kãm ijarê.

Nê ota jar Tĩrtũm kra hkwỳja piitã mẽ awỳr hpêr mẽ.

25E kê Tĩrtũm mẽ apiitã mẽ ato mex o pa. Tã ãm ja pix. Na pa ã mẽ amã hã kagà ho anê. Na hapêx.

Xiakre

Xiakre kot Jejus kôt hkwỳjê piitã hwỳr kagà nê mênh

Xiakre na pre kagàja nhípêx. Kêp Jejus tō nê kêp Jerujarê kamã mẽ kot Jejus kôt amnhĩ xunhwỳr xwỳnhjê nhō pastô na pre. Nê kêp Ijaew. Jakamã na pre hkwỳjê mã kagàja nhípêx nê krĩ piitã hkôt urak nê Jejus kôt mẽ kot amnhĩ xunhwỳr xwỳnhjê hwỳr kurê. Jejus ã mẽ kãm mẽ hkurê xwỳnhjaja na prem mẽ hipêx kati nhũm mẽ amnhĩ xà htỳx kamã hamak o pa. Jakamã nhũm Xiakre kot mẽ hamaxpêr o mẽ hihtỳx kaxyw kagàja nhípêx nê mẽ hwỳr kurê nê mẽ kãm:

1 1Pa ixkwỳjaja. Xà mẽ amex? E ixpê Xiakre na pa. Ixte Tĩrtũm mẽ Pahihti Jejus Kris wa kãm tanhmã amnhĩ nhípêx to xwỳnh na pa. Jakamã kot paj kagàja nhípêx nê pika piitã hkôt mẽ apiitã mẽ awỳr kurê. Mẽ apê Tĩrtũm krajê hwỳr.

Mẽ pahpunuj tã mẽ pahte amnhĩ kaxyw Tĩrtũm kôt pajamaxpêr
Rukre 6.20-23; Rõmãn 5.3-5; Korosê 1.11; Sikũn Pêtre 4.12-19

2-3E ixkwỳjaja. Kêr ka mẽ atõ tanhmã amnhĩ to rỳ tanhmã apunuj to. Rỳ mẽhõ tanhmã Jejus ã mẽ anhípêx to. Tã kêr ka mẽ ja hã amnhĩ pumu nê tee ri amnhĩ kukamã ajamaxpêr o ri akaprĩ hkêt nê. Arĩ akĩnh kãm amnhĩ kaxyw Tĩrtũm kôt ajamaxpêr tỳx rãhã ho ri apa. Kot kaj mẽ ã amnhĩ nhípêx anê nê gaa nê rĩ mẽmoj punuj pê Jejus kôt amnhĩ xunhwỳr tỳx nê. Jakamã kwa kêr ka mẽ tanhmã apunuj to hã amnhĩ pumu nê ã mẽ ate amnhĩ nhípêx anhỳrja kukamã ajamaxpêr pê akĩnh nê ri apa. 4Nom kêr ka mẽ tee ri tanhmã apunuj to hã amnhĩ pumu nê akaprĩ xaj Tĩrtũm kaga hkêt nê. ãm amnhĩ kaxyw hkôt ajamaxpêr tỳx rãhã ho ri apa. Kot kaj mẽ ã amnhĩ nhípêx anê nê gaa nê Tĩrtũm noo mã tãm amnhĩ nhípêx mex o ri apa. Nê kãm hprãm xà hkôt pix mã amnhĩ nhípêx o apa.

**Mê pahte tanhmã amnhĩ kute hã amnhĩ pumunh kôt amnhĩ to
Tĩrtũm wỳr ã mẽ pamã karõ**

Matêwre 21.18-22

5Nê kêr ka mẽ mẽmoj mỳrapê tanhmã apunuj to hãmri nê tee ri ja hã amã Tĩrtũm mã ajamxpêr tỳx prãm nhũm apê ja hihtỳx japêr. Rỳ mẽmoj tanhmã apê amnhĩ nhĩpêx to ka tee ri hkukamã ajamxpêr japêr. Kêr ka mẽ ã ajamxpêr anhỳr japêr hãmri nê amnhĩ to Tĩrtũm wỳr kurê kumrêx. Kot amã ajamxpêr mex nhõr nhũm ate ỹ hã tãm ajamxpêr kaxyw amnhĩ to awỳ. Kot kaj mẽ ã amnhĩ to hwỳr anê nhũm amnhĩ tã mẽ ama nê mẽmojta kutã tanhmã ato axihtỳx to kurê kumrêx ka ỹ hã hkôt ajamxpêr tỳx mex o ri apa. Jao tanhmã akute htã akĩnh nê ajamakêtkati nê ri apa. Koja Tĩrtũm tee ri amã mẽmoj kôt ajamxpêr tỳx prãm kaprỳ hã apumu nê hã amã àkjêr kêt nê. Koja ate amnhĩ to hwỳrta ma nê tanhmã ato mex to. 6Nom kêr ka mẽ amnhĩ to hwỳr kãm tee ri amnhĩ kukamã ajamxpêr kati hkêt nê. Rỳ ajamxpêr o:

— Koonên. Koja apu Tĩrtũm inhmã ja ho anhỳr japêr.

Anhỳr o tee ri amnhĩ kukamã ajamxpêr kati hkêt nê. ãm akĩnh kãm tanhmã ate amnhĩ to hwỳr toja kukamã ajamxpêr o:

— Nà koja inhmã ho anê. Ixte amnhĩ kaxyw kãm ijamxpêr nê amnhĩ to hwỳr xà hkôt koja inhmã tanhmã amnhĩ nhĩpêx to.

Anhỳr o hkamnàr rom ã amnhĩ kukamã ajamxpêr anê.

Nom kot kaj mẽ tanhmã amnhĩ to hwỳr to nê tee ri amnhĩ kukamã ajamxpêr kati nê hkôt ajamxpêr tỳx kêt nê. Nê te kôk nhãm àpêr nê nhãm àpêrta pyrã nê nhãm ri ajamxpêr nê nhãm ri ajamxpêrja o hkôt ajamxpêr kêt nê. Kot kaj mẽ ã amnhĩ nhĩpêx anê nhũm Tĩrtũm tee ri ja hã mẽ apumu nhũm ja kãm mex kêt nê. 7-8 ã mẽ hamxpêr anhỳr xwỳnhjaja na htem nhãm hamxpêr nê nhãm hamxpêr jao hamxpêr mex kêt nê. Jakamã kot kaj mẽ ã ajamxpêr anhỳr o amnhĩ to Tĩrtũm wỳ hãmri nê ãm amnhĩ to hwỳr kaprỳ. Koja ama nê ãm ama. Nom kot kaj mẽ tanhmã akute hã amnhĩ kaxyw hkôt ajamxpêr tỳx pê amnhĩ to awỳ. Nê tee ri amnhĩ kukamã ajamxpêr kati hkêt kãm tanhmã amnhĩ to hwỳr to nhũm amnhĩ tã ama nê hkĩnh nê tanhmã amã mẽmoj nhĩpêx to. Mê ate hã axàhwỳr xà hkôt tanhmã mẽ amã mẽmoj nhĩpêx to.

Mê kêp amrakati xwỳnh mẽ mẽ kot amnhĩ to rũnh xwỳnhjê jarênh

Eprêw 13.5-6; Wam Pêtre 1.24-25

9Nê kwa mẽ akàxpore hkêt xwỳnhjaja. Jar mẽ apê amrakati htã mẽ apê Tĩrtũm kra na ka mẽ. Jakamã kêr ka mẽ akàxpore rũnh kêt tã mẽ apê Tĩrtũm kra hã amnhĩ pumunh kôt ajamakêtkati nê nê akĩnh nê apa.

10-11 Nê mẽ akàxpore rũnh xwỳnhjaja. Mê akàxpore rũnh nê mẽ akukrêx rũnh tã kot kaj mẽ nhỹrmã ty nê piitã rer pa nê mẽ kêp amrakati

xwÿnhjê pyrã nê anhÿ kamã Tirtûm kuri akrĩ nhũm tanhmã mē ajarēnh to. Te mē apê mēmo pixôrã kot amnhĩ nhĩpêx pyrãk. Na hte kwÿhtã axpēn pē axpôt nê muxre nê mex nê harir. Tã gaa nê rĩ hã myt xàhpanh mē nhũm ra nhôôre. Nê gaa nê ra grã pa nê rôrôk nê hapêx. Tã kot kaj mē nhÿrmã urãk nê ty nê akukrêx rer pa. Jakamã kwa kêr ka mē akàxpore rũnh pumunh kôt akĩnh nê ri apa hkêt nê. Kêt ãm mē apê Tirtûm kra hã mãn amnhĩ pumunh kôt akĩnh nê apa.

Mê pahpunuj kôt pagryk nê mē pahkurê

12Nê kot kaj mē atô tanhmã apunuj to htã arĩ amnhĩ kaxyw Tirtûm mã ajamxpêr tÿx rãhã ho ri apa. No tanhmã apunuj to hã amnhĩ pumu nê hkaga hkêt nê. Rÿ kot tanhmã ato xwÿnhhta kêr ka mē amnhĩ tã kamã agryk nê tanhmã ho hkêt nê. ãm Jejus kôt pix mã amnhĩ nhĩpêx rãhã ho ri apa. Kêr kê Tirtûm amã hkĩnh ã amnhĩ tã apumu nê amex ã ajarê. Ka nhÿrmã kuri amex kumrêx nê atĩr tũm nê apa ho apa. Ra kot mē pakukamã mē pahtã amnhĩ jarēnh xà hkôt. Jakamã kêr ka mē tanhmã apunuj to htã ã amnhĩ kukamã ajamxpêr anhÿr pē akĩnh nê apa.

13Nê Tirtûm aa kãm tanhmã amnhĩ tomnuj to hprãm kêt. Nê mē papajaja mē pahte tanhmã amnhĩ tomnuj to kaxyw na hte mē pamã tanhmã ãmnēnh to rÿ mē pamã mē pajamxpêr punuj jagjēnh kêt nê. Jakamã kot ka mē atô amã tanhmã amnhĩ tomnuj to hprãm tã kwa kêr ka Tirtûm tãm kot ja kaxyw mē akrãm mē ajamxpêr punuj jagjēnh to hã hkamnhix kêt nê. 14-15Mê papamjaja na pu htem pajamxpêr punuj xà hkôt tanhmã amnhĩ tomnuj to. No Tirtûm Karô na hte mē pamã mē pajamxpêr punuj jagjēnh kêt nê. Mê papamjaja na pu htem pajamxpêr punuj nê gaa nê ra hkôt tanhmã amnhĩ tomnuj to. Hãmri nê gaa nê ã amnhĩ nhĩpêx anhÿr rãhã ho ri papa. Mê kot amnhĩ tomnuj o mē pa xwÿnhjaja koja mē nhÿrmã ty hãmri nê Tirtûm mē Kra wa kuri htĩr tũm nê pa ho pa hkêt nê.

Tirtûm kot tanhmã mē pahto mex to hã harēnh

Xiakre 3.17-18; Sikũn Pêtre 1.3-4

16Nê e ixkwÿjaja. Tirtûm kot mē pahte amnhĩ tomnuj prãm xàj mē pamã mē pajamxpêr punuj jagjēnh kêt jakamã kwa kêr ka mē ã ajamxpêr anhÿr kêt nê. 17Na hte mē pahto mex pix o pa. Na pre myyti ho kato. Kapêr pix o ho kato. Nê mytwrÿre ho kato. Nê kanhêti ho kato. Ja piitã ho kato nhũm mē pamã hirã mex o harir. Na hte mytwrÿre tōhã hirã mex o pa. Nê gaa nê nyw kaxyw nê kamàt kô. Nê gaa nê nyw mē nhũm akupÿm hirã. ã na hte amnhĩ nhĩpêx anhÿr o pa. No Tirtûmja ã kot anhÿr kêt. Kot amnhĩ nhĩpêxja ãm rãhã ho rãhã. Na hte mē pahto mex pix o pa. No tōhã tanhmã mē pahto mex to nhũm jãã nhũm tanhmã mē pahtomnuj to hkêt nê. 18Tã kapêr pix o kot ã mēmoj to kator kot

anhÿr. Nê mē pamā kapēr o amnhĩrĩt. Kām mē pahto hkra hprām xaj mē pamā Jejus kot tanhmā mē panê amnhĩ nhĩpêx toja nhũm pre mē pamā ho amnhĩrĩt. Na pu prem kuma nê hkôt amnhĩ xunhwÿ nhũm amnhĩ tã mē pahpumu nê mē pahto hkra. Mē pahpê Ijaew kumrêxjaja na pre mē pahto hkra.

Mē pagryk o papa nê mē pahkurê

Rômãn 12.17-21; Epes 4.25-5.2

19E ixkwÿjaja. Kwa mē ixkapēr ma nê hã anohtÿx nê ho apa. Koja mēhõ Tĩrtũm kapēr o mē ajahkre kaxyw mē awÿr mō nê mē amã kapēr jarê ka mē mar tÿx nê. Koja mē ate tanhmā amnhĩ tomnuj to nê mē amã kapēr ka mē amnhĩ tã ama nê kamã agryk kêt nê. 20Mê gryk o mē pa xwÿnhjaja na htem Tĩrtũm kapēr kôt ri amnhĩ nhĩpêx kêt nê. 21Jakamã kwa kêr ka mē axte amnhĩ tomnuj rÿ ajamaxpêr punuj o ri apa hkêt nê. Na htem ohtô nê ã amnhĩ nhĩpêx anhÿr o pa nom kêr ka mē kurom Tĩrtũm kapēr mãn amnhĩ krã him haxàr tÿx nê. Kapēr o mē ajahkre xwÿnhjaja na htem ho mē ajahkre mex o pa. Tã kêr ka mē ama nê amã hkôt amnhĩ nhĩpêx prãm rãhã ho ri apa. Na pu htem Tĩrtũm kapēr ma nê hkôt amnhĩ nhĩpêx o papa hãmri nê nhÿrmã Tĩrtũm mē Kra wa kuri pahtĩr tũm nê pa mex nê papa ho papa.

Mē pahte Tĩrtũm kapēr kôt amnhĩ nhĩpêx ã mē pamã karõ

Matêwre 7.24-27; Wam Juãw 2.3-6

22Nê kwa mē okora. Kêr ka mē ãm Tĩrtũm kapēr ma nê ãm mar kêt nê. Mããnen hkôt amnhĩ nhĩpêx rãhã ho ri apa. Kot kaj mē ama nê ãm ama nê hkôt amnhĩ nhĩpêx kêt nê hãmri nê apê Tĩrtũm kra hã amnhĩ jarênh kaprÿ. Jao nhÿrmã Tĩrtũm mē Kra wa kuri atĩr tũm nê apa hkêt nê. 23-24Te ho mēhõ kot amnhĩ pumunh xà hpyr nê kamã amnhĩ pumunh nê amnhĩ krã hkĩ jaê rÿ amnhĩ kuk tyk pumunh pyrãk. Tã te kot ãm ja hã amnhĩ pumunh nê kot amnhĩ to mex kêt rãhã akupÿm amnhĩ pumunh xà xir nê ma htêm nê axte amnhĩ kuk tyk rÿ amnhĩ krã kĩ jaerta mã hamaxpêr kêt pyrãk. Mē kot Tĩrtũm kapēr mar nê ãm mar nê hkôt amnhĩ nhĩpêx kêt xwÿnhjaja te kot ja jarênh pyrãk. 25Tã kêr ka mē ã amnhĩ nhĩpêx anhÿr kêt nê. Mē ate Tĩrtũm kapēr kôt amnhĩ nhĩpêx o apa kaxyw xatã kamã harê nê mar tÿx o apa. Jao hkôt amnhĩ nhĩpêx mex o apa. Tĩrtũm kot mē pahte tanhmã amnhĩ nhĩpêx to ho papa hã mē pamã karõ xaja ãm hãmri na. Na htem hkôt amnhĩ nhĩpêx nhũm Tĩrtũm ja hã mē



Xiakre 1.22-25

omu nê mẽ ho mex nê nhũm mẽ àmnhĩx hamakêtkati nê hkôt amnhĩ nhĩpêx o pa. ²⁶Nom koja mẽhõ kêp Tĩrtũm kra hã amnhĩ jarênh tã htỳx ri kapêr punuj o ri pa hãmri nê âm kêp hkra hã amnhĩ jarênh kaprỳ. Mẽ pahpê Tĩrtũm krajaja na pu htem ã pakapêr anhỹr kêt nê. ²⁷Axtem mẽ pahte amnhĩ nhĩpêx. Na pu htem mẽ hã awrã rỳ mẽ kêp mẽ mjên tyk xwỳnhjê ho mex nê mẽ hã pahpêr o pahpikênh o papa hkêt nê. Nê tanhmã mẽ kute hã mẽ omu nê mẽ ho ajuta ho papa. ã na pu htem pahpê Tĩrtũm krajaja amnhĩ nhĩpêx anhỹr o papa nhũm Mêpanhĩpêêxà Maati Tĩrtũm ja hã mẽ pahpumu nê hkĩnh nê. No na pu htem mẽ kot amnhĩ tomnuj o mẽ pa xwỳnhjê hkôt ri amnhĩ nhĩpêx kêt nê âm Tĩrtũm kapêr xà kôt pix mã amnhĩ nhĩpêx nhũm amnhĩ tã mẽ pahpumu nê hkĩnh nê.

Mẽ pahte mẽ piitã mẽ hipêx o axpên pyræk ã mẽ pamã karõ

Rõmãn 2.11; Korosê 3.25

2 ¹E ixkwỳjaja. Pahihti Jejus Krisja mex o mex. Tã ra mẽ ate hkôt amnhĩ xunhwỳr jakamã kwa kêt ka mẽ apê hkwy hã mẽ piitã tãm mẽ hipêx o apa. Nê mẽ hipêx o axpên pyræk. ²Jakamã kot kaj mẽ nhỹrmã Tĩrtũm kapêr mar kaxyw axpên wỳr akuprõ nhũm hikàxpore rax xwỳnhhta mẽ akôt axà. Ê mex nê ôr o ìhkra kamã kàx hãmri nê mẽ akôt axà. Nhũm hkôt mẽhõ pê amrakati xwỳnhja tẽ nê axà. Nom wamta kĩnhã kêp amrakati nê ê omnajti nê pikaxônhti. Hãmri nê hikàxpore rax xwỳnhhta hkôt mẽ awỳr tẽn axà. ³Tã tanhmã kot kaj wem ri wa hipêx to? Xà kot kaj mẽ wa hipêx o axpên pyræk nà? Nà xà kot kaj mẽ ã wa hipêx anê nê wam àr xwỳnhhta ê mex ã omunh xà hkôt kãm kadêre hõ gõ nê kãm:

—E ota kadêre. Mãmri hã nhỹ. Anê.

Hãmri nê ê pynajti xwỳnhhta pumu nê axtem nê kãm:

—E atar pikap nhỹ.

Anhỹr o ahpỳnhã wa kãm akapêr? ⁴Kot kaj mẽ ahpỳnhã ã wa hipêx anê nê amnhĩ tomnuj nê. Wam àr xwỳnhhta ka kãm akapêr mex nê tanhmã ho mex to. No hkôt hõta omnajti hã omunh xà hkôt te kamã anhõkre kahak pyræk o hipêx. Kot kaj mẽ ã ahpỳnhã wa hipêx anê nhũm Tĩrtũm tee ri ja hã mẽ apumu nhũm ja kêp omnuj nê. ⁵Kwa mẽ inhma ixkwỳjaja. Mẽ kêp amrakati xwỳnhjaja mẽ hikàxpore hkêt tã na hte mẽ hkwyjaja amnhĩ kaxyw Tĩrtũm kôt hamaxpêr nê hkôt amnhĩ xunhwỳ nhũm amnhĩ tã mẽ omu nê kot mẽ panhĩpêx pyrã nê mẽ ho hkra. Jakamã jar mẽ kêp amrakati htã na htem amnhĩ kaxyw Tĩrtũm kôt hamaxpêr tỳx rãhã ho pa. Jakamã koja mẽ nhỹrmã kuri htĩr tũm nê mex kumrêx nê pa ho pa. Mẽ kãm Tĩrtũm kĩnh o mẽ pa xwỳnh piitã koja mẽ nhỹrmã ã mex nê ri pa anê. ⁶Nom kot kaj mẽ ahpỳnhã mẽ hipêx nê amnhĩ tomnuj nê. E pa mẽmoj tã mẽ akukja. Mẽmojaja na htem tanhmã mẽ ato hêx to? Nê mẽmojaja na htem juisti mã tanhmã mẽ ato kapêr

punuj to? Xà mẽ kêp amrakati xwỳnhjaja? Nà mẽ tãm kêt. Mẽ hikàxpore rũnh xwỳnhjaja na htem ã mẽ anhĩpêx anhỹr o pa. 7Nẽ ra mẽ ate hkôt amnhĩ xunhwỳr xwỳnhja nhũm mẽ axtem nẽ tanhmã mẽ apê ho kapêr to ho pa. Tã ka htem mẽ kêp amrakati xwỳnhjê rom mẽ kãm akapêr mex nẽ mẽ kãm kadêre mex gõ nhũm mẽ hã hkrĩ. 8Tĩrtũm kapêr ã kagà htũm kot ja jarênh kot:

Kêr ka mẽ piitã mẽ hipêx o te ka amã amnhĩ tã ma pyrãk. Anẽ.

Ã kot mẽ pamã karõ kot anhỹr. Kapêrja mex kumrêx. Kot puj mẽ ã axpên nhĩpêx anhỹr jao Tĩrtũm kãm hprãm xà hkôt amnhĩ nhĩpêx mex nẽ. 9Nom kot puj mẽ ã amnhĩ nhĩpêx anhỹr kêt nẽ ahpỳnhã tanhmã mẽ hikàxpore rũnh xwỳnhjê ho mex to nẽ ahpỳnhã tanhmã mẽ kêp amrakati xwỳnhjê nhĩpêx to japêr. Hã kot puj mẽ Tĩrtũm kapêr htũmta nhĩrõp pakuhê nẽ amnhĩ tomnuj nẽ. 10Kot pu mẽ kapêr tũm piitã hkôt ri amnhĩ nhĩpêx mex o ri papa htã ãm pixire nẽ hirõp pakuhê. Jao te pahte kapêr piitã hirõp pakuhê pyrãk. 11Na pre Tĩrtũm mẽ pahte mẽ pahprõ pix tãnopxar o papa hã mẽ pamã karõ. Nẽ mẽ pamjên pix tãnopxar o papa hã mẽ pamã karõ. Nẽ mẽ pahte axpên par nẽ mẽ pahkurê. Jakamã kot puj mẽ pahprõ pix tãnopxar mex o ri papa japêr. Nẽ mẽ pamjên pix tãnopxar mex o ri papa japêr tã tanhmã pajamaxpêr to nẽ pahkwỳjê hõxpĩ. Jao te Tĩrtũm kapêr tũm piitã hirõp pakuhê hpar pyrãk o amnhĩ nhĩpêx.

12-13Koja nhỹrmã Tĩrtũm mẽ pahtrĩ ri tanhmã axpên nhĩpêx to ho papa hã mẽ pahpumunh kôt tanhmã mẽ pajarênh to. Mẽ pamã axpên kĩnh ã axpên to mex o papa hã mẽ pahpumunh kôt mẽ pajarê rỳ mẽ pamã axpên kĩnh kêt ã axpên nhĩpêx o papa hã mẽ pahpumunh kôt mẽ pajarê. Jakamã mẽ kamã mẽ ukaprĩ kêt xwỳnhjaja koja nhỹrmã ja hã mẽ omu nẽ mẽ urãk nẽ mẽ kamã ukaprĩ hkêt nẽ. Nom mẽ kamã mẽ ukaprĩ ho mẽ pa xwỳnhjaja koja ja hã mẽ omu nẽ mẽ urãk nẽ mẽ kamã ukaprĩ nẽ mẽ nẽ mẽ kot amnhĩ tomnuj piitã rênh pa. Jakamã kwa kêr ka mẽ amnhĩ to mex nẽ tãm axpên nhĩpêx o ri axpên kôt apa. Nẽ axpên mã akapêr mex nẽ axpên kamã axukaprĩ pix kukamã ajamaxpêr o apa.

Amnhĩ kaxyw Tĩrtũm kôt mẽ hamaxpêr xwỳnhjê jarênh

Rukre 3.8-14

14Nẽ kwa ixkwỳjaja. Koja mẽhõ kot amnhĩ kaxyw Jejus kôt hamaxpêr nẽ hkôt amnhĩ xãm ã amnhĩ jarênh tã hkôt ri amnhĩ nhĩpêx kêt nẽ. Hã koja nhỹrmã ty hãmri nẽ tanhmã kot we amnhĩ to nẽ Tĩrtũm mẽ Jejus wa kuri htĩr tũm nẽ pa ho pa? Nà koja anhỹr kêt nẽ. Kêp hkra hã amnhĩ jarênh tã hkôt amnhĩ nhĩpêx kêt jakamã koja nhỹrmã wa hwỳr àpir kêt nẽ.

15Nê xà koja mēhō kēp amrakati nē ri pa. Nē ê pynajre pix jagjê nē ri hã pa. Nē ô hkêt nē ri kãm prãm nē pa. 16Ka mē ja hã omu nē tanhmã kãm akapēr to nē kãm:

—Kwa ã amnhĩ nhĩpêx anhỹr kêt nē. Anhõrkwỹ hwỹr tēn axê mex japēr nē axà nē amnhĩm mẽmoj japēr nē aku. Koja Tĩrtũm ato mex rax nē.

Anhỹr o kãm akapēr tã kãm mẽmoj nhõr kêt nē. Tã xà koja we ama nē amar xà hkôt ê mex jagjê nē apkur mex o ri pa? Nà kot ka mē ã kãm akapēr anē nē ho ajuta hkêt nē nhũm arĩ kãm prãm nē ê hkêt nē omnuj nē ri pa. Na htem mẽ kapēr pix o mẽ ho mex kêt nē. Kot kaj mẽ ã kãm akapēr anē nē ãm kãm mẽmoj tã karõ kaprỹ. 17Ja pyrã nē koja mēhõ ra amnhĩ kaxyw Jejus kôt hamaxpēr nē hkôt amnhĩ xãm ã amnhĩ jarēnh tã kapēr kôt ri amnhĩ nhĩpêx kêt japēr. Hã koja ãm kēp hkra hã amnhĩ jarēnh kaprỹ.

18Nê kot kaj mẽ atõ ã ajamaxpēr anē nē ajamaxpēr o:

—Nà Jejus kwỹjaja na htem ahpỹnhã tanhmã amnhĩ nhĩpêx to ho pa. Na hte mẽ hkwỹjaja amnhĩ kaxyw Jejus kôt hamaxpēr tỹx pix o ri pa. Nē mẽ hkwỹjaja tanhmã hkwỹjê ho mex to ho ri pa. ã na htem ahpỹnhã tanhmã amnhĩ nhĩpêx anhỹr to ho pa. Anē.

Kwa mẽ ri ã ajamaxpēr anhỹr kêt nē. Mẽ hkwỹjê ho mex o mẽ pa xwỹnhjaja na htem Tĩrtũm hkôt hamaxpēr pē mããnēn hkôt amnhĩ nhĩpêx nē hkwỹjê ho mex o pa. Koja mēhõ amnhĩ kaxyw Jejus kôt hamaxpēr hã koja mããnēn hkôt amnhĩ nhĩpêx pē tanhmã hkwỹjê ho mex to ho pa. Na htem amnhĩ kaxyw hkôt hamaxpēr pix o pa hkêt nē. Na htem mããnēn hkôt mẽ piitã mẽ ho mex o ri pa.

19Na ka hte mẽ akwỹjaja ã ajamaxpēr anē nē ajamaxpēr o:

—Nà Tĩrtũmja pyxi mex o pyxi mex. Tã kot paj jam ijamaxpēr rãhã ho ri ixpa nē ra ixpê hkra hã ri ixpa. Nom kot paj kapēr kôt amnhĩ nhĩpêx o ri ixpa hkêt nē.

Anhỹr o ajamaxpēr nē ã ajamaxpēr anhỹr kaprỹ.

Nē ãm hãmri na ka htem Tĩrtũm pyxi mex o pyxi mex ã harē. Nom na htem jam hamaxpēr kôt pix mã kēp hkra hkêt nē. Mēkarõmnutijaja na htem haxwỹja Tĩrtũm pyxi mex o pyxi mex kôt hamaxpēr tã mẽ kēp hkra hkêt. Na htem ã hamaxpēr anhỹr pē kãm uma ho pa. 20Ã mẽ ajamaxpēr anhỹrja mex kêt. Koja mēhõ amnhĩ kaxyw Tĩrtũm kôt hamaxpēr ã amnhĩ jarēnh tã hkôt amnhĩ nhĩpêx o pa hkêt japēr. Hãmri nē ãm amnhĩ kaxyw hkôt hamaxpēr ã amnhĩ jarēnh hkaprỹ. E kot paj ixprĩ hã mẽ amã ja jarē ka mẽ inhma. 21Mẽ panhĩgêt finat Apraãw na pre amnhĩ kaxyw Tĩrtũm mã hamaxpēr nē hkôt ri amnhĩ nhĩpêx mex o pa. Tã nhũm amnhĩ tã kamã hamak kaxyw hkra Ijak ã kuwỹ nhũm kuma nē ra kot kãm hpĩr nē õr kaxyw nhũm Tĩrtũm amnhĩ tã omu nē amnhĩm mex ã harē. Hãmri nē kot hkra hpĩr nē kãm kapēr. 22Ra kot amnhĩ kaxyw hkôt hamaxpēr nē hkôt amnhĩ xãm jakamã mããnēn hkôt

amnhĩ nhĩpêx nê ra kot kãm hkra nhõr kaxyw Tirtũm amnhĩ tã omu nê amnhĩm mex ã harê. Na pre ã finat Apraãw Tirtũm kapêr kõt amnhĩ nhĩpêx mex anhyr o pa. Jao amnhĩ kaxyw hkõt hamaxpêr mex ã amnhĩ to amnhĩrĩt.

23Nê kormã Apraãw wa hkra hkêr ri nhũm Tirtũm wa kãm hkra jarê nhũm kuma nê hkra hkukamã amnhĩ kaxyw Tirtũm kõt hamaxpêr tỳx o pa nhũm amnhĩ tã omu nê mex ã harê. Nê kêp hkrãmnhwỳ hã harê. Kapêr ã kagà htũm kot ja jarênh kot:

Na pre Apraãw hkra hkukamã amnhĩ kaxyw Tirtũm kõt hamaxpêr tỳx nhũm amnhĩ tã omu nê amnhĩm mex ã harê. Anê.

24Ã na pre finat Apraãwja hkra kaxyw Tirtũm kõt hamaxpêr anhyrja o ra hkõt amnhĩ nhĩpêx nê ra kot kãm hpĩr kaxyw. Nom kop apu amnhĩ kaxyw hkõt hamaxpêr pix nê hkõt amnhĩ nhĩpêx kêt ronhỹx pre Tirtũm tee ri amnhĩ tã omu nê amnhĩm mex ã harênh kêt nê. Na htem amnhĩ kaxyw Tirtũm mã hamaxpêr nê mããnen hkõt ri amnhĩ nhĩpêx mex o pa nhũm amnhĩ tã mẽ omu nê amnhĩm mẽ mex ã mẽ harê. 25Mêhõ ni kuprỳ finat Raapja na pre ã amnhĩ nhĩpêx anê nê amnhĩ kaxyw Tirtũm kõt hamaxpêr pê tanhmã hkõt amnhĩ nhĩpêx to ho pa. Na pre Ijaew myja wa hamêxkrut nê ma Raap nhõ krĩ hwỳr wa tẽ. Mẽ hã ukapi nê kot mẽ hkurê kaxàr kaxyw mẽ hwỳr wa tẽ. Hãmri nhũm Raap Tirtũm kot wa mẽnh ã wa omunh kurê kumrêx nê põristi kot tanhmã wa ho pymaj amnhĩ nhõrkwỳ kamã mẽ kêp wa ho amũxu nê wa nê mẽ kãm tanhmã hêx to. Nê hpãnhã nhãm pry hõ hkõt akupỹm wa kumê nhũm wa hkà hkĩnh pê ma akupỹm mex nê tẽ. Hãmri nhũm Tirtũm wa hã Raap pumu nê amnhĩm mex ã harê.

26Tã kot kaj mẽ atõ amnhĩ kaxyw Tirtũm kõt ajamaxpêr ã amnhĩ jarênh tã hkõt amnhĩ nhĩpêx kêt japêr. Hãmri nê apê hkra hã amnhĩ jarênh kaprỳ. Te ra mêhõ htyk nê nõr tã nhũm mẽ kot arĩ htĩr ã harênh kaprỳta pyræk.

Mẽ kot Tirtũm kapêr o mẽ ahkre xwỳnhjê jarênh

3 1Nê kwa Kris kõt ixkwỳjaja. Mẽ axohtõ nê mẽ amã Tirtũm kapêr o mẽ ahkre hprãm tã kormã ja kaxyw mẽ apiitã mẽ amex kêt. Mẽ ixte Tirtũm kapêr o mẽ ajahkre xwỳnhjaja kot paj mẽ tanhmã amnhĩ tomnuj to japêr nhũm Tirtũm ja hã mẽ ixpumu nhũm ja kêp omnuj nê. Mẽ ixte kapêr o mẽ ajahkre ho mẽ ixpa kênã kot pa hkêr mẽ ri tanhmã amnhĩ tomnuj to ho ri ixpa. Jakamã kot kaj mẽ Tirtũm kapêr piitã hkõt ri amnhĩ nhĩpêx mex nê rĩ kormã ho akwỳjê jahkre ho ri apa.

2Nê mẽ pahpiitã na pu htem tõhã mẽ pajakwa ho tanhmã amnhĩ tomnuj to. Mẽmoj tã axpên kãm pagryk nê tanhmã mẽ kãm pakapêr

punuj to. Nom koja mēhō tanhmā kapēr punuj toja nē amnhĩ to htỳx nē hāmri nē tām amnhĩ nhĩpêx o pa.

Mē pajakwa jarēnh

Epes 4.29

3Na htem nhỹhỹm kawar o juk kaxyw hakwam kàx jagjê nē kām nhỹhỹm o htēm prām xà hkôt ma nhỹhỹm ho juk o tē. Kàxja hkryre nhũm kawar rũnh tã no nhũm kām ma nhỹhỹm ho mrar prām xà hkôt ho juk o mra.

4Nē gô xujanār kām pàr rũnhta rũnh tã na hte kôk àpêr tỳx nē ma nhỹhỹm o pa. Nē pĩ ho pàr o juk xàta hkryre htã ma nhỹhỹm ho juk o mō. Nhỹhỹm pàr o mrar xwỳnh kām o mōr prām xà hkôt o mō.

5Ja pyrà nē mē pajakwa hkryre htã na htem ho kapēr o tanhmā mē hipêx to ho pa. Tōhã ho kapēr mex nē nhũm mē kuma nē hkĩnh nē. Nē tōhã ho kapēr punuj nē nhũm mē tee ri mē kapēr ã mē kuma nē hkaprĩ nē rỳ kapēr xwỳnhta kamã gryk nē. Mē pajakwa hkryreja te kot kuwy jakrax kryre pyràk. Kot ka kuwy jakrax grire ho tē nē nhỹri pōti kamã amē nhũm kôk ho apê nhũm hpôk rax tokyx anē. Hāmri nē ma pà ho hkaxàr par o mō nē ho hkaxàr pa. 6Mē pajakwa mã kot anhỹr. Kot kaj atỳx ri tanhmā ho akapēr punuj to nhũm mē ama nē axpēn mã anhĩxi ho krĩ nhĩpêx ka amex kêt nē apa. Rỳ ka atỳx ri ajakwa ho tanhmā akwỳjê ho akapēr to nhũm mē tee ri amnhĩ tã ama nē hkaprĩ nē rỳ akamã gryk nē. Satanasti nhỹ hã na htem ã mē hakwa ho kapēr punuj anē.

7Na htem tōhã mēmo mry xoprê pynê nē tanhmā ho nē ra ho kām ma hkêt. Kagã rỳ hagrôre rỳ àati rỳ gôx kām mēmo mryja nhũm htem unê nē tanhmā ho nhũm kām ma hkêt nē mē hkôt pa ho pa. Nom na htem mry piitã ã hipêx anhỹr kêt nē. 8Tã mē pajakwa te mē kot tee ri mēmo mry ho kām ma hkêt kaprỳ xwỳnhta pyràk. Na pu htem amnhĩ krã hkôt pajakwa ho pakapēr mex pix kêt nē. Tanhmā kot puj mē pakapēr punuj kêt kaxyw amnhĩ jakwa hto? Mē pakapēr punuj te kot kagã xoprê kot mē hkamnhar nē ò wenēn o mē hparta pyràk. 9-10Na pu htem tōhã pajakwa ho tām pakapēr nē tōhã pakapēr punuj nē. Nē tōhã Pahi Maati Tĩrtũm mã mex o mex ã harēnh tã ra axtem nē tanhmā mēhō japrỳ hto. Tĩrtũm kot mē pahto amnhĩ pyrà nē mē panhĩpêx tã pu htem axtem nē tanhmā axpēn japrỳ hto ho ri papa. Jao te pahte Tĩrtũm japrỳ pyràk. Kwa ixkwỳjaja. Kêr pu mē pahpê Tĩrtũm krajaja ã pakapēr punuj anhỹr hkêt nē. ãm mē pajakwa ho mēmoj mex pix jarēnh o ri papa.

11-12Xà koja pà kamã hinore pyxi htã kamã gô xành nē mãănēn kamã gô xenh nōkati? Nà koja anhỹr kêt nē. Na hte kamã gô mex pix nē rỳ kamã gô xenh nōkati pix nē.

Ně xà koja jàxô hpàr ã rãrãj harir? Rỳ ahkrô xô hã mánkwrýtze harir? Nà na hte ahpýnhã hpàr ã harir. Ja pyrà nê kër pu mẽ pahpê Tirtúm krajaja pajakwa ho pakapêr punuj pê ho papikamỳr tỳx nê. Nê te hinore kamã gô mex pixta pyrà nê mẽmoj mex pix jarênh o ri papa. No mẽ pajakwa nhíkjê ho tãm pakapêr nê hikjê ho pakapêr punuj kêt nê. ãm pakapêr mex pix o pakapêr o ri papa. Kwa kër pu mẽ ã amnhĩ nhípêx anhỳr rãhã ho papa.

Tirtúm kôt mẽ àhpumunh xwỳnhjê jarênh

Wam Korĩt 2.6-16

13Nê kwa mẽ axàhpumunh tỳx xwỳnhjaja kër ka mẽ amnhĩ to mex o ri apa. Nê mẽ piitã tãm mẽ hipêx mex nê mẽ amã axpên japê hã axpên to ajuta mex o ri apa. Tirtúm kapêr xà hkôt. Kot kaj mẽ ã amnhĩ nhípêx anê nê axàhpumunh mex ã amnhĩ to amnhĩrit. 14Nom kot ka mẽ mẽmoj tã axpên kamã agryk o ri apa. Rỳ amnhĩ pix kukamã ajamaxpêr o ri apa hãmri nê ãm ate Tirtúm kapêr kôt amnhĩ nhípêx ã amnhĩ jarênh kaprỳ. 15ã mẽ kot amnhĩ nhípêx anhỳr xwỳnhjaja na htem Tirtúm kôt amnhĩ nhípêx kêt nê. Mẽ kêp Tirtúm kra hkêt xwỳnh pixjaja na htem ã amnhĩ nhípêx anhỳr o pa. Jao mẽkarômnuti kot amnhĩ nhípêx kôt pix mã amnhĩ nhípêx o pa. 16Axpên kamã mẽ gryk o mẽ pa xwỳnhjaja na htem amnhĩ pix kukamã hamaxpêr jao tanhmã amnhĩ tomnuj to ho pa. Nê amnhĩ tã mẽ kamã mẽ gryk xwỳnhjê homnuj o pa. Tã ã mẽ pahte amnhĩ nhípêx anhỳr pumaj kwa kër pu mẽ mẽmoj tã axpên kamã pagryk o ri papa hkêt nê. 17Mẽ kot Tirtúm kôt amnhĩ nhípêx xwỳnhjaja na htem jajê rom tãm axpên nhípêx rãhã o pa.

Nê axpên kamã ukaprĩ pix o ri axpên kôt pa.

Nê tãm hamaxpêr o pa.

Nê mẽ piitã mẽ hipêx o axpên pyræk.

Nê axpên tã hpijaam o ri pa.

Nê tanhmã ri axpên no kupyry to hkêt nê.

Nê ri oprê ho pa hkêt nê.

Nê mẽ axpên kamã ôkre kahak kêt nê.

Nê mẽ piitã mẽ ho mex o axpên pyræk.

Nê tãm mẽ piitã mẽ hipêx rãhã nê.

ã na htem Tirtúm kôt mẽ kot amnhĩ nhípêx xwỳnhjaja amnhĩ nhípêx anhỳr o pa. 18Kot puj mẽ ã amnhĩ nhípêx anê nê pajamakêtkati nê paxamnhix pahkĩnh nê ri papa. Nhũm nhỹri mẽhõ wa axpên kãm gryk pu mẽ wa omu rỳ wa harênh ma hãmri nê mẽ pahtõ ma wa hwỳr tẽ nê wa kãm pakapêr nê tãm akupým wa ãm. Hãmri nhũm wa ra mẽ pahpyrà nê tãm amnhĩ nhípêx pê hamakêtkati nê wa ri pa. Amnhix ri hkĩnh nê wa ri pa.

Mě kot amnhĩ pix kukamã mẽ hamaxpěr xwỳnhjê jarěnh

Matêwre 20.20-28; Juãw 16.24

4 1Ně kwa mon ka hte mẽ akwỳjaja axpěn mã akapěr mã agêt o axpěn kãm agryk pix o apa? Na ka htem ã amnhĩ nhĩpêx anhỹr o amnhĩ pix kukamã ajamaxpěr. Ně mẽ amã amnhĩ jamaxpěr kôt pix mã ri amnhĩ nhĩpêx prãm. No Tĩrtũm kãm hprãm xà hkôt amnhĩ nhĩpêx prãm kêt nê. 2Na ka htem nhỹri mẽmoj pumu nê tee ri ho amã anhõ hprãm kaprỳ. Ně amã ho anhõ hprãm xàj õ xwỳnhhta pĩr nê kệp utàr mã.

Ně na ka htem tanhmã axpěn kukrêx kute hã omu nê amã ho anhõ hprãm nê hã õ xwỳnhhta mẽ wa axpu. No mẽ amã hprãm xwỳnhhta mẽ ate hõ hã Tĩrtũm wỳr ronhỹx ra mẽ ama nê mẽ amã hõ gõ. Tã mẽ ate hã axàhwỳr kêt jakamã nhũm mẽ amã õr kêt nê.

3Rỳ ka mẽ tõiã mẽmoj tã awỳ nhũm kot mẽ amar tã mẽ amã õr kêt nê. Kot mẽ amã õr nhũm mẽ ate ho anhõxỳ ho apa pymaj na hte tõiã mẽ amã mẽ ate hã axàhwỳr xwỳnhhta nhõr kêt nê.

4Kormã mẽ ate hkôt amnhĩ nhĩpêx mex kêt. Te mẽni hõ ra mjên tã nhãm kot mẽhõ my ho amnhĩkati pyræk o na ka htem amnhĩ nhĩpêx o apa. Jao mẽ amã mẽ apê Tĩrtũm kra hprãm tã axtem nê mẽ kãm hprãm kêt xwỳnhjê hkôt amnhĩ nhĩpêx o ri apa nê mẽ uræk nê tanhmã amnhĩ tomnuj to ho ri apa. Ně mẽ ate amnhĩ tomnuj gryk ã mẽ amã Tĩrtũm prãm kêt ã amnhĩ to amnhĩrĩt.

5Tĩrtũm kapěr ã kagà htũm kot tanhmã Karõ jarěnh to nê harěnh kot:

Na pre Tĩrtũm mẽ pahwỳr amnhĩ Karõ rě nhũm mẽ pahwỳr wrỳ
nê mẽ pakamã agjê nê mẽ pahkôt pa ho pa. Mẽ pahte hkôt
pix mã amnhĩ nhĩpêx o papaja na kãm hprãm. Anê.

ãm hãmri ã harěnh kot anhỹr jakamã kwa kêt ka mẽ harěnh ma nê kãm ajamaxpěr tỳx rãhã ho ri apa.

6Na hte Tĩrtũm mẽmoj to mẽ pakutã nojarêt rãhã pu mẽ ỹ hã tãm amnhĩ nhĩpêx o ri papa. Kapěr ã kagà kot ja jarěnh kot:

Mẽ kãm Tĩrtũm kôt amnhĩ nhĩpêx prãm kêt xwỳnhjaja na hte
Tĩrtũm amnhĩ tã mẽ omu nê mẽ kutã amnhĩ xunhwỳ.

No mẽ kãm hkôt ri amnhĩ nhĩpêx prãm xwỳnhjaja na hte amnhĩ
tã mẽ omu nê mẽ ho mex o pa nhũm htem hihtỳx xà nhỹ
hã mẽ kãm hprãm kêt xwỳnhjê hkôt ri amnhĩ nhĩpêx kêt
nê. Anê.

7Jakamã kwa kêt ka mẽ Tĩrtũm kapěr kôt pix mã mãn ri amnhĩ nhĩpêx o ri apa. Kêt kê Satanasti tanhmã mẽ ate amnhĩ tomnuj to hprãm xàj tanhmã mẽ ato ka mẽ Tĩrtũm Karõ nhỹ hã ãm ama nê hkôt amnhĩ nhĩpêx kêt nê. Nhũm tee ri amã àhkrox kaprỳ nê akaga nê ma tẽ.

8Ně kot kaj mẽ Tĩrtũm kapěr kôt pix mã ri amnhĩ nhĩpêx o apa nhũm amnhĩ tã mẽ apumu nê te kot mẽ apa hã mẽ ajamỳnh nê mẽ ato pa pyræk

o mẽ anhipêx. Jao mẽ ato mex o ri mẽ akôt pa ho pa. Nẽ mẽ atãnopxar rãhã ka mẽ ajamakêtkati nẽ akĩnh nẽ ri apa.

Nẽ kêr ka mẽ tanhmã amnhĩ tomnuj to hãmri nẽ tee ri ja hã amnhĩ pumu nẽ hkaga kurê kumrêx nẽ axte ã amnhĩ nhĩpêx anhỹr kêt nẽ. Rỳ ka mẽ tanhmã ajamaxpêr punuj to hãmri nẽ ja hã amnhĩ pumu nẽ hkaga nẽ hpãnhã tãm ajamaxpêr pix o ri apa. Mẽ apê Tĩrtũm kra hã kêr ka mẽ ãm hkôt pix mã ri tãm amnhĩ nhĩpêx o ri apa.

Mẽ pahte amnhĩ tomnuj ã tanhmã amnhĩ nhĩpêx to hã mẽ pamã karõ
Wam Juãw 1.5-10

9Nẽ kêr ka mẽ tee ri ate tanhmã amnhĩ tomnuj to hã amnhĩ pumu nẽ akaprı xaj mur nẽ akĩnh kêt nẽ. Nẽ akaprı xaj amỹr rax nẽ. 10Hãmri nẽ Tĩrtũm mã amnhĩ jarênh o:

—Pa Tĩrtũm. Na pa ã amnhĩ tomnuj anẽ. Nom kot paj axte hkêt nẽ. ãm inhmã akapêr kôt pix mã ri amnhĩ nhĩpêx prãm.

Anhỹr o kãm akapêr kê mẽ ama nẽ mẽ ate amnhĩ tomnujta ã tanhmã mẽ ato hkêt nẽ. ãm mẽ ato mex nẽ ka mẽ akupỹm ajamakêtkati nẽ axãmnhix akĩnh nẽ ri apa.

Mẽ pahte axpên to pakapêr nẽ mẽ pahkurê
Matêwre 7.1-5; Rõmãn 2.1-3, 14.10-13; Wam Korĩt 4.5

11E ixkwỳjaja. Kwa kêr ka mẽ anhĩõ kot tanhmã amnhĩ tomnuj to hã omu nẽ tanhmã ho akapêr punuj to hkêt nẽ. Tĩrtũm kapêr ã kagã htũm kot ja nẽ mẽ pahkurê kamã hihtỳx jakamã kot ka mẽ ri ã amnhĩ nhĩpêx anẽ nẽ te ate Tĩrtũm kapêr tũm kwỳ omnuj ã harênh pyrãk. Rỳ te axàhpumunh tỳx o ate Tĩrtũm jakrenh ã amnhĩ to jarkrar pyrãk. Jao kapêr kôt amnhĩ nhĩpêx kêt nẽ. Na htem Tĩrtũm kapêr ã kagã htũm kwỳ mex ã harê nẽ hkwy omnuj ã harênh kêt nẽ. Piitã mex kênã.

12Nẽ Tĩrtũmja tapxipix na kêp mẽ pahto amnhĩptar xwỳnh maati. Nẽ tapxipix na hte mẽ pahte tanhmã amnhĩ nhĩpêx to hã mẽ pahpumunh hkôt tanhmã mẽ pajarênh to. Mẽ pahte amnhĩ to mex xwỳnh ã mẽ pajarê rỳ mẽ pahte amnhĩ tomnuj xwỳnh ã mẽ pajarê. ãm tapxipix kot ã mẽ pajarênh kot anhỹr xwỳnh. Tã ka mẽ axtem nẽ kapêr kwỳm ri tanhmã akwỳjê ho akapêr punuj to ho ri apa.

Mẽ pahte Tĩrtũm mã pajamaxpêr pẽ kãm amnhĩ jarênh
ã mẽ pamã karõ
Rukre 12.13-21

13E kwa mẽ inhma ixkwỳjaja. Na ka hte mẽ akwỳjaja tanhmã amnhĩ kukamã ajamaxpêr to nẽ akwỳjê mã amnhĩ jarênh o:

—Koja apkati pa ma krĩ hõ hwỳr mõ nẽ kamã mẽ kãm ixapênh o ixpa hã ixtã amgrã pyxi nẽ hpãnhã kàxpore jamỳnh rax nẽ man akupỹn mõ.

Anhÿr o amnhĩ jarẽ. **14**Kwa mẽ ã amnhĩ kukamã amnhĩ jarẽnh anhÿr kêt nẽ. Mẽ pahtõ mẽ pahte amnhĩ kukamã paxàhpumunh mex? Amrakati kênã. Kot ka mẽ ã amnhĩ kukamã amnhĩ jarẽnh anhÿr tã kormã ã amnhĩ nhĩpêx anhÿr kêt ri tanhmã amnhĩ to nẽ ty. Rỳ tanhmã amnhĩ to nẽ axà hãmri nẽ nhÿhÿm amõr kêt nẽ. Te mẽ pahpê namê pyræk na pu htem ri papa nẽ tanhmã amnhĩ to nẽ ty nẽ pajapêx tokyx anẽ. **15**Jakamã mẽ ã amnhĩ kukamã amnhĩ jarẽnh anhÿr kêt nẽ. Kêt amnhĩ jarẽnh o:

—Koja Tĩrtũm kãm ja prãm koja apkati pa ã amnhĩ nhĩpêx anẽ nẽ ã amnhĩ nhĩpêx anẽ.

Anhÿr o Tĩrtũm kamnàr o tanhmã amnhĩ kukamã amnhĩ jarẽnh to. **16**No mẽ ate amnhĩ krã hkõt amnhĩ kukamã amnhĩ jarẽnh ta Tĩrtũm jamaxpêr xà hkõt kêt. ãm amnhĩ krã hkõt mẽ ate amnhĩ kukamã amnhĩ jarẽnh kênã. ã mẽ ate amnhĩ jarẽnh anhÿrja mex kêt.

17Nẽ mẽ kot tãm amnhĩ nhĩpêxja kot kaj mẽ ate mar mex tã hkõt amnhĩ nhĩpêx kêt japêr hãmri nẽ amnhĩ tomnuj o apa.

Mẽ hikàxpore rũnh xwÿnhjê jarẽnh

Rukre 12.13-21; Wam Ximotre 6.9-10; Apokarip 18.14

5 **1**Nẽ kwa mẽ akàxpore rũnh xwÿnhjaja. Mẽ inhma nẽ inhmar tÿx nẽ. Nhÿrmã mẽ amex kêt jakamã kwa mẽ tee ri amnhĩ kukamã ajamxpêr o ra akaprĩ nẽ amÿr o apa kurê kumrêx. **2**Tĩrtũm noo mã mẽ akàxpore te ra mẽ apê hapêx par pyræk. Te ra mẽ anhÿ kamã mẽ ate amnhĩ tomnuj xwÿnh ã kutã akrĩ pyræk. **3**Mẽ ate mẽ akukrêx nẽ mẽ akàxpore ho apikuprõnh rũnh tã ka htem mẽ akwÿjê pê ho anhõxÿ ho ri apa. Mÿrapê koja nhÿrmã tanhmã mẽ apê amnhĩ to nẽ omnu pa ka mẽ ho apikuprõnh rax kaprÿ. Hãmri nẽ mẽ ate amnhĩ tomnuj mÿrapê Tĩrtũm mẽ Kra wa kuri atĩr tũm nẽ apa ho apa hkêt nẽ. ãm kuwy kamã mẽ amnhĩ xà htÿx kamã ajamak rãhã ho ri apa. **4**Na ka htem apur kãm mẽ àpênh xwÿnhjê mã amnhĩrer kêt nẽ. Nhũm mẽ tee ri amnhĩ tã mẽ ajamã hãmri nẽ mẽ atã amnhĩ to Pahi Maati Tĩrtũm xihtÿx xwÿnh ta wÿr o pa nhũm mẽ atã mẽ kuma. **5**Mẽ akĩnhã mẽ kêp amrakati htã ka htem ãm ja hã mẽ omu nẽ mẽ àpênh pãnhã mẽ kãm amnhĩrer kêt nẽ amnhĩ pix kukamã ajamxpêr. Nẽ amã prãm xà hpix kukamã amnhĩm mẽmoj japrõr pê akĩnh o ri apa. Jao te mẽ apê môx htwÿm nhũm mẽ kot hpĩr nẽ hkrêr mã mex ã harênh xwÿnh ta pyræk. Mÿrapê kot kaj mẽ môxta pyrã nẽ nhÿrmã ty hãmri nẽ Tĩrtũm mẽ Kra wa kuri atĩr tũm nẽ apa ho apa hkêt nẽ. **6**Nom ja pix kêt. Na ka htem mẽ anhõ krĩ kamã mẽ anhõ pahi mã tanhmã akwÿjê ho axêx to ho ri apa. Mẽ kot tanhmã atomnuj to hkêt tã ka mẽ kãm mẽ ho axêx rũnh nẽ. Tã koja nhÿrmã Tĩrtũm mẽ hã tanhmã mẽ ato rax kumrêx ka mẽ rĩ amnhĩ pumu.

**Mě pahte Jejus kutêp amnhĩ kaxyw kãm pajamaxpêr o
papa hã mẽ pamã karõ**

Sikũn Pêtre 3.1-13

7E ixkwỳjaja. Koja mēhõ tanhmã mẽ atomnuj to htã ka mẽ arĩ amnhĩ kaxyw Jejus mã ajamaxpêr rãhã ho ri apa. Pê akupỹn hpõx xã hã arĩgro jamãr rãhã nẽ. Te pur nhõ dõn kot amnhĩ nhĩpêx pyrãk. Koja hpur kãm ahkre nẽ ahkre hpa hãmri nẽ arĩ hamãr o pa nẽ kãm nojarêk kêt nẽ hã na wrỳk jamãr o pa. Jao hamakêtkati nẽ ô jamãr rãhã ho pa. 8Tã kêr ka mẽ urãk nẽ arĩ Pahihti akupỹn hpõx xã hã arĩgro jamãr rãhã ho ri apa. Koja tokyx akupỹn mẽ pahwỳr wrỳ. Jakamã kêr ka mẽ kutêp mẽ kot mẽ atomnuj xwỳnhjê kutã amnhĩ to htỳx nẽ ri apa. Nom tee ri amnhĩ kukamã ajamaxpêr o Jejus kaga hkêt nẽ. Arĩ hamãr pẽ akĩnh nẽ ajamakêtkati nẽ ri apa. Koja akupỹn mẽ pahwỳr wrỳ nẽ mẽ pahto mex rax kumrêx.

9Nẽ kêr ka mẽ axpẽn to akapêr o ri apa hkêt nẽ. Kot ka mẽ ã amnhĩ nhĩpêx anẽ nhũm Tĩrtũm mẽ ama nẽ tanhmã mẽ ajarênh to. Kot mẽ pahpumunh xã hkõt tanhmã mẽ pajarênh to xwỳnh na. Tã ra tanhmã kot mẽ pahpiitã mẽ pajarênh to xã hã arĩgroja ra ahtêp o mõ.

10E ixkwỳjaja. Kêr ka mẽ wam mẽ kot Tĩrtũm nhỹ hã kapêr jarênh xwỳnhjaja kot amnhĩ nhĩpêx mã ajamaxpêr rãhã nẽ. Na prem Tĩrtũm nhỹ hã mẽ kãm kapêr o ri mẽ hkõt pa nhũm mẽ hkwỳjaja ja hã tanhmã mẽ hipêx to nhũm mẽ amnhĩ xã htỳx kamã hamak rãhã ho pa. Tã tee ri amnhĩ kukamã hamaxpêr pẽ Tĩrtũm kaga hkêt nẽ. Na prem arĩ ã hã kapêr jarênh rãhã ho ri mẽ hkõt pa. Tã kêr ka mẽ kot amnhĩ nhĩpêx pyrãk o amnhĩ nhĩpêx nẽ Tĩrtũm kaga hkêt nẽ. 11Na prem amnhĩ xã htỳx kamã hamak o pa rãhã ty hãmri nẽ Tĩrtũm kuri mex nẽ hkĩnh nẽ pa ho pa. Ra mẽ ate finat Johti jarênh mar mex. Na pre omnuj tỳx nẽ pa htã amnhĩ tã Pahi Maati Tĩrtũm kamã gryk nẽ hkaga hkêt nẽ. Hãmri nhũm amnhĩ tã omu nẽ gaa nẽ ho mex rax nẽ nhũm akupỹm mex kumrêx nẽ pa. Pahi Maatija ukaprĩ ho ukaprĩ nẽ mex o mex jakamã na pre ã Johti ho mex anẽ. Tã koja ho mexta pyrã nẽ ã mẽ pahto mex anẽ.


Mě pahte tanhmã amnhĩ nhĩpêx to hã mẽ pamã karõ

Matêwre 5.33-37, 18.15; Rõmãn 12.15; Karatas 6.1-2; Jutre 22-23

12E ixkwỳjaja. Pa mẽ amã mẽmoj jarẽ ka mẽ inhma nẽ inhmar tỳx nẽ. Kêr ka mẽ mẽmoj tã amnhĩ jarênh kaxyw hãmri nẽ akatãt kõt amnhĩ jarênh kurê kumrêx. Nẽ amnhĩ jarênh o: “Nã kot paj ja ho anẽ.” Anẽ. Rỳ amnhĩ jarênh o: “Nã kwarĩ pa ja ho anhỹr kêt nẽ.” Anhỹr o amnhĩ jarênh kurê kumrêx. Kê mẽ akwỳjaja ãm hãmri mẽ ate amnhĩ jarênh ã mẽ apumunh kurê kumrêx nẽ axêx ã mẽ akamnhĩx kêt nẽ. Mẽ apê Tĩrtũm kra kênã kot ka kêt mẽ ri axtem nẽ amnhĩ jarênh o axêx.

13Nẽ koja mẽ anhĩõ mẽmoj tã tanhmã amnhĩ to nẽ omnuj nẽ. Ka mẽ ja

hã omu nê kãm anê kê amnhĩ kaxyw Tĩrtũm mã hamaxpêr pê amnhĩ to hwÿr rãhã ho pa. Rÿ koja hkĩnh nê ri pa ka mẽ ja hã omu nê kãm anê kê hkĩnh kãm mex o mex ã grer o pa. 14Rÿ koja à nê nõ ka mẽ ja hã omu nê kãm anê kê amnhĩ wÿr pastô nhÿ hã mẽ kapêr xwÿnh kwÿjê hã karô. Kê mẽ hwÿr mra nê Jesus nhÿ hã mẽmo twÿm kwÿ ho hkukô nê ho



Xiakre 5.13-15

Tĩrtũm wÿ. 15Kê mẽ ã mẽ à xwÿnhjê hwÿr mrrar nê mẽ ho Tĩrtũm wÿr o pa anê. Koja mẽ ho kuwÿ nhũm mẽ kuma nê akupÿm mẽ ho mex. Nhũm mẽ tanhmã amnhĩ tomnuj to japêr kê mẽ ja hã amnhĩ jarê kê Tĩrtũm mẽ kuma nê ja hã tanhmã mẽ ho hkêt nê. 16Jakamã kêr ka mẽ atô tanhmã amnhĩ tomnuj to nê tee ri ja hã amnhĩ pumu hãmri nê tokyx akwÿjê mã amnhĩ jarê kê mẽ tokyx ato Tĩrtũm wÿ. Kê atã mẽ kuma nê tanhmã akrã hto ka axte ã amnhĩ nhĩpêx anhÿr kêt nê. Nê ra amex nê apa.

Nê koja mēhõ Tĩrtũm kôt pix mã amnhĩ nhĩpêx mex rãhã ho pa. Hãmri nê mẽmoj tã kuwÿ nhũm kuma nê kãm tanhmã mẽmoj to. 17Te finat Eris kot mẽmoj tã hwÿr nhũm kot mar nê kãm ho anhÿrta pyrãk. Erisja kêp mẽ panhiõ na pre. Tã na pre hkwÿjaja amnhĩ tomnuj pix o pa nhũm tee ri mẽ omu nê mẽ hã na wrÿk kêt kaxyw ho Tĩrtũm wÿr kãm hihtÿx nê. Hãmri nhũm kuma nê kãm ho anê nhũm na wrÿk kêt ry rax kumrêx. Hã amgrã axkrunêpxi nê hkôt mytwrÿ kêp 6. Mẽ kot amnhĩ tomnuj tÿx o paja mÿrapê. 18Tã nhũm Eris axte mẽ ho kuwÿ nhũm axte mẽ hwÿr na rê nhũm akupÿm katat kôt wrÿk mex nê. Nhũm akupÿm mẽ hpur kãm mẽ ôja mẽ kãm mex nê akupÿm mẽ kãm ô rũnh nê. Tã ã Tĩrtũm kot Eris mar nê kãm mẽmoj nhĩpêx anhÿrja pyrã nê koja mẽ pama nê mẽ pamã mẽmoj tanhmã ho.

19Nê e mẽ inhma ixkwÿjaja. Koja mēhõ Tĩrtũm kapêr mar tÿx nê te kêp hkra pyrãk o amnhĩ nhĩpêx. Tã tanhmã hamaxpêr to nê kapêr kaga nê htÿx ri amnhĩ tomnuj pix o pa. Ka mẽ ja hã omu nê hwÿr mra nê kot amnhĩ tomnuj nê kãm akapêr kãm axihtÿx kê tokyx hkaga nê akupÿm Tĩrtũm kôt amnhĩ xãm tÿx nê ãm hkôt pix mã amnhĩ nhĩpêx. 20Koja amnhĩ tã mẽ ama nê Tĩrtũm kôt amnhĩ xãm tÿx nhũm amnhĩ tã omu nê kot tanhmã amnhĩ tomnuj tota ho hamakêtkati nê amnhĩ katut kôt kurê nhũm nhÿrmã kuri htĩr tũm nê mex nê pa ho pa. Koja amnhĩ tomnuj tÿx o pa htã hkaga hpa nhũm Tĩrtũm ja hã omu nê hã tanhmã ho hkêt nê axte tanhmã kot amnhĩ tomnuj tota mã hamaxpêr kêt nê.

Tã ãm ja pix. Ixpê Xiakre na pa ã mẽ awÿr kagã nhĩpêx nê mēnh anê.

Wam Pêtre

Simãw Pêtre kot Jejus kôt hkwỳjê hwỳr kagà nê mênh

Simãw Pêtre na pre kagàja nhípêx. Kêp tep pynênh o pa xwỳnh tâ hpãnhã kêp Jejus nhỹ hã hkrajê jahkre ho pa xwỳnh. Nê krĩ pê Jerujarê kamã kêp Jejus krajê nhõ pastô. Na pre krĩ piitã hkôt Jejus ã mẽ kãm mẽ hkurê xwỳnhjaja tanhmã hã mẽ hipêx to nhũm Pêtre mẽ harênh ma nê mẽ hamaxpêr o hihtỳx kaxyw mẽ kãm kagàja nhípêx nê krĩ piitã hkôt mẽ hwỳr kurê. Mẽ kot kamã harênh nê mar nê amnhĩ kamã kahak kêt nê arĩ Tĩrtũm kôt amnhĩ nhípêx mex o pa kaxyw. Nê Jejus ã mẽ kot amnhĩ xà htỳx kamã hamak tâ nhỹrmã kaxkwa kamã mex nê pa ho pa hã mẽ kãm awjarê. ã mẽ kãm mẽmoj jarê nê hã kagà anê. Nê mẽ kãm:

1 1Pa mẽ ate Jejus kôt amnhĩ xunhwỳr nhũm Tĩrtũm kot mẽ ato hkra xwỳnhjaja. Xà mẽ amex? Ot pa mẽ awỳr kagà nhípêx nê kumê. Ixpê Simãw Pêtre na pa. Ixte Jejus nhỹ hã hkrajê jahkre ho mẽ ixpa xwỳnhjê hõ na pa mẽ awỳr kagà nê kumê.

Na xep pre Kris ã mẽ kãm mẽ pahkurê xwỳnhjaja tanhmã mẽ anhípêx to ka mẽ panhõ pika rũm mẽ umaj anhrã nê ma ahpỳnhã krĩ hkôt ri apa.

Jao mẽ akwỳjaja ma pika pê Põt kamã krĩ hkwỳ hkôt apa.

Nê mẽ akwỳjaja pika pê Karatas wỳr apa.

Nê mẽ akwỳjaja pika pê Kapatos wỳr apa.

Nê mẽ akwỳjaja pika pê As wỳr apa.

Nê mẽ akwỳjaja Pitĩn wỳr apa.

ã ahpỳnhã pika hkôt mẽ apigrãnh par anê. Tã ot pa mẽ awỳr kagà nhípêx nê mẽ apiitã mẽ awỳr kurê. Mẽ apỳnh nê mẽ ate kamã harênh nê ixkapêr mar kaxyw. 2Na pre Mẽpahpãm Tĩrtũmja amnhĩm mẽ pahte amnhĩ kaxyw kãm pajamaxpêr xwỳnhjê rê nê mẽ pahã amnhĩ jarênh o:

—Kot paj jajê ho ixkra. Na pre ra Ixkra Jejus Kris ixpê mẽ nê ty nê htyk o hkamrô axkapĩ nhũm mẽ harênh ma nê hkôt amnhĩ xunhwỳ. Tã

nhũm Ixkarõ mẽ hkarõ mã agjê nhũm mẽ ra inhmã hprãm xà kôt pix mã ri inhmã tanhmã amnhĩ nhĩpêx to ho pa.

Anhỹr o mẽ pahtã amnhĩ jarênh. Tã kê mẽ akutã nojarêr rãhã ho ri mẽ akôt pa ka mẽ ỹ hã axàmnhĩx ajamakêtkati nê akĩnh nê ri apa.

Mẽ pahte amnhĩ kukamã pajamaxpêr pê pahkĩnh o papa hã mẽ pamã karõ

Rukre 12.32-34; Rõmãn 8.18-25; Sikũn Korõt 4.16-18

3Nê na pre mẽ panhõ Pahihti Jejus Krisja ty nhũm Hipêêxà Tĩrtũm akupỹm ho htĩr. Tã kot mẽ pakutã nojarêr rãhã ho pa jakamã na pre mẽ pahpê hkrajê mã mẽ pajamaxpêr nyw jagjê pu mẽ ỹ hã pahte amnhĩ nhĩpêx nyw o amnhĩ nhĩpêx o papa. Hãmri nê Jejus akupỹm htĩrja mã pajamaxpêr nê amnhĩ kukamã pajamaxpêr o:

—Kot paj nhỹrmã ty nhũm Tĩrtũm kot Jejus nhĩpêx pyrã nê akupỹm ixtõ ixtĩr pa wa kuri ixtĩr tũm nê inhmex kumrêx rãhã ixpa ho ixpa. Nã koja ã inhĩpêx anê.

Anhỹr o pajamaxpêr jakamã kwa kêr pu mẽ Tĩrtũm mã mex o mex ã mãn harênh rãhã ho papa. 4Na ra mẽ pakutêp õ krĩ kamã mẽmoj piitã ho mex nê. Õ krĩ kamã mẽmoj kot omnu nê hapêx kêt jakamã na pu htem amnhĩ tã hamãr rãhã ho papa.

5Nê mẽ kot Kris ã mẽ atomnuj mỳrapê na ka mẽ amnhĩ xà htỳx kamã ajamak o ri apa nom arĩ amnhĩ kaxyw Tĩrtũm mã ajamaxpêr rãhã ho ri apa. Hihtỳx o hihtỳx jakamã koja mẽ pahkôt pa ho pa nê mẽ pamã pajamaxpêr o hihtỳx rãhã nhũm nhỹrmã Jejus akupỹm mẽ pahwỳr wrỳ. Hãmri pu mẽ hkôt ri amnhĩ nhĩpêx mex rãhã ho ri papa. Ra Tĩrtũm kot mẽ pakukamã mẽ pajarênh xà hkôt. 6Jar mẽ pahte arĩ amnhĩ xà htỳx kãm pajamak o papa htã na pu htem Tĩrtũm nhỹrmã kot mẽ pahto mexta kukamã pajamaxpêr hãmri nê tee ri amnhĩ kukamã pajamaxpêr kêt nê. Mẽ pahpê mẽ pahpunuj tũm nê ri papa ho papa mã xwỳnh kêt. 7Na hte Tĩrtũm mẽ panhĩpêx o te mẽ kot ôr nhĩpêx pyrãk. Na htem hprĩ hã tanhmã ôr kute hã omu. Kêp ôr kumrêx ã omu rỳ mẽmoj mẽ ho pihkàr ã omunh kaxyw kuwy kamã kurê. Nhũm piitã ôr nê pigãnh pa japêr nhũm mẽ omu nê harênh o:

—Nã ãm hãmri. Kêp ôr kumrêx nê mẽmoj mẽ ho pihkàr kêt. Anê.

Na hte Tĩrtũm ã mẽ panhĩpêx anê. Jakamã mẽ pahpê Jejus kôt amnhĩ nhĩpêx o mẽ papa xwỳnhjaja mẽ pahte tõiã tanhmã pahpunuj to htã no nhũm mẽ panê ja rênh kêt nê. Na hte amnhĩ tã mẽ pahpumu nê hamaxpêr o:

—Kot paj kormã ja hã mẽ hamã nê tokyx akupỹm mẽ ho mex kêt nê. Koja mẽ omnuj nê pa htã tee ri amnhĩ kukamã hamaxpêr nê ixkaga hkêt nê arĩ amnhĩ kaxyw ixkôt hamaxpêr rãhã ho pa. Hãmri nhũm

mẽ hkwỳjaja ja hã mẽ omu nẽ mẽ kêp ixkra hã mẽ omunh kurê kumrêx. Te mẽ kot hprĩ hã ôr pumunh nẽ kêp ôr kumrêx ã omunhta pyrâk. Anẽ.

Jakamã kêr pu mẽ arĩ amnhĩ kaxyw hkôt pajamaxpêr rãhã ho papa. Mẽmo mỳrapê mẽ pahpunuj nẽ ri papa htã arĩ hkôt pajamaxpêr rãhã nhũm Jejus nhỹrmã akupỹn mẽ pahwỳr wrỳ. Hãmri nhũm Tĩrtũm mẽ pahpumu nẽ mẽ pamã:

—Nà ãm hãmri na ka prem amnhĩ kaxyw ixpìx mã ajamaxpêr rãhã ho ri apa. Mẽ kot ixtã tanhmã mẽ atomnuj to nhũm mẽ ate amnhĩ xà htỳx kamã ajamak o apa htã aa ixkaga hkêt nẽ arĩ amnhĩ kaxyw inhmã ajamaxpêr rãhã ho ri apa. Nà ãm hãmri mẽ ate amnhĩ to mex kumrêx xwỳnh na ka mẽ. Kot paj mẽ piitã mẽ kãm ja hã mẽ ajarẽ.

Anhỹr o mẽ pamã kapêr.

Nẽ ôr o mẽ hikukrêxja mex tã koja arĩ mex rãhã hkêt nẽ. Koja mẽhõ kãm tanhmã homnu hto hprãm nẽ homnu hpa. No mẽ papajaja kot puj mẽ arĩ amnhĩ kaxyw Tĩrtũm mã pajamaxpêr rãhã ho papa hãmri nẽ ôrta pyrã nẽ pajapêx kêt nẽ. Kurom mẽ pamex tũm nẽ aa pajapêx kêt nẽ papa ho papa.

8-9Nẽ Jejusja aa mẽ ate ano ho omunh kêt tã na ka htem kãm mẽ ajapê htỳx nẽ kot mẽ panê tanhmã amnhĩ nhĩpêx to hã harênh ma nẽ mẽ amã hkĩnh nẽ. Nẽ amnhĩ kaxyw hkôt ajamaxpêr mex rãhã ho ri apa. Jakamã na pre Tĩrtũm ja hã mẽ apumu nẽ mẽ ato hkra nẽ mẽ apê õ krĩ kamã wa kuri amex nẽ apa mã xwỳnh ã mẽ ajarẽ. Ja kaxyw na pu prem amnhĩ kaxyw hkôt pajamaxpêr rãhã jao pahkĩnh nẽ ri papa. Nẽ tee ri tanhmã amnhĩ kĩnh tỳx ã amnhĩ jarênh to hkukamã pajamaxpêr. Kormã aa ã mẽ pahkĩnh anhỹr kêt tã mẽ pahkĩnh tỳx nẽ ri papa.

10Nẽ Tĩrtũm kot mẽ pahto mex pê mẽ panê mẽ pahte amnhĩ tomnuj rênh par nhũm kuri mẽ pahtĩr tũm nẽ mẽ papa hã mẽ pajarênhja. Amnepê mã Tĩrtũm nhỹ hã kapêr jarênh o ri mẽ pa xwỳnhjaja na pre mẽ pakukamã ã mẽ pajarênh anhỹrja ma nẽ tee ri hamaxpêr nẽ tee ri hã axpên kukjêr o ri axpên kôt pa. Nom hprĩ hã mar mex kêt nẽ. Tã arĩ ri mẽ pakukamã hkwỳjê mã ja hã mẽ pajarênh o ri pa.

11Na pre Tĩrtũm Karõja Kris tyk kukamã mẽ kãm ã mẽ pajarênh anhỹr o amnhĩrĩt. Kormã Kris kaxkwa kamã pa ri. Kormã wrỳk nẽ katorxà nhõxãhkre rũm kator kêt ri nhũm pre hkukamã mẽ kãm tanhmã ho amnhĩrĩt to. Mẽ kot hpĩr nhũm kot amnhĩ xà htỳx kãm hamak kãm mẽ panê htykja ã hkukamã mẽ kãm harênh o amnhĩrĩt. Nhũm Tĩrtũm kot akupỹm ho htĩr nẽ kãm mex o mex ã harênhja nhũm hkukamã mẽ kãm harênh o amnhĩrĩt. No ãm hprĩ hã mẽ kãm mẽhõ nhĩxi hkôt harênh kêt jakamã nhũm prem harênh ma nẽ tee ri hkukamã ri hamaxpêr nẽ tee ri hã axpên kukjêr o ri axpên kôt pa. Nẽ hã axpên kukjêr o:

—Kwa mēhō koja we ã amnhĩ nhĩpêx anê? Xà koja tokyx ã amnhĩ nhĩpêx anê nà kormã?

Anhÿr o hã axpên kukjêr o ri pa. 12Hãmri nhũm Tĩrtũm axte mē kãm Jejus jarênh kwỳ ho amnhĩrĩt nē mē kãm:

—Nà mē anoo mã koja ã amnhĩ nhĩpêx anhÿr hkêt nē. Mē amÿr pē mē akanrêhã mē akra nē mē atàmnhwỳjê noo mã koja kato nē mē hkôt ã amnhĩ nhĩpêx anhÿr o pa. Anê.

Mē papamjaja mē panoo mã kator nē ã kot amnhĩ nhĩpêx anhÿr o paja o ã mē kãm ho amnhĩrĩt anê.

Amnepêm Tĩrtũm nhÿ hã kapêr o ri mē pa xwỳnhjaja nē jarãhã mē ixte Jejus nhÿ hã mē ahkre ho ri ixpa xwỳnhjaja mē ixkapêr ãm pixii. Na pa htem wamtajê pyrã nē Tĩrtũm Karõ nhÿ hã àhpumunh tỳx xà ho mē amã tanhmã Jejus jarênh to ho ri mē akôt ixpa. Nhũm hte Tĩrtũm kapêr o mē wrÿk xwỳnhjaja mē ixkapêr ma nē tee ri hamaxpêr o mē pahpyrà nē kãm hprĩ hã harênh mar par prãm nē.

Mē pahte Tĩrtũm pyrã nē tãm amnhĩ nhĩpêx ã mē pamã karõ

Epes 4.1-3; Korosê 1.10-12; Sikũn Pêtre 3.10-13; Wam Juãw 3.1-6

13E kwa Kris kôt ixtõ nē ixtõxjaja. Kêr ka mē Jejus kutêp mēmoj punuj kutã amnhĩ to htỳx rãhã ho ri apa. Nē Tĩrtũm mã amnhĩ nhĩpêx mex rãhã nē. Pê tãm ajamaxpêr nē tãm amnhĩ nhĩpêx o apa. Nē mē ã ajamaxpêr anhÿr o:

—Nà koja nhÿrmã Jejus akupÿn mē ixwÿr wrÿ hãmri nhũm Tĩrtũm ixto mex rax nē. Nà koja ã inhĩpêx anê. Anê.

14Nê kêr ka mē Tĩrtũm kapêr kôt pix mã mãn ri amnhĩ nhĩpêx mex rãhã ho ri apa. Te mēhprĩre kot mē hipêêxã kapêr mar nē hkôt amnhĩ nhĩpêx pyrãk. Kormã mē ate Kris kôt amnhĩ xunhwÿr kêt ri na ka prem ate amnhĩ nhĩpêx tũm kôt ri tanhmã amnhĩ tomnuj to ho ri apa. 15Tã kêr ka mē hpãnhã amnhĩ to mex o mãn ajamaxpêr o apa nē Tĩrtũm pyrã nē amnhĩ tomnuj o apa hkêt nē. Tĩrtũmja kot amnhĩ to mex pix o pa xwỳnh na. 16Kapêr ã kagã htũm kot ja jarênh kot:

Kêr ka mē ixpyrà nē amnhĩ to mex pix o ri apa. Anê.

17Tã koja nhÿrmã kêp Mēpahpãm maati hã hprĩ hã mē pahte amnhĩ nhĩpêx ã mē pahpumunh hkôt tanhmã mē pajarênh to. Tãm mē pahte amnhĩ nhĩpêx kôt mē pajarê rÿ mē pahte amnhĩ tomnuj kôt mē pajarê. Hãmri nē ahpÿnhã mē panhĩpêx. Mē pahto mex nē rÿ mē pahtomnuj nē. Jakamã kwa pu mē nhÿrmã kot tanhmã mē pahtomnuj to pymaj hkôt pix mã amnhĩ nhĩpêx o ri papa rãhã nē.

18Nê kormã mē pahte Jejus kôt amnhĩ xunhwÿr kêt ri na pu prem mē panhĩgêt pyrã nē pahtỳx ri amnhĩ tomnuj o ri papa. Tã nhũm Krisja te amnhĩm mē pajaprôr pyrãk o mē panhĩpêx. Mē pahte hpãnhã kapêr kôt pix mã amnhĩ nhĩpêx o papa kaxyw. No mēmoj to na pre mē

pahpânhã amnhîre? Nà ra mẽ pahte ja jarênh mar tỳx. Na pre kàxpore ho mẽ pahpânhã amnhîrer kêt nê. Rỳ ôr o mẽ hikukrêx ã ohtô ho mẽ pahpânhã amnhîrer kêt nê. Rỳ prat o mẽ hikukrêx ã ohtô ho mẽ pahpânhã amnhîrer kêt nê. Jajaja hapêx tokyx anhỳr mã xwỳnh na. 19Na pre ã mẽ hpânhã amnhîrer anê nê tãm mẽ panê ty nê htyk o amnhĩ nhĩ ho mẽ pahpânhã amnhîrer pa. Nhũm hkamrô axkapĩ. Te amnepê mã mẽ panhĩgêť kot amnhĩ pãnhã Tĩrtũm mã ôwêhti hkrare hpar nhũm hkamrô pikapĩrta pyràk. Ôwêhti krare mexre pix na prem kãm kupa. Mex nê tanhmã kute hkêť xwỳnh pix. Tã Krisja aa tanhmã amnhĩ tomnuj to hkêť kumrêx nê mẽ panê ty nê htyk o Tĩrtũm mã mẽ pahte amnhĩ tomnuj piitã hpãnhã amnhîrer pa. 20Amnepê mã kormã mẽmoj kêt ri na pre Tĩrtũm kot ã mẽ pahpânhã amnhîrer anhỳr kaxyw mẽ pakukamã kuta nê ãm. Tã nhũm amgrã ohtô nê hapêx nhũm mẽ pahwỳr kumê nhũm man mẽ pahwỳr wrỳ. Kot ã mẽ pahpânhã amnhĩ nhĩpêx anhỳr kaxyw. 21Tã nhũm prem kupĩ nhũm Tĩrtũm akupỳm ho htĩr nê mex o mex ã harê. Mẽ pahte ja hã harênh mar kôt amnhĩ kaxyw Tĩrtũm pix mã pajamaxpêr o ri papa kaxyw. Nê mẽ pahte amnhĩ wỳr Jejus jamãr rãhã ho ri papa kaxyw.

22Tã pu prem ra kot ã mẽ panê amnhĩ nhĩpêx anhỳr ã harênh ma nê mẽ pahte amnhĩ tomnuj kaga nê hkôt amnhĩ xunhwỳ. Jao amnhĩ to mex pix o ri papa. Nê mẽ pamã Kris kôt mẽ pahkwỳjê hkĩnh o papa. Tã kwa kêr pu mẽ arĩ pamã axpêň kĩnh tỳx rãhã ho papa.

Te mẽ pakatorxà rũm mẽ pajapôx pyràk o axte mẽ pajapôx ã mẽ pajarênh

Juãw 3.1-21

23Nê na pu prem mẽ pakatorxà nhõxàhkre rũm mẽ pajapôx pyrã nê axte mẽ pajapôx pyràk o amnhĩ nhĩpêx. Jao ra mẽ pahpê Tĩrtũm kra nê ri papa. Na hte mẽ pakatorxà nê mẽ panhĩpêêxàja wa ri pa nê gaa nê mẽ pahpê ty. No kêt Mẽpanhĩpêêxà maati Tĩrtũmja wa kurom rãhã ho rãhã. Tã ra mẽ pahte amnhĩ kaxyw kapêr kôt pajamaxpêr o pahpê hkra jakamã kot puj mẽ uràk nê nhỹrmã pahtĩr tũm nê papa rãhã ho papa.

Nê Tĩrtũm kapêrja Tĩrtũm pyrã nê rãhãã. Kojã aa hapêx kêt nê. 24Kapêr ã kagã htũm kot ja jarênh kot:

Pika piitã hkôt mẽ pa xwỳnhjaja te mẽ kot põtĩ grã pyràk.

Nê mẽ kot amnhĩ to mex xàja te kot kapôt ã pixôrã pyràk.

Na hte põtĩ tokyx grã nê hapêx.

Nê pixôrãja haxwỳja arĩgro htỳx mẽ nhũm grã tokyx anê nê rarak pa nê hapêx.

25 No Tĩrtũm kapêr kojã põtĩ mẽ pixôrãta wa kurom aa hapêx kêt nê. Kojã arĩ rãhã ho rãhã. Anê.

Tã kapêrja tãm na htem mẽ pamã kamã harê pu mẽ pahpiitã mar o papa.

Mê pahte Tirtûm kot amnhĩ nhĩpêx kôt amnhĩ nhĩpêx ã mẽ pamã karõ

Rõmãn 12.2; Wam Korõt 3.16-17; Epes 2.19-22

2 1Ně kwa kêr pu mẽ axte tanhmã amnhĩ tomnuj to ho ri papa hkêt nẽ.

Rỳ tanhmã axpẽn mã paxêx
to hkêt nẽ.

Ně paxêx rom tanhmã ri
axpẽn nokupyr to hkêt
nẽ.

Ně mẽmoj tã axpẽn kãm
pagryk kêt nẽ.

Ně tanhmã axpẽn japyr hto
hkêt nẽ.



Wam Pêtre 2.1-3

Kêr pu mẽ ã amnhĩ nhĩpêx anhỹr o papa hkêt kumrêx.

2Mẽ hkaràre na htem ãm kãm pijaôr pix prãm. Nẽ gaa nẽ htỳxre nẽ ra hprêk o mõ. Tã kêr ka mẽ pijaôr pix prãm xwỳnhjê pyrà nẽ amã Tirtûm kapêr mar nẽ hkôt pix mã amnhĩ nhĩpêx o apa hprãm. Jao mar tỳx pê ra hkôt amnhĩ nhĩpêx mex o mõ nẽ gaa nẽ hkôt amnhĩ nhĩpêx mex o apa. Te mẽ karàre pijaôr nẽ gaa nẽ ra hprêk o mõrta pyràk. 3Ra mẽ ate Jejus kot mẽ pahto mex ã omunh mex kênã.

4Ně na htem kên o ixkre nhĩpêx kaxyw hãmri nẽ hkwỳ kawrà nẽ ri hkapi. Nhũm hõ mex kêt nhũm mẽ tee ri omu nẽ nhãm kumẽ. Tã ja pyrà nẽ na pre mẽ pahkwỳjaja tee ri Kris pumu nẽ htỳx mex kêt ã hkamnhĩx nẽ te mẽ kot kên mênhta pyràk o hipêx nẽ hkaga. No nhũm Tirtûmjã amnhĩm Kris mex o mex ã harẽ. Te ho mẽhõ kot kên mex kêt ã hkamnhĩx nẽ mênh nhũm mẽhõ kot mex ã omunh nẽ amnhĩm mỳnhta pyràk. Nom Krisja kên rom kêp htĩr tũm nẽ pa xwỳnh jakamã nhũm pre Tirtûm mẽ pakaxyw ãm pu prem hkôt amnhĩ xunhwỳ.

5Ně Tirtûm na hte nhỹrmã mẽ pahtrĩr tũm nẽ wa kuri mẽ papa mã xwỳnh ã mẽ pajarẽ. Te mẽ pahpê kên nhũm Tirtûm te kot amnhĩ Karõ mã mẽ pahto ixkre nhĩpêx pyràk. Jakamã na hte Jejus Kris tanhmã mẽ pahkrã hto pu mẽ Tirtûm kôt amnhĩ nhĩpêx mex rãhã ho ri papa. Nẽ tanhmã kãm amnhĩ nhĩpêx mex to nhũm ja hã mẽ pahpumu nẽ hkĩnh nẽ.

6Tirtûm kapêr ã kagà htũm kot tanhmã Kris jarênh to. Nẽ hã kuxi nẽ tanhmã harênh to. Te kêp kên pyràk ã harẽ nẽ harênh kot:

Kot paj nhỹrmã Ijaew wỳr mẽhõ mẽ nhũm mẽ hkôt pa ho pa.

Koja te kêp kên o inhõrkwỳ nhĩpêx kaxyw kên maati mex
kumrêxta pyràk.

Koja amnhĩ kaxyw hkôt mẽ hamaxpêr xwỳnhjaja nhỹrmã ma
inhõ krĩ hwỳr api nẽ hkĩnh nẽ mex rãhã nẽ pa ho pa. Anẽ.

7Tã ra amnhĩ kaxyw hkôt mẽ pajamxpêr xwÿnhjaja. Kên pyræk xwÿnh pê Jejusja na mẽ pamã mex o mex. No mẽ kot hkaga xwÿnhjaja na htem hamaxpêr punuj xwÿnh ã hkamnhĩx nê hkaga nê kãm hkĩnh kêt nê. Tĩrtũm kapêr ã kagà htũm kot mẽ harênh kot:

Na prem kên o amnhĩm òrkwÿ nhĩpêx kaxyw hkawrà ho pa nê kên maatija pumu nê htÿx omnuj ã hkamnhĩx nê hkaga. Mẽ kot hkaga htã nhũm Tĩrtũm mẽ kurom mex o kot kên piitã hakrenh par ã omunh kurê kumrêx. Anê.

8Nê mãânên harênh kot:

Koja mẽ kapêr mar kêt kumrêx.

Te pry kamã kên nõr nhũm mẽ kot nhãm pry nê mẽnh kaxyw hkamnãr o amnhĩ par krã hi kukênh pyræk o koja mẽ amnhĩ nhĩpêx. Anê.

Mẽ kot Kris kapêr mar tã hkôt amnhĩ xunhwÿr kêt jakamã te ho mẽ kot amnhĩ nê kên kamnãr o amnhĩ par krã hi kukênh pyræk o koja mẽ amnhĩ nhĩpêx. Jakamã koja nhÿrmã Tĩrtũmja ja hã tanhmã mẽ ho htÿx kumrêx. Ra kot amnhĩ kukamã mẽ kãm amnhĩ jarênh xà hkôt. 9No mẽ papajaja na pre Tĩrtũm jajê rom amnhĩ kôt mẽ paxunhwÿ. Nhÿrmã ò krĩ kamã mẽ papa ho papa kaxyw. Nê mẽ pahte mex o mex ã harênh kaxyw. Na pu htem Ijaew nhõ patre pyrã nê Pahi Maati Tĩrtũm mã tanhmã amnhĩ nhĩpêx to ho papa. Nom kormã mẽ pahte Kris kôt amnhĩ xunhwÿr kêt ri te mẽ pahpê kamãt kô kamã mẽ pahtÿx ri mẽ papa xwÿnh pyræk. Tã Jejus kôt amnhĩ xunhwÿr nê hpãnhã te mẽ pahpê hirã mex kãm ri mẽ papa xwÿnh pyrã nê tãm amnhĩ nhĩpêx rãhã ho papa. Ra mẽ pahpê Tĩrtũm kra jakamã na pu htem amnhĩ to mex rãhã ho ri papa. Nê Mẽpahpãm maati Tĩrtũm mã tanhmã amnhĩ nhĩpêx to ho ri papa. Te mẽ kot mẽ ho àhwÿr xwÿnhjaja kot kãm amnhĩ nhĩpêx o pata pyræk. ã na pre Tĩrtũm mẽ pahte amnhĩ nhĩpêx anhÿr o papa kaxyw mẽ panhĩpêx.

10Amnepêm kormã mẽ pahpê hkra hkêt ri na pre mẽhõ mẽ pakamã ukaprĩ hkêt kumrêx pu htem pahpunuj nê ri papa. Tã Jejus kôt amnhĩ xunhwÿr nhũm Tĩrtũm mẽ pahto hkra pu mẽ pahpê hkra hã ri papa nhũm mẽ pakamã ukaprĩ rãhã ho mẽ pahkôt pa.

Mẽ pahpê Tĩrtũm mã tanhmã amnhĩ nhĩpêx to xwÿnh ã mẽ pajarênh

Rômãn 13.1-7; Xitre 3.1

11E ixkrãmnhwÿjaja. Ra mẽ pahpê Tĩrtũm kra jakamã mẽ pahpê ò krĩ nhõ xwÿnh. Te mẽ pahpê jar pika nhõ xwÿnh kêt pyræk jakamã kwa kêr pu mẽ arĩ mẽ pahte amnhĩ nhĩpêx tũm o amnhĩ nhĩpêx kêt nê. Nê mẽ pajamaxpêr tũm o pajamaxpêr kêt nê. Ra axtem mẽ pajamaxpêr nyw nê axtem mẽ pahte amnhĩ nhĩpêx nyw kênã. Mẽ pahte amnhĩ nhĩpêx tũmja te kãm akupÿm mẽ pahte hkôt amnhĩ to paxujanãr prãm pyræk. Mẽ pahte axte hkôt amnhĩ nhĩpêx o ri papa kaxyw. Tã nom kêr pu mẽ

anhÿr kêt nê. 12E kwa kêr ka mẽ anhõ krĩ kamã akwÿ kot Kris kôt amnhĩ xunhwÿr kêt xwÿnhjê noo mã tãm ri amnhĩ nhĩpêx o ri apa. Mẽ kot Kris ã tanhmã mẽ anhĩpêx to rÿ tanhmã hã mẽ ato kapêr punuj to htãã. Kot kaj mẽ ã mẽ hkôt amnhĩ nhĩpêx anhÿr o ri apa hãmri nhũm mẽ tee ri mẽ apumu nê hamaxpêr o:

—Kwa mẽ ixte mẽ kot amnhĩ tomnuj xwÿnh ã mẽ harênh tã mẽ kot amnhĩ to mex pix xwÿnh na mẽ. Anê.

Hãmri nê nhÿrmã mẽ pahpyrà nê Tĩrtũm kôt amnhĩ xunhwÿ nê kãm mex o mex ã harê nê kãm:

—Kwa Tĩrtũm. Na pre hte akrajaja anhÿ hã amnhĩ to mex rãhã nê pa ho pa pa ja hã mẽ omu. Nà xep amex o amex Tĩrtũm. Anê.

13Nê mẽ apê Pahihti Jejus Kris kôt amnhĩ nhĩpêx xwÿnh jakamã kêr ka mẽ anhõ krĩ kamã mẽ anhõ pahihti kapêr ma nê kapêr kôt mãn amnhĩ nhĩpêx mex o ri apa. Nê mẽ anhõ pika kamã mẽ anhõ prêjitênja ka mẽ kapêr ma nê hkôt amnhĩ nhĩpêx. Mẽ kot mẽ ato amnhĩptàr xwÿnhjaja ka mẽ piitã mẽ kapêr ma nê mẽ kapêr kôt pix mã amnhĩ nhĩpêx rãhã ho ri apa. 14Nê mẽ anhõ pahi nhÿ hã mẽ kapêr o mẽ pa xwÿnhjaja na htem mẽ akaxyw mẽ unhwÿ. Mẽ kot amnhĩ tomnuj xwÿnhjaja nhũm tanhmã mẽ kot mẽ ho kaxyw. Nê tãm mẽ kot amnhĩ nhĩpêx o ri mẽ pa xwÿnhjaja nhũm mẽ kot mẽ õ pahi mã mex ã mẽ harênh kaxyw. 15Tã kêr ka mẽ kapêr ma nê mẽ hkôt tãm amnhĩ nhĩpêx rãhã ho ri apa. Hãmri nhũm mẽ ato kapêr punuj xwÿnhjaja ja hã mẽ apumu nê axte tanhmã mẽ ato kapêr to hkêt nê. ã mẽ ate amnhĩ nhĩpêx anhÿr o apaja na Tĩrtũm kãm hprãm.

16Nê mẽ pahpê Tĩrtũm kra jakamã na pu htem paxãmnhix kãm tanhmã amnhĩ nhĩpêx to ho ri papa. Nom kêr pu mẽ pahpê hkra hã pahpêx ri amnhĩ nhĩpêx kêt nê.

17 Nê kêr ka mẽ piitã mẽ ho mex o ri apa.

Nê mẽ ato amnhĩptàr xwÿnhjê ho mex nê mẽ hã apijaàm rãhã ho ri apa.

Nê mẽ apê Kris kôt mẽ ate axpên to mẽ atõ nê mẽ atõxjê hã amã axpên kĩnh pê axpên to mex nê.

Nê Tĩrtũm ã apijaàm rãhã nê.

Mẽ kãm mẽ apênh xwÿnhjaja kot tanhmã amnhĩ nhĩpêx to hã mẽ kãm karõ

Epes 6.5-8; Korosê 3.22-25; Wam Ximotre 6.1-2; Xitre 2.9-10

18Nê mẽ apê mẽ kãm mẽ axapênh xwÿnhjaja kêr ka mẽ anhõ patrãw kapêr ma nê hkôt ri amnhĩ nhĩpêx. Kot mẽ ato mex o pa rÿ mẽ atomnuj o pa htã ka mẽ arĩ mẽ hã apijaàm pê hkôt ri amnhĩ nhĩpêx. 19Tanhmã kot mẽ anhĩpêx punuj to htã ka mẽ arĩ kãm axapênh mex rãhã nê. Kêr kê Tĩrtũm ja hã mẽ apumu nê mẽ ato mex nê ka mẽ ajamakêtkati nê

axàmnhĩx ri kãm axàpênh o apa. **20**Nom kot kaj tanhmã amnhĩ tomnuj to nhũm anhõ patrãw ja hã apumu nê hã atak ka amnhĩ xà htỳx kamã ama nê rĩ amnhĩ pumu. No kot kaj akatàt kôt kãm axàpênh mex tã nhũm amarĩ atak japêr tã kêr ka amnhĩ tã kamã agryk kêt nê. Arĩ kãm amnhĩ to htỳx kamã kãm xa nê amnhĩ tã tanhmã ho hkêt nê. Hãmri nhũm Tĩrtũm ja hã apumu nê ato mex nê. **21**Amnepê m na pre mẽ pahte hkôt amnhĩ xunhwỳr xwỳnhjaja Kris pyrã nê mẽ paxà htỳx kamã pajamak o papa hkukamã ja hã mẽ pahpumunh mex. Na pre Kris mẽ pakaxyw amnhĩ xà htỳx kãm hamak tỳx tã amnhĩ to htỳx nê mẽ kãm xa. Tã kêr pu amnhĩ xà htỳx kamã pajamak tã ỹ hã urak nê amnhĩ to htỳx nê papa. **22**Krisja aa tanhmã amnhĩ tomnuj to hkêt nê pa ho pa. Nê aa mẽmoj tã amnhĩ to hêx o pa hkêt. **23**Mẽ kot kãm kapêr punuj tã nhũm amnhĩ tã tanhmã mẽ kãm nê hkêt nê. Nê mẽ kãm kapêr punuj kêt nê. Nhũm prem homnuj tỳx kumrêx nhũm amnhĩ xà htỳx kamã hamak tã amnhĩ tã mẽ kãm àkjêr nê tanhmã mẽ haprỳ hto hkêt nê. Na pre ãm hamaxpêr o: “Nà Tĩrtũm kot ixtã mẽ omunh mex kênã. Koja nhỹrmã mẽ piitã tanhmã mẽ kot amnhĩ nhĩpêx to hã mẽ omunh xà hkôt tanhmã mẽ hipêx to. Tãm koja àhpumunh tỳx xà hkôt tanhmã ixtã mẽ harênh to. Mẽ kurom àhpumunh tỳx o àhpumunh tỳx xwỳnh kênã.” Anê.

24Kris na pre te kawà kamã mẽ pahte amnhĩ tomnuj piitã gjênh nê ho nỳt nê htur rãhã pĩ kahpa hã mẽ panê htyk pyrak o amnhĩ nhĩpêx. Mẽ pahte axte tanhmã amnhĩ tomnuj to hkêt prãm xàj. Pãnhã mẽ pahte amnhĩ to mex pix o ri papa kaxyw. Tã ã kot amnhĩ xà htỳx kãm hamak anhỹr o jêt jakamã kot puj mẽ pahte hkôt amnhĩ xunhwỳr xwỳnhjaja aa mẽ pahte amnhĩ tomnuj pãnhã amnhĩrer kêt nê. Ra Jejus htyk o kot mẽ panê amnhĩrer par kênã.

25Na pu pre te mẽ pahpê ôwêhti pikunor pyrã nê pahtỳx ri papa. Tanhmã amnhĩ tomnuj to rãhã ho ri papa. Tã nhũm Kris te kot ôwêhti jamãr xwỳnh kot ôwêhti pikunor mã katorta pyrak o mẽ panhĩpêx. Pu mẽ hkôt amnhĩ xunhwỳ nê hkôt amnhĩ nhĩpêx mex o ri papa. Jao hkôt papa ho papa.

Mẽ mjên mẽ mẽ hprõ kot tanhmã axpên nhĩpêx to hã mẽ kãm karõ

Wam Korõt 7; Epes 5.22-25; Korosê 3.18-19; Wam Ximotre 2.9-15

3 **1**Nê kêr ka mẽ anijaja mẽ amjên kapêr ma nê hkôt amnhĩ nhĩpêx. Akĩnhã kormã kot Tĩrtũm kôt amnhĩ nhĩpêx kêt japêr tã arĩ kapêr ma nê hkôt amnhĩ nhĩpêx mex o ri apa. Kê mẽ ate amnhĩ nhĩpêx ã mẽ apumu nê mẽ apyrã nê Kris kôt amnhĩ xunhwỳr japêr. Mẽ kãm Tĩrtũm kapêr mar prãm kêt tã koja mẽ ã mẽ ate amnhĩ nhĩpêx anhỹr ã mẽ apumunh kôt mẽ apyrã nê amnhĩ kaxyw hkôt hamaxpêr japêr. **2**Na htem mẽ ate Tĩrtũm kapêr kôt tãm ri amnhĩ nhĩpêx o apa hã mẽ apumunh o ri mẽ akôt pa.

3Jakamã kêr ka mẽ anijaja amnhĩ mex pix kukamã ajamaxpêr o ri apa hkêt nê. Rỳ ajamaxpêr o:

—Ma kot paj mẽ hkuxwaxà ho amnhĩ krã hkĩ kuxwa mex nê inhõkrexê mex jagjê nê ri hã mra. Nê kupêxê mex kwỳ japrô nê ho amnhĩm ixê mex nhĩpêx hãmri nê hagjê nê ri hã mra. Kot paj ã amnhĩ nhĩpêx anê nhũm mẽ piitã ja hã ixpumu nê kãm ixkĩnh nê inhmex ã ijarê. Ma kot paj ã amnhĩ nhĩpêx anê.

Anhỹr o ri amnhĩ kukamã ajamaxpêr kêt nê. 4Tĩrtũm na hte ã mẽ pahte amnhĩ nhĩpêx anhỹr ã mẽ pahpumu nê ãm hã mẽ pahpumu. Mẽ õkrexê nê mẽ ê mex na hte hapêx tokyx anê. No mẽ panhõpinhxà kaxwỳnh kãm tãm ri mẽ pajamaxpêr nê pakamã amnhĩkrit nê papaja. Kot kaj mẽ ã amnhĩ nhĩpêx anhỹr o ri apa hãmri nhũm Tĩrtũm ja hã mẽ apumu nhũm ja kãm mex nê. 5Amnepê mã mẽ pakukamã mẽ panhõ wõwõ nê mẽ panãjaja. Mẽ hkwỳ kot Tĩrtũm kõt amnhĩ nhĩpêx xwỳnhjaja na prem ã amnhĩ nhĩpêx anhỹr o pa. Mẽ kot mjên kõt amnhĩ nhĩpêx o pa jakamã na prem amnhĩ tã mẽ omu nê mẽ ho mex nê kãm mẽ hapê nê. 6Mẽ panhõ wõwõ finat Saraja na pre ã amnhĩ nhĩpêx anhỹr o pa. Jao mjên Apraãw kapêr ma nê hkõt amnhĩ nhĩpêx. Nê kêp õ pahi hã harê nê hkõt pix mã amnhĩ nhĩpêx o ri pa. Tã kot kaj mẽ uràk nê amnhĩ to htỳx nê ã amnhĩ nhĩpêx anhỹr o apa. Hãmri nê amnhĩ tã amã amjên puma hkêt nê apa nê te apê Sara hkra pyràk.

7Nê mẽ amyjaja kêr ka mẽ tãm mẽ aprõ nhĩpêx o ri mẽ hkõt apa. Mẽ akĩnhã mẽ hihtỳx kêt jakamã mẽ kamã axukaprĩ rãhã ho ri mẽ hkõt apa. War ajamê war apê Jesus kukwak ri war atĩr tũm nê apa mã xwỳnh jakamã kêr ka mẽ ho mex rãhã ho ri mẽ hkõt apa. Tĩrtũm kãm war ajamê war ajapê jakamã kot kaj mẽ ã mẽ hipêx anhỹr o ri apa hãmri nê ra axãmnhĩx mẽmoj tã amnhĩ to Tĩrtũm wỳ nhũm mẽ amar kurê kumrêx.

Tĩrtũm krajaja kot amnhĩ xà htỳx kamã hamak ã mẽ harênh

Rõmãn 12.9-21; Korosê 1.10; Wam Tesarõn 5.14-15

8E Kris kõt ixkrãmnhwỳjaja. Nà ixkapêr jatur xà na ja. Kêr ka mẽ ri axpên kõt ajamaxpêr mex pê axpên to mex rãhã ho ri apa. Nê mẽ ate Kris kõt axpên to atõ nê atõx ã amã axpên kĩnh o ri apa. Jao axpên kamã axukaprĩ nê mẽmoj to axpên kutã anojarêt rãhã nê. 9Na pu prem Jesus kõt amnhĩ xunhwỳ nhũm Tĩrtũm mẽ pahto hkra nê mẽ pahto mex ã amnhĩ jarê. Tã koja mẽhõ tanhmã mẽ anhĩpêx to rỳ tanhmã mẽ ato kapêr punuj to. Nom kêr ka mẽ ama nê amnhĩ tã tanhmã ho rỳ tanhmã ho akapêr punuj to hkêt nê. ãm te Tĩrtũm kot mẽ panhĩpêx pyràk o mẽ hipêx nê mẽ ho mex pix o ri mẽ hkõt apa. Ja na Tĩrtũm kãm hprãm. 10Kapêr ã kagà htũm kot ja jarênh kot:

Kot kaj mẽ amã amex nê akĩnh nê ri apa hprãm hã kot kaj mẽ ã amnhĩ nhĩpêx anê:

Kot kaj mẽ ri akapêr punuj o ri apa hkêt nê.

Nê mẽmoj tâ amnhĩ to axêx o ri apa hkêt nê.

11 Nê te mẽ ate amnhĩ katut kôt ate amnhĩ tomnuj rênho o apa pyrà nê hpãnhã amnhĩ to mex pix o ri apa.

Nê mẽ amã tãm axpên nhĩpêx pix prãm o ri axpên kôt apa.

Nê mẽ amã ajamakêtkati nê axpên kôt apa hprãm rãhã ho ri apa.

12 Na hte Tirtũmja ã mẽ kot amnhĩ nhĩpêx anhỹr o pa xwỹnhjê jamãr mex rãhã ho pa.

Nhũm mẽ tanhmã amnhĩ to hwỳr to nhũm mẽ mar kurê kumrêx.

No mẽ kot amnhĩ tomnuj o mẽ pa xwỹnhjaja na hte mẽ kutã

amnhĩ xãm nê ãm mẽ omu nê mẽ ho mex kêt nê. Anê.

Tirtũm kapêr ã kagã htũm kot ã mẽ harênh kot anhỹr.

13Nê kot kaj mẽ amã amnhĩ to mex pix o apa hprãm nhũm mẽhõ ja hã tanhmã mẽ atomnuj to hkêt nê. 14No kot kaj mẽ amnhĩ to mex pix o apa htã nhũm mẽhõ ja hã apumu nê tanhmã hamaxpêr to nê atomnuj ka amnhĩ xà htỹx kamã ajamak japêr. Tã koja Tirtũm nhỹrmã ja hã tanhmã mẽ ato mex to. Jakamã kwa kêr ka mẽ tee ri mẽhõ kot tanhmã mẽ atomnuj to hkukamã ajamaxpêr pê amã mẽ uma ho ri apa hkêt nê. Nê tee ri amnhĩ kukamã ajamaxpêr o akaprĩ nê ri apa hkêt nê. 15Ãm amnhĩ kaxyw Kris mã mãn ajamaxpêr tỹx rãhã nê mẽ panhõ Pahihti hã apijaãm rãhã ho ri apa. Nhũm mẽhõ ja hã mẽ apumu nê tanhmã hã mẽ akukjêr to nê mẽ amã:

— Kwa mẽmo kaxyw na ka pre Kris kôt amnhĩ xãm nê hkôt ri amnhĩ nhĩpêx o apa? Anê.

Ka mẽ ama hãmri nê aprĩ hã kãm amnhĩ jarênh kurê kumrêx. 16Nom kêr ka mẽ akapêr mã aprĩ kamã kãm amnhĩ jarê. Tirtũm kapêr kôt amnhĩ nhĩpêx o apa hã mẽ kãm amnhĩ jarê. Koja mẽ Kris ã mẽ ato kapêr punuj rỳ hã mẽ atã hpêr o axkê nê pikunhar japêr ka mẽ ãm amnhĩ tâ mẽ ama nê ãm mẽ ama. Kwãr mẽ mãmri ã mẽ anhĩpêx anê. Kêr ka mẽ amnhĩ tâ mẽ omu nê arĩ amnhĩ to mex rãhã ho ri apa. Kêr kê mẽ tee ri amnhĩ tâ mẽ apumu nê hpijaãm nê.

17Nê koja mẽ akwỳjaja mẽ ate Tirtũm kapêr kôt amnhĩ nhĩpêx mex o apa hã mẽ apumu nê hã tanhmã mẽ anhĩpêx to htã kêr ka mẽ arĩ Tirtũm kôt amnhĩ nhĩpêx o ri apa. Ja na kãm hprãm. Nom kot kaj mẽ tanhmã amnhĩ tomnuj to nhũm mẽ ja hã mẽ apumu nê pahihti mã mẽ ajarê nhũm kuma nê ja hã tanhmã mẽ amã ãkjêr to ka mẽ ra apijaãm nê.

18Nê Krisja na pre mẽ panê ty. ãm htyk tipxi tâ mẽ pahpiitã mẽ pahpãnhã amnhĩre. Mẽ pakurom aa kot tanhmã amnhĩ tomnuj to hkêt tâ mẽ pahte amnhĩ tomnuj piitã hpãnhã amnhĩrer pa. Mẽ pahte hkôt amnhĩ xunhwỳr nê nhỹrmã ma Tirtũm nhõ krĩ hwỳr paxãpir nê kamã pahtĩr tũm nê papa ho papa kaxyw. Mẽ kot hpĩr tâ nhũm Tirtũm akupỹm

ho htír nhũm htír o htír. 19-20Nom kormã akupÿm htír kêt ri na pre hkarô pix o mẽ htyk xwÿnhjê hwÿr mō. Ahpunu kamã mẽ hkarô kêp prês nê hkrĩ xwÿnhjê hwÿr mō nê mẽ kot Noehti kapêr mar nê hkôt amnhĩ nhĩpêx kêt nhũm gô htãm kot mẽ hanhir par xwÿnhjê mã kapêr. Tĩrtũm kot nhĩrmã mẽ kot amnhĩ tomnuj mÿrapê kuwy maati wÿr mẽ rênh ã mẽ hkukamã mẽ kãm awjarê. Amnepêm kormã Noehti kot pàr raxta nhĩpêx o kuhê ri na prem kãm Tĩrtũm kapêr mar prãm kêt nê. Nhũm amnhĩ tã mẽ omu nê mẽ kamã gryk tokyx anhÿr kêt nê. Arĩ amnhĩ tã mẽ hamãr o pa. Mẽ kot hkôt amnhĩ xunhwÿr nê hkôt amnhĩ nhĩpêx prãm xàj arĩ mẽ hamãr ry ho pa. No ãm tee ri mẽ hamãr kaprÿ nhũm mẽ amnhĩ kaxyw hkôt hamaxpêr kêt nê htÿx ri amnhĩ tomnuj o pa. Mẽ ãm grêre nê Noehti kapêr ma nê gô htãm pymaj hkôt pàr raxta wÿr agjê. ãm mẽ kêp 8 pix nê hwÿr agjê nhũm gô htãm mẽ hanhir kêt nê. Tĩrtũm na pre mẽ nê omunh mex nê. No mẽ kot amnhĩ tomnuj xwÿnhjaja nhũm gô htãmja mẽ hanhir o mẽ himex pa. Nhũm mẽ kêp 8ja pix arĩ htír nê mex nê pàr raxta kamã gô krãhkà hã mex rãhã pa.

21Gô tãmja kêp hprĩ hã mẽ pahte Jejus kôt amnhĩ xunhwÿr ã mẽ pahto amnhĩrĩt xà na. Mẽ pahte amnhĩ nhĩpêx tũm kaga nê hpãnhã amnhĩ nhĩpêx nyw o amnhĩ nhĩpêx o papa hã mẽ pahto amnhĩrĩt xà. Jakamã na htem mẽ pahkrã kumrã. Nom mẽ kot mẽ panê mẽ pagrã kugrãnh kaxyw kêt ra mẽ pahte Jejus kôt amnhĩ xunhwÿr ã amnhĩ to amnhĩrĩt kaxyw na htem mẽ pahkrã kumrã. Ra mẽ pahte Tĩrtũm kapêr kôt amnhĩ nhĩpêx o papa hã amnhĩ to amnhĩrĩt kaxyw. Pu mẽ ra mẽ pahte amnhĩ nhĩpêx nyw o amnhĩ nhĩpêx ã amnhĩ to amnhĩrĩt. Te mẽ pahte gôx kãm mẽ pahte amnhĩ tomnuj rer par pyrã nê hpãnhã amnhĩ nhĩpêx nyw o amnhĩ nhĩpêx o papa.

22Nê na pre Jejus akupÿm htír nê ma akupÿm Tĩrtũm nhõ krĩ hwÿr api nê Tĩrtũm nhĩhkô hã pahihiti hã mẽ hkrĩ xà kamã hkrĩ ho hkrĩ. Hãmri nê ra Tĩrtũm kapêr o mẽ wrÿk xwÿnh nê pahi piitã mẽ ho amnhĩptar o hkrĩ.

Mẽ pahte amnhĩ nhĩpêx nyw o amnhĩ nhĩpêx ã mẽ pamã karô

Epes 4.17-24; Korosê 3.1-11

4 1Nê na prem Kris pĩ nhũm amnhĩ xà htÿx kãm hamak kãm htyk kaxyw tã arĩ mẽ kãm xa. Ra kot amnhĩ xà hkukamã amnhĩ tã mẽ omunh tã tee ri amnhĩ kukamã hamaxpêr o amnhĩ tã tanhmã ri mẽ kot hpĩr mã xwÿnhjê homnuj to hkêt nê. Arĩ mẽ kãm xa nhũm prem kupĩ. Tã kêt pu mẽ uràk nê ã amnhĩ nhĩpêx anhÿr o ri papa. Mẽ kot hã tanhmã mẽ panhĩpêx to htã pu mẽ uràk nê amnhĩ xà htÿx kãm pajamak tã tanhmã amnhĩ tã mẽ ho hkêt nê. Na hte ra mẽ htyk nê mẽ hikwÿ xwÿnhjaja axte amnhĩ tomnuj kêt nê. Tã kêt pu mẽ uràk nê axte tanhmã amnhĩ tomnuj to ho ri papa hkêt nê. 2Jakamã kêt pu mẽ axte mẽ pahte

amnhĩ nhĩpêx tũm kôt amnhĩ nhĩpêx o papa hkêt nê. Nê mẽ pajamexpêr tũm kôt axte pajamexpêr o papa hkêt nê. Âm Tĩrtũm kãm hprãm xà hkôt pix mã tanhmã amnhĩ nhĩpêx to ho papa rãhã ty.

³Amnepêm kormã mẽ pahte Jejus kôt amnhĩ xunhwỳr kêt ri na pu prem mẽ kêp Tĩrtũm kra hkêt xwỳnhjê hkôt amnhĩ nhĩpêx.

Jao nhãm mênijê pumu nê mẽ kamã pahpijaàm kêt hprãm.

Nê pahpipãnh o ri papa.

Nê mẽ pahpipãnh kaxyw axpên wỳr akuprô nê mênijê kamã pahpijaàm kêt.

Nê sãnti hwỳr pahkônkrã ho pahkrĩ nê kãm amnhĩ jagrer.

⁴Tã Kris kôt amnhĩ xunhwỳ hãmri nê mẽ pahte amnhĩ nhĩpêx nyw o amnhĩ nhĩpêx o papa. Hãmri nhũm arĩ mẽ kot amnhĩ nhĩpêx tũm o amnhĩ nhĩpêx xwỳnhjaja tee ri ja hã mẽ pahpumu nê hêx rom amnhĩ kôt mẽ pamã tanhmã ri àhkrox to ho pa. Pu mẽ axte mẽ hkôt amnhĩ nhĩpêx kêt nhũm mẽ tee ri ja hã mẽ pahpumu nê mẽ pakamã gryk kato nê tanhmã mẽ pahto kapêr punuj to. ⁵Tã koja Tĩrtũm nhỹrmã amnhĩ wỳr mẽ hã karõ nhũm mẽ ma hwỳr mra nê kutã hkrĩ. Nê kormã mẽ htĩr ri tanhmã mẽ kot amnhĩ nhĩpêx to ho pa hã kãm amnhĩ jarênh pa. Hãmri nhũm mẽ kot amnhĩ nhĩpêx ã tanhmã mẽ hipêx to. Koja mẽ pahpiitã tanhmã mẽ pajarênh to. Mẽ htyk xwỳnhjaja nê kormã mẽ pahpũr nê mẽ papa xwỳnhjaja nhũm mẽ pahpiitã tanhmã mẽ pajarênh to.

⁶Na pre Jejus ty hãmri nê kormã akupỹm htĩr kêt rãhã hkarõ pix o ma amex wỳr tẽ nê kamã mẽ htĩr ri amnhĩ kaxyw Tĩrtũm mã hamexpêr xwỳnhjê mã awjarê. Na prem mẽ kot amnhĩ tomnuj mỳrapê ra wej nê ty nê arĩ amex kãm ri pa. Jakamã nhũm Jejusja hkarõ ho ma mẽ hwỳr tẽ nê mẽ kãm:

—E na pa ra mẽ ate amnhĩ tomnuj pãnhã amnhĩrer pa. Tã kormã mẽ atĩr ri mẽ ate amnhĩ kaxyw Tĩrtũm kôt ajamexpêr jakamã kot kaj mẽ ma hwỳr api nê wa ixkuri wa ixpyrà nê atĩr tũm nê amex nê apa ho apa. Anê.

**Mẽ pahpê Kris kwỳ hã tanhmã mẽ pahte axpên nhĩpêx to hã
mẽ pamã karõ**

Rômãn 12.6-8; Wam Korõt 12.1-11

⁷Nê koja tokyx mẽ panhõ pikaja mẽ pahpê hapêx nê kamã mẽmoj piitã hapêx pa. Jakamã kwa kêr ka mẽ ate amnhĩ nhĩpêx ã amnhĩ pumunh mex o apa.

Nê mẽ atỳx ri ajamexpêr ri apa hkêt nê.

Nê mẽmoj punuj nê amnhĩ to htỳx o ri apa ho ajamexpêr nyw pix o amnhĩ to Tĩrtũm wỳr rãhã ho ri apa.

⁸Nê kwa kêr ka mẽ amã axpên kĩnh o ri axpên kôt apa. Ja na mex o mex. Kot kaj mẽ ã axpên nhĩpêx anê nhũm Kris kôt atõ rỳ atõxjê hõ tanhmã

atomnuj to japêr ka amnhĩ tã omu nẽ ãm omu. Amã hkĩnh o ãm amnhĩ tã omu. Jao axte kot tanhmã atoja mã ajamaxpêr kêt nẽ.

9Nê kêr ka mẽ axãmnhĩx ajamakêtkati nẽ amnhĩ nhõrkwỹ hwỳr axpên wỳ nẽ axpên to mex o ri apa. Nom kêr ka mẽ agryk kãm amnhĩ wỳr mẽ hwỳr kêt nẽ. 10Na pre ra Tĩrtũm mẽ pahpê hkra hã ahpỹnhã tanhmã mẽ pamã mẽmoj tã karõ hto nẽ ã mẽ pahte amnhĩ nhĩpêx anhỹr o papa kaxyw mẽ pahto mẽ paxihtỳx. Mẽ pahte ahpỹnhã tanhmã axpên to mex to ho ri axpên kôt papa kaxyw. Tã kêr ka mẽ ra kot mẽmoj tã mẽ amã karõ hkôt axpên nhĩpêx o ri axpên kôt apa. 11Koja ma mẽ ate akwỳjê mã kapêr jarênh o ri apa kaxyw mẽ amã karõ ka mẽ ama nẽ akatàt kôt y hã mẽ kãm harênh mex o ri mẽ hkôt apa. Rỳ tanhmã axpên to ajuta hto ho ri apa kaxyw mẽ axunhwỳr japêr ka mẽ amnhĩ tã omu nẽ hkamnàr rom mẽ ho ajuta mex rãhã ho ri apa. Mẽ apiitã Jejus nhỹ hã ã amnhĩ nhĩpêx anhỹr o ri apa. Kêr kê Jejus kôt mẽ akwỳjaja amnhĩ tã mẽ apumu nẽ mẽ anhỹ hã Tĩrtũm mã mex o mex ã harẽ.

Jejus kwỳjaja kot amnhĩ xà htỳx kamã hamak o pa hã mẽ harênh

Rukre 6.20-23; Juãw 16.1-4; Sikũn Tesarõn 1.3-12;

Sikũn Ximotre 3.13; Eprêw 12.3; Xiakre 1.2-4

12E Kris kôt ixkrãmnhwỳjaja. Koja Kris kwỳ kêt xwỳnhjaja Kris ã tanhmã mẽ anhĩpêx to nom kwa kêr ka mẽ tee ri amnhĩ kukamã ajamaxpêr o akaprĩ nẽ apa hkêt nẽ. Kêt mẽ akĩnh rãhã axpên kôt ri apa. Na htem ã mẽ pahpê Kris kwỳjê nhĩpêx anhỹr o pa. Jakamã kwa mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ. 13Mẽ arĩ akĩnh nẽ ri apa. Mẽ kot Kris pyrã nẽ mẽ panhĩpêx punuj tãã. Kêr kê Jejus nhỹrmã akupỹn mẽ pahwỳr wrỳ pu mẽ omu nẽ pahkĩnh tỳx o pahkĩnh tỳx. 14Kwãr mẽ mãmri mẽ pahpê Kris kwỳ hã tanhmã mẽ panhĩpêx to. Na htem ã Tĩrtũm Karõ kot mẽ pahkarõ mã gjêx xwỳnhjê nhĩpêx o pa anê.

15Nê mẽ apê Kris kwỳ jakamã kwa kêr ka mẽ amnhĩ to mex rãhã o ri apa.

Jao mẽ hpar o ri apa hkêt nẽ.

Nẽ ri axàhkĩnh o ri apa hkêt nẽ.

Nẽ nhãm mẽ hkaêx mã agjêx o ri
apa hkêt nẽ.

Nẽ tanhmã mẽ homnuj to ho ri
apa hkêt nẽ.

Kot kaj mẽ ã amnhĩ nhĩpêx anhỹr o ri apa nhũm mẽ anhõ pahihtĩ ja hã tanhmã mẽ ato ka mẽ amnhĩ kamã apijaãm tỳx nẽ.

16Nom koja mẽ apê Kris kwỳ hã tanhmã



Wam Pêtre 4.15-16

mê anhîpêx to ka mê ja hã amnhî tâ mê omu nê amnhî kamã apijaam kêt nê. ãm Tirtûm pix mã amnhî jarê nê kãm:

— Pa Tirtûm. Ixpê akra Kris kwỳ hã na mê ã ixtomnuj anê. Nom ixpê akra jakamã kwãr mê mãmrî tanhmã inhîpêx to. Amex o amex o ate ixto akra jakamã kwãr mê mãmrî ã inhîpêx anhÿr o pa. Anê.

17Nê koja Tirtûm tokyx mê pahpiitã tanhmã mê pahte amnhî nhîpêx to hã mê pahpumu nê tanhmã mê panhîpêx to. Mê pahpê hkrajaja koja tanhmã mê pahte amnhî nhîpêx to hã tanhmã mê pahto mex to. Hãmri nê hpãnhã mê kêp hkra hkêt xwỳnhjê ho hapu nê tanhmã mê hipêx to. Mê kot amnhî kaxyw hkôt hamaxpêr kêt jakamã nhùm mê pahkĩnhã tanhmã mê homnuj tÿx to. 18Kapêr ã kagã htùm kot ja hã mê pajarênh kot:

Mê kot Tirtûm kapêr kôt amnhî to mex xwỳnhjaja na htem
 àmnhix amnhî xà htÿx kamã hamak o pa kamã ty
 nhùm Tirtûm ma õ krî hwÿr amnhî wÿr mê ho àpir
 kurê kumrêx.

Nom mê kot amnhî tomnuj xwỳnhjaja koja mê hkĩnhã amnhî xà
 htÿx kamã hamak rãhã nê pa ho pa nê aa mex kêt nê. Anê.

19Tã koja Tirtûm kãm ja prãm japêr kwãr mê mãmrî Kris ã tanhmã mê pahptomnuj to. Nom kêr pu mê Tirtûm kamnàr rom amnhî to mex pix o ri papa. Kêp mê panhîpêx xwỳnh maati jakamã ra kot amnhî jarênh xà hkôt koja tanhmã ri mê pamã amnhî nhîpêx to ho pa.

Tirtûm krajaja kot tanhmã amnhî nhîpêx to hã mê kãm karõ

Atre 20.28-31

5 1E kot paj hpãnhã mê apê Kris kwỳ hkrãhtùmjê mã ixkapêr ka mê inhma. Ijaxwÿja ixpê mê akrãhtùmjê hõ na pa. Na pa pre mê akurom Kris htyk kãm omu. Nom kot puj mê nhÿrmã pahpimràatã mex o mex ã omu nê uràk nê mê pamex nê ri papa ho papa. 2-3Jakamã e Kris kôt mê hkrãhtùmjaja kêr ka mê atar Kris kôt pahkwÿjê jamãr mex nê. Ra Tirtûm kot mê ate kãm hkwÿjê jamãr kaxyw mê axunhwÿr jakamã kêr ka mê omunh mex rãhã ho mê hkôt ri apa. Te ho ôwêhti jamãr xwỳnh kot ôwêhti jamãr mexta pyrãk. Te mê kêp Tirtûm krit ôwêhti nhùm mê ate kãm mê hamãr o apa xwỳnh pyrã nê kãm mê omunh mex rãhã ho ri mê hkôt apa. Nê akĩnh pê tanhmã ri mê ho ajuta hto ho ri mê hkôt apa. Ja na Tirtûm kãm hprãm. Nom kêr ka mê ano hkà karôt kãm mê ho ajuta hkêt nê. Rÿ kàxpore hprãm xaj mê kãm tanhmã amnhî nhîpêx to hkêt nê. ãm amarĩ tanhmã mê kutã anojarêt to pix kukamã ajamaxpêr o ri mê hkôt apa.

Nê kêr ka mê kãm mêmoj tâ karõ kamã axihtÿx kêt nê. Mê akapêr mã aprĩ kamã mê kãm mêmoj jarê kê mê amnhî tâ mê apumu nê mê apyrã nê ã axpên nhîpêx anhÿr o pa.

4E kêr ka mẽ ã Kris kôt mẽ akwỳjê jamār mex pê mẽ hipêx o apa anê. Hāmri nhũm mẽ pajamār xwỳnh maati ja hã mẽ apumu nê nhỹrmã akupỳn mẽ pahwỳr wrỳ nê mẽ ato mex rax nê.

5Nê e mẽ amy xàptàr nywjaja. Kêr ka mẽ Kris kôt mẽ akrãhtũmjê kapêr ma nê mẽ hkôt ri amnhĩ nhĩpêx mex o ri apa.

Nê kwa kêr ka mẽ apiitã axpên nhĩpêx o te anhĩõ kot amnhĩ to rax o ajakrenh pyrãk. Tĩrtũm kapêr ã kagà htũm kot ja jarênh kot:

Mê kot amnhĩ to jarkrar o ri mẽ pa xwỳnhjaja na hte Tĩrtũm mẽ kutã amnhĩ xunhwỳ.

No mẽ kot amnhĩ to hkryre nê axpên tã hpijaàm o mẽ pa xwỳnhjaja na hte mẽ ho mex o pa.

6Anhỹr ã mẽ harênh jakamã kwa kêr ka mẽ Tĩrtũm ã apijaàm rãhã ho ri apa ixkwỳjaja. Nê axpên mã ri amnhĩ to jarkrar o ri apa hkêt nê. Kêr kê Tĩrtũm xihitỳx xwỳnhja ja hã mẽ apumu hāmri nê nhỹrmã kot mẽ pahto mex xà hã arĩgroja kato nhũm mẽ ate amnhĩ to mex xwỳnh ã mẽ ajarê nê mẽ ato mex rax nê.

7Nê kêr ka mẽ tee ri amnhĩ kukamã ajamaxpêr pê akaprĩ ho ri apa hkêt nê. ãm te mẽ ate Tĩrtũm mã akaprĩ nhõr pyrãk o amnhĩ nhĩpêx nê axãmnhĩx akĩnh nê akaprĩ hkêt nê apa. Tĩrtũm kêp mẽ pajamār xwỳnh maati kênã kot ka kêt mẽ ri akaprĩ nê ri apa.

8Nê kwa mẽ okora. Kêr ka mẽ amnhĩ nê kot mẽ pakutã amnhĩ xunhwỳr xwỳnh maati Satanastija pumunh mex rãhã ho ri apa. Na hte mẽ panhĩpêx o te ropkror kot akunĩ kamã mry ho krihkrit o ri mrar pyrãk o mẽ panhĩpêx. Jao mẽ pahte Kris kaga hprãm xaj apkati mẽ tanhmã nê mẽ pahto ho ri mẽ pahkôt pa. 9Na hte ã pika piitã hkôt Kris kôt mẽ pahtõ nê mẽ pahtõxjê nhĩpêx anhỹr o pa nhũm mẽ pahpyrà nê amnhĩ xà htỳx kamã hamak o pa pê omnuj nê pa. Jakamã kwa kêr ka mẽ Kris kôt amnhĩ xunhwỳr tỳx nê kutã amnhĩ to htỳx rãhã ho ri apa. 10Tĩrtũm kãm mẽ pajapê jakamã na hte mẽmoj to mẽ pakutã nojarêt rãhã ho ri pa. Na pre mẽ pamex nê nhỹrmã mẽ pahte kuri tãm amnhĩ nhĩpêx o papa mã xwỳnh ã mẽ pajarê. Kris kukwak ri ã mẽ pajarênh anhỹr jakamã mẽ ate jar Kris ã apunuj nê ri apa htã kot kaj mẽ kritpêm ã amnhĩ nhĩpêx anhỹr ry hkêt nê. Kojã Tĩrtũm mẽ akrã kamã mẽ ajamaxpêr xihitỳx jagjê ka mẽ akupỳm amex nê axihitỳx pê ate amnhĩ nhĩpêx nyw o amnhĩ nhĩpêx rãhã ho ri apa.

11Tĩrtũmja hihtỳx o hihtỳx nê àhpumunh o àhpumunh. Nê hihtỳx xà nê àhpumunh xà kojã aa kêp hirerek nê hapêx kêt kumrêx. ãm hāmri na mẽ kot harênh kot anhỹrja.

Pêtre kapêr jatur xà

12Nê ota Kris kôt mẽ pahtõ Sirastija na inhmã mẽ akaxyw kagàja nhĩpêx pa mẽ awỳr mẽnh kaxyw. Na pa hte kãm ixkapêr nhũm inhma

nê inhmã hã kagà. Na hte Kris kapêr kôt amnhĩ nhĩpêx rãhã ho ri pa. Tã inhmã kagàja nhĩpêx. Mẽ ate kamã harênh nê mar nê tãm ajamxpêr kaxyw. Nê Tĩrtũm kãm mẽ ajapê nê kot mẽmoj to mẽ akutã nojarêt ã mẽ ate kamã harênh kaxyw. Tã kêr ka mẽ kãm mẽ ajapê hã amnhĩ tã harênh ma nê kapêr kôt pix mã amnhĩ nhĩpêx mex rãhã ho ri apa. Mẽ akwỳjaja kot tanhmã hã mẽ ato htãã.

13Nê ota jar Papirõn kamã Kris kôt mẽ pahtõ nê mẽ pahtõxjaja mẽ awỳr hpêr mẽ. Tĩrtũm kot mẽ pahpyrà nê mẽ ho hkra jakamã mẽ kêp mẽ atõ nê mẽ atõx ã mẽ awỳr hpêr mẽ. Nê Xiakre mããnên mẽ awỳr hpêr mẽ. Te kêp ixkra pyræk.

14Nê kêr ka mẽ nhỹri apê Kris kwỳ hã axpên pumu nê mẽ axpên to atõ nê atõx ã axpên mã akapêr mex kurê kumrêx.

E kê Tĩrtũm mẽ apê Kris kwỳ hã mẽ amã mẽ ajamakêtkati nê mẽ apa xà gõ ka mẽ axãmnhĩx ajamakêtkati nê amex nê ri apa ho apa.

Tã ãm ja pix. Ixpê Simãw Pêtre na pa ã mẽ awỳr kagà nê mẽnh anê.

Sikũn Pêtre

Simãw Pêtre kot Jejus kôt hkwyjê hwÿr wam kagà nê mênh kôt hõ mênh

Simãw Pêtre na pre kagàja nhîpêx. Jejus nhÿ hã hkrajê jahkre ho mẽ pa xwÿnhjê hõ na pre. Mẽ kêp Jejus kra hkêtkwÿnhjaja ra kot Jejus ã hpĩr kaxyw nhũm pre kagàja nhîpêx nê krĩ piitã hkôt Jejus kwÿjê hwÿr kurê nê kamã hpĩr hã mẽ kãm mẽmoj tã karõ. Mẽ kot arĩ Tĩrtũm kot amnhĩ nhîpêx kôt amnhĩ nhîpêx rãhã ho pa hã mẽ kãm karõ. Nê hamaxpêr o mẽ hamaxpêr rãhã ho pa hã mẽ kãm karõ.

Nê mẽ hkwyjê kot Tĩrtũm kôt amnhĩ nhîpêx ã amnhĩ jarênh tã hkôt amnhĩ nhîpêx kêt xwÿnhjaja nhũm pre tanhmã mẽ harênh to. ã na pre mẽ kãm mẽmoj jarênh nê hã kagà nê krĩ piitã hkôt mẽ hwÿr rênh anê. Nê mẽ kãm:

1 1Pa Kris kôt ixtõ nê ixtõxjaja. Xà mẽ amex? Ot pa mẽ awÿr kagà nhîpêx nê krĩ piitã hkôt mẽ awÿr kurê. Ixpê Simãw Pêtre na pa wam ixte kagà nhîpêx nê mẽ awÿr mênh tã axte hõ nhîpêx. Ixte Jejus Kris nhÿ hã mẽ ajahkre ho ixpa xwÿnh ã mẽ amã hipêx nê kumê. Na pa hte Jejus mã amnhĩ nhîpêx mex o ri ixpa.

Nê mẽ papytãr xwÿnh Jejus Krisja Tĩrtũm pyrã nê mex o mex. Nê wa kot amnhĩ nhîpêxja mex o mex. Jakamã na pre wa tanhmã mẽ pahkrã hto pu mẽ amnhĩ kaxyw wa hkôt pajamaxpêr tÿx rãhã ho ri papa. Na ka htem ixpyrã nê ã amnhĩ nhîpêx anê. Tã pa mẽ amã kagàja nhîpêx.

2Nã Tĩrtũm mẽ mẽ panhõ Pahihti Jejus wa kot amnhĩ nhîpêxja na ka mẽ ra harênh mar tÿx nê. Wa kot tanhmã amnhĩ nhîpêx to nê tanhmã wa hamaxpêr toja ka mẽ mar tÿx nê wa hkôt pix mã amnhĩ nhîpêx. Tã kêr ka mẽ arĩ ã amnhĩ nhîpêx anhÿr rãhã ho ri apa. Jao axãmnhĩx ajamakêtkati nê akĩnh nê apa ho apa. Na pa hte ã mẽ ato Tĩrtũm mẽ Pahihti Jejus Kris wa hwÿr o ri ixpa anê. Na hte Tĩrtũm mẽ ato mex nê mẽ akutã nojarêtkatã rãhã ho pa.

Tirtūm kot mẽ pahto mex o pa hã harênh

Epes 2.12-13; Wam Tesarôn 1.2-4; Sikūn Pêtre 3.18

3Nê Tirtūmja àhpumunh tỳx o àhpumunh tỳx jakamã na pu htem hkôt amnhĩ xunhwỳ nhũm amnhĩ tã mẽ pahpumu nê mẽ pamã àhpumunh tỳx xà hkwỳ gõ. Hãmri pu mẽ ra uràk nê amnhĩ to mex nê tãm amnhĩ nhĩpêx o ri papa. Tã kot puj mẽ nhỹrmã ma ô krĩ hwỳr api. 4Na pre mẽ pakukamã amnhĩ jarênh o:

—Kot paj nhỹrmã ixkrajê mã ixte amnhĩ nhĩpêx mex kwỳ gõ nhũm mẽ inhỹ hã ho tãm ri amnhĩ nhĩpêx mex o pa. Nê ixpyrà nê hamaxpêr mex o pa.

Anhỹr jao te ra mẽ pamã hkĩnh xà mex kwỳ nhõr pyràk o mẽ panhĩpêx. Nê te ra kot mẽ pahkrãm hamaxpêr mex jagjênh nê mẽ pamã kot amnhĩ nhĩpêx mex jagjênh pyràk. Mẽmo kaxyw na pre ã mẽ panhĩpêx mex anê? Nà uràk nê tãm mẽ pahte amnhĩ nhĩpêx mex rãhã o ri papa kaxyw. Jao mẽ pahte mẽ kêp hkwỳ hkêt xwỳnhjê hkôt amnhĩ nhĩpêx kêt nê. Nê mẽ hamaxpêr punuj o pajamaxpêr kêt nê. Nê hpãnhã mẽ pahte Tirtūm kôt pix mã amnhĩ nhĩpêx rãhã ho papa. ã mẽ pahte amnhĩ nhĩpêx anhỹrja na mex o mex. 5Tã ã Tirtūm kot mẽ panhĩpêx mex anhỹr jakamã kwa kêr ka mẽ kapêr mar tỳx nê hkôt pix mã amnhĩ nhĩpêx mex o ri apa. Jao amnhĩ kaxyw hkôt ajamaxpêr rãhã nê. Kot kaj mẽ ã amã amnhĩ nhĩpêx anhỹr o apa hprãm hã kot kaj mẽ mãănên amã tãm amnhĩ nhĩpêx o apa hprãm. Nê mẽ amã Tirtūm kapêr piitã mar prãm o ri apa. 6Hãmri nê piitã mar pa nê mẽmoj punuj piitã nê amnhĩ to htỳx nê. Nhũm mẽ kêp Kris kwỳ hkêt xwỳnhjaja Kris ã tanhmã mẽ anhĩpêx to htã ka mẽ ãm amnhĩ tã mẽ omu nê mẽ umaj mẽ amã Kris kaga hprãm kêt nê.

Nê mẽ amã Tirtūm mã amnhĩ jarênh rãhã ho apa hprãm.

Nê mẽ amã kapêr mar rãhã ho apa hprãm.

7 Nê mẽ amã Kris kôt mẽ atõ nê mẽ atõxjê ho mex pix o ri apa hprãm. Jao te mẽ amã amnhĩ tã ma pyràk o mẽ piitã mẽ hipêx o ri mẽ hkôt apa.

8E kêr ka mẽ ã amnhĩ nhĩpêx anhỹr o ri apa. Kot ka mẽ ã amnhĩ nhĩpêx anê nê mẽ panhõ Pahihti Jejus Kris kôt amnhĩ nhĩpêx mex o mỗ. Hãmri nhũm mẽ akwỳjaja mẽ apumu nê mẽ apê Kris kwỳ hã mẽ ajarênh kurê kumrêx. 9No kot ka mẽ atõ ixkapêr mar tã hkôt amnhĩ nhĩpêx kêt nê hãmri te Tirtūm kot anê ate amnhĩ tomnuj rênh par mã ajamaxpêr kêt pyràk. 10-11No na ka htem ã amnhĩ nhĩpêx anhỹr kêt nê. Ra mẽ ate Pahihti Jejus Kris kôt amnhĩ nhĩpêx mex jakamã na htem ja hã mẽ apumu nê Tirtūm kot mẽ ato hkra hã mẽ ajarênh kurê kumrêx. Kot kaj mẽ ã hkôt amnhĩ nhĩpêx anhỹr o apa nê mẽmo arĩgro hã apunuj nê apa htã Jejus kaga hkêt nê. Hãmri nê nhỹrmã ma Tirtūm nhõ krĩ hwỳr api

nhūm mẽ apumu nẽ mẽ ato mex rax nẽ. Hāmri ka mẽ õ krī kamã mẽ panhõ Pahihti Jejus Kris wa kuri atīr tūm nẽ amex nẽ apa ho apa.

12Nẽ na ka mẽ ra Tirtūm kot amnhĩ nhĩpêx mar tỳx nẽ amnhĩ krã kamã kot amnhĩ nhĩpêx mã ajamaxpêr tỳx o ri apa. Tã nom kot paj arĩ mẽ amã ja jarênh rãhã ho ri ixpa. 13Kormã ixtīr ri kot paj xatã mẽ amã harênh o amnhĩrīt. Ja na kêt inhmã hprãm. Mẽ ate nhỹrmã tanhmã ri ajamaxpêr to nẽ hkaga pumaj. 14Na pre mẽ panhõ Pahihti Jejus Krisja inhmã tokyx ixyk ã ijarẽ. Kot paj xep kritpêm ri ixtīr nẽ ixpa hkêt nẽ. 15Jakamã na pa kormã ixtīr ri ã mẽ amã kagã nhĩpêx anẽ. Mẽ ate inhmỳr pê arĩ omunh nẽ kamã harênh nẽ Tirtūm kot amnhĩ nhĩpêx mã ajamaxpêr tỳx rãhã ho ri apa kaxyw.

Pêtre kot no ho Jejus pumunh ã amnhĩ jarênh

Matre 17.1-5; Makre 9.1-8; Sikūn Ximotre 3.16-17

16Nẽ na pa pre ra tanhmã mẽ amã mẽ panhõ Pahihti Jejus Krisja jarênh to. Hihtỳx o hihtỳx ã harẽ nẽ àhpumunh tỳx o àhpumunh tỳx ã harẽ. Nẽ nhỹrmã akupỳn mẽ pahwỳr wrỳk ã harẽ. No na pa pre amnhĩ krã hkôt ã harênh anhỹr kêt nẽ. Na pa pre inhno ho Jejus hihtỳx o hihtỳx ã omunh o hkôt ixpa nẽ ixte omunh xà hkôt ã mẽ amã harênh anẽ. 17-18Amnepê mã kormã ixkwỳjê mẽ mẽ ixte arĩ hkôt ixpa ri pa prem hkôt hixêt prêk nhĩmõk wỳr api. Pa nẽ kaxyw Xiakre nẽ Juãw mẽ pa mẽ hkôt ixpimràatã hixêt ã api nẽ himõk ã ixkuhê. Hāmri nhūm Tirtūm tanhmã Jejus to nhūm hirã htỳx kãm xa. Hāmri nhūm Měpahpãm Tirtūmja mẽ inhmã kapêr. Kaxkwa kamã hirã htỳx rax rúm mẽ inhmã kapêr o:

—E ota Ixkrata xa. Inhmã hapê ho inhmã hapê. Anẽ.

Tã ra ixte mar xà hkôt pa amnhĩ xô ri mẽ amã harẽ nẽ hã kagã. 19Na pa prem ã hixêt prêk nhĩmõk ã Jejus pumunh nẽ Tirtūm kot tanhmã harênh to hã mar anẽ. Hāmri nẽ ijamaxpêr o:

—Nà ãm hāmri na pre amnepêm Tirtūm nhỹ hã kapêr jarênh o mẽ pa xwỳnhjaja Jejus kukamã ã harênh anhỹr o pa. Anẽ.

Mẽ kot tanhmã Jejus kukamã harênh toja te kot kamãt kô kamã kanê hpôk nhĩrã hkryre pyrãk. Tã koja nhỹrmã akupỳn wrỳ hāmri nẽ te myt kator nẽ hirã mex nhūm mẽ pahte mẽmoj pumunh mex pyrãk. Jakamã kwa kêr pu mẽ kot tanhmã Jejus kukamã harênh toja mar tỳx rãhã nhūm nhỹrmã te myt kator pyrã nẽ akupỳn mẽ pahwỳr wrỳ. 20Tirtūm kapêr ã kagã htūm kot tanhmã ÿ hã kapêr jarênh xwỳnhjê jarênh to. Mẽ kot mẽmoj kukamã ujarênh ã mẽ harẽ. Nẽ Jejus kukamã tanhmã ujarênh to hã mẽ harẽ. ã mẽ kot mẽmoj kukamã harênh kot anhỹr. Nom na pu htem amnhĩ krã hkôt ã mẽ ujarênh anhỹrja mar tỳx kêt nẽ. Koja Tirtūm Karõ hprĩ hã mẽ pamã ho amnhĩrīt pu mẽ rĩ kormã pahprĩ hã mar tỳx nẽ. 21Na pre ÿ hã kapêr jarênh o mẽ pa xwỳnhjaja amnhĩ krã hkôt hkwyjê

mã ujarênh o pa hkêt nê. Tirtūm Karō na pre tanhmã mẽ hkrã hto nhũm mẽ ỹ hã hkwyjê mã tanhmã harênh to ho pa nê ỹ hã mẽ pamã hã kagà.

Tirtūm kapêr jarênh o hêx xwỳnhjê jarênh

Korosê 2.16-17; Wam Ximotre 4.1-5; Sikūn Ximotre 3.1-9; Jutre 3-16

2 1Nê amnepê m na pre Ijaew kwỳjaja te mẽ kêp Tirtūm nhỹ hã kapêr jarênh xwỳnh pyrāk. Nom Tirtūm kapêr kwỳm ri hkwyjê mã tanhmã ho hêx to ho pa. Tã koja nhỹrmã mẽmojaja mẽ urāk nê mẽ awỳr mra nê ã mẽ amã Tirtūm kapêr o hêx o pa anê. Nê kapêr kwỳm ri tanhmã mẽ ajahkre hto ho mẽ amã hêx o mẽ akôt pa. Mẽ ate mẽ mar nê amnhĩ nhĩpêx nyw kaga nê hpãnhã mẽ kot amnhĩ tomnuj kôt apa hprãm xàj nhũm mẽ hêx rom tanhmã mẽ ajahkre hto ho pa. Pahihti Jesus kot mẽ nê htyk tã nhũm mẽ hkôt amnhĩ nhĩpêx kêt nê axtem nê ri kapêr o hêx o pa. Mỳrapê koja Tirtūm tokyx mẽ kot amnhĩ xà htỳx kamã hamak tũm xà hwỳr mẽ rênh pa.

2Koja mẽ ohtô nê mẽ kapêr ma nê kãm mẽ mar prãm nê. Nê mẽ hkôt hamaxpêr nê mẽ hkôt amnhĩ nhĩpêx o pa. Jao ra hpijaàm kêt nê mẽ hkôt htỳx ri tanhmã amnhĩ tomnuj to ho ri pa. Tã ã mẽ kot Tirtūm kapêr o mẽ hêx xwỳnhjê mar nê mẽ hkôt amnhĩ nhĩpêx anhỹr jakamã koja mẽ kãm Tirtūm kapêr mar prãm xwỳnhjaja mẽ kot amnhĩ nhĩpêx ã mẽ omu nê Tirtūm kapêrja mex kêt ã harênh japêr. 3Tirtūm kapêr o mẽ hêx o mẽ pa xwỳnhjaja na htem kàxpore pix prãm xàj mẽ awỳr mra nê tanhmã mẽ amã kapêr jarênh o hêx to ho pa nhũm Tirtūm ja hã mẽ omunh rãhã ho hkrĩ. Na hte nhỹhỹm mrar kêt nê rỳ htỳx ôt o hikwỹ hkêt nê. Na hte arĩ mẽ kot amnhĩ nhĩpêx ã mẽ omunh rãhã ho hkrĩ. Tã koja nhỹrmã ma mẽ kot amnhĩ xà htỳx kamã hamak tũm xàta hwỳr mẽ kurê nhũm mẽ ma hwỳr hapêx pa.

4Nê amnepê mã kaxkwa kamã Tirtūm kapêr o mẽ wryk xwỳnh kwỳjaja na prem axtem nê Tirtūm kapêr nhĩrôp kuhê nhũm tee ri amnhĩ tã mẽ omu hãmri nê amnhĩ nê mẽ kator pa. Mẽ kamã ukaprí hkêt nê amnhĩ nê mẽ kator pa hãmri nê mẽ kot amnhĩ xà htỳx kamã hamak tũm xàta wỳr mẽ hano. Nhũm prem ma hwỳr pa nê ahkre xupỳm kãm kamàt kô kamã arĩ hkrĩ ho hkrĩ. Tirtūm kot mẽ piitã tanhmã mẽ harênh to xà hã arĩgroja jamãr o hkrĩ. Nê tee ri kãm hapôx prãm kaprỳ ho hkrĩ.

5Nê amnepê m pika kamã ri mẽ pa xwỳnhjaja na prem haxwỳja piitã amnhĩ tomnuj pix o ri pa. Jakamã nhũm Tirtūm ja hã mẽ omu nê mẽ



Sikūn Pêtre 2.5

kamã ukapří hkêt nê. Nê mẽ hwỳr na rax mẽ. Mẽ kãm kapêr mar prãm kêt jakamã nhũm mẽ hwỳr kumê nhũm wrỳk rax kumrêx nê mẽ hanhir pa nê mẽ himex. Âm Noehti mẽ hkwyê pê 7 pixjaja nhũm mẽ kurom htír nê hkã hkĩnh nê mex nê pa. Noehti kormã na xwỳj ri kot mẽ kãm Tĩrtũm kapêr jarênh o ri mẽ hkôt pa htã nhũm mẽ kuma nê âm kuma. Mỳrapê na prem piitã pikaprãr pa.

6Nê Sotô mẽ Gomo wa kamã mẽ pa xwỳnhjaja haxwỳja na prem amnhĩ tomnuj tỳx kumrêx o pa nhũm Tĩrtũm wamtajê pyrã nê mẽ kamã ukapří hkêt nê. Na pre kaxkwa rũm mẽ hipy mẽmo hpòk kwỳ rê nê ho mẽ ho hapêx pa. Tã mẽmo kaxyw na pre ã mẽ hipêx anê? Nà mẽ piitã mẽ kot mẽ harênh mar nê hamaxpêr o:

—Na hte ã Tĩrtũm mẽ kot amnhĩ tomnuj xwỳnhjê nhĩpêx anê.

Anhỳr o hamaxpêr kaxyw na pre ã mẽ hipêx anê. 7-8Nom Rohtija na pre Tĩrtũm Sotô nê kator jakamã nhũm htyk kêt nê. Na pre hkwyêjê rom tãm amnhĩ nhĩpêx tã mẽ kot amnhĩ tomnuj tỳx xwỳnhjê nhõ krĩ kamã òrkwyê nê ri pa. Nê apkati mẽ tee ri mẽ kot amnhĩ nhĩpêx ã mẽ omu nê mẽ ý hã hkaprĩ nê tee ri mẽ hkukamã hamaxpêr o pa. No nhũm mẽ amnhĩ tomnuj ã amnhĩ pumunh nê tokyx tãm amnhĩ nhĩpêx kêt nê. Nê apkati mẽ tanhmã amnhĩ tomnuj to nê kapêr punuj o pa nhũm Rohti tee ri mẽ omu nê hkaprĩ htỳx nê pa. 9Tã nhũm Tĩrtũm mẽ himex kaxyw nê mẽ nê kator nê mẽ himex pa. Na hte ã Tĩrtũm mẽmoj punuj pê mẽ kot amnhĩ kaxyw kãm hamaxpêr nê hkôt amnhĩ nhĩpêx xwỳnhjê pytãr anê. No mẽ kot amnhĩ tomnuj xwỳnhjaja na hte axtem mẽ hipêx. Tã koja nhỹrmã mẽ pahpiitã tanhmã mẽ pajarênh to xã hã arĩgro kato nhũm ma mẽ kot amnhĩ xã htỳx kamã hamak tũm xã wỳr mẽ rênh pa. Âm tapxipix kot ã mẽ hipêx anhỳr kaxyw àhpumunh tỳx. 10Tã mẽ hpijaãm kêt kãm amnhĩ tomnuj o mẽ pa xwỳnhjaja nê mẽ kot Tĩrtũm kapêr mar nê âm mar xwỳnhjaja koja nhỹrmã mẽ homnuj tỳx nê.

Nê Tĩrtũm kapêr o hêx o ri mẽ pa xwỳnhjaja na htem amnhĩ to jarkrar pix o pa. Nê Tĩrtũm kapêr o mẽ wrỳk xwỳnhjê hã hpijaãm kêt nê. Nê axtem nê mẽ ho kapêr punuj pê tanhmã mẽ haprỳ hto ho pa. 11Tã nhũm htem amnhĩ tã mẽ kuma nê âm mẽ kuma. Mẽ kurom mẽ hihtỳx kumrêx tã no âm amnhĩ tã Tĩrtũm mã tanhmã mẽ ho kapêr to hkêt nê.

12Nê mry xoprê na hte htỳx ri pa ho pa. Tã Tĩrtũm kapêr o mẽ hêx o mẽ pa xwỳnhjaja htem mry xoprêta pyrã nê htỳx ri hamaxpêr mex kêt o pa. Jao hprĩ hã mẽmoj mar kêt tã htỳx ri hijuk ri tanhmã mẽmoj jarênh to.

Nê mry xoprêja htỳx pa nhũm mẽ kot hparja pyrã nê mẽ kot Tĩrtũm kapêr o hêx o mẽ pa xwỳnhjaja koja Tĩrtũm nhỹrmã kuwy hwỳr mẽ ho hapêx nê kamã mẽ rênh pa.

13Nê koja nhỹrmã Tĩrtũm mẽ kot tanhmã mẽ ama hêx to ho pa hã mẽ omunh xã hkôt mẽ homnuj tỳx nê. Na htem hpijaãm kêt nê mẽ piitã

mê noo mã tanhmã amnhĩ tomnuj to ho pa. Kamàt kãm nê arĩgro hã. Nê mê kãm tanhmã amnhĩ nhĩpêx to hprãm xà hkôt pix mã amnhĩ tomnuj o pa.

Na htem te mê kêp Kris kôt mê atôjê pyrã nê mê akôt Tĩrtũm kapêr mar xà hã ixkre hwỳr agjê nê mê anhĩhkô hã mê kot Jejus tyk mã hamaxpêr kaxyw pãwti hkwỹ hku. Nom htỳx hkur o hkrĩ nê htyk mã hamaxpêr kêt nê. Kãm Jejus kĩnh kêt tã hêx rom hpijaàm kêt kãm mê anhĩhkô hã htỳx ri hkur o hkrĩ.

14Nê nhỹri krĩ hwỳr pôj nê mênijê pumu nê kãm mê hkĩnh nê. Ra mê mjên ri pa htã nhũm mê kãm mê ho amnhĩkati hprãm nê mê kamã hpijaàm kêt o ri pa.

Nê kormã mê kot Kris kôt amnhĩ xunhwỳr tohtuj anhỹr xwỳnhjê hwỳr mra nê hêx rom tanhmã mê kãm kapêr to pê mê no kupyw o ri mê hkôt pa. Mê kot mê mar nê Kris kaga nê mê hkôt ri amnhĩ nhĩpêx prãm xàj ã mê hipêx anhỹr o pa.

Na htem hikàxpore rũnh o pikuprõnh pix kukamã hamaxpêr o ra ho ôxỳ nê.

Ã na htem amnhĩ nhĩpêx anhỹr o pa. Tã ra Tĩrtũm kot mê homnuj tỳx kaxyw mê hã amnhĩ jarê. 15-16Te mê kot kamàt kô kamã pryjuk ã hpikunor nê htỳx ri pa pyrãk o na htem amnhĩ nhĩpêx nê kãm Tĩrtũm kapêr mar prãm kêt nê amnhĩ tomnuj pix o pa.

Amnepêm Peo hkra Paraãwta kêp Tĩrtũm nhỹ hã kapêr jarênh o pa xwỳnh tã axtem nê kàxpore rax prãm xàj tanhmã amnhĩ tomnuj to kaxyw. Nhũm Tĩrtũm tee ri ja hã omu nê Paraãw krit jumênreja tanhmã hakwa hto nhũm kãm kapêr. Jumênre kapêr kêt tã nhũm Tĩrtũm tanhmã hakwa hto nhũm kãm kapêr nê tanhmã kot amnhĩ tomnuj to kaxywta ã kãm akir nhũm amnhĩ tã kuma hãmri nê ã amnhĩ nhĩpêx anhỹr kêt nê. Tã mê kot Tĩrtũm kapêr o mê hêx ho mê pa xwỳnhjaja na htem Paraãw pyrã nê kàxpore rax prãm xàj tanhmã amnhĩ tomnuj to pix prãm. 17Te hino ra grã nhũm mê tee ri kamã gô japêr pyrãk o na htem amnhĩ nhĩpêx. Rỳ te kakrã hapôx nhũm mê kot omunh nê na wrỳk ã hkamnhĩx kaprỳ pyrãk. Tã ra Tĩrtũm mê kaxyw kamàt kô htỳx pê mê kot amnhĩ xà htỳx kamã hamak tũm xàta o mê nê. 18Na htem htỳx ri amnhĩ tomnuj o pa hã mê amã amnhĩ to jarkrar o ri pa. Jakamã nhũm mēhō ra amnhĩ tomnuj kaga kaxyw nhũm mê tee ri ja hã omu nê kot ã amnhĩ nhĩpêx anhỹr pymaj tanhmã nê kãm kapêr to nê mê kãm:

—Kwa ixte amnhĩ tomnuj o ixpa htã nhũm Tĩrtũm ja hã ixpumu nê ãm ixpumu nê arĩ inhmex ã ijarê. Na pa hte mê hkuprỳjê hwỳr mra nhũm ja hã ixpumu nê ãm ixpumu nê hã tanhmã ixto hkêt nê. Jakamã kwa mê ixpyrà nê arĩ ã amnhĩ nhĩpêx anhỹr o ri apa. Kojã Tĩrtũm tanhmã hã ato hkêt nê. Anê.

Hãmri nhũm mẽ tee ri kuma nẽ ra hamaxpêr kati nẽ. **19**Na htem mẽ kãm kapêr o:

— Kwa mẽ ixpyrà nẽ mãmri amã tanhmã amnhĩ tomnuj to hprãm xà hkôt amnhĩ nhĩpêx o ri apa. Mẽhõ kot kêt ja nê tanhmã amã kapêr to? Anẽ.

Mẽ kot amnhĩ tomnuj xàja te kêp mẽ õ patrãw pyræk jakamã na htem ãm kôt pix mã amnhĩ nhĩpêx o pa. Jakamã kot pu mẽ tanhmã amnhĩ tomnuj to. Nẽ gaa nẽ axte. Nẽ gaa nẽ ra ho amnhĩ pyræk. Hãmri nẽ tee ri pamã hkaga hprãm kaprỳ nhũm te kêp mẽ panhõ patrãw pyræk o mẽ panhĩpêx pu mẽ ãm kôt pix mã ri amnhĩ nhĩpêx o ri papa.

20Nẽ koja mẽhõ ra Tĩrtũm kapêr ma. Nẽ mẽ panhõ Pahihti Jejus Kris jarênhja nhũm hprĩ hã kuma. Kêp mẽ pahte amnhĩ tomnuj pẽ mẽ papytâr xwỳnh ã harênh ma. Tã nhũm mẽ kot Tĩrtũm kapêr o mẽ hêx xwỳnhjaja hwỳr mra nẽ tanhmã kãm ho hêx to nhũm mẽ kuma nẽ kot amnhĩ nhĩpêx tũm o awjanã. Jao amnhĩ tomnuj tỳx o kormã kot Tĩrtũm kapêr mar kêt ri kot amnhĩ tomnujta jakre. **21**Kêp ãm aa kot Tĩrtũm kapêr mar kêt rãhã htyk ronhỹx ja kãm mex nẽ. Nom ra kot mar mex tã ãm kuma nẽ hkaga jakamã koja mex kêt kumrêx. **22**Mẽ kot ã mẽ kot amnhĩ nhĩpêx anhỹr ã mẽ harênh kot:

Rop na hte ojaĩr nẽ akupỹm ojaĩrta ku.

Nẽ hagrô na htem unê nẽ hkumrã nhũm muxre. Tã nhũm mẽ kãm ure nhũm akupỹm hprôt nẽ mra nẽ akupỹm gyw o amnhĩ tomnu pa. Anẽ.

Tã mẽ kot Tĩrtũm kapêr o mẽ hêx xwỳnhjê mar nẽ mẽ hkôt amnhĩ nhĩpêx xwỳnhjaja te mẽ kot rop mẽ hagrô wa kot amnhĩ nhĩpêxta pyrà nẽ Tĩrtũm kapêr kaga nẽ akupỹm mẽ kot amnhĩ nhĩpêx tũm o awjanã nẽ htỳx ri amnhĩ nhĩpêx o pa.

**Tĩrtũm kot pika ho hapêx kaxyw kormã amnhĩ tã
mẽ pajamãr ã harênh**

Matêwre 24.29-31; Xiakre 5.7-11; Apokariip 19.11-16, 21.1-8

3 **1E** Kris kôt ixkrãmnhwỳjaja. Na pa pre ra wam kagata nhĩpêx nẽ mẽ awỳr kurê. Tã ra axte hkôt ja nhĩpêx. Hamẽ wa kamã na pa mẽ amã Tĩrtũm kot tanhmã amnhĩ nhĩpêx to hã harê. Nẽ Jejus Kris nhỹrmã akupỹn mẽ pahwỳr wrỳk ã harê. Mẽ ate mar nẽ tãm amnhĩ nhĩpêx nẽ tãm ajamaxpêr o kutêp mẽ apa kaxyw.

2Amnepê mã Tĩrtũm nhỹ hã kapêr jarênh o ri mẽ pa xwỳnhjaja na prem Tĩrtũm kot nhỹrmã mẽ pahwỳr mẽhõ mênh mã xwỳnhhta jarênh o pa. Kot nhỹrmã mẽ pahwỳr wrỳk nẽ mẽ pahto amnhĩptâr o pa hã harênh o pa. Tã kêt ka mẽ kapêr ma nẽ hã ano htỳx nẽ hkôt ajamaxpêr tỳx rãhã ho ri apa. Nẽ Jejus kot mẽ awỳr mẽ rênh xwỳnhjaja ka mẽ kapêr ma. Mẽ kot mẽ amã mẽmoj jarênh o mẽ pa xwỳnhjaja na htem tanhmã mẽ

amã Pahihti Kris jarênh to ho ri mẽ akôt pa. Nê tanhmã kot mẽ panê amnhĩ nhĩpêx to hã harê. Tã kêr ka mẽ kapêr ma nê hã ano htỳx nê kãm ajamaxpêr tỳx rãhã ho ri apa.

3Nê kwa mẽ inhma. Nhỹrmã Kris akupỳn mẽ pahwỳr wrỳk xwỳj ri koja mẽ kot amnhĩ tomnuj tỳx xwỳnhjaja mẽ awỳr mra. Mẽ hpijaam kêt o pa xwỳnh jakamã koja mẽ tanhmã mẽ akamã amnhĩ tomnuj to ho pa. Nê mẽ apê Kris kwỳ hã mẽ apumu nê mẽ atã hpêr o pikênh o pa. 4Nê htỳx ri Kris ã mẽ akukja nê mẽ amã:

—Kwa no Krisja? Amnepêm akupỳn wrỳk nê mẽmoj piitã tanhmã hipêx to hã amnhĩ jarênh tã arĩ Tirtũm kot mẽmoj to kator krax rũm mẽmoj amarĩ rãhãã. Ra mẽ panhĩgêjtaja pikaprãr par tã nhũm kormã akupỳn wrỳk kêt nê. Kot mẽ pamã amnhĩ to hêx kênã. Mo kaxyw koja kêt akupỳn mẽ pahwỳr wrỳ? Kot mẽ pamã amnhĩ to hêx kênã. Anê.

5-6Nom ã mẽ kot harênh anhỹrja kot anhỹr kêt. Tirtũm kot mẽmoj to kator krax rũm mẽmoj amarĩ rãhã hã mẽ kot harênhja kot anhỹr kêt. Na pre Tirtũm kapêr pix o kaxkwa nê pika ho kato. Nhũm gô hkwỳja kapêr mar xà hkôt pika hã amnhĩ jahkre. Nhũm hpãnhã panhĩ nhĩpêx. Tã no nhũm mẽ kapêr mar kêt kumrêx. Nê mẽ kot amnhĩ tomnuj tỳx mỳrapê na pre Tirtũm gô ho mẽ himex pa. Jao mẽ hwỳr na rax mẽ nhũm mẽ hanhir o mẽ ho hapêx. No nhũm mẽ kot Jejus wrỳk ã hpêr o pikênh xwỳnhtaja kãm ã mẽ harênh anhỹrja mar prãm kêt. Ra mẽ kot mar tã kãm mar prãm kêt nê arĩ mẽmoj piitã rãhã hã ri harênh o pa. 7Pika nê kaxkwaja arĩ rãhã htã koja Tirtũm nhỹrmã mẽ pahpiitã mẽ pahte tanhmã amnhĩ nhĩpêx to hã mẽ pahpumunh kôt tanhmã mẽ pajarênh to. Nê mẽ kot amnhĩ xà htỳx kamã hamak tũm xà hwỳr mẽ kot amnhĩ tomnuj xwỳnhjê rênh pa. Hãmri nhũm rĩ kormã kaxkwa nê pikaja wa pôr nhũm himôk ã mẽmoj piitã hkaxàr pa nê hapêx.

8Nê amgrà pê 1.000ja mẽ pamã amgrà xohtô rax kumrêx no Tirtũm mã te arĩgro pixire pyrãk. 9Tã ra kot mẽ pamã tokyx Jejus akupỳn wrỳk ã harênh tã nhũm kormã wrỳk kêt jakamã nhũm htem tōhã tee ri hamãr o pa nê hamaxpêr o:

—Hêxta waa nê. Tirtũm kot tokyx akupỳn mẽ pahwỳr Jejus mẽnh ã amnhĩ jarênh tã tokyx mẽnh kêt nê.

Anhỹr o harênh tã no ãm kot anhỹr kêt. Na kormã amnhĩ tã mẽ kot amnhĩ tomnuj xwỳnhjê jamãr o pa. Mẽ kot amnhĩ tomnuj kaga nê hkôt amnhĩ xunhwỳr prãm xaj kormã amnhĩ tã mẽ hamã. Kãm mẽ kot amnhĩ xà htỳx kamã hamak tũm xàta wỳr mēhō ho pixire nê mōr prãm kêt jakamã na kormã amnhĩ tã mẽ hamã. 10Tã koja nhỹrmã mẽ panhō Pahihtija akupỳn mẽ pahwỳr wrỳ. Te mẽ àhkĩnh xwỳnh kot amnhĩ nhĩpêx pyrãk o mẽ pajaêr pê akupỳn wrỳ. Pu mẽ pahtỳx ri tanhmã paxapênh to ho ri papa nê akupỳn wrỳk ã hkamnhĩx kêt rãhã nhũm mẽ pajaêr pê akupỳn wrỳ. Hãmri nê ma akupỳm amnhĩ kôt mẽ pahte hkôt

amnhĩ xunhwÿr xwÿnhjê ho àpir par kurê kumrêx. Hāmri nhūm rĩ kormā kaxkwa kaxàr o hkrihkrit tÿx kām hapêx pa. Nê kanhêti mē myt nê mytwrÿre kaxàr pa. Nê pikaja nê määnēn kamā mēmoj piitā kaxàr pa. 11-12Koja nhÿrmā ã mēmoj hapêx par anê. Jakamā kwa kêr pu mē Jejus kutêp tām ri amnhĩ nhĩpêx rāhã ho ri papa. Nê Tirtūm kapêr kôt pix mā amnhĩ nhĩpêx rāhã nê. Nê kām hprām xà hkôt tanhmā kām amnhĩ nhĩpêx to ho ri papa. Kêr kê Jejus akupÿn wrÿ nê ã mē pahte amnhĩ nhĩpêx anhÿr ã mē pahpumu. Koja wrÿ nhūm rĩ kormā kaxkwa nê pikaja wa kaxàr pa. Nhūm kuwy mÿri kaxkwa kamā mēmoj harir xwÿnhja xêr nê ôr pa nê hapêx. 13Tã kwār māmri mēmoj ã amnhĩ nhĩpêx anê. Koja Tirtūm axte mēmoj mex nhĩpêx. Na pre amnhĩ kukamā ja jarēnh o:

Kot paj axte pika nê kaxkwa hō nhĩpêx nhūm mex o mex. Nhūm mē kot amnhĩ kaxyw Jejus mā hamaxpêr nê hkôt amnhĩ xunhwÿr nhūm ixte mē mex ã mē harēnh xwÿnh pixjaja koja mē pika nywja kamā mex nê pa ho pa. Anê.

14Jakamā kwa ixkrāmnhwÿjaja. Kêr ka mē Kris kutêp kapêr kôt amnhĩ nhĩpêx mex rāhã ho ri apa. Jao kutêp ajamakêtkati nê axāmnhix axpēn kôt apa. Kêr ka mē nhÿrmā amnhĩ wÿr omu nê tee ri amnhĩ kukamā ajamaxpêr kêt nê. Ate tām amnhĩ nhĩpêx o apa hã amnhĩ pumu nê akĩnh nê amnhĩ wÿr omunh o akuhê.

15Nom arĩ Jejus kām mē pahkwÿjê ho hkra hprām jakamā na kormā amnhĩ tã mē hamā nê tokyx akupÿn wrÿk kêt nê. Na pre Jejus kôt mē pahtō Pawre Tirtūm nhÿ hã ã mē pamā ja hã kagà anê. Pawreja ixkrāmnhwÿ mex na. 16Na hte mē pakaxyw kagà nhĩpêx nê kamā mē pahte Jejus kutêp tām amnhĩ nhĩpêx o papa hã mē pamā karō. Na hte tōhã mēmoj tã kagà pu mē kamā harê nê tee ri pahprĩ hã mar mā no ãm mar mex kêt nê. Hāmri nhūm Tirtūm kapêr o mē hêx o mē pa xwÿnhjtaja haxwÿja kuma hāmri nê amnhĩ krã hkôt hijuk ri tanhmā ho hêx to. Te mē kot hprĩ hã mar nê harēnh pyrāk nom hprĩ hã mar kêt nê. ã na htem Tirtūm kapêr ã kagà piitā ho hêx o pa anê. Mÿrapê koja mē nhÿrmā amnhĩ xà kamā hamak tÿx kumrêx.

17Tã e Kris kôt ixkrāmnhwÿjaja. Ra mē ate mē harēnh mar jakamā kwa mē okora. Mē amnhĩ nê mē omunh mex nê mē hkôt amnhĩ nhĩpêx kêt nê. Kot kaj mē anê nê Tirtūm kôt amnhĩ nhĩpêx mex kêt nê. 18Na ka htem mē papytār xwÿnh Pahilti Jejus Kris kôt ri amnhĩ nhĩpêx o apa. Tã kêr ka mē arĩ hkôt amnhĩ nhĩpêx mex rāhã ho ri apa. Nê hkôt amnhĩ xunhwÿr tÿx nê. Kêr kê amnhĩ tã mē apumu nê mēmoj to mē akutã nojarêt nê. Krisja mex o mex nê hihtÿx o hihtÿx. Tã kêr pu mē kām mex o mex ã mǎn harēnh rāhã ho ri papa.

Tã ãm ja pix. Ixpê Simāw Pêtre na pa ã mē amã ja hã kagà nê mē awÿr mēnh anê.

Wam Juãw

Juãw kot Jejus kôt hkwỳjê hwỳr kagà nê mênh

Juãw na pre kagàja nhípêx. Na pre kagà hkwỳ nhípêx rax nê. Na pre mãânên Juãw kot tanhmã Jejus kot amnhĩ nhípêx to ho pa ã kagà nê Apokarip nê Sikũn Juãw nê Hapuhã Juãw nhũm pre ja piitã Tĩrtũm nhỹ hã hã kagà.

Juãwja Jejus nhỹ hã hkrajê jahkre ho mẽ pa xwỳnhjê hõ na pre. Nê kệp Xiakre htõ na pre. Tã ra hpigêt tỳx nê kagàja nhípêx. Uràk nê mẽ kot Tĩrtũm kôt amnhĩ xunhwỳr xwỳnhjê mã hipêx. Mẽ kot kamã harênh nê mar nê kãm axpên kĩnh o pa kaxyw. Nê mẽ kot amnhĩ tomnuj ã amnhĩ pumunh kôt tanhmã amnhĩ nhípêx to hã mẽ kãm karõ nê hã kagà. Á na pre Juãw mẽ kãm mẽmoj jarênh nê hã kagà anê nê mẽ hwỳr kumê. Nê mẽ kãm:

Jejus kệp Tĩrtũm kapêr o amnhĩrit xwỳnh ã harênh

Juãw 1.1-4; Eprêw 1.1-4

1 1Pa ixpyrà nê mẽ ate Jejus kôt amnhĩ xunhwỳr xwỳnhjaja? Xà mẽ amex? E ot pa mẽ amã kagàja nhípêx nê mẽ awỳr kumê. Ixte mẽ amã Tĩrtũm kapêr o amnhĩrit xwỳnh jarênh kaxyw. Amnepê mã kormã mẽmoj amrakati ri nhũm pre ra rãhã ri pa ho pa. ãm kukwak ri pix mã na pu htem Tĩrtũm mẽ wa kuri pahtĩr tũm nê papa ho papa mã xwỳnh. Tã ã hã mẽ ixte kapêr o mẽ ajahkre ho ri mẽ ixpa xwỳnhjaja na pa prem ixpiitã kormã akupỹm kaxkwa hwỳr àpir kêt ri inhno ho omunh o ri hkôt ixpa. Nê mẽ ijamak o kapêr mar o ri hkôt ixpa. Nê mẽ inhĩhkra ho hkupênh o ri hkôt ixpa. 2Na pre kaxkwa kamã Hipêêxà hkôt ri pa ho pa htã amnê pika hwỳr mẽ pahwỳr wrỳ. Hãmri nê jar mẽ pakamã kato pa pre mẽ ixkwỳjaja omu. Tã mẽ ixte omunh xà hkôt na pa htem amnhĩ xô ri tanhmã mẽ amã harênh to. Kojã nhỹrmã akupỹm mẽ pahto mẽ pahtĩr pu mẽ kuri pahtĩr tũm nê pamex nê papa ho papa. 3Na pa prem tanhmã kapêr to hã mar o ri hkôt ixpa. Nê kot tanhmã mẽ kãm amnhĩ nhípêx to hã omunh o ri hkôt ixpa. Tã kagàja kamã amnhĩ xô ri ixprĩ hã mẽ amã harê nê hã kagà. Mẽ ate ixpyrà nê aprĩ hã kot tanhmã amnhĩ nhípêx to ho pa hã harênh mar kaxyw. Jao mẽ pahpiitã te ixkre tipxi kamã mẽ papa pyràk o amnhĩ nhípêx o papa nê axpên kôt pajamxpêr o ri papa.

Jao Měpanhĩpêêxà Maati mẽ Kra Jejus Kris wa hkôt amnhĩ nhĩpêx mex o ri papa. 4Tã pa mẽ amã kagàja nhĩpêx nê mẽ awỳr kumê. Mẽ ate kamã harênh nê mar hãmri nê mẽ ixpyrà nê ajamakêtkati nê akĩnh nê ri apa kaxyw.

Tĩrtũm mex o mex ã harênh

Juãw 8.12; Epes 5.3-21; Wam Tesarõn 5.5; Eprêw 4.14-16, 9.11-14

5Nê Jejus kot tanhmã mẽ inhmã Tĩrtũm jarênh toja kot paj amnhĩ xô ri mẽ amã hã kagà. Nà Tĩrtũm kot amnhĩ nhĩpêxja mex o mex. Aa kot tanhmã amnhĩ tomnuj to hkêt. Mex o mex jakamã na hte tanhmã mẽ kot amnhĩ tomnuj to mã amnhĩ jagiênh kêt. ãm kot amnhĩ to mex o kot amnhĩ to mex rãhã nê pa ho pa xwỳnh na. 6Kot mẽ pahte amnhĩ tomnuj kêt ã mẽ pamã karõ jakamã kot puj mẽ pahpê hkra hã amnhĩ jarênh tã amnhĩ tomnuj pix o ri papa nê ãm pahpê hkra hã amnhĩ jarênh kaprỳ nê amnhĩ to paxêx. Tĩrtũm krajaja na htem amnhĩ tomnuj o pa hkêt nê. 7Nom kot puj mẽ hkôt amnhĩ nhĩpêx nê uràk nê tãm ri amnhĩ nhĩpêx o papa. Nê kapêr kôt ri amnhĩ nhĩpêx. Hãmri nê te ixkre tipxi kamã ri Tĩrtũm mẽ Kra Jejus Kris wa hkôt axpên to papa pyràk o amnhĩ nhĩpêx. Na pre Jejus mẽ panê ty nê hkamrõ axkapĩ. Jao mẽ pahte hkôt amnhĩ xunhwỳr xwỳnhjaja mẽ panê mẽ pahte amnhĩ tomnuj piitã hpãnhã amnhĩrer pa. Jakamã ãm kukwak ri pix mã na pu htem tãm amnhĩ nhĩpêx o ri papa.

Mẽ pahpiitã mẽ pahte amnhĩ tomnuj xwỳnh ã mẽ pajarênh

8Nê mẽ pahte tãhã tanhmã amnhĩ tomnuj to jakamã kot puj mẽ aa pahte amnhĩ tomnuj kêt ã amnhĩ jarê hãmri nê ã amnhĩ jarênh anhỳr o paxêx. Tĩrtũm kot mẽ pahpiitã mẽ pahte amnhĩ tomnuj ã mẽ pahpumunh xwỳnh kênã.

Mẽ pahte amnhĩ tomnuj nê tanhmã amnhĩ nhĩpêx

to hã mẽ pamã karõ

Xiakre 4.9-10

9Nê mẽ pahpê Tĩrtũm krajaja na pu htem tanhmã amnhĩ tomnuj to hãmri nê tee ri ja hã amnhĩ pumu nê pahkaprĩ nê. Nê tokyx amnhĩ to Tĩrtũm wỳ. Hãmri nhũm mẽ pama nê Jejus kukwak ri tanhmã hã mẽ pahto hkêt nê. ãm amnhĩ katut kôt tanhmã mẽ pahte amnhĩ tomnuj tota rê nê axte kãm hamaxpêr kêt nê. Ra kot mẽ pahtã amnhĩ jarênh xà hkôt. Na hte Tĩrtũm amnhĩ jarênh xà hkôt tanhmã amnhĩ nhĩpêx to. Tã ra kot mẽ pahpê hkrajaja mẽ pahte amnhĩ tomnuj piitã amnhĩ katut kôt rênh par ã amnhĩ jarênh jakamã na pre ã mẽ panhĩpêx anê. Na hte mẽmoj tã tanhmã amnhĩ jarênh to hãmri nhũm apkati nhũm ihkjê ho kumê nê axtem tanhmã mẽmoj jarênh to hkêt nê. 10Ra kot mẽ pahpiitã mẽ pahte

amnhĩ tomnuj xwỳnh ã mẽ pajarēnh jakamã kot puj mẽ pahtō ã mẽ pajarēnh anhỹrja ma nē hkôt pajamaxpēr kêt japēr. Rỳ kuma nē ãm kuma nē pajamaxpēr o:

— Nà ixte tanhmã amnhĩ tomnuj tore hã.

Anhỹr o amnhĩ jarē. Hãmri nē te ate Tĩrtũm hêx xwỳnh ã harēnh pyràk. Jao amã kapēr mar prãm kêt ã amnhĩ to amnhĩrĩt.

Jejus kêp mẽ paxyr pê Tĩrtũm mã kapēr xwỳnh ã harēnh

Wam Ximotre 2.5; Eprêw 9.11-14

2 1-2E mẽ ate amnhĩ tomnuj o apa hkêt kaxyw na pa ã mẽ amã ixkapēr nē hã kagà anē. Mẽ ate kamã harēnh nē mar hãmri nē tanhmã amnhĩ tomnuj to hkêt kaxyw. Jejus Kris na pre mẽ pahpiitã mẽ pahte amnhĩ tomnuj pãnhã amnhĩrer kaxyw mẽ panê ty. Jakamã kot puj mẽ pahpê hkrajaja tanhmã amnhĩ tomnuj to nhũm ja hã mẽ pahpumu nē te kêp mẽ paxyr pê Tĩrtũm mã kapēr xwỳnh pyràk o amnhĩ nhĩpêx. Mẽ pakurom aa kot amnhĩ tomnuj kêt jakamã na hte mẽ paxyr pê Tĩrtũm mã kapēr nhũm kuma. Hãmri nē kukwak ri pix mã mẽ pahte tanhmã amnhĩ tomnuj to piitã amnhĩ katut kôt rēnh pa nē axte kãm hamaxpēr kêt nē.

Tĩrtũm krajaja kot Tĩrtũm kôt amnhĩ nhĩpêx ã mẽ kãm karō

3Nē na pu htem Tĩrtũm kôt ri amnhĩ nhĩpêx o papa hã amnhĩ pumunh kôt pahpê hkra hã amnhĩ pumunh mex nē. 4Nom koja mēhō kêp hkra hã amnhĩ jarēnh tâ hkôt amnhĩ nhĩpêx kêt nē ãm kêp hkra hã amnhĩ to hêx. 5Na htem Tĩrtũm kapēr kôt amnhĩ nhĩpêx o pa pê kãm hkĩnh tỳx ã amnhĩ to amnhĩrĩt. Nē kêp hkra hã amnhĩ to amnhĩrĩt mex o pa. 6Jakamã kêt ka mẽ apê Jejus Kris kwỳ hã amnhĩ jarēnh xwỳnhjaja hkôt pix mã amnhĩ nhĩpêx mex o ri apa.

Mẽ pamã axpên kĩnh ã mẽ pamã karō

Juāw 13.34-35; Wam Juāw 3.14-18

7E Kris kôt ixkràmnhwỳjaja. Inhmã mẽ akĩnh jakamã na pa ã mẽ amã mēmoj jarēnh nē hã kagà anē. Kot paj mẽ amã mēmoj nyw jarēnh kêt nē. Ra mẽ ate mēmoj mar xwỳnhhta kot paj axte mẽ amã harē. Mẽ pamã axpên kĩnh nē tãm axpên nhĩpêx o papa hã Tĩrtũm kot mẽ pamã karōta. Ra mẽ ate mar tâ kot paj axte mẽ amã harē nē hã kagà. 8Wam Tĩrtũm kot mẽ pamã axpên kĩnh ã mẽ pamã karōja kormã Jejus kot mẽ panê htyk hkêt ri kot mẽ pamã hã karōta na. Tã ra Jejus kãm mẽ pajapê xàj mẽ panê htyk jakamã na pa axte ã mẽ ate axpên nhĩpêx anhỹr o apa hã mẽ amã karō nē hã kagà. Mẽ ate Kris pyrà nē amã axpên kĩnh xàj tanhmã axpên kutã anojarêt to ho ri apa kaxyw. Nom kormã mẽ pahte Jejus kôt amnhĩ xunhwỳr kêt ri na pu prem ã axpên nhĩpêx anhỹr kêt nē. Tã hkôt amnhĩ xunhwỳ hãmri nē ã axpên to mex o papa anē. 9-11Tã koja mēhō

kot Jejus kôt amnhĩ nhĩpêx ã amnhĩ jarênh tã kãm hkwỳjê hkĩnh kãm àmnhĩx ri mẽ kutã nojarêť o pa hkêť nê. Hãmri nê kot Jejus kôt amnhĩ nhĩpêx ã amnhĩ jarênh ã amnhĩ to hêx. Jao te htỳx ri kamàť kô kamã pa pyràk. No koja mẽhõ kãm hkwỳjê hkĩnh kãm mẽ kutã nojarêť o pa nê mãănêň Jejus kôt amnhĩ nhĩpêx mex o pa. Jao te hirã kamã ri pa pyràk. Jakamã tanhmã hkwỳjê homnuj to ho pa hkêť nê mẽ piitã mẽ ho mex o xppên pyràk o pa.

Juãw kot mẽ piitã ahpỳnhã tanhmã mẽ kãm kapêr to

12-14E kot pa ahpỳnhã tanhmã mẽ amã ixkapêr to nê hã kagà. Mẽ apiitã te mẽ apê ixkra pyràk. Na ka prem Jejus kôt amnhĩ xunhwỳ nhũm Tĩrtũm ja hã mẽ apumu nê Kra kukwak ri mẽ ate amnhĩ tomnuj piitã amnhĩ katut kôt rênh pa nê axte kãm hamaxpêr kêť nê. Jakamã ra mẽ ate Tĩrtũm kêp Mêpanhĩpêêxà Maati hã omunh mex.

Nê mẽ ate Jejus kôt amnhĩ xunhwỳr ã amgrà xohtô xwỳnhjaja. Amnepêm amrakati ri Jejus ra rãhã ri pa ho pa xwỳnhja kôt mẽ ate amnhĩ xunhwỳr xwỳnhjaja kot paj mẽ amã tanhmã ixkapêr to nê hã kagà.

Nê mẽ akwỳjaja ham Jejus kôt mẽ ate amnhĩ xunhwỳr xwỳnhjaja ra mẽ ate Tĩrtũm kapêr mã ajamaxpêr rãhã ho ri apa. Jakamã na hte Satanasti mẽ ate amnhĩ tomnuj prãm xàj tee ri tanhmã mẽ akrã hto ka mẽ Jejus nhỹ hã kutã amnhĩ to htỳx pê hkôt amnhĩ nhĩpêx kêť nê.

Mẽ kot amnhĩ tomnuj xwỳnhjaja tanhmã kot amnhĩ nhĩpêx to

Matêwre 6.24; Eprêw 11.24-26; Xiakre 4.4

15Nê kêr ka mẽ amã Tĩrtũm kôt amnhĩ nhĩpêx prãm xàj mẽ kot amnhĩ tomnuj xwỳnhjê hkôt amnhĩ nhĩpêx kêť nê. Nê mẽ hamaxpêr punuj xwỳnhjê hkôt ri amnhĩ nhĩpêx kêť nê. Kot kaj mẽ hkôt amnhĩ nhĩpêx hãmri nê amã Tĩrtũm kĩnh kêť ã amnhĩ to amnhĩrit. 16Mẽ kot amnhĩ tomnuj xwỳnhjaja na htem mẽmoj punuj mã hamaxpêr nê hkôt tanhmã amnhĩ tomnuj to. Nê mẽmoj pumu nê ra kãm ho õ hprãm nom Tĩrtũm pê ja omnuj ã hkamnhĩx kêť nê. Rỳ tanhmã mẽhõ kot amnhĩ tomnuj to hã omu nê hkôt kãm amnhĩ nhĩpêx prãm. Nê tanhmã amnhĩ to jarkrar to ho ri pa. ã na hte mẽ kot amnhĩ tomnuj xwỳnhjaja amnhĩ nhĩpêx anhỹr o pa. Mẽ kot amnhĩ nhĩpêxja Mêpanhĩpêêxà



Wam Juãw 2.16-17

Tĩrtũm kām hprām kêt. 17Koja nhỹrmã mẽ kot tanhmã amnhĩ tomnuj toja piitã hapêx pa. Nê mẽ hamaxpêr punujja mãânên nhỹrmã hapêx pa. Nê mẽ kot amnhĩ tomnuj o mẽ pa xwỳnhjaja koja mẽ amnhĩ xà htỳx kamã hamak rãhã ho pa ho pa. No Tĩrtũm kôt mẽ kot amnhĩ nhĩpêx o mẽ pa xwỳnhjaja koja mẽ kurom kuri htĩr tũm nê mex nê hkĩnh nê pa ho pa.

Kãm Kris kurê xwỳnh maati jarênh

Wam Juāw 4.1-6; Sikũn Juāw 7-11

18E Kris kôt ixkwỳjaja. Kris akupỹn mẽ pahwỳr wrỳk kukamã koja mẽmoj tanhmã amnhĩ nhĩpêx to. Na pre ra Kris kôt mẽ panhĩõja mẽ pamã ã harênh anê nê harênh o:

—Koja mẽ panhõ Pahihti Kris akupỹn mẽ pahwỳr wrỳk kaxyw hãmri nhũm kêp Kris ã amnhĩ to hêx xwỳnh maati kumrêx nhỹhỹnh kato. Hãmri nê hêx rom te Kris pyrã nê tanhmã mẽ kãm kapêr to nê tanhmã mẽ hipêx to ho pa nhũm rĩ kormã Kris akupỹn mẽ pahwỳr wrỳ. Anê.

Na pre hkukamã ã harênh anê ka mẽ harênh ma. Tã ra mẽ kêp Kris ã amnhĩ to hêx xwỳnhjaja ohtô nê mra nê kãm hkurê xwỳnh maatita kukamã tanhmã amnhĩ nhĩpêx to pê mẽ kãm amnhĩ to hêx o pa. Jakamã na pa ixprĩ hã mẽ amã tanhmã mẽ harênh to. Koja tokyx kêp Kris ã amnhĩ to hêx xwỳnh maatita nhỹhỹnh mẽ pahwỳr kato. 19Na pre hkwỳjaja mẽ pahpê Kris kwỳjê hkôt ri pa htã mẽ pahkĩnhã kêp Kris kwỳ hkêt. Kêp hkwỳ ronhỹx arĩ mẽ pahkôt Kris kôt amnhĩ nhĩpêx o pa. Nom axtem nê àhpumunh tỳx pyrã nê mẽ pahkaga nê htỳx tanhmã amnhĩ tomnuj to ho pa. Jao kêp Jejus kwỳ hkêt ã amnhĩ to amnhĩrit.

20No kêt mẽ pahpê Tĩrtũm krajaja na pre Jejus mẽ pahwỳr Karõ rê nhũm mẽ pahkarõ mã agjê nê mẽ pahkrãm kapêr mex jagjê. Jakamã na pu mẽ mẽ kêp Kris kwỳ hkêt xwỳnhjê rom Tĩrtũm kapêr mar mex nê.

21Xà mẽ ate Tĩrtũm kapêr ã kagà pumunh kêt kôt na pa ã mẽ amã ixkapêr nê hã kagà anê? Nà ra mẽ ate omunh nê mar mex kênã. Tã mẽ ate mẽ kot tanhmã Jejus o hêx to xwỳnhjê pumunh mex nê mẽ harênh mar mex kaxyw na pa ã mẽ awỳr kagà nhĩpêx nê mẽnh anê. Kêr kê mẽ mẽmo arĩgro hã mẽ awỳr agjê nê tanhmã mẽ amã Jejus o hêx to ka mẽ aprĩ hã mẽ omunh mex kurê kumrêx. 22Tanhmã na htem Jejus o hêx to? E kot paj ixprĩ hã mẽ amã tanhmã mẽ harênh to ka mẽ inhma. Nà koja mẽhõ mẽ amã tanhmã harênh to nê harênh o:

—Nà Jejus kêp Tĩrtũm Kra hkêt. Tĩrtũm kot mẽ pahwỳr mẽnh kêt tã ka htem atỳx kapêr kôt ri amnhĩ nhĩpêx o ri apa. Kwa kêt mẽ ixkapêr kôt mãn ri amnhĩ nhĩpêx o ri apa.

Anhỹr o mẽ amã kapêr ka mẽ ama nê kãm Kris mẽ Tĩrtũm wa hkĩnh kêt xwỳnh ã omunh kurê kumrêx. 23Koja mẽhõ Tĩrtũm Kra Jejus kaga nê mãânên Hipêêxà kaga. No koja mẽhõ Tĩrtũm Kra hkôt amnhĩ xãm nê mãânên Hipêêxà hkôt amnhĩ xãm.

Mě pahte Kris kaga pymaj tanhmã amnhĩ nhĩpêx to hã mẽ pamã karõ

24 Amnepêm mẽ ate Jejus kôt amnhĩ xunhwÿrta ã na ka prem kêp Tĩrtũm Kra hã Tĩrtũm kot mẽ pahwÿr mēnh xwÿnh ã harēnh ma. Tã kêr ka mẽ arĩ amnhĩ kaxyw hkôt ajamaxpēr nē hkôt pix mã amnhĩ nhĩpêx o ri apa. Kot kaj mẽ anē nē Mēpanhĩpêêxà Maati mẽ Kra wa hkôt amnhĩ nhĩpêx mex o apa rãhã ty. 25 Hãmri nē wa kuri atĩr tũm nē amex kumrēx nē apa ho apa. Ra Jejus kot ja jarēnh xà hkôt.

26 Na pa ã mẽ amã ixkapēr nē hã kagã anē. Mě aprĩ hã mẽ amã Jejus o hēx xwÿnhjê kapēr mar nē mẽ kot mẽ amã hēx kôt mẽ omunh mex kaxyw. 27 Tĩrtũm Karõ na pre mẽ akarõ mã gjêx pa nē mẽ amã Tĩrtũm kapēr piitã o amnhĩrĩt mex o mẽ akôt pa. Jakamã mẽmo kaxyw kot kaj mẽ Tĩrtũm kapēr o hēx xwÿnhjaja kot tanhmã harēnh toja ma? Ra Tĩrtũm Karõ kot mẽ amã ho amnhĩrĩt o mẽ ajahkre mex o pa kēnã kot ka kêt mẽ nhãm mẽ kapēr ma. Na hte Tĩrtũm Karõja mẽ urã nē Tĩrtũm kapēr ho hēx kêt nē. ãm katat kôt kot ho amnhĩrĩt mex jakamã kwa kêr ka mẽ mar tÿx nē hkôt ri amnhĩ nhĩpêx mex rãhã ho ri apa.

Mě pahte tãm ri amnhĩ nhĩpêx ã mẽ pamã karõ

Juãw 14.25-26, 15.1-8

28 E Jejus kôt ixkrajaja. Kêr ka mẽ arĩ Kris kôt amnhĩ nhĩpêx mex rãhã ho ri apa. Kê nhÿrmã akupÿn mẽ pahwÿr wrÿk o tē ka mẽ amnhĩ wÿr omu nē akĩnh nē. Nē akĩnh kãm axãmnhĩx kutã mra nē hkaxpa nē amnhĩ kamã amã uma hkêt nē. Rÿ mẽmoj tã amnhĩ tã apijaãm kêt nē. ãm axãmnhĩx akĩnh nē ma kutã mra. 29 Krisja mex o mex jakamã na pu htem urak nē amnhĩ to mex o ri papa. Mě pahte amnhĩ to mex o papa xwÿnhjaja urak nē mẽ pahpê Tĩrtũm kra na pu mẽ.

Tĩrtũm krajê hkukamã tanhmã mẽ harēnh to

Rõmãn 8.18; Sikũn Korĩt 3.18; Sikũn Pêtre 3.11-14

3 1 Nē Mēpanhĩpêêxà Maati kãm mẽ pajapê htÿx kumrēx jakamã na pre mẽ pahte hkôt amnhĩ xunhwÿr ã mẽ pahpumunh kôt mẽ pahpê hkra hã mẽ pajarē pu mẽ pahpê hkra nē ri papa. Ja na mẽ pamã mex o mex. Nom mẽ kot hkôt amnhĩ xunhwÿr kêt xwÿnhjaja kot hprĩ hã ja hã mẽ pahpumunh kêt jakamã na htem mẽ pahte tãm amnhĩ nhĩpêx ã mẽ pahpumu nē tee ri hamaxpēr.

2 E Kris kôt ixkwÿjaja. Ra mẽ pahpê Tĩrtũm kra htã kormã mẽ pahte amnhĩ kukamã mẽ pahprĩ hã ja hã amnhĩ pumunh mex kêt. Koja nhÿrmã Jejus akupÿn mẽ pahwÿr wrÿ pu mẽ pano ho tanhmã kute hã omunh mex nē. Hãmri nē tã te kot amnhĩ nhĩpêx pyrak o amnhĩ nhĩpêx mex o papa. Ra mẽ pahte ja mar mex. 3 ã mẽ pahte amnhĩ kukamã pajamaxpēr anhÿr o papa xwÿnhjaja na pu htem kormã amnhĩ wÿr Jejus kamã

pajamak o papa. Pê uràk nê mẽmoj punuj mã pajamaxpêr kêt o papa. Nê uràk nê tanhmã amnhĩ tomnuj to hkêt nê.

Tĩrtũm krajaja kot amnhĩ tomnuj o pa hkêt ã mẽ kãm karõ

4Nê mẽ kot amnhĩ tomnuj o mẽ pa xwỳnhjaja na htem Tĩrtũm kapêr kwỳm ri amnhĩ nhĩpêx o pa. Tã kot puj mẽ tanhmã amnhĩ tomnuj to hãmri nê mẽ uràk nê kapêr kwỳm ri amnhĩ nhĩpêx. 5No Jejus na pre mẽ pahte amnhĩ tomnuj pãnhã amnhĩrer kaxyw mẽ pahwỳr wrỳ. Aa kot amnhĩ tomnuj kêt jakamã tapxipix kot mẽ pahpãnhã amnhĩrer mã tãm. Ra mẽ pahte ja jarênh mar mex. 6Jakamã mẽ pahpê hkwyjaja na pu htem ri pahtỳx tanhmã amnhĩ tomnuj to ho papa hkêt nê. ã mẽ kot amnhĩ nhĩpêx anhỳr xwỳnhjaja kêp hkwy hkêt. 7Nom koja mẽhõ Kris pyrã nê tãm amnhĩ nhĩpêx o pa hãmri nê kêp Tĩrtũm kraa. Jakamã kwa koja mẽhõ Tĩrtũm kapêr kwỳm ri tanhmã mẽ amã kapêr to ka mẽ ama nê ãm ama. 8Mẽ kot amnhĩ tomnuj o mẽ pa xwỳnhjaja na htem Satanasti hkõt ã amnhĩ nhĩpêx anhỳr o pa. Satanastija Tĩrtũm kot mẽmoj to kator krax rũm nhũm ã kot amnhĩ tomnuj anhỳr o pa xwỳnh na. Tã ã kot amnhĩ nhĩpêx anhỳr o paja o hapêx par kaxyw na pre Tĩrtũm Kra Jejusja amnê pika hwỳr wrỳ.

9Nom mẽ papajaja mẽ pahpê Tĩrtũm kra na pu mẽ. Na pre mẽ pahwỳr amnhĩ Karõ rê nhũm mẽ pahkarõ mã gjêx pa nê mẽ pahkõt pa ho pa. Jakamã tanhmã kot puj wem amnhĩ to nê Satanasti pyrã nê pahtỳx ri amnhĩ tomnuj o papa? Nà kot puj mẽ ã amnhĩ nhĩpêx anhỳr kêt nê. 10Koja mẽhõ tãm amnhĩ nhĩpêx kêt nê hãmri nê mãânên hkwyjê kamã ukapri hkêt nê. Hãmri nê ã amnhĩ nhĩpêx anhỳr o kêp Tĩrtũm kra hkêt ã amnhĩ to amnhĩrit. ãm kêp Satanasti hkra hã amnhĩ to amnhĩrit kurê kumrêx.

Mẽ pamã axpên kĩnh o te Jejus kãm mẽ pahkĩnh pyrãk ã mẽ pamã karõ

Matêwre 22.39; Rukre 10.25-37; Juāw 13.31-35

11Nê kêr ka mẽ arĩ amã axpên kĩnh pê tãm axpên nhĩpêx o ri apa rãhã nê. Te amnepê mã mẽ ate Jejus kõt amnhĩ xunhwỳr ã arĩgrota ã mẽ kot mẽ amã ja hã karõ pyrã nê. 12No mẽ ri finat Kaĩ kot amnhĩ nhĩpêx pyrãk o amnhĩ nhĩpêx kêt nê. Kêp Satanasti hkra jakamã na pre htõja pĩ. Kurom kot tãm amnhĩ nhĩpêx ã omu nê kamã gryk nê kupĩ. 13Tã koja mẽ kêp Tĩrtũm kra hkêt xwỳnhjaja Kaĩ pyrã nê kêp mẽ aprãm nõkati nom kêr ka mẽ amnhĩ tã mẽ omu nê tee ri amnhĩ kukamã ajamaxpêr kêt nê. 14Kormã mẽ pahte Jejus kõt amnhĩ xunhwỳr kêt ri na pu prem mẽ uràk nê amnhĩ tomnuj o papa. Jao mẽ pahpê kuwy hwỳr papa mã xwỳnh. Tã mẽ pahte Jejus kõt amnhĩ xunhwỳr jakamã ra pahpê Tĩrtũm mẽ Kra wa kuri pahtĩr tũm nê papa mã xwỳnh. Jakamã na pu htem mẽ kêp hkra hkêt xwỳnhjê kurom pamã mẽ piitã mẽ hkĩnh o

tanhmã mẽ ho mex to ho papa. Mẽ kãm amnhĩ kwỳjê hkính kêt xwỳnhjaja arĩ mẽ kêp kuwy hwỳr mẽ pa mã xwỳnh na mẽ. Ra mẽ pahte ja jarênh mar mex. 15Mẽ kãm mẽ hpar prãm o mẽ pa xwỳnhjaja koja nhỹrmã Tĩrtũm mẽ Kra wa kuri htĩr tũm nẽ pa ho pa hkêt nẽ. Ra mẽ pahte mããnẽn ja mar mex. Jakamã kwa mẽ amã akwỳjê hprãm nõkati ho ri mẽ apa xwỳnhjaja. Tĩrtũm noo mã te ra mẽ ate mẽ hpar pyræk jakamã kot kaj mẽ arĩ ã amnhĩ nhĩpêx anhỹr o ri apa hãmri nẽ nhỹrmã Tĩrtũm nhõ krĩ hwỳr axàpir kêt nẽ.

16-18E ixkwỳjaja. Kwa kêr pu mẽ pajakwa pix o pamã axpẽn kính ã amnhĩ jarênh kêt nẽ. Mããnẽn axpẽn kutã panojarêt o ri papa. Nẽ tanhmã axpẽn to mex to. Tanhmã na pre Jejus kãm mẽ pajapê hã amnhĩ nhĩpêx to? Nà na pre kãm mẽ pamex prãm xàj mẽ panê ty. Kãm amnhĩ tã ma hkêt kãm mẽ pakamã ukapri xàj mẽ panê ty. Tã kêr pu mẽ uræk nẽ pahkwỳjê kamã paxukapri ho mẽ kutã panojarêt rãhã ho papa. Jao mẽ paxàpkur xà hã panhõ pumu nẽ nhỹri pahkwỳjê hõ pumu nhũm kêp amrakati. Pu mẽ tee ri ja hã omu hãmri nẽ kãm mẽ panhõta kwỳ gõ. Kot pu mẽ ã amnhĩ nhĩpêx anhỹr kêt nẽ hãmri nẽ pamã Tĩrtũm kính ã amnhĩ jarênh kaprỹ. 19Nẽ kot puj mẽ ã axpẽn to mex o papa anẽ nẽ ra pahte Tĩrtũm kôt amnhĩ nhĩpêx mex ã amnhĩ to amnhĩrit. Hãmri nẽ ra paxàmnhĩx kãm tanhmã amnhĩ jarênh to ho papa. Amnhĩ kamã pamã uma hkêt nẽ paxàmnhĩx pajamakêtkati nẽ kãm tanhmã amnhĩ jarênh to.

Mẽ paxàmnhĩx amnhĩ to Tĩrtũm wỳr ã mẽ pamã karõ

20Nẽ kot puj mẽ mẽmo arĩgro hã tanhmã amnhĩ tomnuj to hãmri nẽ tee ri ja hã amnhĩ pumu nẽ amnhĩ kamã pagryk nẽ. Na hte Tĩrtũm tanhmã mẽ pahte amnhĩ tomnuj to hã mẽ pahpumu nom arĩ kãm mẽ pajapêê. Mẽ parom àhpumunh o àhpumunh jakamã kot mẽ pahte amnhĩ tomnuj prãm kêt ã mẽ pahpumunh mex. 21Jakamã puj mẽ ã kãm pajamaxpêr anẽ nẽ amnhĩ kamã pamã uma hkêt kãm paxàmnhĩx tanhmã ri amnhĩ to hwỳr to ho ri papa. 22Kot puj mẽ hkôt amnhĩ nhĩpêx o papa rãhã nẽ mẽmoj tã kuwỳ. Nẽ kãm hprãm xà hkôt amnhĩ nhĩpêx o papa hã amnhĩ pumunh kôt mẽmoj tã kuwỳ. Hãmri nhũm mẽ pama nẽ tanhmã mẽ pamã mẽmoj to rỳ mẽ pamã mẽmoj gõ.

Te ixkre pixi kamã mẽ pahtipxi pyræk ã mẽ pamã karõ

23Nẽ tanhmã mẽ pahte amnhĩ nhĩpêx to ho papa hã na hte Tĩrtũm mẽ pamã karõ? Nà mẽ pahte amnhĩ kaxyw Kra Jejus Kris kôt pajamaxpêr nẽ hkôt amnhĩ nhĩpêx o papa hã na hte mẽ pamã karõ. Nẽ kapêr xà hkôt pamã axpẽn kính o mẽmoj to axpẽn kutã panojarêt o papa hã na hte mẽ pamã karõ. Na hte ã mẽ pahte amnhĩ nhĩpêx anhỹr ã mẽ pamã karõ anẽ. 24Jakamã kot puj mẽ kapêr xà hkôt axpẽn nhĩpêx o papa nẽ te ixkre tipxi kamã mẽ pahte axpẽn kôt Tĩrtũm kôt ri papa pyræk. Ra

kot mẽ pahwỳr Karõ rēnh nhũm kot mẽ pahkarõ mã gjêx jakamã na hte mẽ pahkôt pa ho pa hã amnhĩ to amnhĩrĩt.

Mẽ kot Kris kapēr jarēnh ã amnhĩ to hêx xwỳnhjê jarēnh

Wam Korĩt 12.1-3; Wam Juāw 2.18-26; Sikũn Juāw 7-11

4 1-3 Nê koja mẽhõ Tĩrtũm kapēr o mẽ ajahkre kaxyw mẽ amã tanhmã Jejus Kris jarēnh to nê ãm hãmri harē nê harēnh o:

— Na pre Tĩrtũm Kra Jejus mẽ pahwỳr wrỳ nê ĩ ho ĩ ho mẽ pakamã kato. Tĩrtũm tãm na pre mẽ pahwỳr kumẽ nhũm wrỳ.

Anhỹr o mẽ amã harē ka mẽ ama nê kapēr kôt ajamaxpēr kurê kumrêx. ãm hãmri na hte Tĩrtũm Karõ nhỹ ã harēnh anê. No koja Jejus kêp Tĩrtũm Kra hkêt ã harē ka mẽ ama nê ãm ama nê hkôt ajamaxpēr kêt nê. Kãm Kris kurê xwỳnh maati nhỹ hã kapēr xwỳnhjaja na hte ã harēnh anhỹr o pa. Na ka prem ra kãm Kris kurê xwỳnh maati tokyx hpôx ã harēnh ma. Tã na ra ã hã kapēr xwỳnhjaja ohtô nê pika piitã hkôt mẽ hkôt pa nê te Tĩrtũm Karõ nhỹ hã mẽ kãm kapēr pyrãk o amnhĩ nhĩpêx o pa. Nom ãm amnhĩ to hêx o pa. Jakamã e kwa ixkwỳjaja. Koja mẽhõ mẽ awỳr mra nê tanhmã mẽ amã Tĩrtũm kapēr jarēnh to ka mẽ aprĩ hã ama nê rĩ kormã kêp Tĩrtũm nhỹ hã kapēr jarēnh xwỳnh ã harē rỳ kot amnhĩ to hêx xwỳnh ã harē.

4 Kêt mẽ papajaja jajê rom mẽ pahpê Tĩrtũm kra na pu mẽ. Nê Tĩrtũm Karõ kot ra mẽ pahkarõ mã gjêx xwỳnhhta hihtỳx o jajê piitã mẽ hakrenh. Jakamã na pu htem ã hã mẽ kutã amnhĩ to htỳx o papa nhũm mẽ tee ri tanhmã mẽ pamã Jejus o hêx to kaprỳ. Pu mẽ kuma nê ãm mẽ kuma. 5 Mẽ kêp Tĩrtũm kra hkêt jakamã na htem hkôt amnhĩ nhĩpêx kêt nê. Mẽ kot amnhĩ nhĩpêxja axtem na. Jakamã na htem Tĩrtũm kapēr kwỳm ri tanhmã hkra hkêt xwỳnhjê mã kapēr to ho pa nhũm mẽ kuma nê kãm mẽ mar prãm nê. 6 Nom mẽ ixte Tĩrtũm kapēr o mẽ ajahkre xwỳnhjaja na pa htem mẽ kurom Tĩrtũm nhỹ hã ixkatãt kôt ãm hãmri mẽ amã kapēr jarēnh o ri ixpa. Jakamã ka mẽ apê hkra hã mẽ amã mẽ inhmar prãm nê. No mẽ kêp hkra hkêt xwỳnhjaja kãm mẽ inhmar prãm kêt.

Na pu htem pahprĩ hã mẽ kapēr ã mẽ kuma nê rĩ kormã tanhmã mẽ harēnh to. Tĩrtũm nhỹ hã kapēr ã mẽ harē rỳ kãm hkurê xwỳnh maati nhỹ hã kapēr ã mẽ harē.

Tĩrtũm kãm mẽ pajapê hã tanhmã amnhĩ nhĩpêx to hã harēnh

Juāw 3.16-21; Rõmãn 5.5-9, 8.35-37

7 E ixkwỳjaja. Na hte Tĩrtũm tanhmã mẽ pahpê hkrajê ho pu mẽ pamã axpēn kĩnh nê. Jakamã kêt pu mẽ ã axpēn nhĩpêx anhỹr jao axpēn to mex pix nê. ã Tĩrtũm kot mẽ panhĩpêx anhỹr jakamã kêt pu mẽ pahpê hkrajaja ã hã ã axpēn nhĩpêx anhỹr o ri papa.

8Koja mēhō Tirtūm kīnhā kām mē hkwỳjê hkīnh kêt hāmri nē mē kamā ukaprī hkêt o pa. Hāmri nē kēp Tirtūm kra hkêt ā amnhī to amnhīrīt mex nē.

9-10Tirtūm kām mē pajapê htỳx kumrêx. Kormã mē pamã hkīnh kêt ri nhūm kumrêx amnhī rom kām mē pajapê ho pa. Nē kām mē pajapê xàj mē pahwỳr Kra pyxita mē. Mē pahte amnhī tomnuj pānhã kot mē panê htyk kaxyw. Mē pahte kukwak ri amnhī nhīpêx nyw o amnhī nhīpêx nē nhỹrmã wa kuri pahtīr tūm nē pamex nē papa ho papa kaxyw. Ā na pre Tirtūm mē pahwỳr Kra mēnh anhỹr o kām mē pajapê hã amnhī to amnhīrīt.

11E ixkwỳjaja. Tirtūm kām mē pajapê htỳx jakamã kwa kēr pu mē uràk nē pamã axpēn kīnh o papa. Nē axpēn kamã paxukaprī nē. 12Aa mē pahtō pahte pano ho Tirtūm pumunh kêt tā na hte mē pakamã pa ho pa. Pu mē kām mē pajapêta pyrã nē ỹ hã pamã axpēn kīnh o papa. 13Na pre mē pahwỳr Karō rē nhūm mē pahkarō mã agjê pu mē ỹ hã kot amnhī nhīpêx o amnhī nhīpêx o papa.

14Nē mē ixpê Jejus nhỹ hã mē ajahkre xwỳnhjaja. Mē ixte kot amnhī nhīpêx nē kot mēmoj tanhmã ho hã omunh o ri hkôt ixpa jakamã na pa htem ma mē piitã mē kām harēnh o ri mē hkôt ixpa. Nē mē kām harēnh o:

— Tirtūm na pre mē pahwỳr Kraja mē. Kot mē pahpiitã mē panê htyk kaxyw mē pahwỳr kumê. Anê.

15Mē kot Jejus kēp Tirtūm Kra hã harēnh o pa xwỳnhjaja na hte Tirtūm mē kamã pa ho pa nhūm htem ỹ hã ā Kra jarēnh anhỹr o pa.

16Na pu mē ra pahprī hã Tirtūm kām mē pajapê hã amnhī tā omu. Kām mē pajapê htỳx kumrêx ā amnhī tā omu. Jakamã kot puj mē uràk nē ỹ hã pamã mē piitã mē hkīnh o papa. Tirtūm mē mē pahtipxi nē ri papa kēnã.

Mē kām axpēn kīnh xwỳnhjaja kām Tirtūm puma hkêt ā mē harēnh

17Nē kot puj mē pamã axpēn kīnh o papa nē määnēn Kris kôt amnhī nhīpêx ho papa. Hāmri nhūm nhỹrmã Tirtūm kot Kra mē wa kuri mē htīr tūm nē mē pa ho mē pa mã xwỳnhjê nhīxi jarēnh kaxyw pu mē tee ri amnhī kukamã pajamaxpēr kêt nē. Ra amnhī nhīxi jarēnh ma nē pahkīnh nē.

18Nē koja mēhō kām hkwỳjê hkīnh kêt nē tanhmã hō homnuj to. Hāmri nē kot amnhī tā tanhmã ho pymaj kām uma ho hwỳr mrar kêt nē. No koja kām hkwỳjê hkīnh nē tanhmã mē ho mex to ho pa nē kām mē uma hkêt nē. 19Tirtūm kumrêx na pre kām mē pajapê nē mē pakukamã tanhmã mē pahto mex to. Tã pu mē ra amnhī pyrã nē pamã hkīnh o papa. Nē pamã mē piitã mē hkīnh o papa.

20Nē koja mēhō kām Tirtūm kīnh ā amnhī jarēnh tā kām hkwỳjê hō hprãm nōkati hāmri nē ra kām Tirtūm prãm kêt ā amnhī to amnhīrīt.

Kot kaj mẽ ano ho akwỳjê pumunh o apa xwỳnhta amã hkĩnh kêê tâ tanhmã kot ka we amnhĩ to nê ate ano ho Tĩrtũm pumunh kêêta amã hkĩnh ã amnhĩ jarê? Nà ka ã amnhĩ jarênh anhỹr o amnhĩ to axêx. ²¹Na pre Tĩrtũm mẽ pamã kapêr o amnhĩrĩt o:

Kot kaj mẽ amã ixkĩnh hã kot kaj mẽ mããnên amã akwỳjê hkĩnh o mẽ ho mex o ri apa. Anê.

Tĩrtũm nhỹ hã mẽ pamã axpên kĩnh ã mẽ pamã karõ

5 ¹Nê Tĩrtũm kot mẽ pahwỳr Jejus mênh ã harênhja. Koja mēhõ kuma nê amnhĩ kaxyw hkõt hamaxpêr nê Jejus kõt amnhĩ xãm hã koja Tĩrtũm ja hã omu nê ho hkra.

Nê koja mēhõ kãm Tĩrtũm kĩnh hã koja mããnên kãm hkwỳjê hkĩnh o pa. ²Ja pyrã nê kot puj mẽ pamã Tĩrtũm kĩnh nê kapêr kõt amnhĩ nhĩpêx. Hãmri nê mããnên pamã krajê piitã mẽ hkĩnh ho papa.

³Nê kot puj mẽ pamã Tĩrtũm kĩnh nê nhũm kapêrja mẽ pahpê hihtỳx kêt nê. Pu mẽ pamã Tĩrtũm kĩnh ã kapêr kõt amnhĩ nhĩpêx mex o ri papa.

⁴⁻⁵Na pu prem amnhĩ kaxyw Tĩrtũm Kra Jejus kõt pajamaxpêr nê hkõt amnhĩ xunhwỳ nhũm Tĩrtũm ja hã mẽ pahpumu nê mẽ pahto hkra pu mẽ ỹ hã amnhĩ nhĩpêx nyw o amnhĩ nhĩpêx o papa. No ri tanhmã amnhĩ tomnuj to ho ri papa hkêt nê.

Mẽmoj axkrunêpxi nê kot Jejus kêp Tĩrtũm Kra hã ho amnhĩrĩt

Juāw 1.32-34, 3.36, 5.31, 15.26

⁶Nê Jejus pix na pre Tĩrtũm mẽ pakaxyw ãm nhũm kêp Kra hã mẽ pahwỳr wrỳ. Hãmri nhũm Juāw Paxisja pyhti kamã hkrã kumrã. Kêp Tĩrtũm Kra hã hkrã kumrã. Tã nhũm Tĩrtũm kapêr kõt ma tanhmã amnhĩ nhĩpêx to ho pa. Nê ri hkwỳjê mã kapêr jarênh o ri mẽ hkõt pa. Tã nhũm mẽ kupĩ nhũm kêp Tĩrtũm Kra hã pĩ kahpa hã ajêt nê ty nê hkamrõ axkapĩ. ã mẽ panê amnhĩ nhĩpêx anê nhũm Tĩrtũm Karõja kêp Kra hã mẽ pamã ho amnhĩrĩt. ãm hãmri na hte ã tanhmã mẽmoj to amnhĩrĩt to anê. Mẽmoj to hêx kêt jakamã na pre Jejus kêp Tĩrtũm Kra hã mẽ pamã ho amnhĩrĩt.

⁷Nê kêp Tĩrtũm Kra hã mẽ pamã mẽmoj to axkrunêpxi nê ho amnhĩrĩt. ⁸Tĩrtũm Karõ na pre kêp Kra hã mẽ pamã ho amnhĩrĩt pu prem kêp Kra hã omu. Nê Juāw Paxis kot hkrã kumrãrta ã pu mẽ mããnên kêp Tĩrtũm Kra hã kot ho amnhĩrĩtja ã omu. Nê mããnên kêp Tĩrtũm Kra hã pĩ kahpa hã jêt nê htyk nê hkamrõ pikapĩrta ã mẽ pamã ho amnhĩrĩt pu mẽ kêp Kra hã omu. E mẽ pamã mẽmoj to axkrunêpxi nê Jejus kêp Tĩrtũm Kra hã kot ho amnhĩrĩt xwỳnh na jajaja.

⁹Nê na pu htem jar pahkwỳjaja kot axpên mar xà hã ixkre kamã mẽ kapêr ma nê mẽ hkõt pajamaxpêr. Tã koja Tĩrtũm tanhmã mẽ pamã

mëmoj to amnhĩrit to pu mẽ hkõt pajamaxpër kurê kumrëx. Kêp Tĩrtũm kênã kot pu kêt mẽ kapër prã nê hkõt pajamaxpër kêt. Tãm na pre mẽ pamã Jejus kêp Kra hã ã ho amnhĩrit anê. 10Jakamã mẽ pahte Tĩrtũm Kra hkõt amnhĩ xunhwỳr xwỳnhjaja na pu prem Jejus kêp Kra hã harênh ma nê hkõt pajamaxpër kurê kumrëx. No mẽ kêp hkra hkêt xwỳnhjaja na htem Tĩrtũm kot kêp Kra hã harênh ma nê ãm kuma nê amnhĩ kaxyw hkõt hamaxpër kêt nê. Jao te Tĩrtũm kêp Hipêêxà hã amnhĩ to hêx pyrãk ã harê.

11E kot paj ixprĩ hã mẽ amã tanhmã ja jarênh to ka mẽ inhma. Nà na pre Tĩrtũm Krata mẽ pahpiitã panê ty. Jakamã kot puj mẽ pahte hkõt amnhĩ xunhwỳr xwỳnhjaja nhỹrmã ty nhũm Tĩrtũm akupỹm mẽ pahto mẽ pahtĩr. Pu mẽ wa kuri pamex nê pahtĩr tũm nê papa ho papa. 12Mẽ pahpê Jejus kwỳjaja kot puj mẽ ã pahtĩr tũm nê papa anê. No mẽ kêp hkwy hket xwỳnhjaja koja mẽ nhỹrmã ty nê mẽ pahpyrà nê wa hwỳr àpir kêt nê.

13Na ka prem ixpyrà nê amnhĩ kaxyw Tĩrtũm Kra hkõt ajamaxpër nê hkõt amnhĩ xunhwỳ. Tã pa ã mẽ amã kagàja nhĩpêx anê. Mẽ ate kamã harênh nê mẽ pahte nhỹrmã Tĩrtũm mẽ Kra wa hwỳr mẽ paxàpir ã mẽ pajarênhja mar nê amnhĩ kaxyw hkõt ajamaxpër o ri apa kaxyw nê kapër prãr o ri apa hkêt nê.

Mẽ pahte paxàmnhĩx mëmoj tã Tĩrtũm wỳr ã mẽ pajarênh

Juãw 14.13-14

14Nê mẽ pahpê Tĩrtũm krajaja na pu htem paxàmnhĩx pajamakêtkati nê mëmoj tã tanhmã hwỳr to ho papa. Kot puj mẽ kãm hprãm xà hkõt mëmoj tã kuwỳ nhũm mẽ pama. 15Na pu htem mëmoj tã kuwỳ nhũm mẽ pamar mex nê mẽ pahte mëmoj tã hwỳr xà hkõt tanhmã mẽ pamã mëmoj nhõr to rỳ tanhmã mëmoj to. Ra mẽ pahte ja mar mex.

Tĩrtũm kot tanhmã hkra hkêt xwỳnhjê nhĩpêx to hã harênh

Rukre 22.31-32

16-17Nê koja Kris kõt mẽ anhiõ tanhmã amnhĩ tomnuj to ka mẽ atõ tee ri ja hã omu nê ho Tĩrtũm wỳ. Ho awỳ kê nê tanhmã kot amnhĩ tomnuj tota o hapêx nê ja nê ho htỳx kê axte ã amnhĩ nhĩpêx anhyr kêt nê. Kot puj mẽ pahtõ tanhmã amnhĩ tomnuj to nhũm Tĩrtũm tee ri ja hã mẽ pahpumu nhũm ja kêp omnuj nê. Tã kot puj mẽ amnhĩ tomnujta kaga nhũm ja hã mẽ pahpumunh kõt tanhmã hã mẽ pahto hkêt nê. ãm mẽ kot amnhĩ nhĩpêx pixi koja ho hamakêtkati hkêt nê. Koja mẽhõ Tĩrtũm kaga ho hkaga nê aa hkõt amnhĩ xãm kêt nê. Hãmri nhũm tee ri amnhĩ tã omu nhũm ja kêp omnuj tỳx kumrëx. Jakamã koja aa ho hkra hkêt nê. Nê aa kot hkaga ho hamakêtkati hkêt nê pa ho pa. Jakamã koja hkaga xwỳnhhta nhỹrmã ty nê kuri htĩr tũm nê pa ho pa hkêt nê.

18Nê mẽ pahpê Tĩrtũm krajaja na pu htem amnhĩ tomnuj o papa hkêť nê. Tĩrtũm Kra Jejus kot ja pymaj mẽ panê Satanasti pumunh mex jakamã nhũm tee ri mẽ pahte tanhmã amnhĩ tomnuj to hprãm xàj mẽ pano kupyř kaprỳ ho ri pa. Ra mẽ pahte ja mar mex. 19Mê pahpê Tĩrtũm kra na pu mẽ. No mẽ kêp hkra hkêť xwỳnhjaja Satanasti kot amnhĩ tã mẽ ho htỳx pyràk o mẽ hipêx jakamã nhũm htem tanhmã amnhĩ tomnuj to ho pa. Mẽ pahte ja mar mex.

20Nê mãânên ja mẽ pahte mar mex. Na pre Tĩrtũm Kra mẽ pahwỳř wrỳ nê mẽ pamã tanhmã Tĩrtũm o amnhĩrĩť to ho pa. Tapxipix kêp Mẽpahpãm ã mẽ pamã ho amnhĩrĩť. Tã Jejus kukwak ri mẽ pahpê Tĩrtũm kra jakamã kot puj mẽ nhỹrmã wa kuri pahťĩř tũm nê pa mex nê papa ho papa.

21E Kris kôt ixkwỳjaja. Kêř ka mẽ Tĩrtũm kapêř kôt pix mã mãn ri amnhĩ nhĩpêx o ri apa rãhã nê. No nhãm mẽ kot Tĩrtũm kapêř kwỳm ri mẽ amã kapêř o hêx xwỳnhjê kapêř ma nê ãm mẽ ama nê mẽ hkôt amnhĩ nhĩpêx hkêť nê.

Tã ãm ja pix. Ixpê Juãw na pa krĩ piitã hkôt mẽ amã kagà nhĩpêx nê kurê.

Sikũn Juãw

Juãw kot Jejus kôt hkwỳjê hwỳr wam kagà nê mênh kôt hõ mênh

Juãw na pre kagàja nhĩpêx. Jejus nhỹ hã hkrajê jahkre ho ri pa xwỳnhjê hõ na pre. Jakamã na pre hkrĩ hõ kamã Kris kôt htõx mẽ õ fãmii mã kagàja nhĩpêx nê mẽ hwỳr kumẽ. Na pre hte Tĩrtũm kapêr o mẽ hêx o pa xwỳnhjê hõ mẽ õ krĩ hwỳr mra nhũm Juãw kràmnhwỳ nita omu nê htỳx kot mẽ ahkre mex ã hkamnhĩx. Hãmri nê kot Tĩrtũm kapêr o hkwỳjê jahkre kaxyw amnhĩ nhõrkwỳ hwỳr kuwỳ. Hãmri nhũm Juãw tee ri harênh ma nê kãm kagàja nhĩpêx nê kamã kot amnhĩ wỳr hwỳr nê kãm kapêr nê hprĩ hã kãm tanhmã mẽ kot Tĩrtũm o hêx to ho pa hã tanhmã mẽ harênh to. Kot kamã harênh nê mẽ harênh mar hãmri nê mẽ axkãm hamak rom nê ri pa kaxyw. ã na pre Juãwja hkràmnhwỳ ni mẽ hkwỳjê mã mẽmoj jarênh nê hã kagà nê mẽ hwỳr mênh anê. Nê mẽ kãm:

1Pa Jejus kôt ixtõx. Xà mẽ amex? E ot pa mẽ amã kagà nhĩpêx nê mẽ awỳr kumẽ. Akrajaja nê apê mẽ hkatorxà mẽ mẽ ato ixpimràatã mẽ awỳr kumẽ. Ixpê Juãw pigêtre na pa. Inhmã mẽ akĩnh nom papxipix inhmã mẽ akĩnh kêt. Mẽ pahpyrà nê mẽ kot Tĩrtũm kôt amnhĩ xunhwỳr xwỳnhjaja haxwỳja kãm mẽ akĩnh. 2Mẽ pahte Tĩrtũm kapêr kôt ri amnhĩ nhĩpêx rãhã ho ri papa jakamã na pu htem pamã xpên kĩnh o ri papa.

3Na pa hte mẽ pahto Mẽpanhĩpêxà maati Tĩrtũm wỳr o ixpa nê kãm: — Pa Tĩrtũm. Ot pa mẽ amnhĩ to awỳ. Akra Jejus Kris mẽ mẽ amnhĩ to war awỳ. Kêr ka wa mẽ ixkamã axukaprĩ nê mẽ ixkutã war anojarêt rãhã ho ri apa. Nê tanhmã mẽ ixkrã hto pa mẽ ixàmnhĩx ijamakêtkati nê ixkĩnh nê mẽ inhmã xpên kĩnh nê xpên to mex o ri xpên kôt ixpa. Nê tãm ri amnhĩ nhĩpêx. Anê.

Mẽ pamã xpên kĩnh kãm xpên to mex ã mẽ pamã karõ

Juãw 13.34-35; Wam Juãw 2.7-9, 3.14-18

4Nê na pa pre akra hkwỳjê pumu nhũm mẽ inhmã amnhĩ jarê pa mẽ kuma nê mẽ ý hã ixkĩnh nê. Na xep prem Tĩrtũm kôt amnhĩ xunhwỳ nê hkôt ri amnhĩ nhĩpêx mex o pa. Mẽ kot Mẽpanhĩpêxà Maati Tĩrtũm

kapêr ã kagà hkôt amnhĩ nhĩpêx ã inhmã amnhĩ jarê pa mẽ kuma nê ixkĩnh nê. 5-6Jakamã na pa ã amã ixkapêr nê hã kagà anê. E kwa Kris kôt ixtôx. Kêr pu mẽ pamã axpên kĩnh o ri papa hã mẽmoj to axpên kutã panojarêr rãhã ho ri papa. ã ixujarênh anhỹrja nyw kêt. Amnepê mã mẽ ate Jejus kôt amnhĩ xunhwỳr ã arĩgrota ã na prem ã mẽ amã karõ anê. Tã kêr pu mẽ arĩ pamã axpên kĩnh pê Tĩrtũm kapêr piitã hkôt amnhĩ nhĩpêx mex o ri papa. Kapêr ã kagà kot ã mẽ pahte amnhĩ nhĩpêx anhỹr ã mẽ pamã karõ.

Tĩrtũm kapêr o mẽ hêx xwỳnhjê jarênh

Rõmãn 16.17-18; Wam Ximotre 5.22; Wam Juãw 2.18-26, 4.1

7Nê mẽ kot Tĩrtũm kapêr o hêx o ri mẽ pa xwỳnhjaja na mẽ ra ma krĩ piitã hkôt mẽ kãm tanhmã ho hêx to ho pa nê mẽ kãm:

—Jejus kêp Tĩrtũm Kra hkêt ãm mẽ panhĩõ na pre. Na pre Tĩrtũm mẽ pahwỳr mẽnh kêt nê. ãm mẽ panhĩõ rũm na pre kato.

Anhỹr o mẽ kãm ho hêx o pa. Kãm Kris kurê xwỳnh maatija nhỹ hã na htem ã ri ho hêx o pa anê. 8Jakamã kwa mẽ amnhĩ nê mẽ omunh mex nê mẽ ama nê ãm mẽ ama. Kot kaj mẽ kapêr ma nê mẽ hkôt ajamaxpêr hãmri nê mẽ ixte Tĩrtũm kapêr o mẽ ajahkreta kaga. Kwa mẽ arĩ mẽ ate amnhĩ nhĩpêx nyw pix o mãn amnhĩ nhĩpêx rãhã o ri apa. Nê arĩ mẽ amã axpên kĩnh kãm tanhmã axpên to ajuta hto rãhã ho ri apa. Kêr kê Tĩrtũm ja hã mẽ apumu nê nhỹrmã mẽ ato mex nê. 9Nom kot kaj mẽ nhãm mẽ kapêr punujja kôt amnhĩ nhĩpêx nê Kris kôt amnhĩ nhĩpêx kêt nê nhũm Tĩrtũm mẽ akôt pa hkêt nê. Nom kot ka mẽ arĩ Kris kôt amnhĩ nhĩpêx mex nê hãmri nhũm Tĩrtũm mẽ Kra Jejusja wa mẽ akôt ri pa ho pa rãhã nê. 10Jakamã koja ã Tĩrtũm kapêr ã kagà kuhpa hã Jejus o hêx xwỳnhjaja mẽmo arĩgro hã mẽ anhõ krĩ hwỳr pøj ka mẽ omu nê amnhĩ nhõrkwỳ hwỳr mẽ hwỳr kêt nê. Nê tanhmã mẽ kãm akapêr to hkêt nê. ãm ri mẽ hkàx ã ri mra. 11No kot kaj mẽ ã mẽ hipêx anhỹr kêt nê mẽ hwỳr mra nê mẽ mar o akuhê hãmri nê te mẽ ate mẽ hkôt amnhĩ nhĩpêx o amnhĩ nhĩpêx pyræk. Ja pumaj kêr ka mẽ nhỹri mẽ omu nê mẽ htêp kêt kumrêx.

Kagà jatur xà

Hapuhã Juãw 13-15

12E Kris kôt ixtôx. Ixkapêr jatur xà na ja. Ixkapêr ã kagàja ãm hakotre nom inhmã mẽ amã ixkapêr ry hprãm. Jakamã kot paj mẽmo arĩgro hã ma mẽ awỳr mõi pu mẽ axpên pumu nê pahkĩnh nê. Pa rĩ kormã mẽ amã ixkapêr jatur xàm kumê ka mẽ aprĩ hã inhma.

13Nê ota jar Kris kôt atôx krajaja awỳr hpêr mẽ.

E ixpê Juãw pigêtre na pa ã awỳr kagàja nhĩpêx nê mẽnh anê.

Hapuhã Juãw

Juãw kot Jejus kôt hkwỳjê

hwỳr kagà nê mênh o axkrut kôt hõ mênh

Juãw na pre mãânên kagàja nhípêx. Jejus nhỹ hã hkrajê jahkre ho mẽ pa xwỳnhjê hõ na pre. Tã hkràmnhwỳ Gajore mã kagàja nhípêx nê hwỳr kumê. Na pre Jejus kwỳjaja ma krĩ piitã hkôt mẽ kãm Jejus kapêr jarênh o ri mẽ hkôt pa. Jao Gajore nhõ krĩ hwỳr pøj nhũm Gajore mẽ hpôx ã mẽ harênh ma nê amnhĩ nhõrkwy hwỳr mẽ kuwỳ. Jakamã nhũm pre htem ma õ krĩ hwỳr pa hãmri nê kuri pøj. Nhũm Juãw ã Gajore kot amnhĩ nhípêx anhỹr ã harênh ma nê hkĩnh nê hwỳr kagàja nhípêx nê kumê. Nê kamã kãm mêmhõ pê Xotre kot tanhmã amnhĩ tomnuj to ho pa hã harê. ã na pre Juãwja Gajore mã mẽmoj jarênh nê hã kagà nê hwỳr mênh anê. Nê kãm:

1Pa ixkràmnhwỳ Gajore? Xà amex? E ot pa awỳr kagàja nhípêx nê kumê. Apê ixkràmnhwỳ mex na ka. Inhmã akĩnh.


2-3Na pre ra Kris kôt pahtõ hkwỳjaja ixwỳr pøj nê tanhmã inhmã ajarênh to. Na ka xep hte Tĩrtũm kôt amnhĩ nhípêx mex rãhã ho ri apa. Pa ajarênh ma nê anhỹ hã ixkĩnh nê. Nê ato Tĩrtũm wỳr o ixpa. Kot ato mex nhũm amex nê ajamakêtkati nê apa ho apa kaxyw. Nê axà hkêt nê amex nê ri apa kaxyw.

4Ixe Tĩrtũm kapêr o mẽ ajahkre o ri ixpa jakamã te mẽ apê ixkra pyræk. Tã pa tanhmã ate mẽ pahkwỳjê nhípêx to ho apa hã ajarênh ma nê ixkĩnh nê.

Gajore kot tanhmã Jejus kôt hkwỳjê ho mex to hã harênh

Wam Korĩt 16.10-11

5E ixkràmnhwỳ. Na ka xep hte Jejus kôt pahtõjê ho mex o ri apa. Aa ate mẽ omunh kêt tã nhũm htem ma anhõ krĩ hwỳr pa ka mẽ omu nê apê Jejus kôt mẽ htõ hã mẽ ho mex nê. ãm hãmri na ka hte ã mẽ hipêx anhỹr o ri apa Gajore. 6Na pre ra mẽ hkwỳjaja akupỹn ixwỳr pøj nê mẽ ixpê Kris kwỳjê mã amnhĩ tã ajarê. Amã mẽ hkĩnh nê ate tanhmã mẽ ho mex to hã ajarê. Nhũm prem nojarêt ka xep pre mẽ kãm pry hã mẽ apkur



Hapuhã Juãw 6-8

xà hã mëmoj gô nhùm më inhmã ajarê. Nà ãm hãmri na ka hte ã më ho mex o apa anê. ã ate më hipêx anhÿr o apata ã na hte Tirtùm apumu nê hkĩnh nê. 7Na htem krĩ piitã hkôt më kãm Kris kot tanhmã më panê amnhĩ nhĩpêx to hã harênh kaxyw ma më hwÿr pa. Nom më apkur xà hprãm xàj më kot Kris kôt amnhĩ xunhwÿr kêt xwÿnhjê hwÿr pa hkêt nê. 8Jakamã kwa kêr pu më papajaja më pahpê Jejus kôt më htô hã më kãm mëô hkwy nhôr o papa. Kot puj më ã më ho ajuta anê nê te më pajaxwÿja më ãhkô hã ri më kãm Kris jarênh o ri papa pyrãk.

Xotre kãm Juãw kapêr mar prãm kêt ã harênh

Matêwre 20.25-28, 23.1-12

9Nê ra ixte anhô krĩ kamã më apê Kris kwÿjê mã kagà nê mënh nhùm më ate kamã harênhhta. Na xep pre Xotreja kuma nê ãm kuma. Kêp më akrãhtùm prãm xàj kãm ixkapêr mar prãm kêt nê. 10Na xep hte tanhmã ixto hêx to ho pa. Nom papxipix ixto hêx kêt nê. Mããnen Kris kôt më pahtôjaja nhÿhÿnh krĩ hô rùm më awÿr pan pôj nhùm xep tanhmã më amã më ho hêx to. Nê më hpôx ã më omu nom amnhĩ nhôrkwÿ hwÿr më hwÿr kêt nê. Tã ka më kurom amnhĩ nhôrkwÿ hwÿr më awÿ nhùm xep tee ri ja hã më apumu nê më akamã gryk nê më hã më amã akir nê Tirtùm mã amnhĩ jarênh xà hã ixkre nê më ajano. Na xep hte ã amnhĩ nhĩpêx anhÿr o pa. Jakamã kot paj nhÿrmã ma më awÿr mō hãmri nê më apiitã më anoo mã hã kãm akir. Tanhmã kot më ixto hêx to nê tanhmã kot amnhĩ tomnuj to hã kãm akir ka më apiitã hã inhma.

Mê pahte më kot amnhĩ tomnuj xwÿnhjê hkôt amnhĩ nhĩpêx kêt ã më pamã karô

Rukre 6.45; Rômãn 12.9

11E kwa ixkrãmnhwÿ. Kêr ka ã Xotre kot amnhĩ tomnuj o pa anhÿrja kôt amnhĩ nhĩpêx kêt nê. Mê kot amnhĩ tomnuj o më pa xwÿnhjaja na

htem Tĩrtũm kôt amnhĩ nhĩpêx kêt nê. No kêt mẽ kot amnhĩ to mex o ri mẽ pa xwỳnhjaja na mẽ kêp Tĩrtũm kra jakamã kêr ka mẽ ã mẽ kot amnhĩ nhĩpêx anhỹr xwỳnhjê kôt pix mã amnhĩ nhĩpêx.

Temẽtre jarẽnh

12Nê Temẽtre na hte tãm ri amnhĩ nhĩpêx nê ãm hãmri Tĩrtũm kapêr o mẽ ahkre mex nê nhũm mẽ piitã xepên mã mex ã harê. Pa hte ijaxwỳja mẽ kãm mex ã harẽnh o ri mẽ hkôt ixpa ka htem inhma. ãm hãmri na pa hte tanhmã harẽnh to ho ri ixpa.

Kagà jatur xà

Sikũn Juãw 12-13

13E kagàja kamã na pa ãm ja pix jarê nê hã kagà nê awỳr kumê Gajore. Na pa kormã harẽnh jatur xà mẽnh kêt nê. 14Nom kot paj tokyx ma awỳr mỗ hãmri nê rĩ kormã amã hatur xàm kumê.

E kê Tĩrtũm akutã nojarêr rãhã ho pa.

Nê ota jar Kris kôt akrãmnhwỳjaja awỳr hpêr mẽ. Nê kêr ka atar Kris kôt ixkrãmnhwỳjê mã ijarê.

Tã ãm ja pix. Ixpê Juãw pigêtre na pa ã awỳr kagà nhĩpêx nê mẽnh anê.

Jutre

Jutre kot Jejus kôt hkwỳjê piitã hwỳr kagà nê mênh

Jutre na pre kagàja nhípêx. Xiakre pyrã nê kêp Jejus tō na pre. Tã kagàja nhípêx nê krí piitã hkôt Jejus kôt hkwỳjê hwỳr kurê. Na pre mẽ hkwỳjaja kêp Jejus kwỳ hã amnhĩ jarênh tã axtem nê tanhmã amnhĩ tomnuj to ho pa. Jakamã nhũm Jutre kagàja kamã Jejus kwỳjê mã hprĩ hã tanhmã mẽ harênh to nê mẽ kot mẽ hkôt amnhĩ nhípêx nê mẽ kãm kapêr kãm hihtỳx nê. Nê mẽ kãm:

¹Pa Jejus kôt ixtō nê ixtōxjaja. Xà mẽ amex? E ot pa mẽ amã kagà nhípêx nê mẽ awỳr kurê. Tĩrtũm kot ixpyrã nê amnhĩ kaxyw mẽ axunhwỳr xwỳnhjê hwỳr. Mêpanhĩpêxã Maati Tĩrtũm kãm mẽ pahpiitã mẽ pajapê jakamã na hte Kra Jejus Kris mẽ wa mẽ pahťanopxar mex rãhã ho pa.

Ixpê Jutre na pa hte Jejus Kris mã tanhmã amnhĩ nhípêx to ho ri ixpa. Nê ixpê Xiakre htō na pa.

²Na pa hte mẽ ato Tĩrtũm wỳr ho ixpa nê kãm:

— Pa Tĩrtũm. Kwa mẽ kot Akra Jejus kôt amnhĩ xunhwỳr xwỳnhjê pumu nê amã mẽ hapê hã mẽ kamã axukaprĩ rãhã ho apa. Kê mẽ kamã amnhĩ krit nê àmnhĩx hamakêtkati nê ri tanhmã amnhĩ nhípêx to ho pa. Nê mẽ kãm axpên kĩnh o ri axpên kôt pa. Anê.

Mê kot Tĩrtũm kapêr o hêx xwỳnhjê jarênh

Wam Ximotre 1.18-20, 6.12

³E ixkrãmnhwỳjaja. Nà inhmã mẽ akĩnh. Na pa pre jãã mẽ amã kagà hkwỳ nhípêx kaxyw. Mẽ pahte Jejus Kris kukwak ri amnhĩ nhípêx nyw ã tanhmã mẽ pajarênh to nê hã kagà kaxyw tã kormã harênh kêt nê. Kot paj axtem mẽmoj jarê. Na pre Tĩrtũm mẽ pamã kot amnhĩ nhípêx o amnhĩrĩt pa. Nê kapêr o amnhĩrĩt pa. Mẽ pahte mar nê hkôt amnhĩ nhípêx kaxyw. Jakamã kêr pu mẽ kapêr mar tỳx nê amnhĩ krã hi kamã haxàr tỳx nê hã papa. Nom koja mēhō kapêr kuhpa hã tanhmã mẽ amã kapêr o hêx to ka mẽ ama nê ãm ama.

4Na xep ra kapêr o mẽ hêx xwÿnhjaja mẽ akôt pa nê mẽ apyrà nê Jejus kôt amnhĩ xunhwÿr ã amnhĩ jarê nom amnhĩ to hêx. Ka xep mẽ aprĩ hã mẽ hêx ã mẽ omunh kêt nê mẽ kêp Jejus kôt mẽ atô hã mẽ hkamnhix nê atÿx amnhĩ nhôrkwÿ hwÿr mẽ awÿ. Nom mẽ kot Tirtũm kapêr o hêx pix kaxyw na htem mẽ akôt pa nê mẽ amã kapêr o:

— Tirtũm kãm mẽ pajapê htÿx kumrêx nê mẽ pakutã nojarêt ho pa jakamã kwa kêr pu mẽ mãmri nhãm mênijê ho amnhĩkati ho papa. Koja ja hã mẽ pahpumu nê tanhmã hã mẽ pahto hkêt nê. Kãm mẽ pajapê kênã kot kêt hã tanhmã mẽ pahto. No kêt Jejus Krisja mẽ ate kêp mẽ panhõ Pahihti hã harê nom kêp mẽ panhõ patrãw rÿ kêp mẽ panhõ Pahihti hkêt. Anê.

Ã Tirtũm kapêr kuhpa hã mẽ amã harênh anhÿr o pa. Tirtũm kapêr ã kagã htũm kot amnepêm mẽ hkukamã tanhmã mẽ harênh to nê mẽ harênh kot:

Ã mẽ kapêr anhÿr o paja mÿrapê koja mẽ mex kêt nê pa. Koja
Tirtũm mẽ homnuj tÿx kumrêx.

Anhÿr o kot mẽ harênh. Tã pa mẽ amã ixprĩ hã mẽ harê nê hã kagã. Mẽ ate inhmar nê amnhĩ nê mẽ omunh mex kaxyw.

Tirtũm kot tanhmã mẽ kot amnhĩ tomnuj xwÿnhjê nhĩpêx to hã harênh

Sikũn Pêtre 2.1-17; Sikũn Ximotre 3.1-9

5Nê amnepê mã mẽ panhĩgêjtaja kormã Ejit kamã mẽ pa ri nhũm Tirtũm Ejit nhõ xwÿnhjê rũm mẽ kator pa. Hãmri nhũm mẽ hkwyjaja tanhmã hamaxpêr to nê axtem nê amnhĩ kaxyw hkôt hamaxpêr kêt nê. Nhũm tee ri amnhĩ tã mẽ omu nê ã mẽ kot amnhĩ nhĩpêx anhÿr xwÿnhjê nhĩmex pa. Ra mẽ ate mẽ harênh mar mex tã pa axte mẽ amã mẽ harê.

6Nê Tirtũm kapêr o mẽ wrÿk xwÿnh kwÿjaja. Na prem Tirtũm nhÿ hã kapêr o pa htã tanhmã hamaxpêr punuj to nê ra kãm ja ho anhÿr prãm nõkati nê Tirtũm kaga. Jakamã nhũm mẽ hã amÿnê nhũm mẽ unê nê kàx o mẽ hkaxpre pa. Nê nhÿri pika kaxwÿnh kãm kamàt kô htyk kãm mẽ kurê nhũm mẽ arĩ kamã hkrĩ ho hkrĩ. Nom koja nhÿrmã Tirtũm kot tanhmã mẽ pahpiitã mẽ pajarênh to xà hã arĩgro kato nhũm mẽ rĩ kormã hapôx pa. Hãmri nê kot amnhĩ tomnuj mÿrapê ma mẽ kot amnhĩ xà htÿx kamã hamak tũm xàta wÿr ma hapêx.

7Nê krĩ pê Sotô nê Komo nhõ xwÿnhjaja na prem haxwÿja kãm Tirtũm kapêr kôt amnhĩ nhĩpêx prãm kêt nê. Nê krĩja wa hpuhã krĩ hkwyj kamã ri mẽ pa xwÿnhjaja haxwÿja mẽ uràk nê nê kãm kapêr mar prãm kêt nê. Na prem amnhĩ tomnuj tÿx rãhã ho pa. Nê axtem nê axpên pê ri mẽ hprõ ho amnhĩkati ho pa. Nê mẽmy hkwyjaja ri axtem nê axpên to amnhĩkati ho pa. Hãmri nhũm Tirtũm tee ri mẽ kot amnhĩ nhĩpêxja ã omu nê mẽ hipy kuwy hpòk kwÿ rê nhũm mẽ amnhĩ wÿr omu nê kãm ma xàj tee ri hprõt kaprÿ. Nê hprõt kaxyw òrkwÿ rũm hapôj nê hxêt pa

ně hapêx. Na hte ã Tirtũm mẽ kot amnhĩ tomnuj o mẽ pa xwỳnhjê nhĩpêx anê. Jakamã koja nhỹrmã kuwy hpôk rãhã xwỳnhnta wỳr mẽ piitã mẽ rênh pa nhũm mẽ kamã amnhĩ xà htỳx kamã hamak rãhã ho pa ho pa mẽ aa à hapêx kêt nê. Nê à htỳx rãhã papa ho pa. Tã mẽ pahte Sotô mẽ Komo nhõ xwỳnhjê jarênh mar nê mẽ pahte amnhĩ tomnuj kaga kurê kumrêx kaxyw na pre Tirtũm ã mẽ pamã mẽ harênh o amnhĩrit anê.

Mẽ hpijaàm kêt xwỳnhjê jarênh

Sikũn Pêtre 2.10

8Nê mẽ kot Tirtũm kapêr o pihkàr xwỳnhjaja na htem ã mẽ kot amnhĩ nhĩpêx anhỹr xwỳnhjê pyrã nê amnhĩ tomnuj tỳx pix o ri pa. Jakamã na htem tanhmã hpimtir punuj to hãmri nê hkrã hapôj nê hpimtir xà hkôt tanhmã amnhĩ tomnuj to. Jao hkwỳjê kamã hpijaàm kêt o pa. Rỳ mênijê hõ rỳ mêmỹjê hõ nhũm mẽ axpên kãm hpijaàm kêt o pa. Rỳ Tirtũm kapêr o mẽ wrỳk xwỳnhjê ho kapêr punuj nê. Kapêr mã gêt o tanhmã mẽ ho kapêr punuj to. ã na htem hpimtir punuj xà hkôt amnhĩ tomnuj o pa anê. 9Tirtũm kapêr o mẽ wrỳk xwỳnh krãhtũm Mikewja. Kêp mẽ hkrãhtũm tã aa mẽ kãm kapêr mã gêt kêt nê. Na pre Mojes ty nhũm Mikew ra ma hwỳr tèn wrỳ. Nê kuri Satanasti pumu hãmri nê Mojes nhĩ nê tanhmã kãm kapêr to. Nom kapêr mã gêt o kãm kapêr kêt nê. ãm kapêr mã hprĩ ho kãm kapêr nê kãm:

— Kwa ãm omu kê nõ. Kot kaj tanhmã ho nhũm Tirtũm apumu nê hã tanhmã hã ato. Anê.

10-11Nom ixte mẽ amã mẽ hpimtir punuj jarênh xwỳnhjaja. Mẽ kot Tirtũm kapêr o pihkàr xwỳnhjaja kot hprĩ hã Tirtũm kot amnhĩ nhĩpêx ã harênh mar kêt jakamã na htem htỳx ri ho kapêr o haprỳ ho pa. Te ho mry xoprêja hamaxpêr kêt nê htỳx ri amnhĩ nhĩpêx o pa pyrãk. Nom koja nhỹrmã Tirtũm mẽ homnuj tỳx nê.

Te mẽ kot finat Kaĩ kot amnhĩ tũ hpĩr xwỳnh kot amnhĩ nhĩpêxta pyrãk. Nê te mẽ kot finat Paraãw kot amnhĩ nhĩpêx pyrã nê kàxpore rũnh prãm xàj Tirtũm kapêr kuhpa hã tanhmã amnhĩ nhĩpêx to ho pa. Nê te mẽ kot finat Kore kot amnhĩ nhĩpêx pyrã nê Tirtũm kot mẽ kaxyw mẽ õ pahi xãm xwỳnhnta kutã amnhĩ xunhwỳ. Mỳrapê koja mẽ jajê pyrã nê kuwy hpôk rãhã xwỳnhnta wỳr ma hapêx pa.

12Na ka htem apê Jejus kwỳ hã axpên wỳr akuprõ. Nê tũhã mẽ apê hkwy hã amã axpên kĩnh ã axàpkur kaxyw axpên wỳr akuprõ. Nhũm ixte mẽ amã mẽ harênh xwỳnhjaja mẽ akôt agjê nê mẽ akutã apku. Jakamã kwa mẽ o kora mẽ amnhĩ nê mẽ omunh mex nê. Mẽ hipêx o te mẽ ate mẽ axàpkur xà hã mẽ anhõ kamã kênre pumunh nê hanhir nê rênh pyrã nê amnhĩ nhĩhkô hã mẽ pumu nê amnhĩ nê hanor kurê kumrêx. Na htem hpijaàm kêt kãm amnhĩ pix kukamã hamaxpêr pê apkur rũnh o pa.

Te na wrỳk kaxyw htyk rax nẽ mõi nhũm mẽ kot omunh nẽ wrỳk ã hkamnhix tã nhũm kõi kot nhãm mẽn nhũm wrỳk kêeta pyrãk o na htem amnhĩ nhĩpêx. Jao te mẽ kot ãm hãmri mẽ amã Tĩrtũm kapêr jarênh mex pyrãk tã mẽ amã ho hêx.

Nẽ te mẽ kêp mẽmo pĩ hpàr ra ô mã tãm tã ãm htỳx rã nẽ aa ô hkêt nhũm mẽ kot krãhyr nẽ mẽn nhũm grã parta pyrãk.

13Nẽ te mẽ kêp gõi xujanãr kot amnhĩ nhĩpêx pyrãk. Na hte gõi xujanãrja hakax wỳr kapê nẽ mra nhũm hamrõi kỳxpê amgrã kamã arĩk nhũm gõi awjanã nẽ ma akupỹm hipõi wỳr mra. Ja pyrãk na htem ma nhỹhỹm mra nẽ mẽ kãm mẽmojarê nẽ nhãm mra nẽ mẽ kãm mẽmojarê nẽ ma akupỹm mẽ kurũm mra. Nhũm mẽ mar xà hkõt amnhĩ tomnuj rãhã ho pa.

Nẽ te mẽ kot kaxkwa hã kanhêre nhỹhỹm htẽm nhũm mẽ kot nhỹhỹm htẽm xà hkõt omunh kêeta pyrãk. Jakamã koja Tĩrtũm nhỹrmã kamãt kõi kamã mẽ rẽn pa nhũm mẽ aa hapõx kêt nẽ.

Mẽ kot amnhĩ tomnuj xwỳnhjê hkukamã mẽ harênh

Sikũn Pêtre 3.31; Apokarip 20.11-15

14Nẽ na pre finat Enokja amnepê mã ã mẽ kot amnhĩ tomnuj anhỹr xwỳnhjê hkukamã tanhmã mẽ harênh to. Mẽ kot Tĩrtũm kapêr o pihkãr o ri mẽ pa xwỳnhjaja nhũm mẽ hkukamã mẽ harê. Enokja finat Atãw kanrêhã htãmnhwỳ na pre. Tã ã mẽ kot amnhĩ tomnuj anhỹr xwỳnhjê hkukamã mẽ harênh o:

Koja nhỹrmã Pahihtija man pika hwỳr akupỹn wrỳ. Kapêr o mẽ wrỳk xwỳnh xohtõi rax mẽ mẽ hpimràatã akupỹn wrỳ.

15Hãmri nẽ mẽ pahpiitã kormã mẽ pahtĩr ri mẽ pahte tanhmã amnhĩ nhĩpêx to ho papa hã mẽ pahpumunh xà hkõt tanhmã mẽ pajarênh to. Hãmri nẽ mẽ kot Tĩrtũm kapêr o hêx o pa xwỳnhjê pumu nẽ tanhmã mẽ harênh to nẽ mẽ harênh o: “Jajaja na pre mẽ kãm Inhĩpêexã Tĩrtũm prãm kêt nẽ ri kapêr kwỹm pix mã amnhĩ nhĩpêx o pa. Nẽ kapêr punuj o pa. ã na prem amnhĩ nhĩpêx anhỹr rãhã ho pa.” Anhỹr o mẽ harê nẽ amnhĩ nẽ kuwy hwỳr mẽ kurê nhũm mẽ amnhĩ xà htỳx kãm hamak o pa rãhã nẽ pa ho pa. Anẽ.

ã na pre finat Enokja mẽ hkukamã mẽ harênh anẽ. 16ãm hãmri na mẽ harê. Tã na hte arĩ mẽ hkwỳjaja ã amnhĩ nhĩpêx anẽ. Nẽ hamaxpêr mex kêt nẽ. Na htem nhãm tanhmã mẽ ho kapêr punuj to pix kukamã hamaxpêr. Nẽ amnhĩ krã hkõt htỳx ri tanhmã amnhĩ tomnuj to ho pa. Nẽ amnhĩ to jarkrar rãhã nẽ. Nẽ hêx rom mẽ kêp mẽmojarênh kaxyw tanhmã mẽ kãm hêx to.

17E Kris kõi ixkrãmnhwỳjaja. Koja mẽ ã mẽ amã Tĩrtũm kapêr o hêx anhỹr o mẽ akõi pa ka mẽ ama nẽ ãm mẽ ama nẽ mẽ kapêr mar kêt nẽ. ãm mẽ panhõi Pahihti Jejus Kris nhỹ hã mẽ ajahkre o mẽ pa xwỳnhjaja

kot tanhmã mẽ amã mẽ harēnh toja mã mǎn kêt ajamaxpēr tỳx rǎhã o ri apa. 18Na prem mẽ amã mẽ harēnh o:

—Jejus akupỳn wrỳk xwỳj ri koja mẽmojaja mẽ awỳr mran pỳj. Nom mẽ kot Jejus kapēr kwỳm amnhĩ krǎ hkôt tanhmã amnhĩ nhĩpêx to xwỳnhjaja koja mẽ. Hǎmri nê mẽ apê Jejus kwỳ hã mẽ apumu nê mẽ atã akunha nê mẽ atã hpēr o axkê nê Tĩrtũm ǎ hpēr o axkê nê kapēr ǎ kagà hã hpēr o axkê. Anê.

19ǎ mẽ kot amnhĩ nhĩpêx anhỳr xwỳnhjaja mẽ pahpê Jejus kwỳjaja mẽ pahte xpên kutã amnhĩ xunhwỳrja na mẽ kǎm hprǎm. Mẽ kamã Tĩrtũm Karõ gjêx kêt jakamã mẽ kǎm amnhĩ krǎ hkôt pix mã tanhmã amnhĩ tomnuj to ho pa hprǎm.

Mẽ pahte Kris akupỳn wrỳk jamǎr pê tanhmã amnhĩ nhĩpêx to hã mẽ pamã karõ

Matêwre 24.45-51; Rukre 12.25-40; Karatas 6.1-2;

Xiakre 5.19-20; Sikũn Pêtre 3.12-15

20Kwa mẽ apê Jejus kôt ixtõ nê ixtõxjaja kêr ka mẽ ǎ mẽ kot amnhĩ nhĩpêx anhỳr o mẽ pa xwỳnhjê rom apkati mẽ amnhĩ kaxyw Jejus pix mã mǎn ajamaxpēr rǎhã ho ri apa. Te mẽ kot mẽ hakre hã ra ǎptǎr nê amnhĩ krǎm mẽ hakre xà jagiênh tỳxta pyrǎk.

Jao Tĩrtũm kapēr mar tỳx nê hkôt amnhĩ nhĩpêx mex o ri apa.

Nê Karõ nhỹ hã amnhĩ to hwỳr rǎhã nê.

21 Nê Tĩrtũm kǎm mẽ pajapê hã kǎm ajamaxpēr rǎhã ho ri apa.

Nê Pahihti Jejus Kris kǎm mẽ pajapê hã kǎm ajamaxpēr tỳx rǎhã ho apa.

Koja nhỹrmã kǎm mẽ pajapê hã akupỳn mẽ pahwỳr wrỳ nê tanhmã mẽ pahto mex to pu mẽ kuri pahtĩr tũm nê pahkĩnh nê papa ho papa. Tǎ kêr pu mẽ arĩ akupỳn mẽ pahwỳr wrỳk xà hã arĩgro jamǎr rǎhã ho papa.

22Nê mẽ pahkwỳjaja kormã mẽ kot Jejus kôt amnhĩ xunhwỳr tỳx kêt xwỳnhjaja kêr ka mẽ kamã axukaprĩ nê aprĩ hã mẽ kǎm Tĩrtũm kapēr jarēnh o ri mẽ hkôt apa. 23Na pre ra mẽ hkwỳjaja mẽ kot Tĩrtũm kapēr o pihkǎr xwỳnhjê kapēr ma nê mẽ hkôt amnhĩ nhĩpêx. Jakamã kêr ka mẽ ja hã mẽ omu nê te mẽ ate kuwy hpôk rũnh nê mẽ hpa hã mẽ hamỳnh nê nhǎm mẽ rēnh pyrǎk o mẽ hipêx. Jao mẽ kot nhỹrmã Tĩrtũm kapēr o pihkǎr xwỳnhjê hkôt kuwy hpôk rũnhhta wỳr pa pymaj mẽ nê mẽ kǎm akapēr kǎm axihtỳx o ri mẽ hkôt apa. Kê mẽ ama nê mẽ hkaga nê mẽ hkôt ri amnhĩ nhĩpêx kêt nê.

Nê htỳx ri mẽ kot amnhĩ tomnuj o mẽ pa xwỳnhjaja kêr ka mẽ kamã axukaprĩ ho ri apa nê mẽ kamã agryk tokyx anhỳr kêt nê. Xatã mẽ kǎm

Tĩrtũm kapẽr jarẽnh rãhã ho ri mẽ hkõt apa. Nom kwa mẽ okora kêr ka mẽ kot amnhĩ nhĩpêx o amnhĩ nhĩpêx o ri apa hkêt nẽ. Kwarĩ ho kwarĩ.

Jutre kot Tĩrtũm mã mex o mex ã harẽnh

Wam Pẽtre 1.5-7

24Nẽ kêr pu mẽ Tĩrtũm mã amnhĩ jarẽnh kaxyw nẽ ã kãm amnhĩ jarẽnh anẽ nẽ kãm:

—Pa Tĩrtũm. Nã ãm hãmri na ka hte amnhĩ kõt mẽ ixunhwỳr tỳx nẽ pa mẽ akaga hkêt nẽ akõt amnhĩ nhĩpêx rãhã ho ri ixpa. Kot kaj nhỹrmã amnhĩ wỳr mẽ ixto api pa mẽ Akra mẽ war akuri axte tanhmã amnhĩ tomnuj to hkêt nẽ. Nẽ amnhĩ to mex pê anhĩrã htỳx rax kãm ixpa. Jao ixkĩnh tỳx nẽ ixpa ho ixpa.

25—Apê mẽ inhõ Tĩrtũm ã apyxi mex kumrêx na ka. Na ka pre Pahihti Jejus Kris kukwak ri mẽ ixpiitã mẽ ixte amnhĩ tomnuj pê mẽ ixpytã. Nẽ na ka hte anhĩrã htỳx rax rãhã ri apa. Nẽ amex o amex nẽ axihtỳx o axihtỳx nẽ axàhpumunh o axàhpumunh. Nẽ apê mẽ inhõ Pahi Maati hã apyxi mex na ka. Amnepê mã kormã mẽmoj kêr ri ka pre ã amnhĩ nhĩpêx anhỹr o apa rãhã nẽ. Tã arĩ ã ate amnhĩ nhĩpêx anhỹr ho apa ho rãhãã. Nẽ kot kaj apkati mẽ ã ate amnhĩ nhĩpêx anhỹr ho rãhãã. ã ate amnhĩ nhĩpêx anhỹr o apa ho rãhã ho rãhã. Tã ãm ja pix na hapêx. Anẽ.

E kêr pu mẽ ã Tĩrtũm mã mex o mex ã harẽnh anhỹr o papa. ãm ja pix. Ixpê Jutre na pa mẽ awỳr kagãja nhĩpêx nẽ kumẽ.

Apokarip

Juãw kot Jejus nhỹ hã mẽmoj kukamã harẽnh

Juãw na pre mẽ pamã kagàja nhĩpêx. Juãw Paxis kêt axtem Jejus nhỹ hã hkrajê jahkre ho mẽ pa xwỳnhjê hô pê Juãw na pre hipêx. Na pre Jejus ã mẽ kãm hkurê xwỳnhjaja unê nê ma gô hipôk pê Patos wỳr kumê nhũm kêp prês nê gô hipôk kãm pa ho pa nê aa kurũm kator kêt rãhã ty.

Jakamã kormã htír ri nhũm Tĩrtũm kapêr o wrỳk xwỳnhjê hô gô hipôkja wỳr wrỳ nê kãm mẽmoj kukamã awjarê nhũm kuma nê hkôt mẽmoj pumu. Te hpimtir kãm mẽmoj pumunh pyrãk. Hãmri nê omu nê kuma nê amnhĩ xô ri mẽ pamã hã kagà. Na pre mẽmoj to axkrunêpxi nê hã kagà. Mẽ kot Jejus kutã amnhĩ xunhwỳr xwỳnhjaja kot Jejus ã tanhmã kêp hkwyjê to ho pa nhũm mẽ hkwyjaja pikaprãr ã kagà. Nê Jejus kêp Pahi Maati hã kot nhỹrmã mẽ kot Tĩrtũm kutã amnhĩ xunhwỳr xwỳnh piitã ma mẽ kot amnhĩ xà htỳx kamã hamak tũm xà hwỳr mẽ rẽnh par ã kagà. Nê Tĩrtũm kot nhỹrmã hkrajê ho mex kumrêx ã nhũm mããnên hã kagà. Hãmri nê mẽ pamã hã kagà o:

1 1-2E kot paj mẽ amã awjarê nê hã kagà. Ixpê Juãw ixte Tĩrtũm mã tanhmã amnhĩ anhĩpêx to ho ixpa xwỳnh kot paj mẽmoj jarê nê hã kagà. Na pre Tĩrtũmja Jejus mã mẽmoj kukamã tanhmã ujarẽnh to ho ra kãm ho amnhĩrít pa. Kot amnhĩ xô ri mẽ pahte hkôt amnhĩ xunhwỳr xwỳnhjê mã harẽnh kaxyw. Hãmri nhũm kuma nê kot amnhĩ xô ri inhmã ujarẽnh kaxyw man ixwỳr kapêr o wrỳk xwỳnh mẽ nhũm man ixwỳr wrỳ nê ô ri inhmã mẽmoj to amnhĩrít pa. Âm hãmri ã inhmã mẽmoj to amnhĩrít anê. Tã kot paj amnhĩ xwar mẽ apê Jejus kôt ri mẽ apa xwỳnhjê mã harê nê hã kagà. Mẽ ate mar nê axkãm ajamak rom nê ri apa kaxyw. Nà ixte hã kagà mã xwỳnhja koja tanhmã amnhĩ to nê tokyx mẽ pahwỳr wrỳ. ³Jakamã kwa kêt ka mẽ aprĩ hã kagàja kamã harê nê ama nê hkôt pix mã amnhĩ nhĩpêx nê mẽ piitã mẽ kãm kamã harẽnh o ri mẽ hkôt apa. Kot kaj mẽ ã amnhĩ nhĩpêx anê nhũm Tĩrtũm ja hã mẽ ato mex ka mẽ akĩnh nê apa ho apa. Nê mẽ kot mẽ axujarẽnh mar nê hkôt amnhĩ nhĩpêx xwỳnhjaja koja Tĩrtũm ja hã mẽ omu nê mẽ ho mex nê nhũm mẽ apyrã nê hkĩnh nê pa ho pa.

Juāw kot krī pê 7 kôt Jejus kwÿjê hwÿr kagà rēnh

4E ixpê Juāw kot paj atar pika pê As kamā krī pê 7 piitā hkôt mẽ apê Jejus kwÿ hã axpēn wÿr mẽ apikuprōnh xwÿnhjê hwÿr kagà nē kurê ka mẽ kamā harē nē ama.

Na pa hte mẽ ato Tirtūm wÿr rāhã ho ri ixpa. Nē mẽ ato hwÿr o:

— Pa Tirtūm. Kwa kêr ka pika pê As kamā akrajê ho mex nē mẽmoj to mẽ kutā anojarêt rāhã ho apa. Kê mẽ hamakêtkati nē àmnhix ri pa ho pa. Ja na inhmã hprām. Anē.

Tirtūmja rāhã ho rāhã. Amnepēm kormã mẽmoj kêr ri nhūm pre ra rāhã ho rāhã. Nē koja nhÿrmã mẽmoj akupÿm hapêx par tã nhūm Tirtūm aa hapêx kêr kumrêx. Koja arī rāhã ho rāhã. Na hte kaxkwa kamā kot mẽ pahto amnhiptār ā hkrī xà kamā mẽ papytār rāhã ho hkrī.

Nē Tirtūm Karô te kot Tirtūm kot mẽ pahto amnhiptār xà hã hkrī xà kapem kanê maati pixi kamā kwÿt pê 7 xãm xwÿnhhta pyrāk. Na hte Tirtūm nhīhkô hã hkrī ho hkrī. Tã kê mẽ ato mex rāhã ho pa.

5Nē Jejusja na pre hte Tirtūm kapēr o mẽ ahkre mex o pa nē aa hkaga hkêt nē. Tã nhūm prem axtem nē kupī. Hāmri nhūm Tirtūm akupÿm ho htīr. Jejus kumrêx ho htīr nhūm htīr o htīr. Nē kêp pika piitā hkôt pahi piitā nhô Pahihti. Kãm mẽ pajapê htÿx jakamã na pre mẽ panê ty nē hkamrôja te mẽ panê hpikapīr pyrāk o amnhī nhīpêx. Nē htyk o mẽ pahte amnhī tomnuj pānhã amnhīre. Jao te mẽ pahte amnhī tomnuj pê mẽ papytār par pyrāk o mẽ panhīpêx. 6Nē na pre mẽ pahpê patre nē mẽ piitā mẽ ho Hipêêxà Tirtūm wÿr o papa kaxyw mẽ paxunhwÿ. Nē kêp mẽ panhō Pahi Maati hã kãm hprām xà hkôt mẽ pahte kãm tanhmã amnhī nhīpêx to ho papa kaxyw mẽ paxunhwÿ. Jakamã kwa kêr pu mẽ kãm mex o mex nē hihtÿx o hihtÿx ã mǎn harēnh rāhã ho papa.

7Nē koja tokyx akupÿn mẽ pahwÿr kakrã kamā wrÿ pu mẽ pahpiitā wrÿk kãm omu. Nhūm mẽ kot hpīr xwÿnhjaja tee ri amnhī wÿr omu. Nē pika piitā hkôt ri mẽ pa xwÿnhjaja omu nē mẽ kot amnhī tomnuj jakamã tee ri amnhī kukamã hamaxpēr o kãm ma htÿx kumrêx. Hāmri nē kãm ma xàj mur nē htetet o kuhê. Koja nhÿrmã Jejus akupÿn wrÿ nhūm mẽ amnhī wÿr omu nē ã amnhī nhīpêx anē.

8Nē Tirtūm na hihtÿx o hihtÿx nē àhpumunh o àhpumunh. Nē aa kot mẽhō ni rūm kator kêr. Na hte amnhī jarēnh o:

— Ixrāhã ixpa xwÿnh na pa. Amnepê mã kormã mẽmoj piitā hkêt ri pa pre ra ixrāhã ri ixpa ho ixpa. Nē koja nhÿrmã mẽmoj akupÿm hapêx tã pa arī ixrāhã. Anē.

Juāw kot Jejus akupÿm htīr ã omunh

9Nē ixpê Jejus kôt mẽ atō Juāw na pa hte mẽ apyrà nē Jejus kôt amnhī nhīpêx nhūm hte mẽ kãm Jejus kurê xwÿnhjaja mẽ apyrà nē hã

inhîpêx kati ho pa. Mě pahte hkôt ri amnhî nhîpêx o papa jakamã na htem hã mẽ pahtomnuj tỳx rãhã ho pa. Tã pu htem ỹ hã mẽ kutã amnhî to htỳx nê arĩ hkôt amnhî nhîpêx. Jakamã na pa pre Tirtũm kapêr o mẽ ajahkre rãhã ho ri mẽ akôt ixpa. Nê Jejus kêp mẽ panhõ Pahihti hã mẽ amã harẽ. Mỳrapê na prem hã ixpynê nê man amnê ixto tẽ nê jar gô hipôk pê Patos kãm inhmẽ pa kamã ixpê prês nê ixpa ho ixpa.

10Tã nhũm tômĩk pa Tirtũm mã amnhî jarênh o nhỹ. Hãmri nhũm Karõ tanhmã ixkrã hto pa te ixpimtir kãm mêmoj pumunh pyrã nê amnhî katut kôt mēhõ kapêr ma. Te kot pifti kakôr tỳx pyrãk pa kuma.

11Hãmri nhũm inhmã kapêr nê inhmã:

—Pa Juãw? E kot paj amã mêmoj to amnhîrit ka omu nê akwỳjê mã hã kagã. Nê hã kagã hpa hãmri nê ahpỳnhã krĩ hkwỳ hkôt mẽ kêp ixkwỳ hã axpên wỳr mẽ pikuprõnh xwỳnhjê hwỳr arẽ. Mẽ kot kamã harênh nê mar nê axkãm hamak rom nê ri pa kaxyw. Epes wỳr nê Emĩnã hwỳr nê Pekamõ hwỳr nê Xijaxir wỳr nê Satre hwỳr nê Pirate hwỳr nê Raxisej wỳr. Krĩ pê 7ja piitã hwỳr ixkapêr ã kagã nê mẽ hwỳr arẽ kê mẽ apyrã nê mêmoj jarênhja ma. Anẽ.

12Hãmri pa ixte mēhõja pumunh kaxyw ho ijakêx nê kanê hkwỳ pumu. Kanê kêp 7 nê piitã ôr o.

13Nê kanê nhîpôk ri mēhõja te panhî pyrã nê pahi hã ê mex kãm xa. Êja hpar kôn kôt hitep nhũm xa. Nê pahi hã mẽ hinô hpre xã ho amnhî nhĩnô hpre nê xa. Hinô pre xãja ôr pix o. 14Nê hkrã hkĩ te kaxãt nhĩ jaka pyrã nê hakaajre. Nê no te kuwy hpôk pyrã nê hkarỳr tỳx nê. 15Nê hpar te mêmo kax karỳr tỳx pyrãk. Nê kapêr te gô hprôt tỳx koko pyrãk. 16Na pre upôk rũm kanhêti ho 7 nê hamỳ nê o xa. Nê hakwa rũm wapo pôm kato nê akutã wa gixre nê ajêt. Nê hkuk kamã hirã htỳx kumrêx. Te myt kot mẽ pano hã harir nhũm gêk tỳx pyrãk. ã mēhõja kot anhỳr.

17Pa tee ri tanhmã kute hã omu nê inhmã ma htỳx kumrêx nê umaj tēm nê hpar pê te ixtyk pyrã nê nõ. Hãmri nhũm ixtã upôk rũm ãhkraja xi nê inhmã kapêr nê inhmã:

—Kwa amã ixpuma hkêt nê. Pa na pa. Amnepê mã kormã mêmoj kator kêt ri pa pre raa. Nê ixrãhãã. Kojã nhỹrmã mêmoj akupỳm hapêx pa arĩ ixrãhã ixpa ho ixpa.

18—Na pa pre ty tã akupỳm ixtĩr. Nê ixtĩr o ixtĩr. Kam ixpumu. Kot paj axte ixtyk kêt nê. Ixpê mēhtykjê hpãm jakamã papxipix na pa hte mẽ htyk ã arĩgro jarê nhũm mẽ hã ty nê ma mēhtykjê papxã hwỳr ma pa.

19—E kêr ka ate mêmoj pumunh xwỳnhhta pumunh tỳx nê akwỳjê mã hã kagã. Nê mêmoj kormã kot amnhî nhîpêx kêt nhũm ate omunh mã xwỳnhhta ka inhỹ hã mẽ kãm hã kagã. Mẽ kot kamã harênh nê mar tỳx kaxyw.

20—Nê kot paj axte ixprĩ hã ate mêmoj pumunh xwỳnhhta jarê ka inhma. Nã kanê pê 7ta te mẽ kot krĩ hkwỳ pê 7 kamã mẽ kêp ixkwỳ hã

axpën wÿr mẽ pikuprõnh xwÿnhjê pyræk. Nê inhîhkra kamã kanhêti pê 7ta te kêp inhmã mẽ kot mẽ hamãr xwÿnhjê pyræk. Anê.

Epes kamã Jejus kwÿjê hwÿr kagà

2 1Nhũm Jejus arĩ inhmã kapêr nê inhmã:
—E kêr ka krĩ pê Epes kamã ixkwÿjê jamãr xwÿnh wÿr kagà nê amê. Nê kagàja kamã mẽ kãm ixkapêr jarê nê mẽ kãm:

Pa Epes kamã ixkapêr mar kaxyw axpën wÿr apikuprõnh xwÿnhjaja. Ot pa mẽ awÿr ixpêr mẽ. Ixpê ixupôk o kanhêti ho 7 nê hamÿnh nê ho ixãm xwÿnhhta na pa. Nê ixpê ôr o kanê pê 7 nhîpôk ri ixpa xwÿnhhta na pa ã mẽ awÿr ixpêr mẽnh anê.

2Na pa hte tanhmã mẽ ate amnhĩ nhîpêx to ho apa hã mẽ apumunh mex o ixpa. Na ka htem inhmã amnhĩ nhîpêx mex nê pa ja hã mẽ apumu. Mẽ kot ixtã mẽ anhîpêx kati htã ka mẽ kutã amnhĩ to htÿx nê ixkaga hkêt nê. Nê mẽ kot amnhĩ tomnuj xwÿnhjê hkôt amnhĩ nhîpêx o ri apa hkêt nê. Nhũm ixte mẽ awÿr mẽ rênh ã amnhĩ to hêx xwÿnhjaja mẽ awÿr pan pôj ka mẽ aprĩ hã mẽ kot amnhĩ to hêx ã mẽ omu. Hãmri nê tee ri mẽ kot amnhĩ nhîpêx ã mẽ omu nê amnhĩ nê mẽ hanor kurê kumrêx. Âm hãmri na ka htem ã mẽ hipêx anê.

3Nê mẽ kãm ixkurê xwÿnhjaja kot tanhmã ixtã mẽ atomnuj tÿx to htã ka mẽ kutã amnhĩ to htÿx nê aa ixkaga hkêt nê. Nê ixkôt amnhĩ nhîpêx mex rãhã ho ri apa. Âm hãmri na ka htem ã amnhĩ nhîpêx anhÿr o ri apa.

4Âm mẽmoj pixi na ixpê omnuj. Amnepê mã kormã mẽ ate ixkôt amnhĩ xunhwÿr nyw ri na ka prem amã axpën kînh nê axpën to mex o ri apa. Nê mẽ amã axpën tã ma ho te mẽ amã amnhĩ tã ma pyræk o axpën nhîpêx. Tã tanhmã ajamaxpêr to nê axte ã axpën nhîpêx anhÿr kêt nê. Jao te mẽ amã ixkînh kêt pyræk o amnhĩ nhîpêx. Pa tee ri ja hã mẽ apumu nhũm ja inhmã mex kêt nê.

5Kwa mẽ tokyx ja hã amnhĩ pumu nê akupÿm mẽ ate ixkôt amnhĩ xunhwÿr nyw ri mẽ ate axpën nhîpêxta o akupÿm axpën nhîpêx o apa. Kot kaj mẽ anhÿr kêt kot paj te mẽ apê mẽ anhõ kanê hpyr nê kapôt ã mẽnh pyræk o mẽ anhîpêx ka mẽ ri apa nê gaa nê apikaprãr pa. Tã mẽhõ koja mẽ amÿr pê mẽ anhõ krĩ kamã mẽ kãm ijarênh o pa?

6Nê mẽ kêp Nikoraw nhõ xwÿnhjaja na ka htem mẽ kot tanhmã amnhĩ tomnuj to hã mẽ omu nê ixpyrà nê apê ja hprãm nõkati nê mẽ hkôt ri amnhĩ nhîpêx kêt nê. Pa ja hã mẽ apumu nê ixkînh nê.

7Tã ixte mẽ amã ixkapêr jatur xà na ja. Kot kaj mẽ amã ixkapêr mar prãm hã kot kaj mẽ ã Tirtũm mẽ wa Ixkarõ nhÿ hã ixte mẽ amã ixkapêr anhÿrja ma nê kãm ajamaxpêr tÿx rãhã ho ri apa.

Tirtũm nhõ krĩ kamã mẽmo pĩ hpàr kuhê xwỳnh. Mẽ kot ô hkur nẽ axte htyk kêt nẽ pa ho pa mã xwỳnhhta. Kot kaj mẽ ate amnhĩ tomnuj nẽ amnhĩ to htỳx nẽ arĩ inhmã hprãm xà hkôt amnhĩ nhĩpêx rãhã ty pa akupỹm mẽ ato mẽ atĩr nẽ ma pĩ hpàrta wỳr mẽ arẽ. Ka mẽ ma hwỳr mra nẽ ô hõ hta nẽ akrẽ nẽ axte atyk kêt kumrêx nẽ apa ho apa.

E ãm ja pix na hapêx. Anẽ.

—E Juãw. Kêr ka Epes kamã ixkwỳjê jamãr o pa xwỳnhhta wỳr ã ixkapêr ã kagã anẽ nẽ mẽ hwỳr amẽ. Anẽ.

Hãmri pa kuma nẽ ô ri mẽ kãm hã kagã hpa.

Emĩnã kamã Jejus kwỳjê hwỳr kagã

8Hãmri nhũm hpãnhã Emĩnã nhõ xwỳnhjê kaxyw inhmã kapêr nẽ inhmã:

—Nẽ hpãnhã Emĩnã kamã ixkwỳjê jamãr xwỳnh wỳr kagã nẽ mẽ hwỳr amẽ. Nẽ mẽ kãm ixkapêr jarẽ nẽ nẽ mẽ kãm:

Pa Emĩnã kamã ixkapêr mar kaxyw axpên wỳr mẽ apikuprõnh xwỳnhjaja. Ot pa mẽ awỳr ixpêr mẽ. Ixrahã ho ixrahã ixpa xwỳnhhta na pa. Amnepêm kormã mẽmoj piitã hkêt ri na pa pre ixrahã nẽ ri ixpa. Kojã nhỹrmã mẽmoj akupỹm hapêx pa arĩ ixrahã ho ixrahã nẽ ri ixpa. Na pa pre ty no ãm akupỹm ixtĩr o ixtĩr. Tã pa ã mẽ awỳr ixpêr mẽnh anẽ.

9Nã na pa hte mẽ ate tanhmã amnhĩ nhĩpêx to ho apa hã mẽ apumunh rãhã ho ixpa. Na hte mẽ kãm ixkurê xwỳnhjaja ixtã mẽ atomnuj to ka mẽ apê amrakati nẽ ri apa. Nom mẽ ate tãm amnhĩ nhĩpêx jakamã te mẽ apê mẽ hikukrêx rũnh kumrêx xwỳnhjê kot amnhĩ nhĩpêx pyrã nẽ ixkukwak ri akĩnh rãhã ri apa. Na hte mẽ kêp Ijaew ã amnhĩ to hêx xwỳnhjaja mẽ ato kapêr punuj rũnh o pa. Mẽ kot Tirtũm kôt amnhĩ nhĩpêx ã amnhĩ jarênh tã no ãm hkôt amnhĩ nhĩpêx kêt nẽ. ãm Satanasti kôt pix mã na htem amnhĩ nhĩpêx o pa.

10Tã mẽ kãm ixkurê xwỳnhjaja kot ixtã mẽ atomnuj tỳx o pa htã kêr ka mẽ amnhĩ tã mẽ omu nẽ tee ri amnhĩ kukamã ajamaxpêr kêt nẽ. Nẽ arĩ mẽ kutã amnhĩ to htỳx nẽ. Kojã Satanasti mẽ akwỳjê pynê nẽ mẽ ajagjê. Hãmri nẽ mẽ ate ixkaga hprãm xaj tanhmã mẽ anhĩpêx kati hto ka mẽ hãgjênh xà kamã amnhĩ xà htỳx kamã ajamak o atã arĩgro pê 10. Nom kêr ka mẽ kutã amnhĩ to htỳx nẽ ixkaga hkêt nẽ. Mẽ kot mẽ apar mã tã ka mẽ kutã amnhĩ to htỳx nẽ. Kot kaj mẽ aa ixkaga hkêt nẽ ixkôt ri amnhĩ nhĩpêx rãhã ty pa akupỹm mẽ ato mẽ atĩr nẽ ma amnhĩ wỳr mẽ ato api. Hãmri ka mẽ Tirtũm mẽ wa ixri amex nẽ atĩr tũm nẽ apa ho apa nẽ axte atyk kêt nẽ apa.

11E ixkrajaja. Kot kaj mẽ amã ixkapër mar prãm hã kot kaj mẽ ã Tirtũm mẽ wa Ixkarõ nhỹ hã ixte mẽ amã ixkapërja anhỹr ma mẽ kãm ajamaxpër tỳx rãhã ho ri apa. Kot kaj mẽ ate amnhĩ tomnuj nê amnhĩ to htỳx nê inhmã hprãm xà hkõt pix mã amnhĩ nhĩpêx rãhã ty. Hã kot paj akupỹm mẽ ato mẽ atĩr ka mẽ ma kuwyta wỳr apa hkêt nê.

E. ãm ja pix. Na hapêx. Anê.

—E Juãw. Kêr ka Emĩnã kamã ã ixkrajê mã ixkapër ã kagà anê. Anê. Hãmri pa kuma nê ô ri mẽ kãm hã kagà.

Pekamõ kamã Jejus kwỳjê hwỳr kagà

Sikũn Korit 6.14-7.1

12Nhũm Jejus arĩ inhmã kapër nê hpãnhã inhmã:

—E hpãnhã Pekamõ kamã ixkrajê jamãr o pa xwỳnhja wỳr kagà nê mẽ hwỳr amê. Nê mẽ kãm ixkapër jarê nê mẽ kãm:

Pa Pekamõ kamã ixkapër mar kaxyw axpên wỳr mẽ apikuprõnh xwỳnhjaja. Ot pa mẽ awỳr ixpër mẽ. Ixpê ijakwa rũm põm wapo akutã wa gix nê kator nê ãm xwỳnhta na pa mẽ awỳr ixpër mẽ.

13Na pa hte mẽ anhõ krĩ nhõ xwỳnhjaja kot tanhmã amnhĩ tomnuj to ho pa hã mẽ omunh mex nê. Mẽ kot Satanasti kõt pix mã ri amnhĩ nhĩpêx o pa jakamã mẽ anhõ krĩ te kêp Satanasti nhõ krĩ pyræk. ãxipas kot mẽ hkõt mẽ kãm ixkapër o mẽ ahkre ho pa nê aa hkaga hkêt tã nhũm prem axtem nê ixtã kupĩ. Ka mẽ ja hã mẽ omunh tã mẽ umaj ixkaga hkêt nê arĩ ixkõt amnhĩ nhĩpêx rãhã ho ri apa. ãm hãmri na ka htem ã amnhĩ nhĩpêx anê.

14Mêmoj pixi na ixpê omnuj. Na hte mẽ akwỳjaja axtem nê Paraãw kapër kõt amnhĩ nhĩpêx o pa. Na pre Paraãwja Parak mã tanhmã kapër to nhũm kuma nê amnhĩ xô ri tanhmã mẽ anhĩgêt mã kapër to ho pa. Nom ixkapër kõt kêt ixkapër kuhpa hã tanhmã mẽ kãm kapër to nê mẽ kãm: “Mẽ mãmri ma sãnti hã mẽ hkĩnh mã xwỳnhjê hkõt mra nê sãnti hã apku nê hã akĩnh. Nê mẽ uræk nê axpên pê axpên prõ ho amnhĩkati nê axpên pê ri axpên mjên o amnhĩkati nê mẽ ã ri amnhĩ nhĩpêx anhỹr o ri apa. Ja mex kênã.” Anhỹr o mẽ anhĩgêt mã kapër o pa nhũm mẽ kuma nê mẽ hkõt amnhĩ nhĩpêx. Tã ka mẽ akwỳjaja mẽ uræk nê ã amnhĩ nhĩpêx anhỹr o apa. Kwa ja mex kêt.

15Na hte mẽ akwỳjaja Nikorawjê kapër kõt ixkapër kuhpa hã tanhmã amnhĩ nhĩpêx to ho pa. Ja mããnên mex kêt. 16Tã ra mẽ akwỳjaja ã amnhĩ tomnuj anhỹr o pa ka mẽ ja hã mẽ omu nê ãm mẽ omu nê nê tanhmã mẽ kãm akapër to hkêt nê. Kwa mẽ ate ã amnhĩ nhĩpêx anhỹr xwỳnhjaja. Kêr ka mẽ tokyx ja kaga nê akupỹm ixkõt ri amnhĩ nhĩpêx mex nê. Kot kaj mẽ anhỹr kêt kot

paj tokyx mẽ awỳr wrỳ nẽ te ijakwa rũm põm wapo kator xwỳnhhta o mẽ hkanhwỳr pyræk o mẽ anhĩpêx. Nom ixkapêr xihtỳx pix o tanhmã mẽ anhĩpêx to.

17E kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa.

Nẽ kot kaj mẽ ate amnhĩ tomnuj nê amnhĩ to htỳx nẽ inhmã hprãm xà hkõt amnhĩ nhĩpêx rãhã ty. Hã kot paj akupỹm mẽ ato mẽ atĩr hãmri nẽ ra pam mẽ amã mẽ anhõ ka mẽ hkur o apa. Te amnepêm Ijaew kapõt ã pa nhũm ixte mẽ hwỳr “manã” anhỹr xwỳnhhta rẽnũm mẽ kot hkur o pata pyræk. Nom ixte mẽ amã mẽ anhõja na hpimxur. ãm papxipix na pa hte mẽ kãm õr o ixa.

Nẽ kot paj mẽ atã mẽ anhĩxi nyw rẽ. Jao kẽn jakare hkwỳ hã ahpỹnhã mẽ anhĩxi nyw jaxwỳ nẽ mẽ amã kugõ. Ka mẽ hamỳ nẽ kapxipix amnhĩ nhĩxi nyw pumunh o apa.

E ãm ja pix. Na hapêx. Anẽ.

—E Juãw. Kêr ka Pekamõ kamã ixkrajê hwỳr ã ixkapêr anhỹr ã kagà nẽ mẽ hwỳr amẽ. Anẽ.

Hãmri pa kuma nẽ ô ri mẽ kãm hã kagà.

Xijaxir kamã Jejus kwỳjê hwỳr kagà

Jutre 3-23

18Nhũm Jejus arĩ inhmã kapêr nẽ inhmã:

—E hpãnhã Xijaxir kamã ixkwỳjê jamãr xwỳnh wỳr kagà nẽ amẽ nẽ mẽ kãm ixkapêr jarẽ nẽ mẽ kãm:

Pa Xijaxir kamã ixkapêr mar kaxyw mẽ apikuprõnh xwỳnhjaja. E ot pa mẽ awỳr ixpêr mẽ. Ixpê Tĩrtũm Kra na pa. Ixpê inhno te kot kuwy hpøk karỳr tỳx pyræk xwỳnhhta na pa. Nẽ ixpê ixpar te kot kàx karỳr tỳx pyræk xwỳnhhta na pa mẽ awỳr ixpêr mẽ.

19Na pa hte mẽ ate amnhĩ nhĩpêx kõt mẽ apumunh mex o ri ixa. Na ka htem amnhĩ kaxyw inhmã ajamaxpêr pẽ inhmã amnhĩ to mex o ri apa. Mẽ akwỳ kot ixtã tanhmã mẽ anhĩpêx to htã ka mẽ umaj aa ixkaga hkêt nẽ. Nẽ arĩ amã ixkĩnh tỳx kãm tanhmã amnhĩ nhĩpêx to ho ri apa. Nẽ axpẽn to mex nẽ ixkõt pix mã amnhĩ nhĩpêx o ri apa. Jao ra ixkõt amnhĩ nhĩpêx mex o wam mẽ ate ixkõt amnhĩ nhĩpêxta jakre. Nà ja inhmã mex kumrêx.

20Ãm mẽmoj pixi na ixpê omnuj. Mẽ akõt niti ri pa xwỳnh Jejapewtita. Kêp Tĩrtũm nhỹ hã kapêr jarẽnũm o pa xwỳnh ã amnhĩ to hêx xwỳnhhta. Na hte ixkapêr kupa hã tanhmã mẽ ajahkre hto ka htem ama nẽ nê tanhmã kãm nẽ hkêt nẽ. Na hte mẽ amã: “Xê mẽ mãmri ri mẽ hkuprỳjê hwỳr mra nẽ mẽ ho amnhĩkati. Nẽ axpẽn pẽ mẽ aprõ nẽ mẽ amjẽn o amnhĩkati. Nẽ mẽ kot sãnti hã

mě hkĭnh nē hā apkur xwÿnhjê hkôt mra nē mẽ hkôt amnhĭ nhĭpêx. Tĭrtũm kām ja mex kēnā.” Anhÿr o mẽ amā kapêr o pa. Nē inhmā ja mex ā ijarē nom inhmā ja mex kêt. Tā ra mẽ akwÿjaja kapêr ma nē hkôt amnhĭ nhĭpêx ka mẽ ja hā mẽ omunh tā amnhĭ nē nitita janor kêt nē nhũm arĭ ri mẽ amā hêx o ri mẽ akôt pa. 21Ra kot ā amnhĭ nhĭpêx anhÿr o mẽ akôt pa ry rax kumrêx tā pa kormā ja hā tanhmā ho hkêt nē kormā amnhĭ tā hamā. Kot ā amnhĭ nhĭpêx anhÿr kaga kaxyw na pa kormā hamār o ri ixpa. No nhũm aa hkaga hkêt nē.

22Mÿrapê kot paj tokyx tanhmā ho nhũm amnhĭ xà htÿx kamā hamak o hikwÿ. Tā mẽ kot kapêr mar nē hkôt amnhĭ nhĭpêx xwÿnhjaja kot amnhĭ tomnuj ā amnhĭ pumu nē hkaga hkêt hā kot paj mā mẽ ho anē nē. Māānēn tanhmā mẽ homnuj to nhũm mẽ nitita pyrā nē amnhĭ xà htÿx kamā hamak o hikwÿ.

23Nē nitita kot paj kêp hkrajê nhĭmex pa. Ka mẽ apê ixkrajaja ja hā ixpumu nē ixte mẽ apiitā ahpÿnhā tanhmā mẽ ajamaxpêr to hkôt mẽ apumunh ā ixpumu. Nē ixte ahpÿnhā mẽ apiitā tanhmā mẽ ate amnhĭ nhĭpêx to ho apa hā mẽ apumunh xà hkôt tanhmā mẽ anhĭpêx to hā ixpumu.

24Na hte mẽ akwÿjaja akwÿjê rom nita kapêr ma nē ām kuma nē hkôt amnhĭ nhĭpêx kêt nē. Nē mẽ kapêrja mẽ kot kām: “Satanasti kapêr pimxur” anhÿr xwÿnhhta kôt nhũm mẽ amnhĭ nhĭpêx kêt nē. Na htem ixkôt pix mā amnhĭ nhĭpêx mex o ri pa. Tā ā mẽ ate ixkôt amnhĭ nhĭpêx anhÿr o apa xwÿnhjaja kot paj mẽ amā ja pix ā karō ka mẽ inhma. 25Kêr ka mẽ arĭ ixkôt pix mā amnhĭ nhĭpêx o ri apa rāhā pa akupÿn mẽ awÿr wrÿ. Ām ja pix ā kot paj mẽ amā karō.

26Nē kot kaj mẽ ate amnhĭ tomnuj nē amnhĭ to htÿx nē arĭ inhmā hprām xà hkôt amnhĭ nhĭpêx rāhā ty. Hāmri pa ja hā mẽ apumu nē nhÿrmā mẽ ate krĭ hkwȳ hkôt mẽ pa xwÿnhjê ho amnhĭptār o apa kaxyw mẽ axunhwÿ. Ka mẽ apê mẽ õ pahihtĭ nē inhmā mẽ ho amnhĭptār o ri apa.

27Na pre Inhĭpêêxà ixte pika piitā hkôt ri mẽ pa xwÿnhjê ho amnhĭptār kaxyw ixām.

Tā kot paj nhÿrmā amnhĭ pyrā nē mẽ kaxyw mẽ axunhwÿ ka mẽ inhmā mẽ hamār o apa.

Nhũm mēhō ixkapêr kwÿm ri tanhmā amnhĭ nhĭpêx to ka mẽ ja hā omu nē hā tanhmā ho. Te mẽ kot poti punuj mÿnh nē mēnh nē hkrakrak pyrāk.

28Kot paj ā mẽ ate mẽ hipêx anhÿr o apa kaxyw mẽ axunhwÿ. No ām ja pix kêt. Kot paj te ixte mẽ amā kanhêti hō nhōr pyrāk o mẽ anhĭpêx. Arĭgro hkôt kanhêti no hpōk rax japōx xwÿnhhta kot paj te ixte mẽ amā õr pyrāk ka mẽ ixri atĭr tũm nē apa ho apa.

29E ixkrajaja. Kot kaj mẽ amã ixkapër mar prãm hã kot kaj mẽ ã Tirtũm mẽ wa Ixkarõ nhỹ hã ixte mẽ amã ixkapër anhỹrja ma mẽ kãm ajamaxpër tỳx rãhã ho ri apa. Anẽ.

—E Juãw. Kêr ka ã Xijaxir kamã ixkrajê kaxyw ixkapër ã kagà mẽ mẽ hwỳr mẽnh anẽ. Anẽ.

Hãmri pa kuma mẽ ô ri mẽ kãm hipêx mẽ mẽ hwỳr kumẽ.

Satre kamã Jejus kwỳjê hwỳr kagà

Rukre 12.35-40

3 1Nhũm Jejus arĩ inhmã kapër mẽ inhmã:
—E hpãnhã Satre kamã ixkwỳjê jamãr xwỳnh wỳr kagà mẽ mẽ kãm ixkapër jarẽ mẽ mẽ kãm:

Pa Satre kamã ixkrajaja. E ot pa mẽ awỳr ixpër mẽ. Ixpê inhĩkra ho kanhêti pê 7 jamỳnh mẽ xãm xwỳnhnta na pa. Nẽ ixpê inhĩkra ho Tirtũm Karõ ãm pyxi htã te kamã kêp 7 jamỳnh mẽ ho ixãm xwỳnhnta na pa mẽ amã ixkapër.

Na pa hte mẽ ate tanhmã ri amnhĩ nhĩpêx to hã mẽ apumunh rãhã ho ixpa. Mẽ piitã kot axpẽn mã mẽ ate ixkõt amnhĩ nhĩpêx ã mẽ ajarênh tã ã mẽ ate amnhĩ nhĩpêx anhỹr kêt. Na ka htem ixkuhpa hã pix mã amnhĩ nhĩpêx o apa. Jakamã te inhmã ra mẽ atyk mẽ mẽ anhĩkwỹ pyrãk.

2Na ka htem ãm akrãnh mã ixkõt ri amnhĩ nhĩpêx nom Tirtũm mẽ wa ixkõt amnhĩ nhĩpêx mex kêt mẽ. Ra Tirtũm mẽ wa ixte ja hã mẽ apumunh mex. Mẽ ate kormã wa inhnoo mã tãm ri amnhĩ nhĩpêx kêt jakamã kwa mẽ tokyx ja hã amnhĩ pumu mẽ ate amnhĩ tomnuj mã anhũre mẽ wa ixkõt amnhĩ xunhwỳr tỳx mẽ.

3Kêr ka mẽ amnepê mã kormã mẽ ate ixkõt amnhĩ nhĩpêx nyw ri mẽ kot ixkapër o tanhmã mẽ ajahkre htoja mã ajamaxpër mẽ amnhĩ tomnuj mã anhũre. Nẽ ixkapër kõt pix mã mãn amnhĩ nhĩpêx o ri apa. Kot kaj mẽ anhỹr kêt kot paj nhỹrmã mẽ ajaêr pê akupỳn mẽ awỳr wrỳ mẽ ja hã tanhmã mẽ ato.

4Ãm mẽ agrêre mẽ amã ixkõt amnhĩ nhĩpêx prãm. Jao tãm ri amnhĩ nhĩpêx mẽ mẽ kot amnhĩ tomnuj xwỳnhjê hkõt amnhĩ nhĩpêx kêt mẽ. Te mẽ axê jakare kamã apa mẽ tanhmã amnhĩ pê htyk to hkêt pyrãk. Tã kot kaj mẽ nhỹrmã ixri mẽ axê jakare kamã apa ho apa. Ra mẽ ate ja ho anhỹr mã tãm kênã. Ja na Tirtũm kãm hprãm.

5Nẽ krĩ piitã hkõt mẽ ate amnhĩ tomnuj nê amnhĩ to htỳx mẽ inhmã hprãm xà hkõt amnhĩ nhĩpêx rãhã atyk xwỳnh piitã kot ka mẽ nhỹrmã Tirtũm mẽ wa ixri amex mẽ atĩr tũm mẽ apa ho apa. Ra mẽ hixija Mẽpahpãm Maati nhõ kagàja kamã na. Kamã mẽ atĩr o mẽ atĩr mã xwỳnhjê nhĩxi piitã hã kagà. Kot paj kagàta kamã aa mẽ anhĩxi grãnh kêt mẽ. Hãmri mẽ Inhĩpêxã mẽ kapër o mẽ wrỳk

xwỳnhjê mã mẽ ajarênh o: “E mẽ jajê pumu. Ixkwỳ na mẽ.” Anhỹr o mẽ kãm mẽ ajarê.

6E ixkwỳjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỹrja ma nẽ kãm ajamaxpêr tỳx rãhã ho ri apa.

Tã ãm ja pix. Na hapêx. Anẽ.

—E Juãw. Kêr ka ã Satrejê mã ixkapêr ã kagà nẽ mẽ hwỳr mẽnh anẽ. Anẽ.

Hãmri pa kuma nẽ ô ri mẽ kãm hã kagà.

Pirate kamã Jesus kwỳjê hwỳr kagà

Wam Tesarõn 2.13-16

7Nhũm Jesus arĩ inhmã kapêr nẽ inhmã:

—E hpãnhã Pirate kamã ixkwỳjê jamãr xwỳnh hwỳr kagà nhĩpêx nẽ amẽ nẽ mẽ kãm ixkapêr jarê nẽ mẽ kãm kãm:

Pa Pirate kamã mẽ ate ixkapêr mar kaxyw mẽ apikuprõnh xwỳnhjaja. E ot pa mẽ awỳr ixpêr mẽ. Inhmex o inhmex xwỳnh na pa. Aa ixêx kêt nẽ ixpa xwỳnh. Amnepê mã na pre mẽhõja pahi Tawi mã õrkwỹ mex ã saf jamãr o pa. Tã pa hte uràk nẽ Inhĩpêxà Tĩrtũm nhõ krĩ hwỳr mẽ gjêx xà hã saf jamỳ nẽ ho ixpa. ãm papxipix inhõ saf jakamã papxipix na pa hte mẽ ate ixkõt amnhĩ xunhwỳr xwỳnhjaja mẽ agjêx kaxyw mẽ amã kahê xà rẽ nẽ ixkra hkêt xwỳnhjê pẽ kahê. Kot paj mẽ apê ixkrajê mã kahê xà rẽ ka mẽ hwỳr agjê. Hãmri pa mẽ atã kahê nhũm ixkra hkêt xwỳnhjaja tee ri kãm mẽ akõt gjêx prãm kaprỳ.

8Na pa hte tanhmã mẽ ate amnhĩ nhĩpêx to ho apa hã mẽ apumunh mex o ri ixpa. Mẽ agrêre htã na ka htem ixkapêr kõt amnhĩ nhĩpêx mex nẽ aa ixkaga hkêt nẽ. Jakamã kot paj te ixte mẽ amã Tĩrtũm nhõ hakwakre kahê xà mẽnh pyràk o mẽ anhĩpêx ka mẽ axãmnhĩx ajamakêtkati nẽ ma mẽ kãm Tĩrtũm kapêr o mẽ ahkre ho ri mẽ hkõt apa. Nhũm mẽ hkwỳjaja tee ri ã mẽ ate amnhĩ nhĩpêx anhỹrja nẽ mẽ amã kapêr kaprỳ ka mẽ arĩ ho mẽ ahkre ho ri mẽ hkõt apa.

9Nẽ mẽ anhõ krĩ kamã mẽ akwỳjaja na prem ra Satanasti hkõt amnhĩ xunhwỳ nẽ hêx rom mẽ amã amnhĩ to hêx nẽ mẽ amã: “E mẽ ixpê Ijaew mex jakamã kwa mẽ ixkapêr ma nẽ mẽ ixkõt amnhĩ nhĩpêx.” Anhỹr o mẽ amã karõ htã no ãm mẽ kot Satanasti hkõt amnhĩ nhĩpêx xwỳnh na mẽ. Tã kot paj nhỹrmã tanhmã mẽ homnuj to nhũm mẽ tee ri amnhĩ pumu nẽ akupỹm mẽ awỳr mra nẽ mẽ akutã hkõnkrã ho rôrõk nẽ hkrĩ nẽ mẽ amã: “Nà mẽ kajaja na ka pêr mẽ ixrom Jesus kõt amnhĩ nhĩpêx. Mãn kãm mẽ ajapêê.” Anẽ.

10Mê kot ixtã mẽ atomnuj tỳx nhũm mẽ ate amnhĩ xà htỳx kamã ajamak tâ aa mẽ umaj ixkaga hkêt nê. Nê arĩ ixte mẽ amã mẽmoj tâ karõ xà hkôt mẽ kutã amnhĩ to htỳx rãhã arĩ ixkôt ri amnhĩ nhĩpêx o apa. Jakamã mẽ kot nhỹrmã mẽ kãm ixkurê xwỳnhjaja pika piitã hkôt tanhmã mẽ homnuj tỳx to nhũm mẽ amnhĩ xà htỳx kamã ama. Tã kot paj mẽ anê mẽ omunh mex nê nhũm mẽ tanhmã mẽ ato hkêt nê ka mẽ amex nê ri apa ho apa.

11E kot paj tokyx akupỳn mẽ awỳr wrỳ nê mẽ ate ixkôt pix mã amnhĩ nhĩpêx ã mẽ ato mex rax kumrêx. Jakamã kwa mẽ mãmrĩ ã amnhĩ nhĩpêx anhỳr o inhmã hprãm xà hkôt pix mã amnhĩ nhĩpêx rãhã ty. Kot ka mẽ anhỳr kêt kot pa mẽ amã mẽmoj mex nhõr kêt nê.

12Nê kot kaj mẽ kot amnhĩ tomnuj xwỳnhjê kutã amnhĩ to htỳx nê inhmã hprãm xà hkôt pix mã amnhĩ nhĩpêx rãhã ty. Hã kot paj amnhĩ kôt mẽ ato mẽ axihtỳx nê ka mẽ aa ixkaga hkêt nê. Nê kot paj nhỹhỹnh mẽ atã mẽ inhĩxi ho axkrunêpxi nê haxwỳ. Inhĩpêxà nhĩxi nê inhĩxi nyw nê Inhĩpêxà nhõ krĩ nhĩxija kot paj nhỹhỹnh mẽ atã haxwỳ. Tĩrtũm nhõ krĩ mẽ kot kãm: “Jerujarê nyw” anhỳr xwỳnhta koja nhỹrmã tanhmã amnhĩ to nê ra kaxkwa rũm pika wỳr wrỳ.

13E ixkwỳjaja. Kot kaj mẽ amã ixkapêr mar prãm hã kot kaj mẽ ã Tĩrtũm mẽ wa Ixkarõ nhỹ hã ixte mẽ amã ixkapêr anhỳrja ma nê kãm ajamaxpêr tỳx rãhã ho ri apa.

Tã ãm ja pix. Na ra hapêx. Anê.

—E Juãw. Kêr ka ã Pirate kamã ixkrajê mã ixkapêr ã kagà anê. Anê. Hãmri pa kuma nê ô ri mẽ kãm hã kagà.

Raxisej kamã Jejus kwỳjê hwỳr kagà

14Nhũm pre Jejus arĩ inhmã kapêr nê inhmã:

—E hpãnhã krĩ pê Raxisej kamã ixkrajê jamãr xwỳnh wỳr kagà nhĩpêx nê amê. Nê mẽ kãm ixkapêr jarênh o:

Pa Raxisej kamã ixkrajaja. Ot pa mẽ awỳr ixpêr mẽ. ãm hãmri ixkapêr o ixpa nê aa ixêx kêt xwỳnhta na pa. Jakamã ãm hãmri na pa hte Tĩrtũm kapêr o mẽ ajahkre o ixpa nê aa ja kaga hkêt nê. Pa na ixpê mẽmoj piitã hpàr krax.

15-16Na pa hte mẽ ate tanhmã amnhĩ nhĩpêx to ho apa hã mẽ apumunh rãhã ho ixpa. Kop apu mẽ ate ixkôt amnhĩ nhĩpêx mex ronhỹx pa ja hã mẽ apumu nê ixkĩnh nê. Nom mẽ ate ã amnhĩ nhĩpêx anhỳr kêt. No mããnên aa ixkaga hkêt nê. Na ka htem ri atỳx amnhĩ krã hkôt pix mã tanhmã amnhĩ nhĩpêx to ho apa nhũm ja ixpê omnuj nê. Kot kaj mẽ arĩ ã amnhĩ nhĩpêx anhỳr o apa pa hpãnhã amnhĩ nê mẽ akurê. Te mẽ kot gô xenh nõkati janhir nê tee hkakinh nê akupỳm hkapĩr pyræk.


17Mê ate inhmã hprãm xà hkôt amnhĩ nhĩpêx ã amnhĩ jarênh tã ã amnhĩ nhĩpêx anhÿr kêt nê. Nê ixkapêr mar tÿx nê amnhĩ kaxyw inhmã ajamaxpêr mex kêt nê.

18Kwa mẽ tokyx ja hã amnhĩ pumu nê akupÿm ixkôt amnhĩ xunhwÿr tÿx nê. Kêr pa ja hã mẽ apumu nê amnhĩ katut kôt mẽ ate amnhĩ tomnuj rê nê tanhmã mẽ akrã hto ka mẽ inhnoo mã tãm amnhĩ nhĩpêx mex o ri apa. Hãmri pa mẽ amã tanhmã amnhĩ to amnhĩrit to ka mẽ aprĩ hã ixte amnhĩ nhĩpêx ã ixpumunh mex nê ixkôt amnhĩ nhĩpêx mex rãhã o ri apa.

19Xà inhmã mẽ ajapê hkêt ã na pa ã mẽ amã ixkapêr anê? Nà inhmã mẽ apiitã mẽ ajapê htÿx kênã. Nom inhmã mẽ ajapê htã ka htem ixkôt amnhĩ nhĩpêx kêt nê. Na pa tee ri amnhĩ tã mẽ apumu nê ja hã tanhmã mẽ atomnuj tÿx to. Tokyx mẽ ate amnhĩ tomnuj mã anhÿrer nê hpãnhã tãm amnhĩ nhĩpêx kaxyw. Jakamã kwa mẽ tokyx ate amnhĩ tomnuj kaga nê akupÿm amnhĩ kaxyw inhmã ajamaxpêr ho ri apa.

20Na htem hkwÿjê nhõrkwÿ hwÿr gjêx kaxyw hakwa krem kãm àkjêr o kuhê nhũm mẽ kuma nê mẽ kãm anê nhũm mẽ hwÿr agjê. Nê mẽ ixkre hkre kamã axpên mã kapêr o hkrĩ rÿ axpên mã kapêr pê mẽmoj to hkôm o hkrĩ. Ja pyrã nê ot pa mẽ ajamãr o ixpa. Mẽ ate inhmã anhÿr nhũm ixte mẽ akôt ixpa ho ixpa nhũm mẽ pahte axpên to mex o papa kaxyw.

21Kormã mẽ kot ixpĩr kêt ri na pa pre mẽ kot amnhĩ tomnuj xwÿnhjê kutã amnhĩ to htÿx o ixpa. Amnhĩ to htÿx nê ri ixpa kamã ixtyk jakamã nhũm Inhiãpêxã akupÿm ixto ixtĩr nê akupÿm amnhĩ



Apokarip 3.20

wÿr ixto api. Hāmri nē amnhī nhīhkô hã mē ho amnhīptār ã hkrī xà kamã inhÿr pa ixkrī ho ixkrī nē ïhkô hã mē piitã mē ho amnhīptār o ixkrī. Tã kot kaj mē atô ixpyrà nē ate amnhī tomnuj nē amnhī to htÿx nē. Nē inhmã hprãm xà hkôt pix mã amnhī nhīpêx rãhã ty. Hã kot paj amnhī pyrà nē wa ixte mē ato amnhīptār ã ixkrī xàja kamã amnhī nhīhkô hã mē akrī ka mē wa inhīhkô hã wa inhmã mē ho amnhīptār o akrī.

22E ixkwÿjaja. Kot kaj mē amã ixkapêr mar prãm hã kot kaj mē ã Tirtûm mē wa Ixkarô nhÿ hã ixte mē amã ixkapêr anhÿrja ma nē kãm ajamaxpêr tÿx rãhã ho ri apa.

Tã ãm ja pix. Na hapêx. Anē.

—E Juãw. Kêr ka Raxisej kamã ixkrajê mã ixkapêr ã kagà nē mē hwÿr amē. Nē kagàja piitã krī hkwÿ kamã ahpÿnhã ixkwÿjê hwÿr arê kê mē kamã harê nē ixkapêr ma. Anē.

Nhûm pre ã Jejus inhmã kapêr anē. Pa kuma nē ô ri mē piitã mē kãm hã kagà hpa.

Tirtûm kot mē ho amnhīptār ã hkrī xà jarênh

4 1Tã pa axte mēmoj pumu nhûm kaxkwa hwÿr mē gjêx xà hã hakwakreja amnhī kahê xà mē pa omu. Hāmri nhûm axte mēhō kapêr tÿx xwÿnhta. Te kot pifti kakôr tÿx pyràk xwÿnhta axte inhmã kapêr nē inhmã:

—E amnē ixwÿr api pa mēmoj nhÿrmã kot tanhmã amnhī nhīpêx to hkukamã amã ho amnhīrīt ka omu. Anē.

2Hāmri nhûm Tirtûm Karô tanhmã ixto nē ixto api pa kaxkwa kamã mēmoj pumunh o xa. Tirtûm kot mē ho amnhīptār ã hkrī xà maatita pa pre omu. Nhûm kamã mēhōja nhÿ. 3Kuk kamã hirã htÿx kumrêx. Te mēmo kên kamrêk karÿr jaxênh tÿx pyràk. Nē kot mē ho amnhīptār ã hkrī xà puhã màxwÿxti grãgrãreja kãm hipôk nē harir pa omunh o xa.

4Nhûm hkrī xà maati puhã mē ho amnhīptār o hkrī xà kêp 24. Kamã mē aptār tûmjaja hkrī. Mē piitã ôr o mē ahkà htu nē ê jakare nē hkrī.

5Nē Tirtûm hkrī xà maati ja rûm na katôtôk nē hkrakrak nē haxênh japà nē hikwÿ. Nē hkrī xà kapem kanê maati pixi kamã kwrÿt pê 7ja pôk rãhã ho kuhê. Kanêja te Tirtûm Karô pyràk.

6Nē hkrī xà kapem mēmo te gô rax pyràkja hkarÿr jaxênh tÿx kumrêx nē nô. Te ho kàx karÿr jaxênh tÿx pyrà nē hkarÿÿre. Nē hkrī xà puhã mēmoj tÿr nē kuhê pê kwat kuhê. Nē ôkwa nē katut piitã hkôt no. ãm no xohtô rax kumrêx. Na pre ã mēmoj kêp kwatja no xohtô anê pa omu.



Apokarip 4.5

7Wamta te kot mry pê rêawti pyræk. Nê hkôt ja te kot môx myti pyræk. Nê hapu hã hkuk te panhĩ hkuk pyræk. No hapu hã ja te kot àanhãhti htor kaxyw hara koror pyræk.

8Nê piitã hara kêp 6. Nê ã piitã kamã no. Nhũm prem Tĩrtũm mã mex o mex ã grer rãhã ho kuhê nê aa pinhkrênh kêt nê. Nê kãm grer o:

Amex o amex Tĩrtũm.

Nê axihtỳx o axihtỳx.

Nê aa ate amnhĩ tomnuj kêt kumrêx.

Amnepê mã kormã mẽmoj kêt ri ka ra arãhã ri apa. Tã arĩ arãhã ri apa xwỳnh na ka. Kot kaj aa ajapêx kêt nê.

Ãm hãmri na ka hte mẽ ixto mex rãhã ho apa.

Nê amex o amex Tĩrtũm. Anê.

9-10Nhũm prem xatã mẽ ho amnhĩptàr hkrĩ xà kamã hkrĩ xwỳnhja mẽ kot kãm “Rãhã pa xwỳnh” anhỳr xwỳnhhta mã ã grer anhỳr o kuhê. Kãm mex o mex ã grer pê tanhmã kot mẽ ho mex to hã harê. Hãmri nhũm mẽ àptàr tũm pê 24jaja mããnên kutã hkõn krã ho rôrôk nê hipô hpa nê hkrĩ. Nê amnhĩ krã rũm ôr o mẽ ahkàja kwỳr nê hpar pê haxwỳ. Kêp mẽ ô Pahi Maati hã hã hpijaàm kaxyw wamtajê pyrã nê mex o mex ã harênh o hkrĩ nê kãm:

11 Ãm hãmri na pa htem amex o amex ã ajarê Tĩrtũm

Apê mẽ inhõ Pahi Maati na ka.

Nê apê mẽ inhõ Tĩrtũm na ka.

Na ka pre mẽmoj piitã ho akato. Axàhpumunh tỳx nê ajamaxpêr tỳx o mẽmoj piitã amã hprãm xà hkôt ho akator pa.

Jakamã na pa htem ã amex o amex ã ajarênh anê. Mẽ ixrom axihtỳx mex kumrêx na ka hte apa Tĩrtũm. Anê.

Mẽ pahte amnhĩ tomnuj pãnhã amnhĩrer xwỳnh jarênh


Juãw 1.29; Piripos 2.5-11

5 1Tã pa pre arĩ te kaxkwa kamã mẽmoj pumu. Mẽ ho amnhĩptàr ã hkrĩ xà maatita kamã hkrĩ xwỳnh nhĩhkra kamã kagà pa omunh o xa. Upôk rũm omu. No ãm axtem kagà kaxkep na pre. Nê akutã hã kagà nê menh ê ho ho htỳx xàja kêp 7.

2Hãmri nhũm Tĩrtũm kapêr o wrỳk xwỳnh xihtỳx xwỳnhja kapêr tỳx kãm kapêr o:

—E mẽ atõ na ate kagà mỳj pyr nê ho htỳx xà hpôt mã tãm? Anê.

3Hãmri nê tee ri mẽ piitã mẽ hkapi nom nhũm ja kaxyw mẽhõ amrakati



Apokarip 5.1-5

kumrêx. Kaxkwa kamã amrakati nê pika kamã mãânên amrakati nê pika hkrak ri amrakati. Nhÿri mêhõ kot kagà kaxkepta pyr nê hpôt nê omunh mã tãm xwÿnhja amrakati ho amrakati.

4Nhÿm tee ri mêhõ japêr nom mêhõ pumunh kêt nê. Pa tee ri ja hã omu nê ixkaprĩ htÿx nê inhmÿr o xa.

5Hãmri nhÿm pahi hõja ixpumu nê inhmã:

—Kwa amÿr kêt nê. E mêhõ mÿj pumu. Juta kanrêhã htãmnhwÿ xihtÿx xwÿnhhta. Pahi Tawi kanrêhã htãmnhwÿ te kêp mry pê rêaw xihtÿx pyrãk o hihtÿx xwÿnh mÿj pumu. Kot mē kãm hkurê xwÿnhjê kutã amnhĩ to htÿx nê mēmoj punuj piitã ho hapêx kaxyw mã xwÿnh jakamã tapxipix na kot kagàta hpyr nê ho htÿx xà hpôt par mã tãm. E ka omu. Anê.

6Hãmri pa kuma nê hwÿr rĩt nê Jejusja pumu. Kot mē pahte amnhĩ tomnuj pãnhã amnhĩrer xwÿnhhta mē ho amnhĩptàr o hkrĩ xà maati kapem xa. Mēmoj htĩr pê kwat mē àptàr tũm pê 24jê nhĩpòk ri xa. Mē kãm hkurê xwÿnhjaja kot hpĩr nhÿm ra akupÿm htĩr nê xa. Nom ra axtem nê xa. Àhpumunh tÿxja te kot pahi xàhpumunh pyrãk. Nê hpàr kêp 7. Nê no mãânên kêp 7. Noja te Tĩrtũm Karõ pyrã nê kêp pika piitã hkôt pa xwÿnh. ã Jejusja axtem nê ãm anê pa omu.

7Hãmri nhÿm mē pahto amnhĩptàr o hkrĩ xwÿnhhta wÿr tē nē ãkra kamã kêp kagà kaxkepta py.

8Hãmri nhÿm mē htĩr pê kwat mē mē àptàr tũmjaja hpar pê hkõn krã ho rôròk nê hkrĩ hpa nê hipô nê hkrĩ. Piitã wiorãwti jamÿ nê ôr o xijere kamã mēhkuxwa xà jamÿ nê o hkrĩ. Nhÿm Tĩrtũm krajaja Tĩrtũm mã tanhmã amnhĩ jarênh to nhÿm mē mar o hkrĩ. Te xijere kamã mēhkuxwa xà hpãr o hkrĩ pyrã nê mē kuma.

9-10Jakamã nhÿm mē hkõn krã ho hkrĩ xwÿnhjaja mē pahte amnhĩ tomnuj pãnhã amnhĩrer xwÿnhhta kutã kãm greer o hkrĩ. Mē greer nyw o kãm gre nê kãm:

Na prem apĩ ka atyk o mē piitã mē kot amnhĩ tomnuj pãnhã amnhĩrer pa.

Ahpÿnhã pika piitã hkôt mē urojê piitã hpãnhã amnhĩrer pa.

Nê ahpÿnhã ri mē kapêr xwÿnh kwÿjê piitã mē hpãnhã amnhĩrer pa. Atyk o mē kot amnhĩ tomnuj piitã hpãnhã amnhĩrer pa.

Jakamã nhÿm mē kot akôt amnhĩ xunhwÿr xwÿnhjaja kêp Tĩrtũm kra nê ri pa.

Ka ra mē panhõ Tĩrtũm mã mē kêp patre kaxyw mē unhwÿ nhÿm htem pika piitã hkôt mē ho amnhĩptàr o pa.

Tã atyk o ate pika piitã hkôt mē hpãnhã amnhĩrer jakamã kapxipix na ate kagàta pyr nê ho htÿx xà hpôt mã tãm. Anê.

11Hãmri nhÿm Tĩrtũm kapêr o mē wrÿk xwÿnhjaja nhÿhÿnh hapôj nê kuhê. Mē ohtô rax o ohtô rax. Ohtô rax o mē pajamaxpêr jakrenh. Hãmri

ně Tirtūm kot mẽ ho amnhĩptàr ã hkrĩ xà maatija wỳr mra mẽ kãm hipòk pa. Nễ mẽmoj tĩr mẽ kuhê xwỳnhjê mẽ mẽ àptàr tũmjê mã hipòk pa mẽ mẽ pahte amnhĩ tomnuj pãnhã amnhĩrer xwỳnhhta mã kapêr.

12Kàx pê kãm kapêr mẽ kãm:

Àm hãmri na pa htem amex o amex ã inhgrer o ixkuhê.

Mễ ixrom axihtỳx o axihtỳx.

Nễ mẽmoj piitã anhõõ.

Nễ ate mẽmoj piitã hkukamã axàhpumunh par.

Nễ amex o amex jakamã na pa htem amã amex pix ã inhgrer o ri ixpa. Anễ.

13Tã nhũm mẽmoj piitã Tirtūm mẽ Jejus wa kãm wa mex o wa mex ã harê. Pika hkôt panhĩ mẽ mry mẽ àk mẽ mẽmoj piitã. Nễ pika hkrak ri mẽ gô hkrak ri mẽmoj piitã. Nễ mẽ htykjaja. Nhũm mẽ piitã wa kãm wa mex o wa mex ã wa harê mẽ wa kãm:

E ate mẽ ixto amnhĩptàr ã akrĩ xà kamã akrĩ xwỳnh mẽ kot mẽ ixte amnhĩ tomnuj pãnhã amnhĩrer xwỳnh mẽ war amex o wa amex.

Nễ war axihtỳx o war axihtỳx.

Nễ war axàhpumunh o war axàhpumunh.

Na pa htem ã war ajarênh anhỹr rãhã ixpa ho ixpa. Anễ.

14Hãmri nhũm mẽmoj tĩr pê kwatjaja mẽ kuma mẽ mẽ kãm:

— Nã ãm hãmri na ka mẽ ã wa harênh anễ.

Wa mex o wa mex kumrêx. Anễ.

Hãmri nhũm mẽ àptàr tũmjaja Tirtūm mẽ Jejus wa hpar pê hkõn krã ho rôròk mẽ hkrĩ hpa mẽ haxwỳja wa kãm wa mex o wa mex ã wa harê.

Kagà ho htỳx xà pê 7 jarênh

Matêwre 24.3-14; Sikũn Tesarõn 2.3; Wam Juãw 2.18

6 1Tã pa arĩ kaxkwa kamã mẽ pahte amnhĩ tomnuj pãnhã amnhĩrer xwỳnh kot tanhmã amnhĩ nhĩpêx to hã omunh o xa. Nhũm kagà kaxkepta py mẽ wam ho htỳx xà pôt. Hãmri nhũm mẽmo tĩr pê kwatjê hõja kapêr tỳx kumrêx. Te na katõtòk tỳx pyràk o mễhõj mã kapêr mẽ kãm:

— E amnễ mẽ ixwỳr tễ. Anễ.

2Hãmri nhũm kawar jakajre nhỹhỹnh hwỳr hpòx o tễ. Nhũm mễhõja õ kuxê mỳ mẽ hã nhỹ mẽ tễ. Hãmri nhũm nhãm mễhõja hwỳr tễ mẽ kãm pahi hã mẽ ahkà htu. Hãmri mẽ kãm tanhmã kapêr to nhũm kuma mẽ mẽ kot kãm Tirtūm mẽ Jejus wa kurê xwỳnhjê nhĩmex par kaxyw hakêx mẽ ma pika hwỳr tẽn wry.

3Hãmri nhũm mẽ pahte amnhĩ tomnuj pãnhã amnhĩrer xwỳnhja wam kagà ho htỳx xàta kôt axte ja pôt. Hãmri nhũm mẽmoj tĩr pê kwatjê hõja axtem mễhõj mã kapêr mẽ kãm:

—E amně mẽ ixwỳr tẽ. Anẽ.

4Hãmri nhũm kawar kamrêk mẽ hwỳr hpôx o tẽ. Nhũm mẽhõ hã nhỹ nẽ tẽ. Nhũm nhãm mẽhõja kãm wapo gõ nẽ ma pika hwỳr htẽm nẽ wrỳk kaxyw hano. Kot hwỳr wrỳk nẽ pikap mẽ pa xwỳnhjê kurê huk kaxyw. Mẽ kot axpẽn par kaxyw ma mẽ hwỳr kumẽ. Hãmri nhũm kuma nẽ wapota py nẽ hakẽx nẽ ma mẽ hwỳr tẽn wrỳ.

5Hãmri nhũm mẽ pahte amnhĩ tomnuj pãnhã amnhĩrer xwỳnhja kagà ho htỳx xà hõ pôt. Na pre ra ho axkrut nẽ hpôt tã hpãnhã axte hkôt ja pôt. Hãmri nhũm mẽmoj tĩr pẽ 4jẽ hõta mẽhõj mã kapër nẽ kãm:

—E amně mẽ ixwỳr tẽ. Anẽ

Hãmri nhũm kawar tykre mẽ hwỳr hpôx o tẽ. Nhũm hã ỳr xwỳnhja mẽmoj to peja xà hã parãs mỳ nẽ o tẽ.



Apokarip 6.5-6

6Hãmri nhũm mẽ htĩr pẽ kwatjê rũm mẽhõja kãm kapër nẽ kãm:

—E kër ka ma pika hwỳr mẽ hwỳr tẽn wrỳ nẽ mẽ kãm myt pyxi kamã mẽ àpẽn hãnhã mẽ kãm mẽmoj to hkryre nẽ anhõ parãsta kamã ho peja nẽ mẽ kãm õr o apa. Nom mẽ apkur xà hã orti nẽ wĩhti ka mẽ kệp tanhmã ho hkêt nẽ. Anẽ.

Hãmri nhũm kuma nẽ hakẽx nẽ ma tẽn mẽ hwỳr wrỳ.

7Tã nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho axkrunẽpxi nẽ hpôt tã hpãnhã axte hkôt ja pôt. Hãmri nhũm mẽmoj tĩr pẽ kwat kot hitep xwỳnhja mẽhõj mã kãm:

—E amně mẽ ixwỳr tẽ. Anẽ.

8Hãmri nhũm kawar ràrààre mẽ hwỳr hpôx o tẽ. Nhũm mẽhõ hã nhỹ nẽ tẽ. Hã ỳr xwỳnh nhĩxi na pre kệp “Mẽhtyk” anẽ. Hãmri nhũm mẽhõja kãm kapër nẽ kãm:

—E ma pika hwỳr wrỳ nẽ tanhmã mẽ ho kê mẽ ohtô nẽ tanhmã amnhĩ to nẽ axkaprà. Kê mẽ hkwỳjaja pijapu kamã axpẽn pa nẽ mẽ hkwỳjaja prãm xàj ty nẽ mẽ hkwỳjaja tanhmã à htỳx kute kamã ty. Nẽ mẽmo mry xoprêja mẽ hkwỳjê pa. E ma mẽ hwỳr wrỳ nẽ tanhmã mẽ ho ho apa. Anẽ.

Hãmri nhũm kuma nẽ hakẽx nẽ ma pika hwỳr tẽn wrỳ. Hãmri nhũm mẽ htykjê papxàja tanhmã amnhĩ to nẽ te kot hã jêt nẽ ma hkôt mõr nẽ pika hwỳr wrỳk pyræk pa pre arĩ omunh o xa.

9Hãmri nhũm mẽ pahte amnhĩ tomnuj pãnhã amnhĩrer xwỳnhja axte kagà ho htỳx xà hõ hpôt. Na pre ra ho kwat nẽ hpôt tã hpãnhã axte ja pôt. Hãmri nẽ hpôtja kôt pa ra mẽ kot Tĩrtũm mã mẽmoj nhõr xà hã mẽsti pumu. Nẽ hkrak ri mẽ hkarõjê pumu. Mẽ kot hkwỳjê hkôt ri mẽ kãm Tĩrtũm kapër jarẽnh nẽ Jejus kệp mẽ õ Pahĩhti hã harẽnh o pa nhũm

mě kot hã mẽ hpar xwỳnhjê karõja pa pre mẽ omu. Nhũm mẽ mẽsti hkrak ri amnhĩ to Tĩrtũm wỳr o hkrĩ. 10Kỳx pê kãm kapêr nê kãm:

—Ăm hãmri amex o amex Pahi Maati. Aa ate mẽmoj tã tanhmã amnhĩ to axêx to hkêt kumrêx. Kwa xà kot kaj tokyx pika hkôt mẽ kot mẽ inhĩmex xwỳnhjaja tanhmã mẽ ixtã mẽ ho nà? Anê.

11Hãmri nhũm mẽhõja mẽ hwỳr tẽ nê mẽ kãm mẽ ê jakajre gõ nhũm mẽ hagjê. Hãmri nhũm mẽ kãm:

—E mẽ mamrĩ atar akôkôt o akrĩ. Kojã Tĩrtũm kormã tanhmã mẽ kot mẽ atomnuj xwỳnhjê ho hkêt nê. Kê mẽ axte mẽ apyrà nê mẽ akwỳjê nhĩmex mãn. Kojã mẽ Tĩrtũm jamaxpêr xà hkôt axte mẽ akwỳjê pa nhũm rĩ kormã mẽ ato hpimràatã tanhmã mẽ atã mẽ hipêx to. Jakamã e mẽ atar kutêp mãmri akôkôt o akrĩ. Anê.

12Hãmri nhũm mẽ pahte amnhĩ tomnuj pãnhã amnhĩrer xwỳnhhta axte kagà ho htỳx xà hõ hpôt pa omu. Na pre ra ho 5 nê hpôt tã hpãnhã hkôt axte ja pôt. Hãmri nhũm pika htertet tỳx kumrêx. Nê myyti ahtyk nê mytwrỳre te kêp mẽ hkamrô kamrêk tỳx pyrà nê ajêt.

13Nê kanhêti tanhmã amnhĩ to nê axrê nê pikap rôrôk pa. Te kôk xàpêr tỳx nê kot pàrerekre kormã ràx tã kot kãm hikranh par pyrà nê piitã rênh pa nhũm rôrôk.

14Hãmri nhũm kaxkwaja te kagà kaxkep pyrà nê amnhĩ to kaxkep o tẽ. Nê pika piitã hkôt kên prêk nê hixêt prêk maati piitã te hkrĩ xà rũm hapôx nê mrrar nê nhãm hkrĩ pyràk. Nhũm gô hipôk piitã haxwỳja te hikwỳ xà rũm hapôx nê mrrar nê nhãm hikwỳ pyràk. Pika htertet tỳx nhỹ hã ã mẽmoj amnhĩ nhĩpêx anê. 15Hãmri nhũm pika hkôt mẽ piitã tee ri mẽmoj ã amnhĩ nhĩpêx anhỹr ã omu nê kãm ma nê htertet tỳx kumrêx. Mẽ ho amnhĩptar xwỳnhjaja nê pôristi krãhtũmjaja nê mẽ kot amnhĩ to rũnh xwỳnhjaja nê mẽ hihtỳx xwỳnhjaja nê mẽ kãm mẽ àpênh xwỳnhjaja nê amnhĩ mã mẽ àpênh xwỳnhjaja. Ăm piitã mẽmoj ã kot amnhĩ nhĩpêx anhỹr ã omu nê tee ri amnhĩ kukamã hamaxpêr nê kãm ma ho kãm ma. Hãmri nê hpimxur kaxyw ma kên prêk kre japêr o hprôt nê mra. 16-17Hãmri nê amnhĩ to kên prêk wỳ nê kãm:

—Kwa na ra mẽ ixto amnhĩptar ã hkrĩ xà maati kamã hkrĩ xwỳnh mẽ kot mẽ ixte amnhĩ tomnuj pãnhã amnhĩrer xwỳnhhta wa mẽ ixkamã gryk tỳx kumrêx. Ra wa kot tanhmã mẽ ixtomnuj to xà hã arĩgrota kato. Kojã wa mẽ ixtomnuj tỳx nê pa mẽ kutã hkêt nê. Kwa tokyx mẽ inhĩpy arôrôk nê wa kêp mẽ ixto amũxu. Anê.

Mẽ kot Tĩrtũm mã hkrajê kagà

Apokarip 9.4

7 1Tã pa arĩ kaxkwa kamã mẽmoj pumu. Nhũm Tĩrtũm kapêr o mẽ wrỳk xwỳnh pê kwatja piitã ahpỳnhã pika nhĩtep xà hkôt kôk jatur xà hã hamỳ nê ho kuhê. Pika piitã hkôt kôk hpinhkrênh par nê àpêr kêt

nê gô xujanâr kôt àpêr kêt kaxyw hatur xà hã hamỳ nê ho kuhê. Nê pà piitã hkôt àpêr nê tanhmã pĩ hkwỳ ho pymaj nhũm mē ã amnhĩ nhĩpêx anê nê nê hatur xà hã hamỳ nê ho kuhê. ²Na pre ra Tirtũm ja hã mē kãm karõ nê mē kãm:

— E kêt ka mē ma pika hwỳr wrỳ nê pika nê gô xujanârja tanhmã wa homnu hto. Anê.

Hãmri nhũm mē kuma nê hwỳr wrỳ nê kormã nê kòk ho htỳx. Hãmri nhũm Tirtũm kapêr o wrỳk xwỳnhjê hõja myt japôx xà rúm mē hwỳr hpôx o tẽ. Nê ìhkra kamã mē kot Tirtũm kra hã mē hixi jarênh xà hã kagata py nê o tẽ. Hãmri nê kax pê mē kot pika mē gô xujanâr homnu mã xwỳnhjê mã kapêr nê mē kãm:

3— Kwa taxy pa Tirtũm krajê nhõkrã kagà hpa mãn. Kêt ka mē omu nê mē tapxipixjaja tanhmã mē ho hkêt nê. Anê.

4-8 Hãmri nê mē hkagà pa. Ahpỳnhã Ijaew pigràn h xwỳnhjaja mē ho ohtô rax kumrêx nê tanhmã mē hkagà hto. Pa tanhmã mē kute hã mē harênh ma nhũm xep mē ohtô rax kumrêx.

Juta kamã mē kêp 12.000.

Nê Rupê kamã mē kêp 12.000.

Nê Gax kamã mē kêp 12.000.

Nê As kamã mē kêp 12.000.

Nê Natari kamã mē kêp 12.000.

Nê Manase kamã mē kêp 12.000.

Nê Simeãw kamã mē kêp 12.000.

Nê Rewi kamã mē kêp 12.000.

Nê Isaka kamã mē kêp 12.000.

Nê Jipurõ kamã mē kêp 12.000.

Nê Juje kamã mē kêp 12.000.

Nê Pêjamĩ kamã mē kêp 12.000.

Ã mē ohtô rax kot anhỳr. Hãmri nê mē piitã mē pikamỳr par kãm mē kêp 144.000. Piitã kêp Apraãw kanrêhã htãmnhwỳ na pre mē. Tã ã axpên kaxyw mē ohtô rax kumrêx kot anhỳr tã nhũm mē hkagà pa.

Tirtũm kra hkwỳjê jarênh

Apokarip 14.1-5

⁹Tã pa axtem mēmoj pumu. Nhũm mē ohtô rax nê Tirtũm nhõ krĩ kamã kuhê. Ahpỳnhã ri pika piitã hkôt mē urojaja. Nê ahpỳnhã ri mē kapêr xwỳnhjaja nhũm prem pika piitã kurũm kot mē ho amnhĩptar ã hkrĩ xà maatija kamã hkrĩ xwỳnh pê Tirtũm mē mē pahte amnhĩ tomnuj pãnhã amnhĩrer xwỳnhja wa kutã kuhê. Mē ohtô rax kumrêx jakamã pa tee ri mē piitã mē ho kôta hpar prãm kaprỳ. Nê piitã ê jakare kamã kuhê. Nê hkĩnh nê hkĩnh xaj pô hkwỳ jamỳ nê ho àpêr o kuhê. ¹⁰Hãmri nê kỳx pêê Tirtũm mē Jesus wa kãm kapêr nê wa kãm:



Apokarip 7.9

Hêxta waa nê. War amex o war amex Pahi Maati.

Na ka pre Akra Jesus kukwak ri mẽ ixte amnhĩ tomnuj ã tanhmã mẽ ixto hkêt nê.

War ajamẽ mẽ ixkamã axukaprĩ rãhã ho apa xwỳnh na ka wa. Jakamã pa mẽ inhmex nê war awỳr api nê war akuri inhmex nê ijamakêtkati nê ixpa ho ixpa.

Ãm hãmri na ka hte wa mẽ ixto mex rax kumrêx o apa. War amex o war amex. Anê.

11Hãmri nhũm Tĩrtũm kapêr o mẽ wrỳk xwỳnhjaja Tĩrtũm krĩ xà mã hipôk nê hkõn krã ho rôrôk nê hkrĩ hpa. Nê mẽ àptàr tũmjê mẽ mẽ htĩr nê kuhê xwỳnhjaja mẽ ìhkô hã kãm hipôk nê wam tajê pyrãk nê hkõn krã ho rôrôk nê hkrĩ. Hãmri nê mẽ ohtô kot Tĩrtũm mẽ Jesus wa kãm kapêr ã mẽ kuma hãmri nê Tĩrtũm ã hpijaàm kaxyw hpar pê htu mỳr pê hikwỳ hpa nê kãm mex o mex ã harê nê kãm:

12“Ãm hãmri na mẽ ã ajarênh anê Tĩrtũm. Amex o amex.

Na ka hte mẽ ixto mex o apa.

Mê ixrom axàhpumunh o axàhpumunh.

Nê mẽ ixrom axihtỳx o axihtỳx.

Jakamã na ka hte mẽ ixpiitã mẽ ixto mex kumrêx rãhã ho apa.

Ã ate anhỳr rãhã o rãhã jakamã na pa htem amã amex o amex ã ajarênh rãhã ho ixpa.” Anê.

13Hãmri pa mẽ omunh o ixãm rôm nhũm mẽ àptàr tũmjê hõja ixwỳr tẽ nê mẽ ê jaka kamã mẽ hkĩnh xàj pô jamỳnh nê ho kuhê xwỳnhjê hã ixkukja nê inhmã:

—E mãn ate mẽ ê jakare kamã mẽ kuhê xwỳnh mũjjê pumunh nà? Tanhmã na prem amnhĩ nhĩpêx to nê amnê api? Xà ate mẽ omunh? Anê.

14Hãmri pa kuma nê kãm:

—Nà ixte mẽ omunh kêt. Kêt ka na ixrom ate mẽ omunh. Anê.

Hāmri nhũm inhmã mẽ harēnh o:

—Nà na pre mẽ hkwỳjaja Jejus ã mẽ homnuj tỳx kumrēx nē mẽ kupa. Tã mẽ kēp Jejus kwỳ jakamã na pre mẽ nē mẽ kot amnhĩ tomnuj o hapêx nē te amnhĩ kamrô ho mẽ nē mẽ kot amnhĩ tomnuj piitã kuhõnh par pyræk o mẽ hipêx. Jakamã nhũm mẽ ê jaka kamã mex nē hkĩnh tỳx nē pa.

15 Nē Tĩrtũm kot mẽ pahto amnhĩptàr ã hkrĩ xà maati kutã kãm mex o mex ã harēnh rãhã ho kuhê.

Na hte mẽ ho mex rãhã ho pa. Mẽ hkôt pa ho pa jakamã koja mẽmoj tanhmã kēp mẽ ho hkêt nē.

16-17 Nē mẽ pahte amnhĩ tomnuj pãnhã amnhĩrer xwỳnh kot Tĩrtũm krĩ xà maati kamã ãm xwỳnhhta na hte mẽ hamãr mex rãhã ho mẽ hkôt pa.

Te mẽ kot mẽ hkrit jamãr mex pyræk.

Nē te mẽ kot mẽ hkrit kôm o pa nhũm htĩr nē pa pyræk.

Koja mẽ kuri htĩr tũm nē hkôt pa ho pa.

Nē axte kãm prãm kêt nē.

Nē axte kãm kôr kêt nē.

Nhũm arĩgro htỳxja axte mẽ hkà ho hxêt kêt nē.

Koja Tĩrtũm te mẽ kot mẽ hkra no kagô nhĩnhĩnh par pyræk o mẽ hipêx nhũm mẽ axte hkaprĩ nē mỳr o pa hkêt nē.

Pãnhã hkĩnh nē mex rãhã kuri pa ho pa. Anẽ.


Kagà kaxkep o htỳx xà kot hitep jarēnh

8 1Tã pa arĩ kaxkwa kamã mẽmoj pumu nhũm mẽ pahte amnhĩ tomnuj pãnhã amnhĩrer xwỳnhja kagà kaxkep o htỳx xà kot hitepta pôt. Hāmri nhũm kaxkwa kamã mẽmoj piitã hpinhkrēnh pa nhũm mẽhõ kapēr kêt kumrēx. Nē hpinhkrēnh par o ra hã ahtũm ry mex nē.

2Hāmri nhũm Tĩrtũm kutã kapēr o wrỳk xwỳnh pê 7 nē mẽ kuhê xwỳnhjaja. Nhũm kapēr o wrỳk xwỳnhjê hõja mẽ hwỳr tē nē mẽ piitã mẽ kãm pifti gõ.

3-4Hāmri nhũm kapēr o wrỳk xwỳnhjê hõja ôr o xijere py nē Tĩrtũm mã mẽhkuxwa xà ho xêt xà

hã mēs kunihti hwỳr o tē. Mẽ ho amnhĩptàr ã hkrĩ xà maati kutã ôr o mēstija wỳr o tē nē kuri o xa. Hāmri nhũm mẽ kãm kamã mẽhkuxwa xà hkwỳ runh rax nē nhũm mēsti hã ho xêt o xa. Rôm nhũm Tĩrtũm krajaja Tĩrtũm mã tanhmã amnhĩ jarēnh to. Jakamã nhũm mẽhkuxwa xà xêt kũm mẽ mẽ kot Tĩrtũm mã amnhĩ jarēnh xàja mẽ nhũm ahkà nē Tĩrtũm kapēr o wrỳk xwỳnh nhĩhkra kamã xijere rũm Tĩrtũm kutã kàx mã àpir o pa.



Apokarip 8.1-2

5Hāmri nhūm kapēr o wrỳk xwỳnhja xijere kamā kuwy hpòk kwỳ ho nỳt nē ahpār mā pika hwỳr kumē nhūm ma tē nē pikap tēm nhūm pika htertet tỳx nē kamā na katõtòk nē haxēnh nē hkrakrak.

Mē kot pifti kakôr ã mē harēnh

6Hāmri nhūm Tĩrtũm kapēr o wrỳk xwỳnh pē 7 kot pifti jamỳnh xwỳnhjaja ra kot pafti kakôr mǎ.

7Jakamā nhūm wamta õ pifti kakô nhūm na mē te kot jēr krǎ jakot pyrǎk xwỳnh mē kuwy te kot mēmo kamrô kamrêk pyrǎk xwỳnhhta pikap rôròk pa. Nē nhỹhỳnh pika hkwỳ ho rax nē ho kaxàr pa. Nē pòti nē akunĩ hkwỳ ho rax kumrēx nē ho kaxàr pa. 8Hāmri nhūm wam ãm xwỳnh nhĩjuk ri ãm xwỳnhja õ pifti kakô nhūm mēmoj te kēn krǎ hprêk pòk pyrǎ nē kaxkwa rũm ahpār mā tē nē gô xujanār nhĩkjê kamā hpòk rǎhǎ tēn mrô. Hāmri nhūm gô nhĩkjê kamā gôja mēmo hkamrô hǎ amnhĩ jahkre hpa. 9Jakamā nhūm gôx kǎm mēmoj htĩr nē ri mrrar xwỳnhjaja pikaprǎr pa. Nē gôx kǎm pàr gô krǎhkǎ hǎ pa xwỳnhja haxwỳja gjêx pa. Nē pàr kǎm mē pa xwỳnhjaja haxwỳja hagjê nē pikaprǎr pa. No nhūm gô mex kǎm pàr kǎm mē pa xwỳnhjaja mē kurom arĩ htĩr nē.

10Tǎ nhūm wam ãm xwỳnhhta wa hijuk ri ãm xwỳnhja õ pifti kakô. Hāmri nhūm kanhêti rax kumrēxja axta nē hpòk o ma ahpār mā tēn pikap tēm nē pyhti nē hino hkwỳ ho ohtô nē homnu hpa. 11Kanhêti nhĩxi pē na pre “mēmoj xỳ xǎ” anhỹr jakamā nhūm tēm nē pyhti nē hino hkwỳ ho ohtô nē homnu pa. Nhūm prem hwỳr mra nē hkwỳ janhi nē ho ixkô nhūm y nē nhūm mē ohtô nē ho ixkô nē axkaprǎ.

12Hāmri nhūm hpǎnhǎ Tĩrtũm kapēr o wrỳk xwỳnhjê hõja õ pifti kakô. Na pre ra ho axkrunēpxi nē hkakôr tǎ hpǎnhǎ ra axte hõ ja kakô. Hāmri nhūm mēhõja tē nē myyti kura nhūm hkwỳ ahtyk nē hirǎ hkêt nē. Nhūm mytwrỳre nē kanhêti mǎ ho anē nē myyti pyrǎ nē hkwỳ ahtyk nē hirǎ hkêt nē harir. Jakamā nhūm kamàt kǎm hirǎ mex kêt nē. Nē arĩgro hǎ myytija haxwỳja hirǎ mex kêt nē.

13Hāmri pa kaxkwa kamā àanhǎhti pumu nhūm kỳx pē ri htor o pa pē tanhmǎ kapēr to nē kapēr o:

—Hêxta waa nē. Kormǎ kot pifti kakôr xwỳnhjaja axkrunēpxi nē kormǎ hkakôr kêt nē. Koja mē tokyx hkakô nhūm pika hkôt ri mē pa xwỳnhjaja amnhĩ xǎ htỳx kamā hamak tỳx o pa. Na pa tee ri mē hkukamǎ ijamxpēr nē inhmǎ mē hkaprĩ htỳx nē. Hêxta waa nē. Koja mē omnuj tỳx kumrēx. Anē.

9 1Tǎ pa axte mēmoj pumu. Nhūm Tĩrtũm kapēr o wrỳk xwỳnhjê hõ õ pifti kakô. Na prem ra ho kwat nē hkakôr tǎ hpǎnhǎ axte hõja ja kakô. Hāmri nhūm kanhêti hõ axta nē pikap tēm kurê kumrēx nhūm mēhõja omu nē hwỳr tē nē kǎm mēmoj tǎ saf gô. Satanasti jagjēnh xǎ hǎ ahkre xupỳm o htỳx xǎ hǎ safja nhūm kanhêti mǎ kugô.

2Hāmri nhūm kupy nē ahkrehtita wỳr o tē nē kahê xà mē nhūm kurūm kuwy hkūm hapôx rax nē. Nē ma kàx mã àpir o pa nē myyti hpro hpa nhūm kamàt kô rax kumrêx.

3-11Nē kuwy hkūmjā rūm mēmoj te krit pyrāk xwỳnh kwỳjaja pikap rôrôk nē kuhê. Te kot krit pyrāk tã mē hkuk te panhĩ hkuk pyrāk. Nē mē hkrã hkĩ te mēnijê hkrã hkĩ japjê pyrāk. Nē ôr o mē ahkà jagjê. Nē mē wa japjê htỳx kumrêx. Te rêãwti xwa japjê pyrāk. Nē kàx o mē hinô hkà. Nhūm mē htor o hara hkoko htỳx o mra. Te ho kawar xohtô pijapu kaxyw kot mē hkjênh xà kamã mē htur nē mē hkjênh o hprôt nhūm hkoko htỳx pyrāk. Nē mē hkamnhwỳr o pa kaxyw mē hanhyja te kot makre janhy pyrāk. ã kriitija kot anhỳr. Nē te nhỹhỹm oprê kaxyw nojarêt nē mē hkrit kawar hã hikukrêx mex rênh pyrāk. Mēõ pahija ahkre xupỳmta kamã kêp mē hkrãhtùm. Ijaew kapêr kãm hixi pê “Apatô.” No Gres kapêr kãm kêp “Aporiãw.” No mē pakapêr kãm kêp “mē hpar o pa xwỳnh.” Hāmri nhūm Tĩrtùm kriiti mã kapêr nē mē kãm:

—E kêr ka mē ma pika piitã hkôt te makre kot amnhĩ nhĩpêx pyrà nē ri mē hkôt mē hkamnhwỳr o apa. ã amnhĩ nhĩpêx anhỳr o mē atã mytwrỳ pê sĩk. No ãm kêr ka mē hpar kumrêx kêt nē. ãm mē kot amnhĩ xà htỳx kãm hamak pix kaxyw tanhmã mē ho ho apa. Te makre kot mē hkamnhwỳr nhūm à htỳx kumrêxta pyrāk. No mē ate mē hkamnhwỳr nhūm mē hkamnhwỳr xàja koja à htỳx o makre kot mē hkamnhwỳr jakre. Nom ra mē kot Tĩrtùm kra hã mē hkagà xwỳnhjaja kêr ka mē omu nē ãm mē omu nē tanhmã mē ho hkêt nē. Mē kêp ixkwỳ na mē. Nē pō nē prãt ka mē ãm omu nē tanhmã ho hkêt nē. ãm mē kot panhĩ nhõkrã kagà hkêt xwỳnh pixjaja ka ã mē hipêx anhỳr o ri mē hkôt apa. Nom kêr ka mē hpar kêt nē. Kê mē tee ri amnhĩ xà hã maj kãm tokyx htyk nē hapêx prãm hkapyrỳ ho pa. E ma mē hwỳr mra nē ã mē hipêx anhỳr o ri apa. Anê.

Hāmri nhūm mē kuma nē ma mē hwỳr mra.

12Na ra pika hkôt wam mē homnu xà pyxi nē hapêx. No ãm arĩ hamêxkrut.

13Jakamã nhūm Tĩrtùm kapêr o wrỳk xwỳnhjê hõja axte ô pifti kakô. Na prem ra ho sĩk nē hkakôr tã axte hkôt hõja hkakô. Nhūm Tĩrtùm kutã ôr o mēsti rūm mēhõja tanhmã kapêr to. Mēsti janhà rūm kapêr. 14Pifti kakôr xwỳnhhta mã kapêr nē kãm:

—E na ra mē kot mē hkwỳjê nhĩmex ã arĩgrota kato. Jakamã kêr ka ma pyhti pê Erax wỳr wrỳ nē gô mỳ ri Satanasti mã mē àpênh xwỳnh pê kwatja pumu. Na prem ra mē hpa hpre nhūm mē gô mỳr ri arĩ hkrĩ ho hkrĩ. Ka mē omu nē mē kãm mē hpa hpre xà hpôt pa kê mē ma mē hkôt ri mē hpar o pa. Anê.

15Na pre ra Tĩrtùm mē kot mē hkwỳjê nhĩmex o pa kaxyw mē kurê nē gô mỳ ri mē unhwỳ nhūm mē kormã mē hpar xà hã arĩgro jamãr o

hkrĩ. Jakamã nhũm ã pifti kakôr xwỳnhnta mã mẽ harẽnh anẽ nhũm kuma nẽ ma tẽ nẽ mẽ hwỳr wrỳ nẽ mẽ kãm mẽ hpa hpre xà hpôt pa. Hãmri nhũm mẽ ma pika piitã hkôt ri mẽ hpar o mẽ hkôt pa. Nẽ mẽ ho ohtô rax kumrẽx nẽ mẽ himex. 16Nẽ ma amnhĩ kôt pôristi ho ohtô rax nẽ o pa. Piitã kawar ã hkrĩ nẽ mẽ hkôt hprôt nẽ hkoko ho mra. Mẽ kęp 200.000.000 hã mẽ harẽ pa mẽ harẽnh ma. Mẽ ohtô rax o mẽ ohtô rax.

17Na pa pre arĩ te ixpimtir kãm mẽ omunh pyrãk. Nhũm kawar ã mẽ hkrĩ xwỳnhjaja. Mẽ hinô kaja axtem kàx o. Nẽ hkamrẽkja te kuwy hpôk kamrẽk pyrãk. Nẽ rãrãrja te mẽ hkurôt kane xà pẽ ẽsôf rãrãr pyrãk. Nẽ kakrã htyk. ã kàx o mẽ hinô hkà kot anhỳr. Nẽ mẽ hkrit kawarti hkrãja te rãwiti krã pyrãk. Nẽ mẽ hakwa rũm kuwy hpôk mẽ ẽsôfti mẽ kuwy hkũm axpẽn kôt hapôx o pa. 18-19Nẽ kawarti jamy axtem te kęp kagã xoprẽ hkrã pyrãk nhũm mẽ hamy ho mẽ hkamnhar o mẽ kupa. Nẽ mẽ hakwa rũm kuwy hkũm mẽ kuwy hpôk mẽ ẽsôfti hapôx xwỳnhnta mã mẽ ho anẽ nẽ. Jakamã nhũm kawartijaja mẽ hkôt ri hamy mẽ hakwa ho mẽ hpar o pa nẽ mẽ ohtô rax kumrẽx nẽ mẽ himex.



Apokarip 9.17-19

20-21Tã nom nhũm arĩ mẽ htĩr nẽ ri mẽ pa xwỳnhjaja. Mẽ kot mẽ hkwyjẽ hpar kêt xwỳnhjaja hãmri ja hã mẽ omunh tã arĩ amnhĩ tomnuj o pa nẽ kãm urer kêt nẽ. Arĩ tanhmã amnhĩ tomnuj to ho pa. Axpẽn pẽ hprô nẽ mjẽn o amnhĩkati nẽ axpẽn pẽ ahkĩ. Nẽ axpẽn par o ri pa nẽ tanhmã axpẽn xy hto ho pa. ã htỳx ri amnhĩ nhĩpẽx anhỳr o pa nẽ kãm urer kêt nẽ. ãm Satanasti hkôt pix mã ri amnhĩ nhĩpẽx o pa. Nẽ amnhĩm sãnti hkwy nhĩpẽx. Pĩ ho hipẽx nẽ kàx o hipẽx nẽ kẽn o hipẽx. Nẽ hipẽx pa nẽ amnhĩ to hwỳr o pa. Nom mo kot mẽ mar kaxyw sãnti jamak kre? Nẽ kot mẽ omunh kaxyw mo no? Nẽ ri mrar nẽ mẽ ho utàr kaxyw mo hte? Na htem arĩ ã amnhĩ to hwỳr kaprỳ anhỳr o pa.

Kagã kaxkep grire jarẽnh

10 1Tã pa arĩ mẽmoj pumu. Nhũm axte Tĩrtũm kapẽr o wrỳk xwỳnh xihtỳxjẽ hõja pika hwỳr wrỳk o tẽ. Nẽ ẽja kakrã ho na pre. Nẽ hkrã mỳ ri mãxwỳxti ajêt. Nẽ hkuk te myt no kamã hirã htỳx pyrãk. Nẽ akutã hte kamã te kuwy hpôk pyrãk. 2Nẽ ãhkra kamã kagã

kaxkep grire ra pipôt nhũm ma o tẽ nẽ o wrỳ nẽ o xa. Nẽ gô xujanār kām upôk rũm hte xãm nẽ kỳx pẽ amgrà kamã apke rũm hte xãm nẽ o xa pa ixprĩ hã omu.

3Hãmri nhũm kàx pêê amỹra. Te rêãw hkàr tỳx pyràk. Nhũm hpãnhã kaxkwa kamã mẽhõja kãm kapẽr. Te na katõtõk o 7 wês pyràk pa ixprĩ hã tanhmã kapẽr to hã kuma. 4Hãmri nẽ ra mẽ amã ã kagà kaxyw nhũm mẽ ja nê inhmã kapẽr nẽ inhmã:

—Kwa nà kwarĩ ja kot kaj hã kagà hkêt nẽ. ãm ja pix kot kaj akwỳjê mã hã kagà hkêt nẽ. ãm kapxipix mãn ama nẽ ri hã apa.

Anhỹr jakamã pa mẽ amã hã kagà hkêt nẽ. ãm papxipix kuma nẽ ri hã ixpa.

5Tã nhũm Tĩrtũm kapẽr o wrỳk xwỳnh kot gô xujanār kãm upôk rũm hte xãm nẽ apke amgrà kamã ãm xwỳnhhta hãmri Tĩrtũm nhỹ hã kapẽr kaxyw nẽ kànhmã ãhkra pẽ. 6-7Tĩrtũm pẽ kaxkwa nẽ pika nẽ gô xujanār o kator nẽ kamã kot mẽmoj piitã ho kator xwỳnhja. Nẽ htĩr rãhã nẽ pa ho pa xwỳnhja. Nhũm ỹ hã kapẽr nẽ kapẽr o:

—E hãmri. Amnepê mã na pre Tĩrtũm ỹ hã mẽ kãm kapẽr o ri mẽ pa xwỳnhjê mã tanhmã amnhĩ kukamã amnhĩ jarẽnh to. Tanhmã kot pika piitã hkõt mẽ pa xwỳnhjê nhĩpêx to hã amnhĩ jarẽ. Nẽ mẽmo arĩgro hã mẽ kot amnhĩ tomnuj mỳrapê tanhmã kot mẽ hipêx to hã mẽ hkukamã mẽ hã amnhĩ jarẽ. Tã ra ã mẽ hipêx anhỹr xà hã arĩgro kato. Jakamã koja kapẽr o wrỳk xwỳnh kot hitepta õ pifti kakô hãmri nhũm mẽmojja ã amnhĩ nhĩpêx anhỹr kurê kumrêx. ãm hãmri na pa mẽ amã ja jarẽ. Anẽ.

8Pa mar o ixãm rôm nhũm wam inhmã kapẽr xwỳnhhta axte inhmã kapẽr nẽ inhmã:

—E ma pika hwỳr wrỳ nẽ gô xujanār kãm upôk rũm hte xãm nẽ amgrà kamã apke rũm hte xãm xwỳnhhta wỳr tẽ nẽ kêp kagà kaxkep grire pipôt xwỳnhhta py. Anẽ.

9Hãmri pa kuma nẽ ma hwỳr wrỳ nẽ hã kuwỳ nhũm inhmã kugõ nẽ inhmã:

—E mĩ. Apy nẽ akrê. ãnhre. Te kot menh xành pyràk. Nom kot kaj akrê nẽ anhõhy xà. Nom mãmrĩ apy nẽ akrê. E mĩ. Anẽ.

10Hãmri pa kêp kupy nẽ hkaki nhũm ãnhre. Pa hkrêr pa hãmri nẽ inhõhy xà kurê kumrêx.

11Hãmri nhũm kot inhmã õr xwỳnhhta inhmã:

—Nà ãm hãmri na ka apy nẽ akrê. Jakamã kêr ka ano ho ate mẽmoj piitã omunh xwỳnhja nẽ ajamak o ate mẽmoj mar xwỳnhja nẽ ate tanhmã Tĩrtũm kapẽr mar toja ka piitã hã kagà hpa. Hãmri nẽ ate omunh xà hkõt akwỳjê mã piitã harẽnh o apa. Mẽ kot nhỹrmã Tĩrtũm kot tanhmã mẽ piitã mẽ hipêx to hã harẽnh mar kaxyw. Ahpỹnhã ri pika piitã hkõt mẽ urojê piitã koja nhỹrmã ã mẽ hipêx anẽ. Ahpỹnhã ri mẽ kapẽr xwỳnh piitã. Nẽ mẽ õ pahijaja. ãm mẽ piitã koja nhỹrmã ã mẽ hipêx anẽ. Anẽ.

Tirtúm nhỹ hã kapër xwỳnh pijakrut wa harënh

11 ¹Tã nhũm mēhōj inhmã mēmoj to mīdi xà hã pĩ ryre gō nē inhmã:

—E ja py nē Jerujarē hwỳr wrỳ nē kamã Tirtúm mã amnhĩ jarënh xà hã ixkreja o mīdi. Nē ixkre kamã amnepêm mē kot amnhĩ tomnuj pãnhã Tirtúm mã ôwēhti nhōr xà hã mēstita mã ho anē nē ho mīdi. Nē ixkre kamã mē kot Tirtúm mã amnhĩ jarënh o mē hkrĩ xwỳnhjaja ka aprĩ hã mē ho kōta.

2—No ixkre kapem pikaja ka ho mīdi hkêt nē. Ra Tirtúm kot mē kot amnhĩ tomnuj xwỳnhjē mã hkaga jakamã koja mē htỳx ri kãm hprãm xà hkôt tanhmã homnu hto ho pa. Nē Jerujarē piitã hkôt ri homnu ho paja ã hã amgrã axkrunēpxi nē hkôt mytwrỳ kệp 6.

3—Koja Tirtúm ma ỹ hã kapër xwỳnh ho hamēxkrut nē mē hwỳr wa kumē nhũm wa ma mē hwỳr wrỳ nē mē kãm Tirtúm kapër jarënh o ri mē hkôt pa. Hãmri nē tee ri mē kot tanhmã amnhĩ tomnuj to hã mē omu nē hkaprĩ nē. Hãmri nē wa hkaprĩ xàj xak punure kaxô nē haxà nē mē kãm Tirtúm kapër jarënh o ri wa pa hã amgrã axkrunēpxi nē hkôt mytwrỳ kệp 6. Jakamã e. Pija py nē ma mē hwỳr wrỳ nē ixkreta o mīdi. Anē.

4Wa pijakrut wa kot Tirtúm nhỹ hã kapër jarënh o wa pa xwỳnhhta wa. Na htem wa kot amnhĩ nhĩpêx ã wa harënh ma nē mēmo pĩ hpàr pē oriwēhti kot tanhmã amnhĩ nhĩpêx toja mã hamaxpër kurê kumrêx. Nē amnepêm Tirtúm nhỹ hã kapër o pa xwỳnh pē Jakaris kot kanê hpôk xãmta mã mãânēn hamaxpër. Oriwēhti xôja htwỳm rax kumrêx nhũm htem htwỳm opôj nē ho kanê ho nỳt nē hpôk nē kỳx pē unhwỳ nhũm mē piitã hirã kamã rīt mex o ri mra. Nē kanê hpôk mexja te kot Tirtúm kapër pyræk. Nē kanê xãm xàja te kot Tirtúm nhỹ hã kapër jarënh o wa pa xwỳnhhta wa uræk. Nē oriwēhtija haxwỳja te kot wa uræk. Ra Tirtúm Karō kot wa hkarō mã àr jakamã na hte wa hprĩ hã mē kãm Tirtúm kapër jarënh o pa nhũm mē kot mar xwỳnhjaja te kanê nhĩrã kamã ri rīt mex nē ri pa pyrã nē hprĩ hã mar tỳx nē.

5Tã koja mēhō tanhmã wa hipêx to kaxyw wa hwỳr tē nhũm wa hakwa rùm kuwy hpôk kato nē kot tanhmã wa ho mã xwỳnhhta o hxêt o kupĩ.

6Nē koja wa Tirtúm xàhpumunh tỳx xà ho tanhmã ri mē hã mēmoj nhĩpêx to pē mē kãm kapër jarënh o ri mē hkôt pa. Jao tanhmã na hto nhũm mē hã wrỳk kêt ry nē. Rỳ tanhmã mē kệp gō hto nhũm mē hkamrô hã mē kệp amnhĩ jahkre. Koja wa ã Tirtúm nhỹ hã mē kệp mēmoj nhĩpêx anhỹr ho wa pa. Nē xatã wa kãm hprãm xà hkôt tanhmã mēmoj tomnu hto. 7Nē mē kãm kapër o pa pē ã mē hipêx anhỹr o wa hã amgrã axkrunēpxi nē hkôt mytwrỳ kệp 6 nē rĩ kormã ho hapêx. Hãmri nhũm ahkre xupỳm rùm Satanasti nhō kôwenatôja kato nē ma wa hwỳr tē nē

nhÿri pry kahti ri wa unê nê wa kupĩ nhũm wa pry kamã ty nê nõ. 8Hãmri nhũm mẽ wa haxàr kêt nê nhũm wa arĩ pry kamã nõ. Krĩ kapem na prem pĩ kahpa hã Jejus nhô nê kupĩ. Krĩ nhô xwÿnhjaja mẽ kot amnhĩ tomnuj tÿx xwÿnh na mẽ. Te ho amnepêm krĩ pê Sotô mẽ pika pê Ejit kamã mẽ kot amnhĩ tomnuj xwÿnhjê kot amnhĩ nhĩpêx pyræk. 9Jakamã nhũm mẽ kot wa haxàr nê axpên kurê nhũm wa pry kamã arĩ ty nê nõ nhũm mẽ piitã wa hwÿr mra nê wa omu. Nê ahpÿnhã krĩ piitã hkôt mẽ pa xwÿnhjaja tanhmã amnhĩ to nê ja hã wa omu. Ahpÿnhã ri pika piitã hkôt mẽ urojaja. Nê ahpÿnhã ri mẽ kapêr xwÿnh piitã. Hãmri arĩ ahpÿnhã mẽ õ krĩ kamã pa htã tanhmã amnhĩ to nê wa htyk ã wa omunh ã hã apkati axkrunêpxi nê hkôt hã myt apha. 10Koja mẽ wa htyk ã wa omu hãmri nê hkĩnh nê. Nê hkĩnh xàj axpên mã hkĩnh xà nhõr o pa. Wa kot kormã htĩr ri tanhmã mẽ homnuj to ho ri mẽ hkôt paja mã hamaxpêr nê wa htyk ã wa omu nê hkĩnh tÿx nê.

11Tã koja wa htyk ã apkati axkrunêpxi nê hkôt hã myt apha hãmri nhũm Tĩrtũm wa kamã htyxà rê nê akupÿm wa ho wa htĩr nhũm wa kànhmã xa nê ri mra. Hãmri nhũm mẽ kot wa omunh xwÿnhjaja tee ri hã wa omu nê kãm wa uma htÿx kumrêx. ãm kãm wa uma ho kãm wa uma.

12Hãmri nhũm kaxkwa kamã mēhōja wa kãm kapêr nê wa kãm:

— E war amnê mẽ ixwÿr war api. Anê.

Hãmri nhũm wa kuma nê ma kakrã kamã àpir o mõ. Nhũm mẽ kãm wa hkurê xwÿnhjaja tee ri wa àpir ã wa omu.

13Hãmri nhũm pika httertet tÿx nê. Nê krĩ kamã ixkre ohtô nê grànħ pa nê mẽ hkwy nhĩmex rax nê nhũm mẽ ohtô rax kumrêx nê axkaprã. Mẽ kêp 7.000 nê pikaprãr pa. Hãmri nhũm arĩ mẽ htĩr nê ri mẽ pa xwÿnhjaja tee ri mẽ omu nê kãm ma xàj httertet tÿx nê axpên mã:

— Kwa Tĩrtũm mãn ã mẽ panhĩpêx anê. Hihtÿx o hihtÿx jakamã kaxkwa rũm ã mẽ panhĩpêx anê pu mẽ pahpiitã pano ho ixkre pigrànħ ã omu. Anê.

14E na ra amnhĩ xà htÿx kamã hamak xàja hamêxkrut nê hapêx. Tã no ãm arĩ mẽ kaxyw pyxi nê arĩk.

Mẽ kot pifti kot hitep kakôr ã harênh

Apokarip 4.8, 5.9-14, 7.9-12, 14.2-5, 15.3-4, 19.1-2

15Tã nhũm Tĩrtũm kapêr o wrÿk xwÿnh kot hitepja õ pifti kakô nhũm kaxkwa kamã mẽ pa xwÿnhjaja kàx pê kapêr o:

E ãm hãmri. Na ra Mēpahpãm Maati mẽ Jejus Krisja wa kêp krĩ piitã hkôt mẽ piitã mẽ õ Pahihti na wa.

Koja Mēpahpãm Maatija kêp Pahi Maati rãhã nê pa ho pa xwÿnh. Anê.

16Hãmri nhũm mẽ àptàr tũm pê 24jaja. Tĩrtũm kot mẽ pahto amnhĩptàr o hkrĩ xà mã hipòk nê mẽ hkrĩ xwÿnhjaja. Hãmri ã mẽ kapêr anhÿrja

ma nê Tirtũm ã hpijaàm kaxyw hpar pê rôròk pa nê htu mỳr pê hikwỹ. Hãmri nê kãm mex o mex ã harê nê kãm:

17 Pa Pahi Maati Tirtũm. Nà ãm hãmri mẽ ixrom axàhpumunh o axàhpumunh nê axihtỳx o axihtỳx.

Amnepê mã kormã mẽmoj kêt ri na ka pre arãhã apa ho apa.

Tã arĩ arãhã apa ho apa.

Ãm hãmri apê mẽ ixpiitã mẽ ixto amnhĩptàr xwỳnh. Nà ãm hãmri amex o amex.

18 Kot kaj tokyx mẽ piitã tanhmã mẽ kot amnhĩ nhĩpêx to ho pa hã mẽ omunh xà hkôt tanhmã mẽ harênh to.

Nê ra mẽ htyk xwỳnhjaja kot kaj mẽ piitã akupỳm mẽ ho mẽ htĩr pa nhũm mẽ pika rũm hapôx pa nê ma mra nê arĩ mẽ htĩr xwỳnhjê nhĩhkô hã akutã hkrĩ pa.

Ka mẽ piitã mẽ omu nê tanhmã mẽ kot amnhĩ nhĩpêx to ho pa hã mẽ omunh hkôt tanhmã mẽ harênh to.

Mẽ kot amnhĩ tomnuj xwỳnhjaja kot kaj ma mẽ kot amnhĩ xà htỳx kamã hamak o pa htũm xà hwỳr amnhĩ nê mẽ arê nhũm mẽ ma hwỳr hapêx. Hãmri nê tee ri amnhĩ kukamã hamaxpêr nê gryk tỳx kumrêx.

Ka hpãnhã mẽ kot akôt amnhĩ xunhwỳr nê akapêr kôt amnhĩ nhĩpêx o mẽ pa xwỳnh piitã mẽ omu nê tanhmã mẽ ho mex to.

Mẽ kot amnhĩ to rũnh xwỳnhjaja nê mẽ kot amnhĩ to hkryre xwỳnhjaja.

Nê amnepêm mẽ kot anhỹ hã mẽ kapêr o mẽ pa xwỳnhjaja.

Akrajê piitã kot atã hpijaàm xwỳnhjaja kot kaj kormã mẽ htĩr ri tanhmã amnhĩ to mex hã mẽ omunh xà hkôt tanhmã mẽ ho mex to.

Ã kot kaj tokyx mẽ piitã ahpỳnhã mẽ omunh xà hkôt mẽ hipêx anê. Anê.

19Hãmri nhũm kaxkwa kamã Tirtũm nhõrkwỹ hã hakwakre kahê xà amnhĩ mẽ pa kamã ôr o mês kunĩhtita pumu. Pu nhũm na hkatõtòk nê haxênh nê hkrakrak nê na mê te kot jêr krã hakotre pyràk xwỳnhja pikap rôròk rax nê. Nê pika httertet tỳx o httertet tỳx pa arĩ omunh o xa.

Mêhõ ni mẽ kagãmnuti wa harênh

12 ¹Tã pa axte mẽmoj pumu. Kaxkwa kamã aa mẽ pahte mẽmoj pumunh kêt xwỳnhja pa omu. Nhũm mêhõ nija xê te myt no mã hirã htỳx pyràk. Nê hpar nhõkwa kamã mytwrỳre ajêt. Nê kanhêti ho 12 o mẽ ahkà tu nê o xa. ²Na ra htujarô nê hpijagri kaxyw ôhy xà nê amnhĩ kamnhêr o xa.

³Tã pa axte mẽmoj pumu. Aa mẽ pahte mẽmoj ã kot anhỹr pumunh kêt xwỳnh ôja pa omu. Kagãmnuti nom ãm axtem hkà kamrêk tỳx

kumrêx. Nê rax kumrêx. Nê hkrã kêp 7.
Nê hkrã piitã kamã ôr o pahi hã mē ahkã
htu nê o nô. Nê hkrã kamã pãr kêp 10.

4Tã nhũm hamy ho apêr o kaxkwa
kamã kanhêti ho ohtô nê pikap kurê.
Hãmri nê ôhy xà nê amnhĩ kamnhêr o ãm
xwÿnhta wÿr tē nê hkra kator nhũm kot
kêp krêr kaxyw kutã hamãr o nô.

5Hãmri nhũm hkra kato nê myre.
Hihtÿx o hihtÿx ã kot pika piitã hkôt mē
piitã mē ho amnhĩptãr mã xwÿnh na pre.
Nhũm kagãmnutija kot kêp utãr nê hkrêr
mã tã nhũm Tĩrtũm kapêr o wrÿk
xwÿnhjê hõja hwÿr wrÿ nê kêp kumÿ nê
ma Tĩrtũm wÿr kaxkwa kamã kot mē
pahto amnhĩptãr ã hkrĩ xà maatija wÿr
ho api.

6Hãmri nhũm kagãmnuti tee ri ma kot kêp o mõi ã omu nê hpãnhã
nita o apkjê nê kot tanhmã ho kaxyw nhũm amnhĩ tã omu nê umaj hprõt
nê ma tē nê nhÿri kapõt ã amũxu. Ra Tĩrtũm kot hkukamã kãm hpimxur
xà nhĩpêx xà hwÿr hprõt nê ma tē nê kamã kêp amũxu. Nhũm Tĩrtũmja
nê kagã pumunh mex nhũm kêp hpimxur mex ã amgrã axkrunêpxi nê
hkôt hã mytwrÿ kêp 6.

Mê kot kaxkwa kamã mēkarõmnuti kurê kaxàr ã mē harênh

7Tã nhũm mē ra kaxkwa kamã kurê kaxàr kaxyw. Kagãmnuti mē
hkwÿjaja nhũm mē ra Tĩrtũm kurê kaxàr kaxyw kutã amnhĩ xunhwÿ.
Jakamã nhũm Tĩrtũm kapêr o mē wrÿk xwÿnhjê hkrãhtũm Mikewja ma
mē hwÿr amnhĩ kôt hkwÿjê o mra nê mē pijapu ho kuhê.

8Hãmri nhũm kagãmnuti tee mē kutã amnhĩ to htÿx kaprÿ nhũm
Tĩrtũm kapêr o mē wrÿk xwÿnhjaja amnhĩ nê mē ho axtem nê kaxkwa
rũm mē kator o mē kator.

9Satanasti pē kagãmnutita kagã kot ni kator ewa mã hêx xwÿnh na
pre. Nê hêx rom tanhmã hêx to ho pa xwÿnh. Jakamã nhũm Mikew mē
hkwÿjaja hkwÿjê mē mē ho hpimràatã amnhĩ nê pikap mē rēnh pa.

10Hãmri nhũm kaxkwa kamã mēhõja axte kãxpê kapêr nê kapêr o:

E ãm hãmri. Na ra Tĩrtũm hihtÿx o hihtÿx o mē panê mēmoj
punuj piitã ho hapêx par kumrêx.

Na pre hte Satanasti pē mēkarõmnutija xatã hwÿr mra nê kãm
tanhmã Jesus kwÿjê ho kapêr punuj to ho pa.

Tã koja axte mē ho kapêr kêt kumrêx. Ra Tĩrtũm kot amnhĩ nê
kator o kator nhũm ra ma mõi o mõi kênã.



Apokarip 12.3-4

Koja Tirtūm pika piitā hkôt mẽ ho amnhĩptār xwỳnhjê japôx pa nê hpānhā mẽ kaxyw Kra Krisja xām nhūm pika piitā hkôt mẽ ho amnhĩptār rāhā ho pa.

Nà ãm hāmri. Ja mex o mex.

- 11 Na pre Jejus kôt mẽ pahtō nê mẽ pahtōxjaja mẽkarōmnuti kutā amnhĩ to htỳx nê pa. No ãm amnhĩ nhỹ hā ã kutā amnhĩ nhĩpêx anhỹr kêt.

Mẽ pahte amnhĩ tomnuj pānhā amnhĩrer xwỳnhhta na pre ty nê hkamrô ho mẽ kuhō nê mẽ nê mẽ kot amnhĩ tomnuj o hapêx.

Jakamā nhūm prem kukwak ri Satanasti kutā amnhĩ to htỳx rāhā pa.

Nhūm mẽ kot Jejus ã mẽ himex par kaxyw tā nhūm mẽ kām htyk pyma hkêt nê. ãm Jejus kôt arĩ amnhĩ to htỳx nê mẽ hkôt pa rāhā nê.

Jao arĩ mẽ kām Jejus kot mẽ panê tanhmā amnhĩ nhĩpêx to hā harēnh o ri mẽ hkôt pa.

- 12 Tā Tirtūm ra kot mẽ panê mẽmoj punuj o hapêx par jakamā kwa kaxkwa kamā mẽ apa xwỳnhjaja kêt ka mẽ akĩnh nê apa.

Nom gô xujanār kām nê pika kamā mẽ pa xwỳnhjaja hêxta waa nê. Koja mẽ mex kêt nê.

Nê ra Mikew mẽ hkwyjaja kot amnhĩ nê kaxkwa rūm mẽkarōmnuti mẽ hkwyjê kator nê pikap mẽ rēnh par jakamā nhūm Satanastija gryk tỳx kumrêx.

Tirtūm kot ma mẽ kot amnhĩ xà htỳx kamā hamak o pa tūm xàta wỳr mēnh xà hā arĩgro hwỳr amgrà grêre nhūm tee ri amnhĩ kukamā hamaxpêr nê gryk tỳx o gryk tỳx. Anê.

13Hāmri nhūm kagāmnutija mẽ kot amnhĩ nê kaxkwa rūm kator ã amnhĩ pumu nê gryk tỳx nê. Nê gryk xàj ma akupỳm ni kot hkra myre ho pijagri xwỳnhhta wỳr tē nê tanhmā ho kaxyw hkôt ho krihkrit.

14-16Hāmri nhūm Tirtūm kapêr o mẽ wrỳk xwỳnhjê hōja omu nê nija mã àanhàhti jara gō. Kot kagāmnuti pē ho htor nê ma nhỹri hpimxur xà wỳr htēm kaxyw. Nê kormā htor kaxyw nhūm kagāmnuti omu nê kot gō ho hanhir kaxyw hkôt hakwa rūm gō kapĩ nhūm hpikapĩr rax kumrêx. Te pyhti hprôt tỳx pyrāk. Hāmri nhūm Tirtūm omu nê nija nê tanhmā pika hto nhūm kām axkjê nhūm gō hprôt nê kamā pikapĩr pa. Jakamā nhūm mex pē àanhàhti jara ho to nê ma kapôt ã pimxur xà hwỳr ma tē. Nê kamā pa hā amgrà axkrunêpxi nê hkôt mytwrỳ kêp 6 nhūm prem hamār mex rāhā ho pa.

17Hāmri nhūm kagāmnuti tee ri kām hpĩr prām kaprỳ nê gryk tỳx kumrêx. Hāmri nê ma ni hkwyjê hwỳr mō. Mẽ kot Tirtūm mẽ Jejus wa

hkôt amnhĩ nhĩpêx o mẽ pa xwỳnhjê hwỳr tanhmã mẽ homnuj to kaxyw ma mẽ hwỳr mō. Hāmri nē tanhmã kot mẽ ho kaxyw gō xujanār mỳ ri nō.

Satanasti nhō kōwenatō wa kot gō xujanār rŭm kator ã wa harēnh

Sikŭn Tesarōn 2.3-5

13 1Tã pa axte mẽmoj pumu. Nhũm gō xujanār rŭm Satanasti nhō kōwenatōjê hōja te mrymnuti pyrà nē àpir o mō. Kagāmnuti pyrà nē hkrã kêp 7. Nē uràk nē hpàr kêp 10. Nē hpàr piitã kamã pahi hã mẽ ahkà. Nē ahkà piitã hã axtem tanhmã Tĩrtŭm o kapêr punuj to nē tanhmã haprỳ hto hã kagàja hikwỹ.

2Nē hkà te kêp ropkrorti kà pyràk. Nē hakwa te kot rēawti jakwa pyràk. Nē ìhkra te kot pàati nhìhkra pyràk. Jakamã na pre kagāmnuti nhỹ hã hihtỳx o kêp pahi hã pika nhō xwỳnhjê ho amnhĩptàr o pa.

3Nē hkrã hō te mẽ kot hayr o hpĩr nhũm ra akupỳm htĩr nē arĩ hayr xà wakre rã nyw pyràk. Jakamã nhũm pika kamã mẽ pa xwỳnhjaja amnhĩ jaêr pē omu nē kamã no pyma nē. Hāmri nē hkôt amnhĩ nhĩpêx o pa.

4Hāmri nē kagāmnuti kot tanhmã mrymnuti ho nhũm ÿ hã mẽ ho amnhĩptàr jakamã nhũm mẽ piitã hamē wa hã hpijaàm kaxyw wa kãm wa mex o wa mex ã wa harēnh o pa. Nē mrymnuti hã axpēn mã:

—Hêxta waa nē. Mẽ pahtō na mẽ pahte mrymnutita pyrà nē ã mẽ pahte amnhĩ nhĩpêx kot anhỹr? Mẽ pahtō kot pu kutã xa nē paxihtỳx o hkurê kapa? Nà amrakati kumrêx. Anē.

5-6Hāmri nhũm Satanasti tanhmã mrymnuti ho nhũm kapêr o ri mẽ hkôt pa nē mẽ ho amnhĩptàr o hã amgrà axkrunêpxi nē hkôt mytwrỹ kêp 6. No ãm axtem nē Tĩrtŭm o kapêr punuj o ri mẽ hkôt pa. Nē ri tanhmã haprỳ hto nē ò krĩja mex kêt ã harēnh o ri mẽ hkôt pa.

7Hāmri nhũm Satanasti ra kot mẽ hkurê kaxàr kaxyw kãm anē nhũm axtem nē Tĩrtŭm pē hkrajê kutã amnhĩ xãm nē mẽ hwỳr hprôt nē tanhmã hpijapu hto ho pa nē mẽ ho axtem nē mẽ ho krihkrit pa nē ahpỳnhã ri pika piitã hkôt mẽ uro hkwỳjê ho amnhĩptàr o pa. Nē ahpỳnhã mẽ kapêr xwỳnh piitã mẽ ho amnhĩptã.

8Jakamã nhũm mẽ ohtō rax kumrêx nē mrymnuti hkôt amnhĩ nhĩpêx. Nē kutã hkōn krã ho rôrôk nē hkrĩ nē kãm mex o mex ã harē. No ãm mẽ piitã hkêt. Kot mẽ pahte amnhĩ tomnuj pãnhã amnhĩrer xwỳnh kôt ra mẽ kot amnhĩ xunhwỳr xwỳnhjaja tapxipixjaja na prem hkôt amnhĩ xunhwỳr kêt nē. Amnepê mã kormã amrakati ri Tĩrtŭm mẽ Jesus wa ò kagà kamã mẽ htĩr tŭm nē mẽ pa mã xwỳnh nhĩxi xwỳnh pixjaja na prem mrymnuti pumu nē hkwỳjê rom hprĩ hã kot amnhĩ nhĩpêx ã omunh kurê kumrêx nē hkôt amnhĩ nhĩpêx kêt nē.

9 E ka mẽ atō axumar kaxyw ajamak kre hã kot kaj ixujarēnh piitã ama nē kãm ajamaxpêr tỳx rãhã ho apa.

10 Jakamã kwa Tirtũm kôt ixkwỳjaja. Kwãr mẽ mãmri mẽ apynê nê mẽ ajagjê.

Nê kwãr mẽ mãmri wapo ho mẽ ajayr o mẽ apa.

Nom kêr ka mẽ umaj ixkaga hkêt nê. Ixkaga hkêt o ixkaga hkêt.

Mê ãm ixkôt pix mã amnhĩ nhĩpêx o ri apa rãhã ty.

Pika rũm mrymnuti hõ kator ã harênh

Makre 13.22

11Tã pa mrymnuti hõ pumu. Nom wamta pyrã nê gô xujanãr rũm kator kêt axtem pika rũm kato. Nê ôwêhti hkrare pyrã nê hpãr pijakrutre. Nê te ho kagãmnuti kapêr tỳx pyrã nê kapêr tỳx kumrêx o pa.

12Gô xujanãr rũm mrymnuti xàpir xwỳnhhta nhỹ hã pika nhõ xwỳnhjê mã kapêr tỳx nê mẽ kãm:

—E pika piitã hkôt mẽ apa xwỳnhjaja mẽ inhma. Kêr ka mẽ kot hkrã hõ jayr o hpĩr nhũm akupỹm htĩr xwỳnhhta kôt pix mã amnhĩ nhĩpêx rãhã ho ri apa. Nê kãm mex o mex ã harênh rãhã nê.

Anhỹr o mẽ kãm kapêr. 13Hãmri nê Satanasti nhỹ hã mẽ kãm aa mẽ kot mẽmoj pumunh kêt kwỳ ho anhỹr o pa. Jao kaxkwa rũm tanhmã mẽ kãm kuwy ho wrỳk to nhũm pikap rôrôk nhũm mẽ amnhĩ jaêr pê omu nê kamã no puma nê. 14Ã ri mẽ noo mã mẽ kãm amnhĩ nhĩpêx anhỹr o ri mẽ hkôt pa. Gô xujanãr rũm mrymnutija noo mã ã hêx rom amnhĩ nhĩpêx anhỹr o mẽ no kupyr o pa nhũm mẽ omu nê hkôt amnhĩ nhĩpêx. Hãmri nhũm mẽ kãm mẽmoj tâ karõ nê mẽ kãm:

—E wam mrymnutita. Mẽ kot hkrã hõ jayr o hpĩr nhũm akupỹm htĩr xwỳnhhta kêr ka mẽ kãm hkarõ nhĩpêx nê ho mẽ anhõ sãnti. Kê mẽ piitã hwỳr mra nê kutã hkõn krã ho rôrôk nê hkrĩ nê amnhĩ to kuwy nê kãm mex o mex ã harê.

Anhỹr o mẽ kãm hã karõ. 15Hãmri nhũm mẽ kuma nê mar xà hkôt hipêx nê ãm nhũm xa. Hãmri nhũm mrymnuti kot hitepta omu nê hwỳr tẽ nê tanhmã ho nhũm ra kapêr nê mẽ kãm:

—E kêr ka mẽ kot inhmex ã ijarênh kêt xwỳnhjê pynê nê mẽ himex pa. Anê.

16Hãmri nhũm pika rũm mrymnuti kator xwỳnhhta haxwỳja mẽ kãm kapêr nê mẽ kãm:

—E koja ixkwỳjaja inhỹ hã mẽ apiitã mẽ apê ixkwỳ hã mẽ akagã. Mẽ ate amnhĩ to rũnh xwỳnhjaja nê mẽ ate amnhĩ to hkryre xwỳnhjaja. Nê amarĩ mẽ kãm mẽ axapênh xwỳnhjaja nê amnhĩ mã mẽ axapênh xwỳnhjaja. Nê mẽ akàxpore rũnh xwỳnhjaja nê mẽ apê amrakati xwỳnhjaja. Kojã mẽ apiitã mẽ akagã hpa. Mẽ akwỳ nhõkrã kagã nê mẽ akwỳ xupôk rũm mẽ anhĩkra katut kagã.

17—Gô xujanãr rũm mrymnutita nhĩxi kot paj mẽ atã hipêx. Rỳ hixi hã nũm nhĩpêx. Hãmri ka mẽ axãpkur xà japrôr kaxyw nhỹhỹm mra

nhũm mẽ atã hixita pumu nẽ rĩ kormã mẽ amã mẽmoj kwỳ ho wẽnê ka mẽ amnhĩm haprô nẽ ho axàpkur o ri apa. Nẽ mẽ ate mẽmoj to wẽnê xwỳnhjaja koja mẽ apê mẽmoj japrôr kaxyw mẽ awỳr mra ka mẽ tee ri nhỹhỹnh mẽ hã hixi japêr hãmri nẽ mẽ kãm mẽmoj to wẽnê hkêt nẽ. ãm nhỹhỹnh mẽ atã hixi hã kagàta pumunh pix kukwak ri kot kaj mẽ awjaprô rỳ mẽmoj to wẽnê. Anẽ.

18E kwa kêr ka mẽ ixte mẽmoj pumunh nẽ mẽ amã hã kagàta pumu nẽ ama nẽ kãm ajamaxpêr tỳx o apa. Mrymnutita nhĩxi na kêp nũm. Nũmja kêp 666. E kaj mẽ akrã hi mex xwỳnhjaja kot kaj mẽ aprĩ hã ja mar tỳx kurê kumrêx.

Tĩrtũm mex ã mẽ grer

Apokarip 7.1-8

14 1Tã pa axte mẽmoj pumu. Nhũm mẽ pahte amnhĩ tomnuj pãnhã amnhĩrer xwỳnhja hixêt pê Siãwja nhĩmõk ã xa. Nẽ puhã mẽ ohtô rax kumrêx nẽ kuhê. Mẽ ohtô ho mẽ ohtô. Piitã kamã mẽ kêp 144.000. Nẽ piitã ôkrã hã mẽ pahte amnhĩ tomnuj pãnhã amnhĩrer xwỳnh mẽ Hipêêxà wa hixi jaxwỳr pa mẽ omu.

2Nhũm mẽ kaxkwa kamã grer o kuhê. Mẽ grerja mex o mex. Te kot gô hprôt tỳx hkoko htỳx pyræk. Nẽ te na katôtøk tỳx pyræk. Nẽ te wiorãw môr xwỳnhjaja kot hkakrênh mex pyræk pa mẽ mar o xa.

3Nẽ mẽ grer xwỳnhjaja. Jejus puhã mẽ ohtô rax kumrêx nẽ mẽ kuhê xwỳnhjaja na prem Tĩrtũm kot mẽ ho amnhĩptàr ã hkrĩ xàta kuri grer o kuhê. Nẽ mẽmoj tĩr pê kwat xwỳnhjê mẽ mẽ àptàr tũm pê 24jê kuri grer o kuhê. Mẽ grer nyw o gre. ãm mẽ tapxipixjaja mẽ kot mẽ grer nywja mar. Ra mẽ kêp Tĩrtũm kra hã mẽ kot mẽ ôkrã hã Tĩrtũm mẽ Kra Jejus wa hixi ã kagà nhũm Tĩrtũm kot ra mrymnuti mẽ hõta wa kêp mẽ utàr nẽ amnhĩ wỳr mẽ ho àpir xwỳnh na pre mẽ. ãm mẽ tapxipixjaja mẽ grer nywja ma nẽ wa kãm ho grer o kuhê.

4-5Na prem tãm amnhĩ nhĩpêx nẽ Tĩrtũm kôt amnhĩ nhĩpêx rãhã ho pa. Te mẽ kot amnhĩ prô pix tãnopxar rãhã ho pata pyræk. Nẽ ri tanhmã hêx to rỳ tanhmã ri amnhĩ tomnuj to ho pa hkêt nẽ. ãm tãm ri amnhĩ nhĩpêx mex o pa. Mẽ kêp Tĩrtũm mẽ mẽ pahte amnhĩ tomnuj pãnhã amnhĩrer xwỳnh kwỳ jakamã na prem mẽ pahte amnhĩ tomnuj pãnhã amnhĩrer xwỳnhhta kôt pix mã amnhĩ nhĩpêx o pa. Jakamã na prem mrymnuti kutã rôrøk nẽ kãm mex o mex ã harênh kêt nẽ. Tã mẽ kumrêxjaja Tĩrtũm mẽ Kra wa kuri wa kãm grer o kuhê.

Tĩrtũm kapêr o wrỳk xwỳnh pijakrunêpxi jarênh

6Tã pa axte Tĩrtũm kapêr o wrỳk xwỳnhjê hõ pumu nhũm kỳx pê ri htor o pa. Ahpỳnhã ri pika piitã hkôt mẽ uro hkwỳjê hkôt. Na ahpỳnhã ri mẽ kapêr xwỳnhjê piitã mẽ hkôt mẽ kãm Tĩrtũm kot tanhmã mẽ hipêx

to hã harënh kaxyw. Ahpÿnhã mẽ kapër xwÿnh piitã mẽ kãm harënh o pa. Nê htor o pa pê kÿx pê mẽ kãm kapër nê mẽ kãm:

7“E na ra Tirtũm mẽ ate amnhĩ tomnuj mÿrapê tanhmã mẽ ato kaxyw. Jakamã kwa mẽ tokyx hã apijaàm kaxyw akõn krã ho arôrõk nê akrĩ nê kãm mex o mex ã harê. Kêp mẽmoj piitã ho kator xwÿnh na. Na pre kaxkwa ho kato nê pika ho kato nê gô xujanãr o kato nê hino ho kato nê mẽmoj piitã ho kator pa. Jakamã kwa kêr ka mẽ tapxipix ã mãn apijaàm nê kãm mex o mex hã harënh rãhã ho apa.”

Anhÿr o mẽ kãm kapër. 8Hãmri nhũm hõja wamta kõt tẽ nê uràk nê kÿx pê mẽ kãm kapër o:

—Koja Tirtũm tokyx Papirõn grãnh pa. Na hte krĩ nhõ xwÿnhjaja amnhĩ tomnuj pix rãhã ho pa. Mẽ kot amnhĩ nhĩpêx te mẽ kot kagõxÿhti ho hkõm nê amnhĩ mẽ mẽ piitã mẽ kãm õr nê ho mẽ ho pipãnh pyrãk. Na htem mënijê piitã ho amnhĩkati o pa. Nê amnhĩ kwÿjê pê mẽ hprõ ho amnhĩkati. Nê amnhĩ mẽ pika piitã hkõt mẽ pa xwÿnhjê mã anhÿr o pa. Mẽ kot mẽ uràk nê ã amnhĩ nhĩpêx anhÿr o pa kaxyw mẽ kãm anhÿr o pa. Ja mÿrapê na ra Tirtũm kot tanhmã mẽ ho kaxyw mẽ hã amnhĩ jarê. Anê.

9Tã nhũm wa hkõt hõja tẽ nê wa uràk nê kàx pê pika nhõ xwÿnhjê mã kapër nê mẽ kãm:

—E mẽ ate mrymnuti kutã akõn krã ho arôrõk nê akrĩ nê kãm mex ã harënh xwÿnhjaja. Nê mẽ ate karõ nhĩpêx nê kutã akõn krã ho akrĩ nê kãm mex ã harënh xwÿnhjaja. Nê mẽ anhõkrã nê mẽ anhĩkra hã hixi hã kagã xwÿnhjaja.

10-11—Tirtũm na tee ja hã mẽ apumu nê mẽ akamã gryk tÿx kumrêx. Mẽ ate kapër kuhpa hã mrymnuti hkõt amnhĩ xunhwÿr jakamã nhũm mẽ akamã gryk tÿx o mẽ akamã gryk tÿx. Jakamã koja kuwy hpõk rãhã ho rãhã xwÿnhhta kamã mẽ arënh pa ka mẽ amnhĩ xà htÿx kamã ajamak rãhã apa ho apa. Koja kuwy hpõkja aa hapêx kêt nê kurũm kàx mã hkũm àpir o pa rãhã nê. Koja ã mẽ ate amnhĩ tomnuj o mẽ apa xwÿnhjê nhĩpêx anê ka mẽ kamã apa ho apa nê aa kurũm ajapõx kêt nê kamã amnhĩ xà htÿx kãm ajamak rãhã apa ho apa. Arĩgro hãn kamàt kãm arĩ ã amnhĩ nhĩpêx anhÿr rãhã apa ho apa. Mẽ ate gõj rũm mrymnuti mẽ hkarõ ho sãnti wa kutã akõn krã ho arôrõk nê akrĩ nê wa kãm wa mex ã wa harënhja mÿrapê kot kaj mẽ ã amnhĩ nhĩpêx anê. Kot mẽ pahte amnhĩ tomnuj pãnhã amnhĩrer xwÿnh mẽ Tirtũm kapër o mẽ wrÿk xwÿnhjê noo mã kot kaj mẽ ã amnhĩ nhĩpêx anhÿr o apa.

12Anhÿr o mẽ kãm kapër jakamã kwa kêr pu mẽ pahte Tirtũm kõt amnhĩ xunhwÿr xwÿnhjaja mẽ hkukamã mẽ harënhja ma nê Tirtũm kapër kõt pix mã amnhĩ nhĩpêx rãhã ho ri papa. Mẽ kot tanhmã hã mẽ pahto htã pu mẽ hkaga hkêt nê amnhĩ kaxyw Jejus kõt pajamaxpêr tÿx rãhã nê. Hãmri nê nhÿrmã mẽ kurom ma õ krĩ hwÿr api nê kamã pamex kumrêx nê papa ho papa.

Mê kêp Jejus kwỳ hã mê htyk xwỳnhjê jarênh

Wam Tesarôn 4.16

13Tã nhũm kaxkwa kamã mēhōja axte inhmã kapēr nē inhmã:

E Juãw. Kêr ka ã akwỳjê mã mēmoj tã kagà anē nē mê kãm hã kagà ho: “E mê ate Tĩrtũm kôt ri amnhĩ nhĩpêx xwỳnhjaja. Mê kot Tĩrtũm ã mê apar nhũm mê atyk tã koja amnhĩ tã mê ato mex rax kumrêx.” Anhỹr o mê kãm hã kagà.

Anhỹr o inhmã kapēr. Hãmri nhũm Tĩrtũm Karōja kuma nē kãm:

— Nã ãm hãmri na ka ã mê harênh anē. Ra Tĩrtũm kot amnhĩ tã mê omunh rãhã ho pa. Mê kot kôt pix mã amnhĩ nhĩpêx o pa pê mê kãm mê hkurê xwỳnhjê kutã amnhĩ to htỳx rãhã htykja nhũm Tĩrtũm kot amnhĩ tã mê omunh mex. Koja mê ho mex kumrêx. Mê kot Jejus ã mê hpar tã koja mê ho mex rax nē nhũm mê kuri mex rãhã nē pa ho pa nhũm mēhō axte tanhmã mê ho hkêt nē. Anē.

Tĩrtũm kot tanhmã mê kãm hkĩnh xwỳnhjê nhĩpêx to

14Tã pa axte mēmoj pumu. Kaxkwa kamã kakrã jakajre pumu. Nē kamã mēhōj te panhĩ pyrã nē nhỹ. Nhũm ôr o pahi hã mê ahkà htu nē kuteere xwagixre py nē o nhỹ.

15Hãmri nhũm kaxkwa kamã Tĩrtũm kapēr o mê wrỳk xwỳnhjê hōja Tĩrtũm mã amnhĩ jarênh xà hã ixkre rũm kato nē kakrã jaka kamã ỹr xwỳnhta mã kapēr. Kàx pê kãm kapēr nē kãm:

— E pika nhō xwỳnhjaja te mê hpur kãm mēmo hy ra hkamrêk nē hikênh mã mex pyrãk. Jakamã anhō kuteere ata py nē ma mê hkôt tanhmã ri mê ho ho ri mê hkôt apa. Te mê kot mēmo hy nhĩkênh o ri pa pyrãk o mê hipêx nē ma ho mê himex o ri apa. Anē.

16Hãmri nhũm kuma nē pika piitã mỳri ô kuteere ho apê nē te mēmo hy jakàr pyrãk o mê hipêx.

17Hãmri nhũm axte Tĩrtũm mã amnhĩ jarênh xà hã ixkre rũm kapēr o mê wrỳkjê hōja kato. Ĩhkra kamã kuteere xwa gixre py nē o xa.

18Hãmri nhũm axte hōja ixkre rũm kê hkôt kato nē hkukamã kator xwỳnhta mã kapēr. Kàx pê kãm kapēr nē kãm:

— E na ra Tĩrtũm tanhmã mê kot amnhĩ tomnuj to hã tanhmã mê hipêx to kaxyw. Te mê kêp mê hpur kãm mēmo xô pê uwa ra hkamrêk nē rênh mã tãm pyrãk. Jakamã ma pika hwỳr mê hwỳr wrỳ nē mê hkôt ri anhō kuteere ho mê himex o ri apa. Anē.

19Hãmri nhũm kuma nē ma pika hwỳr wrỳ nē mê hipêx o te mê kot uwa xô rênh nē prês kãm hkapĩr nē kagô janênh pyrã nē mê hkôt ri kuteere ho mê hpar o pa. Tĩrtũm ra mê kamã gryk tỳx o mê kamã gryk tỳx jakamã nhũm ã mê hkôt mê hipêx anhỹr o ri pa.

20Jakamã nhũm mẽ hkamrô hpikapĩr rax kumrêx o uwa kagô jakre. Te ho pyhti hprôt o nôr pyrâk. Jao upÿm o 2 met nê hkôt ho mêj met. Nom hprôt xâ hkôt ry rax o ry rax. Ho 300 kirôm. Nhũm ã mẽ kamrô hprôt rax anê.

Tĩrtũm mex ã mẽ grer

15 ¹Tã pa axte kaxkwa kamã mẽmoj pumu. Hãmri nê amnhĩ jaêr pê omu nê tee ri hkukamã ijamaxpêr. Aa mẽ pahte mẽmoj ã kot anhÿr pumunh kêt xwÿnh pa pre omu. Nhũm Tĩrtũm kapêr o mẽ wrÿk xwÿnh pê 7jaja ahpÿnhã pika hkôt mẽ kot amnhĩ tomnuj xwÿnhjê homnuj kaxyw akuprô nê kuhê. ãm jajê pixjaja koja Tĩrtũm nhÿ hã axte tanhmã mẽ homnuj to nê ho anhÿr pa hãmri nhũm ra ja hapêx o hapêx.

²Jakamã pa axte Tĩrtũm kapem gô rax pumu. Te kot kàx karÿr jaxênh mẽ kuwy hpôk o pihkâr pyrâk xwÿnhja hprôt o nô. Nhũm Tĩrtũm kra hkwyjaja gô mÿ ri ohtô rax kumrêx nê kuhê. Na pre ra mrymnutija tee ri amnhĩ kôt mẽ rênh mã nê tee ri mẽ hã amnhĩ nhÿxi hã kagà hprãm kaprÿ nom nhũm mẽ hkaga nê Jejus kôt amnhĩ nhÿpêx rãhã ho pa. Nê mrymnuti karô ho sãnti mã mex ã harênh kêt rãhã ty nê kaxkwa hwÿr api. Jakamã nhũm Tĩrtũm amnhĩ tã mẽ omu nê mẽ kãm wiorãwti hkwy gô nhũm mẽ piitã hamÿ nê gô rax mÿ ri ho kuhê.

³Hãmri nê Tĩrtũm mã tanhmã amnhĩ to ho pa xwÿnh pê Mojes mẽ mẽ pahte amnhĩ tomnuj pãnhã amnhĩrer xwÿnhhta wa kot Tĩrtũm mã grerta nhũm mẽ Tĩrtũm mã ho grer o kuhê nê grer o:

E Pahi Maati Tĩrtũm. Na pa mẽ ra inhmex pê awÿr ixàpir pa.

ãm hãmri na ka hte tanhmã amnhĩ nhÿpêx to ho ri apa.

Aa tanhmã axêx to hkêt.

Nê mẽ ixrom axihtÿx o axihtÿx.

Nê mẽ ixrom axàhpumunh o axàhpumunh.

Jakamã na ka hte mẽ inhmã aa mẽ ixte mẽmoj pumunh kêt kwÿ ho anhÿr o apa.

Pika piitã hkôt ahpÿnhã mẽ ho amnhĩptâr xwÿnhjê nhô Pahi Maati na ka.

Nê ate tãm amnhĩ nhÿpêx xwÿnh na ka.

⁴Jakamã na htem piitã atã hpijaam o pa.

Nê amã mẽ kapêr xàptâr pix o amã kapêr.

Nê amã amex o amex ã ajarênh rãhã nê. ãm hãmri mẽ ixrom kapxipix amex o amex.

Jakamã koja ahpÿnhã pika piitã hkôt akrajê piitã ate tãm amnhĩ nhÿpêx nê tãm mẽ piitã tanhmã mẽ harênh to hã ajarênh ma nê awÿr mra nê akutã hkôn krã ho rôrôk nê hkrĩ nê amã amex o amex ã ajarê. Anê.

Mê homnu xà hã xijere jamÿnh xwÿnh jarênh

5Tã na pa axte mëmoj pumu. Kaxkwa kamã Tirtûm nhôrkwÿ hã hitom xà piitã amnhĩ kahê xà rê nê kuhê pa omu. Nê ixkre kamã õ hitom mex maati haxwÿja amnhĩ kahê xà mẽ nê xa.

6Hãmri nhũm ixkreja rûm Tirtûm kapêr o mẽ wrÿk xwÿnh pê 7jaja hapôj nê kuhê. Mê ê hakajre nê hirã htÿx kumrêx. Nê mẽ hinô pre xàja ôr pix o. Nê piitã Tirtûm mã tanhmã kot mẽ homnuj to xà hã xijere pê 7ta jamÿnh kaxyw kuhê.

7Hãmri nhũm mëmoj tÿr pê kwatjê ôja mẽ kãm xijere hkwy jamÿ nê mẽ hwÿr o tẽ. Xijere kêp 7 nê piitã ôr o. Nhũm hamÿ nê Tirtûm kapêr o mẽ wrÿk xwÿnhhtajê hwÿr o tẽ nê ho mẽ hipêx nhũm mẽ ahpÿnhã hamÿ. Xijere kamã Tirtûm gryk xà jamÿ nê o kuhê.


8Pu nhũm Tirtûm rûm kuwy hkũm hapôj. Tirtûm mex nê hihtÿx xwÿnhhta rûm hapôx rax o ixkreta kunor pa nhũm mẽ tee ri hwÿr gjêx prãm kaprÿ.

Xijere kamã mẽ homnu xà pê 7 jarênh

16 1Tã pa arĩ mëmoj pumu nhũm Tirtûm nhôrkwÿ kamã mëhõja kapêr o wrÿk xwÿnh pê 7jê mã kàx pê kapêr nê mẽ kãm:

—E na pa ra mẽ kot ixkapêr kwÿm ri amnhĩ nhĩpêx xwÿnhjê pumu nhũm ixpê ja omnuj tÿx o ixpê omnuj tÿx. Jakamã e mẽ anhõ xijereta jamÿ nê ma pika hwÿr mẽ hwÿr wrÿ nê axpên pãnhã mẽ hã xijere kamã mẽ homnu xà kapĩ. E mẽ tokyx ma mẽ hwÿr wrÿ. Anê.

2Hãmri nhũm mẽ kuma nê axpên pãnhã mẽ hwÿr wrÿ. Nhũm wamta kumrêx pika piitã hkôt mẽ homnu xàta kapĩ. Pu nhũm mẽ kot mrymnuti mẽ õ sãnti wa kãm mex ã harênh nê amnhĩ tã wa hixi jaxwÿr xwÿnh piitã hkànhy hpa nê à htÿx kumrêx nê ri pa.



3Hãmri nhũm wamta kôt hõja õ xijere py nê gô xujanãr kãm hkapÿr pa nhũm gô te mẽ htykjê kamrô pyrã nê kamã mëmo mry htyyxã rênh xwÿnh piitã pikaprãr pa.

4Tã ra xijere kapÿr xwÿnh o axkrut nê õ xijere kapĩ hãmri nhũm hkôt hõta õ xijere py nê hpãnhã gô hkryre piitã hkôt hkapÿr pa. Pyhti nê ri hino piitã hkôt hkapÿr pa nhũm piitã gô xujanãr pyrã nê mẽ hkamrô hã amnhĩ jahkre hpa.

5Hãmri nhũm axtem Tirtûm kapêr o mẽ wrÿk xwÿnhjê hõ kot kãm gô piitã hamãr xwÿnhhta ja hã omu nê Tirtûm mã kãm:

Pa amex rãhã apa ho apa xwÿnh. Nẽ arãhã apa ho apa xwÿnh.
Nà ãm hãmri na ka ã mẽ kêp gôta nhĩpêx anẽ.

6 Na prem mẽ kot akôt amnhĩ nhĩpêx xwÿnhjê mẽ mẽ kãm ri
akapêr jarênh xwÿnhjê hpar o pa nhũm mẽ hkamrô
hpikapĩr rax nẽ.

Tã ka ra mẽ hã mẽ kêp mẽ hkõm xà homnu hpa nhũm mẽ kêp
mẽ hkamrô ã amnhĩ jahkre nhũm mẽ tee ri ho hkõm mã.
Nà ãm hãmri na ka ã mẽ kêp gô nhĩpêx anẽ Tĩrtũm. Anẽ.

7 Hãmri nhũm mẽ kot Tĩrtũm mã mẽmoj nhõr xà hã mẽsti hpar pê hkrĩ
xwÿnhjê hõja kuma nẽ kãm:

Nà ãm hãmri na ã ajarênh anẽ Tĩrtũm.

Ãm hãmri na ka ã akrajê hã mẽ hipêx anẽ.

Ra ate mẽ hã amnhĩ jarênh xà hkôt na ka hte tanhmã mẽ hipêx
to.

Nà apê mẽ inhõ Tĩrtũm Maati na ka. Mẽ ixrom axihtÿx o axihtÿx
nẽ axàhpumunh o axàhpumunh. Anẽ.

8 Tã ra axkrunêpxi nẽ õ xijere kapĩ. Jakamã nhũm mẽ hpãnhã hõja õ
xijere o tẽ nẽ myyti hã hkapĩr pa nhũm hkagro htÿx nẽ pika hkôt mẽ pa
xwÿnhjê hkà ho hxêt o pa.

9 Kagro htÿx o hkagro htÿx jakamã mẽ hkà ho hxêt nhũm mẽ kamã
hkà kajê hpa. Hãmri nẽ tee ri amnhĩ pumu nẽ hamaxpêr o:

— Nà Tĩrtũmtija na ã mẽ pahtomnuj tÿx anẽ. Anẽ.

Hãmri nẽ kamã gryk tÿx nẽ haprÿ nẽ tanhmã ho kapêr punuj to ho
pa. Nom mẽ kot amnhĩ tomnuj kaga nẽ kãm mex o mex ã harênh kêt nẽ
arĩ tanhmã amnhĩ tomnuj to ho pa.

10 Nhũm ra kêp kwat nẽ õ xijere kamã mẽmojja kapĩ. Jakamã nhũm
ra hpãnhã hõja õ xijere o tẽ nẽ gõj rũm mrymnuti kot mẽ ho amnhĩptàr
xà hã hkrĩ xà hã hkapĩr pa. Jakamã nhũm ra kot mẽ ho amnhĩptàr xà hã
pikaja kamã kamàt kô htyk par kumrêx. Hãmri nhũm mrymnuti mẽ hkôt
mẽ kot amnhĩ nhĩpêx xwÿnhjê hã kamàt kô hpa nhũm mẽ amnhĩ xà htÿx
ã maj amnhĩ nham o axpên kamnhar tÿx kumrêx. 11 Nẽ ã Tĩrtũm kot mẽ
hipêx anhÿr ã amnhĩ tã omu nẽ kamã gryk tÿx nẽ tanhmã ho kapêr punuj
to ho pa. No ãm kot amnhĩ tomnuj xwÿnh ã amnhĩ pumunh nẽ kot
amnhĩ tomnuj kaga hkêt nẽ.

12 Nhũm prem ra kêp sĩk nẽ õ xijere kamã mẽmoj kapĩ. Jakamã nhũm
hpãnhã hõja õ xijere kamã mẽmojta o tẽ nẽ pyhti pê Erax kamã hkapĩr
pa nhũm gõja grà pa nẽ te kêp pry pyrà nẽ nõ. Jakamã nhũm myt japôx
xà rũm mẽ ho amnhĩptàr xwÿnhjaja nẽ pôristijaja hãmri pijapu kaxyw
Jerujarê hwÿr nojarêr nẽ hã hwÿr pa.

13 Tã nhũm kagãmnuti mẽ ÿ hã mẽ kãm hêx o pa xwÿnh mẽ
mrymnutita wa mẽ hakwa rũm mẽmoj te priti pyrà nẽ hapôx o pa. No
ãm priti hkêt mẽ kêp Satanasti mã mẽ àpênh xwÿnh kwÿÿ.

14Jakamã na prem pika piitã hkôt mẽ kot aa mẽmoj pumunh kêt kwý ho anhÿr o hêx rom mẽ no kupyw o mẽ hkôt pa. Tã pika piitã hkôt mẽ ho amnhĩptãr xwÿnhjê mẽ ho pikuprõnh kaxyw mẽ hapêr o pa. Mẽ kot Tĩrtũm xihtÿx o hihtÿx kurê kaxàr kaxyw mẽ pijapu xà hã arĩgro kukamã mẽ ho pikuprõnh o pa.

Jejus kot amnhĩ kwÿjê mã kapêr ã harênh

15Tã nhũm Jejus pika hkôt hkrajaja arĩ mẽ htĩr nê pa xwÿnhjê mã kapêr nê mẽ kãm:

E mẽ inhma ixkwÿjaja. Akupÿm ixte mẽ awÿr ixwrÿk xà hã arĩgroja ã kot paj te mẽ àhkĩnh xwÿnh kot amnhĩ nhĩpêx pyrã nê mẽ ajaêr pê mẽ awÿr wrÿ. Jakamã kêr ka mẽ amnhĩ wÿr ijamãr rãhã ho apa. Kêr pa akupÿn wrÿ ka mẽ amnhĩ wÿr ixpumu nê akĩnh nê amnhĩ kamã amã ixpuma hkêt nê. Anê.

Mẽ kot axpên kurê kaxàr kaxyw mẽ pikuprõnh ã mẽ harênh

16Tã nhũm Satanasti hkwyjaja pika piitã hkôt mẽ ho amnhĩptãr xwÿnhjê ho pikuprõnh pa nê mẽ hkurê kaxàr kaxyw ma Ijaew kot kãm “Amaketõ” jarênhja wÿr mra.

17Hãmri nhũm Tĩrtũm kapêr o mẽ wrÿk xwÿnh pê 7 kot hitepta õ xijere py nê kàx mã kamã mẽmoj kapĩr pa. Jakamã nhũm Tĩrtũm nhõrkwÿ kamã mẽ ho amnhĩptãr ã hkrĩ xà rũm Tĩrtũm kàx pê kapêr o:

—E hãmri. Na pa ra mẽ kot amnhĩ tomnuj mÿrapê tanhmã mẽ ho jatur xàm mẽnh kaxyw. Anê.

18Pu nhũm na hkatõtõk nê hkrakrak nê haxênh nhũm pika htetet tÿx nê. Aa mẽ kot pika htetet tÿx kot anhÿr ã omunh kêt kumrêx.

19Jakamã nhũm Papirõnja kajê axkrunêpxi. Papirõn nhõ xwÿnhjaja kot amnhĩ tomnuj tÿx o paja mÿrapê nhũm Tĩrtũm ã mẽ hipêx anê. Nê pika htetet o pika piitã hkôt krĩ grãnh pa. 20Nhũm gõ hipõk piitã gõja hã axkamur nhũm hapêx pa. Nê kên prêk nê hkrã hixêt rôrõk nê hpigrãnh pa. Pika htetet tÿx kumrêx jakamã ã mẽmoj amnhĩ nhĩpêx anê. 21Nê na mẽ pê jêr krã jakootija mẽ piitã mẽ hipy rôrõk. No



Apokarip 16.21

ãm hkrã hkryre hkêt hkrã rûnh kumrêx. ãm hpÿnh nê kamã kêp 40 kir nê mê hã rôrôk nhûm mê tee ri amnhĩ tã ã omu nê Tĩrtũm kamã gryk tÿx nê haprÿ nê ho kapêr punuj nê.

Tĩrtũm kra hkêt xwÿnhjê jarênh

17 ¹Tã pa pre kê axte mẽmoj pumu. Nhũm kot xijere jamÿnh xwÿnhjê hõja ixwÿr tẽ nê inhmã:

—E ma ixkôt tẽ nê mẽmoj pumu. Anê.

Hãmri pa kuma nê ma hkôt tẽ nhũm inhmã:

—Nà ahpÿnhã gô rax mÿri krĩ nhõ xwÿnhjaja te ho ni hkuprÿ gô mÿ ri ÿr nê kãm mẽmyjê piitã hkĩnh o ÿr xwÿnhhta pyrãk. Na htem urãk nê Tĩrtũm kapêr kôt ri amnhĩ nhĩpêx kêt nê. ãm htÿx ri tanhmã amnhĩ tomnuj to ho pa. Jakamã koja Tĩrtũm tanhmã mẽ homnuj tÿx to nê mẽ ho hapêx. ²Krĩ piitã hkôt mẽ ho amnhĩptãr xwÿnhjaja na hte ma mẽ õ krĩ hwÿr mra nê te mẽ kot mẽ hkuprÿjê ho amnhĩkati pyrãk o amnhĩ nhĩpêx. Nê te pipãnh nê htÿx ri amnhĩ nhĩpêx pyrãk o amnhĩ nhĩpêx o pa. Nhũm krĩ nhõ xwÿnhjaja mẽ urãk nê amnhĩ krã hkôt pix mã tanhmã amnhĩ tomnuj to ho ri pa. E ma ixkôt tẽ nê ja hã mẽ omu. Anê.

³⁻⁴Hãmri nhũm Tĩrtũm Karõ tanhmã ixto nhũm kapêr o wrÿk xwÿnhja ma kapôt wÿr ixto mõ pa kapôt ã mrymnuti hkrã kêp 7 nê kamã hpãr kêp 10 xwÿnhhta pumu nhũm hkamrêeti nê xa. Nê ï piitã hã tanhmã Tĩrtũm o kapêr punuj to hã kagã. Nhũm katut ã mēhõ ni kuprÿta nhÿ. Mẽ ho amnhĩptãr xwÿnh ã mẽ ê kakrã htyk nê hkamrêk o hkukãr jaxã nê hã nhÿ. Nê ôr o ôkrexê. Nê ôr o hinwÿÿxê nê ïhkra kamã kãx. ãm ôr pix o hikukrêx. Nê kên mex karÿr pix o amnhĩ jamrêx. Nê ôr o kopti hõ py nê hã nhÿ. Kopti kamã ni kuprÿ kot amnhĩ tomnuj xã. ãm kot mẽ kêp mẽ mjên o amnhĩkati ho pa xã pix nhũm kupy nê o nhÿ.

⁵Nê ôkrã hã amnhĩ nhĩxi hã kagã kot:

Inhĩxi pimxur pê PAPIRÕN RAXTI.

Nê ixpê mẽ kêp mẽ mjênjê ho amnhĩkati ho mẽ pa xwÿnhjê nã na pa.

Nê ixpê mẽ kot axpên prõ ho amnhĩkati o mẽ pa xwÿnhjê nã na pa. Nê ixpê mẽ kot Tĩrtũm nê mẽ kãm hêx o ri mẽ pa xwÿnhjê nã na pa.

Nê ixpê mẽ kot Tĩrtũm kapêr kôt amnhĩ nhĩpêx o pa hkêt xwÿnhjê nã na pa.

Anhÿr o ôkrã hã amnhĩ nhĩxi hã kagã kot anhÿr. ⁶Nhũm axpã nê nhÿ pa omu. No ãm kagõxÿhti ho hpipãnh kêt. Mẽ kot Jejus kôt amnhĩ xunhwÿr nê ri mẽ kãm Jejus kêp mẽ õ pahшти hã harênh xwÿnhjê kamnhwÿr o mẽ hpar nhũm mẽ hkamrõ pikapĩr xwÿnhjê kamrõ ho na pre axpã nê nhÿ. Pa ã kot amnhĩ nhĩpêx anhÿr ã omu nê tee ri ijamaxpêr.

⁷Hãmri nhũm Tĩrtũm kapêr o wrÿk xwÿnhja inhmã:

—Kwa mon ka ri ja pumu nê tee ri ajamaxpêr? E kot paj ixprî hã amã harê ka inhma. Niti mē hã ȳr xwÿnh pê mrymnutita. Krã pê 7 nê kamã hpàr pê 10 xwÿnhhta kot paj ixprî hã amã hamē wa harê ka wa harēnh ma.

8—Nà mrymnutija na pre htîr nê ri pa tã ty nê ahkre xupÿmti kamã hikwÿ. Nom koja akupÿm htîr nê kurûm kato nhûm mē piitã omu nê ahpÿnhã tanhmã hamaxpêr to. Amnepê mormã amrakati ri Tîrtûm kot ô kagã kamã mē htîr tûm nê mē pa mã xwÿnhjê nhîxi jaxwÿr xwÿnhjaja koja kator ã omu nê âm omu nê tanhmã hamaxpêr to hkê nê. No mē kot Jejus kôt amnhî xunhwÿr kêt xwÿnhjaja koja mē amnhî jaêr pê akupÿm kator ã omu nê tee ri hkukamã hamaxpêr. Hãmri nê axpên mã: “Kwa amnepê m htyk tã ra tanhmã amnhî to nê akupÿm htîr nê api nê mō.” Anhÿr o axpên mã harê. Hãmri nhûm kato nê ma tē nhûm Tîrtûm tã ho hapêx kumrêx nhûm hapêx o hapêx.

9—Kwa inhma nê jam ajamaxpêr tÿx nê. Mrymnuti krã pê 7ta te kêp hixêt prêk pê 7 pyrã nê hã ȳr xwÿnh ni kuprÿta te hixêt prêk pê 7ta ã ȳr pyrãk.

10—Nê mrymnuti hkrã pê 7ja te kêp mē ho amnhîptâr xwÿnh pê 7 pyrãk. Nhûm mē ho amnhîptâr xwÿnhjaja te mē kêp 5 nê ra htyk pyrãk nhûm hkôt hõja arî mē ho amnhîptâr o pa. No kot hitepta kormã. Nom koja mē ho amnhîptâr ry hkê nê.

11—Mrymnuti htîr nê pa htã htyk nê ra akupÿm htîr nê àpir xwÿnhhta koja hkrã hitepta pãnhã mē ho amnhîptâr o pa. Jakamã te mē ho amnhîptâr xwÿnh pê 7jê hõ pyrãk. Koja hkrã pê 7ja mē ho amnhîptã nê gaa nê htyk mē nhûm hpãnhã mrymnutita hpãnhã mē ho amnhîptã. Hãmri nhûm rî kormã Tîrtûm tã mē ho hapêx par kumrêx.

12—Nê ate mrymnuti hkrã kamã pàr pê 10 pumunh xwÿnhhta te mē kêp mē ho amnhîptâr xwÿnh pê 10 pyrãk. No âm jaja na kormã mē ho amnhîptâr kêt nê. Koja mē nhÿrmã anhîpê mrymnuti nhÿ hã ahpÿnhã ri mē ho amnhîptâr o pa nom mē ho amnhîptâr japjê hkê nê. 13Koja mē tanhmã ja hã axpên mar to hãmri nê mrymnuti mã anê nhûm mē hpãnhã mē piitã mē ho amnhîptã.

14—Nê mē ho amnhîptâr xwÿnh pê 10jaja koja mē pahte amnhî tomnuj pãnhã amnhîrer xwÿnh kurê kaxàr kaxyw hwÿr mra nê kutã pijapu ho kuhê. No âm tee ri kãm tanhmã ho hprãm hkaprÿ nhûm mē ho axtem nê amnhî tã mē himex pa. Hihtÿx o hiltÿx o kot mē ho hpimràatã mē hakrenh par. Nê kêp pika piitã hkôt mē ho amnhîptâr xwÿnhjê nhõ Pahihti. Tãm na pre amnhî wÿr mē kot hkôt amnhî nhîpêx o mē pa xwÿnhjê wÿ nhûm htem amnhî kaxyw hkôt hamaxpêr mex rãhã ho pa. 15—Nê krî pê Papirõn kapem gô xohtô mÿ ri ni kuprÿ hkrî xwÿnhhta. Gô xohtõja te kêp ahpÿnhã ri pika piitã hkôt mē uro hkwy pyrãk. Nê te ahpÿnhã ri mē kapêr xwÿnh kwÿ pyrãk.

16—Ně mrymnuti hpàr pê 10ta kêp mē ho amnhĩptàr xwỳnh pê 10 pyràk. Jakamã koja mē kãm ni kupryta prãm nõkati nē kamã gryk tỳx kumrēx. Hãmri nē hwỳr mra nē kêp hikukrēx piitã utã nē kêp ê hkwrỳnh pa nhũm hkênh mex nē xa. Hãmri nhũm mē kupĩ nē ĩ hkrēr pa nē kuwy kamã hi rē nhũm kaxàr pa nē hapêx.

17—Na pre pahi pê 10jaja mrymnuti hkôt amnhĩ xunhwỳ nhũm Tĩrtũm ãm ja hã mē omu nē tanhmã nē mē kãm nē hkêt nē. Jakamã koja mē ãm hkôt pix mã amnhĩ nhĩpêx o pa rãhã nhũm Tĩrtũm mē ho hapêx. Nē mē õ krĩ mē mē ho hpimràatã mē ho hapêx pa. Hãmri nē mē ho hapêx o mē ho hapêx.

18—Ně ate mēhõ ni kupry pumunh xwỳnhhta te kêp krĩ rax pê Papirõn nhõ xwỳnhjê pyràk. Nē mē ho amnhĩptàr xwỳnhja pika piitã hkôt mē ho amnhĩptàr xwỳnhjê hkrãhtũm na. Anē.

À Tĩrtũm kapēr o mē wrỳk xwỳnhja inhmã mē harēnh anē. Pa kuma nē ô ri mē amã hã kagà. Mē ate kamã harēnh nē aprĩ hã mar tỳx kaxyw.

Tĩrtũm kot Papirõn grãnh par ã harēnh

18 ¹Tã pa kê axte mēmoj pumu. Nhũm axte Tĩrtũm kapēr o mē wrỳk xwỳnhjê hõja kaxkwa rũm ahpãr mã wrỳk o tē. Tĩrtũm nhỹ hã hihtỳx nē kamã hirã rax kumrēx o pika piitã hkôt mē kãm hirã pa. ²Nē ahpãr mã tēn wrỳ nē kax pê kapēr o:

E koja Papirõnja pigrãnh pa nē hpãnhã kêp Satanasti mã mē ãpēnh xwỳnhjê papxã nē kêp nhõnhti papxã. Hãmri nē aa kamã mēmoj mex kêt kumrēx.

³ Krĩ nhõ xwỳnhjaja na htem Tĩrtũm kapēr kôt amnhĩ nhĩpêx kêt nē amnhĩ krã hkôt kãm prãm xã hkôt pix mã tanhmã amnhĩ tomnuj to ho pa. Te mēhõ pipãnh nē htỳx ri amnhĩ nhĩpêx o pa pyràk.

Nhũm krĩ piitã hkôt mē ho amnhĩptàr xwỳnhjaja mē hwỳr mra nē mēnijê ho amnhĩkati ho pa.

Nē krĩ nhõ xwỳnhjaja mēmoj pumu nē kãm hkĩnh nē haprõr kurê kumrēx o pa nē aa uaprõr o hapêx kêt nē.

Jakamã na hte krĩ hkwy nhõ xwỳnhjaja mē hwỳr mēmoj to pa nē xatã mē kãm ho wēnê nē mē kukwak ri mē hikaxpore rũnh nē pa.

Anhỹr o kapēr. ⁴Hãmri nhũm Tĩrtũm Papirõn kamã hkrajê mã kapēr nē mē kãm:

E mē tokyx mē kot ri htỳx amnhĩ nhĩpêx xwỳnhjê nhõ krĩta rũm ajapõj ixkrajaja.

Kot kaj mē anhỹr kêt nē ra mē hkôt amnhĩ nhĩpêx pa mē ato apimràatã mē ate amnhĩ tomnuj ã mē atomnuj tỳx nē.

⁵ Krĩ nhõ xwỳnhjaja na htem amnhĩ tomnuj rũnh o pa.

Mẽ kot amnhĩ tomnuj xà te mẽ kot kën katutxô nhũm hprêk rax
o kot kaxkwa kanhwỳr kaxyw pyràk.

Na pa hte ã mẽ kot amnhĩ nhĩpêx anhỳr ã mẽ omunh rãhã ho ri
ixpa. Jakamã kwa ixkrajaja mẽ tokyx mẽ kurũm ajapôj.

Anhỳr o hkrajê mã kapêr. Hãmri nê kapêr o mẽ wrỳk xwỳnhjê mã
kãm:

6 E kwa mẽ ma mẽ hwỳr wrỳ nê tanhmã ixkrajê hã mẽ ho.

No âm kêr ka mẽ tanhmã mẽ ho htỳx o mẽ kot ra tanhmã ixpê
ixkrajê nhĩpêx tota jakre.

Kê mẽ tanhmã ixpê mẽ ho grire htã ka mẽ hã tanhmã mẽ ho htỳx
kumrêx o mẽ kot mẽ hipêxta jakre.

7 Krĩ nhõ xwỳnhjaja na prem mex nê pa.

Nê mẽ hikukrêx rũnh nê hkĩnh nê pa.

Nê tanhmã amnhĩ to jarkrar to ho ri pa nê amnhĩ jarênh o:

“Ot pa mẽ te pahi ni kot amnhĩ nhĩpêxta pyrã nê ixkrĩ xà mex pix
kãm ixkrĩ pyràk.

Nê te Tĩrtũm kot amnhĩ nhĩpêx pyràk o na pa htem amnhĩ
nhĩpêx o ri ixpa.

Nê mẽ ixkĩnh nê mẽ inhmex rãhã ri ixpa.

Ã mẽ ixte amnhĩ nhĩpêx anhỳr xwỳnh na pa mẽ.”

Anhỳr ã amnhĩ to jarkrar o pa.

Tã kêr ka mẽ tanhmã mẽ homnuj to kê mẽ mexta pãnhã omnuj
tỳx nê pa.

Nê kê mẽ hkaprĩ nê amnhĩ xà htỳx kãm hamak rãhã nê pa ho pa.

8 E kê mẽ ã amnhĩ nhĩpêx anhỳr o pa.

Jakamã koja mẽ arĩgro hpỳnh kãm mẽ hkwyjaja hpikaprãr rũnh
nê nhũm arĩ mẽ htĩr xwỳnhjaja omnuj nê pa.

Nê tee ri amnhĩ pumu nê hkaprĩ xàj mỳr o pa.

Nê amnhĩ xà htỳx kãm hamak o pa.

Nê tee ri amnhĩ nhĩpêx o pa.

Nê kãm prãm nê pa rãhã ty nhũm kuwy mẽ ho hkaxàr pa.

Ixpê Pahi Maati Tĩrtũm kot paj ixihtỳx kãm ã mẽ hipêx anê. Anê.

9 Hãmri nhũm krĩ piitã kurũm mẽ ho amnhĩptàr xwỳnhjaja. Mẽ kot mẽ
hwỳr mrar nê mẽ hkuprỳjê ho amnhĩkati nê mẽ uràk nê mẽmoj pumunh
nê haprôr rãhã ho pa xwỳnhjaja tee ri krĩ kaxàr nê kàx mã kuwy hkũm
àpir o paja pumu nê hkaprĩ nê mỳr o kuhê.

10 Nê Tĩrtũm kot mẽ ho hapêx par ã mẽ omu nê kãm ma htỳx kumrêx.
Amỳm mẽ omunh o kuhê nê tee ri amnhĩ kukamã hamaxpêr nê htetet
tỳx nê. Nê mỳr kãm kapêr o:

Hêxta waa nê Papirõn nhõ xwỳnhjaja.

Mẽ amex nê axihtỳx mex nê apa htã nhũm Tĩrtũm mẽ anhĩmex
pa. Hêxta waa nê. Anê.

11 Nê mē hwÿr mrar nê mē kām mēmoj to wēnê ho mē pa xwÿnhjaja haxwÿja krĭ pumu nê tee ri amnhĭ kukamã hamaxpêr nê hkaprĭ nê mÿr o kuhê. Nhÿri koja mē tokyx axte mēmoj to wēnê? Mē kêp mēmoj japrôr rŭnh xwÿnhjaja hkaxàr par kumrêx kênã.

12 Na prem mēmoj piitã ho pa nê mē kām ho wēnê. Mēmoj mex piitã. Ôr o mē hkukrêx nê prat o mē hkukrêx nê kên jaxênh ã kàxpore xohtôô. Nê kupêxê mex. Kakrã htyk nê hkamrêk nê hkroore nê hã hapjê. Nê mēmo pĭ kuxware nê pĭ htÿx nê kên jakàr nê kàx o ri mēmo nhĭpêxja



Apokarip 18.11-13

nhŭm prem mē kām ho wēnê ho pa. 13 Nê mēmo htwÿm nê mē hkuxwa xà. Nê mē ô ho ành xà nê mē ô kuxwa xà nê xwÿgrà nê harôj. Nê môx nê ôwêhti nê kawar nê kaxyw kawarti hkjênh xà hã karrotre. Nê nhÿhÿnh krĭ hō kamã panhĭ hkwy pynê nê mē hwÿr mē o pa nê mē kām mē ho wēnê nhŭm mē amarĭ mē hkôt ri àpênh rŭnh o pa. Na prem ã mē kām mēmoj to wēnê anhÿr o pa. Tã ra mē kot mē haprôr xwÿnh mē mē pimràatã hapêx pa.

14 Jakamã nhŭm mē tee ri mē hkukamã hamaxpêr nê te kot mē kām kapêr pyrã nê mē kām:

Hêxta waa nê. Mē amã mēmoj prãm nê amnhĭm haprôr xwÿnhhta na mē apê hapêx par kumrêx.

Nê mē akàxpore rŭnh nê mē akukrêx rŭnhhta mē mē apimràatã ajapêx pa. Kot kaj mē axte tanhmã amnhĭ nhĭpêx to ho apa hkêt nê. Anê.

15 Hãmri nê amÿm ri Tĭrtŭm kot tanhmã mē hipêx to hã mē omu nê kām ma xàj mur nê httert o kuhê.

16 Nê mÿr kām kapêr o:

Hêxta waa nê. Na pre htem ê mex pix jagjê nê ri hã mra. Kakrã htykre nê hkamrêkre.

Nê mē hikukrêx mex o amnhĭ jamrêx nê ri hã mra.

Nê ôr nê kên mex ã ohtô xwÿnh o amnhĭ jamrêx nê ri hã mra.

17 Tã ra hapêx par kumrêx. Anê.

Hãmri nhŭm gô xujanãr kãm pàr nhô dôn nê mē kot mē kãm pàr o ri mrar xwÿnhjaja nê mē kot kamã tep pynênh xà ho tep pynênh o ri mē pa xwÿnhjaja nê pàr kãm amarĭ mē pa xwÿnhjaja hãmri mē hwÿr mra nê wamtajê pyrã nê tee ri amÿm ri mē ô krĭ pumu nê mÿr o kuhê. 18 Nê

kurūm kuwy hkūm xàpir o pa hã omu nẽ tee ri mẽ hkukamã hamaxpẽr nẽ axpẽn mã:

Hêxta waa nẽ. Krĩ mũj na pre mex o mex. Mex o krĩ piitã
hakrenh par htã hapêx pa. Anẽ.

19Hãmri nẽ mur nẽ hkaprĩ xàj pika hkwỳ jamỳ nẽ ho amnhĩ kamĩ nẽ mỳr kãm kapẽr o:

Hêxta waa nẽ. Krĩ mũj na pre rax o rax.

Nhũm pre nhỹhỹnh pàr kãm mẽmoj to wẽnê ho pa xwỳnhjaja mẽ
hwỳr mẽmoj to pa nẽ mẽ kãm ho wẽnê nẽ mẽ hkukwak ri
hikàxpore rũnh nẽ ri pa.

Tã hãmri mẽ hapêx pa. Anẽ.

20Hãmri nhũm Tĩrtũmja krajê piitã mẽ kãm kapẽr nẽ mẽ kãm:

E ixpê Tĩrtũm na pa ã mẽ hipêx anẽ.

Mẽ kot mẽ apê ixkrajaja tanhmã mẽ atomnuj to ho paja mỳrapê
na pa mẽ atã ã mẽ hipêx anẽ.

Jakamã e kaxkwa kamã mẽ apê ixri mẽ apa xwỳnhjaja.

Nẽ mẽ ate inhỹ hã ri mẽ kãm ixkapẽr jarênh o mẽ apa
xwỳnhjaja.

Nẽ Jesus nhỹ hã mẽ akapẽr o ri mẽ apa xwỳnhjaja. Mẽ apiitã mẽ
apê ixkra na ka mẽ.

E mẽ amnhĩ tã ja pumu nẽ akĩnh nẽ axpẽn mã apikunhar o
akuhê. Pa na pa mẽ atã ã mẽ ho ijapêx anẽ. Anẽ.

21Tã nhũm kapẽr o mẽ wrỳk xwỳnhjê hõja hihtỳx o kẽn rax kumrêxja
mỳ nẽ o tẽ nẽ gô xujanãr kamã kãm gêt nẽ kumê nhũm mrõ nẽ akunok.
Hãmri nhũm kapẽr o:

E krĩta koja Tĩrtũm te ho ixte gôx kãm kẽn mẽnh nhũm
mrõr nẽ hpikunor pyrãk o hipêx nhũm hapêx par
kumrêx.

22-24 Na pre hte krĩja kamã mẽ kot ri mẽ kãm mẽmoj to wẽnê
xwỳnhjaja amnhĩ to rũnh o krĩ piitã hkôt mẽ hakrenh
pa.

Nẽ krĩ nhõ xwỳnhjaja na prem pika piitã hkôt hêx rom
tanhmã mẽ no kupyr to ho ri pa. Jakamã ra mẽmoj to
wẽnê xwỳnhjê pyrã nẽ mẽ hikukrêx rũnh gryk ã Tĩrtũm
kaga.

No ãm ja pix kêt. Tĩrtũm krajê mẽ Tĩrtũm nhỹ hã kapẽr o mẽ pa
xwỳnhjaja na prem mẽ himex rax nẽ. Hãmri nhũm krĩ
piitã kamã mẽ pa xwỳnhjaja mẽ kot mẽ hipêx ã mẽ omu
nẽ mẽ urak nẽ ã mẽ hipêx anhỹr o pa.

Tã Papirõn nhõ xwỳnhjaja kot mẽ hipêx anhỹrja mỳrapê koja
Tĩrtũm mẽ himex par kumrêx.

Jakamã koja mẽ axte hkĩnh nẽ hkĩnh xàj ri grer kêt nẽ.

Nē axte hkīnh nē grer kām hakwa kôr o ri pa kêt nē.
 Nē axte ri wiorāw kakrēnh hkêt nē.
 Nē axte ri amnhīm kawà hyr o hkrī hkêt nē.
 Nē axte harôj kahuk o kuhê hkêt nē.
 Nē axte mẽ ôrkwỹ kamã kanê hpôk kêt nē.
 Nē axte axpẽn mã ri hkrajê rer o ri pa hkêt nē. Koja ã mẽmoj kot
 anhỹr piitã hapêx pa. Anê.

Mê kot Tĩrtũm mex ã mẽ harēnh

19 ¹Tã pa kê axte mẽmoj pumu. Nē kaxkwa kamã mẽ kapēr ma
 nhũm mẽ ohtô rax kumrēx nē tanhmã axpẽn mã kapēr to. Nē
 anhĩpê kàx pē kapēr tỳx nē kapēr o:

E pu mẽ pahpiitã Tĩrtũm mã mex o mex ã harē.

Tapxipix na hihtỳx o hihtỳx.

Nē tapxipix na àhpumunh o àhpumunh.

Nē tapxipix na mex o mex.

Tapxipix na mex o kot mẽmoj piitã hakrenh par.

Ra kot mẽmoj punuj pē mẽ papytār par jakamã kēp mẽ papytār
 xwỳnh ã pixi mex na.

2 Na hte amnhĩ jarēnh xà hkôt tanhmã mẽmoj to ho pa.

Nē amnhĩ to hêx kêt nē.

Tã âm hãmri na ã Papirôn nhõ xwỳnhjê nhĩpêx anê.

Na prem mẽ kām Tĩrtũm kapēr jarēnh o mẽ pa xwỳnhjê nhĩmex
 rax kumrēx.

Nē krī piitã hkôt ri pa nē amnhĩ kôt mẽ kurē nhũm mẽ kuma nē
 mẽ hkôt amnhĩ tomnuj o pa.

Nhũm Tĩrtũm tee ri hã mẽ omu nē ã hkrajê hã mẽ hipêx kati anê.

Âm hãmri na ã mẽ hipêx anê.

Anhỹr o axpẽn mã harē. ³Hãmri nē xatã axpẽn mã:

Nà âm hãmri na ã mẽ panhõ Tĩrtũmja mẽ hipêx anê nhũm mẽ
 kurũm kuwy hkũm kàx mã àpir o pa.

Koja krī nhõ xwỳnhjaja amnhĩ xà htỳx kamã hamak rãhã ho pa
 nē aa à htỳx hapêx kêt.

E pu mẽ hã Tĩrtũm mã mex o mex ã harē. Anê.

4Hãmri nhũm mẽ àptār tũm pē 24 mẽ mẽmoj tĩr pē kwatjaja hãmri
 Tĩrtũm kot mẽ ho amnhĩptār ã hkrī xà maati kutã rôrôk nē kām hipô
 hpa. Hãmri nē ã mẽ kapēr anhỹr xwỳnhjê mã kapēr nē kām:

Nà âm hãmri na ka mẽ ã Tĩrtũm mex ã harēnh anê. E pu mẽ
 pahpiitã kām mex o mex ã harē. Anê.

5Hãmri nhũm mẽhõja Tĩrtũm krī xà maati kamã kapēr o:

E mẽ axte Tĩrtũm mã mex o mex ã harē.

Mê ate Měpahpãm kôt amnhĩ nhĩpêx o mẽ apa xwỳnhjaja.

Nē mẽ apê mẽ ho amnhĩptàr xwỳnhjaja nē amarĩ ri mẽ apa
xwỳnhjaja nē mẽ apiitã mẽ ate Tĩrtũm ã apijaam o mẽ apa
xwỳnhjaja kãm mex o mex ã harê. Anê.

Kot mẽ pahpãnhã amnhĩrer xwỳnh mẽ hkwỳjê jarênh

6Tã pa tanhmã mẽ kapêr to hã mẽ kuma nhũm mẽ kàx pê kapêr tỳx
nê. Te mẽ ohtô rax kumrêx kapêr pyràk. Nê te gô koko htỳx rỳ na katôtòk
tỳx pyràk. Hãmri nê mẽ kapêr o:

E na ra Tĩrtũm kêp mẽmoj piitã ho amnhĩptàr xwỳnh.

Nê kêp mẽ panhõ Pahi Maati.

Nê hihtỳx o hihtỳx nê àhpumunh o àhpumunh.

E pu mẽ kãm mex o mex ã mãn harê.

7-8 Nê hã pahkĩnh nê.

Nê kãm hihtỳx o hihtỳx ã harê.

Te mẽ kot axpên mã mẽ rer xwỳnh kot amnhĩ nhĩpêx pyràk.

Jao mẽ pahte amnhĩ tomnuj pãnhã amnhĩrer xwỳnhhta te kêp
myja pyràk.

Nê mẽ kot hkôt amnhĩ nhĩpêx xwỳnh piitã te mẽ kêp nija pyràk.

Nê te mẽ kot axpên mã wa rer nhũm wa kot axpên kôt pa ho pa
pyràk o koja mẽ amnhĩ nhĩpêx.

Nê te mẽ kot mjên mã xwỳnh mã ê mex jakare nhõr nhũm kot
hagiênh pyràk. Nê ê mexja te mẽ kot tãm amnhĩ nhĩpêx xà
pyràk. Anê.

9Hãmri nhũm Tĩrtũm kapêr o wrỳk xwỳnhja inhmã:

—E Juãw. Pa amã mẽmoj jarê ka mar tỳx nê akwỳjê mã hã kagà.
Tĩrtũm kapêr kwỳ kot paj amã harê. Kêp Tĩrtũm kapêr jakamã ãm hãmri
na. Na hte mẽmoj jarênh o hêx kêt nê. E kapêr ã kagà ho:

Na htem axpên mã mẽ rer kaxyw nê amnhĩ wỳr hkwỳjê wỳ
nhũm mẽ hwỳr mra nê wa hã hkĩnh nê apkur mex nê.

Ja pyrà nê Tĩrtũm kot amnhĩ wỳr mẽ hwỳr xwỳnhjaja koja
mẽ nhỹrmã mẽ pahte amnhĩ tomnuj pãnhã amnhĩrer
xwỳnhhta wỳr api nê ã amnhĩ nhĩpêx anê nê hkĩnh nê
apkur mex nê.

Hãmri nhũm Tĩrtũm mẽ ho mex rax kumrêx. Anê.

—E kêt ka ã akwỳjê mã ja hã kagà anê Juãw. Anê.

Hãmri pa kuma nê kagà ja kamã mẽ amã hã kagà. 10Hãmri nê hã
kagà hpa nê ra ixte kãm mex o mex ã harênh kaxyw kutã ixkõn krã ho
têm nê nhỹ nhũm tee ri amnhĩ tã ixpumu nê inhmã:

—Kwa ã ri inhĩpêx anhỹr kêt nê. Apyrà nê ixte Jejus mã tanhmã
amnhĩ nhĩpêx to xwỳnh kênã. Jejusja apyrà nê kêp inhõ pahĩhti na. Jejus
kapêr na prem hkukamã mẽ kot Tĩrtũm nhỹ hã kapêr o mẽ pa xwỳnhjaja

hã kagà nê mẽ kãm harênh o pa. Jakamã kwa pu mẽ Tirtũm pix kutã mân pahkôn krã ho parôrôk nê pahkrĩ nê kãm mex o mex ã harê. Anê.

Kawar jaka hã ỹr xwỳnh jarênh

11-16Tã pa kê axte mẽmoj pumu. Nhũm kaxkwa axkjê nhũm kamã kawar jakajre xa nhũm mẽhõja hã nhỹ. Hixi na pre kêp “Aa kot Tirtũm kaga hkêt xwỳnh.” Anê nê hixi hõ na pre kêp: “Tirtũm kôt pix mã amnhĩ nhĩpêx o pa xwỳnh.” Anê. ã hixi kot anhỹr jakamã na hte katat kôt ahpỳnhã mẽ kot amnhĩ nhĩpêx ã mẽ omunh xà hkôt tanhmã mẽ harênh to. Mẽ kot amnhĩ to mex ã mẽ omunh xà hkôt tanhmã mẽ hkwyjê jarênh to nê mẽ kot amnhĩ tomnuj ã mẽ omunh xà hkôt ahpỳnhã tanhmã hkwyjê jarênh to. Na pre mẽ kot tanhmã hkwyjê nhĩpêx to ho pa xwỳnhjê kutã amnhĩ xunhwỳ nê mẽ hã tanhmã mẽ ho. ã na pre kawar ã ỹr xwỳnhja amnhĩ nhĩpêx anhỹr o pa.

Nê no te kot kuwy hpôk pyrãk jakamã hprĩ hã mẽmoj piitã omu nhũm mẽmoj kêp hpimxur kêt nê. Nê kêp pahi hã mẽ ahkà ho ohtô nê kutu. Nê nhỹhỹnh í hã hixi hõ hã kagà nom ãm tapxipix kot amnhĩ tã amnhĩ nhĩxija pumunh. Na pre ra amnhĩ kamrô ho ê xy hpa nê xa. Nê hixi hõ pê:

TIRTŪM KAPĒR O AMNHĪRĪT XWỠNH

Nê ê ryti hã hixi hõ hã kagà. Nê ihkjê hã ãm tãm. Hã kagà jarênh kot:

Ixpê mẽ ho amnhĩptar xwỳnh piitã mẽ õ Pahi Maati na pa.

Nê hakwa rũm wapo xwa gixre põm katon ajêt. Kot ho tanhmã mẽ kot Tirtũm mẽ wa kutã amnhĩ xunhwỳr xwỳnhjê nhĩpêx to kaxyw. Jakamã ra mẽ piitã mẽ ho pikuprõnh pa nê mẽ hipêx o te mẽ kot prês kãm uwa xô kagô janênh pyrãk nhũm mẽ hkamrô hpikapĩr rax kumrêx. Tirtũm xihtỳx xwỳnh kot mẽ kamã gryk tỳx jakamã nhũm ã kãm mẽ hipêx anê. Mẽ kot amnhĩ tomnuj o paja mỳrapê.

Nhũm õ pôristi piitã urãk nê kawar jakare hã hkrĩ nê hkôt ri pa. Mẽ ê jaka muxre jagjê nê hã ma hkôt ri pa.

17-18Tã pa axte Tirtũm kapêr o mẽ wrỳk xwỳnh õja pumu nhũm myyti kutã xa nê kàx pê nhõnhti mã kapêr nê mẽ kãm:

—E mẽ amnê mẽ ixwỳr wrỳ nê Tirtũm ã akĩnh nê mẽ htyk nê mẽ hikwỹ xwỳnhjê hã atu nê aku. Mẽ ho amnhĩptar xwỳnhjaja nê pôristijaja nê mẽ hkrãhtũm nê kawar nê kawar ã mẽ hkrĩ nê ri mrar xwỳnhjaja nê mẽ kot amnhĩ to rũnh xwỳnhjaja nê mẽ kot amnhĩ to hkryre xwỳnhjaja. Nê mẽ kãm mẽ àpênh xwỳnhjaja nê amnhĩ mã ri mẽ àpênh xwỳnhjaja. ãm mẽ htyk nê mẽ hikwỹ xwỳnh mũj piitã mãmri mẽ hwỳr wrỳ nê mẽ hã atu nê mẽ aku. E mẽ tokyx nhõnhti. Anê.

19Tã nhũm mrymnuti nê krĩ piitã hkôt mẽ õ pahi nê mẽ õ pôristijaja piitã axpên wỳr akuprô. Wam kawar jakare hã ỹr nê htêm xwỳnh mẽ õ

pôristijê hwÿr hprôt nê mē hkurê kaxàr kaxyw axpēn mar kaxyw akuprô.

20-21 Hāmri nê mē hwÿr mra nê mē hkurê kapa. No âm tee ri amnhî nhîpêx nê tee ri kām tanhmā mē ho hprām hkapyr nhūm wam kawar jakare hā ÿr nê htēm xwÿnhhta hakwa rūm wapo xwagixre kator o mē himex pa. Hāmri nhūm mē hkwyjê pyràn htyk pa nê hikwÿ. Nhūm nhônhti mē omu nê mē hwÿr wrÿk o mra nê mē kuku hāmri nê kām mē hkur kaga nê mē hkaga. No nhūm mrymnuti nê ÿ hā mē kām hêx o pa xwÿnhhta wa nhūm mē axtem nê htîr rāhā wa unê nê ma wa o tē nê êsôf o kuwy maati kamā wa kumê. Hāmri nhūm wa kamā htîr tūm nê hxêt rāhā nê pa ho pa nê aa htyk kêt nê.

Mê kot Satanasti hpa hpre hā mē harēnh

Wam Korît 15.20-28

20 ¹Tā pa kê axte mēmoj pumu. Nhūm Tirtūm kapêr o mē wrÿk xwÿnhjê hōja kaxkwa rūm wrÿ nê ahkre xupÿmti hpro xà ho htÿx xà hā safja py nê kàx pytihti ho mē hpre xàja ô py. ²⁻³Hāmri nê kagāmnuti pē hêx xwÿnh maati Satanastija pynê. Amnepēm Atāw mē Ewa wa kām hêx xwÿnhhta pynê nê kàx pytî o hpa hpre nê hte hpre hāmri nê ahkre xupÿmti nhîtom xà mē nê kamā kumê. Hāmri nê akupÿm hpro xà ho hpro nê saf o hā ho htÿx. Kot pika piitā hkôt mē kām hêx o pa pymaj ā hipêx anê. Kojā tokyx kator kêt ry rax kumrêx. Kojā kamā arî hkrî hā amgrà xohtô nê. Hā amgrà pē 1.000 nhūm rî kormā Tirtūm akupÿm kator nhūm kato nê ri pa. Nom pa hkrânre.

⁴Tā pa mē htyk nê akupÿm mē htîr xwÿnh kwÿjê pumu. Kormā mē htîr ri na prem Tirtūm kapêr kôt pix mā amnhî nhîpêx o pa. Nê Jejus kêp mē ô pahihtî hā harēnh rāhā ho pa. Aa mē kot mrymnuti kutā hkônkrā ho rôrôk nê kām mex ā harēnh kêt. Nhūm prem tee mē ôkrā hā nê mē îhkra katut ā mrymnuti nhîxi nhîpêx kaxyw nom nhūm prem hkaga kamā hihtÿx nhūm prem kām mē hkurê xwÿnhjaja tee ri ja hā mē omu nê mē mut jakàr o mē kupa. Hāmri nhūm Tirtūm akupÿm mē ho mē htîr nê mē kot mē ho amnhîptār ā hkrî xà kamā mē hkrî. Jejus nhîhkô hā mē hkrî hā amgrà pē 1.000 kaxyw. ⁵Mê kumrêx na pre Tirtūm akupÿm mē ho mē htîr nhūm mē hkwyjaja mē hkînh ā arî ty nê hikwÿ hā amgrà pē 1.000 jakre nhūm rî kormā akupÿm mē ho mē htîr.

⁶Wam akupÿm mē htîr xwÿnhjaja kêp Tirtūm kra jakamā koja mē Tirtūm kra hkêt xwÿnhjê kurom hkînh nê pa ho pa. Nê mē kurom mē kot amnhî xà htÿx kamā hamak o pa htūm xà wÿr pa hkêt nê. Nê mē kurom Tirtūm mē Kra Jejus Kris wa kuri mex kumrêx nê wa kām tanhmā ri amnhî nhîpêx to ho pa. Nê Jejus nhîhkô hā mē ho amnhîptār o pa hā amgrà pē 1.000.

Tirtùm kot kuwy hwÿr Satanasti mênh ã harênh

7Tã koja amgrã pê 1.000 hapêx nhùm rĩ kormã Tirtùm kapêr o wrÿk xwÿnhja akupÿm ahkre xupÿm wÿr tẽ nê Satanasti mã kahê xà mẽ nhùm kato. 8Hãmri nê kê axte pika piitã hkôt tanhmã mẽ kãm hêx to ho ri pa. Gorti nhõ xwÿnhjê mã nê Makok nhõ xwÿnhjê mã nê krĩ piitã hkôt Tirtùm nê tanhmã mẽ kãm hêx to ho mẽ hkôt pa. Hãmri nê mẽ kot Tirtùm krajê kutã amnhĩ xunhwÿr nê mẽ hkurê kaxàr kaxyw amnhĩ kwÿjê ho akuprõ nhùm mẽ ohtô rax kumrêx nê axpên wÿr akuprõ. Te pikahti grã xohtô pyrãk.

9Hãmri nê ma Tirtùm krajê nhímex par kaxyw mẽ hwÿr mra nê mẽ õ krĩ mã hipòk pa nê kuhê. Mẽ õ krĩja Tirtùm mã mex tã nhùm mẽ kot kêp grãnh par kaxyw ma hwÿr mra. Hãmri nhùm kaxkwa rùm kuwy hpòkja mẽ haêr pê mẽ hã rôròk nê mẽ ho hxê pa.

10No mẽ kãm hêx xwÿnh maati Satanastita nhùm Tirtùm kapêr o wrÿk xwÿnhja axte unê nê ma êsôf o kuwy maatita wÿr o tẽ nê kamã kumê. Ra mẽ kot kamã mrymnuti wa kot Tirtùm nê mẽ nokupyr o pa xwÿnh wa mênh tã wa hkôt Satanasti mã ho anê nê kamã kumê nhùm kamã pa ho pa. Kojã mẽ aa kator kêt kumrêx. Nê arĩ kamã amnhĩ xà htÿx kamã hamak rãhã nê pa ho pa.

Tirtùm kot ahpÿnhã tanhmã mẽ piitã mẽ harênh to kaxyw

Matêwre 25.31-46; Juãw 5.25-29

11Tã pa axte mẽmoj pumu nhùm kaxkwa mẽ pikaja wa ra hapêx pa. Pa Tirtùm kot tanhmã mẽ piitã mẽ harênh to hã hkrĩ xà raxja pumu. Nhùm hakajre nhùm Tirtùm kamã nhÿ.

12-13Hãmri nhùm ra mẽ htyk nê mẽ hikwÿ xwÿnh piitã akupÿm hapôx pa nê Tirtùm kot tanhmã mẽ harênh to hã hkrĩ xàta kutã hkrĩ pa. Mẽ piitãã. Mẽ kot amnhĩ to rÿnh xwÿnhjaja nê mẽ kot amnhĩ to hkryre xwÿnhjaja nê mẽ ho amnhiptàr xwÿnhjaja nê gô xujanãr kãm mẽ mrõr nê mẽ htyk xwÿnhjaja. Ra mẽ htyk nhùm mẽ kot mẽ hagjênh xwÿnhjaja piitã mẽ htykjê papxà rùm hapôx pa nê Tirtùm kutã ohtô ho ohtô nê hkrĩ. Hãmri nhùm Tirtùm õ kagà py nê kamã mẽ piitã mẽ hixi japêr. Kagà kamã ra mẽ hkukamã mẽ htĩr tùm nê mẽ pa ho mẽ pa mã xwÿnhjê nhĩxi japêr. Nê kagà hõ kamã mẽ htĩr ri tanhmã mẽ kot amnhĩ nhípêx to ho pa hã mẽ piitã mẽ hã kagàja. Nhùm kupy nê kamã tanhmã mẽ harênh to nê hkôt hprĩ hã mẽ piitã mẽ omunh pa nê rĩ kormã ahpÿnhã tanhmã mẽ harênh to.

14-15Hãmri nê mẽ htĩr tùm nê mẽ pa mã xwÿnhjê nhĩxi hã kagàja kamã tee ri mẽ hkwyjê nhĩxi japêr nhùm kamã amrakati. Jakamã nhùm mẽ ma kuwy maatita wÿr mẽ o mra nê kamã mẽ rênh pa. Te axte mẽ htyk nhùm mẽ kot kuwy kamã mẽ hagjênh pyrãk nhùm mẽ kamã rôròk

ně tee ri amnhĩ xà htỳx kamã hamak rãhã në pa ho pa në aa kator kêt kumrêx.

Pika mẽ kaxkwa wa nyw jarênh

Sikũn Pêtre 3.8-13

21 ¹Tã pa axte mẽmoj pumu. Nhũm Tĩrtũm ra pika mẽ kaxkwa nyw wa ho kato. Ra pika në kaxkwa në gô xujanãr tũmja hapêx pa nhũm kaxkwa mẽ pika nyw wa ho kato. Nom axte gô xujanãr o kator kêt në.

²Hãmri nhũm Tĩrtũm nhõ krĩ mex pê Jerujarê nywja tanhmã amnhĩ to në pika nyw wỳr wrỳk o mỗ. Krĩa mex kumrêx. Mex o mex. Te mjên mã xwỳnh ê mex jaxàr në amnhĩ to muxre në mjên wỳr htêm pyrà në pika nyw wỳr mex kumrêx në wrỳk o mỗ.

³Hãmri nhũm Tĩrtũm kot mẽ ho amnhĩptàr ã hkrĩ xà maatija kamã mẽhõja kapêr o:

—Nà ãm hãmri. Na ra Tĩrtũm hkrajê hkôt pa ho pa. Pika nyw kamã mẽ hkôt pa ho pa nhũm mẽ tã no ho omu në hkôt pa ho pa rãhã në. Nà ãm hãmri. Ja mex o mex.

⁴—Koja hkrajaja hkôt pa ho pa në axte htyk kêt kumrêx. Nhũm Tĩrtũm mẽ nê mẽ no kagô nhĩnhĩnh pa nhũm mẽ axte hkaprĩ në mỳr kêt në. Nê ri axte amnhĩ xà kamã hamak kêt në. Nê axte ri tanhmã omnu hto hkêt në. Ra mẽ hkaprĩ në à në mỳr o pata hapêx par kumrêx nhũm hpãnhã mẽmoj nyw pix. Anê.

⁵Hãmri nhũm Tĩrtũm tãm tanhmã inhmã kapêr to. Krĩ xà maati kamã ỳr xwỳnhhta tãm inhmã kapêr o:

—E na pa ra akupỳm mẽmoj piitã ho nyw pa. Jakamã e Juãw. ãm hãmri na pa ã amnhĩ kukamã amã mẽmoj jarênh anê. Ixêx kêt. Jakamã kêr ka akwỳjê mã piitã hã kagà hpa. Kê mẽ kamã harê në tokyx kuma në hkôt hamaxpêr rãhã ho pa.

⁶—Ra ixte amnhĩ kukamã mẽmoj mã ijamaxpêr xwỳnhja na pa ra ho anhỳr pa. Ixpê mẽmoj piitã ho anhỳr o hkrax xwỳnh në mããnên ixpê mẽmoj piitã ho ijapêx par xwỳnh. Nê ixrãhã ixpa xwỳnh. Amnepêm kormã mẽmoj kator kêt ri na pa pre ixrãhã ixpa. Nê ot pa arĩ ixrãhã ixpa. Tã mẽ kãm kôr në kãm gô hkwy ho hkôm hprãm xwỳnhjê pyrà në mẽ kãm ixpix prãm xwỳnhjaja kot paj te mẽ kãm inhõ hino rũm gô hkwy nhõr nhũm mẽ kot ho hkôm pyràk o mẽ hipêx. Hãmri nhũm mẽ htĩr tũm në ixri pa ho pa në axte htyk kêt në. Kot paj ã mẽ hipêx mex anê.

⁷—Mê ate tanhmã amnhĩ tomnuj to nê amnhĩ to htỳx në ixkôt pix mã amnhĩ nhĩpêx o mẽ apa rãhã mẽ atyk xwỳnhjaja kot paj ã mẽ anhĩpêx mex anê. Ka mẽ apê ixkra hã amex në ixkôt ri apa rãhã ho apa. Pa ixpê mẽ anhõ Tĩrtũm ã tanhmã mẽ ato mex to rãhã ho ixpa.

8—No mẽ kot amnhĩ kaxyw ixkõt hamaxpër kêt xwỳnhjaja. Nẽ mẽ kot amnhĩ tomnuj xwỳnhjaja nẽ mẽ kot ri mẽ hpar prãm xwỳnhjaja. Nẽ mẽ kot nhãm ri mẽnijê ho amnhĩkati xwỳnhjaja. Nẽ wajağajaja. Nẽ mẽ kot amnhĩ to sãnti hwỳr o pa xwỳnhjaja. Nẽ ri mẽ hêx nhi xwỳnhjaja. Ǻ mẽ kot amnhĩ nhĩpêx anhỳr xwỳnh piitã koja mẽ apê ixkrajê hkĩnhã ma kuwy maati wỳr hapêx par kumrêx. Te axte mẽ htyk pyræk nom koja mẽ axte htyk kêt nẽ. Anẽ.

Jerujarẽ nyw jarẽnh

Sikũn Korõt 6.16; Karatas 4.26; Eprêw 12.22-24

9Tã nhũm mẽ kot xijere pê 7 kamã Tĩrtũm gryk xà jamỳnh xwỳnhjê hõja hãmri ixwỳr tẽ nẽ inhmã:

—E ma ixkõt tẽ nẽ mẽmoj pumu. Na ra krĩ nywja pika nyw wỳr wrỳk o mõi. Te mjên mã xwỳnh ê mex jaxàr nẽ amnhĩ to muxre nẽ mjên wỳr htêm pyrà nẽ mex kumrêx nẽ kaxkwa rũm pika nyw wỳr wrỳk o mõi. Nẽ kot ho mjên mã xwỳnhhta te mẽ pahte amnhĩ tomnuj pãnhã amnhĩrer xwỳnhhta pyræk. E tokyx tẽ nẽ omu. Anẽ.

10Hãmri nhũm Tĩrtũm Karõ tanhmã ixto pa ma kot inhmã kapër xwỳnhhta kõt tẽ nhũm ma ixto mõi nẽ kên krã hprêeti hwỳr ixto api nẽ himõk ã ixãm. Pa Tĩrtũm nhõ krĩ mex pê Jerujarẽ nywja pumunh o xa. Nhũm mex o mex. Ǻm hãmri te mjên mã xwỳnh kot ê mex jaxàr nẽ amnhĩ to muxre nẽ mjên wỳr htêm pyrà nẽ aħpar mã wrỳk o mõi pa ixprĩ hã omu.

11Na pre rax o rax nẽ mex o mex. Tĩrtũm kamã pa ho pa jakamã nhũm kamã hirã htỳx kumrêx. Te kên mex ã kàxpore xohtõ jaxênh mex tỳx pyræk.

12-13Nẽ krĩ puhã kahêja hprêk rax nẽ. Nẽ hwỳr mẽ gjêx xà kêp 12. Na pre myt japõx xà rũm axkrunêpxi. Nẽ myt gjêx xà rũm haxwỳja axkrunêpxi. Nẽ akutã kahpa hkõt haxwỳja axkrunêpxi. Nẽ aħpỳnhã hakwakre hã Tĩrtũm kapër o wrỳk xwỳnhjaja hamãr o kuhê. Nẽ hakwa kre piitã hã Ijaew pê aħpỳnhã mẽ pikjêr kãm mẽ kêp 12jaja mẽ hixi hã kagà.

14Nẽ kahê xunhwỳr xà hkukamã kên pytyrja aħpỳnhã kêp 12. Kên pytyrta ã na mẽ kot Jejus nhỹ hã mẽ aħkre o mẽ pa xwỳnh maati pê 12jê nhĩxi hikwỹ.

15Tã nhũm kot ixto mõi nẽ inhmã mẽmoj jahkre xwỳnhhta ôr o mẽmo pĩ py nẽ kot ho krĩ ho mĩdi kaxyw xa. Nẽ ho kahê piitã ho mĩdi kaxyw. Nẽ mẽ gjêx xàja ho mĩdi kaxyw.

16-17Hãmri nẽ ho mĩdi hpa. Krĩja ry nẽ kahpa piitã axpên pyræk. Nẽ hprêk piitã mããnên axpên pyræk. Kamã mẽmoj piitã aħpỳnhã kêp 2.200 kirõm. No puhã kahêja hprêk o 64 met pix nẽ.

18Nẽ kahêja kên jaxênh pix o kot amnhĩ nhĩpêx jakamã mex o mex. Nẽ hkarỳr tỳx kumrêx. Nẽ kahê hkre kamã krĩ kamã aħpỳnhã ri ixkreja ôr pix o kot amnhĩ nhĩpêx. Nẽ piitã hkarỳr tỳx.

19-20 Nē kahê xunhwÿr xà hkukamã kën pytyrta ahpÿnhã ri kën mex pix o kot amnhĩ nhĩpêx. Piitã mex kumrêx nē hkarÿrti.

Wamta kawax pê grãgrãre.

Nē hkôt ja kawax pê grãgrã kakrã htyk.

Nē hkôt ja kakrã htyk.

Nē hkôt hõja grãgrã karÿr.

Nē hkôt ja hkamrêk pihkãrti.

Nē hkôt ja grãgrã kakrã htyk.

Nē hkôt ja hkamrêk tÿx kumrêx.

Nē hkôt ja ràràare.

Nē hkôt ja grãgrã mē pihkãr.

Nē hkôt ja ràràr mē pihkãr.

Nē hkôt ja grãgrã karÿÿre.

Nē hkôt ja kakrã htyk pihkãr.

Ã kën pytyr mex kot anhÿr.

21 Nē mē gjêx xà hã hakwakre kahê xà pê 12ja mēmo kën jakooti rÿnh kumrêx pix o. Nē krĩ kahti hkôt pry nhĩkwÿ xwÿnhja ãm ôr pix o. Nē hkarÿÿre.

22 Pa pre tee ri krĩ kamã Tĩrtũm mã amnhĩ jarênh xà hã ixkre japêr nhũm amrakati. Mo kaxyw koja mē axte ixkreja hwÿr mra? Ra Pahi Maati Tĩrtũm xihtÿx xwÿnh mē mē pahte amnhĩ tomnuj pãnhã amnhĩrer xwÿnhhta ra hkrajê kamã pa ho pa kênã kot kêt mē axte ri ixkreta o presija. Koja mē kãm wa mex ã wa kãm harênh prãm nē nhÿri tãm wa hwÿr mra nē ã wa kãm kapêr anê. Te mē pahte pahi hwÿr pamrar nē kãm pakapêrta pyrã nē wa hwÿr mra nē wa kãm kapêr.

23 Nē koja krĩja kamã myyti nē mytwrÿre hkêt. Mo kaxyw kot kêt myyti nē mytwrÿreja arĩ ri hirã ho pa? Krĩ kamã Tĩrtũm pa ho pa jakamã kamã hirã mex kumrêx. Nē mē pahte amnhĩ tomnuj pãnhã amnhĩrer xwÿnhhta haxwÿja kamã pa ho pa. Te kêp kanê hpôk rax kumrêx pyrã nē hirã mex o pa. Kot hirã mex o kot myyti jakrenh. Ã Tĩrtũm mē Kra wa krĩja kamã pa ho pa jakamã nhũm mē axte myyti ho presija hkêt nē.

24 Koja krĩ nhõ xwÿnhjaja hirã mex pix kãm ri pa ho pa nē tãm ri amnhĩ nhĩpêx o ri pa. Tã koja mē ho amnhĩptãr xwÿnhjaja Tĩrtũm wÿr mra nē amnhĩ rom kãm mex o mex ã harê nē kãm:

— Na pre mē ixkwÿjaja mē ixpê mē ho amnhĩptãr xwÿnh ã axpên mã mē inhmex nē mē ixãhpumunh ã ri axpên mã mē ijarê. Nom mē ixrom amex o amex nē axãhpumunh o axãhpumunh. Jakamã ãm hãmri na htem amã amex o amex ã ajarê Tĩrtũm. Anê.

25 Nē krĩ hwÿr hakwakre koja amnhĩ kahê xà rênh rãhã kuhê nē aa amnhĩ kahê hkêt nē. Jar mē panhõ pika kamã na hte kamãt kaxyw nhũm htem amnhĩ tã hakwakre kahê hpa. No mo kaxyw koja mē axte pika

nywja kamã ã amnhĩ nhĩpêx anê? Koja kamàt kêt nê hirã rãhã ho rãhã jakamã nhũm mē amnhĩ tã kahê hkêt rãhã nê pa ho pa.

26Nê koja mē piitã Tĩrtũm wỳr mra nê kãm mex o mex ã harê nê kãm:

— Pa Tĩrtũm. Hêxta waa nê. Anhõ krĩja mex kumrêx. Mex o mex. Nê mē ixrom amex o amex nê axihtỳx o axihtỳx. Nê mē ixrom axàhpumunh o axàhpumunh. Âm hãmri na ka ra mē ixpê akrajê kamã apa ho apa Tĩrtũm. Anê.

27Nê koja mēmoj punuj krĩja wỳr gjêx kêt kumrêx. Mē hpijaam kêt xwỳnhjaja nê ri mē hêx xwỳnhjaja hwỳr gjêx kêt nê. Âm mē pahte amnhĩ tomnuj pãnhã amnhĩrer xwỳnhhta nhõ kagà kamã Tĩrtũm ri mē htĩr tũm nê mē pa mã xwỳnhjê nhĩxi nhĩpêx xwỳnh pixjaja koja mē hwỳr agjê nê kamã pa ho pa.

22 1-2Tã pa pre axte mēmoj pumu. Nhũm Tĩrtũm kapêr o wrỳk xwỳnhja axte inhmã mēmoj jahkre. Nhũm Tĩrtũm mē kot mē pahpãnhã amnhĩrer xwỳnhja wa kot mē ho amnhĩptàr ã hkrĩ xà maati rũm pyhti hprõt. Krĩ kahti hkõt pry pohti nør xwỳnhhta kahti hkõt hprõt o nõ. Pyhti kamã gõja na htem ho ixkõ nê htĩr tũm nê pa ho pa. Gõ karỳyere. Nhũm mēmo pĩ hpàr muxre xwỳnhja akutã hijê nê xa. Pĩ xõja na htem kuwõ nê htĩr tũm nê pa ho pa. Na hte apkati mē ô rãhã nê kuhê. Nê axtem hõja mē piitã mē mex nê à hkêt kaxyw na hõja.

3Amnepê m na pre Tĩrtũm Atãw mã kapêr nê kãm:

— Ate amnhĩ tomnuj mỳrapê kot paj tanhmã pika homnu hto nhũm apê mex kêt nê. Ka kamã apur nê kamã axàpênh rũnh o apa rãhã nê rĩ kormã kamã axàpkur o ri apa. Apê jamnuj tã kot kaj mē ã amnhĩ nhĩpêx anhỳr o apa rãhã ty. Anê.

Tã ra Tĩrtũm nhõ krĩ nyw kamã mē omnuj xàja amrakati kumrêx. Nê Tĩrtũm mē kot mē pahpãnhã amnhĩrer xwỳnhhta wa õ krĩ kamã pa ho pa jakamã mē pahte kamã mē papa xwỳnhjaja kot puj mē wa kãm tanhmã amnhĩ nhĩpêx to ho ri papa.

4Kot puj mē tã pano ho Tĩrtũm pumunh o papa. Hãmri nhũm te mē pahpiitã mē panhõkrã hã amnhĩ nhĩxi nhĩpêx pyræk o mē panhĩpêx.

5Nê kot puj mē Pahi Maati Tĩrtũm nhĩrã kamã ri papa nê axte myyti nhĩrã ho presija hkêt nê. Koja kamàt hapêx pa pu mē axte kanê ho presija hkêt nê. Nê Jejus nhĩhkõ hã hirã kamã mēmoj to amnhĩptàr rãhã ho papa.

Jejus tokyx akupỳn wrỳk ã harênh

Apokarip 1.1-3

6Tã nhũm Tĩrtũm kapêr o mē wrỳk xwỳnh kot ixto mør xwỳnhhta axte inhmã kapêr nê inhmã:

— E nã âm hãmri na ixte amã mēmoj piitã harênh xwỳnhja. Âm hãmri na. Jakamã kwa kêr ka arĩ hã ano htỳx rãhã ho apa. Amnepê m

Tirtũmja ŷ hã mẽ kapẽr o pa xwỳnhjẽ mã tanhmã kapẽr o amnhĩrit to. Kot tanhmã amnhĩ nhĩpẽx to hkukamã mẽ kãm ho amnhĩrit nhũm prem kuma nẽ ô ri ma hkwyjẽ mã harẽnh o ri mẽ hkõt pa. Tã ra mẽ hpãnhã pa mẽ awỳr inhmẽ. Mẽ ate Tirtũm mã tanhmã amnhĩ to ho apa xwỳnhjẽ mã ixte ja jarẽnh kaxyw Pahihti Tirtũmja mẽ awỳr inhmẽ pa wrỳ. Nà koja mẽmoj tokyx ã amnhĩ nhĩpẽx anẽ. 7Na pre Jejus mẽ amã amnhĩ jarẽnh o: “Kot paj tokyx akupỹm mẽ awỳr wrỳ. Tã mẽ ate ijarẽnh ã kagà kamã harẽnh nẽ mar nẽ amnhĩ kaxyw hkõt ajamaxpẽr nẽ hkõt amnhĩ nhĩpẽx xwỳnhjaja kot kaj mẽ akĩnh nẽ ri apa.” Anhỹr o amnhĩ jarẽ. Anẽ.

8Nà ixpẽ Juãw na pa pre ã inhno ho mẽmoj pumunh anẽ. Hãmri nẽ omunh pa nẽ Tirtũm kapẽr o wrỳk xwỳnh kot inhmã harẽnh xwỳnhhta kutã ixkõn krã ho ixtẽm nẽ inhỹr kaxyw. Nom nhũm amnhĩ nẽ inhmã kapẽr kãm hihtỳx nẽ inhmã:

9—Kwa nà ri ã inhĩpẽx anhỹr kêt nẽ. ãm Tirtũm pix kutã na pu htem ã amnhĩ nhĩpẽx anẽ. Apyrà nẽ ixpẽ Jejus kwỳ kẽnã. Na pa hte apyrã nẽ ŷ hã tanhmã amnhĩ nhĩpẽx to ho ixpa. Nẽ mẽ apyrã nẽ kapẽr ã kagà hkõt pix mã amnhĩ nhĩpẽx. Na pu htem axpẽn kutã pahkõn krã ho parõrõk kêt nẽ. ãm Tirtũm pix kutã na pu htem ã amnhĩ nhĩpẽx anẽ.

10—E ã ate mẽmoj pumunh nẽ mar anhỹr xwỳnhja koja tokyx ã amnhĩ nhĩpẽx anẽ. Jakamã kwa kêt ka akwyjẽ pẽ ho apimxur kêt nẽ. Piitã hã kagà hpa kẽ mẽ kamã harẽ nẽ kuma nẽ mẽmoj kot ã amnhĩ nhĩpẽx anhỹr mã xwỳnhhta piitã hkukamã harẽnh ma. Koja tokyx mẽmoj ã amnhĩ nhĩpẽx anẽ.

11—Jakamã kwãr mẽ mãmrĩ piitã tanhmã kãm amnhĩ nhĩpẽx to ho pa hprãm xà hkõt amnhĩ nhĩpẽx o pa. Kwãr mẽ mẽ kot amnhĩ tomnuj xwỳnhjaja ã amnhĩ anhĩpẽx anhỹr o pa. Nẽ kwãr mẽ kot tanhmã kapẽr punuj to xwỳnhjaja mãmrĩ ã amnhĩ nhĩpẽx anhỹr o pa. Nẽ kwãr mẽ kot tãm amnhĩ nhĩpẽx o ri mẽ pa xwỳnhjaja mãmrĩ Tirtũm kõt pix mã ri tãm amnhĩ nhĩpẽx o pa. Anẽ.

Nhũm pre ã kaxkwa hwỳr ixto àpir xwỳnhhta inhmã kapẽr anẽ.

12Hãmri nhũm hpãnhã Jejus tãm inhmã kapẽr nẽ inhmã:

—E kot paj tokyx akupỹm mẽ awỳr wrỳ. Nẽ akupỹm pøj hãmri nẽ mẽ kot amnhĩ tomnuj o mẽ pa xwỳnhjaja pa ja mỳrapẽ ma mẽ kot amnhĩ xà htỳx kamã hamak tũm xàta wỳr mẽ rẽnh pa. No mẽ kot ixkõt amnhĩ nhĩpẽx xwỳnhjaja kot paj akupỹn inhõ krĩ hwỳr amnhĩ kõt mẽ ho api.

13—Nẽ ixrãhãã xwỳnh na pa. Amnepẽ mã kormã mẽmoj kêt ri na pa pre ra ixrãhãã. Nẽ koja nhỹrmã mẽmoj piitã akupỹm hapẽx pa arĩ ixrãhã nẽ ixpa ho ixpa.

14—Nẽ Tirtũm kot mẽ anẽ mẽ ate amnhĩ tomnuj kuhõnh par xwỳnhjaja kot kaj mẽ amex kumrẽx nẽ apa ho apa. Nẽ akĩnh nẽ ajamakêtkati nẽ ri atỳx apa ho apa. Te ho mẽ kot amnhĩ xẽ kahõnh nẽ mex jagjẽnh nẽ ri hã pata pyrãk. Koja Tirtũm mẽ amã anẽ ka mẽ

ajamakêtkati nê õ krĩ hwÿr agjê nê kamã ri amex kumrêx nê ri apa ho apa. Nê kamã mêmõ pĩ xõ mē kot kur nê htĩr tũm nê pa mã xwÿnhhta wÿr mra nê amnhĩm ô rê nê hkur o ri apa. Ra mē ate Jejus kôt amnhĩ xunhwÿr jakamã kot kaj mē axãmnhĩx hwÿr mra nê amnhĩm hkwy rê nê hkur o ri apa. Kot kaj mē ã amnhĩ nhĩpêx anê.

15—Nom mē kot amnhĩ tomnuj o mē pa xwÿnhjaja koja mē akĩnhã inhõ krĩ hwÿr gjêx kêt nê. Mē kot ri mē y ho mē pa xwÿnhjaja. Nê mē kot nhãm ri mēnijê ho amnhĩkati ho mē pa xwÿnhjaja. Nê mē kot ri mē hpar o mē pa xwÿnhjaja. Nê mē kot ri sãnti nhĩpêx o te Tĩrtũm nhĩpêx pyrãk o mē pa xwÿnhjaja. Nê mē kãm ri hêx prãm o ri mē pa xwÿnhjaja. Koja mē akĩnhã inhõ krĩ hwÿr pa hkêt nê.

16—E Juãw. Nã ixpê Jejus na pa awÿr ixkapêr o mē wrÿk xwÿnhhta mē. Kot ixkwÿjê kaxyw amã ixkapêr jarênh kaxyw. Ixpê Tawi pãr krax na pa. Te ixpê arĩgro hkôt kanhêti hpôk rax kot arĩgro ho mör ã ho amnhĩrĩt xwÿnhhta pyrãk. Anê.

Nhũm pre ã Jejus inhmã kapêr anê. 17Tĩrtũm Karõ mē Jejus kwÿjaja na htem ã Jejus kot amnhĩ jarênh anhÿrja ma nê hkĩnh nê. Nê kãm kapêr o:

—Hêxta waa nê. Kwa amnhĩm anojarêt nê tokyx akupÿn mē ixwÿr wrÿ Pahĩti. Pa mē tokyx ã amnhĩ nhĩpêx anhÿr o ri war akôt ixpa. Anê.

Nê mē ate ja mar xwÿnhjaja kêr ka mē urãk nê ã kãm akapêr anê.

Nê te mē amã kôr nê ri mē apa pyrãk xwÿnhjaja kêr ka mē te Jejus wÿr amrar nê õ gô ho akôm pyrã nê hkôt amnhĩ xunhwÿ. Te Jejus amarĩ mē pamã õ gô nhör pyrãk o mē panhĩpêx pu mē hkôt amnhĩ xunhwÿ nê ra pahpê pahĩr tũm nê papa mã xwÿnh. Hãmri nê amnhĩ pãnhã tanhmã kãm amnhĩrer to hkêt nê.

Nhÿrmã mêmõj nyw par ã harênh jatür xà

18E ixpê Juãw na pa Jejus nhÿ hã mē amã mêmõj tanhmã kot amnhĩ nhĩpêx to hkukamã ã mē amã hã kagã anê. Tã kwa mē o kora. Kêr ka mē atõ amnhĩ krã hkôt ri ajamaxpêr o te ho ja pyrã nê hijuk ri axte mêmõj nhĩpêx kêt nê. ãm kwarĩ ho kwarĩ. Kot ka mē atõ anê nhũm Tĩrtũm ja hã apumu nê kagãja kamã tanhmã mē hipêx kati hto xàta o tanhmã anhĩpêx to ka arĩ amnhĩ pumu.

19Rÿ ka mē atõ kagã kamã harê nê ama nê tanhmã ajamaxpêr to nê ajamaxpêr o:

—Nã ja kot anhÿr kêt. Na mē ãm harênh o hêx. Kot paj kuma nê ãm kuma.

Anhÿr o ajamaxpêr japêr. Hãmri nhũm Tĩrtũm amnhĩ tã ama nê kagã mexta kamã kot tanhmã mē ho mex toja o ato mex kêt nê. Ka õ krĩ hwÿr axãpir nê mêmõ pĩ xõ mē kot hkur nê htĩr tũm nê pa kaxyw mã xwÿnhhta ka amnhĩm hõ hyr nê hkrêr kêt nê. Jakamã e kwa mē o kora. Kêr ka mē



kagàta kamã ã mëmoj kot amnhĩ nhĩpêx anhÿr mã xwÿnhhta jarênh ma nê aprĩ hã piitã hkôt ajamaxpêr tÿx rãhã ho ri apa.

20E Jejus kot inhmã mëmoj kukamã tanhmã ujarênh to xwÿnhhta na pre inhmã amnhĩ jarênh o: “Kot paj tokyx akupÿn mẽ awÿr wrÿ.” Anê. ãm hãmri na pre ã amnhĩ jarênh anê. Kojã tokyx akupÿn mẽ pahwÿr wrÿ hãmri nhúm mëmoj piitã mex o mex.

Jakamã kwa kêr ka amnhĩm anojarêr nê tokyx akupÿn mẽ ixwÿr wrÿ Pahihti Jejus.

21Nê ixpyrà nê mẽ apê Tirtũm krajaja na pa hte mẽ ato Pahihti Jejus wÿr rãhã ho ri ixpa nê kãm:

—Kwa akwÿjê pumu nê mẽ kutã anojarêr rãhã ho ri apa Pahihti. Anê.

E mẽ ujarênhja na hapêx. Ixpê Juãw na pa Jejus kot inhmã tanhmã ujarênh toja pa amnhĩ xô ri mẽ amã hã kagà hpa. E na hapêx.

Prĩ hã mẽmo nhĩxi jarẽnh

Aga (Agar) Apraãw prõ Sara mã àpênh o pa xwỳnh na pre. Tã nhũm kormã Saraja htujarô hkêt nẽ pa nẽ tee ri kãm hkra prãm kaprỳ ho pa hãmri nẽ Apraãw mã anẽ nhũm kuma nẽ Agaja kamã hkra. Hãmri nhũm ho hpijagri nhũm kato nẽ hkraja myre. Hixi pê na pre Ismaew (Ismael). Tã nhũm pre hãmri Saraja tã htujarô nẽ hpijagri nẽ hkraja myre. Nhũm Apraãwja hã hixi mẽ nhũm kệp Ijak (Isaque).

Nhũm Sara Aga hkra hkôt kamã gryk nẽ amnhĩ nẽ hano nhũm ma hkra mẽ wa ma mỗ nẽ hixêt pê Sinai tã pa ho pa.

Arãw (Arão) Jako hkra Rewi kanrêhã htãmnhwỳjê hõ na pre. Nẽ Ijaewjê nhõ patre kot wa na pre. Arãw kanrêhã htãmnhwỳ pixjaja na pre hte kệp Ijaewjê nhõ patre. Tĩrtũm kot mẽ kãm ja hã karõ xà hkôt.

Na pre Ijaewjaja kormã Ejit nhõ xwỳnhjê mã àpênh rũnh rãhã ho pa nhũm prem mẽ hipêx kati ho pa. Rôm nhũm Arãw mẽ htõ pê Mojes wa kato nẽ Ejit kamã hprêk. Nhũm Mojesja Tĩrtũm nhỹ hã Ejit rũm mẽ kệp hkwỳjê kator nhũm Arãw ho ajuta ho hkôt pa. Nhũm pre mẽmo arĩgro hã Ijaewjaja wa kamã gryk nẽ ra wa hkaga kaxyw nhũm Tĩrtũm tee ri ja hã mẽ omu hãmri nẽ hprĩ hã mẽ kãm wa kệp mẽ õ pahi hã wa ho amnhĩrit. Jao Mojes mã kãm: “E Mojes. Kêr ka ahpỳnhã Ijaew piitã pikjêr pê 12 krãhtũmjê pê mẽ kot ho amnhĩ kaxpar xàja ka mẽ kệp hamỳ nẽ inhõrkwỹ kaàkre kamã haxwỳr pa. Kê apkati ka hwỳr axà nẽ omu. Nhũm mẽhõ nhõ kô ra higrõt kator xwỳnhnta tãm kot paj kệp Ijaewjê nhõ patre kaxyw ãm.” Anẽ nhũm Mojes kuma nẽ mẽ kệp hamỳ nẽ haxwỳ nhũm apkati nhũm Arãw nhõ kô pix higrõt nẽ kurũm pixõrã hapôj. Nhũm Tĩrtũmja wa kãm anẽ nhũm wa Tĩrtũm nhõrkwỹ kaàkre kamã mês kunĩhti kapem õ kôja xi nhũm arĩk. Eprêw 9.4. Mããnẽn Rewi nẽ Mojes pumu.

Apew (Abel) Kaĩ htõ kot hapu na pre Apewja. Mããnẽn Kaĩ pumu.

Apraãw (Abraão) Ijaewjê pàr krax na pre. Tĩrtũm na pre amnhĩm Ijaewjê rê nẽ mẽ kãm pika mex kumrêxja gõ. Apraãw mẽ kanrêhã hkra nẽ htãmnhwỳjaja mẽ kot pikaja o õ nẽ kamã pa ho pa kaxyw. Jakamã nhũm pre Apraãwja Tĩrtũm kot kãm hã karõ xà hkôt õ pika htũm pê kato nẽ Tĩrtũm kot kãm õr mã

xwÿnh wÿr ma mō. Ām hwÿr pa ry rax kumrēx nē hwÿr pōj nē kamā pa ho pa. Pikaja nhíxi pē na Israew. Ka pika karō kamā hixi japēr nē omu.

Na pre Tirtūmjaja Apraāw mā kapēr nē kām: “E kot kaj mē apē Ijaewjaja ixkapēr ma nē hkôt amnhī nhīpēx hā kot paj mē ato mex nē mē akutā inhnojarēt rāhā ho mē akôt ixpa.” Anē.

Nē Apraāw prō nhíxi pē na pre Sara. Na pre wa hkra hkēt nē paja wa ra hpigēt tÿx nē pa htā nhūm Tirtūm tanhmā Sara hto nhūm Apraāw tā kamā hkra. Nhūm wa hkraja kato nē myre. Hixi pē na pre Ijak.

Nhūm pre Ijakja hprêk nē Repek o hprō. Nhūm Repekja htujarō nē hkra ahpo nē kato. Hamē wa my. Hōja pē na pre Jako nē hōja pē Ejau. Nhūm wa ra hprêk nhūm Tirtūmjaja axte Jako hā hixi mē nhūm māānēn kēp Ijaew. Jakamā hkanrēhā htāmnhwÿjaja na mē kēp Ijaewjaja.

Nē Jakoja na pre hprō axkrut. Prōja na pre wa hamē axpēn to htōx nhūm hamē wa ho hprō. Hōja pē na pre Ri nē hōja pē Rrakew. Nhūm Jakoja māānēn wa kām àpēnh xwÿnh nija wa ho hprō kuprÿ. Nhūm hprō piitā kamā hkra myjaja kēp 12. Na pre Rupē nē Simeāw nē Rewi nē Juta nē Isaka nē Jepurō nē Gax nē Aser nē Juje nē Pējamī nē Tāhti nē Natari. Nhūm pre mē hkra nē mē htāmnhwÿjaja ohtō rax kumrēx. Piitā kēp Apraāw kra Ijak kanrēhā htāmnhwÿ.

Atāw (Adāo) Atāwja Tirtūm kot ho kator xwÿnh kot wa na pre. Na pre pika ho hipēx. Nē hpānhā kām hprō pē Ewa nhīpēx. Māānēn Ewa pumu.

Atāw mē Ewaja wa kumrēx na pre Tirtūm kapēr nhīrōp xa nē hkwȳm ri tanhmā amnhī tomnuj to. Wa tām wa kot amnhī tomnuj o hkrax jakamā mē pahpē wa hkanrēhā htāmnhwÿjē piitā na pu htem wa urā nē amnhī tomnuj o ri papa.

Wam Korīt 15.45 kamā ahpÿnhā Atāw mē Jejus wa harēnh ā kagā kamā harē nē ama. Mē pahpē Atāw kanrēhā htāmnhwÿ jakamā kukwak ri mē pahpē jar pika ja kamā papa xwÿnh. Nom axtem Jejus kukwak ri na hte mē kot amnhī kaxyw hkôt hamaxpēr nē hkôt amnhī xunhwÿr xwÿnhjaja kēp htīr tūm nē pa ho pa mā xwÿnh.

Ejit (Egito) Pika pē Israel tā pika hō na. Israew nhō xwÿnhjaja na prem Ejit nhō xwÿnhjē mā àpēnh rūnh o pa hā amgrā pē 400.

Eris (Elias) Tirtūm nhÿ hā kapēr jarēnh o pa xwÿnhjē hō na pre. Na pre kām mē kot amnhī tomnuj xwÿnhjē pima hkēt nē amnhī to htÿx nē mē kot amnhī tomnuj ā mē kām àkjēr o pa. Tā ra htyk tā nhūm pre Ijaew kwÿjaja htÿx ho nhÿrmā Tirtūm kot mē pahwÿr ām

xwỳnhhta kukamã akupỹn mēnh nhũm wrỳk ã hkamnhĩx. Juãw Paxis na pre te Eris kot amnhĩ nhĩpêx pyrãk o amnhĩ nhĩpêx o pa.

Erisa (Elisá) Namã pumu.

Erox (Herodes) Tĩrtũm kapêr ã kagà nyw kamã ahpỹnhã Eroxjaja kêp kwat.

Pahi Erox (Herodes) Jejus kator rôm kêp Israew kamã mẽ õ pahi. Tãm na pre kormã Jejus karãre ri nhũm pre mẽ kot kãm hpĩr kaxyw hã amỹnê.

Pahi Erox Æxipas (Herodes Antipas) Jejus ra hprêk nê mẽ ahkre ho pa rôm kêp Garirej kamã mẽ õ pahi. Na pre htõ pê hprõ Eroxis (Herodias) pytã nê ho hprõ. Nê na pre Juãw Paxisja ã amỹnê nhũm prem mut krãhta nê kupĩ. Na pre Ijaewjaja Erox Æxipas kot Jejus htyk kaxyw hã àmnênh prãm xaj hwỳr o tẽ nê ho kuma.

Pahi Erox Akrip kot wa (Herodes Agripa I) Na pre ra Jejus akupỹm htĩr nê akupỹm kaxkwa wỳr api nhũm pre hte Pahi Erox Akrip kot waja amnhĩ kaxyw Jejus kôt mẽ hamaxpêr xwỳnhjê nhĩpêx kati ho pa. Jao Juãw tõ pê Xiakreja pĩ.

Pahi Erox Akrip kot hapu (Herodes Agripa II) Tãm na pre Pawre hã amỹnê nê ma Rôm wỳr pahihtĩ Sestija hwỳr kumẽ. Kot kãm tanhmã amnhĩ jarênh to nhũm kot mar kaxyw hwỳr kumẽ.

Ejau (Esaú) Apraãw kra Ijakja na pre hkra nhũm hkraja ahpo. Na pre hõja kêp Ejau nê hõja kêp Jako. Nhũm Ejauja kumrêx kator jakamã kêp Ijak kra kot wa na pre. Tã mẽmo arĩgro hã kãm prãm tỳx kumrêx jakamã Jako kot kãm mẽõ hkwy nhõr pãnhã kêp kot waja o anhĩpa nê hpãnhã kot hapu hã amnhĩ jarê nhũm Jakoja hpãnhã kot wa hã amnhĩ jarê. Jakamã nhũm Jako kanrêhã htãmnhwỳjaja na pre Tĩrtũm amnhĩm mẽ kurê. Mããnên Apraãw pumu.

Ewa (Eva) Atãw prõ na pre. Tĩrtũm kot mẽmoj piitã ho kator kãm na pre Atãw o kato hãmri nê kêp õkwa i hõ kapa nê ho kãm hprõja nhĩpêx. Tã nhũm Satanastija Ewa wỳr hêx rom tẽ nê Tĩrtũm kot mẽmo xõ nê wa hkurê xwỳnh ã ho htỳx nhũm kuma nê hõ hta nê kukrê. Hãmri nê mjên mã hõ gõ nhũm mããnên kukrê. Tã ã wa kot Tĩrtũm kapêr nhĩrõp anhỹr jakamã na pre mẽ pahpiitã mẽ pahte amnhĩ tomnuj o hkrax. Atãw mẽ Ewa wa hkrajê nhĩxi pê na Kaĩ nê Apew nê Setre.

Gomo Sotõ pumu.

Gô Kamrêk (Mar vermelho) Pika wa kêp Israel mẽ Ejit wa hkaêx kãm na Gô Kamrêkja nõ.

Gres (Grécia) Gres nhõ krĩ maati pê na Atenas. Nê krĩ pê Korĩtja pika

pê Gres kamã na. Gres nhõ xwÿnhjaja na prem àhpumunh tÿx nê nhũm mẽ piitã mẽ àhpumunh tÿx ã mẽ hã hpijaãm o pa. Na pre pika xohtô kamã mẽ pa xwÿnhjaja Gres kapêr o kapêr. Jakamã mẽ kot Tirtũm kapêr nyw ã kagà xwÿnhjaja na prem Gres kapêr kãm hã kagà.

Ijaew (Israel) Tirtũm na pre Jako hã hixi hõ mẽ nhũm kêp Ijaew. Nhũm Ijaewja hkra my kêp 12. Mẽ kêp Ijaew nhõ xwÿnhjaja mẽ hixi pixi hkêt. Mãânên mẽ kêp Ijaew nê mẽ kêp Eprêw nê mẽ kêp Jutew. Mãânên Ijaew pumu. Ijaewjê nhõ pika pê na Israew (Israel). Wam hixi na pre kêp Kanaã (Canaã) tã nhũm hpãnhã kêp Israew (Israel) nê mãânên kêp Paresxĩ (Palestina).

Ijak (Isaque) Apraãw mẽ Sara wa hkra na pre. Hixija mẽ kapêr kãm te kot “mẽ pikunhar” nhÿr jarênh pyræk. Na pre Tirtũmja wa hkrata kukamã wa kãm harẽ nhũm Sara ra hpigêx tÿx kumrêx jakamã tee ri amnhĩ kukamã hkra hã amnhĩ jarênh ma nê hã akunha. Jakamã nhũm wa hkra kato nhũm ã wa hã hixi mênh anẽ nhũm kêp Ijak. Mãânên Apraãw pumu.

Ijais (Isaias) Tirtũm nhÿ hã kapêr jarênh o pa xwÿnhjê hõ na pre. Amnepêm kormã Jesus pika hwÿr wrÿk nê kator kêt ri na pre hte Ijaisja hkukamã hprĩ hã hkwyjê mã harênh o pa.

Jako (Jacó) Kêp Ijak kra hõ na pre. Katorxà nhîxi na pre kêp Repek. Nê htõ pihpoja nhîxi na pre kêp Ejau. Ejauja wam kator tã nhũm Tirtũm te Jako kot wam kator pyræk o hipêx. Jakamã tãm na kêp Ijaewjê pàr krax. Mãânên Ijaew nê Apraãw nê Ejau pumu.

Jejus kot mẽ pa ho mẽ pa xwÿnhjaja (discípulos) Na prem Jejus kot pa ho pa pê kapêr ma nê hkôt amnhĩ nhĩpêx o pa. Tirtũm kapêr ã kagà nyw kwÿ pê Atreja na kot mãânên mẽ harênh o “amnhĩ kaxyw Jejus kot mẽ hamaxpêr xwÿnhjaja” nê “Jejus kôt mẽ kot axpên to htõ nê mẽ kot axpên to htõx xwÿnhjaja” anhÿr o mẽ harẽ.

Nê Tirtũm kapêr ã kagà nyw kwÿ pê Matêwre nê Makre nê Rukre nê Juãwja na kot “Jejus kot mẽ pa ho mẽ pa xwÿnhjê pê 12” ã mẽ harẽ. Jajaja na pre Jejusja amnhĩm mẽ kurê. Mãânên mẽ kêp Jejus nhÿ hã mẽ ahkre ho mẽ pa xwÿnhjaja. Mãânên Jejus nhÿ hã mẽ ahkre ho mẽ pa xwÿnhjê pumu.

Jejus kwÿ (Crente) Mẽ kot amnhĩ kaxyw Jejus mã hamaxpêr nê hkôt amnhĩ xunhwÿr xwÿnhjaja na htem kêp “Jesus kwÿ” hã mẽ harẽ.

Jeremís (Jeremias) Tirtũm nhÿ hã kapêr jarênh o pa xwÿnhjê hõ na pre. Amnepêm Ijaewjaja Tirtũm kapêr kwÿm ri tanhmã amnhĩ nhĩpêx

to ho pa ri na pre Jeremĩsja xatã mẽ kot amnhĩ tomnuj kaga nẽ Tĩrtũm kot amnhĩ nhĩpêx o pa hã mẽ hkôt mẽ kãm karõ ho pa. Nẽ Jejus kukamã tanhmã harênh to ho pa.

Jese (Jessé) Pahi Tawi nhĩpêxã na pre. Na pre Tĩrtũm kapêr jarênh o pa xwỳnh pê Ijaisja Jejus kukamã kêp Jese mẽ Tawi kanrêhã htãmnhwỳ hã harê. Mãänñen Tawi pumu.

Jejus (Jesus) Tĩrtũm Kra na. Ijaewjê kapêr kãm hixija te kot “Tĩrtũm kêp mẽ papytãr xwỳnh” anhỹr pyrãk. Kot hprêk nẽ mẽ panê mẽ pahte amnhĩ tomnuj pãnhã amnhĩrer kaxyw htyk jakamã nhũm pre kato nhũm katorxã Marir nẽ mjên wa ã hã hixi mẽnh anẽ nhũm kêp Jejus. Tĩrtũm kot wa kãm hã karõ xã hkôt. Na htem mãänñen Jejus jarênh o “Jejus Kris” nẽ “Tĩrtũm Kra” nẽ “Tĩrtũm kot mẽ pakaxyw ãm xwỳnh” nẽ “Tawi kanrêhã htãmnhwỳ” anhỹr o harê.

Jojuje (Josué) Mojes mõi pê na pre Jojueja kêp Ijaew nhõ pahi nẽ Tĩrtũm kot mẽ kãm pika nhõr xwỳnhnta wỳr mẽ o pa. Na prem pikaja kamã ra mẽ pa ho mẽ pa xwỳnhjê ho hkrihkrit hãmri nhũm Jojuje mẽ kãm pika ho pigrãnh pa. Jakamã nhũm Ijaew piitã pikjêr pê 12jaja piitã amnhĩ pika hkwy ho rax nẽ ho kãja. ãm mẽ kêp Rewi pixjaja na prem hkwy ho kãja hkêt nẽ. Mẽ kêp mẽ õ patre jakamã na prem pika hkwy ho kãja hkêt nẽ.

Nẽ Jojueja kêp mẽ õ pahi mex na pre. Na pre Tĩrtũm kôt mẽ pa kaxyw mẽ kãm kapêr kãm hihtỳx o mẽ hkôt pa. Nẽ mẽ kãm amnhĩ jarênh o: “Kot paj inhõrkwy kamã ixkwỳjê piitã mẽ Tĩrtũm kôt pix mã amnhĩ nhĩpêx rãhã ho ri ixpa.” Anẽ.

Jõhti (Jonas) Jõhtija Tĩrtũm nhỹ hã kapêr jarênh o pa xwỳnhjê hõ na pre. Nhũm pre Tĩrtũm ma krĩ pê Nĩnĩwe wỳr kumẽ. Kot ÿ hã krĩ nhõ xwỳnhjê mã kapêr jarênh kaxyw mẽ hwỳr kumẽ. Nom nhũm Jõhtija hitõt nẽ kãm mẽ hwỳr mõi prãm kêt nẽ. Hãmri nẽ axtem nẽ pãr õ hwỳr axã nẽ ma awry hã nhỹhỹm mõi mã. Hãmri nhũm Tĩrtũm tee ri ja hã omu hãmri nẽ hwỳr na rax mẽ nhũm wrỳk rax kumrêx. Nẽ hkrakrak nẽ haxênh nhũm gõja harĩ nẽ axpên tak nẽ pãr krem agjê. Hãmri nhũm pãr kãm mẽ mrar xwỳnhjaja tee ri amnhĩ kukamã hamaxpêr nẽ ra Tĩrtũm kot Jõhti kamã gryk nẽ mẽ hwỳr na rax mẽnh ã omu hãmri nẽ gõx kãm amnhĩ nẽ kumẽ nhũm gõ xupỳm kãm tẽn mrõ nhũm naja hapêx kurê kumrêx. Hãmri nhũm Tĩrtũm Jõhti wỳr tep rax kumrêx õ mẽ nhũm hwỳr tẽ nẽ htĩr rãhã kukrê. Nhũm õhy kamã htĩr nẽ hkrĩ hã apkati axkrunêpxi nhũm tepja kỳxpê amgrã hwỳr ho õjãir nhũm htĩr nẽ kato. Hãmri nẽ Tĩrtũm kot Nĩnĩwe wỳr mẽnhnta mã hamaxpêr nẽ ma mẽ hwỳr mõi kurê kumrêx nẽ mẽ kãm Tĩrtũm kapêr jarênh o ri mẽ hkôt pa.

Juãw (João) Tirtũm kapêr ã kagà nyw kamã ahpÿnhã Juãw jarênh xohtôô.

Juãw Paxis (Juãw Batista) na pre kêp Tirtũm nhÿ hã kapêr jarênh o pa xwÿnhjê hõ. Te kot hkukamã Eris kot amnhĩ nhĩpêx pyrãk. Nê urà nê hkwÿjê hkôt mē kot amnhĩ tomnuj kaga nê Tirtũm kot amnhĩ nhĩpêx o pa hã mē hkôt mē kãm karô ho pa. Na pre Jejus kukamã mē kãm harênh o pa.

Jejus nhÿ hã kapêr jahkre ho pa xwÿnhjê hõ pê Juãwja na pre kêp Jepetew kra nê kêp Xiakre htô. Na pre Tirtũm kapêr ã kagà nyw kwÿ hã kagà. Na pre Juãw ã kagà nê Wam Juãw ã kagà nê Sikũn Juãw ã kagà nê Hapuhã Juãw ã kagà. Nê Apokarip ã kagà.

Juãw Makre pê Panãpe htô na pre hte Pawre nhĩhkô hã mē kãm Jejus kapêr jarênh o ri mē hkôt pa. Nê na pre Tirtũm kapêr ã kagà nyw kwÿ pê Makre hã kagà.

Simãw Pêtre nhĩpêxàja nhíxi pê na pre kêp Juãw.

Ijaew nhõ patre maati pê Anas kwÿjê hõ na pre kêp Juãw.

Juje (José) Tirtũm kapêr ã kagà nyw kamã ahpÿnhã Juje xohtôô.

Juje hõ na pre kêp Jako krajê hõ. Jakamã kêp Ijaew nhĩgêjtê hõ. Nê na pre kêp Pêjamĩ tã.

Juje hõ na pre kêp Jejus katorxà Marir mjên.

Juje hõ na pre kêp Jejus tøjê hõ.

Juje hõ na pre kêp Xiakre htô.

Juje pê Arimatej nhõ xwÿnh. Hikãxpore rax xwÿnh na pre. Nê kêp Ijaew nhõ juisti hõ na pre. Na pre tãm amnhĩ nhĩpêx o pa nê Jejus kôt ri amnhĩ nhĩpêx o pa.

Juje Pasapas na pre Jejus kôt pa ho pa. Nhũm pre Jejusja ma akupÿm kaxkwa hwÿr api nhũm ÿ hã mē ahkre ho mē pa xwÿnhjaja Jut Kariot mÿr pê amnhĩ kôt mēhõ xãm kaxyw hãmri nê Juje Pasapas mē Maxitre wa harê. Hãmri nê kaxyw Maxitreja xãm.

Panãpe nhíxi hõ na pre kêp Juje.

Juta (Judá) Jako hkra my pê 12jê hõ na pre Jutaja. Jakamã Ijaew kwÿ pê Juta nhõ xwÿnhjê pãr krax na pre. Nhũm pre kanrêhã htãmnhwÿjaja pika pê Israew kwÿ kamã pa ho pa. Krĩ pê Jerujarêja pika pê Israew kamã na. Nê Jejusja katorxà hkôt kêp Juta kanrêhã htãmnhwÿ. Israew kamã krĩ pê Perêj (Belém) kamã na pre kato.

Ijaew (Os Judeus, povo de Israel, Hebreus) Apraãw kanrêhã htãmnhwÿjaja na mē. Na htem mãänên mē harênh o “Eprêw” anê. Ijaewjaja na prem Eprêwjê kapêr o kapêr. Jakamã mē kot Tirtũm kapêr tũm ã kagà xwÿnhjaja na prem Eprêw kãm hã kagà.

Ijaewjê nhõ juistijaja (Conselho superior) Ijaew my kot amnhĩ to rũnh xwỳnhjaja. Na pre mẽ ohtô nê. Mẽ kêp 71 rỳ 71 jakre. Na pre htem axpên wỳr akuprõ nê Ijaewjê hõ kot tanhmã amnhĩ tomnuj to hã axpên mar o hkrĩ. Nhũm patre maati kêp mẽ hkrãhtũm. Jakamã nhũm pre Ijaewjaja mẽ hwỳr Jejus o mỗ. Mẽ kot htyk ã àmnênh kaxyw. Nom Rõm nhõ xwỳnh pixjaja kot mẽ hpar jakamã nhũm prem Sesti nhỹ hã kot mẽ ho amnhĩptàr xwỳnh pê Piratja wỳr kumê. Mãänên Sesti pumu.

Kagãmnuti (dragão) Kêp kagã kumrêx kêt Satanasti na. Nom na htem tũhã kagãmnuti hã harê.

Kagà kaxkep (Rolo de papel) Amnepê mễ õ kagà na te kot mẽ panhõ kagà pyrãk kêt. Na pre htem pĩ ryre pijakrutre hã axpên wỳr pape jatur xà ho kaxkep o axkamur. Nê kamã harênh kaxyw nê kupot nê kamã harênh o hkrĩ.

Kaĩ (Caim) Atãw mẽ Ewa wa hkra kot wa na pre. Na pre Kaĩja htõ kot hapu pê Apew kamã gryk tỳx nê. Tĩrtũm kot mẽ kãm karõ xà hkõt nhũm pre hte Apew amnhĩ nhĩpêx o pa. Jao mẽmo arĩgro hã kãm hkrĩt õwêhti hõ pĩ nhũm Tĩrtũmja omu nê kãm mex ã harê. Tã nhũm Kaĩja Tĩrtũm kapêr kwỳm ri kot amnhĩ nhĩpêx jakamã kãm mẽmo hy kwỳ gõ nhũm Tĩrtũm tee ri omu nê hkaga. Jakamã nhũm Kaĩ ra htõ kamã gryk tỳx nê axtem nê kupĩ. Mỳrapê nhũm Tĩrtũm kãm: “E. ã ate amnhĩ tomnuj anhyrja mỳrapê kot kaj nhỹri anhõrkwỹ nê apa hkêt nê. Koja mẽ piitã akaga ka nhãm apa nê nhãm apa rãhã ho apa nê ty.” Anhỹr o kãm kapêr.

Kanaã (Canaã) Tĩrtũm kot Ijaew mã pika nhõr nhĩxi pê na pre Kanaã. Na htem jarãhã hpãnhã harênh ho Israew nê tũhã ho Paresxĩ (Palestina).

Kore (Coré) Na pre Koreja Mojes mẽ Arãw wa kutã amnhĩ xãm nê amnhĩ kot hkwỳjê mã anê nhũm mẽ mãänên wa kutã amnhĩ xunhwỳ. Nhũm Tĩrtũm tee ri ja hã mẽ omu nê mẽ kamã gryk nê. Hãmri nê tanhmã pika hto nhũm axkjê nhũm mẽ kot Mojes mẽ Arãw wa kutã amnhĩ xunhwỳr xwỳnh piitã kamã rỏrỏk nhũm pikaja akupỹm mẽ hã axkamur nê mẽ himex pa.

Kris (Cristo) Jejus nhĩxi hõ. Ijaew kapêr kãm Krisja te kêp “mễ kot orti ho hkrã kumrãr xwỳnh” pyrãk ã harênh. Na pre hte Tĩrtũm Ijaew mã mẽ ho amnhĩptàr o pa xwỳnh rê nhũm mẽ õ patreja kêp mẽ õ pahi hã mẽ hkrã kumrã. Jakamã nhũm pre Tĩrtũm amnhĩ kukamã kot mẽ pahwỳr mẽ panê htyk xwỳnh pê Jejus mênh ã amnhĩ jarê nê “ixte orti ho hkrã kumrãr xwỳnh” anhỹr ã harê. Jao kot mẽ pakaxyw ãm ã harê.

Marir (Maria) Tĩrtũm kapêr ã kagà nyw kamã ahpỹnhã Marir nhĩxi sohtõ.

Marir pê Jejus katorxà.

Marir Matarên (Maria Madalena). Na pre mêkarō punuti kêp 7 nê hwÿr agjê nê omnuj o hkôt pa. Tã nhũm Jejusja nê mẽ hanor pa nhũm Marir Matarên hpãnhã Jejus kôt pa ho pa.

Marir kêp Matre mẽ Rajare wa htõx. Na pre Jejus par pê kot mẽ ahkre mar o hkrĩ.

Marir pê Xiakre mẽ Juje wa katorxà. Na hte mẽ hkwÿjaja mãânên kêp Kropti prõ hã harê nom ko.

Marir pê Juãw Makre katorxà. Krĩ pê Jerujarê kamã na pre pa. Nhũm pre hte Jejus kôt mẽ pa ho mẽ pa xwÿnhjaja Jejus mÿrpê òrkwÿ hwÿr akuprõ nê kamã amnhĩ to Tĩrtũm wÿr o hkrĩ.

Mẽ ahkà (Coroa) Ahpÿnhã na pre mẽ àhkà. Na hte mẽ ho amnhĩptàr xwÿnhjaja kêp pahi hã ôr o mẽ ahkà jagjê nê hã pa. Nê na pre hte mẽ kot mẽ hkwÿjê ho wa nê hprôt tÿx nê wam hpõx xwÿnhjê mã axtem mẽ ahkà hõ gõ.

Mẽ ujarênh mex (Evangelho) Na pre Tĩrtũmja mẽ pahwÿr Kra Jejus Krisja mẽ. Kot mẽ panê mẽ pahte amnhĩ tomnuj pãnhã amnhĩrer kaxyw htyk kaxyw. Nê htykja kukwak ri mẽ kot hkôt amnhĩ xunhwÿr nê hkôt amnhĩ nhĩpex o pa xwÿnhjaja kêp Tĩrtũm kra nê kêp nhÿrmã wa kuri htĩr tũm nê pa ho pa mã xwÿnh. Mẽ ujarênh mexja na ja.

Mekijetek (Melquisedec) Tĩrtũm kapêr ã kagà kot hprĩ hã Mekijetek jarênh kêt. Na hte ãm harênh kryre. Tĩrtũm kapêr ã kagà nyw kwÿ pê Eprêwja kot tanhmã harênh to nê Tĩrtũm kapêr ã kagà htũm kwÿ pê Jênja mãânên kot tanhmã harênh to. Amnepêm mẽ kãm Apraãw kurê xwÿnhjaja kot kêp htãmnhwÿ pê Rohti mẽ hkwÿjê pytàr nê ma amnhĩ kôt mẽ o mõi nhũm Apraãw kot mẽ harênh mar nê ma mẽ hkôt mõi nê akupÿm mẽ kêp mẽ utàr nê amnhĩm mẽ kêp mẽ hikukrêx mex kwÿ pytàr nê akupÿm mẽ o mõiarta ã na pre Mekijetekja pry hã hkaxpa nê kãm mẽ àpkur xà hkwÿ gõ nê ho Tĩrtũm wÿ. Kot ho mex rãhã ho pa kaxyw nhũm mẽ ho kuwÿ. Nhũm Apraãw amnhĩ tã kuma nê hkĩnh nê hãmri nê kãm kot mẽ kêp mẽ hikukrêx pytàr xwÿnhhta hkwÿ gõ.

Tã nhũm ra amgrà xohtô nê hapêx nhũm Ijaewjaja Apraãw kot Mekijetek nhĩpêxta pyrã nê mẽ õ patre mã mẽ hpur kãm mẽ õ kwÿ nhõr o pa. Jakamã Tĩrtũm kapêr ã kagà nyw kwÿ pê Eprêw kamã Apraãw kot Mekijetek mã õ mẽmoj kwÿ nhõrja kôt Mekijetek kêp patre hã harênh. Patre pyrã nê kêp mẽmoj jamÿnh xwÿnh jakamã mẽ urã nê kêp patre.

Nê Ijaewjê nhõ patre piitã mẽ kêp Rewi pix kanrêhã tãmnhwÿ na pre mẽ. Nom Apraãw kot Mekijetek pumunh nê kãm mẽmoj nhõrta ã na pre kormã Rewija kator kêt nê. Tã Apraãw kot kãm

mêmoj nhõrta na te kot Rewi kanrêhã tàmnhwỳ pê patrejaja piitã Mekijetek mã mêmoj nhõr pyràk. Nhỹrmã mê kator nê kêp Apraãw kanrêhã tàmnhwỳ hã kãm mêmoj nhõr pyràk.

Mês kunĩhti (arca do acordo) Na pre Ijaewjaja Tĩrtũm nhỹ hã pĩ ho mêt nhĩpêx nê piitã ôr o hpro. Mêt kaxwỳnh kãm na pre kên poja Tĩrtũm kot hã mê pahte tanhmã amnhĩ nhĩpêx to hã mê pamã karõja hikwỹ. Nhũm pre hte Ijaewjaja kapõt ã amnhĩ kôt mêt kunĩhtija o pa. Nê nhỹri arĩ hkrĩ hãmri nê Tĩrtũm nhõrkwỹ kaakre kamã unhwỳ nê kamã mêtja xãm. Tã nhũm prem Tĩrtũm kot mê kãm mê õ pika nhõr xwỳnhhta kamã pøj nê mê kãm Tĩrtũm mã amnhĩ jarênh xà hã ixkre nhĩpêx nê hpãnhã kamã mêtja xà nhũm kamã arĩk.

Mê hkĩnh ã arĩgro (Festa) Ijaewjaja na pre htem amgrã mêt mê hkĩnh ã arĩgro hã Tĩrtũm kot tanhmã mê ho mex to mã hamaxpêr pê tanhmã amnhĩ nhĩpêx to. Amgrã pixi kamã ahpỹnhã mê hkĩnh ã arĩgro kêp 5ja na Tĩrtũm kapêr ã kagà nywja kot harênh.

Tĩrtũm mã amnhĩ jarênh xà hã ixkre ho mex ã mê hkĩnh (Festa de Dedicacão) Amnepê m na pre mê kãm Tĩrtũm kure xwỳnhjaja Ijaewjaja kot Tĩrtũm mã amnhĩ jarênh xà hã ixkre homnu pa. Hãmri nhũm Jut Makapisja akupỹm mê kãm ho mex pa. Jakamã na pre htem amgrã mêt kot mê kãm akupỹm ho mex mã hamaxpêr nê hã hkĩnh kaxyw axpên wỳr akuprõ nê hã hkĩnh.

Pas ã mê hkĩnh (Festa da Páscoa) Amnepê m Ijaewjê nhĩgêjtaja na prem mêmo arĩgro hã ôwêhti hkrare kwỳ pa. Tĩrtũm kot ja hã mê omunh nê Ejit nhõ xwỳnhjê nê mê kator kaxyw nhũm prem ã amnhĩ nhĩpêx anê. Jakamã na htem arĩ mê kêp mê hkanrêhã mê htàmnhwỳjaja arĩgro pê Pas ã axpên wỳr akuprõ nê mê hamaxpêr pê mê urà nê ôwêhti hkrare kwỳ pa nê pãwti kaxkrit kêt kãm kuku.

Pãwti kaxkrit kêt kur ã mê hkĩnh (Festa dos pães sem fermento) Mê hkĩnh pê Pas jatur xà kamã na pre hpãnhã pãwti kaxkrit kêt kur ã hkĩnh. Mê hkĩnhja kamã na htem pãwti kaxkrit kêt pix ku nê axtem pãwti kur kêt nê. Amnepê m hĩgêjtaja na prem ra Ejit rũm nojarêt nê kormã pãwti kaxkrit kêt rãhã àr tokyx anê nê kuku hãmri nê ma pa ho pa. Tã mê hkanrêhã mê htàmnhwỳjaja na htem ja hã hkĩnh kaxyw mê urà nê pãwti kaxkrit kêt pix kur o ù semã.

Pêtekos ã mê hkĩnh (dia de Pentecostes) Pêtekosja ã na pre hte Ijaewjaja mê hpur kãm mêtõ rũnh ã hkĩnh kaxyw axpên wỳr akuprõ nê hã hkĩnh. Pêtekos õ hã na pre Tĩrtũm Karõja mê kot Jesus kôt amnhĩ xunhwỳr xwỳnhjê wỳr wrỳ nê mê hkarõ mã agjê.

Pô nhĩrõnh ã mẽ hkĩnh (Festa dos tabernáculos) Mẽ hkĩnhja ã na pre hte Ijaewjaja mẽ hpur kãm ujamỳnh rũnh ã hkĩnh kaxyw axpẽn wỳr akuprõ nẽ amnhĩm pô nhĩrõ nẽ kamã hkrĩ nẽ hã hkĩnh ã ù semãn.

Mẽmyjê my kwỳt kà jakàr (circuncisão) Na hte Ijaew kra myrejaja hapôj nẽ hã arĩgro pê 8 nhũm htem my kwỳt kà hkwy jakà. Amnepêm Tĩrtũm kot Apraãw mã hã karõ xà hkõt. Hipêêxà mẽ katorxà wa kot Tĩrtũm mã hkrareja nhõr ã amnhĩ to amnhĩrĩt kaxyw na htem arĩ ã amnhĩ nhĩpêx anhỳr o pa.

Mẽkarõmnuti (demonio, espírito mau, espírito enganadoso) Mẽ kêp Satanasti nhỹ hã tanhmã amnhĩ nhĩpêx to ho mẽ pa xwỳnh. Na htem mẽ hwỳr agjê nẽ tanhmã mẽ hkrã hto nhũm mẽ ỹ hã omnuj nẽ pa. Nẽ tõiã Satanasti kot amnhĩ tomnuj rãhã ho pa.

Mẽ kot amnhĩ tomnuj xà (Pecado) Koja mẽhõ Tĩrtũm kapêr nhĩrõp xa nẽ tanhmã amnhĩ tomnuj to. ãm mẽmoj to rax rỳ mẽmoj to greire htã Tĩrtũm pê ja omnuj tỳx nẽ.

Mẽ kot Jejus nhỹ hã mẽ ahkre ho pa xwỳnh maatijaja (Apóstolos) Jejus na pre hkõt mẽ pa ho mẽ pa xwỳnhjê ho 12 nẽ mẽ kurê. Ỡ hã hkwyjê jahkre ho pa kaxyw mẽ kurê. Na pre htem Jejus kõt pa ho pa nhũm mẽ ahkre ho pa. Nhũm prem Jejus htyk kãm omu nẽ akupỳm htĩr kãm omu. Jakamã nhũm Jejus ma mẽ piitã mẽ hwỳr mẽ kot mẽ kãm hprĩ hã harẽnh o mẽ hkõt pa kaxyw mẽ kurê. Nẽ kot mẽ nê htyk ã harẽnh kaxyw mẽ hwỳr mẽ kurê. Jakamã nhũm prem kêp mẽ kot Jejus kõt amnhĩ xunhwỳr xwỳnhjê krãhtũmjaja.

Nhũm pre Jejusja akupỳm kaxkwa hwỳr àpir tã mããnẽn Pawre mã amnhĩ to amnhĩrĩt nhũm pre no ho kaxkwa kamã ãm kãm omu. Nhũm Jejus wamtajê kõt kuta nhũm mẽ urà nẽ ỹ hã mẽ ahkre ho pa. Na htem mããnẽn Panãpe mẽ hkwyjaja Jejus nhỹ hã mẽ ahkre ho pa xwỳnh ã mẽ harê nom Jejus na pre mẽ unhwỳr kêt nẽ. Jakamã mẽ hkĩnhã mẽ kêp Jejus nhỹ hã mẽ ahkre ho pa xwỳnh maati kêt.

Mẽ kot Tĩrtũm mã mẽmoj nhõr (Sacrifício) Amnepêm kormã Jejus mẽ pahwỳr wrỳk nẽ kator kêt ri na pre Tĩrtũmja Ijaewjaja kot kãm amnhĩ jarẽnh kaxyw nẽ kãm mẽmoj nhõr ã mẽ kãm karõ. Ahpỳnhã tanhmã kãm mẽmoj nhõr to. Tĩrtũm kot omunh nẽ amnhĩ katut kõt kot tanhmã amnhĩ tomnuj to rẽnh nẽ axte kãm hamaxpêr kêt nẽ mỳrapê tanhmã mẽ ho hkêt kaxyw. Na prem kãm mẽmo mry gõ nhũm patre mẽ kãm kupa. Te mryja kot tanhmã amnhĩ tomnuj to xwỳnhhta pãnhã htyk pyræk.

Na pre Ijaewjaja mẽ tãmjaja Tĩrtũm mã mryja par kêt nẽ. Mẽõ patre pixjaja na pre htem mẽ kãm kupa. Mẽ kot mry par xwỳnhhta

môx myti rỳ ôwêhti rỳ motre na pre. Nom mry mex pix nê tanhmã kute hkêt xwỳnh pix na prem Tĩrtũm mã kupa. Tã nhũm pre Jeusja mẽ pahwỳr wrỳ nê tãm mẽ pahte amnhĩ tomnuj mỳrapê ty. Jakamã na pu htem hkukwak ri arĩ amnhĩ pãnhã Tĩrtũm mã mry par o papa hkêt nê.

Mê hkrã kumrãr (batizar, batismo) Koja mēhõ tee ri kēp amnhĩ tomnuj o pa xwỳnh ã amnhĩ pumu nê kãm ã amnhĩ nhĩpex anhỹr o pa hprãm kêt nê hãmri nê Jeus kôt amnhĩ xãm. Hãmri nhũm amnhĩ tã omu nê amnhĩ katut kôt kot amnhĩ tomnuj piitã rēnh pa nê axte kãm hamaxpēr kêt nê. Ra kot ja hã amnhĩ jarēnh xà hkôt. Jakamã mẽ piitã kot kēp Jeus kwỳ hã ra hkôt amnhĩ nhĩpêx o pa hã omunh kaxyw na hte Jeus kwỳjaja hkrã kumrã.

Mê papytãr xwỳnh (Salvador) Jeus kēp mẽ pahte amnhĩ tomnuj pē mẽ papytãr xwỳnh jakamã na htem tōhã ã harēnh anê. Mẽ pahte amnhĩ tomnuj o mẽ papa xwỳnh jakamã mẽ pahpê nhỹrmã ma amnhĩ xà htỳx kamã pajamak xàta wỳr mẽ papa mã xwỳnhjaja. Jao Tĩrtũm pē awry rax kumrēx nê ri papa ho papa. Nom nhũm Jeusja mẽ pahte amnhĩ tomnuj pãnhã amnhĩrer kaxyw ra mẽ panê htyk jakamã na hte Tĩrtũm amnhĩ kaxyw Jeus kot mẽ hamaxpēr nê hkôt amnhĩ xunhwỳr xwỳnhjê pumu nê Jeus kukwak ri amnhĩ katut kôt mẽ kot amnhĩ tomnuj piitã rēnh pa. Jakamã te Jeusja amnhĩ xà tỳx kamã hamak tũm xà pē mẽ utàr pyrãk o mẽ hipêx nhũm mẽ ra hpãnhã kēp Tĩrtũm mẽ Jeus wa kuri htĩr tũm nê pa ho pa mã xwỳnh.

Mĩra (mirra) Mēhkuxwaxà nê mēhkanexà te kot rãmre kuxware pyrãk. Na pre htem kwỳ ho ixkõ nê ra õtxwa nê. Jao amnhĩ xà htỳx kamã hamak kêt nê. Nê mããnēn mẽ htyk xwỳnhjê jaxàr kaxyw nê ho mẽ hkuxwa nê ho mẽ hkukõ nê rĩ kormã mẽ hagjê.

Mojes (Moisés) Ijaew nhõ pahilhti hõ na pre. Na prem kormã Egit kãm mẽ kãm àpēnh rũnh o pa nhũm prem mẽ homnuj nê. Hãmri nhũm Tĩrtũmja Mojes kot Ejit pē mẽ kator nê ma akupỹm kot mẽ kãm pika nhõr xwỳnhhta wỳr mẽ o pa kaxyw ãm. Hãmri nê mẽ hwỳr mēnh kaxyw kãm kapēr. Nom axtem pĩ hpõk kamã kãm kapēr nê mẽ hwỳr kumê.

Na pre Mojesja Tĩrtũm nhỹ hã tanhmã amnhĩ nhĩpêx to ho pa. Na prem ra Ejit rũm pa nhũm pōristijaja ma mẽ hkôt akupỹm mẽ utàr kaxyw mẽ hkôt hprõt nhũm mẽ hkukamã mōr prēprêk hãmri nê ra gô xujanãrja wỳr pōj. Mẽ kot kãm “Gô Kamrêk” nhỹr xwỳnhhta wỳr pōj nê tee ri amnhĩ kukamã hamaxpēr o kuhê. Hãmri nhũm Tĩrtũm tanhmã kôk to nhũm àpêr tỳx pē gô xupỹm o axkjê nhũm Ijaewjaja hkà hkĩnh pē gô kaêx kãm xarmã mrar

kurê kumrêx. Hâmri nê xarpê hpôx pa nhùm Ejit rûm mē hkôt hprôt xwÿnhjaja ra mē hkôt gô kaêx kôt amgràja kôt xarmã mē hkôt hprôt. Rãhã nhùm kôk hapêx nhùm gô xupÿmja akupÿm axkamur nê mē hanhir pa.

Nê Mojes mã na pre Tirtûmja Ijaewjê kaxyw mē kot tanhmã tãm amnhî nhîpêx to ho pa hã kãm karô. Jakamã nhùm prem Gô Kamrêkja rûm mô nê hixêt pê Sinai hwÿr pôj. Hâmri nhùm Mojes ahte himôk wÿr api nê Tirtûm mã amnhî jarênh o nhÿ nhùm Tirtûmja Ijaewjê kaxyw tanhmã kãm kapêr to. Nê mē kot tãm amnhî nhîpêx kaxyw mēmoj to 10 nê mē kãm hã karô nê mē kãm kên po hã hã kagã nê Mojes mã kugô. Hâmri nhùm Mojes kumÿ nê akupÿm mē hwÿr o wrÿ hãmri nê tee ri tanhmã mē kot amnhî nhîpêx to hã mē omu. Nhùm mē ra wakre kamã axtem nê ôr o amnhîm môx krare karô nhîpêx nê ho sãnti hã harê nê hwÿr akuprô nê hã hkînh nê kãm mex o mex ã harênh o kuhê. Nhùm Mojes tee ri ja hã mē omu nê mē kamã gryk tÿx nê. Nê gryk xàj Tirtûm kot kãm kên po nhôr xwÿnhnta mē nhùm pikrakrak pa. Tã nhùm arîgro hõ hã nhùm Tirtûm axte kên po hõ hã mē kãm axte mēmojta ã kagã. Hâmri nhùm prem Tirtûm nhôrkwÿ kaàkre kamã mês kunîhtita kamã kuxã hãmri nê kapôt ã amnhî kôt o pa. Mãânên mês kunîhti pumu.

Nhùm pre Mojes akupÿm hixêt pê Sinai rûm wrÿ nê Tirtûm kot mē kaxyw mēmoj tã karô xàta piitã hã kagã. ãm mēmoj pê 10 pix kêt mēmoj xohtô nê hã kagã.

Nê Tirtûm kapêr ã kagã htùm kamã wam hkwÿ ho sîkja na pre Mojesja hã kagã. Na pre Jên (Genesis) ã kagã nê Es (Éxodo) ã kagã nê Rewit (Levítico) ã kagã nê Nùm (Números) ã kagã nê Tuterônô (Deuteronomio) ã kagã. Mojesja na pre Tirtûm nhÿ hã Tirtûm kapêr ã kagã htùm kwÿja piitã hã kagã.

Namã (Naamã) Namãja na pre pika pê Sir (Síria) kamã pa. Nê kêp Ijaew kêt. Na pre kêp pôristi krãhtùm tã hkã nhy hkro tÿx xwÿnh na pre. Hâmri nê tee ri amnhî kukamã hamaxpêr nê Tirtûm nhÿ hã kapêr jarênh o pa xwÿnh pê Erisa jarênh ma nê ma hwÿr mô nê kot akupÿm ho mex prãm xàj amnhî to kuwÿ. Hâmri nhùm Erisa kuma nê kãm anê nhùm ma pyhti pê Jotã hwÿr mô nê kamã mrôr o 7 wêsja kot hãmri ra akupÿm mex kurê kumrêx.

Nîniwe (Níneve) Krî hõ nhîxi na. Wÿr na pre Tirtûmja Jôhti kot mē kãm kapêr jarênh o pa kaxyw kumê. Mē kot amnhî tomnuj tÿx o pa mÿrapê ra kot mē ho hapêx kaxyw ã mē kãm harênh kaxyw mē hwÿr kumê. Hâmri nhùm tã mē hwÿr mô nê mē kãm ujarênh o mē hkôt pa nhùm mē kuma nê tee ri amnhî kukamã hamaxpêr nê tee ri amnhî nhîpêx ã amnhî pumu nê hkaprî nê mur. Hâmri

nhùm Tirtùm ja hã mẽ omu nẽ tanhmã mẽ ho kêt nẽ. Määnẽn Jõhti pumu.

Noehti (Noé) Amnepêm na pre Noehtija pa. Arĩ htĩr ri na pre mẽ piitã amnhĩ tomnuj tỳx rãhã ho pa nhùm Tirtùmja tee ri ja hã mẽ omu nẽ kot mẽ hwỳr na rax mẽnh nhùm wrỳk rax nẽ mẽmoj piitã mẽ hanhir par ã harẽnh. Nom nhùm Noehtija mẽ kurom kot amnhĩ to mex xwỳnh jakamã na pre hte Tirtùm kapêr kôt ri amnhĩ nhĩpêx rãhã ho pa. Jakamã nhùm Tirtùm kãm anẽ nhùm kot kãm hã karõ xà hkôt amnhĩm pàr rax kumrêx nhĩpêx. Hãmri nhùm Tirtùm axte kãm anẽ nhùm hprõ nẽ hkra my axkrunêpxi mẽ mẽ hprõjê mẽ ra hwỳr agjê. Nẽ mry nẽ àk piitã axpên kaxyw o axkrut kapên xwỳnhja määnẽn hwỳr agjê. Nẽ mry kwỳ axpên kaxyw o 7 kapên xwỳnh. Nhùm pre piitã pàr wỳr gjêx pa nhùm Tirtùm mẽ hwỳr na raxja mẽ. Nhùm wrỳk rax kumrêx nẽ gaa nẽ pĩ nẽ hixêt prêk piitã hanhir pa. Jao ra mẽ kot amnhĩ tomnuj xwỳnhjê piitã mẽ himex pa. ãm Noehti mẽ hkwyjê pixjaja na prem pàrta kamã mex nẽ hkrĩ.

Nhùm ra amgrã pixi nẽ hapêx nhùm rĩ pika piitã akupỳm grã nhùm mẽ hapôx pa. Hãmri nhùm Noehtija Tirtùm mã amnhĩ jarênh kaxyw kãm mẽmoj gõ nẽ amnhĩ tã kãm mex o mex ã harẽ. Nhùm Tirtùm kãm amnhĩ jarẽ nẽ kãm: “Kot paj axte pika piitã hkôt ã na rax mẽnh anhỳr kêt nẽ. Kam nẽ ixte ã amnhĩ jarênh anhỳr xà hã kaxkwa kamã paxwỳmgêxtija pumu. Kêr ka mẽ nhỹrmã omu nẽ ã ixte mẽ amã amnhĩ jarênh anhỳrja mã ajamaxpêr. Kêr ka mẽ apa nhùm na wrỳ nẽ hapêx nẽ kaxkwa kamã paxwỳmgêxti ajêt ka mẽ omu nẽ ã ixte amnhĩ jarênh anhỳrja mã ajamaxpêr kurê kumrêx.” Anẽ.

Ôwêhti (Ovelha) Amnepêm na pre Ijaewjaja krit ôwêhti xohtô nẽ. Nhùm pre hte mẽhõ mẽ kãm hamãr o pa nhùm prem kãm amnhĩre. Nhùm prem tõhã mẽ tãmjaja amnhĩ krit jamãr o pa. Na prem ma kapôt ã põ kot mẽ o pa nhùm hkur o pa. Nhùm pre hte mẽ kot hamãr o pa xwỳnhhta hprĩ hã ahpỳnhã ôwêhti piitã omunh mex nẽ. Na pre hte mẽ kãm kahê nhĩpêx nhùm kamàt nhùm kamã mẽ hagjê. Hãmri nẽ hagjênh xà kamã kuri hikwỳ. Mẽ kêp hkwy ho àhkĩnh pymaj. Na pre Ijaewjaja tõhã Tirtùm mã amnhĩ jarênh kaxyw nẽ kãm hkrit ôwêhti gõ. Määnẽn mẽ kot Tirtùm mã mẽmoj nhõr pumu.

Tirtùm kapêr ã kagà nyw kôt mẽ kot Jejus kot amnhĩ xunhwỳr xwỳnhjaja na hte mẽ kêp ôwêhti pyrãk ã mẽ harẽnh. Nẽ Jejus kêp mẽ hamãr o pa xwỳnh ã harẽnh.

Paaw (Baal) Sãnti nhíxi. Amnepêm kormã Tirtùm kot Ijaewjê mã pika nhõr xwỳnhhta wỳr hpôx kêt ri na pre ra pikaja kamã mẽ pa

xwỳnhjaja Paaw o sãnti nê amnhĩ to kuwỳ nê kãm mex o mex ã harênh o pa. Tã nhũm Ijaewjaja mẽ õ pika hwỳr agjê nê ja hã mẽ omu nê gaa nê Tĩrtũm kaga nê mẽ urà nê Paaw o mẽ õ sãnti nê amnhĩ to hwỳr o pa. Nhũm Tĩrtũm tee ri ja hã mẽ omu nê hã mẽ kamã gryk nê.

Papirõn (Babilonia) Pika htũm õ nhĩxi. Papirõn kamã mẽ õ pahi na pre ahpỳnhã pika nhõ xwỳnhjê pê amnhĩm mẽ õ pika pytã. Nhũm õ pôristijaja Ijaewjê kutã amnhĩ xunhwỳ nê hkwyjê pytã nê ma akupỳm amnhĩ kôt Papirõn wỳr mẽ o pa nhũm prem mẽ kãm àpênh rãhã ho pa hã amgrã pê 70.

Nê Papirõn nhõ xwỳnhjaja na prem kãm Tĩrtũm prãm kêt jakamã Tĩrtũm kapêr ã kagã nyw kwỳ pê Apokarip kot mẽ kãm Tĩrtũm prãm kêt xwỳnh piitã mẽ kêp Papirõn nhõ xwỳnh ã mẽ harênh. Nom ãm hãmri mẽ kêp pika pê Papirõn nhõ xwỳnh kêt axtem pika piitã hkôt mẽ kãm Tĩrtũm prãm kêt xwỳnhjê piitã nhũm ã mẽ harênh anê. Nê mããnên tũhã krĩ pê Rõm nhõ xwỳnhjaja Papirõn nhõ xwỳnh ã mẽ harê.

Paraãw (Balaão) Tĩrtũm nhỹ hã kapêr jarênh o pa xwỳnhjê hõ na pre. Jakamã nhũm pre Ijaewjaja kormã Tĩrtũm kot mẽ kãm pika nhõr xwỳnhhta wỳr mõi ri ra pika pê Mõap wỳr pøj nê kormã kamã pa. Hãmri nhũm Mõap nhõ pahi pê Parakja tee ri amnhĩ wỳr mẽ omu nê kãm mẽ uma nê. Hãmri nê Paraãw kot kapêr o tanhmã mẽ y hto nhũm mẽ kot mẽ ho krihkrit kaxyw amnhĩ wỳr kuwỳ. Nom nhũm Paraãw kãm Tĩrtũm krajê homnuj pymaj hwỳr mõi kêt nê. Tã ra tanhmã hamaxpêr to nê kàxpore prãm xaj ma hwỳr mõi. Nê kormã hwỳr hkrit jumênre hã nhỹ nê mõi. Hãmri nhũm Tĩrtũm kapêr o mẽ wrỳk xwỳnhjê hõja ra hwỳr kato nê pry kamã xa nê kêp amỳtã. Nom nhũm Paraãw omunh kêt nê. ãm hkrit jumênreja pix na pre omu nê umaj arĩ xa. Nhũm Paraãw tee ri kot axte mõi kaxyw xatã htak tã nom nhũm arĩ xa nê axte mõi kêt nê. Tã nhũm Tĩrtũm tanhmã ho nhũm tãm Paraãw mã kapêr nê amnhĩ tã kãm akir. Krit jumênreja tãm amnhĩ tã kãm akir. Hãmri nhũm Tĩrtũm tanhmã Paraãw no hto nhũm no ho Tĩrtũm kapêr o wrỳk xwỳnhhta pumu. Hãmri nê pahi Parakja kãm hprãm xà hkôt Ijaewjê o kapêr nê hpãnhã kàxpore kwỳ jamỳnh mã tã tee ri mẽ ho kapêr punuj mã. Tĩrtũm ra kot mẽ ho mex jakamã nhũm tanhmã mẽ ho kapêr punuj to hkêt nê.

Paraohiti (Faraó) Egit kãm mẽ ho amnhĩptàr xwỳnh piitã na prem kêp Paraohiti.

Parijew (Fariseu) Ijaew kwỳ kot amnhĩ to rũnh xwỳnhjaja. Na pre htem Tĩrtũm kapêr tũm o mẽ ahkre xwỳnhjê nhĩhkõ hã pa. Nê Tĩrtũm kot Ijaewjê kaxyw Mojes mã mẽmoj tã karõ xà piitã mar pa nê

ho mẽ ahkre ho pa. Nê Tirtùm kot mẽ kãm mẽmoj tâ karôja nhĩpy axte mẽmoj jarê. Nom Tirtùm kapêr kot kêt âm amnhĩ krã hkôt axtem nê mẽmoj jarênh o pa. Na prem htỳx kwỳjê rom kot amnhĩ to mex ã amnhĩ kamnhĩx nom kot anhỳr kêt. Mẽ krãhkã hã te mẽ kot tãm amnhĩ nhĩpêx pyrãk tâ nom hamaxpêr punuj pix o pa. Mẽ tãmjaja na prem Jesus kutã amnhĩ xunhwỳ nê kãm hpĩr prãm o pa. Mããnên Satusew pumu.

Pas (Páscoa) Ijaewjê hkĩnh ã arĩgro pê na Pasja. Amnepêm Ijaewjê nhĩgêjtaja na prem pika pê Egit kãm htyk pumaj amnhĩ pãnhã ôwêhti hkrare hkwy pa. Tirtùm kot ja hã mẽ omunh nê Ejit kãm mẽ kãm mẽ hkurê xwỳnhjê nhĩhkra nê mẽ kator kaxyw nhũm prem ã amnhĩ nhĩpêx anê. Jakamã na htem arĩ mẽ kêp mẽ hkanrêhã mẽ htãmnhwỳjaja arĩgro pê Pas ã axpên wỳr akuprô nê jam hamaxpêr pê mẽ higêjtê pyrã nê ã hkĩnh pê ôwêhti hkrare hkwy par anê nê pãwti kaxkrit kêt kãm kuku. Na htem mããnên arĩgro pê Pasja jarênh o: “Mẽ pahte pãw kaxkrit kêt kur ã arĩgro.” Anê.

Pastô (Pastor) Mẽ kot Tirtùm kapêr o Jesus kôt mẽ htõ nê mẽ htõxjê jahkre xwỳnh.

Patre (Sacerdote) Na pre hte Ijaew nhõ patrejaja mẽ kãm Tirtùm mã mẽmoj nhõr pê mẽ ho hwỳr o pa. Tirtùm mã amnhĩ jarênh xã hã ixkre kamã na prem ã amnhĩ nhĩpêx anhỳr o pa. Âm Arãw kanrêhã htãmnhwỳjê pixjaja na prem kêp patre. Mẽ kêp Arãw kanrêhã htãmnhwỳ jakamã mããnên kêp Rewi kanrêhã htãmnhwỳ.

Mẽ õ patre maatija na kot amnhĩ to rax o patre hkwy jakrenh. Na prem mẽ kêp patre maati nê ri pa hã amgrã pixi kaxyw mẽ unhwỳ. Nhũm amgrãja hapêx nhũm pre htem mẽ hapôj nê hpãnhã mễhõ xãm. Patre maatija pix na pre hte Tirtùm mã amnhĩ jarênh xã hã ixkre jatur xã kamã hitom wỳr agjê. Na pre hte hwỳr agjê nê Tirtùm mã mẽ kot tanhmã amnhĩ tomnuj to piitã hã kãm mẽmoj gõ nê kãm mẽ amnhĩ jarê.

Tã nhũm ra amgrã pixi nê hapêx nhũm prem mẽ hapôj nê hpãnhã patre hõ xãm nhũm hpãnhã kêp patre maati. Nhũm patre maati htũmja hpãnhã kêp patre krãhtũm. Ijaewjê nhõ patre krãhtũmjaja mẽ hkwyjaja na prem ra kêp patre maati nê mẽ hkwyjaja patre hkwy kot amnhĩ to rũnh xwỳnh na pre mẽ.

Pêjamĩ (Benjamim) Jako hkra kot hapu na pre. Jakamã mããnên kêp Ijaewjê kanrêhã mẽ higê. Mããnên Aprãw pumu.

Pejepu (Belzebu) Satanasti nhĩxi hõ na. Mããnên Satanasti pumu.

Pĩ kahpa (Cruz) Amnepêm Rõm nhõ xwỳnhjaja na pre htem pĩ kahpa hã mẽ kot amnhĩ tomnuj tỳx xwỳnhjê janhõ nhũm prem hã harir

rãhã ty. Mẽ kot mẽ hpar o mẽ pa xwỳnhjaja rỳ mẽ kệp àhkĩnh pê tanhmã mẽ hipêx punuj to xwỳnhjaja nhũm prem ã mẽ hipêx anẽ.

Na pre hte pôristijaja mẽ kot hã nhôr mã xwỳnh mã ò pĩ kahpa gõ nhũm amnhĩ kôt htyk xà hã pikaja wỳr o tẽ. Hãmri nẽ hwỳr o pôj nẽ hã nõ nhũm pôristija prek o hã ho tỳx rỳ pàr nhôr pix o hkaxpre nẽ kànhmã pĩta xãm nhũm arĩ ajêt rãhã ty. Mẽ kot prek o pĩ hã mẽ ho htỳx xwỳnhjaja na pre htem amnhĩ xà tỳx kumrêx kamã hamak o harir.

Pirat (Pilatos) Na pre hte pika xohtô hkôt mẽ ho amnhĩptàr xwỳnh maati pê Sesti nhỹ hã Ijaewjê ho amnhĩptàr o pa. Nhũm pre Ijaewjê nhõ pahijaja kãm Jejus pĩr prãm nhũm Pirat mẽ kãm pôristi mã hã amỳnê nhũm prem pĩ kahpa hã nhôr o kupĩ.

Raap (Raabe) Amnepêm Ijaewjaja ra Tĩrtũm kot mẽ kãm pika nhôr xwỳnhhta wỳr gjêx kaxyw hãmri nẽ amnhĩ kukamã mẽmyjê hkwy rẽ. Kot pimxur pê mẽ hwỳr gjêx nẽ hprĩ hã ra kamã mẽ pa xwỳnhjê pumunh o pa kaxyw hwỳr mẽ kurẽ. Hãmri nhũm pikaja kamã mẽ hkuprỳjê hõ pê Raapja ò krĩ nhõ xwỳnhjê pê mẽ ho amũxu. Mẽ kot mẽ hpar pymaj mẽ kệp amũxu. Na pre ra amnhĩ kaxyw Tĩrtũm mã hamaxpêr nẽ kot mẽ kãm ò pika nhôrja kôt hamaxpêr jakamã mẽ kệp mẽ ho amũxu nhũm mẽ tee ri mẽ hapêr kaprỳ. Jakamã nhũm mẽmo arĩgro hã Ijaewjaja piitã pikaja wỳr agjê nẽ Raap nhõ krĩ pytàr kaxyw hwỳr mra nẽ mẽ himex pa. ãm Raap mẽ òrkwỹ kamã hkwy hkrĩ xwỳnh pixjaja nhũm prem tanhmã mẽ ho hkêt nẽ. Nhũm Raapja Ijaewjê kôt pa ho pa nẽ mẽhõ ho mjên. Jao kệp Jejus nãjê hõ na pre.

Repek (Rebeca) Repekja Apraãw kra Ijakja prõ na pre. Wa hkra pihpo wa hixi na pre kệp Ejau mẽ Jako. Mãănẽn Apraãw pumu nẽ Ejau pumu nẽ Jako pumu.

Rewi (Levi) Jako hkra my pê 12jê hõ na pre. Jakamã mãănẽn kệp Ijaew pàr kraxjê hõ. Rewi kanrêhã htãmnhwỳjaja kệp mẽ kãm Tĩrtũm mã amnhĩ jarênh xà hã ixkre kamã àpênh o pa xwỳnh. Nẽ mẽ hkwy pê Arãw kanrêhã htãmnhwỳjaja kệp Ijaewjê nhõ patrejaja. Mãănẽn Arãw pumu.

Nẽ Rewi hõ na pre kệp Jejus kôt mẽ pa ho mẽ pa xwỳnhjê hõ. Hixi hõ na pre kệp Matêwre. Tãm na pre Tĩrtũm kapêr ã kagà nyw kwỳ pê Matêwre hã kagà.

Rohti (Ló) Apraãw tõ kot hapu pê Arã hkra na pre Rohtija. Jakamã mãănẽn kệp Apraãw kra. Mãănẽn Apraãw pumu. Na pre Tĩrtũm Apraãw mã kapêr nẽ kot kãm pika rax ò nhôr ã amnhĩ jarê nhũm kuma nẽ ma pikaja japêr o mỗ nhũm Rohtija ma hkôt mỗ. Nhũm prem Tĩrtũm kot kãm pika nhôr xwỳnhhta wỳr pôj nẽ kamã pa ho

pa. Hãmri nhũm Rohti ma ahte mō nê krĩ pê Sotō kamã amnhĩm òrkwỳ nhĩpêx nê kamã pa ho pa. Sotō nhō xwỳnhjaja na pre htem amnhĩ tomnuj tỳx rãhã ho pa. Nhũm Tĩrtũmja tee ri mẽ omu nê ra mẽ ò krĩ ho hapêx par kaxyw. Jakamã ma Rohti hwỳr kapêr o mẽ wrỳk xwỳnhjê hō mẽ nhũm hwỳr wrỳ nê kãm awjarê. Mẽ kator nê hpãnhã ma nhỹhỹm mōr tokyx anhỹr kaxyw. Nhũm Rohtija kuma nê hkwỳjê mẽ mẽ kêp hapôx pa nê ma nhỹhỹm hprôt mẽ nhũm Tĩrtũm krĩja wỳr kuwy hkwỳ rê nê ho hxêt pa. Nhũm kapêr o wrỳk xwỳnh kot Rohti mẽ hkwỳ kot amnhĩ puhã krĩ hwỳr rĩt nê mẽ kãm kapêr tã nhũm Rohti hprōja kuma nê ãm kuma nê amnhĩ puhã rĩt hãmri nê ã amnhĩ nhĩpêx anhỹrja mỳrapê kaxwa hkrã karôt rax ã amnhĩ jahkre nê hapêx kurê kumrêx.

Rôm (Roma) Pika pê Itar (Italia) kamã krĩ maati na Rômja. Kormã Jejusja htyk kêt ri na pre Rôm nhō xwỳnhjaja amnhĩm ahpỹnhã pika xohtô pytã nê ho mẽ ò pika. Jao mãănênh Ijaewjê nhō pika pê Israew pytã. Nhũm pre Ijaew nhō xwỳnhjaja kãm mẽ hkĩnh kêt kumrêx nê tee ri kãm amnhĩ nê mẽ ho krihkrit prãm kaprỳ. Rôm kãm mẽ ho amnhĩptar xwỳnh na pre kêp Sesti. Sestija na pre amnhĩ to rax o pika piitã hkôt mẽ ò pahi jakrenh par kumrêx.

Rôm nhō pahi mã mẽ kêp kàxpore kwỳ jamỳnh xwỳnh (Cobrador de impostos) Mẽ kêp Ijaewjaja nom na prem Rôm nhō pahija mã apê. Jao Rôm nhō pōristijê mã Ijaew pê kàxpore hkwỳ jamỳ. Nom axtem nê ho prês jakre nê mẽ kêp hamỳ. Jao amnhĩm hamỳnh rax nê. Jakamã nhũm Ijaewjaja kãm mẽ hkĩnh kêt kumrêx.

Rrakew (Raquel) Kêp Jako hprōjê hō na pre nhũm kãm hapê htỳx nê. Nê kêp Juje mẽ Pějãmĩ wa katorxà na pre. Matêwre 2.18 kot Rrakewja te kêp Ijaew katorxà piitã hã harênh pyrak.

Sam (Salmos) Tĩrtũm kapêr ã kagà htũm kwỳ na kêp Sam. Samja Tĩrtũm mã mex o mex ã mẽ grer ã kagà na. Pahi Tawi na pre mẽ grerja kwỳ hã kagà.

Samar (Samaría) Pika pê Jutej mẽ Garirej wa kaêx kãm na pika pê Samarja nō. Amnepêm kormã Jejus htĩr ri Samar nhō xwỳnhjaja na prem kêp Ijaew kumrêx kêt ãm mẽ pihkàr na pre mẽ. Nhũm pre Jutej kamã Ijaewjaja kãm mẽ hkĩnh kêt kumrêx o pa. Mãănênh Juta pumu.

Sap (Sábado) Ijaew kôt xà hã arĩgro. Tĩrtũm kapêr ã kagà htũm kwỳ pê Jên kot tanhmã Tĩrtũm jarênh to. Amnepêm kormã amrakati ri kot mẽmoj piitã ho kator ã harênh. Na pre àpênh o apkati kêp 6 nê ra mẽmoj piitã ho kator pa. Jakamã nhũm arĩgro pê 7ta ã nhũm mẽmoj tã àpênh kêt nê. Arĩ hamakêtkati nê hkôkôt o nhỹ. Jakamã na hte Ijaewjaja urã nê àpênh ã apkati kêp 6. Tômik ã

apê nê sikũn ã apê nê tes ã apê nê kwat ã apê nê kĩt ã apê nê sês ã apê hãmri nê sap ã Tĩrtũm pyrãk nê àpênh kêt nê. Arĩ hkòkòt o hkrĩ.

Na prem amnhĩ krã hkòt tanhmã sap ã amnhĩ nhĩpêx to ho pa hã mêmoj tã hkwỳjê mã karõ. Jakamã nhũm pre mêmõ sap ã amnhĩm kuwõnh kaxyw pĩ hkwỳ kawrà ho mra nhũm htem hã omu nê kamã gryk nê. Rỳ mêmõ õ pur kãm põy ho pixi nê kukwỳr tã nhũm mē hã omu nê kamã gryk nê. Jakamã nhũm pre Jejusja arĩgro pē sap ã akupỹm mēmõ ho mex nhũm hkòt mē pa ho mē pa xwỳnhjaja sap ã mē hpur kãm amnhĩm mēmo hy kwỳ kukē nē Jejus kòt hkanhar o mō nhũm Ijaew nhõ pahijaja ja hã mē omu nē ra mē kamã gryk nē. Axtem nē sap ã àpênh ã mē harē nē mē kamã gryk nē.

Sara (Sara) Apraãw prõ na pre. Na pre hkra hkêt kumrêx nê pa rãhã ra hpigêx tỳx tã htujarõ. Hãmri nê hpjagri nê hkrareja myre. Hixi pē Ijak. Mããnēn Apraãw pumu.

Sarumãw (Salomão) Tawi krajê hõ na pre. Na pre Tawi mỳr pē kēp Ijaewjê nhõ pahi. Nhũm pre mēmo kamàt nhũm gõr nē nõ nhũm Tĩrtũmja hpimtir kãm hwỳr kato nē kãm kapēr nē kãm: “Pa. E amã mêmoj prãm xà hkòt mêmoj tã ixwỳ pa amã kugõ.” Anê nhũm kuma nē kãm: “Nà kot kaj tanhmã ixkrã hto pa ra ixàhpumunh tỳx pē ixkwỳjê ho amnhĩptàr mex o ri ixpa. Ja na inhmã hprãm.” Anhỳr jakamã nhũm kuma nē kaxyw tanhmã hkrã hto nhũm mē ho amnhĩptàr mex o pa. Nhũm Tĩrtũm mããnēn tanhmã ho nhũm hikàxpore rax nē pa. Tãm na pre wam Tĩrtũm mã amnhĩ jarēnh xà hã ixkreta nhĩpêx. Jakamã nhũm pre Ijaewjaja axte Tĩrtũm nhõrkwỳ kaàkre kamã kãm amnhĩ jarēnh kêt nê. Pãnhã Tĩrtũm mã amnhĩ jarēnh xà hã ixkre kamã kãm amnhĩ jarēnh o pa. Ixkreja na pre mex kumrêx. Piitã kēn mex pix o hipêx. Nê õr o hkwỳ nhĩpêx. Nê piitã mex kumrêx.

Satanasti (Satanás, diabo) Kãm Tĩrtũm kurê xwỳnh maati na. Nê kēp mēkarõmnutijê nhõ pahihiti. Na hte hêx rom panhĩjê mã kapēr o pa. Mē kot mar nē tanhmã amnhĩ tomnuj to kaxyw. Nê xatã ra mē kot Jejus kòt amnhĩ xunhwỳr xwỳnhjaja kormã Jejus kòt amnhĩ xunhwỳr kêt ri tanhmã mē kot amnhĩ tomnuj to mã hamaxpēr kaxyw tanhmã mē hkrã hto. Mē kot jam hamaxpēr nē Tĩrtũm kot ra amnhĩ katut kòt mē kot amnhĩ tomnuj rēnh par kêt ã hkamnhĩx o tee ri amnhĩ kukamã hamaxpēr kaxyw nhũm hte ã mē hipêx anhỳr o pa. Na htem mããnēn Satanasti jarēnh o: “kãwti” nê “xapti” nê “hinhu nhĩkòtĩ” nê “Pejepu”. Mããnēn Pejepu pumu.

Satusew (Saduceu) Ijaew kwỳ kot amnhĩ to rũnh xwỳnhjaja. Na prem Tĩrtũm kapẽr ã kagà htũm kõt amnhĩ nhĩpêx rãhã ho pa. Nom Parijewjaja kot amnhĩ krã hkõt mēmoj tã mē kãm karõta nhũm prem hkõt amnhĩ nhĩpêx hkêt nẽ. Jakamã na pre Parijewjaja tee ri ja hã mē omu nẽ hã mē kãm akir nhũm prem hã axpẽn mã àkjêr o pa. Na prem Parijewjê kĩnhã akupỹm mē htĩr ã mē hkamnhĩx kêt nẽ. Jakamã mē htyk nẽ hapêx o hapêx ã mē hkamnhĩx. Nẽ mãânẽn Parijewjê kĩnhã mēkarõ hkêt ã mē hkamnhĩx. Nẽ mē hkĩnhã Tĩrtũm kapẽr o mē wrỳk xwỳnh kêt ã mē hkamnhĩx. Mãânẽn Parijew pumu.

Sãmuew (Samuel) Kêp Tĩrtũm nhỹ hã kapẽr jarẽnh o pa xwỳnhjê hõ na pre. Tãm na pre Tĩrtũm nhỹ hã Tawi kêp Ijaewjê nhõ pahi kaxyw ãm.

Sãsõ (Sansão) Amnepêm Ijaewjê nhõ pahi hõ na pre. Na pre Tĩrtũm tanhmã ho nhũm hihtỳx kumrêx o pa.

Sesti (César) Rõm nhõ xwỳnhjê ho amnhĩptàr xwỳnh na pre. Rõm nhõ xwỳnhjaja na pre htem mē õ pahi piitã Sesti hã mē harẽ. Na pre Rõm nhõ xwỳnhjaja pika ho ohtõ nẽ amnhĩm utà. ãm mē tapxipixjaja na pre htem mē kot amnhĩ tomnuj mỳrapê mē kot mē hpar ã mē kãm amỹnê. Nhũm mēõ pahi Sestija kêp mē piitã mē õ pahi. Nhũm pre Pirat nẽ Peris nẽ Pos Pesti nẽ Eroxo nẽ Akripja kêp Sesti nhỹ hã mē kot mē utàr xwỳnhjê ho amnhĩptàr o pa.

Sinai (Sinai) Mojes kot Tĩrtũm mã amnhĩ jarẽnh kaxyw hixêt prêk nhĩmõk wỳr àpir xàta nhĩxi pẽ na Sinai. Sinai nhĩmõk ã na pre Tĩrtũm Mojes mã Ijaewjaja kot tanhmã amnhĩ nhĩpêx to ho pa hã karõ hã kagàta gõ. Mãânẽn Mojes pumu.

Sotõ (Sodoma) Krĩ pẽ Sotõ kamã na pre Apraãw tàmnhwỳ pẽ Rohtija òrkwỹ nẽ pa. Krĩ pẽ Gomo (Gomorra) tã na pre. Nhũm pre Sotõ mē Gomo wa kamã mē pa xwỳnhjaja na prem amnhĩ tomnuj tỳx kumrêx o pa. Jakamã nhũm pre Tĩrtũmja kaxkwa rũm mē hwỳr kuwy rẽ nẽ krĩta wa ho hapêx par kumrêx. Mãânẽn Rohti pumu.

Tawi (Davi) Ijaewjê nhõ pahi maati na pre. Nẽ kêp Jese kra kot hapu na pre. Nẽ kormã kêp pahi hkêt ri na pre hipêêxà Jese mã hkrit òwêhti jamãr o pa.

Tawija na pre kãm Tĩrtũm kĩnh tỳx nẽ kãm mex o mex ã mē grer kwỳ nhĩpêx rax nẽ. Mē grerja nhĩxi pẽ na Sam (Salmos). Tĩrtũm kapẽr ã kagà htũm kwỳ na.

Nẽ Jejusja katorxà hkõt Tawi kanrêhã htàmnhwỳjê hõ na pre. Kormã Jejus wrỳk nẽ kator kukamã na pre Tĩrtũm nhỹ hã kapẽr jarẽnh o mē pa xwỳnhjaja hprĩ hã tanhmã harẽnh to. Nẽ kêp Tawi kanrêhã htàmnhwỳjê hõ hã harẽ.

Tĩrtũm kapẽr ă kagà nyw (Novo Testamento) Ra Jesusja wrỳk nẽ mẽ panê htyk nẽ akupỳm htĩr nẽ kaxkwa hwỳr àpir xwỳj ri Tĩrtũm kapẽr ă kagà hkwy.

Tĩrtũm kapẽr ă kagà htũm (Velho Testamento) Kormã Jejus kaxkwa rũm mẽ pahwỳr wrỳk kêt ri Tĩrtũm kapẽr ă kagà hkwy na. Na pre Mojes pimrækja Tĩrtũm nhỹ hã kapẽr kwỳ hã kagà nhũm hpãnhã Tĩrtũm kapẽr jarẽnh o mẽ pa xwỳnh kwỳjaja Mojes mỳrpê hatur xàm kumẽ.

Tĩrtũm kapẽr o mẽ wrỳk xwỳnhjaja (Anjos) Na htem Tĩrtũm nhõ krĩ kamã hkôt pa ho pa. Mẽ kêp panhĩ hkêt mẽ kêp mẽkarõ mex na mẽ. Na pu htem pano ho mẽ omunh kêt nẽ. Nom koja mẽ pamã amnhĩ to amnhĩrit pu mẽ rĩ kormã pano ho mẽ omu. Na htem Tĩrtũm mã mẽ kot hkôt amnhĩ xunhwỳr xwỳnhjê jamãr mex o pa. Nẽ na htem tũhã Tĩrtũm mã mẽhõ hwỳr wrỳ nẽ Tĩrtũm nhỹ hã tanhmã kãm kapẽr to. Tĩrtũm kapẽr o mẽ wrỳk xwỳnhjê hkrãhtũm nhíxi pẽ na Mikew.

Tĩrtũm Karõ (Espírito Santo) Tĩrtũm mẽ Jejus wa urà nẽ mãănẽn kêp Tĩrtũm. Na hte amnhĩ kaxyw Jejus kôt mẽ hamaxpẽr xwỳnhjê karõ mã agjê nẽ mẽ hkôt pa ho pa. Jao mẽ kãm Tĩrtũm kapẽr o amnhĩrit o pa. Nẽ tanhmã mẽ ho mẽ hihtỳx to nhũm mẽ àmnhix mẽ kãm Tĩrtũm kapẽr jarẽnh o pa nẽ tanhmã kãm amnhĩ nhĩpêx to ho pa. Na hte ahpỳnhã axpẽn kaxyw tanhmã Jejus kwỳjê to nhũm mẽ ahpỳnhã tanhmã axpẽn to ajuta hto ho axpẽn kôt pa. Jejus kwỳjê piitã Jejus kôt amnhĩ nhĩpêx mex rãhã ho pa kaxyw.

Tĩrtũm kapẽr o mẽ ahkre xà hã ixkre (Casa de oração, sinagoga) Ijaewjê nhõ krĩ piitã kamã na mẽ kot Tĩrtũm kapẽr o mẽ ahkre xà hã ixkre. Na htem sap ă hwỳr akuprõ nẽ Tĩrtũm kapẽr ă kagà hkwy mar o hkrĩ. Nẽ Tĩrtũm mã amnhĩ jarẽ nẽ kãm mex o mex ă harẽ.

Tĩrtũm mã amnhĩ jarẽnh xà hã ixkre (Templo) Ijaew nhõ krĩ maati pẽ Jerujarẽ kamã na pre. Na pre hte Ijaewjaja Jerujarẽ hwỳr mra nẽ kamã mẽmoj tã hkĩnh nẽ Tĩrtũm mã amnhĩ jarẽnh pẽ kãm mẽmoj nhõr o pa. Mãănẽn Sarumãw pumu.

Ixkreja kamã na Tĩrtũm nhõrkwy kaàkre pyrã nẽ hitom hamẽxkrut. Wam hitomja na prem harẽnh o: “Tĩrtũm nhõ hitom mex” anẽ. Nẽ hitom wa hkaêx kãm na pre kupêxê ho hakwakre kahê xà. Nẽ hitom ôja na pre htem harẽnh o: “Tĩrtũm nhõ hitom maati” anẽ. Tĩrtũm na pre hte hirã tỳx kãm õ hitom maatija wỳr wrỳ nẽ te kamã hkrĩ pyrãk o amnhĩ nhĩpêx.

Na pre hte mẽõ patre apkati mẽẽ wam hitomta wỳr agjê nẽ kamã Ijaewjê ho Tĩrtũm wỳr o kuhê. No mẽ kot ho “hitom maati”

anhÿr xwÿnhja wÿr nhũm pre hte mẽ õ patre maati pixja hwÿr agjê. Âm amgrà hpÿnh kãm hwÿr gjêx pÿnh nê.

Tĩrtũm nhÿ hã kapêr jarênh xwÿnh (Profetas) Na prem Tĩrtũm nhÿ hã kapêr o pa. Nê ÿ hã mẽmoj kukamã tanhmã harênh to ho mẽ hkôt pa. Jao Jejus kukamã tanhmã harênh to ho pa. Na prem Jejus kot tanhmã amnhĩ nhĩpêx to ho pa hkukamã harênh o pa. Nê mẽ kãm hkurê xwÿnhjaja kot tanhmã hipêx to hã mẽ harê. Nê nhÿrmã pika piitã hapêx kaxyw Jejus akupÿm wrÿk nê tanhmã amnhĩ nhĩpêx to hkukamã harê.

Tĩrtũm kapêr ã kagà nyw kamã kot tõiã mẽ kot Tĩrtũm Karõ nhÿ hã mẽmoj jarênh xwÿnhjê hã mẽ harê nê mãânên Tĩrtũm nhÿ hã kapêr jarênh o pa xwÿnh ã mẽ harê.

Tĩrtũm nhõrkwÿ kaàkre (Tabernáculo) Na pre Mojesja Ejit rũm Ijaewjê kator hãmri nê Tĩrtũm nhÿ hã mẽ kãm anê nhũm prem kãm amnhĩ jarênh xà hã ixkre kaàkre nhĩpêx. Mry kà nê kupêxê mex o hipêx hãmri nê ma amnhĩ kôt kapôt ã ri o pa. Nê nhÿri amnhĩm hikra nê ra amnhĩ pôi ri âm.

Tĩrtũm nhõrkwÿ kaàkre kamã na prem mêt kunĩhtita xãm. Mãânên mêt kunĩhti pumu. Na pre hte Ijaewjaja kormã pahi Sarumãw kot Tĩrtũm mã amnhĩ jarênh xà hã ixkre nhĩpêx xwÿj ri Tĩrtũm nhõrkwÿ kaàkre hwÿr mra nê Tĩrtũm mã amnhĩ jarênh kaxyw kãm mẽmoj nhõr o pa.

Uwa (Uva) Mêmõ xõ na. Uwa na hte hkrõ hã harir.

Wĩhti (Vinho) Mẽ hkĩnh ã mẽhkõm xà. Uwa xõ kagõ ho hipêx.

Nhỹri Tĩrtũm kapẽr ã kagà kot mẽmoj jarẽnh

Tĩrtũm na ã kot anhỹr:

Tĩrtũm pẽ mẽ panhĩpẽxà maati na ã kot anhỹr: Makre 10.27; 12.29-30; Rukre 1.36-37; 6.33-36; Juãw 4.23-24; Atre 14.14-17; 17.22-31; Rõmãn 1.18-23; 11.33-36; Wam Korĩt 8.4-6; Sikũn Korĩt 1.3-4; Wam Ximotre 1.17; 6.15-16; Eprẽw 4.13; 10.30-31; Xiakre 1.16-17; Wam Pẽtre 1.14-17; Wam Juãw 1.5; 4.7-12; 4.16; Jutre 24-25; Apokarip 4.8-11; 15.3-4.

Tĩrtũm Kra Jesus Kris na ã kot anhỹr:

Jejus Kris kẽp Tĩrtũm Kra. Matẽwre 11.27; 16.13-17; Rukre 1.35; Juãw 1.1-18; 5.19-30; 6.35-40; 8.58; 11.25-27; 14.5-11; 17.1-5; 20.26-31; Atre 3.13-17; 4.10-12; Rõmãn 1.3-4; Wam Korĩt 3.11; Sikũn Korĩt 4.4-6; 5.21; Karatas 4.4; Piripos 2.5-11; Korosẽ 1.15-20; 2.9-10; Eprẽw 1.1-13; 7.26-28; Wam Juãw 2.1-2; 5.20; Apokarip 1.12-18; 19.11-16.

Tĩrtũm Kra na pre mẽ pahpyrà nẽ ĩ ho kato. Juãw 1.14; Rukre 1.26-38; Matẽwre 1.18-25; Rukre 2.1-20; Matẽwre 2.1-23; Karatas 4.4; Piripos 2.6-8; Eprẽw 2.14-18.

Jejus na pre mẽ ahkre nẽ akupỹm mẽ à xwỹnhjẽ ho mex o pa. Matẽwre 4.23-25; 7.28-29; 9.35-36; 11.1-6; Rukre 4.14-44; Atre 10.36-38; Juãw 20.30-31.

Jejus na pre aa mẽ kot mẽmoj pumunh kêt kwỹ ho anhỹr rax kumrẽx o mẽ hkõt pa. Matẽwre 8.1-4; 8.5-13; 8.14-17; 8.23-27; 8.28-33; 9.1-7; 9.18-26; 9.27-31; 9.32-33; 12.9-14; 12.22; 14.13-21; 14.22-33; 15.21-28; 15.32-39; 17.14-18; 20.29-34; 21.18-22; Makre 1.21-28; 7.31-37; 8.22-26; Rukre 5.4-7; 7.11-15; 13.10-13; 14.1-4; 17.11-14; 22.50-51; Juãw 2.1-11; 4.46-54; 5.5-9; 9.1-7; 11.11-44; 21.4-6; Atre 2.22.

Na prem Jejus pynẽ nẽ mẽ kot hpĩr ã amỹnẽ. Matẽwre 26.47-68; 27.1-2; 27.11-14; Makre 14.43-65; 15.1-20; Rukre 22.47-53; 22.63-71; 23.1-25; Juãw 18.1-14; 18.19-24; 18.28-19.16.

Na prem pĩ kahpa hã Jejus nhõr o kupĩ. Matẽwre 27.32-56; Makre 15.22-41; Rukre 23.26-49; Juãw 19.17-37.

Na prem Jejus jaxà. Matẽwre 27.57-66; Makre 15.42-47; Rukre 23.50-56; Juãw 19.38-42.

Na pre Jejus akupým htír nhům mẽ ohtô rax nẽ akupým htír kãm omu. Matêwre 28.1-20; Makre 16.1-8; Rukre 24.1-49; Juãw 20.1-21.14; Atre 1.2-5; 2.24-32; 3.13-17; 4.10; 4.32-33; 10.39-43; 13.28-39; 17.1-3; 17.30-31; Rômãn 1.4; 4.24-25; Wam Korît 15.3-8; 15.12-23; Apokarip 1.18.

Na pre Jejus akupým kaxkwa hwÿr api. Rukre 24.50-51; Atre 1.6-11; 2.32-36; 5.30-31; Rômãn 8.34; Epes 1.19-23; Piripos 2.9-11; Eprêw 1.2-11; 2.9; 4.14-16; 7.25-26; 10.12-14; Wam Pêtre 3.22.

Tĩrtũm Karô na ã kot anhÿr: Matêwre 28.19; Makre 1.9-11; 3.28-30; Rukre 1.35; 3.16; 4.1; 11.13; 12.12; Juãw 1.32-34; 3.5-8; 7.37-39; 14.15-17; 14.26; 15.26; 16.7-15; 20.19-23; Atre 1.2-5; 1.8; 2.1-18; 2.38-39; 4.31; 5.3-6; 8.14-17; 10.44-48; 13.2-5; 15.28-29; 16.7-10; 19.1-7; Rômãn 5.5; 7.6; 8.9-16; 8.26-27; Wam Korît 2.4; 2.9-16; 3.16-17; 6.11; 6.19; 12.1-13; Sikũn Korît 1.21-22; 5.5-6; 13.12-14; Karatas 3.2-5; 4.6; 5.16-18; 5.22-25; Epes 1.13-14; 1.16-18; 3.16; 4.3-4; 4.30; 5.18; 6.17-18; Wam Tesarôn 1.5-6; 5.19; Sikũn Tesarôn 2.13; Xitre 3.5-6; Eprêw 2.4; 9.14; Wam Pêtre 1.2; 1.11; Wam Pêtre 1.20-21; Wam Juãw 2.20; 3.24; 4.13; 5.6-8.

Na pre Tĩrtũm mẽmoj piitã ho kato. Matêwre 19.4; Juãw 1.3; Atre 14.15; 17.24-26; Wam Korît 8.6; Korosẽ 1.15-16; Eprêw 1.2-3; 11.3; Apokarip 4.11.

Na hte Tĩrtũm mẽmoj piitã hamãr o hkrĩ. Matêwre 6.25-34; 10.29-31; Atre 14.15-17; Rômãn 8.28; 11.36; Korosẽ 1.17; Eprêw 1.2-3; Xiakre 4.13-16.

Mẽ papajaja ã mẽ pahte anhÿr:

Na pu htem tanhmã amnhĩ tomnuj to ho papa. Juãw 8.7-9; Rômãn 3.9-20; 3.23; 5.12-13; Karatas 3.22; Wam Juãw 1.8-10.

Koja mẽhõ tanhmã amnhĩ tomnuj to kaxyw nẽ ã amnhĩ nhĩpêx anẽ: Rômãn 1.18-32; 8.5-8; Karatas 5.19-21; Epes 2.1-3; 5.3-5; Korosẽ 3.5-10; Xiakre 4.17; Wam Pêtre 4.3; Wam Juãw 3.4-5.

Koja mẽhõ mẽ pahte amnhĩ tomnuj pãnhã Tĩrtũm mã amnhĩrer kêt pu mẽ pahpiitã nhÿrmã amnhĩ xà htÿx kamã pajamak rãhã ho papa. Matêwre 10.28; 13.41-42; Juãw 3.18-20; 3.36; Atre 17.30-31; Rômãn 1.18-20; 6.23; Karatas 6.7-8; Korosẽ 3.5-6; Sikũn Tesarôn 1.7-10; Eprêw 9.27; 10.26-31; Wam Pêtre 1.17; 4.3-5; Jutre 7; Apokarip 20.11-15.

Tĩrtũm na hte mẽ pahte amnhĩ tomnuj o hapêx.

Tĩrtũm kãm mẽ pajapê nẽ kãm mẽ pahte amnhĩ tomnuj o hapêx prãm. Juãw 3.16; Rômãn 5.7-8; Wam Ximotre 2.4-6; Sikũn Pêtre 3.9; Wam Juãw 4.9-10.

Tĩrtũm Kra pê Jejus Kris na pre htyk o mẽ pahte amnhĩ tomnuj pãnhã Tĩrtũm mã amnhĩre. Makre 10.43-45; Juãw 3.16; Rômãn

4.25; 5.7-8; Wam Korīt 15.3-4; Sikūn Korīt 5.19-21; Karatas 3.13; Wam Ximotre 2.5-6; Eprêw 2.9; 9.28; Wam Pêtre 1.18-20; 2.24-25; 3.18; Wam Juãw 2.1-2; Apokarip 5.8-10.

Jejus kot mẽ pamã htyk kukwak ri na hte Tirtũm mẽ pahte Kraja kõt amnhĩ xunhwỳr xwỳnhjaja mẽ pahte amnhĩ tomnuj xwỳnhjê kõt mẽ pahpumunh kêt nẽ. Matêwre 26.26-29; Rõmãn 3.25-26; 5.9-10; Epes 1.7-8; Eprêw 9.11-14; Wam Juãw 1.6-7; Apokarip 7.14-17.

Tirtũm na hte mẽ pahte amnhĩ tomnuj o hapêx. Atre 5.31; 10.42-43; 26.18; Epes 1.7-8; 4.32; Korosẽ 1.13-14; 2.13-14; Eprêw 10.17-18; Wam Juãw 1.8-10.

Tirtũm na hte Jejus kukwak ri mẽ pahte amnhĩ to mex pyràk ã mẽ pajarẽ. Atre 13.38-39; Rõmãn 1.16-17; 3.21-26; 5.1; 5.14-19; Karatas 2.16; 3.6-9; Xitre 3.7.

Tirtũm na hte tanhmã mẽ pahto pu mẽ amnhĩ nhĩpêx nyw o amnhĩ nhĩpêx o papa. Juãw 3.1-16; 5.19-30; 10.9-10; 11.25-26; 14.6; 17.2-3; 20.31; Rõmãn 5.20-21; 6.5-14; 8.10-17; Sikūn Korīt 5.17; Karatas 2.20; Epes 2.1-6; Korosẽ 2.13; 3.1-4; Sikūn Ximotre 1.10; Xitre 3.4-7; Wam Pêtre 1.23; Wam Juãw 5.11-13.

Tirtũm na hte mẽ pahto hkra. Juãw 1.12-13; Rõmãn 8.14-17; Karatas 4.6-7; Eprêw 12.5-11; Wam Juãw 3.1-3.

Na pu htem Tirtũm kãm mẽ pahto hkra prãm ã harěnh ma hãmri nẽ tanhmã amnhĩ nhĩpêx to?

Pu mẽ pahte amnhĩ tomnuj o papa kurê pahkaprĩ nẽ kãm panhũre. Matêwre 4.17; Makre 6.12; Rukre 13.1-5; 15.1-31; 24.44-47; Atre 2.37-40; 3.19-20; 17.29-31; 20.21; 26.19-20; Sikūn Korīt 7.8-11; Sikūn Pêtre 3.9; Apokarip 9.20-21.

Pu mẽ Jejus kõt amnhĩ xunhwỳ nẽ amnhĩ to kuwỳ kê mẽ pahpê mẽ pahte amnhĩ tomunu j rěnh pa. Juãw 1.12; 3.15-18; 3.36; 6.47; 14.6; 20.31; Atre 4.12; 16.30-31; Rõmãn 3.20-22; 10.9-10; Karatas 2.16; Epes 2.8-9.

Na pu htem Tirtũm kapêr ã kagà kamã pakapêr nẽ kuma nẽ hkõt amnhĩ nhĩpêx o papa. Matêwre 4.1-4; 5.17-20; Juãw 8.31-32; 20.31; Atre 20.32; Rõmãn 15.4; 16.26; Korosẽ 3.16; Wam Tesarõn 2.13; Wam Ximotre 4.13; Sikūn Ximotre 3.14-17; Eprêw 4.12; Wam Pêtre 1.23-25; Sikūn Pêtre 1.19-21; Sikūn Juãw 9-10; Apokarip 1.3.

Na htem Tirtũm mã gõx kãm mẽ pahkrã kumrã. Matêwre 28.18-20; Juãw 3.22; 4.1-2; Atre 2.37-42; 8.5-12; 8.36-38; 10.44-48; 16.14-15; 16.31-33; 19.1-7; 22.12-16; Rõmãn 6.1-4; Karatas 3.25-27; Korosẽ 2.12; Wam Pêtre 3.19-22.

Na pu htem Kris kõt pahtõ nẽ pahtõxjê kõt axpěn wỳr akuprõ nẽ Tirtũm kapêr ma nẽ kãm amnhĩ jarẽ. Matêwre 18.19-20; Atre

2.41-47; Römãn 12.4-8; Epes 4.11-16; Korosě 3.15-17; Wam Ximotre 4.13; Eprêw 10.24-25.

Na pu htem axpën wÿr akuprô nê Jejus htyk mã pajamaxpër pë pãwti hkwȳ hkrë nê mẽmo kagô hkwȳ ho ixkô. Matêwre 26.26-30; Makre 14.22-26; Rukre 22.14-20; Wam Korît 10.15-22; 11.17-34.

Mě pahte Jejus Kris kôt amnhĩ xunhwÿr xwÿnhjaja na pu htem ã amnhĩ nhĩpëx anhÿr o papa:

Na pu htem mẽ panhĩpêêxà maati pë Tĩrtũm mẽ mẽ panhõ Pahihti Jejus Kris kapër ma nê wa hkôt amnhĩ nhĩpëx rãhã ho papa. Juãw 14.15; 14.21; 14.23-24; 15.10-17; Römãn 13.8-10; Wam Pêtre 1.14-16; Wam Juãw 2.3-8; 3.22-24; Sikũn Juãw 5-6.

Na pu mẽ pamã Tĩrtũm kĩnh nê mẽ hpiitã mẽ hkĩnh o papa. Matêwre 22.34-40; Makre 12.28-34; Rukre 10.25-37; Juãw 14.21; Wam Juãw 5.3; Matêwre 5.43-48; Juãw 13.34-35; 15.12-17; Römãn 12.9-10; 13.8-10; Wam Korît 13.1-3; 16.14; Karatas 5.13-15; Wam Tesarõn 4.9-10; Wam Pêtre 1.8-9; 4.8; Wam Juãw 2.9-11; 3.11-18; 4.7-21.

Na pu htem Kris kot amnhĩ nhĩpëx kôt amnhĩ nhĩpëx o papa. Juãw 13.34-35; 14.27; Römãn 12.9-13; Karatas 5.22-26; Korosě 3.12-17; Wam Tesarõn 5.16-18.

Na pu htem Tĩrtũm mã amnhĩ jarěnh o papa.

Tĩrtũm kapër ã kagà nyw na hte ã mẽ pahte kãm amnhĩ jarěnh ã harěnh anê: Matêwre 6.5-13; 7.7-11; 18.19-20; Makre 11.24-26; Rukre 11.1-13; 18.1-8; 21.36; Juãw 14.13-14; 15.7; 16.23-24; Römãn 8.26-27; 12.12; Epes 2.18; 6.18; Piripos 4.6-7; Korosě 4.2; Wam Tesarõn 5.17; Wam Ximotre 2.1-3; 2.8; 4.4-5; Eprêw 4.16; 10.19-22; Xiakre 1.5-8; 4.2-3; 5.13-18; Wam Pêtre 4.7; Wam Juãw 3.21-22; 5.14-15.

Tĩrtũm kapër ã kagà nyw kamã na prem ã Tĩrtũm mã amnhĩ jarěnh anê: Matêwre 11.25-26; 14.22-23; 19.13-15; Makre 1.35; Rukre 5.16; 6.12; 22.32; 22.39-46; Juãw 11.41-42; 17.1-26; Atre 4.24-31; 16.25; 20.36; 21.5; Römãn 1.9-10; 10.1; 15.30-33; Sikũn Korît 12.7-10; Epes 1.15-20; 3.14-21; 6.19-20; Piripos 1.3-5; 1.9-11; Korosě 1.9-12; 4.3-4; Wam Tesarõn 3.9-10; Sikũn Tesarõn 1.11-12; 3.1-5; Eprêw 5.7.

Na pu htem amnhĩ tã Tĩrtũm mã mex o mex ã harěnh rãhã ho papa. Rukre 17.11-19; Juãw 6.11-12; Römãn 1.21; Epes 5.20; Piripos 4.4-7; Korosě 2.7; 3.17; 4.2; Wam Tesarõn 5.18; Wam Ximotre 2.1; 4.4-5.

Na pu htem tanhmã axpën to ajuta hto ho papa. Matêwre 6.1-4; 7.12; 25.31-46; Rukre 3.10-11; 6.38; Atre 11.27-30; Wam Korît 10.24; Sikũn Korît 8.1-15; 9.1-15; Karatas 6.9-10; Piripos 4.14-19; Eprêw 10.24; 13.1-3; 13.16; Xiakre 1.27; 2.15-16; Wam Juãw 3.16-18.

Na pu mẽ pamã amnhĩ to rax o pahkwỳjê jakrenh prãm o ri papa hkêt nê. Matêwre 5.3-12; 18.1-5; Rukre 14.7-11; 18.9-14; Epes 4.2; Piripos 2.3-11; Korosê 3.12-13; Xiakre 4.5-10; Wam Pêtre 5.5-7.

Na pu htem jajê pyrã nê ã pakukrêx nê pakàxpore mã pajamaxpêr anê. Matêwre 6.19-21; 6.24-34; Rukre 12.13-21; 12.32-34; Atre 20.35; Wam Ximotre 6.6-10; 6.17-19; Eprêw 13.5-6; Xiakre 2.1-9; 5.1-6.

Na pu mẽ pamã mẽmoj mỳrapê juisti hwỳr pahkwỳjê ho pamôr prãm o papa hkêt nê. Matêwre 5.25-26; 5.38-42; 18.15-17; Rômãn 12.14-21; Wam Korît 6.1-8.

Na pu htem mẽ papytãr xwỳnhjê hã pahpijaãm nê mẽ kapêr mar tỳx o papa. Matêwre 22.15-22; Atre 5.27-29; Rômãn 13.1-7; Wam Ximotre 2.2-3; Xitre 3.1; Wam Pêtre 2.13-17.

Na pu htem sãnti hã pahpijaãm nê kãm amnhĩ jagrer rỳ kãm amnhĩ jarěnh o papa hkêt nê. Matêwre 4.10; Atre 17.22-31; Wam Korît 5.10-11; 6.9-11; 8.1-13; 10.1-22; Sikũn Korît 6.14-18; Wam Tesarõn 1.9-10; Apokarip 21.8; 22.15.

Na pu htem pahprõ pix tânopxar o papa nê nhãm mênijê ho amnhĩkati hkêt nê. Matêwre 5.27-29; Juãw 8.2-11; Rômãn 13.9; Wam Korît 5.9-11; 6.9-20; Karatas 5.19; Epes 5.3; Korosê 3.5-6; Wam Tesarõn 4.1-8; Eprêw 13.4; Jutre 7.

Na pu htem kagõxỳhti japrõr nê ho pahpipãnh o papa hkêt nê. Rômãn 13.13; Wam Korît 5.10-11; 6.9-11; Karatas 5.19-21; Epes 5.18; Wam Ximotre 3.1-3; Xitre 1.7; Wam Pêtre 4.3-5.

Kris kwỳ hã mẽ kot axpên wỳr mẽ pikuprõnh xwỳnhjê jarěnh:

Na pu htem ã amnhĩ nhĩpêx anhỳr o papa: Matêwre 16.13-20; Atre 2.41-42; Rômãn 12.4-8; Wam Korît 12.12-30; Epes 1.22-23; 2.20-22; 4.1-16; Korosê 1.18; Eprêw 10.24-25; Wam Pêtre 2.4-10; Apokarip 19.5-10.

Koja mēhõ kãm kêp ikrêsti kamã mẽ papytãr xwỳnh prãm nê ã amnhĩ nhĩpêx anê. Pu mẽ ã mẽ kot amnhĩ nhĩpêx anhỳr ã mẽ omu nê rĩ kormã mẽ pakaxyw mẽ unhwỳ. Atre 6.1-6; 14.23; Wam Ximotre 3.1-13; Xitre 1.5-9.

Ikrêsti kamã mẽ papytãr xwỳnhjaja na htem ã amnhĩ nhĩpêx anhỳr o pa: Matêwre 28.18-20; Rukre 22.24-27; Atre 20.17-35; Wam Tesarõn 2.1-12; Wam Ximotre 4.1-16; Sikũn Ximotre 2.1-26; 3.10-17; 4.1-5; Xitre 2.7-8; Wam Pêtre 5.1-4.

Na pu htem ikrêsti kamã mẽ papytãr xwỳnhjê hã pahpijaãm nê mẽ kapêr ma nê mẽ hkõt amnhĩ nhĩpêx o papa. Wam Korît 9.14; Karatas 6.6; Wam Tesarõn 5.12-13; Wam Ximotre 5.17-22; Eprêw 13.7; 13.17.

Na pu htem ã mě pahkwÿjê nhîpêx anhÿr o papa:

Na hte mě hprô nê mě mjênjaja ã axpên nhîpêx anhÿr o pa. Matêwre 19.4-6; Wam Korît 7.1-17; Epes 5.22-33; Korosê 3.18-19; Xitre 2.3-5; Eprêw 13.4; Wam Pêtre 3.1-7.

Mě pahkrajaja na htem ã amnhî nhîpêx anhÿr o pa: Matêwre 15.3-6; Rukre 2.51; Epes 6.1-3; Korosê 3.20; Wam Ximotre 5.4; 5.8; Eprêw 12.7-11.

Mě pahpê mě hipêêxà mě mě katorxàjaja na pu htem ã mě pahkrajê nhîpêx anhÿr o papa: Epes 6.4; Korosê 3.21; Wam Ximotre 3.4-5.

Mě kêp mě mjên htyk xwÿnhjaja na htem ã amnhî nhîpêx anhÿr o pa: Atre 6.1; Rômân 7.2-3; Wam Korît 7.39-40; Wam Ximotre 5.3-16; Xiakre 1.27.

Na pu htem mě pahkwÿjê pyrà nê mě pahprô rÿ mě pamjên kaga hkêt nê. Matêwre 5.31-32; 19.3-9; Rukre 16.18; Rômân 7.2-3; Wam Korît 7.10-17.

Mě pahpê Kris kwÿjaja na pu htem tōhã pamex kêt nê papa.

Na pu htem tōhã amnhî xà htÿx kamã pajamak o papa. Rômân 8.18-25; 8.28; Sikûn Korît 1.3-4; 4.16-18; Xiakre 1.2-4; Wam Pêtre 1.6-9; 2.19-21; 5.8-10.

Mě kêp Kris kwÿ kêt xwÿnhjaja na htem tōhã Kris ã tanhmã mě panhîpêx punuj to. Matêwre 5.10-12; Makre 13.9-13; Rukre 12.4-9; Juãw 15.18-21; 16.1-4; Atre 5.41; Rômân 8.35-37; 12.12-14; 12.17-21; Wam Korît 4.11-13; Sikûn Korît 4.8-11; 12.10; Piripos 1.28-29; Sikûn Tesarôn 1.4-10; 3.2-4; Sikûn Ximotre 3.10-13; Eprêw 10.32-39; 12.3-4; Wam Pêtre 3.13-17; 4.12-19; Apokarip 2.10.

Na pu htem pamã pahtyk pyma hkêt nê. Mo kaxyw kot puj mě pamã uma? Juãw 6.39-40; 11.17-27; 14.1-3; Rômân 8.10-11; 8.38-39; 14.7-9; Wam Korît 15.12-58; Sikûn Korît 5.1-10; Piripos 1.20-24; Wam Tesarôn 4.13-18; Eprêw 2.14-15; Apokarip 14.13; 21.1-4; 22.1-5.

Tîrtûm na hte tanhmã mě pahto ajuta hto rãhã ho mě pahkôt pa. Matêwre 18.19-20; 28.19-20; Juãw 14.16-23; Rômân 8.35-39; Sikûn Korît 6.16-18; Epes 3.17-19; Piripos 4.13; Korosê 2.6-7; Sikûn Tesarôn 3.16-18; Eprêw 13.5-6.

Satanasti kãm tanhmã mě pahptomnuj to hprãm. Matêwre 13.19; Rukre 4.1-13; 22.3-4; Juãw 8.42-44; Sikûn Korît 2.10-11; 4.4-6; 11.13-15; Epes 2.2; Wam Tesarôn 2.18; Sikûn Tesarôn 2.8-12; Wam Pêtre 5.8-9; Wam Juãw 3.8-10; Apokarip 12.7-12; 20.1-3; 20.10.

Mě pahpunuj tã na pu htem Tîrtûm nhÿ hã amnhî to htÿx nê Satanasti kutã amnhî to htÿx nê pakuhê. Matêwre 4.1-11; 6.13; Rukre 22.31-32; Juãw 17.14-19; Rômân 8.31-39; 12.12; 16.19-20; Wam Korît 10.12-13; 16.13; Sikûn Korît 12.7-10; Epes

3.20-21; 6.10-18; Piripos 4.13; Wam Tesarõn 3.1-8; Sikũn Tesarõn 3.3; Sikũn Ximotre 1.7-8; Eprẽw 2.18; 4.14-16; 12.1-2; Xiakre 4.7; Wam Pẽtre 1.5; 5.8-11; Wam Juãw 4.4; 5.3-5; Apokarip 12.7-12.

Na hte Tĩrtũm tõhã akupỹm mẽ à xwỳnhjẽ ho mex. Matẽwre 4.23-25; 9.35; 11.2-5; Atre 3.1-7; 8.5-12; 19.11-16; 28.8-9; Wam Korĩt 12.9; 12.29-30; Sikũn Korĩt 12.7-10; Wam Ximotre 5.23-25; Sikũn Ximotre 4.20; Xiakre 5.14-15.

Koja nhỹrmã mẽmoj ã amnhĩ nhĩpẽx anẽ:

Koja Jejus akupỹn pika hwỳr mẽ pahwỳr wrỳ. Matẽwre 24.29-44; Juãw 14.1-3; Atre 1.10-11; 3.19-21; Piripos 3.20-21; Korosẽ 3.4; Wam Tesarõn 1.9-10; 3.13; 4.13-5.11; Sikũn Tesarõn 1.6-10; 2.1-4; Wam Ximotre 6.13-15; Sikũn Ximotre 4.8; Eprẽw 9.28; Sikũn Pẽtre 3.1-18; Wam Juãw 3.1-3; Apokarip 1.7; 22.12-13.

Koja Tĩrtũm nhỹrmã ahpỹnhã mẽ pahpiitã tanhmã mẽ pajarẽnh to. Matẽwre 7.21-23; 16.24-27; 25.31-46; Juãw 3.18-21; 5.24-30; Atre 17.30-31; Rõmãn 2.1-11; 14.10-12; Wam Korĩt 3.10-15; 4.5; Sikũn Korĩt 5.9-10; Sikũn Tesarõn 1.5-10; Eprẽw 9.27-28; 10.26-31; Wam Pẽtre 1.17; 4.3-5; Apokarip 20.11-15.

Mẽ kot Jejus Kris kõt amnhĩ xunhwỳr xwỳnhjaja koja Tĩrtũm nhõ krĩ hwỳr api nẽ kamã mex kumrẽx nẽ htĩr tũm nẽ pa ho pa. Rukre 12.32-34; Juãw 14.1-3; Sikũn Korĩt 5.1-8; Piripos 1.22-23; Wam Pẽtre 1.4-5; Apokarip 4.1-11; 21.1-4; 21.22-27; 22.1-5; 22.14-15.

Mẽ kot Jejus Kris kõt amnhĩ xunhwỳr kêt xwỳnhjaja koja mẽ kot amnhĩ xà htỳx kamã hamak tũm xà kamã omnuj tỳx kumrẽx nẽ htĩr tũm nẽ pa ho pa. Matẽwre 10.28; 13.41-42; 47-50; 25.41; Rukre 16.23-26; Sikũn Tesarõn 1.7-10; Apokarip 20.10-15; 21.8.